

大乘大集部

乾隆大藏經

目录

- 大方等大集经三十卷（第一卷～第十卷）
- 大方等大集经三十卷（第十一卷～第二十卷）
- 大方等大集经三十卷（第二十一卷～第三十卷）
- 大乘大方等日藏经十卷
- 大方等大集月藏经十卷
- 大乘大集地藏十轮经十卷
- 佛说大方广十轮经八卷
- 大集须弥藏经二卷
- 虚空孕菩萨经二卷
- 虚空藏菩萨经一卷
- 虚空藏菩萨神咒经一卷
- 观虚空藏菩萨经一卷
- 菩萨念佛三昧经六卷
- 佛说大方等大集经菩萨念佛三昧经十卷
- 般舟三昧经三卷
- 阿差末菩萨经七卷
- 大方等大集贤护经五卷
- 拔陂菩萨经一卷
- 无尽意菩萨经四卷
- 大集譬喻王经二卷
- 大哀经八卷

宝女所问经四卷

无言童子经二卷

自在王菩萨经二卷

奋迅王问经二卷

宝星陀罗尼经八卷

度诸佛境界智光严经一卷

大乘金刚髻珠菩萨修行分经一卷

大方等大集经卷第一

序品第一

如是我闻：一时，佛在王舍城耆闍崛山中，往古诸佛本所住处大塔之中。诸大菩萨之所赞叹，其地洁净微妙最胜诸佛法座。诸天、龙、鬼、乾闥婆等常行称咏，又能增长无量善根，常有诸佛微妙光明，成就无量无边功德，具足诸佛所行之处。如来得成菩提道已，转妙法轮，调伏无量无边众生，于一切法而得自在。世尊逮得一切法中无碍智慧，能善分别一切众生诸根利钝，永断一切烦恼习气，不待庄严了知诸法。

与大比丘僧六万八千，一切调伏断烦恼习气，皆是佛子善解深义，悉是福田能断诸有，得净戒果不生不灭。复有无量诸菩萨僧，具无碍智、甚深智、无知智，大慈大悲降注法雨，能施一切甘露法味；于诸众生等心如地，增长成就助菩提法，智慧光明能破黑闇，悉能照明善恶之道；能开众生善心莲华，能令众生善根成熟，增长善芽，干烦恼海，具智慧翼游空无碍；喻之如日，善能增损众生善恶；喻之如月，为诸善本如须弥山；至心寂静修行梵行，不为世论之所动转，安住无上出家之法，能见诸佛一切世界；积善法藏犹如大海，具足成就诸陀罗尼，寂静圣行及大慈悲，清净庄严定慧二目；久已远离深法怖畏，无量劫中所修菩提，未毕竟者终不休息，成就菩萨所有功德。其名曰：慧光无碍眼菩萨摩訶萨、见一切田庄严瓔珞菩萨摩訶萨、不断如来性出世意菩萨摩訶萨、为诸众生示现细行神足菩萨摩訶萨、无量乐说无碍神足幢名称菩萨摩訶萨、净众光自在王菩萨摩訶萨、善能论解字义广说论义神足菩萨摩訶萨、无量功德智慧庄严住菩萨摩訶萨。如是等菩萨摩訶萨，常与如来同止共住，如来常为分别宣说菩萨所行法门之法。

尔时，如来成得佛道，始十六年，广知众中多修梵行悉来大集，堪任受持菩萨法藏。尔时，如来即作是念：“我今当于如是无量象王众中宣说菩萨所行之法，先当示现诸佛如来大神通力，为诸菩萨令知诸佛深境界故。”尔时，世尊即入三昧，其三昧名佛境神通实见众生。以佛功德威神力故，于欲、色天二界中间出大坊庭，犹如三千大千世界，定慧二力之所成就，其处堪任佛所游居。复出大光其明清净，遍照十方诸佛世界，能令众生得知足心。于诸天宫最为殊胜，能劝十方放逸菩萨。其坊四匝白琉璃树，真金为墙，功德宝室，玛瑙垂檐，杂宝栏楯，白真珠网以覆其上，种种幡盖以为庄严，众香涂地，

烧散杂香，十方世界众生所有上妙庄严悉于中现。安置无量百千万亿师子法座，其座各有无量杂色柔软敷具，能令众生欢喜爱乐。诸四天下各以七宝作四梯榱，金刚阶蹬广十由旬，如其行时出微妙音。如四天下，三千大千世界亦复如是。

尔时，世尊从三昧起，大千世界六种振动，亦放无胜最大光明；即与声闻、菩萨大众，前后围绕欲往彼坊。一切诸天尊重赞叹，香华、伎乐、涂末烧香、曼陀罗华、摩诃曼陀罗华、曼殊沙华、摩诃曼殊沙华等以为供养，能动无量无边世界，光明遍照无不大明，示现诸佛神通福德。当尔之时，耆闍崛山一切大众忽然不现，蹬中阶节上升虚空。时，无量亿诸天龙等，及不护神、伎乐神、非天神、金翅鸟舞神、腹行神、嗜肉神、善饿鬼神、瓮耳鬼神、住厕罗刹、厌人鬼、能狂鬼、影鬼、产乳罗刹、持发鬼、常醉鬼，如是等众悉侍从佛，以天香华微妙天乐而供养之。

尔时，四天王合掌长跪，以偈赞佛：

“如来光明胜一切，能坏三恶道黑闇，
今我归依乐依止，萨婆悉达无上尊！”

时，四天王与诸天，偈赞佛已，寻侍佛后。

尔时，帝释与忉利天人，于其界次阶上见佛，以天香华、微妙伎乐而供养之，以偈赞佛：

“如来具足六神通，所得大悲无能胜，
以佛功德严十方，我今敬礼无与等！”

时，帝释与忉利天，偈赞佛已，寻侍佛后。

尔时，夜摩天王与夜摩天子，于其界次阶上见佛，以天香华、微妙伎乐而供养之，以偈赞佛：

“无碍智慧无有边，善解众生三世事，
一心能知无量心，是故稽首礼无上！”

时，夜摩天王与夜摩天子，偈赞佛已，寻侍佛后。

尔时，兜率天王与兜率天子，于其界次阶上见佛，以天华香、微妙伎乐而供养之，以偈赞佛：

“佛知诸法如幻炎，无受无作无字说，
愍众故说不可说，记说无我知法性。”

时，兜率陀天王与兜率天子，偈赞佛已，寻侍佛后。

尔时，化乐天王与善化乐天子，于其界次阶上见佛，以天华香、

微妙伎乐而供养之，以偈赞佛：

“如来具足得十力， 知诸法界如虚空，
无色哀愍示形色， 其心平等视众生。
如来常行世尊行， 为众生故行世行，
开无分别诸法界， 我今敬礼非天人！”

时，化乐天王与诸天子，偈赞佛已，寻侍佛后。

尔时，他化自在天王与他化自在天子，于其界次阶上见佛，以天香华、微妙伎乐而供养之，以偈赞佛：

“如戒而住寂静地， 修集无上三昧定，
其智无碍无有边， 我礼毕竟解脱者！
大慈大悲微妙语， 真实能知道非道，
勇健精进力无胜， 我今敬礼无能动！
常能修集三解脱， 无能称赞尽其德，
乌虽不同金鸟飞， 亦能任力而飞翔。
我今如乌任力赞， 唯愿哀愍受微叹，
不种不收其果实， 不赞如来无解脱。
怜愍为叶智慧华， 三昧为须解脱敷，
菩萨蜂王食甘露， 我今礼佛法莲华！
大悲智慧光圆满， 能破众生无明闇，
其戒清净众乐见， 我今敬礼佛法月！
其心平等如虚空， 香涂割刺心无二，
能净无量众生垢， 我今敬礼佛法河！”

时，他化自在天王与诸天子，偈赞佛已，即寻佛后。

诸天各各赞叹佛已，尔时如来示现无量神通道力，渐渐至彼七宝坊中。如四天下见佛上升，三千大千世界所见亦复如是。尔时，世尊至宝坊中升师子座，声闻、菩萨各各次第坐于宝座。

尔时，世尊入佛三昧，其三昧名无碍解脱，一一毛孔放大光明，其数无量如恒沙等，照于东方无量世界，南西北方、四维、上、下亦复如是。地狱蒙光众苦得息，其余众生除贪恚痴，慈心相向如父如子。尔时，以佛功德力故，其光明中说如是偈，为劝放逸诸菩萨故：

“如来精进无量边， 精进力过无量劫，
谁能赞佛光明德？ 唯有十方诸世尊！
为劝十方诸菩萨， 乐于放逸不修禅，
释迦如来放是光， 召诸菩萨集此界。
成就具足佛十力， 能破世界诸魔王，
世法不污如莲华， 是其光明无有量。

如来转此无上轮， 诸天世人所不能，
为诸众生转法轮， 如本十方佛所转。
如来今者集大会， 难见犹如优昙华，
若有信心成就者， 悉为听法至佛所。”

是光明中所说偈颂遍告十方，劝喻一切诸菩萨等，振动一切世界大地，普施一切众生安乐，能净一切众生烦恼，破坏众生无明痴闇，能蔽一切天魔宫殿，光遍十方还从顶入。

尔时，东方有佛世界，名无量功德宝聚神通；有佛世尊，号净大净光七菩提分宝华无断光王。彼有菩萨，名诸法自在功德华子，遇斯光已，与十恒河沙等诸大菩萨俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华而供养佛，即于佛前以偈赞曰：

“一切功德到彼岸， 常为十方佛所称，
无碍名号遍十方， 大慈大悲释师子。
如来法界无差别， 为钝根者说差别，
宣说一法为无量， 如大幻师示众事。”

时，诸菩萨偈赞叹佛头面礼已，以己神力，于佛东边化作床座次第而坐。

尔时，南方有佛世界，名曰佛光；有佛世尊，号无量功德宝。彼有菩萨名曰宝杖，遇斯光已，即与十恒河沙等诸菩萨众俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华而供养佛，即于佛前以偈赞曰：

“大慈法云降法雨， 常说无常空无义，
以八正水灭结火， 能长众生诸善根。
佛光能破无明闇， 能诲放逸诸菩萨，
能焦三有诸爱种， 能示真实道非道。”

时，诸菩萨偈赞叹佛头面礼已，以己神力，于佛南边化作床座次第而坐。

尔时，西方有佛世界，名曰光明，佛号普光。彼有菩萨名称力王，遇斯光已，即与十恒河沙等诸菩萨众俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华供养于佛，复于佛前以偈赞曰：

“于无量劫发善愿， 是故得身净无漏，
如来行业如虚空， 无碍音声遍十方，
如来梵声如雷音， 此声无业非因出，

无听无受无众生， 大悲何故音声说！”

时，诸菩萨偈赞叹佛头面礼已，以己神力，于佛西边化作床座次第而坐。

尔时，北方有佛世界，名宝庄严，佛号无量功德庄严。彼有菩萨名大海智，遇斯光已，即与十恒河沙等诸菩萨众俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华供养于佛，复于佛前以偈叹曰：

“如来无上金光明， 能坏一切世间闇，
若有众生遇斯光， 遇者悉能坏烦恼。
设身高出大千界， 神通力无边际，
是人不能见顶相， 大悲旷世造何业。”

时，诸菩萨偈赞叹佛头面礼已，以己神力，于佛北边化作床座次第而坐。

尔时，东南方有佛世界，名曰无忧，佛号能坏一切闇。彼有菩萨名无胜光，遇斯光已，即与十恒河沙等诸菩萨众俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华供养于佛，复于佛前以偈赞曰：

“无量界入一毛孔， 亦不娆害诸众生，
如来境界无知者， 是故神通难思议。
能令一身作无量， 而其真身无增减，
虽为众生现神变， 然其内心无憍慢。”

时，诸菩萨偈赞叹佛头面礼已，以己神力，于佛东南化作床座次第而坐。

尔时，西南方有佛世界，名曰善见，佛号心平等。彼有菩萨名大悲心，遇斯光已，即与十恒河沙等诸菩萨众俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华供养于佛，复于佛前以偈赞曰：

“无量世中护禁戒， 犹如牦牛爱其尾，
见有毁戒生悲心， 亦不憍慢赞己身。
如来之心如须弥， 十方邪见不能动，
智慧甚深无得底， 犹如大海难思议。
佛自解脱一切有， 亦令苦缚得解脱，
所得解脱实无差， 随道行时有别异。”

时，诸菩萨偈赞叹佛头面礼已，以己神力，于佛西南化作床座次

第而坐。

尔时，西北方有佛世界，名曰坏闇，佛号大神通王。彼有菩萨名曰宝网，遇斯光已，即与十恒河沙等诸菩萨众俱共发来，至娑婆世界大宝坊中，见释迦牟尼佛，头面礼敬，右绕万匝，以妙香华供养于佛，复于佛前以偈赞曰：

“如来世尊犹如幻， 而为众生说幻事，
宝无真物故名幻， 无有众生说众生。
如人梦中见诸色， 寤已真实无色相，
为度众生示世行， 如来真实无世行。”

时，诸菩萨偈赞叹佛头面礼已，以己神力，于佛西北化作床座次第而坐。

尔时，东北方有佛世界，名曰净住，佛号心同虚空。彼有菩萨名无边净意，遇斯光已，即与十恒河沙等诸菩萨众俱共发来，至娑婆世界，见释迦牟尼佛，头面作礼，右绕万匝，以妙香华供养于佛，复于佛前以偈赞曰：

“佛知甚深诸法界， 常乐寂静修无想，
及知众生诸心想， 亦说诸法如虚空，
住一心中知三世， 亦复能知种种业，
不生心想众生想， 无量世修无相想。”

时，诸菩萨偈赞叹佛头面礼已，以己神力，于佛东北化作床座次第而坐。

尔时，下方有佛世界，名曰乐光，佛号宝优钵华。彼有菩萨名庄严乐说，遇斯光已，即与十恒河沙等诸大菩萨俱共发来，至娑婆世界，见释迦牟尼佛，头面礼敬，右绕万匝，以妙香华而供养佛，复于佛前以偈赞曰：

“无量智者佛真子， 数如十方微尘等，
于无量劫咨问佛， 不尽如来一字义。
是故如来智无边， 功德总持亦如是，
名称力势无边际， 犹如大海十方界。”

时，诸菩萨偈赞叹佛头面作礼，以己神力，于如来下方化作床座次第而坐。

尔时，上方有佛世界，名瓔珞庄严，佛号大名称。彼有菩萨名一切法神通王，遇斯光已，即与十恒河沙等诸菩萨众俱共发来，至娑婆世界，见释迦牟尼佛，头面礼敬，右绕万匝，以妙香华而供养佛，即于佛前以偈赞曰：

“佛身身业无边际，心口及业亦如是，
唯佛能知佛三业，余不知如虚空边。
如来无师无教者，是故众生称大师，
诸佛法界叵思议，菩提法轮入涅槃。”

时，诸菩萨偈赞叹佛头面礼已，以己神力，于佛上方化作床座次第而坐。

尔时，一念中间十方无量诸大菩萨，一时云集大宝坊中。尔时，世尊即从三昧安详而起，警欬之声彻于十方，一切众生悉得闻之，闻已即于佛法僧宝生信敬心。十方世界所有比丘、比丘尼、优婆塞、优婆夷，若人非人，闻佛声已身心寂静，以佛功德威神力故，悉得睹见宝阶梯蹬，于一念顷悉蹬宝阶至宝坊中，各随其位次第而坐。诸梵天人亦闻其音，梵天、大梵天、梵师天、梵众天、光天、少光天、无量光天、净天、少净天、无量净天、无云天、福德天、广果天、无诳天、无热天、善见天、乐见天、阿迦尼吒天，亦一念顷俱至宝坊，见佛世尊头面礼已，次第而坐化作床座。

尔时，世尊见诸大众皆已集会，放眉间光，其光名曰示菩萨力，绕诸菩萨七匝已，于诸菩萨顶髻而入。尔时，会中有一菩萨，名诸法自在功德华子，即入三昧，其三昧名瓔珞庄严；以三昧力故，于宝坊中出师子座，座高八万亿多罗树，七宝庄严散种种华，为诸众生之所乐见，能净一切众生之心。尔时，诸法自在功德华子菩萨摩訶萨，化作如是师子座已，从其三昧安详而起，合掌恭敬，头面作礼，即于佛前以偈赞曰：

“日月光明坏现冥，佛光能坏三世闇，
如来具足神通力，胜于一切诸天光。
佛了法界无觉知，如幻水月无去来，
无生无受无作者，真实知己为众说。
知色心中无色心，方便为众说色心，
如来神通犹如幻，知诸法界亦复然。
一切众生心常净，或时为客烦恼污，
诸佛如来得解脱，示现神通等如幻。
虚空无地无住处，如来之心亦如是，
为众故升师子座，如先诸佛说甘露。
一切大众无去来，亦无听说无受者，
诸法悉皆如虚空，唯愿开阐真实界。
世尊受我师子座，愿为众生师子吼，
愍众故演梵音声，炽然智灯破痴闇。
十方诸来听法众，悉来集会此宝坊，
愿佛当施大法施，破无量世贫穷际。”

尔时，世尊以大慈悲怜愍诸法自在功德华子菩萨摩訶萨，升其所奉师子宝座，欲说一切诸菩萨行无碍法门，具足一切佛法十力、四无所畏，入一切法自在陀罗尼法门，入四无碍智法门，入大神通法门、不退转法轮、不退住处，摄一切乘具一切法界无分别法界，善知一切众生心根，法界真实坚固难沮，能坏一切四魔怨仇，调伏一切恶见烦恼，获得不共善权方便，得大平等心无二故，一切诸佛等入之处无挂碍处，说一切法悉真实故，演说诸法非觉非非觉故，十二因缘平等相观故，具足智慧大庄严故，庄严佛身佛音声故，无尽念意行智慧故，演说真实四圣谛故，能令声闻身心净故，令辟支佛坐绍位床故，大乘菩萨得法自在故，广宣诸佛所有功德故，解说宣示一佛法故，说诸菩萨大功德故，裂诸众生疑网心故，摧灭一切恶邪论故，增长如来佛正法故，显示众生佛神力故，以如是等诸因缘故，如来升于师子宝座。

尔时，宝杖菩萨承佛神力，入佛璎珞庄严三昧；以三昧力故，能令大众悉得种种璎珞庄严。时，称力王菩萨复承佛神力，入莲华三昧；以三昧力故，悉令大众皆得妙华，供养于佛及诸菩萨。时，大海慧智菩萨亦承佛神力，入妙香三昧；以三昧力故，能令大众皆得妙香，供养于佛及诸菩萨。时，宝网菩萨亦承佛力，入光明三昧；以三昧力故，悉令大众身得光明。时，悲心菩萨亦承佛神力，入无瞬三昧；以三昧力故，悉令大众仰瞻如来目未曾瞬。时，无边净意菩萨亦承佛神力，入喜三昧；以三昧力，悉令大众喜乐听法。时，庄严乐说菩萨亦承佛神力，入寂静意三昧；以三昧力，悉令大众远离五盖。时，一切法神足王菩萨亦承佛神力，入不忘三昧；以三昧力，悉令大众专念菩提，心不忘失。时，勇健菩萨亦承佛神力，入无胜三昧；以三昧力，悉令大众摧伏诸魔。

时，破魔菩萨亦承佛神力，入坏魔三昧；以三昧力，召此三千大千世界一亿魔王，来集宝坊至于佛所，头面作礼，合掌恭敬，咸作是言：“唯愿如来，广为众生开甘露门！我等皆因破魔菩萨威神力故，当得远离一切魔业，于诸大众心无妨碍。”

佛言：“善哉！善哉！善男子，汝等今已得离魔业；以是因缘，于未来世复当得离一切魔业。善男子，譬如一处百年闇室，一灯能破；汝等亦尔，无量世中无明黑闇，今日能破。如日月宝光，住信、戒、施、慧、禅定亦尔。善男子，汝等今者请佛说法，以是因缘，汝等当得破无明闇，为诸众生作智慧明。”

尔时，众中有一菩萨名法自在王，白佛言：“世尊，如来境界不可思议。何以故？如来发心将欲说法，能令一切大众云集！为菩提故作大庄严大法神通，无量世间得大名称，身心寂静获得解脱，及得不可思议法界十方诸佛之所赞叹，具足一切十波罗蜜，成就通达善权方便，能裂一切诸魔疑网，能灭众生恶邪诸论，能善分别一切法界，速得具足无碍智慧，具念意行智慧勇健，具足获得四无碍智，善知众生诸根利钝，知众生界随意说法，常能宣说清净法界，善解一切方俗之

言，能得一切清净梵音，具足成就慈悲之心，诸邪异见不能令动，不可破坏如金刚山，具修三相建立法幢，已渡甚深十二因缘河，断断常见能调大众，无量劫中得不可思议法聚，能疗众病如大医王，闻深法已不生怖畏，三十二相、八十种好庄严其身，具足成就三十七品及八解脱，身口意业纯善无杂，能令众生悉来听法，世间之法所不能污，常受安乐常修法界，惠施法宝于法无厌，于诸有法心不染著，犹如莲华尘水不染，明胜诸光智深如海，绍三宝性调众生界，能开佛藏护持佛法，具足无量功德智慧，无量劫中修集庄严无量功德，常欲获得一行之心一色一处，具如是等功德菩萨悉来集会。

“唯愿如来，说菩萨行无碍法门，利益过去、未来、现在诸菩萨等，令初发心得不退故，久发心者得增长故，行菩提道得净意故，不退菩萨学佛法故，一生菩萨瓔珞庄严故，后身菩萨得阿耨多罗三藐三菩提故，定性众生增长因缘故，未定性者作因缘故，未入佛法者令得入故，已入佛法者敬佛法故，乐三乘者说一乘故，施于世间人天乐故。世尊，如来出世，有如是等不可思议事。世尊，今此大众一一菩萨，悉能示现诸大神通，是故诸佛及诸菩萨不可思议。

“世尊，云何众生无明爱重，虽见菩萨如是神通，而故生于声闻、缘觉卑下之心？世尊，菩萨初发菩提心时，已胜一切声闻、缘觉。世尊，譬如有人舍诸琉璃，取于水精；一切众生亦复如是，舍于大乘，喜乐声闻、辟支佛乘。若有众生已发欲发阿耨多罗三藐三菩提心者，如是之人悉当获得如是功德。”

尔时，会中有三十亿那由他百千万亿众生天与人，发阿耨多罗三藐三菩提心。

陀罗尼自在王菩萨品第二之一

尔时，世尊知诸菩萨悉已大集，作是思惟：“今日如是善丈夫等，咸欲得知诸法实义，能持如来甚深法藏，欲得闻受诸菩萨行无碍法门。”寻放眉间白毫光明，名无所畏，绕诸大众满七匝已，于陀罗尼自在王菩萨顶上而入。

尔时，陀罗尼自在王菩萨，承佛神力，化作宝盖，犹如三千大千世界，七宝庄严，以覆如来宝座之上，头面作礼，合掌长跪，说偈赞佛：

“如来于法得自在， 其光能破世间闇，
世尊佛眼无挂碍， 能见诸法真实义。
具足无量诸功德， 无师独悟诸法界，
如来放光为众生， 今入我身何因缘？
我本所知念不明， 陀罗尼根亦如是，

此光今来入我身， 了了得知诸法界。
身心获得大清净， 受乐无上无有边，
我今已知佛境界， 亦得乐说无碍辩。
十方诸佛亲近难， 愚者不能师事之，
我今承佛神力故， 欲少发问利众生：
何因缘发菩提心？ 复以何义佛出世？
何缘放光遍十方？ 复以何因示神通？
何缘佛为众授记？ 愿为大众分别说。
今此大众胜无上， 悉能受持佛法界，
此众无魔及魔业， 唯有开示佛法藏。
我智浅近有边崖， 何能咨请无上尊？
今问如来无边智， 云何得知诸方便？
愿今教诲诸弟子， 我学已得法自在，
得已能施大法雨， 当报十方诸佛恩。

“世尊，诸佛如来不可思议，菩萨所行无有边际，是故我今欲问如来无上法王大慈悲聚，为利众生问甚深义：云何名为菩萨之行？以何瓔珞庄严菩萨，能令菩萨所行清净？云何能坏愚痴诸闇？云何能断疑网之心？云何菩萨为诸众生修慈悲心？云何菩萨拥护众生？云何菩萨真实能修菩萨之业善业不悔业？唯愿如来哀愍宣说！又此大众利根智慧，能解佛语能知法界，能达菩萨所行无碍法门，能坏一切魔及魔业，破大疑心能解诸佛甚深境界，知众生界众生心性，能见无量诸佛世界，能护如来无上正法，能于诸法得大自在。”

尔时，佛赞陀罗尼自在王菩萨言：“善哉！善哉！善男子，能问如来甚深之义！能善行佛无量行者，乃能如汝发斯深问。汝今至心，当为汝说。菩萨若能成就具足如是功德，当于诸法得大自在。”

“世尊，今正是时，唯垂宣说。”

佛言：“善男子，菩萨有四瓔珞庄严：一者、戒瓔珞庄严，二者、三昧瓔珞庄严，三者、智慧瓔珞庄严，四者、陀罗尼瓔珞庄严。

“戒瓔珞庄严有一种，谓于众生无有害心。菩萨若无恶害之心，一切众生常所乐见。复有二种：一者、闭塞恶道，二者、能开善门。复有三种：一者、身净，二者、口净，三者、意净。复有四种：一者、所求悉得，二者、所愿具足，三者、所愿成就，四者、所欲能作。复有五种：一者、信，二者、戒，三者、定，四者、念，五者、慧。复有六种：一、不破戒，二、不漏戒，三、不杂戒，四、不悔戒，五、自在戒，六、无属戒。复有七种，所谓七净：一者、施净，二者、忍净，三者、精进净，四者、禅定净，五者、智慧净，六者、方便净，七者、善方便净。复有八种，谓八具足：一者、无作具足，二者、地具足，三者、不忘心具足，四者、不缓具足，五者、诸根具足，六者、佛世具足，七者、离难具足，八者、善友具足。复有九

种：一者、不动，二者、不畏，三者、定智，四者、寂静，五者、至心，六者、清净，七者、结缓，八者、调心，九者、住调伏地。复有十种：一者、净身，为三十二相故；二者、净口，为言无二故；三者、净意，为解脱故；四者、净田，为令众生福德增故；五者、净心，为调众生故；六者、净有，为行化众生故；七者、菩萨名净，为得如来诸功德故；八者、净慧，大神通故；九者、净方便，破诸魔众故；十者、净戒，为不共法故。善男子，如是等事，名戒璎珞庄严。

“三昧璎珞庄严有一种，所谓为诸众生修集慈心。复有二种：一者、质直，二者、柔软。复有三种：一、不虚诳，二、不粗犷，三、不邪谄。复有四种：一者、不爱行，二者、不瞋行，三、不畏行，四、不痴行。复有五种，所谓远离五盖三昧。复有六种，所谓修集六念三昧。复有七种，所谓修集七觉三昧。复有八种，所谓修集八正三昧。复有九种：一者、菩萨修集菩提心及大慈悲心，于一切无量众生修集念心，远离恶欲不善之法，有觉有观寂静喜乐得初禅；二者、远离觉观内得喜心，至心思惟无觉无观，定生喜乐得第二禅；三者、离喜修舍具足念心，无有放逸身受安乐得第三禅；四者、远离苦乐灭忧喜心，非苦非乐修集舍念，寂静念得第四禅；五者、远离色相，修无量空相；六者、远离空相，修无量识相；七者、远离识相，修无所有相；八者、远离无所有相，修非想非非想相；九者、虽未成就善方便智，以三昧力教化众生。复有十种：一者、观法无有错谬，二者、具足成就舍摩他，三者、精进无有休息，四者、善能了知时节，五者、至心受持善法，六者、寂静其心，七者、观身，八者、常观法界，九者、心得自在，十者、获得圣性。是名三昧璎珞庄严。

“善男子，智慧璎珞庄严有一种，所谓心无疑网。复有二种：一者、远离疑心，二者、远离瞋心。复有三种：一者、远离无明，二者、破无明[穀·禾+卵]，三者、作大光明。复有四种：一者、知苦，二者、断集，三者、证灭，四者、修道。复有五种：一者、戒众清净，二者、定众清净，三者、慧众清净，四者、解脱众清净，五者、解脱知见众清净。复有六种：一者、净檀波罗蜜有三种：一者、内净观法如幻，二者、众生净观之如梦，三者、菩提净不求果报。二者、净尸波罗蜜有三种：一者、观身如影，二者、观口如响，三者、观心如幻。三者、净羼提波罗蜜有三种：一者、闻毁不瞋，二者、闻赞不喜，三者、若被割截及夺命时能观法界。四者、净毗梨耶波罗蜜复有三种：一者、不想，二者、坚固，三者、不见法相。五者、净禅波罗蜜有三种：一者、不著诸法，二者、心不退转，三者、所缘清净。六者、净方便波罗蜜有三种：一者、摄取众生，为解脱故；二者、净陀罗尼，为持法故；三者、所愿清净，为净佛土故。复有七种：一者、修四念处不取不著，二者、修四正勤出出不灭，三者、修四神足身心清净，四者、修于五根知根无根，五者、修于五力能破烦恼，六者、修菩提分知法界真实，七者、修集圣道无有去来。复有八种：一者、

修定，为毕竟净故；二者、修智，为坏闇故；三者、修知阴智，为知法众故；四者、修知界智，为解法界等虚空故；五者、修知入智，为知法性平等故；六者、修知十二因缘智，观无我、无我所故；七者、修观谛智，坏四倒故；八者、修集分别知法界智，为知真实故。复有九种：一者、观无常想，二者、观无常苦想，三者、观苦无我想，四者、观食不净想，五者、观于世间不可乐想，六者、观诸生死多过患想，七者、观解脱想，八者、观离贪想，九者、观于尽想。复有十种：一者、观于诸法犹如幻想，二、如梦想，三、如炎想，四、如响想，五、如芭蕉树想，六、如水中月想，七、如影想，八者、观于法界无增减想，九者、观诸法界无有去住，十者、观于无为无有生灭。是名为慧瓔珞庄严。

“善男子，陀罗尼瓔珞庄严有一种，所谓念心。复有二种：一者、先受，二者、毕竟能持。复有三种：一者、知义，二者、知字，三者、知说。复有四种：一者、正语，二者、了语，三者、无碍语，四者、不谬语。复有五种。所谓五依：一者、依义不依于字，二者、依智不依于识，三者、依了义经不依不了义经，四者、依法不依于人，五者、依出世不依于世。复有六种：一者、如说而持，二者、所言诚实，三者、发言人所乐闻，四者、怜愍语，五者、生善芽语，六者、时语。复有七种：一者、利语，二者、庄严语，三者、无碍语，四者、无滞语，五者、无二语，六者、先知而语，七者、了语。复有八种：一者、知方俗语，二者、知鬼神语，三者、知诸天语，四者、知诸龙语，五者、知乾闥婆语，六者、知阿修罗语，七者、知金翅鸟语，八者、知畜生语。复有九种：一者、无畏语，二者、无缩语，三者、无难语，四者、知解说语，五者、知如法答语，六者、知广说语，七者、知次第语，八者、说无常语，九者、无尽语。复有十语：一者、坏疑网语，二者、开示界语，三者、开法门语，四者、开智慧语，五者、破闇冥语，六者、解一一字语，七者、赞叹佛语，八者、呵烦恼语，九者、分别根利钝语，十者、开佛功德妙语。善男子，是名陀罗尼瓔珞庄严。”

尔时，世尊欲重宣此义，以偈颂曰：

“四庄严瓔珞， 能端严大乘，
 所谓戒定慧， 无上陀罗尼。
 能令三业净， 一切人所爱，
 永断三恶道， 是名戒瓔珞。
 如愿得具足， 获得人天身，
 能修勤精进， 是名戒瓔珞。
 能修无上定， 得二种解脱，
 见无上涅槃， 是名戒瓔珞。
 其戒不破漏， 无上戒不杂，

能得大自在，名璎珞庄严。
戒净能净施，戒净能净忍，
戒净净五度，名戒璎珞严。
戒净能净有，净大不放逸，
无畏心不悔，是名戒璎珞。
戒净得圣性，亦能净身心，
获得无边定，是名戒璎珞。
不怖畏不动，定得清净有，
能断烦恼缚，是名戒璎珞。
能调难调根，能得大名称，
庄严自在心，是名戒璎珞。
能如说而作，能净口四种，
远离诸烦恼，名璎珞庄严。
能净自佛土，能调诸众生，
能修大慈悲，名璎珞庄严。
不作诸恶业，修于菩萨行，
能大力无畏，名璎珞庄严。
能严大涅槃，能得大因果，
慈心满众生，名璎珞庄严。
能离悭诳心，修柔软四摄，
断爱瞋怖痴，名璎珞庄严。
能破五恶盖，修集十念心，
助道不放逸，名璎珞庄严。
具足于二翼，如法思惟义，
乐素住寂静，名璎珞庄严。
于法无所疑，亦无痴乱心，
真实解四谛，名璎珞庄严。
持戒心无著，亦复不生慢，
不取戒戒者，名璎珞庄严。
无上慧净定，亦知二净慧，
能了知三界，名璎珞庄严。
意净不生慢，见不净不轻，
知法不可说，名璎珞庄严。
慧能庄严智，智亦庄严慧，
自他菩提净，名璎珞庄严。
知法如梦幻，不说诸法无，
能随世间说，名璎珞庄严。
慧能庄严戒，戒能璎珞慧，
身口菩提净，名璎珞庄严。
见法如水月，亦如热时炎，

说法如响相，如乾闥婆城，
非法不作法，名慧璎珞严。
慧能庄严忍，忍能庄严慧，
身口菩提净，名璎珞庄严。
随法不增减，解已调众生，
至心观法身，名璎珞庄严。
慧能庄严进，进能庄严慧，
不悔动心净，名璎珞庄严。
慧能庄严定，定能庄严慧，
能说深法界，得无胜神通，
能知诸方便，得无上总持，
法土众生净，名璎珞庄严。
知众根利钝，坏烦恼诸魔，
身心得自在，名璎珞庄严。
道无有去来，亦无去来者，
非过非未来，非现非修者，
不分别法界，能净毕竟定，
知诸阴入界，名慧炬庄严。
阴入界如空，无我无我所，
生灭因十二，是名智慧净。
谛知第一义，亦知阴入界，
于法不生诤，知三世无碍。
分别三聚众，能为说三乘，
能以三宝教，修三无相定。
无相知一相，非幻知如幻，
无说能为说，空说于不空。
诸法非常变，不毁坏法界，
和合因缘故，流布于法界，
是名为真智。不分别法界，
知二动不动，知于二浅深，
知二常无常，是名大净智。
常不失念心，了知于法界，
知字及知义，于世谛无闇。
一闻能持法，解了众生语，
能坏诸邪道，修于无上智。
依无上四依，璎珞大总持，
我说功德鬘，为严菩提心。
于众说无畏，善解天神语，
能坏众疑网，能开诸法界，
能赞于三宝，劝人令供养，

亲近佛与众， 修集无上智。
我说四瓔珞， 能严佛菩萨，
若有至心信， 即得是庄严。”

大方等大集经卷第二

陀罗尼自在王菩萨品第二之二

佛复告陀罗尼自在王菩萨：“善男子，菩萨摩訶萨有八光明，以是八明能坏诸闇净菩萨行。何等为八？一者、念光，二者、意光，三者、行光，四者、法光，五者、智光，六者、实光，七者、神通光，八者、无碍智光。

“念光有八种：一者、不失过去善法；二者、作未来善；三者、闻法不忘；四者、思惟实义；五者、不为六尘所坏；六者、忆持如守门人遮止恶法，为真善法守善法城门；七者、不为邪法之所诳惑；八者、能大增长纯善之法。是名念光八种。

“意光亦有八种：一者、义意非字意，二者、智慧意非识意，三者、法意非人意，四者、实意非虚意，五者、菩萨意非声闻意，六者、上意非下意，七者、佛意非退意，八者、怜愍意非害意。是名意光八种。

“行光亦有八种：一者、法行，二者、一切行，三者、众生行，四者、众生心行，五者、十二因缘行，六者、广说行，七者、行行，八者、一切佛法行。是名行光八种。

“法光亦有八种：一者、世法光，二者、出世法光，三者、无漏法光，四者、无为法光，五者、解脱法光，六者、心解脱法光，七者、毕竟解脱法光，八者、破无明慧法光。是名法光八种。

“智光亦有八种：一者、八正智光，二者、须陀洹智光，三者、斯陀含智光，四者、阿那含智光，五者、阿罗汉智光，六者、辟支佛智光，七者、菩萨智光，八者、正觉智光。是名智光八种。

“实光亦有八种：一者、正定行，二者、得须陀洹果，三者、斯陀含果，四者、阿那含果，五者、阿罗汉果，六者、辟支佛果，七者、菩萨，八者、佛菩提。是名实光八种。

“神通光亦有八种：一者、眼光，能见正色；二者、耳光，能闻正声；三者、念光，能念过去阿僧祇劫所有众生；四者、性光，为现性净众生之心；五者、虚空光，以大神通力，遍到十方无量世界；六者、方便光，具无漏智故；七者、功德庄严光，为利益一切众生故；八者、智慧庄严光，为坏一切众生疑心故。是名神通光八种。

“无碍智光亦有八种：一者、智光，二者、意光，三者、慧光，四者、佛光，五者、正见光，六者、净众生心光，七者、解脱光，八者、毕竟光。是名八无碍智光。”

尔时，世尊欲重宣此义，而说偈言：

“修集于念心， 不忘善恶业，
乐闻赞诵经， 修集不放逸。
能调伏诸根， 安住于寂静，
增长于善法， 修集于念光。
能遮止恶法， 犹善守门者，
能守护法城， 不令四魔入。
不随逐音声， 思惟真实义，
亲近善知识， 喜乐如法住。
其意无边上， 永断诸烦恼，
邪法不能动， 恶世不生谤。
诚心念菩提， 不说小乘心，
常乐念上意， 为众破下意。
不畏魔烦恼， 修集大慈悲，
不念害众生， 其得大智光。
能坏诸疑心， 解了甚深义，
知真实方便， 修四无碍智。
乐观十二缘， 众生之所因，
知无作受者， 能修大光法。
能知诸佛法， 行世出世行，
能到十方土， 了知人天业。
修集无上智， 说三归一乘，
修集八正道， 为坏三世法。
于有漏无漏， 如实而知之，
能利益人天， 令断有漏法。
不谬为无为， 真实而知之，
寂静光无暗， 不著有为相。
知结入出缘， 知众心性净，
若有大乘定， 即知如是法，
乐住无漏流， 了四沙门果。
知菩提道行， 故修无碍智，
破邪修实光， 入众无所畏。
乐说真实义， 为破生死法，
眼耳净无障， 能见闻色声。
过去念不谬， 亦了知他心，
到十方无碍， 知法如虚空。
得无漏智慧， 为调诸众生，
具功德智慧， 为利诸众生，
于无量世中， 求是二庄严。

乐受持净戒，乐护于佛法，
修集真实光，为于如法住。
我说无量光，为令众生得，
有信此经者，即得此诸光。”

尔时，世尊复告陀罗尼自在王菩萨：“善男子，菩萨摩訶萨修集大悲，有十六事。何等十六？”

“一者、菩萨摩訶萨见诸众生贪著我见，以我见故增长诸见，常为生死之所系缚，是故菩萨为此众生修大悲心，悲因缘故宣说法化，为坏众生如是妄见。

“二者、见诸众生心怀颠倒，常见无常，无常见常；苦见于乐，乐见于苦；净见不净，不净见净；我见无我，无我见我。是故菩萨为此众生修集悲心，悲因缘故宣说法要，为坏众生如是四倒。

“三者、见诸众生心怀憍慢，实无有物而生物想，实无有事而生事想，以是因缘起七种慢，以是慢故增长恶法，是故菩萨于此众生修集悲心，悲因缘故宣说法要，破坏众生如是憍慢。

“四者、见诸众生五盖所覆，以覆盖故，心多生疑不解深义，是故菩萨于此众生修集悲心，悲因缘故宣说法要，为坏众生如是五盖。

“五者、见诸众生沉六入海，眼取色相，耳取声相，鼻取香相，舌取味相，身取触相，意取法相，是名为沉。是故菩萨于此众生修集悲心，悲因缘故宣说正法，为拔众生如是沉没。

“六者、见诸众生有七种慢：一者、慢，二者、大慢，三者、慢慢，四者、我慢，五者、增上慢，六者、下慢，七者、邪慢。菩萨摩訶萨于下慢者，自言胜汝；于慢慢者，自言最胜，我色胜乃至识胜；于增上慢者，菩萨语言：‘汝实非圣，不应便起圣人之想。’为邪慢者，宣说正见。是故菩萨于此众生修集悲心，悲因缘故宣说正法，为断众生如是憍慢。

“七者、见诸众生离于圣道，乐行世道恶道，是故菩萨于此众生修集悲心，悲因缘故宣说正法，为断众生世道恶道。

“八者、见诸众生造恶道行，属无明爱妻息所系不得自在，是故菩萨于此众生修集悲心，悲因缘故宣说正法，为断众生如是系缚，脱离恶道。

“九者、见诸众生亲近恶友，远离善友，其心甘愿造作恶业，是故菩萨于此众生修集悲心，悲因缘故宣说正法，为断众生如是恶业，远离恶友，亲近善友。

“十者、见诸众生造作悭贪，于无明爱心无厌足为施智慧，是故菩萨于此众生修集悲心，悲因缘故宣说正法，为断众生如是悭贪、无明及爱，施与智慧。

“十一者、见诸众生我见、断见，为施众生十二因缘真智慧故，菩萨于此而生悲心，悲因缘故宣说正法，为断众生我见、断见，施与

十二因缘智故。

“十二者、见诸众生行无明闇——我见、众生见、命见、士夫见、别异见、邪见、著见，菩萨为施智光明故，于此众生而生悲心，悲因缘故宣说正法，为断众生如是所见。

“十三者、见诸众生乐于生死，于五聚阴而生亲想，是故菩萨于此众生修集悲心，悲因缘故宣说正法，为断众生如是有三。

“十四者、见诸众生为魔所缚，是故菩萨于此众生修集悲心，悲因缘故宣说正法，为坏众生如是魔网。

“十五者、见诸众生甘乐快乐，而不能知真实乐因，是故菩萨于此众生修集悲心，悲因缘故宣说正法，示诸众生真实乐因。

“十六者、见诸众生求涅槃门不能知处，是故菩萨于此众生修集悲心，悲因缘故宣说正法，为此众生开涅槃门。

“善男子，菩萨修悲，悉因如是十六因缘。

“善男子，一切众生有三十二不善之业，菩萨见已修集善业，为坏众生如是恶业。何等三十二？

“一者、有诸众生无明睡眠，菩萨见已修集智慧，为悟众生如是睡眠。

“二者、见诸众生下解下欲，菩萨见已修集上解上欲，为以大乘而教化之。

“三者、有诸众生乐为非法，菩萨见已修集正法，为令众生于诸法中得大自在。

“四者、有诸众生修集邪命，菩萨见已修于正命，为坏众生如是邪命。

“五者、有诸众生入于邪林，菩萨见已修集正见，为令众生出邪林故。

“六者、有诸众生乐为放逸，菩萨见已修不放逸，为令众生离放逸故。

“七者、有诸众生乐为粗穢，菩萨见已修如法住，为坏众生如是粗穢。

“八者、有诸众生慳贪吝惜，菩萨见已修一切施，为坏众生慳贪心故。

“九者、有诸众生毁犯禁戒，菩萨见已修持净戒，为破众生毁犯禁心故。

“十者、有诸众生心常瞋恨，菩萨见已修慈悲忍，为坏众生如是瞋恨。

“十一者、有诸众生懒惰懈怠，菩萨见已修勤精进，为坏众生如是懈怠。

“十二者、有诸众生其心狂乱，菩萨见已修集定心，为坏众生如是狂乱。

“十三者、有诸众生邪智覆心，菩萨见已修集正智，为坏众生如

是邪智。

“十四者、有诸众生说义颠倒，菩萨见已思惟正义，为坏众生如是颠倒。

“十五者、有诸众生乐造世行，菩萨见已修善方便，为坏众生乐世行故。

“十六者、有诸众生系属烦恼，菩萨见已先自除断，为坏众生烦恼系缚。

“十七者、有诸众生我见所缚，菩萨见已自除我见，为断众生如是我见。

“十八者、有诸众生诸根不调，菩萨见已自调诸根，为调众生如是不调。

“十九者、有诸众生说言无作无有受者，菩萨见已宣说有作及有受者，为坏众生如是邪说。

“二十者、有诸众生不知恩义，菩萨见已说知恩法，为坏众生如是不知恩义。

“二十一者、有诸众生未得谓得，菩萨见已修集正法，为坏如是增上慢故。

“二十二者、有诸众生恶口粗穢，菩萨见已修善口语，为坏众生如是恶口。

“二十三者、有诸众生贪无厌足，菩萨见已修集知足，为坏众生不知足故。

“二十四者、有诸众生不能恭敬父母师长，菩萨见已修不放逸，为令众生供养恭敬父母师长。

“二十五者、有诸众生贫穷困苦，菩萨见已修集七财，为坏众生如是贫穷。

“二十六者、有诸众生常为四大毒蛇所病，菩萨见已修身念处，为令众生远离如是四大毒病。

“二十七者、有诸众生行无明闇，菩萨见已修集智慧，为令众生燃慧灯故。

“二十八者、有诸众生乐三有狱，菩萨见已修出离道，为示众生知出离故。

“二十九者、有诸众生常行左道，菩萨见已修集右道，为令众生舍左道故。

“三十者、有诸众生贪著身命，菩萨见已于自身命修不贪著，为令众生舍贪著故。

“三十一者、有诸众生不能恭敬供养三宝，菩萨见已修集信心，为令众生信三宝故。

“三十二者、有诸众生实非世尊，自谓世尊，菩萨见已修集六念，为令彼等知真实法故。

“善男子，是名众生三十二业。菩萨见已修治自业，成就具足一

切善法坏诸恶业，劝诸众生令行善业。善男子，菩萨摩訶萨有无量业。何以故？众生烦恼有无量门，为闭众生烦恼门故，菩萨修集无量善业。善男子，如恒河沙等世界众生，悉住声闻、辟支佛乘，欲比菩萨初发心业，百分千分不可为喻。何以故？二乘之人自为解脱观于烦恼，菩萨不尔，常为众生得解脱故观诸烦恼。善男子，菩萨摩訶萨所作诸业，于诸凡夫、二乘业中最为殊胜。何以故？众生之业性是颠倒，二乘之业有边际故，菩萨之业无边无量，是故菩萨胜于一切声闻、缘觉。”

尔时，陀罗尼自在王菩萨闻是法已，心生欢喜踊跃无量，白佛言：“世尊，甚奇！甚特！快说如是不可思议。如来于此已说菩萨璎珞庄严、菩萨光明、菩萨大悲、菩萨善业。唯愿宣说，云何如来观诸众生起于大悲？云何名悲？悲有何行，有何相貌，何因缘起？云何名佛业？佛业有何行，有何相貌，有何因缘起？善哉！世尊，一切知见，唯愿广说如来之业。”

佛言：“善哉！善哉！善男子，汝今谛听！善思念之，吾当为汝分别解说。善男子，一切如来所有大悲不出不行。何以故？常不变故，无量劫中修集得故，是故大悲不行不转，不修不舍，亦能为于一切众生。善男子，一切诸佛所有大悲，无量无边，其心平等，从久远来，无量舌力不能宣说。善男子，如来世尊，未尝远离如是大悲！无上菩提及与大悲，如是二法等无差别。如来所得无上菩提无根无住。根名我见，住名四颠倒，如来世尊知根知住，是故菩提无根无住。一切众生皆悉无有无根无住，欲施众生无根无住起大悲心，如来于此欲令知故演说正法。

“善男子，夫菩提者，清净寂静。云行为净？云何寂静？净名为内，寂静名外。内名眼空，空名无我、无有所。何以故？性是一故。乃至意亦如是。何以故？性是一故。知眼空已，不著于色，不著色心，是名寂静。乃至意法亦复如是。一切众生不知菩提清净寂静，如来于此而起大悲，演说正法为令知故。善男子，一切众生心性本净。性本净者，烦恼诸结不能染著，犹若虚空不可沾污。心性、空性等无有二。众生不知心性净故，为欲烦恼之所系缚，如来于此而起大悲，演说正法欲令知故。

“善男子，夫菩提者，不取不舍。云何不取？如来不见一切诸法此岸、彼岸。何以故？一切诸法离此、彼故，如来世尊如实知之，是名不取。云何不舍？一切众生不知法界，如来教令了了知故，是名不舍。如来于此而起大悲，演说正法为令众生知是二法。

“善男子，夫菩提者，无想无缘。云何无想？不见眼识乃至意识，不见色相乃至法相。于是法中不知不见故无取著，是名无缘。无想无缘是名圣行。云何圣行？所谓不行三界之行。善男子，如是不行名为圣行，一切圣人不在于行。众生不行如是圣行，如来于此而起大悲，演说正法欲令知故。

“善男子，夫菩提者，非是三世；非三世者，名为三等。过去意、未来识、现在贪，是名三分。以能了了知三分故，意、识及贪无有住处。以是义故，不念过去，不求未来，不爱现在，若见三世悉平等者，是名正见。如来为令一切众生得如是等平等正见，而起大悲演说正法。

“善男子，夫菩提者，无身无为。非眼识界，乃至非意识界，是名无身。不生不灭，不尽不住，无有三相，是为无为。善男子，一切法性是名无性，若无性者则无有二，是故菩提无身无为。一切众生不知菩提无身无为，如来为令了了知故，而起大悲演说正法。

“善男子，夫菩提者，无有分别，无有句义。云何分别？云何句义？无所住者名无分别，字不摄故名无句义；非有二故名无分别，不入法界名无句义；无动摇故名无分别，不变易故名无句义；不可说故名无句义，空故名无分别；无觉观故名无分别，无相故名无句义；不发故名无分别，无愿故名无句义；知众生界同于虚空名无分别，无众生界名无句义；不生故名无分别，无宅故名无句义；不灭故名无分别，无为故名无句义；不行故名无分别，平等故名无句义；知平等故名无分别，寂静故名无句义。众生不知如是等义，如来为令了了知故，而起大悲演说正法。

“善男子，夫菩提者，不可以身得，不可以心得。何以故？身、心如幻故。若能了知身心真实，是名菩提。为流布故名为菩提，而其性相实不可说。

“善男子，夫菩提者，不可说身，不可说心；不可说法，不可说非法；不可说有，不可说无；不可说实，不可说空。何以故？性不可说故。菩提者无有住处，不可宣说犹如虚空。为真实知一切诸法，不可宣说。字中无法，法中无字，为流布故，故可宣说。一切凡夫不知真实，是故如来于此众生而起大悲，演说正法为令知故。

“善男子，夫菩提者，无取无缘。云何无取？云何无缘？知眼真实名为无取，知眼无境名为无缘；乃至知意真实名为无取，知意无境名为无缘。如来世尊以如是义，知于菩提无取著故名为无取，无屋宅故名为无缘。眼识不住于彼色中名无屋宅，乃至意识亦复如是。一切众生心无住处，如来世尊如实而知心无住处。无住处者有四种——色、受、想、行，于是四法心无所住，是名心无住处。是故名为一切诸法悉无住处，如来世尊如实知之，一切凡夫不能知故，如来于此而起大悲演说正法。

“善男子，夫菩提者，名之为空。而菩提中无有空相，是故名空。一切法空，菩提亦尔。如来世尊真实能知如是之空，是故如来名为知空。诸佛名觉，一切诸法而不觉知，空中之空亦能了知。无上菩提空及菩提即是一如，空与菩提是一非二。离空，菩提别有法者可得说二；以无二故，名之为空。无名字故名之为空，无相貌故名之为空，无威仪故名之为空，无修行故名之为空，无言说故名之为空。善

男子，第一义者谓无诸法，云何说空？善男子，譬如虚空无言无说，无言无说故，故名虚空；无言说中无有言说，是名为空。一切诸法亦复如是，无名字法说为名字，如是名字亦无住处；若名无住处，名下之法亦复如是。如来真实知如是法不生不灭，以真知故名得解脱。本无系缚，云何说言名得解脱？是故如来无缚无解。如是等法，一切凡夫不能知见，如来于此而起大悲，演说正法为令知故。

“善男子，夫菩提者，同于虚空。虚空之性，不平不下，菩提亦尔。若法无性，不可说言有平有下。如来世尊知一切法无平无下，乃至微尘不作平下。若法有性即如实智，如实智者，知一切法本无今有，已有还无，出时、灭时无所系属，从缘而出，从缘而灭，以是义故名之为道，断是道故名为菩提。凡夫众生不知如是真实道故，如来于此而起大悲，宣说正法为令知故。

“善男子，夫菩提者，名真实句。真实句者，即是菩提。色亦如是，如是二句等无差别；受想行识，地水火风，眼界、色界、眼识界乃至意界、法界、意识界，亦复如是。是名法流布，真实觉知如是阴入界法无有颠倒。不颠倒者，知过去法不生不灭，未来之法不生不灭，现在之法亦不生不灭。如是知己，名不颠倒名真实句。真实句者，如一法，一切法亦如是；如一切法，一法亦如是。是真实句，凡夫不知，如来于此而起大悲，演说正法为令知故。

“善男子，夫菩提者，非内非外。云何为内？云何为外？非内者，无所造作；非外者，无所觉知。内者谓作，外者谓相，菩提之体非作非相，是故名为非内非外。又非内者，非身口意业；非外者，非三业缘。非内者，无相解脱门；非外者，空解脱门。如是等义凡夫不知，如来于此而起大悲，演说正法为令知故。

“善男子，夫菩提者，无漏无取。云何无漏？云何无取？无漏者远离四流，四流者——欲流、有流、无明流、见流。无取者远离四取，四取者——欲取、有取、见取、戒取。而诸众生无明所覆行于四取，以渴爱故作我我所。如来了知我取根本，是故我净，我净故能净众生。我净者，则不觉知一切诸法，亦不思惟一切非法，不起无明，不起无明因缘故不起十二因缘有，十二因缘有不起故则不生，不生故入决定聚，入决定聚者名为了义，了义者名第一义，第一义者名无众生，无众生义者名不可说，不可说义者即十二因缘义，十二因缘义者即是法义，法义者即是如来。以是义故我经中说，若有得见十二因缘则为见法，见法者为见如来，见如来者即无所见。所见是邪，夫邪见者谓想数法。如来无想亦无想数，以是义故见如来者为无所见。若见如来无想无作、无知无觉，是名真实见于如来。如来亦尔，觉知一切诸法平等。如法界无取，一切凡夫不能觉知，如来于此而起大悲，演说正法为令知故。

“善男子，夫菩提者，清净、寂静、光明、无诤。云何为净？云何寂静？云何光明？云何无诤？不杂烦恼名之为净，空解脱门名之寂

静，无相无愿名为光明，无生无灭名为无诤。又无生者名之为净，无灭者名为寂静，无取者名光明，不出者名无诤。性名为净，无诸烦恼名为寂静、光明、无诤。法界名净，真实之性名曰寂静、光明、无诤。虚空之性名之曰净，无分别法界名曰寂静、光明、无诤。内外清净名之为净，于内外法不取不著，名为寂静、光明、无诤。真知五阴名之为净，真实知界名为寂静、光明，远离诸入名为无诤。见过去尽名之为净，见未来不生名为寂静，见现在法住于法界无有动转，名光明、无诤。清净、寂静、光明、无诤，如是四法等入一界、一法、一句，如是三法即是涅槃。远烦恼故名之为净，毕竟净故名曰寂静，无闇冥故名曰光明，不可说故名之为无诤，以是故言释迦如来默无所说。

“善男子，夫菩提者即是虚空，虚空者名之为法。如法，众生亦尔；如众生，福田亦尔；如福田，涅槃亦尔。以是义故，一切诸法同于涅槃。如来能觉如是法界，是故名佛。修集具足清净、寂静、光明、无诤如是四句，名之为佛。如来能知善方便故，初得菩提默然而住，无所宣说待梵王请。尔时，尸弃梵王与六万八千诸梵天人来至我所，头面作礼，合掌而言：‘唯愿如来，为诸众生转正法轮。’而说偈曰：

“如来法离净寂静， 大光无碍无有诤，
无字无声亦无说， 真实觉知如法界。
佛为众生无量劫， 苦行受持世间戒，
为悟无明睡众生， 久行放逸迷实义。
又此会中无量众， 于无量佛积善根，
能解甚深真实义， 唯愿转于无上轮。
此众已调一切魔， 欲令开阐甘露门，
如来号为真导师， 示闇众生无上道。
如来虽有大慈悲， 怜愍众生如一子，
我今劝请法应尔， 愿转无上正法轮。
如往三佛转法轮， 唯愿如来亦复尔，
毕竟导师无退转， 示暗众生一真道。
如雨润长诸草木， 令诸众生除热渴，
佛施法雨于众生， 为得无上无异果。
如来初生发誓言， 我当救彼苦众生，
众生渴仰甘露味， 愿大施主施法雨。”

“尔时，世尊既受请已，往波罗奈鹿野林中仙人住处，转正法轮。如是法轮，诸天、魔、梵及余沙门、婆罗门等所不能转。尔时，世尊说四谛时，憍陈如比丘得法眼净。其声遍闻三千大千世界，尔时世尊说优陀那：

“甚深之义不可说， 第一实义无声字，
憍陈比丘于诸法， 获得真实之知见；
即是我往无量世， 所得菩提今已得。”

“如来转是正法轮时，无量众生悉得调伏。示现如是大悲神通，众生见已，阿僧祇人发阿耨多罗三藐三菩提心。善男子，如来如是十六大悲，悉为众生而修起之。如来以是悲因缘故，为——众生，于恒河沙劫大地狱中，受诸苦恼心不悔退，而其悲心亦无损减，以是义故，如来大悲不可思议。

“善男子，声闻人悲犹如画皮，菩萨大悲犹如破肉，如来大悲破骨彻髓；声闻之悲赞佛所知，菩萨大悲劝他令行，如来大悲授人阿耨多罗三藐三菩提记；声闻悲心为慈因缘，菩萨大悲为调众生，如来大悲为毕竟度；声闻悲心因粗苦生，菩萨大悲因离苦生，如来大悲因断一切因缘而生。善男子，如来修集如是大悲，若为一人住经一劫、百劫、千劫、万劫，至无量劫终不毕竟入于涅槃。善男子，如来大悲成就如是无量功德。

“善男子，乃往过去无量无边阿僧祇劫，时世有佛号栴檀窟，界名大香，劫名上香。尔时，世尊于三百三十二万劫中，常以正法教诸声闻。时佛身上一一毛孔所出香气，遍满三千大千世界。尔时，此界无有臭秽名，所有草木山河之属悉栴檀香；众生身香亦复如是，一切无有身口意恶，诸佛弟子闻此香已即得四禅。尔时，乃有一万诸佛次第兴世，皆同一号，号栴檀窟，是故彼劫名曰上香。尔时，如来作佛事已欲入涅槃，观诸众生谁未调者我当调之？尔时，如来以净天眼，见有一人在非有想非无想处，已于先佛种下上善根，定当因佛而得度脱，非因声闻得解脱也；寿过八万四千劫已，乃当下来受五欲，当得闻于大乘经典，发阿耨多罗三藐三菩提心安住不退。尔时，世尊以大悲故起大方便，告诸比丘：‘我涅槃时到。’作是言已，即便入于不悔三昧，示诸众生令知涅槃。既知如来入涅槃已，令诸大众广设供养，正法住世满足六十八万四千岁。当尔之时，佛诸弟子，乃至无有一人于正法所作邪法想。

“尔时，世尊以定力故，八万四千劫隐密此身不令众见。过是劫已，彼人即下生于人中长者家，经八十年彼佛即从三昧而起诣长者家。其家大小悉未见者，唯是童子独得见之。尔时，世尊为令彼人于五欲中心生厌离，而为说法。彼人闻已，即得不退阿耨多罗三藐三菩提心。如来知已，即为授记：‘善男子，汝于来世过七万二千阿僧祇百千劫，当得成于阿耨多罗三藐三菩提，号曰宝上。’如是音声余无闻者，唯有一万二千诸天同得闻之，闻已悉发阿耨多罗三藐三菩提心，俱作是言：‘愿彼宝上成佛之时，我等当于是佛法中，咨受正法而为弟子。’尔时，如来知是事已复与授记：‘宝上如来成作佛时，汝等当作受法弟子，彼佛亦当授汝阿耨多罗三藐三菩提记。’时栴檀窟佛授彼记

已，尔乃毕竟入于涅槃，一切诸天大设供养。

“善男子，如来具足如是大悲，非诸声闻、缘觉所知。善男子，尔时彼佛不断佛种，若有众生供养三宝亦复如是。”

佛说如是大悲功德时，此会众中有三恒沙等众生发阿耨多罗三藐三菩提心，半会大众得成于忍，半中之半得具如是十六大悲，其余半半得佛法忍。尔时，一切诸天世人闻法欢喜，同声赞叹：“善哉！善哉！甚奇！甚特！快说如是大悲法门。”

大方等大集经卷第三

陀罗尼自在王菩萨品第二之三

“善男子，如来复有三十二业。何等三十二？善男子，如来能知是处、非处。云何是处？云何非处？善男子，若有造作身口意恶，得受安乐无有是处，是名非处；若有造作身口意善，受乐果者，斯有是处，是名是处。若习慳贪得大富者，无有是处；修行惠施得大富者，斯有是处。毁破禁戒得受天身，无有是处；护持净戒得受天身，斯有是处。瞋恨之人得身端正，无有是处；修集忍辱得身端正，斯有是处。懈怠之人得大神通，无有是处；勤修精进得大神通，斯有是处。放心散乱得定地者，无有是处；摄心不乱得定地者，斯有是处。愚痴之人断烦恼气，无有是处；修智之人断烦恼气，斯有是处。若作五逆得无漏者，无有是处；若无五逆得无漏者，斯有是处。以女人身作转轮王，无有是处；以男子身得转轮王，斯有是处；帝、释、梵王、佛亦如是。若转轮王非法治国，无有是处；转轮圣王正法治化，斯有是处。郁单曰人堕三恶道，无有是处；郁单曰人寿终生天，斯有是处。杀生因缘得长寿者，无有是处；以是因缘寿命促短，斯有是处。若有邪见得圣道者，无有是处；若有正见得圣道者，斯有是处。须陀洹人得第八有，无有是处；须陀洹人即涅槃者，亦无是处；阿那含人受欲有身，亦无是处；阿罗汉人受后有者，无有是处；贤圣之人咨承异师，无有是处；得不退忍退菩提者，无有是处；菩萨坐于菩提树下，不得菩提而起去者，无有是处；如来若有烦恼习者，亦无是处；诸佛世尊知有障碍，无有是处；若有能见如来顶者，亦无是处；若有众生能知如来心境界者，无有是处；如来之心不常定者，亦无是处；如来世尊有二语者，无有是处；如来世尊有过失者，亦无是处。善男子，是名如来第一之业。”

尔时，世尊即说颂曰：

“大地可说动转相， 猛风可说停住相，
虚空可说有色相， 佛不说处为非处。
虚空可说作界像， 佛不说处为非处。”

如来演说处非处，下中上分悉真实，
不说是处非处一，如是二处各无二。
如来亦说下中上，各各无有三种相，
佛知是处非处已，故能宣说无上法。
如来了知众生心，善能分别细微相；
沙门梵志闇处行，不知是处非处因。
众生不知处非处，是故不能得解脱；
如来悉知处非处，是故称为无上尊。
若诸众生无法器，如来于是修舍心，
设大方便待时节，为令彼得真解脱。
如来世尊智无上，是则名为第一法，
如是清净第一业，为令众生得调伏。
如来说是第一力，甚深难测无能知，
如是妙法难可宣，为破邪见怜愍说。

“复次，善男子，如来世尊善知去来现在众生所有诸业，知业知报，知恩知处。若过去业是不善因，如来知是未来世得不善果。若未来业有退因缘，如来了知实是退因。若未来业能增长法，如来悉知以是因缘能增长法。若现在业若进若退，如来悉知以是因缘有进有退。若有作业是声闻因、是缘觉因、是菩萨因、是如来因，如来悉知以是因缘，是声闻因、是缘觉因、是菩萨因、是如来因。是名如来第二之业。”

尔时，世尊复说颂曰：

“如来获得无上智，是故能知业因果，
智知三世非三摄，能知众生三世业，
善解众生安乐因，亦能了知苦恼因。
如来坏邪无因果，是故修集第二业，
通达进退二法因，善恶业果亦复然。
如来知见无障碍，如观掌中庵罗果，
知下中上真实相，三乘所因亦复然。
如来善知众生业，亦知善恶诸业果，
众生业果三世摄，知见不谬名正觉。

“复次，善男子，如来世尊知诸众生种种欲解，若贪欲、若瞋恚、若愚痴：现在世贪起，未来世贪、恚、愚痴；现在世瞋起，未来世贪、瞋、恚痴；现在世痴起，未来世贪、瞋、恚痴。如来悉知，现在住善欲，未来恶欲；现在住恶欲，未来善欲。如来悉知，现在住下欲，未来世下中上分；现在住中欲，未来世下中上分；现在住上欲，未来世下中上分。如来悉知，邪聚众生能作正聚，不定众生住于正

定。如来悉知，欲界众生有色、无色界欲解，知声闻有缘觉欲解、有佛欲解。如来真实通达知故而为说法。是名如来第三之业。”

尔时，世尊即说颂曰：

“众生欲解有种种，其意若干非一徒；
如来真实知诸欲，故能随意演说法。
贪欲瞋恚愚痴性，随相而知无颠倒，
下中上品亦如是，善恶业因果真实。
通达三聚无有定，一切三乘亦复然，
智知三世非三摄，为诸众生说三力。

“复次，善男子，如来悉知无量世界，若修善行、若行恶法、若无碍行。云何名知？内空、外空、内外空故。复次，如来知眼知色及知眼识。云何而知？如虚空故。复次，如来知欲、色界及无色界。云何而知？如觉观故。复次，如来知于行界。云何而知？如行性故。复次，如来知烦恼界。云何而知？客尘性故。复次，如来知不污界。云何而知？一切诸法性本净故。复次，如来知生死界。云何而知？无明缘故。复次，如来知涅槃界。云何而知？实思惟故。复次，如来知世住界，知世爱界，知世瞋界，知世痴界，知世净界，知世净心界，以知界故能实说法。是名如来第四之业。”

尔时，世尊即说颂曰：

“如来人中师子王，能真实知众生界，
如来智慧无有边，是故能知世无边。
知善恶行解脱行，亦知眼色眼识行，
通达一切无量法，其性本来常清净。
内外真实无所有，五阴诸入十八界，
身口意业及四大，如是诸法悉无实。
知如是等众生界，皆悉同于虚空境，
三界性相无真实，诸烦恼界亦如是。
烦恼性相无坚牢，无漏解脱亦复然，
如来虽知真实界，终不言知而生慢。
虚空无量无边际，一切众生界亦然，
如来智慧无边际，远离三种有为相。
佛智无上甚深奥，一切众生不能知，
如来怜愍众生故，宣说如是第四力。

“复次，善男子，如来善知一切众生诸根利钝。云何而知？知上中下，知增知减，亦知贪欲有一亿种，瞋恚愚痴各一亿种，知贪欲重、知贪欲轻，知瞋恚重、知瞋恚轻，知愚痴重、知愚痴轻，知一种根能增生死，知一种根能灭生死，了知善根、知不善根，知非善、非

不善根，知解脱根，知六情根、男根、女根、命根、苦根、乐根、忧根、喜根、舍根、信根、进根、念根、定根、慧根、未知欲知根，知根、知己根，知眼根因乃至意根因，知耳根因作眼根缘，知鼻根因作舌根缘，知舌根因作身根缘，知戒庄严能修于施，知施庄严能修于戒。

“如来悉知谁可说施，谁可说戒，乃至智慧亦复如是；知谁可为说四念处，乃至八圣道分；谁可为说声闻之乘、辟支佛乘、无上佛乘；知缘觉根学声闻乘，知正觉根学声闻乘、辟支佛乘；知下根人能修上根，上根之人修于下根；知众生根，未可调者则生舍心，可调伏者为说正法。如来悉知熟不熟相、不熟熟相、不熟不熟相、熟有熟相，知生死根，知解脱根，知庄严根，知具足根，一切根性、因缘、果报悉知悉见。是名如来第五之业。”

尔时，世尊即说颂曰：

“如来知根到彼岸， 故知众生种种解，
亦了知根下中上， 并及诸业亦如是。
亦知烦恼轻重相， 及知诸根难易调，
知乐生死及解脱， 了知眼根至意根。
知根行处及灭处， 了知一切三乘根，
有可转者不可转， 知众生根熟不熟。
随其意种为说法， 善知呵责软语调；
知有不受教诲者， 则于其人修舍心。
如来善知诸方便， 为破烦恼庄严智，
为破众生烦恼故， 演说如来第五业。

“复次，善男子，如来真实知至处道。云何而知？知正定聚，知邪定聚及不定聚，知于因力及果报力，知过去世福德因缘，知现在世庄严因缘，难调、易调，略说广解、广说略解，知是众生能得解脱、不得解脱，知不定者遇善知识住正定聚，不得善友则无解脱。如来知己，随其意趣而为说法。彼闻法已，系念思惟获得善果。如来出世惟为不定，终不为彼邪定说法。何以故？非是器故，不能获得真解脱故，是名如来于是人所修集舍心。菩萨摩訶萨真实知己勤修庄严，为破如是邪定众生，是故菩萨发阿耨多罗三藐三菩提心。

“如来善知贪有三种：一者、因见净故，二者、受因缘故，三者、本因缘故。瞋有三种：一者、瞋因缘故，二者、受因缘故，三者、本因缘故。痴亦三种：一者、无明因缘，二者、我见因缘，三者、疑网因缘。复次，如来知诸众生苦迟得通、苦速得通，知苦迟者能得乐速，知乐速者能得苦迟，知乐迟者能得乐速；知有修力，知有智力，又知有道具足修力、不具智力，有具智力、不具修力，有具修力及以智力，不具修力、不具智力；又知有道能作净心、不能庄严，

有能庄严、不能净心，有作净心、能具庄严，有不具净心、不具庄严；又知有道能净其身、不净口意，有净口意、不净其身，有身口意净，有身口意不净。是名如来第六之业。”

尔时，世尊即说颂曰：

“如来善知所至处， 亦知众生诸因缘，
亦能了知定不定， 通达明晓调不调；
不为邪定演说法， 亦不调伏下根者。
知贪瞋痴三种说， 亦知诸结轻重相，
知于四道转不转， 是故佛知道毕竟。
修力智力真实知， 下中上力亦如是，
知身口意净不净， 心及庄严亦复然。
众生诸根烦恼界， 如来知己为破坏，
为彼无明闇众生， 宣说如来第六业。

“复次，善男子，如来知禅解脱三昧烦恼解脱。云何而知？知诸众生以因缘故贪乐生死，以因缘故贪乐涅槃。云何名因？云何名缘？若诸众生思惟不善，是名生死因缘；因不善思惟故生长无明，是故不善为因，无明为缘；因无明故则生于行，是故无明为因，诸行为缘；因诸行故则生于识，是故行则为因，识则为缘；因识故则生名色，是故识则为因，名色为缘；因名色故则生六入，是故名色为因，六入为缘；因六入故则生于触，是故六入为因，触则为缘；因触生受，是故触则为因，受则为缘；因受生爱，是故受则为因，爱则为缘；因爱生取，是故爱则为因，取则为缘；因取生有，是故取则为因，有则为缘；因有生生，是故有则为因，生则为缘；因生则有老死等苦，是故生则为因，老死为缘。烦恼为因，诸业为缘；诸见为因，爱结为缘；烦恼为因，五盖为缘，是名为因，是名为缘。而诸众生以是因缘贪乐生死。

“何因缘故贪乐涅槃？有二因、二缘，令诸众生乐于涅槃：一者、乐喜听法，二者、乐正思惟。复有二种：一者、舍摩他，二者、毗婆舍那。复有二种：一者、不去智，二者、不来智。复有二种：一者、观生死，二者、观涅槃。复有二种：一者、如法持，二者、得证。复有二种：一者、修解脱门，二者、得解脱果。复有二种：一者、尽智，二者、无生智。复有二种：一者、谛智，二者、观十二因缘。是名为因，是名为缘，而诸众生以是因缘乐于涅槃。

“如来悉知如是等禅三昧解脱，既了知己，舍离欲恶不善之法，有观有觉，离生喜乐，入于初禅；入初禅出灭定，入灭定出初禅，乃至八解脱亦复如是。一切众生悉不能知如来世尊出入之处，如来悉知住定平等及以上下。众生谓佛入一三昧，而佛实入一切三昧；众生见佛起一切定，而佛实入一定三昧。如来三昧无有次第，然非不定，一

切声闻、缘觉、菩萨悉不能知。如来又知说法因缘，得声闻三昧说法因缘，得缘觉三昧说法因缘，得菩萨三昧，知已随意而为演说。是名如来第七之业。”

尔时，世尊即说颂曰：

“如来了知生死因， 亦复通达解脱因，
既了知已为说法， 破坏生死不善因。
不善思惟无明因， 无明因缘长生死，
烦恼因缘受业果， 诸见因缘增爱结。
若得亲近善知识， 至心听受无上法，
观察内外空三昧， 即能越度生死海。
修集无上定智慧， 观法平等无去来，
若能观见无出灭， 即得了了寂静眼。
修集无上三脱门， 具足尽智无生智，
既自获得无碍智， 复能为诸众生说。
入于初禅出灭定， 入于灭定随意出，
如来三昧无次第， 是故名为常在定。
如来所入种种定， 与诸法界无差别，
二乘不知佛住处， 菩萨不知甚深定。
众生常行无明闇， 不知如来入出处，
无上世尊怜众生， 是故宣说第七业。

“复次，善男子，如来善知自身所有过去世业，若一生、二生至无量生，一灾、二灾至无量灾，一劫、二劫至无量劫，忆念生名种姓、饮食、色貌、形质、苦乐、寿命。念他有灭，生于他有；如自身，他亦如是。亦知众生所有业因，是诸众生造是业因得他有身，是诸众生造是业因得此有身。知众生心及因缘，是心灭已次第生心。如是等事恒沙众生所不能知，佛宿命智悉知三世无有始终，如是智慧不可称量。劝诸众生汝今当念，过去世中所更善恶，以佛力故悉得忆念。往昔所种无量善根，若佛边种，若于声闻、缘觉边种，既忆念已，如来即为随意说法令不退转。是名如来第八之业。”

尔时，世尊即说颂曰：

“如来忆念无量世， 若自若他善恶业，
明见无量劫中事， 犹观掌中庵罗果。
种姓生名悉能知， 色劫生灭亦如是，
亦知寿命及住处， 善恶业因亦复然。
知众无量次第心， 及知心因生灭处，
遍知无量劫中生， 亦不尽于无碍智。
佛智无量不可称， 二乘不知其境界，

为令众生念过去， 随意宣说第八业。

“复次，善男子，如来天眼清净微妙，见诸众生生灭堕落，若受善色、若受恶色，若生善有、若生恶有，亦能明了知诸业因：知是众生身口意恶，诽谤圣人增长邪见，以恶业故，舍此身已即堕地狱；知是众生身口意善，不谤圣人增长正见，以是业缘，舍此身已即生善有。如来天眼能见十方诸佛世界，无有边际犹如虚空，无有限量犹如法界，悉见众生生时灭时，见诸世界成时坏时，亦知众生发菩提心生时灭时；见一切佛始成正觉，转正法轮入涅槃时；见诸声闻证得解脱，得解脱已取涅槃时；见诸缘觉以神通力，报诸众生信施恩时。如是等事，一切五通、声闻、缘觉及诸菩萨所不能见。如来天眼成就如是无量功德，以天眼故观诸众生，谁应为佛之所化度，谁复应为声闻、缘觉之所化度，若应从佛而得度者，如来即为示现其身，其余众生悉无见者。是名如来第九之业。”

尔时，世尊即说颂曰：

“无量劫中修善业， 获得如是净天眼，
能见十方诸众生， 具足成就善恶色，
见上中下诸众生， 亦见受于善恶有，
能知身口意善业， 业因所得诸果报。
亦知声闻辟支佛， 菩萨之人善法境，
见十方佛破魔兵， 转正法轮入涅槃，
见诸声闻得解脱， 教化众生取灭度，
见辟支佛示神通， 以报施主之恩德。
如来所说真实法， 闻已能度生死海，
声闻缘觉及菩萨， 不能知佛所见处。
如来睹见细微尘， 亦见无量无边界，
如来教化佛所度， 是故宣说第九业。

“复次，善男子，如来世尊知诸漏尽毕竟解脱：我生已尽，梵行已立，所作已办，更无后有。佛漏尽智清净微妙，言清净者无诸习气。声闻之智有边有量。何以故？有习气故。辟支佛智亦有边量。何以故？无大悲故。佛漏尽智无量无边。何以故？知一切行故，具足成就一切智故，永断一切诸习气故，摄取大慈大悲，庄严四无所畏，于一切法无取相习，一切世间所不能胜，行住坐卧无诸过失。犹如虚空，清净明了不杂烟云；佛漏尽智亦复如是，不杂一切诸烦恼习。如来成就清净具足是漏尽智，能为众生敷扬宣说，令彼闻者断诸烦恼，菩萨闻已发大庄严为断烦恼。是名如来第十之业。”

尔时，世尊即说颂曰：

“佛漏尽智无有边， 清净不杂烦恼习，

声闻缘觉习结气， 是故漏尽智不净。
如来具足大慈悲， 是故其智无边际，
具足成就一切行， 故知众生漏行处。
所可演说无常我， 令众生知空无乐，
修善思惟得净眼， 知无众生无士夫。
大悲怜愍诸众生， 具足十力四无畏，
为断烦恼智无碍， 是故宣说第十业。

“复次，善男子，如来具足四无所畏，成如来业。如来业者，悉已觉知一切诸法，若天、若人、若魔、若梵、若沙门、若婆罗门，如实而言如来不觉不知法者，无有是处。何以故？如来世尊名为正觉，觉平等法。若凡夫法、若圣人法，若声闻法、若缘觉法、若菩萨法、若佛法，若学法、若无学法，若世法、若出世法，若善法、若不善法，若有漏法、若无漏法，若有为法、若无为法，如是等法平等觉知，故名正觉。言平等者，见空平等法真实故，无相平等坏诸相故，无愿平等不著三界故，不生平等无生性故，无行平等无行性故，无出平等无出性故，无至处平等无至处性故，真实平等无三世性故，智解脱平等无无明性故，涅槃平等无生死性故，见如是法皆悉平等，是故如来名为正觉。如是观已以大慈悲，为诸众生称扬宣说。若非世尊作世尊想，若非正觉作正觉想，若非漏尽作漏尽想，如来具足四无所畏，能坏如是诸恶想等。是名如来第十一业。”

尔时，世尊即说颂曰：

“佛知一切法平等， 是故得名一切智。
凡圣菩萨及佛业， 世与出世善恶业，
空无相愿无生灭， 一切悉见其真实，
如来悉见平等故， 为众演说十一业。

“复次，善男子，如来真实永尽诸漏，是故唱言：我尽诸漏，我都不见人、天、魔、梵、沙门、婆罗门，真实而言佛漏未尽。云何名为如来漏尽？佛于欲漏，心得解脱；有漏、无明漏、一切习气一切见漏，心得解脱，是故如来名为漏尽。第一义中圣人真知，无觉无断，无证无修，为流布故说言尽漏。何以故？尽者即是无生无灭，无尽者不可宣说，不可说故名之无为，夫无为者无出灭住。佛若出世、不出于世，法性常住。如来不觉我及我断，如来住于大慈大悲，为众生故宣说我断。是名如来第十二业。”

尔时，世尊即说颂曰：

“如来永断诸漏结， 及以无边诸习气，
是故世法不能污， 如华处水泥不著。
大悲人中师子王， 为众生故说流布，

真实而知无出灭， 无我我所亦复然。
一切诸法无增减， 随其性相真实说，
如来得大自在力， 为众故说十二业。

“复次，善男子，如来真实说遮道法，我都不见人、天、魔、梵、沙门、婆罗门，说言是法不能遮。云何名遮？云何不遮？有一法能遮道，所谓放逸。复有二法，所谓无惭、无愧。复有三法，谓身、口、意恶。复有四法，所谓欲、瞋、怖、痴。复有五法，所谓杀生、偷盗、淫泆、妄语、饮酒。复有六法，所谓不敬佛、法、僧、戒、三昧、不放逸。复有七法：一者、慢，二者、大慢，三者、慢慢，四者、邪慢，五者、邪语，六者、邪命，七者、邪念。复有八法：一者、邪见，二者、邪思惟，三者、邪语，四者、邪业，五者、邪命，六者、邪方便，七者、邪念，八者、邪定。复有九法，所谓有人欲作诸恶，现作作已加于己亲，有人以善加于己怨，有人以恶加于己身，亦复如是，是名为九。复有十法。所谓十恶：一者、杀生，二者、偷盗，三者、淫泆，四者、妄语，五者、两舌，六者、恶口，七者、无义语，八者、贪嫉，九者、瞋害，十者、邪见。若有比丘起恶思惟，以是因缘，不知有为多诸过咎，以不知故生颠倒心，颠倒因缘增长五盖，五盖增故令诸烦恼遮障善法，烦恼因缘身口意业造作诸恶。如来如实知如是法能遮于道，既自知已为众演说，为坏如是遮障道法。是名如来第十三业。”

尔时，世尊即说颂曰：

“若有修集于放逸， 真实不能得解脱。
身口意等诸恶业， 无惭无愧诸烦恼，
亲近恶法能遮道； 善觉对治不对治，
为坏烦恼故演说， 大慈大悲十三业。

“复次，善男子，如来实说圣道毕竟，若有众生亲近正念必得解脱，我都不见人、天、魔、梵、沙门、婆罗门，真实记言修道者不得毕竟无上解脱。云何名为真实圣道？有一种，所谓一乘。复有二种，谓舍摩他、毗婆舍那。复有三种，谓空三昧、无相、无愿。复有四种，谓四念处。复有五种，谓信等五根。复有六种，谓六念处。复有七种，谓七觉分。复有八种，谓八正道。复有九种，所谓初禅乃至灭定。复有十种，所谓十善。是名毕竟真实圣道。又毕竟道者，无有能作增减、取舍，无执无放，非正非邪，非一非二，是名真实毕竟之道。如来世尊怜愍一切，为诸众生说如是道。是名如来第十四业。”

尔时，世尊即说颂曰：

“如来了知寂静法， 有亲近者得解脱，
如来无师无教者， 自然而得甘露味。

有修三十七助法， 烦恼结灭得解脱，
思惟善知真实法， 不著法性真解脱。
如来见法如虚空， 犹如幻化热时焰，
具足十力无边身， 为众故说十四业。

“复次，善男子，如来身业无有过失，若愚若智，无能宣说佛有过失。何以故？如来若行若坐若住，著衣持钵，若受饮食，若见若闻，若有所说，入出城邑村落舍宅，足不蹈地，常行千叶莲华之上。若有众生遇触佛影，七日安乐无饮食想，舍是身已生于善有。如来衣服离身四寸，暴猛风力所不能动。如来虽有如是等事，而其内心未尝不定，是故如来身无过失。善男子，如来口业亦无过失。何以故？时语、真语、实语、正语、期语、义语、不多语、如持而语、净语、解一切语、微妙语、无异语、一音语，是故如来无口过失。如来意业亦无过失。何以故？如来常作一切佛事，而其内心初无憍慢，不役智虑而知法尽，是名如来无挂碍智，是故如来意无过失。为坏众生如是过失故宣说法。是名如来第十五业。”

尔时，世尊即说颂曰：

“如来身口意寂静， 是故无能说有，
实不可说为流布， 是业非业说为业。

“复次，善男子，如来不与天、人、魔、梵、沙门、婆罗门而生诤讼。何以故？离爱恚故。一切世间供养恭敬，心不生高亦不欢喜；一切世间毁谤轻慢，不生愁恼。凡所造善，事无不成，终不造作不善之业。如来实无世间诤事，亦常修集无诤三昧，如来无我、无有我所，为坏众生是非诤讼，说如是业。是名如来第十六业。”

尔时，世尊即说颂曰：

“如来修集无诤定， 是故其心无瞋喜，
如来为断众烦恼， 是故宣说十六业。

“复次，善男子，如来之心无有忘误，于八解脱不失念心，常观一切众生意行，观已复能随宜说法；于四无碍亦无念失，于三世中忆念不忘，既自不失忆念之心，复为众生说是念法。是名如来第十七业。”

尔时，世尊即说颂曰：

“如来修集八解脱， 故于诸法不失念，
知众生心随意说， 为令得念说是业。

“复次，善男子，如来真实无不定心，若行、若住、若坐、若

卧、若语、若默，常知诸法深妙之义。一切世间若有入定、若不入定，悉无能知如来心也。唯除诸佛借其道力，欲令一切无量众生常在定故，说如是业。是名如来第十八业。”

尔时，世尊即说颂曰：

“如来正觉常在定，所作诸事无散乱，
常入三昧无知者，是故宣说十八业。

“复次，善男子，如来真实无种种想，所谓无分别福田、非福田想，亦无分别诸众生想及以法想、正觉之想及法界想，分别持戒及毁戒想，亦无分别怨想、亲想、受不受想，分别正见、邪见之想。是故如来无种种想，为坏众生如是诸想，宣说是业。是名如来第十九业。”

尔时，世尊即说颂曰：

“如来永断一切想，是故了知诸法界，
为破众生若干想，宣说如来十九业。

“复次，善男子，如来从智舍心，无不知舍。何以故？修身故，修戒故，修心故，修慧故，断痴故，如来舍心出于世间，即是圣舍，是毕竟舍，转梵轮舍，共大悲舍，为利众生舍，知对治舍。如是等舍，无增无减，不高不下，不杂烦恼，不一不二，不观时节，无碍无对，不住不动，不隐不显，真实不虚。如来成就如是大舍，而能为诸众生说法。是名如来第二十业。”

尔时，世尊即说颂曰：

“如来修身戒心慧，从于智慧修舍心，
于诸众生无爱恚，不动不住真实舍。
大慈大悲无上尊，具足如是之大舍，
无碍智慧调众生，演说清净二十业。

“复次，善男子，如来欲业无增无减。何等名欲？欲于善法，所谓大慈大悲，说法度人安住寂静，劝诸菩萨学菩提道，令三乘种相继不绝。如是诸欲，不随欲出，随智而生，欲令一切众生具足阿耨多罗三藐三菩提故，演说正法。是名如来二十一业。”

尔时，世尊即说颂曰：

“如来欲者无增减，大慈大悲故说法，
不断三乘无边身，为众演说如是业。

“复次，善男子，如来精进无有休息。云何不息？所谓调伏众生

说法化度。假使有一人能无量劫佛边听法，如来当为说不休息。若有一佛于无量劫演说法者，如来亦听心无懈怠。若过无量恒沙世界，有一众生应受化者，如来要当随逐不舍，不食不息，不生疲倦悔退之心，常劝众生令勤精进。是名如来二十二业。”

尔时，世尊即说颂曰：

“具精进人师子王， 于大众中赞精进，
精进说法无休息， 是故进业二十二。”

“复次，善男子，如来念心无有增减。何以故？如来初得阿耨多罗三藐三菩提时，遍观一切去来现在众生之心，后说法时不失先念，念本三聚及三种根，凡所演说无不作念。是名如来二十三世。”

尔时，世尊即说颂曰：

“如来初得菩提时， 遍观众生如实心，
凡所说法不失念， 二十三世佛所说。”

“复次，善男子，如来三昧于一切法平等无减，是故诸佛一切平等，于一亿种贪欲恚痴，及一亿种无贪恚痴，其心平等无有差别；有为无为、生死涅槃亦复如是。具如是等平等三昧，不杂眼、耳、鼻、舌、身、意，四大三界非此非彼，亦非一切非增非减。为令众生得是三昧，宣说正法。是名如来二十四业。”

尔时，世尊即说颂曰：

“如来等观一切法， 是故常定心无乱，
不为三界之所摄， 诸根四大亦如是。
一切诸法无差别， 平等观察善不善，
如来所说如是业， 为诸众生得是定。”

“复次，善男子，如来智慧常无减少，以是智力知一切法，能随众生意趣说法得无碍智，知一切义，知一切字，知一切句，于无量劫演一句法，出无量义断一切疑，说三乘法并及八万四千法门，亦说八万四千法聚，是名无量无边智慧。为令众生得是智故，宣说正法。是名如来二十五业。”

尔时，世尊即说颂曰：

“佛智无碍无有边， 能说无碍无边法，
演一字作无量句， 演一句作无量义，
说八万四千法门， 亦及尔所诸法聚，
为令众得无碍智， 是故宣说如是业。”

“复次，善男子，如来解脱无有减少。声闻之人从他闻故而得解脱；缘觉之人从因缘故而得解脱；如来无师自然觉悟，永断烦恼及以习气，过去不断，未来不著，现在不住，亦不贪著眼、色二法，乃至意法亦复如是，知心性净，是故唱言如来一念得阿耨多罗三藐三菩提。为令众生一念得成阿耨多罗三藐三菩提故，演说正法。是名如来二十六业。”

尔时，世尊即说颂曰：

“为诸声闻闻解脱， 亦为缘觉因缘悟，
如来解脱不著有， 不著三世心性净，
凡所演说为解脱， 劝诸众生无上道，
二十六业非业故， 大慈大悲处众说。

“复次，善男子，如来身业随智慧行，智所围绕；以是业故，众生闻见说法、默然、行住坐卧、饮食、出入城邑聚落，三十二相、八十种好悉得调伏，是故如来一切身业随智慧行。是名如来二十七业。”

尔时，世尊即说颂曰：

“如来身业为众生， 故示种种妙相好，
凡所举动调众生， 大悲为众说是业。

“复次，善男子，如来口业随智慧行。何以故？说法净故，无脱失故，真正语、易解语、易知语、非高语、非下语、非曲语、非粗语、非恶语、非闇语、柔软语、非轻语、非疾语、非畏语、非不解义语、非恶声语、非缓语、甘露语、可爱语、次第语、庄严语、恭敬语、乐闻语、不贪语、不垢语、清净语、毕竟语、不诳语、不痴语、无碍语、广语、真实语、不作语、不尽语、安乐语、身寂静语、心寂静语、贪寂静语、瞋寂静语、痴寂静语、坏魔语、破邪论语、梵声、迦陵频伽声、释声、大海潮声、拘仑闍声、秋月孔雀声、拘积罗声、命命鸟声、鹅王声、鹿王声、琴声、鼓声、贝声、伎乐声、人乐闻声、耳根乐声、增善法语、句义无尽语、合字句义语、时语、略语、知足语、调诸根语、施庄严语、清净戒语、共忍行语、精进神通语、远离欲界语、具足智慧语、慈语、悲语、喜语、舍语、说三乘语、不断三宝语、解三聚语、解三世语、解三解脱语、分别四谛语、修集语、赞叹语、佛语、圣语、无边语、无行语。善男子，如来成就如是等语，是故如来所有口业随智慧行。是名如来二十八业。”

尔时，世尊即说颂曰：

“如来所说如净珠， 成就无量诸功德，
其声遍满十方界， 一音能令种种解。

凡所演说不作念， 更不观众心境界，
如来音声如响相， 无说无闻亦如是。
大慈大悲清净语， 为众生解种种法，
是故宣说如来业， 二十八业如先佛。

“复次，善男子，如来意业随智慧行。何以故？如来了知一切众生心意识等，亦不随意、随缘、随贪、随恚、随痴，远离诳惑及我、我所、无明闇翳，平等清净，无有边际犹如虚空，是故如来所修意业随智慧行。是名如来二十九业。”

尔时，世尊即说颂曰：

“如来之心不可量， 如以毫毛举须弥，
常观众生心所缘， 远离说魔烦恼界。
人中象王说善业， 为坏众生种种恶，
为净众生身口意， 二十九业今已说。

“复次，善男子，如来智慧知过去世，其智无碍亦无障者。云何为智？知过去佛无量无数，及其世界所有草木众生之数，其心所缘种种音声，亦知其佛说几所法，有几众生得声闻乘、辟支佛乘及菩萨乘，亦知彼佛所有世界寿命修短，众数多少、名字种种、喘息饮食，众生根界、意界、法界、心界、行界，其心次第生灭出没，如实了知，知其数量，非比智知。是名如来第三十业。”

尔时，世尊即说颂曰：

“佛智无碍无障者， 故能悉知无量土，
了知一切诸佛事， 众生诸根及法界。
人师子王知过去， 如观掌中阿摩勒，
无边身说三十业， 为令众生知过世。

“复次，善男子，如来智慧知未来世，其智无碍亦无障者。云何为智？知未来世若出若灭，一切世界几劫水灾、几劫火灾、几劫风灾成坏之数，几佛世界，几佛出世，世界之中有几微尘，有几声闻、缘觉、菩萨；亦知彼佛几食几息、几行几住、几坐几卧，几人获得声闻解脱，几人获得缘觉解脱，几人获得正觉解脱，几人修集慈悲喜舍；亦复了知几所众生次第心生、次第心灭，了了能知如是等事，亦非比智。是名如来三十一业。”

尔时，世尊即说颂曰：

“如来了知未来世， 一切诸法之出没，
知佛世界及以佛， 众心次第生灭等，
既得知已无憍慢， 名三十一如来业。

“复次，善男子，如来智慧知现在世，其智无碍亦无障者。云何为智？如来悉知十方现在世界，诸佛、声闻、缘觉、菩萨众数，日月星宿、草木微尘、地水火风四大海涘，众生毛发种种形色，心意次第生灭出没；亦知地狱、畜生、饿鬼现业果报，几时住世，几时解脱；亦知人天业果因缘，几时住世，几时解脱；知烦恼界及诸根界、意界、法界。如来虽复种种知己，不生高心，口亦不出二种之言。是名如来三十二业。”

尔时，世尊即说颂曰：

“无上如来叵思议， 无有知佛所缘境，
如来所知如虚空， 无量无称无边界。
所说微妙第一义， 为令众生得是业，
总持自在能问佛， 无上世尊随意答。”

“善男子，如来世尊具足如三十二业，则能调伏无量众生。善男子，如来世尊虽为众生说是诸业，而如来业真实无量不可称计。善男子，如来业者，一切世间所有众生，不能思惟，不能了知，不能宣说。如是业者，悉能等知一切国土犹如虚空。何以故？十方诸佛悉平等故。善男子，诸佛所说，观察众生及佛世界，解脱涅槃等无差别。佛观法界皆一味已，转不可转正法之轮。

“善男子，譬如善识真宝之匠，于宝山中获得一珠，得以水渍从渍出已，置酢浆中从酢浆出已，置之豆汁意犹不已复置苦酒，苦酒出已置众药中，从药出已以麤毼磨，是名真正青琉璃珠。善男子，如来亦尔，知众生界不明净故，说无常、苦及以不净，为坏贪乐生死之心。如来精进无有休息，复为演说空无相愿，为令了知佛之正法。如来精进犹不休息，复为说法令其不退菩提之心，知三世法成菩提道，名大珍宝良祐福田。是故当知，如来诸业不可思惟，不可称量，不可宣说。如来具足三十二业，虽知己身犹如虚空，而于世界示现其身，亦复宣说不可说法，永断一切心之因缘，悉知一切众生心界，亦知一切菩萨境界。善男子，如来世尊真实业者，终不断绝菩萨授记，是名如来真实之业。”

尔时，世尊说是业时，十方世界六种震动，大光普照，雨于无量无边香华。诸在此坊天人大众、阿修罗、迦楼罗、紧那罗、摩睺罗伽、人及非人，闻如来业心大欢喜，复以种种香华、伎乐、宝幢、幡盖供养之具而供养佛。其中或以周罗宝顶、宝发手玢、杂宝璎珞、日珠、月珠、指环珠带、宝佩发饰，或以耳环以奉如来，谓青琉璃及莲华珠、金翅鸟珠、阎浮宝珠、帝释宝珠、火珠、光珠、无量光珠、无量色珠、柔软净珠、金刚宝珠及白真珠；复以杂香，所谓末香、金沙和杂栴檀之香、多伽罗香、沉水弥伽多摩罗跋香；复散诸华，所谓曼陀罗华、摩诃曼陀罗华、曼殊沙华、摩诃曼殊沙华、拘毗陀罗华、波

利质多罗华、乐华、娑罗华、大娑罗华、百叶华、千叶华、饶叶华、大光华、香叶华、乐香华、乐见华、无量色华、无定色华、水生华、优波罗华、波头摩华、拘物头华、分陀利华、陆生华、婆利师华、摩梨华、须曼那华、育吒华、檀内伽梨华、阿提目多伽华、瞻婆华、阿叔迦华，种种伎乐，种种幢幡盖。十方界诸来菩萨，各升虚空宝坊之上，放身投下供养于佛，投身散已其身不现，化七宝网遍覆其上，复现其身于珠网中。尔时，十方一切诸佛，各各遣一波利之树，以用供养释迦如来，以佛力故，一一诸树各至宝坊庄严其处。

尔时，会中无量众生发阿耨多罗三藐三菩提心，无量众生得无生法忍。

大方等大集经卷第四

陀罗尼自在王菩萨品第二之四

尔时，世尊举身顾盼观诸大众，如象王迴而作是言：“诸善男子，谁能守护如是供具及此宝坊，令不毁坏、灭没、损减，以待弥勒成正觉已，十六年后供养彼佛及贤劫中五百如来？”

是时，会中有一菩萨，名诸法神通自在王，即从坐起，胡跪合掌而作是言：“世尊，我能守护如是供具及此宝坊，令不毁坏、灭没、损减，以待弥勒成正觉已，十六年后供养彼佛及贤劫中五百如来。”

尔时，众中有一魔王，名曰神通，其所住国名四天下，语诸法神通自在王菩萨言：“善男子，汝今安置如是供具并及宝坊，置何器中而守护之令不毁坏？”

“善男子，凡言器者，性是无常，而我此身常住无变。善男子，汝今应当谛观我身。”

尔时，魔王闻是语已，如教谛观，见其脐中，有一世界名水王光，有佛世尊号宝优钵罗。其世界中有大宝山，如来处中结跏趺坐，与诸菩萨宣说正法。尔时，魔王见是事已，心甚奇讶，即礼诸法神通自在王菩萨，赞言：“善哉！善哉！大士，我今始知汝有妙器，堪任护持如是供具及此宝坊令不毁灭。”

尔时，魔王即白佛言：“世尊，我往未见如是菩萨，未闻如是微妙法时，欲学声闻入于涅槃。我今既见诸法神通自在王菩萨威神之力，即发阿耨多罗三藐三菩提心。世尊，假使我身恒沙劫中受地狱苦，然后乃成无上道者，亦终不舍菩提之心。”

佛言：“善哉！善哉！善男子，汝能善发阿耨多罗三藐三菩提心，汝亦当得如是无量神通之力。”

是时，会中复有菩萨名师子幢，语陀罗尼自在王菩萨言：“善男子，菩萨摩訶萨获得何等陀罗尼门，而能受持一切佛语，凡所演说字句及义无有穷尽？”

陀罗尼自在王菩萨言：“善男子，有八陀罗尼，菩萨摩訶萨若有得者，则能受持一切佛语，凡所演说字句及义而无穷尽。何等为八？一者、净声光明陀罗尼，二者、无尽器陀罗尼，三者、无量际陀罗尼，四者、大海陀罗尼，五者、莲华陀罗尼，六者、入无碍门陀罗尼，七者、四无碍智陀罗尼，八者、佛庄严瓔珞陀罗尼。是名为八。若有菩萨安住如是八陀罗尼，则能受持一切佛语，凡所演说字句及义而无穷尽。”

师子幢菩萨言：“善哉！大士，唯愿广说，菩萨闻已当得受持一切佛法。”

陀罗尼自在王菩萨言：“善男子，谛听！谛听！当为汝说。

“净声光明陀罗尼者，菩萨摩訶萨若得住者，能于无量无边佛所，具足成就无量功德得净四大。以是因缘，其声微妙，宣说法时，其音遍满一佛世界、二佛世界、五佛世界、十佛世界、二十佛世界、三十佛世界、四十佛世界、五十佛世界、百佛世界、千佛世界、万佛世界乃至百千万佛世界，不可称，不可数，随所说法即得遍闻。其说法时，所坐法座师子之床，或一由旬，或如须弥，或如梵处，坐如是处。设有十方无量诸佛讲宣道化，普得闻之受持不忘，善解字句及其义味。自说法时及听佛说，于是二事各无妨碍。于一字中说一切法，一字者所谓为阿，阿者诸字之初。菩萨摩訶萨说阿字时，即能演说一切诸法。阿之言无，无者，诸法无根，诸法无生，诸法无初，诸法无边，诸法无尽，诸法无作，诸法无来，诸法无去，诸法无住，诸法无性，诸法无出，诸法无行，诸法无增，诸法无高，诸法无减，诸法无主，诸法无用，诸法无愿；诸法无戏论亦无觉观，无说无听，无处无入；诸法无我及无众生，无净无命，无名无主，无有士夫，无内无外，无常无相，无亿无量，无为无迹，无句无字，无碍无共，无随他无随己，无执无放，无取无舍，无数无身，无净无秽，无转无变，无受无声，无相无结，无污无狂，无漏无有，无覆无浊无对，无色无受无想无行无识，无因无果，无阴入界，无因缘无境界无受，无欲无色无无色，无诱导，无黑无白，无滓无思惟，无时无归，无净无杂，无烧无习，无屋无支，无动无住，无坚无脆，无可见无可触，无光无闇，无曲无罪，无实无虚，无痴无观，无见无修，无见无闻，无觉无智，无触无识。

“善男子，菩萨摩訶萨，获得如是净声光明陀罗尼时，于此一字说一切法。菩萨于此一字之中说无量义，无有错谬，不坏法界，不失字义。菩萨得是陀罗尼已，身口意净，举动进止众生乐见，是名身净；凡所演说众生乐闻，是名口净；修集慈悲喜舍之心，是名意净。菩萨得是陀罗尼已，能净二施——财施、法施；能净于戒，见毁戒者不生恶心；能净于忍，见害众生不生瞋恼；能净精进，修行善法无有休息；能净禅定，坏憍慢故；能净智慧，除无明故；能净于业，坏恶因故；能净于眼，得三眼故；能净于耳，获得天耳闻佛声故；能净于

鼻，悉嗅诸佛净戒香故；能净于口，于甘露味不贪著故；能净于身，得化身故；能净于意，善思惟故；能净于色，三十二相故；能净于声，说妙法故；能净于香，戒闻施等得清净故；能净于味，得无上味故；能净于触，修集无上诸三昧故；能净于法，观诸法界无分别故；能净于念，如所闻法不忘失故；能净于意，永不系属诸魔党故；能净于行，观察甚深诸法界故。善男子，菩萨住是陀罗尼已，随说音声所至之处，身之光明亦如是照。善男子，是陀罗尼成就如是无量功德。

“无尽器陀罗尼者，菩萨住是陀罗尼已，说色无常不可穷尽；说色是苦亦不可尽；说色无我，说色如沫，如幻、水月、梦、响、影、焰，亦不可尽；说色无性亦不可尽；说色无相，空不可说、不可愿求、不可造作，不生不灭，非是过去、未来、现在，非内非外，非净非秽，非我我所，非去非来，非对非碍，非一非二，非是众生，亦非寿命，亦非丈夫，非贪瞋痴，非有非无，非漏非无漏，非有为非无为，非盲非聋，非跛非蹙，非狂非乱，非草木石，非树非地，非水火风，非舍非宅，非城非郭，非大村落非山，非圆非方，非四大造，非作非受，非声非闻，非是可说，十二因缘，不可穷尽；非常非断，无业无果，非阴入界，非住欲界、色无色界，非同非异，亦非烦恼，非净非污，非平非曲，菩萨摩訶萨说色如是不可穷尽。善男子，是无尽器陀罗尼者，有无量无边不可说分。分此一分以为千分，我于如是千分之中，唯说一分犹不能尽。

“无量际陀罗尼者，际者，所谓常见、断见；无量者，谓十二因缘。际者，所谓无明行识，乃至老死众苦聚集；又无量者，所谓生死。又复际者，谓无始终；又复际者，谓无取舍；又复际者，无出无灭；又复际者，无污无净，其性净故；又复际者，所谓可见；又复际者，所谓名色；又复际者，有为无为；又复际者，所谓三世内外业果，无业无果、善及不善、有漏无漏、业及烦恼、我以无我、生死涅槃。善男子，夫无量者，所谓微尘；际者，所谓地水火风。是名无量际陀罗尼。菩萨住是陀罗尼已，无量劫中为众说法，而其所说字句义味不可穷尽，是陀罗尼成就如是无量功德。

“大海陀罗尼者，善男子，犹如大海，四天下中所有诸色，众生卉木、药树谷子、日月星宿、云气雷电、国邑聚落、城郭殿堂、园池山河，如是一切诸种种色悉于中现。菩萨住是陀罗尼已亦复如是，一切众生身口意业，各各于是菩萨身中一一印现。十方世界所有众生所有口业，悉于菩萨口中印现，是故菩萨有所言说皆悉真实。印者名无所有，谓诸法无有觉观，无说无边，无作无贪，是名第一真实之义。复有遮印，遮之言眼，眼即无常可净可见。复有那印，那之言名，一切诸法流布故名真实无名。复有逻印，逻之言世，一切世间属爱无明。复有陀印，陀之言十，佛具十力能化众生。复有波印，波之言五，如来远离除灭五欲，得阿耨多罗三藐三菩提。复有杀印，杀之言六，如来真实了知六入故，能调伏一切众生。复有杀印，杀之言六，

如来具足六念处故，得大自在。复有杀印，杀之言六，如来具足六神通故，能以神通教化众生。复有婆印，婆之言左，如来世尊离左道故，得阿耨多罗三藐三菩提。复有多印，多之言实，如来善觉真实性故名正觉。复有耶印，耶之言彼，如来等知此彼平等。复有婆印，婆之言结，如来远离诸烦恼故名阿梨呵。复有阇印，阇言生老，如来已过生老之分故名世尊。复有昙印，昙之言法，如来说法清净无垢。复有奢印，奢之言奢摩他，如来成就修奢摩他。复有佉印，佉之言虚空，如来知见一切诸法同于虚空。复有迦印，迦言苦行，如来远离一切苦行。复有婆印，婆之言实，如来所说四真谛者即是真实。复有摩印，摩之言道，如来能说八正之道。复有伽印，伽之言深，如来所说其义甚深。复有羴印，羴之言忍，如来具足忍波罗蜜。复有呼印，呼之言赞，如来常赞十方诸佛。复有若印，若之言遍知，是故如来名一切智。复有婆印，婆之言有，如来已解一切诸有。复有车印，车之言欲，如来欲于一切善法。复有波印，波之言前，如来常为一切众生现前说法。复有颇印，颇之言果，如来常说四沙门果。善男子，因如是字演说诸法，所有诸字悉于菩萨口业印现，是名大海陀罗尼也。

“莲华陀罗尼者，菩萨住是陀罗尼已，所说法处常出七宝净妙莲华以为法座，菩萨坐上宣说法化。又复多雨无量莲华，是诸莲华亦出种种清净法音，其音深广多诸法喻，十二部音、清净之音、断烦恼音。尔时，菩萨默然而住，是诸莲华皆能演法，亦出种种无量光明，一切众生皆见菩萨坐诸华台施作佛事，是名莲华陀罗尼也。

“入无碍门陀罗尼者，菩萨摩訶萨说一法时无有挂碍，若说二法、三法、四法，乃至百千无量无边恒沙等法，如四天下微尘等法，乃至三千大千世界微尘等法，乃至恒河沙等诸佛世界微尘等法，于字句义亦无挂碍，是名入无碍门陀罗尼也。

“四无碍智陀罗尼者，所谓法无碍智、义无碍智、辞无碍智、乐说无碍智。东方无量世界众生有问法者，菩萨随以法无碍答；南方无量世界众生有问义者，菩萨随以义无碍答；西方无量世界众生有问辞者，菩萨随以辞无碍答；北方无量世界众生问乐说者，菩萨随以乐说智答。是名四无碍智陀罗尼也。

“佛瓔珞庄严陀罗尼者，若有菩萨获得如是七陀罗尼，其顶髻上有佛像现，其色真金，有大光明，三十二相、八十种好。尔时，菩萨身口意等悉作佛业，其所思念如佛所念。菩萨具足如是佛业，能知大众种种之心，知已随意而为说法，若一日、若二日，乃至无量百千万岁，不能尽其所知法门文字句义。又复具足四种智慧。何等为四？一者、知众生心，二者、知诸字句，三者、知所说无尽，四者、知于真实。菩萨具足如是四智，能调众生为阿耨多罗三藐三菩提。善男子，是名佛瓔珞庄严陀罗尼也。

“善男子，是八陀罗尼其分无量。于是分中分其一分以为千分，于是分中唯说一分犹不能尽，是陀罗尼成就如是无量功德。”

尔时，陀罗尼自在王菩萨，即说颂曰：

“如来说八陀罗尼，若有菩萨具得者，
能解诸经种种义，其辞句义不可尽，
具足善业得妙声，能令无量世间闻，
众生闻已修善法，修已获得于解脱。
无量劫中说无法，因一法根说无尽，
亦因一字解多义，是名如来说际持。
人中牛王断二际，说中道义无有边，
具足智慧平等观，虽成是持无得者。
四方色等现大海，一切字印印菩萨，
说法之时无障碍，成就大海陀罗尼。
坐宝莲华演说法，亦雨莲华散大众，
莲华亦说无量法，是名寂静莲华持。
说于一字无障碍，无量字中亦如是，
说无量义无有滞，具足如是无碍持。
说法深义无有尽，辞及乐说无有边，
能破众生疑网心，获得无上智总持。
顶髻常出如来像，身口意业佛无异，
若具如是八持者，穷劫赞叹不可尽。
具足是八陀罗尼，处世不污如莲华，
在世最高如须弥，不可称计亦如是。
世邪不动亦复然，是人具足如是持，
能坏世道诸邪见，犹如师子兽中吼。
若得无上陀罗尼，能达世间清净行，
能增无量诸善法，亦能教化多众生。
具足如是陀罗尼，能坏众生无明闇，
作大光明如朝日，亦能除破诸黑闇。
说法无碍如虚空，为众生行如猛风，
施于法药坏烦恼，如世良医救病者。
若得具足无上持，有赞功德不能尽，
能作清凉如秋月，增长善法亦如是。
菩萨成就如是持，能化无量诸众生，
若具如是陀罗尼，获得自在如大王，
能化众生于大乘，能施法财破贫穷，
能降法雨如龙王，摧灭烦恼如恶雹。
若得如是陀罗尼，能化众生于菩提，
不能说过如帝释，字义不尽如虚空。
若得成就陀罗尼，一切大众乐见闻，
其意不散常在定，修集无量慈悲心，

清淨梵行游神通， 是四皆如大梵天。
若得成就陀罗尼， 即能供养十方佛，
了了观见十方界， 于其世界化众生。
若具如是陀罗尼， 即得具足佛功德，
常为十方佛所念， 亦如父母念一子。
若有菩萨得是持， 能赞功德无量鬘，
具足成就戒念慧， 能解众生心所行。
若得成就陀罗尼， 无有憍慢及悭贪，
善知方便调众生， 修集慈悲坏烦恼。
若得成就陀罗尼， 烦恼不污如虚空，
善解众生随意语， 亦能随意演说法。
若具如是陀罗尼， 悉能了知众生根，
能解众生种种解， 随其所解而说法，
随对治门为说法， 三十七品调众生。
若得如是陀罗尼， 修奢摩他无有边。
若得如是陀罗尼， 具足六度如诸佛，
了知一切烦恼界， 通达寂靜而坏之，
身口意业悉寂靜， 行住坐卧亦如是。
若得成就如是持， 无复烦恼诸习气，
得淨法身无有边， 非生所生常化生，
身口意业随智行， 所有定念亦如是。
若得成就如是持， 有赞叹者不能尽！”

尔时，世尊赞陀罗尼自在王菩萨：“善哉！善哉！善男子，汝已久得是陀罗尼，是故能善分别解说所有无量功德之义。不但今日，已于过去无量佛所亦作如是分别解说。

“善男子，过去无量阿僧祇劫，尔时有佛号淨光明，世界名淨劫，亦名淨纯。淨琉璃以为世界犹如明镜，地平如掌，所有林树七宝所成，妙宝莲华大如车轮，清淨鮮洁人所乐见。其土人民，悉处七宝楼殿堂阁如天无异，贪欲恚痴渐已经微。土无日月，唯有佛光，青莲华开则知是夜，赤莲华敷则知是昼。时彼佛有六万百亿大菩萨僧，出家之人不可称计，皆悉志乐无上大乘，世界乃至无二乘名，一切皆是不退菩萨。其佛寿命具足半劫。人之与天无有差别，在地为人，处空为天。无有王者，除佛法王。其土人民，无有宗事诸天邪神及归依者，亦无女身、毁戒之名，具足三戒。何等为三？一、从戒戒，二、从心戒，三、从慧戒。发菩提心，厌悔生死，名从戒戒；修三昧慧，名从心戒；修集智慧得大智慧，名从慧戒。

“尔时，众中有一菩萨，名曰光顶，从坐而起，头面礼足，右绕恭敬，长跪合掌，而白佛言：‘世尊，所言陀罗尼者，云何名为陀罗尼也？菩萨住何陀罗尼中，能持一切诸佛名号，为诸众生分别解说？’佛

言：‘善男子，有陀罗尼名曰宝炬，菩萨住是陀罗尼中，能持一切诸佛名号，为诸众生分别解说，随诸众生种种语言。’光顶菩萨复白佛言：‘唯愿世尊分别广说，我等闻已当得修持。’佛言：‘善哉！善哉！善男子，至心谛听，吾当为汝分别解说。’尔时，世尊即说偈言：

“远离一切诸烦恼， 清净无垢犹真实，
其心能作大光明， 是名宝炬陀罗尼。
身口意业悉寂静， 犹如秋月之明净，
修集大慈心平等， 是名宝炬陀罗尼。
其心无有诸觉观， 悉得远离于二见，
亦非有想非无想， 是名宝炬陀罗尼。
具足成就念慧， 能入无上大法门，
清净无垢如虚空， 是名宝炬陀罗尼。
远离三种尘劳垢， 成就三种清净慧，
已于三有得解脱， 是名宝炬陀罗尼。
能悉破坏贪恚痴， 亦得远离烦恼浊，
除灭无明诸邪闇， 是名宝炬陀罗尼。
众生音声上中下， 一切悉能了了知，
能随众生意说法， 是名宝炬陀罗尼。
具足甚深无量义， 亦复具足诸字句，
远离于我及我所， 是名宝炬陀罗尼。
具足成就四依法， 亦复具四无碍智，
其心常在于四禅， 是名宝炬陀罗尼。
能广分别第一义， 具足而得四梵行，
修集具足五神通， 是名宝炬陀罗尼。
受持专忆四念处， 精进获得四正勤，
庄严成就四如意， 是名宝炬陀罗尼。
成就五根及五力， 一切邪风不能动，
修集无上七觉分， 是名宝炬陀罗尼。
成就定慧二羽翼， 游翔平坦八正路，
趣向无上智解脱， 是名宝炬陀罗尼。
能践菩萨之道地， 及住无上真解脱，
永断一切烦恼习， 是名宝炬陀罗尼。
能作无量光明， 犹如世间之日月，
能净三种清净眼， 是名宝炬陀罗尼。
能净一切诸烦恼， 亦得远离诸魔业，
观察五阴味过咎， 是名宝炬陀罗尼。
善知调伏诸众生， 永离六根之因缘，
为众说法令得念， 是名宝炬陀罗尼。
住于如是陀罗尼， 能到十方佛世界，

见佛至心听受法，亦能广说如是法；
既闻法已至心持，能为众生说字义，
以大念力因缘故，能解诸佛微妙语；
能说无常苦无我，诸法悉从缘得果，
了了观察诸法界，是名宝炬陀罗尼。
成就乐说无碍智，三明三慧亦如是，
若有住是总持者，乃能得八解脱义。
佛说无量陀罗尼，悉来摄在此持中，
若得如是陀罗尼，是名成就无量持。
若入无量诸禅定，及得无量诸神通，
皆由如是总持力，是故名为持中王。
如四大海无障碍，一切河泉皆投之，
诸法众流亦如是，皆悉归趣是持海。
得身无边意无尽，能广分别说法界，
成就无量功德者，乃能获是陀罗尼。
若得如是微妙持，即得三十二相好，
其色殊胜上种性，多饶财宝得自在，
于诸有中得无生，能广分别诸法义，
安住不动不退地，皆由得是陀罗尼。
菩萨若欲修菩提，当修如是陀罗尼，
得是持已修道易，能演说法调众生，
于无量劫说法时，字义二法不可尽，
能净众生诸烦恼，以得如是陀罗尼。
能转无上正法轮，能令众生脱众苦，
能进众生无上道，以得如是陀罗尼。
若有众生千万口，一口而有千万舌，
不能宣说成持者，所得无量之功德。’

“善男子，尔时净光明佛说是法时，光顶菩萨及与三万二千菩萨悉皆获得是陀罗尼。善男子，汝知尔时光顶菩萨，岂异人乎？即汝身是。是故汝今能广分别是陀罗尼。是大众中得是持者，汝最第一。”

尔时，会中有一菩萨，名曰慧聚，白佛言：“世尊，云何菩萨得宝炬陀罗尼，得已不失，能以此法调伏众生？”

“善男子，若有菩萨安住慧根，造作慧业，如是菩萨能得是持，得已不失，能以此法调伏众生。”

慧聚菩萨复作是言：“善哉！世尊，唯愿演说，云何慧根？云何慧业？”

佛言：“善哉！善哉！善男子，至心谛听，吾当为汝分别解说。善男子，若有善男子、善女人，未闻智慧而得闻之是名为根，闻已广说名之为业；始观诸法名之为根，观已广说名之为业；初观善根名之

为根，转以化人名之为业；观不放逸名之为根，转以化人名之为业；调伏自心名之为根，调伏他心名之为业；住于寂静名之为根，净身口意名之为业；知于一乘名之为根，为众生说名之为业；修奢摩他名之为根，具三种慧名之为业；修三解脱名之为根，证得三慧名之为业；修四念处名之为根，不念于念名之为业；修四正勤名之为根，离烦恼性名之为业；修四如意名之为根，知无如意名之为业；修集信心名之为根，放舍一切名之为业；修无所畏名之为根，能广说之名之为业；修集三昧名之为根，知定次第名之为业；修集智慧名之为根，知一切法名之为业；庄严菩提名之为根，得菩提时名之为业；证苦习道名之为根，证尽灭时名之为业；不依不了义名之为根，依了义经名之为业；初听受法名之为根，依止其义名之为业；不依于人名之为根，依止于法名之为业；见法无常名之为根，法无生灭名之为业；知诸法苦名之为根，知法无作名之为业；知法无我名之为根，知法性净名之为业；知涅槃净名之为根，知法本净名之为业；闻义不畏名之为根，依止于义名之为业；闻真不怖名之为根，依止真法是名之为业；知字不畏名之为根，知已乐说名之为业；闻说如来无碍智力，不生怖畏名之为根，依止如来无碍智力名之为业；生法二缘名之为根，无缘之慈名之为业；怜愍众生名之为根，能为坏苦名之为业；思善得喜名之为根，心不著法名之为业；无爱患舍名之为根，无一无二名之为业；念佛名根，念于法身名之为业；念法名根，知法性净名之为业；念僧名根，知僧无为名之为业；念戒名根，知无持者名之为业；念施名根，能舍烦恼名之为业；念天名根，获得净天名之为业；闻已思惟名之为根，不著世间名之为业；知本无今作名之为根，无作无受名之为业；知于涅槃名之为根，得大解脱名之为业；自利名根，自利利他名之为业；受持八万四千法聚名之为根，通达其义名之为业；能演说法名之为根，解无明等名之为业；劝诸众生于菩提道名之为根，劝修智慧方便不退名之为业；不畏诸有名之为根，愿生诸有名之为业；从闻得忍名之为根，思惟得者名之为业；随意得忍名之为根，因不生得名之为业；余一生在名之为根，最后边身名之为业；坐菩提树名之为根，了知诸法名之为业。”说是慧根慧业之时，一切十方诸佛世界，及此宝坊六种震动。

尔时，慧聚菩萨摩诃萨白佛言：“世尊，何因缘故十方世界及此虚空七宝坊庭如是震动？”

“善男子，是慧根、慧业，亦是过去诸佛所说，是故此地为大震动。”

尔时，具足四无碍智菩萨白佛言：“世尊，何四缘故，慧聚菩萨名之为聚？”

佛言：“善男子，过去无量阿僧祇劫，有佛出世，号功德藏如来、应、正遍知、明行足、善逝、世间解、无上士、调御丈夫、天人师、佛世尊，土名善生，劫名无垢，其土众生一切纯善。尔时，佛有

三万二千大菩萨众，八万四千声闻大众。尔时，世尊欲试菩萨，以百亿事问诸菩萨：‘诸善男子，于是众中，谁能解说如是等义？’其中有言：‘我当思惟，经一月日乃能解之。’或复有言‘我过半月’，复有言曰‘我过七日’，或言‘我过一日一夜’，乃能解之。

“尔时，众中有一菩萨，名曰念意，白佛言：‘世尊，我今不起此坐能解是义。’尔时，菩萨于大众中师子吼已，其地即时六种震动，放大光明，劝诸地神乃至阿迦尼吒诸天，一切悉来诣如来所。尔时，大众所坐之处，纵广满足百万由旬。念意菩萨见诸大众悉以集会，以神通力、智慧念力、陀罗尼力、四无碍力、无所畏力、佛神力故，于是百亿一一事中解百亿义，不豫思惟无有停滞。说是义已，是大众中六万众生发阿耨多罗三藐三菩提心，四万众生得无生忍。从地神诸天乃至阿迦尼吒天，一切悉闻说法之声。

“善男子，汝知尔时念意菩萨，岂异人乎？即慧聚是。以是因缘，名为慧聚。”

尔时，世尊即说颂曰：

“闻说法故名为根， 演说法故名为业。
思惟诸善名为根， 解说深义名为业。
如法而住名为根， 随意说法名为业。
修奢摩他名为根， 具三种慧名为业。
四种念处名为根， 四正勤法名为业。
信等五根名为根， 信等五力名为业。
七菩提分名为根， 八正道分名为业。
不依止字名为根， 依止于义名为业。
不依于人为根， 依止于法名为业。
不依不了名为根， 依止了义名为业。
不依于识名为根， 依于智慧名为业。
了知无作名为根， 通达无生名为业。
生法二慈名为根， 无缘之慈名为业。
无所畏惧名为根， 能宣正法名为业。
六思念处名为根， 六念之义名为业。
能自利益名为根， 自利利他名为业。
受持正法名为根， 能为人说法名为业。
余一生在名为根， 最后边身名为业。
若菩萨心得不退， 即解了知智慧根业，
能得无生之上忍， 能开无上菩提门。”

尔时，陀罗尼自在王菩萨白佛言：“世尊，佛所说法不可思议，无上菩提亦不可思议。何以故？非字说故，非字摄故，如来所说无量无边故，入无量无边法门故，十二因缘深难解故，著二法者不能知

故，利智之人渐渐知故，非是六情所知见故，亦非二乘智境界故。世尊，如是菩提，悉是一切诸法之印，不可造作犹如虚空，非是屋宅离屋宅故，知一切行、一切众生所有因果，一切智慧广大无边，庄严一切无量善法，能为善法而作应器，能以神通显示于人，住二道者示以无二，示一切佛平等无差、无字无义，不可宣说，不可听闻，能示众生三宝正聚，及三脱门解脱三界，示三种慧金刚定因，住于一切诸佛正法，悉闻一切诸佛智慧，利一切众亦能宣说一切诸佛。世尊，若有善男子、善女人，能作如是赞叹菩提所有功德，得闻如是方等经典，受持读诵，书写演说，是能名报诸佛之恩。”

佛言：“如是，如是，善男子，如汝所说，得无量功德。善男子，一切十方诸佛世界满中七宝以献如来，若有人能受持是经，书写读诵，解说其义，所得福德无有差别。”

尔时，世尊告诸菩萨：“善男子，于此众中，谁能于我灭度之后，护持如是无上菩提，广说是义，令法久住？”

尔时，众中有诸菩萨及诸天人各六万亿同声而言：“我等能于如来灭后，护持如是无上菩提，广说是经，令法久住，唯愿如来加之愿力！”

尔时，世尊即说偈言：

“若我实同十方佛， 永渡生死大苦海，
如是功德无上法， 应当久住无毁灭。
若我无量世修慈， 真实为于诸众生，
观众平等无有二， 是故正法得久住。
若我具足二庄严， 无量世中利众生，
以是二法化众生， 是故正法得久住。
若能破坏烦恼结， 并及除灭诸邪见，
具足一切诸善法， 故能善发是愿力。”

“善男子，不独汝等一切人天、一切魔梵，于我灭后，悉能护持如是正法。善男子，虚空可作色，色可同虚空，我愿神通力不可得令异。”

尔时，四天王作如是言：“若有人能于佛灭后，受持是经，读诵书写，解说其义，我等常当随逐守护。”

诸梵天言：“我等当舍禅定妙乐守护是人。”

兜率天言：“我等亦当守护如是持经弟子。”

时，魔波旬复作是言：“世尊，若有人能受持是经，我于其人终不造作魔业魔事。”

功德藏天子言：“世尊，一切诸佛所得菩提悉在是经。若有人能受持读诵，书写解说，当知是人即得菩提。”

弥勒菩萨言：“世尊，我当于彼兜术天上，广宣如是无上经典。”

大德迦葉复作是言：“世尊，我声闻人智慧虽微，应当任力受持读诵，宣说其义。”

阿难复言：“世尊，我于此经真实受持，乃至不失一字一句，如佛口出无有异也。若有众生发菩提心，我亦能为是人广说。”

佛言：“善哉！善哉！善男子，汝等悉能于我灭后，护持正法不令毁灭。善男子，若有众生求于大乘，未得法忍，受持是经，当知是人不过七佛便得授记。若声闻人有受持者，弥勒成佛在初会中。若缘觉人有受持者，于我灭后得成道证。”

说是法时，无量众生发阿耨多罗三藐三菩提心，无量众生成就忍辱，无量众生得不退心，无量世界六种震动。十方世界诸来菩萨，以好香华、伎乐、幡盖供养于佛，咸作是言：“我等来此七宝坊中得大善利！若我脱有少福德力，愿以此力令释迦如来久住于世，如是正典流布遍满十方世界无有毁灭。若有优婆塞、优婆夷等持是经者，令离一切忧愁怖畏无诸病苦。”

尔时，陀罗尼自在王菩萨言：“世尊，今所说法无量无边，不可思议，一切邪法不能倾动，乃是一切善法之本三乘根栽，复是一切诸法初门。若有众生来问我言：‘是法何名？云何受持？’当云何答？唯愿说之。”

佛言：“善男子，是名大悲，说大悲法，名如来业，受菩萨记，当如是持。”

说是经已，人天大众欢喜顶戴，信受奉行。

大方等大集经卷第五

宝女品第三之一

尔时，世尊故在欲、色二界中间，大宝坊中师子座上，与诸大众围绕说法。

尔时，会中有一童女，名曰宝女，即从坐起，右手执持白真珠贯，而作是言：“若我真实能于十方无量世界，受持如是大集正典，读诵书写，演说其义，广流布者，愿此珠贯著佛顶髻及诸菩萨！”说是语已即掷珠贯，以佛神力及以诚言，珠贯即在如来顶上，亦遍一切诸菩萨首。

而诸菩萨各各自于首贯珠中，见其来世成佛之时所有世界菩提之树，众生调伏及往愿力了了见知，见已各各生奇特想，白佛言：“世尊，是宝女者，云何乃有如是无量大功德也？我于无量阿僧祇劫所有誓愿，今于一念悉见了了。”

佛言：“善哉！善哉！善男子，实如所言。是宝女者，已于过去九万六亿那由他佛，种诸善根，发大善愿，所生之处常得真实。是故是女凡所思念，言无虚发。若欲令此大千世界满中宝华，即言而有。

若言欲令满此三千大千世界种种妙香，言已即有。若欲示现种种形色，转轮王色、四天王色、天帝释色、梵天王色，或沙门色、婆罗门色，或比丘色、比丘尼色、优婆塞色、优婆夷色，如言即得。若风灾起时转为火灾，火灾起时转为水灾，水灾起时转为风灾，如言即转。若有魔王将诸兵众，执持刀杖、弓弩、箭矢、铍、戈、楯，欲令转变成宝华者，如言即成。若于空旷无水多乏，为诸众生发大誓愿，其中即有城邑聚落，人民大小浆水无乏。若愿三千大千世界所有诸色如如来色，即如其言成佛妙色。若言一切所有大众悉住虚空，言已即住。善男子，若是宝女，欲于此处虚空之中，遍闻十方诸佛所说，如言即闻。善男子，宝女童女成就如是无量无边诸大功德。”

尔时，宝女即于佛前说偈叹曰：

“我今成就大宝聚， 故能赞叹无上尊，
远离一切诸烦恼， 是足大宝助菩提。
如来具足无上宝， 大光能照无边世，
无上宝幢佛世尊， 我今献宝以供养。
碎磲玛瑙青琉璃， 金刚真珠日月宝，
以如是宝供养佛， 为令众生成菩提。
世尊身光胜诸宝， 众生乐见无疲厌，
处在一方见十方， 令众各见前有佛。
有见如来身行住， 或见坐卧及说法，
或见默然无所宣， 或见入定修智慧。
如来一一毛孔光， 能照十方诸世界，
光明清净最无上， 犹如秋月净莲华。”

尔时，宝女偈赞佛已复作是言：“世尊，我今于此大集经中欲少问义。如来若许，乃敢咨启。”

佛言：“善哉！善哉！宝女，随意发问。若有疑网，我为汝而除灭之。”

尔时，宝女即白佛言：“世尊，云何实语？云何为实？云何法语？云何为法？”

佛言：“善哉！善哉！至心谛听，吾当为汝分别解说。宝女，菩萨摩訶萨有三种实。何等为三？一者、不诳诸佛，二者、不诳己身，三者、不诳众生。云何名为不诳诸佛、己身、众生？宝女，若有菩萨发阿耨多罗三藐三菩提心已，贪著声闻、辟支佛乘，是则名为欺诳诸佛、己身、众生。云何不诳？宝女，若有菩萨发阿耨多罗三藐三菩提心已，若在地狱受大苦恼，若遇魔业邪见同止，若生恶国起恶烦恼，身遇刀槊、斫刺、烧炙，于如是时终不舍离菩提之心，不休不息，不畏不悔，令菩提心遂更增广，为诸众生受大苦恼，见受苦者心更增广，勤修精进欲得菩提，不为邪语之所诳惑，一切邪风不能倾动，是

名菩萨不诳诸佛、己身、众生。

“宝女，若有菩萨不诳诸佛、己身、众生，是名菩萨真实之实。宝女，不诳诸佛复有四事：一者、其心坚固，二者、住于至处，三者、具足势力，四者、勤修精进。不诳己身亦有四事：一者、净心，二者、至心，三者、不诳，四者、不曲。不诳众生亦有四事：一者、庄严，二者、修慈，三者、修悲，四者、摄取。宝女，是名菩萨第一之实。菩萨实者，初发愿时不舍众生。复次，宝女，菩萨实者，不多语、守护语、不粗语、真实语。若在独处、大众、王边发言诚实，非为财物而故妄语，非为自在而故妄语。若有三千大千世界满中七宝，尚不为之而生妄语，况复小事而妄语也？”

“宝女，如是实者，有三十二净。何等三十二？一者、惭语，二者、功德语，三者、愧语，四者、柔软语，五者、不虚语，六者、无讥呵语，七者、不贪著语，八者、不畏语，九者、闭诸恶道语，十者、开诸善道语，十一者、圣行语，十二者、慧行语，十三者、内净语，十四者、外净语，十五者、乐受语，十六者、乐听语，十七者、不涩语，十八者、微妙语，十九者、分别语，二十者、妙音语，二十一者、纯善语，二十二者、不诳语，二十三、不热语，二十四者、欢喜语，二十五者、自劝喻语，二十六者、劝喻他语，二十七者、不失语，二十八者、安隐语，二十九者、福田语，三十者、如佛语，三十一者、实围绕语，三十二者、净口语。

“复次，宝女，菩萨实者，凡所言说口意相称。云何名为口意相称？修集施故获得菩提，非因慳贪而能得之，是名意口相称而语，能施一切名之为实。修集净戒获得菩提，非因毁戒而能得之，是名意口相称而语，如戒而住名之为实。修集忍辱获得菩提，非因瞋恚而能得之，是名意口相称而语，具足修忍是名为实。勤行精进获得菩提，非因懈怠而能得之，是名意口相称而语，修精进故名之为实。修集禅定获得菩提，非因乱心而能得之，是名意口相称而语，修集定心名之为实。修于智慧获得菩提，非因愚痴而能得之，是名意口相称而语，修智慧故名之为实。三十七助菩提之法，四无量心亦复如是。

“复次，宝女，夫真实者，所谓圣行。圣行者，苦无常行。又复圣行，所谓知苦、远集、证灭、修道。知于五阴无出生相，是名知苦。五阴因者，所谓爱结毕竟远离，不贪不著，不赞不求，不去不来，是名离集。灭一切相，然其灭时无一法灭，不平等法作平等法，是名证灭观。奢摩他、毗婆舍那，其相平等，无觉无观，无有平等，无系无取，无作无变，是名修道。真实了知，如是等谛又能分别广说其义，是名菩萨摩訶萨实说是真实法。”

时，十千菩萨得真实忍。

“宝女，法语者，凡所演说依法而语，观法、念法，奉行于法，行到处法，求法、欲法、乐法、修法，法幢、法杖、庄严法器，法灯、法明、法念、法意、法有、法疑，庄严璎珞法床、法仪、法护、

法财，法无穷尽，广大无边，法事、法身、法口、法意。菩萨摩訶萨具足成就如是等法，是名法语。法者，真实之语，守护法语，教人供养父母、和尚、耆旧有德，赞叹菩提及菩提道，令人不舍菩提之心，至心系念不忘菩提，不离庄严修菩提法，亲近贤圣善知识等，修集信心专念听法，慕求正法勤于精进，不贪著法，知恩报恩，乐于寂静不断圣种，教化头陀勤行十善，赞叹惠施一切善法愿向菩提，至心受持清净戒律，修集忍辱，除去懈怠，修净禅定，智慧方便，慈悲喜舍，修四真谛趣向于谛，四无碍智得大神通，随顺法施修四念处，乃至修集八圣道分、定慧二法得智解脱，如法解脱声闻、缘觉、菩萨诸乘，赞说一切所有福德，当观十二甚深因缘，分别空门、无相、无愿无所畏惧，说五阴如幻如化，说十八界如虚空相，说诸入性同于空性，常说七财、六念、六敬，解说具足六波罗蜜，说六常行，修六神通，具足五眼说第一义，流布世间成就业语，一切众生其心平等赞叹佛语。

“宝女，若有菩萨具足如是法语，口终不说我语、不说众生语、不说寿命语、不说士夫语，不说断语、不说常语，不说有见语、不说无见语，不说两断语，不著中语，不说聚语，不说灭语，不说诤语，不说偏语，不觉知语，不颠倒语，不增疑心语，不逆法语，观法界语，破憍慢语。说法菩萨如法而住，如法而说实语、法语、不断语、不折语。说法菩萨，一切世间不能共论，见者怖畏。法语菩萨能演说空、无相、无愿，不著三界及以诸有，不从他乞，无心意识，无有尘垢，无明无闇，不系属他，不系属自，无有高下，不杂一切境界因缘。清净寂静无有导首，难知难觉，不可思惟，不思惟行，清净智者，乃能知之。无受受者永断诸受，过于三世不灭无灭相，不生无生相，无有丰俭，无生无断，无增无减，无当有无已有，非修非见，非魔见非真实见，非相非非相，非一相而亦一相，非有屋宅远离屋宅，非近非远，非离非别，非缚非解，非有漏非无漏亦非相似，非苦非乐，非具足非不具足，非名非色，非著非脱，非破非完，虽非金刚不可坏相真实如尔，非近非远，无色无因，亦非顽瞶，非此非彼，非内非外，非自非他，非见非闻，非忆非忘，非识非知，非识境界非知境界。宝女，是名为法。若能广说如是等法，是名说法。

“复次，宝女，法语菩萨不与一切世间诤竞，不轻不慢于他未学，心不轻笑，不生高心，不自赞叹，不谤他说，不以饮食为他说法，不遮他善令生疑惑；见他犯罪终不说之，于他法中不生轻贱，不遮止他所修行法。凡所说法，不离于空、无相、无愿，终不分别一切法界，不动法界，不动实性，不依字、识、人、不了义，虽不依止亦不诽谤，于自他众不生分别，亦不诽谤十二因缘，非在世间净于世间，非法净法无贪无恚，无有毁戒不舍破戒，无瞋无妒无有懈怠，不失道心不忘菩提，为欲庄严无上智慧，不休不息心不生悔，于他法中心无妒嫉，不以著于非修多罗谤修多罗，毗尼摩耶亦复如是；于正法所终不见非，不因于慢而增长慢，不谤因果及业果报，于正法中心无

退转，知恩念恩报之不忘，终不怀抱瞋恨之心，不著我见，不嫉他利，于怨亲中无有二想，得他讥刺终不报之，不作两舌斗乱彼此，不怀谄曲显异惑众，不为他喜受菩萨戒、比丘戒、比丘尼戒、式叉摩那戒、沙弥戒、沙弥尼戒、优婆塞戒、优婆夷戒，住空闲处思惟寂默，勤心受读十二部经，不为胜他故受持守护如是等戒，不为供养现作知足，不为显他不知足故自修知足，不言诸佛无上菩提他之所作，不造恶业邪恶活命，不舍七财，不贪于食，不断圣种，不诽谤他，不自赞叹，于佛法中不作数量，赞叹大乘心无厌足，是名法语。”

尔时，世尊复告宝女：“菩萨义者，云何名义？所谓信心修庄严时无有虚诳，为欲庄严一切善根，至心专念修行善法，破众生疑不求果报，施诸众生安隐快乐，护持禁戒不失忍心，勤修精进增长善法，修寂静定摄诸散乱，具无上智破无明闇；修集慈心等诸众生，修集悲心随众所作亲往营理，修集喜心施众法喜，修集舍心不观苦乐；舍财法已心无悔吝，所言柔软坏众恶心，利益于他具足甚深，修行同事劝发大乘，以是四摄调伏众生；见一切行皆是无常、苦、空、无我，净诸烦恼；依止于义不依于字，依止于智不依于识，依了义经舍不了义，依止于法不依于人；说义无碍无有穷尽，而于法界无所分别，说辞无碍获得解脱，说乐说无碍如法而说；庄严惠施不知厌足，庄严于戒善愿成就，庄严多闻如法而作，庄严功德具足相好，庄严智慧知诸众生上中下根差别之相，庄严于定为心清净，庄严于智得三种慧；修四念处为心不散乱，修四正勤为得善根，修四如意往来诸方，修集五根辩分别句，修集五力为坏烦恼，修七觉分为知诸法，修八正道不为恶动，修集神通为不退失。菩萨摩訶萨解如是义，是名为义。若有菩萨能说是义，是名说义。

“复次，宝女，又复义者，修集空定坏诸有法，修集无相坏诸法相，修集无愿不求三界；若能演说如是三空，是名说义。一切诸行不可修行，是名为义；菩萨说是不可修行，是名说义。断一切生，是名为义；菩萨若说诸法无生，是名说义。诸有无出，是名为义；如是说者，是名说义。四真谛者，名之为义；如是说者，是名说义。无我我所，名之为义；如是说者，是名说义。字不可说，名之为义；如是说者，是名说义。真实之义，名之为义；如是说者，是名说义。一切菩提之法，不可称计，是名为义；菩萨摩訶萨如是说者，是名说义。多闻之人如法而作，是名为义；如是说者，是名说义。一切诸乘大乘为最，是名为义；能如是说，是名说义。

“复次，宝女，无所分别，名之为义。无有众生，亦无受命，一味不动不尽，一事不生不出，不来不去，不灭不二，不可观见，无有造作，无为无作，心不谄曲，三世平等，三分无差，不失不得，不热不冷，不净不秽，不行如尔，不取不舍，非道示道，非常非断，亦非中道，不瞋不浊，不观于法及以非法，非一切字音声辞语，无心意识，于贪瞋痴不生分别，一切诸法作相有相，空无相愿是三即空，真

实入法等与不等皆悉平等，因于智慧获得解脱。宝女，菩萨若能如是具义，是名为义。说如是义，是名说义。

“宝女，云何菩萨说于毗尼？佛说毗尼凡有二种。何等为二？一者、犯毗尼，二者、烦恼毗尼。云何为犯？云何毗尼？犯已寻觉不善思惟，因于无明颠倒虚妄欺诳烦恼著我众生疑心，不得解脱，掉悔、憍慢、放逸、寡闻，因如是等是名为犯。若破疑心获得解脱，得解脱故见有犯处，即是非处亦非非处，非身口意，不取不舍不可睹见，非是身作及心、口作。若是三作，即是灭法；若是灭法，谁作谁犯？如犯，一切诸法亦复如是。诸法无根无作无处，若能破坏如是等疑，是名为净，是名不热，随师教作，是名有信，是名有定，是名毗尼。云何烦恼？云何毗尼？十二有支，所谓无明乃至老死，是名烦恼性。能调伏一切烦恼，是名毗尼。何以故？空无相愿能调诸法。若法是空、无有性相、不可愿者，云何而有贪恚痴等？无作能调一切诸法，若一切法不可作者，云何而有烦恼诸结？一切诸法从因缘生，若从缘生，云何可见？见如是等十二有支，亦知烦恼及烦恼相。若是空智能观菩提，即以此空空于烦恼。若能观察如是平等，是名毗尼。若能如是演说义者，是名菩萨能说毗尼。若是毗尼能知我者，即是了知烦恼毗尼。云何名为知我毗尼？谓观无我，观于我性，知我净、我实，知我分别、我空、我修，知我不动、不说不著、不生不灭。若能如是知于我者，即是了知烦恼毗尼。若实无我而作我想，于无烦恼作烦恼想，亦复如是。若我本无，烦恼亦尔。若有具足毗婆舍那，则能如是观察了知，是名知我烦恼毗尼。烦恼者，非过去、未来、现在，若能不作不念不求，是名知于烦恼毗尼。毗尼亦非去来现在，如心非色，非内、非外亦非中间；烦恼亦尔非色，非内、外及以中间。何以故？无觉知故，无诤竞故，无清净故，无造作故。若能如是知诸烦恼，不出不灭，是名了知烦恼毗尼。宝女，菩萨若得如是等知烦恼毗尼，亦为众生说如是法，是名菩萨演说毗尼。”

说是法时，十千菩萨得无生忍。

尔时，宝女心大欢喜，前白佛言：“世尊，如来所说真实法义，及以毗尼不可思议。若有菩萨能如是说，是人则能实知实见。”

尔时，舍利弗语宝女言：“汝今已具如是等法，能演说不？”

宝女答言：“大德舍利弗，实名无贪，无贪即义，如是义者即不可说，不可说者即是毗尼。大德，若如是者，云何可说？复次，舍利弗，实者即灭，灭者即法，法者即净，净者即义，义者即毗尼。如是等法无有文字，若无文字，云何可说？大德，实者即如，如者即法，法即无二，无二即义。夫无二者亦不可调，若不可调，云何名调？如是等法悉无所有，若无所有，云何可说？”

舍利弗言：“汝今成就何等宝故，立如是名，名宝女耶？”

答言：“大德，有三十二菩萨宝心，如是心中悉无声闻、辟支佛心。何等三十二？一者、发心为度一切诸众生故；二者、发心为令佛

种不断绝故；三者、发心为持佛法不灭尽故；四者、发心守护僧故；五者、发心为施众生圣法之乐；六者、发心为诸众生修集大慈，令众远离烦恼诸苦；七者、发心修集大悲，舍内外物；八者、发心护持禁戒，调毁戒故；九者、发心修忍，破坏不忍憍慢恶心、颠心、醉心、狂心、放逸自在心故；十者、发心精进，为破懈怠畏退悔心，调伏懈怠诸众生故；十一者、发心修定，为破乱心、狂心、妄念，为令众生获得四禅及八解脱，调伏欲界诸众生故；十二者、发心修智破一切闇，真实知见入于法界；十三者、发心为知众生平等无二，皆一味故；十四者、发心为得无贪、无瞋利衰毁誉，其心无二，安住善法，苦乐不动，为如是等护众生故；十五者、发心为得无怖无畏，欲解甚深十二因缘，离一切见；十六者、发心为欲庄严智慧，及以功德无有厌足；十七者、发心为欲不离见佛常闻法故；十八者、发心为欲如闻而说；十九者、发心为得广大法聚，心无贪吝；二十者、发心为欲赞叹净戒，如闻而住，教化慰喻毁禁人故；二十一者、发心为破一切众生七种慢故；二十二者、发心为知一切众生上中下根；二十三者、发心为破诸魔恶业；二十四者、发心为施众生安乐；二十五者、发心为欲坏破众生，所有众苦心不生悔；二十六者、发心为欲具足成就得佛法故；二十七者、发心为知有为之法，一切无常、苦、无我故，知已不离心无厌悔；二十八者、发心为乐修集一切助菩提法；二十九者、发心为见空无相愿，以众生故而不取证；三十者、发心为于虽畏诸有亦护诸有；三十一者、发心为于见生死过而不厌悔；三十二者、发心为于若近菩提受无上乐舍，是妙乐为众生故受贫穷苦。舍利弗，是三十二发心之宝，悉无声闻、辟支佛心，是故菩萨名为宝聚。”

尔时，世尊赞宝女言：“善哉！善哉！汝真实说菩萨摩訶萨发菩提心。而菩提心成就无量无边功德，不可齐说三十二事。何以故？非声闻宝能得佛宝，非缘觉宝能得佛宝；以菩萨宝能得佛宝，得佛宝已，则得声闻、辟支佛宝、菩萨佛宝，是故菩萨名为宝聚。”

尔时，舍利弗白佛言：“世尊，宝女所说不可思议。我观其说，是女似得四无碍智。”

佛告舍利弗：“汝今方谓，是女未得四无碍耶？是女久已成就具足。宝女说法字不可尽，文句义味亦不可尽。”

时，舍利弗语宝女言：“仁者今当广分别说四无碍智，于一切法悉成其事。”

“大德，菩提心者，名无碍句。何以故？菩提心中摄诸义故，是名义无碍智；一切法界入菩提心，是名法无碍智；实无文字而说文字，是名辞无碍智；不可说法说不断绝，是名乐说无碍智。义不可说，名义无碍；一切诸法皆如幻相，名法无碍；无言说业，名辞无碍；于六入界无有障碍，名乐说无碍。了达于义，名义无碍；乐于寂静，名法无碍；字不含法，法不含义，名辞无碍；说即是声，名乐说无碍。如来正觉即菩提义，名义无碍；菩提义者能生于法，名法无

碍；法可作句，名辞无碍；说已得义，名乐说无碍。法义者，名义无碍；解脱者，名法无碍；演说法相非有法性，名辞无碍；分别法界及非法界，名乐说无碍。僧即无为，名义无碍；诸僧一味，名法无碍；和合僧故，名辞无碍；说僧功德，名乐说无碍。大德，是四无碍遍一切法。”

时，舍利弗言：“世尊，是女人者发心已来为久近耶？在何佛边种诸善根？”

佛言：“舍利弗，过去无量阿僧祇劫，尔时有佛，号分别见如来、应、正遍知、明行足、善逝、世间解、无上士、调御丈夫、天人师、佛世尊，土名大净，如兜率天。与菩萨僧七万六千，一切皆是清净梵行，得不退转陀罗尼门。尔时，有转轮圣王，名净德报王，千世界而得自在，后宫嫔女八万四千，千子具足，其力皆等莲华力士。尔时，圣王于三万六千亿岁，种种供养佛及菩萨，所谓房舍、卧具、衣服、饮食、病瘦医药。”

舍利弗言：“世尊，不审彼佛寿命几时？”

“舍利弗，其佛寿命满十中劫。时，转轮王与其后宫眷属嫔女及外人民九万二千亿那由他，赍持种种无量无边供养之具，往至佛所，以八千亿上妙珍宝而散佛上，头面作礼，长跪合掌，口宣是言：‘世尊，我今所设供养之具，颇复更有殊胜供养胜我者不？’时佛答言：‘大王，有异供养胜诸供养，如是供养于此供养，百分、千分、万分、百千万分不及其一。’王言：‘世尊，是何供养？愿乐欲闻，唯愿说之。’尔时，世尊即说偈曰：

“如恒河沙等世界， 满中妙宝持用施，
虽有如是无量福， 不如怜愍发菩提。
无量亿等恒沙佛， 净妙华香以供养，
如是福德犹不如， 发菩提心七步退。
如是发心即为施， 戒忍精进禅智慧，
若为怜愍发大心， 其福无量不可尽。
上色力财上族姓， 是人乃能发菩提，
主千世界至梵天， 得大自在乃能发。
若乐喜发菩提心， 如是乃能断恶有，
能为人天开正路， 能开八正邪险径。
诸根具足不盲聋， 皆由至心发菩提，
能见十方诸世尊， 能闻天上甘露味。
若能至心发菩提， 是人能破疑憍慢，
无量智慧得自在， 能为众生说法界。
众生见之如父母， 亦如良医师友想，
能疗众生烦恼病， 教诲令趣菩提道。”

“尔时，圣王闻佛说是发菩提心所得功德，其心欢喜，踊跃无量，与其眷属内外人民，悉发阿耨多罗三藐三菩提心，即于佛前而说偈言：

“我今怜愍于众生， 是故发此菩提心！

若欲获得大自在， 不应于此生退转。
生死无量受苦恼， 而于自他无利益，
宁发于此受大苦， 非以不发受安乐。
若有众生发菩提， 即得人天圣王乐，
亦得寂静无漏乐， 及得无上菩提乐，
最上慧忍三昧定， 具四无量及六度，
三种净慧六神通， 四无碍智大自在，
无上十力四无畏， 及三念处及大悲，
成就具足十八法， 如是皆由发菩提。
能动十方诸世界， 亦知十方众生心，
能度无量诸众生， 皆由发于菩提心。”

“舍利弗，说是偈时，四万夫人、无量众生皆发阿耨多罗三藐三菩提心。尔时，圣王复于万亿年中供养彼佛，供养佛已厌世出家，既出家已思惟四句：一者、实句，二者、法句，三者、义句，四者、调句。于一亿年常思如是四句之义。舍利弗，汝知尔时转轮圣王，岂异人乎？即宝女是也。”

舍利弗言：“世尊，何业缘故受是女身？”

佛言：“舍利弗，一切菩萨不以女业而受身也，乃以神通智慧之力示女身耳！为欲调伏诸众生故。舍利弗，汝今实谓宝女菩萨是女身耶？莫造斯观！何以故？受女身者，即是慧力、神通之力。舍利弗，是女久已于无量劫中离男女身。如是身者，非是过去，亦非未来、现在，此身即方便身。是方便身，化此世界九万二千诸女人等，发阿耨多罗三藐三菩提心，是故示现是方便身。”

尔时，宝女语舍利弗：“大德，汝今能以女人之身说正法耶？”

舍利弗言：“我于男身尚生厌悔，况女身乎？”

“舍利弗，汝于男身生厌悔耶？”

舍利弗言：“如是，如是。”

“大德，是故菩萨胜诸声闻、辟支佛等。何以故？汝诸声闻所厌悔处，菩萨于中受乐不悔；声闻之人不求诸有，菩萨于中甘乐受之；声闻之人于诸功德生知足想，菩萨之人无有厌足；声闻之人厌离烦恼，菩萨之人处而不惧。”

舍利弗言：“宝女，菩萨之人有何等力，以是力故心无厌离？”

宝女答言：“大德，菩萨摩訶萨有八种力处之无厌。何等为八？一者、慈力，心无碍故；二者、悲力，为调伏故；三者、实力，不诳

诸佛以众生故；四者、慧力，离烦恼故；五者、方便力，心不悔故；六者、功德力，无所畏故；七者、智力，坏无明故；八者、精进力，破放逸故。是名八力，菩萨具足如是八力，其心不悔。”

舍利弗言：“宝女，汝今已具足八力耶？”

答言：“大德，言具足者即是颠倒，颠倒者即是二相，二相者即是有为，有为者即无所有，无所有者即是平等。大德，若平等者，云何有力？云何无力？云何可说一二之数？大德，一切诸法皆如虚空，而是虚空，不可说内、不可说外，不可说明、不可说闇。一切诸法亦复如是，若一切法同虚空者，云何可说有力、无力、一二之数？大德，菩萨摩訶萨亦有力、亦无力，云何有力？云何无力？无烦恼力，有智慧力；无悭吝力，有惠施力；无破戒力，有持戒力；无瞋恚力，有忍辱力；无懈怠力，有精进力；无乱意力，有禅定力；无无明力，有智慧力。是故菩萨远离恶法，修集善法。是故菩萨无恶法力，有善法力。”

尔时，世尊赞宝女言：“善哉！善哉！若有善男子、善女人，能如是说，即是实说。”

宝女菩萨说是法时，五百菩萨成就忍心。

大方等大集经卷第六

宝女品第三之二

尔时，宝女复白佛言：“世尊，如经中说，如来具足十神力者，为即十力是世尊耶？为离十力有世尊乎？若即十力是世尊者，是名二法；若是二者，即是无常。若离十力有世尊者，云何如来说诸法等？世尊，若一力中具十力者，何故如来说百力？若不说百，当知一力非十非百。”

尔时，世尊赞宝女言：“善哉！善哉！如来世尊，非一非二；若非一二，云何言十？云何言百？菩萨摩訶萨远离一二，得阿耨多罗三藐三菩提。如来世尊非即十力，非离十力，能说十事，故名如来具足十力。如来虽说如是十力，而一力中具无量力，为流布故说言十力。”

宝女复言：“善哉！世尊，唯愿广说如是十力。”

佛言：“宝女，至心谛听，吾当为汝分别解说。宝女，菩萨修行菩提道时，求声闻乘及造恶业，无有是处；以是坚心，得菩提时成就初力。如来成就如是力故，于大众中作师子吼能转法轮，如是法轮，天、人、魔、梵、沙门、婆罗门所不能转。

“复次，宝女，菩萨修行菩提道时，了知诸业悉是一业；以是力故，了知过去、未来、现在一切诸业业因缘处及以非处，得菩提时成第二力。

“复次，宝女，菩萨修行菩提道时，了众生根知已说法，以是力故，得菩提时成第三力。

“复次，宝女，菩萨修行菩提道时，观众生界，观已随界而为说法；以观界故，得菩提时成第四力。

“复次，宝女，菩萨修行菩提道时，观诸众生上中下根，观已随解而为说法；以知解故，得菩提时成第五力。

“复次，宝女，菩萨修行菩提道时，观至处道，若有为道、若无为道，若声闻道、若缘觉道、若菩萨道；以观道故，得菩提时成第六力。

“复次，宝女，菩萨修行菩提道时，恭敬尊重，修诸禅定，为调众生而说法要；以修集故，得菩提时成第七力。

“复次，宝女，菩萨修行菩提道时，于过去善根不生诽谤，成就念心不作放逸；不放逸故，得菩提时成第八力。

“复次，宝女，菩萨修行菩提道时，见未学者不生轻心，自既学已不生憍慢，能施众生智慧光明；以施明故，得菩提时成第九力。

“复次，宝女，菩萨修行菩提道时，教诸众生远离漏法不令增长，赞叹解脱修无漏道，亦为众生说无漏道；以修无漏故，得菩提时成第十力。

“宝女，菩萨修集如是十力，能具如来十种之力。”

宝女复言：“世尊，菩萨摩訶萨修行何法，得四无畏及十八法？”

佛告宝女：“菩萨修行菩提道时，所得妙法不生贪吝，不作是念：‘若我教彼，彼则胜我。’于诸众生其心平等，能舍内外施于一切，观察法界无种种相；以是因缘，得菩提时成初无畏。

“复次，宝女，菩萨修行菩提道时，诸遮道法了了而知，以了知故，不行不随如是遮法，亦不称赞不以教人，知遮道已而远离之；以是因缘，得菩提时成二无畏。

“复次，宝女，菩萨修行菩提道时，常修净道，常说净法，修治庄严得净法故，如是庄严亦自修治，亦教众生；以是因缘，得菩提时成三无畏。

“复次，宝女，菩萨修行菩提道时，终不起于憍慢之心，终不自说我知我见，覆藏功德，显露罪过；以是因缘，得菩提时成四无畏。

“复次，宝女，菩萨修行菩提道时，失道众生示以正道，除去道路瓦石恶刺，津途峻绝施作桥梁，闇冥之处为设灯明，见犯罪者能令调伏，能除众生所有疑悔，于非犯者不强言犯，除坏众生疑法之心，施法光明劝请说法，见说法者称赞善哉，恭敬尊重不生轻心，欲解一切众生言音，不正语者心不轻之；以是因缘，得菩提时成初无失。

“复次，宝女，菩萨修行菩提道时，实语、法语、义语、时语、调伏语、不错语、离诸恶语、圣人之语，若闻法已转为他说，为于自利及利他故，说时不轻，不生诤讼，信佛法僧，亦令众生信佛法僧，观诸法界不可宣说；以是因缘，得菩提时知一切语，得无量门总持方

便，是故其身一切相好一一毛孔，悉出如来微妙音声。

“复次，宝女，菩萨修行菩提道时，常修六念，亦化众生令修六念；以是因缘，得菩提时不失念心，亦得法证总持方便，无量众生于无量劫，思惟深义一时来问，如来不假思惟之力，而能一时各随问答。

“复次，宝女，菩萨修行菩提道时，常护一切众生之心，不与众生作乱心因、诸苦恼因，见诸众生行善法时不遮不乱，善知诸法悉如幻相，于诸众生其心平等，知诸法界同于一味；以是因缘，得菩提时其心常定，得无边闻总持方便，得是持已，心常在定而作佛事。

“复次，宝女，菩萨修行菩提道时，想不颠倒，心不颠倒；以不倒故，于无我中不作我想。众生命人士夫、男女、懦弱烦恼、常断、有无、善恶、垢净、有漏无漏、世间出世间、生死涅槃等想，一切众生有颠倒故，有如是想。若无颠倒，则无是想，行于中道。以是因缘，得菩提时成就一想，无有二想。修是定故，得无尽器总持方便。以是持力，心常修集无想三昧，怜愍众生修集大悲，说法不息。

“复次，宝女，菩萨修行菩提道时，修集舍心，舍于苦乐，不苦不乐，不喜不愁，不爱不瞋。以是因缘，利衰毁誉心无有二，常观无常、苦、无我等，亦化众生修如是舍。以是因缘，得菩提时名为大舍。得是舍已，得大海印总持方便。以是持力，虽得人、天、阿修罗、乾闥婆、迦楼罗、紧那罗、摩睺罗伽、释、天、梵天恭敬供养，不以为欣；邪见恶人轻慢骂辱，不以为戚。其心平等，如地水火风，不上不下，不动不浊，修大慈悲。

“复次，宝女，菩萨修行菩提道时，至心求菩提甚深之法种种善根，不求声闻乘，修集大悲，如是等心无有退转。以是因缘，得菩提时成如来欲，无增无减，得金刚幢总持方便，得大自在，知云何说，知说何事，知何时说，知何处说，知为何众生。

“复次，宝女，菩萨修行菩提道时，常勤精进，于诸善法不知厌足，恭敬供养和尚善友，亦常亲近乐听正法，随闻而持。如是精进，为调众生，为欲供养无量诸佛，为令无量无边众生得无上道，亦令获得如是精进入于法门。以是因缘，得闻佛法总持方便。是故菩萨得菩提时，成就如是精进无减，以精进故具足神通。

“复次，宝女，菩萨修行菩提道时，具足念心修四念处，观内外身无常、苦、无我，受、心、法念亦复如是。修空、无相、无愿三昧，为如来身，观身念处不证解脱。以是因缘，得菩提时成就如来念心无减，得知心通知诸众生根界，解业烦恼行习心处，善根恶根果报生灭诸有次第，诸佛世界，诸乘大众，菩萨诸行得授记莳，父母、亲族、师长、和尚，知如是等心不失念。

“复次，宝女，菩萨修行菩提道时，常修智慧、利慧、疾慧、无边慧、甚深慧、解慧、净慧、不动慧、无碍慧、无胜慧、了知声闻缘觉乘慧、无上慧、不知足慧，具足如是等慧，求慧求法，持法说法，

甘乐于法。以乐法故，于内外物不生贪著，于师和尚能忍众苦，以所须物奉献贡上，为于一字一句之义，能以十方世界珍宝奉施法主，一偈因缘舍于身命。虽于无量恒河沙等劫修行布施，不如一闻菩提之事心生欢喜。于正法所乐闻乐说，常为诸佛、诸天所念。以念力故，世间所有经典书论悉能通达。以是因缘，得菩提时，成佛智慧无增无减，如是等智名为无碍。知众生心，善不善无记、有漏无漏、世间出世间、垢法净法、生死涅槃，一切法门，一切菩提事，一切菩提道，一切世界，一切劫，一切微尘去来现在，于如是事通达无碍说时无尽。以是因缘，如来能于一法之中说无量法。

“复次，宝女，菩萨修行菩提道时，不乐在家求受五欲，乐处空闲修出家法，乐修深义及三脱门。以是修力，得无碍法门、无挂碍智，过魔境界庄严具足，远离烦恼及诸恶见，说甚深义破众疑心，除去一切诸恶觉观，破于欲界、色无色界，为贪众生演说正法令离贪心，为喜瞋者演说慈心令离瞋恚，为愚痴者说十二因缘令离无明，为悭贪者说檀波罗蜜，为破戒者说尸波罗蜜，为瞋恚者说羼提波罗蜜，为懈怠者说毗梨耶波罗蜜，为乱心者说禅波罗蜜，为无智者说般若波罗蜜，为凡夫人说四真谛，为颠倒者说无常、无净、无乐、无我，为结缚者说三十七助菩提法。菩萨具足如是等法，以是因缘，得菩提时成就解脱无增无减。如是解脱，无能动者，毕竟清净，毕竟解脱，能知能见一切声闻、辟支佛乘，亦得清净总持方便，以持力故能说解脱，于一切法得大自在。

“复次，宝女，菩萨修行菩提道时，恭敬智慧，得智势力，得智光明，知眷属智，知无贪心，知无瞋心，知无痴心，知无爱心，知无垢心，知无诤心，知无食心，知无贪心，知无上心，知无碍心，知无记心，知善心，知不善心，知恶心，知净心，知不净心。大心小心、狭心广心、遍知心不遍知心、贪心舍心、持戒心破戒心、忍心不忍心、懈怠心精进心、定心乱心、痴心慧心、凡心圣心、正定聚心、邪定聚心、不定聚心、声闻心、缘觉心、菩萨心、苦谛心、集谛心、灭谛心、道谛心，虽知如是而不取证，为调众生常说正法，谓四真谛、十二因缘，远离断见及以我见，说因缘果从缘而生，非因于我、众、生命等。了知无明因缘于行，行因缘识，识因缘名色，名色因缘六处，六处因缘触，触因缘受，受因缘取，取因缘爱，爱因缘有，有因缘生，生因缘老死忧悲苦聚；无明灭故行灭，行灭故识灭，识灭故名色灭，名色灭故六处灭，六处灭故触灭，触灭故受灭，受灭故取灭，取灭故爱灭，爱灭故有灭，有灭故生老死忧悲苦恼灭，大苦聚灭。作是观已，复作是念：‘如是等法，实非我作、众生寿命士夫等作，非常非断。若非众生、士夫等作，是名为空。如其空者，即是无我、众生、寿命及以士夫，无常无断；若无常断，无生无灭；无生灭者三世不摄；三世不摄即名为无；如其无者不可算数；无算数故即第一义；第一义者即是如来语；如来语者即无斗争；无斗争者名沙门法；沙门

法者即是虚空。’若能了知如是等法，名真实知。若观思惟诸恶因缘，则生无明至大苦聚；恶思惟灭则无明灭，乃至大苦聚灭。作是观已，不著常见，不著断见，知一切法从缘而生，从缘而灭；知一切法无我、众生、寿命、士夫，不见此、彼及以中间。何以故？若无彼、此，云何有中？是故菩萨如是说法。以是因缘，得菩提时成解脱智无增无减，亦得无边总持方便。以得持故，依于法界观虚空界，说是处非处，至漏尽、力、四无所畏、大慈大悲，宣说甚深秘密之藏，兼以是法化于众生，是名不与二乘共之，身口意等具足神通。

“复次，宝女，菩萨修行菩提道时，一切身业随智慧行，不欺众生而作妨碍，不贪不悭无有害心，梵行清净勤修精进，集助道法不惜身命，为诸众生起大慈悲。以是因缘，得菩提时名为如来，一切身业随智慧行，得一切光总持方便。以是持力，能作种种方便之身，所谓天身、龙身、阿修罗身、迦楼罗身、乾闥婆身、紧那罗身、摩睺罗伽身、梵身、释身、四天王身、刹利身、婆罗门身、毗舍身、首陀身，比丘、比丘尼、优婆塞、优婆夷身。示现如是种种身已，为诸大众随意说法，说法既竟即灭不现，令一切众不知所在，或身灭已而故说法。一切众生六情瞻对而无厌足，若不见时，心常缘念。

“复次，宝女，菩萨修行菩提道时，一切口业随智慧行，不欺众生、妄语、两舌、恶口、无义语，常安隐语、法语、毗尼语、不热语、佛语、义语、喜闻语、乐见语。以是因缘，得菩提时名为如来一切口业随智慧行，获得三分总持方便。以是持力，善解一切众生语言，说诸众生所有之业。佛所出言是真实语、十二因缘语、随解脱语、不贪语、寂静语、因缘语。

“复次，宝女，菩萨修行菩提道时，一切意业随智慧行，不欺众生，不妒不害，不作邪见，修于正见，起大慈悲，于诸众生其心平等，终不忘失菩提之心，具足智慧，捐除憍慢。以是因缘，得菩提时，名为如来一切意业随智慧行，获得无垢总持方便。以是持力，住一心中能知一切众生诸心，观众生心悉皆平等，如幻化相本性清净；观诸众生身业平等，皆如水月；见诸众生悉在己身，己身亦在众生身中，犹如影现；能令众生悉作佛身，亦令己身作众生身，一切无有能动转者。

“复次，宝女，菩萨修行菩提道时，信过去世诸佛智慧，善身口意业无有疑网，若闻佛事不可思议不惊不怖；信过去佛世界众生，已得调伏；信如来身游十方界往返无碍，能解一切众生言语，随其种种而为说法，一切三世智慧无碍，了知过去一切法界、一切诸乘，知诸众生业果神通，知他心智，于如是等心信无疑，亦化众生令同己信。以是因缘，得菩提时，名为如来知过去世智慧无碍，因往修集勇健三昧，获得健行总持方便。以是持力，能知过去诸佛世尊寿命、种姓，亦知过去菩萨、声闻、辟支佛等，一切众生业果神通，亦知过去所有诸劫，有佛出者、无佛出者，及其名字净以不净，若广若狭，若粗若

细，若微尘等，若倒若顺，于如是等悉得了知，如观掌中庵摩罗果。

“复次，宝女，菩萨修行菩提道时，信未来世诸佛智慧，善身口意业无有疑网，若闻佛事不可思议不生惊怖；信未来世界众生，悉当调伏；信于如来游十方世界往返无碍，能解一切众生语言，随其种种而为说法，一切三世智慧无碍，了知未来一切法界、一切诸乘，知诸众生业果神通，知他心智，于如是等心信无疑，亦化众生令同己信。以是因缘，得菩提时，名为如来知未来世智慧无碍，因修悲定得师子吼总持方便。以是持力，能知未来诸佛世尊寿命、种姓，亦知未来菩萨、声闻、辟支佛等，一切众生业果神通，亦知未来所有诸劫，有佛出者、无佛出者，及其名字净以不净，若广若狭，若粗若细，若微尘等，若倒若顺，于如是等悉得了知，如观掌中庵摩罗果。

“复次，宝女，菩萨修行菩提道时，信现在世诸佛智慧，善身口意业无有疑网，若闻佛事不可思议不惊不怖；信现在佛世界众生，悉得调伏；信如来身游十方界往返无碍，能解一切众生言语，随其种种而为说法，一切三世智慧无碍，了知现在一切法界、一切诸乘，知诸众生业果神通，知他心智，于如是事心信无疑，亦化众生令同己信。以是因缘，得菩提时，名为如来知现在世智慧无碍，因修净定获得金刚总持方便。以是持力，能知现在诸佛世尊寿命、种姓，亦知现在菩萨、声闻、辟支佛等，一切众生业果神通，亦知现在所有诸劫，有佛出者、无佛出者，及其名字净以不净，若广若狭，若粗若细，若微尘等，若倒若顺，于如是等悉能了知，如观掌中庵摩罗果。

“宝女，是名十八不共之法。如来复有不共之法，谓无见顶。何以故？无边身故。无能胜者，名不共法。何以故？一切事具故。见者除恼，名不共法。何以故？身如药树故。处众无畏，名不共法。何以故？一切清净故。处众无怯，名不共法。何以故？四无畏故。知众生心，名不共法。何以故？随意说法故。徒众寂静，名不共法。何以故？随师教故。出言清净，名不共法。何以故？不说无义语故。凡所宣说，闻者欢喜，名不共法。何以故？离怨亲想故。说法之声齐众而闻，名不共法。何以故？余无利益故。各各见佛正在已前，瞻对之时目未曾眴，名不共法。何以故？身不可思议故。闻佛所说要生善芽，名不共法。何以故？成就无量诸功德故。见者无厌，名不共法。何以故？觉一切法故。举身回顾如象王视，名不共法。何以故？威仪清净故。大师子吼，名不共法。何以故？具足大力故。威仪纯善，名不共法。何以故？所有身业随智行故。口业纯善，名不共法。何以故？所有口业随智行故。一切眼目，名不共法。何以故？所有意业随智行故。众生乐闻，名不共法。何以故？语微妙故。受上供养，名不共法。何以故？无上福田故。无尽功德，名不共法。何以故？不求果报故。无能坏者，名不共法。何以故？一一节中有那罗延力故。记事不虚，名不共法。何以故？知诸根故。为一切师，名不共法。何以故？通达一切故。寿命无尽，名不共法。何以故？得法身故。有亲近者得

大利益，名不共法。何以故？成就一切诸善法故。所得智慧无能浊者，名不共法。何以故？知三世智性清净故。出身血者得五逆罪，名不共法。何以故？成就一切诸善根故。烦恼习尽，名不共法。何以故？了知一切烦恼因故。知一切行，名不共法。何以故？觉一切法故。宝女，是名如来不共之法。”

尔时，宝女复白佛言：“世尊，如来所得三十二相，是何业因之所成就？”

佛告宝女：“如来成就无量功德，是故得成三十二相。我今于是无量事中，当略说之。如来至心护持净戒，得足下平相；修行种种惠施业故，得千辐轮相；不欺一切诸众生故，得足跟佣相；护正法故，得指纤长相；不坏他众故，得网缦相；妙服奉施故，得手足软相；净饮食施故，得七处满相；喜闻佛法故，得鹿王[跳-兆+尊]相；覆藏他过故，得阴藏相；修善法故，得上身如师子相；常以善法化众生故，得缺骨平满相；救护怖畏故，得臂肘佣相；见他事业乐佐助故，得手摩膝相；常修十善故，得清净身相；常施病药故，得所食之物至喉悉现相；常发庄严修善法故，得师子颊相；于诸众生其心平等故，得四十齿相；和合诤讼故，得齿密相；珍宝施故，得齿齐相；身口意净故，得二牙白相；护口四过故，得广长舌相；成就无量功德故，得味中上味相；于众生中常柔软语故，得梵音相；修集慈心故，得紺色目相；至心求于无上菩提故，得牛王睫相；赞叹他人所有功德故，得白毫相；恭敬父母师长和尚故，得肉髻相；乐说深法故，得身柔软相；施敷具故，得金光相；远离聚说世间事故，得一一孔一毛生相；乐受善友师长教敕故，得身毛上靡相；不以恶事加众生故，得发色金精相；常劝众生修三昧故，得身圆满如尼拘陀相；生生之处作佛像故，得那罗延力相。宝女，菩萨摩訶萨成就如是无量功德，获得如是三十二相。”

宝女复言：“世尊，菩萨摩訶萨不可思议。快哉！如来善说佛法。”

尔时，世尊赞宝女言：“善哉！善哉！如汝所说，一切众生闻是义者，即得具足无量功德；闻已信者，亦得成就无量功德。”

说是法时，十方无量无边世界六种震动，无量众生发菩提心，五千菩萨得无生忍，虚空诸天雨种种华，鼓众伎乐以供养佛。

“若有众生已于无量无边佛所植众德本，乃得闻是如来十力、四无所畏、不共之法、三十二相。是人闻已能生深信，信已能于大众之中作师子吼说如是法。何以故？下劣之人不能得闻如是正法，假使得闻未必得信。上人持戒智慧具足乃能得闻，闻已敬信，信已不久当得阿耨多罗三藐三菩提。”

宝女复言：“世尊，佛不可思议，法、僧亦尔不可思议，闻信是经亦不可思议。若有信者，是人定得阿耨多罗三藐三菩提。世尊，云何菩萨修行法行？”

“宝女，菩萨摩訶萨不舍亲旧，知恩报恩怜愍一切，有归依者终不舍弃，至心念于菩提之道，修于忍辱，难施能施摄取众生，慈心护戒，思惟善义，护持正法，乐法念法，持法乐静，独处空闲心无悔退，善护众生净身口意，为四无量发大庄严，常劝众生于菩提道，凡所讲论先赞大乘，不先许人后生悔心，清净其行知足少欲，不悭不妒，不断圣种，心无诤讼了知因果，信、闻、戒、施、惭愧、智慧，亲近善友随师长教，心无憍慢，恭敬礼拜长老有德，离贪恚痴、我及我所，常念佛、法、僧、施、戒、天，得供养时其心不高，常勤修行六波罗蜜、空无相愿、诸善方便，不见我常、众生、寿命、士夫之相，修四念处乃至八正道分，是名菩萨修行法行。又法行者，无眼无色无色想行，无耳无声无声想行，无鼻无香无香想行，无舌无味无味想行，无身无触无触想行，无意无法无法想行；非色行，非色非非色行；非色苦行，非色非非色苦行；非色我行，非色非非色我行；非色空行，非色非非色空行；非色无相行，非色无愿行；非色无行行；非色性行；非色实行；非色寂行；非色生行；非色出行；非色因缘行；非色聚行，是名法行。受、想、行、识亦复如是。”

“宝女，若无如是阴、入、界行，是名法行。无欲界行、色界行、无色界行，无住无脱，是名法行。无去无来，无有住处，无心意识，不见无闻，无知无识，无有身业、口业、意业，非法非非法，非一非二，非去来现在，非垢非净，非聚非散，非我、众生、寿命、士夫，非常非断，非我非我所，非始非终，是名法行，是名我法，是名住处，是名法性，是名法处，是名空处非处，名毕竟处。不动不住，无有相貌，无出无灭，无所修行，无取无舍，无受无施，若能知见如是等法，是名真知，是名实知，是名法知。若有菩萨能作是学，为诸众生行于生死，而于涅槃无所动转，是名菩萨真实法行。”

说是法时，八千菩萨成就忍辱。

尔时，宝女复以种种珍宝杂物，供养于佛而作是言：“世尊，若有菩萨行是法行，即是修行一切佛行，即得授记坐菩提树，成就阿耨多罗三藐三菩提。”

尔时，舍利弗语宝女言：“汝知菩萨不退印耶？”

尔时，宝女即说偈言：

“诸众生界及法界， 若能平等观无异，
不生分别一一数， 是名菩萨不退印。
过去未来及现在， 十方世界诸世尊，
皆悉平等观法界， 是名菩萨不退印。
观有为界皆无常， 有漏无漏亦如是，
知一切法本性净， 是名菩萨不退印。
观于生死无有量， 不可称计知其数，
若能一念通达知， 是名菩萨不退印。”

一切世间诸法界，及以出世诸圣法，
若知平等悉真实，是名菩萨不退印。
若能了知诸佛界，及以诸魔波旬界，
通达是二无差别，是名菩萨不退印。
贪欲瞋恚愚痴等，一切众生诸烦恼，
知从颠倒因缘生，是名菩萨不退印。
生死之法及涅槃，无上正道及菩提，
观察是法无差别，是名菩萨不退印。
知是五阴如菩提，如菩提性入界然，
观是诸法无有二，是名菩萨不退印。
地水火风及造色，观之犹如虚空等，
如是即得真实印，亦如十方诸佛印。
如眼界等菩提然，是二平等无差别，
自能受持为他说，是名菩萨不退印。
知诸众生所有心，能为一切心因缘，
如是因缘无障碍，是名菩萨不退印。
能遍观察诸众生，所有诸根上中下，
能观生死尽彼岸，是名菩萨不退印。
所有字义句无尽，于无量劫而演说，
无能破坏作障碍，是名菩萨不退印。
虚空边际尚可尽，世间猛风可系缚，
菩萨所有不退心，一切世间不能转。
成就无量陀罗尼，于诸法中不失念，
次第演说诸法义，如佛口出无有异。
十方世界佛世尊，为度众生说无量，
悉能受持解深义，是名菩萨不退印。
无量劫中所闻法，犹如现闻而演说，
无量世学陀罗尼，获得如是无尽印。
成就具足如是持，及以无上真智慧，
若得菩萨不退印，则能宣说如是法。
若观一切诸法空，亦不亲近不远离，
若有成就不退心，当知是人有空印。
一切诸法虚空印，其性本来无生灭，
若能了知是法界，是名菩萨不退印。
诸法皆从因缘有，离于众缘无法界，
若能了知如是者，当知是有不退印。
所有威仪诸色声，能空一念悉示现，
为欲教化诸众生，即是菩萨不退印。
惠施之心如虚空，无量劫中不可尽，
成就无量诸功德，即是菩萨不退印。

修集净戒为佛戒， 获得佛戒如虚空，
成就如是无上戒， 即是菩萨不退印。
一切众生所有戒， 及以学戒无学戒，
虽有如是无量戒， 不及不退十六一。
若得最上无生忍， 成就无量无有边，
若得如是无生忍， 如过去佛之所得。
为众生故善庄严， 无量世中不休息，
常勤修集精进行， 即是菩萨不退印。
常乐修集诸禅定， 亦为众生宣说法，
虽复示现诸威仪， 而其内心不离定。
具足无上正知见， 远离一切烦恼习，
若有成就不退心， 则能近于佛境界。
具足三种之神通， 及其如来善方便，
若有成就不退心， 是人欲得正觉印。
一切众生不能知， 是人心行及境界，
为诸众生无量行， 即是菩萨不退印。
其实未得无上道， 而能示现如来身，
生及成道转法轮， 处众示现大涅槃。
未舍菩萨不退印， 亦能获得如来印，
犹如虚空无有边， 所得佛印亦如是。”

说是偈时，三千大千佛之世界六种震动，五千菩萨得不退印。

尔时，世尊赞宝女言：“善哉！善哉！快说菩萨不退转印。”

尔时，须菩提白佛言：“世尊，宝女定得不退转印，是故能作如是宣说。若不证者，何能如是？”

佛告须菩提：“如是，如是，如汝所说，宝女久已得不退印，忍辱成就，已尽大乘甚深边底。”

尔时，宝女白佛言：“世尊，何故名大乘？”

佛言：“其乘广大故名大乘，于诸众生无挂碍故故名大乘，是一切智善根根本故名大乘，无有烦恼诸结黑闇故名大乘，所有光明无处不遍故名大乘，周遍其边有眼目故故名大乘，本性常净初无沾污故名大乘，断诸烦恼一切习气故名大乘。护持禁戒故名清淨，修集定故名为安住，修智慧故名为无漏，修解脱故名无系缚，示一切法等无二故名解脱智，摄十力故名无能动，具四无畏故名无怖惧，摄取十八不共法故名为无碍，修集大慈故名平等，破坏一切诸魔众故名为最胜，摧烦恼魔故名寂静，坏阴魔故名不可数，破死魔故名为常住，具足檀那波罗蜜故名为富足，具足尸罗波罗蜜故名为无热，具足羼提波罗蜜故名为无怨，具足精进波罗蜜故名为无动，具足禅那波罗蜜故名无漏无转，具足般若波罗蜜故名胜一切世间出世间，具足方便波罗蜜故名为摄取，一切诸乘断诸有故名无有，有因八道得故名为安，具足慧翼所

往无碍调诸根故名大神通，修正勤故能见一切诸佛世界，修念处故远离恶法亲近善法，修七觉分远离一切诸烦恼结，无为无漏，无胜无上，无能见顶，无能知者，无有遮障，无有听闻，无入出处，大众大堂一味不作，不作数量平等无二，得大名称十方无碍，一切人天之所恭敬，成就无量无边功德，永断一切悭吝、破戒、害心、懈怠、乱心、无明，能令众生获得多闻，为作安乐断一切苦，能令作善业，佛智、无碍智、无上智、平等智、一切智，是名大乘。”

说是法时，万二千众生发阿耨多罗三藐三菩提心，既发心已，复作是言：“若有众生能发如是大乘心者，即得无量善法利益。”

尔时，宝女白佛言：“世尊，何障碍故，不令众生疾得大乘？”

佛告宝女：“有三十二事，以是因缘为作障碍。何等三十二？一者、乐声闻乘，二者、乐缘觉乘，三者、乐释身故，四者、乐梵身故，五者、乐为世乐受持禁戒，六者、乐修一善，七者、常怀嫉妒，八者、多财贪著悭吝，九者、不乐劝化众生令修善法，十者、心憍慢故，十一者、不求菩提心故，十二者、畏菩提心故，十三者、于一法中生著心故，十四者、不善思惟故，十五者、不能亲近师长和尚善知识故，十六者、诽谤余部故，十七者、不能净于身口意业故，十八者、不能护持无上法故，十九者、得少法味吝不说故，二十者、少解法义生大慢故，二十一者、远离四摄故，二十二者、不能恭敬同师同学故，二十三者、不乐念于六波罗蜜故，二十四者、远离三聚故，二十五者、不发愿故，二十六者、少善根故，二十七者、倒解义故，二十八者、不叹三宝故，二十九者、诽谤大乘菩提事故，三十者、自不解义排他说故，三十一者、不觉了知诸魔事故，三十二者、乐生死故。是名三十二事，障碍大乘，不令众生疾得大乘。宝女，如是障碍其事无量，我于今者但略说耳！大乘所有功德无量，障碍之事亦复如是；亦如涅槃功德无量，障碍之事亦复无量；如生死过无量无边，即是大乘之障碍也。宝女，若有人能远离如是无量恶法，当知是人即得大乘。宝女，若有菩萨能得净心，是人即能获得大乘。”

“世尊，众生云何速得成就无上大乘？”

“宝女，有三十二事，众生修集能速得之。何等三十二？一者、众生不请而往亲附；二者、见他福德不生妒心；三者、至心修集无量善根；四者、营他事业不生愁恼；五者、至心不浊身口业净；六者、不为利养改四威仪；七者、如说而住；八者、于诸众生其心清净；九者、终不放舍菩提之心；十者、清净庄严檀波罗蜜；十一者、清净尸波罗蜜，怜愍毁禁故；十二者、净忍波罗蜜，不惜身命故；十三者、净精进波罗蜜，得十力无畏故；十四者、净禅波罗蜜，远离烦恼故；十五者、净般若波罗蜜，除烦恼习故；十六者、修勇健定，坏诸魔业故；十七者、至心度脱诸众生故；十八者、修四摄故；十九者、心平等故；二十者、不舍一切诸众生故；二十者、知恩报故；二十二者、护持正法故；二十三者、修助道法不休息故；二十四者、于诸善

法无厌足故；二十五者、破憍慢故；二十六者、供养三宝故；二十七者、于一切法不生诤故；二十八者、善解十二深因缘故；二十九者、具七财故；三十者、于一切法得自在故；三十一者、修六神通故；三十二者、修集定慧故。是名三十二众生修集疾得菩提。”

说是法时，七万二千众生发阿耨多罗三藐三菩提心，万二千菩萨得无生法忍。

一切诸天以诸华香、种种伎乐，供养于佛，尊重赞叹，作如是言：“若有得闻如是等经，当知是人定得阿耨多罗三藐三菩提。”

尔时，梵天、释天、四天王天白佛言：“世尊，如来今者演说如是无限量义、了了之义、坏烦恼义，摧诸魔业，破诸邪见，能持一切无上正法。我等亦能受持读诵，书写解说。若佛弟子有能受持读诵、书写广说之者，我等亦当为作卫护。若有恶鬼欲为是人作烧害事，我当遮止不令成就。”

佛言：“善哉！善哉！善男子，汝于尔时，若能护我诸弟子者，即是护持我之正法。如是护者，法则久住。”

尔时，世尊告阿难言：“阿难，汝当受持拥护演说如是经典。若有菩萨于无量劫乐修惠施，复有菩萨受持是经，读诵书写，为人广说，修大慈悲，兼以此义劝人令学，其人所得福多于彼，亦能速疾获得大乘。”

阿难白佛言：“世尊，是经何名？云何奉持？”

佛言：“阿难，是经名为《真实法义毗尼方便》、《成就发心无量宝聚》、《无量陀罗尼十力四无畏不共法聚》、《菩萨摩訶萨不退转印广说大乘宝女所问》，如是等名汝当奉持。”

尔时，阿难及诸人天，闻经欢喜，信受奉行。

大方等大集经卷第七

不眴菩萨品第四

尔时，世尊故在欲、色二界中间大宝坊中，与诸大众围绕说法。尔时，众中有金色光，其光明净遍照三千大千世界，悉蔽一切日月、四天、释、梵光明，照已即灭。一切大众瞻睹如来，目未曾眴。当尔之时，寂然无声，亦无声歟、出入气息。

尔时，大德须菩提白佛言：“世尊，今何因缘有是光明？一切大众瞻睹如来，目未曾眴？”

尔时，佛告须菩提言：“东方过于无量世界，彼有菩萨，名曰不眴，与万菩萨俱共发来，欲听如来微妙方等大集经典，是其光明。”所言未讫，不眴菩萨已至佛所，大宝坊中赞持种种香华伎乐供养于佛，头面礼足，恭敬右绕，却坐一面宝莲华上。

尔时，须菩提复白佛言：“世尊，不眴菩萨，所来世界去此远

近？国土何名？佛号何等？”

佛言：“须菩提，东方去此七万二千恒河沙等诸佛世界，土名不昀，佛号普贤如来、应供、正遍知、明行足、善逝、世间解、无上士、调御丈夫、天人师、佛世尊，不昀菩萨从彼而来。”

尔时，不昀菩萨摩诃萨长跪合掌，说偈赞佛：

“如来世尊众宝聚， 具足一切波罗蜜，
无上法师天中天， 为众生故我敬礼。
寂静戒定不可动， 无上智慧调诸根，
为诸众生说大集， 故我归依师子王。
乐施天人诸安乐， 众生喜见如满月，
具足力势破魔众， 我今归依大药树。
成就善根施甘露， 能度众生生死海，
我今归依无上尊， 具足妙相三十二。
世尊庄严此大众， 犹如须弥显四域，
名称无碍遍十方， 人中象王我敬礼。
如来智慧如虚空， 通达三世无障碍，
随众生根而说法， 我今敬礼自在王。
过无量劫勤精进， 超胜同业诸菩萨，
所得佛法如先佛， 我今敬礼一切觉。
十方诸佛悉赞叹， 精进殊胜无边量，
无量众生得闻已， 悉皆同发菩提心。
于正法中无厌足， 兼以劝化诸众生，
能说清净法之性， 我今稽首大法王。”

尔时，不昀菩萨偈赞佛已，白佛言：“世尊，我等于此大集经中欲少发问，唯愿如来垂哀听许。”

佛言：“善哉！善哉！善男子，随意发问，吾当为汝分别宣说，除却汝等疑网之心。”

不昀菩萨既蒙听许，心大欢喜，白佛言：“世尊，菩萨摩诃萨修何三昧，速得成就阿耨多罗三藐三菩提？得大念心、大智、大意，惭愧勇健，修施教戒，被忍辱铠，建精进幢，游戏神通，庄严慈悲，深乐法喜，登陟舍山，能说能答，摧伏魔怨，坏诸邪见，不离诸佛，菩萨善友常得化身，不失念心深信大乘，乐施众生无上智光，不为世法之所染污，同于四大，如地利益一切众生，如水能洗一切垢秽，如火能熟众生善根，如风能于戒闻慧等无所障碍，修集慈悲犹如虚空，慧眼无量犹如帝释，心得自在如自在天，正法化世如转轮王，聚大福德如须弥山，于善无厌聚众珍宝犹如大海，思惟十二因缘深义亦复如是，无所畏惧如师子王，具善法财犹如商主，一切依止如大医王，能作光明犹如庭燎，破闇如日，清凉如月，烦恼不污犹如莲华，具足一

切诸佛妙法犹如满月。”

佛言：“善哉！善哉！善男子，能以此义咨启如来。至心谛听，吾当为汝分别解说。善男子，有三昧名一切法自在，菩萨修集是三昧者，则能获得如是等事，亦得无量无边福德，疾成阿耨多罗三藐三菩提，成佛之时世界所有一切具足。善男子，一切法自在三昧者，所谓信佛法僧、苦集灭道、阴入界等、空无相愿、出生灭没、十二因缘、内外因果、业及果报，信于开塞观一切法如幻、如化、如焰、如响、如水中月、龟毛、兔角、空中之华、石女之子，如著影衣、梦乘白象，若有若无及以有无，非有非无，非常非断，非生非灭，非内非外，非见非断；信如是等，则能信佛菩萨大事而不自轻。

“菩萨事业虽复广大，我亦能知，心得自在能大惠施，护持禁戒不妨外事，怜愍众生常修忍辱，为不退故勤行精进，为令众生离烦恼故修集智慧，为坏一切分别想故修集三昧，得妙音声一切乐闻；修于念佛，观诸如来平等无二；修于念法，观一切法同一性相；修于念僧，观一切僧无有退转；修于念舍，舍诸烦恼；修于念戒，常念佛戒；修于念天，念后边身。净身口意不随他人，戒、定、智慧、清净施已，能得具足三十二相；施种种物，具足成就八十种好；为欲庄严出世智慧，具四念处；为欲远离一切烦恼故，具四正勤；为令其心得自在故，具四如意；为欲坏破诸魔怨故，修集信根；为不颠倒一切法故，修精进根；劝令忆念诸罪过故，修集念根；为诸众生心清净故，修集定根；为于一切诸法顶故，修集慧根；为无坏故，修集五力；为真实知一切法故，修七觉分；为真实知道非道故，修八正道。乐于寂静，少欲知足，远离恶友。虽复通达一切事业，终不于中生独师想。于诸烦恼心不贪著，不瞋众生，不疑诸见，于我我所心不生著，常修欲度众生之心。于师、和尚、父母、善友生念恩心，常思报答往昔之恩。见毁禁者不生讥刺，舍弃重担真观阴故。不竞不诤护法持戒，摄取持戒及护法者。听法、念法、供养于法，于正法中心无疑网。凡所演说不为饮食，至心演说，说时不轻亦不自高，为出善芽所闻不失。瞻病所须，供给走使，供养法师不说其短，不观种姓、戒与非戒。常乐闻法至心不忘，不失时节常请法师敷扬道化，有所讲说不生憍慢，闻已解义亦不自大，不观他人所有过失，所可听法为知足故，为不断绝三宝种故，为得无碍宿命智故，为得真实见法性故，为发无上菩提心故，为护如来真实法故，为得上族好种姓故，为见佛法比丘僧故，为得坚固不退心故，为行圣行入圣数故，为得无尽大财宝故，为得无边大功德故，为得清净梵音声故，为得具足佛功德故，为得具足菩萨法故，为欲受持读诵书写菩萨法藏及摩夷故，为欲受持如是等法广宣说故。善男子，菩萨摩訶萨获得一切法自在三昧者，于一切事无能教者。”

尔时，世尊即说颂曰：

“其心敬信佛法僧，亦复明信四真谛，
若得智慧无挂碍，是名诸法自在定。
能知于苦第一谛，亦能远离于集因，
证获第三真灭谛，修集无上圣道谛。
具足成就大念心，真实观阴如虚空，
其身威仪大寂静，是名诸法自在定。
能观六入性相空，亦能调柔于诸根，
能坏众生疑网心，是名诸法自在定。
能修集空无相愿，破坏一切诸憍慢，
所行诸行无黑闇，是名诸法自在定。
远离断见及我见，令身口意业寂静，
其心不著有无法，是名诸法自在定。
所说正义无颠倒，调伏一切众生心，
既说法已无憍慢，是名诸法自在定。
修集一切诸善根，不为烦恼之所污，
其心无热亦无浊，是名诸法自在定。
不为他喜求菩提，亦不虚诳修善法，
十方诸佛观其心，是名诸法自在定。
常乐惠施护持戒，怜愍心故忍诸恶，
精进修定及智慧，是名诸法自在定。
为诸众生修慈心，亦无分别怨亲想，
乐施众生无上乐，是名诸法自在定。
调伏众生于菩提，修舍离欲得安乐，
常乐修集五神通，是名诸法自在定。
所说正法众乐闻，其义难尽如大海，
真实了知于法性，是名诸法自在定。
观察佛身如诸法，佛性法性无差别，
护法之心无退转，是名诸法自在定。
身口意业得寂静，具足戒定心无为，
远离一切烦恼习，是名诸法自在定。
能证无上真解脱，亦能获得实知见，
修集定慧无有边，是名诸法自在定。
不净之物不以施，不受一切不净戒，
三十二相具足成，是名诸法自在定。
修行种种诸惠施，是故获得八十好，
于佛法中得自在，是名诸法自在定。
修集具足四念处，正勤能坏诸烦恼，
为调众生修如意，是名诸法自在定。
为入佛法修信根，为坏魔众修五力，
为知诸法修七觉，是名诸法自在定。

修八正道破邪径，施于众生无上乐，
心无憍慢一师想，是名诸法自在定。
若得修集自在定，是人则能离烦恼，
亲近诸佛菩萨等，乐修少欲知足行，
为在无上圣人数，以众生故修大悲，
不为饮食演说法，是名诸法自在定。
为法不惜于身命，护持正法不吝财，
常乐修行二种施，是名诸法自在定。
常劝众生令听法，如其未解心不轻，
不为胜他护持戒，是名诸法自在定。
无量世中所闻法，至心受持为他说，
无上法师大名称，不观时节戒非戒，
演说不休亦不息，不失时节随意说，
所说诸法如幻相，是名诸法自在定。
所言真实甘乐闻，闻已如说而安住，
其心无贪无嫉妒，是名诸法自在定。
有问无瞋无轻慢，常修怜愍无二相，
能自净除诸过失，是名诸法自在定。
具足七种无上财，成就寿命无上命，
具足十力四无畏，是名诸法自在定。
常乐闻法善思惟，善思惟已如法住，
如法住已为众说，是名诸法自在定。
不忘菩提上种性，供养三宝得化身，
劝化大众具菩提，是名诸法自在定。
其目清净见诸佛，得梵音声无上边，
其音遍满十方界，是名诸法自在定。
财宝惠施无有尽，智慧演说无穷竭，
供养父母师和尚，是名诸法自在定。
成就具足宿命智，不失无上菩提心，
六波罗蜜无厌足，是名诸法自在定。
为欲利益众生故，受菩萨藏及摩夷，
乐为众生广分别，是名诸法自在定。
远离一切恶思惟，了了睹见十方界，
一心能知无量心，是名诸法自在定。
一心了知三世事，修集无量诸神通，
得后边身智无碍，是名诸法自在定。
怜愍众生修大悲，观察诸根随意说，
一切佛法得自在，是名诸法自在定。
若有得闻如是事，至心受持生信顺，
即能获得无上道，亦如往世诸世尊。”

尔时，不昀菩萨白佛言：“世尊，菩萨摩訶萨成就何法，获得如是一切诸法自在三昧？”

佛言：“善男子，菩萨摩訶萨具足一法，则能获得如是三昧，所谓不著一切诸法。复有一法，不著于戒。何以故？若不著戒，则能不著一切善法。具足戒故则能成就一切佛法，得大利益无上大道，是故我言：‘戒是一切善法根本，戒名大灯。’若著戒者，是人则于菩提障碍，非菩提道。若于诸法生贪著者，去菩提道则为大远；若不贪著，则为邻近。复有二法，菩萨具足则能获得如是三昧：一者、为于菩提方便，修集舍摩他；二者、为于善法方便，修集毗婆舍那。复有三法，菩萨具足得是三昧。何等为三？一者、不舍众生修空三昧，二者、不舍于法修无相三昧，三者、求于诸有修无愿三昧。”

尔时，世尊即说颂曰：

“调伏众生修集空， 护持法故修无相，
不舍诸有修无愿， 是人则得是三昧。”

“复次，善男子，复有四法，菩萨具足则能获得如是三昧。何等为四？一者、具足四谛方便，二者、具足四无量心，三者、具足四无碍智，四者、具足四摄之法。复有五法，菩萨具足得是三昧。何等为五？一者、具足五神通，二者、具足五根，三者、具足五力，四者、具足真智观于五阴，五者、具足五眼。复有六法，菩萨具足得是三昧。何等为六？一者、具足六波罗蜜，二者、具足六念，三者、具足智慧观于六入，四者、具足远离六道，五者、具足六通，六者、具足六和敬法。复有七法，菩萨具足得是三昧。何等为七？一者、无贪远离烦恼，二者、于众生所无有瞋恚，三者、于诸法中无有疑心，四者、具无碍智无有五盖，五者、观十二因缘无有疑网，六者、成就无上智慧，七者、成就无上三昧。复有八法，菩萨具足得是三昧。何等为八？一者、修集八正道分，二者、离八邪道，三者、远离八难，四者、具足八大人觉，五者、具八解脱，六者、具八胜处，七者、专念菩提，八者、断烦恼习。复有九法，菩萨具足得是三昧。何等为九？一者、不失念心，二者、解甚深义，三者、破坏魔业，四者、具佛三昧，五者、净身口意，六者、具足方便，七者、威仪纯善，八者、勤行精进具六波罗蜜，九者、远离声闻、辟支佛道。复有十法，菩萨具足得是三昧。何等为十？一者、具足佛智，二者、具足法界无分别智，三者、于真实性无有动转，四者、具足三世平等智慧，五者、具足众生心平等智，六者、具知诸根上中下智，七者、具足四无碍智，八者、具足三解脱门，九者、具足诸法同一味智，十者、具足诸法无生灭智。”

说是法时，三万二千菩萨摩訶萨得是三昧。

尔时，须菩提语不昀菩萨言：“是大众中三万二千诸菩萨等，皆

悉获得如是三昧。善男子，汝今得耶？”

不昫菩萨言：“大德，乃至无有一法可得名为三昧，我云何得？凡言得者即是颠倒，夫颠倒者即我我所。菩萨若著我我所者，则不能得如是三昧。”

须菩提言：“菩萨摩訶萨住于何处得是三昧？”

不昫菩萨言：“如须菩提所住之法得解脱者，我如是住得是三昧。”

须菩提言：“我实不住一切法中而得解脱。”

“大德，菩萨摩訶萨亦复如是，不住诸法得是三昧。”

须菩提言：“善男子，菩萨摩訶萨将不住于空无相愿得三昧耶？”

不昫菩萨言：“空无相愿可得住耶？”

“不也，善男子。”

“大德，是故空无相愿所住之处，得是三昧。”

“善男子，如是三昧住在何处？”

不昫菩萨言：“如一切法真实性住，住是三昧者亦如是。住一切诸法真实性者名圣解脱，圣解脱者名无所住，无住之住住一切法，一切诸法不住烦恼、不住解脱。大德，得解脱者，为具烦恼、不具烦恼？”

“善男子，我亦不具，非不具也。”

“大德，若仁不具，非不具者，为何所得言解脱也？”

须菩提言：“善男子，若使法界有缚系者，我则解脱。而法界性无缚解相，非相非非相，非种种相，非一相非多相；如法界相，解脱亦尔。”

时，须菩提说是法时，八千比丘得阿罗汉果。须菩提语不昫菩萨言：“善男子，如佛所说，若能具足如是等法得是三昧，汝今具足是三昧不？”

不昫菩萨言：“大德，一切诸法无有根住，若法无根即是无住，夫无住者名为无作，若无作者云何可住？”

须菩提言：“若无住者，何故如来常作是言：‘住如是法得无生忍’？”

不昫菩萨言：“大德，无所住者亦名为住，是故如来亦说住贪而得解脱，而智慧性不能坏贪住于解脱。若有菩萨能知如是不住之住，是名无生智慧；住是无生智慧中已，则能获得无生法忍。”

“复次，大德，若有菩萨不离凡夫能知圣法，以凡夫心观察圣法，以圣法性观察于忍，忍性观忍，复以是忍观一切法，知如是等名无生忍。”

“复次，大德，若有菩萨观二种界：一、众生界，二者、法界。以法界性观众生性，以众生性观法界性，若离法界无众生界，法界、众生界无生无灭。若能如是通达知者，名无生智；无生智者即无生忍。”

“复次，大德，菩萨摩訶萨知从十二因缘生法，从六境界作六因缘，若善不善，是善不善即无生灭。何以故？境界之性不能生法，六入亦尔不能生法。何以故？无生性故。如其六入能生法者，则应常生，不须外缘。若外境界性能生者，亦应常生，不假于内。若俱生者则有二相，二相之法性无真实。通达了知如是等者，名无生忍。若得如是真智慧者，是名菩萨得无生忍。

“复次，大德，若有菩萨具足成就二种庄严功德智慧，观是二事平等无二。虽如是知不言我知，亦于此知不生贪著，是名无生忍。

“复次，大德，菩萨摩訶萨身意寂静观法寂静，法寂静已观菩提静，菩提静已观忍寂静，亦不随他，不著内外，是名菩萨无生法忍。”

说是法时，不昀菩萨等五百菩萨得无生法忍。

尔时，世尊赞不昀菩萨言：“善哉！善哉！善男子，汝所演说无生法忍，即是真实如先佛说。复次，善男子，菩萨若得心自在者，即得诸法自在三昧。云何名为心自在耶？善男子，若有菩萨远离贪爱，得帝释身或转轮王身，虽为无量诸众生等说五欲乐，而其内心实不贪著，是名菩萨心得自在。复次，善男子，若有菩萨修集三昧、四无量心求诸有时，不以有心，以智慧心，虽生欲界不因欲心，其心常不远离三宝，修集庄严诸波罗蜜，以四摄法摄取众生、调伏众生，修三十七助道之法，是名菩萨心得自在。复次，善男子，若有菩萨修空无相愿，自不证于空无相愿，亦为众生说如是法。为调声闻、辟支佛等，入于无生正定之聚而为说法，彼既闻已即得解脱，自不证之，亦令众生不舍菩提，是名菩萨心得自在。复次，善男子，若有菩萨为调声闻、辟支佛故，入无生灭正定之聚，亦得灭定，又能通达一切三昧出入相行。虽得如是通达自在，亦不证于灭尽三昧。何以故？未具佛法故。是名菩萨心得自在。复次，善男子，若有菩萨以平等智观于法界，种种世间、种种众生、种种说法、种种方便，是名菩萨心得自在。复次，善男子，若有菩萨生长寿夭未尽天寿，其身亦生短命之中，为欲调伏诸众生故，是名菩萨心得自在。复次，善男子，若有菩萨具足快乐，舍是乐已为诸众生受大苦恼，护众生故，护菩提故，是名菩萨心得自在。复次，善男子，若有菩萨同于声闻、辟支佛行，而心护念菩提之道，亦修菩提微妙之行，为诸声闻、缘觉之人，随意说法而亦不证，是名菩萨心得自在。复次，善男子，若有菩萨解八万四千法门，亦复通达烦恼行处，为断众生诸烦恼故，处中说法，亦不为诸烦恼所污，是名菩萨心得自在。复次，善男子，若有菩萨具足神通，若有众生盲聋跛躄，菩萨摩訶萨自变其身，亦同其像而为说法，是名菩萨心得自在。复次，善男子，若有菩萨具足智慧，通达外典善解邪论，而其内心不为邪见，为欲调伏诸众生故修集其道，是名菩萨心得自在。善男子，菩萨具足如是等事，名心自在，亦名得一切法自在三昧。”

须菩提言：“世尊，不脩菩萨得是三昧，为久近耶？”

佛言：“过去无量阿僧祇劫，尔时有佛，号自在王如来、应、正遍知、明行足、善逝、世间解、无上士、调御丈夫、天人师、佛世尊，世界名净，劫亦名净。其佛国土地平如掌，金、银、琉璃、玻瓈庄严，常有幡盖，如兜率天多饶饮食。尔时，众生所有贪欲、瞋恚、愚痴无有势力，多有利智能解佛语，一切悉乐无上大乘。尔时，世尊与八万四千大菩萨众，三万二千声闻大众。

“尔时，世有转轮圣王，名曰广持，号曰法王，成就七宝——轮宝、象宝、马宝、女宝、珠宝、兵宝、主藏之臣，千子具足，王四天下，治以正法不加刀杖，怜愍众生教以十善，一切众生亦乐受之。尔时，千子悉发阿耨多罗三藐三菩提心。尔时，圣王供养如来、菩萨、声闻一切大众，衣服、饮食、卧具、汤药、房舍资生，经万岁已发阿耨多罗三藐三菩提心，为无上道修三十七助道之法。

“尔时，彼佛寿命满足八万四千岁。王有一子名曰法语，于彼佛法信心出家，勤行精进，清净持戒，为得无上菩提道故。尔时，法语比丘二万年中无有睡眠，如弹指顷不生贪心、瞋心、痴心不善觉观，不念父母、宗亲、眷属、饮食、衣服、房舍、卧具、资生之物，亦不觉知昼夜之相，二万年中常修念佛。须菩提，法语比丘勤精进故，获得四禅、四无量心、四无色定，过二万年已往诣佛所，头面礼敬，右绕三匝，却住一面白佛言：‘世尊，我发阿耨多罗三藐三菩提心，为施一切众生安乐，为欲调伏一切众生。唯愿世尊哀愍示导，云何令我化诸众生宣说正法？’

“佛言：‘比丘，有八陀罗尼门，若成就者得无碍语，则能为诸众生说法。何等为八？一者、念佛，知法身故；二者、念法，知净法故；三者、念僧，知无碍故；四者、真实思惟，破恶觉观故；五者、知字，不可说故；六者、修舍摩他，为知诸法同一昧故；七者、修毗婆舍那，为知诸法本性净故；八者、修方便智，为得忍故。比丘，具如是八陀罗尼门，则能堪任宣说正法化诸众生。比丘，复有八精进，菩萨具者能宣说法化诸众生：一者、求法勤行精进，二者、持法勤行精进，三者、观法勤行精进，四者、说法勤行精进，五者、护法勤行精进，六者、供养法师勤行精进，七者、护受法者勤行精进，八者、如法而住勤行精进。是名为八。复有八法，菩萨具足能化众生。何等为八？一者、修慈等观众生故，二者、修悲调伏众生故，三者、观法得无上法故，四者、观智破憍慢故，五者、护诸众生施安乐故，六者、善思惟坏诸烦恼故，七者、修助道法庄严菩提故，八者、护法具足六度故。’

“须菩提，菩萨摩訶萨若能具足如是等法，则能教化一切众生。尔时，比丘闻是法已，于十千系心思惟，勤行精进为得是法。以精进故，即得无尽器陀罗尼，善解一切众生语言随语为说，得是持已，复有无尽辩才；成就如是陀罗尼已，周遍城国村邑聚落，化无量众于

三乘道，为其父母、兄弟、眷属、宗族说法，悉令获得随顺法忍。

“须菩提，尔时比丘复往佛所，头面敬礼，右绕三匝，却住一面白佛言：‘世尊，如佛先说，我已证得，佛神力故得圣智慧。世尊，颇有三昧菩萨修已，心不退转增长善法？’佛言：‘比丘，有三昧名一切法自在，菩萨修已其心不退，亦得增长无量善法。’尔时，比丘闻三昧名，即白佛言：‘世尊，菩萨云何行？云何修？云何学？而能获得如是三昧？’比丘，有八法、八庄严、八发心，菩萨具已得是三昧。何等八？一者、净心，二者、至心，三者、施心，四者、离烦恼心，五者、观六界，六者、修忍，七者、勤精进，八者、修定身心寂静。是名八法。八庄严者：一者、舍，二者、戒，三者、功德，四者、智，五者、舍摩他，六者、毗婆舍那，七者、发菩提心，八者、庄严一切佛法。是名八庄严。八发心者：一者发心，无有众生、寿命、士夫，一切诸法亦复如是；二者发心，一切诸法无常、苦、无我；三者发心，一切诸法空无相愿；四者发心，未来之法无有住处；五者发心，现在之法无有住处；六者发心，一切诸法无业果报；七者发心，一切诸法无有作者，无有受者；八者发心，一切诸法无有系属。菩萨具足如是等法，得是三昧。’比丘闻已进修不久，即得如是一切法自在三昧；得三昧已即放光明，遍照三千大千世界。

“尔时，比丘即往佛所，头面作礼，右绕三匝，上升虚空一多罗树，结跏趺坐满一千年，不动不摇，法喜为食，获得比智，乐说无碍，令三万六千亿众生得不退心，无量众生安住三乘。尔时，法语比丘过千年已，从座而起，作如是言：‘如来世尊勤精进故，得阿耨多罗三藐三菩提，非懈怠也。’

“善男子，汝于无量无边世中，成就无量无边功德，故能速得如是神通。善男子，汝已于往七万六千亿佛所，种诸善根，净修梵行，是故因此过去善根，获得如是现在善果。”

佛告须菩提：“汝知尔时法语比丘得三昧者，岂异人乎？即是今之不昀菩萨，成就如是无量功德。”

尔时，世尊为须菩提说是菩萨往因缘时，三万二千众生发阿耨多罗三藐三菩提心。虚空之中诸天、龙、神、乾闥婆等，雨诸华香以用供养不昀菩萨，而作是言：“我等今日见此菩萨，得大利益！”

尔时，须菩提语不昀菩萨言：“善男子，汝已久修清净梵行。”

不昀菩萨言：“大德，夫梵行者，非是过去、未来、现在。若非过去、未来、现在即是无作，若无作者即名为行，如是行者名为无生，名为无诤，无有言说及以威仪。大德，非眼行故，名为梵行；非耳、鼻、舌、身、意行故，名为梵行；非色、声、香、味、触、法行故，名为梵行；亦非色、受、想、行、识行故，名为梵行；非相非缘，非见非闻，非知非觉。大德，如是等法无去来住，无牵无挽，无有数量，无上无下，是名梵行。”

须菩提言：“善男子，夫梵行者名八正道。”

不昫菩萨言：“大德，云何八正道名为梵行？若以正见为梵行者，不见诸法名为正见，等见诸法名为正见，不见之见乃名正见；若不见者，云何得名为正见耶？若无正见，云何得名为梵行乎？无有思惟名正思惟，夫思惟者名为颠倒；若颠倒者，云何得言正思惟耶？一切音声皆悉平等，若善若恶，若一若二，若过去、若未来、若现在，若一切字、若一切声，是名为响；若是响者，云何得言为正语耶？声平等者，一切行法皆悉无常，是苦、无我，涅槃寂静。若能等观一切诸法，如涅槃相及演说者，是名正语。无身无身业，无口无口业，无意无意业。何以故？无业处故。若有业处则有我我所，若无我我所则无业果。若如是观，名为正业。若为寿命行于邪命，远离邪命故名正命。若观是等无我我所，无有众生、寿命、士夫；如其无者，何故得名为正命耶？于眼识色不生染著，眼识性空，以识性空故眼色亦空；若眼色识空，至意识法亦复如是。若如是观，是名正命。无有颠倒，断诸精进，名正精进。无精进法，无精进者，无有具足成就精进，无有精进为利益者。若能观察如是等法，是名正精进。若能等念一切诸法平等如空，一切诸法亦复如是。如一切法，阴、入、界等亦复如是。若能观于如是等法，是名正念。观一切法皆悉平等，无我我所。若能如是平等观者，是名正定。大德，若能如是观一切法性平等者，名八正道，是名梵行。非以数故名八正道，非八正道名为梵行，非世道故名梵行，非著心故名梵行，非二相故名梵行，无作相故名梵行。若见诸法无有住处，乃名梵行。”

尔时，不昫菩萨为诸大众说如是等梵行法时，五百比丘离诸烦恼，得阿罗汉果。

须菩提言：“善哉！善哉！善男子，快说是法！如离烦恼阿罗汉人，其所宣说等无有异。”

“大德，我今亦是远离烦恼，亦是阿罗汉，我亦远离声闻、缘觉烦恼诸法，我如法住故名阿罗汉。”

尔时，须菩提白佛言：“世尊，是不昫菩萨，乐说无碍，不可思议辩才利智，随问而答。”

佛言：“须菩提，不昫菩萨得一切法自在三昧，以是故能随问而答。若有菩萨得是三昧，一切世间人、天、魔、梵，不能障其乐说无碍。”

尔时，帝释白佛言：“世尊，若有人于无量世中，具足功德乃能得见不昫菩萨，闻其所说。世尊，若有比丘、比丘尼、优婆塞、优婆夷，受持是经，读诵书写，为人解说及闻法者，悉发阿耨多罗三藐三菩提心。当知是辈，一切皆当如不昫菩萨作师子吼。世尊，我当拥护如是等人。”

佛言：“善哉！善哉！憍尸迦，汝今至心护持正法。”

尔时，梵王复白佛言：“世尊，我当乐修舍定三昧，舍禅定乐，来护法及说法者令离病苦。随何国土有说法处，我当往彼至心听

受。若有国土信受此经，供养三宝，我亦当为除灭恶相，令其土境清净安恬，正法治化。”

佛言：“善哉！善哉！梵王，汝真护法。若有人能如是护法，当知是人终不远离三宝之宝。”

尔时，四天王复白佛言：“世尊，我亦能护受持读诵、书写解说如是法者。”

佛言：“善哉！善哉！善男子，若知法者，是人乃能拥护是法。汝于我所得闻法已，即获法眼，断诸恶道。若复至心护持正法，不久当断一切诸有。”

尔时，世尊告阿难言：“汝当受持如是经典，为四部众广说其义。”

阿难白佛言：“世尊，我能受持如是经典，如佛所说等无有异，广为四众宣释分别。”

尔时，人、天、阿修罗、乾闥婆一切大众，闻经欢喜，赞叹善哉。

大方等大集经卷第八

海慧菩萨品第五之一

尔时，世尊故在欲、色二界中间大宝坊中，与诸大众围绕说法。是时，三千大千世界大水盈满犹如大海，又如劫尽水灾起时。然诸世界国邑村落、城郭舍宅、山林树木，上至色界，无所烧害悉皆如故，而诸大众皆见是水。尔时，水中出生无量分陀利华，青琉璃茎，真金为叶，功德宝台，帝释宝须，周匝多有无量之华，纵广十里在宝坊中，高一多罗树。尔时，大众各各自见在此华上。其华尔时出大光明，遍照十方无量世界。尔时，大众心生欢喜：“我等今者必当得闻殊胜妙法。”

尔时，弥勒菩萨即从坐起，前礼佛足，右绕三匝，于莲华上长跪合掌，白佛言：“世尊，何因缘故，如是三千大千世界满中大水犹如大海，又如劫尽水灾起时，复出无量分陀利华，大光如是遍照十方无量世界？”

佛言：“弥勒，下方过于三千大千世界微尘等国，有一世界名宝庄严，其土有佛，号海智神通如来、应、正遍知、明行足、善逝、世间解、无上士、调御丈夫、天人师、佛世尊。彼有菩萨名曰海慧，欲来至此大宝坊中，与无数菩萨俱共已断一切数想，欲来听是大集经典。”

时，舍利弗白佛言：“世尊，彼佛世界去此甚远，海慧在彼，颇得闻此佛所说不？”

佛言：“舍利弗，如汝今于我前所闻，彼亦如是。如汝今日及诸

大众睹见于我，海慧菩萨见我亦尔。”

“世尊，菩萨摩訶萨所有神通不可思议，住于极远无量世界，而有如是无碍天眼、无障耳通。世尊，谁有闻是不思议事，而当不发阿耨多罗三藐三菩提心？唯除下劣不肖人耳！”

尔时，海慧菩萨具足无量神通之力，于一念中在彼国灭，忽然现此大宝坊中。即入三昧，令此大众悉得遥见，彼佛世界所有人民，城邑聚落、屋舍殿堂、山林树木、飞鸟走兽，及见彼佛与诸大众围绕说法。现是事已，即从三昧安详而起，前礼佛足，右绕三匝，以其世界所有香华、种种伎乐，供养于佛，作如是言：“下方世界海慧神通如来，致问无量，如来身命及以大众悉安隐不？”却坐一面宝莲华上。

时，有梵王名曰修悲，作是思惟：“何因缘故有是大水，满此三千大千世界而非水灾？我今当往问于世尊。”即与六万八千梵俱诣如来所，头面敬礼，右绕三匝，长跪合掌，白佛言：“世尊，何因缘故，此中三千大千世界，七宝莲华庄严遍满，无量菩萨各各次第坐宝华上，三千世界大水盈满？”

佛言：“梵天，善男子，此是海慧菩萨摩訶萨神通之力。”

梵天言：“世尊，如来所说大集妙典，犹未讫耶？”

佛言：“梵天，如来所有乐说无碍不可穷尽。梵天，佛与无量菩萨大众，观察法界，讲论法界，法乐微妙亦不可尽。”

梵天言：“世尊，如来所言海慧菩萨，其谁是耶？”

佛言：“梵天，汝今不见坐宝莲华，其华纵广满十由旬，为诸菩萨之所恭敬赞叹者乎？其身色像光明炜烨，唯除如来，余无及者。”

尔时，梵天见已即生恭敬之心，头面礼拜，作如是言：“若有得见如是正士，得大利益！我今遇之，亦复如是。世尊，如是正法当久近住？”

佛言：“善男子，如是正法如如来寿。我涅槃后，是诸菩萨亦护是法。何以故？此经即是过去、未来、现在佛印。”

尔时，海慧菩萨踊在空中高七多罗树，示现己身智慧之力，为令大众生信心故，庄严此经故，而说偈言：

“下方有土过尘数， 有佛海智神通尊，
常为众生演说法， 我闻能受为人说。
我今来此大众中， 供养恭敬十力尊，
所来眷属诸菩萨， 为破法中细疑心。
我今敬礼最无胜， 如法而作上供养，
为欲庄严上菩提， 教化众生无上道。
若观诸色无有相， 亦能断离三种受，
若无相貌及种性， 是人能礼无上尊。
若不贪著我我所， 亦复修集于中道，
观一切法如虚空， 是人能礼无上尊。”

若不贪著诸境界，亦能寂静于内入，
于诸法界不生著，是人能礼无上尊。
若见如来真法身，能竖无上大法幢，
见一切法如幻相，是人能礼无上尊。
若见无施无受者，无作无受亦如是，
若无正见及邪见，是人能礼无上尊。
亦不定在菩提中，又不决定在生死，
远离一切诸烦恼，是人能礼于如来。
若有至心修善法，净身口意三业等，
亦能调伏于诸根，是人能礼无上尊。
若忍诸法无有我，不成菩提舍众生，
为菩提故持净戒，是人能礼无上尊。
若观诸法犹如焰，众生平等如虚空，
净心不作诸心想，是人能礼无上尊。
为诸众生受大苦，为菩提故修忍辱，
观一切法如水月，是人能礼于正觉。
观无众生命士夫，亦为众生修菩提，
观法念念灭尽相，是人能礼无上尊。
受地狱苦心不退，勤加精进修集道，
闻诸法空心不怖，是人能礼无上尊。
一切境界无挂碍，犹如空中动手者，
亦观三世相平等，是人能礼无上尊。
若魔不能知其心，是人能得大神通，
若说法字义无尽，是人能礼无上尊。
若能遍闻诸佛音，闻已受持广宣说，
不见三宝差别相，是人能礼无上尊。
如来具六波罗蜜，无有去来如虚空，
了了知诸众生界，是故我礼无上尊。
如来成就大功德，终不生于似我慢，
我今敬礼佛色像，是身世间不能作。
佛光胜一切光，其意殊妙亦最上，
一切众生不见顶，是故我礼一切胜。
如来知诸众生解，随解而为演说法，
能知烦恼之对治，是故我礼于世尊。”

尔时，海慧菩萨偈赞佛已，从空而下，白佛言：“世尊，我今于此欲少咨问，唯愿如来哀愍听许。”

佛言：“善哉！善哉！善男子，随意致问，吾当为汝分别解说。”

海慧菩萨言：“世尊，我先闻有净印三昧，若有菩萨住是三昧，即得阿耨多罗三藐三菩提。唯愿如来说是三昧，令诸菩萨普皆得闻，

闻已皆当庄严修行，为阿耨多罗三藐三菩提故。”

佛言：“善男子，至心谛听，吾今当说。善男子，如净宝珠，匠者琢磨，价值无量，人所珍重。善男子，菩萨初发菩提心已，修集善法多闻思惟，观察法界净于初心，初心既净咸为诸佛菩萨敬念，即便获得净印三昧。

“善男子，净宝珠者离九种宝。何等为九？一者、金性，二者、银性，三者、琉璃性，四者、玻瓈性，五者、玛瑙性，六者、莲华性，七者、砗磲性，八者、功德宝性，九者、珊瑚性。是名为九离。是九性名净宝珠，其价无量，转轮圣王之所受用。是珠光明，余光不及。

“善男子，菩萨摩訶萨发菩提心亦复如是，离九种性得净印三昧。何等为九？一者、凡夫性，二者、信行性，三者、法行性，四者、八忍性，五者、须陀洹性，六者、斯陀含性，七者、阿那含性，八者、阿罗汉性，九者、辟支佛性。离是九性，入佛种性，得净印三昧。以其净故，胜于一切声闻、缘觉，施于一切众生光明。

“善男子，净宝珠者耐磨穿押，是故此珠名无瑕疵。善男子，净印三昧亦复如是。善男子，云何净印三昧？修集五戒，具十善法，修行慈悲怜愍众生，见他事业亲往营理，爱念一切修舍意净，常念众生以四摄法，摄取一切专念六念，调伏诸根少欲知足，不断圣种息诸斗讼，坏于憍慢，恭敬供养诸师、和尚、耆旧长宿，不轻于他，求法护法，远离恶法，于佛法僧信心无坏，心常缘念一切善法，不赞己身常称他德，知恩报恩净诸威仪，具于忍辱，求舍摩他，修陀罗尼，心等如风、地、水、火、空，常乐出家，修集寂静、持戒、精进，亲近善友，净于诸根，眼、耳、鼻、舌、身、心无碍，观于不净为坏贪结，修集慈心为破怨亲，观十二缘为坏无明，远离一切障碍之法，施法无吝，具足成就六波罗蜜，不求余乘，内外清净观生死过，于菩提道心不悔退，教化众生于大乘中。善男子，菩萨具足如是等法，净不净意，发阿耨多罗三藐三菩提心，是名宝珠。”

尔时，世尊即说颂曰：

“若有修集大慈心， 具足成满十善法，
是人定见弥勒佛， 故菩提心难思议。
修集大悲为众生， 亦常教化于大乘，
为除烦恼修舍心， 故菩提心难思议。
具足修集念智慧， 及能调伏于自心，
能修知足及少欲， 是故菩提心最胜。
远离一切诸恶法， 其心柔软于众生，
增长一切诸善法， 是故菩提心最胜。
恭敬供养师和尚， 绍继增长圣种性，
远离一切诸憍慢， 是故菩提心最胜。

其心质直不欺诳，常乐寂静化众生，
除去憍慢不轻他，是故菩提心最胜。
护持正法能听说，化诸众生离烦恼，
至心专念无上乘，是故菩提心最胜。
供养三宝信四谛，远离诸恶修善法，
不瞋不恚于众生，是故菩提心最胜。
客烦恼起生惭愧，即向十方佛忏悔，
修集善法调诸根，是故菩提心最胜。
净身口意知业果，知恩念恩知酬报，
信十二缘净威仪，是故菩提心最胜。
具舍摩陀修智慧，具足持戒乐菩提，
受大苦恼心不动，是故菩提心最胜。
其心平等如四大，视诸众生如虚空，
常乐出家修菩提，是故菩提心最胜。
贪乐寂静净身心，修行法行观四谛，
实语法语真义语，是故菩提心最胜。
有所说法而安住，勤修精进坏魔业，
于所修法无懈怠，是故菩提心最胜。
亲近善友佛菩提，能度众生生死海，
能净一切六境界，是故菩提心最胜。
远离障碍除五盖，诸根清净无憍慢，
贪欲瞋恚痴对治，是故菩提心最胜。
观善思惟具念心，修助菩提得神通，
不畏生死乐涅槃，是故菩提心最胜。
凡所说法不为食，于诸法中心无吝，
修行善法不求报，是故菩提心最胜。
不以余乘摄众生，所说众乐而受持，
其心无量无有边，是故菩提心最胜。
内外清净无过咎，不畏生死修菩提，
修菩提时心不悔，是故菩提心最胜。
知众生界净国土，庄严菩提不自为，
迷惑众生示正道，是故菩提心最胜。
善知法界真实性，无分别智不可说，
能破众生怖畏想，是故菩提心最胜。
若能具足如是法，是能净发菩提心，
不为世法之所污，烦恼魔业亦复然。
若有能发菩提心，是则能胜一切乘，
能净一切众生心，亦能演说无上道。

“善男子，云何名为菩提之心押而不坏？押者名为大悲，缘于一

切众生，绍三宝种不令断绝，为佛法故庄严善根，三十二相、八十种好严净世界，为护正法不惜身命。善男子，若为诸恶众生打触恼乱烧害，悉当忍之，亦应不舍一切众生，心不生悔不愁不恼，为调众生勤加精进。若遇骂辱、瞋恚、打掷，默然受之终不加报，应作是念：‘夫大乘者与世共诤。何以故？一切众生顺生死流，大乘之法逆生死流。一切众生各各诤讼，大乘之法破坏斗诤。一切众生瞋恚炽盛，大乘之法除灭瞋心。一切众生各各虚诞，大乘之法质直无虚。十方世界若有众生，以诸刀杖随逐菩萨，而作是言：‘谁有发此菩提心者？我当段段支解其身如胡麻许。’菩萨闻此终不退转菩提之心，亦不放舍慈悲喜舍、惠施、持戒、忍辱、精进、禅定、智慧。何以故？菩萨思惟：‘我于无量无边世中，受大地狱、畜生、饿鬼、人、天等身，受行恶法不能自利及利他人。若我或于无量世中，为彼恶人刀杖随逐节节支解，我终不舍于菩提心及诸众生。何以故？若我不能忍受如是世中苦者，何能堪忍地狱诸苦？行善法时，多有恶法来作障碍，我若不忍，云何能作种种善法？一切众生施我恶事，我要当以善法施之。众生施我刀杖骂辱，我以无上大忍施之。’菩萨摩訶萨若能如是思惟观者，当知不久得阿耨多罗三藐三菩提。如是观已能忍三押，谓身、口、意。

“云何押身？若菩萨身被支解时，尔时依法将顺恶人，具足六波罗蜜。云何菩萨身被支解，而得具足六波罗蜜？菩萨若被支解身体不惜身命，尔时具足檀波罗蜜；于彼恶人修集慈心，尔时具足尸波罗蜜；不瞋不骂，不以恶事还往加之，尔时具足忍波罗蜜；为诸众生勤行精进，终不舍离菩提之心，尔时具足精进波罗蜜；若他瞋打其心不动，不失正念其意清静，尔时具足禅波罗蜜；观身无常、苦、空、无我，犹如草木瓦石等类，尔时具足般若波罗蜜。具足如是六波罗蜜已，押而不坏，是名押身。

“云何押口？忍于一切恶言骂辱，若实不实，但责己身烦恼诸结，终不怨他，为诸众生修集慈悲。菩萨摩訶萨修集如是，忍恶骂时，即得具足忍波罗蜜。菩萨摩訶萨遇骂辱时即作是念：‘是人住世慳贪因缘，亲近恶友得是恶心。我破慳贪，修集惠施，亲近善友，是故我能舍是瞋恚。’尔时具足檀波罗蜜。菩萨摩訶萨遇骂辱时作是念言：‘是人破戒不信业果，是故骂我。我受持戒信于业报，是故修忍念于菩提，护持正法将顺众生。’尔时具足尸波罗蜜。菩萨摩訶萨遇骂辱时作是思惟：‘是人懈怠不修善法，是故骂我。我勤精进修集善法，舍离瞋心，于善法所心无厌足。我今要当设大方便，先令是人坐菩提树，然后我当取菩提果。’尔时具足精进波罗蜜。菩萨摩訶萨遇骂辱时复作是念：‘是人失念狂乱放逸，烦恼所污。我今破坏一切烦恼，为如是等诸恶众生发菩提心。若诸众生悉清静者，我复何缘发菩提心？’是故专心缘念菩提，心不匆务，尔时具足禅波罗蜜。菩萨摩訶萨遇骂辱时复作是念：‘是人著我我所、众生、寿命、士夫。我依法界，法界之中唯骂谁受？我亦不见一法是骂及以骂者。’尔时具足般若波罗蜜。若

能至心受持修行五波罗蜜，尔时具足忍波罗蜜，是名押口。

“云何押心？不畏魔众退菩提心，不畏一切众邪异见退菩提心，不畏地狱、饿鬼、畜生种种诸苦退菩提心。若见佛像来作是言：‘汝亦不能发菩提心。菩提之道甚为难得，不如早修声闻乘法，速证涅槃，受大安乐！’菩萨尔时闻是语已，即自思惟：‘菩提之道难之与易，我终不退，定当得到菩提树下坐金刚床。我昔已请一切众生，许当以法而惠施之。我今未与，云何欺诳？我当随顺一切佛心，堪忍如是押心之事，不诳诸佛、人、天、大众及以己身。’是名押心。”

尔时，世尊即说颂曰：

“向菩提道心不坏，大慈大悲亦复然，
又不断绝三宝种，无量庄严为菩提。
为佛十力四无畏，三十二相八十好，
无量世中舍财施，亦受种种大苦恼。
为得三宝诸功德，受持正法而广说，
为度众生生死海，是故堪受种种苦。
十方世界恶众生，执持刀杖逼我身，
心终不动失菩提，怜愍一切众生故。
无量劫中受苦恼，不能自利及利他，
今我此忍大利益，亦能得佛无量德。
为佛功德碎其身，犹如胡麻心不悔，
心亦不退无上道，多受诸苦为菩提。
行住坐卧念菩提，其心寂静离烦恼，
若欲起瞋于众生，先当怨己及烦恼。
三恶道中受诸苦，为诸众生得佛道，
不求人天上快乐，甘乐为众受诸苦。
若于人所受苦，不及地狱百千一，
虽受三恶无量苦，亦不退失菩提心。
观身无常及无我，四大之性如四蛇，
至心放舍如是身，能得智慧无上道。
流转诸有受诸苦，以不能观身真实，
菩萨能观身真实，是故永离诸苦恼。
行恶之时无妨碍，修行善法多留难，
诸佛世尊为证知，是故我受种种苦。
我今能忍如是等，身口意业无量苦，
以是因缘菩提心，坚牢毕竟不可动。
舍身具六波罗蜜，于身无贪具足檀，
于彼恶人生慈心，是故具足于尸罗。
割身能忍不生瞋，以是因缘具羼提，
受苦时心不动转，是故具足毗黎耶。”

不失念心乐寂静，是故具足于禅那，
观身无我无我所，尔时具足于般若。
若我能作是庄严，不久定得无上道，
若我不忍恶口业，云何能坏众烦恼？
若我调伏身口意，则能忍受众苦逼，
能坏一切诸魔众，虽有众邪我不动。
若欲具足波罗蜜，如来十力四无畏，
获得无上无价宝，当学调伏身口意。

“善男子，云何名为穿菩提心？菩萨既发菩提心已，终不生于相似我慢，不著菩提心，不贪菩提心，不爱菩提心，不观菩提心，如是则能令心寂静，观深法界，观诸佛法。深法界者，谓十二因缘，远离二边，一切诸法性自无我，观于我性、一切法性空无有主，住空三昧、无相、无愿，知诸行法无所造作；观色如沫、受如水泡、想如热焰、行如芭蕉、识则如幻，观界无作无有动摇，入如聋盲；心无暂住，憍慢之结都无生处；诸法无二无有分别，一味、一乘、一道、一源；观一切声无有声相，一切音声次第不合，一切诸法不可宣说；了知苦相，集无我所，于灭无增，知道毕竟；无障碍故，观身念处知去来受，念心出灭知于法界，观界非界故修正勤，欲得自在故修如意；离诸烦恼名为信根，乐于寂静名精进根，非有念故名为念根，非思惟故名为定根，远离一切名为慧根；不随他故名为信力，无障碍故名精进力，不退转故名为念力，心得自在名为定力，不观善恶名为慧力；不放逸故名念觉分，入诸法故名择法觉分，如法行故名进觉分，远离恶故名喜觉分，身心寂静名除觉分，知实三昧名定觉分，不观于二名舍觉分；远离诸见名为正见，离诸觉观名正思惟，知诸声性名为正语，于身口意不生贪著名为正业，离嫉妒心名为正命，不增不减名正精进，于善不善不生贪著名正念，观诸心界是名正定；实相之性其性寂静，毕竟义者名无常、苦、无我；假名清净大净能调心者名之为施，身心清净名之为戒，诸法无常名之为忍，勤修是智名为精进，内外清净名为三昧，观真实故名为智慧；知诸众生心性本净是名为慈，观于一切等如虚空是名为悲，断一切喜名为喜心，远一切行名为舍心；一切诸法未来世净，过去种种现在无我。善男子，若能真实观察了知如是等法，是名为穿菩提心宝。菩萨观察如是法已，次第得一切法自在陀罗尼。

“善男子，譬如日月不作往来照明之心，以诸众生福德力故，自行往返坏诸闇冥。善男子，菩萨摩訶萨若能观了如是等法，亦复如是不作是念‘我当利益无量众生’，而令众生大得利益。善男子，若菩萨摩訶萨能作是观，是名禅波罗蜜、般若波罗蜜。何以故？入定乃能作如是观，乱心不能。定者即是禅波罗蜜，观者即是般若波罗蜜，如是乃能观于真实，了了见于一切法相。云何名见一切法相？一切法相名

无相相，言无相者即是无作，即此无作名之为相，若能永断如是无相即无相相。又无相者名无生相，无相相者名无灭相，无生无灭名无相、无相相。若见无生、无灭、无作、无一无二、无瞋无诤、无有，如尔不动不转知于法性，是名真性，是名法性，是名实性。善男子，菩萨摩訶萨若真实知如是等法，名非住住。”

说是法时，十二那由他众生发阿耨多罗三藐三菩提心，万六千天得无生忍。

尔时，世尊即说颂曰：

“能破一切诸法相， 清净无上菩提心，
若能如是观察者， 即得不著一切法。
明见甚深诸法界， 亦不怖畏于涅槃，
以是不怖因缘故， 则能增长于佛法。
明信于因及果报， 十二因缘亦如是，
远离二边常断见， 随意种种说正法。
于常无常心不著， 又能演说于中道，
知一切法是空性， 无有众生无寿命。
一切诸法空无相， 亦复无有次第生，
其性本来常寂静， 无有能作如虚空。
不观一切诸法相， 了了觉知无有生，
观色如沫受如泡， 想如热焰行芭蕉。
观心如幻四大空， 观入犹如聋盲者，
又观心意无内外， 心无住处界无二。
不著诸法色色相， 虽有是知无憍慢，
观一切法皆平等， 一味一乘一道源。
能知如是真实义， 了了能观于法界，
无有音声能观声， 无有心意能观心。
无有文字观文字， 是能真实知法界，
一切法义不可说， 声及文字亦复然。
真实知苦集灭道， 具足系心四念处，
于诸法界无分别， 其心能得大自在。
远离一切诸烦恼， 修四正勤行精进。
为得无碍大自在， 勤心修集四如意。
于一切法不贪著， 为于如是修信根；
常乐住于大寂静， 是故修集精进根；
心无念虑知真实， 是故修集于念根；
悉能调伏诸心想， 是故修集于定根；
为能观察于法界， 是故修集于慧根。
为欲了知诸法界， 是故修集七觉分。
不观诸法一二数， 是故修集八正道。

如意能以财物施， 亦能如意受持戒，
又能清净于内外， 是则名为大神通。
一切诸法本性净， 是故修集于慈悲，
断一切喜诸烦恼， 是故修集于喜心。
一切诸法本性净， 去来现在亦复然，
若观诸法无生灭， 是人即得真实知。”

尔时，世尊复告海慧菩萨言：“菩萨得是净大净已，其心真实，无有欺诳，于诸众生平等无二，得真实智、毕竟大智、净印三昧，安住净印三昧根本。云何名为三昧根本？为诸众生修大慈悲，虽得供养其心不高，瞋恚毁辱心亦不下。心不高故，则能生于不憍法性、不憍名字，亦不生于相似我慢，身口意业从智慧生，是故一切所作诸业非不随智。

“云何菩萨身业随智？所得身形殊胜微妙，众生见者即得调伏，身四威仪亦能调伏。离诸身过、身曲、身滓，其身清净相好庄严，诸根具足无有缺减，不恃此身而生憍慢，见下色者心亦不轻，自于其身不生贪著。观身法界及以身业，知是色已，念于法身，不求食身，以定为食，为调众生现受其施。常修圣行，所谓非为贪欲、瞋恚、愚痴受持清净戒拥护正法。菩萨摩訶萨具足如是随智身业，得大神力、无所畏力。以是力故，于诸佛土普示其身，如此世界所示色身，余诸世界亦复如是；放大光明遍照十方无量世界，其光柔软，众生遇者离烦恼热，离烦恼已受大快乐。是名菩萨身业随智。

“云何菩萨口业随智？所谓远离六十四种恶口之业，粗语、浊语、非时语、妄语、漏语、大语、高语、轻语、破语、不了语、散语、低语、仰语、错语、恶语、畏语、吃语、诤语、调语、调语、诳语、恼语、怯语、邪语、罪语、哑语、入语、烧语、地狱语、虚语、慢语、轻语、不爱语、说罪咎语、失语、别离语、利恶语、两舌语、无义语、无护语、喜语、狂语、杀语、害语、系语闭语、缚语、打语、歌语、非法语、自赞叹语、说他过语、谤三宝语，是名六十四。善男子，菩萨摩訶萨远离如是恶口等事，凡有所说，说实、说真、说解脱、说如实、说随谛、说利众生、说随众生心实不实、说众乐闻、说一切声、说一切语、说净众生根、说令众生离于烦恼、说于佛语、说于甘露其声遍闻十方世界、说令众生永离苦恼、说于深义、说调众生、说不造作恶，是名菩萨口业随智。

“云何菩萨意业随智？住一心中能知一切众生之心，常在禅定现诸威仪，一切众魔、声闻、缘觉悉不能知心所缘处，终不生心欲自毁害方便害他，了一切法通达无碍，得如是心不受能受亦不证灭，是名菩萨意业随智。

“是名净印三昧根本。如是根本复有十种：一者、净初发心，二者、净菩提道，三者、净六波罗蜜，四者、净干慧故修于三昧，五

者、净相，六者、净好，七者、净陀罗尼，八者、净如法住，九者、净于无失，十者、净三十七助道之法。是名为十。善男子，净印三昧具三十法：一者、内净，二者、外净，三者、心净，四者、憍慢净，五者、身净，六者、眼净，七者、一切众生无众生净，八者、一切法本性净，九者、一切法同一味净，十者、空无相愿净，十一者、解脱法门净，十二者、一切诸法入法界净，十三者、一切诸法入一性净，十四者、信心无坏净，十五者、无障碍净，十六者、一切解脱净，十七者、无为净，十八者、观十二因缘净，十九者、十力四无所畏净，二十者、无胜净，二十一者、一切法智净，二十二者、过去业净，二十三者、慈悲净，二十四者、不舍众生净，二十五者、破诸魔业净，二十六者、离内贪净，二十七者、离诸习气净，二十八者、一念知一切法净，二十九者、不失念心净，三十者、具足庄严净。菩萨具足如是等法，名净印三昧；得是三昧已，得八不共法。何等为八？所得世界金刚为地；一树之上种种枝叶、种种华果；一切众生不起烦恼；地狱、饿鬼、畜生之类，悉见菩萨坐菩提树，见已即得微妙快乐；金光遍照无量世界；一切大地六种振动；无一众生有娆害者；一念之智知一切法。是名为八。”

尔时，世尊即说颂曰：

“若知诸法如虚空，	净于本性不生灭，
即能净于如来印，	亦得住于定根本。
虽得供养心不喜，	呵责骂辱心不瞋，
修集慈悲心平等，	是则名为净印定。
远离一切诸憍慢，	离已其心不自高，
能呵烦恼诸结缚，	是则名为净印定。
其身永离诸恶业，	庄严妙相三十二，
具足清净于诸根，	亦复不生憍慢结。
见有下色丑陋者，	贫穷斯下心不轻，
为菩提故净说法，	是则名为净印定。
观察于身真实性，	坏于众生贪身想，
是故获得上法身，	远离一切杂食身。
常在禅定法喜食，	为众生故受揣食，
甘露上味增法命，	是则名为净印定。
爱乐圣行持佛戒，	远离贪欲恚痴等，
菩萨先自调其身，	然后复为众生说。
神通遍游诸十方，	为调众生演说法，
如彼色像示其身，	随其意趣为说法。
身出无量金色光，	遍照十方诸世界，
能坏众生烦恼热，	增长菩提心功德。
若有三恶苦众生，	遇已悉得无上乐，

皆得远离恶道苦，信心成就修善业。
如来所说身净业，为令众生净佛身，
若有能修如是业，获得净身如先佛。
若有远离恶口业，即得从智微妙声，
凡所演说众乐闻，闻者皆得生善芽。
远离六十四恶口，是人则能说甘露，
能说无为之大乘，亦得善解众生语。
能离贪欲悲痴语，演说甚深真实义，
其声遍闻十方界，为众宣说实解说。
呵毁打害不瞋诤，心常怜愍柔软语，
为众演说不可说，说已其心不生慢。
若能清净如是业，是人远离口诸恶，
如来所说口净业，为令众生广长舌。
若有修集善意业，是人一念知诸心，
常在禅定示威仪，坏诸魔业心不高。
不受能受为众生，了知真实不证灭，
一切众魔不知心，声闻缘觉亦复然。
不生害心于自他，能观甚深诸法界，
若欲得是净印定，常当修集于十法。
清净庄严佛境界，净于善法及六度，
具足功德及身相，得无碍说陀罗尼。
如法而住净其心，不失念心说无我，
离一切障慧无碍，其意无失具功德。
修助菩提无放逸，为诸众生说菩提，
无量世界身无碍，演说正法化众生。
具足八种不共法，获得无上大利益，
金刚为地树种种，悉见菩萨坐菩提。
若欲具足如是德，当修净印三昧定，
如来修集是定故，获得功德不可议。

大方等大集经卷第九

海慧菩萨品第五之二

“善男子，菩萨摩訶萨若欲获得净印三昧，应当修集净于菩提，远离一切滓浊之心。善男子，若不能见诸法性净，则为渴爱烦恼所污。一切诸法不可思惟，不作不行，清净寂静，无有尘垢亦无过失，毕竟清净如解脱性。法界不坏无有分别，实性法性无有差别。一切诸法空无相愿，如解脱性无碍平等，一切诸法亦复如是。若能如是正观察者，是名无浊。善男子，菩萨若能为诸众生说如是法，是名无滓。

善男子，若有菩萨心无滓浊，是人则得净印三昧。”

海慧菩萨言：“世尊，如是三昧，其义甚深，不可说故；不可睹见，断数法故；难可解了，不可见故；是大智慧，摄诸法故；一切菩萨皆悉平等，无垢无滓，无诸障碍，无有住处，微妙难明，不可喻说，其性坚固犹如金刚，不生不灭，不破不坏，不系不缚，是大光明远离闇故；不可思议无垢清净，远离贪故；无有诤讼，修集慈故；不觉不观，离去来故；一切平等，如虚空故。世尊，观何因缘得是三昧？”

佛言：“善男子，譬如有人欲游虚空，大自庄严菩萨亦尔，欲得是定当大庄严，平等庄严一切诸法。何以故？世间之法从子得果。善男子，一切有为识为种子，此三昧者无有种子。何以故？而此三昧非眼识识，乃至非意识识，非作非色，非受非想非行非识，观一切法普皆平等，是名三藐三佛陀。善男子，非异相故名为生死，非异相故名为涅槃。善男子，随生死相即涅槃相。何以故？一切诸法本性净故。本性性者名为无性，夫无性者名无性相，若无相性即是无作，如是无作即是法性无有文字，若无文字即名为如；如前，中后亦尔，是名三世。夫三世者即名为空，空即无作，如是无作，何有作者？是故无作名之为空。若无作、作者，当知无法，若无法者，无求无愿；若无愿求，则无身口意业；无身口意业即名无碍；无碍者名为不出，不出不灭不住；不灭不住即无为相；无为相者，是名不住；不住者，谓无一切所作之业，意不住色乃至意不住行。若是四处意无住者是名无住，若无住者则不生于相似我慢，若无如是相似我慢则无增长，若无增长则无有因，若无有因则无觉观，若无觉观是名默然。善男子，如是等法其义甚深，若能信者即得解脱，永离颠倒烦恼障碍，即能受持过去、未来、现在诸佛所有法藏，是大船师、导师、商主、咒师、医师，则能供养三世诸佛，是名佛子，过于魔业，破诸魔众，不久当得净印三昧，能大庄严坚牢船舫，济渡众生于生死海。”

“世尊，云何菩萨能坏一切诸魔伴党？”

佛言：“菩萨若能不求诸法，尔时则能坏破魔众，不求一切境界因缘。善男子，有四种魔：一者、阴魔，二者、烦恼魔，三者、死魔，四者、天魔。善男子，若能观法如幻相者，是人则能破坏阴魔；若见诸法悉是空相，是人则能坏烦恼魔；若见诸法不生不灭，是人则能破坏死魔；若除憍慢，则坏天魔。复次，善男子，若知苦者能坏阴魔，若远离集破烦恼魔，若证灭者则坏死魔，若修道者则坏天魔。复次，善男子，若见一切有为法苦则坏阴魔，若见诸法真实无常坏烦恼魔，若见诸法真实无我能坏死魔，若见诸法寂静涅槃能坏天魔。复次，善男子，菩萨若能于身无贪，舍身施时回向菩提能坏阴魔；施时远离悭贪之心坏烦恼魔；若观财物一切无常能坏死魔；为众生故修悲布施能坏天魔。复次，善男子，若有菩萨不为我见受持净戒能坏阴魔；不为有贪受持净戒坏烦恼魔；若为远离生死过失受持净戒能坏死

魔；若能生心令毁禁者悉持净戒，受持净戒则坏天魔。复次，善男子，若有菩萨不见我忍、我修于忍则坏阴魔，不见众生有修忍者坏烦恼魔，不见生死则坏死魔，不见菩提则坏天魔。复次，善男子，若有菩萨勤修精进，其身寂静则坏阴魔；勤行精进，其心寂静坏烦恼魔；勤行精进，观法无生能坏死魔；勤行精进，为调众生令转生死则坏天魔。复次，善男子，若有菩萨不为五阴修集禅定能坏阴魔，不著界处修集禅定坏烦恼魔，不著入处修集禅定能坏死魔，所有诸善回向菩提能坏天魔。复次，善男子，若有菩萨知阴方便能坏阴魔，知界方便坏烦恼魔，知入方便能坏死魔，以如是等种种方便回向菩提能坏天魔。复次，善男子，若有菩萨观一切法皆是空相能坏阴魔，观一切法悉是无相坏烦恼魔，观一切法悉是无愿能坏死魔，具是三法回向菩提能坏天魔。复次，善男子，若有菩萨观身身处不觉不著能坏阴魔，观受受处不觉不著坏烦恼魔，观心心处不觉不著能坏死魔，观法法处不觉不著能坏天魔。作如是观，终不失于菩提之心，是人则能坏破四魔。

“善男子，若著我者则增魔事。菩萨摩诃萨亦知有我，亦知无我。若有法非有我、非无我，如是则无一法增减。一切众生无明所覆，是故菩萨为欲庄严无上大乘，非为我故而发庄严，发庄严已作是思惟：‘谁庄严法坚固不坏？我当庄严！我亦不为坏我、众生、寿命、士夫而行庄严，为破众生著我邪惑、众生、寿命、士夫等见而行庄严。众生颠倒见是五阴常、乐、我、净，我为说如是无常、苦、空、无我，为令众生得真实智。’若有众生心有愿求，当知是人即名为著。若不愿求则无有著，若不著者是不诳，若不诳者得真实智，知于过去、未来、现在，不著过去、未来、现在。何以故？过去已尽，未来未至，现在不住。若于三世不作著想，名不颠倒，名菩萨行。了知一切众生诸行，知已了了说业及果，亦知贪行、瞋行、痴行，知有众生行于贪欲庄严于瞋，行于瞋恚庄严于贪，行于愚痴庄严于贪，行于贪欲庄严于痴，行于瞋恚庄严于痴，行于愚痴庄严于瞋。

“善男子，有诸众生于色生贪，于声生瞋。复有众生于声生贪，于色生恚。复有众生于香生贪，于味生恚。复有众生于味生贪，于香生恚。复有众生于触生贪，于法生恚。复有众生于法生贪，于触生恚。复有众生贪欲羸劣，瞋恚猛健。复有众生贪欲猛健，瞋恚羸劣。复有贪羸痴健，痴羸贪健，瞋羸痴健，痴羸瞋健。或有众生为色调伏，非为声香味触法等；有为声调伏，非为色香味触法等；有为香调伏，非为色声味触法等；有为味调伏，非为色声香触法等；有为触调伏，非为色声香味法等；有为法调伏，非为色声香味触故。复有众生心寂静故而得调伏，非身寂静而得调伏。或有众生身寂静故而得调伏，非心寂静而得调伏。或有众生闻说无常而得调伏，非因于苦、不净、无我而得调伏。或有众生闻说苦故而得调伏，非因无常、不净、无我而得调伏。或有众生闻说不净而得调伏，非因无常、苦、无我等而得调伏。或有众生闻说无我而得调伏，非因无常、苦、不净等而得

调伏。复有众生见身神通而得调伏，非他心智而得调伏；或有众生因他心智而得调伏，非因神通而得调伏。

“善男子，有诸众生勤修精进迟得解脱，有少精进速得解脱，有勤精进速得解脱，有少精进迟得解脱，有因解脱非缘解脱，有缘解脱非因解脱，有因缘解脱非因缘解脱。有诸众生观于内法而得解脱，非观于外；有观于外而得解脱，非观于内；有观内外而得解脱；有不观内外而得解脱。有诸众生因乐行故而得解脱，非因苦行；有因苦行而得解脱，非因乐行；或因苦乐而得解脱；或有不因苦行、乐行而得解脱。有诸众生因赞美故而得调伏，非因呵责；或因呵责而得调伏，非因赞美；或因赞毁而得调伏；或有不因而得调伏。有诸众生因逆说法而得调伏，不因顺说；或有因顺而得调伏，不因于逆；或因逆顺而得调伏；或有非因逆顺说法而得调伏。有诸众生因闻略说而得调伏，非因于广；或有因广而得调伏，非因于略；有因广略而得调伏；或有不因广略说法而得调伏。有诸众生因四真谛而得调伏，有因念处而得调伏，有因正勤而得调伏，或因如意而得调伏，或因五根而得调伏，或因五力而得调伏，或因七觉而得调伏，或因八道而得调伏。

“善男子，众生之行不可思议，众生之心亦不可思议，众生调伏不可思议，所入法门不可思议，众生境界不可思议。菩萨摩訶萨获得如是不可思议智，然后乃知一切众生所行之行不可思议。善男子，譬如罗网多有诸结，有人在中以咒术力，破网得出随意而去；菩萨摩訶萨亦复如是，入众生中以智咒力，坏烦恼网随意自在，虽未证得阿耨多罗三藐三菩提，而能通达众生所行。”

尔时，舍利弗白佛言：“世尊，菩萨摩訶萨初发无上菩提心时，闻诸众生有如是行，不惊不怖，是事实难不可思议。”

佛言：“舍利弗，于意云何？如师子子，虽复初产，闻师子吼，有怖畏不？”

“不也，世尊。”

“菩萨摩訶萨初发无上菩提心时，闻众生行亦复如是。舍利弗，于意云何？火势虽小，畏干薪不？”

“不也，世尊。”

“菩萨摩訶萨初发无上菩提心已，得智慧火亦复如是。舍利弗，如来今以非喻为喻。舍利弗，譬如猛火与诸干薪，结期七日当大战斗。尔时，一切干树草木种种枝叶悉共聚合如须弥山。尔时，猛火有一亲友而语之言：‘汝今何故，不自庄严多求援助？彼薪众多，汝唯一己，何能当之？’时火答言：‘彼怨虽多，我力能敌，不须伴党。’舍利弗，菩萨摩訶萨亦复如是，虽诸烦恼悉共和合其势炽盛，菩萨智慧力能消灭。舍利弗，菩萨摩訶萨有二种力：一、烦恼力，二、智慧力。菩萨若无烦恼力者，则不能共诸众生行，亦不能知众生行处，亦当证于声闻、缘觉。是故菩萨以烦恼力遍游诸有不生怖畏，是名菩萨行于方便。

“舍利弗，如小毒蛇不须伴侣，初发心者亦复如是。舍利弗，譬如萤火虽有无量千万亿数，不能障蔽日之光明；菩萨摩訶萨亦复如是，虽有烦恼无量无数，不能障蔽菩萨智光。舍利弗，如阿伽陀一丸之药能破大毒；菩萨智慧亦复如是，小智慧药能坏无量烦恼毒。舍利弗，譬如天降一味之水，随地差别得种种味；菩萨摩訶萨一解脱智亦复如是，随众生根说种种异。舍利弗，如阎浮树下有金泥，是金泥中有种种宝；菩萨摩訶萨初发菩提金泥心中，亦复有声闻、辟支佛宝。舍利弗，如余小王，一切悉属转轮圣王；一切人天亦复如是，悉来归属初心菩萨。舍利弗，如薄福人不遇宝雨；若不能于无量佛所种诸善根，则不能发菩提之心。舍利弗，无甘蔗子则无种种石蜜诸味；若无菩提心者，亦无种种三宝诸味。舍利弗，如耆婆医王常作是言：‘天下所有无非是药。’菩萨亦尔，说一切法无非菩提。舍利弗，如阿修罗王尽其势力，不能遮障日月之道；一切魔众亦复如是，尽其势力不能遮障勤行菩萨修菩提道。舍利弗，如色界天宫殿屋宅依空而住；勤行菩萨所得菩提，亦复如是依空而住。舍利弗，譬如虚空悉能容受一切万物，而是虚空初无增减；无量佛法亦复如是，虽有菩萨发心推求，而是佛法亦无增减。舍利弗，譬如有人任力游空，而虚空性无增无减；菩萨亦尔，住其信力行于佛智，而是佛智亦无增减。舍利弗，譬如陶师未成器时不得器名；菩萨善法亦复如是，未发心时亦不得名。舍利弗，如人已见转轮圣王，则不求见诸余小王；菩萨亦尔，若已发起菩提之心，则不更发声闻、缘觉心。舍利弗，如余处中不出众宝，众宝要出于大海中。舍利弗，声闻宝中不出三宝，三宝要从菩萨宝出。舍利弗，譬如太子不名为王，非不名王；菩萨摩訶萨亦复如是，非名为佛，非不名佛。舍利弗，譬如小宝亦不可轻。何以故？如是小宝能作大事，多所利益。菩萨亦尔，初发心时亦不可轻。舍利弗，我今为诸菩萨摩訶萨说如是喻，若有菩萨闻是诸喻即得安乐。”

尔时，世尊即说颂曰：

“若欲证得于佛道，应当除灭疑网心，
勤修无上信心者，即能获得于菩提。
若修净印三昧者，宣说诸法皆如梦，
无量世中净其心，即能得证正觉道。
佛所得道非身业，亦非口意二业等，
无为真实性亦尔，是故不可以喻说。
佛道无对不可见，非眼识界如虚空，
非是一切诸情根，又非诸根之境界。
非相非阴非入界，非是心意受想识，
非知非知之境界，是故佛境不可知。
诸佛大悲难思议，无量无边无障碍，
无字无声不可说，是故无能知佛界。”

若有众生无量世， 亲近善友听正法，
闻已即得大福德， 常受妙乐如先佛。
一切诸魔不得短， 诸根调伏行乐处，
能以方便坏四魔， 如法而住行佛界。
若行如是菩提道， 即得菩提为人说，
能渡众生生死海， 能破一切大邪见。
即得无上相好等， 成就十力四无畏，
能知众生烦恼行， 能坏一切诸有道。
若有菩萨勤精进， 即能破坏诸烦恼，
如火能焚干草木， 菩提心能烧烦恼。”

尔时，世尊复告海慧菩萨言：“善男子，菩萨摩訶萨勤行精进，易得阿耨多罗三藐三菩提。谁有修行勤精进者，当知是人即有菩提。谁有精进，是人即具檀波罗蜜、尸波罗蜜、羼提波罗蜜、毗梨耶波罗蜜、禅波罗蜜、般若波罗蜜，能自利益亦利于他。

“善男子，过去无量劫有佛世尊，号勤精进如来、应、正遍知、明行足、善逝、世间解、无上士、调御丈夫、天人师、佛世尊，国名善见，劫名华聚。尔时，世界大水弥漫，其水出生八万四千上妙莲华，一一纵广满十由旬，有无量亿金色光明，其香微妙。阿迦膩吒诸天见已，多受安乐，作如是言：‘是世间中多有莲华，当知亦当多有佛出。’是故此劫名曰华聚。是时，彼国寂静无声；以寂静故，无量世界诸菩萨等常乐观察；以观察故，各各皆得喜行三昧，是故彼世名曰善见。其国多有七宝林树楼阁殿舍，众生安乐如兜率天，多饶饮食，易获神通，无有女身一切化生，亦无二道，皆修大乘。

“尔时，彼佛有三万六千出家菩萨皆悉获得不退转心，无量人天初发菩提坚固不退。彼佛世尊常乐宣说勤精进行。时大众中有一菩萨，名坚固庄严，从座而起，前礼佛足，长跪合掌，作如是言：‘世尊，云何菩萨勤行精进？’佛言：‘善男子，勤行精进凡有四法。何等四？一者、发心，二者、作心，三者、观心，四者、如法住。如是四法即是具足佛法因缘。何以故？善男子，发者即是生善法因，作者名为增善法因，观者名为利众生因，如法住者名入一切佛法因缘。又复发者求闻正法，作者闻已能说，观者善思惟义，如法住者如说而住。又复发者调伏慳心，作者能一切施，观者为众生施回向菩提，如法住者不求施果。又复发者求觅受人，作者见来求生慈愍心，观者观财无常，如法住者不求果报。又复发者如法求财，作者求于净命，观者于不坚物修于坚法，如法住者一切舍时不生憍慢。又复发者离诸恶戒，作者至心受持诸净禁戒，观者至心调伏毁禁之人，如法住者净持禁戒不生憍慢。又复发者净于口业，作者净于身业，观者净于意业，如法住者修集善法。又复发者远离瞋心，作者修集忍辱，观者将护自他，如法住者修忍辱已不生憍慢。又复发者常乐教化邪见众生，

作者能坏众生瞋恚之心，观者不见内外，如法住者远离一切烦恼诸结。又复发者远离懈怠，作者勤修精进，观者调伏一切懈怠众生，如法住者劝诸众生令修精进。又复发者名为善慈，作者所作已竟，观者不求余乘，如法住者不失无上菩提之心。又复发者庄严禅支，作者庄严三昧，观者终不生于相似我慢，如法住者破坏众生行恶之心。又复发者庄严念心，作者庄严诸有，观者其意坚固，如法住者勇健无怯。又复发者名如法因，作者名如方便，观者名为门户，如法住者名为解脱。又复发者谓求名字，作者持于文字，观者字不可说，如法住者远离文字。又复发者离恶知识，作者亲近善友，观者于善友所至心听法，如法住者不谬解义。又复发者乐于舍家，作者远离怨亲，观者求于善法，如法住者不随他意。又复发者所谓少欲，作者所谓知足，观者易养易满，如法住者善知时宜。又复发者如戒而学，作者于戒不漏，观者如意学戒，如法住者如慧学戒。又复发者檀波罗蜜、尸波罗蜜，作者麁提波罗蜜、毗梨耶波罗蜜，观者禅波罗蜜、般若波罗蜜，如法住者智波罗蜜、方便波罗蜜。又复发者行施摄取，作者软语摄取，观者利他摄取，如法住者同利摄取。又复发者所谓大慈，作者所谓大悲，观者所谓大喜，如法住者所谓大舍。又复发者护持正法，作者净于福田，观者庄严相好，如法住者调伏众生。又复发者实知阴魔，作者离烦恼魔，观者坏于死魔，如法住者摧伏天魔。又复发者谓身念处，作者谓受念处，观者谓心念处，如法住者谓法念处。又复发者了了知苦，作者远离于集，观者证真实灭，如法住者谓修于道。又复发者所谓信根，作者谓精进根，观者所谓念根，如法住者所谓慧根。又复发者谓七觉分，作者谓八正道，观者谓舍摩他，如法住者毗婆舍那。善男子，如一切行皆名为发，修一切善悉名为作，一切净心名之为观，知一切业名如法住。’

“善男子，彼佛复告坚固庄严：‘善男子，勤精进者寂静其心，心若寂静即是精进，若坏贪身即是精进，若知身意即是精进，断我我所即是精进，断诸系缚即是精进，障烦恼尽即是精进，若能远离一切障碍即是精进，若能除却十种憍慢即是精进，能坏贪恚即是精进，若能远离无明有爱即是精进，若不放逸者修于善法即是精进，若能真实观内外入即是精进，若真实知阴界诸入即是精进，心寂静者即是精进，破坏疑心即是精进，若于三世不分别者即是精进，若观法界不动转者即是精进，若不漏者即是精进，若不害者即是精进，若不生悔即是精进，若不求者即是精进，若不灭者即是精进，若不作者即是精进，若无增减即是精进，无上无下即是精进，不舍不著即是精进，不缚不解即是精进，不去不来即是精进，不生不灭即是精进，非有放逸非不放逸即是精进，无作作者即是精进，无闇无明即是精进，非见非不见即是精进。’

“善男子，彼佛说是精进法时，无量菩萨得无生忍。善男子，今此会中五千菩萨亦得如是无生忍法，七千天人发阿耨多罗三藐三菩提

心。善男子，尔时坚固庄严菩萨闻是法已，为得如是无量法故，勤修精进获得下忍，为求法故不坐不卧乃至命终；既舍身已得生梵世，受梵天身于无量世，供养于佛听受正法，于彼劫中，周遍供养八万四千诸佛如来，听受正法勤行精进。善男子，汝知尔时坚固庄严岂异人乎？即我身是。善男子，我久具足是精进故，超弥勒等诸大菩萨先成正觉。是故我言谁有精进，当知是人即有菩提。善男子，我勤精进，犹尚难得阿耨多罗三藐三菩提，况懈怠耶？若有菩萨能精进者，是人则能自利利他。”

尔时，世尊即说颂曰：

“我念过去无量世，	华聚劫中精进佛，
善见世界水弥漫，	出生八万四千华。
其国犹如兜率天，	丰饶饮食无女身，
不由父母悉化生，	亦无二道纯一乘。
十方世界诸菩萨，	观善见国受安乐，
三万二千出家众，	无量人天发菩提。
尔时彼佛赞精进，	唯为坚固菩萨说，
若能发心勤修善，	系心思惟如法住。
尔时世尊为我故，	分别广说是四句，
发菩提心如法行，	思惟得忍如法住。
若求正法名初发，	如法而说名为作，
受义不谬善思惟，	修集于忍如法住。
若勤行施是初发，	求觅受者名为作，
明见无常善思惟，	不观二相如法住。
如法求财是初发，	清净活命是名作，
破坏悭心善思惟，	不求憍慢如法住。
远离恶戒是初发，	不漏护戒是名作，
调伏毁戒善思惟，	戒净无慢如法住。
远离恶口是初发，	其心寂静是名作，
其心寂静善思惟，	诸法寂静如法住。
远离害心是初发，	修集忍辱是名作，
将护自他善思惟，	忍不生慢如法住。
诱喻瞋者是初发，	远离恶人是名作，
内外寂静善思惟，	不著我心如法住。
远离懈怠是初发，	勤修精进是名作，
知于真实善思惟，	修集于道如法住。
始求善法是初发，	求已毕竟是名作，
念心受持善思惟，	不失于法如法住。
求于禅支是初发，	修集三昧是名作，
无相似慢善思惟，	无有过失如法住。

念慧之心是初发，获得法门是名作，
拥护正法善思惟，勇健精进如法住。
正念因缘是初发，修善方便是名作，
观于内法善思惟，得解脱已如法住。
始求文字是初发，通达解了是名作，
知不可说善思惟，了无文字如法住。
远离恶友是初发，亲善知识是名作，
闻已如闻善思惟，不远离法如法住。
佛法出家是初发，除舍怨亲是名作，
修集善法善思惟，不随他意如法住。
少欲知足名发作，乐于寂静善思惟，
住寂静已说无诤，亦自修集如法住。
从戒而学是初发，不行漏戒是名作，
无戒之戒善思惟，从智慧戒如法住。
不说世事是初发，常乐寂静是名作，
易养易满善思惟，观察无常如法住。
乐修施戒是初发，忍辱精进是名作，
修禅智慧善思惟，修智方便如法住。
行施摄取是初发，软语摄取是名作，
利益众生善思惟，自利利他如法住。
修集慈悲名发作，不别三世善思惟，
为诸众生净身心，修集喜舍如法住。
获得正法是初发，清净福田是名作，
庄严自身善思惟，调伏众生如法住。
破坏阴魔是初发，离烦恼魔是名作，
能坏死魔善思惟，摧魔怨敌如法住。
修集身念是初发，修集受念是名作，
修集念心善思惟，修集法念如法住。
了了知苦是初发，远离于集是名作，
证灭真实善思惟，修于正道如法住。
修于信根是初发，修集诸力是名作，
修念三昧善思惟，修于智慧如法住。
身心寂静是初发，远离邪见是名作，
观于名色善思惟，精进不悔如法住。
无我我所是名发，无缚无解是名作，
无去无来善思惟，法性不动如法住。
远离憍慢是初发，除去贪恚是名作，
观十二缘善思惟，离痴有爱如法住。
若能远离一切相，破坏所有诸障碍，
具足十力四无畏，能说功德勤精进。

如来说是精进法，十千众生悟无生，
五千菩萨得法忍，无量人天发菩提。
坚固庄严我身是，精进超过诸菩萨，
若欲获得上真道，当修精进如先佛。”

尔时，修悲梵天语海慧菩萨言：“所言佛法，佛法者，云何名佛法？”

海慧菩萨言：“梵天，佛法者名一切法，一切法者名为佛法。如佛法性即一切法性，如一切法性即佛法性，佛法性、一切法性无有差别。一切法寂静，佛法亦寂静；一切法空，佛法亦空。梵天，一切法即十二因缘，菩提者亦十二因缘。”

梵天言：“善男子，夫佛法者，将不过于三界法耶？”

“梵天，三界、佛法性无差别。三界平等，佛法平等，无有二相。善男子，譬如虚空无有增减；佛法亦尔，无增无减，性是空故无上无下。梵天，若善男子欲见佛法，当作是观。复次，梵天，夫佛法者，非处非非处，非生非灭，非青黄赤白班驳琉璃虚空界色、杂色、无色，非有形质方圆修短，无相无相相，无缚无解，无如是相，名为佛法。无相无句无有文字，清净寂静，空义、无相义、无聚义、毕竟无出义、觉知义，不可宣说，不可睹、不可见者名寂静义，寂静义者即是空义，空义者即无聚义，无聚义者即真实义，真实义者即是毕竟不出之义，毕竟不出义者即不灭义，不灭义者即无处义，无处义者即是法性，法性者即是佛法，是名学法、名阿罗汉法、名缘觉法、名为佛法。如是佛法及余诸法，亦无住处不出不灭，无色形质方圆修短，无智相貌，无明无闇，一切诸法等无差别。求佛法者，谓佛佛法及一切法。菩萨摩訶萨坐于道场菩提树下，乃能了了真实知见。何以故？诸佛正法无住处故，一切诸法亦无住处；佛法不可得，一切诸法亦不可得；佛法平等，一切诸法亦复平等。若无因缘即无种性，若无种性即无出灭，若无出灭即名真实，真实知者即是实性。过去、未来、现在诸法即是佛法。何以故？通达三世无障碍故。无障碍者即是佛智，佛智者即是十八不共之法，不共之法者摄一切法，是故诸法即是佛法，诸法、佛法无二无别。”

梵天言：“善男子，汝今了了见佛法不？”

“梵天，佛法非色不可睹见，汝云何言了了见耶？一切诸法悉不可见。夫了了者即是佛法，无有二相。”

梵天言：“善男子，如来何故，说佛知见一切诸法？”

“梵天，如来佛法若有定相，可得说言了了知见。”

“善男子，佛法无耶？”

“梵天，法若无定，不可说有，不可说无。若不可说有无相者，云何得言了了知见？”

“善男子，如来云何说于佛法？”

“梵天，如说虚空，虚空之性实无定相，佛法亦尔。”

“善男子，佛法如是是不可思议。菩萨初发菩提心时，闻如是法，不惊不怖，不可思议，正觉之性亦不可思议。”

“梵天，佛所说者，乃能发是菩提之心，是故闻之不生怖畏。梵天，若有著者则生怖畏，若不著者不生怖畏；惜身命者则生怖畏，不惜身命无所怖畏；有障碍者则生怖畏，无障碍者无所怖畏；著我我所则生怖畏，断我我所无所怖畏。”

“善男子，菩萨摩訶萨有何力故闻深佛法不生怖畏？”

“梵天，有八种力，闻深佛法不生怖畏。何等为八？一者、信力，二者、善友力，三者、多闻力，四者、善根力，五者、善思惟力，六者、破憍慢力，七者、大慈悲力，八者、如法住力。梵天，菩萨具足如是八力，闻说深法不生怖畏。”

尔时，世尊赞海慧菩萨言：“善哉！善哉！善男子，善能宣说菩萨诸力。实如汝言，菩萨具足如是诸力，闻深佛法不生怖畏。善男子，一切言说名之为声。菩提之性，亦不可说，亦不可见，不可说见名第一义。如来了了知见如是不可宣说，愍众生故而为宣说菩提，非心亦非心数，何况声字？善男子，如来怜愍诸众生故觉甚深法，觉甚深法已，无知无觉，无心心数，无声无字，不可宣说，为众生故说有文字、音声、次第。善男子，譬如虚空非是色法，不可睹见，非对非作。善男子，有人善画，画空作像，若男、若女、若象、若马，如是之人可思议不？”

“不也，世尊。”

“善男子，是犹可信。如来世尊知不可说，而能演说，是事甚难！虽复说此不可说法，然真实知性不可说。善男子，若闻是法不惊不怖，当知是人久于无量诸如来所种诸善根。善男子，如是经典不可思议。若有人能受持读诵，书写解说，是人则能受持一切诸佛法藏，摄取一切众生解脱。善男子，若有菩萨了了得见无量世界所有诸佛，见已即以上妙七宝满是世界，持用奉献诸佛世尊，是人福德宁为多不？”

“甚多，世尊，如是功德难以喻说。”

“善男子，不如有人拥护正法为怜愍故，受持读诵解说是经。何以故？法施之施胜于食施。夫食施者即是世施，法施之施是出世施。善男子，若人能护佛正法者，即为四摄。何等为四？一、为佛摄，二、为天摄，三、为福摄，四、为智摄。佛摄众生，复有四事：一者、常得亲近诸佛，二者、诸魔不得其便，三者、获得无尽陀罗尼，四者、得住不退转地。天摄众生，亦有四事：一者、说法之处诸天清净，二者、说法之时众乐受听，三者、终不为他因缘所害，四者、不信者信。福摄众生亦有四事：一者、庄严于身，三十二相、八十种好；二者、庄严于口，凡所演说众生乐闻；三者、庄严佛土；四者、庄严种姓，所谓释、梵、转轮圣王。智摄众生亦有四事：一者、知众

生根如意说法，二者、知众生病苦随病施药，三者、得大神通游诸佛土，四者、了了通达法界。善男子，若欲获得如是功德，应当勤心护持正法。”

尔时，世尊即说颂曰：

“若能护法生怜愍， 受持是经及广说，
我说千分中一分， 犹如大海取一涸。
知恩念恩念如来， 是人可信付法藏，
供养无量十方佛， 如是则能护佛法。
虽施无量国珍宝， 不如至心诵一偈，
法施最妙胜食施， 是故智者应护法。
十方诸佛天龙神， 功德智慧所摄取，
庄严修行诸相好， 是人皆由护正法。
常遇诸佛善知识， 常闻无上真实道，
速得无量陀罗尼， 是人皆由护正法。
身口意戒得清静， 具大神通游诸国，
不退菩提具六度， 是人皆由护正法。
世界微尘可说尽， 护法功德不可量，
欲得不可宣说知， 应当坚心护正法。”

尔时，众中有一菩萨，名功德宝光，即从坐起，头面敬礼，长跪合掌，前白佛言：“世尊，如来于是大经典中，说言佛法不可宣说。若不可说，云何可护？”

佛言：“善哉！善哉！善男子，如是，如是，如来正法实不可说。如来觉知不可说法，如是正法虽不可说而有字句，以字句故可得宣示，如是字句受持读诵、书写解说，是名护法。善男子，复有护法，见有受持读诵、书写解说之者，恭敬供养，亲近礼拜，尊重赞叹，生于师想，拥护供给衣服、饮食、卧具、汤药、房舍、灯烛，闻其所说称赞善哉，护其种姓所住宅舍，亦复护其侍使之等，闻恶隐蔽，闻善称扬。善男子，若能拥护是持法者，是人即能护佛法僧。复次，善男子，若有能修空无相愿，是人即是护持正法。复次。善男子，见有诽谤方等经者，不与同止，言语谈论调伏其罪，是人即是护持正法。复次，善男子，若有人能修集悲心无饮食想，怜愍众生，宣说正法，是名护法。复次，善男子，不惜身命受持读诵、书写解说如是等经，是名护法。复次，善男子，若有听法一字一句，往一由旬乃至七步入出息顷，是名护法。

“善男子，过去无量阿僧祇劫，有佛号曰大知声力如来、应、正遍知、明行足、善逝、世间解、无上士、调御丈夫、天人师、佛世尊，国名净光，劫名高显，其土纯是青琉璃宝。诸菩萨众一切成就无量势力，具足神通，智慧无碍。一切菩萨悉受天身，至心听法，无有

出家、在家差别。尔时，世尊为护法故，与诸大众颁宣正法。彼时，会中有一菩萨，名曰法慧，白佛言：‘世尊，何等是法而言拥护？’佛言：‘善男子，夫六入者乐求境界，若能遮止是名护法。善男子，眼识于色是名非法，若能远离是名护法；乃至意识于法亦复如是。善男子，若见眼空见已，不观于色，不著于识，是名为法；若能真实知如是法，是名护法。乃至若见意空，见已不观于法，不著于识，是名为法；若能真实知如是法，是名护法。善男子，若法能生法，于是法中不求不取，心不贪著，是名护法。若有见法能生邪见，于是见中不求不取，心不贪著，是名护法。若有无明不能净心，于是垢中不求不取，心不贪著，是名护法。善男子，若有一法求取之后不能施人，此法非法，亦非比尼。若能施者，即是正法，即是比尼。若有无取无求无施，即是正法，即是比尼。夫取求者，即是非道；若不施，即是非法，即非比尼。若能施者，即是正法，即是比尼。不取不求不施，即是不出生不灭；若非出生灭，云何可施？不可施者乃名为法，乃名比尼。何以故？未生烦恼作障因缘故。是故无尽，无尽者无出，无出者名为法，名为比尼。于如是法不求不取，是名护法。’善男子，尔时彼佛说是法时，三万二千菩萨得无生法忍。

“海慧菩萨言：‘世尊，如我解佛所说义者，法及非法是名为法。何以故？若有分别法、非法者，是人不能护持正法。若作法相，是名非法。世尊，若能了达见一切法是无法者，是名第一真实之义。世尊，若无法、无非法即是无数，若无数者即是实性，实性者名为虚空，虚空之性无边无节；法性亦尔，法性、实性无有差别。何以故？无边无节故。若有菩萨见如是等，即真实见。世尊，我不见一法，以不见故，不见有增，不见有减。世尊，我如是见，将不诽谤如来说耶？是实见不？’善男子，如是见者，不谤如来，是真实见。’说是法时，海慧菩萨及万天人得无生忍。善男子，汝知尔时海慧菩萨岂异人乎？即我身是。是故我于无量世中，所求正法今以付汝。”

尔时，众中有六万亿诸菩萨等，同共发声白佛言：“世尊，我等当共拥护正法，受持广说。”

佛言：“善男子，汝今云何如法而住护持正法？”

山王菩萨即作是言：“世尊，惜身命者不能护法；我不惜命，如法而住，故能护法。”

功德山王菩萨言：“世尊，有贪利者不能护法；我无贪利，故能护法。”

宝幢菩萨言：“世尊，若见有法、非法二相，不能护法；我无二相，故能护法。”

福德藏菩萨言：“世尊，具烦恼者不能护法；我有智力，已远离之，故能护法。”

持炬菩萨言：“世尊，不破闇者不能护法；我今破闇，故能护法。”

电光菩萨电光菩萨言：“世尊，若随他心不能护法，我随意，故能护法。”

遍藏菩萨言：“世尊，不调诸根不能护法；我今调伏，故能护法。”

净光菩萨言：“世尊，若作种种诸法相者，不能护法；我今于法无种种相，故能护法。”

增行菩萨言：“世尊，心狂乱者不能护法；我修三昧，故能护法。”

商主菩萨言：“世尊，不知道者不能护法；我今了知，故能护法。”

善念菩萨言：“世尊，有疑心者不能护法；我已断疑，故能护法。”

善见菩萨言：“世尊，不如法住，不能护法；我如法住，故能护法。”

慧光菩萨言：“世尊，愚痴之人不能护法；我今修智，故能护法。”

平等菩萨言：“世尊，取怨亲相不能护法；我今平等，故能护法。”

法行菩萨言：“世尊，不知众生诸根境界，不能护法；我今知之，故能护法。”

神通王菩萨言：“世尊，见我我所不能护法；我今不见。故能护法。”

师子吼菩萨言：“世尊，不知佛性，不能护法；我今知之，故能护法。”

弥勒菩萨言：“世尊，若远菩提，不能护法；我今已近，故能护法。”

功德聚菩萨言：“世尊，若无无量功德聚者，不能护法；我今已有，故能护法。”

文殊师利言：“世尊，如是等语悉是谬语。何以故？如来世尊坐于道场菩提树下不得一法，汝云何言‘我当护法’？世尊，我于诸法不取不舍，为众生故修集悲心，不护不舍。”

尔时，佛赞文殊师利言：“善哉！善哉！善男子，如来昔坐菩提树下实无所得，无所得故便从中起。”

文殊师利言：“如来真实坐于道场菩提树耶？何故而言从坐而起？世尊，如来若坐菩提树下，如来世尊则有二相：一者、如来，二者、菩提。如来世尊已离二相。”

佛言：“善男子，菩提、众生一切法性等无差别，一味一性。如来坐于菩提树下见如是法，是故名为逮得菩提。我都不见离菩提外别有一法，见一切法皆悉平等。而是平等不入于数，是故平等名为无碍，以是因缘，如来名为一切无碍。善男子，若能如是见如来者，是

人即得如来解脱；得解脱已，则能如是真实知见。”

说是法时，海慧菩萨所将眷属诸菩萨等，欢喜踊跃，各作是言：“我等今者得大利益，现见释迦牟尼如来，及见文殊师利菩萨！世尊，随是经典所住世界，当知其土得大利益。若有供养是经典者，及有受持读诵、书写、广说其义，亦得利益。”

尔时，世尊告诸菩萨言：“汝今知得何等利益？”

诸菩萨言：“世尊，我等当以如是之义咨问文殊。”诸菩萨言：“文殊师利，云何名为得大利益？”

文殊师利言：“有十利益。何等为十？佛出于世见已生信，既生信已听受正法，闻正法已永坏疑心，坏疑心已得清净命，得清净命已不为利说法，彼闻法已发菩提心，既发心已坚固不退，心不退已如法而住，如法住已得无生忍。诸善男子，是名十利不可思议。”

说是法时，三万六千众生发阿耨多罗三藐三菩提心；三千大千世界大地六种震动，出金色光。

尔时，海慧菩萨白佛言：“世尊，是大乘经能多利益无量众生。何以故？一切众生因大乘故，得人天乐及涅槃乐。世尊，夫大乘者，何法摄取？何法利益？何法难得？何法障碍？何因缘故名为大乘？”

佛言：“善男子，有一法摄取大乘，所谓初发菩提之心，既发心已修不放逸。复有一法，明信业果。复有一法，观十二缘。复有一法，于诸众生其心平等，乐修大慈。复有一法，谓不退失菩提之心。复有一法，所谓念佛。复有一法，如法住已念于正法。复有一法，以不退心念于众僧。复有一法，不失道心念于净戒。复有一法，远离烦恼心念于舍。复有一法，欲得无量寂静之身专念于天。复有一法，念欲安隐一切众生。复有一法，勤行精进。复有一法，欲令众生悉得解脱，得解脱已受于喜乐。复有一法，乐求正法。复有一法，远离退心为众说法。复有一法，于听法者生爱念心。复有一法，于说法者乐为供养。复有一法，于正法中生药树想。复有一法，于自己身生大医想。复有一法，至心专念护持正法。复有一法，绍隆三宝不令断绝。复有一法，远离懈怠。复有一法，所谓知足。复有一法，于一切财无贪悭想。复有一法，自持戒已能化毁禁。复有一法，自修忍已，能化众生令离瞋心。复有一法，得少利益生大恩想。复有一法，少得恩分生大报想。复有一法，自持净戒不轻毁禁。复有一法，破于憍慢。复有一法，至心求觅听法之人。复有一法，离恶知识。复有一法，至心修善。复有一法，不随他意。复有一法，调伏诸根。复有一法，于法师心如如来想。复有一法，不惜身命护持正法。复有一法，行于世法不为沾污。复有一法，不惜身命求于正法。复有一法，调伏众生受苦不恨。复有一法，如来现在、若涅槃后，供养塔像等无有二。复有一法，众生不请乐为善友。复有一法，于好物中心无贪著。复有一法，乐念出家。复有一法，乐称人善。复有一法，乐求庄严菩提之法。复有一法，于同师同学心无嫉妒。复有一法，教化众生发菩提心心无悔

退。复有一法，覆藏他过。复有一法，求一切语。复有一法，求一切作。复有一法，所谓实语。复有一法，发言之后要终其事。复有一法，于善法所心无厌足。复有一法，随所得物悉与人共。复有一法，善知魔界。复有一法，破坏憍慢修真实知。复有一法，心乐寂静。复有一法，离我我所。复有一法，不自赞叹。复有一法，随俗而行。复有一法，修正命已乐于寂静。复有一法，持净戒已思惟善法。复有一法，修多闻已不生憍慢。复有一法，修善行已即住初地。复有一法，修空三昧观于法性。复有一法，得供养已其心不高。复有一法，乐说世者不与同止。复有一法，得如法物与同学共。复有一法，真实方便。复有一法，一切知己不生贪想。复有一法，未学学已心不生悔。复有一法，既学知己心不轻慢。复有一法，遇骂辱已心不生瞋。复有一法，供养骂辱其心无二。复有一法，闻说正法称赞善哉。复有一法，为欲具足六波罗蜜常求庄严。复有一法，信心不退。复有一法，为菩提道求于庄严。复有一法，受供养已常净己心，为令施主得大利益。复有一法，具足七财。复有一法，能破众生贫穷困苦。复有一法，以善方便调伏众生。复有一法，以四摄法摄取众生。复有一法，不与众生而共诤讼。复有一法，闻法之时，于法师所不求其短。复有一法，未得无上沙门果证心不生悔。复有一法，常行世间，不为八法之所染污。复有一法，常观已过。复有一法，于举罪者不生瞋恚。复有一法，见世间法其心生舍。复有一法，不诤善友。复有一法，先净其心教他令净。复有一法，不为利养受持净戒。复有一法，为增善法修集寂静。复有一法，为于善法修净庄严。复有一法，为净功德而修庄严。复有一法，为净智慧而修庄严。复有一法，修集无想三昧方便。复有一法，如法而忍。复有一法，修三解脱。复有一法，知处非处。复有一法，修舍摩他，为欲庄严毗婆舍那。复有一法，知于解脱。复有一法，观于三世等。复有一法，谓不分别一切法界。复有一法，一切法性不生不灭。菩萨摩訶萨观是百法，如是名为摄取大乘。”

大方等大集经卷第十

海慧菩萨品第五之三

尔时，世尊复告海慧菩萨言：“善男子，有二法利益大乘：一者、乐念佛法，二者、乐离声闻。复有二法：一者、拥护解脱，二者、能演说法。复有二法：一者、求菩提心，二者、调伏众生。复有二法：一者、观菩提心犹如幻相，二者、观诸众生悉无有我。复有二法：一者、不舍菩提之心，二者、观法平等。复有二法：一者、净于善根，二者、无作无净。复有二法：一者、为善法故而修庄严，二者、毕竟。复有二法：一者、自身毕竟，二者、众生毕竟。复有二

法：一者、内净，二者、外净。复有二法：一、不作罪，二、作已悔。复有二法：一、能布施，二、不求报。复有二法：一、平等施，二、能回向。复有二法：一者、持戒，二者、不求善果。复有二法：一、不自誉，二、不毁他。复有二法：一者、忍辱，二者、软语。复有二法：一者、于贪不贪，二者、于瞋不瞋。复有二法：一者、为于善法勤修精进，二者、不轻懈怠。复有二法：一、身寂静，二、心寂静。复有二法：一、求禅支，二、调伏心。复有二法：一、乐在禅定，二、不厌欲界。复有二法：一者、求法，二者、乐法。复有二法：一者、乐观法，二者、欲法。复有二法：一者、乐求善友，二者、恭敬供养。复有二法：一、至心听，二、至心受。复有二法：一、数咨问，二、如法住。复有二法：一者、知法，二者、知义。复有二法：一者、闻已无厌，二者、知已无厌。复有二法：一者、修善，二者、离恶。复有二法：一者、乐说正法，二者、于受法者生怜愍心。复有二法：一者、于法无悭吝心，二者、说时无有食想。复有二法：一者、至心听，二、至心受。复有二法：一、离五盖，二、修七觉。复有二法：一者、喜，二者、乐。复有二法：一者、知己，二者、知时。复有二法：一、信果报，二、作善业。复有二法：一者、不断圣性，二者、实语。复有二法：一者、如说而住，二者、不藏如来功德。复有二法：一者、净身，二者、远离三不善根。复有二法：一者、观身犹如草木，二者、为净心故修行善法。复有二法：一者、净口，二者、远离四过。复有二法：一者、观一切法悉不可说，二者、观声如响。复有二法：一者、净心，二者、远离无明嫉妒邪见。复有二法：一者、内净，二者、外无行处。复有二法：一者、修慈，二者、远离亲怨之想。复有二法：一、观众生犹如虚空，二者、修慈。复有二法：一者、不舍悲心，二者、求善不悔。复有二法：一者、能调不调，二者、调时不悔。复有二法：一者、持法，二者、护持法者。复有二法：一者、乐法，二者、护法。复有二法：一者、称扬人善，二者、乐藏他过。复有二法：一者、离贪，二者、离瞋。复有二法：一者、不舍众生，二者、修舍。复有二法：一者、念佛，二者、知无念处。复有二法：一者、观身，二者、求三十二相。复有二法：一者、念法，二者、化诸众生令住法中。复有二法：一者、观无贪处，二者、于贪者所生于悲心。复有二法：一者、念菩萨僧，二者、依无退僧。复有二法：一者、观于无僧，二者、拥护四沙门果。复有二法：一者、念戒，二者、知菩提心不可宣说。复有二法：一者、观戒无住，二者、护毁禁者。复有二法：一者、念施，二者、施已无悔。复有二法：一者、远离烦恼，二者、离烦恼故演说正法。复有二法：一者、念天，二者、乐寂静。复有二法：一者、具足念心，二者、拥护乱心。复有二法：一者、功德庄严，二者、智慧庄严。复有二法：一者、观无造作，二者、乐修善法。复有二法：一者、无缚，二者、缚者解脱。复有二法：一者、远离诳心，二者、至心清

净。复有二法：一者、知恩，二者、念恩。复有二法：一者、说一切过，二者、而远离之。复有二法：一者、自修圣行，二者、化他令行。复有二法：一者、愿求善法，二者、心无厌足。复有二法：一者、远离恶法，二者、亲近善法。复有二法：一者、请佛说法，二者、至心听受。复有二法：一者、知一切法不生不灭，二者、说字句义。复有二法：一者、知无众生，二者、以己善根与众生共。复有二法：一者、远离诸相，二者、深求三十二相。复有二法：一者、观空，二者、将护众生。复有二法：一者、修集无愿，二者、及愿众生。复有二法：一者、修一切善，二者、愿诸众生同修善根。复有二法：一者、智慧无碍，二者、受诸有身。复有二法：一者、不动，二者、不悔。复有二法：一者、惭，二者、愧。复有二法：一、乐寂静，二、求静法。复有二法：一者、修集无诤三昧，二者、观无众生。复有二法：一者、少欲，二者、知足。复有二法：一者、覆藏他罪，二者、显露己过。复有二法：一者、观十二因缘，二者、深信。复有二法：一者、无我，二者、无众生。复有二法：一者、防自烦恼，二者、坏他烦恼。复有二法：一者、观无作无受，二者、乐修善法。复有二法：一者、观生死过，二者、不断生死。复有二法：一者、自乐生死，二者、化诸众生令度生死。复有二法：一者、求波罗蜜，二者、求已无处。复有二法：一者、求智，二者、化他令同己智。复有二法：一者、不求供养，二者、为供养故造作诸业。复有二法：一者、于有恩处常欲报之，二者、于恩无恩等而报之。复有二法：一者、修不放逸，二者、修无缘慈。复有二法：一者、入于出家，二者、既出家已心生爱乐。复有二法：一者、自成功德，二者、于无德者生怜愍心。复有二法：一者、修于身念，二者、无有念处。复有二法：一者、念于受处，二者、无有念处。复有二法：一者、念于心处，二者、无有念处。复有二法：一者、念于法处，二者、无有念处。复有二法：一者、远离不善之法，二者、亲近能生善法。复有二法：一者、远离已生恶法，二者、护持已生善法。复有二法：一者、为令未生善法得生，二者、为令增广而拥护之。复有二法：一者、获大神通，二者、得已教化众生。复有二法：一者、安住法界，二者、遍见诸佛世界。复有二法：一者、信心不动，二者、化不信者令同己信。复有二法：一者、净心，二者、教化狂乱之人。复有二法：一、勤精进，二、化懈怠。复有二法：一者、具足无碍智慧，二者、化彼无明众生。复有二法：一者、观界，二者、观缘。复有二法：一者、求智庄严，二者、其心不悔。复有二法：一者、观诸烦恼，二者、出烦恼已了知解脱。复有二法：一者、一切法解脱，二者、烦恼不合三界。复有二法：一者、庄严菩提，二者、修学菩提。复有二法：一者、尽智，二、无生智。复有二法：一者、观圣道方便，二者、观生死方便。复有二法：一者、毕竟道，二者、知退转道。复有二法：一者、如法而住，二者、于诸法中不生著见。复有二

法：一者、从缘生灭，二者、从缘解脱。复有二法：一、知魔业，二、知已离。复有二法：一者、于患生忍，二者、于忍生爱。复有二法：一者、为菩提故而修庄严，二者、虽修庄严心无贪著。复有二法：一者、不舍烦恼，二者、不舍修善庄严。复有二法：一者、知处非处，二者、以诸善根回向菩提。复有二法：一者、观菩提心犹如幻相，二者、修向无上菩提庄严。复有二法：一者、观诸众生及以菩提等无差别，二者、知诸众生因缘菩提而得解脱。复有二法：一者、知法无生，二者、为善法故而修庄严。复有二法：一者、不可说法而能宣说，二者、一切众生悉同一乘。

“复有三法：一者、初发菩提之心，二者、亲近善友心不生悔，三者、修集大悲心不退转。复有三法：一者、破坏悭吝，二者、惠施一切，三者、摄取菩提。复有三法：一者、具足净戒，二者、调伏毁禁，三者、回向菩提。复有三法：一者、心不瞋恨，二者、调瞋患者，三者、回向菩提。复有三法：一者、于生死中心无悔退，二者、甘乐营他所作事业，三者、回向菩提。复有三法：一者、得三昧定，二者、不生憍慢，三者、回向菩提。复有三法：一者、求于多闻，二者、得已不生憍慢，三者、回向菩提。复有三法：一者、生缘，二者、法缘，三者、无缘。复有三法：一者、自悲，二者、悲他，三者、离自他悲。复有三法：一者、为于自利修集智慧，二者、以是智慧转化众生，三者、自利利他。复有三法：一者、知过去已尽，二者、知未来无生，三者、知现在无住。复有三法：一者、为正定者修集慈心，二者、为邪定者修集悲心，三者、为不定者修集解脱。复有三法：一者、净身，二者、净口，三者、净意。复有三法：一者、修不净观为坏贪欲，二者、修慈为坏瞋恚，三者、观十二因缘为坏无明。复有三法：一者、安，二者、乐，三者、知足。复有三法：一者、闻已能持，二者、能广分别文字句义，三者、观察罪过。复有三法：一者、具足七财，二者、能大法施，三者、能施众生。复有三法：一者、实义，二者、真义，三者、不诳义。复有三法：一者、自知，二者、知他，三者、知时。复有三法：一者、五阴法阴平等，二者、诸界法界平等，三者、诸入法入平等。复有三法：一者、修空，二者、无相，三者、无愿。复有三法：一者、不谤因果，二者、方便生法皆从因缘，三者、和合因缘而得名。复有三法：一者、信佛不可思议，二者、信法不生诽谤，三者、信僧良祐福田。复有三法：一者、远离贪欲，二者、远离瞋恚，三者、远离愚痴。复有三法：一者、世谛，二者、第一义谛，三者、不著二谛。复有三法：一者、远离烦恼，二者、远离憍慢，三者、于福田所礼拜供养。复有三法：一者、不染欲界，二者、不著色界，三者、于无色界不生憍慢。复有三法：一者、供养不喜，二者、毁辱不恚，三者、离世八法。复有三法：一者、藏覆诸根，二者、解了诸根，三者、寂静诸根。复有三法：一者、趣向善地，二者、离善地障，三者、观善地德。复有三

法：一者、至心，二者、净心，三者、净庄严。复有三法：一者、学戒戒，二者、学心戒，三者、学慧戒。复有三法：一者、受乐不生贪逸，二者、受苦不生恼患，三者、不苦不乐修集于舍。复有三法：一者、转因不造作故，二者、转于烦恼不观相故，三者、转于三世无愿求故。复有三法：一者、眼空，二者、色寂静，三者、受无住处。复有三法：一者、藏戒，二者、护定，三者、观慧。复有三法：一者、忆持念法，二者、思惟观法，三者、如法而住。复有三法：一者、音声因缘声闻解脱，二者、十二因缘缘觉解脱，三者、六度因缘菩萨解脱。复有三法：一者、施，二者、大施，三者、毕竟施。复有三法：一者、护法，二者、护持正法，三者、护持大乘。复有三法：一者、行于生死，二者、观其罪过，三者、知己远离。复有三法：一者、至心听法破除五盖，二者、常乐寂静，三者、如法而住。复有三法：一者、依义，二者、依法，三者、依智。复有三法：一者、求多闻已乐于寂静，二者、乐寂静已思惟善法，三者、善思惟已知法平等。复有三法：一者、亲近智者，二者、咨问多闻，三者、护于善人。复有三法：一、无贪心为人说法，二、见听法者慈心视之，三者、一心观于菩提。复有三法：一者、视诸众生其心平等，二者、观心平等，三者、观佛平等。复有三法：一者、过去已尽，二者、未来不合，三者、现在不住。复有三法：一者、观苦无常，二者、诸法无我，三者、涅槃寂静。复有三法：一者、闻已坚持，二者、三昧坚持，三者、智慧坚持。复有三法：一者、犯已不覆，二者、悔先所犯，三者、至心护戒。复有三法：一者、破坏疑心，二者、破坏悔心，三者、破障碍心。复有三法：一者、善欲，二者、离谈世事，三者、乐于寂静。复有三法：一者、忍甚深法，二者、说甚深义，三者、解种种义。复有三法：一者、具足声忍，二者、具思惟忍，三者、具于顺忍。复有三法：一者、智慧方便，二者、大慈，三者、精进坚牢。善男子，菩萨具足如是等法，能利益大乘。

“善男子，复有四法障碍大乘。何等为四？一者、听不应听，二者、不欲听受菩萨法藏，三者、行诸魔业，四者、诽谤正法。复有四法：一者、贪欲，二者、瞋恚，三者、愚痴，四者、不乐求法。复有四法：一者、嫉他得利，二者、于财悭贪，三者、乐诳法师，四者、不乐亲近见善知识。复有四法：一者、于善知识生恶友想，二者、于恶知识生善友想，三者、非法法想，四者、法非法想。复有四法：一者、不乐惠施，二者、施已生悔，三者、施已观过，四者、不念菩提心。复有四法：一者、为欲而施，二者、为瞋而施，三者、为痴而施，四者、为怖畏而施。复有四法：一者、为名字施，二者、为本而施，三者、为善友施，四者、为胜故施。复有四法：一者、不至心施，二者、不自手施，三者、不现见施，四者、轻慢施。复有四法：一者、下物施，二、少物施，三者、不至心施，四者、轻慢施。复有四法：一者、毒施，二者、刀施，三者、不净施，四者、无利益施。

复有四法：一者、见持戒者生瞋恚心，二者、见毁禁者生爱念心，三者、随恶友语，四者、不念施戒。复有四法：一者、非法求利，二者、如法得财不与人共，三者、断他供养，四者、心不知足。复有四法：一者、为贪利养故摄持威仪，二者、为利养故下声而语，三者、其心谄曲，四者、邪命自活。复有四法：一者、于同学所生瞋恚心，二者、于同乘者生瞋恚心，三者、不知魔业，四者、乐说他过。复有四法：一者、憍慢不听正法，二者、不能恭敬法师，三者、不能礼拜父母师长善友，四者、意随恶业。复有四法：一者、覆他功德，二者、广说他过，三者、增长憍慢，四者、瞋恚坚固。复有四法：一者、懈怠，二者、不乐听闻善语，三者、不随顺语，四者、住于非法。复有四法：一者、不调，二者、不净，三者、不藏，四者、不忍。复有四法：一者、不喜闻受无上善法，二者、乐在城邑聚落村屯，三者、毁破禁戒乐受供养，四者、不能调伏根门。复有四法：一者、不能摄取众生，二者、不能调伏众生，三者、不能护持正法，四者、乐说法师过罪。复有四法：一者、不修信心，二者、不能观察众生罪过，三者、不观恶知识过，四者、不观疑心罪过。复有四法：一者、不观内，二者、不观外，三者、无惭，四者、无愧。复有四法：一、不知恩，二、不报恩，三者、背恩，四者、乐邪见。复有四法：一者、诽谤圣人，二者、将护世人，三者、不信福田，四者、呵毁法施。复有四法：一者、不净身业，二者、不护口业，三者、不舍意业，四者、厌悔大乘。复有四法：一者、为破和合而作两舌，二者、于师和尚出瞋恚语，三者、为坏利益作无义语，四者、欺诳人天而生妄语。复有四法：一者、不护戒因，二者、乱禅定因，三者、不信后世，四者、乐著世事。复有四法：一者、粗糲，二者、憍慢，三者、乐说世间，四者、常乐睡眠。复有四法：一者、假菩萨名而受供养，二者、不能瞻视病苦之人，三者、不种善子，四者、不向菩提。复有四法：一者、自轻，二者、轻法，三者、轻福，四者、数念声闻、辟支佛乘。复有四法：一者、贪身，二者、贪心，三者、贪命，四者、贪戒。复有四法：一者、贪房舍，二者、贪檀越，三者、贪邪见，四者、贪破戒。复有四法：一者、多作，二者、多语，三者、多受，四者、多视。复有四法：一者、我见，二者、邪见，三者、断见，四者、常见。复有四法：一者、不作，二者、作已转，三者、心悔，四者、不乐。复有四法：一者、不向道地，二者、不修禅定，三者、退失智慧，四者、不乐方便。复有四法：一者、障碍于法，二者、障碍善业，三者、烦恼障碍，四者、魔业障碍。善男子，如是等法名障大乘。”

说是法时，四万四千人天发阿耨多罗三藐三菩提心，二万八千菩萨得无生法忍，三千大千世界大地六种震动。虚空之中无量天人，异口同音作如是言：“善哉！善哉！世尊，今日如来大师子吼，怜愍众生开大乘门。世尊，若有众生于是法中得少分者，即得断除三恶道

苦，渐渐当得无量法宝。譬如有人于村邑外见大宝聚，见已怜愍，即还入村告语众人：‘谁欲断贫，当与我俱？’是人说时，或有信者，或不信者。其中信者，即与相随俱至宝所，随意采取即破贫苦，而是宝聚亦无增减，亦不念言‘听是人取、不听彼人’、‘破是人贫、不破彼人’、‘听是持去、不听彼持’。如来世尊亦复如是，于无量世勤求如是无上法宝，求已得见生大怜愍，以大梵音语诸众生：‘若有欲坏生死贫穷，当至心听。’有诸众生薄福不信，则不能坏生死贫穷。其中信者，随任智力，取声闻乘、辟支佛乘、菩萨大乘，是大宝聚亦无增减。若有至此宝聚之中，乃至不能取一宝者，是人常住三恶道中。若有能取一字一句，乃至一念受持之者，是人能坏生死贫穷，何况取是大乘经典一品、二品，及其具足听受读诵，为人解说！”

尔时，世尊赞诸天人：“善哉！善哉！诸天子，若有受持如是经典，是人则具一切善法，顶戴如来无上佛智，是大智聚，能大利益无量众生。”

尔时，世尊以偈颂曰：

“诸乘之中大乘最，犹如虚空无边际，
远离一切生死有，趣菩提树无障碍。
若能清净其心意，所有惠施于一切，
至心受持清净戒，趣菩提树无障碍。
于诸众生心平等，常观烦恼诸罪过，
能胜一切下劣乘，调伏众生于大乘。
若有至心受读经，具足寂静戒忍辱，
具足智慧坏魔众，怜愍众生趣道树。
庄严慈悲乘四禅，智慧利刀摧魔众，
道树下观十二缘，起已愍众说大乘。
十方众生乘大乘，乘无增减如虚空，
大乘神通叵思议，是故如来修集之。
安住念处严正勤，如意为足根势力，
游八正路采觉宝，是故如来趣道树。
其心寂静离烦恼，坏破诸闇获智光，
是故梵天及帝释，敬礼如来乘大乘。
具足六度六神通，具善方便修三脱，
能坏诸魔及邪见，是故如来乘大乘。
若有具足诸善根，及以成就不善根，
有信则得破烦恼，是故大乘难思议。
所有一切世间法，及以无上出世法，
若有学法无学法，一切摄在大乘中。
若有众生行恶道，亲近邪见恶知识，
怜愍是辈修方便，为调伏故说大乘。”

下劣不乐于大乘，心违不能坏人结，
常求自乐舍余人，闻说大乘生恐怖。
若有智者具力势，怜愍众生作利益，
闻说大乘心欢喜，坏众苦恼心不悔。
若欲了知众生行，一切众生诸界根，
菩萨一念能通达，是故大乘难思议。
得身寂静相庄严，得口寂静众乐闻，
得心寂静具神通，如是皆因趣大乘。
若有人能行大乘，是则不断三宝种，
能为众生作利益，破坏贫穷诸苦恼。
能到十方诸世界，现见无量佛世尊，
如是趣向大乘者，是人即得无量福。
一切世间无能胜，趣向无上大乘者，
具足大力坏魔众，是故大乘难思议。
得色得力大自在，梵释转轮圣王身，
若有乘此大乘者，是人受于三界乐。
施已终不生悔心，所重之物不吝著，
舍身自施修慈悲，是故大乘难思议。
持戒精进乐梵行，能以神力障日月，
不贪著身善果报，修如是乘调众生。
说法有受不受者，于是不生瞋爱心，
身心勤修大精进，为得难得之大乘。
能得无上大法王，亦得难忍之忍辱，
无量劫中受苦恼，为得大乘胜一切。
勤作利益多众生，身口意业悉柔软，
修集慈悲及神通，为住大乘大利益。
了知法界生住灭，无我无诤调诸根，
若能安住于大乘，即受安乐如先佛。
具足念心及精进，四如意足大神力，
依止正法及真义，皆由乐住于大乘。
具足无上无所畏，能师子吼无上尊，
微妙相好自庄严，皆由乐住于大乘。
具足三种之神通，调伏教化于众生，
其心寂静无憍慢；若行大乘具忍辱，
具足梵音声微妙，一切众生甚乐闻。
若乐修集大乘者，是人善解众生语，
所作诸业为净土，不久当得无边身。
若有至心听是法，当受无边无上乐，
能游虚空达边际；能知大海水几涘，
不能演说大乘德，是故是乘难思议！”

尔时，世尊复告海慧菩萨：“善男子，若欲受持如是等经，欲自寂静其深心者，应当受持门句、法句、金刚句。

“至心观察门句者，一切法中而作门户，所谓阿字一切法门，阿者言无，一切诸法皆悉无常。波亦一切法门，波者即第一义。那亦一切法门，那者诸法无碍。陀亦一切法门，陀者性能调伏一切法性。沙亦一切法门，沙者远离一切诸法。多亦一切法门，多者一切法如。迦亦一切法门，迦者一切诸法无作无受。娑亦一切法门，娑者一切诸法无有分别。伽亦一切法门，伽者如来正法甚深无底。闍亦一切法门，闍者远离生相。昙亦一切法门，昙者于法界中不生分别。奢亦一切法门，奢者具奢摩他得八正道。佉亦一切法门，佉者一切诸法犹如虚空。叉亦一切法门，叉者一切法尽。若亦一切法门，若者诸法无碍。咄亦一切法门，咄者一切法是处非处。蛊亦一切法门，蛊者观五阴已得大利益。荼亦一切法门，荼者一切诸法无有毕竟。迦亦一切法门，迦者身寂静故得大利益。至亦一切法门，至者心寂静故离一切恶。优亦一切法门，优者受持拥护清净禁戒。蛇亦一切法门，蛇者善思惟。替亦一切法门，替者住一切法。修亦一切法门，修者一切诸法性是解脱。毗亦一切法门，毗者一切诸法悉是毗尼，毗尼者调伏己身。时亦一切法门，时者一切诸法性者不染污。阿亦一切法门，阿者一切诸法性是光明。娑亦一切法门，娑者修八正道。婆亦一切法门，婆者一切诸法非内非外。善男子，是名门句，能净念心，能净其心，知众生根。

“法句者，一切诸法解脱印，一切诸法无二印，一切诸法无常断印，一切诸法无增减印，一切法等如虚空印，一切诸法五眼道印，一切法如虚空印，一切诸法无有分别如虚空印，一切诸法入法界印，一切法如印，一切诸法无去来现在如印，一切诸法本性净印，一切法空印，一切法无相印，一切法无愿印，一切法无处无非处印，一切法苦印，一切法无我印，一切法寂静印，一切法性无过咎印，一切诸法第一义摄取印，一切诸法如法性住印，一切诸法毕竟解脱印，一切诸法无时印，一切诸法过三世印，一切诸法味同一印，一切诸法性无碍印，一切诸法性无生印，一切诸法性无诤印，一切诸法性无觉观印，一切诸法非色不可见印，一切诸法无屋宅印，一切诸法无对治印，一切诸法无业果印，一切诸法无作无受印，一切诸法无出灭印。善男子，是名法句。如是法句，即是过去、未来、现在诸佛菩提。如是法印句，摄取八万四千法聚。善男子，若能如是观法聚者，即能获得无生法忍。善男子，若有未种善根之人，闻是法已，即得种之坏于魔业。善男子，若如是观，即能获得无尽器陀罗尼。如是等法悉能摄取八万四千三昧、八万四千众生行性，是名法句。

“金刚句者，其身不坏犹如金刚。何以故？法性不坏故。智慧之性能破无明，是故智慧名金刚句。五逆之罪坏一切善，是故五逆名金刚句。不净之观能坏贪欲，是故不净名金刚句。慈心之观能坏瞋恚，

是故慈心名金刚句。观十二缘能坏愚痴，是故观缘名金刚句。一众生心摄取一切众生之心，名金刚句。一众生心一切众生心悉皆平等，名金刚句。一切佛一佛皆悉平等，名金刚句。一福田一切福田无尽平等，名金刚句。一切诸法如虚空等，名金刚句。一切诸法等同一味，名金刚句。一切诸法及以佛法平等无二，名金刚句。金刚三昧能坏一切诸魔恶业，名金刚句。如来妙音坏诸恶声，名金刚句。观无生灭过生老死，名金刚句。善男子，如是等法名金刚句，名坚牢句，名不坏句，名不破句，名平等句，名为实句，名无二句、不退转句、大寂静句、无能作过句、不增不减句、无有有句、无有法句、真句、有句、不谤佛句、依法句、共僧句、如尔句、分别三世句、勇健句、梵句、慈句、心句、虚空句、菩提句、不低句、法相句、无相句、心意识无住句、波句句、破魔句、无上句、无胜句、广句、行己境界句、入佛境界句、无觉观句、于法界所不分别句、无句句。善男子，若有菩萨能解如是等句义者，必当坐于菩提树下，金刚师子法座之上。”

说是法时，八千菩萨得入法门陀罗尼，亦获一切众生平等三昧。

尔时，十方诸来菩萨，以妙香华种种伎乐，供养于佛，说偈赞曰：

“我今敬礼无上尊，能知一切众生声，
说相无相实一相，而得妙相三十二。
若有众生一一心，平等摄诸众生心，
说行无行实一行，是故我礼无上尊。
如来真实知因果，故为众生说业报，
真如法界非有无，是故我赞无上尊。
一切众生无觉观，其心本净无有贪，
从因缘故生贪欲，是故我礼真智因。
我见佛身种种色，而如来身实无色，
愍众故示无色色，我礼人中师子王。
一切福田入一田，而是一田无增减，
不动法界不转移，是故我礼人象王。
观诸众生心如幻，诸法菩提亦复然，
知一切法皆平等，是故我礼无平等。
观诸法界悉平等，故说诸法无一二，
非有非无是解脱，是故我礼断二见。
日月可说坠落地，猛风可说索系缚，
须弥可说口吹动，不可说佛有二语。
实语真语及净语，身心清净如虚空，
世法不染如莲华，是故我礼无上尊。
若有能赞如是德，即获如是之功德，
我为如是诸功德，敬礼如是功德聚。”

时，诸菩萨既赞叹已，白佛言：“世尊，夫大宝者，所谓佛也。佛出世者即是乐出，佛出世者即是信出，佛出世者即是念出，佛出世者即是智出，佛出世者即是施、戒、忍、精进、禅定、慧出，佛出世者即是慈出、悲喜舍出，佛出世者即是十二因缘法义智出，佛出世者即是念处、正勤、如意、根、力、觉道一切善法出。”

尔时，众中有一菩萨名曰慧聚，白佛言：“世尊，生老病死出于世者即是佛出，无明爱出即是佛出，贪恚痴出即是佛出，一切疑网烦恼出者即是佛出。何以故？若如是等法不出世者，佛以何缘出现于世？”

佛言：“善哉！善哉！善男子，实如所言。”

尔时，海慧菩萨言：“世尊，若有不见如是等法，时如来为出于世、不出于世。”

“善男子，菩萨初发菩提心时，真实不知如是等法，是故我为而宣说之。善男子，菩萨有四种：一者、初发菩提之心，二者、修行菩提之道，三者、坚固不退菩提，四者、一生当补佛处。发心菩萨见佛色相，见已即发菩提之心；修行菩萨见佛具足一切善法，见已即发菩提之心；不退菩萨见如来身及一切法皆悉平等；一生菩萨不见如来所有功德及一切法。何以故？所得慧眼了了净故，断二见故，净智慧故。若不见净不净，不见非净非不净，是人即能明见如来。

“善男子，我昔如是见燃灯佛，见已即得无生法忍，亦能了了知得无得；得已即时上升虚空，高七多罗树；处空住已，了了得知一切法界，了了知己心无所住；无所住已，得六万三昧门。时，燃灯佛即授我记：‘摩纳，汝于来世当得作佛，号释迦如来、应供、正遍知、明行足、善逝、世间解、无上士、调御丈夫、天人师、佛世尊。’我于尔时都不闻是授记音声，亦无佛想及授记想。我于尔时三种净慧，不见我想，不见佛想及授记想。复有三净，不见于我，不见众生及以正法。复有三净，不见名，不见色，不见因。复有三净，见一切阴悉入法阴，见一切界悉入法界，见一切入悉入法入。复有三净，过去已尽，未来不生，现在不住。复有三净，观身如水月，观声不可说，观心不可见。复有三净，空无相愿。若如是见，即是真实见于授记。善男子，若有菩萨作如是见，是名实见。”

大方等大集经卷第十一

海慧菩萨品第五之四

尔时，海慧菩萨白佛言：“世尊，菩萨摩訶萨若有具足如是等见发何等愿？”

佛言：“善男子，如是之人如本发愿。菩萨摩訶萨若心在定、若不在定，为众生故如本发愿。

“善男子，譬如人有甘蔗稻田，具满一顷，其地平正，欲溉灌时，开其水口纵之令去，更不施功自然周遍。善男子，菩萨摩訶萨亦复如是，若在定中系心思惟，若不在定不思惟时，为众生故如本发愿，所作善根，悉皆愿与众生共之，共已回向无上佛法。菩萨心净，戒、忍、定、慧亦复清净，观于佛法及诸众生平等无二，虽有是愿初无有心。是故菩萨虽复无心，于诸众生而誓愿力未常不及，所有善根悉与共之，共已回向无上菩提。

“善男子，如娑罗树，有人斫伐根，既断已随斫而倒。善男子，菩萨摩訶萨亦复如是，修集三昧常向菩提。假使有人唱言是树莫斫处堕，是树犹故随斫处倒。菩萨摩訶萨亦复如是，所修善法，欲令不向无上菩提，则无是处。何以故？法性尔故。菩萨摩訶萨所修善法，唯为不断三宝种性，为净佛土；为庄严身，三十二相、八十种好；为庄严口，说法之时众生乐闻；为庄严心，观诸众生平等无二；为得佛法诸佛三昧。菩萨虽不贪如是法，而能自在得如是法。何以故？誓愿力故。

“善男子，譬如陶师，泥在轮时不得物名，既成器已，名随物立。菩萨善法亦复如是，未发愿时，则不能得波罗蜜名，是故菩萨一切善法要当发愿。善男子，譬如金师，金未成器亦不得名，及其成已，得瓔珞名。菩萨善法亦复如是，未发愿时，则不能得波罗蜜名。善男子，譬如比丘欲入灭定，先立誓愿：‘我今入定，若撻椎鸣乃当起出。’而是定中无撻椎音，以愿力故，鸣撻椎时则便出定。善男子，菩萨摩訶萨亦复如是，怜愍众生作如是愿：‘诸未度者我当度之，诸未脱者我当脱之。’修菩提时入深三昧，以悲力故念诸众生，不证声闻、辟支佛乘，是故菩萨虽复修集三十七品而不得果。

“善男子，菩萨所行不可思议，虽入深定亦不证得沙门道果。善男子，譬如二人欲过猛火，其一人者著金刚铠即能过之，其一人者身被干草为火所焚。何以故？草则易烧，金则坚故。菩萨摩訶萨亦复如是，怜愍众生专念菩提，庄严甚深无量三昧，以三昧力能过声闻、缘

觉正位不取果证，从定起已得正觉道如来三昧。被干草者喻于声闻，声闻之人厌悔生死，于诸众生无慈悲心，是故不能过于声闻、缘觉正位。何以故？二乘之人于福德中生知足想。菩萨之人于福德中心无厌足，金刚铠喻空无相愿，大猛火者喻诸行法。菩萨摩訶萨观一切法空无相愿，而能不证沙门道果。世尊，菩萨摩訶萨具足是事不可思议，修是三昧而不取证，行生死火不为所烧。菩萨摩訶萨成就方便，入一切定亦不为定之所诳惑，具方便故，虽行诸行心无染著，虽为邪见说沙门果，亦自不证沙门道果。”

佛言：“善哉！善哉！实如汝说。善男子，如三染汁盛以一器，所谓罗差、郁金、青黛，染三种物，所谓毳、氎及憍奢耶衣。毳以浆浸则成青色，氎净浣故成于黄色，憍奢耶衣先以灰浸则成赤色。如是三物，虽同一器，受色各异。善男子，三乘之人亦复如是，器者，喻于空无相愿；三种色者，喻于声闻、缘觉、菩萨；随衣受色，喻三种菩提。空无相愿亦不生念，与如是果，不与是果。善男子，毳喻声闻，氎喻缘觉，憍奢耶衣喻菩萨乘。菩萨摩訶萨见一切法，如聋如盲无有众生；如是见时，心无染著，无有悔退；是时心中真实了知，我于众生非有利益、非无利益，亦为众生修集大悲。

“善男子，譬如微妙净琉璃宝，虽复在泥经历百年，其性常净出已如本。菩萨摩訶萨亦复如是，了知心相本性清净，客尘烦恼之所障污；而客烦恼实不能污清净之心，犹珠在泥不为泥污。菩萨摩訶萨作如是念：‘若我心性烦恼污者，我当云何能化众生？’是故菩萨常乐修集福德庄严，乐在诸有供养三宝，乐为众生趋走供使，于生贪处不起贪心，护持正法，乐行惠施，具足净戒，庄严忍辱，勤行精进，庄严禅支，修集智慧，多闻无厌清净梵行，修大神通三十七品。善男子，菩萨摩訶萨行如是法，不为烦恼之所染污，不著三界。菩萨摩訶萨行善方便功德力故，虽行三界身心不污。

“善男子，譬如长者，唯有一子心甚爱念，其于游戏误坠圜厕。时母见已恶秽不净。父后见之呵责其母，即便入厕牵之令出，出已净洗，爱因缘故忘其臭秽。善男子，长者父母，喻于声闻、缘觉、菩萨；厕喻三界；子喻众生；母不能拔，喻声闻、缘觉；父能拔济，喻诸菩萨；爱因缘者，喻于大悲。菩萨摩訶萨具善方便入于三界，不为三界之所染污，是故道有二种：一者、声闻，二者、菩萨。声闻道者厌于三界，菩萨道者不厌三界。善男子，菩萨修集空无相愿，虽行诸有不堕于有，既不堕有复不取证。行三界者，是名方便；不取证者，是名智慧。善男子，菩萨摩訶萨观一切法无有二相。若观法等众生亦等，如是等者涅槃亦等，是名智慧；若能如是等观众生不证涅槃，是名方便。清净惠施，是名为慧；发愿回向，是名方便。”

“世尊，云何名为清净智慧清净方便？”

“善男子，菩萨若见无我、众生、寿命、士夫，是名为慧；若修集空无相无愿，以诸善根愿及众生回向菩提，是名方便。复次，善男

子，知诸众生下中上根，是名为悲；知已随意而为说法，是名方便。净智慧故，虽行诸有心无染著；净方便故，虽修二乘不证其果。善男子，若能不为一切烦恼之所污染，是名为慧；能调众生悉令趣向阿耨多罗三藐三菩提，是名方便。菩萨发愿，悉令众生得无尽财、无尽福德、增长善根，诸学、无学、声闻、缘觉、一切菩萨随意得法，名净方便；若能受持一切佛法，广分别说，无穷尽说，无障碍说，不空而说，随乐而说，是名净慧。菩萨摩訶萨生生之处不失无上菩提之心，是名净慧；生生之处所作善法愿及众生，名净方便。净慧因缘，知菩提心无住无根；净方便故，化诸众生趣于菩提。”

“世尊，菩萨摩訶萨若具如是二净，所作诸业无非菩提。何以故？一切法中悉有閻障，坏閻障故即是菩提。是故菩萨常不远离于菩提也。菩萨若作如是念言‘我离菩提’，当知是人不得菩提。若念‘我今有菩提’者，是人菩提有净不净。若能如是观诸法者即得菩提，即是净智方便也。”

“善男子，过去无量阿僧祇劫，有佛出世，号无边光如来、应、正遍知、明行足、善逝、世间解、无上士、调御丈夫、天人师、佛世尊，土名不眇，劫名光味。尔时，世尊初坐道场菩提树下，未成佛时，十方世界一生补处不退菩萨悉来睹见，至其所已，以种种华而供养之，华处空中高七多罗树。成佛道已，放大光明遍照十方，十方世界多有诸天，见佛光已，各作是言：‘无边光佛真实出世。’彼佛世界庄严丽饰，如彼他化自在天宫。彼劫初时过十千年，有佛出世号曰光味，是故此劫名曰光味。”

“善男子，光味劫中，有十四亿诸佛如来出现于世。其佛世界有九万六千小国，一一国土纵广八万四千由旬，一一国有八万四千城。其城纵广满一由旬，一一城中居止人民八万四千。彼土具足如是等事，其土纯以四宝校饰，所谓金、银、琉璃、玻瓈，多饶饮食无所乏少。其土人民无我、我所，犹如北方郁单越土。其佛寿命满十中劫，声闻大众九万六千亿，菩萨大众万二千亿。土有二城：一名乐，二名净。其佛世尊生于净城，住于乐城。其土有王，名曰净声，七宝具足，统领三千大千世界。后宫嫔女三万六千，姿颜端严如天无别。有十万子雄猛勇健，悉皆具半那罗延力，各各成就二十八相，一切皆发阿耨多罗三藐三菩提心。有八万女清净无秽，形容瑰异如天无差，一切亦发阿耨多罗三藐三菩提心。其王尔时经二劫中，供养如来及声闻、菩萨大众。为如来故，造作宝坊满五由旬。是宝坊中复有宝楼其数十万，为供养僧。尔时，圣王与其眷属，一切皆修清净梵行。时，佛教化无量众生于大乘法，复化无数于声闻乘。”

“尔时，其王供养佛已，与诸眷属俱至佛所，头面礼足，右绕恭敬，长跪合掌，白佛言：‘世尊，云何菩萨修行大乘不随他语？云何菩萨生得毕竟？云何菩萨得无所住？云何菩萨得无动慧？云何菩萨得清净慧？云何菩萨力能远见？云何菩萨诸根猛利？云何菩萨具足佛土？’

云何菩萨行不放逸？云何菩萨闻甚深法心不怖畏？云何菩萨得名菩萨？’佛言：‘大王，有四事法，修行大乘不随他语。何等为四？一者、具足圣信出于世界，二者、具足智慧观诸法性，三者、具诸神通，四者、修净精进为化众生。大王，菩萨具足如是四法，修行大乘不随他语。复有四法生得毕竟。何等为四？一者、知于善法为调伏心，二者、不贪己乐，三者、为诸众生修集慈悲，四者、常乐大乘。是名为四。大王，复有四法得无所住。何等为四？一、净于心，二、净庄严，三、离虚诳，四、修坚慧为具福德。是名四法。大王，复有四法得净智慧。何等为四？一者、净眼，二者、以四摄法摄取众生，三者、净身三十二相、八十种好，四、净佛土观净法界。是名为四。大王，复有四法，能得远见诸根猛利。何等为四？一者、念菩提树，不舍菩提心；二者、念佛智慧亦不著智；三者、念法身，修集于空、无相、无愿；四者、念佛涅槃，于生死中心无厌悔。是名为四。大王，复有四法，具足佛土行不放逸。何等为四？一者、受帝释身，为化诸天令不放逸；二者、受梵天身，为化诸天令不放逸；三者、受转轮王身，为化众生令不放逸；四者、受于大臣、长者之身具足珍宝，为化众生令不放逸。是名为四。大王，复有四法，闻甚深法心不怖畏。何等为四？一者、亲近善友，二者、善友为说甚深佛法，三者、善能思惟，四者、如法而住。是名为四。大王，复有四法得菩萨名。何等为四？一者、求波罗蜜，二者、为诸众生修集悲心，三者、乐求佛法，四者、化众生时心不厌悔。是名为四。’

“善男子，时净声王从彼如来闻是法已，及诸眷属一切皆得无生法忍，舍其国土，于佛法中出家修道。尔时，世尊告彼王言：‘大王，汝今出家即是报佛。若能如是生信舍离，是名大报，是名功德，多所利益。大王，菩萨出家有二十四利益之事。何等为二十四？一者、舍于世事，得大自在；二者、舍于烦恼，获得解脱；三者、身服染衣，得无染道；四者、具足四事，得四性种；五者、乐于头陀，远离一切大欲恶欲；六者、不舍戒聚，受人天乐；七者、不舍菩提，获得佛法；八者、常乐寂静，离世谈议；九者、不著法故，得大净心；十者、具足禅支，得禅定故；十一者、求于多闻，得智慧故；十二者、破坏憍慢，得智慧故；十三者、破除邪见，得正见故；十四者、不生觉观，为真实知诸法界故；十五者、等观众生，得大慈故；十六者、化诸众生心无疲倦，得大悲故；十七者、不惜身命，为护法故；十八者、寂静其心，为得神通故；十九者、念于如来，为见佛故；二十者、修善思惟，为得十二缘深智慧故；二十一者、得于顺忍；二十二者、得无生忍；二十三、信一切功德；二十四者、得佛智慧。是名二十四。’

“善男子，尔时圣王闻是法已，转以教化一切男女眷属臣民。时，彼国中有九万九千亿众生悉共出家。善男子，净声比丘既出家已，复白佛言：‘世尊，我今云何得名出家？’佛言：‘比丘，汝名净

声，当净自界；自界既净，则名比丘，则名出家。’尔时，比丘闻佛说已，心乐寂静作是思惟：‘界者即眼观，眼空者即是净界，夫净界者即是佛土；耳鼻舌身亦复如是。意者即界，若观意空即是净界，夫净界者即是佛土，即是一界，即是空界，即众生界，即无相界，即无愿界，即无作界，即无为界。’善男子，净声比丘如是观已，即时获得身轻心轻，身心轻已得无量神通，得神通已得乐说无碍陀罗尼门。

“善男子，汝知尔时净声比丘岂异人乎？即汝身是；男女眷属，即汝所将来菩萨听法众是。说是伊帝曰多伽时，万八千人发阿耨多罗三藐三菩提心，八千众生得无生忍。

“善男子，若有欲得阿耨多罗三藐三菩提者，当如法说，如说而住。云何名为如法而说，如说而住？善男子，若有人言：‘我当作佛，请诸众生许以法味。’请已不能受持读诵、分别解说微妙经典，不能护持清静禁戒、勤修精进，不修知足于善法中少得知足，是名欺诳，不如法说，不如说住。若有人言：‘我当作佛，请诸众生许以法味。’请已受持读诵演说，护持禁戒，勤修精进，少欲知足，多得善法不生足想，是名不诳，如法而说，如说而住。

“善男子，譬如国王多请宾客，请已不设供宾之具，宾客既至方云未办。于是宾客各作是言：‘昨受王请，家不设食。今赴王信，复无所得。’呵责愁恚怨叹啼泣。善男子，菩萨摩訶萨请诸众生许以法食，不求多闻、持戒、精进，不修三十七助道法，众生呵责，人天涕泣。善男子，菩萨摩訶萨若能如作应如作说，不应欺诳一切众生。复次，善男子，复有众生请求菩萨为我说法，菩萨许言：‘当为汝说。’许已放逸，众生既见菩萨放逸，即便劝喻，既劝喻已方为说法，说时或问甚深之义，以放逸故而不能答，不能答故心生惭愧，护于身心诳于众生而便舍离。善男子，菩萨若欲如说而住，无惜身心以护众生。

“善男子，过去世有一师子王，住深山窟常作是念：‘我是一切兽中之王，力能视护一切诸兽。’时，彼山中有二猕猴，共生二子。时，猕猴向师子王作如是言：‘王若能护一切兽者，我今二子以相委付，我欲余行求觅饮食。’时，师子王即便许可。时，彼猕猴留其二子，付彼兽王即舍而行。是时，山中有一鹫王名利，见师子王眠，即便搏取猕猴二子处岭而住。时，王寤已，即向鹫王而说偈言：

“我今启请大鹫王， 唯愿至心受我语，
幸见为故放舍之， 莫令失信生惭耻。”

“鹫王说偈报师子王：

“我能飞行游虚空， 已过汝界心无畏；
若必护是二子者， 为我故应舍是身。”

“师子王言：

“我今为护是二子， 舍身不惜如枯草；
若我护身而妄语， 云何得称如说行？”

“说是偈已，即至高处欲舍其身。尔时，鹞王复说偈言：

“若为他故舍身命， 是人即受无上乐；
我今施汝猕猴桃子， 愿大法王莫自害。”

“善男子，时狮子王即我身是，雄猕猴桃者即迦葉是，雌猕猴桃者善护比丘尼是，二猕猴桃子即今阿难、罗睺罗是，时鹞王者即舍利弗是。善男子，菩萨为护是依止者不惜身命。

“善男子，云何名为如说而作？菩萨若言我当惠施，即便大施，是名菩萨如说而作。菩萨若言我能持戒，即化一切同己护戒，是名菩萨如说而作。菩萨若言我修忍辱，即化众生同修忍辱，是名菩萨如说而作。菩萨若言我勤精进为于佛法，即化众生同修精进为于佛法，是名菩萨如说而作。菩萨若言我修禅定即化众生，除去乱心修集禅定，是名菩萨如说而作。菩萨若言我修智慧，如法分别，是名菩萨如说而作。善男子，菩萨若言我当坏破一切恶法，即便修集一切善法，是名菩萨如说而作。

“善男子，能庄严者名为如说，能毕竟者名为如作；能发心者名为如说，得果证者名为如作；能净心者名为如说，能至心者名为如作；能发心者名为如说，不退心者名为如作；至心听法名为如说，闻已如住名为如作；能净口者名为如说，能净身者名为如作；初受戒者名为如说，至心护持名为如作；发菩提心名为如说，行菩萨道是名如作；得住忍地名为如说，住不退地名为如作；得一身名为如说，得后边身名为如作；趣菩提树名为如说，得菩提果名为如作。善男子，是名菩萨如法而说，如说而作。”

说是法时，五百菩萨住无生忍地。

尔时，会中有一菩萨，名曰莲华，白佛言：“世尊，如佛所说，如说、如作不可思议。如佛所住，即是如说，即是如作。”

“善男子，汝于是事能了知不？”

“已知，世尊。”

“若知正法是真实者，名如法住。”

山王菩萨言：“世尊，无所住法名如法住。何以故？见一切法无有觉故。以无觉故，不见一法名之为觉。若无一法，云何有住？若如是见，名如法住。”

福德王菩萨言：“世尊，若随心者，非如法住。若有菩萨观意如幻，名为无住；若无住者，名如法住。”

燃灯菩萨言：“世尊，无有贪心，名如法住。云何贪心？谓于法中有损有益。若无贪心，名如法住。”

日子菩萨言：“世尊，若有菩萨有所著者，是名为动。若于法中心无所著，是名无动。若无有动，名如法住。”

勇健菩萨言：“世尊，一切世间皆随心行，若知心行，名如法住。”

乐见菩萨言：“世尊，如佛所说因受受苦。若能不受诸受则断，若能不取诸取则断，虽不受、取，不舍众生，名如法住。”

香像王菩萨言：“世尊，一切众生悉有重担，所谓五阴。若有能知五阴真实，为坏阴见弃捐重担，而于诸法亦无担想，名如法住。”

持世菩萨言：“世尊，若行世间非如法住，若正庄严名如法住。正庄严者，见一切法等如虚空。”

坚意菩萨言：“世尊，若有菩萨，不生于生，不灭于灭，亦复不见生灭之性，名如法住。”

光明遍照高贵德王菩萨言：“若能知见真实涅槃，见法是灭及无生灭，一切众生悉有佛性，为趣菩提而修庄严，名如法住。”

光无碍菩萨言：“世尊，若有行处即是魔业，非如法住。若无行处则坏魔业，若坏魔业，名如法住。”

净进菩萨言：“世尊，若作念言我当得法，为是得法勤行精进，如是精进是空精进。若能观察诸法不定，以是不定勤修精进，名如法住。”

过三恶道菩萨言：“世尊，一切诸法无作无变，无觉无观，无觉观者名为心性。若见众生心性本净，名如法住。”

不可思惟思惟菩萨言：“世尊，知诸众生一切心性不作心想，名不可思惟而思惟也。若能于是不思惟中而思惟者，名如法住。”

乐寂静菩萨言：“世尊，若有菩萨净诸心界，是则能离一切诸漏。若能远离一切漏者，是名正行；若正行者，名如法住。”

商主菩萨言：“世尊，菩萨若有清净善法，福德庄严、智慧庄严，观二庄严平等无二。以功德等观智慧等，以智慧等观功德等，无差别者，名如法住。”

维摩诘菩萨言：“世尊，不观于二，名如法住。若于法界不坏不别，名如法住。”

依义菩萨言：“世尊，若有菩萨依于正义不依于字，为正义故受持读诵，广说八万四千法聚，无失无动，名如法住。”

净意菩萨言：“世尊，若有菩萨发菩提心，至心拥护是菩提心，修菩提时知诸法性。夫法性者，非处非非处，名如法住。”

毕竟净意菩萨言：“世尊，若有菩萨远离垢秽如浣去垢，能令烦恼不污其心，名毕竟净。其心净已，随菩提行，名如法住。”

海慧菩萨言：“世尊，若有亲近恶知识者，非如法住；不修圣法，非如法住；若近恶友，则行魔业堕于魔处。世尊，若有欲离一切魔业、诸魔行处、诸恶法者，当近善友。”

佛言：“善男子，汝今真知魔业行不？”

“已知，世尊。”

“善男子，汝今当为无量菩萨大众而说。”

“世尊，夫魔业者即是眼色。若人见色生贪著心即是魔业，乃至意法亦复如是。

“复次，世尊，菩萨修行檀波罗蜜时，不爱之物持用惠施，所爱财货贪吝不舍；爱者则施，患者不与；分别受者及以财物，若有分别如是二者，是名魔业。复次，世尊，菩萨修行尸波罗蜜时，护持禁戒，近持戒者，赞叹己身，毁谤破戒，是名魔业。复次，世尊，菩萨修行忍波罗蜜时，于大力者能生忍辱，于少力者不能生忍，见大力者软语谦下，见小力者粗语轻蔑，是名魔业。复次，世尊，菩萨修行精进波罗蜜时，说声闻乘、说缘觉乘、说菩萨乘，修菩提时，轻慢声闻、辟支佛乘；口不宣说，乐于世行；不乐供养恭敬三宝，所谓华香、幡盖、伎乐，尊重赞叹；不求多闻，见多闻者不能亲近，是名魔业。复次，世尊，菩萨修行禅波罗蜜时，获得禅定，不能调伏一切众生，心生悔厌贪著禅乐，呵说法者不乐讲论，赞叹寂静贪著禅味，呵毁二界爱无色身，寿命极长不见诸佛，不闻正法远离善友，不知方便受舍修舍，是名魔业。复次，世尊，菩萨修行般若波罗蜜时，知于因果，不以四摄摄取众生而调伏之，不知众生上中下根，是名魔业。

“复次，世尊，菩萨若乐空闲寂静，乐寂静已受寂静乐，不乐听法说法问疑，以寂静故烦恼不起，以不起故不知知想、不离离想、不证证想、不修修想，不得实义，是名魔业。复次，世尊，菩萨若有修集多闻，好语、乐语、微妙之语、软语、喜语，若为衣食卧具利养而演说法，若有信解能至心听而不为说，若有放逸致供养者便为说之，可为说者而不为说，不可说者反为说之，是名魔业。复次，世尊，若有菩萨说法之时秘藏深义，有诸天人得他心智，知已不悦即作是念：‘我为如来真正法来，不为世间浅近语来。是人欲毁如来正法不能增长。若人有毁佛正法者，我不乐见闻。’其所说即便舍去，是名魔业。

“复次，世尊，若有菩萨于恶知识作善友想。恶知识者，不以四摄摄取众生，不修多闻，不化众生，不说出法，乐说世语，不知法、不知时、不知义，是名魔业。复次，世尊，恶知识者，不能开示分别解说声闻、缘觉、菩萨、佛法，不化众生令修慈悲、远离八难、修行施戒、柔软语言、亲近平等、教忍无力，说言佛道甚为难得，无量世中勤苦乃获，是名恶友，名为魔业。

“复次，世尊，菩萨若有憍慢之心，以憍慢故，不能供养佛法众僧、师长、和尚、父母、长宿、同学、同师。若见胜己，不能亲近听法问疑，是故虽闻闻已便失，见下己者亲近爱念；是故恶法渐渐增长，恶法增故远离善法。世尊，譬如大海渐渐深故，一切诸流悉共归之；菩萨坏慢亦复如是，渐渐增长一切善法。菩萨若不坏憍慢者，是名魔业。世尊，譬如有人，高原陆地种瞻波树，水常行处复作堤塘，

地既高燥又不得水，渐渐枯黄不能增长。世尊，菩萨摩訶萨亦复如是，憍慢增故不亲善友，不闻正法虽闻复失。复次，世尊，菩萨摩訶萨身色具足，端正自在，多有眷属福德庄严，未能具足智慧庄严，以是因缘生于憍慢；以憍慢故，若有菩萨具智庄严，思惟正法身体羸瘠，见已轻慢不能供养，以是因缘复增憍慢，无明放逸不调魔业，如是菩萨为色生慢，是名魔业。”

尔时，世尊告海慧菩萨言：“善哉！善哉！善男子，善能分别宣说魔业。善男子，至心谛听，吾今当说坏魔业道。善男子，一切诸法其性空寂；若知诸法其性空已，亦知一切众生皆空；既知空已，而修慈心调伏自身，是名菩萨破坏魔业。若观诸法性是无相，而为众生修集慈心，是名菩萨破坏魔业。若观诸法性是无愿，为诸众生至心求有，既求有已随而调伏，是名菩萨能坏魔业。观一切法性是无贪，众生之性亦复无贪，为调伏贪而摄取之，是名菩萨能坏魔业。若观诸法性是无恚，众生之性亦复无恚，为调伏恚而摄取之，是名菩萨能坏魔业。若观诸法性是无痴，众生之性亦复无痴，为调伏痴而摄取之，是名菩萨能坏魔业。观诸法性无生无灭，坏生灭故宣说正法，是名菩萨能坏魔业。观一切法性是平等，虽说三乘不舍大乘，是名菩萨能坏魔业。若不贪著心意识等，亦能远离一切因缘，为诸众生得解脱故修法庄严，虽过诸行终不舍离菩萨所行，是名菩萨能坏魔业。”

说是法时，天魔波旬庄严四兵来趣宝坊，如先趣向菩提树时。如来见已，告海慧言：“汝说魔业，我说坏魔，以是因缘，魔王波旬庄严四兵而来至此。欲设何计以当御之？”

海慧菩萨言：“世尊，我今欲持魔王波旬及其眷属置庄严国，我身当住魔所住处。”

尔时，舍利弗言：“善男子，庄严世界去此远近？佛号何等？”

“舍利弗，在此东方过于十二恒河沙等世界，其土有佛，号破疑净光，今现在世为诸菩萨说净菩萨行。彼国三千大千世界有一亿魔，一一魔王有十千亿人兵眷属。其佛初坐菩提树时，如是诸魔悉共庄严至菩萨所。尔时，菩萨先为诸魔讲宣正典，令其得住不退转地，然后乃成阿耨多罗三藐三菩提转正法轮。彼佛世尊，其大弟子及侍使者亦悉是魔，如是等魔悉能教化调伏众生。是故我今取魔波旬安置彼土，为欲坏其所行魔业，庄严如来无上正法。”

时，魔波旬闻是语已心生恐怖，四望顾视欲求退处，四方障碍不得从意，复欲灭身亦不能得，方计不立倍复生惧，白佛言：“世尊，唯愿大慈，少见救护。”

佛言：“波旬，我于此事不得自在。汝当归向海慧菩萨，求哀忏悔。”

时，魔波旬即向海慧合掌而言：“善男子，我从今日不敢复作如是魔业。唯愿仁者听我忏悔！”

海慧菩萨言：“我于汝所都无瞋心，菩萨之法常应忍辱一切众

生。波旬，汝可往彼礼觐彼佛，汝身当得无量利益。”

尔时，菩萨即以右手摩其顶上，作如是言：“若诸菩萨于诸法中无贪吝者，以我神通令汝必至彼佛世界。”言已，波旬即至彼土。既至彼土，见佛敬礼，却住一面。

彼诸菩萨白佛言：“世尊，何等国土有如是等不净之人而来至此？”

佛言：“善男子，西方过十二恒河沙等诸佛世界，彼有世界名曰娑婆，佛号释迦牟尼，为过数量诸菩萨等说大集经。彼有菩萨名曰海慧，说魔业时，是魔庄严四种兵众来至会所，海慧菩萨以神通力移来至此。”

彼世界中诸菩萨等语波旬言：“善男子，汝今宜发阿耨多罗三藐三菩提心，远离魔业。我当与汝共为同学。”

时，魔波旬闻是语已，即发阿耨多罗三藐三菩提心。时，诸菩萨即请波旬升师子座，问波旬言：“承彼如来为诸大众说大集经，斯有何事？惟仁说之。”时，魔波旬以海慧菩萨神通力故宣说所闻，乃至不失一句一字。

彼诸菩萨即白佛言：“我等愿乐欲见彼佛释迦牟尼及众菩萨。”

彼佛即告诸菩萨言：“且待须臾，自当得见此宝坊中。”

诸菩萨等复白佛言：“世尊，我等欲见魔王波旬，于彼世界为何所作？”

尔时，世尊观此彼界众生心已，告海慧菩萨言：“善男子，汝今当以此佛世界示彼菩萨。”

尔时，海慧菩萨即于十指放大光明，其光即过十二恒河沙等诸佛世界遍照彼土，此间大众悉见彼土佛及菩萨、魔王波旬处师子座说大集经。时，诸菩萨即从座起，向彼如来头面敬礼，散种种华而以供养，所散诸华当彼佛上变成华台。

彼诸菩萨见是华台即白佛言：“世尊，如是华台从何处来？”

佛言：“善男子，娑婆世界诸菩萨众所散供养。”

诸菩萨言：“世尊，云何令我得见彼土娑婆世界？”

佛言：“善男子，汝等今当敬礼是光，至心念持，自当得见彼佛世界。”

时，彼菩萨如佛所言，敬礼光明，至心念持，即得见此娑婆世界；见已，即起礼释迦牟尼佛，以诸香华遥供养之。又见三千大千世界，净水澄满犹如大海，彼所散华至此世界大宝坊中，当如来上变成宝盖。

时，魔波旬白彼佛言：“世尊，我当云何还彼世界？”

佛言：“善男子，若欲还者，应当至心念于海慧。”

时，魔波旬至心念于海慧菩萨，念已即得还此世界。

时，舍利弗见魔波旬即作是言：“波旬，汝得见彼佛世界不？”

波旬言：“舍利弗，我已见之，及见彼土清净菩萨所住之处。”

舍利弗言：“汝于彼土作魔业不？”

“大德，我至彼土至心勤求无上菩提，何缘复得造作魔业？若有至心求菩提时见魔业者，是人则得勤修精进。”

此界大众见魔波旬还来至此，六万众生、十千魔众，同共发阿耨多罗三藐三菩提心，作是言：“愿我等辈所受身形，如彼菩萨身形无异。”

海慧菩萨言：“世尊，为阿耨多罗三藐三菩提多有怨敌。善哉！世尊，为护法故建立神通，以通力故，是经当得久住于世。”

佛言：“善男子，我今所立善愿神通，为诸众生种于善根。”

尔时，世尊告四天王：“汝等当知，若我弟子比丘、比丘尼、优婆塞、优婆夷，受持读诵、书写广说如是等经，汝等四王当深护助，无为欲乐而作放逸。吾今出世，为坏放逸，护正法故而说咒曰，所谓：

“三咩(一)(免尔切) 三摩三咩(二) 沫顿祢(三) 婆罗跋底(四) 陀祢(五) 陀那跋底(六) 投弥陀那跋底(七) 阿婆散提(八) 阿摩[(七/矢)+余](九) 毗摩[(七/矢)+余](十) 阁毗罗提(十一) 迦罗提(十二) 迦罗那(十三) 阿梨(十四) 阿罗跋底(十五) 阿[(七/矢)+余]婆散提(十六) 涅伽旦尼(十七) 阿跋底(十八) 沫提(十九) 摩呼沫提(二十) 摩罗夷提(二十一) 毗首提(二十二) 毗首提跋底(二十三) 尼萨[(七/矢)+余](二十四) 莫罕泥(二十五)。

“善男子，是名四天王咒。若有法师受持是经，当诵是咒；诵已，修慈缘念十方，至心念于四天王等。尔时，四王当示其梦，或自往护。”

时，四天王白佛言：“世尊，我等四王闻是咒已，即与眷属至法师所拥护侍卫。若是法师所须资生，我当方便令其得之，远离病苦，身受安乐。”

尔时，世尊告海慧菩萨：“善男子，汝今至心听帝释咒，所谓：

“阁耶(一) 阁耶末底(二) 阿跋底(三) 毗跋底(四) 摩拘[(七/矢)+余](五) 斯陀跋底(六) 输泥(七) 臆帝羯[(七/矢)+余](八) 檀提昙摩尼(九) 多迦隶(十) 叉耶叉耶目佉(十一) 阿跋蒂那(十二) 涅伽蒂那(十三) 莎底(十四) 莎底散提(十五)。

“来！憍尸迦，阿修罗坏，诸天则胜；诸天胜故，佛法增长。憍尸迦，欲受安乐，当护正法。善男子，是名释咒。善男子，若有法师欲说法时，当先洗浴令身净洁，持妙香华正东而礼，一心忆念十方诸佛，慈心普及一切众生，然后乃升师子法座，诵如是咒而作是言：‘憍尸迦来！四天王来！为诸大众除却障碍，消灭烦恼。’尔时，帝释及四天王，念法师故即便共来，是故大众乐闻说法。

“善男子，汝今复听十方诸魔及眷属咒，所谓：

“奢咩(一) 奢摩跋坻(二) 奢摩密喋(三) 阿浮[(七/矢)+余](四) 摩罗欽坻(五) 瞢崛[(七/矢)+余](六) 婆罗缁(七) 迦由犁(八) 坻祁跋坻(九) 阿盧迦尼(十) 比舍荼尼(十一) 尼末坻(十二) 阿跋持(十三) 区区[(七/矢)+余](十四) 伽罗萨尼(十五) 忧目企(十六) 奢蜜坻(十七) 波罗目企(十八) 槃檀那涅伽熙坻(十九) 奢摩[彡+施](二十)。

“如是咒者，力能系缚一切论师、一切魔众，是名佛印，不可破坏，魔眷属怨。善男子，若有法师受持读诵如是等咒升师子座，专念诸佛，慈及众生，自于己身生医师想，于所说法生良药想，于听法者生疾苦想，于如来所生善友想，于正法中生常恒想。若能如是说正法时，其处四边各一由旬魔不能到。”

时，魔波旬白佛言：“世尊，若佛弟子有能读诵如是神咒，其身清净，我当拥护不作魔业。我以海慧神通力故舍于魔业，随有国土城邑村落说是法处，我当化身亲往听受。”

佛言：“善哉！善哉！波旬，汝若能得如是心者，则坏魔业，亦当获得如是等法。

“善男子，复当至心听梵天咒，所谓：

“迷多伽[(七/矢)+余](一) 迦楼那伽[(七/矢)+余](二) 无经多伽[(七/矢)+余](三) 忧比叉伽[(七/矢)+余](四) 佛陀伽[(七/矢)+余](五) 昙摩伽[(七/矢)+余](六) 僧伽伽[(七/矢)+余](七) 苏羯多毗阁耶(八) 摩诃毗檀尼(九) 毗兽提目企(十) 尼波[(七/矢)+余]陀耶(十一) 乌闍跋坻(十二) 乌闍严弥(十三) 捺檀尼(十四) 昙摩波坻吒跋尼(十五) 萨遮坻优波跋坻(十六) 毗兽坻(十七) 莎折多优波舍弥(十八) 乌卢迦耶梵摩(十九) 毗卢迦耶梵摩(二十)。

“若欲具足受持如是梵天咒者，当行梵行清净持戒，读诵是咒，请召梵天：‘梵天汝来，拥护如是大众，令其至心乐听正法，念于三宝，转正法轮，护持法城。’若有法师能调诸根，至心净护身口意等，勤修戒、忍、精进、多闻，发菩提心，修四无量，升于法座诵如是咒；诵是咒已，梵天王等与诸眷属悉来集会听讲法所。”

尔时，梵王白佛言：“世尊，若有法师读诵是咒，我在初禅闻是咒已，当舍定乐而往其所，当施八法。何等为八？一者、施念，持所闻故；二者、施慧，思惟深法故；三者、施解，分别深义故；四者、施乐说无碍，为坏疑心故；五者、施辞无碍，为解一切众生语故；六者、施无所畏，为众无胜故；七者、施法光明，为不谬说故；八者、施其不谬授记。世尊，我等亦能广宣是法。”

“善男子，我涅槃后，如是等天当护正法。”

海慧菩萨言：“世尊，如来正觉涅槃之后，若有信者，应以此法付嘱其人，令得久住。”

尔时，世尊眉间白毫放大光明，遍照三千大千世界，如来化身充满其中，三十二相、八十种好具足庄严，数如三千大千世界一切卉木茎节枝叶。是诸化佛同作是言：“十方诸佛释迦如来，同愿正法久住于世。何以故？虽有一切恶魔眷属，不能破坏如是等法。大地可坏，大海可焦，须弥山王可碎如尘，众生诸心可合，是一虚空可画，四大可转，诸佛誓愿不可变易！”

尔时，世尊即告阿难：“汝当受持如是等经，读诵广说。”

海慧菩萨言：“世尊，今此会中多有无量诸大菩萨，如来何缘顾命阿难令受持之？”

时，诸大众咸有疑心：“海慧、阿难，谁念心多？”

尔时，世尊知众会疑，告大迦叶：“三千大千世界众生数为多不？”

“甚多，世尊。”

“迦叶，假使如是无量众生悉得人身，常问如来，如来所说，不可穷尽，无有障碍。善男子，如天降雨无有障碍，一切众流归集大海，而是大海无增无减；海慧菩萨所可受持十方佛法，亦复如是。迦叶，假使三千大千世界，所有众生具足总持如阿难等，欲比海慧所受持法，百分、千分、百千万分不及其一。”说是语时，百千众生发阿耨多罗三藐三菩提心，以妙华香贡上供养海慧菩萨。

尔时，莲华菩萨白佛言：“世尊，若有人能信顺受持，读诵书写，解说其义，供养恭敬如是经者，得几所福？”

尔时，世尊即说偈言：

“若满三千大千界， 七宝奉施十方佛，
不如信顺是经典， 受持读诵福多彼。
四法所成诸功德， 佛说无量无边数，
发菩提心常法施， 如法而住修集悲。
佛说四法无边量， 智者闻已不怖畏，
虚空之性众生界， 如来正智菩提心。”

说如是等法宝聚时，十方所来诸菩萨等，以妙香华、种种伎乐供养于佛，尊重赞叹，作如是言：“世尊，若有人能受持读诵、书写解说如是等经，所得功德不可称量，十方诸佛说不能尽。何以故？世尊，众生若闻如是等经，无有不发阿耨多罗三藐三菩提心者，是故此经名大宝聚。”

尔时，一切大众人天，一切声闻及阿难等，诸迦楼罗、乾闥婆等及世间人，闻经欢喜，信受奉行。

大方等大集经卷第十二

虚空藏菩萨所问品第六之一

如是我闻：一时，婆伽婆游如来行处妙宝庄严堂上，如来威神大功德庄严众相具足，因于本行佛地得报，菩萨宫宅称无量赞，如来神力之所建立，入无碍智行处生胜喜悦，思念进智分别巧说，众德具足来世所叹。世尊正觉善转法轮，善能调顺无量众生，于诸法中皆得自在，知诸众生心所趣向，善能分别一切诸根，彼岸善断，结习永尽无余，所施佛事自然成办。与大比丘众六百万人俱，其心调柔，结习已断，皆是如来法王之子，行甚深法，善能解了无所有法，殊妙端正威仪具足，是大福田，正住如来所教法中。复与大菩萨僧俱，度一切诸行，不舍菩萨所行，得无我忍，于诸众生不舍大悲，过诸世间而顺世法勤化众生，亦能善入如来行地，又复不离菩萨行地，其名曰：普明菩萨摩訶萨、无碍明菩萨、于一切法自在王菩萨、无碍行处菩萨、分别辩觉菩萨、净无量网明灯王菩萨、不染行处菩萨、坏魔界放光明菩萨，如是等不可计、阿僧祇、不可思、不可称、不可量、无齐限、不可说菩萨摩訶萨俱。

尔时，世尊说诸菩萨出要之行，名无碍法门庄严菩萨道，成就佛法诸力无畏，得知诸法自在，入陀罗尼印门，入分别诸辨门，入大神通门，入说不退转轮诸乘平等门，入一相法界无分别门，入说随众生根所解差别门，入坚法分别坏诸魔界善顺思惟门，入断诸结及见无碍智慧门，入无等愿方便智门，入诸佛等智门，入诸法无滞碍如实分别门，入无变异平等法门，入甚深十二因缘门，入功德智慧庄严佛身口意坚固思进念专无尽门；入四圣谛门，为调伏声闻故；入远离身心行门，为调伏辟支佛故；入授一切智记门，为调伏菩萨故；入诸法自在门，为显佛功德故。所谓开示解说显现令解，教读施設次序开张，分别令易随顺正说。

尔时，世尊如是善分别大法方便时，于此三千大千世界一切诸色像，若铁围山、大铁围山、须弥山王及诸黑山，四天下及阎浮提聚落城邑舍宅、大海江河、泉源陂池、药草树木及诸丛林，诸龙、夜叉、乾闥婆、阿修罗、迦楼罗、紧那罗、摩睺罗伽等宫殿，地神宫殿，虚空中诸神宫殿，四天王天、三十三天、夜摩天、兜率陀天、化乐天、他化自在天及梵天宫殿，上至阿迦膩吒天宫殿，一切大地及欲界色身众生，悉皆隐蔽，眼所不见。喻如劫尽火灾起后，大地焦尽，大水未出，当尔之时，乃无一色与眼作对。尔时，三千大千世界，亦复如是亦无少色。是欲、色界所摄，唯除妙宝庄严堂中所见色像。

尔时，于妙宝庄严堂中虚空中，无所依著，自然成无量百千那由他宝台，微妙庄严世所乐见，喻如大妙庄严世界，一宝庄严佛土菩萨所住宝台，此诸宝台亦复如是，见诸大众坐宝台中。于妙宝庄严堂

内，自然踊出净妙真金师子之座，高十千由旬。此师子座出妙净光明，普照此三千大千世界，映诸菩萨光明令不明显。

尔时，大众欢喜踊跃，心情悦豫，叹未曾有，合掌向佛，作如是言：“今者如来必说大法现此瑞应！”

尔时，舍利弗承佛威神，从宝台起，更整衣服，偏袒右肩，右膝著地，合掌向佛而白佛言：“世尊，是何瑞相，有如是等生胜喜悦现大神变？世尊，此诸大众皆生疑惑！愿如来说何因何缘，现此未曾有事？”

尔时，佛告舍利弗：“东方去此过八佛世界微尘数等佛土，有世界名大庄严，彼国有佛，号一宝庄严如来、应供、正遍知、明行足、善逝、世间解、无上士、调御丈夫、天人师、佛世尊，今现在说法。以何因缘世界名大庄严？若广说彼世界庄严事者一劫不尽，是故彼土名大庄严。何因缘故，彼佛名为一宝庄严？舍利弗，彼如来因一宝说法，所谓无上大乘之宝，是故彼佛名一宝庄严。彼佛与诸菩萨众各升师子座，踊在空中高八十亿多摩树，为诸菩萨说虚空印法门。何谓虚空印法门？如一切法以虚空为门，无住处故；一切法无住处门，无形相故；一切法无形相门，过诸行处故；一切法无行处门，内外净故；一切法净门，性无染故；一切法无染门，自性寂静故；一切法寂静门，心意识本无故；一切法本无门，离物非物故；一切法无物门，无教相故；一切法无教门，无形段故；一切法无形段门，离因缘境界故；一切法无因缘境界门，寂灭相故；一切法寂灭门，离二相故；一切法无二门，舍别异故；一切法无别异门，入一相故；一切法一相门，自相净故；一切法自相净门，过三世故；一切法过三世门，不离平等故；一切法不离平等门，幻化相非相故；一切法幻化相门，体不实故；一切法无体门，无作相故；一切法无作门，身心远离故；一切法远离门，离相无相故；一切法无相门，相不动故；一切法不动相门，无依处故；一切法无依处门，住无际故；一切法无际门，无橛窟故；一切法无橛窟门，无我、无我所故；一切法无我、无我所门，无主故；一切法无主门，性无我故；一切法无我门，内清净故。舍利弗，彼一宝庄严如来，为诸菩萨广说如是虚空印法门。彼如来说是法时，无量阿僧祇诸菩萨，解知诸法性与虚空等，于诸法中得无生忍。

“舍利弗，彼大庄严刹土一宝庄严佛所，有一菩萨摩訶萨名虚空藏，以大庄严而自庄严，于诸不思议愿最为殊胜，得一切功德中之威德无碍知见，不可思议菩萨功德以自庄严。以诸相好，庄严其身；以善说法，随所应度，庄严其口；不退于定，庄严其心；以诸总持，庄严其念；入诸微细法，庄严其意；顺观法性，庄严于进；以坚固誓，庄严淳至；以必成办，庄严所作。以从一地至一地庄严毕竟，舍诸所有，庄严于施；以净心善语，庄严于戒；于诸众生心无有碍，庄严忍辱；众事备足，庄严精进；入定游戏神通，庄严于禅；善知烦恼习，庄严般若。为救护众生，庄严于慈；住不舍众生，庄严于悲；心无犹

豫，庄严于喜；离于憎爱，庄严于舍。游戏诸定，庄严神通；得无尽宝手，庄严功德；分别诸众生心行，庄严于智；教众生善法，庄严于觉；得慧明净，庄严慧明；得义法辞应，庄严诸辩；坏魔外道，庄严诸无畏。得佛无量功德而自庄严，常以诸毛孔说法，庄严于法；见诸佛法明，庄严自明；能照诸佛国，庄严光明；说不错谬，庄严所记；神通随所乐说，庄严教授；神通到四神足彼岸，庄严变化；神通入佛密处，庄严诸如来护持；自悟正智，庄严法自在；如说而行无能坏者，庄严一切善法坚固。彼虚空藏菩萨，成就如是等无量功德，与十二亿菩萨摩诃萨俱，发意欲来诣此娑婆世界见我，礼拜供养，恭敬围绕。亦为此大普集经分别少法门分故，又为此十方诸来会菩萨生大法明故，又为增益开大乘法故，又为受持如来法故，又为无量众生善根出生故，又为以善法调伏诸魔外道故，又为示现菩萨师子游戏神通故，彼虚空藏菩萨，欲来至此，是其瑞应。”

尔时，世尊说此事已，即时虚空藏菩萨，与十二亿菩萨摩诃萨恭敬围绕，诣一宝庄严佛所，白佛言：“世尊，我欲诣娑婆世界，见释迦牟尼佛，礼拜供养。”彼佛报言：“欲往随意，宜知是时。”即顶礼一宝庄严如来足下已，右绕七匝，承佛游戏无作神足，于彼大庄严国土忽然不现，以一念顷与诸菩萨众俱，来至此娑婆世界宝庄严堂妙宝台上。

尔时，虚空藏菩萨雨妙华香，供养世尊，及此大宝集经，所谓曼陀罗华、摩诃曼陀罗华、波利质多罗华、摩诃波利质多罗华、曼殊沙华、摩诃曼殊沙华、卢遮那华、摩诃卢遮那华，水陆诸华大如车轮，百叶、千叶、百千叶，皆出光明，香气普薰，妙香适意，开敷鲜净，杂色光耀眼所乐见，雨如是等种种无量妙华满妙宝堂中，高一多罗树。作诸天乐，其音皆出无量百千法门之声，与檀波罗蜜相应声，尸罗、羼提、毗梨耶、禅那、般若波罗蜜相应声，与四无量相应声，与四摄法相应声，与助道法相应声，与三脱门相应声，与四圣谛相应声，与十二因缘相应声。

尔时，虚空藏菩萨供养世尊，顶礼佛足，绕七匝已，在一面立，白佛言：“世尊，彼一宝庄严如来应正遍知致问无量，少病少恼，起居轻利，安乐行不？彼一宝庄严如来又言：‘有十二亿菩萨，与虚空藏菩萨俱往，至彼娑婆世界。愿世尊说如是如是法，使诸菩萨得自然智，亦使成就大法光明已还来至此。所以者何？以世尊昔来已曾化此善男子等发菩提心。’”

尔时，虚空藏菩萨当世尊顶上，化作大宝盖，广十千由旬，以青琉璃为轩，真珊瑚宝为子，以琉璃及阎浮檀金为升垂，杂妙真珠缦网璎珞，宝铃和鸣。其盖光明普照十方，与诸妙华互相绮错。

尔时，虚空藏菩萨于如来不思议功德深生敬重，合掌向佛，以偈赞言：

“法义智慧最胜尊， 本净无垢无所著，
喻如虚空无染污， 我礼不动圣足下。
行无与等无涯底， 现法严身最殊胜；
佛真法身如虚空， 普生大悲而济度，
人中师子能示现， 百福庄严世尊身。
断诸言语无音响， 离诸言说无戏论，
虽知如是而现说， 无性众生令悦豫。
众心非心得此心， 能知非心幻化心，
善知众生心行性， 而能不住彼我心。
示现威仪济众生， 善逝身无作不作，
佛知众生随所乐， 即能示现如是形。
世尊于法不计我， 不生忆想著于法，
能知以何法受教， 而随所悟应时说。
大众渴仰瞻世尊， 世所希有最无比，
世尊无心于示现， 无能令诸大众悦。
此等诸法从缘生， 虚无寂寞非真实，
世尊善知如是法， 得至清凉泥洹道。
去离二边不著中， 知虚非真无自性，
此等诸法无作者， 善说业报非断常。
法无众生命及人， 寂静不名如虚空，
如实分别无众生， 而安多众至甘露。
昔行多劫不思议， 求进势力胜菩提，
所为妙行今已成， 至无至义觉无余。
一切诸法上中下， 悉知平等常无异，
智者所知知不著， 是故世尊定不乱。
阴入诸界如幻化， 三界皆如水中月，
众生虚伪性如梦， 以智分别说是法。
世人假称名得道， 实无有得无得相，
如道无得轮无转， 如轮无转无度者，
故能度众于四流， 自度度彼系颠倒，
善能安慰苦恼者， 自灭灭彼至无为。
众生无生无涅槃， 众生本净不可得，
道及众生犹如幻， 自觉此际觉多众。
如虚空中不见色， 一切群生色亦尔，
诸法离色及色相， 能知此色则得离。
作诸妙喻以赞佛， 执见而赞是其毁，
佛德如空无差别， 无所限量是赞佛。
故礼净尊净他者， 无缘无心入微心，
如佛功德世尊知， 如如功德我今礼。
能知众生无我者， 知诸法际离欲者，

见法身者则见佛， 即为供养十方佛。”

虚空藏菩萨说此偈已，即时妙宝庄严堂及虚空中诸宝台六变振动。一切大众心净悦豫，踊跃欢喜，叹未曾有，皆言：“虚空藏菩萨，善能说此妙偈。若有善男子、善女人能行此法者，乃至梦中不见有法，以渐皆当得师子吼如虚空藏菩萨。”

尔时，虚空藏菩萨以如斯妙偈赞如来已，白佛言：“世尊，欲少所问，唯愿听许。若听问者，尔乃敢问。所以者何？世尊有无量知见，能知众生诸根，有淳熟、未淳熟者。世尊明达，去诸闇冥故；世尊了义，善说分别诸句义故；世尊知时，不过限故；世尊所记不谬，如说不错故；世尊知时，随诸众生行说法故；世尊善游戏，通达诸神足故；世尊善观，体众生心行故；世尊最无染，于诸法中得自在故；世尊自悟，觉了诸法故；世尊正御邪趣众生，教令入正故；世尊是大医王，能令无始世界众病永断故；世尊大力，成就佛十力故；世尊无畏，成就四无畏故；世尊无胜，成就十八不共法故；世尊大慈，行救一切众生心无碍故；世尊大悲，行知见无我，拔一切众生苦故；世尊大喜，行于禅解脱定，入定到彼岸故；世尊大舍，行断一切憎爱，心如虚空故；世尊得平等觉，了诸佛法无碍故；世尊无憎爱心，毕竟清净毁誉不动故；世尊无希望，智慧满足，于利养赞叹无欲求故；世尊一切知见，一切佛行处，到彼岸故。我知见世尊有如是等无量无边功德成就，是故我欲于法门中少有所问。”

虚空藏菩萨作是语已，尔时，世尊告虚空藏菩萨言：“善男子，我当听汝问，随汝欲问，恣汝所问，吾当随汝所问，悦可尔心。”

尔时，功德光明王菩萨问虚空藏菩萨言：“善男子，汝为谁故欲问如来？”

即时，虚空藏菩萨以偈报功德光明王菩萨言：

“一切等心诸众生， 平等能至彼岸者，
游戏无垢悲心中， 我为是等问世尊。
能到正见无垢秽， 已无犹豫断彼疑，
自得了达利众生， 我为是等问世尊。
知我无我无与等， 为众发心不著众，
能脱众生计我见， 我为是等问世尊。
能护威仪慎所行， 其心清净如虚空，
坚固不动如须弥， 我为是等问世尊。
进心无涯慧无等， 勇健能害烦恼怨，
已结已断断彼结， 我为是等问世尊。
乐施威仪调伏心， 常住闻进戒忍力，
禅定诸通胜慧明， 我为是等问世尊。
乐空无相无愿法， 而现受形处生死，

无生无终达甘露， 我为是等问世尊。
知见甚深无崖际， 声闻缘觉所不及，
而知一切众生行， 我为是等问世尊。
善能了达乐正行， 于法非法系已断，
常处正定心不乱， 我为是等问世尊。
不断佛种诸贤士， 能护正法及与僧，
多闻三世诸佛赞， 我为是等问世尊。”

尔时，虚空藏菩萨以此妙偈答功德光明王菩萨已，白佛言：“世尊，云何菩萨行檀波罗蜜与虚空等？云何行尸波罗蜜、羼提波罗蜜、毗梨耶波罗蜜、禅波罗蜜、般若波罗蜜与虚空等？云何行功德与虚空等？云何行智与虚空等？云何菩萨不离如如，如来所许，念佛、念法、念僧、念施、念戒、念天？云何菩萨修行诸法平等如泥洹？云何菩萨善分别行相？云何菩萨持诸佛法宝藏，随如来所觉法相性，如实知诸法相性已不取不舍？云何菩萨分别众生，从始已来清静而教化众生？云何菩萨善顺发行成就佛法？云何菩萨不退诸通，于诸佛法悉得自在？云何菩萨入甚深法门，诸声闻、辟支佛所不能入？云何菩萨于十二因缘，因善得胜智方便，离二边诸见？云何菩萨为如来印所印，如如不分别智方便？云何菩萨入法界性门，见一切法平等性？云何菩萨淳至坚固犹如金刚，于此大乘心住不动？云何菩萨自净其界如诸佛界？云何菩萨得陀罗尼终不失念？云何菩萨得无障碍如来加持辩？云何菩萨得自在示现受生死？云何菩萨破诸怨敌去离四魔？云何菩萨利益众生庄严功德？云何菩萨世无佛时能作佛事？云何菩萨得海印三昧，善能得知众生心行？云何菩萨能得知诸尘界无碍？云何菩萨威仪行成就，离诸闇冥得胜光明，于诸法中得自然智，速得成就一切智行？”

尔时，世尊告虚空藏菩萨言：“善哉！善哉！善男子，汝善能分别问于如来如斯妙义。如汝已曾供养过去无量诸佛种诸善根，心行平等喻如虚空，礼敬诸佛至慧明处，发勤精进欲度一切，诸佛如法不舍一切众生，度大慈悲彼岸，及过诸魔行不离世法，以虚空同量之心，成就此无上大乘妙法虚空藏。汝之功德无有边际，难可较量！汝已曾于过去恒河沙等诸佛世尊所，问如此事，自亦能说。是故，虚空藏，汝今谛听！谛听！善思念之，吾当为汝分别解说。所问诸菩萨事复过于此，能得无上大乘、如来自然智、一切种智。”

虚空藏菩萨言：“唯然！快哉！愿乐欲闻。”

佛告虚空藏：“善男子，菩萨成就四法，行檀波罗蜜与虚空等。何谓为四？善男子，若菩萨于一切处，无障碍，不分别，行檀波罗蜜，以我净故于施亦净，以施净故于愿亦净，以愿净故于菩提亦净，以菩提净故于一切法亦净。善男子，是为菩萨成就四法，行檀波罗蜜与虚空等。

“善男子，若菩萨成就八法能净檀波罗蜜。何等为八？离我能施，离为我施，离爱结施，离无明见施，离彼我菩提相施，离种种想施，离希望报施，离悭嫉施，其心平等如虚空。是为菩萨成就八法能净檀波罗蜜，离此八法是谓净施。喻如虚空无所不至，菩萨慈心行施亦复如是。喻如虚空非色见，菩萨所行诸施不依于色亦复如是。喻如虚空不受苦乐，菩萨所行诸施离一切受亦复如是。喻如虚空无有相智，菩萨所行诸施离诸想结亦复如是。喻如虚空是无为相，菩萨所行诸施无为无作亦复如是。喻如虚空虚假无相，菩萨所行诸施不依识想亦复如是。喻如虚空增益一切众生，菩萨所行诸施利益众生亦复如是。喻如虚空不可穷尽，菩萨所行诸施，于生死中无有穷尽亦复如是。善男子，喻如化人给施化人，无有分别，无所戏论，不求果报；菩萨亦复如是，如化人相，去离二边而行诸施，不分别戏论希望果报。善男子，菩萨以智慧舍一切结使，以方便智不舍一切众生，是为菩萨行檀波罗蜜与虚空等。”

尔时，会中有一菩萨，名曰灯手，从座而起，偏袒右肩，右膝著地，合掌白佛言：“世尊，何等菩萨能行如是檀波罗蜜？”

佛言：“善男子，菩萨若过诸世间，得出世间法，非色，无体无行，知见清净，非闇非明，离一切诸相，至无相智际，成就无尽忍，近如来知见已，绍菩萨决定界分，已得受记为不退转印所印，已得灌顶正位，已得善行知众生行相，至一切处亦无所至，如是菩萨能行是檀波罗蜜。”

说此法时，万六千菩萨见诸法性犹如虚空，得无生法忍。

佛告虚空藏菩萨言：“善男子，菩萨成就四法，行尸罗波罗蜜与虚空等。何谓为四？善男子，菩萨知身如镜中像，知声如响，知心如幻，知诸法性犹如虚空，是为菩萨成就四法，行尸罗波罗蜜与虚空等。善男子，菩萨成就八法能护净戒。何等为八？善男子，诸菩萨不忘菩提心能护于戒，不求声闻、辟支佛地能护于戒，持戒不限于戒能护于戒，不恃诸戒能护于戒，不舍本愿能护于戒，不依一切生处能护于戒，成就大愿能护于戒，善摄诸根为灭烦恼能护于戒，是为菩萨成就八法能护净戒。善男子，喻如虚空离诸希望，菩萨以无求心能护于戒亦复如是。喻如虚空清净，菩萨持戒清净亦复如是。喻如虚空无有垢污，菩萨持戒无垢亦复如是。喻如虚空无有热恼，菩萨持戒无恼亦复如是。喻如虚空无有高下，菩萨持戒无高无下亦复如是。喻如虚空无有罅窟，菩萨持戒而无所依亦复如是。喻如虚空无生无灭毕竟无变，菩萨持戒无生无灭毕竟无变亦复如是。喻如虚空悉能容受一切众生，菩萨持戒普能运载亦复如是，为利益众生能护正戒。善男子，如水中月，无持戒、破戒；菩萨亦复如是，了知一切诸法犹如月影，无持戒、破戒，是为菩萨行尸罗波罗蜜与虚空等。

“善男子，菩萨成就四法，行羼提波罗蜜与虚空等。何等为四？善男子，若菩萨他骂不报，以分别无我想故；他打不报，以无彼想

故；他瞋不报，以离有想故；他怨不报，以去离二见故。是谓菩萨成就四法，行羼提波罗蜜与虚空等。善男子，菩萨成就八法，能净羼提波罗蜜。何等为八？善男子，菩萨善净内纯至，修羼提波罗蜜；善净外不希望，修羼提波罗蜜；于上中下毕竟无障碍，修羼提波罗蜜；随顺法性无所染著，修羼提波罗蜜；离一切诸见应空，修羼提波罗蜜；断一切诸觉应无相，修羼提波罗蜜；舍一切诸愿应无愿，修羼提波罗蜜；除一切诸行应无行，修羼提波罗蜜。是谓菩萨摩訶萨成就八法，能净羼提波罗蜜。善男子，喻如虚空无憎无爱，菩萨修羼提波罗蜜，无憎无爱亦复如是。喻如虚空无有变易，菩萨毕竟心无变易，修羼提波罗蜜亦复如是。善男子，喻如虚空无有亏损，菩萨毕竟修羼提波罗蜜，心无亏损亦复如是。喻如虚空无生无起，菩萨修羼提波罗蜜，心无生起亦复如是。喻如虚空无有戏论，菩萨修羼提波罗蜜，心无戏论亦复如是。喻知虚空不望恩报，菩萨修羼提波罗蜜，于一切众生不望果报亦复如是。喻如虚空无漏无系，菩萨修羼提波罗蜜，离一切漏不系三界亦复如是。善男子，菩萨行羼提波罗蜜时不作是念‘彼来骂我，我能忍受’，亦不见骂者、受骂者及所骂法，不作是观，不作是戏论言‘彼空，我亦空’，亦不作是思惟‘音声如响，何由而出？’，亦复不作是观‘我是彼非’，又复不作是见‘彼无常，我亦无常’，亦复不作是念‘彼愚我智’，亦不作是想‘我等应行忍辱’。善男子，譬如有人求娑罗枝，为娑罗枝故，赍持利斧入娑罗林中，至一大树下斫其一枝，余枝不作是念：‘彼已被斫，不斫我等。’其被斫者亦不作是念：‘我已被斫，余者不斫。’二俱无想，不生憎爱。善男子，菩萨摩訶萨行羼提波罗蜜时，观知一切法性，如草木、墙壁、瓦石等，而示现割截身体，为教化众生故，无憎无爱，无忆想分别。善男子，是为菩萨行羼提波罗蜜与虚空等。

“善男子，云何菩萨摩訶萨行毗梨耶波罗蜜与虚空等？善男子，菩萨成就四法，行毗梨耶波罗蜜与虚空等。何谓为四？善男子，若菩萨勤求一切善法，而知一切法自性不成就；以一切最胜供具给侍供养诸佛世尊，然不见如来及所供侍之法；善能受持一切诸佛所说妙法，亦不见文字而可受持；亦能成就无量众生，见众生性即是泥洹，毕竟无生无起。善男子，是为菩萨成就四法，行毗梨耶波罗蜜与虚空等。善男子，若菩萨成就八法，能净毗梨耶波罗蜜。何等为八？善男子，菩萨为净身故发勤精进，知身如影，不著于身；为净口故发勤精进，知口语如响，不著于口；为净意故发勤精进，知意如幻无所分别，不著于意；为具足诸波罗蜜故发勤精进，知诸法无自性，因缘所摄不可戏论；为得助菩提分法故发勤精进，觉了一切法真实性故无所碍著；为净一切佛土故发勤精进，知诸国土如虚空故不恃所净；为得一切陀罗尼故发勤精进，知一切法无念无非念故不作二相；为成就一切佛法故发勤精进，知诸法入一相等故而不坏法性。善男子，是为菩萨成就八法，能净毗梨耶波罗蜜。善男子，喻如虚空无有疲倦，菩萨于无

量劫发勤精进，无有疲厌亦复如是。喻如虚空悉能容受一切诸色，然此虚空无有覆障；菩萨为容受一切众生发勤精进，平等无碍亦得如是。喻如虚空能生一切药草丛林，然此虚空无有住处；菩萨为增益一切众生诸善根故发勤精进，无所依著，无有住处亦复如是。喻如虚空至一切处然无有去，菩萨发勤精进为至一切法故，而无至无不至亦复如是。喻如虚空非色，而于中见种种色；菩萨为一乘故发勤精进，而为成就纯至故，示诸乘差别亦复如是。喻如虚空本性清静，不为客尘所污；菩萨发勤精进本性清静，为众生故现受生死，不为尘累所染亦复如是。喻如虚空性是常法，无有无常；菩萨究竟为不断三宝故，发勤精进亦复如是。喻如虚空无始无终，不取不舍；菩萨发勤精进，无始无终，不取不舍亦复如是。善男子，精进有二种，始发精进、终成精进。菩萨以始发精进习成一切善法，以终成精进分别一切法不得自性；唯所集善根见是平等，所见平等亦非平等。善男子，喻如工匠刻作木人身相备具，所作事业皆能成办，于作不作不生二想；菩萨为成就庄严本愿故，发勤精进修一切业，于作不作不生二想，去离二边亦复如是。善男子，是为菩萨行毗梨耶波罗蜜与虚空等。

“善男子，云何菩萨摩訶萨行禅波罗蜜与虚空等？善男子，若菩萨成就四法，行禅波罗蜜与虚空等。何等为四？善男子，若菩萨专其内心，亦不见内心遮缘外界诸心，亦不见外心行处；以己心平等故，知一切众生心平等；亦不依二法心，及平等思惟，法界定性无摄无乱；知一切法性无有戏论。是为菩萨成就四法，行禅波罗蜜与虚空等。善男子，若菩萨成就八法，能净禅波罗蜜。何等为八？善男子，若菩萨不依诸阴修禅，不依诸界修禅，不依诸入修禅，不依三界修禅，不依现世修禅，不依后世修禅，不依道修禅，不依果修禅。是为菩萨成就八法，能净禅波罗蜜。喻如虚空无所依著，菩萨修禅无所依止亦复如是。喻如虚空无所爱恋，菩萨修禅离诸染著亦复如是。喻如虚空不著诸见，菩萨修禅舍离诸见亦复如是。喻如虚空无有诸慢，菩萨修禅离诸憍慢亦复如是。喻如虚空究竟无灭，菩萨修禅善入法性究竟不退亦复如是。喻如虚空不可破坏，菩萨修禅不坏本际亦复如是。喻如虚空无有变易，菩萨修禅不变如如亦复如是。喻如虚空非心离心，菩萨修禅离心意识亦复如是。善男子，菩萨以平等心修禅，非不平等心。云何心平等？若心不高不下，无求无非求，无作无非作，无分别无非分别，无行无非行，无取无舍，无闇无明，无知无念，无非知无非念，不一不异，非二非不二，无动无不动，无去无不去，无修无非修，心不缘于一切境界，是谓平等心。以菩萨心平等故，不取于色，去离眼、色二法而修于禅；以心平故，不取声、香、味、触、法，去离意、法二法而修于禅。善男子，喻如虚空，火灾起时不能焚烧，水灾起时不为所漂；菩萨不为诸烦恼火之所焚烧，不为诸禅解脱三昧所漂，受生自无定乱，乱心众生能令得定，自行已净不舍精进，与平等示现差别而不见平等及不平等二相，善能遍观智慧真性，其

心不为爱见所覆，于诸行中行无所著与虚空等。善男子，是为菩萨行禅波罗蜜与虚空等。

“善男子，云何菩萨行般若波罗蜜与虚空等？善男子，若菩萨成就四法，行般若波罗蜜与虚空等。何等为四？善男子，若菩萨以我净故，知众生亦净；以知净故，知识亦净；以义净故，知文字亦净；以法界净故，知一切法亦净。是为菩萨成就四法，行般若波罗蜜与虚空等。善男子，若菩萨摩訶萨成就八法，能净般若波罗蜜。何等为八？善男子，若菩萨精勤欲断一切不善法，而不著断见；精勤欲生一切善法，而不著常见；知一切有为法皆从缘生，而不动于无生忍法；善分别说一切字句，而常平等无有言说；善能辨宣一切有为无常苦法，于无我法界寂静不动；能善分别诸所作业，而知一切法无业无报；善能分别垢法净法，而知一切法性常净；善能筹量三世诸法，而知诸法无去来今。是为菩萨成就八法，能净般若波罗蜜。善男子，喻如虚空非行无行，菩萨行般若离一切行亦复如是。喻如虚空无能破坏，菩萨行般若一切诸魔无能坏者亦复如是。喻如虚空性常寂静，菩萨行般若觉见寂静亦复如是。喻如虚空性常无我，菩萨行般若了知无我亦复如是。喻如虚空性非众生，菩萨行般若离一切众生见亦复如是。喻如虚空性无有命，菩萨行般若离一切命见亦复如是。喻如虚空性无有人，菩萨行般若离一切人见亦复如是。喻如虚空非物非非物，不可名字，菩萨行般若离物非物见亦复如是。善男子，般若是寂静句，义无微觉故；是不作句，义自相净故；是无变句，义无行相故；是真实句，义不发动故；是不诳句，义无有异故；是了达句，义入一相故；是通明句，义断习气故；是满足句，义无欲求故；是通达句，义能正见故；是第一句，义无所得故；是平等句，义无高无下故；是牢固句，义不可坏故；是不动句，义无所依故；是金刚句，义不可摧故；是已度句，义所作办故；是真净句，义本性净故；是无闇句，义不恃明故；是无二句，义不积聚故；是尽句，义究竟尽相故；是无尽句，义无为相故；是无为句，义离生灭故；是虚空句，义无障碍故；是无所有句，义真清净故；是无处句，义无行迹故；是无罅窟句，义无所猗故；是智句，义无识别故；是无降伏句，义无群匹故；是无体句，义不受形故；是知见句，义知苦不生故；是断句，义知集无和合故；是灭句，义究竟无生故；是道句，义无二觉故；是觉句，义觉平等故；是法句，义究竟不变故。善男子，此般若不从他得，自证知见如性行故，知一切文字句义其犹如响，于诸言音随应而报其辩不断，亦不执著文字言语。菩萨摩訶萨如是能于一切言说中善能报答，知诸音声言说如响，解不可得故，不生执著，亦不戏论。善男子，是为菩萨行般若波罗蜜与虚空等。”

尔时，世尊欲重明此义，而说偈言：

“离著而行施， 普及适众性，

终已无碍心，亦不生分别。
我净故施净，施净故愿净，
愿净菩提净，道净一切净。
无我我所想，离爱及诸见，
舍除彼我相，施心如虚空。
去离诸想施，无有望报心，
舍嫉妒心结，施心如虚空。
空非色无猜，无受想分别，
亦无行及识，施时心亦然。
如空益一切，始终无穷尽，
解法施无尽，利益一切众。
如化人相施，不望所施报，
慧者施亦尔，终不望其报。
以慧断结习，方便不舍众，
不见结及众，如是施如空。
知身如镜像，知声犹如响，
知心如幻化，法性如虚空。
不舍胜菩提，不求于二乘，
于过去诸佛，常敬慎护戒。
不舍本愿故，能于诸趣中，
善成就本愿，摄意护净戒。
如空无希望，无热恼高下，
无浊无变易，净戒者亦尔。
如空受一切，水月不持戒，
护戒者如是，净戒如虚空。
骂打瞋怒等，忍力故不瞋，
无我及彼见，以去离二想。
内纯至善净，外行亦清静，
纯至故无瞋，顺如法能忍。
离诸见忍空，舍觉而离想，
无愿无希望，舍诸行所取。
无爱如虚空，不戏不怀恨，
无戏不求报，无漏忍者尔。
无忍无骂者，彼人声如响，
非是及无常，无如是戏论。
彼愚及我智，无生而示生，
虽如是分别，犹修无生忍。
如斫娑罗枝，余枝不分别，
断身无分别，此忍净如空。
勤修无所依，供佛无佛想，

持法不著文， 度众无众想。
净身净法身， 净口无言说，
净心无意行， 具诸波罗蜜。
具助菩提法， 净土如虚空，
成就辩总持， 求如是佛法。
如空受无倦， 故能生丛林，
遍至无形色， 精进亦如空。
常净如虚空， 无始亦无终，
人精进亦尔， 无始无终成。
如机关木人， 所作无分别，
行者无二想， 其进如虚空。
知止住内心， 摄外境界心，
自心彼心等， 依止无心禅。
诸法性常空， 以无漏智知，
不依阴界入， 亦不依三界。
不依于三界， 不依界道果，
如空常无依， 修禅者亦尔。
空无爱见慢， 修禅者亦尔；
空无退坏变， 修禅者亦尔。
平等寂解脱， 智者不缘界，
无结无禅等， 是故禅如空。
我净众生净， 智净识亦净，
义净文字净， 法净界亦净。
断不善及习， 大士集诸善，
知有无缘生， 无生不著灭。
善分别文字， 说无常苦法，
示现受业报， 言有垢及净。
知法性常净， 而筹量三世，
空无行非行， 慧无行亦尔。
如空无能坏， 无我人寿者，
非物非无物， 拔断二边见。
知句假不染， 不变真实句，
满足通达句， 达义慧等句，
等不动牢句， 金刚度净句，
明尽无尽句， 无为虚空句，
处櫟识别句， 降伏体智句，
断集灭道句， 法觉智慧句。
如响随声应， 无尽辩亦尔，
说法无所依， 此慧净如空。”

大方等大集经卷第十三

虚空藏菩萨所问品第六之二

佛复告虚空藏言：“善男子，何谓菩萨行功德与虚空等者？若菩萨闻佛无量法广大如虚空故，发萨婆若心，彼作是念：‘如萨婆若无量，佛无量，自在觉无量。于如是无量中，生无量欲精进不放逸行，为佛道故，当行无量菩萨所行之法。所以者何？如诸佛无量功德庄严身故，我亦为庄严其身，应成就无量善根。如诸佛无量功德庄严口、庄严意、庄严道场、庄严佛土故，我亦当庄严口、意、道场、佛土，应成就无量善根。我当教化无量众生，为成就善根，我于无量生死中，为成就善根故不生厌倦。诸佛世尊有无量国土、无量智慧、无量神通。彼诸众生无量行、无量心、无量诸根差别，于生死中受无量苦恼聚，起诸烦恼。我为入无量诸佛法，为舍无量众生所行诸根生死苦恼聚故，成就无量善根。’菩萨以如是正观之心，所作功德与诸波罗蜜相应，与四摄法相应，与四无量心相应，与助菩提法相应，成就众生受持正法，恭敬供养诸佛世尊，及净菩萨所行相应法。如是等所作无量功德与虚空等，以众生性无量故，佛智慧无量故，法界无量故，所修亦无量。如虚空众生性，佛智慧法界无处不至，一切众生皆得蒙益。菩萨所作功德亦复如是，至一切处利益众生，以无依著故，以愿方便力故。善男子，菩萨能如是行功德与虚空等。

“善男子，云何菩萨行智与虚空等者？若菩萨从善知识得闻法已，善顺思惟，所作诸行终不放逸，修少境界想已受无量想，受无量想已得如是智明，得是智明已得阴方便智，得界方便智，得入方便智，得谛方便智，得十二因缘方便智，知众生垢亦知垢性，知众生净亦知净性。所谓众生有染心，如实知有染心；无染心，如实知无染心；有恚心，如实知有恚心；无恚心，如实知无恚心；有痴心，如实知有痴心；无痴心，如实知无痴心；有诸烦恼心，如实知有诸烦恼心；无诸烦恼心，如实知无诸烦恼心。彼菩萨不见有垢心为卑、无垢心为胜。所以者何？以菩萨入不二性清净法门智故。如法性，我性亦尔；如我性，无我性亦尔；如无我性，诸法亦尔，性清净故。若入一切诸法性清净者，则不求诸法有垢有净，亦不见诸法文字相貌，不受不著故，亦不见诸法障碍盖缠及不障碍盖缠。菩萨思惟无量境界，离心、识二法，名之为智，不名为识。喻如虚空，无心、意识；菩萨亦复如是，离心、意识，知诸法性与虚空等，智行无碍过诸碍故。善男子，是为菩萨行智与虚空等。

“善男子，云何菩萨成就不离如如来所许念佛者？菩萨若在阿练若处，或在树下，或在旷野，或在露处，以得定力故能摄心不著诸缘，以不散乱心善摄所念，以行相观如来成就三十二相、八十随形好，庄严其身取一一相貌，为成就己身故，心向一切智地，于如来身

忆念放鬘网光明。菩萨以得解希望观如来身，满一由旬、二由旬，三四五十由旬，乃至百由旬，若过百由旬。以得解希望，观坐道场，或见转法轮，或见现种种威仪说法调伏众生，或见于一佛世界施作佛事，或五佛世界，或十、二十、三十、四十、五十，或百佛世界施作佛事，乃至百千无量世界施作佛事。得解希望观自见随意，若听法，若供养给侍诸佛世尊，于余威仪随意自在。菩萨如是观如来色身已，忆念佛功德，或观戒，或观定，或观慧，或观解脱，或观解脱知见，或观力、无所畏，或观佛不共法，或观菩萨本行，或观成就佛地。普忆念如来成就功德已，忆念如来业，何等相貌？云何造业？身造耶？口造耶？意造耶？威仪造耶？可见耶？不可见耶？可说耶？不可说耶？何国造耶？几种身造耶？如是种种忆念胜业，成就不可思议诸善根已，观如来法。诸佛世尊以法身故名为如来，不以色身。彼菩萨不见色是如来，不见相是如来，不见种性是如来，不见阴、界、诸入是如来，不见威仪是如来，不见过去、未来、现在世是如来，不见因是如来，不见缘是如来，不见所以是如来，不见和合是如来，不见有是如来，不见无是如来，不见成就是如来，不见败坏是如来，不见彼有如来，不见此有如来，不见如来在何所，不见如来，不恃如来，不分别如来，不得如来。喻如虚空无有阴、界、入名，非不利益众生；诸佛世尊无有阴、界、入名，亦非不利益众生。善男子，是为菩萨不离如如来所许念佛。

“善男子，云何菩萨不离如如来所许念法者？若菩萨念法，所谓四念处、四正勤、四如意足、五根、五力、七觉分、八圣道分、三脱门、四圣谛、甚深十二因缘、六波罗蜜，菩萨所应学藏，不退转轮净三境，是为菩萨所应念法。云何应念？念舍、念欲、离念、灭念，无来无去念，无樛窟念，无自性念，出世间念，解达念、尽念，无生念、无取念，无漏念、无为念，涅槃无自性。作如是念，于诸法中犹有法想。所以者何？以有想故则有动念，有动念故则住颠倒，住颠倒者无有念法。若离念法、非法二想，知一切法是无生已，断法想故得无生忍，得无所得无所有故。善男子，是为不离如如来所许念法。

“善男子，云何菩萨不离如如来所许念僧者？僧谓四双八辈，僧中或是阿罗汉向、阿罗汉果，或是阿那含向、阿那含果，或是斯陀含向、斯陀含果，或是须陀洹向、须陀洹果，是为声闻僧。复次有僧，所谓不退转菩萨得决定忍，上圣正位已，离诸相恃著戏论，次得如来功德无间。彼菩萨念如是等大菩萨众，应供养赞叹，合掌给侍，右绕礼敬，是良祐福田，是第一僧入圣众数，是僧所应作事皆已成办。是菩萨念僧，亲近菩萨僧，不亲近声闻僧。彼菩萨虽忆念僧，不取僧数，不取有数，知僧是无为，忆念无行、无变异、无生无灭，作如是忆念，不生心行境界。善男子，是为菩萨不离如如来所许念僧。

“善男子，云何菩萨不离如如来所许念舍者？所谓舍财、舍法。复次，有舍身及命，舍一切邪道。复次，有舍不取一切法。所以者

何？有取者则无舍；若不取者，名为究竟舍。究竟舍中则无有求，无求者则不望报，不望报故谓为真实舍者。若菩萨行如是坚固舍，随舍发愿，若舍时及发愿时，不见菩提及佛法而专念舍，念：‘过去诸菩萨行道时云何行舍，我今云何行舍，将无不及为智者所讥耶？’即能一切舍，舍已分别所舍：‘谁是舍者？舍何等物？谁作忆念？’如是分别已都无所得，不见舍者、所施物及所忆念。是为菩萨不离如如来所许念舍。

“善男子，云何菩萨不离如如来所许念戒者？若菩萨持戒至解脱处威仪行成就，乃至微戒畏如金刚，恒修净命善护持戒。菩萨自念戒摄身口，是无作相而谨慎奉行，修胜正命于萨婆若心终不废舍，纯至不动亦终不舍大慈大悲，摄取教诲破戒众生，宁舍身命不求余乘，是名为戒。菩萨念胜戒、不瑕缺戒、不荒秽戒、不求戒、不染戒、无浊戒、智者所叹戒。菩萨念如是等戒，不恃持戒，不毁破戒，不称己德，不讥彼过；终不舍戒，亦不依戒，亦不住戒；虽舍一切诸所恃著而行色行。是为菩萨不离如如来所许念戒。

“善男子，云何菩萨不离如如来所许念天者？若菩萨念天，所谓念欲界天，或色界、或无色界天。念欲界天持戒果报故，受适意色、声、香、味、触，以天五欲游戏娱乐，天衣饮食自恣满足，一向受爱喜适意乐。菩萨作是念：‘此一切兴盛皆当衰灭！是诸天等亦当无常变异，由放逸故不造善根，先有善业今悉当尽。此诸天等虽生天上，犹未脱地狱、畜生、饿鬼之分。’菩萨作是念已，不希望生欲界天处，唯除兜率天宫。兜率宫中生补处菩萨，于一切菩萨行以到彼岸，一切诸地、一切神通、一切诸定、一切陀罗尼、一切辩才、一切菩萨事，于一切方便等以度彼岸，但忆念如是功德，于此天中心生欣仰：‘若欲生天者，当愿生如是天中。’菩萨发心言：‘我何时当得如是天身？’菩萨复念色界诸天，此诸天等，由诸禅四无量心果报故生彼天处，已过欲界欲患，一心处定，以喜为食，一向知受第一乐报。菩萨作如是念：‘彼色界诸天，受少味故用为欢喜，无常有常想，苦有乐想，无我有我想，无涅槃有涅槃想。此色界诸天，亦有无常变异，未脱地狱、饿鬼、畜生之分。’是菩萨不愿生色界诸天处，唯除净居天，即彼入涅槃不还此间者。菩萨作是念：‘此是清净诸天，已脱五道流转生死。’是菩萨以如是故，生敬重之心，亦不愿乐求生彼处。菩萨复念无色界诸天，受无色定果报，已过欲界、色界，心处定寂静。菩萨作是念：‘此无色界诸天，离见佛闻法及供养僧。此诸天等，不知求出无色界法。假令久住会当变灭，未脱地狱、饿鬼、畜生之分。’是故于彼天处亦不愿生，但作是念：‘我当作天中天、如来、应供、正遍知。’是菩萨虽念诸天，不依欲界、色界、无色界天处，而于三界众生起大悲心。是为菩萨不离如如来所许念天。

“善男子，云何菩萨行诸法平等如涅槃者？若菩萨知入诸法平等如涅槃，见一切众生性同涅槃，知已入涅槃者，无阴、界、诸入。如

是菩萨见众生性同涅槃，过诸阴、界、入，见如影如梦，无有生死而现生死。凡夫众生所因结使造烦恼业，造烦恼业已受无量苦报。菩萨以般若波罗蜜力故，善观结使断令不生，亦不因彼作业而受苦报，得至涅槃平等之处，名之无为，过一切算数智道；不舍本愿故，游戏大慈，已到慧方便彼岸，已入佛神通力，已能善知分别诸想，自己得度度未度者，自己得解解未解者，自己得安安未安者，自己得涅槃使未得者得，于涅槃生死无有二想。是为菩萨行诸法平等如涅槃。

“善男子，云何菩萨善分别行相者？若菩萨翘勤精进求胜善法，于甚深法门心入筹量，清净通利分布慧明，得大智明门。以此大智明门力故，知一切众生心行所趣，总说一一众生，有八万四千诸行皆能了知，所谓贪欲行二万一千、瞋恚行二万一千、愚痴行二万一千、等分行二万一千，是为八万四千诸行。一一众生皆有是行，若广说者则有无量行。一一行相门中，知有八万四千诸根；一根门中，知有八万四千种差别解。尽知诸行、诸根、诸解差别相，知所应修习相。云何知差别相？知此诸行、诸根、诸解，是贪欲相，是瞋恚相，是愚痴相，是等分相，是减相，是增相，是住相，是达相，是名知差别相。云何知所应修习相？知诸行、诸根、诸解无常相、苦相、无我相、空相、寂灭相、离相、如实相、涅槃相、相自空相、相自离相。若能知如是等诸行、诸根、诸解，如如来成就诸行无障碍智，知一切众生诸行、诸根、诸解差别相，菩萨亦次如来智知，而不舍菩萨所行，教化众生无有疲倦。是名善分别行相。

“善男子，云何菩萨持诸佛法宝藏者？善男子，如来藏无尽亦无量，至一切处，悦可一切众生。如众生诸行、诸根、诸解，无量阿僧祇、不可思议、不可称、不可量；诸佛法宝藏，无量阿僧祇、不可思议、不可称、不可量，亦复如是。佛法宝藏文字，假令一切众生如阿难等，一劫乃至百劫，不能受持读诵，能令通利除义。所以者何？如来一切法宝藏唯有一义，所谓离欲义、寂灭义、涅槃义。若菩萨闻如来法宝藏已，随力所受，受持读诵通利，善顺正观，如所受行。菩萨入法藏门，坚持思惟，不依一切相行，则得陀罗尼门三昧门；得陀罗尼门三昧门已，能持一如来法宝藏文字及义，若二、若三、若四、若五，若十、二十、三十、四十、五十，若百、若千、若百千，乃至无量无边阿僧祇、不可思议、不可称、不可量，无有量过诸量。于一切诸佛法宝藏，心不散乱，受持读诵通利；文字及义广为人说，依义不依文，净意成就；所闻说法，乃至一句文义不失；能净辩门，善能巧说悦可众心，为诸佛所叹；亦能降伏诸魔外道，及供养三宝。乃至不见一法异于法性，不坏本际，不动于如。如来所觉了性法，以知一切法性如如来所觉故，乃至不见一法不入佛法者。所以者何？如来知一切法性如幻无成就故，知一切法性如野马无所取故，知一切法性如镜中像不彼此故，知一切法性如梦不真实故，知一切法性如响从缘起故，知一切法性空虚无实故，知一切法性无相无分别故，知一切法性

无愿无发动故。如来如实知一切法性如是相，菩萨如是知一切法性无生，能持诸佛法宝藏，乃至一切非念非不念。是为菩萨持诸佛法宝藏。

“善男子，云何菩萨分别众生从始以来清净而教化众生者？若菩萨为教化一切众生故，修于大慈大悲时，作如是思惟：‘何等是众生？’作是念言：‘此诸众生但假名字，颠倒虚假谓为众生。一切众生本际清净，毕竟无生无起，但因虚妄愚痴故造种种业，造种种业已受无量忧悲苦恼。喻如有人梦中劫盗他物，为王者所捉种种苦治，梦作贼人虚妄忆想受诸苦恼。’作是念言：‘我何时当得脱此苦恼？是人梦中实无成就，无所觉知。一切凡夫及一切诸法，皆亦如梦无有觉知，为颠倒所覆，受无量妄想忧悲苦恼，亦复如是。’菩萨作是念言：‘是诸众生，我应令如实觉知诸法，使脱妄想苦恼。’于诸众生中，亦不见众生性，而不舍大悲教化众生。是为菩萨分别众生从始以来清净而教化众生。

“善男子，云何菩萨善顺发行成就佛法者？若菩萨闻甚深微妙，于诸世间最胜佛法，发大欲精进：‘我应成就此甚深微妙，于诸世间最胜佛法。’如是善思惟分别：‘是何等法与何法相应？是何等法知何法？’菩萨作是念言：‘无有法与法相应者，无有法与法不相应者，无有法知法者，无有法不知法者，此诸法性钝性无性故。是一切法从因缘生，无有定主，而能随意庄严，有种种果报相，诸法无性故。布施是庄严宝藏大富相，布施得大富不离因故，布施不知大富，大富不能知施。持戒是庄严生天相，持戒得生天不离因故。多闻是庄严智慧相，多闻得智慧不离因故。思惟是庄严断结相，思惟得断结不离因故，思惟不能知断结，断结不能知思惟。’菩萨如是忆念诸法无生能庄严相，是故布施已回向萨婆若，成就檀波罗蜜，行是菩萨檀波罗蜜，则能具足佛法。持戒回向萨婆若，成就尸波罗蜜，行是菩萨尸波罗蜜，则能具足佛法。修羼提波罗蜜回向萨婆若，成就羼提波罗蜜，行是菩萨羼提波罗蜜，则能具足佛法。发毗梨耶回向萨婆若，成就毗梨耶波罗蜜，行是菩萨毗梨耶波罗蜜，则能具足佛法。入禅定回向萨婆若，成就禅波罗蜜，行是菩萨禅波罗蜜，则能具足佛法。净般若回向萨婆若，成就般若波罗蜜，行是菩萨般若波罗蜜，则能具足佛法。菩萨如是善顺行时，不见一法无因无缘而生者，亦不著因缘，自善顺入一切法。如我无生无起，一切法无生无起，亦复如是。如我空，一切法空，亦复如是。如我离，一切法离，亦复如是。知一切法入平等如性，非作非不作。是为菩萨善顺发行成就佛法。

“善男子，云何菩萨不退诸通，于诸佛法悉得自在者？若菩萨戒身真净，心定不动，得大智光明，已成就福德智慧资粮，已到诸波罗蜜彼岸，已成就四摄，已修四梵行，已修欲进念慧定，以善修四神足故得五神通。诸菩萨本业净故，勤进不废舍故，常不散乱行故，善伏结使故，离念声闻、辟支佛心故，受持方便故，攀缘上地诸法故，无

我无依行故，是以菩萨不退诸通。是故诸菩萨，究竟知诸法无退，知诸法与法性等无有变异如虚空无变。是为菩萨不退诸通，于诸佛法悉得自在。

“善男子，云何菩萨入甚深法门，诸声闻、辟支佛所不能入者？若菩萨入甚深因缘法，知逆顺因缘法，善知出知离、知生知灭、知集知尽，善知众生以何因缘故受垢离垢、舍净得净，乃至不见一法有垢有净；知一切法性相清净，亦不得清净法相。以我甚深故知一切法甚深，以我离故知一切法离，以我无二故知一切法无二，以眼、色二俱离故乃至意、法亦离，则入第一义。以世谛故假名诸法，亦不执著真谛、世谛。是为菩萨入甚深法门，诸声闻、辟支佛所不能入。

“善男子，云何菩萨于十二因缘，善得胜智方便，离二边诸见者？若菩萨知一切缘生法，属他所摄、属因、属缘、属和合、属所由，所谓诸法皆从境界缘生，各有所因，各有所依，诸法各各九相分别。譬如外诸药草丛林及诸树木等，皆无诸根，无记无知，依诸大故便得增长，各各无相分别；内有诸法亦复如是，依造业增长一切诸法，无我、人、众生、寿命，亦无作者、受者，诸法生时无能生者，灭时无能灭者。菩萨作是念言：‘是诸缘生法各无自性。无自性者他不能生，所因亦无性，所缘亦无性，无自性者则无他性。若法无自性他性者则无生，无能生未生，不可生已，生亦不生。若未生非未生，不生者则究竟无生无能生。是故一切诸法皆无生无起，但以名字故，假名从因缘生，而实无生，亦无断无常。所以者何？若法有生性者，则当有灭，则是断见。若无灭者，即有常见。离断、常见故，当知一切诸法皆无有生。是为菩萨于十二因缘，善得胜智方便，离二边诸见。

“善男子，云何菩萨为如来印所印，如如不分别智方便者？若菩萨于甚深法，得现前知见力，离一切倚著，过诸戏论，得无终无始无生法忍。如来尽知诸菩萨所成就根已，以如来印印之，所谓受决定三菩提记。是如来印无错无谬，无诸障碍，无诤竞不可沮坏，无能非者，无能发印者得。如来印愿行成就，智水所灌菩萨为如是印所印，所谓究竟无生无起印、空印、无相印、无愿印、离染印、寂灭印、涅槃印。菩萨智行成就，不坏如性，不变法界，不离本际，于诸法中不见上中下、黑白等差别。菩萨亦见一切众生，为此印之所印，无忆想分别，不舍本大誓愿。是为菩萨为如来印所印，如如不分别智方便。

“善男子，云何菩萨入法界性门，见一切法平等性？若菩萨见诸法界，无处不至，无来无去，无生无灭，无相无起，无戏无行。菩萨作如是思惟：‘此诸法等皆同法界。如法界是离欲界，离尘垢界故；是无生界，不可作故；是无灭界，无灭尽故；是无来界，不入根门故；是无去界，无所至故；是不可安界，无形质故；是无穢窟界，无依止故；是真实界，三境分断故。此法界中无眼界、无色界、无眼识界，如法界，一切法界亦如是，是故名一切法入于法界；乃至无意界、法界、意识界，如法界，一切法亦如是，是故名一切法入于法界。是菩

萨知一切法入于法界，知地界、法界无二无别，水界、火界、风界、法界亦无二无别，欲界、法界亦平等无二无别，色界、无色界、有为界、无为界、法界亦平等无二无别，如是知无心境界及觉。是为菩萨入法界性门，见一切法平等性。

“善男子，云何菩萨淳至坚固，喻如金刚心住不动于此大乘者？若菩萨以直心行，成就净淳至以不退，毕竟不减，勤进以无碍，大慈以无倦，大悲以普至，方便得成就真实观慧，无碍等法皆悉成就。菩萨见一切众生有垢有浊、凡愚粗犷、拒逆不顺，是故菩萨为教化一切群生故不废精进，见此生死有量过患忧悲苦恼等，不退于来际庄严，亦解无量无边阿僧祇诸佛法，为成就难集、难持、难满诸佛法故，种诸善根而能入如来无量法宝藏。众生性无量故，法性无量故，虚空性无量故，为受持一切如来法宝藏故，不舍精进，闻一切法空、无相、无愿，无作、无生、无起，解了分别观行身证，成就未具足佛法。终不中道证于实际，善入诸禅解脱三昧，亦不厌离欲界而现受生，已离阴、界、诸入，无形、无色、无行，而随众生性，随意示现种种形色而为说法，转菩萨轮，示大涅槃，亦不舍菩萨行。入如是不思议法门，知一切法无性相，不动、不坏、不散，于此大乘不退转。如金刚宝珠能鉴余宝，余宝无能鉴此珠者；诸菩萨亦复如是，能以声闻、辟支佛乘，度无量无边众生令入涅槃，而自不灰度，亦不退究竟大乘。是为菩萨淳至坚固，犹如金刚心住不动于此大乘。

“善男子，云何菩萨自净其界如诸佛界者？若菩萨知一切法无界无非界，至一切处无至无不至。若菩萨见法发六情皆知是佛法，亦不见凡夫法、佛法有异，作是念：‘此一切法皆是佛法，佛法至一切处故。一切诸法及佛法但假名字，亦非是法亦非非法，是故我等不应取著。’以自界净故知诸佛界净，此法与平等等。‘眼界是佛界，耳、鼻、舌、身、意、法界是佛界，我不应分别有尊有卑。’菩萨如是至一切法平等界。是为菩萨自净其界如诸佛界。

“善男子，云何菩萨得陀罗尼终不失念者？若菩萨已得成就陀罗尼行。云何陀罗尼行？善男子，陀罗尼行有三十二。何等三十二？修于得法为陀罗尼故，修于欲法，修于尊法，修于向法，修敬仰法，修于乐法，修求法无厌，修亲近供养多闻智慧者，修于和尚阿闍梨所无憍慢心尊重给侍，修如来教诲无所拒逆，修于说法人所生世尊想不求其短，修于受持正法开示解说，修所得法无所吝惜，修无希望而行法施，修求智慧根栽，修如所闻法善顺思惟，修于诸法坚固受持，修于梵行无有休息，修乐远离行阿练若行，修心常寂静，修勤行诸念，修顺行六和敬，修于诸长宿无调慢行，修于一切众生中生无碍心，修缘生法得，修顺忍，修三脱门正观心无惊怖，修四圣种顺行不惊疑，修勤受持诸佛正法，修为众生行于大慈，修受持正法不惜身命，修大智行不生憍慢，修常教化众生而无厌倦。善男子，是为三十二种修陀罗尼行。菩萨修已得如是陀罗尼门，以得是陀罗尼门故，能总持一切诸

佛所说。不忘不失陀罗尼者，所谓于如所闻法不忘不失，以念而念，以意分别，以进能觉；于诸文字入无边崖，于诸言音随类善解，言辞辩说无有滞碍；于不了义经善能进入，于了义经进入微觉；于世谛有分别智，于第一义谛知无言说，于诸谛有分别智；于四念处有不忘智，于四正勤等无坏智，于四神足有游戏智，于诸根门有差别智，于诸力中得无胜智，于七觉分觉一切法如性智，于八圣道无退没智；于定法中得善住心，于慧法中得遍至智，于明解脱得随顺智，于诸辩中得深入智，于诸神通得生起智，于诸波罗蜜得分别智，于四摄法得方便智，于讲法处授不及智，于诸经义得无分别智，于诸文字得无尽智，于一切众生得称足智，随所受解得说法智，于一切文字得所因辩智，于一切垢净得如实觉智，于一切法得无障翳明智，是为陀罗尼。得陀罗尼平等心者，去离憎爱能堪受法雨，断一切结使热恼，顺诸助道法，是为陀罗尼。菩萨住此陀罗尼故常行无失，是为菩萨得陀罗尼终不失念。

“善男子，云何菩萨得无障碍如来加持辩者？若菩萨善净淳至，善护戒众，拔诸慢根，离彼我想。诸佛世尊知如是菩萨，是大法器令持正法，以佛神力及自善根力故，得捷辩，得疾辩，得无碍辩，得无滞辩，得巧说辩，得甚深辩，得众音具足辩，得善庄严辩，得无减辩，得无畏辩，得妙偈赞辩，得快说修多罗辩，得善说譬喻本缘辩，得无坏胜辩，得分别句无尽辩，得圆足辩，得威德无违辩，得说法不唐捐辩，得断众疑辩，得利应辩，得分别文字不错谬辩，得悦可众辩，得问答方便辩，得以法降伏一切外道辩。已成就如是等二十四辩，此诸辩修行二十四种因故能得成就。何等二十四？善男子，若菩萨不违逆师长教故，能得捷辩；不谄曲故，能得疾辩；舍离烦恼故，得无碍辩；无我行故，得无滞辩；离两舌故，得巧说辩；入因缘法无际故，得甚深辩；行种种施故，得众音具足辩；严饰如来塔庙故，得善庄严辩；不舍菩提心故，得无减辩；善护戒众故，得无畏辩；施种种幢幡华盖宝铃故，得妙偈赞辩；恭敬供养给侍诸尊及师长故，得快说修多罗辩；昔植修习无量善根故，得善说譬喻本缘辩；不轻贱恶趣众生故，得无坏胜辩；施无量宝藏故，得分别句无尽辩；真实言说无粗犷故，得圆足辩；讲说法时无争竞故，得威仪无违辩；以德淳净顺法律行故，得说法不唐捐辩；不吝于法不恃己德故，得断众疑辩；求法之时，不威逼他生恭敬心故，得利应辩；常省己过不讥彼缺故，得分别文字不错谬辩；等润众生不望报故，得悦可众辩；受持大乘，不求小乘故，得问答方便辩；不著我见入平等性故，得以法降伏一切外道辩。是名二十四种成就诸辩因，善能随彼众生所应受解说法无有错谬，所受法者亦不退失。是为菩萨得无障碍如来加持辩。

“善男子，云何菩萨得自在示现受生死者？若菩萨成就十二法，得自在示现受生死。何等十二？亲近真善知识故，消除我见故，成就戒身故，善知入出定故，并修智慧方便故，善知深入诸通游戏故，如

实亲知诸法无生无起故，净本愿种故，常不舍大慈大悲故，知一切法如幻化故，知一切法如梦想故，一切诸佛加威神故。是为菩萨成就十二法，无生现生，无起现起，而现一切生死，于一切诸佛大会示现其身，在在佛国皆现受生，而常不动于真法身。是为菩萨得自在示现受生死也。

“善男子，云何菩萨破诸怨敌去离四魔者？若菩萨翘勤修习，观五阴如幻，得离阴魔；观诸法性净故，得离烦恼魔；观一切法从缘生性不成就故，得离死魔；观一切法缘所庄严是无常败坏相故，得离天魔。菩萨如是观故得离四魔，发趣菩提终不懈息。所有障菩提魔业，菩萨皆能远离。何谓魔业？所谓心向小乘是为魔业，不护菩提心是为魔业，于众生生异想是为魔业，行施望报是为魔业，为受生故持戒是为魔业，有色想行忍是为魔业，为世事精进是为魔业，于禅生著味想是为魔业，于慧生戏论是为魔业，厌倦生死是为魔业，作诸善根而不回向是为魔业，厌恶烦恼是为魔业，犯罪覆藏是为魔业，憎嫉菩萨是为魔业，诽谤正法是为魔业，不受正法是为魔业，不知报恩是为魔业，不进求诸波罗蜜是为魔业，不敬顺法是为魔业，吝惜于法是为魔业，为利养说法是为魔业，不知方便而化众生是为魔业，舍四摄法是为魔业，轻毁禁者是魔业，嫉持戒者是魔业，学二乘行是为魔业，希望正位是为魔业，舍离大慈而观无生是为魔业，欲证无为法是为魔业，厌离有为功德是为魔业，不愍众生是为魔业，不谦下尊长是为魔业，习行两舌是为魔业，谗谄多奸是为魔业，显己净行是为魔业，作恶不耻是为魔业，不流布法是为魔业，以少德为足是为魔业，不遮结使是为魔业，不舍心垢是为魔业，忍沙门垢是为魔业。善男子，若亲近行一切不善法，远离一切善法尽是魔业。善男子，是谓诸魔业。行是业者障菩提道，彼诸菩萨已过舍离，能正受行故。云何为正受行？若菩萨成就四法能正受行。何等为四？一者、于诸波罗蜜法无懈退行，二者、不舍欲进及不放逸，三者、正住方便大慈法中，四者、入甚深无爱无憍窟法门。善男子，菩萨成就此四法，正受行故能破诸怨敌。是为菩萨能破诸怨去离四敌。

“善男子，云何菩萨庄严功德资粮利益众生者？若菩萨善根回向向无等等，若有所种善根，若布施、若爱语、若利益、若同事，尽以施与一切众生，以净戒众故得自在力；用此自在力故，随诸众生所应受乐而度化之。以种功德无厌故，得无尽宝手；用此无尽宝手，能施众生无量富乐。以求无边智慧资粮故，得无碍陀罗尼辩；用此无碍陀罗尼辩能总持一切诸佛所说，能说妙法悦可众心。以善调身心故，不退于诸通；用此不退诸通力故，能过无量佛刹，以无数方便度多众生。以常勤求法无疲倦故，得一一毛孔出无量法门；用出无量法门力故，能常以法施利益众生。以并修慧方便波罗蜜故，得分身智；用此分身智力故，能于诸趣中在在现身度化群生。常以无相敬侍诸佛故，得无厌见闻；以此无厌见闻力故，其有众生得见闻者，彼诸众生乃至

为作大涅槃因。是为菩萨庄严功德资粮利益众生。

“善男子，云何菩萨世无佛时能作佛事化度众生者？若菩萨已成就菩萨十力，已于菩萨四无畏中而得自在，已于菩萨十八不共法中不从他受，已修如来力无所畏不共法等，已得游戏首楞严三昧，已于四辩得智力自在，已于诸佛法得灌顶正位，于一切诸菩萨行得次佛神力。若有菩萨成就如是等法者，若诸佛土众生应见佛身而受化者，然彼土世无佛时即于彼国而现入胎，现初生时，现出家时，现坐道场转法轮时，现舍寿命未入涅槃时，亦能示现大涅槃，亦现法住时节久远，亦复不舍菩萨行法，亦不用所化以为满足。是为菩萨世无佛时能作佛事化度群生。

“善男子，云何菩萨得海印三昧，能知一切众生心行者？若菩萨多闻如海，成就慧众常勤求法。菩萨为闻法故，尽能施与珍宝库藏；为闻法故，尽能施与仆从给使、妻子眷属；为闻法故，舍家饰好严身之具；为闻法故，谦下给事；为闻法故，舍国土荣位及己身命。菩萨以如是等无数方便，勤求法门而不恃所行。菩萨为闻法故，去至一由旬乃至百由旬，为闻一四句偈受持读诵广为人说，不舍是精进。是菩萨自成就多闻，于一切众生生大悲心、无忧心、不望报心，乃至一众生不生轻贱而为说法；从一日乃至七日而无食想，乃至命终不舍说法。以说法善根回向海印三昧，随所闻法受持读诵通利，善知义趣不依文字，真实坚持终身不舍。菩萨发大欲精进，以此大欲精进力故，不久便得海印三昧；得此三昧已，即得自然无量阿僧祇百千万法门，得无量阿僧祇百千万亿修多罗，不从他闻自然能说一切诸佛所说悉能受持，能了一切众生心行。善男子，喻如阎浮提一切众生身及余外色，如是等色海中皆有印像，以是故名大海印。菩萨亦复如是，得大海印三昧已，能分别见一切众生心行，于一切法门皆得慧明。是为菩萨得海印三昧，见一切众生心行所趣。

“善男子，云何菩萨得知诸尘界无碍者？若菩萨以眼空故知色亦空，以色离故知眼亦离，耳、鼻、舌、身亦如是。意空故知法亦空，以法离故知意亦离。菩萨如实知空性离性，于内外法无有障碍，知诸结本性净故则不起使，于一切法无所有著，以不见诸法著处、著法、著者。是为菩萨能得知诸尘界无碍。

“善男子，云何菩萨威仪行成就，离诸闇冥得胜光明，于诸法中得自然智，速得成就一切智行者？若菩萨发起所作修习正行，诸业尽是如来所许、智者所赞，所谓身、口、意业。以行此业故，悦可诸佛及余贤圣善知识等，所造诸业无能讥嫌，最胜无上无与等者无能毁损。所作诸业终不悔退，所作诸业不离愚痴，所作诸业皆能观知，所作诸业终不动转，所作诸业究竟吉祥。是菩萨知所作业非憍慢，所造慧所作业非愚痴所造，如是所作善业已，一切三昧诸陀罗尼门，悉现在前不从他闻。菩萨若见诸佛，若不见诸佛，终不退转助菩提道诸善根。若遇适意善知识、不适意善知识，不退菩提法。是菩萨过一切障

碍地，离一切诸魔结使修三解脱，般若波罗蜜力故，疾得佛道、自然道、一切智道、如来道。是为菩萨威仪行成就，离诸闇冥得胜光明，于诸法中得自然智，速得成就一切智行。”

尔时，世尊欲重宣此义，而说偈言：

“已离边无碍， 慧功德庄严，
彼离诸著相， 回向无上道。
舍我慢憍慢， 慧者庄严智，
无障碍解脱， 具足一切智。
非色非种性， 念佛非功德，
不忆念法身， 是念佛所许。
离欲性寂静， 非相非明闇，
无心无意行， 如是名念法。
圣无为无爱， 无诸烦恼染，
以解脱得称， 名念僧无碍。
已舍一切受， 无阴界入行，
解脱诸动念， 名究竟念舍。
不依无漏戒， 不行身口意，
不生过三有， 名念无漏戒。
如天净无垢， 兜率灌顶天，
忆念自业报， 当作天中天。
持世尊正法， 舍离诸烦恼，
解脱法非法， 是持世尊法。
如佛得道相， 受持法亦然，
善思惟真际， 无法可摄持。
如我性净故， 诸法性亦净，
知众生如相， 而教化众生。
不见众生增， 亦复不见减，
说断颠倒想， 教化无量众。
说诸阴界入， 不异于佛界，
知如虚空性， 则入于佛界。
言语诸文字， 犹如呼声响，
知非内非外， 即得陀罗尼。
受持读诵利， 进求说诸法，
无我无法想， 安住陀罗尼。
持诸佛所说， 善说悦众心，
不失诸禅定， 是陀罗尼力。
不持不诵文， 不积集诸法，
常说法无碍， 如龙降大雨。
无住无障碍， 说无量契经，

不生众生想， 慧者得是辩。
以佛力说法， 庄严自威仪，
悦众随所乐， 是辩佛所许。
知法实性者， 知与虚空等，
无我人寿命， 如是持佛法。
众生同涅槃， 究竟不生灭，
得是不动忍， 是为不放逸。
见诸阴如幻， 诸界如法性，
六入如空聚， 得离于阴魔。
知使如浮云， 究竟无和合，
于法无妄想， 则离烦恼魔。
知众生不生， 无生则无死，
诸法无去来， 如是过死魔。
无爱无动者， 行道无道想，
无我人行悲， 则能降众魔。
知智识平等， 不住为无为，
知众心如幻， 心健无能坏。
此彼无障碍， 成就胜法船，
渡众无众想， 是谓大船师。
知空无有我， 净生死渴爱，
将导渡众生， 是谓大导师。
善知进退相， 随法而依止，
方便示涅槃， 佛说善导师。
知心心相续， 二心不共俱，
是名知心性， 佛赞能护众。
知诸法性净， 如空水中月，
知者离烦恼， 是谓净众生。
知一余亦然， 入诸法如梦，
虚空不可取， 得道无染污。”

说此分别诸法门时，七十二那由他众生发阿耨多罗三藐三菩提心，三万二千菩萨得无生法忍。

时，大宝庄严堂，六种震动，大光普照。诸天于虚空中作百千种伎乐，雨种种天华，说如是言：“此诸众生为如来印所印，已入如来法中，闻此法门心得信解，受持通利，能为他说，如法修行。”白佛言：“世尊，我等一切向此佛土，深心供养，恭敬礼拜。以如来、应供、正遍知出世故，闻说此方便法门，及见此土菩萨。”

尔时，虚空藏菩萨闻佛解说已，心净欢喜；心净欢喜已，以无价宝网供养于佛。宝网中放大光明，照十方诸佛国土；供养已，白佛言：“世尊，未曾有也！如来无碍智如是甚深难解。如来、应供、正

遍知，如所闻法门，佛以无碍智如实解说，一切大众皆得欢喜。”

大方等大集经卷第十四

虚空藏菩萨所问品第六之三

尔时，众中有一菩萨，名曰速辩，即从座起，偏袒右肩，右膝著地，合掌向佛，白佛言：“世尊，此虚空藏菩萨，何因缘故名虚空藏？”

佛告速辩菩萨：“善男子，譬如大富长者多诸民众，无量库藏财宝充满，能行布施心无悭吝。若行施时，贫穷住者随意所须，开大宝藏悉能给与。彼诸众生皆得适意，长者施已心喜无悔。善男子，虚空藏菩萨亦复如是，常行功德成就方便力回向故，戒身善清净故，得成就神足力故，纯至究竟善清净故，所愿增益成就故，知一切法如幻化故，得如来神足力故，于虚空中随众生所须，若法施、若财施，尽能施与皆令欢喜。以是故，善男子，是贤士以此方便智故，名虚空藏。

“复次，善男子，过去无量阿僧祇劫，复过无量阿僧祇劫，不可思议、不可称、不可量、不可算数。尔时，有佛出世，号普光明王如来、应供、正遍知、明行足、善逝、世间解、无上士、调御丈夫、天人师、佛世尊，世界名曰大云清净，劫名虚空净。是大云清净世界，丰足炽盛，安稳快乐，多诸天人。地平如掌，无诸沙砾荆棘，宝绳界道，杂宝庄严，软如天衣阎浮檀金华遍布其地，众宝间错。世界众生无上中下，人天同等如兜率天。彼世界无有村营城邑聚落，是诸天、人各有宝楼台观，人宫在地，天处虚空，以此为异。是普光明王如来寿命十六中劫，纯以菩萨为僧，有六十那由他，皆得神通游戏，于菩萨行悉得自在。

“尔时，于三千大千世界处中有一四天下，名曰日明，如来于中成阿耨多罗三藐三菩提，于三千大千世界而作佛事。彼日明四天下中，有转轮圣王，名功德庄严，于四天下而得自在，七宝成就。是大圣王，于四天下中起七宝台，东西八由旬，南北四由旬，周匝有五百园观。是功德庄严圣王，有三十三万六千宫人嫔女，端正殊妙如天玉女；有四万童子端正勇健，各与半那罗延力等。尔时，功德庄严王与童子、嫔女及诸眷属俱，出诣大乐庄严园游观，作乐歌舞以自娱乐。尔时，众中有二大夫人，一名德威，二名德光，离本坐处诣一树下，思惟诸行无常。当作是思惟时，各有一子化生抱上，端正殊妙，成就第一微妙之色，相好严身观者无厌，身放大光普照园观。于上空中诸天唱言：‘此二童子，一名师子，二名师子进。’从是以来常名师子、师子进。尔时，二子适生不久，说诸妙偈，赞功德庄严王言：

“昔造善恶不败忘， 供养诸佛亦不失，

纯至不舍菩提心，坚持所闻不忘智。
调伏自守不失戒，忍辱软和善防护，
能报恩者造善业，能勤精进不失道。
善能专心定诸根，心能分别思惟慧，
以智能造不浊业，以此净法证菩提。
不为烦恼所染著，善能分别诸义趣，
是故能舍受胎形，化生清净莲华中。
我等从上医王佛，闻此普光明如来，
智慧无等叵思议，故来至此为法故。
愿共父王到佛所，礼拜供养大法王，
诸佛世尊甚难值，亦如优昙波罗华。’

“王闻是语甚适意，时会大众皆欢喜，
百千万种导从王，俱共发进向佛所。
到已瓔珞及杂华，涂香伎乐诸供具，
供养围绕七匝已，合掌敬礼在前立。
尔时师子师子进，顶礼两足天人尊，
以口鸣足而赞叹，言辞妙巧顺法义：
‘世尊是舍依止护，为世盲冥开大明，
体众心行到彼岸，随所信乐能悦可。
今此大王恃王位，贪著色声香味法，
是故不来至佛所，失供养佛不闻法。
快哉世尊生大悲，愿说无上菩提法，
令此大王发道心，坚固不退于佛智。’

“佛踊八十多罗树，处在虚空告王言：
‘人王汝今至心听，闻已如法而奉行！
五欲无常喻如梦，命喻草木如霜露，
王及国邑如幻化，是故智者不足贪。
习行欲者无厌足，习欲渴爱更增心，
习犹未足而命终，唯得圣智者乃足。
汝当善顺观己身，诸阴如幻不坚固，
四大其犹如毒蛇，六情无实如空聚。
妻子珍宝及王位，临命终时无随者，
唯戒及施不放逸，今世后世为伴侣。
观我神足力无畏，以诸相好庄严身，
辞应弟子徒众等，是故王宜发道心。’

“大王即时闻法已，妻子眷属皆欢喜，
七十六千亿众俱，皆发无上菩提心。

皆言我已发道心， 誓度一切诸众生，
我等涉行为众生， 成正觉已度脱之。

“尔时，功德庄严王从佛闻说如斯等偈，及见神变已，复增益坚固菩提之心，顶礼佛足而白佛言：‘唯愿世尊，及菩萨弟子大众，受我八万四千岁请愿，以衣服、饮食、卧具、医药给侍所须。’尔时，世尊及诸大众，为怜愍王故即便受请。于是功德庄严王，知佛受其请已，欢喜踊跃，顶礼佛足，绕已便去。

“时，王子师子、师子进，及二万王子，舍世王位，于佛法中剃除须发，出家修道，勤行精进，乐求善法。师子及师子进出家未久，得五神通坚固不退。彼佛知此二人得神通已，加其威神，常为众生演说妙法。彼二比丘，即于彼三千大千世界，从国至国，从四天下至四天下，施作佛事而为说法。彼二比丘，以如是因缘，化度无量阿僧祇众生，令坚固不退于无上乘。

“尔时，功德庄严王于八万四千岁中，以诸乐具供养世尊及大众已，与一切群臣前后侍从，为听法故往至佛所，而作是念：‘我诸子等剃除须发出家修道，常受供养自不行施，亦未见得过人之法，宁可还家舍财布施修诸功德，如我所种善根耶？’尔时，普光明王如来即知功德庄严王心，告师子进菩萨言：‘善男子，现汝自在功德神力，大菩萨变现，使此大众普得见闻，回彼邪心使得正见，为降伏诸魔外道故。’尔时，师子进菩萨即时入定已，现如是等相，使三千大千世界六变振动，于上虚空中雨种种妙物，所谓诸华香、末香、涂香、缯盖、幢幡，作种种天乐，美膳饮食、瓔珞衣服、种种珍宝，皆从空中缤纷而下；雨如此宝，满足三千大千世界，众生得未曾有皆大喜悦。

“尔时，从地神、诸天上至阿迦膩吒天皆欢喜踊跃，唱如是言：‘此大菩萨，可名虚空藏。所以然者？以从虚空中能雨无量珍宝充足一切。’尔时，世尊即印可其言名虚空藏。于是功德庄严王，见师子进作如是无量神变，心净踊跃得未曾有，舍憍慢心，合掌向佛，作如是言：‘希有世尊！菩萨功德智慧乃能如是，自然而雨无量珍宝，充足一切终无穷尽。世尊，在家者施，所益无几；夫出家者，以神通力施无崖际。在家者施，不称彼意，虽施犹吝以为苦恼；出家者施，能适彼意，亦不吝惜不生苦恼。’尔时，功德庄严王即舍王位与子吉意，以真心心剃除须发，于佛法中出家修道；出家已，为增长善法故常勤精进，出家未久修得四禅、四无量心及五神通。时，吉意王以法治化，国无怨者，精进不废供养世尊。”

佛复告速辩菩萨：“善男子，尔时功德庄严王者，岂异人乎？莫造斯观！即拘留孙如来是。尔时师子菩萨者，则我身是。尔时师子进菩萨者，即虚空藏菩萨是。善男子，虚空藏菩萨当乎尔时，初于空中雨无量珍宝，以是因缘常名虚空藏。善男子，尔时王子吉意者，今弥勒菩萨是。尔时二万王子于彼佛法中出家者，今与虚空藏菩萨来此众

中听法者是。于彼佛法中先出家者，彼王内外眷属及王子所化众生，今现在十方行菩萨道。是故速辩菩萨，应常净戒众增长本愿，以净戒众增长本愿故，随欲所作皆能成办。”

尔时，众中有诸菩萨，渴仰欲见虚空藏神变之力，虚空藏相貌云何。尔时，世尊知众心所念，即告虚空藏菩萨言：“善男子，现汝神变虚空藏相。”尔时，虚空藏菩萨即入称一切众生意三昧，入已以此三昧力故，于此三千大千世界，妙宝庄严堂上虚空中，雨种种妙物，随众生所欲尽给足之。所谓须华雨华，须鬘须香，须末香，须涂香，须缯盖、幢幡，须种种音乐，须严身之具、瓔珞衣服，须肴膳饮食，须车乘翼从，须金、银、琉璃、玻瓈、砗渠、玛瑙、真珠、珊瑚，雨如是等种种珍宝随意与之。有须法欲法乐法之者，于虚空中随所乐闻，出众法音悦可耳根，所谓契经、音合偈经、受记经、偈经、结可经、因缘经、双句经、本生经、胜处经、方等经、未曾有经、大教敕法，须如是等经者，尽出应之。须譬喻者，须那罗等变音者，须巧言语音者，须种种杂音者，须甚深音者，须方便浅音者，须如是等音者，尽出应之。须声闻乘度者，出四谛法音应之。须缘觉乘度者，出甚深十二因缘法音应之。须大乘度者，出六波罗蜜不退转法音应之。又于空中出诸妙偈曰：

“说诸法性，	如虚空等，	今说其门，	众咸谛听。
如空无高，	亦无有下，	以无高下，	亦无体性。
如空无生，	亦无有灭，	以无生灭，	性不败坏。
如空无增，	亦无有减，	以无增减，	同诸法相。
如空无明，	亦无有闇，	以无明闇，	心性亦尔。
如日照空，	亦无有喜，	不照不忧，	智者学尔。
如雨铍箭，	不伤于空，	行者修空，	亦不可伤。
如空水润，	无有喜悦，	智者称利，	亦无喜悦。
如空毁誉，	无有分别，	智者毁誉，	亦复如是。
如动大地，	空终不动，	智者无依，	不动法性。
如干大炭，	不烧虚空，	知烦恼者，	不为所烧。
如空常住，	无有败坏，	诸法亦尔，	常住法界。
喻如虚空，	受一切色，	法界亦尔，	受一切法。
如空非色，	相不可见，	心性如是，	同空无相。
虚空假名，	无有形貌，	心意识然，	亦假名说。
如空无边，	终不可取，	大人智然，	与虚空等。
如鸟行空，	无有足迹，	行菩提然，	行不可见。
身灭过去，	如虚空等，	现在诸阴，	同虚空相。
四大亦然，	同如虚空，	如三灾后，	无诸异相。
一切众生，	不能满空，	凡夫如是，	五欲无满。
若有圣智，	知一切法，	彼足无求，	离淫贪著。

如空广大，无有边崖，佛法亦尔，无有边际。
知诸法性，是佛法者，彼不依物，亦不舍物。
知物非物，住于实际，于物非物，无有二相。
以声明空，空性非声，无有音声，是为名空。
佛虽说空，终已无说，空性叵说，是故名空。
如幻化梦，野马影响，诸佛说法，皆悉如是。
为导众生，说如是喻，真净之义，更无譬喻。
诸法无相，以相如说，相及无相，法性俱无。
空相为相，空亦无相，体此相者，是为菩萨。
无滞无碍，无戏无动，无始无终，是为菩萨。
不离众生，非众生数，如众生性，是为菩萨。
喻如幻师，杀众幻人，实无死者，所度亦尔。
幻与众生，泥洹佛法，知同一性，无性无相。
此大士得，无漏空藏，充足一切，不可穷尽。
昔植众德，故获斯藏，不有贮聚，乃能如是。
能知诸法，因缘生者，其藏无尽，不可思议。
救世大仙，说四无尽，空及道心，众生佛行。
若财是宝，则可贮聚，非宝无宝，是以无尽。
究竟空法，已尽无尽，无尽不尽，是谓无尽。
知此门者，近于菩提，住此门故，速成菩提。”

以虚空藏菩萨神力故，于上空中雨如是等妙法及财，令三千大千世界一切众生，得无量不可思议快乐所愿具足。有患苦众生蒙药除愈；孤穷众生得无量珍宝；系闭众生得开悟解脱；诸根不具者悉得具足；应被刑戮者，空中雨诸化人而代受之；亲爱久别悉得欢会；被忧煎众生悉得无忧；堕三塗众生蒙光触身，除一切苦，身心快乐。

尔时，此三千大千世界中众生各各饮食游戏，五欲具足，共相娱乐，或有行施作诸功德。一切众生成就如是等乐，各作是言：“乃有此大士能施世乐！此虚空藏菩萨出世故，能施世间甘露，乃能常勤为与一切众生乐无疲倦也。”

虚空藏菩萨现如是等神变，悦可一切众生性，示现菩萨神力，以财施、法施摄众生故，令无量阿僧祇众生发阿耨多罗三藐三菩提心，令无量菩萨得无生法忍，复令无量阿僧祇不可说不可说诸菩萨发勤精进故，得成就诸三昧门陀罗尼门，得游戏神通门。

尔时，生疑菩萨作是念：“此不可思议未曾有也。虚空藏菩萨，但于娑婆世界示现种种神足也，亦于他方世界现种种神足也？”

尔时，虚空藏菩萨知生疑菩萨心所念，即放身光，以此光明力故普照十方无量无边诸佛世界。尔时，生疑菩萨及余菩萨，皆见虚空藏以神变力，于十方无量无边不可思议诸佛世界，应化众生亦如此娑婆世界等无有异，一切声闻、辟支佛所不能为。

生疑菩萨见如是神变已，疑网即除，合掌礼虚空藏菩萨而作是言：“希有大士！乃能安此无尽之藏在虚空中，普雨充足无量世界而犹不尽。大士，有安此藏在于空中其已久如？”

虚空藏言：“善男子，自我发阿耨多罗三藐三菩提心已来，常有此藏在于空中。”

生疑菩萨又问：“大士，发阿耨多罗三藐三菩提心已来几时？”

虚空藏答言：“世尊当知，汝可问之。”

生疑菩萨即白佛言：“世尊，虚空藏菩萨发阿耨多罗三藐三菩提心已来，为经几时？唯愿说之，除我等疑。”

佛告生疑菩萨言：“善男子，此事久远甚深难知。若当说之，令诸天人皆生疑惑，不信佛语，以不信故得无量罪。”

生疑菩萨复白佛言：“世尊，唯愿说之。若有久植善根者，必当信受！”

佛告生疑菩萨：“善男子，汝已殷勤欲闻，岂得不说？谛听！谛听！善思念之，吾当为汝分别解说，为坚固善根久植德本者生喜悦故。善男子，喻如一恒河沙数等诸恒河沙，以此诸恒河沙一沙为一佛土，末尔所佛土尽为微尘聚著一处，有一长寿之人于此尘聚中，百劫乃取一尘尽此尘数；欲知虚空藏菩萨发心已来劫数，复过于此，非算数所知。善男子，当以此比知虚空藏发心久近。

“善男子，乃往过去过恒河沙数等诸恒河沙，以此诸恒河沙一沙为一佛土，末尔所佛土尽为微尘，复过是数百千万劫，尔时有佛，号曰净一切愿威德胜王如来、应供、正遍知、明行足、善逝、世间解、无上士、调御丈夫、天人师、佛世尊。彼世界名曰现无量诸佛刹土，劫名众宝庄严。彼世界何故名曰现无量诸佛刹土？善男子，以彼刹土真净故，能现十方诸佛刹土，喻如无翳净月现于清水。善男子，以是因缘故，十方无量阿僧祇诸佛刹土，及彼诸佛并师子座，众生所作皆现彼国，是故彼世界名为现无量刹土。彼世界与百亿三千大千世界等，广博严净，丰乐安隐，天人炽盛。地平如掌，无有丘陵堆阜秽恶不净。多诸珍宝，间错而成端严可乐，悬诸缯彩、幢幡、华盖庄严，烧栴檀、沉水、众妙杂香，以杂色劫波育张施其上众宝妙华以布其地。在在处处，生宝华树、果树、衣树、瓔珞树、伎乐树、宝器树、香树、灯树、药树等，普以庄严。以界八道平正分明，真珠瓔珞宝网庄严，观者无厌。彼世界中不假日月光明，以诸灯树及摩尼树，而以照明无有昼夜，唯以宝华开合知有时节。彼世中众生，无盲瞎、痿蹙、瘠短、跛蹇形体，不具颜貌丑恶污面睐眼，无有如是等丑恶众生，一切众生皆成就三十二相庄严其身。彼世界中乃无三涂、八难诸恶名字，亦不闻外道异学音声。彼世界众生皆必定于阿耨多罗三藐三菩提，亦无声闻、辟支佛名，彼佛纯说诸菩萨乘。彼世界中无女人及胎产者，一切众生结跏趺坐自然化生，无老病名尽彼寿命。命终之后，生余清净佛土，或还生本土。善男子，彼土成就如是无量无边不

可思议功德，我若一劫若减一劫，说彼功德终不能尽。

“善男子，尔时现无量诸佛刹土中有一转轮圣王，名曰众天灌顶，典领三千大千世界，于诸佛所久植德本，利根慧猛，威德成就。灌顶圣王有三万六千子，皆于莲华中化生，皆于过去诸佛所久植善根。尔时，净一切愿威德胜王如来，与诸天世人大众恭敬围绕，游于众天灌顶圣王住处。诸菩萨众无量无数，非算师及算师弟子所能算知。彼佛寿命百千劫，劫数长短如此贤劫。彼世界众生，经尔所劫谓如一劫。尔时，众天灌顶圣王请净一切愿威德胜王如来及菩萨僧，四十中劫劫数长短，如此中劫供养适意，肴膳饮食、衣服、卧具、房舍台观、园林浴池，如是等种种所须之物，而以供养。尔时，众天灌顶圣王为供养佛故，庄严一小千世界以为妙堂，纯以琉璃宝庄严其地，周匝垣墙众宝合成，以赤栴檀及忧陀罗婆罗栴檀为柱，以砗磲宝为栴橈，间错此堂，以如是等庄严合成甚可爱乐。世尊中食后从三昧起，在此堂中为诸大众讲说妙法。复庄严一堂与一四天下等，欲令如来及菩萨僧于其中食，日日所用食直珍宝如大山[卅/積]。

“善男子，尔时众天灌顶转轮圣王，于四十中劫常专一念，未曾放逸不作余事，常以一切乐具，供养如来及菩萨僧，于尔所时所作功德，亦不发愿有所志求。过四十中劫，于最后日，以无价三衣供奉如来、诸菩萨僧，各施一衣。当乎尔日，世尊中后为诸大众广说妙法。于时，众天灌顶圣王侍从围绕，为听法故往诣佛所。尔时，世尊知彼圣王功德淳淑堪任有用。于时，世尊及众天灌顶转轮圣王等，七日七夜都无食想，处师子座身不倾动说大乘经，名摄菩萨净行不退转轮方便。世尊说如是法，为欲令尽受持不忘失故。灌顶圣王于七日七夜心不散，从佛闻法欢喜踊跃，其心悦豫从座而起，顶礼佛足，右绕七匝，绕七匝已右膝著地，合掌向佛，深心淳至，发阿耨多罗三藐三菩提心已，即说偈言：

“我发无上心， 请召诸群生，
无救者作救， 冥世开大明。
非为一法行， 非为供一佛，
非为一众生， 愿度无余故。
生老病死苦， 众恼所逼者，
一切莫忧惧， 我誓要当度。
欲瞋痴慢覆， 失道造诸恶，
正断邪恶业， 导至无畏城。
堕三塗众生， 难处受众苦，
强志莫忧惧， 我生施无畏。
无明痴所翳， 不识解脱门，
我为燃法炬， 得明至涅槃。
为四流所漂， 沉溺不得边，

为造胜法船， 令度诸有流。
处生死饥馑， 食先甘业尽，
我为作导师， 当令至安乐。”

佛告生疑菩萨言：“善男子，尔时灌顶圣王说此偈已，彼佛世界即六变振动，光明遍照。于时圣王发道心已，即得菩萨三昧，名曰不退菩提心。以得此三昧力故，常得见诸佛无碍，乃至梦中一切烦恼不为作患。自是已后，其心不与嫉妒共俱，不与破戒俱，不与瞋恚俱，不与懈怠俱，不与散乱俱，其心不与愚痴等俱。彼灌顶圣王，尽其形寿常给侍世尊左右，为闻法故。又常教化三万六千子令发阿耨多罗三藐三菩提心，亦复教化余无量无边众生令发阿耨多罗三藐三菩提心。

“善男子，尔时众天灌顶转轮圣王者，岂异人乎？莫造斯观！即今虚空藏菩萨是也。尔时，彼诸王子及诸大众教令发阿耨多罗三藐三菩提心者，我今即见在此会中大力精进大智慧诸菩萨摩诃萨听法者是也。

“善男子，虚空藏菩萨发心已来，经如是无量阿僧祇劫行菩萨道。此虚空藏菩萨从发心已来，未曾失菩提心，未曾胎产，常值诸佛听法、供养众僧，于诸佛所受持正法，摄法为首未曾失念，能善分别成就遍行，初发心已得甚深难解菩萨初地能行诸施，成就大悲得无戏论，无有厌倦发勤精进，学一切诸论知一切世法，成就惭愧得坚固念力。此菩萨住于初地，于无量阿僧祇、不可称、不可量、不可思议、不可说、不可说诸劫，能净淳至具足行檀波罗蜜。于诸众生常行大慈，勤修摄法、一切波罗蜜及诸助道法，成就欲进不放逸等，皆随顺檀波罗蜜。是菩萨住于初地，常勤给侍供养诸佛，勤求方便教化众生，净佛国土。住于初地，得入一切地智慧光明而不过初地，然后乃成就无量功德智慧资粮。得如来力持不退神通已，离诸地障碍，而从初地入菩萨第二地，住无量阿僧祇劫净于二地，修尸罗波罗蜜乃至十地。为——众生所经劫数亦复如是，于——地中过无量阿僧祇劫成就菩萨行，为诸众生现作佛事，而不舍菩萨所行。善男子，少有菩萨能行如是甚深不思议、殊胜不散乱、淳至勤修进行，如此虚空藏菩萨所行成就者。”

尔时，生疑菩萨问虚空藏菩萨言：“希有！善男子，乃能如是发弘誓愿，于此大乘久住生死无疲倦耶？”

虚空藏答言：“善男子，此大地运载诸山河石壁、树木丛林、一切药草、百谷苗稼及诸众生有疲倦不？”

答言：“不也，大士。”

虚空藏言：“善男子，诸菩萨心亦如大地，淳至成就故，行菩萨行无有疲倦亦复如是。”

虚空藏复言：“善男子，如此大地住于水上，此水持地无有疲倦；诸菩萨心亦如大水，以大悲力故，教化众生无有疲倦亦复如

是。”

虚空藏复言：“善男子，如此大水住于风上，此风持水无有疲倦；诸菩萨心亦如大风，以大方便力故，净佛世界无有疲倦亦复如是。”

虚空藏复言：“善男子，喻如大风住于空上无所依止，此空持风无所障碍、无有疲倦；诸菩萨心亦如风空，以般若波罗蜜力故，集一切佛法无有懈怠疲倦亦复如是。所以者何？菩萨知一切法相所以成就，无生、无作者、无受者，因缘合成故而有所作，所作诸法亦无有实；本际空故，本际离故，实无成就；自性空故，无生无灭。知一切诸法性相如，是故不见有法可生疲厌及疲厌者。所以者何？菩萨知一切法无二故，知生死性与涅槃性等，知涅槃性与一切法性等，知一切法性与无性等故，亦不恃不著，知一切诸法过去际、未来际无自性。以定力故，誓愿力故，不起于定而能现一切所作。”

尔时，生疑菩萨问虚空藏菩萨言：“唯愿大士说诸菩萨三昧行业。何谓三昧？何谓行三昧业者？”

虚空藏菩萨答生疑菩萨言：“善男子，有八万四千种诸三昧门，此诸三昧门能总摄一切诸余三昧。何等是八万四千三昧门？善男子，菩萨有三昧名曰不忘菩提心，能成就不散乱行。有三昧名曰降伏，能净淳至。有三昧名曰不显行，能究竟成就不退所作。有三昧名曰不依，能增进成就毕竟。有三昧名曰无垢，能成就白心。有三昧名曰照耀，能开示善法。有三昧名曰真净，能回一切魔行。有三昧名曰踊出，终不为外道诸论之所降伏。有三昧名曰舍离，能调伏一切诸烦恼结。有三昧名曰回伏，能令一切入真实道。有三昧名曰转进，能离声闻、辟支佛地。有三昧名曰乐游，能不厌生死。有三昧名曰趣向，能从一地至一地故。有三昧名曰怡怿，能成就悦可大众故。有三昧名无碍光，能于一切众生成就等心。有三昧名曰知所作，能顺一切所作不逆故。有三昧名曰师子相，能成就大众无所畏。有三昧名曰心勇，能降伏四魔。有三昧名曰莲华庄严，能成就不染世法。有三昧名曰光庄严，能普照诸佛世界。有三昧名曰清凉，能断离憎爱故。有三昧名曰幢相，能成就一切佛法光明故。有三昧名曰炬王，能成就大智慧光明。有三昧名曰日光，能成就断除无明闇冥。有三昧名曰集德，能成就辞辩无尽。有三昧名曰那罗延，能成就金刚身。有三昧名曰坚固，能成就不掉动心。有三昧名曰弥楼幢，能成就不见顶相。有三昧名曰坚自在，能成就度本愿。有三昧名曰金刚士，能成就不退诸通。有三昧名曰金刚场，能成就升于道场。有三昧名曰喻如金刚，善能鉴彻一切诸法。有三昧名曰行王，能观一切众生心行。有三昧名曰慧王，能成就胜智，知诸根满足未满足者。有三昧名曰随类，能成就随众生性而为说法。有三昧名曰修一切诸身，能成就法身。有三昧名曰不眇，能得成就无碍见见诸如来。有三昧名曰无诤，能得分别一切因缘。有三昧名曰无垢轮，能得成就转妙法轮。有三昧名曰电光，能得觉诸法

因缘。有三昧名曰善分别，能知诸界尽同一界。有三昧名曰庄严王，能得成就相好。有三昧名曰随解王，能以一音报于一切。有三昧名曰不分别法界，能知一切三昧同一三昧。有三昧名曰坚固，能得不退于诸法性。有三昧名曰不可坏，能知诸法同于法性。有三昧名曰无终，能知本际非际。有三昧名曰无作，能成就如如无有变易。有三昧名曰无动，能知诸法平等如虚空。有三昧名曰净住，能得成就诸波罗蜜。有三昧名曰善摄，能成就四摄法。有三昧名曰等行，能得成就四梵行。有三昧名曰无碍观，能得成就诸助道法。有三昧名曰海印，能得总持诸佛所说。有三昧名曰空，能断一切诸见。有三昧名曰无相，能断一切诸觉。有三昧名曰无愿，能得净成就一切诸愿。有三昧名曰决了，能得成就无生法忍。有三昧名曰不脱，能得成就不失所闻法。有三昧名曰无翳，能以善说悦可众生。有三昧名曰得丰，能得成就宝手。有三昧名曰法云，能雨一切法门。有三昧名曰宝庄严，能得成就不断三宝胜种。有三昧名曰无比，能成就智所作业。有三昧名曰虚空门，能得离一切障碍。有三昧名曰智印，能得遍知一切诸法。有三昧名曰见现在诸佛，能得成就诸如来功德。有三昧名曰选择寂静如意，能得成就离于本际。有三昧名曰分别一相法门，能得成就于未来世说一相法门。有三昧名曰了知一切法平等性，能得成就解了一切经书。有三昧名曰集诸功德，能得润益一切众生。有三昧名曰游戏神通，能得成就不可思议解脱。有三昧名曰自觉，能入如来秘密之藏。有三昧名曰首楞严，能于菩萨地中乃至示大涅槃。有三昧名曰遍至，能得成就在在现生。有三昧名曰灌顶王，能得成就菩萨所行无余。有三昧名曰无胜，能得成就如来十力。有三昧名曰无尽，能得成就四无所畏。有三昧名曰无等，能得成就佛不共法。有三昧名曰愿王，能得成就诸所闻法，自利利彼功不唐捐。有三昧名曰善入无垢印，能现前觉了一切佛法。有三昧名曰善知觉，能得成就萨婆若智无有遗余。有三昧名曰尽无边，能得成就一切佛事受行无余。

“善男子，此谓八万四千三昧门。以此等为首，菩萨坐道场时，便得八万四千诸三昧门，一一三昧以无量阿僧祇百千万亿三昧以为眷属。善男子，是诸三昧能知八万四千种众生诸所行法，以能显现八万四千法聚。善男子，是为略说诸菩萨行，及诸佛法藏少分，而诸菩萨行无量无边，诸佛法藏不可思议。”

尔时，虚空藏菩萨说是法时，有万六千菩萨得柔顺忍无量三昧而现在前，复有八万四千众生发阿耨多罗三藐三菩提心。

尔时，世尊赞虚空藏菩萨言：“善哉！善哉！善男子，快说是诸三昧法门，善说如来胜智。如汝自身，证行此法不从他得。”

尔时，生疑菩萨合掌白虚空藏言：“希有！大士，乃能成就如是不可思议功德！不从他闻，而能入于如来胜智行处。我亦愿乐欲令一切众生得此不可思议法如来行处。”

尔时，大德舍利弗问生疑菩萨言：“善男子，谁为汝作此生疑名

也？”

生疑菩萨答舍利弗言：“菩提心为我作此生疑名。所以然者？若不发菩提心，于佛法中终不生疑。其有发阿耨多罗三藐三菩提心者，其人于一切佛法则生疑惑，为欲现知明了一切佛法故。譬如灌顶刹利王最大太子，成就王相应作国主，次父之后应绍王位，是故其子每常咨问治国之法：‘我当云何监领国事？’大德舍利弗，菩萨摩訶萨亦复如是，毕竟发阿耨多罗三藐三菩提心者，次如来后亦应绍继无上法王尊位，亦常思惟咨问一切智相应之法：‘我等应当云何持无上法王法也？’是故亦于一切佛法每常生疑。大德舍利弗，当知以此因缘，由菩提心故立此生疑名也。”

生疑菩萨复语舍利弗言：“大德，我从昔来不忆值诸佛菩萨及善知识，未曾不问诸佛妙法，是故我真名生疑也。”

大方等大集经卷第十五

虚空藏菩萨所问品第六之四

尔时，虚空藏菩萨白佛言：“世尊，诸佛行处不可思议，菩萨所应行法亦复无量，是故此行不可以少誓庄严，不可以少言说，不可以小乘道而得成就。快哉！世尊，唯愿说诸菩萨大誓庄严及道庄严。菩萨以大誓庄严及道庄严故，能乘大乘行真实最上出世间道，为当得出世无上大乘，成就一切自然大智。虽未成一切智，能作佛事利益一切。”

佛告虚空藏菩萨言：“善男子，谛听！谛听！善思念之。吾当为汝，分别解说诸菩萨大誓庄严、乘庄严、道庄严。”

“唯然！世尊，愿乐欲闻。”

佛言：“善男子，菩萨有二十庄严法以自庄严，自庄严已能乘大乘。何等为二十？善男子，若有菩萨毕竟发阿耨多罗三藐三菩提心，于一切众生最胜大悲，生利益众生心；利益众生心已，便能庄严无上大誓。何谓大誓庄严？为度未度者大誓庄严，乘大船舫故；为解未解者大誓庄严，脱虚妄颠倒故；为安未安者大誓庄严，安止无畏道故；为未得涅槃者令得涅槃大誓庄严，舍五阴重担故；为常勤给足众生大誓庄严，精进不懈怠故；为不舍无量生死大誓庄严，不疲厌故；为悦可一切诸佛大誓庄严，现前供养恭敬故；为受持一切佛法大誓庄严，不断三宝种故；为受持一切所闻不忘大誓庄严，得陀罗尼故；为善说法悦可一切众生大誓庄严，得辩才故；为集无量功德资粮大誓庄严，成就相好故；为悦可一切善知识大誓庄严，坚固所行故；为遮驰散心大誓庄严，生诸禅解脱三昧故；为在阿练若处舍离身命大誓庄严，得六通故；为欲大师子吼无所畏惧大誓庄严，现前得无我法故；为欲至一切世界大誓庄严，欲知一切诸法如幻如梦如影故；为普照严

饰一切世界大誓庄严，净戒众受持成就力故；为成就如来十力大誓庄严，满足诸波罗蜜故；为得四无所畏大誓庄严，如所说行故；为尽得十八不共法大誓庄严，如所闻菩萨地法不戏论故。善男子，是为诸菩萨二十大誓庄严，以此庄严力故能乘于大乘。菩萨以此自庄严力故，断三恶趣因缘，是名庄严；具足善为诸佛所护持，是名庄严；随所欲至便得往生，是名庄严；舍一切胞胎能化生诸佛前，是名庄严；能行无诤身口意业，是名庄严；住不放逸行，为诸天世人之所恭敬，是名庄严；善通达三脱门而不证实际，是名庄严；一切无我法皆现在前而犹不舍大誓庄严，是名庄严。是为菩萨具足大誓庄严。

“云何云为庄严菩萨乘？善男子，乘者，谓无量也，无边崖故，普遍一切喻如虚空，广大容受一切众生故，不与声闻、辟支佛共，是故名大乘。复次，乘者，以正住四摄法为轮，以真净十善业为辐，以净功德资粮为毂，以坚固淳至毕竟为辘轳钉辘，以善成就诸禅解脱三昧为辘，以四无量心为善调，以善知识为御，以知时非时为发动，以无常、苦、空、无我之音为驱策，以七觉宝绳为鞅，以净五根为索带，以弘普端直大悲为旛幢，以四正勤为网，以四念处为安详，以四神足为速进，以胜五力为鉴阵，以八圣道为直进，于一切众生无障碍慧明以为轩，以无住六波罗蜜回向萨婆若，以无等四谛度到彼岸，是为大乘。此乘诸佛所受，声闻、辟支佛所观，一切菩萨所乘，释、梵、护世所应敬礼，一切众生所应供养，一切智者所应赞叹，一切世间所应归趣，一切怨憎不能轻毁，一切诸魔不能破坏，一切外道不能测量，一切世智不能与竞。此乘殊胜无能遏者，一切贤圣之所守护。此乘随愿，能至一切佛界故；此乘普照，能放缦网光明故；此乘有大名称，能出法门故；此乘强志，不退还故；此乘坚牢，不懈缓故；此乘正住，不倾动故；此乘众事备具，能满一切所愿故。善男子，是名大乘诸大誓庄严。菩萨乘此乘，乘此乘已能从一地至于一地，是其庄严；能舍诸地过患，是其庄严；能舍诸魔业，是其庄严；能化度众生，是其庄严；能净佛世界，是其庄严；能现菩萨神变，是其庄严；能度生死大饥馑，是其庄严；能入如来行处，是其庄严。

“善男子，云何菩萨庄严道？善男子，菩萨大誓庄严及乘大乘，已舍一切邪道，舍一切邪道已趣于真实正道到萨婆若。何谓正道耶？所谓不舍善法故行于大欲，不退菩提道故勤修精进，善根不失故行不放逸，不动淳至不没于所作，必能究竟仰攀上法，求功德资粮无有满足，求智慧资粮终不废舍，是为菩萨正道。复次，善男子，菩萨道者，所谓四禅、四无量心、四空定、五神通、三福业、三学、六应敬、六念、四摄法、四念处、四正勤、四神足、五根、五力、七觉分、八圣道分、三解脱门，知阴方便，知界方便，知入方便，知谛方便，知因缘方便，是名为道。菩萨得成就此道方便，皆能随顺入六波罗蜜道。所以然者？以菩萨六波罗蜜道不与一切声闻、辟支佛共故。此道一切诸佛皆所称叹，从诸如来口出成就方便。

“菩萨能知一切法实性者，能住出世间六波罗蜜圣道。云何为住？善男子，若有菩萨成就自然慧方便而求菩提，于此五受阴中为如实觉故求于菩提。是菩萨知色无常而行布施，知色苦，知色无我，知色钝，知色无智，知色如幻，知色如水中月，知色如梦，知色如影，知色如响，知色如旋火轮，知色无我，知色无众生，知色无命，知色无人，知色无主，知色无养，知色空，知色无相，知色无愿，知色无作，知色无生，知色无起，知色无出，知色无形，知色寂静，知色离，知色无终，知色无成，知色与虚空等，知色如涅槃性而行布施。菩萨如是行施时，以施离故知色亦离，以色离故知施亦离，以色施离故知愿亦离，以愿离故知色施亦离，以色施愿离故知菩提亦离，以菩提离故知色施愿离，而知一切法同菩提性。善男子，是为菩萨出世间檀波罗蜜。受、想、行亦如是。知识无常应行布施，知识苦，知识无我，知识钝，知识无智，知识如幻，知识如野马，知识如水中月，知识如梦，知识如影，知识如响，知识如旋火轮，知识无我，知识无众生，知识无命，知识无人，知识无主，知识无养，知识如空，知识无相，知识无愿，知识无作，知识无生，知识无起，知识无出，知识无形，知识寂静，知识离，知识无终，知识无成就，知识与虚空等，知识如涅槃性而行布施。菩萨如是行布施时，以施离故知识亦离，以识离故知施亦离，以识施离故知愿亦离，以愿离故知识施亦离，以识施愿离故知菩提亦离，以菩提离故知识施愿离，而知一切法同菩提性。善男子，是为菩萨出世间檀波罗蜜。复次，善男子，菩萨知色无常而护于戒，乃至知色如涅槃性而护于戒。知受、想、行亦如是。知识无常而护于戒，乃至知识如涅槃性而护于戒，以戒离故知识亦离，知戒离故乃至于识亦离，乃至知一切法同菩提性。善男子，是为菩萨出世间尸波罗蜜，羼提波罗蜜、毗梨耶波罗蜜、禅波罗蜜亦如是。知色无常而行于慧，乃至知色如涅槃性而行于慧。知受、想、行无常而行于慧，乃至知识如涅槃性而行于慧。以慧平等故知识平等，以识平等故知慧平等，以慧识平等故知愿平等，以愿平等故知慧识平等，知慧识愿平等故知菩提平等，以菩提平等故知慧识愿平等，即知一切法同菩提性。善男子，是为出世间般若波罗蜜。是为菩萨出世间波罗蜜道，悉能摄取一切诸道，当知一切诸道皆入在中。

“何故名之为出世间耶？善男子，五受阴名为世间。菩萨善分别五阴，观是无常乃至如涅槃性，已知此道中无有世间及世间法，知此道是无漏，是出世间，无所系著，是名出世间。善男子，是名菩萨道。复次，道者，所谓如实求一切诸法，分别选择不见一切诸法，相续积聚无二无别，是故名道。而此道者无有憎爱，无憎爱故名为平等，离思惟观察余乘故名为广大，去离谄故名为端直，去离曲心故名为无奸，断除诸盖故名无系滞，去离欲瞋、恚害觉故名无尘垢，不爱色、声、香、味、触故名为安乐，去离诸魔事故名为清凉，去离烦恼众贼故名为无畏，能到涅槃故名为出要，成就静定故名清凉水，慧善

解故名常明，善修慈故名凉乐，不舍大悲故名进无厌，常行喜故名悦豫，成就舍故名无过失，顺摄法故名大富，成就施食波罗蜜力故，得萨婆若智辩诸佛善护持故名过四魔行法，不舍本愿故名进无滞碍，渡一切烦恼流故名无有上，一切世间无能降伏故名无训对。善男子，此道成就如是等及诸余无量功德。一切大士乘此道故能往来教化无量众生，是为庄严；无诸烦恼现入烦恼，是其庄严；观于生死而不证实际，到空、无相、无作门，而能教化行诸见诸相诸愿众生，是其庄严；现入声闻、辟支佛涅槃而不舍生死，是其庄严；现诸趣受生而不动于法性，现说一切言教而不动于无言，是其庄严；能现一切佛事而不舍菩萨行，是其庄严。

“善男子，是为菩萨大誓庄严、大乘庄严、道庄严。菩萨以大誓庄严自庄严故，能乘大乘顺出世间圣道，未得萨婆若为众生故能作佛事。”

尔时，众中有菩萨名曰宝德，问虚空藏菩萨言：“善男子，汝已修此出世间圣道耶？”

虚空藏答言：“已修。”

宝德言：“云何修？”

虚空藏答言：“如得清净道如是修。”

宝德问言：“云何为清净道？”

虚空藏答言：“善男子，我净故道净。”

宝德问言：“云何为我净？”

虚空藏答言：“如世净。”

宝德问言：“云何世净？”

虚空藏答言：“善男子，色过去际净。所以然者？以色本际无来故。色未来际亦净。所以然者？以色未来际无去故。色现在际亦净。所以然者？以现在色无住故。善男子，是为世净。受、想、行、识过去际净。所以然者？以识本际无来故。识未来际亦净。所以然者？以识未来际无去故。识现在际亦净。所以然者？以识现在际无住故。善男子，是为世净。善男子，以世中世净故则我净，以我净故是名道净。”

宝德言：“善男子，如是净道能何所为？”

虚空藏答言：“能作大智慧光明。以此慧明力故，能知一切法过去、未来际。”

宝德复问言：“何谓过去、未来法际？”

虚空藏答言：“一切法于过去际无生，于未来际无灭，是名知过去、未来际。”

宝德复问：“若见过去、未来际者，为何所见？”

虚空藏答言：“见二俱离。”

宝德复问：“何谓二俱离？”

虚空藏答言：“离断常者。善男子，若有见法生及著法者，则是

断常见。所以然者？由有生故则有灭，有生灭故则有断常之见。若不见有法从自性、他性生者则见因缘，若见因缘则见法，若见法者则见如来，若见如来者则见如，若见如者则不滞于断亦不执于常，若不常不断者即无生无灭。”

宝德复问：“善男子，若无生无灭，云何有名数？”

虚空藏答言：“假言说故名之法耳！善男子，犹如有空故，有色差别名，所谓青黄赤白色、紫色、玻璃色、琉璃色、粗色、细色、长色、短色、方色、圆色。虚空不为如是等法所染，然一切色自性亦空，一切诸法亦复如是，同虚空性，但假言说有数数耳！所谓善法不善法、世间法出世间法、应作法不应作法、有漏法无漏法、有为法无为法。而菩萨亦不作一切非福行，所作福行皆是虚诳，非真不坚固。是菩萨知一切行非行，平等舍离一切相，成就般若波罗蜜力故，回向菩提而亦不见菩提有增有减。不于色中求菩提，亦不于受、想、行、识中求菩提。菩萨以无求故，住于清净戒众，修无愿解脱门，满足一切诸愿，知生死性同涅槃性。虽入究竟涅槃，为断除众生虚妄颠倒故行菩萨行，亦无行法可行。善男子，如是菩萨入于涅槃行菩萨行。善男子，凡有所作皆是生死，无有所作是名涅槃。菩萨所行是无所作，是故菩萨名入涅槃行菩萨行。善男子，凡有染著槃窟妄想戏论取相，是名生死。涅槃者，无染著槃窟妄想戏论取相，是名涅槃。菩萨以修无乐著槃窟妄想戏论取相，行菩萨行，是名菩萨入于涅槃行菩萨行。”

当说此法时，有五百菩萨得无生法忍。

尔时，世尊赞虚空藏菩萨言：“善哉！善哉！贤士，快说法性称菩萨行真实不异。”

虚空藏白佛言：“世尊，此是如来快也。所以者何？由世尊慧明故，我等得斯辩分。世尊，喻如日光照阎浮提，由日威德力故，有眼之者得见色像作诸事业；由于如来大智力故，照一切众生及诸世界亦复如是。诸法实性不可言说，诸言说性与虚空等，是故诸法不可得数。凡有数法则有限量，凡有限量则是有为，凡有为则为可知、可断、可修，凡是可知、可断、可修则有得、有证、有名数法，思惟筹量分别。不见有法可知、可断、可修、可证、可得故，即无有得。所以然者？以一切法无生故。能如是正见诸法，于诸法中不生爱染，以无爱染故则无有著，以无著故则无近，以无近故则无受无取。何谓无受无取？谓色若常若无常，无受无取；受、想、行、识若常若无常，无受无取。色若苦若乐、若有我若无我、若净若不净，无受无取；受、想、行、识若苦若乐、若有我若无我，无受无取。色若空若非空，无受无取；受、想、行、识若空若非空，无受无取。色若离若非离，无受无取；受、想、行、识若离若非离，无受无取。菩萨以无受无取故，得诸法无受三昧；住是三昧已，诸佛世尊以无上心通授是菩萨记。是菩萨虽入涅槃，见一切众生究竟同涅槃性，为教化众生故，

不舍大誓庄严及菩萨大悲。云何菩萨入于涅槃行菩萨行？善男子，凡有所作名为生死，凡无所作名为涅槃。菩萨以正智慧，见一切诸行离相。菩萨以法明眼明了见故，能说如来智明。”

尔时，宝德菩萨问虚空藏菩萨言：“善男子，汝何为自隐己智，言尽是如来力耶？”

虚空藏答宝德言：“善男子，如来岂不说隐善显恶也？善男子，我还问汝，随意答我。善男子，于汝意云何？若无阿那婆达多龙王时，阿耨大池能出四河，使诸众生得受用不？”

宝德答言：“不也。”

虚空藏言：“善男子，若无如来则无法律，菩萨无由得成大智之海，亦不能利益一切众生。以如来出世故则有法律，诸菩萨得成大智之海，亦能度化一切众生。善男子，是故当知一切菩萨所得辩说，能以利益众生，皆是如来神力。”

宝德复问：“善男子，诸如来辩，可得转至菩萨心不？”

虚空藏答言：“不也。”

宝德言：“云何由如来力故得辩说也？”

虚空藏答言：“善男子，喻如巧种果树，因缘和合便得果实；然树非即果，果不离树。善男子，如来所说法，菩萨于此法中善顺行故，便生大智明辩，因佛说得亦无有转。”

宝德言：“希有！善男子，因缘生法如是甚深难测。”

虚空藏言：“善男子，一切诸法究竟无生。”

宝德言：“善男子，诸法谓从缘生。”

虚空藏言：“善男子，生已生也，未生生也。”

宝德言：“善男子，生已不生，未生亦不生。”

虚空藏言：“善男子，是故无生。”

宝德言：“善男子，缘中有因耶？”

虚空藏答言：“无也。”

宝德言：“因中有缘耶？”

虚空藏答言：“无也。”

宝德言：“于汝意云何？若因若缘自实有性耶？”

虚空藏言：“无也。”

宝德言：“善男子，于汝意云何？诸法无因缘生耶？”

虚空藏答言：“不也。善男子，是故一切法无自性，无生无起无出。是以缘不生因，因不生缘，自性不生自性，他性亦不生他性，自性不生他性，他性不生自性，是故说一切法自性无生。所以者何？以如无生无灭，法性、实际亦无生无灭。如如、法性、实际，如来所觉一切诸法亦复如是无生无灭。”

宝德言：“善男子，如来亦不出世也。”

虚空藏答言：“此不应说也。所以者何？如来于一切法，尽不可说，不可言出，不得言不出。若有人问言：‘如来出世耶？不出世’

耶？’智者为不谤如来故应置不答。”

宝德问言：“云何应置？”

虚空藏言：“如法性住，应如是置。”

宝德言：“云何法性住？”

虚空藏答言：“如虚空性住，住无所住，法性亦如是住。如法性，众生性亦尔；如众生性，一切法亦尔；如一切法，如来亦如是住，住无所住。无住处故，无住无不住，是故不得言生，不得言灭。”

宝德言：“善男子，如来出世事，甚深！甚深！”

虚空藏答言：“善男子，若能如实解了缘生法者，名为佛出世。”

宝德言：“善男子，谁当解此说也？”

虚空藏答言：“若于一切法中不得增减者。”

宝德问言：“何谓为增？”

虚空藏答言：“增者所谓增上句，谓于无中妄生增上。无增上句者是平等句、无等句、无文字句、无句、无教句。无教之中，无句无增上，亦无心意识，以是故非句。喻如空中鸟迹究竟已无，当无而言鸟迹；于一切法中无有字句亦复如是，无句而假名为句。如无迹假名为迹，如来出世亦无有出，假名为出亦复如是。是故智者不应取著，以无取著故假名为出，而常依无出。所以者何？以无生是一切诸法实性故。无生者则无所有，是故名一切法无所有性，无所有性无有住处，无住处故是无住际。一切诸法及无住际即是实际，实际即是一切法际，是故言一切法与实际等。言实际者是三场分断际、不可坏际、不断不常际、如实际、三世等际，以如是等际等一切法际。所以者何？实际及我际无二无别，实际及众生寿命养育人际无二无别，实际及我见际无二无别。于我见中无有实际，能如是如实知者则无有二十种我见。所以者何？以实际中无一无多故。实际与平等，无来无去，无尽无减，实际究竟空故，是故言一切法是无尽门无尽际。涅槃者无尽，所谓空故无性故。如涅槃无尽无不尽，一切法亦复如是。以是故言一切法与涅槃等，诸法无等无不等无俦匹故。喻如虚空无有俦匹，一切诸法亦复如是。若见有罽匹言有涅槃者，已言有涅槃，便求涅槃则与贤圣相违。已言有涅槃故，便言此应知、此应断、此应证、此应修、此应生、此应灭，如是行不具者，不能如实知，不能如实见，则不识不解，不知不见；不识不解一切法故，则著于文字，于诸法中妄生争竞，生争竞者于佛法中则为可愍。所以然者？如来说言，沙门之法不应争竞。”

尔时，大德阿难白佛言：“希有世尊！此贤士才辩乃能如是甚深明了难解难测也。于一切法不从他受，如身自证能如是说。”

虚空藏菩萨即谓阿难言：“大德，我已自身证知，是故如所证知能如是说。何以故？我身即是虚空，以虚空证知一切法，为虚空印所印。大德阿难，凡诸菩萨修身善解身相者，能以此身作诸佛事，现种

种色像，而亦不退于真法身，亦复不离结业生身。又复不过于平等性，现变化身悉得自在，于一切佛国普能示现，终已不隐应化之身，如是行者皆可名之为身证行。”

阿难问言：“善男子，汝于法颇有证耶？”

虚空藏答言：“大德阿难，我不见法离于身、身离于法。”

阿难言：“善男子，汝若身证者，汝得阿罗汉果耶？”

虚空藏言：“大德，无得不得无所得故，于一切法无恼行故，离贪欲、瞋恚、愚痴故，是谓阿罗汉。”

阿难言：“善男子，汝何时当般涅槃耶？”

虚空藏言：“大德，阿罗汉者无般涅槃，知一切法究竟是涅槃亦无涅槃相。凡愚之人有如是分别戏论行，言此是生死、此是涅槃。阿罗汉者无是戏论也。”

大德阿难言：“善男子，如我解汝所说义。夫菩萨者，不应言是凡夫，亦不应言是学，不应言是无学，去离二相故。”

虚空藏言：“大德阿难，善哉！善哉！以非凡夫、非学、非无学故，在在处处皆能示现，于一切处亦不取著。”

尔时，五百大声闻各以己身所著忧多罗缙奉上虚空藏，奉上衣已，一时同声说如是言：“其有众生深心发阿耨多罗三藐三菩提者，快得善利！于如是大智法藏中不堕其外。”所上之衣即便不现。

彼诸声闻问虚空藏言：“衣何所至也？”

虚空藏答言：“入我藏中。”又言：“如来知之，汝等可问。”

尔时，诸声闻即白佛言：“世尊，衣何所至也？”

佛告诸比丘：“东方去此过无量阿僧祇诸佛刹土，有世界名曰袈幢，其界有佛，号曰山王如来，虚空藏已遣此衣至彼世界。”

诸声闻即白佛言：“世尊，以何因缘遣衣至彼耶？”

佛言：“欲以此衣于彼世界施作佛事。虚空藏菩萨于此所说，如虚空藏等三昧印法门，此三昧于彼衣中当演其义音。彼世界无量阿僧祇诸菩萨，闻此法故当得无生法忍。诸比丘当知，菩萨作如是种种方便利益众生。”

说此法时，于上虚空中雨无量金色华，以此诸华遍覆妙宝庄严堂。于诸华中出如是法音：“其有众生信此虚空藏所说法，善顺思惟分别其义者，皆当为不退转印所印，毕定得至无上道场。”

尔时，阿难白佛言：“世尊，是何瑞应乃雨此华，出如是妙音安慰众生？”

佛告阿难：“有梵天名曰光明庄严，从梵天上与六十八百千梵众俱欲来诣此。”

如来说此语已，时诸梵众忽然来至妙宝庄严堂上，顶礼佛足，右绕七匝，绕七匝已在一面立，合掌向佛而白佛言：“希有世尊！虚空藏菩萨不可思议，戒众清净，善修诸定，善分别大智慧，善能游戏诸大神通，善能满足大弘誓愿，善能成就大权方便，善能庄严身、口及

意，善能于诸法中成就大自在力。是虚空藏菩萨，身、口及意都无所作，无有分别忆想，而能现此不可思议庄严神变。又能显现无量百千法门，亦能出入百千诸三昧门，从昔以来常乐修习成就诸善法故。世尊，诸菩萨不应于往昔所修善根不知其因，集诸善根亦应无厌。所以者何？是因往昔所种善根果报故，能现如是不可思议神变。”

佛告梵天：“如是，如是，如汝所言。诸菩萨已成就善根资粮及出要智方便故，能现如是不可思议功德庄严之事，无忆想分别，亦无不分别。”

梵天白佛言：“世尊，云何菩萨集善根资粮及出要智方便？”

佛告光明庄严梵天言：“善根有三种。何等为三？所谓无贪善根、无恚善根、无痴善根，是名善根。资粮者，所谓舍一切所有修慈观诸法，是名资粮。方便者，所谓去离凡夫地，不愿乐声闻、辟支佛地，进入诸菩萨地，是名方便。智者，所谓知舍不善法智，知集善法智，知回向菩提智，是名智。菩萨能住如是等正行者，是名出要。

“复次，善根者，能发阿耨多罗三藐三菩提心。资粮者，所谓求一切善法。方便者，所谓已作未作善根终不废忘。智者，所谓知心如幻化。如是等法现前了知，是名出要。

“复次，善根者，所谓淳至。资粮者，所谓发动。方便者，所谓深心。智者，所谓无持无动。能行如是等法者，是名出要。

“复次，善根者，所谓欲善法。资粮者，所谓胜进。方便者，所谓安住不放逸。智者，所谓舍一切依著。能行如是等行者，是名出要。

“复次，善根者，所谓正信。资粮者，所谓不舍本愿。方便者，所谓不舍念定。智者，所谓慧。能正住如是等行者，是名成就善根、资粮、智方便、出要。

“复次，善根者，所谓悦可诸善知识。资粮者，所谓给侍所须，恭敬供养，尊重利益。方便者，所谓于善知识生世尊想。智者，所谓知时非时而问法。能正住如是等行者，是名出要。

“复次，善根者，所谓善顺听法。资粮者，所谓受持不废忘。方便者，所谓随闻能观。智者，所谓随所闻而行。能正住如是等行者，是名出要。

“复次，善根者，所谓值佛悦可。资粮者，所谓护一切诸波罗蜜诸摄法及助道法。方便者，所谓能从一地至于一地。智者，所谓得无生法忍。菩萨能正住如是等行者，是名成就善根、资粮、方便智、出要。”

尔时，光明庄严梵天白佛言：“希有世尊！如来能以四句义，总说一切菩萨行。世尊，一切佛法应于中求。”

尔时，虚空藏菩萨语梵天言：“一句亦能总摄一切佛法。何谓为一？所谓离欲句。所以然者？以一切佛法同于离欲。如佛法，一切法亦然。梵天，是为一句总摄一切佛法。复次，梵天，一空句总摄一切

佛法，一切佛法同于空故。如佛法，一切法亦然。梵天，是为一句总摄一切佛法。所谓无相句、无愿句、无作句、无生句、无起句、如句、法性句、真际句、离句、灭句、尽句、涅槃句，总摄一切佛法，以一切佛法同于涅槃故。如佛法，一切法亦然。梵天，是为一句总摄一切佛法。所以者何？以如是等句皆非句故。一切佛法非句，假名为句。复次，梵天，欲是离欲句。所以者何？离欲性即是欲故，一切佛法亦同是性。瞋恚是离瞋句。所以者何？离瞋恚性即是瞋恚故。愚痴是离愚痴句。所以者何？离愚痴性即是愚痴故，一切佛法亦同是性。身见是实际句。所以者何？实际性即是身见，一切佛法亦同是性。无明是明句。所以者何？明性即是无明故，一切佛法亦同是性。乃至苦恼是离苦恼句。所以者何？离苦恼性即是苦恼故，一切佛法亦同是性。色是虚空句。所以者何？虚空性即是色故，一切佛法亦同是性。受、想、行、识是无作句。所以者何？无作性即是识故，一切佛法亦同是性。地大是虚空句。所以者何？虚空即是地大故，一切佛法亦同是性。水大、火大、风大是法界句。所以者何？法界性即是风故，一切佛法亦同是性。眼是涅槃句。所以者何？涅槃性即是眼故，一切佛法亦同是性。耳、鼻、舌、身、意是涅槃句。所以者何？涅槃性即是意故，一切佛法亦同是性。梵天，是为一句总摄一切佛法。菩萨入如是等一一智门，皆见一切佛法入于一句。

“梵天，喻如大海能吞众流，一一句中摄一切佛法亦复如是。喻如虚空悉能包容一切色像，一一句中摄一切佛法亦复如是。如是等一切佛法，若摄若不摄，若说若不说，不增不减，究竟离相故。梵天，喻如算师数数以算筹，布在算局上，然局中无筹，筹中无局。所以者何？究竟不相应故，究竟离故。如是于上一句中假名数故，言一切佛法皆入一句，而诸佛法不可名数算计，究竟不相应故，究竟离故。梵天，如佛法名数，即是一切法名数。何以故？一切法即是佛法。此法非法非非法，自性空故，自性离故，自性究竟无性故。无性即是虚空，虚空性同一切法性，此法性非生相非灭相，非有处相非无处相，是故一切法名无相无非相。”

说如是一法门时，于彼梵众中，有万二千梵天皆发阿耨多罗三藐三菩提心，复有昔植德本五千梵天得无生法忍。

尔时，众中有一菩萨，名曰宝手，问虚空藏菩萨言：“希有善男子！一切诸法及如来法，甚深难测不可思议。又善男子，何谓安一切佛法根本耶？”

虚空藏菩萨答宝手言：“善男子，菩提心是安一切佛法根本。一切法住菩提心故，便得增长。”

宝手菩萨言：“善男子，菩提心者，何法所摄得不忘失，能速至不退转地？”

虚空藏言：“善男子，菩提心为二法所摄得不忘失，速至不退转地。何等为二？所谓淳至、毕竟，是名为二法所摄得不忘失，能速至

不退转地。”

宝手言：“善男子，此二者为几法所摄？”

虚空藏言：“此二法为四法所摄。何等为四？所谓淳至者，为不虚诈、不谄曲所摄；毕竟者，为无我及上进所摄。是为二法为四法所摄。”

宝手言：“善男子，此四法为几法所摄？”

虚空藏言：“善男子，此四法为八法所摄。何等为八？所谓不虚诈者，为不犹豫及体真净所摄；不谄曲者，为正直及正住所摄；无我者，为不退没及进所摄；上进者，为功德资粮及智资粮所摄。是为四法为八法所摄。”

宝手言：“善男子，此八法，复为几法所摄？”

虚空藏言：“善男子，此八法，复为十六法所摄。何等十六？所谓不犹豫者，为大慈及大悲所摄；体真净者，为身调及心调所摄；正直者，为忍辱及柔和所摄；正住者，为无憍慢及无滞碍所摄；不退没者，为坚固及力所摄；上进者，为如所作及正行所摄；功德资粮者，为始发及究竟不舍所摄；智资粮者，为求多闻及思惟所闻所摄。是为八法为十六法所摄。”

宝手言：“善男子，此十六法，复为几法所摄？”

虚空藏言：“善男子，是十六法，为三十二法所摄。何等三十二？所谓大慈者，为无碍心及于一切众生等心所摄；大悲者，为无厌倦及勤给足一切众生所摄；身调者，为不触挠及不加害所摄；心调者，为定及寂静所摄；忍辱者，为受正教及顺行所摄；柔和者，为惭及愧所摄；无憍慢者，为谦卑及礼敬所摄；无滞碍者，为无垢秽及不强梁所摄；坚固者，为不犯所行及成就本愿所摄；力者，为住正意及不掉动所摄；如所作者，为如说及能行所摄；正行者，为正发及正进所摄；始发者，为必胜及不退所摄；不舍者，为乐胜及上求所摄；求多闻者，为亲近善知识及悦可善知识所摄；思惟所闻者，为智慧及善观所摄。善男子，是为十六法为三十二法所摄。”

宝手言：“善男子，此三十二法，复为几法所摄？”

虚空藏答言：“善男子，是三十二法，为六十四法所摄。何等六十四法？所谓无碍心者，为护我及护彼所摄；于一切众生等心者，为无别异及一味所摄；无厌倦者，为如梦观及知生死如幻所摄；勤给足一切众生者，为诸神通及方便所摄；不触挠者，为羞耻及信有业报所摄；不加害者，为少欲及知足所摄；定者，为无发恼及无散失所摄；寂静者，为舍吾我及离我所摄；受正教者，为求法及欲法所摄；顺行者，为敬重及平等无疲倦所摄；惭者，为内心断除及外不行所摄；愧者，为信乐佛智及在屏处不行恶所摄；谦卑者，为不驕慢及知自下所摄；礼敬者，为身端心直所摄；无垢秽者，为具静定及修智慧所摄；不强梁者，为不粗犷及不两舌所摄；不犯所行者，为不舍菩提心及念道场所摄；成就本愿者，为舍魔事及佛神力所持摄；正住意者，

为不轻躁及不掉乱所摄；不掉动者，为如石山及不可移转所摄；如说者，为所作善业及无热恼所摄；能行者，为无虚诳及不舍归趣所摄；正发者，为离边见及顺观甚深因缘所摄；正进者，为善巧及方便所摄；必胜者，为不懈慢及勇猛所摄；不退者，为大欲及增进所摄；乐胜者，为见如来及闻法所摄；上求者，为舍诸地过患及得诸地功德所摄；亲近善知识者，为无憎嫉及信乐所摄；悦可善知识者，为敬顺及不逆教敕所摄；智慧者，为无常观及无我观所摄；善观者，为修无相及不怙涅槃所摄。善男子，是三十二法，为六十四法所摄。”

宝手复问：“此六十四法，复为几法所摄？”

虚空藏答言：“善男子，此六十四法，为百二十八法所摄。何等为百二十八法？所谓护我者，为断一切恶及成就一切善根所摄；护彼者，为忍辱及柔和所摄；无别异者，为犹如水心及如风心所摄；一味者，为法界观及如如观所摄；如梦观者，为无移转观及无真实观所摄；如幻者，为适性示现及无自性观所摄；诸神通者，为了义及了智所摄；方便者，为大悲及般若波罗蜜所摄；羞耻者，为不覆藏所犯及悔过所摄；信有业报者，为不放逸及畏恶趣所摄；少欲者，为净处有齐限及离宿秽所摄；知足者，为易称及易养所摄；无发恼者，为究竟及究竟边际所摄；无散失者，为得忍及不退转地所摄；舍吾我者，为不计我身及与寿命所摄；离我所者，为无贪及无愚痴所摄；求法者，为智及断所摄；欲法者，为不著五欲及离烦恼所摄；敬重者，为起世尊想及疗救想所摄；无疲倦者，为身轻及翹勤省眠所摄；内心断除者，为身念处及受念处所摄；外不行者，为心念处及法念处所摄；信乐佛智者，为深敬重及净信所摄；在屏处不行恶者，为自证知及诸神天证知所摄；不轻慢者，为不自叹誉不讥彼人所摄；知自下者，为不虚称及不显己德所摄；身端者，为不行三不善业及不犯禁戒所摄；心直者，为常省己过及不说彼短所摄；具静定者，为寂静心及灭烦恼所摄；修智慧者，为选择诸法及知无我所摄；不粗犷者，为常行益事及顺忍所摄；不两舌者，为自足眷属及和合别离者所摄；不舍菩提心者，为众生及为佛智所摄；念道场者，为欲坏于魔众及成正觉所摄；舍魔事者，为正观及不舍菩提志所摄；佛神力持者，为坚固行及善淳至所摄；不轻躁者，为坚护诸根及不舍境界所摄；不掉乱者，为观苦及观空所摄；如石山者，为不高及不下所摄；不可移转者，为断爱及除恚所摄；所作善业者，为智所作业及舍魔事所摄；无热恼者，为净戒及净定所摄；无虚诳者，为诚实语及不望果报所摄；不舍归趣者，为成就贤士业及不行怯弱所摄；离边见者，为观无生及不败坏观所摄；顺观甚深因缘者，为观因及观缘所摄；善巧者，为第一无诤竞及不轻慢所摄；方便者，为离方便及无生方便所摄；不懈慢者，为身力及心力所摄；勇猛者，为胜进心及害怨敌所摄；大欲者，为不求利养及不爱身命所摄；增进者，为无愚冥及不退还所摄；见如来者，为修念佛及清净信所摄；闻法者为乐至讲所及乐请问所摄；舍诸地过患

者，为不散乱行及舍离恶知识所摄；得诸地功德者，为方便回向及不舍本行所摄；无憎嫉者，为能施一切及称意而舍所摄；信乐者，为无垢行及不浊心所摄；敬顺者，为知世宜及随顺行所摄；不逆教敕者，为舍除不净及净正行所摄；无常观者，为动转观及败坏观所摄；无我观者，为不得作者及不得受者所摄；修无相者，为不缘境界及除觉所说所摄；不怙涅槃者，为除去无明及断爱著所摄。善男子，是为六十四法，为百二十八法所摄。”

尔时，宝手菩萨从虚空藏菩萨，闻分别如是等法门已，欢喜踊跃得未曾有，即白虚空藏菩萨言：“希有大士！汝乃能成就如斯捷疾辩才及巧分别辩，事事所问尽能开解。如我今者，解汝所说义趣及与文字，以如是方便，若一劫若减一劫，说不可尽，辩亦无断。”

尔时，佛告宝手菩萨言：“善男子，如是，如是，如汝所言。此虚空藏菩萨若演一句之义，若一劫若减一劫，说不可尽，辩亦无断。虚空藏菩萨有如是无量无边不可思议无尽辩才。”

尔时，宝手菩萨以手遍覆妙宝庄严堂，于其手中出无量华香、璎珞、末香、涂香、衣服严身之具及诸幢幡妙盖，雨如是等上妙供具，供养如来及虚空藏。于上空中，百千音乐不鼓自鸣，于诸音中出诸妙偈，以赞如来：

“持德开德具百福， 上意调伏念不动，
沙门贤士降天人， 十力佛子十方吼。
大称威德自在尊， 降伏有畏除痴闇，
能度漂流诸天人， 闭恶趣门使清凉。
圣尊巧说音微妙， 无错无谬音恬静，
三界无等无三垢， 十方所说施众乐。
意念坚固乐寂静， 最胜十方降彼力，
已舍谄曲得甘露， 无有尘累众归仰。
世尊处众不动转， 而化十方无量众，
随众生行能随顺， 佛子亦乐修此行。
如日无翳能普照， 能令众华得开敷，
佛智慧光照长流， 诸子得悟亦如是。
如风无碍山不动， 净如虚空照如日，
佛子放光雨甘露， 是故我礼佛及子。
大千海水尚可量， 十方虚空犹可涉，
诸众生心尚可同， 世尊功德不可尽。”

大方等大集经卷第十六

虚空藏菩萨所问品第六之五

说此偈已，时魔波旬严四种兵来诣佛所，到已化作长者形，前礼佛足，在一面立而白佛言：“希有世尊！此诸大士，乃能成就如是不可思议种种神变，又能示现不可思议庄严之事。世尊，于未来世有几所众生，闻此不可思议神变而得开悟，决定不疑者也？”

佛告魔波旬言：“于未来世中，少有众生若一若二，闻此不可思议神变经典，得信解者少耳！波旬，喻如一毛析为百分，以一分毛于大海中取一滴水。于汝意云何？取者多耶？在者多耶？”

波旬言：“世尊，取者甚少，在者甚多。”

佛复告波旬言：“如海中所取水甚少，众生闻是不可思议神变经典，能信解者少亦如是。如大海中水在者甚多，不信解不可思议神变经典者，多亦如是。”

佛复告波旬：“若有一人于恒河沙等劫，日日以满三千大千世界满中珍宝持用布施，不如善男子、善女人闻是不可思议神变经典能信解者，其福甚多！所以者何？波旬，若有信解是经典者，则知其人亲从释迦牟尼如来，闻是经典信解无疑。何以故？波旬，若未种善根众生，闻此世所难信经典，能信解者无有是处。波旬，我般涅槃后法欲灭时，多有憍慢众生，彼诸众生著我所说文字，不知方便故，各各生于诤竞，舍思惟法，舍已正行，为利养、名誉、衣服、饮食自缠缚故，乐论世俗种种诸事及世典文辞，而不论第一实义，不乐玩习佛无上道，反向他人诂论如是等真实深妙经典，则为诽谤诸佛，积集无量大苦恼聚。魔神诸天佐助彼人，为利养恭敬及名闻故，重增放逸憍慢。彼诸人等以憍慢故，若见有持戒贤行比丘受持读诵此经典者，而轻慢憎嫉横生谤毁。彼诸愚人则为现世破犯禁戒。其中或有畏不活者，或惭耻于人者，假被袈裟，或有舍戒还附俗者，如是等人身坏命终，堕阿鼻地狱受诸苦报。”

佛复告波旬：“于未来世中，若有求菩萨乘众生，著诸因缘善根微浅，新发道意，但著文字不能了义，于如是等甚深经典，受持读诵为人说时，则为他人所见轻贱陵蔑。以为他人所轻贱陵蔑故，便舍如是等甚深经典，读诵声闻、辟支佛相应经典。为利养、名誉、种种所须之所缠缚故，反诽谤毁谤如是真实甚深经典，又复轻贱受持读诵此经典者，乃至不欲以眼观之，常乐卑行退失菩萨大乘之法，所谓退失淳至心及深心。魔神诸天得如是等人便故，勤作方便坏乱其心，乃至使令不闻如是等经。设当闻者，生大诽谤无有信心。此人亦复积集无量罪聚，成就破法重业，永离三宝，不得见佛闻法及供养僧。所以者何？波旬，以于如来所说法律中生疑犹豫故。”

尔时，魔波旬自见有过，忧愁惶恐，前礼佛足在一面立。

时，虚空藏菩萨问魔波旬言：“汝何以忧愁憔悴战栗悚息，状如失志人，在一面立耶？”

魔波旬答言：“善男子，我从如来闻说如是等可畏之事，是故以为忧愁恐怖，当堕何趣？谁当救我？我于如来所说法律之中，数作无

量诸留难事，是故忧耳！”

虚空藏言：“波旬，佛法之中有出罪法。汝可来至世尊所，可诚心忏悔所作诸恶，更莫复作。若能如是，可获善利，为不空过。”

尔时，天魔波旬即前五体投地，礼世尊足下，仰视如来，流泪涕泣而白佛言：“世尊，我今诚心忏悔，从昔以来于如来所说法律之中，数作无量诸留难事。唯愿世尊起大悲心，以慈愍故愿受忏悔。”

佛言：“善哉！善哉！波旬，汝乃能自见所作诸恶，为上善哉！能如是悔过罪者，于佛法中则为弘广如来法藏，诸佛亦受其人悔过。是故汝今勿更复作！”

尔时，世尊告众菩萨言：“诸贤士，汝等各说过魔界行法，为生怜愍魔波旬故。”

尔时，众中有一菩萨名金山王，在众中坐即白佛言：“世尊，若有防护内界者，则为未过魔界。若复有菩萨见一切诸界同佛界者，知此佛界即是非界，是为菩萨能过魔界。”

尔时，宝德菩萨白佛言：“世尊，有依倚橛窟者，是为魔界。若有菩萨不倚橛窟，知一切法无得相者，则能为诸众生说断倚橛窟法，是为菩萨能过魔界。”

尔时，宝手菩萨白佛言：“世尊，若有取我、我所者，是为魔界。若有菩萨不取我、我所者则无诤竞，以无诤竞故则无心行，况有魔界耶？是为菩萨能过诸魔界。”

尔时，无诤勇菩萨白佛言：“世尊，若有触有离则有诤讼，有诤讼者魔得其便。若无触无离自不诤讼，亦不令他诤讼，以得无我故，无恼行者能过魔界。”

尔时，宝思菩萨白佛言：“世尊，若有妄想分别则是烦恼，及有烦恼处则是魔界。若有菩萨知一切诸法无相貌者，于诸烦恼则无妄想，若内若外亦不别知，去离一切妄想分别故，是为菩萨能过魔界。”

尔时，乐作菩萨白佛言：“世尊，若有乐不乐处则有憎有爱，若有憎有爱则是魔界。若有菩萨去离憎爱平等行者，于诸法中则无二想，得入不可思议界，是为菩萨能过魔界。”

尔时，离诤菩萨白佛言：“世尊，魔界由我而起。若菩萨能知我者，得无我忍即知我净，知我净故知一切法净，知一切法净故，知诸法性净如虚空，是为菩萨能过魔界。”

尔时，法自在菩萨白佛言：“世尊，若顺烦恼法为爱所使者，魔则得其便。世尊，若有菩萨于诸法中最得自在自然开悟，以为诸佛之所授记，于菩提法终不退转，是为菩萨能过魔界。”

尔时，山相击音菩萨白佛言：“世尊，若心有缺漏，则是魔界。若菩萨戒无缺漏、心无缺漏，成就一切诸空法行者，是为菩萨能过魔界。”

尔时，喜见菩萨白佛言：“世尊，若有不见佛、不闻法者，魔得

其便。若有菩萨常见诸佛而不著色像，常听诸法而不著文字，以见法故则为见佛，以无言说故能听诸法，是为菩萨能过魔界。”

尔时，帝网菩萨白佛言：“世尊，若有恃有动，则是魔界。若菩萨善相顺精进，知一切法究竟，无成就相故不恃不动，是为菩萨能过魔界。”

尔时，德明王菩萨白佛言：“世尊，若有行二法者，则魔得其便。若有菩萨知一切法同于法性，则不见魔界与法性有异解，知法性与魔界等，以不二相故，是为菩萨能过魔界。”

尔时，香象菩萨白佛言：“世尊，若有菩萨性弱畏甚深法者，则魔得其便。若勇健菩萨善能通达三解脱门，于甚深法不惊不畏，以能现前证知诸法实性故，是为菩萨能过魔界。”

尔时，弥勒菩萨白佛言：“世尊，喻如大海中水，同一碱味；佛法海中亦复如是，同一法味，所谓解脱味、离欲味。若菩萨善解一味法者，是为菩萨能过魔界。”

尔时，虚空藏菩萨白佛言：“世尊，喻如虚空究竟无垢，究竟明净，究竟不为一切烟尘云雾之所干绕；菩萨亦复如是，心如虚空，知一切法性常清净，亦复不为客尘烦恼之所干绕，得度般若波罗蜜彼岸，离诸闇冥，于诸法得慧光明者，是为菩萨能过魔界。”

尔时，文殊师利法王子菩萨白佛言：“世尊，若有言语则有障碍，若有障碍则是魔界。若法不为一切言说所表者，乃无障碍。何谓法不可言说？所谓第一义，其第一义中亦无文字及义。若菩萨能行第一义谛，于一切法尽无所行，是为菩萨能过魔界，无所过故。”

尔时，世尊告波旬言：“汝闻说过魔界法不也？”

波旬白佛言：“世尊，唯然已闻。”

佛言：“波旬，若有行如是等法者，一切诸魔无如之何！若有诸魔，欲于行人起魔事者，终不能办，而更成就无量罪聚。是故，波旬，汝可发阿耨多罗三藐三菩提心，于如是过魔界法，应坚持奉行。汝若能如是行者，则能过一切诸魔国界。波旬，喻如百千年垢腻，可于一日浣令鲜净；如是于百千劫中所集诸不善业，以佛法力故善顺思惟，于一日一时尽能消灭。波旬，如有干草[廿/積]大如须弥，以少火投中速能烧尽；如是以少慧力故，能除灭无量诸闇冥聚。何以故？波旬，慧明勇猛故，无明劣弱故。”

时，魔波旬即作是念：“大慈世尊今怜愍我，而能为我说菩提心法。我今宜应于如来所种少善根。”

于是波旬即化作八万四千殊妙宝盖，及无量华鬘、瓔珞、末香、涂香，而告己眷属言：“诸佛世尊出世甚难！卿等诸人咸应共来至世尊所，为供养故。”

尔时，魔天眷属中，有八万四千众及魔波旬，各共持殊妙宝盖及无量华香、瓔珞、末香、涂香，至世尊所设供养已，皆发阿耨多罗三藐三菩提心。诸余魔眷属诸天不发菩提心者，形相嗤笑讥论波旬，复

言：“希有波旬！乃能于沙门瞿昙前，诈现如是笃信之相，状如至亲。所以然者？波旬或欲于沙门瞿昙所学咒幻方术，是故今于面前，现善赞誉耳！”

尔时，魔子丑面及余魔子等，悉无信心各说是言：“假使沙门瞿昙，以诸方术回转魔王者，我等共当设诸方便令如是等经不得流布。设使流布者，亦当令少有护助，信受行者亦令甚少，当为多人之所薄贱轻弄，常堕边方，不令中国之所宣传。唯使诸无威德贫穷众生当得闻之，常为诸大威德豪富之人不信诽谤也。”

尔时，世尊告虚空藏菩萨言：“贤士，汝闻此诸魔子出是恶言不耶？”

虚空藏白佛言：“唯然，已闻。”

佛言：“善男子，是故汝当安慰护助此妙经典，为降伏诸魔神故。”

于是虚空藏菩萨即白佛言：“诸佛世尊皆已护持如是等经，我等亦当安慰受持。”

尔时，虚空藏菩萨即说咒曰，所谓：

“阿跋低(一) 跋低(二) 毗跋低(三) 婆醯多□散提(四) 头楼陀罗尼(五) 涅伽多涅伽多尼(六) 钵伽多尼(七) 迷罗育低(八) 伽楼那涅耐提(九) 萨遮跋低(十) 浮多勒差(十一) 达摩涅折低(十二) 达摩勒差(十三) 郁伽离(十四) 尸伽离(十五) 咻楼咻楼咻楼德迦撒(十六) 多婆婆帝低(十七) 尸罗□婆帝低(十八) 阿叉夜涅涕池(十九) 枳奢婆迦利拖(二十) 佛驮遏提魅低(二十一) 达摩蔚耆罗泥(二十二) 僧伽□铜咩(二十三) 阿□头隶(二十四)

“不可济度，坏魔眷属。

若犯此者，无诸刀杖，顺已处行，圣众所住。

吉吉等句，顺流解脱，破诸外论，降伏魔众。

四王常护，及天帝释，梵王世主，奉佛诸天。

护菩提者，如是等神，常当拥护，降伏诸魔。

利众生故，受持正法，护说法师，尽当拥护。”

虚空藏菩萨说此咒已，即时此妙宝庄严堂及三千大千世界六变振动。

时，诸魔子见上虚空中，有五百密迹执金刚杵，炽然如火甚可怖畏。时，诸密迹唱如是言：“若有魔子及诸魔神，若闻此咒，其有不发阿耨多罗三藐三菩提心者，吾等当击破其头令作七分。”

尔时，魔子及诸眷属，惊怖战悚身毛皆竖，即合掌礼佛而白佛言：“我等今发阿耨多罗三藐三菩提心。善哉！世尊，愿救我等离此恐怖得无畏乐。”

尔时，世尊告侍者阿难言：“如向此诸魔子所说言‘我等当于来世于此经典作留难’者，必当称其本誓而作留难如斯经典。唯当以佛神力及诸菩萨受持故，当得流布于世，而无有多人受持读诵分别解说。”

佛复告阿难：“汝见此诸魔子为脱恐怖故发阿耨多罗三藐三菩提心不？”

阿难白佛言：“世尊，唯然已见。”

佛复告阿难言：“此语即为诸魔子，当作离魔事因，以不深心发菩提故。”

佛复告阿难：“于未来世，当有佛出现于世，名无垢相如来应正遍知。此魔波旬，于彼佛所乃当不退转发阿耨多罗三藐三菩提心。阿难，彼无垢相如来，知其深心成就故，当授阿耨多罗三藐三菩提记。当于尔时，亦当作魔王，深心敬信于如来正法；如弥勒出时，有魔王名曰导师，深心敬信佛法圣众。此诸五百魔子，亦当于彼生于魔中，当于彼佛所为菩提故种诸善根；乃至波旬成佛之时，当与授阿耨多罗三藐三菩提记。”

佛告阿难言：“此魔波旬，今虽发菩提心，犹豫不定，如少叠毳，虽尔当渐渐成就无量功德，为世之尊如今我身。”

尔时，众中有无量无边诸天、世人、释、梵、护世，闻授魔波旬记当得成佛，欢喜踊跃，怪未曾有，合掌向佛而作是言：“甚奇希有！其见佛者必得成就无量功德法宝之聚。所以然者？或有不信众生，为欲扰乱如来故而得见佛，或有遇会得见佛者，即为彼众生作因，乃至令得涅槃。”又白佛言：“世尊，自除如来应正遍知，谁能如是分别，知众生根？”

佛告诸天人言：“如汝等所言，其有得见如来者，无不蒙益。汝等当知，或有众生善根都尽，于无量阿僧祇那由他劫，无人身分者。如是众生见如来故，即便得作善因乃至涅槃。如来乃能如是，作无量不可思议无上福田。”

佛复告诸天人言：“心性常净，而凡愚众生不能如实知见。以不能如实知见故，言是垢；能正知见故，便言是净。而第一实义中，无有一法可净可污。汝等当知，诸烦恼者，无方无处，非内非外，以不善顺思惟故便生烦恼，善顺思惟故则无烦恼；增减不等则生烦恼，无增减者则无烦恼；虚伪妄想便是烦恼，无有妄想则无烦恼。是故我言，如实知邪见则是正见，而邪见亦不即是正见。能如实知者，则无虚妄增减取舍，是故名为正见。”

佛复告诸天人言：“喻如大地依水界住，大水依风界住，大风依虚空住，虚空无所依住。如是大地无所依住，而假有依住之名。是故汝等当如是知之，苦依于业，业依于结，而苦、业、结都无所依，以心性常净故。如是当知，一切诸法无有根本，都无所住，以假言说故，言有而实无也。是故说一切法本性常净，究竟无生无起。”

佛复告诸天人言：“是故汝等当知，此法门名为性常净法门。菩

萨通达此门者，不为一切烦恼之所染污，而亦不恃此清净门。以舍一切诸恃动故，使得平等道，能过魔界，入于佛界，亦能得入诸众生界，而不动法界知一切法无界无非界，而能速生一切智界。”

当说此法时，有五百菩萨得无生法忍。

尔时，申越长者在于众中，从座而起，顶礼佛足，白佛言：“世尊，为我故说如是等甚深经典。我先为触恼世尊故，作大火坑及设毒饭，而大圣如来是不可害者。故我于佛生信敬心，自尔以来，疑悔心结常未能除灭。今者从佛闻此甚深微妙经典，疑悔即除，心无障碍，得安乐行。世尊，是故我信敬心转复增长。今我家中多诸财宝，当以供佛、法、僧，及诸沙门、婆罗门、贫穷孤独、下贱乞儿。世尊，谁当闻是断一切缚甚深经典，而于一切诸物生贪著者乎？”

尔时，虚空藏菩萨白佛言：“世尊，诸佛如来无上菩提，甚为甚深，难可测知。若有菩萨于未来世，舍己身命及利养名誉，而能侍佛菩提者，甚为难有！”

尔时，众中有六十八亿菩萨，从座而起，合掌向佛，一时同声而说偈言：

“世尊灭后，	我等能忍，	舍身寿命，	为护正法。
舍利名誉，	离诸贪著，	愿护正法，	为佛智故。
骂詈呵责，	及讥刺语，	护正法故，	当忍受之。
轻贱毁弄，	唱说恶名，	当以慈忍，	为护此经。
来世比丘，	计著诸有，	与魔为党，	诽谤正法。
毁禁行恶，	乐著俗累，	为利所覆，	不乐正法。
恃玩俗典，	憍慢放逸，	高叹己利，	蔑正行者。
常舍闲静，	乐处愤闹，	习世文辞，	计著吾我。
不营教化，	不业智慧，	舍离坐禅，	不亲三宝。
无有智慧，	群党求利，	动与结俱，	乐受他供。
他慈心施，	惜犹己有，	数往到彼，	说诸世事。
田宅居业，	及贩卖事，	勤求息利，	犹言沙门。
驕慢著有，	依邪险见，	闻性空法，	当大惊怖。
言后长远，	但求现报，	当虚妄说，	非法言法。
如是大灾，	弊恶比丘，	魔及魔子，	复当佐助。
经文是一，	说义各异，	各是己论，	愚者当尔，
诸深妙经，	能与解脱，	当拥遏之；	及说浅事，
我胜汝劣，	由胜得果，	于佛法中，	当如是竞。
如是竞时，	众生数坏，	为非法王，	之所恼逼。
于是末世，	坏甚可畏！	我持正法，	救世所说；
我常慈心，	不舍法律，	生正大悲，	为世作护。
毁禁作恶，	不住正法，	坠堕何道，	我常忧愍。
见故作恶，	谤毁正者，	我终不共，	与为亲党。

常任我力，善护口过，见无用人，不说其短。
我住圣种，头陀护戒，处定习慧，常勤修行。
离世愤闹，乐处闲静，无著如鹿，善调知足。
若至聚落，摄根少语，见说法者，共论正法。
爱语利益，以化众生，又与说法，令断恶行。
我为正法，极远当往，为彼说法，利益众故。
若见凡愚，有缺失者，但当自护，住法行忍。
毁辱恭敬，当如须弥，不染世法，为世导师。
毁禁比丘，若来呵责，自省己行，将是业报。
当为是等，嫉恶众生，先意善言，现为恭敬。
彼即生念，我亦沙门，成就是德，无若干恶。
诸毁禁等，如失志人，闻是经忧，如剃照镜。
其作方便，不欲闻之，复教余人，言非正法。
又教国王，坏臣民心，诽谤正法，言非佛说。
我等于时，以佛力故，为持正法，不惜身命。
世尊知我，言无有二，当坚护持，住是正法。
作诚实语，如说而行，悦可诸佛，乃成菩提。”

尔时，虚空藏菩萨赞诸菩萨言：“善哉！善哉！诸大士，汝等乃能发诚实愿，受持如来甚深微妙无上大法，甚为快也！”

虚空藏菩萨白佛言：“世尊，其有善男子、善女人，受持读诵此经典者，得几所福？”

佛告虚空藏言：“贤士，譬如东方十三千大千世界，南西北方、四维、上、下各十三千大千世界，尽末为微尘，以尔所尘集为一聚。设有一人成就神足无量威德，寿命长远。此人持诸微尘，过东方尔所尘数世界，乃下一尘；如是展转东行，尽此尘聚，而诸世界犹不可尽。如东方世界，南西北方、四维、上、下，亦过尔所佛土乃下一尘，如是展转诸方世界，尽此尘聚而诸世界犹不可尽。虚空藏。于汝意云何？是诸世界宁为多不？”

虚空藏白佛言：“甚多！甚多！世尊，无量无边不可计知。”

佛言：“贤士，是诸世界微尘所著处及不著处，尽此微尘所及世界已，还为一大城，纵广高下悉皆同等，于其城中满葶苈子。贤士，是诸葶苈子，可数知不？”

虚空藏白佛言：“世尊，假设譬喻犹不能了，况可数知？唯除如来，无能数者。”

佛告虚空藏言：“如是，如是，如汝所言，唯如来能知是诸葶苈子，若百数、千数、百千万数。”

佛言：“贤士，设有一人成就神足无量威德，能以口吹是诸葶苈布散十方，一葶苈子堕一佛世界，终不过一。贤士，于汝意云何？是诸葶苈所及世界，宁为多不？”

虚空藏白佛言：“世尊，是诸世界，乃非心力所能分别。说分别者，令人心迷错乱。”

“贤士，我今告汝，若有行菩萨道善男子、善女人，日日以满尔所等世界，无量珍宝持用布施，无有休废不营余事。若复有善男子、善女人，受持读诵书写此甚深经典，不求利养，为菩提故，乃至为一人说，使其人闻已，劝令于阿耨多罗三藐三菩提，乃至发一善念，欲令正法久住世故。此人功德复过于彼布施者上，百倍、千倍、百千万倍，乃至非算数譬喻所及，何况能令住阿耨多罗三藐三菩提者！何以故？贤士，以能说如是无量善根，成就诸菩萨，为护持正法故。贤士，我不见菩萨更有余法能过于是，坚固正行，摄诸善法，教化众生者也。”

尔时，虚空藏菩萨白佛言：“世尊，希有如来不可思议，如来大法亦不可思议。如如来大法不可思议，其受持此经典者，所得功德亦不可思议。唯愿世尊，护持此经为当来世，令受持此正法诸善男子、善女人，手得是经，执在胸怀不离是经。若应离生死者，不从他闻，自然得悟菩提；悟菩提已，广为他说。”

佛言：“贤士，谛听！谛听！善思念之。吾当为护此经故，当说章句召护世四天王天、帝释、梵天王等诸神。以此章句召故，护世四天王天、帝释、梵天王，皆当拥护诸说法师持此经者，说此世所难信甚深经典时，使无能作留难，所谓若王大臣驱遣出国，若得重病，若斗争时起，若国土疾疫。如是等事起时，以咒术力故，即令消灭不得成就。何等为咒术章句？所谓：

“头头丽(一) 提提丽(二) 陀夜簸帝(三) 陀夜罗伽罗(四) 尼帝提(五) 毗婆知(六) 赊咩(七) 赊弥多毗(八) 目企(九) 臆帝低(十) 尼[山+耆]弩祢(十一) 阿[口]多丽(十二) 鸣多罗尼(十三) 婆簸斯(十四) 钵他输陀尼(十五) 钵陀[口]枳(十六) 钵陀散提(十七) 般若牟丽(十八) 阿娑究丽(十九) 浮陀勒差(二十) 伊那萨枝(二十一) 多婆萨枝(二十二) 多婆钵低(二十三)。

“随佛意，顺法性，恭敬僧，世主信。护世四王，为诸佛子，受持此咒，护说法者。”

尔时，四天王即从座起，合掌向佛，而白佛言：“世尊，我等当护此诸佛子受持经者。”即说咒曰：

“首鞞(一) 首婆钵低(二) 首提帝(三) 因哆拥(四) 陀梨拥(五) 陀罗尼(六) 颇耽糜(七) 阿丘拥怯卑(八) 阿目企(九) 陀罗尼陀拥(十) 藪首晒婆醯那(十一) 脾提脾陀赖散提(十二) 三咩(十三) 婆夜咩(十四) 三摩赖弥(十五) 波扇多[口+第](十六) 休休(十七) 醯醯(十八) 丘楼丘楼丽(十九)。”

于时，四大天王自在者，说此不可犯咒已。

尔时，天帝释即从座起，心净悦豫，合掌向佛，而说偈言：

“末世饥馑时， 大称诸贤士，
受持说此经， 我当为给侍。”

于是帝释说此偈已，即说咒曰：

“弥低(一) 首脾(二) 摩诃弥低(三) 达摩弥低(四) 天多伽丽
(五) 三摩弥低(六) 萨遮弥低(七) 那提咩(八) 阿□多丽(九) 阿□
头拥(十) 阿□勒差(十一) 萨婆萨埵阿□伽醯(十二) 阿那□多卑(十
三) 修翼低(十四) 阿毗卢提(十五) 阿毗伽醯(十六) 浮提菩舍咩
(十七) 膩魑(十八) 遏他尼低(十九) 泥提罗尼(二十) 阿那他婆差
帝(二十一) 咩低(二十二) 咩低阇耶私(二十三) 修莎罗(二十四)。

“汝等起禅乐， 来护持法者，
诸世界世尊， 皆悉共受持。”

尔时，梵自在天王即从座起，赞彼释、梵、护世诸天言：“善哉！善哉！汝等乃能为护正法持法说法者故，发大庄严。汝等正应如是，甚得其宜！随如来法律住世久近，于尔所时中，当有识别正行法行。于尔所时中，诸天世人甚当炽盛，充满宫宅。此法灭后，诸天世人转当减少，宫宅空荒。”

尔时，世尊告弥勒菩萨言：“弥勒，汝受持此甚深经典，读诵书写，广为人说。弥勒，我今以如斯等甚深经典嘱累于汝，令此大法久住世故，降伏诸魔故，为利益一切众生故，令一切外道不得便故，教敕一切菩萨使亲近此经不远离故，欲令佛法大明久住于世不衰灭故，使佛法僧种不断绝故。”

尔时，弥勒菩萨即白佛言：“世尊，我于如来在世及灭度后，常当受持此甚深经典广宣流布。所以者何？受持此法者，则为受持过去、未来、现在诸佛正法，非但受一如来法也。世尊，我亦为自护己法故。世尊，我常与诸天入众，普会处兜率天宫，每为广说如是等甚深经典。我复当令人中，受持读诵此经典者，使手得是经执在胸怀不离经卷。世尊，若复末世法欲灭时，其有受持此经转为人说者，当知皆是弥勒威神之所建立。世尊，当于尔时虽多诸魔事扰乱行人，诸说法者，依烦恼魔为魔所持故，不乐此经，不勤修习，互相是非。我等俱当勤作方便，令说法者爱乐是经，常勤修习，读诵通利，广为人说。”

尔时，世尊赞弥勒菩萨言：“善哉！善哉！弥勒，汝乃能为护持正法故作师子吼。汝不但今于我前作师子吼，亦于过去无量阿僧祇诸佛前作师子吼，护持正法。”

尔时，世尊告大德阿难言：“阿难，汝受持此经耶？”

阿难白佛言：“唯然！世尊，以佛神力故我已受持。”

佛言：“阿难，汝常当广为四众分别解说。若有先种善根乐胜法者，如是等人闻已，则能信解受持读诵，广为人说。其人则得无量无边不可思议大功德聚。”

阿难即白佛言：“世尊，当何名斯经？云何奉持？”

佛言：“阿难，此经名劝发菩萨庄严菩提，当如是奉持之。”

尔时，功德庄严菩萨，在于众中即从座起，右膝著地，合掌向佛，白佛言：“希有世尊！如来为拥护正法及说法者故，善能如是快赞此经。世尊，诸新学菩萨为菩提故种诸善根，以种种华香、瓔珞、末香、涂香，勤供养如来，而不受持此经，是人颇成以第一供养供如来不？”

佛言：“善男子，不成第一供养如来，亦不能以此因缘得无量功德，不如善男子、善女人，受持此经者功德甚多。”

尔时，世尊即说偈言：

“我以佛眼， 所见佛刹， 周遍十方， 广大无边，
尔所诸界， 盛满珍宝， 菩萨以此， 恒用布施。
若有于此， 甚深妙经， 无所得法， 诸佛所说，
而能受持， 为人演说， 此人功德， 复多于彼。
华香瓔珞， 涂香末香， 宝盖幢幡， 上妙衣服，
以是供具， 普满诸界， 供养如来， 回向佛道。
若后末世， 法欲灭时， 于救世法， 勤修助助，
受持正法， 不放逸行， 此功德聚， 复多于彼。
十方世界， 一切巨海， 尽盛满中， 上妙香油，
作大灯炷， 犹如须弥， 燃以供养， 一切诸佛。
法炬若欲， 断灭之时， 知世众生， 无明所覆，
若能燃此， 大法炬者， 此人功德， 复胜于彼。
我之所见， 无量诸佛， 虽亿千劫， 种种供养，
诸天上妙， 适意供养， 不能受持， 此妙经典。
若于诸佛， 知有重恩， 拥护三宝， 为报恩故，
为欲饶益， 一切众生， 受持此经， 福胜于彼。
我以佛眼， 所见众生， 若有能教， 尽成释梵，
所得功德， 不如书写， 持此经者， 功德甚多。
大千世界， 所有众生， 若有能教， 尽成二乘；
若有能发， 菩提心者， 护持此经， 功德复胜。
持经功德， 假令是色， 悉当充满， 十方世界；
唯除如来， 无上大智， 更无能知， 此功德者。
如如来智， 无有边际， 虚空法界， 亦无边际；
能持如来， 此经法者， 功德无边， 亦复如是。”

尔时，功德庄严菩萨白佛言：“世尊，如我今者，信解如来说所讲义趣。后五百岁，法欲灭时，诸发大乘众生，其不受此经法者，将知是等为魔所持堕佛法外。世尊，我今堪任如来灭后受持此经，欲令佛法久住世故。”

尔时，世尊为嘱累此经法故，放大光明，普照十方无量阿僧祇诸佛世界。彼诸如来，亦为嘱累此经法故，皆放眉间白毫相光，普照十方一切世界，无不周遍说此经已。如来以大神力放光明。时，无量阿僧祇诸佛世界，六变振动。有无量阿僧祇众生发无上道心，无量阿僧祇菩萨得无生法忍，复有无量阿僧祇菩萨得一生补处善根，又复过是无量阿僧祇众生得声闻乘住学无学地。

佛说经已，虚空藏菩萨，大德阿难，诸菩萨大众，及诸声闻、诸天世人，闻佛所说，皆大欢喜。

大方等大集经卷第十七

无言菩萨品第七

尔时，世尊故在欲、色二界中间大宝坊中，与诸大众围绕说法。

时，王舍城师子将军家产一子。当其生时，虚空之中多有诸天作如是言：“童子，当应念法，思惟于法！凡所发言莫说世事，常当颁宣出世之法！常当守口慎言少语，莫于世事起诸觉观！当依于义，莫依文字！”

尔时，童子闻是语已，不复涕泣无婴儿相，乃至七日色貌和悦，见人欢喜目未曾眴。是时，有人语其父母：“是儿不祥，不应畜养。何以故？暗无声故。”

父母答言：“是儿虽复暗不出声，然其身根具足无缺，当知是儿必有福德，非是不祥薄福之人。”因为立字曰无言。

时，无言童子渐渐长大如八岁儿，所游方面人所乐见，随有说法转法轮处，乐往听受口无所宣。尔时，无言童子以佛神力，与其父母眷属宗亲往宝坊所，到已见佛，心生欢喜，礼敬供养，右绕三匝，合掌而立，并见十方诸来菩萨生大喜心。

尔时，舍利弗白佛言：“世尊，师子将军所生之子，身根具足而不能语，是何恶业因缘所致？”

佛告舍利弗：“汝今不应作如是语轻是童子。何以故？是人即是大菩萨也，已于无量无边佛所种诸善根，不退转于菩提之道。是儿生时，多有诸天来诫敕之：‘善哉！童子，当念正法，思惟正法！无得宣说世间之事，常当颁宣出世之义！常当守口慎言少语，莫于世事起诸觉观！当依于义，莫依文字！’舍利弗，如是童子从天教诲，是故无语默然思惟获得四禅。舍利弗，无言菩萨示如是身，则能调伏无量众生，是故默然无所宣说。舍利弗，我今说是大集经典，无言菩萨当于

此中能大利益无量众生。”

时，无言菩萨以己愿力、神通道力，令诸天、龙、夜叉、乾闥婆、阿修罗、迦楼罗、紧那罗、摩睺罗伽，比丘、比丘尼、优婆塞、优婆夷，各自见其右手之中有大莲华犹如车轮，色香具足，微妙第一，人所乐见。一一华台有一菩萨结跏趺坐，三十二相、八十种好庄严其身。

尔时，无言菩萨现如是等大神通已，低头合掌，作如是言：“南无佛陀！南无佛陀！”诸莲华台中一切菩萨，亦复如是同作是言：“南无佛陀！南无佛陀！”发是言已，十恒河沙等世界大地六种震动，虚空诸天以妙香华种种伎乐供养于佛。尔时，无言以佛神力及己愿力，与诸菩萨踊在虚空高七多罗树，正向于佛而说偈言：

“如来无色示现色， 亦复于色不染著。
若有众生入佛法， 云何当知真实色？
非色聚中有如来， 亦不离色有如来，
如来已离诸色聚， 哀愍众生故示色。
如来哀愍众生故， 以诸相好庄严色，
实无色相为众说， 是故如来难思议。
如来正法无文字， 离文字已无有声，
无有文字无可说， 甚深寂静无有觉。
如佛先在菩提树， 所觉诸法亦如是，
此法无字无音声， 亦无造作无可说。
如是诸法无相貌， 亦以远离一切相，
一切诸法若无相， 如来云何而演说？
如来具足大慈悲， 是故怜愍为利益，
不可说法而演说， 亦知真实不可说。
如来了知不可说， 亦知音声性空寂，
真实了知一切义， 是故名佛真实觉。
所说之法名世谛， 如来真实觉知之，
世谛不出无有性， 不可造作无有期。
真实无有色相貌， 为众故示种种色，
知法无法无上尊， 为众生故而演说。
我初生时受天语， 是故默然无所说，
至心念法思惟法， 是故不见色与声。
若得入于深法界， 尔时则无色声等，
若能远离于心业， 即得远离于口业。
无有言说即是语， 虽复言说亦无语，
语亦非作亦非说， 言语本性寂静故。
我今至心念菩提， 亦复至心修其道，
我今说是无上语， 亦当定得真实道。

我心不得菩提道，口及口行亦不得，
无上菩提即是空，其性本来常寂静。
如菩提性声亦尔，不见不取法性故，
我声如是不可见，所求菩提亦如是。
为菩提故有修行，是行亦无所至处，
是行如是无至处，是故菩提处非处。
六波罗蜜如菩提，一切善法亦如是，
一切语言无语言，于无语中能说语。
若有惠施妙音声，惠施之主及财物，
如是等施即菩提，一切皆悉不可说。
若是布施可口说，菩提体亦应可说，
菩提之性如虚空，一切音声亦如是。
若有心能真实知，知己亦能宣说声，
随知是声而处灭，即是菩提真实相。
若能远身口意业，一切烦恼亦复然，
即是一切波罗蜜，如来所说实法性。
惠施不在菩提中，菩提不在惠施中，
如是二法即音声，亦无所住无至处。
若有能知如是等，即是真实大菩萨；
若于施时不生慢，即是无上大施主。
护持禁戒即是声，无有形色无至处，
诸法不生及不灭，即是无上持戒相。
如是禁戒无能作，亦复无身口意业，
若不出灭不造作，云何可说是禁戒？
为流布故出音声，众生立名名禁戒，
如诸禁戒声亦尔，如是二法俱无漏。
口之所说为戒故，而说种种诸庄严，
音声实无诸庄严，真实知之无所有。
身业口业及心业，能回此戒向菩提，
禁戒音声及菩提，如是二法如虚空。
若有能作如是知，是人即行戒行处，
即能得到戒彼岸，彼处甚深难得见。
说忍音声即是空，空性无处无造作，
忍辱与空是二法，无有差别如虚空。
忍辱之声非色作，不可睹见无处所，
若有修集平等心，即是忍之真实相。
忍辱虽复念念灭，而与色身常共行，
一切文字皆无漏，众生立名名忍辱。
若有能调身口意，即是无上之忍辱，
若有能忍忍辱者，是亦即是无上忍。

若有众生碎其身，节节坏末如胡麻，
观身犹如干草木，是则名之为身忍。
若闻恶口骂詈时，其心不动如法住，
观察音声如虚空，即是无上之口忍。
若能通达烦恼因，远离一切诸烦恼，
是则名之为心忍，不为一切烦恼污。
如忍即是菩提性，身口意业亦如是，
若能回是向菩提，是则名为得菩提。
若有众生勤精进，上中下等及粗细，
于无量劫修集之，无所获得无毕竟。
若不获得精进者，是故菩提名无得；
若能不得一切法，即是无上勤精进；
若有如是精进者，不增不减如虚空；
如是即是大菩萨，勤行精进无所畏。
一切诸禅无有聚，无有造作无至处，
若有思惟一切法，即是真禅波罗蜜。
远离一切诸恶色，恶身恶口亦复然，
能焦一切诸烦恼，即是真禅波罗蜜。
若能观心真实性，一切法中亦不见，
若能无心远离心，即是真禅波罗蜜。
若能观心及菩提，即是无上真实见，
若有如是真实见，获得菩提不为难。
若能知见无文字，一切诸法无生灭，
若作如是观见者，是即名为大智慧。
虽复口说于智慧，智慧亦不住口声，
若知口声实无声，即是智慧之真性。
若法无有此彼住，中间亦复无住处，
一切法性无住处，即是无上大智慧。
无有文字无有行，无有相貌无有性，
无有取舍等二相，是名无上大智者。
若观一切波罗蜜，其性平等如虚空，
是即名为无平等，能观一切法平等。
若能平等一切法，亦能观于众生等，
悉能等观一切佛，所得智慧无平等。
若诸菩萨有智者，能观如是无等法，
即得无上菩提果，犹如先佛之所得。”

无言菩萨说是偈时，万二千那由他众生发阿耨多罗三藐三菩提心，六万菩萨得无生忍。

时，华台中诸菩萨等，悉从座起，头面礼佛，以妙莲华恭敬供养

无言菩萨，口宣是言：“我是知恩，我今报恩。”

时，舍利弗言：“世尊，如是菩萨何因缘故发如是言：‘我是知恩，我今报恩’？”

佛言：“舍利弗，如是菩萨皆悉因于无言菩萨发菩提心，是故说言‘我是知恩，我今报恩’。今复因于无言菩萨听受如是大集经典，并来睹见供养于我。”

尔时，无言菩萨白佛言：“世尊，我有所疑，今欲启请，唯愿如来哀愍听许。”

佛言：“善男子，随意致问，当为汝说。”

时，舍利弗语无言菩萨：“仁者，若无言语，云何得问？”

“大德，一切诸法皆悉无言无字无说。何以故？一切众生性无言故。以觉观故而有声出，若无觉观，云何有声？云何可说？云何有字？大德，夫觉观中无字无声，离于觉观亦无声字，觉观之体即非觉观，我作文字亦不觉观，我因觉观有大功德。若能观于如是深法，是则名为十二因缘。若从缘生，即是空寂，则无定相。若有如是真实知者，即是真实知于法性。大德，诸法悉从因缘和合，而和合中实无作者、生者、出者，是故诸法无主、无音、无声、无心，无有觉观非无觉观。何以故？颠倒因缘而有出灭。是故若有问者、听者及解说者，不合不散，一相无相。大德，夫问难者即是大悲，我有大悲是故问佛。如是问者即是悲问，非口问也。夫口问者是声闻问，声闻著声故名声闻，菩萨普悲故无口问。”

舍利弗言：“善男子，若一切法性无定者，一切众生性亦无定。若无定者，菩萨为谁而修悲心？”

“大德，若诸众生有定性者，一切菩萨终不修悲。一切众生实非众生，以颠倒故作众生想。是故菩萨修集悲心，为坏颠倒宣说无我。大德，菩萨摩訶萨不为坏有而说正法，不为坏我、寿命、士夫而修慈悲宣说正法，为知真实深法界故而宣说法。真法界者，即空三昧、无相、无愿。”

舍利弗言：“善哉！善哉！善男子，我亦如是真实了知。所以相问，试汝智耳！为令佛法增长故问，为欲利益众生故问。”

尔时，无言菩萨白佛言：“世尊，如经中说有二因缘能生正见，所谓闻声及善思惟。唯愿哀愍，为诸菩萨广宣说之，云何闻声及善思惟生于正见？”

佛言：“善男子，至心谛听！吾当为汝分别解说。善男子，为菩提心而听法者，即是闻声；至心忆念菩提之心，是善思惟；观菩提心，是名正见。复次，善男子，为菩提道而听法者，是名闻声；远离道，是善思惟；如法而住，是名正见。为调伏心而听法者，是名闻声；远离恶心，是善思惟；获得善心，是名正见。为严善法而听法者，是名闻声；修集庄严，是善思惟；愿向菩提，是名正见。为听善法，是名闻声；增长善法，名善思惟；愿向菩提，是名正见。为听惠

施，是名闻声；能舍一切，是善思惟；不求果报，是名正见。为听戒聚，是名闻声；至心护戒，名善思惟；愿向菩提，是名正见。为听法忍，是名闻声；打骂不报，是善思惟；愿向菩提，是名正见。为听精进，是名闻声；破坏懈怠，是善思惟；愿向菩提，是名正见。为听三昧，是名闻声；能净身心，是善思惟；愿向菩提，是名正见。为听智聚，是名闻声；闻已正观，是善思惟；愿向菩提，是名正见。听四摄法，是名闻声；摄取众生，是善思惟；知是摄法无取无作，空无所有，是名正见。听五通法，是名闻声；得身心轻，名善思惟；愿向菩提，是名正见。听四无碍，是名闻声；修集无碍，是善思惟；愿向菩提，是名正见。听四依法，是名闻声；勤修四依，名善思惟；愿向菩提，是名正见。听三十七品，是名闻声；若闻演说四念则是念处，说于舍离谓四正勤处，说于定聚谓四如意，说无所畏谓诸根处，说无能坏谓诸力处，说离烦恼谓七觉分，说真知法谓八正道，是善思惟，不著断常；以如是道愿向菩提，是名正见。听四谛法，是名闻声；知苦、离集、证灭、修道，是善思惟；见如是法不生不灭，是名正见。听三解脱，是名闻声；信空三昧，不畏无相，不疑无愿，是善思惟；以如是法愿向菩提，名为正见。修空三昧调心明见，修集无相为除觉观，修集无愿为求诸有，是名正见。听发心法，是名闻声；修菩提道，是善思惟；其心不退，是名正见。得善知识，是名闻声；供养亲近，名善思惟；受其教诲，是名正见。听于法界，是名闻声；观于法界，是善思惟；如法而住，是名正见。见佛世尊，名为闻声；念诸菩萨，名善思惟；得毕竟道，是名正见。初听八万四千法聚，是名闻声；观诸众生如是行处，是名思惟；调伏八万四千诸根，是名正见。

“善男子，随何因缘，能生善法是名闻声？闻已不离诸善因缘，名善思惟？以如是法愿向菩提，是名正见？善男子，如是二法无有差别，谓善思惟及以正见。何以故？一切诸法平等无二，是善思惟能观平等是正见故，无增减者即是正见，无取舍者即是正见，无作作者即是正见，无觉观者即是正见，无念念处即是正见，无作无思即是正见，无一无二即是正见。一门、一味、一乘、一行，其性是一。无诸烦恼慢慢等结，无闻无说，无垢无净，法界之性不可分别，如如不动三世平等，无我我所，无有众生、寿命、士夫，无字无声，不可宣说，不知不见，一切法中得知足心，远离诸相，断一切喜觉观屋宅，乃至赞佛不生佛相。若入定时，观如是等甚深法界，名善思惟。从定起已为诸众生，宣说如是甚深法界，是名正见。”

说是法时，十千菩萨得是正见。

尔时，舍利弗语无言菩萨言：“善男子，从谁闻法而得正见？”

无言菩萨言：“大德，若有不得去来现在菩提心者，我从彼闻而得正见。观三世等、一切法等，于一切法不生觉观，其心不住有为无为，远离一切众生之相，而为众生修诸苦行，亦复远离二种之相，一众生相，二者心相，远离二节知实法性，实法性者无有有有，通达一

切诸佛深法，不生憍慢自言我知。大德，我从是人听受正法，是人亦不宣说一字，亦令一切而乐闻之，知法真实不可宣说，为众生故而宣说之，出于世间不为世污，毕竟修集无有能知修与不修。我从是人闻受正法，住于法性于众生性不生分别，观众生性、法性、空性皆悉平等。我于如是人边闻法，是人坐菩提树下，不起不行、不眠不卧、不睡不寤而得菩提，得菩提已终不作相言得菩提，一切众生亦不知彼获得菩提，无得乃得故无得相。

“大德，夫正法者无有光明，无光明者即无处所，无处所者即是无身，无身者即是无畏，无畏者即是不出，不出者即是不生，不生者即是不灭，不灭者即是不著，不著者即是不动，不动者即是不变，不变者即无馱无闇，无馱无闇即无觉观，无觉观者即是无世，无世者即是无器，无器者即是无贪，无贪者即是性净，性净者不合烦恼，不合烦恼者即不颠倒，不颠倒者即是平等，平等者即是真实，真实者不生不灭，不生不灭者名从因缘，从因缘者即不去来，不去来者即无境界，无境界者即是无句，无句者即是不狂，不狂者即是无闻，无闻者即是无作，无作者即是无住，无住者即是无字，无字者即是无相，无相者即是过于心意识句，过心意识即是寂静，寂静者即是无热，无热者即是无瞋，无瞋者即毕竟，毕竟者即是无有，无有者即是涅槃，是名为法。大德，即是正法，即是说法，即是闻法，即是正见。

“大德，夫正见者不见于身，身行、病行，不见于见，不生贪著，不觉不观，是名佛法圣见、正见。复次，大德，观无明爱与解脱等无有差别，是名正见。如是见已不著不取，是名圣见。复次，大德，观贪恚痴、空无相愿平等无二，不见于相、见无相相，是名圣见。不观一二，等一切法，名圣正见。复次，大德，若能观我及众生等，众生等故如来平等，如来等故佛法平等，佛法等故圣众平等，圣众等故大慈平等，慈平等故虚空平等，以不住住，如是平等名圣正见。大德，如一切法，声亦如是，如声即是圣见，即是正见。大德，圣正见者亦无生出，若无生出，从谁听法？”

舍利弗言：“如我解仁所说义者，一切诸法无所语言。”

“大德，如是，如是，一切诸法实无言说。善男子，若言如来成就功德，如是言中得何等罪？大德，若如是说，当知是人有大过咎。何以故？如来功德不决定故。所以者何？无福无罪故名如来。若观如来有功德者，是名为欲。夫有欲者即是大欲，有欲、大欲即是过咎。”

“善男子，云何得名无过咎耶？”

“大德，如第五大，如第七情，如十九界，无出无入，无生无灭，无有造作，无心意识，乃名无过。若有知见，远离证修，是名罪过。若有诸界，是名罪过。若无诸界，是名无过。”

尔时，佛赞无言菩萨言：“善哉！善哉！善男子，如汝所说，即是善说。”

说是法时，万二千菩萨得无生法忍。

无言菩萨复白佛言：“世尊，如佛所说，菩萨摩訶萨有四种力，所谓信力、进力、念力、慧力。唯愿如来广分别说，云何名为菩萨四力？”

佛言：“善男子，至心谛听！吾亦当说。若有菩萨于佛正法深信顺解，不作疑心，是名信力。若勤精进求于佛法，不休不息，不生疑悔，是名进力。若有菩萨求于善法，得已不失念菩提心，所作善根愿向菩提，是名念力。若有菩萨内自思惟，不随他语，了知法性，是名慧力。

“复次，善男子，若有信心亲近圣人，是名信力。若能供养如是圣人，是名进力。至心听受圣人之言，是名念力。闻圣法已如法而住，是名慧力。

“复次，善男子，信业果者，是名信力。既生信已不作诸恶，是名进力。过去善业现世犹增，是名念力。若知诸法有因有果，是名慧力。

“复次，善男子，若信心法不可说者有名信力。若因此信能调伏心，是名进力。若能至心，是名念力。观法如幻，是名慧力。

“复次，善男子，若见法空，是名信力。若断邪见，是名进力。若见内外悉皆空寂不生怖畏，是名念力。若能观见第一义空，是名慧力。

“复次，善男子，若能观见无相无愿，是名信力。为他演说无相无愿，是名进力。至心观察无相无愿，是名念力。了知是法不可宣说，是名慧力。

“复次，善男子，能一切施不求果报，是名信力。施已不悔亦不休息常行不绝，是名进力。施时至心念于菩提发愿回向，是名念力。不观财物、受者、施者及以果报，是名慧力。

“复次，善男子，若有受持清净禁戒不求果报，是名信力。不生烦恼毁坏禁戒，是名进力。如是净戒至心护持愿向菩提，是名念力。观身口意如水中月、响、幻、炎等，是名慧力。

“复次，善男子，若有修行忍辱之法不求其果，是名信力。若有打骂能忍受之，是名进力。为忍辱故修集慈悲及不放逸愿向菩提，是名念力。观身口意都无所忍，是名慧力。

“复次，善男子，若有了知勤精进故，得阿耨多罗三藐三菩提，非懈怠得，是名信力。若能调伏一切众生，护持听受供养正法，能为众生趋走给使能净佛土，是名进力。能令众生远离懈怠，勤修精进愿向菩提，是名念力。若修精进不增不减，是名慧力。

“复次，善男子，若乐寂静离说世事，是名信力。若住空寂获得四禅及八解脱，是名进力。若于诸禅无有退失，是名念力。若观诸禅无常、苦、无我，是名慧力。

“复次，善男子，若闻一切诸波罗蜜、三十七助菩提之法信不生

疑，是名信力。闻已转为众生演说，是名进力。心善思惟，是名念力。如法而住，是名慧力。

“复次，善男子，为诸众生修集慈心，是名信力。怜愍众生令其离苦，是名进力。观察法已心得大喜，是名念力。于怨亲中其心平等修集大舍，是名慧力。

“复次，善男子，观察是身无量众恶之所成就，诳惑凡夫犹如幻相，是名信力。受死苦时，专心系念佛法僧宝不惜身命，是名进力。亦不生于诸恶之心、声闻心、辟支佛心、贪心、瞋心、痴心、妒心、悭心、毁戒心，是名念力。若观法界分别法界观无碍智，亦知过去、未来、现在，是名慧力。

“复次，善男子，喜者名信，不退转者名为精进，不狂乱者名为念力，了了知者名为慧力。

“复次，善男子，以信力故能有所作，以进力故事得毕竟，以念力故无所漏失，以慧力故能如法说。

“复次，善男子，观疑网故，名为信力。远离疑故，是名进力。更不生疑，是名念力。说能坏疑，是名慧力。

“复次，善男子，信佛法者，是名信力。为菩提故而修行之，是名进力。得顺忍故，是名念力。得无生忍，是名慧力。

“善男子，信根、信力无有差别，进根、进力，念根、念力，慧根、慧力，亦复如是。”

说是法时，百千菩萨得无生忍地，四万二千众生发阿耨多罗三藐三菩提心。

是时，会中有一菩萨，名曰莲华，语无言菩萨言：“善男子，汝向问佛，佛即为汝分别解说，汝心喜耶？”

无言菩萨言：“善男子，我亦不问不听一法，云何生喜？”

莲华菩萨言：“善男子，汝于佛所不听法耶？”

无言菩萨言：“诸佛如来都无所说，我云何听？何以故？我非法器故。”

莲华菩萨言：“汝今若非是法器者，是何等器？”

无言菩萨言：“善男子，我身今者尚非法器，况复余器？”

莲华菩萨言：“汝若非是真法器者，云何当得阿耨多罗三藐三菩提？”

无言菩萨言：“善男子，阿耨多罗三藐三菩提亦非是器。善男子，若离佛法有菩提者，当知有器。一切佛法即是菩提，菩提即是佛法。善男子，是故我若远离烦恼，不见佛法，不见菩提，烦恼、菩提及以佛法无有差别。若烦恼中见菩提者即是如见，若离烦恼见菩提者是名倒见。”

莲华菩萨言：“善男子，云何名倒见？”

“见我、寿命、士夫、摩纳，离是之外别有贪欲、瞋恚、愚痴，是名倒见。一切法性及菩提性无有差别，无作无受，我性、众生、寿

命、士夫、摩纳，即是贪欲、瞋恚、愚痴，如是等法即是菩提，是名如见。即四大中及四大造求于菩提，不余处求。云何名求？求时不见一切诸物，不见者即是无处，无处者即是无住，无住者即是一切诸法之性，一切诸法若无性者即是实相，实相者非常非断名毕竟节。若有能见如是等节，当知是人不会流不散，不会不散即无生灭，即是涅槃，即是实知一切诸法。若如是等得涅槃者，即是圣句入于涅槃。是故如来于经中说：自不调伏能调伏他，自不解脱能解脱他，自不寂静能寂静他，自不涅槃令他涅槃，无有是处。若自调伏令他调伏，若自解脱令他解脱，若自寂静令他寂静，若自涅槃令他涅槃，斯有是处。善男子，菩萨摩訶萨修菩提道，解了一切众生所行，于诸法相及以法界不生分别。修行一切善法之时，亦不见有诸魔徒众。虽求佛法不见求者，虽调众生不见我人，虽行诸法烦恼不污，虽顺世法世法不染，负五阴担亦无住处，远离诸界不动法界，修解脱法门不退善法，明见三界不杂烦恼，行檀波罗蜜不生憍慢，乃至般若波罗蜜亦复如是。随一切行实不行于一切诸行，若能修行如是等行，当知即是行菩提道。于菩提道及菩提行不生分别，若行如是菩提道行，于诸法中不见有我，无贪无瞋，无亲无怨，无有障碍。若无障碍即无为行，若无为行即是真实大菩萨也。”

莲华菩萨言：“善男子，何因缘故名为菩萨？”

“善男子，能觉众生所不觉者故名菩萨，能寤无明睡眠众生故名菩萨，演说随顺菩提之法故名菩萨，能令众生深乐寂静是名菩萨。增长佛语，竖正法幢，护念圣众，于菩提心无有动转，不住声闻、辟支佛心，终不舍离至诚之心，发愿毕竟能度未度、能解未解，为无依者而作归依，能灭未灭，能调烦恼，不脱烦恼观生死过亦求诸有。修空三昧不舍众生，修集无想不舍菩提想，修集无愿深乐诸有。虽乐佛法于贪无贪，知有为法多诸罪咎而其内心不舍有为。虽离诸闇不得大明，得大智慧以为器钾。深乐惠施严施瓔珞，净佛世界具足净戒，具足誓愿具足忍辱，能调一切不忍众生，勤修精进求无坏身，能坏欲界乐受下身，虽受诸有其心不悔，善知方便常自调伏求于菩提。为诸众生修习慈心，为坏众苦修集悲心，为调不调修习喜心，非毕竟舍修集舍心。通达了了解甚深义，非诸声闻、缘觉境界，依于义法、了义经智不依世法，亦为众生而作依止。为诸众生庄严身口，如说而作庄严于心。为诸众生庄严神通，利益众生犹如大地。能净一切犹如大水，烧诸烦恼犹如炽火。于法无碍犹如猛风，于法平等犹如虚空。得陀罗尼持一切门，乐说无碍令众喜闻。至心念佛为净心故，能大法施段食施故。正命自活威仪清净，修无诤三昧深乐寂静。乐调众生离说世语，见乐世者呵责教诲。具七种财其心柔软，乐行惠施坚固不退。眷属不坏亲近善友，知恩报恩观过去业。随众生意能坏疑心，观察生死多诸过咎。所作至心解一切语，修集大乘不疑三乘。众生乐见随问而答，得无碍智诸佛所念，时节语、不多语。光明清凉犹如秋月，善法

具足犹如满月，众生乐见犹如明月，增长善法犹如初月，一味甘甜如月一味，观一切法如水中月，清净无垢如月无翳。易共语言诸根具足，于一切法犹如桥梁，能度众生于四馱水。为诸众生营作佛事，其心初不动菩萨界，以如是义故名菩萨。”

尔时，莲华菩萨白佛言：“世尊，无言菩萨作如是说，当知不久得阿耨多罗三藐三菩提，转于无上法宝之轮。若有能信受持如是无言菩萨所说法者，亦复当得如是功德。”

佛言：“善哉！善哉！善男子，如汝所说，无言菩萨得慧灯三昧，是故若欲于无量劫说一句义不可穷尽。”

莲华菩萨言：“世尊，唯愿如来垂矜哀愍，增长众生诸善法故，庄严无上大集经故，少为大众开示如是慧灯三昧。若有智慧菩萨，闻已亦当获得如是三昧，得已亦当疾得阿耨多罗三藐三菩提。”

佛言：“善男子，至心谛听！吾当为汝少分别说。言慧灯者即是智灯，智灯者即是破闇，无闇者即是破疑，破疑者即是慧灯，慧灯者即是诸法无二相也。善男子，了了智、不疑智、不失智、不挽智、不随智、无闇智、圣智、猛利智、捷疾智、分别智、广大智、纯一智、种种智、过去智、未来智、现在智、三世平等智、三界智、三解脱门智、三慧智、三宝智、三乘智、三眼智、三垢智、三滓智、三聚智、心意识智、阴入界智、因缘和合智、见毕竟智、如法界智、自相智、第一智、方便智、一切声语智、一切字智、无碍智、不坏智、能说法智、知下中上根智、无作无受智、一切咒智、一切医智、一切世事智、庄严陀罗尼智、日月三昧智、入三昧智、圣智、圣三昧智、金刚三昧智、无诤三昧智、心等三昧智、坏魔三昧智、日光三昧智、无想三昧智、宝幢三昧智、一切法门三昧智、一切法器三昧智、无边光三昧智、福德三昧智、无住三昧智、乐见三昧智、善见三昧智、无尽器三昧智、毕竟尽智、一切智、无动智、那罗延三昧智、一切见智，如是等六万三昧门智，我于往昔见燃灯佛，即得如是诸三昧门。如是诸三昧门，一切悉是慧灯三昧之所摄持。

“善男子，譬如日出能为四事：一者、有大光明，二者、除灭闇冥，三者、示种种色，四者、令诸众生得造事业。菩萨摩訶萨住是三昧亦复如是，能为四事：一者、破坏一切烦恼闇冥，二者、出大慧光，三者、示诸众生种种诸行，四者、开示众生道非道等。善男子，譬如净宝之珠置之高幢，其明遍照四由延所，施诸众生所须之物，而珠体相无有增减。慧灯三昧亦复如是，住是三昧菩萨摩訶萨，永断一切烦恼习气，净戒、净定、净慧、净身心、净于方便、净陀罗尼，修集大悲放大光明，遍照无量诸佛世界，随众生意而作事业。菩萨虽作如是诸事，而其相性无有增减。

“善男子，譬如虚空容受佛土无有障碍，亦不障碍一切雨沛、风火水灾，一切众生无量无边。善男子，慧灯三昧亦复如是，住是三昧诸菩萨等，为诸众生说一切法无有障碍，方便教化一切众生：为因力

者演说方便，令其解脱调伏成熟；为邪定者方便演说，令坏邪定；无善子者令种善子；无法器者令作法器。为法器者分别演说阿耨多罗三藐三菩提，求声闻人方便说法，令其获得四沙门果；求缘觉人方便教诲，令其获得辟支佛道；复为方便说法渐进，令其悉发阿耨多罗三藐三菩提心住不退地，通达八万四千法聚。为坏众生疑网心故，种种开示分别解说，解说一事于无量劫不可穷尽。虽作如是无量之事，而是三昧亦无增减。

“善男子，譬如一灯力能显示种种诸色，慧灯三昧亦复如是，于一心中能于无量诸佛世界示种种色，而是三昧无有倾动。是故四念处中法念为顶，四正勤中未生善法能生善法名之为顶，四如意中身心寂静名之为顶，五根、五力中慧根、慧力名之为顶，七觉分中择法为顶，八正道中正见为顶，一切外道所有舍摩他、毗婆舍那名之为顶，四真谛中灭谛为顶，四依之中依义为顶，四无碍智义无碍智名之为顶，六神通中漏尽为顶，四无量心悲心为顶，修梵行中智慧为顶，诸波罗蜜中般若为顶，一切方便知众生心名之为顶，一切诸力处非处力名之为顶，诸无畏中初名为顶，不共法中无碍为顶，三十二相无见顶相名之为顶，八十种好不空说法名之为顶，庄严口中解一切语名之为顶，庄严心中破慢为顶，一切法中智慧为顶，是名慧灯三昧。”

说是经时，莲华菩萨及万菩萨得是三昧，三千大千世界大地六种震动，一切大众以妙华香、种种伎乐供养于佛尊重赞叹。

时会菩萨各作是言：“世尊，我等昔来未曾闻是三昧名字，况得闻其广说分别？我今皆得如是三昧，是故报恩设此供养。若有闻是三昧名字，即能获得大利益事，不失无上菩提之心。”

佛言：“善哉！善哉！善男子，如汝所说。若有众生，已于无量无边佛所，植诸善本亲近善友，然后乃得闻是三昧。”

尔时，世尊说是法时，于其脐中出一菩萨，身真金色，三十二相、八十种好，放大光明，除佛光明余无及者。是时，菩萨敬礼佛足，右绕七匝，长跪合掌而白佛言：“世尊，慧憍如来致意无量，问讯世尊起居轻利，身无病患，大众安不？我今此界有六万亿诸菩萨等，欲往听受大集妙典，并欲觐见无言菩萨；及以十方诸来菩萨，并复欲闻慧灯三昧。善哉！善哉！释迦牟尼，幸为开示，令诸往者悉得慧灯三昧，还来此土。”

时，舍利弗言：“世尊，慧憍如来住何方面？去此远近？世界何名？而是菩萨复名何等？是六万亿诸菩萨等住在何处？”

“舍利弗，其佛世界去此东方过一恒河沙等恒河沙世界，世界名曰金刚坚根，佛号慧憍。舍利弗，何因缘故，世界名曰为金刚坚根？舍利弗，彼佛世界地悉金刚，其佛愿力故致如是。其佛身体、众生菩萨身悉金刚，是故世界得如是名。此菩萨者，名金刚脐，是人能于一念之顷，破坏一切金刚诸山，直至无量诸佛世界，示现诸佛脐中而出。以佛神力及已愿力，是故名金刚脐也。舍利弗，汝向所问如是

菩萨住何处者？汝今当问彼金刚脐，自当答汝。”

尔时，舍利弗即问金刚脐言：“善男子，汝言六万亿菩萨者，住在何处？”

金刚脐言：“如来说汝智慧第一，当以圣智观是菩萨所住之处。”

时，舍利弗即以圣智观之不见，语金刚脐：“善男子，我尽圣智不见。”

“大德，汝之同学阿尼楼陀，天眼第一，当令观之住在何处。”

尔时，阿尼楼陀以天眼观三千大千世界亦不能见，语舍利弗：“我以天眼都不能见。”

金刚脐菩萨言：“大德，汝之同学若不能见，不名天眼，应名肉眼。”

舍利弗言：“善男子，汝之天眼，其义云何？”

“大德，我之天眼，汝诸声闻所不见色我能见之。”

舍利弗言：“善男子，何等色法我不能见而汝得见？”

“大德，汝今得见金刚坚根世界，慧憍如来及菩萨不？”

“不也，善男子，我唯闻名，不能得见。”

“大德，如是佛土、如来、菩萨及诸众生，我之天眼悉能得见，是名菩萨清净天眼。如是天眼，一切声闻、辟支佛等之所无有。”

说是法时，求声闻者六万众生舍离本志，发阿耨多罗三藐三菩提心，各作是言：“愿我获得无碍佛眼，不用声闻、辟支佛等障碍之眼。”

尔时，金刚脐菩萨即入三昧，以佛神通及己力故，令一切众悉见六万亿诸菩萨等，在佛身内坐莲华台，至心专念听佛所说，然不逼触如来之身，而如来身无增无减、无有障碍。

时，诸大众见是事已，供养礼敬，欢喜赞叹如来之事不可思议，复作是言：“如来之身智慧三昧，一切悉皆不可思议。何以故？是六万亿诸菩萨等，悉住身内无障碍故。”

金刚脐菩萨观诸大众，作如是言：“诸大众，汝等不知如来之身如虚空也，是无边身、无障碍身、广身、法身、无相貌身、无量身耶？诸善男子，如来若欲内一切物，所谓国土城邑、村屯聚落、山河树木置身中者亦无障碍，是故如来不可思议。善男子，十方世界无量净土无量菩萨来诣如来，听大集经成就妙色，具二十八大人之相，如来亦内置其身内。何以故？此土众生梵释诸王，若其见者生愧耻故，是故不令得见一人。”

尔时，世尊功德力故，及金刚脐菩萨力故，悉令大众见如是等六万亿菩萨，悉从如来一毛孔出，出已礼佛右绕七匝却坐一面。

尔时，金刚脐菩萨白佛言：“世尊，何因缘故，无言菩萨名无言也？”

佛言：“善男子，汝自咨问无言菩萨，自当答之。”

金刚脐菩萨即问无言菩萨：“善男子，何因缘故字无言耶？”无言

菩萨默然而住，二问、三问亦复如是。

金刚脐言：“善男子，何故不答？”

无言菩萨言：“我求言辞都不可得，是故默然无所宣说。”

“善男子，若求言辞不可得者，云何有是不得之言？”

“善男子，我答一切佛语、世语。”

“云何名为答佛语耶？”

“善男子，我以念力受持一切诸佛所说，不忘不失，然都不见音声字句，为流布故而宣说之，亦为众生坏是声字及以文句而宣说法。”

“云何名为答世语耶？”

“解诸众生种种言音，随其所言而为说法。”

“善男子，汝能如是随顺说法为久近耶？”

“善男子，我从除灭觉观已来能作是说。”

“善男子，何因缘故作如是说？”

“善男子，若无觉观，声云何出？以是因缘作如是说。”

“善男子，夫声出者，为从身出，从心出耶？”

“善男子，夫音声者不在身心。何以故？身如草木，心如幻化，众因缘故有声而出。若从缘出即是无常，若无常者即是无定，无常、无定即是空无。夫音声者犹如虚空，不可睹见、不可宣说如虚空，一切诸法亦复如是。若声无者，声所了法亦复是无。是声空故一切法空，声寂静故诸法寂静，声不可见，一切诸法亦不可见。声不出生，一切诸法亦不出生。若不出生即无去来，若无去来即是甚深十二因缘，甚深因缘无作无属。若无作属即无生出，无生无出即是无句。若无句者即是不生，眼色及识乃至法识，无有生老病死等苦、日月光明亲怨之想，断一切行难可睹见不近不远。”

金刚脐言：“善男子，如是等说是何等说？”

“善男子，如是即是毕竟不出。”

“善男子，何等名为毕竟不出？”

“善男子，不近不远是毕竟不出。”

“善男子，何等名为不近不远？”

“善男子，即是虚空。若见诸法如虚空者，是名平等。”

“善男子，以何义故，名一切法如虚空耶？”

“善男子，过去之法无有终竟，未来、现在亦无终竟，三世无终，即是实相，即是无二。二者所谓，眼色、耳声、鼻香、舌味、身触、心法是名为二。若有二者即是可说，若无二者即不可说，不可说者即是无识、无心、无意，以是义故不可宣说。夫可说者即是二法，不可说者即是无二。”

“善男子，谁作是二？”

“善男子，夫无二者，不可作二，二亦不可作于无二。若坚牢者不可作脆，脆亦不可作于坚固。生死之法不作无二，涅槃之法不得作

二。正见之性不作邪见，邪见之性不作正见。”

金刚脐菩萨白佛言：“世尊，无言菩萨凡所解脱，似得如是慧灯三昧？”

佛言：“善哉！善哉！善男子，汝谓无言不得慧灯三昧耶？”

尔时，金刚坚根世界慧憍如来、诸菩萨等，语无言菩萨言：“善男子，汝住何地能作是答？”

无言菩萨言：“善男子，如佛所说，菩萨摩訶萨若住戒地能如是答。”

“善男子，善哉！善哉！唯愿解说如是戒地。”

“善男子，若无身住、心住、意住、内住、外住及内外住即是住戒。善男子，若无相、无命、无作、无行即是住戒。若有菩萨住如是戒即是无住，若无住者终不生念‘我能出声有所演说’。善男子，如汝所问，住在何地能如是答者，我住法性实相法界能如是答。若如是知法真实者则无觉观，若无觉观云何有说？”

诸菩萨言：“善男子，如是说时为何所说？”

“善男子，如是说时即说二法：一者、灭尽，二者、不出；一者、过去，二者、未来、现在不住故不可说。善男子，过去之法不可作相，未来、现在亦复如是。若使有人于三世法而作相者即是颠倒。是故一切诸法之义不可宣说，一切法义身口意等所不能说。何以故？无业无作，无有色貌，无有口业，无有觉观，犹如响相，如佛化故。善男子，诸佛菩萨凡所言说皆逆世语，是故一切诸佛菩萨不可思议，诸佛菩萨所有智慧不可思议、不可穷尽、不动法界。”

尔时，一切菩萨摩訶萨同声赞叹无言菩萨：“善哉！善哉！善能分别如是法门，令我等辈得大利益，并得觐见如是无量诸大菩萨。”

金刚脐语无言菩萨言：“善男子，我欲与汝俱还金刚坚根世界，觐见供养慧憍如来。”

无言菩萨言：“善男子，金刚坚根世界，即是此间娑婆世界；慧憍佛者，即是释迦牟尼如来，我何用往彼佛世界？”

金刚脐言：“善男子，此佛世界地非金刚，云何而言即彼世界？”

无言菩萨言：“善男子，汝之神通，能坏无量金刚之山直过无碍。汝今试坏此土微尘，如其坏者，然后乃知汝名金刚。”

尔时，无言即便入于金刚三昧，悉变此土一切山林草木微尘皆为金刚。时金刚脐尽其神通，乃至不能破一微尘。

时，金刚脐白佛言：“世尊，我之神力能坏一切世界金刚及诸山壁，以何因缘今于此土，乃至不能坏是一微尘？为是如来神通之力，为是无言道德力耶？”

佛言：“善男子，是无言菩萨入金刚三昧，三昧力故令此三千大千世界一切所有悉为金刚，若欲复使无量世界为金刚者其力亦能。”

金刚脐菩萨言：“世尊，菩萨摩訶萨具足几法，能得如是金刚三昧？”

佛言：“善男子，菩萨摩訶萨具足四法，则能获得如是三昧。何等为四？一者、至心念于菩提，二者、所作善法毕竟，三者、至心庄严善法愿向菩提，四者、能观十二因缘。是名为四。复有四法：一者、成就神通；二者、修三脱门；三者、持戒精进，常观法界，知一切法无有根本，无有觉观，不可宣说；四者、知义知时，知实知一切法皆悉平等。是名为四。复有四法：一者、从大悲心求大智慧，二者、从善方便求三十七助菩提法，三者、从大慈心观诸众生一切平等，四者、从于舍心观四真谛。复有四法，所谓身、口、意业及菩提心，不可沮坏悉如金刚。善男子，菩萨摩訶萨，具足成就如是等法，则能获得金刚三昧。”

说是法时，六万亿菩萨一切悉得金刚三昧。

尔时，无言启白其父师子将军：“尊者，佛出世间即是具足无量功德，大功德聚即是如来。佛出世时，无量众生得大利益，大利益者即是涅槃。夫涅槃者常不变易，尊者何故不发阿耨多罗三藐三菩提心？”

其父答言：“吾初生时，已发阿耨多罗三藐三菩提心。尔时，亦有无量诸天来劝如汝无异，如是事者唯佛证知。”

师子将军所将眷属满五百人，悉发阿耨多罗三藐三菩提心。

尔时，无言菩萨赞其眷属：“善哉！善哉！善能庄严菩提之心。”

诸眷属言：“云何名为庄严菩提心？”

无言菩萨言：“有四十事庄严菩提心。何等四十？所谓信佛不疑，不动法界，供养圣众，亲近善友，于诸菩萨作医王想，于诸众生其心平等，供养恭敬诸师和尚，父母有德顺受其语，护法求法，至心听法，既受持已为人广说，供养恭敬护法之人，为他说法，不生食想，破坏憍慢，知恩报恩，常善思惟，如法而住，能施难施，至心护戒，精进勤修一切善法，具足成就功德庄严，心无嫉妒护诸众生，防制烦恼，调伏其心及以施心，调诸众生能断烦恼，知足寂静，修净梵行，不断圣种，世法不污，供养恭敬说法之人，随顺世间，远离懈怠，无有放逸，不求下乘菩提之心初不动转，处在生死心不厌悔，远离一切不善之法，具足一切纯善妙法庄严梵行，是名四十。”

尔时，师子将军言：“汝当时时示现其身，为令我等不退无上菩提之心。”

无言菩萨言：“尊者，具足十法常得亲近诸佛菩萨。何等为十？所谓自舍己乐以施众生；修集忍辱护无力者；常劝众生修集善法；化导一切趣向菩提；愿诸众生先得阿耨多罗三藐三菩提，我当供养，听其所说，受持拥护，然后我当成无上道；知实法性不惜身命；为护法故闻深法界不生恐怖；观无菩提无有得者；观己平等一切众生亦复平等，以众生等观法亦等，以法平等观虚空等；观生死苦亦不舍离，见生死过心无悔恨。具足如是诸善法者，常得亲近诸佛菩萨。”

说是法时，师子将军及诸眷属得柔顺忍。

尔时，世尊告阿难言：“阿难，汝当受持读诵书写如是经典。何以故？是经典中分别演说一切法相，亦令无量无边众生，发阿耨多罗三藐三菩提心。阿难，若有能于无量佛所植诸善本，是人乃能信受是经，持读诵写，广分别义。受是经者有三事：一者、定发阿耨多罗三藐三菩提心，二者、得不退心，三者、能护正法。”

尔时，大众闻是语已，有七那由他菩萨，即从座起白佛言：“世尊，我等能于如来灭后，受持是经读诵书写。”

无言菩萨言：“世尊，如来世尊得何等法，而令是等受持守护？”

“善男子，若能护是持法之人，即是护法。所谓书写读诵，解说文字，文字可说，法不可说。善男子，有二种人能守护法：一者、如法而住，二者、诵是文字。若无文字，法不可说。”

尔时，一切大众及师子将军、所将眷属、诸天世人，闻是法已，心大欢喜，信受奉行。

大方等大集经卷第十八

不可说菩萨品第八

尔时，世尊故在欲、色二界中间大宝坊中，与诸大众围绕说法。是时，会中有一菩萨名不可说，从座而起，更整衣服，偏袒右肩，前礼佛足，长跪合掌而说偈言：

“无碍智慧无碍行， 如虚空性不可说，
三世平等无觉观， 我今敬礼无上尊。
观于无相乐寂静， 调伏诸根远离相，
了诸法性无有二， 我礼人中师子王。
观众生性及法性， 如是二性无差别，
等心观于诸众生， 今我永断一切性。
所得菩提无所得， 如菩提性色亦尔，
无相庄严庄严相， 我今敬礼无上尊。
一切法界无觉观， 凡夫观之有相行，
法界之性不破坏， 佛真实智故我礼。
如来身业不可说， 口意等业亦如是，
一切法性及众生， 无上胜尊了了知。
如来住于真实地， 所可演说无声字，
众生乐闻得大利， 是故如来难思议。
所说诸法无相貌， 调伏众生断诸有，
善说众生法性空， 是故我礼大丈夫。”

尔时，不可说菩萨偈赞佛已，白佛言：“世尊，此会菩萨，各各

当已已咨请竟。我今于是大集经中复欲少问，唯愿如来垂哀听许。”

佛言：“善哉！善哉！善男子，随疑致问，吾当为汝分别解说。”

尔时，不可说菩萨既蒙许可，即入定意；入定意已，悉令大众处大宝台，上虚空中雨散华香，种种伎乐而以供养，复出是声：“是不可说菩萨摩訶萨，今于是中欲问大事。”

尔时，不可说菩萨摩訶萨白佛言：“世尊，诸佛菩提清净寂静，大静无垢，无闇大光，真实如尔，其性平等，微妙甚深无有觉观，远离诸垢不可宣说，无字无句，无有音声，广大无量，无有边际，离一切边不增不减，不前不却无有住止，无峻无平，无有有无，坚固无坏无我我所，无取无舍，无广无狭，无法无众生，无尽毕竟尽，不空空性，非处非非处，非心非作，非生非灭，如地、水、火、风无有边际不可度量，平等遍有无有障碍犹如虚空，非眼识界乃至非意识界，断一切有不可譬喻离一切喻，如一切佛真实知故非不是如。何以故？一切众生皆悉得故非异于如。何以故？一切众生悉平等故其性是有。何以故？是实性故其性是实。何以故？无有去来现在节故。无作无受，无色无心，无想无受断一切受，无想断想，无行断行，无识断识，无阴入界断阴入界，无初中后离诸魔业，无有流布无漏非摄，非行非讼无诤无罪，常住自性无有分别，无生无能生，无灭无能灭，无有根本无上无下，无有屋宅无方无间，非智非慧亦非慧行，非谛所摄非生死摄，无有对治，无具功德，远离诸相。

“世尊，若如是义名菩提者，即无变句，即无觉句，即无贪句，即无诤句，即坚固句，即不坏句，即不动句，即不作句，即无身句，即无生句，即无智句，即平等句，即无二句，即是实句、有句、真句、第一义句、无分别句、一味句、一事句、一乘句、无尽句、三世平等句、分别三世句、空句、无相句、无愿句、无行句、寂静句、性句、如句、无生句、无出句、尽句、无屋宅句、法句、实性句、自身性句、无身句、无作句、无想句、无诤句、无断句、无常句、十二因缘句、可观句、定句、上句、胜句、无罪咎句、无上句、毕竟句、净句、无顶句、无胜句、无等句、无依句、念句、无相似句、胜一切世间句、无句句、一切句之所依句。如是菩提，非青、非黄、非赤、非白，非色非非色，非长非短，非圆非方，无有规矩，非三界摄，非道非毕竟，非行非到，非有处所非取非舍，离诸烦恼无有愁畏，断一切喜无真无化，离一切入无我我所，无有众生、寿命、士夫，无量无边不可思议，无有分界犹如虚空，其性毕竟不可宣说，成就如是无量之法乃名菩提。”

说是法时，三千大千世界大地六种震动，一切诸天大设供养香华伎乐，各作是言：“善哉！善哉！善男子，快作是说。”

尔时，会中有八万四千菩萨，得无尽器陀罗尼，一切法自在三昧无碍解脱法门。若有人能如是信者，是人亦当得是法利。

尔时，不可说菩萨复白佛言：“世尊，菩萨之戒不可宣说。何以

故？身之本性不可说故，是故身戒不可宣说；口之本性亦不可说，是故口戒不可宣说；意之本性亦不可说，是故意戒不可宣说。世尊，若有菩萨修行无上菩提道时，护十善法亦不可说。若以十善劝诸众生，所劝众生亦不可说。修集慈悲喜舍之心亦不可说。何以故？修集慈心观无众生，修集悲心无作无受，修集喜心离憍慢醉，修集舍心远离二相。世尊，若有菩萨如是修集四无量心，即是修于清净梵行，住于梵道。是梵方便胜一切梵，常为诸梵之所供养。何以故？胜出一切诸梵行故，不修众生因缘慈故，不修诸法因缘悲故，不修二相因缘喜故，不修内外因缘舍故，远离一切世间行故，舍弃世间诸梵行故，是故常为一切诸梵之所供养。

“世尊，以是因缘，菩萨之戒不可宣说。菩萨戒者，终不自诋亦不诋佛。何以故？自即无性，无性即无，无即无出，无出即是无有因缘，无因缘者即是无字，无字者即是不可言说。若有菩萨能如是学即不自诋。云何名为不诋？诸佛如来觉了一切诸法非法非非法，若非法非非法者即是平等，如是平等不可宣说。若有菩萨作如是学，是名不诋诸佛如来。复次，自者即是无我、无有所，知亦无我、无有所。若能如是修集学者，亦是无我、无有所。若能如是思惟观者即不自诋。又如来者能随于如，随于如者即随众生，随众生者即是随顺一切诸法，随一切法即是不出不灭不住。若法不出不灭不住即是无为，是故说言无为之法有三种相，所谓无出、无灭、无住。以是义故名无为，无为即圣，圣名无怨，如来远离一切怨故故名为圣。怨者所谓无明，如来永离一切无明，是故不为一切怨仇之所侵害。凡夫之人具无明故，是故常为怨仇所害。如来世尊能观怨界及智慧界，知烦恼界及寂静界，知生死界及涅槃界，知众生界及法界，了知魔界及以佛界，观于色界及以眼界、耳界、声界、鼻界、香界、舌界、味界、身界、触界、意界、法界，知无明界及智慧界，皆悉平等即是平等。佛界不可说界，生死、涅槃二界平等，即是佛界不可说界。名色界知名色界皆悉平等，即是佛界不可说界。知六入界、六神通界皆悉平等，即是佛界不可说界。触界、灭界皆悉平等，即是佛界不可说界。受界、灭界皆悉平等，即是佛界不可说界。爱界、灭界皆悉平等，即是佛界不可说界。取界、灭界皆悉平等，即是佛界不可说界。有界、灭界皆悉平等，即是佛界不可说界。生界、灭界皆悉平等，即是佛界不可说界。老病死界及以灭界皆悉平等，即是平等佛界不可说界。世尊，菩萨若能作如是等观，即得入于一切诸界。菩萨若入如是等界，见有贪者不生瞋恚，见断贪者亦不生爱；见有瞋者不生瞋心，见断瞋者不生爱心；见有痴者不生恚心，见断痴者不生爱心。何以故？菩萨摩訶萨于如是等三种界中了了知故，如是菩萨了知三聚。世尊，菩萨若欲作是学者不诋如来。何以故？知诸如来所觉诸法，而是菩萨随顺学故，是故菩萨不诋如来。”

尔时，众中有一菩萨，名无所畏，问不可说菩萨言：“善男子，

菩萨摩訶萨，云何而学名诳如来？”

不可说菩萨言：“善男子，若有菩萨自作是言：‘我是持戒，彼是破戒。’如是菩萨名诳如来。‘我是施者，彼是悭贪。我是修忍，彼是瞋恚。我是精进，彼是懈怠。我是定者，彼是乱者。我是智慧，彼是愚痴。我是知足少欲之人，乐于寂静易养易满，乞食粪衣，唯畜三衣，不处众中，多闻诤语所言柔软，众生乐受具念智慧，净诸威仪及以口业，具四摄法慈悲喜舍，真语实语如说而作，知魔境界知己远离，常能修学六波罗蜜，能善说法为诸众生发大誓愿，能化众生不令放逸。’若作如是自赞己身毁谤他者，是名菩萨诳于如来。

“复次，善男子，菩萨若言：‘我能观察如是等法远离修灭。’是亦名为诳于如来。何以故？诸佛出世及不出世，法性常住。以常住故，一切法界不可知见，不可远离，不可修灭。菩萨若说我及我所，是亦名为诳于如来。何以故？无二相故。若有说言：‘我已得证，我能远离。’是亦名为诳于如来。何以故？性清静故。若言‘我有四念处’者，是亦名为诳于如来。何以故？如来觉了一切诸法无有念故。若言‘我有四正勤’者，是亦名为诳于如来。何以故？如来觉了一切诸法本性离故。若言‘我有四如意分’，是亦名为诳于如来。何以故？如来觉了一切诸法无分别故。若言‘我具根、力、觉、道’，是亦名为诳于如来。何以故？如来世尊性无为故。若有说言‘我异道异’，是亦名为诳于如来。何以故？身即是道故。若言‘我明异于有爱’，是亦名为诳于如来。何以故？无明与爱即是智慧即解脱故。若言‘三毒异三解脱门’，是亦名为诳于如来。何以故？空无相愿即是贪欲瞋恚痴故。若言‘四倒异四果者’，是亦名为诳于如来。何以故？四倒即是四道果故。若言‘八邪异于八正’，是亦名为诳于如来。何以故？为坏八邪修八正故。若言‘众生九居止处异九次第’，是亦名为诳于如来。何以故？无二性故。若有说言‘十善异于无学十善’，是亦名为诳于如来。何以故？一切诸法无修学故。善男子，菩萨若学如是等法，是名为诳诸佛如来。

“善男子，一切众生及一众生无二无别。何以故？性无我故，言一众生、一切诸法无二无别。若言一法、一切法界无二无别，一佛世尊、一切法界无二无别，言一佛界、一切佛界无二无别，言一福田、一切福田无二无别，一切福田及以虚空无二无别，一切圣人远离烦恼，一切凡夫无二无别本性清静，一众生心、一切众生心无二无别本性清静，一界、一切界，一入、一切入，一众生行、一切众生行无二无别。若言诸法乃至无有一念暂住，不造众恶，不著善法，不生憍慢，于不得中不作得想，于不证中不作证想，知于生死及以涅槃无作无受，知诸烦恼无有根本无生无长，随于戒戒、心戒、慧戒，远离烦恼不舍众生，净檀波罗蜜；无戒于戒，净尸波罗蜜；无人于人及无有我，净羼提波罗蜜；无作于作，净毗梨耶波罗蜜；无净于净，净禅波罗蜜；无行于行，净般若波罗蜜。无尽无生获得忍辱，得无记心而受记前，不入正位亦不退转，一生不生兜率陀天，不从天下而处母胎，

于一切法心无所住，亦不自说我已过于生老病死，不行七步，亦不自言我是世间无上之尊，不处中宫嫔女娱乐，不习世间技艺之事。示现老人为坏贪身，示现病苦为坏贪寿，示现死相为坏贪欲及我我所，示现沙门为令众生不求释梵人天之神，勤求出世无上之法。踰出宫城，示现出离三界系缚及示悲果，前后顾视示无瞋爱，三十二相庄严其身，为示众生良祐福田。剃除周罗弃舍瓔珞，遣马捷陟放闍陀还，示现远离一切烦恼。现剃髡发示不贪著于一切法，受著袈裟示调众生。从郁陀伽阿罗逻边咨问受法，示现破坏自高之心。六年苦行为坏外道，现受饮食示随世法，现受藁草示于知足，坐草蓐上示坏憍慢。诸天龙神赞叹戴仰，示现功德庄严果报。降伏魔怨示勇猛力，右手指地示往福力，大地震动示报恩故。获得无上菩提之道，示现了知一切法相，观诸法等名之为佛，佛之智慧无能胜者。以是义故名如来，了了知见善不善法名萨婆若，真实语故名天人师，不出诸法名转法轮，无转无说故名转说，无入之入名为法入，无门之门名为法门，无作之作名为法作，无禅之禅名为正禅，无脱之脱名正解脱，一切法性无系无缚。若是灭法即是过去，即是不生，是名佛出，无出之出即名佛出。若有菩萨能作是学，是名不诳诸佛如来。”

尔时，世尊赞不可说菩萨摩訶萨言：“善哉！善哉！善男子，善能分别如来出世。若有能信如是佛出，是人不觉一法微相。若不觉者，乃能了知如来出世。何以故？无出之出即是佛出。无作无作者，无受无受者，无漏无漏者，无诤无诤，无入无转，无生无灭，无有菩提，无谄无诳，无心意识，无眼无二，无有眼行乃至意行，无说无教，是名佛出。”

尔时，无畏菩萨白佛言：“世尊，如佛所说，如来出世及不可说所说佛出，谁当信之？”

尔时，宝女语无畏言：“法兄，如来出世不可思议，难可庄严，难可证得。若人懈怠，心不真正，虚伪谄曲，憍慢喜瞋，嫉妒悭贪，不知恩义受恩不报，三戒不净贪著三界，三垢所污不敬三宝不修三脱，粗犷恶口乐说无义不知惭愧，为利养故外现细行，自诳诳他贪于供养诸根不调，乐求声闻、辟支佛乘，心不真实，寡闻愚痴，无念喜忘不知方便，不修慈悲喜舍之心常行魔界，贪著于人、众生、寿命，说无因果无业行缘，其心放逸乐为恶行，舍离头陀乐行世法，自赞己身毁谤他身，贪于身命色等五法，乐于睡眠，喜闻世法不知时节，亲近恶友，不能修行四摄之法。法兄，如是等人不知佛出，不信佛出。”

无畏菩萨言：“宝女，汝今已得远离如是恶法不耶？”

宝女言：“法兄，我已远离如是恶法。云何远离？如不贪节，云何不贪？犹如贪节。云何贪节？如真实节。云何实节？如我见节。云何我见？如过去节。云何过去？如无明节。云何无明？如贪爱节。云何无明贪爱等节？犹如智慧解脱等节。云何智慧解脱等节？犹如幻

节。”

无畏菩萨言：“宝女，幻者非心非意，智慧解脱即是心意。”

“法兄，一切众生心意智慧，及以解脱悉皆如幻。”

无畏菩萨言：“宝女，如不可说菩萨所说，汝能信不？”

宝女言：“法兄，不可说者终无所说，如其说者非不可说。若不可说有所说者，云何得名不可说耶？即应是说，以不可说实无所说，是故名为不可说也。若不可说实无所说，我于今者为何所闻？若无所闻，何所信耶？”

无畏菩萨言：“宝女，是不可说实有所说，今有证知所谓大众。一切大众皆悉得闻，是不可说之所宣说。”

宝女言：“法兄，此大众中，若有言我闻不可说之所说者，即是虚妄。何以故？是不可说实无所说，云何大众而言闻耶？”

无畏菩萨言：“宝女，汝于今者信佛语不？”

“法兄，若有世间无信之人，即是佛也。何以故？信者即是贪欲瞋恚，如来无有贪欲瞋恚，是故无信，若无信者即是无证。法兄，空无相愿真实无证，是故如来亦无有证。法兄，法界实性无作无为，虚空等法真实无证，是故如来亦无有证。”

无畏菩萨言：“宝女，以何为证？”

宝女言：“法兄，若有不见无量佛法，如是之人可以为证。”

无畏菩萨言：“宝女，此舍利弗、目犍连等是证信不？”

宝女言：“法兄，如是，如是，是证是信。何以故？声闻人戒则有边际，如来之戒无有边际。定、慧、解脱、解脱知见亦复如是。”

尔时，舍利弗语宝女言：“宝女，声闻亦有三解脱门，如来亦有三解脱门。汝今何故以声闻人而为证信，不以如来？”

宝女言：“大德，如阿耨达池，有八味水雨阎浮提而已，一切草木丛林悉得增长，如是雨水有差别不？”

舍利弗言：“不也，宝女。”

“大德，如阿耨达池水本一味，德人用之则有种种微妙甘味，薄德之人用其味则一粗恶不美。大德，如来、声闻三解脱亦复如是。是故如来、声闻之人则有差别，而法界性实无差别。”

尔时，世尊赞宝女言：“善哉！善哉！宝女，善能分别宣说是义。”

宝女说是法时，天与人三万二千发阿耨多罗三藐三菩提心。

宝女复语舍利弗言：“大德，譬如大海其水一味，多有诸宝，亦有水精下价之珠；法界亦尔，虽复平等，诸佛学之得无价宝，声闻学之得下价宝。大德，如须弥山上，有诸天人多受快乐，或复有天少受快乐，而须弥山实无差别；法界亦尔，虽复无差，如来处之受无量乐，声闻处之受有量乐。大德，如转轮王，虽有千子皆亦不得称绍尊位；声闻之人亦复如是，虽有智慧不名为佛。大德，如燃灯器，金则黄光，铜则赤光，其色虽异，灯无差别；法界亦尔，诸佛燃之智光无

边，声闻燃之智光有边，而法界性实无差别。大德，如转轮王入城邑时，一切悉知；薄福之人入城邑时，乃至亲厚犹不觉知。如来世尊入法界时亦复如是，一切天人皆悉觉知，障覆一切外道异学，胜诸声闻、辟支佛等；声闻之人入法界时，声闻犹尚不觉不知，况复余人？大德，譬如山间有师子吼，瞿枳罗鸟、迦陵频伽、孔雀等声，人声、牛声、驴声、马声，响随声发，而是响者实无差别，随声发故响则不同。如来、声闻三解脱门亦复如是，如来能坏一切魔众，能胜一切外道邪见，能知一切众生心念，能知众生种种所行，能调声闻、辟支佛等，能出诸佛如来音声；声闻之人虽同法界，则不能同作如是等事。大德，譬如甘蔗其味虽一，与白石蜜为福德人，出黑石蜜为薄福德人；法界亦尔，菩萨摩訶萨则得大智甘露之味，不杂声闻、辟支佛味，声闻唯得有边智味。大德，譬如三千大千世界多有大海，为利无量无边众生，亦有小河利少众生；法界亦尔。大德，如日月星宿俱游虚空，而星宿明不及日月，是虚空性实无差别；法界亦尔，如来、声闻虽俱游止，智慧光明实不同等，而法界性亦无差别。大德，譬如二人同学一业，一则工巧多得利益，一则疏拙获利无几；如来、声闻法界亦尔。大德，如一叠华无有差别，巧方便故得上价衣，拙方便故得下价衣；法界一性亦复如是，如来乃以智慧方便大慈大悲业因缘故，得大寂静无价智慧，声闻之人得下智慧而不清净。大德，如大海中有罗睺阿修罗王，亦有其余众生之类，唯阿修罗王能得其底，余则不得；法界亦尔，如来则得毕竟智慧，声闻不得。大德，譬如大地生千叶华及七叶华，诸天世人见千叶华悉生欢喜；如来、声闻法界亦尔，诸天世人见佛欢喜心生爱乐，非声闻也。大德，以是义故，如来智慧无量无边，声闻智慧有量有边，而法界性实无差别。”

无畏菩萨语宝女言：“是不可说菩萨摩訶萨定是汝师，能以妙法调伏于汝。”

宝女答言：“善男子，不可说菩萨无所调伏。何以故？如是菩萨，不见自他及以此彼，如其尔者，何所调伏？善男子，若有不觉一切魔界及自境界，如是之人则能调伏。复次，善男子，若能知见一切诸法，不见有我及以我所，如是之人则能调伏。复次，善男子，若有能自勤修苦行，不劝他修，修苦行已心不生高，如是之人则能调伏。复次，善男子，如诸菩萨为众生故，在大生死即得解脱不行涅槃，如是之人则能调伏。是名第一实义调伏。”

尔时，世尊告无畏菩萨言：“善男子，是宝女者，真实从彼不可说菩萨而得调伏；以调伏故，未来当得阿耨多罗三藐三菩提。”

是时，宝女复白佛言：“世尊，菩萨摩訶萨实无调伏。若调伏者即是大悲，悲能调伏，非是人也。声闻之人则须调伏。何以故？无大悲故。世尊，如庵罗果树上熟者，其味甘美，人所贪嗜；若生郁者，其味则苦，人所薄贱。如来智慧亦复如是，从大悲生，是故自调不由于他。”

无畏菩萨语宝女言：“汝亦能报是不可说菩萨恩不？”

宝女言：“善男子，我若知恩，何得不报？若有众生不能修行菩提道者，如是之人则不能报。”

“宝女，云何名为修菩提道？”

宝女言：“善男子，三十二业名菩提行。何等三十二？终不退失菩提之心；不贪声闻、辟支佛心；至心修行无有谄曲；凡所修行无有障碍；为众生行心无厌悔；虽行生死离贪恚心；于诸众生其心平等，悉能教化而调伏之；以四摄法而摄取之；为众得乐修大慈心；为苦众生修行大悲；如说而行精进坚固；终不欺诳一切众生；所修庄严为助菩提；不求一切世间之乐，心不贪著世间利养；不为身故造作众恶；不贪寿命，不见他过；其心调伏净三种戒；庄严修集相好之业；常念出家报往善业；常乐寂静多闻无厌；智慧能利自身他身；凡所说法无有食想；能舍一切不求果报；净于戒聚不生憍慢；终不自赞所有功德；为他人故勤修忍辱；为净土故勤行精进；为知方便求一切智；永断一切烦恼习气；为得神通护持正法；亲近善友善心思惟；远离魔业如法而住，得无生灭微妙智慧。善男子，若有不能行如是法，当知是人不能报恩，亦复不能知如来恩。

“善男子，有二种人必死不治，毕竟不能知恩报恩：一者、声闻，二者、缘觉。善男子，譬如有人坠堕深坑，是人不能自利利他；声闻、缘觉亦复如是，堕解脱坑，不能自利及以利他。”

尔时，无畏菩萨即脱己身所著上衣，以报宝女说法之恩。尔时，宝女不肯受之。无畏菩萨言：“我为法故，唯愿受之。”

“善男子，法离于贪，是故不应说法。而受法者无取，是故不应取供养物。法者无贪，是故不应贪供养物。法者无我及以我所，是故不应以我所物而为供养。法者清净，是故不应以不净物而为供养。法无身心，身心行者非供养也。法非心意识，心意识者非供养也。法无牵挽，有牵挽者非供养也。法非有无，是故有法非供养也。法非诸有，是故有想非供养也。法非觉观，有觉观者非供养也。法无增减，有增减者非供养也。法无高下，有高下者非供养也。法不可说、不可听闻、无有名字，舍一切声远离圣道，是故不可以衣供养。法无境界，非眼境界至意境界，无有屋宅，是故不应以衣供养。法者即是十二因缘，非常非断，是故不应以衣供养。法无障碍，不颠不倒，不可量度，无我、众生、士夫、寿命，不生不灭，不出无为，是故不应以衣供养。”

无畏菩萨言：“宝女，如来世尊亦受如是法之供养。”

“善男子，如来虽受法之供养，如法界性而不分别。”

“宝女，云何名为分别法界？”

“善男子，若言法异，法供养异，受施者异，施者亦异，是则名为分别法界。若不分别法及供养、受者、施者，是则不名分别法界。”

无畏菩萨言：“宝女，如其法界无分别者，云何说言分别法界不分别耶？”

宝女言：“善男子，法界之性虽无分别，而诸众生心颠倒故生于分别。善男子，如有器故，名为完破；若有作业有所取者，则名为破，名为分别。善男子，如器虽坏，器中虚空终不可坏，法界之性亦复如是。”

尔时，世尊赞宝女言：“善哉！善哉！若有人能成就是法，如是之人堪受三千大千世界人天供养。”

佛说是已，大众诸人各各脱身乌多罗僧奉上宝女。

尔时，不可说菩萨摩訶萨白佛言：“世尊，凡可说者即是世间，不可说者即是出世；可宣说者即是爱心，不可说者即是离爱；可宣说者是世间行，不可说者是出世行。世尊，出世之义无所造作，无所作者即无诤讼，无诤讼者即沙门法，沙门法者即出世法，出世法者即无罪过，无罪过者即是不取不生不灭，不生不灭即是出世，出世之法不可宣说不可显示。以是义故，一切诸法不可宣说。”

尔时，众中有一天子，名曰胜意，语不可说菩萨言：“善男子，若一切法不可说者，众生云何而得言说不可说言？”

“善男子，汝宁知响有言说不？”

胜意言：“善男子，响者皆从因缘而有。”

“善男子，是响之因，为定在内，为定在外？”

天子言：“善男子，如是因者，不定在内，不定在外。”

“天子，一切众生强作二想而有所说，诸法之性实不可说。”

天子言：“善男子，若不可说，云何如来宣说八万四千法聚，令诸声闻受持读诵？”

“天子，如来世尊实无所说，无所说者即是如来。天子，汝知何等为如来也？将不谓色受想行识是如来乎？将不说佛是去来现在，有为无为，阴、界、诸入三界所摄，是因、是果、是和合耶？或想、非想、亦想非想、非想非非想耶？”

“不也，善男子。”

“天子，若如是等非如来者，云何可说？若不可说，云何而言如来世尊演说八万四千法聚？是故八万四千法聚实不可说，声闻受者亦不可说，不可说者即是正义，义若无说即是真实。若可说者则为不定，若不可说则为可证。若可说者不可为证。何以故？以颠倒故。”

尔时，胜意天子白佛言：“世尊，是不可说菩萨所说，谁当信之？”

尔时，不可说菩萨以神通力，化作比丘作如是言：“我今深信是不可说菩萨所说。何以故？我如如来亦如法界，如来诸阴不可宣说，我阴亦尔不可宣说；如来界入不可宣说，我之界入亦不可说；如来菩提、我之菩提，亦尔等无差别。如来了知诸众生界，我亦了知诸众生界；如来转于无上法轮，我亦如是转于法轮；如来入于无上涅槃，我

亦如是入于涅槃。”

天子言：“比丘，汝今将非魔所造耶？而说是言等于如来。”

比丘言：“天子，若有人言我异佛异，当知是人即魔弟子。若有说言以我平等观法平等，法平等故众生平等，众生平等如来平等，如是之人即真实知能过魔界。”

时，化比丘说是语时，五百比丘漏尽解脱，八千菩萨成就忍辱，即以香华供养比丘。

舍利弗言：“诸善男子，何故供养是化比丘？”

诸菩萨言：“大德，谁作是化？”

“诸善男子，汝今不知是不可说之所化乎？”

诸菩萨言：“大德，譬如如来复化如来，有人供养，为供养谁？”

“诸善男子，是人即是供养如来。”

“大德，若有供养是化比丘，即是供养不可说菩萨。”

舍利弗言：“善男子，是不可说菩萨摩訶萨，设何供养任供养之？”

“大德，若有智人无有声行，无字无色，无名无作，无所宣说，无自无他，无法非法，无净无秽，如是供养乃任供养。”

时，化比丘语舍利弗言：“大德，汝意将无谓我今者异于汝耶？”

舍利弗言：“不也，比丘。何以故？如来常说一切诸法皆悉如幻，如来如说，我亦如信。”

“大德，若有人能供养如来，即是供养化无异也。”

时，舍利弗语不可说菩萨言：“善男子，谁入是化今作是说？”

“大德，如镜中像，其谁在中而有像现？”

“善男子，无在中者，直以清净四大因缘故有像现。”

“大德，化亦如是，法性净故能作此说。”

“善男子，若尔者，一切众生何故不能如是宣说？”

“大德，镜之背后俱不离镜，像何不现？”

“善男子，镜背四大不清净故。”

“大德，众生亦尔，不能清净法界性故不能宣说。”

“善男子，汝先后语义不相应。何以故？汝常说言，一切法界性自清净，今云何说法界不净？”

“大德，若不尔者，汝云何因阿湿比丘得法眼净？”

“善男子，我但因其开导，除灭客烦恼故名法眼净，实无所得。善男子，若有人言我得虚空，是义不然。何以故？虚空之性常自清净。若常清净，云何可得？客云覆故众生不见，除客云故名之为见。法界之性亦复如是，是故我实不得法眼。善男子，汝今云何作如是等不相应说，言法界性或净不净？”

不可说菩萨言：“大德，汝之所说及我所说者，皆是诸佛如来境界，非是我等之所知见。”

舍利弗言：“善男子，若言是说是佛境界非我所知，云何复言法

界之性无有分别？若有分别，当知法界则有无量。”

不可说言：“大德，法界性一实非无量。”

舍利弗言：“善男子，如其法界性是一者，云何说言是佛境界非我所知？若法界一，以何因缘一切众生不名如来？”

“大德，汝欲分别众生、如来有异相也？”

“善男子，如汝先说，我不欲令众生、如来有别异想。”

“大德，汝意定谓有无生耶？”

“善男子，有所谓法界。”

“大德，汝意复谓有邪正耶？”

“不也，善男子，邪正聚者即是颠倒。”

“大德，汝谓有法不生耶？”

“不也，善男子，若是不生毕竟不生。”

“大德，汝意谓是不生之法有分别耶？”

“不也，善男子。”

“大德，如其不者，何故说言一切众生非如来耶？若如是者，谁是众生？谁是如来？”

“善男子，我以先解如是之义，为显智慧故作此问。善男子，若有不解汝意所说，是诸众生当堕地狱。何以故？以生诽谤故。”

不可说菩萨言：“大德，如是法者，无人能诽，无人能受。何以故？若有诽受，当知是人亦当获得如是等法。大德，如大力士，弱劣之人不能生疑；我法亦尔，若有不于无量佛边种善根者，终不能疑，不能受持。”

“善男子，如我解汝所说义者，有人信顺如是法语，胜无量劫行檀波罗蜜、尸波罗蜜、羼提波罗蜜、毗梨耶波罗蜜、禅波罗蜜、世间般若波罗蜜。”

尔时，世尊赞舍利弗言：“善哉！善哉！如汝所说。若有信解如是语者，当知是人已于无量阿僧祇劫，修行如是六波罗蜜。若有不能信是语者，则不能得受佛记。阿耨多罗三藐三菩提。若能信者，则得受记成阿耨多罗三藐三菩提。舍利弗，我念往昔无量劫中修六波罗蜜，以不能信如是语故不得受记，不成阿耨多罗三藐三菩提；其后信已即得受记，成阿耨多罗三藐三菩提。是故当知，若有人能信解是语，即得受记成阿耨多罗三藐三菩提。”

不可说菩萨白佛言：“世尊，以何等分而得受记？若过去分得受记者，是义不然。何以故？是灭法故。若未来分得受记者，是亦不然。何以故？以未生故。若现在分得受记者，是亦不然。何以故？不可说故。若是三分无受记者，云何说言菩萨受记？”

佛言：“善男子，若有菩萨摩訶萨，信不可说，知不可说，说不可说，于不可说不生怖畏，知不可说及色二法无有差别；受、想、行、识、眼乃至意，佛法僧宝、生死、解脱、法界不可说亦复如是。是名菩萨得忍辱分，得无生分，得无出分，得无取分，得无污分，得

无有分，得无作分；具足成就如是等分，于一切法不生二相、二心、二意、二分、二缘。若有菩萨能如是观，是名不去不来不住，以不住故无所作，无所作故无所愿求，无愿求故不断不常。若无断常即是中道，中道即是十二因缘，十二因缘无作无求，以是义故名为甚深；无有作者，无有受者，以是义故复名甚深；不生而生，不出而出，以是义故复名甚深。譬如炽火从因缘生，无有作者，无有受者，是火灭已无有去处，无有来处；一切诸法亦复如是，无有作者，无有受者。善男子，若有菩萨能如是知，当知是人则得受记。”

尔时，世尊说是法时，八千菩萨得无生法忍；得是忍已，上升虚空七多罗树，合掌恭敬而说偈言：

“若能观是色阴分， 及不可说无二相，
是人即获平等智， 犹如先佛之所得。
若观受想行识阴， 亦复如是无有二，
能谛了知不可说， 即得受记如先佛。
若欲观察入界等， 及一切法无二相，
无声无字无有节， 是故诸法不可说。
不可说分三世分， 即是一分无差别，
实性真相悉平等， 如是观名义菩萨。
贪欲瞋恚及愚痴， 空无相愿悉平等，
生死涅槃无差别， 佛法僧宝亦无二。
一切法义不可说， 无有生灭如虚空，
无作无受如火性， 从缘而生非缘灭。
灭已不知去来处， 一切诸法亦如是，
诸法皆从因缘生， 因缘断故名为灭。
若法不生而不灭， 亦复不常而不断，
即是甚深十二缘， 更不从缘而出生。
本无有生而今生， 本无有出而今出，
无有造作无受者， 无有诸因及果报。
亦复非有而非无， 非有彼此二种相，
亦不在内非在外， 即是甚深十二缘。
是法本无而今有， 已有之法后还无，
若有法三世摄， 当知性相如前说。
若是内法外中无， 外法之性内中无，
一切诸法亦如是， 是名第一真空义。
一切众生心本性， 清净无秽如虚空，
凡夫不知心性故， 说客烦恼之所染。
若诸烦恼能污心， 终不可净如垢秽，
诸客烦恼障覆故， 说言凡夫心不净。
如其心性本净者， 一切众生应解脱，

以客烦恼障覆故，是故不得于解脱。
心不能生次第心，心不能见次第心，
一切诸心从缘生，是故次第心不断。
若能知见如是心，犹如虚空及幻相，
是人即得心自在，亦能了知次第心。
犹如幻师所作幻，无量世业师亦尔，
如心众生亦复然，若知即得心自在。
若有能得如是忍，犹如幻法无因缘，
若知如是不生贪，不由因缘得解脱。
一切众生诸心性，如来摄为三世摄，
犹如幻物无真性，众生之心亦复然。
心能了知诸众生，众生亦能了于心，
心者非色不可见，如心众生亦复然。
如众生性一切法，无为之性不可说，
如来学得真法性，是故名为无碍智。
一切凡夫不知见，流转无量生死中，
无明所覆迷于实，不知如尔及法界。
法界之性如虚空，一切世间不能说，
如来修集大慈悲，无字法中而演说。
犹如世间六种味，各各不能自觉知，
众生虽说阴入界，而不能了其性相。
众生智慧不生灭，犹如虚空及以幻，
远离一切颠倒故，是则名为净智慧。
如来觉了一切法，无受无作如草木，
若能观察如是法，是人即得无生忍。
若有无量诸菩萨，获得如是忍辱者，
是人即为无量佛，授其无上菩提记。
若能放舍内外物，乃至不惜于身命，
能调一切诸众生，是人即为佛授记。
若能清净诸众生，既清净已不生慢，
说诸众生悉清净，以是因缘得受记。
若知诸法念念灭，为众生故修忍辱，
复能演说众生忍，因是忍故得受记。
远离恶法勤精进，为修善法不休息，
若能演说勤精进，因精进故得受记。
一切诸法本性净，平等无差如虚空，
若能演说是平等，因三昧故得受记。
若能知法不可说，说时不生于怖畏，
能以方便化众生，因是智故得受记。”

尔时，魔王将四种兵——车兵、马兵、象兵、步兵，来至佛所。魔自化身作比丘像，语不可说菩萨言：“善男子，魔王波旬，今将四兵来至佛所，汝今欲设何等方便？”

不可说言：“彼若来者，我当令其发阿耨多罗三藐三菩提心。”

比丘言：“善男子，彼魔波旬都无善心，云何能令发菩提心？”

不可说言：“我当调伏令得善心，得善心已以是因缘，发阿耨多罗三藐三菩提心。云何调伏？我当往彼他化自在王其境界，彼当属我；既属我已，我当随意而调伏之。”

尔时，波旬闻是语已，心生忧怖，即欲退还而不能得，复作是念：“我于今者既不被缚，又不得解，亦复不能作神通力。”

时，魔即闻空中声曰：“是不可说神通之力。”

魔王波旬即时便前向不可说，礼拜忏悔而作是言：“我今舍离一切魔业。”

不可说言：“波旬，谁系缚汝？”

波旬答言：“善男子，我无系放而不能行。”

不可说言：“善男子，如汝今者，不系不放而不能行；一切众生亦复如是，无系无放而不能行。何以故？无明爱等颠倒系缚不得解脱。波旬，汝今若欲坏系缚者，应当速发阿耨多罗三藐三菩提心。”

波旬答言：“善男子，一切众生成就几法，能发无上菩提心耶？”

“波旬，众生成就十六种法，能发阿耨多罗三藐三菩提心。何等十六？所谓常修上心莹磨诸根，勤修诸善庄严功德，至心持戒不生悔厌，修集大悲怜悯众生，信佛世尊有大慈悲，为诸众生受行诸苦，能坏众生所有苦恼，调伏诸根具足正念，心无所畏不求诸有，乐求佛智不乐二乘，受乐无慢受苦无悔，恭敬智慧破坏憍慢，知恩报恩具足身力，护持正法不断三宝，是名十六。善男子，若有众生具如是法，当知是人能发阿耨多罗三藐三菩提心。”

波旬言：“善男子，众生若具如是等法，能发阿耨多罗三藐三菩提心者，我今实无如是等法，云何能发无上道心？”

不可说言：“波旬，譬如种树为华果实，初虽未有，当知其后必得不疑。众生若为向菩提心行，亦复如是，虽未现有，渐渐当得是十六法。”

波旬言：“善哉！善哉！善男子，如汝所说。”

说是法时，天与人众三万二千，发阿耨多罗三藐三菩提心。

波旬言：“善男子，云何名为向菩提心行？”

“善男子，有三十二法，向菩提心而得增长。何等三十二？一者、至心；二者、定心；三者、净心；四者、欲心；五者、不放逸心；六者、修集善法；七者、庄严趣向无上菩提；八者、能以四摄摄取众生；九者、乐行方便；十者、调伏众生；十一者、能熟众生；十二者、能知因缘；十三者、勤行精进；十四者、亲近善友；十五者、具足信心；十六者、具足信心故便生欢喜；十七者、供养恭敬师长和

尚有德之人；十八者、能瞻病苦；十九者、能善思惟；二十者、如法而住；二十一者、为护法故不惜身命；二十二者、成就总持；二十三者、具足念心；二十四者、能说深法；二十五者、具足智慧；二十六者、具足诸力；二十七者、愿于菩提；二十八者、不舍众生；二十九者、修集慈悲喜舍之心；三十者、游于生死心不生悔；三十一者、为受身故庄严福德，为发净愿庄严智慧；三十二者、知一切法不可宣说。是名三十二。菩萨若能增长是法，必得阿耨多罗三藐三菩提。善男子，譬如秋夜，初月增长亦明亦净；众生未发菩提之心，具足如是三十二法，亦复如是。善男子，菩萨若能具足如是三十二法得妙色相，常为天人之所供养，能舍一切不求果报，发大誓愿净于三世，持戒完净不漏不破，修于忍辱得从闻善，无生法忍庄严善法，身心寂静不贪善根，终不修集爱味诸禅，亦不修习缘众生慈，唯修法缘无缘之慈，修集大悲作他所作，知恩报恩不舍众生，乐听正法如闻而说，演说法时无有食想，能调自他离贪恚心，以四摄法摄取众生，修行福智二种庄严，毗婆舍那及舍摩他，具足念心净诸威仪，成就获得四无碍智，身口意业从于智慧，其心坚固无有退转，常能利益一切众生。波旬，为诸众生入佛法故，示有文字音声演说，第一义中都无如是文字声说，是则名为一切法性，一切法性性不可说。”

波旬言：“善男子，若一切法不可说者，菩萨云何发大誓愿向于菩提？”

不可说言：“波旬，譬如虚空其性无边，是中宁可作井池不？”

“不也，善男子。”

“波旬，若一切法性无不可说者，终不可证，不可宣说。”

波旬言：“云何名为发菩提心？”

不可说言：“了知贪性则名发心，若复了知瞋痴悭妒，阴、入、诸界，无明、行、识、名色、六入，乃至生老病死大苦，是名发心。”

波旬言：“一切诸法有何等性？”

“波旬，一切诸法无出是性。”

波旬言：“云何无出？”

“夫无出者即无魔迹，魔迹即是我及我所，离我我所是名无出。觉观因缘行想聚取，说想非想、生灭善恶、有漏无漏、有为无为、世及出世即是魔迹。若无如是，即是无出。”

说是法时，八千菩萨得无生忍。虚空之中出如是声：“善哉！善哉！波旬，说是法时八千菩萨得无生忍。”

波旬言：“善男子，菩萨具足何等法故得无生忍？”

空中声曰：“修集具足六波罗蜜得无生忍。”

尔时，不可说菩萨白佛言：“世尊，唯愿如来，为诸菩萨说不可说。”

佛言：“善男子，若有菩萨行檀波罗蜜时，观身如幻，观受如

梦，观于菩提犹如虚空，行施之时不见一法，是名檀波罗蜜不可宣说。

“若有菩萨观戒、戒地，毁戒及地，观诸众生无有我性，观于法性，是名持戒不毁破戒；具足戒已不发三眼：一、持戒眼，二、破戒眼，三、菩萨眼。虽复持戒不求一法，不见菩提去来现在，是名尸波罗蜜不可宣说。

“善男子，若有菩萨观诸众生，不生不出而修于忍，观于菩提、众生、诸法皆悉空寂，众生空中无瞋喜心，亦复不觉一法怨相而修于忍，亦复不觉远离一法而修于忍，是名羼提波罗蜜不可宣说。

“善男子，若有菩萨勤行精进，都不见有身口意等一法是生、一法是灭，而修精进不坏法界；为度众生而修庄严，于空无我不生错乱，为欲具足一切佛法而行庄严；闻说佛法即是无法，于是事中不生恐怖；清净庄严如来世界，虽复庄严观之如空，亦不庄严转于法轮。何以故？一切法性不可说故。是名毗梨耶波罗蜜不可宣说。

“善男子，若有菩萨修禅波罗蜜，修已不见过去心性，净本性已不见住处，亦复不见贪恚痴心、上中下心及无贪恚，愚痴、慧心亦不分别。何以故？如贪恚痴性，无贪恚痴亦复如是。如是观已亦入禅定，亦不能作平等平等，亦不能以不平等法而作平等，亦能了知阴界诸入、善恶、净秽、有漏无漏、世间出世间、生死涅槃对治等法。是名禅波罗蜜不可宣说。

“善男子，云何名为不可宣说般若波罗蜜？若无慧行，无我、我所、众生、寿命、士夫，常断、有无等见，欲界、色界及无色界，是名无行。无有诤讼，无去无来，是则名为随于慧行。离无明闇及恶邪见，观如是法即真实观。善男子，火灾起时一切烧尽，无有因缘唯除虚空。菩萨行是不可宣说般若波罗蜜时，亦复如是无有因缘，见一切法本性尽灭，以方便故为诸众生宣说涅槃；亦知众生无有名字，以方便故宣说名字；以慧力故知过去、未来说于出灭；虽复了知无有身心，以方便故说于身心；虽知诸法不可宣说，为众生故方便而说；虽知无施及以受者，以方便故说施说受；虽知诸法本性清净，以方便故说有禁戒；虽知诸法本无瞋性，以方便故修集忍辱；虽知无修无有远离，以方便故勤修精进；虽知诸法本性寂静，以方便故修行禅定；虽知无有生死涅槃，以方便故修集智慧；虽知诸法本性自灭，以方便故说于涅槃即是般若。夫般若者，无声名字，不可宣说，不可见闻，无心无识，不取不舍，非我我所，非有处所、形质、规矩，不高不下，非色非见，非对非作，非觉非想，无有住处，非去来现在，非色声香味触法意，非明非闇非是虚空，非内非外，非作非有，非肥非瘦，非增非减，本性清净，非贪恚痴，亦非狂乱，无有边际，不可称量，是名般若波罗蜜不可宣说。”

说是法时，魔王波旬于系得脱，心生欢喜即作是言：“如我今闻不可说法而得解脱，若有善男子、善女人闻是法者，亦当如我于颠倒

中而得解脱，一切众魔不得其便。”

尔时，会中万二千众生发阿耨多罗三藐三菩提心。

是时，阿难白佛言：“世尊，如是正法，名字何等？云何奉持？”

佛告阿难：“是经名为《方等大集》，亦复名为《不可说法》，亦复名《入一切佛法断一切佛所有名字》。若有人能顶戴受持如是等法，即能获得阿耨多罗三藐三菩提。”

尔时，空中多设伎乐香华，供养不可说菩萨。是时，三千大千世界六种震动。

大方等大集经卷第十九

宝幢分初魔苦品第一

尔时，世尊故在欲、色二界中间大宝坊中，与诸眷属围绕说法，告大众言：“我昔初得阿耨多罗三藐三菩提时，住王舍城迦兰陀长者竹林。尔时，城中有二智人，一名优波提舍，二名拘律陀，具足成就十八种术，五百弟子常相随逐。是时，二人各相谓言：‘若有先得甘露味者，要当相惠。’时，有比丘名曰马星，于其晨朝从禅定起，入王舍城次第乞食，优波提舍中路遥见马星比丘，即作是念：‘我久住是王舍城中，初未曾见若人沙门、婆罗门等威仪庠序，如此人者。我当往问，所事何师？从谁受法？’

“时，优波提舍即往趣彼马星比丘，作如是言：‘比丘，汝师是谁？从谁受法？’马星答言：‘善男子，有释迦牟尼如来大士，胜诸出家无上之尊，已度生死获得解脱，能度一切无量众生，名之为佛，能悟众生，善作诸行能干苦河，具足成就如是等法，即是我师，我从受法。’优波提舍言：‘汝师常说何等法义？’善男子，汝今谛听！我当为汝分别解说：法从缘生，通达是因，因缘灭故，即是寂静；世间即苦，苦因名集，若修八正，世间集灭；若无苦集，我师说言，名为涅槃。善男子，我师唯说如是等法。’优波提舍闻是语已，得法眼净，名须陀洹，即说偈言：

“我闻比丘说四谛， 即得过于三恶道，
昔来未闻今得闻， 昔所未得今已得。
我今已过三恶趣， 真实了知非道，
我今诚心归依佛， 以能宣说是法故。”

“说是偈已，复语比丘：‘如是世尊今住何处？’马星答言：‘世尊今在王舍大城迦兰陀长者竹林之中，与迦叶等千比丘俱，菩萨十千，汝可往彼。’优波提舍言：‘比丘，我今先当还问同学及我徒众。’时，优波提舍敬意礼拜马星比丘，右绕三匝还所住处。拘律陀梵志遥见优波

提舍，即便问言：‘优波提舍，汝今诸根清净悦豫颜色光泽，将非获得甘露味耶？’善男子，我已得矣。谛听！谛听！当为汝说：法从缘生，通达是因，因缘灭故，即是寂静；世间即苦，苦因名集，若修八正，世间集灭；若无苦集，我师说言，名为涅槃。’拘律陀言：‘善男子，如是之言能尽诸苦，即是梵行，能断邪见一切因缘，亦说一切有为皆空。善男子，唯愿更说。’优波提舍复如本说，说已即得须陀洹果。拘律陀言：‘如是之言，能过四流度于生死，通达五阴永灭烦恼，是甘露味我今已得，不宜住此。善男子，如是师者住在何处？’优波提舍言：‘我闻住在王舍大城迦兰陀竹林。’

“尔时，优波提舍及拘律陀，告诸弟子：‘此间今有释迦如来，我已咨受其所说法。汝等今者欲何所趣？’尔时，魔王告诸天众：‘鸯伽摩伽陀国有二大人智慧最胜，一名优波提舍，二名拘律陀，今欲为彼瞿昙弟子。若此二人从彼瞿昙沙门受法，我境则空。我今欲往转彼二人出家之心。’尔时，魔王即化其身作马星像，至优波提舍拘律陀所，而作是言：‘善男子，我先所说试汝智耳！汝既无答，释迦如来真实不作如是之言。如来常说，无善业果，无恶业果，若能亲近五欲乐者，是人即得甘露法味。又言无有今世后世，是故无业，若无业者谁作谁受？既无种子，云何得果？释迦如来唯作是说。’尔时，优波提舍与拘律陀，各相谓言：‘如是语者即是魔说，非如来语，又非马星比丘所说。’魔知是已即便灭去。

“尔时，二人复告弟子：‘摩纳，汝常谛观生老病死，世无免者。我今已能永灭诸苦，汝等今日欲何志求？’尔时，魔王复更化作马星形像，而作是言：‘谁能破坏生老病死？譬如有人说言：“我能坏彼虚空。”无有是处。若言能坏生老病死，亦复如是。’时，拘律陀语魔王言：‘我欲通达清净之法远离诸苦！一切出家皆悉无有解脱如是烦恼苦者，是故我今欲诣如来。魔王如野狐鸣，而云师子吼。色虽相似，实非师子。魔王汝今虽作比丘形像，汝之所说非比丘说。夫比丘者破诸烦恼，破烦恼语即是清净，言无善恶非比丘语。’时，虚空中一切诸天，各各赞言：‘善哉！善哉！善男子，一切出家佛道最胜，夫佛道者即是涅槃。汝今不受魔之所说，善哉！善哉！’尔时，魔王受大苦恼即便隐灭。

“时，诸弟子白二师言：‘如师今受瞿昙沙门无上正法，我等亦尔，当往启受。’时，二大师与五百弟子前后围绕，往迦兰陀长者竹林。尔时，魔王复于其路化作大坑深百由旬，欲令诸人不得诣佛。如来知已即以神通，令彼二人所见平坦无有坑岭。魔复于前化作大山高广千里，如来神力令其不见。时，魔复遣百千师子遮其道路。时，诸师子见优波提舍及拘律陀五百弟子，善心即生默然潜伏。诸人即得前至佛所，到已头面礼敬佛足，却住一面而白佛言：‘世尊，唯愿如来听我出家，我欲修佛清净梵行。’佛言：‘善来！诸善男子，恣意修集清净梵行。’作是言已，具比丘戒。尔时，魔王见是二人得出家已，即便

化作自在天像，向于佛而说偈言：

“世间若有智慧人， 具足成就世方术，
悉来礼敬供养我， 我亦为彼说净道。
瞿昙若欲度生死， 今当诚心见归依，
我今所说清净道， 如先佛说无有异。”

“我时以偈答魔王言：

“我真实知八正道， 能永远离破诸苦，
汝等真实不能知， 无以狐身师子吼。”

“尔时，魔王隐自在天像，复现梵像而说偈言：

“真实远离诸烦恼， 能过三千大千界，
莫为众生受诸苦， 应当默然受禅乐。
世间乃至无一人， 堪任盛受甘露味，
我今怜愍故告汝， 应当速入于涅槃。”

“我时以偈复答魔言：

“我见世间多众生， 能度生死大嶮河，
如是上中下品类， 先得度已我乃灭。”

“尔时，魔王受大忧恼，入于苦宅还其所止。其诸眷属各作是言：‘我王何故受是大苦？’虽作是语无能知者。时魔婬女其数五百，身佩璎珞庄严饰好，为魔波旬作诸伎乐，歌舞嬉戏以相娱乐。波旬以手而遮止之，婬女于是默然而住。从二至七，魔亦如是遮止至七。时，有一女名曰电光，语波旬言：‘大王何故如是愁恼？如失天位，火灾起耶？将无有怨不能坏乎？’波旬答言：‘我有大怨谓释种子！是大恶人成就幻术，若不治者我界则空。’诸婬女言：‘彼释种子，以何庄严？有何道力？谁为伴党，能空王界？’魔王答言：‘彼人以戒、施、忍庄严，无常、苦、空以为器甲。若坏众生诸有受生，我莫能知其所住处。具足无上大神通力，大慈大悲而为伴党，能度一切三有众生，是故能令我界空虚。’时诸婬女闻佛功德，赍持香华及诸伎乐，来至佛所尽心供养。是大众中唯佛见之，其余众生悉无睹者。

“尔时，大众咸有疑心，即白佛言：‘世尊，如是香华伎乐供养，将非舍利弗、目犍连等力所作耶？’佛言：‘不也。此是波旬五百婬女供养之具，魔王不久当来至此。’时诸婬女闻佛语已，心生欢喜，即得不失菩提之心。尔时，婬女长跪合掌，而说偈言：

“如来永断诸烦恼， 能施众生净法眼，
令众生度生死河， 是故至心赞叹礼。
一切人天赞供养， 具足无量无边智，
愿佛为我开方便， 令我得解于女身。
世尊修大空三昧， 了了通达第一谛，
具足法宝大商主， 愿坏魔力调我等。”

“尔时，娑女说偈赞已，即还魔所而说偈言：

“王之自在非常我， 亦未离生老病死，
众苦烦恼绕王身， 常行痴闇处恶道。
若欲度生老死河， 当生信心诣如来，
我今欲还至佛所， 咨受甘露断诸味。”

“尔时，波旬生大恶心，欲以五系系诸娑女，佛神力故而不能系。时诸娑女即还佛所，波旬眼见不能遮止，复于空中作毗岚风，欲令诸女处处散灭不见于佛，以佛力故不能令坏。尔时，魔王啼哭懊恼，以大音声告其妻子：‘我今丧失大神通力！有一毒树今出于世，为诸众生说于断灭，成就大幻有巧方便。’魔诸眷属闻是语已，悉来聚集至魔王所：‘大王何故生大愁苦？既无退相，又无火灾，欲界之中亦无怨敌。’魔王言子：‘汝今不见，世有一人坐菩提树，坏四兵聚犹如猛火焚烧干草。世间所有一切智人，今已归属如此，即是我之怨敌。汝今不见五百娑女，舍我而去归依彼耶？汝等若不治彼释子，如此三千大千世界，不久当空。汝等各当牢自庄严，咸共尽力除彼释子。’魔子言曰：‘善哉！大王，我当庄严尽其神力。若我能除，善哉快矣！如其不能，复当归依。’魔王复曰：‘恶人汝今云何发如是言？’大王，瞿昙沙门往独一己坐菩提树犹难沮坏，况今眷属无量殷多而可除灭？’魔王言：‘爱子若能杀彼瞿昙沙门，甚善！甚善！如其不能，自守土境。’

“尔时，四兵其数无量，满阎浮提高八十由延，放大恶风，降注大雨，手拍须弥动四天下，出大恶声如大龙王、夜叉、诸鬼，振动一切河池泉源。一切龙、鬼、人、天之等，咸皆怖畏心惊毛竖。时，彼魔众于须弥山取一大石，欲令覆盖王舍大城迦兰陀林诸善男子。我于尔时即入破魔力势三昧，魔子尔时所雨刀槊箭石火毒，以我力故，皆悉变为忧钵罗华、钵头摩华、拘勿头华、分陀利华墮王舍城，复雨种种微妙妙香，变是恶声作如来声、法声、僧声、神通之声、波罗蜜声、不退转声、菩萨之声、破四魔声、涅槃音声，坏其恶风令无遗余。其土所有一切草木，悉皆变为微妙七宝。我身尔时高至初禅，三十二相、八十种好，放大光明悉照三千大千世界。其中所有一切天人，诸龙、夜叉、阿修罗、迦楼罗、紧那罗、摩睺罗伽、人非人等，地狱、畜生、饿鬼等类，皆见我身。无量诸天大设供养，华香幡盖伎

乐之属。三恶众生称南无佛，即得解脱受人天身。尔时，魔众见佛示现如是神力皆生信心，生信心已即说偈言：

“我今归依于如来，净身口意无上智，
能示魔界八正道，施闇众生大光明。
具足大力无能胜，等视一切如子想，
其心平等如虚空，故我稽首大商主。
烦恼不污修慈悲，获得吉祥示因果，
能施众生真解脱，是故我今稽首礼。
大慈大悲天中天，最胜无上之世尊，
说一切法如水月，我今敬礼大幻师。
众生遇重烦恼病，是故归依大医王，
三恶众生贫七财，今当归依离诸漏。
唯愿哀愍听我忏，于佛所生诸恶心，
佛是众生慈父母，我今弃舍诸魔业。
我能请召诸众生，为其发起菩提心，
愿为我说无上道，具足何等得菩提？
我今献奉妙香华，为众生故供养佛，
亲近善友善思惟，至心听受如法住。”

“尔时，五百婬女及魔眷属，以妙香华、幡盖、伎乐，供养于我。此供养具，遍至无量恒河沙等诸佛世界，一时供养无量诸佛。一切魔众悉皆睹见一切诸佛形色、修短、方圆之相，等无有异；唯师子座、世界、树林、所居舍宅，差别不同。魔众见已各心欢喜，坐于佛边至心听法，听受法已还波旬所，启白魔言：‘我等往至彼瞿昙所，尽其神力乃至不能令一毛动。大王当知，我今已属瞿昙沙门。’尔时，波旬心恶生瞋，即作是念：‘我当云何杀彼释子除灭此怨？’尔时，波旬及其眷属，心生忧恼，入于苦宅。

宝幢分中往古品第二

“尔时，魔众复还我所，而白我言：‘世尊，我欲大乘念于大乘，欲具神通大慈大悲。世尊，菩萨摩訶萨具足几法不近恶友，速得成就阿耨多罗三藐三菩提？’善男子，菩萨摩訶萨具足四法不近恶友，速得成就阿耨多罗三藐三菩提。何等为四？一者、若有菩萨不贪诸法、不舍诸法，不受诸法、不觉诸法，亦无有我及以我所想，行于布施不求果报，不生贪著不舍不取，亦无觉知我我所想，乃至般若亦复如是。二者、若有菩萨不见众生、寿命、士夫，亦复不舍于众生界，不贪不取，亦无觉知我我所想。三者、若有菩萨不见色、声、香、味、

触、法，不舍色、声、香、味、触、法，不舍不取，亦无觉知我我所想。四者、若有菩萨能深观察如是等法，于佛正智不生觉观。何以故？断一切行，断一切智，名为佛智。无有无乘，无声无想无字，无有无量，无生无出无灭，无想无碍无障，无见寂静，无我无命无名，无明无闇，无处无界，无根无翅，无有思惟，无食无贪，无净无垢，无尘无节，无边无数，无行无受，无业无宅，无取无作，无可显示，无念念灭，即是佛智。犹如虚空，如空无觉不可宣说，无有染著，无有觉知。善男子，菩萨具足如是等法，不亲恶友，速得成就阿耨多罗三藐三菩提。

“善男子，若有能求如是智慧，当知是人能观二法，所谓眼、色乃至意、法。复有二法，生死、涅槃。复有二法，一生二有。复有二法，一常二断。复有二法，众生、寿命。复有二法，一此二彼。复有二法，一内二外。诸善男子，若有欲求如是佛智，离是二法，观异法者，当知是人则不能得。善男子，譬如有人求火取水，求水取火，求食取石，求华取铁，求香取尸，求衣取木，求于涂香而取虚空。求佛智者，若离是二更观异法，亦复如是。”

是时，宝坊大会之中，有一菩萨名曰地意，闻是语已白佛言：“世尊，不可说义可觉知不？若不可觉，云何得名一切智耶？”

“善男子，不可说智即一切智。善男子，我今问汝，随汝意答。于意云何？我得如来一切智时，有所得不？”

地意菩萨即便思惟：“我若说有即是常见，如其说无即是断见。我等当远离如是二边，说于中道。”思惟是已，白佛言：“世尊，如是义者亦有亦无。世尊，若不出灭，无数无量，非明非闇，即是佛智。”

电意菩萨言：“世尊，若无去来，即是佛智。”

善见菩萨言：“世尊，无得无离，无证无修，即是佛智。”

无尽意菩萨言：“世尊，若法不为三世所摄，不堕三界，非是三结、三智、三乘、阴入界等，无有增减，即是佛智。”

金刚意菩萨言：“世尊，若不分别凡法、圣法，学无学法，声闻、缘觉及以佛法，即是佛智。”

坚意菩萨言：“世尊，如法无转，即是佛智。”

宝手菩萨言：“世尊，若观诸法生坏之相，观已通达知无得失，即是佛智。”

善觉意菩萨言：“世尊，三界众生，从意观意亦不觉意，即是佛智。”

分别怨亲菩萨言：“世尊，若有人能不乐烦恼，不厌烦恼，不爱瞋，不舍不求，不施不念，即是佛智。”

莲华子菩萨言：“世尊，不乐罪福得深法忍，不觉不知我及我所。若不觉知我我所者，即是佛智。”

月光童子菩萨言：“世尊，若能观察一切诸法，犹如水月，亦不

见法有增有减，即是佛智。”

无边意童子菩萨言：“世尊，若于诸法不见明闇，于一切心不见生灭，即是佛智。”

弥勒菩萨言：“世尊，若能观察四种梵行及不善行平等无二，即是佛智。”

无尽意菩萨言：“世尊，若观三世、六波罗蜜二相无差，即是佛智。”

文殊师利童子菩萨言：“世尊，若于诸法心无贪瞋，亦观诸法甚深境界，亦不了知非不了知，亦不观法有增有减，不观智慧及以无明，即是佛智。”

尔时，众中有一菩萨，名曰乐欲，语文殊师利言：“善男子，如来世尊以何因缘，说如是等甚深之义？”

文殊师利言：“善男子，为令众生远离邪见得正见故，得正见已不生染著，无有悭吝，不近恶友，正命自活，不著三结，怜愍众生，不著三宝，不逛一切，于诸众生不舍不著，不著财物，不著三界，众生怖畏能为救护，能坏恶道开示正路，不著忍辱离一切想，灭一切垢，除一切闇，不求果报。善男子，以是因缘求一切智，得是智已，于声字句不生觉观，佛语邪语、佛行余行、佛法余法，阴、界、诸入，功德庄严、智慧庄严，十波罗蜜、三解脱门，业之与果，世智佛智，于如是法不生分别，是故如来说如是等甚深之义。”

乐欲菩萨言：“善哉！善哉！文殊师利，实如所言，甚深义者即是佛智。何以故？无所觉故。若无所觉故不可说，不可说者即是佛智。若有能知是不可说，当知是人即得佛智。”

佛言：“善哉！善哉！善男子，善能分别宣说佛智。何以故？不著诸法，不生不灭，即是佛智。善男子，不著诸法，即不出边，不破坏边，无明、涅槃真无出边，虚空涅槃、一切诸法、一切众生不可说边，是虚空边、无挂碍边、无有物边、无有阴边、三行空边，法阴、业阴、果非果阴、聚阴无物无物边、虚空边，一切诸法不可说边。菩萨摩訶萨若能具足如是等边，即得佛智。”

说是佛智不可说时，一切魔众得无生法忍，舍于粗身获得细身、随心意身、法化之身。复有二万八千众生，于诸法中得无生忍。九万二千菩萨，得无量陀罗尼。一切众魔以妙香华伎乐，供养赞诵如来，作如是言：“世尊，善知识者，即是一切善法根本。我今遇佛善知识故，得大利益。”

佛告：“善男子，汝当至心观于诸业。”

尔时，世尊即为众会说过去业：“善男子，过去无量阿僧祇劫，劫名电持。时世众生寿命满足六万八千，世界名曰妙香光明。是有佛，号香功德如来、应、正遍知、明行足、善逝、世间解、无上士、调御丈夫、天人师、佛世尊。尔时，彼世具足五滓，有转轮王名曰华目，王四天下，与诸眷属、大臣、人民至于佛所，以妙香华、幡盖、

伎乐，供养于佛及比丘僧，敬意礼拜，右绕三匝，以偈赞佛：

“佛为人天所赞叹， 远离诸恶乐寂静，
具足七财破贫穷， 云何令众得深智？
修集三种解脱门， 已得离生老病死，
能度三恶道诸生， 云何令众过魔业？”

“佛言：‘大王，具足三法得甚深智。何等为三？一者、至心缘念一切众生；二者、修集大悲破众生苦；三者、见一切法无有众生、寿命、士夫，不生分别。又有三法能过魔业：一者、于诸众生不生恶心；二者、修行施时，不观福田及非福田；三者、观一切法平等无二犹如虚空，不生不灭，无行无物，无有相貌，不可宣说。菩萨具足如是等法，得甚深智能过魔业。’

“尔时，圣王有一夫人，名曰善见，与八万四千诸婢女俱共供养佛，既供养已，即说偈言：

“大千世界无胜者， 常乐寂静修子想，
善行远离诸尘垢， 云何令我离女身？
已得远离一切怨， 真实见生老病死，
唯愿为我演说道， 令我具足男子身。
离诸有得无上有， 能施欢喜增善法，
具足十力四无畏， 云何令我离女身？
摧灭四魔修四梵， 实语具足巧方便，
三十二相八十好， 云何令我离女身？”

“佛言：‘善女人，有巧方便，得离女身，能坏女业，乃至得阿耨多罗三藐三菩提，终不复受女人之身，除其誓愿巧方便者，所谓宝幢陀罗尼门。若有能修是陀罗尼，得离女身，净身口意，远离三障。若有闻是陀罗尼名，即离女身受男子身，得具足身微妙智慧，净身口意，乐于善行，具足多闻，远离恶业及受苦报，能灭五逆无间重罪。何以故？如是宝幢陀罗尼者，即是过去无量诸佛之所演说，为破恶业增长善法故；十方现在无量诸佛亦共说之，为破恶业增善法故；未来之世十方诸佛亦共说之，为破恶业增善法故。我今现在亦复宣说如是宝幢陀罗尼门，十方现在无量诸佛悉共赞叹是陀罗尼。善女人，若刹利王所领国土，若有如是陀罗尼名，赞叹受持，读诵书写，其王则为十方现在诸佛世尊护念赞叹，乃至阿迦尼吒诸天亦复护念而赞叹之。是王行住坐卧之处，亦有无量天、龙、夜叉悉共护念，令其国土和安无诤，无有疫病，兵革不起，无恶风雨，不寒不热，谷米丰熟。诸恶鬼神及恶禽兽，悉怀喜心不生恶想。随是经典所住国土，其土若有恶星、不祥恶想恶病，皆悉除灭。若刹利王兴兵攻伐，专念是经，能伏强敌令已得胜，二王俱念，则二兵和同不相侵害。若有国土城邑村落

人，若畜生有疫病者，当写是持安著幢头，其土不祥疾疫悉皆除灭。若有法师持戒精进，月十五日净自洗浴，以妙香华供养三宝，升师子座赞陀罗尼，是人能护所住国土，所有恶相寻即消灭，亦能调伏教化众生，得阿耨多罗三藐三菩提。善女人，若有人能读诵此经乃至一偈，如是之人终不复更受女人身，亦得不退菩提之心。’

“尔时，香功德佛说是陀罗尼已，足指按地，即时大地六种震动，乃至十方亦复如是。其中所有天、龙、夜叉，以佛如来功德力故心生欢喜，亦见亦闻说陀罗尼。尔时，如来说宝幢陀罗尼曰：

“南无婆伽婆帝树帝三藐 伽陀婆娑失利头多陀伽多也 那摩舍迦牟那头 多他伽多也 哆陀伽多也 哆陀也 他阍落翅 阍落翅目翅 阍隶 阍罗阍怜泥 阍罗跋赖帝 阍醯隶波罗 富娄沙 三摩奢 阿摩弥 沉摩弥 摩诃弥 阍摩弥 婆罗弥 婆婆毗 婆婆毗 婆婆毗 婆阍毗 婆罗诃 婆隶徒 阍诃弥 婆罗诃 婆隶徒 阿罗阍醯 阍斗目咭 婆沛罗 婆沛罗私陀 跋赖吒 檀帝隶 檀帝罗 檀帝隶 修隶毗诃伽 旃陀毗 诃伽 旃陀毗诃伽 斫呬 树提沙毗 呵伽 萨婆叉裔 帝多凡修罗毗诃伽 阍罗阍罗迦奢弥隶呵 奢弥隶呵 奢弥隶呵 奢弥隶呵 奢弥隶呵 毗婆车 陀羯 摩豆宁 豆宁 豆宁 温摩 渥毗婆车提 阍那吃栗多 阿訥婆陀隶 奴鸯崛隶 多崛隶毗婆崛隶究罗呵 因陀婆隶 婆诃那毗婆车陀羯 婆 遮婆吒 遮婆吒 遮婆吒 呵暮阿陀舍尼 婆隶跋吒 婆师久摩 羯摩树吒 羯阍醯 阍醯树吒 膩迦毗罗娑 毗罗娑 毗罗娑 毗罗娑 毗赖阍 毗赖阍 劫婆摩诃劫婆 醯利嘻隶 嘻隶阿那婆吒 昙摩檀那阍那 阿婆罗弥隶施 阿罗军陀 波食毗婆吒那帝隶婆凡 羯摩叉帝婆罗咄颇婆 富娄沙多凡 阿三摩 三摩 三摩 毗吒若多陀 阿竭陀 莎诃’

“尔时，世尊即为大众说陀罗尼，五百婬女闻已即得男子之身，复有无量人天诸女亦受男子身，及得不退菩提之心，永断一切决定女业。善男子，尔时夫人闻是持已，所将八万四千女人亦转女身得男子身，复有无量人天妇女亦转女身得男子身。尔时，圣王以四天下委付千子，与无量人出家修道。

“尔时，复有无量诸天各作是念：‘转轮圣王以何因缘舍国出家？’复相谓言：‘此界如来演说妙法，以法力故女转为男。有人出家能施袈裟，为诸白衣说人天乐，坏三恶苦灭一切有，摧诸魔业令魔受苦，魔既受苦不乐听法。大幻师者，谓香功德沙门是也。’复有说言：‘当知沙门即是魔也。何以故？能转女身得男子身。’时，有大臣名曰善行，作如是言：‘我诸妇女悉为男子。汝等无量妻妾诸女，亦舍本形受男子身，剃除须发，被著袈裟，咸皆归向属彼沙门。唯我一己独住不往，我等当舍是国土去，永不见闻是大恶人。’尔时，诸人闻是

语已，唱言：‘善哉！我今若欲不见不闻，远离恶沙门者，当入深山。’尔时，诸人既入山已，舍家修集婆罗门法，作如是言：‘无有解脱，无善恶果。此世今有一沙门出，宣说断见，说于魔业欺诳众生，是大幻师。若人往见听其所说，亲近礼拜，供养恭敬，心即狂乱无所晓知，剃除须发，被著袈裟，舍家所有受乞食制，住于冢间受一食法，于生死中生厌离想，不乐受于五欲之乐及诸香华璎珞伎乐，不乐宣说世间之事，具足如是诸不善法。说斯断见行于魔业，是诸众生之大怨仇，教化无量无边众生，令生断见。若不见闻，得大利益。’

“时，华目比丘闻无量人生大邪见，即作是念：‘我若不能调伏如是邪见众生，云何当得阿耨多罗三藐三菩提？’时，华目比丘即便往请香功德佛，与无量比丘僧，周遍国土城邑聚落处处说法，所谓远离恶法，修进善法，或说大乘，或缘觉乘及声闻乘，或沙门果，或比丘戒，或优婆塞戒，或说三归，或复演说转女身法，或说宝幢陀罗尼门，或说十善。说是法时，破除无量众生疑网，生于善心，发于阿耨多罗三藐三菩提心，令无量众生来至佛所。唯除一人，善行大臣向彼华目，发恶誓愿：‘汝若未来成无上道，我当于汝成佛国土而作恶魔，诋菩提树作大恐怖。若成佛已，当坏汝法。若我于汝生信心者，汝便当与我受记莳。’

“诸善男子，尔时比丘，即我身是；夫人善见，即弥勒是；善行大臣，魔波旬是。波旬，汝于尔时发是誓愿，若于我所生信心者，当与受记。是故我今称汝本愿，与受阿耨多罗三藐三菩提记。波旬，汝于往昔香功德所，礼拜供养，以是善根，我今与汝授菩提记。”

说是法时，五百婬女得男子身，无量众生以三乘法而得调伏。

大方等大集经卷第二十

宝幢分中魔调伏品第三

尔时，世界百亿魔王悉来集聚，至波旬所。波旬语诸魔王言：“诸善男子，汝等知不？有释种子出现于世作大幻术，六年苦行趣菩提树。我于尔时，将领三万六千亿众，至于彼所然我尽力，乃至不能动金刚座。尔时，瞿昙于菩提树成就幻术，以幻力故，令此三千大千世界六种震动，使我眷属颠倒堕落如树拔根。当尔之时，释子成就无相幻术，以幻力故，十方智人悉皆归属。推求瞿昙所度众生，心相所在莫知其处。若有人能至心归依，尽力不能动其一毛，不可诳惑，不可怖畏。我今婬女五百之众，及诸眷属悉复归向，而我不能遮止动转。汝等今者福德弘大，多有幻力，若能有心见助佐者，然后我能坏彼释子断绝其命，亦能摧破诸归依者，灭沙门法增长魔业，尔时我当受无上乐。”

尔时，有魔名曰亲近，即作是言：“彼释子者，悉已成就无量功

德，功德庄严，智慧庄严，不住诸有悉能调伏一切众生，能坏种种众苦烦恼，身净心净，汝等不能起恶加害。”

波旬言：“我诸眷属为彼释子之所诳惑，汝等若不作方便者，如是世界不久当空。”

复有魔言：“如来不住一切诸有，心净身净，远离一切诸恶烦恼，于三界中而得解脱，一切有为不能系缚，是故名为无上寂静。如是寂静，谁能毁害？”

波旬言：“若欲界中所有众生，贪著五欲归释子者，是人则能破坏四魔。是等恶人若不治者，汝等云何能治欲界？”

复有魔言：“彼释子者如幻如炎，不可宣说，无有处所，无诸障碍，如是之人云何可害？”

波旬言：“释子于此欲界之中，受食供养诳惑众生，我当云何而不治耶？”

复有魔言：“我今所有神通之力，及我眷属神通之力，不及释子神通之力十六分中一，我当云何而能加害？”

波旬言：“若彼瞿昙入城乞食，我当方便令其终日不得一粒，当放大石骂辱使瞋。我唯一己犹望能办，况于汝等多诸眷属！”

复有魔言：“设使造作如是等事加彼释子，不能令彼生瞋喜心。若不瞋喜，云何可害？”

波旬言：“彼释子者有大智慧，以智力故瞋处不瞋、喜处不喜，修集大慈大悲之心，于诸众生平等无二，是故于我不生瞋喜。”

复有魔言：“若为三界所系缚者，我则能害。彼释子者，不为三界之所系缚，我何能害？”

波旬复言：“汝等若能随我计者，害彼不难！汝等悉作比丘、比丘尼、优婆塞、优婆夷像，至诸国土城邑聚落，向诸国王、大臣、长者，作如是言：‘我等已属沙门瞿昙。沙门瞿昙实非沙门空言沙门，非婆罗门虚自称言是婆罗门，实非持戒现持戒相，真实破戒不异凡夫。汝等若信，善哉！善哉！如其不信，七日之后，当雨大石、猛火、利刀。’作是言已，便当于空而降雨之。若作如是种种方便，瞿昙眷属将坏不久。”

时，诸魔王咸言：“善哉！”尔时，诸魔各自庄严，庄严毕已，趣向鸯伽摩伽陀国。

尔时，波旬所有一切弊恶眷属，悉庄严已趣向雪山。时，雪山中有一仙人，名曰光味，眷属五百悉具五通。波旬到已，头面礼敬，作如是言：“沙门瞿昙悉坏一切异见外道，处在大众宣说是言：‘一切众生中实无沙门及婆罗门。’大德，若能与我俱至摩伽陀国，我则能坏沙门瞿昙。沙门瞿昙殊不能与大德论议诃试神力！沙门瞿昙若摧灭已，一切众生悉当恭敬供养于汝。”尔时，波旬作是语已，还来向于无量魔众广说上事。

时，有一魔复作是言：“瞿昙沙门入王舍城，乞食之时，我当于

其中路，而作师子、虎、狼、罗刹、恶鬼等像，令彼见已生怖畏心，既生怖畏不能论议现神通力。”

复有魔言：“我当于彼虚空之中，降雨大石坏破瞿昙。”

复有魔言：“我当诈作瞿昙弟子，既为弟子当得亲近，得亲近已当断其命。”

复有魔言：“我当现作长者之像，设食请之。彼若受请，我当害之。”

复有魔言：“我当现作淫女之像，至诸王所，云彼瞿昙与我交通。”

复有魔言：“我当至彼瞿昙沙门，现坏其身而为七分。汝等当言：‘如此尸者瞿昙所杀。’”

复有魔言：“我当于彼虚空之中，大声唱言：‘沙门瞿昙是大恶人，若有男女供养之者，命终当生阿鼻地狱。’”

尔时，世尊知魔心已，变此三千大千世界悉为金刚，以遮石雨、火雨、刀雨，悉令众生眼不睹见如是魔业。

尔时，世尊四大弟子，入王舍城次第乞食。

时，舍利弗从东门入，中路值遇五百魔子执持刀杖，语舍利弗：“汝若歌舞，善哉！善哉！如其不者，当断汝命。”舍利弗言：“善哉！童子。我今当歌，汝等当舞。”诸魔子言：“善哉！大德。”

时，舍利弗即说偈言：

“我今不求阴界入， 无量世中诳惑故；
若有求于如是法， 是人终不得解脱。”

时，舍利弗说是偈已，复说陀罗尼句：

“婆呵罗(一) 婆呵罗(二) 婆罗婆呵啰(三) 摩利至喽罗呵
(四) 萨[多+也]婆啰呵(五) 阿摩喽呵啰(六) 莎呵(七)。”

时，舍利弗说是陀罗尼已，五百魔子心得调伏。得调伏已，礼拜忏悔，即作是言：“大德，我今当发阿耨多罗三藐三菩提心，归依三宝，舍离一切魔之恶业。”

尔时，大德大目乾连从南门入，中路亦值五百魔子手执刀杖，语目连言：“汝若歌舞，善哉！善哉！如其不者，当断汝命。”目连答言：“善哉！童子，我今当歌，汝等当舞。”诸魔子言：“善哉！大德。”

尔时，目连即说偈言：

“我今不求阴界入， 无量世中诳惑故；
若有求于如是法， 是人终不得解脱。”

时，目乾连说是偈已，复说此陀罗尼句：

“阿嚧摩(一) 阿嚧摩(二) 摩嚧拏(三) 嚧闍(四) 闍呵奢(五) 摩呬(六) 奢摩呬(七) 奢摩呬(八) 伽伽那嚧摩(九) 莎呵(十)。”

时，目乾连说是陀罗尼已，五百魔子心得调伏。得调伏已，礼拜忏悔，即作是言：“大德，我今当发阿耨多罗三藐三菩提心，皈依三宝，舍离一切恶魔事业。”

尔时，弥多罗尼子从西门入，中路亦值五百魔子执持刀杖，语富楼那：“汝若歌舞，善哉！善哉！如其不者，当断如命。”富楼那言：“善哉！童子，我今当歌，汝等当舞。”诸魔子言：“善哉！大德。”

时，富楼那即说偈言：

“我今不求阴入界， 无量世中诳惑故；
若有求于如是法， 是人终不得解脱。”

时，富楼那说是偈已，复说此陀罗尼句：

“呌竭嚧(一) 呌竭嚧(二) 呌竭嚧(三) 茂遮泞(四) 茂遮泞(五) 阿跋多尼(六) 比跋多尼(七) 莎呵(八)。”

时，富楼那说是陀罗尼已，五百魔子心得调伏。得调伏已，礼拜忏悔，即作是言：“大德，我今当发阿耨多罗三藐三菩提心，皈依三宝，舍离一切恶魔事业。”

时，须菩提从北门入，中路亦值五百魔子执持刀杖，语须菩提：“大德，汝若歌舞，善哉！善哉！如其不者，当断汝命。”须菩提言：“善哉！童子，我今当歌，汝等当舞。”诸魔子言：“善哉！大德。”

时，须菩提即说偈言：

“我今不求阴入界， 无量世中诳惑故；
若有求于如是法， 是人终不得解脱。”

时，须菩提说是偈已，复说此陀罗尼句：

“娑茂提(一) 比茂睨(二) 茂利蛇闍醯(三) 思隶(四) 思隶(五) 思隶(六) 婆思隶(七) 婆思隶(八) 呵嚧思隶(九) 复多拘置思隶(十) 莎呵(十一)。”

时，须菩提说是陀罗尼已，五百魔子心得调伏。得调伏已，礼拜忏悔，即作是言：“大德，我今当发阿耨多罗三藐三菩提心，皈依三

宝，舍离一切恶魔事业。”

尔时，世尊神通力故，令王舍城所有众生一切皆见百由旬地，城四门中各各皆有一大弟子。其城中出一大莲华，纵广满足二十五丈，琉璃为茎，黄金为叶，金刚为须，有无量叶，光明远照。众生皆见高出三丈，四天王处乃至阿迦膩吒天处，亦如是见高出三丈。

时，莲华中说如是偈，诸天世人随处皆闻：

“此世界中一佛出， 悉能摧伏一切魔，
能转无上妙法轮， 调伏此间诸众生。
二足中尊能成就， 忧婆提舍拘律陀，
能破二种烦恼根， 佛欲来此调众生。
了知三世如掌果， 具足三戒所说净，
远离三垢愍一切， 佛欲来此调众生。
具足如意无所畏， 调伏四众说四果，
常乐说法真实义， 圣师子王为我来。
具足五力及五根， 成就功德无碍智，
无上世尊为众生， 修悲拔出三恶众。
调伏六根得上信， 远离六入修六念，
具足六通真实语， 世尊欲来调众生。
一切众生烦恼缚， 处闇不知解脱道，
常行魔路不知实， 贪著颠倒失智慧。
不知此彼及生死， 贪五欲故远离禅，
是故不能得解脱， 不能修道报昔善。
众生不知生老死， 是故不修三解脱，
远离一切施戒慧， 是故不出三恶道。
众生若离五欲乐， 亲近如来听正法，
至心受持一偈义， 是人解脱如先佛。”

又复偈音闻于色界十六住处：

“若有修集清净法， 远离诤讼修禅定，
至心专念诸解脱， 无有散乱坏烦恼，
获得十三忍辱法， 远离恶触及乱心，
出过一切生老死， 修四无量诸禅定。
永断常见及断见， 过三恶道得正定，
深观无常无我乐， 获随法忍如先佛。
若欲舍乐如涕唾， 观一切空行无异，
净于法界及菩提， 于法无碍如虚空，
能坏四魔灭烦恼， 修集正道诸方便，
不畏邪见如师子， 当亲如来则获之。”

出如是等偈音声时，无量众生趣莲华所。尔时，波旬耳闻是偈，又见王舍城中莲华，无量众生悉坐其下，次第乃至阿迦膩吒，亦复如是受大苦恼，告诸魔言：“谛听！谛听！瞿昙沙门作大幻术。汝等不能造作魔业，不久当失所居之处。汝等当雨刀石猛火。”

时，有一魔语波旬言：“瞿昙沙门，悉已成就无量功德，具二庄严，所谓功德、智慧。彼神力故，令我狂乱不能造作魔之事业。我今于彼实怀恐惧！”

复有一魔语波旬言：“汝今愚痴行于邪道，无心之人若见瞿昙尚生信敬，况有心者！汝今若欲得大利益，应当至心归依宗敬。”

复有一魔语波旬言：“波旬，汝今云何常乐恶行造作恶业？汝当远离恶魔之业！汝今不见如来世尊，趣王舍城欲施众生甘露味耶？汝来当共归依瞿昙。”

尔时，无量魔众乘空而下至王舍城，或作王像，或转轮王像成就七宝，或复示作自在天像，或作沙门、梵志、尼乾，或作四天王像、日月等像、帝释梵像，或有坐立及以礼拜而赞叹者，或有周遍绕王舍城，或有示现上其城上，或有青色、白衣、白璎珞、白幡、白盖，或有黄色、赤衣、赤璎、赤幡、赤盖，或有白色、种种色衣、种种璎珞、黄幡、黄盖，或有赤色、青衣、青璎、青幡、青盖，或七宝色、七宝衣服、七宝璎珞、七宝幡盖，或琉璃色，或玻瓈色，种种色衣、种种璎珞、种种幡盖，或有向佛散种种华烧香礼拜，或有歌颂赞叹起舞。

波旬见已举声啼哭，即作是念：“我今丧失所有福报，一切魔众悉皆归属瞿昙沙门。”

尔时，波旬语梵天言：“我虽失福无有伴党，犹故能坏瞿昙沙门。我今当示最后势力，我今能拔如是莲华。”尔时，波旬则趣莲华，虽复目睹捉不能得。如世人言我能捉电，电虽可见而不能捉；莲华亦尔，魔虽得见而不能捉。

是时，波旬心生懊恼：“如是莲华捉之尚难，云何可拔？”复作是念：“我今当出无量恶声，令诸四众闻已怖畏，当舍瞿昙进散而去。”波旬尔时即出大声，一切四众都无闻者，唯魔自闻，闻已复生大怖畏心。尔时，波旬怖畏战栗，两手拍地而不能著，犹如拍空；复欲取杖以打四众，亦不能见；倍生怖畏举身战栗，犹如猛风吹动树叶，复作是念：“我今永失一切功德、一切神力，不如速还本所住处。若不还者，必死不疑。”于是欲去，莫知道径，复作是念：“我今住此，瞿昙沙门多将眷属，今至不久，如其到者必见屠戮。我今正欲沉身此地，复恐此界众生见之。”是时，波旬不能上下四方遁走，即见己身被五系缚，见已涕泣愁忧苦恼。

时，有一魔名曰圣道，作转轮王像，向彼波旬而说偈言：

“汝以何缘出恶声，啼哭愁忧受苦恼？”

如来今将趣莲华，能坏众生种种苦。
汝等若欲受安乐，当至心依无上尊；
汝若不乐五系缚，应受我语归世尊。”

尔时，波旬闻是偈已，即作是念：“为我得脱，当诈归依非实心也。”即向如来所住方面，合掌说偈：

“我今归依世中尊，能坏众生诸苦恼，
亦复忏悔一切恶，于佛眷属更不造。”

时，魔波旬说是偈时，于五系缚寻时解脱，得解脱已欲趣己界，复还被缚第二、第三乃至第七。尔时，波旬既不得去，至心听法。

宝幢分中三昧神足品第四

是时，如来四大弟子与诸魔子，游王舍城歌舞颂偈。尔时，大地六返震动，无量天人悲感啼泣：“苦哉！苦哉！今者如来犹在于世，而四弟子为诸魔众之所戏弄。”即共和集，往至佛所而作是言：“世尊，唯愿如来放舍舍心。何以故？一切诸魔欲坏佛法。”

佛言：“我今当入王舍大城，教化众生欲破坏魔业，示大神通施作佛事。”

尔时，佛欲入王舍城。时诸天众悲号，向佛而作是言：“今佛入城实非时也。何以故？无量恶鬼弥满虚空，无量魔众持刀大石。若佛入城，如来法灯将灭不久。”尔时，如来默然不许。复有天言：“世尊，王舍城中，五百魔子执持刀戟欲害如来。”复有一天啼泣而言：“今者释种不久当坏。”复有天言：“无上法船今当散灭，三界众生谁当济渡令至彼岸？”复有天言：“一切众生常为烦恼之所缠绕，无上大师如其灭者，谁当令彼得解脱耶？”复有天言：“世尊，不见空中无量魔众，欲雨刀剑、大石、猛火。唯愿如来，愍众生故且莫入城。”复有天言：“世尊，王舍城中有二万魔，各各示作婆罗门像，执持刀剑欲害如来；复有二万持槊待佛；复有二万执持弓箭；复有二万持大炬火。唯愿如来，受我等语勿复入城。”如来尔时默然不许。

尔时，世尊入王舍城门，其守城天啼泣向佛作如是言：“唯愿如来勿复入城。何以故？今此城中恶众弥满。若使如来于此灭者，我当云何见诸天众？魔众今者欲雨刀剑、猛火、大石。如来若灭，众生闇行，灭大法炬，坏大法山，生老病死欢喜受乐。”佛于尔时，虽闻是语亦不许可。时天复言：“世尊若不惜身命，必欲放舍，有六大城，何必于此？如来若于此间灭者，则令我于无量世中得大恶名。”

尔时，复有无量诸天俱至佛所，作如是言：“世尊，我已曾见无

量诸佛说法教化无量众生，实未曾见如是魔众。世间众生常为无量诸恶烦恼之所围绕，值遇良医通达无量医方方便。如来何故，放舍大慈大悲之心？”复有天言：“如来往昔无量劫中为诸众生修集苦行，今者云何欲舍众生放弃身命？唯愿怜愍演说正法，调伏一切闇昧众生，愿施众生光明，迷行之人示以正路，永断一切三恶道苦。唯愿久住，莫舍身命。”

尔时，复有净居诸天，告诸天言：“且勿号哭，放舍愁恼。如来具足十力无畏，今欲摧灭一切魔众。假使无量无边魔众，乃至不能动佛一毛。”

尔时，梵王、释提桓因往至佛所，白佛言：“世尊，一切魔众今者定欲毁害如来。唯愿勿往，如来当灭一切众生无明闇行。世尊往昔请诸众生，许以甘露斯事未果，云何便欲放舍身命？莫徇往昔菩提树下坏一魔已轻蔑余者，如来若入王舍城中，即便灭没无复疑也。”

尔时，世尊出大梵音声，遍三千大千世界已，而作是言：“谛听！谛听！假使诸魔悉皆遍满十方世界，尽其力势乃至不能动我一毛。我昔已请无量众生许以甘露，今当演说第一义谛，增长善法，说于正道，以称我愿。我于往昔无量世中，为诸众生多受苦恼，放舍一切金、银、琉璃、玻瓈、宝货、国城、妻子、衣服、饮食及以身命，以妙香华、幡盖、灯明供养诸佛，受持净戒，修行忍辱，谁能以恶加于我身？我于众生常修慈悲，谁能令我而灭没耶？如我先已摧魔眷属，当知今者亦能破坏，汝等于此勿怀怖畏！”

时，无量天闻是语已，心生喜乐，各各而言：“南无大士如来世尊！坏大魔众，破诸烦恼，永断习气，摧憍慢山，拔生死树，灭死日月，除无明闇，劝化一切邪见众生，焦涸四流，燃大法炬，示菩提道，击大法鼓，施诸众生善法之乐，复令觉悟四真谛相，度生死海入无畏处。”说是语已，以妙香华、幡盖、伎乐供养于佛，复以种种微妙好华散王舍城，所谓曼陀罗华、摩诃曼陀罗华、波楼沙华、摩诃波楼沙华、迦迦罗华、摩诃迦迦罗华、曼殊沙华、摩诃曼殊沙华、瞻婆罗华、摩诃瞻婆罗华、欢喜华、大欢喜华、爱乐华、大爱乐华、波利质多华、俱毗遮罗华、忧婆钵罗华、俱物头华、波头摩华、分陀利华，如是等华庄严遍覆如来行处，于路二边七宝行树高一多罗树，间有八味清泉。上虚空中多有诸天，手持上妙七宝幡盖，雨诸杂华、金、银、玻瓈、琉璃等宝，牛头栴檀及白栴檀，坚鞞沉水种种华香，遍雨如来所行之处。复有种种微妙伎乐，一切人民悉共严治王舍城外如来行处，诸魔眷属庄严城内。

时，佛世尊入王舍城，尔时心游首楞严定，示现微妙八十种好。若事象者即现象像，事师子者现师子像，有事牛者即现牛像，事命命鸟现命命像，有事兔者即现兔像，有事鱼、龙、龟、鳖，梵天、自在、建陀、八臂、帝释、阿修罗、迦楼罗，虎、狼、猪、鹿，水、火、风神，日月星宿，国王、大臣，男女大小，沙门、婆罗门，四

王、夜叉，菩萨、如来，各随所事而得见之；见已皆称南无南无无上世尊，合掌恭敬礼拜供养。

尔时，雪山光味仙人，与其弟子在西门下，侧立待佛。光味仙人睹见佛身，是仙人像，为无量众生之所供养，即作是言：“如是人者，真是大仙，堪受世间人天供养。何以故？福德相故。我云何知彼大我大？我今当问生姓、经书、出家久近。”光味仙人即趣佛所，告其弟子摩纳：“彼仙人者，德相成就了了可知，聪明睿哲能解深义。汝等应当至心生信！如我所见相书所载，是人必能说无上道，彼定能令我度生死。”五百弟子同声叹言：“善哉！善哉！如和尚言。”

尔时，光味与五百弟子，前后围绕即至佛所，作如是言：“汝是谁耶？”

佛言：“是婆罗门。”

光味复言：“姓何等耶？”

答言：“我姓瞿昙。”

又问：“受何戒耶？”

答言：“吾受三戒。”

又问：“修集何行？”

答言：“吾修三空行。”

又问：“出家已来为久近乎？”

答言：“具大智时。”

又问：“汝颇读诵星宿书不？”

答言：“汝今读诵得何利益？”

光味复言：“我以此法教诸众生，受我语者多献供养。”

佛言：“汝知此书，颇能得过生老死不？”

光味复问：“瞿昙，生老病死云何可断？”

佛言：“汝若不能断生老死，何用读诵如是星书？”

光味复言：“瞿昙，汝若不知星宿书者，身上何故有星行处。如我知者，定谓瞿昙通达如是星宿彼岸。”

佛言：“云何名星宿道？”

光味答言：“谓二十八宿日月随行，一切众生日月年岁皆悉系属。瞿昙，一切星宿迹有四分。

“瞿昙，东方七宿，谓角、亢、氐、房、心、尾、箕。若人生日，属角星者，口阔四指，额广亦尔，其身右边多生黑子，上皆有毛，当知是人多财富贵。广额似像，聪明多智，眷属炽盛。其项短促，脚两指长，左有刀创，多有妻子，恶性轻躁。寻命八十，四十年时一受衰苦，长子不寿，心乐法事，衰患在火。瞿昙，属角星者有如是相。属亢星者，心乐法事，受性多巧，聪明富贵，多怀惭愧，怨不能害，乐欲出家，受性柔软，轻躁确尽无所隐藏，寿六十年，三十五时身遇笃病，绕颈四指，当有疮痂，不宜子息。瞿昙，属亢星者有如是相。属氐星者，生人受身勇健，臣富豪贵，寿二十五，左有黑子，

于父母所恒生恶心，敬出家人，于己眷属不能增长。瞿昙，属氏星者有如是相。属房星人，受性弊恶，愚騃无智，巨富豪贵，右有黑子，寿三十五当被兵死，宜于兄弟。瞿昙，属房星人有如是相。属心星人，富贵多财，愚痴风病，寿三十五，头有疮癩，有大名声，毒不能中，妻子不乐。瞿昙，属心星人有如是相。属尾星人，具诸相好，雄壮富贵，得大自在，两乳轮相，有大名声，身诸光明胜于日月，聪明大智无能胜者，贪乐出家能调烦恼，增长眷属多有惭愧，寿命百年，四十五时暂一受苦，胸有德相众生乐见，不宜父母。瞿昙，属尾星人有如是相。属箕星人，乐喜诤讼，多犯禁戒，受性弊恶，人不喜见，贪欲炽盛，寿六十年，贫穷困苦，常乐游行，牙齿疏小，胸臆确瘦。瞿昙，属东方宿有如是相。

“属井星人，多饶财宝，人所恭敬，心乐于法，脐有疮癩，寿八十年，慈孝供养父母师长，先父母丧，心无慳吝，多有惭愧，衰祸在水。瞿昙，属井星者有如是相。属鬼星人，慳吝短寿，脐下四指当有黑子，不宜父母，喜乐诤讼。瞿昙，属鬼星者有如是相。属柳星者，富贵持戒，慕乐法事，寿七十五，增长眷属，死已生天，腰有赤子，敬受法者，人所信伏。瞿昙，属柳星者有如是相。属七星者，乐为劫贼，盗物为业，奸伪谄曲，薄福短寿，举动粗犷，愚痴狂骇必被兵死。瞿昙，七星生者有如是相。属张星者，寿命八十，善于音乐，首发稀少，衰二十七及三十三，富贵勇健有大名称，聪明无吝，乐法惭愧，不宜父母及以兄弟，颈有疮癩，过三十五乃有子息，阴有黑子，髀有黄子。瞿昙，属张星者有如是相。属翼星人，善知算数，慳吝恶性，钝根邪见，右有黑子，寿命三十三，绝无子息。瞿昙，属翼星者有如是相。属轸星人，巨富豪贵，多饶眷属、奴婢、仆使，聪明勇健，乐法爱法，敬受法者，寿命百年，死已生天。瞿昙，属南方星者有如是相。

“属奎星者，其人两颊当有黑子，持戒乐法，敬受法者，富贵乐施，身有火疮，寿五十年。瞿昙，属奎星者有如是相。属娄星者，寿命短促，贫穷困苦，乐见毁戒，其心慳吝，膝下疮癩，寿三十年，不宜于兄。瞿昙，属娄星者有如是相。属胃星者，不宜父母，多失财宝，田业舍宅，膝有黑子，过二十二得大富贵，不慳乐施。瞿昙，属胃星者有如是相。属昂星者，乐于正法，辩口利辞，聪明富贵，多有名称，护持禁戒，人所敬信，死已生天，膝有青子，寿五十年。瞿昙，属昂星者有如是相。属毕星者，人所信伏，恶性喜斗，于己姊妹生于贪心，富贵多怨，常患胸痛，不宜钱财，左有黑子，寿七十年。瞿昙，属毕星者有如是相。属觜星者，富贵乐施，惭愧无贪，无有病苦，众生乐见，死已生天，衰在七十，寿满八十。瞿昙，属觜星者有如是相。属参星者，受性弊恶，多造恶业，作守狱卒，贪欲偏多，聪明贫苦，寿六十五，多有黑子。瞿昙，属西方星有如是相。

“属斗星者，受性愚痴，贪不知足，贫穷恶性，寿命短促，当病

食死，黑色羸瘦。瞿昙，属斗星者有如是相。属牛星者，性痴贫穷，乐为偷窃，心多嫉妒，寿七十年，无有妻子。瞿昙，属牛星者有如是相。属女星者，持戒乐施，其人足下多有黑子，增长眷属，寿八十年，有大名声，无有病痛，宜于父母及以兄弟。瞿昙，属女星者有如是相。属虚星者，福德富贵，眷属爱乐，悭吝不施，寿六十五，其人足下当有黑子。瞿昙，属虚星者有如是相。属危星者，身无病苦，聪明持戒，通达世事，富贵多财，寿八十年，宜诸眷属。瞿昙，属危星者有如是相。属室星者，受性弊恶，多犯禁戒，为人富贵，寿命百年，死堕恶道，不宜父母及以兄弟。瞿昙，属室生者有如是相。属壁星者，雄猛多力，尊荣富贵，有大名称，眷属增长，不宜父母，寿命千年，名闻无量，乐法出家，敬受法者，聪明多智，善解世事。瞿昙，属北方星有如是相。

“若有通达如是相者，到于彼岸得大智慧。”

佛言：“众生闇行，著于颠倒烦恼系缚，随逐如是星宿书籍。仙人，星宿虽好，亦复生于牛马狗猪，亦有同属一星生者，而有贫贱富贵参差，是故我知是不定法。仙人，汝虽得禅，我是一切大智之人，何故不问解脱因缘，乃问是事？”

光味又言：“汝今现身如世无异，而尊其事与仙无别，我今真实不知汝是天耶仙耶？龙耶？鬼耶？声如梵音，色如古仙，我从昔来未曾见闻如是色相、如是事业，是故今问，汝为是谁？系属于谁？姓氏何等？宣说何事？唯愿广说，我当听受。”

尔时，世尊即说偈言：

“若有学习著相书，是人不能知此彼；
若有烦恼所缚者，不得解脱常受苦。
我今具足六神通，是故名大婆罗门；
六波罗蜜是我性，以六和敬调诸根。
我已受持三种戒，行空无相三脱门；
我往初发菩提心，尔时得名大出家。
我都不觉一法相，是故不说星宿书；
法无众生无寿命，是故演说无我净。
已度三受三行岸，断诸根故无有相；
我已真实知诸法，是故获得大寂静。
若无挂碍如虚空，虽行菩提不学法，
修集禁戒大忍辱，即得无想大智慧。
若不觉业求果报，如法不转得菩提！
心不贪著一切阴，亦复不观于此彼，
又不觉知菩提道，是能速得菩提道。
无有相貌无想念，于一切法无觉观，
亦不贪著于诸法，即能获得一切觉。

若有修集净梵行，是人得名婆罗门；
观察诸法如虚空，是人即得名大觉。”

于是，世尊说是偈已，光味仙人及诸眷属，一切皆见如来本身；见本身已，往善所追，即各获得宝幢三昧。得是三昧，能遍观察一切三昧，故名为幢；于诸三昧而得自在，游入一切三昧境界，是故名为宝幢三昧。

尔时，光味合掌恭敬，持微妙华满其手掬，说偈赞佛：

“如来成就无量德，犹如大海水弥漫，
功德光明甚微妙，悉照三千大千界。
勇猛精进大智慧，出胜一切诸众生，
具足大慈大悲心，是故我礼无上尊。
如来永断诸烦恼，故我稽首大仙师，
清净金色戒光明，我今礼敬于佛日。
能干众生诸烦恼，能说真实菩提行，
能坏一切烦恼山，转于无上正法轮。
今我修于菩提道，为得无量大智慧，
如来具足一切相，愿记我等菩提时。
我当云何断烦恼，度脱一切苦众生，
演于真实正真道，平等犹如十方佛？
众生三世造恶业，我当云何令其断？
若我身口意善业，愿此因缘断彼结，
永断一切烦恼病，身受妙乐如先佛。
令众妙色诸根具，远离诸恶修善法，
断除众生诸邪见，修习具足于正见。
得识宿命乐善行，度生死河至彼岸，
六波罗蜜得具足，知佛深法常住世。
乐降无上大法雨，令诸众生离贫渴，
若我身口意恶业，今于佛前悉忏悔。
我今所有福德力，施与众生早成佛，
我请一切诸众生，劝之令种菩提子。
我为众生受苦时，愿不生悔及退转，
净于世界及众生，得无碍智净法界。
若我真实得佛道，愿此所散成华盖！’

尔时，光味即以华散，是时三千大千世界六种震动，无量众生生敬喜心。有诸众生奉事象者，见佛是象，作如是言：“云何此象有大福德，令是仙人敬意供养？”乃至若有敬事佛者，见彼仙人敬心供养，见已生信礼拜赞叹。尔时，世尊出首楞严定，从定起已，一切众

生悉见佛身，见已心生供养欢喜，各任己力而作供养。

尔时，世尊告光味言：“善男子，一切诸天见汝决定发阿耨多罗三藐三菩提心，欢喜踊跃故，令是地六种震动。善男子，汝当成就无量智慧，然后获得无上佛道，乃当复于无量世界燃大法炬。善男子，汝于来世过三阿僧祇劫，当于此土北方世界，名曰香华，其界庄严如阿弥陀，当于彼中得成为佛，名光功德如来、应、正遍知、明行足、善逝、世间解、无上士、调御丈夫、天人师、佛世尊，于无量世宣说大乘，终不说于声闻、缘觉。”

尔时，大众耳闻目见光味仙人得受记莂，悉共欢喜供养恭敬。五百弟子、无量众生，发阿耨多罗三藐三菩提心，其意坚固无有退转。

大方等大集经卷第二十一

宝幢分中相品第五

尔时，佛知诸魔心已即入三昧，三昧力故令王舍城有十二门，一门中有一如来。尔时，诸魔见十二佛，自现其身为五通像，乃至示现梵天王像，以妙香华、幡盖、伎乐供养于佛。佛入城时足指案地，令此三千大千世界六种震动。其中天、人、阿修罗等，帝释、梵天及四天王一切众生，悉皆得见十方世界十方众生，皆悉来集王舍大城，齎持香华供养于佛。佛神力故，令香华中说如是偈：

“若欲永断三恶道， 应当发起菩提心。
若于生死独觉者， 是能度脱诸众生。
若欲离于恶勿务， 应当修集于正道。
若有值遇诸如来， 是人即得受道记。
如来大士利众生， 今来入此王舍城，
欲摧一切诸魔众， 欲转无上正法轮。
佛为五滓诸众生， 宣说三乘首楞严，
如来今欲大授记， 欲听实义应往彼。”

是偈音声周遍而闻，迦兰陀竹林精舍有诸菩萨、阿罗汉等，悉往集会王舍大城中；乃至十方无量世界、净土秽土、有佛之处及无佛处，一切众生悉来聚集。尔时，世尊入佛庄严瓔珞三昧，入三昧已，令此娑婆世界清净庄严，犹如未来遍见如来所有国土。尔时，世尊光明净妙，众生乐见；十方无量微尘世界、净秽等土、有无佛处，一切众生亦复如是，乐见如来净妙光明，亦复乐闻如来音声。尔时，十方一方面，无量佛土无量菩萨，悉来至此娑婆世界王舍大城。

尔时，此界具足多有无量菩萨，如是菩萨悉共供养如来世尊。或有菩萨于娑婆世界雨诸杂香以供佛养，或有菩萨于此世界雨真珠宝以供养佛，或有菩萨于此世界雨妙瓔珞，或雨金、银、琉璃、玻瓈、砗磲、玛瑙，或雨栴檀、沉水诸香，或复有雨牛头栴檀，或雨诸华须曼那华以供养佛。或有菩萨以真实法赞叹于佛，或有现作天帝释像、梵天王像、四天王像、魔王形像、自在天像、犍陀天像、八臂天像、转轮王像、宝像、山像、树林等像，大臣、长者、男女、师宗、牛、羊、象、马、水牛等像，作如是像，趣王舍城大莲华所，以手触华华即为动。

是时，一切魔众男女大小及诸眷属，皆悉动摇，生大恐怖，即作

是言：“何因缘故我之宫殿如是倾动？我等所尊将不退没，失我天耶？我等复不欲灭堕乎？我往常见如是世界有五滓浊，今者何缘寂然清净？”尔时，诸魔悉见十方清净菩萨皆来集会娑婆世界，见是事已复作是言：“以佛世尊光明严丽，众生乐见之因缘故，乃至不见己之眷属有一人在。”复作是念：“我今何故不往佛所亲近供养？”

时，魔波旬即至佛所，合掌恭敬而说偈言：

“我今归依于如来， 已得欢喜至心乐，
愿见放舍还本处， 还已乃当听正法。”

尔时，世尊说偈答言：

“我不劝汝以去来， 诸法性相亦如是，
汝今若有大神通， 随意自在无遮者。”

是时，波旬复说偈言：

“如佛世尊真实语， 今者实无遮我者，
我适欲还本处时， 寻即见身被五缚。”

佛言：“我已永断一切系缚，欲解一切众生系缚，我亦不念众生诸恶，是故得名解脱系缚。”

尔时，世尊见十方众生悉来集会，即说偈言：

“一切大众至心听， 远离一切疑网心，
我今所说不思议， 应当谛观业因缘。
无上世尊甚难有， 法僧二宝亦复然；
人身难得信亦尔， 施心福田亦复难；
无上世尊难得见， 见已闻法亦复难；
难得远离于八难， 得如法忍亦复难；
其心难得而调伏， 修空三昧亦复难；
修善思惟如法住， 如是二事亦复难；
一切烦恼难远离， 获得菩提亦复难。
我今说趣菩提事， 犹如世人说变化；
我之所说远离爱， 能坏闇冥修善法；
所示无上正真道， 应当至心勤修行。
若欲远离三恶垢， 及余一切诸魔业，
不为烦恼之所害， 应当从佛听正法。
若欲具足三种戒， 应学具足三脱门，
即能破坏三界结， 亦能过于三恶道。
若不断绝三宝性， 为于正法丧身命，

即能具足无量通，是人名为如法住。
若欲三世无觉观，亦复不著三世法，
是人能过于三界，亦复获得如法忍。
一切凡夫无明覆，常为四倒所围绕，
于无法中作法想，于无物中作物想，
以是因缘名颠倒，如是之人行邪道。
若有说言眼见色，乃至意能知诸法，
如是之人行颠倒，流转生死无量劫。
若有修集四禅定，是则名为世间慧，
能度一切诸颠倒，亦于生死得解脱。
若能调伏诸众生，亦复远离于四流，
如是之人干生死，亦复能到于彼岸。
若能具足四如意，是名菩萨无所畏，
亦能永断于生死，令诸众生脱恐怖。
若能了了知五阴，是人能到无漏边，
了知不生亦不灭，能令众生到彼岸。
若能于佛世尊前，忏悔发露一切罪，
是人远离于邪见，能到生死之彼岸。
若观生死多受苦，行业因缘迳三恶，
以近恶友因缘故，造作无量之恶业。
若能远离恶知识，亦能远离诸邪见，
是人能观生死过，亦能咨问第一义。
若有能观第一空，是人能服甘露味；
我常说于第一义，至心听者无有相。
我说六入真实空，无有造作无受者，
众生颠倒谓有相，法性真实无所有。
若有众生六受爱，是能生于六触因，
如是六触真实空，一切诸法亦复然。
如一法性诸法尔，如一切法一法然，
一切诸法无生灭，亦无相貌无有物。
我所宣说无胜道，一切诸法如一法，
若见诸法无性相，是人获得真实义。
若有修行十三忍，即能度于生死岸，
真知法性众生性，得无上道如先佛。”

于是世尊说是偈时，十方如恒河沙等五浊世界一切众生悉得闻之。一一世界无量众生，闻已即得不退转心，或有获得陀罗尼者，或复有得三昧定者，或有成就得诸忍者。此佛世界无量众生闻已亦得不退转心，教化众生于三乘中。

尔时，光味菩萨于莲华边造七宝梯具种种华，合掌恭敬而白佛

言：“如来佛日大慈悲光，无量众生多受苦恼，唯愿降注无上法雨，除灭众生烦恼疾病。有诸众生任为法器，堪受如来无上法味，愿说八道净于法眼，上升莲华摧伏众魔，十方世界无量菩萨悉为证人，了了能见诸法空寂，无有相貌犹如虚空，知法无我。唯愿如来忆念往昔初发菩提心时所立誓愿，如来时自言：‘我若具足十力、四无所畏，当施众生甘露法味，悉令得度生死大海。’今已果之，唯愿演说清净之法，度诸众生于生死海，化无量人于菩提道。”

尔时，世尊即蹬宝梯坐莲华上，遍观十方告波旬言：“波旬，汝亦当生欢乐之心。何以故？以汝因缘有是大集，亦因于汝令我说法。说法因缘断诸生死，度于四流，令诸众生获得正道得虚空相，如是等事皆因于汝。汝当请我，我当说法。”

魔波旬言：“瞿昙，若无瞋心、憍慢、嫉妒，何故恼我而宣说法？若有瞋恚、憍慢、嫉妒，云何自言我得解脱？”

佛言波旬：“我住母胎经历十月，汝于尔时欲来杀我，我心于汝亦无瞋恚。我初生时地六种动，汝于尔时复降石雨。我饮乳时，汝持毒药置之乳中。我昔初乘香象之时，汝动此地令六种震欲令我堕。我在林野修世禅时，汝将婬女欲来乱我。我乞食时，汝以臭豆持来施我，我时虽受竟不食之。我初出城，汝自变身为黑毒蛇，又作恶贼围城四边。我行虚空，复放风雨。我下马时，雨大猛火。我苦行时，复作恶声故令五人恐怖舍我。我身羸瘦，复放冷风，及其洗浴，放大暴水。我度河已复欲危害，化作无量师子恶兽。受牧牛女所奉乳糜，汝复持毒置之而去。我趣菩提道树之时，复于中路降金刚雨。我坐树下金刚座上，复遣四女来娆乱我。汝虽如是欲来害我，然我于汝都无恶心，如是等事终不能令我心扰乱。复将无量百千万众，造作种种无量恶事，欲令我身不得菩提。我既获得阿耨多罗三藐三菩提已，复来请我令舍寿命。因于汝故，令我于彼娑罗大村乞食不得。又因汝故，令阿闍世放大醉象欲令害我。又因汝故，提婆达多放下大石。又因汝故，令我受彼婆罗门请，三月之中食瞰马麦。又因汝故，令我为彼孙陀利女之所诽谤。又因汝故，尸利鞠多火坑毒食以请于我。汝于尔时，作如是等无量恶事不能害我，今复聚合如是魔众欲来害我，然我于汝都无瞋心。我今当度无量亿魔，我为众生常勤修集慈悲喜舍。汝若不信，十方诸佛、诸大菩萨可为明证。唯为汝故，使我于此恶世之中施作佛事。汝虽于我作无量恶，然我犹故随逐于汝。我今实无瞋妒、憍慢，我于汝所修集慈心，汝于我所生大恶心。善哉！波旬，应离恶心，启请于我说无上法。我欲与汝受菩提记，既受记已，当广为汝宣说法要。汝闻法已，当得远离一切恶业。我常思念种种方便令汝解脱，而汝于我常生恶心。我常于汝生怜愍想，汝今当舍恶见恶意。我当授汝阿耨多罗三藐三菩提记！”

尔时，波旬闻是语已，生瞋恶心欲还所止，复还见身被五系缚，欲出大声而不能出，即吐恶气欲杀害佛。尔时，如来变其恶气成须曼

华，佛神力故，令是化华遍至十方恒河沙等诸如来所而以供养，于诸佛上一一化作须曼华盖。

尔时，无量诸佛世尊无量菩萨，各各自问其土如来：“如是变化，谁之神力？”

无量诸佛各各说言：“娑婆世界释迦如来，欲为具足五浊众生演说法要，所谓法印句门入陀罗尼，能坏一切魔境界力，开显一切佛功德力，竖大法幢不断佛种，能令一切善法增长，能坏一切邪见众生，能坏一切恶梦不祥，能断疾病、刀兵、饥馑、斗讼等事，复能调伏一切天、龙、乾闥婆、人，炽然慧炬示导一切平等之道，能令一切远离恶见，能断一切诸恶种性，能令一切同于一性，能护一切城邑聚落、沙门、婆罗门，能知一切星宿运度，能学一切世间诸事，能令一切远离恶口获无碍辩，观一切法通达其性如法而住，能说大乘安慰菩萨，悉令能得不退转心，能施无上甘露法味，能令获得无生法忍，转正法轮利益调伏无量众生，悉令得住六波罗蜜，能令众生见无上道，能降法雨示诸佛事过四魔界，入大涅槃金刚法心因缘自在陀罗尼。持欲演说如是等法，如过去佛未来诸佛之所宣说。现在十方诸佛世尊，住世说法教化众生，皆是金刚法心因缘自在陀罗尼也，过去、未来诸佛世尊亦复如是。”

尔时，诸方无量菩萨各白佛言：“世尊，我初未曾闻金刚法心因缘自在陀罗尼，云何名为金刚法心因缘自在陀罗尼？唯愿如来分别解说，乃至为令入大涅槃，利益无量人天杂类。”

尔时，十方诸佛世尊，各各告其诸菩萨言：“善男子，我亦欲见释迦如来听受是法，为欲利益一切众生，为坏一切众生恶业，乃至为欲入大涅槃。”

尔时，十方诸佛世尊告诸菩萨言：“善男子，若欲供养一佛世界无量诸佛，各欲听受无上正法、所未闻法，见大集会，宜当往诣娑婆世界释迦如来所住之处。”

尔时，无量诸菩萨等，默然而受佛之教敕，各作是言：“我欲于彼一佛世界供养恭敬无量诸佛，亦欲于彼无量佛所听受种种无量法义，亦欲睹见无量神通及以无量不思議事，不知彼土有座处不？若有座处，则得供养听受正法。”

尔时，诸佛告诸菩萨言：“善男子，汝等不应于如来所生疑虑心。何以故？诸佛境界不可思议，智慧方便不可思议，为欲调伏一切众生。善男子，娑婆世界释迦如来，智慧方便不可限量。善男子，释迦如来一切众生阴所摄身，一一皆如须弥山王，能令葶苈容其座处，是名如来智慧方便。亦令众见葶苈不宽、所座不迕，而葶苈子其质如本无增减相。复次，善男子，一切世界所有大地，悉令入于一微尘中，亦令微尘无增减相，是名如来智慧方便。复次，善男子，一切世界所有诸水，悉能令入一微尘中，亦令微尘无增减相，是名如来智慧方便。复次，善男子，一切世界所有诸风，悉能令入一毛孔中，亦令

毛孔无增减相，是名如来智慧方便。复次，善男子，一切世界所有诸火，悉令入于一毛孔中，亦令毛孔无增减相，是名如来智慧方便。复次，善男子，十方所有一切众生，悉能令入一微尘中，亦令微尘无增减相，是名如来智慧方便。复次，善男子，一切众生三世所有身口意业，三世所受苦受、乐受、无苦乐受，三世众生身口意业所受果报，三世所有地、水、火、风，至一切法界，释迦如来于一念中了了通达，亦不称言我知我觉，又不役虑然后而知。善男子，释迦如来具足如是智慧方便住娑婆世界。”

尔时，十方无量佛土无量菩萨，既得闻佛无量功德，即各具足无量神通。

宝幢分中陀罗尼品第六

尔时，东方有乐世界，佛名阿閼，与诸无量神通菩萨发彼世界，一念来至娑婆世界释迦如来大集之处，到已坐于化莲华上。无量菩萨亦复如是，各各皆坐化莲华上。如是东方无量诸佛、无量菩萨各各来诣娑婆世界，到已皆坐化莲华座。南、北二方亦复如是。

尔时，西方安乐世界无量寿佛，亦与无量神通菩萨发彼世界，一念来至娑婆世界释迦如来大集之处，到已坐于化莲华上。无量菩萨亦复如是，各各皆坐化莲华上，各各以己神通福力作供养具，或作金沙和微妙香以散佛上，或作种种微妙香华，或起右绕娑婆世界，或有长跪说偈赞叹，或有系心善思惟者，或雨金华乃至优钵罗华，或以妙眼瞻睹佛身。

时，有童子名须菩提，以己神力及佛神力，出大音声而说偈言：

“诸佛无量大宝幢，能坏一切疑网心，
我初未曾得见闻，如是无量大会众。
满此世界无量佛，具足福德诸菩萨，
此地即是大宝塔，皆得供养十方佛。
无量诸佛何因缘，悉来集是恶世界？
今此国土恶众生，亦复不能信佛事。
为坏一切大魔业，为欲具足大功德，
为欲示现大神通，是故诸佛集会此。
此会若有诸众生，至心生于信喜心，
若以此心听受法，是人即能破魔业。
若欲通达无上乘，及欲修行八正道，
若欲永断诸烦恼，应当至心听正法。
诸十方佛及菩萨，皆来至此坐化华，
释迦如来欲说法，为护正法住无量。”

如是音声充遍大会，无量菩萨得无量忍，异口同声作如是言：“我今坐已，唯愿如来宣说正法，摄一切法无畏微妙，能坏魔业过于魔道，摧伏魔幢建立胜幡，坏诸烦恼调伏怨敌，裂诸疑网入种智门，过诸怖畏护众菩萨，亦令菩萨一切受乐，得诸菩萨慧方便门，及以一切安乐之处，一切三昧忍辱光明慧方便门，三十七品心陀罗尼。唯愿如来广分别说，为令众生受诸安乐，获得上色、上力、上乐、上触、上辩、上念、上意，为闻法已不忘失故，为坏国土恶瑞应故，受持戒故，修集道故，不失无上菩提心故。唯愿如来为如是事，颁宣广说是陀罗尼，为护法故，不断一切三宝种故，示诸菩萨菩提道故，为不分别虚空法性空相等故，显示明闇、有相无相、观平等相此彼法故，为不分别众生、寿命、士夫等法，不生不灭断一切相，一切变易等相无物，虚空实性故。唯愿释迦牟尼如来及与诸佛广宣分别大陀罗尼，为令无量无边众生真实睹见三宝性故，为令无量无边众生发阿耨多罗三藐三菩提心故。”

尔时，一切无量诸佛默然许之，许已即入诸佛上妙境界誓愿功德三昧。尔时，此间娑婆世界，所有地狱、畜生、饿鬼诸苦即灭得见诸佛，有诸众生疑网无信即得净信。一切众生悉见无有贪欲、瞋恚、愚痴、憍慢、恶见疑网、狂乱等病，身心寂静，各各皆作如是念言：“唯我一人独坐佛前听受正法。如来世尊唯为我说，独调伏我断诸烦恼，如我所请而为我。”

尔时，世界一切众生，异口同音作如是言：“愿佛说法，我当顶受。”尔时，释迦如来劝此世界所有众生，令供养佛。尔时，众生既闻劝已，即各供养一切诸佛，香华、幡盖、伎乐、赞叹。

尔时，世尊即作是言：“十方诸佛，谛听！谛听！我以往昔本愿力故，在此世界具足五浊恶众生中，成阿耨多罗三藐三菩提。是诸众生迷失正道，无明所覆，失于正念增长烦恼，安处三趣乐作十恶，远离善根舍功德业，喜造五逆耽著非法，诽谤正典毁谤圣人，瞋恚炽盛不乐修慈，招提僧物随意而用，于业果报不能深信，不乐供养师长、和尚、有德之人。为如是等弊恶人故，修集如是大慈悲心，以是因缘，于是世界而得成道。既成道已，常乐修集勤精进法，忍于饥渴寒热等苦，游诸国土城邑聚落，为诸众生宣说正法。或有众生贫穷病苦受身丑陋，为怜愍故，受其所施臭秽之食，为欲增长施主福德，皆悉食之。亦受众生粗涩臭秽弊坏衣服，山间、河涧、空旷林野所有住处悉亦受之。若草、若叶、若石、若埽，为众生故随施受之而卧其上，以勤精进修善方便。为刹利故演说王事，为婆罗门说四毗陀星宿祀天，为诸大臣说治化事，为诸医师演说四大增减等病，为诸农夫商贾之人说护财谷，为诸女人说护瓔珞，勤修诸善得不共夫，为出家者说于忍辱。为调伏故说如是法，未得善利劝之令得，未得证者劝令得证，未解脱者劝令解脱。为调众生受诸苦恼，我为众生修集慈悲，然诸众生犹于我所生不善心，或打或骂，或生嫉妒，或有说言：‘沙门瞿

瞿昙即是幻士！虽赞持戒自畜妻妇，虽赞慈心而害众生，赞舍富贵自往王家。瞿昙沙门善知方术，虽畜妻妇不生子息。瞿昙沙门能治女身故，令末利生爱重心。瞿昙沙门善知咒术故，令须达生宗敬想。瞿昙沙门善知药法，是故其身常有光明。’得如是等无量恶名。或有以石土木刀毒遥见打掷为欲杀我，为杀我故，放恶象毒蛇，于我住处放大猛火、粪秽不净，造作种种诸恶方便，欲坏我法，为灭我法，为摧法幢，为破法船，为坏法性，为破法藏。

“十方诸佛唯愿观察，过去诸佛有于如是五滓世界成得佛道，无不说不说如是大集金刚法心因缘自在陀罗尼者，为坏一切诸魔力故，为三宝种不断绝故，为诸众生增善法故，为坏一切佛法怨故，为令众生远离苦故，灭身口意诸恶业故，为令人天性调柔故，为诸国土受安乐故，为破世间诸恶相故，为令众生悉得具足六波罗蜜故，为发无上菩提心故，为教菩萨善方便故，为令菩萨次第住故。以如是等诸因缘故，过去诸佛为如是等五滓众生，说是大集金刚法心因缘自在陀罗尼也。今此世界十方诸佛悉来集会，唯愿诸佛，各说如是陀罗尼咒，为怜愍故，为当流布大乘经故，为此世界法久住故，令诸恶魔不得便故。”

尔时，诸佛即皆同声，说此陀罗尼句：

“安伽趺(一) 安伽趺(二) 半伽趺(三) 婆婆伽趺(四) 婆趺伽趺(五) 婆地比呵(六) 曼啰婆毗(七) 阿[口+企](八) 阿佉婆唎(九) 题咩(十) 度慕泯(十一) 翹婆知(十二) 翹由离(十三) 三摩婆阿尼(十四) 三摩多婆提冷(十五) 阿弥(十六) 阿移(十七) 陀摩翹阇(十八) 弥啰[口+犁](十九) 破罗婆泯(二十) 伽沘(二十一) 伽那婆趺泯(二十二) 希利(二十三) 希提(二十四) 希趺(二十五) 翹希趺(二十六) 谿婆提(二十七) 婆迦斯(二十八) 咤迦泯(二十九) 咤迦婆趺泯(三十) 伽那嚧呵泯(三十一) 希利泯(三十二) 尸利泯(三十三) 频地利嚧泯(三十四) 具婆希(三十五) 酬冷(三十六) 弥啰酬冷(三十七) 酬徒(三十八) 阿其离(三十九) 阿婆弥(四十) 婆利也(四十一) 多哆旦(四十二) 富流(四十三) 希利(四十四) 战地离(四十五) 摩陀弥(四十六) 陀弥(四十七) 究周流(四十八) 牟周流(四十九) 阿遮吒(五十) 至利(五十一) 至弥利(五十二) 遮婆呵(五十三) 周婆(五十四) 周娄(五十五) 悉啰嚧呵(五十六) 究娄(五十七) 娑罗究洞(五十八) 究侗(五十九) 摩诃娑趺娑(六十) [豆+斤]侗(六十一) [豆+斤]侗(六十二) 摩诃萨哆希力陀蛇(六十三) 富黑(六十四) 修富黑(六十五) 度摩波利呵利(六十六) 呵婆移(六十七) 流之沘(六十八) 迦趺叉(六十九) 阿陀摩兜(七十) 比婆呵(七十一) 提提利(七十二) 摩摩利(七十三) 波舍佉(七十四) 或或趺(七十五) 路迦比那蛇迦(七十六) 婆时利(七十七) 嚧时罗陀唎(七十八) 嚧时离陀提(七十九) 斫迦趺婆时离(八十) 遮居离(八

十一) 遮迦逻婆提(八十二) 陀吟(八十三) 陀吟(八十四) 婆冷(八十五) 牟离咤吟(八十六) 休休吟(八十七) 多伽频婆吟(八十八) 舍利奢(八十九) 流流周(九十) 之利周利(九十一) 牟吟慕陀吟(九十二) 慕茶泞(九十三) 慕茶泞(九十四) 伽伽逻尼(九十五) 牟茶泞(九十六) 散婆逻牟茶泞(九十七) 提提罗蛇尼(九十八) 摩醯首罗逻蛇尼(九十九) 律师婆尼(一百) 陀逻嚧至(百一) 战荼罗素咩(百二) 萨婆萨写阿提[口+悉]多(百三) 车陀兜嚧阿那(百四) 摩弥尼(百五) 嚧罗逻提(百六) 乌闍其离(百七) 比比那(百八) 嚧那诃逻(百九) 复佛吟(百一十) 仇留(百一十一) 仇留(百一十二) 牟留(百一十三) 牟留(百一十四) 希希(百一十五) 希希(百一十六) 阿逻(百一十七) 阿逻(百一十八) 迦迦茶婆呵(百一十九) 希希多(百二十) 阿由那(百二十一) 鞞荼谿婆斯(百二十二) 竭陀尼(百二十三) 阿婆陀呵泞(百二十四) 末力伽比流(百二十五) 破罗萨哆(百二十六) 阿路沙嚧提(百二十七) 希利希利(百二十八) 夜哆婆闍蛇(百二十九) 莎其罗(百三十) 夜哆波兰遮(百三十一) 希力陀婆呵(百三十二) 萨多波利嚧嚧(百三十三) 末力伽毗卢呵尼(百三十四) 阿遮罗佛提(百三十五) 陀蛇波罗遮波遮蛇(百三十六) 宾荼希力陀蛇(百三十七) 战陀逻嚧泞(百三十八) 阿遮吟输陀泞(百三十九) 波逻冀逻摩力伽(百四十) 伊罗(百四十一) 波逻冀逻摩力伽(百四十二) 伊罗(百四十三) 伊利吟(百四十四) 波臆脾(百四十五) 婆嚧嚧涅(百四十六) 萨婆嚧多哆多(百四十七) 萨多[口]竭脾(百四十八) 阿那嚧罗那伏律涅(百四十九) 阿罗茶(百五十) 安伽吟(百五十一) 舍弥尼(百五十二) 比婆罗嚧俞希(百五十三) 阿希多(百五十四) 阿婆希(百五十五) 尼嚧嚧蛇嚧(百五十六) 阿之逻末力伽(百五十七) 罗嚧那(百五十八) 罗仇婆吟(百五十九) 犁勒那朋舍(百六十) 陀摩伽蛇(百六十一) 闍罗战陀(百六十二) 三牟陀罗嚧提(百六十三) 摩诃复多脾比伽嚧三牟陀(百六十四) 陀罗尼牟陀离那(百六十五) 摩呾牟陀逻(百六十六) 娑嚧婆提(百六十七) 思比陀牟陀(百六十八) 阿嚧多尼(百六十九) 娑婆多尼(百七十) 慕迦逻(百七十一) 比豆多逻斯那(百七十二) 厕提牟地离都思(百七十三) 移迦之(百七十四) 卑利痴比迦蛇(百七十五) 嚧呵婆呵冀荼(百七十六) 迦嚧吒(百七十七) 尸逻波逻提多希力陀陀蛇(百七十八) 三牟陀多陀罗尼(百七十九) 陀逻(百八十) 陀逻(百八十一) 陀逻(百八十二) 弹提罗(百八十三) 弹提罗休尼罗萨婆希力陀蛇勿陀离都思闍吒(百八十四) 闍婆咤(百八十五) 闍呾嚧咤(百八十六) 修摩堤(百八十七) 摩提(百八十八) 摩诃复多勿陀离多(百八十九) 易翅之散迦罗(百九十) 婆荼蛇多那尼(百九十一) 首力多复多(百九十二) 伊弥尼弥尼(百九十三) 装遮尼(百九十四) 输沙萨遮尼(百九十五) 牟地离多遮利也何堤咩那(百九十六) 婆比哆(百九十七) 阿那若哆(百九十八) 摩诃富若三牟遮蛇嚧多逻摩诃迦留尼迦牟地离多(百九十九) 萨

婆三藐波罗提般(二百) 至逻阁罗兜(二百一) 萨婆尼犁(二百二) 萨婆牟尼婆罗沙婆摩诃迦留那三摩提若那若那婆离难(二百三) 咩啰多竭毗(二百四) 比利也比利也(二百五) 婆犁那提[口+悉]多(二百六) 萨婆复都波蛇(二百七) 莎呵(二百八)。”

尔时，娑婆世界一切众生，闻是咒已，各各称言：“南无一切十方诸佛！”第二第三亦复如是：“甚奇！甚特！诸佛大会不可思议，诸菩萨事亦不可思议。我等昔来未曾得闻如是持名，今得闻之，能坏一切魔境界力，绍三宝性，断魔罗网，得诸善法具足佛事，为如是等说是大持，为诸众生著心封印，印诸众生阴入界法，乃至获得大般涅槃。”

尔时，会中有一童子菩萨，名曰月光，从莲华起，一心合掌观察十方，以佛力故出大音声，其音遍闻娑婆世界，而说偈言：

“如是大集甚难得， 具足智慧亦复难，
难得亲近善知识， 如是法印亦难闻。
如来怜愍诸众生， 为众生故护正法，
说是无上陀罗尼， 为坏种种诸魔力。
十方诸佛说是持， 为不断绝三宝性，
能和一切诸忿诤， 亦能增长无上忍，
增益众生诸善根， 消灭国土诸恶相，
能破众生三恶业， 亦令远离诸恶见。
如来说是无上持， 为欲显示无上道，
亦为具六波罗蜜， 真实修于菩提道。
是持即是善方便， 亦能增长无碍智，
摄取一切诸善法， 是故名为无上持。
具修三十七道品， 是名无垢菩提道，
能断一切疑网心， 及断众生诸烦恼，
是持即是真实语， 了了睹见菩提道。
我今欲说陀罗尼， 是则名为无上胜，
为欲拥护说法师， 及以听受是持者。
其谁欲受欲听者， 我今当说勿生疑，
无上无胜陀罗尼， 即是最上之智慧。”

尔时，有恒河沙等菩萨童子，异口同音作如是言：“我等亦欲说陀罗尼！若比丘、比丘尼、优婆塞、优婆夷，先当澡浴，净于身心，著新衣服，以妙香华供养三宝，升于法座说陀罗尼。如是四众，无有众生能起恶事以加之者，身心不浊，四大清静，身诸病苦皆得远离。如是法师，若有过去业因缘病，悉皆消灭。听此法者亦复如是，灭过去业因缘病苦。”

尔时，月光童子菩萨，向十方佛，长跪合掌而说咒曰：

“那提阿三摩路卑(一) 咩罗素摩嚧混(二) 伊希那遮久遮尼(三) 那婆久遮尼(四) 那遮久遮尼(五) 牟罗输陀尼(六) 嚧茶呌(七) 嚧茶呌(八) 修罗罗尼(九) 那嚧修罗罗尼(十) 复多拘知(十一) 波利车陀(十二) 闍罗呌(十三) 闍罗呌婆移(十四) 闍罗呌那(十五) 摩叉呌(十六) 迦迦呌(十七) 呵呵(十八) 呵呵(十九) 休休休(二十) 拔施脾陀那利车陀(二十一) 阿摩摩(二十二) 呌摩(二十三) 三牟陀罗(二十四) 阿陀罗呌婆(二十五) 散迦罗尼(二十六) 波利车陀菩提娑婆提比摩(二十七) 比比摩(二十八) 摩诃比比摩(二十九) 复多拘知(三十) 阿迦奢戒娑婆波利车陀(三十一) 莎呵(三十二)。”

尔时，娑婆世界十方诸佛、菩萨、声闻、释、梵、龙王、阿修罗王、乾闥婆王、迦楼罗王、紧那罗王、摩睺罗伽王等，同声唱言：“善哉！善哉！菩萨童子，善能说是大陀罗尼，为坏魔业及恶知识身心诸病，是上慧印。”

尔时，会中有一梵王，名菩提自在，自变其身而为女像，端严殊特踰于人天，以妙瓔珞而自庄饰，在西方佛阿弥陀前，作如是言：“唯愿世尊，加我神力，令我一音遍满此间娑婆世界。我今欲说陀罗尼咒，护说法者及听法者，亦令释迦如来灭后，无有能于是说法者生起恶事。若魔，若魔父母、子息、眷属、亲友、仆使，若天、若龙、若阿修罗、若乾闥婆、若迦楼罗、若紧那罗、若摩睺罗伽、若邬槃荼，若富单那、迦多富单那、荔[廿/梨]多、毗舍遮、夜叉、罗刹等，父母、子息、眷属、仆使亦复如是，于是法师不能为恶，乃至不能动其一毛之分为其身心而作恶事。唯愿世尊，加我神力，令我音声遍此世界。”

尔时，会中有一帝释，名曰高持，语菩提自在梵言：“姊，莫于如来生戏弄心。何以故？夫戏弄者即凡夫法！如来已过凡夫事业，一切有为悉是无常，如来不增有为之法，唯增于空断声字句。姊，如来于汝不生诤讼，但观平等，一相无相，犹如虚空。夫虚空者无三有为，无有觉观，不离有为，无有障碍。如来世尊亦复如是，于一切法无有障碍，如来于欲亦复如是，一切觉观、寿命、士夫、阴界诸入、音声字句，悉皆无碍。姊今云何，于如来所而生戏弄？”

无量寿佛告帝释言：“善男子，当先思惟然后发言，无得于后而生悔恨。何以故？是女人者即大丈夫，已于无量诸如来所，久修善本，为欲庄严此大众故，现为女身，实非女也，即是菩萨摩訶萨身！汝云何言称之为姊？”

尔时，帝释闻佛语已，即前忏悔。

自在梵言：“我受汝忏，令汝不得恶口等果。”

尔时，梵天白无量寿佛：“世尊，若彼高持不忏悔者，当得何等恶口果报？”

佛言：“善男子，彼若不忏，当于八万四千世中常受女身，其形丑陋，臭秽不净，是故众生应当护口。”

尔时，无量寿佛告菩萨言：“我今施汝威神道力，便可说之。”

尔时，梵天敬白十方无量诸佛及诸菩萨、一切人天：“唯愿善听！若有欲令如来正法久住于世，拥护说法及听法者，唯愿诸佛悉施我欲。”说是语时，其音遍满娑婆世界。

尔时，一切梵王、释王，各作是言：“我施仁欲，并欲受持。”

尔时，梵天即说咒曰：

“阿摩犁(一) 比摩犁(二) 伽那沙跢(三) 波利战跢(四) 摩诃战跢(五) 遮弥(六) 摩诃遮弥(七) 素咩(八) 多弥(九) 阿嚧呵(十) 比嚧呵(十一) 修伽阍尼嚧咄婆(十二) 牟罗波利车陀(十三) 夜叉战跢(十四) 比舍遮战茶(十五) 阿婆阿多尼(十六) 三婆逻哆尼(十七) 娑伽罗尼(十八) 谿婆尼(十九) 慕呵尼(二十) 郁摩遮吒尼(二十一) 呵呵摩摩呵呵(二十二) 阿多遮尼(二十三) 咄伽舍婆(二十四) 阿摩罗(二十五) 阿牟罗(二十六) 牟罗波利跋泯(二十七) 阿娑罗咄婆莎呵(二十八)。”

尔时，一切诸天世人，咸皆赞言：“善哉！善哉！是陀罗尼不可思议无能胜者。”

尔时，梵王复作是言：“若有不能调伏恶鬼，闻是持已即便能调。若有受持如是咒者，随所住国信心诸王，一切男子、女人、若大、若小、若天、若人，皆于是王不能起恶。若有起恶首为七分，其心干焦，身被癞病，有神通者即便还失，暴风所吹，身陷入地。随是持咒流布之处，我亦当护，令得远离一切诸恶，受者、听者不乏衣食、卧具、医药、资生所需。”

尔时，会中有一梵天，名曰正语，亦现女像，复作誓言：“我今于此娑婆世界，现在佛前至心护法，乃至释迦如来灭后亦当护之，随是持咒流布之处，护其国土，说者、听者令离魔业一切恶事。若有法师欲说法者，为调众生，先当读诵是陀罗尼。”即说咒曰：

“阿婆咩(一) 比摩咩(二) 庵婆罗(三) 庵婆唎(四) 波利茶(五) 富沙波罗婆呵(六) 阍留迦(七) 摩咄罗蛇(八) 伊利弥利(九) 冀利弥利(十) 冀提遮罗牟蛇离(十一) 牟陀罗目[口+企](十二) 莎呵(十三)。”

“若有法师，先读诵说如是持者，我以天耳当往听之，闻已身往在其会中，令诸会者远离诸恶，至心听受如是持咒。若我闻已而不往者，则为欺诳过去、未来、十方现在无量诸佛，亦于未来不得成就阿

耨多罗三藐三菩提。若我往者，即令法师逮无碍辩，得无所畏；听法之人，远离病苦及疑网心、饥渴寒热、兵革怨敌、虎狼毒兽一切诸恶。唯愿十方一切诸佛加我神力。”

尔时，释迦如来白诸佛言：“今我当与此梵天咒，为护法故。”即便说咒：

“遮慕鞠(一) 慕茶波利车陀(二) 阿牟摩(三) 阿牟摩(四) 阿牟摩(五) 娑罗叉(六) 娑罗究思(七) 弥咭波利嚩呵(八) 遮罗摩(九) 蛇哆嚩(十) 修比咭(十一) 阿牟罗波利车题(十二) 萨婆佛陀阿提[口+悉]沘(十三) 莎呵(十四)。”

于是如来说是咒已，即告梵天：“善男子，如是持咒力，能调伏一切众生。”

尔时，梵天白佛言：“世尊，我今所以现此女身，为欲调伏一切女人。若有女人欲生男者，当读是持，读是持已即得生男；厌儿息者，便不复生。若有受持读诵之者，我当至心营卫拥护。”

大方等大集经卷第二十二

宝幢分中护品第七

尔时，会中有一菩萨，名善系意，立于宝光功德佛前，现身如梵，或如帝释，或自在天，或他化自在天像，或兜率天，或夜摩天，或提头赖吒天，或毗楼勒迦，或毗楼博叉，或毗沙门，或作龙王，或阿修罗王，或紧那罗王，或伽楼罗王，或夜叉王，或罗刹王，或毕力迦王，或毗舍闍王，或拘办荼王，或作刹利、婆罗门、毗舍、首陀、比丘、比丘尼、优婆塞、优婆夷，或作师子、象、虎、毒蛇、牛、马之形，复作种种飞鸟之身，一时之中能示八万四千种色。

尔时，富楼那弥多罗尼子，白释迦如来言：“世尊，何因缘故，是善男子变现如是八万四千种种诸色？”

佛言：“富楼那，是善系意菩萨摩訶萨，所入三昧不可思议，非是声闻、缘觉境界。是善男子，以如是等诸善方便调伏众生，随众生身意色三昧悉能住之。若有众生宗事梵天，敬念梵天，即现梵像为说三乘法；乃至或有奉事佛者，即现佛身为说三乘。若有众生宗事畜兽，即现兽像为说三乘。若有奉事山谷、河涧、树林、百卉，即现其像而调伏之。若有众生贪于财利，先以财施，后为演说三乘之法，为坏贪故。若有病者，随其所须给施医药，若悟时与，若梦中与，令其病者众苦除愈，为调伏故而说法。富楼那，是善男子于一日夜，能以三乘调伏恒河沙等众生。”

富楼那言：“是善男子，发阿耨多罗三藐三菩提心已来，为久远

耶？”

“富楼那，是善男子已于无量恒河沙等劫中发心。是人得是三昧已来，调伏众生，已经六万四千亿阿僧祇劫。”

富楼那言：“世尊，是善男子久近当得成无上道？成道之时在何国土？”

“富楼那，此世界中过六大劫，劫名星宿，于是劫中当成正觉，号曰宝髻。是时众生寿四万岁，多造恶逆，具足五滓。成正觉已四十年中，宣说三乘便入涅槃。”

富楼那言：“世尊，彼时众生未调伏者，复当云何？”

“富楼那，彼时众生无有一人不调伏者。富楼那，如是菩萨常立誓愿：‘十方各各千佛世界所有众生，乃至一人不调伏者，我终不成阿耨多罗三藐三菩提。若我不能了知见如是世界所有诸佛，亦复不成阿耨多罗三藐三菩提。如是十方千佛世界所有众生，若有一人非我调者，我亦不成阿耨多罗三藐三菩提。若他世界所有恶人愿生我国，生我国已，我当以三乘之法而调伏之。’富楼那，如是菩萨具足如是不思议事。”

富楼那言：“世尊，我于今者得大利益，而得见闻如是正士。若有人能至心听受是大集经，是人亦得如是利益。”

宝幢分中授记品第八

尔时，阿閼佛告大众言：“今是众中梵、释、四王、阿修罗王、人王、非人王，如是等众集会甚难。汝等今日而得值遇，应当至心于诸佛前，随其至乐发深重愿。”

时，有魔王名庄严华，现七宝首而为女像，身佩种种微妙璎珞，作如是言：“今我至心于诸佛前立大誓愿，愿于贤劫娑婆世界，以此女身常施众生香华甘果而调伏之，以是因缘，令其成就阿耨多罗三藐三菩提。”

尔时，一切十方诸佛同时赞言：“善哉！善哉！善男子，汝有信喜，而于今日大作佛事，当随汝愿悉得成就。”

魔王复言：“世尊，随何国土有人受持、读诵、书写、思惟分别是陀罗尼处，我当住中为作种种华果树林、泉源浴池、谷米所须，令无所乏。若有众生于是经中，义说非义，非义说义，我当治之，或令病苦狂乱错谬，国主嫫之生瞋害心。此言若虚，则为欺诳十方大众，亦莫令我于未来世得阿耨多罗三藐三菩提。若此世界及他世界佛诸弟子，不得供养利安之者，无有是处，除过去业必应受者。如我所施华果浴池、泉源谷米，即是我之檀波罗蜜；受我施已，获得无上慈善之心，即是我之尸波罗蜜；受我施已，勤修精进集诸善法，即是我之进波罗蜜；受我施已，深观诸法无常之相，即是我之禅波罗蜜；受我施

已，能忍一切身口意恶，即是我之忍波罗蜜；受我施已，能观诸法空无相愿，即是我之般若波罗蜜。如是我则具足成就六波罗蜜，唯愿十方无量诸佛令我得之。”

尔时，十方无量诸佛默然许可。尔时，慧幢如来赞庄严华：“善哉！善哉！善男子，如汝所愿，当令汝果。汝既果已，当得利益无量众生。”

尔时，魔王即以女身说此陀罗尼：

“遮弥咭(一) 遮咩咭(二) 遮咩咭(三) 涅伏多阿提(四) 嚩呵(五) 嚩呵(六) 嚩呵(七) 沫罗(八) 沫迦(九) 娑罗知(十) 比婆婆比(十一) 娑罗婆罗娑利地离(十二) 娑罗摩希地离(十三) 娑罗娑时离(十四) 地离多波地沫迦(十五) 休休休(十六) 阿沙伽闍脾(十七) 多咭(十八) 多咭(十九) 多咭(二十) 婆油婆醯(二十一) 乌波那地(二十二) 萨多波地(二十三) 频闍波罗(二十四) 富通沙陀(二十五) 陀那陀沴那(二十六) 遮居离厕移(二十七) 闍罗嚩呵尼(二十八) 沫罗沫迦(二十九) 三藐波罗提波那婆延(三十) 萨多波陀(三十一) 频闍波罗(三十二) 富通沙陀(三十三) 陀那陀沴那遮居离厕移(三十四) 闍罗嚩呵尼(三十五) 沫罗沫迦(三十六) 三藐波罗提波那婆延(三十七) 萨多迦利地摩咩摩咩摩咩闍婆罗(三十八) 莎呵(三十九)。

“世尊，是陀罗尼流布之处，若国土城邑、聚落村屯，我当住中调伏众生，悉令具足无上佛道。”

尔时，一切十方诸佛、无量菩萨、梵、释、四王、阿修罗、乾闥婆、迦楼罗、紧那罗、摩睺罗伽、人非人等，同声赞言：“善哉！善哉！善男子，汝能以是女人之身，护持如来无上正法调伏众生，修行具足六波罗蜜，演说无量诸佛功德。”

尔时，释迦如来告诸大众：“谁能与此同心护法？”

尔时，会中无量众生咸作是言：“我等能与是善男子，同共护法，不相舍离如影随形，愿是菩萨成无上道，当复与我授佛道记。”

时，庄严华白释迦如来言：“世尊，如来灭后，我当于此护持如来无上正法及受法者。唯愿如来怜愍我故，授我阿耨多罗三藐三菩提记。”

佛言：“善男子，汝得阿耨多罗三藐三菩提时，世界名法行，佛名功德意。”时，庄严华既闻记已，即以香华供养如来。

尔时，会中有一菩萨，名曰吉意，白娑婆世界十方诸佛言：“世尊，是人已于贤劫之初迦罗鸠孙陀佛所，发大誓愿，愿以女身教化成就无量众生，亦令远离四百四病故，说四百四善方便，根药、果药、散药、丸药、下药、吐药、阿伽陀药、油酥汤药，各四百四，以如是等调伏众生。复于四万四千岁中，供养恭敬迦罗鸠孙陀佛及以众僧，

供养佛已即得受记。彼佛告言：‘善男子，未来众生寿命百三十年，当有如来号释迦牟尼，以大愿力，娑婆世界当有十方无量诸佛菩萨集会。是大集时，汝于彼中当得受阿耨多罗三藐三菩提记。迦那牟尼、迦葉等佛，亦复如是。’是人尔时白彼佛言：‘世尊，我以本愿力故，常以女身持种种药，给施一切病苦众生。以我是愿福德力故，一切树木华果悉出甘露之味。若有食者，即是我之檀波罗蜜因；若有食我如是所施华果谷米甘露味者，舍除毁禁，受持净戒，即是我之尸波罗蜜因；受我食已，勤行精进修集善法，即是我之进波罗蜜因；堪忍持戒思惟修善，即是我之羼提波罗蜜因；深观诸法无常之相，即是我之禅波罗蜜因；观法苦、空、无常、无我，即是我之般若波罗蜜因。如此世界女身教化，调伏众生令离病苦，十方世界亦复如是。’世尊，我说是事，令庄严华增长成就精进力势。如来灭后，我当与彼共护佛法。唯愿世尊，于此大众与我授记。”

尔时，一切十方诸佛赞言：“善哉！善哉！释迦如来当授汝记。”

尔时，世尊告吉意言：“善男子，汝于当来莲华世界，得成为佛，号曰善见。如吉意女，地天、水天、火天、风天、虚空天、种子天、华天、果天、山天、树天、草天、抵天、涧天、宝天、四天下天，乃至六万七千神天，亦复如是，皆是菩萨现受女像为调伏众生。是等女天悉得授记，当成阿耨多罗三藐三菩提。所以现为女像教化，为令众生转女身故。若转男身得女身易，若转女身为男则难，是故以此女身教化。”

是等六万七千诸女得授记已，百亿龙王、百千亿夜叉、百万亿阿修罗、七万亿天、九万九千亿魔王，恒河沙等人，所谓刹利、婆罗门、毗舍、首陀，不可数拘办茶等，发阿耨多罗三藐三菩提心。无数众生得不退转菩提之心，不可数众生得菩萨三昧，不可数众生得无生忍，不可数众生得陀罗尼，不可数众生得菩萨地，不可计众生成就忍辱，不可计众生得沙门果，不可计众生得尽诸漏，不可计众生于声闻心无有退转，不可计众生于缘觉心无有退转，不可计众生得不退心。

宝幢分中悲品第九

尔时，释迦如来白诸佛言：“世尊怜愍我故，悉来集此娑婆世界。”

时，庄严华、吉意菩萨，为护法故发深重愿，如愿即得。

时，十方佛为二正士大誓愿故，即说咒曰：

“树提婆婆(一) 持律提婆婆(二) 牟尼婆婆(三) 萨多婆婆(四) 富若棱伽婆婆(五) [口+長]那婆婆(六) 摩诃迦留那婆婆(七) 摩诃伏律多婆婆(八) 阿慕呵婆婆(九) 流提婆婆(十) 厕提婆

婆(十一) 娑利罗婆婆(十二) 却伽婆婆(十三) 婆由婆婆(十四) 跋多婆婆(十五) 阿提啉那婆婆(十六) 阿摩婆婆(十七) 阿颇那婆婆(十八) 多咤多婆婆(十九) 复多拘置婆婆(二十) 尼提提婆婆(二十一) 梨究舍罗婆婆(二十二) 梨养那婆婆(二十三) 梨陀兜婆婆(二十四) 梨比目叉婆婆(二十五) 梨道居罗婆婆(二十六) 赖吒提那婆婆(二十七) 婆婆(二十八) 婆婆(二十九) 婆婆(三十) 三摩多(三十一) 阿那若三摩多(三十二) 咤咤咤咤咤咤咤咤(三十三) 娑咤思提(三十四) 萨婆佛陀究舍罗牟罗阿提啉那(三十五) 莎呵(三十六)。”

说是咒已，复告二人：“善男子，汝等若欲教化众生，应当受持如是等咒。”

时，庄严华菩萨，与诸菩萨其数十万，作如是言：“十方诸佛为众生故所说神咒，我等要当受持在心。若我今于十方佛前，立大愿已，听是神咒不能受持，则为欺诳诸佛世尊，亦莫令我得阿耨多罗三藐三菩提。若有人天持是咒者，设有于其起恶心者，我若不护，令我不得成无上道。若比丘、比丘尼、优婆塞、优婆夷，受持是咒，亦无有能于是四众起恶心者。”

时，十方佛同声赞言：“善哉！善哉！善男子，汝能受持无上法雨。”

尔时，释迦如来告魔波旬：“汝于佛法当生信心！以汝因缘，当令无量无数众生得解脱果。汝今失离一切伴侣，谁当与汝复共为恶？我怜愍故，殷勤告教，汝可速发阿耨多罗三藐三菩提心。”

魔波旬言：“世尊，我今乃至无一念心发阿耨多罗三藐三菩提心。瞿昙今者，未能永断欲界众生，云何令我失离伴侣？我终不能归依三宝。”

宝幢分中护法品第十

是时，会中有佛，名曰曼陀罗华微妙香，语释迦牟尼佛：“如过去世十方诸佛，以怜愍故，亦悉集会五浊世界，为护法故，坏魔怨故，怜愍众生故，施大智炬故，为说正道故。十方现在无量诸佛亦复如是，今日十方无量诸佛悉来集会娑婆世界，谁可付嘱释迦佛法？”

释迦如来言：“我之正法，可以付嘱频婆娑罗等诸大国王、四王、帝释、梵天王等，如是等众能护我法。若有能发菩提心者，当知是人则能护法。”

尔时，一切大众，所有天王、梵王、龙王，异口同声作如是言：“世尊，我等要当至心护法。何以故？如来正法难得难值，一佛界中无量佛会亦复难遇！十方诸佛尚为众生而来集会，我等云何不护

正法？”

尔时，十方诸佛同声赞言：“善哉！善哉！善男子，若有刹利能护法者，所有国土衰恶之事，四百四病皆令除灭，及其国土所有树木、华果、谷米滋茂丰登，护其人民亲戚眷属令离诸恶；若有比丘、比丘尼、优婆塞、优婆夷，亦当护之。何以故？过去菩萨得成阿耨多罗三藐三菩提者，皆由拥护正法因缘，未来、现在亦复如是。若能护是受者、听者，当知佛法久住不灭。是故娑婆世界天王、人王当守护法，为久住世不断绝故。善男子，若有善男子、善女人，欲令佛法久住于世不灭尽者，应当供养是大集经受者、说者。何以故？是大集经即是十方诸佛印封，若能供养如是大集，即是供养十方诸佛。释迦如来灭度之后，随有是经流布之处，若有听受持、读诵解说、书写经卷乃至一偈一句一字，而其国主一切恶事即得消灭，所有树木、谷米、药草，四大天王降施甘露而以益之，国土王法悉得增长，邻国恶王勤求和同，各各自生喜心、慈心，一切诸天佛弟子者悉来拥护。如是国土王子、夫人及诸大臣，各各生于慈愍之心，谷米丰熟食之无病，亦无斗讼兵革不起，无诸恶兽及恶风雨，远离一切过去恶业。若诸众生有女业者，现受、生受及以后受，即能令灭除五逆罪、谤方等经及以圣人、犯四重禁、一阐提辈、其余恶业如须弥山，悉能远离增长善法，具足诸根身口意善，远离恶见破坏烦恼，修集正道供养诸佛，具足善法及内外事，令诸众生寿命增长，念慧成就。”

尔时，弥勒菩萨等九万七千亿菩萨得无生忍者，作如是言：“我等亦能佛灭度后护持正法，为怜愍故，当于都邑城村聚落广说是经。”

尔时，娑婆世界无量诸佛，同声赞言：“善哉！善哉！善男子。”

娑婆世界一切人天，复作是言：“我等亦能于佛灭度后，护持正法及四部众中受持说者。”

时，十方佛复赞叹言：“善哉！善哉！汝等真能护持正法。善男子，汝等若能护持正法，应当供养如是诸佛世尊，我等要当拥护是经流布之处都邑聚落人民眷属及受持者，并令土地谷米丰熟，药木滋茂。何以故？随有是经流布之处，我于是中有大力势，以力势故我能护之，令离一切衰祸之事，亦令是国所有众生远离恶业生于惭愧。”

是时，十方诸佛赞言：“善哉！善哉！汝今真能护持正法，亦能供养十方诸佛、护持法者、听受法者。”

宝幢分中四天王护法品第十一

尔时，释迦牟尼佛告诸梵天、帝释、四王：“善男子，我为如是恶众生故，本愿力故，大怜愍故，于此恶处成就阿耨多罗三藐三菩提，为欲利益无明闇冥渴法众生、常乐增长烦恼众生，破坏魔众，建

立法幢，施其法雨，令诸众生离烦恼苦，令不可计无量众生发阿耨多罗三藐三菩提心。无量诸佛及诸菩萨，悉来在此世界集会，为坏众生无量恶业，绍三宝种。我涅槃后所有正法，当付汝等，汝等便当深心守护。若有菩萨福德成就，如是等辈，亦能拥护我之正法。若有众生，已于诸佛种诸善根者，是人于后法欲灭时余五十年，守护正法，信敬受持，读诵书写，解说其义。如是法师，若于都邑城村聚落，欲多饶益无量众生，当净澡浴，著新好衣，庄严香华，于一案上安置种种诸甘味浆，置高座前。汝等尔时若不来集，为护法师，遮诸恶事，听受正法，自利利他，汝则欺诳十方诸佛。”

尔时，梵天白佛言：“世尊，随是经典流布之处都邑聚落，我当至心而拥护之。若比丘、比丘尼、优婆塞、优婆夷欲说是经，当净洗浴，著新净衣，聚集香华乃至甘浆，置高座前，我与眷属定往其所。若我不往，则为欺诳十方诸佛世尊。此世界中，随有是经流布之处，当令其地无诸兵革及诸恶事。我今至诚十方佛前立深重誓！”即说咒曰：

“安仇呵(一) 登伽(二) 富罗那呵(三) 蛇咩呾(四) 呾呾(五) 婆呾(六) 嚩呾嚩(七) 居离那呾嚩(八) 莎呵(九)。”

尔时，释提桓因，即说咒曰：

“呾嚩蜜奢(一) 摩奢蜜奢(二) 那罗呾(三) 阿牟若(四) 阿牟嚩呵(五) 阿呾咤(六) 阿呾(七) 阿伽呾时伏律[口+企](八) 莎呵(九)。”

尔时，东方天王提头赖吒，即说咒曰：

“频头闍那(一) 呾婆闍那(二) 罗牟呾(三) 叉娑罗(四) 富那婆呵(五) 阿末伽婆咤(六) 莎呵(七)。”

尔时，南方天王毗留勒叉，即说咒曰：

“郁呾那婆闍荼(一) 三牟陀斯若(二) 哆哆周多(三) 婆逻那婆(四) 婆逻闍(五) 莎呵(六)。”

尔时，西方天王毗留博叉，即说咒曰：

“闍路伽(一) 阿郁伽(二) 阿摩慕伽(三) 阿摩摩逻闍(四) 嚩脾也牟闍(五) 莎呵(六)。”

尔时，北方天王毗沙门，即说咒曰：

“啾地离(一) 啾[颱-台+秋]啾地离(二) 呿啾地离(三) 阿尼[颱-台+秋]地离(四) 希力多啾地离(五) 娑竭逻希力多啾地离(六) 散究娑啾地离(七) 陀摩叉地离(八) 莎呵(九)。”

尔时，十方诸佛赞梵、释、四王等言：“善哉！善哉！汝等今真能护持正法。”

时，梵、释、四天王等白佛言：“世尊，我等随是经典流布之处，要当至心护持。”

十方诸佛及诸菩萨，同共赞言：“善哉！善哉！毗沙门等，汝能真实护持正法。”

尔时，娑婆世界，有万二千大鬼将军护此世界，复有四万四千小将，成就大力及大功德，同音而言：“世尊，我等亦当于未来世，随有是经流布之处，我则随护。若说法时，我亦当往。有听法者，当为坏其种种魔业护说法者，令得增长一切善法。当劝诸王、大臣、长者，施其衣食种种资生所须之物，亦令其土无有兵革寇难之事及恶风雨。若我虚妄，则诳十方无量诸佛。”

尔时，娑婆世界有一菩萨，名曰疑心，白释迦牟尼佛言：“世尊，此娑婆世界，有百亿魔不？如其有者，悉来集不？”

佛言：“一切都集。”

“世尊，若都集者，有信心不？”

佛言：“善男子，皆有信心。唯除波旬眷属千人，当于未来破坏我法，常求过罪。是魔波旬及其眷属破坏三宝。何以故？皆是过去恶因缘故，过去不种善根因缘。善男子，我法灭时，是魔波旬及与眷属，于如是法乃得信心，种菩提子修菩萨道，乃至得阿耨多罗三藐三菩提。”

尔时，会中有一魔天，名曰太白，已于无量诸如来所成就功德，所有信根无能倾动，奉敬三宝，已于诸佛得受阿耨多罗三藐三菩提记，现仙人像，从坐而起，长跪合掌，以大音声遍诸佛土而白佛言：“世尊，释迦如来本愿因缘，生怜愍故，于此具足五浊世界谤法众中，得成阿耨多罗三藐三菩提。以怜愍故，说三乘法脱三恶道。复为无量无边菩萨说无生忍，不断十方诸佛种性。是故我当于未来世至心拥护，令释迦法久住不灭，令诸魔众不得其便。我终不坏如来正法！若无持者，佛法则灭。若诸四众无说听者，法则衰灭。若未来世善男子、善女人，修立三业，绍三宝性，为坏三界诸恶烦恼修行正道，能坏众生三恶道苦，一切魔众无能为也！唯愿十方无量诸佛，施我功德、智慧二力。我欲诵咒，为坏一切恶魔眷属。”

时，十方佛同共赞言：“善哉！善哉！”

时，太白魔即说咒曰：

“阿摩犁(一) 阿汉呿咩(二) 阿闍婆嚩(三) 阿闍婆婆(四) 阿

闍婆婆(五) 牟罗娑梨(六) 脾也呾娑[口+企](七) 闍摩娑梨(八) 呵呵(九) 呵呵(十) 呵呵(十一) 伽罗娑咤(十二) 闍囊却伽(十三) 若蛇却伽(十四) 比若蛇娑呾伽(十五) 阿牟叉逻(十六) 叉叉(十七) 叉叉(十八) 叉叉(十九) 牟逻婆呵呾迦(二十) 莎呾若(二十一) 莎波利婆多(二十二) 牟逻(二十三) 若若(二十四) 战陀修利蛇若若(二十五) 莎提若若(二十六) 那婆呵若若(二十七) 呾逻叉若若(二十八) 那波逻若若(二十九) 复多拘知若若(三十) 哆哆哆若若(三十一) 萨菩婆比若若(三十二) 逻提悉多若若(三十三) 遮居逻摩频婆多叉婆(三十四) 叉摩摩(三十五) 叉波若(三十六) 若比多(三十七) 摩罗比沙蛇(三十八) 莎呵(三十九)。”

说是咒时，地六种动，一切魔众心生怖畏。一切天人乃至迦罗富单那皆离怖畏，得不退转菩提之心。

尔时，魔王问坚意言：“善男子，是太白魔王从何处来？有何等力？而能破坏一切魔众及诸黑业，增长瞿昙断灭之法？我今睹见，心欲变吐，四方皆闇，身心苦痛，而彼见之甘乐爱著。唯愿怜愍，为我说之。”

坚意菩萨言：“波旬，皆是一切诸佛威神，令是太白有如是力，以是力故坏诸魔众，增长如来无上正法。是太白菩萨所有德力，乃至人天无能坏者。波旬，汝于三宝宜应生信，发菩提心，远离一切身口意恶。”

波旬言：“大士，我今方欲造成种种身口意恶，实不能发菩提之心。”

宝幢分中旷野鬼品第十二

尔时，旷野菩萨即现鬼身，散脂菩萨即现鹿身，慧炬菩萨现猕猴身，离爱菩萨现羖羊身，尽漏菩萨现鹅王身，如是五百诸菩萨等各各现种种诸身，其身悉出大香光明。一一菩萨手执灯明，为欲供养十方诸佛。

尔时，疑心菩萨至心观察是五百人，即知悉是菩萨大士，语旷野鬼言：“善男子，汝等何故现如是身供养诸佛？”

旷野鬼言：“善男子，往古过去九十一劫，有佛世尊，号毗婆尸如来、应、正遍知、明行足、善逝、世间解、无上士、调御丈夫、天人师、佛世尊，我于尔时，与如是等同一父母共为兄弟，受持五戒勤修精进，聪明智慧心乐善法，种种供具供养彼佛，既供养已，皆发阿耨多罗三藐三菩提心，为欲调伏一切众生。尸弃、毗舍浮、鸠留孙佛，亦复如是，皆供养已。散脂大士于彼佛前立大誓愿：‘愿我来世以鬼神身教化众生！若有弊恶鬼众生，我当演说三乘之法而调伏之，’

乃至无量恒河沙等恶鬼、恶兽悉令调伏，然后乃当成就阿耨多罗三藐三菩提。’亦有一万二千大鬼，于此世界发大誓愿调伏众生。尔时我复发大誓愿：‘若有恶鬼，欲坏如来如是正法，我当治之。’是故我受如是鬼身。若有恶鬼，能杀众生，令其心乱，恶心杀害，深著邪见，能令刹利、婆罗门、毗舍、首陀乱心作恶，于国土中移转日月，错易年岁使国荒乱，寒暑失所变改时节，降恶风雨谷米不登，及坏一切树木果子，愿我悉能调伏教化令住三乘。我亦不害夺其命根，同其受身，与共软语言谈戏笑，以三乘法而教化之令离恶道。若有众生远离善法，行身口意不善之业，舍是身已生三恶道。或有杂作善恶诸业，是人舍命则受鬼身。是故尔时，恶鬼滋多，善鬼鲜少，是故我欲调伏恶鬼现受是身，亦令刹利、婆罗门、毗舍、首陀远离恶心。善男子，有金刚槌咒，以是咒力，一切恶鬼于彼四姓不能为恶。善男子，若有都邑城村聚落有是咒处，一切恶鬼无能为也。是处众生皆修慈心，远离一切不善之事恶病、恶雨、亢旱、斗争，乃至鸟兽皆生善心，远离一切诸恶怖畏。我今于此十方佛前，发大誓愿，欲说是咒。”

尔时，释迦如来告旷野鬼：“善男子，十方诸佛今已施汝神通之力，便可说之。”

时，旷鬼即起合掌而说咒曰：

“豆摩(一) 豆摩(二) 陀摩(三) 陀摩(四) 豆摩(五) 豆摩(六) 那那罗(七) 尼罗(八) 尼罗(九) 究吒尼(十) 究吒尼(十一) 摩诃究吒尼(十二) 吒吒吒抹(十三) 摩诃吒吒吒(十四) 阿娑婆(十五) 阿比(十六) 利尼(十七) 利尼(十八) 摩诃利尼利尼(十九) 利弥(二十) 利弥(二十一) 利弥(二十二) 陀利蓰(二十三) 摩诃利蓰(二十四) 首流首流(二十五) 摩诃首流首流(二十六) 首流多(二十七) 摩诃首流首流(二十八) 郁究摩(二十九) 仇摩(三十) 仇摩(三十一) 仇摩那(三十二) 利弥(三十三) 利弥(三十四) 希利(三十五) 希利(三十六) 希利(三十七) 希利(三十八) 希利(三十九) 希利(四十) 希利(四十一) 希利(四十二) 希利(四十三) 希利(四十四) 希利(四十五) 希利(四十六) 希利(四十七) 尼弥尼弥(四十八) 希尼(四十九) 希利(五十) 牟尼(五十一) 牟尼(五十二) 牟提尼(五十三) 婆遯婆遯婆遯吒(五十四) 跋迦那利也(五十五) 祇儻(五十六) 时儻力娑婆(五十七) 时那(五十八) 时那(五十九) 时那遯娑婆(六十) 莎呵(六十一)。

“世尊，随有国土诵此咒处，彼诸恶鬼虽闻是咒，于诸众生犹怀恶心、凶暴难伏、不受法教、不起慈心者，我为是等诸恶鬼故，更说此咒以调伏之：

“阿车(一) 阿车(二) 牟尼(三) 牟尼(四) 尼休休(五) 牟尼

(六) 牟尼(七) 摩那婆娑婆(八) 休休(九) 阿尼罗那荼(十) 阿多但荼(十一) 阿多阿提(十二) 流吒(十三) 希尼(十四) 希利(十五) 希利(十六) 希利(十七) 希利(十八) 希利(十九) 希利(二十) 希利(二十一) 郁仇摩(二十二) 仇摩(二十三) 仇摩(二十四) 仇摩(二十五) 希利(二十六) 希利(二十七) 希利(二十八) 尼利(二十九) 尼利(三十) 摩诃尼梨(三十一) 三牟陀呼呾(三十二) 呵吒(三十三) 阿吒(三十四) 阿吒(三十五) 陀罗咩呾(三十六) 叉嚩呾(三十七) 叉嚩呾(三十八) 卑利痴比(三十九) 阿波(四十) 泯闍(四十一) 婆由(四十二) 阿迦奢(四十三) 咄咄咄(四十四) 究脾(四十五) 婆穷脾(四十六) 阿叉穷脾(四十七) 视靴穷脾(四十八) 萨多伽穷脾(四十九) 逻闍穷脾(五十) 萨多兜穷脾(五十一) 莎呵。”

宝幢分中还本品第十三

于是十方无量诸佛，各各欲还本佛世界，其地即时六种震动，上虚空中雨种种华，微妙伎乐不鼓自鸣，种种诸香而以供养，一切大众悉共合掌礼敬诸佛。

尔时，梵天白月香佛言：“世尊，是谁神力？成几福德？于未来世能信、受持、读诵、书写如是经典？”

“梵天，皆是十方现在诸佛本愿力故，破坏魔众；除国霜雹、暴风、恶雨，护持正法，为调众生宣示正道，亦是诸佛本愿力故。来世众生成就十法，能于未来护持正法，是人亦为诸天所护。梵天，若有人能具足念心善意方便，是人则能拥护正法，不贪五欲常修习空，忍辱如地得深大忍，以四摄法摄取众生，此彼无碍修行清净菩提道，行宝幢三昧。如是之人，于未来世能护正法，书写、受持、读诵、解说。是人舍身，得见十方现在诸佛及比丘僧、诸菩萨等，亦闻诸佛所说妙法，闻已即得圣人喜乐，灭除一切不善之法，得生清净诸佛国土，常闻演说大乘经典，终不生于五浊世界，常得亲近娑婆世界如是诸佛。是人于后余五十年，以佛力故，则能护持如来正法。”

尔时，释迦牟尼佛告梵天言：“随是经典流布之处，其土则无一切恶事、恶雨、疾病，受者、听者身无患苦，衣食无乏。”

尔时，华幢佛告诸大众：“若以满此娑婆世界微妙七宝施十方佛，不如有人于佛灭后余五十年受持、读诵、书写是经，所得福多先福德！”

佛复告大众：“假使有人，以恒河沙等上妙七宝施十方佛，不如有人于佛灭后余五十年，受持、读诵、书写是经所得福多！”

佛说是已，诸天世人闻已欢喜，信受奉行。

大方等大集经卷第二十三

虚空目分声闻品第一

尔时，世尊故在欲、色二界中间大宝坊中，与无量比丘僧、诸大菩萨，围绕说法。

时，舍利弗、目犍连等，出家未久，以舍利弗、目连因缘，说声闻法杂四真谛。尔时，众中有诸人辈，本是外道，诸根闇钝，自谓有智，起大憍慢，增长色慢、欲慢、无明慢、胜慢、非法慢，未得第二、第三、第四沙门果证，是故如来为如是等宣说中道，为离如是恶烦恼故。如来说是中道义时，如是诸人各各论说断见、我见。

尔时，世尊即作是念：“哀哉！诸人本外道故，虽入佛法犹生大慢，于未得中而生得想，于未知中而生知想，于如来法中而不修行。虽顺四谛而不能得四无碍智，乃至不得第四果证。”尔时，世尊二手举捉瞻婆华鬘，发大誓愿，以愿力故，于华鬘中出生四宝：一、帝释宝，二、天光宝，三、金刚光宝，四、胜诸光宝。一一宝中出大光明，遍照此间娑婆世界，光明出已掷之虚空。

时，华鬘中说是偈言：

“虽除须发不去结， 被服染衣不离染，
示佛为师不随教， 如是之人污大众。
如来宣说正法时， 而复不能至心听，
是人不得真实义， 亦不能离诸烦恼。
若能睹见实法性， 是能破坏无明慢；
若有亲近善知识， 是人速得甘露味；
若能呵责于生死， 是则能得到彼岸；
是人具足戒多闻， 亦具禅定智慧聚。
若人欲坏烦恼魔， 远离阴魔及死魔，
摧伏天魔诸眷属， 常当亲近无上尊。”

说是偈已，声闻弟子有憍慢者，咸作是念：“如来知我并有污心，是故为我说如是偈。”即时心中生大惭愧。及四天下佛诸弟子，亦复如是生惭愧心，于一念顷悉来集会。尔时，无量百千万亿声闻大众悉来聚集。于是佛知众会已定，即为宣说杂四真谛。

时，此宝鬘直往南方，过九万二千恒河沙等诸佛世界，彼有世界名金刚光藏，其土众生具足五滓。有佛世尊，号金刚光明功德如来、应、正遍知、明行足、善逝、世间解、无上士、调御丈夫、天人师、佛世尊，亦为四众宣说如是杂四真谛法。而彼会中有诸菩萨、声闻，四众比丘、比丘尼、优婆塞、优婆夷，见是宝鬘大光明已，观察四方，仰见宝鬘在佛顶上虚空中住，即白佛言：“世尊，如是宝鬘，从

何处来？谁之所遣？”

彼佛答曰：“善男子，北方去此九万二千恒河沙等诸佛世界，彼有世界名曰娑婆。有佛世尊，号释迦牟尼如来、应、正遍知、明行足、善逝、世间解、无上士、调御丈夫、天人师、佛世尊，亦为具足五滓众生，宣说开示杂四谛法，如我今于此土无异。善男子，彼佛世界所有众生甚大痴闇，粗犷轻躁，生大憍慢，多作恶业，难调难解。是故释迦牟尼如来为此大集，于大集中演说正法，为坏如是诸大恶事。彼世界中所有众生，于未得中而作得想，于未证中而作证想，于未修中而作修想。是故彼佛为大众说法，如法修行，为坏如是大憍慢故，为得尽智及无生智，将欲宣说虚空目法行，为得声闻、缘觉、佛果，欲开如来无上法藏。是故彼佛遣此宝鬘，从我索欲，我今与之，并欲以是法目陀罗尼赠彼为信，能作无量微妙大明，能干一切诸恶烦恼，能持一切所闻不忘，能净一切心之垢污，能护一切诸善禁戒，能入一切大智慧中，能护一切无上三昧，能护己心生他喜心，受持圣法远离诸病，所求之法如愿即得，增长一切资生所须，亦能长养一切善根，能调恶王及以四姓，诸恶鬼神鸟兽水虫，护持一切诸善根本，能得如来一切诸法，乃至能得十八不共。是故我今欲遣如是法目陀罗尼，至彼世界与释迦如来。”即告金刚山童子言：“善男子，汝可往彼娑婆世界称我名字，问讯彼佛：金刚光明功德如来，以此法目陀罗尼门远赠世尊。”

金刚山童子言：“世尊，善哉！善哉！我亦欲往礼觐彼佛，并欲启受所未曾闻虚空目法门。”

尔时，复有六万亿菩萨摩訶萨、八十千亿声闻大众，同声而言：“世尊，我等亦欲诣彼世界礼觐彼佛，并欲启受所未曾闻虚空目法门。唯愿如来加我神力令得往返。”

彼佛答言：“善哉！善哉！诸善男子，宜知是时。是金刚山童子者，能调伏汝，即是汝等善知识也。”

尔时，彼佛即告金刚山童子言：“善男子，谛听！谛听！我当为汝宣说如是法目陀罗尼。”即说咒曰：

“阿嚩(一) 阿嚩阿嚩(二) 曩那蛇沙吒(三) 摩诃摩呾(四) 摩诃毗娑娑(五) 树喻低(六) 阿咤(七) 那嚩那咤祇(八) 佛阁罗哆(九) 安缕赖哆(十) 阁逻迦咤(十一) 阿那耨德叉(十二) 流浮婆(十三) 那嚩茶嚩(十四) 勒叉鲁遮那(十五) 莎吒呾嚩(十六) 陀逻尼茂阇(十七) 波逻迦咤嚩(十八) 鞞那阇(十九) 婆那鞞呼(二十) 阿那迦咤(二十一) 栴荼咤修(二十二) 波罗呾多(二十三) 修鲁遮那(二十四) 鲁遮那嚩(二十五) 鲁遮那曩嚩嚩斯(二十六) 莎呵。”

“善男子，汝当受持、读诵、书写是陀罗尼，往彼世界问讯释迦牟尼如来，如我辞曰：‘四部弟子乐受法不？四姓之人能供养不？众生’

之心不浊乱不？常能亲近于如来不？复能尊重赞叹佛不？增广流布佛正法不？金刚光明功德如来，以此法目陀罗尼门远赠世尊，能作大明，干焦一切诸恶烦恼，乃至获得如来十八不共之法。”

时，金刚山童子受持、读诵、书写如是陀罗尼已，告诸大众：“若欲往彼娑婆世界，觐见释迦牟尼如来，并欲启受所未曾闻虚空目法门者，应当远离一切色想，亦莫念于分别之相，常当修集虚空之相，远离一切取舍等相，放舍一切尘劳等相，解诸结缚专念虚空。”

尔时，大众咸作是言：“善哉！善哉！善男子。”即前礼佛礼已，系念观虚空相，于一念顷即来至此娑婆世界，觐见释迦牟尼如来，头面礼足，供养恭敬，尊重赞叹，右绕三匝，却在一面，合掌而立。

是时，宝鬘复往西方，过八万亿诸佛世界，彼有世界名曰慧闇，具足五滓。有佛世尊，号曰智幢如来、应、正遍知、明行足、善逝、世间解、无上士、调御丈夫、天人师、佛世尊，亦为四众宣说如是杂四谛法。彼时会中有诸菩萨、声闻，四众比丘、比丘尼、优婆塞、优婆夷，见是宝鬘大光明已，观察四方，仰见宝鬘在佛顶上虚空中住，即白佛言：“世尊，如是宝鬘，从何处来？谁之所遣？”

彼佛答言：“善男子，东方去此八万亿诸佛世界，彼有世界名曰娑婆，具足五滓。有佛世尊，号释迦牟尼，十号具足，亦为四众宣说开示杂四谛法，如我今于此土无异。乃至欲开如来法藏，是故彼佛遣此宝鬘，从我索取，我今与之，并欲赠彼净目陀罗尼，能作大明干焦烦恼，乃至能得如来十八不共之法。是故我今，欲遣如是净目陀罗尼，至彼世界赠彼如来。”

彼佛即告胜幢童子：“汝可往彼娑婆世界，称我名字问讯彼佛，并以如是净目陀罗尼门远相赠遗。”

时，彼众中复有无量菩萨、声闻，同声而言：“善哉！世尊，我等亦欲诣彼世界礼觐彼佛，并欲听受所未曾闻虚空目法门。”乃至彼佛即说咒曰：

“勿力呵(一) 勿力呵(二) 勿力呵(三) 勿力呵(四) 阿婆勿力呵(五) 萨[多+也]勿力呵(六) 修嚩舍勿力呵(七) 那婆勿力呵(八) 修破嚩(九) 阿能伽(十) 祇比叉(十一) 阎蛇私罗(十二) 那婆噢[口+男](十三) 呌伽钵罗(十四) 那逻那[言+阎](十五) 宿沙(十六) 翅奢私罗(十七) 阿嚩罗私罗(十八) 摩诃迫祇阁那(十九) 阿那闪陀罗(二十) 阿嚩呌伽(二十一) 那犹多闪陀罗(二十二) 娑颇啰(二十三) 阿囊伽伽(二十四) 那啰拏(二十五) 娑遮(二十六) 守留多竭婆侈那(二十七) 莎呵。

“善男子，汝当受持、读诵、书写是陀罗尼，往彼世界，乃至一面合掌而立。”

是时，宝鬘复至北方，过九万九亿诸佛世界，彼有世界名曰为常，具足五滓。有佛世尊，号发光功德，十号具足，亦为四众宣说开示杂四谛法。而彼会中有诸菩萨、声闻，四众比丘、比丘尼、优婆塞、优婆夷，见是宝鬘大光明已，观察四方，仰见宝鬘在佛顶上虚空中住，即白佛言：“世尊，如是宝鬘，从何处来？谁之所遣？”

彼佛答言：“善男子，南方去此九万九亿诸佛世界，彼有世界名曰娑婆，具足五滓。有佛世尊，号释迦牟尼，十号具足，亦为四众宣说开示杂四谛法，如我今于此土无异。乃至欲开如来法藏，是故遣此四宝华鬘，从我索取，我今与之。并欲赠彼光目陀罗尼，能作大明干焦烦恼，乃至能得如来十八不共之法。是故我今，欲遣如是光目陀罗尼，至彼世界赠彼如来。”

彼佛即告胜意童子：“善男子，汝可往彼娑婆世界，称我名字问讯彼佛，以是光目陀罗尼远相赠遗。”

时，彼众中复有无量菩萨、声闻，同声而言：“善哉！世尊，我等亦欲诣彼世界礼觐彼佛，并欲启受所未曾闻虚空目法门。”乃至彼佛即说此陀罗尼：

“阁婆摩(一) 阁婆摩(二) 阁婆摩(三) 阿驹卢吒(四) 比婆阁婆(五) 摩诃陀摩呾婆(六) 阿逻阁(七) 珊菩陀(八) 囊呾婆(九) 阿啰阁婆(十) 啰阁婆(十一) 阁坻叉地婆(十二) 摩醯阁婆尼畔陀(十三) 比牟遮婆(十四) 那啰地婆(十五) 斫迦婆(十六) 输卢多婆(十七) 输卢多婆(十八) 伽怛婆(十九) 嗜毗婆(二十) 迦地婆(二十一) 质多婆(二十二) 娑茂陀婆(二十三) [革+丞]啰婆(二十四) 叱那修留坻婆(二十五) 莎呵。

“善男子，汝当受持、读诵、书写是陀罗尼，往彼世界，乃至一面合掌而立。”

是时，宝鬘复至东方，去此六万千亿佛土，彼有世界名曰宝顶，具足五滓。有佛号曰宝盖光明功德，十号具足，亦为四众宣说开示杂四谛法。而彼会中有诸菩萨、声闻，四众比丘、比丘尼、优婆塞、优婆夷，见是宝鬘大光明已，观察四方，仰见宝鬘在佛顶上虚空中住，即白佛言：“如是宝鬘，从何处来？谁之所遣？”

彼佛答言：“西方去此六万千亿诸佛世界，彼有世界名曰娑婆，具足五滓。有佛世尊，号释迦牟尼，十号具足，亦为四众宣说开示杂四谛法，如我今于此土无异。乃至欲开如来法藏，是故遣此四宝华鬘，从我索取，我今与之。并欲赠彼圣目陀罗尼，能作大明干焦烦恼，乃至能得如来十八不共之法。是故我今，欲遣如是圣目陀罗尼，至彼世界赠彼如来。”

即告虚空声童子：“善男子，汝可往彼娑婆世界，称我名字问讯

彼佛，并以如是圣目陀罗尼远相赠遗。”乃至复有无量菩萨声闻大众，同音而言：“善哉！世尊，我等亦欲诣彼世界礼觐彼佛，并欲启受所未曾闻虚空目法门。”乃至彼佛即说此陀罗尼：

“阿罗摩(一) 阿罗摩(二) 阿罗摩(三) 阍蛇啰阍(四) 字犁蛇罗阍(五) 伽阍呼(六) 喽啰遮罗(七) 阿那遮(八) 阿咭莎啰(九) 咭伽莎阍那(十) 那乌呵(十一) 那啰咭那乌呵(十二) 摩醯湿波罗遮摩(十三) 阿摩呢呵(十四) 阿蛇娑利罗(十五) 斫啾遮摩(十六) 斫啾娑斫啾那(十七) 那嚩那嚩摩阍(十八) 阿嚩咭嚩十九) 车婆那婆(二十) 咭伽禅缕(二十一) 娑啰梅陀啰(二十二) 摩醯湿波罗呢罗那嚩(二十三) 娑檀摩叉蛇(二十四) 莎呵。

“善男子，汝当受持、读诵、书写是陀罗尼，往彼世界，乃至一面合掌而立。”

时，四童子变此世界地平如掌，香华、幡盖、七宝具足，为供养佛。一切天宫、阿修罗宫悉为震动，诸天悦豫多受喜乐，咸以香华、七宝、幡盖、种种伎乐供养于佛。时，四童子作如是等供养佛已，上升虚空高七多罗树，各执四宝说偈赞叹：

“佛是清净大法王， 为诸众生说甘露，
于诸众生心如地， 大宝商主愍一切。
为众生说清净法， 令离诸苦及烦恼，
如来心等如虚空， 其语微妙知真道。
具足戒禁及智慧， 永灭烦恼降甘露，
为渴法者出恶世， 智炬大明能坏闇。
虽无修集八圣道， 及以证得解脱者，
如来犹故生怜愍， 施诸人天净法眼。
能度众生生死岸， 能施无上七财宝，
能令众生悔生死， 具修三十七助道。
法宝久失佛今示， 是故得名无上尊，
四方众生已大集， 唯愿怜愍转法轮。”

尔时，一切无量大众心生欢喜，各作是言：“如是无量无边众生从何处来？威仪清净具无量德，惭愧智慧皆悉成就，我从昔来未曾睹见如是妙色五通大仙。”

尔时，世尊告憍陈如比丘：“憍陈如，四方多有无量菩萨，悉来集会，为听法故，今当至心清净其意。”

尔时，世尊以微妙音告四童子：“诸善男子，善来甚快！从何方面何处而来？”

时，四童子敬礼佛足周匝围绕。尔时，金刚山童子言：“世尊，南方去此九万二千亿恒河沙等诸佛世界，彼有世界，名金刚光藏，具

足五滓。有佛世尊，号金刚光明功德如来，十号具足，今现在为诸众生，宣说开示杂四谛法。彼佛劝我至此世界，问讯世尊，并欲听受虚空目法门。世尊，彼金刚光明功德如来，致敬殷勤问讯世尊，并遗如是陀罗尼，能作大光明干焦烦恼，乃至能得如来十八不共之法。”即于佛前说如是咒，乃至四童子亦复如是。说是咒已，其地即时六种震动。

一切龙王各作是言：“我等亦当共至佛所。”尔时，东方有二龙王，一名牛护，二名宝护，是二龙王与六万龙王。南方亦二，一名为月，二名婆修，与七万龙王来至佛所，头面敬礼，前白佛言：“世尊，我等皆能受持、读诵、书写如是法目陀罗尼。若有比丘、比丘尼、优婆塞、优婆夷，受持、读诵、书写如是法目陀罗尼者，我等皆当诚心守护。”西方、北方亦复如是。

尔时，世界一一各有十万龙王，来至佛所头面礼敬。尔时，龟兹国土有一龙王，名曰海德，是阿那婆达多龙王弟，与九万龙王。于阗国土有一龙王，名乐藏宝，亦是阿那婆达多龙王弟，与万八千龙王。波罗越国有一龙王，名曰山德，亦是阿那婆达多龙王弟，与二万龙王。师子国土有一龙王，名曰宝藏，与四万八千龙王。毗荼国土有一龙王，名曰长发，与四万二千龙王。念蜜奢山有一龙王，名曰婆修吉，与八千龙王。乌菴国土有一龙王，名阿钵罗罗，与二万五千龙王。乾陀罗国有一龙王，名伊罗钵多，与三万龙王。真丹国土有一龙王，名曰三角，与万八千龙王。难陀龙王、优波难陀龙王，亦与无量龙王，共至佛所头面礼敬，白佛言：“世尊，我等皆能受持、读诵、书写如是陀罗尼门，乃至不忘不失一字。”

佛言：“善哉！善哉！善男子，汝等真实能护正法。”

尔时，世尊告正语天女：“天女，汝能守护我正法不？”

“世尊，如来在世及灭度后，是陀罗尼流布之处，我当守护。有受持者，随其所求我当与之。若复有欲见我身者，我当现之。世尊，若有比丘、比丘尼、优婆塞、优婆夷欲见我者，当净其身，持戒精进，于一日中三时洗浴，断食三日，独在静处，若佛像边，若在塔中，若处静室，以妙香华、种种幡盖及诸味浆供养于佛，面正东向读诵如是陀罗尼句：

“唵吒置(一) 唵吒置(二) 休娄(三) 休娄(四) 屯豆娄(五) 屯豆娄(六) 咭吒(七) 咭吒(八) 比莎诃。

“是时，四众诵是陀罗尼已，我当随诸四众之所愿求，我悉当令一切成就。若我不来，即为欺诳十方诸佛，亦莫令我成阿耨多罗三藐三菩提。”

尔时，佛告罗睺阿修罗王、毗摩质多阿修罗王、毗娄遮那阿修罗王：“我今以此净目陀罗尼，付嘱汝等。何以故？汝有大力，若有众

生不信三宝，能令信故。”

诸阿修罗言：“善哉！世尊，我等护持。若有四众比丘、比丘尼、优婆塞、优婆夷，若佛在世，若灭度后，受持、读诵、书写广说是陀罗尼，我于是等能施八事。何等为八？一者、健行，二者、乐听受法，三者、心无怖畏，四者、常明无闇，五者、善愿具足，六者、解脱，七者、具足辩才，八者、善法增长。世尊，若阿修罗父母、兄弟、妻子、眷属恼是人者，我等当治。若我不于此世界中护佛法者，则为欺诳十方诸佛。”

尔时，世尊观四众已，告憍陈如比丘：“憍陈如，一切大众甚乐闻法！无量世界无量众生，悉为法故来集于此，咸皆欲知法行方便，成大智慧，远离贪欲一切烦恼，真实了知法行方便。”

时，憍陈如白佛言：“善哉！世尊，诚如圣教。世尊，四方世界无量菩萨，悉持四佛所与欲来并欲启受虚空目法行。今正是时，唯垂怜愍，为众生故而宣说之。世尊，所言法行，法行比丘，云何名为法行比丘？唯愿世尊，分别演说法行比丘。”

佛言：“憍陈如，至心谛听！当为汝说。若有比丘，读诵如来十二部经，谓修多罗乃至优婆提舍，是名乐读，不名法行。复有比丘，读诵如来十二部经，乐为四众敷扬广说，是名乐说，不名法行。复有比丘，读诵如来十二部经，能广演说思惟其义，是名思惟，不名法行。复有比丘，受持读诵十二部经，演说思惟观其义理，是名乐观，不名法行。

“憍陈如，若有比丘能观身心，心不贪著外一切相，谦虚下意不生憍慢，不以爱水溉灌业田，亦不于中种识种子，灭觉观心境界都息，永离烦恼其心寂静，如是比丘，我则说之名为法行。如是比丘，若欲获得声闻菩提、缘觉菩提、如来菩提，即能得之。憍陈如，如工陶师埏埴泥，置之轮上随意成器，法行比丘亦复如是。憍陈如，若有比丘修法行者，当观三事：一者、身，二者、受，三者、心。观三事已得二种智：一者、尽智，二者、无生智。

“憍陈如，云何尽智？云何无生智？知尽烦恼名为尽智，知尽有支名无生智。复次，无行行智名曰尽智，无行果智名无生智；尽诸使智名曰尽智，尽烦恼智名无生智。复次，知尽诸行名曰尽智，尽一切有名无生智；分别尽物是名尽智，知诸缚解名无生智；知尽根界名曰尽智，知尽缘界名无生智；不觉观烦恼名曰尽智，不觉观果报名无生智。复次，尽三地智名曰尽智，尽一切漏名无生智。复次，我生已尽，梵行清净，名曰尽智；更无余有，名无生智。如是二智即名一智，亦名一行知于三道。若有比丘能断三道，是名法行。能作是观，是观心、受。云何比丘能观察身？若有比丘观息出入，是名观身、观受、观心。云何名为观息出入？息入出者，名阿那波那，入名阿那，出名波那，观于出入如门如向。若有比丘能如是观，是名法行。若有比丘能观能数，随息入出冷暖长短，若遍满身，系心鼻端，能观新

故，分别诸相能观生坏，求舍摩他善入于定，亦能观察息之粗细，乃至观于内身，身作身想，是名比丘修于法行。

“憍陈如，修数息时获得二事：一者、离恶觉观，二者、观息相貌。修集随时亦得二事：一者、专念念心，二者、离善觉观。观于冷暖亦得二事：一者、分别出入，二者、观心数相。修观身时亦得二事：一者、身轻，二者、心轻。转观生灭亦得二事：一者、知一切法是无常相，二者、知一切法是无乐相。善男子，法行比丘念入出息系心一处。云何数减？二数为二，三数为三，乃至十数为十，是名数减。云何数增？一数为二，乃至九数为十，是名数增。何故修增？坏一切觉观故。得初禅时观息出入，及以心相。初禅五支：一、觉，二、观，三、离生喜，四者、受乐，五者、定。具五支时离贪患痴。若有比丘具是五支，是名法行。远离五事，成就五事，修集梵行成大功德。

“憍陈如，若有比丘能得二禅，名为法行。若有比丘观息出入，系心一处远离喜乐，得第三禅不喜不乐。何以故？一心系念息入出已，远离喜乐得第四禅。若有比丘观息入出则观五阴，若观五阴是名法行。若比丘见一切法行生灭，乃至见一切烦恼生灭，是名法忍。若比丘见眼空，乃至见意识空，是名空忍。若比丘见眼无相，乃至见意识无相，是名无相忍。若比丘不愿于眼乃至意识，是名无愿忍。若比丘观苦异、乐异、不苦不乐异，是名中谛忍。若为众生行于生死，如是名为随上谛忍。云何随忍、随根、随力、随于觉观乃至随涅槃？于如是法心不著者，是名信忍，是名为信，不名信根。若摄身心不令造恶，是为精进，不名进根。若能专念如是等法，是名为念，不名念根。心心数法能系一缘，是名为定，不名定根。若能不观如是等相，是名为慧，不名慧根。若观如是无根，是名法行。

“憍陈如，若有比丘观于顶法、世第一法，观三解脱空无相愿、无常苦空，是名法行，是名空三昧。如三昧，缘无受命，缘无自在。无相三昧，缘尽、缘坏、缘灭、缘厌。无愿三昧缘于甘露，非甘露行，有甘露行非缘甘露。有空三昧缘于甘露，非甘露行，有甘露行非缘甘露。无相三昧缘于甘露，非甘露行，有甘露行非缘甘露。憍陈如，若有比丘缘慧灭庄严入无愿三昧，是名缘于甘露非甘露行。若有比丘缘慧灭而得解脱，名甘露行非缘甘露。空与无相亦复如是。憍陈如，若有比丘能如是观，是名法行。

“憍陈如，若有比丘观受观心，是名法行。何以故？能坏我见二十种故。憍陈如，断见、我见各有五种：色断乃至识断，是名五断见；色我乃至识我，是名五我见。憍陈如，五种断见分别则有四十四种：十六种说想，八说无想，八说非想非非想，六说种种想，六种说断，是名四十四种。我见分别十八：四定说我，四种说边，四说异事，六说无求三昧。是名六十二见。二十我见因缘，能生四百四种烦恼。为离如是诸烦恼故，观于身心是名法行，如是比丘能观身心。

“憍陈如，云何八人？云何决定？憍陈如，断见之人言一念断，常见之人言八忍断，是二种人俱得决定后离烦恼俱亦无妨。憍陈如，能得八忍是名八人，得十六心是名决定，是名如法。憍陈如，若有比丘成出入息，即得八人名，亦名决定。憍陈如，若有比丘成就数息，即得信根乃至慧根；若得五根，即得世间第一法。如是比丘，能破一切疑网之心，是名真实修集圣行。若有比丘成就苦智，则断十种烦恼，是名修初无漏心观。尔时次第观无愿三昧，观无愿时修三十七助道之法，是名无漏定智，得苦法忍、苦法智、集法忍、集法智。尔时，观于色界五阴，无色界四阴，如欲界苦，色、无色界亦复如是；如是观已，断色、无色十八种烦恼；十八种断已，作是思惟：‘如是诸苦，从何业来？谁之所造？’作是观已，了知是苦从爱因缘：‘我若不拔如是爱根，必当生苦。’是故观集，作是观已断七烦恼；观欲界集已，色、无色界亦复如是。如是观已，得比忍、比智，作是观时断十二烦恼。憍陈如，具八忍者是名见法。断三界集已，复作是观：‘何因缘故断于苦集？为安乐故。夫安乐者即是灭谛。’尔时初观欲界灭谛，得灭法忍断七烦恼，色、无色界亦复如是。作是观已，得灭比忍，灭十二烦恼。复作是观：‘何因缘故得是比忍？因修八道，以八正道力故，知欲界苦集灭谛，色、无色界苦集灭谛。’尔时，次生道法忍，得已能断八种烦恼。尔时复观色、无色界，得道比忍，断十四烦恼。以修集故，远离八十八种烦恼，是名决定得须陀洹果，是名十六心，是名必得菩提，是七往来断一切苦。憍陈如，有人从信决定，有人从法决定，有人从一生得须陀洹果乃至得阿罗汉，有人入信根乃至慧根，有人修定，有人修慧。有人得初禅乃至四禅，入决定观，观一切行无常次第生灭，远离一切凡夫之法。有人观一切行无常、苦、空、不净，不得自在无有寂静，从缘而生，从缘而灭，作是观已，得寂静灭谛。是名比丘如法而行。憍陈如，如来了知一切众生诸根利钝，亦知一切众生心性诸烦恼性，是名如来随应众生而为说法，随诸烦恼宣说对治，是故得名萨婆若智。

“憍陈如，我涅槃后有诸弟子，受持如来十二部经，书写读诵，颠倒解义，颠倒宣说，以倒解说，覆隐法藏，以覆法故名昙摩鞞多。憍陈如，我涅槃后我诸弟子，受持如来十二部经，读诵书写，而复读诵书说外典，受有三世及以外外，破坏外道善解论义，说一切性悉得受戒，凡所问难悉能答对，是故名为萨婆帝婆。憍陈如，我涅槃后我诸弟子，受持如来十二部经，书写读诵，说无有我及以受者，转诸烦恼犹如死尸，是故名为迦葉毗部。憍陈如，我涅槃后我诸弟子，受持如来十二部经，读诵书写，不作地相、水火风相、虚空识相，是故名为弥沙塞部。憍陈如，我涅槃后我诸弟子，受持如来十二部经，读诵书写，皆说有我不说空相犹如小儿，是故名为婆嗟富罗。憍陈如，我涅槃后我诸弟子，受持如来十二部经，读诵书写，广博遍览五部经书，是故名为摩诃僧祇。善男子，如是五部虽各别异，而皆不妨诸佛

法界及大涅槃。

“云何名为随于信行？若信三宝物足信根，从信根因缘入于决定，得须陀洹果、斯陀含果、阿那含果，过色、无色界，得阿罗汉果，从信得解名信解脱，亦名一分，亦名身证，名慧解脱，是名随信行。

“憍陈如，云何名为随于法行？若有从法入于决定，具足慧根，得须陀洹果、斯陀含果、阿那含果，过色、无色界，得阿罗汉果，是名见到二分解脱，亦名身证，慧得解脱、心得解脱，得灭尽定，是故名二分解脱，是名无学解脱，是名法行，是名成就观身乃至成就法观，是名成就毗婆舍那及奢摩他。

“云何名为奢摩他？奢摩他者，名之为灭，能灭贪心、瞋心、乱心，名奢摩他。云何名为奢摩他相？能灭贪相及瞋痴相，名奢摩他相。云何名为随奢摩他入于决定？若能随修奢摩他行，尊重赞叹，向奢摩他方便庄严，是则名为奢摩他相。若有比丘深自思惟：‘我之贪心，唯观不净乃能坏之；瞋恚之心，慈能坏之；十二因缘能坏愚痴。’是名奢摩他相。

“云何名为毗婆舍那？若修圣慧，能观五阴次第生灭，是名毗婆舍那。复次，若观诸法皆如法性，实性实相真实了知，是名毗婆舍那。云何名为毗婆舍那相？若能成就具足念心，观一切行从缘而生，从缘而灭；一切行无自在、无作、无受，是名毗婆舍那相。云何名为从毗婆舍那入于决定？至心念于毗婆舍那，恭敬尊重向庄严道，是名从毗婆舍那入于决定。

“云何名为出法摄心非灭法摄心？若比丘能观心出因缘乃至一切行出因缘，是名出法摄心非灭法摄心。云何名为灭法摄心非出法摄心？若比丘能深观察灭心因缘乃至一切行灭因缘，是名灭法摄心非出法摄心。云何名为非出法摄心非灭法摄心？若比丘能观心性眼性乃至识性，是名非出法摄心非灭法摄心。云何缘摄心非思惟摄心？若比丘能观出息不观入息，是名缘摄心非思惟摄心。云何名为思惟摄心非缘摄心？若比丘观于入息，是名思惟摄心非缘摄心。云何名为非缘摄心非思惟摄心？若比丘观于心性、眼性乃至意性，是名非缘摄非思惟摄。

“憍陈如，若比丘能摄心者，则得八十诸三昧门，及修三解脱门。若比丘观过去身，及修庄严观身见身，是名修无愿解脱门。若比丘观过去身已，唯见于心而不见身，及修庄严观身见身，是名修无相解脱门。若比丘观过去身已，亦不见作及以作者，作者无身，身无作者，修庄严道观身见身，是名修空解脱门。观受、心、法亦如是。

“复次，憍陈如，三解脱门修庄严观，观一切行不出不灭，出已则灭，灭无所至，不至去来，是名庄严无愿解脱门。复次，观未来世诸行未出，若行未出则无有灭，是名庄严无愿解脱门。不毕竟尽，毕竟尽者则无生灭，若无生灭即毕竟尽，若毕竟尽即空因缘，若如是观

毕竟尽者，是名庄严空解脱门。若观诸行是毕竟尽，即无生灭，若无生灭即无有空。何以故？先有后无名之为空，若本无者则无后无，若无后无云何名空？若无行者即是为空；毕竟尽者，非是有为，亦非无为。空亦非行，亦非无行。是故毕竟尽者，非有为摄，非无为摄，是名庄严无相解脱门。若一切行毕竟尽者，即是涅槃，非过去、未来、现在。是故非过去行灭名为涅槃，非未来、现在行灭名为涅槃，须陀洹人见是涅槃，乃至阿罗汉人见是涅槃。何名苦谛？观一切行不见第一谛，观一切因不见第二谛，观一切灭不见第三谛，观一切道不见第四谛。云何名生？本无后有，是名为生。云何名灭？有已还无，是名为灭。无有出灭，是名为尽。何因缘故，无有出灭名之为道？道有六行，修非修，行非行，知非知。若有比丘，能见如是生灭法者，是人能厌一切诸行，能见一切行无常相。云何无常相非无常法？若有相杂初无漏根行，若有相杂无愿解脱门行，若有空相、苦相、不净相、无我相，是名无常相非无常法。云何无常法非无常相？所谓三界色相乃至法相，是名倒相，是名舍相，非无常相，是名无常法非无常相。云何无常相亦无常法？所谓一切众生未得决定，以世俗道入诸三昧，随法相忍，是名无常相亦无常法。云何非无常相非无常法？所谓寂静常相、解脱净相，是名非无常相非无常法。云何名为得第一谛？所谓观于六根、五阴犹如镜像，名得第一谛。云何一心观于四谛？若观诸行悉是苦因，以苦因故可见可灭可得远离，如是名为心缘无漏，是故一心获得四谛，名离有漏心得解脱。若有比丘观于心心，是名无愿解脱门。观心心已，观十二事：一者、业，二者、行，三者、苦，四者、空，五者、坏，六者、不自在，七者、过去，八者、现在，九者、未来，十者、因缘，十一者、无作，十二者、无受。是名见于心心，名无愿解脱门。若有比丘观察是心，无有心主，无出入者，无能远离，无可远离，是名见于心心，得空解脱门。若观无有入定之心，而得远离一切烦恼，无因缘故烦恼不生，是名远离见于心心，得无相解脱门。若如是观，即得远离有漏之心，得无漏解脱。

“憍陈如，一切有为诸行无有决定，若不定者，云何而得入于定聚？若言观察于三世已得入定聚者，是义不然。何以故？过去已尽，未来未出，现在无常，三世观异，云何得入正聚耶？是故一切异观性不决定。憍陈如，譬如殿堂有四梯橙，若言不由初第一橙至四橙者，无有是处。登初橙时，亦不得名登第四已，如是四橙亦不名一。憍陈如，若是四谛即一谛者，可一心得。憍陈如，观时亦异，得时亦异；观时异者，因果尽坏；得时异者，苦智、集智、灭智、道智。若有比丘观行无常，是苦、无我、不净、无住，是漏结缘，是一切有，是名系缚。是故不求诸阴、诸行，厌一切行乐求涅槃，至心思惟涅槃功德，深乐寂静不惜身命，修奢摩他、毗婆舍那，是名比丘修集法行。

“憍陈如，云何比丘心能见心？若有比丘能观察心，心是无常、

是生灭法，是名比丘心能见心。如是比丘修空三昧。云何名空？阴、入、界空，谛空、实空、十二因缘空、性空。云何阴空？所谓色空无我我所，乃至识空无我我所，是名阴空。入、界二空亦复如是。云何谛空？所谓苦谛无得无舍，乃至道谛亦复如是。云何实空？一切法中无有觉观、我及我所，是名实空。云何十二因缘空？十二因缘即是十二有支，观十二支无我我所，是名十二因缘空。云何性空？若有比丘，观于眼空无我我所，乃至意空亦复如是，是名法行能观心心。如是比丘不见众生、寿命、士夫、某甲，知诸法性真解世谛，为流布故说阴、入、界，知一切法性无出灭。如是比丘能度生死，能知一切苦集灭道，能断烦恼。

“憍陈如，若有比丘修集法行，知一切法从因缘生，从因缘灭，如是比丘得三解脱知色真相。色真相者，所谓碍相、受受相、想觉相、行行相、识知相。是名真知一切法相，如是观已得空解脱门。见一切法无作受者、寿命、自在，唯见无常、苦、无我等，是名得无愿解脱门。观一切法无生无灭，是名得无相解脱门。

“憍陈如，法行比丘能得神通，无恶觉观，口终不说四种恶过，无有斗争不听恶言，尔时即得远离五盖，增五善根。是法行比丘获得初禅，入初禅已欲得身通，系心鼻端观息入出，深见九万九千毛孔息之出入，见身悉空，乃至四大亦复如是。如是观已，远离色相获得神通；乃至四禅亦复如是。云何法行比丘获得眼通？憍陈如，若有比丘观息出入真实见色，既见色已作是思惟：‘如我所见三世诸色，意欲得见随意即见。’乃至四禅亦复如是。云何法行比丘得天耳通？憍陈如，若有比丘得初禅时，观息出入已次第观声；乃至四禅亦复如是。云何法行比丘得他心智？若有比丘观息出入得初禅时，修奢摩他、毗婆舍那，是名他心智；乃至四禅亦复如是。云何法行比丘得宿命智？憍陈如，若有比丘观息出入，得初禅时获得眼通，得眼通已，观于初有迦罗罗时，乃至五阴生灭无量劫中五阴生灭；乃至四禅亦复如是。所言禅者，何故名禅？疾故名禅；疾大疾，住大住，静寂静，观灭远离是名为禅。初禅者亦名具足，亦名远离。云何具足？云何远离？言远离者远离五盖，言具足者具足五支，所谓觉、观、喜、安、定。云何名觉？如心觉大觉、思惟大思惟，观于心性，是名为觉。云何名观？若观心行、大行、遍行随意，是名为观。云何为喜？如真实知大知心动至心，是名为喜。云何为安？所谓身安、心安、受安，受于乐触，是名为安。云何为定？若心住大住不乱，于缘不谬无有颠倒，是名为定。第二禅者，同离五事，所谓五盖；具足三支，一喜、二安、三定。入第三禅，亦离五事，具足五支：一者、念，二者、舍，三者、慧，四者、安，五者、定。入第四禅，亦离五事，具足四支：一者、念，二者、舍，三者、不苦不乐，四者、定。憍陈如，若有比丘具足四禅，是名法行。

“憍陈如，若有比丘观身厌患，远离身相、一切身触、喜触、乐

触，分别色阴远离色阴，观无量空处，是名法行。比丘入空处定，是名比丘修集法行。憍陈如，云何比丘得识处定？若有比丘修舍摩他、毗婆舍那，观心意识，自知此身不受；知三受已，得远离是三种受，是故名得识处定，是名法行。憍陈如，云何比丘得少识处定？若有比丘观三世空，知一切法行亦生亦灭，空处识处亦生亦灭；作是观已次第观识：‘我今观识亦非识非非识。若非识者是名寂静，我今云何永断此识？’作是观已得少识处，是名比丘得少识处定。憍陈如，云何比丘获得非想非非想定？憍陈如，若有比丘有非心想，作是顺忍：‘我今此想是苦、是漏、是疮、是病，是不寂静。若我能断如是非想及非非想，是名寂静。’若有比丘，能断如是非想非非想，是名获得无想解脱门。何以故？法行比丘作是思惟：‘若有受想，若有识想，若有触想，若有空，若有识，若有非想非非想，如是等想名为粗想。我今若修无想三昧，则能永断如是等想。’是故见于非想非非想，为寂静处；如是见已，入非想非非想定。若得非想非非想定已，不爱不贪能破无明；破无明已，名为获得阿罗汉果。前三种定二道所断，后第四定终不可以世俗道断。凡夫离于非想非非想处，无粗烦恼，亦有十法，所谓一受、二想、三行、四触、五思惟、六欲、七解、八念、九定、十慧。云何为受？所谓识受。云何为想？所谓识想。云何为行？所谓法行。云何为触？所谓意触。云何为思？所谓法思。云何为欲？所谓欲入出定。云何为解？所谓法解。云何为念？所谓念三昧。云何为定？所谓心如法住。云何为慧？所谓慧根、慧力，观向四果行，乃至得阿罗汉果，观于生灭及空三昧，观于四大如四毒蛇。如是十法，第四空处具足而有；以其无有粗烦恼故，一切凡夫谓是涅槃。

“憍陈如，若有比丘修集圣道，厌离四禅及四空处，观于灭定庄严之道，作是思惟：‘诸出入息悉是无常，我若能断出入息者，即是安乐。’是故一切诸行因缘悉灭，受灭乃至慧灭，觉观灭故，阴入界灭，贪恚痴灭，一切心数法灭，一切非心数法亦灭，是名不与凡夫共法，非是世法，是无学法。憍陈如，若须陀洹、斯陀含，终不能得如是灭定。若次第得须陀洹果，亦不能得。若须陀洹舍是身已，得阿罗汉果，亦不能得。若有具足八解脱者，是人能得。”

“憍陈如，若使如来穷劫尽劫说是法目陀罗尼法乃能穷尽，是名法无碍智。憍陈如，如是法目陀罗尼者不可思议。憍陈如，假使有人，能以免毛滴数知海水滴，不能数知法目陀罗尼所有功德。若除如来，欲说尽者无有是处，乃至一切娑婆世界微尘亦尔。”

尔时，世尊告金刚山童子言：“善男子，汝所持来法目陀罗尼，吾今所说颇有异不？”

“不也，世尊。”

“善男子，如是说不？”

“世尊，实如是说。”

“善男子，若有人能受持如是法，读诵书写，广为人说，当知是

人常为一切人、天、龙、神、阿修罗、乾闥婆、迦楼罗、紧那罗、摩睺罗伽等之所守护，一切四魔不能得其便，度烦恼河入八正道。”

金刚山童子言：“善哉！善哉！世尊，实如圣教。”

尔时，世尊告憍陈如：“若比丘、比丘尼、优婆塞、优婆夷，修行是法无能坏者。是名施光，能净寂静，无有行处，无浊无动，无有舍宅，无少无多，名至处行、细行、坚行，能坏四魔及四魔众一切邪见，度生死河入智慧海，常为诸圣之所赞叹，得近如来所入之处。虽复未断一切烦恼，亦得上身、无上菩提、上色、上力、上辩、上念、上慧、上处，或得典领作四域王，若三二一，若作帝释，乃至得作他化自在王，若作梵王。若复获得菩提树下金刚之床，梵音深远，其心平等，得大悲心，得舍摩他，坏诸烦恼，名无上尊。”

说是法时，舍利弗、目犍连等，于一坐处得阿罗汉果。

尔时，一切世人、诸天而赞叹言：“如来功德不可思议，无量众生得须陀洹果、斯陀含果、阿那含果、阿罗汉果，发阿耨多罗三藐三菩提心。”

尔时，四天王及功德天白佛言：“世尊，随是经典所流布处，我当护其四部弟子，及其国土、城邑、村落、诸王、人民。”

大方等大集经卷第二十四

虚空目分中世间目品第二

尔时，世尊即放眉间白毫相光，悉蔽十方诸佛世界日月星宿、珠火灯明所照之处，一切石山、诸恶刺棘为不复现。十方无量恒河沙等世界众生，见是光已，各各系念思惟善事。其中诸佛见是光已，各告己众而作是言：“善男子，过于无量恒河沙世界，彼有世界名曰娑婆，具足五滓。有佛出世，号释迦牟尼如来、应、正遍知、明行足、善逝、世间解、无上士、调御丈夫、天人师、佛世尊。无量世界无量菩萨、无量声闻，悉集彼土坐彼佛前，彼佛即为宣说法行法目陀罗尼门。为诸声闻说法行已，放大光明，将欲演说净目法目陀罗尼法；为中乘者，得缘觉果；为诸菩萨，庄严成就阿耨多罗三藐三菩提，具足十地如来十八不共之法，转不退轮坏三恶趣，令修八圣得无上果。”

尔时，十方恒河沙等世界诸众，闻是语已，各各白佛言：“世尊，我欲往彼娑婆世界至说法处，听受如是净目法门。”

尔时，无量诸菩萨众，悉共来诣娑婆世界，到于佛所，头面礼拜，却坐一面。时，此世界无量梵天，往至佛所，供养恭敬，却坐一面。百亿魔天、百亿化自在天、百亿兜率天、百亿夜摩天、百亿帝释天、百亿四天王天、百亿日月天、百亿自在天、百亿阎罗王、百亿地鬼、四百亿阿修罗、四百亿龙王，如是等众悉向佛所，恭敬供养，却坐一面。无量沙门及婆罗门悉得神通，来向佛所，恭敬供养，却坐一

面。

诸世界中外道相师，见光明时作是思惟：“如是光者，非是日月星宿之明，必是异光。如是不久七日并出，当焦四海、须弥山王、一切草木。其后欲界火灾当出。”或复有言：“却后不久，必当雨毒害于一切。”或复有言：“却后不久，必当雨刀害诸人物，恶时将至谁能救之？”或复有言：“瞿昙沙门怜愍一切，唯是能救，施其寿命。”

尔时，一切无量众生至心念佛，念已即见是大宝坊，以佛力故即至坊中。尔时，波斯匿王，以佛神力故亦见宝坊，以佛力故得到坊中。忧填耶那王、恶性王、输头檀王、摩醯陀王、修陀奢那王、频婆娑罗王，如是等王亦因佛力得见宝坊，悉至坊中供养礼拜次第而坐。各作是念：“今此众中有大仙人，有佛世尊，此光因缘今当问谁？当问仙人，问佛可耶？”

尔时，须陀舍那王言：“我今有大婆罗门师，名曰电发，善知相法能解能说，是最可问。”电发闻已，即作是言：“我所博览一切相书都无此事，我实不能解此光瑞。”阎浮提中一切相师，其数五百悉不能解。

尔时，频婆娑罗王语诸王言：“汝何故狂？此大众中有佛世尊，号释迦牟尼，具一切智，善知世间、出世间相，了十二月善相之书，大悲怜愍一切众生，实语正语，唯佛能说是光报应。”

尔时，诸王及诸大众一切宗仰，共白佛言：“世尊，唯愿如来为我等说十二月相书。”

佛言：“大王，今此大会不应宣说世间相书。”

频婆娑罗王白佛言：“世尊，今此会有诸众生，不信如来所有功德，又不信是一切智人。唯愿破坏如是疑心，而宣说之。是诸众生若得闻已心生喜信，生信心已，乃可为说出世之道。如是众生亦当乐受，易可调伏。”

佛言：“大王，至心谛听！我当说之。大王，往昔雪山有一仙人，名婆伽婆，食果草根，修集慈心，而不能除诸烦恼结，不能调伏贪欲之心。时，彼住处有一雌虎，即共行欲，虎便怀妊，日月已满，至此人所产十二子。是时，仙人心怜愍故，即取洗浴而哺养之，虎母心爱随时乳养。尔时，仙人各为立名，一名竭伽，二名跋伽婆，三名为虎，四名师子，五名担重，六名婆罗堕阁，七名步行，八名婆罗奴，九名健食，十名恶性，十一名师子担，十二名健行。是十二子年始七岁，食草根华果。是时，父母俱时命终。时，十二子心怀愁恼，仰天号哭：‘如何一旦无所归依！’时，有树神闻是声已，作如是言：‘诸童子，且莫啼哭！有归依处，所谓梵天怜愍众生。汝等应当昼夜六时净自洗浴，向于虚空，至心礼拜求哀梵天。梵天当以无碍天耳闻汝等声，闻已当来至汝住处，以怜愍故，来已当坏汝等痴闇，施慧光明得智慧已，一切诸天当供养汝，况世间人！’时，十二子闻是语已，如教而行经十二年，然后梵天乃闻其声，即来下至三十三天。

“尔时，帝释见梵天来即前供养，既供养已，即复白言：‘大士，欲何所至？’”憍尸迦，汝不见彼雪山之中十二仙耶？憍尸迦可共往彼。’时，释提桓因与无量天，相随俱下至雪山中。时，十二仙见梵天来，欢喜踊跃礼拜供养。时，梵天王告十二童子：‘汝等何故，十二年中精勤苦行供养于我？欲何所求？为求名声、色力、财宝、圣道、智慧、诸天身耶？’时，竭伽仙白梵天言：‘大士，我今不求如是等事，我欲求智慧，为众生故。我等孤稚，少失覆荫，自随其心，无教告者。唯愿大士施我智慧，令我识知善恶等业，及了众生善恶等业，亦知众生国土城邑、刹利、婆罗门、毗舍、首陀、男女大小、善恶等相、受苦乐事。诸王贪国无厌足者，兴兵相伐衰盛等相，若我知己，当以方便教灭恶相，令得受乐。’”（佛说相法悉不译出。）

虚空目分中弥勒品第三

尔时，弥勒菩萨即于佛前，心念说偈，问于如来：

“非有途路，而有轮转；如来亦不，
住一切道，非道见道，道见非道？”

佛言：“善男子，非道者即是不出不灭，不住非智，非智境界，非明非闇，非常非断，非善非恶，非是色阴乃至识阴，是名实性，是名法性，名一切行，名真实际，是名非道。如是道中，诸佛如来转于法轮，而不贪著如是诸道。若有众生，道见非道，非道见道，如是众生不能达于道与非道及知三道。如来悉能分别解说，及以断道。

“善男子，如来世尊于无道中而转法轮，为坏众生三种道故。何等三道？一、烦恼道，二者、苦道，三者、业道。业道者，所谓行、有。烦恼道者，所谓无明、爱、取。苦道者，所谓识、名色、六入、触、受、生、老、死等。如是三道，何因缘有？触缘故有。善男子，因眼见色而生爱心，爱心者即是无明，为爱造业即名为行，至心专念名之为识，识共色行是名名色，六处生贪是名六入，因入求受名之为触，贪著心者即名为爱，求是等法名之为取，如是法生是名为有，次第不断名之为生，次第断故名之为死，生死因缘众苦所逼名之为恼，乃至识法因缘生贪，亦复如是。如是十二因缘，一人一念皆悉具足。出有三种：一者、因出，二者、初出，三者、道出。若有比丘修行法行，观察所有爱心相貌。比丘当观，若有爱心即是无明，无明之体能出二过：一者、出行，二者、出识。识亦有二：一者、出名，二者、出色。名色亦二：一者、无住，二、住六入。六入亦二：一、不厌欲，二、能生触。触亦有二：一、生受心，二者、求受。受亦有二：一、受苦乐，二、生贪爱。爱亦有二：一者、系缚坚固，二者、求

取。取亦有二：一者、贪心，二者、求有。有亦有二：一者、乐住，二、生因缘。生亦有二：一者、生老，二者、苦缘。老亦有二：一、坏壮色，二、作死因。死亦有二。一、坏寿命，二、爱别离。是名出因。云何初出？若有比丘修集法行，观如是法，亦出亦灭，是名初出。”

尔时，世尊告憍陈如：“云何道出？若比丘见道有二种：一者、行行，二者、慧行。憍陈如，汝颇知是行行、慧行耶？”

憍陈如言：“未知，世尊。唯愿如来，为观十二因缘比丘得大智慧，坏诸烦恼，分别解说，比丘闻已当具受持。”

尔时，世尊告宝幢童子：“善男子，汝颇能知息出入不？”

“不也，世尊。”

“善男子，法行比丘，先观无明乃至老死。云何名为观于无明？

先观中阴，于父母所生贪爱心，爱因缘故四大和合，精血二谛合成一谛，大如豆子名歌罗罗。是歌罗罗有三事：一命、二识、三暖。过去世中业缘果报，无有作者及以受者，初息出入是名无明。歌罗罗时气息出入，有二种道，所谓：随母气息上下，七日一变，息入出者名为寿命，是名风道；不臭不烂，是名为暖，是中心意名之为识。善男子，若有欲得辟支佛果，当观如是十二因缘，后观三受因缘，五阴、十二入、十八界。云何为观？随于念心观息出息入，观于内身皮肤肌肉、筋骨髓脑如空中云。是身中风亦复如是，有风能上，有风能下，有风能满，有风能焦，有能增长，是故息之出入名为身行；以出入息从觉观生，故名意行；和合出声，名为口行。以如是等三行因缘，故有识生；识因缘故则有四阴及以色阴，故名名色；五阴因缘故行六处，故名六入；情尘相对，故名为触；触因缘故念色至念法，是名为受；贪著于色乃至于法，是名为爱；爱因缘故四方求觅，故名为取；取因缘故受于后身，故名为有；有因缘故有生老死种种诸苦，是名五阴、十二入、十八界十二因缘之大树也。是故缘出入息，能生一切诸苦烦恼。是故凡夫生时，亦为烦恼系缚，死时亦尔，终不能得身心自在，不得三昧，不尽诸漏。若有比丘观入出息，如空中风无我我所，无有作者及以受者，从缘而生，从缘而灭，无相无物，无有觉观；众生风者亦复如是，共四大行，生歌罗罗九孔乃至九万九千诸孔出入无作无受，是风出入如是肉段，以是因缘故，有无明乃至老死众苦聚集。

“善男子，譬如虚空无物无我，出入诸息，地、水、火、风，寿命、暖、识，无明乃至生老病死，亦复如是。众生颠倒，于非我中而横见我，于如是等同虚空法作阴、界、入想。一切凡夫因是颠倒，轮转生死无有穷已。若法行比丘，观是息冷则举身冷，观是息暖则举身暖，是身尔时随意随风。若观冷时，不得禅定，不入定聚，是人则堕冷地狱中。若观暖时，不得禅定，不入定聚，是人则堕热地狱中。若佛弟子修集法行，观察出入息冷暖等时则得正道。法行比丘如实观察无明乃至生老病死，心不颠倒，是名净目陀罗尼也。善男子，汝若能

受是陀罗尼，即是真实观入出息。”

宝幢菩萨白佛言：“世尊，诸佛境界不可思议，非是声闻、缘觉所及。”

尔时，四天王白佛言：“世尊，随是经典所流布处，我等要当随侍守护，所有恶事悉令消灭。”

虚空目分中四无量心品第四

尔时，频婆娑罗王白佛言：“世尊，因诸声闻、辟支佛等修行法行，令阎浮提无有疾疫饥馑恶事。世尊，菩萨摩訶萨修四无量心，若有四姓供养恭敬，得几所福？”

佛告大王：“若有菩萨修四无量，随所住国具八上事：一者、其土人民供养父母，增长惭愧，恭敬沙门、诸婆罗门耆旧有德，受持禁戒。大王，若诸国土有诸菩萨修四无量，其土人民，则能成就如是初事。复次，大王，若有菩萨修四无量，随所住国其土人民，修集慈心远离杀害，其心调柔，无有浊心、瞋恚之心，平等无二，是名为二。复次，大王，若有菩萨修四无量，随所住国其土人民，不贪财宝，乐为惠施，呵责盗窃，是名为三。复次，大王，若有菩萨修四无量，随所住国其土人民，自足妻色，远离非法，呵责欲心，是名为四。复次，大王，若有菩萨修四无量，随所住国其土人民，真语、实语、无破坏语，常修善语，是名为五。复次，大王，若有菩萨修四无量，随所住国其土人民，无有嫉妒、浊恶之心，是名为六。复次，大王，若有菩萨修四无量，随所住国其土人民，正见不谬，无有邪见，是名为七。复次，大王，若有菩萨修四无量，随所住国其土人民，一切供养恭敬三宝，远离恶见，是名为八。大王，若有菩萨修四无量，随所住国其土人民，具足如是八种功德。

“大王，若有菩萨修四无量，随所住国，其土无有八怖畏事。何等八？一者、无内外军畏，二者、无诸恶鬼畏，三者、无恶星宿畏，四者、无诸恶病畏，五者、无诸恶兽畏，六者、无诸恶贼畏，七者、无诸旱涝畏，八者、无诸谷难畏。大王，若有菩萨修四无量，随所住国，其土无有如是八畏。

“大王，若有菩萨修四无量，随所住国，其土具足八大丈夫。何等八？一者、有诸众生，已于过去无量佛所，深种善根，如是之人乐生其土。二者、复有众生，已于过去无量世中，修戒多闻，如是之人乐生其土。三者、复有众生，已于过去无量世中，供养父母、师长、和尚、耆旧有德，如是之人乐生其土。四者、复有众生，已于过去无量世中，成就天业，当受天身，故转天身来生其土。五者、复有众生能坏一切三恶道业，如是之人乐生其土。六者、复有众生具声闻乘，如是之人乐生其土。七者、复有众生乐缘觉乘，如是之人来生其

土。八者、复有众生，已于过去无量世中，修六波罗蜜，如是之人乐生其土。大王，若有菩萨修四无量，随所住国，其土具足如是八人。

“大王，若有菩萨修四无量，随所住国，其地具足上地水味、无上法味、众生之味，一切众生心相亲爱。如是众生舍是身已，复生天上，乃至鸟兽亦复如是。大王，譬如一筐盛四种香：一者、沉水，二者、多伽罗，三者、牛头栴檀，四者、多摩罗叶。如是四香合有四两，有四姓人，以四种衣置之筐中，经数日已各自赉去。而是四香铢两不折，然是衣中各各有香。大王，若有菩萨修四无量，随所住国其土人民，各各成就种种功德，而于菩萨无所损减。”

尔时，频婆娑罗王白佛言：“世尊，菩萨摩訶萨修四无量心不可思议。何以故？菩萨摩訶萨自身修集，能令无量无边众生得大利益。”

尔时，会中有一菩萨，名曰净光，告无胜菩萨言：“善男子，汝今已得无上利益。何以故？汝常修集四无量心。”

无胜菩萨言：“善男子，我今云何得大利益？如是法中无作无受，无觉不见无知，无此无彼。善男子，如人自言，能画虚空璎珞庄严；虽有是言，真实不能。一切诸法亦复如是，无出无坏，无生无灭，无有处所，无有觉观，净三解脱，无相无作无愿。如尔法界，无转无散，无合无碍，无浊无边。犹如虚空无有和合，无欲无性，无见无说，法性无数，无少无多，无有境界，无二无著，无量无色，无声寂静，无变无量。犹如虚空，无比无胜，无常无断，难见难知，难可思惟，坚固无行，无有瞋恚，摄诸佛界。是名梵行，名四无量，如来修集，心无厌足，勤行精进。是名佛法，大信大念，大不放逸，至心不忘。若菩萨摩訶萨修集如是四无量心，即是菩萨修行菩萨甚深法界，如是菩萨将欲近入无生法忍，行六波罗蜜护诸佛法，已近第三如法顺忍，真见佛身，能摧魔众及坏邪道，度生死河入大智海，通达一切诸佛境界，具足庄严诸佛功德，诸所有色、种姓、财物胜诸众生，次第当坐如来法座，具足一切三昧总持，不为一切圣人所轻，为诸缘觉之所赞叹，常为诸佛之所护念，能解一切国土众生种种语言，于诸法中，不见受者及以施者，亦无说者及听法者，无有作者及以受者，犹如虚空。”

净光言：“善男子，是故我言，汝今成就无量功德。何以故？已于无量无边世中勤修集故。善男子，若佛获得十力、无畏一切佛法，出家苦行逮成正觉，转妙法轮示大神通，入大涅槃，如是等事悉皆因修四无量心，如是即是四无量果。以是义故，诸善男子及善女人，应当修集四无量心。”

说是法时，二万众生得随慈忍，无量众生具四无量心，一切大众咸供养佛。

虚空目分中净目品第五

尔时，有一菩萨童子，名无胜意，长跪合掌白佛言：“世尊，慈无量心，有何等相？有何等体？何等因缘？何等果报？云何具足？”

佛言：“善哉！善哉！善男子，能问如是甚深之义。”

尔时，如来即入三昧，其三昧名调伏众生无所畏惧。入三昧已，从其肉髻放大光明，其光猛盛有种种色，遍照无量无边世界。复出妙音，而说偈言：

“淤泥之中生芙蓉， 亦复生于种种华，
众生以之供养佛， 并及一切诸天神。
一切恶国亦如是， 生诸圣人大菩萨，
能调难调不调众， 犹如众生华供养。
娑婆世界恶土地， 释迦住中宣说法，
若欲获得无量利， 应当往彼娑婆界。”

无量世界所有众生，闻是偈已，各各供养其土世尊。既供养已，乘佛神力，悉来集会娑婆世界，至于佛所，头面礼拜，却坐一面。

尔时，此界大宝坊中，无量众生具足弥满。是诸众生各作是念：“独我至此供养如来，独在佛前咨问正法，如来独为我一人说。”

尔时，世尊告无胜意童子：“善男子，慈有三种：一、众生缘，二者、法缘，三者、无缘。善男子，众生缘者缘于五有。若有法行菩萨，欲得具足六波罗蜜、大慈大悲、菩萨十地，速得成就阿耨多罗三藐三菩提，转正法轮，调伏无量无边众生，令度无边生死大河，欲坏无量恶魔伴党，入大涅槃。如是菩萨，应当修集四无量心。应云何修？若菩萨摩訶萨，为下方众生乃至上方一切众生，修集是慈，视诸众生如父如母，如师和尚，如佛世尊、声闻、缘觉，尔时应作如是思惟：‘若有众生，横于我所起诸恶事，菩萨尔时应作是念：若我瞋是恶众生者，则为十方诸佛所见，是大可耻，当见呵责。云何是人为阿耨多罗三藐三菩提，而自不能调伏其心？譬如有人无有脚足而欲趣彼郁单曰土，如无目者而欲读书，如无手者而欲执作；远离慈心，而欲获得阿耨多罗三藐三菩提者，亦复如是。若不能断如是瞋心，尚不能得声闻菩提，何况阿耨多罗三藐三菩提？若我不能调伏自心，当为诸佛、声闻、缘觉、天龙八部之所呵责。若我不能调伏自心，当得大罪受地狱苦，不得现在、未来利益，是故应当修集慈心。’复作是念：‘若有于我已作诸恶，始作欲作，或以恶事加于我亲，以利养事益于我怨，亦复如是。’如是观已，菩萨先于一方众生，修集慈心；二三四方、四维、上、下，亦复如是。善男子，是名菩萨慈缘众生。”

尔时，会中有一天子，名曰明星，白佛言：“世尊，若菩萨摩訶萨，初修慈心，如是慈心有何等果？为是现在，为在未来，具足成就

几所福德？世尊，如是菩萨修集慈心，颇复当堕三恶道不？”

佛言：“善哉！善哉！善男子，汝已于昔供养恭敬无量诸佛，是故今能发如是问。已种善子善根坚固，无量世中修集慈心，不与声闻、辟支佛共，为欲利益无量众生，是故今者能作是问。善男子，谛听！谛听！今当为汝分别解说。若有菩萨，能如我先所说修慈，是人则得卧安、寤安、不见恶梦，资生所须无所乏少，诸天守护，人天乐见，不闻恶声，身不恶病，常乐寂静勤行精进，乐受正法知见无我，常为国主、沙门、梵志、男女大小乃至鸟兽之所供养，亲近善友，所谓声闻、缘觉、诸佛菩萨，乐行惠施能度众生，所有善心不为三毒之所破坏，善名好誉流布四方，能疗众生所有恶病，能令众生远离众苦，能解众生一切系缚，能调众生诸恶烦恼，能坏一切恶邪异见，能与众生信心、念心、大智慧心，心住大乘无能倾动，不随他语，能坏众生身口意恶，能灭众生三种障业，唯除五逆、诽谤正法贤圣之人、劫招提僧物。

“善男子，菩萨若能如是修慈，当舍命时，面见十方诸佛世尊手摩其头。佛手触故心则欢喜，心欢喜故，寻得往生其佛国土，亦闻如是善妙之言，所谓：‘莫生怖畏！莫生怖畏！汝是修慈纯善之人，定当得生净佛世界，觐见无量诸佛世尊，离三恶道，必入涅槃，亦闻法缘、无缘之慈，亦得具足四无量心，乃至获得阿耨多罗三藐三菩提。’”

尔时，明星天子闻是法时，于诸禅定出入自在。无胜意童子白佛言：“世尊，如是天子，以何力故，于禅定中速入速出？”

佛言：“善男子，是天子者，已于无量诸如来所，植诸善根，无量世中修法缘慈。本愿力故生四天处，在日天前十千由旬，所住宫殿纵广三万二千由旬，琉璃所成，前后左右满十由旬，诸天男女而共围绕。是人在中，离其眷属三由旬所，独坐宝床，出入禅定一日一夜，此四天下有八十天处、六十龙处、四阿修罗处、四迦楼罗处、五十二紧那罗处、四十六摩睺罗伽处、八拘办茶处、三十富饿鬼处、三十毗舍遮处，于如是处，悉能调伏如是众生。以本愿力故，往昔发愿：‘此阎浮提夜五分过，余一分在，当在日前十千由旬，先当破坏阎浮提闇而作明相。若阎浮提诸善众生，欲度生死修禅定者，当为是人除去睡眠，施其念力。若欲见我，我当于梦现作和尚、师长、父母。若有凡夫修集外道，我当破坏其人邪心，示以正道。若有众生，于世间事及出世事生懈怠者，睹见我已，除去懈怠，勤修事业。若有众生迷失正路，得见我时则还见道。若有众生身遇重病，得见我者苦痛休息，身得安眠受大快乐。若有老人，身受众苦，心多忘误，得见我者还得念心。然我出时，能令众生系心念善。若有众生命将欲尽，最后一念，我当为说大乘经典，彼既闻已面见佛像，舍身得生净佛世界。若有欲求辟支佛者，我当为说辟支佛乘。若有欲求声闻乘者，我亦当为说声闻乘。若有众生有三恶业，闻我说法恶业即灭。’世尊，我先行于阎浮

提国，然后次行于瞿陀尼，瞿陀尼后次郁单曰，郁单曰后次弗婆提，以如是等本愿力故，常得修行六波罗蜜，乃至得成阿耨多罗三藐三菩提。”

尔时，明星天子白佛言：“世尊，我今为欲利益一切众生故，说此陀罗尼：

“卢遮罗(一) 卢遮那(二) 卢遮那(三) 娑罗叉嚧(四) 娑罗叉嚧(五) 娑罗叉莎(六) 阿嚧呵呵(七) 阿嚧特茶(八) 阿婆闍婆(九) 阿婆叉那(十) 阿叉叉叉叉(十一) 富罗婆遯(十二) 阿婆叉叉(十三) 闍婆闍婆(十四) 摩呵迦波(十五) 阿婆阿婆摩呵娑摩(十六) 频豆(十七) 娑闍羯波(十八) 阿鞞(十九) 阿鞞(二十) 呵呵尼摩(二十一) 沫遯娑律闍(二十二) 迦留那闍遯(二十三) 莎呵(二十四)。

“世尊，若有比丘、比丘尼、优婆塞、优婆夷，若男若女、若大若小，若有至心念我事者，是人则得净于诸业，神通、施、戒、忍辱、精进、禅定、智慧，解脱、佛土、四无碍智，如是诸人不得成就如是事者，我则欺诳十方诸佛，于未来世，亦莫令我得阿耨多罗三藐三菩提。”

尔时，无胜意童子白佛言：“世尊，他方佛土所有人民，常作是言：‘娑婆世界杂秽不净，然我今者常见清净。’”

佛言：“如是，如是，善男子，如汝所说。又此世界诸菩萨等，或作天像调伏众生，或作龙像、或作鬼像、或阿修罗像、或迦楼罗像、或紧那罗像、或摩睺罗像、或夜叉像，或拘办荼像、毗舍闍像、薜荔陀像、人像、畜生像、鸟兽之像，游阎浮提，教化如是种类众生。善男子，若为人天调伏众生，是不为难；若为畜生调伏众生，是乃为难。

“善男子，阎浮提外，南方海中有琉璃山，名之为潮，高二十由旬，具种种宝。其山有窟名种种色，是昔菩萨所住之处，纵广一由旬，高六由旬，有一毒蛇在中而住，修声闻慈。复有一窟名曰无死，纵广高下亦复如是，亦是菩萨昔所住处，中有一马修声闻慈。复有一窟名曰善住，纵广高下亦复如是，亦是菩萨昔所住处，中有一羊修声闻慈。其山树神名曰无胜，有罗刹女名曰善行，各有五百眷属围绕，是二女人常共供养如是三兽。

“善男子，阎浮提外西方海中有玻瓈山，高二十由旬。其山有窟，名曰上色，纵广高下亦复如是，亦是菩萨昔所住处，有一猕猴修声闻慈。复有一窟名曰誓愿，纵广高下亦复如是，亦是菩萨昔所住处，中有一鸡修声闻慈。复有一窟名曰法床，纵广高下亦复如是，亦是菩萨昔所住处，中有一犬修声闻慈。中有火神，有罗刹女，名曰眼见，各有五百眷属围绕，是二女人常共供养是三鸟兽。

“善男子，阎浮提外北方海中有一银山，名菩提月，高二十由旬。中有一窟名曰金刚，纵广高下亦复如是，亦是菩萨昔所住处，中有一猪修声闻慈。复有一窟名香功德，纵广高下亦复如是，亦是菩萨昔所住处，中有一鼠修声闻慈。复有一窟名高功德，纵广高下亦复如是，亦是菩萨本所住处，中有一牛修声闻慈。山有风神名曰动风，有罗刹女名曰天护，各有五百眷属围绕，是二女人常共供养如是三兽。

“善男子，阎浮提外东方海中有一金山，名功德相，高二十由旬。中有一窟名曰明星，纵广高下亦复如是，亦是菩萨昔所住处，有一师子修声闻慈。复有一窟名曰净道，纵广高下亦复如是，亦是菩萨昔所住处，中有一兔修声闻慈。复有一窟名曰喜乐，纵广高下亦复如是，亦是菩萨昔所住处，中有一龙修声闻慈。山有水神名曰水天，有罗刹女名修惭愧，各有五百眷属围绕，是二女人常共供养如是三兽。

“是十二兽，昼夜常行阎浮提内，天人恭敬，功德成就，已于诸佛所发深重愿，一日一夜，常令一兽游行教化，余十一兽安住修慈，周而复始。七月一日鼠初游行，以声闻乘教化一切鼠身众生，令离恶业劝修善事；如是次第至十三日，鼠复还行。如是乃至尽十二月，至十二岁，亦复如是，常为调伏诸众生故。善男子，是故此土多有功德，乃至畜生亦能教化，演说无上菩提之道。是故他方诸菩萨等，常应恭敬此佛世界。”

尔时，会中有一优婆塞，名曰净德，白佛言：“世尊，我今可得睹见如是十二兽不？”

“善男子，若有比丘、比丘尼、优婆塞、优婆夷，欲得睹见是十二兽，欲得大智、大念、大定、大神通力，欲受一切所有典籍四无量心，欲行正道得奢摩他，欲得寂静，欲增善法。是人当以白土作山，纵广七尺，高十二尺，种种香涂，金薄薄之，四边周匝二十尺，所散瞻婆华当以铜器盛，诸种种非时之浆置之四面，清净持戒，日三洗浴，敬信三宝，离山三丈，正东向立，诵如是咒：

“战阿罗呵(一) 修利蛇比摩(二) 其罗跋(三) 佛已牟逻(四) 若蛇牟逻(五) 阿呵希(六) 婆呵啰希(七) 若蛇呵希(八) 萨婆复多呵(九) 梨毗婆呵休(十) 摩沙车婆牟梨(十一) 迦嚧浮(十二) 逻奢浮(十三) 修逻蛇牟(十四) 呿迦那(十五) 摩希叉婆(十六) 迦婆摩呵(十七) 阿叉比婆逻(十八) 多波比婆(十九) 沙持因持利蛇鞞婆(二十) 阿闍牟他婆(二十一) 婆卢婆叉(二十二) 槃陀哆(二十三) 遮罗叉婆希(二十四) 呵迦比牟(二十五) 哆比勒搜(二十六) 散遮勒搜(二十七) 嚧婆浮(二十八) 娑嚧嚧叉搜(二十九) 佛已遮(三十) 哆莎赖沙(三十一) 陀叉逻莎(三十二) 波利波遮(三十三) 修罗修(三十四) 搜婆莎弥(三十五) 希逻(三十六) 嚧婆牟娑嚧娑(三十七) 牟娑嚧私(三十八) 逻婆嚧娑(三十九) 频婆思嚧娑(四十) 嚧嚧婆娑(四十一) 陀摩卢遮那嚧娑(四十二) 富囊挫兰呵嚧娑(四十

三) 首陀卢遮那逻娑(四十四) 嚩摩摩逻娑(四十五) 比摩卢遮那咭伽(四十六) 萨颠摩逻娑(四十七) 阿利那遮那耨耨(四十八) 比摩牟(四十九) 婆罗呵芒嚩呵逻私菟菟(五十) 阿由比目醯(五十一) 牟尼逻提致沙(五十二) 莎呵(五十三)。

“住十五日，当于山上见初月像，尔时则知见十二兽，见已所愿随意即得。善男子，若能如是修行苦行，即得眼见是十二兽。”

尔时，净德优婆塞语明星菩萨言：“善男子，汝能教化调伏众生，云何调伏？为以身耶？口耶？意耶？”

“善男子，我非身、口，唯以心业。”

“善男子，若是心业，为过去耶？未来耶？现在乎？”

“善男子，亦非去来，唯是现在，制限在心不令作恶。”

“善男子，汝犹不能令现在心获得解脱，云何而能调伏众生？”

明星答言：“我今受持四无碍智净目持力故，能调伏一切众生。”

净德言：“四无碍智净目持者，亦复不能调伏众生。何以故？无觉观故，云何而言能调众生？”

“善男子，我今问汝，随意见答。善男子，摄入系缚、解脱清净道及寂静，虽复平等亦不平等。如是平等及不平等，何因缘生？何因缘出？何因缘增长？汝宁不知乎？”

净德答言：“善男子，如是等事，因我我所生、出、增长。”

明星菩萨言：“善男子，是我我所何因缘生？”

“善男子，是我我所，风因缘生。”

明星菩萨言：“风住何处？”

“善男子，风住虚空。”

又问：“虚空为何所住？”

答言：“虚空住于至处。”

又问：“至处复何所住？”

答言：“至处何处住者不可宣说。何以故？远离一切诸处所故，一切处所所不摄故，非数非称不可量故。非觉非观，非有非无，非行非生，非出非灭，非有增长，非字非念，非作非受，非闇非明，非增非减，非壮非老，真实之性是一切法无挂碍门，是故至处无有住处。”

明星菩萨言：“善男子，如是即是四无碍智净目陀罗尼。若有菩萨修集如是陀罗尼者，一切烦恼则为烂败入法缘慈，一切法中无有疑心。”

说是法时，十方世界无量众生得法缘慈，无量众生得近四无碍智净目陀罗尼。

尔时，世尊赞是二人：“善哉！善哉！善男子，能如法问，能如法答。是陀罗尼因缘力故，四天王等，于我灭后能守护法。”

大方等大集经卷第二十五

虚空目分中圣目品第六

尔时，明星菩萨白佛言：“世尊，声闻之人行声闻乘，辟支佛人行辟支佛乘，如是二人云何修悲？思作何法？离何烦恼？”

佛言：“善男子，若有善男子、善女人，行声闻乘、辟支佛乘，不观众生所有乐相，不作怨亲父母等相，怜愍众生修起悲心，乃至十方亦复如是：‘若我不能于恶众生修集悲者，当观是人八种苦相，生苦乃至死苦。是人具足如是八苦，我当云何于是人所不生悲心？是人复有三种大苦，亦复未得脱三恶道，我当云何不生怜愍？云何名为观于生苦？从业因缘父母和合，初受意识，歌罗罗时，其身犹如葶历子许，是时未有入出息，亦不觉知苦之与乐、不苦不乐，离先色相，未具后色，无力无欲，无有精进，无有憍慢、上色、上性、上自在相，无五欲相，诸根不具。如是众生，我当云何不生怜愍？如是众生过去爱取名为无明，过去业有名之为行，初入胎心名之为识，歌罗罗中初色四阴名为名色。是时未具十二有支，以生因缘故，可说有十二因缘。众生如是，何有智者不生怜愍？歌罗罗时住六七日，六七日转名頽浮陀，是时形色犹如小枣；住七七日转名伽那，是时形色如胡桃壳；住八七日转名闭尸，形色犹如频婆罗果，是时身边有五胞出谓头手脚；十二七日始有肠相；二十七日男女根别；二十一七日始生骨节；乃至三十六七日中，其身具足血肉毛根；三十八七日具足身肢，四日四夜住在腹中臭秽之处。是人如是，我当云何不怜愍耶？’尔时，还忆本生之事，忆已愁苦，作是念言：‘若我出胎当修善法，愿后更莫生如是处！修不放逸远离受生。初出母胎，尔时举身受迫迫苦；入风触身，亦复受苦；身初至地，以水摩洗复受大苦犹如地狱，尔时还失忆宿命事。生已复有老病死苦随逐不舍，复有风病、白水黄水和合等病，如是四病数各百一常随逐之，是故名为生，是大苦。既受生已老复随逐，发白面皱，失智惭愧，发毛稀疏，诸行陈故诸根衰熟，易破易坏，烂朽危脆，唯贪二味，所谓碱、酢，能坏安乐，身根遍恼，是大苦河，能破众生三世壮色，妄如婴儿，狂如鬼著。众生具足如是恶事，我当云何不生怜愍？尔时复为死所侵逼，失于智慧、寿命、诸有，舍弃诸阴，身坏命坏四大离散。三世众生寿命之怨，一切众生成就死法，我当云何不生怜愍？尔时复有所不爱物而来亲近，所谓寒热饥渴、恶人、恶兽。众生如是，我当云何不生怜愍？复有所爱别离，所谓盛年、财宝、康强、寿命、父母、妻子、亲戚眷属、上妙六尘。众生既受如是等苦，我当云何不生怜愍？或有众生于三世中，求上六尘而不能得，以是因缘具受众苦。若我于此恶类众生不生怜愍，我当云何得阿耨多罗三藐三菩提？一切众生受五阴担，我亦如是。若我不修大悲之心，云何得舍如是重担？一切圣人已得远离五阴重担。若不

修行三种净戒，不善思惟，其心放逸不行正道，不得解脱，如是之人受百种苦。众生既受如是百苦，我当云何不修悲心？’若有众生于一日夜能如是观，是人得心犹如虚空，是人能于一切众生修集大悲，是人能得身心寂静，是不远正真法界及以法性，如是方便，能得声闻、缘觉众生缘悲。

“若有菩萨初修道时，作是思惟：‘设令我有恒河沙等如须弥身，当以是身为于一人，于无量世受大剧苦，令彼一人得受乐者，我终不悔，亦不退转于菩提心。’复作是念：‘假令一切所有众生，各各执椎如须弥山，来打我身经无量岁，我当忍受，不生恶心乃至一念。’复作是念：‘是人所受百种之苦，一切众生亦受是苦，而不知念阿耨多罗三藐三菩提。我今是学阿耨多罗三藐三菩提，云何不受刀剑火石亦复如是？若我当于一切众生生恶心者，诸佛贤圣当见呵责，而作是语：“是人欲得阿耨多罗三藐三菩提，云何如是而不忍辱？”’菩萨摩訶萨修净意者即是忍辱，忍辱者即是瓔珞、精进道性、器四财宝。菩萨修集如是忍辱，能净身心，能净庄严、坚固庄严，得大智慧，不与声闻、辟支佛共，于诸众生最为殊胜，一切四魔不得其便，邪不能动，烦恼折减，一切怨仇不能为恶，言辞所说不可穷尽，其智甚深犹如大海，精进坚牢如须弥山，等诸众生如海一味，能大利益犹如大地，净众垢污犹如清水，能作光明犹如朗日，于众无碍犹如猛风，世法不污犹如莲华，下视众生如金翅鸟，众生乐见如夏日云，众生乐受如夏时雨，见无余求犹病遇医，坏诸贫穷如如意珠，施众禅定犹如梵天，生死无碍犹如虚空，示平不平犹如明灯，人天恭敬犹如帝释。若有菩萨起瞋恚心，一切怨贼悉得其便，丧失一切善根财宝，一切众魔获得其过，为诸烦恼之所污染，入大闇处失一切善根，为诸圣人之所呵责。若有菩萨起瞋恚心乃至一念，则为丧失一切善法。设我悉受一切众生无量亿数打骂毁辱，乃至不应起一念瞋。何以故？如是众生不学慈悲。若彼众生心无瞋打，我当云何修集慈悲？以是义故，众生瞋时我应生喜。何以故？即是我之悲因缘故。’若有善男子、善女人能作是观，即得不共声闻、缘觉众生缘悲，亦能疾得阿耨多罗三藐三菩提。

“善男子，复有众生观三恶道苦众生已，修集悲心；复有观察三界所有诸苦众生，而修悲心；复有观察五阴众生，而修悲心，入、界亦尔。善男子，以是义故，菩萨摩訶萨欲得阿耨多罗三藐三菩提，当修慈悲。何以故？夫慈悲者，即是一切善法种子。若有众生得色界身，亦是修集慈悲因缘；若无色身，若声闻道、若缘觉道，若诸菩萨庄严坚固行六波罗蜜，调伏众生得无生忍，成阿耨多罗三藐三菩提，皆因慈悲种子因缘。”

说是慈悲因缘法时，明星菩萨得无生法忍，是忍不与缘觉、声闻共之。八万四千众生得如法忍，五万五千那由他众生发阿耨多罗三藐三菩提心，十万八千众生得不退心，二万众生成就慈悲，五千比丘得阿罗汉果，五百比丘尼尽一切漏，十万亿众生破大邪见得正见心。

尔时，世尊告无胜意童子：“善男子，过去有佛名发功德意，亦说如是大慈大悲。”

无胜意童子言：“世尊，所言如者，云何名如？”

佛言：“善男子，远离身相名之为如。”

无胜意童子言：“所言身者即是实性，即是寂静，即是法界，即是无漏，即是无尽。”

佛言：“善男子，如身者即是一切众生之身，即是过去、未来边际，即是寂静。”

无胜意童子言：“世尊，若一切佛如即是身。”

佛言：“善哉！善哉！善男子，如是法界无有增减，三世平等，不生不出不灭。犹如虚空，如身亦如是。”

说是法时，三万众生得如法忍。

尔时，世尊告明星菩萨言：“善男子，云何修集缘众生喜？善男子，若有菩萨不修慈悲，不念众生所有乐相，乃至不观三趣三界所有诸苦，而亦观于五阴出灭，如是观已生于喜心。但乐观法，观已生喜，如是喜心愿及众生，是名为喜。”

“世尊，云何修舍？”

“善男子，若有菩萨不修慈、悲及以喜心，修舍念舍，父母乃至声闻、缘觉、菩萨、诸佛。修是舍时，远离一切爱瞋法心，是人修集空无相愿，既修集已，不久定当得入涅槃。若人修集如是等四无量心，是人则为十方诸佛、菩萨、天、龙、夜叉、刹利、婆罗门、毗舍、首陀、比丘、比丘尼、优婆塞、优婆夷之所供养。随有国土若四部众修集如是四无量心，其土则已远离一切衰祸之相，其中众生乐离恶法，受持善法。善男子，四无量心，具足如是无量福德。”

虚空目分中辟支佛乘品第七

无胜意童子复白佛言：“世尊，修缘觉乘比丘、比丘尼、优婆塞、优婆夷、善男子、善女人，云何修集慈、悲、喜、舍？”

佛言：“善男子，若有修集辟支佛乘比丘、比丘尼、优婆塞、优婆夷、善男子、善女人，观众生乐，解众生乐，念法缘慈，终不忆念缘众生慈，如自心中所受乐事亦愿众生同共得之，观法平等，观乐平等，观心平等，观如平等。如是观已，乃至不于一人生恶。设有因缘生恶心者，应作是念：‘若我于彼生恶心者，云何当得阿耨多罗三藐三菩提？’菩萨摩訶萨成就无量纯善功德，若于一人生瞋恶心，尚不能得阿耨多罗三藐三菩提，况我未成诸善功德？’以是因缘，修众生慈及法缘慈；悲、喜、舍心亦复如是。善男子，若有欲学缘觉乘者，应如是修慈、悲、喜、舍。”

说是法时，六万亿众生得住初地，或得二地、三地、四地、五

地，或有众生得无生忍，或有获得辟支佛道及声闻道，无量众生发阿耨多罗三藐三菩提心。

虚空目分中圣目无碍智品第八

尔时，众中有一童子名虚空声，白佛言：“世尊，云何菩萨庄严无上菩提之道，修一切智目方便、无缘梵行一切法目方便、无缘梵行一切阴入界方便、解脱方便、三昧方便、陀罗尼方便、得忍方便、诸地方便？世尊，云何菩萨摩訶萨，修一切智目门，同虚空慧度于彼岸，无缘梵行，越度四流断四魔系？”

佛言：“善哉！善哉！善男子，汝今能入四无量海，欲度众生于生死河，是故今者发如是问，复欲不断佛大智海。善男子，十方佛土若有菩萨，同共汝行三昧智慧，我说法时，如是等辈悉为明证。若无如是菩萨证者，我则不说无缘梵行。何以故？我若说者，多于是中而生疑心，若有未得无缘梵行亦复生疑，以是义故，不应宣说。”

尔时，世尊即入三昧，其三昧名虚空幢，入已面门出大光明，其明种种遍照十方诸佛世界，蔽于日月令不复现。其光明中出大声言：“娑婆世界释迦牟尼，为诸众生宣说梵行坏诸烦恼，说声闻乘、辟支佛乘无缘梵行，无量众生及诸菩萨，次第而坐听受正法；亦说清净菩提之行，为欲利益无量众生故，作大集说种种行，无量众生获得一生及以后生。”

十方众生闻是语已，一切悉集娑婆世界，或有菩萨现真金身雨于金沙，或现银身雨于银沙，或琉璃身雨琉璃沙，或玻瓈身雨玻瓈沙，或沉水身雨沉水沙，或栴檀身雨栴檀沙，或多摩罗跋身雨多摩罗跋沙，供养于佛，供养已毕，头面敬礼，却坐一面。

尔时，世尊告虚空声童子：“善男子，今日十方诸大菩萨，其中或有得法忍者，得无生忍、一生、后生，悉为我证：如是菩萨修集慈、悲、喜、舍之心，了了通达诸法之性，亦能远离身相业相，其心不著有为无为，亦不贪著眼乃至意色乃至法，至心修集无缘梵行，无诸觉观不生憍慢，无所贪著知真实性，观一切法皆悉平等，所谓三世、三界、三戒，亦得增长大慈、大悲、大喜、大舍。一切众生远离三界阴、入、界等，离一切字聚、名聚、句聚有为之法，作是观时，即得具足大慈、大悲、大喜、大舍，修集同空三昧、梵行、六波罗蜜，诸佛护念，具善方便住第三忍，过于声闻、辟支佛道，远离一切眼色因缘乃至一切意法因缘，观法界如随顺不倒，获得大慈大悲等力，于诸法中得大自在，而于生死不生厌悔，有大力势调伏众生，于三乘中得智方便，能雨法雨得无碍智，解诸众生异语方便。善男子，是名圣目陀罗尼，具无碍智修集梵行。

“善男子，若有菩萨修是梵行，如是菩萨常得见佛，能具佛法净

佛世界，性净、众净、行净、智净、意净、供养亦净，能具十地，次第当坐如来法座，如是名为清净法行，是名如来，是名世尊，名过四潮，名菩提道，能得菩提转大法轮。云何名为一切智耶？若智能观一切平等，众生平等，三世平等，不倒平等，如是等一切法见虚空目，见法虚空目，见无行虚空目，见性虚空目，见如空虚空目，见如内空虚空目，见如外空虚空目，见如内外空虚空目，见如大空虚空目，见如第一义空虚空目，见如有为空虚空目，见如无为空虚空目，见如毕竟空虚空目，见如无始空虚空目，见如性空虚空目，见如散空虚空目，见如自性空虚空目，见如一切法空虚空目，见如无所觉空虚空目，见如无法空虚空目，见如无性空虚空目，见如无法有法空虚空目，见如实性空虚空目，见如无相无愿空虚空目，见如一切法无边无处空虚空目，见如大慈大悲空虚空目，见一切知见虚空目，见一切智，如是见已转正法轮，是名不共众生法界，是名一切智，名佛境界。”

说是无缘梵行时，九万二千众生成就是法，恒河沙等众生得如法忍，恒沙众生远离垢秽得法眼净，一千比丘得阿罗汉果，无量人天发阿耨多罗三藐三菩提心。

虚空目分中护法品第九

尔时，一切欲、色界天，以妙香华、幢盖、伎乐供养于佛，白佛言：“世尊，如来先已于阎浮提，转正法轮；今复于此大宝坊中，转大法轮，为菩提行故。”

一切大众复作是言：“如来境界不可思议。何以故？如来在此大宝坊中，转法轮时，十方无量佛世界中，所有菩萨悉来集此，为听如是虚空目法行。”

尔时，文殊师利童子、金刚山童子、无胜幢童子、无胜意童子、虚空声童子，如是等童子，其数九万二千亿，白佛言：“世尊，唯愿如来以愿力故，令是虚空目法行久住于此娑婆世界及十方土，无有灭没。何以故？如是法中说三梵行，菩萨若行如是三行，即得阿耨多罗三藐三菩提。”

佛言：“善男子，南方世界金刚光明功德如来，西方世界智幢如来，北方世界发光功德如来，东方世界宝盖光明功德如来，是四如来以先有愿，以是愿故，是经后当流布十方，令诸菩萨悉得修行如是三行。我今以此正法，付嘱四大天王、功德天女、四大龙王、诚实语天、四阿须罗王、具天、大自在天、八臂天地神女等。何以故？善男子，或有众生，其性弊恶，有大势力，多造重业不受是经。是人死已，受恶鬼身、恶龙之身，是恶鬼龙欲坏佛法，降注恶雨、恶风尘坌，为诸修行三业比丘而作重病，以手探腹取其心肝，吹吐恶气置饮食中故，令食者得大重病，良医拱手不能疗治。如是修行三业比丘，

尽舍命已，是名法灭。如是恶鬼，复令如来所有弟子，刹利、婆罗门、毗舍、首陀，大臣、长者悉生恶心，恶心既生互相残贼。当尔之时，阎浮提内国土城邑，空荒无人。人民既无，谁当流布如是经典？是故我今不以是经付嘱菩萨、比丘、比丘尼、优婆塞、优婆夷及诸国主，以付四王乃至地神，如是天神至心护持。若有国土刹利、婆罗门、毗舍、首陀、比丘、比丘尼、优婆塞、优婆夷，受持读诵如是经者，是诸天神当至心护，劝诸檀越令致供养，所谓衣服、饮食、卧具、病药、房舍、灯烛。是诸檀越若有恶相、诸恶病瘦，诸天力故悉令消灭，以是因缘，法得增长无有灭没。”

尔时，一切诸天神等白佛言：“世尊，若今现在，若佛灭后，我等要当舍离自事，守护是法。若佛弟子，比丘、比丘尼、优婆塞、优婆夷，有能受持如是等经勤行精进，虽复受畜八不净物，畜养妻息、金、银、琉璃、玻瓈、田宅、奴婢、仆使，我为法故亦当守护，遮诸恶鬼不令娆近。随是经典所在之处，令其土地、日月、五星不越常度，怨仇兵革皆悉消伏，所有众生若男若女、若大若小，悉乐受诵如是经典，持戒清净勤行精进。世尊，以是因缘，一切诸天乐处人间。是人舍身即得生天，诸天增长色、力、寿命，所有恶相灭无遗余。其无信者，我能令信。若佛弟子，比丘、比丘尼、优婆塞、优婆夷，不能受持如是经典读诵书写，不乐寂静，不善思惟，乐求供养，不持净戒，懒惰懈慢，心无惭愧，亲近白衣。如是比丘，以财俗力毁佛弟子，若打若杀，若缚若骂，向王大臣说其过恶。佛诸弟子，闻是事已生大恶心。生恶心已，诸善鬼神舍至他土，是故恶鬼即得其便。既得便已，诸国兴兵互相讨伐，降恶风雨令谷不登，人民饥馑共相茹食。”

尔时，十方世界菩萨白佛言：“世尊，诸佛如来，为如是等五淖众生，制于禁戒。唯愿如来为法久住，复制禁戒，所谓身戒、口戒、意戒，不得受畜一切恶物，恶心斗争，亲近国王、大臣、长者，受畜一切俗人之物，如余佛土所制净戒。”

佛言：“善男子，止！止！佛自知时。善男子，因缘未出，如来则不豫制禁戒。”

尔时，世尊告频婆娑罗王：“大王，汝之国法，何名大罪？何名小罪？”

频婆娑罗王言：“世尊，我之国法，有四重罪：一者、断他命根，二者、偷至五钱，三者、淫他妇女，四者、为五钱故大众王边故作妄语。如是四罪，犯者不活。”

佛言：“我今亦为未来弟子制是四重。复次，大王，王子几岁不听入宫？”

“世尊，过二十年则不听入。”

佛言：“我亦如是，沙弥二十乃至得道不听入众。”

王言：“世尊，如我国法，有作罪者必死不疑，或打或骂，闭系

输物，摈出界外。如来法中，其义云何？”

“大王，我之法中亦复如是。有犯罪者，或令苦作一月二月，或不与语、共坐、共食，或不共住，或摈令出，或出一国、或出四国有佛法处。治如是等恶比丘已，诸善比丘安乐受法，故使佛法久住不灭。大王，若未来世有我弟子，饶财多宝有大力势，王所亲爱，一切大众不能摈治，如是等人汝等当治。刹利、婆罗门、毗舍、首陀不能治者，如是四姓则为断我三宝种性，能灭法炬，破坏法船，焦涸法味，夺众生眼；我法坏时，心则放舍。大王，譬如一人夺一切眼。于意云何？是罪多不？”

“甚多，世尊，不可称量，不可计数。”

“大王，若有刹利、婆罗门、毗舍、首陀，有大力势，见我法灭舍不守护，其所得罪亦复如是。大王，若有国主，于无量世修施戒慧，见我法灭舍不拥护，如是所种无量善根悉皆灭失。其国当有三不祥事：一者、谷贵，二者、兵革，三者、疫病。一切善神悉舍离之，其王教令人不随从，常为邻国之所侵娆，暴火横起，多恶风雨，暴水增长吹漂人民，内外亲信咸共谋叛，其王不久当遇重病，寿终之后生地狱中。若宿善追及，还得人身，无量世中常盲无目，贫穷踰跄行乞自活，常生恶心；因是恶心，复当还堕于地狱中。如王，夫人、太子、大臣、城主、村主、将帅、郡守、宰臣，亦复如是。”

频婆娑罗耳闻是语，悲泣哽咽，收泪而言：“世尊，我值如来，犹故不能如法治国，况未来世放逸诸王！不能持戒修行精进，治恶比丘护持佛法，不能绍继三宝种性，如是诸王，长夜常行于三恶道。”

尔时，诸王、夫人、太子、大臣、城主、村主、将帅、郡守、宰官，皆白佛言：“我等于今现在之世，要当勤心守护佛法，亦当供养受持法者，衣服、饮食、卧具、医药，治恶比丘绍三宝性。”

佛言：“善男子，汝等若能建立此事，则为供养三世诸佛，亦得无量不可思议诸善功德。”

虚空目分中大众还品第十

尔时，世尊复告诸天：“善男子，汝等今者勿怀忧虑！我今当与未来弟子，为护法故，立严峻制，为不断绝三宝性故，为欲增长诸善法故，为增长多闻满宝藏故，为离一切苦烦恼故，为成无上菩提道故。善男子，我今所说，一切声闻具足成就得声闻乘，一切缘觉具足获得辟支佛乘，一切菩萨具足成满三种梵行得无上智。善男子，是经能离诸恶众生，能坏众生恶不善法，能灭身口意不善业，能破一切诸恶果报。若有善男子、善女人供养是经，则为供养十方诸佛。”

尔时，娑婆世界一切众生，异口同音而作是言：“善哉！善哉！世尊，我初未闻是大法聚，今得闻之。世尊，我能受持守护是法，为

护法故不惜身命。若有比丘、比丘尼、优婆塞、优婆夷受是经者，我当供养，随其所须一切给与。若复有能供养如是受持经者，我等亦当勤守护之，内外财宝令无损耗，随是经法所流布处，亦护其土令无诸恶。”

佛言：“善哉！善哉！善男子，汝能如是守护法者，则为供养三世诸佛。善男子，若诸众生有护法心，若生人天得大自在，乃至畜生亦有大力，为人所重不经寒苦。善男子，是护法者恶不能加，心无所畏，无能破坏，诸魔烦恼不得其便，多饶眷属，智慧具足，凡有所说无所挂碍，乐行十善修集正定，父母诸王见则恭敬，能升法座转正法轮，凡有所闻终不忘失。”

大方等大集经卷第二十六

虚空目分中宝髻菩萨品第十一之一

尔时，世尊故在欲、色二界中间大宝坊中，坐师子座，放大光明犹如日月，得大自在犹如梵释，功德高显独如须弥山，法界甚深犹如大海，于大众中演说正法，初中后善字义真正，具足清净班宣梵行，为诸菩萨净于法印，令诸菩萨闻已修集。

尔时，东方过九万二千诸佛世界，彼有世界名曰善华。其土有佛，号曰净住如来、应、正遍知、明行足、善逝、世间解、无上士、调御丈夫、天人师、佛世尊，为化众生宣说正法。有一菩萨名曰宝髻，与诸菩萨其数八千，没彼世界欲来此土，赍妙宝盖欲奉如来。其盖周覆一千世界，及诸香华欲供养佛，妙音说偈赞叹如来：

“若诸人天得睹佛， 则为获得大利益，
如来所受苦无量， 勤精进故得菩提。
往昔精进修菩提， 超过一切诸菩萨，
为令众生得利益， 故转无上正法轮。
如来如是难得见， 所说正法亦难闻，
获得人身亦复难， 诸根具足亦如是。
若诸众生行不善， 亦不能作三善业，
若人欲得大利益， 应当覩见释中尊。
若欲听受无上法， 并见十方诸菩萨，
具足三十二妙相， 应当速诣大宝坊。
今若不种诸善根， 后必不得大涅槃，
若欲具足人身者， 应当速诣娑婆界。
若欲破坏三恶道， 欲受人天微妙乐，
获得无上无比乐， 应当诣于娑婆界。
大医今施甘露味， 除灭众生诸烦恼，

如来商主大法王， 今日演说无上界。”

宝髻菩萨说是偈时，其声遍满大千世界。

时，舍利弗闻是偈已，即白佛言：“世尊，如是偈音何处演说？”

佛言：“舍利弗，东方过于九万二千诸佛世界，彼有世界名曰善华，其土有佛号曰净住，彼有菩萨名曰宝髻，与八千菩萨俱来至此。是其所说，其声闻乎大千世界，劝诸众生令修善法。”

尔时，宝髻菩萨与八千菩萨，及无量人天，来至佛所，头面礼拜，白佛言：“世尊，善华世界净住如来，致敬问讯，起居轻利，气力安不？眷属大众乐受法不？世尊，我从彼来至此世界，为听菩萨净行法印。唯愿如来，普为一切，大慈怜愍分别解说，令诸菩萨闻已修集，破坏一切烦恼习气修菩萨行，了知一切众生之心，能修菩萨所有行相，能得解了智慧之行，能知一切烦恼等行，能修菩萨所修法行，能深观察一切罪过，身得无碍见一切佛。”

佛言：“善哉！善哉！善男子，谛听！谛听！我今当说如是净行十分之一。善男子，菩萨摩訶萨有四行。何等为四？一者、波罗蜜行，二者、助菩提行，三者、神通行，四者、调众生行。波罗蜜行者，是愿方便；助菩提行者，是修道方便；神通行者，是调心方便；调心方便者，是菩提心坚固方便。

“善男子，云何名檀波罗蜜？檀波罗蜜即是净行，能坏痴心，能修舍心，修舍心已能一切施。若有菩萨能一切施，即得四种无分别心。何等为四？一者、不分别众生，二者、不分别法，三者、不分别心，四者、不分别愿。是名为四。不分别众生，是可与、是不可与，此多与、此少与，此上与、此下与，此恭敬与、此轻慢与，此全与、此半与，此持戒、此破戒，此福田、此非福田，此得大报、此不得大报，此是正见、此是邪见，此行正聚、此行邪聚。善男子，若菩萨摩訶萨得如是心，名不分别心，无憍慢心，无上下心，无挂碍心，是平等心，真正之心，平等施戒，平等慈悲，无有分别犹如虚空，是名不分别众生。不分别法者，菩萨终不作是分别，受者为说、不受不说，受法者施其所须、不受法者则不供给，终不观察凡夫之人不可惠施、贤圣之人则应布施，是名不分别法。不分别心者，观诸众生心皆平等，不为报施，无内外贪，非为名施，不求果施，所爱之物施已不悔，为摄众生故行惠施，是名不分别心。不分别愿者，施时不为得帝释身、梵王之身、转轮王身、魔身、长者大臣之身，亦复不为大自在故、大眷属故，不为上有，不为声闻、辟支佛乘，乃至不为阿耨多罗三藐三菩提故，而行布施，是名不分别愿。

“善男子，菩萨摩訶萨修惠施时，具足成就如是四事，则得远离八不正见：一者、我见，二者、众生见，三者、寿命见，四者、士夫见，五者、常见，六者、断见，七者、有见，八者、无见。是名为八。复得远离四种功德：一者、凡夫功德，二者、声闻功德，三者、

缘觉功德，四者、余习功德。如是施已，不观四相：一者、常相，二者、乐相，三者、我相，四者、净相。能净四法：一者、净身，二者、净口，三者、净心，四者、净愿。远离三碍：一、果报碍，二、声闻碍，三、悔心碍。

“善男子，菩萨修行如是施时，远离三畏：一者、憍慢畏，二者、上慢畏，三者、魔业畏。菩萨修行如是施时，具四种印：一者、内空印，二者、外空印，三者、众生空印，四者、菩提空印。如是施时，具四精进：一者、满众生故具足精进，二者、护佛法故具足精进，三者、为具三十二相、八十种好故具足精进，四者、净佛土故具足精进。是时复得具足四念：一者、念菩提心，二者、念欲见佛，三者、心常念慈，四者、念离烦恼。如是施时，净于三事：一者、自身，二者、他身，三者、菩提。如是施时，净于四智：一者、界智，二者、众生满足智，三者、愿智，四者、助菩提智。善男子，菩萨若能行如是法，则能净于檀波罗蜜。

“善男子，云何菩萨净于尸波罗蜜行？善男子，有一种净，所谓菩萨怜愍一切世间众生，胜于声闻、辟支佛慈，能坏魔业调诸众生，具足无量功德宝聚，无有放逸。复有二种：一者、于诸众生不生恶心，二者、调诸众生令向菩提。复有三种：一者、净身，远离一切身恶业故；二者、净口，远离一切口恶业故；三者、净意，远离一切贪恚邪见故。复有四种：一者、劝诸众生令持禁戒；二者、劝诸众生具足净戒；三者、能调诸毁戒者；四者、见持戒者，供养恭敬，尊重赞叹。复有五种：一、持戒已不生憍慢，二、见毁戒不生轻慢，三、见持戒心无嫉妒，四、终不求声闻之乘，五者、不念辟支佛乘。复有六种：一者、念佛，为过戒故；二者、念法，为过戒已心不生悔；三者、念僧，为能具足如来戒故；四者、念戒，为不求诸有果报故；五者、念施，为能一切悉施与故；六者、念天，为欲具足诸善法故。复有七种：一者、深信一切佛法；二者、勤行精进，为得佛法故；三者、具智，为知一切诸佛法故；四者、闻已能说一切佛法故；五者、供养父母、师长、和尚；六者、畏于现在、未来恶业；七者、有惭愧心。复有八种：一者、不为利养显异惑众；二者、不说自事，离一切故；三者、不赞供养，心知足故；四者、行圣种性，乐善法故；五者、随头陀法，不惜身命故；六者、乐于寂静，离说世事故；七者、深心乐法，厌三界故；八者、至心护法，不惜身命故。复有九种：一者、离九恶心，过九众生所居处故；二者、念净；三者、念修；四者、增长善法；五者、心乐寂静；六者、离烦恼热；七者、庄严舍摩他；八者、勤行精进；九者、不欺众生。复有十种：一者、净身三业，二者、净口四业，三者、净意三业，四者、远离嫉妒，五者、离谄曲心，六者、至心念戒，七者、为持戒故勤行精进，八者、软语为调众生，九者、受身为众生使，十者、于诸福田不生轻慢。善男子，菩萨修行尸波罗蜜，有二种净行：一者、有心有相及以庄严，宁舍寿

命终不毁戒；二者、无心无相及无庄严，于一切法心无所著。复有二种：一者、净于内入，二者、不求一切外入。复有二种：一者、常愿菩提之心，二者、不观本向菩提戒相。

“善男子，云何菩萨净羼提波罗蜜行？善男子，菩萨摩訶萨受骂不报，口业净故；受打不报，身业净故；受瞋不报，意业净故。善男子，菩萨摩訶萨虽受骂辱所以不酬，护众生故；受诸楚毒所以不报，护后世故；被截手足，慈心不瞋，护菩提故；见有求者，心不生瞋，为四摄故，生慈心故，增菩提道故，坏悭贪心破魔业故。善男子，菩萨摩訶萨修念佛已，行于忍辱，受一切苦，为得佛身故。善男子，复有菩萨修于忍辱，为欲具足得十力故。复有菩萨修于忍辱，为欲成大师子吼故；复有修忍，为知三世无挂碍故；复有修忍，为得大慈大悲力故；复有修忍，为得具足一切智故。善男子，菩萨摩訶萨具足二力，能成就忍：一者、智力，二者、修力。以智力故观于身心，是故为忍；以修力故不著诸法，是故为忍。复次，善男子，净忍菩萨则能观察一切法中无有众生，是故修忍。一切诸法其性解脱，是故菩萨观一切法无忍无瞋，若于诸法心无所著，是名为忍。善男子，菩萨有二忍：一者、观如法身，二者、观如法界。菩萨摩訶萨若能如是观二法者，是名菩萨净羼提波罗蜜行。

“善男子，云何菩萨净毗梨耶波罗蜜行？若菩萨摩訶萨，于诸修行不息不悔，于诸善法心无厌足，亦乐修行五波罗蜜，常求庄严一切善法，拥护正法乐宣说之，调伏众生心无休息，过于声闻、辟支佛乘，拥护一切诸佛正法，修诸苦行其心不悔，终不丧失本昔善根，广修多闻心无厌倦，为众走使不生愁悔，是名精进。如是精进云何名净？若能观身犹如影像，口无言说，心毕竟净，以尽智观诸灭法，以无生智知诸有尽，如是观时则能庄严三种精进：一者、体庄严，二者、觉庄严，三者、分别庄严。复有三种不著精进：一、不著眼，二、不著色，三、不著识，乃至法亦复如是。是名不取不舍精进。具足如是勤精进已，不取惠施、不舍悭贪，不取持戒、不舍毁戒，不取忍辱、不舍瞋恚，不取精进、不舍懈怠，不取禅定、不舍乱心，不取智慧、不舍愚痴，不取善法、不舍恶法，不取佛道、不舍二乘，是名二种勤精进也，是二精进能具佛法。复有二种，所谓内外。若菩萨能修如是勤精进者，是名毗梨耶波罗蜜行净。

“善男子，云何菩萨净禅波罗蜜行？若菩萨摩訶萨，取诸禅支观诸禅支，观已入定，既入定已，不贪著色、受、想、行、识，是名为禅。非著眼禅乃至意禅，是名为禅。非著色禅乃者法禅，是名为禅。非著地、水、火、风、空禅，是名为禅。非著日、月、释、梵、自在天禅，是名为禅。非著欲界、色无色禅，是名为禅。非著此彼禅，是名为禅。非观身心禅，是名为禅。非著上下禅，是名为禅。非著四取禅，是名为禅。非著众生、寿命、士夫、我、人相禅，是名为禅。非著常见、断见、有无见禅，是名为禅。非毕竟尽漏禅，是名为禅。非

入定聚禅，是名为禅。非得沙门果禅，如是禅者，非毕竟行禅。名空调伏禅，非真空禅；名无相调伏禅，非真无相禅；名无愿调伏禅，非真无愿禅。是菩萨具足成就大慈大悲一切空行禅。云何名为具一切空？若能不观布施、持戒、忍辱、精进、禅定、智慧、方便、慈悲喜舍、四谛、菩提、智慧誓愿庄严、舍摩他、毗婆舍那、解脱、惭愧，是名诸佛方便三昧神通无碍智，摄取十力、四无所畏、十八不共法，不为二乘之所染污，断诸习气，具足无量大神通智，为诸众生之所归依，庄严世法及出世法，能善调伏一切众生，渡于四流生死大海，能断一切所有系缚，净诸法性，是名性寂静，非向法寂静，亦取向法舍性，了了向法盲性，有闻向法聋性，勤调伏向法停住，凉灭寂静，调伏炽然，是名一切行空。

“善男子，譬如三千大千世界，所有众生悉善知画，其中或有善能泥涂，或能磨彩，或晓画身不晓手足，或晓手足不晓面目。时，有国王以一张氎与是诸人，而告之言：‘凡能画者，悉来聚集于此氎上，画吾身像。’尔时，诸人悉来聚集，随其所能而共作之。有一画师，以缘事故竟不得来。诸人画已，持共上王。善男子，可言诸人悉集作不？”

“不也，世尊。”

“善男子，我说此喻，其义未显。善男子，一人不来故，不得言一切集作，亦不得言像已成就。佛法行者亦复如是，若有一行不成就者，不名具足如来正法，是故要当具足诸行，名为成就无上菩提。”

说是法时，六万菩萨于一切行得具足空。

“善男子，云何菩萨摩诃萨净般若波罗蜜？善男子，菩萨摩诃萨具十二慧：一者、知过去无碍，二者、知未来无碍，三者、知现在无碍，四者、知有为无碍，五者、知无为无碍，六者、知一切世作无碍，七者、知出世无碍，八者、知辩才无碍，九者、知实无碍，十者、知世谛无碍，十一者、知第一义谛无碍，十二者、知诸众生利钝无碍。是名为慧，难破能破，难观能观，难解能解，譬如金刚不可沮坏。是名出世之慧、毕竟慧、一切众生真解心慧，难行难入难见，甚深难可习学，正见正聚，远离诸见及以习气，自知了了知见一切众生之心，法智义智无所贪著，旷大光明无诤无诤，善知时节过于时节，护正法聚，毕竟觉、正觉、实觉，远诸垢秽不为一切之所呵责，一行无行，一切众生行，无足迹行。虽离一切世间之行，亦不远离一切世行；虽离世界，不离佛土；虽离一切诸行庄严，亦不远离调伏众生；虽离诸行，不离善行；虽离众生心行因缘，不离知于众生心行；虽离世行，不离世法；虽离诸身，亦入众生心，是名为慧。如是智慧甚为难得，非善根纯熟终不能获，不能常修行善法者亦不能得。如是智慧，菩提树下乃能得之，真知法性，诸佛所护，度至彼岸，知一切法施甘露味，是故名为般若波罗蜜。善男子，如是智慧，毕竟了知一切缘、一切相、一切众生心之所行，以是义故名为智慧。如是智慧有二

寂静：一者、知碍相寂静，二者、知无碍相寂静。复有二种：一者、无觉净，二者、离诸见净。如是智慧，菩萨摩诃萨常游众生利钝根中、众生心中、一切法中，观诸烦恼即是智慧。菩萨虽住诸界，多住佛界，能善观见十方世界，离一切盖，悉是一切佛法根本，具足一切无上佛法，不学诸法、不离诸法，不坏一法、不成一法。菩萨成就如是智慧，能作功德，能读诵说一切佛法，一切福德悉能得之，皆能修成一切善法，是名菩萨净般若波罗蜜行。”

说是法时，二万二千众生发阿耨多罗三藐三菩提心，八千菩萨得无生忍，五百比丘漏尽意解，十千天人得须陀洹果。

尔时，一切天与人同声而言：“世尊，若有人能信是经者，当知是人诸佛所护，何况有能受持、读诵、书写供养！”

“善男子，云何菩萨摩诃萨净菩提行？善男子，菩萨摩诃萨观身念处，有二种行：一者、不净行，二者、净行。不净行者，观身不净，臭秽充满，无常无住诳诸凡夫。净行者，菩萨摩诃萨作是思惟：‘我今因是不净之身，得净佛身，得净法身、净功德身、一切众生所乐见身。’复次，善男子，菩萨摩诃萨观身身已，能净二行：一者、无常，二者、常。菩萨摩诃萨观身无常毕定当死，如是观已，不为身故造诸恶业邪命自活，修三坚法：一者、身坚，二者、命坚，三者、财坚。如是观已，能为众生而作给使，即得远离身口意曲。菩萨如是观身无常，得如是等无量功德。云何为常？菩萨摩诃萨观无常已则得常身，因无常故得功德身，因无常故不断佛种、法种、僧种。善男子，又复常者即是无尽，无尽者即是为无为，无为者即是一切智所行处，一切智所行处者是空无相愿。又复常者即是虚空，菩萨摩诃萨观一切法犹如虚空，是名菩萨摩诃萨常行。善男子，复有菩萨修身念处，观察一切众生之身，毕竟当是如来佛身。如如来身，法身亦尔，如是二身我身亦尔，是名菩萨观无漏身。菩萨尔时所得善法，随其多少悉是无漏。以如是法，发愿回向一切种智，得无漏已终不起漏。所言漏者即是三漏，所谓欲漏、有漏、无明漏。菩萨了了知三漏已，为众生故生于欲界，亦复不为欲漏所污；色、无色界亦复如是。无明漏者已拔其根。何以故？拔无明故则无见漏。菩萨摩诃萨修身念已，于是身中，不见我及我所，不生憍慢；离我我所故，不求不取一切财物，不求取故于物无诤，以无诤故即是寂静。夫寂静者即是忍辱，住于忍辱不上不下，不上不下者即如法住，如法住者，不行善法，不行恶法。不上下已即得善友，得善友已遇善知识，遇善知识故得闻正法，闻正法故不以漏心向有漏法，是名过于诸漏境界，过漏境已常入禅定。既入定已，乃至一法不生觉观；无觉观故，不作一法，不变一法，是名如法，是名一切法平等。若得如是诸法平等，是名一切智。善男子，菩萨摩诃萨若能如是观身念处，是名观身身念。

“善男子，菩萨尔时次观受念处，于有受者生慈悲心，向诸众生作如是言：‘毕竟乐者断一切受。若人能断一切受者，即是常乐。’菩

萨尔时随所受者生慈悲心，若自若他受乐受时，远离爱心生于慈心；若受苦时，远离瞋心生于悲心；若受不苦不乐，离无明心生于舍心。是故菩萨受乐受时不生贪著，受苦受时不生瞋恚，受不苦不乐不生无明。菩萨尔时观一切受无常、苦、无我，见受乐者即知是苦，见受苦者如痛如疮，见不苦不乐受是不寂静；观于乐受即是无常，观于苦受即是空无，不苦不乐即是无我。菩萨尔时作是观已，见是诸受即是无受，见一切受即是有为，若是有为即是生灭散漏无住。如是观已，不见于我，不见受者，是名菩萨大智方便。因是方便，见一切受无常生灭，观一切法悉是空无，无受无受者，无作无作者，从缘而生，从缘而灭，无属无取，于诸因缘不生觉观。因无觉观，作如是言：‘诸因缘法皆悉是空。’菩萨摩訶萨如是观时成受念处，能令身心皆悉寂静，知一切行，是名一切智，是名受受念处。

“云何菩萨修心念处？菩萨摩訶萨住菩提心，观是心性，不见内入心，不见外入心，不见内外入心，不见阴中心，不见界中心；既不见已，作是思惟：‘如是心、缘，为异不异？若心异缘，则一时中应有二心。若心即缘，不应复能观于自心；犹如指端不能自触，心亦如是。’作是观已，见心无住无常变异，所缘处灭，即知是心非从缘生非不缘生、非常非断、非内非外、非有非无。观心如是，不妨如法知心寂静，是名菩萨修心心念。复次，善男子，菩萨摩訶萨观心非色不可睹见，非是觉观，是名菩萨修心念处。如心，心数亦如是；如心数，心行亦如是；如心行，心所求法亦如是；如所求法，菩提亦如是；如菩提，一切善法亦如是。菩萨若观心，如猕猴、画水、朝露、蜂王、鱼母，如河如焰，如想远事，独行无身，常转无停，贪著诸界次第生灭，能摄如是无量之心，令住一处不动不转，不漏不错，不乱不散，是名舍摩他。菩萨若能作如是观，是名成就观心心念处，是名知心境界，是名知心法界，是名知心真实之相，是名知心真实之性，即是广知，即真净知，了知、真知、实知如幻，是名知法，名知心性，名知心尽，名无取知、无挂碍知。菩萨摩訶萨如是观已，善知一切众生心性，知已如应而为说法。如知自心性，知一切众生心性，亦复如是。如知知心相，知一切众生心相，亦复如是。如知自心空，知一切众生心空，亦复如是。如观自心平等，观一切众生心平等，亦复如是。作是观已不动法界，是名菩萨修心心念处。

“善男子，云何菩萨修法念处？菩萨摩訶萨作如是观，法出法灭，无我、众生、寿命、士夫，无生无灭，无没无出，是名法性。若能求法，是名出法；若不求法，是名灭法。若善不善，出者从缘，灭者从缘。如是观时观于三行，所谓恶行、善行、不动行。是三行中，我当常行福善之行，为十善法。十善法者，为净身业，欲求如来三十二相、八十种好，他不能害。净口业者，凡有所说众乐听受。净心业者，于诸众生其心平等。常入禅定，净四无碍智。净慈心故，施众生常乐。净悲心故，无量世中为众生受苦其心不悔。净于十力，为知众

生诸根利钝。净四无畏，为知众生障无障故。净十八法，为知三世无障碍故。净一切佛法，为一切众生无能胜故。菩萨摩訶萨能如是观，于诸善法及诸功德不生厌足，亲近善行，远离恶行及烦恼习，真实了知于不动行，虽知不贪心得自在，随愿往生非结业生，生于欲界为众生故。善男子，菩萨摩訶萨得善方便，观法念处，修集庄严助菩提法，远离一切障菩提垢，得是功德，不著常见，不著断见，离是二见行于中道。夫中道者有二种法：一者、不善念，二者、无明。是二法中心不放逸，是名中道。复有二法：一行、二识。复有二法：一者、名色，二者、六入。复有二法：一触、二受。复有二法：一爱、二取。复有二法：一有、二生。复有二法：一老、二死。是二法中不放逸者，是名中道。如是中道，世间智慧所不能见，不可宣说，不可显示，无有相貌，无色无处，无取无舍，清净寂静。善男子，夫中道者，不可眼见，乃至不可触触，亦无至处亦世出世，不可宣说非多非少，故名中道。善男子，我与无我名为二边，若有说言非常非断、非命非土、非想非非想、非觉非非觉、非实非虚、非此非彼、非有非无、非有为非无为、非行非非行、非生死非涅槃，不作如是，是名中道。复次，善男子，菩萨摩訶萨观法法念，不分别法界；如法界，众生界亦如是。如是二界名虚空界，一切诸法悉入法界。夫法界者即众生界，众生界者即无分别。是名观察一切法，等见一切界即是法界，虽明了见而心不著，以不著故则无分别。菩萨摩訶萨不以肉眼、天眼、慧眼观法念处。何以故？如是三眼无相貌故。是故观法则以法眼，虽了了知而心不著，虽复不著不失法界，是名佛智。能知如是甚深法界，亦不失于一切智念，是名菩萨修法法念处。

“善男子，菩萨摩訶萨何故修集是四念处？为欲远离四颠倒故，修身念处为离净倒，修受念处为离乐倒，修心念处为离常倒，修法念处为离我倒。又离四食，修身念处离于抆食，修受念处离于触食，修心念处离于识食，修法念处离于思食。又复远离识四住处，修身念处离住色处，修受念处离住受处，修心念处离住想处，修法念处离住行处。复离五阴，修身念处远离色阴，修受念处远离受阴，修心念处远离识阴，修法念处离想、行阴。是名菩萨净四念行。

“善男子，云何菩萨修四正勤行？菩萨摩訶萨常乐修集一切善法，未生恶法为不生故勤行精进，已生恶法为远离故勤行精进，未生善法为令生故勤行精进，已生善法为住不失故勤行精进。善男子，菩萨摩訶萨于无量世修集善行，是故性善，不以方便令恶不生。若有菩萨修四正勤，心得自在。四正勤者，菩萨尔时心及心数与大慈悲和合共行，故名正勤。菩萨尔时次第修集四如意足：一者、欲，二者、心，三者、进，四者、慧。专念至心念于菩提，是名为欲；修大悲故觉心轻便，是名为心；远离恶法，是名精进；得方便故，名之为慧。菩萨修四如意足已，得四自在：一者、寿命自在。以自在故，虽生短命，自得长寿为调众生，与长寿者演说正法，于长寿中能现短寿。随

是菩萨所生之处，若天、若人得命自在。二者、身得自在。以自在故，随心作身，随心作色，示现威仪为众生故。菩萨若欲于诸众生其身同等，高大微小悉皆能作。三者、得法自在。以自在故，能知一切世出世法，示诸众生一切世事，于出世行心亦不退，明知甚深十二因缘，得无碍智，能为众生说种种法。无量众生闻是法已，发阿耨多罗三藐三菩提心。四者、愿得自在。以自在故，令四大海合作一海，不来不去，无有动转，如本不异；亦令三千大千世界诸须弥山合为一山，不来不去，无有动转，如本不异。于四天王、三十三天无所妨碍，欲令三千大千世界，悉作金宝、七宝、栴檀、华香、瓔珞，虚空水火皆随意成。是名菩萨得四自在。善男子，菩萨若得四如意足，则得面见十方诸佛，与共语言进止一处；一切梵天、帝释、四王、阿修罗、乾闥婆、迦楼罗、紧那罗、摩睺罗伽，亦复如是。

“云何净严四如意足？善男子，若能供养父母、和尚、师长、有德，见诸众生先意问讯，柔软与语，如语而作，视诸众生其心平等，善心、正心、恭敬心、惭愧心，远离贪欲、瞋恚、愚痴，无欺无贪，无妒无慳，营他事业如己所作，无势力者助其力势，泥涂之处发治土石，河涧沟渠造作桥梁，或以身负，或施船济，常施众生所需之物，口不说他衰恼之事，亦不讥刺他所犯罪，有犯罪者能如法除，遮诸烦恼令不生起，所重之物能以施人，既施之后心不生悔，为诸众生发愿回向，信心以善劝诸众生，不惜身命少欲知足，于他利养心无希望，常念出家亦劝众生，念善知识无心舍离，于怨亲中平等无二，以种种乘施行路者，羸乏之人施床卧具，有恐怖者能为救护，视诸众生如父母想，不轻毁戒施贫财物，有病瘦者给其医药，施恩于他不自称说，终不断绝三宝种性，常念无为，远离世事一切诸恶不善之法，不为世法之所污染，不失菩提至心之念，是名庄严净四如意足行。

大方等大集经卷第二十七

虚空目分中宝髻菩萨品第十一之二

“云何菩萨净五根行？菩萨信心不可动转，名为信根；不由他教而行精进，名精进根；常念菩提，名为念根；常修大悲，名为定根；摄取善法，名为慧根。复次，信诸佛法，名为信根；求诸佛法，名精进根；念诸佛法，名为念根；得佛三昧，名为定根；断诸疑网，名为慧根。复次，心向菩提无有疑网，名为信根；增长善法，名精进根；求善方便，名为念根；视诸众生其心平等，名为定根；观诸众生上中下根，名为慧根。复次，心净无浊，名为信根；坏众浊心，名精进根；念清净法，名为念根；观心性净，名为定根；能令众生住清净法，名为慧根。复次，远离一切弊恶之法，名为信根；求诸善法，名精进根；得已不失，名为念根；既得善法如法而住，名为定根；思惟

善法、不善、无记，名为慧根。复次，信根者即是施心，精进根者即是乐施无有休息，念根者既施之后不求果报，定根者即平等施心无分别，慧根者不观福田及非福田。复有信根，即是初入善法之心，精进根者能坏憍慢，念根者离我我所，定根者远离一切六十二见，慧根者远离一切诸恶烦恼。是名菩萨净五根行。

“云何菩萨净五力行？善男子，菩萨摩诃萨具足五根，不为诸魔之所破坏，故名为力。一切声闻、辟支佛乘所不能及，一切众生不能令其退大乘心，一切烦恼不能破坏，能令其心知足少欲，身得大力，善覆诸根，得金刚身，是名为力。善男子，菩萨摩诃萨，住信力时终不造作一切诸恶，住进力时造一切善，住念力时不失善法，住定力时不为五欲乐之所坏，住慧力时远离一切诸结烦恼。复次，住信力时不随他语，住进力时求善不息，住念力时得陀罗尼，住定力时说法平等，住慧力时能坏一切众生疑心。复次，住信力时具得解力，住进力时具精进力，住念力时具解脱力，住定力时具足愿力，住慧力时具诸行力。复次，住信力时见慳罪过，住进力时远离慳贪，住念力时以所修善愿向菩提，住定力时其心平等，住慧力时心终不求施戒定报。复次，住信力时能离一切破戒之垢，住进力时至心具戒，住念力时以所持戒愿向菩提，住定力时具清净地，住慧力时远离作戒。复次，住信力时远离瞋心，住精进力修习忍辱，住念力时以所修忍愿向菩提，住定力时护诸众生，住慧力时不观众生、士夫、寿命。复次，住信力时远离懈怠，住进力时所修诸行到毕竟岸，住念力时所修精进愿向菩提，住定力时身心寂静，住慧力时不住善恶。复次，住信力时远离一切匆务之事，住进力时勤求禅支，住念力时以所修定愿向菩提，住定力时其心常定，住慧力时不著诸定。复次，住信力时远离无明，住进力时勤求诸善，住念力时以所修智愿向菩提，住定力时修善思惟，住慧力时如法而住。复次，住信力时具足七力，住进力时得住七觉，住念力时得八念处，住定力时离七识处，住慧力时离八邪支。复次，心于菩提无有退转，是名信力净、信力行；不取不舍，是名进力净、进力行；修四念处，是名念力净、念力行；调伏于心，是名定力、净定力行；远离诸见，知善方便，是名慧力净、慧力行。

“善男子，云何菩萨净七觉行？终不失于助菩提法，名念觉分；不取不舍奢摩他，名择觉分；离一切恶名进觉分，离诸愁恼，名喜觉分；身心寂静，名除觉分；得解脱味，名定觉分；所作已办，名舍觉分。复次，不舍菩提心，名念觉分；至心护法，名择觉分；调诸众生无有休息，名进觉分；具足善法，名喜觉分；离诸烦恼，名除觉分；能令众生住三昧中，名定觉分；令诸众生悉知法界，名舍觉分。复次，不念声闻、辟支佛乘，名念觉分；分别一切法字句义，名择觉分；求善法时三业不息，名精进觉分；离怨亲心，名喜觉分；如法而住，名除觉分；随诸世间而能调伏，名定觉分；不观二法，名舍觉分。善男子，助菩提者，觉一切法，知一切法，分别诸法，筹量诸

法，知诸众生心性心行，是名菩提分，亦名圣行。如是圣行，非是一切凡夫魔众邪见所行，非是色、声、香、味、触行，非一切相、一切受、诸心意识见闻觉知、有想无想一切法行，故名圣行。夫圣行者，非觉非非觉，亦非大觉，而能对治一切诸法，然复不与诸法诤讼，是名圣行。圣行者，即是佐助菩提之法。

“善男子，云何菩萨净八道行？八道者，所谓正见。云何正见？正见者，见一切法皆悉平等，如是正见不名空见。何以故？自有正见非是空见，如是二见亦名同见。复有我见、众生见、空见，不名正见，如三见亦复同见。又众生见、命见、空见，不名正见，如三见亦复同见。又有我见、断见、空见，不名正见，如三见亦复同见。又有有见、无见、空见，不名正见，如三见亦复同见。复有四见，佛见、法见、僧见、空见，是名正见，如是四见不名空见。善男子，若有人著如是见者，不名正见；若不著者，乃名正见。何以故？夫正见者，见无分别，平等无二。云何名为平等见耶？若作是念：‘凡夫法下，学法为上。’如是名为非平等见。‘凡夫法漏，学法无漏。凡夫法食，缘觉无食。凡夫法垢，菩萨法净。凡夫有为，佛是无为。’如是见者非平等见。若能观察凡夫之法乃至佛法无有差别，乃名平等。若能观见凡夫法空至佛法空，是名正见。观凡夫法从因缘生，辟支佛法亦从缘生，乃名正见。若观凡夫法寂静、菩萨法寂静，是名正见。若观凡夫法不具足，乃至佛法亦不具足，是名正见。若观我与无我无有差别，无差别见，乃名正见。若如是见，则不见于上中下法，于一切法亦无觉观，是名正见。正见者名无所见，无所见者即是正见。若如是见，是人乃至不见一法、一法相貌、一法光明。善男子，若如是见，是名佛法之正见也。”

说是法时，五百比丘得阿罗汉果。

“善男子，云何正觉？正觉者离一切觉，觉者名为智慧方便，观法知法是名正觉。观察诸法何者是垢？何者是净？如是观已，都不觉知等与不等，离一切觉，是名正觉。

“云何正语？口所出言，不自焦恼亦不焦他，不自污辱亦不污他，不自生慢不生他慢，不自诳惑不诳惑他，是名正语。复次，正语凡有所说，说一切法皆悉平等，善能分别有为之相，是名正语。复次，正语说一切法空无相愿，无生无灭，无出无没，是名正语。复次，正语说有为苦、无常、无我，涅槃寂静，是名正语。若有众生说言众生，一切无有寿命、士夫，一切诸法从因缘生，从因缘灭，犹如子果，是名正语。净正语者即是佛语，是名净正语行。

“云何正业？正业者，若业虽能坏一切业，亦不名业。若业能作寂静之因，不垢不净，能坏烦恼不令增长，是名正业。知业如是犹作善业，亦观诸业皆悉空寂，无有坚实是苦无乐，是名正业。

“云何正命？正命者，若命不妨自身他身，不增一切诸恶烦恼，非恶业活，是名正命。菩萨摩訶萨于诸众生净于正命，以是正命愿向

菩提，是名正命，如是正命能利自他。

“正精进者，勤作方便求诸善法，欲心不息无有厌悔，是名精进。推求诸法平等之性，亦不观法等与不等，不作非不作，了知于如法性实性，名正精进。宣说正法，令诸众生离邪精进，亦知众生所修行行，是名正精进。

“云何正念？若念施、戒、忍辱、精进、禅定、智慧、四无量心，是名正念。复有正念，摄诸烦恼不令妄起，不近一切恶魔诸业，不堕恶道，不起恶心，常修一切正善之法，远离一切邪恶之法，是名正念。菩萨住是正念之中，获得正聚沙门正果，是名正念。

“云何正定？修行圣行，知苦、离集、证灭、修道，是名正定。复有正定，观一切法皆悉平等。若观我净，一切亦净；若观我空，一切亦空。虽作是观不入正位，是名菩萨之正定也。菩萨摩訶萨住是定中，于一念顷得一切智，是名正定。”

说是法时，万六千天与人发阿耨多罗三藐三菩提心。

“善男子，云何菩萨净神通行？善男子，天眼五种，悉能睹见十方世界，及见十方世界诸佛，亦见众生出生退没，所见十方无有挂碍，胜于一切声闻、缘觉及诸天人。菩萨具足如是五事，则能了了见一切法，是名菩萨净天眼行。菩萨摩訶萨得天耳通，闻五种声，人声、非人声、地狱声、十方诸佛说法之声、一切众生语言音声，是名菩萨净天耳行。云何菩萨净他心智行？知他心智亦有五种，悉知一切人天之心，地狱、饿鬼、畜生等心，知过去心、知未来心、知现在心，是名菩萨净他心智行。复有他心智，知是众生是正定聚、是邪定聚、是不定聚，知是众生有贪瞋痴，既了知已随应说法，众生闻已得坏烦恼，是名菩萨净他心智行。云何菩萨净宿命智行？了知是身从贪恚痴因缘而生，了知是身从施、戒、忍、精进、定、慧、慈悲喜舍因缘而生，了知是身具足不具足，了知是身因无明爱及四倒生，了知是身施因缘故具足财物及以眷属。如是等智，是名菩萨净宿命智行。云何菩萨净神通行？神通行者亦有五种：一者、示色，二者、解种种语而为说法，三者、善能了知心意识等，四者、能觉诸法说一切法。是名菩萨净神通行。

“善男子，如是五通为漏尽故，菩萨修习而不尽漏，为欲了知一切诸漏。何以故？调众生故。善男子，譬如一城，纵广一由旬，多有诸门，路险黑闇甚可怖畏，有入城者多受安乐。复有一人，唯有一子爱念甚重，遥闻彼城如是快乐，即便舍子欲往入城。是人方便得过险道，到彼城门，一足已入，未举一足，即念其子，寻作是念：‘我唯一子，来时云何竟不与俱？谁能养护令离众苦？’即舍乐城还向子所。善男子，菩萨摩訶萨亦复如是，为怜愍故修习五通；既修习已，垂得尽漏而不取证。何以故？愍众生故舍漏尽通，乃至行于凡夫地中。善男子，城者，喻于大般涅槃；多诸门者，喻于八万诸三昧门；路险难者，喻诸魔业；到城门者，喻于五通；一足入者，喻于智慧；一足未

入者，喻于菩萨未证解脱；言一子者，喻于五道一切众生；顾念子者，喻大悲心；还子所者，喻调众生；能得解脱而不证者，即是方便。善男子，菩萨摩訶萨大慈大悲不可思议。”

宝髻菩萨白佛言：“世尊，如佛所说大慈大悲不可思议，实如圣教，不但慈悲不可思议，善方便力亦不可思议。菩萨为了自知当得阿耨多罗三藐三菩提而不证之，为众生故行于生死，不为生死之所污染。世尊，菩萨摩訶萨具何等法，在生死中心不厌悔？”

“善男子，菩萨摩訶萨具二十一法，在生死中而不生悔：一者、所修善法共大慈行，二者、所修慈心共大悲行，三者、所修大悲共调众生行，四者、调伏众生共精进行，五者、所修精进共善心行，六者、所修善心共方便行，七者、所修方便与慧共行，八者、所修习慧共禅定行，九者、所修四禅共神通行，十者、所修神通与智共行，十一者、所修习智与欲共行，十二者、所修习欲与念共行，十三者、所修习念共菩提心行，十四者、所修菩提共四摄行，十五者、所修四摄与戒共行，十六者、所修戒禁共多闻行，十七者、所修多闻共如法住行，十八者、如法共住陀罗尼行，十九者、陀罗尼共无碍智行，二十者、无碍智共功德庄严行，二十一者、功德庄严共智慧庄严行。是名菩萨二十一法，在生死中不生厌悔。”

宝髻菩萨白佛言：“世尊，云何菩萨庄严自身，亦令众生得大利益？”

佛言：“善男子，菩萨摩訶萨若具多闻则名庄严，为他演说名大利益。复次，得大总持名为庄严，为他演说名大利益。复次，无有放逸名为庄严，调伏众生名大利益。复次，三十二相名为庄严，具大智慧名大利益。复次，口言柔软名为庄严，说如说行名大利益。复次，能一切施名为庄严，不求果报名大利益。善男子，是名菩萨庄严自身，亦令众生得大利益。”

“善男子，过去无量阿僧祇劫，劫名乐喜，彼中有佛，号一切众生乐念如来、应、正遍知、明行足、善逝、世间解、无上士、调御丈夫、天人师、佛世尊，其佛世界名曰天观。善男子，何故彼劫名曰乐喜？彼大劫中具有六万诸佛出世。彼劫之初首陀婆天，唱如是言：‘是劫当有六万佛出。’众生闻已心皆乐喜，是故彼劫名曰乐喜。善男子，其佛世界庄严微妙无有量，快乐好妙如天无别，是故世界名曰天观。其土皆悉栴檀为地，一切无有土沙尘雾，其香遍薰无量佛土，其地周遍出诸莲华，一一诸华有大光明遍照其土。其土众生悉得神通，足不蹈地；乃至无有一人处胎，皆悉化生。一切不闻女人之名，亦无受苦三恶道名。一切众生禅喜为食，其土无有三乘之名。一切皆以真金瓔珞、天冠宝饰而自庄严。虽无剃发染衣袈裟，而亦得名出家之人。何以故？于一切物舍无贪故。彼土如来色如梵天，现梵天身，为诸菩萨演说法要。若他世界有诸菩萨，见彼佛已受大欢喜。善男子，彼佛若欲宣说法化，升大法座，在大众上七多罗树，常略说法。何以

故？一切众生根猛利故。如来所说唯是一句，而诸众生解百千句。如来常说四净之法。何等为四？一者、波罗蜜净，二者、助菩提净，三者、神通净，四者、调众生净。

“时，有菩萨名曰宝聚，白佛言：‘世尊，云何菩萨庄严自身，亦令众生得大利益？’彼佛答言：‘善男子，菩萨若具无碍智者名为庄严，能作智明名大利益。’尔时，彼佛说是法时，六千菩萨得无生忍。时，彼菩萨复白佛言：‘世尊，云何菩萨庄严菩提树？’佛言：‘善男子，菩萨若能修不放逸，是名庄严菩提之树。云何名为不放逸？不放逸者名如法住，如法住者如说而住。复次，不放逸者，名无量庄严、无量布施、无量持戒、无量忍辱、无量精进、无量禅定、无量智慧、无量佛法、无量调伏、无量功德智慧庄严，供养无量诸佛世尊，具智慧故无量多闻，为增智慧故无量修奢摩他、毗婆舍那，成就如是无量等法，名为庄严菩提之树，亦能疾得阿耨多罗三藐三菩提。善男子，一切佐助菩提之法，以不放逸而为根本。具大庄严一切智慧，不失一切善法，远离一切烦恼，摄取一切诸法，于一切法无有挂碍，调伏诸根，护诸善法不令退失，知时非时，具足十力、四无所畏，佛法顶法名不放逸。’善男子，说是法时，万二千菩萨得无生忍。尔时，宝聚菩萨即汝身是。善男子，汝今当知具不放逸菩萨摩訶萨，则能庄严菩提之树。

“善男子，云何菩萨净于调伏？善男子，众生之行，无量无边，不可思议；调伏亦尔，无量无边，不可思议；菩萨行亦无量无边，不可思议。菩萨摩訶萨一心至心调伏众生，善男子，有诸众生闻说惠施则得调伏；或有众生闻说持戒而得调伏；复有众生闻说施戒而得调伏；复有众生软语调伏；复有众生瞋语调伏；复有众生具二种语而得调伏；复有众生闻说身业而得调伏；复有众生闻说舍身而得调伏；复有众生胜能调伏；复有众生强可调伏；复有众生闻说呵责而得调伏；复有众生施时调伏；复有众生初时调伏；复有众生见妙色已而得调伏，声、香、味、触亦复如是；复有众生常亲近故而得调伏；复有众生常远住故而得调伏；复有众生见佛调伏；或有众生闻法调伏；或有众生闻无常法而得调伏，苦、空、无我，亦复如是；或有众生闻说施声而得调伏，戒、忍、精进、禅定、智声，亦复如是；或有众生闻说一切有为无常而得调伏；或有众生闻赞人天而得调伏；或有众生闻声闻乘而得调伏，辟支佛乘、佛乘亦复如是；或以四摄而得调伏；或以三摄、二摄、一摄而得调伏；或复不以四摄之法而得调伏；或因内施而得调伏，外施、内外施亦复如是；或闻宣说地狱中苦而得调伏，饿鬼、畜生、人、天亦尔；或说纯乐而得调伏；或闻纯苦而得调伏；或闻苦乐而得调伏；或有睹见比丘形像而得调伏，比丘尼、优婆塞、优婆夷像而得调伏；或因种种作倡伎乐而得调伏。善男子，菩萨如是能知种种调伏众生行，是名菩萨能行六波罗蜜，具足佐助菩提之法，具足神通调伏众生。善男子，若有菩萨具足四法，则能调伏一切众生：

一者、心不悔厌，二者、不贪诸乐，三者、知时非时，四者、了知诸心。复有四法，何等为四？一者、正语，二者、爱语，三者、净语，四者、如法语。复有四法：一者、于诸众生心无挂碍，二者、悲心，三者、利益心，四者、自调诸根。复有四法：一者、净于自心，二者、怜愍他心，三者、勤行精进，四者、远离受乐。善男子，是故菩萨摩訶萨调伏之行，无量无边不可思议。

“善男子，过去无量阿僧祇劫，有劫名爱，是中有佛，号广光明如来、应供、正遍知、明行足、善逝、世间解、无上士、调御丈夫、天人师、佛世尊，世界名寂静。彼佛具有九万六千亿声闻众，八万四千诸菩萨众。其土人民寿命十七万二千岁。尔时，有一大王之子，名财功德，婆罗门种，颜貌端正，众生乐见。年十六时，自恃端正而生憍慢，初不向佛恭敬礼拜。尔时，如来即作是念：‘如是王子，今将退失阿耨多罗三藐三菩提，善根不熟。若得善友，则得诣佛闻法受持。’尔时，如来即于八万四千菩萨大众之中，行筹而言：‘谁能调伏是婆罗门子？谁能于是八万四千年中，经常往返是王子家若受众苦，所谓骂打心不生悔？’八万四千诸菩萨等乃至无有一人取筹，第二第三亦复如是。第三唱已，有一菩萨名净精进，即从座起，偏袒右肩，右膝著地，合掌而言：‘世尊，我今能诣彼王子家甘心受苦。’说是语时，三千大千世界为大震动，一切人天咸同声唱言：‘善哉！善哉！大士。’时，净精进菩萨即便往彼王子门立，王子见之，恶言皆毁，以土坌面，刀杖瓦石而加其身。菩萨尔时不瞋不去，心不疲厌，经一千年受如是苦；过二万岁，乃得至彼第二门下；八万四千年七日未滿，方得至其第七门下。尔时，王子见是菩萨，便作是言：‘道士今来何所求索？’即于菩萨生不思議心：‘云何是人经尔所时，多受众苦而心不厌？’第二第三亦如是言：‘道士今来欲何所求？’尔时，菩萨知彼王子心已调伏，即说偈言：

“世间所有一切财， 金银琉璃及玻瓈，
及四供养我不须， 唯为法故来至此。
此世有佛名广光， 为众生说无上法，
众生闻已离烦恼， 亦受无量甘露味。
诸佛世尊出于世， 甚难于彼灵瑞华，
今此世出无上尊， 汝乃放逸沉欲海。
一切众生常闇行， 无上如来施慧炬，
自恃财色生憍慢， 而不往诣如来尊。
一切财宝众生命， 佛说是二悉无常，
众生若闻是甘露， 不诣佛者名放逸。
汝本往昔行菩提， 请诸众生许法味，
汝今犹属诸烦恼， 云何能调诸放逸？
我今求汝共诣佛， 破坏憍慢离烦恼，

勤修精进舍国事， 令汝终时心不悔。’

“是时王子闻是已， 远离憍慢即生信，
赞叹恭敬净精进， 忏悔先来所加苦：
‘我今舍离国土事， 及以上妙五欲乐，
坏破憍慢至佛所， 听甘露法调众生。’

“八万四千众围绕， 持妙香华往供养，
到已即便奉献佛， 破慢至心而听法，
礼拜合掌心欢喜， 向佛世尊发是言：
‘我今归依净精进， 受苦不悔调伏我，
虽设多供不能报， 今于佛前至心悔。
我所修行菩提道， 以慈悲心调众生，
我更不造放逸心， 乃至获得菩提道。’

“善男子，尔时王子即舍王位，在佛法中出家听法，如法而住得无生忍。善男子，汝知尔时净精进者，岂异人乎？莫作斯观！即我身是。财功德者，即弥勒是。善男子，是故菩萨调众生行，无量无边不可思议。若有菩萨能调众生，是真菩萨所修之业。善男子，菩萨摩訶萨有四种业：一者、净佛国土菩萨业，二者、净身菩萨业，三者、净口菩萨业，四者、求一切佛法菩萨业。复有四业：一者、知心，二者、知根，三者、知病，四者、能治。”

尔时，宝髻菩萨闻是法已，即以髻上真宝之珠价值无量，从无量业之所出生，奉献如来，作是誓愿：“我今以是顶宝施佛，愿此功德为众生首，因是因缘得无上智。”

尔时，世尊即便微笑，是时口中出大光明，种种杂色，悉能隐蔽一切光明。

尔时，疾辩菩萨即起合掌，白佛言：“世尊，何因缘故如来微笑？”

佛言：“善男子，汝见宝髻施我顶宝不？”

“已见，世尊。”

“善男子，如是菩萨已于无量无边佛所，发阿耨多罗三藐三菩提心，持戒精进求于菩提，供养无量恒河沙等诸佛世尊，亦已调伏恒河沙等无量众生。善男子，如是菩萨于未来世，过十阿僧祇劫，当得阿耨多罗三藐三菩提，号曰宝出，世界名净光，劫名无垢。其佛世界七宝所成，光明遍照十方世界，一切人民无有饥渴，一切皆是清净菩萨，耳初不闻二乘之名，常闻纯一大乘之法，是故如来名曰宝出。一切菩萨具足神通，其土无主，唯除法王。一切众生悉得化生，亦复无有三恶之名及男女根、爱欲之名，无有众生不具诸根，亦无边地。众生寿命四万中劫。是佛世尊不说余事，唯除六度。菩萨慈悲，一切利

根，闻说一句悟解千句。是佛常为一切菩萨说陀罗尼金刚句。云何名为陀罗尼金刚句？陀罗尼金刚句者即是一句，如是一句即摄一切法句、无尽法句，无尽法句一切诸佛所不能尽，是故名无尽法句行。无尽法句摄一切字，一切字者摄一切法句。一时不得说于二字，一字亦复不合二字，是故名一句，名为作句，名为字句。若不分别字句、法句、作句，是名陀罗尼金刚句。善男子，如是陀罗尼金刚句，彼佛常为诸菩萨说。善男子，若我一劫若减一劫，说彼如来所有功德不能具尽。”

尔时，宝髻闻授记已，心大欢喜，说偈赞叹：

“一切知见一切事， 得到一切法彼岸，
远离一切诸烦恼， 是故名佛无上尊。
我所供养无量佛， 如来善了如一佛，
如来获得无碍智， 故知三世无障碍。
如来今为我授记， 令我远离疑网心，
我亦当得真实道， 如今释迦牟尼尊。
一切大地能令散， 虚空日月可令落，
如来之言无有二， 是故我定得菩提。
正语实语微妙语， 授我无上菩提记，
若我真实得菩提， 当善调伏无量众。
我之所得净妙国， 及其大众佛已说，
我今闻此无上法， 坏疑趣向于菩提。
我今精进修菩提， 调伏众生心不悔，
今佛口施我信力， 无上智慧及佛力。”

说是偈时，万二千众生发阿耨多罗三藐三菩提心，各作是言：“愿我皆得生彼世界。”

尔时，世尊告阿难言：“汝当受持如是正法，读诵广说，为大利益诸天世人。阿难，若有众生信受是经，定当为我之所授记。善男子，若以三千大千世界满中七宝给施众生，满一千年，不如有人受持读写如是经典。”

阿难白佛言：“世尊，是经何名？云何奉持？”

“阿难，是经名曰《方等大集大陀罗尼大行菩萨入处》。”

尔时，阿难闻佛说已，诸天世人皆大欢喜，信受奉行。

大方等大集经卷第二十八

日密分初护法品第一

尔时，世尊故在欲、色二界中间大宝坊中，与大菩萨其数无量，

为诸大众说虚空目出息入息甘露门已默然而住。一切大众亦复如是，各作是念：“如来今日深知我心欲法无厌，必当降注甘露法雨。”作是念已，合掌恭敬乐瞻如来，犹如笃病乐见良医，处闇之者乐睹光明，如没水者乐至彼岸，如受苦者乐得归依，一切大众亦复如是。

是时，众中有一菩萨，名莲华光功德大梵，已于无量无边佛所，种诸功德善根增长，于阿耨多罗三藐三菩提心不退转，成就具足法缘之慈，从坐而起，合掌恭敬，长跪白佛言：“世尊，一切众生心所缘处，无有边际，骏速无形，其性本净，于诸有中无能障碍，欲得通达知真实故，精勤修集四无量心，因修集故获得尽智。世尊，若使三界性本净者，何故修集如是尽智？惟愿如来为诸菩萨敷扬散说，令退转者得不退故，摧灭无量烦恼界故，断破无边诸苦聚故。惟愿如来，垂心怜愍，说未曾闻。众生闻是未曾闻已，度生死海，摧折爱树。何以故？一切烦恼爱为根本。惟愿垂哀，分别演说爱之过咎。如来能净众生六根，重愿演说清净法聚。”

佛言：“善哉！善哉！善男子，若有能行六波罗蜜，即能自知心所行处，是人终不念声闻乘。虽复修行无量诸行未得其边，亦不怖畏退堕声闻、辟支佛地。若诸菩萨不能修集四无量者，如是菩萨于菩提道则为有退，是名不得清净六根，是名于法有贪有悭，如是名为行于他行、不行自行，是名不能成就七财，不能度脱一切众生于生死海。是故我说如是行者，即是声闻、辟支佛行。我初演说四圣谛行，后复续说诸菩萨行，尔时一切大众咸作是念：‘如来将欲说声闻乘，不说大乘耶？将非如来不乐如是菩萨众耶？如来自欲断三宝种性耶？何故不说大乘妙法？’为诸天入得信心故，未发菩提心者为发心故，已发心者得增长故，为诸众生得信心故，如来若说大乘法者，无量众生当得发起菩提之心，因得修行不共之法，成就具足法陀罗尼。善男子，声闻乘者即是大乘，大乘者即声闻乘，如是二乘无有差别。”

尔时，众中诸住十住诸菩萨等作如是言：“世尊，我等已得无生法忍，我已能行如来十八不共法行，我已解了诸声闻乘及以大乘。如是众中无量众生，不能得解小乘、大乘。诸善男子，汝等当修不退禅定。”时诸菩萨即便修入，入已或有身放光明犹一灯炬，如释梵身光，如日月光，如三日光，如四日光，如八日光，如十日光，如亿日光，如是遍照娑婆世界。是光能令无量众生身心寂静，在三恶者离诸苦恼，邪见之人远离恶见，永离贪欲、瞋恚、痴怖、饥渴等患。尔时，此佛世界众生，皆共供养佛法僧宝增长善法。尔时，此佛世界，并及十方恒河沙等无量世界，若空不空及净不净光，悉遍照十方佛界。所有菩萨能行圣行菩提道者，于一念顷悉来聚集大宝坊中，头面礼佛，却坐一面。

尔时，世尊告声闻众：“汝等比丘颇见如是善神足不？如是神足能坏一切恶魔境界及诸有处，能护法界，能行一切诸佛境界，分别声闻、辟支佛界，出胜一切所有神通。善男子，一切菩萨所以示现大神

通者，为增众生诸善根故，为不断绝三宝性故，为未信者得信心故，为已信者得增长故，为令众生受五乐故，为欲长养大乘法故，为令身得常乐我净故；以如是等诸因缘故，示诸众生如是神通。善男子，随如是等菩萨行处，是中佛法即得增长，若现在、未来久住不灭。所有众生修立塔庙，供养众僧，求无尽身、无苦恼身所作供养，皆作生身、法身。生身供养者即是塔像，法身供养者书写读诵十二部经，如是胜以七宝、香华、伎乐、幡盖、瓔珞供养。

“善男子，我于尔时心亦受之，由如是施，如是众生具足当得三乘果报，心不退转。若诸众生具造屋室及经行处，我即受用。若树林、华园、讲堂、精舍，及供养我所有弟子，饮食、卧具、病药、房舍，我亦受用。若诸法师高座说法，我于是时亦至心听。若施法师衣食、卧具、病药、房舍、园林、服乘、田宅、奴婢，我亦受之。是名法供养。如是之人能净身心庄严身心，亦能庄严阿耨多罗三藐三菩提，能得无上微妙快乐，能一切物施、一切人施、一切时施，能一切果受、一切人受、一切时受，是名成就惠施之福。是人终不到三恶道，得不堕法，如意所求不转三乘。是人常得具足二种，所谓财、法，所求之物随意即得，常为十方诸佛所念，能坏一切魔之境界。若有信者，以其所有奉施法师。若有破戒受如是物，乃至一叶一华一果，如是痴人，以是因缘得大不善报，现在即得四大恶果：一者、恶名远闻；二者、所亲师友悉皆远离；三者、得大重病苦恶而死，所谓死时不下饮食，睹见恶色，以是因缘，口不能语，卧失糞秽；四者、所有六物及余财货不至僧中，或为火烧，恶贼所劫。后世复受四种恶报，所谓地狱、饿鬼、畜生。若得人身，身无手足。若受饿鬼，无量岁中不见水浆，不闻其名。受畜生身，常食泥土。若得为人，处在空土，无三宝处五滓之世，盲无眼目，常遇重病，食诸糞秽，舍是身已还堕地狱。何以故？以受法师所得物故。是恶比丘能坏、能灭、能断三宝，是故获得如是恶果。”

尔时，众中有一大德比丘，名伽耶迦葉，白佛言：“世尊，如是人者可名人不？我今思惟非是人也。何以故？是人深为利养心故受持禁戒，故名非人。”

佛言：“善哉！善哉！迦葉，宁受地狱等身，终不受取如是等物。善男子，人身难得已得，佛法难遇已遇，禁戒难受已受，而不趣向圣行梵行，是名丧失大利益事。如是恶人，贪食心故受持禁戒，非为法心。如是痴人以多闻力，及以国王、大臣力故，受如是物，即便当得大恶业果。”

尔时，频婆娑罗王白佛言：“世尊，出家之人受如是物，得如是果。在家人受，其罪云何？”

佛言：“大王，汝今不应问如是事？”

王言：“世尊，我修圣行，终不受取如是等物。为未来世诸恶王等，问如是事耳！”

佛言：“大王，我若宣说未来恶王所得果业，有不信者得大罪报，是故我今置之不说。”

王言：“世尊，惟愿如来，为未来世刹利、婆罗门、毗舍、首陀有信敬者，奉持佛法，守护法师及财物者，具分别说。”

佛言：“善哉！善哉！大王，若未来世诸恶王等，侵夺法师如是等物，当知是王现世获得二十种恶：一者、天不卫护，二者、恶名远闻，三者、亲友远离，四者、怨敌增长，五者、财物损耗，六者、心多散乱，七者、身不具足，八者、不得睡眠，九者、常患饥馑，十者、所服饮食变成恶毒，十一者、民不爱敬，十二者、邻国数侵，十三者、所有眷属不受其教，十四者、秘密之事谋臣显露，十五者、所有财物水火侵夺，十六者、常有重病，十七者、汤药不行，十八者、医药不疗，十九者、浆水不下，二十者、常念不净。是名二十。舍是身已，寻复当生阿鼻地狱一劫受苦；过是劫已，得饿鬼身处大空野，不闻浆水饮食之名，诸根残缺身不具足，无量岁中受大苦恼；受是果已，生大海中受大兽身，无量由旬如大肉团，常为众生之所啖食受大苦恼；若得人身，生无佛处五滓之世，耳目不具。大王，未来恶王得如是等诸大恶报。”

王言：“世尊，我今宁受地狱之身，终不受是恶王身也。”

佛言：“大王，今以是法、法师、财物，付嘱汝等有信诸王。何以故？夫法师者，即是如来法身之藏。”

王言：“世尊，若诸刹利、婆罗门、毗舍、首陀有能护持如是法财，其人当得何等功德？”

佛言：“大王，如是人者，胜于一切声闻、缘觉。大王，譬如有人能断一切十方众生所有寿命，夺其眼目，截其手足。大王，如是人者所得罪报为多少耶？”

频婆娑罗王默然不答。

佛言：“大王，何故默然？”

王言：“世尊，是人所得恶业果报，不可称量，不可计数。世尊，若于一人造此恶业，罪尚难计，况一切人！”

“大王，若佛在世及灭度后，若有恶王刹利、婆罗门、毗舍、首陀，侵夺法师如是等物，所得罪报分为百分，上所得罪不及其一。”

频婆娑罗王言：“世尊，如法治国，是王难得。若不放逸则能护法，若放逸者则不能护。世尊，能护法者得何功德？”

“大王，譬如有人能与如上众生寿命、眼目、手足，是人得福宁为多不？”

“世尊，能与一人命目手足，其福尚多，况尔所人！大王，若有护法所得功德分为百分，先所得福不及其一。”

王言：“世尊，若有受取一法师物，是得罪不？若有拥护一法师者，复得福不？”

“大王，若有受取一法师物至五法师，护一法师及五法师，所得

罪福正等无别。大王，若一庙寺、若一村落、若一树林住五法师，若鸣犍捶集四方僧，客僧集已，次第赋给房舍、饮食、卧具、医药，无吝惜心，初夜后夜读诵讲论，厌患生死，专乐涅槃，不自赞身，不诤彼短，少欲知足常乐赞叹，少欲知足勤心精进，志乐寂静修于念定，怜愍众生。大王，是名众僧如法而住。护戒精进，持佛密藏，读诵书写分别教诏，是名众僧怜愍众生，利益众生。能持如来十二部经，亦能奉持寂静禁戒，具足惭愧贤圣功德，大王，是名众僧大功德海，为天人师，能大利益无量众生，能断一切众生苦恼，能施一切众生解脱。是五比丘犹名众僧，何况无量！大王，若无量僧悉破禁戒，但令五人清净如法，若有施者得福无量，不可称量，不可计数。何以故？以有护持佛法者故，愍愍一切诸众生故，其心平等无二相故。”

王言：“世尊，破戒比丘可得处众受信施不？”

“大王，如王国内有一罪人未及摈驱，王若给施刹利、婆罗门、毗舍、首陀，是人颇得受乐不耶？”

“不也，世尊。”

“大王，破戒比丘亦复如是，虽在众中受受信施，不得安乐。何以故？破禁戒故，不如法故。大王，如是人者，一切十方无量诸佛所不护念，虽名比丘不在僧数。何以故？入魔界故。持禁戒者即佛弟子，毁禁戒者即魔弟子。又持戒者即出世道，破禁戒者即入世道。我都不听毁戒之人受人信施如葶苈子。何以故？是人远离如来法故。”

王言：“世尊，言破戒者，有何等相？可得知不？”

“大王，有智能知。大王，若有不能恭敬三宝，不生信心，无有惭愧，于师、和尚、耆老、长宿、同师、同学不生恭敬，摧灭圣幢不修梵行，增长慳贪乐在居家，不能清净口四种业，常修食心，远离法心，乐说世间无益之事，是名比丘初破戒相，未名具足毁禁戒也。若如是等受畜奴婢、象马牛羊、骆驼鸡猪乃至八种不净之物，是名具足毁禁戒也，如是名为沙门中滓、沙门中曲、沙门中幻、沙门中贼、沙门中醉、沙门中旃陀罗也。如是比丘不应共住，不共和合，不应共作九十九羯磨，是名丧失比丘事业堕在贪处。大王，宁与旃陀罗人而共同止，不与如是恶比丘住。何以故？如是比丘烧灭善根，断三世善慈愍之心。是恶比丘，即是圜厕增生死法，即是人天诸恶种子。何以故？是人欺诳自他人天，如是比丘灭解脱灯，能摧法幢，能涸法海，破说法者，能诋施主，破和合僧。若有恶王，若刹利、婆罗门、毗舍、首陀，拥护如是诸恶比丘，是王便当增三恶道，种植天人诸恶种子。大王，若恶比丘呵骂责数如法住者，敬信诸王应当摈驱。若驱摈者，王多得福。若王无信，如法比丘不应与彼恶比丘住。如法比丘有智慧者，应先往王所作如是言：‘大王，今者能持法不？’王若答言：‘大德，我能如法护持佛法。’智者尔时便应默然。若彼大王有贪心者，语比丘言：‘大德，是寺庙中多有大众，我当云何为五比丘驱遣多人？’智者闻已不应复往，便当舍去至寂静处。”

王言：“世尊，若有恶王随顺如是恶比丘语，而是大地云何能载是王？从此过于无量恒河沙劫，终不能得复受人身。无量众生得解脱已，是生犹故未能得断三恶道业。”

“大王，若未来世有信诸王，若刹利、婆罗门、毗舍、首陀，能护法师造立塔像，供养众僧种种所须，治恶比丘，为护法故能舍身命，宁护如法比丘一人，不护无量诸恶比丘。是王舍身生净佛土，常值三宝，不久当得阿耨多罗三藐三菩提。大王，我今不听一人受畜八不净物，惟听大众得受畜用。大王，若有人能护持法者，当知是人乃是十方诸佛世尊大檀越也，护持大法。大王，僧物难掌！我今惟听二人掌护：一者、罗汉比丘具八解脱，二者、须陀洹人。大王，除是二人，更无有人掌护僧物。”

日密分中陀罗尼品第二

尔时，世尊为频婆娑罗王说是法已，东方有国名曰无量，彼中有佛名五功德，常说妙法教化众生。有一菩萨名曰日密，至心听法仰瞻虚空，见有无量无边菩萨，从东方来趣向西方，即白佛言：“世尊，我见东方无量菩萨趣向西方，以何因缘，舍净妙国趣向秽土？”

“善男子，西方过此无量无边恒河沙等诸佛世界，彼有世界名曰娑婆，五滓具足，弊恶众生充满其土，释迦如来于中宣说三乘之法，为欲增长佛正法故，为不断绝三宝种故，为破魔界竖法幢故，为法久住不灭尽故。彼佛世界有无量佛、无量菩萨，宣说宝髻陀罗尼法，既说法已，释迦如来复说三乘、四无碍智、四种梵行及四摄法。无量众生闻是法时心无疲厌，乐甘露故。以彼如来本愿力故，四方无量诸佛菩萨悉集其土。”

佛说法时，诸菩萨众悉入禅定，既入定已身放光明，如一灯炬至亿日光。

“善男子，若欲护法，可从定起诣娑婆世界。善男子，彼佛世界所有众生，烦恼坚牢系缚深重，其形丑秽多起憍慢，恶口两舌远离实语，其实愚痴现智慧相，多起悭贪现舍离相，多有谄曲现质直相，心多浊乱现清净相，多有嫉妒现柔软相，乐离别人现和合相，多起邪见现正见相。彼国众人随女人语，以随语故断绝善根增三恶道。善男子，汝今颇能为我作使至彼国不？我欲与欲，令彼如来善说法要。所言欲者，谓真陀罗尼。是陀罗尼成就具足无量功德，能断欲贪、色无色贪、憍慢我慢、一切取贪、一切五盖、一切我见、断见、戒取见、取见、常见、众生见、士夫见、作者见、受者见、人见、天见、色见、声见、香见、味见、触见、四大见、出见、生见、灭见、住见，是名随如真忍。是陀罗尼能真实知色乃至识、眼乃至意、阴入界诸入，解脱法界无上妙乐。善男子，彼界众生如生聋生盲生哑，贪欲狂

醉；是故与欲，随如真实陀罗尼法一切法藏不可思议诸法之门，能坏一切诸魔伴党及魔境界。善男子，是陀罗尼亦能调伏一切魔众，能怖一切诸恶毒龙，能使恶鬼生知足想，能化一切阿修罗众，能调一切大金翅鸟怖紧那罗，令诸罗刹刹利、婆罗门、毗舍、首陀生于敬信，能坏一切贪女身者，令多闻者生爱乐心，习禅之人心得寂静，善疗一切诸恶重病，能除一切国土恶相，所谓恶贼、恶鸟、恶兽、恶风、恶雨、恶寒、恶热。善男子，若有人能诵如是陀罗尼者，则能得见无量诸佛。善男子，汝持是咒至彼国土，向彼四众具足宣说。”

尔时，世尊即说是陀罗尼：

“婆移婆地波利婆唎(一) 婆醯婆诃波利婆唎(二) 卑利痴比卑利痴波利婆唎(三) 阿脾阿婆波利婆唎(四) 沘沘沘阁波利婆唎(五) 摩唎摩罗波利婆唎(六) 呿岐却伽波利婆唎(七) 阿路迦阿路迦波利婆唎(八) 哆咩哆摩波利婆唎(九) 思唎思罗波利婆唎(十) 伽咩伽摩波利婆唎(十一) 阿步嚩阿步婆波利婆唎(十二) 罗摩(十三) 罗摩(十四) 罗摩(十五) 罗咩(十六) 罗摩(十七) 罗罗(十八) 逻罗(十九) 逻罗(二十) 摩比挫若那(二十一) 复多其醯复多其力摩波利婆唎(二十二) 遮[醯-台+秋]其力醯遮[醯-台+秋]其力摩波利婆唎(二十三) 输路多其力醯输路多其力摩波利婆唎(二十四) 其浪那其力醯其浪那其力摩波利婆唎(二十五) 时呪其力醯时呪其浪摩波利婆唎(二十六) 迦地其力醯迦地其力摩波利婆唎(二十七) 摩那其力醯摩那其力摩波利婆唎(二十八) 拔施其力醯拔陀其力摩波利婆唎(二十九) 脾陀那其力醯脾陀那其力摩波利婆唎(三十) 室囊其力醯室囊其力摩波利婆唎(三十一) 优波陀其力醯婆婆陀其力摩波利婆唎(三十二) 婆婆其力醯婆婆其力摩波利婆唎(三十三) 阁提其力醯阁提其力摩波利婆唎(三十四) 阁逻摩那罗其力醯阁逻摩那罗其力摩波利婆唎(三十五) 豆呿萨多波其力醯豆呿萨多波其力摩波利婆唎(三十六) 阿逻波逻腿阁其力醯阿逻波逻腿阁其力摩波利婆唎(三十七) 阿拔多(三十八) 比跋多写(三十九) 阿婆逻牟波摩萨写比伽(四十) 比尼跋多(四十一) 阿陀利也赖咩(四十二) 散比伽扇提(四十三) 莎呵。”

尔时，日密菩萨摩诃萨白佛言：“世尊，我能向彼宣说是咒，但于彼土生怖畏想。何以故？如来向者为我宣说，彼土众生多诸弊恶，犹如生蜚生盲生哑，随女人意。世尊，若有随顺女人意者，当知是人永断善根。”

佛言：“善男子，汝今不为现利后利，当为饶益一切众生，但往宣说勿生疑虑。善男子，汝非彼土维摩诘耶？何故生怖？”

日密菩萨默然不对。

“善男子，何故默然？”

日密言：“世尊，彼维摩诘即我身也。世尊，我于彼土现白衣

像，为诸众生宣说法要，或时示现婆罗门像、或刹利像、或毗舍像、或首陀像、自在天像、或帝释像、或梵天像，或龙王像、阿修罗王像、迦楼罗王像、紧那罗王像、辟支佛像、声闻像、长者像、女人像、童男像、童女像、畜生像、饿鬼像、地狱像，为调众生故。是时众中，有诸菩萨其数八万，同一三昧出入共俱。复有无数无边菩萨，其心掉动至心系念，欲得亲近亲见礼拜释迦如来及诸大众，并欲听受微妙大典。如是大众皆共同心欲往彼界，我为是辈欲说大事。何以故？是等大众其心未定，若往彼界或生颠倒，近恶知识。”

尔时，彼佛告日密言：“善男子，汝今不应生怖畏想。何以故？我今当施汝等菩萨，不共法行、无想行、调伏行、解脱行、分别生死行、不断三宝行、大慈大悲行、一切智解脱行、破坏四魔恶邪论行、尽智无生智行、毕竟入涅槃行，是名莲华陀罗尼，令诸菩萨不乐三界，证无相解脱门，入无行解脱门。善男子，若有信者能至心听是莲华持，是人能薄一切贪欲、一切烦恼，舍身七世常得生天，识知宿命；虽处欲界不为欲污，常乐出家，一切人天乐与供养。善男子，若有人能至心七日及听是持者，终不堕坠三恶道中。善男子，若有人天听是持者，远离欲法，修集禅定。若有人能于王刹利、婆罗门、毗舍、首陀耳中，宣说是陀罗尼，闻者寻发出家之心。若有女人能至心听是陀罗尼受持读诵，即转女身得男子身，于阿耨多罗三藐三菩提无有退转，乃至证得大般涅槃，终不更受女人之身，除自发愿。善男子，若有人以是总持咒余药草，持涂鼓贝若打若吹，若有闻者邪见盖道诸弊恶病无能加之。善男子，是陀罗尼成就如是无量福德。”

尔时，世尊即说是陀罗尼句：

“思陀摩提(一) 比路迦摩提(二) 伊梨迦利利(三) 流遮修流遮(四) 佛提比佛提(五) 摩诃佛提(六) 温摩提温摩多波罗提陀沱(七) 罗伽婆罗迦陀罗波利提陀沱(八) 频豆频豆摩提(九) 至吒至吒波罗提陀沱(十) 遏迦战陀豆(十一) 呵呵至置(十二) 呵多尼咩(十三) 呵多迦摩比岐(十四) 呵多富那婆婆罗闍(十五) 呵多三暮沱(十六) 呵多比摩多佛题(十七) 呵多蛇其攞(十八) 呵多比摩其攞(十九) 呵多三牟陀闍脾(二十) 呵多比摩多逻祇(二十一) 呵多希醯(二十二) 呵多遮知(二十三) 呵多达波罗闍(二十四) 呵多婆休罗闍(二十五) 呵多婆闍摩提(二十六) 呵多留伽摩提(二十七) 呵多乌伽赖咩(二十八) 呵多陀摩密提(二十九) 呵多萨婆优波陀那(三十) 若若若(三十一) 比闍若若(三十二) 比婆闍若若(三十三) 婆逻末力伽若若(三十四) 伊沙安兜逻伽豆[口+企](三十五) 莎呵。”

尔时，世尊告日密菩萨言：“善男子，是莲华持能断四流，汝当至心受持是持向彼世界。何以故？彼佛世界有百亿魔众，能坏众生所有善法。善男子，汝等若诵是陀罗尼，则不为彼恶魔所侵。”

尔时，日密与无量亿诸菩萨俱，无数人天白佛言：“世尊，如来智慧不可思议，我等昔来初未曾闻是陀罗尼。”

尔时，彼佛世界女人八万四千，闻是持已，寻转女身得男子形。

时，彼佛以瞻婆华鬘，告日密言：“善男子，汝持此鬘并陀罗尼，往娑婆世界，供养彼佛释迦牟尼。”尔时，日密从彼如来默然而受。

是时，会中八万菩萨俱白佛言：“世尊，我等亦欲往彼世界。”

佛言：“善男子，善哉！善哉！汝等若往，一切当现梵天之像。”

尔时，大众即便化为梵天之神，往娑婆界释迦如来所，到已即于此娑婆界雨瞻婆华，头面礼敬释迦如来，右绕三匝，即坐一面。时佛故为频婆娑罗王，宣说法行。

尔时，南方过一由旬满城沙数诸佛世界，有一世界名袈裟幢，其中众生具足五净。其土有佛，名山王如来、应供、正遍知、明行足、善逝、世间解、无上士、调御丈夫、天人师、佛世尊，今现在为诸众生宣说法要。

彼佛世界有一菩萨名香象王，仰瞻虚空，见无量菩萨从南方来趣向北方，见已白佛言：“世尊，如是菩萨摩訶萨等何因缘故，从南方来趣于北方？”

佛言：“善男子，北方过一由旬城沙世界，有国名娑婆，释迦如来在中宣说大集妙典分别三乘。为不断绝三宝种故，不断法行破魔界故，竖法幢故，一切十方诸佛世尊，悉于彼土宣说敷演宝幢陀罗尼，说已各各还本住处。释迦牟尼为诸菩萨及声闻众宣说法要。善男子，汝等颇欲诣彼世界听受法不？我今亦欲与彼佛欲，所谓断业陀罗尼，随顺空门，断于色贪、憍慢、慢慢、我慢，乃至为得尽智、无生智故。”

尔时，世尊即说此陀罗尼句：

“豆幕提(一) 豆幕提(二) 奥叉豆幕提(三) 波罗婆娑豆幕提(四) 萨婆阿迦舍豆摩(五) 阿鞞伽伽(六) 鞞咩多伽伽(七) 阿鞞伽伽(八) 阿婆慕阿却伽(九) 阿那若却伽(十) 脾也佛提却伽(十一) 婆路遮却伽(十二) 式[口+企]却伽(十三) 比堤弥逻却伽(十四) 乌数摩却伽(十五) 乌罗却伽(十六) 阿叉却伽(十七) 蛇婆摩那却伽(十八) 湿波却伽蛇婆比若那却伽(十九) 遮[颰-台+秋]陀兜却伽(二十) 蛇婆摩那比若那陀兜却伽(二十一) 卑利痴比陀兜却伽(二十二) 蛇婆比若那陀兜却伽(二十三) 折挫利蜜兜波那却伽(二十四) 蛇婆阿脾陀尼迦却伽(二十五) 豆伽却伽(二十六) 蛇婆末力却伽(二十七) 比婆婆那(二十八) 阿比叉婆(二十九) 阿婆那那(三十) 比那那(三十一) 婆牟陀那那(三十二) 萨婆迦那那(三十三) 萨婆散哆那比具波那那(三十四) 阿翼之那那(三十五) 叉婆(三

十六) 叉婆(三十七) 伊利(三十八) 蜜利(三十九) 伊伊利(四十) 伊伊兰弥利(四十一) 莎呵。”

尔时，世尊告香象王菩萨言：“善男子，是名随空三昧陀罗尼也，永断一切欲贪、色贪及无色贪，乃至断除一切烦恼。善男子，汝当一心受持读诵是陀罗尼，往彼世界教化众生。”

香象王菩萨言：“世尊，我已至心受诵是持，今欲往彼，然生畏想。何以故？我曾从佛闻，彼世界众生弊恶，多贪瞋痴。”

时，山王佛告香象王言：“善男子，汝常化作婆罗门像教化众生，或摩醯首罗像、或帝释像、或那罗延像，或鬼像、天像、龙像、阿修罗像、转轮王像，婆罗门、刹利、毗舍、首陀像，大臣、长者像，声闻像、男女等像，教化众生，云何方言于彼世界生怖畏耶？善男子，我当施汝大法行法一切智慧，能知诸行破四魔行，能调一切众生行，能喜一切众生行，不断三宝行，能调一切恶龙行，能坏一切众生恶业行，大慈大悲行，破三恶道行，救众生行，破恶见行，能坏女业行，一切法无尽行，能破一切悭贪行，能得一切三昧神通行，能令众生欢喜行，乃至能得菩提道行。善男子，若有众生闻是等行，当知是人能得破坏恒河沙等恶业因缘，断绝三障，惟除五逆、谤方等经、毁谤圣人。

“善男子，若有人能信心听受如是等行，是人随意获得三乘，不离十方诸佛、菩萨、阿罗汉等，常净三业随众生意。当知是人能一切舍乃至头目，一切诸恶不能加害。是人若行尸波罗蜜，得具忍戒、圣所乐戒、圣所念戒、大寂静戒、调伏梵释四天王戒、调伏婆罗门刹利毗舍首陀戒。是人终不自赞己身、毁谤他身，心常呵责世中利养，卧安悟安，身无病苦，易得饮食，一切众生之所乐见。是人临死，则得睹见诸佛菩萨，诸佛赞言：‘善哉！善哉！善男子，善持禁戒，精进无懈，当生我国。我能令汝住十住位。’既见佛已，心生欢喜，以是因缘，舍身则得往生净国，位阶十住乃至得阿耨多罗三藐三菩提。是人若行毗梨耶波罗蜜，成就大力，身心无病，健行布施、戒波罗蜜，人、天、龙、鬼、阿修罗等悉来供养礼拜是人，乃至得阿耨多罗三藐三菩提。是人若行羼提波罗蜜时得法缘忍，不觉不见一切众生。是人若为一切众生之所割剥，终不生于一念恶心，乃至得阿耨多罗三藐三菩提，常为人天之所供养。是人若行禅波罗蜜，获得法缘禅定解脱，十方诸佛无时不念，乃至得阿耨多罗三藐三菩提，常为人天之所供养。是人若行般若波罗蜜时，常为诸佛菩萨所护，乐于寂静调伏心界，了了通达一切法界，心无疑碍，人天不能沮坏其心，乃至得阿耨多罗三藐三菩提，常为人天之所供养。

“善男子，受是行已，往娑婆世界不应生怖。善男子，若净世界所摈之人悉在彼土，所谓五逆、谤方等经、毁谤圣人、犯四重禁，如是人等多共污辱。娑婆世界释迦如来，本愿因缘于彼现身。善男子，

若彼世界所有恶人闻是行已，七年之中修慈悲心，离口四过，修集六念。善男子，是人复当净自洗浴，著鲜洁衣，向于东方至心作礼，诵如是等行陀罗尼，乃至七年所有诸恶皆悉除灭。若有女人能如是行，即转女身得男子身，乃至得阿耨多罗三藐三菩提。”

尔时，世尊即说此陀罗尼：

“舍罗那脾蛇(一) 式叉脾蛇(二) 蜜提脾蛇(三) 波罗呵那脾蛇(四) 律提脾蛇(五) 因提利蛇脾蛇(六) 婆罗脾蛇(七) 蒲澄伽脾蛇(八) 三摩提脾蛇(九) 陀罗尼脾蛇(十) 叉提脾蛇(十一) 长那脾蛇(十二) 阿留波脾蛇(十三) 阿尼阁脾蛇(十四) 末力伽脾蛇(十五) 阿邈若脾蛇(十六) 波罗提散比陀脾蛇(十七) 复弥脾蛇(十八) 邈陀脾蛇(十九) 摩诃咤罗脾蛇(二十) 摩诃伽留那脾蛇(二十一) 卑利痴比脾蛇(二十二) 萨埵脾蛇(二十三) 陀摩脾蛇(二十四) 多摩脾蛇(二十五) 阿路迦脾蛇(二十六) 波罗提婆娑脾蛇(二十七) 波罗提首六迦脾蛇(二十八) 伽伽那脾蛇(二十九) 摩留多脾蛇(三十) 首若咤脾蛇(三十一) 波罗提多脾蛇(三十二) 阿尼蜜多脾蛇(三十三) 具沙脾蛇(三十四) 靳遮那脾蛇(三十五) 阿比婆娑(三十六) 阿□那(三十七) 阿□那(三十八) 阿婆诃遮遮(三十九) 遮遮罗比牟(四十) 叉蛇比牟(四十一) 阿摩脾蛇比牟(四十二) 阿三牟陀遮罗比牟(四十三) 车陀比牟(四十四) 阿迦舍比牟(四十五) 蒲波舍摩比牟(四十六) 阿那婆娑比牟(四十七) 阿诃诃比牟(四十八) 阿罗波逻比牟(四十九) 郁波舍摩娑利罗比牟(五十) 莎呵。”

尔时，香象王菩萨白佛言：“世尊，我当受持读写大行陀罗尼已，往娑婆世界。”

是时，彼土多有无量菩萨摩訶萨，俱从定起，共白佛言：“世尊，我亦欲往娑婆世界，觐见礼拜释迦如来，听受咨启大集经典。”

佛言：“善哉！善哉！善男子，欲往随意，今正是时。善男子，汝等可化作帝释像。”

时，香象王菩萨摩訶萨及其大众，悉皆变身为帝释像，俱共发来诣娑婆界。到已，即于娑婆世界雨散诸香，所谓牛头、栴檀、闷坚鞭香，多摩罗拔、沉水诸香，多伽罗香，以用供养释迦如来。尔时，香象王菩萨与其大众，从空而下，头面礼佛，右绕三匝，却坐一面。

大方等大集经卷第二十九

日密分中陀罗尼品第二之余

尔时，西方过四十恒河沙等诸佛世界，有佛世界名曰坚幢，具足五滓。其土有佛，名高贵德王如来、应供、正遍知、明行足、善逝、

世间解、无上士、调御丈夫、天人师、佛世尊，今现在宣说法要教化众生。

彼大众中有一菩萨，名光密功德，仰瞻虚空，见诸菩萨从西方来趣于东方，见已白佛言：“世尊，何因缘故无量菩萨，从西方来趣于东方？”

佛言：“善男子，东方去此四十恒河沙等世界，彼有世界名曰娑婆，具足五滓。释迦如来以是因缘，为诸众生宣说妙法名曰大集，分别三乘为不断绝三宝性故，破魔界故，竖法幢故。一切十方无量诸佛悉集彼国，咸共宣说宝幢陀罗尼，说已各各还本住处。释迦如来为诸菩萨及声闻众，敷扬宣说四无碍智清净梵行。善男子，汝今颇欲诣彼世界见彼佛不？我今亦欲与彼佛欲，所谓断业陀罗尼，随无愿定，成就具足无量功德，能断欲贪、色无色贪、憍慢、慢慢、我慢，乃至尽智、无生智，得阿耨多罗三藐三菩提。”

尔时，世尊即说陀罗尼句：

“舍那舍嚩(一) 摩舍那舍嚩(二) 阿嚩叉舍(三) 叉[颱-台+秋]舍嚩(四) 遮[颱-台+秋]舍嚩(五) 输卢多舍嚩(六) 其浪那舍嚩(七) 视呪嚩(八) 迦她舍嚩(九) 摩那舍嚩(十) 叉嚩邲陀(十一) 遮[颱-台+秋]卑利痴比叉嚩(十二) 输卢多阿嚩叉嚩(十三) 其浪那泚祇叉嚩(十四) 视呪嚩由叉嚩(十五) 迦她迦逻摩叉嚩(十六) 摩那乌闍叉婆(十七) 阿路迦若她叉婆(十八) 频闍散迦罗摩叉婆(十九) 安仇逻却伽叉婆(二十) 三摩流波脾她叉婆(二十一) 舍摩迦闍叉婆(二十二) 叉她逻娑叉婆(二十三) 扇多脾娑叉婆(二十四) 那奴那(二十五) 泥那奴那(二十六) 阿婆泥那奴那(二十七) 那她波那移那奴那(二十八) 伊槃都头呿写莎呵。”

尔时，佛告光密功德言：“善男子，汝持是持至彼世界，先问起居，然后说之。”

时，诸菩萨白佛言：“世尊，我已受持是陀罗尼，我虽欲往，然生畏想。何以故？曾从佛闻，彼土众生恶见成就，多贪恚痴，随女人语，能速造作阿鼻狱业。”

佛言：“善男子，汝非彼土诸四天下，二界中间二十一日大金翅鸟，恐怖大海六万四千亿诸大龙王，令得归依佛法僧宝，发菩提心耶？”

“世尊，实如圣教。”

“善男子，国土亢旱，汝非象龙、马龙、金翅鸟龙，于七日中降注大雨，令诸恶龙生恐怖耶？”

“世尊，实如所言。”

“善男子，汝于如是诸恶龙中犹不生畏，何缘而今生怖畏耶？”

“世尊，譬如智人闻于他处多有宝藏，是人即往以抓把之，把已

渐见，心生欢喜，竟无疲厌。我亦如是，因问如来，得闻如是实语，因闻是语得大势力，能执佛印调伏彼土。”

佛言：“善哉！善哉！善男子，我当施汝大神良咒，能净诸业，净于因缘，净于调伏，净于欲，净增长，净平等，净恶风，净行，净无明，净生死，净一切烦恼，净一切三界有为之法，净于彼此，是名曰咒。善男子，如是神咒彼国闻已，上中下结皆悉微薄，色、无色有亦复如是，皆得超越恒河沙等劫中诸业，一切五有身口意恶皆能令净。善男子，若有人能听受是咒，持讽诵读乃至七日至心不忘，当知是人一切恶罪皆悉消灭，除五逆罪、谤方等经、毁谤圣人、犯四重禁。是人所求乃至菩提随意即得，若欲修行檀波罗蜜亦得成就，乃至般若波罗蜜亦复如是。

“善男子，娑婆世界所有众生，无有因缘得呵责法。何以故？十方世界所可摈遣诸恶众生，皆往生彼娑婆世界，是故能作五逆恶罪、谤方等经、毁谤圣人、犯四重禁。是人以是业因缘故，多生恶道受无量苦；既受苦已，又不能得十善之法，以是因缘复还生于娑婆世界。是人若本修集信根乃至慧根，终不生于弊恶国土。以修如是恶法因缘故，生于恶国，诸根残缺，不具人身，无有念心，饮食、衣被、卧具、医药、严身资生所须难得，寿命促短不得安眠，智慧、善根、福德不具，吉事鲜少无有慈心，乐行恶业，乐修恶见，乐读邪书，乐信恶友，乐发恶愿，多诸病苦，多恶遽务，常喜增长三恶道法，敬事邪神受性弊恶，调戏嫉妒，具足成就诸不善业，乐谤三宝，乐行三恶道。善男子，是恶众生闻是咒已，于生死法而生悔心，离三恶道，修集信根乃至慧根，亦乐修行六波罗蜜清净梵行，增寿益算，除恶病苦，智慧炽盛，亲厚无损，一切善法无有耗减，具足成就十善之法，长益三宝乐修法行，令诸众生具足如是无量善法。

“善男子，释迦如来娑婆世界，若有众生受持禁戒，敬信三宝，咨启妙法，读诵书写得欢喜心，以是因缘，即得过于三恶道业。若有未来重恶之罪，即现在受苦，小遇头痛，若失财物、眷属离坏、恶名远闻，若被打骂，则得除灭。善男子，如是神咒成就具足无量功德，能坏一切所有恶业，能为众生作大利益，能浣众生无量恶心，作大光明，得大念心，作大寂静。是人常为十方诸佛、菩萨、声闻、缘觉、诸天龙鬼、人王之所拥护。是人临死得见十方无量诸佛，闻佛所说，诸佛赞言：‘善哉！善哉！善男子，汝来生我净妙国土，我能令汝速住十地。’是人寻时生欢喜心，欢喜心故则得深信，以是因缘则得生于净妙国土，生已即阶十住正位，得阿耨多罗三藐三菩提。善男子，汝可受持如是神咒读诵通利，向娑婆世界先往问讯释迦如来，然后宣说。”

尔时，世尊即说此陀罗尼：

“却伽波利车阢(一) 竭婆叉斯(二) 竭婆吟(三) 邨陀波逻婆伽

差(四) 叉婆俞岐(五) 波逻提呵吟(六) 舍摩那思迦提(七) 三摩咩伽受荑(八) 阿叉蚩那沘(九) 叉婆嚧祇(十) 尼陀那闍荑(十一) 三摩那闍荑(十二) 阿陀舍蚩闍荑(十三) 比波嚧嚧闍荑(十四) 斯叉闍荑(十五) 斯若闍婆闍荑(十六) 娑利罗仇呵闍荑(十七) 沙罗仇呵闍荑(十八) 厠婆那拘施(十九) 婆陀那拘薄(二十) 思婆陀那缇(二十一) 比婆波逻罗沘(二十二) 优波迦罗摩那缇(二十三) 阿那婆哆罗[口+企](二十四) 波罗提迦逻咩那(二十五) 婆迦咩施(二十六) 婆卢遮那嚧咩迦罗咩陀吟(二十七) 迦摩娑施(二十八) 阿舍却岐(二十九) 那蚩军祇(三十) 邨陀嚧沘(三十一) 基离那娑沘(三十二) 留遮娑沘(三十三) 娑咩摩迦吟(三十四) 舍利蚩嚧沘(三十五) 摩伽闍荑(三十六) 诃利拘那娑(三十七) 那蚩那目[口+企](三十八) 娑罗叉拘罗(三十九) 那蚩那受吟(四十) 因陀罗嚧娑沘(四十一) 乌阿(四十二) 阿婆阿(四十三) 阿嚧嚧阿(四十四) 嚧嚧阿嚧嚧(四十五) 娑咩伽豆佉尼提罗涅槃希(四十六) 莎呵。”

尔时，彼佛说此陀罗尼已，时彼会中复有无量菩萨大众，同声赞言：“善哉！善哉！我等今日亦欲往彼。”

彼佛告言：“宜知是时，汝若往者，一切变身为那罗延像。”皆言：“如是，世尊。”

尔时，光密菩萨与诸大众，一切化为那罗延像，俱共发来至娑婆界。既至此已，于虚空中雨细金沙，持以供养释迦如来。既供养已，从空而下，头面敬礼，右绕三匝，却住一面。

尔时，北方过于八万恒河沙等诸佛世界，彼有世界名普香身，具足五滓。是中有佛，号德华密如来、应供、正遍知、明行足、善逝、世间解、无上士、调御丈夫、天人师、佛世尊，今现在为诸众生宣说法化。

彼大众中有一菩萨名虚空密，在会听法，仰瞻虚空，见诸菩萨其数无量，从北方来趣于南方，即白佛言：“世尊，何因缘故，无量菩萨从北方来趣于南方？”

佛言：“善男子，南方过于八万恒河沙等诸佛世界，彼有世界名曰娑婆，具足五滓。有佛世尊，名释迦牟尼，今现在世为诸众生宣说妙法，分别三乘竖大法幢广说法聚。十方诸佛悉集彼国，为诸菩萨解说宝幢陀罗尼已，各各还归本所住处。释迦如来故为大众菩萨声闻宣说法要，多有秘密甘露之语，若欲听者可往彼国。释迦如来常发大愿：‘若有十方诸菩萨等来听我语，即得十八不共之法。’又复愿言：‘我成佛已，愿我土地具足上味。’彼佛世界所有菩萨有大念心，精进、持戒、智慧具足，犹如诸佛清净世界，修集禅定成就具足，若入禅定其身放光，或如一灯，或如百千无量日月，悉共集会听佛说法。若有十方诸菩萨等来至彼者，皆从定起往至彼国，覲见释迦牟尼

如来及其大会，听陀罗尼游戏神通。

“善男子，汝若欲往娑婆世界！彼土众生寿命短促多诸恶病，智慧、善根、福德、善行皆悉薄少，于三恶道不生怖畏，贪著财物，心不清净，多怀嫉妒，无有惭愧，乐行十恶。是诸众生或有杂行，舍是身已，即于其国作大恶鬼，乃至作恶迦那富单那；作恶鬼已收取地味，乃至一切果蓏谷米草木等味，若有食者，身得恶病无有势力。是诸恶鬼，常伺众生初生长大能断其命，是故其土众生短寿。

“善男子，我本修集菩提道时，亦常发愿：‘愿我来世常勤精进不休不息，恭敬供养无量诸佛，听受正法问难深义。我当云何护处胎者，令其母子产生安隐？若天龙鬼、若罗刹鬼、若阿修罗、若迦楼罗、若紧那罗、若摩睺罗伽、若拘辩荼、若荔[廿/梨]多、若毗舍遮、若富单那、若迦多富单那、若受多罗、若阿卫末罗、若一行乃至四行、若起死尸鬼、若毒蛊道、若恶药、若触身心，如是等事，不能为是母子作恶；乃至生已，乳哺饮食长养大时，不能作恶令其心浊；乃至梦中亦复如是，常行十善乐施乐戒，于三恶道心生怖畏。世尊，有何咒药能办是事？’时，无量佛即时施我净陀罗尼，以是持力令我于往无量世中，调伏无量无数众生，劝之令行六波罗蜜。我于无量无数世中，常念何处有是妊身诸女人等，防遮恶鬼乃至恶药。是故我往先教三归，教三归已，一切恶众及诸毒药无能加害。是儿生已常得善心，智慧具足，身体无缺，若游行时常为无量善神拥护，面貌端正众生乐见，乐修慈悲、布施、持戒、忍辱、精进，处在寂静乐修禅定，近善知识，具足智慧坏诸苦恼，一切天鬼乐为供养，厌离生死甘乐涅槃。若发无上菩提之心即得阿耨多罗三藐三菩提，若发辟支佛心即得辟支佛道，若发声闻心即得如实忍，是诸众生永离恶趣，常行善道。善男子，我以如是无量方便调伏众生，为阿耨多罗三藐三菩提。

“善男子，若有众生遇大重病，取师子皮以咒咒之持与病者，如其无皮若肉若骨，若无肉骨若取粪涂及屎处土，若无粪土以咒结索，或作符书以与病者，病即除愈。若树无华果，以咒雨水持以溉灌便得华果。若亢旱时，求觅龟心，五返咒之置龙泉中则降大雨。若多雨时，坏败谷麦城邑聚落，求蟒蛇皮七返咒之，置龙泉中霖雨即止。若其国土多有怪异，恶风恶雨，恶星日月，应于七日中净自洗浴，服食乳糜，七日之中读诵是咒，诸恶异怪寻即消灭。善男子，若有人闻是陀罗尼，所有烦恼寻即薄少，入正定聚。善男子，我以如是无量方便调伏众生，令得修集六波罗蜜，乃至得阿耨多罗三藐三菩提。

“善男子，是陀罗尼，能为众生作大利益，能断一切诸恶重病，能护一切妊身女人及处胎者，灭一切结知阴入界，摧伏四魔所有境界，能令一切诸天欢喜，令诸恶鬼生知足想，能令恶龙心大怖畏，能坏一切恶邪诸论，令诸四姓心生欢喜，能令女人贪心自除，令多闻者念心坚牢，坐禅之人心得善寂，能坏一切国土恶相，令三宝种无有断绝，能令法果增长无减，能令佛法广普流布，能坏一切无明痴聚，能

得尽智及无生智。”

尔时，世尊即说此陀罗尼句：

“摩那叉(一) 阿婆叉(二) 伽罗婆叉(三) 闍罗叉(四) 摩摩那叉(五) 叉婆叉(六) 摩陀叉(七) 那茶叉(八) 那茶罗休(九) 比婆那吒(十) 却伽那吒(十一) 阿吒那吒(十二) 究那吒(十三) 波利究婆那吒(十四) 那茶那吒(十五) 富利迦那吒(十六) 优多罗那吒(十七) 伽毗那吒(十八) 君闍那吒(十九) 阿目佉那吒(二十) 遮凡婆罗那吒(二十一) 却钳婆罗那吒(二十二) 佛迦罗那吒(二十三) 帝婆留陀逻那吒(二十四) 三摩罗蛇那吒(二十五) 尸利拘婆那吒(二十六) 憍多吒(二十七) 多茶罗婆(二十八) 摩留多却婆(二十九) 提休叉(三十) 婆提逻酬(三十一) 挫摩那酬(三十二) 婆呵那富置(三十三) 散提逻闍婆(三十四) 阿摩摩闍婆(三十五) 摩休罗伽闍罗(三十六) 阿涅那(三十七) 阿涅那逻婆(三十八) 阿涅那叉(三十九) 阿婆呵末力伽涅那叉(四十) 伊槃都豆咄写(四十一) 莎呵。

“毕竟尽苦，是名为咒。”

说是咒时，彼大众中六万人得如法忍，复有六万人入正定聚。

“善男子，我今以是净陀罗尼与彼佛欲，汝当受持讽读诵写。”

时，虚空密菩萨摩訶萨敬承佛教，受持读写是陀罗尼，与无量菩萨俱共发来。至娑婆界，悉自变其身为转轮王，以种种宝供养如来，头面敬礼，右绕三匝，却坐一面。

日密分中分别说欲品第三

尔时，频婆娑罗王见无量菩萨，或作梵像及帝释像、那罗延像、转轮王像，从座而起，敬意合掌，在一面立。

尔时，日密菩萨摩訶萨即于佛前以偈赞叹：

“于诸足中最殊胜， 施诸恶见大光明，
行正道者施法印， 摧灭恶龙及四魔。
坚竖法幢施解脱， 以大法炬坏众闇，
亲近善友修集定， 愍众生故说福田。
佛法僧宝甚难得， 人身信心亦复难，
虽得人身善友难， 得善友者坏烦恼。
众生闇行没结河， 如来船师能拔济，
四方诸佛遣我来， 今于大会说与欲。”

日密菩萨说是偈已，如其本土所教诫事悉皆说之。

尔时，世尊告舍利弗：“是陀罗尼，四方诸佛所与欲也，为欲利

益此土众生。舍利弗，汝当受持、读诵、书写是陀罗尼，于四众中广分别说。”

时，虚空密菩萨摩诃萨复以偈赞于佛：

“如来真实知法界， 示魔众生正直道，
若有真实生信心， 是则能破三恶道。
供养如来一香华， 无量世受无上乐，
无量世中身具足， 亦得无上真智慧。
若能一闻是总持， 即得摧灭诸烦恼，
一切人天所供养， 获得无生及尽智。”

日密分中分别品第四

尔时，世尊告四大菩萨：“善男子，汝若住此世界者，随意修集所有善法。”

时，四菩萨及其大众，即便各各随意入定；既入定已，身出光明犹如一灯，乃至犹如无量日月。

尔时，大德阿若憍陈如，承佛神力即作是念：“我今若问如来一义，如来因是或当分别广说如是四陀罗尼。如来说时，其声必闻娑婆世界。众生闻已，疑网心坏，于向法中得大光明，度于彼岸，到正定聚，不堕恶道，一切悉行纯善之法。”作是念已，即从座起，敬意默然，合掌而立。

尔时，佛告阿若憍陈如：“汝将不欲问大义耶？”

“如是，世尊，实欲咨启，惟愿听许。”

佛言：“憍陈如，汝今知时，我当破坏一切疑网。”

憍陈如言：“如佛经中说有二种，所谓爱与士夫行于生死。云何名爱？云何士夫？何故如来说是二种行于生死？”

佛言：“善哉！善哉！憍陈如，快发斯问！能大利益无量众生，是知时问，是如法问。谛听！谛听！吾当为汝分别解说。憍陈如，爱有三种，所谓欲爱、色、无色爱。复有三种，所谓有爱、断爱、法爱。憍陈如，云何欲爱？所言欲者名为放逸，放逸因缘则为贪触，以触因缘则生乐想，乐想因缘则焦身心，焦身心故乐行十恶，十恶因缘则能增长三恶道苦，若受人身贫穷困苦，贪因缘故五道受生，生在羊中多受苦恼，虽受是苦，心无惭愧不生悔恨。若因少善还得人身爱心增长，爱增长故身口不净，造作无量诸重恶业乃至五逆，以是因缘复于地狱受大苦恼。一切受苦皆因爱心，是故如来为爱解脱，宣说正法，呵责欲法。若有众生得闻如是呵责欲已，观欲如果，如大毒树、毒盆、行厕，如刀如贼，如旃陀罗，如热铁丸，如恶雹雨，如恶暴风、毒蛇、怨家、空野、罗刹，如杀害人，如粪如冢。若有人能作如

是观，是人所有爱之与贪，爱腻、爱著、爱宅、爱热、爱憎等法寻即除灭；灭已念法、乐法、学法、受法、取法，勤求于法、财法、藏法、净法、行法，归依于法。是人临死获得法念，因法念故，寻得闻于十方诸佛宣说法要教化众生，既闻法已心生欢喜，生欢喜故即得睹见诸佛色身。是人舍身，生净国土无三恶道，常与善人游止共俱，具足智慧、舍施、精进，修集慈悲，调伏众生断烦恼习，具足无量庄严功德。譬如香篋以盛衣服，夜服皆香，篋香不减。憍陈如，若诸众生善愿力故生净国土，共善众生同共事业，亦复如是，自增诸善，彼善无减。憍陈如，是故善男子、善女人，若欲自利、利他、共利，常当勤求依于善友。憍陈如，若人能作如是观察欲性之相，当知是人不久当得阿耨多罗三藐三菩提。”

“世尊，云何善友？”

“憍陈如，夫善友者，所谓诸佛、菩萨、诸阿罗汉。又善友者，即我身是。何以故？我常怜愍一切众生，能说诸欲所有过患，是故大众应受我语。我所出语终无有二，言不虚妄，不两舌语，非无义语，非粗恶语，所言诚实，慈语、悲语、安众生语。我今当说诸欲罪过，汝等应当一心受持；既受持已，脱三恶道，疾得阿耨多罗三藐三菩提。”

尔时，娑婆世界一切众生同发声言：“世尊，唯愿宣说欲之罪过，我等今当至心受持。”

佛言：“诸善男子，有四种欲：一者、色欲，二者、形欲，三者、天欲，四者、欲欲。是名为四。云何色欲？四大造色，凡夫不见无我、众生，生颠倒想，见男女想、上下色想，是色可爱，是色可恶。因是颠倒见男女相故，令贪欲未生便生，生已增长。是人因是远离善根及善知识，不能善护身口意业，是故名为恶法之聚。何以故？不能观察欲解脱故。以是义故增三恶道，受于地狱、饿鬼、畜生，无量世中受大苦恼皆由贪欲，贪欲因缘令欲增长。若有智者观察女色，见不净相皮肤肌肉、筋骨血脉，见已心乐修集是想。如女身，男身亦尔；如近，远亦如是；如此，彼亦如是；如他，自亦如是。是人若能修集是心，即于贪爱疾得解脱，观是身骨筋节相连，心随身行，尔时系心在于额上如枣许处，心乐修集如是相已，身得寂静不见恶相，不见恶事，不见恶缘，是则名为奢摩他，名心寂静。云何复名身寂静耶？是人入定灭于入息，既无入息何有出息？是则名为身心寂静，身心寂静即舍摩他之因缘也。是人观身所有骨节，离散如沙为风所吹，见已即生空无物想观于虚空，是则名为身心寂静，是名因于舍摩他定而得解脱。”

“世尊，虚空相者，是有为相不？”

“憍陈如，是有为相。”

“世尊，虚空若是有为相者，为是自相、是他相耶？”

“憍陈如，若能观察一切法界及有为界，是名为自相。何以故？

若能观察色寂静者即见佛身。所以者何？若人观骨能令如沙为风所吹，是人能破色贪、色欲，能深观察色之实性。是人所见皆如虚空，十方诸色空如琉璃，于中复见无量诸佛，乃至十方亦复如是。复见如来三十二相、八十种好，十方世界亦复如是。是人若得悔生死法，即自思惟：‘我当问佛，如是虚空谁之所作？当云何灭？’作是念已：‘我已问已，我已知已，虚空之性无有作者，当云何灭？言虚空者，无有觉观，无物无数，无有相貌，无出无灭，一切诸法亦复如是。’作是观时得阿那含果。是阿那含悉断一切贪欲之心，唯有五事未能除断：一者、色爱，二者、无色爱，三、掉，四、慢，五者、无明。是人若得见如来身，便作是念：‘我当知数。’是人尔时观少见少、观多见多，复作是念：‘如是诸佛从何处来？’复作是念：‘如是诸佛，无所从来，去无所至。我三界心，是心因身。我随觉观欲多见多、欲少见少。诸佛如来即是我心。何以故？随心见故，心即我身，我即虚空。我因觉观见无量佛，我以觉心见佛知佛，心不见心，心不知心。我观法界性无坚牢，一切诸法皆从觉观因缘而生。是故一切所有性相即是虚空，虚空之性亦复是空。’若有初发菩提心者，当观无量诸法因缘。是人若发求声闻心，尔时即得无相三昧，令彼无明永灭寂静，亦复获得随顺空忍。是人若见虚空是空，尔时即得身心寂静，是则名为空解脱门，取阿罗汉则为不难。若复修行灭定解脱，为灭无量诸法因缘。”

说是法时，九万九千亿众生得修定忍，八万四千众生得修空忍，六万众生得空三昧解脱门，二万众生悉得现见诸佛三昧，八万四千众生得阿罗汉果，无量众生得须陀洹果。

“复次，憍陈如，若有比丘自观己身作不净想，不能调伏自己心者，是人次应谛观死尸，若青色、若烂坏、若赤色、若肿胀、若离散、若骨白如贝，当深观心乐住何处？知已即取如观外色，自身亦尔，若青色乃至如贝，如昼夜亦如是，如夜昼亦如是，如去来亦如是，如来去亦如是。尔时，若见外物树木、人畜杂物皆作骨想，作是观已乃至命终不生贪心。是人现在能离于欲，他世未能。是人若能获得修空陀罗尼者，即能观骨作离散相如沙微尘，若自若他不见色相如一微尘，即时获得虚空之相，见一切色如青琉璃；见已复观虚空黄色，能观黄色、赤色、白色、杂色、琉璃色，若见地、水亦如琉璃。是人能观一切大地如四指许，若欲动者，即以足指蹶之令动随意久近，乃至大地、树木、山河悉为之动。若观诸水作种种色，或分陀利华、优钵罗华、拘物头华、波头摩华，于一切水行住坐卧。观一切山作种种色，其形细软如兜罗绵，而于其中行住坐卧。又自观身轻漂如风，作是观已，能游虚空行住坐卧。是人复入火光三昧，身放种种妙色光明。又复游入焰摩迦定，身上出水，身下出火。作如是等大神变已，复作是念：‘我当云何得见诸佛？’尔时，随其所观方面悉得见佛，多观多见，少观少见。见已复念：‘诸佛世尊无所从来，去无所至。我三界心，是心因身。我随觉观欲多见多、欲少见少。诸佛如来

即是我心。何以故？随心见故，心即我身，我即虚空。我因觉观见无量佛，我以觉心见佛知佛，心不见心，心不知心。我观法界性无坚牢，一切诸法皆从觉观因缘而生。是故法性即是虚空，虚空之性亦复是空。我因是心见青、黄、赤、白、杂色虚空。’作神变已，所见如风无有真实，是则名为共凡夫人如实陀罗尼。是人复作是念：‘若有虚空即是无取，无有觉观，不可宣说。如我心离观虚空相，亦观心相不作远离，离一切作不作发心。设发寻灭，以心缘灭故。’是心便灭，净身口意修集灭定，是人长夜系心在定，从灭定起，舍其寿命入于涅槃，是名不共凡夫如实陀罗尼。

“云何名为共凡夫人如实陀罗尼？若有能作如是思惟：‘我随意见，色即是见，色即是我心，我心即色。如我远离一切色相，观虚空相。’是人尔时修虚空相，是则名为共凡夫人如实陀罗尼。若有能作如是观：‘色即是虚空，我以如是色因缘故得观虚空。虚空之性名无障碍，是风住处。如是风者因四大生，我是色相亦复如是因四大起，虚空风色等无差别。一切法性自空寂，观自他性亦复如是。虚空者即是无生无灭。’作是观时系念如来，作是念已见虚空中有无量佛，即时获得阿那含果，是名不共凡夫如实陀罗尼也。

“复作是念：‘言虚空者即是我也，即是净我，即是我心。我者无色，如空无边，我亦如是。’是名共凡夫如实陀罗尼。若有能观一切法中无我、无我所，言空处者即是无我、色无有我，若念如来若观如来即是我也，我见佛已，得沙门果乃至阿罗汉果。是名不共凡夫如实陀罗尼也。若观净我者即是空处，空即我心，若能永断一切烦恼即是净心，若能修集八直正道是名净心。能如是修，即能获得须陀洹果乃至阿罗汉果。是名不共凡夫如实陀罗尼。

“复有观色，观色相者即分别相，分别相者即是瞋相，瞋恚相者即生死相。我今为断生死相故，观心相空。是名共凡夫如实陀罗尼。又复观我即是寂静，我今亦未断于觉观。若我观我我如虚空，我我者即是苦，苦所从生即名为集，如是苦集是可断法是名为灭，观苦集灭是名为道，得须陀洹果乃至阿罗汉。是名不共凡夫如实陀罗尼。

“又复念言：‘我何以故观于虚空？虚空者即我，我若远离虚空观者，次观识处。如虚空观，识观亦尔。如空无边，心亦如是。’是名共凡夫如实陀罗尼。若能观识即是苦者，知苦所从名之为集，若集可断是名为灭，观苦集灭是名为道，得须陀洹果乃至阿罗汉果，是名不共凡夫如实陀罗尼。

“若观识处即是觉观疮疣烦恼，如我远离空处、识处，修无想处，是人修无想已得无想定，是名共凡夫人如实陀罗尼。若观识处即是疮疣苦恼之法，如我远离观于识相，次观无想相，言无想者即是我无我所相；作是观已，即得须陀洹果乃至阿罗汉果，是名不共凡夫如实陀罗尼。

“若有能观无想处者即是细想，如我远离是无想处，观非有想非

无想处，是名共凡夫人如实陀罗尼。若观非想非非想处即是大苦，是处可断可得解脱；作是观时，得须陀洹果乃至阿罗汉果，永断一切欲贪色贪，离凡夫名得圣人号，永断一切三恶道因，是名如实陀罗尼也。

“是彼诸佛之所遣来，日密菩萨所赍持欲，能断一切诸结烦恼，一切恶见、我见、取见、戒见、常见、断见、命见、作见、士夫见、受见、色见、触见、出见、四大见，能断如是等见。是陀罗尼善能了达阴、入、界等，能净诸见，能令受者永受安乐，沮坏众魔，调伏恶龙，令诸天喜，坏阿修罗，调迦楼罗，能喜刹利、婆罗门、毗舍、首陀，能断恶欲，令坐禅者贪乐寂静，能疗一切诸恶重病，能防一切诸恶斗讼，能增法界，能护三宝，能得尽智及无生智坏无明聚。”

如来说是陀罗尼时，无量众生得须陀洹果，无量众生得阿罗汉果，无量众生获得是持，无量众生发阿耨多罗三藐三菩提心，无量众生得无生忍。

尔时，阿若憍陈如白佛言：“世尊，云何名为莲华陀罗尼？如日密菩萨之所宣说，智者受持、读诵、书写得大利益，不乐三界，得无相解脱门者，皆能断诸烦恼，七返常受人天之身，虽在欲界不为欲污，诸天世人常所恭敬。”

佛言：“憍陈如，所问莲华陀罗尼者，非诸声闻、缘觉所知，是陀罗尼乃是十八不共法行。憍陈如，假使我于无量劫中，宣说是持终不可尽，亦令闻者生迷闷心。是陀罗尼唯佛能说，唯佛能听。何以故？是陀罗尼难知难解，余三亦尔。”

“世尊，唯愿如来当说如空空行陀罗尼。”

“憍陈如，至心谛听！当为汝说。憍陈如，若有众生放逸因缘分触欲心，是人不知解脱之处，流转生死无量世中，在三恶道受大苦恼。菩萨摩訶萨见诸众生受如是等无量苦恼，生怜愍心，勤行不息遍修诸道，作是行已得阿耨多罗三藐三菩提，得菩提已说苦解脱，众生闻已即得脱苦。苦解脱者，即是初果乃至阿罗汉果。

“憍陈如，云何触欲？言触欲者二身共合，因身合故则生于触，因触生乐，因乐生苦，苦因缘故，生死苦恼从是而生。憍陈如，如四毒蛇以四因缘能害众生，见、嘘、啗、触；欲亦如是，有见因缘，有闻因缘，有念因缘，有触因缘，因是四缘令诸众生远离一切诸善根本，于生死中受大苦恼。

“憍陈如，云何名为触欲解脱？若有比丘能观白骨作是思惟：‘色者即是四大所造，四大所造即是无常，性无坚牢，离散之法。皮毛肉血，智者云何于是身中生净好相？’作是观已，悉于一切十方净色，即时获得不可乐相。是比丘复作是念：‘我于是相乐修集者，则得断除一切烦恼生老病死。’是名舍摩他。若观足骨乃至头骨，是名毗婆舍那。既得如是毗婆舍、那舍摩他已，观息出入。见息出时，即作是念：‘如是风者，从何处来？去至何处？’如是观时远离身相，生于空相不见内

法，是名内空。不见我所及外色相，是名外空。观内外色空，复作是念：‘我今修集入息相已作大利益，能坏一切内外诸色。我坏如是内外色相，皆是入息观因缘也。以是因缘，令我不见内外诸色，我无色相即是空力。我今定知一切诸法，无有去处，无有来处。’作是观已，所有觉观一切永断。复观是识，知是一切觉观因缘，我当远离心意识行。何以故？若有生者当知定灭。作是观时，得须陀洹果乃至阿罗汉果，或有获得如法忍者，或得菩提。若观觉观是灭相者即得灭定，是名不共凡夫如空陀罗尼，是持成就无量功德，永断无量诸大苦恼。”

说是法时，九万二千众生得须陀洹果，六万众生得阿罗汉果，九万九千众生得如空陀罗尼，八万众生得辟支佛果，八千亿众生发阿耨多罗三藐三菩提心，无量众生得不退心。

尔时，阿若憍陈如白佛言：“世尊，高贵德王佛所持来欲，随无愿陀罗尼，唯愿如来分别解说。”

“憍陈如，我今当说，至心谛听！憍陈如，有诸众生触欲系缚不知解脱，是人应观无愿解脱，作如是念：‘欲欲、色欲及无色欲，触欲、解欲，知是诸欲因觉观生诸行因缘。如是诸行，无有作者，无有受者，因风而生；我身口行亦复如是，因风而生，因是风故身得增长，因是风故口得增长。如我观风即入出息，谛观一切身诸毛孔从风因缘，复观一切不净之物，复观是身命终之时，是尸更无风息入出。’复作是念：‘我身口行因缘于风，若无风者，无身口行因缘。’是故尔时得空三昧修集增长，因修集故能断欲贪乃至触欲。作是观已，得须陀洹果乃至阿罗汉果，或有发阿耨多罗三藐三菩提心。”

尔时，善意觉观菩萨摩訶萨白佛言：“世尊，若声闻人修不净相，得成相已有何等相？”

“善男子，若为破坏欲贪之结修不净相，系心眉间自观身骨，是名一相。若观自身及以他身，是名二相。又观一切悉是不净，是名三相。是人能观苦集尽净，名舍摩他得暖法相。是人如是观白骨时见智如灯，观身四行乃至微尘，是名顶法。观四真谛，是名声闻不净观，成就获得舍摩他定，是名白骨观相。观是相时得八正道，因八正道，得须陀洹果乃至阿罗汉果。善男子，光明佛土声闻之人，观如是法即得道果。”

说是法时，无量众生得如法忍，无量众生得如实忍。

大方等大集经卷第三十

日密分中分别品第四之余

尔时，世尊复告憍陈如：“若四真谛可一念证者，如来应为一切众生演说一行、一法、一事；若一人证时，一切众生亦应同证。何以故？烦恼同故，亦不应有八万法聚差别之异。憍陈如，是故众生应以

种种因缘调伏，不以一缘。憍陈如，一切众生非实一乘、一行、一贪、一念、一欲、一解、一信，是故如来宣说种种句偈名字、种种法门。以是义故，如来具足十种神力。憍陈如，一切众生具有种种颠倒之相，是故如来为净颠倒，说无常相、苦相、无我相、胀相、烂相、青相、坏相、离散等相。”

“世尊，云何名为一切世间不可乐想？云何复名食不净想？”

佛言：“憍陈如，汝今不应问如是事。何以故？彼界得道，此界得道，其相各异。憍陈如，我若具说，众生闻者或生迷闷。”

“世尊，唯愿怜愍，为诸菩萨能信解者，分别宣说。世尊，是诸众生若闻宣说如是二相，能种善子，增长善根，能破无明。世尊，一切众生痴爱因缘乐于生死，是故生死无始无终。世尊，一切众生以食因缘增长贪欲。世尊，一切众生初未得闻如是二相，是故流转生死五道受大苦恼。如来世尊大慈大悲，无量世中常念众生，唯愿如来怜愍故说，不可乐想、食不净想。若佛宣说不可乐想、食不净想，众生闻者不生欲贪，不生食贪。世尊，若有众生能苦呵责欲心、食心，当知是人速到彼岸。”

佛言：“憍陈如，至心谛听！我今当说一切世间不可乐想、食不净想。憍陈如，世有二种：一、众生世，二者、器世。众生世者，所谓五道众生。器世者，欲界之中有二十处，色界十六，无色四处。云何欲界有二十处？

“八大地狱，一一地狱有十六围绕：一者、等活，二者、黑绳，三者、众合，四者、叫唤，五者、大唤，六者、热，七者、大热，八者、阿鼻地狱。若有众生身口意恶，悉生如是大地狱中受大苦恼。是诸众生虽见妙色，不生乐想，以是因缘复生大苦；声、香、味、触亦复如是。有智之人观是事已，生不乐想。

“憍陈如，若观畜生其身细小，犹如微尘十分之一，有如微尘乃至如枣，有一由旬乃至百千万由旬等。是诸众生或有寿命，如一念顷至七念顷，或有一劫至千万劫顷。是诸众生无有法行、智慧、惭愧、怜愍之心，当受苦恼生大怖畏，各各常生相害之心，远离一切诸善之法，常行黑闇，常行邪道，是故智者修不可乐想。

“憍陈如，智者复观饿鬼之身，或长一尺，或如人等，或百由旬，或如雪山，当患饥渴，裸形无衣，被发缠身，无有惭愧，羸瘦骨立，身无血肉，各生恶心心无怜愍，湿冷诸气永无复有，或食铁浆、铁麩、铁丸、热粪、热脓、热血、热风、热草、热果，然不能得恒不供足，寿千万劫常受苦恼行于黑闇。智者观已，修集世间不可乐想。

“憍陈如，有智之人，次观人身，一切皆有生苦、老苦、病苦、死苦、爱别离苦、怨憎会苦、求不得苦、饥渴困苦、欲苦、瞋苦、嫉妒等苦，两舌、恶口、寒热等苦，诸恶兽苦，恶王等苦。是人身中受如是苦，智者云何而不修集不可乐想？

“憍陈如，智者云何观于欲天不可乐想？智者观初欲界六处，是

中众生欲爱所焦，所受果报不等故苦，无常故苦，取苦尽苦，爱别离苦，智者云何于中不修不可乐想？

“次观色界十六住处，是中诸天修世禅定，有漏故苦，无寂静苦，所欲故苦，有胜定苦，善法藏苦，未解脱苦，不知彼岸，不尽地狱、饿鬼、畜生、人因缘苦。观是苦已，智者即修不可乐想。复次，色界众生，或有修集无漏禅定，是等不能具足八正道苦，欲具八正道方便时苦，得无学地不自在苦，不得缘觉三昧故苦，不得如来三昧故苦，不能观察一切众生境界故苦。如是众生于色界中，若入涅槃受如是苦，智者云何于色界中不修世间不可乐想？

“次复观察于无色界不可乐想。彼中众生修有漏三昧苦，学地不得自在苦，又不得听闻正法故苦，不能毕竟断受故苦，舍命退时生邪见苦，不能永断三恶道苦，舍命堕苦，知如是时修集世间不可乐想。

“复次，憍陈如，世间者即是行，行有三种：身行、口行、意行。身行者谓入出息，口行者所谓觉观，意行者所谓想受。是三种行，其相是一，智者云何能分别知？智者观息出入数时，深观息之冷暖乃至一切毛孔入出。是人观息，谛知是息本无今有，若本无今有是无常相、无决定相，如电画水。如是观时得身行相，观如是相从何因缘？即知是相因于觉观，觉观之性本无今有，是故无常，是可断法，是可解脱。是觉观相因心而生，心亦本无今有，本无今有是无常相、可破坏相、无归依相、无有物相、无有我相。作是观时，于诸行中心则生悔，能修世间不可乐想。汝等比丘，若能深观如是三行，则能永断一切烦恼，能净正见，断生死法，成平直道，正聚所摄，得须陀洹果乃至阿罗汉果。

“憍陈如，智者于诸行中修不可乐想。憍陈如，云何比丘观所著衣作不乐想？若有比丘裁衣、缝衣、见衣、触衣、著衣、脱衣，观如是时，如血涂皮烂臭可恶，虫所住处无可乐处。如是观时，于衣贪心即时除灭。

“憍陈如，云何修集食不乐想？若有比丘执持钵时，如血涂髑髅，烂臭可恶虫所住处。若得食时，应观是食如死尸虫。若见麁时如未骨想，得饭浆时作粪汁想，得诸饼时作人皮想，所执锡杖作人骨想，得乳酪时作脓血污想，若得菜茹作发毛想，得种种浆作生血想。憍陈如，若有比丘作如是观，是名于食不可乐想。

“憍陈如。云何于房舍生不可乐想？比丘若入房舍之时，应生是念如入地狱受诸苦恼：如是房舍即是和合，所有材木即是人骨，土是人肉，乃至一切床榻被褥亦复如是。作是观时，是名世间不可乐想。若能观察如是想者，是人即得如实法忍，随空无相无愿等忍。是人乐修空相，因修空相见一切法悉是生灭苦、空、无我，观阴入界、十二因缘，一切法性苦、空、无我。如是见已，即得须陀洹果乃至阿罗汉果。

“憍陈如，修集世间不可乐想，能断欲贪、色无色贪，一切憍

慢、疑、掉、无明，乃至得无学地，是名具足随无愿陀罗尼。憍陈如，是陀罗尼能破一切恶魔，乃至能令三宝增长。”

说是法时，无量众生得法眼净，无量亿众诸漏永尽，八那由他众随无愿陀罗尼，无量众生发阿耨多罗三藐三菩提心，五万八千众生得不退菩提心，无量众生得如法忍。

尔时，无量众生白佛言：“世尊，一切众生若闻是法，云何不发阿耨多罗三藐三菩提心？我今护持听受是法。”

佛言：“善哉！善哉！诸大檀越，汝等今者欲护大法，因护法故未来之世，当得无量福德果报。”

尔时，舍利弗白佛言：“世尊，德华密佛遣虚空密菩萨摩訶萨，所持来欲净陀罗尼，唯愿说之。”

佛告舍利弗：“谛听！谛听！善思念之，当为汝说德华密佛所遣来欲净陀罗尼，为坏此土众生四倒。舍利弗，此土众生实无有我，颠倒心故，横生我想。智者深观知无有我，作是观已则破颠倒。

“舍利弗，云何智者观于无我？所谓观身谛知无我。何以故？以和合故。复次，观眼亦无有我。何以故？四大合故。若眼转瞬即是风力，如是风者，因于虚空去来回转，而虚空性性无所有亦不可说，若无所有不可说者即是无我，是故虚空实无有我。是空中风，亦复无物不可宣说，是故无我。如观风，地亦如是；地亦无物不可宣说，是故无我。水、火亦尔。是故当知眼之四大，亦复无物不可宣说，是故无我。若复有言眼、色因缘故有我相者，是义不然。何以故？眼中无我，色亦如是，而和合中亦复无我；和合因缘生于眼识，而是识中亦复无我。因识生色名为名色，名色因缘生于六入，六入因缘触，触因缘受，受因缘爱，爱因缘取，取因缘有，有因缘生老病死等，如是等法因眼识生，而是眼识亦复不从十方而来。所因之念生眼识者，是念亦灭。眼识不住于二念中，亦不语念‘汝住我灭’，而是灭法亦无处所，是故诸法缘合故生，缘离故灭。若因缘故生，无缘则灭，是故当知实无有我。而是因缘亦无作受，无有作者，是故无我。若无我者，我所亦无，是故眼性无我、我所，无合无散即是生灭。一切诸法亦复如是，一切法性无取无舍，非诸声闻、缘觉、诸佛之所造作。如眼识空，一切法空亦复如是。作是观时得空三昧门，或得须陀洹果乃至阿罗汉果。

“观眼既然，耳、鼻、舌、身亦复如是。观身无我，发亦无我，皮毛血肉、筋骨骨髓、肠唾暖气、上下诸风、寿命、名字皆无有我，直以众缘和合故名为身，身触因缘故生身识，识因缘名色，名色因缘六入，六入因缘触，触因缘受，受因缘爱，爱因缘取，取因缘有，有因缘生老病死等。如是等法因生身识，而是身识亦复不从十方而来。所因之念生身识者，是念亦灭。身识不住于二念中，亦不语念‘汝住我灭’，而是灭法亦无处所。是故诸法缘合故生，缘散故灭，有缘故生，无缘故灭，是故当知实无有我。而是因缘亦无作受，无有作者，是故

无我。若无我者，我所亦无，是故身性无我、我所，无合无散即是生灭。一切诸法亦复如是，一切法性无取无舍，非诸声闻、缘觉、诸佛之所造作。如身识空，一切法空亦复如是。作是观时得空三昧门，或得须陀洹果乃至阿罗汉果。

“舍利弗，若有比丘能如是观眼、身无我，当知是人得三昧门，为诸天世人之所供养。”

说是法时，无量众生过去恶业悉得除灭，无量众生得法眼净，无量众生得须陀洹果乃至阿罗汉果，九万四千众生获得如是净陀罗尼，无量众生发阿耨多罗三藐三菩提心，无量众生于菩提中心不退转，无量众生得如法忍，无量众生得破欲贪、色无色贪，无量众生得随空无相愿陀罗尼，无量众生成就不净观，无量众生成阿那波那、或得舍摩他、或得毗婆舍那、或得性地，或得声闻、辟支佛法，或得菩萨法，一切女人闻已悉得转于女身，欲界众生悉受快乐如三禅地。尔时，一切天人八部，供养于佛，欢喜而住。

日密分中不思议大通品第五

尔时，频婆娑罗王白佛言：“世尊，此世界中无量菩萨，所可成就光明妙色，我从本来初未曾见，初未曾闻。世尊，是菩萨光能照一切娑婆世界。若是菩萨近于阿耨多罗三藐三菩提者，其光云何？”

“大王，若有菩萨成就无上菩提道者，其光能照十方世界。何以故？善法庄严诸功德故，成就具足庄严法故，一切善根多增长故，以近无上菩提道故，毕竟无上菩提道故，受于如来正法果故，分别演说无边法故，所可得身无挂碍故，获得清净真实法故，所可修集到彼岸故，未来世业已得尽故，成就无量佛正法故，能转无上妙法轮故，于一切法得自在故，通达一切众生根故，永断一切烦恼习故，是故光明悉能遍照十方世界。大王，随佛功德大势力故，亦能睹见十方诸佛。”

王言：“世尊，我今欲见十方诸佛、菩萨、声闻。”

尔时，世尊告阿若憍陈如：“若我弟子声闻之人在家出家，是人各各深自思惟所有善法：‘我亦欲入如来三昧。’若有人天得如实忍，若有不退于三乘者，如是众生亦入于定。复有众生于三宝所得信敬心，亦复如是入于禅定。”

尔时，世尊即入三昧，其三昧名一切佛境界行智广如虚空一切智者喜日月光明。如三昧，声闻、缘觉及诸菩萨，所不能知，不能计量，是名佛境界三昧。如来入是三昧已，娑婆世界百亿四天下、百亿须弥山、百亿日月乃至百亿有顶，如是等土悉入佛身。娑婆世界地狱、饿鬼、畜生、天、人，有受苦者皆得除灭，一切欢喜譬如比丘入第三禅。所有一切菩萨摩訶萨悉从定起见佛光明，见光明已，自所有

光寻灭不现。一切声闻所受快乐，譬如比丘入第三禅。尔时，一切无量众生悉皆自睹，如来毛孔一一毛孔出无量光，如恒河沙等日月光明，亦如恒河沙十住菩萨所有光明，如是光明悉能遍照十方佛土。

尔时，十方诸佛世尊，各告大众：“诸善男子，汝等颇见释迦如来大光明不？如是光明成就无量无边功德。是光因于大慈大悲，为于怜愍诸众生故，是故今者示诸众生大神变相。一切众生见是光已，皆发阿耨多罗三藐三菩提心。”他方世界有诸众生得神通者，皆集至此娑婆世界。其不得者，遥礼供养。

尔时，一切诸佛、菩萨及声闻众，皆悉来诣娑婆世界。一切菩萨悉以七珍、种种华香、伎乐、幢盖，供养恭敬，尊重赞叹。有诸众生处佛身者，皆悉见之，见已复受无量快乐。尔时，娑婆世界一切众生，同共发声作如是言：“我等以是善因缘故，愿后共生一国土中，令得睹见十方诸佛，三恶业道已得消灭。若有众生见佛神变，不发阿耨多罗三藐三菩提心者，当知是人常行黑闇。诸菩萨等为众生故受种种苦，或化作佛，或作辟支佛，或作声闻、梵天、帝释、四大天王、那罗延像，自在天像、龙像、鬼像、阿修罗像、转轮王像，若有佛界应以声闻得调伏者现声闻像，如是等化自非十住不能为也。是故无上菩提之心，成就无量无边功德。”

尔时，一切诸佛身内所有众生，以偈颂曰：

“以诸恶心因缘故， 流转生老病死者，
以不亲近善知识， 是故不能到彼岸。
若能远离诸恶心， 诸恶邪见恶因缘，
能断三有生死者， 是则能到于彼岸。
众生难得于人身， 得已值遇善友难，
笃信之心复难得， 得已难得听正法。
若有能发菩提心， 是人能断诸烦恼，
亦能教化无量众， 现大神变如今佛。
若能永断二法者， 所谓常断二见等，
若见一切行无我， 是人名为善思惟。
若能修集苦集谛， 是人能断诸烦恼，
若能发起菩提心， 是人则胜诸世间。”

说是偈已，无量众生发阿耨多罗三藐三菩提心，复有众生发缘觉心，复有众生发声闻心，或有众生得无量陀罗尼，复有众生得如法忍、不退忍、如实忍，或有获得须陀洹果乃至阿罗汉果。

尔时，波旬悉见娑婆世界在佛身内，见已悲泣，涕泪横流，心生愁恼，若坐若起、若行若立、进止出入，以手拍头亦受苦恼，乃至一切魔之眷属亦复如是。

时，魔波旬有一大臣，名曰空树，见魔愁恼，而说偈言：

“何故愁恼而独行， 其心迷乱如狂人，
所至之处心不乐？ 唯愿天王说因缘。”

时，魔波旬复以偈答：

“我见瞿昙大神力， 是故生恼而狂行，
内心躁动无安所， 愁热逼切及眷属。
睹见如来无边身， 悉受一切娑婆界，
令我境界悉空虚， 是故我今生愁恼。
十方所有诸圣人， 悉来集会此世界，
大设供养供养佛， 是故令我生愁恼。
瞻睹如来大神力， 及见眷属归依佛，
我今独行无伴侣， 是故令我生愁恼。”

尔时，大臣复说偈言：

“我今多有诸眷属， 其心弊恶具器甲，
力能破坏如来身， 及能毁坏大神力。”

时，魔波旬复说偈言：

“我今眷属深畏佛， 云何能坏神通力？
若欲生心毁坏时， 则自见身被五缚。”

是时，大臣复说偈言：

“如其怨敌势力大， 当诈现亲则可坏，
若知瞿昙有大力， 先当现诈亲厚心。”

时，魔波旬复说偈言：

“我若诈现亲厚心， 为欲毁坏瞿昙身，
即现颈下系死尸， 为一切人所呵责。”

是时，大臣复说偈言：

“一切欲有是魔界， 所有人天属如来，
愿王切敕恶龙王， 是能破坏瞿昙身。”

时，魔波旬复说偈言：

“若汝审知龙有力， 我已失心汝自约，

若实能坏瞿昙者， 我还得土及本心。”

尔时，大臣即便宣告诸恶龙王：“汝当为我坏瞿昙身。”

时，诸恶龙将欲飞空而不能动，即语大臣：“敬奉来命欲往毁坏，适生此心便不得去。”

尔时，大臣即生怖畏，作如是念：“我若今者现魔大力，令诸恶龙心生瞋恚，以瞋恚故则能毁坏瞿昙之身。”

尔时，龙宫有化死尸充满侧塞，诸龙见已，自于宫室心不甘乐，作是念言：“是谁化作此死尸耶？”虽复思惟莫知谁为。

尔时，一切四天下中诸大龙王，及其男女大小眷属，即出宫室至佉罗坻山。其山平坦，广纵正等四万由旬，皆是先圣所游居处，七宝具成。乃至难陀、婆难陀王，亦舍住处至此山中。四大海中，所有龙王及其眷属无量无边，伊罗跋龙王、善住龙王、龟龙王、阿那婆达多龙王、目真邻陀龙王、德海龙王、水德龙王、舍德龙王、乐德龙王、阿波那罗龙王、山德龙王、牛德龙王、伊罗跋多龙王、长臂龙王、长发龙王、净龙王、迦羯罗龙王、水[漂+寸]龙王、黑发龙王、金色龙王、舍拘龙王、念弥龙王、象龙王、利牙龙王、有行龙王、疑网龙王、长面龙王、赤眼龙王、乐见龙王，如是等阎浮提土所有龙王，其数八万并其眷属，乃至四万四千国土所有龙王，皆至佉罗坻山。北郁单越有二龙王，一名无遍，二名金身，是二龙王，与无量众及四万四千国土龙王，亦至此山。东弗婆提有二龙王，一名为月，二名婆私吒，是二龙王，与无量众生及四万四千国土龙王，至此山中。西瞿耶尼有二龙王，一名宝发，二名光发，及四万四千国土龙王至此山中。及四天下四生龙王，并其眷属亦至此山。是诸龙王其身皆如四寸药根，以瞋恚故身如须弥。

时，魔波旬见如是等诸龙王已，告其眷属：“谛听！谛听！以我力故令如是龙从宫室出，至彼大山悉失势力，不能毁坏瞿昙沙门。”

尔时，复有大臣名曰戒梯，即白魔言：“大王，如是龙王为欲破坏释迦身故，集会一处各作是念：‘我今当以何等方便，坏瞿昙身？’”

波旬答言：“我有是事，若审汝当往看。”

尔时，大臣与百千万众生，欲往彼山。

尔时，如来从禅定起，坐于一面示现常身。大臣既见如来常身在摩伽陀国，见已即作是念：“瞿昙沙门退失神通，将不于我生怖畏耶？欲于我所生大恶乎？我应先至彼瞿昙所，与共谈论。”

尔时，大臣即与大众往至佛所，而说偈言：

“汝身未度生死海， 云何当能度众生？

瞿昙勿诳诸众生， 说言当得大涅槃。”

尔时，如来复以偈答：

“我已得度生死海， 亦得永脱一切有，
我以慈悲因缘故， 说言众生当涅槃。
汝已于昔无量世， 发起无上菩提心，
已曾供养无量数， 百千巨亿诸世尊。
汝今定当得佛道， 云何言我诳众生？
我今施汝大念力， 便可至心观本身。”

尔时，大臣闻是偈已，即自观察过去本身，了了明见发菩提心，供养无量无边诸佛；见已即时心大惭愧，于如来前头面著地，忏悔作礼白佛言：“世尊，我今已忆无量世中发菩提心，已曾供养无量亿佛，于诸佛所听受妙法，已得修行六波罗蜜。世尊，迦叶佛时，有一比丘说声闻乘，我不思惟，便言：‘是语非是佛语，魔之所说。’是人已发菩提之心行菩萨道。以是因缘，迦叶如来不授我记，我因是事生于魔界，受是身来，已经五万七千亿岁。世尊，我宁以是过去等身受地狱苦，终不退于菩提之心。”

佛言：“大臣，善哉！善哉！若人以金如须弥山并七宝物，于无量世供养于佛，其福不如发菩提心。何以故？发是心者，乃是供养十方诸佛。”

尔时，戒梯菩萨即于座上得如法忍，从坐而起，头面作礼，绕佛三匝，以身上衣供养于佛，乃至四万四千大众亦复如是。

时，魔波旬见其大臣及其眷属，已归依佛，心生苦恼，牢闭门户，却坐一面。

尔时，世尊即为大众说三种慈，所谓生缘、法缘、无缘，如虚空中目中之所宣说。

尔时，一切诸天龙王，悉皆集会佉罗坻山先圣住处，欲动不能，欲行亦然，欲现大身而复不能，寻向难陀、婆难陀王而作是言：“大王，先者所作臭秽死尸，皆是波旬之所为也，是故令我悉来至此受是小身。若能归依魔波旬者，可得解脱。”

尔时，伊罗跋罗龙王言：“魔王今者丧失本心及其神足，云何当能救济汝等？”

尔时，龙王或有归依四天王者，或有归依忉利天、或焰摩天、或兜术天、或化乐天、或他化自在天、或梵天等。

尔时，海龙王即作是言：“汝等不见释迦如来，一切贤圣人天杂类，大设供养而归依耶？”

尔时，或有龙王，归依那茶仙人、或马藏仙人，或归广仙人、或光味仙人、或跋伽婆仙人，归依如是等五种仙人。是五仙人悉得五通，住于雪山，悉在光味大仙人所听受正法。光味菩萨亦以种种无量赞叹赞叹如来。

尔时，仙人悉闻一切龙王音声，闻已即白光味仙人：“颇闻诸龙哭声不耶？”

答言：“已闻。”

“大士，唯愿往彼救济其苦？”

光味答言：“汝等可往，我不得去。所以者何？今有大天，欲得闻受无缘慈故。”

时，四仙人礼拜光味，往佉罗坻山而救济之。诸龙见已，即各举声求哀求救。仙人答言：“我不能救，彼雪山中有一菩萨名曰光味，彼能救拔，吾等不能。汝当一心求哀作礼。”时，诸龙王各自同声向彼作礼。

尔时，光味闻是声已，与无量诸天大众至佉罗坻山。龙王见已头面作礼：“唯愿大士救我等苦。”

尔时，光味菩萨知时已到欲说星宿。尔时，大海龙王白光味菩萨言：“大士，是星宿者，谁之所说？谁作大星？谁作小星？谁作日月？何日之中？何星在先？云何满月？云何为时？如是星宿系属何天？性是何等？何轻何重？何善何恶？何食何施？谁造此昼？谁作此夜？影有几步？名曰为转，云何南转？云何北转？大士，汝于诸仙最为第一，唯愿具足分别解说。”

尔时，光味菩萨告诸龙王：“大王，先过去世贤劫之初旃陀延城，其城有王名无量净，正法治国，不贪欲乐，常乐寂静，才智聪达。王有夫人，欲心发动与王游行，在一林中贪心视王，即便妊身。是时，夫人时满即生其儿，头、耳、项、眼、唇、口悉皆似驴，余分似人。其母见已即生怖畏，掷之厕中。身未至地，是时驴鬼于空接取，往雪山之中，瞻看哺养犹如生子。时，雪山之中有甘美药，驴鬼采取以食是儿，是儿食已身则转异，有大光明，福相具足，智慧慈悲。以是因缘，诸天礼拜供养赞叹。为是儿故，于雪山中有诸种种药草果蓏。余相悉转，唯唇似驴，是故名为驴唇仙人，于六万年受持禁戒常翹一足。一切梵天、魔天、帝释，大设供养而供养之，皆悉合掌，白驴唇仙人：‘欲求何愿？唯愿语之。若我力能，我当施汝。’仙人答言：‘我今欲得了知星宿，为众人故心生怜愍。’一切天言：‘若为怜愍一切众生，欲得知者，愿当说之。’仙人言：‘梵天，我实不解最初宿。’”

说是星时，诸大龙王于光味菩萨，心生欢喜。

尔时，光味菩萨为诸龙王，出微妙音赞叹三宝，又作是言：“我今真实不能救拔汝等苦恼，唯有如来释迦之尊乃能救之！释迦如来为欲调伏诸众生故，于无量世能舍所珍，修习慈悲为救苦恼。”

尔时，一切龙王、男女大小心念佛，赞叹归依：“南无世尊！于众生中最为殊胜。一切法中心得自在，于诸法海已到彼岸，能救一切众生苦恼，施其安乐平等无二，怜愍一切能示正道惠施正眼，一切天龙之所供养，能受一切十方世界所有人天微妙供具。世尊，我今多受无量苦恼，唯愿慈悲少垂救拔。”是诸龙王心念佛已，寻自见身如先无异。

时，光味菩萨语诸龙王：“如来功德不可思议，为众生故于无量世修行具足六波罗蜜，说三慈悲调伏众生，说一切法无我无作，说阴入界四大烦恼，说烦恼性及众生性，说一切法无性无相、无碍无作、无垢无净、无明无暗、无取无舍、无行无住、无一无二，阴入界等及以四大亦复如是，名第一义空。是故如来能调众生为无上尊，是故如来能拔汝等无量苦恼。”

日密分中救龙品第六

尔时，世尊告光味菩萨：“善男子，汝今欲闻诸龙业不？”

光味菩萨白佛言：“世尊，今正是时，唯愿演说。”

佛言：“善哉！善哉！善男子，至心谛听！当为汝说。”

尔时，一切天人以好香华、妓乐、旛盖供养于佛。尔时，世尊与欲、色界一切诸天、无量声闻及菩萨众，从摩伽陀国趣须弥山。

尔时，梵天设七宝座以待如来，复有造作七宝街道。是时，梵王作如是言：“唯愿如来经涉此路坐我座上。”尔时，他化自在天复以阎浮檀那宝造床及道，亦言：“如来愿行此路坐我座上。”尔时，化乐诸天复以天金造床及道，亦言：“如来愿行此道坐我金床。”尔时，删兜术陀天复以天银造床及道，亦言：“如来愿行此道坐我银床。”时，夜摩天复以琉璃造床及道，亦言：“如来愿行此道坐琉璃床。”时，忉利天复以真珠造床及道，亦言：“如来愿行此道坐真珠座。”时，四天王复以玛瑙造床及道，亦言：“如来愿行此道坐玛瑙床。”时，四阿修罗复以栴檀造床及道，亦言：“如来愿行此道坐栴檀座。”

尔时，世尊心怜愍故，化作佛像遍行六道，遍坐六座，以如来真身处在梵王所设道座。一一化像皆有无量声闻、菩萨以为眷属，一一化像所有光明，犹如无量日月光明。是诸龙王见化像已，心生恭敬，各作是言：“今须弥山乃至如是千日月耶？”

难陀、婆难陀言：“如来世尊，与无量梵天趣须弥山，是其光明，非日月也。汝等若欲得解脱者，应当至心专念如来。如来世尊已坏无明，是故今有如是光明。”阿那婆达多龙王言：“是光明者，是魔所有，非佛光也。何以故？一切欲界属魔波旬故。是魔波旬能作是恶，波旬今者怜愍故，能救如是诸龙王苦。”或有说言：“如此乃是化自在天、化乐天、兜率陀天、夜摩天、忉利天、四天王等，以怜愍故能救如是诸龙王苦。”善住龙王言：“是光明者，即是光味菩萨光明，以怜愍故救诸龙王苦。”宝髻龙王言：“是光明者，乃是出家剃除须发大德人光，以怜愍故救诸龙王苦。”海龙王言：“是光明者是如来光。何以故？以怜愍故。如来世尊，于诸众生修一子想，能救众生一切苦恼，于无量世修行具足六波罗蜜，唯为救济一切众生无量苦恼，是故一切欲色界天，设大供具而供养之。”

尔时，世尊告帝释言：“憍尸迦，如我游此娑婆世界为化众生，如汝在于三十三天为度诸天。”

憍尸迦言：“世尊，我今未有无边之智，云何说我能化诸天？世尊，是须弥山有无量天、无量梵天、无量鬼神、无量乾闥婆、无量紧那罗、无量迦楼罗、无量阿修罗、无量摩睺罗伽、无量诸龙、无量大仙、无量圣人。唯愿如来，以怜愍心化度如是无量众生。”

尔时，世尊熙怡微笑，无量色光从其口出，青、黄、赤、白、玻璃、杂色，遍照十方幽冥之处，胜无量亿梵天光明、无量亿数释天日月，能坏一切诸恶魔业。

尔时，世尊告帝释言：“憍尸迦，娑婆世界所有诸山须弥为最；我亦如是，于诸众生最为第一。”

尔时，一切龙王闻是语已，各白佛言：“世尊，唯愿怜愍，救我等苦。”

佛言：“诸善男子，汝等先当至心念佛，我当救之。”

尔时，世尊告憍陈如，其音遍闻十方世界：“憍陈如，一切诸法悉皆无常，一切诸法生住无常。何以故？生因缘故。一切因缘生法，即是苦也。若法生时即是苦，即是痛疮，即是有支，即是生老，即是生灭。憍陈如，眼即无常，若眼生者即是苦，即是痛疮，即是有支，即是生老，即是生灭；乃至意亦如是。憍陈如，若眼灭者，即是生老病死等灭，即是一切有支灭；乃至意亦如是。众生不知眼之生灭，是故流转在五道中。如来为断眼生灭故而演说法，亦为说苦断苦行法，是故如来是梵中大梵、天中大天、象中大象，是沙门中大沙门、婆罗门中大婆罗门、慈中大慈、悲中大悲，无上之尊为大丈夫，已到生死大海彼岸，最大福田，无胜施主，其心平等为大法王，持大禁戒无上精进，善修梵行了知正道，为大导师通达余业。

“憍陈如，善知眼之生灭因缘故名如来，不了知故名为凡夫。云何不知名为凡夫？憍陈如，一切众生皆说有我，是故不见眼生灭相，轮转五道。憍陈如，有诸外道，说言见者名之为我，乃至知者是我，眼者即是我之因缘，乃至意者亦复如是。憍陈如，诸外道说眼喻于向，我者喻见，若如是者是名颠倒。何以故？所言见者即是和合，于和合中而生我想，是故颠倒。若言向喻于眼见喻我者，是义不然。何以故？向中见者，亦见亦闻，亦识亦触，眼不如是，是故见者不得名我。向虽久故见犹明了，眼若久故不得如是。我者名常，若我见闻我则无常，若无常者云何说我？憍陈如，众生以是颠倒因缘不见四谛。如来了是颠倒相故，名为正智。我者即是如来，若有能知如来我者，是人则能坏颠倒相，若坏颠倒则破魔业，若破魔业，是人则能救拔诸龙。憍陈如，是故我今能救诸龙。”

大乘大方等日藏经卷第一

护持正法品第一

如是我闻：一时，娑伽婆在王舍城迦兰陀竹园，与大菩萨其数无量不可称计前后围绕，及余十方诸佛世界，无量无数不可思议阿僧祇诸大菩萨、声闻之众，地及虚空皆悉遍满，俱来集会前后围绕。复有十方无量世界帝释天王、梵天王、四天大王，诸大龙王、夜叉王、乾闥婆王、阿修罗王、迦楼罗王、紧那罗王、摩睺罗伽王，如是等无量无数不可称计俱来集会。复有欲界、色界天、龙、夜叉、罗刹、乾闥婆、阿修罗、迦楼罗、紧那罗、摩睺罗伽等，皆悉一心瞻仰如来。

尔时，世尊为诸大众说虚空目安那波那甘露法门四无量已，默然而坐。娑婆世界地及虚空，一切大众亦皆默然合掌向佛，唯希如来甘露法雨而无厌足。犹如重病思遇良医，如在大闇思见光明，如溺大河思登彼岸，如遭急难思求依护；如是遍满娑婆佛刹地及虚空诸大菩萨及诸声闻，释梵天王、摩睺罗伽王，乃至人非人等，合掌默然，瞻仰法王亦复如是。

尔时，众中有一大梵天王，名曰功德莲华光，已于昔日供养无量无边诸佛，于诸佛所植诸善根，于阿耨多罗三藐三菩提得不退转，系心缘法善修慈愍，即从坐起，合掌向佛而说偈言：

“大圣神通力， 能速遍诸刹，
 如心无所障， 光照十方国，
 巧说奢摩他， 尽智及方便，
 阿那波那念， 及四无量等。
 佛于三界中， 生死际已舍，
 净慧悉满足， 胜人天修罗，
 已离于爱缚， 度疑到彼岸，
 了知诸菩萨， 现证于佛法。
 众生心乱故， 堕在生死河，
 如盲无所见， 常为苦所没，
 远离善知识， 不闻清净法，
 轮回生死中， 为诸结所缚。
 佛度生死海， 慈悲故说法，
 为烦恼众生， 断生死罗网。
 爱为烦恼本， 诸众生染著，
 能仁巧分别， 令尽生死际。

以痴爱因缘， 不修诸功德，
若能断之者， 六根皆寂灭。
大慈牟尼王， 悲心为说法，
闻已除痴爱， 获甘露涅槃。”

尔时，佛告功德莲华光大梵天王，而说偈言：

“过去修诸度， 今亦如是行，
不乐声闻乘， 及辟支佛地。
复有诸众生， 数起瞋恚心，
及念二乘等， 是则为障碍。
以是诸障故， 退失于佛法；
不起是障者， 得佛法满足。
有四生众生， 俱来至此刹，
非唯爱欲身， 非尽念不净。
是中大智人， 能行菩提道，
已曾久修习， 定忍总持等。
能守护诸根， 正念跏趺坐，
安住自境界， 佛当为汝说。
乐五众众生， 为说不净法，
令断于系缚， 七菩提分满。
我无嫉妒心， 怜愍故为说，
菩萨闻此法， 不舍菩提心。
十方一切佛， 已曾住此刹，
昼夜常加护， 令佛法久住。
汝等诸菩萨， 愍此刹众生，
常生欢喜忍， 令我法久住。
我说声闻法， 为断贪欲心，
示五阴诸入， 及十八界空。
十三奢摩他， 及毗婆舍那，
能断难断爱， 是人得清静。
显说无漏行， 声闻四真谛，
怜愍众生故， 为令法久住，
说此四谛法， 令度生死海。
复告诸菩萨， 汝等莫生疑，
佛当为汝等， 广说菩萨行。”

尔时，此娑婆世界中，所有众生在佛会者，作如是念：“如来今者，欲说声闻法，不说菩萨道。”十方世界诸来菩萨复作是念：“如来慈愍欲令我等，于此世界修诸禅行，使三宝种不断绝故；于此刹中所

有天、龙、夜叉、罗刹、乾闥婆、阿修罗乃至人非人等，未信者令信，已信者令增进故；欲令一切众生悉受安乐，舍诸疑悔，满足涅槃八正道故；令此佛刹有大福德，具足熏修众善法故。”十方世界所有众生作如是念：“娑婆佛刹福德吉处，我今恭敬尊重供养礼拜。”彼佛刹中诸菩萨等各作是念：“我今应当于此世界结跏趺坐，各各入于种种胜忍陀罗尼门及诸三昧，放大光明利益安乐诸众生故。”作是念已，即于此刹跏趺而坐，入于胜忍陀罗尼诸深三昧。

是诸菩萨或有经于百大劫中修菩萨行，有得无生法忍乃至十地，具足修习十八不共、四无所畏等诸功德法，各以胜忍陀罗尼诸深三昧因缘力故，放大光明。其中或有光，如灯炬野火之明，有如释梵诸天大梵王光，又如一日之光，二三四五如是转倍，乃至百千万亿日光。此诸光明遍照三千大千世界，其中众生遇斯光者，身心安乐皆大欢喜，如人热闷入清凉池。是光能除众生三恶道苦，饥渴寒热种种诸病，及贪瞋痴邪见等患，乃至能令三界狱中所有恐怖厄难众生，令尽苦际。是时，此刹诸众生等蒙光力故，咸共深心恭敬供养，尊重赞叹佛法僧宝，厌舍诸恶勤修善法。从是诸光，乃至遍照十方如恒河沙等诸佛世界，净秽等刹、有佛无佛皆悉普照。犹如重夜幽闇之中，忽有百千万亿日光俱时普照；此及他方恒河沙刹土，光明遍照亦复如是。

尔时，十方恒河沙等诸佛世界，有诸菩萨摩訶萨等，承佛神力，于一念顷来至此刹，各在一面结跏趺坐。是诸菩萨或有已经百千大劫修菩萨行，或有乃至具足十地，皆悉修习十八不共、四无畏等诸功德法，各以善根福德力故，入深三昧放大光明，遍照三千大千世界。其中所有魔王、龙王乃至人天，诸光明等皆悉不现。

尔时，世尊告诸声闻四辈等众：“汝今应知，此诸菩萨摩訶萨等，大善根力入于三昧放此光明，遍照三千大千世界。又彼十方诸佛如来，曾于此刹作佛事已而还本国，今共加护此诸菩萨摩訶萨等，令入禅定现神通力，为令现在及未来世三宝久住不断绝故。以是菩萨神通光明因缘力故，令诸天、龙、夜叉、罗刹、阿修罗、迦楼罗、紧那罗、摩睺罗伽、人非人等，未信者令信，已信者令增长，于正法中发大精进，如法修行自在无碍得不退转，乃至修学涅槃正道具足满故。是诸菩萨随所住处，于当来世是中皆应起立塔寺造作法堂，安置舍利经法形像，以种种七宝而修供养，所谓金、银、琉璃、砗磲、玛瑙、玻瓈、真珠、珂贝、璧玉及上缯彩，种种衣服、床榻卧具，种种幡盖、袈裟法服，种种瓔珞、华香、末香、涂香、烧香，作诸音乐礼拜供养，为令恐怖生死众生求涅槃道修功德故。”

尔时，世尊作如是言：“于未来世若有善男子、善女人，于三宝所如是布施我悉受之，令彼众生于三乘中随其所乐得不退转。若复有人为供养故，或造一舍一僧伽蓝，经行之处布施园林，衣服、饮食、卧具、床褥、种种汤药而供养之，或有建立讲读论堂经行禅室，于中布施奴婢、田宅、象马车乘、驼驴牛羊，种种诸物、衣服卧具及诸汤

药、资生所须，令持法比丘身心安隐，坐禅修道，讲读论义，如法修行具足庄严，得胜自在涅槃道故，欲令佛法久住于世故，舍如是等种种诸物，我于尔时与诸菩萨及声闻众皆悉受之。若未来世有善男子、善女人，为供养三宝故，能舍如是种种诸物，建立讲读论堂、经行禅室，给其所须，我悉知见而生随喜，与诸菩萨及声闻众同共受用。何以故？为令是等得大果报，于三恶道得远离故，随其所欲于三乘中得不退转，乃至各于三乘而般涅槃故。又善男子、善女人，以如是等种种诸物供养因缘故，于未来世当获二利。何等为二？一者、法利，二者、财利。随所生处资财具足，宿习因缘故，是诸物不生悭吝悉能舍施；为欲供养比丘、比丘尼、优婆塞、优婆夷故，随其住处，或在山林树下阿兰若处无烦闹声，堪可坐禅系念之处，建立塔寺房堂静室，随彼所须皆能给施。是比丘等受彼施已如法行故，天、龙、夜叉随其所在皆悉拥护。”

尔时，佛告诸比丘言：“汝等当知，十方诸佛已曾于此娑婆世界，入深禅定现大神通，破坏魔王及诸龙等，慈愍众生故演说妙法，为令三宝久住世间，各于此土作佛事已归还本国。尔时如恒河沙等诸佛世界，有无量无边阿僧祇菩萨摩訶萨，欲见于我礼拜供养，听闻正法及受持故，复为闻说虚空目修多罗四无碍法，各于他方来集此刹，慈悲怜愍诸众生故，入于禅定现大威力，破坏魔王及诸龙等，欲令此土诸众生辈供给供养、施其所须、修诸功德，于三乘中得解脱故。是未来世有善男子、善女人，信心清净为欲供养如法修行诸比丘故，或舍家宅、园林、田地、奴婢乃至资生种种所须。尔时若有破戒比丘，受他所舍乃至一华一果；是恶比丘以愚痴故，受他净心所施诸物获大恶报，于现在世得四恶报。何等为四？一者、恶名远闻流布十方；二者、父母师长、兄弟眷属、奴婢亲戚皆悉离散；三者、获大重病卧粪秽中，恶报相现痛苦而死；四者、衣钵坐具所有资财，悉为五家之所分散。是名四种恶报。于未来世复获四种大恶果报。何等为四？一者、身坏命终堕大地狱。二者、于地狱中久受勤苦，地狱终已复生畜生、饿鬼道中，得无手足报，居在旷野无水之处，经百千万岁具受辛苦。三者、从彼命终生毒蛇中，得无眼报，经无量岁唯食于土。四者、于彼命终得生人中，堕五浊世不值诸佛。于彼世中虽得人身，常无眼目亦无手足，住在旷野，唯食世间所弃秽食恒不充足，不得与人同共住止，从彼命终复堕地狱，于三恶道难得免出。何以故？彼善男子、善女人，净心舍施田舍园林、衣服汤药种种诸物，唯欲供养如法比丘，然破戒者受他所施唯欲供身，不与如法持戒比丘，以是因缘获如是罪。又破戒者久处生死具受诸苦，虽得人身不值佛世。所以者何？诸佛如来不可思议难可值遇，彼破戒者，断灭法母不求精进，不用见闻佛法僧故，以是因缘不值佛世。彼恶比丘于当来世得如是等大恶果报！”

尔时，大德伽耶迦葉，闻此语已，悲泣雨泪而白佛言：“世尊，

如我解佛所说义者，宁处地狱具受众苦，终不受此破戒身也。所以者何？虽得此身而复出家，为衣食故具犯禁戒受他净施，获如是等种种苦恼。”

佛言：“迦葉，如是，如是，如汝所说，宁处地狱受种种苦，不受人身起如是等破戒罪业。何以故？地狱罪毕更不造新故，业尽已便于苦报而得解脱。迦葉，诸身之中人身难得，得人身已值佛出世复难于是；虽值佛世，出家受戒是最为难。所以者何？得受戒已，如法修行能尽苦际，断诸漏结而得解脱。是净信心善男子、善女人，若刹利、婆罗门、毗舍、首陀，欲供养净行持戒比丘，以其具足福德善根故，或舍家宅、园林、静室、奴婢、象马牛羊等物种种资生，以为常住僧业，令彼比丘身心安隐集善根故。是愚痴比丘，毁犯净戒舍诸善根，远离静念专为非法，彼善男子等而不供养，以是因缘衣服卧具、资生所须皆不充足，便作是言：‘我大智人，堪可受彼所施诸物！’或假檀越豪强势，夺他如法比丘所受诸物，唯自供身以为私用，言是己有此非僧物。彼愚痴人造是罪故，于当来世受如是等诸恶果报。”

尔时，频婆娑罗王白佛言：“世尊，若善男子、善女人，若刹利、婆罗门等，欲供养如法比丘故，舍彼田宅园林种种诸物资生所须，是破戒者夺他所受唯自供己，以是因缘获如是等大恶果报。若在家人，夺彼持戒行法比丘如是布施种种资生而自用者，是诸人等得几许罪？”

佛言：“大王，不须问此得几罪报？”

王复白佛：“若未来世有刹利等，以种种诸物施与持法比丘，以是因缘诸比丘等多有资生。是刹利、婆罗门、毗舍、首陀，不信佛法及因果故又不畏罪，如是人辈夺而用者，得几许罪？”

佛言：“大王，是诸人等夺他施故，当得无量恶果报，若我具说重增彼罪。所以者何？是刹利、婆罗门、毗舍、首陀，净心施彼行法比丘种种诸物，是比丘等多有资生，如是愚人犹彼痴驴，以不信故夺他所受种种施物而自供己，以是因缘故当得大罪。彼人若闻我说恶业差别种种果报，诽谤不信，如是愚人得二种罪：一者、夺他所施，二者、于我所说诽谤不信。”

时，频婆娑罗王复白佛言：“世尊，唯愿说之！唯愿说之！于当来世若刹利、婆罗门、毗舍、首陀四种姓中，有信佛法深识因果怖畏罪者，闻佛所说初中后善义味甚深，纯备具足清净梵行，如是之人闻已能信，如法修行作诸功德。复为供养行法比丘故，舍种种诸物给其所须。若有破戒比丘及愚痴人，夺彼持法比丘如是种种所受诸物，彼信心人方便拥护持戒比丘，终不令彼侵夺欺陵。”

频婆娑罗王说是语已，佛言：“大王，善哉！善哉！快说是语。大王，于当来世若有刹利、婆罗门、毗舍、首陀，为欲供养行法比丘故，或舍田宅、园林、奴婢、象马、衣服、卧具、饮食汤药、资生所须；若有刹利、婆罗门、毗舍、首陀，以不信故夺他所施，而彼愚人

于现身中得二十种大恶果报。何者二十？一者、诸天善神皆悉远离；二者、有大恶名流布十方；三者、眷属知识违背乖离；四者、怨憎恶人同共聚会；五者、所有资财悉皆散失；六者、心狂痴乱恒多躁扰；七者、诸根不具；八者、睡卧不安；九者、恒常饥渴；十者、所食之物犹如毒药；十一者、所爱之人悉皆离别；十二者、共事之人常多斗诤；十三者、父母兄弟妻子奴婢不信其言；十四者、所有隐密覆匿之事，知识亲友共相显露；十五者、所有财物五家分散；十六者、常遇重病无人瞻视；十七者、资生所须常不称意；十八者、形体枯悴；十九者、久受勤苦难得免离；二十者、常处粪秽乃至命终。

“大王，是愚痴人于现身中得如是等二十种诸恶果报，命终之后堕阿鼻地狱一劫受苦，饥食铁丸，渴饮融铜，用热铁鍱以为衣服，行住坐卧所受之物皆是火聚，六方炽焰更相通彻。彼诸罪人于阿鼻地狱具受如是种种等苦，从彼命终生末伽车[馬+犬]饿鬼中，居在旷野无水之处，生便无眼，又无手足，四方热风来触其身，形体楚毒犹如剑切，宛转在地受大苦恼，脂髓膏流犹居热熬，魂神迷乱出大恶声。具受如是百千种苦经无量岁，然后命终生大海中受肉团身，其形长大满百由旬；然彼罪人所居之处，于其身外面一由旬，满中热水状若融铜，经无量百千岁受如是等种种苦恼，如地狱中等无差别。从彼命终于阎浮提旷野泽中忽然化生，形如肉团犹若大山，四方热风来烧其身，飞禽走兽竞来食之，经无量岁尔乃命终还堕地狱。复经无量百千万岁备受众苦，然后命终生饿鬼中，乃至肉团之身，经无量百千岁，往反轮回具受众苦。其罪渐薄得出为人，生无佛国五浊刹中，从生而盲诸根不具，身形丑恶人不喜见。”

佛告频婆娑罗王言：“大王，如是罪人于当来世，获如是等大恶果报。所以者何？是持法比丘如法行故，有信心者种种资财具足施与；彼恶比丘愚痴人等，夺而自用故，获如是诸恶果报。”

尔时，频婆娑罗王闻此语已，悲泣雨泪而白佛言：“世尊，我今宁受地狱等身，终不欲受是人身也。何以故？以此人等造是罪故，获如是种种大苦果报。”

尔时，佛告频婆娑罗王言：“大王，汝等诸王及刹利、婆罗门、毗舍、首陀、聚落主等，如今现在及未来世乃至法住，于是时中所有持法比丘，付嘱汝等应好拥护。若有信心善男子、善女人，为供养行法比丘故，或舍种种资生杂物，汝好拥护，勿令非法比丘及诸恶人欺夺侵陵。若有恶人欺夺如法比丘所受信施，汝等应当如法治之。”

王白佛言：“世尊，若有国王见彼非法比丘及诸愚人夺彼行法比丘所受信施，不如法治者，当得几许罪报？乃至刹利、婆罗门、毗舍、首陀、聚落主等，见此非法比丘及诸愚人侵夺行法比丘所受信施，当得几许罪报？”

佛告大王：“我今问汝，随汝意答。除诸佛如来所有功德，一切声闻及辟支佛所有福德，若有一人具足成就如是等大福德聚，是人福

德是为多不？”

王言：“世尊，如是，如是，是人福德甚多！甚多！”

佛言：“大王，如彼一人所得福德，如是一切众生各皆备足是等功德，若有恶人于彼一切有福人所，割其手足耳鼻，生挑其眼，如是恶人得几许罪？”

王闻此语，悲泣哽咽不能自胜。

佛言：“大王，何以不答？”

时王闻已犹复悲泣，而白佛言：“世尊，如是愚人所获罪报，无量无边阿僧祇不可称计，乃至算数譬喻所不能及。世尊，若毁坏一人具上福者，手足耳鼻生挑其眼，其罪大多不可思议，何况毁坏一切具是福者！”

佛言：“大王，如我现在及未来世乃至法尽，于其中间若有信心善男子、善女人，俱舍如是资生所须、田宅、园林、象马、奴婢、衣服、卧具、汤药等物，施与行法比丘；若非法比丘及诸愚人夺彼所施，是刹利、婆罗门、毗舍、首陀聚落主等，见此非法恶人不如法治者，获大重罪复过于彼！”

尔时，频婆娑罗王白佛言：“世尊，如是国王治国之事，甚难！甚难！何以故？彼放逸王等不如法治，是非法恶人获如是罪。若有国王及刹利等不放逸故，拥护是等持法比丘，若有信心檀越施彼所须，若有非法恶人侵夺欺陵，当如法治者，得几许福？”

佛言：“大王，如上所说具福诸人，若复有人有大势力，禁闭狱中具受饥渴无量苦恼；若有一人具足大力，胜于前者出彼狱中，尔许诸人悉令解脱，经于百年四事供养，衣食汤药种种所须无不备足。”

佛言：“大王，彼有力人得几所福？”

王白佛言：“世尊，彼有力人所得福德，不可思议，不可称计，乃至算数譬喻所不能及。”

佛言：“大王，彼刹利、婆罗门、毗舍、首陀及聚落主等，如今现在及未来世乃至法住，是诸人等如法治彼非法比丘及愚痴人故，所得福德复过于彼。若复有人于今现在及未来世乃至法欲灭时，若有信心善男子、善女人，具舍种种所须施彼行法比丘，若有非法恶人侵夺欺陵，若复有人方便教化不令侵夺，语言：‘汝等今者，若不随教，当治汝罪！’如彼恶人随其教诲止彼欺心，不复侵夺持法比丘所受信施，是刹利乃至聚落主等，所得福德甚多！甚多！”

王复白佛言：“世尊，若有乃至一比丘能如法住所有诸物，若有恶人欺陵侵夺者，我等刹利及婆罗门乃至聚落主等，不如法治当获大罪。是一比丘所有资生，彼非法恶人有侵夺者，我等刹利乃至聚落主等，如法拥护不令彼人侵夺欺陵，乃至如法治之获大功德。”

佛言：“大王，不如汝所说。所以者何？于我法中有诸比丘，假令如法始从一人乃至四人，我不听受彼田宅、园林、象马、车乘、奴婢等常住僧物，若满五人乃可得受。若在僧伽蓝中或阿兰若处，持法

比丘在中止住，鸣钟集僧和合布萨羯磨等事，房舍、床榻、卧具、汤药同共受用；乃至百千众僧在一伽蓝若阿兰若处，鸣钟集僧和合布萨，房舍、卧具、衣服、汤药同心受用。而不贪著，亦不系念，不如其驢陀鸟贪著诸肉，食尽乃止终不中舍。持法比丘则不如是，初中后夜减省睡眠，精进诵经，坐禅修道，背舍生死向涅槃路。如是比丘不称他短，不说己长，谦下卑逊不自憍高，衣食知足，头陀精进不放逸行，系念思惟心不驰散，于一切众生起慈悲心怜愍覆护。大王，如是僧中有劫夺者获大罪报，守护饶益得大功德。

“复次，大王，随其所在若僧伽蓝或阿兰若处，有五比丘止住其中，持戒不破清净具足，乃至小罪中生大怖畏，如佛修多罗中所说空行，若自读诵，教他读诵，不诽谤他，不说他过，不称己长谦下自卑，不生憍慢嫉妒之心，慈悲怜愍一切众生，求解脱道出生死海。如是众僧，若在伽蓝或阿兰若处，鸣钟集僧和合受用，常住僧物乃至汤药，若复有人如法供养获大功德，劫夺侵陵得大罪报。

“大王，是五比丘，精进持戒惭愧具足，于小罪中生大怖畏，行头陀法住四圣种，如是众僧所有福德犹若大海，即是世间天、人、阿修罗中最上福田，能令一切众生离诸苦恼而得涅槃，何况十人、二十、三十乃至百千！若有信心刹利、婆罗门、毗舍、首陀，为供养故鸣钟集僧，是僧集时其中或有非法比丘若多若少，共如法比丘同处集者，于是众中乃至有五比丘，持戒清净具足惭愧，于小罪中恒生怖畏终不毁犯；如是众僧大修精进，弃舍世间所有诸事，惟希出世涅槃之道，所有功德无量无边，是大福田，应受世间天人供养！是故，大王，汝等应好拥护如法安置，供给所需勿令乏少。若有非法之人欲相欺陵轻心毁辱者，汝好护持，勿令是等侵扰之也。”

频婆娑罗王白佛言：“世尊，我于今者欲有所问，惟愿听许。”

佛言：“大王，随汝意问。”

王白佛言：“世尊，若有破戒比丘，得与如法众僧和合共住，受彼上妙衣食、卧具、资生所需乃至汤药不？”

佛言：“大王，我今问汝，随汝意答。如王国中群臣百官乃至亲属，如是之人若一若二乃至众多，犯王国法合其重罪，王时瞋怒方欲刑戮。王于尔时设于大会，歌舞作乐欢乐集时，是犯罪人得在会次，同食歌舞欢娱乐不？”

王白佛言：“如是之人不得在会，乃至不令与我相见，何况共受集会欢乐？”

佛言：“大王，如是，如是，若有比丘破戒犯罪，实非沙门自言是沙门，实非梵行言我梵行，如是之人犹如盲人，于生死中流转退没。大王，如是之人于三世诸佛法中具犯禁戒，以是因缘诸佛如来之所弃舍，非佛弟子是魔眷属，常趣恶道不堕僧数，不得在如法僧中行住坐卧同受房舍、卧具、资生诸物，乃至糠[𦵏+孚]亦不得受，何况得受众僧上妙供具资生所需？如是之人，佛法之外，众所弃舍！”

频婆娑罗王白佛言：“世尊，是破戒比丘不得与如法众僧和合共住同受种种衣食、卧具、汤药等物。世尊，是破戒人有何等行类相貌而可得知？”

佛言：“大王，是破戒相初未现时难可了知。何者是破戒初相？所谓不乐供养三宝，和尚阿阇梨亦不信重，四圣种法而不修习，又不修行三十七助道法，是名破戒初相。心贪利养无有惭愧，与诸俗人以为亲友，称赞己德以自贡高，轻蔑诽谤毁谤他人，心不乐说正法之言，唯喜好谈无益之语，专行魔业恼乱众僧，他说一言十语加报，纵心荡逸终不相下。犹如恶狗，复似飞鸟众声乱鸣唯欲求胜，虽复出家处在众中，谄曲虚伪专行刺毒。又如商人持种种物在道而行逢彼恶贼，是破戒人为沙门中贼。又似猕猴粪涂身已搪突于人，在于众中犹如俱兰吒华无色无香，心不和合恒出诤讼之言，常贪利养名闻等事，乐恶比丘及诸俗人以为伴侣而共谈语。是诸比丘乃至未盗众僧田宅、园林、奴婢、象马驼骡牛驴如是等物难可了知，是名破戒初相。若盗如是等物，是名破戒等相。是相出已失比丘法，是波罗夷非沙门，不得与如法众僧同共止住，应当摒出。”

佛告大王：“是持戒比丘，宁与旃陀罗同共止住，不与破戒之人同住居止。如树枯朽火从内起，根本既烧枝叶亦尽；破戒比丘亦复如是，以破戒火烧诸功德，善根果报悉尽无余，于未来世堕三恶道，远舍慈悲而行魔业，譬如厕溷不可为净，谤诸贤圣断三宝种，法海干竭坏正法城，诳惑施主恼乱清众，如法比丘僧和合时违诤不随。彼破戒比丘盗僧物因缘故，国主刹利、婆罗门、毗舍、首陀乃至若男若女一切施主等，虽舍所须空无所得，失人天路堕恶道中。是故，大王，汝等当知，彼破戒人无有惭愧，以劫盗心取彼僧物以为己有。是如法比丘随其住处，若在林中或在伽蓝，不应共住应生慈愍，方便示教遣令出众，语言：‘长老，汝等不应住此。’如是三谏，是破戒人若去者善；若不出众，如法比丘不得瞋骂，应告国王刹利、婆罗门、毗舍、首陀及有势力者言：‘此有比丘不如法行，恒相扰乱，不令我等安心行道，惟愿检校勿令侵恼。’而彼国王刹利乃至聚落主等，应当治之驱逐令出。若彼刹利王等取彼破戒比丘饮食财物而不驱遣者，如法比丘亦不应瞋，莫贪住处及资生等，默然舍去，更求余处无难之所，若在山林窟中，或阿兰若地，随其静处就彼而住。”

频婆娑罗王闻此语已，悲啼号泣而白佛言：“世尊，刹利、婆罗门、毗舍、首陀乃至聚落主，为衣食资财故护彼破戒比丘与其势力，令此如法比丘舍其住处，以是因缘于当来世堕大地狱受无量苦，于三恶道轮回往返难得免出。于未来世，有无量无边恒河沙等诸佛出现于世，具大慈悲入生死中度苦众生，而不能令彼等国王刹利、婆罗门及聚落主舍恶趣报得人天身。何以故？不受如法比丘语故，又不供给供养故，受如是等大罪果报。”

佛言：“大王，于当来世诸国土中有信心刹利、婆罗门、毗舍、

首陀，为供给供养如法比丘因缘故，若造伽蓝静处、或阿兰若处起立房堂，施与如法比丘，或舍田宅、园林、奴婢种种所须资生杂物乃至汤药。以如是供养因缘故，彼诸施主于当来世，或生刹利、婆罗门大姓等家，六欲诸天乃至有顶，或生他方净佛世界值佛闻法，不久当得阿耨多罗三藐三菩提。若复有人于我法中，为求福德涅槃道故，应当供养供给如法比丘。”

尔时，频婆娑罗王白佛言：“世尊，是诸比丘虽犯破戒初相，然未盗僧物。如是之人，云何不得与如法比丘同共住止、同饮食衣服等和合受用？”

佛言：“大王，我今问汝，随汝意答。若王眷属、大臣宰相，犯王国法造种种罪，唯不合死有刑流者；如是之人，王若设会歌舞作乐大集之时，得在会次同受饮食共欢乐不？”

王白佛言：“世尊，如是之人尚不欲见，何况得在会所同受欢乐？”

尔时，佛告王言：“大王，若有富伽罗具造诸恶，于三恶趣不能勉离；如是之人受他田宅、园林、象马、车牛资生之具，如此之人非佛弟子，非沙门，非释子，于三世佛法中是大罪人，不得与行法比丘乃至和合少时共住同受衣服、卧具、饮食、汤药。若有刹利、婆罗门、毗舍、首陀及聚落主等，见破戒人与持法比丘同住共受衣服等物而不驱遣，彼刹利等，是三世诸佛正法之中为大罪人。如是刹利、婆罗门等，若不驱遣彼恶比丘，虽复更修功德种种布施，欲免此罪终不能灭，要必当堕阿鼻地狱。是故，大王，若有欲得自利利他者，于彼破戒人所不应拥护。何以故？若有供养彼恶比丘，失人天善根，断三宝种，堕诸恶趣。若刹利、婆罗门等，拥护行法比丘，不令彼恶比丘与共同住和合受用衣服饮食，是刹利等虽不布施修余功德，即是三世诸佛之大檀越，能持三世诸佛正法。是人命终生于他方净佛国土，不久当得阿耨多罗三藐三菩提。是故，大王，汝等刹利、婆罗门等，应当拥护供养供给行法比丘，乃至法欲灭时所有如法比丘，应当拥护供养供给，以是因缘能令三宝久住不灭。若不拥护如法比丘，我法即灭；若法在世，能令人天充满，恶道减少。”

王言：“世尊，有何等人堪为知事守护僧物，供养供给如法比丘？”

佛言：“大王，有二种人堪持僧事守护僧物。何者为二？一者、具八解脱阿罗汉人，二者、须陀洹等三果学人。此二种人堪知僧事，供养众僧；诸余比丘，或戒不具足，心不平等，不令是人为知僧事。”

大乘大方等日藏经卷第二

陀罗尼品第二之一

尔时，世尊共频婆娑罗王说是法时，东方过无量无边恒河沙等诸佛国土，有佛世界名无尽德，佛号瞻波迦华色如来、应供、正遍知、明行足、善逝、世间解、无上士、调御丈夫、天人师、佛世尊，于今现在常说妙法教化众生。彼有菩萨名日行藏，仰观虚空，见有无量无边阿僧祇菩萨摩訶萨众从东方来往趣西方，复见西方有大光明，是等菩萨寻光而去。尔时，日行藏菩萨见此已，即从座起顶礼佛足，恭敬合掌白佛言：“世尊，我见空中无量无边恒河沙等诸菩萨众，从东方来往向西方，复见西方有大光明。以何因缘有此大光，诸菩萨等寻光而去？”

尔时，瞻波迦华色佛告日行藏菩萨言：“善男子，西方过无量无边恒河沙等诸佛世界，彼有世界名娑婆，具足五浊。其国有佛，名释迦牟尼如来、应供、正遍知、明行足、善逝、世间解、无上士、调御丈夫、天人师、佛世尊，于彼世界召集大众，以方便力广说三乘，论议法门教化众生。为令法母久住故，为令三宝不断绝故，为令法行常住故，为令魔王失势力故，为建立法幢故，为令正法久住故，以是因缘诸菩萨等集彼世界。十方诸佛，已于彼处说宝幢陀罗尼竟，各还本土。今释迦牟尼佛，复于彼界为诸菩萨摩訶萨、大阿罗汉一切大众，演说三乘、四无碍智、四梵天行及四摄法，娑婆世界地及虚空大众充满，咸皆渴仰乐闻佛说。何以故？彼佛如来所说妙法犹如甘露，一切听者心无厌足。又以彼佛本愿因缘，十方佛刹诸菩萨众皆集其土。彼诸菩萨或有百劫修行者，乃至一生补处者，有于十八不共法中自能修习不由他悟者，有得自在无碍智慧方便具足者。是诸菩萨既集彼已，一切皆坐，以自善根方便力故入于三昧，入三昧已身放光明。有菩萨光如一灯者，有如山上烽火者，有如一、十日、百日、千日光者，有如无量千万日光明者。以彼菩萨力故，于大集所遍覆三千大千世界，为欲令彼娑婆世界福德庄严，四大滋味地转增胜，众生受用增益身力，得四念处，得大精进，远离慳贪能行布施，如净佛刹诸众生等，以是因缘诸菩萨众各各端坐，以自善根力入诸三昧放大光明。复有十方诸佛刹中菩萨摩訶萨未来集者，从禅定起见大光明，亦欲往诣娑婆世界，见释迦牟尼佛及大集众，恭敬礼拜听受妙法，欲闻日藏法行坏龙境界焰品一切众生恶业尽陀罗尼故。诸菩萨等欲集彼处，以自善根力入种种三昧，汝今亦可从禅定起诣彼世界。

“善男子，彼佛世界诸众生等，有种种恶多诸渴爱，为诸烦恼之所系缚，犹如厕猪乐处不净，诸女人等身体丑陋自谓端正，犹如醉人不自觉知，种种臭秽自言清静，两舌恶口远离实语，常乐淫欲行非梵行，实大愚痴现智慧相，心大慳贪现能施相，心怀谄曲虚幻不实现质直相，于他善事心生妒忌，口言赞美心怀瞋嫉现慈忍相，常乐破坏现和合相，邪见偏多现正见相。彼土众生有得禅定获身通者，或有具足得五通者，或有久修四禅定者，如是智慧丈夫为诸女人之所惑乱，心随染著为欲所使犹如僮仆，于一念顷退失是等诸妙功德，当堕恶道，

三) 伽罗娜揭逻醯伽罗娜揭诃波履婆[(匕/矢)+余)](二十四) 什婆揭逻醯什婆揭诃波履婆[(匕/矢)+余)](二十五) 迦(居佉切)耶揭诃醯迦耶揭诃波履婆[(匕/矢)+余)](二十六) 么娜揭罗么那揭诃波履婆[(匕/矢)+余)](二十七) 馱跋曷利捨揭诃醯馱跋曷利捨揭诃波履婆[(匕/矢)+余)](二十八) 鞞[多+頁]娜揭诃醯鞞[多+頁]娜揭诃波履婆[(匕/矢)+余)](二十九) 怛履瑟那揭诃醯怛履瑟那揭诃波履婆[(匕/矢)+余)](三十) 优波陀那揭诃醯优波陀那揭诃波履婆[(匕/矢)+余)](三十一) 婆嚧揭诃醯婆嚧揭诃波履婆[(匕/矢)+余)](三十二) 阇帝揭诃醯阇帝揭诃波履婆[(匕/矢)+余)](三十三) 社啰摩啰娜揭诃醯社啰摩啰娜揭诃波履婆[(匕/矢)+余)](三十四) 独佉珊多跋揭诃醯独佉珊多跋揭诃波履婆[(匕/矢)+余)](三十五) 阿啰波啰[跑-包+翕]陞社揭诃醯阿啰波啰[跑-包+翕]陞社揭诃波履婆[(匕/矢)+余)](三十六) 阿跋[多+頁]鞞婆[多+頁]写(三十七) 阿跋啰摸么娑卸(思夜切)鞞也(三十八) 毗尼跋[多+頁](三十九) 阿利也曷啰舍弥(四十) 萨鞞伽羶帝莎波诃(四十一)。

“善男子，此日藏法行坏龙境界焰品尽一切众生恶业陀罗尼欲四谛顺忍，汝可持往娑婆世界，问讯释迦牟尼佛作如是言：‘东方过无量恒河沙佛刹，彼有世界名无尽德，佛号瞻波迦华色多陀阿伽度阿罗诃三藐三佛陀，今现在说法。彼佛如来令我送欲，并问讯释迦牟尼佛：少病少恼，气力安乐，及诸弟子悉安隐不？闻佛说法如教行不？’彼释迦牟尼佛已能破坏一切魔王境界、一切龙王境界，独超众圣转妙法轮。但彼五浊诸恶众生障碍未尽，为是等故，我今说此日藏法行坏龙境界焰品一切众生恶业尽陀罗尼欲。此四谛顺忍陀罗尼有大威德，若有人能受持读诵得大势力。”

尔时，日行藏菩萨摩訶萨作如是言：“我已受持此陀罗尼得大势力，能向彼国具足宣说，但彼世界有诸恶事我甚怖畏。何以故？我向亲闻佛口所说，彼土众生多诸贪欲如生盲人，诸女人等多诸奸谄诳惑于人，实不端正自言端正，实大愚痴现智慧相，能令众生迷没贪著，乃至久修禅定得五神通诸智慧人，于一念顷为诸女人之所惑乱，退失是等神通智慧一切善根，堕大地狱。彼诸众生有如是事故我怖畏。”

时，瞻波迦华色佛闻此语已，告日行藏菩萨言：“善男子，汝今不为自身得力、自身安乐，当为利益一切众生故往彼宣说。”

尔时，瞻波迦华色佛告日行藏菩萨言：“善男子，彼娑婆世界释迦牟尼佛大集众中，有一优婆塞名毗摩罗诃，是汝身不？”

时，日行藏菩萨默然不答。

尔时，世尊复更问言：“善男子，何故默然？”

如是三问然后乃答，作如是言：“如是，如是，我于彼刹为欲教化诸众生，故名毗摩罗诃，彼诸众生皆谓我是优婆塞毗摩罗诃。世尊，我于无量阿僧祇诸佛刹中，为化众生作种种身，或于余刹作梵王

身，或作帝释，或作炎摩、兜率、化乐、他化自在天王等身，复于余刹或作龙王、阿修罗王、迦楼罗王、紧那罗王、摩睺罗王如是等身，复于余刹或作声闻、辟支佛身，或作人王刹利等身、婆罗门身、长者身、女人身、童男身、童女身，复于余刹或作畜生身、饿鬼身、地狱身。世尊，于此刹中有八十百千诸菩萨等，同众禅定行住坐卧未曾舍离。是等菩萨见我欲往娑婆世界皆乐随从，欲见释迦牟尼佛及大集众，礼拜供养并欲听法；而诸菩萨有初行者其心未定，而彼世界多诸恶事，是等菩萨或生贪染，恐于彼处近恶知识心生颠倒，我甚怖畏。”

尔时，瞻波迦华色佛告日行藏菩萨言：“善男子，勿怖勿畏！今为汝等一切菩萨说离受不共行、法无相处行、调伏地行、解脱之行、到有海岸行、三宝性久住不尽行、大慈大悲行、一切智解脱行、坏四种魔降外道行、尽智无生智行、尽一切作业一切寿命阴行。善男子，今为汝说日眼莲华陀罗尼。此陀罗尼能令众生厌离生死三有牢狱，得无相三昧解脱门苏息处，得无相三摩跋提，舍最后一念身智而入涅槃。

“善男子，若有人能一心听受此日眼莲华陀罗尼，是人所有一切贪欲及诸烦恼皆悉微薄，舍身之后七返生天得宿命智，不为欲染而得圣道，一切诸天皆乐供养；天上寿尽复得七返生于人中，虽处欲界不为欲染，即于人中得成圣果，常为一切礼拜供养。

“善男子，若有得闻此陀罗尼，乃至七遍一心善听者，此人命终七返生天，获得五通为诸天师，一切诸天皆悉礼拜恭敬供养；天上寿尽七返生人，得五神通为人中圣师，一切天、龙、夜叉、乾闥婆、阿修罗等皆悉供养。

“善男子，若有人能于天众中，七遍宣说此莲华陀罗尼，一切诸天及天女等能一心听，皆离五欲乐修禅定。若有人能于国王所或刹利、婆罗门、毗舍、首陀等众中，七遍宣说此陀罗尼，如是等众能善听者即得出家。若有女人得闻此咒一心善听，七日七夜不念余事专心诵持，舍此身已得转女身，随所生处能薄贪等一切烦恼，于阿耨多罗三藐三菩提无有退转，乃至得证大般涅槃，终不更受女人之身，除化众生自愿受身。

“善男子，若有诵此莲华陀罗尼七遍，咒诸药草用涂鼓贝，若打若吹随其音声所至之处，一切咒诅、一切厌蛊、一切毒药、一切符书、一切谄缚淫欲烦恼不能为害。善男子，我今说此大力日眼莲华陀罗尼。”即说咒曰：

“哆经他(一) 徒陀摩帝(二) 毗卢迦(基我切)么帝(三) [口+璽] [(匕/矢)+余](四) 羈(居离切)[多+頁](丁可切)矣利师(五) 泓制(六) 苏楼泓制(七) 佛地(徒纸切)毗佛地(八) 摩诃佛地(九) 郁奴摩提(十) 郁奴摩爹(徒娜切十一) 钵[朗-月+斤]底筛(踈皆切十

二) 达膩阿罗伽度芦婆(十三) 阿啰伽度芦婆(十四) 钵[朗-月+斤]底筛达膩(十五) 频豆频豆么底(十六) 质吒质吒钵[朗-月+斤]底筛达膩(十七) 頔勒羈(十八) 旃陀罗提(十九) 呵呵(虎我切)质[木+郅](竹几切二十) 诃[多+頁]膩弭(二十一) 诃[多+頁]迦(其我切)么鞞祇(二十二) 诃[多+頁]富娜曷啰婆嚩(二十三) 曷啰移(社奚切二十四) 诃[多+頁]斫郛三摩帝(二十五) 诃[多+頁]毗么[多+頁]佛地(二十六) 诃[多+頁]夜奇离(二十七) 诃[多+頁]毗三么揭离(二十八) 诃[多+頁]三姥爹啰社裨(二十九) 诃[多+頁]鞞么[多+頁]曷啰誓(三十) 诃[多+頁]唎(呼旨切)[口+戒](呼计切三十一) 诃[多+頁]者者帝(竹帝切三十二) 诃[多+頁]达么曷啰誓(三十三) 诃[多+頁]蒲呼曷啰誓(三十四) 诃[多+頁]跋社么帝(三十五) 诃[多+頁]嚧伽曷啰舍弥(三十六) 诃[多+頁]达么徒蜜帝(三十七) 诃[多+頁]萨婆优波陀娜(三十八) 若(如者切)茹若(三十九) 毗社树竖(四十) 毗者社若(四十一) 若婆罗末伽(其我切)若若(四十二) [口+璽]沙案[多+頁](四十三) 娑啰伽(四十四) 独鼓莎波诃(四十五)。

“善男子，此日眼莲华陀罗尼，能干一切欲河，能出一切苦海到于彼岸。汝当至心持此陀罗尼往彼世界，如从我闻至彼说之。何以故？彼佛世界有百千万种种魔事、咒药、蛊道，能坏众生所有善法。汝等若诵此陀罗尼，一切魔王内外眷属所作种种无量恶事，及上妙五欲不能侵恼，何况余人鄙陋秽欲而能为害？”

尔时，日行藏菩萨，与无量千万亿那由他诸菩萨等，及无量百千那由他诸天及人，白佛言：“世尊，如来功德智慧辩才不可思议，大不可思议，最大不可思议！我等昔来未曾得闻如是坏欲大陀罗尼。”说此语时，众中八万四千天女至心听受，生大信心恭敬供养，即转女身得男子身，于阿耨多罗三藐三菩提得不退转。

尔时，瞻波迦华色佛，捉瞻波迦华鬘，告日行藏菩萨摩訶萨言：“善男子，持此华鬘并日眼陀罗尼、四谛顺忍陀罗尼，往彼世界供养释迦牟尼佛。此陀罗尼有大势力，犹如电光，速能破坏一切欲事，能大利益，能尽一切欲贪，乃至能除一切苦担。汝可持去问讯释迦牟尼佛。”

时，日行藏菩萨于彼佛所默然受之。尔时，众中八万菩萨俱白佛言：“世尊，我等皆往彼娑婆世界，见释迦牟尼佛及大集众，礼拜供养听受妙法。”

佛言：“善男子，随汝意去，咸可一心作梵天像形色长短、威仪服饰，往彼世界。”

尔时，日行藏菩萨及无量百千那由他诸菩萨等，皆作大梵天像，形色长短、威仪服饰等无有异。作此化已顶礼佛足，右绕三匝绕已复礼，礼已于彼界没，如一念顷即至娑婆世界。初入娑婆世界即以瞻波

迦华，散释迦牟尼佛积至于膝，如是渐行往诣佛所，到佛所已顶礼佛足却一面立。当尔之时，释迦如来犹为频婆娑罗王宣说法行。

尔时，南方去此娑婆世界，譬如有城方一由旬，沙满其中，复有一人具大神力担负而行，尽一世界乃下一沙，过是数已有佛世界名袈裟幢，具足五浊，佛号山帝释王如来、应供、正遍知、明行足、善逝、世间解、无上士、调御丈夫、天人师、佛世尊，今现在说法。于彼众中有菩萨摩訶萨名曰香象，仰观虚空，见无量无边阿僧祇菩萨摩訶萨众从南方来往诣北方，又见北方有大光明。见此事已，问山帝释王佛言：“以何因缘，诸菩萨等从南方来往诣北方？”

尔时，山帝释王佛告香象菩萨言：“善男子，北方过一由旬城沙满其中，从是北行，一沙为一世界，过是数已有佛刹土名曰娑婆，具足五浊，有佛号释迦牟尼，于今现在为无量大众，以方便力广说三乘论议法门。为教化众生故，为令法母常住故，三宝性不断绝故，增长法行故，坏魔境界故，建立法幢故，十方诸佛已于彼刹说宝幢陀罗尼竟各还本土。今释迦牟尼佛复为诸菩萨摩訶萨、大声闻众，宣说妙法。娑婆世界地及虚空，大众充满间无空处乐闻佛说。何以故？彼佛如来所说法要，言辞美妙犹如甘露，一切听者心无疲厌。善男子，汝能往彼娑婆世界听受法不？我今亦欲与彼佛欲，并说随顺空忍陀罗尼。此陀罗尼有大势力，能大利益，能尽一切欲贪、一切色贪、一切无色贪，能尽一切我慢、大慢、增上慢，能生尽智，能觉无生智，能裂一切无明闇障，能舍一切苦担。”

尔时，世尊而说咒曰：

“哆经他(一) 头摩帝头摩帝(二) 恶踰(軀宜切)头摩帝(三) 钵啰婆娑头摩帝(四) 萨婆迦捨头摩帝(五) 阿鞞却伽(其我切六) 培鞞娜却伽(七) 碎(苏骨切)朱叉却伽(八) 阿嚧摸诃却伽(九) 阿娜涅也却伽(十) 毗耶佛履帝却伽(十一) 僧迂嚧者却伽(十二) 阿泥么却伽(十三) 卢者那却伽(十四) 尸弃却伽(十五) 毗底(都履切)[穴/(怡-台+未)]啰却伽(十六) 郁芻么却伽(十七) 坞啰却伽(十八) 恶鼓却伽(十九) 耶婆么娜却伽(二十) 尤嚧跛却伽(二十一) 耶婆毗娘那却伽(二十二) 斫芻陀妬却伽(二十三) 耶婆么娜毗娘那陀妬却伽(二十四) 必利洩陞(蒲比切)陀妬却伽(二十五) 耶婆毗娘那陀妬却伽(二十六) 𧰨捶(都和切)履悉蜜驻跛萨他娜却伽(二十七) 耶婆阿虱吒达奢阿鞞尼迦佛陀达摩却伽(二十八) 独佉却伽(二十九) 耶婆磨勒伽却伽(三十) 毗婆嚧哪毗鼓嚧(三十一) 阿那娜娜(三十二) 阿陞 娜娜(三十三) 三姥陀[朗-月+斤]娜娜(三十四) 萨婆迦嚧娜娜嚧(三十五) 萨婆僧萨他娜毗瞿跛娜娜(三十六) 阿紧(吉因切)柘若(女我切)娜娜(三十七) 叉 婆叉 嚧(三十八) 婆叉嚧(三十九) 伊犁伊囉(四十) 伊犁伊伊罗(四十一) [穴/(怡-台+未)]利莎波诃(四十二)。

“善男子，是名顺空陀罗尼。汝可持往娑婆世界教化众生，问讯释迦牟尼佛。”

尔时，香象菩萨作如是言：“我已受持此陀罗尼，得大势力，得大利益，今欲往彼唯有一事心生怖畏。何以故？我亲从佛闻彼土众生多诸恶贪，乃至女人谄诈弊恶，令久修禅得五神通智慧之人，于一念顷退失神通及诸功德，堕大地狱故我今生怖。”

尔时，山帝释王佛告香象菩萨言：“善男子，譬如雪山以十三因缘，令虚空中有清凉风，以冷风故热恼皆除，一切河水悉皆清凉。善男子，如是久学无生忍智慧菩萨，以十三因缘防护身心，不生烦恼六根无热，不为无明河之所漂流，智慧之人能为愚人说无众生等法，令离痴缚除五阴重担。善男子，汝以十三种因缘，久学无生忍，何故而言我今怖畏？汝于余刹或作梵天身教化众生，复于余刹或作摩醯首罗身教化众生，复于余刹或作帝释身教化众生，复于余刹或作那罗延身教化众生，复于余刹或作天身教化众生，复于余刹作夜叉身教化众生，复于余刹或作龙王身教化众生，复于余刹或作阿修罗王身教化众生，复于余刹或作转轮圣王身教化众生，复于余刹或作大医王身教化众生，复于余刹或作刹利身教化众生，复于余刹或作婆罗门身教化众生，复于余刹或现声闻身教化众生，复于余刹作大臣身教化众生，复于余刹作辟支佛身教化众生。如是无量刹中以种种色身，现化众生而作佛事，云何方言我今怖畏？

“善男子，勿生怖畏！今为汝说无尽根大受记持心法行，一切智智坏四魔行，三宝久住行，坏一切毒龙境界行，尽一切众生恶业行，大慈教化众生行，大悲淳至入三恶道救拔众生行，于一切众生作欢喜心行，断一切众生恶见、恶爱、恶愿、恶乘行，解脱一切众生地狱行，断一切女身得丈夫身行，说一切法阴无有尽行，断一切众生慳嫉行，得一切三昧神通无尽行，摄一切众生安置菩提道行，舍声闻、辟支佛乘行，乃至说得无上最胜涅槃行。善男子，若有众生闻此无尽根授记法行生信乐者，彼人所有无量生死，恒沙业障、众生障、法障、烦恼障，能障一切善根，未受、未尽、未吐者，如是等业皆悉灭尽，不受罪报，不生恶处，唯除三事。何者为三？一五无间，二谤正法，三谤圣人，此三种罪必定受报。

“善男子，若有众生乃至一念，闻此无尽根受记陀罗尼，能至心听信受忆念生尊重者，彼人所有恒沙罪业不受果报，常乐修行一切善根。若行檀波罗蜜时，十方诸佛，一切菩萨、辟支佛、大阿罗汉，皆以神力加护。是人得圣加故多饶财宝，以用布施不可穷尽，乃至能舍头目髓脑，远离嫉妒得平等心，于一切田心无优劣，亦复不见我能行施、彼为受者。作是施时，一切天、龙、鬼、神、阿修罗、夜叉、乾闥婆等不能为障，唯除三种，所谓五逆、诽谤正法、毁谤圣人。此三种罪，一切圣人神力不加故有障碍。若行尸波罗蜜时，常勤精进住忍辱中，得欢喜心，得随顺心，怜愍众生犹如一子亦如己身，常为一切

圣人之所赞叹，常为诸天、释、梵、四王、龙、神、夜叉、人非人等，刹利、婆罗门、毗舍、首陀，礼拜供养得圣力加，心不自高亦不毁他，亦复不乐多积衣食，趣得支身心无忧恼，于一日夜六时自省，卧觉安隐，无多恼患衣食丰饶，于一切众生慈悲不舍，随心所念皆悉不空。临命终时得见诸佛，一切诸佛皆赞叹言：‘善哉！善哉！大丈夫，善能持戒清净不破！善来！将汝往诣清净佛刹，令汝得住十地位中。’彼人见佛得清净心，得欢喜心，心欢喜故，舍身则得往生净国速得十地，不久即得阿耨多罗三藐三菩提，乃至一念闻此无尽根受记陀罗尼得如是利。是菩萨若学行羼提波罗蜜时，一切圣人神通力加令得法忍，不见众生、不见彼、不见此。若有人来截其手足，割其耳鼻，乃至不起一念瞋心；离瞋心已，一切天王、一切人王，礼拜供养，乃至速得阿耨多罗三藐三菩提。是菩萨若学行毗梨耶波罗蜜时，得无患身成就大力，壮健智慧精进勇猛，能行四摄布施、爱语、利益、同事教化众生；具四摄已，一切天王、龙王、夜叉王、阿修罗王、迦楼罗王、紧那罗王、摩睺罗伽王、人王，合掌烧香恭敬礼拜。是人名闻流布，常为一切人天之所爱念，乐欲见之常欲拥护，乃至速得阿耨多罗三藐三菩提。是菩萨若学禅波罗蜜时，圣人加故，得四禅、四空、三摩跋提，乃至千万三摩提门、陀罗尼门、忍门，常为一切诸佛所念，常为一切天王、人王拥护爱念，恭敬拜礼，乃至速得阿耨多罗三藐三菩提。彼菩萨若学般若波罗蜜时，常为诸佛、菩萨、阿罗汉、辟支佛之所拥护，心得安隐远离愤闹得胜法念，心心数成就得圣人智慧，根具足入一切法中，所作已办度疑网河，于一切法不生疑碍，一切天、人、阿修罗所不能坏，常为天人八部供养恭敬，爱念守护，闻名见形皆生欢喜乐欲亲近，若自供养，若教人供养。此人临终见十方佛，一切诸佛皆悉授手，赞言：‘善哉！善哉！大丈夫！善来！将汝往向我清净佛刹，令汝得住十地位中。’是人闻已得欢喜心，心欢喜故命终即得生佛净土，生已速得住于十地，不久即证阿耨多罗三藐三菩提。

“善男子，此无尽根大授记陀罗尼，有如是大力、如是大利益，汝当受行，往彼世界不应怖畏。善男子，释迦牟尼佛本所誓愿：‘若有众生造作五逆、谤方等经、毁谤圣人犯波罗夷，如是之人清净佛刹所不容者，皆生我国我当教化。’以是因缘诸恶众生悉集其国。善男子，若彼世界诸恶众生，闻此无尽根大授记陀罗尼，能于七年常行慈心、不动心、怜愍心、平等心，远离两舌、不恶口、不妄语、不绮语，如是昼夜常念诸佛，当净洗浴昼三夜三，整衣服右膝著地，合十指掌对十方佛前，念无尽根大授记陀罗尼一心诵者，彼人经七年已，所有诸难极重罪业皆灭无余。若有女人欲求自在，能于七月昼三夜三，如前念此无尽根大授记陀罗尼一心诵者，如是女人随所生处得大自在，于流转中更不复受女人之身，乃至得阿耨多罗三藐三菩提，唯除自愿。若有女人求好夫主，求好种姓，求大自在，求不用男女或愿多有男女者，应当澡浴清净著净洁衣，独处闲静昼三夜三，右膝著地，合掌向

佛，一心诵念此无尽根大授记陀罗尼者，随心愿乐皆得称意，所求男女多少皆得，端正聪明无有疑难。善男子，此无尽根大授记陀罗尼，如是大力，如是大利益，汝从生死以来未曾得闻。”

尔时，世尊即说咒曰：

“哆侄他(一) 捨囉娜毗夜也(二) 式叉毗夜也(三) 徒寐履帝毗夜也(四) 鉢囉河娜(奴下切)毗夜也(五) 矣履地毗夜也(六) 因地利夜毗夜也(七) 嚩[朗-月+斤]毗夜也(八) 蒲騰伽毗夜也(九) 三摩地毗夜也(十) 陀罗尼毗夜也(十一) 羴(查盍切)帝毗夜也(十二) 毗梨耶毗夜也(十三) 闍娜毗夜也(十四) 鉢邏若(女我切)阿嚩(力口切)必也毗夜也(十五) 阿纫(奴邻切)社毗夜也(十六) 摩伽毗夜也(十七) 遏鼻娘毗夜也(十八) 鉢囉帝 三陞(蒲履切)爹毗夜也(十九) 步寐(莫履切)毗夜也(二十) 娑(毗必切)经[口+耶](余歌切)毗夜也(二十一) 摩诃梅怛梨毗夜也(二十二) 摩诃迦嚩(力口切)那毗夜也(二十三) 摩诃牟帝多毗夜也(二十四) 摩呼畢叉毗夜也(二十五) 必利洩鼻毗夜也(二十六) 萨埵毗夜也(二十七) 达摩毗夜也(二十八) 答摸毗夜也(二十九) 阿卢迦毗夜也(三十) 鉢囉帝 婆娜毗夜也(三十一) 鉢囉帝 输卢得迦毗夜也(三十二) 伽伽那毗夜也(三十三) 摩嚩[多+頁]毗夜也(三十四) 鉢囉帝 多三姥波爹毗夜也(三十五) 输娜 多毗夜也(三十六) 阿尼蜜多毗夜也(三十七) 揅(乌合切)鉢囉尼系毗夜也(三十八) 侯嚩[多+頁]毗夜也(三十九) 瞿沙毗夜也(四十) 紧(吉因切)柘那毗夜也(四十一) 阿鼻三摩夜毗夜也(四十二) 阿怒娜(四十三) 阿怒娜(四十四) 揅嚩呵者者(四十五) 者遮嚩(四十六) 者遮嚩毗姥(四十七) 柘陞(蒲履切)斫羯者遮嚩毗姥(四十八) 毗夜也毗姥(四十九) 察夜毗姥(五十) 阿么毗夜也毗姥(五十一) 阿三姥陀遮嚩毗姥(五十二) 坞眇陀毗姥(五十三) 阿迦舍毗姥(五十四) 骠鉢舍么毗姥(五十五) 阿那婆娑毗姥(五十六) 阿呵呵毗姥(五十七) 阿嚩波嚩毗姥(五十八) 优波舍么毗姥(五十九) 萨利罗毗姥(六十) 莎波呵(六十一)。

“善男子，此无尽根大授记陀罗尼，有大威德，有大势力，能大利益一切众生，摄护众生，怜愍众生，洗除众生，令得寂灭。善男子，持此陀罗尼往诣娑婆世界，如我所言问讯释迦牟尼佛。”

尔时，山帝释王佛说此陀罗尼已，一切大众皆大欢喜，赞言：“不可思议！大不可思议！得见离障第一智慧，说此大授记陀罗尼，一切众生所有小罪、中罪、大罪、最大罪，轻重业障牢固难舍，能与善根作障碍者，此陀罗尼速能除尽得无漏道。”

尔时，香象菩萨生大欢喜，而说偈言：

“此无尽根陀罗尼， 最胜第一无过者，

能尽众生诸恶业，亦断一切罪馱河。
生死流转自所作，悉能远离无有余，
以福德力因缘故，于一切苦得解脱。
能竭生死三有海，速生清净有佛国，
于流转中大怖畏，现见无量障碍，
悉能倾动诸烦恼，疾证无上胜菩提。
一切众生不能坏，若有闻此陀罗尼，
速能受持常忆念，具足如是诸功德。”

尔时，香象菩萨白山帝释王佛言：“我已持此无尽根授记陀罗尼竟，今欲往彼娑婆世界。”

是时，众中有无量阿僧祇菩萨摩訶萨，从无垢三昧起，异口同音白佛言：“世尊，我等今者渴仰欲见释迦牟尼佛及大集众礼拜供养。我从昔来未曾得闻日藏法门，惟愿听我往彼世界。”

尔时，世尊告诸菩萨言：“善男子，随汝意去，咸可一心作帝释像身形色貌、长短威仪、势力自在，往彼世界。”

尔时，香象菩萨及无量阿僧祇菩萨，咸共一心悉皆化作帝释王身，形貌色像、长短威仪、势力自在皆无有异。作此化已，三礼山帝释王佛，右绕三匝绕已从彼界没，如一念顷即到娑婆世界。入此刹已，放诸香云雨种种末香，所谓牛头栴檀香、龙身牢固香、多摩罗叶香、沉水香、多伽罗香，随六时变异香。为供养释迦牟尼佛故放香云已，次第渐向释迦牟尼佛所，到佛所已，以帝释身顶礼佛足，右绕三匝却一面立。当尔之时，释迦如来犹共频婆娑罗王宣说法行。

大乘大方等日藏经卷第三

陀罗尼品第二之二

尔时，西方去此佛刹，四十二恒河沙等诸佛国土，过是数已，有佛世界名坚固幢，其国有佛，号智德峰王如来应供正遍知，于五浊世与诸四众眷属围绕而为说法。时彼众中，有菩萨摩訶萨名炎德藏，在大众中听佛说法，仰观虚空，见无量无数阿僧祇菩萨摩訶萨众从西方来而往东方，复见东方有大光明。睹是事已，即白智德峰王佛言：“世尊，以何因缘有如是事？”

尔时，智德峰王佛告炎德藏菩萨摩訶萨言：“善男子，东方去此四十二恒河沙等诸佛世界，有世界名曰娑婆，佛号释迦牟尼如来应供正遍知，现处五浊，为无量无边众生说三乘法。欲令法母三宝种久住故，法行不断故，破魔界故，为欲建立佛法幢故，十方一切诸如来等，皆悉至彼娑婆世界，共说宝幢陀罗尼，说已各还本刹。今释迦牟尼佛复为菩萨摩訶萨及声闻众，更大集会，以四无碍智说三解脱门清

净梵行，娑婆世界地及虚空皆悉充满。是诸大众皆悉乐闻释迦如来所说法门，心无厌足。”

尔时，智德峰王佛告炎德藏菩萨摩訶萨言：“善男子，汝可持我语，往娑婆世界问讯释迦牟尼佛。彼佛今说日藏法行坏龙境界名曰炎品，能尽一切众生恶业。善男子，我有陀罗尼欲名无愿顺，汝可送往。此陀罗尼有大势力，有大利益，能尽一切欲贪、色贪、无色贪，能尽一切我慢、慢慢、增上慢，能破一切无明闇聚，能舍一切诸苦重担，乃至能得尽智无生智，得阿耨多罗三藐三菩提。”

时，彼世尊而说咒曰：

“怛经他(一) 舍摩那舍婆(二) 奢摩那舍婆(三) 阿婆叉舍婆(四) 斫芻舍婆(五) 输嚧哆罗舍婆(六) 伽拏舍婆(七) 什婆舍婆(八) 迦耶舍婆(九) 摩那舍婆(十) 叉婆毗陀(十一) 斫芻毕利湊鼻叉婆(十二) 输嚧哆啰阿婆叉婆(十三) 伽啰拏帝闍叉婆(十四) 视婆婆喻叉婆(十五) 迦耶羯啰摩叉婆(十六) 摩那乌闍叉婆(十七) 阿卢迦若那叉婆(十八) 毗闍羯啰摩叉婆(十九) 唵句啰呌伽叉婆(二十) 婆摩喽毕也鼻耶叉婆(二十一) 舍摩迦闍叉婆(二十二) 叉耶啰婆叉婆(二十三) 羯哆鼻耶婆叉婆(二十四) 那都那(二十五) 泥那都那(二十六) 阿婆泥那都那(二十七) 那耶波那夷那都那(二十八) 伊沙伊婆都度呌[口*寫](二十九) 莎呵(三十)。

“善男子，汝可持此无愿顺陀罗尼，往彼娑婆世界，如我辞曰：‘智德峰王如来问讯释迦牟尼佛，起居轻利，气力安乐不？转正法轮无障碍不？彼恶众生乐听所说日藏法行坏龙境界炎品不？’”

尔时，炎德藏菩萨白智德峰王佛言：“世尊，我今已受持此陀罗尼，今虽欲往娑婆世界而怀怖畏。何以故？我亲从佛闻彼佛世界五浊炽盛，彼诸众生众苦逼迫，贪欲、瞋恚、愚痴、邪见、贪著女色，于须臾间能成阿鼻地狱恶业，以是义故我甚怖畏。”

尔时，智德峰王佛告炎德藏菩萨言：“善男子，汝飞于彼娑婆世界四天下中，二十一日化作金翅鸟王，令彼大海六十四万亿诸龙见汝形故皆生怖畏，以是因缘受三归依，乃至发阿耨多罗三藐三菩提心不？”

炎德藏菩萨言：“如是，世尊，实如圣说。”

尔时，智德峰王佛复告炎德藏菩萨言：“善男子，汝往于彼娑婆世界四天下中亢旱之处，于七日中化作象头马头大龙王身，令旧住龙心生怖畏，不安本处悉腾虚空，七日之中澍大甘雨耶？”

炎德藏菩萨言：“世尊，实如圣说。”

佛言：“善男子，汝于如是诸恶龙中尚不怖畏，又汝过去发弘誓愿，在在处处利益众生，何故今者忽生恐畏？汝受我使，莫生惊怖！”

尔时，智德峰王佛告炎德藏菩萨言：“善男子，我复教汝智慧依止大授记陀罗尼，汝持往彼得无怖畏。”

尔时，炎德藏菩萨白佛言：“世尊，譬如智人坐伏藏上，以手把土忽得一宝，得已欢喜复更重把，如是渐渐得宝转多。我亦如是重问如来，望得如来无价法宝，得是宝已，为欲教化诸众生故。若蒙如来开大法印，以法印力、如来力故，则能教化一切众生。”

尔时，智德峰王佛即说咒曰：

“恒经他(一) 珊提 啰那奢摩(二) 三摸他那奢摩(三) 阿跋阇那奢摩(四) 莎凌楞伽奢摩(五) 僧逾伽奢摩(六) 拔[馬+犬]那奢摩(七) 三摩毗沙摩奢摩(八) 婆多那奢摩(九) 三摩羯岚摩奢摩(十) 遏毗[馬+犬]奢摩(十一) 耶婆闍罗摩逻拏奢摩(十二) 邪婆萨婆摩奴闍奢摩(十三) 耶婆萨婆恒利陀都(十四) 三斯羯利哆奢摩(十五) 阿逻波罗奢摩(十六)。”

佛言：“善男子，此智慧依止授记陀罗尼，彼土众生若有闻者，皆能轻薄下中上结，色、无色有亦复如是，恒河沙等劫生死过恶皆悉散灭；过去五有身口意业，生于有中受不爱果，所在生处障修善根四大衰恶，所爱之财求不能得，旧所亲爱悉皆离散，所不乐事而悉和合，身受诸苦心多浊乱，不乐修习一切善根，乐著一切诸不善法，如是等业悉灭无余。善男子，若有一闻此陀罗尼，一心听受七日七夜专精修习，如上所说诸恶罪业皆得消灭，除五无间、诽谤正法、毁谤圣人、犯四重禁，此四种人失陀罗尼力毕定受罪。若复有人无是四罪乐修善根，修行檀波罗蜜种种布施，是人则为一切诸佛、诸菩萨众、声闻、缘觉之所加护，以圣加故得无尽物。亦乐持戒、忍辱、精进、禅定、智慧，一切天、人、阿修罗等不能沮坏，常为一切天王、人王，见者恭敬供养礼拜，闻者欢喜心常忆念赞叹守护。临命终时，得见十方曾所念佛，皆来授手作如是言：‘善男子来！我今将汝向我世界，令汝安住十地位中。’彼人见佛心大欢喜，以欢喜故得生清净有佛国中，速住十地，是人不久当得阿耨多罗三藐三菩提。

“善男子，此智慧依止大授记陀罗尼，有如是大力，有大利益。善男子，彼娑婆世界，有诸众生不到涅槃道。何以故？造五无间、诽谤正法、毁谤圣人、犯四重禁。如是众生，十方净土所不容者皆生彼国。是诸众生于三恶道长夜受于种种诸苦。彼众生等虽出三塗，已无清净业因缘故，释迦如来本愿力故，还复生于彼娑婆界。若诸众生过去所有信根乃至慧根，曾修布施乃至智慧，曾修愿行不乐流转，学涅槃道净修梵行，如是人等生彼世界。恶业众生得丑陋身，诸根缺减，其心暗钝，衣服、饮食、卧具、汤药、资生乏少，寿命短促，痴无智慧，睡眠不安，薄善根，少福德，诸适意事而不从心；复无悲心，乐行恶行，乐著恶见，乐习恶论，乐起恶愿，乐受恶法不信正法，多诸

病苦，多散乱心，多乐恶事造三恶业，虚妄忆想非吉为吉，心不乐忍其心粗犷，常乐修习十不善业，诽谤三宝趣三恶道。

“善男子，彼佛刹中如是众生，闻此智慧依止授记陀罗尼，至心一听者，彼诸众生生厌离心度三恶道。复有众生曾修信根乃至慧根，亦曾修习六波罗蜜，不乐流转净修梵行，若得闻此陀罗尼已，增益寿命身少病苦，智慧增益，资财无损，长善根海，增善知识，乃至增益一切善业皆悉成就，成就正见，具足十善，种三善根，乐三自归，乐起诸愿，乐阿兰若光显三宝，复能于此智慧依止大授记陀罗尼，至心听受专精修习，读诵受持乃至七日七夜忆念不舍，成就如是无量功德。除五无间、诽谤正法、毁谤贤圣、犯四重禁，如是众生堕于恶趣，于彼命终而来生此娑婆世界，以彼业气习未尽故，于未来世应受恶报。由得闻此智慧依止大授记陀罗尼，于现在身虽不能得胜妙果报，以陀罗尼力故，于当来世无量恶报悉灭无余。彼诸众生为灭如是诸恶业故，应当书写此陀罗尼门，复应造作七佛形像，于释迦牟尼佛法之中，建立寺舍供养供给法行比丘，亦当数数受八戒斋，勤行精进，乐听正法，如说修行。此诸众生于三宝中得决定信，生欢喜心因缘故，能灭无量百千万亿那由他劫在在处处应受恶道种种诸苦。于现在世多诸病苦，受身形残，资生减失，眷属离散，为人奴仆，受诸殴打恶口粗犷，不得自在为人诽谤，已受如是种种苦故，过去恶业皆悉灭无。如是，善男子，此智慧依止授记大陀罗尼，于诸众生有大势力，我今更说。”

尔时，世尊即说咒曰：

“怛经他(一) 佉伽波利眇(妹兮切)提(二) 伽唎婆叉(三) 西伽跋黎(四) 鼻陀钵啰婆伽叉(侧檀反五) 叉婆踰岐(六) 钵底呵梨(七) 奢摩那四迦涕(八) 三摩迷伽阁筛(踈斋切九) 阿叉夜那低(十) 叉婆跋移(常兮切十一) 祢[馬+犬]那阁筛(十二) 娑摩娜阁筛(十三) 娑摩伽逻阁筛(十四) 阿地呵奢夜阁筛(十五) 鼻钵啰婆阁筛(十六) 西叉阁师(十七) 西祢夜阁婆阁筛(十八) 娑利罗瞿啞(瞿之切)夜阁筛(十九) 娑利罗瞿啞夜阿阿鞞婆那鳩世(二十) 萨檀拘帝(二十一) 私婆檀那梯(二十二) 毗哆钵啰鼻利低(二十三) 呕波羯啰磨娜梯(二十四) 阿那叱地夜跋罗企(丘兮切二十五) 钵罗帝羯迷那(二十六) 三迦太夜世(二十七) 萨卢遮那婆娑迷(二十八) 拘嚧太利(二十九) 迦摩萨世(三十) 阿世奢佉岐(三十一) 那夜军闍(三十二) 鼻地夜跋泥(三十三) 羯罗那跋泥(三十四) 郁遮跋泥(三十五) 三迷摩迦黎(三十六) 奢利夜跋泥(三十七) 模伽阁师(三十八) 呵利拘那婆(三十九) 那夜那目企(四十) 娑啰叉拘黎(四十一) 那逻延拏树黎(四十二) 因陀罗婆萨泥(四十三) 乌阿阿婆阿阿阿(乌可切)阿罗婆阿(四十四) 婆啰(四十五) 阿婆啰(四十六) 何罗萨弥伽(其我切四十七) 豆佉祢提 罗(四十八) 涅槃醯莎和呵(四十

九)。

“善男子，此大授记陀罗尼有大功德，有大势力，有大利益，能尽一切恶业，怜愍救护一切众生，悉能洗除诸罪垢秽，身心光洁，能与念力与寂灭力。若有众生一心听受，如说修行，一切如来、一切菩萨、一切辟支佛、一切阿罗汉悉皆加护，乃至天王、人王亦常护念，敬爱礼拜，供养供给。彼人临终，得见过去曾所诵念十方诸佛，皆悉授手作如是言：‘善男子来！我今将汝生净佛土，汝生我国速住十地。’彼人见佛得大欢喜，大欢喜故命终得生净佛国土，既生彼已得住十地，不久得成阿耨多罗三藐三菩提。善男子，此智慧依止大陀罗尼，有如是力，能净恶业，成就净心，证涅槃道。”

尔时，智德峰王佛告炎藏菩萨言：“善男子，持此陀罗尼，往诣娑婆世界至释迦牟尼佛所，如我辞曰：‘智德峰王佛问讯世尊。’”

炎藏菩萨摩诃萨言：“唯然受教。”

时，彼众中无量无边阿僧祇菩萨摩诃萨，异口同声作如是言：“我等今者乐欲见彼娑婆世界释迦牟尼佛，礼拜供养，及见大众，听受日藏坏龙境界能尽诸恶业陀罗尼门。我等昔来初未曾往彼娑婆界，今从定起欲往彼土，惟愿世尊听我等往。”

尔时，智德峰王如来告众菩萨摩诃萨言：“善男子，欲往随意，应当摄心以游彼国。汝等各自变身如那罗延具足庄严。”

时，炎藏菩萨与诸菩萨摩诃萨众，一切皆作那罗延身庄严示现，顶礼佛足，右绕三匝即从彼发，如一念顷至娑婆界四天下中摩伽陀国释迦牟尼佛所。到已，以阎浮金末而散佛上，既供养已顶礼白佛言：“世尊，智德峰王如来问讯世尊：‘少病少恼，起居轻利，气力安不？转正法轮无障碍不？’”作是语已，却住一面。

尔时，北方去此娑婆世界，八十恒河沙佛刹，过是数已有佛世界，名普上香，五浊充满。彼国有佛，号德华藏如来应供正遍知，现在说法。彼佛众中有菩萨摩诃萨，名虚空藏，在会听法。尔时，虚空藏菩萨摩诃萨仰观虚空，见虚空中无量无边阿僧祇菩萨摩诃萨，从北方来往诣南方，复见南方有大光明。见是事已，即白佛言：“世尊，我始从定起在会听法，见虚空中无量无边阿僧祇菩萨摩诃萨，从北方来往诣南方，复见南方有大光明，以何因缘有如是事？”

尔时，德华藏佛告虚空藏菩萨言：“善男子，于此南方过八十恒河沙佛刹，有佛世界名曰娑婆，亦如我刹五浊充满。彼中有佛，号释迦牟尼如来应供正遍知，今现在世，为诸众生说三乘法。欲令法母久住世故，令三宝种不断绝故，建大法幢坏魔网故，十方诸佛皆集彼国说宝幢陀罗尼，说已各还本土。释迦牟尼佛为诸菩萨摩诃萨、大声闻众作大集会，以四无碍智说三解脱门。彼佛土中地及虚空大众充满，如来处于师子之座，放大光明说深妙法，清净梵行及以四摄，日藏法

门坏龙境界炎品除诸众生不善恶业陀罗尼门，一切乐闻无有厌足常作是念。若有十方一切刹中菩萨摩訶萨，亿百千劫行菩萨行，欲得逮于一生补处，乃至十八不共之法，自具足得无障碍智不随他教者，彼诸菩萨悉应来集娑婆世界，以自善根入种种三昧，令此世界大地得大利益，令诸众生不失念力，布施、持戒、忍辱、精进、得大智慧，亦如他方清净佛土具诸功德。今此娑婆世界亦有十方诸大菩萨摩訶萨众悉来集会，彼菩萨众于娑婆世界，随自分力各入三昧，从于身边而放光明，或如大灯，或如百千万亿无量无边日月光明。彼诸菩萨摩訶萨皆大集会彼娑婆界，以是因缘有大光明。彼十方佛刹诸菩萨众未至彼者，从三昧起趣于南方，往娑婆世界欲见释迦牟尼佛及诸大众，欲闻破坏一切恶业陀罗尼门，结跏趺坐，各各入于奋迅游戏诸深禅定。

“善男子，汝今可往彼娑婆世界。善男子，彼中众生短命多病，少智慧、少善根、少福德，于三恶道心无怖畏，乏少资生多贪爱欲，行不净行，无惭无愧乐行十恶。如是众生舍此身已堕于恶道，复有生于恶夜叉中，迦吒富单那中，乃至阿迦富单那中；既生彼已，收地精气及种种谷、华果草木一切等味。其有食者身力减损，彼诸恶鬼增益势力，常伺人便住胎出胎，随其成长乃至夺命。是故彼诸众生多病短命，无念慧力，不畏未来三恶道苦，乃至乐行十不善业堕于恶道。善男子，我于过去行菩萨时作如是愿，牢固勇猛勤无休息，供养诸佛如说修行，咨问彼佛：‘何等陀罗尼咒，能护胎藏及以母身令得安隐，令诸恶龙、夜叉、罗刹、阿修罗、迦楼罗、紧陀罗、摩睺罗伽、鸠槃荼、裨黎多、毗舍闍、富单那、迦吒富单那、乌摩罗、阿跋思摩罗，或一日疔乃至四日，或毒药恶咒，或行恶药，能令身心逼迫苦者，令是诸恶悉不得便；或在母胎乃至出胎、乳哺长养种种饮食及其精气，身心浊乱悉不得便，令彼众生安隐住胎，乃至乳哺长养身心不浊，无病长命，增益智慧，乃至能行十善业道，乐行布施，乐持禁戒，怖畏未来三恶道苦？何等陀罗尼能得如是？唯愿大慈为我宣说，我得闻已于当来世教化众生。’尔时，彼佛即为我说奢摩裴多悉致蔓多罗大授记陀罗尼。我闻此咒受持流布无量亿劫，常以此咒化导众生，令得修行六波罗蜜牢固精进。复以此咒护诸母人及护胎藏，若天、若乌摩罗、阿跋娑摩罗、人非人等，于彼妇人及以胎藏，不能令彼四大不调身心浊乱，夺人精气恶咒恶药，乃至阿修罗，及余世间坏胎藏者亦不得便，胎藏安隐，产生无难，诸根满足，身体清净颜貌端正，具足智慧不失念力；大力诸天百千万亿，及诸眷属无量众数常随卫护，能令彼得宿命智慧，怖畏恶道生慈悲心，乐行布施、持戒、忍辱、精进、禅定，乐善知识易得圣智，能得尽苦具足智慧，乐空寂处灭诸烦恼，天、龙、夜叉诸鬼神等供养供给，厌恶生死志求涅槃，乃至能发阿耨多罗三藐三菩提心，在在生处终不忘失菩提之心，速得成就菩萨三昧。若生辟支佛心现得顺忍，于未来世成辟支佛。若发声闻心得四谛顺忍，不堕三恶生天人中。

“善男子，我于过去行菩萨行时，以无量方便教化众生，令住阿耨多罗三藐三菩提。善男子，此陀罗尼如是大力有大利益。善男子，若诸众生遇重癰病，应以此陀罗尼咒师子乳与病者服，一切诸病悉皆除愈。若不能得师子乳者，取祭死尸边食，以此陀罗尼咒之与病者服，一切诸病亦悉除愈。若无此食应取坐弃药，持此陀罗尼咒之与病者服，一切诸病亦得除愈。善男子，我于过去行菩萨行时，如是勤求方便教化众生，乃至令住阿耨多罗三藐三菩提。若见诸树无华果者，我时即以此咒用咒雨水浇灌树根，彼树华果即得滋茂，乃至蒲桃种谷草皆令茂盛。若天无雨，取沟渎中诸不净汁，安龟甲中以咒咒之，以瞻波迦树叶裹此龟甲，置龙池中即时大雨。若天多雨损败苗实，当取阿闍迦罗蛇头中珠以咒咒之，置龙泉中雨即便止。若非时黑风、大寒、大热，日月星宿失其常度，年节四时变异灾怪，应愍众生，七日七夜净修梵行澡浴身体，服食乳糜若但食菜，一心专念更无异想，七日七夜讽诵受持此陀罗尼。复以此陀罗尼咒，咒净葵菜，裹摩陀那果安天庙中，即除非时风雨寒热种种灾恶，日月星宿还依常度。善男子，我于过去修菩提时，欲令众生所在安隐，若见虚妄忆想倒见众生，我于尔时为彼说此陀罗尼咒；彼诸众生闻此咒已，虚妄颠倒皆悉舍离，修十善业起于善愿，淫欲薄少。善男子，我于过去以方便力教化众生令住六波罗蜜，亦自具行六波罗蜜，乃至得阿耨多罗三藐三菩提。

“善男子，此陀罗尼能与众生如是大力，与大利益，能除一切诸病苦恼，能护怀妊妇人及以胎藏，能坏一切烦恼诸结，能知四大、五阴、十二入、十八界示方便道，能觉安隐快乐涅槃，能令众生信心清净，能入诸法差别法门，摄诸外道坏魔境界。善男子，此陀罗尼力能令一切诸天欢喜，夜叉、恶鬼心生知足，诸阿修罗极大怖畏，迦楼罗、紧陀罗等亦皆欢喜，摩睺罗伽不能反顾，摧伏邪论，能令刹利、婆罗门、毗舍、首陀信心欢喜，能令女人薄少淫欲，于多闻者益其念力，修禅定者乐阿兰若，能却一切盗贼斗争、饥馑疫病、旱涝寒热、粗涩恶触，如是等事皆悉除灭，法母增长佛法流布，三宝不断除生死畏，破无明聚弃舍苦檐，能得尽智及无生智。”

尔时，世尊即说咒曰：

“怛经他(一) 摩那叉(恻我切二) 阿婆叉(三) 罗伽娑叉(四) 闍罗叉(五) 末磨那叉(六) 阿婆叉(七) 曼陀叉(八) 那荼叉(九) 那荼罗休(十) 鼻萨那吒(十一) 佉伽那吒(十二) 阿吒那吒(十三) 拘那吒(十四) 钵利伽萨那吒(十五) 那荼那吒(十六) 富利迦那吒(十七) 郁怛罗那吒(十八) 迦毗那吒(十九) 军闍那吒(二十) 苏目伽那吒(二十一) 遮婆茂婆罗那吒(二十二) 佉伽凡钳婆罗那吒(二十三) 富沙迦罗那吒(二十四) 系娑(苏我切)郁卢达罗那吒(二十五) 三摩罗耶那吒(二十六) 失啰伽三(二十七) 憍怛吒(二十八) 怛罗

(二十九) 摩妬佉啰婆(三十) 提畜叉(三十一) 婆帝啰竖(三十二) 豆婆那摩啰竖(三十三) 婆呵那否智(三十四) 僧低啰阁婆(三十五) 阿摩啰阁婆(三十六) 摩呼啰伽阁罗(三十七) 阿祇拏婆啰(三十八) 阿祇拏叉(三十九) 阿婆呵摩唎伽祇拏叉(四十) [口+堊]沙[口+堊]婆都豆佉写(四十一) 娑和呵(四十二)。”

尔时，世尊说此陀罗尼时，彼大众中六万亿人得柔顺忍，复有六十频婆罗人得须陀洹果、斯陀含果、阿那含果、阿罗汉果。“善男子，汝可持我此陀罗尼，往娑婆界如我辞曰：‘北方去此八十恒河沙佛刹，过是数已有佛世界，名普上香，亦具五浊。彼中有佛号德华藏如来应供正遍知，现在说法，问讯释迦牟尼佛：少病少恼，气力安不？诸弟子众乐听法如说行不？能摧四魔诸恶龙不？佛转法轮无障碍不？’善男子，于彼释迦牟尼佛所，说此藏法门，能坏魔王、龙王境界，灭除恶业；说此奢摩裴多悉致大授记陀罗尼，欲令此陀罗尼有大势力、大利益，能令众生安稳快乐灭诸烦恼，乃至舍弃苦担。”

尔时，德华藏佛诸弟子众咸共赞言：“善哉！善哉！希有世尊！希有世尊！如来智慧一切法中无障无碍，我等从昔已来初未得闻如是甚深大陀罗尼，能与众生安稳快乐，听此陀罗尼已悉发勇猛读诵受持。何以故？此陀罗尼有如是无量无边大功德故。”

尔时，虚空藏菩萨摩訶萨白佛言：“世尊，若有众生怖畏生死，欣乐涅槃，一心称名礼拜供养德华藏佛，并诵此陀罗尼生希有心，彼诸众生增长善根获大利益。”

尔时，德华藏佛告虚空藏菩萨摩訶萨言：“善男子，如是，如是，如汝所说。善男子，我于往昔修菩提时，勤求方便作如是愿：‘我得阿耨多罗三藐三菩提时，若有十方诸佛国土，其中众生乐行布施乃至智慧，若能至心称我名号礼拜供养，令彼众生无有天、人、阿修罗等能加恶者，亦无有能障碍修行六波罗蜜者，又能增益无量善根，唯除过去造极恶业者。若此愿不成，我誓不取成等正觉。善男子，若有妇人欲求子者，若复不愿有多子者，若有怀妊怖畏产难，彼诸人等应当至心称我名号礼拜供养，若人非人无能得便，亦无恶咒毒药能令身心受逼迫苦，乃至一念能加恶者，我誓不取阿耨多罗三藐三菩提。’善男子，我于往昔求菩提时作如是愿，覆护利益一切众生，是故众生应当至心称我名号礼拜供养，一切诸恶皆悉除灭决定无疑，唯除过去极重恶业现受报者。”

尔时，虚空藏菩萨白佛言：“希有世尊，不可思议！我今欲往娑婆世界见释迦牟尼佛，但彼众生弊恶嫉妒，无慈悲心不知报恩，言常粗犷，多行邪见，无恼我耶？我今往彼，或无利益。”

佛言：“善男子，无如是事，谁是成就四无量心而能加恶？假使百千诸魔眷属亦无障碍者。善男子，汝于往昔无量劫来，而常修行四无量心，汝莫怖畏。善男子，我有陀罗尼，从四无量梵行中生，能灭

诸恶乃至恶梦。汝可受持此陀罗尼，若有多瞋众生闻此咒者皆生慈心，若不生者或便惛睡。”

尔时，世尊即说咒曰：

“怛经他(一) 浮呼鼻利呵(二) 浮浮啰(三) [口+璽]逻啰婆(四) 一逻(五) 娑呵(六) 呵筹(七) 伽筹(八) 伽伽那叉(九) 奢摩奢摩(十) 蜜多啰蜜多啰(十一) 斫迦罗(十二) 跋帝帝[(七/矢)+余](十三) 娑伽啰帝[(七/矢)+余](十四) 豆利哆咧(香指切)[穴/(怡-台+未)](十五) 咧黎呵跋醯(十六) 那逻阁啼(十七) 夜婆那蜜低黎(十八) 绮底蜜低黎(十九) 婆利蜜低黎(二十) 始佉蜜低黎(二十一) 摩都啰蜜低黎(二十二) 佉伽蜜低黎(二十三) 萨都阁蜜低黎(二十四) 萨婆羯摩蜜低黎(二十五) 摩那跋利多蜜低黎(二十六) 陀胝(张夷切)湿婆啰蜜低黎(二十七) 娑和呵(二十八)。

“善男子，此陀罗尼名灭一切恶及诸恶梦。其有诵持者，应以瞻卜油咒之七遍，用涂两手及用涂面，诸恶心人睹见之者皆生欢喜，乃至恶龙、夜叉、迦吒富单那等，乃至千万诸魔眷属不起恶心，况加恶事？假使满四天下诸恶众生，咒一合水而以散之，令彼众生皆生信心，乃至不起一念之恶。若有浊水满四大海，取一合水以此咒咒之投彼大海，能令浊水悉变澄清。善男子，汝可持此陀罗尼往娑婆界。”

尔时，无量阿僧祇菩萨摩訶萨，异口同声作如是言：“我等今者渴仰欲见大德世尊释迦牟尼佛，礼拜供养，尊重赞叹，亦欲观彼大众集会，听日藏法门坏龙境界炎品。为除一切众生诸恶业故，惟愿世尊听我往彼。”

佛言：“善男子，欲往随意，应当一心以游彼国。汝等皆可变作转轮圣王，七宝成就，千子具足，庄严其身如转轮王法。”

即时，八十千万菩萨摩訶萨与虚空藏菩萨，恭敬围绕德华藏佛，绕三匝已上升虚空。是诸菩萨摩訶萨众，各自化作转轮王身，七宝成就，千子具足，象兵、马兵、车兵、步兵，如是种种庄严如轮王法，即从彼发，一念之顷至娑婆世界，以阎浮提金末散娑婆世界佛及菩萨、声闻大众，如是金末皆悉遍满娑婆世界，复以龙栴檀香末而以散之，复以真珠亦以散之，复以真珠金瓔珞具亦以散之，复以颈珠而用散之，复以种种瓔珞种种衣服而以散之，复以种种幢幡宝盖亦以散之。其诸菩萨摩訶萨众，皆为供养释迦牟尼多陀阿伽度阿罗呵三藐三佛陀。彼诸菩萨摩訶萨众，作是供养已，恭敬围绕右绕娑婆世界，绕三匝已而来至此四天下中摩伽陀国释迦牟尼佛所，到已恭敬礼拜，绕佛三匝，却住一面。

大乘大方等日藏经卷第四

菩萨使品第三

尔时，频婆娑罗王，见未曾见无量阿僧祇梵天、帝释天、那罗延天、四天下转轮圣王，见已心大欢喜，从座而起在一面立。

尔时，四使菩萨摩訶萨及其眷属，合掌向释迦牟尼佛。时，日行藏菩萨以瞻波迦华鬘散释迦牟尼佛上，而赞叹曰：

“于诸足中最殊胜， 施诸恶见大光明，
能说出世平等行， 行正道者施法印。
摧灭毒龙及四魔， 解世烦恼佛为胜，
竖坚法幢施解脱， 以大法炬灭众闇。
亲近善友修集定， 愍众生故说福田，
佛法僧宝甚难得， 人身信心亦复难。
虽得人身善友难， 得善友者坏烦恼，
众生恶智烦恼覆， 速能为灭烦恼网。
众生没于烦恼河， 佛如大船能拔济，
我等诸佛使说欲， 随喜如来佛法藏。”

尔时，日行藏菩萨白释迦牟尼佛言：“世尊，东方过无量恒河沙佛刹，彼有世界名无尽德，佛号瞻波迦华色如来应供正遍知，现在说法。彼佛如来使我送欲，并问讯释迦牟尼佛：‘少病少恼，无多患不？弟子眷属身力乐不？常安隐不？乐听法不？闻佛所说如教行不？乐阿兰若不？’世尊于此破坏众魔，独超众圣转于无碍微妙法轮，但此五浊诸恶众生障碍未尽，于佛法轮不信受者；为是等故，彼瞻波迦华色佛说此日藏法行坏龙境界炎品一切众生恶业尽陀罗尼欲，名四谛顺忍陀罗尼。此陀罗尼有大势力，有大利益，能尽一切欲贪、色无色贪、一切慢、增上慢、我慢等，如上所说。此四谛顺忍陀罗尼，能坏一切魔王势力，能令诸天心生欢喜，能令阿修罗、迦楼罗生大怖畏，能令紧陀罗心生欢喜，能令摩睺罗伽生怖畏心，能坏外道，于刹利所能与知足，能摄婆罗门令入佛法，能令毗舍生大信心，能令首陀罗生欢喜心，能令女人离诸贪欲，能令智人生欢喜心，令坐禅人乐阿兰若，能却一切种种恶事及诸斗诤、饥馑、疫病、夭横死者，能除外贼、非时寒热、恶风雨、恶兽、瀑水、苦辛枯涩诸恶触等，能建立法幢光显佛法，令法母久住佛种不灭，能安慰生死流转众生，能生尽智，能觉无生智，能裂一切无明暗聚，能舍一切苦担，能干一切苦海。”

尔时，日行藏菩萨，即说如上四谛顺忍陀罗尼：

“怛经𑖀(一) 婆𑖀婆野波履婆[(𑖀/𑖀)+𑖀](二) 婆𑖀婆𑖀波履婆[(𑖀/𑖀)+𑖀](三) 必利𑖀(他地切)𑖀必利𑖀鼻波履婆[(𑖀/𑖀)+𑖀](四) 阿𑖀阿𑖀波履婆[(𑖀/𑖀)+𑖀](五) 低𑖀低𑖀波履婆

[(七/矢)+余))(六) 末[(七/矢)+余)]末遛波履婆[(七/矢)+余)]
 (七) 却偈却伽(其箇切)波履婆[(七/矢)+余)](八) 阿卢翅阿卢迦(其
 可切)波履婆[(七/矢)+余)](九) 萨他迷 萨他么波履婆[(七/
 矢)+余)](十) 曷罗誓曷罗 社波履婆[(七/矢)+余)](十一) 徙
 [(七/矢)+余)]徙遛波履婆[(七/矢)+余)](十二) 伽迷伽么波履婆
 [(七/矢)+余)](十三) 阿蒲婆阿蒲婆波履波[(七/矢)+余)](十四)
 罗么罗罗么(十五) 罗谜 罗么(十六) 曷罗[朗-月+斤](勒可切)曷
 罗遛(十七) 何啰罗何啰罗么(十八) [月+𠂔][打-丁+翕]婆 攘娜
 复[多+頁](登我切十九) 伽遛弥复[多+頁](二十) 揭遛么波履婆
 [(七/矢)+余)](二十一) 斫𣎵揭遛𣎵斫𣎵揭遛诃波履婆[(七/
 矢)+余)](二十二) 输𣎵但𣎵揭遛𣎵输𣎵但𣎵揭遛诃波履婆[(七/
 矢)+余)](二十三) 伽罗娜揭遛𣎵揭罗娜揭遛诃波履婆[(七/
 矢)+余)](二十四) 什婆揭遛𣎵什婆揭遛诃波履婆[(七/矢)+余)](二
 十五) 迦耶揭遛𣎵迦耶揭遛诃波履婆[(七/矢)+余)](二十六) 么娜
 揭遛𣎵么娜揭遛诃波履婆[(七/矢)+余)](二十七) 馱跛曷利捨揭遛𣎵
 馱跛曷利捨揭遛诃波履婆[(七/矢)+余)](二十八) 鞞[多+頁]娜揭遛
 𣎵鞞[多+頁]娜揭遛诃波履婆[(七/矢)+余)](二十九) 怛履瑟那揭遛
 𣎵怛履瑟那揭遛诃波履婆[(七/矢)+余)](三十) 忧波陀那揭遛𣎵忧波
 陀那揭遛诃波履婆[(七/矢)+余)](三十一) 婆𣎵揭遛𣎵婆𣎵揭遛诃波
 履婆[(七/矢)+余)](三十二) 阇帝揭遛𣎵阇帝揭遛诃波履婆[(七/
 矢)+余)](三十三) 社𣎵摩𣎵娜揭遛𣎵社𣎵摩𣎵娜揭遛诃波履婆[(七/
 矢)+余)](三十四) 独佉珊多跛揭遛𣎵独佉珊多跛揭遛诃波履婆[(七/
 矢)+余)](三十五) 阿𣎵波𣎵[跑-包+翕]陞社揭遛𣎵阿𣎵波𣎵[跑-包
 +翕]陞社揭遛诃波履婆[(七/矢)+余)](三十六) 阿跋[多+頁]鞞婆
 [多+頁]写(三十七) 阿跋𣎵摸跛么娑卸(思夜切)鞞也(三十八) 毗尼
 跋[多+頁](三十九) 阿梨耶曷𣎵捨弥(四十) 萨鞞伽羶帝莎波诃(四
 十一)。”

说此咒已白佛言：“世尊，此四谛顺忍陀罗尼，是彼瞻波迦华色佛所送。”

尔时，释迦牟尼佛闻此咒已赞言：“善哉！善哉！”乃至一切娑婆世界诸佛刹中十方来众及此刹众，亦称善哉，除入定者。

尔时，释迦牟尼佛告日行藏菩萨言：“善男子，我今不起此座，于大众中广为众生说此四谛顺忍陀罗尼，文字及义不增不减。善男子，汝欲来此，彼瞻波迦华色佛为护汝身不怖畏故，说身受行陀罗尼，乃至说涅槃道日眼莲华陀罗尼，汝今当为一切众生于此宣说。”

尔时，日行藏菩萨即于佛前，说所持来日眼莲华陀罗尼：

“怛经他(一) 徙陀摩帝(二) 毗卢迦(基我切)么帝(三) [口+𠂔]
 [(七/矢)+余)](四) 鞞(基离切)[多+頁](丁可切)矣利师(五) 沤制

(六) 苏楼沕制(七) 佛地毗佛地(徒纸切八) 摩诃佛地(九) 郁奴摩提(十) 郁奴摩爹(十一) 钵[朗-月+斤]底筛(疎皆切十二) 达膩阿罗伽度芦婆(十三) 阿啰伽度芦婆(十四) 钵[朗-月+斤]底筛达膩(十五) 频豆频豆么底(十六) 质吒质吒钵[朗-月+斤]底筛达膩(十七) 頔勒羈(十八) 旃陀罗提(十九) 呵呵(虎我切)质[木+郢](竹几切二十) 诃[多+頁]膩弭(二十一) 诃[多+頁]迦(其我切)么鞞祇(二十二) 诃[多+頁]富娜曷啰婆嚩(二十三) 曷啰移(社奚切二十四) 诃[多+頁]斫芻三摩帝(二十五) 诃[多+頁]毗么[多+頁]佛地(二十六) 诃[多+頁]夜奇离(二十七) 诃[多+頁]毗么三揭离(二十八) 诃[多+頁]三姥爹啰社裨(二十九) 诃[多+頁]鞞么[多+頁]曷啰誓(三十) 诃[多+頁]啞(呼旨切)[口+戒](呼计切三十一) 诃[多+頁]者者帝(竹帝切三十二) 诃[多+頁]达么曷啰誓(三十三) 诃[多+頁]蒲呼曷啰誓(三十四) 诃[多+頁]跋社么帝(三十五) 诃[多+頁]嚧伽曷啰舍弥(三十六) 诃[多+頁]达么徒蜜帝(三十七) 诃[多+頁]萨婆忧波陀娜(三十八) 若(如者切)茹若(三十九) 毗社树竖(四十) 毗者社若(四十一) 若婆罗末伽(其我切)若若(四十二) [口+堊]沙案[多+頁](四十三) 娑啰伽(四十四) 独鼓莎波诃(四十五)。”

说此咒已白佛言：“世尊，彼瞻波迦华华佛，为护我故说此陀罗尼。”

尔时，释迦牟尼佛告长老耶舍：“汝可持此日眼莲华陀罗尼。何以故？佛出世难，闻此陀罗尼亦复甚难。若佛如来及弟子众，或阿罗汉，须弥山王及于大海，其德可说；此日眼莲华陀罗尼，非于一劫若百千劫可说其德。此陀罗尼如是甚深，汝当一心受持读诵，于四众中广宣说之。彼娑婆界一切众生闻此咒已，一切欲贪、色无色贪悉皆除灭，乃至能得漏尽智证得涅槃乐。”

尔时，香象菩萨复以偈赞：

“唯佛坐于菩提树， 能坏众魔及眷属，
独得无上胜菩提， 证知一切众生类。
佛放胜光蔽外道， 如日能映诸萤火，
法母三宝种常住， 圣集为度诸众生。
为求善法及菩提， 供养佛故同集此，
唯佛甘露洗众生， 演说菩提胜行故。
能度众生更不生， 尽漏尽思尽烦恼，
安置众生寂灭城， 唯佛于世如妙药，
能除众生诸忧愁。 彼佛使送陀罗尼，
并复问讯牟尼月， 多闻智海慈悲行。”

说此偈已白佛言：“世尊，譬如有城方一由旬，沙满其中，如是

一沙为一佛刹，过是数已，南方有佛世界名袈裟幢，具足五浊，佛号山帝释王如来，十号具足，今现在说法。彼佛如来使我送欲，并问讯释迦牟尼佛：‘少病少恼，常安乐不？弟子众等无多患不？乐听法不？既闻法已如说行不？乐阿兰若不？乐坐禅不？’佛于此刹破坏魔王及诸恶龙，光显正法转无障碍清净法轮，但此佛刹诸恶众生障碍未尽，不受法轮者，为是等故，彼山王如来，令我送此日藏法行坏龙境界炎品一切众生恶业尽陀罗尼欲，名空顺忍陀罗尼。此陀罗尼有大势力，有大利益，能却一切欲贪，能尽一切色非色贪，能尽一切慢增上慢，如上所说，乃至能舍苦担。”

尔时，香象菩萨即说所送空顺忍陀罗尼：

“怛经他(一) 头摩帝头摩帝(二) 恶踰(軀宜切)头摩帝(三) 钵啰婆娑头摩帝(四) 萨婆迦捨头摩帝(五) 阿鞞却伽(其我切六) 培鞞娜却伽(七) 碎(苏骨切)朱叉却伽(八) 阿嚧摸诃却伽(九) 阿娜涅也却伽(十) 毗耶佛履帝却伽(十一) 僧迂喽者却伽(十二) 阿泥么却伽(十三) 卢者那却伽(十四) 尸弃却伽(十五) 毗底[穴/(怡-台+未)]啰却伽(十六) 郁芻么却伽(十七) 塢啰却伽(十八) 恶鼓却伽(十九) 耶婆么娜却伽(二十) 尤喽跋却伽(二十一) 耶婆毗娘那却伽(二十二) 斫芻陀妬却伽(二十三) 耶婆么娜毗娘那陀妬却伽(二十四) 必利洩陞(蒲比切)陀妬却伽(二十五) 耶婆毗娘娜陀妬却伽(二十六) 𧰨(之结切)埵(都和切)履悉蜜驻跋萨他娜却伽(二十七) 耶婆阿瑟吒达奢阿勒尼迦佛他达摩却伽(二十八) 独佉却伽(二十九) 耶婆磨勒伽却伽(三十) 毗婆嚧毗毖(三十一) 阿那娜娜(三十二) 阿陞娜娜(三十三) 三姥陀[朗-月+斤]娜娜(三十四) 萨婆迦嚧娜娜(三十五) 萨婆僧萨他娜毗瞿跋娜娜(三十六) 阿紧(吉因切)柘若(女我切)娜娜(三十七) 叉(初诈切)婆叉嚧(三十八) 伊犁伊囉(三十九) 伊犁伊伊罗(四十) [穴/(怡-台+未)]利莎波诃(四十一)。”

说此咒已白佛言：“世尊，此陀罗尼是彼山王如来所送。”

尔时，释迦牟尼佛心大欢喜，赞言：“善哉！善哉！”并及一切娑婆世界诸大集众，皆大欢喜同赞善哉，除空静处入禅定者。

尔时，释迦牟尼佛语香象菩萨言：“善男子，我今不起此座，于大众中广为众生说此空顺忍陀罗尼，文字及义不增不减。善男子，汝欲来此彼山王佛为护汝故，说无量根陀罗尼，汝可说之。何以故？能却一切心受行故，得平等一切智智故，四魔境界坏故，法母三宝性不断故。”

尔时，香象菩萨白佛言：“世尊，我今当说。”即于佛前说所持来无尽根大授记陀罗尼：

“怛侄他(一) 捨嚧娜毗夜也(二) 式叉毗夜也(三) 徒寐履帝毗

夜也(四) 钵啰河娜 毗夜也(五) 矣履地毗夜也(六) 因地利夜毗夜也(七) 喽[朗-月+斤]毗夜也(八) 蒲腾伽毗夜也(九) 三摩地毗夜也(十) 陀罗尼毗夜也(十一) 羴帝 毗夜也(十二) 毗梨耶毗夜也(十三) 闍娜毗夜也(十四) 钵逻若 阿雷(力口切)必也毗夜也(十五) 阿纫(奴陵切)社毗夜也(十六) 摩伽毗夜也(十七) 遏鼻娘毗夜也(十八) 钵啰帝 三陞 爹毗夜也(十九) 步[穴/(怡-台+未)](无佛切)毗夜也(二十) 毕(那因切)经[口+耶](余歌切)毗夜也(二十一) 摩诃梅怛梨毗夜也(二十二) 摩诃迦雷 那毗夜也(二十三) 摩诃牟帝多毗夜也(二十四) 摩呼畢叉毗夜也(二十五) 必利洩鼻毗夜也(二十六) 萨埵毗夜也(二十七) 达摩毗夜也(二十八) 答摸毗夜也(二十九) 阿卢迦毗夜也(三十) 钵啰帝婆娜毗夜也(三十一) 钵啰帝输卢得迦毗夜也(三十二) 伽伽那毗夜也(三十三) 摩雷[多+頁]毗夜也(三十四) 钵啰帝多三姥波爹毗夜也(三十五) 输娜 多毗夜也(三十六) 阿尼蜜多毗夜也(三十七) 揅(乌合切)钵啰尼系毗夜也(三十八) 侯喽[多+頁]毗夜也(三十九) 瞿沙毗夜也(四十) 紧柘那毗夜也(四十一) 阿鼻三摩夜毗夜也(四十二) 阿怒娜(四十三) 阿奴娜(四十四) 阿喽呵者者(四十五) 者遮啰(四十六) 者遮啰毗姥(四十七) 柘陞 斫芻者遮啰毗姥(四十八) 毗夜也毗姥(四十九) 察夜毗姥(五十) 阿么毗夜也毗姥(五十一) 阿三姥陀遮啰毗姥(五十二) 坞眇陀毗姥(五十三) 阿迦舍毗姥(五十四) 骠钵舍么毗姥(五十五) 阿那婆娑毗姥(五十六) 阿呵呵毗姥(五十七) 阿啰婆啰毗姥(五十八) 优波舍么毗姥(五十九) 萨利罗毗姥(六十) 莎波呵(六十一)。”

说此咒已白佛言：“世尊，此是山王如来所说无尽根授记陀罗尼，护我身故。”

尔时，释迦牟尼佛告长老憍陈如：“汝可受持读诵此无尽根陀罗尼。憍陈如，佛出世难，闻此陀罗尼者亦复倍难。善男子，若佛如来、或佛弟子大阿罗汉等，于百千劫可得数知一切众生三世心心数法；此陀罗尼德，非百千劫说能尽其边。以是故，憍陈如，当受持此无尽根陀罗尼，于四众中如闻广说。若有众生得闻此法，能尽恶业乃至得四无碍不坏辩才，能常乐说，于三界中得最胜身。”

尔时，炎德藏菩萨摩诃萨合掌向释迦牟尼佛，以偈赞曰：

“六道烦恼苦所漂， 佛智如船自他度；
六根所迷魔罣缚， 佛出世难说实道，
智人能舍六种家； 佛为世亲除俭法，
得六神通诸三昧； 诸佛大圣实语者，
能解众生流转缚。 我等信心闻佛赞，
世亲使我来此刹， 唯愿世尊听我说！”

尔时，炎德藏菩萨摩訶萨白佛言：“世尊，西方过四十二恒河沙等佛刹，有佛世界名坚固幢，佛号智德峰王如来，十号具足，今现在说法。彼佛如来使我说欲，并问讯释迦牟尼佛：‘安隐住不？起居轻利不？弟子众等无多患不？乐听法不？若听法已，能如说行坚固住不？乐阿兰若行不？’如来于此破坏众魔及龙眷属，光显正法最胜无碍转妙法轮，但此世界诸恶众生障碍未尽，于佛法轮不顺行者，是故彼佛说此日藏法行坏龙境界炎品一切众生恶业尽陀罗尼欲，所谓无愿顺陀罗尼。此陀罗尼有大势力，有大利益，能尽一切欲贪、色无色贪、一切慢、增上慢、我慢等，如前所说，能裂一切无明暗聚，能舍一切苦担。”

尔时，炎德藏菩萨即说所送无愿顺陀罗尼：

“怛经他(一) 舍摩那舍婆(二) 阿婆叉舍婆(三) 斫芻舍婆(四) 输嚧哆罗舍婆(五) 伽拏舍婆(六) 视婆舍婆(七) 迦耶舍婆(八) 摩那舍婆(九) 叉婆毗陀(十) 斫芻毕利洩鼻叉婆(十一) 输嚧哆罗阿婆叉婆(十二) 伽啰拏帝闍叉婆(十三) 什婆婆喻叉婆(十四) 迦耶羯摩叉婆(十五) 摩那乌闍叉婆(十六) 阿卢迦若那叉婆(十七) 毗闍僧羯摩叉婆(十八) 唵句啰咤伽叉婆(十九) 娑摩喽毕也鼻耶叉婆(二十) 舍摩迦闍叉婆(二十一) 叉耶啰婆叉婆(二十二) 嚧哆鼻那婆叉婆(二十三) 那都那(二十四) 泥那都那(二十五) 阿婆泥那都那(二十六) 那耶波那夷那都那(二十七) 伊沙伊婆都度咤[口+寫]莎呵(二十八)。”

说此咒已白佛言：“世尊，此无愿顺陀罗尼，是彼智德峰王如来所送。”

尔时，释迦牟尼佛及一切娑婆世界诸大集众，皆赞：“善哉！善哉！”唯除在定。

尔时，释迦牟尼佛告炎德藏菩萨摩訶萨言：“善男子，我今不起此座，于大众中广为一切众生说此无愿顺陀罗尼，文字句义不增不减。善男子，汝从彼来，智德峰王佛为护汝故，说智慧依止陀罗尼，汝今当为一切众生于此宣说。若有众生闻此法已，所有上中下结欲有因缘所生烦恼悉皆微薄，复能除却恒河沙劫生死之苦，一切恶业亦皆除灭，一切善根具足圆满。”

尔时，炎德藏菩萨白佛言：“世尊，如是，如是，我今当说。”即于佛前说智慧依止陀罗尼：

“怛经他 佉伽波利眇(妹兮切)提伽唎婆叉 西伽跋梨鼻也娑啰婆伽叉 叉婆踰岐(疆兮切)钵底呵梨 奢磨那四迦涕 三摩迷伽闍师(疏齐切)阿叉夜那低 叉婆跋移(常兮切)祢[馬+犬]那闍师 娑摩娜闍师 娑摩伽逻闍师 阿地呵奢夜闍师 鼻钵啰婆闍师 西叉闍师 西

祢夜闍婆闍师 娑利罗瞿唎(香之切)夜闍师 娑利罗瞿唎夜阿鞞鞞婆
那鳩世 萨檀拘帝 私婆檀那梯 毗哆钵罗鼻利低 呕波羯磨那
梯 阿那叱地夜跋罗伞(羌兮切)钵罗帝羯迷那 三迦太夜世 萨卢遮
那婆迷 拘嚧太黎 迦摩萨世 阿世奢佉岐 那夜军闍 鼻地夜跋
泥 羯罗那跋泥 郁遮跋泥 三迷摩迦梨 奢利夜跋泥 摸伽闍师
呵利拘那婆 那夜那目伞 娑罗叉拘黎 那罗延拏树黎 因陀罗婆萨
泥 乌阿阿婆阿 阿阿(乌可切)何罗婆阿 婆罗阿婆罗 阿罗萨弥伽
(其我切)豆佉祢提 啰涅槃醯莎和呵。”

说此咒已作如是言：“此是智德峰王佛所说陀罗尼。”

尔时，释迦牟尼佛告長老舍利弗言：“汝可受持此智慧依止陀罗尼。所以者何？佛出世难，闻此陀罗尼亦复倍难。舍利弗，若佛如来及佛弟子大阿罗汉，于百劫中可得知此四天下微尘等数，此智依止陀罗尼德于百千劫说不能尽。此陀罗尼如是甚深，是故应受持读诵，于此众中广为人说。若有众生能听受者，彼人所有下中上欲有因缘所生烦恼，及色无色有因缘所生烦恼，皆悉微薄；复能除却恒河沙劫生死之苦、五无间业，及于女人旧所造业皆悉除灭，乃至漏尽得涅槃道。”

尔时，虚空藏菩萨摩訶萨合掌向佛而说偈言：

“如来真实知法界， 示魔众生正真道，
若有真实生信心， 是则能破三恶道。
供养如来一香华， 无量世受无上乐，
无量世中身具足， 亦得无上真智慧。
若能一闻是总持， 即能摧灭诸烦恼，
一切人天所供养， 获得无生及尽智。
华德藏佛功德具， 彼佛使我来问讯。”

尔时，虚空藏菩萨白释迦牟尼佛言：“北方去此八十恒河沙世界，彼有佛刹名一切香上，具足五浊，佛号德华藏如来、应供、正遍知、明行足、善逝、世间解、无上士、调御丈夫、天人师、佛世尊，今现在说法。彼佛使我送欲，并问讯释迦牟尼佛。如来于此降伏众魔及龙眷属，最胜无碍转妙法轮，但此刹中诸恶众生，于佛法轮不顺行者，是故彼德华藏佛，说此日藏法行坏龙境界炎品一切众生恶业尽陀罗尼欲，所谓奢摩裴多悉致那利陀罗尼。此陀罗尼能令众生得大势力、得大利益、得大安隐，能除一切病苦，能坏一切烦恼、一切阴入界，能差别知一切法，能示一切方便，能清净涅槃道，能令一切众生心生欢喜，能入一切法门无有障碍，能以正法降伏外道令住佛法，能坏一切魔王境界。此陀罗尼有大力用，善摄一切诸魔外道令失势力，能令诸天生大欢喜，能令夜叉心生知足，能怖阿修罗，能坏金翅鸟，

能令紧陀罗生大欢喜，能令摩睺罗伽不敢回顾，能令外道默然无对，能令刹利心生欢喜，能令婆罗门信入佛法，能令毗舍、首陀罗等皆大欢喜，能令女人不乐多欲，能令怀孕女人产生安隐，能令多闻人心不失念，能令坐禅人乐阿兰若，能除一切患难、一切斗争饥馑疾疫，能除内外奸宄，能除非时寒热、风雨暴水、苦辛枯涩恶触等事，能光显法母建立佛法，绍三宝种令不断绝，于生死中作大安慰，能生尽智，能证无生智，能坏无明暗聚一切苦担，此名奢摩裴多悉致陀罗尼。”

尔时，虚空藏菩萨即于佛前，说奢摩裴多悉致那利大授记陀罗尼：

“怛经他(一) 摩那叉(二) 阿婆叉(三) 罗伽婆叉(四) 闍罗叉(五) 末摩那叉(六) 阿婆叉(七) 曼陀叉(八) 那荼叉(九) 那荼啰叉(十) 鼻萨那吒(十一) 佉伽那吒(十二) 阿吒那吒(十三) 拘那吒(十四) 钵利伽萨那吒(十五) 那荼那吒(十六) 富利迦那吒(十七) 郁怛罗那吒(十八) 迦毗那吒(十九) 军闍那吒(二十) 苏目伽那吒(二十一) 遮婆茂啰那吒(二十二) 佉伽凡钳婆啰那吒(二十三) 富沙迦啰那吒(二十四) 系娑(苏我切)郁卢达啰那吒(二十五) 三摩罗耶那吒(二十六) 失啰伽三(二十七) 憍怛吒(二十八) 怛罗(二十九) 摩妬佉婆(三十) 提畜叉(三十一) 婆帝啰竖(三十二) 豆婆那摩罗竖(三十三) 娑呵那否智(三十四) 僧低 罗闍婆(三十五) 阿摩啰闍竖(三十六) 摩呼啰伽闍罗(三十七) 阿祇拏婆啰(三十八) 阿祇拏叉(三十九) 阿婆阿摩喇伽祇拏叉(四十) [口+堊]沙[口+堊]婆都豆佉写莎波呵(四十一)。”

说此咒已白佛言：“世尊，此陀罗尼有大势力，有大利益，彼德华藏佛令我送来。”

尔时，释迦牟尼佛赞言善哉，及一切大众皆赞善哉，除坐禅者。

尔时，佛告虚空藏菩萨摩訶萨言：“善男子，我今不起此坐，广为大众说此陀罗尼，文句及义不增不减。善男子，汝从彼来，德华藏佛为护汝故说陀罗尼，令恶心者生欢喜心，诸不信者悉皆惛睡。此陀罗尼从德华藏佛所久修四无量行生，汝今当为一切众生于此宣说。若有闻此陀罗尼，一切恶人皆生欢喜。”

尔时，虚空藏菩萨，即说一切恶心众生生欢喜心、不信众生悉皆惛睡陀罗尼：

“怛经他(一) 浮呼鼻利呵(二) 浮浮啰(三) [口+堊]逻啰浮(四) 一逻(五) 娑呵(六) 呵筹(七) 伽筹(八) 伽伽那叉(九) 奢摩奢摩(十) 蜜多啰蜜多啰(十一) 斫迦罗(十二) 跋帝帝[(七/矢)+余](十三) 娑伽啰帝[(七/矢)+余](十四) 豆利哆唎(香指切)

[穴/(怡-台+未)](十五) 唎黎呵跋醯(十六) 那罗闍嚩(吒戒切十七) 夜婆那蜜低黎(十八) 绮底蜜低黎(十九) 婆利蜜低黎(二十) 始佉蜜低黎(二十一) 摩都啰蜜低黎(二十二) 佉伽蜜低黎(二十三) 萨都闍蜜低黎(二十四) 萨婆羯摩蜜低黎(二十五) 摩那跋利哆蜜低黎(二十六) 陀胝(张夷切)漂婆啰蜜低黎(二十七) 莎和呵(二十八)。”

说此持已，一切恶龙各还所住悉皆睡眠，唯除得忍不退转者。乃至恶夜叉、恶阿修罗、恶迦楼罗、恶紧那罗、恶卑离多、恶毗舍闍、恶富单那、恶迦吒富单那，彼一切众各还所住皆悉睡眠，唯除得忍不退转者。若复有人恶心粗犷无有慈悲，彼此怀恨常不舍离，不畏当来堕于恶道，造五无间，诽谤正法，毁谤圣人，乐行不善，彼恶众生闻此咒已悉皆惛睡。有信心者得慈悲心、不斗争心，得不浊心，得念法缘心，畏当来世堕三恶道，得恭敬三宝心，得念法心、念寂灭心。一切众生闻此陀罗尼已，即得住于如是等心。

尔时，虚空藏菩萨白佛言：“世尊，我欲来此，彼德华藏佛为护我故，说此陀罗尼。”

尔时，释迦牟尼佛告长老目乾连言：“汝可受持此陀罗尼。目连，如来多陀阿伽度阿罗诃三藐三佛陀出世甚难，闻此陀罗尼亦复倍难。所以者何？此陀罗尼从无限齐四梵行生。目键连，如来百千劫不行余业，说此陀罗尼义，一切天人无有能知者，乃至十地菩萨亦不能知，唯除诸佛。此陀罗尼如是甚深、如是大力，能与大利益，能速满足阿耨多罗三藐三菩提，又能满足大慈大悲教化众生。是故，目连，汝当受持读诵此陀罗尼，于大众中广为人说。若有闻此陀罗尼者得大利益，多瞋众生于未来世应受恶者，皆悉尽灭不受果报，能知生死多诸过恶，修大善根，取大福德，亲近大善知识供给供养，是故速得不退阿耨多罗三藐三菩提。目连，此陀罗尼能燃法灯，绍三宝种。”

大乘大方等日藏经卷第五

定品第四

尔时，世尊告四使菩萨及其眷属诸菩萨等：“善男子，汝若乐住此娑婆界者，各各随意入所修学自福德善根、三昧陀罗尼、三摩提、三摩跋提。”

时，四菩萨及其眷属，即便各各随意入定，入禅定已身出光明，有菩萨光如大炬火，有菩萨光乃至如百千万日月光者。

尔时，大德憍陈如承佛神力，作如是念：“我今欲问如来一义，如来因是，或当分别广说如来四陀罗尼文字及义。如来若说，此娑婆界十方之众，若得闻者怀疑网心，于一切法得大光明速得四果，未得

须陀洹速得须陀洹，未得斯陀含得斯陀含，未得阿那含得阿那含，未得阿罗汉得阿罗汉，过三恶道得人天身，一切悉得纯善之法。”作是念已即从座起，合掌向佛默然而住。

尔时，佛告阿若憍陈如：“汝将不欲问我义耶？”

憍陈如白佛言：“如是，世尊，我实欲问。愿佛听许，如我意说。”

佛告憍陈如：“随汝意问，我当广说令汝心喜。”一切天人闻此语已皆生欢喜。

尔时，憍陈如白佛言：“世尊，如佛经中说有二种，所谓爱及富伽罗，行于生死。云何名爱？云何名富伽罗？何故如来说此二种行于生死？”

佛告憍陈如：“善哉！善哉！快发斯问。憍陈如，汝为怜愍一切众生故作是问，欲与一切众生乐故作如是问，如是问者是知时问。憍陈如，至心谛听，我今当说。”

憍陈如言：“如是，如是，如佛所说，我当受持。”

尔时，世尊告憍陈如：“爱有三种，所谓欲爱、色爱、无色爱。复有三种，所谓有爱、离有爱、法爱。憍陈如，何者欲爱？欲名放逸，放逸因缘则生贪触，以触因缘则生乐想，如是等法众生乐著，欲心发动如火所烧。欲因缘故乐造十恶舍离十善，以是因缘堕于地狱、畜生、饿鬼，生贫穷、夜叉中。欲因缘故于生死中，受五阴身具种种苦，虽受是苦不生怖畏，心无惭愧不乐修善，于流转中难得人身。设得人身，以欲因缘身口不净，造作无量诸重恶业乃至五无间业；以是因缘，复于生死三恶道中受大重苦。一切受苦皆因欲心，欲集因缘犹如粪猪被于系缚，趣三恶道受诸苦恼。是故如来为断贪欲，宣说正法呵责欲法。若有众生得闻如是呵责欲已，能如实观诸欲不净，如毒生果，如火聚，如满[土+瓦]毒药，如满瓶粪，如利刀，如贼，如旃陀罗加絺那，如热铁丸，如大雹雨，如恶毗岚婆风，如恶毒蛇，如恶野泽，如罗刹洲，如跋陀伽都，如种种粪扫聚，如尸陀林。是人如是知欲过患，于欲事中生大怖畏身大战动，爱法、乐法、学法欲，剃除须发，身被法服，求于正法，求法自在，于正法中生清净心，于法道中行法救济。如是乐者，彼人临终获得正念，以念法故，乐法气味故，念法果报故，见十方佛在大众中宣说法要教化众生，既闻法已得欢喜心，心欢喜故数数得见诸佛色身。是人死已离三恶道，生有佛刹，常与善人游止，共俱能行布施、忍辱、精进，乐于禅定，修习五通乐涅槃道，大慈悲心教化众生，能得诸佛瓔珞庄严功德之身，过去所有烦恼及习悉皆尽灭。彼诸众生得如是庄严身心，譬如香篋盛种种衣衣服皆香，而彼香华不失称两，不损其色。如是，憍陈如，若有众生乐法因缘，临命终时得见诸佛，因见佛缘得欢喜心，心欢喜故生有佛刹，共善众生同其事业，亦复如是自增善根，得种种瓔珞庄严身心，不久得阿耨多罗三藐三菩提觉，而彼善不减。是故，憍陈如，若

有善男子、善女人，见自利益，见他利益，见彼此利益，常应亲近善友，学善友法，常闻善友呵责欲法种种过患，如是闻已，乃至得阿耨多罗三藐三菩提道。憍陈如，所言善友者，谓诸佛、菩萨、辟支佛、阿罗汉。又善友者，即我身是。何以故？我今出世怜愍众生，欲为断除一切苦恼，能说诸欲一切过患，是故大众应受我语，我不妄语，常真实语，非无义语，非粗恶语，慈悲心语。我今当说诸欲罪过，汝等应当一心受持，既受持已，于三恶道速得解脱，乃至得阿耨多罗三藐三菩提。”

尔时，一切娑婆世界三千大千一切大集诸来众等同发声言：“唯愿如来宣说欲过，我等闻已，如佛所说至心受持。”

佛言：“憍陈如，谛听！谛听！四种因缘众生生欲。何者为四？色贪、长短赤白等贪、触贪、乐贪、乐歌舞种种庄严瓔珞服饰等贪。何者色贪？色名四大和合，生灭不住，无我无众生。如是四大无我无众生，一切凡夫无明颠倒，横于色中而生觉观：此是男、此是女，此好、此恶，此可乐、此不可乐。欲火入心犹如鬼著，男见女身执相取著长短黑白，以是因缘，未生欲能令生，已生欲能令增长。是人如是念欲转多常不舍离，一切善根悉皆减少，不复爱乐诸善知识，不能善护身口意业，与一切罪而共和合，不见一切诸欲过患；以不见故，命终即入三恶道中，或在地狱，或在畜生，或在饿鬼。于彼恶道无量世中受诸大苦，皆由贪欲，贪欲因缘令欲增长。诸有智者观察女色念不净想，不念女身所有发毛皮肉筋血，但念白骨专心不舍。如女人身，男子身亦如是；如见近身，远身亦如是；如他身，自身亦如是；但念白骨，不念发毛皮肉筋血，如是念已数数思惟，心常信念不忘失者，此名心顺行道初断欲法门。是人复念彼骨中心三摩跋帝，住于眉间如枣许处；如是念已数数思惟心住不失，彼人尔时心得寂静，气息不出不入，不见恶相，不见恶事，不乐不念乃至不缘一法，是则名为奢摩他，名心寂静，此名烦恼顺行道第二断欲法门。云何身寂静？是人如是念故，能令身中出入息定，不入不出。彼智慧人波啰娑佛陀，身心乐寂灭，如是念故心速顺奢摩他，此名第三寂灭攀缘断烦恼道法门。是人复念头骨顶中如一小枣处，如是数数念已见彼中空；如是数数念空，见彼顶骨如一沙尘；如是第二第三见骨末，依此法用一切头骨皆如尘末，见彼骨末为风所吹；如是见一切身骨，皆悉如末为风所吹；如是不见身骨乃至见虚空。彼中身心波啰娑三跋帝，此名第四顺奢摩他寂灭攀缘断烦恼道法门。”

尔时，长老阿若憍陈如白佛言：“世尊，虚空相者，是有为相不？”

佛言：“如是，善男子，虚空之相是有为相。”

时，憍陈如复白佛言：“世尊，若虚空相是有为者，为是自相，为他相耶？”

佛言：“憍陈如，若能观察一切法界及有为界，是名自相。何以

故？若能观察色寂静者，当知彼人能见如来。所以者何？若人观骨，见骨如末为风所吹；见是事已，能深观察色之实性。是人尔时见一切色悉皆空寂，乃至不见一切诸相，唯见虚空但念虚空，于彼虚空数数修习，见十方色一切皆空如净琉璃；于中复见无量诸佛，乃至十方亦复如是。见佛身已，又见如来三十二相、八十种好，乃至十方悉见诸佛色身具足，光照团圆如尼俱陀树。彼人过去若曾习学涅槃之道有善根者，即作是念：‘我当问佛，如是虚空谁之所造？久近当灭？’作是念已即便问佛，尔时如来即为宣说：‘夫虚空者，但有名字，无有作者，当何所灭？言虚空者，无有觉观，无物无数，无有相貌，无出无灭，一切法相亦不可得，能想所想亦皆是无。了知是已，于诸想缚悉皆解脱，即便获得阿那含果，能断一切贪欲之心，唯有色爱、无色爱结，及于掉慢诸无明在。’彼人尔时见佛身已，作如是念：‘我今当知如来身相长短广狭。’作是念已，见所在处十方空中悉有如来。彼人尔时欲得观少即便见少，欲得观多随意见多，无量无边亦复如是。复次，彼人更作是念：‘如是诸佛从何而来？’复作是念：‘如是如来无所从来，去无所至。’彼人尔时不见诸佛有去来已，又作是念：‘三界受身心但虚假，以是因缘我随觉观，欲多见多，欲少见少。诸佛如来即是我心。何以故？自心作佛自心见故。心即我身，身即虚空。我因觉观故见无量无边诸佛，我以觉心见佛知佛，非心心知，非心心见，见心相者则不可断。我观法界性无牢实，随念生故。是故一切所有性相，及心觉观即是虚空，虚空之性亦复非有。’若能如是见彼空者，已于过去发菩提心。彼人修习三昧因缘，即得诸佛现其前住。是人若发声闻心，即得一切无相三昧；既修习已，复得无著清静智心远离无明，亦复获得随顺空忍，不久得于四果真证。彼人若见空即是空，尔时即得身心寂静，得寂静已，是则名为空解脱门；入是门已，欲得取于阿罗汉果则为不难，是名第五修习空寂灭诸攀缘断烦恼道真实法门。”

尔时，世尊说此法已，彼大众中有九十九百千万亿诸天及人，得奢摩他顺忍，八万四千人得空顺忍，如是六万天人得空三摩提解脱法门，二万众生皆得诸佛现在三昧，无量众生得须陀洹果，八十四百千比丘得无漏道。

尔时，佛告憍陈如言：“若复有人自观头骨，心若不停及不乐者，是未调伏。既未调伏亦复不能得于解脱，彼人尔时应当更诣尸陀林所观察死人，或见青瘀肿胀血涂，或见脓流处处淹渍，皮肉烂溃筋脉相交，禽兽往来争共啖食，或见白骨其色如珂，髑髅差移手足分散；见是相已，当熟察心乐住何处，知已即观常念不舍，一切外色败坏若斯，自揆我身亦应如是：始从青瘀臭处腥臊，终至白骨支离消散。心常专念勿使他缘，若住若行，若坐若卧，勤修观行滑利流通，昼夜相续不令驰散，闭目开目恒使分明，从少至多内外洞彻，如是展转乃至山河、草木丛林、人畜等物，皆作骨相亦复如是，于四威仪常

见自身骨具等事，未曾舍离。如是心住不动如山，于一缘中常定无乱，不净念等悉具足满。彼人尔时于此身中作是观已，乃至命终不起染心，于现在时能离贪欲，他世未能。此人若得顺虚空陀罗尼，即能观骨作离散相，如是念已，四方俱时皆令风起吹此骨身，皆悉磨散使如微尘；如是自身风因缘故皆作尘已，一切诸色、一切大地亦各以风因缘缘故散如微尘；如是作已，身及万物悉皆随风，尘飞消散都无所见，犹如虚空离诸言说。如是观已得虚空相，见一切物如青琉璃，数数修习，如是等念令不驰散。如是观已，复观虚空作于黄色系心忆想，亦令成就无分散意；如是观已，复观赤色想念赤色；观赤色已，复作白色想念白色；观白色已，复观紫色；紫色成已，观玻璃色。于虚空中作如是念：‘如是万法，色及地等一切诸物，皆见青色及玻璃色令不驰散。’作是观已次作水想，亦见青色及玻璃等一切诸色，皆见于水更无余想，唯见大地如四指许，余皆为水。彼人见是四指地已便无增减，复作是念：‘我于今者当以足指动此大地。’使令动转随意久近，若欲令于少分动者即随所念；如是动已，乃至能令诸山、大地、大海江河，一切随动出大音声，其声远彻闻于余方。复观诸水有种种色，或优钵罗华、拘物头华、钵头摩华、分陀利华，如是种种一切诸华皆随念见。复观虚空皆作地想，于其地上行住坐卧俯仰屈伸。复观一切土石诸山作种种色，事形细软如兜罗绵，于其山上回转去来经行宴坐。彼人尔时作如是等诸外观已，悉皆放舍还更摄念，复自观身作轻微想，更增修习令其成就，如兜罗绵随风飘散，作是观已，于虚空中行住坐卧。是人复入火光三昧，身现种种妙色光明，青黄赤白及玻璃色。又复游入炎摩迦定，于身上下互出水火，乃至地中现于出没，如鸟处空无诸障碍，日月威力有大光明，能以手摩不生惊畏，又复身上到于梵天。作如是等现神变已，复随所乐作如是念，于其身内或青、或黄、或赤、或白，或复见紫及以玻璃。复作是念：‘我当云何得见诸佛？’随其方所皆悉睹见。彼人尔时若欲见小随念即见，若欲见大亦随念见，乃至充塞遍满虚空。复作是念：‘是等诸佛，无所从来，去无所至，唯我心作。于三界中，是身因缘唯是心作。我随觉观，欲多见多，欲少见少。诸佛如来即是我心。何以故？随心见故，心即我身，即是虚空。我因觉观见无量佛，我以觉心见佛知佛，心不见心，心不知心。我观法界性无牢固，一切诸法皆从觉观因缘而生，是故法性即是虚空，虚空之性亦复是空。我因是心见种种色青黄赤白，一切杂色及以虚空。’种种示现作神变已，所见如风无有真实，但妄想心依止于色，是则名为共凡夫人顺四谛陀罗尼。”

佛言：“憍陈如，何者名为不共凡夫四谛顺陀罗尼？若有人能作如是念：‘此虚空者不可捉持，无有觉观不可宣说；心亦如是犹如虚空，不可捉持不可宣说。如是二种，皆悉虚妄忧愁恼乱，犹如火烧虚诳斗争。我今舍离是空色等，一切诸念乱想觉观。’如是舍诸虚空色等虚妄觉观一切心已，心不复生，离诸念故心得寂灭，得寂灭已更不复

生。何以故？心缘灭故是心便灭，身心释悦悉皆舍离，以舍离故身得安隐，舍觉观故口离语言，心安一缘修习灭定。是人尔时一日一夜，入于如是寂灭三昧，如意自在经无量亿百千万岁，于是三昧堪忍不散，从灭定起舍有漏法及其寿命，入于涅槃。此名无漏不共凡夫四谛顺陀罗尼第一解脱门。”

佛复告憍陈如：“云何名为共凡夫人四谛顺陀罗尼？若有人能作如是念：‘我随觉观观如是色，观如是我，我心即色，色即我心。若我远离一切色相观虚空相。’是人尔时修虚空相，即入无量空处三昧。此则名为共凡夫人顺四谛陀罗尼义。若有人能作如是念：‘色即是空，我以此色因缘空故，得见虚空。何者境界是虚空相？虚空之性名无障碍是风住处，如是风者是四大相，我色亦尔是四大摄，此二法者无有差别，心亦如是犹如虚空。’复作是念：‘此四大者以何为体？一切诸法性自空寂，自他等性亦皆空寂。夫虚空者即无所有，不生不灭，无处无家。’作是观时系念诸佛，既系念已，见虚空中有无量佛，一心念已得阿那含果。此则名为不共凡夫四谛顺陀罗尼第二解脱门。

“复次，行者作如是念：‘何者境界是虚空相？复何因缘名为我相？’行者自念：‘言虚空者即是我也，即是净我，即是我心。我者无色如虚空无边，我亦如是。’此则名为共凡夫人如实陀罗尼。若有能观一切法空无我我所，言空处者即是无我，色亦无我。若观如来即是我，我见佛已，得须陀洹果、斯陀含果、阿那含果，乃至一切有漏法尽得阿罗汉果。此则名为不共凡夫四谛顺陀罗尼第三解脱门。

“复次，行者若观于我清净不浊，即是空处，空即我心。若能永断一切烦恼即是净心，若能修习八直正道是名净心，作如是学，即能获得须陀洹果乃至证得阿罗汉果。此则名为不共凡夫四谛顺陀罗尼第四解脱门。

“复次，行者若有欲观于色相者即分别相，分别相者即是瞋相，瞋恚相者即生死相，我今为断生死相故观心相空。此则名为共凡夫人四谛顺陀罗尼。行者若观于我即是寂静，我今亦未断于觉观。若观于我及我我所如观虚空，我我所者即是苦也，苦所从生即名为集，如是苦集是可断法是名为灭，观苦集灭是名为道，得须陀洹果、斯陀含果、阿那含果，乃至获得阿罗汉果。此则名为不共凡夫四谛顺陀罗尼第五解脱门。

“复次，行者作如是念：‘何以故？我今已观此虚空相，夫虚空者即是我。我若远离虚空观者，次观识处。如虚空观，识观亦尔；如虚空处无量无边，识亦如是无量无边。此则名为共凡夫人四谛顺陀罗尼。行者若念识名为想，亦名觉观，识即是苦，知苦所从名之为集，苦集可断是名为灭，观苦集灭是名为道，得须陀洹果、斯陀含、阿那含、阿罗汉果。此则名为不共凡夫四谛顺陀罗尼第六解脱门。

“复次，行者若观识处即是觉观，如刺入身，如疮如病，如我前时远离空处，离空处已亦离识处，离识处已修无想处。是人尔时得无

想已不缘一法，即得住于无想三摩跋提。此则名为共凡夫人三摩跋提。若观识处即是疮痍苦恼之法，如病如痛，如我远离观于识相；次观无想，言无想者即是无我，无我我所想，观念清净大般涅槃。作是观时，即得须陀洹果、斯陀含果、阿那含果，乃至得于阿罗汉果。此则名为不共凡夫四谛顺陀罗尼第七解脱门。

“复次，行者若有能观无想处者，即是细想。如我远离是无想处，观非有想非无想处亦复如是。此则名为共凡夫人如实陀罗尼。若观非想非非想处即是大苦，是处可断可得解脱，作是观时，彼人即得须陀洹果、斯陀含果、阿那含果，乃至得于阿罗汉果。此则名为不共凡夫四谛顺陀罗尼第八解脱门。

“憍陈如，此陀罗尼有如是等不可思议种种利益，又能除断一切欲贪、一切色贪、一切非色贪，离凡夫位得圣人法，永断一切三恶道因，于当来世不更受于地狱、畜生及以饿鬼，是名四谛顺陀罗尼。汝今当知，此即是彼瞻波迦华色如来所遣，日行藏菩萨所赍持欲。我今在此说大集经，是故彼佛送此欲来。此陀罗尼能断一切诸结烦恼，又能永尽一切结恨、诸增上慢及我慢等一切嫉妒，能却世间一切家业、一切戏笑，能断一切我见、一切疑见及婆罗多触，能断一切常见、断见、寿命见、遍沙见、富伽罗见、作见、知见、一切色见乃至触见、一切生见、一切四大见，能断如是一切诸见，能知一切五阴、十二入、十八界等，能令受者得涅槃乐，能坏众魔调伏恶龙，能令一切诸天及诸夜叉皆生欢喜，能怖阿修罗及迦楼罗、紧那罗、摩睺罗伽，能坏一切恶邪外道，能悦一切刹利、婆罗门、毗舍、首陀罗，能令一切多贪妇女念于少欲，能令多闻人心生欢喜，能令坐禅人乐阿兰若，能疗一切诸恶重病，能却一切斗争、饥馑、疾疫凶衰及诸横死，能除外贼、恶风恶雨、恶水瀑河、非时寒热、种种苦辛粗涩恶味，能光法母建立法幢，绍三宝种使不断绝，又能安慰生死流转恐怖众生令其快乐，能生尽智证无生智，能裂无明破诸闇聚，能舍苦担入于涅槃。”

佛说此四谛顺陀罗尼忍时，无量无边阿僧祇众诸天及人，远尘离垢，于诸法中得法眼净。九十六亿那由他众生，舍诸烦恼心得解脱。八十亿百千那由他众生，得此四谛顺陀罗尼。无量无数阿僧祇众生，发阿耨多罗三藐三菩提心，亦复得于不退转道。四万二千众生，得无生法忍。一切天、龙、夜叉、罗刹、阿修罗、迦楼罗、乾闥婆、紧陀罗、摩睺罗伽、薛荔多、鸠槃荼、毗舍遮、人非人等皆悉赞言：“善哉！善哉！无上世尊，言音微妙不可思议，最胜难量不可称说，无慧眼者为出智光，苦担众生能为除却，于流转海作大船筏，如是善巧无碍智说，谁有闻者不乐发于阿耨多罗三藐三菩提心？”

尔时，长老阿若憍陈如白佛言：“世尊，云何名为日眼莲华陀罗尼？如日行藏菩萨摩訶萨之所宣说，智者受持读诵书写得大利益，于三界狱不生乐想，得无相三摩提解脱门，得无所有处三昧，得双头灭结。若有闻者能薄烦恼，七返常受人天之身，于人天中能得圣道，不

为贪欲之所染污，诸天世人常所恭敬。”

佛告憍陈如：“谛听！谛受！精勤用心莫生疲懈。汝所问此日眼莲华陀罗尼者，非是一切声闻、辟支佛心行境界。何以故？此陀罗尼乃至清净十八不共佛法力生。憍陈如，若我今于百千万劫，说此日眼莲华陀罗尼终不可尽，亦令闻者一切天人心生迷闷。此陀罗尼，唯佛能说，唯佛能听。何以故？此陀罗尼有无量义难知难觉。如日眼莲华陀罗尼，自余三方无尽根陀罗尼、智依止陀罗尼、恶睡眠众生陀罗尼，亦复如是。”

憍陈如白佛言：“世尊，唯愿说彼南方山王如来香象菩萨所送空顺陀罗尼。”

佛言：“如是，如是，至心谛听，当为汝说。憍陈如，若有众生触欲因缘惛醉迷乱，不知解脱醒觉之处流转生死，于无量劫在三恶道，受诸苦恼不可堪忍。菩萨摩訶萨大慈悲心，见诸众生受如是等无量苦恼，起大精进修行诸道，修行道已得阿耨多罗三藐三菩提，得阿耨多罗三藐三菩提已说出苦道。若有众生能至心听如说顺行即得脱苦，得须陀洹果乃至阿罗汉果。”

佛告阿若憍陈如：“云何触欲？若有众生和合欲事，因和合故则生于触，因触生乐，因乐生苦；苦因缘故，生死苦恼从是而生。憍陈如，如四毒蛇，以四因缘能害众生，所谓见毒、噓毒、啗毒、触毒；如是一切念欲众生亦复如是，有见因缘，有闻因缘，有念因缘，有触因缘，以是四缘，令诸众生远离一切诸善根本，于生死中受大苦恼。”

佛告憍陈如：“云何名为触欲解脱？若彼行者作如是念：‘以何方便得离触欲？’复作是念：‘若我能观骨琐远离贪欲，是则名为最胜方便。’作是思惟：‘色者即是四大所造，四大所造即是无常，性无牢固破坏离散。皮肉发抓脓血筋骨，智者终不于是身中生净好相。’作是观已，若昼若夜悉见一切十方清净犹如珂贝；见是事已，即时获得一切世间不可乐想。如是行者复作是念：‘我此生死烦恼鼓作，我于此想若乐修者，则能断除一切烦恼生老病死。’如是行者于一切骨正觉观已，一心正念不失不动，此名奢摩他。如是次第正观头骨乃至足骨，一心正念不失不动，此名毗婆舍那。复作是念：‘以何方便得破生死？’作是思惟，观于口鼻和合出入风方便故，破生死鼓。如是行者自观身骨，犹如碎末为风所吹，于自身中骨想皆尽不见身相；如是观时远离身相，生于空相不见内法，此则名为第一空门。复次，行者于自身中复更思惟：‘一切外色风力所坏。’作是观已，于此内外一切诸色不念不见，此则名为第二空门。复次，行者作如是念：‘我今不见一切内外诸色相貌，皆是空力。我今定知，一切诸法无有去相，无有来相。’作是观时，一切觉观悉皆永断，此则名为第三空门。复次，行者作如是念：‘识为大罪。’复观是识知是一切觉观因缘，‘我当速离心意识行。何以故？若有集法当知定灭，一切有法体非真实，一切有法性是寂

灭。’此则名为第四空门。作是观时，得须陀洹果乃至阿罗汉果，或有获得法顺忍者，或有获得菩提证者。复次，行者若观觉观是灭相者，即得灭定。此则名为不共凡夫空顺陀罗尼。是陀罗尼成就无量一切功德，有大力势能大利益，永断无量诸大苦恼，善能除断一切欲贪、一切色贪乃至一切想非想贪，能舍一切烦恼苦担。此即是彼山王如来香象菩萨摩訶萨所送，以我说此大集经故，彼佛送此陀罗尼欲。”

说此法时，九十二万百千众生得须陀洹果。六百万诸众生等不生烦恼，得无漏道慧心解脱。九十那由他百千众生，于初学中得此空顺陀罗尼。八百万诸众生等，得辟支佛证智定心。六十六频婆罗众生，发阿耨多罗三藐三菩提心。无量众生亦得住于不退转道。一切大众皆赞善哉，天雨杂华并散香末。

尔时，憍陈如复白佛言：“世尊，唯愿如来，为我说彼智德峰王佛，遣炎德藏菩萨摩訶萨所送无愿顺陀罗尼。”

佛言：“如是，如是，憍陈如，至心谛听，当为汝说。有诸众生处在世间，爱乐于欲，昼夜贪味不知出道；不知出故，于流转身受大苦恼。是人应当观于无愿解脱法门，作如是念：‘欲欲、色欲及无色欲、触欲、解欲，如是等欲因觉观生，诸行因缘和合故有。’复次，行者更如是念：‘如是诸行无有作者，无有受者，因风造作故有。于我身口意行亦复如是，因风而生，因是风故身得增长，因是风故口得增长。’复作是念：‘若身口意因风造者，我当碎身令如微尘。’如是念已谛自观察：‘我此身中入出息即同彼风。’谛观一切身诸毛孔，从风因缘故有生死。复观一切不净之物，肉血发爪因风故成。复观是身命终之时，是尸更无风息入出。复作是念：‘我身口行因缘于风，若无风者无身口行。’是故尔时得空三昧修集增长，因修集故一切有本叶薄华萎，乃至渐渐能断欲贪及以解欲，作是观已得须陀洹果乃至阿罗汉果，或有发阿耨多罗三藐三菩提心。复次，行者若心乱时，应如是观彼欲因缘，念种种色乃至念天。以是心散，时彼行者更如是念：‘若我一切诸生处中，欲未断故此心更生。譬如伐树，不去于根唯却枝干，不除根故其树更生；爱亦如是，爱入未断能生诸苦。’复次，行者不念于取，一心专修，乃至我身，骨琐雪白色如珂贝悉皆筋连；见骨琐已，是时若眼中见内外色，或复见彼一切皆空，但骨琐连色白如贝不增不减。时彼行者，如是念已不失于心，此名奢摩他。复次，行者若如是学，此我头骨、齿骨、项骨，乃至此是我脚指骨，如是念者坐不得禅。何以故？以有奢摩他、毗婆舍那两种念故，心不得禅。时彼行者，摄念缘中心住不动，欢喜快乐速疾得修，若独念一毗婆舍那心正住者，应当速疾念彼骨琐专系思惟。此行若明，更好观察骨相成尘，磨灭分散随逐因缘。作是观者，此名毗婆舍那顺忍觉。若一切骨离垢色白，碎末为尘与心和合，如是思惟，此名生顺忍觉。若彼行者观一切色，离垢洁白及骨成尘，离我和合心识去来，如是观者，此名无我尽顺忍觉。若一切色为识境界眼中来者，离垢净白及以骨尘，作如是

念：‘彼不可说，不可捉持，亦不停住。’如是念者，此名奢摩他顺忍觉。如是行人，得此顺忍觉因缘故，于三世中现在未来，一切贪欲悉皆除灭及尽三有，于三界中脱三垢缚，即得入于三解脱门。如是念已，得须陀洹果，乃至如是一相念者得阿罗汉果。复次，行者，观一切色，及以骨琐犹如珂贝，离垢筋连见骨琐已，时彼行人心定不动；若心不动，行住坐卧常系一缘；如是念者，名奢摩他调柔修习。时彼行人，复更内外观察于空，念内外空得入三昧，观一切色悉皆青相，念此骨琐亦作青色。见诸骨琐作青色已，时彼行人复作是念：‘谁作此色及骨琐青？谁造谁安？’乃至琉璃及玻瓈色。作此思惟分别想已更如是念：‘此青色者心因缘见，是虚妄见，非是实见。’如是念已，知法从缘精勤修习，于诸世间常为众生礼拜供养。”

佛告憍陈如：“此无愿顺陀罗尼义，除不乐想，及除食中诸颠倒想，是彼智德峰王如来遣炎德藏菩萨摩訶萨所送来欲。”

尔时，座中有菩萨摩訶萨，名正念智，白佛言：“世尊，若诸声闻修不净相及奢摩他，得成相已有何等相？”

佛言：“善男子，若为破坏贪欲之结，修不净念系心眉间，自观己身三百碎骨，如是相出及不净念，于是时中彼行人身亦热亦动，此名初相。得是相已，乃至常观彼如是相，见自己身淫触等相及以他身亦复如是，名第二相。又彼行者修不乱心，一切悉观亦皆不净，名第三相。是人能观苦集尽净，名奢摩他。行者身中如是相出得于暖法，如温乳汁灌澍身心，此则名为不动心相。时彼行者若有心中乐如是相，当舍念心，此相清净贪染，自除无明污心，智慧断故。行者如是观白骨时，念此骨相乃至寂灭因缘故，有如是观察，即见一切身中暖出。此如是相，若奢摩他得具足满，此则名为暖相善根。行者尔时缘于过去福德善根，今作此修心行清净，见智如灯内心自知。复次，行者观身四行，从于琐骨乃至微尘洞彻明了，如自额中睹于灯炎，见一切色及以自心并心数法，尽分别知。譬如窗中日光明照，微尘回转无暂时停，一切有为譬如尘性。作如是念，乃至世间一切有法见无我见寂灭实智。行者尔时得顶善根，是名顶法。复次，行者得顶法已，更自观身，或见火出，或见火燃，或见大光满十方。从初禅地乃至四禅善根所生，如是色阴微妙四大，彼行者身亦如是得所见身色，满足禅乐不异于天。时彼行人，更从心里复出日光，见于十方处处日轮皆悉遍满，见是相已不生心念，是时得入空三昧中，复见顶上种种色出犹如伞盖，此名顶相功德善根。复次，行者，不取缘相四谛顺忍，尔时彼中得四谛证。善男子，此名声闻修习不净正念因缘，不净正念因缘成已得奢摩他，是名白骨灯光观相。复于彼中，如是相生亦见是相，见是相已得欢喜心，欢喜因缘得八正道，因八正道能断一切烦恼爱结，得须陀洹乃至阿罗汉果。善男子，汝自刹中胜炎佛土，声闻之人若富伽罗乐阿罗汉，观如是法不净因缘即得道果。”

说此不净解脱法时，无量无数无边众生证得四谛如法顺忍，乃至

无量无边众生得如实现果。

尔时，世尊复告阿若憍陈如言：“善男子，若一切众生共同一心，其四真谛可以一念而证得者，如来应为一切众生演说一行一法一事，亦不应有八万法聚，随逐因缘差别之异。若一人证时，一切众生亦应同证；若一人断时，一切众生亦应同断；不应别有声闻三乘，不应别有菩萨十地。何以故？烦恼同故，断时证处处所是同。憍陈如，是故众生应以种种因缘调伏，不以一缘及以一事。”

“憍陈如，若一切众生觉观未尽，如是时中一切有法大疮大刺种种有生，种种生中有法增长种种相、种种色、种种心。时彼行者如是思念，若欲自心乐心取相，观此骨琐心和合生。彼念因缘，作此初心次第思惟，如是必定得涅槃道果证不难，又见此身得乐因缘不退转故。复次，行者作如是念：‘何缘故心和合生？’彼因缘故乐说方便，能知是者，此则名为第二胜心，现见法乐，住必定心得不退转。复次，行者如是思念：‘我今此心几许因缘和合共生？处处觉观攀缘取舍，如是身心有乐受故，或妄想住。我于彼身心乐寂灭。’又如是念：‘若我因缘和合故生，缘骨琐故，身心安乐乐已还灭。’若彼行人生于眼识乃至意识，生及住、灭方便因缘亦皆寂灭，作如是念，此则名为第三胜心现见法乐，必定不退得涅槃道，以是因缘及得四果不久不难。复次，行者作如是念：‘若我此身一切法界，通达方便清净体性，亦非体性寂灭方便住。’复如是念：‘我一切心相寂灭方便住，又一切心相觉观想灭寂静心住。’此则名为第四胜心，现见法乐，如是必定得涅槃道，身虽未证欲证不难。”

“憍陈如，如是四种最胜尚心和合现时，即得明见八十四百千三摩提行门；见是行已得阿那含果，乃至得阿罗汉果。尔时又得二种解脱，有大势力，具大神通，为诸天人礼拜供养。憍陈如，一切众生非实一乘、一行、一贪、一念、一欲、一解、一信，是故如来宣说种种句偈名字种种法门；以是义故，如来具足十种神力。憍陈如，一切众生具有种种颠倒之想，是故如来为净众生颠倒想故，说无常想、或乐苦想、或无我想、或乐死想、或膨胀想、或乐烂想、或乐脓想、或青瘀想、或乐种种虫啖食想、或乐臭想、或乐骸骨离散等想。”

尔时，阿若憍陈如重白佛言：“世尊，云何名为一切世间不可乐想？云何复名一切世间食不净想？”

“憍陈如，汝今不应问如是事。何以故？我此刹中，别有方便得涅槃道及四果法。彼刹众生根性不同，信心行别，方便力别得涅槃道，国界既殊其相各异。憍陈如，若我具说如是之法，唯除得无生忍菩萨摩诃萨能信受此，其余众生闻即迷没。”

时，憍陈如复白佛言：“世尊，唯愿怜愍，为诸菩萨能信解者分别宣说。世尊，是诸众生，若闻宣说一切世间不可乐想及以食中不净想等，听闻如是二种相已，能生种种上妙善根，能破无明种种障碍。一切众生爱入和合痴见缠缚如揭头罗，于流转中处处受生，于流转中

处处造行。又过去际诸流转中不可见知，以是因缘乐于生死，是故生死无有始终。何以故？一切众生在流转中，不闻如是食不乐想，以食因缘增长贪欲；又不闻于此法门故，是故五处流转受生困苦疲极。如來世尊大慈大悲，无量世中常念众生，唯愿如來怜愍故，说此具足满无愿顺陀罗尼。”

大乘大方等日藏经卷第六

恶业集品第五

尔时，世尊告憍陈如言：“善男子，彼智德峰王如來，愍此世界五浊众生及天人故，命彼焰德藏菩萨摩訶萨送此欲来，为欲安乐诸众生故。”

时，憍陈如重白佛言：“世尊，如是，如是，惟愿如來广演分别一切世间不可乐想、食不净想。若佛宣说不可乐想、食不净想，众生闻者，能舍欲贪不著诸味。世尊，若有众生能于诸欲及饮食中皆生怖畏，于此二事生厌离心，苦切呵责应修清净，当知是人越流转河速到彼岸，能得解脱诸有系缚。”

佛言：“憍陈如，如汝所说一切世间不可乐想、食不净等，对诸天人及余大众，如智德峰王如來无愿顺陀罗尼，焰德藏菩萨摩訶萨所送，汝至心受。”

憍陈如言：“唯然世尊，我今谛听。”

佛语憍陈如：“云何名为一切世间不可乐想？”

憍陈如言：“世间者凡有二种：一者、众生世间，二者、器世间。云何名为众生世间？所谓五趣众生，天、人、饿鬼、畜生、地狱，此名五趣众生世间。器世间者，欲界之中有二十处、色界十六、无色有四，此四十种，名器世间众生住处。

“欲界之中有二十处者，第一谓于八大地狱，一一地狱四面各有十六隔子以为眷属周匝围绕，彼中观察生不乐想。云何名为八大地狱？一名一死一活地狱，二名黑绳地狱，三名众合地狱，四名叫唤地狱，五名大叫唤地狱，六名热地狱，七名大热地狱，八名阿鼻地狱。若过去、未来及现在世有诸众生，自身口意造诸恶业故，生于彼大地狱中，经无量劫备受种种百千苦恼。彼地狱中设睹妙色，以心逼切不生乐想，以见因缘无乐想故复生大苦，如是转转从一地狱至一地狱，苦中极苦不可堪忍不可言说；若耳闻声及鼻嗅香、舌尝其味、身中觉触、心缘诸法亦复如是。彼一切心不爱乐不曾欢喜，一切不好无一可意，身常火燃，食热铁丸，饮融铜汁，所有触处悉皆是火，不可忍耐极大苦受。彼诸众生以其恶业未毕尽故如是不死，乃至一切未受果报亦彼中生，次复人中身口意行造恶业故亦彼中受。憍陈如，世间众生多乐于乐，不乐辛苦，彼地狱中谁欲乐入？此名最初恶业地狱众生

所住之处，智慧之人观是事已生不乐想。

“憍陈如，何者名为第二所居畜生生处，观察彼已生不乐想？憍陈如，畜生之中身有差别，或有众生其身大者，如析一毛以为百分如一分许，有于如是不可思议微细之身，复有众生身如窗中游尘，复有众生身如十千由旬；复有众生寿命如一时顷，复有众生寿命如七时顷，复有众生寿命一劫，乃至百劫千万亿劫。以恶业故在彼中生，不乐善法，不种善根，无有法行亦无智慧，无惭无愧无慈悲心，常受苦恼生大怖畏，各各互生相害之心，远离一切诸善之法，常行不善，无明黑暗嶮恶道中造地狱业，起瞋忿心不乐福德，是报熟时恶道中受，下身下心生如是处，常受种种饥渴寒热、捶打乘骑，负重困乏，领穿背破，蚊虻毒虫竞相啖食，如是苦恼无量无边，何有智人乐于彼处？智慧之人观是事已，于畜生中不生乐想，是名第二恶业众生畜生住处。

“憍陈如，云何名为第三所居饿鬼生处，观察彼处生不乐想？憍陈如，饿鬼之中身有差别，或有饿鬼身长一尺，或有饿鬼身量如人，或有身如千踰闍那，或复有鬼身如雪山。彼诸饿鬼裸形无衣，被发自缠黑瘦羸瘠，唯皮裹骨肉血都无，身体粗涩犹如枯树，恒苦饥渴思念饮食常不能得，口内火燃焰出于外，心常瞋忿无有慈悲，热闷惶惶求凉不得，又为饥渴之所逼切，饮销铜汁食烧铁丸，及诸热恶臭烂脓血，热屎、热尿、热粪、热浆及诸热风或复热雨，一切草木江海河池，树叶华果所食之物，求觅甚难恒不能得。设复得之，或经千年或百千年，如是寿命常受苦恼，行住坐卧黑闇无明，何有智人乐于彼者？智慧之人观是事已，于饿鬼中不生乐想，是名第三恶业众生饿鬼居处。

“憍陈如，云何名为第四人间所居之处，观察彼处不生乐想？憍陈如，有智之人次观人中，一切皆有种种诸苦，所谓生苦、老苦、病苦、死苦、爱别离苦、怨憎会苦、求不得苦、五盛阴苦，饥苦、渴苦、贪苦、瞋苦、妒嫉等苦，妄言、绮语、两舌等苦，恶口骂詈、诽谤等苦，寒苦、热苦、恶风恶雨疫蝗等苦，毒恶禽兽伤害等苦，恶世恶王牢狱等苦，贫穷下贱短命等苦，既念此苦更生重苦，缘苦生苦还造苦因，于未来身复受苦报，如是转转无量无边，受诸辛苦无有穷尽，何有智者乐于彼中？是名第四众生人中居处，智慧之人观是事已，于人道中不生乐想。

“憍陈如，云何名为第五所居欲天生处，观察彼处生不乐想？憍陈如，有智之人观初欲界有于六天，是中众生常乐欲事欲爱所缠，所受果报差别不等生于苦受。或复果报胜劣不同，或上或下，其下果报见上果报，耻愧羞惭常生苦受。或于过去修福来者今得生此，果报将终福德欲尽，如是念时则生苦受。或复种种有所为作，勤劳辛苦故生苦受。或所爱人玩弄之物，分张离散故生苦受。一切福德果报毕尽，见好处所心生爱乐，既不得往生大苦受。又知业行堕堕恶道畜生、饿

鬼及地狱中，以如是故倍大苦受。如是种种无量诸苦，何有智者乐于彼处？此名第五欲界六天受报处所，智慧之人观是事已，于彼欲天不生乐想。

“复次，憍陈如，云何名为色天中不生乐想？智慧之人观彼色界十六住处一切诸天，修于世禅得生于彼，因既有为是有漏法，苦未尽故，不得寂灭心意快乐及于种种其余胜乐，是故苦受。又未到于乐彼岸故，是故在此苦流转中不知出道，以是义故三恶趣中未得解脱，是故苦受。何有智者乐于彼处？此名第六有漏色天，智慧之人观是事已，于彼色天不生乐想。

“复次，憍陈如，智者观彼色界众生，如是修习无漏禅故得住彼天，以未具足满八正道，是故苦受。为八正道欲满足故精勤方便，是故苦受。一切无学三摩提地，心未得故生于苦受。彼辟支佛诸陀罗尼，未自在得故生苦受。于诸如来三昧境界，未自在得故生苦受。一切众生境界皆苦，如是众生于色界中，若欲双头入般涅槃，如上所说种种诸苦具足受之，何有智者乐于彼处？是名第七无漏色天，智慧之人观是事已，于色天中不生乐想。

“复次，憍陈如，云何名为观无色天不生乐想？智慧之人观无色界四种天处，以能修习有漏三昧，故得生彼一切漏中未得解脱，是故生苦。一切学地及无学地未得自在，是故生苦。不得听闻诸佛正法，是故生苦。一切爱欲未毕竟断，于流转中不得自在，是故生苦。彼处寿终不得胜趣生于邪见，如是大苦一切三恶烦恼业道未能永断，如是生苦。一切三恶道中未得度脱，如是生苦。何有智者乐于彼中？是名第八无色四天，智慧之人观是事已，于无色天不生乐想，故得出于一切有狱，及离一切诸有中。如是八种和合观时，智慧之人乃能获得，虽不生心而常至心修八正道。憍陈如，此则名为一切世间不可乐想。

“复次，憍陈如，言世间者即名为行，云何智者于行世中不生乐想？行有三种。何者是三？一者、身行，二者、口行，三者、意行。云何身行？身行者谓气息出入，是名身行。云何口行？口行者所谓觉观言说，是名口行。云何意行？意行者名为想受，是名意行。是名三行，此三种行其相如是。一切众生一种心想，智者云何能分别知？于身口意生不乐想。智者观身出入气息取九十九数时，深观息之凉暖和合方便，一切身分出入气息，彼一切身出入气息从口鼻中，乃至一切毛孔道中气息出入。是人观息谛知是息，本无有生亦无有灭，若本来无今始有者，是无常想无决定相，如水上泡，如空中霆。如是观时，一切行中得身行相，观如是相从何因缘？即知是相因于觉观，觉观之性本无今有，是故无常，是可断法，是解脱法，而是觉观因妄心生，而此心性本无今有，本无今有是无常相、可破坏相、无归依相、无有物相、无有我相、无有实相。作是观时，于诸行中心则生悔，能修世间不可乐想。复次，智者若能深观如是三世，则能永断一切烦恼十二

入等，能净正见，断除流转相续之法，成平直道正聚所摄。作如是等方便修时，决定能得须陀洹果乃至阿罗汉果。憍陈如，是名智者于诸行中得不乐想，以是义故，名不乐想方便攀缘。

“复次，憍陈如，云何智者观所著衣作不乐想？憍陈如，若智慧人观于衣裳，或造或缝，或割或染，及成就已在其身边，或见或摩，或著或脱，如是想念此如人皮，见新色衣作血涂想，诸恶臭虫之所居停，蚊虻蛆虱不净充满，智者见已不生乐心。如是，憍陈如，此名智人于衣服中得不乐想。

“憍陈如，云何名为智慧之人观于食中得不乐想？憍陈如，若有行者执持钵时作如是想：‘此之皿器如剥发皮脓血所污，不净髑髅烂臭可恶，诸蝇蛆虱遍满其中无可贪者。’若见食时应观是食，如死尸虫秽恶充遍。若得糗者作如是观，此糗糲尘犹如骨末。若得于[𦵇-夫+并]，应观是[𦵇-夫+并]作人皮想。如是得臠或复得浆，得粥得羹如是想念，此如脓血或大小便，或如人脂，或如人脑。若得种种众杂菜茹，复作是观，此如马髦，或如人发。若得萝卜齏者，复作是念，此如人齿。若得肉者，作如是念，此如人肉。得白石蜜、或黄石蜜、或蒲桃饮、或石榴浆、乳、酪、醍醐、生熟苏等，作如是念，此如人血，或如人脓、或涕、或涎脑髓唾等。如是恶露臭处难看，智慧之人于是食中不生乐想。

“复次，憍陈如，云何智人于房舍中生不乐想？智者如是入诸堂宇房廊屋室，或楼阁中，入已思惟应生怖畏：‘我今入此外有四门，如大地狱焚烧我身。’若见屋梁椽柱脊檩，如是观察此之材木共相撑柱，犹如人身一切碎骨，见泥泥壁如肉覆骸，见画庄严如血涂漫，又观种种床蓐铺席犹如人皮，又观坐卧眠止处所，或如骨锁，或如死人，如是种种饮服汤药丸散煎膏，皆作是想起诸厌离。憍陈如，是名智人一切食中得不乐想，如是念已得何利益？即能获得三种顺忍。何者三忍？谓空顺忍、无相顺忍、无愿顺忍。是人如是得三忍已乐修空想，因修空想住是空中，见一切法悉皆是空；入是空已复得利益，能知生灭方便利行。如是阴界无常、苦、空、无我、不净，见十八界及十二入，乃至四谛、十二因缘，一切法性苦、空、无常及以无我，如是念已得须陀洹果乃至阿罗汉果，得解脱相。

“复次，憍陈如，此三摩提无学解脱，如是利益一切世间不生乐想，善能除断一切欲贪、一切色贪及非色贪、一切疑慢、一切调戏、一切无明，又能安置于无学地。憍陈如，此名二种一切世间不可乐想，如是种种名具足满无愿顺陀罗尼微妙之义。此陀罗尼有大势力，能除欲、色、非色调慢，能证尽智及无生智，能裂一切黑暗罗网，能舍一切苦恼重摧。以我说此大集经故，彼智德峰王如来，命焰德藏菩萨摩訶萨，手中送此无愿顺陀罗尼欲来。憍陈如，是陀罗尼能摧一切诸恶魔等，能胜一切毒害龙众，诸天敬信倍更欢喜，夜叉顺奉生大踊跃，诸阿修罗内心怖畏，又能恐惧迦楼罗王令紧那罗生于爱乐，摩睺

罗伽自然摄伏，能破一切邪见外道，令刹利王生欢喜心，诸婆罗门信心增长，又令毗舍及首陀罗悉生欢喜，能令多欲女人贪心止息，令多闻者进益受持，坐禅行人乐阿兰若，能除一切种种诸患，能却一切斗争怨家，饥馑非时、外贼横死、恶风雷雨、暴水灾霜、寒热苦辛、粗涩味触如是变怪悉能消除，光赞大乘绍三宝种，照耀佛母竖立法幢，安慰流转怖畏众生，此名微妙无愿顺陀罗尼。”

说是法时，无量无数阿僧祇众生远尘离垢得法眼净，九十八频婆罗人得阿罗汉果，八那由他众生得彼无愿顺陀罗尼，无量无数阿僧祇众生发阿耨多罗三藐三菩提心得不退转，五百八十万众生得无生法忍。

尔时，一切无量大众，天、龙、夜叉、罗刹、阿修罗、迦楼罗、紧那罗、摩睺罗伽、饿鬼、毗舍遮、鸠槃荼、富单那、迦吒富单那、人非人等，异口同音俱称赞言：“善哉！善哉！大圣世尊不可思议，最大最妙不可思议！如来世尊得无碍智，明见我等于此阿耨多罗三藐三菩提中敢有不发欢喜心者。世尊如来知诸众生，善知诸根，知诸烦恼，知诸方便，知到彼岸，能令众生充足法味，能令众生见八圣道，能除众生担苦之担，能与众生乐担令担。我今一切天、龙、夜叉、阿修罗、迦楼罗、紧那罗、摩睺罗伽等一切合掌，各各如是齐心唱言：在在处处有佛世尊，说此四种无愿顺忍陀罗尼处，乃至国王、大臣、长者、沙门、婆罗门、毗舍等众，有能书写置此经处，或复有人能读能诵讲说之者，如是等处我等卫护加助威神，有所求须一切供养，礼拜供给彼说法人，不令乏少无有衰耗，不如意事、一切怨家不能得便，一切资生常使具足，身无烦恼得欢喜心，乐于法者我如是护。彼人终不更生恶道，以是因缘成于法器，一切供养得具足满。”

佛言：“善哉！善哉！诸大檀越，汝等今者欲护大法，因护法故三宝不断，未来之世当得无量福德果报。”

尔时，长老舍利弗于大众中即从座起，一心合掌前白佛言：“世尊，德华藏佛遣虚空藏菩萨摩訶萨所送奢摩裴多悉帝那恶业众生不信心者令彼睡眠陀罗尼欲，我及一切世间天人欲得闻知，唯愿如来广为宣说。”

佛告舍利弗：“谛听！谛听！善思念之，我为汝广分别说德华藏佛所送净陀罗尼欲。彼佛如来为此土诸众生等薄少善根多诸烦恼，以烦恼故起四倒心乐著我想，著我想故颠倒迷惑，流转生死失八正道，是故彼佛送此欲来。舍利弗，一切众生实无有我，此土众生颠倒心故横生我想。舍利弗，智慧之人深自观察知无有我，作是观时则破四倒。

“舍利弗，云何智者观于无我？所谓观身谛知无我。何以故？以和合故。复次，观眼亦无有我。何以故？眼识初生，如是观察至心思惟，或见种种服饰衣裳铺卧床蓐结跏趺坐，坐已摄念一切六根不相舍行，心不舍故如是可见，而此眼根四大合生，筋连水满余不能动。若

眼转时但是风力，风故能转，而彼风性因于虚空，出入根中左右回转，根清净故则能明见。而彼虚空性无所有有依止，不可捉持亦不可说，若无所有不可说者即是无我，是故虚空实无有我。是空中风亦复无物，以无物故不可宣说，是故无我。是风因缘亦入根中，左旋右转清净照了，彼风吹幻亦不可捉亦不可说，离于我所觅不可得。如是眼中地界牢固，如尼拘陀子，至心谛观观已拔出，碎末为尘吹令飞散，如是推求永不见我。如是决定知无有我，此地界中分析无我，彼地地相但有名字，不可捉持无我无主。如是次第观察水界及以火界犹如风界，如是思惟，既思惟已定知无我，故不复疑眼大中我。是故当知，眼之四大一切无物不可宣说，是故无我。若复有言眼识因缘故有我者，是义不然。何以故？眼中无我色亦如是，而和合中亦复无我，和合因缘生于眼识。如是识中亦复无我，风中空中悉亦无我，如是推觅竟不可得。此识但是十二因缘循环流转，离十二因缘识不可见，但因识生名色名为名色，名色因缘故六入生，六入因缘故触生，触因缘故受生，受因缘故爱生，爱因缘故取生，取因缘故有生，有因缘故生生，生因缘故则有衰老及以病死；如是等法因眼识生，而是眼识非东方来，南西北方、四维、上、下亦复如是。所因之念生眼识者，是念亦灭眼识不住，第二念中亦不语念‘汝住我灭’，而是灭法，亦复非去至十方面，亦复不专一处住止。是故诸法因缘故生，若离因缘则不得生。因因缘生，因因缘灭，如是因缘名相续法。是故当知，实无有我，而是因缘亦无作者、无有受者、无有起者、无他起者，是故无我。若无我者，我既是空，我所亦空。何以故？然体性尔故。是故眼性无我、我所，无有积聚非合非散，即生灭故。一切诸法亦复如是，一切法性无取无舍，非罗汉作，亦复非是辟支佛作，非菩萨作，非如来作。如眼识空，一切法空亦复如是，离我无我空故不见。作是观察无相无愿三种解脱空门之时，悉能除断一切悭贪及诸烦恼。如是念已，或有得于须陀洹果、阿罗汉果。观眼既然，耳鼻舌中亦复如是。

“复次，行者知身无我，次观于发，析一一毛以为百分，烧使成灰风吹散灭，如是一发体性既空，行人心疑自然明了。何以故？一发之中不见有我，如是皮中、肉中、血中、唾中、涕中、肠中、脑中、骨中、髓中、筋脉甲爪、喘息冷暖、上下诸风、寿命、名字皆无有我，直以因缘共相和合故名为身。如是思惟至心观已，知身触因故生身识，识因缘名色，名色因缘六入，六入因缘触，触因缘受，受因缘爱，爱因缘取，取因缘有，有因缘生，生因缘老死。彼一切法心识依止故生身识，而是身识非东方来，南西北方、四维、上、下亦复如是。所因之念生身识者，彼念灭时身识不住，第二念中亦不语念‘汝住我灭’，而是灭法，亦无处所，不见聚处，不见散处。是故诸法缘合故生，缘离故灭，有缘故生，无缘故灭。一切因缘相续故见，若离相续则不可见，是故当知实无有我，而是因缘亦无作者、无有住者、无有起者、无使起者，如是因缘不可得故，是故无我。若无我者，我所亦

无，是故身性无我我所，无聚无散，生灭法故。一切诸法亦复如是，彼法性中亦不可得无取无舍，非声闻作，亦复非是辟支佛作，非菩萨作，非如来作。如身识空，一切法空亦复如是，体性无我亦无我所，彼空故我不可见。一切诸法悉皆离我亦离我所，以离故空。作是观时，即能获得无相无愿三种解脱空行法门，证空因缘能断一切悭贪烦恼，或有得于须陀洹果，乃至第四阿罗汉果。智者如是一一推寻我不可得，不可得故自知无我，谛观无我离疑网心，尔时知身了了无我。

“舍利弗，若有行者能如是观。当知是人得此无相无愿解脱三种空门，为诸天主释提桓因之所供养并护其身，令常受乐犹如帝释。如是梵天乃至一切诸天余王，一切龙王、一切夜叉王、一切迦楼罗王、一切紧那罗王、一切摩睺罗伽王，彼诸王等如是礼拜，供养供给无令乏少，常加卫护亲奉所须，恶心众生不得其便。若在一一切诸人王中，所得礼拜供养护身亦复如是。舍利弗，此名奢摩裴多悉帝那持陀罗尼，是德华藏如来命虚空藏菩萨摩訶萨送来至此，以我此刹说于日藏大集经故彼持欲来。此陀罗尼有大势力，能大利益，慈悲怜愍一切众生，能救一切危厄患苦，能舍一切烦恼诸结，能知一切阴入界等，能辨一切法之差别，能示一切善巧方便，能与一切涅槃道乐，能入一切诸法之门，能摧一切难降伏魔，能破一切邪论外道，能与一切诸天欢喜，能令一切夜叉知足，能怖一切诸阿修罗，能令一切诸迦楼罗心生喜悦，能令一切诸紧陀罗欢乐无厌，能令一切摩睺罗伽不得回顾，能令一切刹利喜欢，诸婆罗门信心增广，毗舍眷属及首陀罗皆大欢喜踊跃，无量多欲妇女能令少贪，妊娠女人使得安稳，令念持者乐于多闻，修习定人乐阿兰若，能却斗争国土饥荒，能除死殃及诸盗贼、非时风雨、冻渴苦辛、粗涩肥膻如是恶触，照曜法母竖立法幢，于流转中绍三宝种，解诸系缚怖畏众生，能生尽智证无生智，能破黑暗与大光明，能舍众生苦恼重担。如此奢摩裴多悉帝那持大授记陀罗尼，能令一切三有众生恶业道中截流而过入佛界中，于一切法自在无碍，乃至十八不共佛法无为彼岸，能转法轮雨诸法雨，善能教化一切众生，悉令得住于涅槃道。”

说此恶业尽陀罗尼法时，无量众生过去恶业悉得除灭，无量阿僧祇诸天及人远尘离垢得法眼净，无量众生得须陀洹果，百千频婆罗众生得于无漏阿罗汉果，七十那由他众生获得如是奢摩裴多悉帝那持陀罗尼，得此陀罗尼已于三乘中更不退转。无量无数阿僧祇诸天及人，发阿耨多罗三藐三菩提心。无量众生于菩提中亦得住心不退转道。八万四千诸众生等得无生忍。一切现在娑婆世界刹中众生，闻此四种四谛顺空顺无愿顺奢摩裴多悉帝那持等陀罗尼义已，悉得破坏一切欲贪、长短色贪、触贪、乐贪、色非色贪。又诸众生得如实见知贪障碍，听闻法已其中有得不净观善根者，有得六入念者，或有得于普不散心善根者，或有得于遍善根者，或有得于阿那波那善根者，或有得于奢摩他者，或有得于毗婆舍那者，或有得于初禅定者，或有得于中

间禅者，或有乃至得四禅者，或有得于四空定者，或有得于四谛顺忍者，或有得于性人地者，或有得于八法地者，或得和合小乘善根者，或得小乘非和合者，或复有得一切智知善根者，或复有得三摩提忍陀罗尼善根者。又彼众中有诸女人厌离心生，观察女身有种种过穷极鄙恶：“我以何故受于此身贪著色欲？”作是呵责，以闻法故，一切妇人悉各修念不乐自身。其中九十一频婆罗人中女人，转女人相得男子身。九十九百亿天中女人，八万四千龙中女人，八百六十万夜叉中女人，八十四万阿修罗中女人，七万迦楼罗中女人，十二频婆罗紧陀罗中女人，一千摩睺罗伽中女人，九十频婆罗饿鬼中女人，四十二频婆罗毗舍阇中女人，如是一切诸女人等，悉失本根得成男子。其中若有妊娠妇人，胎藏安隐无诸伤损，乃至畜生亦复如是。其产生者具足五根，男女聪明，智慧端正。或有藏内未时即生，或有他患皆能除却，悉令安隐如第三禅修习行人得于定乐，身心悦豫亦复如是。

尔时，一切天、龙、夜叉、阿修罗、迦楼罗、紧陀罗、摩睺罗伽、薛荔多、毗舍遮、鸠槃荼、富单那、迦吒富单那、人及非人，一切大众同作是唱：“善哉！善哉！佛婆伽婆，如是妙法不可思议！我等昔来未曾听受，如今如来所转法轮，能令我等一切恶业障碍尽除，于流转中度一切有，饮甘露浆得寂灭乐，教化拥护一切众生，舍于五浊得胜智慧入佛境界，照耀三宝不令断绝。如来今者降诸法雨，称我等力一心供养。”如是乃至迦吒富单那等种种诸天，作于诸天种种音乐，复雨天上细末金银犹如雨下，乃至华香、衣服、璎珞、种种宝鬘，以散如来，为供养故一切天人悉皆云集，唯除坐禅入三昧者。如是众生各于生处，所有华香、衣服、璎珞、金银宝鬘，供养佛已欢喜而住。

护持品第六

尔时，一切诸天大王并其眷属，一切龙王，一切夜叉王、阿修罗王、迦楼罗王、紧陀罗王、摩睺罗伽王、薛荔多王、毗舍遮王、富单那王，乃至迦吒富单那等一切诸王，各并眷属礼拜于佛，同心合掌作如是言：“世尊，我等从今在在处处，若有比丘或比丘尼，诸优婆塞及优婆夷，但有信心若男若女，能作如是念不净观寂灭三昧如前佛说善根因缘得摄心住者，我等一切天诸眷属，乃至清净信心之人或男或女，常当救济犹如导师，令彼身心及其眷属为作供养，衣食、床铺、卧具、汤药种种资生所须皆与，如是具足令其安隐，更不愁于一十五种浊恶之事。设复有者，我等于中常共加护。何者名为十五浊心？所谓或以石撩，或以杖打，或以刀斫，或以槊贯，或毒药中，或崖上掷，或复恶人，或复不信，或四大动，我为作护；或以恶心送彼人所好饮食汤药者，我为作护；贪、瞋、妒嫉、两舌、恶口，如是恶事欲

相加者，我为作护；或有恶人用浊恶心，以诸衣钵、床卧、铺具、病患汤药常作檀越，或劝化他，或自亲旧为供养者，彼诸恶事我为作护；或复怨家，或复恶鬼，如是等恶我为作护；或毒中护，或恶天子，或内国土，或外国土，如是贼起我为作护。此十五种浊恶之事，或比丘、或比丘尼、或优婆塞、或优婆夷，或余信心男子女人，或今现在或复当来，乃至劫尽末法世时。何者名为末法世时？谓读诵人无不依于波罗提木叉道中行，若不坐禅则不能得于三摩提，乃至不得第四之果，乃至不得寂灭三昧，是则名为末法世时。若如上说，初夜后夜不曾睡眠，读诵是经或坐禅定，如是住者，彼诸眷属比丘、比丘尼、优婆塞、优婆夷，乃至信心或男或女一切眷属乃至住处，或复聚落都邑国城，或阿兰若处，或聚落主家，随所在处有此十五浊者，我尽救济为作拥护，令是诸恶一切悉除。于何聚落有福德人常住之处，或多人住，或一人住，乃至复有一日一夜修福德者，乃至一日一夜所住处者，或复城邑，或聚落家，我皆救济为作护助，不令其人经于恶事。无问一切诸檀越家，或复刹利，或婆罗门、毗舍、首陀，或男或女小男小女，一切救济常为守护不令人恶。若有如是修福德者身心精进，若有人供养礼拜恭敬种种供给，或为造房、或大寺舍、或林、或苑、或作衣裳，食饮所须坐卧处所，或复病患汤药针灸种种医疗，如是檀越，我等如是十五浊中一切悉护。若有胎藏妊娠女人，供养如是福德人时，我等护持无时暂舍。设诸恶人及以恶鬼欲加恶者，回彼恶心悉令欢喜。如是儿女在在处处修福德者，念善根者为他爱敬，或余众生劝助赞美，或复家人称说其名，或咒结索拥护众生，或教福德，或教舍恶，我等于彼如是众生，十五浊中常亲护持，诸恶鬼神不得其便。若有如是修福德者或人非人，能信其语如教而行，如是一切我等亦护。若有恶人，于彼行者修福人中，或瞋或骂，或欲加恶，或生障碍者，如是等辈诸恶众生，我等不护是恶众生。

“十五浊事不得护者名字云何？十五浊者，第一、恶患；第二、失于自在；第三、散失种种资生；第四、身中四肢种种割截，或眼、或耳口鼻手足，或复斫头；第五、失于所爱妻子及诸眷属；第六、失于官位；第七、失居家；第八、为诸怨家所侵；第九、心常忧愁；第十、瞋于刹利心常行恶；第十一、邦邑国城众生浊恶；第十二、诸偷盗来失种种物；第十三、自家妇女恒相斗争；第十四、国土贼盗他国贼来；第十五、短命速死。若恶众生有如是十五种事，我等不护富伽罗等言。若复有人虽修福业，不受善语恒起恶瞋，欲为造福德者作诸恶事，种种福中为作障碍，若有如是诸恶众生来归于我，望咒术中得种种力，如是咒中种种法用虽具足有，我等于彼如是众生，不加不护，不与其力亦不救济。若彼众生意欲规求，望得如是如是之物我亦不与。若有众生于常修常命福德之人，生瞋作恶种种障碍者，如是我等亦如上说。或复今世及未来中，能依此法忆念修行及法欲尽，常有诸天龙神乃至迦吒富单那等，恶心瞋忿无有慈悲，不乐当来妙好之

身，不畏三塗恶道果报。若有如是造福德人，乐阿兰若种诸善根，或住缝间，或复树下，或在寺舍，或尸陀林行住处所，福德之人悉如上说；天龙乃至迦吒富单那，恶见恶心此福德之人，是处住止，或身心浊，或夺精气，或被行人供养檀越，我诸天龙乃至迦吒富单那等，离慈悲心不知恩报，于当来生不怖恶道，垢浊身心夺其精气。唯除过去极重恶业，此恶业中非可得护。若我天龙乃至迦吒富单那等应可得护而不护者，现世则为欺诳一切三世诸佛，于流转中不见罗汉及辟支佛，常令我身不成福器不得涅槃。”

佛言：“善哉！善哉！善男子，汝能如是发于此心，亦如一切三世诸佛过去世时修行无异，绍三宝种，竖立法幢，光照法母，汝等如是则为供养一切三世十方诸佛。汝善男子，或男或女能作如是勤精进心，于正法中好守护者，如是法行富伽罗故，常护常念常供给足。如是众生于流转中，常得尊贵和合眷属，常受安乐不经辛苦，乃至速成阿耨多罗三藐三菩提道。善男子，汝等求乐不求于苦，是故应当常勤精进作诸善根。”

诸天等言：“善哉！善哉！我从今日如是修习如是发心。”

尔时，此娑婆界有于恶心诸饿鬼等，常仰食啖一切众生精气血肉以为生活，如是鬼等无量阿僧祇，同白佛言：“世尊，我等恶业罪报所招，常啖于人肉血精气以活性命，今日发心入佛法住，为佛弟子，更不造恶不生恶念。若佛弟子如佛今说不净观法，常如是修如是习行一种无异，若我不如富伽罗心所在念者，令于我眼黑暗常盲，一切四肢不能动转，又不具足身中五根。我等亦如富伽罗，护此福德人并其施主。造立寺舍房室、树林园苑、浴池衣钵、饮食卧具、倚床汤药一切所须，如是檀越我等亦护。”

佛言：“善哉！善哉！善男子，汝好发心，常当如是莫令放逸。”

尔时，牢固地天从座而起，作如是言：“世尊，若佛弟子常摄五根，如佛今说不净观法，如是系念至心行时，我等地天为此行者，常出地味滋润彼人，令其身中增益寿命。是地精气充溢因缘，行者身中得色、得力、得念、得喜、得精进、得大智慧。”

佛言：“善哉！善哉！汝大檀越能发是心，真是佛子，从佛口生，从法化生！与如是食益于彼身，此福因缘速于大乘成就满足。”

尔时，众中有大德天，复从座起前白佛言：“世尊，若有如是法行比丘佛弟子等，彼诸檀越，或以种种金、银、宝珠、种种资生、种种谷米具足供给。若诸弟子如佛所说不净观法，乃至寂灭三昧空门如是系念，从于初夜至中后夜坐卧行立，如是念法心无外缘。彼诸檀越为营寺舍，或造一屋，或一树林，或复衣食、坐卧、床铺、病患汤药、种种资生常供给之，彼得如是无乏少已，身得安隐无有忧愁，心常欢喜，得好福田成就法器。如是施已，当来之世得大果报，深心乐法，不生恶道，不造恶法。我如是护彼人，即得修慈悲心，如是种种胜妙善根增长不减。”

佛言：“善哉！善哉！大檀越，此是汝等精进之心，于大乘中速能增长福德之力！”

尔时，众中金刚力士复白佛言：“世尊如来说此大集经已，诸大檀越并眷属众，各各发心护持佛法利益众生。彼因缘故，此娑婆界佛刹之中，法母照曜增进光明。”

尔时，弥勒菩萨摩訶萨，为欲利益于未来故，即于众中问金刚力士言：“善男子，何者为虚空之法？此可见不？若不可见，此事云何？”又复问言：“何者名为诸法和合？”

金刚力士报弥勒言：“实际之岸不可见故，此和合法亦不可见。”

弥勒又问：“善男子，何者名为真实虚空不和合法？”

金刚力士报弥勒言：“彼中无异。”

弥勒又问：“善男子，何者名为虚空之法？何者名为不和合法？”

金刚力士报弥勒言：“不动不生法界入事，是故不异。”

弥勒又问：“善男子，云何名为有为无为、漏无漏法？”

金刚力士报弥勒言：“如本真实如是如如性无有异，漏无漏法虚空和合是故不异。”

弥勒又问：“善男子，何者名为真实如如漏无漏法？”

金刚力士报弥勒言：“虚空合故真实如如，非是漏法，非无漏法。”

弥勒又问：“善男子，何者名为虚空和合法？”

金刚力士报弥勒言：“一切诸法离于障碍，和合故空非集非散。何以故？体性不失故。而彼空中亦不可得物及空故，故名空法。善男子，一切法中此方便故，当知一切如如体性，体性本来是空故空；如是万法和合故空，想离想故，此空非想，非想亦空。何以故？如是一切和合法空不可说故，一切诸法体性尔故。此如是法非沙门造，非罗汉造，非辟支佛造，非菩萨造，非如来造，如是如是真实如如、漏无漏法一切皆空，和合法故，非相离故，非异法故，弥勒菩萨如是当知。”

尔时，金刚力士说是法已，无量众生曾于过去学空来者，一切恶业悉皆除尽远尘离垢，于诸法中得法眼净。九十二那由他众生，于此法中发阿耨多罗三藐三菩提心。无量众生亦得住于不退转道，究竟阿耨多罗三藐三菩提。

大乘大方等日藏经卷第七

佛现神通品第七

尔时，频婆娑罗王闻佛说此不净观法，一切大众各欲护持，踊跃欢喜，即从座起前白佛言：“世尊，如是法门福德最胜，不可思议！今此国土娑婆世界佛刹之中，无量诸大菩萨摩訶萨，所可成就光明妙

色，我从本来初未曾见，初未曾闻。世尊，是菩萨光悉能遍照大千世界乃至有顶亦皆充满。我今眼中不睹余色，但见于此娑婆世界佛刹之中乃至大小诸铁围山悉满光明。世尊，如是菩萨摩訶萨等，若得近于阿耨多罗三藐三菩提者，其光云何？如来入于三昧所，放光明相复云何？如来光明，我得见不？缘彼光明，复得见于其余佛刹种种妙好奇特事不？”

佛言：“如是，如是，大王，若有菩萨成就无上菩提道者，其光能照十方世界。何以故？能于如来境界之中，行大福德庄严力故；于过去世菩萨行中，成就具足大福德力庄严法故；一切菩萨修行善根多增长故；具无量福生于佛家，亲近无上菩提道故；毕竟无上菩提妙道，于不可宣说如来智力奋迅，远离一切障碍，佛境界中胜疾智故；入佛智慧正法果故；分别过去无量劫来，无边佛法境界依故；此地最胜转妙法轮，一切自在所得身，如是福德无挂碍故；获得清净真实法故；所可修习到彼岸故；未来世业已得尽故；通达一切众生善根，永断一切烦恼习故；离于障碍住佛界中，是故光明悉能遍照十方世界。大王，如是随佛功德光明力故，亦能睹见一切十方无量无数阿僧祇佛。”

王言：“世尊，我今欲见如是十方无量无数阿僧祇佛，并诸菩萨摩訶萨及声闻众。”

时，频婆娑罗王随从眷属有无量亿诸众生等，异口同音复白佛言：“如是，世尊，亦愿如来示现我等诸佛境界过去所行福德庄严离障碍事，我等见已发欢喜心。”

尔时，世尊告阿若憍陈如：“汝等大众在家出家声闻弟子，皆各系念深心思惟，以自善根力入于禅定。我于今者亦欲入于如来三昧。”

当于尔时，此佛刹中天、龙、夜叉乃至一切人及非人，或有见四谛者，或有得顺忍者，或于三乘得不退者。如是众生皆结跏坐亦入禅定，复有众生于三宝中得信敬心，亦复如是入于禅定。

尔时，世尊即入一切如来境界日月三昧，行智广大悉能遍覆一切虚空，能令一切智慧众生皆生欢喜。如是三昧不可计量、不可睹见，非诸声闻及辟支佛乃至十方恒河沙等补处菩萨之所能知，唯佛如来乃能得之，是名如来境界三昧。如来如是入三昧已，此娑婆世界三千大千百亿四天下、百亿须弥山、百亿日月乃至百亿诸有顶天，皆悉影现入佛身中；如是娑婆世界一切佛刹入佛身已，其中所有一切众生地狱、饿鬼及以畜生、或天、或人，彼诸众生或身或心，有苦受者皆得除灭，一切自在悉生欢喜，譬如比丘入第三禅得具足乐。尔时，一切诸大菩萨摩訶萨众，先在座中入三昧者皆从定起，从定起已见佛光明，见光明已自所有光寻灭不现。如是声闻及佛弟子，乃至一切诸天人众入禅定者各各皆起，彼诸大众身心得乐，譬如比丘入第三禅。尔时，一切无量众生大欢喜，踊跃无量，不可思议未曾闻见。又其六

根一切清净现佛身中，或坐或行，或住或卧。复见如来一一毛孔出无量光，譬如十方恒河沙等日月光明，亦如一切恒河沙等大摩尼珠，亦如恒河沙等十地菩萨摩诃萨众一时普放大焰光明，如是光明悉能遍照十方佛土。如是如来一一毛孔所出光明，处处皆满，于十方刹最为殊胜。

尔时，十方一切诸佛，于其刹中自在而住，各为大众异口同音，称赞我名说于此偈：

“汝观具足功德满， 怜彼一切诸众生，
智慧大力能拔除， 释迦如来胜中最。
慈悲心故放此光， 一切佛刹皆充满，
又愍是诸众生故， 令其悉现于身中。
一一佛刹满光明， 众生见者皆欢喜，
发心清净悉牢固， 得胜无上实菩提。
汝等若有得神通， 一切宜应急疾往，
恭敬接足稽首礼， 释迦师子最胜尊。
若有未得神通者， 向彼低头遥礼拜，
速起菩提真智念， 得见牟尼正觉身。”

尔时，十方一切诸佛各于其国说如是偈，慈悲教化诸众生故。又以如来过去修行，愿力庄严具足满故。彼诸佛刹一如来，亦有无量恒河沙等诸大菩萨摩诃萨众并大弟子声闻比丘，复有无量亿恒河沙诸天及龙、夜叉、乾闥婆、阿修罗、迦楼罗、紧陀罗、摩睺罗伽等，无量大众围绕彼佛，各乘神通俱来诣此娑婆世界。到此刹已向于如来，头面接足右绕三匝，右绕毕已各赍持来一切所有种种宝物、种种宝衣、种种袈裟、种种璎珞、种种幡盖、种种杂华、种种熏香、种种涂香、种种音乐、种种赞叹、种种歌舞供养如来，设供养已与其眷属各还所住。时诸众生在娑婆界佛身中者，皆悉见之，见已欢喜，复受无量无边快乐。又诸众生得见十方一切诸佛，于其刹土坐金刚座而演说法。又见诸佛各各刹中于自坐处，为诸众生说此世界释迦如来一切功德，有大名称、大智慧力，福德庄严，具大精进、大慈悲力教化众生。彼诸刹中无量阿僧祇恒河沙等众生，发阿耨多罗三藐三菩提心，于自刹中得受记别；无量众生于缘觉乘得受记别；彼诸大众亦见此土一切众生入于佛身，亦得如是受于记别。其中众生或有受乐、或有受苦，一切皆现释迦如来身内住止。若空五浊佛刹众生得见如来，及见十方无量无数说法诸佛，一如来各有无量无数众生恭敬围绕，见已起大爱敬生欢喜心，彼诸众生一切身中所有恶受悉得除舍安隐快乐。若不空五浊刹者，十地菩萨摩诃萨等教化众生故，随何刹中得见于佛，见已生信，得信心已听受妙法。彼诸菩萨各于彼处化作佛身，以一声声满一切刹，各各异口同说偈言：

“十方诸佛同一乘， 成就善根故来此，
离佛及余菩萨众， 更无如是大德人。
汝等一一诸众生， 速发菩提无上道，
若不勇猛勤精进， 流转苦海无出期。
汝等宜应一切来， 速随于我相逐往，
供养人中释师子， 顶礼右绕彼世尊。”

时诸菩萨摩訶萨等，化作佛身说此偈已，各与无量无边恒河沙数得神通力一切众生，俱来诣此见释迦牟尼佛，见已右绕三匝，绕已各持贡来种种宝物、种种宝衣、种种音声、种种歌舞，以用供养释迦如来。供养毕已悉发阿耨多罗三藐三菩提心，或有众生于辟支佛乘而发愿者，如是悉得不退转道。彼诸众生又皆各各得种种忍、种种陀罗尼、种种善根，得已各还本刹。或有菩萨化作辟支佛身，或复化作阿罗汉身，或复化作梵天王身，或复化作帝释天身，或复化作四天王身，或复化作那罗延身，或复化作摩醯首罗，或复化作自在天身，或复化作星宿天身，或复化作阿修罗身，或复化作转轮圣王，如是种种龙身、鬼身，随所在处佛刹之中。若有众生乐见阿罗汉身，见罗汉已欢喜受法；彼诸菩萨摩訶萨等，为欲教化诸众生故，即于彼中作罗汉身，为彼众生说种种法。彼诸众生见大光明及释迦佛，得见佛已心中爱敬生大欢喜，具足六根满一切愿，恶业皆尽悉乐受生。又彼菩萨摩訶萨等，于佛刹中化作如是阿罗汉身，说法教化大福德聚，具足成就善根力故，能以一音遍一切刹，作诸言辞说如是偈：

“众生久处流转中， 愚痴不知出要道，
以诸种种罪业故， 得此生死苦恼身。
是故应速舍恶心， 邪见颠倒诸烦恼，
早度有流到彼岸， 云何汝等不觉知？
难见导师今已见， 难得人身今已得，
难遇善友今逢值， 难闻正法今得闻，
是故汝等应至心， 速发无上菩提道，
出离一切生死狱， 证佛微妙功德身。
若能永离两种邪， 所谓断常等二见，
知于一切行无我， 如是名入正观门。
爱行取入有于生， 智水洗除悉令净，
同共往诣娑婆国， 恭敬供养释师子。”

时诸菩萨摩訶萨等，如是化作阿罗汉身，说此偈已，与于无量恒河沙等得神通力一切众生，俱共发引来到此刹。到已头面顶礼释迦牟尼如来并其眷属，恭敬围绕三匝佛已，出所贡来种种宝物、种种宝衣、种种袈裟、种种瓔珞、种种伞盖、种种幢幡、种种宝华、种种宝

香、种种音乐偈赞歌舞，以用供养释迦如来。供养毕已各还自刹，到自刹已坐于自座，各为于己众称扬赞叹释迦如来，作如是言：“释迦如来，怜愍教化一切众生，能与众生一切利益。”

是诸菩萨各自众中如是称说，彼众闻已悉皆赞叹释迦如来，既赞叹已无量无数阿僧祇众生，发阿耨多罗三藐三菩提心，或复有于辟支佛乘而发心者，或复有于声闻乘中而发心者，各各乘中得不退道。有得种种陀罗尼忍、种种善根，亦见此土娑婆佛刹诸众生等入释迦如来身中。是诸众生见此不可思议神德变已，无量阿僧祇恒河沙等众生，皆发阿耨多罗三藐三菩提心。其中或有发声闻、辟支佛心者，各于自乘得不退转。或有作于转轮圣王微妙之身得受记别。

魔王波旬品第八之一

尔时，欲界魔王波旬，悉见一切娑婆国土所有众生及诸天宫合家眷属在佛身中。时，魔波旬见已，悲泣涕泪横流，心大懊恼遍身汗出，啼哭失声称怨大唤，或起或立或坐或行，入出家居东西狂走，频申欠咭怖惧惶惶，愤叹长歔喘息粗短，合眼张口吐舌舐身，露背现胸申臂缩脚，摇动头项索手揩摩，种种施为受大苦恼；乃至一切魔之眷属，心内愁忧亦复如是。

时，魔波旬有一军主，名戒依止，见王身心如是煎迫，说偈问言：

“何故愁恼独行住， 唱唤驰走似颠狂，
出入家居心不安？ 如是因缘愿王说。”

时，魔波旬闻是语已，倍更懊恼啼哭雨泪，说偈答言：

“我今身体汗遍流， 心中分裂如刀割，
啼哭眼中泪如血， 为睹瞿昙现变通。
其形广大无有边， 刹土悉皆居腹内，
我失臣民及眷属， 境界宫殿悉空虚。
复有十方大众来， 充满于此娑婆界，
各设无边大供养， 礼拜围绕或往还。
令我自在无威力， 伴侣眷属归于彼，
如来有是大神力， 云何令我心不愁？”

时，戒依止大魔军主，为于波旬复说偈言：

“我所统领诸军众， 强壮勇健实难当，
刀轮奋击拟如来， 须臾破身令粉碎。”

时，魔波旬说偈答言：

“我等诸军及眷属，久已归依佛世尊，
设欲自往生恶心，即见顶边带枷锁。”

时，戒依止大魔军主，复说偈言：

“我今多设诸方便，诱诳于彼恶怨家，
诈现亲善作知识，得便然后当摧灭。”

时，魔波旬说偈答言：

“若我发起毒恶心，如是方便欲毁佛，
即见死尸系颈下，如是臭恶难可看。”

时，戒依止大魔军主，复说偈言：

“一切欲界属于魔，唯有天人信归佛，
诸恶毒龙亦王领，愿敕速害瞿昙身。”

时，魔波旬复说偈答：

“若审知龙有力能，我已荒迷汝自救；
若实能坏瞿昙者，我还得土复本心。”

尔时，戒依止大魔军主即自念言：“世间难摧谓三种毒：一者、天魔，二者、恶龙，三者、得定五通仙人。我今魔宫已被破坏，唯龙境界牢固，光明照耀海中，威力自在，眷属围绕不可思议。龙既属魔，其余兵众悉皆统领，今当为王约敕，速往坏彼瞿昙。”

魔波旬言：“善哉！善哉！智慧军主汝可疾去，到彼龙宫如是切敕，早与瞿昙共相斗战。”

时，戒依止大魔军主，辞王毕已即自举手，普告无量百千军众唱如是言：“汝等宜应速整衣铠！我今欲往彼龙王宫，令诸恶龙兴发毒风，害瞿昙命使令破碎。”

如是说已，一切军众悉不能动。其戒依止军众及身既不得前，眼中泪出，身毛皆竖，合掌向魔波旬说言：“我等今者不能得去！沙门瞿昙奸伪多幻，知我等家系缚于我，令我身内一切火燃焦沸热恼犹如汤煮。我今如是力不自在，云何复欲假力于他？”

时，魔波旬倍更懊恼忧愁不乐，令戒依止具以上事宣告诸龙：“汝当为我坏瞿昙身。”

时，诸恶龙将欲飞空而不能去，语戒依止：“敬奉来命，欲往毁坏。”适生此心便不得往。

时，戒依止即生恐怖作如是念：“若我今者现魔大力，令诸恶龙心生瞋忿，以瞋忿故则能破坏瞿昙之身。”

时，魔波旬及戒依止，化龙宫内作诸蚊虻蝇蛆、毒虫、死尸、人粪，臭处狼藉充满其中。诸龙见已，于自宫室心不甘乐，作是念言：“是谁化作此恶物也？”虽复思念莫知谁为。

尔时，一切四天下中，诸大龙王及其男女大小眷属悉生瞋忿，即出宫殿至须弥下佉罗坻山。其山平坦，于山顶头有大圣人先所居住。彼山周匝纵广正等四万由旬，一切庄严纯是七宝。乃至难陀、优婆难陀龙王，亦与无量百千眷属，舍自住宫往佉罗坻大圣人处请求救济。彼龙奋身如须弥山，即到彼已其身皆小犹如铜筋，虽如是知不能得语，各各自说我等欲往而不能动，即大忧愁瞋忿停坐。

尔时，复有娑伽罗龙王，亦与无量亿那由他百千眷属。如是伊罗钵龙王，如是善住龙王，如是德叉迦龙王，如是阿那婆达多龙王，如是目真邻陀龙王，如是海德龙王，如是婆娄那龙王，如是大德龙王，如是那吒达都龙王，如是阿钵罗迦龙王，如是山德龙王，如是牛头龙王，如是阿蓝浮龙王，如是伊罗钵多龙王，如是郁伽伽臂龙王，如是婆罗那那龙王，如是斯罗摩罗龙王，如是迦迦吒行龙王，如是稽罗绮龙王，如水行龙王，如是安阁那殊致龙王，如是迦那迦宾阁那龙王，如是奢俱奢伏绮龙王，乃至闭眼龙王，乃至白象腋龙王，乃至天利龙王，乃至天婆婆遮罗龙王，乃至天迦龙王，乃至伊罗口龙王，乃至天眼赤龙王，乃至端正龙王，乃至光行龙王，乃至此间阎浮提地八十六千诸大龙王。时彼一切一一龙王，各有无量百千眷属悉皆来诣此圣人处请求救济。如是乃至八十四万诸海洲中，一一海洲则有无量亿那由他百千诸龙，各舍宫宅为救济故来佉罗坻大圣处。如是郁单罗拘卢洲中，鼻担比龙王、大遍龙王，彼二龙王各与无量亿那由他百千诸龙眷属围绕，请求救济故来到此圣人住处。如是弗婆毗提洲中，苏摩娄叉龙王、婆斯目叉龙王，彼二龙王亦与无量亿那由他百千诸眷属围绕，悉来到此求于救济。如是瞿耶尼洲中，曷赖多那龙王、瞿波罗婆龙王，彼二龙王亦与无量亿那由他百千诸龙眷属围绕前后随从，为求救济故来到此大圣人处。

尔时，复有此四天下八万四千一切洲中，所有诸龙卵生、胎生、湿生、化生，如是诸龙如在生处，龙妇、龙男、龙女、龙子，为救济故一切悉来此大圣人牟尼处所，到已一切皆得小身譬如铜筋。彼龙瞋忿各作是念：“我等本身如须弥山，今者云何如是细小？”

时，魔波旬见于诸龙，皆来入此牟尼处所悉受小身；见已，波旬心中懊恼，亦生瞋忿怖畏不安，语其众军及眷属言：“汝等看此一切诸龙，以我力故变其宫殿，化作一切蚊虻毒蝇及余臭恶种种粪秽，皆舍自家来诣大山圣人处所，悉失势力无复自在，不能毁坏沙门瞿昙。”

时，戒依止大魔军主白波旬言：“大王莫愁，愿听我语。如是诸

龙受此身者，非是沙门瞿昙所化。龙自集会一处戏笑作于是身，望得方便害彼释子。”

魔波旬言：“如是者善，汝可速去听问彼龙：‘说何语言，作何方便，可得令彼沙门瞿昙破坏离散？’若得碎者，我境界胜，龙宫亦全。”

时，戒依止大魔军主，前后导从百千万众欲往彼山，发于自家乘空而进。

尔时，世尊宣扬过去一切诸愿，通达显示究竟无余。一切圣人现在世者，一切牟尼处所作证，一切众生教化毕了，一切诸佛眷属家生，奋迅境界皆已示现。一切菩萨摩訶萨众，所得寿命一种无差。一切天、龙、夜叉、罗刹人及非人，得见一切诸佛刹土，光明遍照种种庄严心皆欢喜。十方一切余佛刹中，此刹光明最胜巍巍，福德因缘得此殊胜。余佛刹中一切五道皆来此刹，供养礼拜释迦如来。

是时佛神力故，此娑婆界及十方佛土一切众生入佛身内。如是神通，诸佛境界三摩提力。彼诸众生见佛身光，出过十方一切诸佛世界，普皆充满照耀殊特能蔽余光，于自坐处作如是说：“释迦如来不可思议未曾闻见！”彼诸菩萨如是说已，各以种种华香、宝衣、袈裟、缨络、种种音乐供养如来，供养毕已无量百千右绕礼拜悉皆退坐。时，此大众一切天、龙、夜叉、罗刹、阿修罗、迦娄罗、紧陀罗、摩睺罗伽、鸠槃荼、薜荔多、毗舍遮、富单那、迦吒富单那，乃至一切人及非人，亦设种种供养，如前作礼右绕毕，皆退坐如是听法。

时，戒依止大魔军主，将领眷属在于阎浮地上游行。尔时，如来在众中坐，示现常身安然不动。大魔军主见已念言：“沙门瞿昙示现大身，今复本形在摩伽陀国端坐不异，或能见我大魔军众，怖畏失力无复神通。”

彼戒依止大魔军主复作是念：“沙门瞿昙多诸巧慧，或能于我欲生恶心。我今先当到瞿昙所，看彼道术方便因缘，试共谈论观其诈伪。”

时，戒依止大魔军主，眷属围绕前至佛所，对如来立而说偈言：

“未能度脱于自身， 生死海中得出离，
何以诳他众生类， 云我安汝置涅槃？”

尔时，如来答戒依止大魔军主，而说偈言：

“我久超度流转海， 更不生于诸有中，
慈悲愍念诸群生， 是故说于出要道。
汝于往昔无数劫， 已发最胜菩提心，
值遇燃灯佛世尊， 修行布施及持戒。

如是过去亿千佛， 悉已恭敬曾供养，
当得于此清净乘， 我今决定授汝记。
未来成佛还如我， 云何乃说诳众生？
我今施汝智慧眼， 可念前生行本末。”

时戒依止魔军主， 即得宿命识往身，
头陀苦节习于禅， 业果福德皆明了。

时，戒依止大魔军主闻此偈已，念彼过去福德因缘，对于如来五体布地，眼中泪出，长跪合掌作如是言：“如来世尊，我大懊悔！我大惭愧！如大痴人，如迷如醉，如著鬼癫！我念过去经一阿僧祇劫，大精进力发阿耨多罗三藐三菩提心，行六波罗蜜，修习圣道作诸福德，值佛现在种种供养，听受妙法发弘誓愿。乃至迦葉如来法中，有一比丘说声闻法，有大乘人说菩萨法，我于尔时心错口恶谤此说人，言是魔语或魔眷属，大乘人边说小乘过。如是恶口说因缘故，我于彼中，迦葉如来不授我记得阿耨多罗三藐三菩提。以彼恶口罪业因缘，我于彼死魔界中生，受是身来已经五十七亿千岁。世尊，我宁更历六百年受地狱苦，终不一念失阿耨多罗三藐三菩提心，何况退于四梵行念？第一第二如是忏悔，乃至第三如是忏悔，并余眷属亦复如是。又过去世流转际中，如是当来于生死海及在地狱，终不暂退阿耨多罗三藐三菩提心。”

佛言：“军主，善哉！善哉！善男子，若复有人，燃于大灯如须弥山，并七宝物于无量世供养诸佛，是福德聚不如有人至心慈悲发菩提心。何以故？发是心者乃是供养十方诸佛，彼过去福此最为胜。汝善男子，今尽此罪更莫余念，生死五阴一切有中得导师身。”

尔时，戒依止菩萨摩訶萨，即于坐处得法顺忍，从座而起，头面作礼绕佛三匝，即脱身上无价宝衣真珠璎珞供养如来；脱布施已，说偈问言：

“菩萨云何修诸法， 达了一切悉皆空，
观察世间如水泡， 能尽诸有无明缚，
一切恶见性非实， 得胜无生顺忍心，
常于菩提道中行， 能令众生得解脱？”

尔时，世尊答戒依止而说偈言：

“不动如山四种心， 智慧之人乃能有，
无量亿劫受诸苦， 为愍一切诸众生。
佛说禁戒坚固持， 乃至不破如一点，
一切三世佛正法， 具足圆满悉能行。”

尔时，八万四千魔军及戒依止菩萨眷属，闻戒依止得授记已心大欢喜，即于佛前至心悔过，一切皆发阿耨多罗三藐三菩提心。此菩提心名为三昧顺菩提心，得此心已欢喜踊跃，各各脱衣以用布施，布施已坐。

尔时，波旬见其军主并及眷属已归依佛，心生瞋忿苦恼不安，更大怖畏作如是言：“我今得出沙门腹中，复失眷属未知几人，于此得出作佛弟子有几人。速闭城门，莫放一人令其出外，自魔境界安隐住止。”

尔时，世尊更为彼魔大众眷属说三种梵行，所谓众生攀缘、法攀缘、离攀缘，如虚空眼品中说。

尔时，一切诸天龙王，悉皆集会佉罗坻山牟尼圣人处所中住。彼一切龙各见自形，小如铜筋欲动不能，游行绝望思念旧体，懊恼细身宛转彼中，不得自在怖畏毛竖，一切相与向难陀、跋难陀王边，礼拜作如是言：“大王，我龙国土，今者所有蚊虻苍蝇、毒虫粪秽种种不净，皆是瞿昙之所为也。是故我等皆舍宫宅，来到此间求觅救济。又不能得离于小身及以怖畏。若能归依佛世尊者可得免脱。”

是时，难陀、跋难陀龙王，作如是言：“沙门瞿昙多诸方便种种幻术，能内一切娑婆佛刹安置身中。于我龙家亦复化作一切诸恶，令我怖畏来此求救。今者沙门自失势力，无复方便神通道术，身今如本坐旧座中，岂能救我？如是小身既造此狱，安置于我皆不得去，何能救济令无怖畏？一切诸龙系属波旬，欲界自在；唯有魔力，今可礼拜求出此难，各各还家安隐而住。”

尔时，伊罗婆龙王复作是言：“汝等诸龙莫生懊恼。何以故？沙门瞿昙已能降伏魔之眷属，群臣人民作于弟子。唯魔王在丧失本心及其神力，云何当能救济汝等？”

时，诸龙王闻伊罗婆如是说已，或有礼拜四天王者，或有礼拜帝释天者，或有礼拜须夜摩天，或有礼拜删兜率陀，或有礼拜化乐天者，或有礼拜他化自在，或有礼拜大梵天者。尔时，娑伽罗龙王，复语一切诸龙王言：“汝等不见彼诸天王、人及非人圣贤杂类，礼拜供养沙门瞿昙而归依耶？”

尔时，诸龙即复归依其余仙圣。时彼山顶有六圣人：第一名苏尸摩，第二名那筹，第三名阿收求多，第四名毗梨呵，第五名婆揭菴，第六名殊致阿罗娑。彼一切龙，或有归于苏尸摩边作礼拜者，或有归依于那筹者，或有礼拜阿收求多，或有礼拜毗梨呵者，或有归依婆揭菴者，或有归依殊致罗娑。彼一切龙，皆悉归命此六圣人请求救济。是六圣人得五神通，悉各在于雪山边住。彼五圣人皆在殊致罗娑菩萨摩訶萨大圣人所听于正法。

时，殊致罗娑菩萨亦以种种无量言辞，赞叹释迦如来神德。时，五圣人悉闻一切龙王哭声，求乞救济闻已即起，白殊致罗娑菩萨摩訶萨言：“大德，颇闻彼龙啼哭号啕求救声不？”

答言：“已闻。”

“大士，今圣人处，一切诸龙大懊恼心，我等闻知尚欲往救，况大德乎！唯愿慈悲往至彼所，救一切龙与其解脱。”

时，殊致罗娑大圣入言：“汝等可往，我未及去。所以者何？此中大天、龙王、夜叉，百千万众今对我坐，问离障碍四梵行法，彼此欢喜听我所说。”

时，五圣人礼彼殊致罗娑大士三匝绕已，以神通力飞腾虚空，到佉罗坻大山顶头牟尼圣人处所。

尔时，彼处一切龙王，见五圣人心生欢喜，恭敬礼拜作如是言：“汝等大仙福德之人，智慧方便一切庄严，于苦恼中已到彼岸，愿救济我出恶狱中令得解脱。”

彼五圣人如是答言：“我等不能救济汝等。所以者何？现今雪山有大菩萨名殊致罗娑，诸圣人中最大智慧、大解方便。彼菩萨能与汝解脱，汝可一心求哀劝请。”

诸龙闻已，如是异身同共合掌，遥向殊致罗娑圣人，恭敬礼拜皆唱是言：“大德圣人，愿救济我，愿怜愍我。”

尔时，殊致罗娑菩萨摩訶萨，闻彼龙王唱救济声，即与大天、紧那罗等，夜叉、罗刹百千万人前后围绕，以神通力发于雪山乘空而往，到佉罗坻山顶。

时，诸龙王见彼圣人，各各恭敬合掌礼拜，一心同声作如是言：“大仙圣人愿救济我，于此狱中与我解脱，令我自身及以眷属，安稳还家离诸苦恼。”

尔时，殊致罗娑菩萨善解方便知世因缘，欲为诸龙说星宿法：“星宿法者，各有度数和合时节，合时则易，不合则难，时节未合不得解脱。谛听次第，我当为汝分别解说。今此月者名奢婆拏，星宿名为富那婆薮，富那婆薮属此五月，此月复系属于日天。汝诸龙王，与此星辰时未和合。”

尔时，娑伽罗龙王白殊致罗娑菩萨言：“大士，是星宿者本谁所说？谁作大星？谁作小星？谁作日月？何日之中？何星在先？于虚空中复谁安置三十日月十二月年？云何为时？系属何处？姓何字谁？何善何恶？何食何施？若为是昼，若为是夜，日月星宿复若为行，何者名为月初一日？何者满月？若为时节，若为行度，一一各几复若为停？几许时行？何者是轻？何者是重？何者是合？何者非合？云何力多？云何力少？云何名为日前后行？上行几影？下行几影？影有几步名曰为转初转？云何月北月南？云何次第？大士，汝于诸圣第一最尊，愿愍我龙具足解说，我等闻已脱苦奉行。”

尔时，殊致罗娑菩萨告诸龙言：“大王，过去世时，此贤劫初有一大城名曰瞻波，彼中人民和合炽盛。有一天子名大三摩多，端正少双，才智聪明，正法行化，常乐寂静不著世荣，为诸人民之所宗仰，恭敬礼拜而侍卫之。彼三摩多，清静慈悲，愍念众生犹如赤子，不乐

爱染常自洁身。王有夫人，多贪色欲。王既不幸无处遂心，曾于一时游戏园苑，独在林下止息自娱，见驴命群根相出现，欲心发动脱衣就之，驴见即交遂成胎藏。月满生子头耳口眼悉皆似驴，唯身类人而复粗涩，驴毛被体与畜无殊。夫人见之心惊怖畏，即便委弃投于屏中，以福力故处空不坠。

“时有罗刹妇名曰驴神，见儿不污念言福子，遂于空中接取洗持，将往雪山乳哺畜养，犹如己子等无有异，及至长成教服仙药，与天童子日夜共游。复有大天亦来爱护此儿，饮食甘果药草身体转异，福德庄严大光照耀。如是天众同共称美，号为佉卢虱吒大仙圣人。以是因缘，彼雪山中并及余处，悉皆化生种种好华、种种好果、种种好药、种种好香、种种清流、种种和鸟，在所行住并皆丰盈。以此药果资益因缘，其余形容粗相悉转身体端正，唯唇似驴，是故名为驴唇仙人。

“是驴仙人学于圣法，经六万年翘于一脚，日夜不下无有倦心。天见大仙如是苦行，时诸梵众及帝释天，并余上方欲色界等，和合悉来礼拜供养。乃至龙众、修罗、夜叉一切云集，所有仙圣修梵行人，皆来到此驴圣人边，种种供奉赞叹称扬，如是苦行生来未睹。设供养已，合掌问言：‘大仙圣人欲求何等？唯愿为我诸天说之。若我力能即当相与，终不吝惜。’尔时，驴唇闻是语已，内心庆幸，答诸天言：‘必能称我情所求者，今当略说。我念宿命，过去劫时见虚空中有诸列宿日月五星，昼夜运行各守常度，为于天下而作照明。我欲了知分别识解，愍暗瞑故不惮劬劳，此贤劫初无如是事。汝等一切诸天龙神怜我故来，愿说星辰日月法用，犹如过去置立安施，造作便宜善恶好丑，如我所愿具足说之。’一切天言：‘大德仙人，此事甚深非我境界。若为怜愍一切众生，如过去时愿速自说。’

大乘大方等日藏经卷第八

魔王波旬星宿品第八之二

“尔时，佉卢虱吒仙人告一切天言：‘初置星宿昴为先首，众星轮转运行虚空。’告诸天众：‘说昴为先，其事是不？’尔时，日天而作是言：‘此昴宿者，常行虚空历四天下，恒作善事饶益我等。我知彼宿属于火天。’是时众中有一圣人名大威德，复作是言：‘彼昴宿者我妹之子，其星有六形如剃刀，一日一夜历四天下行三十时。属于火天姓鞞耶尼，属彼宿者祭之用酪。’佉卢虱吒仙人语诸天曰：‘如是，如是，如汝等言，我今以昴为初宿也。复次，置毕为第二宿，属于水天，姓颇罗堕，毕有五星形如立叉，一日一夜行四十五时，属毕宿者祭用鹿肉。复次，置嘴为第三宿，属于月天，即是月子，姓毗梨伽耶尼，星数有三形如鹿头，一日一夜行十五时，属嘴宿者祭根及果。次复，置

参为第四宿，属于日天，姓婆私失絺，其性大恶多于瞋忿，止有一星如妇人廕，一日一夜行四十五时，属参宿者祭用醢醢。次复，置井为第五宿属于日天，姓婆私失絺，其有两星形如脚迹，一日一夜行十五时，属井宿者以粳米华和蜜祭之。次复，置鬼为第六宿属岁星天，岁星之子，姓炮波那毗，其性温和乐修善法，其有三星犹如诸佛胸前满相，一日一夜行三十时，属鬼星者亦以粳米华和蜜祭之。次复，置柳为第七宿，属于蛇天，即姓蛇氏，止有一星如妇女廕，一日一夜行十五时，属柳星者祭用乳糜。右此七宿当于东门。

“次复，置南方第一之宿名曰七星，属于火天，姓宾伽耶尼，其有五星，形如河岸，一日一夜行三十时，属七星者宜用粳米乌麻作粥祭之。次复，置张为第二宿，属福德天，姓瞿昙弥，其星有二形如脚迹，一日一夜行三十时，属张宿者毗罗婆果以用祭之。次复，置翼为第三宿，属于林天，姓憍陈如，其有二星形如脚迹，一日一夜行十五时，属翼星者用青黑豆煮熟祭之。次复，置轸为第四宿，属沙毗梨帝天，姓迦遮延，蝎仙之子，其星有五形如人手，一日一夜行三十时，属轸星者作莠稗饭而以祭之。次复，置角为第五宿，属喜乐天，姓质多罗延尼，乾闥婆子，止有一星如妇人廕，一日一夜行十五时，属于角者以诸华饭而用祭之。次复，置亢为第六宿，属摩诃罗天，姓迦梅延尼，其有一星如妇人廕，一日一夜行十五时，属亢星者当取菽豆和苏蜜煮以用祭之。次复，置氏为第七宿，属于火天，姓些吉利多耶尼，氏有二星形如脚迹，一日一夜行四十五时，属氏宿者取种种华作食祭之。右此七宿当于南门。

“次复，置西方第一之宿其名曰房，属于慈天，姓阿蓝婆耶尼，房有四星形如纓络，一日一夜行三十时，属房宿者酒肉祭之。次复，置心为第二宿，属帝释天，姓迦罗延那，心有三星形如大麦，一日一夜行十五时，属心星者以粳米粥而用祭之。次复，置尾为第三宿，属猎师天，姓迦遮耶尼，尾有七星形如蝎尾，一日一夜行三十时，属尾星者以诸果根作食祭之。次复，置箕为第四宿，属于水天，姓特叉迦旃延尼，箕有四星形如牛角，一日一夜行三十时，属箕宿者取尼拘陀皮汁祭之。次复，置斗为第五宿，属于火天，姓摸伽逻尼，斗有四星如人拓地，一日一夜行四十五时，属斗宿者末粳米华和蜜祭之。次复，置牛为第六宿，属于梵天，姓梵岚摩，其有三星形如牛头，一日一夜行于六时，属牛宿者以醢醢饭而用祭之。次复，置女为第七宿，属毗纽天，姓帝利迦遮耶尼，女有四星如大麦粒，一日一夜行三十时，属女宿者以鸟肉祭之。右此七宿当于西门。

“次复，置北方第一之宿名为虚星，属帝释天，娑婆天子，姓憍陈如，虚有四星其形如乌，一日一夜行三十时，属虚宿者煮乌豆汁而用祭之。次复，置危为第二宿，属多罗拏天，姓单那尼，危有一星如妇人廕，一日一夜行十五时，属危宿者以粳米粥而用祭之。次复，置室为第三宿，属蛇头天，蝎天之子，姓闍都迦尼拘，室有二星形如脚

迹，一日一夜行三十时，属室星者肉血祭之。次复，置辟为第四宿，辟属林天，婆娄那子，姓陀难阇，辟有二星形如脚迹，行一日一夜四十五时，属辟星者以肉祭之。次复，置奎为第五宿，属富沙天，姓阿风吒排尼，奎有一星如妇女簾，一日一夜行三十时，属奎宿者以酪祭之。次复，置娄为第六宿，属乾闥婆天，姓阿舍婆，娄有三星形如马头，一日一夜行三十时，属娄星者以大麦饭并肉祭之。次复，置胃为第七宿，属阎摩罗天，姓跋伽毗，胃有三星形如鼎足，一日一夜行三十时，属胃宿者粳米乌麻及以野枣而用祭之。右此七宿当于北门。二十八宿有五宿，行四十五时，所谓毕、参、氏、斗、辟等。二十八宿言义广多，难晓深趣不可具宣，我今略说。’说是宿时，同闻诸天皆悉欢喜。”

尔时，殊致阿罗娑仙人告诸天曰：“是佉卢虱吒仙人，于过去世亦造恶业，罪因缘故，虽得人身半为驴状；以有慈力其罪除灭，更得最好端正之身犹如帝释。”告诸龙等：“我以福德诸因缘故如彼仙人，为一切天而作导师今亦如是，能教汝等深实语言。诸龙当知，佉卢虱吒似释身已，是天人众皆悉欢悦，一心合掌作如是言：‘今大圣人为我等说往昔之事，何者星宿行最在前？食何等食？作何事业？行于虚空复几许时？’如是问已，仙人答言：‘汝等一切至心听受，我以慈力还得端正，今复怜愍安隐众生，说一年内事之终始，令于汝曹如盲得目，初日星宿乃至月满，诸星所在皆悉具说。为欲利益诸众生故，安置昴星在众星前，汝等诸天以为是不？’一切天言：‘善哉！善哉！我等经历星宿，知昴最尊大威德天之外甥也。其有六子运行虚空，是故昴星可为先首。’佉卢虱吒仙人言：‘月合诸星起昴终胃，月行宿讫一月将满，八月黑初月合在胃，如是次第轮转不息。我今复说刹那之数，一千六百刹那名一迦罗，六十迦罗名摸呼律多，三十摸呼律多为一日夜。胃宿纵恶自在如首罗天，能护四方皆得安隐。汝等天人见彼为恶勿生嫌怪，严治刑法乃护众生。’一切天言：‘如是，如是，如圣人教，严于法令乃济众生。’月与胃合，其日病者或轻或重难可疗治。其日生者性多瞋愤，犷恶刚毅难可亲昵，有大官位能胜众生。亢、虚、参、胃，此四宿日不得入阵斗战，不可远行，不得剃头及以治鬘。毕、牛、轸星，此三宿日，乃宜斗战及以远行、剃头洗头。柳、张宿日，可得造作一切诸事。昴宿、翼宿、斗宿，此三宿日求财可得，宜服医药持戒布施，宜作新衣及造瓔珞。嘴宿、角宿、女宿、七星之宿，此四宿日宜于行来道路安隐。氏宿、井宿、危宿，此三宿日作恶得成。房宿、柳宿、心宿、娄宿、七星之宿、张宿，此六宿日得造舆车床及绳床并诸衣服，要结知识。

“昴宿速疾作种种业，其速如火。其日得病，酪饭祭之，四日除愈。其日生者常得大富，其日入胎。斗宿、房宿、虚宿、柳宿、室宿，此五宿日不宜造作一切诸事，唯得共于大敌斗战。井、氏、翼宿，此三宿日善恶之事皆悉得作。毕宿之日亦得自在。井、氏、危

宿，此三宿日，昴宿生者于此日内，不得作事远行斗击，假令急事亦不得作。女、角、嘴宿，此三宿日亦为最恶。翼宿之日与怨家斗获得其胜，或刚或柔还致和合。轸宿、牛宿，此二宿日求伴不得，服药合药出家布施，造新衣服、璎珞、床铺、卧具等物皆得成就。参宿、虚宿、亢宿，此三宿日行来安隐。鬼、尾、室宿，此三宿日共他造恶，离于慈心种种得作。七星宿、日心宿、房宿、柳宿、辟宿，此五宿日宜结婚姻，宜造舆车及以床褥。参宿之日作事亦吉，然于一切须生怜悯。

“毕星水性，汝等于此第二宿日，造柔软事悉得和合。其日病者，以香祭火五日后愈。其日生者其人大富福德乐法。牛宿、奎宿、七星宿日，及心宿日而受胎者，其人薄德常作下事。鬼、尾、室宿，此三宿日，一切事业皆不得作，不得斗战，不得远行，不得诣官，卖买交易工巧作务皆不得作。亢宿、虚宿，此二宿日，若作好事不得和合，唯宜斗战克获胜捷。轸宿之日为事有利，利作柔软无有障碍。嘴宿、角宿、女宿等日众事和合，所作成办服药得力，若欲舍施若造衣服及以璎珞皆悉得作。井宿、氏宿、危宿等日远行安隐。房宿、柳宿、辟宿等日，欲离慈心造恶得成。斗宿、箕宿、娄宿、胃宿、室宿、翼宿此六宿日，宜结亲友婚聚知识，床铺辇舆皆悉得造。

“嘴宿四日用事，于此世间作诸事业疾速自成。其日病者，豆糜祭月八日除愈。其日生者，为人猛健大富饶财，当为妇女见诸恶事宜自防护，我说不虚。嘴宿生人，若以女宿、娄宿、斗宿、张宿等日而入胎者为恶不善。昴宿、房宿、柳宿此三宿日，不得斗战，不得远行及向官府，有须行者应止勿去。井宿、氏宿、危宿等日，造作众恶不相和顺，妄言谄曲欲杀怨家皆得成就。角宿之日欲作事者刚柔并得。参宿之日作事利益能致自在。亢虚二宿不相和合，参星之日乃得利益。其日服药出家布施，璎珞衣服并皆得作。鬼宿、尾宿、室宿等日远行安隐。心宿、奎宿、七星宿日，此三宿日欲作恶者恶事得成。轸宿、胃宿、毕宿、牛宿、箕宿等日，宜结亲友，得好知识，婚嫁吉事、舆车床褥皆悉得造。

“参宿五日用事能成诸恶，欲为业者少于利益。其日病者，以生酥糜祭于四道十日得愈。其日生人性虽聪明而心怀恶，求于钱财遂至于死，亦主作贼致失身命。其日生人及入胎者，虚宿、心宿、奎宿、翼宿、斗宿、胃宿，此六宿日多为障碍，乃至鬼、尾、室宿等日，亦不和合，一切诸事皆不得作。亢宿之日欲造作者，宜为轻事。氏宿、危宿、井宿、奎宿，此四宿日乃得自在。

“井宿六日用事，其为恶业分判果决。其日得病，炒粳谷华祭于日天，八日得愈。其日生人及受胎者，宜为田作当得大富，又饶畜生象马羊等。于辟宿日百事不宜。柳宿、房宿，此二宿日造作百事多有耗散。氏宿之日宜作众事，如意自在。鬼宿、参宿、尾宿等日，宜造百事所求称意。心宿、星宿、奎宿等日，宜出远行，道路安隐所向和

合。斗宿、翼宿、奎宿等日，宜结朋友求善知识。亢宿、毕宿、觜宿、虚宿，此四宿日为井生人作诸障碍。

“鬼宿七日用事，能为柔软不破善法。其日得病，以黄石蜜祭于岁星，五日除愈。其日生者，此人持戒好乐善事，得大官位国师宰辅，常教国王善法治世，至于娶妻特难和合，殷勤因人然后成就。其日生人，欲在室宿、鬼宿、翼宿、娄宿、斗宿等日受胎者吉。毕、角、女宿，此三宿日为其障碍。七星、心宿、奎宿之日，作事不成当失财物。尾宿之日作事得成。房宿之日亦多利益。辟宿、柳宿，此二宿日为事不称。张宿之日远行安隐。娄宿、箕宿为其障碍。轸、牛、昴宿，此三宿日作事和合必得良伴。亢宿、觜宿、参宿、虚宿，宜结朋友及善知识。亢宿、危宿，此二宿日所求者得多有利益。

“柳宿八日用事，一切恶业皆悉能作，于世间中如阎罗王。其日病者不可疗治。其日生者，性多瞋怒无有慈悲，多造[億-音+(夫+夫)]过人所憎嫉，能破善法常好猎射。辟宿、牛宿，此二宿日入胎者吉，轸宿、昴宿入胎者凶。觜宿、虚宿、亢宿、张宿，此四宿日不宜作事多有耗散。箕宿、娄宿、房宿等日，宜作众事得好成就。心宿之日、七星宿日、胃宿之日远行安隐。翼宿、斗宿、女宿等日，宜修读学伎艺成就。角宿、斗宿、危宿、尾宿、毕宿，此五宿日宜结知识。氏宿、参宿、井宿、室宿，此四日亦复宜结诸知识。

“七星九日用事，于诸众生温和柔软。其日病者，以胡麻油和粳米饭祭其先人，八日除愈。其日生者，聪明福德常为善事，然彼人性微好妄言，若护其身宜慎妄语，其人作事利。心宿日、奎宿、氏宿，此三宿日受胎者，贫乏少财物。参宿、危宿、毕宿等日受胎者，凶常作恶事。角宿、女宿，此二宿日受胎亦贫，好为恶事。翼、胃、斗宿，此三宿日而受胎者，作事自在得他人物。娄宿、张宿、箕宿等日，欲作事者多饶障碍。轸宿、牛宿、昴宿、氏宿，此四宿日行来安隐作事和合。虚宿、觜宿，此二宿日为其障碍。

“张宿十日用事，作柔软事安隐世间。其日病者，以频婆果生苏祭神，七日得差。其日生者，性乐芳香衣裳瓔珞，贪于欲事而复嗜酒，若在众中须自慎傲。娄宿、井宿，此二宿日受胎最恶。虚、亢、觜宿，是三宿日受胎亦恶不宜作事。昴、轸、牛宿，此三宿日亦多障碍。张宿之日乃得自在。胃宿、斗宿，此二宿日有所求者不得如意。氏宿之日其受胎者能除障碍。亢宿、参宿、毕宿、女宿，此四宿日远行安隐。柳宿、奎宿、鬼宿、心宿、房宿、辟宿，此六宿日欲结知识障碍不成。

“翼宿十一日用事，行四天下作两种业，所谓谄曲及柔软事。其日得病，煮黑青豆以用祭神，十日除愈。其日生者宜于种种，然性愚痴，慳贪鄙吝不能喜舍，亦能不食五日、六日乃至七日，不为世人之所爱乐，善须谨慎防护怨家不宜斗诤。胃宿之日而入胎者多造诸恶。危宿、参宿、氏宿、房宿，此四宿日善恶二事并皆得作。房宿之日无

有善恶。辟宿、鬼宿，此二宿日有受胎者好失财物。胃宿、娄宿、斗宿，此三宿日受胎之者。轸牛、昴宿，此三宿日作事和合。若于虚宿、觜宿、亢宿，此三宿日作事者成，得三宿力远行安隐。井、室、尾宿，此三宿日无善无恶。娄宿、七星奎宿、柳宿、心宿等日，结善知识嫁娶之事皆得和合。

“轸宿十二日用事，为恶自在速疾如风。其日得病，以醑祭神，五日除愈。其日生者大富饶财，能用五兵刀、槊、弓箭、斗轮、鞬索，能作大贼杀害众生；若修善者亦能持戒喜舍布施，种种功德皆悉能作。其人行处，七步之内蛇不敢前。其日入胎，于诸贼众而得为主，又能持戒喜舍布施。尾宿之日其受胎者，所在之处无有障碍，入阵斗战能胜怨敌。井宿、室宿二宿之日，其受胎者从生至死常宜作事。牛、亢、虚宿，此三宿日其受胎者，唯除牛宿不宜作事。其余亢、虚及女、觜宿，此四宿日作事利益得于自在。亢、毕、危等，此三宿日远行安隐。氏宿、参宿、房宿、辟宿，此四宿日作种种事得人气力，又宜娶妇要结亲友及善知识。箕宿、七星、娄宿、斗宿、张宿、胃宿，此六宿日有造作者如上利益。

“角宿十三日用事，为恶速疾。其日病者，去菽豆皮生捣祭神，六日除愈。其日生人，嘲戏音乐歌舞作倡皆悉能解，复能舍施，又多色欲，亦复爱乐有知之人。其人入胎宜毕宿日、娄宿、七星、箕宿等日，其人入胎多造作恶事。辟宿、房宿、鬼宿等日，其人作事种种皆吉无有障碍。危宿、氏宿、参宿等日，若作事业亦得自在。觜宿、亢宿、虚宿、尾宿，此四宿日远行安隐。觜宿、柳宿，营事业者得知识力。心宿、奎宿、斗宿、昴宿、翼宿、牛宿、张宿，此七宿日宜结亲友婚姻等事。

“亢宿十四日用事，能于世间作诸恶业，其性疾速为业快利。其日得病极恶难治，华蜜祭神，二十五日乃可得愈。其日生者，善能算计大富饶财，其性慳贪不能喜舍，又多瞋恚心意难得，若见特牛及黄腰者须自防护。其人若在觜宿、箕宿此二宿日而入胎者为恶不善。张宿、胃宿、柳宿、心宿，此四宿日欲作事者无有善恶。室宿、尾宿、井宿等日，欲为事者多有障碍。参、氏、危宿，此三宿日有所营者得他人力。娄宿、箕宿、七星之宿，此三宿日远行安隐。房、鬼、辟宿，此三宿日宜结亲友娶妇之事。轸宿、女宿、毕宿、昴宿、牛宿、翼宿、亢宿此七宿日，但宜行来余不可作。

“氏宿十五日用事，能作诸恶人所畏敬。其日得病以华祭神，满十五日乃得除愈。其日生者，威德肃然大富饶财，其性慳贪淫他妇女，须自治身勿行此事。其人入胎宜在参宿，欲作诸事宜在危宿。若七星宿、娄宿、箕宿日，作事者成无有善恶。若昴宿日、牛宿、翼宿，营事则恶多有障碍。辟宿、房宿、尾宿，此三日则有利益。室宿之日远行安隐。心、奎、柳宿，此三宿日欲为事者得他人力。张宿、斗宿、胃宿，此三宿日宜结亲友、娶妇之事。

“房宿白月一日用事，能于世间作速疾事。其日病者，作青豆饭以用祭神，十日除愈。其日生者有堕崖岸刀兵之厄，于此二事须自护身，宜于治生贩卖之业，软弱儒雅乐法信福。其人入胎宜井宿日、张宿、斗宿、胃宿等日，欲作诸事无有善恶。轸、毕、女宿，此三宿日作事者凶。心宿、柳宿、奎宿，此三宿日作事者吉。室宿、房宿、鬼宿、辟宿，此四日作事安隐而得自在。箕宿、娄宿，此二日远行安隐得知识力。虚宿、昴宿、张宿、翼宿，作事有利得他人物。箕宿、觜宿、角宿、虚宿、亢宿、参宿，此六宿日要结亲友大小知识、娶妇皆吉。

“心宿二日用事，好作恶事。其日得病，以粳米饭并大麦饭黄石蜜等祭帝释天，经十三日然后除愈。其日生者，性多瞋恚无有慈心，纵持戒者亦复破戒。若见于他行净行法，宜于此处须自慎微。生产之所亦须护身，此心宿日入胎者吉。角、虚、觜宿，此三宿日入胎不吉。昴、牛、翼宿，此三宿日宜作诸事。辟宿之日若作事者多有障碍。七星、箕、娄，此三宿日乃得自在多有利益。尾宿、柳宿、奎宿、危宿、轸宿、毕宿，此六星宿得他人力。胃、张、斗宿，此三宿日宜远行来道路安隐。室宿、亢宿、危宿、井宿、氏宿、参宿，此六宿日宜结亲友及以娶妇。

“尾宿三日用事，刚柔二事皆悉能作。其日得病，取诸果根及果华气，以用祭神三十日愈。其日生者，大富饶财多有谷麦。其人有相神德之人，唯生产处须自防慎；亦复好为草马所蹋，至草马所又须自备。尾宿之日而入胎者，柳宿、角宿、危宿、参宿，此四宿日宜作恶事。轸宿、房宿、毕宿、奎宿，此四宿日不可造作诸种事业。危宿之日恶事得作。斗宿、翼宿、胃宿，此三宿日欲作恶事，无有利益多诸烦恼。箕宿、七宿、娄宿，此三宿日乃得自在为有利益。角宿、虚宿、觜宿，此三宿日得他人力而获自在。昴宿、牛宿、张宿，此三宿日行来安隐。室宿、辟宿、井宿、鬼宿、房宿、氏宿，此六宿日宜结知识大小亲友、婚姻嫁娶其事皆吉。

“箕宿四日用事。其日得病，应以麻糜尼俱陀子，祭于水神八日乃愈。其日生人，善能耕田行船之业，其性精进行十善业，多闻智慧，有大名誉、大富饶财，常与智人共相随逐。七星宿日及娄宿日宜作诸业。角、觜、虚宿，此三宿日，造作诸事无善无恶。氏宿、室宿，此二宿日为事不吉。井宿之日经营事者失于旧业。翼宿、昴宿、牛宿等日欲为事者，自在如意能有利益。张宿、胃宿、斗宿等日造作事者，得他人力亦为有利。参宿、亢宿、危宿等日，欲作事者亦得他力。轸宿、毕宿、女宿等日，若欲远行道路安隐。奎宿、鬼宿、柳宿、房宿、辟宿，此五宿日宜结亲友娶妇之事。

“斗宿五日用事，作柔软业。其日得病，炒粳谷华以蜜和之，用祭诸神七日除愈。其日生者是智慧人，少病大富多有知识。其人入胎宜在张宿，若在危、参、亢宿等日平无善恶，欲营众事皆悉成就。辟

宿、房宿、鬼宿、胃宿，此四宿日作事不吉。毕、女、轸宿，此三宿日欲求自在多有障碍。昴宿、牛宿、翼宿等日，欲营事者自在如意。氏宿、井宿、室宿等日，亦宜作事有其福力。角宿、觜宿、虚宿等日，若远行者道路安隐。奎宿、柳宿、房宿、娄宿、七星心宿，此六宿日宜结亲友嫁聚之事。

“牛宿六日用事。其日生者，为性刚毅心无怖畏，猛健胜人能破国土，前无强敌大富饶财。若入胎者宜在翼宿，一切众星不为障碍皆作善友。

“女宿七日用事。其日得病，经十二月石蜜及华祭于山神乃得除愈。其日生者远行遇伴，宜以治生作柔软事。其人有智少于病疾，常得世间国王供养。轸宿之日入胎者平无有善恶。鬼宿、房宿，此二宿日为作障碍。七星宿、心宿、女宿、毕宿，此四宿日宜造众事。亢宿、危宿、参宿等日作事不合，虚宿、觜宿乃得和合如意自在。室宿、井宿、氏宿等日，远行安隐亦得自在。奎宿、房宿、柳宿等日欲营事者，得他人力亦遇良友。昴宿、张宿、翼宿等日宜结亲友。

“虚宿八日用事。其日得病一年乃愈，应以菹豆、乌豆、小豆、江豆作四种臠，香华祭神。其日生者性多瞋贪，贫无衣食，于色欲间亦复乏少，依约亲属常多怖畏。若角宿日受胎者吉。张宿、胃宿、箕宿之日受胎者，恶多有障碍。房宿、柳宿、奎宿等日入胎者，平无有善恶。氏宿、井宿、室宿等日受胎，亦恶离散不合。亢、危、参宿，此三宿日作事利益得有和合。觜宿之日，欲作事者一切得作。鬼宿、尾宿、辟宿，此三日宜以远行道路安隐。娄宿、七星心宿等日，若为事者得善知识及于良伴。翼宿、箕宿、昴宿等日，亦宜要结诸亲友等。毕宿、牛宿，此二宿日亦复宜于结大善友。

“危宿九日用事，其性柔软。其日得病，苏乳酪糜以祭水神，七日除愈。其日生者性多瞋忿，猛健勇锐而有水厄，若至水所须自防慎。亢宿之日入胎者吉。娄宿、七星心宿等日，若作事者平无善恶。斗宿、昴宿、翼宿，此三宿日作事者恶。辟宿、鬼宿、尾宿、参宿，此四宿日作事亦恶不得如意。室宿、井宿、氏宿之日，作事和合而得安隐。七星之宿、房宿、柳宿、奎宿等日，远行安吉。张宿、箕宿、胃宿等日，欲作事者得良伴力。角宿、女宿、觜宿、轸宿、毕宿、牛宿，此六宿日宜结善友及以纳妻。

“室宿十日用事其性速疾。其日得病，以种种华用祭于神，三十日愈。其日生者奸伪作贼，愚痴妄语杀害众生，心常作恶不畏父母，若斗盗盗贼如是等处横罗其殃。其人入胎必在氏宿。若作事者箕宿、胃宿、张宿之日，无有障碍处处可为。毕宿、轸宿、牛宿，此三宿日若作事业一切皆恶，井宿之日作事乃吉。房宿、柳宿、奎宿之日造作事者，多有障碍不得利益。鬼宿、尾宿、辟宿之日，宜作事业为得利益。娄宿、七星、心宿等日远行安隐。昴宿、斗宿、箕宿等日，若作事者得良伴力。虚宿、觜宿、角宿等日，宜以要结小知识者。虚宿、

参亢宿等日，宜以要结大知识者。

“辟宿十一日用事。其日得病，华及鹿脯以祭火神，满七日愈。其日生者，其人智慧乐圣人法，学于众艺种种皆能，歌舞伎倡亦复悉解，又主大富多有金银及饶谷帛。若入胎者宜。尾宿日、昴宿、斗宿，此三宿日造作众事平无善恶。觜、女、鬼宿，此三宿日为事成就。心、娄、七星，此三宿日为事多障。柳宿、房宿，此二宿日欲作事者和合如意。轸宿、牛宿、毕宿之日，作事自如逢遇良伴。张宿、胃宿、箕宿之日行来安隐。亢宿、虚宿、参宿，宜可要结小知识者。井宿、氏宿、危宿等日，宜可要结亲友大吉。

“奎宿十二日用事。其日得病，宜以香华祭于神祇，经二十日乃得除愈。其日生者，作柔软事有大势力，人所尊重，唯于閤里须自护身，大富饶财金银谷帛无有限量，治生有利得他人物。彼人入胎，宜在心宿、轸宿、毕宿、牛宿等日，亦多蓄积。亢宿、虚宿，此二宿日，作事者平无有善恶。参宿之日不可作事。柳宿、翼宿、斗宿、昴宿，此四宿日行来安隐。女宿、毕宿、角宿之日，若作事者为得良伴。箕宿、张宿、胃宿等日欲作事者，无有障碍为得人力。娄宿、心宿、尾宿，此三宿日欲结知识为有利益。井宿、氏宿、危宿，此三宿日宜可要结知识小者。鬼宿、尾宿、室宿，此三宿日宜可要结知识大者。

“娄宿十三日用事。其日得病，麦粥祭神，二十五日然后除愈。其日生者为性躁疾，常护众生不害物命，若至关津须自防慎，当作医师善解方药能疗众病，亦复善能歌舞之事。心宿之日有入胎者，无有障碍。角宿、觜宿、女宿、虚宿、井宿、亢宿、危宿，此七宿日若作事者平无善恶。此星宿日，唯莫卖买，不宜行来及以剃头，亦不得至相斗处所。昴宿、斗宿、张宿，此三宿日宜报怨仇斗争得胜，宜作轻利濡事得成。七星宿日作事牢固亦有利益。张宿、箕宿、胃宿，此三宿日欲远行安隐。辟、轸、毕宿，此三宿日作事利益亦宜密语。参宿、虚宿、亢宿之日宜作恶事。鬼宿、尾宿、室宿等日，宜可要结诸小知识。柳宿、房宿、辟宿等日，宜可要结诸大知识，为得众人爱护于己，宜造床舆及买牛马。

“胃宿十四日用事。人生吉凶造作善恶疾病等事如上说了。月行虚空周匝宿讫还更起昴，是故言日虚空月满，三十昼夜亦名月满，八月满者起胃终昴其月如是。夜十五时，昼十五时，日午之影长六脚迹。娄宿夜行房在日前，荧惑日子是时随日，是八月时蝎神主当昴宿为业前已说竟。是白月内，次十五日昴又用事，月合昴星是八月满，昴与月合一日夜讫，其次复转合于毕宿，九月初日毕用事也。

“九月黑月，一日合毕，二日合觜，三日合参，四日合井，五日合鬼，六日合柳，七日合星，八日合张，九日合翼，十日合轸，十一日合角，十二日合亢，十三日合氏，十四日合房，十五日合心，是黑月满。白月，一日合尾，二日合箕，三日合斗，四日合牛，五日合

女，六日合虚，七日合危，八日合室，九日合辟，十日合奎，十一日合娄，十二日合胃，十三日合昴，十四日合毕，十五日合觜，是白月满。九月合觜宿满，昼十四时，夜十六时，日午之影长八脚迹。日行南陆，昴宿夜行，尾在日前。其九月时岁星用事，为一切天之所尊敬，得失诸事皆悉由之。是九月时，射神主当。

“十月黑月，一日合参，二日合井，三日合鬼，四日合柳，五日合星，六日合张，七日合翼，八日合轸，九日合角，十日合亢，十一日合氐，十二日合房，十三日合心，十四日合尾，十五日合箕，是黑月满。白月，一日合斗，二日合牛，三日合女虚，四日合危，五日合室，六日合辟，七日合奎，八日合娄，九日合胃，十日合昴，十一日合毕，十二日合觜，十三日合参，十四日合井，十五日合鬼，是白月满。十月合鬼宿满，昼十三时，夜十七时，日午之影长十脚迹。觜宿夜行，女在日前。当此之时辰星用事。是十月时，磨竭之神主当其月。

“十一月黑月之内，一日合柳，二日合七星，三日合张，四日合翼，五日合轸，六日合角，七日合亢，八日合氐，九日合房，十日合心，十一日合尾，十二日合箕，十三日合斗，十四日合牛，十五日合女，是为黑月满。白月，一日合虚，二日合危，三日合室，四日合辟，五日合奎，六日合娄，七日合胃，八日合昴，九日合毕，十日合觜，十一日合参，十二日合井，十三日合鬼，十四日合柳，十五日合七星，是白月满。十一月合七星满，昼十二时，夜十八时，日午之影十二脚迹。鬼宿夜行，危在日前，近南转辰星用事。是十一月，水器之神主当其月。

“十二月黑月，一日合张，二日合翼，三日合轸，四日合角，五日合亢，六日合氐，七日合房，八日合心，九日合尾，十日合箕，十一日合斗，十二日合牛，十三日合女，十四日合虚，十五日合危，是黑月满。白月，一日合室，二日合辟，三日合奎，四日合娄，五日合胃，六日合昴，七日合毕，八日合觜，九日合参，十日合井，十一日合鬼，十二日合柳，十三日合七星，十四日合张，十五日合翼，是白月满。十二月合翼宿满，昼行十三时，夜行十七时，日转近北，日午之影十二脚迹。七星夜行，天师岁星用事之时。是十二月，天鱼之神主当其月。

“正月黑月，一日合轸，二日合角，三日合亢，四日合氐，五日合房，六日合心，七日合尾，八日合箕，九日合斗，十日合牛，十一日合女，十二日合虚，十三日合危，十四日合室，十五日合辟，是黑月满。白月，一日合奎，二日合娄，三日合胃，四日合昴，五日合毕，六日合觜，七日合参，八日合井，九日合鬼，十日合柳，十一日合七星，十二日合张，十三日合翼，十四日合轸，十五日合角，是白月满。正月合角宿满，昼行十四时，夜行十六时，日转近北，日午之影长八脚迹。张宿夜行，娄在日前。日子荧惑严恶速疾此时用事。是

正月时，持羊之神主当其月。

“二月黑月，一日合亢，二日合氐，三日合房，四日合心，五日合尾，六日合箕，七日合斗，八日合牛，九日合女，十日合虚，十一日合危，十二日合室，十三日合辟，十四日合奎，十五日合娄，是黑月满。白月，一日合胃，二日合昴，三日合毕，四日合觜，五日合参，六日合井，七日合鬼，八日合柳，九日合星，十日合张，十一日合翼，十二日合轸，十三日合角，十四日合亢，十五日合氐，是白月满。二月合氐宿满，昼行十五时，夜行十五时，日近北行，日午之影长六脚迹。角宿夜行，昴在日前。阿修罗师名曰太白此时用事。是二月时，持牛之神主当其月。

“三月黑月，一日合房，二日合心，三日合尾，四日合箕，五日合斗，六日合牛，七日合女，八日合虚，九日合危，十日合室，十一日合辟，十二日合奎，十三日合娄，十四日合胃，十五日合昴，是黑月满。白月，一日合毕，二日合觜，三日合参，四日合井，五日合鬼，六日合柳，七日合星，八日合张，九日合翼，十日合轸，十一日合角，十二日合亢，十三日合氐，十四日合房，十五日合心，是白月满。三月合心宿满，昼行十六时，夜行十四时，日行近北，日午之影长四脚迹。氐宿夜行，觜在日前。日子名曰佛陀悬多此时用事作柔软业。是三月时，双鸟之神主当其月。

“四月黑月，一日合尾，二日合箕，三日合斗，四日合牛，五日合女，六日合虚，七日合危，八日合室，九日合辟，十日合奎，十一日合娄，十二日合胃，十三日合昴，十四日合毕，十五日合觜，是黑月满。白月，一日合参，二日合井，三日合鬼，四日合柳，五日合七星，六日合张，七日合翼，八日合轸，九日合角，十日合亢，十一日合氐，十二日合房，十三日合心，十四日合尾，十五日合箕，是白月满。四月合箕宿满，昼行十七时，夜行十三时，日近北行，日午之影长两脚迹。房宿夜行日随井星。是四月时，蟹神主当其月。

“五月黑月，一日合斗，二日合牛女，三日合虚，四日合危，五日合室，六日合辟，七日合奎，八日合娄，九日合胃，十日合昴，十一日合毕，十二日合觜，十三日合参，十四日合井，十五日合鬼，是黑月满。白月，一日合柳，二日合七星，三日合张，四日合翼，五日合轸，六日合角，七日合亢，八日合氐，九日合房，十日合心，十一日合尾，十二日合箕，十三日合斗，十四日合牛，十五日合女，是白月满。五月合女宿满，昼行十八时，夜行十二时，日极行北，日午之影长半脚迹箕。宿夜行心在日前，是时光，焰炽大盛。此五月时，师子之神主当其月。

“六月黑月，一日合虚，二日合危，三日合室，四日合辟，五日合奎，六日合娄，七日合胃，八日合昴，九日合毕，十日合觜，十一日合参，十二日合井，十三日合鬼，十四日合柳，十五日合七星，是黑月满。白月，一日合张，二日合翼，三日合轸，四日合角，五日合

亢，六日合氏，七日合房，八日合心，九日合尾，十日合箕，十一日合斗，十二日合牛女，十三日合虚，十四日合危，十五日合室，是白月满。六月合室宿满，昼行十七时，夜行十三时强，日近南行，日午之影长二脚迹。女宿夜行张在日前，月子名觉此时用事。此六月时，天女之神主当其月。

“七月黑月，一日合辟，二日合奎，三日合娄，四日合胃，五日合昂，六日合毕，七日合觜，八日合参，九日合并，十日合鬼，十一日合柳，十二日合七星，十三日合张，十四日合翼，十五日合轸，是黑月满。白月，一日合角，二日合亢，三日合氏，四日合房，五日合心，六日合尾，七日合箕，八日合斗，九日合牛女，十日合虚，十一日合危，十二日合室，十三日合辟，十四日合奎，十五日合娄，是白月满。七月合娄宿满，昼行十六时，夜行十四时，日转近南，日午之影长四脚迹。室宿夜行角在日前，阿修罗师名曰太白此时用事。是七月时，秤量之神主当其月。”

“尔时，佉卢虱吒告天众言：‘是诸月等各有主当，汝可救济四种众生。何者为四？救地上人、诸龙、夜叉乃至蝎等，如斯之类皆悉救之。我以安乐诸众生故，布置星宿各有分部。乃至摸呼罗时等亦皆具说，随其国土方面之处，所作事业随顺增长。’佉卢虱吒于大众前合掌说言：‘如是安置日月年时大小星宿，何者名为有六时也？正月、二月名暄暖时，三月、四月名种作时，五月、六月求降雨时，七月、八月物欲熟时，九月、十月寒冻之时，十有一月合十二月大雪之时，是十二月分为六时。又大星宿其数有八，所谓岁星、荧惑、镇星、太白、辰星、日、月、荷罗睺星。又小星宿有二十八，所谓从昴至胃诸宿是也。我作如是次第安置说其法已，汝等皆须亦见亦闻。一切大众于意云何？我所置法其事是不？二十八宿及八大星，所行诸业汝喜乐不？为是为非宜各宣说。’

“尔时，一切天、人、仙人、阿修罗、龙及紧那罗等，皆悉合掌咸作是言：‘如今大仙，于天人间最为尊重，乃至诸龙及阿修罗无能胜者！智慧慈悲最为第一，于无量劫不忘怜愍一切众生故获福报，誓愿满已功德如海，能知过去、现在、当来一切诸事，天人之间无有如是智慧之者！如是法用，日、夜、刹那及迦罗时，大小星宿，月半、月满、年满，法用更无众生能作是法，皆悉随喜安乐我等。善哉！大德，安隐众生。’

“是时，佉卢虱吒仙人复作是言：‘此十二月一年始终，如此方便大小星等刹那时法皆已说竟。又复安置四天大王，于须弥山四方面所各置一王，是诸方所各领众生。北方天王名毗沙门，是其界内多有夜叉。南方天王名毗留茶俱，是其界内多鸠槃荼。西方天王名毗留博叉，是其界内多有诸龙。东方天王名题头隶吒，是其界内多乾闥婆。于四方维皆悉拥护，一切洲渚及诸城邑，亦置鬼神而守护之。’

“尔时，佉卢虱吒仙人说法已，诸天、龙、夜叉、阿修罗、紧那

罗、摩睺罗伽、人非人等，一切大众皆称善哉欢喜无量。是时天、龙、夜叉、阿修罗等，日夜供养佉卢虱吒。次复于后过无量世，更有仙人伽伽出现于世，复更别说置诸星宿、小大月法、时节要略。”

尔时，诸龙在佉卢氏山圣人住处，尊重恭敬光味仙人，尽其龙力而供养之。

大乘大方等日藏经卷第九

送使品第九

尔时，娑伽罗龙王白光味菩萨言：“大德，乃能忆念如是过去宿命劫中种种善业无量往事而不忘失，及说虚空星宿照明安施法用，悉皆了达一无遗，于三界中最尊最胜，智慧第一更无能过。是故彼龙并及我等，如是方便得脱此狱离于苦恼，怜愍众生慈悲一切，功德戒行及婆罗多，庄严于心一切满足。”

是时，光味语诸龙言：“我今非是佉卢虱吒苦行仙人，亦复不能于虚空中置于星宿，今我说者神通力知。汝娑伽罗诸龙王等莫作是说，我实不能。然此佉卢虱吒仙人，宿往因缘说犹未尽。尔时，帝释及诸梵天各向佉卢虱吒仙人，齐共合掌作如是言：‘我等乐闻，唯愿更说。我等梵天诸天中尊，犹如大仙圣人中尊。我诸天中有梵行者，若放种种神祇咒术我皆了知，亦能为他分别广说。’时虱吒仙言：‘若能如是，亦可教化一切众生悉令知之。’是时，青眼帝释天主在于众中，虱吒仙人语帝释言：‘天主，一切善法必令具足，住持于世常使照明，修善法人拥护勿舍。若有精进乐善众生，持戒多闻，修禅学慧，如是等众，天主应当供给所须衣服、饮食、卧具、汤药，种种施与令无有穷。我说虚空星宿法已，今此世界诸地分中，各有龙王停止守卫。如娑伽罗龙、婆娄那德叉、迦宝、护大行、瞿娑罗婆、苏婆呼嚧、俱叉婆、私无俱叉等，此八龙王护于海中，能令大海无有增减。阿奴驮致毗昌伽苏致婆娄那得于问娑叉婆，此四龙王守护池中出一切河，是故诸河流注无竭。难陀、优波难陀，此二龙王守护山中，是故诸山丛林郁茂。婆须吉娑罗嚧盖输卢瞿摩只利，亦为守护。毗梨沙阎浮伽赤眼娑罗婆帝，于小河水而为守护。悉陀摩奴阿罗苏摩贺卢唱利，于圣人所及诸药草而为作护。坚固紧输迦欢喜，此于地中而为守护。最胜光毗喻婆三婆毗离耶尸弃，此于火中作护。动摩都劣三摸地鞞兰耶鞞赖车，此于风中作护。优罗婆罗阿闍耶帝罗娑罗，此于树中作护。吁嚧呵张火薄脚罗沙斯，此于华中作护。香常跋陀耶婆遮富婁那迦罗，此于果中作护。阿匙林婆毗遮婆多吁嚧脂多末罗伽，彼中毗首羯磨苏摩鼓师奇和沙月眼，此四种一切工巧为最守护。鞞罗睺陀罗僧伽那斯阿兰那俱无迦，如此四种夜叉，于一切福德布施等中能为作护。金刚

眼师子眼善见眼三槃，如此四种一切龙护，如是等各各为护。”

尔时，光味菩萨于诸仙圣、天、人、龙中最上最胜，怜愍一切苦恼众生，是故于此救诸龙厄令得解脱。时，光味菩萨作是思惟：“云何当令彼诸龙等，于三宝中回心归向？”即以方便善巧音辞，次第教言一切龙王：“信于我者，我实不能拔济于汝。今有大圣一切智人，乃能施汝安隐无畏。我所赞叹佉罗虱吒仙人功德，如是说法，非我小德办于斯事。彼圣人者，过去无量阿僧祇劫，已曾修习种种福德，一切难事皆悉能舍，所谓象马、种种宝车、妻子、国城、金银辇舆、奴婢衣裳、床榻敷具，众生须者称意与之，或复手足、耳鼻舌身、头目筋骨、皮肉肌肤求无吝惜，速能满足六波罗蜜，具大慈悲于苦恼众生能令解脱；为诸众生得安隐故，乃至处于地狱之中，救济众生心无暂舍，亦不自为得成佛道，欲令一切恶趣众生得脱种种老病死苦。是大仙人，乃往过去无边劫中，经历是等种种愿行。而是仙人，生生世世坚固精进勇猛慈悲，引接众生安涅槃道。又彼佉罗虱吒仙人，无量劫来种种福德具足圆满，乃至生于净饭王家，托在摩耶夫人腹内，既出生已举手唱言：‘我三界中最尊最胜！’放种种光能与一切众生安乐，光因缘故感动无量天、龙、夜叉及阿修罗、人非人等，一切悉来而共供养。又于生时，一一方面各行七步，脚所蹈处皆有莲华承捧其足；以此脚踏行步因缘，一切山河地及大海悉皆涛动，如是变现出生功德。又释迦子，能令我等一切众生解脱生老病死，寂灭安隐，离诸怖畏到涅槃城。”

说是语时，一切诸天、阿修罗众、龙及夜叉、乾闥婆、紧陀罗、摩睺罗伽、人非人等，各散种种众宝、杂华、涂香、末香，于虚空中犹如雨下以用供养，种种赞叹。

尔时，光味菩萨为诸大众而说偈言：

“过去无量僧祇劫， 种种布施习檀那，
清静尸罗及羼提， 精进坐禅学般若。
安乐一切众生故， 备忍种种诸苦辛，
宫中六万后妃嫔， 弃舍出家如脱屣。
独处六年修苦行， 日食一麻一米麦，
精进昼夜不睡眠， 身形唯有皮骨在。
菩提树下思惟坐， 八十万众天魔来，
四方上下地及空， 八十由旬悉充满，
如是魔军及眷属， 皆能破坏使归降，
成就无上胜菩提， 得证第一义谛果。
见闻种种无怖畏， 其心寂静如涅槃，
常于一切众生中， 等心愍念无偏党。
真实智慧具足满， 教导一切诸天人，
无一众生起邪恶， 如是慈悲彻骨髓。

又于一切众生类，乃至蚊子及蝇飞，
不生恼乱毒害心；一切众生流转中，
悉能令其得解脱；又于系缚诸有狱，
拔出众生使获安；结是小小如筋身，
大圣悉皆往救济。彼诸龙等一切众，
能却其恶及忧愁，是故大圣哀愍来，
慈心出汝此狱中，广说无边深秘要，
不自在者悉称心，一切归寂安隐住。
得彼圣人救济者，不畏金翅诸鸟王，
各还所止恣意游，如本受乐心无异。
大圣过去修万行，不许恼乱一众生，
汝等所有诸灾恶，魔王所为非佛作。
莫起余心谤毁佛，受我教诲发菩提，
勿生疑恶自迷没，一一皆如我前说。”

尔时，一切诸大龙王所有眷属男女大小，在于牟尼圣人处者，闻此说已各各一心齐共合掌，作如是言：“南无南无大圣！一切世间众生中胜，具一切法到自在岸，能与一切众生解脱，能与一切众生安乐，能与一切众生欢喜，能令一切到智慧彼岸，于诸众生慈悲平等，令修善法悉具足满，成就一切善业众生，安立善道与实法眼，于天龙中作上福田，于三界中最胜最尊，能受世间一切供养。我等诸龙同共辛苦，满此狱中未能得出。”如是至心礼拜归命，说此语已，一切龙等悉得本形；虽复旧身，而犹不能于彼山中免离得出。

尔时，一切诸龙王等复白光味菩萨言：“惟愿救济！如大德说，彼圣人者，于诸众生不起恼乱常施安乐，此言诚实，我今信受无有疑心。若愍众生慈悲救济，惟愿速来，令我等辈出彼魔狱。”

是时，光味告诸龙言：“彼大圣人具足智慧，牟尼如来心常怜愍一切众生，修习诸善，舍于诸恶，大悲普覆，于流转中精勤勇猛接引众生，于菩提道令得安隐，现见因果成就佛眼。一切菩萨摩訶萨过去久远不瞋因缘，悉皆具足慈悲喜舍四梵行法。复次，菩萨摩訶萨道行因缘中生，因缘生已，种种恶趣及慈等行皆已说竟。复次，彼佛如来世尊住无量阿僧祇恒河沙等诸佛刹微尘等无量无边清净阿耨多罗三藐三菩提行故，六波罗蜜悉具足满。菩萨摩訶萨出于流转生死海故，到大涅槃智慧彼岸，坏四魔故，绍三宝种不断绝故，能以法水洗诸众生，一切烦恼垢令清净故。如来如是永离攀缘说四梵行，复说如性出相离相，及离我见，一切法等无尽方便，谓于五阴、十八界、十二入实谛观故，四大差别生死等法皆得灭尽，方便离于贪瞋痴等，一切烦恼体性悉空，无众生界离诸攀缘，无喜离喜，无行离行，无物离物，无想离想，无诸障碍，无有处所，无尘不染，无暗无明，不可捉持，无自无他，不来不去，无异离行乃至一切阴入界等，智眼体性非暗非

明，不行不生，法界真实，不灭不坏，如如不生，法界真实皆空，过去一切诸法等中悉皆了达，是真攀缘，如来从生。若有菩萨于是法中达到彼岸，具足充满六波罗蜜，犹如虚空离色离触，如是心得无障碍智，普断一切诸见及习悉皆除尽，如是得离一切烦恼，是名菩萨摩訶萨离观四种梵行之法。”

是时，光味说此法已，时彼众中娑伽罗龙王、毗昌伽苏脂龙王、须摩呼嚧迦沙护宝龙王，如是等龙王，已于过去菩萨行中修习福德发弘誓愿，念宿命已即得光明照耀陀罗尼；余诸龙众八十那由他，亦曾过去种种愿行悉修习来，一切皆发三菩提心得于三昧。

尔时，光味即自化作圣人一身如菩萨形，与诸仙等乘神通力，从虚空中往如来所。

念佛三昧品第十

尔时，一切诸龙众等，信受光味菩萨之言，皆悉至心归依于佛、归依于法、归依于僧。作是归时，魔王波旬亲见亲闻，既见闻已，大生惊怪怖畏不安，瞋恚忧愁遍身流汗，举手摸头而说偈言：

“呵呵看彼甚大笑， 奸伪幻惑释沙门，
诱诳诸龙皆归已， 迷忤一切诸众生。
惑乱道中妄安立， 实非言是我法真，
如是实法若得时， 彼中始终应不失。”

尔时，波旬说是偈已，彼众之中有一魔女名为离暗。此魔女者曾于过去植众德本，作是说言：“沙门瞿昙名称福德，若有众生得闻佛名一心归依，一切诸魔于彼众生不能加恶，何况见佛亲闻法人，种种方便慧解深广！父王今者欲于如来及学佛道者边兴造恶心，终不能成。”

时魔王言：“沙门瞿昙解达真如，智慧广大，于空法中深入坚固，自既度脱生死大海，又教众生亦皆出离。”

魔女答言：“如王所说，若于空法觉实际者，设千万亿一切魔军，终不能得须臾为害。如来今者开涅槃道，女欲往彼归依于佛。”即为其父而说偈言：

“离相不著人中胜， 如如常住天中尊，
到于彼岸智慧城， 我今欲往归依彼！
修学三世诸佛法， 度脱一切苦众生，
善于诸法得自在， 当来愿我还如佛！”

尔时，离暗说是偈已，父王宫中五百魔女姊妹眷属，一切皆发菩

提之心。

是时，魔王见其宫中五百诸女，皆归于佛发菩提心，益大瞋忿怖畏忧愁，即作是念：“我今当行大魔王力、大魔王威，于自宫中魔王坐处极尽神化，当彼圣人牟尼住所，一切诸龙和合集处，作大火石从虚空中一时雹下，碎彼诸龙及光味仙人使其远散。若彼去者，我魔王宫乃可安乐。”作是念已，即于空中放大火雹如雨而下。

是时，如来以神通力变彼火石悉为天华，缤纷乱坠堕伽罗砥，满山顶上圣人住处悉皆充遍，一切龙王莫不欢喜。

是时，魔王见雹下于圣人住所，即自指示五百女言：“诸女好看，今彼处所一切诸龙眷属大众，归依沙门瞿昙边者，我已破碎一切如尘，何况我宫而不能坏？若我宫中有欲归向于瞿昙者，要当使其如彼不异。”

是时，五百诸魔女等，更为波旬而说偈言：

“若有众生归佛者， 彼人不畏千亿魔，
何况欲度生死流， 到于无为涅槃岸！
若有能以一香华， 持散三宝佛法僧，
发于坚固勇猛心， 一切众魔不能坏。
何况毕定求作佛， 若有精诚持一戒，
或复至心来佛边， 听受一句微妙法！
即发不退菩提道， 决定一切众中尊，
得佛金刚不坏身， 能摧一切四魔众。
父王但看诸龙等， 各散种种香华云，
惟佛世尊能了知， 非是魔王之境界。
独一无二导师于世， 说于殊胜难思议，
所作一切皆吉祥， 能令众生罪业除。
我等过去无量恶， 一切亦灭无有余，
至诚专心归佛已， 决得阿耨菩提果！”

尔时，魔王闻是偈已，倍大瞋恚怖畏煎心，憔悴忧愁独坐宫内。

是时，光味菩萨摩訶萨闻佛说法，一切众生尽离攀缘得四梵行，当于佛前从空而下。到佛所已，光味菩萨与其大众，为佛作礼右绕三匝，却住合掌而白佛言：“世尊，如来说彼四禅地依止心念陀罗尼。以是陀罗尼咒术力故，我忆过去有二婆罗门子，以欲事故罪应合死，为官所收，杀时未到。王敕有司付于牢狱，半月半月时给一餐，五缚系身，两手两足悉皆桁桎，咽喉被锁饥渴难堪，兼复畏于死时将逼，狱中一心归依于佛，彼时有佛名曼陀罗华香，专意佛边遥求救济。是时，彼佛怜愍众生及我等故，于自座中现佛境界大神通力，说四禅地依止心念陀罗尼，作如是言：‘我以佛力令彼狱中二婆罗门闻此四禅地依止心念陀罗尼，闻已欢喜至心忆念，以是因缘令其所有一切恶业、’

一切障碍，若今生中恶业障碍，若多生中诸恶业障，若烦恼障、法障、众生障、舍施障、智慧障、生活障、寿命未尽横死障、意欲不生系地所牵业力障碍，若有清净佛刹之中情愿欲生而不得往违心障碍，如此一切恶业障碍，闻此四禅地依止心念陀罗尼因缘故，喉及手足五种枷锁，自然一时脱落在地，即于狱中得陀罗尼力，以神力故得出于狱，从虚空中到曼陀罗华香佛所，礼拜供养尽其寿命，即得往生山光佛刹。彼佛世尊名曰云色，从云色佛求请出家；既出家已，生生世世无量劫中，常得不生于空佛刹，恒值佛世。’如今此刹娑婆世界三千大千佛土，地及虚空乃至阿迦膩吒天，人非人等皆悉充满；时彼佛刹一切众生，地及空中乃至阿迦膩吒天亦复如是。一切众生具足恶业及诸障碍，以彼如来为众生故说此四禅地依止心念陀罗尼，身口意恶悉皆消除。若听闻此陀罗尼力，一切三世诸罪恶业悉灭无余。又彼众生种种更得人忍三昧陀罗尼，乃至寿命欲尽之时，此间死已如愿欲生他方清净佛刹，应念即生得于宿命，常勤精进行十善法，常不复堕三恶道中，常能修行六波罗蜜，常行四摄，常得见佛，常闻于法，常供养僧，常得四禅及五神通，常具足得四梵行，念生生世世常与彼法和合共生，乃至涅槃未曾舍离。”

佛言：“善哉！善哉！善男子，汝为大利益众生故，作如是说过去宿命发心因缘。”

尔时，世尊复告光味菩萨言：“善男子，谛听！谛听！若有比丘、比丘尼、优婆塞、优婆夷，或男或女有信心者，欲于三乘及余道中，愿得速证涅槃道尽一切苦者，欲得一切闻持在心，一切身口意业清净，欲护佛法，欲求种种利益，种种衣食一切丰饶，自在殊胜端正大力，眷属强盛，国土富安，职位高迁多人敬奉，聪明智慧最尊最胜，行住四仪常无所乏，及乐种种施戒坐禅，得诸三昧乃至无色，一切有顶所有三昧，亦复乐于四梵天行，若有乐于陀罗尼人，望得如是种种众事，而彼恶业坚固厚重，诸业障碍，烦恼障碍，乃至欲生清净佛刹不生障碍，以如是故，种种善愿不得称心，欲令如是种种恶业速灭尽者；而此众生应净洗浴著鲜洁衣，菜食长斋勿啖辛臭，于寂静处庄严道场，正念结跏或行或坐，念佛身相无使乱心，更莫他缘念其余事，或一日夜或七日夜，不作余业至心念佛，乃至见佛小念见小、大念见大，乃至无量念者见佛色身无量无边。彼佛身形三十二相，于一相亦念亦观皆令明了，随所见相见青光明，于彼光相专精系意无令心乱，作是念时而诵是咒：

“哆经哞 毗视林婆毗视林婆 郁头波[馬+犬]避耶 毗视林婆
斯那婆颇罗斯那婆颇 罗阿□那多他侈 阿□那多他侈 復嚧多俱致
毗视林婆 毗视林婆 莎呵。

“如是一相在于前心，[骨+力][骨+力]专念不起乱想，然后诵此

陀罗尼咒，乃至念于佛身相中青色出光，彼光出已从行者顶入。尔时安心慎莫惊怖，于自身中见于此光，如彼青色念此青光，于自身中各各肢体处处遍行，乃至一切身中火燃，见火燃已乃至成灰，及四方风来吹散灭。如是念时，见于自身无有一相惟有空在，乃至十方皆悉是空不见一色。如是念佛青色力缘，诵持于咒成就此行。

“善男子，若复有人如是系念不散乱心，学四禅地依止心念陀罗尼，而彼众生一切业障、烦恼障、法障罪业皆尽，惟除五逆、破毁正法、诽谤圣人。若复有人如是乐者，能如上习念佛三昧，一日一夜口能诵持一切佛法，一切外道十八种论智慧胜处，如是种种句义文章悉皆忆持无有遗忘。又一日夜得于四禅、四种神通、四无量行、四种辩才，及四无色三摩跋提，如是等法一切成就具足得之。如是修者，乃至能于一弹指顷，到一佛刹及无量刹。又以一足能动如是无量刹土，过是等刹亦能动摇。能以一身结跏趺坐遍满诸刹，如是世界能令水满，十方尘数皆能数知，能以七宝满诸国界。又复彼人于一念顷，悉能得知生死业报，过去、现在及以当来一切众生所有心数。又彼行人能以一身，种种化作一切佛身、帝释天身、梵天王身、那罗延身、摩醯首罗身、四天王身、转轮圣王身，乃至水火遍虚空。又复彼人如是念者，能一念中一切十方地及虚空种种华满七宝充遍，一切众香、伞盖幢幡、种种衣裳、种种缨络，一切虚空皆悉能满。若复有人至心修习此四禅地，依止念佛三昧，一一差别谛识了达。时彼众生如是无量恶业悉尽，如是无量福德精进种种三昧、种种陀罗尼、种种忍及五神通，于余乘中速得满足，流转海中毕定疾出。除五无间、谤法、诽圣不得是法，彼人应须经七七日，此四禅地依止念佛三昧心内熏修，于此法中常说修习不舍离者一切罪尽。若不专心，罪两分尽；平常用心，罪一分尽；如是修习须精进心、纯信敬心，能如是者彼恶乃尽。若复有人此四禅地依止念佛三昧，或天中说，或人中说，若彼天人信心听受如此三昧，内自思惟生于欢喜，如是之人若在牢狱五锁系身，或复余处受辛苦者悉得免脱。若失生活，或复求财，或打或烧，或临河水，或被毒药，或为种种怨家来侵，或一切鬼、或一切幻、或复国王种种怖畏，或自家中斗争口舌，或复他人横来瞋怒，或死怖畏，或恶道中欲堕怖畏，如是怖畏此业皆尽，生人天中。若复有人一闻如是四禅地依止念佛三昧，至心信受如是念佛三昧，有大势力，有大利益，小小用心尚得如是，何况至心无有疑惑！”

说此三昧法时，众中八十六频婆罗那由他百千从十方来诸天人等，过去已曾为此三昧所熏修者，皆悉获得如上所说。复有八十四那由他众生得苦智忍，无量众生得此三昧或须陀洹至罗汉果，无量众生发菩提心。

时，彼离暗五百魔女，承佛神力在魔王宫，悉皆得此念佛三昧，悉舍本形得男子身，曾于过去修学如是念佛三昧故。时，此五百诸魔王女得三昧已及男子身，心生欢喜欲往佛所，一切化作大梵天身，一

一梵王无量千亿眷属围绕，或作无量帝释天身，亦有千亿眷属围绕，各以无量种种音乐种种庄严，如是化已从魔宫下，向如来所设于供养，种种华鬘、末香、涂香散于佛上，顶礼佛足右绕三匝，却住一面。

升须弥山顶品第十一

尔时，佛告光味菩萨摩訶萨言：“善男子，汝今当知，彼一切龙恶道中生罪业悉尽。”复告光味：“空观心念故。”

时，光味言：“如是，世尊，如来清净戒行具足，如来当为一切诸龙作庄严故。”

“复次，光味，我于是时，实为诸龙不可思议业报差别欲广说故。”

尔时，一切诸色欲天，乃至夜叉、鸠槃荼等，从虚空中雨种种华，散种种香、衣服幢幡、七宝瓔珞，种种伎乐无量百千亿那由他，一时俱作歌咏赞叹出妙音声，人与非人欽然恭敬。

尔时，世尊从座而起，四面顾视向北方看，此何处山与须弥接近，彼欲界及于色天。尔时，如来与诸大众菩萨、声闻、天、人、龙、神一切八部四面围绕，前后导从趣须弥山。是时，如来欲以足步蹶于山根次第登上。大梵天等知佛欲升须弥山顶，即为如来化作七宝阶桥，持诸天衣及华香末种种校饰，如是作已前白佛言：“惟愿如来行我桥上。”他化乐天亦为佛故，用阎浮金化作宝桥，以龙栴檀末而散桥上，作如是言：“惟愿如来行我桥上。”化自乐天亦为佛故，用诸天金化作宝桥，种种牛头栴檀末散于桥上，作如是言：“惟愿如来行我桥上。”兜率陀天亦为佛故，以诸天银化作宝桥，以诸种种应时所出微妙之香名黑栴檀末而散桥上，作如是言：“惟愿如来行我桥上。”须夜摩天亦为如来，以天琉璃化作宝桥，散诸种种多摩罗叶细末香，作如是言：“惟愿如来行我桥上。”天帝释亦为佛故，以赤真珠化作宝桥，以天种种栴檀一切宝末用散桥上，又以天缯七宝妙网而罗覆之，覆已作如是言：“惟愿如来行我桥上。”如是四镇四大天王，亦以珍琦天石藏宝，为如来故化作宝桥，亦持细妙种种天衣覆于桥上，覆已作如是言：“惟愿如来，从我桥上上须弥山。”是时，四大阿修罗王并其眷属，为如来故，以其所出摩娑罗宝化作宝桥，持天金银细末之屑散于桥上，散已作如是言：“惟愿如来行我桥上。”

尔时，世尊为彼一切梵、释、四镇及阿修罗、诸天王等，以怜愍故一时化作八佛如来，三十二相、八十种好无有殊异，八部四众菩萨声闻围绕导从。彼一切天、阿修罗等，如是大设诸庄严已，时佛世尊即上宝桥升须弥顶，或余处起，或余处去。彼八如来身大明耀，一一佛身皆放光明，如百千亿日月之光一时照明。如是八佛放身光已，时

诸龙众一切皆在此佉罗山圣人处所集聚而住。诸龙见已一切怪言：“此是何处八大护世，今来依止于须弥山？”

尔时，难陀、优波难陀龙王作如是言：“此是梵天一切欲色围绕而住，一切天中最为殊胜到智慧岸，怜愍我等故来至此。今一切龙若欲得出此苦狱者皆可礼敬。”

是时，阿那婆跋多龙王作如是言：“此非梵天，乃是魔王，于欲界中威力自在，愍我等故，妻子眷属皆悉围绕。为欲界中一切众生脱于怖畏，故来是中救我龙厄。”

时，地利致色龙王作如是言：“此非魔王，乃是欲界他化等天故来此中，欲令一切诸龙解脱。”

尔时，众中一切龙王皆发大声，作如是言：“愿诸天等，与我解脱，与我解脱，施我安乐，令我早得出于地狱。”

时，娑伽罗龙王复作是言：“彼非兜率化自乐等，此是天主释提桓因所放光明，照于欲界及四天下，观彼一切四域众生乐于善法。汝等一切起慈悲心，更勿生瞋，于彼天所求乞解脱速离此苦。”

时，善住龙王作如是言：“此非帝释，乃是一切诸色界天，舍于禅乐从彼下来，欲雨法雨与众生乐。汝诸龙等一切至心礼拜乞救。”

时，毗昌伽苏脂龙王复作是言：“此非色天神通力来，是四天王毗沙门等，为护四方各各自将眷属而来，欲除罪恶诸众生故。”

尔时，宝护龙王复作是言：“此非四天王，我见染衣、剃除须发、身服袈裟、相好端然、盛德自在，为诸天人之所瞻仰，恭敬供养合掌围绕，如日月天星宿遍绕。此八大圣皆悉显赫，坚固照明身紫金光，三十二相慈悲一切，于三界中得受供养。”

尔时，毗昌伽苏脂龙王更如是言：“真实导师我亲见来，能救能护一切众生，能竭苦海，能于此狱与解脱乐，今近住此须弥山顶。”

如是世尊神通力故，此须弥顶忽更广阔，八十四百千踰闍那。尔时欲色一切诸天，各欲供养于如来故，为佛造作七宝阶桥，楼阁梯橙次第节级，乃至上到阿迦腻吒天，各以种种不可思议天杂琉璃罗网校饰，犹如宝盖巧妙少双，一切众生见无厌足，无量百千种种珍宝以用庄严，种种天衣、种种瓔珞、种种伞盖、缯彩幢幡、蠡鼓钟铃、华香伎乐，如是供养遍满虚空。

尔时，世尊告帝释言：“天主，如是三千大千世界娑婆刹土，一切诸佛并大菩萨摩訶萨、大阿罗汉、大仙圣人，及乐福德大力魔王，种种色欲天、龙、夜叉、人非人等，于此三千大千刹住受用皆讫。如是，帝释，此须弥山，如来世尊、十方佛刹诸来菩萨、大阿罗汉、一切圣人，乐福魔王、大德诸天，乃至龙、夜叉、罗刹、人及非人，此须弥山皆悉停住。汝诸天等，当来世中多得势力。”

时，天帝释白佛言：“若佛如来怜愍我者，如是受用神通力作，及此三千大千世界娑婆刹中所有菩萨、大阿罗汉、大梵、魔王、他化乐天、诸帝释天，乃至于此娑婆世界所有天王、龙王、夜叉王、乾闥

婆王、阿修罗王、迦娄罗王、紧那罗王、摩睺罗伽王，复有大力福德众生，天中圣人、人中圣人，一切皆来供养佛故，见于佛故，礼拜佛故，听于法故。如是等众，此须弥山若受用者，我于当来增大胜乐，得大安隐。”

尔时，世尊受帝释天于彼中住，端坐正念，熙怡微笑。笑已，口中出种种光，青色、黄色、赤色、白色、紫玻璃色，照此三千大千佛刹之中，百亿魔王宫、百亿帝释宫、百亿梵天宫、百亿一切诸天王宫、百亿阿修罗王宫、百亿圣人牟尼住处。是一切光如是照已，如上所说一切福德大力魔王，乃至圣人一切惊觉，各各寻光乘神通力，如一念顷来到于此须弥山顶。

尔时，世尊现神光已，告帝释言：“天主，如是三千大千世界一佛刹中，则有百亿须弥山王。是时一切诸须弥中，此须弥山最尊最胜。何以故？我及天人一切大集在此受用度诸龙故。”

说此语时，无量百亿帝释天等，一切梵王皆大欢喜。如是如来神通力故，时四龙王皆得从彼圣人住处而出，既得出已各还自方。如是娑伽罗龙王，还于南方大海岸中，复其本身大如须弥，乃至举头到帝释宫自见于佛。如是西方护宝龙王，北方毗昌伽苏脂龙王，东方苏摩呼嚧叉龙王，各还大海于旧宫中悉复本形，乃至如前须弥山头自来见佛所。余无量那由他百千万亿，犹在彼处不能得出，时一切龙向大圣人如是称说：“愿救济我！愿救济我！于此狱中令速解脱。”

尔时，难陀、优波难陀二龙王等，从佉罗山圣人住处，各以自身依须弥山，化作大桥柱帝释宫，作如是言：“惟愿如来踏此桥上，从须弥顶下佉罗坻圣人处坐，为一切龙归依说法。”

时，帝释天如是念言：“此龙身涩毒气皮粗，或伤如来足不安隐。”作是念已，即以天服覆于龙身，又持天中牛头栴檀、优罗伽娑罗栴檀、多摩跋香，此三种香及以天华种种屑末，散于桥上并蔽龙身。时，佉罗坻牟尼住处，以佛力故更增广博，八十四亿那由他百千踰阇。彼处广已，大梵天王以天金银化作师子须弥宝座，种种庄严幡华帐盖而安置之。尔时，一切诸龙王等闻是语已，各白佛言：“世尊，惟愿怜愍救我等苦。”

佛言：“龙王，汝等先应至心念佛，我当救之。”

尔时，世尊在须弥顶，告于长老憍陈如言：“憍陈如，诸佛境界奋迅神通加被之力如是说法，及此一切三千大千娑婆世界佛刹之中，所有一切无量众生，彼诸众生闻我说法能听受者。憍陈如，一切诸法悉皆无常，一切诸法生住无常。何以故？生因缘故，如眼识生、生已住、住已念、念更生，此即是苦，是生因缘，即是苦生，即是痛痒，即是一切十二有支，即是生老病死因缘，如是念念生灭。如眼因缘，耳、鼻、舌、身亦复如是。憍陈如，住虽暂有灭更渐生，此譬如[穴/忽]，此生住缘，此苦因缘，有此百种老病及死，如是展转渐生因缘，眼见造业，随见随念，随念随造，所造生死因缘无穷。憍陈如，

如眼寂灭，光灭没故不见众色，如彼日没窗中不见，若因缘灭一切患灭，十二有支一切寂灭，生死寂灭如日没缘，耳、鼻、舌、身亦复如是。憍陈如，如心寂灭所缘亦灭，此[六/忽]因缘如本不生，一切万法亦复如是，此名苦灭一切患灭，十二有支一切寂灭，究竟生死尽诸有边亦复如是。

“憍陈如，众生不知眼之生灭，随逐耳、鼻、舌、身所染，是故流转于五道中。我之圣法能离生死过于彼岸，是故如来为断一切眼生灭故而演说法，亦为说苦断苦行法，一切苦中得尽其底。是故如来得此法已，是一切天、梵中大梵、天中大天、人中大人、沙门中大沙门、婆罗门中大婆罗门、大慈悲中大悲最胜、无上之尊为大丈夫，已度生死流转彼岸，一切世中最胜檀那、昙摩、僧昙摩。何者檀那？所谓舍施，乃至头目手足、所须肢节皆悉能舍，况复余物！此名檀那。何者昙摩？清净持戒，乃至人来索头与头，心不瞋忿慈悲不失，是名昙摩。何者僧昙摩？不舍六根一心禅定，一切福德言语诵持忆念不忘，此二思量思念已修，此二种名僧昙摩。一切众生平等心法，若我舍法，昙摩、檀那及僧昙摩，四梵行法、圣八正道，如是之法慈心熏故，此一切法于无量劫慈心修故，如我所得一切诸法，于众生中广演宣说，亦作导师悲怜众生开解其意，演说此事无所缺减。汝等今者，应当一心信受奉持学习诸禅，种种兰若，或林树下，或复冢间，种种山岩崖岸中住，于彼坐禅为尽生死故，勤大精进，身心不倦，莫作下心，无所成故死时悔恼。此我一切所教之法，如是说已，此娑婆界三千大千佛刹之中百亿四天下、一四天下，则有无量亿那由他百千众生，彼诸众生种种善根福德具足，或得陀罗尼，或得于忍，或得法眼，或得须陀洹乃至阿罗汉，或有众生，地狱、畜生、饿鬼等中，余报恶业悉得尽灭，如是夜叉、贫穷因缘一切皆尽而得大富，或有众生人中贫穷恶业报尽，及诸恶病皆得除愈，狱禁众生皆蒙解脱。”

尔时，娑伽罗龙王即于佛前，说偈赞叹：

“真金离垢满月面， 清净行具最胜田，
 三界天人龙中尊， 能去众生污垢恼。
 施戒忍辱及精进， 成就真实平等心，
 解脱诸龙施安乐， 忆念往昔誓愿力。
 慈悲久修众业行， 坚固胜彼诸众生，
 如是备受众苦辛， 不忘彼龙诸所恼。
 种种流转得越度， 出过生死海彼岸，
 自身解脱济群生， 智水洗龙使清净。”

尔时，空中自然而雨种种香华、种种宝衣、种种音乐、种种歌舞充满虚空，一切天、龙、夜叉、罗刹及阿修罗悉皆恭敬。

尔时，世尊与诸大众菩萨、声闻，左右围绕前后随从，从须弥顶蹈龙身桥，下佉罗坻圣人住处，梵天所敷宝师子座，坐于彼座。时，虚空中一切天、龙、夜叉、罗刹，并阿修罗、紧那罗等各设供养，种种香末、种种华香、种种宝衣以散佛上，右绕三匝礼已而坐。

尔时，娑伽罗龙王白佛言：“世尊，何因缘故，我等一切在龙中生？”

佛言：“龙王，谛听！谛听！我今为王分别广说，有十种业来生龙中。何者为十？有诸众生行六波罗蜜，欲得阿耨多罗三藐三菩提，亦愿欲得无恶障碍，或复欲得多修布施，以时舍施愿因缘故来生龙中。复次，龙王，或有众生于大乘中修行舍施，福德果报因缘故愿生龙中。复次，龙王，或有众生为阿耨多罗三藐三菩提故行于布施，福报虽多不能清净，怖畏地狱、饿鬼、畜生中因缘故愿生龙中。复次，龙王，有诸众生欲行阿耨多罗三藐三菩提时，生高心大慢力因缘故愿生龙中。复次，龙王，有诸众生发菩提愿行阿耨多罗三藐三菩提时，多生瞋恚恨他众生，以瞋忿向彼地狱、饿鬼、畜生因缘故长起瞋忿，如是死已愿生龙中。复次，龙王，有诸众生求于小乘，欲得福田觅圣人中，舍布施报福德供养，如是因缘自愿力故来生龙中。复次，龙王，有诸众生嫉妒慢故，彼业因缘来生龙中。复次，龙王，有诸众生多起憍慢饶于语言，以彼自业来生龙中。复次，龙王，有诸众生不信佛法僧宝，又不供给和尚阿阇梨及余大德，又不供养父母二亲，于中种种瞋忿毒心爱憎憍慢痴因缘故，于福田中邪错行故，以是业缘来生龙中。复次，龙王，有诸众生种种痴慢恶业力多，福德力少，心怖畏故愿生龙中。复次，龙王，有诸众生妄语、两舌、恶口无慈，此三业缘故而生龙中。”

佛言：“龙王，以此十种业因缘故来龙中生。复次，龙王，复有三业因缘而生龙中。何等为三？有诸众生，坚固恶业造身口意，彼业熟故生地狱中经无量劫，受大极苦难得解脱。虽免大业，小业未尽生于龙中，或畜生中，或饿鬼中，以此三恶业因缘故来生龙中。”

时，娑伽罗龙复白佛言：“如是，世尊，而此龙中或有诸龙所受乐报犹如诸天，或有余龙受乐如人，有如饿鬼、如畜生者，或有余龙如地狱中受大辛苦。”

说是事已，时娑伽罗大龙王子名青莲华面，前白佛言：“世尊，我何恶业罪因缘故来生龙中，身大端正，所有色触或复衣裳及坐卧处，于一切时我身受用犹如火烧，常无衣服赤体而行？如我父王乐受最胜，如转轮王果报不异。”

佛言：“华面，谛听！谛听！善思念之，今当为汝说于本事。乃往过去三十一劫，有佛世尊名曰尸弃多陀阿伽度阿罗诃三藐三佛陀。时彼世中，有王名曰裴多富沙。彼富沙王，于三月中供养彼佛并及无

量百千须陀洹、斯陀含、阿那含、阿罗汉并大菩萨摩訶萨众，以种种衣服饮食汤药而供给之至心听法，既闻法已即发阿耨多罗三藐三菩提心。如是三月设供养已，彼富沙王，为尸弃佛及余众僧造立寺舍，施种种衣、饮食、汤药、床卧、被褥具足丰饶。彼富沙王第一太子，名裴多娑树帝。彼娑树帝见佛闻法，于流转中生大怖畏，从父王边礼拜咨启，请欲就佛愿求出家。王报子言：‘欲往随意，任汝出家。’既出家已，又白父言：‘我欲父王寺上停止。’富沙王言：‘亦随汝意。’住彼寺中。时尸弃佛众僧弟子，在彼寺中坐卧受用敷啖饮食，彼富沙子裴多树帝妒嫉心生，忿彼旧住佛弟子众恒瞋骂之。时，彼众僧被瞋骂已悉皆离寺，彼娑树帝见僧去已生欢喜心，即自念言：‘彼去者好，我大安隐！’众僧去已，时娑树帝恣用寺内衣服饮食，有余人来即不听住。彼娑树帝具造如是诸恶业已，命终之后生大地狱中，经无量千万那由他岁受诸火烧；地狱得脱生饿鬼中，复经无量百千万岁而受辛苦；饿鬼中死还堕地狱，脱地狱已生饿鬼中，如是经由三十一劫。汝等诸龙，谛听！谛受！其娑树帝于流转中，具足如是受诸辛苦。”

佛言：“华面，彼娑树帝者岂异人乎？即汝身是也。乃往过去恶业因缘故生大地狱、饿鬼、畜生轮转受苦，经是三十一大劫中备受众苦未曾暂舍，余残业故来生龙中受是恶报。”

时，华面龙闻是语已大声啼哭，举身自投，四支布地，礼拜白佛作如是言：“我今至心从佛忏悔，我大痴惑、大慢愚矇！不解方便差别好恶造是罪业，低头合掌至心发露不敢覆藏。如來世尊，我今至诚入于骨髓，归佛、归法、归比丘僧，从今发意乃至寿尽，于是时中作优婆塞！”

佛言：“善哉！善哉！善男子，汝今有于地狱、饿鬼、恶道业报，如是至心归依我者得尽彼业。此中死已值弥勒佛得于人身，于弥勒佛法中出家证罗汉果。”

佛言：“华面，莫更狐疑，时彼裴多富沙人王，于三月中以种种资生供养尸弃如来，及诸菩萨、声闻众故今得此报，受娑伽罗大龙王身犹如天乐，三十一劫不生三恶，常生天人受如是报。彼亦为于阿耨多罗三藐三菩提行因缘故，来此龙中愿欲得生。”

说是语时，一切诸龙皆大懊恼悔往先咎，悉于佛前至心供养。

大乘大方等日藏经卷第十

三归济龙品第十二之二

尔时，众中有一盲龙，名曰颇罗机梨奢，举声大哭作如是言：“大圣世尊，愿救济我！愿救济我！诸佛慈悲怜愍一切，我今身中受大苦恼，日夜常为种种诸虫、小蛇、虾蟆之所啖食，居热水中无暂时乐。”

佛言：“梨奢，汝过去世于佛法中曾为比丘，毁破禁戒，内怀欺诈，外现种种善相威仪，广贪眷属弟子众多，名声四远莫不闻知。彼诸弟子如是说言：‘我和尚得阿罗汉果。’以是因缘多得供养，得供养已独受用之，见持戒人反恶加说，彼人懊恼如是念言：‘世生生中愿我所在食汝身肉。’如是恶业死生龙中，是汝前身，众生愿故食啖汝身，恶业因缘得此盲报住热水中。又于过去无量劫中，在融赤铜地狱之中，常为诸虫之所食啖。”

尔时，龙众闻此语已，忧愁啼哭作如是言：“我等今者，皆悉至心咸共忏悔，愿令此苦速得解脱。”

尔时，如来出金色手，摩彼龙面作如是言：“汝等谛听！我于过去曾作国王名曰善眼，是时有一盲婆罗门，来从我乞求索一眼，我时欢喜两眼皆与。若我此言诚不虚者，令汝梨奢清净眼生，一切诸罪悉皆除尽。”即说咒曰：

“多经哱 斫芻佉婆 娑兰那佉婆 羯磨佉婆阿难阇那 毗啰阇佉 波兰多若摩 尼婆罗那都夜阿鞞栴陀罗树低频头输第 吃利波输第 颇罗输第 阿誓 多誓 多[(七/矢)+余] 多[(七/矢)+余] 婆细陀索继陀索继鸣卢罗避摩诃鸣卢罗避 帝履何逻多那婆罗帝莎呵。”

尔时，世尊说此实净眼陀罗尼已，彼梨奢龙得清净眼，余五万三千龙亦得净眼，及余八十四那由他夜叉、鸠槃荼、饿鬼、薜荔多、毗舍遮、人非人等，罪垢消灭皆得净眼。

尔时，善德天子向佛合掌，而说偈言：

“看彼十力世导师， 能使诸龙眼清净，
今生若不得值佛， 诸失眠者常盲冥。”

尔时，世尊告长老憍陈如：“汝可持此净眼陀罗尼咒。若有众生过去恶业，于今现在或当来世，或四大病，或恶人咒，或因毒药，以此缘故即便失明。如是众生，应当诵此净眼陀罗尼，自悔过去所造恶业，于诸众生起大慈悲，至心念佛舍于余事，七七日中昼夜六时以手拭眼，以是因缘得清净眼。若有众生于过去世作诸恶业，或毁于法，或谤圣人，于说法者为作障碍，或抄写经洗脱文字，或损坏他眼，或暗蔽他，此业缘故今得盲报。如是重恶业因缘故，七七日中不得差者，应当抄写此陀罗尼至心诵持悔过彼业，复以海沫、甘草、呵梨勒、阿摩罗、毗醯罗，此五种药捣末蜜和，盛著旧龟甲中以久年酥火上煎已，诵此陀罗尼一千八遍，以咒此药用涂眼上，舍诸缘事七七日中念佛造像至心发愿，时彼众生恶业消尽得清净眼。若有财者并营寺舍，随力所办布施资生，如是一切恶业皆尽，于当来世无量生中常不失眼。”

尔时，一切诸龙众等作如是言：“南无南无大悲世尊！能施三世众生利益，失眠得明，一切恶业清净无垢。”

尔时，有龙名曰青色，大声唱唤而说偈言：

“世尊能除诸罪垢， 犹如大河洗一切，
 悉知众生种种行， 是故称佛众中尊。
 我所居停住泽中， 大野枯泉无有水，
 热风吹身剧于火， 形体屋舍臭难堪。
 八千亿年住于彼， 曾无一日受欢乐，
 常为众生所食啖， 眷属大小悉皆然。”

尔时，世尊说偈答言：

“若有众生造诸罪， 而复修营于福德，
 建立寺舍施钟铃， 种种饮食供养僧；
 以此杂福因缘故， 在所生中随业受，
 造恶苦辛如地狱， 施食快乐似天堂。
 或复来生于龙中， 缘彼善业因缘故，
 于龙头中自然出， 希有如意妙宝王；
 所欲念者皆随意， 种种果报皆悉具，
 虽处枯泉及旱泽， 能出上妙清流水；
 清净虚空布密云， 地平如掌泉池涌，
 行住坐卧所在处， 皆能应念生诸水。
 若有一切诸众生， 虽复能得于人身，
 备造种种罪恶业， 不能供养于三宝，
 死后众苦皆聚集， 地狱饿鬼具受之。
 设复得为龙王身， 所有眷属并妻子，
 贫穷饥饿诸热恼， 顶上无有如意宝，
 居住空泽多毒虫， 枯涸常干无有水。
 如是皆由过去世， 曾于佛法作比丘，
 或见兰若苦行人， 嫉妒悭心惜饮食，
 远客比丘来寄止， 瞋忿怀怒心不喜，
 檀越平等施饮食， 于中遮止便骂詈。
 设有清净好流水， 屎尿粪秽满其中，
 所有居住行坐处， 一切臭秽皆不净。
 或有清净持戒者， 如是见已皆远离；
 若有余处好人闻， 无心欲来于此者。
 彼人恶业因缘故， 死堕地狱无量世，
 灰河沸屎烧赤铜， 无量亿年受楚毒；
 如是饿鬼中饥渴， 生曾不闻浆水名。

余报复生龙道中，具足多年受辛苦，
虽得龙身常饥饿，在所生处空无水，
或在枯泽恶焦山，绝水常干无饮食，
死已数入地狱中，大火热恼充遍身。
在彼经于无量岁，如是循环饿鬼中，
自非修禅能救济；礼拜供养佛如来，
持戒智慧学多闻，精进舍于悭慢想，
妒嫉毒心最为恶，此业因缘须断除。
忆念死时受是殃，决定无疑早忏悔！”

尔时，如来说是偈已，彼龙众中二十六亿诸饿龙等，念过去身皆悉雨泪，作如是言：“唯愿哀愍救济于我！大悲世尊，我等忆念过去世时，于佛法中虽得出家，备造如是种种恶业，以恶业故经无量身在三恶道，亦以余报故生在龙中受极大苦。如青色龙，我亦如是。”

尔时，世尊语诸龙言：“汝可持水洗如来足，令汝殃罪渐得除灭。”

时，一切龙以手掬水，水皆成火变作大石，满于手中生大猛炎，弃已复生如是至七。一切龙众见如是已，惊怖懊恼啼泣雨泪。

佛告诸龙：“汝造罪业得是恶报，修善业人受于好果。我今教汝说真实誓：若佛导师怜愍一切，于诸众生平等无二，此言不虚，愿我诸龙火炎时灭。”作是誓已火炎皆灭。

时，饿龙等乃至八过，以手捧水洗如来足，至心忏悔：“我从今日更不造恶！”如是忏已各白佛言：“如来大慈愿救济我！”

佛言：“诸龙，汝此恶业有余未尽，弥勒佛世当得人身，值佛出家，精进持戒得罗汉果。”

时，诸龙等得宿命心，自念过业啼泣雨面，各如是言：“我忆往昔于佛法中，或为俗人亲属因缘，或复听法来去因缘，所有信心舍施种种华果饮食，共诸比丘依次而食。”或有说云：“我曾吃啖四方众僧华果饮食。”或有说言：“我往寺舍布施众僧，或复礼拜，如是吃啖。”或复说言：“我毗婆尸如来法中曾作俗人。”或复有说：“我尸弃佛如来法中曾作俗人。”或复有说：“我毗叶婆如来法中曾作俗人。”或复有说：“我迦罗拘村驮佛法之中曾作俗人。”或复有说：“我迦那迦牟尼佛法之中曾作俗人。”或复有说：“我迦葉佛如来法中曾作俗人。”或复有说：“我释迦牟尼佛法之中曾作俗人，或以亲旧问讯因缘，或复来去听法因缘往还寺舍。有信心人供养僧故，舍施华果种种饮食，比丘得已回施于我，我得便食。彼业因缘，于地狱中经无量劫，大猛火中或烧或煮，或饮洋铜，或吞铁丸，从地狱出堕畜生中，舍畜生身生饿鬼中，如是种种备受辛苦。恶业未尽，生此龙中常受苦恼，热水烂身，热风吹体，热沙、热土、热粪、热灰，食入口中变成铜汁或作铁丸，于一切时所食之物，入口口焦，入咽咽烂，入腹腹燃，直过堕地

遍体穿穴，受如是苦不可堪忍。惟愿如来慈悲救济！”

佛告诸龙：“此之恶业与盗佛物等无差别，比丘逆业其罪如半，然此罪报受未尽故难可得脱。汝等今当尽受三归，一心修善，以此缘故，于贤劫中值最后佛名曰楼至，于彼佛世罪得除灭。”

时，诸龙等闻是语已，皆悉至心，尽其形寿各受三归。

时，彼众中有盲龙女，口中腥烂，满诸杂虫状如屎尿，乃至秽恶犹若妇人，根中不净臊臭难看，种种噬食脓血流出，一切身分常为蚊虻诸恶毒蝇之所啖食，身体臭处难可见闻。尔时，世尊以大悲心，见彼龙妇眼盲困苦，如是问言：“妹何缘故得此恶身？于过去世曾为何业？”

龙妇答言：“世尊，我今此身众苦逼迫无暂时停，设复欲言而不能说。我念过去三十六亿于百千年生恶龙中受如是苦，乃至日夜刹那不停。为我往昔九十一劫，于毗婆尸佛法之中作比丘尼，思念欲事过于醉人，虽复出家不能如法，于伽蓝内敷施床褥，数数犯于非梵行事，以快欲心生大乐受，或贪求他物多受信施。以如是故，于九十一劫常不得受天人之身，恒三恶道受诸烧煮。”

佛又问言：“若如是者，此中劫尽，妹何处生？”

龙妇答言：“我以过去业力因缘生余世界，彼处劫尽，恶业风吹还来生此。”时彼龙妇说此语已，作如是言：“大悲世尊，愿救济我！愿救济我！”

尔时，世尊以手掬水，告龙女言：“此水名为瞋陀留脂药和，我今诚实发言语汝：我于往昔为救鸽故舍弃身命，终不疑念起慳惜心，此言若实，令汝恶患悉皆除差。”

时，佛世尊以口含水，洒彼盲龙妇女之身，一切恶患臭处皆差。既得差已，作是说言：“我今于佛乞受三归。”是时，世尊即为龙女授三归依。

时，彼众中复有一龙，种种臭恶一切诸虫满其口中，及咽喉内脓血流出，有见闻者皆悉舍去。时，佛见已即便问言：“善男子，汝于过去作何恶业受如是报？”彼龙张口，于其口内出种种虫，脓血流溢犹如热火，虽复张口竟不能言，即还闭口。

尔时，世尊即为彼龙而说偈言：

“汝以过去盗因缘，轻戏圣人受是报，
至诚听我此实言，即得清凉灭诸苦。”

尔时，世尊说实语已，即以少水泻龙口中，火及虫脓悉皆灭尽，龙口清凉作如是言：“大圣如来，我忆过去迦葉佛时，曾作俗人在田犁地。有一比丘，来从我乞求五十钱，我时报言：‘听待谷熟当与汝食。’比丘复言：‘若当五十不可得者，愿乞十文。’我于尔时瞋彼比丘而语之言：‘乃至十钱亦不相与。’时，彼比丘心生懊恼，又于余时往

寺舍中入树林下，辄便盗取现在僧物十庵罗果而私食之。彼业因缘地狱受苦，恶业未尽生野泽中作饿龙身，常为种种诸虫食啖，脓血流溢饥渴苦恼。又彼比丘以瞋忿心恶业缘故，死便即作小毒龙身，生我腋下[口+束]于我血，热气触身不可堪忍，是故我身热脓血满。”龙白佛言：“大悲世尊，唯愿慈哀救济于我，令我脱彼怨家毒龙！”

尔时，世尊以手抄水，发诚实语作如是言：“我曾往昔于饥谨世，尔时愿作大身众生长广无量，以神通力于虚空中唱如是言：‘彼野泽中有大身虫名曰不瞋，汝等可往取其身肉，以为饮食可得不饥。时彼世中人非人等，闻此声已一切悉往竞取食之。’”说是真实谛信语时，彼龙腋下小龙即出。

时，此二龙俱白佛言：“世尊，我等久近离此龙身解脱殃罪？”

佛告龙言：“此业大重，次五无间。何以故？若有四方常住僧物，或现前僧物，笃信檀越重心施物，或华或果、或树或园、饮食资生、床褥敷具、疾病汤药一切所须，私自费用或持出外，乞与知识亲里白衣，此罪重于阿鼻地狱所受果报。是故汝等可受三归，归三宝已乃可得住于冷水中。”如是三称三受，身即安隐得入水中。

尔时，世尊即为诸龙而说偈言：

“宁以利刀自割身， 支节身分肌肤肉，
所有信心舍施物， 俗人食者实为难。
宁吞大赤热铁丸， 而使口中光焰出，
所有众僧饮食具， 不应于外私自用。
宁以大火若须弥， 以手捉持而自食，
其有在家诸俗人， 不应辄食施僧食。
宁以利刀自屠脍， 身体皮膜而自啖，
其有在家诸俗人， 不应受取僧杂食。
宁以自身投于彼， 满室大火猛焰中，
其有在家俗人辈， 不应坐卧僧床席。
宁以火热炎铁锥， 拳手握持便焦烂，
其有在家俗人等， 不应私用于僧物。
宁以胜利好刀砧， 而自脔切其身肉，
勿于出家清净人， 发起一念瞋恚心。
宁以自手挑两眼， 捐弃投之掷于地，
其有习行善法者， 不应怀忿瞋心视。
宁以热铁鑠其身， 东西起动行坐卧，
不应瞋忿心妒嫉， 而著众僧净施衣。
宁饮灰汁碱卤水， 热沸烁口犹如火，
不应怀贪毒恶心， 服食众僧净施药。”

尔时，世尊说此偈已，一万四千诸龙众等悉受三归，所有过去、

现在业报，诸苦恼中而得解脱，深信三宝其心不退。复有八十亿诸龙众等，亦于三宝起归敬心。

尔时，世尊告憍陈如：“汝观此等诸恶众生自诳其心，或以怖畏贫穷因缘，或于恶道生于恐惧修行善法，或作比丘所得种种资生之具，皆是信心檀越所施，而是众生或自食啖，或与他人或共众人，盗窃隐藏私处自用，如是业故堕三恶道久受勤苦。复有众生，贫穷下贱不得自在，是故出家望得富饶解脱安乐；既出家已，懈怠懒堕不读诵经，禅慧精勤舍而不习，乐知僧事。复有比丘昼夜精勤乐修善法，读诵经典坐禅习慧不舍须臾，以是因缘感诸四辈种种供养。时知事人得利养已，或自私食，或复盗与亲旧俗人，以是等缘久处恶道出已还入，如是愚瞋不见当来果报轻重。我今戒敕沙门弟子念法住持，不得自称：我是沙门，真法行人。猗众僧故，他信施物，或饼或果或菜或华，但是众僧所食之物，不得辄与一切俗人；亦不得云，此是我物别众而食；又亦不得以众僧物贮积兴生种种贩卖，云有利益招世讥嫌；又亦不得出贵收贱与世争利；又亦不得为于饮食及僧因缘，使诸众生堕三恶道。应须劝引安善法中，令比丘众真信三宝，摄诸众生乃至父母，令得安隐置三解脱。”

护塔品第十三

尔时，长老阿若憍陈如白佛言：“世尊，此日藏修多罗长夜照明，说一切龙恶业果报不可思议，复说菩萨真实行法。”

佛言：“如是，如是，憍陈如，此四天下有大支提圣人住处，若有众生精勤方便坐禅正慧，当知此处则为不空，如是福地则为流布日藏法宝。何者名为大支提处？此阎浮提内王舍城中，圣人处所大支提者，乃是过去无量如来、无量菩萨、无量缘觉、无量声闻，曾于其中修道灭度，今悉现有当来亦然。过去诸佛菩萨圣人，皆以付授婆娄那龙，令使拥护住持安立；我今亦欲令此处所光明久住，还以付嘱婆娄那龙。若有众生能护我法，精勤方便坐禅正慧，诸富伽罗，应常守护供给供养。”

尔时，婆娄那龙王作如是言：“如是，如是，如世尊教。往昔过去迦罗鸠村驮应正遍知，亦以此处令我守护供给供养，精勤方便坐禅正慧，修善法者为作檀越；我于尔时，供给守护乃至法灭。次复有佛，名拘那迦牟尼乃至迦叶，亦以此处付嘱于我守护供养；我于尔时供给守护，乃至法尽亦复如是。彼佛法中或有弟子，不受奴婢僮仆田地，以清净心精勤苦行，如是一切我皆守护。今日如来，复以此处付嘱于我住持守护。”

尔时，世尊复以西瞿耶尼须弥山下，何罗阇低罗山中圣人处所名曰云尽，付宝护龙王。时，宝护龙白佛言：“世尊，如是，如是，如

世尊教。过去迦罗鸠村驮如来，亦以此云尽圣人住处付嘱于我，我于尔时守护此处，及佛弟子如法行者乃至法灭。”

尔时，世尊复以东弗婆提须弥山下，青鸯伽那山中支提圣人住处名圣人生，付苏摩呼嚧叉龙王。时，彼龙王白佛言：“世尊，如是，如是，如世尊教。”

尔时，世尊复以须弥山下北胁之间，华齿山中支提圣人住处名香峰牟尼，付毗昌伽苏脂龙王，乃至清净法行比丘亦皆付嘱。时，彼龙王作如是言：“如是，如是，如世尊教。过去迦罗鸠村驮如来，亦以此香峰圣人住处付嘱于我，及法行比丘守护供养，乃至迦叶如来亦复如是。今日如来，又以香峰支提处所付嘱于我，我当守护。”佛言：“善哉！善哉！汝大龙王，如是能护我法，住持法母，汝是我伴大善知识、如法檀越。一切众生依于我法，国土久住利益照明。”

尔时，世尊复以西瞿耶尼洲中那焰牟尼圣人处所，付嘱瞿娑岚婆龙王，乃至法行弟子，守护供养亦复如是。复以东弗婆提洲中，昵迦罗陀莲华牟尼圣人住处，付嘱婆私摸极叉龙王，乃至法行弟子，守护供养亦复如是。复以北郁多罗越洲中香峰炎圣人住处，付嘱地行龙王，乃至法行弟子，守护供养亦复如是。复以大海之中娑伽罗龙王宫摩尼藏炎牟尼圣人住处，付嘱娑伽罗龙王，乃至供养亦复如是。复以须弥山顶帝释住处开华藏殿牟尼圣人住处，付嘱伊罗跋罗龙王，守护供养亦复如是。复以此阎浮中难陀婆陀那大德圣人牟尼住处，付嘱阎浮迦龙王，守护供养亦复如是。复以此阎浮中鞞奢利善住牟尼圣人住处，付嘱婆须吉龙王，守护供养亦复如是。复以此阎浮中迦毗罗婆须都善香迦那迦灯牟尼圣人住处，付嘱阿那婆达多龙王，守护供养亦复如是。复以阎浮提中摩伽陀国毗富罗朋迦牟尼圣人住处，付嘱山德龙王，守护供养亦复如是。复以阎浮提中摩偷罗国名爱云炎牟尼圣人住处，付嘱阎婆迦质多罗龙王。复以阎浮提中憍萨罗国名闍耶首驮牟尼圣人住处，付嘱吃利弥迦龙王。复以阎浮提中苏波洛闍萨遮牟尼脂邻陀罗名香牟尼圣人住处，付嘱牟尼脂邻陀罗龙王。复以阎浮地中乾陀罗国名大利舍那若摩罗牟尼圣人住处，付嘱伊罗跋多罗龙王。复以阎浮提内闍宾国中名宫宫摩尼佉牟尼圣人住处，付嘱吁留迦龙王。复以阎浮提中庵浮利摩国名亿藏炎牟尼圣人住处，付嘱迦浮迦龙王。复以阎浮提中震旦汉国名那罗耶那弗罗娑婆牟尼圣人住处，付嘱海德龙王。复以阎浮提内于闍国中水河岸上牛头山边近河岸侧，瞿摩婆罗香大圣人支提住处，付嘱吃利呵婆达多龙王，守护供养。

“此大支提皆是过去大圣菩萨、大辟支佛、大阿罗汉、得果沙门、五通神仙诸圣住处，是故过去一切诸佛次第付嘱，欲令流转怖畏众生增长善根得菩提故。如是十方无量无数阿僧祇刹过去诸佛及诸菩萨，皆住于彼大支提处常加守护，令诸众生恶业尽故。于未来世无量无边阿僧祇刹，诸佛、菩萨摩訶萨、声闻、缘觉，亦复住此二十大支提常加守护，令诸世间增福德故，一切众生恶业尽故。复次，一切菩

萨摩诃萨、一切辟支佛、一切阿罗汉、得果沙门，一切五通神仙圣人，于此二十圣人住处大支提中常加护持，一切众生福德增故，一切众生恶业尽故。如是过去一切圣人，付嘱如是二十支提。我今付嘱亦如前佛，欲令一切流转海中怖畏众生得安乐故，坚固护持不散坏故。”

时，一切龙受佛付嘱二十支提圣人处已，作如是言：“大圣世尊，我等诸龙多于障碍，贪嗜睡眠如痴无异，一夜睡眠当于人中二十一年，如是我等睡犹不觉。或有恶人及非人等，或水或火毁坏支提，我等或睡或食饮时，或复喜欢为世欲事，如此因缘，此之恶事则不能却。是故我于一切过去、现在、当来佛法之中成诸不善。”

尔时，世尊告二十八夜叉将言：“我今持此圣人住处付嘱于汝，此二十支提福德住处，好加爱敬精心护持。”

时，二十八夜叉将言：“敬顺佛教，二十支提如来付嘱岂敢不持？但瞿摩娑罗香山一处，我难受取。”

时，只利呵婆达多龙王，即白佛言：“世尊，如来今者，以于阗国牛角峰山瞿摩娑罗乾陀牟尼大支提处付嘱于我，然彼国土城邑村落悉皆空旷，所有人民悉从他方余国土来，或余天下，或余刹中，菩萨摩诃萨、大辟支佛、大阿罗汉、得果沙门、五神通人坐禅力故，向彼供养。瞿摩娑罗旧无众生，一切来者皆是他国。世尊，此二十八诸夜叉将，不肯护持我今怪此。所以者何？以彼不护，我等诸龙得于恶名。”

佛言：“龙王莫如是说。何以故？今有二万大福德人见于四谛，从沙勒国而往彼住。以彼二万福德众生有大力故，于此瞿摩娑罗香山支提处，日夜常来一切供养。龙王当知，如是之时恒不饥乏。又迦叶佛时，彼于阗国名迦趺沙摩，国土广大安隐丰乐，种种华果众生受用。彼国多有百千五通圣人间福田，依止其中系念坐禅，乐阿耨多罗三藐三菩提。以其国土安隐丰乐，彼土众生多行放逸贪著五欲，谤毁圣人为作恶名，以灰尘土垒彼圣人。时诸行者受斯辱已，各离彼国散向余方。时彼众生见圣人去心大欢喜，是因缘故，彼国土中水天、火天皆生瞋忿，所有诸水河池泉井一切枯竭。时彼众生无水火故饥渴皆死，是时国土自然丘荒。”

佛告龙王：“我今不久往瞿摩娑罗牟尼住处，结跏七日受解脱乐，令于阗国，于我灭度后一百年，是时彼国还复兴立，多饶城邑郡县村落，人民炽盛皆乐大乘，安隐快乐，种种饮食及诸果华无所乏少。”

时，僧儿耶大夜叉将白佛言：“世尊，如是，如是。”

佛言：“大夜叉将，汝忆过去久远事不？”

僧儿耶言：“我念往昔迦叶佛时，此牛角山圣人住处，迦叶如来亦于彼处七日结跏受解脱乐。过七日已从禅定起，我时到彼瞿摩娑罗香牟尼住处礼拜供养。彼迦叶佛，亦以平等法行比丘，精勤方便坐禅

正慧，修善法者付嘱于我。”

时，只利呵婆达多龙王白佛言：“世尊，我誓于此瞿摩娑罗香大支提所常护不舍，乃至佛诸弟子法行比丘，精勤修善不受畜者我等守护，乃至法尽。或水、或火，或龙、夜叉，或鸠槃荼，弥勒佛时瞋忿作恶，如是时中非我所护。”

佛言：“善哉！善哉！龙王，若能如是发至诚心，加护我法，住持法母，令法久住，是我真伴，是好檀越。”

是时，座中有六十亿菩萨摩訶萨并及十方余佛刹中一切菩萨，皆悉来集娑婆世界，听于日藏大授记经，闻已一切同白佛言：“如是，世尊，我等从今常来于此四天下中牟尼住处礼拜供养，持种种华、种种幡盖、种种金银而以奉散，亦复持此日藏授记恶业尽陀罗尼，如佛所说广为一切众生而宣说之。我今为利自身、他身恶业尽故，行菩提道满足六度。今此众中有多亿魔，及于无量阿僧祇天、龙、夜叉、阿修罗、迦楼罗、紧陀罗、摩睺罗伽，悉在此会围绕世尊。惟愿如来，以此二十牟尼圣人住处普皆付嘱，莫遣当来魔天、龙王、夜叉、罗刹及紧陀罗、阿修罗等生于异心，于此二十大支提处空无守护，令彼恶人及非人等欲兴破毁。”

佛言：“善哉！善哉！善男子，汝莫怖畏。何以故？过去诸佛亦以此处，付嘱一切龙王、夜叉；我亦如是，以此二十大支提处，付嘱诸龙及夜叉众。所以者何？未来众生多在八难，欲令彼等恶业尽故，薄慢心故，乐涅槃故，乃至资生所需、饮食汤药无所乏故，风雨顺时、华果茂盛、五谷熟成常安乐故，以是因缘，付嘱诸龙及夜叉等。于未来世一切诸佛，亦于二十大支提处林树经行坐禅苦行，得阿耨多罗三藐三菩提转于法轮，乃至涅槃安置塔庙；及佛弟子法行比丘，四果圣人亦于彼住，一切天人皆于彼处礼拜供养，多生功德起涅槃道。彼佛世尊，亦以二十大支提处及诸弟子，付嘱龙王及夜叉等令加守护。善男子，我今为汝说，一切恶心众生悉得欢喜，亦得生于诸三昧力，亦除一切恶邪烦恼。大授记陀罗尼咒，此陀罗尼，过去、未来一切诸佛加助随喜。此咒能令恶心众生得柔软故，教修一切诸福德故，令习恶人心欢喜故，一切福德皆成就故，种种大愿达彼岸故，大智慧中安隐住故，得大闻持陀罗尼故，大方便智得究竟故，一切怨家生欢喜故，能除一切诸灾患故，出大难故，离怖畏故，办大事故，大谛见故，得大忍故，大智海中深远入故，得四神足、三摩跋提能除一切诸恶见故，乃至能了阿耨多罗三藐三菩提故。”而说神咒：

“多经唵阿摩 阿摩娑娑 阿摩波利娑娑 三舍耶揭娑波利娑娑 蜜多罗蜜多罗舍罗耶蜜多罗波利娑娑 蜜多罗三[穴/(怡-台+未)]若耶尼瞿卢陀三[穴/(怡-台+未)]若耶 摸极叉三[穴/(怡-台+未)]若耶示利苦伽娑 优婆矣罗阇 毗那舍耶 三摩舍罗耶帝罗 阿那薄迦岚摩 娑婆迦岚摩 示利地毗迦罗婆那 三摩若那阿波娑

伽 那罗夜那跋 伽摩萨婆多他阿伽多地悉他那跋伽莎呵。”

尔时，世尊说是咒已告大众言：“此陀罗尼亦名贤面，一切诸佛之所加护，能生禅定三摩提，能尽一切诸恶，乃至能了阿耨多罗三藐三菩提。若今现在及未来世大支提处，若有余众，或魔、或天、或龙、夜叉、或复罗刹、或阿修罗、或迦楼罗、或紧陀罗、或鸠槃荼、人及非人，或以水火种种恶事欲坏支提，汝等应念三世诸佛，念诸佛已于彼众生起慈悲心，诵持如是大陀罗尼，令诸一切恶心众生悉皆除灭。若诸魔王及人非人，于如来所心不乐者，悉生欢喜恭敬供养。”

时佛神力，令魔波旬于自宫内即得安住，自然得闻此陀罗尼；闻此咒已，即于佛所生欢喜心，得大信心；得信心已啼泣雨泪，集诸眷属作如是言：“汝等一切谛听！谛听！我今于此大牟尼处，得大忍心不动如山。彼牟尼尊慈悲满足，放大光明照一切龙、一切天人、一切修罗，我亦在彼于牟尼所兴造诸恶，今欲忏悔受三归依。汝若曾于佛边作恶，今可忏悔受三归依。我今共汝俱往见佛，礼拜供养至心听法，断烦恼魔入清净道，离于怖畏到涅槃城。”

时，魔波旬与其眷属八十亿众，前后围绕往至佛所，到已接足顶礼世尊，说如是偈：

“佛两足尊世中胜， 自得寂灭亦教他，
忍辱精进愍众生， 我等愚痴兴恶意。
不知过去诸业行， 惟佛世尊能了知，
苞藏国土内身中， 令我心远种种惑。
三世诸佛大慈悲， 受我礼忏一切殃，
法僧二宝亦复然， 至心归依无有异。
愿我今日所供养， 恭敬尊重世导师，
诸恶永尽不复生， 尽寿归依如来法。”

时，魔波旬说是偈已，白佛言：“世尊，如来于我及诸众生平等无二，心常欢喜慈悲含忍。”

佛言：“如是。”

时，魔波旬生大欢喜发清净心，重于佛前接足顶礼右绕三匝，恭敬合掌却住一面，瞻仰世尊心无厌足。

时，彼众中有一魔子名加罗支，与其眷属从座而起，到于佛前接足顶礼，长跪白佛作如是言：“世尊，云何名眼？为眼是色因缘？为色是眼因缘？乃至意法因缘亦复如是？”

佛言：“善男子，非眼是色因缘，非色是眼因缘，乃至非意是法因缘，非法是意因缘。善男子，眼眼性空，眼识识性空。善男子，眼因缘眼识生，彼因缘故色可见，乃至意因缘意识生，彼因缘故法可知，非眼识可得。何以故？非余处来，非余处去，眼非常住，于三世

中一切皆空。如是眼者亦非满见，亦非减见，非和合见，非相离见，亦非相触，亦不依止。譬如日出光照一切，其有窗处明焰皆入照于壁上，而是壁光不作是念我暗我明，此光非但独在一壁及众多壁，以因缘故有是光生。此壁及光，非合非离因壁见光，而此壁光不作是念日能生我，日亦不念我生此光。何以故？日灭没已光亦随灭，去处来处一切皆空无一可见。以日因缘故能照耀见此光色，以光显赫照耀因缘故得可见。于彼生识亦复如是，是内六入生外六入，亦外六入生内六入，外六入亦非因缘，内六入亦非因缘。何以故？彼此性离亦非聚集，亦非和合亦非依止，乃至内入、外入，彼和合识亦非聚集，亦非和合亦非依止。何以故？各不相持境界离故。此法及识智慧知见诸行因缘，行因缘故有识，而此识生则三种行。云何三行？身行、口行及以意行。云何身行？身行名为气息入出，此名身行。彼息出入去来动作，彼此出入各不相识。新识若生，旧识不住，体性尔故，非聚集故，亦非异故，于如如中各不相依，虚空平等风行空中，风亦非空，空亦非风。何以故？彼此不触各非境界，彼二皆空亦不可说。何以故？相离相故，无增减故，不依此岸及彼岸故，第一义谛如如住故，此名身行。是故身行非识依止，亦非伴侣，非是和合，非是聚集，常不依止，相离相故，是识亦复非依止身离和合故，此名身行。云何口行？口行二种名为觉、观。云何是觉？何者是观？于出入息生二种心，思惟忆念是名为觉；乃至细心次生，如是渐除得清净心亦名为觉。是觉依止出入故生，生已即灭，根尘亦复不觉，此彼境界相相离故，性相无故，乃至不可说其长短，此名为觉。何者是观？若有人观冷相触身于是中行，或复热相一切气息皆犹于风，彼风因缘观触知者，此名为观。各离境界彼此离相，乃至不可说其长短，是名觉观。云何意行？意行名思。云何名思？知一切法，乃至能知时出入气息，非时出入气息，知此出息非彼入息，知彼入息非彼出息，差别悉知，如是思量，知行顺相非行顺相，此则名为彼风依止，如是二种不可得说。云何是思？云何心相？乃至知行差别作已，入涅槃道过凡夫地名出生死，于禅定中心能除却，此则名思。如是风者不去不来，彼思识中如是依止，眼如眼乃至意如意各不相触，三受尽已名为圣人。如是，善男子，非眼是色因缘，非色是眼因缘，乃至非意是法因缘，非法是意因缘。何以故？此二境界非远非近，亦非聚集，亦非思量，亦非和合。何以故？不可说故，此岸彼岸中不依止故，依实际故。”

佛说此已，是时魔子伽罗支二万眷属，曾于过去佛法之中修行福德皆得顺忍。复有无量无边众生，亦于过去植众德本，或得初禅乃至四禅，或有得于须陀洹果、斯陀含果、阿那含果，或有当来于小乘中为福种子，乃至当来辟支佛中得为种子，或复有发阿耨多罗三藐三菩提心。时彼众中有六十频婆罗龙，过去已来未曾值佛，今闻此法皆发阿耨多罗三藐三菩提心。此时一切三千大千佛刹大地，六种震动大动遍动。

一切十方诸来菩萨摩訶萨，各得种种菩萨三昧，得三昧已各以种种宝、种种衣、种种香、种种华，散于佛上供养如来，作如是言：“如是世尊不可思议，我从昔来未曾见闻如是大集说此三昧陀罗尼，此即释迦牟尼如来第二利益转妙法轮！我等今者于此日藏大授记鞞富略修多罗一心奉持，为诸众生广分别说。”

是时，众会魔天、龙王、夜叉、罗刹、阿修罗、迦楼罗、紧陀罗、摩睺罗伽、鸠槃荼、薜荔多、毗舍遮，现在集者悉如是说：“不可思议释迦如来，能作如是利益众生。”各大欢喜，以种种音乐、种种宝、种种衣、种种瓔珞、华鬘、烧香、涂香，从空而散供养如来。

是时，娑伽罗龙王白佛言：“世尊，惟愿如来暂入海中，往我家内受我微供，怜愍我故。若佛如来至我宫者，我之眷属一切皆得闻此日藏授记大陀罗尼。”

时，娑伽罗龙王复白佛言：“世尊，彼大海中一切男女，若得闻此大乘日藏大授记经，专心听者得几许福？”

佛言：“龙王，若善男子以四天下满中七宝布施如来，复有众生具足闻此大乘日藏大授记经一心听者，于前福德百倍不及，百千亿倍不及，乃至算数所不能及。大王，若有听是甚深经典，其福难量！”

尔时，娑伽罗龙王复作是言：“若佛世尊不入大海，我当抄此日藏授记大集经典置我宫中。以是因缘，于彼海中几许诸龙福德增长？”

佛言：“龙王，随所有处抄此日藏大授记经，如法安置恭敬供养，则能获得十种利益。何等为十？若有人能如法抄写此经一心供养，令其家内一切吉祥，若在众中得大自在，五谷丰饶，种种资生钱财宝物悉皆具足。复次，龙王，若有宅内，或复众中抄此日藏大授记经抄已供养，于其处所，则有六十亿菩萨摩訶萨，数来礼拜供养此经。以是因缘，种种恶事、斗诤疾疫、种种恶病、谷米贵俭、国土饥荒、他方贼盗、非时风雨，一切皆灭。”

彼六十亿菩萨摩訶萨白佛言：“世尊，我当种种拥护供给令得称心。”

“复次，龙王，若有家内或大众中，抄此日藏大授记经如法安置，彼帝释天及诸梵天、四天王天、二十八夜叉将并其眷属，乃至大德天并其男女，娑罗娑陀天、牢固地天、善住乐天等，一切眷属皆至其国，日夜至心常加守护与其安乐。”

时，帝释天乃至善住乐天等，闻是语已作如是言：“如是，如来，我及眷属常当至心往护彼国。”

“复次，龙王，若有居家乃至国土抄写此经，福德天下于过去世供养多佛布施、持戒，如是之人往彼受生。复次，龙王，若有居家乃至国土抄写此经，其中众生精进勇猛，不乐五欲常行檀那波罗蜜乃至般若波罗蜜。复次，龙王，若有居家乃至国土抄写此经，福田众生常乐安住。复次，龙王，若有国土抄写此经，其国常有种种善法如雨而

下。复次，龙王，若有国土抄写此经，其中众生于十善业常行不舍。复次，龙王，若有国土抄写此经，其中众生常生慈心。复次，龙王，若有居家乃至国土抄写此经，其中众生常生人天不入恶道。大王，如是日藏大授记经，随何国土如法抄写，安置供养数数读诵，具足得此十种利益。何以故？若有读诵此日藏经如说行者，彼福德聚于百劫中说不可尽。龙王，此日藏大集大授记经，如是甚深，能满大愿，能大利益。”

说是经已，十方佛刹诸来菩萨，到此三千大千世界娑婆国土大集聚会，并此菩萨摩訶萨众，乃至魔王、天、龙、夜叉、罗刹、阿修罗、迦楼罗、紧那罗、摩睺罗伽、鸠槃荼、饿鬼、毗舍、遮富单那、人非人等，随分悟解满足于心，皆大欢喜各设供养，僉然而住。

大方等大集月藏经卷第一

月幢神咒品第一

如是我闻：一时，佛在佉罗帝山牟尼诸仙所依住处，与大比丘众有学、无学六百万人，于诸烦恼坚牢缠缚悉得解脱，唯勤方便求断习气，及诸菩萨摩訶萨众，无量无边、不可算数、不可称计，悉得忍力。化诸龙众说《日藏经》已，即时西方现大华云，所谓优波罗华、波头摩华、拘牟陀华、芬陀利华、阿提目多华、瞻波迦华、婆利师迦华，如是华云悉皆来现。其华云中现一半月，广十由旬，于半月复现真金重阁讲堂，庄严微妙。其堂光明过百千万亿日月光明，其光悉照佉罗帝山。复现种种奇异华云，所谓优波罗华，乃至婆利师迦华。其华光艳，照牟尼仙所依住处，七宝五柱重阁讲堂，甚奇微妙，隐蔽日月光不能现。于其堂中复现半月，于半月中有于千叶青色莲华，其华台上复有世尊端坐说法。其光普照一切大众，一一头上皆现半月微妙天鬘，复雨种种宝、种种华、种种香。

尔时，慧命大目犍连，见如是等神通变化生希有心，又知大众心有所疑，从座而起，偏袒右肩，右膝著地，合掌向佛，而说偈言：

“唯佛悉除诸烦恼，于盲冥中能觉悟，
为群生故闭恶趣，令诸众生住善道。
唯佛降伏诸亿魔，令诸外道失光显，
调伏众生住檀尸，枯涸众生烦恼海。
八功德水令洗浴，以觉分宝济众生，
无量亿众入涅槃，能转无上法轮宝。
一切所有诸龙众，为瞋所使行诸恶，
渴爱所逼无有慈，唯佛能益令归信。
四天下龙皆来集，一心归于佛法僧，
尽诸业障及烦恼，皆护正法而安住。
于此复现妙华云，中有半月光照曜，
一切现此半月鬘，今当欲有何佛事？
积此诸华如大山，雨诸香华及众宝，
大众睹瑞心有疑，当欲雨于何法雨？
此处微妙最第一，如此大众皆依住，
于诸过佛修供养，是人师子如是来。”

尔时，佛告大目犍连：“西方有世界名月胜，佛号日月光，有月

藏童真菩萨摩诃萨，将诸眷属八十亿那由他百千菩萨摩诃萨，欲来向此；为欲见我礼拜供养，与大众集说欲随喜，又欲付嘱诸天、龙、夜叉、乾闥婆等正法眼故。”应时月藏菩萨摩诃萨，与其眷属八十亿那由他百千菩萨摩诃萨，从彼世界来至佛所，头面礼足，右绕三匝，住立佛前，皆悉合掌一音说偈：

“吉祥无数劫， 所修为众生！
吉祥见众生， 生死苦所逼！
吉祥以檀施， 大仙作饶益！
吉祥能行施， 超越于人天！
吉祥护净戒， 众生不能动！
吉祥令怒者， 住于慈善心！
吉祥发勇进， 度脱懈怠者！
吉祥离恶道， 安置于善趣！
吉祥善修忍， 容恕怒恶心！
吉祥希有事， 是故悉归依！
吉祥修诸禅， 诸天生希有！
吉祥悉枯竭， 众生诸苦海！
吉祥熏修智， 追回恶道轮！
吉祥上菩提， 到最难到处！
吉祥降魔众， 建立正法幢！
吉祥所转者， 最是正法轮！
吉祥愍异空， 降伏诸外道！
吉祥降法雨， 充足渴世间！
吉祥作明证， 天人乾闥婆！
吉祥满世界， 我为最上师！
吉祥安四果， 应受世供养！
吉祥令亿众， 安住于涅槃！
吉祥久住时， 法眼所建立！
吉祥久住世， 世间无与等！
吉祥菩提果， 众所获大利！
吉祥为众生， 宣说无上法！
吉祥以法水， 洗浴诸众生！
吉祥善能度， 是诸天等人！
吉祥能显现， 无垢真妙法！
吉祥除众生， 所有诸烦恼！
吉祥诸僧众， 世间最第一！
吉祥善生世， 能益于人天！
吉祥令四众， 明净善光显！
吉祥令四众， 全护戒律仪！

吉祥行檀舍， 持戒及精进！
吉祥修忍禅， 及以妙般若！
吉祥大梵王， 娑婆世界主！
吉祥大魔王， 诸欲自在王！
吉祥憍尸迦， 辅佐诸眷属！
吉祥诸天众， 及诸宫殿等！
吉祥毗沙门， 及诸夜叉众！
吉祥提头赖， 眷属乾闥婆！
吉祥毗楼勒， 并与鸠槃荼！
吉祥毗楼博， 及诸龙军众！
吉祥日月天， 星辰及诸宿！
吉祥大自在， 儿及造界主！
吉祥风火神， 及以地神等！
吉祥诸龙众， 及以阿修罗！
吉祥诸罗刹， 及与紧那罗！
吉祥迦楼罗， 摩睺罗伽等！
吉祥雨甘雨， 行雨大神王！
吉祥护持国， 一切人中王！
吉祥婆罗门， 刹利毗舍陀！
吉祥所供养， 最胜尊导师！
吉祥愿闻者， 真正无过法！
吉祥诸现未， 供养三宝者！
吉祥一切众， 灭除诸烦恼！
吉祥诸众生， 同住于正法！
吉祥檀尸罗， 精进之彼岸！
吉祥禅那度， 忍辱波罗蜜！
吉祥诸一切， 到彼智岸者！
吉祥令诸病， 一切皆除愈！
吉祥皆休息， 一切浊恶世！
吉祥诸众生， 愿令悉解脱！
吉祥令一切， 悉得诸无漏！
吉祥于大地， 种子所生者！
吉祥诸禾稼， 药草树林果！
吉祥彼一切， 依时悉成熟！
吉祥胜地精， 一切处充满！
吉祥人精气， 一切皆安住！
吉祥法精气， 充满一切众！
吉祥皆休息， 一切诸罪恶！
吉祥令众生， 而得胜菩提！
吉祥于诸法， 自在到彼岸！

吉祥正法雨， 普润诸众生！
吉祥诸众生， 悉度于三有！
吉祥令一切， 悉证大涅槃！

“大德婆伽婆，我今欲说吉祥章句大力神咒。如是神咒过去诸仙之所宣说，建立守护善能增长吉祥之事，能除一切罪垢恶见，入诸善根增长大悲。以此咒句，悉能资益一切众生，乃至一切獐鹿鸟兽所得闻者，令如是等心得安隐，离浊恶世一切诸障，众生障、法障如是等障皆悉休息，一切善根随所触法令得入心，念慧坚固，名称形色人所喜乐，勇健无畏，于十善业道坚固安住，檀波罗蜜乃至般若波罗蜜、四念处乃至十八不共法坚固安住，大慈大悲、大方便力、一切种智乃至究竟无上涅槃坚固安住，除其造作五无间业、诽谤正法、毁谤贤圣、断常二见，唯除如是诸罪人等。是吉祥句，常为先圣建立加护。如此咒句，亦复能令诸天信受得入十善业道，亦令得入檀波罗蜜乃至般若波罗蜜，四念处乃至十八不共法，大慈大悲、大方便力乃至一切种智、无上涅槃。复能令彼诸魔眷属悉得归信，诸神、龙王、夜叉、罗刹、阿修罗、乾闥婆、紧那罗、伽楼罗、摩睺罗伽、饿鬼、毗舍闍、刹利、婆罗门、毗舍、首陀令入十善业道，檀波罗蜜乃至般若波罗蜜，大慈大悲、大方便力，四念处乃至十八不共法，一切智、一切种智、无上涅槃，唯除五逆、诽谤正法、毁谤贤圣。”作是语已，而说咒曰：

“多地夜他旃达利 旃达啰毗提 旃达啰磨咩 旃达啰婆婆犀
旃达啰跋帝 旃达啰不[口+梨] 旃达啰婆[口+兮] 旃达啰差帝[口+梨]
旃达啰阁移 旃达啰頰寄 旃达啰底[口+梨] 旃达啰𩇛咩
旃突喽 旃达啰婆啰[口+兮] 旃达啰勿达[口+梨] 旃达啰娑地
移 旃达啰娑咩 旃达啰佉祇 旃达啰因达[口+梨] 旃达啰恶差
旃达啰梨鞞 旃达啰簸利鞞 旃达啰跋筏 旃达啰悉那帝 旃达啰簸
鬚 旃达啰頰泥 旃达啰祇[口+梨] 旃达啰博差 旃达啰悉泥[口+兮]
旃达啰卢咩 旃达啰鸠闭 旃达啰娑闭 旃达啰受婆隶 旃
达啰宾滞 旃达啰恶差 旃达啰𩇛帝 旃达啰伽泥 旃达啰什鞞 旃
达啰悉钵尸 旃达啰磨泥 旃达啰跋帝 迷底唎耶跋帝 迦喽拏跋
帝 萨底耶跋帝 多鬚耶跋帝 差耶跋帝 扇多跋帝 底啰跋帝 旃
达啰卢寄 𩇛婆呵。

“世尊，如此神咒，过去诸佛牟尼仙圣建立守护。如此神咒名月幢月，能令众生悉得吉祥归信三宝，灭除一切诸恶重罪，乃至逮得上涅槃。”

月藏菩萨说是咒时，三千大千世界六种震动，依欲界、色界一切众生，皆大战悚惊怖不安。于时，诸天雨种种宝、种种华、种种香、

种种末香、种种衣服、种种卧具、种种瓔珞。雨如是等种种物时，如是诸物互相振触，出于种种妙法音声，谓三宝声、三律仪声、三解脱声、三明声、三学声、离三界欲声、三种菩提声、无常声、苦声、无我声、空声、不希望声、离喜声、无生声、如体性声、实际声、法界声、如如声、不去不来声、无处不建立不退转不行无窟宅无所依发精进声，檀波罗蜜声乃至般若波罗蜜声，慈悲喜舍、四念处乃至八圣道分声，奢摩他、毗婆舍那声，四摄声、四无碍声、摄受正法声、因缘法声、护正法声；如幻、如梦、如影、如响、如水中月，随诸众生应得度者而摄受之，厌离流转向空闲阿兰若处，为他说者已自行之不相违背，悉皆如法坚固安住而求一切善根声；十地声、无生忍声、十八不共法声、一切种智声、转法轮声、生死流转令住八圣道不随流转声、降伏四魔令入无余涅槃声。

闻是声已，此三千大千世界众生及地狱众生等，于彼一切诸众生类，一一众生皆以前身亲善知识因缘力故，随其差别所种善根，若檀、若尸、若修禅定，若于声闻及缘觉乘发心起愿，若于无上大菩提果发弘誓愿，于彼众生随本所习，如前诸声悉入其耳，随其善根曾所修行造作业缘，皆能忆念此宿命事，爱重敬信佛法僧宝，速来归依。彼众生中自有业障悉得除尽，于彼命终，一时生天及生人间，俱至佛所而坐听法。如是畜生、饿鬼亦悉来集，皆是先业，亲善知识因缘力故，种善根故若檀若尸，乃至业障而得尽灭，其中亦有即身来至佛所听法，亦有于彼命终生于天人来诣佛所听受正法。如是人天悉来佛所，唯除魔王及诸眷属，四阿修罗王并其眷属。

于时，三千大千世界地平如掌。当于尔时，须弥山、铁围山、大铁围山、黑山，是等诸山大海树林皆悉不现，唯除佉罗帝山。其山广博如十四天下，于中人与非人间无空处。上方亦如十四天下，无量不可计无有边际。于虚空中大众充满，为见佛故，礼拜供养故，成熟众生，见大众集为听法故，而来集会。此三千大千世界，随其所有宫殿舍宅、林树药草、茎叶华果、众杂宝物，如是一切，皆悉变成半月而现于彼。一半月之中出是色光，如千日月和合光明遍照三千大千佛土，如是色相广大庄严。是时，十方无边佛土一切皆现，于彼佛土菩萨摩訶萨、释天王、梵天王及余天王、龙王、夜叉王、紧那罗王，一切神王承佛威神，得见此佛及大众集；复见如是妙色光明，见已皆悉发意欲来，承佛神力，于一念顷即至佛所，礼拜供养，至心听法。

尔时，月藏菩萨摩訶萨，以天宝末、天华、天香、天鬘、天衣散于佛上，三遍散已右绕三匝，住立佛前，合掌白言：“大德婆伽婆，我有罪过，不及于此大众集会，十方所有菩萨摩訶萨于此悉集，我有因缘后来至此。大德婆伽婆，我在本国月胜世界，与诸眷属七日之中入阿颇那迦定；从定起已，即问日月光如来：‘大德婆伽婆，徒众眷属今何所去？’日月光佛即答我言：‘善男子，东方去此过百千亿佛世界已，次有世界，名曰娑婆。彼土有佛，号释迦牟尼如来应供正遍知，

住世说法未入涅槃，今于彼处大众集会，十方诸佛国土所有菩萨摩訶萨，一切皆集于彼世界，为见释迦牟尼佛礼拜供养听大集经故，我眷属亦复往彼。汝今亦可诣彼佛所，礼拜供养说月幢月咒。’以是因缘我来在后。”

是时，月藏菩萨而说偈言：

“唯佛独是众生父，于烦恼火而救拔，
我今谢过最胜佛，以我因缘后来故。
唯佛人天作大明，普照十方诸国土，
我今谢过佛法王，以我因缘后来故。
唯佛能示涅槃道，趣恶道者追令回，
谢过牟尼大商主，以我因缘后来故。
唯佛世间大医师，于失明者与法眼，
谢过最胜大医王，以我因缘后来故。
唯佛能示诸船筏，令众生度四疾河，
谢过人中最胜者，以我因缘后来故。
唯佛慈云降法雨，洗众生意烦恼垢，
谢过大圣胜法尊，以我因缘后来故。
唯佛一人于四流，能度众生三有海，
谢过世尊实语者，以我因缘后来故。
唯佛开诸正法藏，以七圣财济众生，
谢过大胜法施主，以我因缘后来故。
唯佛能与众生眼，于无明闇拔盲瞽，
我本端坐一三昧，阿耨那禅心安住，
我不见佛现神变，以我因缘后来故。”

佛言：“善哉！善哉！善男子，汝大精进能于七日入深禅定。如是妙定，是丈夫住处，是如来住处、无上住处。善男子，汝及眷属七日安住阿耨那迦禅，以是义故，今悉成就无量亿那由他百千诸天、龙王、夜叉、阿修罗、紧那罗、人非人等，于阿耨多罗三藐三菩提，除其业障、众生障、法障、禅障、烦恼障、觉分障，悉灭无余。彼诸众生，有得不忘菩提心三昧者，于无上道不退转者。复有众生，于一切佛法得大明忍。彼等众生以此善根，不久于阿耨多罗三藐三菩提而成正觉。如是，善男子，汝以七日入禅定故，一时能灭众生大苦，令得成就大福德聚。善男子，若有众生，唯依读诵欲求阿耨多罗三藐三菩提者，是人多喜著于世俗，以世俗故尚不得调己心烦恼，何能调伏他人烦恼？善男子、善女人，乐著读诵求菩提者，便有嫉妒，求名利富贵，高心自是轻慢毁他，以自高故，尚不能得欲界善根，何况能得色、无色界一切善根？又不能得声闻菩提，何况能得辟支佛道及无上菩提？何以故？第一义谛阿耨多罗三藐三菩提，不与声闻、辟支佛

共，是故非以世俗能得阿耨多罗三藐三菩提最胜善根大福德聚。

“善男子，譬如星火不能枯竭甚深大海；如是，如是，善男子，不以世俗能竭自身烦恼大海，何能竭他众生烦恼？善男子，譬如一人人口所吹风，不能损坏世界大地；如是，善男子，不以世俗能得成就大慈大悲。善男子，譬如藕丝不能秤动须弥山王；如是，善男子，不以世俗能自满于阿耨多罗三藐三菩提智，何能令他得第一义？如是，善男子，能成就阿耨多罗三藐三菩提智者，非世俗也。何者是第一义？所谓修造一切福事。若修福者，亦当数数熏修身心；若修身者，则能修心；能修心者，则能修慧；若能修身心修慧，如是之人则能速满六波罗蜜，能以四摄摄诸众生，成熟于阿耨多罗三藐三菩提成等正觉，不以世俗也。于世俗中，复有众生计断常二见者，非第一义。复有众生，于世俗中我见、边见，亦非第一义。复有众生，于其世俗求现世乐及后世乐，亦非第一义。而我不见更有一法，能尽业障乃至烦恼障，一日一夜令无量亿那由他百千众生，悉得敬信佛法僧宝，成熟安住无上大乘。若有禅士，虽复持戒不能具足，禅法不周末得三昧；是人于禅，若坐若行，初夜后夜，得与禅定相应而住，则能除断无量业障，能令多亿那由他百千众生，悉得归信，成熟菩提种种善根福德之聚，况具持戒，得真法三昧诸陀罗尼忍，得四梵住宴坐寂定，于七日中所得福德，不可思议，不可为喻！何况能除众生障烦恼障等，尽灭无余，乃至成熟无量众生，向阿耨多罗三藐三菩提，亦能积集无量福聚，又能满足六波罗蜜！何以故？

“是修禅者，若行若坐，除诸障法令心清净，于一切行舍攀缘想，是檀波罗蜜；于舍攀缘想常不休息，是尸波罗蜜；于诸境界不生疮疣，是羼提波罗蜜；不舍于离，是毗梨耶波罗蜜；于诸事中心不放纵，是禅波罗蜜；诸法体性无生乐忍，是般若波罗蜜。复次，若于境界不起扰浊，是檀波罗蜜；若于境界无有疮疣，是尸波罗蜜；若于境界不能染污，是羼提波罗蜜；若于境界无有动转，是毗梨耶波罗蜜；若于境界无有计念，是禅波罗蜜；若于境界一向清净行，是般若波罗蜜。复次，于诸阴舍，是檀波罗蜜；于诸阴不计念，是尸波罗蜜；于诸阴求无我想，是羼提波罗蜜；于诸阴起怨家想，是毗梨耶波罗蜜；于诸阴不令炽然，是禅波罗蜜；于诸阴毕竟弃舍，是般若波罗蜜。复次，于诸界舍，是檀波罗蜜；于诸界不扰浊，是尸波罗蜜；于诸界舍因缘，是羼提波罗蜜；于诸界数数弃舍，是毗梨耶波罗蜜；于诸界不起发，是禅波罗蜜；于诸界如幻想，是般若波罗蜜。复次，菩萨于诸众生起于慈心，是檀波罗蜜；于诸众生心无憎爱，是尸波罗蜜；于诸众生起于悲想，是羼提波罗蜜；于诸众生起救济想，是毗梨耶波罗蜜；于诸众生以喜摄想，是禅波罗蜜；于诸众生，不作彼此吾我等想，是般若波罗蜜。复次，菩萨于诸众生，以法施之，不生二想，是檀波罗蜜；于诸众生柔和爱语，是尸波罗蜜；于诸众生不起诸恶，是羼提波罗蜜；于诸众生爱语不退，是毗梨耶波罗蜜；于诸众生利益怜

愍，是禅波罗蜜；于诸众生同行其法，是般若波罗蜜。复次，菩萨安置众生于诸善处，是檀波罗蜜；于一切法而不依倚，是尸波罗蜜；于一切法以一道入，是羼提波罗蜜；于一切法及一切难，无扰浊想，是毗梨耶波罗蜜；于一切法而不分别，是禅波罗蜜；能以一字入一切法，为众生说，是般若波罗蜜。

“善男子，如是菩萨摩訶萨，以此第一义甚深法要，能满六波罗蜜，非世俗也。如是，如是，善男子，诸菩萨摩訶萨等，第一义谛善巧方便，皆以此法自为为他，勤修令满六波罗蜜，速于阿耨多罗三藐三菩提而成正觉。如是十方现在诸余世界，所有菩萨摩訶萨等，第一义谛善巧方便，一切皆悉以此道法，速于阿耨多罗三藐三菩提而成正觉。当来十方无量阿僧祇诸佛世界，诸菩萨摩訶萨等，皆悉勤修如是甚深第一义谛善巧方便，修六波罗蜜，能于阿耨多罗三藐三菩提而成正觉，非世俗也。彼诸菩萨摩訶萨，为法眼久住绍三宝种使不断绝，勤求修学，为一切众生，执大明炬而作照明，令其止息烦恼道、苦道，与其慧眼，令度一切三有流转，安置无上菩提之道。彼等于圣法默然，初夜后夜舍得相应，善能出生三昧正受，与三解脱门相应而住。善男子，汝今七日于阿兰那迦禅而入定故，成熟无量诸众生故，是故劝汝及诸善男女等，若现在世、未来世、末世，于我法中初夜后夜常与于舍相应而住，以正法眼而作照明，绍隆三宝使不断故，为成熟众生故，勤修如是第一义谛，为满六波罗蜜勤修而住。”

佛告一切诸天入众、龙神夜叉：“应当养育供给是人，衣服、饮食、卧具、汤药，随其所须尽给与之，亦当守护除其灾横，离诸凶衰，殃恶疾病悉令除灭。何以故？与禅相应者是我真子，从佛口生，从法化生。若有施主天龙夜叉，能于现世及未来世与舍相应，以第一义谛为满六波罗蜜故，为除众生诸烦恼道及苦道故，法眼久住绍三宝种使不断故，汝等施主天龙夜叉皆应护养，并与衣服、饮食、卧具、病瘦汤药，随其所须尽给与之，亦应劝请及以赞叹。以彼施主天龙夜叉持我正法，为欲令我法眼久住，绍三宝种使不断故，如是等辈是我真子，从佛口生，从法化生故。比丘、比丘尼、优婆塞、优婆夷，及余清信士，若善男子、善女人，以第一义乃至求于阿耨多罗三藐三菩提者，及养护者，我以彼等寄付于汝，弥勒为首及以贤劫诸菩萨等，当以四事摄受劝化，授其禁戒，复令住于四无量心、四禅、四无色定、大方便力、大慈大悲乃至十八不共法，当复授与无上道记。”

尔时，弥勒菩萨摩訶萨以为上首，及与贤劫诸菩萨等，白佛言：“世尊，如是，如是，大德婆伽婆，我当护念彼诸众生，乃至与其授于阿耨多罗三藐三菩提记。若现在世及未来世，乃至法住，是诸施主作大明者，亦当与授无上道记。天、龙、夜叉、捷闼婆等，于阿兰若处静默修行，求第一义者，信乐受持，供养供给衣服、卧具乃至汤药，随所须者。”

尔时，世尊欲重明此义，而说偈言：

“于此世间一日出， 无量亿华悉开敷，
如佛一人出世间， 众生所怖福华现。
若欲速得十胜力， 及度坚固诳烦恼，
复欲速得最胜定， 静默独住阿兰若。
欲得人天信敬受， 及除心之烦恼渴，
欲断于心苦重担， 安心圣道奢摩他。
若欲排却诸恶难， 及诸功德自庄严，
于诸苦海欲自度， 应当安心妙菩提。
若欲得彼七法财， 及欲得于方便忍，
欲为众生说妙法， 常当乐住阿兰若。
六根常与三昧合， 应当寂住阿兰若，
少欲头陀善知足， 此人能入贤圣道。
若能速舍五欲乐， 得五力故灭烦恼，
若于五道度众生， 自舍过恶住三昧。
若欲得于四无量， 及得无碍四辩才，
欲得四禅彼岸处， 是人应修第一义。
若欲速知于三有， 欲知诸法苦无常，
及知诸行性相空， 应当乐住阿兰若。
若欲速知二种法， 毗婆舍那奢摩他，
及欲速知有为过， 要当住于菩提心。
独住闲静不放逸， 便能疾舍于世谛，
以精进求第一义， 能速舍离诸恶道。
若欲枯竭脓血海， 及欲枯竭烦恼海，
若欲速竭三有海， 常与圣种心相应。
若欲成熟众生海， 若欲满诸大愿海，
若欲得知生死际， 如救头燃处闲静。
欲知本生及居处， 久远微细所从来，
以诸方便乐闲静， 摄心于彼得三昧。
若欲游戏禅定海， 若欲觉悟神通海，
若欲度于渴爱海， 若欲得于天中最，
若欲得饮正法海， 若欲见于庄严土，
若欲见于诸佛海， 欲问甚深诸义海，
欲得如是胜功德， 及欲速得胜菩提，
当离众恼住兰若， 以此得道亦不难。
若人百亿诸佛所， 于多岁数常供养，
若能七日在兰若， 摄根得定福多彼。
若人读诵千亿法， 及解妙义如佛说，
若于七日住兰若， 三昧福聚转多彼。
若人多岁营僧事， 更不造作余种业，
若人七日住兰若， 其人福聚多于彼。

为众说法解深义，于多年岁无余业，
若能七日心住寂，其福德聚不可数。
若人营造多佛塔，伽蓝田业给施僧，
若能七日在兰若，其福转多胜于彼。
闲静无为佛境界，于彼能得净菩提，
若人谤彼住禅者，是名毁谤诸如来。
若人破塔多百千，及以焚烧百千寺，
若有毁谤住禅者，其罪甚多过于彼。
若有供养住禅者，饮食衣服及汤药，
是人消灭无量罪，亦不堕于三恶道。
是故我今普告汝，欲成佛道常在禅，
若不能住阿兰若，应当供养于彼人。
若能住禅不放逸，则能速满于六度，
欲求大明菩提道，以此方便疾能到。
欲求菩提住寂静，当舍一切诸缘业，
及离烦恼舍诸乐，则能速到檀彼岸。
若舍境界阴界入，及舍贪瞋愚痴过，
弃诸烦恼修善业，以此能到檀彼岸。
当以慈悲念众生，息诸分别不自是，
常能怜愍诸众生，即满尸罗波罗蜜。
勤舍罪业修诸禅，亦当舍诸阴界入，
爱诸方便常求禅，除障到于精进岸。
境界不动不味著，为舍因缘修悲喜，
一道清净不移动，以此得满忍辱度。
于境界中不念虑，离疾不乐得于喜，
诸法离掉无分别，不染不愁是为舍。
阴界如幻无起作，相续修行不断绝，
善修了知如是法，以此得满般若度。
故我今告一切众，若有欲除诸罪业，
求忍三昧陀罗尼，当知如是住寂静。
若欲超越声闻乘，及欲超越缘觉乘，
又欲疾得胜佛地，应当速住阿兰若。
若心摄住阿兰若，以此即是供诸佛，
于是能舍一切罪，是则能满于六度。
当得作佛三有最，能转清净正法轮，
枯竭众生诸恶趣，度脱众生三有海。
当舍恶见诸缘事，常发最胜菩提心，
应当速向兰若处，于彼当成如是德。”

尔时，世尊说此经时，诸会大众闻是甚深第一义禅，有于过去善

修集者九万二千人，得无生法忍。七十亿那由他百千众生，得种种三昧诸陀罗尼及无生忍。八万一千人得授阿耨多罗三藐三菩提记。如恒河沙等众生未发无上菩提心者，悉皆发心，于阿耨多罗三藐三菩提得不退转。

大方等大集月藏经卷第二

魔王波旬诣佛所品第二

尔时，复于魔王宫中，所有一切诸杂林树、果实华叶、衣冠瓔珞庄严之物，皆悉变成半月而现，放大光明照魔王宫，内外明彻。琴瑟箜篌一切乐器，及非乐器宝庄严具，及余诸物，自然演出如是偈句：

“世间无等大导师， 于诸法中最自在，
今住佉罗帝迦山， 为众显示佛法海，
开说一道清净法， 闻者必得胜菩提。
波旬犷戾你不如， 令汝魔界悉空无，
汝本曾作一邪善， 今得如是自在报，
汝今法应当退落， 何不速去见导师？
一切所来诸众生， 曾作邪善千亿数，
福藏大众皆来集， 听受最上无病法。
各各向佛心敬仰， 见尊导师修供养，
以其净信灭烦恼， 更不重生于欲界。
专信礼拜尊导师， 灭三界苦烦恼缚，
亿世受于胜妙报， 速与三界为亲友。
又于三界作法王， 说真实法度众生，
一切诸法如水泡， 有为相现犹如幻。
福报无常悉空无， 当疾舍离我见过，
速发无上菩提心， 以此定受胜妙福。”

尔时，魔王波旬及诸官属，见闻是已，惊怖战悚从床而堕，两手掩耳而作是言：“当观沙门作此幻惑，必夺我等诸魔势力，令诸色像悉成半月，复出如是种种音声。沙门瞿昙现大神力，尽摄欲界以为己有，可速击鼓，集诸大众皆到此处。”作是语已，于其宫中即便击鼓。击彼鼓时，于其鼓中，即出如是音声偈句：

“诸法空寂风和合， 远离所依众色像，
于作无用诳众生， 事相诈现犹如幻。
和合因缘故成字， 如书虚空字不住，
阴界空寂离众色， 无常义现不自实。”

声尘入于耳根门， 无常义现不暂停，
其识如幻若分别， 显现无我不自在。
眼根迅速故空寂， 是苦自性义相应，
鼻根香尘与舌味， 身根及与一切触，
心法并与无常俱， 迷惑众生无所觉。
如是六境生诸苦， 能令失坏涅槃道，
以是凡夫转五趣， 不能离缚得解脱。
于诸境界除渴爱， 则能速到胜妙处，
此心自性清净相， 观是了知菩提道。
若己境界得自在， 则能悲愍一切众，
于彼当得檀戒忍， 智慧功德自庄严，
得最无上菩提智， 能度无量诸众生。”

说此偈时，魔之宫殿，一切众生惊怖不安，男夫妇女、童男童女，迭共相唤，诣魔王所，住立其前。魔王以偈告彼众言：

“汝等悉见此魔宫， 如是无量极丑恶，
诸声不息生大苦， 定夺我等魔势力。
沙门瞿昙作是声， 欲灭魔力境界事，
可速往诣瞿昙所， 咸共赞叹而归依。”

尔时，魔子名鸯瞿罗歇，即以偈颂而白父言。

“我今严驾著铠甲， 将诸勇健斗战士，
弓刀铍槊及刀轮， 刀面鼓面诸兽面，
魔军夜叉龙修罗， 及诸眷属满虚空，
速诣恶心瞿昙所， 碎灭令彼如灰尘。”

尔时，魔王说偈答言：

“我从昔来于彼人， 曾作无量恶留难，
汝亦应见菩提树， 瞿昙胜我及军众。
如是我等数恼乱， 瞿昙常胜于我等，
不见天龙阿修罗， 能动彼人一毛端。”

尔时，复有魔之大臣，名珊卢遮那，而说偈言：

“我等可速舍欲界， 但当自护己宫殿！
瞿昙昔来未至此， 今来拒之莫听前！”

尔时，魔王甚大忧愁，默然不答。复有大臣，名起怖畏，而说偈

言：

“唯有巧力可伏怨， 当以谄伪诈为亲，
我等将众往诣彼， 诡诈而叹彼沙门。”

复有大臣，名毗闍陀行，而说偈言：

“昔此宫殿众盈满， 沙门侵夺今减少，
已归彼者众甚多， 我等亦可往归依。”

尔时，魔王闻其所说，即瞋彼臣，瞋已默然。复有大臣，名曰老智，而说偈言：

“瞿昙力加诸宫殿， 出此种种异音声，
我等若不疾诣彼， 沙门必速来到此！
此处无人能遮护， 以力止彼瞿昙仙，
我等宁可共一切， 速诣归彼大沙门。”

尔时，于彼诸宫殿中，所居大众男夫妇女眷属大小，悉作一朋复作是言：“大王，今可将诸眷属速诣彼所，我等今当守护此诸城邑宫殿。”

尔时，魔王即作是言：“如是，如是，我与他化自在天王及诸军众眷属大小往诣彼所，并与化天、兜率陀天、须夜摩天、释提桓因及其军众共诣彼所。复与毗沙门天王并诸军众，毗楼勒叉天王并鸠槃荼军众，提头赖吒天王并乾闥婆、紧那罗军众，毗楼博叉天王及诸龙众，往诣彼所。”

作是语时，复有魔王辅佐大臣，名珊遮罗拏，白言：“大王，今者所有诸天宫殿皆悉空寂，欲界诸天及诸天女一切眷属，悉在瞿昙大沙门所听法而住。如是紧那罗、龙、鬼、夜叉、伽楼罗、鸠槃荼，悉在彼处种种供养沙门瞿昙，听受其法。”

尔时，魔王自观察已，见诸欲界一切宫殿皆悉空寂，欲界之中所有诸天、人非人等，皆悉集在于瞿昙所而坐听法，唯有阿修罗未到于彼，而作是言：“我今当与诸阿修罗俱诣彼所，令其会众皆悉惑乱不得正信。勿使瞿昙教彼大众诸法如幻，不去不来，不合不散，不生不灭，令我欲界皆悉空寂！”复作是言：“我今当共诸阿修罗并及军众疾诣彼所，遮诸众生不令速得越度苦海到于彼岸，以沙门力速背死法，令我境界势力减少。我今速往遮护彼诸人非人等！”

时，魔波旬即以魔之神通境界，念四阿修罗王及其军众一切眷属，速来集在须弥山顶，然后相将共下诣彼瞿昙沙门所，诈设美言谦下赞叹，示作归依求见因缘，当以方便令诸大众悉生怖畏断其正信，又不令彼于瞿昙所生其尊敬，以是令彼沙门瞿昙厌患于世速入涅槃。

如是魔王，数数希望阿修罗众；然诸阿修罗，为佛神力之所加故，茫然不知魔之希望。其魔即时恶意于佛及一切阿修罗，便作是言：“观瞿昙一人于我境界，已得解脱不可追回。我于欲界悉得自在，此凡贱畜生阿修罗不受我教，我当为其作大哀恼，令彼速舍所治宫殿。然后我当以神通力，将诸眷属往见瞿昙。又复与诸大臣勇将、左右诸军、男夫妇女营从围绕，以第一最胜五音作乐调戏歌舞，一切衣服庄严之具，众宝香华、幢幡宝盖、音声和合令速严办，往见瞿昙。我今亦将夫人嫔女及以男女大众围绕，以第一最胜魔之境界神通游戏五音和合，往见瞿昙。何以故？唯除瞿昙，诸余大众天、龙、乾闥婆、人及阿修罗等，世间大众悉令迷惑，当以坚牢欲网而罗网之，于生死大海不令速度，是故诣彼，余者留住守此宫殿。”

时，魔波旬即将九百六十万频婆罗眷属、男夫妇女、童男童女、大臣左右，以魔境界神通加持，作第一最胜五音伎乐歌舞调戏，一切所有令人多喜生染著者悉具备之。时，魔波旬住彼诸宫告言：“悉出，往诣彼所。”而复合掌，说偈颂曰：

“唯佛尽除诸烦恼， 唯佛能化诸世间，
唯佛能燃正法灯， 三界中最我归依！”

尔时，魔王既作如是魔之神通境界力已，从彼宫出以手散华，所散之华于四天下悉作华盖在空而住，于一切处悉雨种种宝种种华如云而下。

当于尔时，世尊仍说住阿兰若第一义谛。佛告大众：“汝等一切守摄诸根，系心专念莫令驰散。此魔波旬，多将诸众歌舞调戏，五音作乐众伎和合，又与妇女眷属大小围绕而来。”

尔时，魔王与诸眷属，寻即来到佉罗帝山牟尼诸仙所依住处。到佛所已，即于佛上虚空之中化七宝盖，纵广七由旬而覆佛顶，复以无价真珠瓔珞严置佛上，复以种种众宝、华香、涂香、末香、天鬘、幢幡宝盖、金缕真珠、瓔珞及五音伎乐，供养世尊，右绕三匝，而说偈言：

“我今归命佛世尊， 从是终不起恶心，
瞿昙心定容恕我， 我当守护佛正法！
于世更无如世尊， 怜愍利益众生者，
自得解脱令他得， 是故我归最胜尊。
唯佛慈愍一切众， 已越生死烦恼山，
常慈乐度诸众生， 今速归依汝世尊。
能了有为及无为， 离二如莲不著水，
积德梵行所依身， 是故我今归依佛。
世无寂定无病法， 清净常胜伏烦恼，

唯有正法及涅槃，是故归依无等法。
于世更无如僧众，和合解脱八丈夫，
能离一切烦恼缚，是故归依大德僧。
闲居静默常一食，第一义心恒相应，
慈悲愍念诸众生，我亦归依于彼等。
于三宝种作炽然，护养所有佛声闻，
我劝一切诸众生，名衣上馔而供养。”

尔时，会中诸来大众，若天、若人、乾闥婆等同声赞言：“善哉！善哉！”

尔时，世尊告慧命憍陈如，而说偈言：

“我已告汝声闻众，所有相应求解脱，
常乐所依四圣种，以彼得满菩提道。
如树果繁速自害，竹芦结实亦如是，
如骡怀妊自丧身，无智求利亦复然。
亦如盛夏恶雹雨，伤害一切诸苗稼，
如是贪求利养者，必当速失胜菩提。
又如诸树华开敷，而复为火所焚烧，
如是贪求利养者，亦当退失菩提道。
若有比丘得供养，乐求利养坚著者，
于世更无如此恶，故令不得解脱道。
如是贪求利养者，既得道已还复失！”

尔时，魔王闻说偈已，即自念言：“沙门瞿昙，知我虚伪诈现归依。”羞愧默然，退坐一面听法而住。魔诸妇女，诸根形貌容状光色，皆悉枯悴变成恶色，背偻跛蹙，丑陋弊恶。所有男夫，都不复能歌舞调戏，五音作乐皆悉闭塞不能出声，却坐一面，听法而住。

诸阿修罗诣佛所品第三

尔时，月藏菩萨摩訶萨，为欲摄化诸众生故，说月幢月咒句之时，于彼四大阿修罗王所治之处，一切所有草木华果、众宝瓔珞庄严之事，衣服卧具皆悉变成半月而现。彼等诸事迭相振触出五音声，所有鼓贝箜篌箏笛具足作乐。彼等音中，亦复演出如是偈句：

“唯佛化导以安隐，并众住在佉罗山，
于臭烦恼拔众生，为其说法永断除。
凡夫悉堕生死海，烦恼驶河起波浪，
三有更无哀愍者，如牟尼尊慈善心。

多众聚集一方所，天人鸠槃龙夜叉，
悉依佉罗帝山所，于诸苦畏求解脱。
我等俱时速诣彼，为欲听闻正法故，
魔王不久或来此，而为我等作留难。
一心听受胜妙法，于彼净心得大福，
以福长寿除诸怨，于世常受威德乐。
若以此福求解脱，断诸烦恼得罗汉，
及断诸缘作辟支，亦能成佛具诸乐。
如是当得无有疑，是故速舍诸缘缚，
一切当起清净心，速到佛所修供养。
从此贤劫初以来，未有如是大众集，
于后久远弥勒兴，我等不得许时寿。”

尔时，于彼四阿修罗城邑宫殿有如是事，以菩萨力庄严加持故，闻是句义皆生信心，各各于其城邑宫殿云集一处，共相谓言：“今当于此欲有何事？所以者何？我等昔来未曾见者今得见之，昔未闻者今得闻之，无人知者。”

时，魔波旬从己宫下欲礼佛故而往散华，所散之华于四天下皆作华雨。当雨之时，于四阿修罗城邑宫殿，遍一切处皆悉变作最极臭秽，及恶烟尘、灰土蓬[火+孛]处处盈满，蚊虻蛇蝎、诸恶毒蝇亦复悉满，忧愁恼乱不可爱乐。当于尔时，诸阿修罗城邑宫殿皆悉黑闇，一切阿修罗男夫妇女、童男童女，悉怀最极忧愁恼乱不乐住彼，各于巷陌迭相云集，至己王所在前住立。阿修罗王，见诸衰害极增忧愁。毗摩质多罗阿修罗王，与诸眷属及所治处一切阿修罗男夫妇女、童男童女；波罗陀阿修罗王，跋持毗卢遮那阿修罗王，与诸眷属及所治处男夫妇女、童男童女，向罗睺罗阿修罗王所治城邑聚落宫殿。见彼如是诸恶恼乱蚊虻蛇蝎毒蝇等已，三阿修罗王俱至罗睺罗阿修罗王所，于前住立。毗摩质多阿修罗王，请问罗睺罗阿修罗王，而说偈言：

“一切修罗诸宫殿，犹如地狱等无异，
热风暴起来至此，一切状似火烧焚。
所有树林诸果实，悉皆堕落在于地，
诸有莲华及浴池，草苗众华悉枯竭。
烟尘蓬[火+孛]于我等，阿修罗城诸宫殿，
及有蚊虻蚤恶蝇，无量诸恶毒虫等。
今闻如是众恶声，众生多恼不喜乐，
诸阿修罗受此苦，悉为饥渴所逼恼。
苦逼无所可归依，一切惊怖心焦枯，
生死畏等谁威力，而不利益我天龙？
以何方便令休息，如是种种怖畏事？

非是恶龙来至此， 降伏我等阿修罗？”

尔时，罗睺罗阿修罗王，说偈答言：

“阿修罗辈汝谛听， 我等昔日具安乐，
五欲所须皆称意， 神通勇健有大力。
所持弓刀及箭槊， 冒索矛[矛+贊]剑轮等，
一切今当悉退落， 城邑巷陌尽茫然。
男夫妇女先凶健， 颜色端正有势力，
悉与诸天共齐等， 于今时中定当尽。
命尽众生白法尽， 羞耻惭愧解心尽，
及聪明人所知尽， 巧行与善圣智尽。
苗稼及诸华药尽， 果味等尽诸戒尽，
所欲称意音乐尽， 众宝衣服饮食尽。
喜乐事尽人天尽， 夜叉乾闥修罗尽，
婆罗门种刹利尽， 并诸毗舍首陀尽。
唯共诸恶众生等， 非圣谄曲杀盗淫，
妄语两舌绮恶口， 贪恚胆佞痴邪见。
俭短增长及饥渴， 爱离怨会与捕猎，
见他得利生嫉忌， 割截斩斫诸破坏。
毒害刀槊剑轮增， 面目流泪忧悲苦，
蚊虻恶风及烟尘， 斯等并来为触恼。
地狱畜生与饿鬼， 是等境界大苦海，
此非善行相应时， 念念退失于正见。
白业之人恶事增， 如是众恶皆兴盛，
是阿修罗尽时至， 唯无等乘能遮止。”

尔时，波罗陀阿修罗王，白罗睺罗阿修罗王，说偈问言：

“唯王为诸众生故， 常勤精进修诸法，
具大福德神通力， 及以智慧庄严身，
此是何力谁所作， 欲灭我等阿修罗？
谁能救护于我等， 当礼敬彼而归依？”

尔时，罗睺罗阿修罗王，说偈答言：

“此非释梵天王力， 亦非自在那罗延，
又非夜叉及龙神， 唯除魔王欲自在。
昔恼诸龙亦如是， 大仙瞿昙为断除，
我等礼彼瞿昙仙， 能施我等安乐故！”

尔时，跋持毗卢遮那阿修罗王，以偈问言：

“为是天人龙夜叉， 能施一切安乐者，
彼何神通精进力， 为当方便造幻惑？
于何法中得自在？ 何谁能受彼教敕？
为于魔力得解脱， 而得何力使其然？”

尔时，罗睺罗阿修罗王，以偈答言：

“昔见端正大沙门， 端坐菩提树阴影，
魔将军众而诣彼， 以慈悲力速降伏。
于彼得成胜菩提， 超过一切诸天众，
具大慈悲入涅槃， 故能枯竭众苦海。
此诸仙中最胜幢， 具足十力众生药，
释梵自在修罗仙， 欲自在魔那罗延，
悉礼于彼作归处！ 是人能示众解脱，
于诸一切三界中， 超胜所有诸天众，
调伏寂静降诸根， 乐寂七圣财庄严，
安住涅槃到彼岸， 悉能枯竭烦恼海。
是故我等一切众， 悉归能灭诸苦者，
皆持种种妙香华， 各各合掌而求请。”

尔时，罗睺罗、毗摩质多罗、波罗陀、跋持毗卢遮那，四阿修罗王，及男夫妇女、童男童女，所有一切阿修罗众皆悉云集。有以烧香供养礼佛而求请者；有持种种杂色妙华，有持种种摩尼宝珠，有持种种幢幡宝盖、金缕真珠、璎珞、衣服，以用奉佛而求请者；有持种种箏瑟笙箫笛鼓吹五音作乐，供养礼拜求请佛者。罗睺罗阿修罗王，以己神通境界之力，大身游戏两手执持帝释毗楞伽摩尼宝鬘，头面礼拜遥奉世尊，说偈赞曰：

“佛为众生乐， 久修诸苦行，
怜愍一切众， 愿亦愍我等。
忍辱如大地， 悲愍诸众生，
休息诸浊恶， 愍覆于我等。
佛度诸畏讫， 得于无上智，
等心于众生， 愿愍阿修罗。
佛以八圣船， 度脱苦众生，
涅槃味充饱， 慈念阿修罗。
佛于诸众生， 不耻恶种姓，
一切如赤子， 是故归依佛。”

尔时，毗摩质多罗阿修罗王，以两手捧持一切诸天登祚所著摩尼宝鬘，头面作礼以偈赞曰：

“胜过天龙众， 修罗鸠槃荼，
尽除诸烦恼， 心意所作恶。
降伏业苦道， 而到于彼岸，
远离于有想， 及无想众生。
悲念众生故， 不入于涅槃，
为诸众生故， 能忍一切苦。
视于诸众生， 如母念一子，
愿愍于此等， 苦处洒悲水。
休息苦恼触， 烦恼水所溺，
起发坚勇者， 愿救众生苦。
念今苦苦至， 为魔力所坏，
苦触阿修罗， 愿洒大悲水。
众生若于佛， 起于瞋恶心，
而不能动佛， 身心少分者。
若彼所有乐， 境界身心事，
佛常等慈悲， 于此更无异。
唯佛于天人， 能施一切乐，
我等为魔恼， 心孤无所依。
无有余众生， 能灭于魔业，
唯佛速除遣， 尽坏无有余。
诸天龙证知， 夜叉阿修罗，
如佛众生最， 能救一切苦。
魔欲速灭我， 修罗诸宫殿，
愿速放戒光， 施我满足乐。”

尔时，波罗陀阿修罗王，两手捧持梵天光幢摩尼宝珠和合天鬘，头面作礼说偈赞曰：

“流转狱所缚， 离诸一切乐，
极恶大巨海， 没溺无所依。
唯佛精勤行， 于三阿僧祇，
自度到彼岸， 悉竭烦恼海。
为诸众生故， 六年行苦行，
而得无上智， 灭除彼烦恼。
我等为魔娆， 无力受诸苦，
愿除魔所加， 洗浴我等宫。
此等僧祇众， 为诸苦所恼，

愿救此诸苦， 当往见世尊。”

尔时，跋持毗卢遮那阿修罗王，两手捧持梵天艳光摩尼宝鬘，头面作礼以偈赞曰：

“今礼牟尼尊， 于法自在者，
超过释梵王， 降魔及军众。
超过日月光， 及与四天王，
慈悲明日月， 普照诸众生。
五日并出时， 海水悉枯竭，
若供佛功德， 无能枯竭者。
超度于三界， 而入无畏城，
大悲覆众生， 诸苦悉除灭。
等心诸众生， 如母视一子，
我等忧翳障， 慈风愿吹散。
更无余归依， 可救我等苦，
如佛功德满， 莫舍修罗宫。”

尔时，世尊以佛耳闻，以佛眼见诸阿修罗城邑宫殿，魔力所加，一切诸难皆悉周遍无有遗余俱受苦恼：“愿乐求我荫覆救护，为归为趣，我当救护诸阿修罗，今正是时。”于时，世尊以大悲威势现一切乐，即入悲风光明三昧；三昧力故，令四阿修罗宫殿所有魔之神力所加苦事，一念之顷皆悉休息还复如故，亦如三十三天宫殿，于中即现第一妙乐可乐之事。

彼诸阿修罗见已，踊跃心生欢喜，口眼皆悦熙怡微笑，皆作是言：“南无佛陀！南无佛陀！”作是语已，即以诸天胜妙宝鬘，向佛方所遥掷奉献。其罗睺罗阿修罗王所掷宝鬘即到佛所，于佛顶上空中而住。毗摩质多罗阿修罗王所掷宝鬘，亦到佛所于虚空中住右肩上。波罗陀阿修罗王所掷宝鬘，亦到佛所于虚空中住左肩上。跋持毗卢遮那阿修罗王所掷宝鬘，亦到佛所住于佛前放光而照。其余所有诸阿修罗，复持种种众宝香华幢幡宝盖，及以金缕宝珠、天鬘真珠、瓔珞、种种衣服、涂香、末香，彼等一切悉向世尊遥掷奉献而以供养。是时，于此佉罗帝山牟尼诸仙所依住处，雨种种华乃至末香如降暴雨。

尔时，会中有菩萨摩訶萨，名求断疑，从座而起，偏袒右肩，合掌礼佛，以偈问曰：

“大仙世尊无量智， 于先已雨如是雨，
现诸神通变化瑞， 月藏菩萨来到此。
今复雨于种种宝， 谁当复来到于此？
为是大德诸菩萨？ 为是他方诸佛使？”

尔时，佛告求断疑菩萨摩訶萨言：“善男子，此是魔王波旬，于四阿修罗城邑宫殿，化作阴闇灰尘烟雾、蚊虻毒蝇及以种种毒蛇蜂蝎，于彼一切树林草木华果泉池皆悉枯涸。一切阿修罗苦困欲死，彼等向我一心归依合掌作礼，以种种华乃至末香，于彼阿修罗所住城邑，向我遥掷而作供养。罗睺罗阿修罗王所掷宝鬘，今我顶上者是也。毗摩质多罗阿修罗王所掷宝鬘，今我右肩者是也。波罗陀阿修罗王所掷宝鬘，在我左肩者是也。跋持毗卢遮那阿修罗王所掷宝鬘，今在我前者是也。”

尔时，魔王波旬从座而起，向佛合掌，恭敬礼拜而作是言：“此诸阿修罗蒙佛恩福，我今亦令诸阿修罗还得具足饶益安乐。”

佛告波旬：“汝今不须作如是言，我已令其充足安乐。我诸阿修罗城邑宫殿，转胜微妙，乐具悉有还复如故。何以故？彼等四大阿修罗王是我亲旧，如是其余所有一切阿修罗等，于我得信敬仰尊重心生希有，今当不久来至于此为听法故。”

魔王波旬复生恶心而作是念：“我是一切欲界之中最胜自在，于诸众生能作苦乐。沙门是人，何能狡猾幻惑异端妖邪多语，敢共我竞而欲与我校量比并？释、梵、四王、摩醯首罗、那罗延天、转轮圣王，一切众生，无能与我校量比并作相违者。今此瞿昙，作幻逛惑一切众生，遍四天下地及虚空一切盈满，皆悉欲见瞿昙故来，今此下贱畜生之类诸阿修罗亦复蒙摄。我今当作魔之境界神通势力游戏所加，更作幻惑恼乱于彼沙门瞿昙，及以降伏诸来会众。”

时，魔波旬观其眷属而说偈言：

“诸魔各作念， 我常降伏怨，
及恼此会众， 并禁阿修罗。”

尔时，世尊而说偈言：

“汝等见我力， 昔于菩提树，
天神为证明， 我修真正法。
随汝所有力， 恣汝当现之，
若能恼我者， 我当作归依。”

尔时，魔王波旬复增第一极重瞋恨，以一切魔力境界神通游戏所加，念于四方最热之风，令其一切诸来大众热风触恼而作降伏。于时，世尊即入摧伏魔力三昧，其三昧力，即于四方复起第一妙香凉风，触其身分皆受快乐。魔王波旬知是事已，复于佛前化大火聚。世尊即于彼处化作清凉大池，水涌上出。魔王见已，复于空中降雨大石。佛即变其所雨之石，悉令化作种种天华而雨其处。魔王波旬及与眷属，复以两手捉佉罗帝山，而欲速疾震动三千大千世界。佛复以此三千地界加作金刚，尚不能动乃至一尘，况能多也！魔王复以瞋怒之

力，向阿修罗所住之方，放口嘘气成黑气云，令其城邑宫殿阴闇，使诸阿修罗重复迷惑不能去来。尔时，世尊即复变其所吹气云，令作种种天妙华云，尔时于彼四阿修罗城邑宫殿，复雨种种天华之雨。其华雨中演出百千微妙法门，所谓佛声、法声、僧声，檀那波罗蜜声乃至般若波罗蜜声，三善行声、三归依声、三律仪声、三不护声、三依止声、三种菩提声、三乘声、三修声、三种善根声、越度三界声、三受声、三解脱声、三示现声、四念处声、四正勤声、四如意足声、四不坏信声、四禅声、四梵住声、四摄声、四无碍智声、四无色定三摩跋提声、四圣谛声、五根声、五力声、五支三昧声、五解脱入声、显示六根声、六和敬声、六念声、六通声、七圣财声、七识住声、七觉分声、八圣道声、九次第定声、十圣处声、佛十力声、大慈声、大悲声、因缘生起声、心不可坏声、舍一切恶见声、不忘菩提心声、不退转声、忍声、三昧声、陀罗尼声、授记登祚声、无生忍声、苦行声、十地声、十八不共佛法声、到菩提声、转法轮声、不可坏佛声、舍声、厌声、解脱定声、灭声、成就众生声、摄受正法声、辩才声、无常声、苦声、无我声、空声、无所作声、寂静声、无生声、如声、实际声、入法界声，无众生、无命、无养育、无受者、如如、不生不灭、不常不断、不去不来、不住不行声，大神通变化声、加护三宝种声乃至大般涅槃声，地狱、畜生、饿鬼、人、天苦五阴重担声，数数流转生死与爱别离声，一切有为流转之狱如幻、芭蕉、水月、响声，信、念、精进、忍及智慧、十善业道护持声，出彼流转狱声，于彼华雨出是无量百千种声。彼诸音声，能令无量阿僧祇等阿修罗，于三宝中深得敬信，尊重归依生希有心，渴仰欲见释迦牟尼，及欲听法供奉众僧，极甚惊怖流转生死与爱别离，希望涅槃。

彼诸一切阿修罗等俱发声言：“南无释迦牟尼如来！南无释迦牟尼如来！我等今往见于释迦牟尼如来，礼拜供养故，听法故，及供奉众僧故，为看大集故，为求无上菩提乘故，为退落魔幢故，为建立法幢故，为三宝种不断绝故，为听第一义圣谛法门故，为休息烦恼道苦道故，为断截魔缚故，为枯竭爱河故，为满法海故，为入智海故，为成熟众生海故，为供养诸佛海故，是故我等及诸眷属往诣佛所，不为恶魔于我等中更得自在，我等从今不复重遭如是之苦！”

尔时，牟尼邻陀阿修罗王，复作是言：“我今亦与妇妾宫人男女大小，诸阿修罗妇女眷属八万四千，一切皆悉著青衣服青色庄严，青伞、青盖、青幢、青幡、青车、青华、青色摩尼琴瑟箜篌、青宝、青鼓。我今将诸五音作乐歌舞调戏第一庄严，及将眷属而往见佛，恭敬礼拜听受妙法，供奉众僧故往诣佛所。”

尔时，须质多罗阿修罗王复作是言：“我今亦与妇妾宫人男女眷属九十九百千阿修罗妇女，一切皆著黄衣庄严，乃至供奉众僧故往诣佛所。”

尔时，睽婆罗阿修罗王复作是言：“我今亦与妇妾宫人男女眷属

百千亿阿修罗妇女，一切皆悉著紺色衣璎珞庄严，乃至供奉众僧往诣佛所。”

尔时，跋持毗卢遮那阿修罗王复作是言：“我今亦与妇妾宫人男女眷属九十九频婆罗阿修罗妇女，一切悉著朱色衣服璎珞庄严，乃至往诣佛所。”

尔时，毗摩质多罗阿修罗王复作是言：“我今亦与妇妾宫人男女眷属九十九恶初矣尼百千阿修罗妇女，一切悉著玻瓈色衣璎珞庄严，乃至往诣佛所。”

尔时，罗睺罗阿修罗王复作是言：“我今亦与夫人嫫女男女眷属，及土田主、附庸王并及长者、臣将左右、城邑聚落所有人众，如恒河沙等阿修罗妇女，一切悉著玛瑙色衣璎珞庄严。复持玛瑙色衣，及与幢幡宝盖、金缕真珠、璎珞、摩尼宝珠、香华、涂香及所乘车，皆悉同是玛瑙之色。并以鼓角琴瑟箜篌箫笛伎乐，如是等事皆玛瑙色。相与作乐歌舞戏笑，最胜庄严在于虚空，为欲见佛礼拜供养，及为听法供奉众僧故，往诣佛所。”如前所说，皆悉严备彼诸色相，第一微妙希有未有，昔来未闻如是等大庄严事，从彼阿修罗所居处出住在空中。

尔时，毗摩质多罗阿修罗王，及与眷属五音作乐歌舞戏笑，诣罗睺罗阿修罗王于前而引。

尔时，波罗陀阿修罗王，及与眷属皆大严持，到罗睺罗阿修罗王右厢而引。

尔时，跋持毗卢遮那阿修罗王，并与眷属亦复如是具大庄严，到罗睺罗阿修罗王左厢而引。

尔时，睺婆罗阿修罗王，及与眷属亦悉严持，诣罗睺罗阿修罗王于后而引。

尔时，牟真邻陀阿修罗王，及与眷属亦大严驾，到罗睺罗阿修罗王在上而引。

尔时，须质多罗阿修罗王，及与眷属如是庄严，亦到罗睺罗阿修罗王在下而引。

尔时，于中罗睺罗阿修罗王及与眷属，如是色相以大庄严，五音伎乐一时俱作，歌舞戏笑音声和合而诣佛所。复以两手持种种宝华天鬘涂香，向佛方所遥散奉献，到佉罗帝山上变作大云空中而住。其佉罗帝山牟尼诸仙所依住处，雨种种宝种种华、种种天鬘、种种涂香。

尔时，会中有诸众生作如是念：“欲有何事？是何等力先作此瑞？”

尔时，世尊告慧命耶舍言：“汝等比丘当自正念，系心而住勿得散乱。”世尊复告慧命耶舍：“汝等比丘当以精勤系念而住，勿得散乱！若能精勤系念不散，则能休息烦恼之道及除苦道，能住第一义谛，能满六波罗蜜，不久得成阿耨多罗三藐三菩提。此是诸阿修罗及与一切眷属妓女而今欲来，并作五音妓乐和合而作庄严，为礼拜我供

养听法。是故汝等，勿得散乱，系念而住。”

尔时，一切阿修罗及与眷属，寻即来到佉罗帝山，到已即时右绕其山，三匝讫已，将诸眷属诣世尊所。

尔时，罗睺罗阿修罗王，向世尊头面作礼，右绕三匝，于前住立，持梵天髻上光明艳色摩尼宝珠置于佛前，复用种种宝华、末香、幢幡宝盖及以金缕真珠、瓔珞，复以种种歌舞作乐而用供养，合掌向佛说偈赞曰：

“心调土中最， 能施一切乐，
法灯常法施， 增长法智慧。
世尊燃法炬， 天人皆悉知，
了达希望法， 安住涅槃道。
唯佛荫诸众， 如盖覆一切，
摧伏诸阴魔， 死魔烦恼魔。
降魔及军众， 并及恶心意，
稽首于世尊， 勇健愍诸有。
是魔极恶心， 常行诸恶事，
此是彼戏笑， 欲得众生苦。
此诸修罗宫， 苦云悉弥覆，
佛即起悲心， 触我诸修罗。
佛为众生故， 修诸苦行讫，
多劫修檀戒， 行忍及智慧。
世尊更不作， 诸余恶行事，
佛以如是事， 足令我得乐。
唯佛精进士， 三界无等双，
离诸烦恼缚， 解脱于三有。
佛仍于众生， 慈悲而常转，
礼佛不动山， 慈心正安住。”

尔时，毗摩质多阿修罗王及与眷属，头面接足礼拜世尊，右绕三匝，佛前住立，即以千斤阎浮檀金置于佛前，复以日爱宝摩尼珠置在佛上，如是种种宝、种种香华乃至种种歌舞伎乐而作供养，合掌恭敬说偈赞曰：

“释梵大自在， 轮王那罗延，
护世及波旬， 悉无如是力。
天龙夜叉等， 人及阿修罗，
亦无如世尊， 慈悲大势力。
唯佛众生最， 如地不瞋喜，
能忍一切恶， 并作恶业者。”

等视诸众生，如母爱其子，
心平于一切，是故礼佛足。
愿护此一法，勿使魔更来，
不令彼得胜，作此恶恼害。
一切恶瞋怒，及以最极恶，
实语愿说咒，降伏诸魔军。
如人身无病，不求诸医师，
如是阿修罗，无事不想佛。
我今甚欢喜，来诣于佛所，
愿说清净法，令到菩提道。
显示诸贤圣，寂定如虚空，
远离于诸恶，及离我我所。
速知于实际，能除诸烦恼，
速断一切缚，得知最上道。”

尔时，波罗陀阿修罗王及与眷属，顶礼佛足右绕三匝，持众杂色种种宝树，状如波吒罗七宝之树置于佛后，种种宝叶华果、金缕真珠、瓔珞、天生宝鬘、天瓔衣服、指印环玠、宝盖幢幡、手瓔珞、脚瓔珞、臂瓔珞宝庄严具，于佛头上空中垂下，乃至种种歌舞作乐而供养佛，一心合掌说偈赞曰：

“众生常为彼，烦恼火所烧，
求乐恒不得，不遇施乐者，
一切住恶道；唯佛众生药，
安住解脱道，能救一切苦。
唯佛赏人主，三有中更无，
愍进智慧水，众德满如海。
为盲失道者，安住于正路，
导引诸众生，住胜涅槃道。
凡夫饥无厌，唯佛能充饱，
常为烦恼溺，唯佛能救拔。
遭溺之病苦，苦逼失其念，
如此苦苦者，导师为亲救。
恶心众生等，龙鬼诸罗刹，
见佛得正念，安住大悲心。
唯佛于三界，能作救护者，
我等已孤独，悉为众苦溺。
我等皆一心，一切乐法住，
愿说最上义，令我得菩提。
以得于佛眼，最上诸佛智，

速伏诸魔怨，愿降正法雨。”

尔时，跋持毗卢遮那阿修罗王将诸眷属，顶礼佛足右绕三匝，于佛右左积阎浮檀金，复以种种宝、种种华、种种末香、宝盖幢幡，及以金缕真珠、璎珞、歌舞作乐，合掌供养说偈赞曰：

“福田福德水，福种福德牙，
福树福德枝，福条福德叶，
福华福味果，最上福味浆，
福色福阴影，福德子成就，
佛福善坚固，福勇能伏他，
福色勇健士，福德不动山，
福华覆盖土，福药所依身，
福山最上顶，放福智慧水，
福德海甚深，福德众生依，
妙福众宝璜，福味如巨海，
福器盛甘露，福愿皆盛满，
福商恒将向，无漏宝国土，
我等众福尽，是故归依佛！
福德贤宝瓶，愿愍施我等！”

尔时，复有阿修罗仙，名一切菩提鬘，具有大福、大威德、大智慧、大苦行，以菩提心而作庄严，得五神通离诸尘垢，安住成就一切众生，常化一切阿修罗等堪受彼供，是诸阿修罗无上导师，与九万五千具足五通阿修罗仙，前后围绕来诣佛所顶礼佛足，以真金瓶盛八功德水，置于佛前并献宝杖。复与九万五千眷属各各执持异种宝盖，以奉世尊右绕三匝，合掌向佛说偈赞曰：

“忍辱如大地，忍水常盈满，
安住于净忍，宁心无所失。
烦恼渴爱尽，安处于信财，
佛住慈悲心，置众菩提道。
说法犹如水，若闻如是法，
爱乐菩提心，能成第一义。
大悲愿调伏，此诸下劣行，
愿受我修罗，所献众宝物。
三界所有供，弃舍不求染，
唯佛无烦恼，堪受世供养。
佛以大菩提，严三有众生，
愿说第一义，为得菩提故。
我于拘留孙，曾闻第一义，

拘那含牟尼， 迦葉佛亦然。
我以自願力， 应现阿修罗，
为化修罗故， 修行菩提道。
闻法获德藏， 复能转示他，
降魔恶徒党， 炽然正法朋。
于此浊恶世， 难有功德人，
现佛境界事， 是佛妙神力。”

大方等大集月藏经卷第三

本事品第四

尔时，弥勒菩萨摩訶萨，即从座起，偏袒右肩，整理衣服，合掌向佛而作是言：“世尊既是释迦贵种刹利大姓，迦毗罗城净饭王子，此四阿修罗畜生种类极成卑下。世尊，何故言与我亲？”

尔时，佛告弥勒菩萨摩訶萨言：“于过去第三十一劫有佛出兴，号毗舍浮如来、应、正遍知、明行足、善逝、世间解、无上士、调御丈夫、天人师、佛世尊，彼佛常为四众说法。尔时，有一大婆罗门，名弗沙耶若，已于过去无量佛所种诸善根，于阿耨多罗三藐三菩提而不退转，深信具足归依三宝，受持五戒离诸放逸。时，弗沙耶若有弟八人，一名弗沙金刚，二名弗沙那毗，三名弗沙闍利，四名弗沙跋摩，五名弗沙车帝，六名弗沙树，七名弗沙毗离，八名弗沙那提。时，弗沙耶若婆罗门劝诸弟言：‘汝等贤首，今可归依佛法僧宝，受持五戒离诸放逸，发阿耨多罗三藐三菩提心。’时，彼诸弟皆悉不肯归依三宝，乃至不肯发菩提心。时，弗沙耶若数劝诸弟经于多年，复问诸弟：‘汝等何故皆悉不肯归依三宝？乃至不肯发菩提心？竟有何意何所愿求？’时，彼八弟即作是言：‘兄能千年修二威仪，唯行唯住不坐不卧，经七日夜限食一揣，修此难行足满千年，然后我当归依三宝，受持五戒离诸放逸，发于无上菩提之心。’

“弥勒，时弗沙耶若闻是语已，一心喜悦，即为八弟而立誓言：‘汝等若能归依三宝，乃至能发阿耨多罗三藐三菩提心不退转者，我今必当千年之中不坐不卧，七日夜限食一揣。我立誓已，于千年中若昼若夜，乃至一刹那顷念于坐卧，乃至七日夜过食一揣，永当使我违三世佛，违六波罗蜜，违十善业道，不成阿耨多罗三藐三菩提。’尔时，空中有百千亿那由他无量诸天赞言：‘大士，善哉！善哉！坚固勇猛，大力决定，汝于来世盲冥众中当得成佛，多陀阿伽度阿罗诃三藐三佛陀声震于世！’时，毗舍浮佛以弗沙耶若头陀功德故赞言：‘善哉！善哉！大婆罗门，汝今以此苦行威仪，行檀波罗蜜乃至般若波罗蜜故，于未来世第三十一大贤劫中，人寿百岁于彼成佛，号释迦牟尼如来应正遍知，声震于世。汝当尔时，与此八弟授阿耨多罗三

藐三菩提记。’弥勒，彼弗沙耶若婆罗门，足满千年不坐不卧，经七日夜限食一揣；满千年已，令彼八弟安住三归，受持五戒，及发无上菩提之心。善男子，是弗沙耶若化其八弟，及余无量百千万亿那由他等诸婆罗门、长者、居士、男子女人、童男童女皆成熟已，即于毗舍浮如来法中出家学道。尔时所有解说经论及诸外典，诵持不忘为人解说，然后至闲林中，与第一义谛禅波罗蜜相应而住经五万年。于彼时中，成熟无量百千万亿那由他阿僧祇天、龙、夜叉、阿修罗、伽楼罗、紧那罗、摩睺罗伽、畜生、饿鬼、毗舍遮、人非人等，向于阿耨多罗三藐三菩提令不退转。

“弥勒，彼弗沙耶若婆罗门者，岂异人乎？莫作异观，我身是也！我于尔时为欲成熟彼八弟故，于千年中不坐不卧但行但立，经七日夜限食一揣；我为成熟彼诸弟故，乃至闲林中住第一义谛经五万年，成熟无量百千万亿那由他阿僧祇天、龙、夜叉、阿修罗、伽楼罗、紧那罗、摩睺罗伽、畜生、饿鬼、毗舍遮、人非人等，向阿耨多罗三藐三菩提令不退转。尔时弗沙金刚者，今罗睺罗阿修罗王是；弗沙那毗者，今毗摩质多罗阿修罗王是；弗沙闍利者，今波罗陀阿修罗王是；弗沙跋摩者，今婆稚毗卢遮那阿修罗王是；弗沙车帝者，今魔王波旬是；弗沙树者，今汝弥勒是，以是因缘得无碍智，一生补处安住大乘；弗沙毗离者，今毗摩罗诘是也；弗沙难提者，今提婆达多是也。当如是观，我昔为求阿耨多罗三藐三菩提故，为欲成就魔王波旬故，作如是等无量苦恼毛竖惊怖难行之事。是故今此魔王波旬，以福德、智慧二种庄严故，有如是等神通威力，有大功能，于欲界中最胜自在。此魔王波旬及余眷属，今于我所起勤害心，于正法幢起推折心，于僧宝所起破坏心，于八圣道起断除心，于正法灯起毁灭心，于诸众生一切善法起隐没心、致留难心、作恐怖心、不怜愍心、违反之心，令诸众生退舍善道堕恶趣心，于诸龙众起惊怖心，于阿修罗宫起破坏心，于此说法大众会所欲障碍故而来至此，复起欲坏大众集心，兴此恶意顾视而坐。若有众生为障碍他故，扰乱他故，降伏他故，欺陵他故，求称誉故，求名闻故，依于五欲戏笑乐故，求富贵故，修行施、戒、忍辱、精进、禅定、智慧；不为解脱，不为信敬，不为离欲寂静，唯为自身五欲乐故，修行施、戒、忍辱、精进、禅定、智慧，为如是等诸结所缚杂于愚痴，于欲界中果报成熟，为魔王波旬如是苦恼。此魔王波旬以本障碍他故，扰乱他故，降伏他故，欺陵他故，求称誉故，求名闻故，依于五欲戏笑乐故，求富贵故，于毗舍浮如来法中，修行施、戒、忍辱、精进、禅定、智慧，以是因缘，今于现在白法尽灭，五浊恶世得作魔王，于三宝所不生信敬无尊仰心。如是波旬常于众生而作诸恶，不利益故，令苦恼故，令堕落故；提婆达多亦复如是。此罗睺罗阿修罗王、毗摩质多罗阿修罗王、波罗陀阿修罗王、婆稚毗卢遮那阿修罗王、牟真陀阿修罗王，及余阿修罗等，亦于毗舍浮如来法中，憍逸自举不勤修习，复怀疑惑杂诸烦恼，贪欲、瞋恚、

愚痴邪见，无明胆佞断常之心，修行施、戒、忍辱、精进、禅定、智慧，以是因缘，今生下类苦恼畜生阿修罗道，为诸结所缚疑惑愚痴，是故彼等尚不能发世俗正见，何况能发无上善根？唯有弥勒菩萨摩訶萨、毗摩罗诘及菩提鬘阿修罗仙等，于毗舍浮如来法中，不为障碍他故，乃至不求富贵故，但乐离欲化众生故，修六波罗蜜，以是因缘，此大丈夫弥勒菩萨、毗摩罗诘及菩提鬘阿修罗仙等，得无碍智，以诸菩萨功德庄严，巧成一切众生智药。

“是故我今告于汝等：若有欲求无上智者，是人应当深信清净，以第一义谛而求菩提，莫以世谛！譬如五大河水能满大海，不以小河；如是以依第一义故，速能充满一切智海，不以世谛。又如须弥山王依于大地久住不动，不以依水；如是以依第一义谛，一切善根而得坚固，不以世谛。又如一切草木依于大地而得生长，不以草叶；如是四念处乃至十八不共法、大慈大悲等，依第一义谛而得生长，不以世谛。又如猛风依于虚空而能吹荡烟云尘雾，不依于地；如是为求菩提诸善男子、善女人等，依第一义谛，能吹诸恶见云、烦恼烟雾、十恶道尘，不以世谛。又如依日大光明故，得见高下及诸色像种种作业，不以依彼油灯小光；如是以依第一义谛菩提之心，无有迷惑作诸善业，不以世谛。是故应舍一切爱取摄受之事，住闲林中，不作放逸修第一义，不以世谛；汝等如是便能速满六波罗蜜，于阿耨多罗三藐三菩提而成正觉。”

尔时，世尊欲重明此义而说偈言：

“一生处弥勒， 问于尊导师，
云何畜生类， 言与人为亲？
世尊见久远， 告于弥勒言：
修罗等往昔， 皆是我兄弟。
第三十一劫， 毗舍浮佛时，
我作婆罗门， 聪慧字耶若，
六度常相应， 菩提不退转。
时我有八弟， 邪见婆罗门，
劝令信三宝， 及发菩提心，
彼皆不肯行， 愚痴邪见故。
既历多年已， 钝根作是言：
‘兄能千年中， 常离于坐卧，
复经七日夜， 限食饭一揣，
如是千年满， 我当住菩提。’
我时一心喜， 暂住二威仪，
既满千年已， 方得成熟彼，
又化多众生， 出家离俗已，
复与第一义， 相应五万年。”

如是第一义，我时本安住，
转化无量众，坚住无上道。
罗睺毗摩质，婆稚波罗陀，
波旬毗摩诘，弥勒及提婆，
如是八人等，先是我兄弟，
为彼修苦行，成熟于菩提。
我为无上道，行诸苦难事，
波旬提婆达，常欲危害我。
魔于过去时，所作诸善业，
初无有信敬，恒欲恼众生；
但为富贵欲，求名不尊重，
毗舍浮法中，而行于六度；
白法尽灭已，恶法增长时，
得为魔波旬，欲界中自在。
又于三宝所，不肯生信敬，
波旬提婆达，常欲恼众生。
如是修罗王，增上憍逸士，
疑惑有欲垢，及诸嫉妒行，
今在畜生类，而作修罗王，
于诸最胜法，无智不能了。
弥勒毗摩诘，道鬘修罗仙，
于毗舍得信，修行无上道；
彼与六度合，常化诸众生，
是故今殊胜，成熟无碍智。
故我今示汝，宜舍诸疑惑，
勤修第一义，证菩提不难。
如海常充满，种种众宝物，
如是修真谛，能令智满足。
又如依大地，生长诸苗稼，
如是真谛合，能生胜菩提。
又如风依空，吹荡诸尘噎，
如是修真谛，能灭诸烦恼。
又如依日光，明见诸色像，
若住第一义，能睹诸佛法。
是故若欲求，于世速成佛，
宜舍诸见著，安住第一义。
往诣闲林中，端坐修禅定，
勇决独无侣，求无上菩提。
精勤自调伏，防护于己心，
弃舍诸邪见，远离于断常。

怒心龙夜叉， 并及诸鬼神，
无量百千亿， 化之以真谛。”

第一义谛品第五

尔时，月藏菩萨摩诃萨即从座起，偏袒右肩，右膝著地，合掌向佛而作是言：“世尊，我今欲有所问，唯愿如来，随时听许为我解释。”

尔时，佛告月藏菩萨摩诃萨言：“善男子，如来应正遍知恣汝所问，当随意答，令汝心喜。”

尔时，月藏菩萨摩诃萨闻佛语已，即白佛言：“唯然受教！大德婆伽婆，云何菩萨摩诃萨住阿兰若修第一义谛得如月，以四无碍成熟众生能满六波罗蜜？”

佛言：“善哉！善哉！善男子，快问是义。汝于过去无量佛所植诸善根，修诸功德圆满之行，已曾问此甚深之义。汝今直欲为彼未曾修习求阿耨多罗三藐三菩提诸善男子、善女人故问如是义。善男子，谛听！谛听！善思念之，吾当为汝分别解说。善男子，若有清信善男子、善女人，求阿耨多罗三藐三菩提者，当作是观：三界所有一切众生，皆为贪欲、瞋恚、愚痴三毒猛火焚烧炽然，生老病死忧悲苦恼皆亦炽然不得解脱。作是观时，菩萨于彼诸众生所起大悲心，复作是念：‘一切众生莫不厌苦求乐，彼等如是为苦所转如五节轮。’复作是念：‘何因缘故此诸众生众苦增长无有休息？’作是念时，知诸众生皆为爱取因缘所摄，故受是苦增长不息：‘是故我当弃舍爱取所摄因缘，出向闲林独而无侣，于第一义谛思惟而住。如是先自除苦，然后乃能除众生苦。’如是菩萨以真实心欲令众生离苦得乐，当知此心从大悲起。菩萨摩诃萨弃舍一切爱取因缘，出向闲林独而无侣如犀牛角，于四圣种喜悦而住，不念地、不念我地、不念地我，水火风大亦如是。不念色、不念我色、不念色我，受想行识亦如是。不念眼、不念我眼、不念眼我，如是不念眼识、不念我眼识、不念眼识我，如是不念眼触、不念我眼触、不念眼触我，如是眼触因缘生受，若苦、若乐、不苦不乐，不念乐、不念我乐、不念乐我，乃至不苦不乐亦如是；耳鼻舌身亦如是，不念意、不念我意、不念意我，乃至意触因缘生受，若苦、若乐、不苦不乐，不念乐、不念我乐、不念乐我，乃至不念不苦不乐亦如是。不念四大、不念我四大、不念四大我，乃至不念三受、不念六想、不念三行、不念六识，不念色声香味触亦如是。不念虚空处、不念识处、不念无所有处、不念非想非非想处，不念见、不念闻、不念觉、不念知、不念代谢、不念觉观、不念心，不念此世间、不念彼世间，不念过去、不念未来、不念现在，不念断、不念常，不念三昧、不念禅，不念舍、不念尽、不念用，不念生、不念

灭，不念我、不念数，不念黑、不念白，不念胜、不念劣，不念行、不念住、不念坐、不念卧，不念闇、不念明，不念作、不念三界、不念刹那亦如是。

“诃诃诃诃诃诃 哒啰咩 达啰腻移 沓婆差 沓婆褐勒叉移
陀婆木叉移 苏婆贺

“善男子，是名菩萨摩訶萨住于闲林修第一义谛。”

佛说如是阿兰若第一义谛时，有八十亿百千频婆罗诸天及人，于第一义谛曾修习者皆得无生法忍，复有恒河沙等天人得柔顺忍，复有过虚空量诸众生等得不忘菩提心三昧，复有八万四千比丘得无漏心解脱。

尔时，世尊复作是言：“善男子，若有菩萨摩訶萨，如上所说，弃诸爱取所摄因缘，乃至如我所说修第一义谛时，云何菩萨摩訶萨得如月，以四无碍成熟众生能满六波罗蜜？”

“善男子，如菩萨摩訶萨观诸众生，皆为三毒猛火炽然，生老病死忧悲苦恼皆亦炽然不得解脱。作是观时，菩萨于彼诸众生所起大悲心，此是菩萨摩訶萨得如月，照除众生无明黑闇如初日月。

“如菩萨摩訶萨为除众生诸苦恼故，舍诸爱取所摄因缘，此是菩萨摩訶萨得如月，照除众生无明黑闇，与义无碍相应成熟众生，为满六波罗蜜故如二日月。

“如菩萨摩訶萨出向闲林独而无侣如犀牛角，于四圣种喜悦而住，此是菩萨摩訶萨得如月，照除众生无明黑闇，与法无碍相应成熟众生，为满六波罗蜜故如三日月。

“如菩萨摩訶萨修第一义谛，此是菩萨摩訶萨得如月，照除众生无明黑闇，与词无碍相应成熟众生，为满六波罗蜜故如四日月。

“如菩萨摩訶萨于三界境界及一切乐，皆悉弃舍修第一义谛，此是菩萨摩訶萨得如月，照除众生一切渴爱，与乐说无碍相应成熟众生，为满六波罗蜜故如五日月。

“如菩萨摩訶萨舍弃现在人中乐，亦不希望于五欲乐而修第一义，此是菩萨摩訶萨得如月，照除众生一切瞋闇，成熟众生能满檀波罗蜜，是故菩萨摩訶萨于诸众生如六日月。

“如菩萨摩訶萨于诸境界得奢摩他定，此是菩萨摩訶萨得如月，成熟众生能满尸罗波罗蜜，是故菩萨摩訶萨于诸众生如七日月。

“如菩萨摩訶萨三界境界休息相应，不分别瞋、不分别慈，此是菩萨摩訶萨成熟众生能满羼提波罗蜜，是故菩萨摩訶萨于诸众生如八日月。

“如菩萨摩訶萨一切三界休息相应，不分别极不分别，此是菩萨摩訶萨成熟众生能满毗梨耶波罗蜜，是故菩萨摩訶萨于诸众生如九日月。

“如菩萨摩訶萨为悲愍众生故而修第一义，此是菩萨摩訶萨成熟众生能满禅波罗蜜，是故菩萨摩訶萨于诸众生如十日月。

“如菩萨摩訶萨为众生故，于诸三界阴、界、诸入三受等事，不分别极不分别，住如实际而修第一义，此是菩萨摩訶萨成熟众生能满般若波罗蜜，是故菩萨摩訶萨于诸众生如十一日月。

“如是，善男子，此是菩萨摩訶萨住于闲林修第一义时得如月，以四无碍成熟众生能满六波罗蜜。

“复次，善男子，云何菩萨摩訶萨修第一义时成熟众生复得如月？善男子，如菩萨摩訶萨住于闲林，若行若住若坐若卧，舍离分别一切三界阴、界、入等，住不分别修第一义。时诸地行天、龙、夜叉、罗刹、阿修罗、鸠槃荼、饿鬼、毗舍遮、富单那、迦吒富单那，饥渴寒热更相怖畏，逼迫身心常怀瞋恶，于诸众生而无慈愍，不观后世畏。彼诸天龙乃至迦吒富单那往菩萨所，见已大笑，而欲夺于菩萨精气，又以恶气而欲噓之，及欲打害散乱其心。彼诸鬼神虽起此恶，去一由旬不能往到彼菩萨所，何能以气噓之夺其精气，及以打害散乱其心？彼诸鬼神心极生怪，复示第一最恶形色，欲令菩萨畏之心裂，然此菩萨若行若住乃至不能动其一毛，何况能作诸余恼乱？彼诸天龙乃至迦吒富单那，以一切方便不能少分恼乱于彼修第一义谛菩萨摩訶萨。彼等便于修第一义谛菩萨摩訶萨所，心得敬信尊重敬仰心生希有；以于菩萨生敬信故，身心苦尽得乐充满。彼等复数诣菩萨所接足礼敬，还其本处游行止住，复于众生更相敬重，常生慈心、不怖畏心、不胆佞心、不恼害心、无怨仇心、不斗争心、作平等心、休息杀生心乃至休息诸邪见心。彼等数数向于菩萨极作敬重，头面礼足，发愿忏悔一切罪业，而作是言：‘我等从今乃至久远，生死流转随几时中，亦常恭敬供养仁者，以为左右、亲友知识、兄弟眷属及作檀越。乃至菩萨于阿耨多罗三藐三菩提得成正觉，是时仁者于三乘中与我授记。以仁者力故，我等当于生死流转而得解脱入无畏城！’此是菩萨摩訶萨修第一义时，成熟众生能满六波罗蜜。是故菩萨摩訶萨于诸众生如十二日月。

“如菩萨摩訶萨住于闲林修第一义时，所有空行天、龙、夜叉、罗刹、阿修罗、鸠槃荼、饿鬼、毗舍遮、富单那、迦吒富单那，于诸众生犷恶瞋恚，无有慈愍，不观后世畏，作如是等诸恶形色非威仪事，乃至不能恼彼住于闲林修第一义谛菩萨摩訶萨一毛，何况能作诸余恼乱？彼等天龙便于菩萨摩訶萨所心得敬信，乃至休息十不善道。彼等数数向菩萨所发愿忏悔一切罪业，乃至：‘仁者于三乘中与我授记，我等当于生死流转而得解脱入无畏城。’此是菩萨摩訶萨修第一义时，成熟众生能满六波罗蜜。是故菩萨摩訶萨于诸众生如十三日月。

“如菩萨摩訶萨住于闲林修第一义时，彼诸天龙乃至迦吒富单那，向彼菩萨摩訶萨边，忏悔业障、众生障、法障、烦恼障，乃至是诸众生得成熟故能满六波罗蜜，是故菩萨摩訶萨于诸众生如十四日

月。

“如菩萨摩訶萨住于闲林修第一义时，彼诸天、龙、夜叉、罗刹、鸠槃荼、饿鬼、毗舍遮、富单那、迦吒富单那，犷恶瞋恚，于诸众生无有慈愍，不深敬信，不观后世畏；乃至彼修第一义谛菩萨摩訶萨所，深得敬信尊重敬仰生希有心，一切皆悉弃舍恶业及舍舍宅，昼夜诣彼修第一义谛菩萨摩訶萨所，修行如上休息杀生，于诸众生生悲心、利益心、怜愍心而住，休息偷盗、邪淫、妄语，此是修第一义菩萨摩訶萨能满檀那波罗蜜；如彼休息两舌，此是菩萨摩訶萨能满尸罗波罗蜜；如彼休息恶口，此是菩萨摩訶萨能满羼提波罗蜜；如彼休息绮语，此是菩萨摩訶萨能满毗梨耶波罗蜜；如彼休息贪瞋，此是菩萨摩訶萨能满禅波罗蜜；如彼休息邪见得正见，数数作如是愿，当令我等得无上智，此是菩萨摩訶萨能满般若波罗蜜。如彼天龙乃至迦吒富单那，于彼修第一义菩萨摩訶萨所深得敬信，亦复不勤怖畏刹利、沙门、婆罗门、毗舍、首陀，亦不怖畏男夫妇女、童男童女，亦不怖畏象、马、师子、虎、豹、豺狼、獐、鹿、鸟、兽，亦不怖畏国土城邑、聚落舍宅，亦不怖畏地水火风，亦不怖畏药草林树华果等物。此是菩萨摩訶萨修第一义时，成熟众生乃至能满六波罗蜜，是故菩萨摩訶萨于诸众生如十五日月一切圆满。

“如是菩萨摩訶萨住于闲林修第一义谛，速能满足六波罗蜜。譬如十五日月众星围绕微妙可爱，如是修第一义谛菩萨摩訶萨，为彼信心诸天龙等乃至迦吒富单那，善行围绕微妙可爱。譬如十五日日照除一切无明黑闇，如是修第一义谛菩萨摩訶萨，照除天龙乃至迦吒富单那等十不善噎。譬如月体性凉冷，能令热恼诸众生等身心得乐；如是修第一义菩萨摩訶萨，令彼天龙乃至迦吒富单那等瞋怒所恼者，令住慈心身得安乐。譬如月令失道者见道，如是修第一义谛菩萨摩訶萨，令诸失道天、龙、夜叉乃至迦吒富单那等，于天人所皆生慈愍，乃至能见于三乘道。譬如十五日月一切圆满照于月爱摩尼宝珠，如是宝珠以月光照故，能出多水满于小河及诸大河又满大海；如是修第一义谛菩萨摩訶萨，以如是等威仪力故，乃至迦吒富单那得深敬信，不怖刹利乃至不怖童男童女，不怖城邑乃至不怖树林华果，以此因缘人非人等乃至迦吒富单那獐鹿鸟兽，各于所须具足充满；以彼所须得充满故，不相恼害身心安乐，于十善业道堪能修行，乃至于天人中得受果报具足快乐，以是因缘于三乘中得不退转，如是诸天人等多得饶益。

“如菩萨摩訶萨住于闲林修第一义，能令诸天人等得安隐乐，以是等故速能满足六波罗蜜。是故菩萨摩訶萨当住闲林修第一义，于一切善根三昧陀罗尼，忍辱坚固得住成熟。如须弥山王善得安住，如是修第一义谛菩萨摩訶萨，于一切善根檀波罗蜜善得安住；如师子兽王，以尸罗波罗蜜降诸烦恼；如那罗延，以羼提波罗蜜伏诸三界一切恶见；如波利质多罗树华始开敷，以毗梨耶波罗蜜种种善根华得开敷；如日轮焰光，以禅波罗蜜能除一切无明黑闇；如十五日月一切圆

满，以般若波罗蜜功德庄严所愿圆满；如如意宝能除贫穷，以方便力种种善根不可穷尽，智财无减法愿充满。犹如大云能降大雨，如是菩萨摩訶萨住于闲林修第一义，乃能降注诸法宝雨。如菩萨摩訶萨修第一义，善能安住于菩萨行，一切魔事终不能动得不退转，于阿耨多罗三藐三菩提亦得圆满，种种功德宝华庄严，得到一切诸法智明。如幢上摩尼宝，能成一切义；如毗沙门王贤瓶，能到一切智炬；如得月爱摩尼宝珠在于手中，一切所知皆得圆满；犹如大海；亦如冬时著惭愧衣；如勇健人巧用种种坚牢器杖；如善化伏藏养育一切众生；如阿那婆达多池、紧那罗等均平受报；犹如莲华，诸烦恼泥不能染污；如宝华聚，百千法门种种围绕；犹如宝鬘，一切声闻、辟支佛等之所瞻仰；犹如泉池净水盈满，洗除众生诸烦恼垢；如斯陀大河，荡除众生一切烦恼诸恶见垢；如大河中船，能度众生诸烦恼河；如枳萨利师子，降伏一切众邪异道；如帝释金刚杵，降伏一切烦恼阿修罗；犹如伞盖，遮障众生诸烦恼雨；如大梵王，令诸众生度于流转，生死旷野示涅槃道。是名菩萨摩訶萨住于闲林修第一义时成熟如是无量功德。

“如是，善男子，第一义谛是何句义？第一义谛是五根句义，第一义谛是三昧根义、大慈大悲义、深信一切智义、以四摄法摄受一切众生义、护持正法义、勤求一切佛法义、远离诸难义、住佛功德义、超过声闻辟支佛地义、能净三业义、以诸三昧庄严心义、净三恶趣令诸众生舍邪道义、信解忍义、成熟众生无生忍义、舍离憎爱义、于诸法决断义、分别一切法义、勤求一切智义、得一切助菩提义、觉了十二因缘义、分别上首义、三不护义、四无畏义、十力义、大慈大悲成熟众生义、方便勤求如来十力第一义谛义、十地义、登祚地义、降魔义、得一切种智义、转法轮义、降法雨义、度一切众生义、建立八圣道义，第一义谛有如是等无量大义。善男子，第一义谛荡诸结垢灭一切恶，能度众生烦恼淤泥，枯竭爱河超过一切流转旷野，破诸见网照除无明，降伏诸怨断除忧戚，诸根适悦令入正道，觉悟诸法增长善根，舍诸凡愚入贤圣位到菩提道。善男子，如是第一义谛，一切功德皆悉圆满，成熟无上最胜智慧，能令众生到于一切生死彼岸。”

尔时，月藏菩萨摩訶萨白佛言：“世尊，所谓三昧，三昧者是何身？是何攀缘？是何想？是何相？是何性？第一义谛，是何身？是何攀缘？是何想？是何相？是何性？”

佛言：“善哉！善哉！善男子，汝于三昧久已修习善根圆满，汝今为于诸众生故问，于如来如是等义。善男子，汝今谛听！善思念之，吾当为汝分别解说。”

月藏菩萨摩訶萨白佛言：“世尊，唯然受教。”

佛言：“善男子，诸声闻乘三昧者，名不善三昧，三界身、颠倒攀缘、不净想、厌离相、不喜乐性。地界三昧者，不分离身、取攀缘、重想、坚相、碎坏性。水界三昧者，不分离身、满攀缘、润想、稀软相、枯竭性。火界三昧者，不分离身、成熟攀缘、热想、烧相、

尽灭性。风界三昧者，不分离身、吹举攀缘、无碍想、急疾相、轻举性。分别阴三昧者，渴爱身、缘起攀缘、弃舍想、苦相、无我性。空三昧者，通利法身、诸法攀缘、无物想、开视相、毕竟空性。无相三昧者，舍三结身、涅槃攀缘、空想、休息相、究尽作性。如是无愿心法三昧者，五识身、因缘攀缘、常修行想、速疾相、无所依性。此等是声闻乘三昧。

“修是缘起三昧，名缘觉乘三昧。

“安住大乘善男子，慈三昧者，忆念身、众生攀缘、无碍想、无瞋相、不浊性。悲三昧者，忆念身、众生攀缘、不害想、救拔相、愍恻性。喜三昧者，忆念身、众生攀缘、乐著想、爱乐相、常欢喜性。舍三昧者，忆念身、众生攀缘、无瞋喜想、常舍相、无功用性。念佛三昧者，法性身、形像攀缘、色处想、爱敬相、欢喜性。念阿那波那三昧者，以身为身、念为攀缘、不住想、冷热相、生灭性。

“善男子，如是第一义谛四禅灭空三昧三摩跋提，依阿那波那念。何谓阿那波那念？阿那言入息，波那言出息，念谓心法。善男子，彼入息、出息当修，修已身猗心亦得猗。当云何修？一者、数，二者、随顺，三者、止住，四者、观相，五者、转还，六者、快净。数有二种作：一者、依彼除觉观，二者、取出入息相。随顺亦二种作：一者、依出除觉观，二者、取入息相。止住亦二种作：一者、示现出入息渐渐减尽，二者、安住三昧。观相亦二种作：一者、示现出入息渐渐减尽；二者、观察心心诸法，种种别异，处处止住。转还亦二种作：一者、息三种受，二者、止三种行，以此得净空三昧。何者为空三昧？见诸法无命，观诸法无主，于彼得住七种空。何者为七？所谓阴空、界空、入空、谛空、因缘空、法空、性空，是名空三昧。住是空三昧则增长因缘息，增长因缘息则事休息，事休息故则道休息。

“善男子，此是菩萨摩訶萨第四禅不可得无言说得第一义谛三昧，非声闻、辟支佛境界。菩萨摩訶萨得禅定处，毕竟不堕声闻、辟支佛地，能满六波罗蜜，于七日夜成熟无量亿那由他百千众生天、龙、夜叉乃至迦吒富单那等，何况能多日夜！随其所有国土城邑，有如是等住第一义禅，菩萨摩訶萨于彼国土有十二种功德利益。何等十二？一者、于彼世界国王不瞋恼，婆罗门不瞋恼，沙门不瞋恼，毗舍不瞋恼，首陀不瞋恼，男夫妇女、童男童女及畜生类禽兽等不瞋恼；二者、于彼国土他方怨敌不来侵国，兵杖不起；三者、于彼国土无贼寇、无欺诈、无矫诳；四者、于彼国土恶人不入，无诸疫病，唯除四大相违病者，终不横死除自报尽；五者、于彼国土亦无非时风雨寒热；六者、于彼国土，一切众生无有瞋恶、急躁粗犷、颠倒见取、为痴所覆，天、龙、夜叉、罗刹、阿修罗、鸠槃荼、饿鬼、毗舍遮、富单那、迦吒富单那，师子、白象、虎、豹、豺狼、毒蛇虺蝎；七者、于彼国土亦无蚊、虻、恶蝇、虱、蚤、鼯鼠、野狐、鼯胡、兔、梟及

以鷹、鵠并余伤害食苗稼虫；八者、于彼国土华果美味皆悉甘脆，无苦辛涩无味等物，亦无饥馑，果药丰饶；九者、于彼国土大地平正，无有旷野高下峻难，地无盐卤亦无坑涧，华果树林常得青翠扶疏蔚茂，是故众生不乏衣食，所须常得饶益安乐；十者、于彼国土人无怨仇斗争毁訾，亦无言讼，皆生慈心、利益心、同心、喜心、施心、戒心、忍心、精进心、禅定心、智慧心、求法心、不违反心、勤求三乘心、求解脱心、知足心，唯除过去诸不善业怨仇心等；十一者、于彼国土当得诸佛住世，若无诸佛有缘觉住，若无缘觉有声闻住，若无声闻有五通仙住，于彼国土常有如是应受供人；十二者、于彼国土无恶名称不可乐声，所谓谪罚声、斗讼声、狱系缚声、杀害声、著铠甲声、捕猎声、偷盗声、骂詈声、期克声、俭声、饥馑声、少衣服声、欺陵声、病声、邪淫声、妄语声、两舌声、粗犷语声、绮语声、贪声、瞋声、归依恶天神声，于彼国土常无如是诸恶邪声，常有如是好声满足，所谓三宝声、三律仪声、四梵住声、四摄声、六波罗蜜声、无生法忍声、登祚声、不受后有声、降魔声、转法轮声、降法雨声，于彼国土以此诸声常得充满。修第一义禅菩萨摩訶萨，随所住处于彼国土诸众生等，皆得趣向无上菩提，于三界中声震于世。若有菩萨摩訶萨欲得速满六波罗蜜，及欲成熟无量无数万亿众生速成阿耨多罗三藐三菩提，当诣闲林于四圣种相应而住，如是菩萨摩訶萨以第一义谛得八地智。”

尔时，世尊欲重明此义，而说偈言：

“月藏问尊天人师，愿为我说上月语，
云何菩萨住兰若？云何修习第一义？
云何于彼得如月，与义相应无碍智，
能成无数亿众生，亦能速满于六度，
断除烦恼及诸行？佛说修习第一义，
见三界苦烦恼火，老病忧悲死炽然，
于诸众生生怜愍，速舍爱取摄因缘，
喜乐圣种住兰若，于第一义常相应。
修诸禅者舍六根，亦舍爱取阴界入，
三界境界爱尽除，远离三世及断常，
于禅损减尽不念，是人得离黑白尘，
亦离明闇诸分别，亦常修习第一义。
舍离阴界住菩提，于诸世间得如月，
国土众生息惊怖，犹如满月照世间，
如是众生得安乐，如月性冷焱光明，
于诸国土恶声息，如是功德亦如月。
若人修习第一义，微妙音声满世间，
俭病斗争悉休息，令诸众生向菩提，

信顺忍成第一义， 悟无生忍亦复然，
亦以此成无碍智， 亦能速满于六度，
亦以此法成众生， 亦以此法速成佛。
声闻不善处， 颠到亦应离；
地界不分离， 坚重碎坏性；
水界不分离， 希润枯竭体；
火界烧煮熟， 热想尽灭性；
诸阴是爱性， 因缘得休息；
空有于七种， 法物令开现；
无相除渴爱， 休息于诸结。
舍诸集因缘， 皆以无愿力，
修习因缘起， 唯是缘觉乘。
大乘诸众生， 修行诸梵住，
安般念三昧， 开示于身心，
心能住无事， 休息三种取，
不可得言说， 是名第一义，
非彼二乘地， 安住此实际。
若以此三昧， 成熟无数众，
名称满于中， 是人速成佛。
是故若欲满， 檀等波罗蜜，
及欲成佛道， 常乐阿兰若。
若常乐兰若， 修诸圣德行，
速舍诸缘碍， 得成佛菩提。”

尔时，世尊说是第一义时，于彼众中五百七十菩萨摩訶萨，曾于过去修此法者，一切皆得无生法忍。复有六十百千频婆罗菩萨摩訶萨，曾修此法，彼等皆悉于十地行得自然智。复有六十百千那由他频婆罗众生，曾于过去修四梵住及四无碍，彼等皆得月藏三昧自然成熟得八地智。复有八万四千比丘，得尽诸漏，心得解脱。如恒河沙数诸众生等未发无上菩提心者，皆于阿耨多罗三藐三菩提得不退转。

大方等大集月藏经卷第四

令魔得信乐品第六

尔时，有一帝释天王，名曰火光，与大众集在于会坐，白憍尸迦帝释言：“憍尸迦，此魔波旬，为当欲令住于闲林与第一义相应菩萨摩訶萨等得三昧故，勤作恼乱，为欲退彼三昧故也。”

时，憍尸迦答彼火光天帝释言：“是魔波旬，于四天下一切处中，令诸众生退失留难善朋党故，勤作恼乱；又令退失留难檀波罗蜜

乃至般若波罗蜜故，勤作恼乱；复令退失天人种故、三种菩提故，增长三恶道故，勤作恼乱。魔诸眷属亦复如是，为欲增长一切众生大苦海故，勤作恼乱。”

憍尸迦说是语已，于时一切诸来大众，皆以慈心瞻视魔王。有诸菩萨摩诃萨等，慈愍劝谏魔王波旬。是时，火光帝释复与一万帝释天众，悉共合掌向魔波旬作如是言：“大王，欢喜！欢喜！于三宝中应生信敬。”

是时，娑婆世界主大梵天王与六十亿百千梵众及四天王，慈心眼视魔王波旬亦作是言：“欢喜！欢喜！汝魔波旬，若于三宝不得信敬，未来长夜有大损失，无所利益堕诸恶道。”

是魔波旬，为彼一切诸来大众，各各皆以慈心眼视，及诸菩萨摩诃萨等，释天、梵天、护世四王劝谏之时，从座而起，合掌向佛，头面礼足，而说偈言：

“智者一向弃王位，以有烦恼嫉妒慢，
故令失坏胜善道，坠堕诸恶不善趣。
我以富贵狂因缘，于善导师多留难，
遮障众生诸善业，初不见佛起瞋心。
世尊一向常忍辱，慈悲怜愍诸众生，
等心一切已慢除，枯竭众生烦恼海。
唯佛烧尽烦恼薪，能示人天解脱道，
令亿众生度有海，我盲无智入闇冥。
我今启请诸大众，愿以慈愍助我等，
谢过如来住坚信，更不重起恼乱心。
我今一向护佛法，炽然光显正法眼，
自舍所有贪妒慢，忏悔无余诸罪业。
我今发大菩提心，及劝一切众生等，
自修精进满六度，置彼众生于八道。
我为一一众生故，显说无量诸法门，
随所能令入法城，如是勤劝一切众。
未曾见有如此会，悉能净信于三宝，
由我恶心被厌贱，故今舍之及众过。
从今永住净信心，愿后更不被厌贱，
心与圣德常相应，不复造作众恶业。”

尔时，魔王说此偈已，即向佛所到已礼拜，而说偈言：

“我于世尊作留难，愿以上忍见容恕，
救孤独者受我忏，大智慈仁不怀瞋。”

尔时，一切诸来大众咸同一音而白佛言：“婆伽婆，唯愿容恕魔

王波旬！魔今深信诚心忏悔，当持佛法炽然法眼，令世尊法久住于世，复使人天长夜当得利益安乐。”

尔时，世尊以偈答曰：

“忍为世间最， 忍是安乐道，
忍为离孤独， 贤圣所欣乐。
忍能显众生， 忍能作亲友，
忍增美名誉， 忍为世所爱。
忍得富自在， 忍能具端正，
忍能得威力， 忍照于世间。
忍得诸欲乐， 忍能成工巧，
忍力降伏怨， 及以除忧恼。
忍得好容色， 忍能具眷属，
忍招诸胜报， 忍能超善道。
忍得人乐观， 忍能得妙好，
忍能息诸苦， 忍得寿命长。
忍得大梵王， 忍得欲自在，
忍得天帝释， 轮王具神通。
忍得人中主， 忍力难降伏，
忍得龙夜叉， 修罗中自在。
忍能息诸怨， 不害于众生，
忍能离偷盗， 忍能舍淫欲。
忍能止妄语， 两舌绮恶言，
忍能除贪瞋， 及离邪见意。
忍力成施戒， 精进及禅那，
般若波罗蜜， 能满此六度。
忍能除诸惑， 忍得罗汉乐，
亦得辟支佛， 及住无生忍。
忍能具十地， 速得菩提道；
忍于诸众生， 得为无上胜；
忍能降众魔， 及伏诸外道；
忍能于世间， 转最无上轮；
忍令多众生， 枯竭三恶道；
忍断烦恼障， 及能净法眼；
忍授众生记， 三乘随所求；
忍能伏刚恶， 夜叉罗刹等；
忍与种种人， 授记最胜道；
忍已降诸怨， 亦能灭众恶；
忍能息一切， 非时暴风雨；
忍能作大集， 此诸所来众。

我怨汝波旬，于我诸犷戾，
但自谢己心，是我第一怨。
今于大众前，证知劝诫汝，
莫坏我所习，一切佛正法。”

尔时，一切诸来大众，天、人、阿修罗、乾闥婆等同声叹言：“善哉！善哉！婆伽婆，如来常于一切众生慈悲怜愍，以诸善法饶益安乐。魔王波旬，常于世尊起憎恶心、怨心、害心，与诸众生为恶知识，于诸善法常作留难令住不善。”

时，有梵天名曰威德，白不动大梵天王，而说偈曰：

“如空无边亦无等，一切众生所依住，
佛智如是不思议，于一切法到彼岸。
世尊有叹檀行处，怜愍一切众生故，
以檀得为功德士，速能满诸波罗蜜。
或有广说戒忍进，及以禅那般若等，
世尊于此一一中，具足能显于六度。
如来唯以禅定法，说能趣向菩提道，
是故常应乐住禅，速能证于大菩提。”

尔时，复有一切梵王、诸帝释王、诸余天王、诸龙王、诸夜叉王、诸阿修罗王、诸伽楼罗王、诸紧那罗王、诸乾闥婆王、诸摩睺罗伽王、诸罗刹王、诸鸠槃荼王、诸饿鬼王、诸毗舍遮王等，从座而起向魔波旬，合掌而礼作如是言：“大王敬信！敬信牟尼世尊！以此世尊解脱诸过，到于一切功德彼岸，慈悲怜愍诸众生等，施一切乐觉了诸法，舍诸流转住于彼岸。”又言：“大王，若有众生，乃至一念深信如来，敬仰尊重叹未曾有，以敬信故得作轮王，统四天下七宝具足，乃至得作帝释天王、欲自在主魔王波旬、娑婆界主大梵天王，何况常能具信三宝！是故大王，应舍魔见诸恶浊心具足净信，于生死流转富贵自在受诸果报，后成正觉能施众生一切安乐，得为世间无上福田。”

尔时，魔王复与诸臣顶礼佛足，专心敬信牟尼世尊，殷勤忏悔。
尔时，世尊以偈告曰：

“恶心奸慧汝当起，我常容忍天人证，
至心修行菩提道，汝当作佛无边慧。”

尔时，魔王极生净信，即持无价摩尼宝鬘，无价咽瓔珞、臂瓔珞、脚瓔珞及以指印，奉献世尊，合掌而礼作如是言：“我昔于佛多作留难，为欲破坏正法眼目，断三宝种，坏灭法炬。何以故？远离善法迷惑心故。今于三宝深得敬信，本昔所作一切业障今已忏悔，已发

阿耨多罗三藐三菩提心蒙得授记。唯愿世尊，哀受我等摩尼宝鬘、瓔珞指印。”尔时，世尊慈悲怜愍魔波旬故，即便受之。

尔时，魔王心生大喜作如是言：“若佛所有声闻弟子，比丘、比丘尼、优婆塞、优婆夷，若复余人，宴坐闲林与第一义相应住者，现在未来若魔、魔子、魔妇、魔女、魔诸左右男夫妇女，及依魔住所有众生，若天、天子、天妇、天女、天诸左右男夫妇女，若龙、龙子、龙妇、龙女、龙诸左右男夫妇女，乃至迦吒富单那若子、若妇、若女、若诸左右男夫妇女，扰乱衰害取其精气，气嘘其身散乱其心，若夺衣服、饮食、汤药，若教他夺，若夺其味，若以鼻嗅，若放臭气满其住处，若复见彼住于闲林比丘、比丘尼、优婆塞、优婆夷及余众生修第一义者，若不勤作供给供养衣服、饮食及以汤药，我当令彼若魔、魔子乃至迦吒富单那左右男女，得头病、眼病、耳病、腹病如是等病之所逼恼，退失神通不复能得飞空远逝，一切方所皆迷闇冥。”

魔王波旬作是语已，即说咒曰：

“菴摩差(叉戒切)曷啰摩差 菴摩摩啰差 莫叉鞞闍婆帝 莫叉苏兜帝 阿婆羯筏 阿婆坻 时那匙(上支切)那 摩伽娑婆犀 頔啰弃摩那底[口+梨] 浮闍跋啰坻泥 阿佉[口+樓]差 摩佉跋弥 陀罗阿鞞斯啰佉鞞 娑牟达罗佉鞞 毕[口+梨]剌毗 涅槃帝郁特迦涅槃帝 坻闍涅槃帝 婆耶婆涅槃帝 阿迦奢妹啰 涅槃帝 分示 那啰夜 拏佉婆涅文支 摩醯首婆啰 涅文支 阿娑遮婆 涅文支 萨兜婆 僧弃耶跋 柘涅文支 钵啰摩頔他 涅文支 钵啰伽拏 钵啰頔他 涅文支 多婆跋啰多 涅目多钵啰摩頔他 涅文支遯 苏婆呵。”

尔时，一切诸来大众，于中所有恶行恶心，于诸众生无慈悲者皆悉惊怖。魔王波旬复作是言：“若有违我此教令者，当得如上众病等恼。复次，世尊，我今摄护佛子声闻，伏诸恶行，不令现在及未来世作诸衰恼，能使世尊法眼久住，令三宝种不断于世。”

尔时，世尊复赞魔言：“善哉！善哉！如是波旬，汝于长夜具大功德，无复诸恶一切衰恼。”

尔时，一切诸来大众，诸天及人、乾闥婆等皆悉赞言：“善哉！善哉！魔王波旬，能于三宝深得净信。如是佛法长夜炽然，天人当得入无畏城，闭塞恶道，常开善趣解脱之门，于四天下所有斗争、疫病饥馑、非时风雨皆得休息，又令四天下常得安稳、丰乐可乐、多众盈满。”

尔时，魔王礼世尊足，右绕三匝退坐一面。

尔时，大众欲重明此义，以偈颂曰：

“魔心决定得欢喜， 忏悔如来及眷属，

真心踊跃作是语，慈悲人前舍诸恶。
犹如虚空无边际，佛智境界亦如是，
觉了无边诸法已，于世说法最第一。
或有说檀胜无等，以檀能得妙菩提；
或复有说尸罗忍，精进禅定及智慧。
如是种种方便说，示现无等大菩提，
天人修罗应当知，世尊降伏自在魔。
此经佛说忍为最，能得一切安隐乐，
忍能休息诸烦恼，能示胜妙解脱城。
卑心合掌咸向佛，忏悔已作诸恶业，
当发最胜菩提愿，我等必当作导师。
自然如来授记已，魔王速成等正觉，
及余百千众生等，亦与无上菩提记。
已满忍辱波罗蜜，速为无等大导师，
与诸善法作依止，护诸声闻故说咒。
若魔依魔诸神鬼，夜叉修罗富单那，
如有恼害佛子者，当以恶病著其身。
一切大众皆踊跃，欢喜咸作如是言，
以此业故法炽盛，则得久住于世间。
魔王安住净忍心，三宝水泉难枯竭，
当息世间一切浊，饥馑暴风及亢旱。
是故人天得诸乐，本所修习忍辱行，
乐檀尸罗忍方便，到进禅智大彼岸。”

尔时，世尊显说如是忍功德时，九百八十万诸天人等曾修忍者，一切悉得无生法忍；十频婆罗百千人得柔顺忍；亿那由他百千天人得须陀洹果；过于数量诸众生等得世正见；十频婆罗百千天人阿修罗、夜叉、罗刹，昔未曾发阿耨多罗三藐三菩提心者，悉得发心及不退转；百万众生得授阿耨多罗三藐三菩提记。

一切鬼神集会品第七

尔时，护世四大天王从座而起，合掌向佛，头面礼拜作如是言：“婆伽婆，此阎浮提种种国土，城邑村落、园林寺舍、山泽等处，所有诸恶天、龙、夜叉、罗刹、阿修罗、鸠槃荼、饿鬼、毗舍遮、富单那、迦吒富单那依彼住者，瞋恶穢戾，无惭无愧，于诸众生无有慈愍，常害他命及作恼乱。彼诸天龙乃至迦吒富单那等，于阎浮提非时数数起于亢旱、恶风雷雨、闇[目+壹]灰尘、严寒毒热，以是灾害坏诸苗稼、五谷华果、蒲萄甘蔗、劫贝等物，故令众生多有种种

饥馑疫病、爱别离苦众恼逼切，各各迭相怖惧斗战心常恐惧。诸王刹利于己眷属五欲众具不生喜乐，于己国土触恼一切沙门、婆罗门、毗舍、首陀、男夫妇女、童男童女，亦复触恼象、马、牛、羊、师子、虎、豹、豺狼、狗犬，一切禽兽皆令触恼。于诸众生种种因缘而逼恼之，昼夜杀害烧煮割截，五谷财帛、所欲供具、身心乐事及诸善行皆悉损减。以是因缘令人天等善趣减少，又令阎浮提善事灭故不可爱乐，我等一切不能遮护！

“今此世尊大集之处，一切大士菩萨摩诃萨、诸声闻众皆悉云集，一切天王及与眷属，一切龙王、阿修罗王乃至一切毗舍遮王，悉与眷属皆来集会。世尊，彼等于此阎浮提一切国土城邑、村落山谷、寺舍园林之处，唯愿世尊，分张付嘱天、龙、夜叉、罗刹、阿修罗、鸠槃荼、饿鬼、毗舍遮等，各令护持。若彼天龙乃至毗舍遮，于阎浮提作于一切斗争触恼、非时风雨、疫病饥馑、寒热等事，各各随分而遮护之。若于阎浮提所有斗争触恼、疫病饥馑、非时风雨、寒热等事皆悉休息，令阎浮提所有华果药草、劫贝财帛、五谷、甘蔗蒲萄及酪蜜等皆得成熟，所有苗稼不令衰坏，于阎浮提诸处人中及獐鹿鸟兽，随其所欲皆无乏少。以无乏故，令彼众生修诸善行，修正法行，修真实行，勤修而住，令彼诸善增长不退。以是因缘，此阎浮提安隐丰盛，人多盈满甚可爱乐，世尊正法则得久住，一切人天所愿满足，众生悉得趣向善道及涅槃道，离三恶趣，令三宝种得不断绝。”

尔时，四天王欲重明此义，以偈颂曰：

“于此阎浮提， 所有诸国土，
恶天龙夜叉， 罗刹鸠槃荼，
饿鬼毗舍遮， 迦吒富单那，
瞋恶无恩养， 无慈于众生。
彼等无惭愧， 触恼诸刹利，
沙门婆罗门， 毗舍及首陀。
师子象虎豹， 非时恶风雨，
疫病及饥馑， 能令众生苦。
彼等害众生， 毁坏于世间，
残害诸苗稼， 及灭正法灯。
我等四天王， 不能遮此恶！
愿佛当分布， 国土城邑等，
付嘱龙夜叉， 罗刹鸠槃荼。
令彼各遮护， 非时恶风雨，
息诸怖畏恼， 令无病饥馑。
华果药苗稼， 充足众美味，
众生不乏少， 所用诸供具。
一切善法增， 令得可乐事，

佛法得久住， 众生趣善道，
三宝种不绝。 愿佛常哀愍，
大地具众美， 离诸苦辛味，
华果皆具足， 种种味充满，
泉池陂河等， 净水常充满，
于诸苗稼等， 不能夺精气。
彼所进饮食， 心软无粗穢，
慈念常相向， 流转净无垢，
舍家众事业， 住于阿兰若，
勤修菩提行， 令多众生信，
法朋得增益， 令魔众损减，
四天下丰乐， 诸处人充满。”

尔时，世尊问四天王、释提桓因、娑婆世界主大梵等言：“诸天王辈，若见若闻此贤劫初拘留孙佛及拘那含牟尼佛、迦叶佛等出现世时，云何以此阎浮提中所有天、龙、夜叉、鸠槃荼等分张付嘱，为如我今菩提树下初成正觉，以此一切阎浮提中天、龙、夜叉、鸠槃荼等分张付嘱安置不也？”

如是问已，四大天王、释提桓因、娑婆世界主大梵王等白佛言：“大德婆伽婆，我等见闻此贤劫初拘留孙佛菩提树下初成正觉，以此阎浮提天、龙、夜叉、鸠槃荼等分张付嘱，如今世尊菩提树下初成正觉，以此阎浮提天、龙、夜叉、鸠槃荼等分张付嘱，等无有异。彼拘留孙佛出现世时，众生寿命四万岁，彼时大地精气、众生精气、法精气等力得增上，味增上、威增上、德增上、慈增上、胜增上、智增上，如是等事皆得增上。尔时，依地果味众华药等众生食者，皆得软心、慈心、悲心、喜心、舍心、施心、戒心、忍心、精进心、禅定心、智慧心，离杀生心乃至离邪见心，少欲知足少烦恼垢，多福长寿离欲闲居，爱乐正法厌患流转炽三宝种，以是因缘得离恶道趣向善道。尔时，诸天乃至迦吒富单那，一切禽兽悉得具足如是等事。次后众生名寿损减，名寿损减故福德损减，福德损减故地味精气损减，地味精气损减故众生精气损减，众生精气损减故众生心法作善惭愧损减，众生心法作善惭愧损减故正法甘露精气损减。彼诸众生名寿损减，乃至正法甘露精气损减故，广作杀生乃至邪见，乃至禽兽亦复如是。如是众生远离善道及涅槃道趣向恶道，彼命终已生恶道中。若彼众生生于夜叉乃至迦吒富单那中者，瞋恶无慈，不视后世可怖畏事，广作杀生乃至邪见。彼等众生于阎浮提，未得入于付嘱护持分中。如是拘那含牟尼佛、迦叶佛，于菩提树下初成正觉，以此阎浮提天、龙、夜叉、鸠槃荼等分张付嘱，如今世尊于道树下初成正觉，以此阎浮提天、龙、夜叉、鸠槃荼等分张付嘱，等无有异。如是白法渐减，黑法增长，从是已来无量那由他百千恶龙、夜叉乃至迦吒富单那生长

番息，常瞋穢恶不怀惭愧，于诸众生无有慈心，不观后世可怖畏事，残害他命食其血肉，彼等不入分布分中无定住处。此恶龙等不守护人乃至畜生，常欲夺人精气断他命根，灭坏国土城邑、村落寺舍等处，能令诸王瞋恼，乃至能令畜生等恼，又复能令非时风雨、严寒毒热，坏灭一切华实苗稼。如是恶龙乃至迦吒富单那等不受我教，我于彼等不得自在，是故于今五浊极恶白法损减。如来出世，一切众生于慈导师得生敬信尊重爱乐，佛所发言称机利益，具足功德智慧之聚得成大悲，六波罗蜜相应究竟所愿得满，获六神通于法自在，覆护摄受一切众生，能与众生一切善道及涅槃乐。今者于此本未曾有，昔来未闻如是大集，一切天王及与眷属皆来集会，一切龙王乃至日王、夜叉王、罗刹王、阿修罗王、乾闥婆王、紧那罗王、伽楼罗王、摩睺罗伽王、鸠槃荼王、饿鬼王、毗舍遮王，悉与眷属皆来集此。所未来者今愿世尊，以神通力尽皆摄之。若有诸恶鬼神无所系属，不受他教，瞋恶粗犷无有慈愍，不观后世可怖畏事，残害他命饮血食肉，所不来者，唯愿世尊当复慈愍，以神通力命彼鬼神及其眷属皆来至此，使得分布入他分中，不令数数恼乱众生。以此方便令四天下大地余味而不速灭，精气安住不复损减；以地精气不损减故，众生精气不损减；众生精气不损减故，正法甘露精气住不损减；正法甘露精气不损减故，众生心法作善平等增长，以是因缘令三宝种得不断绝。如是，如是，法眼久住，闭三恶道，开于善趣及涅槃门。如是，如是，白法增长，黑法损减。如是，如是，天人增长，无量天人悉得充足涅槃快乐。”

四天王等说是语时，世尊观察默然不言。尔时，娑婆世界主大梵天王、憍尸迦及诸释天、四大天王，皆共合掌告诸大众：“我等咸白一切菩萨摩訶萨、一切声闻，一切天、龙、夜叉、罗刹、乾闥婆、阿修罗、紧那罗、伽楼罗、摩睺罗伽、饿鬼、毗舍遮、富单那等一切大众，愿悉劝请如来法尊！当使世尊令诸天众悉集于此，一切龙众乃至一切迦吒富单那等亦悉来集。彼等于阎浮提所有国土城邑村落、寺舍园林、山谷旷野、河井泉池，如是等处游止住者分张付嘱，令彼一切诸善天龙乃至一切迦吒富单那分取安置，各自当分平等守护，不令纵舍不令生恼，各各教彼同行其法，常作善念折伏恶心；复令各各护持自分，而不纵舍不恼于他。彼若各各当分平等作护持者，名称流布，得大勇猛，获大福报。”

尔时，一切菩萨摩訶萨、一切声闻，一切天、龙、夜叉、罗刹、阿修罗、伽楼罗、紧那罗、乾闥婆、摩睺罗伽、鸠槃荼、饿鬼、毗舍遮、富单那、迦吒富单那，乃至一切诸来大众，欢喜踊跃从座而起，合掌向佛，一时同声作如是言：“我等劝请如来应供正遍知，愍我等故，利众生故，得大悲心，一切诸天乃至迦吒富单那悉令集此。彼等于此阎浮提中城邑村落乃至依止泉池住者，分张付嘱，令彼天龙乃至迦吒富单那分取安置。若彼诸天乃至迦吒富单那等各舍己分，犹作恼害不遮恼他，应当治罚而折伏之。愿佛发勇作大佛事，一切尽皆分张

安置。”

尔时，世尊说偈答曰：

“于此佛法中， 无有恼他义，
度于苦彼岸， 诸处心平等。
诸法无有二， 导师舍憎爱，
一道如虚空， 此是佛境界。
若有有为心， 思惟去来事，
彼以法非法， 能摄鬼神来。”

尔时，复有一大梵天名曰正辩，住第十地圣无上圣，以诸菩萨功德庄严在会而坐。此正辩天白诸天王，一切龙王、一切阿修罗王乃至一切迦吒富单那王，作如是言：“汝等如是，今从如来得闻是义。如佛世尊，若行若住若坐若卧不恼众生，汝等今悉一时同声发愿希求应当说言：‘所有非人，一切天龙鬼神所摄，常食精气，恼害于他食肉饮血者，彼等一切，愿护世四王力势折伏。所有化生、湿生、胎生、卵生，如是随其所有诸龙、夜叉、罗刹、阿修罗、伽楼罗、乾闥婆、紧那罗、摩睺罗伽、鸠槃荼、饿鬼、毗舍遮、富单那、迦吒富单那一切等类四生所依，彼等悉为四大天王力所摄伏。愿四大王摄彼一切所不来者悉至于此！’”

尔时，一切天王乃至迦吒富单那王作是愿言：“除三十三天已下所有四天王天及诸龙众，乃至迦吒富单那四生所依一切无余，悉愿依于四大天王，彼等四王力所摄伏。若有诸天乃至迦吒富单那等，于四天王如有违反一一王力不受教敕，即当为彼炽然铁轮截其耳鼻。若截耳鼻犹故违者，复令铁轮截彼手足。若截手足犹故违者，复斩其首。若有乃至违四天王教敕之者，必令如是。”

尔时，毗沙门天王，即以炽然焰赫铁轮，向于北方而遥掷之，即说咒曰：

“多地夜他 穷穷尼逻穷(其凤切) 叉婆穷 伽佉伽伽泥 迦佉阍罗厕 苏婆诃。”

尔时，毗楼博叉天王，亦以炽然焰赫铁轮，向于西方而遥掷之，复说咒曰：

“多地夜他 尸梨器 尸罗器 伽伽那 尸梨器 叉尸罗器底 阍利 苏婆诃。”

尔时，毗楼勒叉天王，亦以炽然焰赫铁轮，向于南方而遥掷之，即说咒曰：

“多地夜他 阁逻鼻唎师 阁啰鼻唎师 悉多婆 阁啰鼻唎师
达罗尼 阁逻阁啰 鼻唎师 苏婆诃。”

尔时，提头赖吒天王，亦以炽然焰赫铁轮，向于东方而遥掷之，
即说咒曰：

“多地夜他 阿那易(七利切)阿那阿那耶 阿那浮毗 阿迦奢浮
毗 摩系 都易 苏婆诃。”

尔时，四方诸天乃至迦吒富单那，及诸大小树林药草神等，遥见
铁轮炽然焰赫，悉大惊惧，愁忧不乐，恐命不存，观十方已各作念
言：“谁当有能救于我等，为归为趣施我等命？”即便观见大悲世尊，
如实利益诸众生者，佉罗帝山牟尼诸仙所依住处，大众悉集围绕而
坐。“唯彼当能救我等命！”即往佛所疾如电光，到佛前住。如是十方
所有诸天乃至迦吒富单那等，皆往佛所，到已而住。

尔时，世尊欲重明此义，而说偈言：

“时我两足尊， 问释梵四王：
‘为见为闻彼， 过去诸导师，
分布四天下， 为令天等护，
可不如我今， 道树下分布？’
天王答我言：‘如是昔诸佛，
坐于道树下， 分与夜叉等，
后因过及时， 转生诸杂恶，
鸠槃龙夜叉， 罗刹鬼单那，
穢恶无慈愍， 常食他肉血。
彼恼于诸国， 及恼四姓人，
非时作风雨， 及以寒热等，
饥馑病斗争， 灭坏大地味，
无慈于一切， 恼害多众生。
莫能遮护者， 不伏于我等！
是以地精气， 众生精气没；
正法妙精气， 难得者日损。
时过因缘故， 天人等损减，
增长诸恶世， 法朋难可得。
法不久住世， 灭坏正法灯，
断绝三宝种， 世间当盲冥。
今佛大勇猛， 于白法尽时，
出现阎浮提， 大悲众生药，
中言具六通， 究了诸法岸，
利益众生故， 作此大集会，

一切天龙王，护世等来集。
诸鬼恶无慈，恒食他血肉，
龙鬼富单那，彼等不来此，
无所受教令，不依属他分，
一切受佛语，令彼皆来集。
愿分于彼等，各令有所嘱，
不令更恼害，夺他精气等。
三种精气住，令人修法行，
白法得增长，黑法得消灭。
以是恶道息，天人得增益，
解脱门得开，三宝种炽然，
福流诸众生，速能得解脱！’
于时我默然，不随于彼等，
梵王诸帝释，四大护世王，
俱白一切众：‘所来在会者，
劝请天人师，摄诸鬼来此，
分张付嘱彼，城邑诸村落，
昼夜常护持，各令住自分。’
菩萨等大众，从座起合掌，
劝请大导师，摄诸鬼来此，
一切分作分，护持阎浮提，
勿恼于众生，发勇人中上。
我不恼乱他，远离去来事，
了知法无二，离诸众生想。
正辩大梵王，告诸天王言：
‘导师不恼他，佛法无此事，
悉共发愿言，令鬼不为害，
分布各依止，彼四天王等。’
诸王作是言：‘我今依汝语，
誓敕于彼等，悉令得作分，
若彼不依教，速为轮所烧。’
于时四天王，使轮向四方，
乃至一时顷，尽皆到佛所，
顶礼世尊足，合掌于彼住。”

大方等大集月藏经卷第五

诸恶鬼神得敬信品第八上

尔时，护世四大天王，见无量阿僧祇天、龙、夜叉乃至迦吒富单

那等，种种色、种种形、种种欲、种种行、种种性。彼等于诸众生性无慈愍，瞋恶粗穢，不观后世畏，不入他分无所护持，数恼刹利乃至畜生，夺其精气，食其血肉。是诸鬼神俱来集已，时四天王欢喜踊跃，各自问其所领大将。

毗沙门天王问散脂夜叉大将言：“此四天下所有夜叉，若卵生、胎生、湿生、化生，或依城邑聚落、舍宅塔寺、园林山谷、河井泉池、埵间树下、旷野田中、闲林空舍、大海宝洲，若地行、水行、空行一切无余，今悉来集世尊所不？”

散脂大将言：“大王，此四天下所有夜叉，乃至大海宝洲，若地行、水行、空行一切无余，今悉来集在世尊所。”

提头赖吒天王问乐欲乾闥婆大将言：“此四天下所有乾闥婆……”余如上说。

毗楼勒叉天王问檀帝鸠槃荼大将言：“此四天下所有鸠槃荼……”余如上说。

毗楼博叉天王问善现龙王言：“此四天下所有诸龙、摩睺罗伽、伽楼罗、诸饿鬼等，若卵生、胎生、湿生、化生，若依城邑聚落舍宅乃至大海宝洲，若地行、水行、空行一切无余，今悉来集世尊所不？”

善现龙王言：“大王，此四天下所有诸龙乃至饿鬼一切无余，今悉来集在世尊前。”

尔时，四大天王、释提桓因、娑婆世界主大梵天王、正辩梵天，合掌向佛一心敬礼而作是言：“大德婆伽婆，此四天下所有天、龙、乾闥婆、紧那罗、夜叉、罗刹、鸠槃荼、毗舍遮、摩睺罗伽、伽楼罗、诸饿鬼等，若卵生、胎生、湿生、化生，若地行、水行、空行一切无余，今悉来集在世尊所。我等受诸大智人语劝请如来，唯愿世尊，哀愍我等诸众生故，令恶众生得敬信故，为正法眼得久住故，绍三宝种不断绝故，令地精气、众生精气、正法精气久住增长故，又令善道及涅槃道、八真圣道常不灭坏及增长故。世尊，此阎浮提所有城邑聚落舍宅乃至宝洲一切无余，天、龙、夜叉乃至迦吒富单那等，随其所宜分布付嘱，令护持故。今此大集一切天王，一切龙王乃至毗舍遮王，各将眷属皆悉来集。以彼一切付嘱是等，令其教授忆念摄受同行其法。令彼诸天乃至迦吒富单那等，各于己分护持养育，勿自纵舍亦莫恼他，见恼他者令其遮护不得纵舍。令彼各于己分，发大勇力正护养育。若彼发大勇力应生欢喜，彼则喜乐，名称流布，获大福报。”

尔时，世尊受其劝请，慈悲怜愍彼等众故，遍观一切诸来大众，即举右臂而作是言：“汝等贤首一切大众，各各谛听！我当解说。佛出世难如优昙华，离八难难如顺时香树，闻正法难如雨阎浮檀金，遇戒定僧为供养难如诣大海宝洲，于三宝所得净信难如求如意珠，值遇三宝为布施难如求功德天贤瓶，受持戒难如牛头旃檀洲难可得到，于

众生所起悲愍难如值勇健怨贼执金刚杵难得脱免，谨慎知足难如善作马祀（梵语阿湿婆迷陀耶若，此云马宝柱，祀为此祀者，唯阎浮提王之所能也）。

“诸贤首，有十种平等，若有众生具此平等，于流转时恒受胜报，速能得入无畏大城。何等为十？一者、众生平等，二者、法平等，三者、清净平等，四者、布施平等，五者、戒平等，六者、忍平等，七者、精进平等，八者、禅平等，九者、智平等，十者、一切法清净平等。

“诸仁者，于彼何者众生平等？众生者，谓三界所有一切众生。若有众生自爱己身，欲得活命求乐离苦，应如是学。若有丈夫寿者作业，若善不善，自作教他，现见受报。是故诸仁者，若求乐离苦，彼应如是，若身口意作诸善业不作恶业，若此身、若后身自益益他，自善善他不作恶业。诸仁者，是名众生平等。

“诸仁者，于彼何者法平等？法者，若有众生求乐离苦，欣生畏死，恩爱别离，怨憎会，如此之人心海所溺。何以故？若有众生，计著我者生死流转，不见清净解脱道故。是故于法平等思惟观察，不离众生有法，不依法有众生，如众生体性即是我体性，如我体性即是一切法体性，如一切法体性即是佛法体性。如是观诸法平等时，众生即阴不可得，离阴不可得，和合不可得，离和合亦不可得，非法非非法。是人如是得住无相，是名法平等。

“诸仁者，于彼何者清净平等？谓得人身具满十德。何等为十？一者、离下贱家；二者、不钝；三者、不哑；四者、诸根不缺；五者、得男子身；六者、容颜端正；七者、得好眷属；八者、不贫；九者、不为他欺，发言有中；十者、多人瞻仰。何以故？言得人身名清净平等。如得人身故，得三律仪离三恶道，能求三乘三种菩提随所而得。云何清净平等？若人能得菩提，于一切法心无所依，于一切内外境界心无所依。是人于一切法，于如如无所取，见一切法不取内心、不取外心，于二境界极得寂定。是人如是正见清净法时，不见内外有众生、命者、寿者、生者、人者、众数、养育、作者、使作者、起者、使起者、受者、使受者、知者、见者。是人如是于诸众生得见无我清净平等，无众生、无命、无我，离欲清净不起边见，如是得入众生清净平等，如是得入一切法空，无行智印无相无愿，如是得入众生清净平等。是人以彼法成熟众生，而不坏我，亦不坏事及不坏财。若知一切众生体性平等，则知一切法体性；若一切法体性即是佛法体性，是名一切法平等佛法，是名清净平等。

“诸仁者，于彼何者布施清净平等？诸仁者，以四种布施清净平等，以布施故，众生于流转时恒受胜报，速能得入无畏大城。何等为四？一者、于一切众生起怜愍心，二者、平等心，三者、大慈心，四者、大悲心。此为四种布施清净平等，众生于流转时恒受胜报，速能得入无畏大城。

“诸仁者，于彼何者于一切众生起怜悯心清净平等？若有众生求乐离苦，恩爱别离，怨憎不会，欲得长寿、利养、名称、富贵、五欲，应如是学：‘如我爱欲，喜重自己身命无有厌足，以一切方便无上护持无有价量；如是于一切众生，一一众生乃至虫蚁，爱欲喜重自己身命无有厌足，以一切方便无上护持无有价量。我何故于他众生于他寿者，作恼作害，夺活命具，离其命根，坏其命根？若我于他众生于他寿者生恼离命，以离一一命故，我当亿百千世于世世中还彼离命受诸苦恼。我从今日于诸众生，起父母想及男女想，乃至虫蚁亦作父母及男女想，更不恼害他命，亦不夺他活命之具，不离坏命，亦不教他夺其精气及断命根。如是我当亿那由他千百劫流转生死于世世中受身命时，无能恼害夺活命具及离坏命者。何以故？一切众生，无有非我父母兄弟男女等者，如是我于一切众生无有非其父母兄弟男女等者。以是因缘，我曾与一切众生亲，一切众生曾与我亲，我若于亲而生恼者，是所不应。所谓恼者，我若触恼刹利，令彼刹利于己境界国土人民，于诸所欲不生知足；及婆罗门乃至畜生，触恼其心令不知足，以是因缘共相战斗诤论、讥毁诉讼、谄诳妄语、互相支解及断命根。是故我今于诸众生休息触恼及断命根，我以此布施清净平等因缘故，于流转时无能触恼共我斗战诤论、讥毁诉讼、谄诳妄语、支解断命。’是名触恼。”

“于彼何者害命？彼应如是学：‘一切众生与我亲，我与一切众生亲。我若害众生命是所不应，我若作非时风雨、亢旱灾雹、雨尘闇暍、枯涸诸水、损减华果药草众味，以是因缘众生饥渴，四大增动生种种病，因其病故而取命终。是故我于一切众生休息害命，以休息故，地味精气不复隐没，以是因缘令诸众生离于饥渴，四大不动，诸病不生，不因于彼而取命终。我以此布施清净平等，乃至流转时，我更不受饥渴病苦。’是名害命。”

“于彼何者活命之具？彼所资身命者，应如是学：‘一切众生与我亲，我与一切众生亲。我若于彼夺活命具，是所不应。若夺众生华果药草、五谷精气活命具者，令彼众生食恶华果药草、五谷众味精气，令其身心损瘦无力，失念瞋恶、轻躁粗横，恶色多病。是故我当随顺过去诸天仙教，于一一华果众味精气六十四分中，取一分精气以活身命，余六十三分留活众生令受安乐。我今以是知足因缘，乃至流转时，我更不食无味精气残害之食，具大威力，强记软心，好色无病。’是名活命之具。”

“于彼何者离别命？若以恶心视诸众生，气噓其身散乱其心，于彼节节夺其精气，夺精气故令其身心为苦所恼。应如是学：‘我与一切众生亲，乃至是所不应。我若于亲恶心视之，气噓其身散乱其心，于身支节夺其精气，故令我亲身心得苦。以是因缘乃至流转时，无有非人恶心视我，亦不气噓我身散乱我心，不夺精气。’是名离别命。”

“于彼何者坏命？若诸众生为自食故，割截支节尽夺精气，山木

高处深水大河推令堕落，若与毒药使起尸鬼，若作厌蛊及余物害，若断饮食，或斩其首以断命根。以是因缘，汝等若自爱己欲得长寿、求乐离苦、名称富贵及求解脱，应如是学：‘我与一切众生亲，一切众生与我亲。若我为自食故，夺其精气、割截支节乃至斩首，是所不应。以此因缘乃至流转时，无能斩首坏我命者。’是名坏命。

“此是清净平等！诸仁者，若复怜愍一切诸众生故，为之积集功德智慧，断除一切虚诳幻见，得坚固勇猛求一切善如说修行，为命因缘于他众生不起恶念，于诸众生不起害心，所持禁戒与众生共，见众生乐深生欢喜，于己乐缘自能知足，一切爱事无不能舍，于一切法无吝惜心，常怖三界于诸忍事力能堪受，信无常相能如说行，于己有失能自观察，见他有所失则生悲愍，于诸善法无有厌足，常发露忏悔，得无边回向能求深法，于诸众生作福田心，求厌离智于三界狱流转烦恼能得怖畏，勤息众生一切苦恼，能求一切佛法，能发休息诸恶道心，于一切法善得安住。诸仁者，是名世间清净平等。

“诸仁者，我今当说第一义清净平等。”作是说已，即说咒曰：

“多地也他 夜咩夜咩 钵罗佉夜咩 优钵罗佉夜咩 夜寐 耶夜咩 佉夜夜咩 苏婆诃。”

说此法门时，八百六十万紧那罗、乾闥婆等，远尘离垢得法眼净。

尔时，世尊复说咒曰：

“多地也他 瞿竭[口+梨] 瞿竭[口+梨] 夜婆瞿竭[口+梨] 忧婆夜婆 瞿竭[口+梨] 苏婆诃。”

尔时，世尊复说咒曰：

“多地也他 陀娑 陀罗娑 陀罗陀娑 忧跋陀罗 陀罗娑 罗婆诃。”

说此法门时，九百四十万夜叉，远离尘垢得法眼净。

尔时，世尊复说咒曰：

“多地也他 阿闍泥 叉叉阿闍泥 伽叉叉 阿闍泥 毛罗阿闍泥 叉差 苏婆诃。”

说此法门时，七千万龙，于远尘离垢法而得三昧。

尔时，世尊复说咒曰：

“多地也他 诃诃诃诃诃诃 系打婆 诃诃诃 若若若 诃诃

诃 苏婆诃。”

说此法门时，三百万那由他阿修罗，得不忘菩提心三昧。
尔时，世尊复说咒曰：

“多地也他 阿奴那 阿奴那 阿婆那奴那 阿婆夜[口+梨] 阿婆那奴那 苏婆诃。”

说此法门时，八万四千频婆罗、鸠槃荼，得喜乐三昧。
尔时，世尊复说咒曰：

“多地也他 陀伽陀阇 阿婆陀伽陀阇 阿婆陀 伽陀阇阇 捷陀捷陀阇 苏婆诃。”

说此法门时，七十万那由他饿鬼、毗舍遮、富单那、迦吒富单那，得电王三昧，过诸数量天、龙、夜叉乃至迦吒富单那等昔未曾发无上菩提心者，皆悉发心。

“诸仁者，是名第一义布施清净平等。

“诸仁者，于彼何者戒清净平等？若一切世间、若出世间，善道及涅槃乐，戒为根本，能安住声闻、辟支佛地，能安住阿耨多罗三藐三菩提智。此戒清净平等，所谓十善业道，休息杀生、偷盗、邪淫、妄语、两舌、恶口、绮语、贪瞋、邪见。

“诸仁者，休息杀生获十种功德。何等为十？一者、于诸众生得无所畏，二者、于诸众生得大慈心，三者、断恶习气，四者、少诸烦恼为事决断，五者、得寿命长，六者、为非人护持，七者、寤寐安隐无诸恶梦，八者、无诸怨仇，九者、不畏恶道，十者、身坏命终得生善道。诸仁者，是名休息杀生得十种功德。若能以此休息杀生善根回向阿耨多罗三藐三菩提，是人不久证无上智。彼人到菩提时，于彼国土离诸害杀，长寿众生来生其国。

“休息偷盗获十种功德。何等为十？一者、具大果报为事决断，二者、所有财物不共他有，三者、不共五家，四者、众人爱敬无有厌足，五者、游行诸方无有留难，六者、行来无畏，七者、以乐布施，八者、不求财宝自然速得，九者、得财不散，十者、身坏命终得生善道。诸仁者，是名休息偷盗得十种功德。若能以此休息偷盗善根回向阿耨多罗三藐三菩提，是人不久得无上智。彼人到菩提时，于彼国土具足种种华果树林、衣服、瓔珞庄严之具，珍奇宝物无不充满。

“休息邪淫获十种功德。何等为十？一者、得诸根律仪为事决断，二者、得住离欲清净，三者、不恼于他，四者、众人喜乐，五者、众人乐观，六者、能发精进，七者、见生死过，八者、常乐布施，九者、常乐求法，十者、身坏命终得生善道。诸仁者，是名休息邪淫得十种功德。若能以是休息邪淫善根回向阿耨多罗三藐三菩提，

是人不久得无上智。彼人到菩提时，于彼国土无有生臭，亦无女根，不行淫欲，皆悉化生。

“休息妄语获十种功德。何等为十？一者、众人保任所言皆信，二者、于一切处乃至诸天发言得中，三者、口出香气如优钵罗华，四者、于人天中独作证明，五者、众人爱敬离诸疑惑，六者、常出实语，七者、心意清静，八者、常无谄语言必应机，九者、常多欢喜，十者、身坏命终得生善道。诸仁者，是名休息妄语得十种功德。若能以此休息妄语善根回向阿耨多罗三藐三菩提，是人不久得无上智。彼人到菩提时，于彼国土无有生臭，众妙宝香常满其国。

“休息两舌获十种功德。何等为十？一者、身不可坏平等，二者、眷属不可坏平等，三者、善友不坏平等，四者、信不坏平等，五者、法不坏平等，六者、威仪不坏平等，七者、奢摩他不坏平等，八者、三昧不坏平等，九者、忍不坏平等，十者、身坏命终得生善道。诸仁者，是名休息两舌得十种功德。若能以此休息两舌善根回向阿耨多罗三藐三菩提，是人不久得无上智。彼人到菩提时，于彼国土所有眷属，一切魔怨及他朋党所不能坏。

“休息恶口获十种功德。何等为十？一者、得柔软语，二者、捷利语，三者、合理语，四者、美润语，五者、言必得中，六者、直语，七者、无畏语，八者、不敢轻陵语，九者、法语清辩，十者、身坏命终得生善道。诸仁者，是名休息恶口得十种功德。若能以此休息恶口善根回向阿耨多罗三藐三菩提，是人不久得无上智。彼人到菩提时，于彼国土法声充遍，离诸恶语。

“休息绮语获十种功德。何等为十？一者、天人爱敬，二者、明人随喜，三者、常乐实事，四者、不为明人所嫌共住不离，五者、闻言能领，六者、常得尊重爱敬，七者、常得爱乐阿兰若处，八者、爱乐贤圣默然，九者、远离恶人亲近贤圣，十者、身坏命终得生善道。诸仁者，是名休息绮语得十种功德。若能以此休息绮语善根回向阿耨多罗三藐三菩提，是人不久得无上智。彼人得菩提时，于彼国土端正众生来生其国，强记不忘乐住离欲。

“休息贪欲获十种功德。何等为十？一者、身根不缺，二者、口业清静，三者、意不散乱，四者、得胜果报，五者、得大富贵，六者、众人乐观，七者、所得果报眷属不可破坏，八者、常与明人相会，九者、不离法声，十者、身坏命终得生善道。诸仁者，是名休息贪欲得十种功德。若能以此休息贪欲善根回向阿耨多罗三藐三菩提，是人不久得无上智。彼人得菩提时，于彼国土离于魔怨及诸外道。

“休息瞋恚获十种功德。何等为十？一者、离一切瞋，二者、乐不积财，三者、众圣喜乐，四者、常与贤圣相会，五者、得利益事，六者、面容端正，七者、见众生乐则生欢喜，八者、得于三昧，九者、得身口意光泽调柔，十者、身坏命终得生善道。诸仁者，是名休息瞋恚得十种功德。若能以此休息瞋恚善根回向阿耨多罗三藐三菩

提，是人不久得无上智。彼人得菩提时，于彼国土所有众生悉得三昧，来生其国心极清净。

“休息邪见获十种功德。何等为十？一者、心性柔善，朋侣贤良；二者、信有业报，乃至夺命不起诸恶；三者、敬信三宝，设为活命不信天神；四者、得于正见，不怪异事，亦不简择良日吉时；五者、常生人天离诸恶道；六者、常乐福德，明人赞誉；七者、弃俗礼仪常求圣道；八者、离断常见入因缘法；九者、常与正趣正发心人共相相遇；十者、身坏命终得生善道。诸仁者，是名休息邪见得十种功德。若能以此休息邪见善根回向阿耨多罗三藐三菩提，是人速满六波罗蜜，于善净佛土而成正觉。得菩提已于彼佛土，功德智慧一切善根庄严众生来生其国，不信天神，离恶道畏，于彼命终还生善道。

“诸仁者，于彼行布施清净平等时，于戒休息杀生修平等行，具大清净平等果报，得于长寿离诸怖畏。彼行布施清净平等时，于戒休息偷盗修平等行，具大清净平等果报，不共他有，修一切善无有留难。彼行布施清净平等时，于戒休息邪淫修平等行，具大清净平等果报，修习善根无有留难，无邪淫念观自他妇。彼行布施清净平等时，于戒休息妄语修平等行，具大清净平等果报，不被毁谤，发心坚固如说修行，于天人中独作证明，口出香气如优钵罗华。彼行布施清净平等时，于戒休息两舌修平等行，具大清净平等果报，得不坏眷属、丈夫眷属、敬信眷属。彼行布施清净平等时，于戒休息恶口修平等行，得微妙音不闻恶声。彼行布施清净平等时，于戒休息绮语修平等行，具大清净平等果报，发言得中断一切疑，众生乐见。彼行布施清净平等时，于戒休息贪欲修平等行，具大清净平等果报，受果报已还复能舍，受解脱果具大势力。彼行布施清净平等时，于戒休息瞋恚修平等行，具大清净平等果报，容颜端正众人爱敬，为事无碍诸根不缺。彼行布施清净平等时，于戒休息邪见修平等行，具大清净平等果报，正见国土正见家生，常值诸佛、菩萨、声闻，见佛闻法，供养众僧，修菩提行，常不舍离清净平等。

“诸仁者，此是戒清净平等。以是戒清净平等自庄严者，是人不久成佛功德，具足相好音声清净，降诸魔怨得清净平等。是人不久得一切佛法、禅念慧行、清净大智、大慈大悲，乃至能满一切佛法清净平等。是名世间戒行清净平等处。

“诸仁者，于彼何者出世间戒行清净平等处？若于戒三摩跋提信解行者，不依色阴持戒，不依受想行识阴持戒，不依眼、不依色、不依眼识、不依眼触、不依眼触因缘生受爱取有生持戒，乃至不依意、不依法、不依意识、不依意触、不依意触因缘生受爱取有生持戒，不依地界持戒，不依水火风界持戒，不依无边虚空入持戒，乃至不依非想非非想入持戒，不依欲界、色界持戒，不依现世、后世持戒，不依声闻乘、辟支佛乘、一切种智持戒，不依闻、不依禅、不依智持戒，不依听力、不依三昧力、不依陀罗尼力、不依忍力、不依有漏力不依

无漏力、不依有为界力不依无为界力、不依善不善力、不依明闇力持戒。诸仁者，是名出世间戒清净平等处，是名修戒梵路圣道，能入无上无畏大城，众圣所依戒清净平等；以护第一义清净戒故，能入净智。戒者是何义？譬如大铁围山间热恼之风，以山障故不令得至四天下；如是学圣清净平等戒，爱热之风，修四念处故不令得起，以是义故名之为戒。譬如大铁围山间臭秽之风，以山障故不令得至四天下；如是护圣清净平等戒，以四无所畏故爱取臭秽不令得起，以是义故名之为戒。譬如大铁围山间黑闇，以山障故不得至四天下；如是护圣清净平等戒，无明有为有漏相，修七觉分故不令得起，以是义故名之为戒。离欲义是戒义，解脱义是戒义，休息义是戒义，无尽义是戒义，灭义是戒义，此诸句义名为戒义。

“诸仁者，是名有为无为戒清净平等。若有世间沙门、婆罗门，住此有为无为清净平等戒者，彼人名为世间福田。若有于彼敬信尊重护持养育，给施衣服、床褥卧具、饮食汤药一切所须，是人以此善根乃至流转时恒受胜报，速能得入无畏大城。

“诸仁者，于彼何者忍清净平等？忍有二种：一者、舍忍，二者、息怒忍。诸仁者，于彼何者舍忍？若有众生，求一切乐，息一切苦，是名舍忍清净平等。若复有人求乐离苦，彼人观于三界一切苦道烦恼毒热，唯除圣人。是人为己利故生大怖畏，如是怖畏，观于三界一切炽然，为诸烦恼大火所烧，一一众生为诸苦害，驱驰流转不能自脱；如彼为苦所逼未得解脱，我亦如是苦所逼，以何方便能自脱苦？即作是念：‘不以余事，我以舍忍解脱诸苦，令具诸乐。’作是念已，即便起发，以忍知足，能舍种种资身之具，所谓饮食衣服、卧具屋宅、象车马乘，随其所须皆悉给与。是人以忍布施欲灭诸苦，是人数数修忍知足，住时能行，舍施于正，趣正行人应往其所，亲近供养随顺其教，以供养故，如是如是闻于种种生死过患、涅槃利益。是人或于声闻乘发心，或于缘觉乘发心，或于大乘发心，为己乐故，复增忍知足护养众生，是名舍忍清净平等。乃至舍外钱财及自己乐，忍受诸苦令他得乐，是名舍忍清净平等。若见乞人种种形色、种种威仪、种种音声、种种瞋怒、种种骂辱、种种欺陵、种种粗穢不喜之言，来从求索，是人如是如是心未调柔，瞋恚未净，未住净忍，彼作是念：‘谁能胜我？何以故？彼食血肉，诸恶夜叉、罗刹、鸠槃荼、饿鬼、毗舍遮、富单那、迦吒富单那等，未闻生死苦恼、涅槃功德，不观后世畏众苦所恼，未得解脱一切诸苦。何以故？彼等离善知识，不闻正法故在生死为苦所溺。我已数数得闻生死苦恼、涅槃功德，观后世畏勤息诸苦，近善知识得闻正法。我今欲度生死沉溺，何故起瞋？是故我应作是思惟：骂辱音声及诸违事皆悉如风，我当弃舍不应起瞋。’如是应舍诸众生想，作是念时，骂辱音声及诸违事悉如风过，离众生想修行忍辱清净平等。是人若数于彼众生舍种种想、骂辱音声及诸违事，离分别想修行忍辱清净平等，是人住忍心喜得净，如是则能

修无碍智，谓法无碍及义无碍；如是则能悉舍内财，所谓皮肉筋骨、眼耳鼻舌、手足及头等所爱之命，如是菩萨摩訶萨修无分别非无分别忍清净平等，是名舍忍清净平等。

“诸仁者，于彼何者息怒忍清净平等？诸仁者，若菩萨摩訶萨，能于一切言语音声文字，舍分别想；及一切色身形相、举动威仪、去来意业戏笑，舍分别想；亦舍一切爱取所摄，不求果报，离于苦乐，无分别想乃至于己身命分别无分别想，得住第一义忍清净平等。譬如虚空，遇闇不瞋，得明不喜，不作如实分别之心；如是菩萨摩訶萨，住第一义忍清净平等，于彼一切有为诸法、语言形色及苦乐受，离分别不作分别，不瞋不喜，于诸众生离分别想，得住第一义忍清净平等。譬如虚空不动不止，遍动不震，不止遍震；如是菩萨摩訶萨，于一切业有为诸行，身心不动，不止遍动，亦复不震不止遍震。譬如虚空清净离垢，如是菩萨摩訶萨，住第一义忍清净平等，于彼一切有为身心，善得清净。譬如虚空长养一切众生，如是菩萨摩訶萨，住第一义忍清净平等，养育众生。譬如虚空不为劫火所能烧坏，非劫尽水及劫尽风所能毁坏；如是菩萨摩訶萨，住第一义忍清净平等，乃至未到无上菩提，不为贪欲、瞋恚、愚痴三毒炽火烧坏其心。譬如清净虚空十五日夜，极圆满月普放冷光，令热恼众生身心凉乐；如是菩萨摩訶萨，住第一义忍清净平等，皆息己身威仪忧恼，亦息众生诸烦恼热。譬如清净虚空十五日夜，极圆满月众星围绕，临四天下光明照耀；如是菩萨摩訶萨，住第一义忍清净平等，随所住处，为诸天龙乃至迦吒富单那等之所围绕，晖显照耀。譬如清净虚空十五日，夜极圆满月照海岛上，月爱摩尼从彼珠中流出大水能满大海；如是菩萨摩訶萨，住第一义忍清净平等，以第一义忍清净平等，放胜光明，照耀一切天、龙、夜叉、罗刹乃至迦吒富单那等，令彼悉得善心清净，于诸众生起大慈悲心、深利益心、休息苦恼心、令住一切乐心、观后世畏心、离一切恶心、于一切善法起勤进心。彼诸鬼神以得如是诸胜善心，次第渐离一切不善，一切善根悉皆充足，故能流满涅槃大海。

“诸仁者，汝等应当观此菩萨，虽未至究竟，以住第一义忍清净平等故，已得超过一切声闻及辟支佛，能以善法成熟众生。如我昔作忍辱仙人，常在林中食诸甘果，时有国王名曰迦利，支解我身而为八段。我于彼时，以能善修第一义忍故，从所割处流出白乳。以是忍辱苦行因缘，成熟无量亿那由他百千天、龙、夜叉、罗刹、乾闥婆、阿修罗、紧那罗、摩睺罗伽、伽楼罗、饿鬼、毗舍遮、富单那、迦吒富单那等。彼时无量亿那由他百千人非人等，悉发阿耨多罗三藐三菩提心。我昔为人生非难处，作此苦行不足为难。

“诸仁者，汝等谛听！如我往昔生在难处，受彼兔身，为使仙人得肉食故，即自踊身投大火聚，以能善修第一义忍清净平等，令彼火聚变成莲池。时彼兔身卧华台上，以苦行因缘，令此三千大千世界六种震动。尔时，帝释、护世四王，天、龙、夜叉乃至迦吒富单那等，

及诸仙人、人非人等，种种供养而语我言：‘汝若得成阿耨多罗三藐三菩提时，当于彼时，我等必于阿耨多罗三藐三菩提而得授记。’诸仁者，我昔免身，以能善修第一义忍清净平等故，已得不共声闻、缘觉所有供养。是故彼时梵释天王、护世四王、天、龙、夜叉乃至人非人等，悉以种种胜上香花、涂香、末香、音乐、宝幢幡等事，赞颂尊重，稀有供养，今阿罗汉之所无也。

“诸仁者，菩萨如是善能修住第一义忍清净平等，此四句义今当解释。第一义者，能到彼岸，以是义故名第一义。忍者，见三界阴为究竟空，及见界、入为究竟空，以是义故名之为忍。清净者，谓以圣慧除净三界诸烦恼道、业道、苦道，以是义故名为清净。平等者，谓以圣慧于三界行、一切法理、真如、实际得如实知，无烦恼道、业道、苦道，以是义故名为平等。此是菩萨摩訶萨第一义忍清净平等。

“诸仁者，于彼何者是精进清净平等？以此精进，能与布施清净平等作因，乃至能与般若波罗蜜清净平等作因，以是则能舍一切见。以此精进能与四念处清净平等作因，超过一切声闻、缘觉。以此精进能与四正勤、四如意足作因，以是则能舍诸烦恼。以此精进，能与四摄事、四无碍辩、四梵住、四无色定、五根、五力、七觉支、八圣道分、九次第定，断十二有支，得如来十力、十八不共法、大慈大悲、般若波罗蜜清净平等而作因缘。以此精进，能与成熟众生清净平等作因。以此精进，为得无量佛胜法故集诸善根。以此精进，能习无量巧方便智，无量愿智转转殊胜，修习无量功德聚。以此精进，随愿受生化利益。以精进故，居兜率天宫观其时节，舍彼宫殿正知了了而入母胎。以精进故，于蓝毗尼林从母右胁安隐而出。以精进故，行七步已震动大地及诸山海。以精进故，受彼难陀及婆难陀龙王兄弟淋水洗浴。以精进故，童子游戏示现一切工巧奇能。以精进故，处在宫中五欲不染。以精进故，夜半踰城向闲林下。以精进故，诣优陀迦迦罗荼迦罗摩诸仙人所而修供养。以精进故，六年修彼难行苦行。以精进故，得阿耨多罗三藐三菩提。以精进故，转大法轮无量人天得证圣道。是名精进清净平等。

“诸仁者，我以是精进，今于佉罗帝山牟尼诸仙所依住处，作此大集。十方所有菩萨摩訶萨，有如佛土微尘数众悉令集此，有如佛土微尘等数诸天及龙、夜叉、罗刹、乾闥婆、阿修罗、摩睺罗伽、迦楼罗、紧那罗、鸠槃荼、饿鬼、毗舍、遮富单、那迦吒富单那等，悉来大集，为闻法故，是名精进清净平等。诸仁者，以四大海水分作滴数，如彼滴数，具修精进清净平等，能令菩萨摩訶萨等，满足毗离耶波罗蜜，是名精进清净平等。

大方等大集月藏经卷第六

诸恶鬼神得敬信品第八下

“诸仁者，于彼何者是禅清净平等？有禅，声闻、缘觉、如来共；有禅，缘觉、如来共，不共声闻；有如来禅，不共声闻、缘觉；有如来禅，共声闻、缘觉、一切众生。

“诸仁者，于彼何禅，声闻、缘觉、如来共？若有众生，求乐离苦观后世畏，是人修行布施清净平等时，若有正趣正发心者，应到其所起卑下心随顺供养，从彼人边得闻正法，闻已知义如法修行，心乐离欲流注相续。是人得离诸欲恶不善法，有觉有观，离生喜乐入初禅；无觉无观，定生喜乐入第二禅；离喜行舍，念增上正知入第三禅；舍苦舍乐，先灭忧喜，不苦不乐，舍念清净入第四禅；度一切想，灭有对想，不念别异想，入无边虚空处；度无边虚空处，入无边识处；度无边识处，入无所有处；度无所有处，入非想非非想处；度非想非非想处，入灭受想定。

“诸仁者，住初禅者灭音声刺，住第二禅者灭觉观刺，住第三禅者灭喜刺，住第四禅者灭出入息刺，住无边虚空处者灭色刺，住无边识处者灭虚空刺，住无所有处者灭识刺，住非想非非想处者灭无所有刺，住灭受想者灭受想刺，是名身行得猗、口行得猗、意行得猗，八解脱禅士，得灭尽定到彼岸。阿罗汉依此处得四念处、四正勤、四如意足、五根、五力、七觉分、八圣道分、三解脱门、四无碍辩，依此处得奢摩他、毗婆舍那。此非菩萨行清净平等，不得四摄事、四梵住、三不护、四无所畏、十力、十八不共法、一切智智，是名禅波罗蜜平等，声闻、缘觉、如来共。诸仁者，若复有人，先修缘觉乘退入声闻乘行声闻行，是人入初禅乃至入灭尽定，依此定得三解脱门、四无碍辩，不得四摄事、四梵住、三不护，乃至不得一切智智，是名禅平等，声闻、缘觉、如来共。诸仁者，若复有人，先修大乘退入声闻乘，是人入初禅乃至入灭尽定，得三解脱门、四摄事、四梵住，不得三不护，乃至不得一切智智，是名禅平等，声闻、缘觉、如来共。

“诸仁者，于彼何禅，缘觉、如来共，不共声闻？若有众生，久修声闻乘后入缘觉乘，是人昔来未得初禅，得已思惟求因缘法，乃至得第四禅已思惟求因缘法，入空无愿无相三昧，以彼三昧思惟舍离证无色定，以彼三解脱门入灭尽定，于一切处思惟求缘觉法。是人求于因缘第一义三行灭无余非想受灭，是名禅平等，缘觉、如来共，不共声闻。若复有人，未学声闻乘善学缘觉乘，是人入初禅思惟求因缘法，是人依初禅超彼余禅及无色定，入三行灭无余第一义灭定，是名禅平等，缘觉、如来共，不共声闻。

“诸仁者，若复有人，未学声闻、缘觉乘，先学大乘退入缘觉乘，是人入初禅，于彼禅中思惟求因缘法，如是乃至第四禅中思惟求因缘法，如是四无色定一切处思惟求因缘法，如是三行灭无余第一义灭定，以三解脱门得不可说三昧，其处无生无灭、非证非修、非有非无、非此岸非彼岸、非闇非明、非可测、非分别非不分别，是名伽伽毗沙擎劫辟支佛世间独福田，是名禅清净平等第一义，缘觉、如来

共，不共声闻。其处一切生死有海断，行苦、苦苦、坏苦断，于不可说义能自觉知，是名第一义禅清净平等。

“诸仁者，于彼何者如来第一义禅清净平等，不共声闻、缘觉？若如来入初禅，不依阴入定，不依界入定，不依入入定，不依地界、水火风界入定，不依虚空处界、识处界、无所有处界、非想非非想处界入定，不依灭界入定，不依现在及未来世入定，不依生不依灭入定，不依有不依无入定，无所依不依所依；如如来入初禅如是，第二、第三、第四禅、虚空处界、识处界、无所有处界、非想非非想处界如是。如来入灭界定，不依阴入定，乃至不依所依。如来入灭界定，是名如来第一义禅清净平等，不共声闻、缘觉。

“诸仁者，于彼何者是如来禅清净平等，共声闻、缘觉、一切众生？如来入世间初禅，乃至入世间第四禅；缘觉、声闻亦能入世间初禅乃至第四禅；一切众生劫欲尽时，亦曾能入世间初禅乃至第四禅，于后恶心因缘退失修禅，瞋恶粗穢不观后世畏，于诸众生无有慈愍，食其血肉趣三恶道。复次，如如来入世间初禅，乃至入世间第四禅；彼一切众生，若天、若人、畜生、饿鬼、地狱众生作是念：‘如来心心数法，行在何处？住在何住？’彼一切众生乃至虫蚁，佛力加故，亦如实知佛心心数法住于初禅，乃至知住第四禅，此亦是如来禅平等共一切众生。此禅平等，非一切声闻、辟支佛地，是名禅清净平等。

“诸仁者，于彼何者智器清净平等？智有二种：一者、世间智，二者、出世间智。诸仁者，何者世间智？其世俗书典、口所言说、结集解释、言语之道、音声演说、文字显示、闻诸论说，若书字句义、若算、若数、若印、若种种苦行法、若学工巧事，如是所说种种作业，随其所求皆得成就；诸余三世俗念作事，若触若受若想若思若念，如是一切非涅槃器，是名世间智器平等。诸仁者，于彼何者世间智器平等？诸仁者，世间智器平等者，布施、持戒、忍辱、精进、禅定、闻慧智器平等。何者世间布施智器平等？诸仁者，若有人乃至尽形休息杀生、偷盗、邪淫、妄语、饮酒诸放逸处，于一切众生安住慈心、怜愍心、救济心是涅槃器。诸仁者，是名世间布施智器平等。诸仁者，于彼何者世间戒智器平等？诸仁者，若于一切众生具哀愍心观后世畏，常住慈心、柔软心、利益心、无怨仇心、无嫉妒心、无粗穢心、无两舌心、无憍逸心，安住慈心。诸仁者，是名世间戒智器平等。诸仁者，于彼何者世间忍智器平等？诸仁者，若闻众生种种恶口纯粗穢言，闻已不取，不起卒暴，不生变浊，不现瞋相，于诸众生亦复能忍，不顺言辞音声所出。诸仁者，是名世间忍智器平等。诸仁者，若见众生于其我所作恶、作过、作罪、作无利益，若坏色、若坏声香味触、若坏身、若坏命，于此众生常能修忍应如是学：‘是诸众生，从无始流转习贪恚痴，离善知识未曾修学。我近善知识，我能修学，我求一切乐。若于一切众生不起瞋嫌，是人得一切乐。’是故于彼一切众生，见已不取，不起卒暴，不生变浊，不现瞋相，是名世间忍

智器平等。诸仁者，于彼何者世间精进智器平等？诸仁者，若于众生勤施不断，及修戒、忍、精进、禅、智不断。诸仁者，是名世间精进智器平等。诸仁者，于彼何者世间禅智器平等？诸仁者，若入世间初禅乃至第四禅，入无边虚空处乃至非想非非想处。诸仁者，是名世间禅智器平等。诸仁者，于彼何者世间闻慧智器平等？诸仁者，若与如是空法相应，大乘言教有所堪能，读诵受持言辞清净，为人演说不诤不幻，一切烦恼恶业障尽，知法知义，是人于彼言教知法知义，昼夜精勤求无上智。诸仁者，是名世间闻慧智器平等。

“诸仁者，于彼何者出世间智器平等？诸仁者，若善男子，不取色受想行识，不取眼色，不取眼识，不取眼触，不取眼触因缘生若苦、若乐、不苦不乐；如是乃至不取意法，不取意识，不取意触，不取意触因缘生若苦、若乐、不苦不乐；如是不取地界、水火风界，不取虚空界，乃至不取非想非非想界；不取现在及未来世；不取善、不善；不取有漏、无漏；不取声闻乘，不取缘觉乘，不取无上大乘；不取三界，不取三乘；不取有，不取无；不取无所有，无有言说，得无缘慈三昧，非诸声闻、辟支佛地。是人以此三昧故，能见入首楞严三昧门，次第当得首楞严三昧。诸仁者，是名出世间智器清净平等，非决定清净平等，是方便力求智平等。

“诸仁者，于彼何者安住出世间一切法器般若一切法界清净平等？诸仁者，一切法界，非肉眼见，非天眼见，是圣法慧眼相应。以圣慧眼观诸法界不增不减，不见诸法有盛有衰，不见近远方所，无所至去，不见有生有灭。是人如是见诸法清净平等时，更不见众生有实可得。若入众生不可得，是人则得入一切法不可得。何以故？不离众生有一切法，不离一切法有众生；其众生体性是一切法体性，其一切法体性是众生体性；其一切法体性是我体性，其我体性是一切法体性；其一切法体性是佛法体性，其佛法体性是无我界体性；其无我界体性是实际体性，其实际体性是如如体性，如是知一切法。诸仁者，是名安住出世间一切法器般若一切法界出世间智器清净平等。

“诸仁者，于彼何者出世间一切法器清净平等？若菩萨摩訶萨如是安住般若入禅定时，不见有法可得，住于禅定而不舍离于一切法境界，无住无灭无所觉知住于禅定。是人不以身禅住于禅定，不以心禅住于禅定。是人住如是禅时，入于如如实际法界，能入诸法无所取著，超过一切声闻、辟支佛上。是人于如是禅住于禅定，是未决定菩萨，能断一切诸烦恼见及上烦恼缠。若复菩萨能住如是禅者，则能入于一切诸法，入此法时能知众生善恶诸欲而成熟之。是人不见众生，不见我、人、寿命、众数、生者、养育、作者、使作者、起者、使起者、受者、使受者。是人若复入于如如法界时，见诸众生颠倒烦恼，以颠倒故受种种苦。是人如是入于微细如如实际法界，是菩萨于众生不见众生而成熟之，众生非实故，众生无众生故，众生无我故，众生离故，众生无自性故，众生不可说故，众生空故，众生无相故，众生

无愿故，众生无作故，众生如性故，众生无生故，众生不灭故，众生清净故，而成熟众生如是亦不见我，乃至不见受者，亦不坏事。是诸法自性相，不可说不可说法界，一切语言文字不能说，不可显示，无所有。是菩萨以大悲故，于不可说法而说诸法，此有漏、此无漏，此世间、此出世间，此有罪、此无罪，此有为、此无为，此有烦恼、此无烦恼，此应修行、此应舍离，此凡夫法、此学法、此无学法，此缘觉法、此菩萨法、此佛法。诸仁者，是未决定菩萨，如是安住出世间一切法器般若入一切法界清净平等分别说法，菩萨于所说法不见其相。诸仁者，譬如幻者，遍虚空界化作种种色种种华，未曾作事而能现作。佛不出世，于彼华中，能出如是妙义句味，入于法门演法音声，作如是事，是为难不？”

时，一切天人及鬼神众作如是言：“大德婆伽婆，此事为难！大德修伽陀，此第一难！”

佛言：“诸仁者，此转难，此第一转难！其未决定菩萨，于无所属法如是法，无色不可见，非文字非言说，自未知、未证、未善修、未自在、未到彼岸，而能于他众生除诸烦恼而成熟之，此为转难。彼诸众生，于如是甚深无言说法未作证，闻已不谤，此为第一转难。彼诸众生，能碎一切诸烦恼树，住柔软心、作业心，于一切众生慈心、愍心、不害心、悲心、共心、同心。彼诸众生，以柔软心故，枯竭有海，渡烦恼海，速入无畏城，于如是无言说未作证，闻已不谤，彼亦转难、第一转难！何故汝等恶心鬼神不自制心，于诸众生不作柔软心，不观后世畏？

“诸仁者，若有住出世间一切法器清净平等三昧菩萨摩訶萨，能使一切众生守护六根各住自境，岂况不能遮障汝等恶心鬼神？是善丈夫皆得是法住大慈大悲心不恼于他！何以故？以修大慈大悲方便力故不恼于他。是诸菩萨入如是甚深法已，能掷众生虚空界中，多亿那由他劫各不相见，岂况不能制于汝等诸恶鬼神？亦复能掷一切众生世界中间大黑闇处，乃至能令一切众生唯食风、食水、食土、食石。是诸菩萨以住如是甚深出世间法器清净平等三昧故，能令一切众生于多亿劫不食，岂况不能制于汝等食他众生精气血肉诸恶鬼神，何故纵舍汝等？是诸菩萨以大慈大悲方便力故纵舍汝等。于此四天下所有菩萨摩訶萨，安住如是甚深出世间法器清净平等三昧，其名曰：众自在菩萨、慈自在菩萨、文殊音菩萨、电自在菩萨、日自在菩萨、月自在菩萨、地自在菩萨、想自在菩萨、观世自在菩萨、水自在菩萨，如是等万八千菩萨摩訶萨居此四天下。彼诸菩萨摩訶萨住此十种第一甚深出世间一切法器清净平等。何等为十？所谓众生平等、法平等、清净平等、布施平等、戒平等、忍平等、精进平等、禅平等、般若平等、一切法清净平等。住此十种第一甚深出世间一切法器清净平等三昧菩萨摩訶萨，一一皆能制于汝等诸恶鬼神，如上所说，何故纵舍汝等？是诸菩萨以修大慈大悲方便力故纵舍汝等，何况如来、应、正遍知、明

行足、善逝、世间解、无上士、调御丈夫、天人师、佛世尊！

“诸仁者，假使一切众生，住如是十种出世间甚深一切法器清净平等，如前所说菩萨摩訶萨，以一如来一念之智胜于彼等，何况如来于一切时，以大悲心覆护汝等，不生瞋恚亦不弃舍！如来于一切时怜愍汝等，欲令得于利益安乐；汝等如是无有惭愧，不观后世畏，于一切众生作不瞋心、不柔软心、恶心、怨心、不慈心、不悲心。汝等不应作是非法！”欲重明此义，而说偈言：

“大雄见如是， 无余鬼神集，
即时举右臂， 宣说如是言：
佛出世甚难， 法僧亦复难，
众生净信难， 离诸难亦难，
哀愍众生难， 知足第一难，
得闻正法难， 能修第一难！
得知难平等， 于世常受乐，
此十平等处， 智者当速知。
初众生平等， 舍离诸恶业，
造作诸善业， 久受于胜乐。
修行法平等， 一切法等等，
佛声闻缘觉， 凡夫等如如。
此清净平等， 于彼人中得，
远离取境界， 亦复不坏我。
布施平等喜， 不害他众生，
不夺活命具， 不坏诸华果。
无有一众生， 非我父母者，
一切诸众生， 曾与我亲知。
我更不触恼， 乃至一众生！
休息于非时， 一切恶风雨。
丰盛可乐事， 养育诸亲知，
众生精气增， 常得不损减。
不气噓他身， 不瞋恶眼视，
不夺他精气， 充满一切乐。
我心利一切， 不瞋有失者，
为断诸烦恼， 求于诸佛法。
十种善业道， 智者常守护，
于世常欢喜， 后得见涅槃。
不依阴持戒， 亦不依界入，
灭诸有支戒， 灭诸有渴爱。
舍离种种想， 能息于瞋怒，
如是字言合， 智者离分别。

如虚空空故，离一切分别，
如是修忍者，智者离分别。
譬如空中月，众星共围绕，
如是修忍者，安隐众中显。
月光照摩尼，海水得盈满，
忍照恶心鬼，令得清净信。
一切离诸恶，修于菩提行，
彼众生次第，能满诸佛海。
我昔作仙人，林中修忍辱，
节节支解身，不起瞋怒心。
作兔为仙人，自投身入火，
我以修忍故，火变为莲池。
我以彼忍力，成熟多众生，
今诸阿罗汉，无有如是忍。
智者常精进，修行为福慧，
智海得增满，得成诸佛海。
修禅及般若，得离诸烦恼，
不分别三界，得住于如如。
智者修禅智，出世住实际，
不染于诸法，离一切分别。
不分别诸法，不见有众生，
诸法唯一相，得见佛境界。
无量菩萨众，安住此法性，
不恼于汝等，以住圣般若。
如来于汝等，容恕不为恼，
汝等无羞耻，远离于惭愧。
作恶诸众生，弊性多刚强，
见佛大勇猛，皆得柔软心。
汝等各应当，自遮己恶心；
汝等当次第，速证大涅槃。
汝等若柔软，得离诸恶业，
为护此法故，付嘱于汝等。
我所说声闻，具智大名称，
彼怜愍汝等，令得福智慧，
当得饮食利，诸天所供养，
得于胜住处，及得增寿命。
若闻导师语，如说能修行，
人天世间中，常受胜乐报！”

尔时，世尊于彼诸恶鬼神众中说法讫时，于彼诸恶鬼神众中，彼

恶鬼神昔于佛法作决定信，彼于后时，近恶知识，心见他过，以是因缘生恶鬼神。彼九十二那由他百千诸恶鬼神得住须陀洹果，亿那由他频婆罗百千诸恶鬼神昔行大乘者得随顺忍，无量阿僧祇诸恶鬼神得柔软心，得已复发阿耨多罗三藐三菩提心。

尔时，于彼鬼神众中，有罗刹王名牛王目，与万罗刹王合掌向佛，一心敬礼而作是言：“大德婆伽婆，我等为瞋使故久于世间受不爱果。我等今者承佛神力，得自忆念此贤劫中宿命之事。我等于鸠留孙如来法中曾得出家，诵持八万大乘法聚，复诵八万声闻法聚，发阿耨多罗三藐三菩提愿。我等彼时于阿兰若住法比丘所起瞋怒心，以是业障于彼命终生于地狱，久被烧煮失念无余，于彼命终生此食他血肉恶罗刹中。正由我等昔出家时共作恶业，今受于此恶罗刹身，为饮食故断无量亿那由他百千众生命。以是我等今于佛所，悔诸恶业更不复作，如是至三，至到坚固修行律仪！唯愿世尊，授于我等阿耨多罗三藐三菩提记。”

佛言：“诸仁者，我不见更有一法远离菩提心如于阿兰若比丘所而起恶心者。诸仁者，于未来世，此贤劫最后如来名曰卢遮，彼佛当授汝等胜菩提记。”

彼万罗刹王垂泪而言：“宁处地狱，不作人身于阿兰若比丘所一念之顷而起恶心！以彼能断一切善故，何况数数而起恶心！”

尔时，复有诸恶鬼神敬信三宝，住柔软心观后世畏，一切同音而作是言：“大德婆伽婆，我等从今休息诸恶，忏悔过去一切恶业。我等今当食华、食香、食果、食水、食风、食法、食喜，更不恼他，护持佛法，受佛付嘱为久住故，及受世尊声闻弟子住阿兰若者增上护持。”

佛言：“善哉！善哉！善丈夫，汝等应当如是善受我之付嘱，我今复以汝等付嘱贤劫一切菩萨、一切声闻。彼怜愍汝等，于其昼夜作善助道，与汝善分称名劝请，以是汝等增长精气、大力威德及大功能、亲知眷属。彼彼如是护持我法故，亦复善护阿兰若住法比丘若大乘小乘，如是，如是，精气增长乃至眷属。如是，如是，汝等作胜供养三世诸佛，以此善根能舍恶趣，得世间乐及涅槃乐！”

诸天王护持品第九

尔时，世尊示世间故，问娑婆世界主大梵天王言：“此四天下，是谁能作护持养育？”

时，娑婆世界主大梵天王作如是言：“大德婆伽婆，兜率陀天王，共无量百千兜率陀天子，护持养育北郁单越；他化自在天王，共无量百千他化自在天子，护持养育东弗婆提；化乐天王，共无量百千化乐天子，护持养育南阎浮提；须夜摩天王，共无量百千须夜摩天

子，护持养育西瞿陀尼。

“大德婆伽婆，毗沙门天王，共无量百千诸夜叉众，护持养育北郁单越；提头赖吒天王，共无量百千乾闥婆众，护持养育东弗婆提；毗楼勒叉天王，共无量百千鸠槃荼众，护持养育南阎浮提；毗楼博叉天王，共无量百千龙众，护持养育西瞿陀尼。

“大德婆伽婆，天仙七宿、三曜、三天童女，护持养育北郁单越。彼天仙七宿者，虚、危、室、辟、奎、娄、胃。三曜者，镇星、岁星、荧惑星。三天童女者，鸠槃、弥那、迷沙。大德婆伽婆，彼天仙七宿中，虚、危、室三宿是镇星土境，鸠槃是辰；辟、奎二宿是岁星土境，弥那是辰；娄、胃二宿是荧惑土境，迷沙是辰。大德婆伽婆，如天仙七宿、三曜、三天童女，护持养育北郁单越。

“大德婆伽婆，天仙七宿、三曜、三天童女，护持养育东弗婆提。彼天仙七宿者，昴、毕、觜、参、井、鬼、柳。三曜者，太白星、岁星、月。三天童女者，毗利沙、弥偷那、羯迦吒迦。大德婆伽婆，彼天仙七宿中，昴、毕二宿是太白土境，毗利沙是辰；觜、参、井三宿是岁星土境，弥偷那是辰；鬼、柳二宿是月土境，羯迦吒迦是辰。大德婆伽婆，如天仙七宿、三曜、三天童女，护持养育东弗婆提。

“大德婆伽婆，天仙七宿、三曜、三天童女，护持养育南阎浮提。彼天仙七宿者，星、张、翼、轸、角、亢、氏。三曜者，日、辰星、太白星。三天童女者，[糸+臬]呵、迦若、兜罗。大德婆伽婆，彼天仙七宿中，星、张、翼是日土境，[糸+臬]呵是辰；轸、角二宿是辰星土境，迦若是辰；亢、氏二宿是太白土境，兜罗是辰。大德婆伽婆，如天仙七宿、三曜、三天童女，护持养育南阎浮提。

“大德婆伽婆，彼天仙七宿、三曜、三天童女，护持养育西瞿陀尼。彼天仙七宿者，房、心、尾、箕、斗、牛、女。三曜者，荧惑星、岁星、镇星。三天童女者，毗离支迦、檀婆、摩伽罗。大德婆伽婆，彼天仙七宿中，房、心二宿是荧惑土境，毗利支迦是辰；尾、箕、斗三宿是岁星土境，檀婆是辰；牛、女二宿是镇星土境，摩伽罗是辰。大德婆伽婆，如天仙七宿、三曜、三天童女，护持养育西瞿陀尼。

“大德婆伽婆，此四天下南阎浮提最为殊胜。何以故？阎浮提人勇健聪慧，梵行相应，佛婆伽婆于中出世，是故四大天王，于此倍增护持养育。此阎浮提有十六大国，谓鸯伽摩伽陀国、傍伽摩伽陀国、阿槃多国、支提国，此四大国，毗沙门天王与夜叉众围绕护持养育；迦尸国、都萨罗国、婆蹉国、摩罗国，此四大国，提头赖吒天王与乾闥婆众围绕护持养育；鸠罗婆国、毗时国、般遮罗国、疏那国，此四大国，毗楼勒叉天王与鸠槃荼众围绕护持养育；阿湿婆国、苏摩国、罗苏吒国、甘满闍国，此四大国，毗楼博叉天王与诸龙众围绕护持养育。

“大德婆伽婆，过去天仙，护持养育此四天下故，皆亦如是分布安置。于后随其国土、城邑村落、塔寺园林、树下冢间、山谷旷野、河泉陂泽乃至海中宝洲天祠，于彼卵生、胎生、湿生、化生诸龙、夜叉、罗刹、饿鬼、毗舍遮、富单那、迦吒富单那等，生于彼中还住彼处，无所系属不受他教，是故愿佛于此阎浮提一切国土彼诸鬼神分布安置，为护持故，为护一切诸众生故，我等于此说欲随喜。”

佛言：“如是，大梵，如汝所说。”

尔时，世尊欲重明此义，而说偈言：

“示现世间故， 导师问梵王，
于此四天下， 谁护持养育？
如是天师梵， 诸天王为首，
兜率他化天， 化乐须夜摩，
能护持养育， 如此四天下。
四王及眷属， 亦复能护持；
二十八宿等， 及以十二辰，
十二天童女， 护持四天下。
随其所生处， 龙鬼罗刹等，
不受他教者， 还于彼作护。
天神等差别， 愿佛令分布，
怜愍众生故， 炽然正法灯。”

尔时，佛告月藏菩萨摩訶萨言：“了知清净土，此贤劫初，人寿四万岁时，邬留孙佛出兴于世。彼佛为无量阿僧祇亿那由他百千众生，回生死轮，转正法轮，追回恶道安置善道及解脱果。彼佛以此四大天下，付嘱娑婆世界主大梵天王、他化自在天王、化乐天王、兜率陀天王、须夜摩天王等，护持故，养育故，怜愍众生故，令三宝种不断绝故，炽然故，地精气、众生精气、正法精气久住增长故，令诸众生休息三恶道故，趣向三善道故，以四天下付嘱大梵及诸天王。如是渐次劫尽，诸天人尽，一切善业白法尽灭，增长大恶诸烦恼溺，人寿三万岁时，拘那含牟尼佛出兴于世。彼佛以此四大天下，付嘱娑婆世界主大梵天王、他化自在天王乃至四大天王及诸眷属，护持养育故，乃至令一切众生休息三恶道趣向三善道故，以此四天下付嘱大梵及诸天王。如是次第劫尽，诸天人尽，白法亦尽，增长大恶诸烦恼溺，人寿二万岁时，迦叶如来出兴于世。彼佛以此四大天下，付嘱娑婆世界主大梵天王、他化自在天王、化乐天王、兜率陀天王、须夜摩天王、憍尸迦帝释、四天王等及诸眷属，护持养育故，乃至令一切众生休息三恶道趣向三善道故，彼迦叶佛以此四天下，付嘱大梵、四天王等，及付诸天仙众、七曜、十二天童女、二十八宿等，护持故，养育故。

“了知清净土，如是次第至今，劫浊、烦恼浊、众生浊、大恶烦

恼浊斗争恶世，时人寿百岁，一切白法尽，一切诸恶闇翳世间，譬如海水一味大碱，大烦恼味遍满于世集会恶党，手执髑髅，血涂其掌，共相杀害，如是恶众生中，我今出世菩提树下初成正觉，受提胃波利诸商人食。为彼等故，以此阎浮提分布天、龙、乾闥婆、鸠槃荼、夜叉等；护持养育故，以是大集十方所有佛土一切无余菩萨摩訶萨等，悉来集此。乃至于此娑婆佛土，其处百亿日月、百亿四天下、百亿四大海、百亿铁围山大铁围山、百亿须弥山、百亿四阿修罗城、百亿四大天王、百亿三十三天，乃至百亿非想非非想处，如是略数娑婆佛土，我于是处而作佛事。乃至于娑婆佛土所有诸梵天王及诸眷属，魔天王、他化自在天王、化乐天王、兜率陀天王、须夜摩天王、帝释天王、四大天王、阿修罗王、龙王、夜叉王、罗刹王、乾闥婆王、紧那罗王、迦楼罗王、摩睺罗伽王、鸠槃荼王、饿鬼王、毗舍遮王、富单那王、迦吒富单那王等，悉将眷属于此大集，为闻法故；乃至于此娑婆佛土所有诸菩萨摩訶萨等及诸声闻一切无余悉来集此，为闻法故。我今为此所集大众，显示甚深佛法，复为护世间故，以此阎浮提所集鬼神，分布安置护持养育。”

尔时，世尊复问娑婆世界主大梵天王言：“过去诸佛，以此四大天下曾付嘱谁，令作护持养育？”

时，娑婆世界主大梵天王言：“过去诸佛，以此四天曾付嘱我及憍尸迦令作护持，而我有失不彰己名及帝释名，但称诸余天王及宿曜辰护持养育。”

尔时，娑婆世界主大梵天王及憍尸迦帝释，顶礼佛足而作是言：“大德婆伽婆，大德修伽陀，我今谢过。我如小儿愚痴无智，于如来前不自称名。大德婆伽婆，唯愿容恕。大德修伽陀，唯愿容恕。诸来大众，亦愿容恕。我于境界言说教令得自在处护持养育，乃至令诸众生趣善道故。我等曾于鸠留孙佛已受教敕，乃至令三宝种已作炽然。拘那含牟尼佛、迦葉佛所，我受教敕亦如是，于三宝种已勤炽然，地精气、众生精气、正法味醍醐精气久住增长故。亦如我今于世尊所顶受教敕，于己境界言说教令得自在处，休息一切斗争饥馑，乃至令三宝种不断绝故，三种精气久住增长故，遮障恶行众生护养行法众生故，休息众生三恶道趣向善道故，为令佛法得久住故，勤作护持。”

佛言：“善哉！善哉！妙丈夫，汝应如是。”

尔时，佛告百亿大梵天王言：“所有行法、住法、顺法、厌舍恶者，今悉付嘱汝等手中。汝等贤首，于百亿四天下，各各境界言说教令得自在处，所有众生，弊恶粗犷恼害于他，无有慈愍不观后世畏，触恼刹利心及婆罗门、毗舍、首陀心，乃至触恼畜生心，如是作杀生因缘，乃至作邪见因缘，随其所作非时风雨乃至令地精气、众生精气、正法精气作损减因缘者，汝应遮止令住善法。若有众生，欲得善者，欲得法者，欲度生死彼岸者，所有修行檀波罗蜜者，乃至修行般

若波罗蜜者，所有行法住法众生，及为行法营事者，彼诸众生，汝等应当护持养育。若有众生，受持读诵，为他演说种种解脱经论，汝等当与彼诸众生念持方便得坚固力，入所闻不忘智信诸法相，令离生死修八圣道三昧根相应。若有众生，于汝境界住法，奢摩他、毗婆舍那次第方便与诸三昧相应，勤求修习三种菩提者，汝等应当遮护摄受，勤作舍施勿令乏少。若有众生，施其饮食、衣服、卧具、病患因缘施汤药者，汝等应当令彼施主五利增长。何等为五？一者、寿增长，二者、财增长，三者、乐增长，四者、善行增长，五者、慧增长。汝等长夜得利益安乐，以是因缘汝等能满六波罗蜜，不久得成一切种智。”

时，娑婆世界主大梵天王为首，共百亿诸梵天王咸作是言：“如是，如是，大德婆伽婆，我等各于己境界，弊恶粗犷恼害于他，无慈愍心不观后世畏，乃至我当遮障，与彼施主增长五事。”

佛言：“善哉！善哉！汝应如是。”

尔时，复有一切菩萨摩訶萨、一切诸大声闻、一切天龙乃至一切人非人等赞言：“善哉！善哉！大雄猛士，汝等如是，法得久住，令诸众生得离恶道，速趣善道！”

尔时，世尊欲重明此义，而说偈言：

“我告月藏言， 入此贤劫初，
 邬留佛付嘱， 梵等四天下。
 遮障诸恶故， 炽然正法眼，
 舍离诸恶事， 护持行法者。
 不断三宝种， 增长三精气，
 休息诸恶趣， 令向诸善道。
 拘那含牟尼， 复嘱大梵王，
 他化乐天， 乃至四天王。
 次后迦叶佛， 复嘱梵天王，
 化乐等四天， 帝释护世王。
 过去诸天仙， 为诸世间故，
 安置诸宿曜， 令护持养育。
 至于浊恶世， 白法尽灭时，
 我独觉无上， 安置护人民。
 今于大众前， 数数恼乱我，
 应当舍说法， 置我令护持。
 十方诸菩萨， 一切悉来集，
 天王亦来此， 娑婆佛国土。
 我问大梵王， 谁昔护持者？
 帝释大梵天， 指示余天王。
 于时释梵王， 谢过导师言：

我等所王处， 遮障一切恶。
炽然三宝种， 增长三精气，
遮障诸恶朋， 护持善朋党。”

大方等大集月藏经卷第七

诸魔得敬信品第十

尔时，会中有一魔王，名曰岁星，即起合掌，向诸魔众而说偈言：

“今此瞿昙仙， 大欲欺陵我！
分布四天下， 一切诸鬼神，
与诸四天王， 皆悉令护持，
唯除于我等， 而不见与分。”

尔时，会中复有魔王，名那罗延月，举手指示魔王波旬，而说偈言：

“由此波旬故， 而不分与我，
如是一恶人， 毁灭我等众。”

尔时，会中复有魔王，名卢陀弗师吒，而说偈言：

“我等今当共， 远弃魔波旬！
如是弊波旬， 鄙践极恶法，
我等从昔来， 未曾见闻此。
我今咸劝请， 大师瞿昙仙，
真正法宝聚， 炽然令久住，
我等当护持， 养育令增长！”

尔时，魔王波旬见闻诸魔，作一朋党共评论已，羞惭耻愧，从座而起合掌向佛，而说偈言：

“一切佛世尊， 于诸世间中，
永离于妄语， 最尊独第一！
我今已忏悔， 一切尊导师，
深得生敬信， 一向定归依。
世尊今何故， 犹见生厌贱？”

尔时，世尊告彼月藏菩萨摩訶萨，而说偈言：

“了知清淨土，如是魔波旬，
今实于我所，种种作留难，
无能尽说过！今于大众中，
诚心忏悔我，非是谄曲意，
深敬信三宝，尊重未曾有。
是故我今与，如是魔波旬，
当授于无上，正智菩提记。”

尔时，月藏菩萨摩訶萨白佛言：“世尊，凡夫心轻犹豫不定，于三乘中未住究竟，于善于恶不能决定，愿亦不定；以不定故，遇善知识得生淨信；以信因缘，身口意业所作诸善能发胜愿；以彼善心胜愿因缘，随所希求得彼最胜妙善报果。大德婆伽婆，譬如群牛，食种种草若生若枯，亦饮种种清浊等水，及构捋时出纯净乳，从彼淨乳出香味酪，从香味酪出生熟酥，从生熟酥出上醍醐胜果成熟。大德婆伽婆，如是凡夫，善心相续能生淨信，以信因缘次发胜愿，如是次第得大妙果。如是，世尊，发大乘者亦复如是，乃至未得柔顺忍来，心常犹豫动转不定；得顺忍已，于大乘中修六波罗蜜，心不疲倦次第增进，乃至得作自然法王。大德婆伽婆，譬如粪秽散置野田，下诸种子以水溉灌，人功助成因缘具足，于诸种子华叶果实具足成熟。大德婆伽婆，如是凡夫以犹豫心于大乘中行六波罗蜜，次第修学得柔顺忍，不久能满六波罗蜜，于阿耨多罗三藐三菩提而成正觉。如是波旬，虽复昔有种种诸恶烦恼炽然，种种心行、身口意业作诸不善应受苦报，今于佛所，深得敬信至诚忏悔，发于无上菩提之心；既发心已，即得受于阿耨多罗三藐三菩提记，次第得成无上法王。大德婆伽婆，譬如商主，昔虽未见大海宝洲，办具资粮道路不错，共诸商人勤用功力，次第得度大海彼岸到彼种种摩尼宝洲。大德婆伽婆，如是波旬，若能诚心发露忏悔一切恶业，以诸善根至诚回向无上菩提，发大勇猛则能速满六波罗蜜，能度三有生死大海，无边功德皆悉圆满，得到一切智慧宝洲，非是二乘之所能到。”

尔时，佛告月藏菩萨摩訶萨言：“了知清淨土，如是，如是，如汝所说。此魔波旬，今于我前发露忏悔昔所造作一切恶业，已得清淨发于无上菩提之心，是故我今与是波旬授于阿耨多罗三藐三菩提记，于未来世当得成于无上法王。”

尔时，复有百亿诸魔，俱共同时从座而起，合掌向佛，顶礼佛足而白佛言：“世尊，我等亦当发大勇猛护持养育佛之正法，炽然三宝种久住于世间，令地精气、众生精气、法精气皆悉增长。若有世尊声闻弟子住法顺法三业相应而修行者，我等皆悉护持养育，一切所须令无所乏。复有世尊声闻弟子，无所积聚，离诸烦恼、浊乱斗争、不相言讼、不求名利，于诸恶法羞惭耻愧，不与四众亲友交通，弃舍聚落独住闲林，坚固勇猛如救头燃，于诸善法相应住者，我等当共护持养

育，一切所须令无所乏，所有一切诸恶众生我悉遮障，于一切处所有斗争、饥馑疾疫、他方怨敌、非时风雨、冰寒毒热、蚊虻蛇蝎、诸杂虫兽，我皆遮护令得敬信；刹利、婆罗门、毗舍、首陀乃至畜生，亦令敬信于佛正法；一切天、龙、夜叉、罗刹、阿修罗、乾闥婆、紧那罗、摩睺罗迦、迦楼罗、鸠槃荼、饿鬼、毗舍遮、富单那、迦吒富单那等，亦令敬信佛之正法；复令一切天、龙、夜叉、罗刹、阿修罗、乾闥婆、紧那罗、摩睺罗伽、迦楼罗、鸠槃荼、饿鬼、毗舍遮、富单那、迦吒富单那等，精气具足，色力丰盛，好香美味充足无乏；所有依地一切草木，根茎枝叶华果繁茂，五谷苗稼增长光泽，及诸衣服亦悉丰饶，土地肥良皆悉可乐，寺舍园林、河泉池井、宫殿屋宅、山薮林野悉令具足，令诸众生于彼住处，心得悦乐，身不疲倦。若复世尊声闻弟子，有所积聚、烦恼散乱、懈怠懒惰不应法者，我当弃舍不复护持安置养育，自修而住。我今终不于三世佛所而故妄语犯染污罪！”

佛言：“善哉！善哉！诸欲自在士，汝应如是炽然我法，乃至能与一切众生安稳快乐。诸仁者，我以法眼复寄阎浮提一切人王，若我弟子于我法中，贪爱积聚烦恼斗争，与俗相染，亲友交通，贪求名利，于身口意不应正法，令诸天人不得敬信，乐作诸恶住不善道，令阎浮提诸国王等当如法治，为令佛法得久住故，诸天人等得敬信故。”

尔时，世尊复告百亿他化自在天、百亿化乐天、百亿兜率陀天、百亿须夜摩天、百亿释提桓因言：“诸仁者，如我所说法律毗尼，付嘱汝等，汝当护持如上所说安置养育。”

作是语已，彼五天王即白佛言：“世尊，若有世尊声闻弟子住法顺法三业相应而修行者，我等皆共护持养育，供给所须令无所乏。若复世尊声闻弟子无所积聚，护持养育亦如上说。若复世尊声闻弟子住于积聚乃至三业与法不相应者，亦当弃舍不复养育，自修而住。我今终不于三世佛所而故妄语犯染污罪！”

佛言：“善哉！善哉！妙丈夫，汝应如是令我佛法炽然久住，与诸众生安稳快乐。”

尔时，一切诸来大众，天、人、乾闥婆等，亦复赞彼五天王言：“善哉！善哉！妙丈夫，我等昔来未闻如是护持养育！诸佛正法久住世间，天人炽盛，恶道减少。”

尔时，世尊欲重明此义，而说偈言：

“于此娑婆界， 初入贤劫时，
拘楼孙如来， 已嘱于四天，
帝释梵天王， 护持令养育，
炽然三宝种， 增长三精气。
拘那含牟尼， 亦嘱四天下，

梵释诸天王，护持令养育。
迦葉亦如是，已嘱四天下，
梵释护世王，护持行法者。
过去诸仙众，及以诸天仙，
星辰诸宿曜，亦嘱令分布。
我出五浊世，降伏诸魔怨，
而作大集会，显现佛正法。
诸天咸劝请，分布四天下，
我时问梵天：‘谁昔受付嘱？’
梵天不自称，及以天帝释，
遍观诸天已，然后忏悔佛。
一切诸天众，咸共白佛言：
‘我等所王处，皆护持正法，
炽然三宝种，增长三精气，
令息诸病疫，饥馑及斗争。
过去诸如来，教我令安置，
如今尊导师，亦敕令护持。’
世尊复告语：‘百亿诸梵天，
百亿天帝释，百亿四天王，
汝等各皆悉，于己四天下，
随其所王处，遮障恶众生，
不令心扰浊，安住于善处。
修行正法者，当与不妄念；
若有诸声闻，勤求涅槃者，
一切有所须，悉皆供给之；
亦与彼施主，增益五功德，
寿命报安乐，精进及智慧，
能速满六度，证于大菩提。’
如是百千亿，诸天大梵王，
咸共白佛言：‘我各于己土，
护持诸声闻，遮障恶众生，
安住佛正法，炽然三宝种，
三种味精气，皆悉令增长。’
百亿诸魔众，皆共生惭愧，
亦悉从座起，合掌白佛言：
‘我等皆发心，护持佛正法，
炽然三宝种，增长三精气。
安置诸众生，令住于善道，
为诸众生故，休息一切恶。
护持于世尊，行法诸声闻，

持佛真妙法，三业常相应，
以诸所须物，养育令无乏。
若有诸声闻，无所积聚者，
远离斗争讼，羞惭于名利，
坚固勤精进，犹如救头燃；
能令无量众，安住于正法，
一切诸恶处，皆令可爱乐，
依地所生种，果药诸苗稼，
悉皆令滋茂，膏泽香味具。
若有诸声闻，贪求积聚者，
瞋妒多诤讼，求利无羞耻，
若有如是辈，我等当舍离。
我于三世佛，终不犯妄语！’
导师复告语：‘汝等诸魔众，
护国诸人王，遮障恶众生。’”

提头赖吒天王护持品第十一

尔时，于此世界四天下中，有日天子、月天子，告彼疾行坚固天子言：“世尊今在佉罗帝山牟尼诸仙所依住处作大集会，佛及弟子为令佛法得久住故，绍三宝种不断绝故，三种精气不损减故，令恶众生得敬信故，使三恶道得休息故，令三善道得增长故。汝等速往彼大集所说欲随喜，我及眷属，于佛正法护持养育。”

时，彼疾行坚固天子往诣佛所，到已头面礼足而白佛言：“世尊，彼日天子、月天子，遥礼佛足作如是言：‘我等既是乘车疾行，不得往诣彼大集所。我及眷属说欲随喜，于佛正法我当护持，安置养育令三宝种而得炽然，亦令五星、二十八宿皆得正行，三种精气悉令增长，遮障一切不善众生，令善法朋皆得充盛，人天善道具足盈满。’”

佛言：“日天子、月天子，汝于我法护持养育，令汝长寿无诸衰患。”

尔时，复有百亿提头赖吒天王、百亿毗楼勒叉天王、百亿毗楼博叉天王、百亿毗沙门天王，彼等同时及与眷属从座而起，整理衣服，合掌敬礼作如是言：“大德婆伽婆，我等各各于己天下，勤作护持养育佛法，令三宝种炽然久住，三种精气皆悉增长；乃至世尊声闻弟子三种善业相应住者，我等于彼勤加护持摄受养育，令心不浊，离诸散乱，趣涅槃门。随几时中，我等常当遮障一切恶心众生，令善法朋久住增长，一切斗争、疫病饥馑、非时风雨、冰寒毒热、苦辛涩触、无味枯燥、臭秽众恶不可乐事悉令休息。何以故？世尊弟子不作积聚，常修慈心与善相应，离诸散乱而安住故。”

佛言：“善哉！善哉！善男子，汝当如是勤加护持，摄受养育我所修习诸佛法眼。”

诸来大众亦皆赞言：“善哉！善哉！”

尔时，佛告乐胜提头赖吒天王言：“妙丈夫，此四天下阎浮提中东方第四分，汝应护持。何以故？此阎浮提，诸佛兴处，是故汝应最上护持。过去诸佛已曾教汝护持养育，未来诸佛亦复如是。并及汝子、乾闥婆众、诸夜叉等一切眷属，应令敬信护持养育。汝有九十一子乐种种行，彼或乘象游行十方，或复乘马、或复乘驼、或乘特牛、或乘羖羊、或乘白羊、或复乘龙、或复乘鸟、或乘男夫、或乘妇女、或乘童男、或乘童女游行十方，汝亦应令得生敬信，当共彼等护持阎浮提东方第四分。

“复有乾闥婆大臣大力军将，初名般支迦，次名般遮罗，次名郎伽罗，次名扇陀，次名奚摩跋多，次名质多斯那，次名那荼王，次名禅那离沙婆，次名尸婆迦，次名牟真邻陀，次名毗湿婆蜜多罗，次名除珍达罗斯等，皆是汝之大臣大力军将，汝亦应令得生敬信，当共彼等护持阎浮提东方第四分。复有四大刹多罗大力军将，有多兵众，一名好长耳，二名好长鼻，三名善充满，四名佉陀梨钵帝。斯等刹多罗皆是汝之大力军将，汝亦应令得生敬信，当共彼等护阎浮提东方第四分。

“复有乾闥婆大力军将兄弟三人，常将兵众有大势力，彼等皆悉受汝教令，一名乐欲，二名著欲，三名喜歌。复有乾闥婆兄弟十一人，初名鞞利迦，次名槃梯，次名蓝菩尸佉，次名迦罗荼，次名拘枳罗声，次名耶舍失利，次名耶舍槃多，次名耶输达罗，次名摩罗槃妒，次名摩罗缦都，次名摩头曼多。复有乾闥婆兄弟三人，一名尸利曼都，二名头坻曼多，三名富师波曼多。复有乾闥婆三十三人，初名萨陀曼都，次名耶闍曼多，次名檀那曼多，次名难提迦，次名忧波罗，次名波头摩，次名栴檀，次名栴檀那，次名度卢摩罗娑，次名般遮罗，次名拘枳罗苏婆罗，次名沾浮罗，次名般遮尸佉，次名搔跋尼，次名苏罗斯，次名摩罗毗，次名跋达那，次名迦摩尸利吒，次名尼干吒，次名尼干吒迦，次名婆提浮罗，次名耶输陀罗，次名毗首婆蜜多罗，次名尸蹉陀，次名天鼓，次名摩兜罗，次名质多罗斯那，次名那荼王，次名禅那梨沙婆，次名尸婆迦，次名牟真邻陀，次名毗首婆蜜哆庐，次名除珍达罗。如是乾闥婆有多军众大有势力，汝亦应令得生敬信，当共彼等护持阎浮提东方第四分。

“复有十六天神，有大势力具足神通，初名最胜，次名上胜，次名成就义，次名他不胜，次名上喜，次名喜军，次名乐喜，次名增长喜，次名饶财，次名多饶财，次名具毛，次名十毛，次名饶毛，次名忧波罗，次名钵摩迦，次名除摩。如是十六诸天神王大有威力，汝亦应令得生敬信，当共彼等护持阎浮提东方第四分。

“东方有处名遮波罗，过去诸佛曾依彼住，亦是罗汉诸贤圣众得

证果处，诸天等发心修行所依住处，汝等应以大精进力护持阎浮提东方第四分。东方有山名阿跋多，次名梨师三婆婆，亦是过去诸佛贤圣本修行处，诸天等依于此处得见圣谛，是故汝等当以大精进力护持阎浮提东方第四分。东方复有三曜、七宿、三天童女，应令彼等于其昼夜正行世间，汝共彼等护持阎浮提东方第四分。东方复有天、龙、夜叉、罗刹、鸠槃荼、饿鬼、毗舍遮、富单那、迦吒富单那等住汝东方无所属者，我当于后分布彼等安置诸国令汝护持。”

尔时，乐胜提头赖吒天王白佛言：“世尊，如是，如是。大德婆伽婆，过去诸佛付嘱安置护持养育，亦教我等护持东方弗婆提界，如今世尊教我安置一无异。我当深心顶戴敬受于佛正法，护持阎浮提东方第四分，并我诸宫眷属大小亦令护持，于三恶趣皆令休息，于三善道皆悉炽然。”

尔时，乐胜提头赖吒天王，复有刹多罗辅佐大臣、男夫妇女、童男童女，一切皆共从座而起，合掌向佛，头面礼足而白佛言：“世尊，我等今于导师世尊得生深信，尊重敬仰得未曾有；法宝、僧宝亦生深信，尊重敬仰得未曾有。大德婆伽婆，我等从今精勤护持阎浮提界东方第四分。世尊所有声闻弟子，若比丘、比丘尼、优婆塞、优婆夷，若余众生于三善业相应住者，敬信三宝供养奉施听受法者，于佛正法发心修行受持禁戒相应住者，并勤供养诸众僧者，我等常当护持养育。若复有余诸众生等住阿兰若，及佛弟子住法顺法，发心坚固如犀牛角，独而无侣住于闲林，我等当以一切所须供养奉施护持养育。若复有余一切众生见彼闲林相应住者，能以所须勤供养者，我等亦当护持养育，令其所须悉得称意，亦令长寿无诸衰病，财富自在安隐快乐，善名流布。大德婆伽婆，我等当作如是等事护持养育，于佛正法亦令一切斗争疫病、饥馑俭短、非时风雨悉令休息，复令一切华果药草、五谷等物滋茂成熟、肥腻软泽、善香美味、妙色增盛，又令地味、众生味、法醍醐味滋茂增长。如是精味得增长故，息三恶道善道盈满，佛法久住炽然世间。”

佛言：“善哉！善哉！妙丈夫，汝等精勤作如是事护持养育，令我法眼久住炽然，善说法律能生信解，则为具足供养三世一切诸佛。汝等便得寿命增长、法增长、眷属增长、名称增长、色力增长、善朋增长、舍宅增长、信增长、戒增长、闻增长、精进增长、念增长、慧增长。如是等事得增长故，便能速满六波罗蜜，得成无上自然法王如我今也。”

尔时，一切诸来大众，天、人、乾闥婆等咸皆赞言：“善哉！善哉！妙丈夫，汝应如是精勤护持诸佛正法，令得久住，炽然在世，使不断绝。”

尔时，世尊欲重明此义，而说偈言：

“世间二神通， 日月遣使来，

疾行坚天子， 今与大众欲：
‘如是佛正法， 我等当守护！
 炽然三宝种， 星辰得正行，
 增长三精气， 遮障恶众生，
 法朋得增长， 善道皆盈满。’
 百亿提头赖， 勒叉毗楼博，
 百亿毗沙门， 咸共白佛言：
‘我于已天下， 各皆勤护持！
 乃至诸比丘， 少欲离积聚，
 我等遮诸恶， 法朋得增长，
 斗争病饥馑， 诸恶令休息。’
 导师佛告言：‘乐胜提头赖，
 过去诸如来， 已教汝安置，
 护持阎浮提， 东方第四分。
 汝军及眷属， 亦令法眼增。’
 提头白佛言：‘唯然大雄猛，
 我军大力众， 法眼令炽然，
 除诸不善法， 遮障恶众生，
 常护诸声闻， 无所积聚者。’
 乾闥婆悉起， 亦复白佛言：
‘声闻无积聚， 饮食令无乏，
 我等护持法， 住法境界者。
 养育彼施主， 我等亦护持，
 遮障恶众生， 法朋令炽然，
 三种精气增， 善道皆充满。’”

毗楼勒义天王品第十二

尔时，佛告火华毗楼勒义天王言：“妙丈夫，此四天下阎浮提界南方第四分，汝应护持。何以故？此阎浮提，诸佛兴处，是故汝应最上护持。过去诸佛已曾教汝护持养育，未来诸佛亦复如是。并及汝子一切眷属，大臣、军将、夜叉、罗刹，皆令护持。汝有九十一子，乐种种行，或复乘象游行十方，乃至或乘童男童女游行十方，汝亦应令得生敬信，共护阎浮提南方第四分。

“复有鸠槃荼大臣，有多兵众，大有势力，初名跋那拘，次名阿吒薄拘，次名婆吒迦，次名薮支卢摩，次名阿斯目佉，次名跌荼尸帝，次名摩兜罗，次名跌荼泥弥，次名帝利捷吒迦，次名梅檀那，次名伽罗竭陀，次名薮目佉，次名陀提目佉；乃至复有四刹多罗，一名金刚轮，二名金刚焰，三名箭毛，四名风王。彼等皆有大力兵众，乃

至复有鸠槃荼大力军将兄弟九人，一名檀提，二名忧波檀提，三名葛迦赊，四名钵湿，五名摩诃钵湿婆，六名大肚，七名象手，八名十手，九名火手。复有鸠槃荼兄弟三人，一名地行，二名山行，三名左行。复有鸠槃荼兄弟三人，一名黑色，二名朱目，三名云色。复有鸠槃荼兄弟四人，一名无垢，二名无疮疣，三名云天，四名大力。复有鸠槃荼二十六人，初名长耳，次名长乳，次名独象，次名编发，次名十杵，次名十目，次名孤树，次名乐欲，次名大欲，次名木师，次名爱子，次名三鸠槃荼子，次名一切巷，次名杂色，次名彩眼，次名满瓶，次名瓶眼，次名无病，次名刍叉，次名黄发，次名多荼叉，次名叉叉，次名缕縆，次名啖蝇，次名马水，次名啖髓。斯等鸠槃荼大力军将，有大势力多有兵众，汝亦应令得生敬信，共护阎浮提南方第四分。

“复有十六诸天神王，初名杂止，次名杂发，次名芬陀利，次名妙光，次名火光，次名独闇，次名多闇，次名斑驳，次名月尊，次名众杂，次名夜暮，次名欺陵，次名不欺陵，次名恶执，次名婆苏执，次名他不胜。斯等十六诸天神王，有多兵众大有势力，汝亦应令得生敬信，共护阎浮提南方第四分。

“南方有塔名善安住，过去诸佛、诸仙贤圣曾于彼住见四圣谛。南方有山名曰善现，过去诸佛、诸贤圣众亦于彼住见四圣谛。南方复有三曜、七宿、三天童女，汝亦应令正行于世，共护阎浮提南方第四分。南方复有天、龙、夜叉、罗刹、乾闥婆、鸠槃荼、阿修罗、迦楼罗、紧那罗、摩睺罗伽、饿鬼、毗舍遮、富单那、迦吒富单那住汝南方无所属者，我当于后分布安置随其国土，亦令汝等护持养育。”

尔时，火华毗楼勒义天王白佛言：“世尊，如是，如是。大德婆伽婆，去诸过佛已曾嘱我教令安置，亦为过去诸天神仙教我安置护持阎浮提南方第四分，如今世尊亦教安置，我当顶受护持养育。我及眷属大臣军将亦复护持养育佛法，乃至三恶趣皆悉休息，于三善道增长盈满。”

尔时，火华毗楼勒义天王眷属，刹多罗等大臣辅佐鸠槃荼大将、男妇妇女、童男童女，彼等皆悉从座而起，向佛合掌顶礼佛足，而白佛言：“世尊，我等今于导师世尊得生深信，尊重敬仰得未曾有；法宝、僧宝亦生深信，尊重敬仰得未曾有。大德婆伽婆，我等从今精勤养育护持阎浮提南方第四分，乃至令佛正法久住炽然，恶道休息善道盈满。”

佛言：“善哉！善哉！妙丈夫。”乃至一切诸来大众，天、人、乾闥婆咸共赞言：“善哉！善哉！”

尔时，世尊欲重明此义，而说偈言：

“佛告毗楼勒， 大臣鸠槃荼：

过去佛教汝， 护持于南方，

古昔诸天仙，亦教汝安置，
炽然正法朋，遮障恶众生。
导师今告汝，令我法炽然，
当受我寄付，如来正法眼。
炽然三宝种，三种精气增，
饮食众味药，膏泽丰可乐。
住法诸比丘，乃至无积聚，
应当护养育，令无所乏少。
亦护彼施主，财命乐富慧，
五事常饶益，悉令得增长。
正行诸宿曜，星辰岁四时，
令竭三恶趣，善道皆盈满。”

毗楼博义天王品第十三

尔时，佛告栴檀华毗楼博义天王言：“妙丈夫，此四天下阎浮提界西方第四分，汝应护持。何以故？此阎浮提，诸佛兴处，是故汝应最上护持。过去诸佛已曾教汝护持养育，未来诸佛亦复如是。并及汝子、大臣眷属亦令护持。汝有九十一子，乐种种行如上所说。复有诸龙大臣兵众有大势力，一名师子，二名师子发，三名自在，四名黄头，五名黄鼬，六名赤目，七名瞿耽摩，八名山水。乃至复有四刹多罗，一名鸯瞿，二名崩瞿，三名儻伽叉，四名闍叉附。乃至复有诸龙军将，有大势力常将兵众，初名难陀，次名忧波难陀，次名善现，次名阿那婆达多，次名和修吉，次名善建立，次名天齿，次名得叉迦，次名婆楼那，次名婆娑婆，次名阿楼那，次名侯楼茶，次名冰伽罗，次名生伽罗，次名功德，次名妙德，次名功德满，次名虚妄行，次名波赊，次名摩诃波赊，次名禅那，次名宅施，次名海施，次名阎浮施，次名睽婆罗，次名善臂，次名苏摩那，次名日光，次名月光，次名月眼，次名栴檀，次名妙贤，次名妙耳，次名质多罗，次名施色，次名頽支，次名牟真邻陀，次名蓝净罗，次名迦那迦，次名象耳，次名般筹迦，次名声佉，次名伊罗钵，次名阿波罗迦，次名那罗达，次名忧波那罗，次名尸利迦，次名庵罗提他，次名婆稚子，次名提到罗吒，次名瞻波，次名瞿昙摩，次名般遮梨，次名项力，次名黠婆利，次名毗摩，次名山臂，次名恒伽，次名辛头，次名博义，次名私陀斯，如是等六十一龙，皆是汝之大力军将。乃至西方十六天神，亦有兵众有大势力，初名萨沙婆帝，次名西赊婆帝，次名耶输陀罗，次名耶赊跋帝，次名郁伽摩，次名第一善，次名善觉，次名善起，次名闍陀，次名毗闍陀，次名离垢，次名毗楼茶，次名牛仙，次名瞻婆迦，次名优楼伽，次名迦迦吒誓。乃至西方有塔名曰极雨，乃至有山名曰

香风，乃至有山名众色重阁，乃至西方复有三曜、七宿、三天童女，皆令正行，共护阎浮提西方第四分。西方所有诸天、龙、鬼乃至迦吒富单那等住汝西方无所属者，我当于后分布安置，随其国土亦令汝等护持养育。”

尔时，栴檀华毗楼博义天王，作如是言：“大德婆伽婆，过去诸佛已曾如是教我安置护持养育此阎浮提西方第四分，如今世尊教我安置等无有异。我今佛前深受教敕护持西方诸佛正法，乃至善道皆令盈满。”

尔时，毗楼博义复于佛前，而说偈言：

“毗楼博义王， 共诸龙臣言：
过去佛天仙， 敕我护西方，
并诸龙军众， 遮障恶众生。
斗乱诸病疫， 汝应令休息，
增长三精气， 及护我法眼。
住法诸比丘， 少欲无积聚，
护持增寿命， 及色力乐瞻。
如是天人师， 今悉向我说！
深信佛所敕， 我今顶戴受。
护持三宝种， 炽然正法眼，
住法诸声闻， 我等当护持。
共诸龙军众， 除诸不善法，
遮障恶众生， 令彼悉休息。
华果药丰饶， 膏泽众味具，
令诸刹利王， 敬信佛正法。
毗舍及首陀， 龙神夜叉众，
我令彼得信， 深敬佛所说。
护持在闲林， 少欲无积聚，
正行诸宿曜， 星辰岁四时，
令竭三恶趣， 善道皆盈满。”

毗沙门天王品第十四

尔时，佛告拘鞞罗毗沙门天王言：“妙丈夫，此四天下阎浮提界北方第四分，汝应护持。何以故？此阎浮提，诸佛兴处，是故汝应最上护持。过去诸佛已曾教汝护持养育，未来诸佛亦复如是。并及汝子、大臣眷属、夜叉、毗舍遮皆令护持。汝有九十一子，乐种种行，彼或乘象游行十方，或复乘马、或复乘驼、或乘特牛、或乘羖羊、或乘白羊、或复乘龙、或复乘鸟、或乘男夫、或乘妇女、或乘童男、或

乘童女游行十方，汝亦应令得生敬信，共护阎浮提北方第四分。

“复有夜叉大臣大力军将，初名无病，次名吉祥，次名安隐，次名成利，次名他不胜，次名满愿，次名丰饶，次名欢喜，次名水尽，次名南浮沙度，次名电光，次名火光，次名水眼，次名郁伽，次名好耳，次名摄受。斯等夜叉是汝大臣大力军将，应令彼等得生敬信，共护阎浮提北方第四分。

“复有四大刹多罗，一名长目，二名长面，三名坐瓮，四名华杖。斯等刹多罗皆是汝之大力军将，汝亦应令得生敬信，共护阎浮提北方第四分。

“复有夜叉大力军将，常将兵众，初名因陀罗，次名苏摩，次名婆楼那，次名婆闍波帝，次名婆罗波闍，次名伊奢那，次名胜欲，次名栴檀，次名尼干吒，次名尼干吒迦，次名婆稚，次名摩尼遮罗，次名波尼迦，次名忧般遮迦，次名娑陀只利，次名奚摩跋多，次名萨他，次名波罗末檀那，次名干竹迦，次名迦摩多卑，次名富楼那，次名佉陀利，次名瞿波利，次名只呵知，次名阿吒迦，次名阿吒薄拘，次名那罗提，次名那罗迦担，次名禅那梨沙婆，次名质多罗迦，次名质多斯那，次名施婆利，次名涅伽多，次名长牟，次名摩那吒，次名摩那婆，次名臬何度，次名毗卢遮那，次名伏龙，次名毗摩，次名护门，次名多摩那，次名能迷惑，次名取意，次名子男婆，次名伽吒僧叉，次名钵干沓婆，次名明月，次名阿婆娑婆，次名三牟达罗，次名牛仙。斯等五十夜叉军将，皆是汝之大力军众受汝教敕，汝亦应令得生敬信，共护阎浮提北方第四分。

“复有十六诸天神王，初名伊茶，次名鞞茶，次名那茶，次名天莲华，次名钵陀摩跋帝，次名黠干絺多，次名摩诃军闍，次名阿奚多，次名奚多奢耶，次名毗楼稚，次名忧波罗，次名月，次名如月，次名婆楼那，次名三波帝。斯等十六诸天神王亦有大力有多军众，汝亦应令得生敬信，共护阎浮提北方第四分。

“北方有塔名尸佉利，过去诸佛、诸仙贤圣依彼住处见四圣谛。北方有山名曰申渠，日月天子所居住处，及大神力名称鬼神所居住处。汝以彼等大精进力，共护阎浮提北方第四分。北方复有三曜、七宿、三天童女，汝亦应令正行于世，共护阎浮提北方第四分。北方所有天、龙、夜叉、罗刹、鸠槃荼、饿鬼、毗舍遮、富单那、迦吒富单那，住汝北方无所属者，我当于后分布安置，随其国土亦令汝等护持养育。”

尔时，拘毗罗毗沙门天王白佛言：“世尊，如是，如是。大德婆伽婆，过去诸佛已曾教我令作护持安置养育此阎浮提北方第四分，我今如是深受佛教护持阎浮提北方诸佛法。”

尔时，拘毗罗毗沙门王儿及大臣，刹多罗等诸夜叉将，十六天神一切眷属、男夫妇女、童男童女皆从座起，合掌向佛，顶礼佛足而白佛言：“大德婆伽婆，我及眷属，今于佛所得生深信，尊重敬仰得未

曾有；法宝、僧宝亦生深信，尊重敬仰得未曾有。大德婆伽婆，我等从今，诚心殷勤摄伏恶心诸众生故，勤加护持此阎浮提北方第四分。我今亦与上首毗沙门王，同心护持此阎浮提北方诸佛法。”

尔时，拘毗罗毗沙门王复白佛言：“世尊，若佛弟子比丘、比丘尼、优婆塞、优婆夷，于佛正法三业相应者，专心听法如说修行学持戒者，若余众生于三宝所得敬信者，供佛施僧勤修福业者，我与眷属皆共同心受佛寄付为作安置护持养育。若佛弟子依阿兰若住法顺法勤加修行，如犀牛角独而无侣住于闲林，我当倍复护持养育。若有众生，于彼闲林世尊所有修行声闻勤修供养无所乏者，我当方便护持养育五事饶益。何谓为五？一者、寿命增长，二者、财增长，三者、无病增长，四者、乐增长，五者、称誉增长。我以如是护持养育令具足故，三宝炽然，佛种久住。若有众生，于己境界贪求聚积无有厌足，不观后世可怖畏事，瞋恶躁急无有慈愍，触恼刹利种种兵仗共相战斗，屠割斫刺，捕猎杀害，牢狱系闭，謫罚摈黜，杀生偷盗乃至邪见，而与刹利作恶因缘；及婆罗门、毗舍、首陀、男夫妇女、童男童女乃至畜生共相触恼作恶因缘，令彼众生迭相杀害种种劫夺，无量恶行因缘集会。我当遮障诸恶众生，令住慈心、悲心、信心、戒心、舍心、闻心、慧心，令离不善安置善处，遮诸斗争、疫病饥馑、非时风雨及恶霜雹，亦复遮障一切恶象、师子、虎、狼、恶牛、恶马、熊、黑、鹰、鹞、蚊虻蝇蚤，亦令一切华叶果药五谷滋茂，众香美味好色腻泽，皆悉可乐常令丰足。地味精气、众生味精气、法醍醐味精气，如是精气增长，世间所有枯燥粗涩恶色无味臭秽华叶果药不可爱乐不中用物，我令彼等皆悉隐没。如是地味精气、众生味精气、法醍醐味精气增长久住；以地味精气、众生味精气、法醍醐味精气增长久住故，如是佛法增长久住；以是佛法增长久住故，一切众生生死烦恼长夜休息，得入无畏大涅槃城。以是因缘，我共军将大臣眷属，护持阎浮提北方第四分，令佛法眼久住炽然；乃至亦令世尊弟子无所积聚住于闲林，如犀牛角独而无侣，三业相应如救头燃，不相调弄欺陵斗争，于诸众生生慈心、悲心、愍心、信心、戒心、舍心、精进心、念心、定心、慧心。

“大德婆伽婆，我等如是令佛法眼久住世间，于三宝种炽然久住，亦令世间一切众生不可乐事苦触等物悉令休息，遮恶众生建立善法，息三恶趣增三善道。若复世尊声闻弟子，弃舍正念、弃舍思惟、弃舍正观、弃舍读诵及为他说，弃舍正法所修行事，营综家业种种生具商贾，种植园林果树，畜养奴婢、象、马、骆驼、牛、羊、鸡、犬、猪豚、獐鹿、鹰、鹞、孔雀，勤修王家所有事业，城邑事、聚落事、家业事，与俗交通，驱使走役，通致信命，贮积钱财、饮食、衣服、稻粟缁帛，于他财物亦复守护藏惜积聚，或复咒术或以书画教他自活；若如是者，我等不能护持养育。我今终不于三世佛所而故妄语犯染污罪！”

佛言：“善哉！善哉！妙丈夫，我于无量阿僧祇劫所修法眼善说正法毗尼正戒，如是勤加护持养育令久住者，则为供养三世诸佛。汝等如是则得寿命增长、财增长、力增长、乐增长、朋党增长、眷属增长、宫殿增长、信增长、戒增长、闻增长、精进增长、舍增长、念增长、慧增长；以是增长因缘力故，便能速满六波罗蜜成等正觉，犹如我今得成无上自然法王。我今复以佛之正法，付嘱阎浮提诸大国王，于我灭后护持养育。若有比丘离诸惭愧污染我法，私立田业、畜养奴婢乃至畜生而作种种家业生活；如是比丘，阎浮提界诸大国王，应当遮障呵责摈黜令离诸过，护持养育令行正法。”

尔时，一切诸来大众，天、人、乾闥婆、阿修罗、人非人等，咸皆赞言：“善哉！善哉！妙丈夫，汝为佛法得久住故勤加护持。”

尔时，世尊欲重明此义，而说偈言：

“佛告毗沙门， 及千夜叉众：
‘汝等皆应共， 护持于北方，
住法诸比丘， 惭愧声闻等。
汝受我寄付， 勤加护养育，
过去尊导师， 敕汝令安置，
护持佛正法， 遮障恶众生，
增长三精气， 息诸斗诤讼，
相应诸声闻， 亦当勤护之。’
毗沙门王言：‘如是佛正法，
寄付我顶受， 勤加护养育，
炽然正法眼， 增长三精气，
遮障恶众生， 勤断诸斗讼。
无积聚声闻， 少欲知足者，
能离诸恶业， 我亦勤护持。
若有能供养， 修行诸声闻，
当以五事增， 饶益于彼等。
腻泽香美味， 华果众药草，
为令彼受用， 我悉令丰饶。
三种味精气， 彼得增长故，
我等勤护持， 佛法久炽然。’
我复令国王， 剃发无惭者，
彼等王应遮， 大众咸皆赞。”

咒轮护持品第十五

尔时，世尊复告四天王言：“我今与汝大力雄猛不可害轮大明咒

句。如是咒句，过去亿百千万诸佛之所演说。汝若持此大力雄猛不可害轮大明咒句，一切诸魔及魔眷属尚不敢近，何能触娆？”

尔时，世尊作是语已，即说咒曰：

“哆经夜他(一) 阿婆夜陀提(二) 毗喽陀毗羯啰咩(三) 阿那毗[口+梨](四) 阿那逻移(五) 阿毗勤泥(六) 阿拘毗移(七) 阿咒帝(八) 输婆提市(九) 提阁婆底(十) 摩诃提帝(十一) 忧簸舍咩(十二) 迷哆啰伽啼(十三) 阿婆喽[口+兮](十四) 悉达涕(十五) 頞他悉地(十六) 舒婆谟遮(十七) 婆蒲娑婆帝(十八) 娑摩羯啰舒祇(十九) 阿[口]哆[口+梨](二十) 达摩毗诃[口+梨](二十一) 哆他多娑摩底(二十二) 佛陀地虱他泥(二十三) 尸罗毗首地(二十四) 阿[少/(兔)]羯啰咩(二十五) 阿僧诃喇移(二十六) 复多俱致(二十七) 阿毗市聂帝(二十八) 苏婆诃(二十九)。

“诸仁者，此是汝等四大天王，大力雄猛不可害轮大明咒句。如是咒句，过去亿百千万诸佛之所演说。汝若持此大力雄猛不可害轮大明咒句，一切诸魔及魔眷属尚不敢近，何能触娆？”

尔时，所有一切诸魔及魔眷属皆悉惊怖无有势力，各各羞惭向佛合掌。

尔时，世尊复告毗沙门天王言：“我今与汝北方大力雄猛不可害轮大明咒句。汝以持此大力雄猛不可害轮大明咒故，于己眷属及他眷属，天、龙、夜叉、罗刹、阿修罗、乾闥婆、鸠槃荼、饿鬼、毗舍遮、富单那、迦吒富单那尚不敢近，何能触娆？汝于一切恶鬼神所，当得大力雄猛不可害轮。”

尔时，世尊作是语已，即说咒曰：

“哆经夜他(一) 勿檀泥(二) 钵罗勿檀泥(三) 勿达那跋帝(四) 渠唎乾陀利(五) 朱唎(六) 栴荼唎(七) 頞唎毗闍耶 未提(八) 驱驱勿檀泥(九) 跋罗吠罗(十) 勿檀泥(十一) 苏婆诃(十二)。

“汝以此咒，北方当得大力雄猛不可害轮，于己眷属及他眷属，尚不敢近，何能触娆？”

尔时，世尊复告提头赖吒天王言：“我今与汝东方大力雄猛大明咒句，乃至当得不可害轮。”

尔时，世尊作是语已，即说咒曰：

“哆经夜他(一) 丘喽闍帝(二) 勿喽闍帝(三) 钵罗帝虱虱(丑芥切四) 摩诃萨唎(五) 崎啰跋帝(六) 郁那婆帝(七) 伽楼婆帝(八) 求喽鞞(九) 勿喽鞞(十) 求喽勿喽鞞(十一) 求喽求喽(十二) 勿喽乾提(十三) 勿喽闍帝(十四) 阿罗娑婆帝(十五) 摩罗娑

婆帝(十六) 黠泥迷泥(十七) 多豆婆南(十八) 多豆婆南(十九) 苏婆诃(二十)。

“汝以此咒，东方当得大力雄猛不可害轮，于己眷属及他眷属，尚不敢近，何能触娆？”

尔时，世尊复告毗楼勒义天王言：“我今与汝南方大力雄猛大明咒句，乃至当得不可害轮。”

尔时，世尊作是语已，即说咒曰：

“哆经夜他(一) 耆唎耆唎(二) 耆卢那跋帝(三) [口+兮]泥(四) 诃膩泥(五) 诃泥那跋帝(六) 群筹群筹(七) 苏婆诃(八)。

“汝以此咒，南方当得大力雄猛不可害轮，于己眷属及他眷属，尚不敢近，何能触娆？”

尔时，世尊复告毗楼博义天王言：“我当与汝西方大力雄猛不可害轮大明咒句。汝以持此大力雄猛不可害轮大明咒故，于己眷属及他眷属，诸龙、夜叉、罗刹、阿修罗、乾闥婆、鸠槃荼、饿鬼、毗舍遮、富单那、迦吒富单那等，尚不敢近，何能触娆？”

尔时，世尊作是语已，即说咒曰：

“哆经夜他(一) 阿毗婆唎泥(二) 婆唎拏跋帝(三) 勿啰竭啰跋帝(四) 婆唎泥(五) 婆唎拏耶世(六) 忧受婆罗(七) 钵啰受娑[口+梨](八) 膩受婆隶(九) 摩诃受婆隶(十) 受婆逻(十一) 摩身达啰舍(十二) 娑闍鞞(十三) 萨婆哆啰毗唎帝(十四) 讫利多耶世失盍(丑芥切十五) 苏婆诃(十六)。

“汝以此咒，西方当得大力雄猛不可害轮，于己眷属及他眷属，尚不敢近，何能触娆？”

尔时，世尊复告四大天王，而说偈言：

“诸山有称誉， 自在者化作，
极两鸡罗娑， 香仙佉罗担，
风火及雪山， 日月所居处，
北方常护持， 世尊真妙法。
般支般遮罗， 讫尼伽罗度，
彼等常护持， 四维佛正法。
地神大地神， 黑色大黑色，
罗睺毗摩质， 须质波罗陀，
婆稚睽婆利， 及牟真邻陀，
共护于下方， 世尊真妙法。”

大方等大集月藏经卷第八

忍辱品第十六

尔时，有一阿修罗王，名曰火味，在彼会中，从座而起，举手而指罗睺罗阿修罗王，向四百亿阿修罗王，作如是言：“此罗睺罗阿修罗王，是我等辈尊重师长，能以福慧益诸众生，自在勇猛诸阿修罗中最胜第一。罗睺罗王及与我等，皆为瞿昙之所欺陵，为令佛法得炽然故，付嘱余众而不见与故，令我等受大耻辱。”

次复有一阿修罗王，名镇星毗摩，作如是言：“我等昔来，各各于己四天下中，与释提桓因共相齐等，今如野干逐师子后，我等宁可舍此凡下还于本国城邑宫殿。又我宁死，何能忍受如是陵辱？此是大怨，令我等辈生大忧苦。”

时，罗睺罗阿修罗王，作如是言：“众生宁可最胜人边受其骂辱，不于凡下而得赞叹。何以故？令多好人所轻贱故。此天人师，于三界中最胜自在，住于彼岸，善知时宜，随其所应故如是也。”

尔时，月藏菩萨摩訶萨，合掌向佛，一心敬礼而作是言：“导师当观此罗睺罗阿修罗王，具有如是坚慧胜慧，安住坚信，乐善乐忍，持戒清淨，深信三宝，不久速成无上导师。唯愿世尊，炽然法故应当与此罗睺罗分。”

尔时，世尊告四百亿阿修罗王，而说偈言：

“汝先具诸德， 各已住净信，
如是昔诸佛， 嘱法与汝等。
我今以此法， 悉亦付嘱汝，
当以诸方便， 护持我法眼。
汝等作是福， 增满大智海，
各于自境界， 守护我正法。
住法常乐忍， 护持定根者，
汝等若如是， 咸供三世佛。
常诣于善趣， 命智果具足，
于世流转时， 得离诸恶道。
诸求胜报者， 当炽我法眼，
各于己国土， 遮障恶众生。”

尔时，诸阿修罗悉起合掌，咸作是言：

“我等阿修罗， 各各于己国，
休息一切恶， 炽然世尊法。
习行法施者， 于恶作护持，

增长三精气，离恶住善道。”

尔时，诸来一切大众，诸天及人、乾闥婆等，咸皆叹诸阿修罗言：“善哉！善哉！”

尔时，世尊亦复叹彼四百亿阿修罗王及诸眷属，作如是言：“善哉！善哉！妙丈夫辈，汝能如是，是名供养三世诸佛。当勤护持养育我法，佛之法眼而得炽然，令三宝种久不断绝。是故我今将于汝等及诸眷属，付嘱十方一切诸佛现在住世未涅槃者，及付贤劫一切菩萨摩訶萨。汝等常与彼诸阿修罗生生相值，汝当于此贤劫之中得成正觉出于世时，当与汝等作上施主，护持正法，持戒第一，得禅三昧，具足忍力。如此贤劫最后如来，名曰卢遮应正遍知，出现于世，尔时卢遮当授彼等阿耨多罗三藐三菩提记，便得速满六波罗蜜，不久当为无上法王，得入无畏涅槃大城。如是若复有诸众生，若现在世及未来世，于我法中出家修道三业相应；若复放人出家修道；若复有能勤加护持养育供给我诸声闻比丘、比丘尼、优婆塞、优婆夷，令三宝种得不断绝；若有能修檀波罗蜜乃至般若波罗蜜；若有营造塔庙形像及以修故，种种舍施供养供给四方众僧，置立寺舍及以修故；又复于彼四方僧寺，舍施种种衣服卧具器物所须，及施田宅、财宝、园林、僮仆给使乃至畜生；若复见他舍施诸物还追夺者，以力遮护；若复施我声闻弟子衣服、饮食、卧具、汤药一切所须；我之所有声闻弟子，或有因缘遭遇苦恼，若以自力，若假他力，方便令脱。我以如是诸众生等，悉皆付嘱十方现在一切诸佛，及付贤劫所有菩萨摩訶萨等，令其摄受生得相值。若彼贤劫诸佛出世，是诸众生，于彼佛所作大施主，守护正法，持戒第一，得禅三昧，具足忍力。如此贤劫最后如来出现于世，于时彼佛当授彼等阿耨多罗三藐三菩提记，便得速满六波罗蜜，不久当为无上法王，得入无畏涅槃大城。”

尔时，复有无量亿百千众生，悲泪满目，瞻仰如来作如是言：“我今观诸大悲世尊所有解脱，出于三界一切诸道生死牢狱，舍于渴爱离世八法及我我所、憍慢烦恼，离于一切十二有支，知一切法犹如虚空住不颠倒，常于众生起大悲心。然诸如来为众生故，令此法眼及三宝种于此娑婆久住不灭故加护持。如来今复以诸天、龙、夜叉、罗刹、乾闥婆、紧那罗、迦楼罗、摩睺罗伽、鸠槃荼、饿鬼、毗舍遮、富单那、迦吒富单那、人非人等，寄付诸佛及诸菩萨。彼诸众生现在、未来，若布施、若持戒、若修定慧，于此佛法精勤相应，寄付诸佛及诸菩萨摩訶萨等，为满六波罗蜜令得阿耨多罗三藐三菩提故。若有众生厌苦求乐，无不于现在世及未来世方便精勤护持养育炽然法眼，绍三宝种而能得之。”

佛言：“如是，如是，如汝所言。若有爱已厌苦求乐，应当护持诸佛正法，从此当得无量福报。若有众生，为我出家，剃除须发，被服袈裟，设不持戒，彼等悉已为涅槃印之所印也。若复出家不持戒

者，有以非法而作恼乱骂辱毁谤，以手刀杖打缚斫截，若夺衣钵及夺种种资生具者，是人则坏三世诸佛真实报身，则挑一切天人眼目，是人为欲隐没诸佛所有正法三宝种故，令诸天人不得利益堕地狱故，为三恶道增长盈满故。何以故？我昔为于一切众生修菩萨行，为此法眼于诸众生起大悲心，舍己身血犹如大海，与诸乞者舍头犹如毗福罗山，眼耳亦尔，舍鼻犹如百千突卢那，舍舌犹如一突卢那，舍手、舍脚各皆亦如毗福罗山，舍皮可覆一阎浮提，亦舍无量象马车牛、奴婢妻子及以王位与诸乞者，亦复舍于无量国土、城邑宫殿、村落舍宅、寺庙园林、衣服、卧具、山泽林藪与诸乞者，于诸佛所受持禁戒而无缺犯，一一佛所无量供养，一一佛所禀受无量那由他百千法门，受持读诵护持戒行，善修三昧陀罗尼忍。又我亦曾供养恭敬无量无边菩萨摩訶萨，供养恭敬无量缘觉，供养无量佛声闻众，供养无量到果声闻，供养无量外道仙人，供养无量父母师长，供养无量病苦之者，亦于无量苦逼众生无救护者为作救护，无归依者为作归依，无趣向者为作趣向，令其安住及以供养。我已无量长远劫数修诸苦行，持戒威仪，梵行具足。

“诸仁者，我已如是于彼三大阿僧祇劫悲愍一切苦众生故，发大坚固勇猛之心，久修无上菩提之行。我今于此盲冥世间无大导师俭法之时，极恶增长白法尽时，五无间业、诽谤正法、毁谤贤圣与不善根相应众生，瞋恶穢涩，离诸羞耻，无有慈愍，不观后世可怖畏事，于如是等诸众生中，发心愿成阿耨多罗三藐三菩提。复于一切净佛国土所弃众生中降大法雨，复愿与彼诸众生等除如金刚坚固烦恼，彼等众生随其所欲于三乘菩提令不退转。复愿救度三恶众生安置善道及涅槃乐，与彼众生作正法眼，加护令得久住于世长夜炽然。彼诸众生于我法中出家剃发，被服袈裟，不持禁戒，若有供养彼等人者，如是众生亦得大果，何况为我出家持戒、住法相应，供养侍者即得无量阿僧祇大福德聚！何况复能种种供养我诸声闻圣弟子众，而当不得无量不可说阿僧祇大福德聚？是故我今于如是等诸众生中，于阿耨多罗三藐三菩提而成正觉，一切世间天人中最以大悲故，建立一切诸声闻众为上福田，所谓得向八大丈夫。以是缘故，所有众生于现在世及未来世应当深信佛法众僧，彼诸众生于天人中当得受于胜妙果报，不久当得入无畏城。如是乃至供养一人为我出家及有依我剃除须发、著袈裟片、不受戒者，供养是人亦得乃至入无畏城。以是缘故我如是说，若复有人为我出家、不持禁戒、剃除须发、著袈裟片，有以非法恼害此者，乃至破坏三世诸佛法身、报身，乃至盈满三恶道故。是故我上如是告汝，若有爱己求乐离苦，应当精勤护持养育炽然法眼，绍隆三宝令不断绝；以是因缘，从此当得无量福报。”

尔时，月藏菩萨摩訶萨复与八千亿那由他百千菩萨摩訶萨，俱从座起，合掌向佛，一心敬礼作如是言：“如是，如是，大德婆伽婆，于我住处月胜世界大师如来日月光，时时称扬娑婆世界释迦牟尼佛，

昔菩萨时大勇猛力，极苦精勤而修诸行：‘如是菩萨以大慈悲大愿力故，今者于彼五浊恶世、无间罪业、诽谤正法、毁谤贤圣、不善相应诸众生中，于阿耨多罗三藐三菩提而成正觉。是佛于彼计断计常、瞋恶粗惨、无有慈愍、归依邪道求种种师、不观后世可怖畏事诸众生中，为之说法。然诸众生勤作方便欲害释迦牟尼如来，或以毒药和食而奉，或以刀杖、恶象、师子、恶牛、恶狗方便欲害，或有谤言而无梵行，或言非男，或言是贼，或言杀生，作如是等种种诽谤。或复有以尘土污坌，或有于大众中粗穢骂詈种种毁谤，或有于佛住处以诸臭秽不净之物污令盈满，或有见者啼泣不喜，或有见者合眼掩面，或有见者背走远逝，有不欲见闭户塞窗。而彼释迦牟尼如来于此一切恶众生中，而能忍受如是无量众恶苦事，亦复于彼诸恶众生不瞋不恼，然复不舍昼夜常于彼诸众生起大悲心，一切时处随逐化之。如少犉牛，初生犉子而未长大，忽然失之，其母尔时求觅而走；如是释迦牟尼如来亦复如是，于诸众生其心平等，以大悲故随逐而走，于三恶道而拔济之，置于善道及涅槃乐。如是大悲相应具足，今此释迦牟尼如来娑婆世界而作佛事。’尔时，于彼一切大众闻此事已，皆生希奇未曾有心欢喜踊跃，于彼佛前作如是言：‘大德婆伽婆，我等亦尔，当以精勤大勇猛力，经于无量阿僧祇劫修菩提行，行檀波罗蜜乃至行般若波罗蜜，如是善巧方便成熟诸众生故而修诸行。犹如释迦牟尼如来作菩萨时久修菩提行，愿于五浊不净世界恶众生中，于阿耨多罗三藐三菩提而成正觉，乃至安置一切众生于诸善道及涅槃乐；我亦如是，愿于五浊不净佛土，于阿耨多罗三藐三菩提而成正觉，如是成熟五无间业，乃至与彼诸不善根相应众生，安置善道及涅槃乐。’彼诸众生即时于日光佛所如上所愿得授记者。”

尔时，会中复有无量恒河沙等菩萨摩訶萨，是于十方为见释迦牟尼佛故，为供养故见大集故而来此者，彼诸菩萨咸同一音作如是言：“大德婆伽婆，我等亦各于己佛土，从彼如来各闻如是称扬世尊，如月藏菩萨之所说也。于彼各有那由他诸菩萨等，悉皆如是发大誓愿，为欲成熟诸众生故而作佛事，亦如月藏菩萨摩訶萨之所说也。”

尔时，复有于彼诸来一切天、龙乃至一切迦吒富单那、人非人等，皆悉合掌作如是言：“我等谢过大悲释迦牟尼如来应正遍知！我等于佛若身口意所作罪过，若于法僧及于世尊一声闻弟子所作罪过，今于佛前诚心忏悔，愿更莫造，坚持禁戒！我等无知，犹如小儿不善所行，唯愿世尊，大悲深愍受我忏悔。我等受寄护持养育世尊法眼，以诸方便令得炽然，护持三宝久住不灭，亦能增长三种精气遮障诸恶，于佛一切声闻弟子，乃至若复不持禁戒、剃除须发、著袈裟片者，作师长想，护持养育与诸所须令无乏少。若复有诸刹利国王，作诸非法恼乱世尊声闻弟子，若以毁骂刀杖打斫，及夺衣钵种种资具，若他给施作留难者，我等令彼自然卒起他方怨敌，及自国土亦令兵

起、病疫饥馑、非时风雨、斗争言讼、诽谤讥调，又令其王不久复当亡失己国。如是若复诸婆罗门、毗舍、首陀、男夫妇女、童男童女，若余天龙乃至迦吒富单那等，于佛所有声闻弟子作其恼乱，若夺精气嘘其身，乃至恶心以眼视之，我等悉共令彼天龙乃至迦吒富单那等，所有诸根缺减丑陋不依处所。我以誓力悉令如是，我等游止及常居处，令彼不复得与我等共住共食，亦复不得同处戏笑，如是摈罚；若有恼乱乃至剃发、被服袈裟、不持戒者亦复如是。若复世尊声闻弟子，乃至无所积聚有慈愍心三业相应，如是时来我等能护令世尊法眼炽然不灭。”

尔时，世尊而赞叹言：“善哉！善哉！诸妙丈夫，汝若如是则于一切所作事中无诸过失。汝等以是受我付嘱护持养育炽然法故，便为供养三世诸佛。若汝勤加护持养育炽然我法，绍三宝种令不断绝，若有为我已出家者，及与未来诸出家者，汝等亦应护持养育，此是汝等阿耨多罗三藐三菩提因。”

尔时，罗睺罗阿修罗王，与无量百千阿修罗等，俱从座起，合掌向佛，一心敬礼作如是言：“大德婆伽婆，我等亦为勤护养育炽然佛法，令三宝种不断绝故，为降伏他故，休息遮障一切诸恶故，令三精气得增长故，复为护持摄受养育世尊所有声闻弟子及正法故，复为利益诸众生故，遮诸罪过，摧诸恶人，降伏诸怨，并除一切邪鬼魍魉，息诸斗争，成就一切诸禾苗稼，令诸恶人得作善友，悉摄一切散乱者故，又令所欲皆得称意故，说大陀罗尼，名曰电光噤缩。”作是语已，即说咒曰：

“多地夜他 啰婆系 啰婆系 啰婆系 曼隹啰系 阿婆隹啰系 跋啰摩啰系 珊都啰系 闍婆勒那啰系 阿婆蜜喇始也啰系 伽那底啰啰系 伽婆叉牧达啰啰系 首牧达啰 首牧达啰 首牧达啰啰系 牟尼婆遮 那啰系 底喇啰且那朋 舍罗系朱勤那 底喇鸣闍牟尼啰系 质啰迦罗 底喇牟尼 啰系 旃达啰□那 头婆啰系 逻苏婆诃。

“大德婆伽婆，此电光噤缩大陀罗尼，悉能饶益一切众生，乃至令诸所欲称意。若有比丘、比丘尼、优婆塞、优婆夷，若余清信善男子、善女人等，能与禅法相应而住，若复营事，若行兰若，若在树下，若在露地，如是人等若能受持读诵念此电光噤缩大陀罗尼，若有阿修罗、阿修罗妇、阿修罗父、阿修罗母及与儿女若阿修罗、左右眷属、男夫妇女及阿修罗给使之人，欲来恼害伺其便者，皆悉不能得彼少分。是阿修罗不复还能入己城邑，令其头破以为七分如阿梨树枝。”

尔时，诸来一切大众咸皆叹言：“善哉！善哉！”

尔时，毗摩质多罗阿修罗王复与百千阿修罗等俱从座起，合掌向

佛，一心敬礼作如是言：“大德婆伽婆，我等亦为护持养育世尊所说正法眼故，乃至增长三种精气故，复为护持摄受养育世尊所有声闻弟子故，又为降伏一切怨家令诸恶人皆生归仰，休息一切所有疾病，伏诸刚强摄诸恶人令作善友具好眷属，令诸种子得生不坏，成熟一切果实苗稼故，说大陀罗尼，名师子游步。”作是语已，即说咒曰：

“多地夜他 涑(娑留切)唎夜 跋啰企(佉帝切) 跋啰企 跋啰企 阿牟尼 阿牟佉牟尼 闍耶毗 闍易 阿婆啰[题-页+巳] 耶闍夷泥 娑诃萨啰叉 佉[口+梨]阿那佉[口+梨]毗耶寐失啰佉唎牟那迦啰 娑佉[口+梨] 阿蜜多受 沙佉[口+梨] 何婆咩 娑斯那 喽系 常伽啰奢咩 颇逻啰娑勿达[口+梨]设闍喽奢摩那企博慈僧伽奢咩 忧波扇多诃唎 苏婆诃。

“大德婆伽婆，此师子游步大陀罗尼，能伏诸怨，乃至成熟一切苗稼。若有比丘乃至清信善女人等与禅相应，乃至露地受持读诵，流布如是师子游步大陀罗尼，若有阿修罗乃至给使，欲来恼害伺其便者，终不能得彼之少分。是等亦复不能还入阿修罗城，令其头破而作七分如阿梨树枝。”

尔时，诸来一切大众亦皆叹言：“善哉！善哉！”

尔时，牟真邻陀阿修罗王，与无量百千阿修罗等俱从座起，合掌向佛，一心敬礼作如是言：“大德婆伽婆，我等亦为护持养育世尊所说正法眼故，乃至增长三种精气故，复为护持摄受养育世尊所有声闻弟子故，说大陀罗尼，名伏诸龙。”作是语已，即说咒曰：

“多地夜他 毗唎沙叉 毗唎沙叉 毗唎沙叉 [系+巢](须凌切)诃毗唎[天+一]至迦 毗唎沙佉那 摸啰曷多诃诃纒 诃纒诃纒伽伽纒涑竭[口+梨] 涑竭[口+梨] 三牟达啰 涑竭[口+梨] 萨婆闍逻 涑竭[口+梨] 悉那婆 涑竭[口+梨] 萨婆浮闍伽 涑竭[口+梨] 诃诃涑竭[口+梨] 悉多婆闍多 涑竭[口+梨] 娑紧柘那 涑竭[口+梨] 阿婆多诃膩夜婆斫 闍毗夜 诃膩夜 军陀闍婆 遮罗斗牟逻 阿佉闍 诃膩夜斗 婆罗斗 毗弥奢 阿膩夜斗 阿衫浮 诃膩夜 苏婆诃。

“大德婆伽婆，此伏诸龙大陀罗尼，悉能休息一切疾病，亦能卷缩打缚一切恶鬼不令为害，能止非时恶风暴雨、诸恶毒气；亦能降伏眼视杀人、众恶龙等，断诸欲著，于诸龙身能作热恼，及能热恼其所住处，热恼其心，热恼其业，热恼所有资生之具。大德婆伽婆，若有比丘乃至清信善女人等与禅相应，乃至露地受持读诵，流布如是降伏诸龙大陀罗尼，若有龙、若龙妇、若龙父、若龙母、若龙儿女、若龙左右男夫妇女、若龙给使，欲来恼害伺其便者，乃至不能得彼少分，令其反得热恼之病，头破七分如阿梨树枝。”

尔时，四天下所有诸龙来在会者皆悉瞋怒，怖彼所来阿修罗城，诸阿修罗令使惊怖不能自安。

尔时，复有娑伽罗龙王，从座而起向诸大龙，合掌作礼而说偈言：

“若有见大圣，是人则除瞋，
离瞋即为圣，应当止悲恼。
忍辱世第一，忍得世间乐，
忍辱离诸怨，忍趣安隐城。
无量阿修罗，恒与我等怨，
但当自容忍，佛常如是说。
由瞋趣恶道，瞋还增长瞋，
以瞋舍朋友，瞋不得解脱。
我等畜生道，恶戒瞋恚故；
若能除瞋慢，得生于人中。
既得人身已，归佛而出家，
修习解脱行，当为大导师。”

尔时，娑伽罗龙王如是说已，一切诸龙皆得忍辱，面色熙怡各坐本处。

尔时，跋持毗卢遮那阿修罗王，复与无量百千阿修罗等俱从座起，合掌向佛，一心敬礼作如是言：“大德婆伽婆，我等亦为护持养育世尊正法，令三宝种不断绝故，勤降伏他一切恶事，及诸恶人皆悉休息，令三精气而得增长故，复为救护摄受养育世尊一切声闻弟子故，说大陀罗尼，名休息众病。”作是语已，即说咒曰：

“多地夜他 摸楞伽摩 摩朋伽摩 阿毗朋伽摩 闍逻朋伽摩
悉多婆毗[口+興](诃朋切)伽摩 跋尸夜毗[口+興]伽摩 餘尼毗[口+興]伽摩 阿舍尼毗[口+興]伽摩 婆诃毗[口+興]伽摩 差(叉梨切)啰毗啰婆利 珊底啰毗恒伽摩 娑伽啰闍逻丘肘 闍逻丘肘毗鞞舍丘肘萨婆卢伽 因地利耶丘肘 悉蜜唎底 毗朋楞舍丘肘 苏婆诃。

“大德婆伽婆，此休息众病大陀罗尼，能除所有一切病苦，息诸毒害一切恶害，亦能降伏一切恶龙，令与世尊声闻弟子奉给所须犹如奴仆。”

尔时，诸来一切龙众、诸大龙王皆悉瞋忿，于虚空中即起大云在阿修罗上，欲声大鼓，欲降大石，雨铁胃、索纆、铍刀、杖刀、面铁口、利齿口、竹口、瓶口如是等形，为欲害诸阿修罗而不能得。

尔时，世尊告诸龙众阿修罗言：“汝等莫斗，应修忍辱。仁者，

若能离于瞋怒成就忍辱，速得十处。何等为十？一者、得作王，王四天下自在轮王；二者、毗楼博义天王；三者、毗楼勒义天王；四者、提头赖吒天王；五者、毗沙门天王；六者、释天王；七者、须夜摩天王；八者、兜率陀天王；九者、化乐天王；十者、他化自在天王。诸仁者，若具足忍，是人速得如是十处忍辱近果。复次，诸仁者，若能深忍转增具足，当知是人复得五处。何等为五？一者、梵众，二者、大梵天王，三者、声闻道果，四者、缘觉，五者、如来应正遍知。诸仁者，若能深忍转增具足，是人速得如是五处。又若具足修行忍者，自然近得一切世间胜妙五欲，资生所须皆悉具足。是人若复至到修行忍功德者得圣安乐。若有非圣凡下之人，犷戾自高，性常瞋怒，于多人所现大瞋恚，当知是人身坏命终堕于地狱。若复僥得出彼地狱，生于下劣畜生道中，作下劣龙身、阿修罗身。若得生人，极下卑贱，诸根残缺，或长诸根、或复无根、或复二根、或复大根，形容丑陋，跛躄背偻，身体臭秽，生旃陀罗、妓作邪媚如是等余下贱之家。若生边地，少衣乏食，下贱家生及无福田，喜作种种不善之处。以是因缘，是人展转复趣地狱、畜生、饿鬼。诸仁者，我今略说如是不忍瞋怒果报。诸仁者，以瞋恚故于生死中增长无量恶不善法，以是因缘，是人转复堕于地狱、畜生、饿鬼。诸仁者，是故我今如是告汝一切诸龙、阿修罗等，汝已长夜各各迭相违反而住。汝等一切今悉于我及与诸来大众之前，各各迭相应生至到忍辱之心，当息久积心瞋怒。若不能忍，必令汝得所不喜果，是故汝等各相容忍。若能不瞋，斗争讥调言讼嫉妒自守而住，汝等如是必定当得胜妙之事，无诸过恶。”

尔时，诸来一切大众咸皆叹言：“善哉！善哉！汝能如是受佛教诫，各各如是迭相忍辱，便得于此四天下中常得胜报，无诸恶事。”

尔时，月藏菩萨摩訶萨复告娑伽罗龙王、罗睺罗阿修罗王、阿那婆查多龙王、毗摩质多罗阿修罗王、婆楼那龙王、牟真邻陀阿修罗王、善住龙王、跋持毗卢遮那阿修罗王，以偈教言：

“汝等得授记， 最胜非余乘，
何故于导师， 而无羞惭耻？
执持筏而溺， 多众随驶流，
如是弃最胜， 一切所厌贱。
凡龙阿修罗， 瞋故被厌贱，
汝等妙丈夫， 悉应舍恚怒。
慈能趣善道， 具受诸欲乐；
慈能离诸难， 及作善知友；
慈能得大智， 及依大明师；
慈能离诸恶， 亦令人乐观；
慈得具大富， 常能施一切；
慈能乐戒定， 复得最胜慧；

慈能得工巧， 善学一切事；
慈于最胜处， 端坐化众生；
慈得胜妙身， 备相端正容；
慈能具妙音， 众人悉乐闻；
慈得善眷属， 梵行无嫉妒；
乐法具惭愧， 明人常随喜；
慈能得官位， 坐于胜座处；
能息众生恶， 安置菩提道；
慈能得十地， 及忍陀罗尼；
慈能成就悲， 舍离于诸著；
慈能得神足， 值遇明导师；
慈能得净土， 清净离烦恼；
慈能降众魔， 到大菩提岸；
慈于天人中， 能转正法轮；
慈能化众生， 置于三乘处；
慈能善说法， 降伏诸外道；
慈以八圣道， 度脱天人等，
安置不死处， 汝等皆能入。
我今与汝等， 慈心陀罗尼，
我于亿佛所， 专心得听闻。
汝以己眷属， 安置慈忍处，
相于起慈心， 长夜得安乐。”

尔时，月藏菩萨摩诃萨说此偈已，即说咒曰：

“多地夜他 迷帝[口+梨] 摩诃迷帝[口+梨] 迷哆啰[跋帝
迷哆啰[题-页+巳] 迷哆啰憩 迷哆罗侯系 迷哆啰[(匕/
矢)+余]] 迷帝[口+梨] 迷帝[口+梨] 迷喽娑鞞訖唎帝 娑诃啰
[题-页+巳] 闍逻风伽徒 薺啰耶诃泥 娑逻浮常耆 初罗叉鞞 那
耶那喽系 俱嚧他车掣 阿摸伽啰尼 啰闍頰寄 吉[(匕/矢)+余]]
奢薺啰 三摩啰泥 浮闍伽 鞞[口+梨]系 奴膩多鞞[口+梨]系
阿啰尸企 刹哆啰豆喽咩 阿求疑耆唎哆啰[题-页+巳] 诃啰悉那
鞞 阿俱卑易 鸯鳩[题-页+巳] 摸叉毗鉢啰易 俱嚧他又易 苏婆
诃。

“诸仁者，此大慈心陀罗尼，我曾往昔于亿佛所从彼得闻，汝等应当于己眷属及他眷属息怒恶心而教授之。”

月藏菩萨摩诃萨说是慈心陀罗尼时，如来叹言：“善哉！善哉！”一切所有诸来大众，诸天、乾闥婆、阿修罗、人非人等，亦皆叹言：“善哉！善哉！”

尔时，诸天各得住于慈心、忍心、无怨心、无言讼心，迭相谢过。天向诸龙，龙向诸天，慈心、忍心、无怨心、无斗争心、无言讼心迭相谢过。诸天向阿修罗，阿修罗向诸天，乃至谢过。诸龙向阿修罗，阿修罗向诸龙，乃至谢过。诸天向夜叉，夜叉向诸天，乃至谢过，悉如上说。如是，如是，天向罗刹、乾闥婆、紧那罗、伽楼罗、摩睺罗伽、鸠槃荼、饿鬼、毗舍遮、富单那、迦吒富单那，住于慈心、忍心、无怨心、无斗争心、无言讼心，乃至迦吒富单那向彼诸天，住于慈心乃至谢过亦如上说。龙向夜叉乃至迦吒富单那住于慈心，乃至谢过；夜叉乃至迦吒富单那向于诸龙，乃至谢过亦皆如是；乃至迦吒富单那向迦吒富单那，住于慈心，乃至谢过亦复如是。彼等皆以大慈心陀罗尼力因缘故，一切天、龙、阿修罗、夜叉、罗刹、乾闥婆、紧那罗、伽楼罗、摩睺罗伽、鸠槃荼、饿鬼、毗舍遮、富单那、迦吒富单那等，迭相住于慈心、忍心、无怨心、无言讼心、无斗争心、离瞋怒心、离嫉妒心。是大慈心陀罗尼力因缘故，一切人类迭相住于慈心、忍心、怜愍心、无怨心、无言讼心、无斗争心，一切畜生若禽兽乃至极下微小诸虫迭相住于慈心、忍心、怜愍心、无怨心、无斗争心、无违反心。

尔时，诸天乃至一切迦吒富单那、人非人等所来大众，合掌向佛恭敬礼拜，同时一音作如是言：“我等皆已承佛威神，迭相谢过。迭相住于慈心、忍心、怜愍心、无怨心、无斗争心，我等一切今当亦复谢过。如来应正遍知，我等昔来于世尊所，若身口意所作罪过，及于法僧若身口意所作罪过，乃至世尊一声闻弟子若身口意所作罪过，乃至若有为佛剃发、著袈裟片、作违反行非法器者若身口意所作罪过，是等诸罪悉于佛前诚心忏悔，修戒威仪。愿佛容恕受我等忏，当令我得住戒威仪！又复我等从今以往，乃至剃发、著袈裟片、作违反行者，及佛声闻弟子所，悉当发心作导师想，护持养育具足供给，一切所须不令乏少。”

佛言：“善哉！善哉！诸妙丈夫成就忍辱，乃至汝等于我佛所若身口意所作罪过，若于法僧所作罪过，乃至我一声闻弟子若身口意所作罪过，乃至为我剃除须发、著袈裟片者若身口意所作罪过，各自深观如是罪业诚心忏悔，皆得除灭不受恶报。如是汝等皆当护持养育我法，乃至为我出家剃发、不持禁戒、著袈裟片者，汝等皆应护持养育。若能护持养育此者，深可赞叹。若我所有声闻弟子持戒具足、多闻舍慧、解脱知见悉具足者，汝等皆应护持养育，彼等自以过去善根福德因缘善得供养。若有众生于未来世无智慧福德，为我剃发、著袈裟片、不受禁戒或受毁犯，于诸善法不得相应，若复护持养育此者得无量福。我与彼等作善导师怜愍利益。何以故？当来之世有恶众生，于三宝中少作善业，若行布施、若复持戒、修诸禅定，以其如是少许善根作诸国王，愚痴无智，无羞惭愧，憍慢炽盛，无有慈愍，不观后世可怖畏事。彼等恼乱我诸所有声闻弟子，打缚骂辱，或复驱使令其

供给，夺其饮食、衣钵、汤药、所需之物、寺舍园田，系闭牢狱，摈徙謫罚，乃至剃发、著袈裟片者亦复如是。及以群臣诸断事者，愚痴无智，离诸羞惭，无有慈愍，不观后世可怖畏事。彼等恼乱我诸声闻，乃至系狱，摈徙謫罚，乃至为我剃除须发、著袈裟片者亦复如是。我今以此诸出家者悉付于汝，勿令彼等饥渴孤独致于命终。”

尔时，上座阿若憍陈如从座而起，作如是言：“大德婆伽婆，彼等刹利，若婆罗门、毗舍、首陀，如是等人恼乱世尊声闻弟子得几许罪？且置持戒，若复为佛剃除须发、著袈裟片、不受禁戒、受而毁犯，恼乱此者得几许罪？”

佛言：“止！止！憍陈如，莫问此事。”

尔时，娑婆世界主大梵天王，即从座起而白佛言：“大德婆伽婆，唯愿说之。大德修伽陀，唯愿说之。若有为佛剃除须发、被服袈裟、不受禁戒、受已毁犯，其刹利王与作恼乱、骂辱打缚者得几许罪？”

佛言：“大梵，我今为汝且略说之。若有人于万亿佛所出其身血，于意云何？是人得罪宁为多不？”

大梵王言：“若人但出一佛身血得无间罪，尚多无量不可算数，堕于阿鼻大地狱中，何况具出万亿诸佛身血者也！终无有能广说彼人罪业果报，唯除如来。”

佛言：“大梵，若有恼乱骂辱打缚为我剃发、著袈裟片、不受禁戒、受而犯者，得罪多彼。何以故？如是我出家剃发、著袈裟片、离不受戒、或受毁犯，是人犹能为诸天天人示涅槃道。是人便已于三宝中心得敬信，胜于一切实道。其人必速能入涅槃，胜于一切实道。唯除在家得忍辱者，是故天人应当供养，何况具能受持禁戒、三业相应！”

“诸仁者，其有一切刹利国王及以群臣诸断事者，如其见有于我法中而出家者，作大罪业、大杀生、大偷盗、大非梵行、大妄语及余不善，如是等类但当如法摈出国土城邑村落，不听在寺，亦复不得同僧事业，利养之物悉不共同。不得鞭打，若鞭打者理所不应；又亦不应口业骂辱，一切不应加其身罪。若故违法而謫罚者，是人便于解脱退落受于下类，远离一切人天善道，必定归趣阿鼻地狱，何况鞭打为佛出家具持戒者！”

尔时，复有一切诸天、一切诸龙，乃至一切迦吒富单那诸来大众，于三宝中得增上信尊重敬仰及希有心，复作是言：“我等一切从今以往，护持养育世尊正法。及与比丘、比丘尼、优婆塞、优婆夷，乃至毁犯佛禁戒者，我等亦当摄受护持。乃至为佛剃除须发、著袈裟片、不受禁戒、无所积聚，我亦于彼作导师想，护持养育供给所需皆令具足。若诸国王见有如是佛出家受持禁戒，乃至为佛剃除须发、著袈裟片、不受禁戒、受而毁犯、无所积聚，如其事缘治其身罪鞭打之者，我等不复护持养育如是国王，舍离彼国；以舍离故，令其国土

而有种种谄诈斗争、疫病饥馑、刀兵俱起，非时风雨、亢旱毒热伤害苗稼。又若我等舍离彼国，当勤方便令其国土所有世尊声闻弟子悉向他国，使其国土空无福田。若有世尊声闻弟子，乃至但著袈裟片者，若有宰官鞭打彼等，其刹利王不遮护者，我等亦当出其国土，复作是言：‘我等今者一切相与，随所堪能，勤作种种供养世尊。’”

尔时，诸天及与诸龙，乃至一切迦吒富单那等，俱时发心因缘力故，即时于此四天下中，所有诸山皆悉变成七宝之山，为欲供养世尊故耳！所有树林枝叶华果，一切亦皆变成七宝。于其华果复出种种胜妙供具，及五音作乐而为供养。四天下中所有依地众药草苗，一切亦皆变成七宝而为供养。此四天下所有地界，一切变成青琉璃地而为供养。彼诸天龙乃至迦吒富单那，四天下中上尽欲界一切所有，各随力能而作供养。有雨种种宝、种种华、种种衣服、种种瓔珞、种种天妙华盖幢幡而为供养，有持种种天妙幢幡、宝盖、金缕、真珠、瓔珞、摩尼宝器而为供养，有以种种琴瑟箜篌、箫笛齐鼓、鼗鼓雷鼓以为音乐供养世尊，有以种种歌乐音声而为供养，有雨种种音乐之器而为供养，复以种种庄严国土而为供养。诸四天下所依住者，人非人等，乃至一切大小诸虫皆悉见闻。彼等一切苦受休息皆生乐受，随有种种身触觉知得乐充足，及得希奇未曾有心，于三宝中深得敬信。

尔时，世尊大悲怜愍一切众生，为成熟故：“彼等一切音声语言，皆是贤圣之所加被。如是一切人非人等所有语言，及从宝中所出音声，枝叶华果、琴瑟箜篌、箫笛齐鼓、鼗鼓雷鼓所出音声，一切皆是圣力所加。彼等一切皆得希奇未曾有声建立所加，所谓色色空、受受空、想想空、行行空、识识空，如是眼入眼入空、耳鼻舌身入耳鼻舌身入空、意入意入空，如是色入色入空、声香味触入声香味触入空、法入法入空，如是眼界眼界空乃至意识界意识界空。如是知身离欲净，知一切法离欲净，知一切法界离欲相，知一切法如如。如是知者，是人则为于空不动，是人堪能拔济一切众生想，于一切行令得解脱于众生想、色想、受想、行识想、眼入想乃至意识界想，是人如是堪能安置一切众生于三乘无为界。

“行者云何能开示简择彼等诸法？所谓修内空、外空、内外空、空空、大空、第一义空、有为空、无为空、毕竟空、无始空、散空、性空、自相空、一切法空、不可得空、无法空、有法空、无法有法空，复有法法相空、无法无法相空、自法自法相空、他法他法相空。若能如是修习简择此诸法空，彼人堪能乃至安置一切众生于三乘无为界。彼等行者以何法门得知内空乃至无法有法空？所谓还以空解脱门，能修简择内外等法。何者名为内外法？内法者，所谓眼、耳、鼻、舌、身、意。行者如实知眼眼空，非积聚不可坏不可取。何以故？此诸法性尔。乃至知意意空，非积聚不可坏不可取。何以故？诸法性尔。是名内空，如是行者应如实知。外法者，所谓色、声、香、味、触、法。行者如实知色色空乃至法法空，非积聚不可坏不可取。

何以故？诸法性尔。是名外空，如是行者应如实知。何者名为内外空？内外法者，谓内六入、外六入。行者如实知内外入空，非积聚不可坏不可取。何以故？诸法性尔。是名内外空，如是行者应如实知。何者名为空空？空者，一切诸法空。以彼空故空，非积聚不可坏不可取。何以故？诸法性尔。是名空空，如是行者应如实知。何者名为大空？东方东方空乃至四维空，非积聚不可坏不可取。何以故？诸法性尔。是名大空，如是行者应如实知。何者名为第一义空？第一义者，所谓涅槃。如是涅槃以涅槃故空，非积聚不可坏不可取。何以故？诸法性尔。是名第一义空，如是行者应如实知。何者名为有为空？有为法名欲界、色界、无色界，欲界、色界、无色界空，非积聚不可坏不可取。何以故？诸法性尔。是名有为空，如是行者应如实知。何者名为无为空？无生无灭不住不异，是名无为。无为以无为故空，非积聚不可坏不可取。何以故？诸法性尔。是名无为空，如是行者应如实知。何者名为毕竟空？毕竟名诸法至竟不可得，非积聚不可坏不可取。何以故？诸法性尔。是名毕竟空，如是行者应如实知。何者名为无始空？来去不可得，非积聚不可坏不可取。何以故？诸法性尔。是名无始空，如是行者应如实知。何者名为散空？无所取舍，非积聚不可坏不可取。何以故？诸法性尔。是名散空，如是行者应如实知。何者名为性空？一切有为无为法性，非声闻作、非缘觉作、非如来作，此法性空，非积聚不可坏不可取。何以故？诸法性尔。是名性空，如是行者应如实知。何者名为自相空？恼坏是色相，能受是受相，取相是想相，造作是行相，了知是识相，如是等有为无为一切法自相自相空，非积聚不可坏不可取。何以故？诸法性尔。是名自相空，如是行者应如实知。何者名为一切法空？一切法者，所谓色、受、想、行、识，眼乃至意，色乃至法，眼色因缘生识乃至意法因缘生识，此有为无为诸法，是名一切法。彼诸法空，非积聚不可坏不可取。何以故？诸法性尔。是名一切法空，如是行者应如实知。何者名为不可得空？一切法不可得，非积聚不可坏不可取。何以故？诸法性尔。是名不可得空，如是行者应如实知。何者名为无法空？一切无物不可得，非积聚不可坏不可取。何以故？诸法性尔。是名无法空，如是行者应如实知。何者名为有法空？于和合中无物，非积聚不可坏不可取。何以故？诸法性尔。是名有法空，如是行者应如实知。何者名为无法有法空？无物无物空，有物有物空，非积聚不可坏不可取。何以故？诸法性尔。是名无法有法空，如是行者应如实知。何者名为法法相空？法名五阴，五阴空，非积聚不可坏不可取。何以故？诸法性尔。是名法法相空，如是行者应如实知。何者名为无法无法相空？无法名无法，是无为法空，非积聚不可坏不可取。何以故？诸法性尔。是名无法无法相空，如是行者应如实知。何者名为自法自法相空？诸法自法空，是空非智作非见作，非积聚不可坏不可取。何以故？诸法性尔。是名自法自法相空，如是行者应如实知。何者名为他法他法相空？若

佛出世若不出世，法住、法相、法位、法界、如、实际，性相常住无有变异过。此诸法空，非积聚不可坏不可取。何以故？诸法性尔。是名他法他法相空，如是行者应如实知。

“知已能令众生离众生想，离一切行想、受想、色想、识想，离眼想乃至意想，离色想乃至法想，然后安置一切众生于三乘无为界。若有行者，于此诸法如实现前知，得名善修。彼诸众生昔于此法已修习者，如是第一甚深法声入于耳根。或有众生不种善根，如是法声亦入于耳。或有见佛专心瞻仰，彼人一切无尽善根皆来现前，乃至逮得不退转地，十力无畏成大法器。或有众生有无常声入于耳根，或有苦声、空声、无我声、三律仪声、四念处声、四正勤声、四如意足声、五根声、五力声、七觉分声、八道分声、实论声、因缘法声、梵住声、四摄声、无碍辩声、禅声、解脱声、无色定声、六波罗蜜声、巧方便声、三昧陀罗尼忍声、声闻乘声、缘觉乘声、大乘声、不退转地声、业障尽声、烦恼障尽声、众生障尽声、法声尽声、有为国土功德庄严声、无为心清净声、大慈声、大悲声、三不护声、四无畏声、十力声、十八不共法声、一生补处声、十地声、最后身声、降魔声、无上智声、转法轮声、随应度者现神变声、弃诸命行声、于诸众生示现无上大涅槃声，如是诸声各各差别入于耳根。是诸众生乃至畜生、饿鬼趣等，如是无量百千法门入于耳根，彼诸众生得第一希有欢喜踊跃，于三宝中极得信敬。彼诸众生烦恼障、业障、众生障、法障，于三分中二分已尽。彼诸众生闻是声已，无量阿僧祇众生昔有恶心者，彼等悉得柔软之心、怜愍心、善业心，得观后世可怖畏事，得种具足天人善根，以彼诸声令于无量阿僧祇众生归依三宝。所有受持禁戒净者，彼等有得须陀洹果，乃至有得阿罗汉果。复有无量阿僧祇众生，于缘觉乘种诸善根。复有无量阿僧祇众生，发阿耨多罗三藐三菩提心，即得住于不退转地。复有无量阿僧祇众生，得无生法忍。”

尔时，世尊欲重明此义，而说偈言：

“火味阿修罗， 指示罗睺罗，
是我最胜师， 福慧庄严具。
佛告于彼等， 当息妒瞋怒，
付嘱是法眼， 护持故当受。
彼诸修罗喜， 敬答尊导师：
‘我当护法眼， 乃至法久住。
我等说最胜， 不隐法神咒，
令彼一切龙， 皆失憍慢力。’
尔时诸龙辈， 各各皆瞋怒，
欲以憍慢力， 共诸修罗斗。
佛告诸龙王， 及以修罗主：
‘汝等于长夜， 各各常犷戾。

若不除瞋怒，于诸乐非器，
常为苦所触，下劣臭秽身，
身分支不具，恒乏于资生，
闻说此诸苦，皆以瞋为本。
恶罚诸枷锁，牢狱饥渴等，
地狱鬼畜生，由瞋受此苦。
一切应忍辱，能忍者则无，
丈夫得最胜，富贵具诸欲。
汝等二朋众，诸龙阿修罗，
各自修忍辱，忍故无诸恶。’
大众皆喜悦，一切咸赞叹：
‘汝今闻是语，皆悉得于忍。’
天龙阿修罗，夜叉及诸鬼，
一切皆得忍，慈心共相视。
人与畜生等，得忍皆和顺；
禽兽及小虫，慈悲相怜愍。
大众皆合掌，瞻仰导师言：
‘我等迭相荫，皆得慈心住。
又我诸大众，于佛尊导师，
所作诸罪业，若身口意犯，
于法众僧所，一人边有过。
人中坚固士，唯愿见容恕！
我于世尊法，一切所作恶，
今悉至到忏，愿佛慈纳受。’
于时两足尊，告彼大众言：
‘汝忏恶业尽，终无有苦报！
剃发不受戒，被服袈裟片，
而作导师想，于彼人中上。
恶王障法眼，贪痴打比丘，
如出导师血，当堕阿鼻狱。’
大众作是言：‘我等护比丘，
若有诸恶王，恼诸声闻众，
我等于诸事，皆舍于彼国。
其土有沙门，令向于余处，
毁坏彼诸国，饥馑兵疫起。
沙门所诣国，我等亦诣彼，
悉令得胜乐，具足衣饮食。’
于彼炽法眼，供养人中上，
无余四天下，悉变成七宝。
复雨诸香华，珍宝及衣服，

歌舞妓乐等， 供养于导师。
众生所见闻， 皆得充足乐，
圣加令诸音， 尽变作佛声。
说诸有为苦， 无常空无我，
三世一切法， 悉空无所有。
集散二俱空， 眼识二亦然，
乃至心法界， 阴身等法空。
如是知诸法， 则能救众生，
若知三界空， 能解众生缚。
诸有十二支， 一切皆性空，
若昔于此法， 如是修习者，
彼等闻诸声， 悉皆得于忍，
智力无所畏， 得住菩提道。
薄福诸众生， 得闻有为声，
无量众精勤， 得入菩提行。
檀戒忍精进， 禅定及智慧，
佛土福庄严， 精进故令净。
汝等当作佛， 到彼诸法岸，
降魔及军众， 而降正法雨，
无量众生界， 能与正法眼。
汝等一切众， 速入安隐城，
无量众闻声， 得趣大菩提，
及得二乘道， 有得人天乐，
有得至于果， 罗汉三摩提。
如是恶众生， 得于柔软意，
怖畏诸恶业， 安住慈善心。”

大方等大集月藏经卷第九

分布阎浮提品第十七

尔时，世尊既知一切诸来大众于三宝所皆生深信，尊重敬仰得未曾有，更不信事诸余天已，告他化自在天王、化乐天王、兜率陀天王、须夜摩天王、帝释天王、四大天王及诸眷属，娑伽罗龙王、阿那婆达多龙王、罗睺罗阿修罗王、毗摩质多罗阿修罗王、睺婆利阿修罗王、跋持毗卢遮那阿修罗王、大树紧那罗王，乐欲乾闥婆军将、檀提鸠槃荼军将、因陀罗夜叉军将、寒叶饿鬼王、垂唇毗舍遮王、阿那竭啰富单那王、巷路唤声迦吒富单那王等，作如是言：“诸仁者，汝等一切如是劝我，分布安置此阎浮提，一切国土城邑宫殿、王都聚落、山岩寺舍、园池旷野、诸树林间，付嘱护持勿令有恶。又令大地精

气、众生精气、正法精气增长炽然，佛正法眼久住于世，绍三宝种使不断绝，损减恶趣增益善道，令此阎浮提一切安隐丰乐可乐。以是因缘，我今分布此四天下，嘱汝一切诸大天王、一切龙王，乃至一切迦吒富单那王，汝等各应发心舍离眷属，分布安置护持养育；并汝诸天一切眷属，乃至迦吒富单那王一切眷属，亦令于此阎浮提中一切国土乃至树林，分布安置护持养育。是故汝等诸大天王及诸眷属，乃至迦吒富单那王及诸眷属，于阎浮提皆应诚心随喜赞叹，莫瞋莫恨亦莫生怒。”

尔时，所有一切菩萨摩訶萨，色界诸天、欲界天人，一切龙众、一切乾闥婆，乃至一切迦吒富单那等诸来大众，皆悉合掌，各作是言：“我等一切诚心随喜，敬受佛教。如佛世尊分布安置此阎浮提，我等发心受佛教敕，护持养育佛正法眼令得炽然。”

佛言：“善哉！善哉！妙丈夫，汝等应当如是诚心说欲随喜。”

尔时，世尊告彼法食、喜食、禅食诸天言：“此四天下大海水中八万洲渚一切国土，汝等法食、喜食、禅食诸天，应等护持养育我法。住法比丘如法顺法，发心修行三业相应，剃除须发，身著袈裟，汝等应当护持养育。”

时，彼法食喜食禅食诸天各作是言：“我当护持大海水中八万洲渚一切国土诸佛正法。若佛弟子乃至不畜妇女、畜生、田宅、资产，我等皆当护持养育。”

尔时，世尊赞彼天言：“善哉！善哉！”一切大众亦复赞言：“善哉！善哉！”

尔时，世尊告月藏菩萨摩訶萨言：“了知清净土，若我住世诸声闻众，戒具足、舍具足、闻具足、定具足、慧具足、解脱具足、解脱知见具足，我之正法炽然在世，乃至一切诸天人等，亦能显现平等正法。于我灭后五百年中，诸比丘等，犹于我法解脱坚固；次五百年，我之正法禅定三昧得住坚固；次五百年，读诵多闻得住坚固；次五百年，于我法中多造塔寺得住坚固；次五百年，于我法中斗争言颂，白法隐没损减坚固。

“了知清净土，从是以后于我法中，虽复剃除须发、身著袈裟、毁破禁戒、行不如法假名比丘，如是破戒名字比丘，若有檀越舍施供养护持养育，我说是人犹得无量阿僧祇大福德聚。何以故？犹能饶益多众生故，何况我今现在于世！譬如真金为无价宝，若无真金，银为无价；若无银者，鉿石无价；若无鉿石，伪宝无价；若无伪宝，赤白铜铁、白镴铅锡为无价宝。如是一切诸世间中佛宝无上，若无佛宝，缘觉无上；若无缘觉，罗汉无上；若无罗汉，诸余圣众以为无上；若无圣众，得定凡夫以为无上。若无得定，净持戒者以为无上；若无净戒，污戒比丘以为无上；若无污戒，剃除须发、身著袈裟名字比丘为无上宝，比余九十五种异道最尊第一，应受世供为物福田。何以故？能示众生可怖畏故。若有护持养育安置是人，不久得住忍地。”

尔时，世尊告六欲诸天言：“汝等应如过去佛时所得分当勤护持，复于此四天下时时之中勤加思惟佛正法义，为令我法得久住故，绍三宝种不断绝故。”时，彼诸天各作是言：“唯然受教！”尔时，世尊赞言：“善哉！善哉！”一切大众亦复赞言：“善哉！善哉！”

尔时，世尊告四天王言：“汝等及诸眷属，应如过去佛时所得分，还作护持安置养育我之正法。”时，四天王各作是言：“唯然受教。”佛及大众咸皆赞言：“善哉！善哉！”

尔时，世尊告乾闥婆等言：“诸仁者，汝等及诸天仙，于优曇林、庵罗林、閼浮林、诃梨勒林、阿摩罗林、蒲萄林，如是等林于中而住。复共四天王宫诸天子等，为我佛法得久住故，应当思惟佛正法义。”时乾闥婆等咸言：“如是，大德婆伽婆，唯然受教。”佛及大众咸皆赞言：“善哉！善哉！”

尔时，世尊告娑伽罗龙王、难陀龙王、婆难陀龙王、善现龙王、婆楼那龙王、婆修吉龙王、得叉迦龙王、阿难陀龙王、阿楼那龙王、岁星龙王言：“汝等各大海之中住本宫殿，护持养育我之正法。”时，龙王等各作是言：“唯然受教。”佛及大众咸皆赞言：“善哉！善哉！”

尔时，世尊告阿那婆达多龙王、善住龙王、清觶龙王、摩利尼龙王、优婆罗龙王、乾闥婆龙王、云池龙王、主雷龙王、摩奚曼多龙王、美音龙王言：“汝等各住本宫护持养育我之正法。”时，龙王等各作是言：“唯然受教。”佛及大众咸皆赞言：“善哉！善哉！”

尔时，世尊告鸠槃荼檀提大将、优婆檀提大将、迦罗迦大将、摩诃钵𢆶大将、摩呼陀遮利大将、堀求尼大将、婆朱𢆶尼大将、鸯堀卢大将、鞞罗差大将、一眉大将言：“汝等各住本宫护持养育我之正法。”时，鸠槃荼大将等各作是言：“唯然受教。”佛及大众咸皆赞言：“善哉！善哉！”

尔时，世尊告因陀夜叉大将、苏摩大将、婆楼那大将、波闍钵帝大将、跋罗头婆闍大将、伊奢那大将、旃檀那大将、月眼大将、婆多竭梨大将、奚摩跋多大将言：“汝等各住本宫护持养育我之正法。”时，夜叉大将等各作是言：“唯然受教。大德婆伽婆，我等护持养育安置世尊正法，及住法比丘供给所须，乃至剃发不持戒者，亦复供给一切所须，为令佛法得久住故，绍三宝种不断绝故，三种精气得增长故，休息一切斗争、言讼怨仇、疫病、饥馑短乏，非时亢旱、曜宿失度为断除故，乃至世尊声闻弟子三业相应不积聚者当勤养育。”尔时，世尊赞言：“善哉！善哉！善男子，汝等如是为利益安乐一切三界众生故。”及一切大众亦复赞言：“善哉！善哉！”

尔时，世尊告一切毕利多依旷野住者，一切毗舍遮依空舍住者，一切富单那依野田住者，一切迦吒富单那依于缝间及厕边住者言：“汝等各于住处护持养育我之正法。”时，毕利多等各作是言：“唯然受教。”佛及大众咸皆赞言：“善哉！善哉！”

尔时，世尊复作是言：“诸仁者，所有诸天、乾闥婆、紧那罗、夜叉、罗刹、龙王、阿修罗、鸠槃荼，如昔世尊所分得分国土城邑聚落舍宅，随所得处为作护持安置养育，我当随喜，一切大众亦复随喜。若复有诸天、龙、夜叉乃至迦吒富单那等，如昔世尊所分得分国土城邑，不正护持安置养育者，我当转付诸余天龙，令其安置护持养育，各随国土善作护持。我今以波罗奈国付嘱，善发乾闥婆千眷属，阿尼罗夜叉仙五百眷属，须质多罗阿修罗无量眷属，德叉迦龙王百眷属，大黑天女五百眷属，汝等护持养育波罗奈国，为令我法得久住故，绍三宝种不断绝故，遮障一切恶众生故。”时，善发乾闥婆、阿尼罗夜叉仙、须质多罗阿修罗、德叉迦龙王、大黑天女等，各与眷属咸作是言：“大德婆伽婆，我等护持养育安置波罗奈国周遍土境，遮障不饶益、养育饶益者，乃至遮障一切不善诸恶众生。尔时，世尊赞言：“善哉！善哉！”诸来大众亦复赞言：“善哉！善哉！”

尔时，世尊以迦毗罗婆国，付嘱火护紧那罗仙千眷属，拘翅罗声乾闥婆万眷属，婆闍跋帝夜叉大将千眷属，奢摩那迟阿修罗二万眷属，跋那牟支龙王一万眷属，摩诃钵奢鸠槃荼大将五百眷属，栴迟栴荼梨二大天女各一万眷属：“汝等共护迦毗罗婆国，乃至遮障诸恶众生。”彼等一切皆作是言：“我等及诸眷属，护持养育迦毗罗婆国周遍土境，乃至遮障诸恶众生。”佛及大众咸皆赞言：“善哉！善哉！”

尔时，世尊以摩伽陀国，付嘱善住炎光天子千眷属，优波罗乾闥婆千眷属，乐声阿修罗千眷属，善臂龙王善意龙王各万眷属，孔雀味阿修罗五百眷属，拘那罗大夜叉三千眷属，军毗罗夜叉百千眷属，十象鸠槃荼大将百千眷属，憍恶天女夺意天女各十千眷属：“汝等共护摩伽陀国，乃至遮障诸恶众生。”佛及大众咸皆赞言：“善哉！善哉！”

尔时，世尊以拘萨罗国，付嘱迷提羯那天子千眷属，乐胜乾闥婆大将十千眷属，乌麻紧那罗千眷属，具德龙王千眷属，弗沙钵帝阿修罗五百眷属，婆楼那夜叉大将、婆楼那王夜叉大将各五万眷属，那荼迦鸠槃荼五百眷属，摩尼毗梨天女千眷属：“汝等共护拘萨罗国。”乃至佛及大众咸皆赞言：“善哉！善哉！”

尔时，世尊以鸯伽国，付嘱月音天子万眷属，乐欲乾闥婆大将、沾浮楼乾闥婆大将各十千眷属，阿摩罗军紧那罗五百眷属，师子藏阿修罗五百眷属，旃檀大夜叉、力幢大夜叉各五千眷属，奴罗车鸠槃荼二千五百眷属，摩诃迦梨天女二千五百眷属：“汝等共护鸯伽国土。”乃至佛及大众咸皆赞言：“善哉！善哉！”

尔时，世尊以般遮罗国，付嘱罗拏时天子五百眷属，乐歌乾闥婆七千眷属，摩叶紧那罗千眷属，般支迦夜叉将五千眷属，安阁瞿波阿修罗千眷属，乐法鸠槃荼五百眷属，左黑天女王鬘天女各二千五百眷属：“汝等共护般遮罗国。”乃至佛及大众咸皆赞言：“善哉！善哉！”

尔时，世尊以苏摩国，付嘱宝髻天子五千眷属，摩头曼多乾闥婆千眷属，胜缕紧那罗千眷属，优波般遮迦夜叉将二千眷属，黑龙王千

眷属，知欲阿修罗千眷属，鸠罗婆鸠槃荼六百眷属，斯多天女博叉天女各五百眷属：“汝等共护苏摩国土。”乃至佛及大众咸皆赞言：“善哉！善哉！”

尔时，世尊以阿湿婆国，付嘱卢醯奴天子千二百眷属，流水乾闥婆千眷属，摩尼拓罗夜叉军将五千眷属，阿周罗阿修罗六百眷属，日光龙王无量眷属，摩尼拓利鸠槃荼五百眷属，不可取天女马胜天女各二千五百眷属：“汝等共护阿湿婆国。”乃至佛及大众咸皆赞言：“善哉！善哉！”

尔时，世尊以摩偷罗国，付嘱善择天子十千眷属，静明乾闥婆千眷属，游梯迦紧那罗二百眷属，胜欲夜叉、乘人大夜叉各千五百眷属，无垢龙王千眷属，伽楞拓利阿修罗千眷属，墨色鸠槃荼千眷属，夺意天女二千眷属：“汝等共护摩偷罗国。”乃至佛及大众咸皆赞言：“善哉！善哉！”

尔时，世尊以支提耶国，付嘱善贤天子五百眷属，阿吒迦乾闥婆五百眷属，无垢紧那罗千眷属，除结夜叉、无结夜叉各五百眷属，妙贤龙千眷属，普竹阿修罗五百眷属，牛王鸠槃荼三百眷属，胜优波罗天女子眷属：“汝等共护支提耶国。”乃至佛及大众咸皆赞言：“善哉！善哉！”

尔时，世尊以婆蹉国，付嘱月光天子十千眷属，莲华香乾闥婆千眷属，摩陀那果紧那罗五千眷属，大果夜叉五千眷属，阿楼那龙千眷属，恶树阿修罗百眷属，叶眼鸠槃荼五百眷属，阿那迦华天女千眷属：“汝等共护婆蹉国土。”乃至佛及大众咸皆赞言：“善哉！善哉！”

尔时，世尊以赊耶国，付嘱摩醯首罗天仙五千眷属，不酒乾闥婆千眷属，离垢紧那罗千眷属，因陀罗夜叉、苏摩夜叉各二千五百眷属，善现龙千眷属，牟真邻陀阿修罗王五百眷属，优波檀提鸠槃荼、訖利迦迦鸠槃荼各二千五百眷属，鬼子母天女善护天女各万眷属：“汝等共护赊耶国土。”乃至佛及大众咸皆赞言：“善哉！善哉！”

尔时，世尊以优禅尼国，付嘱月云天子五百眷属，门牟乾闥婆千眷属，摩尼耳乾闥婆五百眷属，五恶夜叉千眷属，山臂龙王五百眷属，木手阿修罗三百眷属，善现鸠槃荼五百眷属，毛齿天女千眷属：“汝等共护优禅尼国。”乃至佛及大众咸皆赞言：“善哉！善哉！”

尔时，世尊以修罗吒国，付嘱法华天子百千眷属，具欲乾闥婆将万眷属，山怖紧那罗仙一百眷属，难陀龙王十千眷属，驴眼阿修罗五百眷属，善灯大夜叉千眷属，大肚鸠槃荼将千眷属，安隐天女千眷属：“汝等共护修罗吒国。”乃至佛及大众咸皆赞言：“善哉！善哉！”

尔时，世尊以摩诃罗佉国，付嘱孔雀发天子五百眷属，乐欲乾闥婆、虎就乾闥婆各五百眷属，乳味紧那罗百眷属，主水龙王千眷属，乐宝阿修罗五百眷属，羝羝脚大夜叉、军那罗大夜叉各千眷属，钵头摩迦迦槃荼大将五百眷属，婆楼尼大天女五千眷属：“汝等共护摩诃罗佉国。”乃至佛及大众咸皆赞言：“善哉！善哉！”

尔时，世尊以输卢那国，付嘱千金天子千眷属，善胁乾闥婆千眷属，白色紧那罗五百眷属，世辩夜叉千眷属，大富鸠槃荼五百眷属，极恶天女摩尼果天女各五百眷属：“汝等共护输卢那国。”乃至佛及大众咸皆赞言：“善哉！善哉！”

尔时，世尊以摩尼调鞞国，付嘱华音天子五百眷属，那罗延乾闥婆二百眷属，摩醯首罗华紧那罗三百眷属，团眼夜叉五百眷属，波罗奈子阿修罗百眷属，赤目鸠槃荼百眷属，雪王天女百眷属：“汝等共护摩尼调鞞国。”乃至佛及大众咸皆赞言：“善哉！善哉！”

尔时，世尊以波吒罗弗国，付嘱娑罗流支天子千眷属，人华乾闥婆五百眷属，摩尼瞿沙紧那罗三百眷属，声佉流支夜叉五百眷属，娑罗地阿修罗五百眷属，尸利瞿沙龙八百眷属，浮流尼鸠槃荼百眷属，毗楼池天女五百眷属：“汝等共护波吒罗弗国。”乃至佛及大众咸皆赞言：“善哉！善哉！”

尔时，世尊以乾陀罗国，付嘱火布天子三千眷属，喜歌乾闥婆千眷属，大胜紧那罗五百眷属，师子发夜叉五百眷属，伊罗钵龙王千眷属，贤力龙王千眷属，精气主阿修罗五百眷属，猿猴声鸠槃荼百眷属，摩尼天女频头天女各千眷属：“汝等共护乾陀罗国。”乃至佛及大众咸皆赞言：“善哉！善哉！”

尔时，世尊以阿槃提国，付嘱师子爱天子五千眷属，摩罗曼多乾闥婆二千眷属，胜目紧那罗百眷属，苏摩夜叉地行夜叉各千眷属，冰加罗阿修罗三千眷属，婆私陀茶龙千眷属，军那罗叉鸠槃荼百眷属，忧波罗天女流泉天女各二千眷属：“汝等共护阿槃提国。”乃至佛及大众咸皆赞言：“善哉！善哉！”

尔时，世尊以婆楼拏跋帝国，付嘱鸡娑利天子千眷属，众彩乾闥婆五百眷属，博叉流支紧那罗二百眷属，迦茶龙王、忧波迦茶龙王各二千眷属，毗摩阿修罗百眷属，月焱鸠槃荼三百眷属，自护天女摩尼频头天女各千眷属：“汝等共护婆楼拏跋帝国。”乃至佛及大众咸皆赞言：“善哉！善哉！”

尔时，世尊以帝跋尼国，付嘱师子齿天子五千眷属，萨陀曼多乾闥婆五百眷属，牟尼萨罗紧那罗百眷属，摩尼贤夜叉、满贤夜叉各二千五百眷属，铁耳阿修罗五百眷属，阿槃多鸠槃荼百眷属，萨市尼天女般支天女各千眷属：“汝等共护帝跋尼国。”乃至佛及大众咸皆赞言：“善哉！善哉！”

尔时，世尊以瞻波国，付嘱香云天子并诸天仙一千眷属，德鬘乾闥婆二百眷属，求筹遮紧那罗百眷属，坚毛夜叉五千眷属，迦那迦阿修罗百眷属，善现鸠槃荼、近现鸠槃荼各五万眷属，什目天女五百眷属：“汝等共护瞻波国。”乃至佛及大众咸皆赞言：“善哉！善哉！”

尔时，世尊以悉都那国，付嘱赤云天子千眷属，沾浮楼乾闥婆五百眷属，摩尼遮婆紧那罗百眷属，难胜夜叉千眷属，泥茶鸠支阿修罗五百眷属，鞞迦鸠槃荼百眷属，静默天女善目天女各一千五百眷

属：“汝等共护悉都那国。”乃至佛及大众咸皆赞言：“善哉！善哉！”

尔时，世尊以西地国，付嘱山眼天子二百眷属，法喜乾闥婆百眷属，薺支罗婆紧那罗百眷属，大身夜叉千眷属，执刀阿修罗百眷属，止流鸠槃荼三百眷属，金光天女、黑光天女各二千五百眷属：“汝等共护西地国土。”乃至佛及大众咸皆赞言：“善哉！善哉！”

尔时，世尊以富楼沙富罗国，付嘱阿罗脯斯天子千眷属，难提乾闥婆百眷属，净众紧那罗百眷属，摩尼华夜叉千眷属，迦茶龙王、阿婆罗罗龙王各二千五百眷属，大怖伽楼罗百眷属，讵多孙地阿修罗五百眷属，烧竹鸠槃荼五百眷属，多卢斯天女三目天女各五百眷属：“汝等共护富楼沙富罗国。”乃至佛及大众咸皆赞言：“善哉！善哉！”

尔时，世尊以乌菟国土，付嘱习音天子五百眷属，华光乾闥婆三百眷属，善怖紧那罗百眷属，迦罗婆提夜叉五百眷属，郎浮罗龙三百眷属，遮曼池阿修罗百眷属，曼陀果鸠槃荼百眷属，呵梨帝天女染贤天女各五百眷属：“汝等共护乌菟国土。”乃至佛及大众咸皆赞言：“善哉！善哉！”

尔时，世尊以寄萨离国，付嘱黑色天子千眷属，金色乾闥婆百眷属，跋那牟至紧那罗八十眷属，散发夜叉五百眷属，力天龙王百眷属，那佉遮利阿修罗百眷属，无垢声鸠槃荼八十眷属，胜针天女蝎天女各五百眷属：“汝等共护寄萨离国。”乃至佛及大众咸皆赞言：“善哉！善哉！”

尔时，世尊以金性国，付嘱禅那离沙婆天子五百眷属，摩那婆乾闥婆百眷属，善称紧那罗百眷属，禅那离沙婆夜叉五百眷属，宝冠阿修罗百眷属，香意鸠槃荼八十眷属：“汝等共护金性国土。”乃至佛及大众咸皆赞言：“善哉！善哉！”

尔时，世尊以摩都罗国，付嘱歌赞天子百眷属，五髻乾闥婆五百眷属，威德紧那罗八十眷属，坚铎夜叉五百眷属，冰伽罗阿修罗五百眷属，贤目鸠槃荼百眷属，沾浮楼天女五百眷属：“汝等共护摩都罗国。”乃至佛及大众咸皆赞言：“善哉！善哉！”

尔时，世尊以薺离迦国，付嘱财目天子千眷属，善顶乾闥婆百眷属，除摩鸠斯紧那罗五百眷属，坚固夜叉五百眷属，耶婆那夜叉千眷属，无畏紧那罗百眷属，跋罗头婆闍夜叉五百眷属，啖婆何利阿修罗八百眷属，瞿伽叉鸠槃荼三百眷属，啖婆何利罗刹五百眷属，释迦罗刹五百眷属：“汝等共护薺离迦国。”乃至佛及大众咸皆赞言：“善哉！善哉！”

尔时，世尊以般遮囊伽罗国，付嘱婆婆叉天子千眷属，月光乾闥婆百眷属，围目夜叉千眷属，大云阿修罗五百眷属，诃奴闍伽槃荼百眷属，摩尼枳萨梨天女五百眷属，多摩罗婆利天女千眷属：“汝等共护般遮囊伽罗国。”乃至佛及大众咸皆赞言：“善哉！善哉！”

尔时，世尊以波斯国，付嘱檀师天子五千眷属，拘毗罗乾闥婆

三千眷属，梨鞞摩师紧那罗千眷属，住勇夜叉五百眷属，那摩罗王夜叉五百眷属，庵罗提他乾闥婆千眷属，伊沙那时紧那罗千眷属，竭娑拘支鸠槃荼四千眷属，那罗斯罗刹五千眷属，呵梨达罗刹二千眷属：“汝等共护波斯国土。”乃至佛及大众咸皆赞言：“善哉！善哉！”

尔时，世尊以敕勤国土，付嘱佉楼那天子千眷属，妙好乾闥婆五百眷属，帝利迦紧那罗五百眷属，三钵夜叉二万眷属怖畏夜叉十千眷属，休流歇龙千眷属，金耳阿修罗千眷属，善林树鸠槃荼千眷属，金枳萨罗罗刹五千眷属：“汝等共护敕勤国土。”乃至佛及大众咸皆赞言：“善哉！善哉！”

尔时，世尊以叵耶那国，付嘱海怖天子千眷属，那荼浮乾闥婆百眷属，马目紧那罗百眷属，华齿夜叉二千眷属，大齿夜叉千眷属，忧波罗耳龙五百眷属，动手阿修罗百眷属，解脱鸠槃荼百眷属，质摩只萨梨罗刹女五百眷属，黑闇罗刹、护门罗刹各二千五百眷属，月光罗刹千眷属：“汝等共护叵耶那国。”乃至佛及大众咸皆赞言：“善哉！善哉！”

尔时，世尊以尸利耶摩国，付嘱黑发天子百眷属，金臂乾闥婆八十眷属，风响紧那罗百眷属，阿楼那夜叉千眷属，八发夜叉千眷属，上踊龙王百眷属，快作阿修罗百眷属，香筒鸠槃荼五百眷属，黑泽天女五百眷属：“汝等共护尸利耶摩国。”乃至佛及大众咸皆赞言：“善哉！善哉！”

尔时，世尊以跋离迦国，付嘱赤铜色天子八百眷属，媚眼乾闥婆百眷属，针黑紧那罗百眷属，牟耳夜叉五千眷属，黠罗羯那龙百眷属，息牛阿修罗百眷属，阿毗拏萨利鸠槃荼五百眷属，长苗天女妙胜天女各五百眷属：“汝等共护跋离迦国。”乃至佛及大众咸皆赞言：“善哉！善哉！”

尔时，世尊以闍宾那国，付嘱怖黑天子五十眷属，五音乾闥婆千眷属，水性紧那罗五百眷属，广执夜叉三万眷属，长生夜叉、流云解脱夜叉各二千五百眷属，睺罗茶龙十千眷属，郁金阿修罗千眷属，陀楼跋尼鸠槃荼五百眷属，正辩天女千眷属，园林罗刹女十千眷属：“汝等共护闍宾那国。”乃至佛及大众咸皆赞言：“善哉！善哉！”

尔时，世尊以忧罗睺国，付嘱那罗摩乾闥婆百眷属，五怖夜叉二千眷属，尸利沙夜叉千眷属：“汝等共护忧罗睺国。”乃至佛及大众咸皆赞言：“善哉！善哉！”

尔时，世尊以佉罗婆罗国，付嘱时兰那乾闥婆百眷属，华宝夜叉千眷属，善乐目龙千眷属，怖人鸠槃荼五百眷属，顺欲天女百眷属：“汝等共护佉罗婆罗国。”乃至佛及大众咸皆赞言：“善哉！善哉！”

尔时，世尊以阿疏居迦国，付嘱牟尼佉利夜叉二千眷属，好施罗刹千眷属，婆稚龙五百眷属，止云鸠槃荼百眷属，呵梨帝罗刹女千眷属：“汝等共护阿疏居迦国。”乃至佛及大众咸皆赞言：“善哉！善哉！”

哉！”

尔时，世尊以达罗陀国，付嘱鞞婆达利乾闥婆百眷属，道路夜叉黄头夜叉勇健夜叉各千眷属，跋陀龙王二千眷属，孔雀毛龙王百眷属，生解天女毛罗阇利天女各二百五十眷属：“汝等共护达罗陀国。”乃至佛及大众咸皆赞言：“善哉！善哉！”

尔时，世尊以弗梨沙国，付嘱夺意夜叉戒贤夜叉各五百眷属，云腹龙王三百眷属，离恶鸠槃荼八十眷属，搔跋质罗天女百眷属：“汝等共护弗梨沙国。”乃至佛及大众咸皆赞言：“善哉！善哉！”

尔时，世尊以伽陀国，付嘱持华乾闥婆、摩睺罗伽乾闥婆各千眷属，金枳持夜叉、毗持夜叉各二百五十眷属，光掌龙王、胜夺龙王各五百眷属，阿楼尼天女、华目天女各二百五十眷属：“汝等共护伽陀国土。”乃至佛及大众咸皆赞言：“善哉！善哉！”

尔时，世尊以遮居迦国，付嘱剑婆罗龙王五百眷属，极恶鸠槃荼百眷属，那朱波毗舍遮百眷属，星目罗刹女五百眷属，天铠饿鬼将二百眷属，歇恶夜叉三百眷属：“汝等共护遮居迦国。”乃至佛及大众咸皆赞言：“善哉！善哉！”

尔时，世尊以筏提国，付嘱具足龙王善道龙王各百眷属，坚目鸠槃荼百眷属，八毗那耶迦天女一百眷属，道神天女尸利天女各二百五十眷属，珂贝天女安住天女各五十眷属：“汝等共护筏提国土。”乃至佛及大众咸皆赞言：“善哉！善哉！”

尔时，世尊以沙勒国，付嘱发色天子百眷属，护国乾闥婆百眷属，佛护夜叉、助鬘夜叉各五百眷属，孔雀项龙王百眷属，山目龙女五百眷属，讫利波迦鸠槃荼五百眷属，持德天女、龙护天女各二百五十眷属：“汝等共护沙勒国土。”乃至佛及大众咸皆赞言：“善哉！善哉！”

尔时，世尊以于填国土，付嘱难胜天子千眷属，散脂夜叉大将十千眷属，羖羊脚大夜叉八千眷属，金华鬘夜叉五百眷属，热舍龙王千眷属，阿那紧首天女十千眷属，他难闍梨天女五千眷属：“毗沙门王神力所加，共汝护持于填国土。”乃至佛及大众咸皆赞言：“善哉！善哉！”

尔时，世尊以龟兹国土，付嘱牟铠天子千眷属，黄头大夜叉千眷属，厌财罗刹女千眷属，睺护大夜叉千眷属，疏齿鸠槃荼千眷属，尸利遮吒罗刹、鹿齿罗刹各五百眷属：“汝等共护龟兹国土。”乃至佛及大众咸皆赞言：“善哉！善哉！”

尔时，世尊以婆楼迦国，付嘱寒茶夜叉千眷属，阿婆迦利鸠槃荼百眷属，垂乳罗刹千眷属：“汝等共护婆楼迦国。”乃至佛及大众咸皆赞言：“善哉！善哉！”

尔时，世尊以奚周迦国，付嘱王活乾闥婆五百眷属，奚卑罗龙百眷属：“汝等共护奚周迦国。”乃至佛及大众咸皆赞言：“善哉！善哉！”

尔时，世尊以亿尼国，付嘱勇健执蠡大夜叉将千眷属，象耳龙王三千眷属，迦迦知罗刹女、雪池罗刹女各二千五百眷属：“汝等共护亿尼国土。”乃至佛及大众咸皆赞言：“善哉！善哉！”

尔时，世尊以鄯善国，付嘱阿罗知天子百眷属，阿沙迦夜叉五千眷属，无著罗刹女十千眷属：“汝等共护鄯善国土。”乃至佛及大众咸皆赞言：“善哉！善哉！”

尔时，世尊以紧那罗国，付嘱赤目大夜叉十千眷属，不动伽槃荼千眷属：“汝等共护紧那罗国。”乃至佛及大众咸皆赞言：“善哉！善哉！”

尔时，世尊以震旦国，付嘱毗首羯磨天子五千眷属，迦毗罗夜叉大将五千眷属，法护夜叉大将五千眷属，坚目夜叉大将五千眷属，大目夜叉大将五千眷属，勇健军夜叉大将五千眷属，摩尼跋陀夜叉大将五千眷属，贤满夜叉大将五千眷属，持威德夜叉大将五千眷属，阿茶薄拘夜叉大将五千眷属，般支迦夜叉大将五千眷属，婆修吉龙王五千眷属，须摩那果龙王五千眷属，弗沙毗摩龙王五千眷属，呵梨帝鬼子母天五千眷属，伊罗婆雌大天女五千眷属，双瞳目大天女五千眷属：“汝等贤首，皆共护持震旦国土，于彼所有一切触恼、斗争怨仇、忿竞言讼、两阵交战、饥馑疫病、非时风雨冰寒毒热悉令休息，遮障不善诸恶众生瞋恚粗犷、苦辛涩触无味等物悉令休息，令我法眼得久住故，绍三宝种不断绝故，三种精气得增长故，利益安乐诸天人故，勤加护持。以是因缘，汝等今世及以后世常得安乐。”毗首羯磨天子及与眷属，迦毗罗大夜叉、法护夜叉、坚目夜叉、大目夜叉、勇健夜叉、摩尼跋陀夜叉、贤满夜叉、持威德夜叉、阿茶薄拘夜叉、般支迦夜叉及与眷属，婆修吉龙王、须摩那果龙王、弗沙毗摩龙王及与眷属，呵梨帝鬼子母天、伊罗婆雌天女、双瞳目天女及与眷属，各作是言：“大德婆伽婆，我等共护震旦国土，休息一切斗争；乃至增长三种精气，我等勤加护持养育；乃至世尊声闻弟子三业相应不积聚者，倍复安置护持养育。”

尔时，世尊赞言：“善哉！善哉！善男子，汝应如是护持我法。”诸来大众亦复随喜赞言：“善哉！善哉！”

“诸仁者，我以阎浮提一切国土，付嘱诸天、乾闥婆、紧那罗、夜叉、龙王、阿修罗、伽蓝茶、诸天女等，各令安置护持养育一切众生，是故汝等诸大龙王不得分者，应当容忍莫恨。所谓娑伽罗龙王、阿那婆柢多龙王、伊罗跋龙王、婆楼那龙王、善住龙王、德叉迦龙王、恒河龙王、辛头龙王、博叉龙王、私陀龙王、堤首尼龙王、摩醯谟遮利龙王、金胁龙王、跋致苏多龙王、弗婆钵睺龙王、众色云龙王、拘那跋帝龙王、阿斯多龙王、遮弥罗龙王、香山龙王、那罗延面龙王、娑婆牟支龙王、那陀叉龙王，如是等一百八十万诸大龙王，住阎浮提不得分者，应当容忍莫恨。汝等各住本宫，护持养育我之正法，当作利益一切众生行，以是因缘，汝等今世及以后世自利利他。

何以故？彼诸天、龙、乾闥婆、紧那罗、夜叉、阿修罗、鸠槃荼、天女、罗刹女等，随其国土昔所住处，彼诸天龙乃至天女，为护彼彼诸国土故，安置养育一切众生，是故汝等大夜叉王不得分者，应当容忍莫恨。所谓箭毛夜叉、赊罗毗夜叉、迦吒首利夜叉、婆罗目企夜叉、婆罗稚夜叉、婆摩罗夜叉、其梨迦吒夜叉、由梯迦夜叉、其梨呵夜叉、满面夜叉、迦赊毗提夜叉、护国夜叉、楼迦夜叉、箭爪夜叉、波那流支夜叉、狼爪夜叉、狮子怖夜叉、阿楼尼夜叉、修罗阇毗夜叉、阿茶阇梨夜叉、得叉梨师夜叉、灰手夜叉、苏摩那虎夜叉、罗摩那时夜叉、恶叉尼弃罗夜叉、质多罗夜叉、佛护夜叉，如是等八频婆罗诸夜叉大将，依阎浮提种种寺舍园林、泉池山岩、林藪树下安住不得分者，应当容忍莫恨。随所住处，乃至山林树下各住本处，护持养育我之正法，利益安乐一切众生行，以是因缘，汝等今世及以后世自利利他。何以故？彼诸天、龙、乾闥婆、紧那罗、夜叉阿修罗、鸠槃荼、天女、罗刹女等，随其国土昔所住处，彼诸天龙乃至天女，为护彼彼诸国土故，安置养育一切众生。是故汝等诸阿修罗王不得分者，应当容忍莫恨。所谓罗睺罗阿修罗王、毗摩质多罗阿修罗王、波罗陀阿修罗王、睺婆利阿修罗王、牟真邻陀阿修罗王、须质多罗阿修罗王、跋稚毗卢遮那阿修罗王、悉利罗耆阿修罗王、黠罗跋支阿修罗王、瞿摩阇毗阿修罗王、毗荼叉阿修罗王、那耶遮利阿修罗王、伽阇弥罗阿修罗王、初罗檀荼阿修罗王、阿斯末罗阿修罗王、迦摩跋知阿修罗王、婆罗干荼阿修罗王、毕他摩尼阿修罗王、波罗那佉阿修罗王、萨婆鸯伽叉阿修罗王、讫赊婆睺阿修罗王，如是等六万那由他阿修罗王住阎浮提不得分者，应当容忍莫恨。各住本宫护持养育我之正法，当作利益一切众生行，以是因缘，汝等今世及以后世自利利他。何以故？彼诸天、龙、乾闥婆、紧那罗、夜叉、阿修罗、鸠槃荼、天女、罗刹女等，随其国土昔所住处，彼诸天龙乃至天女为护彼彼诸国土故，安置养育一切众生，是故汝等诸大天女应当容忍莫恨。所谓歌大天女、造光天女、地解天女、增护天女、解脱天女、增水天女、少热天女、净目天女、饶财天女、宝藏天女、摩尼爪天女、黑绳天女、随时天女、王顶天女、天水天女、眼目天女、莲华天女、忧昙婆罗天女、赊尸天女、明炬目天女、善意天女、难胜天女、胜目天女，如是等六十二百千诸大天女，依阎浮提种种塔寺城邑、聚落园林、泉池河边、山谷大海边住不得分者，汝等随所住处，各各于彼护持养育我之正法。汝等于彼所有怖畏、斗争怨仇、饥馑疫病、他方怨敌、非时风雨、冰寒毒热悉令休息，遮障不善诸恶众生瞋恚粗犷、苦辛涩触无味等物悉令休息，令我法眼久住世间，绍三宝种不令断绝，三种精气增长炽然，利益安乐诸天人故勤加护持。以是因缘，汝等今世及以后世常得利益，安乐众生。”

时，彼六十二百千天女白佛言：“大德婆伽婆，我等护持养育佛法，休息斗争，增长一切三种精气，乃至世尊声闻弟子三业相应无所

积聚者，我等勤加护持养育。”佛言：“善哉！善哉！善女人辈，汝等应当如是护持。”诸来大众皆亦随喜赞言：“善哉！善哉！”

尔时，世尊复告一切诸天、乾闥婆乃至诸大天女言：“我今与汝息诸诤讼大陀罗尼心。汝等以此陀罗尼心故，各于己国，若曜宿失度，摄诸众生令得敬信，一切斗争悉得休息。”作是语已，即说咒曰：

“多地夜多 摩陀那 摩陀那 瞿摩陀那阿婆摩多 阿兮摩多
摩陀那佉 阿差摩[土+玄] 波罗赊摩帝 阿唎婆三摩摩帝尼佉摩
帝 波赊摩帝 苏遮啰拏摩帝阿毗婆摩帝 阿罗毗婆摩帝 悉陀頞他
摩帝 叉婆摩帝 苏婆诃。”

尔时，娑婆世界主大梵天王，从座而起，向佛合掌，头面作礼而作是言：“大德婆伽婆，我今复以大陀罗尼，降诸恶龙及恶鬼神，护持国土，遮障一切诸恶众生。”作是语已，即说咒曰：

“哆地夜他 县无啰牟喽啰牟喽那伽牟喽 那伽牟喽 阿薮啰牟
喽 药叉牟喽 药叉牟喽伽槃荼牟喽 浮单那牟喽 迦吒富单那牟
喽 阿耶婆牟喽 侯诃侯诃牟喽 诃诃诃诃 牟厨帝药叉牟喽啰婆诃
啰婆诃啰婆诃 萨婆乌闍 啰婆诃 苏婆呵。”

尔时，所有诸天、龙王、伽槃荼、饿鬼、毗舍遮、富单那、迦吒富单那饮血食肉者，皆悉惊怖忧愁恐惧，向佛合掌，头面礼足而作是言：“唯愿世尊大悲覆护，我等云何复得存活？”

佛言：“汝等且莫忧愁，大地所有华果五谷药草众味清净未食堕落地者，如是华果众味精气汝等食之足得活命。若复有人作食清净遗落在地，汝等亦当食其精气而自充济。复有我诸声闻弟子修禅定者，以己善根咒愿，汝等亦得色力、精气丰盛、眷属朋党具足势力。若有施主施我弟子寺舍园林、田地舍宅，称名咒愿，汝当于彼与欲随喜护持养育；以是事故，汝等宫殿当得增长。若有施主施我弟子饮食、衣服、卧具、汤药，受取之时称名咒愿，汝亦随喜；以彼咒愿汝随喜故，汝等便得寿命增长、愿容增长、安乐增长、朋党增长、势力增长。汝等昼夜应当精勤护持养育如是施主及以受者。”

尔时，世尊欲重明此义，而说偈言：

“两足大法王， 观众作是言：
‘帝释汝问我， 各随与其分，
天龙伽槃荼， 夜叉修罗刹，
阎浮诸国土， 城邑众聚落，
旷野诸树林， 山岩井泉池，
法眼得久住， 诸恶令休息。

丰饶悉可乐， 为于阎浮提，
四天中鬼神， 付嘱勤护持。
汝等舍眷属， 我复更分布，
莫瞋怒嫉妒， 与欲当随喜。’
法喜禅味食， 如是诸天众，
一切皆悉起， 咸作如是言：
‘我等为正法， 护持阎浮提。
声闻具持戒， 不为积聚者，
剃头不持戒， 欲令法眼增，
我等皆至心， 勤加护养育。’
导师告彼言：‘正法我灭后，
具满五百年， 坚固住解脱；
五百年禅诵； 五百造塔寺；
至后五百年， 坚住于斗争。
后时有剃头， 破戒无羞耻，
供养如是辈， 亦得无量福。
譬如金无价， 除金至银宝，
鉅石伪铜铁， 白镵及铅锡，
世间若无宝， 锡镵为最上；
佛宝亦如是， 最尊独第一，
次宝辟支佛， 罗汉余证果，
得定净持戒， 破戒名字僧，
深信求解脱。 若能供养彼，
不久住忍地， 必速证菩提。
六欲诸天子， 宝国诸鬼神，
住林乾闥婆， 海中十大龙，
十大鸠槃荼， 夜叉十神通，
各住本宫殿， 护持我正法。
饿鬼住旷野， 毗舍遮空室，
富单依野田， 迦吒冢间住，
如是各随喜， 依分皆护持。
依分不正护， 复勤恼于他，
我以如是等， 更转付余天，
诸龙夜叉众， 乾闥紧那罗，
天女修罗等， 罗刹鸠槃荼，
普遍诸国土， 安置护养育，
迦毗波罗奈， 摩伽拘萨罗，
般遮鸯伽国， 苏摩阿湿婆，
摩偷支提国， 婆蹉及赡耶，
罗吒忧禅尼， 罗吒输卢那，

摩尼調鞞国， 乾陀波吒罗，
般提婆楼帝， 跋尼悉都那，
瞻波钵浮尼， 富楼沙富罗，
乌菴寄萨梨， 金性摩都罗，
波斯敕勤土， 般遮囊伽罗，
尸利耶摩国， 叵耶薮利迦，
闍宾跋利国， 佉罗忧罗赊，
伽赊遮居国， 达罗弗离沙，
筏提沙勒国， 婆楼兮周迦，
于填及鄯善， 龟兹紧那罗，
震旦等国土， 护持令安置。
于此一切国， 诸龙无分者，
一百八十万， 夜叉等无分，
及八频婆罗， 修罗不得分，
六万那由他， 天女等无分，
六十二百千， 我今悉谢汝，
各住本宫殿， 护持我正法。
当与汝神咒， 遮障恶众生，
休息诸恼害， 一切斗争讼。
亢旱及水潦， 病俭诸贼寇，
增长三精气， 诸恶令休息。
护持我正法， 炽然三宝种，
声闻诸比丘， 三业常相应，
剃头不持戒， 一切皆护持。
为诸声闻故， 具舍诸田宅，
饮食及汤药， 一切有所须，
如是诸施主， 汝等护养育。”

大方等大集月藏经卷第十

星宿摄受品第十八

尔时，佛告娑婆世界主大梵天王、释提桓因、四天王言：“过去天仙云何布置诸宿曜辰，摄护国土养育众生？”

娑婆世界主大梵天王、释提桓因、四天王等，而白佛言：“过去天仙分布安置诸宿曜辰，摄护国土养育众生，于四方中各有所主。东方七宿：一者、角宿主于众鸟，二者、亢宿主于出家求圣道者，三者、氏宿主水生众生，四者、房宿主行车求利，五者、心宿主于女人，六者、尾宿主洲渚众生，七者、箕宿主于陶师。南方七宿：一者、井宿主于金师，二者、鬼宿主于一切国王大臣，三者、柳宿主雪

山龙，四者、星宿主巨富者，五者、张宿主于盗贼，六者、翼宿主于商人，七者、轸宿主须罗吒国。西方七宿：一者、奎宿主行船人，二者、娄宿主于商人，三者、胃宿主婆楼迦国，四者、昂宿主于水牛，五者、毕宿主一切众生，六者、嘴宿主鞞提诃国，七者、参宿主于刹利。北方七宿：一者、斗宿主浇部沙国，二者、牛宿主于刹利及安多钵竭那国，三者、女宿主鸯伽摩伽陀国，四者、虚宿主般遮罗国，五者、危宿主著华冠者，六者、室宿主乾陀罗国、输卢那国及诸龙蛇腹行之类，七者、壁宿主乾闥婆善音乐者。大德婆伽婆，过去天仙如是布置四方诸宿，摄护国土养育众生。”

尔时，佛告梵王等言：“汝等谛听，我于世间天人仙中一切知见最为殊胜，亦使诸宿曜辰摄护国土养育众生。汝等宣告令彼得知，如我所分国土众生各各随分摄护养育。”大梵王等而白佛言：“如是，大德婆伽婆，唯然受教。”

尔时，佛告梵王等言：“我今以彼于摩国、陀楼国、悉支那国、奈摩陀国、陀罗陀国、佉沙国、罗佉国、赊摩国、侯罗婆国、舍头迦国、頰闍婆国、没遮波国，此十二国付嘱角宿摄护养育；亦护角宿日建立国土城邑聚落，及角宿日所生众生，汝等宣告令彼得知。”梵王等言：“如是，大德婆伽婆，唯然受教。”

尔时，佛告梵王等言：“我今以彼阿罗茶国、诃利那国、叔迦罗国、波卢罗国、弗利赊国、那摩帝国、俱致娑国、苏那婆国、赊摩国、跋陀婆国，如是十国付嘱亢宿摄护养育。”乃至唯然受教。

尔时，佛告梵王等言：“我今以彼佉搜迦国、信头婆迟国、阿摩利国、余尼目佉国、难陀婆国、伽沙国、跋使俱闍国、由婆迦国、婆佉罗国、沙婆罗国、伽楼茶国、鸠筹迦国、婆遮利婆国，此十三国付嘱氏宿摄护养育。”乃至唯然受教。

尔时，佛告梵王等言：“我今以彼波头摩国弗色迦罗国、目帝国、高伽摩国、耆利国、不摩婆国、南耆利国、遮波罗国、修帝达赊国、提婆那国、奚周迦国，此十一国付嘱房宿摄护养育。”乃至唯然受教。

尔时，佛告梵王等言：“我今以彼睺罗婆国、鸠罗婆国、牟罗婆国、能伽婆国、苏提闍国、鸠知迦国、天王国、毗那婆国、波搜多国、奚迦国，如是十国付嘱心宿摄护养育。”乃至唯然受教。

尔时，佛告梵王等言：“我今以彼伽闍弗国、迦罗婆国、迦迦波他国、悉陀叉国、郁瑟吒罗婆国、帝罗南国、阿罗毗国、那婆国、弗色迦罗婆国、摩兜利国、迦邻伽跋帝国、摩于达利国、毕姜闍国、钵利犀罗婆国，此十四国付嘱尾箕二宿摄护养育。”乃至唯然受教。

尔时，佛告梵王等言：“我今以彼婆蹉国、忧禅尼国、忧楼频螺国、输尼般多国、摩茶婆国、毗使拏提波国、遮罗羯波国、婆罗斫迦罗国、罗摩伽摩国、迦尸弗国、伽楼沙国、陀修国、卢醯多国、阿婆陀茶国、帝拏槃那国、遮达那国、毗伽闍国，此十七国付嘱井宿摄护

养育。”乃至唯然受教。

尔时，佛告梵王等言：“我今以彼波吒利弗国、摩尼蓝婆国、婆楼那国、那遮罗国、羯那国、北般遮罗国、帝跋拏国、娑罗蹉国、瞻波国、苏都那国、鸠楼差多国、西地国、富楼沙富罗国、侯弥单国、蓝摩婆国、瞿罗国、奚摩国、阇耶波梯国、婆求弥国、恒河门国、头婆罗婆帝国、旃达罗跋帝国、婆楼迦车国、苏尼弃国、瞿沙跋帝国，此二十五国付嘱鬼宿摄护养育。”乃至唯然受教。

尔时，佛告梵王等言：“我今以彼寄萨梨国、摩诃尼梯国、乌场国、须尼弃国、波罗婆国、忧罗婆国、区茶国、尼佉国、干茶波罗婆国、婆寄多国，如是十国付嘱柳宿摄护养育。”乃至唯然受教。

尔时，佛告梵王等言：“我今以彼阿鞞遮国、苏跋拏国、阇吒国、金性国、摩兜罗国、毗摩尸利国、检婆楼遮国、苏梨国、婆求遮国、频头罗婆国、婆罗那国、般遮囊伽罗国，此十二国付嘱星宿摄护养育。”乃至唯然受教。

尔时，佛告梵王等言：“我今以彼波斯国、诃利陀国、敕勤国、阿摩罗国、婆罗婆国、苏摩尼弃国、叵耶那国、三牟遮国、尸梨沙国、婆利国、伽菟娑国、摩遮国、兜佉罗国、摩头师利国，此十四国付嘱张翼二宿摄护养育。”乃至唯然受教。

尔时，佛告梵王等言：“我今以彼伽罗婆罗国、忧罗睺国、闍使拏国、婆耆国、檀多摩利国、婆楼遮国、陀茶国、达拏国、菟牟寄睺国、鸠论遮差国、呾罗婆罗国、阿疏俱迦国，此十二国付嘱轸宿摄护养育。”乃至唯然受教。

尔时，佛告梵王等言：“我今以彼鸠睺弗利国、紧那罗国、迦卑罗摩利国、三谟师国、咽罗尼国、时婆利国、奚阇尼国、摩兜蹉迟国、般茶梨国、蜜拏梨国、修罗毗国、侯摩多尼国，此十二国付嘱奎宿摄护养育。”乃至唯然受教。

尔时，佛告梵王等言：“我今以彼提帝睺婆国、苏摩跋罗国、多罗比尼国、阿睺若国、俱萨罗斯国、悉都那国、娑罗瞬迟国、紧拏多利国、湿婆尼利国、罗婆师饥国、佉吒梨毗国、佉娑利国、白马国，此十三国付嘱娄宿摄护养育。”乃至唯然受教。

尔时，佛告梵王等言：“我今以彼阿斯那弃国、军陀罗毗国、安尼师国、遮俱波国、兜伽帝国、逋支国、支多毗悉帝国、忧篴帝国、槃头波罗国、毗罗梨迦国、摩陀罗毗国、迦拏波帝国、达婆娑梨国，此十三国付嘱胃宿摄护养育。”乃至唯然受教。

尔时，佛告梵王等言：“我今以彼波罗耽罗国、只叔迦国、婆楼遮国、输卢那国、迦毗罗婆国、奢耶国、马面国、伽楼茶国、憍罗跋陀国、吴地国、阇婆跋帝国、鞞楼国、伽楼诃国、于填国、伽颇罗国、狗面国、尼婆罗国、俱那娑国，此十八国付嘱昂宿摄护养育。”乃至唯然受教。

尔时，佛告梵王等言：“我今以彼摩伽陀国、鞞提诃国、萨罗

国、奚浮迦国、牟尼奢耶国、罗罗国、余尼迦国、拘萨罗国、跋沙伽国、阿茶国、鞞诃迦国、頽那婆国、伽耶国、尼婆国、槃罗婆国、跋知尼国、陀楼国、尸利曼多国、弥伽颇罗国、摩醯首罗腻罗耶国、闍宾国、婆卢师多国、沙勒国、忆尼国、筏提国，此二十五国付嘱毕宿摄护养育。”乃至唯然受教。

尔时，佛告梵王等言：“我今以彼尼娑国、迦尸国、奢伽尼国、阿吒摩阇国、紧陀国、摩婆摩国、达毗迦国、八城国、殊提沙国、婆毗迦国、婆求茶国、摩诃罗吒国、乾陀罗国、迦婆摩国、般遮罗国、多茶沙国、首婆迦国、摩师跋那国、兜罗婆国、苏摩国、婆求国、摩多摩利国、摩罗婆国、鸠留国、瞿沙国，此二十五国付嘱宿摄护养育。”乃至唯然受教。

尔时，佛告梵王等言：“我今以彼阿湿婆国、奢跋那国、摩偷罗国、鸯伽吒婆国、摩头曼多国、俱周罗国、曼遮国、婆求摩国、俱阇婆国、震旦国、首罗犀那国、阿那牟佉国、佉罗婆罗国、犀摩娑国、那□逻婆跋陀国、曼迟罗婆国、奚周迦国，此十七国付嘱参宿摄护养育。”乃至唯然受教。

尔时，佛告梵王等言：“我今以彼辛头伽罗国、瞿那悉须国、迦罗差国、娑罗差国、达罗腻钵帝国、海果国、阿楼瑟拏罗婆国、那婆弗使波罗婆国、摩那兜利国、民陀罗跋帝国，如是十国付嘱斗宿摄护养育。”乃至唯然受教。

尔时，佛告梵王等言：“我今以彼刹利天祠如是二处，付嘱牛宿摄护养育。”乃至唯然受教。

尔时，佛告梵王等言：“我今以彼阿楼那国、鸠私娑罗阇利国、瞻波兜钵国、龟慈国、摩蓝浮沙国、舍迦国、物陀罗多国筏提国、瞿师国婆罗弥国，如是十国付嘱女宿摄护养育。”乃至唯然受教。

尔时，佛告梵王等言：“我今以彼难提跋弥国、波罗尸国、满福国、忧罗奢国、蓝浮沙国、娑婆国、摩陀罗婆国、筏提国、佉沙国、娑罗斯国、师子国、诃波他国、诃利伽时国、忧婆毗罗国、多罗尼国、毗舍离国、忧迦利国，此十七国付嘱虚宿摄护养育。”乃至唯然受教。

尔时，佛告梵王等言：“我今以彼迦车鞞帝国、波利支国、龙华国、鸠茶婆国、难提跋檀那国、婆楼迦国、乾陀俱致国娑弥利国、夜瑟吒俱利国，如是九国付嘱危宿摄护养育。”乃至唯然受教。

尔时，佛告梵王等言：“我今以彼侯曼陀国、奢曼陀国、头摩迦国、酬摩迦国、犍沙婆国、鸠支国、博叉利国、德叉尸罗国、婆弥婆利国、跋陀跋帝国、忧摩差国、跋娑多牟利摩国、婆楼迦车国、婆罗跋帝国，此十四国付嘱室壁二宿摄护养育；亦护二宿日建立国土城邑聚落，及二宿日所生众生，汝等宣告令彼得知。”梵王等言：“如是，大德婆伽婆，唯然受教。”

尔时，佛告梵王等言：“所言曜者，有于七种：一者、日，二

者、月，三者、荧惑星，四者、岁星，五者、镇星，六者、辰星，七者、太白星。所言辰者，有十二种：一名弥沙，二名毗利沙，三名弥偷那，四名羯迦吒迦，五名[系+集]呵，六名迦若，七名兜逻，八名毗梨支迦，九名檀尼毗，十名摩伽罗，十一名鸠槃，十二名弥那。我今令此诸曜辰等摄护国土城邑聚落养育众生，汝等宣告令彼得知。”梵王等言：“如是，大德婆伽婆，唯然受教。”

尔时，娑婆世界主大梵天王、释提桓因、护世四王及诸眷属而白佛言：“大德婆伽婆，若有世尊声闻弟子，不得畜养奴婢、畜生、园林田宅，俗人资具及不交往，除四方僧物，起发精进，三业相应，常怀惭愧，独住闲林集诸善法；我于彼时令宿曜辰正行于世，遮恶众生触恼斗争、两国兵仗，疾病饥馑、非节风雨、失时寒热悉令休息，护佛正法久住炽然，绍三宝种使不断绝，三种精气增长安住，亦使世尊声闻弟子身口意业清净相应，发大勇猛循法而住。”

尔时，佛告阿若憍陈如言：“为令我法得久住故，成熟众生故，阎浮提中一切诸国、一名诸国、多名诸国、同名诸国及不列名国，分布与彼天、龙、夜叉乃至迦吒富单那等令作护持，及宿曜辰亦付诸国令作护持；乃至令三宝种不断绝故，所有诸国多名同名，于彼诸国同名夜叉、同名罗刹，有国无鬼神名有鬼神住，还付彼等令作护持，于阎浮提有余鬼神不列名者亦使护持。憍陈如，一切鬼神皆悉发心护持养育，乃至随我声闻弟子三业相应常无聚积循法而住，于一切时护持养育。憍陈如，汝等应当常不聚积，住阿兰若，三业相应，背舍生死趣向涅槃，成熟众生，应如是学。”

尔时，世尊欲重明此义，而说偈言：

“或熟众生故，我问诸天王：

‘云何昔天仙，配宿摄诸国？’

梵天答我言：‘过去天仙等，
安置诸宿曜，护如法众生。’

今付汝国土，应当加养育，
亦付鬼神等，而令作护持。

及彼宿曜辰，各令摄国土，
护持养育故，炽然正法眼。

护不畜田宅，清净声闻众，
遮诸恶众生，及息诸浊恶。

不绝三宝种，增长三精气，
汝告宿曜等，令彼作护持。

我告诸声闻，令住正法眼，
应当舍憍慢，精勤住兰若，

背舍于生死，趣向于涅槃，
乐住禅境界，成熟亿众生。’

建立塔寺品第十九

尔时，娑婆世界主大梵天王、释提桓因、四天王等及诸眷属，从座而起，合掌向佛，一心敬礼而作是言：“佛说于此四天下中所有过去诸佛如来之所建立住持大塔牟尼诸仙所依住处，于现在世及未来世而常不空，佛为菩萨摩訶萨等降大法雨皆悉充满，初名众仙所兴，次名德积，次名金刚焰，次名香室，次名睽婆梨，次名贤城，次名须质多罗，次名水光，次名香薰，次名善建立，次名遮波罗，次名金灯，次名乐依，次名牟真邻陀，次名金刚地，次名慈窟，次名那罗延窟，次名渠摩娑罗香，次名慧顶，次名大德窟，次名善现，次名青郁茂窟，次名虚空子，次名牛头栴檀室，次名难胜。此是过去诸佛建立住持大塔，常为菩萨摩訶萨等之所加护，是于我等常所供养。世尊所有声闻弟子，于现在世及未来世，复有几所塔寺住处，令我等辈护持养育？”

尔时，世尊熙怡微笑，从其面门放种种光照曜诸方，即时于此四天下中，而有无量百千诸佛处处而现：东弗婆提八万佛现，北郁单越百千佛现，西瞿陀尼五万佛现，诸海岛国百千佛现。此阎浮提二百五十千佛处处而现：波罗奈国六十佛现，迦毗罗婆国二十佛现，摩伽陀国三十佛现，鸯伽摩伽陀国二十佛现，拘萨罗国五十佛现，须罗吒国二十佛现，摩诃罗吒国三十佛现，乾陀罗国十佛而现，阿槃提国二十六佛现，般遮罗国二十五佛现，苏摩国十二佛现，阿叶婆国十佛而现，摩偷罗国十佛而现，毗罗国十八佛现，婆蹉国五十六佛现，奢耶国四十二佛现，优禅尼国二十三佛现，舒卢那槃多国二十五佛现，舒卢那国三十八佛现，摩尼蓝婆国二十五佛现，波梨弗国五十五佛现，婆楼那跋提国四十八佛现，提跋那国二十九佛现，瞻波国二十五佛现，悉都那国三十六佛现，西地国七十佛现，富楼沙富罗国五十佛现，乌长国二十六佛现，枳萨罗国二十二佛现，金性国二十九佛现，摩兜罗国四十佛现，涑利迦国二十八佛现，般遮囊伽国五十八佛现，波斯国二十佛现，敕勤国四十佛现，尸利沙国三十二佛现，婆伽罗国五十八佛现，罽宾国五十五佛现，忧罗奢国二十五佛现，佉罗婆罗国十二佛现，阿疏拘迦国二十二佛现，陀罗陀国十五佛现，波卢那国二十佛现，弗离沙国十五佛现，迦沙国二十八佛现，遮拘迦国二十佛现，筏提国四十五佛现，沙勒国九十八佛现，于填国百八十佛现，龟兹国九十九佛现，婆楼迦国二十四佛现，奚周迦国十八佛现，亿尼国八十佛现，鄯善国二十九佛现，紧那罗国八十佛现，震旦国二百五十五佛现，罗罗国二十四佛现，吴地国五十佛现，新陀跋持国二十五佛现。

佛言：“诸仁者，如是等佛，于此四天下国土城邑、村落山林处而现，我今神力之所加故，还有如是等数塔寺。于彼彼处，我诸声

闻现在、未来三业相应，及与三种菩提相应，有学无学，具足持戒多闻善行，度诸众生于三有海，及诸施主为我声闻而造塔寺，亦复供给一切所须，及彼眷属付嘱汝等，勿令恶王非法恼乱，又复勿令他方冤敌、盗贼水火、人非人等之所恐怖，亦勿令彼饥渴乏少，以乏少故于三善业不得相应，退舍禁戒，善朋损减。”

尔时，复有诸梵天王、诸释天王、诸龙王、诸夜叉王、诸阿修罗王、诸鸠槃荼王，皆与眷属合掌向佛而作是言：“大德婆伽婆，已有一切如来塔寺及阿兰若处，现在世尊声闻弟子所有住处，及未来世刹利、婆罗门、毗舍、首陀，若在家人、若出家人，为于世尊声闻弟子造塔寺处，随有世尊声闻弟子三业相应，及与三种菩提相应，有学无学，住于持戒多闻善行，我等悉共守护于彼，令离一切诸难怖畏。诸有世尊声闻弟子所立塔寺及阿兰若处，如有给施饮食、衣服、卧具、汤药一切所须，如是施主我等亦当护持养育。若复世尊声闻弟子，乏少昼夜所须众具贫苦之者，我为彼等作大施主，受其寄付护持养育，除诸怖畏。”

佛时赞言：“善哉！善哉！诸贤首，汝等一切于四天下应当如是。如今汝等受我教敕如说修行，我以汝等及诸眷属付嘱弥勒。”

尔时，世尊欲重明此义，而说偈言：

“天王皆悉起， 敬礼瞿昙仙，
 问诸塔寺数， 说佛所依处：
‘于此四天下， 复有几塔寺，
 声闻所依者， 我等共护持？’
 两足尊微笑， 于此四天下，
 化作诸佛现， 无量百千数。
 四方神力加， 故现诸化佛，
 示佛诸声闻， 所立诸塔寺。
 为住三乘道， 是故而建立，
 乐三业相应， 如是声闻住。
 以诸声闻寺， 付嘱于汝等；
 供养彼施主， 亦当护养育，
 不令相违恼， 勿使他得便，
 莫令有乏少， 退舍于禁戒。
 天王及眷属， 禀受佛教敕：
‘我等悉护彼， 导师所建立；
 我等及眷属， 勤护诸塔寺；
 已作当作者， 一切勤护持。
 知足诸比丘， 住于无积聚，
 离欲慈悲心， 我等当守护。’”

法灭尽品第二十

尔时，月藏菩萨摩訶萨复从座起，整理衣服，偏袒右肩，合掌向于十方一切诸来菩萨摩訶萨众，口眼微笑，顾视月灯菩萨摩訶萨，而说偈言：

“观此希有慈悲士， 释迦大仙尊导师，
今以此法甘露味， 付嘱夜叉令护持，
普告一切作是言：‘我之正法汝当护，
一切声闻器非器， 当视如子护养育！
为我剃头著袈裟， 勿令于后有恼害，
休息诸恶俭病疫， 亦息非时风热雨，
如是三种精气增， 正法久住于世间，
众生不堕诸恶道， 速能趣向大涅槃。’
我从昔来未见闻， 慈悲希有余士无，
除佛更无余众生， 能令正法久炽然。
诸佛慈悲慧无量， 广持正法令久住，
导师灭后佛正法， 炽然久住事希有。
此土不善烦恼山， 坚固希有最难坏，
转正梵轮法眼住， 悉令住善到涅槃。
此土极恶人与魔， 夜叉修罗鸠槃荼，
彼等究竟灭烦恼， 护持世尊真妙法。
以是因缘得最胜， 能尽所作诸恶业，
彼勤供养于三宝， 是故速能趣涅槃。
断除烦恼牟尼尊， 世间自在大导师，
怜愍一切众生故， 告令护持佛正法。”

尔时，月灯菩萨摩訶萨，闻月藏菩萨说是偈已，复说偈言：

“我欲问佛无边慧， 法眼几时住于世？
如此佛月灭度后， 烦恼痴诤闇世间，
云何贤圣复得集？ 当作何人方便护？
云何示世安隐道， 能度三趣亿众生？”

尔时，一切诸来大众，向诸菩萨摩訶萨赞言：“善哉！善哉！”

尔时，月灯菩萨摩訶萨从座而起，偏袒右肩，整理衣服，右膝著地，合掌向佛，头面作礼，以偈问曰：

“我今问佛无边慧， 以我今有诸疑网，
以何因缘法眼灭？ 云何法灯久炽然？
谁能破坏此法鼓？ 谁能枯涸正法河？

云何法眼得久住？ 我当于彼助护持！
为以尸罗精进力， 为以羼提禅般若，
为以何力法久住？ 唯愿速说何方便！
云何法水得久流？ 有多亿数助佛者，
我等精勤坚固行， 为令法海不速竭。
大地精味常增长， 及以众生法精味，
枯涸众生烦恼海， 众生更不趣恶道。”

尔时，佛申金色右臂，而说偈言：

“汝等共谛听， 一切有为法，
无常火所烧， 无有少常者。
譬如诸戏人， 作于种种戏，
如是等众生， 皆为烦恼转。
犹如幻芭蕉， 亦如水中月，
三界有为法， 一切皆如是。
诸法我自觉， 道成如先佛！
我今大众会， 天人作证明，
正法付天神， 护持众苦尽，
成于三界尊， 能令法炽盛。
显现八正路， 邪意恶觉灭，
沙门刹利王， 激动相瞋恼。
我今当不久， 涅槃灭无余，
大智诸声闻， 亦随我涅槃。
余方诸佛国， 一切诸菩萨，
具大神通者， 复还向他方。
福德诸国王， 大臣长者灭，
限满百年后， 佛法渐隐没。
薄福众生等， 于我法出家，
不乐于三乘， 亦不畏后世。
活命故出家， 多诈无羞耻，
贪求诸名利， 处处谄嫉妒。
远离于禅诵， 善舍诸善法，
昼则乐言讼， 夜则多睡眠。
乐读外杂典， 舍离佛所说，
复与女人通， 严饰身衣服。
为求名利故， 但营世俗业，
常为他作使， 通致诸信命。
往返俗人家， 贩卖以自活，
乐作诸田业， 又复喜斗争。”

见诸善比丘，梵行多闻者，
嫉妒复瞋骂，不容彼坐卧，
而作粗穢语，诽谤及毁訾。
于诸俗人边，称扬不善业，
言此诈比丘，是贼最恶人，
若有供养者，多得恶名闻，
于彼不获福，亦莫信彼说。
诸寺恶比丘，盗说梵行者，
种种不善事，是以刹利瞋。
彼诸恶比丘，杂以外文颂，
称赞彼刹利，能令刹利喜。
毗舍婆罗门，利喜亦如是，
以是得供养，持戒被欺陵。
刹利婆罗门，嫌恨持戒者，
嫌恨持戒故，致使诸天瞋，
弃舍彼国土，刹利辅相臣。
向于宝国土，在彼而安住，
轻贱持戒故，菩萨亦舍离。
诸天舍离后，其国大可畏，
恶龙恶夜叉，罗刹鸠槃荼，
入国夺精气，及食其血肉。
恶王婆罗门，毗舍首陀等，
共护国城邑，及以诸村落。
宫舍国园林，恶鬼遍充满，
常夺彼精气，触恼诸刹利。
婆罗毗舍陀，男女等皆瞋，
复令心变恶，互共相斗争。
彼等斗争故，布萨行檀绝，
其国水枯竭，非时风雨起，
饥馑极俭短，乏少资生具，
果苗不成熟，地味众生味，
法味及精气，一切皆损减，
兴动诸兵仗，互共相劫夺。
如是慳贪国，恶比丘往返，
复以佛僧物，饮食诸果药，
持用与俗人，因此得供养，
奴婢及田宅，与彼令摄受。
不善比丘等，以之为尊长，
少智诈多闻，不喜禅戒者。
禅戒者去后，为财共斗争，

刹利闻生瞋，打害恶比丘，
还俗舍法服，系闭于牢狱，
以是诸天瞋，迭共相告语：
‘如是国土中，旃陀罗王治，
朋党恶比丘，毁破袈裟服，
自坏己国土，不久当败亡，
堕在阿鼻狱，受苦极长远，
于是贤劫中，无脱地狱时。’
是旃陀罗王，众圣所厌贱，
听读檀尸法，谄曲虚诈现。
是王多诈伪，速灭己国土，
苗稼不成熟，亢旱及水潦。
鼯鼠恶象暴，自他国兵起，
曜入非常宿，大地普震动。
白虹妖星堕，时气多疫病，
焚烧诸聚落，速坏国城邑。
剃头著袈裟，诸佛所加护，
一人出家者，天人所供养，
唯除诸如来，无有自在者。
彼旃陀罗王，謫罚恶比丘，
毁坏三世佛，二种净法身，
烦恼疮深重，难得值诸佛，
诸天皆舍离。彼旃陀罗王，
如是国土坏，法眼当散灭；
诸天舍离故，如是国土坏，
三种精气减，毁灭天宫殿，
白法善朋少，黑法恶党增，
于彼浊恶世，无有明智人。
所住阿兰若，乐法安隐住，
彼持我正法，能令多众信，
鬼神敬信故，遮障诸怖畏，
增长三精气，炽然我正法。
彼以禅定乐，充满天宫殿，
是故以我法，付诸鬼神王，
遮障恶刹利，莫恼我声闻。
国王于持戒，亲近常供养，
破戒不亲供，舍离各随住。
国王不恼彼，持戒及毁禁，
刹利净持戒，彼此皆信敬。
毗舍婆罗门，不恼诸天神，

正法得久住，白法常增长。
汝等于此土，随意而安住，
汝等若发心，此土常安住。
乃至我法尽，莫向诸余国，
以檀尸罗法，令多众归信。
智者能成熟，彼非是希有；
于彼恶世时，炽然我正法，
遮障恶刹利，此事为希有！
慈心常相应，莫打我声闻，
彼二说正法，能救地狱苦。
比丘不护戒，国王莫謫罚，
汝诸刹利王，莫共沙门斗。
俗人作诸恶，速趣于地狱，
软语向彼二，遮除诸恶业。
莫以粗穢语，亦莫打治罚，
以是国不坏，增长三精气，
正法得久住，佛法久炽然。
多有说法者，能闭三恶趣，
休息世间恶，增益诸天众，
涅槃门得开，无漏者则入，
菩萨得增长，犹如明分月，
能以于六度，充满诸佛法。
是故诸智者，所来诸菩萨，
当住于此土，炽然我正法。
盲冥失道者，当与正法眼，
众生以六度，成熟于菩提。
汝等则成供，三世诸如来，
速证菩提果，净国作导师。”

大众皆默然，唯有贤劫众，
弥勒为上首，一切皆悉起，
合掌而白佛，咸作如是言：

“我不诣余方！护持佛正法，
尽我精进力，成熟大菩提，
随于彼时中，应机而说法。
欲有留难时，我等不能遮；
法欲灭尽时，我亦不能遮。”

尔时，世尊告彼白智童真菩萨摩訶萨，而说偈言：

“观此诸菩萨，勇猛执智炬，
无量阿僧祇，他方佛土来。
种种善根宝，归依诸佛海，
慈悲方便力，于佛法不动。
于此无有一，能持我法者，
贤劫诸菩萨，堪能持我法。
于我灭度后，佛法欲灭时，
所有出家者，而无有惭耻，
远离功德智，懈怠不精进，
舍道学世业，不乐持禁戒，
愚痴与俗交，多言复无羞，
贪取佛僧物，染著五欲乐。
如是比丘等，资生与俗同，
疑惑多贪财，邪淫怒嫉妒，
见住兰若者，说其诸过恶，
不乐读诵经，嗜睡多喜斗。
如是等沙门，厌贱禅兰若，
坚著于恶事，自高轻蔑他。
沙门及俗人，悭贪不舍施，
啖食佛僧物，多遭种种病，
无有慈愍心，少力恶喜斗。
以是天不雨，润泽悉枯竭，
饥馑遍世间，果实无滋味，
乏少于饮食，瞋诤相侵夺。
造十不善业，少福无供养，
法味不纯厚，行法心亦薄，
迭共作粗想，杀害无慈愍，
不孝于父母，亦不供尊长，
多修世俗行，疑惑复嫉妒，
贪染于邪法，非法无厌足，
贪求无厌故，是以久流转。
如是诸国王，及以辅相臣，
沙门婆罗门，毗舍首陀罗，
乐斗憎持戒，互共相谤毁。
南方边夷国，王名波罗帝，
百千诸军众，士将共围绕。
西方边夷国，有王名百祀，
亦将百千军，前后共围绕。
北方边夷王，名善意释迦，
士将诸营从，围绕亦百千。

东方睽弥国，王名为大军，
眷属百千众，围绕而侍卫。
大军王有子，名之为难看，
生时身著铠，把刀血涂身，
大力身坚固，而从母胎生。
是时长者等，大臣五百人，
同时俱生子，身亦著铠甲，
执刀血涂身，皆从母胎生，
是日于其国，天龙降血雨。
五百长者子，难看同处养，
难看年七岁，父王授其位。
边夷三恶王，又至北天竺，
破国杀害人，怨仇妒女色，
积财以火烧，瞋怒向中国。
边夷王等来，毁破佛塔寺，
杀害诸众僧，劫夺佛僧物。
病瘦诸比丘，不能走逃避，
少壮强力者，散走于诸方。
诸余比丘等，少年初出家，
未善学戒者，威仪法不具，
处处走逃避，随至被欺陵，
毁辱而打骂，恒受诸苦恼。
彼三边夷王，及与诸军众，
渐诣拘睽弥，十二年中斗。
三王及眷属，难看王杀尽，
统领阎浮提，而作一盖王。
于后大悔恨：‘我获无量罪！
颇有明比丘，当于我忏悔？’
说言有三藏，父名为火施，
种姓常清净，是大婆罗门，
子名失师迦，高才智勇博，
释子中大名，今住波梨国。
时王即遣使，请彼三藏来，
为王演正法，令王生敬信。
‘我于十二年，战斗大作罪，
三王及眷属，军众我杀尽。
我亦十二年，具设般遮会，
普告阎浮提，释子皆来集。
所有诸比丘，住在阎浮提，
愿各悉来此，受我等供养。’

比丘等悉集， 睽弥般遮会，
在路有饿死， 或病在道傍，
中有遭水毒， 或值贼虎伤，
或复坠山涧， 比丘死无数，
余残到睽弥， 威仪法则坏，
百千皆来集， 设大般遮会。
初起般遮日， 大云皆悉起，
普遍阎浮提， 降澍于大雨。
时王甚欢喜， 此是众僧力，
比丘既集已， 互共相借问：
颇见我和尚？ 及问阿阇梨，
知识诸等侶， 同学何处去？
‘我今得来此， 彼或道路亡！’
高声大悲哭， 相恋而嗥啼，
失师三藏起， 少时静默住。
比丘大嗥哭， 惆怅不自抑；
王见彼嗥哭， 晓谕亦不止。
时王自思惟：‘此有罗汉不？’
天神夜告王：‘还于波梨弗，
善财长者子， 名曰洩罗多，
是大阿罗汉， 恒在香山中，
三明解脱具， 而来安住此。’

今于此大月， 十五日布萨，
由此布萨故， 百千众集会。
中有一三藏， 复有阿罗汉，
于时诸天众， 皆来听布萨。
今是最后集， 当作无上护，
法幢当摧折， 法炬当散灭，
法山欲崩颓， 法海当枯竭！
八种功德水， 最后当亦竭！
比丘众声乱， 三藏于时起，
高声言寂静：‘谛听戒律仪！
所有诸释子， 一切皆来集，
我于此众中， 多闻到彼岸，
学戒犹不净， 何况于余人？
若有一比丘， 能持此禁戒，
威仪无缺者， 今当为布萨。
若于毗尼戒， 威仪无缺犯，
于此大众前， 有者今当现，

为学戒律者， 今当作布萨！’
罗汉溱罗多， 即起师子吼：
‘依如经中说， 我学戒清净，
决定无有疑， 布萨我当听，
如佛之所说， 禁戒我善学！’
三藏有弟子， 名曰鸯伽多，
憍恶即瞋骂， 咄彼溱罗多：
‘经中未见汝， 是学戒律者，
大德如是说， 云何故违反？’
鸯伽瞋极盛， 两手执大棒，
打杀阿罗汉， 净戒可敬者。
诸善比丘等， 大哭而嗥啼，
各各相瞋怒， 毁破身衣服。
时有大夜叉， 名目佉檀提，
于佛深生信， 敬重佛正法，
即以金刚杵， 杀害彼鸯伽，
由杀阿罗汉， 无著溱罗多。
复有恶比丘， 名曰鸡多罗，
两手亦执棒， 复杀彼三藏。
比丘皆悉起， 各各共相杀，
百千诸比丘， 存活者无几。
是时须臾顷， 大地普震动，
于其虚空中， 出大恶音声。
四方起大恶， 火爨数百千，
火幢大可畏， 现住在空中。
彗星及妖星， 四方而流堕，
千亿诸天神， 皆作如是言：
‘释迦所集法， 今日当隐没！’
色界诸天子， 一切欲界天，
正法隐没已， 大声悲嗥哭。
见佛诸夜叉， 堕地而宛转：
‘从今于世间， 更无有佛法！
律仪木叉戒， 一切悉空无！
閻冥遍世间， 无救无归趣，
诸人等不久， 无异于獐鹿。
法幢当摧折， 法鼓声亦绝，
甘露门闭塞， 法师亦丧亡！
法炬当散灭， 法轮更不转，
正法桥破坏， 法足不复行，
法水止不流， 法河永枯竭，

法山欲崩颓， 法海当复竭！’
住林阿兰若， 所有诸天子，
于时大怖畏， 悲噪而自扑。
有诸魔眷属， 邪见诸恶党，
歌舞皆欢喜， 踊跃弄衣服：
‘释迦所说法， 趣彼甘露者，
隐没是其宜， 我法得炽盛。’
难看王既知， 正法隐没已，
从初至后夜， 出城往诣彼，
见诸比丘尸， 堕地即闷绝，
良久乃得苏， 而复更悲啼：
‘见杀阿罗汉， 三藏失师迦，
无量比丘死， 我亦不久活。’
收拾阿罗汉， 别取三藏尸，
及诸比丘丧， 种种而阖维。
余残在比丘， 召唤集一处，
肴饌众美味， 种种而供养。
复舍千万宝， 一宝直百千，
以此众宝物， 拟造五百寺。
一一诸比丘， 各施百千物：
‘师等在此住， 我等当养育，
为我说正法， 我当至心听！’
一切皆默然， 无有说法者。
其王三劝请， 白诸比丘已，
亦皆默然住， 一切无说者。
王白诸比丘：‘可不知法耶？’
语已袈裟白， 染色不复现，
从床皆堕落， 宛转在于地。
咸皆称佛言， 佛法宝隐没，
须发爪皆长， 诸法亦忘失。
当时虚空中， 大声震于地，
一切皆遍动， 犹如水上轮。
城壁碎落下， 屋宇悉圯圯，
树林根枝叶， 华叶果药尽。
唯除净居天， 欲界一切处，
七味三精气， 损减无有余。
解脱诸善论， 当时一切尽，
所生华果味， 希少亦不美。
诸有井泉池， 一切尽枯涸，
土地悉碱卤， 剖裂成丘涧。

诸山皆焦然， 天龙不降雨，
苗稼皆枯死， 甘蔗劫贝药。
生者皆死尽， 余草更不生，
雨土皆昏闇， 日月不现明。
四方皆亢旱， 数现诸恶瑞，
十不善业道， 贪瞋痴倍增。
众生于父母， 视之如獐鹿，
众生及寿命， 色力威乐减，
远离人天乐， 皆悉堕恶道。

“如是不善业， 恶王恶比丘，
毁坏我正法， 损减天人道。
诸天善神王， 悲愍众生者，
弃此浊恶国， 皆悉向余方。
先佛不作者， 我今为众生，
弃舍身寿命， 为增三精气。
悲愍众生故， 舍寿第三分，
令我法海满， 洗浴诸天人。
过去诸如来， 依寿而灭度，
彼于七日后， 正法皆隐没。
今我涅槃后， 正法五百年，
住在于世间， 众生烦恼尽，
精进诸菩萨， 得满于六度，
行者速能入， 无漏安隐城。
像法住于世， 限满一千年，
剃头著袈裟， 持戒及毁禁，
天人所供养， 常令无所乏；
如是供养彼， 则为供养我。
若为我法， 归依而剃头，
身著袈裟衣， 说彼是我子，
假使破禁戒， 悉住不退地。
若有挝打彼， 则为打我身；
若有骂辱彼， 则为毁辱我；
是人心欲灭， 正法大明灯。
故为器非器， 舍寿第三分，
为众得安乐， 饶益诸天人。
我昔行苦行， 为诸众生故，
舍已自身乐， 令法久炽然。
我昔舍身命， 为诸病人故，
亦为贫众生， 令法久炽然。

我昔为菩提，舍财及妻子，
宝象马车乘，令法久炽然。
我昔供诸佛，缘觉及声闻，
父母诸师长，令法久炽然。
为闻菩提故，无量阿僧祇，
备受种种苦，令法久炽然。
我修戒律仪，长夜常勤行，
十方佛为证，令法久炽然。
我昔常忍辱，忍诸恶众生，
为众除烦恼，令法久炽然。
我昔勤精进，坚固常伏他，
度脱诸众生，令法久炽然。
我修禅解脱，无色三摩提，
恒沙不可数，令法久炽然。
我昔为般若，住在于闲林，
演说无量论，令法久炽然。
我昔常怜愍，舍已身血肉，
及舍身支节，为增长法眼。
我愍恶众生，以慈而成熟，
安置于三乘，增长正法施。
我昔智方便，度脱诸恶见，
安置于正慧，法雨令不绝。
我昔以四摄，救度诸众生，
灭恶烦恼火，令四众久住。
我昔除外道，诸恶邪见网，
安置于正路，四众得供养。
我为彼舍命，慈愍度众生，
不令世间闇，而有所归趣。
如是于后时，欲令法不坏，
是故嘱法眼，饶益诸众生。
于我灭度后，菩萨向余方，
为欲不灭坏，一切贤圣法，
故我今说咒，令法久炽然。
金刚密无缺，解脱味所依，
所有十方佛，当与我说欲，
在此所来者，大众亦与欲。”

尔时，世尊为令正法得久住故，说大陀罗尼咒：

“哆地夜他 阿婆牟寄 婆牟寄 质闍牟寄 佉罗牟寄 遮罗摩

兮 阿兮 阿兮 达啰婆帝 摩呵地喇滞 悉耽婆罗兮 阇迦利 磨什婆[(七/矢)+余] 达啰牟驶 能伽咩 什婆[(七/矢)+余] 什婆啰 摩涅婆波 苏婆诃。”

尔时，世尊说此金刚坚固深密解脱味体陀罗尼句时，遍此三千大千世界六种震动，天降华雨，一切乐器不鼓自鸣。诸来大众遍满大地，皆悉悲泣流泪赞叹，而作是言：“释迦牟尼如来应正遍知甚为奇特，未曾有法大悲具足，随彼众生为成熟故，安置显现未来法故舍第三分寿。”

说是语时，在会众生依烦恼身者心得敬信，尽虚空量诸众生等未发无上菩提心者皆悉发心，九十二那由他众生得柔顺忍，八那由他众生得首楞严三昧圣灯三昧，十万诸夜叉见四真谛，二千菩萨得共行测量毗尼三昧，六十四百千阿修罗得殊胜行那罗延三昧，八那由他百千诸天得清净行三昧，三十那由他百千鸠槃荼得胜幢上灯三昧，二十那由他百千诸龙得不欺陵力行三昧，二万比丘尽诸有漏心得解脱。

尔时，智炬童真菩萨摩訶萨，白文殊师利菩萨摩訶萨言：“了知清净土，观此释迦牟尼如来，以大名称充满十方诸佛国土。云何充满？谓释迦牟尼佛从初发心求阿耨多罗三藐三菩提已来，于一切众生平等安置，以福田心种种勤修而行布施，于一切菩萨道修最胜行，成熟一切诸众生故发最胜愿，舍清净国至此五浊众苦世界，于阿耨多罗三藐三菩提而成正觉。以大慈悲因缘力故，为无间业、诽谤正法、毁谤贤圣一切不善恶业缠缚，十方一切清净佛土所弃众生，为诸烦恼之所缚者，成熟如是诸众生故，于此娑婆世界求阿耨多罗三藐三菩提，于一切菩萨道修最胜行。是人今于五浊世界，于阿耨多罗三藐三菩提而成正觉，此无间业诸众生等，种种骂辱诽谤如来，轻贱毁谤，勤加逼恼。彼等以嫉妒因缘故，种种方便心欲杀害，复以种种兵仗刀箭、[矛+(替-日+貝)]鉞钺斧、崩大石山、毒药、水火，复放狂象、师子、虎、豹、恶牛、恶狗勤加害佛；尔时如来犹于彼等诸众生所，以大慈悲哀怜覆护，踰于父母视其一子，于诸苦海方便拔济。是以今佛释迦如来，于十方佛土名称普闻。今复为此诸众生故，以一切法付嘱天、龙、诸鬼神等，为令法眼久住炽然；复为众生舍第三分寿，亦为法眼久住炽然，一切声闻器以非器，及诸剃头著袈裟者，为护持故，不恼害故，增长三精气故。以是释迦如来于此十方一切佛土、一切如来、一切菩萨摩訶萨、一切大智诸天人所，极得名称充满十方。是故一切诸来菩萨摩訶萨等，各各相与随力所堪，皆设第一最上供具，供养如来尊重恭敬。”

尔时，一切诸来大众菩萨摩訶萨等，从座而起，口眼微笑。彼诸菩萨于此娑婆世界，遍雨种种宝供养具供养世尊，有雨碎金，有雨碎银，有雨碎毗琉璃，有雨碎玻瓈，有雨赤真珠，有雨碎玛瑙，有雨碎砮磲，有雨龙蛇所爱重者碎栴檀香，有雨牛头栴檀香，有雨多摩罗跋

香，有雨黑坚沉水香，有雨种种众妙宝华，有雨七宝盖、七宝幢、七宝幡、金缕真珠、璎珞环钏，有持劫波如意宝树，有持宝衣树，有持宝华树，有持宝器树，有持宝香树，供养世尊。复有菩萨，于娑婆土所有树林华叶果实一切草木，变成七宝而供养佛。复有菩萨，于娑婆土一切所有山石塼瓦，变成七宝而供养佛。复有菩萨，于娑婆土一切所有大地界分，变为微妙诸天宝香而供养佛；一切众生依地住者，彼等七日七夜身心快乐犹若诸天。复有菩萨，于娑婆土一切所有大水界分，变为诸天第一微妙甘露美味香洁醇具水界；众生七日七夜身心快乐犹若诸天。复有菩萨，以一切风变为微妙清静香风而供养佛；于三恶道所有众生，一切无余香风触故，七日七夜身心快乐犹若诸天。尔时上至阿迦腻吒天，下至四天王身天及诸天女一切无余，而以种种微妙音声赞叹世尊，复以种种歌舞音乐而供养佛。一切夜叉、一切罗刹、一切鸠槃荼、一切乾闥婆、一切阿修罗，一切紧那罗、饿鬼、毗舍遮、富单那、迦吒富单那、人非人等，彼等一切随力所堪作种种赞叹，乃至种种供养世尊。

尔时，世尊告上首弥勒，及贤劫中一切菩萨摩訶萨言：“诸善男子，我昔行菩萨道时，曾于过去诸佛如来作是供养，以此善根与我作于三菩提因。我今怜愍诸众生故，以此报果分作三分：留一分自受；第二分者，于我灭后，与禅解脱三昧坚固相应声闻令无所乏；第三分者，与彼破戒读诵经典相应声闻，正法、像法剃头著袈裟者令无所乏。弥勒，我今复以三业相应诸声闻众比丘、比丘尼、优婆塞、优婆夷，寄付汝手，勿令乏少孤独而终；及以正法、像法毁破禁戒著袈裟者，寄付汝手，勿令彼等于诸资具乏少而终；亦勿令有旃陀罗王共相恼害身心受苦。我今复以彼诸施主寄付汝手，我今所有器以非器为我出家而供养者，汝等亦当护持养育。

“弥勒，若于现在及未来世，读诵受持此法门者，彼等当得十种清净功德。何等为十？身清净故，离杀生、离偷盗、离邪行；口清净故，不妄语、不恶口、不两舌、不绮语；心清净故，离贪欲、离瞋恚、离邪见，是为十。从是已后，百千万生常得如是十种精净功德。若有至心听此法门者，是人住如实际得于八种清净功德。何等为八？一者、长寿；二者、端正；三者、富贵；四者、名称；五者、常为诸天守护；六者、所须常无所乏；七者、尽诸业障；八者、命欲终时有十方佛及诸大众，放大光明照其眼目，令其人见得生善处，于百千万生常得如是八种功德。我今更复略说，是人当得十三种清净功德。何谓十三？一者、生死流转，终不更起颠倒恶见；二者、不生五浊无佛国土；三者、常得见佛；四者、常闻正法；五者、常得供养众僧；六者、值善知识；七者、常与六波罗蜜相应；八者、不堕小乘；九者、常以大慈大悲大方便力成熟众生；十者、常发胜愿；十一者、乃至菩提而常不离如上等法；十二者、速能满足六波罗蜜；十三者、于阿耨多罗三藐三菩提而成正觉。若有受持、书写读诵、为他解说、如说修

行此月藏法门者，所得功德如前所说。”

作是语时，月藏菩萨摩訶萨，尊者阿若憍陈如，及于一切诸来大众，天、人、阿修罗、乾闥婆等，一切众生闻佛所说，皆悉欢喜，顶戴奉行。

大乘大集地藏十轮经卷第一

大乘大集地藏十轮经序

昔者旭照高山天宫，御一乘之驾流，晖原隰鹿苑转四谛之轮。虽复发轸分途而塗无乱辙，一云普洽而卉木各茂，自鹤林变色慧日寢光，达学电谢以息肩，真人长往而寂滅。且前贤述圣难令各解，后进孤陋更异亲承，况乎正法既往，久当像末！定慧与福德异时，醇化与浇风殊连。然则一乘、三乘之驾，安可以同其辙哉？若识时来在数药性勿违，然后可以清沉痼之宿疾，体权实之同归矣。

十轮经者，则此土末法之教也。何以明之？佛以末法恶时去圣浸远，败根比之坏空见，借喻生盲沉醉五欲，类石田之不苗。放肆十恶似臭身之垢秽，故此经能濯臭身、开盲目、陶坏器、沃石田。是以菩萨示声闻之形象，王敬出家之服，以此幢相化彼无惭，显二事之护持，成三乘之道果。故经曰：为令此土三宝种性威德炽盛久住世故。又曰：摧灭一切诸众生类，犹如金刚坚固烦恼。然则三宝久住，显教传於末法，金刚烦恼险障异乎一乘。寻旧经之来年代盖久，但谱第遗目傳人失记翻译之主，既往来兹之日罕闻同我者。失魄於真彩异我者大笑，於淡味谬以千里，能勿悲乎？夫极曜文天或蔽亏於薄雾，至言范物时沦滞於邪辩，针石一达有死生之巨痛，纤毫错学有升墮之异塗，其可易乎！

属有三藏玄奘法师者，始则学架东朝，末乃访道西域，轻一生之性命，涉数万之艰难，果能竭溟渤以索亡珠，蹈龙宫而穷秘藏，吞法流於智海，瓶泻无遗受道气於檀林，香风更馥至於因明，三量声论八音，莫不究立破之源穷字转之本，如来所说菩萨所传已来未来一朝备集，昉以薄业不偶真应。幸达圣制乱於未兆，后贤傳灯於既夕，遂使定死餘命冀反魂於法药，昏野迷方期还转於觉道，於是染翰操纸杜绝外虚，预详至释彼纷执，壽咨法主重启梵文。粤以永徽二年岁次辛亥正月乙未，尽其年十二月甲寅翻译，始毕凡八品十卷。以今所翻比诸旧本，旧本已有今更详明，旧本所无斯文具载。於是处座抗谈者，响法雷而吐辩。静处通微者，镜玄波而照心。顶火暴腹之徒，戢萤晖於慧日；喜足谦怀之侶，腾高节於清风矣。前佛既往，后佛未与，庶此教长悬永济来者，弘道之士如何勿思！

序品第一

如是我闻：一时，薄伽梵在佉罗帝耶山诸牟尼仙所依住处。与大苾刍众俱，谓过数量大声闻僧，复有菩萨摩訶萨众，谓过数量大菩萨僧，说《月藏》已。尔时，南方大香云来，雨大香雨；大华云来，雨大华雨；大妙殊丽宝饰云来，雨大殊丽妙宝饰雨；大妙鲜洁衣服云来，雨大鲜洁妙衣服雨。是诸云雨，充遍其山诸牟尼仙所依住处。从诸香华、宝饰、衣服，演出种种百千微妙大法音声，谓归敬三宝声、受持学处声、忍辱柔和声、精进勇猛声、降伏四魔声、趣入智慧声、广大名称遍满三界声、劝修殊胜念定总持声、空无相无愿声、厌离贪欲声、色如聚沫声、受如浮泡声、想如阳焰声、行如芭蕉声、识如幻事声、无常声、苦声、无我声、空声、惭愧声、远离声、护念声、慈悲喜舍声、证得诸法声、生天涅槃声、趣向三乘声、转大法轮声、雨大法雨声、成熟有情声、度三恶趣声、修治圆满六到彼岸声、善巧方便声、趣入十地声、游戏神通声、游戏清净无上大乘声、不退转地声、无生法忍声、灌顶受位声、趣入一切诸佛大海声。

尔时，一切诸来大众，咸见如是种种云雨，亦闻如是诸法音声，随意所乐，各见其身种种香华、宝饰、衣服之所庄严。又各自见两手掌中，持如意珠；从是一一如意珠中，雨种种宝；复从一一如意珠中，放诸光明。因光明故，一一有情皆见十方殑伽沙等诸佛世界；又因光明，见诸佛土一一世尊，无量众会恭敬围绕；复因光明，见诸佛土一切有情。若有病者，因此光明之所照触，众病除愈；诸应被杀及囚系者，光明照故，皆得解脱；诸身语意粗重秽浊，因光皆得轻软清净；诸饥渴者，亦皆饱满；诸被种种刑罚逼切，光明照故，皆离忧苦；诸少衣服、宝饰、珍财，光明照故，随念皆足。若诸有情，乐欲杀生，乃至或有乐欲邪见，由此光明之所照触，皆悉乐欲远离杀生，乃至乐欲远离邪见。若诸有情，为于种种求不得苦之所逼切，光明照故，随愿皆得。又因光明，见诸佛土一切有情，所受众苦无不休息，皆悉欢娱受诸妙乐。又见如是诸佛土中，由此光明之所照触，远离一切昏云、尘雾、烈风、暴雨、不善音声，及诸臭秽、苦辛、恶味、恶触、恐怖，远离一切邪业、邪语、邪意、邪归，不寒不热，安静坦然，地平如掌，诸妙乐具充满其中。

尔时众会，其身欻然，地界增强，坚重难举，既睹斯瑞，咸悉惊疑：“何因何缘，而现此相？”

于众会中有天帝释，名无垢生，去薄伽梵不远而坐，即从座起，顶礼世尊，合掌向佛，以颂问曰：

“具谛语谛见，谛善住牟尼，
普为众弘宣，谛究竟坚法，
令诸有情类，灭苦及苦因。
何缘于此中，现诸云雨等？”

令举众欢悦，咸生净信心，
皆发趣大乘，度疑生实见。
天人大众身，地界增坚重，
不能自胜举，此相有何缘？
两手皆珠现，雨众宝放光，
照十方除罪，息苦获安乐。
导师复何因，令举众皆见，
种种香鬘等，各各自严身？
天人普犹豫，不测何因缘，
有谁将欲来，现此神通力？
为是佛菩萨，为梵魔释天？
唯愿大导师，速为众宣说。”

尔时，世尊告无垢生天帝释曰：“汝等当知，有菩萨摩訶萨，名曰地藏，已于无量无数大劫，五浊恶时，无佛世界，成熟有情。今与八十百千那庾多频跋罗菩萨俱，为欲来此礼敬亲近供养我故，观大集会生随喜故，并诸眷属，作声闻像将来至此，以神通力现是变化。

“是地藏菩萨摩訶萨，有无量无数不可思议殊胜功德之所庄严，一切世间声闻、独觉所不能测。此大菩萨，是诸微妙功德伏藏，是诸解脱珍宝出处，是诸菩萨明净眼目，是趣涅槃商人导首。如如意珠雨众财宝，随所希求皆令满足。譬诸商人所采宝渚，是能生长善根良田，是能盛贮解脱乐器，是出妙宝功德贤瓶。照行善者犹如朗日，照失道者犹如明炬，除烦恼热如月清凉，如无足者所得车乘，如远涉者所备资粮，如迷方者所逢示导，如狂乱者所服妙药，如疾病者所遇良医，如羸老者所凭几杖，如疲倦者所止床座，度四流者为作桥梁，趣彼岸者为作船筏，是三善根殊胜果报，是三善本所引等流，常行惠施如轮恒转，持戒坚固如妙高山，精进难坏如金刚宝，安忍不动犹如大地，静虑深密犹如秘藏，等至严丽如妙华鬘，智慧深广犹如大海，无所染著譬太虚空，妙果近因如众华叶，伏诸外道如师子王，降诸天魔如大龙象，斩烦恼贼犹如神剑，厌诸諠杂如独觉乘，洗烦恼垢如清净水，能除臭秽如疾飘风，断众结缚如利刀剑，护诸怖畏如亲如友，防诸怨敌如堑如城，救诸危难犹如父母，藏诸怯劣犹若丛林，如夏远行所投大树，与热渴者作清冷水，与饥乏者作诸甘果，为露形者作诸衣服，为热乏者作大密云，为贫匮者作如意宝，为恐惧者作所归依，为诸稼穡作甘泽雨，为诸浊水作月爱珠，令诸有情善根不坏，现妙境界令众欣悦，劝发有情增上惭愧，求福慧者令具庄严，能除烦恼如吐下药，能摄乱心如等持境，辩才无滞如水激轮，摄事系心如观妙色，安忍坚住如妙高山，总持深广犹如大海，神足无碍譬若虚空。灭除一切惑障习气，犹如烈日销释轻冰。常游静虑无色正道，一切智智妙宝洲渚，能无功用转大法轮。

“善男子，是地藏菩萨摩诃萨，具如是等无量、无数、不可思议殊胜功德，与诸眷属欲来至此，先现如是神通之相。”

世尊说是地藏菩萨诸功德已，尔时地藏菩萨摩诃萨，与八十百千那庾多频跋罗菩萨，以神通力现声闻像，从南方来至佛前住，与诸眷属，恭敬顶礼世尊双足，右绕三匝，在如来前合掌而立，以颂赞曰：

“两足尊导师，慈心常普覆，
安忍如大地，遍除瞋忿心。
具殊胜相好，庄严诸佛国，
能以谛慈悲，充满一切土。
永绝诸爱网，如实善安住，
舍诸清净国，度染浊众生。
本愿摄秽土，成熟恶众生，
起坚固正勤，久修诸苦行。
久修诸苦行，闻生悚惧心，
修诸施戒忍，及精进定慧。
曾供事无量，佛菩萨声闻，
及济诸有情，饥渴病死者。
本为他有情，自舍多身命，
本为正法故，舍多骨血皮。
弃舍自安乐，悲愍诸有情，
专为诸有情，勤修断惑网。
善护于六根，恒远离诸欲，
观有为无常，苦空无我性。
诸苦业增长，皆贪爱为因，
故先于六根，永断诸贪欲。
普于有情界，常安住大悲，
虽得胜菩提，而不舍本愿。
随见诸有情，逼切在众苦，
随起勤精进，勇猛而济拔。
令勤修施戒，忍进定般若，
如母于一子，慈心而养育。
本于有情类，常住普慈心，
故速证菩提，度脱无量众。
本修菩提行，无不为众生，
故今于有情，不舍于六度。
昔常于末世，求无上菩提，
今还未世中，速成无上觉。
调伏诸恶见，天龙人药叉，
安住能断惑，如金刚圣道。

授无量有情，得胜菩提记，
成应供导首，最上良福田。
世尊无等侶，普覆诸群生，
无量大名闻，充满十方界。
是故诸菩萨，为成就己事，
咸共来归依，大牟尼足下。
闻所说妙法，皆生欢喜心，
起增上正勤，修习菩提行。
由导师法力，皆速证菩提，
故今者导师，大集未曾有。
十三兆药叉，恒啖诸血肉，
皆舍诸恶业，速趣大菩提。
有得胜总持，安忍及静虑，
有永尽诸漏，应供世间尊。
有修四无量，有住四摄法，
有得四辩才，有安住顺忍，
有得健行定，有得妙慧眼，
有住无生忍，皆由导师力。
世尊大威德，摧灭众魔怨，
降伏诸外道，九十五异类；
尽地狱傍生，饿鬼非天趣，
故贞实有情，咸归尊足下。
今者息刀兵，疫病饥馑劫，
度迷失正道，盲冥诸有情；
诸烦恼狂乱，皆安寂灭道，
故我舍诸缘，来礼敬尊足。
无边诸佛土，现在诸导师，
咸广赞世尊，闻者皆来此。
我闻遍知海，真实德无边，
度脱诸有情，心欢喜敬礼。
曾修无量福，今得礼尊足，
愿无量劫中，常修多供养。
我今学世尊，发如是誓愿，
当于此秽土，得无上菩提。”

尔时，地藏菩萨摩訶萨以妙伽他礼赞佛已，与诸眷属，复持无量天妙香华、种种宝饰而散佛上，变成宝盖住虚空中，为听法故，即于佛前俨然而坐。尔时，一切诸来大众既见地藏菩萨摩訶萨已，皆获希奇，得未曾有，各持种种上妙香华、宝饰衣服、幢幡盖等，奉散地藏菩萨摩訶萨而为供养，皆作是言：“我等今者快得善利，因佛神力，

亲得瞻仰、礼敬、供养如是大士。”

尔时众中，有菩萨摩訶萨，名好疑问，从座而起，整理衣服，偏袒一肩，礼佛双足，右膝著地，合掌向佛，而白佛言：“世尊，此善男子从何而来？所居佛国，去此远近？成就何等功德善根？而蒙世尊种种称叹，复能赞佛不可思议功德法海。我等昔来，未曾闻见，唯愿为说。”

世尊告曰：“止！善男子，如是大士功德善根，一切世间天人大众，皆不能测其量浅深。若闻如来为汝广说如是大士功德善根，一切世间天人大众，皆生迷闷，或不信受。”

时，好疑问复重请言：“唯愿如来，哀愍为说。”

佛言：“谛听！善思念之！吾当为汝略说少分。如是大士，成就无量不可思议殊胜功德，已能安住首楞伽摩胜三摩地，善能悟入如来境界，已得最胜无生法忍，于诸佛法已得自在，已能堪忍一切智位，已能超度一切智海，已能安住师子奋迅幢三摩地，善能登上一切智山，已能摧伏外道邪论，为欲成熟一切有情，所在佛国悉皆止住。

“如是大士，随所止住诸佛国土，随所安住诸三摩地，发起无量殊胜功德，成就无量所化有情。

“如是大士，随住如是诸佛国土，若入能发智定，由此定力，令彼佛土一切有情，皆悉同见诸三摩地所行境界。

“随住如是诸佛国土，若入具足无边智定，由此定力，令彼佛土一切有情，随其所应，能以无量上妙供具，恭敬供养诸佛世尊。

“随住如是诸佛国土，若入具足清净智定，由此定力，令彼佛土一切有情，皆悉同见诸欲境界无量过患，心得清净。

“随住如是诸佛国土，若入具足惭愧智定，由此定力，令彼佛土一切有情，皆得具足增上惭愧，离诸恶法，心无忘失。

“随住如是诸佛国土，若入具足诸乘明定，由此定力，令彼佛土一切有情，皆得善巧天眼智通，宿住智通，死生智通，了达此世他世因果。

“随住如是诸佛国土，若入无忧神通明定，由此定力，令彼佛土一切有情，皆离一切愁忧昏昧。

“随住如是诸佛国土，若入具足胜通明定，由此定力，令彼佛土一切有情，皆得具足神通善巧。

“随住如是诸佛国土，若入普照诸世间定，由此定力，令十方界离诸昏暗，令彼佛土一切有情，普见十方诸佛国土。

“随住如是诸佛国土，若入诸佛灯炬明定，由此定力，令彼佛土一切有情，舍邪归依，归正三宝。

“随住如是诸佛国土，若入金刚光定，由此定力，令彼佛土，所有一切小轮围山、大轮围山、苏迷卢山及诸余山，溪涧沟壑，瓦砾毒刺，诸秽草木，皆悉不现；令彼佛土，所有一切众邪蛊毒、诸恶虫

兽、灾横疫病、昏暗尘垢、不净臭秽，悉皆销灭；令彼佛土，地平如掌，种种嘉祥自然踊现，清净殊胜众相庄严。

“随住如是诸佛国土，若入智力难摧伏定，由此定力，令彼佛土一切魔王及诸眷属，皆悉惊怖，归依三宝。

“随住如是诸佛国土，若入电光明定，由此定力，令彼佛土一切有情，皆悉远离后世恐怖，得法安慰。随住如是诸佛国土，若入具足上妙味定，由此定力，令彼佛土一切有情，随念皆得饮食充足。

“随住如是诸佛国土，若入具足胜精气定，由此定力，令彼佛土一切有情，无不皆得增上力势，离诸病苦。

“随住如是诸佛国土，若入上妙诸资具定，由此定力，令彼佛土一切有情，随乐皆得床座敷具、衣服宝饰，诸资身具无所乏少，殊妙端严，甚可爱乐。

“随住如是诸佛国土，若入无诤智定，由此定力，令彼佛土一切有情，身心勇健，远离一切怨憎系缚，和顺欢娱，爱乐具足，施、戒、安忍、勇猛精进，心无散乱，成就智慧。

“随住如是诸佛国土，若入能引胜踊跃定，由此定力，令彼佛土一切有情，皆受无量胜妙欢喜。

“随住如是诸佛国土，若入具足世路光定，由此定力，令彼佛土一切有情，得无碍智，能修种种清净事业。

“随住如是诸佛国土，若入善住胜金刚定，由此定力，令彼佛土一切有情，皆得诸根具足无缺，常乐远离，其心寂静。

“随住如是诸佛国土，若入增上观胜幢定，由此定力，令彼佛土一切有情，皆深呵厌自恶业过，咸善护持十善业道生天要路。

“随住如是诸佛国土，若入具足慈悲声定，由此定力，令彼佛土一切有情，皆悉发起慈心悲心、无怨害心、普平等心、更相利益安乐之心。

“随住如是诸佛国土，若入引集诸福德定，由此定力，令彼佛土一切有情，离诸斗争、疾疫、饥馑、非时风雨、苦涩辛酸、诸恶色触，悉皆销灭。

“如是大士，随住如是诸佛国土，若入海电光定，由此定力，令彼佛土一切大地众宝合成，一切过患皆悉远离，种种宝树、衣树、器树、诸瓔珞树、华树、果树、诸音乐树，无量乐具，周遍庄严。以要言之，此善男子，于一日每晨朝时，为欲成熟诸有情故，入殑伽河沙等诸定，从定起已，遍于十方诸佛国土，成熟一切所化有情，随其所应，利益安乐。

“此善男子，已于无量无数大劫，五浊恶时无佛世界，成熟有情；复于当来，过于是数。

“或有世界刀兵劫起，害诸有情；此善男子，见是事已，于晨朝时，以诸定力，除刀兵劫，令诸有情互相慈愍。

“或有世界疫病劫起，害诸有情；此善男子，见是事已，于晨朝

时，以诸定力，除疫病劫，令诸有情皆得安乐。

“或有世界饥馑劫起，害诸有情；此善男子，见是事已，于晨朝时，以诸定力，除饥馑劫，令诸有情皆得饱满。

“此善男子，以诸定力，作如是等无量、无边、不可思议，利益安乐诸有情事。

“此善男子，具足成就无量、无数、不可思议，殊胜功德，常勤精进，利益安乐一切有情。曾于过去无量、无数、殍伽沙等佛世尊所，为欲成熟利益安乐诸有情故，发起大悲坚固难坏勇猛精进无尽誓愿；由此大悲坚固难坏勇猛精进无尽誓愿增上势力，于一日夜或一食顷，能度无量百千俱胝那庾多数诸有情类，皆令解脱种种忧苦，及令一切如法所求，意愿满足。

“随所在处，若诸有情，种种希求忧苦逼切，有能至心称名念诵归敬供养地藏菩萨摩訶萨者，一切皆得如法所求，离诸忧苦，随其所应，安置生天涅槃之道。

“随所在处，若诸有情，饥渴所逼，有能至心称名念诵归敬供养地藏菩萨摩訶萨者，一切皆得如法所求，饮食充足，随其所应，安置生天涅槃之道。

“随所在处，若诸有情，乏少种种衣服、宝饰、医药、床敷及诸资具，有能至心称名念诵归敬供养地藏菩萨摩訶萨者，一切皆得如法所求，衣服、宝饰、医药、床敷及诸资具，无不备足，随其所应，安置生天涅槃之道。

“随所在处，若诸有情，爱乐别离，怨憎合会，有能至心称名念诵归敬供养地藏菩萨摩訶萨者，一切皆得爱乐合会，怨憎别离，随其所应，安置生天涅槃之道。

“随所在处，若诸有情，身心忧苦，众病所恼，有能至心称名念诵归敬供养地藏菩萨摩訶萨者，一切皆得身心安乐，众病除愈，随其所应，安置生天涅槃之道。

“随所在处，若诸有情，互相乖违，兴诸斗争，有能至心称名念诵归敬供养地藏菩萨摩訶萨者，一切皆得舍毒害心，共相和穆，欢喜忍受，展转悔愧，慈心相向，随其所应，安置生天涅槃之道。

“随所在处，若诸有情，闭在牢狱，桎械枷锁检系其身，具受众苦，有能至心称名念诵归敬供养地藏菩萨摩訶萨者，一切皆得解脱牢狱、桎械枷锁，自在欢喜，随其所应，安置生天涅槃之道。

“随所在处，若诸有情，应被囚执，鞭撻拷楚，临当被害，有能至心称名念诵归敬供养地藏菩萨摩訶萨者，一切皆得脱离囚执、鞭撻、加害，随其所应，安置生天涅槃之道。

“随所在处，若诸有情，身心疲倦，气力羸憊，有能至心称名念诵归敬供养地藏菩萨摩訶萨者，一切皆得身心畅适，气力强盛，随其所应，安置生天涅槃之道。

“随所在处，若诸有情，诸根不具，随有损坏，有能至心称名念

诵归敬供养地藏菩萨摩诃萨者，一切皆得诸根具足，无有损坏，随其所应，安置生天涅槃之道。

“随所在处，若诸有情，颠狂心乱，鬼魅所著，有能至心称名念诵归敬供养地藏菩萨摩诃萨者，一切皆得心无狂乱，离诸烦恼，随其所应，安置生天涅槃之道。

“随所在处，若诸有情，贪欲、瞋恚、愚痴、忿恨、慳嫉、憍慢、恶见、睡眠、放逸、疑等，皆悉炽盛，恼乱身心，常不安乐，有能至心称名念诵归敬供养地藏菩萨摩诃萨者，一切皆得离贪欲等，身心安乐，随其所应，安置生天涅槃之道。

“随所在处，若诸有情，为火所焚，为水所溺，为风所飘，或于山岩、崖岸、树舍颠坠堕落，其心惶惶，有能至心称名念诵归敬供养地藏菩萨摩诃萨者，一切皆得离诸危难，安隐无损，随其所应，安置生天涅槃之道。

“随所在处，若诸有情，为诸毒蛇、毒虫所螫，或被种种毒药所中，有能至心称名念诵归敬供养地藏菩萨摩诃萨者，一切皆得离诸恼害，随其所应，安置生天涅槃之道。

“随所在处，若诸有情，恶鬼所持，成诸疟病，或日日发，或隔日发，或三四日而一发者，或令狂乱身心战掉，迷闷失念，无所了知，有能至心称名念诵归敬供养地藏菩萨摩诃萨者，一切皆得解脱无畏，身心安适，随其所应，安置生天涅槃之道。

“随所在处，若诸有情，为诸药叉、罗刹、饿鬼、毕舍遮鬼、布怛那鬼、鸠畔荼鬼、羯吒布怛那鬼、吸精气鬼，及诸虎、狼、狮子恶兽，蛊毒、厌祷、诸恶咒术，怨贼、军阵及余种种，诸怖畏事之所缠绕，身心惶惶，惧失身命，恶死贪生，厌苦求乐，有能至心称名念诵归敬供养地藏菩萨摩诃萨者，一切皆得离诸怖畏，保全身命，随其所应，安置生天涅槃之道。

“随所在处，若诸有情，或为多闻，或为净信，或为净戒，或为静虑，或为神通，或为般若，或为解脱，或为妙色，或为妙声，或为妙香，或为妙味，或为妙触，或为利养，或为名闻，或为功德，或为工巧，或为华果，或为树林，或为床座，或为敷具，或为道路，或为财谷，或为医药，或为舍宅，或为仆使，或为彩色，或为甘雨，或为求水，或为稼穡，或为扇拂，或为凉风，或为求火，或为车乘，或为男女，或为方便，或为修福，或为温暖，或为清凉，或为忆念，或为种种世出世间诸利乐事，于追求时为诸忧苦之所逼切，有能至心称名念诵归敬供养地藏菩萨摩诃萨者，此善男子功德妙定威神力故，令彼一切皆离忧苦，意愿满足，随其所应，安置生天涅槃之道。

“随所在处，若诸有情，以诸种子植于荒田或熟田中，若勤营务，或不营务，有能至心称名念诵归敬供养地藏菩萨摩诃萨者，此善男子功德妙定威神力故，令彼一切果实丰稔。所以者何？此善男子，曾过无量无数大劫，于过数量佛世尊所，发大精进坚固誓愿；由此愿

力，为欲成熟诸有情故，常普任持一切大地，常普任持一切种子，常普令彼一切有情随意受用。此善男子威神力故，能令大地一切草木根须、芽、茎、枝叶、华果，皆悉生长，药谷、苗稼、华果茂实，成熟润泽，香洁软美。

“随所在处，若诸有情，贪、瞋、痴等，皆猛利故，造作杀生，或不与取，或欲邪行，或虚诳语，或粗恶语，或离间语，或杂秽语，或贪，或瞋，或复邪见十恶业道，有能至心称名念诵归敬供养地藏菩萨摩訶萨者，一切烦恼，悉皆销灭，远离十恶，成就十善，于诸众生，起慈悲心及利益心。此善男子成就如是功德妙定，威神之力，勇猛精进，于一食顷能于无量无数佛土，一一土中，以一食顷皆能度脱无量无数殊伽沙等所化有情，令离众苦，皆得安乐，随其所应，安置生天涅槃之道。

“此善男子，成就如是如我所说不可思议诸功德法，坚固誓愿，勇猛精进，为欲成熟诸有情故，于十方界，或时现作大梵王身，为诸有情如应说法；或复现作大自在天身，或作欲界他化自在天身，或作乐变化天身，或作睹史多天身，或作夜摩天身，或作帝释天身，或作四大王天身；或作佛身，或作菩萨身，或作独觉身，或作声闻身；或作转轮王身，或作刹帝利身，或作婆罗门身，或作吠舍身，或作戍达罗身；或作丈夫身，或作妇女身，或作童男身，或作童女身；或作健达缚身，或作阿素洛身，或作紧捺洛身，或作莫呼洛伽身；或作龙身，或作药叉身，或作罗刹身，或作鸠槃荼身；或作毕舍遮身，或作饿鬼身，或作布怛那身，或作羯吒布怛那身，或作粤闍诃洛鬼身；或作师子身，或作香象身，或作马身，或作牛身，或作种种禽兽之身；或作剎魔王身，或作地狱卒身，或作地狱诸有情身。现作如是等无量无数异类之身，为诸有情如应说法，随其所应，安置三乘不退转位。

“善男子，如是大士，成就如是不可思议诸功德法，是诸殊胜功德伏藏，是诸解脱珍宝出处，是诸菩萨明净眼目，是趣涅槃商人导首，如是乃至能无功用转大法轮，如前广说。

“善男子，假使有人于其弥勒，及妙吉祥，并观自在、普贤之类而为上首，殊伽沙等诸大菩萨摩訶萨所，于百劫中至心归依，称名、念诵、礼拜、供养，求诸所愿，不如有人于一食顷，至心归依，称名、念诵、礼拜、供养地藏菩萨，求诸所愿，速得满足。所以者何？地藏菩萨利益安乐一切有情，令诸有情所愿满足，如如意宝，亦如伏藏。如是大士，为欲成熟诸有情故，久修坚固大愿大悲，勇猛精进过诸菩萨，是故汝等应当供养。”

尔时，十方诸来大众，一切菩萨摩訶萨，及诸声闻、天人、药叉、健达缚等，皆从座起，随力所作，各持种种金银等屑、众宝华香，奉散地藏菩萨摩訶萨。复持种种上妙衣服、末尼宝珠、真珠华鬘、真珠璎珞、金银宝缕、幢幡盖等，奉上地藏菩萨摩訶萨。复以无

量上妙音乐，种种赞颂，恭敬供养地藏菩萨。

尔时，地藏菩萨摩诃萨持此种种上妙供具，回奉世尊，而说颂曰：

“天人龙神所供养，十方菩萨皆来奉，
闻救世有大功德，唯愿受我最胜供。”

尔时，地藏菩萨摩诃萨说是颂已，顶礼佛足。
于是世尊复说颂曰：

“起坚固慧清净心，灭诸有情无量苦，
施众妙乐如宝手，能断惑网如金刚。
起大悲慧具精进，善持妙供奉世尊，
以海智救苦众生，登诸趣有无畏岸。”

尔时，地藏菩萨摩诃萨即从座起，而白佛言：“大德世尊，我当济度此四洲渚，世尊弟子一切苾刍、苾刍尼、邬波索迦、邬波斯迦，令其皆得增长忆念，增长守护忆念，增长寿命，增长身体，增长无病，增长色力，增长名闻，增长资具，增长亲友，增长弟子，增长净戒，增长多闻，增长慧舍，增长妙定，增长安忍，增长方便，增长觉分圣谛光明，增长趣入大乘正道，增长法明，增长成熟有情，增长大慈大悲，增长一切白法，增长妙称遍满三界，增长法雨普润三界，增长一切大地精气滋味，增长一切众生精气善作事业，增长正法精气善行，增长智慧光明，增长六到彼岸妙行，增长五眼，增长灌顶，增长生天涅槃，所谓有名具足水火吉祥光明大记明咒总持章句。我于过去殑伽沙等佛世尊所，亲承受持此陀罗尼，能令增长一切白法，增长一切种子、根须、芽茎、枝叶、华果、药谷、精气滋味，增长雨泽，增长有益地水火风，增长喜乐，增长财宝，增长胜力，增长一切受用资具。此陀罗尼，能令一切智慧猛利，破烦恼贼。”即说咒曰：

“讖蒲(一) 讖蒲(二) 讖讖蒲(三) 阿迦舍讖蒲(四) 缚羯洛讖蒲(五) 菴跋洛讖蒲(六) 筏罗讖蒲(七) 伐折洛讖蒲(八) 阿路迦讖蒲(九) 苾摩讖蒲(十) 萨帝(丁簋切)摩讖蒲(十一) 萨帝(丁簋切)呢(泥吉切)诃罗讖蒲(十二) 毗婆(缚迦切)路迦插婆讖蒲(十三) 邬波睺摩讖蒲(十四) 奈野娜讖蒲(十五) 钵刺惹三牟底(都异切)刺拏讖蒲(十六) 刹拏讖蒲(十七) 毗湿婆(缚迦切)梨夜讖蒲(十八) 舍萨多腊婆(缚迦切)讖蒲(十九) 毗埵(汪贺切)荼素(上声)吒(知戒切)(二十) 莫醯隶(二十一) 苾谜(二十二) 睺谜(二十三) 斫羯洛细(二十四) 斫羯洛沫四隶(二十五) 厕(初几切)隶(二十六) 諱(匹里切)隶(二十七) 揭刺婆跋罗伐刺帝(二十八) [户+欠](许矣切)隶(二十九) 钵腊薛(三十) 钵刺遮啰饭怛泥(去声)(三十一) 曷刺怛泥(去声)(三十

二) 播啰(三十三) 遮遮遮遮(三十四) [户+欠](同上)隶(三十五)
弭隶(三十六) 鬻羯他(三十七) 托契(三十八) 托龠卢(三十九) 闾
隶(四十) 闾隶(四十一) 弭隶(四十二) 磨绽(徒界切)(四十三) 瘳
绽(徒界切)(四十四) 矩隶(四十五) 弭隶(四十六) 盎矩之多毗(四
十七) 遏[口+梨](四十八) 祁(上声)[口+梨](四十九) 波啰祁(上
声)[口+梨](五十) 矩吒苦沫隶(五十一) 敦祇(葵计切)(五十二) 敦
祇(五十三) 敦具隶(五十四) 汧卢(五十五) 汧卢(五十六) 汧卢
(五十七) 矩卢窠都弭隶(五十八) 弭[口+李]第(五十九) 弥[口
+李]绽(徒界切)(六十) 叛茶陀(六十一) 喝(诃葛切)罗(六十二)
[户+欠](许矣切)梨(六十三) 汧卢(六十四) 汧鲁卢(六十五)

“善说能净诸有尘，善说能净斗争劫，
善说能净浊恶意，善说能净浊大种，
善说能净浊恶味，善说能净浊恶气，
善说能满诸希望，善说能成诸稼穡，
善说能令一切佛，如來世尊所加护，
善说又能令一切，菩萨加护而随喜。

“世尊，如是具足水火吉祥光明大记明咒总持章句，我于过去殑伽沙等佛世尊所，亲承受持此陀罗尼，能令增长一切白法，广说乃至增长一切受用资具。大德世尊，此陀罗尼，普能济度此四洲渚，世尊弟子一切苾刍、苾刍尼、邬波索迦、邬波斯迦，令其皆得增长忆念，广说乃至增长一切受用资具。此陀罗尼，能令世尊甘露圣教，炽然久住，利益安乐三界众生。”

尔时，地藏菩萨摩訶萨，演说如是大记明咒总持章句，时佉罗帝耶山普皆震动，俱胝天乐不鼓自鸣，雨无量种天妙香华及珍宝等。一切众会咸悉惊跃，皆获希奇，得未曾有。

时众会中，有大吉祥天女、具大吉祥天女、大池妙音天女、大坚固天女、具大水天女、放大光天女而为上首，总有一万八千天女，于四大种皆得自在，从座而起，稽首佛足，合掌恭敬，而白佛言：“希有大德！甚奇世尊！我等虽于诸四大种得自在转，而不能知是四大种初中后相、生灭违顺。如此大士，已得微细甚深般若波罗蜜多，能善了知是四大种初中后相、生灭违顺。”

佛言：“如是，如是。天女，此善男子，已得微细甚深般若波罗蜜多，能善了知是四大种初中后相、生灭违顺。

“天女当知，如如意珠，具足众德，能雨种种上妙珍宝施诸众生；此善男子，亦复如是，能雨种种觉支珍宝，施诸众生。

“如宝洲渚，种种珍宝，充满其中；此善男子，亦复如是，成就种种觉支珍宝。

“如天波利质多罗树，众妙香华之所严饰；此善男子，亦复如是，种种微妙佛法珍宝而自庄严。

“如师子王，一切畜兽无能惊伏；此善男子，亦复如是，一切众生无能惊伏。

“譬如朗日，能灭世间一切昏暗；此善男子，亦复如是，能灭一切众生恶见、无明昏暗。

“譬如明月，于夜分中，能示一切失道众生平坦正路，随其欲往，皆令得至；此善男子，亦复如是，于无明夜，能示一切迷三乘道、驰骋生死旷野众生三乘正路，随其所应，方便安立，令得出离。

“譬如大地，一切种子、树山、稼穡、地身、众生之所依止；此善男子，亦复如是，一切殊妙菩提分法之所依止。

“譬如大宝妙高山王，善住坚固，无缺无隙；此善男子，亦复如是，善住一切不共佛法，由不弃舍诸众生故，名为无缺，一切善根皆善施与诸众生故，名为无隙。

“譬如虚空，一切众生皆所受用；此善男子，亦复如是，一切众生皆所受用。

“此善男子，成就如是等无量无边诸功德法。”

时诸大众，闻说地藏菩萨摩訶萨成就无量称赞功德，皆获希奇，得未曾有，尊重恭敬，皆大欢喜，至心谛观地藏菩萨，目不暂舍。

尔时，世尊重显此义，而说颂曰：

“地藏真大士，具杜多功德，
现声闻色相，来稽首大师。
施诸众生乐，救脱三有苦，
雨无量种雨，为供养大师。
天帝无垢生，观察四方已，
合掌恭敬住，赞请于大师。
我见世尊众，末尼宝光明，
遍照诸佛国，无不皆明了。
六通照世间，今当来至此，
勇猛名地藏，现出家威仪。
七圣财伏藏，无畏佛音声，
诸菩萨胜幢，众生之导首。
解脱宝所依，福海具精进，
悲意乐聪敏，救苦诸有情。
与怖者为城，如明月示道，
生善根如地，破惑如金刚。
能施解脱宝，如水漂众惑，
烦恼热为盖，愈疾如良医。
一日称地藏，功德大名闻，

胜俱胝劫中，称余智者德。
能解诸众生，一切烦恼缚，
至健行定等，诸定之彼岸。
十二缘清静，诸智如虚空，
破无边佛土，诸有情暗聚。
随诸土入定，四静虑等流，
普令诸有情，入定除惑热。
众生宿恶业，刀兵病饥馑，
随所在恼害，皆能令解脱。
众生五趣身，诸苦所逼切，
归敬地藏者，有苦悉皆除。
众生乘苦轮，展转相违害，
归敬地藏者，皆住忍慈心。
十二缘所怖，追求苦所依，
归敬地藏者，皆安住无畏。
若乐修诸福，正念戒闻慧，
归敬地藏者，所求皆满足。
乐一一功德，工巧药种子，
归敬地藏者，所求皆满足。
求诸谷药田，男女衣仆使，
归敬地藏者，所求皆满足。
众德具相应，能任持大地，
因兹诸谷药，润泽而细软。
诸烦恼所覆，乐行十恶业，
归敬地藏者，烦恼恶皆除。
现作种种身，为众生说法，
具足施功德，悲愍诸众生。
假使百劫中，赞说其功德，
犹尚不能尽，故皆当供养。”

大乘大集地藏十轮经卷第二

十轮品第二

尔时，地藏菩萨摩訶萨从座而起，整理衣服，顶礼佛足，偏袒一肩，右膝著地，合掌恭敬，而白佛言：“我今问世尊无量功德海，唯愿赐开许，为解释除疑。”

世尊告曰：“汝真善士！于一切法智见无碍，为欲饶益他有情故，请问如来。随汝意问，吾当为汝分别解说，令汝心喜。”

于是地藏菩萨摩訶萨，以颂问曰：

“我曾十三劫，已勤修苦行，
为一切有情，除三灾五浊。
多俱胝佛所，已设无边供，
曾见大集会，清信众和合。
聪哲勤精进，皆来同会集，
未曾见如是，无诸杂秽众。
云何此佛国，秽恶损净善；
智者皆远离，恶行者同居；
多造无间罪，诽谤于正法；
毁圣起恶见，妄说断常论；
具造十恶业，不畏后世苦；
多远离三乘，臭秽向恶趣；
无明蔽其目，贪嫉多奸矫？
云何转佛轮，度此众生类？
云何破相续，如金刚烦恼？
云何得总持，果能如是忍？
今我见导师，大集甚希有，
未曾见余处，具如是众德，
具杜多功德，勤修菩提道。
云何处愚众，能开示佛轮？”

世尊告曰：“善哉！善哉！善男子，汝于过去殑伽沙等诸佛世界，五浊恶时，已曾请问殑伽沙等诸佛世尊如是法义。汝于如是所问法义，已作劬劳，已善通达，已到圆满众行彼岸，已得善巧方便妙智。今为成熟一切有情，令得利益安乐事故；为令一切菩萨摩訶萨善巧方便，圣行伏藏，施等六种波罗蜜多，成熟一切有情胜行，一切智智功德大海速圆满故；为转一切刹帝利王诸暴恶行，使不堕落三恶趣故；为令此土三宝种姓威德炽盛，久住世故，复问如来如是法义。谛听！谛听！善思念之！吾当为汝分别解说。”

“唯然，世尊，愿乐欲闻。”

尔时，佛告地藏菩萨摩訶萨言：“善男子，如来由本愿力，成就十种佛轮，居此佛土五浊恶世。一切有情，退没一切白净善法，匮乏所有七圣财宝，远离一切聪敏智者，断常罗网之所覆蔽，常好乘驭诸恶趣车，于后世苦不见怖畏，常处遍重无明黑闇，具足十种不善业道，造五无间，诽谤正法，毁谤贤圣，离诸善法，具诸恶法。我住如是杂恶土中，得安隐住，得无惊恐，得无所畏，自称我处大仙尊位，转于佛轮，降诸天魔外道邪论，摧灭一切诸众生类，犹如金刚坚固烦恼，随其所乐，安置一切有力众生，令住三乘不退转位。

“善男子，譬如有国，时虚君位，其中所有一切人民，自军他军更相侵害，忧愁扰乱，人众不安，有无量种斗讼违诤，互相欺凌，谄

言妄语，粗恶乖离，诬罔矫乱，种种疾病，盲翳昏闇，寒热疟疾，温气疫疠，癰癤干枯，饮食不消，其心狂乱，诸根不具，肢体缺减，乏少种种衣食资具，一切所有皆不可乐。诸有情类，归依种种外道邪神，恶见、恶心及恶意乐，皆悉炽盛，迷失正道，临堕恶趣。时彼国中，有诸耆旧，聪明多智，博学平恕，威严整肃，相与谋议，运诸筹策。即便召集国邑人民，共所荐推取一王子，先具多种布施、调伏、寂静、尸罗，精进勇猛，难行苦行一切备满，具诸殊胜福德之相，诸根圆满，支体无缺，身形长大，相好端严，成就最胜美妙容色，常为一切尊重恭敬，率土人民无不亲爱；禀性淳质常怀慈悲，博学多才备诸技艺，柔和忍辱庄严其心。是大后妃所生嫡子，以诸妙香，熏清净水，调和冷暖，沐浴其身，著于种种上妙香熏，众宝庄严鲜净衣服，末尼珠宝置在髻中，金宝华鬘冠饰其首，素练轻绁束于发际。又以种种末尼真珠，金银等宝共所合成，珎瑯瓔珞环玼印等，众妙宝饰庄严其身，织成宝履下承其足，众宝伞盖上覆其顶，安置古昔一切天仙所护持座，趣入一切天帝同许共所护持，善巧营构殊妙大殿，登自先王所升尊座。绍王位已，扣击一切天帝、龙帝、药叉神帝、阿素洛帝、鸠畔荼帝，各所护持广大钟鼓，其声振响周遍国界。刹帝利等四大种姓，无量人众，沐浴其身，著净衣服，执持种种妙宝缯彩、伞盖、幢幡、末尼真珠、金、银、螺贝，璧玉、珊瑚、茂琉璃等，生色可染无量珍奇，奉献新王，以呈嘉瑞。贵族净行，博学多才诸婆罗门，以无量种微妙赞颂歌咏帝德，种种善事咒愿于王，以诸吉祥散洒王顶。先王所重宿望贵族，博学多艺，性直贤明，随其所应，授以种种职位官僚，理诸王事。先于国境，自军他军更相侵害，今皆令息；亦令一切怨敌恶友，能为害者皆悉殄灭。损除自国一切黑品，增益自国一切白品。

“善男子，刹帝利种灌顶大王，成就如是第一王轮。由此轮故，于自国土得安乐住，能伏一切怨敌恶友，善守护身，令增寿命。

“善男子，如是杂染五浊恶世，索诃佛土空无佛时，其中所有一切众生，为自心中随眠缠垢，自军他军恼害侵逼，愁忧扰乱愚冥不安，起无量种执著断常，斗讼违诤，互相轻蔑，起贪、瞋、痴、谄、诳、谎言等，具足十种不善业道，执著有情纷扰世界，成就种种烦恼疾病，阙正法眼，忿恨烧恼，常不思惟真实正法，弃正法味，讥毁善行，乏少所受喜乐滋味，常为种种烦恼罗网之所覆蔽，归依六种外道邪师，迷失圣道，向三恶趣。于此土中，有诸菩萨摩訶萨，已于过去亲近供养无量诸佛，已入诸佛功德大海，已住诸佛本所行道，皆共集会，来至我所，同谓我言：‘汝于过去，已修无量布施、调伏、寂静、尸罗，精进勇猛，难行苦行一切备满。是诸微妙福慧方便大慈悲等共所庄严大功德藏，是一切定总持安忍诸地功德圆满大海，无谄无诳，身形长大，相好圆满，忍辱柔和，端正殊妙。不复依他修菩提道，一切智海已得圆满，成就最胜美妙容色，能为一切声闻、独觉作大导

师，亦能安慰一切生死怖畏众生与作亲友，大慈悲等无量功德共所庄严。是羯洛迦、孙驮羯诺迦、牟尼迦葉波如来等父之真子，于此贤劫当得作佛，一切菩萨摩訶萨中最为上首。以诸功德种种妙香，熏奢摩他、毗钵舍那、清静之水，而自沐浴著惭愧衣，清静法界为髻中珠，冠饰诸佛所行境界广大华鬘，束以解脱殊妙素练。又以种种一切智智、无生忍等功德珍宝而自庄严，慈悲喜舍以为宝履，能覆三界三种妙行圆满圣因以为伞盖，安置古昔诸佛天仙共所护持金刚定座，趣入一切声闻、独觉恭敬护持四种念住，坐先诸佛所敷之座，证得无上正等菩提一切智位。为令一切三宝种姓不断绝故，转于法轮，击法钟鼓，妙法音声，遍满三界，令诸天、龙、药叉、罗刹、阿素洛、羯路荼、紧捺洛、莫呼洛伽、鸠畔荼、弥荔多、毕舍遮、布怛那、羯吒布怛那、人非人等，于四圣谛皆得明解，三转十二行相法轮，一切世间所有沙门、若婆罗门、诸天魔梵、人非人等所不能转，为欲利益安乐世间无量天人，令得殊胜广大义利，昔所未转，而今转之。’

“善男子，我成如是第一佛轮。由此轮故，如实了知此世他世、是处非处，得安隐住，得无惊恐，得无所畏，降诸天魔外道邪论，转大梵轮，成大梵行。我应住此杂染世界五浊恶时，处大众中正师子吼，灭诸有情五无间业，广说乃至诸不善根，摧灭一切诸众生类，坚如金刚相续烦恼，建立一切永尽诸漏，解脱妙果随其所乐，安置一切有力众生，令住三乘不退转位。

“善男子，如刹帝利灌顶大王，初登王位，受帝职已，观察过去、未来、现在诸王法道，于其种种王业轮中，以善观察因、果、报、智，随其所应，建立一切辅臣僚佐，普及国邑愚智人民三种业轮；由此业轮，率土众生长夜受用，所有种种适意资具，喜乐增长，能灭一切怨敌恶友。何等名为三种业轮？一者，建立帝王业轮，谓善教习军阵斗战，降他兵众，抚育人民；二者，建立田宅业轮，谓善教习造舍营农，令得安隐，饮食充足；三者，建立财宝业轮，谓善教习工商杂艺，令得种种珍玩资财，随意受用，增诸快乐。

“善男子，刹帝利种灌顶大王，成就如是第二王轮。由此轮故，于自国土得安乐住，能伏一切怨敌恶友，善守护身，令增寿命。

“善男子，如是如来初成佛果，得无上智，观察过去、未来、现在诸佛法眼，以善观察诸业法受因果报智，建立一切所化有情三种业轮。由此业轮，能令三宝种姓法眼长夜不灭，无上正法炽盛流通，令诸有情长受种种生天涅槃安隐快乐，及令一切外道邪论不能降伏我正法眼，而能如法摧彼邪论。

“善男子，何等名为三种业轮？一者，建立修定业轮；二者，建立习诵业轮；三者，建立营福业轮。

“善男子，云何如来修定业轮？定有十种：何等为十？谓正观察诸有识身六种境界，我、我所执以为其因，业为良田，无明覆盖，爱为滋润，无有自在，依他而立，系属众缘。为欲断灭业、烦恼、苦三

种流故，如是观察。云何业流？谓诸有情所行诸行。若此诸行，所由无明，及爱为因，能生诸有，名烦恼流。若由烦恼，识为其因，众缘和合，名色生起；名色为因，众缘和合，六处生起；六处为因，众缘和合，触、受、后有、生、老死等，次第生起，是名苦流。如是三流，业为良田，无明为因，爱为滋润，而得生长。为欲枯涸业为良田、无明为因、爱为滋润三种流故，于五取蕴，观为无常及苦、无我，愚钝无动，如幻、如焰、如水中月、如梦所见，空无所有、无相、无愿，无所造作，无生无起，无出无像，寂静远离，无所出生。于五取蕴，如是观察，能顺空忍，顺无相忍，顺无愿忍。为欲随顺观五取蕴，复方便修入出息观，即是修习持来去念。云何由念如实观察入息出息？谓正观察，数故、随故、止故、观故、转故、净故，应知此中，数能造作二种事业：一、能为依伏诸寻伺，二、能取于入出息相。随能造作二种事业：一、依出离舍诸寻伺，二、能善取入出息相。止能造作二种事业：一、能示现入出息灭，二、能安住胜三摩地。观能造作二种事业：一、能示现入出息尽，二、能安住心及心法，别异观察。转能造作二种事业：一、能方便舍诸取蕴，二、能方便趣入圣地。净能造作二种事业：一、能舍结，二、能净见。如是六种方便，修习入出息观，便能随顺观五取蕴。所以者何？如是入息出息自性，名色取蕴；如是入息出息领纳，名受取蕴；如是入息出息取相，名想取蕴；如是入息出息造作，名行取蕴；如是入息出息了别，名识取蕴；如是所说五种取蕴，各各别异，互不相似，新新非故，无住无积，不可言说。如是观察五种取蕴，能除三行。若能如是究竟，随观三种行尽，便能于此诸有识身，六种境界究竟随观，我、我所执业，于无明、爱、因田覆润，一切皆尽。如是修习四种念住，皆得圆满；乃至修习八支圣道，皆得圆满；如是乃至修习十八不共佛法，皆得圆满；如是乃至修一切种无生法忍，首楞伽摩三摩地等，皆得圆满。如是修习持来去念，入诸静虑，名住正法胜义有情，名为真实修习静虑，名为真实供养三世诸佛世尊，名一切佛心中之子，从佛口生，是法所成，是法所化。或有菩萨，如是修习渐渐退转，乃至漏尽，成阿罗汉，具六神通；或有菩萨，如是修习渐渐增长，功德圆满，成大菩萨；乃至十八不共佛法，一切种智修习圆满，此人不久，当得无上正等菩提。善男子，我以如是诸业法受因果报智，观察三世诸佛法眼，安立有情，于此十种修定业轮，令其修习。善男子，是名如来修定业轮。

“善男子，云何如来习诵业轮？谓诸苾刍，或苾刍尼、邬波索迦、邬波斯迦，或复净信诸善男子，或善女人，善根微薄，依世俗谛，根机未熟，我当安置如有有情，令其习诵初夜、后夜，精勤无怠。若诸有情求无上智，我当安置纯净大乘，令其自读，或教他读，令其自诵，或教他诵，令其自说，或教他说；于大乘中，令其自习，或教他习；为令自身及他身中大烦恼众皆除灭故，为令证得无上智

故，为除一切有情苦故，为令趣入无畏城故。若诸有情求缘觉乘，我当安置诸缘起法，令其习诵。若诸有情求声闻乘，我当安置百千文颂四阿笈摩，百千文颂毗奈耶藏，百千文颂阿毗达磨，及毗婆沙，令其习诵。善男子，是名如来习诵业轮。

“善男子，云何如来营福业轮？谓诸有情，根机愚钝，未种善根，智慧微劣，懈怠失念，染著种种受用资具，远离善友，我当安置如是有情，使营福业，谓令修作佛、法、僧事，及亲教师、轨范师事。善男子，是名如来营福业轮。

“善男子，我成如是第二佛轮。由此轮故，以其无上三世业智，如实了知一切有情，诸业法受因及果报，随其所应立三业轮，成熟一切所化有情，得安隐住，得无惊恐，得无所畏，摧诸天魔外道邪论，转大梵轮，成大梵行，如实了知众生因报。

“善男子，如刹帝利灌顶大王，成善巧智，观察一切沙门、婆罗门、刹帝利、吠舍、戌达罗等种种功德，多闻、勇健、工巧、技艺。若诸众生，富有功德成巧便智，精进勇猛坚固不退，种种福德而自庄严；此刹帝利灌顶大王，随彼所应，给施珍宝、财谷、田宅、奴婢、仆使。于自国土，若诸众生，德艺轻微，功业鲜薄；此刹帝利灌顶大王，随彼所应，微加赈恤。于自国土，若诸众生，功德薄劣，少于精进，懈怠懒惰，忘失正念，无慈悲心，不知恩报，于后世苦不见怖畏，没居家泥，积诸恶行；此刹帝利灌顶大王，随彼所应，种种谪罚，或以言教苦切呵责，或夺种种珍宝资财，或夺受用如意产业，或罚鞭杖，或禁牢狱，或断支节，或斩身首，如是无量随应谪罚。

“善男子，刹帝利种灌顶大王，成就如是第三王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来成就善巧知根机智，若诸弟子远离福慧巧方便智及以布施、调伏、寂静，失念心乱，来至我所，归依于我，而我善知彼根意乐、随眠、胜解，随其所应，为说治罚毗奈耶法。若诸众生，其性很戾，于诸学处不能奉持，为令久住我之圣教，多有所作，或为制立忆念治罚，或以言教恐怖呵责，或暂驱摈，或令折伏归诚礼拜，或不与语、不共同利，或如草布，或复灭摈。我以妙智知诸有情、补特伽罗根机、意乐、随眠、胜解，如应谪罚，为令皆破广大积聚无义黑闇，枯竭烦恼诸瀑流故，令得生天涅槃乐故，为行恶道补特伽罗得调伏故，随其所应，说治罚法；观察黑说大说差别，随其所应，授与治罚行恶道法。我以妙智知诸有情，具足成就，增上信敬，纯净意乐，随其所应，为说种种善品差别，令其修学，乃至令彼一切善根，皆得圆满入无畏城。

“善男子，我成如是第三佛轮。由此轮故，知诸有情补特伽罗，种种根机、意乐、随眠及与胜解、诸业法受，随其所应，利益安乐，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，知自国土有无量有情补特伽罗，归依种种邪神外道，起于邪信，及起邪见，学邪禁戒，执著修治邪吉凶相，具受种种无利益苦。大王知己数数召集，以其先王治国正法，开悟示现教习诫敕，令其舍除倒信倒见，修学先王正直旧法，令自国土一切有情，一趣、一归、一意、一欲，一切和合同依先王正法，而转听受诏命，随顺奉行，率土和同，作所应作。时刹帝利灌顶大王，常与群臣数数集会，共味嘉肴，受诸快乐，嬉戏游行，不相猜贰，咸共畴咨理诸王务。

“善男子，刹帝利种灌顶大王，成就如是第四王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来成就善巧知胜解智，见诸世间种种邪归、邪见、邪意，乐著邪法，行邪业行，由是因缘受无量苦。如来见已，数数召集于大众前，以其过去诸佛世尊三宝种姓因果、六种波罗蜜多、瑜伽依因、三律仪等诸因果法，开悟、示现、庆慰、诫敕一切众会，令其解脱诸颠倒见，建立正见，安置十善正直旧道，共诸有情数数同修法随法行，方便引摄因果等流。为诸有情四众和合，同修一切殊胜善行，便共游戏四种念住，于三摩地、解脱智见、诸道品中，欢娱受乐。为令圣教久住世故，绍三宝种不断绝故，便共游戏四正勤、四神足、五根、五力、七等觉支、八圣道支，于其种种胜三摩地、解脱智见、诸道品中，欢娱受乐。

“善男子，我成如是第四佛轮。由此轮故，知诸有情补特伽罗种种胜解、归趣、意乐、诸业法受，随其所应，利益安乐，得安稳住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，知自国土，或他国土，有无量有情补特伽罗，于自财色耽染无厌，于他财色贪求追爱，即便安置坚固城郭、村坊、戍逻、国邑、王宫，广说乃至舍罗、鸚鵡，防守众具令无损失。

“善男子，刹帝利种灌顶大王，成就如是第五王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来成就善巧知诸性智，知诸恶魔，及九十五众邪外道，并余无量众魔外道所惑有情，于自财色耽染无厌，于他财色贪求追爱，于我自身及我徒众深生憎嫉，为害我故，假设珍饈杂以毒药，闇置火坑，伪敷床座，或推山石，或放狂象，拔剑追逐，散垒尘秽，谤行淫欲，毁是不男，或谓非人，或言幻化，以是诸恶而相诽谤，于佛法僧亦起无量种诽谤骂詈毁辱，于我近住声闻弟子嫉妒因缘起诸毁谤。如来知己，善守六根，依四梵住，具四辩才，为诸声闻宣说法要，安立清净三解脱门。我以如是世出世间知诸性智，如实了知一切众生，种种无量诸性差别，随其所应，为作饶益。

“善男子，我成如是第五佛轮。由此轮故，以世出世知诸性智，

知诸有情补特伽罗，种种无量诸性差别，随其所应，利益安乐，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，安置一切坚固城郭、村坊、戍逻、国邑、王宫，广说乃至舍罗、鸚鵡防守具已，处自宫中，与诸眷属后妃、嫔女而自围绕，游戏五欲种种乐具，放恣六根受诸喜乐。

“善男子，刹帝利灌顶大王，成就如是第六王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来，与诸菩萨摩訶萨众，及大声闻，安置一切坚固圣教防守之事，即便现入最初静虑，乃至现入第四静虑，现入无边虚空处定，广说乃至现入非想非非想定，如是乃至现入一切佛所行定。入此定已，无量百千俱胝那庾多天、龙、药叉、罗刹、健达缚、阿素洛、揭路荼、紧捺洛、莫呼洛伽、弥荔多、毕舍遮布怛那、羯吒布怛那等，于诸众生常怀毒恶损害之心，无慈无悲，于后世苦不见怖畏，而彼见我入于一切佛所行定，皆于我所生大欢喜，起净信心，于三宝中皆生最胜欢喜净信，尊重恭敬得未曾有，于一切恶惭愧发露，深心悔过誓愿永断。由是因缘，一刹那顷，无量无数诸烦恼障、业障、法障皆得销灭，无量无数福慧、资粮、皆得成满，背离生死，趣向涅槃，护持如来无上正法。

“善男子，我成如是第六佛轮。由此轮故，如来游戏静虑解脱、等持等至、无量百千微妙深定，以净智随转，灭诸有情无量烦恼，随其所应，利益安乐，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，与诸群臣领四兵众，周巡观察一切自国城邑、聚落、山川、溪涧、园苑、田泽、陂河、池沼、旷野、丛林、镇逻等处。随彼所在国界诸方险阻多难，不任营理有疑有怖，堪容外境怨敌恶友投窜藏伏；此刹帝利灌顶大王，随其力能方便安置，种种修理坚固防守，令彼诸方平坦无难，堪任营理无疑无怖，遮其外境怨敌恶友投窜藏伏，安抚自国一切人民皆离众苦，受诸快乐。

“善男子，刹帝利灌顶大王，成就如是第七王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来以其佛眼，如实了知一切有情补特伽罗，有贪、有瞋、有痴心等；如实了知是诸有情种种烦恼病行差别，如来知己，便起无量精进勇猛方便势力，随其所宜，授以种种修定妙药，令诸有情，精勤修学除烦恼病。若诸有情，宜修不净除烦恼病，即便授以修不净药。若诸有情，宜修梵住除烦恼病，即便授以修梵住药。若诸有情，宜修缘起除烦恼病，即便授以修缘起药。若诸有情，宜修息念除烦恼病，即便授以修息念药。若诸有情，宜可修于三解脱门除烦恼病，即便授以修于三种解脱门药。若诸有情，宜修静虑除烦恼病，即便授以修静虑药。若诸有情，宜修无色除烦恼病，即便授以修无色

药。若诸有情，乃至宜修首楞伽摩诸三摩地除烦恼病，即便授以首楞伽摩三摩地药。所以如来授诸有情如是法药，不令一切所化有情为四魔怨之所系摄，不令一切所化有情背人天乘向诸恶趣，不令如来无上法眼三宝称姓速疾坏灭，由是如来授诸有情如是法药。

“善男子，我成如是第七佛轮。由此轮故，以其无上遍行行智，授诸众生种种法药，令勤修学除烦恼病，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，忆念自他本昔种姓，初生童子嬉戏等事；谓忆自他于如是处，初生沐浴怀抱乳哺，按摩支节乃至戏笑，或弄灰土，或与侍从种种遨游，或习技艺，或复修营种种事业，或游他国夙夜栖泊，或奉事王，或理王务，或为太子，或登王位得大自在受诸快乐，广大名称遍诸方维；念是事已，安立先王所遵正法，抚育一切国土人民，守护自国不侵他境。

“善男子，刹帝利种灌顶大王，成就如是第八王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来处大众会，忆念自他宿世所经无量种事：谓忆一生，或二、或三乃至无量百千生事，或忆成劫，或忆坏劫，或忆无量成劫、坏劫；曾于过去住如是处，如是名字、如是种性、如是种类、如是饮食、如是领纳苦受乐受、如是寿量、如是久住、如是极于寿量边际；从彼处没，来生此间，复从此没，往生彼处；忆念宿世如是等事无量无边，随诸众生根性差别，建立正法为作饶益。

“善男子，我成如是第八佛轮。由此轮故，利益安乐无量有情，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，随念观察自国有情，种姓、技艺及诸事业，死此生彼，因果胜劣差别不同。知彼有情生如是家，其身勇健或复怯弱，于诸技艺已学未学，所有事业善作恶作，富贵贫贱，端正丑陋，如是等类乃至命终，或有自业未尽而死，或有自业已尽而死，或犯王法刑戮而死，或有递相残害而死，或因鞭杖捶楚而死，或因图圈幽繫而死，或因习学技艺而死，或因战阵伤杀而死，或因斗争殴击而死，或因财宝贪吝而死，或因色欲耽湎而死，或因忿恨结愤而死，或因劳倦顿弊而死，或因饥渴乏绝而死，或有过死，或无过死，或耆年死，或壮年死，或幼年死，或作种种善业而死，或作种种恶业而死。知诸有情行善行者，身坏命终，当往善趣；知诸有情，行恶行者，身坏命终，当往恶趣。知是事已，复自思维：‘我当正勤修身善行，修语善行，修意善行。我当施設种种方便，修行布施、调伏、寂静，身坏命终，当往善趣，勿堕恶趣。’此刹帝利灌顶大王，思惟是已，勇猛精进，修身、语、意三种善行，常行布施，一切所有饮食、衣服、象马、骑乘、卧具、医药、房舍、灯明及余资具，奴婢、僮

仆、种种珍财，头目手足乃至身命，无所吝惜；及离杀生，离不与取，离欲邪行，离虚诳语，离粗恶语，离离间语，离杂秽语，离诸贪欲，离诸瞋恚，离诸邪见。由是因缘，此刹帝利灌顶大王，当获十种功德胜利：何等为十？一者、具大名称；二者、具大财宝；三者、具妙色相；四者、具多眷属；五者、少病少恼；六者、朋友眷属，聪慧多闻；七者、正至正行，亲近供养；八者、广美声誉，流振十方；九者、大威德天神，常随卫护；十者、身坏命终，当生天上，常居善趣安乐国土。

“善男子，刹帝利种灌顶大王，成就如是第九王轮。由此轮故，令自国土增长安乐，能伏一切怨敌恶友，善守护身，令增寿命。

“善男子，如是如来如实了知一切有情死生等事，谓如实知：若诸有情，成身恶行，成语恶行，成意恶行，诽谤贤圣，具足邪见，邪见业因，身坏命终，堕诸恶趣，或生地狱，或生傍生，或生饿鬼；若诸有情，成身善行，成语善行，成意善行，不谤贤圣，具足正见，正见业因，身坏命终，升诸善趣，或生天上，或生人中，或尽诸漏。如来如是如实知己，于彼众生起大慈悲，勇猛精进，现三神变，令彼众生归趣佛法，教诫安置，成立世间、出世间信。何等为三？一者，神通变现；二者，记说变现；三者，教诫变现。由是三种变现威力，劝发有情教诫安置，成立世间、出世间信，令于一切有趣死生皆得解脱。

“善男子，我成如是第九佛轮。由此轮故，利益安乐无量有情，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，如刹帝利灌顶大王，为除四洲无量有情种种身病，舍弃王位，以诸香汤沐浴身首，著鲜净衣，端坐思维，于诸众生，其心平等慈悲护念，为令解脱一切病故，以其种种香华伎乐及余供具，供养一切大威德天神。尔时，一切天帝、龙帝，乃至莫呼洛伽神帝，知是事已，各相谓言：‘此刹帝利灌顶大王，具诸功德有大威神，应作轮王，统四洲渚，我等宜应共往建立，令复王位统四洲渚，令诸众生无病安乐。’时诸天帝，乃至莫呼洛伽神帝，即便共往立刹帝利灌顶大王转轮王位，令具七宝，统四大洲，皆得自在，千子具足，勇健端正，能摧怨敌，跨王大地恒穷海际，谪罚皆停，刀杖不举，咸修正法，普受安乐。

“善男子，刹帝利种灌顶大王，成就如是第十王轮。由此轮故，于四大洲，爰及八万四千小渚，安立其中诸有情类十善业道，善守护身，令增寿命，身坏命终，当生天中，受诸妙乐。

“善男子，如是如来昔菩萨位，知自他身有无量种诸烦恼病，以定香水洗浴其身，及以谛法、大慈大悲灌沐其首，著惭愧衣。十方一切诸佛世尊，以诸静虑、等持精进、方便智意、慈悲护念，咸作是言：‘如是太士，是大福慧庄严宝器，堪容一切三种不护、四无所畏、

如来十力及与十八不共佛法，堪得无上一切智智，大慈大悲无不具足，常欣利乐一切众生，是求佛宝商人导首，能救有情生死众苦，能施有情涅槃大乐。我等一切诸佛世尊，应以诚言与其所愿，令成如来应正等觉，得无上法，为大法王。’我于尔时依福慧力，勇猛精进，于四圣谛如实知己，证得无上正等菩提。

“善男子，如转轮王统四大洲，皆得自在；如是如来，于四静虑、四无色定、四种梵住、四无碍解、四圣谛观、四无所畏、如来十力及与十八不共佛法、一切种智，皆得自在。如转轮王，具足七宝；如是如来，成就七种菩提分宝。如转轮王千子具足，勇健端正，能伏怨敌；如是如来，有阿若多憍陈那为最初，苏跋陀罗苏刺多为最后，诸大声闻从佛心生，从佛口生，从法化生，得佛法分，诸漏永尽名为勇健，具四梵住名为端正，能伏一切天魔外道异论怨敌。如转轮王，化及八万四千小渚；如是如来，于百俱胝南赡部洲，于百俱胝西瞿陀尼洲，于百俱胝东毗提河洲，于百俱胝北俱卢洲，于百俱胝诸大溟海，于百俱胝诸妙高山，于百俱胝四大王天，于百俱胝乃至非想非非想天，于百俱胝大轮围山，于此高广一佛土中，言音施化皆得自在。

“善男子，我成如是第十佛轮。由此轮故，如实了知自身他身诸漏永尽，利益安乐无量有情，得安隐住，得无惊恐，得无所畏，自称我处大仙尊位，转于佛轮，摧诸天魔外道邪论，处大众中正师子吼。

“善男子，我成如是十种佛轮。本愿力故居此佛土，五浊恶世一切有情，损减一切白净善法，匮乏所有七圣财宝，远离一切聪敏智者，断常罗网之所覆蔽，常好乘驭诸恶趣车，于后世苦不见怖畏，常处遍重无明黑闇，具十恶业，造五无间，诽谤正法，毁谤贤圣，离诸善法，具诸恶法。我于其中成就如是佛十轮故，得安隐住，得无惊恐，得无所畏，自称我处大仙尊位，转于佛轮，降诸天魔外道邪论，摧灭一切诸有情类犹如金刚坚固烦恼，随其所乐，安立一切有力众生，令住三乘不退转位。”

尔时，会中一切菩萨摩訶萨众，一切声闻，一切天、龙，广说乃至一切羯吒布怛那众、人非人等，皆大欢喜，同唱善哉，雨大香雨，雨大华雨，雨众宝雨，雨大衣雨，一切大地皆悉震动。闻说如是十种佛轮，于众会中，有八十四百千那庾多菩萨摩訶萨，得无生法忍；复有无量菩萨摩訶萨，获得种种诸陀罗尼三摩地忍；复有无量无数有情，初发无上正等觉心，得不退转；复有无量无数有情，逮得果证。

大乘大集地藏十轮经卷第三

无依行品第三之一

尔时，会中有大梵天，名曰天藏，久植善根，住第十地，具诸菩

萨摩诃萨德，即从座起，合掌礼佛，而说颂言：

“功德藏慧海，我今问所疑，
愿慧海垂听，为我除疑滞。
我等今渴仰，德藏胜法味，
及最上义味，举众咸欲闻。”

佛告天藏大梵天言：“如来今者恣汝意问，当随问答，令汝心喜。”

大梵天言：“唯然，世尊。”以颂问曰：

“利慧修定者，安住不放逸，
为住胜义谛？为依止生死？
昼夜于法义，精勤而习诵，
为渡烦恼海？为退堕恶趣？
勇猛勤营福，为定趣涅槃？
为处生死中，退堕于恶趣？
聪慧刹帝利，成就十种轮，
为沉生死中？为当升佛果？
杂染心难伏，诸烦恼所乱，
以何净其心，修定福诵业？”

尔时，世尊告彼天藏大梵天曰：“善哉！善哉！汝善辩才，能问斯义。汝于此法，已作劬劳。汝于诸行，已得圆满。汝于过去殑伽沙等佛世尊所，已勤三业，兴隆正法，绍三宝种，今为饶益无量众生，复问如来如是深义。善男子，有大记别法，名无依行。过去一切诸佛世尊，为欲成熟诸有情故，为令厌离生死法故，为令除断业烦恼故，为令三乘速圆满故，宣说住持此无依行大记别法。现在十方诸佛世尊，亦为成熟诸有情故，为令厌离生死法故，为令除断业烦恼故，为令三乘速圆满故，宣说住持此无依行大记别法。未来一切诸佛世尊，亦为成熟诸有情故，为令厌离生死法故，为令除断业烦恼故，为令三乘速圆满故，宣说住持此无依行大记别法。汝于过去诸如来所，已具得闻此无依行大记别法。我于今者，亦为成熟诸有情故，为令厌离生死法故，为令除断业烦恼故，为令三乘速圆满故，宣说住持此无依行大记别法。汝应谛听！善思念之！吾当为汝分别解说。”

尔时，天藏大梵天言：“唯然，世尊，愿乐欲闻。”

佛言：“大梵，有十种无依行法，若修定者随有一行，尚不能成欲界善根；设使先成，寻还退失；况当能成色、无色定，乃至三乘随成一乘？何等为十？一者、世有一类，虽欲修定，而乏资缘，经求扰乱；二者、复有一类，虽欲修定，而犯尸罗，行诸恶行；三者、复有一类，虽欲修定，而颠倒见，妄执吉凶，身心刚强；四者、复有一

类，虽欲修定，而心掉动，不顺贤圣，诸根轻躁；五者、复有一类，虽欲修定，而离间语，破乱彼此；六者、复有一类，虽欲修定，而粗恶语，毁骂贤圣；七者、复有一类，虽欲修定，而杂秽语，及虚诳语；八者、复有一类，虽欲修定，而怀贪嫉，于他所得利养恭敬，心不欢悦；九者、复有一类，虽欲修定，而怀瞋忿，于诸有情，心常愤恚；十者、复有一类，虽欲修定，而怀邪见，拨无因果。大梵当知，是名十种无依行法。若修定者随有一行，尚不能成欲界善根；设使先成，寻还退失；况当能成色、无色定，乃至三乘随成一乘？

“复次，大梵，又有十种无依行法，若修定者随有一行，终不能成诸三摩地；设使先成，寻还退失。何等为十？一者、乐著事业；二者、乐著谈论；三者、乐著睡眠；四者、乐著营求；五者、乐著艳色；六者、乐著妙声；七者、乐著芬香；八者、乐著美味；九者、乐著细触；十者、乐著寻伺。大梵当知，是名十种无依行法。若修定者随有一行，终不能成诸三摩地；设使先成，寻还退失。若不能成诸三摩地，虽集所余诸善法聚而有是事，追求受用信施因缘，发起恶心心所有法，于诸国王、大臣等所犯诸过罪，或被呵骂，或被捶打，或被断截肢节手足；由是因缘，或成重病，长时受苦，或疾命终，于三恶趣随生一所，乃至或生无间地狱，如喙达洛迦、阿婆茶底、沙瞿波理迦、提婆达多。如是等类退失静虑，乃至堕于无间地狱，受无量种难忍大苦。”

尔时，世尊告阿若多憍陈那言：“吾听汝等，给阿练若修定苾刍最上房舍、最上卧具、最上饮食，一切僧事皆应放免。所以者何？诸修定者，若乏资缘，即便发起一切恶心心所有法，不能成就诸三摩地，乃至堕于无间地狱，受无量种难忍大苦。修定行者，若具资缘，诸三摩地未成能成；若先已成，终不退失，由此不起一切恶法，广说乃至不善寻伺，往生天上证得涅槃。修定行者，若未成就诸三摩地，初夜、后夜当舍睡眠，精进修学，远离愤闹，少欲知足，无所顾恋，一切贪瞋、忿覆、恼害、憍慢、贡高、悭吝、嫉妒、离间粗恶、虚诳杂秽，一切人间嬉戏放逸，皆悉远离。如是行者，应受释、梵、护世四王、转轮王等，赞叹、礼拜、恭敬承事，奉施百千那庾多供，况刹帝利、婆罗门、筏舍、戍达罗等！未得定者，尚应受此赞叹、礼拜、恭敬承事，奉施供养，何况已得三摩地者！”

尔时，世尊而说颂曰：

“修定能断惑，余业所不能，
故修定为尊，智者应供养。”

尔时，天藏大梵天言：“大德世尊，于佛法中而出家者，若刹帝利，大臣、宰相，以鞭杖等捶拷其身，或闭牢狱，或复呵骂，或解肢节，或断其命，为当合尔？为不合耶？”

佛告天藏大梵天言：“善男子，若诸有情，于我法中出家，乃至剃除须发，被片袈裟，若持戒，若破戒，下至无戒；一切天、人、阿素洛等，依俗正法，犹尚不合以鞭杖等捶拷其身，或闭牢狱，或复呵骂，或解肢节，或断其命，况依非法？何以故？除其一切持戒多闻，于我法中而出家者；若有破戒行诸恶法，内怀腐败如秽蜗螺，实非沙门自称沙门，实非梵行自称梵行，恒为种种烦恼所胜败坏倾覆，如是破戒诸恶苾刍，犹能示导一切天、龙、药叉、健达缚、阿素洛、揭路荼、紧捺洛、莫呼洛伽、人非人等，无量功德珍宝伏藏。

“又善男子，于我法中而出家者，虽破戒行，而诸有情睹其形相，应生十种殊胜思惟，当获无量功德宝聚。何等为十？谓我法中而出家者，虽破戒行，而诸有情，或有见已，生于念佛殷重信敬殊胜思惟；由是因缘，终不归信诸外道师、书论徒众，乃至能入离诸怖畏大涅槃城。或有见已，生念圣戒殊胜思惟；由是因缘，能离杀生，离不与取，离欲邪行，离虚逛语，离饮诸酒生放逸处，乃至能入离诸怖畏大涅槃城。或有见已，生念布施殊胜思惟；由是因缘，得大财位，亲近供养，正至正行，乃至能入离诸怖畏大涅槃城。或有见已，生念忍辱柔和质直殊胜思惟；由是因缘，便能远离离间粗恶、杂秽瞋忿，乃至能入离诸怖畏大涅槃城。或有见已，生念出家精勤修行殊胜思惟；由是因缘，能舍家法，趣于非家，勇猛精进，修诸胜行，乃至能入离诸怖畏大涅槃城。或有见已，生念远离诸散乱心，静虑等至殊胜思惟；由是因缘，心乐山林阿练若处，昼夜精勤，修诸定行，乃至能入离诸怖畏大涅槃城。或有见已，生念智慧殊胜思惟；由是因缘，欣乐听闻，读诵正法，乃至能入离诸怖畏大涅槃城。或有见已，生念宿植出离善根殊胜思惟，软语慰问，乃至礼足；由是因缘，当生尊贵大势力家，无量有情咸共瞻仰，乃至能入离诸怖畏大涅槃城。

“善男子，于我法中而出家者，虽破戒行，而诸有情睹其形相，生此十种殊胜思惟，当获无量功德宝聚。是故一切刹帝利王、大臣宰相，决定不合以鞭杖等捶拷其身，或闭牢狱，或复呵骂，或解肢节，或断其命。

“复次，大梵，若有依我而出家者，犯戒恶行，内怀腐败如秽蜗螺，实非沙门自称沙门，实非梵行自称梵行，恒为种种烦恼所胜败坏倾覆。如是苾刍，虽破禁戒行诸恶行，而为一切天、龙、药叉、健达缚、阿素洛、揭路荼、紧捺洛、莫呼洛伽，人非人等，作善知识，示导无量功德伏藏。如是苾刍，虽非法器，而剃须发，被服袈裟，进止威仪同诸贤圣；因见彼故，无量有情种种善根皆得生长，又能开示无量有情善趣、生天、涅槃正路。是故依我而出家者，若持戒，若破戒，下至无戒，我尚不许转轮圣王，及余国王、诸大臣等，依俗正法，以鞭杖等捶拷其身，或闭牢狱，或复呵骂，或解肢节，或断其命，况依非法？

“大梵，如是破戒恶行苾刍，虽于我法毗奈耶中名为死尸，而有

出家戒德余势。譬如牛麝身命终后，虽是无识傍生死尸，而牛有黄，而麝有香，能为无量无边有情作大饶益；破戒苾刍亦复如是，虽于我法毗奈耶中名为死尸，而有出家戒德余势，能为无量无边有情作大饶益。

“大梵，譬如贾客入于大海，杀彼一类无量众生，挑取其目，与未达那果和合捣筛，成眼宝药，若诸有情盲冥无目，乃至胞胎而生盲者，持此宝药涂彼眼中，所患皆除，得明净目；破戒苾刍亦复如是，虽于我法毗奈耶中名为死尸，而有出家威仪形相，能令无量无边有情暂得见者，尚获清净智慧法眼，况能为他宣说正法！

“大梵，譬如烧香，其质虽坏，而气芬馥，熏他令香；破戒苾刍亦复如是，由破戒故非良福田，虽恒昼夜信施所烧，身坏命终堕三恶趣，而为无量无边有情作大饶益，谓皆令得闻于生天涅槃香气。

“是故，大梵，如是破戒恶行苾刍，一切白衣皆应守护、恭敬、供养。我终不许诸在家者，以鞭杖等捶拷其身，或闭牢狱，或复呵骂，或解肢节，或断其命！我唯许彼清净僧众，于布萨时或自恣时，驱摈令出；一切给施四方僧物、饮食、资具，不听受用；一切沙门毗奈耶事，皆令驱出，不得在众，而我不许加其鞭杖、系缚断命。”

尔时，世尊而说颂曰：

“瞻博迦华虽萎悴，而尚胜彼诸余华；

破戒恶行诸苾刍，犹胜一切外道众。

“复次，大梵，有五无间大罪恶业。何等为五？一者、故思杀父；二者、故思杀母，三者、故思杀阿罗汉；四者、倒见破声闻僧；五者、恶心出佛身血。如是五种，名为无间大罪恶业。若人于此五无间中，随造一种，不合出家，及受具戒。若令出家，或受具戒，师便犯罪，彼应驱摈令出我法。如是之人，以有出家威仪形相，我亦不许加其鞭杖，或闭牢狱，或复呵骂，或解肢节，或断其命。

“复有四种，近五无间大罪恶业根本之罪。何等为四？一者、起不善心，杀害独觉，是杀生命，大罪恶业，根本之罪；二者、淫阿罗汉、苾刍尼僧，是欲邪行，大罪恶业，根本之罪；三者、侵损所施三宝财物，是不与取，大罪恶业，根本之罪；四者倒见破坏和合僧众，是虚诳语，大罪恶业，根本之罪。若人于此四近无间大罪恶业根本罪中，随犯一种，不合出家，及受具戒。若令出家，或受具戒，师便得罪，彼应驱摈令出我法。如是之人，以有出家及受具戒威仪形相，我亦不许加其鞭杖，或闭牢狱，或复呵骂，或解肢节，或断其命。

“如是或有是根本罪，非无间罪；有无间罪，非根本罪；有根本罪，亦无间罪；有非根本罪，亦非无间罪。

“何等名为是根本罪，亦无间罪？谓我法中，先已出家受具戒者，故思杀他，已到究竟见谛人等，如是名为是根本罪，亦无间罪。

此于我法毗奈耶中，应速驱摈。

“何等名为是根本罪，非无间罪？谓我法中，先已出家受具戒者，故思杀害他异生人，下至方便与人毒药，堕其胎藏，如是名为是根本罪，非无间罪。此人不应与僧共住，诸有给施四方僧物，亦不应令于中受用。

“何等名为是无间罪，非根本罪？谓若有人，或受三归，或受五戒，或受十戒，于五无间随造一种，如是名为是无间罪，非根本罪。如是之人，不合出家，及受具戒；若令出家，或受具戒，师便得罪，彼应驱摈令出我法。

“何等名为非根本罪，亦非无间罪？谓若有人，或受三归，或受五戒，于佛法僧而生疑心，或归外道以为师导，或执种种若少若多吉凶之相祠祭鬼神；若复有人，于诸如来所说正法，或声闻乘相应正法，或独觉乘相应正法，或是大乘相应正法，诽谤遮止，自不信受，令他厌背，障碍他人读诵书写，下至留难一颂正法，如是名为非根本罪，亦非无间，而生极重大罪恶业，近无间罪。如是之人，若未忏悔，除灭如是大罪恶业，不合出家，及受具戒；若令出家，或受具戒，师便得罪，彼应驱摈令出我法。若已出家，或受具戒，犯如是罪，若不忏悔，此于我法毗奈耶中，应速驱摈。所以者何？此二种人，习行破毁正法眼行，习行隐灭正法灯行，习行断绝三宝种行，令诸天人习行无义、无利、苦行，堕诸恶趣。此二种人，自谤正法，毁谤贤圣，亦令他人诽谤正法，毁谤贤圣，命终当堕无间地狱，经劫受苦，不可疗治。

“复次，大梵，或有遮罪无依行法，或有性罪无依行法，于性罪中或有根本无依行法。云何根本无依行法？谓若苾刍，行非梵行，犯根本罪；或以故思杀异生人，犯根本罪；或复偷盗非三宝物，犯根本罪；或大妄语，犯根本罪。若有苾刍，于此四种根本罪中，随犯一种，于诸苾刍所作事业，令受折伏，一切给施四方僧物，皆悉不听于中受用；而亦不合加其鞭杖，或闭牢狱，或复呵骂，或解肢节，或断其命；如是名为于性罪中根本重罪无依行法。何故说名为根本罪？谓若有人犯此四法，身坏命终，堕诸恶趣；是诸恶趣，根本罪故，是故说名为根本罪。

“何故无间及近无间根本罪等，说名极重大罪恶业无依行法？善男子，譬如铁抔、铅锡抔等，掷置空中，终无暂住，必速堕地；造五无间，及近无间四根本罪、并谤正法、疑三宝等，二种罪人亦复如是。若人于此十一罪中，随造一种，身坏命终，无余间隔，定生无间大地狱中受诸剧苦，故名极重大罪恶业无依行法。犯此极重大罪恶业无依行法补特伽罗，于现身中，决定不能尽诸烦恼，尚不能成诸三摩地，况能趣入正性离生？彼人命终，定生地狱，受诸重苦。

“复次，大梵，若善男子，若善女人，以净信心归依我法，或趣声闻乘，或趣独觉乘，或趣大乘，于我法中净信出家，受具足戒；于

诸学处，深心敬重；于四根本性罪戒中，坚固勇猛，精勤守护。如是之人，常为一切人非人等，随逐拥卫，名不虚受人天供养，于三乘中随所欣乐，速能趣入成办究竟。是故真实求涅槃者，宁舍身命，终不毁犯如是四法。所以者何？诸有情类，要由三因得涅槃乐：一者、依止如来为因，二者、依我圣教为因，三者、依我弟子为因。诸有情类依此三因，精勤修行，得涅槃乐。若人毁犯如是四法，我非彼师，彼非弟子。若人毁犯如是四法，则为违越我所宣说，甚深广大、无常苦空无我相应利益、安乐一切有情别解脱教。若越如是别解脱教，则于一切静虑、等持皆成盲冥，不能趣入，为诸烦恼恶业缠缚，于三乘法亦为非器，当堕恶趣，受诸重苦。

“若善男子，若善女人，于我所说别解脱教，所制四种根本重罪，清净无犯，我是彼师，彼是弟子。随顺我语，善住我法，一切所作皆当成满。此人善住尸罗蕴故，名为善住一切善法，或名具足住声闻乘，或名具足住独觉乘，或名具足住于大乘。所以者何？若能护持如是性罪四根本法，当知则为建立一切有漏、无漏、善法胜因，是故护持如是四法，名为一切善法根本。如依大地，一切药谷卉木丛林皆得生长；如是依止，极善护持四根本戒，一切善法皆得生长。如依大地，一切诸山、小轮围山、大轮围山、妙高山王，皆得安住；如是依止，极善护持四根本戒，诸声闻乘及独觉乘、无上乘，皆得安住。如依大地，求得一切世间美味；如是依止，极善护持四根本戒，求得一切念定总持、安忍圣道，乃至无上正等菩提。又如大地，于净不净皆等任持；极善护持四根本戒诸善男子及善女人亦复如是，于其法器及非法器，其心平等，不诤不弄，不自贡高，不卒呵举，能为一切善法生处。又如大地，一切有情，皆共受用而得存活；极善护持四根本戒诸善男子，及善女人亦复如是，于诸如来所说正法，生长第一欢喜净信，于诸有情无差别想，以四摄法平等摄受，一切有情皆共依止，受用法乐而自存活。”

尔时，尊者优波离闻佛所说，从座而起，整理衣服，顶礼佛足，偏袒一肩，右膝著地，合掌恭敬白佛言：“世尊，如佛所说，极善护持四根本戒，诸善男子及善女人，于其法器及非法器，其心平等，不诤不弄，不自贡高，不卒呵举。若如是者，于未来世，有诸苾刍破戒恶行，实非沙门自称沙门，实非梵行自称梵行。诸苾刍僧，于是人等，云何方便呵举驱摈？”

佛告尊者优波离言：“我终不许外道俗人举苾刍罪！我尚不许诸苾刍僧，不依于法，率尔呵举破戒苾刍，何况驱摈？若不依法，率尔呵举破戒苾刍，或复驱摈，便获大罪。优波离，汝今当知有十非法，率尔呵举破戒苾刍，便获大罪；诸有智者，皆不应受。何等为十？一者、不和僧众，于国王前，率尔呵举破戒苾刍；二者、不和僧众，梵志众前，率尔呵举破戒苾刍；三者、不和僧众，宰官众前，率尔呵举

破戒苾刍；四者、不和僧众，于诸长者、居士众前，率尔呵举破戒苾刍；五者、女人众前，率尔呵举破戒苾刍；六者、男子众前，率尔呵举破戒苾刍；七者、净人众前，率尔呵举破戒苾刍；八者、众多苾刍、苾刍尼前，率尔呵举破戒苾刍；九者、宿怨嫌前，率尔呵举破戒苾刍；十者、内怀忿恨，率尔呵举破戒苾刍。如是十种，名为非法率尔呵举破戒苾刍，便获大罪。设依实事而呵举者，尚不应受，况于非实？诸有受者，亦得大罪。

“复有十种非法呵举破戒苾刍，便获大罪，诸有智者亦不应受。何等为十？一者、诸余外道，呵举苾刍；二者、不持禁戒在家白衣，呵举苾刍；三者、造无间罪，呵举苾刍；四者、诽谤正法，呵举苾刍；五者、毁谤贤圣，呵举苾刍；六者、痴狂心乱，呵举苾刍；七者、痛恼所缠，呵举苾刍；八者、四方僧净人，呵举苾刍；九者、守园林人，呵举苾刍；十者、被罚苾刍，呵举苾刍。如是十种非法呵举破戒苾刍，便获大罪。设依实事而呵举者，亦不应受，况于非实？诸有受者，亦得大罪。

“复次，优波离，若有苾刍，毁犯禁戒，与僧共住。于众僧中有余苾刍，轨则所行，皆悉具足，一切五德，无不圆满，应从座起，整理衣服，恭敬顶礼苾刍僧足，便至破戒恶苾刍前，求听举罪作如是言：‘长老忆念！我今欲举长老所犯，以实非虚妄，应时不非时，软语非粗犷，慈心不瞋恚，利益非损减，为令如来法眼、法灯久炽盛故，长老听者，我当如法举长老罪。’彼若听者，便应如法如实举之；彼若不听，复应顶礼上座僧足，恭敬白言：‘如是苾刍犯如是事，我依五法如实举之。’时僧众中上座苾刍，应审观察能举所举，及所犯事虚实轻重，依毗奈耶及素怛缆，方便检问，慰喻呵责，以七种法如应灭除。若犯重罪，应重治罚；若犯中罪，应中治罚；若犯轻罪，应轻治罚，令其惭愧，忏悔所犯。”

时，优波离复白佛言：“世尊，若实有过恶行苾刍，恃白衣力，或财宝力，或多闻力，或词辩力，或弟子力，以如是等诸势力故，凌拒僧众；上座苾刍，持素怛缆及毗奈耶及摩怛理伽者，如法教诲，皆不承顺，如是苾刍，云何治罚？”

佛言：“优波离，上座苾刍持三藏者，应和僧众，遣使告白国王、大臣，令助威力，然后如实依法治罚。”

时，优波离复白佛言：“世尊，若彼有过恶行苾刍，以财宝力，或多闻力，或词辩力，或以种种巧方便力，令彼国王、大臣欢喜，皆住破戒非法朋中，容纵如是恶苾刍罪，不听如实依法治罚，尔时僧众应当云何？”

佛言：“优波离，若彼苾刍行无依行，于僧众中，粗重罪相未彰露者，是时僧众应权舍置。若彼苾刍行无依行，于僧众中，粗重罪相已彰露者，是时僧众应共和合，依法驱摈，令出佛法。优波离，譬如燕麦，在麦田中，芽、茎、枝、叶与麦相似，秽杂净麦，及至彼草其

穗未出，是时农夫应权舍置。穗既出已，是时农夫恐秽净麦，并根剪拔弃于田外。行无依行破戒苾刍亦复如是，恃白衣等种种势力，住于僧中威仪形相与僧相似，秽杂清众，乃至善神未相觉发，于僧众中，粗重罪相未彰露者，是时僧众应权舍置。若诸善神已相觉发，于僧众中，粗重罪相已彰露者，是时僧众应共和合，依法驱摈，令出佛法。优波离，譬如大海不宿死尸；我声闻僧诸弟子众亦复如是，不与破戒恶行苾刍死尸共住。”

时，优波离复白佛言：“世尊，若彼破戒恶行苾刍，僧众共和合驱摈已；彼恶苾刍以财宝力，或多闻力，或词辩力，或以种种巧方便力，令彼国王、大臣欢喜，皆住破戒非法朋中，以威势力凌逼僧众，还令如是破戒苾刍与僧共住，尔时僧众当复云何？”

佛言：“优波离，尔时僧中有能悔愧持戒苾刍，为护戒故，不应瞋骂破戒苾刍，但应告白国王大臣；或恐凌逼，而不告白，应舍本居，别往余处。”

大乘大集地藏十轮经卷第四

无依行品第三之二

尔时，地藏菩萨摩訶萨复白佛言：“大德世尊，颇有佛土五浊恶世空无佛时，其中众生烦恼炽盛，习诸恶行，愚痴戾戾，难可化不？谓刹帝利旃荼罗、宰官旃荼罗、居士旃荼罗、长者旃荼罗、沙门旃荼罗、婆罗门旃荼罗。如是等人，善根微少，无有信心，谄曲愚痴，怀聪明慢，不见不畏后世苦果，离善知识，乃至趣向无间地狱。如是等人，为财利故，与诸破戒恶行苾刍，相助共为非法朋党，皆定趣向无间地狱。若有是处，我当住彼，以佛世尊如来法王，利益安乐一切有情，无上微妙甘露法味，方便化导令得受行，拔济如是刹帝利旃荼罗，乃至婆罗门旃荼罗，令不趣向无间地狱。”

尔时，佛告地藏菩萨摩訶萨言：“善男子，于未来世此佛土中，有诸众生烦恼炽盛，习诸恶行，愚痴戾戾，难可化导，谓刹帝利旃荼罗、宰官旃荼罗、居士旃荼罗、长者旃荼罗、沙门旃荼罗、婆罗门旃荼罗。如是等人，善根微少，无有信心，谄曲愚痴，怀聪明慢，离善知识，言无真实，不能随顺善知识语，常行诽谤毁骂詈，于诸正法犹豫倒见，不见不畏后世苦果，常乐习近诸恶律仪，好行杀生，乃至邪见，欺诳世间，自他俱损。是刹帝利旃荼罗，乃至婆罗门旃荼罗，坏乱我法，于我法中而得出家，毁破禁戒，乐营俗业。彼刹帝利乃至婆罗门等，恭敬供养，贪利求财，有言无行，传书送印，通信往来，商贾贩易，好习外典，种植营农，藏贮宝物，守护园宅、妻妾、男女，习行符印，咒术使鬼，占相吉凶，合和汤药，疗病求财，以自活命，贪著饮食、衣服、宝饰，勤营俗务，毁犯尸罗，行诸恶法，贝音

狗行，实非沙门自称沙门，实非梵行自称梵行。彼刹帝利旃荼罗，乃至婆罗门旃荼罗，爱乐亲近，恭敬供养，听受言教。此破戒者，于刹帝利旃荼罗，乃至婆罗门旃荼罗，亦乐亲近，恭敬供养，听受言教。若见有人于我法中，得出家已具戒富德，精进修学无学行，乃至证得最后极果，彼刹帝利旃荼罗，乃至婆罗门旃荼罗，反生憎嫉，不乐亲近，恭敬供养，听受言教。

“善男子，譬如有人入宝洲渚，弃舍种种帝青、大青、金、银、真珠、红莲华色筏琉璃等大价真宝，取迦遮珠。于未来世此佛土中，有刹帝利旃荼罗，乃至婆罗门旃荼罗，亦复如是，入我正法宝洲渚中，弃舍种种具戒富德、乐胜义谛、具足惭愧学无学人，及善异生，精勤修学六到彼岸、具诸功德真圣弟子；取诸破戒好行众恶，无惭无愧，言辞粗犷，身心憍傲，离诸白法，无慈无悲恶行苾刍，以为福田，恭敬供养听受言教。如是恶人师及弟子，俱定趣向无间地狱。

“善男子，有十恶轮，于未来世此佛土中，有刹帝利旃荼罗、宰官旃荼罗、居士旃荼罗、长者旃荼罗、沙门旃荼罗、婆罗门旃荼罗，如是等人，于十恶轮，或随成一，或具成就，先所修集一切善根，摧坏烧灭皆为灰烬，不久便当肢体废缺，于多日夜结舌不言，受诸苦毒，痛切难忍，命终定生无间地狱。

“何等为十？如是破戒恶行苾刍，有刹帝利及宰官等，忍受恶见，谤阿练若清净苾刍言：‘诸仁者，如是苾刍愚痴凡猥，诈现异相，诳惑世间，为求饮食、衣服、利养，恭敬名誉，自赞毁他，嫉妒斗乱，贪著名利，无有厌足，应当摈黜勿受其言。如是苾刍专行妄语，离谛实法，于此皆无得道果者，亦无离欲永尽诸漏；但为利养、恭敬、名誉住阿练若，自现有德，慎莫供养恭敬承事。如是谄曲，非真福田，非行道者。’时，刹帝利旃荼罗，乃至婆罗门旃荼罗，于阿练若清净苾刍，不能生实信心希有之想，心无恭敬，意怀凌蔑，不乐亲近，承事供养，所有言说皆不听受。轻毁如是住阿练若清净苾刍，即是轻毁一切法眼三宝种姓。时，彼国中有诸天、龙、药叉神等，信敬三宝无动坏者，于刹帝利旃荼罗王，乃至沙门、婆罗门等旃荼罗人，心生瞋忿，互相谓言：‘仁等当观此刹帝利、宰官、居士、长者、沙门、婆罗门等旃荼罗人，皆悉轻毁一切法眼三宝种姓，损减善根，由恶友力摄诸罪业，当堕恶趣。我等从今勿复拥护此刹帝利旃荼罗等，并其所居国土城邑。’作是语已，一切天、龙、药叉神等，皆悉舍弃，不复拥护彼刹帝利旃荼罗等，并彼所居国土城邑。于彼国土一切法器真实福田皆出其国，设有住者，亦生舍心，不复护念。由诸天、龙、药叉神等，及诸法器真实福田，于刹帝利旃荼罗等，并彼所居国土城邑，皆舍守护不护念已；时彼国土自军他军，竞起侵袭，更相残害，疾疫饥馑，因此复兴。彼刹帝利旃荼罗王，乃至沙门、婆罗门等旃荼罗人，一切国民皆无欢乐，先所爱乐今悉别离，朋友眷属更相瞋恨，潜谋猜贰，无慈无悲，嫉妒慳贪，众恶皆起，所谓杀生乃至邪见，无

惭无愧，食用一切宰堵波物及僧祇物，曾无悔心。彼刹帝利旃荼罗王，憎嫉忠贤，爱乐谄佞，令己官庶互相侵袭，愤恚结怨，兴诸斗争；共余邻国交阵战时，军士离心，无不退败。彼刹帝利旃荼罗王，宰官、居士、长者、沙门、婆罗门等旃荼罗人，不久便当肢体废缺，于多日夜结舌不言，受诸苦毒，痛切难忍，命终定生无间地狱。

“复次，善男子，有刹帝利旃荼罗王、宰官、居士、长者、沙门、婆罗门等旃荼罗人，随恶友行，善根微少，谄曲愚痴，怀聪明慢，于三宝所无淳净心，不见不畏后世苦果。此有一类，于声闻乘得微少信，实是愚痴，自谓聪敏，于我所说缘觉乘法，及大乘法，毁谤诽谤，不听众生受持读诵，下至一颂。复有一类，于缘觉乘得微少信，实是愚痴，自谓聪敏，于我所说声闻乘法，及大乘法，毁谤诽谤，不听众生受持读诵，下至一颂。复有一类，于大乘法得微少信，实是愚痴，自谓聪敏，于我所说声闻乘法，缘觉乘法，毁谤诽谤，不听众生受持读诵，下至一颂。如是等人，名为毁谤佛正法者，亦为违逆三世诸佛，破三世佛一切法藏，焚烧断灭，皆为灰烬，断坏一切八支圣道，挑坏无量众生法眼。若刹帝利、旃荼罗王，乃至沙门、婆罗门等，旃荼罗人，于佛所说声闻乘法、缘觉乘法及大乘法，障碍覆藏，令其隐没，乃至一颂；当知是人，名不恭敬一切法眼三宝种姓。由是因缘，令护国土一切天、龙、药叉神等，信敬三宝无动坏者，于刹帝利、旃荼罗王，乃至沙门、婆罗门等旃荼罗人，心生瞋忿；广说乃至彼刹帝利旃荼罗王，宰官、居士、长者、沙门、婆罗门等旃荼罗人，不久便当支体废缺，于多日夜结舌不言，受诸苦毒，痛切难忍，命终定生无间大狱。

“复次，善男子，有刹帝利旃荼罗王，宰官、居士、长者、沙门、婆罗门等旃荼罗人，随逐破戒恶行苾刍，广说乃至于彼国中，有诸法器真实福田，于刹帝利旃荼罗等，皆住舍心而不护念。虽居其国而依法住，常不喜乐俗间居止，亦不数数往施主家。设令暂往，而护语言；纵有语言，曾无虚诳，终不对彼在家人前，讥毁轻弄诸破戒者，于诸破戒恶行苾刍，终不轻然辄相检问，亦不现相故显其非，常近福田，远诸破戒；而彼破戒恶行苾刍，于此持戒真善行者，反生瞋恨，轻毁侵袭，于刹帝利旃荼罗王，乃至沙门、婆罗门等旃荼罗人，在家男女大小等前，种种谄曲虚妄谈论，毁谤诽谤此持戒者，令刹帝利旃荼罗王，乃至沙门、婆罗门等旃荼罗人，于我弟子少欲知足，持戒多闻，具妙辩才诸苾刍所，心生瞋恨，种种粗言，呵骂逼切，令心忧恼，身不安泰，或夺衣钵诸资身具令其匮乏，或夺所施四方僧物不听受用，或闭牢狱，枷锁拷楚，或解支节，或斩身首。

“善男子，当观如是诸刹帝利旃荼罗王，乃至沙门、婆罗门等旃荼罗人，亲近破戒恶行苾刍，造作如是种种大罪，乃至当堕无间地狱。若诸众生作五无间，或犯重戒，或近无间性罪，遮罪犹轻。如是诸刹帝利旃荼罗王，乃至沙门、婆罗门等旃荼罗人，亲近破戒越法重

罪。

“善男子，如是破戒恶行苾刍，虽作如是越法重罪，而依我法剃除须发，被服袈裟，进止威仪同诸贤圣，我尚不许国王、大臣、诸在家者，依俗正法，以鞭杖等捶拷其身，或闭牢狱，或复呵骂，或解肢节，或断其命，况依非法？国王、大臣、诸在家者，若作此事，便获大罪，决定当生无间地狱。于诸破戒恶行苾刍，犹尚不应如是谪罚，何况持戒真善行者？

“善男子，若有苾刍，于诸根本性重罪中，随犯一罪，虽名破戒恶行苾刍，而于亲教和合僧中，所得律仪犹不断绝，乃至弃舍所学尸罗，犹有白法香气随逐。国王、大臣、诸在家者，无有律仪，不应轻慢及加谪罚。如是苾刍，虽非法器，退失圣法，秽杂清众，破坏一切沙门法事，不得受用四方僧物，而于亲教和合僧中，所得律仪不弃舍故，犹胜一切在家白衣！犯性罪者尚应如是，况犯其余诸小遮罪！是故不许国王、大臣、诸在家者，轻慢谪罚。所以者何？

“善男子，乃住过去有迦奢国王，名梵授，敕旃荼罗：‘有大象王，名青莲目，六牙具足，住雪山边，汝可住彼拔取牙来。若不得者，汝等五人定无活义。’时旃荼罗为护身命，执持弓箭，披赤袈裟，诈现沙门威仪形相，往雪山边，至象王所。时彼母象，遥见人来执持弓箭，惊怖驰走，诣象王所，白言‘大天，今见有人张弓捻箭，徐行视覷来趣我等，将非我等命欲尽耶？’象王闻已，举目便见剃除须发著袈裟人，即为母象而说颂曰：

“被殒伽沙等，诸佛法幢相，
观此离诸恶，必不害众生。”

“时，彼母象以颂答曰：

“虽知被法服，而执持弓箭，
是恶旃荼罗，乐恶无悲愍。”

“时，大象王复说颂曰：

“见袈裟一相，知是慈悲本，
此必归佛者，愍念诸众生。
汝勿怀疑虑，宜应速摄心，
被此法衣人，欲渡生死海。”

“时，旃荼罗即以毒箭弯弓审射，中象王心。母象见之，举声号啕，悲哀哽噎，以颂白言：

“被此法衣人，宜应定归佛，

威仪虽寂静，而怀毒恶心。
应速蹋彼身，令其命根断，
灭此怨令尽，以射天身故。’

“时，大象王以颂答曰：

“宁速舍身命，不应生恶心，
彼虽怀诈心，犹似佛弟子。
智者非为命，而坏清净心，
为度诸有情，常习菩提行。’

“时大象王心生悲愍，徐问人曰：‘汝何所须？’彼人答曰：‘欲须汝牙。’象王欢喜，即自拔牙施旃荼罗，而说颂曰：

“我以白牙今施汝，无忿无恨无贪惜，
愿此施福当成佛，灭诸众生烦恼病。’

“善男子，当观如是过去象王，虽受无暇傍生趣身，为求阿耨多罗三藐三菩提故，而能舍弃身命无吝，恭敬尊重著袈裟人，虽彼为怨，而不加报。然未来世，有刹帝利旃荼罗王，宰官、居士、长者、沙门、婆罗门等旃荼罗人，实是愚痴，怀聪明慢，谄曲虚诈，欺诳世间，不见不畏后世苦果，于归我法而出家者，若是法器、若非法器诸弟子所，恼乱呵骂，或以鞭杖楚撻其身，或闭牢狱，乃至断命。此于一切过去、未来、现在诸佛，犯诸大罪，决定当趣无间地狱，断灭善根，焚烧相续，一切智者之所远离。彼既造作如是重罪，复怀傲慢，诳惑世间，自称我等亦求无上正等菩提，我是大乘，当得作佛。譬如有人，自挑其目，盲无所见，而欲导他登上大山，终无是处。于未来世有刹帝利旃荼罗王，宰官、居士、长者、沙门、婆罗门等旃荼罗人，亦复如是，于归我法而出家者，若是法器、若非法器诸弟子所，恼乱呵骂，或以鞭杖楚撻其身，或闭牢狱，乃至断命。此于一切过去、未来、现在诸佛，犯诸大罪，断灭善根，焚烧相续，一切智者之所远离，决定当趣无间地狱。彼既造作如是重罪，复怀傲慢，诳惑世间，自称我等亦求无上正等菩提，我是大乘，当得作佛。彼由恼乱出家人故，下贱人身尚难可得，况当能证二乘菩提？无上大乘，于其绝分！

“又善男子，过去有国，名般遮罗，王号胜军，统领彼国。时彼有一大丘圻所，名竭蓝婆，甚可怖畏，药叉、罗刹多住其中，若有入者，心惊毛竖。时有国人，罪应合死，王敕典狱缚其五处，送竭蓝婆大丘圻所，令诸恶鬼食啖其身。罪人闻已，为护命故，即剃须发，求觅袈裟，遇得一片，自系其颈。时典狱者，如王所敕，缚其五处，送丘圻中。诸人还已，至于夜分，有大罗刹母，名刀剑眼，与五千眷属

来入冢间，罪人遥见，身心惊悚。时，罗刹母见有此人被缚五处，剃除须发，片赤袈裟系其颈下，即便右绕尊重顶礼，合掌恭敬，而说颂言：

“人可自安慰，我终不害汝，
见剃发染衣，令我忆念佛。”

“时，罗刹子白其母言：

“母我为饥渴，甚逼切身心，
愿听食此人，息苦身心乐。”

“时，罗刹母便告子言：

“被殃伽沙佛，解脱幢相衣，
于此起恶心，定堕无间狱。”

“时，罗刹子与诸眷属，右绕此人尊重顶礼，合掌恭敬，而说颂曰：

“忏悔染衣人，我宁于父母，
造身语意恶，于汝终无害。”

“尔时，复有大罗刹母，名驴骡齿，亦有五千眷属围绕来入冢间。时，罗刹母亦见此人被缚五处，剃除须发，片赤袈裟系其颈下，即便右绕尊重顶礼，合掌恭敬，而说颂言：

“人于我勿怖，汝颈所系服，
是仙幢相衣，我顶礼供养。”

“时，罗刹子白其母曰：

“人血肉甘美，愿母听我食，
增长身心力，勇猛无所畏。”

“时，罗刹母便告子言：

“人天等妙乐，由恭敬出家，
故供养染衣，当获无量乐。”

“时，罗刹子与诸眷属，右绕此人尊重顶礼，合掌恭敬，而说颂曰：

“我今恭敬礼，剃发染衣人，
愿常于未来，见佛深生信。”

“尔时，复有大罗刹母名狰狞发，亦有五千眷属围绕来入冢间。
时，罗刹母亦见此人被缚五处，剃除须发，片赤袈裟系其颈下，即便
右绕尊重顶礼，合掌恭敬，而说颂言：

“大仙幢相衣，智者应赞奉，
若能修供养，必断诸有缚。”

“时，罗刹子白其母曰：

“此人身血肉，国王之所赖，
愿听我饮啖，得力承事母。”

“时，罗刹母便告子言：

“如是染衣人，非汝所应食，
于此起恶者，当成大苦器。”

“时，罗刹子与诸眷属，右绕此人尊重顶礼，合掌恭敬，而说颂
曰：

“汝是大仙种，堪为良福田，
故我修供养，愿绝诸有缚。”

“尔时，复有大罗刹母名刀剑口，亦有五千眷属围绕来入冢间。
时，罗刹母亦见此人被缚五处，剃除须发，片赤袈裟系其颈下，即便
右绕尊重顶礼，合掌恭敬，而说颂言：

“汝今被法衣，必趣涅槃乐，
故我不害汝，恐诸佛所呵。”

时，罗刹子白其母曰：

“我常吸精气，饮啖人血肉，
愿听食此人，令色力充盛。”

时，罗刹母便告子言：

“若害诸袈裟，剃除须发者，
必堕无间狱，久受大苦器。”

“时，罗刹子与诸眷属，右绕此人尊重顶礼，合掌恭敬，而说颂曰：

“我等怖地狱，故不害汝命，
当解放汝身，愿脱地狱苦。”

“时，诸罗刹母子眷属，同起慈心，解此人缚，忏悔慰喻，欢喜放还。此人清旦疾至王所，以如上事具白于王。时胜军王及诸眷属，闻之惊跃，叹未曾有。即立条制颁告国人：‘自今已后，于我国中，有佛弟子，若持戒、若破戒，下至无戒，但剃须发，被服袈裟，诸有侵凌或加害者，当以死罪而刑罚之。’由此因缘，众人慕德，渐渐归化王瞻部洲，皆共诚心归敬三宝。

“善男子，当观如是过去罗刹，虽受无暇饿鬼趣身，吸人精气，饮啖血肉，恶心炽盛，无有慈悲，而见无戒剃除须发，以片袈裟挂其颈者，即便右绕尊重顶礼，恭敬赞颂，无损害心。然未来世，有刹帝利旃荼罗王，宰官、居士、长者、沙门、婆罗门等旃荼罗人，心怀毒恶，无有慈愍，造罪过于药叉、罗刹，愚痴傲慢，断灭善根，于归我法而出家者，若是法器，若非法器，剃除须发，被服袈裟，诸弟子所，不生恭敬，恼乱呵骂，或以鞭杖楚撻其身，或闭牢狱，乃至断命。此于一切过去、未来、现在诸佛，犯诸大罪，断灭善根，焚烧相续，一切智者之所远离，决定当生无间地狱。

“又善男子，昔有国王，名超福德。有人犯过，罪应合死，王性仁慈，不欲断命。有一大臣多诸智策，前白王曰：‘愿勿为忧，终不令王得杀生罪，不付魁脔令杀此人。’时彼大臣以己智力，将犯罪人付恶醉象。时恶醉象，以鼻卷取罪人两胫，举上空中，尽其势力欲扑于地，忽见此人裳有赤色，谓是袈裟，心生净信，便徐置地，忏悔悲号，跪伏于前，以鼻拄足，深心敬重瞻仰彼人。大臣见已，驰还白王，王闻喜愕，叹未曾有。便敕国人，加敬三宝，因斯断杀，王瞻部洲。

“善男子，当观如是过去醉象，虽受无暇傍生趣身，而敬袈裟，不造恶业。然未来世，有刹帝利旃荼罗王，宰官、居士、长者、沙门、婆罗门等旃荼罗人，心怀毒恶，无有慈愍，造诸罪业，过恶醉象，愚痴傲慢，断灭善根。于归我法而出家者，若是法器，若非法器，剃除须发，被服袈裟，诸弟子所，不生恭敬，恼乱呵骂，或以鞭杖楚撻其身，或闭牢狱，乃至断命。此于一切过去、未来、现在诸佛，犯诸大罪，断灭善根，焚烧相续，一切智者之所远离，决定当生无间地狱。若刹帝利旃荼罗王，乃至沙门、婆罗门等旃荼罗人，成就如是第三恶轮，由此因缘，令护国土一切天、龙、药叉神等，信敬三宝无动坏者，于刹帝利旃荼罗王，乃至沙门、婆罗门等旃荼罗人，心生瞋忿；广说乃至彼刹帝利旃荼罗王，宰官、居士、长者、沙门、婆

罗门等旃荼罗人，不久便当肢体废缺，于多日夜，结舌不言，受诸苦毒，痛切难忍，命终定生无间地狱。

“复次，善男子，于未来世此佛土中，有刹帝利旃荼罗王，宰官、居士、长者、沙门、婆罗门等旃荼罗人，随恶友行，善根微少，广说乃至不见不畏后世苦果。见有所施四方僧物，谓诸寺舍，或寺舍物，或诸园林，或园林物，或诸庄田，或庄田物，或所摄受净人男女，或所摄受畜生种类，或所摄受衣服饮食，或所摄受床座敷具，或所摄受病缘医药，或所摄受种种资身应受用物，如是所施四方僧物，具戒富德，精进修行，学无学行乃至证得最后极果，清净苾刍所应受用；彼刹帝利旃荼罗王，乃至沙门、婆罗门等旃荼罗人，以强势力侵夺具戒清净苾刍，不听受用；回与破戒恶行苾刍，经营在家诸俗业者，令共受用，或独受用。破戒苾刍既受得已，或共受用，或独受用，或与俗人，同共受用。由是因缘，令护国土一切天、龙、药叉神等，信敬三宝无动坏者，于刹帝利旃荼罗王，乃至沙门、婆罗门等旃荼罗人，心生瞋忿；广说乃至彼刹帝利旃荼罗王，宰官、居士、长者、沙门、婆罗门等旃荼罗人，不久便当肢体废缺，于多日夜，结舌不言，受诸苦毒，痛切难忍，命终定生无间地狱。

“复次，善男子，于未来世此佛土中，有刹帝利旃荼罗王，宰官、居士、长者、沙门、婆罗门等旃荼罗人，随恶友行，善根微少，广说乃至不见不畏后世苦果。见依我法而出家者，聪睿多闻，语甚圆满，或能传通声闻乘法，或能传通独觉乘法，或能传通无上乘法，令广流布，利乐有情；彼于如是说法师所，呵骂毁辱，诽谤轻弄，欺诳逼迫，恼乱法师，障碍正法。由是因缘，令护国土一切天、龙、药叉神等，信敬三宝无动坏者，于刹帝利旃荼罗王，乃至沙门、婆罗门等旃荼罗人，心生瞋忿；广说乃至彼刹帝利旃荼罗王，宰官、居士、长者、沙门、婆罗门等旃荼罗人，不久便当肢体废缺，于多日夜，结舌不言，受诸苦毒，痛切难忍，命终定生无间地狱。

“复次，善男子，于未来世此佛土中，有刹帝利旃荼罗王，宰官、居士、长者、沙门、婆罗门等旃荼罗人，随恶友行，善根微少，广说乃至不见不畏后世苦果。见有所施四方僧物，寺舍、庄田、人畜、财宝、华树、果树、染树、荫树、香药树等，及余资身种种杂物，我诸弟子具戒富德，精进修行学无学行，乃至证得最后极果，清净苾刍所应受用；彼刹帝利旃荼罗王，乃至沙门、婆罗门等旃荼罗人，以强势力，或自逼夺，或教人夺，或为自用，或为他用。由是因缘，令护国土一切天、龙、药叉神等，信敬三宝无动坏者，于刹帝利旃荼罗王，乃至沙门、婆罗门等旃荼罗人，心生瞋忿；广说乃至彼刹帝利旃荼罗王，宰官、居士、长者、沙门、婆罗门等旃荼罗人，不久便当肢体废缺，于多日夜，结舌不言，受诸苦毒，痛切难忍，命终定生无间地狱。

“复次，善男子，于未来世此佛土中，有刹帝利旃荼罗王，宰

官、居士、长者、沙门、婆罗门等旃荼罗人，善根微少，无有信心，谄曲愚痴，怀聪明慢，言无真实，远离善友，随恶友行，于诸圣法，心怀犹豫，不见不畏后世苦果，常乐习近诸恶律仪，好行杀生，乃至邪见，而怀傲慢，诳惑世间，自称我是住律仪者。彼刹帝利旃荼罗王，乃至沙门、婆罗门等旃荼罗人，种种方便，毁灭我法，于归我法而出家者，数数瞋忿，呵骂毁辱，拷楚禁闭，割截肢节，乃至断命，我所说法不肯信受，坏宰堵波及诸寺舍，驱逼苾刍退令还俗，障碍剃发被服袈裟，种种驱使同诸仆庶。由是因缘，令护国土一切天、龙、药叉神等，信敬三宝无动坏者，于刹帝利旃荼罗王，乃至沙门、婆罗门等旃荼罗人，心生瞋忿；广说乃至彼刹帝利旃荼罗王，宰官、居士、长者、沙门、婆罗门等旃荼罗人，不久便当肢体废缺，于多日夜，结舌不言，受诸苦毒，痛切难忍，命终定生无间地狱。

“善男子，若刹帝利旃荼罗王，宰官、居士、长者、沙门、婆罗门等旃荼罗人，于上所说十种恶轮，或随成一，或具成就，先所修集一切善根，摧坏烧灭，皆为灰烬，不久便当支体废缺，于多日夜，结舌不言，受诸苦毒，痛切难忍，命终定生无间地狱。此刹帝利旃荼罗王，宰官、居士、长者、沙门、婆罗门等旃荼罗人，于当来世，下贱人身尚难可得，况当能证二乘菩提？无上大乘，于其绝分！如是恶人，大乘名字尚难得闻，况当能证无上佛果？是人究竟自损损他，一切诸佛所不能救。

“善男子，譬如有人压油为业，一一麻粒皆有虫生，以轮压之油便流出。汝当观此压麻油人，于日夜中杀几生命！假使如是压麻油人，以十具轮相续恒压，于一日夜一一轮中，所压麻油数满千斛，如是相续至满千年，汝观此人杀几生命，所获罪业宁为多不？”

地藏菩萨摩訶萨言：“甚多，世尊！甚多，大德！此人所杀无量无边，所获罪业不可称计，算数譬喻所不能及，唯佛能知，余无知者。”

佛言：“善男子，假使有人为财利故，置十淫坊，一一坊中置千淫女，一一淫女种种庄严，诳惑多人，恒为欲事，如是相续至满千年，此人获罪不可称计，算数譬喻所不能及；如前十轮压油人罪，等一淫坊所获罪业。

“又善男子，假使有人为财利故，置十酒坊，一一坊中种种严饰，方便招诱千耽酒人，饮兴欢娱，昼夜无废，如是相续至满千年，此人获罪不可称计，算数譬喻所不能及；如前所说十淫坊罪，等一酒坊所获罪业。

“又善男子，假使有人为财利故，置十屠坊，一一坊中于一日夜，杀害千生，牛、羊、驼、鹿、鸡、猪等命，如是相续至满千年，此人获罪不可称计，算数譬喻所不能及；如前所说十酒坊罪，等一屠坊所获罪业。

“如前所说十屠坊罪，等刹帝利旃荼罗王，乃至沙门、婆罗门等

旃荼罗人，于前十恶随成一轮，一日一夜所获罪业。”

尔时，世尊而说颂曰：

“十压油轮罪，等彼一淫坊，
置彼十淫坊，等一酒坊罪；
置十酒坊罪；等彼一屠坊，
置彼十屠坊，罪等王等一。”

大乘大集地藏十轮经卷第五

无依行品第三之三

尔时，地藏菩萨摩訶萨复白佛言：“大德世尊，若有真善刹帝利、真善宰官、真善居士、真善长者、真善沙门、真善婆罗门，如是等人，能自善护，亦善护他，善护后世，善护佛法出家之人。若是法器，若非法器，下至无戒，剃除须发被袈裟者，普善守护，恭敬供养。又能善护声闻乘法、缘觉乘法及大乘法，恭敬听闻，信受供养。于住大乘，具戒富德，精勤修行，乃至住果补特伽罗，能善守护助其势力，咨问听受，欢喜谈论，远离破戒恶行苾刍。于诸所施四方僧物，终不令人非法费用，勤加守护，供四方僧。于宰堵波，及僧祇物，终不自夺，不教他夺，亦不自用，不教他用。于能辩说三乘法人，恭敬供养，加护与力，不令他人诽谤毁辱；尊重安慰诸出家人，信受护持佛所说法，终不破坏诸宰堵波，亦常护持僧伽蓝舍。于剃须发、被服袈裟、出家人所，终不毁废。于十恶轮自不染习，亦常劝他离十恶轮。具学先王治国正法，绍三宝种，常令炽盛，恒乐亲近诸善知识，慈心抚育一切国人，随其所宜方便化导，令舍邪法，修行正法。如是真善刹帝利王，乃至真善婆罗门等，得几所福？灭几所罪？”

佛言：“善男子，假使有人，出现世间具大威力，于日初分，积聚七宝满赡部洲，奉施诸佛及弟子众；于日中分，亦集七宝满赡部洲，奉施诸佛及弟子众；于日后分，亦集七宝满赡部洲，奉施诸佛及弟子众；如是日日相续布施，满百千年。此人福聚，宁为多不？”

地藏菩萨摩訶萨言：“甚多，世尊！甚多，大德！此人福聚无量无边，不可称计，算数譬喻所不能及。唯佛能知，余无知者。”

佛言：“善男子，如是，如是，如汝所说。若有真善刹帝利王，乃至真善婆罗门等，于十恶轮自不染习，亦常劝他离十恶轮，所获福聚，过前福聚，无量无边，不可称计。

“又善男子，假使有人，出现世间具大威力，为四方僧营建寺宇，其量宽广等四大洲，上妙房舍、床敷、衣服、饮食、医药，资缘

充备，令诸如来、声闻、菩萨、大弟子众，止住其中，精进修行种种善品，若昼若夜无有懈怠，经百千俱胝那庾多岁，供给供养相续不绝。此人福聚，宁为多不？”

地藏菩萨摩訶萨言：“甚多，世尊！甚多，大德！此人福聚无量无边，不可称计，算数譬喻所不能及。唯佛能知，余无知者。”

佛言：“善男子，如是，如是，如汝所说。

“又善男子，假使有人，出现世间具大威力，为四方僧营建寺宇，宽广量等十四大洲，上妙房舍、床敷、衣服、饮食、医药，资缘充备，令诸如来、声闻、菩萨、大弟子众，止住其中，精进修行种种善品，若昼若夜无有懈怠，经百千俱胝那庾多岁，供给供养相续不绝。此人福聚，宁为多不？”

地藏菩萨摩訶萨言：“甚多，世尊！甚多，大德！此人福聚无量无边，不可称计，算数譬喻所不能及。唯佛能知，余无知者。”

佛言：“善男子，如是，如是，如汝所说。

“又善男子，假使有人，出现世间具大威力，为佛舍利起窣堵波，严丽高广量等三千大千世界如前所说，为四方僧造寺福聚类此所说，为佛舍利起窣堵波，所获福聚，于百分中不及其一，于千分中亦不及一，于百千分亦不及一，于俱胝分亦不及一，那庾多分、数分算分、计分喻分，乃至邬波尼杀昙分亦不及一。

“又善男子，假使有得波罗密多，具八解脱静虑等至大阿罗汉，遍满三千大千世界，如稻、麻、竹苇、甘蔗、丛林，一切皆被坚缚五处，经百千年，时有一人出现于世，具大威力，乐福德故，悉解被缚诸阿罗汉，香汤澡浴，奉施衣钵，经百千年，给上房舍、床敷、衣服、饮食、医药，种种所须如法资具，诸阿罗汉般涅槃已，供养焚烧收取舍利，以妙七宝起窣堵波安置其中，复以种种宝幢、幡盖、香华、伎乐而供养之，如前所说，为佛舍利起窣堵波，所获福聚，类此所说，解阿罗汉供养福聚，于百分中不及其一，于千分中亦不及一，于百千分亦不及一，于俱胝分亦不及一，那庾多分、数分算分、计分喻分乃至邬波尼杀昙分，亦不及一。

“善男子，若有真善刹帝利王，乃至真善婆罗门等，于十恶轮自不染习，亦常劝他离十恶轮，所获福德，过前福聚无量无边，不可称计。如生福数，灭罪亦尔。

“善男子，若有真善刹帝利王，及诸真善宰官、居士、长者、沙门、婆罗门等，于未来世后五百岁法欲灭时，能善护持我之法眼，能自善护，亦善护他，善护后世，善护我法出家弟子，若是法器，若非法器，下至无戒剃除须发被袈裟者，普善守护，恭敬供养，令无损害。又能善护三乘正法，听受供养声闻法时，于独觉乘及大乘法不生诽谤，于独觉乘及大乘人亦不憎嫉；听受供养独觉法时，于声闻乘及大乘法不生诽谤，于声闻乘及大乘人亦不憎嫉；听受供养大乘法时，于声闻乘、独觉乘法不生诽谤，于声闻乘、独觉乘人亦不憎嫉；于声

闻乘、独觉乘法，不求趣证，唯求趣证大乘法。于住大乘具戒富德，精勤修行，乃至住果补特伽罗，多数亲近，承事供养，深心敬重，请问听受，远离破戒恶行苾刍。于诸所施四方僧物，终不令人非法费用，勤加守护，供四方僧。于窣堵波及僧祇物，终不自夺，不教他夺，亦不自用，不教他用。于能辩说三乘法者，恭敬供养，加护与力，不令他人诽谤毁辱。尊重安慰诸出家人，信受护持如来圣教，终不破坏诸窣堵波，亦常护持四方僧寺。于我出家诸弟子所，终不毁废还俗策使。于十恶轮自不染习，亦常劝他离十恶轮，具学先王治国正法，十善业道摄化世间。常当亲近诸善知识，绍三宝种，常令炽盛，善护法眼，令不灭没。如是真善刹帝利王，乃至真善婆罗门等，由具如是诸功德故，名不虚受国人俸禄，一切天、龙、药叉鬼神，乃至羯吒布怛那等，皆生欢喜，慈悲拥护一切法器真实福田，亦生欢喜慈悲护念。由是因缘，所居国土及诸有情，展转炽盛安隐丰乐；邻国兵戈不能侵害，皆敬慕德，自来归附。由此展转劝修善业，枯竭恶趣，增长天人，守护身命，令得长远，自灭烦恼，亦令他灭，住持菩提道、六波罗蜜多，破坏一切众邪恶道。于生死海，不久沉沦，常离恶友，常近善友，生生常遇诸佛菩萨，恭敬承事，曾无暂废。不久皆当随心所乐，各各安住于佛国土，证得无上正等菩提。”

尔时，众中一切天帝及诸眷属，乃至一切毕舍遮帝及诸眷属，从座而起，顶礼佛足，合掌恭敬，而白佛言：“大德世尊，于未来世后五百岁，于此佛土法欲灭时，若有真善刹帝利王，乃至真善婆罗门等，于十恶轮自能远离，亦能劝他令其远离，善护自他，善护后世，护持正法，绍三宝种，皆令炽盛，无有断绝，以要言之，如佛所说。如是等人，于三乘法，恭敬听受，终不隐藏；于三乘人，护持供养，不令烦恼；于三宝物，勤加守护，不令侵损；我等眷属，于此真善刹帝利王，乃至真善婆罗门等，勤加拥护，令其十法，皆得增长。何等为十？一者、增长寿命，二者、增长无难，三者、增长无病，四者、增长眷属，五者、增长财宝，六者、增长资具，七者、增长自在，八者、增长名称，九者、增长善友，十者、增长智慧。大德世尊，若彼真善刹帝利王，乃至真善婆罗门等，于十恶轮自能远离，亦能劝他令其远离，具前所说诸功德者，我等拥护，定当得此十法增长。

“复次，世尊，若有真善刹帝利王，乃至真善婆罗门等，成就如前所说功德，我等眷属，勤加拥护，令于十法，皆得远离。何等为十？一者、远离一切怨家寇敌，二者、远离一切非爱色声香味触境，三者、远离一切障病疾病，四者、远离一切邪执恶见，五者、远离一切邪妄归依，六者、远离一切邪恶灾怪，七者、远离一切邪恶事业，八者、远离一切邪恶知识，九者、远离一切居家淤泥，十者、远离一切非时夭丧。大德世尊，若彼真善刹帝利王，乃至真善婆罗门等，成就如前所说诸功德者，我等拥护，定当得此十法远离。

“复次，世尊，若有真善刹帝利王，具修如前所说功德令圆满者，我等眷属，勤加拥护，令此帝王并诸眷属及其国土一切人民，令于十法，皆得远离。何等为十？一者、远离一切他国怨敌，二者、远离一切自国怨敌，三者、远离一切凶恶鬼神，四者、远离一切愆阳亢旱，五者、远离一切伏阴滞雨，六者、远离一切非时寒热、烈风、暴雨、霜雹灾害，七者、远离一切恶星变怪，八者、远离一切饥谨荒俭，九者、远离一切非时病死，十者、远离一切邪执恶见。大德世尊，若彼真善刹帝利王，具修如前所说功德令圆满者，我等眷属，勤加拥护，令此帝王并诸眷属及其国土一切人民，定当得此十法远离。”

尔时，世尊赞诸天帝及其眷属，及至一切毕舍遮帝及眷属，言：“善哉！善哉！汝等乃能发此誓愿，此事皆是汝等应作。由是因缘，当令汝等长夜安乐。”

尔时，天藏大梵复白佛言：“世尊，唯愿听我为未来世此佛土中，一切真善刹帝利王，说能护国不退轮心大陀罗尼明咒章句。由此护国不退轮心大陀罗尼明咒章句威神力故，令未来世此佛土中，一切真善刹帝利王，不为一切怨敌恶友之所摧伏；能令一切怨敌恶友，自然退散；能善护持身语意业，为诸智者常所称赞，离诸恶法；常行善法，常离一切邪见邪归；常于大乘，精进修行勇猛坚固；常能成就无量无数所化有情，智不依他自然善巧，具能修行六到彼岸珍宝伏藏，远离一切忿恚嫉等烦恼缠垢；常为一切人非人等，恭敬护念；诸有所为，心无忘失，不舍有情，乐四摄事，常不远离法器福田。”

佛言：“天藏，吾今恣汝，为未来世此佛土中，一切真善刹帝利王，说能护国不退轮心大陀罗尼明咒章句。由此护国不退轮心大陀罗尼明咒章句威神力故，令未来世此佛土中，一切真善刹帝利王，不为一切怨敌恶友之所摧伏，广说乃至常不远离一切诸佛及佛弟子。”

尔时，天藏大梵即说护国不退轮心大陀罗尼明咒章句：

“怛经他牟尼冒隶(一) 牟尼揭腊筏(二) 牟尼纥梨达曳(三) 牟尼嚧诃毗折(常列切)隶(四) 牟尼曷栗制(五) 牟尼笈谜(六) 束訖罗博差(初戒切)(七) 钵逻奢博差(初戒切)(八) 蜜罗博差(九) 骚刺婆訖栗帝(十) 妬刺拏訖栗折(章列切)隶(十一) 钵怛逻叉訖栗帝(十二) 具具拏蜜隶(十三) 呬(乌合切)筏叉萨隶(十四) 遏怒诃祇[口+履]筏(十五) 牟尼钵塔筏(十六) 莎诃(十七)”

天藏大梵说是咒已，复白佛言：“唯愿世尊及诸大众，于我所说大陀罗尼，皆生随喜。”

世尊告曰：“善哉！善哉！”

一切大众亦作是言：“善哉！善哉！”

尔时，世尊复告尊者大目乾连，及告弥勒菩萨摩訶萨曰：“善男子，汝等皆应受持如是天藏大梵所说，护国不退轮心大陀罗尼明咒章句，传授未来此佛土中，一切真善刹帝利王，令自受持，及令流布。由是因缘，彼诸真善刹帝利王，并诸眷属，及国人民，一切皆得利益安乐，常转法轮；名称高远，威德炽盛，摧灭邪见，建立正见，守护法眼，绍三宝种，皆令炽盛，无有断绝；成熟无量无边有情，于大乘中坚固净信，久住圆满，能具修六波罗蜜多，断一切障，速到究竟。”

尔时，世尊重显此义，而说颂曰：

“时天藏大梵，请问两足尊，
利根等有情，乐修定诵福，
聪慧王成法，为升进沉沦，
所修三事中，谁除惑不退？
世尊告彼言，若犯无依行，
虽觉慧猛利，而趣无间狱。
非真聪慧故，乐行十恶轮，
断灭诸善根，速趣于地狱。
定能断烦恼，非听诵福业，
故欲求涅槃，常当修静虑。
有慧勤精进，护持我正法，
由敬信袈裟，能渡烦恼海。
乐处空闲林，远造无同类，
敬持戒修定，能渡诸有海。
普信敬三乘，兴隆我正法，
供养染衣者，当成功德海。
能伏难调心，不举苾刍罪，
修知足圣种，当成两足尊。
远离恶苾刍，亲近圣行处，
不食用僧物，速证大菩提。
三界中安乐，皆由三宝生，
故求安乐人，常供养三宝，
旃荼罗王等，朋党恶苾刍，
于三宝起过，速堕无间狱。
十压油轮罪，等彼一淫坊；
置彼十淫坊，等一酒坊罪；
置十酒坊罪，等彼一屠坊；
置彼十屠坊，罪等王等一。
真善国王等，兴隆我正法，
普供养三乘，当成功德海。”

七宝满赡部，奉施佛及僧，
彼所获福聚，不如护佛法。
为佛僧造寺，量等十四洲，
彼所获福聚，不如护佛法。
造佛窣堵波，量等三千界，
彼所获福聚，不如护佛法。
解阿罗汉缚，种种修供养，
不障我正法，其福胜于彼。
千俱胝劫中，智者勤修定，
所生胜觉慧，不如护我法。
真善国王等，远离十恶轮，
护持我正法，及著袈裟者。
不毁谤我说，三乘法及人，
普听闻供养，护持说法者。
不损三宝物，不障著袈裟，
当敬器非器，福胜无伦匹。
如五日并现，大海皆枯竭，
如是护我法，能枯竭烦恼。
如风灾起时，诸山皆散灭，
如是护我法，能除灭烦恼。
如水灾起时，大地皆漂坏，
如是护我法，能坏非爱果。
如如意宝珠，随所愿皆满，
如是三乘法，能满众生愿。
如遇得贤瓶，除贫获富乐，
如是遇佛法，灭惑证菩提。
如十五夜月，明照满虚空，
如是护法人，智慧周法界。
如虚空平等，无物亦无相，
如是护法人，知诸法一味。
如日放光明，恒除世间闇，
如是护法者，常普照世间。”

有依行品第四之一

尔时，金刚藏菩萨摩訶萨于大众中，从座而起，顶礼佛足，偏袒一肩，右膝著地，合掌恭敬，以颂问曰：

“昔言破戒失净德，非贤圣器非我子，

诸沙门法弃如炬，不应居我清众中。
三垢所污失灭道，彼不堪消胜供养，
于施四方僧众物，少分我亦不听受。
四根本罪随犯一，清众所弃如海尸，
云何今说恶苾刍，应忍应悲遮谪罚，
复劝应勤供养彼，悲愍勿生微恶心，
恭敬听受所说法，当获福慧大悲者？
六通救世余经说，汝等皆当信大乘，
正直微妙菩提道，应舍二乘解脱路。
云何今复说三乘，普劝听持修供养，
根力觉道沙门果，此经中有余处无？
八支圣道无等伦，三乘皆同行此道，
欲求解脱勤精进，各随所愿证菩提。
有情中尊当照察，会今昔教使无违，
令诸天人菩萨众，解悟心欢证真实。
闻说大乘谁有益？闻说大乘谁有损？
十种解脱声闻乘，闻说谁损谁有益？
何人闻法转升进？何人闻法翻退没？
云何厌患诸有为，能速枯竭于老死？
昼夜勤修诸善者，依何妙理御何乘，
能渡深广四瀑流？救世皆当为宣说。”

尔时，佛告金刚藏菩萨摩訶萨言：“善哉！善哉！善男子，汝今为欲利益安乐无量有情，为诸天、人、阿素洛等，作大义利，请问如来如是深义。汝应谛听，善思念之，吾当为汝分别解说。”

金刚藏菩萨言：“唯然世尊，愿乐欲闻。”

佛言：“善男子，有十种补特伽罗，轮回生死，难得人身。何等为十补特伽罗？一者、不种善根，二者、未修福业，三者、杂染相续，四者、随恶友行，五者、不见不畏后世苦果，六者、猛利贪欲，七者、猛利瞋恚，八者、猛利愚痴，九者、其心迷乱，十者、守恶邪见。如是十种无依行因，令诸众生犯根本罪，毁犯尸罗，堕诸恶趣。何等名为十无依行？谓我法中而出家者，有加行坏，意乐不坏；有意乐坏，加行不坏；有加行、意乐俱坏；有戒坏、见不坏；有见坏、戒不坏；有戒、见俱坏；有于加行、意乐、戒、见，虽皆不坏，而但依止恶友力行，作无依行；有虽依止善友力行，而复愚钝犹如哑羊，于诸事业都不分别，闻善友说善不善法，不能领受，不能记持，不能解了善不善义，由是因缘，作无依行；有于种种财宝众具常无厌足，追求因缘，其心迷乱，作无依行；有为众病之所逼恼，便求种种祠祀咒术，由是因缘，作无依行。如是十种无依行因，令诸众生犯根本罪，于现法中非贤圣器，毁犯尸罗，堕诸恶趣。

“善男子，若有补特伽罗，加行坏、意乐不坏，随遇一种无依行因，犯根本罪，便深怖惧，惭愧舍弃，而不数数作诸恶行，如来为益彼故，说有污道沙门。所以者何？彼作如是重恶业已，即便发露，不敢覆藏，惭愧忏悔。彼由如是惭愧忏悔，罪得除灭，永断相续，不复更作。虽于一切沙门法事皆应拔出，一切沙门所有资具不听受用，而由彼人于三乘中成法器故，如来慈悲，或为彼说声闻乘法，或为彼说缘觉乘法，或为彼说无上乘法；彼有是处转于第二、第三生中，发正愿力，遇善友力，一切所作诸恶业障皆悉消灭，或有证得声闻乘果，或有证得缘觉乘果，而般涅槃，或有悟入广大甚深无上乘理。如是戒坏、见不坏者，应知亦尔。

“若有补特伽罗，意乐坏，加行不坏，如来为益彼故，说求四梵住法，彼是声闻乘器，或是缘觉乘器。

“若有补特伽罗，加行、意乐俱坏，彼于诸乘皆非法器，如来为益彼故，赞说布施。

“若有补特伽罗，见坏、戒不坏，如来为益彼故，说缘起法令舍恶见，于现身中入声闻法，或缘觉法，或于余身方能悟入。

“若有补特伽罗，戒、见俱坏，彼于圣法亦不成器，如来为益彼故，赞说布施。

“若有补特伽罗，加行、意乐、戒、见不坏，而但依止恶友力行，如来为益彼故，赞说十善业道。

“若有补特伽罗，虽复依止善友力行，而复愚钝犹如哑羊，不能领受善不善法，如来为益彼故，赞说习诵。

“若为种种贪病所逼，有为种种见趣迷惑，如来为益如是等故，求解脱者，为其开示能出生死，趣声闻乘四圣谛法；断见论者，为其赞说诸缘起法；常见论者，为说三界诸有诸趣，死此生彼如陶家轮，往来无绝无常等法。

“善男子，如来无有所说名字，言说音声空无果者，无不皆为成熟有情。是故一切毁谤如来所说正法，坏诸有情正法眼罪，过诸无间，似无间等无量重罪。若有于我为欲利乐一切有情所说正法，谓依声闻乘所说正法，或依缘觉乘所说正法，或依大乘所说正法，诽谤遮止，障蔽隐没，下至一颂，当知是名谤正法者，亦名毁灭八圣道者，亦名破坏一切有情正法眼者。如是之人，既自习行大无利行，亦令一切有情习行大无利行。此人依止无惭愧僧，如是毁谤如来正法。

“复次，善男子，有四种僧，何等为四？一者、胜义僧，二者、世俗僧，三者、哑羊僧，四者、无惭愧僧。云何名胜义僧？谓佛世尊，若诸菩萨摩訶萨众，其德尊高，于一切法得自在者，若独胜觉，若阿罗汉，若不还，若一来，若预流，如是七种补特伽罗，胜义僧摄。若诸有情，带在家相，不剃须发，不服袈裟，虽不得受一切出家别解脱戒，一切羯磨、布萨、自恣悉皆遮遣，而有圣法得圣果故，胜义僧摄。是名胜义僧。

“云何名世俗僧？谓剃须发，被服袈裟，成就出家别解脱戒，是名世俗僧。

“云何名哑羊僧？谓不了知根本等罪，犯与不犯；不知轻重，毁犯种种小随小罪；不知发露忏悔所犯，蠢愚鲁钝，于微小罪，不见不畏；不依聪明善士而住；不时时间往诣多闻聪明者所，亲近承事；亦不数数恭敬请问：‘云何为善？云何不善？云何有罪？云何无罪？修何为妙？作何为恶？’如是一切补特伽罗，哑羊僧摄。是名哑羊僧。

“云何名无惭愧僧？谓若有情为活命故，皈依我法而求出家，得出家已，于所受特别解脱戒，一切毁犯无惭无愧，不见不畏后世苦果，内怀腐败如秽蜗螺，贝音狗行，常好虚言曾无一实，慳贪、嫉妒、愚痴、憍慢，离三胜业，贪著利养，恭敬名誉，耽湎六尘，好乐淫泆，爱欲色声香味触境。如是一切补特伽罗，无惭僧摄，毁谤正法。是名无惭愧僧。

“善男子，胜义僧者，于中或有，亦是胜道沙门所摄。言胜道者，谓若能依八支圣道，自度一切烦恼驶流，亦令他度。此复云何？谓佛世尊，及独胜觉，诸阿罗汉，如是三种补特伽罗，已离一切有支眷属，故名胜道。复有菩萨摩訶萨众，不假他缘，于一切法智见无障，摄受利乐一切有情，亦名胜道沙门所摄。其胜义僧，及世俗僧，于中或有，亦是示道沙门所摄。若有成就别解脱戒，真善异生，乃至具足世间正见，彼由记说变现力故，能广为他宣说开示诸圣道法，当知如是补特伽罗，名最下劣示道沙门。证预流果补特伽罗，是名第二。证一来果补特伽罗，是名第三。证不还果补特伽罗，是名第四。复有菩萨摩訶萨众，是名第五，谓住初地至第十地，乃至安住最后有身，此皆示道沙门所摄。若有成就别解脱戒，轨则所行，清净具足，此皆命道沙门所摄。以道活命，故名命道。复有菩萨摩訶萨众，为欲摄受利益安乐一切有情，具足修行六到彼岸，亦名命道。如是胜道、示道、命道三种沙门，名为世间真实福田。所余沙门，名为污道，虽非真实，亦得堕在福田数中。

“若有依止无惭愧僧补特伽罗，于我正法毗奈耶中名为死尸，于清众海应当摈弃，非法器故。我于彼人，不称大师；彼人于我，亦非弟子。有无惭僧，不成法器，称我为师；于我舍利及我形像，深生敬信；于我法僧圣所爱戒，亦深敬信；既不自执诸恶邪见，亦不令他执恶邪见；能广为他宣说我法，称扬赞叹，不生毁谤；常发正愿，随所犯罪，数数厌舍；发露忏悔，众多业障，皆能除灭。当知如是补特伽罗，信敬三宝、圣戒力故，胜九十五诸外道众多百千倍，非速能入般涅槃城，转轮圣王尚不能及，况余杂类一切有情？以是义故，如来观察一切有情，诸业法受差别相已，作如是说：‘于我法中，剃除须发、被袈裟者，我终不听刹帝利等毁辱谪罚。若有毁辱谪罚一切出家之人，所获罪报，如前广说。又依我法，舍俗出家，剃除须发，被赤袈裟，即为一切过去、未来、现在诸佛慈悲护念。威仪形相，所服袈

袈，亦为过去、未来、现在诸佛世尊慈悲守护。是故轻毁剃除须发、被赤袈裟、出家人者，即是轻毁一切过去未来现在诸佛世尊。由是因缘，诸有智慧厌怖众苦，欣求人天涅槃乐者，不应轻毁舍俗出家、剃除须发、被袈裟者。’

“有无惭憎，毁破禁戒，不成三乘贤圣法器，既自坚执诸恶邪见，亦能令他执恶邪见。谓为真善刹帝利、真善婆罗门、真善宰官、真善居士、真善沙门、真善长者、真善筏舍、真善戍达罗，若男若女，说诸世间无父无母，乃无有善业恶业所得果报，无有能得圣道果者，一切诸法不从因生。或有执言，色界是常，非变坏法。或有执言，无色界常，非变坏法。或有执言，外道所计诸苦行法，得究竟净。或有执言，唯声闻乘得究竟净，非独觉乘，亦非大乘；于声闻乘，信敬称赞，宣说开示，于独觉乘及于大乘，诽谤轻毁，障蔽隐没，不令流布。或有执言，唯独觉乘得究竟净，非声闻乘，亦非大乘；于独觉乘，信敬称赞，宣说开示，于声闻乘及于大乘，诽谤轻毁，障蔽隐没，不令流布。或有执言，唯有大乘得究竟净，非声闻乘，非独觉乘；于大乘法，既自生信、教他生信，既自恭敬、教他恭敬，既自称赞、教他称赞，既自书写、教他书写，既自读诵、教他读诵，既自听受、教他听受，既自思惟、教他思惟，于他有情，若是法器，若非法器，皆为广说，开示解释，微细甚深大乘法义；于声闻乘及独觉乘，诽谤轻毁障蔽隐没，不令流布，自不生信、障他生信，自不恭敬、障他恭敬，自不称赞、障他称赞，自不书写、障他书写，自不读诵听受思惟、障他读诵听受思惟，不乐广说开示解释三乘法义。或有执言，唯修布施得究竟净，非戒、非忍乃至非慧。或有执言，唯修禁戒得究竟净，非施、非忍乃至非慧。或有执言，唯修安忍得究竟净，非施、非戒乃至非慧。或有执言，唯修精进得究竟净，非施、非戒乃至非慧。或有执言，唯修静虑得究竟净，非施、非戒乃至非慧。或有执言，唯修般若得究竟净，非施、非戒乃至非定。或有执言，唯修种种世间所习诸技艺智得究竟净。或有执言，唯修种种投岩赴火自饿等行得究竟净。

“善男子，如是破戒恶行苾刍，非法器者，种种诱惑真善法器诸有情等，令执恶见；彼由颠倒诸恶见故，破坏真善刹帝利王，乃至真善戍达罗等，若男若女，所有净信戒闻舍慧，转刹帝利成旃荼罗，乃至筏舍戍达罗等成旃荼罗。此非法器破戒苾刍，并刹帝利旃荼罗等，师及弟子，俱断善根，乃至当堕无间地狱。

“善男子，如人死尸，膨胀烂臭，诸来见者，皆为臭熏，随所触近烂臭死尸，或与交玩，随被臭秽之所熏染；如是真善刹帝利王，乃至真善戍达罗等，若男若女，随所亲近破戒恶行非法器僧，或与交游，或共住止，或同事业，随被恶见臭秽熏染。如是，如是，令彼真善刹帝利王，乃至真善戍达罗等，若男若女，退失净信戒闻舍慧，成旃荼罗，师及弟子，俱断善根，乃至当堕无间地狱。

大乘大集地藏十轮经卷第六

有依行品第四之二

“善男子，汝观如是刹帝利等无量有情，亲近如是破戒恶行非法器僧，退失一切所有善法，乃至当堕无间地狱。是故欲得上妙生天涅槃乐者，皆应亲近承事供养胜道沙门，咨禀听闻三乘要法，或求示道、命道沙门。若无如是三道沙门，当于污道沙门中求。虽复戒坏，而有正见，具足意乐及加行者，应往亲近承事供养、咨禀听闻三乘要法，不应亲近承事供养加行、意乐及见坏者。彼虽戒坏，而无邪见，意乐、加行、见具足故，应诣其所，咨禀听闻声闻乘法、独觉乘法及大乘法，不应轻毁。于三乘中，随意所乐，发愿精进随学一乘，于所余乘不应轻毁。若于三乘随轻毁一，下至一颂，不应亲近，或与交游，或共住止，或同事业。若有亲近，或与交游，或共住止，或同事业，俱定当堕无间地狱。

“善男子，是故若欲于三乘中，随依一乘求出生死，欣乐安乐厌危苦者，应于如来所说正法，或依声闻乘所说正法，或依独觉乘所说正法，或依大乘所说正法，普深信敬，勿生谤毁、障蔽、隐没下至一颂，常应恭敬、读诵、听闻，应发坚固正愿求证。谤毁三乘随一法者，不应共住下至一宿，不应亲近咨禀听法。若诸有情，随于三乘毁谤一乘，或复亲近谤三乘人咨禀听受，由此因缘，皆定当堕无间地狱，受大苦恼，难有出期。何以故？

“善男子，我于过去修菩萨行，精勤求证无上智时，或为求请依声闻乘，所说正法下至一颂，乃至舍弃自身手足、血肉皮骨、头目髓脑；或为求请依独觉乘，所说正法下至一颂，乃至舍弃自身手足、血肉皮骨、头目髓脑；或为求请依于大乘，所说正法下至一颂，乃至舍弃自身手足、血肉皮骨、头目髓脑。如是勤苦，于三乘中下至求得一颂法已，深生欢喜，恭敬受持，如说修行，时无暂废，经无量劫修行一切难行、苦行，乃证究竟无上智果；复为利益安乐有情，宣说开示三乘法。以是义故，不应谤毁、障蔽、隐没下至一颂，常应恭敬、读诵、听闻，应发坚固正愿求证。

“善男子，如是三乘出要正法，一切过去、未来、现在过殑伽沙诸佛同说，大威神力共所护持，为欲拔济一切有情生死大苦，为欲绍隆三宝种姓令不断绝。是故于此三乘法，应普信敬，勿生谤毁、障蔽、隐没。若有谤毁、障蔽、隐没三乘法，下至一颂，决定当堕无间地狱。

“复次，善男子，于未来世此佛土中，有刹帝利旃荼罗、婆罗门旃荼罗、宰官旃荼罗、居士旃荼罗、沙门旃荼罗、长者旃荼罗、苾刍旃荼罗、戍达罗旃荼罗，若男若女，谄曲愚痴，怀聪明慢，其性凶悖、燥厉、粗犷，不见不畏后世苦果，好行杀生，乃至邪见，嫉妒恚

贪，憎背善友，亲近恶友，非是三宝贤圣法器。或少听习声闻乘法，便于诸佛共所护持独觉乘法、无上乘法，诽谤毁咎，障蔽隐没，不令流布。或少听习独觉乘法，便于诸佛共所护持声闻乘法、无上乘法，诽谤毁咎，障蔽隐没，不令流布。或少听习无上乘法，便于诸佛共所护持声闻乘法、独觉乘法，诽谤毁咎，障蔽隐没，不令流布；为求名利，唱如是言：‘我是大乘，是大乘党，唯乐听习受持大乘，不乐声闻、独觉乘法，不乐亲近学二乘人。’如是诈称大乘人等，由自愚痴憍慢势力，如是谤毁、障蔽、隐没三乘法，不令流布；憎嫉修学三乘法人，诽谤毁辱，令无威势。

“善男子，一切过去、未来、现在诸佛世尊，及诸菩萨摩訶萨，为欲利乐一切有情，以大悲力护持二事：一者、为欲绍隆三宝种姓常令不绝，舍俗出家，剃除须发，被服袈裟；二者、三乘出要四圣谛等相应正法。如是二事，唯佛世尊及大菩萨能善护持，非诸声闻、独胜觉等，亦非百千那庾多数大梵天王及天帝释王、四大洲转轮王等所能护持。于未来世此佛土中，有刹帝利旃荼罗王，见依我法而得出家，剃除须发、被袈裟者，方便伺求所犯过失，以种种缘呵骂毁辱，或加鞭杖，或闭牢狱，或夺资具，或脱袈裟废令还俗使作种种居家事业，或横驱役，或滥摈遣，或断饮食，或害身命。彼刹帝利旃荼罗王，以己愚痴憍慢势力，毁辱谪罚诸佛菩萨以大悲力共所护持我诸弟子，诽谤毁灭诸佛菩萨以大悲力共所护持我甚深法，于其三世诸佛菩萨共所护持三乘法，障蔽隐没，不令流布。有刹帝利旃荼罗王，乃至筏舍、戍达罗等旃荼罗人，若男若女，愚痴憍慢，自号大乘，彼人尚非声闻、独觉二乘法器，况是无上大乘法器？为求利养、恭敬、名誉，诳惑世间愚痴杂类，自言‘我等是大乘人’，谤毁如来二乘法。如是人等，愚痴、谄曲、憍慢、嫉妒、悭贪因缘，毁我法眼，令速隐灭。彼于三世一切诸佛，犯大过罪；亦于三世一切菩萨，犯大过罪；又于三世一切声闻，犯大过罪；不久便当肢体废缺，遭遇种种重恶疾病。彼刹帝利旃荼罗王，乃至筏舍、戍达罗等旃荼罗人，若男若女，由造恶业起倒见故，损断一切所有善根。虽复有时多修施福，于未来世，当生鬼趣、傍生趣中，受富乐果；而彼身中，尚不能起色、无色界下劣善根，况当能种声闻、独觉及无上乘无功用起一切智智善根种子？又令其舌为病所害，于多日夜结舌不言，受诸苦毒痛切难忍，命终定当生于无间大地狱中。是故如来慈悲，怜愍一切真善刹帝利王，乃至真善戍达罗等，若男若女，令得长夜利益安乐，殷勤恳切作如是言：‘汝等应当于归我法，剃除须发、被片袈裟出家人所，慎勿恼乱讥呵谪罚。于我所说三乘法教，慎勿谤毁、障蔽、隐没。’若违我言而故作者，所获罪报如前广说。所以者何？此归我法，剃除须发、被赤袈裟出家形相，乃是过去、未来、现在诸佛菩萨，大悲神力之所护持。此剃须发、被赤袈裟出家威仪，是诸贤圣解脱幢相；亦是一切声闻乘人，受用解脱法味幢相；亦是一切独觉乘人，受用解脱法味幢相；亦

是一切大乘之人，受用解脱法味幢相。如来所说三乘法，亦是三世诸佛菩萨，大悲神力之所护持，是诸贤圣解脱依止；亦是一切声闻乘人，受用解脱法味依止；亦是一切独觉乘人，受用解脱法味依止；亦是一切大乘之人，受用解脱法味依止。

“善男子，以是义故，求解脱者应当亲近，恭敬供养诸归我法，剃除须发、被赤袈裟出家之人。应先信敬声闻乘法，若自听受、教他听受，若自读诵、教他读诵，若自书写、教他书写，若自施与、教他施与，若自宣说、教他宣说，思惟修行，广令流布。如是信敬独觉乘法，若自听受、教他听受，若自读诵、教他读诵，若自书写、教他书写，若自施与、教他施与，若自宣说、教他宣说，思惟修行，广令流布。如是信敬于大乘法，若自听受、教他听受，若自读诵、教他读诵，若自书写、教他书写，若自施与、教他施与，若自宣说、教他宣说，思惟修行，广令流布。若非器者，不应自听，勿教他听，乃至广说。又应远离一切恶法，应舍恶友，应亲善友，应勤修习六到彼岸，应数忏悔一切恶业，应随所宜勤发正愿。若能如是，斯有是处，现身得成声闻乘器，或独觉乘种子不退，或复大乘种子不退。是故三乘皆应修学，不应憍傲妄号大乘，谤毁声闻、独觉乘法。我先唯为大乘法器坚修行者说如是言：‘唯修大乘，能得究竟。’是故今昔说不相违。”

尔时，世尊重显此义，而说颂曰：

“对诸大众前，金刚藏问我：

云何劝供养，破戒恶苾刍，
失杜多功德，痴恶见所持，
非法器污道，而不听谏罚？
复说从彼闻，三乘微妙法，
真解脱良药，趣寂静涅槃？
何故余经言，一大乘解脱，
遮学二乘法，今复说三乘？
哀愍诸有情，令舍邪恶业，
得利益安乐，愿为说除疑。
为益刹帝利，乃至戍达罗，
不听恼苾刍，恐彼染大罪。
剃发被袈裟，诸佛法幢相，
诸佛等护持，解脱道之眼。
虽破诸律仪，非永遮解脱，
能舍诸恶见，当速趣涅槃。
如腐败良药，犹能疗众病，
如是破律仪，亦能灭他苦。
不听彼苾刍，在布萨羯磨，
许为他说法，俱获福无疑。

若归敬三宝，称我为大师，
能弃舍众恶，胜诸外道众。
如堕罗刹渚，商众悉惊惶，
各执兽一毛，渡海得免难；
如是破戒者，离诸恶邪见，
由一信为因，脱烦恼罗刹。
由护解脱相，诸佛等护持，
不恼破戒僧，能离诸重恶。
诸乐多福人，欣求真解脱，
等护器非器，证解脱无难。
痴慢号大乘，彼无有智力，
尚迷二乘法，况能解大乘？
譬如阙坏眼，不能见众色，
如是阙坏信，不能解大乘。
无力饮池河，讵能吞大海？
不习二乘法，何能学大乘？
先信二乘法，方能信大乘，
无信诵大乘，空言无所益。
内真怀断见，妄自号大乘，
不护三业罪，坏乱我正法，
彼人命终后，定堕无间狱。
故应观机说，勿为非器者，
憍傲无慈悲，暴恶志下劣。
智者应当知，是坏断见者，
非声闻缘觉，亦非大乘器，
谄毁谤诸佛，必堕无间狱。
持戒乐喧闹，慳法畏苦恶，
智者应当了，是名声闻乘。
乐施观生灭，常欣独静处，
智者应当了，是名独觉乘。
具足诸善根，守护慈悲本，
常乐摄利物，是名为大乘。
舍身命护戒，不恼害众生，
精进求空法，应知是大乘。
心堪忍诸法，善言无秘吝，
于法常欣乐，应知是大乘。
法器非法器，利乐心平等，
不染诸世法，应知是大乘。
是故有智者，普敬说三乘，
不恼我僧徒，速成无上觉。

“复次，善男子，若有真善刹帝利、真善婆罗门、真善宰官、真善居士、真善长者、真善沙门、真善筏舍、真善戍达罗，若男若女，成就十种有依行轮，于现身中，速能种植声闻乘种，令不退失；或于现身，成声闻乘诸圣法器，非独觉乘、大乘圣器。何等为十？一者、具足净信，信有一切善恶业果；二者、具足惭愧，远离一切恶友恶见；三者、安住律仪，远离杀生乃至饮酒；四者、安住慈心，远离一切瞋恚忿恼；五者、安住悲心，救拔一切羸弱有情；六者、安住喜心，离远一切语四恶业；七者、安住舍心，远离一切悭贪嫉妒；八者、具正归依，远离一切妄执吉凶，终不归依邪神外道；九者、具足精进，坚固勇猛修诸善法；十者、常乐寂静，思求法义，欢悦无倦。

“善男子，若有真善刹帝利王，乃至真善戍达罗等，若男若女，成此十种有依行轮，于现身中，速能种植声闻乘种，令不退失；或于现身，证声闻乘所有圣法，成声闻乘诸圣法器；非证独觉大乘圣法，非成独觉大乘圣器，应知此中独觉大乘，皆如是说。善男子，如是十种有依行轮，一切声闻、独觉、菩萨、诸佛如来，皆同共有。

“善男子，复有十种有依行轮，不共声闻，唯与独觉、菩萨、如来皆同共有。若有真善刹帝利王，乃至真善戍达罗等，若男若女，成此十种有依行轮，于现身中，速能种植独觉乘种，令不退失；或于现身，证独觉乘所有圣法，成独觉乘诸圣法器。何等为十？一者、修行清净身语意业；二者、具足惭愧，厌患自身；三者、于五取蕴深生怖畏；四者、见生死河极为难渡；五者、常乐寂静，离诸愤闹；六者、乐阿练若，不讥他失；七者、守护诸根，心常寂定；八者、善观缘起，审察因果；九者、常乐勤修等持静虑；十者、于集起法能善除灭。

“善男子，若有真善刹帝利王，乃至真善戍达罗等，若男若女，成此十种有依行轮，于现身中，速能种植独觉乘种，令不退失；或于现身，证独觉乘所有圣法，成独觉乘诸圣法器。

“善男子，是名一切声闻、独觉有依行轮。一切声闻及诸独觉，依止此轮，速能超渡三有大海，速能趣入般涅槃城。

“善男子，有依行轮，是何句义？言有依者，名有执取、有所依、有所摄受、有所系属；行谓蕴行、界行、处行、有系属行；轮谓教授教诫之轮，如转轮王所乘车轮，或首行轮。如是一切声闻、独觉，依止此轮求涅槃道，故此二种非大乘器。所以者何？由彼依止下劣行故，非大乘器。由彼执取自诸蕴行，惊怖厌患，自求解脱一切忧苦，不求解脱一切有情而修行故，非大乘器。由彼依止自诸界行，惊怖厌患，自求解脱一切忧苦，不求解脱一切有情而修行故，非大乘器。由彼摄受自诸处行，惊怖厌患，自求解脱一切忧苦，不求解脱一切有情而修行故，非大乘器。由彼系属有系属行，于诸有情不乐摄受，无有慈悲，有系属故，非大乘器。由彼观他，具受众苦，舍而不救，但为自身求解脱故，非大乘器。由彼自断诸烦恼首，不乐断除一

切有情诸烦恼首，非大乘器。由彼不能驭大乘轮趣菩提故，非大乘器。由彼不能随大光轮趣菩提故，非大乘器。由彼喜乐独一无二，入涅槃城而修行故，非大乘器。

“善男子，有诸众生，于声闻乘、独觉乘法，未作劬劳正勤修学，如是众生根机未熟，根机下劣，精进微少；若有为说微妙甚深大乘正法，说听二人俱获大罪，亦为违逆一切诸佛。所以者何？若诸众生，于声闻乘、独觉乘法，未作劬劳正勤修学，根机未熟，根机下劣，精进微少，而便听受微妙甚深大乘正法；如是众生实是愚痴，自谓聪睿陷断灭边，坠颠狂想执无因论，于诸业果生断灭想，拨无一切善作、恶作，妄说大乘，坏乱我法，非法说法，法说非法，实非沙门说是沙门，实是沙门说非沙门，实非毗奈耶说是毗奈耶，实是毗奈耶说非毗奈耶；愚痴颠倒、憍慢、嫉妒、朋党之心，于大乘法，称赞拥护，令广流布；于声闻乘、独觉乘法，谤毁障蔽，不令流布；不能如实依声闻乘，或独觉乘，或无上乘，舍俗出家，受具足戒，成苾刍性，亦不如实修集一切善法因缘；于我弟子，或是法器，或非法器，谓勤修行学无学行，乃至证得最后极果真善异生，持戒、破戒、无戒者所，种种毁骂，呵责恼乱，夺其衣钵，不听受用诸资生具系缚禁闭。如是拨无一切因果断灭论者，虽在人中，实是罗刹，于当来世无数大劫难得人身。宁在地狱受无量苦，不处人中超断灭见。如是痴人，不久便当肢体废缺，于多日夜，结舌不言，受诸苦毒，痛切难忍，命终定生无间地狱，于诸恶趣轮转往来，受诸苦恼难可救济，多百千劫难复人身。虽过无量无数劫已，还得人身，而生五浊无佛世界，生盲生聋，暗哑无舌，种种重病常所婴缠；或身残丑，人不喜见；言词拙讷，耳所恶闻；心常迷乱，无所解了；生贫穷家，众事阙乏；不逢善友，随恶友行；乐作恶业，好执恶见，造无间罪，复还重堕无间地狱，转轮恶趣难有出期。如是愚痴断灭论者，坏乱毁灭我之正法，逼恼谪罚我诸弟子，持戒、破戒及无戒者，皆令不安修诸善品，由是因缘，多百千劫没众恶趣，从閻入閻，难有出期。如是众生所有罪报，皆为未求听习声闻、独觉乘法，先求听习微妙甚深大乘正法。如是愚痴断灭论者，下劣人身尚难可得，况当能成贤圣法器？尚不能得声闻独觉所证涅槃，况得广大甚深无上正等菩提？如是众生所有过失，皆由未学声闻乘法、独觉乘法，先入大乘。

“善男子，譬如坏瓶多诸瑕隙，盛油乳等尽皆渗漏，能盛所盛，二俱坏失。所以者何？器有失故。如是众生，于声闻乘、独觉乘法，未作劬劳正勤修学，根机未熟，根机下劣，精进微少；若有为说微妙甚深大乘正法，说听二人俱获大罪，亦为违逆一切诸佛，所有过失广说如前。譬如世间库藏颓穴，置诸宝货多有散失；如是众生于二乘法谤毁不信，不肯修学，为说大乘不如实解，因此造罪轮转无穷。譬如舟船多诸泄漏，不任承载泛于大海；如是众生多怀慳嫉，于二乘法未曾修学，妄号大乘，实怀断见，憍慢谄曲成泄漏身，不堪凭入一切智

海。譬如有人，其目盲瞽，不堪呈示种种珍宝；如是众生憍慢放逸，执著空见，不学二乘，盲无慧目，不任显示无上大乘功德珍宝。譬如有人，其身臭秽，虽以种种上妙香涂，而竟不能令身香洁；如是众生愚痴憍慢，于二乘法不乐勤修，不断杀生乃至邪见，虽勤听受无上大乘，而竟不能解甚深法。譬如石田，虽植好种，勤加营耨，终无果实；如是众生于二乘法，憍慢懈怠，不乐勤修，贪求五欲，曾无厌倦，虽于彼身植大乘种，精进勤苦，终无所成。譬如瓮器，先贮毒药，投少石蜜，不任食用；如是众生于二乘法不肯修学，执无因论，为说大乘，终不能成自他利益。譬如瓮器，先贮石蜜，投少毒药，不任食用；如是众生精勤修学，二乘法犹未成就，为说大乘，二俱坏失。譬如有人痴狂心乱，为作音乐不能了知；如是众生于二乘法未曾修学，贪瞋痴等猛利烦恼扰乱其心，执著无因及断灭论，根机未熟，为说大乘，虽经多时而不能解。譬如有人不著甲冑，不持刀杖，辄入阵中，必遭伤害受诸苦恼；如是众生于二乘法未曾修学，智慧狭劣，根器未成，为说大乘，必生妄执，由此展转造恶无穷。如是痴人，不久便当肢体废缺，于多日夜，结舌不言，受诸苦毒，痛切难忍，命终定生无间地狱，于诸恶趣轮转往来，应知如前次第广说。

“善男子，是故智者先应观察一切众心，然后说法，先当发起慈心、悲心、喜心、益心、不懈怠心、能忍受心、不憍慢心、不嫉妒心、不悭吝心、等引定心，然后为他宣说正法，终不令他诸众生类，闻所说法，轮转生死，堕大险难。

“是故如来善达一切众生心相，以无尘垢、无取行轮，为说正法；具大甲冑一切菩萨摩訶萨众，为他说法亦复如是。由悲愍故，为令断灭诸烦恼故，为令超渡三有海故，为诸众生于三乘中随心所乐，随趣一乘速圆满故，为说正法，终不令其轮转生死，堕大险难。

“云何名无尘垢行轮？无尘垢者，谓说法时，不为有蕴，不为有处，不为有界，不为有欲界，不为有色界，不为有无色界，不为有此世，不为有他世，不为有诸行，不为有受，不为有想，不为有思，不为有触，不为有作意，不为有无明，乃至不为有老死，不为有行及不行故，为诸众生宣说正法；唯为一切诸蕴、处、界，广说乃至行与不行皆寂灭故，为诸众生宣说正法；以是义故，名无尘垢。行者，所谓为能永断死此生彼，为诸众生宣说正法；所谓为能永断诸蕴处界，广说乃至为能永断行与不行，为诸众生宣说正法；是名为行。轮者，所谓如满月光，清凉无碍遍满虚空，照触一切无障碍；如是如来及诸菩萨所有神通、记说、教诫三种胜轮，作用无碍遍诸世界，利乐一切所化众生，令诸众生不异归趣，不共一切世间众生，不共一切声闻、独觉，能令众生断灭生死诸苦恼法，证得安乐菩提涅槃，是名为轮。如是名为诸佛菩萨无尘垢行轮。

“云何名为无取行轮？谓于诸法无所挂碍，犹如日光普照一切，三乘根器随其所宜，宣说正法，无所执著。谓诸如来，为诸众生说如

是法，犹如虚空无差别相，以无量定游戏自在庄严住持，为诸众生说微妙法，无所执著。具大甲冑一切菩萨摩訶萨众，为他说法，亦复如是。谓说诸法非有，非空；非即色空，非离色空；乃至非即识空，非离识空；非即眼空，非离眼空；乃至非即意空，非离意空；非即色空，非离色空；乃至非即法空，非离法空；非即眼识空，非离眼识空；乃至非即意识空，非离意识空；非即欲界空，非离欲界空；乃至非即虚空无边处空，非离虚空无边处空；非即识无边处空，非离识无边处空；非即无所有处空，非离无所有处空；非即非想非非想处空，非离非想非非想处空；非即四念住空，非离四念住空；乃至非即八支圣道空，非离八支圣道空；非即缘起法空，非离缘起法空；非即三不获空，非离三不获空；非即四无所畏空，非离四无所畏空；非即十力空，非离十力空；非即十八不共法空，非离十八不共法空；非即大慈大悲大喜大舍空，非离大慈大悲大喜大舍空；非即涅槃空，非离涅槃空；是名如来及诸菩萨，为诸众生宣说处中微妙正法。

“善男子，如是如来为诸众生，以无尘垢行轮说法，如满月光，清凉无碍遍满虚空，照触一切无障碍界，乃至广说。又以无取行轮说微妙法，于一切法无所挂碍，犹如日光普照一切，三乘根器随其所宜，宣说正法，无所执著。谓诸如来，为诸众生说如是法，犹如虚空无差别相，以无量定游戏自在庄严住持，为诸众生说微妙法，无所执著，令于三乘随宜趣入。具大甲冑一切菩萨摩訶萨众，为他说法，亦复如是。令诸众生，闻此最胜甚深法已，于三乘中随其所乐，随趣一乘，种种善根皆得成熟；随于一乘，极善安住，终不令其于生死中，增长种种恶不善法，令于涅槃坚固不退。

“善男子，菩萨摩訶萨，为断无量无数众生生死流转，为他说法；声闻、独觉，但为自断生死流转，为他说法。菩萨摩訶萨，为令无量无数众生渡四瀑流，为他说法；声闻、独觉，但为令己渡四瀑流，为他说法。菩萨摩訶萨，为除无量无数众生诸烦恼病，为他说法；声闻、独觉，但为自除诸烦恼病，为他说法。菩萨摩訶萨，为断众生诸蕴烦恼，习气相续令尽无余，为他说法；声闻、独觉，但为自断诸蕴烦恼，习气相续有余不尽，为他说法。菩萨摩訶萨，为成大悲等流果故，大悲为因，为他说法；声闻、独觉，不为大悲等流果故，无大悲因，为他说法。菩萨摩訶萨，于诸众生有所顾念，而为说法；声闻、独觉，于诸众生无所顾念，而为说法。菩萨摩訶萨，为息一切他众生苦，为他说法；声闻、独觉，但为自息己所有苦，为他说法。菩萨摩訶萨，为满一切众生法味，为他说法；声闻、独觉，但为自满己身法味，为他说法。菩萨摩訶萨，为诸众生得胜法明，为他说法；声闻、独觉，但为自己得胜法明，为他说法。

“善男子，以要言之，菩萨摩訶萨无量律仪，普为除灭一切众生大无明闇、大怖畏事、一切衰损，得大光明及大名称，如实觉悟一切智智，为他说法；声闻、独觉少分律仪，但为灭除自无明闇，得小光

明及小名称，如实觉悟少分法智，为他说法。

“善男子，声闻、独觉，无有于他，实怀顾念；无有于他，实怀悲恻；无有于他，实不轻弄；无有于他，实为利益；无有于他，实为拔济；无有于他，实行荐举；无有于他，实欲称叹；无有于他，实无谄曲而行赞美；无有于他，不顾己身令彼安乐；无有于他，不起误失身语意业。

“善男子，住大乘者，无有于己，实怀顾念；广说乃至无有于他，发起误失身语意业。

大乘大集地藏十轮经卷第七

有依行品第四之三

“复次，善男子，有诸众生，禀性暴恶，言辞粗犷，实是愚痴，怀聪明慢，不断杀生乃至邪见；于他所得利养恭敬、世所称誉，深生嫉妒；常自追求利养恭敬、世所称誉，曾无厌倦；恒自赞誉，轻毁于他；不自防护身语意业，常乐习行一切恶行；内行殄毒，无有悲愍，无惭无愧，喜触恼他；于诸福田好简胜劣，于归我法诸出家人，常乐伺求所有瑕隙，才得少相未审真虚，即便轻毁呵骂谪罚；其心刚强，恨戾迷乱，常喜触恼诸出家人；不省己过，念讥他阙，虽闻赞叹大乘功德发意趣求，而心好为诸重恶事；曾未寂静诳惑他故，于大乘法，现自听闻、教他听闻，现自读诵、教他读诵；为自荐举陵伏他故，于大乘法，恭敬赞美；自于大乘诸行境界不曾修学，未能悟解，而自称号‘我是大乘’，诱劝他人附己修学，规求名利以自活命。譬如破戒恶持律师，自犯尸罗，乐行恶行，为名利故，诱劝他人，令勤修学毗奈耶藏；如是谄曲虚诈众生，下贱人身尚当难得，退失善趣二乘涅槃，况得大乘？终无是处，当堕恶趣，难有出期。诸有智人不应亲近，而无惭愧，于大众中自号大乘如师子吼，为名利故，诱诳愚痴令亲附己，共为朋党。譬如有驴披师子皮，而便自谓以为师子，有人遥见，谓真师子，及至鸣已，皆识是驴，咸共唾言：‘此非师子，是食不净真弊恶驴。’种种呵叱，皆共舍去。我说如是补特伽罗，常乐习行十恶业道，烧灭一切人天种子，尚退声闻、独觉乘法，况于大乘能成法器？愚痴憍慢，自号大乘，诳惑他人，招集利养。譬如痴慢无手足人，欲兴战伐入于大阵，徒设功效，终无克成；诈号大乘，亦复如是。信手、戒足，无有一全，不自崖揆所堪行业，欲兴战伐烦恼大阵，徒设功效，终无克成。我说是人，不护三业，专行恶行，妄号大乘，实于三乘皆非法器，而欲破坏一切众生勇健坚固烦恼大阵，欲皆显示一切众生八支圣道，令入无畏涅槃之城，终无是处。所以者何？

“善男子，夫大乘者，受持第一清净律仪，修行第一微妙善行，具足第一坚固惭愧，深见深畏后世苦果，远离所有一切恶法，常乐修

行一切善法，慈悲常遍一切有情，恒普为作利益安乐，救济度脱一切有情，所有厄难生死众苦，不顾自身所有安乐，唯求安乐一切有情，如是名为住大乘者。

“善男子，有何等相名声闻乘？谓诸众生，常勤精进，安住正念，乐等引定，离诸谄诳，信知业果，不著五欲，世间八法所不能染，修善勇猛如救头燃，常审谛观诸蕴、界、处，恒乐安住所有圣种，具此相者，名声闻乘。如是众生，尚未能成独觉乘器，况复能成大乘法器？”

“善男子，有何等相名独觉乘？谓诸众生，具上声闻一切功德，复能于彼五取蕴中，数数安住随无常观，数数安住随生灭观，普于一切缘生法中，能审谛观皆是灭法，具此相者，名独觉乘。如是众生，非大乘器！”

尔时，世尊重显此义，而说颂曰：

“若真善人刹帝利，乃至真善戍达罗，
修信等十有依轮，于声闻乘速成器。
求独觉乘三业净，具足惭愧怖诸蕴，
知过乐静住空闲，念守诸根心寂定。
善观缘起修静虑，诸蕴界处巧能观，
具此十行有依轮，成胜乘器度有海。
修共三乘二乘轮，自求解脱烦恼苦，
不度有情不舍习，此人俱非大乘器。
愚痴懈怠根下劣，于二乘法不勤修，
定不能具大乘轮，故非大乘广大器。
愚痴独一求解脱，劣意下行无慈悲，
乐著断见向恶趣，弃舍正法说非法。
毁谤二乘舍律行，受具足戒号大乘，
破乱我法惑众生，由此人身难复得。
恼乱我法诸贤圣，谪罚被赤袈裟人，
呵骂遮夺衣钵等，长时退失人天趣。
是故若欲复人身，不患舌[舌+今]而舍命，
常乐值遇诸佛者，普应弘护三乘法。
欲得三乘最上乘，应善观察三乘法，
欢喜为他普开示，当得成佛定无疑。
破戒慳嫉怀憍慢，自赞毁他号大乘，
舍离此人依智者，定当成佛度三界。
于三乘器随所宜，慈悲为说三乘法，
随愿令满无慳嫉，当得成佛定无疑。
知蕴界处皆空寂，无所依住譬虚空，
说法等摄诸有情，当获妙觉无边智。

破戒意乐怀恶心，闻说大乘胜功德，
诈号大乘为名利，如弊驴披师子皮。
我今普告一切众，若欲疾得胜菩提，
当善修持十善业，护持我法勿毁坏。
我昔诸余契经说，应求大觉行大乘，
舍离声闻独觉乘，为清净者说斯法。
曾供无量俱胝佛，断恶勤劳修净心，
我为劝进彼众生，故说一乘无第二。
今此众具三乘器，有但堪住声闻乘，
心极忧怖多事业，彼非上妙菩提器；
有痴乐静住独觉，彼非上妙菩提器；
有堪安住上妙智，故随所乐说三乘。
具净功德乐解脱，闻说大乘堕恶趣，
如病痰癰教服乳，此增毒害非除疾。
如是非器声闻乘，闻说大乘心迷乱，
便起断见堕恶趣，故应说法审观机。”

忏悔品第五

尔时，世尊说是颂已，于众会中有无量百千众生，曾误闻法，谬生空解拨无因果，断灭善根，往诸恶趣。闻说此经，还得正见，即从座起，顶礼佛足，于世尊前深生惭愧，至诚忏悔，合掌恭敬，而白佛言：“大德世尊，我等本在声闻乘中曾种善根，未能成熟声闻乘器；后复遇闻独觉乘法，迷惑不了，便生空见拨无因果，由是因缘，造身语意无量罪业往诸恶趣。我等今者于世尊前，闻说此经还得正见，深心惭愧，发露忏悔，不敢覆藏，愿悉除灭，从今已往永不复作，防护当来所有罪障。唯愿世尊，哀愍摄受，令我等罪皆悉销灭，于当来世永不更造。唯愿世尊，哀愍济拔我等当来恶趣苦报。我等今者，还愿受行先所修习声闻乘行。唯愿世尊，哀愍教授。”

世尊告曰：“善哉！善哉！汝等乃能如是惭愧，发露忏悔。于我法中，有二种人，名无所犯：一者、禀性专精，本来不犯；二者、犯已惭愧，发露忏悔。此二种人，于我法中，名为勇健得清净者。”

于是世尊随其所乐，方便为说四圣谛法。于彼众中，有得下品忍者，有得中品忍者，有得上品忍者，有得世间第一法者，有得预流果者，有得一来果者，有得不还果者。于中复有八万四千苾刍，诸漏永尽，心得解脱，意善清净，成阿罗汉，欢喜礼佛，还复本座。

时众会中，复有五十七百千那庾多众生，曾误闻法，谬生空解拨无因果，断灭善根，往诸恶趣。闻说此经，还得正见，即从座起，顶

礼佛足，于世尊前深生惭愧，至诚忏悔，合掌恭敬，而白佛言：“大德世尊，我等本在独觉乘中曾种善根，未能成熟独觉乘器；后复遇闻说大乘法，虽生爱乐而不能解，愚冥疑惑，便生空见拨无因果，由是因缘，造身语意无量罪业，乘此业缘，于无量劫堕诸恶趣，受种种苦，楚毒难忍。我等今者于世尊前，闻说此经还得正见，深心惭愧，发露忏悔，不敢覆藏，愿悉除灭，从今已往永不复作，防护当来所有罪障。唯愿世尊，哀愍摄受，令我等罪皆悉消灭，于当来世永不更造。唯愿世尊，哀愍济拔我等当来恶趣苦报。我等今者，还愿受行先所修集独觉乘行。唯愿世尊，哀愍教授。”

世尊告曰：“善哉！善哉！汝等乃能如是惭愧，发露忏悔。于我法中，有二种人，名无所犯：一者、禀性专精，本来不犯；二者、犯已惭愧，发露忏悔。此二种人，于我法中，名为勇健得清净者。”

于是世尊随其所乐，方便为说诸缘起法。令彼一切修缘觉乘，渐次圆满，皆悉证得幢相缘定，于独觉乘得不退转，欢喜礼佛，还复本座。

时众会中，复有八十百千那庾多众生，曾于过去诸佛法中，毁谤佛教下至一颂，由是因缘堕诸恶趣，受众苦报，初复人身，生便喑哑，常患舌[舌+今]，口不能言。闻说此经，还得正见，即从座起，顶礼佛足，于世尊前深生惭愧，至诚忏悔宿世恶业，合掌恭敬，瞻仰世尊，佛神力故，皆悉能语。

尔时，世尊知而故问：“汝等宿世作何恶业，今处众中，口不能语？”

彼诸人众俱时白佛，于中一类作如是言：“大德世尊，我等往昔于毗钵尸如来法中，或言毁谤大乘正法，或言毁谤独觉乘法，或言毁谤声闻乘法，下至一颂。我等由是恶业障故，九十一劫流转生死，常处地狱，傍生、饿鬼，喑哑无舌，都不能言，受诸苦毒，痛切难忍；始于今世得复人身，而犹喑哑，常患舌[舌+今]，蒙佛神力，方始能言，复能忆念自过去世所有因缘诸恶业障。”

复有一类作如是言：“大德世尊，我等往昔于尸弃如来法中，或言毁谤大乘正法，各随本缘，如前广说。”

复有一类作如是言：“大德世尊，我等往昔于毗摄浮如来法中，或言毁谤大乘正法，各随本缘，如前广说。”

复有一类作如是言：“大德世尊，我等往昔于羯洛迦孙驮如来法中，或言毁谤大乘正法，各随本缘，如前广说。”

复有一类作如是言：“大德世尊，我等往昔于羯诺迦牟尼如来法中，或言毁谤大乘正法，各随本缘，如前广说。”

复有一类作如是言：“大德世尊，我等往昔于迦葉波如来法中，或言毁谤大乘正法，或言毁谤独觉乘法，或言毁谤声闻乘法，下至一颂。我等由是恶业障故，从尔以来，流转生死，常处地狱、傍生、饿

鬼，喑哑无舌都不能言，受诸苦毒，痛切难忍；始于今世，得复人身，而犹喑哑，常患舌[舌+今]。蒙佛神力，方始能言，复能忆念自过去世所有因缘诸恶业障。我等今者于世尊前，闻说此经，获得正见，深心惭愧，发露忏悔，不敢覆藏，愿悉除灭，从今以往永不复作，防护当来所有罪障。唯愿世尊，哀愍摄受，令我等罪皆悉销灭，于当来世永不更造。唯愿世尊，哀愍济拔我等当来恶趣苦报。唯愿世尊，哀愍我等，为说正法。”

世尊告曰：“善哉！善哉！汝等乃能如是惭愧，发露忏悔。于我法中，有二种人，名无所犯：一者、禀性专精，本来不犯；二者、犯已惭愧，发露忏悔。此二种人，于我法中，名为勇健得清淨者。”

于是世尊随其所乐，方便为说种种正法，各随所宜，皆得利益，欢喜礼佛，还复本座。

时众会中，复有无量百千声闻，及无量百千那庾多菩萨，闻说此经，忆昔所造诸恶业障，即从座起，顶礼佛足，于世尊前深生惭愧，至诚忏悔，合掌恭敬，皆白佛言：“大德世尊，我等忆昔曾于无量诸佛法中，或有说言：‘我等于彼诸佛弟子，或是法器，或非法器，多行忿恨，呵骂毁辱，讥刺轻诮，种种诽谤，隐善扬恶。我等由此恶业障故，经无量劫堕诸恶趣，受诸重苦，楚毒难忍。后得值遇无量诸佛，皆曾亲近承事供养，又得值遇无量菩萨摩訶萨众，亦皆亲近承事供养；于——佛、——菩萨摩訶萨前皆深惭愧，发露忏悔诸恶业障，于——佛、——菩萨摩訶萨所，皆得听受无量法门，精勤护持，修学无量难行苦行。由彼业障有余未尽，令我等辈，未能证得安乐涅槃，未能证得三摩地门殊胜功德。我等今者，于世尊前闻说此经，复深惭愧，发露忏悔，不敢覆藏，愿悉除灭，从今以往永不复作，防护当来所有罪障。唯愿世尊，哀愍摄受，令我等罪皆悉除灭，于当来世永不更造。唯愿世尊，哀愍济拔我等当来恶趣苦报。我等今者承佛威力，愿随所乐，速能证得安乐涅槃，或能证得三摩地门殊胜功德。’复有说言：‘我等于彼诸佛弟子，或是法器，或非法器，以粗恶言期克迫胁。我等由此恶业障故，经无量劫堕诸恶趣，应知如前次第广说。’复有说言：‘我等于彼诸佛弟子，或是法器，或非法器，打棒伤害。我等由此恶业障故，经无量劫堕诸恶趣，应知如前次第广说。’复有说言：‘我等于彼诸佛弟子，或是法器，或非法器，侵夺衣钵。我等由此恶业障故，经无量劫，堕诸恶趣，应知如前次第广说。’复有说言：‘我等于彼诸佛弟子，或是法器，或非法器，侵夺种种资生众具，绝其饮食。我等由此恶业障故，经无量劫，堕诸恶趣，应知如前次第广说。’复有说言：‘我等于彼无量诸佛出家弟子，或是法器，或非法器，退令还俗，脱其袈裟，课税役使。我等由此恶业障故，经无量劫堕诸恶趣，应知如前次第广说。’复有说言：‘我等于彼无量诸佛出家弟子，或是法器，或非法器，或有罪犯，或无罪犯，枷锁系缚，禁闭牢狱。我等

由此恶业障故，经无量劫堕诸恶趣，应知如前次第广说。’复有说言：‘我等于彼无量诸佛出家弟子，或是法器，或非法器，起轻慢心，种种触恼，令不安乐。我等由此恶业障故，经无量劫受诸重苦，楚毒难忍。后得值遇无量诸佛，皆曾亲近承事供养，又得值遇无量菩萨摩訶萨众，亦皆亲近承事供养；于一一佛、一一菩萨摩訶萨前，皆深惭愧，发露忏悔诸恶业障，于一一佛、一一菩萨摩訶萨所，皆得听受无量法门，精勤护持，修学无量难行苦行。由彼业障有余未尽，令我等辈，未能证得安乐涅槃，未能证得三摩地门殊胜功德。我等今者，于世尊前闻说此经，复深惭愧，发露忏悔，不敢覆藏，愿悉除灭，从今以往永不复作，防护当来所有罪障。唯愿世尊，哀愍摄受，令我等罪皆悉消灭，于当来世永不更造。唯愿世尊，哀愍济拔我等当来恶趣苦报。我等今者承佛神力，愿随所乐，速能证得安乐涅槃，或能证得三摩地门殊胜功德。’”

于是世尊普告声闻、菩萨众曰：“善哉！善哉！汝等乃能如是惭愧，发露忏悔。有二种人，名无所犯：一者、禀性专精，本来不犯；二者、犯已惭愧，发露忏悔。此二种人，于我法中，名为勇健得清净者。

“又善男子，如是恼乱佛弟子罪，比前所说近无间罪，彼但有名，未足称罪，然此恼乱佛弟子罪，亦过前说五无间罪无量倍数。所以者何？若诸苾刍毁破禁戒，作诸恶法，犹能示导无量百千俱胝那庾多众生，善趣涅槃无颠倒路，与诸众生作大功德珍宝伏藏，如前广说，况持禁戒修善法者！以是义故，若有恼乱佛弟子众诸出家人，当知则为断三宝种，亦则名为挑坏一切众生法眼，亦为毁灭我久勤苦所得正法，与诸众生作大衰损。是故恼乱佛弟子罪，过前所说五无间罪无量倍数。是故汝等今于我前，起至诚心、增上惭愧，殷勤恳切发露忏悔往昔所造诸恶业障，我今慈悲摄受汝等，令恶业障渐得消灭。于此佛土大贤劫中，有千如来出现于世，汝等于彼诸如来前，亦当至诚发露忏悔诸恶业障，防护当来所有罪咎。于此贤劫千如来中，最后如来名曰卢至如来、应、正等觉、明行圆满、善逝、世间解、无上丈夫、调御士、天人师、佛、薄伽梵，十号具足。汝等于彼卢至佛前，亦当至诚发露忏悔诸恶业障，乃得灭尽无有遗余。”

时诸声闻及菩萨众，俱时白佛：“唯然世尊，我等审当于彼最后卢至佛所，获得正见，离诸邪见，诸恶业障尽灭无余，解脱一切众苦恼者。若令我等于大贤劫，常处无间大地狱中，恒受种种极重苦恼，亦能堪忍。”

世尊告曰：“善哉！善哉！汝等乃能如是勇猛。汝等由此坚固精进自誓愿力，定能于彼卢至佛前，宿世所集诸恶业障皆悉消灭，定能发起增上信敬亲近供养卢至如来，定能永断一切烦恼成阿罗汉，或定能证三摩地门殊胜功德。”

时诸声闻及菩萨众，欢喜礼佛，还复本座。

尔时，世尊告金刚藏菩萨摩訶萨言：“善男子，我以佛眼观诸世间，见未来世此佛土中，有无量无数百千俱胝那庾多刹帝利旃荼罗、婆罗门旃荼罗、宰官旃荼罗、居士旃荼罗、长者旃荼罗、沙门旃荼罗、苾舍旃荼罗、戍达罗旃荼罗，若男若女，少种善根，虽得人身，而随恶友，起诸邪见，造诸恶行，坏我甚深无上正法，于我所说无有炽然，灭炽然法，不生信乐。或于我说与声闻乘相应正法，诽谤轻毁，障蔽隐没，不令流布。或于我说与独觉乘相应正法，诽谤轻毁，障蔽隐没，不令流布。或于我说与无上乘相应正法，诽谤轻毁，障蔽隐没，不令流布。或于归我诸出家人，若是法器，若非法器，多行忿恨，呵骂毁辱，讥刺轻诮，种种诽谤，隐善扬恶，广说乃至起轻慢心种种触恼。如是诸人，非圣法器，自实愚痴，怀聪明慢，从此命终堕三恶趣，受无量种增上猛利难忍苦毒，经于无量百千俱胝那庾多劫难复人身，如前广说。善男子，如是众生，宁处无间大地狱中受诸重苦，不受如是鄙恶人身，憍慢贡高，随顺恶友，造作如是恶不善业，流转生死，难可济度；常处生死，受诸苦恼。”

尔时，会中有无量无数大慧有情，从座而起，顶礼佛足，合掌向佛，悲泣堕泪，而白佛言：“大德世尊，谛观如是世间众生，虽皆获得难得人身，而远离正信，远离正愿，远离正意乐，远离正见，远离善知识，远离好时，远离好处，远离净戒，远离正定，远离正慧。如是众生，虽皆获得难得人身，而由愚痴憍慢力故，造作如前所说重罪，毁谤世尊所说正法，触恼世尊出家弟子。我等今者对世尊前，以至诚心发真誓愿：‘我等从今流转生死，乃至未得解脱已来，常愿不遇如是恶缘，决定不造如是重罪，终不毁谤诸佛正法，亦不触恼诸出家人，必不挑坏众生法眼，亦不断灭三宝种性。’唯愿世尊，哀愍摄受我等所发如是誓愿。”

时众会中，复有无量百千俱胝那庾多聪慧有情，从座而起，顶礼佛足，合掌恭敬，而白佛言：“大德世尊，我等今者对世尊前，以至诚心发真誓愿：‘我等从今流转生死，乃至未得法忍已来，于其中间，常愿不处诸帝王位，常愿不处诸宰官位，常愿不处诸国师位，常愿不处城邑聚落镇逻长位，常愿不处诸军将位，常愿不处诸商主位，常愿不处一切祠祀寺观主位，常愿不处长者、居士、沙门主位，常愿不处诸师长位，常愿不处诸家长位，常愿不处断事者位，常愿不处乃至一切富贵尊位。乃至未得法忍已来，我等若处如是诸位，则于佛法名恶因缘，造诸重罪，毁谤诸佛所说正法，触恼诸佛出家弟子，必当挑坏众生法眼，亦为断灭三宝种性，亦为损恼无量有情，由是定当堕无间狱，轮转恶趣，难有出期。’唯愿世尊，哀愍摄受我等所发如是誓愿。”

尔时，一切诸来大众，天、龙、药叉、健达缚、人非人等，皆从座起，顶礼佛足，悲号感切，涕泪交流，合掌恭敬，而白佛言：“大德世尊，我等无始生死已来，愚痴憍慢，起诸恶业，或身恶业，或语

恶业，或意恶业，自作教他，见闻随喜。如是诸罪，今对佛前，皆深惭愧，发露忏悔，不敢覆藏，愿悉除灭，从今以往永不复作，防护当来所有罪咎。”第二第三，亦如是说：“我等至诚，发真誓愿：‘从今乃至生死后际，于其中间，常愿不逢诸恶知识，亦愿不遇诸恶因缘，设当逢遇愿不随顺，决定不造如前所说诸恶罪业，勿令我等长夜受苦。’唯愿世尊，哀愍摄受我等所发如是誓愿。”

尔时，世尊普告一切诸来大众：“善哉！善哉！汝等乃能于后世苦，深见怖畏，发露忏悔。汝等今者，欲度生死深广瀑流，欲入无畏涅槃之城，发如是愿。

“诸善男子，有十种法，能令菩萨摩诃萨等，获得无罪正路法忍。何等为十？

“诸善男子，若诸菩萨摩诃萨等，不著内身，不著外身，不著内外身，不著过去身，不著未来身，不著现在身，名第一法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著内受，不著外受，不著内外受，不著过去受，不著未来受，不著现在受，名第二法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著内想，不著外想，不著内外想，不著过去想，不著未来想，不著现在想，名第三法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著内行，不著外行，不著内外行，不著过去行，不著未来行，不著现在行，名第四法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著内识，不著外识，不著内外识，不著过去识，不著未来识，不著现在识，名第五法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著此世，名第六法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著他世，名第七法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著欲界，名第八法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著色界，名第九法，能令菩萨摩诃萨等，获得无罪正路法忍。

“又善男子，若诸菩萨摩诃萨等，不著无色界，名第十法，能令菩萨摩诃萨等，获得无罪正路法忍。

“诸善男子，是名十法，能令菩萨摩诃萨等，获得无罪正路法忍。”

世尊为众说此法时，于众会中，有七十二百千俱胝菩萨摩诃萨，同时证得无生法忍。复有八十四百千那庾多菩萨，证得随顺法忍。复

有无量百千声闻，乃至永断一切烦恼成阿罗汉。复有百千那庾多众生，先未发心，今发无上正等觉心，于如来智住不退地。复有无量无数众生，先未发心，于今乃发独觉乘心。复有无量无数众生，先未发心，于今乃发声闻乘心。

尔时，世尊复告大众：“若诸有情已得法忍，处刹帝利灌顶王位，受用种种胜大财业，及处种种富贵尊位，是我所许，非余有情。”

金刚藏菩萨白佛言：“世尊，若诸有情未得法忍，于刹帝利灌顶王位，受用种种胜大财业，及余种种富贵尊位，定不许处，为亦许耶？”

世尊告曰：“若诸有情未得法忍，有能受行十善业道，亦劝众生令受学者，我亦听许处刹帝利灌顶王位，受用种种胜大财业，及余种种富贵尊位。若诸有情未得法忍，亦不受行十善业道，及劝众生令勤受学，以强势力处刹帝利灌顶王位，受用种种胜大财业，及处种种富贵尊位，名刹帝利旃荼罗王，及余种种富贵尊位旃荼罗王，愚痴憍慢，毁坏扰乱我甚深法，灭正法灯，断三宝种；于我出家诸弟子众，种种恼乱，捶拷刑罚，夺其衣钵、基业、财产，退令还俗，课税役使，系闭牢狱，乃至断命；于我所说微妙法义，诽谤轻毁，障蔽隐没，不令流布，夺夺堵波及僧祇物；如是诸人，皆当堕无间地狱，受诸剧苦，轮转恶趣，难有出期。”

时金刚藏菩萨复白佛言：“世尊，若诸有情未得法忍，亦不受行十善业道，及劝众生令勤受学，以强势力处刹帝利灌顶王位，受用种种胜大财业，及余种种富贵尊位；颇有别缘，得方便救，令其免堕无间地狱及余恶趣，受诸苦不？”

世尊告曰：“亦有别缘，得方便救，谓有众生处刹帝利灌顶王位，及余种种富贵尊位，虽复未得成就法忍、十善业道，而有信力尊敬三宝，于佛所说三乘相应诸出要法，下至一颂，终不谤毁、障蔽、隐没，不令流布；于佛出家诸弟子众，持戒、破戒下至无戒，剃除须发、被袈裟者，皆不恼乱捶拷谪罚，侵夺衣钵、基业、财产，退令还俗，课税役使，系闭牢狱乃至断命；亦不侵夺堵波物及僧祇物，遮制摧伏诸暴恶人，不令恼乱诸出家众，不令侵夺三宝财物；于佛所说三乘相应诸出要法，恭敬听受，既听受已，精进修行，法随法行；于我三乘贤圣弟子，恭敬供养，亲近承事；于大乘中誓愿坚固，终无疑难退屈之心，亦常劝导安置众生，令于大乘信受修学。此刹帝利旃荼罗王，及余种种富贵尊位旃荼罗王，过去诸佛皆共听许处帝王位，及余种种富贵尊位。虽复受用种种国土、城邑、聚落、胜大财业，而得免堕无间地狱及余恶趣。我亦听许处帝王位，及余种种富贵尊位，虽复受用种种国土、城邑、聚落，而得免堕无间地狱及诸恶趣。若诸有情欲得忏悔，除灭一切诸恶业障令无余者，于我所说如是法门，当勤

修学，勿令废忘。有能如此现前大众惭愧忏悔诸恶业者，先世所造一切恶业皆得销灭，无有遗余。”

大乘大集地藏十轮经卷第八

善业道品第六之一

尔时，金刚藏菩萨摩诃萨复白佛言：“大德世尊，菩萨摩诃萨，云何于声闻乘，得无误差？云何于声闻乘补特伽罗，得无误差？云何于独觉乘，得无误差？云何于独觉乘补特伽罗，得无误差？云何于大乘，得无误差？云何于大乘补特伽罗，得无误差？云何常能炽然三宝种姓？云何于诸如来出家弟子，若是法器，若非法器，下至一切被片袈裟、剃须发者，得无误差？云何于大乘法，常得升进，无有退转？云何利慧胜福，常得增长？云何于一切定诸陀罗尼，诸忍诸地，速得自在，无有退转？云何常得值遇诸善知识，随顺而行？云何常得不离见一切佛及诸菩萨、声闻弟子，不离闻法，不离亲近供养众僧？云何于诸善根常精进求，心无厌足？云何常于菩提种种行愿，心无厌足？”

尔时，世尊告金刚藏菩萨摩诃萨言：“善男子，有菩萨摩诃萨十轮，若菩萨摩诃萨成此十轮，于声闻乘，得无误差；于声闻乘补特伽罗，得无误差；于独觉乘，得无误差；于独觉乘补特伽罗，得无误差；于其大乘，得无误差；于其大乘补特伽罗，得无误差；常能炽然三宝种姓；于诸如来出家弟子，若是法器，若非法器，下至一切被片袈裟、剃须发者，得无误差；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足；常于一切先所造作恶不善业，以圣金刚坚利法智，摧坏散灭，令无遗余，不受果报，更不造新恶不善业，心无厌倦，速能证得无上法轮；常勤修习七觉分，心无厌倦；常能除灭一切众生诸烦恼病，心无厌倦；一切众生，依止存活。

“善男子，如转轮王具足七宝，凡所行动，轮宝导前，余宝随后，巡四大洲，普能除灭一切众生身心浊秽，普能生长一切众生身心安乐；菩萨摩诃萨亦复如是，成就十轮，于声闻乘得无误差，广说乃至一切众生，依止存活。

“善男子，如大车辘具足四轮，多人乘之游行大路，于其路上土块、瓦砾、草木、根、茎、枝、叶、华、果为轮所辗，皆悉摧坏，不任受用；菩萨摩诃萨亦复如是，成就十轮，悉能摧坏诸烦恼障、诸有情障、一切法障，令不受报。

“善男子，如利剑轮才一投擿，能斩怨敌首及支节，令无势用；

菩萨摩訶萨亦复如是，成就十轮，能破一切五趣牢狱、生死大苦，永断一切烦恼恶业，令不受报。

“善男子，如火灾起，五日出时，遍四大洲一切河、海、水界、津润，无不枯竭；菩萨摩訶萨亦复如是，成就十轮，一切四因诸烦恼障、诸有情障、一切法障、苦报根本，悉皆枯竭。

“善男子，如风灾起，四方猛风俱时顿发，一切世界大小诸山及诸大地，悉皆散灭；菩萨摩訶萨亦复如是，成就十轮，世间四倒憍慢诸山，无不崩坏，一切众生诸烦恼障、诸有情障、一切法障、苦报根本，悉皆散灭。

“善男子，如师子王吼声一发，一切禽兽悉皆惊怖，飞落走伏，无敢辄动；菩萨摩訶萨亦复如是，成就十轮，法音一震，乃至一切外道异学、恶知识等，悉皆惊怖，忘失言辩，无敢酬抗。

“善男子，如天帝释，与阿素洛将欲战时，天军围绕，手执金刚，奔趣阵敌，诸阿素洛惊怖退散；菩萨摩訶萨亦复如是，成就十轮，一切倒见外道异学、恶知识等，惊怖退散。

“善男子，如如意珠置高幢上，能雨种种上妙珍宝，给施一切贫乏众生；菩萨摩訶萨亦复如是，成就十轮，处净戒幢雨大法雨，给施一切无量众生。

“善男子，如闇夜分，世间幽冥都无所见，迷失正道，满月出已，诸闇皆除，诸失道者皆见正路；菩萨摩訶萨亦复如是，成就十轮，若诸众生无明昏闇，由此迷失八支圣道，菩萨为其宣说正法，除无明闇，生法光明，开示显现八支圣道，令断诸漏，尽诸苦际。

“善男子，如大日殿出现世间，一切苗稼悉皆增长，一切华叶悉皆敷荣；一切臭秽悉皆除歇，诸谷果药悉皆成熟，雪山销流，诸河充溢，渐次转注，满于大海；菩萨摩訶萨亦复如是，成就十轮，依止增上布施、调伏、寂静、尸罗、安忍、正勤、静虑、般若、方便慈悲、辩才功德，皆悉炽盛，为诸众生宣说正法，由法威光，令诸众生种种增上善根苗稼悉皆增长，种种增上妙行华叶悉皆敷荣，种种烦恼恶业恶行悉皆除歇，善趣涅槃，诸谷果药悉皆成熟，邪见慢山悉皆销流，种种正信戒闻舍慧及诸定河无不充溢，渐次盈满大涅槃海，令诸有情随意所乐，趣入无畏涅槃之城。

“善男子，云何名菩萨摩訶萨十轮？

“善男子，此十轮者，非余法也，当知即是十善业道！成就如是十种轮故，得名菩萨摩訶萨也。于一切恶皆能解脱，一切善法随意成就，速能盈满大涅槃海，以大善巧方便智光，成熟一切众生之类，皆令获得利益安乐。所以者何？善男子，过去一切诸佛世尊，皆悉远离十恶业道，皆悉称扬赞叹如是十善业道所得果报。是故若能于此所说十善业道，随守获一，乃至命终究竟无犯，必获一切殊胜果报，如前所说。

“善男子，若菩萨摩訶萨，能尽形寿远离杀生，即是施与一切众

生无惊无怖，令诸众生不生忧苦，离毛竖畏，由此善根速得成熟。所有前际轮转五趣没生死河，因杀生故，造身语意诸恶业障、诸烦恼障、诸有情障、一切法障、诸寿命障，自作、教他、见闻随喜，由此远离杀生轮故，皆悉辗坏，摧灭无余，不受果报。于现身中，诸人天等皆共亲爱，无有猜虑，身心安乐，寿命长远。将命终时，身心不为忧苦逼切，所爱妻子眷属围绕。临命终时，不见可怖剡魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，无病长寿，端正聪明，安隐快乐；复遇可意成调善法，具戒富德真实福田，为善知识，依彼修学离杀生法，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，离诸兵器，无有怨害斗战之名，绝诸怖畏，安隐快乐，一切无病长寿有情来生其国；如来自寿无量无边，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第一远离杀生轮也。菩萨摩訶萨成就此轮故，于声闻乘，得无误失；于声闻乘补特伽罗，得无误失；于独觉乘，得无误失；于独觉乘补特伽罗，得无误失；于其大乘，得无误失；于其大乘补特伽罗，得无误失；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误失；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广如前说。

“复次，善男子，若菩萨摩訶萨，能尽形寿离不与取，即是施与一切众生无惊无怖，无有热恼，亦无扰动，于自所得如法财利喜足而住，终不希求非法财利，由此善根速得成熟。所有前际轮转五趣没生死河，因不与取，造身语意诸恶业障、诸烦恼障、诸有情障、一切法障、诸财宝障，自作、教他、见闻随喜，由此远离不与取轮，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，财宝具足。将命终时，身心不为忧苦逼切，所爱妻子眷属围绕。临命终时，不见可怖剡魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，具大财宝，端正聪明，安隐快乐，不与五家共诸财宝；复遇可意成调善法，具戒富德真实福田，为善知识，依彼修学离不与取，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，众宝庄严，宝树、宝池、宝台殿等，无不充备，离我、我所，无所摄受，一切具足严饰有情来生其国；如来自身寿命无量，为诸有情如应说法，般涅槃后，正法久住，利益安乐

无量有情。

“善男子，是名菩萨摩訶萨，第二远离不与取轮。菩萨摩訶萨成就此轮故，于声闻乘，得无误失；于声闻乘补特伽罗，得无误失；于独觉乘，得无误失；于独觉乘补特伽罗，得无误失；于其大乘，得无误失；于其大乘补特伽罗，得无误失；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误失；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿离欲邪行，即是施与欲流所漂一切众生无惊无怖，无嫉无害，无有热恼，亦无扰动，于己妻室喜足而住，终不希求非法色欲，由此善根速得成熟。所有前际轮转五趣没生死河，因欲邪行，造身语意诸恶业障、诸烦恼障、诸有情障、一切法障、诸室家障，自作、教他、见闻随喜，由此远离欲邪行轮，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，妻室贞良。将命终时，身心不为忧苦逼切，所爱妻子眷属围绕。临命终时，不见可怖剋魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，具诸眷属，端正聪明，安隐快乐；复遇可意成调善法，具戒富德真实福田，为善知识，依彼修学离欲邪行，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，无诸女人，离诸淫欲，具足第一梵行有情来生其国，一切有情皆受化生，不处胞胎臭秽不净；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第三远离欲邪行轮。菩萨摩訶萨成就此轮故，于声闻乘，得无误失；于声闻乘补特伽罗，得无误失；于独觉乘，得无误失；于独觉乘补特伽罗，得无误失；于其大乘，得无误失；于其大乘补特伽罗，得无误失；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误失；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿离虚诳语，一切众生常共爱敬，所出言词皆诚谛量，闻悉敬奉，无所猜疑，由此善根速得成熟。所有前际轮转五趣没生死河，因虚诳语，造身语意诸恶业障、

诸烦恼障、诸有情障、一切法障、诸信言障，自作、教他、见闻随喜，由此远离虚诳语轮，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，所出言词他皆信奉。将命终时，身心不为忧苦逼切，所爱妻子眷属围绕。临命终时，不见可怖剋魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，所言诚谛，端正聪明，安隐快乐；复遇可意成调善法，具戒富德真实福田，为善知识，依彼修学离虚诳语，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，一切真实，离诸虚伪，妙香洁物之所庄严，无谄无诳，心行正真，希求纯净善法有情来生其国，香洁妙服，宝饰庄严；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第四远离虚诳语轮。菩萨摩訶萨成就此轮故，于声闻乘，得无误失；于声闻乘补特伽罗，得无误失；于独觉乘，得无误失；于独觉乘补特伽罗，得无误失；于其大乘，得无误失；于其大乘补特伽罗，得无误失；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误失；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿离离间语，一切众生常共爱敬，所发言词皆令和顺，闻悉敬奉，无所猜疑，由此善根速得成熟。所有前际轮转五趣没生死河，因离间语，造身语意诸恶业障、诸烦恼障、诸有情障、一切法障、诸和敬障，自作、教他、见闻随喜，由此远离离间语轮，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，所发言词皆令和顺。将命终时，身心不为忧苦逼切，所爱妻子眷属围绕。临命终时，不见可怖剋魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，所言和顺，端正聪明，安隐快乐；复遇可意成调善法，具戒富德真实福田，为善知识，依彼修学离离间语，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，一切坚密，难可破坏，诸美妙物之所庄严，无违无竞，善和诤讼，希求淳质善法有情来生其国，常修和敬，听闻正法；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第五远离离间语轮。菩萨摩訶萨成

就此轮故，于声闻乘，得无误差；于声闻乘补特伽罗，得无误差；于独觉乘，得无误差；于独觉乘补特伽罗，得无误差；于其大乘，得无误差；于其大乘补特伽罗，得无误差；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误差；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿离粗恶语，一切众生常共爱敬，所发语言皆令欢悦，闻悉敬奉，无所猜疑，由此善根速得成熟。所有前际轮转五趣没生死河，因粗恶语，造身语意诸恶业障、诸烦恼障、诸有情障、一切法障、诸调善障，自作、教他、见闻随喜，由此远离粗恶语轮，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，所出言词皆令欢悦。将命终时，身心不为忧苦逼切，所爱妻子眷属围绕。临命终时，不见可怖剎魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，所言柔软，端正聪明，安隐快乐；复遇可意成调善法，具戒富德真实福田，为善知识，依彼修学离粗恶语，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，远离一切不可意声，种种上妙、如意、和雅诸意乐声、结集法声，充满其土，具足念慧，梵音清彻，调善有情来生其国，常以软语，更相劝进；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第六远离粗恶语轮。菩萨摩訶萨成就此轮故，于声闻乘，得无误差；于声闻乘补特伽罗，得无误差；于独觉乘，得无误差；于独觉乘补特伽罗，得无误差；于其大乘，得无误差；于其大乘补特伽罗，得无误差；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误差；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿离杂秽语，一切众生常共爱敬，所发言词皆有义利，闻悉敬奉，无所猜疑，由此善根速得成熟。所有前际轮转五趣没生死河，因杂秽语，造身语意诸恶业障、诸烦恼障、诸有情障、一切法障、诸义利障，自作、教他、见闻随

喜，由此远离杂秽语轮，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，所发言词皆成义利。将命终时，身心不为忧苦逼切，所爱妻子眷属围绕。临命终时，不见可怖剋魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，言必饶益，端正聪明，安隐快乐；复遇可意成调善法，具戒富德真实福田，为善知识，依彼修学离杂秽语，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，远离一切无义利声，种种上妙菩萨藏摄大音声周遍国土，成就无边大愿妙智，能善辩说种种法义，如是有情来生其国；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第七远离杂秽语轮。菩萨摩訶萨成就此轮故，于声闻乘，得无误失；于声闻乘补特伽罗，得无误失；于独觉乘，得无误失；于独觉乘补特伽罗，得无误失；于其大乘，得无误失；于其大乘补特伽罗，得无误失；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误失；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿远离贪欲，一切众生常所爱重，其心清净，离诸染浊，由此善根速得成熟。所有前际轮转五趣没生死河，因贪欲故，造身语意诸恶业障、诸烦恼障、诸有情障、一切法障、诸无贪障，自作、教他、见闻随喜，由此远离贪欲轮故，皆悉辗坏，摧灭无余，不受果报。于现身中，诸人天等皆共亲爱，无所猜虑，身心安乐，其心清净，离诸染浊。将命终时，身心不为忧苦逼切，所爱妻子眷属围绕。临命终时，不见可怖剋魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，其心清净，离诸染浊，端正聪明，安隐快乐；复遇可意成调善法，具戒富德真实福田，为善知识，依彼修学离贪欲法，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，地平如掌，众宝充满，种种宝树行列庄严，种种宝衣、宝庄严具、宝幢幡盖、金、银、真珠、罗网等树，处处皆有，甚可爱乐，远离憍慢，颜貌端严，诸根无缺，其心平等，如是有情来生其国，无贪功德圆满庄严；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第八远离贪欲轮也。菩萨摩訶萨成

就此轮故，于声闻乘，得无误差；于声闻乘补特伽罗，得无误差；于独觉乘，得无误差；于独觉乘补特伽罗，得无误差；于其大乘，得无误差；于其大乘补特伽罗，得无误差；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误差；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

大乘大集地藏十轮经卷第九

善业道品第六之二

“复次，善男子，若菩萨摩訶萨，能尽形寿远离瞋恚，一切众生常所爱重，其心清净离诸垢秽，由此善根速得成熟。所有前际轮转五趣没生死河，因瞋恚故，造身语意诸恶业障、诸烦恼障、诸有情障、一切法障、诸无明障，自作、教他、见闻随喜，由此远离瞋恚轮故，皆悉辗坏，摧灭无余，不受果报。于现身中，诸人天等皆共亲爱，无所猜虑，其心清净，离诸垢秽。将命终时，身心不为忧苦逼切，所爱妻子眷属围绕。临命终时，不见可怖剌魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，其心清净，离诸垢秽，端正聪明，安稳快乐；复遇可意成调善法，具戒富德真实福田，为善知识，依彼修学离瞋恚法，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入深广智海，乃至证得无上菩提。所居佛土，远离一切浊秽风云、郁蒸尘垢、诸粗弊物，众宝庄严甚可爱乐，远离憍慢，颜貌端严，诸根无缺，心常寂定，如有情来生其国，慈悲功德，圆满庄严；如来自身寿命无量，为诸有情如应说法，般涅槃后，正法久住，利益安乐无量有情。

“善男子，是名菩萨摩訶萨，第九远离瞋恚轮也。菩萨摩訶萨成就此轮故，于声闻乘，得无误差；于声闻乘补特伽罗，得无误差；于独觉乘，得无误差；于独觉乘补特伽罗，得无误差；于其大乘，得无误差；于其大乘补特伽罗，得无误差；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误差；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，心无厌足。所得果报，广说如前。

“复次，善男子，若菩萨摩訶萨，能尽形寿远离邪见，一切众生常所爱重，其心清净，离邪分别，由此善根速得成熟。所有前际轮转五趣没生死河，因邪见故，造身语意诸恶业障、诸烦恼障、诸有情障、一切法障、诸正见障，自作、教他、见闻随喜，由此远离邪见轮故，皆悉摧坏，摧灭无余，不受果报。于现身中，诸人天等皆共亲爱，无所猜虑，身心安乐，其心清净，离邪分别。将命终时，身心不为忧苦逼切，所爱妻子眷属围绕。临命终时，不见可怖剋魔王使，唯见可意成调善法，具戒富德真实福田，为善知识，身心欢悦，深生敬信。既命终已，还生人中，诸根圆满，支体具足，随所生处，其心清净，离邪分别，端正聪明，安隐快乐；复遇可意成调善法，具戒富德真实福田，为善知识，依彼修学离邪见法，能断一切恶不善法，能成一切殊胜善法，能求一切大乘法义，能修一切菩萨愿行，渐次趣入大乘大海，乃至证得无上菩提。所居佛土，远离一切声闻、独觉二乘人法，远离一切天魔徒众，远离一切外道朋党，众宝庄严甚可爱乐，远离一切妄执吉凶、常见、断见、我我所见，如是有情来生其国，寿命长远，受用一味，谓大乘味；如来自身寿命无量，为诸有情如应说法，般涅槃后，正法久住，利益安乐无量有情。圣教一味，无有乖诤，炽盛流通，离诸障难。

“善男子，是名菩萨摩訶萨，第十远离邪见轮也。菩萨摩訶萨成就此轮故，于声闻乘，得无误失；于声闻乘补特伽罗，得无误失；于独觉乘，得无误失；于独觉乘补特伽罗，得无误失；于其大乘，得无误失；于其大乘补特伽罗，得无误失；常能炽然三宝种性；于诸如来出家弟子，若是法器，若非法器，下至一切被片袈裟、剃须发者，得无误失；于大乘法，常得升进，无有退转；利慧胜福，常得增长；于一切定诸陀罗尼，诸忍诸地，速得自在，无有退转；常得值遇诸善知识，随顺而行；常得不离见一切佛及诸菩萨、声闻弟子，不离闻法，不离亲近供养众僧；于诸善根，常精进求，心无厌足；常于菩提种种行愿，六波罗蜜多，心无厌足。所得果报，广说如前。

“善男子，若菩萨摩訶萨成就如是十轮，能速证得阿耨多罗三藐三菩提。所以者何？于过去世一切如来、应、正等觉，皆悉远离十恶业道，皆悉称扬赞叹如是十善业道所得果报，为欲长养一切众生利益安乐菩提道故，为欲除灭一切众生业烦恼苦令无余故，为欲枯竭三恶趣故，为欲绍隆三宝种故，为欲断除三界有故，为欲永断蕴、界、处故，为令一切速入无畏涅槃城故。广说如前，远离十种不善业道，所得果报。

“是故，善男子，若不真实希求如是十善业道所证佛果，及不真实下至守护一善业道，乃至命终而自称言：‘我是真实行大乘者，我求无上正等菩提。’当知如是补特伽罗，是极虚诈！是大妄语！对十方界佛世尊前，诳惑世间，无惭无愧，说空断见，诱诳愚痴，身坏命终，堕诸恶趣。

“善男子，若但言说，及但听闻，不由修行十善业道能得菩提般涅槃者，于一劫中，或一念顷，可令十方一切佛土地界微尘算数众生，皆登正觉，入般涅槃，然无是事！所以者何？十善业道，是大乘本，是菩提因，是证涅槃坚固梯蹬。

“善男子，若但发心，发誓愿力，不由修行十善业道能得菩提般涅槃者，于一劫中，或一念顷，可令十方一切佛土地界微尘算数众生，皆登正觉，入般涅槃，然无是事！所以者何？十善业道，是世出世，殊胜果报功德根本。

“善男子，若不修行十善业道，设经十方一切佛土微尘数劫，自号大乘，或说或听，或但发心，或发誓愿，终不能证菩提涅槃，亦不令他脱生死苦。

“善男子，要由修行十善业道，世间方有诸刹帝利、婆罗门等大富贵族，四大王天乃至非想非非想处，或声闻乘，或独觉乘，乃至无上正等菩提，皆由修行十善业道，品类差别。

“是故，善男子，若欲速满无上正等菩提愿者，当修如是十善业道以自庄严。非住十恶不律仪者，能满如是无上正等菩提大愿。若求速悟大乘境界，速证无上正等菩提，速满一切善法愿者，先应护持十善业道。所以者何？十善业道，是能安立一切善法功德根本，是世出世胜果报因，是故应修十善业道。”

尔时，世尊重显此义，而说颂曰：

“欲除诸有苦，证得大菩提，
应修十善轮，精勤勿放逸，
便于三乘法，及补特伽罗，
一切出家人，皆得无误失。
信受行大乘，利乐一切众，
觉胜法净土，速证大菩提。
若离于杀生，一切皆爱敬，
恒无病长寿，常乐不害法，
一切所生处，恒乐佛所行，
常遇佛法僧，速成无上觉。
若离不与取，智者皆爱敬，
灭贪所生业，获无贪所生，
生生常巨富，能为大施主，
得众宝庄严，可爱净佛国。
若离欲邪行，灭臭秽烦恼，
枯竭贪爱河，速得净佛国，
拔诸众生类，令出欲淤泥，
安置于大乘，使勤修梵行。

若离虚诳语，得圣自在智，
常乐谛实言，灭虚妄众苦，
一言为证量，常遇佛法僧，
速得大菩提，劝修不妄语。
若离离间语，成众善法器，
常遇佛法僧，不归于断灭，
得圣无染著，陀罗尼宝藏，
达深法海源，速成无上觉。
若离粗恶语，常说柔软言，
众生皆爱敬，灭先世罪业，
令众常欢悦，成菩萨导师，
知诸佛所行，超过第十地。
若离杂秽语，智者皆爱敬，
为他所发言，具获五功德，
常听受圣言，恒欣求圣道，
圆满诸佛海，速得一切智。
若离于贪欲，不诽谤圣教，
供养服袈裟，弘三乘圣道，
当生净佛国，导师之所居，
乘于无上乘，速得最胜智。
若离于瞋恚，一向修慈心，
速疾证等持，乐众圣行处，
当生净佛土，远离诸过恶，
住彼证菩提，令离诸瞋忿。
若离于邪见，纯修净信心，
乐开示三乘，亦供养诸佛，
永脱诸恶趣，遇众贤圣者，
具诸菩萨德，速得最上智。
我说十善业，能趣胜菩提，
生长诸等持，陀罗尼忍地。
此轮大威德，能摧诸恶趣，
破坏诸恶障，速证大菩提。

福田相品第七之一

“复次，善男子，菩萨摩訶萨，有十财施大甲冑轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。何等为十？所谓布施种种饮食、衣服、宝饰、象马、车

乘，及以自身手足耳鼻、头目髓脑、皮骨血肉、国城、妻子、奴婢、田宅，如是一一行布施时，不顾身命，不专为己求于世间、出世间乐，发心布施；但欲普为一切有情生长大慈大悲芽故，发心布施；为欲引发善巧方便殊胜智故，发心布施；为欲引发一切有情安乐事故，发心布施；为欲除灭一切有情苦恼事故，发心布施；无胜他心，无粗犷心，无嫉妒心，无悭吝心，而行布施；于所施物若多若少，下至一食，终不希求自受果报，发心布施；终不希求声闻乘果，发心布施；终不希求独觉乘果，发心布施；于所施物若多若少，下至一食，但为希求一切种智，发心布施。

“善男子，菩萨摩訶萨，成就如是十种财施大甲冑轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。所以者何？声闻、独觉发心布施，无大慈悲，但为己身舍贫穷故，但为己身脱众苦故，但为己身得安乐故，但为己身证涅槃故，不能普为一切有情而行布施。菩萨摩訶萨发心布施，有大慈悲，普为有情舍贫穷故，普为有情脱众苦故，普为有情得安乐故，普为有情证涅槃故，不为自身而行布施。以是义故，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。菩萨摩訶萨，修行财施波罗蜜多时，于妙五欲心无染著，自所摄受一切乐具，普能施与一切有情；依普摄受诸有情心，依自忍受一切苦心，依灭一切有情苦心，依与一切有情乐心，依与有情大涅槃心而行布施。以是义故，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。

“善男子，若于五欲心无染著，具大慈悲，而行布施，是名菩萨摩訶萨也！亦名一切声闻、独觉真实福田。若不除断世间五欲，无大慈悲，而行布施，虽舍无量无边施物，而犹不得名为菩萨摩訶萨也！亦非一切声闻、独觉真实福田，此施不蒙圣印所印。是故应断世间五欲，具大慈悲，而行布施。若不断于世间五欲，无大慈悲，而行布施，不名菩萨，非真福田。

“善男子，染著五欲行布施轮，尚不能灭自身所有少分苦恼，况能除灭一切有情无量苦恼？”

尔时，世尊重显此义，而说颂曰：

“成就财施轮，智者净意乐，
尽离于五欲，安乐诸有情。
为乐诸有情，不求自果报，
虽行少分施，而名真福田。
虽复施众多，而依止五欲，
非圣印所印，住不定聚中。
虽行少分施，而不依五欲，

名声闻独觉，真实良福田。
故应舍五欲，常行清净施，
安乐有情众，成真实福田。”

“复次，善男子，菩萨摩訶萨，有十法施大甲冑轮。若菩萨摩訶萨成就此轮，从初心，一切五欲皆能除断，速能获得日灯光定，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。何等为十？谓诸如来所说正法，或声闻乘相应正法，或独觉乘相应正法，或与大乘相应正法，或世间法、或出世间法，或有漏法、或无漏法，或有为法、或无为法，或不二法。菩萨摩訶萨于此十法，深信敬重一切听闻，随力所能审谛领受，思惟观察究竟通利，随其所宜为他演说。于说法时，无嫉妒心，无悭吝心，无憍慢心，无求利心，无轻他心，无自举心；有恭敬心，有饶益心，有大慈心，有大悲心。为声闻乘补特伽罗，说声闻法，不为彼说独觉乘法及大乘法；为独觉乘补特伽罗，说独觉法，不为彼说声闻乘法及大乘法；为于大乘补特伽罗，说大乘法，不为彼说声闻乘法、独觉乘法；随诸有情根器所能，为说正法，非根器者，终不为说。于其大乘诸有情所，终不劝修独觉乘行、声闻乘行；于独觉乘诸有情所，或时劝彼修大乘行；于声闻乘诸有情所，或时劝修独觉乘行及大乘行。于诸如来所说正法，下至一颂乃至半句，深信敬重，终不毁谤、障蔽、隐没。于说法师起世尊想，于听法众起病者想，于所说法起良药想，断除五欲，无所希求，宣说正法。

“善男子，是名菩萨摩訶萨，十种法施大甲冑轮。若菩萨摩訶萨成就此轮，能断五欲，速能获得日灯光定，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“智者修法施，随器说三乘，
不为说余乘，恐闻而谤法。
称根器说法，不为非根器，
各随其所乐，劝进令欢喜。
终不劝大乘，令修二乘行，
或时劝彼二，进修中上乘。
常恭敬听法，深信不毁谤，
供养说法师，如佛世尊想。
劝闻妙法药，令除烦恼病，
舍利养名誉，而宣说正法。

“复次，善男子，菩萨摩訶萨，复有净戒大甲冑轮。若菩萨摩訶

萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何净戒大甲冑轮？

“善男子，菩萨净戒，有二种相：一者、共，二者、不共。云何菩萨共净戒轮？谓诸在家、近事、近住所受律仪，或复出家及受具足别解脱戒，如是律仪、别解脱戒，是名菩萨共净戒轮，共诸声闻、独觉乘等。菩萨不由此净戒轮，能除一切有情烦恼、诸恶见趣及能解脱业障生死，此不名为大甲冑轮，亦不由此名为菩萨摩訶萨也，及名一切声闻、独觉真实福田。云何菩萨不共净戒大甲冑轮？谓诸菩萨，普于十方一切有情，起平等心、无扰动心、无怨恨心，护持净戒；普于一切持戒犯戒、布施悭贪、慈悲忿恚、精进懈怠、下中上品诸有情所，无差别心，无差别想，护持净戒；普于三界一切有情，无恚无忿，及诸恶行，护持净戒；普于三有蕴、界、处中，无所分别，护持净戒；不依欲界，护持净戒；不依色界，护持净戒；不依无色界，护持净戒；不观诸有一切果报，护持净戒；不依一切得与不得，护持净戒，不依诸行，护持净戒；是名菩萨不共净戒大甲冑轮。

“善男子，若菩萨摩訶萨成此净戒大甲冑轮，从初发心，一切五欲皆能除断，得名菩萨摩訶萨也！超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“住在家律仪，出家解脱戒，
与二乘等共，不名摩訶萨。
智者修空法，不依诸世间，
亦不依诸有，护持清净戒。
离取相尸罗，无染无诸漏，
护持如是戒，名真实福田。

“复次，善男子，菩萨摩訶萨，复有安忍大甲冑轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何安忍大甲冑轮？

“善男子，菩萨安忍，有二种相：一者、世间，二者、出世间。云何菩萨世间安忍？谓有漏忍，缘诸有情有取有相，依诸果报，依诸福业所发起忍，依自诸色、声、香、味、触所发起忍，有发趣忍、无堪能忍、力羸劣忍、弃众生忍、有诳诈忍、矫悦他忍、不为利乐诸有情忍，是名菩萨世间安忍。如是安忍，共诸声闻、独觉乘等。此不名为大甲冑轮，亦不由此名为菩萨摩訶萨也，及名一切声闻、独觉真实福田。云何菩萨出世安忍大甲冑轮？谓无漏忍；一切贤圣大法光明，普为利乐一切有情，无染著忍；永断一切所作事业，语言、因相、文

字、音声、行依处安忍；修此忍故，能断一切三结、三受、三相、三世、三有、三行、三不善根、四种瀑流、四扼、四取、四种身系；修此忍时，心意寂静，是名菩萨出世安忍大甲胄轮。

“善男子，若菩萨摩訶萨成此安忍大甲胄轮，从初发心，一切五欲皆能除断，得名菩萨摩訶萨也！超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“安忍说二种，谓有相无相，
有相忍有著，智者不称誉。
修忍依三行，依蕴界处等，
是名有漏忍，非摩訶萨相。
为灭四颠倒，修无染著忍，
寂静三行等，此忍可称誉。
能寂静诸行，离一切分别，
心平等如空，此忍可称誉。
诸法同一趣，空无相寂灭，
心无所住著，此忍成大利。

“复次，善男子，菩萨摩訶萨，复有精进大甲胄轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何精进大甲胄轮？

“善男子，菩萨精进，有二种相：一者、世间，二者、出世间。云何菩萨世间精进？谓诸菩萨精进勇猛，勤修三种世福业事。何等为三？一者、施福业事，二者、戒福业事，三者、修福业事。修此即名三种精进。如是精进，缘诸众生有漏有取，依诸果报，依诸福业，是名菩萨世间精进。如是精进，共诸声闻、独觉乘等。此不名为大甲胄轮，亦不由此名为菩萨摩訶萨也，及名一切声闻、独觉真实福田。云何菩萨出世精进大甲胄轮？谓诸菩萨勇猛精进，于诸众生其心平等，除灭一切烦恼业苦。如是精进，一切贤圣共所称誉，无漏无取，无所依止；普于一切精进懈怠、布施悭贪、持戒破戒、慈悲忿恚、下中上品诸众生所，无差别心，无差别想，勇猛精进；普于三界一切众生，平等无二，为作事业，语言思惟诸行依处，无所住著，勇猛精进；普于三有蕴界处中，无所分别，勇猛精进；不依欲界，勇猛精进；不依色界，勇猛精进；不依无色界，勇猛精进；不观诸有一切果报，勇猛精进；不依一切得与不得，勇猛精进；不依诸行，勇猛精进；不依三种世福业事，勇猛精进；具足出世三福业事，勇猛精进；是名菩萨出世精进大甲胄轮。

“善男子，若菩萨摩訶萨成此精进大甲胄轮，从初发心，一切五

欲皆能除断，得名菩萨摩诃萨也！超胜一切声闻、独觉，普为一切声闻、独觉，作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“于六根染著，漂愚五瀑流，
虽勇猛精进，智者皆厌毁。
缘众生精进，有漏及有取，
非真实福田，不名摩诃萨。
智者勤精进，远离一切著，
心无所依止，名真实福田。
不染著名色，离蕴界处等，
为众作归依，是名摩诃萨。
行世如水月，修精进究竟，
此轮能永断，众生烦恼缚。

“复次，善男子，菩萨摩诃萨，复有静虑大甲冑轮。若菩萨摩诃萨成就此轮，从初心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何静虑大甲冑轮？

“善男子，菩萨静虑，有二种相：一者、世间，二者、出世间。云何菩萨世间静虑？谓诸菩萨，依著诸蕴，修习静虑；依著诸界，修习静虑；依著诸处，修习静虑；依著欲界，修习静虑；依著色界，修习静虑；依著无色界，修习静虑；依著三律仪，修习静虑；依著三解脱，修习静虑；依著四念住，修习静虑；依著四正断，修习静虑；依著四神足，修习静虑；依著五根，修习静虑；依著五力，修习静虑；依著七等觉支，修习静虑；依著八圣道支，修习静虑；依著地界，修习静虑；依著水界，修习静虑；依著火界，修习静虑；依著风界，修习静虑；依著空界，修习静虑；依著识界，修习静虑；依著乐受，修习静虑；依著苦受，修习静虑；依著不苦不乐受，修习静虑；依著虚空无边处，修习静虑；依著识无边处，修习静虑；依著无所有处，修习静虑；依著非想非非想处，修习静虑；依著此世，修习静虑；依著他世，修习静虑；依著小想，修习静虑；依著大想，修习静虑；依著无量想，修习静虑。如是静虑，有漏、有取、有所依著，是名菩萨世间静虑。如是静虑，共诸声闻、独觉乘等。此不名为大甲冑轮，亦不由此名为菩萨摩诃萨也，及名一切声闻、独觉真实福田。云何菩萨出世静虑？谓诸菩萨，远离诸蕴，修习静虑；远离诸界，修习静虑；远离诸处，修习静虑；远离欲界，修习静虑；远离色界，修习静虑；远离无色界，修习静虑；远离三律仪，修习静虑；远离三解脱，修习静虑；远离四念住，修习静虑；远离四正断，修习静虑；远离四神足，

修习静虑；远离五根，修习静虑；远离五力，修习静虑；远离七等觉支，修习静虑；远离八圣道支，修习静虑；远离地界，修习静虑；远离水界，修习静虑；远离火界，修习静虑；远离风界，修习静虑；远离空界，修习静虑；远离识界，修习静虑；远离乐受，修习静虑；远离苦受，修习静虑；远离不苦不乐受，修习静虑；远离虚空无边处，修习静虑；远离识无边处，修习静虑；远离无所有处，修习静虑；远离非想非非想处，修习静虑；远离此世，修习静虑；远离他世，修习静虑；远离小想，修习静虑；远离大想，修习静虑；远离无量想，修习静虑。如是静虑，能发贤圣广大光明，无漏无取，无所依著，是名菩萨出世静虑大甲冑轮。

“善男子，若菩萨摩訶萨成此静虑大甲冑轮，从初发心，一切五欲皆能除断，得名菩萨摩訶萨也！超胜一切声闻、独觉，普为一切声闻、独觉，作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“为舍己重担，修有所得定，
求断自烦恼，非真智者相。
依器有所观，求解脱修定，
取著此彼岸，非利乐有情。
为利乐有情，修定舍重担，
灭一切烦恼，是真智者相。
为润诸有情，修无依著定，
永断诸有爱，是名大慧者。
为解诸有缚，令住无畏城，
修行寂止定，是名摩訶萨。”

大乘大集地藏十轮经卷第十

福田相品第七之二

“复次，善男子，菩萨摩訶萨，复有般若大甲冑轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何般若大甲冑轮？”

“善男子，菩萨般若，有二种相：一者、世间，二者、出世间。云何菩萨世间般若？谓诸菩萨，唯依读诵、书写、听闻，为他演说三乘法，欲求除灭一切众生无明黑暗，欲求发起一切众生大慧光明；谓于如来所说种种与声闻乘相应正法，精勤读诵，听闻书写，为他演说，劝正修行；或于如来所说种种与独觉乘相应正法，精勤读诵，听

闻书写，为他演说，劝正修行；或于如来所说种种与无上乘相应正法，精勤读诵，听闻书写，为他演说，劝正修行；不求贤圣无漏道支，不求圣道，不求圣道所摄解脱，不行寂静真实般若，常行有见有相般若。如是般若，有取有著，是名菩萨世间般若。如是般若，共诸声闻、独觉乘等。此不名为大甲冑轮，亦不由此名为菩萨摩訶萨也，及名一切声闻、独觉真实福田。云何菩萨出世般若？谓诸菩萨，精勤修习菩提道时，随力读诵、听闻、书写，为他演说三乘正法，而于其中，依无所得方便，而住无所行动、无所思惟、无有根本，以如虚空心、普寂灭心、无增减慧、无取著心、无生灭心、无退转心、法平等心、真如心、实际心、法界心、无我心、无分别心、寂灭安忍离分别心，善巧安住无成坏地，善巧安住无住无著胜妙慧地。如是般若，无取无著，是名菩萨出世般若大甲冑轮。

“善男子，若菩萨摩訶萨成此般若大甲冑轮，从初发心，一切五欲皆能除断，得名菩萨摩訶萨也！超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。

“复次，善男子，菩萨摩訶萨，复有善巧方便大甲冑轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何名为善巧方便大甲冑轮？

“善男子，菩萨善巧方便，有二种相：一者、世间，二者、出世间。云何名为菩萨世间善巧方便？谓诸菩萨，或为自利，或为他利，或为俱利，常怀彼此示现种种工巧技术，为自及他得成熟故，承事供养诸佛世尊、或诸菩萨、或诸独觉、或诸声闻、或母、或父、或诸病者、或诸羸劣无依怙者；若见厄难临被害者，种种勤苦方便救济，以四摄事成熟有情。是诸菩萨自住大乘，于诸声闻及独觉乘非大乘器，若诸声闻及独觉乘根未熟者，为说微妙甚深法教令其修学；或劝勤修诸圣静虑，或为开示最胜义谛，劝令修行超四颠倒，觉悟四种无堕法性，或令趣入四无碍解，或复乃至劝令安住四念住、四正断、四神足、五根、五力、七等觉支、八圣道支，有余无余，道及道果，趣入巧智，令其成熟。若诸有情，贪求名称、利养、富贵，诸根躁扰，善根未熟，劝令读诵诸阿笈摩，及毗奈耶、阿毗达摩，或劝读诵除佛所说顺解脱论，令其成熟。若诸有情，不乐布施，劝令惠舍种种珍财，令其成熟。若诸有情，暴恶不仁，劝令修学四种梵住。若诸有情，心多忿恚，劝令修忍。若诸有情，心多懈怠，劝修精进。若诸有情，心多散乱，劝修静虑。若诸有情，具足恶慧，为说正法，谓以记说，教诫方便，令其成熟。若诸有情，不敬三宝，具无依行，劝受三归，令敬三宝；或劝受学近事律义，或劝受学近住律仪，令其成熟。或劝修习种种工巧技术业处，令其成熟。如是等菩萨摩訶萨种种世间巧方便智，过殑伽沙菩萨摩訶萨以是一切书论、工巧、伎术业处，加行、精进巧方便智，摧伏一切外道异学，如是名为菩萨世间善巧方便。此巧

方便，共诸声闻、独觉乘等，亦作一切佛法依因，亦是善巧诸行依处，亦是善巧任运无思，灭退堕法。

“又善男子，若诸菩萨，不依明师，不依善友，修行世间善巧方便，是诸菩萨愚于世间善巧方便，向诸恶趣，不能随顺安住出世巧方便智，亦非一切真实福田，不能善巧知诸有情根行差别。以于善巧方便愚故，为诸声闻及独觉乘非大乘器，及于大乘根未熟者，宣说大乘，令其修学；又为大乘法器有情，宣说声闻、独觉乘法，令修声闻、独觉乘行；为独觉乘法器有情，说声闻乘，令其修习声闻乘行；为声闻乘法器有情，说生死法，令其爱著，不为宣说厌生死法。又于善巧方便愚故，若诸有情，乐行杀生，广说乃至执著邪见，为彼宣说甚深大乘，不为宣说生死流转，死此生彼，众苦果报，令其厌怖离诸恶法。又于善巧方便愚故，乃至若诸有情，乐修净戒，令修布施；若诸有情，乐修安忍，劝舍安忍，令修净戒；若诸有情，乐修精进，劝舍精进，令修安忍；若诸有情，乐修静虑，劝舍静虑，令修精进；若诸有情，乐修般若，劝舍般若，令修静虑。如是菩萨，愚于世间善巧方便，不能真实利乐有情，与诸有情为恶知识。此巧方便，依有所得，有所执著，如是名为菩萨世间善巧方便。如是世间善巧方便，共诸声闻、独觉乘等。此不名为大甲冑轮，亦不由此名为菩萨摩訶萨也，及名一切声闻、独觉真实福田。云何名为菩萨出世善巧方便？谓诸菩萨，但为利他，不为自利，示现种种工巧技术，为成熟他，承事供养诸佛世尊、或诸菩萨、或诸独觉、或诸声闻、或母、或父、或诸病者、或诸羸劣无依怙者；若见厄难临被害者，种种勤苦方便救济，以四摄事成熟有情，随其意乐，随其根器，为诸有情宣说正法。又能渐次劝诸声闻修独觉乘，劝诸独觉修习大乘。若于声闻及独觉乘根未熟者，为说厌离生死苦法，令其修学，厌离生死，欣求涅槃；若诸有情，乐行杀生，广说乃至乐著邪见，随其根性，或为宣说生死流转，死此生彼，众苦果报，令其厌怖离诸恶法；或为宣说与声闻乘相应正法，或为宣说与独觉乘相应正法，或为宣说无上乘中浅近之法，令渐修学。若诸有情，已乐布施，为说胜上受持净戒，令其修学；广说乃至若诸有情，已乐静虑，为说胜上无漏圣道所摄般若，令其修学。此巧方便，依无所得，无所执著，如是名为菩萨出世善巧方便大甲冑轮。

“善男子，若菩萨摩訶萨成就如是善巧方便大甲冑轮，从初发心，一切五欲皆能除断，得名菩萨摩訶萨也！超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。”

尔时，世尊欲重显此义，而说颂曰：

“所修慧有二，世间出世间，
取著名世间，无取著出世。

修善巧方便，依二种差别，
有所得世间，无所得出世。
若唯说一乘，是名恶说法，
不能自成熟，亦不能度他。
一向恶众生，为说三乘教，
是则为愚痴，不名摩诃萨。
有堪趣三乘，欣求闻正法，
为说乐生死，非为智者相。
专意谛思惟，随根欲教化，
此善巧方便，智者所称誉。
众生虽有恶，而堪入三乘，
随根器教导，令解脱众恶。

“复次，善男子，菩萨摩诃萨，复有大慈大甲冑轮。若菩萨摩诃萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何大慈大甲冑轮？

“善男子，慈有二种：谓法缘慈、有情缘慈。法缘慈者，名为大慈，名大甲冑；有情缘慈，不名大慈，非大甲冑。所以者何？有情缘慈，共诸声闻、独觉乘等，声闻、独觉为自利乐，不为有情，精勤修习有情缘慈；声闻、独觉为自寂静，为自涅槃，为灭自惑，为灭自结，不为有情，精勤修习有情缘慈。是故此慈，不名大慈，非大甲冑。其法缘慈，不共声闻、独觉乘等，唯诸菩萨摩诃萨众所能修行，菩萨摩诃萨普为利乐一切有情，精勤修习此法缘慈；菩萨摩诃萨普为一切有情，寂静及得涅槃，灭烦恼结，精勤修习此法缘慈。是故此慈，名为大慈，是大甲冑。又诸菩萨，修法缘慈，不依诸蕴，不依诸处，不依诸界，不依念住，乃至不依道支，不依欲界，不依色界，不依无色界，不依此世，不依他世，不依此岸，不依彼岸，不依得，不依不得。如是菩萨修法缘慈，超诸声闻、独觉乘地，是名菩萨法缘大慈大甲冑轮。

“善男子，若菩萨摩诃萨成此大慈大甲冑轮，从初发心，一切五欲皆能除断，得名菩萨摩诃萨也！超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“声闻及独觉，修有情缘慈，
心带十三过，唯求自利乐。
菩萨大名称，普为诸有情，
修不共大慈，心离十三过。
心除十三垢，为趣大菩提，

修法缘大慈，成福田非远。
安住十三力，出过诸有情，
犹如师子王，超胜诸禽兽。
降伏十三怨，离断常边执，
心无有染浊，速证大菩提。

“复次，善男子，菩萨摩訶萨，复有大悲大甲冑轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。所以者何？一切声闻、独觉乘等，但为己身得利乐故而修行悲，不欲普为一切有情得利乐故修行大悲；菩萨摩訶萨，不为己身得利乐故而修行悲，但欲普为一切有情得利乐故修行大悲。是故菩萨成就大悲大甲冑轮，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。是菩萨摩訶萨普为饶益诸有情故，行四摄事而成熟之。谓由大悲，普为利乐诸有情故，行布施摄，能舍一切珍宝财物、禽兽、仆使、国城、妻子乃至身命，无所吝惜；行无所得为方便故，不见一切所化有情，不见施者，不见受者，不见施物，不见施行，不见施行所得果报，乃至不见无所得行。如是大悲，普为利乐诸有情故，行爱语摄，行利行摄，行同事摄，随其所应，如上广说，乃至不见无所得行。是菩萨摩訶萨常以最胜能调伏心、能寂静心、无数量心、不行一切蕴处界心，所生无动无住大悲大甲冑轮，成熟一切所化有情，心无厌倦。如是名为菩萨大悲大甲冑轮，不共一切声闻、独觉。

“善男子，若菩萨摩訶萨成此大悲大甲冑轮，从初发心，一切五欲皆能除断，得名菩萨摩訶萨也！超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。”

尔时，世尊重显此义，而说颂曰：

“甚深微妙法，所成之大悲，
难测类虚空，无色无安住。
菩萨大精进，具杜多功德，
胜智成大悲，勇健超诸世。
无依怙有情，生死苦秽缚，
大悲水沐浴，令解脱众苦。
菩萨行大悲，能竭生死海，
非诸声闻众，及独觉所行。
众生贪恚痴，迷谬堕恶趣，
濯以大悲水，脱苦得萧然。

“复次，善男子，菩萨摩訶萨，复有能引遍满虚空、无量无边、

广大众具、辞无碍解、一切佛法、诸三摩地、诸陀罗尼、坚固大忍大甲冑轮。若菩萨摩訶萨成就此轮，从初发心，一切五欲皆能除断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。云何菩萨摩訶萨能引遍满虚空、无量无边、广大众具、辞无碍解、一切佛法、诸三摩地、诸陀罗尼、坚固大忍大甲冑轮？谓诸菩萨，于一切法审谛照察，如月光遍满虚空，其心平等，无依无相，无住无染；普于一切三摩地门、陀罗尼门，心无行动；于诸眼色、眼识、眼触，离意染著，心无行动；于眼触缘，生内三受，或乐、或苦、或非苦乐，心常寂定，无所取著；于诸耳声、耳识、耳触，于诸鼻香、鼻识、鼻触，于诸舌味、舌识、舌触，于诸身触、身识、身触，于诸意法、意识、意触，广说亦尔，普于一切心意识中，心常寂定，无所取著；于心意识，所生三受，或乐、或苦、或非苦乐，心常寂定，无所取著；普于三世诸蕴、界、处，一切品类皆无取著，心无行动；普于一切三界、三行、三触、三受、三根、三乘、三律仪、三解脱，一切品类，其心寂静，无住无相，无所取著，平等而住；普于一切布施、净戒、安忍、精进、静虑、般若波罗密多，心无行动，寂静而住；如是普于四念住、四正断、四神足、五根、五力、七等觉支、八圣道支，心无行动，寂静而住；普于一切九次第定，心无行动，寂静而住；又于三行无障法智，道支道体所引作用，皆无取著，心无行动；于阿赖耶、非阿赖耶，有取、无取，有漏、无漏，此岸、彼岸，小大无量，作与不作，善、恶、无记，诸品类中，心无行动，寂静而住；普于一切大慈大悲，善巧方便，成熟有情，乃至十地、三不护、四无所畏，乃至十八不共佛法，一切品类皆无取著，心无所动，寂静而住。菩萨摩訶萨，由此轮故，能永息除三受过失，能永寂灭一切分别，能永远离一切法相，复能安住能引一切虚空眼顶、诸三摩地、诸陀罗尼、善巧方便大甲冑轮。菩萨安住如是轮故，一切过去所引未尽恶不善业、无暇恶趣、诸有诸趣、死生诸业，皆能除灭，令尽无余，不受果报。

“又善男子，譬如世界火灾将起，五日出时，一切世间小池、小河、大河、大海，水皆枯竭，灭尽无余；如是菩萨成就能引遍满虚空、无量无边、广大众具、辞无碍解，一切佛法、诸三摩地、诸陀罗尼、坚固大忍大甲冑轮，复能安住能引一切虚空眼顶、诸三摩地、诸陀罗尼、善巧方便大甲冑轮，一切过去所引未尽恶不善业、无暇恶趣、诸有诸趣、死生诸业，皆能除灭，令尽无余，不受果报。

“又善男子，譬如世界水灾起时，于此三千大千世界，诸小世界，各四大洲，八万小渚妙高山王，及诸山等，皆为灰水，浸烂销尽，令无有余；如是菩萨成就能引遍满虚空、无量无边、广大众具、辞无碍解、一切佛法、诸三摩地、诸陀罗尼、坚固大忍大甲冑轮，复能安住能引一切虚空眼顶、诸三摩地、诸陀罗尼、善巧方便大甲冑轮，一切过去所引未尽恶不善业、无暇恶趣、诸有诸趣、死生诸业，

皆能除灭，令尽无余，不受果报。

“又善男子，譬如黑暗遍满虚空，朗日出时皆能除灭；如是菩萨成就引遍满虚空、无量无边、广大众具、辞无碍解、一切佛法、诸三摩地、诸陀罗尼、坚固大忍大甲冑轮，复能安住能引一切虚空眼顶、诸三摩地、诸陀罗尼、善巧方便大甲冑轮，发起无边虚空智日，能永除灭自身四倒无明黑暗，一切过去所引未尽恶不善业、无暇恶趣、诸有诸趣、死生诸业，皆能除灭，令尽无余，不受果报。又由此故，于诸佛法，增进自在常无退转，不复随顺恶友力行；常得不离见一切佛及诸菩萨、声闻弟子，不离闻法，不离亲近供养众僧；于诸功德心常无厌，乃至菩提恒无间断；又常不离念佛思惟，乃至梦中亦无暂废。

“又善男子，云何菩萨摩訶萨能引遍满虚空、无量无边、广大众具、辞无碍解、一切佛法、诸三摩地、诸陀罗尼、坚固大忍大甲冑轮？谓诸菩萨入初静虑乃至第四静虑，入无边虚空处乃至非想非非想处，入灭受想定；住此定中，一切三受、三行断灭，心无行动，诸受想思触作意等悉皆断灭；安住此定，或一日夜，或复乃至七七日夜，受定味食；从此定起，其心寂静，无所取著，宴然而住。复入胜义究竟空定，住此定中，其心平等，无所取著犹若虚空，身诸毛孔皆出霜液，状如昂星，灭除一切郁烝结缚；从此定起，得正忆念，最胜喜乐充遍其身，如大自在天子入现一切乐定，身诸毛孔皆遍受乐。如是菩萨，乐触其身便思念佛，思念佛故则唯见佛，不见余相。菩萨尔时，若念一佛则见一佛，若念多佛则见多佛；若念小身佛则见小身佛，若念大身佛则见大身佛，若念无量身佛则见无量身佛；若念自身为佛身相，则见自身同于佛身，众相圆满；若念他身为佛身相，则见他身同于佛身，众相圆满；若念一切情非情数所有色像为佛身相，则见一切情非情数所有色像皆同佛身，众相圆满，不见其余一切色像。菩萨尔时便作是念：‘一切诸法、一切色像，皆如幻等，谛实不虚。我今复应皆悉断灭一切三受、三行等法，令无有余。’作是念已，入灭尽定；住此定中，如心所期，皆尽断灭，受定味食，或一七日夜，或二七日夜，或三、四、五、六、七、八、九、十七日夜，或经无量百千俱胝那庾多劫，随力所能，安住此定，受定味食；从此定起，其心寂静，无所取著，宴然而住。复入胜义究竟空定，广说如前。乃至思念佛身相已，知一切法、一切色像，皆如幻等，谛实不虚。

“善男子，是名菩萨摩訶萨能引遍满虚空、无量无边、广大众具、辞无碍解、一切佛法、诸三摩地、诸陀罗尼、坚固大忍大甲冑轮。菩萨摩訶萨成就此轮，则能安住能引一切虚空眼顶、诸三摩地、诸陀罗尼、善巧方便大甲冑轮。住此轮故，发起无边虚空智日，能永除灭自身四倒无明黑暗，一切过去所引未尽恶不善业、无暇恶趣、诸有诸趣、死生诸业，皆能除灭，令尽无余，不受果报。

“善男子，若菩萨摩訶萨成就此轮，从初发心，一切五欲皆能除

断，超胜一切声闻、独觉，普为一切声闻、独觉作大福田，一切声闻、独觉乘等皆应供养、承事、守护。由此轮故，于诸佛法，增进自在常无退转，不复随顺恶友力行，常得不离见一切佛及诸菩萨、声闻弟子，不离闻法，不离亲近供养众僧；于诸功德，心常无厌，乃至菩提恒无间断；又常不离念佛思惟，乃至梦中，亦无暂废。如是菩萨，福德智慧速疾圆满，不久安住清净佛国，证得无上正等菩提；于彼佛国，一切有情皆受化生，色相如佛，烦恼微薄，皆住大乘。”

尔时，世尊重显此义，而说颂曰：

“欲成诸法器，断一切烦恼，
常趣入真空，众事无难作。
为断诸有缚，当勤修等持，
功德定相应，必获难思慧。
修静虑无色，灭定真空观，
起念佛胜智，能尽一切恶。
有无一切法，破以真空观，
永离诸恶趣，常得见诸佛。
善修真空观，勤学诸善法，
供养一切佛，速当成佛果。
为有情亲友，灭除烦恼病，
速住净佛国，证得大菩提。
众生如佛相，遍满于佛土，
皆趣求佛乘，离声闻独觉。”

获益嘱累品第八

佛说如是大法门时，于众会中，有殑伽沙等菩萨摩訶萨，过去久习念佛思惟，今闻世尊所说念佛修观方便，皆得念佛三摩地门。复有无量无边众生，闻是法已，皆得一切定命华鬘陀罗尼门。复有无量无边众生，闻佛所说，皆得一切首楞伽摩电光依止陀罗尼门。复有无量无边众生，闻佛所说，皆得一切法自在转光明依止顺忍。复有无量无边众生，闻佛所说，远尘离垢，于诸法中生净法眼，得预流果。复有无量无边众生，闻佛所说，得一来果。复有无量无边众生，闻佛所说，得不还果。复有无量无边众生，闻佛所说，皆得最上阿罗汉果。复有无量无边众生，闻佛所说，心求出离三界牢狱，依佛出家，趣入正法。复有无量无边众生，闻佛所说，尽寿安住十善业道，依声闻乘发心不退。复有无量无边众生，闻佛所说，尽寿安住十善业道，依独觉乘发心不退。复有无量无边众生，闻佛所说，尽寿安住十善业道，依大乘中，发阿耨多罗三藐三菩提心，不复退转。复有无量无边众

生，闻佛所说，得世正见，由此正见，除灭一切往恶趣因、烦恼恶业，增长一切向善趣因、正愿善业。复有无量无边众生，闻佛所说，皆受三归，安住近事、近住、净戒，乐供养佛，乐听闻法，乐奉事僧，昼夜精勤，曾无懈怠。复有无量无边众生，闻佛所说，远离一切邪趣、邪归、恶意、恶业，于佛法中得决定信，弃舍家法，清净出家。

尔时，世尊告虚空藏菩萨摩訶萨言：“善男子，吾今持此地藏十轮大记法门，付嘱汝手，汝当受持，广令流布。若诸众生，于此法门，有能读诵，思惟其义，为他解说，住正行者，汝当为彼守护十法，令于长夜利益安乐。何等为十？一者、为彼守护一切财位，令无损乏；二者、为彼守护一切怨敌，令不侵害；三者、为彼守护，令舍一切邪见、邪归、十恶业道；四者、为彼守护，令免一切身语谪罚；五者、为彼守护，遮断一切谤毁轻弄；六者、为彼守护，令于一切轨范、尸罗皆得无犯；七者、为彼守护，令悉除灭一切非人、四大乖反、非时老病；八者、为彼守护，不遭一切非时非理灾横夭殁；九者、为彼守护，命欲终时，得见一切诸佛色像；十者、为彼守护，令其终后，往生善趣，利益安乐。

“善男子，若诸有情，于此法门，有能读诵，思惟其义，为他解说，住正行者，汝当为彼勤加守护如是十法，令于长夜，利益安乐。”

时虚空藏菩萨摩訶萨白佛言：“唯然世尊，我当受持如是法门，广令流布。若诸有情，于此法门，有能读诵，思惟其义，为他解说，住正行者，我当为彼守护十法，令于长夜，利益安乐。”

时薄伽梵说是经已，于众会中，虚空藏菩萨摩訶萨、地藏菩萨摩訶萨、金刚藏菩萨摩訶萨、好疑问菩萨摩訶萨，天藏大梵等，及诸天、龙、药叉、健达缚、阿素洛、揭路荼、紧捺洛、莫呼洛伽、人非人等，一切大众，闻佛所说，皆大欢喜，信受奉行。

佛说大方广十轮经卷第一

序品第一

如是我闻：一时，佛在佉罗堤耶山牟尼仙所住之处，与大比丘众俱，无量无数声闻大众，菩萨摩訶萨无量无边不可称计，说月藏讫。

尔时，南方有大香云雨大香雨、大华云雨大华雨、无量璎珞云雨种种璎珞雨、大衣云雨大衣雨。于佉罗堤耶山牟尼仙所住处，是诸大雨皆悉遍满，大阴云雨而雨香华、衣服、璎珞，亦说种种无量法音，如是次第乃至广说三归声、持戒声、忍辱声、精进声、禅定声、具足智慧声、降伏四魔声、名称普闻遍满三界声、念定总持声、空无相无愿声、离欲声、色如聚沫声、受如水泡声、想如热炎声、行如芭蕉声、识如幻声、无常苦空无我之声、惭愧声、念处声、慈悲喜舍声、证诸法声、涅槃声、无窟宅声、三乘声、转法轮声、成熟众生声、度三恶道声、六波罗蜜声、善巧方便乃至具足十地声、游戏神通声、游戏无上大乘声、阿鞞跋致声、无生法忍声、入佛海声。

诸来大众悉见种种雨，亦闻无量诸法音声，随意衣服严饰之声，又复皆悉见其两手有如意珠雨如意宝。其如意宝各出光明，如是光中皆见十方恒沙世界一切诸佛，是诸佛所各有菩萨而自围绕。其光明中尽见十方诸佛世界，若有病者，蒙光触身众病除愈；一切系缚及应死者，光触身故皆得解脱；若身行恶、口行恶、意行恶，光触身时悉除三恶；若诸饥渴众生，蒙光触身亦皆饱满；种种谪罚身受苦切，乏少衣服严饰璎珞种种之物，蒙光触身，随所念忆悉得满足；若有杀生、偷盗、邪淫、妄言、绮语、两舌、恶口、骂詈，蒙光触身，如是等恶皆悉得除；若诸众生有求不得苦，蒙光触身皆悉受乐；光明清净悉无翳障、风云、尘雾及诸臭秽，苦恼辛酸不善音声乃至怖畏恶触皆得除灭，远离诸恶，一切邪伪谄曲亦皆无余，一切恶欲悉得弃舍，诸妙胜乐一切皆集。

尔时，众会皆悉坚固，难动如地，心无去来不可毁坏。如是大众得未曾有：“以何因缘，我等身体今皆大重不能自胜？”当于尔时，有一帝释名曰净有，于大众中不远而坐。于是净有，即从座而起，整衣服，右膝著地，合掌向佛，以偈问曰：

“实语实见者，实住牟尼尊，
久住于法行，惟愿演说法。
佛为实因缘，能灭众生苦，
何故于此处，而雨种种雨？”

大众皆喜悦，心生信安乐，
开示诸疑惑，令住于大乘。
身难动如地，及一切人天，
皆见如是相，大众悉有疑。
两手各皆出，摩尼宝光明，
一切诸衣鬘，杂饰严身具。
十方之福田，离一切过恶，
众苦得休息，皆因于救世。
一切诸天人，无能说因缘，
是谁神通力，而来至此处？
为佛诸菩萨，梵魔帝释等，
唯愿救世说，神通之因缘。”

尔时，世尊告净有帝释言：“如是！如是！汝今谛听，吾当说之。是地藏菩萨摩訶萨，于无量阿僧祇劫，为五浊恶世成熟众生故而来至此，与八十频婆那由他百千亿万等大菩萨俱，悉为礼拜供养恭敬故，欲见大众集会故，欲听大众起随喜故。

“是地藏菩萨作沙门像，现神通力之所变化有如是等大庄严事，亦是如来不可思议无量功德，亦名声闻、辟支佛正法伏藏，亦名解脱智宝之大尘渚，亦名菩萨救世之法，亦名涅槃导师商主。犹若如意宝珠所求满足，亦如宝渚一切商人所趣，亦如大地能生善根，亦是涅槃大法神器，亦是功德清静之瓶，亦是日月照明行处，亦是黑闇幽冥大炬，如月清凉除烦恼热，如无足者得如意乘，如乱心者得甘露味，如羸老者遇其机杖，是大福田之根本也。舍心无碍如彼浚流，救苦不难如赴亲友，除结使炎之大云盖，如净水珠能除秽浊，若趣险道回示正路，是疲极者安隐床座，是四使流生死桥梁，亦度彼岸无上大船，是三善根胜妙果报，是诸施者最上大乘。持戒不动如须弥山，精进难坏犹如金刚，忍辱坚固亦如大地，总持正法心无二相，禅定庄严如妙华鬘，智慧深广犹如大海，心无所依犹如虚空，方便无染如众华聚。处于外道如师子王，远离烦恼如犀一角，灭诸结使如洗尘垢，能除臭秽如疾飘风，将护有疾如彼良医，消除众病如妙药王，断诸烦恼如持利剑，为怖畏者作大亲友，防诸怨敌如坚城堑，能除其渴如清净水，济诸饥乏犹如甘果，亦是裸者最胜衣服，与盛热者为密云盖。具足如是善根果报，清静第一坚固不坏，微妙色处能生爱乐，于大会处而生惭愧，除诸结使禅定行处，乘四正勤四摄馱流，忍辱大地亦如须弥，总持深广如彼大海，神足无碍自在虚空，降伏诸魔一切结习，修行正道无量禅定，亦为一切种智之渚，能转无作清静法轮。地藏菩萨摩訶萨，为欲来故，先现此瑞；亦为供养恭敬我故，来至于此。”

佛复赞叹地藏菩萨言：“汝从南方来。”

八十频婆百千那由他菩萨，以神通力俱来至此，悉作声闻像在如

来前，顶礼佛足右绕三匝，即为合掌而说偈言：

“两足最胜大导师，恒修于慈发善心，
能生忍辱如大地，解脱众生除瞋恚。
具足最大诸相好，而能严饰一切界，
能满一切诸福田，常修实语及大慈。
能悉断除诸爱网，皆能如实善安住，
舍余清净诸佛国，其中众生具善根。
本愿欲度浊恶世，成熟一切诸众生，
能生坚固勤精进，超过无量诸苦行。
常修难行恐怖处，超过无量诸苦行，
布施持戒忍精进，修习禅定与智慧。
无数诸佛菩萨等，声闻大众皆供养，
充给饥渴病汤药，救度一切诸系缚。
我从本来舍身命，为利众生无贪惜，
常为法故而舍身，皮骨血肉施众生。
己所得乐皆悉舍，有大慈悲为一切，
于诸众生烦恼网，修行寂灭悉超度。
关闭一切六情根，常能远离于诸欲，
修苦无常空无我，亦善观察于世谛。
诸苦所因爱欲本，悉能干竭诸烦恼，
以是义故摄六根，能善断除一切爱。
能修无量大悲门，普给一切诸群生，
我要不舍本誓愿，而亦不住胜菩提。
一切众生如如相，亦见群盲受苦切，
如是思惟为众生，便能勤修大精进。
发起精进施戒忍，修诸禅定及智慧，
犹如其母唯一子，而以慈心养育之。
汝于众生亦如是，常能赈给于一切，
是故汝速得菩提，度脱一切无量众。
汝本修习菩提时，誓愿不舍一众生，
无不使住施戒忍，精进禅定修智慧。
常能于彼末世中，求于无上胜菩提，
是故救世于末劫，速得无上最胜道。
调伏恶魔夜叉等，诸恶龙神及与人，
犹如金刚断诸结，悉能安住诸圣道。
为无量众而授记，当成菩提无上道，
功德最胜明智者，是真福田之大将。
于无量界为救世，普覆一切诸群生，
于十方界作福田，名声远闻遍一切。

是故一切诸菩萨，皆悉能舍于己事，
是汝神足而来集，俱诣世尊大牟尼。
愿令如来时演说，若得闻者皆欢喜，
既闻法已勤精进，常得修学菩提道。
皆由于汝大将力，当得疾近于菩提，
未曾闻见今大集，是故汝等俱来会。
有十三亿诸夜叉，甚为残害食血肉，
疾舍诸恶到于此，安住最胜无上道。
有得忍辱陀罗尼，有得最妙诸禅定，
有已获证诸漏尽，无著罗汉人中尊。
有能善修四无量，有能住于四摄法，
有得最胜四辩才，复有得修诸法忍。
有得三昧首楞严，有得虚空智慧眼，
有得无生诸法忍，皆因世尊所说法。
悉制一切诸异学，九十六种外道等，
摧伏一切魔怨已，皆是救世大将力。
关闭地狱鬼畜生，利益一切天人众，
是故真实诸众生，而皆来集佛神力。
饥馑疾疫刀兵劫，悉于今日而消灭，
若有盲冥失正道，此诸众生令解脱。
无量烦恼狂乱者，皆悉安置寂灭道，
合众悉能舍己业，为礼如来故至此。
无量世界亿佛土，皆是救世之所住，
名闻十方称无量，我等闻已故至此。
一切种智功德海，得闻如是真实相，
度脱一切诸众生，我今欢喜故敬礼。
令我增长无量德，是故稽首今顶礼，
而于百千万亿劫，常勤修习种种施。
我今当学发弘誓，我今来此佛神足，
我当修学处浊世，能到第一胜菩提。”

尔时，地藏菩萨摩訶萨，以若干种天华、香华、瓔珞而散佛上，所散之华变成宝盖。是时，地藏菩萨在佛前坐，听受经法。诸来会众见地藏菩萨，生希有想，以种种香华、瓔珞、缯盖、幢幡及诸衣服，以散地藏菩萨上，作如是言：“我等快得善利，佛神力故，得见如是诸大丈夫礼敬问讯。”

尔时，复有渴仰菩萨摩訶萨，从座而起，整其衣服，右膝著地，合掌向佛，白佛言：“世尊，此善男子，从何佛国而来至此？修何善根，能作如是种种赞叹说佛功德？我从昔来未曾闻见。”

尔时，世尊告渴仰菩萨：“止！止！大士，不须是问。一切大众

及诸天人，除佛如来，无有能知此善男子功德数量。如来今日必当显说，但诸天人愚闇自蔽。是族姓子，成就不可思议功德首楞严三昧，入如来行处，得无量法忍，于诸佛法而得自在，入深法忍，已度一切智海。

“此善男子，游戏以师子光三昧，登一切智山须弥之顶，摧伏异学成熟众生，在所佛国悉皆止住。随诸佛国入智三昧，以是三昧力故，令一切国土众生见诸菩萨。随诸佛国入智乐三昧，于彼国土所有供养随供养佛。随诸佛国入清净乐三昧，入是三昧，悉见诸欲一切过患，而于心相清净无染。随诸佛土入惭愧三昧，而于彼国令诸众生悉得惭愧，远离诸恶无有愚闇。随诸佛国入水渚三昧，亦能令彼一切众生悉入是定，令诸众生得宿命智，能知先世死此生彼，善于禅定。随诸国土入无忧明三昧，亦能令彼一切众生悉离忧愁。于诸佛国入神通三昧，亦能令彼一切众生，皆入神通三昧。随佛国土入智明三昧，亦能令彼一切众生悉离愚痴，便见十方一切佛国。随诸佛国入佛炬三昧，亦能令彼一切众生皆归三昧。随诸佛国入金刚光三昧，入是三昧已，亦能令彼一切诸佛国土，铁围、大铁围乃至须弥山王，一切溪涧沟壑，皆悉不现，地平如掌；能令一切诸恶毒蛇及以蛊道，皆悉消灭。随诸佛国入智力降伏三昧，亦能令彼魔及魔眷属，皆悉惊怖，归依三宝。随诸佛国入电光三昧，亦能令彼一切众生，离后世怖，得法安慰。随诸佛国入味乐三昧，亦能令彼一切众生，随其所念饮食悉得充足。随诸佛国入精气悦乐三昧，亦能令彼一切众生，得坚牢身离诸病苦。随诸佛国入乐具三昧，亦能令彼一切众生，悉得床敷、卧具、衣服、瓔珞，无所乏少病瘦医药，身皆端正。随诸佛国入无诤智三昧，亦能令彼一切众生，身皆长壮端严殊大，远离一切怨憎系缚，皆得受乐，皆好布施、持戒、忍辱、精进、禅定，心无散乱，具足智慧深入法门。随诸佛国入无忧怖三昧，而能于彼一切众生，皆得欢乐心离忧怖。随诸佛国入光乐三昧，于彼佛国一切众生，得无碍智，离于事务。随诸佛国入善住金刚三昧，亦能令彼一切众生，得诸根具足，悉不缺坏。随诸佛国入观幢三昧，亦能令彼一切众生，皆悉厌离舍弃诸恶，护持十善，上生天道。随诸佛国深入大慈音声三昧，亦能令彼一切众生，各相哀愍皆起慈心，得无畏心，得无恼心、等心，更相悲念。随诸佛国入集福处三昧，亦能令彼一切众生，得离斗争、疾病、饥馑、非时风雨，饮食苦涩辛酸等味皆悉消灭。

“是地藏菩萨，所至佛土，入海电三昧，随所至国，一切皆悉变成宝地，离诸秽恶，衣树、瓔珞树、华果树严饰佛界。于晨朝时，入恒河沙世界三昧，为成熟众生故，从禅定起，令无量无边诸佛世界，于五浊恶世成就众生悉空无余。有佛世界，刀兵起时，此族姓子，以晨朝时入三昧力故，刀兵钲仗皆悉消灭。随诸佛土有疾疫劫起害诸众生，亦令病疫自然消除。随诸佛土若有饥馑劫起，令彼饥馑亦尽消灭，悉得充满。

“此族姓子，以是三昧威神力故，能令成熟一切众生。地藏菩萨，以不思议功德成熟众生，于过去无量恒河沙诸佛所，久发大悲坚固誓愿，皆悉成熟一切众生，庄严势力犹如雷震，于一食顷而能成熟无量亿等那由他人具足善根。

“若有众生为无量亿种种诸苦恼，饥渴切逼，有称地藏菩萨名者，悉能令彼饮食充足，灭诸苦恼，置涅槃道皆得快乐。

“若有众生乏少衣服、宝冠瓔珞、病瘦医药种种众具，若称地藏菩萨名者，随其所欲皆令充足，安住涅槃道得第一乐。

“若有众生离喜乐心，而与不喜乐集会者，若称地藏菩萨名者，一切乐具尽皆归之，所不喜者亦悉远离，是意所乐者能令皆得安住涅槃得第一乐。

“若有众生身心受苦，众病所持，能称地藏菩萨名号，身心苦恼皆悉除愈，安置涅槃得第一乐。

“若诸众生恶心相向，能称地藏菩萨名号一心归依者，令彼众生柔和忍辱更相惭愧，慈心忏悔，安住涅槃。

“若诸众生生闭牢狱，枷锁其身具受众苦，能称地藏菩萨名号一心归依者，令诸众生皆得解脱自在无碍；乃至应被系缚囚执鞭杖，能称地藏菩萨名号一心归依者，亦复如是皆悉解脱，安住涅槃得第一乐。

“若有众生诸根不具疲极懈怠，颠狂放逸忘失本心，贪欲、瞋恚、愚痴、嫉妒、悭吝、邪痴、懦弱、睡眠等恶皆悉炽盛，能称地藏菩萨名号一心归依者，如是众苦皆令解脱，安住涅槃得第一乐。

“若有众生为大水漂流，猛火所焚，或坠高岩投身山险，或坠树木及诸屋舍而身颠覆，有如是等无量怖畏，称地藏菩萨名号一心归依者，有如是等怖畏之事悉令解脱，安住涅槃得第一乐。

“若有众生为诸毒蛇、种种禽兽之所螫者，或被种种毒药所中，能称地藏菩萨名号一心归依者，是诸怖畏悉得解脱。

“若有众生为阿波魔罗掩蔽伤害，若一日、二日、三日乃至四日，能令心狂、心乱、心战、心调、心颠倒乃至失心，能称地藏菩萨名号一心归依者，如是族姓男女，于诸怖畏悉皆解脱，安住涅槃得第一乐。

“若有众生为诸罗刹恶鬼所捉，鸠槃荼所捉，富单那所捉，迦吒富单那、师子虎狼、恶毒蛊道，或为军阵战斗怨贼围绕，临敌惧死贪生求乐，能称地藏菩萨名号一心归依者，如是族姓子男女，速离众苦悉除患难，安住涅槃得第一乐。

“若有众生为多闻、为信、为戒、为施、为禅定、为神通、为解脱，为色声香味触，为诸功德，为工巧华果树木敷具，为增益财利，为诸医药、房舍、屋宅，为使水雨顺时，为得清凉，为求男女妻子方便修福，为除寒热令得正念，求如是等种种因缘，能称地藏菩萨名号一心归依者，此善男子威德力故，悉能称彼无量众生功德所愿。

“譬如下种于彼荒田，能称地藏菩萨名号一心归依者，皆悉变成微妙胜果。何以故？此善男子，以于过去无量阿僧祇不可数劫如来之前，发坚誓愿犹如大地，令一切众生皆得受用。是善男子功德力故，能令善根芽茎枝叶乃至华果，皆悉润泽增长成熟。若有众生造作诸恶十不善业，能称地藏菩萨名号一心归依者，一切结使烦恼消灭，远离十恶成就十善，于诸众生起慈悲心，兴利益心。是善男子，以精进力于一食顷，无量阿僧祇诸佛世界于一佛国以一食顷，度脱无量恒河沙阿僧祇众生，以是相貌令脱诸恶，皆悉成就不可思议功德。

“此善男子，以是坚固誓力，能令成熟一切众生。如是族姓子，或作梵天身，成就众生；或作自在天、大自在天、摩醯首罗天，或作欲界他化自在天、化乐天、兜率陀天、炎摩天、帝释身、四天王身，或作菩萨身，或作辟支佛身，或作声闻身，或作转轮圣王身，或作婆罗门、刹利、毗舍、首陀等身，或作男身、女身，或作童男、童女身，或作乾闥婆、紧那罗、摩睺罗伽、天、龙、夜叉身，或作罗刹身，或作鸠槃荼身，或作毗舍闍身，或作富单那身，或作师子身，或作虎狼身，或作象身、马身，或作水牛身，或作种种鸟身，或作阎罗王身，或作地狱卒身，或作地狱身，为诸众生种种说法，随诸众生显示三乘，皆悉令住不退转地。此善男子，成就如是不思议功德伏藏，以解脱宝而自庄严，亦是菩萨诸法之母，向大涅槃无上商主。

“善男子，弥勒、文殊、观世音、普贤等而为上首，如是等恒河沙诸大菩萨，若人于百劫中礼敬供养欲求所愿，不如于一食顷礼拜供养地藏菩萨，功德甚多，所愿速得，皆悉满足。何以故？此地藏菩萨，于一切众生能大饶益，为如意宝故。此族姓子，若欲成熟众生故，能发坚固大悲伏藏，令满一切众生心愿。是故，善男子、善女人应当供养地藏菩萨。”

时会大众十方来者，菩萨摩訶萨及诸声闻，一切天、人、夜叉、乾闥婆等，从座而起，随力供养，或以金银等屑散彼地藏菩萨上，或以种种宝华衣服、摩尼宝珠及华鬘、珠璎、金缕幡盖以散地藏菩萨上，复以无量音乐种种赞颂供养地藏菩萨。

尔时，地藏菩萨摩訶萨，复以此供施修伽陀，即说偈言：

“天人龙神所供养，十方菩萨皆来集，
闻有救世大功德，愿佛受我最胜供。”

尔时，地藏菩萨摩訶萨，说是偈已，顶礼佛足。于是世尊，复说偈言：

“欲起坚固净智者，能灭众生诸烦恼，
令众得乐如宝手，能断结网如金刚。
汝起大悲诸精进，以是供养最胜尊，

其心如海救一切，度诸众生苦彼岸。”

尔时，地藏菩萨摩訶萨，作礼而起，白佛言：“世尊，我当济度此四天下，增长比丘、比丘尼、优婆塞、优婆夷，增长护念、增长寿，令身无疾病，增长色力，增长名称，增长资业，增长亲友，增长眷属，增长信戒，增长多闻，增长于施，增长忍辱，增长方便，增长觉意及诸圣谛，增长入于大乘一切正道，增长照明真实法相，增长成熟一切众生，增长发大慈悲喜舍，增长无量一切净法，增长妙称名闻三界，增长法雨润三有流，增长大地一切物味，增长众生所有善业，增长法气无数福行，增长智慧皆悉照明，增长六波罗蜜所行之道，增长五眼通达无碍，增长灌顶，增长涅槃，增长威德照明一切未曾有法。众德究竟记莂咒术陀罗尼章句，我于过去恒河沙佛所，皆悉受持如是等咒，增长白净具足之法，增长种子、根茎、华果、一切药谷，增长云雨地水火风，增长福乐，增长财物，增长无量最胜果报，增长基业。此咒利益能除一切苦恼系缚！”即说咒曰：

“閼浮（一） 閼閼浮（二） 阿含閼浮（三） 婆吒迦罗閼浮（四） 菴罗閼浮（五） 毗罗閼浮（六） 婆闍罗閼浮（七） 阿卢伽閼浮（八） 达摩閼浮（九） 婆吒摩閼浮（十） 婆帝邪尼梨呵罗閼浮（十一） 鞞婆卢伽叉摩閼浮（十二） 忧婆舍摩閼浮忧婆舍摩閼浮（十三） 那邪那閼浮（十四） 闍那娑牟致啰那閼浮閼浮閼浮（十五） 毗尼梨夜那閼浮（十六） 奢多婆閼浮（十七） 娑遮修[路-各+致]（十八） 摩醯梨（十九） 阇弥（二十） 阇弥（二十一） 遮加啰斯（二十二） 遮迦摩私梨（二十三） 差梨（二十四） 奚隶（二十五） 迦啰娑啰娑啼（二十六） 呵梨波啰鞞（二十七） 波遮啰婆阇祇（二十八） 啰遮阇祇（二十九） 娑啰遮遮醯梨（三十） 摩梨（三十一） 伊迦他他企（三十二） 他丘楼（三十三） 閼梨（三十四） 舍梨（三十五） 弥梨（三十六） 摩叉（三十七） 多叉（三十八） 鸠梨（三十九） 弥梨（四十） 鸯叉之多毗（四十一） 頞梨（四十二） 祇梨（四十三） 波罗祇梨（四十四） 叉吒苦婆梨（四十五） 贞祇贞祇（四十六） 贞求梨（四十七） 休楼休楼（四十八） 鸠流兜弥梨（四十九） 弥梨叉（五十） 婆茶婆呵罗（五十一） [閼-心+规][閼-心+规]梨（五十二） 嘘[口+留]嘘楼留（五十三） 婆娑闍毗（五十四） 输檀祇（五十五） 私婆呵（二十六） 摩诃复阇迦楼沙毗输檀祇私婆呵（五十七） 迦楼沙罗婆毗输檀祇私婆呵（五十八） 迦楼沙乌闍毗输檀祇私婆呵（五十九） 萨婆呵奢波利富啰檀祇私婆呵（六十） 萨婆娑斯邪三波阇祇私婆呵（六十一） 萨婆多他迦多阿[(卷-已)/衣]底私婆呵（六十二） 萨婆菩提萨埵阿[(卷-已)/衣]底阿□无地底私婆呵（六十三）

“世尊，今所说咒，是未曾有威德照明，是众德本记菟章句陀罗尼神咒。我于过去恒河沙诸佛所受持是咒，增长一切白净之法，增长善种、根茎枝叶、华果药谷，增长雨泽、地水火风，增长喜乐，增长财物，增长胜妙，增长产业。此咒威力，善能系缚，亦名善解。世尊，说此陀罗尼咒，与四天下声闻弟子，比丘、比丘尼、优婆塞、优婆夷，皆悉护念，增长财物一切产业，增长佛法能令流布，广大无量三界受乐。”

佛说大方广十轮经卷第二

诸天女问四大相品第二

尔时，地藏菩萨广说如是大记菟经时，佉罗堤耶山六种震动，一切音乐不鼓自鸣，雨众宝华，一切大众皆悉战栗生希有想。

尔时，功德天女、功德乐天女、妙音声天女、坚固地神天、未曾有天、大光明天，如是等天以为上首，与一万八千及余大自在鬼神，从座而起，合掌向佛，白佛言：“希有世尊！希有善逝！我等虽于四大得自在力，而不能知四大根本初中后相起灭因缘，不识怨憎，不知是善不善，乃至亲友。若善男子，得是甚深般若波罗蜜，能善分别如是四大初中后相，知诸生灭。”

佛言：“如是！如是！天女，此善男子，得甚深般若波罗蜜，善知四大初中后者。譬如善神有如意珠，能雨种种无量宝雨，有大利益；如是，善天女，此善男子复能雨于种种觉意无量诸宝，皆悉遍施一切众生。譬如宝渚，能出无量若干种宝；是善男子满足种种觉意等宝，亦复如是。譬如波利质多罗树，华初开时，光色妙好；如是善男子，以无量佛法而自庄严，亦复如是。如师子王，于一切众生中无能惊者；如是善男子，于诸众中亦复如是，得无所畏。譬如日出灭一切闇，如是善男子，能除众生一切谄曲结使之闇，亦复如是。譬如明月照四天下，能令迷者还得正道；如是善男子，能令未入三乘，迷于生死旷野道者，皆使回向得其正道，安住三乘。譬如大地百谷种子及诸药木，一切众生悉依增长；如是善男子，一切助道诸余善法皆得增长。譬如须弥山王能善坚固，安住一切令无增减；如是善男子，安住佛法而不舍于一切众生，善根坚固无有缺减不令漏失。譬如虚空，一切众生行住出入依止而住；如是善男子，一切众生亦皆依止，增长一切无量功德。”

尔时，一切大众闻是地藏菩萨名号，生希有心，得未曾有，恭敬尊重，皆大欢喜，皆悉谛观地藏菩萨，目不暂舍。

尔时，世尊欲重宣此义，而说偈言：

“头陀功德尽和合，诸声闻众无异相，

地藏菩萨真大士，为礼世尊而来此！
度三恶趣诸苦恼，为礼世尊而来此！
诸天普雨无量种，皆为供养世尊故，
而谛观察于四方，离垢照明天帝释，
合掌一心向于佛，皆欲劝请于世尊：
我今欲见此大众，摩尼宝珠出光明，
一切福田最广大，悉见光明而普照。
世尊神通光明照，今为谁故而显现？
诸来大众最勇猛，地藏至此真佛子。
伏藏七宝满足施，佛藏珍宝是无畏，
种子即是大菩萨，一切众生之商主。
此主能生佛法宝，大功德海而精进，
大悲体性甚聪哲，能救一切众生苦。
亦能救度诸怖畏，譬如明月示正道，
能生善根如大地，亦如金刚摧诸结。
为大施主解脱宝，漂诸烦恼如大水，
如盖普覆烦恼热，亦如良医除众病。
于一食顷赞地藏，过诸菩萨百亿劫，
如诸智者无量德，是故地藏大名称。
烦恼系缚诸众生，皆令远离得解脱。
得首楞严大三昧，能度诸禅至彼岸，
十二因缘悉清静，其智广大如虚空。
无量佛国诸众生，皆悉能灭黑闇聚，
而于一切四禅中，遍观佛国修诸行，
能令众生入三昧，皆悉得离烦恼热。
众生过去恶业故，常处刀兵疾疫劫，
于此世间受苦恼，彼善男子能救脱。
一切六道诸众生，常为苦恼之所逼，
当悉归命于地藏，当令苦恼悉消灭。
众生轮转没诸苦，互相残贼起斗诤，
若能归命地藏者，令彼斗诤皆悉忍。
趣于三恶甚可畏，所求不得常苦恼，
亦当归命于地藏，一切皆得除怖畏。
若修持戒及念定，欲得多闻智慧者，
皆当归命于地藏，随心所愿悉满足。
欲得如是诸功德，及以工巧善种子，
皆当归命于地藏，令彼所愿悉满足。
一切药谷诸福田，乃至欲求男女等，
皆当归命于地藏，令彼所愿悉满足。
若欲修行诸功德，一切所有依大地，

药谷滋茂而润泽，亦因地藏得增长。
结业烦恼所覆障，造作十恶诸不善，
皆当归命于地藏，悉除结使重恶罪。
能以正法示众生，作种种形随应说，
具修布施诸功德，欲救众生起大悲。
假使满足于百劫，不可分别其功德，
是名功德之大藏，一切皆当供养之。”

发问本业断结品第三

尔时，地藏菩萨摩诃萨，从座而起，整其衣服，长跪叉手，右膝著地，合掌向佛，白言：“世尊，如我今者欲发少问，唯愿听许，时为解说。”

佛言：“汝是真善丈夫，为欲显示一切众生无碍智慧，亦令他人作大丈夫。若有所问，随汝意答，勿生疑难，如来今日当为解说，令汝欢喜。”

尔时，地藏菩萨以偈问曰：

“曾于十三劫，修行佛福田，
饥馑与疾疫，悉为众生灭。
为亿诸佛等，造不思議供，
今见大会集，清净众俱来。
聪哲勤精进，皆来至此会，
一时而云集，无有诸浊恶。
浊世多讥嫌，作恶损净行，
云何不善识，扰乱毁威仪？
皆与恶逆俱，诽谤于正法，
毁誉诸贤圣，妄著于断常。
造作十恶业，不畏后世苦，
破坏三乘法，谄曲趣恶道。
无明蔽其目，贪嫉多奸伪，
云何转法轮，解脱诸谄曲？
烦恼金刚俱，云何得断离？
云何为总持，忍辱能柔和？
此集未曾有，令我值世将，
诸处未曾见，如是之大众，
具足头陀行，久修菩提道，
云何于此处，成佛转法轮？”

尔时，佛告地藏菩萨：“善哉！善哉！善男子，汝于过去恒河沙佛所已问此义。如是之法汝亦曾闻，具智慧行功德满足，以方便力渡于彼岸。汝为成就诸余众生安乐利益故，亦欲令一切菩萨摩訶萨众满足一切方便伏藏，为具六波罗蜜，欲满一切智海，为回诸帝王使不堕恶道，欲令十方世界三宝炽盛诸法久住，以是义故，问于如来。善男子，汝今谛听！谛听！当为汝说。”

地藏菩萨白佛言：“唯然，世尊，愿乐欲闻。”

佛言：“此是如来过去本誓愿力成就十轮。如此国土有五浊恶世，一切净法皆悉损减，离圣七财，远诸智人，为断常网之所覆障，载恶道车不畏后世，常处无明黑闇之中，具行十恶能造五逆，诽谤正法毁谤贤圣，远离一切诸善功德成就恶法，能于如是多恶世界，悉令安隐得无所畏，成就先圣最胜之法能转法轮，制诸怨敌皆悉际伏，摧灭烦恼犹如金刚，令诸众生安住三乘阿鞞跋致地。

“善男子，譬如有人远离功德，世界国土或自境内而有军起，或为邻国外来强兵之所践害，忧愁恼乱种种斗争，及诸诸伪欺诳妄语有种种病，愚闇所蔽目视不了，为童子鬼魅所持，阿钵摩罗之所惑著，身体干枯狂乱失心，诸根丑陋手足不具，常乏财产无有福祿，不为一切之所喜乐，多归异道起诸邪见，心意颠倒趣三恶道。如是国土多诸耆旧，以为辅相臣佐吏民，爵祿有序而与同好不相侵害，如是建国则有无量种种明制调伏人民，施戒慈忍威仪具足，难行苦行一切备满，以如是福德因缘，众生诸根皆悉具足，身体长大威德炽盛相好端严，常为一切尊重恭敬，皆共亲友仁性宽慈聪敏多智。若有尊重及诸王子备此德者，以诸香汤，调和冷暖，以用洗浴；著鲜净衣其光如宝，顶上复有如是宝珠真金华鬘，手系素缯，种种华鬘金银真珠以为珙环，杂宝珠网而作臂指，种种环玕如是等宝庄严其身，先所奉事天及诸仙一切帝释，悉皆听许敷置高座，如前父王登尊位时；升如是座，绍王位已，一切龙王、天帝、阿修罗帝、鸠槃荼帝，是前父王所有钟鼓，今受位时亦击此鼓。如是音声遍满城邑，一切刹利、婆罗门、毗舍、首陀，澡浴身体，著鲜净衣，种种诸宝缯盖、幢幡、金、银、摩尼、真珠、珊瑚、琉璃、珂贝、一切珍宝，以新王立，见有如是吉祥等相，故种种献奉。尔时新王绍灌顶位，先王所置宿旧先臣，随其所能各为职司，若己国内自有军兴，及以邻国起诸兵众，随有怨敌悉皆殄灭，守护己国无诸毁损，善增眷属更相亲友。

“善男子，若能如是，名为初轮灌顶王位，于其国土得安乐住初伏怨敌，寿命长远守护身命。如是，如是，善男子，若人处于五浊诸恶世界，远离于佛，是故此中一切众生，心多瞋恚更相侵逼，一切人民皆悉愁恼，愚闇痴冥起于断常，种种斗争贪嫉谄伪，作诸欺诳悉具十恶，取著众生恼乱人民，种种烦恼及诸过患，是故远离甚深法眼，为瞋恚病之所扰害，心常远离舍弃真实一切法味，意想散乱讥诃善法，乐所爱味常为烦恼及诸邪见惑网所覆，归依六师，伤败圣道，趣

向三恶。有诸菩萨摩訶萨已曾亲近供养过去无量诸佛，能度一切智慧大海，安住诸佛所行之道，皆悉集会到于我所。汝以修集种种布施，善能调伏成就苦行，远离诸恶，久修诸佛难行苦行，常念智慧方便福德，大慈大悲庄严瓔珞广大伏藏，一切禅定总持、忍辱诸地大海皆已具足，不生谄诳幻伪之心，身相柔和满足忍辱，而常善顺以自庄严，皆悉近于一切智海，其色盛妙光明具足，能为一切声闻、辟支佛作大导师，亦与一切生死怖畏众生为作安慰，即是拘楼孙佛、拘娜含牟尼佛、迦葉佛。如是等如来之子，于尘劫中最为上首，以禅定智水而自洗浴，著惭愧衣，是最胜大仙所行之处，亦是解脱功德华鬘，亦名一切种智无生真实而自庄严，是三善行能为三界作密云盖，已于过去一切佛土善得安住，处于金刚三昧之座，亦于过去声闻、辟支佛所，安置尊座，四念处座，亦是先佛所安置座，于一切智诸住于菩提，能转法轮绍三宝种令使不绝，击于法鼓出大音声遍满三界，以此法轮声使诸天、人、阿修罗、迦楼罗、紧那罗，摩睺罗伽、人非人等，鸠槃荼、富单那、迦吒富单那、饿鬼、毗舍闍，皆以四圣谛寂灭之相而自庄严，三转十二行法轮，昔所未转如今转之，一切沙门、婆罗门、若天、若魔、若梵皆不能转，为欲利益安乐一切诸天人故。

“善男子，是名转于初轮。若今后世、是处非处如实而知，到于安隐无畏之处，一切怨敌自然降伏；如实而知能转梵轮，处处现于五浊恶世，诸弟子等正师子吼，若作五逆罪业众生，成就十恶如是人等，碎诸烦恼犹如金刚，断诸有漏令得解脱，随其所欲安置三乘住不退地。

“善男子，譬如有人初登王位，受灌顶已，观察去来三世若干等种无量王事，而以智慧观察业因一切果报，随其性相而置爵位。以此三业故，令其国土增长安乐，邻国怨敌悉皆摧伏。何等为三？如灌顶王刹利，为护命故防备怨敌与他战斗，经营王宫及诸国土，一切奉禄、人民产业。是名灌顶大王成就第二轮，邻国怨敌不能侵害，守护身命长寿安乐。

“如是，善男子，如来始成佛道得无上智，过去、未来、现在一切法眼亦如三世诸佛所得法眼故修行正法，为欲观察一切业报差别之相，具深法眼分别业因，能令善根一切炽盛，长夜安隐，悉使众生成就种种无量之乐，能使一切外道怨敌自然降伏。

“何等为三业？坐禅、诵经、营理僧事。云何为禅？禅有十种。何等为十？第一知身，知身六入，知我我所，知业因为因自在受生，知种种爱无明黑闇，知所亲爱无有真实属众因缘，欲苦相续流注不绝，为灭此等令悉除断。云何为业流？观察一切三种业行，是名业流。生死无际，爱因缘有，是名烦恼流。烦恼因缘故，无明和合能生名色；名色和合因缘故，能生六入；六入因缘故，能生触；触因缘故，能生受；受因缘故，能生后有；后有因缘故，能生生；生因缘故，能生老病死苦，是名苦流。如是三流，皆从爱生。何以故？因无

明业爱为水润。为欲枯涸此三流故，乐观无常名无常忍，能观无常苦空无我，信一切法愚痴无智，如幻、如炎、如水中月、如梦，空无相无愿，寂灭无生，空无诸相。常观五阴空无相无愿，随顺忍乐观察出息入息，系念安般增数减数，观住、观灭、并观住灭。还数有二种：意与觉观俱，灭于觉观取出息入息相。减数有二：依止有出能除觉观，出息入息取其相貌。观住有二种：观出入息，见其灭想心能住定。灭有二种：尽除诸结深净于见，修出入息观察五阴。何以故？此出入息名色盛阴，亦名受想行识等盛阴，是名五盛阴种种不相应相。复有五种：非新、非故、非有、非聚、非言。如是五种，以此五阴观三种业，以此三业观究竟尽。复观六处，有我、我所，有业，无明为田，爱为湿润，究竟灭尽。以是观察，具四念处，修集满足，四念处、四正勤、四如意足、五根、五力、七觉分、八圣道分，乃至能满足十八不共法，得无生忍及一切智，具足首楞严三昧，修出入息安般三昧，满足一切正法住处。若能如是修诸禅定，则是供养过去未来一切诸佛，是名佛子，从佛口生，从正法生。有能如此善修禅者，或是大士诸菩萨等，或是漏尽辟支、罗汉，如所修集，是名菩萨摩訶萨，则能满足十八不共法，具一切智。善男子，是人不久当得阿耨多罗三藐三菩提，亦是三世如来世尊甚深法眼，满足业行观察果报，安住众生于十种禅定。如是善男子，则能转于如来所转禅定法轮。

“彼善男子，云何修于如来诵习？若有比丘、比丘尼、优婆塞、优婆夷，善男子有少信心微薄善根，于世谛中善根未熟，令彼众生于初中后夜以时诵习修禅喜悦求无上智，我于尔时安置大乘修习禅定，读诵受持种种供养，自诵教人诵，自说教人说，自供养教人供养，自住大乘亦教人住大乘，互相教化灭诸烦恼，皆为得于无上道利，亦欲灭诸众生无量等苦，亦为得入无所畏处涅槃之城。若有众生乐求辟支佛者，为说十二因缘法；乐求声闻者，为说百千四种阿含，及与无量阿毗昙等教，令诵习如说修行。善男子，是名如来修诵习轮。

“善男子，若有钝根众生，为欲发起善根因缘，懈怠少智忘失正念，贪著住处、衣服、饮食、四事供养，远离一切诸善知识。如此众生，教令劝化营理僧事及与佛法和尚阿阇梨故，是善男子，则为安置如来劝化营事福处。如是善男子，如实知于修习业法。

“善男子，是名第二佛轮。具足三业成熟众生轮，到于安隐无畏之处，能师子吼，转梵法轮，令诸外敌皆悉降伏，如实能知众生因缘。

“善男子，譬如灌顶刹利王，沙门、婆罗门、毗舍、首陀，谛善观察谁有勇健，种种伎能，多闻持戒，善知分别有功德者，方便智慧能勤精进坚固不退，种种福德而自庄严，于是众中作灌顶刹利王，随其相貌金银珍宝仓库谷帛，及诸田宅奴婢仆使，皆悉给与此国；若有于众生中能持戒者，如此众生亦给短乏。若有众生不持戒者，少于精进懈怠懒惰忘失正念，无慈愍心亦无反复，不畏后世在欲淤泥；如是

灌顶刹利大王，随其事相谪罚安慰，或以教令谪罚，或以系闭谪罚，或以财物谪罚，或复有夺种种产业，或有罚其鞭杖，或有截其支节，或有斩其身首，有如是等无量教授，是名灌顶刹利大王第三轮也，能令增益己之国土，降伏一切诸恶外敌，守护身命令得长寿，如是如是。

“善男子，若我声闻弟子，离于智慧方便福德及诸调伏，忘失正念，乱心放逸，归依于我，我知体性随其相貌而调伏之。若有贡高难可调伏，心不恭敬，不坚持戒，为法久住而调伏之，若起心念教令心悔，又须言语而谪罚者，驱令下意终不与语，亦于僧中谪罚令其礼拜，呵诘嫌责不同僧利，或在僧前四体投地自归伏罪，或时驱出不得共住。我知众生种种体性，心所趣向，能生信解，为利彼故，除其黑闇干竭驶流，得涅槃乐。为欲调伏破戒众生，广说诸经地狱等苦，若有众生能起信敬净意方便，随彼体相说诸善根，为具善故，乃至令得到无畏城。善男子，是名第三轮也。以如是轮，随彼众生得种种解，修行诸业，悉具善本，使得安隐到无畏处，如彼贤圣转佛法轮，外道怨敌自然降伏，能师子吼。

“善男子，譬如灌顶刹利大王，于国人民有若干种，邪归、邪见、邪解、邪出家，或于吉相专修如此，无量苦恼伤害众生。灌顶大王以先王旧法，为彼众生令专修学断除倒见，先王旧善治国之法亦使修行。灌顶刹利大王制法，令诸众生悉同一意俱共调伏，同希望、同所乐欲、同共归趣皆令和合，随顺先王旧国之法，听受诏命，皆共随伏同奉国法。尔时灌顶刹利大王，常与国人同其饮食，而共戏乐不相疑猜，心相体信共行王法，是名灌顶大王第四轮也。以如是轮，能令己国悉得增长，并制怨敌皆悉降伏，能保国土守护寿命。

“善男子，如来世尊，见诸众生有若干种邪归、邪见，希乐邪业，观诸众生，以是因缘，已于过去诸佛如来在大众前，数数开示佛法因果，说六波罗蜜修行正道，说佛法僧三宝圣种，数数显现一切业报，示教利喜而将导之，令诸邪见悉得解脱，及与四众亦皆解脱，具修善行柔和调顺，游戏四念处，于诸解脱知见正道，悉得快乐令法久住，使三宝种终不断绝，乃至四正勤、四如意足、五根、五力、七觉分、八圣道分，一切禅定解脱知见，悉得自在游戏无碍。如是，善男子，是名如来第四轮也。如来成就如是轮故，令诸众生一切归依，皆修善业同其知见，安隐快乐悉令住于无畏之地，高胜大仙所证之处，转佛法轮，一切沙门、婆罗门、诸梵、魔、天所不能转，摧伏天魔一切外道，于四众中能师子吼。

“善男子，譬如灌顶大王，能令己国及他人民，若自妻色心无厌足，于他产业并诸妻色皆生贪著，守护城郭禁诸杂物，国土村邑及以王宫，乃至戍逻，皆悉遮制致密坚固。善男子，是名第五灌顶大王禁制轮也。时灌顶王，如是成就轮已，能令外诸怨敌皆悉降伏，亦使己国常得增长救护身命。

“善男子，如来多陀阿伽度，能令魔王波旬，九十五种众邪外道，及诸无量一切众生，于己产业心无厌足，乃至欲害我故，以火坑毒饭，推山欲压，放其醉象，或拔利剑，以如是等而逐于我，或以麀糲而竺于佛，或以淫欲而谤如来，或言非人亦非丈夫，如是种种诽谤毁谤，而口恶骂于佛法僧，为诸利养众因缘故，而生嫉妒诽谤声闻。如来世尊善守六根，住四梵处，教诸声闻，或以四念处，以四辩才，为说声闻三解脱门，如是如来有若干种，或以世间法及出世间法，能令一切如实而知。善男子，是名如来第五轮也。如来修如是轮，以出世间智，令他众生种种归依，皆同产业共其知见，安隐快乐住无所畏，是诸高胜大仙居处，转佛法轮，沙门、婆罗门、诸梵、魔、天所不能转，悉能摧伏一切天魔及诸外道，于四众中能师子吼。

佛说大方广十轮经卷第三

灌顶喻品第四

“善男子，譬如灌顶刹利大王，诸秘要法守护之事皆悉备已，然后与诸宫人嫖女而自围绕，游戏五欲放逸自恣，不摄六根肆情快乐，是名灌顶刹利大王第六轮也，外诸怨敌悉皆降伏，增益己国，寿命长远。

“族姓子，如来世尊及诸菩萨摩訶萨、诸声闻众，深自防护得无所畏。尔时如来入于初禅，第二、第三乃至第四禅，入于空处、识处、不用处、非想非非想处，悉入诸佛行处三昧。尔时如来入三昧已，无量亿那由他天、龙、夜叉、乾闥婆、阿修罗、迦楼罗、紧那罗、摩睺罗伽、人非人等，饿鬼、毗舍闍、富单那、迦吒富单那，粗弊恶心其意很戾无有愍伤，于诸众生不起慈心言无后世，而彼见我入一切佛行处三昧故，得胜欢悦于诸三宝，得最胜盛爱乐欢喜，尊重恭敬得未曾有，离一切恶，心多悔过，于一切种无量无数业障、烦恼障、法障，于一刹那顷悉能灭尽，功德智慧皆得具足，背离生死趣向涅槃，一切皆悉护持佛法，是名如来第六轮也。如来成就如是轮故，禅定解脱三摩跋提断众生结，以是智慧灭诸烦恼到安隐处，得无所畏，高大胜仙转于梵轮，若沙门、婆罗门，及诸魔、梵所不能转，一切外道尘劳怨敌皆悉降伏，于四众中而师子吼。

“善男子，譬如灌顶刹利大王与四兵众，一切己国城邑、聚落园树、田泽泉池、溪谷丘涧及诸旷野，遍观己国，于其中间所有产业，若于彼处多有疑畏敌国怨贼，刹利大王便随其处，置同心人防诸怨贼，善守己国令得安乐，是名刹利灌顶大王第七轮也，外诸怨敌皆悉降伏，增益己国，寿命得长。

“如是，族姓子，如来世尊为诸众生开示佛眼，若欲心如实知欲心，若瞋心如实知瞋心，若痴心如实知痴心，亦知众生为诸烦恼有种种

种病，随其所行如实而知。如来悉于如是等处，皆以方便精进势力，令诸众生随其类根，以禅定药除灭烦恼。若有众生多贪爱者，教以不净；若有众生可以四梵堂治者，教修四梵堂；若有众生多愚痴者，教观因缘；若有众生应修数息者，教以数息；若有众生应修三解脱门者，教以三解脱门；若有众生应修禅定者，教以禅定；若有众生应修无色定者，教以无色定；乃至应以首楞严三昧断诸众生烦恼病者，亦即教修首楞严三昧。何以故？不使众生堕于四魔，令得自在断人天道，亦复不令诸众生等，入于恶趣断三宝种。是善男子，如来能知一切至处，是名如来第七轮也。如来成就如此轮故，到安隐处得无所畏，高大胜仙能转法轮，一切沙门、婆罗门，及诸魔、梵所不能转，诸余外道一切怨敌皆悉降伏，于四众中而师子吼。

“善男子，譬如灌顶刹利大王，为诸众生念先种姓，幼小嬉戏所生之处，及诸澡浴、偃卧饮乳、剪治手足、一切爪甲、按摩支节，乃至戏弄灰土供奉事者，习学无量种种技术，游行他国晨夜住处，敬事王者及诸大臣，并作太子至今登位，得为大王，受诸娱乐自在无碍。尔时诸方四维上下，有大音声说偈赞叹，愿使常以正法治国，不恼众生，为护国土故，是名刹利灌顶大王第八轮也。成就如是轮已，是时灌顶刹利大王，能令一切外道怨敌皆悉降伏，自保寿命令得增长。

“如是，善男子，如来世尊于大众中观宿命因缘，一生、二生、三生，乃至无量百千亿生，忆念劫成劫坏，乃至无量亿劫一切成坏，我生彼处，如是种姓，如是名字，如是生处，食如是食，受如是苦乐，如是长寿，如是久住，如是寿命边际，于彼没已而来生此，复于此没往生于彼，能知彼相一切方所，若干种别本宿命事，是名如来第八轮也。如来成就如是轮已，到安隐处得无所畏，最胜大仙转于法轮，一切沙门、婆罗门及诸魔、梵所不能转，外道怨敌皆悉降伏，于四众中能师子吼。

“善男子，譬如灌顶刹利大王，于其国界所有人民悉知根源，种姓眷属皆悉勇健，种种技术，知其贫富、端正丑陋。乃至死时，或以自业命终而死，或犯王法刑戮而死，或更相残害夭寿而死，或以鞭杖闭系囚缚，或以技术战阵斗争，或以财物，或以爱欲，或以瞋恚，或以饥渴，或以已过患，或以老死，或以中年，或以幼少，或作善业，或作恶业，一切死者皆悉察知因缘本末。如是思惟，若有众生修善因缘为欲生天，或有众生修恶因缘趣向恶道。如是思惟，修身善行、修口善行、修意善行，我常方便教修布施，皆令调伏随顺此行，若命终时当生天上，常处善趣，远离恶道。如是灌顶刹利大王，勤修一切身口业善，好行布施饮食、衣服、象马乘骑、卧具医药种种所须，乃至给使、奴婢僮仆皆悉施与，并舍头目及诸手足，不惜身命，悉断杀生、偷盗、邪淫、妄言、恶口、两舌、绮语、贪瞋邪见。如是灌顶刹利大王，有十种利益，护善名称而得财业，身相微妙，多得眷属，少病少恼得贤智眷属，趣向善处，皆悉供给亲近供养，名闻十方，一切

皆为说偈赞诵，诸大天神悉来拥护，身坏命终得生天上，是名灌顶刹利大王第九轮也。成就如是轮已，增益国界，寿命延长。

“如是，善男子，如来世尊为诸众生，悉知他人死此生彼，如实而知：若有众生成就身业不善、口业不善、意业不善，诽谤贤圣，邪见颠倒，以是邪见因缘业故，身坏命终，堕于恶趣生地狱中，或生畜生及诸饿鬼。若有众生，成就身善业、口善业、意善业，不诽谤贤圣，具足正见，成就正见业因缘故，身坏命终，入于善趣得生天上，生天上已或生人中，尽诸结漏。如是如来，善知众生诸业因缘。如来于诸众生，悉能发于大慈大悲，常勤精进现三种神通，能令安住世间出世间信。何等为三？一者、神通，二者、说法，三者、知他心。以此三种神通，令诸众生安置世间出世间信，知一切趣，一切有为、一切受生皆得解脱。善男子，是名如来第九轮也。如来成就如是轮故，到安隐处得无所畏，最胜大仙转于法轮，一切沙门、婆罗门及诸魔、梵所不能转，一切外道诸余怨敌皆悉降伏，于四众中能师子吼。

“善男子，譬如灌顶刹利大王，于四下一切众生为病所恼，舍弃王位，以种种香汤而以洗浴，洗沐头发著鲜净衣，端坐思惟，为除一切众生病苦皆得解脱。如是灌顶刹利大王，以华香璎珞及众伎乐，一切天、龙、夜叉、乾闥婆、阿修罗、迦楼罗、紧那罗、摩睺罗伽皆悉供养已，各相谓言：‘如是灌顶刹利大王多诸功德，应为转轮圣王统四天下。我等应当建立此王治国政事。’尔时，一切天帝乃至摩睺罗伽等亦如是言：‘当立此王主四天下。’尔时，刹利大王具足七宝，统四天下，为转轮圣王，千子具足，皆多勇健，形貌端正，能降伏外敌，游巡四海，案行天下一切大地，终不谪罚刀杖加害，如法教敕皆悉受用。善男子，是名转轮圣王第十大轮也。以是力故，转轮圣王王四天下及八万四千海渚，皆使修集一切善法，无不建立，守护身命寿得增长。

“如是，善男子，如来从初发心已来，于己身命乃至他身，所有烦恼若干种病，悉以禅定净水洗浴，以如实法大慈大悲，溉灌其顶，著惭愧衣。十方如来以禅定智力、大精进力、无量方便定意观察，欲灭一切众生烦恼种种过患，如佛世尊作如是言：‘最大智者福德庄严堪为法器，三解脱门、四无所畏，如来十力、十八不共法，一切智智大悲利益，救济一切诸苦众生！佛大商主，度脱无量苦恼众生与涅槃乐，加其愿力，欲使满足成等正觉无上法王。’如是福德具足智慧勇猛精进，如实正观了四真谛，得阿耨多罗三藐三菩提，是名如来能尽一切诸漏根本第十法轮也。

“善男子，譬如转轮圣王，于四天下游戏自在；如来亦复如是，于诸四禅心得自在，四无色定修四梵堂，具四辩才，正观四谛、四无所畏、十力、十八不共法，于一切智得自在力。善男子，譬如转轮圣王，七宝具足；如来世尊具足七觉亦复如是。善男子，转轮圣王具足千子；如来亦有一切声闻诸大弟子，憍陈如以为初首，须拔陀罗为最

后也，真是我子，从佛口生，从法化生，断一切漏，勇猛精进修四梵堂，犹如四兵降伏魔怨。善男子，譬如转轮圣王王四天下，有八万四千海渚皆随言教；如来世尊，亦有百亿阎浮提、百亿瞿耶尼、百亿弗于逮、百亿憍单日、百亿海水、百亿须弥山王、百亿四天王，乃至百亿非想非非想天、百亿铁围大铁围山，是佛国土广大无量，一切皆随如来教化。善男子，是名如来第十轮也。

“如来成就如此轮故，若五浊恶世一切佛法功德退没，离圣七财及诸智者，为欲除断覆一切患灭三恶趣，乃至后世无明黑闇，一切世间皆与十恶共相和合，造于五逆，诽谤正法，远离诸善，悉染一切不善根本，如是成就十种佛轮，到安隐处得无所畏，高胜大仙能转法轮，一切沙门、婆罗门及诸魔、梵所不能转，摧伏一切外道怨敌，以金刚智能破众生一切烦恼，令使三乘得不退转，于四众中能师子吼。”

尔时，菩萨摩訶萨，及以一切诸大声闻，天、龙、夜叉、乾闥婆、阿修罗、迦楼罗、紧那罗、摩睺罗伽、饿鬼、毗舍闍、人非人等，皆称善哉，雨众华雨，雨杂宝雨，雨衣服雨，雨妙香雨，一切大地皆悉震动。

佛说如是十轮经时，在会大众，有八万四千亿百千那由他菩萨摩訶萨得无生法忍；复有无量菩萨摩訶萨得深禅定忍辱陀罗尼；复有无量众生未发菩提心者，今皆发心住不退转地。尔时，复有无量大众，有得须陀洹、斯陀含、阿那含、阿罗汉者，次第修学证沙门果。

证相品第五

尔时，大梵天名曰天藏，久植善根住第十地，是大菩萨摩訶萨。是时，众中有天藏大梵，从座而起，整其衣服，右膝著地，以偈问佛：

“我今稽首问，功德海无边，
愿时赐听许，除断诸疑悔。
渴仰持功德，法味中最上，
众生咸乐闻，如是第一义。”

尔时，世尊告天藏大梵：“随汝所问，如来世尊亦当随问而答，令汝欢喜得未曾有。”

尔时天藏大梵言：“唯然，世尊。”以偈问曰：

“智慧修禅定，安住不放逸，
为住第一义，而处于生死。

勤修于诵习，能度烦恼海，
为当证不退？为当堕恶道？
常勤而劝化，为定趣涅槃？
为在于生死？为堕于恶道？
智慧刹利种，依止十种轮，
为处于生死？为得成佛道？
心浊难调伏，烦恼多散乱，
以何净其心，禅诵而劝化？”

尔时，佛告天藏大梵：“善哉！善哉！大梵所问，纯善第一。汝已满足一切诸行，于过去恒河沙佛所修行三业，摄心禅定、常勤诵经、营理僧事，炽然佛法建立三宝如大梁柱，又复能为多人无量众生问于如来如是之义。若善男子依止威仪大记荊论，过去诸佛之所演说神通住持，是名如来成熟众生令悉厌离，为灭一切烦恼病故，为欲满足三乘道故；十方乃至恒河沙现在诸佛，亦说如是依止威仪大记荊论，为成熟一切诸众生故，令得厌离故，欲使摧灭一切结使故，为得满足三乘道果住持正法故。汝于过去诸佛所闻，我亦如是，依止威仪大记荊论，为欲成熟一切众生故，令得厌离故，灭诸结使，为得满足三乘法故。是故，大梵，汝当谛听！善思念之。”

天藏大梵言：“唯然，世尊。”

佛言：“若有依止于十不善轮，则不具足欲界禅定，亦不能具足欲界善根，况能成就色、无色界一切禅定？亦复不能成就三乘及余诸善！何等为十？有欲修禅众事不具；有欲破戒成就恶法；生于倒见亦著吉相；恶心难调不顺贤圣；诸根轻躁而不具足微少善根；但作两舌多喜斗乱；作粗恶语而恒骂詈；好作绮语及诸妄言；生于贪嫉，见他得利常生嫉妒；一切众生有恼害心，作大邪见说无因果。天藏大梵，满足十事虽欲修禅，不能成就欲界小善，况能成就色、无色界善根及三乘善法？

“复次，大梵，又有十事而不能得成就禅定。何等为十？乐著作伎，乐著言说，多好睡眠，种种所求，贪著美色，乐著于香，乐著诸味，乐著音声，乐著于触，乐著觉观。大梵，是名十种，而不能得成就于禅；设使成就，寻即退失终不能成。而但为得檀越信施，因其利养心生恶法，若在刹利诸王众中，多诸过罪为他骂詈，及加鞭杖截其支节，或犯大罪久受诸苦，若疾命终必堕恶趣，乃至入于阿鼻地狱。譬如阿兰迦兰、栴头蓝弗、蛭数拘迦梨、提婆达多，如是等毁坏禅定，乃至阿鼻地狱受大重罪。”

尔时，佛告阿若憍陈如：“我今听汝清净比丘，受于第一床敷卧具、饮食肴膳，能除一切众生疾疫。何以故？若坐禅比丘阙少众具，一切心数多起散乱，但念诸恶而不能得成就禅定，乃至至于阿鼻地狱受诸罪报。若众缘备足修诸禅定，则易成就心得专一，若已得者皆令

增长，一切不善觉观散心皆悉能知不令得起，趣向涅槃到于彼岸。若有坐禅未成就者，初中后夜当勤修习，远离愤闹少欲知足，于一切结使起于舍心，一切贪欲、瞋恚、憍慢、贡高、两舌、恶口、妄语，如是等悉得远离，应受释、梵、四天王等百千那由他供养恭敬，况复婆罗门、刹利、居士、毗舍、首陀所有供养！”

尔时，世尊即说偈言：

“修禅灭诸结，余业则不能，
是故禅第一，智者应供养。”

尔时，天藏大梵白佛言：“世尊，若有比丘能修禅者，刹利大臣应加谪罚鞭杖，乃至兀其手足不耶？”

佛言：“善男子，若诸比丘佛法出家，剃除须发披著袈裟，一切天、人、阿修罗皆应供养。若护持戒，不应谪罚闭系、兀其手足乃至夺命，悉无是法。何以故？除其多闻及持戒者，若有破戒比丘于我法中而出家者，成就诸恶如败脓坏，非婆罗门自言婆罗门，非梵行而言梵行，退失堕落圣道果证，为诸烦恼结使所胜、结使所坏。又复破戒诸恶比丘，能示天、龙、夜叉、乾闥婆、阿修罗、迦楼罗、紧那罗、摩睺罗伽、人非人等，无量功德珍宝伏藏。若有依我而出家者，众生应作十种胜想，得无量无边福德。

“何等为十？有诸众生见依我出家者，应作念佛想，以是净心欢喜因缘，不信一切诸余外道，及外道经书。若当见时，即应思惟决定圣戒，以是因缘，能断杀生、偷盗、邪淫、妄语乃至不饮酒等，入涅槃城。见有依我而出家者当起施心，以是因缘，于将来世财富无量，善去善向，殊胜供养常得充给，乃至入于无畏大涅槃城。又见依我佛法出家，柔和质直，常行忍辱，不生卒暴，心无狂乱，喜乐正法，常好闲静阿练若处，乃至欲入涅槃无畏之城。若有众生，破戒非法作恶威仪，见如是人，当共软语乃至礼足，以是因缘，此人后世生尊贵家，有大势力，常为一切之所瞻视，乃至当得入涅槃城。

“天藏大梵，若依我法出家造作恶行，如是比丘盲无所睹，此非沙门自称沙门，非梵行自称梵行，退没堕落为诸烦恼之所败坏。如此比丘修行恶法，犹能开示一切天、龙、夜叉、乾闥婆、阿修罗、迦楼罗、紧那罗、摩睺罗伽、人非人等一切善法功德伏藏，为善知识。虽不少欲知足，剃除须发披著袈裟服，以是缘故，能为众生增长善根，于诸天人开示善道。是以依我出家比丘，若持戒、若破戒，我悉不听转轮圣王、大臣、宰相，不得谪罚系闭、加诸鞭杖、截其手足乃至断命，况复余轻犯小威仪破戒比丘？虽是死人，是戒余力犹如牛黄，是牛虽死人故取之，亦如麝香死后有用，能大利益一切众生。恶行比丘虽犯禁戒，其戒势力，犹能利益无量天人。譬如估客入于大海，断于无量众生之命挑其眼目，持阿摩那果捣蕤和合成其宝药，若有众生盲

冥无目，乃至胎胞而生盲者，以此宝药而用涂之，众病得除其眼明净；如是，如是，若诸比丘虽破戒造作恶行，于佛法中名为死人，复能令他一切众生，使得清净智慧法眼，能令见者尚得如是，况复为开示种种法！

“大梵，譬如烧香，香体虽坏，熏他令香；破戒比丘亦复如是，自堕恶道能令众生增长善根。恶行比丘为不信所烧，身坏命终堕三恶道，能使他人得大利益示涅槃道。以是因缘，一切白衣不应侵毁轻蔑破戒比丘，皆当守护尊重供养，不听谪罚、系闭其身乃至夺命。四方众僧，若至布萨自恣之时，听便驱出不共法事，三世僧物饮食敷具皆不听用，一切羯磨说戒律处，悉皆驱出不得在众，而悉不听王及大臣加其鞭杖、系闭谪罚乃至夺命。”

尔时，世尊而说偈言：

“瞻卜华虽萎，胜于诸余华，
破戒诸比丘，犹胜诸外道。”

“复次，天藏大梵，有五种逆罪为最极恶。何者为五？故心杀父、母、阿罗汉，破坏声闻和合僧事，乃至恶心出佛身血，诸如是等名为五逆。若人于五逆中作一一逆者，不得出家受具足戒；若听出家，则犯重罪应摈令出；若已有出家诸威仪者，不应加其鞭杖及诸系闭。

“复有四种大罪，同于四逆，犯根本罪。何者为四？杀辟支佛，是名杀生犯根本罪；淫阿罗汉比丘尼，是名邪淫犯根本罪；若人舍财与佛法僧，主掌此物而辄用之，是名为盗犯根本罪；若人倒见破坏比丘僧，是名破僧犯根本罪。若人于四根本罪中犯一一罪，皆悉不听佛法出家；设使出家，不得听受具足戒；若受具者应驱令出，以有出家威仪法故，不应鞭杖系闭、夺其生命。如是皆犯根本罪，非逆罪也。有是根本罪亦是逆罪，有是逆罪非根本罪，有非根本罪亦非逆罪。何者为逆罪亦是根本罪？若人出家受具足戒得见谛道，断其命根，是名逆罪，亦是根本罪也；如是众生，于我戒律中应驱令出。何者为根本罪非逆罪？若人在我法中出家，如是凡夫众生故害其命，若以毒药或堕其胎，是名根本罪非逆罪也；若有四方僧物饮食敷具，悉不应与同共利养。若有众生于佛法僧而生疑心，此中出家自言更有世尊，或于种种诸吉相中生疑惑心；若复有人于诸如来所说之法而生疑惑，于声闻、辟支佛乃至大乘，于中诽谤出其过恶，见他读诵而作留难乃至一偈，此非根本罪亦非逆罪，是名甚恶近于逆罪。如是众生若不忏悔除其罪根，终不听使佛法出家；设出家受具足戒不悔过者，亦驱令出。何以故？不信正法，毁谤三乘坏正法眼，欲灭法灯断三宝种，减损人天而无利益堕于恶道。此二种人名谤正法、毁谤贤圣，地狱劫寿增长，如是诸恶业已，是名根本大重罪也。”

“何者是不威仪根本法？若比丘故淫犯根本罪，故杀凡夫人犯根本罪，除三宝物不与而取犯根本罪，故妄语犯根本罪。于此四根本中，若犯一罪，一切比丘所作法事悉不听入，四方僧物饮食卧具皆悉不得共同受用。然帝王、大臣、一切群官，不应加其鞭杖、系闭刑罚乃至夺命，是名根本罪体性相也。何以名为根本重罪？若人作如是行，身坏命终堕于恶趣，作如是行是恶道根本，是故名为根本罪也。譬如铁丸，虽掷空中，终不暂住，速疾投地；如是五逆等罪，犯四重禁，及二种众生——毁坏正法、诽谤贤圣，如是等十种罪中，若人犯一一罪者，身坏命终皆堕阿鼻地狱。是故作逆业犯根本重罪者，皆悉不听度令出家。犯逆罪者如此人等，于其一身终不能尽诸烦恼结成就禅定，况能超出决定菩萨？命终之后必堕地狱受恶道苦。

“若有族姓男女，以深信心归依佛法，或趣声闻、辟支佛，或趣大乘，于我法中而得出家，受于具戒极有信心，护持根本四重等罪，常勤精进勇猛不休，日日拥护一切人非人等，终不虚受人天供养，于三乘中随所乐欲。何以故？志求解脱乃至舍命终不毁犯。何以故？如是三种众生，皆求涅槃修行其因，依止世尊，依止经律，依止声闻正位弟子。若有众生犯四重禁非佛弟子，我所显示甚深法相，一切无常、苦、空、无我，为诸众生利益安乐，说解脱法波罗提木叉，如是经论及诸禅定，盲无所见，破戒退没坠三恶道。若有族姓男女，于是波罗提木叉清净法中不犯根本者，我是彼世尊，彼是我弟子，随顺我语安住佛法，一切所作皆悉成就，安立戒身及诸善法，亦能建立能大利益安乐天人世尊。如是之人，则具足一切声闻、辟支佛乘乃至大乘，皆悉善住。

“何以故？是根本戒守护一切正法，及诸有漏、无漏等法，皆悉因此而得成立，是故名为戒根本也。譬如因地，一切万物百卉药谷皆因生长；如是善学四根本戒，一切善法皆因得生。譬如大地，一切诸山乃至铁围、大铁围、须弥山王皆依得住；如是善解四根本戒，声闻、辟支佛乘乃至无上天乘皆依而住。譬如大地，一切物味依地而住；如是善学四根本戒，禅定解脱总持乃至阿耨多罗三藐三菩提亦因而成。譬如大地，净不净物一切悉载；如是族姓男女，善学四根本戒，持戒毁戒、是法器及非法器皆悉满足，谛自观察不讥彼短，而不自高亦不毁他，能为一切善法洲渚，犹如大地一切众生之所依止。如是族姓男女，善能修学四根本戒，一切如来所说经论，皆生爱乐欢喜受持，不起种种非法之想，一切众生皆依四摄而自存活。”

尔时，尊者优波离，从座而起，整其衣服，叉手合掌，白佛言：“世尊，若世尊作如是言，是法器及非法器悉不讥诃，他未来时作诸恶行如是比丘，非沙门而作沙门，非梵行而作梵行，今当云何呵责其心，驱遣令出？”

佛言：“我悉不听俗人讥呵！复有十种非法讥呵即得大罪。何等为十？若僧不和合，于国王前而讥呵者，是名非法。若僧不和合，于

婆罗门众中而讥呵者，亦名非法。若僧不和合，于王眷属及诸大臣而讥呵者，是名非法。若僧不和合，于白衣中而讥呵者，是名非法。若僧不和合，于妇女、小儿等中而讥呵者，是名非法。僧不和合，于僧净人前而讥呵者，是名非法。僧不和合，于比丘尼众中而讥呵者，是名非法。僧不和合，于本怨嫌前而讥呵者，是名非法。若僧不和合，以瞋恚心而相讥呵者，是名非法。有如此等十非法不应讥呵！假使举得少罪亦不应受，若复少有如佛法讥呵者亦不应受。又复十种非法讥呵不应受。何等为十？若余外道来讥呵者亦不应受，非持戒白衣而犯逆罪，诽谤正法，毁坏贤圣，若起狂心，若散乱心，为诸余天地四方僧净人，若是一切犯禁比丘所举之罪皆不应受，是名为十非法讥呵所不应受。

“若有比丘，造诸恶行共僧中住，清净比丘威仪具足，于非法处一切不行，成就五法，应顶礼僧足诸恶比丘言：‘我今欲举汝罪，是实不虚，是时非时，慈心软语，为使佛法久得安住，为欲炽然一切佛法。若听我说，我当如法举汝。’彼若不听：‘我当顶礼持戒比丘上座等足白言：大德，此比丘犯如是事。’依于五法而举彼罪，上座比丘应察是语，如毗尼、如修多罗，当以灭谤法如法除灭，若犯重罪应以重治，若犯中罪应以中治，若犯微细罪当以微细治教令悔过。”

优波离白佛言：“世尊，若造恶行比丘实有过罪，而恃白衣一切势力，或恃巨富财物等力、或恃多闻、或恃辞辩、或恃弟子如是等力，众僧当共和合，持修多罗、持毗尼、持有戒德僧者，不取其语而用势力，有如是等应当云何？”

佛即答言：“应诣国王、大臣、宰相如法治罪。”

优波离复白佛言：“世尊，如此恶行比丘，若财物力、若多闻力、若辞辩力，能令国王大臣欢喜，或有非法朋党，为应舍置不耶？”

佛言：“优波离，若事未现，应当舍去；若事已出，僧应和合速疾驱摈不得共住。优波离，譬如瞿麦、妨麦、稗莠，根茎枝叶与麦相以，若未莠出时不可分别；穞既出已，田峻农士并根俱弃。何以故？坏净麦故。优波离，如是破戒恶行比丘，若恃白衣及诸势力住居僧中，过未出时人不敢呵，其事现已诸天便讥，当言僧中无有禁制，若恶行比丘，众僧应速和合疾共摈出。

“优波离，譬如大海不宿死尸；如是我诸声闻大弟子众破戒谄曲，此等恶人不应共住，亦复如是。若破戒比丘，为刹利王及诸辅相朋党非法，如此比丘，则得自恃多闻、财物巨富、辞辩如是等力，肆心无畏强僧中住。尔时惭愧持戒比丘，心有所疑不应共诤，不应守护共作伴党；如是持戒比丘，便语国王及诸大臣，更至他国。”

佛说大方广十轮经卷第四

刹利旃陀罗现智相品第六

尔时，地藏菩萨白佛言：“世尊，是刹利旃陀罗、辅相旃陀罗，少于善根不肯信向，谄曲愚痴自称多知，皆生憍慢，不畏后世恶业果报，离善智识，乃至趣向阿鼻地狱，为财利故，与此恶行诸比丘等，作非法朋党。”

佛言：“如是，如是。善男子，于未来世，刹利旃陀罗乃至婆罗门旃陀罗，善根微少，无有信心，欺诈骗曲，是诸愚痴现智慧相，不随善知识语，实是愚痴现为智慧，心常疑悔不畏后世，而无禁戒作诸杀生，乃至邪见欺诳于他，于诸世间常行诽谤语。刹利旃陀罗、婆罗门旃陀罗坏乱佛法，于我法中而得出家，常毁破戒作诸恶行，而刹利、婆罗门尽心供养多畜钱财。贪心染著取空言语，通致信命治生贩卖，好读外典垦土种植，守护钱财、产业、舍宅，守护妻子咒说仙药，贪著衣服饮食之物，破戒恶行其声如贝，实非沙门自言沙门，实非梵行自谓梵行，乃至为刹利、婆罗门恭敬供养听受。刹利旃陀罗、婆罗门旃陀罗，好喜破戒远离持戒，于我法中，若见有人持戒修善能谦下者，学与无学一切得向，如是比丘，皆悉不得恭敬供养，有所言说皆不听受。

“善男子，譬如有人到宝渚所，舍帝释青宝及大青宝、金银真珠，皆悉舍离大价之宝，取于水精；若我法中，如是持戒有大功德，心常谦下而便舍之，取于破戒造恶行者，成就恶法，不生羞耻心无惭愧，远离一切大慈大悲，反取如是诸恶福田，听受其语，供养如是造作恶人，师及弟子俱堕地狱，悉具于此十种恶轮刹利旃陀罗、婆罗门旃陀罗、沙门旃陀罗、大臣旃陀罗，先修善根今悉消灭，乃至堕于阿鼻地狱。何等为十破戒恶行？如是比丘，乃至刹利、婆罗门，忍乐恶见，诽谤阿练若比丘，愚痴谄曲非毁贤圣，诳惑世间饮食、钱财及诸利养，求名称故自苦其身，毁谤他人嫉妒斗乱，纯为利养，莫肯听受信用其语，退弃令下远离实法，皆言无有得道果者，亦无离欲能尽结者，但为利养而自显现：‘慎莫奉事供养是等，乃是谄曲诳惑之人，实非福田趣向道者。’是时刹利旃陀罗、婆罗门旃陀罗，于阿练若比丘，不生恭敬希有之心，其心颠倒而不承事恭敬供养，不肯听受信用彼语，即是不能护持法眼绍三宝种。尔时，国土天龙鬼神而于三宝信心深重，皆同瞋恚如是刹利、婆罗门等，互相语言：‘汝今谛观刹利旃陀罗、沙门旃陀罗、婆罗门旃陀罗、大臣旃陀罗，悉起憍慢，一切三宝断于善根近恶知识，退失善法当入恶趣。我等今日不复拥护如此国土刹利、婆罗门等。’一切天龙诸善鬼神既舍离已，于其国中堪任法器为福田者皆生舍心。若一切天神及堪任法器应为福田者，于彼刹利旃陀罗等生舍心已，于自国土及余邻国，皆悉兵起、饥馑疾疫，更相残害不复欢乐，先所爱乐皆悉别离，忿心慳吝无有矜憐，于一切众生不起慈心，杀生乃至邪见无惭无愧；一切塔寺及僧祇物，皆悉食啖供其衣

服，瞋诸左右悉生嫌隙；若与他战，令己军众自然退散；若欲死时，皆结其舌口不能语，趣向地狱。

“复次，善男子，刹利旃陀罗，乃至婆罗门旃陀罗，皆悉远离诸善知识，轻慢三宝，无恭敬心，不畏后世。于声闻乘得少信心谓己聪哲，而于辟支佛乘及大乘经法，诽谤不信，不读不诵，下至一偈生不信心，是名谤法。若复有人，少信辟支佛法及大乘法，而不信于声闻之法，毁谤讥呵，亦名诽谤正法。是名诽谤三世诸佛正法之藏，断八正道，破于无量众生法眼。若复有人，于如来所说声闻乘、辟支佛乘及菩萨乘，若作障碍、若隐蔽覆藏乃至一偈，而不恭敬于三宝者，以是因缘，令使守护一切国土天龙善神，以不动信即便瞋恚，是刹利诸臣乃至结舌不语而死，堕阿鼻地狱。

“复次，善男子，若持戒有功德者在彼国住，具足法器，善入舍心，安住静室，而不数数至檀越舍，亦不轻呵恶行比丘使彼觉知，亦不讥嫌呵责破戒。而恶行比丘，于清净持戒者所反生讥嫌，言作奸伪种种妄语，于刹利、大臣及至国中一切人民男女大小，悉于其前生诸诽谤。而彼刹利旃陀罗等，于诸清净持戒具足修行功德有名闻者——如是比丘真我弟子，具足一切禅定解脱——善巧言辞便起毁谤而生瞋恚，种种恶口粗语，逼切令受苦恼，或夺衣钵及四方僧物、资业敷具驱遣令出，或时系闭，或斩截其首。

“善男子，谛观亲近恶行比丘者，为得几所罪？乃至当堕阿鼻地狱！若众生造作五逆等罪及四根本罪，诽谤贤圣，诽谤正法，超过一切根本之罪。如是恶行诸比丘等，我亦不听刑罚、鞭杖系闭乃至断命，以是因缘得大罪报，况复坚持禁戒清净行者！若有比丘，于性重罪中若犯一罪者，虽犯重罪，和上众僧和合羯磨，所受之戒犹有余势。譬如妙香虽无香质，余分芬馨不可轻蔑；破戒比丘亦复如是，无戒白衣不应轻慢，虽非法器，于贤圣毗尼中退没堕落，弃出家法，不得受用四方僧物，于众僧和合所受得戒余不犯者，其戒香气多有势力，是故不听白衣谪罚。

“善男子，往昔过去有国名迦尸，时王名梵摩达多，敕旃陀罗言：‘雪山下有六牙白象王，名栴波罗华眼，可拔其牙。若不得者，汝等五人悉断其命。’尔时，旃陀罗护惜身命，诈作沙门，外现精进被著袈裟，如王所敕，往至彼山到象王所。母象见之张弓挽箭，生怖畏心，语象王言：‘此是猎师，今已张弓挽箭而来，将非我等命欲尽耶？’尔时，象王即便见之剃除须发，被著袈裟，而说偈言：

“‘彼恒沙诸佛，幢相之法衣，
悉舍于诸恶，云何害众生？’

“尔时，母象复说偈言：

“身虽被袈裟，持弓执毒箭，
作恶旃陀罗，无有悲愍心。”

“尔时，象王复说偈言：

“袈裟决定服，以哀愍为本，
是必归佛者，慈悲诸众生。
于此衣无疑，汝当自摄心，
能被此服者，欲度生死岸。”

“尔时，旃陀罗即以一毒箭射其象王。是时，母象见射象王已，
大唤悲号，复说偈言：

“如是之衣服，应当归依佛，
威仪虽寂静，而心怀大恶。
速疾踏彼身，断除其命根，
灭此怨令尽，是射汝身者。”

“尔时，象王复说偈言：

“宁速舍身命，不应生恶心，
彼虽怀恶心，犹似佛弟子。
智者不为己，卒暴起瞋心，
常思为众生，修行于菩提。”

“尔时，象王心生慈悲，即唤彼人而问之言：‘汝须何物？’彼便答
言：‘欲须汝牙。’

“尔时，象王即自拔牙，发大誓愿，而说偈言：

“我今以白牙，求佛故奉施，
不瞋不贪惜，令众灭烦恼。”

“善男子，我于往昔曾见如是畜生身中，求无上道能作如是，不
惜身命为护佛法，终不于被著袈裟者而作留难。于未来世，刹利旃陀
罗、辅相旃陀罗、婆罗门旃陀罗、居士旃陀罗，以谄曲心欺于世间不
畏后世，若诸世间有求无上道者，入我法中而得出家生心恼害，我诸
弟子应成法器及不成者，恶口骂詈鞭杖谪罚逼切其身，于过去、未
来、现在诸佛犯诸重罪，趣阿鼻地狱，断诸善根除灭信心，一切智者
之所远离。譬如丈夫，虽自无目能示他道；我诸弟子亦复如是，虽毁
禁戒，犹能利益世间众生。若未来世旃陀罗王乃至居士旃陀罗，见有
依我法中出家，若成法器、不成法器，而便扰恼我诸声闻一切弟子，

则于三世无量诸佛作大过罪，消灭善心难复人身，何况毁谤正位声闻、辟支佛及诸大乘无量功德！

“善男子，譬如过去有国名般闍罗，王号胜军。人罪应死，系著可畏轲蓝冢间，令使恶鬼食啖其身。时守狱人以五系缚，送著可畏轲蓝冢间。是人闻已，即剃须发，以纳袈裟著于颈下。尔时，守岳之人受王敕已，即捉缚送至可畏轲蓝冢间。是时冢间，有罗刹名曰恶眼，共五千罗刹俱至冢间，即见是人，被五系缚在于冢间，剃除须发，以纳袈裟系著于颈。尔时，罗刹右绕是人，而说偈言：

“‘今可自安慰，我终不害汝，
剃发服袈裟，令我忆念佛。’

“尔时，罗刹子复说偈言：

“‘白母甚饥渴，当须食此人，
我得除饥渴，身心快安乐。’

“尔时，罗刹母说偈答子：

“‘恒沙等诸佛，法式之幢相，
于此起恶心，当堕阿鼻狱。’

“尔时，罗刹子与其眷属，右绕匝已，而说偈言：

“‘我等父母共为恶，身口意等造不善，
我已舍恶不害汝，被著染衣解脱相。’

“尔时，罗刹名为牛齿，有五百眷属，俱共围绕入大冢间，见被缚人剃除须发，以纳袈裟系其颈下，右绕竟已，而说偈言：

“‘归依众圣妙幢相，袈裟系颈谓其人，
我为此故而恭敬，唯愿勿怖不害汝。’

“尔时，罗刹子复说偈言：

“‘母今当知人肉美，应当食肉而饮血，
益其气力得具足，增益身体无所畏。’

“尔时，罗刹母复为其子，而说偈言：

“‘一切世间众乐具，天龙夜叉及罗刹，
悉当恭敬染衣者，当获种种上妙乐。’

“尔时，罗刹子与其眷属，右绕恭敬，而说偈言：

“悉应恭敬而归依，剃除须发著袈裟，
我于过去无数劫，见佛世尊救世者。”

“尔时，第三罗刹名曰黄发，亦有五千眷属，而自围绕入大冢间，见被缚人剃除须发，系纳袈裟而著颈下，复右绕已，而说偈言：

“仙人幢相我归依，若能供养得胜利，
为袈裟故修供养，应悉除断诸有缚。”

“尔时，黄头罗刹子而说偈言：

“我得此人应食啖，国王所遣故来此，
当食其肉复饮血，母语子言应供养。”

“尔时，黄头罗刹复为其子，而说偈言：

“如是相人非我食，若起恶心大苦器。”

“尔时，罗刹子右绕恭敬，复说偈言：

“如是大仙堪福田，是故应供离有缚。”

“尔时，刀口罗刹复与五千罗刹来到冢间，见系缚者剃除须发，以纳袈裟系其颈下，心恭敬已，而说偈言：

“有余生死得涅槃，纳袈裟者不应害，
若害此人佛所呵，应当尊重而供养。”

“尔时，罗刹子复说偈言：

“我等常吸人精气，食啖其肉复饮血，
是故当食此众生，令我身体益气力。”

“尔时，罗刹母复为其子，而说偈言：

“若有生心欲加害，剃除须发袈裟者，
必堕恶趣阿鼻狱，受苦无量甚长远。”

“尔时，罗刹子与其眷属，右绕被缚著袈裟者，复说偈言：

“我今怖畏地狱苦，终不恶心害汝命，

我等同心当放汝，亦求解脱地狱苦。’

“尔时，罗刹等即便解放彼被缚人。时被缚人待至天明到于王所，王即广告一切人民。诸人集已，皆请问王及侍从左右群臣百官：‘是人得来未曾有也！’彼王即便立制普告内外：‘若我国中，有佛声闻诸弟子等，若成法器及不成者，不起恭敬或加谪罚，以是因缘，我当刑戮乃至致死。’”

“族姓子，阎浮提王及与夜叉食血肉者，恶心炽盛无怜悯心，乃至见剃除须发、系纳袈裟以著其颈，尚不加害，况余众生而起轻慢？未来世中，当有刹利旃陀罗、居士旃陀罗造作诸恶，复有恶鬼断于善根趣阿鼻地狱，若于我法而能出家，若成法器及不成法器，剃除须发当夺命根。

“族姓子，譬如过去有王，名曰福德，若人有犯罪过者乃至系缚，尔时彼王不欲夺人身命，有辅相大臣语王莫愁：‘若杀此人，或能令王而得大罪。’大臣自以智慧，将付狂象。尔时，狂象捉其二足，欲扑其地，而见此人著染色衣故，狂象即便安徐置地，不敢损伤，共对蹲坐，以鼻舐足，而生慈心。族姓子，象是畜生，堕于八难，见染衣人，尚不加恶生于害心！乃至未来世，若有旃陀罗王，见我法中有人出家，堪任法器及不成法器，故作逼恼或夺其命，若作是行，则口不能语，命终之后，必定堕于阿鼻地狱。

“善男子，是名第三轮，刹利旃陀罗乃至居士旃陀罗，虽有过去宿植善根，现造恶故，今尽消灭。

“复次，善男子，当有刹利旃陀罗乃至居士旃陀罗，见有施四方僧物、床敷卧具、塔庙住处，及与园林、屋舍田宅、一切净人、牛驴骡马种种畜生、衣服饮食、汤药所须、资生杂物，持戒清淨有德比丘，辩才聪明言辞应机，如是人等悉不与之；破戒比丘作恶行者，给其所须床褥敷具自恣受用，并与白衣同共食啖，以是因缘，刹利旃陀罗、居士旃陀罗，命终皆堕阿鼻地狱。

“复次，族姓子，当有刹利旃陀罗、居士旃陀罗，见有依我法中出家，若声闻、辟支佛，乃至大乘说法法师，诽谤骂辱，欺诳正法而作留难，恼乱法师，以是因缘，堕阿鼻地狱。

“复次，族姓子，若有刹利旃陀罗、居士旃陀罗，见人有与四方僧物，华树、果树、杂味树、荫树、香树，我声闻弟子持戒多闻坐禅诵习者，所有资生众具，若自夺或使人夺，自食使人食，以是因缘，命终之后，堕阿鼻地狱。

“复次，族姓子，于未来世，当有刹利旃陀罗、居士旃陀罗毁坏我法，若见依我法中而出家者，于此人所数数瞋恚骂詈毁辱，我所说的法不肯信受，破坏塔寺僧坊堂舍，杀害比丘，先所修习一切善根，皆悉灭尽；命欲终时，支节皆疼如火焚烧，其人舌根如被系缚，于多日中口不能语；命终之后，堕阿鼻地狱。

“若成就如是十种恶轮不善众生，难得人身，况复能成声闻、辟支佛果，乃至成就具足大乘？一切诸佛所不能救！善男子，譬如押油，一一麻中皆生诸虫，以押油轮而押取之，即便得油。善男子，汝等当看押油之人，于其日夜为应定杀几所众生？若复有人，以是十轮而押油者，一轮一日一夜押油千斛，如是乃至满于千年，是押油人得几所罪？”

地藏菩萨言：“甚多！世尊，无量无边阿僧祇数！此押油人得如是罪，无有能知是人罪量其数多少，唯佛与佛乃能知之。”

佛言：“善男子，譬如十轮之罪等一淫女舍，其舍有十女人皆为求欲；如是十淫女舍，其罪等一酒家；如是十酒家等一屠儿舍；如是十屠儿舍罪，等刹利旃陀罗、居士旃陀罗十轮中等于一轮一日一夜罪。”

尔时，世尊而说偈言：

“十轮罪等一淫舍，十淫罪等一酒家，
十酒家等一屠儿，十屠儿罪等一王。”

尔时，地藏菩萨摩訶萨白佛言：“世尊，若有真善刹利、辅相、大臣，真善沙门、真善婆罗门、真善居士，自护护他，于将来世守护佛法，守护堪任法器及不堪法器者，乃至守护剃除须发著染衣者，持戒清净有功德者，供养恭敬听受言教，于声闻、辟支佛法皆悉守护，谛听受持守护大乘，如闻信受住大乘者，持戒多闻言辞清辩，与如此人对相欢娱，则心悦乐咨问议论敬受教诲，远离破戒非梵行者，四方僧物而自食啖、私窃费用不依戒律、随顺十恶不善轮者亦令舍离不与从事，教学先王治国旧法典制，绍三宝种常令炽然，亲近一切诸善知识，遵用前王所行政法，是名真善刹利，得几所福？灭几所罪？”

佛言：“族姓子，譬如丈夫欲求出世，集诸珍宝满阎浮提，若值佛出并声闻众，于其晨朝修行布施，日中亦施，如是次第乃至千年，常修布施种种供养。族姓子，如是行施，得大福不？”

地藏菩萨白佛言：“世尊，其福甚多，无量无边阿僧祇数，无能称量！如此福者，唯佛世尊乃能知之。”

佛言：“如是，如汝所说。若有真善刹利，远离不善十恶之轮，亦能遮制断他诸恶，如上所说，是人功德倍多于前！假设有人，以四天下尽为四方众僧建立房舍，卧具医药悉皆给足，使百千亿声闻弟子及菩萨摩訶萨修行种种无量法门，坐禅诵经教化诸善，如此之人其福多不？于上千年修行布施，供养功德复倍于前。假设有人于四天下，尽为建立僧房堂阁，卧具医药皆悉具足，满百千亿声闻弟子、菩萨摩訶萨，修诸法门一切诸善，坐禅诵经教化功德，得几所福？”

答言：“世尊，其所得福无量无边阿僧祇数。”

“善男子，假设满三千大千世界，为舍利故起诸塔庙遍满三千大千世界，如是造塔功德无量，其福日夜常得增长；四方造作僧房，卧具医药所需一切悉给，起塔功德复倍于前。假使三千大千世界满中菩萨，具足六波罗蜜如稻麻竹苇，设满三千大千世界声闻罗汉具八解脱，亦如稻麻竹苇丛林，皆被囚执坚固系缚乃至一劫。复有一人出现于世，为福因缘故，悉解诸菩萨及阿罗汉被系缚者，并与洗浴，给其衣服、瓶钵房舍、饮食医药种种卧具，乃至百千万岁尽入涅槃，复取舍利而供养之，为一一舍利起七宝塔，供养如是七宝塔故，各以香华及诸伎乐缯盖幢幡；若复有人，为如来故起诸塔庙，乃至满三千大千世界，其所得福百千亿分，不如解此被缚功德，真善刹利、真善婆罗门、真善居士、真善沙门，如是福聚增长无量阿僧祇数。于末法中法欲灭时，能善自护亦护他人，于未来世常护佛法，亦复护我声闻弟子，堪任法器及不任者，乃至剃除须发、被著袈裟，不应娆乱而作恼害；若有亲近供养声闻乘者亦不得恼乱，亦复不应愿乐，供养于大乘者终不欺毁，修辟支佛乘者亦自亲近供养；坚固受持大乘之法安住大乘有功德者，善巧机辩恒乐，亲近咨问义论，问已随顺受持，而于一切恶行比丘皆悉远离，不应与同四方僧食共受利养；自不染著十恶之轮，亦不教他令生染著，皆悉修习先王之道，具行十善，常当亲近诸善知识，炽然法眼。如是真善刹利，得福倍多无量无边，终不虚食国民禄俸，天、龙、夜叉、乾闥婆、阿修罗、迦楼罗、紧那罗、摩睺罗伽乃至富多那等，皆悉爱念同共拥护者；若有一切堪任福田成法器者，皆悉爱念同共拥护，己国增长，若他国土亦令增广，涸竭恶道利益天人，守护寿命令得久长，自灭结使，亦能灭他一切烦恼，成就菩提，满足六波罗蜜，远离一切恶道而随生死流转无数，于生死中而无讥嫌，常值善知识，悉与诸佛菩萨共俱，远恶知识，如是不久成就佛国，得阿耨多罗三藐三菩提。”

尔时，一切天帝及诸眷属，乃至毗舍闍帝释及诸眷属，从座而起，合掌向佛，白佛言：“世尊，于未来世，有真善刹利王乃至真善居士，若能远离此十恶轮，守护己身亦能护他，及护持正法绍三宝种，炽然不断成熟三乘，于佛所说悉能信受如法供养，诸佛所说终不覆藏。我等眷属，与真善刹利王乃至真善居士，当以十法守护此人令得增长。何等为十？为护寿命，终不横死，除诸非法，常得少病，眷属安稳，财产增长，具足大富，名称远闻，亲近善知识，智慧增长。如是真善刹利乃至真善居士，远离一切十恶轮者，如佛所说，当以十种善法而守护之，令得增长。何等为十？所谓怨贼外敌不能侵害，色声香味触无不可喜者，一切病痛、邪缚、邪归依，一切疑悔、一切邪谄、一切恶友、一切不善根本、一切夭横死亡，真善刹利具足功德，如上所说皆悉除灭，当以十善法守护是人。”

“复次，世尊，若真善刹利，如上所说功德满足，皆悉修行，我当以此十法，守护刹利国土之人。何等为十？惧邻国怨敌，畏非人，

畏于亢旱，畏于霖雨，畏非时风，畏非时恶星变怪，畏饥馑，畏非时病死，畏恶邪见，畏真善刹利，于上所说能修行者，我等当以十法，守护国土及诸人民。”

尔时，世尊赞天帝释乃至富多那等：“善哉！善哉！善男子，皆是汝等之所应作。”

尔时，天藏大梵即从座起，整其衣服，右膝著地，长跪叉手，白佛言：“世尊，唯愿听我说，是真善刹利，转不退转地陀罗尼心咒章句。以此不退转地陀罗尼神咒力故，使未来世真善刹利，令边国怨敌自然退散，使身口意戒成就，得胜智慧，为一切智人之所赞叹，远离诸恶，常修行善，远离一切邪见、邪归依，精进坚固成熟无量诸众生故，得自在智，六波罗蜜珍宝伏藏具足增长，远离一切瞋恚贪诸恶嫉妒，常为天人之所守护，得不退转菩提之心，不舍一切众生，得四摄法无所疑问，成熟法器具足福田，亲近菩萨、诸声闻众利益一切。善男子，真善刹利终不退转菩提之心，得陀罗尼神力功德，于未来世最胜不坏无所讥嫌，常亲近诸佛一切菩萨。”

尔时，天藏大梵即说咒曰：

“多闍他 牟尼[日/月]梨 牟那舍啰鞞 牟尼夷梨陀夜末啼 卢闍毗闍隶 牟那栗芝 阿昵伽 弥[口+叔]迦罗博差 波罗舍博差 蜜罗博差 扫啰娑栗啼 兜罗拏栗婆隶钵哆叉栗婆隶 旧旧拏弥隶 阿鞞叉婆隶 阿□阿祇梨梵牟尼波陀鞞 私婆呵。”

尔时，天藏大梵说是咒已，白佛言：“我愿世尊，于此陀罗尼心生随喜。”

佛言：“善哉！善哉！大梵，我于此咒心生欢喜。”

时会大众亦称：“善哉！快说此陀罗尼也。”

尔时，佛告大目犍连、弥勒菩萨摩訶萨：“汝等受持不退转地心陀罗尼，能令真善刹利安乐利益，为转法轮故，为名称利故，为威德故，为灭诸邪见故，为建立正见故，为守护法眼故，为无边众生令得成熟故，为使坚固大乘不退故，为使满足六波罗蜜故。”

尔时，世尊欲重宣此义，而说偈言：

“尔时天藏梵，发问两足尊：

利根等众生，修禅而诵习，
勇猛强劝作，刹利有智者，
云何灭烦恼？云何住不退？
佛时答彼言，犯重堕落者，
虽意有明利，急趣阿鼻狱。
此十种恶轮，无智所修行，
则断善根本，速疾堕地狱。

禅定亦灭结，非独多闻智，
若欲得解脱，应当勤修禅。
智者常精进，守护我正法，
以恭敬袈裟，能度烦恼海。
乐处于空林，远离五逆罪，
持戒修禅定，能度烦恼海。
若有信三乘，炽然于佛法，
供养染衣者，得大功德海。
能调难伏心，不举比丘罪，
圣种修少欲，获得两足尊。
远离恶比丘，恭敬亲贤圣，
不食僧祇物，速到于菩提。
三界得妙乐，三宝出于世，
若欲得安乐，当供养三宝。
三宝旃陀罗，刹利作过者，
恶比丘伴党，速疾堕地狱。
如是十轮罪，等如一淫女；
以是十淫罪，亦等同一酒；
如是十酒罪，复等如一屠；
以是十屠罪，亦同于一王。
有真善刹利，供养于正法，
三乘得炽盛，当获功德海。
具足七宝等，遍满阎浮提，
持用施诸佛，其福犹有限。
乃至四天下，造僧房供养，
彼虽得大福，不如护正法。
假使为诸佛，满中造塔庙，
彼虽得大福，不如护正法。
罗汉诸菩萨，解缚而供养，
显现于我法，其福倍于彼。
修禅亿千劫，不为诸佛护，
若不隐正法，诸佛速护念。
若真善刹利，远离十恶轮，
能守护佛法，及持袈裟者；
不谤毁正法，我所说三乘，
闻已能供养，护持法器者。
譬如五日出，能竭于大海，
若护我法者，则竭烦恼结。
譬如风灾起，悉摧一切山，
若护正法者，亦灭诸烦恼。

譬如水灾起，漂荡坏大地，
若护正法者，亦消诸烦恼。
世有如意宝，能满人所愿，
若说三乘法，随愿亦皆得。
譬如获宝瓶，尽破于贫穷，
如是破烦恼，速疾得菩提。
如月十五日，光明满虚空，
得是智慧者，满足护正法。
如空无所有，无物亦无相，
守护正法者，是智无疑惑。
如日所照处，能除诸闇冥，
守护正法者，是则得照明。”

佛说大方广十轮经卷第五

众善相品第七

尔时，金刚藏菩萨，于大众中从座而起，偏袒右肩，右膝著地，
长跪叉手，合掌向佛，以偈问曰：

“毁破禁戒失头陀，以造逆故非我灭，
如过去佛之所说，破净戒者不入众。
诸有一切沙门事，犹如焦炷皆舍弃，
三垢所污离解脱，不堪消受国供养。
四方众僧资生业，悉不听取微少分，
若犯四重根本罪，为众弃舍如死尸。
云何此经说忍辱，于恶比丘起悲心，
遮制一切诸谪罚，复令供养恶比丘？
昔于余经复说言：汝等皆当信大乘，
是名质直胜菩提，汝等应当离二乘。
复于此经说三乘，及诸根力觉道分，
禅定解脱三乘法，谛听信受解脱因。
此有沙门四圣果，除此经外无沙门，
三乘皆同八正道，欲求解脱勤精进。
若有智者诸人天，菩萨大士来至此，
此诸大众皆已证，如是大乘诸人等，
有能正说开示义，若能听者得何利？
十种分别声闻人，能如是说谁不利？
若有人听得何法？云何能听得增长？
复有谁听而损减？复有听者尽老死？

诸有为法悉厌离，昼夜修习于禅定，
何时当得而济脱，能度四流名救世？”

尔时，佛告金刚藏菩萨：“善男子，善哉！善哉！利益安乐一切众生，若人及天无能如是问于如来。善男子，谛听！谛听！善思念之，吾当为汝分别解说。”

“唯然，世尊，我今谛听，愿乐欲闻。”

“善男子，复有十种难得人身。何等为十？不宿植善根，未修福者，心常愤闹，随恶知识，不畏后世，耽著贪欲、瞋恚、愚痴，颠狂失心，乃至邪见，是名十法难得人身。复有十法，无依止因缘犯根本罪，以破戒故坠于恶道。何等为十？无依止威仪，有依我法而出家者，内心不坏、修道坏，修道不坏、内心坏，有内心、修道俱坏，有戒坏、见不坏，有见坏、戒不坏，有戒、见俱坏，有内心修道戒、见俱不坏。若随恶知识，无依止威仪，虽遇善知识，而复愚痴犹如白羊，闻善法已不能受持，亦不为他分别演说，不识善不善，无依止威仪；众具无量而不知足，以是因缘心常散乱，是名无有依止威仪，为种种病之所苦恼，以是因缘修诸咒术。若有依止是十无威仪，犯根本重罪，而复战惧心怀惭愧，而不数数作诸恶行，如来为欲利益如是等故，是名污道。

“何以故？若作如是恶者，应当忏悔，弃舍发露终不覆藏，若能如是令罪消灭则不更作。虽为众弃，一切众僧基业敷具所需之物不得受用，如是等人以成法器故，如来为说声闻、辟支佛、大乘之法，斯有是处。若二世、三世遇善知识，一切恶业消灭无余，得声闻果、辟支佛果，乃至入于甚深大乘法。如是之人，名为破戒，不名破见。若有人内心坏，行不坏、见不坏者，如来为是等说四无量心，亦堪任为声闻器、辟支佛器。若有人行坏、体坏，于此二乘悉不成器，为如是众生故，如来便为说布施法。复有人见坏、戒不坏者，为如是众生故，说十二因缘法，得离坏见已，于一身得入声闻法，若隔身得辟支佛法。若有人戒坏、见不坏，于圣法中堪任为器。若有人内心行、见、戒俱坏者，而从善知识，以是因缘，如来为说十善正法。若有愚痴，随恶知识，不知善不善，如来为是等故教令诵习。若有人为邪见所惑，欲求解脱，如来即便以声闻乘为说四谛法。若有人起断见者，为说十二因缘法；若人起常见者，为说三界生死轮回，知如是法死此生彼，为说声闻法。如来观察终不妄说，若有成熟众生及不成者，悉以方便通达，无碍一切重罪诸逆罪等。若有众生作不饶益，乃至破毁清净法眼，如我为欲利益一切众生故，随顺一切声闻乘、辟支佛乘及菩萨乘。若诽谤正法遮障覆藏不显现者乃至一偈，如是人等名谤正法，坏八正道，亦坏一切众生法眼，如是之人则失大利，亦为众生作不饶益，依愚痴僧诽谤正法。

“复次，族姓子，有四种僧，何等为四？第一义僧、净僧、哑羊

僧、无惭愧僧。

“云何名第一义僧？诸佛世尊、大菩萨摩訶萨、辟支佛，于一切法悉得自在；阿罗汉、阿那含、斯陀含、须陀洹，是七种人名为第一义僧。诸有在家无法服者，不能具受波罗提木叉戒，不入布萨自恣而得圣果，得圣果已，亦名第一义僧。

“云何名为净僧？诸有能持波罗提木叉具足戒者，如律修行，威仪不犯，是名净僧。

“云何名哑羊僧？不知根本罪，不知犯不犯，不知轻重，不知微细罪而可忏悔，愚痴无知，不见有罪可畏，亦不依止善知识丈夫，不数亲近善知识丈夫故，不能咨问经中深义：何者是善非善？何者犯重？何者犯轻？修行何事为善，何事为恶？如是等相名哑羊僧。

“云何名无惭愧僧？若有人为自活命来入佛法，而受波罗提木叉戒悉皆毁犯，破和合僧，无有惭愧不畏后世，内怀臭秽，其声如贝言辞坚[革+卯]，常怀嫉妒愚痴憍慢，弃舍三业但为利养，放恣六情贪著五欲色声香味触，诽谤正法，如是等人，依止我法，心无惭愧，是故名无惭愧僧。

“云何名为第一义僧？虽有圣道隐而不现，乘八正道能度烦恼三有驶流，是名真道。何以故？诸佛世尊、缘觉、罗汉，断一切有名为真道。又诸菩萨摩訶萨，自省已过，求一切法得无碍智而不取证，为众生故示灭结道。若复有人，不成就波罗提木叉戒，名为依止第一义僧乃至净僧。若有真善凡夫，乃至真善正见及诸凡夫，神通变化云他正道，如是之人皆悉名为能示道者。第二须陀洹、第三斯陀含、第四阿那含，第五菩萨摩訶萨住于初地，乃至住于十地一生补处，如是等者名为示道。若复有人，成就波罗提木叉戒，是名依道而活；菩萨摩訶萨为摄一切成熟众生，修行六波罗蜜，如是等亦名示道，亦名依道而活，亦名灭结道，如是名为世间福田。除此以外，皆名污道，亦名恶福田。依止无惭愧僧，于佛法中亦名死尸，是可弃者，于僧大海亦名不成法器，彼非我弟子，我亦非彼师。

“复有不成法器者，称佛是我世尊，我灭度后得信向心法僧圣戒，自不起恶见，亦不讥他恶，而广为人显说我法，不生诽谤发正誓愿，已所作恶数数忏悔，能除无量种种诸罪，作如是信，令使九十五种异学外道犹悉能度向于涅槃，非转轮圣王所有功德之所能及。

“以是义故，如来观察一切众生本业，作如是说。以是因缘故，于我法中出家，剃除须发、被染衣者不应起恶。一切过去、未来、现在诸佛大悲，皆悉护持如是出家被服染衣，以是故，若于出家一切人边起恶心者，则同过去、未来、现在诸佛等前为恶无异。若复有人破戒不成法器者，诸如是等，当作恶见亦讥他恶，譬如真善刹利，真善辅相，真善大臣，真善沙门，真善婆罗门，真善居士，真善毗舍、首陀，若男若女，无父无母，世间阿罗汉，无正道无趣向正见者，亦无修善恶果报，无有得果者，一切法皆无因缘；或有作如是说，色界是

常是不坏法，或计无色界是常不坏法；或说外道苦行，编椽棘刺，五热灸身，以为第一；或说纯声闻乘，以为第一，不说辟支佛乘，乃至诽谤大乘摩诃衍法，隐蔽覆藏，不能显发开示分别；或有一向纯信摩诃衍，讥嫌声闻、辟支佛乘；或有说言，施为第一，持戒乃至智慧非是第一；或有说言，戒为第一，布施乃至智慧非是第一；或有说言，忍辱为第一，布施、持戒乃至智慧非是第一；或有说言，精进以为第一，布施、持戒、忍辱乃至智慧非是第一；或有说言，禅定以为第一，布施、持戒、忍辱、精进乃至智慧非是第一；或有说言，智慧最为第一，布施、持戒、忍辱、精进、禅定非是第一；或有说言，外道苦行以为第一。如是族姓子，破戒恶行诸比丘等，于成法器者边生种种毁谤，向恶见者说如是言，有颠倒见者，破坏真善刹利，信戒闻舍智慧皆悉破坏，真善辅相，真善沙门、婆罗门，真善居士，真善毗舍、首陀，真善男女，破坏信戒闻舍智慧。如是破坏，名为刹利旃陀罗乃至居士旃陀罗，破戒比丘自断善根，亦能令真善刹利亦失善根，乃至堕于地狱。

“善男子，譬如脓烂死尸，有所近处皆悉臭秽，有所至处自臭亦令他臭；如是真善刹利，亲近恶知识破戒比丘，随所近处悉生恶见臭秽如是，能使刹利断于善根，趣阿鼻地狱。如是真善辅相，乃至真善妇女，亲近破戒恶行比丘，皆为旃陀罗，断于善根趣向地狱。

“族姓子，汝观是亲近破戒恶行比丘退一切善，是故欲得大涅槃乐，皆应亲近供养灭结修道者，于彼修学具足三乘示道者边应亲近供养，具足内心，具足修道，具足知见，应听声闻、辟支佛道，不诽谤贤圣，于摩诃衍亦不诽谤，随其所欲精进，于三乘中随其发愿修学一乘，不应诽谤大乘经典乃至一句一偈。若诽谤者，不应共住，亦不应亲近。若亲近共住者，即趣阿鼻地狱。是故，族姓子，于三乘中当随所乐趣向一乘。欲得远离一切苦者，应信如来所说声闻、辟支佛乘，悉应依止摩诃衍所说诸法，不应诽谤隐蔽覆藏乃至一句一偈，应当谛听发正誓愿。若有谤正法者，不应共住，亦不应于是人所咨受听法。若就听法，以是因缘，常趣阿鼻地狱受大苦恼。何以故？族姓子，我本为菩萨行时求无上道，依声闻乘为求一偈，乃至舍身、手足支节、头目髓脑，如是求于辟支佛乘，及求佛乘；我本为菩萨时，为无上道故，亦复如是为一偈故，舍身手足、头目髓脑、血肉皮骨，如是苦行乃至究竟成无上道。此三乘法皆是三世恒沙诸佛之所演说，神力守护，为欲悲愍诸众生故，亦为欲绍三宝种故不令断绝。

“复于未来世，若有刹利旃陀罗乃至妇女旃陀罗，以愚痴故自谓为智，多恶粗犷，不畏后世，作诸杀生乃至邪见、嫉妒悭贪，随恶知识；又于三乘不成法器，于声闻乘得少闻已，于辟支佛乘乃至大乘，一切诸佛之所护持而生诽谤覆障不令显现；若于摩诃衍得少闻者，于诸声闻、辟支佛乘，诸佛神力之所护持而生诽谤毁谤，不信我大乘及能分别说大乘者；若言我听大乘，不受声闻、辟支佛乘，以己少智慧

闇力故。亦是过去、未来、现在诸佛大悲力故，为欲利益一切众生，有二种护持：第一、为欲绍三宝种令不断绝，出家修道，剃除须发而著袈裟；第二、说应四谛法，趣向三乘。如是二种如来护持，非声闻、辟支佛所能持也，乃至百千帝释梵天亦不能持，百千那由他转轮圣王亦不能持。

“复有刹利旃陀罗，若见有人于我法中而出家者，如是声闻弟子，闭系牢狱、鞭杖谪罚或至夺命，于此甚深一切诸佛菩萨所护持法，悉使坏乱三乘正道诽谤覆藏。如此之人不识大乘，如是刹利旃陀罗，尚不堪任为声闻器，况复大乘？复有妇女旃陀罗，欺诳世人，自言‘我是行摩诃衍’者，以愚闇故，慳贪嫉妒故，毁坏我法，言我自当速趣涅槃。而于诸佛如来世尊所得生其罪过，一切菩萨摩訶萨、一切诸佛声闻弟子边亦皆犯罪，令寿命短促，多诸苦恼，诸根缺坏，支节不具，恒多疾病。刹利旃陀罗乃至妇女旃陀罗，作诸恶业，皆生倒见，断一切善根，虽多布施于畜生中受种种身而得果报。于未来世身坏死时，终不能生色界善根成无碍智，亦不能趣一切种智，而多疾病舌不能语，向阿鼻地狱。

“是故如来，为欲利益真善刹利使得安乐，亦令真善妇女得其利益，以是因缘，不听恼乱于我法中而出家者。又复于我说法中起诸诽谤，以如是事，获大罪报，如前所说。何以故？披著袈裟是一切诸佛解脱之相。

“是故一切诸佛，护持声闻解脱等味大正法幢，亦是辟支佛第一大乘解脱味幢。是故求解脱者，应先读诵声闻乘等谛听其法，远离一切诸恶知识，亲近一切诸善知识，供养恭敬；然后读诵方等大乘六波罗蜜，一切所作诸恶不善，皆悉发露如法忏悔；发大誓愿，身坏命终于后世中，悉能成就声闻法器，斯有是处，亦是辟支佛种子，乃至大乘阿鞞跋致无上种子。何以故？善男子，复有十种依止轮，若成就是轮已，真善刹利乃至真善妇女，则能速疾成声闻器种、辟支佛种、大乘阿鞞跋致种。何等为十？如是真善刹利乃至真善妇女，信有业报具足惭愧，远离邪见及恶知识，持戒不杀乃至不饮酒，慈心一切离瞋恼害，具足悲心救济忧苦，羸劣众生得于喜心，远离两舌、妄言、绮语，得无诤心离慳贪嫉妒，终不依止诸邪异道，离一切疑网及众苦相，发大精进于一切法而得坚固，疾证寂静得法欢悦。

“族姓子，是十种依止轮，真善刹利乃至真善妇女，成就十轮，则便速得声闻法器、辟支佛种、大乘阿鞞跋致种子，是名依止轮也。如是轮者，悉与声闻、辟支佛共。”

尔时，世尊欲重宣此义，而说偈言：

“于众中第一，剃头著袈裟，
云何恶比丘，破戒得供养？
毁禁失头陀，诡语邪见持，

非器毀于道， 不应使謫罰。
若从彼听法， 信寂灭涅槃，
若得解脱者， 为彼之良药。
于诸余经中， 但说一乘道，
言无有二乘， 第一之解脱。
利益诸众生， 尽业报烦恼，
恒有悲愍心， 刹利乐正法。
婆罗门毗舍， 首陀等染罪，
欲恼于比丘， 必趣向恶道。
如是一切佛， 护持染袈裟，
诸佛解脱道， 是说名第一。
著于解脱服， 速疾舍恶见，
趣向于涅槃， 犹如药治病。
虽破于禁戒， 亦能灭他苦，
我终不听彼， 在众而布萨。
若为他说法， 彼此俱得福，
称我为世尊， 归依于三宝，
遮断诸恶业， 犹胜于外道。
譬如罗刹王， 商人入怖畏，
捉揽马一毛， 必度大海难。
破戒舍恶邪， 离烦恼罗刹，
是故护解脱， 诸佛之所持。
不恼破戒者， 必舍诸罪恶，
是故有福者， 欲求于解脱，
能护器非器， 解脱亦不难。
于此无势力， 愚闇于声闻，
非彼缘觉等， 而能说大乘。
不觉于缘觉， 而赞于大乘，
彼已破于信， 读诵大乘经。
不护于余乘， 身口意所犯，
唯说于断见， 破坏于正法，
后当得成人， 还堕阿鼻狱，
是以观众生， 勿有非器者。
若犯毀禁戒， 无愍矜谄曲，
亦应知是因， 恶口而断见，
非声闻缘觉， 亦复非大乘，
毀谤三世佛， 必趣阿鼻狱。
谄曲而持戒， 散心慳惜法，
厌恶诤贪嫉， 是名为声闻。
有智乐行施， 能起生灭相，

执心常独处，是名为缘觉。
持戒不惜身，犹如猛师子，
志求寂灭道，是名为大乘。
守护于正法，善说而显示，
得深诸法忍，是名为大乘。
法器非法器，心常行平等，
不染于世法，是名为大乘。
是故于二乘，智者如法说，
守护我声闻，速成最正觉。

佛说大方广十轮经卷第六

刹利依止轮品第八

“复次，善男子，十种依止行轮，一切声闻、辟支佛乃至如来，皆与同等。若有成就依止轮者，真善刹利乃至真善妇女，速疾得成声闻法器、辟支佛种，亦能成就如来法器。

“何等为十？族姓子，所谓真善刹利乃至真善妇女，身口意业净修法行，有惭有愧，厌恶己身畏五盛阴，不见生死大河彼岸，乐于寂静离诸愤闹，无有诤心不讥他短，守护诸根心常念定，善观因果，能成就禅定，常乐摄心善解生灭，如是则能成就十依止轮。是名为真善刹利乃至真善妇女，速疾成就声闻乘、辟支佛种，亦得大乘阿鞞跋致。如是族姓子，能成声闻、辟支佛乘，依止此轮度诸有海入涅槃城。

“云何名依止、威仪、轮？云何名依止？我所谓依止五受阴故，名为依止，于五受阴而作己想决定依止。云何名威仪？有阴威仪，有界威仪，是名威仪。云何名轮？诸佛神力所持言教，皆名为轮及与剑轮。如是声闻、辟支佛人，依止此轮求涅槃道，染著依止，不任大乘清净法器。

“云何依止？依止阴界心生惊怖，依止厌离、依止于身而求解脱，度脱己苦，以己受阴为求一切众生解脱。以著己受故，而不堪受大乘法也。但自为己，不为众生，无大悲心，以是故不住大乘。久住生死便舍他苦，为欲断己烦恼故，不能舍于手足头目，是故不任大乘法器。亦不求于大乘道轮，而亦不求梵音轮也，是故不任大乘之器，独一无伴入涅槃城。以是义故，若有众生，不闻声闻、辟支佛乘，诸行不具，善根不熟，微少精进，若此人前有所说法二俱得罪，亦是扰乱一切诸佛。以是义故，若有众生，于声闻、辟支佛乘而不成熟诸善根者，若听微妙大乘经者，彼人愚痴，自谓为智，堕于断见，如是人等说无因果无善恶业，亦于我法而作坏乱，非法言法，非沙门自称沙门，非比丘言是比丘，遮断一切声闻、辟支佛乘而不流布。

“若于声闻、辟支佛法，出家受具足戒，为集一切诸善根故，故任法器及不任者，学无学人善巧言辞，机辩无碍已证诸果，乃至真善凡夫具足持戒，于是等边而作骂詈，夺其衣钵执缚系闭。如是断常是人中罗刹，得人身难，宁堕地狱得无量罪，不受人身起于断见，是故生常愚痴口不能语，乃至命终趣阿鼻地狱，人身难得；于阿僧祇劫设得人身，于诸佛界生五浊世，身常喑哑，口不能语，耳无所闻，如是等病逼切其身，志意错乱，无有饮食资产财业，远离善知识，成就诸恶，亦为恶见之所覆障，造众逆罪而说断见，恼乱我等声闻弟子持戒清净修功德者，为恶所染。若人下根下精进，不求声闻、辟支佛乘，于大乘道而生断见，欲求人身尚难可得，况求声闻、辟支佛乘？于此二乘尚不能行，况复能了甚深大乘？

“譬如坏瓶，多诸穿穴，若盛油水，则皆漏尽而俱失坏。何以故？是器过故。若有众生根不熟者，亦复如是，同彼瓶相。善男子，如盲人前示种种宝；如是无智慧者，憍慢放逸乃至断见，广示大乘亦复如是不能了知。譬如有人，其身臭秽，虽以旃檀、沉水香等种种涂身，犹不能香；如是不勤求声闻、辟支佛乘，不断恶业乃至邪见，若以摩诃衍大乘香涂，犹故不香。譬如薄田虽植好种，终不能成；如是不能勤求声闻、辟支佛乘，于彼五欲不生厌离，如是之人若以摩诃衍道，而为说之则不能成。譬如毒瓶著少石蜜不任食用，若不能修声闻、辟支佛乘乃至大乘，言无因果者，若欲为说大乘经典，不能令彼如闻修学，则不信受犹如毒瓶置少石蜜；如是不任声闻、辟支佛器，而置大乘味者，当知是等二俱无用。亦如狂人前，若弹笙篴箫笛鼓贝，作众伎乐，不能解了；如是不能勤求声闻、辟支佛乘，有重贪欲、瞋恚、愚痴，乃至声闻乘根不熟者，若为说摩诃衍道，亦不能了。譬如有人不持铠杖而入战阵，既入之后必当得于无量苦恼；如是不能勤求声闻、辟支佛乘，根不熟者，若为显示摩诃衍乘，亦复如是，必当得彼无量苦恼。

“是故，善男子，有智之人先观众生，然后说法，以慈悲喜舍心，及利益心、不懈怠心，以忍辱心、不憍慢放逸心、无嫉妒心、无吝惜心，以修定心，为人说法，亦不令他堕堕恶趣不如意处。是故如来能知他心，救济众生，随其信轮而为说法，以大庄严而自庄严。

“若为菩萨摩訶萨说法，恒以大悲因缘，为断众生一切结使而为说法，度诸有海为于三乘中随便成就一乘故而为说法，终不欲令堕于生死而为说法、分别诸阴而为说法、分别诸入而为说法、分别诸界而为说法、分别欲界道而为说法、分别色界无色界道而为说法，不为今世有，不为后世有，不为行有，不为心想有，不为心行有，不为意思有，不为无明有，乃至不为生老病死有，不为行无行众生而为说法乃至行非行寂灭而为说法、一切想无生而为说法。

“云何名行？行者名为死此生彼，若能覆此生死，名灭行非行。

“云何名轮？如如意宝能持一切，遍满虚空度诸国土，观察世间

诸行起灭犹如幻化，不与声闻、辟支佛共，是故名断一切行轮。

“如是，善男子，如来以如是相，为诸众生种种说法，亦如虚空无有分别，与无量三昧自在游戏而为说法。

“如是菩萨以大庄严而自庄严，为诸众生，说色非空，离色非空，乃至识非空，离识亦非空；眼非空，离眼亦非空，乃至意非空，离意亦非空；眼识非空，离眼识亦非空；意识非空，离意识亦非空；空处非空，离空处亦非空；识处非空，离识处亦非空；无所有处非空，离无所有处亦非空；非想非非想处非空，离非想非非想处亦非空；四念处非空，离四念处亦非空；道亦非空，离道亦非空；十二因缘、三不护法、十力、四无所畏、十八不共法，大慈大悲大喜大舍，乃至涅槃非空，离涅槃亦非空。

“善男子，是名如来中道实义决定性相，为他众生分别演说诸行无生，住持正法，遍满虚空，乃至无量禅定一切法相，皆如日光照明，开示令入三乘，为得涅槃令得解脱。

“菩萨摩訶萨如是说法，为最第一利益众生。谛听甚深法已，随意所欲，于三乘中，随所修习种种善根则善住一乘，亦不增益诸不善法，其行坚固不退涅槃。

“菩萨摩訶萨为断无量生死劫苦而为说法，亦为声闻、辟支佛乘众生令度四流。

“菩萨摩訶萨为断一切众生四流而为说法，声闻、辟支佛乘但为自己断四流故而为说法。

“菩萨摩訶萨为断众生烦恼病故而为说法，声闻、缘觉为断己烦恼故而为说法。

“菩萨为断众生烦恼业习使无余故而为说法，声闻、缘觉虽断烦恼习有余故而为说法。

“菩萨摩訶萨为令众生得大悲果报故而为说法，声闻、缘觉离于大悲而为说法。

“菩萨摩訶萨但为悲愍诸众生故而为说法，声闻、缘觉虽复说法，实无悲愍利益之心。

“菩萨摩訶萨为灭众生诸毒苦故而为说法，声闻、缘觉但灭己苦故而为说法。

“菩萨摩訶萨为满一切法味故而为说法，声闻、缘觉自满己法故而为说法。

“菩萨摩訶萨为一切众生得法光照成大明故而为说法，声闻、缘觉但为自得法之照明，不为众生演说法相。

“善男子，是名略说灭除一切大无明闇得大明故，而欲成就一切种智悉觉悟故，乃为他人分别说法，声闻、缘觉为欲灭己无明闇障，内自照明得正觉悟。

“善男子，声闻、缘觉不为众生而生厌恶，不为愍救度脱他人，不为于他令得名誉称扬赞叹，不喜他人而生谄曲，但自护己不护于

彼，不为安乐一切众生。声闻、缘觉若见他人有微少过，必起身口意业等罪。

“善男子，菩萨摩訶萨住大乘者，皆悉救护慈愍于他，乃至不见众生身口意业过。

“善男子，若有众生，起于粗弊愚痴恶口，自谓为智，乃至不离邪见，为求他利而生嫉妒，贪著名称自举轻他，不能守护身口意等，心常念恶无有愍伤，而喜恼乱选择福田。若有依我而出家者，不见其过，轻毁骂詈心常散乱，不自省己念讥彼阙，于大乘人虽生愿乐无寂静心，起重恶心永离他人，恒作是语而自称说，是大乘人亦教他读诵，但自赞己非毁于他。以是义故，赞叹大乘自不调伏，于大乘道而欲教他修行大乘便作是说，自谓大乘，譬诸恶行律师而教人言。如是谄曲难得人身，亦失声闻、辟支佛乘，常趣恶道，不欲亲近诸有智者，而唱是言作师子吼：‘我是大乘。’

“善男子，譬如有驴著师子皮，自以为师子，有人远见亦谓师子，驴未鸣时无能分别，既出声已远近皆知非实师子。诸人见者皆悉唾言：‘此弊恶驴，非师子也。’我今所说亦如是等，若造十恶烧灭人种，非诸声闻、辟支佛器，败坏种子，如是愚痴诳惑他言：‘我是大乘。’

“善男子，譬如有人而无手足，欲至战阵无所堪施；破戒之人亦复如是，欲与结使烦恼战斗，我说是人终无果报。毁犯禁戒作恶行者，于一切处不成法器，若自说言：‘我是大乘，能破一切众生烦恼尘劳大阵，亦为众生住八正道入无畏城。’则无是处。何以故？若有众生，威仪清净，惭愧具足，畏于后世，远离一切不善等法，喜乐一切诸善功德，而于众生起大悲心，亦能济度一切苦厄，救护生死诸怖畏者，不著己乐庆于彼乐，常勤精进专念不舍，心乐寂定舍于谄伪邪惑欺诳，善知业知业果报，不著五欲，世间八法所不能染，乐观阴界如救头燃、如救衣燃，安住声闻种，有如是相名声闻乘，则于大乘所不堪任。辟支佛乘复有何相？若人具上二十法者，则能常观五受阴生灭等相，明观诸法皆因缘生，亦知灭相，如是之人不任大乘，不能成于大乘法器。”

尔时，如来以是义故，而说偈言：

“刹利依止十，婆罗门首陀，
若修真善行，堪为声闻器。
辟支佛胜乘，三业悉清净，
守护于诸根，所说好柔软。
分别观诸阴，界入亦复然，
乐独空闲处，善慧观因缘。
常摄于诸根，依止是十轮，
于诸无坏乘，堪任为法器。”

念度于有海，等行于三轮，
不依于结使，而近解脱门。
不任大乘器，不具大胜轮，
不勤求大乘，并诸下根者。
若有愚痴人，心常怀懈怠，
是故非大乘，亦不堪大器。
独一求解脱，痴谄无愍行，
常行于断见，彼亦趣恶道。
弃舍于正法，而说于非法，
遮断三乘道，舍律欲爱具。
恼坏贤圣法，打掷袈裟者，
毁誉而诽谤，亦自坏其身。
为欲修人身，不舌噤而死，
常值诸佛者，显示三乘法。
欲炽然三乘，及与分别者，
欢喜而显示，必成佛无疑。
破戒而嫉妒，自赞复毁他，
是智者所弃，得佛三界尊。
以悲心说法，随心之所乐，
具分别三乘，必成佛无疑。
说法如虚空，而心无所依，
阴界入皆空，必成佛无疑。
恨戾喜破戒，若闻赞大乘，
诈称为菩萨，驴披师子皮。
我今为众说，欲得胜菩提，
护持于十善，莫坏于我法。
我于余经说，行第一菩提，
离声闻缘觉，为净众生说。
曾供亿诸佛，灭恶心解脱，
我从彼所闻，但一无二乘。
此众说三乘，有住声闻者，
心恼多造作，不任道器故。
有住于缘觉，愚闇于胜法，
不任上乘器，随所欲而说。
头陀闻解脱，当堕于恶道，
冷阴而服乳，终不能差病。
如是声闻器，狂心说断见，
是故先观察，然后应说法。”

尔时，世尊说是偈已，于大众中无量百千人民，多有空乱意众

生，断于善根说无因果，趣向恶道，若得正见，在世尊前能至心忏悔，而白佛言：“我于如来正法之中，久修声闻，植诸善根，而不能成声闻法器，方复更求辟支佛乘，愚惑不了，更起断见获无量罪。我等今悉于世尊前诚心忏悔，唯愿哀愍受我等忏悔，拔除罪根不受恶报，还修善根，求声闻乘。”

佛言：“善哉！善哉！善男子，汝等若能发露诚心忏悔，于我法中，说有二种得无所犯：一者、本不作恶，二者、作已能悔。是二种人俱获清静。”

尔时，世尊为无量百千众生，随顺其心说四谛法，有得法忍，有得世间第一法，有得须陀洹果，有得斯陀含果，有得阿那含果。复有八万四千比丘，不受诸法漏尽意解得阿罗汉。

尔时，众会复有七千五那由他百千人等，堕于断见断诸善根应趣恶道者，还得正见，悉于佛前，自归发露，诚心忏悔，作如是言：“我等本种辟支佛因缘而不能成，今闻大乘心生爱乐，我等愚闇便起断见，言无因果。以是因缘，造作无量身口意业诸余恶业，以是义故，于多劫中常堕恶道，受无量苦。今于佛前皆悉发露，至心忏悔不敢覆藏，为欲满足缘觉乘故。”随彼意说得光明三昧，速不退转辟支佛乘。

时，彼众中复有八十那由他百千众生舌不能语，皆于过去诽谤无量恒沙诸佛所说正法，乃至诽谤一句一偈，以是罪业不能忏悔，佛神力故令使今日皆悉能言。

尔时，世尊知而故问：“汝等宿世作何恶业，于此会中口不能语？”

彼即答言：“我于过去毗钵尸佛法中诽谤大乘。”或有说言谤声闻乘，或有说言谤辟支佛乘，以是业障罪报因缘，于九十一劫坠堕生死，常处地狱及受饿鬼，舌不能语受大苦恼，始于今日得复人身，蒙佛神力始今得语，佛神力故得宿命智，能知过去一切所作恶业因缘。有说尸弃佛、随叶佛、拘楼秦佛、拘那含牟尼佛、迦叶佛所，诽谤正法乃至一句一偈，以佛神力悉知过去所作恶行，一切业障皆悉明了。

尔时，众会无量百千声闻，无量百千菩萨摩訶萨，从座而起，自归向佛，发露忏悔：“我等皆于过去无量诸佛法中，若任法器及不任者诸声闻众，多起讥诃，自举轻他，诽谤毁骂，扬恶遏善。以是业障，堕三恶道具受苦痛，虽复供养过去诸佛，及大菩萨摩訶萨众，乃至忏悔受持禁戒，得闻佛法自学教他，但以诽谤余业障故，不能得趣寂灭涅槃及禅定乐。如是罪缘，今向世尊自归发露至心忏悔。”复有说言：“我等于诸如来声闻弟子，夺其财业及诸饮食或系牢狱，以是业故堕三恶道受大重苦。我等虽于过去诸佛世尊及大菩萨前，发露忏悔，受持读诵种种禁戒，但以余罪业障因缘，不能得向寂灭涅槃及禅定乐。今于佛前皆悉忏悔，一切余业无量罪障，唯愿世尊受我等忏，拔除一切三恶道苦。自今以后愿佛神力，令我所乐随意无碍，得于涅

槃及禅定乐。”

尔时，世尊告诸声闻及大菩萨：“此是五逆余业罪障，但有名字无有实法，皆由恼乱声闻弟子能生大罪。何以故？破毁禁戒诸恶比丘，犹能为诸无量百千万那由他人，而作珍宝之大伏藏，况持净戒炽然三宝者而起扰乱？是即名为断三宝种成就恶业，亦名坏于一切众生法眼毁佛正法。若见有人依我出家而扰乱者，如是业障过诸逆罪，我今当以悲心哀愍汝等，如是业障悉听忏悔，永尽无余。于贤劫中千佛出世，汝于其所亦悉忏悔，终不复起诽谤正法。其最后佛，号曰楼至如来应供至真等正觉，汝于彼佛皆悉发露，一切业障永尽消灭。”

时，诸菩萨及大声闻俱共白佛：“唯然，世尊，如教修行。我等于贤劫中，当堕三恶及阿鼻狱，受种种苦犹能堪忍，况复于彼楼至如来，令我忏悔使得正见，解诸邪见，业障众罪皆悉消除！”

尔时，如来赞诸声闻及大菩萨：“善哉！善哉！汝等能以如是勇猛精进，令本恶业皆悉消灭，能生信解，第一恭敬值遇诸佛，得诸三昧，弃舍结漏，得阿罗汉。”

尔时，世尊告金刚藏菩萨摩訶萨：“善男子，我以佛眼皆悉眼见，无量阿僧祇百千那由他众生，刹利旃陀罗乃至男女旃陀罗，于未来世少种善根而得人身，为恶知识之所破坏，于甚深法不生信乐，多起谤毁，于炽然法，具足声闻、辟支佛乘者，或有遮断大乘者，于我声闻弟子成器、不成器者，如上所说。以愚痴故，自谓为智，于此终没，无数百千劫，于地狱中受无量苦如先所说。是诸人等，虽得人身，宁受阿鼻地狱诸大重罪，终不受是谤法人身！何以故？随顺恶知识憍慢自恣，常作如是诸恶业者，终不得度生死彼岸，四流所漂受大苦恼。”

当于尔时，有大智者而为涕泪，作如是言：“视诸众生难得人身，远离信心及大誓愿，离于心相，离于正见，离善知识，离于时节，离于方所，离于持戒、禅定、智慧，如是众生以愚痴故憍慢自恣，有如是想毁坏佛法悉如上说。世尊，我从今日亦于佛前而发誓愿，我等虽处生死，不坏正法，愿于未来世诸佛法中不断三宝。”

尔时，复有大士聪明智慧，从座而起，合掌叉手，而发誓言：“我等虽在生死，不得法忍已来，于其中间，愿莫受身，莫作辅相大臣乃至令长村邑聚落等主，不作国师、军幢将师、长宿之处，不作祠祀主、估客商人处，不作居士处，不作粗人处，不作断事处。若不得法忍，不于众生居自在处。若作是等，则于佛法名重因缘，必当堕于阿鼻地狱。”

一切大众天、龙、夜叉、乾闥婆、阿修罗、迦楼罗、紧那罗、摩睺罗伽、人非人等，皆悉泣泪而白佛言：“世尊，我等本处生死所作恶业，若身业、若口业、若意业，多所造作或复随喜，今于佛前皆悉发露，忏悔除灭，更不敢作！如是第二、第三亦复如是，不于生死随恶知识，亦愿我身不造恶业，悉如上说。”

尔时，世尊告诸大众：“善哉！善哉！善男子，汝能如是畏于后世，欲度生死诸有流苦，欲入无畏大涅槃城，发此誓已。善男子，具足十法，则得成就无著法忍。善男子，菩萨摩訶萨，不著内身，不著外身，不著内外身，不著过去、未来、现在身，是名菩萨初得成就无余法忍。复次，不著内身受，不著外身受，不著内外身受，不著过去、未来、现在身受，乃至不著想行，不著内识，不著外识，不著内外识，不著过去、未来、现在识，不著前世、不著今世、不著后世，不著色界，不著无色界，是名菩萨摩訶萨成就十法得无著忍，若能如是于如来所说法。”

是时，七十二亿那由他百千菩萨得无生忍；八万四千那由他菩萨皆得顺忍；无量那由他百千声闻，断诸结漏得阿罗汉；无量那由他百千众生，未发菩提心者今皆发心；复有无量众生，亦得发于辟支佛心。

尔时，世尊告金刚藏菩萨：“若有众生成就法忍者，应得灌顶转轮圣王，所有饮食无量财业。其余众生不得法忍者，亦不能得灌顶转轮王位。”

金刚藏菩萨白佛言：“世尊，为灌顶刹利王不得忍者，云何而得饮食财业？”

佛言：“灌顶王虽不得法忍，能成就十善者，我亦听作国主，饮食财业任意自在。善男子，灌顶刹利王若不得法忍，又不具足修行十善，名为刹利旃陀罗。如是愚痴，当破甚深炽然佛法，断三宝种，而使扰乱声闻弟子，亦作无量种种谪罚，夺人财物基业，诽谤善法而心覆藏不令显现，或夺塔物僧祇物，如是之人皆悉趣向阿鼻地狱。”

金刚藏菩萨白佛言：“世尊，若灌顶刹利王不得法忍，复不具足修行十善，必当不得免斯恶耶？”

佛言：“假使灌顶刹利王不得法忍，而复不修十善道者，能成就信力归依三宝，不谤正法乃至一句一偈，亦不扰乱声闻弟子持戒清净有德之者，不取佛物、僧祇物。若人见有扰乱如此比丘，而复夺于佛物、僧祇物者，能为遮制令无侵毁，数数听受顺于实法，于三宝中常应供养亲近是人清净比丘得坚固愿，于摩訶衍心无疑惑，亦能成就大乘众生，建立正法信大乘者。如是灌顶刹利王者，已于宿世诸如来所，得其城邑资生财物，我亦知之不堕恶道。若欲永灭一切恶者，应当修行如是正法，于过去世所作恶业悉得除尽。”

佛说大方广十轮经卷第七

远离讥嫌品第九

尔时，金刚藏菩萨复白佛言：“世尊，云何菩萨摩訶萨于声闻乘、辟支佛乘不生讥嫌，于诸菩萨亦无讥嫌？云何于如来声闻众中，

成器、不成器得无讥嫌，于大乘道常善修行？云何得利智一切三昧诸陀罗尼及诸地忍？云何得升进不退转法？云何常得善知识？云何常得不离佛法，供养众僧及诸菩萨？云何于善根不生厌足？云何于菩萨行愿得无厌足？”

尔时，世尊告金刚藏菩萨言：“善男子，菩萨摩訶萨有十种轮，若有成就如是轮者，则于声闻、辟支佛乘无所讥嫌，乃至菩萨乘亦无讥嫌。若于如来声闻众中，成器、不成器者悉无讥嫌，常得升进不退法轮，而于大乘亦得增长无有阙失，常得禅定诸陀罗尼及诸地忍，不离佛法，供养众僧及诸菩萨，求于善根悉无厌足，得坚固精进，发无量行愿；过去所作一切恶业，皆以贤圣金刚地智，令使永尽悉得究竟；一切现在所有恶业，皆使无余更不复作；能速成就无上法轮，七觉意宝而无厌足；能除一切众生结使，人所依止。

“善男子，譬如转轮圣王，若欲行时，宝轮最在其前，其余诸宝皆悉随后，能灭一切诸四天下众生浊恶，亦令四下一切人民身意受乐；菩萨摩訶萨亦复如是，若成就十轮，于声闻乘无所讥嫌，乃至一切众生亦依止而存。善男子，譬如大车具足四轮，多人依止乘于正路，边有块石众草，乃至根茎华果，为轮所辗皆悉消灭；如是菩萨摩訶萨为诸众生，若有障法一切罪业，辗断消灭令不受报。善男子，譬如剑轮悉能斩截怨敌等首，既断支节手足更不任用；菩萨摩訶萨若能成就如是十轮，一切六趣欲界诸恶，皆悉断除令尽无余，不复受报。善男子，譬如五日出时，一切四天下大地，所有水处无不干竭；如是菩萨成就十轮，能为众生除诸业障及障法等罪，众苦根本一切消灭。譬如风灾起时，四方大风一时俱起，能吹一切大石诸山皆为微尘；如是菩萨摩訶萨能成就十轮，为诸众生同共依止，令四倒山结使诸业障法重罪灭苦根本，令得无余。善男子，譬如师子王若欲吼时，一切畜生诸众生等皆悉怖畏；如是菩萨摩訶萨亦复如是，乃至外道及诸异学恶知识等，皆令惊畏忘失言辩。善男子，譬如释提桓因以军围绕，手执金刚杵破坏阿修罗；如是菩萨摩訶萨成就十轮者，一切倒见外道之属，恶知识等皆悉坏灭。善男子，譬如如意宝珠，著高幢上雨种种宝；如是菩萨摩訶萨成就十种轮者，能持戒幢，雨众法雨，以施一切无量众生。善男子，譬如夜闇，明月出现灭一切闇，若有一切迷失道者令得正道；如是菩萨摩訶萨成就十轮者，无明黑闇如是众生失八正道，亦为众生说种种法，令其照明，尽诸苦际，示八正道。善男子，譬如日初出时，一切谷米皆悉增长，诸华开敷及诸药谷尽得成熟，雪山消流诸河充溢，以渐次第满于大海；如是菩萨摩訶萨成就十轮者，但调伏戒慈悲炙暖故，为诸众生说无量法，能生善根种种华果，一切结使业报恶行及邪见悉得消灭，乃至究竟证于涅槃，一切妙果无不悉得，信戒施闻慧无量三昧如是次第犹如大河以渐满足，以渐满故能令众生入于无畏涅槃之城。

“善男子，云何名菩萨摩訶萨十种轮者？所谓十善是也。菩萨成

就此十轮故，乃能成熟一切众生。菩萨以离杀生故，能令一切众生无惊无怖，无有一切忧悲苦恼，善根成熟具足果报。若于前际流转六趣没生死河，以如是等不杀生因缘，先世所作身口意等恶业诸罪一切烦恼，能令众生障于正法，自作教他作乃至见作随喜，受持如是不杀轮故皆悉辗坏，一切恶业障碍罪报令无有余。亦以不杀因缘，能令一切诸天人等皆生爱乐无有疑悔，寿命得长；临欲终时，所爱妻子及诸眷属悉皆围绕，身不受苦；乃至神逝所往之处，终不见阎罗王及诸狱卒。若临死时遇善知识，清净持戒心乐福田，舍此身已得生人中诸根聪利，复值善知识清净持戒，常乐福田断除诸恶，而求一切大菩萨行，入深智海遂得菩提。其所生处，常离刀杖诸恶国土，寿命长远，自在净国离诸惊怖，如彼佛寿无量无边，亦复能作如是寿命，为诸众生说法教化，乃至佛涅槃后令法久住。善男子，是名菩萨摩訶萨最初轮也。菩萨若成就此轮，于声闻乘、辟支佛乘无所阙失，于一切如来声闻弟子亦无阙失，不退大乘，一切三昧诸陀罗尼及诸忍等，到于一切自在之地，常随善知识佛及菩萨，得闻正法，供养众僧，植诸善根，恒无厌足，修诸菩萨一切行愿，亦无厌足。何以故？过去诸佛于此十恶皆悉远离，于一一恶不善业等亦不赞叹。以是之故，善男子，于此十善若能守一善业，以如是相所获果报亦如前说。

“复次，善男子，菩萨摩訶萨修行不盗，能施一切众生，无惊无怖无畏亦无愁恼，己所有物，如法饮食资身财业，恒求一切如法利益无非法欲。以此善根行业果报，假使曾于六趣流转没生死河，以不盗力故，身口意业所作众罪能障正法，乃至财业等障，自作教他见作随喜，以不盗轮皆悉辗除令无有余。亦令人天一切爱乐而无疑悔，乃至临命终时，妻子眷属一切围绕，身不受苦。若命终后，神逝所往，不见阎罗王及诸狱卒。恒遇所爱诸善知识，持戒清净心乐福田，乃至能离一切恶法，成就一切无量善法。随所生处，得大财业；有财业已能离怖畏，而悉不与水火贼共，乃至到于菩提，悉得众宝严饰佛国，宝树具足，无我我所无取无著，成就一切众生行业，无我所、无所受、无寿、无众生，而悉调伏于彼佛国。善男子，是名菩萨摩訶萨第二轮也。若菩萨成就此轮，于声闻、辟支佛乘悉无阙失，乃至如来声闻弟子亦无讥嫌，而自于彼摩訶衍乘无有厌足，悉得一切诸三昧门及陀罗尼忍地，亦不舍于一切誓愿。

“复次，善男子，菩萨摩訶萨终身远离邪淫，一切众生皆为欲流之所沉没，而能施于无畏无嫉无热恼害，于己妻色恒生知足，无非法欲。以是善根果报力故，若有宿世邪淫果报，六趣生死流转诸有，自作教他见作随喜，而令悉离诸邪淫轮，辗断恶业令无有余，乃至成菩提道，生于净国无女人处，第一清净，彼诸众生皆悉化生，不从父母和合受身。善男子，是名菩萨摩訶萨第三轮也。菩萨摩訶萨成就此轮，乃至不舍一切愿行。

“复次，善男子，菩萨摩訶萨尽其形寿，离诸妄语，常随顺语，

以是因缘人天欢喜，乃至逮得菩提，不谄众生而生其国，所言真实无有虚伪，是名菩萨摩訶萨第四轮也。若菩萨成就此轮，乃至常求一切菩萨愿行，而无厌足，终不暂舍。

“复次，善男子，菩萨摩訶萨于终身中常离两舌，乃至以此善根至成菩提，调伏众生，修六和敬，来生其国，皆共一心互相恭敬，而无违失修质直法。善男子，是名菩萨摩訶萨第五轮也。菩萨摩訶萨成就此轮，乃至常求菩萨行愿，无有厌足终不暂舍。

“复次，善男子，菩萨摩訶萨远离恶口，乃至成就菩提，耳终不闻不适意事，常生佛国，恒闻种种柔软人声及音乐声，闻诸法声周遍佛国，志念成就梵音清彻，如是众生来生其国。善男子，是名菩萨摩訶萨第六轮也。若有菩萨成就此轮，从初发心乃至成佛，恒求菩萨一切行愿，而无厌足终不舍离。

“复次，善男子，菩萨摩訶萨于其终身远离绮语，乃至菩提，常于佛国闻诸菩萨摩訶萨百千法音周遍佛国，而恒远离一切绮语，成就善语法语如是众生，来生其国。善男子，是名菩萨摩訶萨第七轮也。若菩萨成就此轮乃至菩提，常求菩萨一切行愿，而无厌足终不暂舍。

“复次，善男子，菩萨摩訶萨于其终身远离贪欲，乃至菩提，常生净国，地平如掌，众宝充满，亦以宝树而严饰之，复有若干种无价宝衣、瓔珞、幢幡、金绳、珠璣，而彼世界种种庄严罗网宝树，彼中众生远离憍慢我心贡高，颜貌端严诸根具足，其心平等，如是众生来生其国。善男子，是名菩萨摩訶萨第八轮也。若菩萨能成就此轮，乃至菩提，恒求菩萨一切行愿，而无厌足终不暂舍。

“复次，善男子，菩萨摩訶萨于其终身远离瞋恚，乃至菩提，悉除一切垢恼秽浊尘云暴风，于彼净国无诸浊恶断除憍慢。生彼国已，形色端正，相好第一，诸根不缺，禅定慈悲，以自严饰，如是众生来生其国。善男子，是名菩萨摩訶萨第九轮也。若菩萨成就是轮，乃至菩提，恒求菩萨所作愿行，而无厌足终不暂舍。

“复次，善男子，菩萨摩訶萨于其终身远离邪见，复能以比离邪见轮，令诸人天一切爱乐，若有众生流转六趣没生死河，如是人等起身口意，一切业障及烦恼障而障正法，自作教他作见作随喜，以此离邪见轮，碾断业结令灭无余。妻子眷属围绕左右，临命终时身不受苦，神逝所往，亦终不见阎罗王等及诸狱卒，随善知识持戒清净，心乐福田恒生正信，命终之后得生人中，亦与善知识及诸持戒福田之人而相遭遇，还相依止令得正见，为善知识之所教授，修习善法恒离一切不善等恶，于诸善根皆悉成就，一切菩萨所行之道无不修习，以是因缘能度一切众生，入摩訶衍正法大海，乃至得菩提道，一切疑网及诸吉相常见断见，离我我所见，如此众生来生其国，寿命无量，悉同法味皆是大乘，弃舍声闻、辟支佛，及诸天魔、一切外道并魔眷属，皆悉已离如是等恶来生其国。彼佛寿命无量无边，恒于其中而作佛事，般涅槃后令法久住，无所损减而更炽然皆悉一味。善男子，是名

菩萨第十轮也。若菩萨摩訶萨成就此轮，于声闻乘、辟支佛乘不生讥嫌，及二乘人亦无讥嫌，乃至大乘亦复如是。于大乘人能令增广炽然三宝，于诸如来声闻弟子，成器及不成器者亦无讥嫌，而能庄严摩訶衍道，一切三昧诸陀罗尼乃至忍地，恒善修学证胜进法，不离诸佛及大菩萨善知识等听法信受，乐供养众，心无厌足，求诸善根，终不暂舍，菩萨所行六波罗蜜亦无厌足。

“善男子，若能成就如是十轮者，菩萨摩訶萨，疾成无上正真道觉。何以故？过去诸佛修行十善，离一切恶，能现如是种种果报因缘无量相貌，具菩提道，悉断一切烦恼结使，尽竭三恶皆使无余，是故能令绍三宝种，久住于世常得炽然，使不复受三有之身向于涅槃，为断阴入界等入无畏城，以此远离十恶因缘，具足果报如上所说。以是义故，善男子，若于此十善不修一者，求于佛道，而复自言：‘我是大乘，皆应当得无上菩提。’如此之人，是大妄语，多行谄曲种种欺诳，于诸佛所，能断一切众生善根趣向三恶。是故善男子，具足十善刹利大姓、婆罗门大家，四天王天乃至非想非非想天，声闻乘、辟支佛乘，修行如是十善功德，悉能具足阿耨多罗三藐三菩提故。善男子，以此十善而自庄严，求无上果修学大乘疾成佛道者，此则安立一切功德善根处所，若能守护十善，便于善根誓愿满足，成无上道。”

尔时，世尊欲重宣此义，而说偈言：

“以十轮觉悟，欲离一切苦，
不应讥声闻，恼著袈裟者。
随顺缘觉乘，信心勤精进，
安乐诸众生，而受行大乘。
一切诸缘觉，觉了最胜法，
净修于佛道，速证得菩提。
远离于杀生，人天皆爱念，
生生得长寿，善修无害业，
一切所生处，常乐于佛法，
亲近世尊者，速证得菩提。
若离于偷盗，一切智所敬，
悉灭诸悭贪，守护不盗戒，
生处常大富，为他作施主，
而得严净国，以众宝庄饰。
灭除烦恼秽，干竭于爱欲，
能远离邪淫，速得清净国，
永离欲淤泥，解脱净众生，
令人于大乘，由离邪淫故。
欲得圣智者，赞叹于实语，
弃舍诸妄语，悉灭于苦恼，

究竟得实语，常值于诸佛，
速疾成菩提，远离妄语故。
堪任为善器，而远离两舌，
常与当佛会，永舍于断见，
得圣无染著，逮总持辩才，
能知深法海，不久得菩提。
常说柔软语，远离于恶口，
众生所爱乐，能灭先世业，
令众生欢悦，菩萨之法将，
悉知诸佛行，得入第十地。
智者所爱敬，远离于绮语，
具足五功德，所说皆觉了，
欲闻尊贤教，及与求圣道，
供养诸佛海，速得一切智。
一心除贪淫，不坏于正法，
供养染衣者，炽然三乘道，
常生清净国，法将之住处，
于彼获妙智，第一无上乘。
常行于慈心，远离诸瞋恚，
速疾得禅定，志乐贤圣行，
生于清净国，远离一切过，
随佛所住处，永离一切瞋。
专一修纯信，远离诸邪见，
显示三乘道，是名法供养，
免离于恶趣，解脱值贤圣，
具足菩萨行，逮得最上智。
安住而说法，能成于菩提，
三昧总持忍，皆由十善故，
具足轮威德，悉碾除恶趣，
尽灭业结障，疾成正法将。

布施品第十

“复次，善男子，若成就十轮菩萨摩訶萨，从初发心，一切五欲皆悉舍离，胜一切声闻、辟支佛人，亦能为彼二乘而作福田。何等十？常行布施，所谓饮食、衣服、象马辇舆，乃至己身手足头目、髓脑耳鼻、皮骨血肉一一皆舍。若行施时，不著躯命，亦不为己求世间法出世间乐，恒念度脱一切众生，修大慈悲巧方便智，如是心施于诸众生，为令一切皆得安乐故施，为灭一切众生结使故施，不受后有

故施，不粗心故施，无嫉妒故施，乃至最下乞人亦如是施，不为受报故施，不求声闻、辟支佛故施，求一切种智故施，乃至一人亦常如是修行于施，是名菩萨摩诃萨心施，成就初轮庄严法施。

“如是菩萨从初发心，能为一切声闻、辟支佛作大福田，应当守护恭敬供养。何以故？一切声闻、辟支佛，为断己身三恶趣贫，但自饶益而不为他修行布施；菩萨摩诃萨为断一切众生苦恼，以大慈悲哀愍心施，是故能为声闻、辟支佛而作福田。不为于己而求果报，唯为最上第一乐故常行于施，终不染著人天生死五欲乐故修行于施，而为利益一切众生，不念自身所受善恶修行于施，为断一切众生苦报修行于施，菩萨能如是行檀波罗蜜故，堪任为声闻、辟支佛福田。若不染著世间五欲，而为具足大慈大悲能如是施，名为菩萨摩诃萨，亦名声闻、辟支佛福田。假设修行无量布施，若不断于世间五欲不名为施，亦不名菩萨，不能与声闻、辟支佛作大福田，不为贤圣所印。是故应断五欲不染著施，若染五欲则不名菩萨，亦非福田，如斯施者不能灭于烦恼少分，何况能除一切结习？”

尔时，世尊欲重宣此义，而说偈曰：

“成就于施轮，智者清净心，
尽离于五欲，令众得妙乐。
乃至施少分，皆为除众苦，
不令受少果，应获上福田。
虽复种种施，而不离五欲，
此施非圣印，不堕决定聚。
舍欲而行施，施微而报重，
声闻辟支佛，俱以为福田。
是故应离欲，常得清净施，
安乐诸众生，是名真福田。

“复次，善男子，菩萨摩诃萨有十种法施轮，若能成就十种法施轮者，速疾得日光三昧，能为一切声闻、辟支佛作大福田。何等为十？所谓依止佛法，依止声闻法，依止辟支佛法，依止摩诃衍法，依止世间、出世间法，依止有漏、无漏法，尊重恭敬一切听受，随顺受持为他广说。若为声闻人说，应四谛法究竟涅槃，而无嫉妒憍慢之心，不为利养一切名称，亦不自举亦不轻他，恒为一切发大慈悲分别演说，不为说辟支佛法及与大乘。若为辟支佛人说，应十二因缘分，离老病死得尽苦际，都不为说声闻小乘、菩萨等法。若为大乘人说，应六波罗蜜，具足诸行证无上道，亦不为说声闻、辟支佛法，但随诸众生所应修行而为说之。于诸如来所演言教，乃至一句一偈，恭敬尊重终不诽谤，亦不隐没而作障碍，于说法人作世尊想，于听法者作病人想，于正法中作妙药想，弃舍五欲为欲说法，心常平等而不取相。

“善男子，是名菩萨摩訶萨十种法施轮也。若菩萨成就如是十种法施轮者，便速疾得日光三昧，能为一切声闻、辟支佛作大福田，常为一切守护供养。”

尔时，世尊欲重宣此义，而说偈言：

“智者修法施，演说于三乘，
不堪法器者，终不令谤法。
声闻及缘觉，多人而修习，
辟支佛利智，教令入大乘。
但为成法器，非法不妄说，
随诸根利钝，渐教令升进。
于法常恭敬，信受不诽谤，
有能说法者，供养如世尊。
听法诸众生，令灭于烦恼，
不贪著名誉，利养而说法。

持戒品第十一

“复次，善男子，菩萨摩訶萨发大庄严具足戒轮，若成就此轮，从初发心远离五欲，于声闻、辟支佛中，第一最胜为大福田，皆应供养而守护之。

“何为菩萨摩訶萨庄严戒轮？善男子，菩萨摩訶萨有能出家，受其具足成就波罗提木叉，而不与声闻、辟支佛共。若菩萨不以此戒能为众生除诸烦恼一切邪见，是则不名为摩訶萨，亦不名为声闻、辟支佛大福田也。善男子，若菩萨摩訶萨，于一切众生心常平等，护持净戒，志念坚固而不退转，心恒专一不生异想——若见持戒破戒、慳贪布施、上中下等，有若干种无量众生，瞋恚恼害，行住坐卧——于三有中阴入诸界而无分别。如是持戒，不著欲界持戒，不著色、无色界持戒，不分别观察有想持戒，不为到不到故持戒。

“善男子，菩萨摩訶萨，以如是相貌，发大庄严清净戒轮，从初发心常离五欲。如是菩萨摩訶萨，则能为一切声闻、辟支佛作大福田，亦为众生守护供养。”

尔时，世尊欲重宣此义，而说偈言：

“优婆塞律仪，住于解脱戒，
虽与二乘共，不名摩訶萨。
若修于空法，不依于世间，
亦不依诸有，智者护净戒。
不取于戒相，清净离诸漏，

如是护戒者，最胜之福田。

忍辱品第十二

“复次，善男子，云何名菩萨摩訶萨发大庄严具足忍轮？若菩萨成就此轮者，从初发意能除五欲，堪为声闻、辟支佛作大福田，亦为众生尊重恭敬供养守护。善男子，菩萨摩訶萨忍辱有二种：一者、世间，二者、出世间。

“又菩萨有漏忍者则受诸有，亦不能无众生之想，依止果报，依止功德，亦名住色声香味触忍，亦名羸劣忍，无所堪忍悲愍念众生而修行忍，但是谄曲悦彼故忍，不为安乐众生故忍。如是忍者，则与声闻、辟支佛同，非大庄严，亦非菩萨，但有假名。如是菩萨，终不堪任为诸声闻、辟支佛作大福田，是名菩萨世间忍轮。

“云何名菩萨以大庄严出世间忍？为诸众生故，修行于忍而不染著，若于一切所作事务，言语相貌音声名字圣所住处，皆悉随顺而不舍，于三结三受、三相三世、三有三业，如是等事悉不依止，心恒寂灭而修行忍，是名菩萨出世间忍轮。

“善男子，菩萨摩訶萨成就如是大庄严忍轮，从初发心常离五欲。是诸菩萨摩訶萨，能为声闻、辟支佛作大福田，为一切众生守护供养。”

尔时，世尊欲重宣此义，而说偈言：

“此忍说二种，有相及无相，
有相修行忍，智者所不贵。
有相说三业，即依于忍聚，
是名有漏忍，非是大人相。
于四颠倒中，修于无著忍，
寂灭于三业，是忍为最胜。
灭于一切行，不依相无相，
心犹如虚空，是忍为最胜。
众生皆一相，诸法空寂灭，
心无有所著，是忍最大利。

佛说大方广十轮经卷第八

精进相品第十三

“复次，善男子，菩萨摩訶萨成就大庄严精进轮，从初发心离五欲者，能为声闻、辟支佛而作福田，亦为一切守护供养。善男子，菩

萨摩诃萨精进有二种：一者、世间，二者、出世间。世间精进复有三种：一者、修福精进，二者、勇猛精进施戒禅定，三者、缘于有漏及诸众生，依于果报福行住处。是名世间精进，则非摩诃萨也。

“复次，菩萨摩诃萨于一切众生心常平等，但为除灭烦恼业结而勤精进，于圣无漏无取无舍，亦无依止，无杂秽心，亦无乱想，持戒破戒、精进懈怠、布施悭贪、浊心慈心，如是一切皆悉平等而行精进；不于三界起种种想，于诸众生若闻言语造业处所，于阴界入无所取想，而修精进；不依欲界，不著色界及无色界，不生到不到想而修精进；不著一切行，不依三种福而勤精进。菩萨摩诃萨成就如是大庄严轮，从初发意离于五欲，名为摩诃萨，亦复堪与声闻、辟支佛作大福田，为诸众生守护供养。”

尔时，世尊欲重宣此义，而说偈言：

“染著六情根，愚闇于四流，
精进常勇猛，智者所讥嫌。
境界处精进，善取于有漏，
不名为福田，亦非摩诃萨。
智者勤精进，除灭一切著，
心无所依止，是名为福田。
不著于名色，为众作归依，
勇猛离诸阴，是名为福田。
照了于愚闇，超度到彼岸，
如是精进轮，断众烦恼缚。”

禅相品第十四

“复次，善男子，菩萨摩诃萨有大庄严禅定轮，若菩萨成就此轮，从初发意断除五欲，是则堪为声闻、辟支佛福田，一切众生守护供养。善男子，菩萨摩诃萨修禅有二：一者、世间，二者、出世间。

“云何名世间禅？若菩萨依于阴相，染著欲界、色界、无色界修禅，依止三解脱、四念处、四正勤、四如意足、五根、五力、七觉分、八圣道分，乃至地水火风空识等，皆悉依止而生染著，如是修禅，是名菩萨修世间禅，亦与一切声闻、辟支佛共，不得名为摩诃萨也。

“云何名出世间禅？善男子，所谓菩萨能出世间放大光明，不著四念处、四正勤、四如意足、五根、五力、七觉分、八圣道分，如是等法皆无依止而修于禅，乃至身口意戒、三解脱门、阴界诸入、三受四大、空处、识处、不用处、非想非非想处，今世后世悉离空静，不依止空大空，是名菩萨摩诃萨出世间禅。”

“善男子，以如是相故，菩萨摩訶萨则能成就大庄严禅轮，从初发意离于五欲，堪为声闻、辟支佛福田，亦为一切守护供养。”

尔时，世尊欲重宣此义，而说偈言：

“为舍重担故，修于有相禅，
但断于己结，不名为智者。
染著而修禅，依止于解脱，
取著于彼岸，不能利众生。
若为弃重担，欲利诸众生，
灭结修诸禅，是名真智者。
若断于有爱，为利诸众生，
修于无相禅，是名摩訶萨。
断除众生缚，令世间无畏，
寂灭而修禅，是名摩訶萨。”

智相品第十五

“复次，善男子，菩萨摩訶萨有大庄严智轮，若能成就如是大庄严智轮，从初发意离于五欲，则能堪为声闻、辟支佛而作福田，亦为一切守护供养。善男子，菩萨摩訶萨有二种智：一者、世间，二者、出世间。

“云何名世间智？所谓菩萨依止读诵，欲灭一切众生愚闇作大照明，如来所说种种无量，于声闻乘皆悉听受，自书使人书，自读诵亦教人读诵；若说辟支佛法及大乘法，皆悉随顺一切信受，若自读诵教人读诵，自书亦教人书；能为众生广说分别显示其义，读诵经法求诸无漏八圣道分解脱之味，而不求于寂灭智慧，常有存相取著之心，是名菩萨世间智轮，亦与声闻、辟支佛等无有异也，不可名为菩萨摩訶萨。

“云何名出世间智轮？菩萨摩訶萨修道之时，随其精进行住诵习，而于彼相不取不著不念不思惟，如是行类则非下劣，心如虚空同于寂灭；观法平等，都无所著，亦无所系，无生无灭，心无退转，常行平等诸法实际，深入寂灭得无生忍，不取诸相心无增减，不依诸地亦不住智慧。菩萨若得如是具足智者，是名菩萨出世间智。有此行类，则能成就大庄严智轮，从初发意不染五欲，亦能堪为声闻、辟支佛福田，一切众生守护供养。

“复次，善男子，菩萨摩訶萨有大庄严轮，若菩萨成就如此大庄严轮者，从初发心断除五欲，堪为声闻、辟支佛作大福田，亦为一切守护供养。善男子，菩萨方便复有二种：一者、世间，二者、出世间。

“云何名菩萨世间方便？自为及人常怀彼此，种种伎艺而成就众生，能现如是若干种身，或现佛身，或现辟支佛身，或现声闻身，或现父母身，随所应见而为现相；若有病人及看病者，瞻视羸劣无有能救，一切怖畏乃至应死，悉以方便救令解脱；常行四摄，成就众生住于大乘。若声闻、辟支佛人，有不堪任为大乘器根不熟者，即于二乘法中，令使修习如是甚深微妙之法，开宗显现第一义谛，超过凡夫颠倒境界，依于四依具四辩才，四念处、四正勤、四如意足、五根、五力、七觉分、八圣道分，住善取道，入方便智道，成熟众生。若诸众生有为名称，染著利养诸根动摇，而不成就涅槃善根，如是等人教令习诵如来所说声闻、辟支佛乘，成就杂施功德，教令助功；若有众生多起瞋恚，其心甚恶而无哀愍，教令修行四无量心而得成熟；若见懈怠如是众生，教令精进；多瞋众生教行忍辱；散心众生教令禅定；愚痴众生为说正法，令修智慧教化成就；若有众生无所依止无恭敬，教令开示归依三宝；有如是等教使修习优婆塞戒，亦教八戒斋法；或有众生以种种技术著作务处，教化成就如是等辈。恒沙菩萨有世间方便智慧，菩萨摩訶萨成就如此方便智轮，以诸经论作务技术，摧伏一切外道异学苦行智轮。是名菩萨摩訶萨，成就世间方便智，与一切声闻、辟支佛共。

“善男子，若有菩萨不依明师，亦不依止善知识，以是行类相貌，染著世间而自迷惑；如是菩萨，则不能住出世方便智轮，不名福田，亦不能善知众生诸行。若见不成法器众生，及声闻、辟支佛乘根不熟者，于是人所显示大乘，是名愚痴，无巧方便；而教大乘人舍菩萨道，令修声闻、辟支佛法，是为错谬，不识人根。若见辟支佛人，教令舍离，修声闻乘，不识人根而谬说法，有如是失，堕于咎过。若见声闻人厌于生死者，为说世间三界果报乐著生死，不识人根而谬说法，有如是失，堕于咎过。若有众生不断杀盗，乃至不断邪见，具行十恶诸不善根，见如是等而为显示菩萨大乘甚深之法，竟不说于恶道果报，生死受苦轮转诸趣，不识人根妄说诸法，堕于咎过，亦名愚痴，无方便智。若见乐持戒者为说布施，乐精进者为说持戒，乐忍辱者为说精进，乐禅定者为说忍辱，乐智慧者为说禅定，是名菩萨愚痴，无巧方便智轮，亦名世间智，则与一切声闻、辟支佛共，亦不可名为摩訶萨也。

“云何名菩萨摩訶萨出世间方便智轮？若诸菩萨有所作业，皆为他人不念己身，作若干等种种技术，乃至悉欲与人共之，如前所说。若有己利回施他人，见堪任器者而为说法，渐教声闻、辟支佛乘；见辟支佛人，教令渐修摩訶衍乘，亦不为声闻人根不熟者，而为说乐生死法；有杀生乃至邪见，为说声闻法生死所趣；若乐修施者，为说无上技术；乃至乐智慧者，为说贤圣无漏智道。以是智慧成就众生，不取众生想及智慧想，是名菩萨摩訶萨能出世间最大庄严方便智轮。若菩萨摩訶萨成就此轮，从初发意断除五欲，是名菩萨摩訶萨堪为声

闻、辟支佛作大福田，常为一切守护供养。”

尔时，世尊欲重宣此义，而说偈言：

“应说一乘道，而为演二乘，
则为目欺诳，不名度众生。
决定堕邪聚，而示下劣乘，
是则为愚痴，不名摩诃萨。
趣向一乘者，为欲听法故，
乐处于生死，智者之所说。
决定专一心，随欲而教化，
是名为方便，智者所赞叹。
一向为声闻，教令生厌恶，
堪住为器者，教以摩诃衍。

“复次，善男子，菩萨摩诃萨取法之慈而庄严轮，不取众生相。何以故？取众生慈而庄严者，则是声闻、辟支佛行，不能庄严大乘道也。声闻、辟支佛虽修于慈，但自为己，不为利人；为自调伏，灭己结业，尽诸烦恼已得涅槃，为我人众生而修行慈，于他众生心常放舍，是故不名为大庄严轮，唯断己结，不能为人除诸烦恼。菩萨摩诃萨则不如是，常为一切众生修行慈心，庄严大慈，名为菩萨摩诃萨无依止慈。不依止阴界入故而修行慈，不依止四念处、四正勤、四如意足、五根、五力、七觉分、八圣道分而修行慈，不依止欲界、色界、无色界而修行慈，不依止此世、后世故而修行慈，不依止此岸而修行慈，不依止彼岸而修行慈，不为不到故而修行慈，菩萨摩诃萨唯缘法故而修行慈。此非声闻、辟支佛之所能行，唯诸菩萨摩诃萨乃能成就如是大庄严缘法慈轮。若菩萨从初发意离于五欲，如是菩萨摩诃萨，堪任声闻、辟支佛作大福田，亦为一切众生守护供养。

“复次，善男子，菩萨摩诃萨修大悲轮，从初发意断除五欲，名为摩诃萨，堪为声闻、辟支佛作大福田，常为一切众生守护供养。何以故？一切声闻、辟支佛，但自为己而修悲故。菩萨摩诃萨则不如是，而自亡己，为一切众生故而修行悲，是故堪为一切众生作大福田。如是菩萨摩诃萨，能兼他人，修四摄法为成熟众生故，乃至舍己支节身命及以财物，以此大悲为欲安乐诸众生故，亦不得众生相，不得施者相，不得受者相，乃至不得施业果报相；行檀波罗蜜时，不取行相、爱语、利益及同事相，虽行四摄而不取相，常以最胜心、第一心、寂灭心，乃至无量阿僧祇心，无行阴界入心、无动摇而常安住庄严大悲寂灭心，成就众生。

“善男子，以如是相能大庄严，不与一切声闻、辟支佛共。菩萨摩诃萨具足成就此大悲轮，从初发意断除五欲，堪为声闻、辟支佛作大福田，常为一切众生守护供养。”

尔时，世尊欲重宣此义，而说偈言：

“此法难思议，甚深如虚空，
无色无所住，大悲之所成。
常勤行头陀，菩萨最上智，
大悲勇进力，超过一切人。
众生无归依，生死苦所缚，
普欲令解脱，大悲水洗除。
干竭生死海，则非声闻地，
及与缘觉乘，菩萨所哀愍。
贪欲恚愚痴，众生没恶道，
以此大悲水，洗浴苦众生。

“复次，善男子，又有广遍虚空、无边无有量数种种差别音声辩才、一切三昧总持忍辱大庄严轮，菩萨摩訶萨若成就此轮，从初发意断除五欲，则能堪为声闻、辟支佛作大福田，一切皆应供养守护。

“云何名为菩萨摩訶萨广遍虚空、无边无量种种差别音声辩才、一切三昧总持忍辱大庄严轮？所谓菩萨照明一切法，犹如月光普照天下，无相无依，心无所染，于诸三昧身心不动，眼、眼触、眼识悉皆不动。若眼缘触，内生三受，苦受、乐受、不苦不乐受，生寂灭心与无生心；耳鼻舌身乃至心意意识无生亦如是，能生三受寂灭心、无生心；三世阴界入一切亦皆无生无有动摇，三界、三行、三戒、三乘、三解脱、三根、三触亦寂灭心、无生心；一切处无住，皆行无相檀波罗蜜，乃至持戒、忍辱、精进、禅定、智慧波罗蜜皆住寂灭，心无动乱；四念处、四正勤、四如意足、五根、五力、七觉分、八圣道分皆住不动，九次第定亦不动，乃至三行如不如相亦悉不动；知一切法悉无所障住八圣道，窟宅及非窟宅、有取无取、有漏无漏、有此彼岸无此彼岸、无大无小、有作无作、有善无善、有记无记，于一切处而心不动；乃能如是大慈大悲兴大方便，为成熟众生，守护三乘及四无畏，分别十地乃至十八不共法，于一切处皆住无作无起，心常安住，取相三受皆悉寂灭。菩萨摩訶萨离一切相，得虚空眼火光照明三昧，一切三昧王，方便大庄严轮。若菩萨住是三昧，则能灭除过去诸业，三恶趣苦皆悉消灭，令尽无余。

“善男子，譬如五日出时，一切泉流河池及诸大河，四大海水皆悉枯竭；如是菩萨摩訶萨，以广遍虚空、无边无量阿僧祇譬喻言辞巧说辩才、一切三昧总持忍辱大庄严轮，菩萨若能成就此轮，灭尽三有，除诸恶趣，于过去世所有业障永灭无余。善男子，譬如世界劫欲尽时，此四天下及八万四千诸河渚等，并四天王一切诸山，皆悉败坏，消灭永尽，令无有余。善男子，菩萨摩訶萨亦复如是，成就一切三昧诸陀罗尼忍辱轮者，能灭先世所作恶业，乃至三有一切恶趣永尽。

无余。善男子，譬诸黑闇遍满虚空，日轮出时，一切黑闇皆悉除灭；菩萨摩訶萨亦复如是，若能成就大庄严轮，乃至一切三昧总持忍辱轮，己身及他颠倒诸闇皆悉消灭，如是虚空无边智日，悉能消灭先世诸恶不善，使业永尽无余。是菩萨不随恶知识，常不离诸佛而听正法，乃至不离诸菩萨行，于其梦中心常念佛。

“何等是菩萨摩訶萨大庄严遍满虚空、广大无边无量阿僧祇种种言辞音声辩才、一切三昧总持忍辱轮？菩萨摩訶萨，入于初禅乃至第四禅，入空处乃至非想非非想处，入满足灭尽定，乃至满足灭三行心、无动受心，想触意行寂灭不动，或住一日一夜乃至七日七夜住于禅味，亦住第一义空，身诸毛孔出于暖气，烧灭一切结使业薪，如是次第深逮正念，一切身体悦乐满足。譬如自在天子入现一切乐三昧，入是三昧已，一切身毛孔中皆悉受乐；如是乐相触菩萨身，而便自忆念佛，念佛已，即便见佛，无复余相。若念一佛，则见一佛；若念无量佛，则见无量佛；若念佛身少分，则见少分，若念佛无边身，则见无边身；若观自身作佛相者，则见己身同佛相好具足庄严；若观他身欲作佛者，则见他身亦同其佛庄严相好；若欲随观众生皆作佛相者，则随所观同佛身相，余无所见。心所起念皆实不虚，知一切法如幻、如水中像，悉观三受三行永尽消灭。如是观已，还入灭尽定禅悦味食，或于一七日，二七、三七乃至七七，或十日、五十日，如是乃至百千万亿劫，还入实谛空观，如前念佛，成就作是观已。

“善男子，以如是相广大遍满虚空、无量无边阿僧祇种种言辞音声辩才、一切三昧总持忍辱轮。菩萨成就如是轮故，断除五欲，灭尽过去一切恶业，三有六趣皆悉消灭令无有余，堪为声闻及辟支佛作大福田，亦为一切守护供养，离四颠倒愚痴大闇，不复更随诸恶知识，常不离佛得闻正法，乃至梦中见佛听法、供养众僧，于一切菩萨所行之道，疾成阿耨多罗三藐三菩提，得净佛土，于彼佛国一切众生悉皆化生，相好如佛，住摩訶衍，结使微薄。”

尔时，世尊欲重宣此义，而说偈言：

“堪任法器者，则破诸结使，
能住于善住，皆悉无疑难。
为欲断有缚，当作大庄严，
修学诸禅定，智慧不思议。
修学于诸禅，观第一寂灭，
以此念佛智，能尽一切恶。
相与无相等，以空悉能灭，
永断于恶趣，不离见诸佛。
善修学诸法，供养一切佛，
疾成于正觉，以修空相故。
为众作亲友，除舍诸结使，

是名净福田，疾近于菩提，
众生作佛相，遍满诸世界，
为求佛道故，远离于二乘。”

说是法时，恒河沙等无量菩萨，本所曾闻念佛正法，若有废忘今悉还得。无量众生闻是念佛百千三昧，悉入一切三昧方便，皆得忆念总持华鬘。无量众生而皆依止首楞严三昧，乃至成就电光三昧，得一切法照明逮无生忍，远尘离垢得法眼净。无量众生得须陀洹果、斯陀含果、阿那含果、阿罗汉果。

无量众生皆求出家入佛法中，无量众生住于十善，有发声闻心者，有发辟支佛心者，有发阿耨多罗三藐三菩提心者，得不退转者。无量众生得世间正见，以正见因缘故断恶趣结，皆得生天及在人间，归依三宝弃舍五欲，于佛法中而得出家，离一切邪见得清净信。

尔时，世尊告金刚藏菩萨摩訶萨：“善男子，汝当以此不退法轮，授地藏菩萨记。若有众生读诵此经，为他解说住是法者，应当拥护十法。何等为十？拥护一切财物，离一切恶、一切邪见、邪归依、十恶、一切身过、一切口过、一切诽谤、一切破戒、一切横病、一切横死。如是众生临命终时，皆得见佛即生天上。若有众生读诵此经，应当拥护如是十法，是名诸佛伏藏。”

佛说是经已时，四部众及诸天、龙、夜叉、乾闥婆、阿修罗、迦楼罗、紧那罗、摩睺罗伽、人非人，及地藏菩萨等，闻是经已，欢喜奉行。

大集须弥藏经卷上

声闻品第一

南无十方一切诸佛

如是我闻：一时，婆伽婆在佉罗帝山，依牟尼仙住处，与大声闻众过出众数，一切皆是佛大弟子。与大菩萨众无量无边，悉从十方诸佛世界而来集会，次第究竟梵翼记分。

尔时，众中去佛不远，有功德天住于佛前，为听法故即从座起，合掌向佛而白佛言：“大德婆伽婆，有诸菩萨以施福船筏渡生死海。何以故？此佛世界五浊极秽，多有众生功德智慧悉皆减少，以是因缘故，菩萨摩訶萨于此众生起大悲心。

“又此众生说无因论，资财乏短，勤苦追求而不能得。此诸菩萨若不施行，不能化彼罪恶众生，是故诸菩萨作如是念：‘我今被檀度铠起大精进，泛施船筏越生死海。’是诸菩萨摩訶萨，修行布施福德之事，令入诸佛无上大海，乃至获得最上灌顶法王之位。

“世尊，复有众生计存常见，广乏资财，苦身求索亦不能得。菩萨若不修行戒施，则不成熟彼诸众生，是故菩萨摩訶萨于计常众生起大悲心，复作是念：‘我当化彼计常众生。我以如是持戒铠筏，欲度生死大海，乃至得受灌顶法王之位。’是诸菩萨以持戒福事行及十善道，成熟众生令入无上诸佛大海，乃至安置灌顶法王之位。

“世尊，此复有众生行十善道而不清淨，于杀盗淫乃至贪嗔等身见众生，福德智慧减少故，资财乏短，勤苦追求亦不能得。彼诸众生若不以出家清淨戒，无以成熟。是故菩萨摩訶萨，于彼杀、盗、淫、妄语、两舌、恶口、绮语、贪嗔等身见恶行众生所，起大悲心，以无常方便令诸众生入佛法中，以出家戒成熟众生：‘此即是我忍进钾胄，是出家戒即为船筏渡生死海。’以是缘故，菩萨摩訶萨以持戒福德及无常方便，教化成熟出家律仪戒众生。彼菩萨以是业故，乃至令入无上诸佛大海，乃至安置灌顶法王之位，菩萨摩訶萨便自能入无上诸佛大海。”

尔时，功德天白佛言：“大德婆伽婆，云何菩萨摩訶萨，最初修学禅波罗蜜本业，学已知诸禅分能出欲界，断除五支成就五支，于四神足游戏神通，善能往诣一切佛刹迅疾如电，于一切佛所供养听法，为竭众生三种道故。何等为三？谓业道、烦恼道、苦道，满足禅波罗蜜。云何满足禅波罗蜜？具足六波罗蜜。满足六波罗蜜已，速得阿耨多罗三藐三菩提。”

佛言：“善哉！善哉！清净智！汝清净智，于此法中以为疲劳满此法行，为众生故，能于如来应正遍知所问于此义。汝清净智，当至心听，善思念之，我今为汝分别演说。”

功德天言：“如是，世尊，我当听受，唯愿说之。”

于是世尊告功德天言：“清净智，如汝所问，云何菩萨摩訶萨最初修学禅波罗蜜本业，学已智于禅分能过欲界，除断五支成就五支，于四神足游戏神通，善能往诣一切佛刹迅疾如电，于一切佛所供养听法，为竭众生三种道故。何等是三？谓业道、烦恼道、苦道。能生修道所作福事，满足禅波罗蜜；禅波罗蜜满足故，具足六波罗蜜；满足六波罗蜜已，速得阿耨多罗三藐三菩提？”

“清净智，此菩萨摩訶萨初修禅定，于一切出入息相系心缘念。彼菩萨摩訶萨以不乱心出息入息，随入息触心，彼入息触心者名为觉；随出息触心，随出息触心者名为观；乃至喜乐一心不乱心，将出欲界离于觉观，断除贪欲及嗔恚盖，伏一切恶法，得于初禅有觉有观。彼时即有如是相起，一切身分悉皆震动充遍于身。若菩萨增上勇猛，系念专住，彼时便能灭于觉观，喜乐一心得第二禅。为除喜过精勤不止，既灭喜已得第三禅乐。菩萨尔时其身适乐，犹如暖乳以灌身体，得希有乐如天身想。彼得成就如是胜乐，于三宝中得增上信心，复作是念：‘我为利益一切众生，被服大铠勤修禅定，我今应舍身乐。’彼菩萨摩訶萨止出入息，舍相续攀缘心，系意鼻端，于出入息住心观察。又观彼心刹那散坏，知生知灭。又知彼心刹那相应散坏无生，如水中月、如光影、如阳焰、如电，心意识一切阴界入如泡，是故舍弃身乐，思念彼法生灭，入第四禅。尔时即有如是相起，菩萨虽复闭目，如大日光照见明了。彼菩萨作是念：‘以此攀缘光明相故，一切众生阴界入不断增长炽然。我今应当心念止于攀缘光明。’彼复于此以灭方便，舍受想思触忆集生灭，入胜清净善寂灭城，住止身口意业。彼菩萨还从定起，取出入息相，观触念相还入空定；从空定起，复观出入息生灭攀缘相，便入无愿三昧；从无愿三昧起，见出入息寂灭，住无相定，如是则能修满四念处及三解脱门。彼菩萨以观出入息生灭，观于生灭故修四正勤满足。彼菩萨以观出入息出没相，便能具修满四神足。彼观出入息故，即能散坏其身犹如窗尘，尔时即得修满五根。以出入息出没方便，观察三行，如是便能修满五力。彼以除出入息受想方便，观察除寂灭，如是修七菩提分满足。彼以出入息风方便念，散坏一切大地界，及一切色悉皆无余。彼无有相无有语言，无有状貌无有假名，三行寂静极寂静寂灭，得无缘三昧。此如是名游戏禅定禅波罗蜜本业，诸菩萨摩訶萨共一切声闻、辟支佛禅本业。若住于此以下精进，或证须陀洹果，或斯陀含果、阿那含果，或乃至住阿罗汉果。若菩萨坚固精进大悲心，顾念一切众生，无量福德智慧聚为之疲劳。彼菩萨摩訶萨于如是禅本业，游戏三昧方便安住，不退阿耨多罗三藐三菩提，不堕声闻决定聚中，不舍禅定本业大铠。彼菩萨摩

诃萨满足禅波罗蜜，满足禅波罗蜜已，便能满足六波罗蜜。

“清净智，乃至若国土中或比丘、比丘尼、优婆塞、优婆夷，欲趣声闻乘，欲趣缘觉乘，或趣大乘；或善男子、善女人，于如是禅本业游戏三昧系念思惟者，随所住处，彼国土一切天王常善守护，一切龙王、一切夜叉王、一切阿修罗王、一切紧那罗王、一切摩睺罗伽王、一切饿鬼王、一切毗舍闍王、一切罗刹王等，当善护彼国。若国土中有如是禅相应福田住者，彼国土彼刹利王，得十种可爱乐法。何等为十？一者、安隐灭一切患，二者、长命，三者、得上妙色，四者、皮肤鲜软，五者、支节可爱，六者、得善眷属，七者、能修善业，八者、系念慈悲方便，九者、恒与名称福器相应，十者、命终生于天上。是为十。又彼国土复得成就十种殊胜利益。何等为十？一者、不为自贼他贼之所劫害；二者、亦无恶贼毒兽、蚊虻蝗虫等；三者、无有旱潦及非时风雨寒热等触；四者、土地平正，无诸丘墟溪涧峻坑；五者、彼国一切种子、五谷诸药、草木林树蓊蔚茂盛，无诸辛苦涩恶等味华果；六者、无诸恶声、斗争反逆、饥俭病患及非时死；七者、彼国众生长命端正，适乐丰盈无秽浊心，游戏快乐，如法修行生于天上；八者、其国土中诸福田器之所依住，爱乐随顺禅定三昧；九者、彼国众生饮食所须悉皆无乏，上妙可爱资成四大，称顺根性增长无违；十者、其土人民勇健强记有慈悲心，命终生天。清净智，此十种法善能庄严于彼国土。

“清净智，此菩萨摩诃萨以业障碍舍离大乘，住声闻地违化众生，此是声闻禅波罗蜜游戏三昧。声闻以此了知满足禅分，出三界窟宅及诸有缚，断除五支成就五支，越过三界住无学地，游戏神通到八解脱，禅定彼岸一劫修行，得为一切诸佛之子，从佛口生，从法化生。彼虽如是，犹故不能往诸佛土、供养诸佛、从佛听法，亦复不能干竭众生三种道。若能如是游戏三昧者，随其所住国土，获得如上大功德利。”

菩萨禅本业品第二

尔时，佛告功德天言：“清净智，云何菩萨摩诃萨不共一切声闻、辟支佛禅波罗蜜本业差别满足？若菩萨摩诃萨满足禅波罗蜜已，便能满足余五波罗蜜。清净智，此菩萨摩诃萨于一切出入息中及五受阴，观其生灭；既观察已消竭渴爱，不堕声闻决定聚中，于四神足游戏神通，善能往诣一切佛刹迅疾如电，于诸佛所供养听法，干竭一切众生三道，谓烦恼道、业道、苦道，虽出欲界而不舍欲界，为化众生故现生诸趣，不为胎染，断除众生烦恼罗网，然于众生而无所求。

“清净智，此菩萨摩诃萨随出入息各各别观，但新非故如实了知，如是出入息中色受阴如实了知，受想行阴亦如实了知，如是出入

息中识受阴如实了知。于出息异、入息异，知出息异，知入息异，知入息异中受想思触念，知出息异中受想思触念亦如是。入息受时非出息受，出息受时非入息受，如是有轮转受想思触念因缘故相续不断，漂生死海而不能渡，数数生死已还生，不能如实觉知此法，不能如实出彼生死，于出入息不能如实觉察。复次，如是出入息，于九疮门出入往来，如是九十九那由他百千毛孔门，一切皆悉出息入，而于九十九那由他百千毛孔不增不减，不能觉知非过去、非未来、非初、非中、非后，不知住不知出。复作是念：‘我今一切毛孔出息入息生灭方便，应与生灭相相应住。’是菩萨摩訶萨随九疮门出息入息生灭观察如是，九十九那由他百千毛孔门，一一毛孔中观察出入息生灭，观察出入息生灭相应住。若菩萨欲观毛孔小相，但见毛端息从往来，即能见小；若欲见大，便能得见如芥子许；若欲得见如庵摩勒果许，即能见见；若欲得见频螺果许，亦即能见；若欲得见一由旬、千由旬乃至一四天下，一一毛孔而观察之，随欲见广即能见广。彼时菩萨作如是念：‘众生以眼迷惑，系缚生死相续不断，漂生死流受种种苦。’彼菩萨复作是念：‘我今舍弃一切色想，已得无言三昧，非诸声闻、辟支佛地。于彼地界亦无所得，水界、火界、风界、虚空界、识界亦无所得，不行阴界入，非前际非后际、非此世非他世、非善业报非恶业报、非生非灭、非有烦恼非离烦恼，无有所得。’菩萨如是住寂灭住，彼若欲得于无量劫于此一切法无语言空三昧，若住若加；菩萨如是自智加持三昧力故，便能于此一切法无语言空三昧，无量劫住，亦能满足六波罗蜜，为成就众生因缘故。

“清净智，如是地藏菩萨摩訶萨于此一切法无语言空三昧，到自在彼岸。是菩萨若欲入此三昧时，以福德智慧力，为成熟众生故，先作是愿：‘乃至我未出三昧已来，于此时中欲令此国土境界及四天下，此佛世界一切众生诸有所须资生之具，随其相貌，随其多少，随其所欲。’所谓饮食、衣服、卧具、瓔珞庄严之具，园林屋宅、形形状貌、肢节身分，可爱色声香味触等，欲见如是等事，是时菩萨便入此三昧。菩萨入此三昧已，随其时节，于此佛世界四天下一切众生，如上所说所须之具便得充足。或复作是念：‘随我住定时节远近，随诸众生多少分齐，欲除众生身心之病。’谓风黄瘡等分之病，或人非人所作，如是欲灭贪瞋痴等烦恼诸病，及灭十不善业，令住十善业道中，便即入此三昧。彼菩萨摩訶萨随其住定时节久近，随其所为多少众生，如上所说身心病苦悉皆除灭。又菩萨复作是愿：‘随我住定时节已来，欲灭地狱种种诸苦，畜生之中互相残食等苦，阎魔罗界饥渴等苦，及寒热苦、怨憎会苦、爱别离苦、求不得苦。随愿分齐，令诸众生离一切苦恼及不善法，成就一切善法。令诸众生慈心相向，生利益心、不动心、无怨心、无诤心、无斗讼心、哀愍心，乃至禅正受善住心、不迷惑心，及灭众生愚惑之心，又灭众生常见、断见及诸见聚，于三宝所恭敬供养希有心。令诸众生离四颠倒住四不颠倒，于四圣谛及第一

义谛心善安住。’如是菩萨福德智慧善巧方便力之所加持，菩萨尔时为化众生因缘故欲入三昧，乃至未出三昧已来，令此国土及阎浮提四天下，乃至此一佛刹所有众生，随其分齐安乐之事，如上所说欲令获得，然后入于无语言一切法空三昧。彼菩萨摩訶萨入此三昧时间乃至佛刹，随所要期众生分齐，彼菩萨以福德智慧三昧力故，随住定时，如上所说种种资生及诸乐具，乃至未出定来，令诸众生悉皆获得。彼菩萨入此定时，无有身苦心苦亦无饥渴，火不能烧，水不能漂，乃至劫火所不能害，及以劫水亦不能烂，不为风灾之所散坏，又复不为疫病、饥馑、刀兵等劫尽其命根，欲取灭度随意自在，又人非人毒风暴雨不能侵恼。又彼菩萨在定未起随其所念，欲令无量佛刹入一微尘，又复十方国土一切诸佛及大菩萨、声闻眷属，于一爪甲悉能得见令无遗余。又令一切众生入一毛孔，而彼众生于自境界悉见如故。又十方世界无量佛刹所有诸风，菩萨悉令入一毛端，随风境界游行虚空，广狭去来无诸障碍，于彼毛端亦无增减如本不异。又十方一切诸佛世界所有水界，菩萨能令入一豆[禾+會]，随水广狭流注往来亦无障碍，于彼豆[禾+會]而无增减。又彼菩萨不复处胎，除自愿力，不生恶趣，不受女形，不生下劣，诸根具足终不缺减，身口意行无有过失，亦不生于无佛世界，除自愿力为化众生。是菩萨常不远离见佛闻法、供侍众僧，亦不远离福德智慧无畏方便教化众生，乃至入于无上涅槃。

“如是，清净智，彼菩萨摩訶萨被于如是大坚固铠，最初修习禅波罗蜜本业，能过欲界了知禅分，断除五支成就五支，乃至游戏于四神足，善能往诣一切佛刹迅疾如电，供养一切诸佛听闻正法，干竭众生所有三道，所谓烦恼道、业道、苦道。如是，清净智，菩萨摩訶萨满足禅波罗蜜已，便能满足六波罗蜜；满足六波罗蜜已，速得阿耨多罗三藐三菩提。”

尔时，世尊说是禅波罗蜜本业时，于彼众中，五万众生曾于过去修行此法，是故今得无生法忍；八万四千菩萨得首楞严三昧；九万九千菩萨得满足禅波罗蜜；无量无边众生发未曾发无上菩提心，发是心已住不退转地。

灭非时风雨品第三

于时，地藏菩萨摩訶萨告功德天言：“清净智，汝今当观此四天下端严殊妙，一切菩萨所应供养忆念守护，于其长夜应当恭敬。今释迦牟尼佛集一切菩萨摩訶萨故，显示一切菩提道，行不退转轮，究竟善巧方便佛灌顶地，乃至汝行檀波罗蜜，满足最上不退转行。若汝于如是最上福田，以诸饮食而修供养，以此精勤速能满足六波罗蜜；满足六波罗蜜已，则能究竟安住一切种智。”

时，功德天作如是言：“如是，如是，如仁者所说，唯愿听我说本因缘。我念往昔过无量劫，我共释迦牟尼佛修菩萨行同发誓愿：‘汝若能得成无上道时，愿我于彼四天下中到功德处；得功德处已，于一切众生中，随其所须衣食之具悉皆给与。’仁者善听，于过去世过无量劫，彼时有佛，号因陀罗幢相王如来、应供、正遍知、明行足、善逝、世间解、无上士、调御丈夫、天人师、佛世尊，出现于世，人寿千岁。彼时有优婆塞，名光无垢德，聪慧调柔，多闻无畏，为四众说法，众所归伏多有眷属。彼有长子名无垢德，即以偈颂问其父曰：

“父今何故，勤心不下，舍其事业，及自身命，
为护众生，勇猛增勤？何故此身，不取灭度？”

“尔时，光无垢德复以偈颂而报子言：

“吾见世苦，极迷众生，生老病死，之所逼迫，
烦恼火炽，沉流恶道，故我勇猛，欲灭彼火。
又智减少，不见未来，堕生死河，极重恶处，
对于恶道，迷失正路，为救度彼，故我修行。
又不能成，布施调摄，而常远离，人天安乐，
于善知识，常相乖背，愿示众生，出世要路。
烦恼狱中，常系众生，无有眼目，复无救者，
执著恶见，啖食血肉，为除彼故，故我修行。
我于众生，如是悲念，为一人，住阿鼻狱，
具受种种，尤剧苦恼，如为一人，众多亦然。
我不乐求，声闻智慧，及缘觉智，亦不愿求，
唯求无上，最胜智慧，子今当知，我行胜道。
乃至无量，恒河沙数，苦恼众生，未脱苦来，
为欲度彼，诸众生故，我终不取，菩提正觉。
汝今当知，亦应如是，于诸众生，常应起悲，
应常勇猛，修行善法，以此回向，无上圣道。
烦恼火中，救脱众生，汝应勇猛，何极苦恼？
应当修行，布施调柔，得成佛道，无有疑也。
若我得成，无上菩提，汝于众生，给施饮食，
我时授汝，胜菩提记，汝当安住，坚固誓愿。”

尔时，功德天语地藏菩萨摩訶萨言：“善男子，我于尔时于因陀罗幢相王佛所，作如是愿：‘乃至我住世间随其久近，种种精勤难行苦行、布施调伏、禁摄放逸及诸禅定，营助众事，多闻舍行，皆悉修习，所有种种难舍能舍。如是我父，于当来世人寿百岁、烦恼怨诤秽浊迷惑恶世界中，成阿耨多罗三藐三菩提，我于彼国中现为功德主。于释迦牟尼佛境界众生及其眷属，得施无上衣服、饮食、资身之具。

即于释迦牟尼佛前，得受阿耨多罗三藐三菩提记。若彼土众生暴恶粗犷无慈愍心，亦无反复恶行恶心，成就如是种种诸恶，风雨不时或复旱潦，寒热不调作诸灾变，众生所有诸华果实，五谷药草及诸美味，悉皆殄灭夺其精气，众生产资皆悉衰耗而作闇冥，愿我尔时于彼众生福德加被智慧威力，悉令遮止生其信心。又令众生资生不乏，不令行恶，增长善法，佛所应度受化众生，绍三宝性使不断绝，势力增盛。又令我得依报自在，教化众生令得阿耨多罗三藐三菩提。于今佛前所发誓愿，于未来世得满足者，唯愿印可赐言善哉！’尔时，因陀罗幢相王佛即便印可赞言：‘善哉！善哉！善男子，如汝所愿必得满足。又善男子，我当施汝作世水宅心陀罗尼。汝以此陀罗尼心能成就众多众生，又令无量众生丰足资生果报无乏，又能度于烦恼暴流。’即说咒曰：

“多地耶他 阇蓝婆 摩诃阇蓝婆 阿奴呵阇蓝婆 娑啰阇蓝婆 郁伽阇蓝婆 夜叉毗梨阇蓝婆 那伽毗梨阇蓝婆 优罗伽毗梨 阇蓝婆 阿萨帝鼻梨阇蓝婆 阿输婆比 梨阇蓝婆 摩嗟比 梨阇蓝婆 曼厨迦比梨阇蓝婆 佉目罗比梨阇蓝婆 崩起比梨阇蓝婆 阿摩比梨阇蓝婆 苏脂目佉阇蓝婆 娑摩啰婆摩啰阇蓝婆 摩啰比阇迦茶钵多啰布疏波颇蓝婆 素叉犁牛婆索达摩耶若 比利使致搔醯蓝婆 伽苦步(上声) 罗婆穷(去声) 穷婆罗穷频头穷 婆罗阇比 娑婆呵。

“是陀罗尼句，若为他人及自己身，称其名号为诵此陀罗尼，一切怖畏、一切殃祸悉皆消灭。善男子，此作世水宅心陀罗尼，汝若以此心陀罗尼，便能成就众多众生。’

“汝善男子，我昔于彼因陀罗幢相王佛所，受持此作世水宅心陀罗尼，于彼佛所种种供养，持戒多闻布施精勤；从是以来，复于十千佛所，增进如是愿行。以此善根，今于贤劫中得大功德处，今犹不堪成此大业。何以故？从昔以来无量恶龙及夜叉、罗刹、阿修罗、鸠槃荼、饿鬼、毗舍遮等出生世间，于诸众生毒恶凶暴、无信无悲、无慈愍心行于恶法，非时风雨旱潦灾雹，寒热不调种种返逆，自军他军怨憎斗争，热风暴起不顾来世。是诸众生于彼过去诸佛之所加持作世水宅心陀罗尼不生信乐。彼恶众生不信乐故，于诸种子芽茎、枝叶花果、美味五谷、药草及诸资生，破灭毁坏夺其精气，于诸地味放毒气吹。以是毒气，令其地味杂毒涩恶，杂病无膩臭秽无味，令此大地作如是等，由是因缘众生不乐。若依地味众生食此种子芽茎、枝叶花果、诸味五谷、药草资身之具者，便生恶心刚犷毒恶，于诸众生无悲愍心不顾后世，为诸病所逼身色粗恶，种种烦恼诸苦所害，具足恶见住邪归依，于三宝所不生信乐尊重恭敬希有之心，乃至禽兽亦复执于种种恶见，迷失本道，谄曲无实但有口言。彼诸众生于三宝中，身口心意违失善法；破戒比丘不能禁摄，于彼持戒任放相应，辩才大德诸

比丘所常生远离不能亲近，骂詈毁谤轻弄恼乱称扬其过，远离惭愧离十善道，心不爱乐一切善行起远离心。尔时众生远离福智，寿命短促趣向恶道。是故我今于彼众生，不能令其丰足所须，亦复不能成熟众生。

“汝于今者是大丈夫，于正法中而得自在智慧善巧，又汝已度一切三昧陀罗尼忍，善能观察智慧彼岸，慈悲庄严通智彼岸汝悉已度。又汝于彼诸菩萨中为最胜幢，已能成就一切众生。汝今为我应当于此四天下中起悲愍心自智观察，云何能令此四天下诸恶毒龙、夜叉、罗刹、阿修罗、鸠槃荼、饿鬼、毗舍遮、迦吒富单那等，一切恶鬼皆悉降伏，风雨顺时水旱调适，秋实丰茂寒温和平；以是因缘，令诸地味增长势力气味香美，食用无患增益念力，色貌充润甚可爱乐，称意之事皆出于世，依此大地诸众生等，食用无过增长念力如上所说？”

尔时，地藏菩萨告功德天言：“清净智，我今能令此佛刹土所有四大普遍无余，悉能令变为天饮食，使诸众生于百千劫食不能尽。何以故？但此众生薄福德故所不能食，于此胜报非其应器。清净智，我又能令此娑婆佛刹变为天宫及天卧具，庄严衣服香华果树，种种音声众妙伎乐，众宝庄严悉能为作。此诸众生远离福德，又非其器不堪受用，唯除如来应正遍知，十住菩萨及住首楞严三昧得自在者乃能受用。清净智，又我能令一切众生置第四禅令无有余，岂可不能降伏龙、富单那等？又我不应佛未听许而现神变。譬如转轮圣王主兵藏臣，不奉王教而发四兵，无有是处；如是菩萨悉是佛子，从佛心生，从佛口生，从法化生，是故一切诸菩萨等，无有不请如来而现神变。清净智，复有陀罗尼轮，名水风摩尼宫集一切咒术章句，建立一切三世诸佛三宝之性。清净智，汝今可问如来水风摩尼宫大陀罗尼轮集一切咒术章句，若佛说者我亦随喜。汝等若能受持此陀罗尼者，一切所愿皆悉满足。”

尔时，大功德天女与大辩天女、大坚固天女、作光大天女、可喜天女、安隐天女、多摩罗坚固天女、明星主天女、奢摩天女、颇梨天女，如是等上首天女，八万四千那由他天，百千众前后围绕，从座而起合掌向佛。时，功德天女即于佛前而说偈言：

“能灭极恶浊烦恼，离垢无垢清净行，
我等渴仰陀罗尼，唯愿演说总持轮。
牟尼说寂无秽浊，三宝炽然最胜句，
令修罗等得净心，增长地味无毒恶。
能除寒热暴风雨，愿说守护夺精气，
令食谷药果味等，强记除患修善行。
灭除毒害诸恶见，归信最胜无上法，
或夺精气多烦恼，云何教化此众生？
此诸天等于牟尼，希求最上甚深妙，

显示趣向菩提道，令诸众生入大乘。
大众云集果愿满，十方菩萨赞佛德，
云何降伏诸恶龙，雨泽调适苗稼茂？”

尔时，佛告功德天言：“清净智，此大陀罗尼，诸佛如来时乃说之。如来今于大众会前而自要誓，此水风摩尼宫陀罗尼轮，一切十方三世诸佛之所加持，今当显示。一切十方诸来菩萨得闻此者，彼诸菩萨能住十方无佛国土五浊世中，能显示此水风摩尼宫陀罗尼轮。以此陀罗尼力故，其国所有非时风热寒温旱潦悉皆除灭。由此陀罗尼故，令彼毒恶无慈愍众生不顾来世，谓天龙、夜叉、罗刹、阿修罗、迦楼罗、紧那罗、摩睺罗伽、鸠槃荼、饿鬼、毗舍遮、富单那、迦吒富单那、人非人等，乃至禽兽，得信乐心柔和软善，念力善巧乐求正法，护持正法绍三宝种。以此陀罗尼力故，彼佛刹土所有众生，增长寿命，增长身色，增长五谷，增长资生，增长安乐，增长无患，增长名誉，增长持戒，增长多闻，增长布施，增长慈悲，增长智慧，增长方便，增长三昧，增长陀罗尼，增长地观，增长乐出世，增长化众生，增长入大乘，增长胜愿，增长地地转入，增长观察阴界入，增长惭愧，增长摄功德庄严佛土，增长六波罗蜜行，增长一切十方诸佛常所护念，增长值遇佛一切菩萨善友，增长游戏神通，增长坏一切烦恼不令增长，增长神通度于彼岸，不令退减一切善法乃至无上涅槃。”即说咒曰：

“多地他 苏婆罗 婆罗底 那耶婆罗底 掣(平声)沙吒婆罗底
阿那婆罗底 奢婆多曷 嚩婆罗底 奢嚩拏婆罗底 鸠牟尼婆罗底
珊支嚩婆罗底 制(平声)陀娑婆罗底 娑婆婆罗底 娑婆钵利诃
利 娑婆婆罗多(上声)钵利诃利 那耶钵利诃利 婢毗迦钵利诃利耶
若钵利诃利 苏婆罗钵利诃利频头钵利诃利 闍罗钵利诃利憩多罗钵
利诃利 特叉钵利诃利 珊尼摩钵利诃利 苏婆婆钵提犁 劬摩耶
婆 末陀索溪 阿那耶波卢誓 迷罗跋迷 阿罗那求师佉罗毗闍鞞
那罗延拏婢谄林鞞 忧罗伽阿尼弥鞞 宫闍嚩婆胡迷 诃闍赁鞞 羯
摩毗罗犁 舍罗摩拏婆离犁 佉曷罗伽奢迷 阿斯那迷 阿耆尼钵底
利 能求耽鼻犁婆耶遮婆留尼 犍嚩赁鞞犁释迦嚩是若移 阿那鷄
提 帝利 那耶 娜尼利帝利耶头婆佛阿诃地子瑟痴帝 莎婆诃 使
此国天子及其眷属悉皆吉祥莎婆呵 那罗延拏 尼罗移莎婆呵 斫迦
嚩跋多迦罗迷 莎婆呵。”

说此水风摩尼宫陀罗尼轮一切咒术章句时，一切佛刹所有大地六种震动，诸来大众战栗不安，心惊恐怖同声唱言：“南无南无佛陀耶！”

尔时，佛告功德天言：“清净智，汝以此水风摩尼宫陀罗尼轮

力，能除一切斗争，一切毒害夜叉、罗刹、修罗、恶龙，乃至人非人等及诸禽兽，一切非时风热、寒冷灾雹、旱潦等过，悉皆消灭。清净智，此陀罗尼能令五谷悉皆成好，令诸众生增益寿命，增长果报，乃至增长一切善法，未入无上涅槃已来不令失坏。若闻此陀罗尼，受持读诵如说行者，彼人必定趣于涅槃安住三界。”

尔时，地藏菩萨白佛言：“世尊，我亦欲说磨刀大陀罗尼。以此陀罗尼力，令一切众果报所须，及以地味悉无减损，无能毁夺地之精气，又亦无能放毒气者，亦复无能坏其美味，不能令其变为涩恶，亦复不能令其隐没，亦复不能令此大地不生五谷、芽茎枝叶、华果药草，亦复不能夺其精气，又复不令有其毒气，亦不干枯，又不涩恶，不令不熟，寒热不伤，食用无障，食已无毒，若食有毒能令食者腹痛吐下。身心逼恼支体挛缩，热病颠狂心乱失念，迭相劫夺斗争，杀生偷盗乃至邪见，是诸众生常与如上恶法相应，所谓若天、或龙，或夜叉、罗刹、阿修罗、迦楼罗、紧那罗、鸠槃荼、乾闥婆、饿鬼、毗舍遮，或富单那，或迦吒富单那，或人或非人，于诸众生不能恼害。

“多地他 那鼻 摩诃那鼻 初何啰那鞞 阿鼻具那鞞(去声)僧输沙拏那鞞 鼻何啰闇佉鞞 阿婆啰牟尼 多嚧那胡嚧醯 那他(上声)钵帝利 闍婆徒迷 魔啰娑帝 帝弭罗钵帝利 囊荼 涅利何隶 斫初婆嘶 佉拏(上声)毗迷跢(上声)帝都裔 莎波呵 鸯求啰跢 莎波呵 布疏簸耶迷 莎波呵 颇罗债鞞 莎波呵 萨智耶都裔 莎波呵 赊梨啰 那婆迦罗摩毗沙 莎波呵 此陀罗尼句拥护此国主 莎波呵。

“汝清净智，此是磨刀大陀罗尼。汝以此磨刀大陀罗尼力，于诸众生，能作如上诸大业事，能为大药。以是因缘故，汝今则能令诸众生禀受汝化。”

于是一切诸来大众，赞地藏菩萨言：“善哉！善哉！”

尔时，世尊亦赞地藏菩萨言：“善哉！善哉！善男子，汝今能为一切众生如大妙药。何以故？汝身即是微妙大药。汝于此四天下一切众生中众生之药，能灭一切众生苦恼，能施一切众生乐具，成就大悲。汝能显示如是甚深磨刀大陀罗尼力故，令此众生地味、精气种子、芽茎枝叶、华果诸味、五谷药草而不衰损，无毒增长，具足成就众生食者，令彼众生秽浊斗争悉皆消灭堪修善行，此四天下非时风热寒温旱潦皆悉消除，日月星宿、昼夜、月半月尽、时节年岁变怪为灭此故说此磨刀大陀罗尼。以此陀罗尼力故，令我三宝种及以法眼得久住世，使此愚闇薄福我慢所坏者，不修善根恶刹利及诸宰相，于我如是百千万亿阿僧祇劫精勤苦行所集之法不灭不坏，比丘、比丘尼、优婆塞、优婆夷无有恼乱，以无恼故诸天不忿，天不忿故一切众生悉皆获得如上乐具。”

大集须弥藏经卷下

陀罗尼品第四

尔时，世尊告功德天言：“清净智，我于往昔与汝二人，于因陀罗幢相王佛所同发誓愿，我今与汝得愿满足。我今已得阿耨多罗三藐三菩提，汝亦住于功德之处。”

功德天言：“如是，如是，大德婆伽婆！如是，如是，大德修伽陀！我与世尊所愿已满，我与世尊善欲已满，我共世尊昔于因陀罗幢相王佛所同发誓愿，今愿悉满心意满足，是故如来出现于世，我今得住功德之处。我今虽复得功德处，犹故未能满昔本愿成熟众生。何以故？此处多有象龙、马龙、蛇龙、鱼龙、虾蟆龙，彼于此界诸众生中起于恶行，虽说甚深作光陀罗尼，犹故未制此诸恶龙。彼龙常起非时寒热、恶云暴雨、旱潦不调、伤害众生及以五谷芽茎枝叶花果药草。大德世尊，今此世界四天下中，诸龙、大龙及龙眷属男龙女龙、龙男龙女，所有龙趣生者，彼一切皆已来集。又十方世界一切佛刹，诸大菩萨摩诃萨皆来集会，及一切天、夜叉、罗刹、乾闥婆、紧那罗、鸠槃荼、饿鬼、毗舍遮、富单那、迦吒富单那等一切来集。又复世尊，声闻弟子人非人等，亦悉来集在大集会，为听法故住于佛前。一切众生依四食活。大德婆伽婆，今正是时，唯愿除此诸恶毒龙灾害方便，于如来所无有信心，其心常与恶法相应，恼乱众生，损坏众生，资生之具毒恶粗犷，于诸众生无悲愍心不见后世，莫令于我所化众生为作障难。是故，世尊，于彼众生应起大悲灭彼诸恶。”

尔时，世尊告须弥藏龙仙菩萨摩诃萨言：“善男子，汝于往昔燃灯佛所，为化诸龙发大勇猛弘誓大愿。汝须弥藏，有四生龙大龙毒恶，过去、未来、现在所有气毒龙、见毒龙，触毒、啮毒、贪毒、瞋毒、痴毒龙等。此诸恶龙，今当云何如法除彼所有恶业，令诸众生所有种种资生之具无所损减，于三宝中信乐爱敬，深信后世离于恶业？”

尔时，须弥藏龙仙菩萨摩诃萨白佛言：“世尊，我当入彼毒龙宫中，结跏趺坐入龙频申三昧。以此三昧力故，令彼恶龙贪嗔傲慢皆悉消灭，柔和调伏，其心寂静深信后世，于一切众生所，慈悲怜愍起救济心。令彼毒龙心生敬信，亦不恼乱一切众生，安置救济众生心地。又世间所有风雨旱潦，有云大云寒热所害，彼诸众生当称我名，合十指掌作如是言：‘大慈悲者，念我！念我！能化伏龙须弥藏菩萨，种种方便智慧勇猛修行无上菩提道者，唯愿救我，除灭我苦！’作是言已，即说咒曰：

“多地耶他 萨耽婆步阇 毗梨荼步阇 输拒卢梨荼步阇 迷卢
阇婆 伽除婆步阇 炎(于剑切)炎阿泥婆步阇 苏摩罗阿跋多步阇

债菩步阇 莎波呵 此陀罗尼咒句拥护某甲 莎波呵。’

“大德婆伽婆，若有众生为诸毒龙之所恼乱，当称我名并诵此陀罗尼，能灭此龙贪嗔慢妒毒恶之心。我以清净天耳过于人耳而得闻之，我得闻已，若四生龙、大龙、龙父、龙母、龙男、龙女及龙眷属，不能令彼生敬信心，犹作如是非时风雨、寒热旱潦、灾云恶等，若不灭者，又我不与一切众生安乐因缘满其愿者，我便欺诳一切十方三世诸佛，亦莫令我得成阿耨多罗三藐三菩提。如是，大德婆伽婆，我于过去燃灯佛所，于佛眷属大众之前，发于如是坚固大愿。从是以来，常善安住教化众生；又从是来，复于亿那由他百千佛所诸佛现在眷属前，亦作如是坚固大愿。我常安住大精进力，教化众生策勤不倦，如我今者于世尊前坚固精进等无有异，为欲降化诸恶龙故。世尊，我念过去阿僧祇劫已来，未曾忆念于一念顷舍于坚固勇猛精进心，常安住坚固精进教化众生，乃至今日亦复教化一切众生。此诸龙王，于大乘法精进修持，谓此善住龙王为一切象龙主，此难陀龙王、婆难陀龙王为一切蛇龙主，此阿耨达龙王为一切马龙主，此婆楼那王为一切鱼龙主，此摩那苏婆帝龙王为一切虾蟆龙主。如是等诸大龙王，能与众生作诸衰恼，自余诸龙自力不堪作上衰患。此五大龙王安住大乘有大威德，是大龙王各各佛前约率眷属，不令起作如上灾祸，于佛法灯三宝种姓久住于世不令速灭。”

尔时，一切诸来大众，同声赞颂须弥藏龙仙菩萨摩訶萨言：“善哉！善哉！”

尔时，善住龙王从座而起，偏袒右肩，合掌向佛而作是言：“大德婆伽婆，依属于我诸龙大龙，所谓胎生、卵生、湿生、化生，随佛弟子声闻、菩萨徒众眷属，所住国土慈心相向，无怨害心住安等心。又彼国土得为王者，于佛法中得净信心拥护佛法，不恃傲贵自在而生憍慢毁坏佛法，亦不恼乱比丘、比丘尼、优婆塞、优婆夷所有依佛出家若器非器，剃除须发服持袈裟至于彼人信心护持。其国土中或余众生于佛法中起怨刺者，国王应当如法遮约。又其国中先王敬信，曾施沙门及婆罗门田宅封邑，令其受用更不追夺。若有辅相明智大臣，和合一心共治国事，得财坚固尝舒施手。是刹利王善护国土，一切国中所有斗争秽浊如前所说，我等诸王，各各自敕己之眷属不起灾变。何故我今作如是敕？此袈裟染衣一切过去诸佛常所加持，又此袈裟则为一切诸菩萨种，则是趣向涅槃正路，即是刚刀能断烦恼，则是涅槃种子，则是失道者灯明，亦是除病者药，如大猛风吹无明云，则是欲行恶道者杖，则是吐药能吐烦恼毒，则是金刚坏修罗冤，则是一切善法宝藏，如清净水能洗罪染，观诸法犹如明镜，能摄乱心犹如罗网，能容禅定犹如宝篋，犹如大地能生诸波罗蜜，应当顶戴如髻明珠，能容忍辱犹如屋宅，则是净器容十地行，障诸外道犹如城郭，则是良医治烦恼病，于诸学者如须弥山，除烦恼蒸犹如明月，除邪见闇犹如净

日，为智慧藏犹如大海，于菩提分法犹如华鬘，于一切智智犹如贤瓶，一切佛护犹如意珠。又此袈裟一切诸佛之所加护，于诸众生雨法雨故。是故，婆伽婆，若恶刹利王破坏佛法，恼乱比丘、比丘尼乃至器非器依佛出家者，若治罚其身，或税其物乃至断命，是故其国中，有敬信佛天、夜叉、罗刹、阿修罗、鸠槃荼、饿鬼等有大威德，于彼一切刹利王所起嗔恚心，令彼国土斗争、饥俭疫病、刀兵竞起，非时风雨、旱潦寒热，损伤五谷种子、芽茎枝叶、华果药味。此非龙过，是诸龙等实自无辜横得恶名。大德婆伽婆，譬如婆罗门自食蒜已与宝女通，不言己臭，妄怨宝女言汝臭秽。世尊，是刹利恶王亦复如是，舍刹利法行首陀行，以是因缘，彼护国土威德诸天乃至薜荔等，心生嗔忿破坏国土。国王臣民不审已过，妄与诸龙大龙而作恶名。”

佛言：“龙王已曾教敕一切诸王，若顺教行者得人天乐，乃至获得涅槃之乐。若恶刹利王不顺教行者，乃至堕于阿鼻地狱。”复告龙王：“各各自诫己之眷属，当设严教勿令违犯，令彼现在及未来世莫坏我法及三宝种。”

尔时，龙王白佛言：“如是，如是，婆伽婆！如是，如是，修伽陀！世尊，随彼彼土若有持戒多闻所居之处，于彼国中随其所有我之眷属，若男龙、女龙、龙父、龙母、龙男、龙女及龙眷属，于彼国土若城邑聚落一切诸处，作非时风雨、霜雹寒热，伤坏五谷华果药味资生之具。世尊，若彼福田所居之处，若有诸龙违背我教，我与立誓，令彼恶龙其身焦瘦退失神通，焦热触身依报灭坏，无复辞辩不堪为作。”即说咒曰：

“多地耶他 那伽[口+阎]步竹蓰 那伽泥迷 那伽陀啰输伽啰
输伽啰 阇逻输伽啰 阿鼻摩祇娑波呵娑啰目企 迦罗帝步竹蓰 耶
婆萨耽鞞 帝阇耶 婆颇隶 毗目睺羯隶 莎波呵。”

“如是陀罗尼句拥护某甲，令一切怖畏、一切灾害悉令消灭，莎波呵。”

尔时，一切大众赞善住龙王言：“善哉！善哉！大龙王，能护一切众生。”尔时，会中一切龙众惊怖恐惧。

时，难陀龙王、婆难陀龙王，从座而起，偏袒右肩，合掌向佛而作是言：“大德婆伽婆，若现在世、未来世，若恶刹利王，悭惜资财自不受用亦不施他，于己资财悭惜耽著不舒施手，于沙门、婆罗门不信，不施贫穷行路乞丐之者，皆不给济，于己宫内及其眷属亦复不与如法乐事。彼彼守护国土，诸天、夜叉、罗刹、阿修罗、鸠槃荼、饿鬼等有大威德，彼等一切于恶刹利王起嗔怒心，令彼国土斗争、饥俭疫病、刀兵竞起，乃至五谷药味悉皆损坏。非彼诸龙及大龙过，彼龙王等实无过失横得恶名。譬如有风吹彼臭尸，世间之人便言臭风，然彼风性实非臭也；如是，世尊，恶刹利王亦复如是以悭贪故，一切护

国土者起嗔恚心，以嗔恚故破乱其国，横为诸龙而作恶名。虽然我为彼龙而作教令，若彼诸龙，若过去、若未来违我教者，若于如是诸佛所有声闻弟子持戒多闻所居国土，若我眷属胎生、卵生、湿生、化生，若男龙、女龙、龙父、龙母、龙男、龙女及龙眷属，于彼城邑聚落、山川溪谷，作非时风雨、旱潦灾雹、大寒大热，伤害众生、五谷华果及诸药味资生之具，于佛声闻弟子福德人所作损害者，彼诸龙等违我命者当为立誓，令彼诸龙身体挛缩不能游行，退失神通焦热触身，一切依报悉皆损坏，无复辞辩，无所能作。”即说咒曰：

“多地他 婆啰拏输迷 鸠牛婆头啰跢婆嚧拏惧鞞 阿迦罗跢
翅迦泥毗摩何啰伽跢 鸠拏鼻 阿罗耆 阿多沙隶 那邪那耽鞞 迦
罗鸠世 衰鸯俱波罗制乾 陀何罗婆斯 莎婆呵。

“此陀罗尼句拥护某甲，莎波呵。”

尔时，一切大众赞难陀跋难陀言：“善哉！善哉！”

尔时，阿那婆达多龙王，亦于佛前自誓拥护，敕诸眷属亦如上说，即说咒曰：

“多地他 那摩比梨世 那婆那摩比梨世阿奴差那婆躬牛闍鼻
跢 佉伽裴佉钵啰都嚧安廌(徒卖反)贺耶斯隶 那啰邪拏瞿迷比那悉
须隶 阿賧迦啰迷 阿初是泥移徙 牟尼萨鞞 莎波呵。

“此陀罗尼拥护某甲令无怖畏殃祸，莎波呵。”

尔时，婆楼那龙王，亦于佛前教令眷属，及自要誓亦如上说，即说咒曰：

“多地他 兮摩鞞迷 簸罗绮拏瞿泥 多拏频度帝利泥 婆罗叉
达利迷 伽僧俱迷 比邪牟芩 翅世 徒嚧谟提摩移(上)多那锯斯
折摩奚鸡 遮罗何啰鸯耆那荼达坻 捷荼加都隶 莎波呵。

“此陀罗尼句拥护某甲，莎波呵。”

尔时，摩那苏婆帝龙王，即从座起，偏袒右肩，右膝著地，合掌向佛而作是言：“大德婆伽婆，若有依我诸龙大龙，胎生、卵生、湿生、化生。婆伽婆，若现在未来有恶刹利王等，舍刹利王法行于恶行，是王当趣阿鼻地狱先道，当知皆是恶刹利王过，龙王无辜横加恶名，以此因缘龙王嗔忿作诸恶业，虽然我等敬受如来之教。世尊，譬如人众之中有妙宝女，澡浴清净以香涂身，著转轮圣王上妙衣服，于其头首著胜七宝鬘，以真金绳臂印环钏以自庄严乘大象乘，眷属围绕送诣刹利王所。如是，世尊，我等诸龙畜生所摄损坏之身，为贪嗔慢之所染污。如来今者是法轮王，以第一调伏水洗浴我等服惭愧衣，以三十七助菩提分鬘庄严头首，以种种三昧陀罗尼忍地庄严我等心意识

升大乘。我今欲往离于五浊清净佛土随佛世尊为诸清净大菩萨众之所围绕说大乘法处，是故我等敬受佛教。我于今者及自眷属，安住坚固弘誓大愿，在在处处城邑聚落山川边城，若声闻乘人、若辟支佛乘人、若菩萨乘人，若出家、若在家，若持戒、若破戒，若多闻、若少闻，若精进、若懈怠，若定、若乱，若念、若失念，但于如来所爱信恭敬心生希有，于法僧所及圣爱戒亦复如是，于三菩提随意趣向，爱信恭敬生希有心，坚固安住随所住处，若我眷属、若龙父龙母、若男龙女龙、若龙男、若龙女及龙眷属，随在在处处城邑聚落山川边岭，非时风雨、旱潦灾雹、寒热暴起，伤害五谷种子、芽茎枝叶及诸药味资生之具，在在处处随有佛诸声闻弟子福田住处，若有诸龙违我命教，我今立誓令其身体一切挛缩，退失神通不能游行，焦热触身诸根闭塞，依报失坏不能为作。”即说咒曰：

“多地邪他 佛陀闍邪 婆罗差 阿摩尼迷菩哆 娑离梨 阿婆末提 钵啰帝邪尼利 阿婆尼逻迷 伞罢输筏 那苏都卑钵梨卑娑什鞞 娑捷陀婆梨 婆啰謏訖利移 莎波呵。

“此陀罗尼拥护某甲，莎波呵。”

尔时，一切诸来大众欢喜踊跃，合掌赞叹摩那苏帝龙王言：“善哉！善哉！大丈夫，汝所应作为欲利益一切众生。”是时一切龙众惊怖战栗，闷乱失性。

尔时，有乾闥婆仙名曰药生，即从座起，偏袒右肩，合掌向佛而作是言：“诸佛大众当一心念：若现在、若未来恶刹利王，愚痴无智憍慢所害，不顾后世欺诳无悲，恼乱比丘、比丘尼，乃至归依如来剃须著袈裟衣者而作恼乱。我当于彼恶刹利王所，以三昧力故而作是誓，令彼恶王现得果报，当令王身及其眷属资生乐具为诸敌国之所侵夺，及为内贼反逆扰乱，河池枯竭或复潦溢，疫病所恼，恶星变现，寇贼竞起，耽荒著乐，家亲眷属乖散不安，四大变异鬼神娆乱，天及诸龙乃至饿鬼有威德者悉皆不安，有刹利、婆罗门、毗舍、首陀若男若女亦悉不安，师子、虎、狼、恶兽、毒虫亦皆不安，我今为欲破坏彼恶王国故作此誓。何以故？是诸恶王于如来所出家剃发一切诸佛之所住持三宝种者而作恼乱。”即说咒曰：

“多地他 跋泥 耶婆那钵隶 摩诃跋那泥度嚧 摩遮诃 鸠苏摩婆罗帝 育多衫婆差 鞞摩地利多差婆(上)嚧钵那邪 钵利婆利菩摩 度嚧迦啰迷 泥何镰阁斯逻迷帝利 裴摩跋多 磨输嚧佉誓 那邪那嫌居隶 卑婆车鞞梨栖 陀那谟制 僧伽毗舍差 波罗刹帝 波罗民陀达隶 浮弥颇师诃 十嚧摩陀隶 婆那伽逝浮摩诃 陀婆诃 颇那邪比梨使致什婆迦罗迷修多罗差 乾闥婆斯迷 莎波呵。

“此陀罗尼句拥护某甲令无怖畏灾祸，莎波呵。

“令恶刹利王及不见后世恼乱比丘者得如是恶。”

尔时，一切诸来龙众及乾闥婆众，各作是言：“愿放舍我！若刹利王违法行恶恼乱法僧，我当顺誓，还令我等于自宫内游戏歌舞自在受乐。”

尔时，一切诸来大众同声赞言：“善哉！善哉！”

尔时，地藏菩萨摩訶萨，合掌礼佛而作是言：“世尊，我有一切三昧游戏神通，今亦欲说幢杖大陀罗尼门。若于此幢杖大陀罗尼门一经耳者，所有耳病悉得除愈，亦除一切贪嗔痴等烦恼诸病，设不全灭能令轻薄。以此咒咒于海皮，安禅百千遍用涂王鼓，有闻声者，所有贪嗔痴等一切烦恼悉皆微薄，于佛法中得清净信恭敬爱乐希有之心，亦得勇猛随顺法行，深信后世资生丰足，众人爱乐莫不喜见。”即说咒曰：

“多地他 崩伽婆 末帝阿卢波 摩帝器多罗浮革波那蹇地 句那摩众隶 磨蹉奴隶 桥何啰那地 那叉跋迷槃陀何啰输迷 摔伽罗耆梨迷 卢醯多何罗鞞 儻伽罗苏 婆伽那子梨泥 安陀柘迦梨迦啰浮逝 鸡舍卢醯 三摩提头婆利 莎波呵。”

“此陀罗尼句拥护某甲令离怖畏，莎波呵。”

尔时，如来赞地藏菩萨摩訶萨言：“善哉！善哉！善丈夫。”及一切大众亦共赞言：“善哉！善哉！”

尔时，无尽意菩萨即从座起，偏袒右肩，合掌向佛而作是言：“佛及大众唯愿随喜，我今亦欲说大陀罗尼，名一切如来语言音声发幢盖摩尼愿眼，有大威德，有大威势，有大威力，满多闻藏，满智慧藏，诸佛声闻之所成就。若有于如来所，尽形寿安住净戒，安住优婆塞戒，若住沙弥戒，若住具足戒，若器非器，若于此幢盖摩尼愿眼大陀罗尼，能受持读诵七日七夜，慧观方便恒常观察于五受阴，数数诵此幢盖愿眼大陀罗尼，于七日七夜能诵满百千遍，使得闻持随闻能受，得无量辩才，能令刹利、婆罗门、毗舍、首陀及一切众生生敬信心，又复能令丰足资财趣向天道，常得亲近生诸佛前。”即于佛前而说咒曰：

“多地他 帝利拏 僧是若翅 鼻帝利拏频鞞迦嚩阇差 菴婆苏闭 遮摩罗谿鞞 阿婆罗差 阿差邪卢臂 阿迟邪兜摩帝弥利尸利婆毗莎婆利 鸯渠闍阇是祢 闍闍啰奴迷 阿那摩输地 弥梨佉其利差 居罗婆睺 末伽婆差 袍婆莎婆利呵佛梨 帝苏步 莎婆啰佉逝 苏谟帝谟泥 莎波呵。”

“此陀罗尼拥护某甲，莎波呵。”

尔时，世尊赞无尽意菩萨言：“善哉！善哉！善丈夫，于我法中善作住持。汝能显现此幢盖愿眼大陀罗尼，能示一切众生多闻眼。”

尔时，一切菩萨大众赞无尽意菩萨言：“善哉！善哉！善丈夫，汝于现在及未来世，若有趣向一切大乘众生，则能增长住持多闻之聚。汝今于此幢盖愿眼满足多闻大陀罗尼，能显示故。”

尔时，文殊师利童子菩萨摩訶萨，即从座起，偏袒右肩，合掌向佛而作是言：“世尊，我今亦欲令此四天下所有树木华果、五谷药味、芽茎枝叶，及依地众生资须之具令其丰足，为拥护故说大陀罗尼，名能惧尸利子利奴，此四天下中希有未有未见未闻。如来所作如是大集，我今说此能惧尸利子利奴大陀罗尼，有大威力，增长一切种子、芽茎枝叶、华果药味，润泽甘美悉皆丰饶，令一切众生能作信戒、多闻、布施、智慧、慈悲、方便，长养一切助菩提分法。”即于佛前而说咒曰：

“多地他 阿曼祢邪居闭 伽婆叉毗誓渠 卢遮卢迷 钵吒叉卢迷 尸利邪叉居苏迷那婆锯闻地(徒买切) 何啰阁跋迷车吒婆波摩哖毕素很祇阿佛啰素隶何娑伽阁差 卢摩浮阁差 钳毗啰婆素迷 阿奴摩邪萨利钵罗赊都裔莎波呵。

“此陀罗尼句拥护某甲，莎波呵。”

尔时，文殊师利白佛言：“世尊，以此陀罗尼书高幢上，以大音声而读诵之，复以此陀罗尼咒磨陀那果汁一千遍，用散树木田苗五谷，若以此咒咒诸蠹鼓而吹击之，随其音声所到之处，所有华果五谷药味依地生者，一切灾害无能毁坏，无能干枯，不能烧灭，亦复不能夺其精气，又亦不能损其势力，无能劫夺。若天、若龙乃至大威德辟荔鬼，若魔、若魔子、若魔眷属不能为害，况余众生及众生数？惟除宿业定障。”

尔时，世尊赞言：“善哉！善哉！善男子，汝今善能于四天下中升施德乘。善男子，汝复又能助成无量众生无上菩提之道。”

尔时，一切诸菩萨众赞文殊师利菩萨言：“善哉！善哉！如汝所作常应如是。”

尔时，观世音菩萨语弥勒菩萨摩訶萨言：“我今与汝大陀罗尼，名船华功德。以此陀罗尼句，于诸众生被以大慈铠音而为说法，是等众生以汝三昧神通力故得闻正法，除诸恶心及诸邪见、诸恶知识及诸恶伴，恒常忆念慈悲善根，于一切众生所起怜愍心、深见后世心、远离十不善心、住十善道心，悉能清净一切众生心，降注法雨称众生欲，一切冤家令其欣喜生信乐心。”即说咒曰：

“多地邪他 蓝步莎婆利迦莎邪跋迷 三称移婆竭隶 陀婆何楞伽阁隶 暮力差素何叉莎婆梨 苏呵风祇阿婆路迦陀隶 悉陀呵毗婆差驰呵 那频婆子梨 阿毗扇呵遏鞞 搔婆遮罗 阿婆啰何罗斯婆罗呵初地 利[王+璽]迦何啰都裔 三摩提羯泥婆罗阍尼帝利 摩诃浮

多多究细 阿嚧拏尼隶 婆罗呵唎迷 尼罗居苏迷 莎波呵。

“此陀罗尼句拥护国主，莎波呵。

“如是，弥勒，此船华功德大陀罗尼。以此陀罗尼铠，菩萨摩訶萨为众生说法，若诸众生闻此陀罗尼音一经耳者，乃至微细蚊蚋虫等，浊恶之心皆悉消灭，于善法中得安住心，况复人等得闻此陀罗尼！若有人欲求雨者，当至泉源龙居之处，诵此陀罗尼一日诵一千八遍，日日如是乃至七日，复以种种好华名香、百味饮食散龙池中，唯除酒肉五辛不净之食，从月七日至十四日，于十五日旦当以胡椒末和蓖麻油咒一千八遍，涂白氎上弃龙泉中，能令此龙于彼人所生大欣喜便澍大雨。”

尔时，会中诸大龙及诸龙仙诸来集者，得闻船华功德大陀罗尼，欣喜踊跃不能自胜，深自庆幸起于慈心信后世心，于三宝中净信尊重生恭敬心、希有之心，忏悔自己生畜生趣恶业之心，入无上大乘心。彼诸龙等各随力能欲供养佛，诸龙大龙或有雨于金末、银末、牛头栴檀、坚黑沉水、龙坚栴檀、多摩罗叶香，又雨优钵罗华、波头摩种种诸华、种种衣、种种盖、种种幢幡、金绳珠璣。一切诸龙大龙向佛合掌，一时同声而作是言：“大德婆伽婆，我等一切于三宝所住增上信乐心，我等今者于世尊前说诚实誓，在在处处城邑聚落人民之中，显示如是船华功德陀罗尼。如是一切诸余陀罗尼，谓水宅心陀罗尼、磨刀陀罗尼、幢盖愿陀罗尼、能求尸利子利奴陀罗尼、船华功德陀罗尼，及四天王所说陀罗尼，并四龙心陀罗尼，如是等大陀罗尼，在在处处一一显示演说受持读诵，我等诸龙随彼彼处城邑聚落边地山川，随其时节起云降雨，寒温调适。我等于彼彼处，灭除自军他军斗乱、诤讼、疫病、饥馑死亡等，令其处处安隐丰熟，人民安乐甚可爱乐。我又令彼种子、芽茎枝叶、华果树木、五谷药草，增长其味不令损减，众生依报丰饶，肥腻甘甜胜味妙香能令出生。我等亦能令阎浮提一切诸王悉生慈心、利益心、无怨心、无违诤心。如是婆罗门、刹利、毗舍、首陀，乃至夜叉令生慈心，乃至优婆塞、优婆夷令生和合心。随此陀罗尼所至到处，我等能为如上所说之事。”

尔时，世尊赞诸龙言：“善哉！善哉！”尔时，一切诸来大众亦赞诸龙：“善哉！善哉！”

尔时，须弥藏菩萨亦赞善哉，赞善哉已，告功德天言：“清净智，汝今乃有如是无量诸大菩萨以为善友，犹故不能转调伏轮成熟众生。”

时，功德天语须弥藏菩萨言：“若菩萨摩訶萨以愿力自在因缘故，于此秽恶五浊佛刹受生，得值如是善知识伴，如我今日得遇如是相应善友者，彼人阿耨多罗三藐三菩提便在掌中，则为满足六波罗蜜。若有勇猛精进菩萨为善友所摄者，一切种智便在掌中。”

佛言：“如是，如是，清净智，如汝所说。若有菩萨摩訶萨愿力

自在，为成熟众生因缘故生五浊世，勇猛精进坚固不退，以四摄法相应，为如是大善知识伴所摄，一切智智已在掌中。当知彼人便为满足六波罗蜜离三恶道，当知是人远离胞胎，当知是人住无学地尽诸有漏，当知彼人为一切诸佛忆念护持，当知是人住离欲地。”

尔时，会中有天帝释，名无垢威德，合掌向佛而作是言：“世尊，何因何缘，是诸龙大龙损坏世间众生资财？”

佛言：“有二因缘，是诸龙等能坏世间众生资财。何等为二？一者、贪力因缘，二者、嗔力因缘。以是因缘故，起非时云雨霜雹寒热，损坏众生所有种子芽茎、枝叶华果、五谷药味，悉令烧燃干枯堕落，损减众生资生之具，令身口意造作种种诸重恶业。众生以此重业障故，烧灭过去一切善根无有遗余，远离善知识常在三恶道。或有众生，于现在世为衣食故，乃至造作五逆重业，以恶业故于无量劫不得人身。设使久后得人身者，或诸根残缺，或失正念，生真陀罗家、下劣种姓工巧之家，贫穷下贱，衣食不充，资生乏短，又复以恶业故离善知识，以身口意恶业障行，复堕三恶道中乃至阿鼻地狱是其胜路。如是善男子饮食乏短故，是诸众生久处生死沉流不绝，具受三塗种种极苦。”

尔时，世尊即说偈言：

“所有诸苦生，皆由于饮食；
若离于饮食，诸苦则不生。”

尔时，无垢威德帝释即说偈言：

“奇哉恩爱胃，乃至有顶，
如是广大胃，皆因饮食生。
凡夫二种因，爱绳系缚身，
不能得逃避，犹如鹿著胃，
或走或徐行，起已还复堕，
爱毒药过故，或啼或喜笑。
机关苦轮逼，犹如压油麻，
一切诸人天，爱逼迫亦然。
百千众伎术，虽见种种巧，
爱戏弄人天，巧妙过于彼。
贪爱毒之过，能害一切人，
设学武勇怨，犹尚不能及！
如夜叉所执，狂乱种种语，
爱夜叉所执，狂乱过于是。
世有吉祥人，能离恩爱怖；
若能干竭爱，则度世彼岸。”

尔时，观世音菩萨亦说偈言：

“贪嗔痴惑人，狂乱无正念，
远离一切善，造作重恶业。
不敬尊父母，散灭于善道，
不敬信三宝，又造诸逆业。
无有悲愍心，暴恶甚可怖，
彼嗔心力故，入阿鼻地狱。
众生嗔恚故，迭互相食啖，
数数恶道中，众苦所逼迫。
远离善知识，恶心所蹶顿，
常处诸有海，游行黑闇路。
菩萨大悲身，为如是众生，
自舍于己乐，令彼得解脱，
修习菩提行，造作三种事，
建立胜法幢，除灭众生恶。
为一众生故，广集诸苦行，
精勤修道法，舍财及身命。
为一一众生，无量劫受苦，
救拔众生故，堪忍世苦恼。
功德天勇猛，住教化众生，
为贪欲众生，发起菩提心。”

尔时，功德天以一斛器盛诸种子，奉上观世音菩萨摩訶萨而作是言：“我今以此一切种子施善丈夫，为欲增益一切种子，愿令我意所欲成满。又令我于四天下充足众生资生之具，于恶暴虐断善众生拔其苦恼，令得安住菩提之种。”

尔时，观世音菩萨摩訶萨即以手执彼种子器，遍示十方作如是言：“一切十方诸佛、菩萨及以诸龙今现在者，愿悉念我，令使一切诸四天下所有种子、芽茎枝叶、华果五谷及诸药味、地味精气、众生精气、善法精气增长无损。又复令此四天下中三宝种性相续不断，使功德天一切所愿皆悉满足。常使功德天能令一切众生资财丰足，亦能教化一切众生，远离一切恶令发菩提心。又令诸众生得离三恶道生于天中。”即说咒曰：

“多地他 牟尼尸婆 牟尼那佉 牟尼波罗 牟尼婆利 萨[豆
+斤]婆于娑差帝刹多啰波罗那腻罗 婆邪婆 萨婆毗闍 邪婆悉利
梨 莎波呵。

“此陀罗尼句拥护某甲，莎波呵。”

尔时，世尊赞观世音菩萨功德天言：“善哉！善哉！”告功德天

言：“清净智，一切诸佛及诸大众已作加护，于此四天下中五谷种子、芽茎枝叶悉令成熟，又亦令汝能化众生，汝今应当教化众生。”

尔时，帝释憍尸迦白佛言：“世尊，当何名此法门？云何受持？”

佛告憍尸迦：“此经名曰《如来共功德天本愿要誓经》，亦名《须弥藏菩萨所愿》，亦名《陀罗尼箴》，亦名《增长地味》，亦名《三昧方便教化众生》。”

说此法时，功德大天，须弥藏菩萨摩訶萨，及一切诸来龙、大龙并其眷属，一切神仙、天、人、阿修罗、乾闥婆众，闻佛所说，皆大欢喜。

虚空孕菩萨经卷上

如是我闻：一时，婆伽婆住佉罗坻迦山，古昔神仙所居之处，与
大一切比丘众俱，度量已过，皆悉漏尽诸大沙门。复有菩萨摩訶萨众
无量无边阿僧祇恒河沙数诸大人俱，乃至世尊授功德天记蒯讫已。尔
时，世尊默然而住，及诸大众亦复如是。

尔时，西方有一应珠，是摩尼宝忽然出现。复有百千帝释天宝，
左右围绕摩尼应珠。时彼应珠最在其前，应珠现已，彼山所有诸色光
明皆悉不现，并诸天、人、大神王等，声闻、菩萨、大地、火、风、
诸水色光莫不隐蔽，唯除如来光明不灭。

尔时，大会睹如来光无量无边不可说不可说，遍满十方犹如虚
空，而世尊光威严殊特照耀显赫最妙最胜。时彼大会所有众生集会之
者，各见自身所有光明，并及诸大妙色隐蔽不现，自己色相触受等事
亦复如是。凡所观处状若虚空，亦复隐蔽日月星宿、地水火风、一切
诸色种种光明，不与眼对，耳不闻声，鼻不闻香，舌不得味，心意识
等亦不能缘，亦无彼我，亦无六入。一切诸大凡所求觅，欲有观视一
切方处，皆悉不见。所视诸方，唯见佛身光明相好显现特尊。遥见彼
珠，无量无数释提桓因著身妙珠左右围绕，彼胜摩尼独在于前。

时大众中，唯诸菩萨十住地者，或得首楞严三昧者，或复有得一
生补处，彼等菩萨见斯瑞相，不惊不怖不没不悔。所以者何？彼诸菩
萨，于一切法皆达真理，晓了实相勤入空门，以是义故，不惊不怖亦
不悔没。其余菩萨摩訶萨等，及诸声闻、天、龙、夜叉、阿修罗、迦
楼罗、紧那罗、鸠槃荼，及诸饿鬼、毗舍遮、富单那迦吒、富单那人
非人等集会之者，皆悉惊怖恐惧滞没，于此彼岸不能晓了，以惊怖心
各各相求而不显现，心怀疑惑各作是念：“此是何相？此事何因？此
谁威力？”欲自决疑而无问处。

尔时，于彼海会之中有一菩萨摩訶萨，名曰梵檄，即从座起，合
掌向佛，而说偈言：

“一切诸法相，真实无知者；
若人住诸阴，六根皆闭塞。
观一阴不实，所谓色阴是，
彼疑诸佛法，迷惑众生等。
善哉大世尊！愿为说实法，
如来此彼岸，教知空忍门。
彼大精勤者，得定身难说，
最大摩尼宝，顶戴彼庄严，

天帝著身珠，无量左右绕。
彼等欲来故，先现是瑞相，
彼等诸菩萨，悉得首楞严。
如是诸智辈，欲见佛世尊，
彼等来诣此，说深法无疑。
愿佛慰此众，彼当哀矜汝，
是等欲来故，先现是境界。”

于时佛世尊，告彼菩萨言：

“一如汝所说，此是三昧境，
若人闻无住，彼人能住智。
此是虚空孕，三昧威力境，
得住无说处，三昧先相现。
若人住二见，彼等常迷惑，
染著断及常，即失此彼岸。
此等二见者，若欲速解脱，
是等莫言说，速得证诸地。”

尔时，世尊说此偈已，告彼菩萨作如是言：“仁者，虽然但初学人诸菩萨等应欲教者，应教彼等言说之相，以方便力亦教攀缘六波罗蜜，乃至诸大本相次第相生应教令证；既证知己，然后能于一切诸法无言无说，须知本体生处应灭攀缘，诸阴无体应证应知，不令彼堕断常见中；舍二边已，即不惊怖不没不悔，于诸一切法中不生攀缘之想，于诸一切波罗蜜速得圆满具足成就，亦不住于断常二见。”尔时，世尊说是法已，时会大众还得相见如本无异，如旧所见诸色光明，如前所闻还闻如故，所证所触亦复如是。

尔时，世尊即举右手，唱如是言：“此是虚空孕菩萨摩訶萨，来诣我所，得诸三昧如大海水，于菩萨行成就具足如须弥山，于大智内犹若虚空，勤行精进犹如大风，于诸忍中犹若金刚，于般若中犹如虚空，于菩萨众犹如大幢，向涅槃路如大商主，于诸善根犹如地藏，为众贫穷犹如德瓶，为幽众生犹如日光，为失路者犹如盛月，为惊怖众如须弥山，为诸烦恼病苦众生如甘露药，为断善根诸众生等犹如拄杖，于生天路及涅槃道犹如桥梁，于度彼岸犹如大船，于上生天犹如阁道，若有被人诽谤恼者为作伞盖，于诸外道犹如师子，于诸恼热犹如冷水，于魔怨敌犹如铠钲，于学错误犹如智师，于诸善根犹如大地，于爱鬘者犹如香花，于诸持戒及知足者犹如明镜，于诸无惭无愧人所犹如刀剑，于诸病患众生之内犹如良医，于饥众生如功德天，于渴众生犹如月珠，于疲乏众犹如床铺，于诸勤求三昧人所犹如日珠，于向菩提道心众生犹如车乘，于诸爱乐禅定众生如清凉池，于乐菩提

助道众生犹如花鬘。彼善男子，又于行诸波罗蜜者犹如大果。彼善男子，于修诸地如彼应现摩尼之宝。若人修习首楞严三昧者，如波利质多罗树。彼善男子犹如利剑，割截一切诸见结故。彼善男子犹如金刚，破坏一切习气烦恼故，能降伏一切魔众，于方便众生如解地藏者。彼善男子，显现胜智善巧方便。彼善男子，于一切法真实体中能作住持，又于一切辟支佛所作花鬘，又于一切声闻众所犹如衣覆，于一切天犹如净眼，于诸人中犹如直路，于诸畜生能作归依，怜愍饿鬼，拔地狱苦。又于一切诸众生所，为大宝器是大福田，于诸菩萨犹如大车。彼善男子犹如大臣，于三世中诸佛如来但他阿伽度阿罗呵三藐三佛陀，常能守护诸法城。彼善男子，以十八不共法而庄严身，具足一切诸佛智慧，堪受一切众生供养种种供具而供养之，唯除如来。汝等此会，应须迎逆持诸供具，随力随分而供给之，尊重赞叹，以种种宝及诸幡盖、香花宝幢、诸花鬘等，末香、涂香、花鬘庄严种种瓔珞，以诸宝器安置香汤净洒道路，种种瓔珞庄严道侧，种种赞叹而歌咏之。何以故？汝等一切不久当得如是种种功德之器。”

尔时，一切集会大众皆从座起，面向西方，于虚空孕菩萨摩訶萨所来之处，低头合掌遥礼致敬，心生欢喜踊跃无量，熙怡含笑正立而住。彼大众中最胜菩萨摩訶萨，及大沙门天王、龙王、夜叉王、阿修罗王、迦楼罗王、紧那罗王、摩睺罗伽王、五通诸仙，各各思惟：“我等今者作何供具，最胜最胜庄严供具，供养供给彼善男子？”

尔时，虚空孕菩萨摩訶萨现神通力，变此三千大千世界，平正如掌七宝合成，除灭一切山川沙卤、高峰石崖、丘陵坑坎、土块礞石、臭处粪秽、荆棘沙砾无复遗余，除诸云雾尘烟等秽及诸恶声种种音乐。于此大千种种诸树变为七宝，其诸宝树枝叶花果出微妙香，于地所生种种药草若小若大、若有枝叶若无枝叶皆成七宝，于此娑婆大千世界诸病患者莫不除愈，一切地狱、饿鬼、畜生皆悉除灭一切诸苦。彼等众生饥者得食，渴者得饮，裸者得衣，复得种种微妙瓔珞。于是娑婆世界之内，所有众生随心所乐莫不满足，身色端正世间无比最胜殊特，六根具足支节洪满，离诸烦恼心得寂定，乐行善行，于佛法僧心得净信。如是此会所集种种一切大众，左右二手皆持应珠。于应珠中复出种种微妙光明，照此三千大千世界悉皆遍满无不明耀。而彼应珠复出种种微妙音声，雨种种宝、种种幡盖、种种瓔珞、种种花香，雨种种鬘、种种宝器、种种甘果，复雨种种无价衣服、种种金缕，复雨种种真珠罗网，复雨种种优钵罗花、分陀利花、波头摩花、拘物头花、沉水等香，复雨种种诸末香等，所谓牛头栴檀及赤栴檀、白栴檀等，于彼菩萨所来之路自然洒扫。于道二边变成七宝庄严廊庑，犹如天帝难胜法堂。于其廊内自然化成种种玉女状，如欲界魔王妻妾，皆作五种微妙音声，自相娱乐或歌或舞。化作如是宝步廊已，于佛顶上虚空之中化成一盖，如梵天王所受用者，纵广正等满百由旬，宝縵为縷，真珠垂露，四散垂下，诸余瓔珞处处庄严。其瓔珞中出五音声，

一切大地所生草木若大若小、若长若短、若好若恶皆悉出于五种天乐，一切众生莫不闻者，闻彼声已，无有不得不退转地，毕竟得至阿耨多罗三藐三菩提。

尔时，彼会一切大众，见虚空孕菩萨现大神力如是庄严，心生欢喜踊跃无量，生殊特想复作是念：“我等今者，于世尊前，云何当为彼善男子敷设别座？”

尔时，佛前自然即有一莲华座，白银为茎，紫金为叶，码碯为台，梵摩尼宝以为花蕊，纵广正等一俱卢舍。其叶无量百千等数。其花周匝自然踊出无量无边百千花座，一如前花等无有异。又复于彼大莲华上，见虚空孕菩萨摩訶萨，结跏趺坐自然显现，首戴应珠。于彼围绕莲华之上，复有无量无边眷属诸菩萨等，结跏趺坐自然显现。

尔时，弥勒菩萨摩訶萨，即以偈告药王菩萨摩訶萨言：

“先来大菩萨， 有大名闻者，
顶礼世尊足， 退坐莲花上。
此胜人来已， 显现大庄严，
不礼世尊足， 迺坐莲花座。”

尔时，药王菩萨摩訶萨，还以偈颂报弥勒菩萨摩訶萨言：

“此是仁者见， 诸佛真如法，
不见有众生， 不染于分别。”

尔时，弥勒菩萨摩訶萨，复以偈颂报药王菩萨摩訶萨言：

“若不见众生， 是住于实际，
何故现庄严？ 汝决我心疑。”

尔时，药王菩萨摩訶萨，复以偈颂报弥勒菩萨摩訶萨言：

“此是智者诸方便， 为化一切诸众生，
所有不解真如者， 愚痴执著住分别。
是智出现为世谛， 众苦逼恼不会真，
欲为令彼等解脱， 故现如是庄严事。”

尔时，世尊赞叹药王菩萨摩訶萨言：“善哉！仁者，如是，如是，如汝所说。假使一切凡夫众生，彼等众生终不能知须陀洹人境界方便解脱之事；假使一切诸众生等悉得成于须陀洹果，彼等众生亦不能知一斯陀含境界方便解脱等事；乃至斯陀含人亦不能得知阿那含境界方便；其阿那含亦不能得知阿罗汉境界方便；其阿罗汉亦不能知一辟支佛方便解脱；假使一切诸众生等，悉得独觉辟支佛道，犹如犀牛

独一无侶，彼等缘觉不能得知无生法忍境界方便解脱之事而化众生；假使一切诸众生等得无生忍，亦不能得知一辯才首楞严三昧菩萨摩訶萨方便信行契会真如观察建立，本不能知从何处生从何处灭。

“是善男子虚空孕菩萨，得无生法忍已，过无量无边数劫，亦复已得无碍辯才首楞严三昧，知诸众生心心所趣。以是菩萨故，令无量无边众生见大庄严显现神力得住厌地。如此善男子从此处没，隐身不现，于西方出，知于此刹三乘杂教，以是义故，故现无边虚空三昧神通胜智。现三昧已，令诸众生生厌离想，然后现于世谛，现入庄严三昧；现入三昧已，因此三昧，教化无量无边众生。善男子，此善男子若径示现真如境界无生法忍庄严事者，即时世间一切天人心生扰乱即便迷惑，乃至八地菩萨犹尚迷没，况余人也！善男子，此大菩萨无人能知心行境界显现之相。此善男子得入如是甚深微妙功德之法故，有如是无量无边巧方便智，已入一切诸佛法海，无有疑心不由他悟，自知方便堪为一切大众生等而作大王。

“善男子，此善男子虚空孕菩萨犹如宝幢，能为一切众生示现天道解脱之路，能除众生心烦恼病，能灭其身诸大苦毒。善男子，若有众生堕在邪见旷野之中，厄难迷惑不解方便，欲求生天，欲求涅槃，彼等众生若能至心烧沉水香，顶礼致敬彼虚空孕菩萨摩訶萨足者，此善男子知彼众生心心所行真实敬信，而彼众生起烦恼见迷惑颠倒，如其往昔所作心业，种诸善根随其所能，于诸佛边种诸善根，或于法边，或于僧边，或作施业，或持戒业，或复欲于内心证法。此善男子或于梦中，或于白日在于现前，以善方便示现至真之道。作是方便已，令诸众生解诸邪见发生善愿，断诸邪路灭诸邪道归于正见，如实得彼真正三行，即得真正深心所愿。或复得于真善知识，因善知识悉得断除臭处烦恼邪见之病，复得速解恶道之愿，即得善行胜愿因缘。彼等速得心行自在，亦得安住十深忍中。若有众生自于身起种种诸病逼切之者，或有众生忘失本心，或复失眠，或复失舌，于六根内不具足者，或于身分小不遂者，彼等众生若能至心顶礼虚空孕菩萨，或复称名皆得如意。若有众生欲治患者，于晨朝时香汤澡浴，当净身口，面正向东烧沉水香，顶礼虚空孕菩萨摩訶萨大德之足，而彼善男子于睡眠梦中，或作婆罗门身，或作天帝释身，或作功德天身，或作大辯天身，或作刹利身，或作大臣身，或作断事官身，或作医师身，或作父母身，或作童子身，或作童女身，在病者前忽然来现，以是方便而令彼病速得除愈，或复示作良药，方便令彼病者一切诸患悉得除差。若有众生或求资财，或求多闻读诵经论，若好寂静深思禅定，或求多智，或求名闻，或求伎艺，或求苦行，或求官位，或求身色，或求财宝，或求善根，或求音声，或求饶子，或求妻妾，或求眷属，或求多众，或求行施，或求持戒，或求忍辱，或求精进，或求禅定，或求般若，或求好声言语清辯，或求事他称彼心意，或求解脱一切众罪，或求劝人令行布施乃至行智，或求长命，或有众生乏少资财恒作慳贪，

欲令彼等除舍慳贪行于布施，或破戒者欲令持戒，若懈怠者欲令精进，乃至无智慧者令学智慧，若有众生未得定乘教行小乘，自度身者教缘觉乘，而此善男子于彼众生，示现方便令解上业。若有众生无有慈心，唯护自身不救他苦；或有众生作如是念：‘我今当作何等方便？’若有众生欲发道心为他障碍，彼等众生欲回彼心，欲作如是方便示现，教彼众生住四梵行，乃至教行大慈大悲。彼等众生应当顶礼虚空孕菩萨，或住阿练若处，若在空中，烧沉水香，或烧多伽罗香，或烧栴檀香，香汤澡浴身口清静，胡跪合掌，五体投地，顶礼十方一切诸佛，而诵此咒：

“多地他(一) 阿蜜利舍(二) 阿蜜利舍(三) 迦喽尼迦(四) 遮
啰遮啰(五) 毗遮啰(六) 臆遮啰(七) 迦喽尼迦(八) 何啰没啰
(九) 何啰末啰(十) 毗伽阭喇(十一) 摩摩佉(十二) 蒲闍末那迦喽
尼迦(十三) 真多末膩(十四) 逋啰夜迦喽迦(十五) 萨婆赏迷萨他钵
夜(十六) 阿闍若阭履(十七) 萨破钳(十八) 萨破钳(十九) 喉喽帝
毗毗伽钳(二十) 地喇杀吒毗伽钳(二十一) 迦喽尼迦哺喇夜妒摩
摩(二十二) 萨迦赐夜(二十三) 阿赏夜(二十四) 萨婆钵达舍(二
十五) 阿舒迦伽帝(二十六) 莎呵(二十七)。

“诵此咒时，彼善男子即来现前，或作人形，或作野兽形，或作鸟形，或虽复来隐身不现，观彼众生福业深浅，随所受身或出音声，示现一乘善巧方便，令彼众生从一方便能化无量百千众生，未住定乘令住定乘，或住声闻，或住缘觉。彼诸众生于一时顷发智方便，用少功业令入大乘不退转地，乃至教示种种三昧诸陀罗尼忍辱等，乃至令住第十菩萨行地之中。

“善男子，此虚空孕菩萨，得如是等善巧方便大慈悲智。善男子，我今为汝要略说之。假使有人度量虚空能尽边际，而此善男子方便大智大慈大悲总持三昧难可度量，此大菩萨得如是等不可思议功德之法。善男子，此虚空孕菩萨，见有众生舍离谄曲远离邪心，发淳厚意成就正见，不毁于他，不赞自己，舍离慳妒无有谄曲，不求名闻信心净者，是善男子怜愍彼等清净众生，示现方便、智慧、精进，如是方便、如是智慧、如是精进得度厄难，发菩提心当得阿耨多罗三藐三菩提；教彼众生所有善根回向菩提，当得正道不退转地，速至阿耨多罗三藐三菩提；教作如是方便之利，智慧、精进圆满成就六波罗蜜，发大力心，当速成就阿耨多罗三藐三菩提。善男子，此虚空孕菩萨，得如是等不可思议殊特方便善巧胜智教化众生。”

尔时，弥勒菩萨摩訶萨白佛言：“世尊，此善男子以何义故，首戴应珠，如是光焰，如是威力，善能示现，诸余菩萨无有是事？”

佛告弥勒菩萨摩訶萨言：“善男子，此善男子虚空孕菩萨摩訶萨，为诸众生成就大慈，常化众生而无休息，见诸众生在大厄难，欲

拔苦故常不休息。若有众生犯四重禁，将堕恶道舍诸善根散灭众善，而此善男子为彼众生作大医师。见彼众生堕于无明入邪见网在危厄狱，此善男子为彼众生，犹如日光照明彼罪灭四重业，为彼众生拔心疑刺。若有众生破坏心器，而此善男子见彼众生破灭法行为烦恼陵，失于正法欲入恶道，无有归依无有救护弃舍诸智，此善男子为彼等辈罪恶众生，犹如拄杖示现正道，于诸罪垢烦恼秽恶洗令香净教背恶道，犹如大车将入天处速得涅槃。若有众生以欲逼心迷惑热恼，若有众生嗔恚炽盛共相斗争，憍慢嫉妒心无暂息，烦恼所乱失于本心，若有众生无明闇障无出离心，不识有因不畏来世，或有众生广集财宝心无厌足，或有众生具行十恶曾无休息，此善男子为彼等故，闭恶道门开天人路，犹如妙车运令上生安置涅槃解脱正道。以是义故，此善男子于诸天人应受供养，唯除如来阿罗呵三藐三佛陀。”

尔时，弥勒菩萨摩訶萨白佛言：“世尊，佛于前说有四重者，何等为四？而诸众生犯四重已，退失诸善，断灭善根，堕于恶道，违本誓愿，烦恼所押，为诸天人之所憎恶。而此善男子见如是等诸恶众生，拔彼苦恼置安乐处，令得充足。”

尔时，佛告弥勒菩萨：“善男子，凡刹利王有五重恶。若彼国王犯五恶者，失于往昔所造善根，忘本誓愿被烦恼盖，远离天人一切乐事，堕于恶道无有出时。善男子，若有刹利灌顶王者，强夺佛物，或夺僧物、招提僧物，或夺信心所施之物，或自身夺，或教人夺，是名第一极恶重罪。若有刹利灌顶之王，诽谤正法，或声闻乘、或缘觉乘、或复大乘，诽谤不信，不令他行教令隐藏，是名第二极恶重罪。若有刹利灌顶之王，为我出家诸弟子等剃除须发著袈裟者，若持戒者、若无持戒，身脱袈裟令彼还俗，科彼与罪若打若缚，若复骂辱流徙诸方，或遣输物，或令入狱，或断命根，是名第三极恶重罪。若有刹利灌顶之王，故断父命，故断母命，或复断我弟子阿罗汉命，破和合僧，出佛身血，此等五逆若犯一种，或始发心，是名第四极恶重罪。若有刹利灌顶之王，不说有因弃于来世行十恶业，十恶业中多教众生行十不善建立十恶，是名第五极恶重罪。善男子，若有刹利灌顶之王，此等五恶但犯一者，彼刹利王失于往昔所作善根，悉令散灭，违本誓愿被烦恼盖，失天人乐后堕恶道，于无量劫无有出期。

“善男子，此虚空孕菩萨摩訶萨，为彼众生故生边地显示其身，或作沙门、婆罗门等，威仪庠序，观彼众生随何身化，方便示现如是身相，在在处处于国王前如是说法昔未闻者，如来所说一切智法甚深经典，持戒、忍辱、诸地行相为说示现。知彼刹利灌顶之王，昔造诸罪作不善行，自悔自惭欲得谢过更不敢造，舍离恶事有悔过者，后作福德行大布施建立善业，往生上界即得解脱。

“善男子，一切大臣有五重罪。若有大臣，夺取佛物，或夺僧物、招提僧物，是名第一重罪。若有大臣，破国村邑，或破聚落，或破城隍，或破他国，是名第二重罪。若有大臣，诽谤正法，或声闻

乘、或缘觉乘、或一切智乘，若自诽谤，若教他谤，不令修行，隐没不显，是名第三重罪。若有大臣，于佛世尊出家弟子，故生扰乱而恐怖之，若有持戒、若不持戒，若有精进、若不精进，脱彼袈裟逼令还俗，或与身罪或打或缚，禁系骂辱呵叱恐怖，或令输物，或令入狱，或断命根，如是名为第四重罪。若有大臣造作五逆，或一、或二、或三、或四，或具五种造罪恶业，如是名为第五重罪。善男子，若有大臣此五种中若犯一者，彼等大臣失于往业，所作善根皆悉灭尽，违本誓愿失天人乐，堕于恶道受大极苦。

“善男子，此虚空孕菩萨摩訶萨，为彼众生生于边地，故住边地示现身相，作沙门身威仪庠序为彼说法。或复现于婆罗门身，容仪齐肃，或作童子而为说法。在在处处示现生相，知彼等辈随有善根而为说法。未曾有者诸佛所说深妙经典诸陀罗尼忍辱诸地慰喻说法，作是方便，令诸臣等悔过发露心生惭愧，忏彼恶业舍离众罪，教修布施、精进持戒，建立善业往生上方得涅槃道。

“善男子，声闻之人有五种事犯大重罪。何等为五？一者、杀生，二者、行淫，三者、劫盗，四者、妄语，五者、破坏形像出佛身血，是名五种犯大重罪。若我声闻诸弟子等，于五事中但犯一者，乃至如上所说之事，是虚空孕菩萨摩訶萨，为彼等故往生彼处示现身相，或作沙门及婆罗门，以彼威仪现彼身相，为说种种微妙法义一切智人所共深种种法门修多罗等诸陀罗尼一切诸地显扬宣说，令彼等闻悔昔所造种种诸恶，忆念不忘深生惭愧，忏悔彼罪更不敢作；忏悔罪已，修行布施，备行苦行，精勤勇猛，命终上生后得涅槃，即便发心入于大乘行菩萨行。

“善男子，大乘之人有八种事，犯于大罪；造八重已，令彼初行诸菩萨等失彼往昔，所种善根皆悉灭失，违本誓愿为烦恼盖，使诸天人之所轻忽，违背大乘即堕恶道，于多时间在烦恼处离善知识。善男子，何等为八？若有众生，以于往昔造恶因缘生不净刹，彼等众生以不多种善根因缘故，因善知识乃能得闻甚深大乘微妙经典。彼众生等心意狭劣，亦复不能多种善根。是初行菩萨，虽复发于阿耨多罗三藐三菩提心，闻是甚深空相经典，为他解说读诵，如其所闻，如其所诵，为种种愚痴哑羊众生如是之辈宣扬敷演，于彼前说一切智法教令读诵，而彼凡夫无有功劳，以凡夫心不能得解甚深法意，闻是法已生恐怖心，心生悔没，即便背于阿耨多罗三藐三菩提，于声闻行中发心修学。

虚空孕菩萨经卷下

“善男子，是名菩萨最初犯于第一大罪。是善男子犯是罪已，失于一切往昔所造诸善根等，违本誓愿，被烦恼降不得上生，亦复不能得涅槃乐，徒自虚行于菩萨行，忘菩提心后堕恶道。善男子，是故菩

萨欲化众生，先须知心，应知其行，如其彼行次为说法。譬如有人欲入大海，应先知彼水之深浅然后当入，乃至略说。此虚空孕菩萨摩訶萨，为于彼等诸众生辈，现生彼国示现身相，善能知彼若干众生犯于重罪畏堕恶道。

“若复有人怖畏罪故，或闻他说称彼虚空孕菩萨名者，或复欲乐见彼菩萨，而彼菩萨为欲忏悔深重罪故，于后夜时，香汤澡浴著净衣裳，烧沉水香、多伽罗香，右膝著地，合掌向东，当至心称彼虚空孕菩萨名号。时虚空孕菩萨，知彼初发菩提道心人行罪福轻重，随其根性而为现身，或复作于婆罗门身，乃至童男、童女之身在现前住。现前住已，为欲怜愍初发心故，观彼菩萨本起重业罪过因缘教令忏悔，为彼示现甚深善巧微妙方便说于最上大乘法要，教令建立三昧忍门诸陀罗尼说地等法，令其解脱一切恶道重罪因缘，住不转地，向于阿耨多罗三藐三菩提；又得大力犹如金刚成牢固心，于六波罗蜜中又得成就阿耨多罗三藐三菩提。是虚空孕菩萨，或众生前示现己身，现自身已而为说法。

“若虚空孕菩萨未为现于身时，时彼初行菩萨大士，更于后夜，香汤澡浴著净衣裳，烧沉水香，求彼东方黄白大士名阿楼那，而口唱言：‘仁阿楼那，汝大慈悲，欲出现照此阎浮提。怜愍我故，起慈悲心覆护于我，为我咨白虚空孕菩萨，令虚空孕菩萨示我方便。我今欲忏所有重罪，令我于圣大乘之中得大智眼。’作是劝请礼拜已讫，还归本处安隐睡眠。尔时，东方黄白大士阿楼那出时，虚空孕菩萨即来现身，于睡眠梦中，在彼犯重菩萨之前示现己身，教彼重罪初行菩萨大智方便悔所犯罪；或复示现大方便智，令彼初发道心菩萨得彼三昧，名无忘失菩提之心，安止住于大乘法中，速满成就六波罗蜜。

“复次，善男子，或有初行菩萨，见行菩萨行者，至其所而告彼言：‘汝不能行菩萨六波罗蜜，亦不能成就阿耨多罗三藐三菩提。汝当发声闻、辟支佛心，汝于烦恼即得解脱。’乃至如前说。善男子，是名第二菩萨犯于重罪。

“复次，善男子，或有初行菩萨，见他众生作如是言：‘仁者勿行波罗提木叉毗尼戒律，于是法中勿为精进。汝速发阿耨多罗三藐三菩提心，汝速读诵大乘经典。汝所作三种诸烦恼行，谓身口意，因此恶业诸烦恼故，即得清静。’乃至如前所说。善男子，是名初行菩萨第三犯于重罪。

“复次，善男子，或有菩萨，见于他人作如是说：‘汝诸人辈，舍声闻乘莫听读诵，莫为他说覆藏勿示。汝等善男子莫失声闻乘！汝若行此声闻乘者，不得大果，不能断除诸烦恼结。汝但说清静大乘经典，听诵受持为他显说，以此因缘，汝得度脱一切恶道，得灭一切诸恶等业，当速成就阿耨多罗三藐三菩提。’彼人若闻初行菩萨如是言者，随顺此行，彼等二人皆犯重罪。善男子，是名第四犯于重罪。

“复次，善男子，初行菩萨常行两舌，以心口相违。凡所读诵大

乘经典，求名闻故，为利养故，为得尊重求供养故，作如是心读诵经典，为他解说受持宣通。若为他说方便随宜，于他边闻复向他说：‘我今身是大乘之人，自余非也。’发如是等嫉妒之心。以利养故，或见其余大乘行者从他人边所得财宝四事供养，以是因缘，彼等即便生嗔恨心，为彼菩萨处处流布鄙恶名闻，毁辱骂詈诽谤轻贱，称誉自己。以如是等嫉妒心故，向于他人说上人法：‘我得上人。如是上法，我得我知。’以是因缘，是人违于本誓愿故，被烦恼降背大乘法。彼等众生于大乘中，犯大重罪乃至舍身堕于恶道。譬如有人欲采珍宝诣宝洲边而不入海，虽复入海在于中路自破船舶，而彼痴人于海水内便取命终。善男子，如是如是其初行菩萨等，发心欲入大乘之海，而彼痴人因嫉妒故毁谤妄语，以是因缘，彼等痴人破信行船，破信行已灭智命根。善男子，其初行菩萨如是愚痴无智少闻，以嫉妒因缘，妄语毁他遂犯大罪。善男子，是名初发心菩萨第五犯大重罪。

“复次，善男子，有当来世初行菩萨，或复俗人、出家人等，所有甚深空相法门微妙经典——以诸陀罗尼、诸地、诸忍，以种种行等而庄严之，为诸大智诸菩萨等，作于勤求苦行境界——于大乘经或读或诵，或解说宣扬，为他敷演分别广宣，而语他言：‘我自然解如是经典，自然证知，自然明了。唯我一人为汝等故慈悲演说。汝从我闻已，如是思惟，如是读诵，如是甚深法中自然晓了，汝以是因缘当得知见如我今者。’而不肯言：‘我读我诵如是甚深微妙经典，为汝说也。’如是之人，从其四辈求利养故自卖其身；以是因缘，一切三世多陀阿伽度阿罗诃三藐三佛陀，及大菩萨摩訶萨，一切诸圣富伽罗所，彼诸痴人得波罗夷罪，犯彼大重，虚妄诳惑一切天人。如是痴人亦复无有大乘之分，况入大乘耶？况得胜处？况复当得成就阿耨多罗三藐三菩提耶？譬如有人欲行远路，至于旷野以饥渴所逼，忽值果林便入彼处，求食因缘欲活命故。而彼之人，忽遇大树花果充足香美成就，遇已得味，得是味已更上毒树而服毒果，服已命终。善男子，如是如是愚痴人辈，今已获得人身值善知识，依倚知识入于大乘。彼等众生求利养故，好自称誉毁谤他人，得如是等犯大重罪；犯重罪已，为诸智人之所轻慢，当堕恶道。以是因缘，一切刹利、婆罗门、毗舍、首陀不得亲近。若有诸人亲近彼者，如是人辈即违一切大智圣人，成大过罪。善男子，是名初行菩萨犯于第六大重罪也。

“复次，善男子，当来之世或有刹利诸国王等，为诸恶行婆罗门国师、恶行大臣、恶行医师等——实是愚痴，谓己大智有大才能，多受封禄——而彼人等，修诸施行造众福业。彼诸人辈，因少布施修行义故，懦弱放逸谓己有道，劝刹利王共我弟子诸沙门等互相诤竞更相破坏，或劝沙门共刹利王更相斗争。彼恶人辈依刹利王，与比丘罪或税财物。彼诸比丘以刹利王、诸大臣等逼迫因缘故，或输己物，或输僧物，或输招提僧物，以是诸物输税供官与彼恶人。而彼恶人从诸比丘取是诸物奉刹利王，彼等二人悉皆犯于大重罪也。彼诸刹利及恶人

等，共诸比丘互相斗争，以是因缘，舍彼正法建立非法，取彼非法远离正法，舍依大乘所说经典毗尼戒律、忧波提舍、摩诃忧波提舍，远离慈悲般若波罗蜜善巧方便及余经典戒律之行，如来说莫不弃舍，为欲扰乱诸比丘故，虚心横违佛戒律自造法制，造法制已扰乱比丘，令诸比丘皆悉远离奢摩他观正行正念，乃至使于禅定之者皆生忿恚扰乱之心常恒斗争，以是因缘，令诸比丘生诸烦恼不得寂定。

“尔时，彼等诸比丘辈，失正信法，失善比丘威仪法式，令堕诸见，以是因缘，令诸比丘皆悉懈怠多事世念，不能持戒，破戒舍戒，不复能依沙门法则，口言我是沙门比丘，虽复唱言我是梵行，举动声气犹如贝声，不依正法而说于法。如是之等诸比丘辈及诸眷属，于刹利王所并诸臣民，以输物故，增倍供养。如是等辈诸恶比丘，于俗人前说诸有德阿兰若等空闲比丘不善之事，令彼刹利、诸恶臣等并诸眷属，遂于精进持戒比丘生不善心、诽谤之心，于精进比丘所有资财皆悉夺取，夺已转施诵经比丘。彼等二人悉犯重罪。何以故？其禅定比丘真实福田，如是观已应令修业，不令彼等知彼僧务。而禅定比丘，当得三昧诸陀罗尼、诸忍地等，当作法器，真是福田，真实福器，为世间眼，为彼世间作大光明显示善路，为建业地于烦恼田，教彼众生皆令得度，度已建立涅槃之道。善男子，是名初行菩萨有八种重罪而不用功舍离二处。彼初行菩萨犯大重罪因缘力故，所有往昔作诸善根皆悉忘失，忘失已后堕于恶道，违于本誓，被烦恼降失天人乐，虚妄迷惑失菩提心。

“善男子，为如是等诸善男子故，此虚空孕菩萨生彼国中，为彼众生示现身相，或作比丘身威仪庠序，或作婆罗门身显现威仪具足成就，乃至应以畜生而得化者，即现畜生威仪之相。略说乃至如首楞严三昧所说，当知是处亦复如是，巧知根机种种心器随应现身，于彼众生随顺说法，教彼种种未曾有法，于一切智之所宣说微妙经典、诸陀罗尼、诸忍地等普为显现，令彼诸恶犯重罪者初行菩萨教生惭愧，令其怖惧悔没之心，忏彼重罪，远离弃舍永不敢作。

“善男子，彼等众生以犯重罪恐怖因缘，闻是虚空孕菩萨名号欲自见身者，畏堕恶道悔彼罪故，是诸众生应当顶礼虚空孕菩萨摩诃萨足，复应至心称其名号。时彼虚空孕菩萨摩诃萨，随其根业以菩萨身相即在现前，应以比丘身得度者即现比丘身相，应以婆罗门身度者即现婆罗门身相，应以童男童女身度者即现童男童女身相，观彼初行菩萨如所犯重即现如是，如是方便教令忏悔，于甚深法无上乘中显示善巧方便之行，若正地、若非正地、若诸三昧、若诸陀罗尼、若诸忍中示现教行，乃至次第教令建立八正道处。以虚空孕菩萨力故，彼等众生得脱一切诸恶道苦，脱恶道已建立置于不退转地，后得建立必得阿耨多罗三藐三菩提。善男子，如是如是彼菩萨等，于六波罗蜜行中，大力精勤犹如电光，速得成就阿耨多罗三藐三菩提道。

“善男子，若虚空孕菩萨摩诃萨，于犯重罪菩萨前不现身相者，

其犯重罪初行菩萨知自罪失故，欲请虚空孕菩萨，于后夜时以香汤洗浴，著净衣裳，胡跪合掌，向于东面烧沉水香，至心劝请东方黄白阿楼那天子，应作是言：‘阿楼那，阿楼那，汝有大慈悲，有大功德！汝初出东方普照阎浮提，以慈悲故愿覆护我，为我速疾劝请虚空孕菩萨具大悲者，令彼菩萨特为我故，于睡眠中显示巧便；以巧方便故，教我忏悔所犯重罪，于大圣大乘中速得智眼。’作是语已，彼重罪初行菩萨，还入室中寝卧睡息。尔时，东方黄白阿楼那阎浮提显现之时，彼虚空孕菩萨，即随后来作菩萨身，在彼初行菩萨目前，于睡梦中现巧方便，教犯罪者忏悔恶业，于初行菩萨前作如是等方便知见；作是方便已，其初行菩萨即时得一二三昧，名不忘失菩提，于大乘中得决定住不可退动，速得成就六波罗蜜，不久当证阿耨多罗三藐三菩提。善男子，此虚空孕菩萨，最大勤劳办最胜事，成就胜妙如意摩尼微妙宝珠，贯在其顶奇特显现。善男子，此虚空孕菩萨，有如是等无量无边不可思议功德之聚。

“复次，善男子，若有众生闻是虚空孕菩萨名者，或作形像以种种供具供是菩萨，尊重恭敬礼拜赞叹，以种种香花、花鬘、涂香、末香、烧香，以种种幡盖宝幢供养于彼；供养是已，复更供养尊重恭敬，将自身命付彼菩萨。彼等众生以是菩萨威神力故，火不能烧，水不能溺，杖不能伤，一切国土所不能害，于一切处人与非人，毕竟不能夺其精气，唯除命尽。设有重病不得久停，不为饥逼而取命终，不为县官横所触烧，不犯重罪，乃至命尽之时，眼不睹色，耳不闻声，鼻不闻香，舌不得味，身不得触，唯有微细气息身中暖气，及微细识犹在未离，当是时间，虚空孕菩萨为彼众生示现己身。若有众生在世之时信婆罗门者，是善男子于最后识欲离身时，作婆罗门身于前显现令生欢欣。若有众生先事魔王者，后命尽时，是虚空孕菩萨现魔王身；乃至在世事那罗延天者，若自在天、若帝释天、若转轮圣王、若日月天、若提头赖吒天、若毗楼勒叉天、毗楼博叉天、若毗沙门天，乃至世间种种山神、树神、河神、泉井之神，如是众生，随其所有归依之者，是虚空孕菩萨还作如是如是身相，临命终时在彼众前显现身相，随彼众生所有心愿，皆现与之于前现身，现彼身已作如是言：

“‘若人以智慧，能见四谛者，
是人烦恼中，即能度彼岸。’

“彼诸众生，以意识知见此法已，得生善处。若有众生应以佛身化者，即现佛身，在众生前说如是言：

“‘若于佛智底，能度烦恼海，
即速证智慧，诸苦得解脱。’

“尔时，彼诸众生以念佛故，以闻佛音故，心生欢欣，命终已后，舍五浊世即生净土，值遇诸佛听受正法，乃至略说法僧亦尔。

“善男子，此虚空孕菩萨，得如是等不可思议功德之法。善男子，若复有人，于自心中欲取种种三昧得大自在。彼等众生，于后夜时应从卧起，以香汤澡浴烧沉水香，随力随分以种种供具供养虚空孕菩萨，顶礼足下；供养礼拜已，于一切众生边，当生慈心作如是言：‘虚空孕菩萨得大慈悲门，已得智慧，速念我，速念我！愿常与我正念三昧方便！’即诵咒曰：

“多地他(一) 嚧慕(二) 嚧那弃(三) 博叉尼隶(四) 萨慕达嚧多隶(五) 多那耶那耶(六) 摩诃迦流尼迦(七) 阿奴波阇婆三勿利帝(八) 阿迦罗阇婆三勿利帝(九) 拔折嚧阇婆三勿利帝(十) 胡卢舍三勿利帝(十一) 阿那摩三勿利帝(十二) 蒲多俱致三勿利帝(十三) 莎呵(十四)。

“诵此咒已，彼菩萨威神力故，即得正念入诸三昧门。若复有人，欲诵种种经论，或诸佛所说，或声闻所说。彼人于后夜时，于东方处黄白现时，以香汤澡浴著净衣裳，东面胡跪烧沉水香，随力所办供养顶礼虚空孕菩萨，于一切众生所生慈悲心，作如是言：‘虚空孕菩萨，善男子已得一切众生边不思议慈悲之心，以大智慧念我念我！汝是菩萨最胜富伽罗，与我正念诸胜三昧方便巧妙深大智慧。’即诵咒曰：

“多地他(一) 尼罗涉鞞(二) 钳菴沙涉鞞(三) 耶婆那涉鞞(四) 博察萨迷(五) 波吒罗阇驶(六) 萨他那苏嚧鞞(七) 贯萨多罗羯嚧泥(八) 户摩户摩(九) 摩诃迦流尼迦(十) 莎呵(十一)。

“善男子，乃至若有众生，欲入大海采诸珍宝，或复心欲入于地下阿修罗宫，或复欲得服定年药，或复被禁牢狱系闭，或恩爱别离，或有怨憎交会而不能离，若在火难，若在水难，若刀杖难，若蛊毒难，若被咒咀言说，若被师子虎狼之难，若被蟒蛇蝮蝎之难，若被盗贼，或被幻惑之难，或被一切恐怖之难；若有众生，桎械枷锁禁系之难，若被县官所录，若被刑流将断命根，或有长病困笃著床疫病所逼恐怖畏死，若乏衣食、卧具、汤药、资财之物。彼等众生，于后夜间黄白出时，香汤澡浴著净衣裳，顶礼虚空孕菩萨，胡跪合掌以面向东，随力随分所办供具供彼菩萨，为诸众生发慈悲心，口唱是言：‘虚空孕具大慈悲，为诸众生常作利益，念我念我，以慈悲心愿观我心，愿解脱我，如前所说之难。’应说偈言：

“我之无福相，愿与我功德，
我今贫贱苦，今应与我愿。

虚空孕菩萨，是我归依处，
如于此世中，未来与我乐。’

“尔时，虚空孕菩萨摩訶萨，闻彼众生音声之辞，或复现本菩萨之身，乃至或现童男童女身，在于彼前慰喻彼言，护诸怖难，所有恐怖皆悉除灭；乃至略说，有诸贫穷孤露众生，或无资财活命之者，观彼心意令满彼愿乃至所须一切施与。善男子，若有王子欲得灌顶之位，欲得称职，彼诸王子，应当供养彼大菩萨称其名号，随力随分供养彼虚空孕菩萨；乃至如是等欲得婆罗门位，欲得大富长者位，欲得大居士位，欲学诸伎术，欲证内法，欲得咒术，欲学工巧，欲闻一颂，欲望解脱，彼诸众生闻是虚空孕名字，于后夜间黄白现时，以香汤洗浴著净衣裳，以面向东胡跪合掌，顶礼虚空孕菩萨，归依彼已，合掌劝请，作如是言：‘虚空孕具大慈悲，我既薄福与我福相，满我心愿。’应当说于如是偈言：

“我心所求者，勿令乏少耳，
愿发怜愍心，慈悲称我愿。’

“尔时，虚空孕菩萨，以净天耳过于人耳，闻彼众生此音声已，为彼众生或现自身在众生前，观察众生心心所行，随堪可与，如是如是，为彼众生示现方便。善男子，是虚空孕菩萨，得如是方便功能具足入大智海。此虚空孕菩萨摩訶萨，有如是等不思議事。

“善男子，若复有人，于四大海水滴滴数之能知多少，此虚空孕菩萨摩訶萨善巧胜智方便，教化诸众生等现作方便不可数知。善男子，假使有人十方虚空可现不可现处可知边际多少，此虚空孕菩萨摩訶萨善巧方便教化众生不可得知边际之数。为诸众生作巧方便，变化自身而为显现，或作佛身而化众生，或作婆罗门身教化众生，乃至随所应现种种身相得受化者，即现彼身而不分别，应以畜生身而受化者即现畜生，应以地狱身而受化者即现地狱身，有诸众生在于现前化身显现，有诸众生应以睡梦现身益者于睡梦中即为现身。有诸众生临至命终唯有细识，欲灭众罪令断恶道欲将善道，为彼众生化种种身，是诸众生存存之日归依何天，应见彼天即得安乐者，乃至应将善处，即现彼天令其欢欣。善男子，是故此虚空孕菩萨，无人能知教化身数边际之量。善男子，是虚空孕菩萨，得如是等不可思议方便胜智功能具足殊妙之法。此虚空孕菩萨摩訶萨，已入诸佛功德之海。善男子，是故虚空孕菩萨摩訶萨，头戴显现摩尼应宝。”

尔时，一切大众在会中者，从佛所闻赞叹虚空孕菩萨已，于虚空孕菩萨即生希有殊特之心，生极尊重恭敬之心，皆悉合掌瞻仰而住持种种香花、末香、涂香、幡盖宝幢、杂色衣服、杂宝瓔珞，歌颂赞叹种种音乐，供养虚空孕菩萨。时，虚空孕菩萨摩訶萨，持前供具供奉

世尊；奉世尊已，在世尊前长跪合掌，而白佛言：“世尊，云何于五浊之世被大黑闇无明所覆诸众生内，能作佛事？”

佛言：“善男子，譬如虚空不缚不解无见无迷，而虚空体本性清净。而虚空内，因风动现尘雾烟云，故名虚空为不净耳！因水雨故离彼尘等诸障碍法，即得显现日月星宿，便知刻漏罗婆时节、昼夜长短、半月满月、年岁度数。如是，如是，善男子，如来一切诸法真如，随于虚空心之本相本性清净，但诸众生以客尘烦恼心意成浊，为彼等故，如来以慈悲等法门雨慈悲雨，被烦恼所浊诸众生辈，即得清净无有诸垢。而彼众生心得清净，即见佛日出现于世，得智光明润已，于不思议诸佛功德之内，自得晓了，建立彼于胜四念处及圣道中，乃至建立十八不共法大慈大悲真实法中，是故有诸阿罗汉、辟支佛等、诸菩萨辈出现于世。善男子，于汝意云何？虚空之性能住于眼不？”

答言：“不也，世尊。”

佛言：“眼能住于识不？”

答言：“不也，世尊。”

佛言：“眼住触不？”

答言：“不也，世尊。”

佛言：“眼内因触所生三种之受，于是之中虚空住不？”

答言：“不也，世尊。”

佛言：“略说乃至耳鼻舌身亦复应当作如是观。善男子，于汝意云何？意住空界不？”

答言：“不也，世尊。”

“乃至意中虚空住不？因是法中诸佛如来应正遍知出现于世不？”

答言：“不也，世尊。”

佛言：“善男子，诸众生等依住虚空不？”

答言：“不也，世尊。”

佛言：“善男子，于意云何？虚空之性依众生住不？”

佛作是语已，虚空孕菩萨摩訶萨白佛言：“世尊，各各不相倚住，于自境界各不相侵。世尊，一切诸法无有境界，空故无染，一如实际，一如如如，应作是知。世尊，譬如虚空，不可破坏，不可分别，不作分别，不动无碍，无芽无子无果，无名无字，无思无念。如是，如是，世尊，一切法相如是知己，菩萨摩訶萨于一切法中得无生忍。”

尔时，世尊而说咒曰：

“多地他(一) 缚婆何啰闍(二) 末奴叉夜(三) 祇那闍耶(四) 闍那膩莫(五) 牟尼呵啰(六) 阿那也(七) 破罗漂颇(八) 伽罗婆膩莫(九) 阿你捺也(十) 阿婆舍舍婆(十一) 舍那舍莫(十二) 那舍哆多(十三) 迦罗莫舍莫(十四) 吉唎摩妒毗沙莫(十五) 支多那也(十

六) 鸡梨奢都(十七) 三舒沙腻(十八) 莎呵(十九)”

佛言：“善哉！善哉！善男子，汝能于如是眼降伏胜师子安庠步水频申吼陀罗尼，为诸众生命终之时，最后出息命欲过时，能灭烦恼障、业障、法障，灭是障已令生清净刹中。善男子，汝能行无量无边诸佛世界为诸众生起慈悲心，至于村落、城邑、府省、县官、宫殿及诸国土，至是处已，现种种形、种种威仪，说大乘经典教化众生，于刹利恶行乃至沙门恶行所，断于种种不善之法，安置一切诸善法中。”

尔时，世尊说是法时，于大众中无量无边诸天世人得种种三昧陀罗尼诸忍，或复有得十地法中真实智慧，十千人等于无生法中得无生忍。若有众生执著虚空是有为者，得此灯光明已，有为施根皆悉断灭，无为施行速现成就。

佛说经已，于大众中，诸比丘等及天、龙、夜叉、乾闥婆、阿修罗、迦楼罗、紧陀罗、摩睺罗伽、梵、释、护世四大天王，闻佛所说此妙经典，一切皆悉欢欣奉行。

虚空藏菩萨经

如是我闻：一时，佛住佉罗底翅山，依牟尼仙所住之处，与无量大比丘众。复与无量无边阿僧祇恒河沙数菩萨摩訶萨俱，皆从他方异佛刹来。尔时，世尊欲为大众说四辩才三明梵行住破恶业障陀罗尼经。

尔时，西方过八十恒河沙世界有一佛刹，名一切香集依，其中众生成就五浊。彼国有佛，名胜华敷藏如来、应、正遍知、明行足、善逝、世间解、无上士、调御丈夫、天人师、佛世尊，彼佛今正为诸大众转妙法轮。彼有菩萨摩訶萨，名虚空藏，已从彼佛闻深妙法得诸禅定。时，彼菩萨见于他方无量无边阿僧祇数诸大菩萨，身升虚空往诣东方，又复遥见东方世界有大光明，即便往诣胜华敷藏佛所，头面礼足绕百千匝，胡跪合掌而白佛言：“世尊，我见他方无量无边阿僧祇数诸大菩萨，身升虚空往诣东方，又复遥见东方世界有大光明。以何因缘而有斯事？唯愿为我具解说之。”

时，胜华敷藏佛告虚空藏菩萨言：“善男子，东方去此过八十恒河沙世界，有一佛刹名曰娑婆，其中众生成就五浊。彼国有佛，名释迦牟尼如来、应、正遍知、明行足、善逝、世间解、无上士、调御丈夫、天人师、佛世尊。今者在于佉罗底翅山，依牟尼仙所住之处，为令法流不断绝故，为令三宝常住世故，为降诸魔建法幢故，为闭生死开般涅槃故，为诸菩萨及以声闻诸来大众欲说四辩才三明梵行住破恶业障陀罗尼经故，欲令十方诸佛刹土一切菩萨，从欢喜地乃至补处，住不共法不随他信，善于方便具无碍辩，如此大士悉云集故，是以彼佛放斯光明。其诸菩萨见此光已，乘虚而往至彼恶世，为诸众生说破恶业障陀罗尼。彼佛国土亦具五浊，与此世界等无有异。汝今应往娑婆世界，礼拜供养听受正法，并为彼国诸恶众生，说破恶业障陀罗尼。”

时，虚空藏菩萨摩訶萨，闻佛语已欢喜踊跃，与八十亿菩萨同时发声而白佛言：“世尊，我今渴仰欲见彼佛！今当承佛威神诣娑婆世界释迦牟尼佛所，礼觐供养听受正法，亦为彼国诸恶众生，说破恶业障陀罗尼。”时，胜华敷藏佛答虚空藏菩萨摩訶萨言：“善哉！善哉！汝自知时。”时，虚空藏菩萨摩訶萨即与八十亿菩萨俱顶礼佛足，身升虚空诣娑婆世界。

尔时，西方有如意宝珠光现，以无量释迦毗楞伽宝而为围绕。其珠光明，蔽于一切人天八部、声闻、菩萨，日月星辰、地水火风界所有光明皆不复现。时会大众，唯睹佛光及以珠光无量无边不可思议不可言说，无复余色唯见虚空。尔时，如来光相照耀。时会大众各自

见，亦不见他，一切诸色悉灭无余不与眼对，不得自身色相形貌，及于所触无彼无此亦无中间，随所视方皆悉如是，亦复不见日月星宿、地界、水界、火界、风界，悉皆无有与眼对者，耳不闻声，鼻不嗅香，舌不知味，身不觉触，诸心数法亦无所缘，于我我所无复起相，亦无六入分别之想，不得诸大诸来大众，唯见佛光及以珠光。其珠纯以无量释迦毗楞伽宝而为围绕。

于其会中诸大菩萨，位登十住、得首楞严三昧及一生补处者，见此相已，身心安隐不惊不怖。所以者何？缘解法相自性真实，及以于如第一义空故。其余菩萨及声闻众，天、龙、夜叉、乾闥婆、阿修罗、迦楼罗、紧那罗、摩睺罗伽、鸠槃荼、饿鬼、毗舍遮、富单那、迦吒富单那、人非人等，见此相已，惊怖迷闷，其心扰乱，各不相见亦无问处，心自思惟：“不知何缘有此异相？亦复不知是谁神力？”

尔时，众中有一菩萨摩訶萨，名曰梵顶，稽首佛足，长跪合掌而说偈言：

“一切法自性，众生无知者，
系著于色阴，六情所愚惑，
不见于一阴，推寻求色阴，
于佛法生疑，今会有此人。
愿说决定法，为断诸疑网，
使知彼此岸，逮得虚空忍，
勇健入三昧，身相不可说，
如意大宝珠，常在其顶上。
释迦毗楞伽，而以围绕之，
此会诸大士，位皆十地者，
得首楞严定，及一生补处，
斯等诸菩萨，悉皆遥见之。
睹此瑞相已，必知胜士来，
礼觐无上尊，因说深妙法，
安慰怖众生，归依天人师，
勇猛所行处，教化熟众生。”

尔时，世尊而说偈言：

“善哉如汝说，定者所行处，
身相不可见，修慧能推求。
此是虚空藏，常所行止处，
无依无戏论，三昧力示现。
众生著二见，常为所迷惑，
以彼迷惑故，不知彼此岸。”

欲离于二见，修不可说行，
速疾得究竟，满足于诸地。

“复次，善男子，初发心菩萨摩訶萨，初可说相及攀缘相修六波罗蜜，乃至知于地水火风虚空及识，生灭之相、如实之性；复知诸法不可言说，无有自性，无生无灭，无有攀缘，不动不摇，空无所有。一切诸法如是修行，离断常见不生怖畏，于一切法不起触想，心无攀缘空无所有。如是修行速疾具足六波罗蜜，更不复住断常见中。”当于如来说此语时，一切大众见闻觉知，如本色像而于境界不取其相。

尔时，世尊即申右手指于西方，而作此言：“如斯光瑞，是虚空藏菩萨摩訶萨欲来之相。是菩萨具诸三昧犹如大海，住菩萨戒如须弥山，忍辱之心犹如金刚，精进勇猛犹如疾风，智如虚空，慧如恒沙，诸菩萨中如大胜幢，向般涅槃之大导师，善根之地，是贫穷者吉祥之瓶，入闇者日，失道者月，是怖畏者所归依处，烦恼焦热甘露之水，善根者杖，般涅槃桥，生天者梯，度生死船，由旷路乘，诽谤恶口热恼者盖，降诸外道犹如师子，能净诸见犹如雨水，破烦恼怨犹如霹雳，毁戒者药，生善根芽犹若春泽，庄严菩萨犹如华鬘，显善恶行犹如明镜，无惭愧者上妙衣服，三苦病者之大良医，是热渴者明月之珠，疲极者床，具诸三昧犹如日珠，趣菩提路大牛之车，游禅定者清凉华池，助菩提鬘波罗蜜果，是十地中如意摩尼，是求首楞严者波利质多罗树，伐恶见刀，断烦恼习犹如金刚，降伏诸魔生诸功德智慧宝藏，依于一切诸佛功德，是诸缘觉所依窟宅，是声闻眼、生天者眼，行邪道者正直之路，是畜生归、饿鬼之怙，是地狱救，一切众生无上福田，三世诸佛第一辅臣；能护法城，已具庄严十八不共诸佛秘藏，满足成就佛之智慧，一切人天所应供养，唯除如来余无及者。汝等大众，皆应深心恭敬奉迎虚空藏菩萨摩訶萨，随力所能，应以妙宝、幢幡伞盖、华香璎珞、末香涂香、衣服卧具、歌呗赞叹、平治道路种种庄严尊重供养。汝等大众，皆亦应成如是功德器。”

尔时，大众有从座起向虚空藏菩萨所现瑞方，踊跃欢喜颜貌怡悦，端目专注俱共奉迎。余菩萨摩訶萨及大声闻，天主、龙主、夜叉主、乾闥婆主、阿修罗主、迦楼罗主、紧那罗主、摩睺罗伽主、五通仙人主，各作是念：“我等当办何等最上最妙供具，而以供养彼大士耶？”

尔时，虚空藏菩萨摩訶萨，即以神力变娑婆世界，除众秽恶及诸丘山、瓦砾荆棘、坑坎堆阜、旷野险隘，风尘云雾皆悉澄霁，七宝为地平坦如掌，无量众宝以为林树，枝叶花果皆以宝成，名华软草亦复如是，香气芬烈普熏世界。娑婆界中一切众生无诸苦患，盲聋喑哑癱残百疾一时除愈，其怨恶者咸生慈心，地狱、饿鬼诸楚痛声皆悉休息，饮食衣服庄严之具自然丰足。其诸众生妙色端正，支节具足威德第一，除诸结使，心得寂静，于诸善根深生欣乐，以清净信安住三

宝。一切大众两手皆有如意摩尼，于其珠内出大光明遍照世界，并奏天乐，雨种种宝杂色宝衣，又雨种种妙庄严具，宝鬘、宝盖、种种宝器、种种天衣、金锁瓔珞、真珠瓔珞，青红赤白杂色莲华，雨沉水香、牛头栴檀遍满世界。其路两边有七宝台如帝释殿。又其台中嫫女盈满，颜貌端严犹如魔后，作天伎乐出五音声。又于佛上有天七宝，大梵王盖悬处虚空，供养如来。其盖方圆百千踰闍那，复以宝网罗覆其上，真珠毵带垂饰四面。盖中演出种种乐音，清妙和雅超绝人天。一切大地草木丛林、华果枝叶皆出妙声，宣畅大乘六波罗蜜诸地行法，闻其声者于无上道皆不退转，亦有逮得无生忍者。

尔时，大众见虚空藏菩萨摩诃萨神变奇特，心生欢喜叹未曾有，各作是念：“此菩萨摩诃萨，既现如斯大神通力，不久必来至此世界，我等今者当设何座以供待之？”

当于众会作此念时，即于佛前有宝莲华从地踊出，白银为茎，黄金为叶，金刚为台，琉璃为实，码碯为须，梵色宝珠以为须本，颇梨为蕊。其华纵广百踰闍那，有八十亿诸宝莲华，周匝围绕。尔时，虚空藏菩萨忽然在彼宝莲华上，结跏趺坐。又见顶上如意宝珠，以无量释迦毗楞伽宝而为围绕。其八十亿菩萨，各各坐余宝莲华上。

尔时，弥勒菩萨摩诃萨即便说偈，问药王菩萨摩诃萨言：

“我自从昔来，见诸菩萨众，
有来觐世尊，先围绕恭敬，
头面接足礼，然后退就坐。
云何此大士，现斯神通力，
不修菩萨仪，而坐宝莲华？”

尔时，药王菩萨摩诃萨以偈答曰：

“此大智慧士，善住深妙法，
不依妄想心，而来见世尊。”

尔时，弥勒菩萨摩诃萨复以偈问：

“若不见众生，及以诸法相，
其心常安住，诸法真实际，
云何而示现，自在神通力？
唯愿为演说，除我此疑惑。”

尔时，药王菩萨摩诃萨复以偈答：

“今此大士夫，勇健入方便，
为熟众生故，现此神通力。”

若不住实际，愚惑诸凡夫，
明智开俗谛，为入真谛故。”

尔时，世尊告药王菩萨摩訶萨：“善哉！善哉！善男子，如汝所说。一切凡夫众生，不能思量一须陀洹解脱行处；一切众生得须陀洹，不能思量一斯陀含解脱行处；一切众生得斯陀含，不能思量一阿那含解脱行处；一切众生得阿那含，不能思量一阿罗汉解脱行处；一切众生得阿罗汉，不能思量一辟支佛解脱行处；一切众生成辟支佛，不能思量一与般若波罗蜜相应菩萨摩訶萨方便行处成熟众生；一切众生得般若波罗蜜相应菩萨摩訶萨方便行处成熟众生，不能测量乃至得无生法忍菩萨摩訶萨举足下足方便行处及解第一义谛成熟众生；一切众生得无生法忍菩萨摩訶萨方便行处及解第一义谛成熟众生，不能测量得四辩才菩萨摩訶萨举足下足方便行处及解第一义谛成就众生；一切众生得四辩才菩萨摩訶萨方便行处及解第一义谛成熟众生，不能测量住般若波罗蜜究竟首楞严三昧菩萨摩訶萨举足下足方便行处及解第一义谛成熟众生。

“善男子，是虚空藏菩萨摩訶萨，已无量劫得无生忍具无碍辩，究竟满足首楞严定，住最上地决定坚固终无倾动，善知众生深心所行，应睹神变庄严之事。又复应见虚空藏菩萨摩訶萨欲来瑞相，又有见虚空藏菩萨摩訶萨得离欲地住地入地故，示入无边空处三昧，于西方没而来现此，时诸众生怖畏惑乱，入于俗谛现大庄严，为欲成熟诸众生故。

“又善男子，是虚空藏菩萨摩訶萨，若现第一义谛无生庄严，诸天及人乃至八地菩萨，皆当迷闷无能见其境界行相，善入如是深妙功德。善男子，虚空藏菩萨摩訶萨，巧方便慧深入一切诸佛法海，离诸疑惑不依他故，智慧善巧，于诸菩萨摩訶萨中最上幢王。

“善男子，虚空藏菩萨，是一切众生生天般涅槃大明导主，能断一切烦恼心患，善治身毒及四大病。若有众生起恶邪见，轮回迷没生死旷野，无善方便不知生天般涅槃路。若有众生称虚空藏菩萨摩訶萨名，至心归命，烧坚黑沉水及多伽罗香，恭敬礼拜时。虚空藏菩萨观此众生心心善根，若见众生诸见烦恼之所惑乱，若见过去善根种子心所行业，于佛法僧布施、持戒、忍辱、精进、禅定、智慧，及余功德随所堪能。时虚空藏菩萨摩訶萨，观彼众生随所应见，于其梦中现种种形，即以方便而为说法。

“善男子，若有众生应于寤觉见虚空藏菩萨摩訶萨，即于目前见种种形，即以方便开正直道，破诸众生恶业邪见、恶愿、恶归、恶处、恶取，如是计著悉令解脱，身口意业无诸邪曲，趣正直道、正业、正见、正愿、正归、正处、正取，常获亲近诸善知识，速疾舍离臭结烦恼，永免三塗八难之苦，常行善业得自在力，乃至渐渐入深法忍。若诸众生种种身病，及心狂乱、聋盲暗哑、手足拘躄、诸根不

具，称虚空藏菩萨摩訶萨名，至心归命，烧坚黑沉水及多伽罗香，恭敬礼拜，或从乞药，或愿除愈。时虚空藏菩萨摩訶萨，即随其愿，或现梵天像，或现释提桓因像，或现毗沙门像，或现四天王像，或现焰摩天像，或现兜率陀天像，或现自在天像，或现大自在天像，或现婆罗门像，或现刹利像，或现长者像，或现居士像，或现大臣官属像，或现童男童女像，或现父母亲属像，或现执金刚像，或现天、龙、夜叉、乾闥婆、阿修罗、迦楼罗、紧那罗、摩睺罗伽、人非人像，现如是等种种诸像，在于梦者及寤者前为说病相，并为分别诸药对治：‘病状如此应服此药，若如是病宜服彼药。’诸众生等既闻说已，各随所应而合诸药。若自无者，菩萨悉与。是诸众生或有一服、二服、三服，众病皆愈，或有但见所现之身病即除者。

“如是，善男子，是虚空藏菩萨摩訶萨具大慈悲，若有众生贫困困苦欲求大富，欲多诵习，欲乐多闻，欲求解脱，欲求离欲，欲求禅定，欲求名称，欲得第一，欲求善巧，欲得自在，欲得端正，欲求好色，欲得妙声，欲求好香，欲得上味，欲求好触，欲得饮食，欲求勇健，欲得种姓高贵，欲愿生男，欲愿求女，欲得眷属，欲求福德，欲得成就六波罗蜜，欲得巧言，欲求覆护一切众生，欲得免脱一切牢狱，欲断一切诸恶律仪，有施心者愿建立之，乃至智慧亦复如是，欲得长寿，欲愿多财得已能用；欲令慳者能行布施，其毁禁者令坚持戒，若嗔恚者令修忍辱，其懈怠者使住精进，散乱心者教修禅定，其愚痴者令修智慧；不定乘者劝学声闻，著我众生教缘觉乘，若有众生离大慈悲自惜己身舍诸众生，愿离此心生大慈悲不自护身摄取众生，发阿耨多罗三藐三菩提心。善男子，时虚空藏菩萨摩訶萨，知彼心已即现方便，令此众生舍离先心起大慈悲，不护己身不舍众生，发菩提心住四梵行。若有众生乐大慈悲，欲求救济一切众生，欲愿安住阿耨多罗三藐三菩提，于阿练若处若在林中、若于露地，烧坚黑沉水多伽罗香，合掌恭敬向于十方，五体投地至心归命虚空藏菩萨摩訶萨，而便说此陀罗尼咒：

“阿蜜栗舍阿蜜栗舍 迦楼尼迦 遮罗遮罗毗(薄履切下同)遮罗珊(素干切)遮罗 迦楼尼迦罗母罗母 母楼(力斗切下同)鞞(步倪切下同)迦陀履摩目佉(去佐切)浮楼阁婆(步可切)奈迦楼尼迦真多摩尼富罗邪迦楼尼迦萨埵(都果切下同)舍迷(莫隶切)他跋夜 阿若(而夜切)陀梨跢(怖得切下同)铃(巨耽切下同)跢铃罗底(都履切下同)毗鞞迦铃台(徒履切)栗致毗鞞迦铃 迦楼尼迦 否(方久切)梨夜斗磨磨(武佐切)阿奢(始迦切)萨埵跋履 波迦夜阿输迦(居佐切)伽(巨左切)底 娑婆呵。

“善男子，是虚空藏菩萨摩訶萨，或现天像，或示人像，或獐鹿像，或为鸟像，或不现形，随彼所应以诸方便而为说法，化度无量那由他百千众生，令住声闻乘、辟支佛乘及住大乘；又于少时建立众

生，住于大乘得阿鞞跋致，乃至令得诸深三昧及陀罗尼满足十地者。善男子，是虚空藏菩萨摩訶萨，具大慈悲。若人思量乃可能知虚空边际，无能测量虚空藏菩萨摩訶萨，智慧方便大慈大悲，及三昧力成熟众生之边际者。善男子，是虚空藏菩萨摩訶萨，成就如是不可思议功德智慧。善男子，若有众生心无谄曲，亦不幻伪其心纯至，顺入正流所见真实，不讥彼阙不自矜高，不卑他人离诸嫉妒，不自显异矫惑众人，心本具足。善男子，是虚空藏菩萨摩訶萨，怜愍此等诸众生故，以方便智勇猛精进修善方便，除灭此等诸众生罪，令发阿耨多罗三藐三菩提心，一切善根皆悉回向无上菩提得不退转，获大势力及精进力，为欲满足六波罗蜜故，常勤修习大慈大悲，乃至究竟得阿耨多罗三藐三菩提。善男子，是虚空藏菩萨摩訶萨，成就如是不可思议功德，勇猛成就一切众生。”

尔时，弥勒菩萨摩訶萨即从座起，顶礼佛足，而白佛言：“世尊，虚空藏菩萨摩訶萨，以何因缘，独其顶上有此殊妙如意宝珠，以无量释迦毗楞伽宝而为围绕，光明显曜蔽于众色，不与诸余菩萨摩訶萨等？”

尔时，世尊告弥勒菩萨摩訶萨言：“是虚空藏菩萨摩訶萨，具大慈悲，能拔众生危厄险难。若有众生犯根本罪应堕恶趣，一切善根皆已烧然；虚空藏菩萨摩訶萨，是大无明邪见黑暗清净朗日，是灭根本罪者之大良师，能拔疑箭，破善法器能令完全。善男子，若有众生犯波罗夷，断善根栽趣向地狱，无所归依智者所弃，悉能济拔开示真路，能洒众生臭恶烦恼令离恶趣，是升人天解脱者梯。若有众生贪愚惑乱能令觉悟，嗔恚害心及以痴暗，谤无因果放逸不信不畏未来，贪求无厌极怀嫉妒，具十恶业日夜增长；如此众生，是虚空藏菩萨摩訶萨，能除如上诸重罪业，安处人天解脱之处犹如大车。善男子，是虚空藏菩萨摩訶萨，是诸天世人所应尊重奉迎供养。”

尔时，弥勒菩萨摩訶萨白佛言：“世尊，云何名为犯根本罪波罗夷耶？若有众生犯斯罪者，善根烧然堕于恶趣离安隐处，永失一切天人之乐。是虚空藏菩萨摩訶萨，能令此等诸恶众生，还得具足人天福乐。”

尔时，世尊告弥勒菩萨摩訶萨：“善男子，若灌顶刹利王有自在力，犯五根本罪，先所修习皆悉烧然，失安隐处远人天乐堕于恶趣。何等名为五根本罪？善男子，所谓灌顶刹利王，领国土有自在力，取兜婆物及四方僧物，或教人取，是则名犯初根本罪。复次，善男子，灌顶刹利王领国土有自在力，毁谤正法，舍声闻乘、辟支佛乘，舍无上乘，又制他人不令修学，是名第二犯根本罪。复次，善男子，灌顶刹利王领国土有自在力，若复有人以如来故，剃除须发身被法服，持戒毁戒、有戒无戒，脱其袈裟逼令还俗，或加杖捶，或复系缚，或截手足乃至断命，自作使他造如此恶，是名第三犯根本罪。复次，善男子，灌顶刹利王领国土，有自在力作五逆罪。何等为五？一者、杀

母，二者、害父，三者、杀阿罗汉，四者、破和合僧，五者、出佛身血。如是五无间罪若犯一者，是则名为犯根本罪，是名第四犯根本罪。复次，善男子，灌顶刹利王领国土有自在力，谤无因果不畏未来造十恶业道，亦教他人令行十恶，是名第五犯根本罪。善男子，是名灌顶刹利五根本罪。若犯一者，此则名为犯波罗夷，先所修习一切善根皆悉烧然，离安隐处失人天乐堕于恶趣。善男子，是虚空藏菩萨摩訶萨，为此人故起大慈悲现生边地，随所应见现种种形，或沙门像、婆罗门像，刹利、长者、居士等像，而为其说一切种智甚深大乘未曾有法诸陀罗尼及忍辱地，以如是等种种妙法而引导之。灌顶刹利既闻法已，心生惭愧极怀怖惧，向说法者发露忏悔，先所犯罪誓不更作，安住布施、持戒、忍辱、精进、禅定、智慧，勤修慈悲，生人天乐、般涅槃乐。

“复次，善男子，大臣亦有五根本罪犯波罗夷，若有犯者，先所修习一切善根皆悉烧然，堕于恶趣离安隐处，永失一切天人之乐。何等为五？谓彼大臣统理国土依倚王力，取兜婆物及四方僧物，或教人取，是则名犯初根本罪。复次，善男子，若彼大臣统理国土依倚王力，破坏村邑城郭国土，或教人破，是名第二犯根本罪。复次，善男子，若彼大臣统理国土依倚王力，毁谤正法，舍声闻乘、辟支佛乘，舍无上乘，亦制他人不令修学，是名第三犯根本罪。复次，善男子，若彼大臣统理国土依倚王力，若见有人以如来故，剃除须发身被法服，持戒毁戒、有戒无戒，脱其袈裟逼令还俗，或加杖捶，或复系缚，或截手足乃至断命，自作使他造如此恶，是名第四犯根本罪。复次，善男子，若彼大臣统理国土依倚王力作五逆罪。何等为五？一者、杀母，二者、害父，三者、杀阿罗汉，四者、破和合僧，五者、出佛身血。如是五无间罪若犯一者，是则名为犯根本罪，是名第五犯根本罪。善男子，是名大臣五根本罪。若犯一者，此则名为犯波罗夷，先所修习一切善根皆悉烧然，离安隐处失人天乐堕于恶趣。善男子，是虚空藏菩萨摩訶萨，为此人故起大慈悲现生边地，随所应见现种种形，或沙门像、婆罗门像，刹利、长者、居士等像，而为其说一切种智甚深大乘未曾有法诸陀罗尼及忍辱地，以如是等种种妙法而引导之。彼时大臣既闻法已，心生惭愧极怀怖惧，向说法者发露忏悔，先所犯罪誓不更作，安住布施、持戒、忍辱、精进、禅定、智慧，勤修慈悲，生人天乐、般涅槃乐。

“复次，善男子，声闻亦有五根本罪犯波罗夷，若有犯者，先所修习一切善根皆悉烧然，堕于恶趣离安隐处失人天乐。何等为五？谓杀生、偷盗、淫泆、妄语、出佛身血。善男子，是名声闻五根本罪。若犯一者，此则名为犯波罗夷，先所修习一切善根皆悉烧然，离安隐处失人天乐堕于恶趣。善男子，是虚空藏菩萨摩訶萨，为此人故起大慈悲现生边地，随所应见现种种形，或沙门像、婆罗门像，刹利、长者、居士等像，而为其说一切种智甚深大乘未曾有法诸陀罗尼及忍辱

地，以如是等种种妙法而引导之。时彼声闻既闻法已，心生惭愧极怀恐怖，向说法者发露忏悔，先所犯罪誓不更作，安住布施、持戒、忍辱、精进、禅定、智慧，勤修慈悲，生人天乐、般涅槃乐。

“复次，善男子，初发心菩萨趣向大乘，有八根本罪犯波罗夷，先所修习一切善根皆悉烧然，堕于恶趣离安隐处失人天乐，亦失大乘境界之乐，久在生死离善知识。何等为八？谓彼菩萨宿业因缘生五浊世，有余善根近善知识，归趣甚深大乘之法，发无上心智慧微浅。是初发心菩萨，又从他闻甚深空法读诵受持，复于少智愚痴人前读诵解说，余人闻已惊疑怖畏，于阿耨多罗三藐三菩提，心生退没乐声闻乘，是名初发心菩萨犯于第一根本重罪，先所修习一切善根皆悉烧然，堕于恶趣离安隐处，失人天乐及以大乘境界之乐，坏菩提心。是故菩萨，宜应先知众生善根及了彼心，随其所堪次第说法，如入大海渐渐至深。善男子，是虚空藏菩萨摩訶萨，随其所应以种种形现生其土，而为说法令生惭愧，于所犯罪发露忏悔，不堕恶趣增进善根，长养阿耨多罗三藐三菩提心。善男子，又有初发心菩萨犯根本罪畏堕恶趣，闻虚空藏菩萨摩訶萨名，至心愿见，欲发露忏悔所犯罪故，于初夜后分烧坚黑沉水及多伽罗香，至心合掌，称虚空藏菩萨摩訶萨名。善男子，时虚空藏菩萨摩訶萨，随其所应现种种形或现自身，或声闻身，或刹利身、婆罗门身，乃至童男童女等身，在彼犯罪初发心菩萨前，教令发露忏悔除罪，以善巧方便开示甚深无上正真大乘之行三昧总持忍辱之地，舍诸恶趣，得不退转阿耨多罗三藐三菩提心，精勤修行六波罗蜜，得力坚固犹如金刚，乃至自得阿耨多罗三藐三菩提。又善男子，虚空藏菩萨摩訶萨，若不现身在其人前教发露者，是初发心菩萨，应于后夜合掌至心而向东方，烧坚黑沉水及多伽罗香，请明星言：‘明星！明星！成大慈悲！汝今初出照阎浮提，大悲护我，可为我白虚空藏菩萨摩訶萨，愿于梦中示我方便，发露忏悔犯根本罪，令得大乘方便智眼。’善男子，彼初发心菩萨，即于梦中明相出时，虚空藏菩萨摩訶萨，随其所应而为现身，以诸方便，令彼初发心菩萨发露忏悔先所犯罪，示方便智令彼菩萨深怀惊怖，于阿耨多罗三藐三菩提心，得不忘三昧坚住大乘，疾得满足六波罗蜜，不久成就一切种智。

“复次，善男子，初发心菩萨语余人言：‘汝今不能乐于大乘，亦不能行六波罗蜜，终不能得阿耨多罗三藐三菩提，不如早发声闻、辟支佛心，速尽生死入般涅槃。’余如上说，是名初发心菩萨犯于第二根本重罪。

“复次，善男子，初发心菩萨语余人言：‘汝今何用受学波罗提木叉律仪，当速发阿耨多罗三藐三菩提心，受持读诵大乘经典，先所造作身口意业诸不善行，当得清净，不受未来诸恶果报。’余如上说，是名初发心菩萨犯于第三根本重罪。

“复次，善男子，初发心菩萨语余人言：‘汝今不应听受读诵声闻经典，汝当覆蔽声闻经典。声闻法中无大果报，不能断除结使烦恼。

汝当听受读诵清净大乘甚深经典，又能消除诸不善业，疾得阿耨多罗三藐三菩提。’作此说已有信受者，二人俱名犯根本罪。余如上说，是名初发心菩萨犯于第四根本重罪。

“复次，善男子，初发心菩萨欺妄两舌，希求名称利养恭敬，赞大乘经为他解说，而语人言：‘我是善解摩诃衍者。’为贪利故，见他解说大乘经典得供养者，憎毁轻疾而自贡高，虚诳妄语得过人法。作此行者离安隐处犯波罗夷，于大乘中为犯最重根本罪也。善男子，譬如有人欲趣宝洲乘船入海，而于中路自坏其船，没溺而死不自济命，岂能得宝？如初发心菩萨亦复如是，乘正信船入于大乘深广法海，始得入海自坏信船失智慧命。如是愚痴初发心菩萨，以嫉妒故虚诳妄语得过人法，而犯大乘重根本罪。余如上说，是名初发心菩萨犯于第五根本重罪。

“复次，善男子，未来世中，初发心菩萨语在家出家初发心菩萨言：‘修多罗中甚深空义，及以三昧诸陀罗尼忍辱之地种种庄严，是大明智诸菩萨等所可观行，受持读诵大乘经典，又能为他分别演说。我自解了，以慈悲故为汝等说。汝等亦当随所说行，于深妙法而得知见。’彼初发心菩萨不作是言‘我读诵思惟从他闻解’而言自得，皆是贪求利养因缘而自炫卖，违负三世诸佛菩萨及众贤圣，犯于大乘最深重罪，失人天路，尚不能得声闻、辟支佛乘，何由渐进到于大乘？善男子，譬如有人将导众人游行旷野，经过丛林极大饥渴，见彼林中有诸美果而弃舍之，取于毒果食已命终。善男子，彼人犹尚不能自济，况复兼能度于余人？彼初发心菩萨亦复如是，人身难得今已得之，遇善知识发大乘心，而贪利养轻自炫卖，犯重根本罪，违负三世诸佛菩萨，为诸贤圣之所弃舍，堕于恶趣。是故婆罗门、刹利、毗舍、首陀罗，不应亲近此恶菩萨，若亲近者亦皆得罪。余如上说，是名初发心菩萨犯于第六根本重罪。

“复次，善男子，未来恶世，初发心菩萨造作诸杂旃陀罗行，谓刹利旃陀罗、婆罗门旃陀罗、大臣旃陀罗、大将军旃陀罗、毗舍旃陀罗、首陀罗旃陀罗。何等名为旃陀罗义？彼谓造作诸恶心业，此恶比丘自言智慧，自恃财宝行于布施，放逸憍慢，嗔嫌憎嫉余善比丘共相斗争，恃王臣力，取善比丘物以奉大臣，大臣得已传以上王，佛法僧物亦复如是。善男子，王与大臣及恶比丘犯根本罪。余如上说，是名初发心菩萨犯于第七根本重罪。

“复次，善男子，未来恶世，初发心菩萨造作诸杂旃陀罗行，谓刹利旃陀罗、婆罗门旃陀罗、大臣旃陀罗、大将军旃陀罗、毗舍旃陀罗、首陀罗旃陀罗。此恶比丘恃怙国王及大臣力，自言智慧自恃财宝行于布施，轻戏毁辱诸善比丘斗争恼乱，法说非法，非法说法，舍正经律颠倒义论，断学般若离慈悲心，不信如来所说经典巧方便戒，违法立制，令诸清净善行比丘废于坐禅、读诵经典，无苦恼者生其苦恼，有苦恼者复令增长，恒怀恶心坏善威仪，行住坐卧无复时节毁禁

破戒，实非沙门自言沙门，实非梵行自称梵行，不解经典为他解说，邀致四众供养恭敬。善男子，王与大臣及恶比丘犯根本罪。余如上说，是名初发心菩萨犯于第八根本重罪。善男子，彼善比丘坐禅诵经，皆是佛法出要正因，是上福田，又是忍辱三昧法器，能说妙法成就众生，破无明黑暗开世间眼，济拔众生烦恼业恶。若彼恼乱故犯重罪，是善男子犯八根本重罪者，未能深入于佛正法，以功德智慧极微少故。

“善男子，是初发心菩萨犯此八根本重罪已，先所修习一切善根皆悉烧然，犯波罗夷离安隐处，失人天乐及以大乘境界之乐，坏菩提心堕于恶趣，轮回生死离善知识。善男子，是虚空藏菩萨摩訶萨，现种种形生其土，或现刹利形，或现婆罗门形，或现声闻形，或现辟支佛形，乃至童男童女等形，在彼犯罪初发心菩萨前而为说法，令生惭愧极大惊怖又教发露忏悔除罪，以善巧便开示甚深无上正真大乘之行三昧总持忍辱之地，舍诸恶趣，得不退转阿耨多罗三藐三菩提心，精进修行六波罗蜜，得力坚固犹如金刚，乃至疾得上菩提。

“又善男子，虚空藏菩萨摩訶萨，若不现身在其人前教发露者，是初发心菩萨，应于后夜合掌至心而向东方，烧坚黑沉水及多伽罗香，请明星言：‘明星！明星！成大慈悲！汝今初出照阎浮提，大悲护我，可为我白虚空藏菩萨摩訶萨，愿于梦中示我方便，发露忏悔犯根本罪，令得大乘方便智眼。’善男子，彼初发心菩萨，即于梦中明相出时，虚空藏菩萨摩訶萨，随其所应而为现身，以诸方便令彼初发心菩萨于所犯罪深怀惊怖，示方便智令彼菩萨发露忏悔，于阿耨多罗三藐三菩提心得不忘三昧坚住大乘，疾得满足六波罗蜜，不久成就一切种智。善男子，彼虚空藏菩萨摩訶萨，勇猛饶益一切众生故，其顶上得有如此如意宝珠，复以无量百千释迦毗楞伽宝而为围绕，不与一切诸菩萨等。善男子，是虚空藏菩萨摩訶萨，成就如斯不可思议方便智慧。

“复次，善男子，若有众生，闻虚空藏菩萨摩訶萨名，或造形像，或设供养，是人现世无诸灾患，水不能漂，火不能烧，刀不能伤，毒不能中，人及非人无能有害，亦无图圉、盗贼怨家、诸恶疾病、饥渴之苦，随寿长短必无天横。临命终时，眼不见色，耳不闻声，鼻不闻香，舌不知味，身不觉触，手足诸根不能为用，唯余微识及身温暖。时虚空藏菩萨摩訶萨，随彼众生所事之神而现其身，或转轮圣王身，或提头赖吒身，或毗沙门身，或毗楼勒迦身，或毗楼博叉身，或余天身，或龙、夜叉、乾闥婆、阿修罗、迦楼罗、紧那罗、摩睺罗伽、人非人等身，在其人前而说偈言：

“‘四圣谛义，智者应观，若解了者，能离生死。’

“善男子，时彼众生于命临终，既见其昔所事之神，又闻为说如

此要偈，既终之后不堕恶趣，因斯力故速免生死。又善男子，若有众生心乐佛法，虚空藏菩萨摩訶萨，于其临终而现佛形，为说偈言：

“佛智真实，度生死海，速求佛智，得尽诸苦。”

“善男子，时彼众生得见佛身，又闻此偈至心观察，欢喜踊跃不能自胜，命终之后得生净国，永不更在五浊世界，常获亲近彼佛如来，又闻妙法，不久当得阿耨多罗三藐三菩提。善男子，是虚空藏菩萨摩訶萨，随彼众生临终之时，应闻妙法及应见僧，亦皆普示。善男子，是虚空藏菩萨摩訶萨，成就如此不可思议方便智慧。

“复次，善男子，种种众生欲得三昧自在之力，应于后夜净自洗浴著新洁衣，烧坚黑沉水及多伽罗香，于一切众生起慈悲心，向于东方至心合掌，称虚空藏菩萨名，而作是言：‘忆持大智虚空藏得大慈悲，唯愿施我不忘三昧。’即便说此陀罗尼言：

“毖(于后切)漏母漏诺蹠(去支切)博叉(楚垢切)底(都履切下皆同)隶娑勿阤逻婆(涉可切)[多+頁](都可切)隶奈夜奈夜 摩诃迦楼尼迦阿□(奴后切)播闾(市盐切)婆(薄贺切下闾婆皆同)悉寐(莫履切下皆同)栗底 西伽(巨左切)罗闾婆悉寐栗底跋(专葛切)闾逻闾 婆悉寐栗底卢舍悉寐栗底 阿婆(步可切)遮奈悉寐栗底 浮侈(邪贺切)俱致悉寐栗底 娑婆呵

“善男子，是虚空藏菩萨摩訶萨，即令彼人得于三昧自在之力。

“复次，善男子，若有众生，乐欲读诵种种书论欲伏众生，所谓彼论，或是佛说，或菩萨说，或声闻说，或世人说。是人应于后夜净自洗浴著新洁衣，烧坚黑沉水及多伽罗香，于一切众生起慈悲心，向于东方至心合掌，称虚空藏菩萨摩訶萨名，而便诵此陀罗尼咒：

“阿祢(奴履切)逻闾鞞(步儿切下皆同)钤(巨耽切)浮娑闾鞞耶娑奈闾鞞 博厕(初器切)娑迷(莫隶切)波吒(张伽切)逻闾鞞 他奈婆逻鞞萨(始达切)多罗伽(已佐切)逻泥(奴帝切)休磨(武佐切下皆同)休磨 摩诃迦楼尼迦 娑婆呵。

“善男子，是虚空藏菩萨摩訶萨，即令彼人得于忆持不忘之力。

“善男子，若有众生欲入大海，欲为商贾，欲服汤药而求力验，欲脱系缚，欲脱枷锁，欲求免脱输送财物，若爱别离，若怨憎会，欲避水火，欲避盗贼，欲避师子，欲避虎狼毒蛇之难，欲免疾病饥渴之患，欲求尊位，有如是等诸所求欲，称虚空藏菩萨摩訶萨名，恭敬供养虚空藏菩萨摩訶萨，皆令满愿。

“复次，善男子，若有王子贪乐王位，欲希灌顶得自在力，应于后夜净自洗浴著新洁衣，烧坚黑沉水及多伽罗香，于一切众生起慈悲

心，向于东方至心合掌，称虚空藏菩萨摩訶萨名，而便诵此陀罗尼咒：

“阿祢(奴履切)逻阍鞞(步倪切下皆同)钤(巨耽切)浮沙阍鞞耶婆奈阍鞞 博厕(初器切)婆迷(莫隶切)波吒(张伽切)逻阍鞞 他奈婆逻鞞萨(始达切)多逻伽(已佐切)逻泥(奴帝切)休磨(武佐切下同)休磨摩訶迦楼尼迦 娑婆呵。

“善男子，是虚空藏菩萨摩訶萨，皆令彼人得满所愿。

“复次，善男子，若有婆罗门众愿乐欲得大婆罗门处，复有众生求长者处，或居士处，或工巧处，或多闻处，或威力处，或思惟处，或解脱处，应于后夜净自洗浴著新洁衣，烧坚黑沉水及多伽罗香，于一切众生起慈悲心，向于东方至心合掌，称虚空藏菩萨摩訶萨名，而作是言：‘唯愿施我大慈悲力，令我所求疾得满足。’时虚空藏菩萨摩訶萨，以净天耳闻彼请已，随其所应现种种形而为说法，令彼所愿皆得满足。

“善男子，是虚空藏菩萨摩訶萨，成就如是不可思议方便智慧，久已得入佛功德海。善男子，大海之水乃可有人能知滴数，无能测量虚空藏菩萨摩訶萨巧方便智成就众生之限数也。又善男子，虚空之量尚可知，无有能知虚空藏菩萨摩訶萨所可成熟种种众生及其变化，或作佛形，或菩萨形、辟支佛形，或声闻形、婆罗门形，或童男童女形，乃至人非人等形，各随所应，或令目睹，或使梦见。若有众生临命终时，唯除最后极微一息，先造恶业烧诸善根当堕恶趣，是虚空藏菩萨摩訶萨，皆能拔济令得安立天人之路，如斯等事之边际者。善男子，是虚空藏菩萨摩訶萨，成就如此不可思议巧方便者，佛功德海久已得入。善男子，以此缘故顶上得有如意宝珠，以百千释迦毗楞伽宝而为围绕，有大光明。”

当于如来说此法时，一切大众咸生奇特叹未曾有，皆悉合掌，向虚空藏菩萨摩訶萨。时虚空藏菩萨摩訶萨，即从座起，偏袒右肩，长跪合掌而白佛言：“世尊，今此世界具于五浊众生愚暗，云何世尊能于其中施作佛事？”

尔时，世尊告虚空藏菩萨摩訶萨言：“善男子，汝见虚空，无有贪欲，无嗔无痴，自性清静，风尘暗障以为不净，既澄朗已即见日月星辰，及知刹那罗婆时数。善男子，如来久于第一义空已得自在，见一切法无有贪欲、嗔恚、愚痴，无缚无解自性清静，但以众生客尘烦恼之所覆障不能觉悟，如来慈悲为此等故方便说法，而为除断客尘烦恼，开其智眼，使见如来净日照明，现在获睹甚深妙法、四念处法乃至八圣道法，令诸众生建立安住，又令疾发阿耨多罗三藐三菩提心，得大慈悲，乃至具足十八不共法，成一切种智。善男子，如来出世则能成熟诸菩萨众，及以缘觉、声闻之众。善男子，今是虚空为倚于

眼，为倚眼识，为倚眼触而得住耶？”

虚空藏菩萨摩诃萨白佛言：“不也，世尊。”

佛言：“善男子，为是内起眼触之缘生彼三受而倚空耶？”

虚空藏菩萨白佛言：“不也，世尊。”

佛言：“善男子，耳鼻舌身意亦复如是。”

佛言：“善男子，众生今者为倚于空，为是虚空倚于众生？”

虚空藏菩萨白佛言：“世尊，各各相倚互作境界，又复各各不为境界，一切诸法皆悉空寂，一切诸法皆悉虚假，一切诸法皆依于如及以实际。世尊，犹如虚空无坏无成，无忆想分别，无动无摇，无爱无憎，无芽无种子，无果无业无报离于文字。世尊，一切诸法亦复如是。菩萨若知此者，是名善知诸法之性得无生忍。”

尔时，虚空藏菩萨摩诃萨，即说陀罗尼言：

“阿□(奴侯切)柰阿婢(夫者切)婆(薄贺切)逻阇(市夜切)摩(莫可切)□(奴后切)叉夜 视柰视柰 阇柰毗(夫尼切)磨(武佐切下皆同)牟尼呵罗阿柰夜 颇逻(力可切下同)白呵(乎贺切)揭(巨谒切)婆祿(奴履切)婆(薄贺切)菟毗(薄履切下同)毗柰夜 菟舍舍婆 舍柰磨舍柰[多+頁](都可切下皆同)他(吐贺切)磨柰末兜梵毗沙(所贺切)舍磨支[多+頁]柰枳黎舍庵复(扶豆切)僧输沙(疏马切)泥(奴帝切)娑婆呵。”

尔时，世尊告虚空藏菩萨摩诃萨言：“善哉！善哉！汝今说此无尽降伏师子奋迅陀罗尼，一切众生临命终时最后神识，有重烦恼障及重恶业，此陀罗尼悉能烧然，令得往生清净佛国。善男子，汝今善能以此成熟无量众生，又能成熟无量佛刹村园城邑一切众生，又随所应现种种形，又随其根说种种法，或为演说大乘经典开深法门。若沙门旃陀罗、婆罗门旃陀罗、刹利旃陀罗、毗舍旃陀罗、首陀罗旃陀罗，此诸人等所犯重罪，以因汝故悉得烧然，今于善法建立增长。”

尔时，世尊而说偈言：

“众生诸贪诤，皆因诸根起，
若能摄诸根，疾得于解脱。”

尔时，如来说此经已，有十千人天得无生法忍，无量人天得诸三昧，又无量人天得陀罗尼，又无量人天逮得忍辱，又无量人天于十地中各得增进。

尔时，世尊告阿难及弥勒菩萨摩诃萨言：“汝等应当恭敬奉持此经。”

尔时，阿难及弥勒菩萨，即从座起，偏袒右肩，长跪合掌白佛言：“世尊，此妙经典我已受持，当何名此经？”

佛言：“善男子，此经名《忏悔尽一切罪陀罗尼经》，亦名《不可思议方便智救济一切众生经》，亦名《能满一切众生所愿如如意宝

珠经》，亦名《虚空藏菩萨经》，如是奉持。阿难当知，若有善男子、善女人，久发阿耨多罗三藐三菩提心，于无量百千阿僧祇劫修行六波罗蜜，于十方世界一切佛所种种供养，乃至满无量阿僧祇恒河沙劫，不如有人读诵书写、为人解说虚空藏菩萨经及持名号，比前功德，百分、千分、百千万亿分不及其一，算数譬类所不能知。”

尔时，阿难及弥勒菩萨白佛言：“世尊，我当如是奉持。”

时诸大众，闻佛所说，欢喜踊跃，以诸供具，供养于佛。

虚空藏菩萨神咒经

如是我闻：一时，佛住佉罗山依正觉仙所住之处，与无数大比丘声闻众俱，亦与无量阿僧祇恒河沙等菩萨摩訶萨，演说如来功德经已。

尔时，西方有如意宝现，以无量百千释迦毗楞伽宝周匝庄严。是宝珠光隐蔽一切余色光明，唯见如来及如意宝，余无量无边不可说色见如虚空，如来威光极更明显。此诸会众，不睹自身各不相见，大众诸色悉灭无余，不与眼对，不得色身及以所触，随所观视唯见虚空，亦不见于日月星辰、地界、水界、火界、风界，不与眼对，耳不闻声，鼻不嗅香，无心心数，无我我所及六入起想，瞻睹他方不得诸大，在在方所唯见佛身色相光明，亦复遥见如意宝珠，以无量百千释迦毗楞伽宝周匝庄严，余无所见。于此众中有住十地菩萨摩訶萨，得首楞严三昧，一生补处最后有身，见如是相不惊怖畏，解诸法空如实际性，是故不惊不怖不畏。余诸菩萨摩訶萨、声闻、天、龙、夜叉、乾闥婆、阿修罗、紧那罗、拘槃荼、毗舍遮、富单那、迦罗富单那、人及非人，在会中者，极惊怖畏生于忧愁，此彼闇蔽其心动乱，各不相见睹无问处：“其事云何？何因缘尔？为是谁力？”

尔时，众中有菩萨摩訶萨，名曰梵德，合掌向佛而说偈言：

“一切法如性，人无有知者，
依住于色阴，六情根闇蔽，
不见于一阴，思惟求色阴，
于佛法有疑，此中有是人。
如此彼亦尔，总知虚空相，
彼三昧勇健，其身不可说，
如意大宝珠，见在其顶上，
释迦毗楞伽宝，皆遥远见彼。
是大慧众生，度首楞三昧，
一切大慧者，欲来见世尊，
今说甚深法，决定无有疑。
安慰于此众，悉来归世尊，
勇健者行处，教化熟众生。”

尔时，世尊而说偈言：

“如是如汝说，三昧者行处，

若闻正住处，是慧众生住。
此是虚空藏，菩萨所行处，
无依无戏论，彼三昧示现。
众生著二见，常为所劫夺，
著断常二见，彼此常闇蔽。
如是二见等，将欲得解脱，
其性不可说，速疾证诸地。

“复次，善男子，是初发心菩萨摩訶萨，说初境界相，谓六波罗蜜，乃至知诸大生灭如实之性，然后知于一切诸法不可言说，无性无生无灭无境界，不动不摇，如是修行一切诸行，如是悉离断常二见不生怖畏，于一切法不起境界心，疾得具足六波罗蜜，更不复住断常见中。”佛说是已，一切大众见闻觉知如本色相。

尔时，世尊申其右臂说如是言：“是虚空藏菩萨摩訶萨来。”作是语已，告诸大众言：“是菩萨得诸三昧犹如大海，持菩萨戒如须弥山，智所通达犹如虚空，勤行精进犹如疾风，修行于忍犹如金刚，其慧如空，诸菩萨中犹如胜幢，向涅槃者导，是一切善根之藏，贫者得瓶，入闇者日，失道者月，是怖畏者大须弥山，是烦恼焦热者甘露，是一切种善根者栽，是趣大涅槃者桥，是堕恶道者船，生天者梯，是诽谤恶口者救，热恼者盖，于诸外道如师子王，摄取诸见犹如水镜，魔怨中铠，毁戒者药，是诸善本行之地，造鬘者华，具行者藏，无惭愧者上妙衣服，病者良医，饥者得食，渴者月珠，疲极者床，修三昧正行者日，向菩提者大车，游禅定者胜地，助菩提者宝轮。善男子，此是向波罗蜜者果报，是善男子又是进修行十地者如意宝珠，是善男子是进行首楞严三昧者波利质多罗树，是断邪见结使者刀，破诸习气犹如金刚，能降诸魔是良方便，是开发意，是诸一切佛法所依，是缘觉华鬘、声闻衣服、诸天眼目、人之正道，是畜生归，是饿鬼护、地狱尊救，是一切众生福田，是诸菩萨摩訶萨大车，是善男子是三世如来应供正遍知最大辅臣、护法城门，是善男子乃至具足十八不共法以自庄严得于佛智成就具足，是善男子悉是一切众生应供，唯除如来，诸余一切应供中最。汝等大众，皆应奉仰各随力能应办供具，供养恭敬而尊重之，种种珍宝、幢幡宝盖、涂香末香、衣服瓔珞、种种杂物，净治道路种种庄严，以种种赞叹而赞叹之。汝等一切不久当得是功德器！”

尔时，一切大会皆共和合，从座而起，向虚空藏菩萨摩訶萨所现之方，叉手合掌，其心欢喜颜貌怡悦，以清净目谛观视之。于时众中，诸大菩萨及大声闻，天主、龙王、夜叉主、阿修罗主、伽留罗主、紧那罗主、摩睺罗伽主及五通仙，各作是念：“当设何等最上最胜供具供养是善男子？”

尔时，虚空藏菩萨摩訶萨，变娑婆界，地平如掌，七宝庄严，除

去诸山、旷野堆阜、墙壁瓦砾、灰粪臭秽、尘雾云雷、乾闥婆声，一切树木变成七宝，华叶果香皆悉具足，依地草木枝节茎叶亦变化成七宝，尽娑婆世界除一切病，一切地狱、畜生、饿鬼无诸苦恼，皆得衣服饮食瓔珞之具。娑婆世中一切众生，得成如意妙色端严威德第一肢体具足，除诸结使心得寂静，于诸善根其心欣乐，以清净心安住三宝。此所集众，两手自然有化如意宝，一一如意宝各出光明，遍照于此娑婆世界。又是宝珠出妙乐音，雨种种宝、种种妙衣、种种瓔珞，雨种种金锁瓔珞、真珠瓔珞，又雨种种妙华、青莲、红莲、赤莲、白莲及水坚华，复雨多摩钵香、牛头栴檀末香，庄严于道。其道二边，化七宝堂如帝释堂。于其堂内化诸嫫女犹如魔后，作于五乐欢娱受乐。当于佛上虚空之中，化天宝盖满百由旬，清妙鲜洁宝网庄严，垂真珠贵庄严其中，作众伎乐过于天乐。田地草木树林华叶诸果实中，各出妙音殊过天乐，有闻音者，于阿耨多罗三藐三菩提得不退转。

尔时，一切诸大会众，见虚空藏菩萨摩訶萨作是庄严，得未曾有，作是念言：“我等云何为是善丈夫，于世尊前当设何座？”

尔时，佛前出宝莲华，白银为茎，黄金为叶，码碯为台，梵摩尼宝以为其须，纵广十里。复有如是无量百千诸宝莲华，周匝围绕。见虚空藏菩萨摩訶萨忽在华上结跏趺坐，见其顶上如意宝珠。见虚空藏所将眷属，亦各坐余莲华台上。

尔时，弥勒菩萨摩訶萨，以偈问于药王菩萨：

“如诸本先来，大名称菩萨，
恭敬礼世尊，然后乃就坐。
是善丈夫来，示现大庄严，
不敬礼世尊，忽见其已坐。”

尔时，药王菩萨以偈答于弥勒菩萨：

“见是大丈夫，善住于佛法，
是不见众生，不依一切想。”

尔时，弥勒菩萨复以偈言：

“若不见众生，安住于实际，
何义故庄严？为我显现说。”

尔时，药王菩萨复以偈答：

“是方便勇健，教化众生故，
不知第一义，凡夫妄想行。
世谛聪慧者，迷真故受苦，

为脱是等故，现如是庄严。”

尔时，世尊赞药王菩萨言：“善哉！善哉！是善丈夫，如汝所说。假令一切诸凡夫，不能知一须陀洹解脱行处；一切众生得须陀洹，不能知一斯陀含解脱行处；一切斯陀含、阿那含、阿罗汉，亦复不知一辟支佛解脱行处；一切众生作辟支佛独一麒麟，亦不知一无生忍菩萨摩訶萨善行方便教化众生；一切众生得无生忍，不知一得首楞严三昧无碍辩才菩萨摩訶萨第一义谛解脱之行。善男子，是虚空藏得无生忍，得无碍辩，得首楞严三昧，知此大众过无量劫心之善根，应当现于大庄严故，住离欲地故。此善男子从西方没而来至此，示现同诸声闻、缘觉，入于无量空处三昧，现于神通，一切众生生奇特心，复于世谛示现庄严，教化无量诸众生故。是善男子若现第一义谛无生庄严，乃至天人皆当惊怖迷惑失心，至八地菩萨亦复失心，无有能见其行相貌，入如是等深功德法。是善男子善知方便，度于一切诸佛法海，断于疑惑，自然善知诸方便度，于一切菩萨摩訶萨中犹如王幢。

“善男子，是虚空藏菩萨摩訶萨，示诸众生天道、涅槃道，能解众生结使心病，亦治四大身内增损诸患。若有众生诸邪见逼，迷于生死旷野之中不知方便。云何名为天道、涅槃道？是诸众生，若称虚空藏菩萨名，礼拜供养烧众名香；是善男子观心善根见结覆心，及知过去心种善根，亦知现在供养佛法僧宝修施戒德如是诸事，或于梦中方便示现正直之道；方便力故，及于一切恶见、恶事、恶愿、恶求、恶归、恶趣，心得解脱，身口意行悉皆正直，所愿正直，得近正直真善知识，疾得解脱诸恶臭结、恶见诸病，速疾得尽恶道恶业，所愿善故，行善业故，速疾得作心自在者，住甚深忍。若有众生，种种诸病逼切，其身其心散乱，聋盲暗哑诸根不具，支节各异将有死相如是等事，一心称是虚空藏菩萨名，除诸病故，欲无病故，烧沉水香、坚黑沉水，若多竭流香，礼虚空藏；是善大丈夫于夜梦中，作婆罗门像在其人前，或现释像、大功德天像、妙音天像、刹利像、大臣像、兵使像、良医像，或父母像、或男女像，于夜梦中在病人前如实为说种种随病汤药，病者一服所患悉除。复有如是所营求事，欲多闻义，若欲寂静，欲修禅得慧，欲得名称，欲求工巧，欲得自在，欲得妙色，欲得封邑，欲得势力，欲得才能，欲得妙声，欲得子息，欲得眷属，欲得功德，欲得布施、持戒、忍辱、精进、禅、慧，欲得美语，欲人恭敬，欲脱诸恶安止于施乃至住慧，欲得长寿，欲得种种所须之具得已能用，欲劝慳人令行布施，欲令破戒安住持戒，欲令懈怠安住精进，欲劝愚痴令住于慧，未定乘者劝住声闻，自摄乘者劝住缘觉，是善男子作是方便示诸众生。若有众生舍离大悲，自护己身心舍众生，若有是心：‘我何方便能劝彼人，令住阿耨多罗三藐三菩提，安住方便四梵行处，乃至令其住于大悲？’是人敬礼虚空藏菩萨摩訶萨，若阿练若处、若在林中、若露地，烧沉水香、坚黑沉水，若多竭流香，至心合

掌，五体投地遍礼十方，尔时说是陀罗尼句：

“阿弥隶奢阿弥隶奢迦留尼迦(一) 遮罗遮罗毗遮罗珊遮罗迦留尼迦(二) 罗茂罗罗茂罗毗伽陀隶(三) 摩懵咭复闍摩那伽留尼迦(四) 真陀摩尼富罗移迦留尼迦(五) 萨婆阿奢弥咄罗[口+皮]离移(六) 阿渍陀梨(七) 破仇破仇(八) 留抵脾脾伽仇(九) 價致脾脾伽仇迦留尼迦(十) 富隶移埤摩阿奢(十一) 萨埤波咄罗遮阿输迦竭抵莎呵(十二)。

“是善男子为于彼人，现人色像、鹿色像、马色像或天色像，随彼功德现于如是色像言说示一方便；是方便故，能教化无量百千那由他众生，不定乘者、声闻乘者、缘觉乘者，令是众生于一时中一弹指顷少方便慧，能令安住无碍大乘得不退转，乃至得于种种三昧，得陀罗尼，亦得于忍安住十地。是虚空藏菩萨摩訶萨，成就如是不可思议方便智慧大悲之力。善男子，假使能得虚空边际，无有能知是善男子智慧方便大慈大悲三昧之力，教化众生得其边者。是虚空藏菩萨摩訶萨，成就如是不可思议无边功德。善男子，若有众生，无谄幻惑正行威仪，成就正见质直无诳，不自赞誉离于嫉妒，无有奸诈善心成就，如是等人，是善男子而怜愍之，示方便智正行精进；以是方便智慧正行精进力故，脱诸苦恼，发阿耨多罗三藐三菩提心，一切善根悉皆回向于无上道，得不退转，以精进力满足六波罗蜜故，大勤进行速疾正觉阿耨多罗三藐三菩提。虚空藏菩萨摩訶萨，成就如是不可思议无量功德，教化众生。”

尔时，弥勒菩萨摩訶萨白佛言：“世尊，何缘独见此善男子顶上如意宝，极为妙色端严赫焰非余菩萨？”

佛言：“善男子，是虚空藏菩萨摩訶萨成就大悲，为利众生脱大苦事。若有众生犯根本重罪当堕恶道，拔断一切诸善根行；如是众生，是善男子为作妙药。若有众生堕大无明，闇蔽恶见牢狱系闭，为大照明犹之如日，令其悔过断根本恶，能除众生疑心毒箭。或有众生破坏心器犯根本重罪，失诸善法当堕恶道，无归无趣，一切明慧之所舍弃；是善男子能示是等罪闇众生，安于善道犹如宝杖，又能洗一切臭恶结使，能转恶道安止人天，逮涅槃乐犹如大车。若有众生多欲所转，极多嗔恚忿怒心乱，或多愚痴无明覆蔽，说无因果不见不怖，不畏后世贪财无厌，乃至常行十种恶业；如是众生，是善男子为闭恶道安止天人，逮涅槃乐犹如大车。以是缘故，一切天人皆应供养是善男子，唯除如来应供正遍知。”

尔时，弥勒菩萨白佛言：“世尊，何等名为犯根本罪？众生犯是根本罪已，拔断一切诸善根行，当堕恶道；犯堕根本罪故，离于一切人天之乐。复因由是善男子故，令彼众生具满人天涅槃之乐？”

佛言：“善男子，灌顶刹利王犯根本重罪有五事。灌顶刹利王犯

五根本罪已，诸先所种一切善根悉皆败坏，犯堕根本罪故，离于一切人天之乐，当堕恶道。何等为五？善男子，若灌顶刹利，劫夺塔物，或夺僧物、若招提僧物，若自取、若使人取，是名初犯根本重罪。若诽谤法故，闻佛为声闻说、为缘觉说、为大乘说，诽谤遮固不令流布，是名犯第二根本重罪。若为我出家，剃除须发被服袈裟，或能持戒、或不持戒，或破戒、或不破戒，脱其袈裟罢令还俗，或捶打其身而谪罚之，收闭圜墙，或断其命，是名第三犯根本重罪。若刹利王以自在力，作五无间罪，劝他人作五无间罪，于五无间罪随作一罪，是名第四犯根本重罪。若刹利王说无因果舍于他世，行于十恶，劝多众生作十恶业，是名第五犯根本重罪。

“善男子，若灌顶王于此五根本重罪之中，若犯一一，则破过去一切善根，犯堕重罪，离于一切人天之乐，当堕恶道。以是缘故，虚空藏菩萨摩訶萨现生边地，或现沙门形服威仪，或现婆罗门形服威仪，在在现生随彼彼处，为诸刹利说未曾闻法，如一切智说甚深经典，说陀罗尼及忍辱地，敷演开示。以是缘故，灌顶王先所作恶不善之业，惭愧悔过更不复作，安住布施，寂静调伏，大勤进行，趣向大道。

“复次，大臣亦有五事犯根本重罪。何等为五？若彼大臣劫夺塔物，及夺僧物、招提僧物，是名第一犯根本重罪。若大臣破于国城村邑聚落，是名第二犯根本重罪。若大臣诽谤正法，闻佛为声闻说、为缘觉说、为行一切智者说，诽谤遮固藏匿隐覆，是名第三犯根本重罪。若诸大臣见人为佛出家，剃除须发被服袈裟，若持戒、若不持戒，若破戒、若不破戒，脱其法服罢令还俗，挝打其身谪罚系闭，若断其命，是名第四犯根本重罪。若大臣犯五无间一一恶业，是名第五犯根本重罪。

“善男子，若大臣犯一一五根本重罪，则坏过去一切善根，离于一切人天之乐，当堕地狱。以是缘故，是虚空藏为是等故现生边地，作沙门形色，若婆罗门乃至男女等像而为说法，在在处处为于大臣说甚深法，如一切智说诸甚深经典及陀罗尼忍辱之行，开示演说。大臣闻已，所造恶业惭愧悔过更不敢作，安住布施，寂静调伏，勤行精进，趣向大道。

“善男子，声闻弟子犯根本重罪亦有五事。何等为五？杀生、淫欲、偷盗、妄语、若出佛身血，是名声闻犯五根本重罪。若有声闻犯一一根本重罪，疑箭在心焦灭诸根，必定趣向恶道。虚空藏菩萨为是等故，在在现生，或作沙门形色威仪乃至男子等像而为说法，令求声闻人惭愧悔过更不敢作，安住寂静，调伏趣向无上大道。

“善男子，初向大乘善男子，犯根本等重罪有八。何等为八？若有众生，恶业因缘生五浊世，以少善根近善知识，闻此大乘甚深妙法，少觉少知少善根故，发阿耨多罗三藐三菩提心，闻第一无相等经，转为凡愚分别解说。是凡愚人闻已惊畏，退失阿耨多罗三藐三菩

提心，愿求声闻乘，是名初发心菩萨犯初根本重罪。以是罪故所修善根一切破坏，犯堕重罪，离于天人及涅槃乐，退菩提心当堕恶道。是故菩萨应知他心及善根已如应说法，如度大海渐渐深广。是故虚空藏现生其土，同彼色像而为说法。是名初犯根本重罪。

“行者欲见虚空藏菩萨忏悔所犯恶罪，于夜后分，烧沉水、坚黑沉水、若多竭流香，合掌称虚空藏菩萨名。是善男子随功德分，见虚空藏所现形色，若见其身，若沙门、若婆罗门、若男、若女，种种形色而为说法。是初发心菩萨所犯根本重罪即得忏悔，堪忍无上大方便行三昧忍辱及陀罗尼，至安住地能断恶道，于阿耨多罗三藐三菩提得不退转，于六波罗蜜得大精进力犹如金刚，当疾觉于阿耨多罗三藐三菩提。若于其前不现身者，是初行菩萨，明星出时从座而起，向于明星说如是言：‘南无呵喽那！南无阿喽那！成就大悲！今者初出于阎浮提，愿以大悲覆护于我。以我言说白大悲虚空藏菩萨，于夜梦中示我方便。’以是缘故，得悔所犯根本重罪，成就大乘方便智眼。寻于眠中明星出时，虚空藏菩萨即于梦中自现色身令其悔过，灭除诸恶已即得三昧，名不忘菩提之心，善住大乘具六波罗蜜。

“若初行菩萨语余人言：‘汝等不能行六波罗蜜，亦不能觉阿耨多罗三藐三菩提。汝等速发声闻辟支佛心，可得度于生死。’余如上说，是名初行第二犯根本重罪。

“复次，初行者或说是言：‘汝用善持调伏戒为？但当速发菩提之心。汝当读诵大乘经典，身口意恶当得清净无有恶报。’余如上说，是名初行第三犯根本重罪。

“复次，初行者若说是言：‘汝有大德，应离声闻法，勿听，勿读，勿为他说。汝善男子，当隐藏声闻经法。声闻法中不得大乘，不能令汝使得边际。唯当听受大乘经典为他人说，汝诸恶业当得清净疾成佛道。’若受是语摄取是见，二俱犯罪。是名初行菩萨第四犯根本重罪。

“复次，初行者妄语两舌，异思说大乘异经典，为于名誉利养受持读诵，如其所闻为他广说，作如是言：‘我知大乘非余人也。’见他得利心生嫉妒，说他恶名诽谤毁谤，自说得过人法，是人破坏犯堕重罪，离大乘法当堕恶道。如人入海求宝船败没死，是初行者亦复如是。是名初行第五犯根本重罪。

“复次，未来当有若在家出家初行菩萨，读诵方广经典，为利养故言：‘我解是妙法，愍汝等故为汝等说。’是初行菩萨实无饶益众生之心。如人饥乏，入大果林舍诸美果服毒果而死；是初行菩萨亦复如是，得入大乘正觉宝林，为利养名誉故说大乘经，犯根本重罪，为诸智者之所呵责，人天四众不应亲近。是名初行第六根本重罪。

“复次，刹利王有国相旃陀罗、臣旃陀罗、兵吏旃陀罗、医旃陀罗，如是痴人自持财宝虽行施惠，放逸憍慢破坏众僧，因倚王臣劫夺僧物。是名初行第七犯根本重罪。

“复次，若刹利旃陀罗、臣旃陀罗、比丘旃陀罗等，嗔嫌沙门，法说非法，非法说法，舍诸经律，非时义论，非法立制，断学般若，恼乱比丘，令诸沙门失净信心坏破威仪，实非沙门自言沙门，实非梵行自言梵行，令诸四众增致供养。是王臣及比丘二俱得罪，是名初行第八犯根本重罪。是初行菩萨犯此根罪，不名修行，断诸善根，离人天乐当堕恶道。

“善男子，虚空藏菩萨为是等故，随形入类现同色像，而为说首楞严等种种经律，令犯罪者悔诸恶业，成就善根究竟涅槃。若善男子礼拜称赞虚空藏菩萨，是人现在得大功德。复次，若有众生，闻虚空藏菩萨名，造立形像，供养恭敬尊重赞叹，种种供养具而以供养。是人现身水不能漂，火不能烧，刀不能伤，毒不能害，人与非人无有能害，亦无病痛饥渴之患；临命终时，是虚空藏现其所事种种天像、日月等像，令诸众生各见所归充满其愿，说如是偈：

“‘是四圣谛，慧者若见，知生死过，度诸有流。’

“若有众生深心信佛，即现佛身，而说是偈：

“‘佛智真实，若度诸有，得证佛智，脱一切苦。’

“是诸众生临命终时，得见佛身深心爱乐欢喜踊跃，既命终已离五浊世，生净佛土见佛闻法。善男子，是虚空藏菩萨摩訶萨，成就如是不可思议功德。若欲增长修诸禅定智慧自在，当澡浴清洁，于夜后分礼虚空藏已设诸供养，作如是言：‘于诸众生大慈悲者，愿施与我念定方便。’即说陀罗尼句：

“留牟兰那哈(一) 颯钵尼隶(二) 茂呢阿婆多隶(三) 那那移(四) 那移摩诃迦留尼迦(五) 阿捺婆闍婆[口+蜜]吒(六) 阿迦闍婆[口+蜜]吒(七) 跋闍闍婆[口+蜜]吒(八) 路奢[口+蜜]栗吒(九) 阿那摩[口+蜜]吒(十) 复多句[口+致][口+蜜]吒莎呵(十一)。

“即与彼人念定方便。若欲读诵种种经论，亦于明星出时，供养礼拜虚空藏菩萨已，作如是言：‘大悲虚空藏极拯济诸众生，愿愍念于我，与我念慧力。’即说陀罗尼句：

“阿弥罗闍鞞(一) 唵蒲沙闍鞞(二) 唵婆那闍鞞(三) 唵差三弥(四) 唵咤罗闍师(五) 悉[口+炭]那[口+束+頁]鞞(六) 世罗迦尼(七) 呼摩呼摩(八) 摩诃迦留尼迦莎呵(九)。

“若欲渡海，欲求伏藏，欲求仙道，若系闭，若有别离，若怨憎会，若水若火，若刀若毒，若病蛊道，师子、虎、狼、毒蛇、盗贼

等，种种怖畏及所须之物，是人应当称虚空藏菩萨名礼拜供养，应于彼起大慈父想，说如是偈：

“愍我愍我大悲称， 利益世间虚空藏，
愿以大悲谛观我， 救我如是诸怖畏。
大德施我功德利， 我今苦逼最贫穷，
归依我尊大寂静， 愿得现乐及来世。”

尔时，虚空藏菩萨或现自身，或现他身，种种形色而安慰之令得解脱，所须之物亦悉具足。若复王子欲绍王位，婆罗门处、长者工巧处、大威德处、大思惟处、大解脱处；是人亦于夜后分，称虚空藏菩萨名，礼拜供养诚心归依。虚空藏菩萨清净天耳远闻音声，往其人前而为说法令满所愿。善男子，虚空藏成就如是不可思议功德智慧方便。假令众生数知海水，不能得知虚空藏菩萨功德之量。复有众生能知十方虚空边际，亦不能知虚空藏菩萨神通变化权智之力。是故虚空藏顶上宝珠光色如是。”

尔时，会众闻佛所说，欢喜踊跃顶礼佛足，白佛言：“世尊，云何能于五浊恶世教化众生？”

佛言：“善男子，犹如虚空，无缚无解无嗔无爱，其性清净。善男子，如来亦尔，于第一义空心得自在其性清净，虽处浊世，不为尘垢之所染污，为化众生故出现于世。善男子，而是虚空依于六识而得住耶？”

“不也，世尊。”虚空藏白佛言，“世尊，各不相依各无行处，一切法空无有积聚，本际如实犹如虚空，无坏无成，无忆想分别，无动无爱，无子无果，无报无有文字。世尊，菩萨摩訶萨如是知诸法性得无生忍，如是，世尊。”即说咒曰：

“卑婆罗阇(一) 摩[口+飲]移(二) 慎那阇移(三) 禅那尼摩(四) 牟尼呵罗(五) 阿那咤(六) 破罗仇呵(七) 竭婆尼摩(八) 阿毗咤(九) 修婆奢奢阇婆(十) 舍那舍那(十一) 舍那哆咤(十二) 剑摩舍摩(十三) 祢摩浮摩(十四) 毗沙舍摩(十五) 遮那咤那(十六) 翅疑唵喃三[口+輸]四泥莎呵(十七)。”

佛言：“善哉！善哉！善男子，汝今能说是降伏眼师子吼步水陀罗尼，令诸众生临命终时，破烦恼障、业障、报障得生净土。汝能愍念众生游诸佛土，示现色身利益众生，说大乘经能断诸恶，令王旃陀罗乃至沙门旃陀罗修诸善法。”

佛说此经时，无量阿僧祇人得天种种三昧陀罗尼，住于诸忍得地十智，十千人得无生法忍。佛说偈言：

“若众生诤讼， 因根本所摄，

能摄诸根本，速疾得见彼。”

佛说经已，一切大众欢喜奉行。

观虚空藏菩萨经

如是我闻：一时，佛住旃陀罗山，依正觉仙人所住之处，与千二百五十比丘俱；贤劫千菩萨，弥勒为首。

尔时，长老优波离，即从座起，整衣服，为佛作礼，白佛言：“世尊，先于功德经中，说虚空藏菩萨摩訶萨名，能除一切恶不善业，治王旃陀罗乃至沙门旃陀罗诸恶律仪。如此恶事若欲治，当云何观虚空藏菩萨？设得见者，云何共住布萨僧事？若优婆塞破五戒、犯八戒斋，出家比丘、比丘尼、沙弥、沙弥尼、式叉摩尼犯四重禁，在家菩萨毁六重法，出家菩萨犯八重禁。如是过人，世尊先于毗尼中说，决定驱槟如大石破。今于此经说，大悲虚空藏能救诸苦，及说咒以除罪咎。设有此人，云何知之？以何为证？惟愿天尊，分别解说。”

佛告优波离：“汝及未来世一切善持毗尼者，应当教此犯罪众生安慰其意：世尊大慈，弘誓无量，不舍一切；于深功德经说治罪法，名决定毗尼，有三十五佛救世大悲，汝当敬礼。汝敬礼时，当著惭愧衣；如眼生疮深生愧耻，如癩病人随良医教，汝亦如是应生惭愧；既惭愧已，一日乃至七日礼十方佛，称三十五佛名，别称大悲虚空藏菩萨名。澡浴身体，烧众名香坚黑沉水；明星出时，长跪合掌，悲泣雨泪称虚空藏，白言：‘大德大悲菩萨，愍念我故为我现身。’尔时当起是想，是虚空藏菩萨顶上有如意珠，其如意珠作紫金色。若见如意珠即见天冠，此天冠中有三十五佛像现，如意珠中十方佛像现。虚空藏菩萨身长二十由旬，若现大身与观世音等。此菩萨结跏趺坐，手捉如意珠王，其如意珠演众法音与毗尼合。若此菩萨怜愍众生故，作比丘像及一切色像，若于梦中，若坐禅时，以摩尼珠印印彼人臂；印文有除罪字，得此字已，还入僧中如本说戒。若优婆塞得此字者，不障出家；设不得此字，便使空中有声唱言：‘罪灭！罪灭！’若无空声使知毗尼者，梦见虚空藏菩萨，告言毗尼菩萨：‘某甲比丘，某甲优婆塞，更令忏悔，一日乃至七七日。’礼三十五佛虚空藏菩萨力故，汝罪轻微。’知法者，复教令涂治圜厕，经八百日，日日告言：‘汝作不净事，汝今一心涂一切厕，莫令人知；涂已，澡浴礼三十五佛，称虚空藏，向十二部经，五体投地说汝过恶。’如是忏悔复经三七日，尔时智者应集亲厚，于佛像前，称三十五佛名，称文殊师利，称贤劫菩萨，为其作证，更白羯磨如前受戒法。此人因苦行力故，罪业永除，不障三种菩提业。”

佛告优波离：“汝持是观虚空藏法，为未来世无惭愧众生多犯恶者，广分别说。”

说是语时，时虚空藏菩萨，结跏趺坐，放金色光，如意珠中见三十五佛已，白佛言：“世尊，我此如意珠宝从首楞严出，是故众生见珠者，得如意自在。”

尔时，世尊敕优波离：“汝持此经，不得为多众广说，但为一人——持毗尼者。为未来世无眼目众生作眼目故，慎莫忘失。”

时，优波离闻佛所说，欢喜奉行。

观虚空藏菩萨经

右观虚空藏菩萨经，按开元录，系是单译，止有二纸。经后旧尚有八纸经文，准校勘大藏竹堂讲师批，该是后人采集虚空藏经咒，并诸经中佛名及咒，以为劝世修行法，不可连在观虚空藏经后，下竺本及福本皆无。又按此经，世尊先于深功德经，说治罪法，名决定毗尼；有三十五佛者，即出宝积经第九十卷优波离会，与决定毗尼经同本，余文皆例此。然详观所批理，亦可以意会。徒存似是，姑为删之。

菩萨念佛三昧经卷第一

序品第一

如是我闻：一时，佛住王舍城耆闍崛山，与大比丘众一千二百五十人俱，皆是阿罗汉，诸漏已尽无复烦恼，调伏纵任善脱无脱，深知无知所作已办，逮得无我舍诸重担，除灭九结决定解脱，诸心自在犹如大龙，唯除阿难。

尔时，难陀天子、修难陀天子、栴檀天子、修摩那天子、自在天子、大自在天子、阿逸多天子、修行天子，如是无数净居天子，于夜后分光色倍常，耆闍崛山欽然大明。时诸天子往世尊所，一心恭敬顶礼佛足，以天细末栴檀之香、多摩罗跋沉水天香、天华鬘香、俱修摩等种种华香，以散佛上，重礼佛足，右绕三匝，却住一面合掌向佛。

时，栴檀天子默然生念：“过去诸佛皆为诸天、世人、沙门、婆罗门，演诸佛所说菩萨念佛三昧。”复作是念：“今我世尊亦应如昔过去诸佛，安乐世间诸人天故，宣说菩萨念佛三昧。”时诸天子俱白佛言：“世尊，过去诸佛皆说菩萨念佛三昧，安乐世间人天八部。唯愿世尊，如昔诸佛广为众生说此三昧。”尔时，世尊默然许之。时诸天子绕佛三匝，顶礼佛足忽然不现。

尔时，世尊于夜后分明相出时，熙怡微笑作大师子[口+馨]咳之声。耆闍崛山别住诸僧，承佛神力俱到佛所。王舍大城诸比丘尼，蒙佛威声亦悉同集。摩竭提国阿闍世王先尼梵子，与无量亿眷属围绕，承佛神力于一念顷俱到佛所。复有阿罗婆迦夜叉、伽陀婆夜叉、金毗罗夜叉、修脂路摩夜叉、摩罗陀利夜叉，如是等夜叉神王有大威力，一一皆有百千眷属，乘佛神力于一念顷至耆闍崛山。复有罗睺罗阿修罗王、毗摩质多罗阿修罗王、修婆睺阿修罗王、波呵罗头阿修罗王，及其眷属；如是乃至三千世界，天龙龙王无量无边，生希有心肃然毛竖，承佛神力于一念顷往到佛所。东方世界如恒河沙梵天天王，闻佛馨咳，肃然毛竖往到佛所，自余三方及上下方亦复如是。

时，给孤独须达长者，亦与无数百千眷属，从舍卫城往到佛所。时，毗耶离有大长者名曰善思，次名降怨，次名吉祥；复有离车诸王子等，名欢喜象，次名举象；复有断事庶士首陀名曰光象，如是一切皆大乘学，与无量众承佛神力往到佛所。时，瞻婆城有庶士子，名曰庠序，次名饶益；复有大长者子名无量力，如是等众已于过去种诸善根有大威德，承佛神力往到佛所。时，波罗奈无量众生，宿植德本今已成熟，从波罗奈鳞次相继步至佛所，稽首作礼侍立左右。是时，拘

尸那竭大城，无量力士及力士子，已于过去供养诸佛，植诸善业具大威德，从拘尸那共相和顺，随路贯次往到佛所，至心恭敬前顶礼足。是时，三千大千世界纵广正等，佛神力故，一切八部天、龙、夜叉、乾闥婆王、阿修罗王、迦楼罗王、紧那罗王、摩睺罗伽，如是等众皆来集会间无空缺。

尔时，世尊见众已集，复更发大师子之声。从僧坊出近至异处，遥见彼方其地众宝，世尊见已复更微笑。即时世间人、天、阿修罗，各持无量末香杂华以散佛上，至心恭敬尊重赞叹。是时众中，长老舍利弗、长老目犍连、长老摩诃迦叶、长老须菩提、长老富楼那弥多罗尼子、长老罗睺罗、长老摩诃金毗罗、长老摩诃迦旃延、长老阿楼驮、长老劫宾那、长老轮卢那二十亿子、长老难陀、长老阿难陀，皆有威德具足神通，如是圣众悉已俱集。

尔时，众中长老弥勒菩萨、三界菩萨、越三界菩萨、初发心即转法轮菩萨、善思菩萨、大音声菩萨、持地菩萨、文殊师利童子菩萨、不空见菩萨，如是等众无量无边，已曾供养过去诸佛，深种菩萨无数行愿，久发无上菩提之心。尔时，长老不空见菩萨，欲知如来神通之相微笑之意，更正衣服，绕佛三匝，却住一面，合掌向佛，即说偈曰：

“最胜无为， 两足世尊， 为调御故， 现斯熙怡。
富能开惠， 令贫满足， 佛演法施， 明发亦然。
一切世间， 之所归趣， 以何因缘， 示此微笑？
无上正觉， 愿为我说。”

尔时，世尊告不空见：“汝见彼处众宝地不？”

不空见言：“唯然，已见。”

“如是，不空见，彼地乃是往昔诸佛之所游化。”

时，不空见心自念言：“我宜速疾至彼地所，如其相貌心入三昧，入三昧已为佛世尊，化作种种众宝法座。”即如其念施置座已，往诣佛所劝请如来升此宝座，白言：“世尊，此处皆是往古来今诸佛如来游践之地。”

是时，世尊往到彼处即就法座。于一念顷如来应正遍知力故，此刹三千大千世界六种震动，踊、遍踊、等遍踊，震、遍震、等遍震，吼、遍吼、等遍吼，动、遍动、等遍动，摇、遍摇、等遍摇，起、遍起、等遍起，东踊西没、西踊东没，南踊北没、北踊南没，西踊东没、东踊西没，北踊南没、南踊北没。光明遍照无量世界，一念之间一切众生，乃至阿鼻地狱，悉受快乐。

佛升法座， 如日晖曜， 一切世间， 之所归仰。
震动大千， 咸生欣悦， 佛登宝座， 如日显照。

一切世间，顶戴法王，欲令众生，普获安乐。
佛就座已，如日融朗，一切世间，尊承法王，
放净光明，照诸刹土。
奇哉斯乘，乘之最胜！异哉斯乘，无能过者！
暂现之处，已不可量，善哉斯乘，乘之弘大！
乘是乘者，不可思议，诸天魔梵，所不能测。

尔时，世尊广长舌相遍覆三千大千世界，普告声闻及众菩萨：“诸善男子，一心静听！是夜难陀天子、修难陀天子、栴檀天子、修摩那天子、自在天子、大自在天子、阿逸多天子、修行天子，如是无量净居天子，于夜后分光色倍常，耆闍崛山欽然大明。尔时诸天来诣佛所，一心恭敬顶礼佛足，以天细末栴檀之香、多摩罗跋沉水天香、天华鬘香、俱修摩等种种华香，以散佛上，重礼佛足，右绕三匝，却住一面，合掌向佛，供养恭敬尊重赞叹。是时栴檀天子默然生念：‘过去诸佛应正遍知，皆为人、天、沙门、婆罗门，敷演诸佛所说菩萨念佛三昧。今我世尊亦应如昔过去诸佛安乐众生，宣说菩萨念佛三昧。’时诸天子作是劝请，我默然许。如是，比丘，栴檀天子、难陀天子、无量净居诸天子等，知我许已忽然不现。”

尔时，世尊即说偈言：

“告诸比丘，于后夜时，诸天身色，光炎倍常。
耆闍崛山，欽然大明，供养尊重，围绕世主。
难陀天子，善喜天子，善意天子，栴檀天子，
自在天子，及大自在，阿逸天子，善行天子，
如是无量，净居天子，有大神力，来至我所。
广设种种，珍妙供养，皆共恭敬，右绕三匝，
头面礼足，却住一面。栴檀天子，默然住已，
发心欲为，教化众生，请说菩萨，念佛三昧：
‘往昔诸佛，已曾说故。善哉释迦，十力如来，
说三摩提，欲令一切，得安乐故。’佛默然许。
时诸天子，已知垂允，我亦于此，耆闍崛山，
如过去佛，所说三昧。时诸天子，已知如来，
默然许之，欢喜快乐，右绕三匝，礼足而去。
比丘听我，所演三昧，如昔诸佛，莫生疑惑！
如来智慧，不可思议！过去诸佛，最上菩提，
于诸知见，心无疑网。如今现在，第一菩提，
我皆了知，心无滞碍。若当来世，欲成菩提，
欲为怜愍，将来世故，我亦明晓，心无毫疑。
是故如来，深解无穷，智力无碍，不可思议。
如彼所知，我悉究尽，一切众生，不测其奥。”

不空见本事品第二

尔时，世尊告长老舍利弗、长老目犍连、长老大迦叶、长老须菩提、长老富楼那弥多罗尼子：“诸天世人皆已来集，汝等比丘各升法座作师子吼。所以者何？此众多有诸声闻人，闻师子吼悉得解脱。”

尔时，世尊告弥勒菩萨、越三界菩萨、不思議菩萨、不空见菩萨：“汝等即时请如来演诸佛所说真实功德师子吼音。”

不空见言：“如是，世尊，唯然已闻。”即说偈赞：

“身色如金，	百福庄严，	为怜愍故，	
了达真谛，	功德具足，	名誉远流，	
今日世尊，	以何因缘，	于大众中，	令我请问？
正觉无伦，	最上莫过，	功德法王，	大智难穷，
调伏世间，	以何因缘，	于大众中，	令我请问？
如来净戒，	定智解脱，	解脱知见，	悉皆无等，
今我善逝，	以何因缘，	于大众中，	令我请问？
威德无比，	得度彼岸，	法王世尊，	能为众生，
作大利益，	善逝何因，	于大众中，	令我请问？
百劫修慈，	习近悲处，	辩才无滞，	善逝何因，
于大众中，	令我请问？		
最上法王，	普利群生，	贫者得富，	盲者得视，
楚毒永息，	恐惧获安，	以何因缘，	令我请问？
佛身净妙，	尘垢不污，	如来之衣，	种种杂色，
世尊族姓，	王中之王，	以何因缘，	令我请问？
佛所著衣，	去身四指，	而不离身，	身能降怨，
以何因缘，	令我请问？		
如来行处，	无诸坑坎，	智慧力故，	所履皆平，
以何因缘，	令我请问？		
如来之身，	不增不减，	行步平正，	不邪不曲，
妙绝常伦，	难可思议，	以何因缘，	令我请问？
仰瞻尊颜，	目不暂徙，	佛行不假，	神足之力，
威仪自然，	庠序可观。		
若为魍魎，	之所捉持，	迷闷失心，	无所觉省；
若睹世尊，	于一念顷，	诸恶永离，	还得正念。
若有众生，	触佛足尘，	于七月中，	身心快乐，
命终之后，	得生善处，	归命世尊，	施一切乐。
若有人病，	极受众苦，	佛以手摩，	即得除愈。
善逝旷劫，	悉得一切，	不可思议，	无数安乐。
佛昔勇猛，	摄取当来，	无量劫中，	所得净法。

我于是处， 无疑异心， 以何因缘， 令我请问？
过去当来， 天中特尊， 今遇调伏， 人中大仙，
以何因缘， 令我请问？”

尔时，世尊告不空见：“谛听！谛听！善思念之。”

不空见言：“唯然。”

世尊告不空见：“我忆往昔无央数劫，尔时有王名无量力，有大神通势力自在。是王住处造立大城，城名善建，纵广正等十二由延。其城七重，面有三门，门城皆以金、银、琉璃、玻瓈、码瑙、真珠、珊瑚庄校严丽。堑亦七重，皆悉七宝。是诸门外以金银沙布饰其地，一门两边各有金银四阙相对。

“如是，不空见，又以金银作大罗网弥覆门上，金网处处悬于银铃，银网往往垂于金铃，风吹铃网皆作箜篌乐器之声，宫商调畅更相应和。王造城已安处其中。斯城堑外有七池沼，金、银、玻瓈、珊瑚所成。此诸池沼有七阶道，亦是七宝之所庄校。金阶道者银为栏楯，银阶道者金为栏楯，银为阶道真珠栏楯，真珠阶道琉璃栏楯，玻瓈阶道珊瑚栏楯，珊瑚阶道真珠栏楯，真珠阶道金为栏楯。如是，不空见，无量力王植众奇华，优钵罗华、钵头摩华、拘物头华、分头利华、那梨尼华，香气调柔，无吝惜者随意采之。其池岸上种种华树，所谓伊曾华树、尼曾华树、迦多曾尼华树、阿提目多迦华树、瞻卜华树、婆利师华树、拘毗陀罗华树、陀□迦梨华树。此诸华树气若天香，亦无守护随意而取。

“又不空见，是善建城有多罗树七重行列，悉以七宝互相交错，金多罗树银叶华果；银多罗树赤真珠叶，华果亦然；白真珠树琉璃为叶，华果亦然；琉璃树者玻瓈为叶，华果亦然；玻瓈树者码瑙为叶，华果亦然；码瑙树者赤真珠叶，华果亦然；赤真珠树珊瑚为叶，华果亦然；珊瑚树者金为其叶，华果亦然。不空见，风吹诸树更相振触出微妙声，譬如乐师善能击发五种之音。又不空见，王所住处如是众声恒不断绝，象声、马声、车声、军声、螺声、鼓声、箫声、笛声、箜篌琵琶歌舞之声，如是众声未曾暂废。王常宣令境内人民，若有所须衣服、饮食、象马车乘，恣随其意一切给与。多罗树间常出乐音，诸人游之五欲自娱。王视国人如父念子，一切奉王犹若慈父。

“又不空见，善建城内开诸街巷廛邑市肆，处处复有四宝池沼，其池相去尽一箭道。是池四岸众宝阶陛，金阶银栏、银阶金栏，玻瓈、珊瑚间错亦然。又不空见，王于诸池植众名华，复于池上种杂华树，伊尼曾华树、迦昙婆华树、阿提目多伽华树、瞻卜华树、陀□迦利华树，芳如天香亦无惜者。城内又建诸园林观，种种华果行列其间。复于园中四方周匝，处处皆有诸妙华池，亦以七宝庄严如前。有众婬女更相娱乐，一切人民恣意游适。

“又不空见，无量力王族姓豪杰，大刹利种所生父母，乃至七世

霄胤相承，悉皆清净容色端雅，人中独绝，财宝巨亿不可称计。又不空见，无量力王深信弘惠虚心大施，施诸沙门及婆罗门，乃至盲聋癱残、百疾贫穷、孤独困厄之人。王所统领八万四千城邑聚落，净业果报七宝庄饰，一一城上复造八万四千栴檀众妙楼櫓。是诸门外开四衢路，路首悉起严丽台观，一切人民任意游戏。常于昼夜楼观台殿巷陌廛里悉燃灯烛，其明猛盛遍照国界，众生蒙光身心快乐。

“又不空见，王有二子，一名师子，二名师子意，久发无上菩提之愿，名称远闻具大威德。尔时，有佛号曰宝肩如来、应、正遍知、明行足、善逝、世间解、无上士、调御丈夫、天人师、佛世尊，出现于世，作是唱言：‘我于今世及以后世，沙门、婆罗门、天、人、阿修罗大众之中，一切知见普为群生说诸妙法，初中后善、语善、义善，具足清白梵行之相。’与大罗汉七百千万亿，皆具神通威德自在。宝肩如来于晨朝时，齐整衣服执持应器，比丘翼从入城乞食。时无量力共其二子，在高楼上欢娱受乐，王遥睹佛功德相好，生奇特心欣跃无极，眷属围绕俱到宫门，告其二子：‘速赍香华、幢幡、伎乐疾至佛所。’即以牛头栴檀末香诸妙珍异，以供养佛及比丘僧，右旋三匝，头顶礼足，却住一面。

“又不空见，王与二子请宝肩佛及声闻众，尽其形寿施诸所安。宝肩如来于天人中，教化已周将般涅槃。时王知佛不久住世，与其二子臣民眷属，前后导从至涅槃所。如来尔时灭度已讫，头面敬礼悲号啼哭，以身投地如大山崩，作是唱言：‘世间眼灭！’重更哀嗟：‘世间眼灭！如来涅槃一何驶哉！犹商失主，佛灭亦然！世间黑闇盲无慧目！’捶胸拍头举声大叫，呜咽扞泪告其二子：‘办诸香汤洗浴如来。’又以种种妙香涂身，一切散华及诸华鬘，无量妙衣缠如来身。七宝为棺，以铁为椁，聚赤栴檀高一由旬，纵广正等一拘卢舍。复以华香散于[廿/積]上，酥油千器以灌栴檀，然后起火；火既发已，复更号恸洒泪如雨。

“尔时，师子作是念言：‘世尊涅槃，我生何为？亦当随佛入于涅槃。’立此誓讫，重以种种珍妙香华散于[廿/積]上，白氎缠身，手执火炬，自投火中火即猛盛，为利众生归依世尊，而说偈愿，赞咏如来：

“如大珍宝聚， 世间之所尊，
生死苦永尽， 于斯般涅槃，
自从今已往， 不睹转法轮！
我所奉法王， 已入于涅槃，
宣扬广大义， 不可复重布。
何当在大众， 闻说于菩提，
诸天及世人， 欢喜赞善说？
我于今日后， 绝不思议声，

世间胜调御，于此而沉沦。
龙神阿修罗，及以紧那罗，
欣悦常歌叹，不复闻斯音。
贫者得满足，苦恼蒙救护，
世尊今涅槃，悉丧所依怙。
父王无量力，及弟师子意，
亦复无慈荫，更不闻说法，
我亦随世尊，速取于灭度。
世间无明道，何用苦生为？
今焚此毒身，愿获不思议。
我昔与父王，常于长夜中，
勤供佛法僧，今得获果报。
若我于佛所，修习诸善行，
为调伏世间，得不思议故，
为令诸众生，发不思议愿。
世尊般涅槃，我投火盛时，
若人见闻者，一切得成佛，
唯除邪谤人，及证正位者。
若我修菩萨，广大无量行，
众生梦见者，皆令得佛道，
唯除邪谤人，及证正位者。
此身如聚沫，要当必有死，
一切众生类，若食我肉者，
是等不可量，疾当得成佛。
我修菩萨行，恶口骂詈者，
是人值调御，必当得成佛，
唯除邪谤人，及证正位者。
若人于我身，修于慈悲观，
求第一菩提，速得成佛道，
唯除邪谤人，及证正位者。
以是烧身缘，为求彼此愿，
若我心真实，即还见佛起。
设得更睹佛，如先住世者，
我身投火中，犹前侍佛时。
佛起如真身，今睹不异昔，
尔乃证诸佛，相续常不断。
唯愿普眼尊，愍摄于世间！’

“佛知王子心，渴仰甚殷重，
即于焰聚中，奋大神通力，

如从三昧起， 光明倍明显。
不可思议众， 咸叹未曾有，
广为时会人， 更作大利益，
所化既已毕， 还入于涅槃。
师子既见佛， 示大威神力，
身心甚欣悦， 坦然快安乐，
深知诸佛法， 不可得思议：

“如来虽涅槃， 犹应众生愿，
不思维戒定， 智慧与解脱，
及解脱知见， 神化不可量。
归依于世尊， 然后当放身，
世间妙威仪， 最胜无伦匹，
自在诸神力， 亦复无等双。
如来还涅槃， 一切咸惊惋，
是故我至心， 归依普眼尊！
归命于善逝， 累尽无为主！
归命永离苦， 怜愍于世间！
正智遍观察， 了达知他心，
除诸烦恼病， 成就无量众。
大医人中尊， 施不思议药，
能善除世间， 一切众疾苦。
归依无上师， 哀矜众生者！
若我赞如来， 一念之功德，
烧身微毫善， 须臾供养福，
如是诸净业， 愿施于一切。”

“如是，不空见，时天、魔、梵及余一切世间人民，悉见师子投身盛火，皆大悲愕生奇特心。命终之后即生梵天，有大神力威势自在，是梵尔时中心念言：‘云何忽然来生此间？’重更思惟往昔人中，已曾奉侍宝肩如来，至心恭敬尊重赞叹，佛涅槃已烧身供养，复说偈颂发弘誓愿，乘此善业得生梵天。‘我今当往至烧身所。’是梵即时忽然不现，譬如壮士屈伸臂顷，便到如来闍维之处，以天栴檀、沉水碎香、俱修摩华、多摩罗跋种种香华不可称数，遍散空中如雨而下，十方交纷若风旋雪，供养宝肩如来舍利，向无量力说其本缘：‘我是王子师子之身，投火供养命过之者。唯愿大王不加慈念！我今已蒙获诸善利，由昔至诚虔恭奉侍，尊重歌叹宝肩如来，功福果报得生梵天。是故大王与师子意，应共珍敬受持妙法，收取舍利分布供养，无令遗落而生懈怠。大王当知，我生梵天，亦常敬持受此胜法。’作是言已忽然不现。

“又不空见，无量力王与师子意，取水灭火，以诸妙香众华、宝鬘幢幡、伎乐种种供养，须臾之顷周遍八万四千城邑，悉起八万四千塔庙，皆以七珍庄校严丽。是诸宝塔高一由延，纵广正等一拘卢舍，于一塔周匝各燃八万四千众香油灯。是诸塔间复以种种香华伎乐供养如前，尊敬受持如此妙法。无量力王以是善根与师子意，经历八万四千劫中不堕恶道，又于八万四千亿劫亲近供养六万诸佛，次第奉敬常不断绝，世世恒作转轮圣王。

“又不空见，宝肩如来涅槃之后，时有菩萨现于世间名普密王，为愍世间出家学道，菩提树下结跏趺坐，一心定意正智解脱，豁然大寤得无上道。又不空见，是师子梵至普密王佛世尊所，住在虚空以天栴檀供养于佛，右绕三匝稽首作礼，请转法轮而白佛言：‘唯愿世尊从道场起摧诸魔军，于净神智无所毁损。愿世间师哀从定寤，调御有解诸声闻众，开演美妙善逝之法。如来前身久修智慧，摄受善法今为人尊，过去世中已发弘誓，愿得佛时当度未度。今愿已满得安隐处，最胜无为寂然妙乐，当开甘露解众三结。’尔时，世尊默然许之。

“时彼大梵及无数天，既知如来当转法轮，咸共欢喜踊悦无量。梵天于时设诸妙供，即发大愿求无上道：‘遇普密王应正遍知，生我净妙功德之聚，以此果报于生死中，常得亲近睹十方佛。若我供养佛菩提树，如是种种所修功德，愿慈愍故为我说法。以此果报，于生死中，常得赞叹诸佛塔庙。’又不空见，师子王子烧此一身，以是功德所修善根，恒住梵世值五千佛，供养敬侍尊重赞叹，植诸善根发不思愿。汝不空见莫生此疑！时无量力王岂异人乎？我身是也。”

时，不空见即白佛言：“是二王子为今现在？为已灭度？唯然，世尊，愿为说之。”

告不空见：“尔时王子师子意者，弥勒是也。时师子者，汝身是也。王子师子舍此一身，宝肩如来佛法之中，教化成就三万众生，安住阿耨多罗三藐三菩提心。”

尔时，世尊即说偈言：

“忆念宿世时， 宝肩无量眼，
出现于世间， 广利一切众。
金色百福严， 慈矜哀愍故，
深解真实谛， 为度诸世间，
显示甚深法， 济苦恼众生。
宝肩正遍知， 一切世间尊，
三轮善逝众， 七十二亿千，
与是诸大众， 入城共分卫。
昔有大国王， 名为无量力，
自在大威德， 势能伏一切。
其王与二子， 俱游高台观，

王于台观上，遥睹调伏仙。
宝肩天人师，翼从诸比丘，
时王与二子，速迎人中尊。
既至如来所，即广设妙供，
顶礼绕三匝，却立合掌住。
请佛及众僧，尽寿奉所安，
衣服及肴饌，极世之珍异。
八万四千岁，奉施未常息，
时王及二子，静心求菩提。
时佛既灭度，收取尊舍利，
为彼宝肩佛，敬造七宝塔，
八万有四千，微妙甚端雅，
一一佛塔燃，八万四千灯。
时王无量力，复于善逝处，
香华众伎乐，深心以供养，
已种不思議，无量诸善根。
历事六万佛，一切世间依，
至诚求第一，无上胜菩提。
比丘莫疑惑，往昔有国王，
汝善聪慧者，勿生于异见，
时彼无量力，今则我身是。
杂华及众香，昼夜明诸灯，
为利阎浮提，供养诸如来。
布施恒不足，闻法亦复然，
曾无懒惰意，一心求菩提，
宝肩正觉尊，无上大明智。
汝昔曾烧身，供养于大仙，
自投猛焰中，初无畏苦心。
烧身如燃炷，以油滌其上，
渐渐不顿尽，譬如净灯炷，
为利众生故，供养涅槃佛。
彼佛已烧身，汝知方便请，
睹佛从火起，光明更明显，
见佛不异昔，心生恃怙想，
即时舍此身，为益一切故：
‘若我果斯愿，敬佛亦如前，
所获诸功德，不可得思议。
我若有宿愿，摄受先世业，
合集百千万，必当得见佛。
我愿若真实，佛应从火起！’

佛智甚清淨，究竟无染著，
澹然常寂灭，相续恒不断，
知师子心淨，亦先照其意，
佛便从火起，相好更殊特。
不空见菩萨，世间怙既起，
一切愿无余，彼复发誓愿，
其愿不思議，不可得称数。
法主矜世故，起于猛焰中，
善逝难思力，光明更殊胜。
彼时一切众，皆悉怀惊愕，
淨心发高叹，欣跃未曾有：
‘奇哉大神通，势力无伦匹，
甚深佛境界，不可得思议！’
一千诸众生，见此神变已，
于诸法不受，善得心解脱。
不空见当知，师子为世间，
请佛还起时，一千诸众生，
于彼善逝处，睹佛神变化，
其心正趣向，无上菩提道。
大悲为世间，广作利益已，
佛还入涅槃，师子亦舍身，
即于命终时，忽然生梵天。
梵天从上来，以天栴檀末，
散之以供养，如来闍维处。
宝肩灭度已，有佛普密王，
最胜人中尊，天王之大仙，
哀愍众生故，出现于世间。
是佛坐道树，得成菩提已，
梵天设美肴，供养于世尊，
头面接足礼，请佛转法轮。
普密王如来，即知梵天心，
默然而许之；梵天大欣庆，
复于烧身所，更发诸大愿。
是梵已曾修，不可思议善，
昔于一劫中，供养五千佛，
至心敬世尊，奉持人中尊。
又告不空见，慎莫怀疑惑，
汝若有聪慧，勿生于异见，
昔日梵天者，今即汝身是。
过去五千佛，善逝般涅槃，

我悉明见汝，一一诸佛前，
烧身以供养，求第一菩提。
过去多千佛，灭度遗舍利，
如是诸佛所，舍身及手足，
为利众生故，修习菩萨行。
近世及远世，我悉咸了知，
常于百千生，勤修诸苦行，
佛在及涅槃，汝愿恒满足。
复告不空见，如此诸大愿，
摄取过去世，无量百千生，
我住自在力，今悉照知之。
汝圣果成就，即时皆明见，
摄取不思议，真实诸行等，
住佛前赞叹，供养两足尊，
是故今劝请，众圣之法王。
普密王佛所，摄取最胜愿，
蒙佛现神通，汝今获此果。”

不空见菩萨，白言牟尼尊：
“百千生诸愿，云何得摄取？
愿少为敷拆，令我得开解。”

“不空见昔誓，雷音成佛时，
见坐菩提树，我当请说法。
先佛名帝幢，普眼之世尊，
一切诸众生，所共归依处，
是时广发愿，求无上菩提。
为日光如来，作大七宝轮，
汝时于彼处，已发最胜愿。
不空见菩萨，此愿我悉知，
造七宝僧坊，杂色以庄严，
奉今修伽陀，广施未来佛，
发此誓愿已，即时而舍去。
第一众尊佛，人中上师子，
名不可思议，善生之世尊，
奉上七宝盖，端饰甚微妙。
天中天大仙，盖身普眼佛，
明灯供养已，是处发大愿。
近世及远世，多有诸如来，
千亿那由他，其数复倍上。

于是诸佛所，发无量大愿，
令一切众生，悉获快安乐。
普密王佛前，先生如是念，
我今说汝昔，修行至菩提，
愿一切大地，皆生种种华。
云雷音佛所，为利世间故，
尔时发誓愿：若有诸众生，
闻我名字者，一切皆得佛。
于帝幢佛所，设大珍妙供，
复发诸善愿：若眼见我者，
于此世界中，皆当得成佛。
在日光佛所，奉上七宝轮，
无量光焰，炫晃甚辉丽，
时复发愿已，誓生佛刹土，
七宝严僧坊，杂色甚雅好，
以此珍奇特，奉施于善逝。
又发誓愿已，得天妙宫殿，
斯处快欢乐，皆悉成佛道。
人中师子王，无上如来所，
奉上珍宝盖，发于殊胜愿：
愿诸众生类，不为日所曝，
身心得安乐，无复热恼患。
盖身善逝所，供施灯明已，
复发弘誓愿：若我命过处，
众生食肉者，愿皆成佛道。
若闻我名者，无有贪吝心，
乃至梦中闻，亦无爱惜意，
一切成佛道，唯除见谛者。
若眼见我者，除诸贪嫉意，
昼夜梦见时，亦舍染吝心，
一切当得佛，唯除见谛者。
若有愍念汝，或生憎嫉者，
是等于我所，当得佛法王。
若汝临终时，又勤求菩提，
我今如实说，汝之真功德，
必于当来世，获是无上尊。
若有处水陆，空行众生等，
食我身肉者，愿悉得成佛。
我已知汝为，安乐众生故，
勤修菩萨道，满足大千行。

众生多疑谤，是故不显现，
如此众生类，即时于是处，
若得信念等，及以欢喜心，
悉当成正觉，唯除见谛者。
若人愿乐见，世间所尊怙，
或乐转法轮，有乐勉众苦，
是人为菩提，利益故发心；
若有乐供养，三世诸法王；
若人欲出生，一切功德聚；
如是众生等，应持此三昧。”

尔时，世尊说是偈已，即从座起还入僧坊，于常静室，右胁而卧。

菩萨念佛三昧经卷第二

神通品第三

尔时，长老舍利弗、长老目犍连、长老阿难，诸天、魔、梵及阿修罗，沙门、婆罗门，阎浮提人咸生是念：“今日如来应正遍知，以何因缘于大众中，直说念佛三昧名字，不为一切广演分别，便从座起而入静室？”

时，不空见心自念言：“诸天、魔、梵悉已集会，世尊今者右肋而卧，我当微现神通变化，示神通已种种赞叹，宣扬如来大悲功德。当如其相摄心入定，以是定力变此三千大千世界地平如掌，皆作众宝微妙杂色。复列八道七宝诸树，金多罗树银叶华果，银多罗树琉璃华果，余宝庄严亦复如此。一切佛刹悬缯幡盖，妙幢宝鬘种种绮饰，优钵罗华、钵头摩华、拘物头华、分陀利华，如是诸华布一切处。”

时，不空见即如所念现大神通，乃至三千大千世界，令诸众生天、龙、夜叉、乾闥婆、阿修罗、紧那罗、摩睺罗伽、人非人等，皆坐众宝莲华之上，华叶无数色香具足，各相知见坐宝莲华。

时，不空见又以定心，入此三昧现大神通，复令三千大千世界地大震动。如摩竭国赤圆铜钵，置平石上倾危不定，大地震动亦复如是。若有众生闻此音声，觉悟之者皆得快乐，譬如东方不动国土，亦如西方安乐世界，其中众生欢娱踊跃。

时，不空见复以清净恬寂调和柔润端正，至直无曲甚深定心，如其相貌示无作神通。于是三千大千世界满虚空中雨大猛火，无一众生身心热恼。此诸群生大火触身，觉是相已快乐无比。譬如比丘入火三昧，身心欣跃彼亦如是。

时，不空见复以定心现无作神通，又令三千大千世界，雨天栴檀

细末之香，香气氤氲遍满大千。若有众生嗅斯香者，开神适体快乐无极。譬若释迦牟尼如来，于昔劫中修菩萨行，定光佛所受记莳时，获不思议无生妙乐，一念之顷不可计众，亦得如是随意欢娱。

尔时，阿难在大众中而作是念：“佛入静室，是谁神力而现斯变？为余声闻目犍连等？将非弥勒菩萨、越三界菩萨、文殊师利菩萨、不空见菩萨？为是修习大乘之人，乃能示此神变之相。”

尔时，阿难问目连言：“世尊说汝于声闻中神通变化为最第一，今此通变非尔为耶？”

目连答言：“长老阿难，汝问何缘有是神通？如此变化非我所为！长老阿难，我所能者，以此三千大千世界内置口中，无一众生生觉知相。复次，阿难，我游梵天，发言音响遍闻大千。如是，阿难，我在佛前作师子吼，能以须弥内置口中，若经一劫若过一劫。阿难，我又住彼炎天言语音声，此间世界皆悉闻知。长老阿难，我能移于天神堂阁，置阁浮提而不动摇。”

又告阿难：“我能降伏恶性毒害，难陀龙王、优钵难陀诸龙王等，又能摧靡弊魔波旬。复次，阿难，我往东方，过三千大千，还住第三世界之中。彼有大城号曰宝门，凡有六万亿千家属，令彼家家皆见我身；复能使此诸众生等，闻说无常苦空之音。复次，阿难，我实有此诸妙神通未曾示现。我今处在莲华之座，悉见诸方一一方分，有阿僧祇无数如来，皆名释迦牟尼世尊，处处僧坊右胁而卧，睹佛刹土有如是相，犹我天眼见千世界。若斯相貌，是谁神通？”

时，目犍连即说偈言：

“善修最胜， 获四神足， 今我神通， 无与等者，
唯除自然， 世间之师。
我今住此， 阎浮提界， 动彼东方， 诸佛刹土。
帝释宫殿， 诸嫫女等， 觉此震动， 皆悉惊悚。
我能含吐， 诸佛刹土， 大海山川， 城邑聚落。
难陀龙王， 及跋难陀， 如斯族类， 性甚毒害，
我之神力， 悉能摧伏。
我住梵宫， 言语之音， 令此世间， 皆悉闻知。
能住佛前， 吞须弥山， 经百千岁， 乃至劫劫。
住炎世界， 凡有声响， 使此刹土， 莫不闻之。
我往宝城， 变身普现， 遍在六万， 亿千之家。
我于此生， 未现斯变。
阿难当知， 吾今所见， 善哉奇特， 灵化神通。
我自见身， 及诸众生， 悉共坐此， 宝莲华上。
历观十方， 大威世尊， 我从昔来， 未见斯瑞。
不疑如来， 自然神变， 或是菩萨， 威神之力。”

尔时，长老大目犍连，说此神通师子吼时，十千众生皆得人身，远尘离垢获法眼净。

尔时，阿难问舍利弗：“如来说汝智慧第一，今此神变将不汝耶？”

答言：“阿难，非我为也！我所能者二十年中，常勤修习毗婆舍那，行住坐卧正念观察，其心澄寂曾无动乱，分别显说无量诸法，方便精求不出法界，唯有如来乃能究尽。长老阿难，汝颇知不？若我以衣置于大地，目连虽有自在神通，尽其势力不能令动。

“长老阿难，汝今当知，我于佛前作师子吼，诸大声闻具大神通，三果学士、天、人、魔、梵、阿修罗神、沙门、婆罗门、一切阎浮外道异学尼犍子等来在会中，若能自知身无我者，我今当以三摩跋提，决定为之师子吼说、大丈夫说、不思議说。唯除世尊一切知见、弥勒菩萨一生补处、住无生忍菩萨摩訶萨、海德三昧菩萨摩訶萨、善建德三昧菩萨摩訶萨、诸佛现前三昧菩萨摩訶萨，大德声闻今可问我，如此身者何者是我？为可见耶？不可见耶？又问异学诸外道等，汝所计身有神我者，为是过去，为当现在？

“长老阿难，我如是相，种种神通变化非一，声闻、缘觉所不能知，亦不能见。何者是我？所言我者为住何处？闻如是声，长老阿难，吾常精勤修丈夫业，亦复恒习知解之行。我今更有心自在力，我能伏心，心不伏我。长老阿难，吾见自身，及以天人坐大莲华。又见诸方在在处处，无数难思阿僧祇界，睹佛世尊坐道树下，大能天子请转法轮，吾当随顺闻如是声。我眼悉见诸世界中，种种缯盖幢幡华鬘，如我即时见此忍土。

“长老阿难，我心念言：为是世尊作此神通？大德声闻之所为乎？菩萨往昔曾种善根，今获如斯变化果报？”

时，舍利弗即说偈言：

“如来不思議， 如是佛功德！
若有善逝众， 神通广难思！
及诸佛弟子， 有学无学众，
于此刹土中， 我智最第一，
唯除诸菩萨， 信念深固者。
长老阿难陀， 我慧无等双，
现在及未来， 无能见过者，
除世调御尊， 及趣菩提人。
我恒勤修习， 毗婆舍那行，
满足二十年， 观察一切法，
精心方便求， 未曾得边际。
我所有智慧， 不可得称量，
我以智慧力， 现在于佛前，

能师子吼说； 唯除异学人，
及行声闻乘， 求我真实者。
若我现神通， 飞腾虚空时，
此刹无人见， 吾之所游处，
声闻亦不睹； 唯除世间雄，
鬪别两足尊， 及以善逝子，
如是诸人等， 知我之所在，
外道众邪见， 悉非其境界。
心常自在转， 禅悦不思议，
若有大士业， 修习深空行。
长老阿难陀， 我现此神通，
一切声闻众， 终不能得知。
奇哉于今日， 悉睹十方佛！
我在于华座， 明见诸刹土，
建列不思议， 宝幢妙华香，
一切世界中， 变化不可称。
长老我心念， 不疑是世尊，
威德善逝众， 种种变化事，
或是不空见， 菩萨之所为。”

是舍利弗师子吼时，一万三千诸众生等，远尘离垢得法眼净。
时，大迦葉亦在众中，阿难心念：“是大迦葉，威德具足神通自在，今者变化将非是耶？”

于是阿难问迦葉言：“此之灵奇是大德乎？”

迦葉答言：“斯神化相非我所为！吾以智力悉能分别显示一切。
长老阿难，我今住于世尊之前作师子吼，能以三千大千世界，其中诸水江河溪壑泉源池沼，百千万亿无量巨海，一切水聚吸置口中悉使枯竭，令诸水性鱼龙之属都不觉知，亦无恼害。

“长老阿难，汝今当知，我于佛前诸天、世人、梵、魔、沙门一切众中，师子正说无畏之言。我力能吹须弥山王、大转轮山、雪山山王，乃至三千大千世界一切诸山皆成微尘，依此山者都不觉知。长老阿难，我能如是，得此自在神通之力。复次，阿难，我又能吹三千大千诸世界中，一时皆成猛炎炽火，譬如劫烧将尽之时，一切众生亦不觉知，又无烧害热恼之者，又不生念烧刹土想。我神力相具足如是！

“长老阿难，吾住此间，天眼远瞩东方世界，亿百千刹诸佛国土，始处处烧终同一火，我既见已心生念言：‘今当示现神通变化。’即如其相以三昧力住此世界，过于东方亿百千刹，能以一气吹彼猛火悉令俱灭。火既灭已从三昧起，复更发大炎盛之火。长老阿难，我神通相及波罗蜜如是满足。若有人天生疑不信，世尊今者右胁而卧，若从定起，汝可往问，唯佛如来能知此耳！”

世尊于时于静室中遥语阿难：“大德迦葉说师子吼，汝善受持。”

尔时，人、天、阿修罗等，皆共叹言：“奇哉上座！”

摩诃迦葉师子吼时，三亿众生皆得人身，远尘离垢得法眼净。八十五百千那由他诸天，亦皆离垢得法眼净。长老不空见菩萨、弥勒菩萨、文殊师利童子菩萨、越三界菩萨，如是无量诸菩萨等，皆被坚固弘誓之铠，闻大迦葉师子吼说，以篋盛华搏如须弥，作此变化供养迦葉，爰及一切声闻之众。空中复化作七宝盖，一一声闻各荫一盖。

尔时，长老摩诃迦葉见是宝盖，语阿难言：“此众决定大乘之行，作是种种神变之事。长老阿难，我坐莲华处处方所，见佛世尊不可称计阿僧祇数。复睹诸刹七宝严净，杂色间错微妙无极，其中众生更相迎接。悉见彼国丰乐之相，譬如三十三天之上，贪醉华鬘，爰著瓔珞，诸天身色如月光明。于虚空中有化宝盖，一一众生各荫一盖，亦如我今等无有异。处处佛刹无量菩萨，从兜率天降神母胎。长老阿难，我今所见，奇哉达行及师子吼！此实非凡之所能为，如是瑞相现大神通。”

尔时，长老摩诃迦葉即于众中，而说偈言：

“阿难汝当知， 我以念定力，
现在于佛前， 以是三千界，
此佛之刹土， 一切诸巨海，
大小江河等， 无量种水聚，
我以神通故， 悉能吸彼水，
置之于口中， 虽皆令枯竭，
众生无伤损， 不恼于水性。
此刹众须弥， 黑山诸山等，
我住神奇力， 悉能吹散之。
我以聪慧智， 又用神通化，
令此佛刹土， 一切成烟焰，
众生不热恼， 亦无畏惧想。
我住于此界， 见彼东方国，
阿僧祇刹土， 悉为火所焚，
奇哉难思力， 令彼火即灭。
既见诸神力， 如此自在行，
令无数佛刹， 悉无有毁损。
我处莲华座， 见此诸刹土，
种种皆端妙， 殊杰鲜俦匹。
又睹兜率天， 菩萨降神时，
不疑诸善逝， 心达自在者。
为是诸声闻， 不空见菩萨，
为弥勒大士， 而有斯瑞相？”

尔时，阿难心生念言：“是富楼那弥多罗尼子，说法人中最为第一，今在此会有大神德，决定诸法得到彼岸，如是神通将非己耶？我今当问。”即便白言：“唯富楼那，如是瑞相大德为乎？”

答言：“非也！长老阿难，我之神通调伏利益诸众生故，力能示现以手掌摩此之三千大千世界，不令众生有伤损者。若有众生乐神通力，示现翻覆大千世界。譬如勇健巨力丈夫，以指捻取迦利沙槃，上下抛掷不以为难；我以右手转侧三千大千世界亦复如是，无一众生有恼害者。长老阿难，若此三千大千水界，我以手指一点取之，悉著口中亦无众生生知觉想。我于佛前作此神通。

“长老阿难，于夜初分，我以清净胜妙天眼，于此三千大千世界，历观诸方何者众生，于法疑滞当为除断；即以天眼观诸方时，处处见有四方世界，其土广大无数众生迷于正法。长老阿难，我心念言：‘不起此坐住破彼疑。’即如三昧清净寂定，调和柔润正直之心，断彼众生于法疑惑。我于会中演说法时，一一众生谓在其前。长老阿难，夜既初分，四方各有无数千众，悉得安住于圣法中，三万众生皆受禁戒，六万众生归依三宝。从三昧起，我如是相神通变化，悉能断除众生疑惑。

“长老阿难，我能安住于此世界，以净天眼见于北方除怨国界，从此佛土过三万刹，有一众生于法疑惑，是世界中佛般涅槃，应声闻法之所化度。我心念言当断其惑，不往彼处即于此坐，遥令众生自然调顺。长老阿难，我今即时如定心相入此三昧，无数众生作法光明。如是相貌，我之声闻诸波罗蜜皆已满足。若使有人于此众中，脱生疑网不信受者，如来起时自可往问。”

即于是时佛神力故，虚空之中出大音声：“阿难，汝今如是受持，如富楼那师子正说。”

时，诸人、天、阿修罗等，皆叹奇哉实为希有：“声闻神通相貌如此，岂况如来真境界乎！”时诸人天作此赞已，富楼那弥多罗尼子，即于众中而说偈言：

“我诸漏已尽， 决定到彼岸，
永脱一切生， 为世所归依。
既入于众数， 异佛神通力，
右手能翻覆， 天地山河等，
不令一众生， 而有伤损者。
长老我神通， 势力实如此，
若有三千界， 大千之水聚，
于此佛土中， 或见或不见，
我能以一指， 悉点内口中，
不使诸众生， 而有觉知想。
我于初夜时， 天眼观诸方，

何者众生等，于法有疑惑，
当住神通力，悉为除断之。
我见一众生，于法堕疑网，
若有淳善心，贪慕求法者，
吾不起此坐，悉除彼痴惑。
四方千亿众，我以净眼施，
能令彼生信，使发菩提心。
时有三万人，从我受禁戒，
六万诸众生，归依于如来，
其心得寂静，安住正法中。
我于初夜时，示现妙神通，
一念于此坐，历观东北方，
周观过千刹，正降怨世界，
彼有一众生，心疑于诸法；
我住此佛刹，彼人疑于法，
欲令见正路，今决其迷惑。
长老我神通，智力实如斯！
唯佛能哀愍，一切诸世间，
此处人不信，可往问世尊。
我今坐莲华，见彼佛涅槃，
处处方刹土，阎维如来身，
及见佛殊特，为是谁神力？
又如我所见，诸佛般涅槃，
广远甚弘雅，不可得思议，
为是佛所作，声闻之人耶？”

尔时，阿难心生念言：“此罗睺罗是佛之子，有大威德神通自在，今亦在此大众之中，如是变化将非己耶？”阿难即便问罗睺罗：“汝于戒学得到彼岸，此之神通汝所为乎？”

罗睺罗答言：“非我所作！长老阿难，我如是相，种种百千威德神力，随意自在为佛之子，或隐或显未曾忆念，不尝在前亦未示现。长老阿难，我能以此三千大千世界之中，百亿四天下、百亿日月、百亿大海、百亿须弥、百亿大小转轮之山，如是广大诸余山等，以四神足置一毛端，不令众生有伤损者，于四天下不相逼迫，彼此去来亦无妨碍，吾之神通自在如此。长老阿难，我能以此三千大千一切水界，大海、江河、溪涧、池沼，以一毛孔嗽置口中，渟流派别本相分明，其中众生适性不改，水之盈竭亦不觉知。

“长老阿难，我住此土，如定心相入此三昧，见东北方难生如来。我在此刹白净王所，撮取一把栴檀末香，供养彼刹一切诸佛。其香芬烈，乃至十方。难生世尊化作台观，高十由延，七宝所成，即在

此处烧众天香。复于台上化作宝盖，其盖足高亿千由延，纵广正等百千由延。彼世界中一切众生，皆共幻作栴檀楼阁。其楼上高百千由延，纵广正等五千由延。如是无量在宝台中，各各庄严不相障碍。长老阿难，瑞相如是，我于声闻具波罗蜜。或有生疑不能信者，世尊若起自可往问，我师子吼如来证知。”

时，罗睺罗即说偈言：

“长老阿难陀， 我以大千界，
百亿四天下， 及无数佛刹，
如是诸刹土， 悉入一毛孔，
我神通如此， 无所譬类者。
世界甚广大， 不满一毛孔，
各安去来业， 悉不见妨碍。
我能如是示， 神力不虚行，
须弥宝山王， 及大小转轮，
复有诸余山， 皆入一毛孔，
以我神变力， 彼此不相碍。
长老我如是， 示此神奇相，
悉见入毛孔， 而身不疲倦。
我又神足力， 以此大千界，
江河大海水， 吸内毛孔中，
而此佛刹土， 一切大水聚，
当入毛孔时， 区别不浑乱。
我在善逝前， 示现于神通，
若疑不信者， 往问普眼尊。
我处莲华座， 见十方菩萨，
头目及妻子， 施以求菩提。
奇哉我所见， 实生希有心，
不疑于世尊， 所作之神变。
为诸大威德， 善逝声闻众，
为是不空见， 弥勒菩萨等？”

长老罗睺罗师子吼时，八十七亿百千那由他诸天人等得法眼净。是诸天等见法、到法、选择众法、明了于法，如是相貌当设供养，以天栴檀细末之香，以用奉散罗睺罗上：“奇哉佛子离垢清净，住大乘行深妙之法，能演师子殊妙之音！善哉罗睺罗未来之世，当师子吼犹若今日。”

尔时，阿难心生念言：“此须菩提阿兰若行，最为第一而无等双，今是大德在此会中。世尊常说此须菩提，能作种种无量神通。”阿难即问须菩提言：“如是变化将非汝耶？”

答言：“长老，非我所为！我能常乐不舍闲处，如彼定心入此三昧，以是三千大千世界置一毛端极微之分，周回旋转如陶家轮，其中众生无觉知者。长老阿难，我于佛前，能师子吼正说无畏。吾以一口气，吹此三千大千世界悉令烧尽，不使众生有热恼想。我曾示现如此神变，能在佛前说师子吼，以此大千世界众生置一指端上升虚空，彼此寂然无诸音声，不相触碍及觉知者。

“长老阿难，我之所能，如彼定心入此三昧，以清净眼一时瞩对八方上下六万诸佛，一一方中又睹六万百千世界诸佛如来，彼处次第见无前后。长老阿难，我如定心，如其相貌作神通行，住此阎浮须弥山顶释提桓因所居天宫，撮取一把栴檀末香，俱时遍散十方诸佛，纷纶弥漫以用供养。我住此刹见彼众生，恭敬尊重赞叹如来，彼土众生悉知我是释迦如来应正遍知声闻之中空闲第一。长老阿难，我之神通，如是相貌究竟彼岸。若此人天于我生疑，有不信者往问世尊，如来自当知此三昧。”

时，佛神力于虚空中，震大音声告阿难言：“如须菩提正说师子无畏之音，汝可受持。”

时，诸人、天、梵、魔、沙门，一切阎浮阿修罗等，既得法利生希有心，惊愕毛竖，叹言：“奇哉！声闻神变乃能如此，岂况如来种种神力，无数三昧真实者哉！”

时，须菩提知诸人天已得法利，即说偈言：

“世间师称我， 阿兰若最胜，
安住禅解脱， 现无量神力。
长老阿难陀， 我能以大地，
置于一毛端， 旋之而不危；
亦如陶家轮， 虽转不倾侧；
又于世尊前， 破碎一切地，
及以诸山岳， 无有损伤者。
我住神足力， 威势皆如此，
我能以手掌， 举刹及众生，
安置虚空中， 从上次第下，
亦无一众生， 惊疑怖畏者。
我入三昧时， 见彼东方佛，
其数有六万， 南方亦复然；
我复见西方， 六万世间尊，
北方及上下， 斯数亦如是；
及睹众楼阁， 妙绝无等伦，
以少栴檀末， 供养诸世尊。
我实有若斯， 无垢神通行，
能大师子吼， 及诸示现等，

不能深信者，可往问如来。
我无众生想，亦无无生想，
无佛无法想，一切无相故。”

菩萨念佛三昧经卷第三

弥勒神通品第四

尔时，弥勒菩萨摩訶萨心生念言：“是诸声闻有大威德无数神通，各各自说大师子吼。我当于此人、天、魔、梵、沙门、婆罗门、声闻、菩萨大众之前，微现神变。”即于晨朝语阿难言：“大德，今可正衣持钵共往佛所。”到已头面礼如来足白言：“世尊，我今欲入王舍城中分卫乞食。”

世尊知时默然而许，于是弥勒告阿难曰：“我向心念，初受食处，于此众生先当令发无上道心，然后乃取此人饭食。大德阿难，我已发意，今便共行入城乞食。”诣大长者婆罗门家，到已持钵默然而住。

长者见已即便白言：“善来比丘，久望慈顾，愿圣今者受我蔬食。”

弥勒菩萨语长者言：“我今未能受尔供养。汝若能种无上菩提善根因缘，当受汝食。”

是时，长者即白弥勒：“若能以我所施之食，供养恒沙诸佛世尊，然后乃当发菩提心，决定大乘真实之行。所以者何？我于先佛种善根故。”

时，阿逸多答长者言：“若能安住如是誓愿，我当以食供养恒沙诸佛世尊，皆使周遍。”

长者复言：“唯然，仁者，我当真实发大誓愿，愿以此食供养恒沙诸佛世尊悉令周普。”如是三白。

尔时，弥勒语长者言：“汝今便可时施所供，当以献上恒沙诸佛。”尔时，长者即以名膳奉授弥勒。弥勒受已，于长者前一念之须，忽然往彼恒沙佛所，供养周遍奉设既毕，还长者家。

长者见是神通之相，叹言希有踊跃无量：“我今复应种诸善根，奉施甘果肴膳美味，严饰床座皆悉丰足。”

长者复持一切珍宝，香华、华鬘、金衣、素叠，俱共往诣至如来所。到已头面敬礼佛足，于如来前发菩提心，又立大愿而作誓言：“若有众生修菩提行，闻我施食善根因缘，一切当得无上菩提。若吾斯愿诚谛不虚，必当获得阿耨多罗三藐三菩提！时无数菩萨及诸声闻，一切大众咸来集者，此之三千大千世界，即时应当六种震动。”发是誓已大千刹土，便大起踊具十八相。

是时，长者语阿难言：“大德今者现为我证！若不信者问于世

尊，神通相貌具足如是。我今未得无上菩提，自在变化已能如此。”

弥勒菩萨语阿难言：“我忆过去阿僧祇劫造光佛所，修得少分诸佛如来所行三昧。获是定已，见于东方无数诸佛各住彼刹，以三昧力于无量劫，方便度脱不可计众得阿僧祇神通变化，住于阿耨多罗三藐三菩提道，犹今王舍婆罗门也。大德阿难，我于往昔莲华上佛应正遍知所，以一神通化度三万亿那由他百千众生住无上道。大德阿难，我于往昔最高如来应正遍所，得普世定度脱六万欲界诸天发菩提心。我具如是神通相貌。”

时，阿逸多即说偈言：

“正服持应器， 往诣能仁尊，
头面礼佛足， 白言行乞食。
佛即许其去， 当广利众生，
吾般涅槃后， 汝应次作佛，
名誉及功德， 一切皆具足。
我时心念言：‘今日行分卫，
若初施食者， 令住三菩提。’
时彼大长者， 见我行乞食，
即便从座起， 恭敬意无量：
‘善来阿逸多， 希现乃如此，
今来一何晚， 唯愿前坐食！
大士法难思， 当设鲜微膳。’
‘长者汝若能， 为利诸人天，
发无上菩提， 我当受汝食。’
‘即时若能尔， 我当立誓愿，
阿逸汝即时， 能以所施食，
奉献恒沙佛， 悉令周遍者，
然后我当发， 无上菩提心。’
‘长者若定能， 作此真实誓，
施于恒沙佛， 愿得大果报，
我今保此誓， 建立必不虚。’
持钵受食已， 普供人中尊，
修行菩提道， 利益诸众生。
阿难是长者， 见我神通事，
心敬大欢喜， 叹仰未曾有，
其心即安住， 无上坚固愿。
复施珍果膳， 严饰妙香华，
素叠及名宝， 种种众妙供，
共我诣如来， 深发菩提愿。
长者发誓已， 更作广大愿，

其愿无限量，不可得思议，
众生若闻者，此刹成佛道。
造光如来处，得此微妙定，
诸佛之所说，施不思議乐。
造光世尊所，获得此三昧，
尔时我悉睹，十方诸如来。
若得大威力，乃能见是事，
安住此三昧，示现诸神通，
百阿僧祇劫，修习种种行，
利益诸众生，未曾有休息。
莲华上佛所，得是三昧已，
我以种种化，七十千众生，
皆悉令得修，无上菩提道。
最高如来所，专修诸梵行，
得微妙三昧，施不思議乐。
最高善逝处，又得普世定；
尔时复安住，月出三摩提，
迦葉如来所，得是深三昧。
大德我如此，示现神变时，
摄取于往昔，百千世神通。
若住此威势，能作种种化，
我亦见诸佛，现作如此行。
若有欲乐见，诸佛世之师，
复有欲愿闻，法轮深妙音，
亦乐拔世间，一切生死苦，
当勤受持此，清净三昧王。”

尔时，诸天、世人、魔、梵，一切阎浮及阿修罗，闻阿逸多师子吼已，生希仰心叹未曾有。

赞佛音声辩才品第五

尔时，不空见菩萨摩訶萨，即从三昧庠序而起。时诸人、天、龙、神、魔、梵、沙门、婆罗门、阿修罗等一切世间，皆悉赞言：“异哉至法！”

时，不空见告阿难言：“妙哉！诸佛实为希有，世尊大悲无不具足，故名如来应正遍知，获得无上菩提之道，知一切法无生无行无得无失，波罗奈国仙人鹿苑，三转十二行无上法轮，沙门、婆罗门、诸天、魔、梵，一切世间无能转者，所谓是苦、是苦集、是苦灭、是苦

灭道，八圣道分无数章句，无量诸相无限行处，如此义味赞诵解说，分别敷拆无不具足。”

时，不空见复告阿难：“善哉！诸佛大悲满足，故名如来应正遍知，得是无上菩提之道。今此大会诸声闻众，未曾闻法当令闻之，先所未说今当为说，不思议法当思议说，所未得法今当使得，未学之法令得修习，无相之法作有相说，略说少法启悟弘多。今告此众诸阿罗汉，毕竟作证无著真人，永得解脱无始生死。阿难当知，譬如有人以一把[麥+戈]投恒河中，谓能以此断彼驶流，此人所作为难不耶？”

阿难答言：“如是甚难。”

时，不空见语阿难言：“诸佛如来应正遍知得无上道，为诸声闻说未闻法倍难于彼。复次，阿难，譬如有人生无口舌，声震恒沙一切世界，此为难不？”

阿难答曰：“如是甚难。”

不空见言：“诸佛如来应正遍知得无上道，为诸声闻不思议法作思议说尤难于彼。复次，阿难，譬如有人指虚空中示种种色，为难不耶？”

阿难答曰：“如是实难。”

不空见言：“诸佛如来应正遍知得无上道，令诸声闻所未得法今当令得弥难于彼。复次，阿难，譬如有人无有手足及咒术力，担须弥山或欲履水，或持浮木渡于大海，此为难不？”

阿难答曰：“如是甚难。”

不空见言：“诸佛如来应正遍知得无上道，为诸声闻以无相法作有相说，以未学法作有学说又难于彼。”

时，不空见即说偈言：

“诸佛不思议， 深行大慈悲，
常施法光明， 相继恒不绝。
无数那由他， 亿劫甚难见，
无比最胜尊， 未闻当令闻。
有为缘起转， 无实恒虚伪，
毕竟常无生， 一切法空故。
诸佛所行慈， 不可得思议，
佛说所未说， 如此难见法，
利益诸人天， 普及于一切。
诸如来深解， 不可思议法，
能为声闻众， 说有思议法，
佛说无相法， 能作有相说。
外道痴所迷， 不识生死源，
如来既知己， 皆悉令摧伏。
住十力敷演， 未得法令得，

世尊真实说， 利益诸人天。
欲以一把[麥+戈]， 断截恒河水，
长老此虽难， 未足称为难；
世依说无生， 斯难过于彼。
若人无口舌， 声震遍诸刹，
虽复能如此， 不足以为难；
未学令得学， 是则最甚难。
若人指空中， 言有种种色，
诚能为此事， 岂足称甚难？
未得法令得， 我说最为难。
若人无手足， 担负须弥山，
欲渡于大海， 未足以为难；
无相说有相， 此则倍难彼！”

时，不空见复告阿难：“诸佛世尊希有殊特，于阿僧祇无量诸法，决定究竟到于彼岸，故名如来应正遍知，戒、定、慧、解脱知见等众一切法相无取著行，建胜宝幢出一大音。若有众生乐闻施惠得解脱者，即生念言：‘如来为我说施利益。’若有众生乐闻禁戒得解脱者，即生念言：‘如来为我说戒饶益。’若有众生乐闻三昧得解脱者，即生念言：‘如来为我说于三昧。’若有众生乐闻智慧得解脱者，即生念言：‘如来今者为我说智。’若有众生乐闻解脱得济度者，即生念言：‘如来今日为说解脱。’若有众生乐闻解脱知见之者，即生念言：‘如来为我说于知见。’若有众生乐于生天得解脱者，即生念言：‘如来为我说于生天。’若有众生乐闻无常得解脱者，即生念言：‘如来为我说于无常。’若有众生乐闻说苦而得解脱，即生念言：‘如来今者为我说苦。’若有众生乐闻无我得解脱者，即生念言：‘如来今者为说无我。’若有众生乐闻寂灭得解脱者，即生念言：‘如来为我说寂灭法。’若有众生乐闻不净得解脱者，即生念言：‘如来为我说净法。’若诸众生乐闻无上道得解脱者，即生念言：‘如来今者为我赞叹诸佛功德说大乘法。’无一众生闻如来说如此法已不解脱者。”

时，不空见即说偈言：

“此闻调御师， 于众中演说，
戒定慧解脱， 解脱知见等，
如是一切法， 宣说皆作佛。
乐闻说施戒， 而得解脱者，
各闻世间依， 叹施戒功德。
乐闻说定智， 解脱功德者，
即闻佛世尊， 演不思议音。

乐生天解脱， 牟尼即为演。
乐闻智慧者， 天中天今说。
乐闻无常苦， 无我不净说，
寂灭等诸音， 而得解脱者，
即时便得闻， 不可思议声。
若有欲乐闻， 辟支佛功德，
善逝今便为， 说斯缘觉乘。
闻佛诸功德， 如此解脱乘，
世尊说法已， 众生求菩提。
如此一切音， 不可得思议，
佛所宣诸法， 利益于世间。
既蒙解种种， 清净之妙声，
即时悉皆发， 无上菩提心。”

时，不空见复告阿难：“诸佛世尊殊特希有，成满一切无数善根，故名如来应正遍知，亲近供养无量诸佛，布施调伏一心寂定，今得无上菩提之道，具足成就无数辩才。释迦如来得无量辩、最无上辩、无能答辩、无取著辩、胜解脱辩、无挂碍辩、成就性辩、成教化辩、施无热辩、有无问辩、豫知之辩、若有相辩、若无相辩、静默然辩、能除恚辩、种种章句及名字辩、甚深句字及宣示辩、宣示甚深调柔之辩、无量譬辩、无问答辩、具足定辩、具广大辩、具难思议辩、具开敷辩、具清净辩、具无毁辩、具足聪慧无毁损辩、具心无著辩、具心无吝辩、具足无失字句之辩、具无盗辩、具无妄辩、具足开发说法意辩、具足说法开发烦恼生净心辩、具足亲近说章句辩、具说过去辩、具说未来辩、具说现在辩、具说希有辩、具足无生胜妙智辩、具足一切大众喜辩。”

时不空见，即说偈言：

“昔已曾至心， 供养无量佛，
是以人中尊， 今得无上道。
不思議善根， 阿僧祇诸辩，
无碍开发辩， 佛得此众辩。
无上解脱辩； 成就教化辩；
广宣诸相辩； 有问无问辩；
种种说甚深， 随顺譬类辩；
清净难思音， 具足妙说辩；
淳净义成就， 决定众相辩；
不思及不退， 无卑无下辩；
善哉明慧人， 无著无毁辩；
不失字章句， 无妄摄乐辩；

能断烦恼心， 不忘十力辩；
最上及亲近， 宣说三世辩；
若圣与不圣， 如此随顺辩；
无远无生等， 近听远闻辩；
说善逝功德， 音声清畅辩。
若人以一毛， 点取大海水，
可知其数量， 能令干竭尽；
无有知诸佛， 如来大胜辩。
或有量虚空， 能知其边际，
能秤须弥山， 亦可识斤两。
如来智辩力， 无能摧伏者，
虽复历劫数， 不测如斯辩。”

时，不空见复告阿难：“长老当知，诸佛世尊大梵音声、师子音声、雄猛之声、龙王音声、弦声、歌声、柔软好声、大小雷声、不思議声、无量妙声、无边胜声、满足音声、不退之声、迦陵频伽声、清净欢喜声、如来分别声、如来识了声、如来甚深声、如来无毁声、如来不却声、如来清彻声、无衰无损声、如来美妙声、如来最美声、如来无不美声、如来广具足一切功德声，是处说如来应正遍知，以一音声令一世界，其中众生皆悉乐闻。又以一音令二世界，其中众生亦愿乐闻。如来一音，乃至百千万亿那由他无边世界，其中众生乐闻亦然。彼处众生闻如来声，如是解了，如是识知，皆言如来为我说法。如是，阿难，诸佛如来不思議音利益之声，譬如日轮照阎浮提，有目众生皆蒙慧利；如是如来应正遍知，音声法轮清净微妙，济拔一切亦复如是。

“长老阿难，譬如初春十五日夜月轮圆满，清明澄照无诸霞翳，阎浮提人皆出游观得恣欢娱，缘月盛故；如是如来应正遍知，音声法轮清净微妙，众生所以得利益者，缘遇如来法光明故。长老阿难，譬如众川江河溪壑巨细诸水，悉入大海皆成一味，而此一味具足众味，亦有无量诸妙珍宝，人及非人虽贪此宝，大海深广难得得渡；如是如来应正遍知，清净音声法轮难解，令诸众生得法宝利，无量安乐亦复如是。长老阿难，譬如大地开发种子生长万物，利益众生无不丰溢，聚落城邑帝王京畿，一切境界皆依此地；如是如来应正遍知，音声法轮清净微妙，拯救一切无量众生，悉令欢乐亦复如是。长老阿难，譬如虚空，世间去来无所妨碍，而此虚空能安乐物；如是如来应正遍知，音声法轮清净微妙，饶益一切亦复如是。长老阿难，譬如三十三天上，波利质多、拘毗罗树华叶芬敷，诸天游观莫不欢适；如是如来音声法轮，清净敷演一切法声，甘露利乐亦复如是。”

时，不空见即说偈言：

“世尊梵王音， 阎浮提第一，
师子雄猛声， 及以大龙声，
弦竹调软音， 十方不思議，
钟鼓雷吼声， 无边普震声，
佛土满足声， 未曾衰减声，
迦陵频迦声， 爱顺欢喜声，
圣喜无浊声， 教与无教声，
甚深无为声， 无讥毁谤声，
难见善分别， 句字之音声，
无诸衰损声， 美妙普遍声，
无有系缚声， 及无遗忘声。
一切功德声， 世间依所说，
能以一音声， 遍满一切界，
调伏群萌类， 欢喜悉乐闻，
皆云今如来， 独为我说法。
如来以一音， 乃至恒河沙，
无量世界中， 众生皆乐闻。
譬如出晖明， 照耀一切物；
世尊如是音， 为众演说法。
初春十五日， 满月光澄净，
如此明月轮， 遍照阎浮提，
皆令得欢乐， 利益亦无边；
世依犹斯月， 睹者无不欣。
清净妙音声， 能为利一切，
阎浮提最上， 不可得思议。
如大海无边， 众宝之所出，
深广难可济， 饶益一切众；
大胜佛如是， 最上无过者，
有教无教等， 音声甚难解。
清净无所毁， 能施一切乐，
于此三千刹， 安置一切众；
佛音声如是， 利物难思议。
虚空无挂碍， 能通诸飞行；
世尊音如是， 广润一切众。
如天香华树， 敷荣善利益；
如来诸音声， 具足益世间。
我于一劫中， 说佛声功德，
虽复历百劫， 不测其始终；
诸佛亦如是， 不可思议音，
十方诸众生， 异口无边辩，

说佛声功德，不能尽其际。
世间依如是，不可思议音！
若有诸水陆，一切众生等，
假令悉得佛，不测声涯底。
诸善逝如是，不可思议音！
如此调御师，音声无与匹，
若能随顺念，终不堕恶趣。
若有诸菩萨，闻佛具足音，
当得佛法王，不思議音声。”

时，四天王、释提桓因、焰摩天子、兜率天子、自在天子及大自在，并与其子名曰商主，大梵天王、净居诸天，复有大力威德诸天，欲色二界诸天子等，闻不空见菩萨所说佛声功德，叹未曾有，以天梅檀细末之香，散不空见菩萨摩訶萨，乃至十方供养已毕。

时，有六十亿百千那由他欲色诸天，闻此音声皆种无上菩提善根。五千比丘亦发无上菩提之心，被弘誓铠。七百万诸比丘尼，发无上心及弘誓愿。百千优婆塞从华座起，诣不空见大菩萨所。复有二亿百千那由他诸女人等，各脱身上珠宝瓔珞，奉不空见菩萨摩訶萨，亦发无上菩提大愿。

赞如来功德品第六

尔时，不空见菩萨摩訶萨告阿难言：“奇哉！希有诸佛如来，具足深知生死往来，忆识生处亲戚眷属，善知烦恼诸恶过患，具足相好，具足行舍、大舍意念、戒、定、智慧、解脱、解脱知见，具足六通到于彼岸，若慈大慈、若悲大悲、若喜大喜、若舍大舍，最胜无伦到于彼岸，威仪神通一切诸法最胜无碍到于彼岸，若处非处示导诸方利益最胜到于彼岸，及舍摩他、毗婆舍那最胜无比到于彼岸，一切禅定解脱三昧、三摩跋提最胜无上亦到彼岸，无贪、无嗔、无痴、无慢、无恚、无过、无有慢慢、无惑无恚，度脱五道、四毗舍罗、众生善根、业报论议最胜无等到于彼岸，一切众生戒聚不断，不漏不浊无杂无言，慧明清净勇猛殊胜，沙门、婆罗门、人、天、魔、梵，一切世间之大法主，无一众生能测如来戒定之分如毛发许，更无有人能超过者。长老当知，应如是观：‘我能究尽虚空边际，不能度量诸佛世尊戒、定、智慧、解脱知见。所以者何？以无边故。’如来戒定神通诸法，非是浅识之所思议，深不可测无能穷者。”

时，不空见即说偈言：

“世尊生死尽，住胎难思议，

法性以为母，不可得为比。
具足善功德，世间无能及，
身相三十二，八十种妙好。
世间叵思议，摄取诸善业，
妙哉人中尊，具足善超出。
若舍及大舍，烦恼心解脱，
方便诸胜业，满足无与等。
具足戒定智，解脱知见分，
诸佛法无边，六通到彼岸。
如来具慈悲，喜舍诸行处，
能解众生缚，拔济种种苦。
诸佛深智聚，不可得思议，
威仪无等比，神通到彼岸。
无诸烦恼行，善解于真谛，
若处及非处，利益悉具足。
定解脱如此，不可得思议，
善解舍摩他，毗婆舍那等。
已到世所无，永离诸恶心，
善学定解脱，除灭愚痴患。
净戒不断绝，不漏亦不浊，
善学戒无失，勇健明哲人。
无有一众生，而怀疑谤心，
沙门婆罗门，人天及魔梵，
心信不怀疑，常善学清净。
我能知虚空，四方广大相；
不能测勇猛，无上清净戒。
能以一气吹，海水令枯涸；
不能测如来，清净法明戒。
能以一气吹，须弥令碎尽，
大小转轮山，亦复成粉尘；
不能测如来，净戒之崖际，
虽复历劫数，不能得其量。”

时，不空见菩萨心生念言：“善哉如来应正遍知，愿屈威神降临众会！我今欲为诸菩萨等，请问如来念佛三昧。世尊先于大众之中，虽说其名竟不敷演，便入静室右胁而卧。”

尔时，世尊即知其念，佛神力故令此三千大千世界，六种震动具十八变。亦如前说放大光明，普照此土娑婆世界，日月星宿、欲界诸天、无边恒沙众梵天等，其明隐蔽悉不复现，唯佛神光显耀殊特。愍众生故即从卧起，齐整衣服往大会所。时诸世间人、天、沙门、婆罗

门等及阿修罗，各见如来殊胜光明，从华座起往诣佛所，恭敬合掌却住一面。

时，不空见遥睹佛来，容色端严威仪庠序，仰瞻相好无不具足，见已即告长老阿难：“世尊今从静室而来，必当敷演显发最胜第一义谛无虚妄说、巧妙宣说、无分别说，善能思量不起恶业，身业无毁、口业无讥、意业无失三业皆净，戒、定、智慧及以解脱、解脱知见亦悉具足，无上方便神通利益，不思议辩殊特具足，善知生死无能过者，住胎清净、母族豪胜、众善功德最为具足，不可思议相好具足，往昔因缘及意具足，烦恼解脱心得具足，若舍大舍超出具足，五识无取离染具足，五分法身清净具足，究竟已到六通诸法及法性相皆到彼岸，毗婆舍那及舍摩他、根、力、觉、道到于彼岸，慈悲喜舍不可思议，深心惭愧到于彼岸，已至诸法自在彼岸，过去、未来、现在诸法皆悉知见不著不退，能知一切过去身业，亦知转变到于彼岸，口意二业亦复如是。长老阿难，如来世尊一念能知一切众生心行善恶莫不了达。”

时，不空见告阿难言：“譬如大海深广难渡，诸佛戒品渊旷亦然。譬如须弥永不可倾，如来定品难动亦然。长老阿难，譬如虚空，清净容纳无有齐限，诸佛三昧摄取无边清净智品，又摄一切众生净心。长老阿难，譬如日光，悉能临照无量色像，如来法光无幽不烛。长老阿难，譬如大火，焚烧山野一切众物，如来法火能烧众生无量烦恼永得清净。长老阿难，譬如涌泉，盈流出外成于渊池，能洗万物皆令洁净，如来法水亦除众生一切结累常得获安。长老阿难，譬如医王，善疗众生种种疾患，如来法药能消众生生死重病皆使永除。长老阿难，譬如时雨，润益卉木无不增长，如来法雨亦润一切枯槁众生。长老阿难，如狮子吼，能使众兽皆令慑伏，如来法音能坏众生计我见者永得远离。长老阿难，譬如大船能济彼岸，如来法船渡诸众生四流彼岸。长老阿难，如优昙华希有难见，如来出世亦复难遇。长老阿难，譬如波梨质多罗树，其华敷荣馨香殊特，佛大人相明发亦然。长老阿难，譬如父母能育诸子，如来亦尔善利众生。

“长老阿难，若人说言如来出世，无边正说是名真说；若人说言如来出世，说不思辩是名正说。长老阿难，略说如来有无边辩、无取著辩、无挂碍辩、胜解脱辩、成就妙辩、常随顺辩、渐亲近辩、有无问辩、微妙净辩、最上辩、慈大慈辩、悲大悲辩、喜大喜辩、舍大舍辩、佛出世辩、又利益辩。长老阿难，若人说言如来出世，具足利益一切众生，是名正说。长老阿难，若人说言众生无安、无救、无归、无趣、无主，如来出世能作安、救及归、趣、主，是名正说。

“长老阿难，我若一劫或至百劫，宣说诸佛世尊功德智慧辩才，亿不及一。又于无量一切诸劫，宣述如来应正遍知功德辩才不能穷究。长老阿难，譬如有人，羸老挛癖住他人所，语彼人言：‘奇哉丈夫！我虽如此，能以一毛点取一切无量诸水，内置口中悉令枯竭。’此

人既无神通咒术，能为斯事为可信不？”

阿难答言：“此为难信。”

不空见言：“实不能也，徒空言耳！如是，阿难，我说诸佛功德辩才不能穷极，犹如彼人无竭水理。长老阿难，假使我于亿百千那由他劫，不能宣说诸佛功德智慧辩才一毛之分，唯佛与佛乃能尽耳！长老阿难，如此大地容受众生，乃至有足及以无足四足多足、有色无色、有想无想非有想非无想，若此世界、若他世界，若干世界、百千世界、无量无边一切世界，其中众生当得成佛；是诸世尊于亿百千那由他劫，说佛功德不能穷尽一毛之分，如是功德无不具足。”

时，不空见而说偈言：

“长老阿难陀， 法王从彼来，
一切诸世众， 无不兴供养。
胜炎光明主， 功德皆无数，
最胜利益说， 真说不生说，
谛说无妄说， 无异及善说，
出微妙音声， 大智善宣说，
身口意清净， 不缘虑诸恶。
如来胜戒定， 第一智解脱，
解脱知见等， 威仪常难思。
无上神通智， 利益最无比，
善得无垢行， 最胜微妙辩。
无上人中尊， 具足知生死，
住胎既无比， 母族亦复然。
不思议殊相， 八十种妙好，
容色甚挺特， 端正无有比。
具足无惑心， 舍大舍亦尔，
超出一切欲， 五识无不具。
证智超六通， 具足四无碍，
备无量知见， 难思众神变。
舍摩毗婆那， 皆悉度彼岸，
达舍离垢主， 威仪恒自在。
众中大神王， 徐行从彼来，
无著修伽陀， 住于十力智，
行慈演法光， 一切胜智说。
能知大海水， 无边深广量；
不测无上力， 净戒定崖畔，
虽历亿千劫， 不知其限齐。
以手接须弥， 上掷至梵天；
不能动如来， 最初甚深定。

游猎虚空中，可知其边际；
无有能测度，如来不毁智。
能以足履虚，穷极其限量；
不能测离垢，弃累人中尊。
如日能除闇，悉见善恶色；
自然世间师，能灭愚痴瞋。
譬如月盛满，一切皆欣乐；
法月光明王，睹者皆欢喜。
如夜燃明灯，有眼无不见；
调伏无比灯，能演法光明。
世师法灯炬，善灭一切阴，
宣说自然法，普闻于众生。
大智胜医王，犹如涌流泉，
法药消众病，能施一切乐。
譬如大龙王，普降于甘露，
能令此大地，一切皆沾洽；
大悲哀世尊，法雨亦如此。
譬如师子吼，蠕动皆怖畏；
如来震法音，降伏诸外道。
譬如大牢船，能运载一切；
佛度多亿众，济彼四流岸。
譬如优昙华，奇哉称希有；
人中尊难遇，乃复过于此。
一切诸世间，常所归依处，
如天喜见城，婆梨质多华，
芬敷垂光彩，诸天所游乐。
世依踰于彼，相好甚微妙，
世尊已为我，示现诸神变。
我今少宣说，诸佛之功德，
以我所修业，以施利众生。”

菩萨念佛三昧经卷第四

如来神力证正说品第七

尔时，世尊以金色手，摩不空见菩萨顶上，出广长舌而告之言：“善哉！善哉！汝不空见，善说如来应正遍知真实功德，信如所言。又不空见，若人说言无安无救、无归无趣、无主众生，如来出世能为如是诸众生等作安作救归趣主者，是名正说。又不空见，若人说言，如来出世说不思辩及无边辩，是名正说。又不空见，若人说言，

一切众生深著贪欲嗔恚邪见，如来出世悉能除断贪欲等病，是名正说。又不空见，若人说言，一切众生嫉妒缠垢之所染著，如来出世悉令除断，是名正说。又不空见，若人说言，一切众生无惭无愧，如来出世能使众生惭愧具足，是名正说。又不空见，若人说言，一切众生深著悭慢，如来出世悉能除断令无悭慢，是名正说。又不空见，若人说言，一切众生无慈无悲无喜无舍不善恶念，如来出世悉令具足四无量心利益善念，是名正说。又不空见，若人说言，一切众生无诸善根，如来出世教化一切令种善业，是名正说。又不空见，若人说言，五浊恶世众生病增，如来出世能作安乐，此人所言即是我说。所以者何？我出恶世说法利益诸众生故。”

尔时，如来摩不空见菩萨顶时，于一念顷，此界众生承佛神力，悉见东方清净刹土无量无边阿僧祇佛，及闻诸佛说法音声；如是南方乃至十方，如观掌中庵摩勒果，一切众生悉皆见彼清净佛刹。又一念顷，如来世尊应正遍知，以金色手摩不空见菩萨顶已，以佛威神示现往昔最胜愿力，即见上方清净佛刹无量无边阿僧祇数已灭度佛。又复受持三昧力故，得见未来一切诸佛。

时，不空见睹诸佛已，即从座起，齐整衣服，右膝著地，合掌恭敬，白佛世尊而说偈言：

“三千大千水， 人或知其限，
善调御世尊， 戒品不可量，
假使旷劫思， 不能测其岸。
如有勇健士， 一吹震须弥；
佛入初禅定， 千劫不能动。
足履虚空游， 能知其边量；
纵使穷劫中， 不能度佛智。
虚空无形量， 狂风亦能动；
世尊无烦恼， 莫能断其辩。
如日照虚空， 其光甚明彻；
大仙尊辉相， 映蔽于一切。
犹月星中最， 圆光甚可乐；
如是法月王， 一切皆归仰。
譬如优昙华， 世间所希有；
调御天中天， 难值过于此。
今者大圣尊， 哀矜摩我顶，
金色百福严， 怜愍利一切，
深解真实谛， 功德悉具足。
世依善宣说， 言论人中上，
敷演难思音， 普闻十方界。
自然尊慈念， 以手摩我顶，

得见恒河沙，最胜世间王。
人中大牟尼，一念摩我顶，
悉睹恒沙佛，犹如阿弥陀。
天中尊利益，一念摩我顶，
得见不动界，阿閼两足尊。
大悲所行处，一念摩我顶，
得见灭度佛，一切世间师，
大慈所行处，善调伏诸根。
我乘昔愿力，即于摩顶时，
得见未来佛，弥勒世依等。
即摩我顶时，得见过去佛，
亦得睹当来，十方难思尊。
佛眼调伏尊，即时摩我顶，
复因宿妙愿，得见清净刹。
如来不思议，神通亦复然，
智定诸功德，皆不可称量。
世尊慈悲故，哀愍见教化，
如来金色手，以摩我顶上，
得见十方佛，金塔如恒沙，
复见十方界，无数诸如来，
殊胜银宝塔，庄严种种色，
百千众伎乐，供养常不绝。
我又见他刹，诸佛众具塔，
金银及玻瓈，各高一由延，
端严甚精妙，不可以言宣。
见诸牟尼塔，种种七宝严，
住于虚空中，天华悉周布。
又见殊胜塔，高十二由延，
及睹灯明佛，净光照诸刹。
我复见处处，不思議众塔，
又睹余胜尊，以手摩我顶。
佛以柔软手，一念摩我顶，
见彼诸如来，安住于刹土，
或复在空中，而现种种相。
复睹诸菩萨，未脱众惑累，
在无量佛刹，修习诸苦行，
日夜常勤心，以求胜菩提。
又见处处有，无数诸菩萨，
常能为众生，作诸利益事，
烧身发光明，以求道因缘。

复见诸菩萨，安住于佛前，
供养灭度佛，无量珍妙塔，
以求菩提利，及以大威德。
见十方法缘，烧身如灯炷，
昼夜常修心，不懈于食息。
又见诸菩萨，舍国城妻子，
头目及髓脑，为安乐众生。
我悉见彼此，普眼世间尊，
威力得自在，不可以言宣。
如我所知者，世间最为上，
天中天以手，哀摩我顶时，
即得见彼众，归命人中尊。”

不空见劝请品第八

尔时，不空见菩萨摩訶萨白佛言：“世尊，如来处室宴寂既久，此会大众皆悉渴仰。严座已讫，唯愿世尊，哀愍一切屈就斯座。”

时，不空见更正衣服，合掌向佛白言：“世尊，今欲请问，愿少宣说，我当至心听受奉行。”

佛告不空见：“恣汝所问，当为决疑，令尔欢喜，诸天世人亦当证知。”

时，不空见白言：“世尊，菩萨摩訶萨亲近修习何等三昧，得见法乐增长其心，所闻三昧旷如大海，菩提之心安若须弥，外道邪风所不能动，于无碍法心亦无著，犹如虚空无所染污，破无明闇亦如朝日，施法光明若月盛满，烧一切阴炽然猛炎，焚诸烦恼之大火聚，譬如江海一切诸水，水性之属依之而活，又如大船能渡彼岸，亦如桥梁能令众生，不堕生死烦恼驶流，犹若波梨质多罗树生诸众生，七菩提华悉能普薰十方世界，如优昙华世所希有，亦如良医善疗诸患，大悲广救应病授药，如栴檀树能消热恼，又如大雨润施一切，胜妙之法味若香蜜，令众无畏如师子王，安乐众生过于慈母，深知法性达义趣相，得义巧便法相亦然，善于正道具足方便，如实说法得安摄众，开发众生生死根源，一切法性如海一味，三昧安静犹若山王，道心不动譬如帝幢，得坚固力身相端严，威仪具足无所染污，族姓豪胜功德备足，得无边辩、无所著辩、无异句辩、不思议辩、无边量辩、深解脱辩、成就胜辩、常忍辱辩、渐亲近辩、问无问辩、无毁坏辩、无退转辩、甚深句字种种说辩、甚深广说章句字辩、无量无边喻譬之辩，如是一切悉皆具足，未得道者当令得道，及得梵音、意欢乐音、迦陵频伽师子等音、大龙牛王钟鼓美音、歌音、弦音、雷震之音，得于一切世间供养，具足六通到于彼岸，得无忘失忆持之法，获诸善根容仪轨

则？”

时，不空见以偈问曰：

“金色百福严，深解于真谛，
怜愍善利益，听我问诸佛：
应修何三昧，具足净功德，
人中无比尊，众智无过者？
我今问世间，最胜无上主，
为行何三昧，功德不思议？
云何诸菩萨，而得人中上，
应当勤修习，最胜寂静定，
行此三昧已，为世作利益？
云何得自然，多闻如大海？
云何获不动，深妙之智慧，
住佛诸功德，犹如转轮山？
云何心不著，自然如虚空，
摧伏诸外道，不起于恶心？
云何当修得，犹若日月等？
又复当云何，同彼大灯炬？
求习何三昧，光明照一切？
云何得消除，众生老病累？
云何令一切，得度于苦海？
云何得发心，敬礼三界尊？
云何如天华，相好甚明著，
优昙时一现，值佛难于是？
云何如医王，施药灭众病，
善调伏诸根，安住于戒品？
云何如法王，度无边功德？
云何见法满，犹如甘净蜜？
云何师子音，施利于众生？
云何如慈母，施众难思乐？
云何得四辩，行甚深菩提，
为我说最胜，无上第一道？
云何能得说，无著大智慧？
云何义巧便，得法不思议，
善知巧便相，知世出世法？
云何能得意？云何复得道？
云何得忆念？云何安具足？
云何得多闻，深广若大海？
云何说诸佛，真实之功德？

云何说众生， 生死之源本，
诸法无异相， 如海同一味？
云何得三昧， 不动如山王，
菩提心安寂， 犹如帝释幢？
云何得诸余， 不思议菩提？
云何得端严， 成就诸威仪？
云何得豪族， 为功德法王？
云何得无边， 及得无著辩？
云何得成就， 不思句字义？
唯愿世间依， 为我分别说！
云何得最胜， 无上莫能过，
及以无著说， 无失与忍辱，
亲近不思议， 有问无问等，
梵音意乐音， 迦陵善妙音，
得修菩萨行？ 愿尊教诏我！
云何得师子， 大龙牛王音？
云何得钟音， 弦歌与美音？
云何获聪慧？ 愿世调伏说！
云何得说法， 心常无厌足，
无毁诸功德， 常演震雷音？
云何当得宣， 种种甚深法？
云何众譬喻， 善说到六通？
云何不失法， 百千岁生念，
勤修不懈倦， 善法普眼尊？
若为十方界， 说修不思议，
于诸智不疑， 归趣求解脱，
是以我今日， 请问于如来。”

时，不空见菩萨摩訶萨，如彼神通无作行力，于虚空中当世尊上，自然变成天妙宝盖，七宝庄严种种微妙。于此盖中雨众杂华，绕佛三匝住在顶上。华倾恭敬向佛世尊，即于华中而说偈曰：

“归命于大圣， 正觉两足尊，
诸天及世人， 无能与等者！”

尔时，此华堕佛足上，复更踊起，起已自然遍散三千大千世界。复于盖中雨栴檀末，空中交纷墮于佛上，俄尔之间忽然不现，香气芬芬充溢大千。是诸众生闻此香者，身心安隐皆得快乐，犹如菩萨得四禅乐。

时，不空见现神通讫，即白佛言：“云何菩萨得大智慧、速疾智

慧、猛利智慧、无相智慧、甚深智慧、广大智慧、普遍智慧、不惧智慧？云何获得无上善根，心如金刚坏诸法相，身心柔软心大如海，戒品难量心如磐石，其心柔和正直端严，心如山王摄众善法，心如大地能安一切，得不信他不讥彼阙，得善趣行安住诸法，正向不谤无上世尊，生生恒得无离见佛，住此世界得见他方无量诸佛闻法遇僧，又得摄取清净国土，常得善根自利利他？是以我今请问世尊！

“我为解脱饶益众生，为诸菩萨得不思议，具足善根请问如来。为被僧那忍苦大铠，悲一切故请问如来。为欲利乐诸众生故，被弘誓铠无众生想，欲度生死无生死想，我恒如此利益众生，是故我今请问如来。世尊，我于诸众生所，不起坏心亦无嗔骂、诽谤毁骂及轻凌心，初无恚恨忿戾忍恨，无忘失意亦不嫉妒，不怀楚毒行于慈悲，我如是相修学大乘，为利益故请问如来。

“世尊，我今为众生故舍五欲乐，能忍众苦施一切乐，为诸众生作法光明。世尊，我于内外诸法心无吝惜，我如是相利众生故请问如来。世尊，我今被弘誓铠，为一众生于恒沙劫，入大地狱受诸苦恼，我未曾于一念之顷退失无上菩提心也。是故我今利众生故，悉能忍受无量极苦而不退于菩提之心，为一切故请问如来。我今如此被弘誓铠，为诸众生作其僮仆，为利彼故请问如来。世尊，我今为众生故，舍于头目髓脑之属，悉忍斯苦不退菩提，如是相貌请问如来。”

时，不空见即说偈言：

“云何习大智， 广智与疾智？
我今故请问， 大雄世间师。
云何得甚深， 微妙大智慧？
最胜菩提道， 唯愿普智说。
云何无惧智， 善巧随顺说，
复得金刚心， 于法不生惑？
云何得柔和， 心无有垢染，
清净戒如海， 不宿于死尸，
复得心如山， 不动难思议？
云何不信他， 亦不讥彼阙，
决定行善趣， 闭塞诸恶道，
安住坚固志， 欢喜心不坏？
云何得生念， 又得于调伏，
住此而得见， 他方刹土佛；
既得闻说法， 亦得值遇僧，
欲得求供养， 他方刹土佛，
种种妙华香， 随意以奉献；
欲求住此界， 见诸无边刹，
世依示神通， 向诸十方国？

我自饶众生，亦无善友劝，
安住诸惭愧，自舍于己利，
以利于他故，请问大胜尊。
若为求佛智，摄取不思善，
为此利益故，请问于如来。
无著世间依，当修何三昧，
如是为众生，发弘誓大愿，
免济诸群生，种种诸剧苦，
虽复勤修行，而无众生想？
为利善趣故，请问于如来。
于一切众生，常起平等心，
未曾有分别，恒修于慈悲。
我为利益故，请问于如来，
亲近何等法，疾得难思定？
调御说斯定，显示无边德。
我发弘誓愿，为利一众生，
于不思议劫，恒受烧煮苦。
善哉令一切，长得获安乐，
永无幻惑心，常修正直意。
恒舍内外法，摄取诸众生，
为作利益故，请问普眼尊。
不嗔不恶口，秽谤结恨等，
自身能忍苦，为他作仆使，
是故我请问，大威德世尊。
常以欢喜心，勤修菩萨行，
捐弃无量头，以求胜菩提，
为益世间故，舍目及手足。
众生随生死，痴瞋无智慧，
何方救济彼，令得永解脱？
舍所爱妻子，珍妙诸器服，
金银玻璃珠，无数众宝藏，
为趣正道故，请问于如来。
慧施常无厌，闻法亦复然，
住于阿兰若，心无有懈怠，
为此利益故，请问于如来。
常求善言教，闻恶恒舍离，
于诸群生类，初无不善念，
为是利益故，请问于如来。
慈心观众生，如母念一子，
于仇不追怨，更生邻愍心，

为利一切故， 请问人中王。
若获诸福报， 设复无所得，
亦当为众生， 请问大威尊。
我请自然尊， 若得少福者，
以此业果报， 疾得菩提定。”

赞三昧相品第九

尔时，世尊告不空见菩萨摩訶萨言：“善哉！善哉！不空见，无劝汝者，乃能如是为诸众生请问三昧，欲以解脱利众生故，欲令众生具不思议净善根故，欲令众生获得三界最胜利故，为令众生超出三界一切行故，为令众生于诸有得善义故，为令众生深解随顺得饶益故，为令众生于甚深法决定义故，欲令众生尊说法故，欲令众生敬重施故，欲令众生舍诸有故，欲令众生趣无上戒故，欲令众生具足忍故，欲令众生勤精进故，欲令众生得禅定故，欲令众生深重智慧如金刚心善修定故，欲令众生心离尘故，欲令众生善摄心故，欲令众生其心不动犹如帝幢故，欲令众生重法义故，欲令众生不惜身命厌诸行故，以是等缘请问如来。”

尔时，世尊告不空见：“汝今谛听！善思念之，吾当为汝分别演说。”

时，不空见即白佛言：“唯然，世尊，愿乐欲闻！”

告不空见：“诸佛所说菩萨所行念佛三昧，此三昧者，诸菩萨等常应亲近精勤修习。既得修习此三昧已，即便增长见法安乐，增长无贪及以嗔痴，增长惭愧、六神通等，增长得见一切诸佛，增长无数清净佛土得知宿命生死因缘，住胎清旷母族豪胜，得微妙善大人相好，具足出家及舍大舍，得知众生其行相续，具足多闻世出法，又得种种诸善法处，当得善学世无比法，复得善巧说一切法，及得了知前际后际，字章句相智慧备足，得善转心神通变化，善知过患得广大力，得知他方诸菩萨等，及以众生精粗白黑、长短大小处及非处，未成佛道趣向具足，得不动念神通具足，常得大姓高族具足，端正威势功德具足，得梵音等及以诸辩，无不具足悉如上说，同如来生无生之生，常生中国不处边地，欲求遍往他方世界至诸佛所咨受正法，欲乐住此或游十方覲诸如来恭敬供养，彼此菩萨功德具足。”

尔时，世尊即说偈言：

“不空见菩萨， 有妙三昧王，
我住智力故， 深知此三昧。
菩萨应当修， 得见十方佛，
到六通彼岸， 疾得菩提道。”

见诸净妙土，摄知生死缘，
住胎既无比，母族又殊胜。
善修诸法行，相好皆具足，
出家弃诸爱，人天所滞欲。
为利世间故，求于菩提道，
生在豪姓家，永到甘露境。
具得六神通，圆足说真智，
多闻持正法，获得大自在。
多闻广于海，如闻皆修行，
具众决定义，及知众生本。
学习世出世，善法之所趣，
获得聪利智，捐去无知业。
弃舍有为事，行于无为法，
亦得天眼智，天耳闻诸法。
忆念宿世行，知他心意识，
欲乐现种种，诸妙神通事。
常善转变心，开演于明脱，
开发十力慧，广利于世间。
知处及非处，诸法之所归，
说烦恼过患，常应修此定。
得趣向具足，得意无与等，
得念及威力，得安行亦然。
姓族最殊胜，端严甚清显，
弃于有为行，无毁诸功德。
得大威势力，人中最殊胜，
犹如天帝释，天中独尊严。
欲得无比音，雄猛诸威音，
成就义大仙，当求此三昧。
如龙欢喜行，普施电光耀，
复降甘润雨，沾洽于大地，
是龙所游境，实为不思议；
若安住最上，神通王三昧，
能作诸供养，奉献无边佛，
犹如龙王雨，泽及于一切。
欲成就善教，亲近最上说，
摄取无为乐，当修此三昧。
种种深解脱，当宣诸妙偈，
欲令一切众，咸使得安乐，
常修是三昧，不离佛菩提。
及与声闻众，得见他方刹，

若欲得咨问， 此土之世尊，
及诸他方佛， 应修此三昧。
若欲见他方， 不思议世尊，
亲近彼诸佛， 蒙光设供养，
往返诸刹土， 得无数功德，
应当修诸佛， 所说深三昧，
往往从生处， 恒得与佛俱。”

正观品第十

尔时，不空见菩萨白佛言：“世尊，菩萨摩訶萨若欲成就诸佛所说，菩萨念佛三昧者，应当亲近修习何法？”

尔时，世尊告不空见：“若诸菩萨欲得修习诸佛所说念佛三昧，欲得亲近诸佛如来，复欲疾得阿耨多罗三藐三菩提者，应当安住决定之心，又应永舍不决定心，舍我见心，知无我心，当观此身如水聚沫，观于色阴当如芭蕉，次观受阴如水上泡，复观想阴如热时焰，又观行阴如空中云，观于识阴犹如幻化。菩萨若欲入此三昧，应当深生怖畏之想，又宜具足惭愧之心，舍不怖畏而作怖畏，舍无惭愧修惭愧心，具舍摩他、毗婆舍那，以方便智舍我无我，应习智脱及三空门；又当深知三受生起，亦应舍离三不善根，即当起于三昧之聚，观诸众生犹如我身，观四念处、身受心法，观四食患作无食想，所谓抆食、触、思、识等，修不净想及以慈悲，安住于喜令舍具足，起诸禅定而不味著，亦不毁谤一切诸法；此身不实犹如幻焰、不乐长寿应当舍离，善防护心习学多闻，不慢于法勤护不谤，即得闻才及以法才；既闻法已守护是义，尊重佛法恭敬僧宝，近善知识远离恶友，不著世俗言论之味，恒能不离阿兰若行，心常平等怜愍众生，其心不退不怀嫉妒，称量诸法心不染累，分别一切无数诸法，常求甚深方等经典，信心坚固不生疑虑，常能精勤读诵此经，即是诸佛无上道也。

“诸佛功德之所生处，应当如是真实其心，摧伏憍慢至意听受，增长正法离杀盗淫、懒惰、贡高、是非之心，舍存真我邪谤之说，除秽乱语灭诸争论，心乐安住布施、持戒、忍辱、精进、禅定、智慧，诸波罗蜜皆悉具足，能舍头目心不退没；如四大姓不可改易，身意精勤不顾躯命，于四供养心无贪著；安住十二头陀之行，不求己利及以名誉，舍心爱滞得四神足，离四颠倒及烦恼刺渡于四流，于四威仪修四念处，令得五根修行五力，舍于五结不求五欲福报之庆，舍五秽心修五解脱，善知五阴弃六欲处及六身受，除六爱身修于六念，知六识分勤求六通，修七觉意深知七界，所谓害界、恚界、出界、欲界、色界、无色界及以灭界，除断七使及七识住，舍八懒惰去八妄语，知世八法得八大人觉，知八解脱修八正道，舍于众生九居之处，除九慢法

放弃九恼，亲近修学喜等九法，又复勤习九次第定，舍十不善行于十善，方便精勤求佛十力。

“又不空见，我今略说一切诸佛所说三昧。应当勤修念报佛恩，学三昧已，即得不退阿耨多罗三藐三菩提。而是菩萨以大智力，能为众生说此三昧，其余声闻不能观察宣说书写受持读诵。若能观察书写受持读诵之者，此人福业亦不唐捐，要当得值佛出于世。若诸菩萨教化受持，疾得不退菩提之道。又不空见，诸佛所说念佛三昧名为要法，诸大声闻所不能行。若人闻说此三昧者，将来之世必当值佛。”

尔时，世尊即说偈言：

“若有修诸佛， 所说深三昧，
观法心相续， 舍不相续念。
善观于阴身， 离我无我想，
此身不牢固， 犹如水聚沫，
虚诞犹如化， 亦如婴儿语。
观色如浮云， 见受若水泡，
想如热时焰， 观行阴无实，
犹如彼芭蕉， 观五识如幻，
修惭愧恐惧， 舍摩毗婆那。
应远无惭愧， 除我无我见，
习如与解脱， 及以三空门。
又应知三受， 舍三不善根，
常学三善根， 求最胜三昧。
勤行戒定智， 速得甚深定，
离诸邪见等， 正习此三昧。
舍世众争论， 常修出世法，
观察身念处， 受心亦复然。
于法无疑惑， 不久得此定，
常行禅解脱， 不惜身寿命。
多闻不贡高， 不诽谤诸法，
闻法应受持， 持已谛观察。
常供养诸佛， 法僧亦如是。
若于善知识， 恒念报其恩，
远诸恶知友， 不闻邪师论；
应求赞善者， 常共俱游处，
不远阿兰若， 应求胜菩提。
等心于群生， 不毁谤诸法，
不染一切法， 应知真实法，
舍诸非法行， 不久得此定。
除一切诸恶， 及见真我者，

杀害慢淫盗， 毁谤懒惰等，
不作诸恶口， 邪论诤讼等，
次第说佛法， 当求此三昧。
施戒及忍辱， 精进禅智等，
常勤精修习， 成就此诸度，
不久当得斯， 功德定法行。
若舍内身分， 及外财眷属，
不久得菩提， 最静心三昧。
若人心如地， 水火风空等，
皆悉当速疾， 获此妙三昧。
若有诸人等， 身心甚端直，
不贪著衣食， 床褥及医药，
是人当疾得， 如此之三昧。
成就四正勤， 具足四如意，
舍于四颠倒， 及四烦恼刺，
永度于四流， 弃舍诸受取，
修行五根力， 除断于五结，
不求五欲报， 舍诸烦恼心，
应修五解脱， 及五身三昧，
谛知五阴法， 深修六和敬，
远离不恭敬， 除去六触身，
观六度相续， 舍彼六爱身，
成就于六通， 深修六念处，
亦复勤专行， 六识之法分，
修七菩提分， 复行于七财，
念舍憍慢处， 除断七种使，
当修如此行， 以求胜三昧。
舍彼七识住， 除此八妄语，
常修八正道， 得三昧不难，
得八大人觉， 行八解脱门，
知世间八法， 即为最胜智，
如此常修行， 得三昧不难。
自离于九恼， 亦不恼他人，
修喜等九法， 次当得三昧。
聪慧舍十恶， 修行十善业，
又能遵十力， 得三昧不难。
常受持善法， 舍诸不善法，
昼夜常摄心， 得三昧不难。
住此三昧已， 不思議力说，
常见佛金色， 亦得闻演法。

若欲见十方， 灭度现在佛，
及以未来世， 饶益众生者，
是人当修此， 最上妙三昧。”

菩萨念佛三昧经卷第五

正观品第十之余

尔时，不空见菩萨摩訶萨白佛言：“世尊，菩萨若欲成就一切诸佛所说念佛三昧，云何当令其心相续？”

佛告不空见：“是诸菩萨，若能至心忆念过去、未来、现在十方一切无量如来、应、正遍知、明行足、善逝、世间解、无上士、调御丈夫、天人师、佛世尊，悉知众生往来生死，住胎具足母族亦然，及善相好、四毗舍罗、慈悲喜舍、惭愧恐惧、威仪等行悉亦具足，及舍摩他、毗婆舍那、解脱知行诸解脱门，念、处、正勤、神足、根、力、觉道等法皆悉具足，知诸四流及生具足，亦知众生源始具足，生诸六通起大神足，戒、定、智慧及以解脱、解脱知见无不具足，无碍解脱及无碍利一切善法亦皆具足，色心清净、境智清净、金色等身清净具足。而此菩萨应如是念：诸佛如来至心不动，亦当安住无所著心。

“复应如是心相续观：为何等法是如来耶？为以即色是如来耶？为当异色是如来乎？若以即色是如来者，色处众生具足色阴，而是众生应是如来。若以异色是如来者，除十二缘岂有如来？又以即受是如来耶？为当异受是如来乎？若以即受是如来者，一切众生具足受阴，而是众生应是如来。若以异受是如来者，除十二缘何有如来？想、行、识等亦复如是。为即眼根是如来耶？为异眼根是如来乎？若即眼根是如来者，一切众生应是如来。若异眼根是如来者，除十二缘何名如来？耳等诸根亦复如是。为即四大是如来耶？为异四大是如来乎？若即四大是如来者，内外四大亦是如来。若离四大是如来者，除十二缘何有如来？地、水、火、风皆亦如是。

“菩萨如是相续观已，明见色阴既非如来，异彼色阴亦非如来；又见受阴即非如来，若异受阴亦非如来；即想、行、识非如来者，异想、行、识亦非如来。又见眼根非即如来，见异眼根亦非如来；耳、鼻、舌、身非即如来，异耳、鼻等亦非如来。见色、声等非是如来，异色、声等亦非如来；见香、味、触非是如来，异香、味、触亦非如来；见意及法非是如来，若异意法亦非如来。见即四大非是如来，见异四大亦非如来；地、水、火、风亦复如是。菩萨如是心相续观，于一切法得方便智。

“又不空见，汝以何法能得无上菩提道耶？为以身得？为以心得？若以身得，此身不净，无所觉知如草木瓦砾；菩提非色无有形

质，其相空寂不可见法。此身既如草木无知，云何当得菩提道耶？若以心得无上道者，心无形相犹如幻化，菩提无心亦无色貌，如幻如化云何可得？若诸菩萨得如此解，非身能得无上菩提，亦非心得无上菩提，不离身、心得无上道。”

尔时，佛告不空见言：“应当如是观于如来，作是观者名为正观。又不空见，菩萨如是相续观法心不动摇。菩萨应当如是深解，则不退于三昧法也；又常离于不相续心，必当疾得无上菩提。”

尔时，世尊即说偈言：

“心心相续念， 去来今现在，
一切普眼尊， 不久当见佛。
住佛大威力， 慈哀利世间，
忆念人中华， 调御功德尊。
当念昔生死， 住胎母族姓，
容相悉具足， 不久当见佛。
念佛八十好， 及宿世因缘，
恒集最胜业， 正念善法意。
念佛六神变， 及大自在通，
戒定智解脱， 皆悉得成就。
云何最上师， 得此寂静地？
念慈世间尊， 悲喜舍最上。
惭愧力无畏， 世间威德师，
念佛舍摩他， 毗婆舍那等。
又念智解脱， 及以三空门，
具念修正勤， 神足亦复然。
念根力具足， 及以菩提分；
念佛离生灭， 获此寂静处。
念难思善法， 色受皆清静，
想行及以识， 清静亦如是。
念佛真金色， 安住无著心，
观何法名佛， 摄心恒相续。
念色非如来， 四阴亦如是，
离阴非如来， 想识应当知。
念眼非如来， 耳等法亦然，
离眼非如来， 五情法皆尔。
念十二因缘， 调心得见佛，
念四大非佛， 异此四亦非，
应了十二缘， 见佛不为难。
若使诸佛阴， 而是如来者，
众生悉有阴， 亦应即如来。

若欲得根力， 当念十二缘，
阴非世间师， 异阴亦如是。
往昔诸因缘， 相续恒分别，
是以能摄取， 不思议智力。
此身常无知， 如草木瓦砾；
菩提无形色， 寂灭恒不生，
身不触菩提， 菩提不触身，
心不触菩提， 菩提不触心，
而能有触相， 实为不思议。
此是佛世尊， 最胜寂静处，
善能灭一切， 外道诸邪见。”

尔时，不空见菩萨摩訶萨白佛言：“世尊，菩萨云何得知我见？云何复当得离斯见？”

尔时，世尊告不空见：“菩萨若欲舍我见者，莫著住处，当依无依，欲以法明利益一切，欲吹法螺击大法鼓，欲造法船建立法桥，度诸众生生死有流，欲观身相及不相续。此身不净秽恶充满，脓血涕唾九孔恒流，无常败坏胸息不住，危脆难信不可爱乐，犹婴儿语虚妄无知。是身不实如水聚沫，纵复假以衣服饮食，香熏庄严种种宝饰，于百千岁恣随其意，会当磨灭长夜无益。如此身性是生死法，又为虫兽之所食啖，复于长夜或在地狱、畜生、饿鬼、阎罗王所受无量苦未曾暂息，又于永劫处生死中为他僮仆策使万端。此身长勤受众苦恼，而初不能知苦、断习、证灭、修道行诸功德。此身虽小受污甚多，应以身施诸众生，若有惜命施其以寿，若须力者当惠其力，须肉与肉，须血与血；当施须者不求勿与，或于彼人无所利益。愿以舍身善心因缘，除我见惑得解无我。住是舍身思惟观时，不复著于我见之惑，以不坚身修于坚身。

“又不空见，譬如村邑，多有童子相随出村，游戏水边见水聚沫，是诸童子竞取弄戏，而此聚沫不自觉知，为他所弄亦无痛痒。如是，不空见，若有菩萨观自己身，当知此心犹彼聚沫无有分别。若此菩萨作是观者，不久当得此深三昧，亦当疾得无上菩提。”

尔时，世尊即说偈言：

“欲求最胜定， 得不思菩提，
永舍于我见， 常应观此身：
无常苦不净， 涕唾臭污等，
九孔流诸秽， 甚为可厌患。
虚诞无真实， 此是磨灭法，
眩惑犹幻化， 亦如水聚沫。
我此身危脆， 疮疣之窟宅，

周遍皆臭毒， 无一可乐处，
养之初无益， 卒为虫狼食。
一切诸乐具， 供膳于此身，
会归当朽灭， 终不得一实。
长勤无边劫， 苦痛恒万端，
地狱畜生报， 根本受苦处，
长夜增饥渴， 不可不思议，
众苦所逼迫， 为此乖菩提。
我此身不实， 应施诸众生，
解法心无惜， 所须便给之。
作此思惟已， 即唱如是言：
我今舍此身， 血肉随意取！
若有惜命者， 我当惠其寿！
亡躯济众生， 为疾得三昧。
段段求水沫， 未曾得坚实，
我身亦如是， 求真不可得。
若得此正观， 疾成菩提道！”

尔时，世尊即便微笑。诸佛如来法皆如是，当于世尊微笑之时，面门即放种种色光，青、黄、赤、白、红、绿、玻瓈，上至梵天从彼还下，绕佛三匝复至顶上，斯光俄顷忽然不现。长老阿难即从座起，更整衣服，右膝著地，合掌向佛以偈问曰：

“最胜调御尊， 微笑非无缘！
无上世间师， 愿为我宣说，
为以何因缘， 而现此微笑？
金色百福严， 善解于真谛，
哀矜利益者， 世间所归趣，
为以何因缘， 而现此微笑？
无等人中尊， 最上无过者，
如来诸功德， 清妙无瑕秽，
复以何因缘， 而现此微笑？
住圣大悲尊， 一切所归者，
已离诸烦恼， 以净调御音，
唯愿为我说， 微笑之因缘！
今日谁应得， 若此深广义？
谁住坚固地？ 谁国遇吉祥？
世间所归尊， 何故现微笑？
一切所归趣， 调御为我说！
愿闻清净人， 微笑之因缘，

若蒙圣开演， 疑惑则永除。”

尔时，世尊告阿难言：“我向说此相续观时，三万人得法眼净，八万百千亿那由他天亦悉离垢法眼清净，复有三万亿那由他比丘、比丘尼证阿那含，复有三万比丘、比丘尼及清信士女得无生忍。三万众生发菩提心，即皆修习菩萨之行，于人尊劫悉当成佛，此是初发无上道心。复有九万亿那由他诸众生等，悉皆不退菩提之道，当得作佛，号曰放光及离垢尊释迦牟尼日光相佛、月光明佛、天中尊佛。九十二亿那由他众，发声闻心当成罗汉。”

尔时，世尊作是语时，声震三千大千世界。佛以天眼见于十方，九十亿百千那由他诸佛刹土。其中众生皆见如来放眉间光，名曰明焰，遍照十方，众生见已心惊毛竖。时彼刹土无量百千万亿那由他诸众生等遇斯光者，其中有得须陀洹果、斯陀含果、阿那含果、阿罗汉果，有多众生发菩提心，皆不退转无上菩提，于未来世当得作佛，皆同一号号不退转。

尔时，世尊欲令此义光宣明显，重说偈言：

“我向宣说此， 心相续观时，
即有六十千， 九十九亿众，
以闻法利故， 而发菩提心；
复有三万人， 皆得圣慧眼，
已闻相续念， 寂定之菩提，
此等悉得免， 恶道之苦难。
八万亿诸天， 既闻如来音，
获得净法眼， 永离恶趣苦。
三万亿四众， 得不起法忍，
度脱诸恶道， 无复苦恼患，
当得成佛道， 如春之敷荣。
三万亿诸人， 学于菩提道，
是人亦当得， 诸佛大威力，
既成无上道， 怜愍于世间。
六万千天子， 学习于菩提，
乐中之乐行， 犹如弥勒尊。
无碍世间依， 以笑广利益！
阿难汝当知， 皆有因缘故，
是以我今日， 示发此微笑。”

尔时，不空见菩萨摩訶萨白佛言：“世尊，菩萨摩訶萨，云何当知安住惭愧、恐惧等法，舍无惭愧得此三昧？”

尔时，世尊告不空见：“此诸菩萨所以惭愧，身作诸恶而怀羞怖，口意行恶复生耻辱，嫉妒、懒惰亦复如是。若起不善，恭敬诸佛，畏惧诸天及以世人，恶不善法可羞耻故，菩萨如是则住惭愧，舍无惭愧诸不善法，勤修众善护清净行，默然闲寂三业具足，不久亦当得此三昧，生生恒得值遇诸佛，当疾得于阿耨多罗三藐三菩提。

“又不空见，奇哉希有！我念过去经阿僧祇亿百千万那由他劫，初第三劫名为善生，次复有劫名曰宝炬，次复有劫名莲华池。时浊劫起余一千年，次复有劫名曰乐住。时有国王生此劫中，名胜微密，有大威德势力自在。王所住城名拘修摩清净香聚，其城纵广七十由延，有十二重七宝庄校，严丽光明如善建城。城北有地名离垢，此处有苑苑名安隐，纵广正等面十由延，周匝皆有诸多罗树，其苑法式犹善建园。又不空见，尔时有佛，号曰明相如来、应、正遍知、明行足、善逝、世间解、无上士、调御丈夫、天人师、佛世尊，出现于世。”

佛告不空见：“时明相佛与其眷属住安隐园，所从比丘九十九亿百千那由他皆阿罗汉，诸漏已尽无复烦恼，心得自在所作已办，所应学者皆悉已学。明相如来应正遍知，于其晨朝著衣持钵，翼从比丘入城乞食。时微密王闻佛当来，即乘大象象名乐手，前后导从无数百千，皆共出城奉迎世尊。又不空见，是微密王遥见佛来，光色相好微妙殊特，皆大欢喜，即便下象趣如来所，头面礼足，右绕三匝，即于道路请佛及僧，时明相佛默然许之。王既知佛已受其请，即于其夜扫洒烧香，严办种种珍妙供具。复于城内遍竖幢幡，悬诸华鬘、瓔珞、宝盖，牛头香汁以洒尘盆，散种种华严饰于地，以篋盛华置于座前，作众妙伎以用供养。又不空见，王办供已，于晨朝时与诸营从，诣安隐园顶礼如来，白言：‘世尊，食时已至。’时明相佛闻王请已，即如其相现大神通，与诸比丘俱升虚空，放净光明九万百千照于东方，三方亦然。一一光中有八十亿那由他等诸妙莲华，一一华上有化如来，相好具足如明相佛。是诸如来眷属无量，左侍帝释，右侍梵王，犹如真实释梵无异。

“又不空见，明相如来现此种神变相时，一念之顷欲色诸天，即作无量众妙伎乐，以天栴檀、多摩罗跋、沉水、华鬘，如是诸香以用供养明相如来。时彼世尊为王说法：‘大王当知，诸行无常，有为皆苦，不实故空，一切诸法悉无有我。所以者何？此身不净，九孔流秽犹粪中虫，破坏危脆念念不住，四大诸阴假以为身，饥渴寒热恒来侵迫，虚诞幻炎犹水聚沫，不得自在磨灭之法，强名为人无一可恃。是故大王当深观察，生死诸行甚可压患，当勤方便求速远离。’时微密王闻是语已，合掌向佛而作是言：‘如是，世尊，诚如圣教。有为诸行无常、苦、空，一切诸法皆悉无我，现见此身不净臭秽，众苦之聚甚可厌患。’时王见佛神通相貌，及闻如来所说之法，即发阿耨多罗三藐三

菩提心。

“又不空见，时彼如来，知王已发菩提之心，与诸大众俱受王请，乘虚而往至城便下。是王从佛步入宫门，献座已讫次第而坐。王与群臣、宫内眷属，及国人民侍立左右，擎诸供膳前受嚩愿，各各授食皆令充足；饭食已讫漱口澡手，复以种种华香伎乐，名衣上宝而以供养。时微密王即于是日，舍四天下及八十四亿那由他妃后嫔女，以国王位付其长子，与八十亿那由他人俱共往诣明相如来，于彼佛所出家修道。王出家已将欲请法，白言：‘世尊，云何菩萨得诸佛所说念佛三昧？若人能得此三昧者，当疾成于阿耨多罗三藐三菩提具足见法。’时明相佛告微密比丘：‘菩萨有二法得此三昧，亦当疾成无上菩提。何谓二法？菩萨应当信于如来所说经典，此大方等诸佛行处。菩萨具足此二法者，得此三昧当疾成佛。复有二法。何谓为二？舍摩他、毗婆舍那。复具二法，舍我无我，安住惭愧、恐惧等法。菩萨若能具足二法，得此三昧疾成正觉。’”

告不空见：“是微密比丘白明相佛：‘云何菩萨安住惭愧、恐惧之法，得此三昧？’明相如来告比丘言：‘菩萨应当舍三恶业、无惭愧等诸不善法，住于惭愧、恐惧之法。而是菩萨惭愧具足，舍诸不善修行善法，应护清净身口意业。’又不空见，是时比丘，于彼佛所闻说过患，即舍无惭，恐惧诸恶，精勤摄心住诸善法，不失善法欲令满足。复更摄心安住正观，观一切法不增不减，亦不见法去来生灭。微密比丘作是观时，不见诸法有种种相，观十二缘如梦如炎，观于诸法如影幻化，观于诸法无增无减，观于诸法无名无性，观一切法无灭无生。微密菩萨如是修行，不久当得此三昧也；获三昧已辩才不断，过六万亿那由他劫，当得阿耨多罗三藐三菩提。”

佛告不空见：“汝莫生疑，尔时舍国出家学道微密王者，岂异人乎？莲华上佛如来是也。微密菩萨安住惭愧，修习成就一切善法，不久便得如此三昧。又不空见，我今语汝诸佛所说念佛三昧。若有众生不种善根，终不得闻如此三昧。”

告不空见：“若善男子、善女人等，曾于过去无量佛所，亲近供养植众善本，方得闻此三昧宝王，何况书写、读诵受持、分别解说、观其义趣！是善男子、善女人等，所种善根无量无边不可称计。是诸人等修菩萨乘，方得少闻如此三昧，次第当得阿耨多罗三藐三菩提，唯除身证。”

时不空见白言：“世尊，是诸众生不学大乘，为能得此三昧宝不？”

佛言：“如是，亦当能得。又不空见，譬如有药，其质坚[革+印]不可斫刺，以石磨取用之涂鼓。若有怨敌临阵战时，彼军亦以毒涂其箭，闻鼓音声毒不能行。如是，不空见，若善男子、善女人等，少得遇闻三昧光声，是人皆当得于无上菩提之道，唯除身证。又不空见，譬如众生若依须弥金色之边，其身即与彼山同色。所以然者？山势力

故。如是，不空见，若有善男子、善女人等，少闻三昧威光之力，当得阿耨多罗三藐三菩提，唯除身证。所以者何？而此三昧，功德最胜不思議故。

“又不空见，譬如诸水悉入大海同其一味。所以然者？以海力故。若善男子、善女人等，不能读诵持说书写，但得暂闻此三昧宝，一切皆当得无上道。所以者何？三昧力故。又不空见，若人正说诸佛法门得三昧母，说此三昧是名正说。若人正说如是三昧，无量无边功德之聚，摄取长养是名正说。又不空见，菩萨摩訶萨修行布施，于一念顷以众妙宝，奉献恒沙诸佛世尊，以此功德当得成佛；若人读诵受持解说书此三昧，功德胜彼布施之福不可称计。”

尔时，世尊即说此偈：

“我念往昔生， 调御明相佛，
一切诸世间， 咸共所归趣，
慈悲哀众生， 为说众妙法。
是佛大知见， 明了三世法，
如此普明尊， 世间最为上。
如来不思議， 无量深智力，
开显诸法门， 为利群生故，
发起大悲心， 拔济无量苦。
明相善逝尊， 八亿声闻众，
皆是阿罗汉， 诸漏悉已尽，
是诸应真等， 随从法王游。
时有安隐园， 在城东北隅，
大仙经行处， 恒与圣众俱。
时有转轮王， 微密勇健士，
怜愍一切故， 导从出彼城。
是王遥睹佛， 其心甚寂怕，
相好殊世表， 威仪亦无比。
王即步奉迎， 往到世依所，
既至如来前， 头顶接足礼，
合掌恭敬已， 往住于一面，
请佛受明供， 世尊默然许。
王知佛垂许， 还敕诸官属，
洒扫宫城内， 严办诸肴膳。
王复到佛所， 白言食时至，
世尊若矜愍， 愿时屈威神，
与诸圣众俱， 至当奉微供。
时佛闻王请， 即现大神变，
普放千亿光， 遍满十方刹，

一一光明中，化作亿莲华，
大悲愍众生，为众现斯瑞。
又告不空见，彼诸莲华中，
有大威德王，相好特端严，
各以最胜意，广说诸佛法：
诸行皆无常，苦空亦如是，
无我恒不实，此为磨灭法，
有何聪慧人，而生乐著心？
诸行犹幻炎，破坏流动法。
大悲明相佛，演说如是法。
诸天见世尊，奋大神通时，
作众上妙伎，广设香华供：
善哉佛威力，不可得称说！
王睹神化已，兼设妙供养，
捐去四天下，及以五欲乐，
出家守一心，以修菩提道。
是王学道时，问彼明相佛：
安住何等法，得佛力三昧？
时佛说二法，如是应当修，
得此深妙定，施不思議乐。
闻佛说法已，踊跃充遍身，
即发菩提心，当得此三昧。
微密比丘者，莲华上佛是。
若人信如来，不诽谤此经，
是人住佛境，疾得此三昧。
若人畏生死，心不著于我，
常修舍摩他，及毗婆舍那，
是人如此相，疾得此三昧。
安住惭恐畏，常修于止舍，
利智勤苦行，速得此寂定。
观法无增减，一切如虚空，
是聪慧菩萨，疾得此三昧。
不见诸法起，亦不见其尽，
恒观法无常，亦如梦幻等，
常能勤习行，不久得此定。
不见法异相，唯睹无生灭，
又如影响炎，当得此三昧。
观诸法平等，无有差别相，
内既无身想，观外亦复然，
不见其名字，亦无有生灭，

若能如是观，疾得此三昧。
时微密比丘，如是谛观已，
初中及后夜，其心常相续，
既闻如来说，不久得此定，
即于一念顷，而证此三昧；
得不断菩提，即睹十方佛，
具诸有为行，其心渐清净。
比丘在生死，满十六千劫，
曾供无量亿，诸佛之世尊，
然后获寂定，得于无上道。”

佛告不空见：“莫心疑不信，
汝是聪哲人，勿怀于异见。
尔时比丘者，莲华上佛是！
我今语于汝，诸天及世人：
若欲观一切，无量诸法者，
是人当应修，如此妙三昧。
若有人乐欲，生无量功德，
施众难思乐，当持此三昧。
若人乐欲见，十方三世佛，
复乐转法轮，当持此三昧。
若有人乐欲，具足诸相好，
深知生死缘，亦备众善本，
是以当勤持，如此胜三昧。
若有人乐欲，远离诸恶趣，
为利众生故，当持此三昧。
如是善人等，昔已曾供养，
非一二与十，无量亿诸佛，
求最上菩提，得持此三昧。
若人乐欲求，正念闻三昧，
已曾多供养，过去无量佛，
是人久勤修，过去所行道。
若人于彼处，闻说胜三昧，
即发欢喜心，踊跃意无量，
昔已曾供养，多亿天中天。
若人于此经，常修相续心，
读诵及解说，受持与书写，
是人已曾见，无量大明力。
譬如战场所，他阵放毒箭，
以闻药鼓声，毒消得欢乐；

若人闻如是，胜定妙三昧，
为他说此法，得明三昧力，
当来必成佛，唯除身证者。
如须弥功德，依者同其色，
行者有深慧，闻定亦复然。
若有人得闻，最胜三昧声，
斯人功德聚，犹如大海量，
决定明三昧，当得于菩提。
譬如江河水，悉入于大海，
异本众流相，皆同一碱味；
若人闻如是，微妙之三昧，
即同菩提性，无异无分别。
若有诸菩萨，于多亿劫中，
勤修行布施，为利一切众，
诸佛世依所，广植无量业；
是诸菩萨等，涉历无数劫，
虽行布施业，得福未为多，
慈心说三昧，功德胜于彼。
如母能生育，此三昧亦然，
显现难思议，诸佛之功德。
是人聪慧故，常修此三昧，
不久当疾得，无上自然佛。”

三法品第十二

尔时，不空见菩萨摩訶萨白佛言：“世尊，菩萨摩訶萨，具足几法得此三昧？”

世尊即告不空见言：“菩萨若能具足三法，得此诸佛所说三昧。何者为三？所谓不贪、不嗔、不痴，如此善根。若是菩萨住于无贪，便得满足檀波罗蜜；心得安住如此法已，摄取不贪清净善根，永离贫穷恒得豪富，具大威势如日光曜。如是菩萨所修功德，皆为一切诸众生故，所可宣说无不信受，得此三昧不以为难，亦当疾成无上菩提。菩萨具此妙善功德，天人敬信。菩萨若复能修不嗔善根之行，满足忍辱波罗蜜也。若是菩萨安住忍度，若人骂詈刀杖加之，解其支节，断其头首，不生一念忿恼之心，亦不说他诸恶过咎，摄取不嗔清净善根，慈心为利一切众生，是以修行如此三昧。菩萨安住此三昧已，得与诸佛世尊常俱，乃至梦中不离见佛，经行坐卧皆获安乐，诸天护念不见恶梦，寤寐欢喜，刀不能伤，毒亦不害，水所不[漂+寸]，火所不烧，所资四事恒得丰足，亦为一切皆令欢喜，疾当得于无上菩提。

若是菩萨除舍无明，具足不痴善根之时，正观修行毗婆舍那，即便摄取不痴善根，于一切法决定巧便，满足般若波罗蜜也，他来问难疾能答对。菩萨具足如是三法，速当得此三昧之宝。

“又不空见，若是菩萨复具三法当得此定。何谓为三？应观一切诸行无常，应观一切诸行皆苦，应观一切诸法无我。菩萨具足如此三法，当得斯定疾成佛道。又不空见，若是菩萨复具三法当得此定，疾成无上菩提之道。何者为三？所谓供养现在诸佛，及以灭度如来舍利，若以华香、幢盖、缯幡、种种珍妙而以奉献，若自供养劝人令行，复应发愿作如是言：‘以我善根布施因缘，愿得诸佛所说三昧。’又不空见，复当赞叹现在如来般涅槃佛真实功德，赞戒功德、定、慧、解脱、解脱知见、威仪神通、教化辩才、阿兰若行及以慈悲喜舍之法，复更殊胜赞叹佛法仪容相好无量功德，既赞叹已复发愿言：‘若我赞叹诸佛功德，设获微福，以此善根，当得诸佛所说三昧，疾当得成无上菩提。’

“又不空见，菩萨摩訶萨于诸佛所，闻此三昧功德名字，有三随喜。何谓为三？如过去佛往昔已曾修菩萨行求阿耨多罗三藐三菩提，如彼诸佛求是三昧，我亦随学求此三昧；亦为自利及利他人，闻三昧已即生随喜，我亦当复随彼随喜，此是第一随喜者也。又不空见，如彼未来诸佛世尊，亦当修习菩提之行，闻此三昧自利利他生于随喜，我亦随喜，是名第二。若诸如来住现在世安隐住快乐，断不善行舍诸恶趣，变化幻术种种伎乐围棋博弈，一切诸恶悉皆离之，深定大悲无不具足；如彼诸佛往昔已曾修菩萨行闻此三昧，即便求之生随喜心，我今亦尔，如过去佛随而喜之，是名第三。

“又不空见，此三随喜与发愿俱，若我所获善根功德，愿使众生常得是定。又不空见，菩萨具足此三随喜，亦当疾得如是三昧。又不空见，若善男子、善女人等，随喜斯定得此善根功德之聚，为此善根以譬明之。如有一人以彼三千大千世界恒河沙为聚，于大聚中捻取一沙，掷过无量不可思议亿那由他无边世界；复取一沙掷过无量无数世界，如是次第尽大沙聚。此诸世界，若善算师、算师弟子，能得边际知其数不？”

时，不空见即白佛言：“如此人者不能知也！唯舍利弗、不退菩萨，乃能知此世界之量！”

告不空见：“不可思尽若干世界满中珍宝，其高过于诸天所居，乃至非想非非想处，以此珍宝施诸众生，此善男女得福多不？”

时，不空见即白佛言：“甚多！世尊，无量无边。”

尔时，佛告不空见言：“我当语汝，若善男女于诸佛刹满中珍宝，以用施于一切众生。若善男子、善女人等，闻此三昧三随喜已，发愿求于无上菩提，亦复欲乐修于多闻；是善男子、善女人等，所获功德胜彼施福，无量无边不可称计。”

佛告不空见：“此念佛三昧即是一切善根之母，如是说者名为正

说。”

菩萨念佛三昧经卷第六

劝持品第十三

尔时，世尊告不空见：“乃往昔世过阿僧祇阿僧祇无边大劫，尔时有佛，号宝胜光如来、应、正遍知、明行足、善逝、世间解、无上士、调御丈夫、天人师、佛世尊，出现于世无与等者，一切人天所共恭敬，解脱调伏度生死岸，无上最胜第一世尊，为护一切世间之师，今世后世皆悉明了，所可说法初中后善，其义深远，其语巧妙，具足清白梵行之相。时宝胜光如来世尊于彼经行，与三万亿百千声闻，皆住学地，人天恭敬。是宝胜光佛从卧而起心生念言：‘此诸声闻皆住学地，当随所乐为说深法，令彼速得尽诸有漏。’”

告不空见：“宝胜光佛即时便现大神通力，令此三千大千世界，遍满其中皆成烟炎。是诸声闻见此神变，不生怖畏皆大欢喜，譬如比丘得四禅乐。”

告不空见：“宝胜光佛于夜后分为说法故，即现种种神通变化。时宝胜光佛告诸声闻：‘汝等比丘见此三千大千世界烟炎不耶？’比丘白佛：‘唯然，已见。’比丘当知，有为诸行无常、苦、空，一切诸法皆无有我。所以者何？此身不净，九孔常流臭秽充满，诸行无常轮转之法，危脆不坚一念不住，生老病死之所逼切，犹如幻、炎、水聚、泡沫，无人无主犹若草木，甚可患厌应速远离。”

佛告不空见：“是三万亿百千声闻，闻宝胜光佛说是法时，是诸比丘见法住法，选择善法度四颠倒，于佛法僧得净善法，能不信他皆得漏尽。时诸声闻同声白佛：‘如是，世尊，有为诸行无常、苦、空，一切诸法皆悉无我。此身不净九孔流溢，甚可厌恶应速舍离。诚如圣教！诚如圣教！’又不空见，有三示现，神通示现、教诏示现、说法示现。时宝胜光佛以此示现，如是调伏诸声闻众，度三脱门空无相愿，及三万亿百千那由他诸菩萨等，皆当得成无上菩提。”

告不空见：“是诸菩萨闻彼世尊说宝三昧，开化人天八万四千亿百千岁，转法轮已然后灭度。”

时，不空见白佛言：“世尊，彼宝胜光如来出世，调伏声闻为有几何？正法、像法住世几岁？”

尔时，世尊告不空见：“如是三千大千世界，一切星宿可知其数，宝胜光佛诸声闻众，无量无数不可限量。宝胜光佛般涅槃后，正法住世八十亿那由他岁，像法住世十二亿岁。于是中间有佛出世，号曰慈行，寿不可称量。其佛身长足一由延，国人身量六拘卢舍。莲华周圆亦复如是，悉以此华遍布大地，一切众生游息其上。

“尔时世界名多莲华，其地柔软犹如鹿茸，若触身时状若天衣，

一切众生快乐无极，又如自在诸天宫殿。是诸众生欲度东海，胸顷之间便到彼岸；南、西、北方亦复如是，若有众生凡欲所之发心即至。是宝胜光佛初成道已，时四海内其地纵广，足八万亿百千那由他，诸声闻众悉满其中，诸阿罗汉皆各一食，唯除阿难。金刚密迹及阿逸多八十那由他不退菩萨，请彼慈行如来世尊，为诸菩萨说此三昧。将欲分别显示之时，一音之中而说偈言：

“若人勤方便， 求习出家行，
竟修最胜法， 摧破四魔军，
犹如大象王， 践踏众小草。
若人欲疾得， 寂定菩提道，
为诸众生故， 修行此三昧。
敷演净妙法， 施彼一切乐，
是人则与佛， 同其大悲心。”

“尔时，慈行佛般涅槃后，有一比丘名曰树王，于正法中广宣流布是妙经典三昧宝王。有转轮王号帝幢天，有大威德政法治世。是王有城名帝幢处，纵广正等十二由延，城郭楼观皆是真金，种种彩画众宝庄严。其城四面各有三门，国界严饰如善建城。

“又不空见，时王帝幢于夜后分眠寐之中，有净居天来至其所，即于梦中而告之曰：‘大王当知，有三昧名诸佛所说念佛三昧。若有菩萨修是三昧，恒生净土不离见佛，世出世辩无不具足，必当疾得无上菩提。’时王忽然于梦惊寤，犹见此天故在其前，即白天曰：‘谁能受持如是甚深念佛三昧？’天告王曰：‘去此不远有大比丘名曰树王，常乐受持读诵敷演，如说修行是深三昧。’尔时，帝幢从彼天所，受此三昧及比丘名，至心忆持不令忘失，即于晨朝舍四天下金轮七宝及八万亿无数百千宫人嫔女，为求三昧甚深法故，即与眷属同时舍家，俱共往诣树王比丘。

“又不空见，时彼四众天龙八部皆共围绕，有九万亿欲界诸天、八万那由他诸菩萨等，亦与眷属恭敬围绕。树王比丘时为大众，说此甚深念佛三昧。帝幢大王即至其所，以天真宝散比丘上，五体投地至心顶礼。复持八万净妙金华、天曼陀罗、沉水、末香，又以敬心奉散比丘。供养既毕即与眷属，皆悉出家被净法服，为欲修习此三昧故，供养恒沙无量诸佛。与其眷属求是三昧，八万四千亿那由岁，衣服、饮食及诸珍宝，亲近供养树王比丘，常自受持读诵解说，如说修行是妙三昧，亦化一切无量众生，大悲为心初无懈倦。帝幢菩萨及其眷属，闻树王师说此妙法，至心受持未曾暂舍，深生恭敬恒如佛想，精勤修习初不休息。树王比丘皆悉成就彼八万亿百千比丘，修菩萨行往不退地，然后灭度，彼诸眷属皆亦命过。尔时复有佛出于世，号阎浮幢如来世尊，十号具足。帝幢比丘既值世尊供养恭敬，咨禀如是甚深

三昧，受持读诵如说修行，饶益一切人天世间，皆得无上菩提大利。帝幢比丘广宣流布诸佛所说甚深定故，过三千劫当成正觉，又能成就九亿百千那由他等无量眷属，皆悉安住不退菩提。”

尔时，世尊告不空见：“时帝幢王大比丘者，岂异人乎？今现成佛，号曰高行如来、世尊、应、正遍知，十号具足。又不空见，汝今当知，以是三昧威神势力，饶益如是无量众生，以少闻故常值佛世。又不空见，若有菩萨少得闻此三昧名故常值佛世，何况菩萨于今现在！若得闻遇此三昧经受持读诵，其福如上已不可量，何况复能广闻受持、读诵解说、如说修行！又不空见，若有菩萨乘，于大乘、辟支佛乘及声闻乘、人天之乘，若善男子、善女人等，或得暂闻是妙三昧，是诸菩萨及善男女皆当疾得无上正觉。

“又不空见，是诸人等，譬如有人在阎浮提见彼明相，决定必知日出不久大光普照，阎浮提人因日光明，能得分别青黄等色；如是，不空见，若有行者略闻诸佛所说三昧，是善男子、善女人等，不久当得无上菩提，犹彼明相知日必出。汝当深信此妙三昧，受持忆念勿生疑惑。又不空见，善男子等如劫将尽六日出时，一切大地皆成烟焰；七日出时，三千大千世界之中一切洞然；如是，不空见，善男女等学大乘者有不学者，若得少闻此三昧宝，书持读诵解说其义，皆当疾得无上菩提。又不空见，善男子等譬如掘井若见淤泥，必定知水不复远也。又不空见，若有菩萨及诸众生，于佛所说念佛三昧，应当书写受持读诵，解说其义，如说修行，忆而不忘；是善男子、善女人等，不久疾得无上菩提。

“又不空见，善男子等，譬如有入吞金刚丸，时诸聪慧善男子等，必知此人定死不久，以此金刚极难消故；如是，不空见，善男子等若人于是妙三昧宝，受持读诵，广说深义，乃至少闻三昧妙法，此善男子、善女人等，不久当得无上菩提。所以者何？诸佛所说念佛三昧如金刚故。过去、未来、现在诸佛、应、正遍知之所宣说，分别选择威神守护，令诸行者不失作业。菩萨应当如是修习，恒欲利益一切世间，是名菩萨乘此乐行。如忉利天欢喜之园，若有见者身心踊跃；菩萨如是得此三昧，疾成无上菩提正觉，于所未闻诸章句等，若欲习学得亦不难。妙哉往古一切诸佛，为利益故分别示现，令满句义安住法界，诸大菩萨摄持拥护，敷演教化令乐正道。如是法门次第仪式，菩萨大士皆应当知。

“又不空见，若有菩萨于此诸佛所说三昧，若少闻者是诸人等，皆当疾得无上菩提。又不空见，是故我今为汝分别开示演说。汝又当知，若得闻此诸佛所说念佛三昧受持解说，不久疾得无上正觉菩提之道。是故汝今应当受持读诵修行乃至书写，亦当广为一切四众，国王、大臣、沙门、婆罗门，及诸异学。分别解说。所以者何？此等若闻当得满足无上菩提。

“又不空见，若善男子、善女人等应当决定至心净信此深三昧。

所以者何？皆是往古一切诸佛之所称赞。汝今当以不思議意，至心忆持深信此定，精勤修习令心相续。所以者何？此三昧者，皆是诸佛真实之说，随顺佛说至佛行处，选择分别佛所证知，甚深宝财诸佛本事，往生因缘诸佛法藏，究竟秘密诸佛圣印，如实知性诸佛真身。又不空见，此三昧者，出生行人无量善根，恒得生于大刹利家、大婆罗门及余胜家，得大威力终成菩提。所以者何？诸佛所说念佛三昧甚深妙典，能施众生不虚果故，亦令行者得无边福。若有闻者，是人获得无量无边阿僧祇等不可思議诸功德聚。

“又不空见，我今当说譬况之法成满此义，如有智人开譬则解。犹若大施诸菩萨等，常于清旦及以中晡日皆三时，如来三昧忆念力故，以诸珍妙一切杂宝，遍满恒沙大千世界，常以奉施亿千恒沙如来世尊及声闻众，经百千亿那由他等恒河沙劫如是大施，以求阿耨多罗三藐三菩提。”

告不空见：“此大菩萨所得功德，宁为多不？”

不空见言：“甚多！世尊，无量无边不可思議。”

告不空见：“我当为汝分别解说此施善根！如此诸佛所说三昧，第一真实佛口所说，若能书写受持、读诵敷演、分别解说之者，出生无量诸功德聚，比前功德其福甚多，何况闻已劝人受持，广为四众分别解说！又不空见，我今说此功德宝聚不可穷尽。”

诸菩萨本行品第十四

尔时，不空见菩萨、善现菩萨、善欢喜菩萨、无量示现菩萨、无量力菩萨、无量幢菩萨、无量明菩萨、无量胜菩萨、无量智菩萨、无量修王菩萨、无量意菩萨、无量胜思菩萨、无量定菩萨、分别一切法意菩萨、分别虚空意菩萨、分别无著意菩萨、无量宝意菩萨、一切寂定自在菩萨、善教诏意菩萨，如是等比九万百千亿那由他，此诸菩萨而为上首，即从座起更整衣服，右膝著地，合掌恭敬白佛言：“世尊，我等于此诸佛所说菩萨念佛甚深三昧，忆念受持，书写读诵，广分别说，如说修行，令心相续乃至菩提，常当受持分别宣说。所以者何？我等皆于诸佛所说甚深经典，种种相貌未曾满足。若有多人欣乐勤修，即能增长建立安乐。所以者何？若能次第修行是法书写读诵，亦教他人受持解说，必能满足无上菩提，渐渐增进成就无余。”

尔时，世尊知诸菩萨摩訶萨等心之所念，以佛常法即现微笑，于其面门放杂宝光，所谓金、银、琉璃、砗磲、码瑙、珊瑚、琥珀、赤真珠宝，种种无量微妙众色。其光普照无量世界，明耀朗彻乃至梵世，从上还下住佛顶上。譬如净喜天宝帝幢，微妙修直甚可爱乐；此刹三千大千世界，皆悉庄严犹如瓔珞。尔时，大众诸菩萨等，睹斯神变咸共惊叹：“善哉！希有如来神通。”

时有菩萨摩訶萨，名惭愧安定发众意行，即整衣服，右膝著地，恭敬合掌瞻仰世尊，以天沉水细末妙香，及天曼陀奉散世尊，即于佛前而说偈言：

“调御无与等，色身妙相严，
犹如天华树，香气遍十方，
具足善行意，修习无量智，
调御大威尊，愍利诸恶趣。
唯愿无量智，为说微笑缘！
最胜无边智，大威无等等，
何故现微笑，愿说其因缘？
此三千大千，一切诸世界，
严饰如华缨，净若忉利天，
见者皆欢悦，何因现斯笑？
盲瞶得明视，聋者获聪听，
狂乱果正念，喑哑皆能言，
以何因缘故，示现斯微笑？
象马及众鸟，皆发和雅音，
一切诸乐器，不鼓而自声，
今以何因故，天尊忽微笑？
上方诸天等，及下世间人，
一切妙音乐，悉演殊美声，
何因示斯笑？唯愿为显说！
善哉甚希有！人天皆相见，
以何因缘故，示现此微笑？
调御两足尊，矜愍众生故，
愿闻尊笑意，令我得净善。”

尔时，世尊知惭愧安定发众意行菩萨，及余大士请问意故，佛即宣说如恒沙等应正遍知之所说偈：

“告诸菩萨众，汝等且应观：
彼六万八千，诸善男子等，
往昔已堕落，今还修菩提。
皆誓言我等，各住生死中，
当来牟尼所，当受持此经。
皆乐闻此典，最胜不思议，
诸佛所说法，心常无厌足。
我今当告汝，此诸菩萨众，
非唯一佛所，发斯深敬心。”

忆念于往昔，三万六亿等，
百千那由生，为摄法利故，
尔时于是处，初起一切行；
又于彼前生，恒沙大智所，
是处初起行，摄取最胜法。
明慧人求法，心常不满足，
恒舍身命财，以求菩提道。
忆昔恒沙等，不可思议劫，
时有正觉尊，无量大胜光，
是处初起行，为求法利故。
又于宝胜炎，大明及电光，
难思照一切，是等大仙所，
三业持此法，为摄最胜道。
日光及月光，难思功德海，
具足一切行，如是诸佛所，
是处初发心，为求胜菩提。
又于彼前生，值遇猛盛光，
及与师子佛，于彼如来所，
三业受斯法，求第一菩提。
于彼过去世，诸佛恒相继，
师子幢如来，功德悉具足，
是处又发心，为求法利故。
复有他方佛，号曰胜帝幢，
调伏闻世间，于彼诸佛所，
为求胜法故，摄取无上慧。
无量智生等，不思議诸佛，
法音闻高远，如是世尊所，
三业受斯法，求第一菩提。
昔于善眼佛，犹无边火幢，
发此猛利心，求无量菩提。
又于光力王，变化神刹土，
住是大仙所，以求胜菩提。
光炎生调御，无量相德明，
于彼初发心，求此三昧宝。
炎光及大众，明聚降怨佛，
如是世尊所，求法施众乐。
一切光如来，难思及日明，
无量力善逝，无边定意佛，
于彼诸世尊，发心施法乐。
金华大圣尊，善华香正觉，

阿兰若行佛，无漏如来等，
如是诸佛所，敬求最胜道。
此方及他刹，过去无量智，
于彼两足尊，受持此三昧，
身口意勤修，求第一菩提。
以此诸善业，供养天中尊，
具足满八万，常求无上道。
是诸菩萨等，死此离恶道，
一切共俱生，恒奉人天尊，
永离邪惑法，不生卑贱家，
远离恶知识，亲近于善友，
摄取诸功德，乃至于菩提。
当于未来世，值遇弥勒尊，
供养天中天，摄取胜菩提。
慈氏尊灭后，师子佛调御，
于彼世尊所，为法净三业，
摄持诸胜行，以求正觉道。
贤劫中千佛，无上两足尊，
当为此菩萨，宣说深妙法，
是诸善逝子，必获无碍色。
过此贤劫已，无量光如来，
月显及贤观，相继出于世；
贤观佛灭度，其间甚久远；
多罗幢如来，绍继广开化；
彼诸敏慧人，为法设妙供。
多罗大圣尊，既入于涅槃，
分别世如来，其后次成佛，
为深三昧故，奉敬彼法王。
分别佛灭后，示现尊出世，
示现圣日没，华上世所依，
次第成正觉，当生一切见。
华上既善逝，优钵罗胜佛，
出现调世间，当供两足尊。
优钵罗灭度，拘修摩世依，
其次成菩提；彼佛慧日没，
庄严大势尊，于是出于世；
庄严圣眼灭，次有众智胜，
于彼为法故，广设无量供。
众智胜灭后，善现佛大智，
当兴于世间；善现泥曰已，

妙持世依师，次为调御尊；
妙持如来后，善围绕世尊，
第一智当兴，于彼求菩提。
善围绕佛灭，无量光正觉，
大胜无边明，现前最法王，
如是三调御，相继出于世；
现前慧日没，最炽念王兴，
为此法利故，供养难思议。
知彼当来佛，一切世主上，
受行此菩提，为求法寿命。
以是诸善业，于此界命终，
得供无量寿，大威降怨佛。
既值人中尊，广设无边供，
为得法义利，摄第一菩提。
住彼诸世界，众多世智所，
为利益众生，不求五欲乐。
奉敬多亿佛，当成无碍智，
怜愍脱众苦，安乐诸世间。
获最胜菩提，彼刹广难议，
众宝妙庄严，无边净妙乐。
若亿那由他，是诸菩萨等，
赞人中法王，不思议佛智。
我今告汝等，诸天及世人，
若求学佛智，则与如来等。
是人乐佛智，求习胜菩提，
以求菩提故，应获人尊法。
诸天龙夜叉，迦留摩睺罗，
及诸拘槃荼，常深护佛法。
若人求菩提，护法应如子，
若求佛菩提，则得大果力，
端严甚殊妙，色像如真金，
常为一切众，普慧深远义，
具足不思议，一切诸功德。
净色百福严，世间最上宝，
人天无比尊，龙鬼莫能议。
是人依菩提，得供最胜仙，
为利众生故，开示深定法。

尔时，众中思义菩萨、舍非义菩萨、心勇健菩萨、分别心菩萨、无恚意菩萨、拔烦恼菩萨、善思义菩萨、众智菩萨、无缚菩萨、众光菩萨、智灯光菩萨、造智知识菩萨、无等烦恼菩萨，帝幢天子、他化天子，皆共恭敬而白世尊：“今言诸佛之所说者，何故名为诸佛所说？云何诸佛？何者是佛？当云何念名为念佛？为起身念？为起法念？”

尔时，世尊告诸菩萨：“善哉！善哉！诸善男子，汝等所问甚深难思，皆是承佛威神之力，生此乐说无碍辩才。诸佛所说，名为佛说。正念诸法真实之相，是名念佛。何谓正念？莫著一切诸恶诽谤，应修一切无讥谤法，当离于我及以非我，不见众生、寿命、宰主、养育士夫、人及生者，莫著作者、使作之者、阴界诸入、想所缘处，于一切法今世、后世乃至三界无依无染，我见诸行无取无舍，禅定、解脱及六神通，如意、根、力、菩提觉分、毗舍罗等无量善法，略说九万亿那由他不可思议甚深三昧，一切诸佛常所念法佛方便慧，随而书写读诵敷演方等经典，说佛功德，名佛所说。”

尔时，世尊即说偈言：

“常能舍一切， 有为虚危相，
不得诸法性， 则获是三昧。
莫著诸诽谤， 及忆想分别，
永离我我所， 如是得三昧。
不于诸阴法， 见众生寿命，
我人及起者， 士夫养育等，
亦无分别想， 是名为说法。
于诸法不染， 我性及我所，
见我非阴生， 则得此三昧。
色受想行识， 一切空无相，
根本皆不净， 知此得三昧。
观诸有为法， 从缘不自在，
一切不真实， 虚诞不可取；
如彼从缘法， 是则名眼入，
耳鼻等亦尔， 皆无有自性。
若能谛分别， 得生此三昧。
是身虚无实， 阴聚无一净，
九孔流脓血， 谁当乐此处？
意入念念灭， 虚妄常如幻，
若能深分别， 则得是三昧。
一切诸入等， 皆空无有实，
凡夫犹小儿， 痴惑计有身，
贪爱之所迷， 不知是虚妄；

是身如空聚，众贼之所止，
可患虚诳法，智者常厌离，
如是深观察，则得是三昧。
阴界入诸法，皆空无一实，
若人能分别，得生此三昧。
如炎泡聚沫，幻化芭蕉等，
当观身危脆，不实倍于此；
若此诸菩萨，如是智不毁，
疾得一切佛，所说深三昧。
诸法不自生，亦不从他有，
毕竟无所住，无漏法亦然，
若能如是观，则生此三昧。
舍一切有为，诸行变异相，
此法如虚空，生者不可得，
菩萨如是知，修学一切法，
疾得胜菩提，转无上法轮。
是菩萨则能，建立于法幢，
以不思議智，分别一切法，
皆见是虚诳，毕竟不真实。
我今虽为汝，宣示此三昧，
如是仪式相，其义甚难知。”

尔时，世尊说此法时，有诸菩萨得无生忍，又复安住念佛三昧。是诸菩萨皆见东方如恒沙等诸佛世尊，说此三昧清净平等，无增无减，无二无异。其余诸方亦复如是，皆有无量亿那由他如来世尊，俱时皆演诸佛所说念佛三昧。时诸菩萨闻佛所说身心欢喜，快得安乐，不胜踊跃，即于佛前，重以偈颂说其相貌：

“归命世光明，正觉牟尼尊，
大法圣医王，释迦佛智海，
人依师子王，普示诸色相，
见彼东方刹，那由他诸佛。
非愍众生故，说法如师子，
调伏那由他，如是诸菩萨，
安住童真地，得无生法忍，
善顺甚深性，于法无所坏。
其余九方等，相貌亦如是，
悉见多亿众，那由他诸佛。
譬如师子王，恐惧之所依，
无漏寂无等，转第一法轮。”

是处无去来，其相亦不住，
一切法无实，性空无生灭。
众生及寿命，士夫亦如是，
一切阴界入，无实如空卷。
譬如诸野兽，毕竟无所依，
诸法实无生，或有常不净。
秽心贪生死，如彼痴婴儿，
多亿那由劫，恒苦而不厌；
是以佛慈悲，为此说菩提。
是故诸佛子，常舍身手足，
头目及髓脑，妻息妙珍宝，
皆悉能弃舍，以此行菩提。
既能施妻子，眷属诸外财，
又弃天世位，身肉及筋骨，
能舍是难舍，疾得成正觉。
施戒最胜果，忍进禅慧等，
行慈悲喜舍，以求无上智，
菩萨应修是，为利众生故。”

尔时，世尊即以偈颂答诸菩萨：

“菩萨若多劫，修行是真如，
不异不分别，以此说菩提。
其性甚寂静，难得难可见，
当起无尽意，修习如是行。
是菩萨则得，进智近菩提。”

尔时，世尊为诸菩萨略说四法，满菩提故，而告之言：“诸善男子，当学戒品善自防慎，守护观察生智方便，常勤修习乃至菩提，于诸众生恒起慈心，为除我见及我所想，求于最胜无上菩提，乃至舍身及以命财，应当守护成就增长，如是四法三昧根本。”

大众奉持品第十六

尔时，世尊知九万亿那由他等诸大菩萨摩訶萨众皆悉已集；复有百千万亿菩萨，是等当于弥勒佛时，悉得住于不退转地。是时，东方九万九亿百千那由他诸菩萨众，梵上菩萨而为上首；南方复有九万九亿诸菩萨众，持诚菩萨摩訶萨等而为上首；西方复有九万九千诸菩萨众，大智菩萨摩訶萨等而为上首；北方复有九万九千诸菩萨众，大光

菩萨摩訶萨等而为上首；复有住彼欢喜世界，无量菩萨皆悉来集。梵身天王、大华梵王、无量梵王皆悉来集，复有无边百千那由他释提桓因众念天主而为上首，复有无量百千亿万那由他等四大天王，复有无量迦流夜叉、持鬘夜叉、常醉夜叉，复有诸余天、龙、夜叉、乾闥婆王、阿修罗王、迦留罗王、紧那罗王、摩睺罗王、罗刹夜叉、拘槃荼鬼、富丹那鬼及与迦吒富丹那鬼，如是种种无数百千大力鬼神亦来在座。

尔时，世尊应正遍知，知诸大众皆悉已集，将为此等略说斯经功德深重次第之法，为欲调伏诸人天故，复作师子譬咳之声，即为时会说未曾有：“此经法者，去来现在三世诸佛之所修行，能灭一切诸大苦恼，是故诸佛尊重是法，已行、当行、今亦修行。是故大士欲求我身，应当尊重真实之法，敬事法者当如敬佛。所以者何？法不异佛，是人求法应到于此。若天、若龙、人及非人，能求法者疾舍诸苦，行法除苦佛说最胜。是故菩萨为欲利益一切世间求菩提法，是诸菩萨则为已施一切众生菩提之乐，疾得度于生死大海。当我须臾说此三昧微妙经王教世间时，一切山河及以大地，皆悉俱时六种震动，时诸众生皆称善哉。所以者何？当佛说此菩萨念佛大三昧王，大乘方等微妙经典，无边功德大智海时，亿百千数那由他等无数世界佛之刹土，皆悉六种十八相动，及放净光大明普照。”

尔时，虚空无量诸天击大天鼓声若雷震，又奏和雅调畅之音。复有八万亿那由他地神天女，持众宝座从地踊出至世尊前，至心恭敬而以奉献。复有主乐乾闥婆王，作亿百千那由他等种种妙音甚可爱乐。复有诸龙及诸龙王子，兴大密云普覆世界，雨天曼陀及众妙华，周布大地高百由延。时娑竭罗诸大龙王，于虚空中变成宫殿，众宝庄校微妙殊特，天栴檀末普散此刹。三千大千佛之世界，复有色界诸梵天王，于如来上作宝华盖，遍覆三千大千刹土。是盖处处垂诸宝铃，其铃皆出微妙之音，譬如他化自在天乐。

尔时，此会一切众生皆修慈悲喜舍之心，既闻法音不胜喜悦，各各至心重归三宝。时会闻法无边众生，皆发无上菩提之心。复有无量诸众生等，悉深发辟支佛心。复有无数诸众生等，皆发声闻菩提之心。复有无量诸刹利王，沙门、婆罗门、毗舍、首陀、长者、居士，皆悉获得须陀洹果、斯陀含果、阿那含果。复有无边诸众生等，皆证无著阿罗汉果。

尔时，世尊说是经已，一切大众皆大欢喜。不空见等诸大菩萨大声闻众，及诸世间人天八部、阿修罗等，闻佛所说，皆大欣乐，顶戴奉行。

佛说大方等大集经菩萨念佛三昧经卷第一

序品第一

尔时，婆伽婆在王舍城耆闍崛山中，与大比丘众千二百五十人俱。一切皆是大阿罗汉，诸漏已尽无复烦恼，心善解脱，慧善解脱，调伏一切犹如大龙，舍离重担不受后有，所作已办获真己利，住平等智入解脱门，自在得度众苦彼岸，惟除尊者阿难一人。复有无量诸菩萨摩訶萨众，皆从十方世界来者，各与一切菩萨摩訶萨众俱。

复有无量净居诸天子，其名曰：难陀天子、须难陀天子、栴檀那天子、须摩那天子、自在天子、大自在天子、难胜天子、善威光天子。如是等诸天子众，过夜半已放大光明，直照于此耆闍崛山已，咸诣佛所顶礼尊足，即以天多摩罗跋香、天沉水香、天多伽罗香、天末栴檀香及牛头栴檀香，如是等种种诸香，殷勤再三散于佛上已。复以天散华及天鸡婆罗华、摩訶鸡婆罗华、曼陀罗华、摩訶曼陀罗华、曼殊沙华、摩訶曼殊沙华、阿地目多华，以如是等种种众华，亦殷勤再三散于佛上已，而复渐进，前诣佛所右绕三匝，一心恭敬合十指掌，稽首礼佛退住一面。

尔时，诸天子众各如是念：“今此菩萨念一切佛三昧法门，过去诸如来应供等正觉，已曾于彼天人大众中，宣扬分别利益一切诸众生故。今我世尊，岂不为斯天人大众，梵、魔、沙门、婆罗门，诸龙、夜叉、乾闥婆、阿修罗、迦楼罗、紧那罗、摩睺罗伽、人非人等，敷演宣说如是妙典？为欲利益一切世间天人大众故，亦令未来世一切众生咸蒙利益故。”

尔时，难陀天子、须难陀天子、栴檀那天子、须摩那天子、自在天子、大自在天子、难胜天子、善威光天子，如是一切诸天子众作是思惟已，即白佛言：“世尊，婆伽婆，今此菩萨念一切佛三昧法门，过去诸如来应供等正觉，已曾为诸天人大众，梵、魔、沙门、婆罗门，诸龙、夜叉、乾闥婆乃至一切人非人等，敷扬演说如是经典，利益世间诸众生故。惟愿世尊大慈哀愍，今亦为此天人大众，梵、魔、沙门、婆罗门，及彼一切人非人等，演说如是方等法门，令诸世间多获利益安隐快乐故。”

尔时，世尊大悲熏心，为欲利益一切世间诸众生故，默然受是诸天子请。时诸天子见佛默然，知圣哀许，顶礼佛足围绕三匝，即于耆闍崛山忽然不见，还于天宫。

尔时，世尊过夜后分将明旦时，便作大师子王警欬之声而复微

笑。时佛如来应供等正觉，忽发如是殊异声已，须臾之间是耆闍崛山精舍所有诸比丘众，承佛威神，一切皆悉集于如来应供等正觉所。

尔时，复有众多异阿兰若处诸比丘等，具大神通有大威德，亦皆承佛威神，俱从阿兰若处来，入耆闍崛山集如来所。

尔时，王舍大城一切诸比丘尼亦皆承佛威神，入耆闍崛山集如来所。

尔时，摩伽陀国主，韦提希子阿闍世王，与无量百千眷属前后围绕，入耆闍崛山集如来所。

尔时，复有诸夜叉大将，其名曰：阿吒婆迦旷野居夜叉大将、伽陀婆迦驴形夜叉大将、金毗罗摩竭鱼夜叉大将、须脂路摩针毛夜叉大将、摩罗陀梨持华鬘夜叉大将，如是等诸夜叉为首，并余诸夜叉辈，有大威神具大势力，各与无量百千眷属前后围绕，入耆闍崛山集于佛所。

尔时，复有诸阿修罗王，其名曰：大叫罗睺阿修罗王、种种可畏毗摩质多阿修罗王、须婆睺善臂阿修罗王、波诃罗舒展陀阿修罗王，有大威神具大势力，闻佛警声，心生惊悚，身毛皆竖，各与无量百千眷属前后围绕，来入耆闍崛山集于佛所。

尔时，复有此三千大千世界所有诸大龙王，及其眷属彼各闻佛警声时，心生惊悚，身毛皆竖，承佛威神，来入耆闍崛山集于佛所。

尔时，舍婆提大城给孤独长者，亦与无量百千眷属前后围绕，自舍婆提诣王舍城，入耆闍崛山集于佛所，为欲恭敬供养如来听闻正法故。

尔时，毗舍离大城，亦有无量诸梨车子，皆生大净婆罗门家，其名曰：善思梨车子、伏怨少壮梨车子、功德生梨车子、无边手梨车子、举手梨车子、然手长者子，如是等而为上首，皆已久住无上大乘，各与无量百千眷属前后围绕，自毗舍离诣王舍城，入耆闍崛山集于佛所。

尔时，瞻波大城，复有无量诸长者子，已于过去供养无量无边诸佛种诸善根，具大威德有大势力，其名曰：善住长者子、利益长者子、无边精进婆罗门子，如是等而为上首，及余无量长者居士，各与无量百千眷属前后围绕，自瞻波城诣王舍城，入耆闍崛山集于佛所，为欲恭敬供养如来听闻正法故。

尔时，波罗奈城，有无量种异类人众，已于过去供养无量百千诸佛，植诸善根皆已纯熟，自波罗奈诣王舍城，入耆闍崛山集于佛所，为欲恭敬供养如来听闻正法故。

尔时，拘尸那城，复有无量诸力士末罗子，亦曾供养无量百千诸佛世尊，以久熏修诸善根故，有大威德具足势力，亦与无量眷属围绕，自拘尸那诣王舍城，入耆闍崛山集于佛所，亦为恭敬供养如来听闻正法故。

尔时，东方过无量恒河沙诸世界中，一切大梵天王并余天众，有

大威德具大神通，闻佛世尊大师子王警欬声时，咸大惊愕举身毛竖，承佛威神，各与无量千万天众眷属围绕，皆自本处发来诣此娑婆世界王舍大城，入耆闍崛山集于佛所。如是南西北方四维上下，皆有如是无量恒河沙世界，所有一切大梵天王及余天众，有大威德及大神通，闻佛世尊大师子王警欬声时，亦咸惊悚举身毛竖，承佛威神，各与无量千万天众眷属围绕，皆自本处发来诣此娑婆世界王舍大城耆闍崛山集于佛所。

尔时，耆闍崛山，其地弘博纵广正等，如此三千大千世界大众充满无有空处如杖头许。然彼大众皆有无量大威德力及大神通，一切天人，诸龙、夜叉、乾闥婆、阿修罗、迦楼罗、紧那罗、摩睺罗伽、人非人辈皆悉充满。

尔时，世尊知诸世间天人大众一切集已，复发如是大师子王警欬之声，发大声已自精舍出，至一方所而复微笑。时诸世间天人大众睹是事已，各舍己服及诸华鬘，以种种香而散佛上，供养恭敬至心瞻仰。

尔时，大众中有尊者舍利弗、尊者目犍连、尊者大迦叶、尊者须菩提、尊者富楼那弥多罗尼子、尊者罗睺罗、尊者大劫宾那、尊者大迦旃延、尊者阿泥楼陀、尊者护世、尊者守笼那、尊者难陀、尊者阿难等而为上首，及余一切诸大声闻，皆是大德具大神通，一切皆来集斯会坐。

尔时，大众中复有尊者弥勒菩萨摩訶萨、越三界菩萨摩訶萨、踰大步菩萨摩訶萨、初发心即转法轮菩萨摩訶萨、善思菩萨摩訶萨、大音声菩萨摩訶萨、善行步菩萨摩訶萨、超三世菩萨摩訶萨、持世菩萨摩訶萨、文殊师利菩萨摩訶萨、不空见菩萨摩訶萨等而为上首，及余无量无数菩萨摩訶萨，皆于过去无量诸如来所，种诸善根众行熏修功德成满，久已得住阿耨多罗三藐三菩提。

尔时，尊者不空见菩萨摩訶萨，见佛世尊复微笑已，从座而起，整容理服，偏袒右肩，右膝著地，合掌向佛而说偈曰：

“最胜无上两足尊， 无缘不应现微笑，
一切世间无等侣， 惟愿为我演笑因。
常施贫穷诸所须， 亦说大乘最妙宝，
能与生盲决胎膜， 今事微笑何因缘？
世尊三界尚无比， 何况世间得论胜！
能作世间大导师， 今应显笑有何缘？”

尔时，世尊即告不空见菩萨摩訶萨言：“不空见，汝今见斯胜地方所，左右边动众相庄严可爱乐不？”

不空见言：“如是，世尊。如是，婆伽婆。”

佛复告言：“不空见，汝应当知此地方所，往古诸如来应供等正

觉，已曾受用教化游居。”

尔时，不空见菩萨闻佛教已，速疾而行趣彼方处，至彼方已，便入三昧。住三昧时，自然成就上妙宝座，种种庄严皆悉具足。严饰座已，还诣佛所，头面礼足而白佛言：“世尊，今此方处庄严若是。惟愿世尊，亦当及时处斯胜地。”

尔时，世尊便往方所，至方所已如法升座。于是如来应供等正觉升此座时，如此三千大千世界一切大地六种震动，所谓：动、遍动、等遍动，震、遍震、等遍震，涌、遍涌、等遍涌，吼、遍吼、等遍吼，起、遍起、等遍起，觉、遍觉、等遍觉，东涌西没、西涌东没、南涌北没、北涌南没、中涌边没、边涌中没。时此大地如是动已，佛神力故遍此世界有大光明，令诸众生等受快乐。下至阿鼻大地狱中，所有众生蒙光触身，诸苦消灭等受快乐。如是一切诸地狱中受苦众生，及以诸畜生辈，更相残害阎罗王界诸饿鬼等，遇斯光已所有苦具皆悉消除，饥渴充满，无有众生不受乐者。当尔之时，一切众生悉舍恶念，皆起慈心，递相爱乐各怀悲愍，犹如亲属相视欢欣和合同座，于是赞曰：

“世尊处斯座， 能放大光明，
大地六反动， 令众生欢喜。
如来处斯座， 法王放光明，
当知如是时， 众生等受乐。
正觉处斯座， 大智归依处，
放光利世间， 遍照此佛刹。
奇哉是大乘， 最胜乘无上，
如来处斯座， 利益难思议！
奇哉是大乘， 最胜乘无上，
沙门婆罗门， 于此莫能测！”

尔时，世尊出广长舌，遍覆于此三千大千世界已，告诸菩萨摩訶萨及诸大声闻众言：“诸善男子，汝等当知昨中夜后，欬有净居诸天，难陀天子、须难陀天子、栴檀天子、须摩那天子、难胜天子乃至须多波天子等，与无量诸天子，有大威德具大神通，放盛光明直照耆闍崛山，来至我所，即以种种天上妙香，所谓天末栴檀乃至天多摩罗跋香等散于我上。复以种种天华，所谓优钵罗华乃至大曼殊沙华等，供养于我右绕三周，顶礼我足退住一面。彼退住已，更于我所增敬上心，合十指掌默然而住，住已即作如是思惟：‘今此一切菩萨念佛法门，过去诸如来应供等正觉，已曾为彼天人大众宣扬解释，惟欲安乐彼诸众生。今我世尊亦当为此天人大众，如是演说念佛法门，安乐利益诸众生故。’彼诸天子如是念已，即便请我说此法门。时我默然许为其说，诸天知己于是不现。”

尔时，世尊即说颂曰：

“比丘知昨中夜后， 净居天王摩醯罗，
将诸天众及眷属， 难陀及以须难陀，
须摩那天栴檀等， 乃至难胜须多波，
普放世间胜光明， 直照此土耆闍崛。
彼天既来至我所， 以天华香而供养，
然始右绕我三周， 顶礼恭敬一面住。
彼诸天子默生念：‘今此念佛修多罗，
过去最胜曾广宣， 怜愍世间众生故。
今我释尊十力具， 宁不演说斯法门？
利益世间诸群生， 安隐一切天人故。’
诸天念已便发请， 时我默然遂许之，
我故欲于耆闍山， 如先诸佛所演说。
天知我已许之故， 生大欢乐尊敬心，
一切咸复恭敬礼， 右绕三周然后去。
比丘汝辈当善听， 我闻过去诸佛说，
莫于是处生惊疑， 诸如来智难可测。
往昔诸佛所行道， 我先知尽无复疑，
现在一切人中尊， 所得菩提我已证。
当来大悲愍世者， 自然法身我觉知，
我今具足无碍智， 如是大智难称量，
超出世间无与等， 一切众生莫能测！”

不空见本事品第二之一

尔时，世尊告尊者舍利弗、尊者大目犍连、尊者大迦叶、尊者须菩提、尊者富楼那弥多罗尼子，如是等具足神通有大威德诸大弟子言：“汝诸比丘，如汝所知，依汝境界，当于我前各师子吼。何以故？若汝说者，令此一切天人大众诸声闻人咸得信解故。”

尔时，世尊复告弥勒菩萨摩訶萨、文殊师利菩萨摩訶萨、越三界菩萨摩訶萨、超不思议菩萨摩訶萨、善行步菩萨摩訶萨、初发心即转法轮菩萨摩訶萨、善思惟菩萨摩訶萨、大音声菩萨摩訶萨、持世菩萨摩訶萨、不空见菩萨摩訶萨等言：“不空见，汝今应当大师子吼，决定请说诸佛世尊所得功德真实相貌。汝若请者，则能利益一切世间诸众生辈，是故我今躬自劝汝。”

时，彼不空见菩萨闻圣教已，即于佛前以偈赞曰：

“世尊百福金色身， 慈悲妙觉第一义，

功德智慧斯无减，忽令我请问因缘？
无有等类人中尊，世间胜智靡超者，
法王功德已究竟，何缘今日劝我请？
佛灭清净禅第一，智慧深妙解脱真，
解脱知见先圆满，何故今日劝咨问？
法王威仪咸具足，一切世间最尊雄，
既能自利亦利他，大师何因劝我请？
世尊慈悲久淳至，旷劫常行无怨亲，
无障碍辩难称量，何因世尊令我请？
能施一切贫乏财，亦开世间生盲眼，
胜尊能令怖者安，何缘世尊劝我请？
佛身滓秽不能污，衣服本来离尘垢，
生处王中圣王家，何因今者方劝请？
圣衣离身四指间，终无近体而能住，
旋岚巨风吹不动，圣尊何事而劝请？
世尊寻常行路时，所至窟凸自平满，
或经高阜即坦然，何因今日令我请？
世尊身相悉圆满，行步支节无动摇，
由得不坏难思议，不应今日令我请。
我观世尊回顾时，大地便随六反动，
无有神足若如来，如是自在人中最。
世尊光明所照触，能令狂者不失心，
但能暂睹如来光，或时失念旋即复。
世尊行时足动尘，众生遇者七日乐，
乃至寿终随意生，故我归命与乐者。
若人遭病受大苦，众痛酸迫不能堪，
暂蒙世尊以手摩，即得安隐不可说。
世尊法身具斯力，皆因旷劫长时修，
是处终无有疑惑，导师不应劝我请。
人中独尊种种能，调伏大仙度一切，
我今还白天人师，是故不应劝我请。”

尔时，世尊复告不空见菩萨言：“善哉！善哉！汝不空见，快说是事！善思念之，吾当解说。”

不空见言：“如是，世尊，惟愿广释，我今谛受。”

佛告不空见：“我念过去无量无边阿僧祇劫，时彼有王，名无边精进，有大神通，具足威德正法治化，所居大城名曰善住。其城宽旷东西具满十二由旬，南北惟有七由旬半。城有七重，其城重别皆以七宝，所谓金、银、琉璃、玻瓈、玛瑙、砗磲、真珠、珊瑚，尽用如是众宝间错。复次，不空见，当知彼城，城有四面，面别三门，门各皆

有二阙相对，楼阁高广庄严殊丽，具足咸以妙宝合成。当其门中竖帝释胜幢以为门限，乃至所有楣栌枢闼，一切皆是众宝厕寔。复次，不空见，彼城诸门，咸有金银二种络网罗覆其上，复于网上种种严饰，金网银铃、银网金铃，清风吹动出微妙音，具足和雅犹如天乐。

“复次，不空见，彼城七重，于七重内具足宝阶，斯有栏槛镂绮分明，七宝所成杂色可爱。于金栏处垂白银茸，于银栏所悬真珠茸，于珠栏处悬琉璃茸，乃至种种诸彩交错，众宝间悬互相映发。复次，不空见，彼城七重周匝皆有宝堊围绕，所谓金、银、琉璃、玻瓈、玛瑙，诸种庄严皆用宝成其堊，各有七宝阶陛杂色分炳微妙可观。

“复次，不空见，彼精进王，诸堊水中妙华盈满，所谓优昙钵华、钵头摩华、拘物头华、分陀利华。如是众华光明可爱，鲜洁柔软芳烈远闻，众生受用无遮护者。复次，不空见，彼精进王，其堊岸上植种种华，所谓尼文迦多华、钵帝剑华、阿地目多迦华、瞻波迦华、婆梨师迦华、拘毗罗陀华、达奴迦利迦华，如是诸华香鲜可爱犹如天华，民人取用亦无遮护。

“复次，不空见，彼城各有七重行列，多罗宝树周匝围绕，鲜明可爱七宝合成。其黄金树，白银为叶及以华果；白银树者，真珠为叶及以华果；真珠树者，琉璃为叶及以华果；琉璃树者，玻瓈为叶及以华果；玻瓈树者，玛瑙为叶及以华果；玛瑙树者，砮磲为叶及以华果；砮磲树者，赤真珠为叶及以华果；赤真珠树者，珊瑚为叶及以华果；珊瑚树者，真金为叶及以华果。

“复次，不空见，诸多罗树光茂可观，微风触动出妙音声，若得闻者欢喜受乐。如人作乐能生种种微妙音声，若有得闻无不受乐；彼多罗树风来触时出微妙音，令人乐闻亦复如是。复次，不空见，彼王城中常有如是种种诸声未曾断绝，所谓象声、马声、车声、步声、鼓声、贝声、箜篌声，琴瑟琵琶箏笛箫，如是一切种种音声未曾暂息。王恒宣令国内民人：‘谁有所须饮食、衣服、象马车乘，随意所须皆悉给与。’复次，不空见，彼王城外多罗树林，行人游处在下休息，若饮若食，或卧或坐，闻此宝树诸微妙音莫不皆受五欲妙乐。

“复次，不空见，彼精进王，于大城内近远皆如一射箭所置一华池，四岸及底皆四宝成，四面阶道七宝庄饰，所谓黄金阶道白银庄饰、白银阶道琉璃庄饰、琉璃阶道玻瓈庄饰、玻瓈阶道玛瑙庄饰、玛瑙阶道珊瑚庄饰、珊瑚阶道琥珀庄饰，众宝杂厕见者欢喜。复次，不空见，彼池复有诸种妙华，所谓优钵罗华、钵头摩华、拘物头华、分陀利华，如是众华香气芬馥，众生闻者无不爱乐。于池岸上复植诸华，所谓伊尼摩迦乃至达迦利华，众华可爱犹如天华。彼华池门常开不闭，人民往来无遮禁者。

“复次，不空见，彼精进王，于大城内置游观园。于诸园中复有种种七宝树林常有华果，王与夫人后宫侍御，同共游处欢欣取乐。门亦不限，任彼人民游观嬉戏等受快乐。复次，不空见，又于彼园内面

各一箭所别置华池，亦以金等四宝所成。复用七宝严饰阶陛，众色光丽见者乐观。彼池水内种种诸华，所谓优钵罗华乃至分陀利，是等众华芳鲜可爱。池岸复有多种林树及诸华果，所谓婆尼斫迦华、陀摩那伽乃至达□迦利华，是等华果香鲜可爱，人民取用无遮禁者。

“复次，不空见，彼精进王禀性仁爱，慈念众生如母爱子，亦常深心敬事沙门、婆罗门、刹利、长者，如子事父。复次，不空见，彼王形量魁伟挺异常人，身体圆满众相具足，面目端正颜色光荣，威德弘普天人爱敬。复次，不空见，彼王宿植德本生刹利家，种姓尊高世无胜者，所生父母七世清净，妻子眷属福庆会同，无有一人行过非者。复次，不空见，彼王以福业故，天下丰饶，凡是百味恒满仓厨，增锦诸珍盈溢府库。

佛说大方等大集经菩萨念佛三昧经卷第二

不空见本事品之余

“复次，不空见，彼精进王，以慈爱怜愍多好行檀，常为大会无碍施主，天下所有沙门、婆罗门、贫穷疾病诸乞求者，随须给与无有休厌。

“复次，不空见，彼精进王，凡所统领八万四千城邑聚落，皆是净业胜因所感七宝合成。于诸城上一一复造八万四千栴檀楼观，诸门左右亭传路次，悉有堂舍众宝庄严。门无昼夜常开不闭，以拟一切等获大安。又诸城内衢巷街陌，恒燃灯烛有大光明，令彼人民各力为作，同共受斯安隐快乐。

“复次，不空见，彼精进王，时有二子：一名师子，二名师子意。诸根明利身相圆满，有大威德具足神通，皆已先发阿耨多罗三藐三菩提心。

“复次，不空见，当尔之时有佛世尊，号曰宝聚如来、应供、等正觉、明行足、善逝、世间解、无上士、调御丈夫、天人师、佛世尊，出现于世，常为天、人、梵、魔、沙门、婆罗门，诸龙、夜叉、乾闥婆、阿修罗乃至一切人非人等，宣明正法初中后善，义味深奥其文亦善，纯备无杂清白梵行。复次，不空见，时彼宝聚如来应供等正觉，常与七十二亿百千诸大声闻皆阿罗汉，具足神通有大威德，近善住城说法教化。

“复次，不空见，尔时宝聚如来应供等正觉，即于食时著衣持钵，与彼七十二亿百千大声闻众前后围绕，威容详雅入善住城次第乞食。彼精进王，适与二子在高楼上，遥望见彼宝聚如来，大众围绕端严殊特威德巍巍，行人观睹莫不乐见，诸根清净心虑澹然，上下调伏胜奢摩陀，到于第一功德彼岸，具足圆满一切种地。王既见已，生奇特心喜勇无量，即与二子取诸华鬘、涂香、末香及余名香，俱出宫

门，速疾持诣宝聚如来应供等正觉所，奉献供养佛及大众，顶礼佛足却住一面。复次，不空见，彼精进王及其二子，即便要请宝聚如来，与诸大众尽形供养，所谓衣服、器具、饮食、医药，凡是所须悉皆奉给，庶事隆厚圣众获安。是精进王与其二子，宿植德本常求佛法，今既遭逢又蒙受请，心生欢喜庆幸特深。

“复次，不空见，时彼宝聚如来应供等正觉，于天人中说法教化所应作已，便于中夜入无余涅槃。不空见，时精进王，闻彼世尊般涅槃已，即与夫人及其二子，躬率群臣及诸民众，诣彼世尊般涅槃处，至已敬礼世尊足下，悲号啼哭椎胸大叫，举身投地如树中摧，蹙地宛转而伤叹曰：‘世尊灭度一何驶哉！大圣涅槃遗弃我等，世间方盲导师长逝，众生贫困商主告终，世界将昏慧灯忽灭！’不空见，彼精进王，如是追慕极悲叹已，方与二儿诣世尊所，以诸香水沐浴圣身，复用众香遍涂尊体，更以种种殊异华鬘微妙乐音，尽虔供养然后方用迦尸迦衣，妙叠缠裹安处金棺及以铁椁，其棺又以七宝杂厠。如是盛置彼佛身已，方聚清净赤妙栴檀，高一由旬，纵广正方一拘卢舍，散诸种华及以华鬘，烧燃殊胜涂末香等，灌以酥油然后起火阇维宝聚如来色身。

“复次，不空见，时彼王子师子既见如来般涅槃已，如是思惟：‘天人大师舍我灭度，我于今日何义苟存？今我若获随从如来应供等正觉而取灭度，岂不乐哉！’不空见，时彼王子如是念已，用诸名香自涂其身，复以诸香熏其衣服，以氎缠裹，然后周围放大猛火焚烧其身。火炽盛已，师子方于猛焰之中，发大弘誓救诸众生，歌赞归依如来功德，以偈颂曰：

“‘世间宝中最尊上， 今日放舍入无余，
天人大师转法轮， 我等从此不复睹。
法王利益无量众， 今已弃置入涅槃，
吼宣如是大菩提， 长不复见众围绕。
不可思议大导师， 说法能令闻者喜，
一切天人诸魔梵， 从今永绝不闻声。
能施贫穷法财宝， 为众演说皆乐闻，
诸天龙鬼人非人， 自此长往无归趣。
世间从今无所依， 偏悼我王何恃怙？
并师子意失覆护， 永不闻佛说法音。
我宁捐躯及寿命， 无用独住于世间，
以是今灭所爱身， 因兹更广弘誓愿。
我于佛所种善根， 父王亦常尊三宝，
先愿以此诸功德， 令王及我证法身。
于不思议诸佛所， 供养修行众善业，
普愿群生同斯福， 亦令我誓无虚言。

世尊灭度我焚身， 其有得闻或亲见，
一切皆同等正觉， 非彼现在身证者。
若人觉悟及梦中， 但令见我今所作，
彼必成佛无有疑， 非彼现在身证者。
我此爱身终败坏， 事同水沫无坚牢，
愿彼食我诸虫兽， 皆得速成菩提道。
今我誓行精进事， 或有毁骂或轻诃，
令我速得调御师， 非彼现在身证者。
我求无上正觉时， 其或慈心相观视，
即于世间疾成佛， 非彼现在身证人。
我今所愿及未发， 为是焚烧所爱身，
若此诚誓必不虚， 令我还见灭度佛。
如我暂得睹世尊， 何异天师重出世！
今我虽复盛焦燃， 犹冀身存得观佛。
世尊智慧无障碍， 常转三世清净轮，
如昔广利诸众生， 令我见佛从火起。
济世大师若暂起， 如先威力普眼尊！’

“佛知师子心精诚， 为之暂起视神力，
广与世间兴变事， 令无量众厌患身，
毕竟利益诸众生， 还复焚身入寂处。
大众睹佛巨神变， 以清净意赞妙音：
‘诸佛妙法难思议， 戒及禅定亦复然，
智慧解脱不可量， 神通变化亦难测，
虽已灭度能净我， 今故归命焰炽身。
世尊威德无有比， 神通已达彼岸边，
灭度能令生厌离， 令我归依普眼观。
慈悲一切最尊胜， 能以自心知他心，
悉治无边界众生， 归命无等善逝者。
于诸医中第一尊， 常以妙药施众生，
能除无量众病苦， 归命怜愍救护人。
以我称赞诸善根， 恭敬供养诸功德，
放舍爱身所获福， 先愿利益诸众生。’

“不空见，时彼王子师子，发斯大愿以自庄严，然后增火卒舍身命。时诸世间天、人、梵、魔、沙门、婆罗门，乃至一切人非人等，见斯事已，咸于世间生重厌离。

“复次，不空见，时彼王子舍身命已，即生梵天作大梵王，于诸梵中最尊最胜，有大威德具大神通。不空见，时彼王子生梵宫已，即自思惟：‘我从何处作何善根而来生此，得有如是功德果报大神通

力？’作是念已，便自了了分明见知：‘我于人间为精进王子，我与父王众具供养恭敬歌赞宝聚世尊。世尊灭度，我即焚身于彼炽然猛火之中，发大誓愿叹佛功德，以此善根今生梵宫。然我今应还下人间，开慰我父答所生恩，复当供养宝聚如来入于涅槃烧身处也。’

“复次，不空见，时大梵王如是念已，与眷属天于彼宫没，犹如壮士屈伸臂顷，即至人间往诣宝聚如来应供等正觉阇毗身处，以天众香所谓天末旃檀及天牛头沉水、多摩罗跋香等而为供养，复散种种天上妙华，华若车轮犹云遍满而为供养。师子梵天供养佛已，方慰其父精进王言：‘大王当知，王子师子烧身丧命，今我是也。我时即生大梵天中，愿王勿复忧悲痛恼，惟应欢喜深自庆快。何以故？王今已获第一大利。所以者何？诸佛世尊难遭难遇，而王已得值遇世尊宝聚如来应供等正觉，尊重恭敬具足供养，是为希有第一大利。是故大王从今已后，惟当一心受持是法，弟师子意亦应如是受持此法；复应供养世尊舍利，处处流布广兴塔庙。我于梵宫亦常如是，持斯妙法尊奉舍利。’如是言已忽然不现。

“复次，不空见，时彼精进王闻梵语故，即与其子师子意者，往诣宝聚如来应等正觉舍利之所，恭敬礼拜歌诵赞叹，持一切香、一切华鬘并诸音乐，复持诸种幢幡宝盖奉献供养。又少时间，于彼八万四千诸城，纯以七宝兴起八万四千塔，高一由旬，面各广长一拘卢舍，殊特端严光耀可爱，安止舍利咸令供奉。又于一一宝塔之所，常燃八万四千灯明，各各复以一切名香、一切妙华，及以华鬘、一切幢幡、一切宝盖、一切乐音，鼓羸角贝钟铃磬铎，凡是众具莫不毕备，如是供养受持是法。彼精进王以斯善根，于八万四千劫不生恶道，及师子意亦同果报。王大夫人名曰善意，其最大臣多曰无嗔，亦于八万四千劫中受胜果报。彼王如是于诸劫中，次第供养六万诸佛，所生常受转轮王身，正法治化利益众生。

“复次，不空见，彼宝聚佛灭度之后，时节未几，有一菩萨摩訶萨，名普密王现生世间，为世间故舍家出家示修苦行，诣菩提树坐于道场，以一念慧断除无明烦恼习气，即证阿耨多罗三藐三菩提。不空见，时彼师子大梵天王，以天眼观见普密王如来应供等正觉出兴于世，即复还下住虚空中，持天众香及以妙华散于佛上，然后至地右绕三周，恭敬合掌头面礼拜，劝请世尊转大法轮。时，彼师子梵王住于佛前，以偈请曰：

“世尊今应阐妙法，我等众生堪听闻，
智慧摧敌今适兴，一切世间莫能毁。
如来无上调御者，具足至真十种号，
利世大师今已起，自然正觉妙菩提。
功德圆满人中上，圣智久修非始然，
世尊但为演妙音，今此大众乐闻受。

弘誓本为度世间， 无归依者作覆护，
如昔所愿今既满， 已到寂静无为处，
今当速开甘露门， 能坏三缚出众恼。’

梵王陈请义已周， 如来于是默然许，
于须臾顷普密佛， 遂令彼梵极欢喜，
及无量亿天人众， 以闻善逝转法轮。
时彼梵天蒙说已， 广持众具奉报恩，
于是复发弘誓愿：‘为求无上菩提处。
今于普密世尊前， 陈我所作诸功德，
以此善根所生处， 常奉十方诸世尊。
我昔道场供养佛， 请听慈说利众生，
因是微善凡所居， 愿于佛前常歌赞。’”

尔时，世尊复告不空见菩萨摩訶萨言：“不空见，时彼精进王子师子梵天，以烧身善根得生梵宫，次第供养五千诸佛，听闻正法增长善根，常发广大不思议愿。不空见，汝今当知，尔时无边精进王者，岂异人乎？即我身是。”

时，彼不空见菩萨复白佛言：“世尊，彼王二子，师子及师子意者，今何所在？为于现世供养诸佛？为已灭度在他世耶？”

佛言：“不空见，汝知尔时王子师子意者，今此弥勒菩萨摩訶萨是；尔时王子师子者，即汝不空见菩萨是也。以汝于彼宝聚如来佛法之中，发大誓愿一舍身故，能令三万天人大众发阿耨多罗三藐三菩提心。彼辈终必证大菩提无有疑也！”

尔时，世尊为重宣此义，以偈颂曰：

“我观过去久远劫， 佛号宝聚无上尊，
无师自觉现世间， 能益天人群生类。
具足百福金色相， 慈心显发实义门，
开示众生菩提路， 吼唱能尽众苦源。
宝聚挺特人中胜， 七十二亿众圣贤，
三明六通具八解， 随佛入城而分卫。
我于今日为胜王， 无边精进大威力，
恒将二子从左右， 因巡游观处高楼。
遥见调伏大仙神， 比丘僧众悉围绕，
我时及子趋疾下， 驰诣无等尊胜前。
既至大师善逝所， 施设诸种妙供具，
顶礼尊足口发言， 启请如来及僧众。
衣食众具尽形奉， 满足八万四千年，
并是二子净信心， 为求无上菩提故。”

人中极尊既涅槃，兴起八万四千塔，
众宝间厕奇光耀，但为人宝遗余身。
一一城中宝塔所，各燃无量百千灯，
香华音乐鼓钟铃，彼王为佛兴斯供。
因种如是胜善根，次第遭遇六万佛，
悉皆供养亲承事，为求无上大菩提。
汝不空见勿复疑，曩时统领大地主，
彼深智王我身是，其号无边精进力。
常以华香修供养，教化一切诸众生，
具燃无量百千灯，为世除闇作光明。
施与财宝未曾休，听闻正法亦无厌，
精进苦行不暂舍，为证无上大涅槃。
汝于宝聚如来所，以衣缠身火洞燃，
犹如灯炷涂膏油，须臾火至即[火+鐵]炷。
汝时身火炽焰盛，毛色无动神不惊，
于彼人宝灭度日，尔躬如是为世间。
猛火如斯煎迫时，汝犹方便而劝请：
‘愿见世尊从火起，大悲护世现本形。
我今所愿成就者，方得如意舍身命，
但能暂见如往昔，所获功德不思议。
我凡所有诸誓言，冀其一切皆和会，
若我当来必成佛，愿于猛焰见世尊。’
佛智清净无障碍，于彼三世坦然平，
照明师子淳净心，佛以精诚从火现。
不空见此愿力持，护世须臾应念起，
因兹更发庄严誓，不思议愿实难量。
世尊从彼火起时，一切皆得厌离心，
又以净意发赞音，佛威希有难可测！
无边相好火盛燃，法王应念忽便起，
以佛世尊现神变，千数众得解脱心。
汝不空见知师子，大慈应感忽还坐，
由见世尊此神变，千数众发菩提心。
大悲为世利益已，还复偃卧猛火中，
师子于是放舍身，一念往生大梵处。
即从梵宫还佛所，具足供养人中尊，
奉持微妙天华香，投散彼佛碎身地。
彼宝聚尊涅槃后，其间时节无几何，
复有普密天人师，为利世间故兴世，
坐于道树等至真，是天中天号大觉。
大梵天王设供养，恭敬顶礼两足尊，

请转法轮利世间，佛知心净默然许。
梵王闻法大欢庆，身得安乐心怡然，
更发殊常大誓愿，植不思議众善根。
一劫值遇五千佛，皆得亲承兴供养，
智者不应更他疑，彼时师子汝即是。
不空见时为吾息，汝后事佛经五千，
我皆明见汝烧身，求斯无上菩提道。
汝复无量千佛所，于彼灭度舍利时，
亦烧无量所爱躯，皆为他乐自受苦。
我知汝今及异世，无量千生长时修，
或佛现在或涅槃，汝常建斯诚实语。
经昔无量百千生，惟我神力能知汝，
不空汝久发斯愿，果报今者皆明现。
汝于诸佛大师前，不思議行悉圆满，
常业歌赞两足尊，苦行熏修诸大誓。
今获偈叹大法王，斯由往积胜因缘，
又于普密王佛前，摄取最上无边愿，
汝今果获如斯报，蒙佛如来现威神。”

时不空见于众所，恭敬合掌顶礼佛：
“请问天尊调御师，慈悲利益众生事，
大仙我曾何誓愿，而能舍弃无量生？
惟愿世尊开少分，我蒙圣说乃能了。”

“不空汝于往昔事，吾今为汝粗说之，
汝于云音如来所，已发如是广大愿：
诸佛若证菩提时，当今我身常奉觐。
又于帝幢普眼佛，彼时亦发大誓愿：
世间若有最导师，当令我即同斯道。
汝于日灯如来所，亦发胜妙诸行愿。
汝不空见惟我知，造作众宝经行处，
或营壮丽佛精舍，若构殊异僧伽蓝，
彼皆微妙七宝成，一切资具奉诸佛。
于不思議众所尊，人中师子善生佛，
持七宝盖及众具，供奉超世天中天。
于彼普眼如来所，尔时又起妙愿行，
广施灯明众供调，奉献世间天人师。
汝于如是无量佛，过千万亿那由他，
自受勤苦安众生，发彼庄严弘广誓。
汝于普密王佛前，所发诚愿我今说：

如其修行成佛者， 我所散华遍大地。
汝于云雷音佛所， 为世间故发斯愿：
若有众生闻我名， 愿彼咸即成佛道。
复于帝释幢佛前， 广兴供养因誓愿：
凡我所处若见闻， 彼彼皆得成佛道。
汝于日灯如来所， 奉施七宝经行处。
无边威所大明佛， 汝当尔时发愿言：
常施胜处妙庄严， 愿我佛刹亦如是。
汝于月上如来所， 愿得第一最天宫，
佛尊处中而游化， 众生游者悉成佛。
汝于澡浴善逝前， 实作如是至诚愿：
若于夏日盛暑时， 众生身心离热恼。
汝于鸯只罗佛所， 亦发如是增上愿：
恒于长夜黑闇时， 愿施灯明除迷惑。
若我舍施身命处， 其有食肉诸众生，
必皆成佛无有疑， 非彼现在身证者。
或于觉悟及梦里， 若有众生闻我名，
一切成佛无有疑， 非彼现在身证者。
汝于勇猛精进时， 其有爱憎尔所作，
斯等皆当成法王， 非彼现在得证者。
汝先无量世生处， 于彼恒愿求菩提，
我今说汝实功德， 当来必获无上尊。
若有禽兽及余众， 彼必成佛无复疑，
诸是食汝身肉等， 一切自然证法身。
我知汝有千数行， 皆为利益诸众生，
若有闻者或生疑， 以时未至我不说。
凡我所说汝诸事， 其或众生愿乐闻，
彼彼得佛必无疑， 非余现在身证者。
若人欲见救世尊， 转此清净胜法轮，
闻已能破诸苦恼， 为证菩提故乐闻。
若人欲见三世佛， 恭敬供养上福田，
具足积聚诸功德， 必先受持此三昧。”

为利世间天人故， 世尊宣说是事已，
遂下法座而徐行， 即还归寂于本室。

佛说大方等大集经菩萨念佛三昧经卷第三

神变品第三

尔时，尊者舍利弗、尊者大目犍连、尊者大迦叶、尊者阿难，及诸天、人、梵、魔、沙门、婆罗门等，咸作是念：“何因何缘，今我世尊如来应供等正觉，在于天人大众中，为诸梵、魔、沙门、婆罗门，诸龙、夜叉、乾闥婆、阿修罗及以人非人等，宣说如斯念佛三昧法门名已，而未解释，即从座起还本住处，默然寂坐耶？”

尔时，不空见菩萨摩訶萨如是思惟：“今这天、人、梵、魔、沙门、婆罗门，及彼一切诸龙、夜叉、乾闥婆等，大众咸集，而我世尊本处入定。我今亦应少现神通，现神通已，为令种种称叹世尊大慈功行。”

尔时，不空见菩萨摩訶萨，如是思惟已即入三昧。三昧力故，令此三千大千世界庄严微妙，凡诸所有皆七宝成，所谓金、银、琉璃、玻瓈、玛瑙、砗磲、珊瑚、真珠，如是众宝之所严饰。其地平正犹如手掌，一切大地咸有如是宝。诸多罗树八道间错罗布其中，彼等诸树端严可爱，金多罗树白银叶华，银多罗树琉璃叶华，琉璃树者玻瓈叶华，玻瓈树者玛瑙叶华，玛瑙树者砗磲叶华，砗磲树者真珠叶华，赤真珠树黄金叶华。如是处处悬缯彩盖，垂诸金铃，宝网罗覆，建布幢幡皆用杂宝。复以种种微妙庄严周匝围绕世尊住处，一切多是可爱众华，所谓优钵罗华、波头摩华、拘物头华、分陀利华。如是等华皆悉充满于此世界，具足庄严清静微妙，其事亦尔。

尔时，不空见菩萨摩訶萨，三昧力故复现如是庄严之事，令此三千大千世界所有大众，乃至天、龙、夜叉、乾闥婆、阿修罗、迦楼罗、紧那罗、摩睺罗伽、人非人等一切众，故化作众宝大莲华座。其华具有无量千叶清静柔软，譬若迦耶邻尼天衣，令诸众生各相见知彼此，咸得坐于华座。

尔时，不空见菩萨摩訶萨，复于定中更现如是大神通事，令此三千大千世界一切大地六种震动，所谓动、遍动、等遍动，涌、遍涌、等遍涌，起、遍起、等遍起，震、遍震、等遍震，吼、遍吼、等遍吼，觉、遍觉、等遍觉，是六各三合十八相，如是乃至中涌边没、边涌中没。犹如摩伽陀国赤圆铜钵，置于石上倾转不定自然出声；如此三千大千世界，不扣不击自然出声，其事若此。当震吼时，彼诸众生闻声觉悟者，一切皆受上妙触乐。犹如东方不动世界，亦如西方安乐国土，其中众生等受快乐，闻声获安亦复如是。

尔时，不空见菩萨摩訶萨住三昧故，心转清静无有垢浊，随顺调柔远离粗犷寂无变动，心深润泽普令安乐，然后复作如是神通，令此三千大千世界，遍虚空中雨炽然火，不令灭坏众生身心，而彼众生蒙火触身，皆得受斯微妙胜乐。犹如比丘入火三昧恬然安乐，触火众生怡悦亦尔。

尔时，不空见菩萨摩訶萨，以三昧力复作如是大神通事，令此三千大千世界，雨天栴檀细末之香，其香微妙遍满三千大千世界。若彼众生闻此香者，皆得如是第一胜乐。犹如释迦如来应供等正觉，其于

往昔行菩萨时，在彼燃灯佛世尊前，受菩提记已，得不思议希有妙乐；时诸众生闻天妙香，不思议乐遍满身心亦复若此。

尔时，众中尊者阿难作如是念：“今何因缘忽见如是不可思议希有庄严？此大神变谁所致乎？然我世尊还房宴寂，不当若是斯大神通，岂我诸大声闻众中所能作耶？为此会众多诸大人犹如龙象，或其所作得非弥勒菩萨、文殊师利菩萨、越三界菩萨乃至不空见等？亦或是余诸大菩萨摩訶萨辈，具足威光现斯事耳？”

尔时，尊者阿难如是念已，即白尊者大目连言：“大德，我闻世尊常如是说：我弟子中神通第一，则目连其人也。今现是瑞，将无大德之所为乎？”

时，大目连答阿难言：“仁者，此瑞殊常，非我能作。所以者何？忆念我昔于一时间，取此三千大千世界悉内口中，其时众生乃至无有一念惊惧觉往来想。阿难，又念我昔住梵天宫发一大声，遍此三千大千世界。阿难，复念我昔在世尊前作师子吼，能以须弥内于口中，能过一劫若减一劫如是为常。阿难，又念我昔至阳炎世界，于彼发声遍此世界咸得闻知。阿难，又念我昔身住于此阎浮提界，而能遥动忉利天宫难胜大殿。阿难，又念我昔至彼难陀、优波难陀诸龙王所，彼龙如是炎炽巨毒，我时降伏令住戒善，又亦曾辱恶魔波旬。阿难，我念往昔至于东方，住彼第三千世界，有一大城名曰宝门，于彼凡有六万亿千家人，我即于彼六万亿千家中，一一皆见我目连身，为彼众生演说诸法无常、苦、空、无我，皆令安住如是正法。

“阿难，我虽能为曩之变化，初未曾见如是神变，云何作耶？阿难，今我处此大莲华座，观见十方一一佛土无量无边，同我世尊释迦号者，皆还本室默然寂坐，而我见彼诸佛国土，亦如观此娑婆世界。阿难，我于向时亦以天眼，周遍观察是变因缘，而终弗知所从来处。”

尔时，大目连为重明此义，以偈颂曰：

“我所成就四神足， 同类孰能相校比，
唯独世尊天人师， 余人神通宁我及！
我曾吞合此佛刹， 大地众生弗觉知；
我又曾至梵天宮， 一音充满此世界；
我又曾于世尊前， 吞啖须弥若经劫；
我又炎界发大声， 令此佛刹遍闻听；
我又震动天帝宮， 彼于天女众中坐；
我又往诣难陀所， 降伏如斯大毒龙；
我又念昔作神变， 身住于此现东方，
我令六万亿千家， 彼彼各谓见我身。
阿难我今所观变， 初未睹是大神通，
我唯生大希有心， 然是神通非我作。

我今处大莲华座， 亦见众生坐华中，
复见诸佛大威王， 观察尽于十方界。
决定自在天尊作， 或能大士之所为，
如是非常大神变， 昔来未见今方睹。”

尔时，尊者大目犍连作如是等师子吼，时彼大众中十千天人，于诸法中得清净眼。

尔时，阿难白尊者舍利弗言：“大德，我亲从佛闻如是言：我诸声闻大弟子中智慧第一，则舍利弗其人也。今此神变，将非大德之所作乎？”

时，舍利弗语阿难言：“阿难，此瑞殊常，非我所及。所以者何？我念自从二十年来，精勤修习毗婆舍那，一心观察求法实相，终不能知诸法边际。阿难，又念我昔取一袈裟投置地上，时大目连第一上座威神若是，既不能取，乃至不能举令离地，何云手擎？阿难，又念我昔居世尊前作师子吼，亦于一切具足神通诸大声闻及学无学，天、人、梵、魔、沙门、婆罗门，乃至一切诸龙、夜叉、乾闥婆、阿修罗等诸大众前，时彼外道波梨波闍来至我所，与我诤入诸禅定已，复欲共我较隐其身竞师子吼。我于彼时，建丈夫志，行丈夫事，遂作如此诸不思议。唯除世尊一切知见，及以弥勒菩萨摩訶萨诸是一生补处者，又除彼成就甚深法忍诸菩萨摩訶萨，又除得海德三昧诸菩萨摩訶萨，又除得善住三昧诸菩萨摩訶萨，又除得诸佛现前三昧菩萨摩訶萨，除如是等诸大菩萨摩訶萨已，自外所有如来世尊声闻大弟子，若来问我隐身时事，乃至外道波梨波闍等，而更问我隐身时为住何处者。阿难，我作如是大神变时，一切声闻设辟支佛，皆不能知我身所在，及其说时空闻我声，终不能知我身所在。

“阿难，我常精勤大丈夫行，亦复成就大智人事也。阿难，我心随我行，非我随心行。阿难，我今自知身处大莲华座，亦见一切天人大众皆悉坐彼大莲华座。阿难，我复见彼一切十方无量无边不可思议诸世界中，皆有诸佛世尊，悉在菩提树下坐于道场成等正觉，具足成就无量无边大威德力。诸天大众恭敬围绕，大梵天王请转法轮曰：‘世尊，若当转法轮者，我等随顺。’阿难，我闻是声，我见是事，今者如是无量无边诸佛国土，皆是七宝杂色繒彩，悬诸金铃，罗网覆上，种种宫殿微妙庄严，如此娑婆世界。阿难，我于向时亦作是念：‘今此不思议大庄严事，将非世尊大神通作乎？或是诸大菩萨摩訶萨辈，厚集善根具足福智，能现若斯大神变耳！亦或世尊声闻众中诸大弟子，久种善根具大威德之所为也。’”

尔时，尊者舍利弗为重明此义，以偈颂曰：

“世尊神力难思议， 及求如来功德者！
所有声闻大弟子， 满此佛刹学无学，

于彼智中我第一，何云更有胜我者？
唯除诸佛如来辈，及诸菩萨行菩提。
自我观察诸法相，具足满于二十年，
求诸法底不得边，我之智慧过于彼。
今者在佛世尊前，欲以此智师子吼！
且置一切诸外道，唯大声闻求我身，
终无有能见我身，及以所作诸神变；
唯除如来等正觉，并诸佛子大菩萨，
是乃知我身所在，非彼外道及声闻。
禅定解脱不思议，是心任我而回转，
我修丈夫真空行，仁者我业常如是。
我有如是胜神通，一切声闻不能入，
然我今所见十方，若斯神力我贪羨。
我今处大莲华座，遍见诸方无量土，
无量刹中咸有佛，各诣佛树坐道场。
彼刹众宝异庄严，端正微妙甚可爱，
我时亦作如是念，决定如来现神通，
或大弟子之所为，或诸菩萨不空见。”

尔时，尊者舍利弗作如是师子吼，时众中有一万三千人，远尘离垢得法眼净。

尔时，阿难如是思惟：“此大迦叶，有大威德具足神通，今是变化或其所作，我今亦当问其作不？”

于是阿难即白尊者摩诃迦叶言：“大德，我亲从佛闻如是说：我弟子中头陀第一，则大迦叶其人也。是不思议大神变事，将非大德之所为乎？”

时大迦叶答阿难言：“仁者，此变殊常非我能作。所以者何？我念一时辄不自量，在世尊前作师子吼。阿难，我时于此三千大千世界，须弥山王及大铁围，乃至诸余黑山之属，一以口吹能令破散，乃使无有如微尘许。其有众生住彼山者，不令损害亦无觉知，如是诸山皆悉灭也。阿难，我又一时于此三千大千世界，一切大海、大河、小河、陂池诸水，乃至无量亿那由他百千水聚，以口一吹皆令干竭，而彼众生不知不觉亦无苦恼。阿难，我又一时在如来所，及诸天、人、梵、魔、沙门、婆罗门，一切世间诸大众前，作师子吼广现神通。阿难，我今唯有如斯威力，能作如是自在神通。

“阿难，我念一时在于如来应供等正觉前，为诸世间天、人、梵、魔、沙门、婆罗门，一切大众作师子吼。世尊，我能于此三千大千世界之内，以口一吹即令大火炽然遍满犹如劫烧，终亦不使损一众生，亦令众生竟不觉知。阿难，我真具足如是神通。阿难，我念一时于此世界，以天眼观见彼东方过亿百千世界，有一佛刹猛火洞燃。我

既见已如是思惟：‘而我今应示现神通。’既思惟已即入三昧，于三昧中以口一吹过于东方千亿世界，炽燃猛火即令熸灭。彼火灭已我便出定，即见彼界还复如本。阿难，我今但有如是神力。

“阿难，今此众中有诸众生，若天、若人、若梵、若魔、若沙门、婆罗门，多有疑心谓我妄言。彼若不信，世尊后时从三昧起，任自咨问。而今世尊虽入三昧，足知是事亦闻我声。”

尔时，世尊尚坐本处住三昧中，遥命阿难曰：“如是，如是，如大迦叶师子吼说，真实非虚，汝当忆持。”

时，诸天入一切大众闻佛教已，方于迦叶生希有心起难遭想。时，彼尊者摩诃迦叶，作如是等师子吼时，有三亿人于诸法中远尘离垢，复有八十五那由他百千诸天，远尘离垢得法眼净。

尔时，不空见菩萨、弥勒菩萨、文殊师利菩萨、越三界菩萨，如是及余无量无边诸大菩萨摩诃萨等，皆自久来被服如是大弘誓铠，闻大迦叶作师子吼，便化华聚若须弥山，乃至再三散迦叶上。复多化作大七宝盖，住虚空中覆大迦叶顶，并覆一切声闻大众。

尔时，大迦叶见如是等诸七宝盖，遂告阿难曰：“阿难，今此众中决定知有大乘高行菩萨摩诃萨，能作如是大神通事，而今复现斯大神变也。阿难，我今坐此大莲华座，所见诸方无量无边不可称数诸佛世尊，又见彼刹皆七宝成，殊丽庄严真可瞻睹。彼诸众生复有如是胜上果报，我今悉见犹如忉利，一切诸天耽醉华冠常带璎珞，诸天身色如月光明，于虚空中有化宝盖。彼诸众生一一顶上悉有宝盖，如我顶上覆七宝盖无别异也。阿难，我又见彼诸佛刹土，有诸菩萨自兜率天降入母胎。阿难，我见如是神通事时，深生欢喜踊跃无量。阿难，我复思念：‘如是奇异，如是希有，岂彼随宜凡劣众生能作如是大师子吼，能现如是大神通事？’”

尔时，尊者大迦叶为重明此义，以偈颂曰：

“阿难十方大水聚， 大海巨河诸流等，
我以口风一往吹， 令彼枯竭无遗滞。
曾住正觉世尊所， 于此刹中作神变，
我能干涸水聚时， 众生无损亦不觉。
此界所有一切山， 须弥铁围黑山等，
能以口风吹令散， 仁者我住如是通。
众生所有住须弥， 及余诸山不动处，
尔时令彼无损觉， 智者我有如是通。
我以神通烧此刹， 口风一吹皆炽然，
彼等众生不觉知， 当尔之时无毁坏。
我昔于此佛刹中， 遥见东方满刹火，
用口气吹能灭彼， 我通如是难思议。
我今见此大神通， 心生殊特大希有，

诸佛弟子不思议，一切诸行亦如是。
我今处此莲华上，观彼众刹妙庄严，
菩萨降自兜率天，入于母胎尽生际。
为当定此声闻辈，心得自在神通人？
为是菩萨不空见，复彼弥勒文殊等？”

尔时，阿难复作是念：“此富楼那弥多罗尼子，于一切法已到彼岸，有大威德具足神通，或时能作如是大事。我今亦应问其作不？”

尊者阿难如是念已，即便白彼富楼那言：“大德，我亲从佛闻如是语：我大声闻诸弟子中说法第一，则富楼那弥多罗尼子其人也。是不思议庄严神瑞，将非大德之所为乎？”

时，富楼那答阿难曰：“此瑞异常，非我能及。所以者何？我念昔时有诸众生，应以神通得教化者，我便为彼取此三千大千世界，以手摩之开示彼等。当尔之时，无一众生有惊怕想亦不觉知，唯彼众生应在此化与神通者，乃能见我手摩世界。阿难，譬如壮士以右手，取一迦梨沙般那，左手回转不以为难；如是，阿难，我取于此三千世界，以手回转不以为难亦复若此。阿难，我念一时于世尊前，以一指节取此三千大千世界一切水聚，皆令入我手指节间，无一众生有损减想。

“阿难，我往一时于初夜中，以净天眼过于人眼，观此三千大千世界，作如是念：‘是中复有何等众生，于诸法中心生疑惑，我当解释令得除断。’我即观此三千大千世界，所有一切诸四天下无量众生疑惑诸法，我复生念：‘我今应当不离是坐，不出是定，为诸众生断除疑网。’阿难，我时念已，便入定心清净明了，光泽成就寂然不动，为彼众生宣说诸法，决断疑网无有滞碍，令彼众生各作斯念：‘我等今者皆各蒙此尊者富楼那弥多罗尼子，独住我前为我宣说。’阿难，我当初夜说法之时，即有一万四千众生皆得安住佛正法中，复有三万众生护持禁戒，复令六万众生信佛法僧归依三宝，然始安详自三昧起。阿难，我唯有是说法余巧决疑事也。

“阿难，我又复念于此世界，以天眼观见彼北方，过三万佛刹有一世界，其号伏怨。彼世界中有一众生，于诸法中多起疑网。时彼众生有声闻根易可受化，然彼世尊般涅槃已，我即生念：‘我今亦应不起此坐，不往彼刹，而为众生解释疑网。’如是念已即入三昧，于三昧中为彼世界无量无边不可称数阿僧祇诸众生辈，演说正法，令彼皆得诸法光明。阿难，我但具是声闻神通。今此众中若有疑者，须世尊出请问自知。”

如是语时，佛神力故虚空出声，告阿难曰：“阿难，如是，如是，如富楼那大师子吼，汝当忆持。”

尔时，诸天、世人、阿修罗等，一切大众闻是事已，发希有心生奇特想，作如是言：“希有！希有！声闻尚能建斯大事，况彼菩萨诸

佛世尊！”

尔时，尊者富楼那弥多罗尼子，为重明此义，以偈颂曰：

“我于说事悉通达， 诸漏有生皆灭除，
望佛如来无分毫， 大尊神变独超世。
我取此界及诸山， 以手回转亦摩抹，
彼时不动一众生， 我但有斯神通力。
三千世界诸水聚， 此刹若见若不闻，
我内彼水一指间， 于诸众生无损减。
我于初夜天眼观， 何等众生心疑惑，
求其善根及诸法， 欲以神力为决除。
我于如是生念时， 不离本坐亦无往，
已为宣说正道法， 令彼得闻破心疑。
我于如是说法时， 令万四千住圣法，
三万诸人护禁戒， 六万正信受三归。
我复念彼初夜时， 所出神通甚微妙，
观过北方三万界， 见一佛刹名伏怨。
彼佛界中诸众生， 独有一人深疑惑，
我时不起现彼说， 令彼各谓己独闻。
阿难我智正若此， 如是神通佛自知，
众生若有疑惑者， 但当决定请世尊。
我今坐斯莲华上， 见一世尊般涅槃，
彼佛处火就阇维， 自外诸方亦皆尔。
我心观佛生希有， 是不可测谁所为？
为是世尊为声闻？ 而我见佛斯灭度。”

尔时，阿难复如是念：“彼尊者罗睺罗，世尊之子，于一切法已度彼岸，有大威德具大神通，或时能作如斯大事。我今亦当问其作不？”

尊者阿难作是念已，即便白彼罗睺罗：“大德，我亲从佛闻如是言：我诸声闻大弟子中持戒第一，则罗云其人也。是不思议庄严神变，将非大德之所为乎？”

时，罗睺罗答阿难曰：“阿难，世尊大悲普覆一切，虽称赞我持戒、精进、具足神通，然而今者所现神变事，特非常不可测度。我从生来未尝见睹，亦未思惟又无分别，况复能为如斯神变？阿难，是大庄严实非我作。所以者何？我念往昔唯此三千大千世界广大若是，所谓百亿四天下、百亿日月、百亿大海、百亿须弥山、百亿大铁围山，如是及余黑山之类，一切皆纳一毛孔中。当尔之时，我身如本，众生不异。诸四天下所有大地，须弥诸山乃至大海及以众流，咸皆安隐无相杌触，一切无有逼迫损伤。阿难，我但有是自在神力。

“阿难，我昔一时取此三千大千世界所有大海，及余小海、大河、小河，乃至陂池微细水聚，如是一切悉入毛孔。当尔之时，我身无损，众生无害。诸大海水及与河流，乃至陂池细微水聚，各皆如本无相漂迫，所居皆知身在水中。

“阿难，我昔一时此处入禅，既入定已，即于东北至一世界，彼佛世尊号难胜威如来、应供、等正觉、明行足、善逝、世间解、无上士、调御丈夫、天人师、佛世尊所，现身礼敬。敬已即复还此世界迦维罗城净饭王前，求索一掬栴檀末香，得已还持，于彼佛刹供养世尊，香气遍满。时即为彼难胜威佛，化作楼观像辇，分明高万由旬，一切妙宝庄严间错，复以天香为七宝盖覆佛顶上，高一万亿八千由旬，广八千由旬。又于彼界为一切众生，各各化作栴檀楼观像辇，高百由旬，广五十由旬，四柱方整随意所乐，令彼众生各具庄严，各皆自有无相障碍。阿难，我但如是究竟声闻神通彼岸。今此众中若有于我生疑惑者，任咨世尊，世尊虽处寂定尚当证知。”

尔时，罗睺罗欲重宣此义，而说偈曰：

“我曾取此三千界， 百亿四天与铁围，
一切悉入毛孔中， 阿难我有如斯力。
此阎浮提如是大， 彼彼各住不相知，
一切皆入毛孔中， 阿难是我神通力。
此须弥山甚高广， 铁围众山不随宜，
皆悉置一毛孔中， 阿难知我神通力。
彼等皆各无迫触， 而见入我一毛中，
时我身体不觉疲， 彼亦不知处毛道。
三千大千诸水聚， 众流陂河及大海，
一时吸之置毛孔， 我但有是大神通。
此界如是众水聚， 大海诸河及细流，
彼等皆各不相知， 而我能令入毛孔。
阿难我此神通事， 昔曾数现世尊前，
此众如有疑惑人， 当问如来无碍眼。
阿难我处大莲华， 见彼十方诸菩萨，
舍施头目及妻子， 悉祈无上菩提尊。
我见神变生希有， 决为世尊之所为，
或不空见弥勒辈， 亦或声闻大弟子。”

尔时，尊者罗睺罗，作如是等师子吼。时，彼大众中有八十七亿百千那由他诸天等，远尘离垢得法眼净。是诸天人得法证已，以天栴檀末香，殷勤再三散于尊者罗睺罗上。如是供养已，复发是言：“希有！希有！清净佛子真行大乘，已于诸法种众善根，今能如是大师子吼。”

佛说大方等大集经菩萨念佛三昧经卷第四

神变品之余

尔时，阿难复作是念：“彼尊者须菩提，善修无诤行，于一切法已到彼岸，有大威德具足神通，或能为是不思议变。我今应当问其作不？”

时，彼阿难如是念已，而复白彼须菩提言：“大德，我亲从佛闻如是说：我诸声闻大弟子中解空第一，则须菩提其人也。是不思议大庄严事，将非大德之所作乎？”

时，须菩提答阿难曰：“阿难，世尊虽说我修无诤空行第一，然是神通非我能作。所以者何？我念一时入于三昧，如此三千大千世界弘广若斯，置一毛端往来旋转如陶家轮。当尔之时，无一众生有惊惧心，亦不觉知己之所处。阿难，我念往昔于如来前，欲作如是大师子吼白言：‘世尊，如此三千大千世界宽广如是，我能以口微气一吹皆令散灭，复令其中所有众生不惊不迫无往来想。’阿难，我于尔时在世尊前，已曾示现如是神通。阿难，我念一时复于佛前作师子吼白言：‘世尊，我今能以如此三千大千世界，其间所有一切众生，皆悉安置一指节端上至有顶，然后还来住于本处，令彼众生寂然无声，不相逼迫无往返想。’

“阿难，我念一时宴坐三昧，见彼东方现前则有六万诸佛；如是南西北方、四维上下无量无边百千世界，各有六万诸佛世尊，昔所未见今皆见知。阿难，我于彼时住阎浮提，以是定心复发神力，至须弥顶天帝释边，撮取一栴檀末香，往彼无量诸世界中，供养向时尔许如来应供等正觉。彼彼世界诸众生等，皆悉明了见我住是阎浮提界，供养承事彼诸世尊，知我是此娑婆世界释迦牟尼如来应供等正觉，声闻大弟子上座须菩提，于空无诤三昧门中最第一者。阿难，我到如是神通彼岸，具足成就神通波罗蜜。

“阿难，今此众中若天、若人、若梵、若魔、若沙门、婆罗门等，于我所说尚有疑心。彼若能问我师世尊，今在寂定自当证知。”

尔时，佛神力故，于虚空中出大音声，命阿难曰：“阿难，如是，如是，如上座须菩提向师子吼，汝如是持。”

时，彼天、人、梵、魔、沙门、婆罗门、阿修罗等，见闻是已身毛皆竖，发希有心得未曾有，作如是言：“甚为希有！实未曾睹如是大事。乃至世尊诸弟子等，尚有如是胜妙神通大威德力，何况诸佛所有三昧神通境界，而可思量，而可宣说？”

尔时，尊者须菩提，见诸世间天、人、梵、魔、沙门、婆罗门生希有已，为重明此义，以偈颂曰：

“我住禅定解脱门， 无诤三昧最第一，

我昔曾于世尊所， 现神通力无有边。
我转三千世界地， 一切令入毛道中，
如彼陶轮无穷已， 众生安然不觉往。
我昔住于如来前， 分散诸山及大地，
时彼众生无损减， 以住如是神通门。
我以此界及众生， 皆置掌中入后顶，
乃至还下彼不觉， 一切咸是斯神通。
我曾入定观东方， 见彼六万诸世尊，
南西北方亦如是， 六万如来无有阙。
又彼四维及上下， 诸佛亦足六十千，
平等具相金色身， 我以天香而遍散。
令彼众生悉知见， 各言我有须菩提，
亦领此界牟尼尊， 声闻禅中最第一。
我今作此师子吼， 时众若疑当问佛，
佛放大声诚告曰：如是阿难汝受持。
我灭众生及我心， 乃至佛想无遗行，
无诤空行无伦比， 我实住此三摩提。”

弥勒神通品第四

尔时，弥勒菩萨作如是念：“今者世尊诸大声闻弟子众辈，有大威德具足神通，各皆自陈师子吼事。如我今者，亦应于一切世间天、人、梵、魔、沙门、婆罗门诸大众前，少现菩萨神通事耳！”

时，彼弥勒菩萨如是念已，即告尊者阿难曰：“我念昔曾于晨朝时，著衣持钵诣世尊所，顶礼佛足白言：‘世尊，我今欲入此王舍城如法求食。’言已即行。阿难，我于尔日复如斯念：‘今于谁家初施食者，我要当令是人先住阿耨多罗三藐三菩提，然后方受斯人食也。’阿难，我时念已即入大城次第乞食，至一大姓婆罗门家，于彼门下默然立住。

“阿难，时彼大姓施婆罗门，知我乞食见我默住，即告我言：‘善来阿逸多！圣者阿逸多！今日何故自屈临此？其有所须，愿取我食。’阿难，我即告彼婆罗门言：‘大婆罗门，汝今若能于阿耨多罗三藐三菩提种善根者，然后乃当受汝施食。’阿难，时婆罗门即答我言：‘仁今若能持此食分遍奉十方恒河沙等一切诸如来应供等正觉者，然后我当发阿耨多罗三藐三菩提心，尽力勤修诸菩萨行。所以者何？我亦先于诸如来所，种彼一切诸善根故。’阿难，我时复语婆罗门言：‘大婆罗门，汝今必能建立斯志，我当受食分布供养恒沙如来阿罗诃三藐三佛陀，无有疑也。’时，婆罗门复语我言：‘圣者阿逸多，但受我食分张奉献恒沙如来，我便发誓亦如誓行。’阿难，我复语彼婆罗

门言：‘大婆罗门，汝今审能发如斯誓、如誓行者，我取汝食分散供养恒沙如来。’阿难，彼婆罗门乃至三反要我供养，我亦殷勤令其发心也。

“阿难，我时如是与婆罗门，反覆周旋相约束已，然后告彼婆罗门言：‘大婆罗门，如汝言者，速将食来，吾当为汝分布供养恒沙世尊。’阿难，时婆罗门闻我言已，便授我食。我既受已，则于其前如弹指顷，分布供养恒沙如来。阿难，我于尔时分布彼食，供养恒沙诸世尊已，然后还彼婆罗门家。阿难，时婆罗门见我如是无碍神通，心生惊怪，身毛皆竖，然后欢喜踊跃无量，即持种种上妙饮食，奉施于我劝我饱食，我时受已自恣食之。彼婆罗门然后方持一切珍宝、一切诸香、一切众华、一切华鬘、一切上妙诸瓔珞具，与我相随诣世尊所，恭敬合掌顶礼佛足，即于佛前发阿耨多罗三藐三菩提心，复作是愿：‘其有众生闻我施此抔食善根，皆即住于不退转地。世尊，若我此愿必得成就阿耨多罗三藐三菩提者，以此善根令我未来成菩提时，亦有如是无量无边诸声闻众，皆是清净大阿罗汉如今无异。若我此誓真实不虚者，以是因缘令此三千大千世界一切大地六种震动。’而彼大婆罗门发是愿时，佛神力故，应时此间三千大千世界所有一切大地六种震动。

“阿难，今此众中若天若人于我此事生疑心者，世尊出时应当咨问。阿难，我今未成阿耨多罗三藐三菩提，已具如是大威德力，到于一切神通彼岸。阿难，我念往昔无量无边阿僧祇劫，有佛世尊号曰燃灯如来应供等正觉，出现世间。我时于彼燃灯佛前，获得如是一切菩萨念佛三昧；得三昧已，诸方所有一切诸佛现说法者，彼诸世尊常现在前。又我得此三昧门已，即于无量无边劫中，以此神通教化无量无边众生，悉令住于阿耨多罗三藐三菩提中，犹如今者王舍城中大婆罗门。阿难，复念往昔于彼莲华上如来应供等正觉所，以一神通教化成熟彼三万亿百千众生，皆令住于阿耨多罗三藐三菩提中。阿难，我又曾于最上不退转行佛世尊所，得一三昧名曰普明；得三昧已，教化成熟六万八千欲界诸天，皆令发于阿耨多罗三藐三菩提心。阿难，当如是知，菩萨摩訶萨一切皆有不可思议大神通力第一彼岸。”

尔时，弥勒菩萨摩訶萨，为重明此义，而说颂曰：

“我曾晨朝整衣钵， 请问释师教明行，
于是顶礼辞如来：‘世尊我今将求食。’
大师如是诫我曰：‘汝去当念利众生，
我涅槃后汝成佛， 诸种功德皆圆满。’
阿难我时如是念：‘未知今往前食所，
当于谁家初受食？ 我应教令住菩提。’
我行乞食有所遇， 遂逢大姓婆罗门，
以恭敬心称善来：‘希有远至阿逸多，

我今自悔仁来晚，唯愿时坐受我食；
大士妙法难思议，我当奉上精美膳。’
我时语彼婆罗门：‘汝能先发菩提意，
利益天人大众等，然后我方受汝食。’
彼婆罗门复要我：‘汝阿逸多今若能，
以我此供恒沙尊，如是我发菩提志。’
我便许彼婆罗门：‘汝于菩提慎莫退！
吾以汝供奉诸佛，终令汝身获大果。’
时婆罗门更诚誓：‘愿为我奉诸如来，
诸佛胜尊若受者，我行菩提无疑惑。’
彼婆罗门信我言，发诚至心受我食，
我持彼供恒沙尊，令婆罗门须臾见。
彼既睹我大神通，或惊或喜增珍膳，
供养我毕至佛所，便发无上菩提心。
时婆罗门发心已，复广弘誓不思议：
‘若有菩萨得闻者，彼于世界速成佛。’
我昔在佛燃灯前，得此微妙胜三昧，
彼名菩萨念诸佛，能与妙乐难称量。
昔于燃灯世尊所，受此胜念三昧时，
我登得见十方佛，以彼威德故能睹。
若人住此三昧中，能现无边诸神变，
百僧祇劫诸所作，皆为利益诸众生。
我于莲华上佛所，得三昧故现神通，
满足七万诸众生，皆因我住菩提道。
我又最上如来前，于彼精勤修梵行，
所得三昧实端生，能施深乐难称量。
我于最上行佛所，受一三昧名普明，
月上佛时住胜禅，迦葉佛前获深定。
阿难如是大神通，皆于往昔得成就，
以此神通自在力，我所修见诸如来。
若人欲见诸世尊，欲转无上妙法轮，
欲拔众生出苦海，是人应学斯妙定。”

尔时，众中梵、魔、沙门、婆罗门、天、人、阿修罗一切世间，
得闻弥勒菩萨摩訶萨师子吼时，皆大欢喜，生奇特心，叹未曾有。

叹佛妙音胜辩品第五

尔时，不空见菩萨摩訶萨，睹诸大众天、人、梵、魔、沙门、婆

罗门、诸龙、夜叉、乾闥婆、阿修罗等，得未曾有生奇特心，或时惊怖身毛皆竖，见是事故，一心安详从三昧起已，即告尊者阿难言：“大德，善哉！妙哉！诸佛世尊甚为希有！甚为希有！所以者何？诸如来应供等正觉乃至能有大慈大悲，具足无量诸功德等。阿难，诸如来应供等正觉能证如是阿耨多罗三藐三菩提时，觉一切法无有生故，见一切法无有作故，知一切法不可得故，然后于彼波罗奈城古仙住处鹿苑林中，三转十二行无上妙法轮。而是法轮初未曾见，一切世间若梵、若魔、若天、若人、若沙门、婆罗门，有能如法为斯转者。何等名为三转法轮？云何复称十二行也？所谓此是苦、此是集、此苦灭、此苦灭道，乃至此苦已知、此集已断、此灭已证、此道已修，是为三转。如是三转得名为十二行也。又此为八圣道分是中有无量文字、无量名句、无量言音、无量义趣、无量解释，然说斯义为开示故，为论义故，为分别故，为显示深义故，为易知故，为具足故。”

时，彼不空见菩萨摩訶萨，复告尊者阿难言：“阿难，是故我言，诸佛世尊甚为希有，诸如来应供等正觉有大慈悲具足功德。诸佛世尊既证得阿耨多罗三藐三菩提已，然后为诸声闻众等，于彼无教法中以教说故，无言法中以言说故，无相法中以相说故，无证得中教令证得彼法。虽无语言可说相貌可得，而诸智者皆已觉悟，诸贤善人亦得证知，诸阿罗汉咸得解脱于彼无始生死中也。复次，阿难，譬如有人持一束草，言欲堰塞恒河大流。于意云何？彼人如是其事可乎？”

阿难答曰：“不也，大士。何以故？彼人所作世间本无，何论可不？”

不空见言：“如是，阿难，如来应供等正觉，为诸声闻于无言法更以言宣，无名相中以名相说，其事若此。复次，阿难，譬如有人本无口舌，欲以一音遍诸世界咸得闻知。于意云何？彼人所作其事可乎？”

阿难答曰：“不也，大士。何以故？彼人所作世间本无，何论可不？”

不空见言：“如是，阿难，如来应供等正觉，为诸声闻无言说中更以言宣，无名相法以名相说，其事亦尔。复次，阿难，譬如有人手持彩笔书画虚空，望成文字。于意云何？彼人所作可成就乎？”

阿难答曰：“不也，大士。彼人所作世间亦无，何问成不？”

不空见言：“如是，阿难，如来应供等正觉，为诸声闻无言法中更以言宣，无名相法以名相说，其事若此。复次，阿难，譬如有人先无手足、咒术伎能，而大唱言：‘我能担负须弥山王。’于意云何？彼人所作其可遂乎？”

阿难答曰：“不也，大士。是人所作世间既无，何问可不？”

不空见言：“如是，阿难，如来应供等正觉，为诸声闻无言法中更以言宣，无名相法以名相说，其义亦尔。复次，阿难，亦如有人至

大海际，或取一板，或持小筏，或欲身涉，或欲身浮，广施方便发如是言：‘我度大海登陟彼岸。’于意云何？彼人所作为可尔乎？”

阿难答言：“不也，大士。一切世间本无斯事，何云可不？”

不空见言：“如是，阿难，如来应供等正觉，为诸声闻无言说中更以言宣，无名相法以名相说，其义若此。”

尔时，不空见菩萨摩訶萨，为重明此义，以偈颂曰：

“诸佛大慈难思议，常以悲光照一切，
于无量亿那由劫，正觉如是深法门。
诸法本性无生处，因缘集会往来空，
无上天师虽善宣，然彼自性常寂灭。
诸佛正法难称量，世尊慈爱故宣演，
能开如是难见法，利益世间诸天人。
不可说法难值闻，十力雄猛能广说，
显示最上清凉道，安隐世间天人众。
世尊巧说无相法，无师自然能觉知，
破坏一切诸外道，凡愚莫知此实际。
诸佛智海难测量，宣说法界亦无尽，
一切声闻同已证，开示转变不思议。
如人把草塞恒河，尊者我谓不为难，
正觉转彼无生轮，我持此事难于彼。
若人手执五色笔，种种众彩画虚空，
无语言中置语言，我持此事难于彼。
若人无手亦无足，求负须弥度大海，
无相法中转相轮，我谓此事难于彼。
若人无舌复无口，一言遍满恒沙界，
无证法中能令证，我谓斯事难于彼。”

尔时，尊者不空见菩萨摩訶萨告阿难言：“尊者，诸佛如来应供等正觉，甚为希有！能于无量阿僧祇劫，觉了通达一切诸法究竟彼岸号佛世尊。然诸如来应供等正觉，随顺众生诸根差别乐欲所应，微妙圆音自然而出，普为宣说种种句门，所谓：若诸众生乐行布施，如来则为赞说檀波罗蜜，彼亦随念‘世尊为我宣说施法’；有诸众生乐修禁戒，如来则为赞说尸波罗蜜，彼复生念‘世尊为我宣说戒法’；有时众生乐行忍辱，如来则为赞说羼提波罗蜜，彼亦生念‘世尊为我宣说忍法’；有时众生乐行精进，如来则为赞说毗梨耶波罗蜜，彼亦生念‘世尊宣说精进’；或时众生乐习禅定，如来则为赞说禅波罗蜜，彼亦生念‘世尊为我宣说禅法’；或时众生乐求智慧，如来则为赞说般若波罗蜜，彼亦生念‘世尊为我宣说智慧’；或时众生乐求解脱，如来则为赞说解脱，彼亦生念‘世尊为我宣说解脱’；或时众生乐修解脱知见，如

来则为赞说解脱知见，彼亦生念‘世尊为我宣说解脱知见’；或时众生乐生天者，如来则为赞说生天，彼亦生念‘世尊为我宣说生天’；有诸众生乐修无常，如来则为赞说无常，彼亦生念‘世尊为我宣说无常’；有诸众生乐修苦者，如来则为赞说众苦，彼亦生念‘世尊为我宣说苦法’；有诸众生乐修无我，如来则为赞说无我，彼亦生念‘世尊为我宣说无我法’；有诸众生乐修空寂，如来则为赞说空法，彼亦生念‘世尊为我宣说空法’；有诸众生乐修不净，如来则为赞说不净，彼亦生念‘世尊为我宣说不净’；有诸众生乐欲生天，如来则为说生天法，彼亦生念‘世尊为我宣说生天法’。尊者，乃至有诸众生乐种种法，如来则为说种种法，彼亦生念‘世尊为我宣说种种法。’”

尔时，不空见菩萨，欲重明此义，而说偈言：

“诸佛世尊具圆音， 随众生类自然出，
彼之意乐所欲闻， 如来随顺说发起；
或有众生乐布施， 如来则为赞檀度；
或有众生乐持戒， 如来复为赞尸罗；
或有众生乐忍辱， 如来则为赞羼提；
若有众生乐精进， 如来为赞毗梨耶；
或有众生乐三昧， 如来则为赞禅定；
若彼众生乐智慧， 如来则为赞般若；
若彼众生乐解脱， 如来亦为赞解脱；
若彼众生修无常， 即令闻彼无常法；
彼若乐闻苦不净， 亦令闻苦不净音；
彼若乐闻空无我， 不思議音赞空寂；
彼若乐闻缘觉乘， 世师妙音说缘觉；
彼或乐闻诸佛乘， 两足尊赞菩提道；
乃至彼乐生天宫， 音中亦显生天事。
如是妙音难思议， 随诸类感便应现，
彼等既闻清净音， 其谁不趣菩提道？”

尔时，不空见菩萨摩訶萨复告尊者阿难言：“阿难，诸佛世尊殊特希有！如来应供等正觉，能有如是炽然善根。所以者何？诸佛世尊从久远来，乃能供养无量无边过恒沙数诸如来等，又复常行施、忍、精进诸事，所谓捐舍身命头目髓脑，难作能作种种苦行，调伏身心，然后方证阿耨多罗三藐三菩提。证菩提已，则能具足无量辩才为他说法。云何辩才？谓不思議辩才、无上辩才、无胜辩才、无取著辩才、妙解脱辩才、无障碍辩才、善和合辩才、相应辩才、炽盛辩才、无有问辩才、豫知辩才、作相辩才、无作相辩才、静默然辩才、不怯弱辩才、除患辩才、种种文字庄严辩才、种种词句庄严辩才、义句庄严辩才、甚深句庄严辩才、显现深义辩才、于深示浅易知辩才、无边譬喻

辩才、捷疾辩才、善决疑辩才、成就无际辩才、能问辩才、略问广答辩才、利益辩才、无毁辩才、善思量辩才、无謬塞辩才、无耻辱辩才、具足成就离谤辩才、具足成就智人所赞辩才、具足无畏心辩才、具足不狭劣辩才、具足不错文句辩才、具足不忘辩才、具足无失辩才、具足随心说法辩才、具足知他至心为说辩才、具足开发无秽浊辩才、具足庄严音句能说辩才、具足能说过去辩才、具足能说未来辩才、具足能说现在辩才、具足圣者辩才、具足知无生妙知辩才、具足能令一切众生欢喜辩才。”

尔时，不空见菩萨摩訶萨，重宣此义，而说偈曰：

“供养最胜尊， 无数无边量，
能证无上道， 世间大导师。
广集诸善根， 得彼难思辩，
无謬复无碍， 无量亦无边。
和合解脱义， 尊胜无上人，
善说断疑网， 随问皆能释。
种种深密教， 及以诸譬喻，
具足庄严辩， 妙音难可量。
清净咸相应， 决了法安住，
不思无能坏， 亦无惧畏心。
妙音与智俱， 不惊不毁损，
无错庄严句， 安乐无忘失。
不惑于诸方， 无滓致心净，
过去与当来， 现在无挂碍。
凡圣平等转， 辩才非他生，
近远同时闻， 佛音说时出。
海水可知量， 毛滴可知数，
诸佛大名称， 辩才难得边。
虚空可尽边， 须弥易称量，
无上天人师， 辩才深难测。”

佛说大方等大集经菩萨念佛三昧经卷第五

叹佛妙音胜辩品之余

尔时，不空见菩萨摩訶萨，复告尊者阿难言：“阿难，诸佛世尊是大梵声，是大师子声，是大雄朗声，是大龙王声，是大妙鼓声，是大妙歌声，是妙好声，是大风声，是大云声，是大雷声等。阿难，诸佛世尊是大善声，不思議声，是无量声，是无边声，是不可称声，是满足声，是无碍声，是迦陵频伽声。阿难，诸佛如来是圆满声，诸如

来是可证声，诸如来是可知声，诸如来是深远智声，诸如来是不可坏清声，诸如来是无垢声，诸如来是无诃声，诸如来是无嘶破声，诸如来是妙好声，诸如来是最上妙好声，诸如来是无缺声，诸如来是不怯弱声，诸如来是具足一切功德声。阿难，诸佛如来应供等正觉出音声时，若欲一音遍满一佛世界即能遍满；若欲遍满二佛世界，若三、若四、若五、若十乃至百千世界乃至亿那由他，乃至无量无边阿僧祇不可数知世界，如来世尊还出如是无量无边阿僧祇不可数不可知殊异声音，皆悉充满彼诸世界，令彼众生诸有得闻如来声者，咸作是念：‘今者世尊独为我转如斯法轮。’阿难，诸佛世尊有如是等不思議声。阿难，诸佛世尊有如是声如是利益。

“尊者阿难，譬如日轮，为阎浮提诸众生辈有眼目者作大利益。云何利益？所谓光明照了一切。如是，阿难，诸如来应供等正觉，清净声轮凡所至处，能为一切信根众生，随宜宣说作大利益，其义亦尔。复次，阿难，譬如秋月十五日夜，彼月光轮清净圆满，阎浮提人见者欢喜。如是，阿难，诸如来应供等正觉圆满声轮，能为一切法音光明，闻者欢喜得大利益，其义亦尔。复次，阿难，譬如大海水，平等一味常住澹然难入难度，其间多有诸异珍宝，而能为彼一切众生若人非人作大饶益。如是，阿难，诸如来应供等正觉，圆音平等一味湛然难入难测，微妙而能安乐一切众生，其义亦尔。复次，阿难，譬如大地，任持一切山林河海、王都大城、民人聚落，复能生长诸种苗稼根茎华果，饶益安乐一切众生。如是，阿难，诸如来应供等正觉，普载声轮任持一切令无坏损，复能生长众生善根功德华果饶益世间，其义亦尔。复次，阿难，譬如虚空容受一切，能令众生种种兴作，往来游处为大利益。如是，阿难，诸如来应供等正觉，广大声轮遍满一切，能令众生多有所作，受用去来无不利益，其义亦尔。复次，阿难，譬如三十三天波利质多罗树，其华敷时能令三十三天皆生欢喜多受适乐。如是，阿难，诸如来应供等正觉，开发声轮，能为一切启甘露门，令诸众生等证常乐，其义亦尔。”

尔时，不空见菩萨摩訶萨，为重明此义，以偈颂曰：

“世尊真善大梵音， 师子妙音牛王吼，
最上龙吼满世界， 器度雄朗丈夫声，
云雷风等弘壮声， 彼不思議悉无量，
转行十方无边界， 所至无碍皆悉闻。
如来出声甚圆备， 世间未能障其声，
亦如迦陵频伽音， 所闻清婉甚微妙。
圣不望报生物喜， 教令证此最胜声，
解脱深句无有比， 世间无有能毁坏。
不破不缺微妙声， 相续不断和合出，
救护世间无穷已， 具足一切功德音。

调伏丈夫如意声，其声遍闻于三界，
彼诸众生斯念喜，各言为我宣妙声。
若欲声满一世界，若二三四及与五，
若二十至五十，百千亿数复过前，
若复过彼恒沙土，皆能充满一切刹，
令彼众生无异心，咸作是念但为我。
譬如日轮出现时，能为阎浮作明导；
如是世尊天人师，法声光明照世间。
犹如秋月处众星，其轮圆满异明净，
彼为阎浮兴大利，众生睹见皆欢喜；
世尊如是满月声，不思议净胜世间，
其有闻者心无厌，为诸众生作饶益。
犹如大海水湛然，深广无边难得底，
其间常出众异宝，为诸世间作利益；
如是诸佛大名称，其声深远亦难穷，
恒教证彼清净音，与不可坏一切乐。
若此三千诸大地，能持异类诸众生；
如是诸佛普载声，生成一切众饶益。
譬如虚空能容受，飞鸟群生皆获益；
如是足尊广纳音，恒以胜善利众生。
犹如忉利质多罗，华时已乐彼诸天；
如是诸佛甘露音，能为众生毕竟利。
尊者设我满一劫，或复百劫赞其声，
生生弗能得其边，佛不思议声若是。
假使十方诸众生，各各恣口长歌叹，
终亦莫能致少分，佛音如是难思议。
假彼行住诸众生，或于一时皆成佛，
彼诸佛说亦无尽，佛声如是难思议。
世尊如是众妙音，庄严具足无伦匹，
若人但能生喜心，彼等终无恶道畏。
佛音如是难思议，第一微妙无可比，
若有菩萨得斯喜，不久则成佛法王。”

尔时，四天王、天主帝释、须夜摩天王、兜率陀天王、化乐天王、他化自在天王、魔王之息导师太子、娑婆世界主大梵天王，乃至净居天王，及余一切大威德诸天，与欲色界中复有无量诸天子等，闻不空见菩萨摩訶萨称赞世尊音声功德已，一切皆于不空见所起尊重心，欢喜踊跃不能自持，咸以天妙栴檀末香、天华及鬘、天妙衣服、宝盖幡幢、杂色雕彩，施散悬置于不空见菩萨摩訶萨上。

时，会众中有六万亿那由他百千欲色界天，闻说如来音声功德，

为当得故发阿耨多罗三藐三菩提心种诸善根。复有五千比丘，被精进铠于阿耨多罗三藐三菩提种诸善根。复有七百千万诸比丘尼，发阿耨多罗三藐三菩提心及弘誓愿。复有百千优婆塞，皆各从彼宝莲华座起，直诣不空见菩萨摩訶萨所。复有二亿那由他百千女人，各解自身众宝瓔珞散掷虚空，住于不空见菩萨摩訶萨上，皆于阿耨多罗三藐三菩提种诸善根。

赞如来功德品第六

尔时，不空见菩萨摩訶萨，复告尊者阿难言：“阿难，诸佛世尊甚为希有！诸如来功德具足故，自天降下具足故，入胎具足故，住胎具足故，出胎具足故，母生具足故，善根具足故，众相具足故，众好具足故，庄严具足故，出家具足故，入定具足故，大入定具足故，深心具足故，至心具足故，真信具足故，无畏具足故，戒身具足故，定身具足故，慧身具足故，解脱身具足故，解脱知见身具足故，诸通具足故，证智具足故，至一切证知第一彼岸故，至慈大慈第一彼岸故，至悲大悲第一彼岸故，至喜大喜第一彼岸故，至舍大舍第一彼岸故，至最胜无等第一彼岸故，至诸威仪第一彼岸故，至诸神通第一彼岸故，至一切诸法无碍第一彼岸故，至是处非处力第一彼岸故，至诸开道利益第一彼岸故，至奢摩他、毗婆舍那第一彼岸故，至一切禅定解脱三摩跋提第一彼岸故；至无贪无嗔无痴无慢无放逸无嫉妒无恚，舍离诸过解脱五道，至四无畏第一彼岸故；令一切众生种诸善根受业果报，教论发起第一彼岸故；令一切众生诸戒行聚，不破不缺不浊不杂，成丈夫志无所触犯，智者所赞无有过愆，一切世间若天、若人、若梵、若魔、沙门、婆罗门，乃至无能如法诃责非理毁者。

“阿难，诸佛世尊功德殊胜，一切世间众生类中，乃至无有能得测量宣说如来戒等功德知其少分，何处有人复能过者？阿难，汝等从今当如斯观：此虚空界如是广大，此四方界如是弘宽，我皆了知限量边际，诸佛功德不可测量。如是，阿难，诸佛世尊所有戒聚、所有定聚、所有慧聚及解脱聚、解脱知见聚，乃至一切威仪神通利益无碍，不可宣说，不可显示，不可得知，不可得入。所以者何？阿难，诸佛世尊所有功德皆无有边。何以故？诸佛世尊有无量戒行，有无量定行，有无量慧行，有无量解脱行，有无量解脱知见，乃至有无量诸功德悉等。是故，阿难，当知诸佛世尊具足若此。”

尔时，不空见菩萨摩訶萨，为重明此义，以偈颂曰：

“世尊天降入胎时，住不思議出亦尔，
生家最胜母无比，最上第一诸功德。
体备众相三十二，诸好具足庄严身，

诸佛所作不思议，皆缘旷劫久修集。
人中胜上求出家，成就禅定大三昧，
正心淳信斯坚固，一切方便无不知。
戒行三昧皆具足，智慧成满无伦比，
解脱知见亦已获，神通威德彼岸边。
能灭炽苦救众生，慈悲要行最为首，
喜舍亦妙行平等，诸佛世尊自证知。
身口常与意行合，所行随智难思量，
威仪无比超世间，法王神力到彼岸。
无诤三昧见法如，是处非处皆明了，
禅定解脱难测度，普能饶益诸众生。
定慧止观斯成就，光明遍觉灭垢心，
无有贪恚众过愆，解脱无畏皆善学。
戒行无破亦无羸，无浊无杂尽清静，
多众生触不嗔恼，不求果报智所称。
内无过失外无毁，假彼天人及梵魔，
或复沙门婆罗门，莫能讥诃常清静。
虚空犹可尽其界，诸方亦可极其边，
无上调御天人师，清静戒行孰能测？
大海可以口饮干，无边水聚亦复尔，
诸佛光明不可识，清静戒行谁得边？
须弥可以口吹散，大小铁围亦复然，
诸佛妙行不可知，清静戒行难得底。”

尔时，不空见菩萨摩訶萨作是思惟：“今者如来应供等正觉，若降威神俯临斯会可谓善哉！今我亦当为诸菩萨摩訶萨故，请问世尊一切菩萨念佛三昧微妙法门。如来先已显示其名，今者当应为诸弟子，演说斯法宣明义理。世尊，宁当过安禅寂乎？”

尔时，世尊知彼不空见菩萨摩訶萨如是念已，佛神力故，应时此会三千大千世界大地六种震动，所谓动、涌、起、震、吼、觉等，如是具足十八相动乃至涌没。如是动已，时佛世尊，复以神力放大光明，照此三千大千世界。彼光出时能令一切星宿天宫、月天子宫、日天子宫，乃至欲界诸天宫殿，所有光明丧灭不现。复有如是无量无边不可思议阿僧祇恒河沙数，诸梵天宫所有威光，悉皆暗晦；乃至色界一切天宫，蒙佛光故亦皆不现。诸光没已，唯佛世尊神光独盛。尔时，世尊大慈熏心，为欲饶益诸众生故，从禅定起安详徐步，诣彼大众，周旋观察是不空见菩萨摩訶萨等已，于是一切世间诸天及人、若梵、若魔、沙门、婆罗门、诸龙、夜叉、阿修罗辈遇佛光明，咸各自彼莲华座起，前诣佛所曲躬合掌，礼敬世尊各还退坐。

尔时，不空见菩萨摩訶萨遥见世尊，身相分明端严殊特，诸根寂

静如调象王，心意朗然若澄净水，一切种具足，一切智圆满，自彼而来深生喜已。于是不空见菩萨即告尊者阿难言：“阿难，汝观世尊从禅定起，如来世尊从静室来，必当开演第一诚谛终无虚妄。如来世尊是妙语者、是真语者、是实语者、是如语者、是不异语者、是善语者，心善思惟常行善事，身业无失、口业无失、意业无失，一切功德斯皆具足。所谓具足最上第一戒聚故，具足最上第一定聚故，具足最上第一实慧聚故，具足最上第一解脱聚故，具足最上第一解脱知见聚故，具足最上第一威仪故，具足最上第一神通故，具足最上第一利益故，具足最上第一不思议辩才故，具足最上第一成就故，具足最上第一微妙故，具足最上第一无退故，具足最上第一入胎故，具足最上第一住胎故，具足最上第一生家故，具足最上第一圆满功德故，具足最上第一不思议诸相故，具足最上第一不思议诸好故，具足最上第一过去业故，具足最上第一善根故，具足最上第一具足发心故，具足信心故，具足破烦恼故，具足大破烦恼故，具足舍家故，具足知五种故——所谓具足第一戒身故、具足第一定身故、具足第一慧身故、具足第一解脱身故、具足第一解脱知见身故，已到第一神通彼岸故，已到第一无余智证彼岸故，已到第一分别法彼岸故，已到第一分别义彼岸故，已到第一分别辩才彼岸故，已到第一寂静定彼岸故，已到第一明达彼岸故，已到第一根力觉道彼岸故，已到第一慈及大慈彼岸故，已到第一悲及大悲彼岸故，已到第一喜及大喜彼岸故，已到第一舍及大舍彼岸故，已到第一不思议威仪彼岸故，已到第一惭愧彼岸故，已到第一于一切法自在彼岸故，已到第一过去智知见无碍彼岸故，已到第一未来智知见无碍彼岸故，已到第一现在智知见无碍彼岸故，已到第一身业随智慧行彼岸故，已到第一口业随智慧行彼岸故，已到第一意业随智慧行彼岸故。阿难，如来应等正觉，于一念中能具足知一切众生心心所行，若善若恶、若净若垢等。”

尔时，不空见菩萨摩诃萨，复告尊者阿难言：“尊者阿难，诸佛世尊如大海，净戒聚不可得底故。尊者阿难，诸佛世尊如须弥山，三昧聚不可动摇故。尊者阿难，诸佛世尊如虚空，智慧聚无有边故。尊者阿难，诸佛世尊如虚空，摄一切众生无障碍故。尊者阿难，诸佛世尊如日轮，为诸世间作法光明故。尊者阿难，诸佛世尊如大火聚，焚烧一切众生诸烦恼薪故。尊者阿难，诸佛世尊如河如陂如池如泉，洗荡众生老病死垢故。尊者阿难，诸佛世尊如良医，能愈一切众生诸疫病苦故。尊者阿难，诸佛世尊如大云雨，能以法水润泽众生枯槁故。尊者阿难，诸佛世尊如师子王，能破一切众生大我慢故。尊者阿难，诸佛世尊如大船，能度众生生死河故。尊者阿难，诸佛世尊如那罗延，能伏一切世间大力故。尊者阿难，诸佛世尊如优昙华，一切世间难得见故。尊者阿难，诸佛世尊如波利质多树华，三十二大人相可爱乐故。尊者阿难，诸佛世尊如父母，能与一切众生安乐利益故。尊者阿难，诸佛世尊作利益作安乐，能令一切众生得住故。

“尊者阿难，若人说言‘如来出世有无量辩才’，如是说者，是则名为善说如来。如来出世有不思议辩才，是名善说。尊者阿难，乃至如是略说，如来出世有无边辩才，如来出世有无碍辩才，如来出世有无取著辩才，如来出世有胜解脱辩才，如来出世有随顺义辩才、相应义辩才、微妙净辩才、巧问辩才、不问辩才、上辩才、无上辩才、慈辩才、大慈辩才、悲辩才、大悲辩才、喜辩才、大喜辩才、舍辩才、大舍辩才、佛出世利益辩才。尊者阿难，若人说言‘如来出世具足利益一切众生’，是则名为善说如来。尊者阿难，若人正言‘同义辩才利益众生’，是则如来出于世间。又说若言‘彼利益辩才，为一切众生得利益故，当正言音悉令具足，是则如来出于世间’，斯人亦名善说如来。尊者阿难，若人说言‘彼无归众生、无依众生、无救众生、无护众生、无怜愍众生，如来出世，为归、为依、为救、为护、为怜愍者’，是则名为善说如来。

“尊者阿难，假使我今若经一劫若减一劫，长时歌赞诸佛世尊辩才功德终不得一。又复经于无量劫数，具足演说如来应供等正觉辩才功德，终亦不得其少分边。尊者阿难，譬如有人老病羸瘠，至大众中发如是言：‘诸人当知，我虽年迈为病所摧，而犹能以一毛端勺滂取大海，令即干枯。’是人素无神通咒术，而能如是果决壮言。尊者，于意云何？彼人言义可取信不？”

阿难答曰：“不也，大士。”

不空见复言：“尊者，彼人之言，一切世间诸天及人颇曾惊叹此事希有，如是困人能以毛端尽大海水如斯念不？”

阿难答曰：“不也，大士。”

“如是，尊者，此事本无依，何取信？我今赞说诸佛世尊辩才功德不得少边，其事若此。尊者阿难，且置斯事。假使佛今还自赞说毛分功德，过亿百千那由他劫亦不能尽，而况余人？尊者阿难，且置斯事。我今更说假使大地所有一切众生，若干种类有足、无足、二足、四足乃至多足，有色、无色、有想、无想、非有想非无想，如此世界及以十方无量无边诸世界中所有众生，设使尽皆一时成佛。彼诸世尊经无量劫，皆还叹佛一毛功德终亦不尽。尊者阿难，当知一切诸佛世尊，乃有如是不可思议具足功德。”

尔时，不空见菩萨摩訶萨，为重明此义，以偈颂曰：

“尊者当观法王来， 一切世间应供养，
功德威光殊显赫， 一切智满难可倾。
最上妙言佛真说， 实语及如无异言，
善说圣法真实知， 身口离过意亦尔。
心无异念绝分别， 戒行最胜三昧深，
智慧解脱悉超伦， 解脱知见无可比。
威仪具足不思议， 无上神通如实智，

利益世间无有量， 辩才妙行亦无类。
降天下生象牛王， 入胎成就世中胜，
住胎殊异无有等， 家生具足母尊高。
成就众根最第一， 胜相圆满不思议，
妙好咸备极庄严， 一切分明世瞻仰。
具足真心信清净， 禅定除垢有大威，
放舍世欲乐出家， 菩提成就得五种。
已度神通第一岸， 智慧无碍亦无边，
及奢摩他毗舍那， 法王通达斯自在。
大海之水广且深， 其或可以毛端测，
调御丈夫清净戒， 虽经旷劫不能知。
须弥虽固犹可动， 以手投掷至梵宫，
诸佛初住定禅时， 已自无能动乱者。
虚空容有得其边， 四方亦可知其限，
终无能见正觉境， 思惟分别此彼处。
尊者大地实弘广， 然可以指遍度量，
舍离烦恼人中尊， 彼心意识不可尽。
如日轮光破众闇， 观诸善恶若见色，
如是自在世间师， 能破巨黑无明云。
犹如秋月出重云， 众生见者皆欢喜，
法王智光如满月， 如睹妙色无不乐。
冥寂长夜如明灯， 为诸眼目作先导，
世间智者能除暗， 恒以法光照众生。
能设法炬自在尊， 天人大师为他作，
一切诸有皆灭尽， 是故称佛光明王。
圣智如河及泉水， 能荡生老病死尘，
如大医王施良药， 调御能除众疾苦。
犹如龙王降大雨， 能满一切诸大地，
诸佛如是行慈悲， 充足一切乐法者。
大师子王震吼时， 降伏世间诸恶兽，
世尊如斯决定说， 破除外道我慢心。
如大舟船常往返， 济度一切诸去来，
诸佛如是遍周旋， 拔彼常没四流者。
优昙钵华世希有， 此阎浮提最难见，
天人世尊难中难， 一切世间归依处。
如波利树华现时， 三十三天甚爱乐，
大人相好出兴世， 众生睹见悉欢喜。
世尊神变难穷尽， 如我今者谓宣说，
我以叹佛诸功德， 毕竟利益诸群生。”

佛说大方等大集经菩萨念佛三昧经卷第六

佛作神通品第七

尔时，世尊自袈裟内出金色手，摩彼不空见菩萨摩訶萨顶，复出广长舌相，即告不空见菩萨言：“善哉！善哉！汝不空见，汝今乃能为诸众生，如是叹说如来应供等正觉真实功德也。不空见，若有说言：‘世间众生无救护时，是中必有能救护者，出现世间为作救护。’不空见，当知即是善说如来也。复次，不空见，若复说言：‘世间众生无归趣时，是时必有不思议辩才、无量辩才出现于世，能与众生作大归依。’不空见，当知即是善说如来也。复次，不空见，若复说言：‘世间众生多贪欲行，多嗔恚行，多愚痴行，是时必有无欲恚痴大师出世为除三毒。’不空见，当知即是善说如来也。复次，不空见，若复说言：‘世间众生多悭吝时，多嫉妒时，是时必有远离悭嫉好行布施大师出兴为破悭嫉。’不空见，当知即是善说如来也。复次，不空见，若复说言：‘世间众生无有惭愧羞耻之行，是时必有惭愧羞耻大师出世除无惭耻。’不空见，当知即是善说如来也。复次，不空见，若复说言：‘世间众生多行憍慢贡高之事，是时必有和敬调柔大师出世为除憍慢。’不空见，当知即是善说如来也。复次，不空见，若复说言：‘世间众生无有慈悲不能喜舍，多行嗔恚秽浊毒心，是时必有断除嗔毒具足四等导师出世教修慈悲大利益事。’不空见，当知即是善说如来也。复次，不空见，若复说言：‘世若多恶无善众生，其有能教令生善根，先有善根令其增广，如是利益大师出兴。’不空见，当知则是善说如来也。复次，不空见，若复说言：‘五浊恶世众生病增，世有大人能行利益，导以出法安乐众生。’不空见，当知是言则谓我也。所以者何？吾今出于五浊恶世，宣扬妙法断除邪垢，能多利益诸众生故。”

尔时，世尊手摩不空见菩萨顶时，即以神力于一念间，令此大众咸见东方无量无边不可说阿僧祇现在一切诸佛国土。彼国土中诸佛世尊未灭度者，及彼众生一切境界皆悉现前，亦闻彼佛说法音声，亦见彼刹清净庄严种种具足。如是乃至南西北方、四维上下十方所有诸佛净土，一切境界明了现前，若观掌中庵摩勒果。又复世尊以手摩彼不空见菩萨摩訶萨顶时，以佛神力及不空见本愿因缘，于一念间，即见十方无量无边阿僧祇不可数过去诸佛入涅槃者，乃至彼刹清净庄严了了分明若观手掌；又蒙佛力亦见当来诸佛世尊，清净刹土庄严具足。

尔时，不空见菩萨摩訶萨，以本愿力承佛威神，尽见十方三世诸佛及彼佛刹清净庄严已，为重宣此义，即从座起，正持威仪，偏袒右肩，右膝著地，合掌向佛，以偈颂曰：

“三千世界所有水， 若人欲量皆可知，
调御丈夫天人师， 戒行深远孰能测！

须弥高广最巍巍， 羸老病人口吹散，
世尊初入于禅定， 亿百千劫难可了。
虚空足量能尽边， 四方亦可步其际，
世尊大师等正觉， 智慧甚深无源底。
虚空平等无挂碍， 可为暴风所飘动，
如来本性无烦恼， 贪恚痴毒何所居？
日轮圆满处空中， 清净光明遍世界，
如是阿罗仙种姓， 于此天众而曜晖。
又如秋月合昴宿， 威光超世挺众星，
如是满月大法王， 炎赫独出天人上。
若优昙华甚希有， 时乃一遇不世出，
诸天中天调御师， 有时而现随意感。
世尊妙手摩我顶， 金色百福相庄严，
不可毁坏悉具足， 其为利益斯若是。
世尊真言及实语， 人中法王转正轮，
普遍十方世界中， 甚为利益悉自在。
蒙世尊手摩顶时， 我见十方最上人，
如恒河中沙数， 大威德仙众多彼。
大牟尼尊手加我， 即见诸佛如弥陀，
犹恒河中算沙数， 人中最胜众多彼。
如来慈手亲摩觉， 安乐世界我见知，
阿閼应供两足尊， 大悲光明作饶益。
我蒙世尊神手触， 尽见世间灭度尊，
于一念顷如恒沙， 大慈降伏诸根者。
世尊以手摩我时， 亦睹弥勒昔诸愿，
如彼当来一切事， 了了明白无复疑。
过去诸佛我已见， 未来现在亦复然，
十方三世诸如来， 神通德力难称说。
世尊以手摩我时， 普见十方救世者，
并睹诸佛清净刹， 我因更发最上愿。
诸佛神通难思议， 戒定智慧亦如是，
诸余功德不可说， 唯愿如今常教示。
如来下手摩我时， 即见十方诸塔庙，
众宝金色如恒沙， 具足种种微妙供。
诸佛皆具大名称， 彼彼相好充十方，
百千乐音以供养， 我见彼刹悉如是。
彼刹复有诸佛塔， 金缕间错宝玻瓈，
高大过于一由旬， 端正庄严皆若此。
复见大尊诸塔庙， 众宝杂厕甚精华，
亦有住于虚空中， 常以天华散其上。

我复见彼诸胜塔，涌出高满十二旬，
彼诸佛所名灯燃，光明遍照十方刹。
世尊以手摩顶时，我见妙塔不可说，
彼佛各有大名称，其间皆悉如来力。
世尊手摩我顶时，于是得见诸佛刹，
彼或烧身或受辱，种种行类不可宣。
各于自刹修苦行，无有昼夜如救燃，
勇猛弘誓度众生，皆为无上菩提故。
我又睹见十方刹，有诸菩萨常辛勤，
自剎身肉燃多灯，彼为菩提光明故。
我又复见清净身，于诸佛前常立住，
至彼世尊涅槃已，为求菩提大德故。
我又复见为法人，香油灌身燃灯炬，
苦身精意遍十方，终不系心财食类。
我又更见诸丈夫，恒舍头目及身手，
妻子王位与国城，志令群生获安乐。
如我所见无遗余，不可口言而宣说，
我所知见最胜等，蒙佛威灵故遍观。
世尊威神加持故，令我见斯希有事，
吉祥第一天中天，我今归依最无上。”

见无边佛广请问品第八

尔时，不空见菩萨摩訶萨白佛言：“世尊，今此一切天人大众，既见世尊久处禅定，默无言说咸生渴仰，唯愿世尊俯就斯座。”

尔时，世尊闻不空见菩萨摩訶萨，为彼天人大众请已，端身正念，默然许之。

尔时，不空见菩萨既蒙默许，偏袒右臂，右膝著地，合掌向佛复白佛言：“世尊，我今欲问，若圣听者乃敢发言。”

佛告不空见：“如来应供等正觉，随汝所问，当为汝说，断汝所疑，令尔心喜。然是天、人、梵、魔、沙门、婆罗门等皆当证知。”

时，不空见菩萨摩訶萨承佛教已，即便白言：“世尊，菩萨摩訶萨应当思惟何等三昧？应当亲近何等三昧？应当修行何等三昧？如是菩萨思惟亲近，及以修行此三昧已，现见何法而得安乐？云何当得如大海，多闻受故？云何当得如须弥山，菩提心安住不倾故？云何当得如大铁围山，一切外道邪论不能动故？云何当得如虚空，一切法无碍故？云何当得如虚空，心无染著故？云何当得如日轮，破除一切无明闇故？云何当得如月轮，白净法圆满故？云何当得如灯轮，作法光明故？云何当得如大炬，一切受阴灭故？云何当得如火聚，焚烧一切诸

烦恼故？云何当得如河池泉源，一切众生随意受用故？云何当得如大船，一切众生度彼岸故？云何当得如桥梁，不没生死烦恼中故？云何当得降伏众敌，破坏魔军诸憍慢故？云何当得如波利质多罗树，为一切诸方所有众生，开七菩提华香风普熏故？云何当得如优昙钵华，希有难得故？云何当得如药王，等疗一切众生病苦故？云何当得如大医王，起大悲心愍痛众生故？云何当得如栴檀树，除众热恼作清凉故？云何当得如大云雨，等注法雨令满足故？云何当得如蜜器，能具足说一味法故？云何当得如师子吼，能与一切众生无怖畏故？云何当得如父母，等与一切众生安乐利益故？云何当得见真法，至如法性实际彼岸故？云何当得解释深趣，至实义彼岸故？云何当得巧说法辩，至能分别彼岸故？云何当得善巧说法，至具足方便彼岸故？云何当得分别了义，善知字句法故？云何当得正意正行，具知足故？云何当得统御大众，无所畏故？云何当得说如实义，入实际故？云何当得如大海，一切法同一味故？云何当得如大山，三昧安静无能动摇故？云何当得如门闼，菩提心不可动转故？云何当得坚固力，心志具故？云何当得具足威仪，不作虚谄故？云何当得端正身，为他欢喜说法故？云何当得最妙最上色相故？云何当得尊贵大姓家生故？云何当得大法王福报功德故？云何当得具足无量辩才故？云何当得不取著辩才故？云何当得不错辩才故？云何当得分别种种名字句辩才故？云何当得不思议辩才故？云何当得无边辩才故？云何当得解脱辩才故？云何当得同义辩才故？云何当得随他意义辩才故？云何当得渐亲近辩才故？云何当得所问能答辩才故？云何当得无问自说辩才故？云何当得不毁坏辩才故？云何当得无退转辩才故？云何当得甚深句字种种说辩才故？云何当得无量无边譬况辩才故？云何当得未证大菩提，已能具足梵音声故？云何当得第一微妙音声故？云何当得迦陵频伽音声故？云何当得师子王音声故？云何当得大龙王音声故？云何当得大牛王音声故？云何当得大钟鼓音声故？云何当得胜妙歌赞音声故？云何当得乐弦音声故？云何当得哀婉清美音声故？云何当得风云雷震音声故？云何当得甚深庄严辩才音声故？云何当得诸妙语言文字章句真正庄严辩才音声故？云何当得甚深能大巧说音声故？云何当得种种譬喻辩才音声故？云何当得一切世间最胜供养音声故？云何当得共他论义辩才音声故？云何当得神通彼岸音声故？云何当得不忘失法音声故？云何当得不缺少善法音声故？云何当得诸善根行具足他赞音声故？如是一切悉皆具足。”

尔时，不空见菩萨摩訶萨，发如是等诸疑问已，为重宣此义，以偈问曰：

“具足金色百福相，能觉一法利无边，
最胜功德我今问，何等三昧先应思？
如来妙智无等伦，世间宁有加上者？”

我今请尊修何定， 所获功德不思议？
天人大师上调御， 思惟是定何功德？
菩萨于此云何修， 而能安乐于一切？
云何自然多闻海？ 云何守护决定心，
得住诸佛功德处？ 云何如大铁围山，
是中都无恚恨心， 而能降伏诸外道？
云何无碍如虚空？ 云何复得心自在？
云何如日复如月？ 云何同炬亦如灯？
云何为众作光明？ 云何复须观三昧？
云何解脱诸烦恼？ 云何能度生死岸？
云何发心苦轮中， 独超三界无与等？
云何波利质多树， 大人相好妙庄严？
云何如彼优昙华， 勇健雄猛不出世？
云何施药不望报， 良医救苦调御师，
能除众生诸热病， 安住净戒得清凉？
云何当得如法宝， 无量功德度彼岸？
云何甚深微妙法， 犹蜜甜味妙无加？
云何得此师子音， 能令众生无怖畏？
云何等益如父母， 得彼深乐不思议？
云何能得妙辩才， 行于菩提大名称？
云何说彼最胜道？ 云何而得无碍智？
云何于义能巧便？ 云何妙知诸法相？
云何分别名句身？ 云何世法及出世？
云何正念与正行？ 云何知足具思惟？
云何多闻如大海？ 云何叹佛真实德？
云何说彼诸众生， 生死根本如实际？
云何诸法无差别， 犹如大海同一碱？
云何如山定无动， 不退转心如门闌？
云何一心无余业， 但求无上大菩提？
云何具足诸威仪， 身相端严见者喜？
云何常生大姓家， 亦受法王大福聚？
云何得彼无量辩， 所有言论世莫思？
云何字句义深微， 我今请问护世者？
云何无上难得胜， 亲近真辩无遗忘？
云何同义称根性， 若问不问斯相应？
云何未证具梵音， 其声清婉甚微妙，
迦陵频伽声可爱， 大智雄猛声远闻？
云何师子大龙音， 更得深重牛王吼？
云何世尊得弦乐， 具足种种诸器声？
云何获彼甜味， 而常演说众欣乐？

云何功德音无毁， 其出如风若震雷？
云何多种譬喻音， 能宣甚深诸言说？
云何所出善语言？ 云何诸法不忘失？
云何有中获宿命？ 彼诸神通云何修？
云何修行无疲倦， 遍知一切诸善法？
如是诸法不思议， 自然轮转遍十方，
世尊我皆无复疑， 是故今问归依处。”

尔时，不空见菩萨摩訶萨，殷勤郑重如是问已，即以神力身升虚空，于虚空中自然化作天宝华盖，庄严微妙七宝所成，谓金、银、琉璃、玻瓈、玛瑙、砗磲、真珠，具如是等种种宝饰。彼宝盖中雨种种华，而彼众华右绕三匝住佛顶上，即彼华中以偈叹曰：

“归命丈夫大调御， 无上正觉两足尊，
一切世间天人辈， 宁有可以比类者？
长夜黑暗诸众生， 愚痴颠倒堕邪道，
极尊明智世间眼， 能令还复平正路。
失于清白法种子， 众生烦恼内烧心，
胜尊犹如世父母， 能令安止白法处。
遗丧善法深利人， 后世方将可怖畏，
最尊成就大慈行， 为诸众生真导师。
一切众生无善利， 无有覆护无救者，
希有大悲教世师， 世尊真为作救护。”

尔时，华中说是偈已，彼华方至如来足上，须臾即飞遍往三千大千世界，遍诸佛前施散供养。彼宝盖中复出栴檀末团大如车轮，至如来身忽然不现。而彼栴檀香气微妙，充满三千大千世界，所有众生得闻此香，皆悉受于上妙快乐，犹如菩萨入第四禅。

尔时，不空见菩萨摩訶萨，示现如是神通事已，即白佛言：“世尊，是诸菩萨摩訶萨等，云何当得如斯智慧？所谓大智慧、速疾智慧、机捷智慧、猛利智慧、无相智慧、巧入智慧、甚深智慧、广普智慧、无畏智慧、圆满智慧。云何复得不可算数不可称量诸妙善根？所谓心如金刚，善根穿彻一切法故；心如迦邻提衣，柔软善根能作业故；心如大海，善根摄诸戒聚故；心如平石，善根住持一切事业故；心如山王，善根发生一切善法故；心如大地，善根负持众生事业故；得心不随他行，善根远离非法教诲故；得心善修行，善根一切法安住故；得不坏信善根，于诸如来所行之处不疑惑故；住一世界自然遍见十方诸佛，亦闻彼佛宣说妙法；复见菩萨声闻大众，又睹佛刹清净庄严受用等事悉无疑故；乃至摄受决定善根，于一切时自利利他故。

“世尊，如我今者实为自利，复欲利益诸众生故，请问如来也。

世尊，我今复为弘广众生净信心故，请问如来也。世尊，我今复为彼诸菩萨摩诃萨辈，具足圆满不思议善根故，请问如来也。世尊，我复为斯被大精进弘誓铠甲诸大菩萨摩诃萨故，请问如来也。世尊，有诸菩萨摩诃萨辈，于生死中发大精进，为一切众生而亦不取众生之相，然是菩萨摩诃萨虽于生死烦恼中，长夜度脱一切众生，而实不住生死烦恼想。世尊，我为如是诸众生故，请问如来也。世尊，有诸菩萨摩诃萨等，行慈悲时于诸众生都无嗔恨，设诸众生诃责骂辱楚撻打种种苦迫，如是菩萨于众生所终无报答，乃至不起嫌心不失本愿，无异分别及余思惟一心修行大慈大悲。世尊，我为如是住于大乘诸菩萨故，请问如来也。世尊，有诸菩萨摩诃萨辈，为众生故欲舍己乐及诸乐具，欲受一切炽然大苦，发如斯念：‘我当云何令一切众生得最胜乐，令一切众生得大法明？’世尊，彼诸菩萨如是念时，凡所有物若内若外，无不施者，无不益者，无不饶者。世尊，我为如斯诸菩萨故，请问如来也。世尊，有诸菩萨摩诃萨辈，被著如是精进铠时，发如斯念：‘我今当应为一一众生，于恒河沙劫住大地狱受诸苦恼，犹入出息不以为苦，亦不退没菩提之心。’世尊，我复为是诸菩萨故，请问如来也。世尊，有诸菩萨摩诃萨辈，被著如是精进铠已，发如斯念：‘我今当为一切众生，执诸事业厮役服勤，种种承事不以为苦。于是或为奴婢，或为仆隶，或为僮从，或为弟子，我应如是乃至为作种种眷属成熟众生。’世尊，我复为是诸菩萨故，请问如来也。世尊，有诸菩萨摩诃萨辈，为一切众生故，发大勇猛修诸苦行，舍身手足头目髓脑，或时节节支解其形，析骨消髓不以为苦，无有休懈，方更炽然于阿耨多罗三藐三菩提事。世尊，我为如斯诸菩萨故，请世尊耳！”

尔时，不空见菩萨摩诃萨，如是问已，为重宣此义，以偈颂曰：

“我问天师诸胜智， 大智彼等云何成？
云何速智及捷疾， 利智聪明能通达？
何因得彼甚深智， 尽无边智为我宣，
弘广普遍一切智， 是为最胜求菩提？
云何当得无怖畏， 具足善巧为我说？
云何而得金刚心， 一切法中无疑惑？
云何得是柔软心， 戒行清明净如海？
云何如山不动转， 菩提决定愿庄严？
云何行行不随他， 于义明了得安住？
云何而得不坏信， 诸佛所作无复疑？
云何得彼生念智， 住于一界现十方，
遍睹诸佛及闻法， 并大集众亦明了？
其身不离于一刹， 而能供养十方尊，
妙华众香及涂香， 诸余众具难可说。
心住此刹无他缘， 身现十方无量土，

亲承奉事彼诸佛， 悉由神通力无边。
无请我今为行慈， 住于惭愧修行者，
不自利己常益他， 为斯我请大名称。
诸有发心求佛智， 善根成熟不思议，
如是三昧云何修？ 我故为彼问无著。
被此忍铠为众生， 我要当拔诸重苦，
彼等已离众生想， 为斯故问正觉真。
彼辈常住平等心， 观察众生无异想，
常能成就慈悲者， 我为彼故问如来。
是中应行何等法， 速得如是不思议，
所得功德无有边？ 我为彼故请调御。
被弘誓铠勇猛人， 为一众生恒沙劫，
大地狱中受焰苦， 善哉安乐诸众生。
彼等无睡亦无疲， 内外诸物无不施，
如是摄受众生者， 我今为彼同普观。
呵责毁辱及捶骂， 身受煎迫众事苦，
为他奴婢及仆隶， 皆由斯辈请世尊。
无量百千数亿头， 有来求索皆能舍，
当舍头时极欢喜， 为求无上妙菩提。
为诸众生而更舍， 手足及以身余肢，
救解失道众生类， 除拨生死还正路。
又施妻妾及男女， 七宝珠玉及金银，
亦舍上妙众器具， 我为彼故问如来。
舍身命财无厌倦， 长夜听说不疲劳，
心常寂灭行头陀， 我以彼故问正觉。
真实妙语恒系心， 粗鄙恶言闻即离，
而于他所无嫌恨， 我缘彼故咨自在。
常以慈心观众生， 其犹父母爱一子，
而于怨亲行平等， 故我为彼请人王。
现有如斯诸功德， 然我今日以宣陈，
其或未具诸众等， 我亦为是咨问佛。
世尊我今有善根， 初发问时便克获，
藉此菩萨诸功德， 速证寂静三昧王。”

佛说大方等大集经菩萨念佛三昧经卷第七

赞三昧相品第九

尔时，世尊赞不空见菩萨摩訶萨言：“善哉！善哉！不空见，汝于往昔乃能供养无量无数诸佛世尊，于诸佛所种诸善根，具足修行诸

波罗蜜，一切法中所作已办，而常为彼诸众生辈，作不请友为行大慈，成就正信诸众生故，请问世尊如斯大义；为被大铠诸众生故，请问世尊如是大义；为不动不退大菩提心诸众生故，请问世尊如斯大义；为不坏信意诸众生故，请问世尊如斯大义；为发弘广大愿庄严诸众生故，请问世尊如斯大义；为不思议善根诸众生故，请问世尊如斯大义；为著不思议铠甲诸众生故，请问世尊如斯大义；为超越三界诸众生故，请问世尊如斯大义；为专精实义诸众生故，请问世尊如斯大义；为随顺大智诸众生故，请问世尊如斯大义；为乐甚深法行诸众生故，请问世尊如斯大义；为重布施诸众生故，请问世尊如斯大义；为重开示诸众生故，请问世尊如斯大义；为一切能舍内外身财诸众生故，请问世尊如斯大义；为成就最上无上戒聚诸众生故，请问世尊如斯大义；为深忍相应诸众生故，请问世尊如斯大义；为勇猛精进诸众生故，请问世尊如斯大义；为得深禅定诸众生故，请问世尊如斯大义；为深重智慧诸众生故，请问世尊如斯大义；为以资财方便巧摄一切诸众生故，请问世尊如斯大义；又为心若金刚诸众生故，为心如门闌不动不转诸众生故，为心如净水无有尘垢诸众生故，为心如迦耶邻提衣诸众生故，为乐入深义诸众生故，为尊重正法诸众生故，为舍担能担诸众生故，为不惜身命诸众生故，为不乐一切世间有为诸众生故，请问如来如是大义。不空见，汝于今者能为如斯诸大菩萨摩訶萨辈，请问如来如是义耳！”

尔时，世尊复告不空见菩萨摩訶萨言：“不空见，汝应谛听，善思念之，吾当为汝广分别解说。”

时，彼不空见菩萨摩訶萨即白佛言：“善哉！世尊，如蒙圣说，一心谛受。”

佛言：“不空见，有菩萨三昧，名念一切佛，菩萨当应亲近修习观察思惟。如是三昧既能修习，观察思惟此三昧已，则得增广成就现前安乐法行故，则得增广无贪善根故，则得增广无嗔善根故，则得增广无痴善根故，则得具足惭愧故，则得成就神通故，则得圆满一切佛法故，则得清净一切佛土故，则得天降下生具足故，则得入胎具足故，则得住胎清净具足故，则得母生微妙清净具足故，则得家生清净具足故，则得诸根微妙清净具足故，则得大人相清净具足故，则得诸妙好清净具足故，则得出家具足故，则得最上寂静具足故，则得大寂静具足故，则得诸通具足故，则得为一切众生作归依具足故，则得多闻具足故，则得世间出世间法具足故，则得一切诸法住处具足故，则得巧妙方便知出世法具足故，则得善通达一切诸法具足故，则得巧知前际后际法相具足故，则得善巧庄严文字句义具足故，则得智慧具足故，则得微妙神通具足故，则得巧转变心具足故，则得善教示他具足故，则得为他众生及富伽罗胜负白黑上下满缺增损胜力具足故，则得是处非处具足故，则得未成阿耨多罗三藐三菩提趣向具足故，则得正行具足故，则得意具足故，则得自在具足故，则得神通具足故，则得

尊胜大家具足故，则得大姓具足故，则得端正具足故，则得大威具足故，则得大光明具足故，则得作诸功德具足故，则得大功德具足故，则得大人牛王具足故，则得令他欢喜音具足故，则得令他深欢喜音具足故，则得微妙音具足故，则得梵音具足故，则得相应辩才具足故，则得无诤辩才具足故，则得无著辩才具足故，则得称实辩才具足故，则得种种辩才具足故，则得一切言音辩才具足故，则得所生不离诸佛世尊而常恭敬供养具足故，则得离边地生具足故，则得常生中国具足故，则得遍游诸世界礼拜承事诸佛世尊咨请论义具足故，则得成就无量无边功德具足故，则得一切菩萨功德庄严具足故，乃至则得菩提树下道场庄严具足故。”

尔时，世尊为重宣此义，以偈颂曰：

“不空见斯胜三昧， 如我今住智德中，
其有菩萨能修行， 彼见十方一切佛。
当即速获诸神通， 因是复睹清净刹，
遂能下生妙具足， 入胎具足亦复然。
住胎之时无有比， 母最清净胜家生，
一切相好咸具足， 亦当修彼诸行法。
舍家出家离众欲， 捐弃人欲及与天，
彼为世间求菩提， 所生常有诸甘露。
亦得诸通及神足， 转智圆满彼世间，
多闻总持大德人， 行行斯由多闻海。
统诸大众义明了， 巧知众生方便学，
诸法行处皆悉知， 世间之法及出世。
智人所知智具足， 远离诸业及痴恼，
有为之法尽皆舍， 而常亲近于无为。
常以天眼观众生， 复用天耳听闻法，
宿命明白知过往， 他心善达前人意。
神通变化自在游， 心能巧转随所因，
得大名闻行佛国， 能广利益诸世间。
明达是处及非处， 一切诸法靡不知，
深照净法及垢染， 以常修习胜三昧。
能得正行具足人， 彼之智慧实无比，
具正思惟大威德， 亦得安住正修行。
复生大家及尊姓， 众事端严见者喜，
彼虽处于有为中， 所作功德无能坏。
所生常受大功德， 往来多作人中王，
或为忉利释天尊， 时作光天及梵主。
凡所出声悉无比， 梵天妙响师子音，
诸龙美音遍行中， 大功德声牛王吼。

备于弦乐及歌声，迦陵频伽音精妙，
能会义理令众欢，以获三昧故得然。
善出精雅及好声，多用爱言悦一切，
深婉妙音并善语，彼声常有未曾绝。
行步举动若龙王，普放电光照一切，
降雨滂洽于大地，是谓龙德难称量。
如是人龙所游处，住斯妙定胜神通，
无量无数诸化身，遍诸佛前等供养。
偈颂譬喻诸种作，言词雅正理趣安，
彼常法乐与众生，得是胜定故无碍。
所生不离于诸佛，亦见菩萨及圣僧，
恒居利益无难处，成就三昧照十方。
欲遍诸佛有咨论，或生无量难思刹，
现前供养一切佛，成就三昧故若斯。
如是功德不可说，超过数表绝称量，
道树等觉恒俱生，诸佛咨嗟唯此定。”

正观品第十

尔时，不空见菩萨摩訶萨白佛言：“世尊，若诸菩萨摩訶萨欲得成就诸佛所说菩萨念佛三昧者，彼菩萨摩訶萨应当亲近修习何法，能得成就思惟三昧耶？”

尔时，世尊告不空见菩萨摩訶萨言：“不空见，若诸菩萨摩訶萨欲得成就诸佛所说念佛三昧，欲得常睹一切诸佛承事供养彼诸世尊，欲得疾成阿耨多罗三藐三菩提者，当住正念远离邪心，断除我见思惟无我，当观是身如水聚沫，当观是色如芭蕉虚，当观是受如水上泡，当观是想如热时焰，当观是行如空中云，当观是识如镜中像。菩萨若欲入是三昧，当应深生怖畏之想，当念远离讥嫌免他诃责，当念除去无惭无愧成就惭愧，当应成就奢摩他、毗婆舍那，当应远离断常二边，常念一心精勤勇猛除去懈怠发广大心，常念观察三解脱门，常念先生三种正智，常念断灭三不善根，常念成就诸三昧聚，常念成就一切众生，常念等为众生说法，当观四念处，所谓身念处、受念处、心念处、法念处，当念四食过患，所谓抆、触、思、识等，于是食中生不净想，当念四无量，所谓修于大慈、行于大悲、安住大喜、具足大舍，当念成就诸禅而不味著。然复思惟一切诸法，常念不惜其身不保其命，舍身及心摄受多闻，念如是法，应如是护不得诽谤，多闻法财如所闻法如义受持，于诸佛所起尊重心，又于法僧生肃恭意，亲善知识远离恶友。除灭世间无义语言，不著世乐，不舍空闲，住于一切生平等心，于诸众生无有退没，无损害心亦无妒嫉。于一切法起称量

心，不作罪恶心无垢染，一切诸法无处可得。常求甚深广大经典，于中恒起增上信心，莫生嫌疑无为异意，如是经典最胜广大，常念诵持，常思演说。何以故？是为诸佛世尊道法，独能生成佛菩提故，于当来世得彼无量诸佛功德，应当为他如法宣说。降伏憍慢莫乱正闻，恭敬尊重供养是法，舍诸欲求息诸诤竞，除诸睡眠灭诸疑网，殄绝迷惑明识我见，不事戏论远离尼乾、邪命自活遮罗迦波梨婆阁语言论等。常应善住檀波罗蜜中，圆满尸波罗蜜，常念羼提波罗蜜，不舍毗梨耶波罗蜜，游戏禅波罗蜜，具足般若波罗蜜，舍弃身命无爱惜心。如四大性不可改变，如于地界起平等心，水、火、风界亦复如是，成就身业心意精勤，无不活畏，不贪衣、食、汤药、床铺、房舍、殿堂一切众具，乐行头陀常住知足，不求利养，不事名闻，凡是爱著悉灭无余。观四念处断四颠倒，不念恶刺永度四流，修四如意住四威仪，当具五根亦增五力，应灭五盖不用五情，远离五浊成五解脱，得入内自思惟广大圣智，正观五阴，不行六尘，降伏六根，亡灭六识，断绝六受，除六渴爱，行六念处及六智分法，于六通中常求利益，修七觉分通达七界，灭除七使及七识住，离八怠惰除八妄语，明了世间八法所因，应得八种大人觉法，证八解脱修八正道，亲近思惟广大分别，专精远离九众生居，灭九种慢捐弃九恼，常思九种欢喜等法，亲近修习九次第定，终不念行十种恶业，而勤造作十善业道，常求如来十种力智。

“不空见，我今为汝略说如是菩萨摩訶萨念佛三昧法门，诸所当得大利益事。若有菩萨摩訶萨应当修学念佛三昧，如是修者名报佛恩。思惟是者即不退转于阿耨多罗三藐三菩提，亦当满足彼诸佛法，乃至能为一切众生作大依止，亦令成就无上种智故。不空见，斯诸菩萨摩訶萨有大智故乃能思惟，非彼声闻、辟支佛人得观察也。不空见，若人于此念佛三昧，或时亲近思惟修习，若受持、若读诵、若书写、若教书写、若教读诵受持、若少开发、若为解说、若能广宣，彼虽少时勤苦疲劳，然其所作终不虚弃，必获果报得大义利。不空见，彼菩萨摩訶萨以为他受持法故，速得不退阿耨多罗三藐三菩提，于当来世决定成佛。不空见，当知如是念佛三昧，则为总摄一切诸法，是故非彼声闻、缘觉二乘境界。若人暂闻说此法者，是人当来决定成佛无有疑也。”

尔时，世尊为重宣此义，以偈颂曰：

“若人欲修此三昧， 能念一切诸如来！
彼既思惟是法门， 诸非法处当远离，
亦当远离无惭愧， 破除断见及与常，
复应安住三空门， 当念勤修解脱智。
既拔三种不善根， 即亦思惟三善本，
若知观察三受处， 得斯妙定良非难。

若人欲求胜三昧，先应持戒后修智，
自然远离诸邪见，亦无戏论及语言，
次第观受斯皆苦，然后观察生灭心。
若人思惟三昧时，当应深念出世事，
诸法有疑咸悉除，得此三昧甚为易。
亦应善通四念处，先当观身不暂住，
恒求解脱及禅定，不爱寿命岂惜身？
弗以多闻陵侮人，宁当诽谤于正法？
闻正法已能思惟，昼夜受持身所诵，
尊重诸佛深敬法，承事僧众不敢轻，
善知识所常念恩，远离一切诸恶友，
不与恶人同坐起，除彼为众说法处。
为求最上菩提故，终勿舍离阿兰若，
一切众生皆平等，于诸法中莫分别。
欲求彼法真实处，诸法相中无著心，
彼轻慢意悉能除，不久必得此三昧。
明识我见及疑心，亦当觉察诸调戏，
不得起于恶欲意，应灭诤竞与睡眠。
若不学彼外道法，诸是戏论自然除，
但能随顺佛法言，求此三昧须臾获。
常行布施及戒忍，勇猛精进无倦时，
恒处禅思及智慧，自然得斯三昧行。
能施头目无爱畏，舍余诸物终不疑，
彼趣菩提无艰难，亦速获斯凝静定。
若能持心如大地，又同水火及与风，
更等虚空无边崖，彼人速得此禅定。
若有精诚身口意，彼不贪食及衣财，
其于众具既无求，能如是修证三昧。
应常专念四正勤，亦当成彼诸神足，
速须远离颠倒想，烦恼棘刺先断除。
当念杜绝四流河，亦思干涸诸渴爱，
具足五根及五力，分裂破坏五盖衣。
五种欲事不俱怀，内心幻伪亦宜舍，
复当愿求五解脱，思惟五身三摩提。
应速观知五阴处，正心和敬于六缘，
彼不恭慎应远离，亦当减损六触身。
于六受处心正观，常念断除六种爱，
复以六通成就世，亦修六念及智明。
勤求七觉七圣财，必须舍彼疑惑处，
欲得三昧恒若斯，渐当散灭诸烦恼。

彼常远离七识住，斯八颠倒亦拔除，
若能住于八正道，自当速证此深定。
恒住八大丈夫行，复以八解自娱心，
不染八法离世间，获最胜智当不远。
于他人所无嗔心，先应除此九种慢，
思九欢喜根本法，得彼次第九种禅。
绝此十恶不善因，应修智人十种善，
若能修行十种力，得是三昧终无难。
当念摄持诸善法，放舍不善众恶缘，
前后勤求彼正念，证此三昧岂能久？
若住如是三昧已，当转智力不思議，
遍见诸佛金色身，所生常得闻正法。
若欲见彼诸世尊，或已灭度及现在，
当来一切愍世者，应思惟此胜三昧。”

思惟三昧品第十一之一

尔时，不空见菩萨摩訶萨白佛言：“世尊，若诸菩萨摩訶萨念欲成就诸佛所说念佛三昧者，云何思惟而得安住？”

佛告不空见菩萨言：“不空见，若诸菩萨摩訶萨必欲成就是三昧者，先当正念过去所有诸如来应供等正觉，次念现在所有诸如来应供等正觉，次念未来所有诸如来应供等正觉。彼如是念一切三世十方世界中，是等一切诸如来、应供、等正觉、明行足、善逝、世间解、无上士、调御丈夫、天人师、佛世尊，天降成就，入胎成就，住胎成就，出胎成就，出家成就，诸功德成就，诸根成就，诸相成就，诸好成就，庄严成就，戒品成就，三昧成就，智慧成就，解脱成就，解脱知见成就，四无畏慈悲成就，喜舍成就，惭愧成就，威仪成就，诸行成就，奢摩他成就，毗婆舍那成就，明解脱成就，解脱门成就，四念处成就，四正勤成就，四如意足成就，五根成就，五力成就，觉分成就，正道成就，往昔因缘成就，双教示成就，诸通教示成就，大通教示成就，戒品成就，一切三昧成就，无碍利益成就，为他利益无碍成就，一切善法成就，清净色成就，清净心成就，清净智成就，诸入成就，金色百福成就。

“时，彼菩萨念诸如来如是相已，复应常念彼诸如来应供等正觉，心无动乱，亦当安住无所著心。心无著已，彼复应作如是思惟：‘是中何等名曰如来？为当即是如来耶？为当离色是如来乎？若以色法为如来者，彼诸众生皆有色阴，一切众生应是如来。若以离色为如来者，离色则是无因缘法，无因缘法云何如来？’菩萨如是观知色已，次复观受。彼时更作如是思惟：‘为当即受是如来耶？为当离受是

如来耶？若即受法为如来者，彼诸众生皆有受阴，一切众生应是如来。若离受法为如来者，离受则为无因缘故，彼无缘法云何如来？彼既如是观色受已，乃至观识亦如是。时彼菩萨复如斯念：‘若此诸阴非如来者，岂彼诸根是如来乎？’如是念已则先观眼：‘为当即眼是如来耶？为当离眼是如来乎？若即彼眼是如来者，一切众生皆有是眼，一切众生应是如来。若离彼眼是如来者，离眼则为非因缘故，彼非缘法云何如来？’菩萨如是观察眼已，观耳、观鼻乃至观意亦如是。时彼菩萨复如斯念：‘若此诸根无如来者，岂彼诸大有如来乎？’如是念已则先观地：‘为即地界是如来耶？为离地界是如来乎？若即地界为如来者，彼内外法皆属于地，如是地界应是如来。若离地界为如来者，离地即为无因缘故，彼无缘法云何如来？’彼既如是观察地界，乃至观彼水、火、风界亦如是。而彼菩萨能作如是正思惟时，不以色观察如来，不离色观察如来；如是不以受不离受，不以想不离想，乃至不以识不离识，观察如来亦如是。又彼观时，亦不以眼观察如来，不离眼观察如来；如是不以耳不离耳，不以鼻不离鼻乃至不以身意不离身意，观察如来亦如是。又彼观时，不以色观察如来，不离色观察如来；如是不以色不离色，不以声不离声，乃至不以触法不离触法，观察如来亦如是。又彼观时，不以地观察如来亦不离地，观察如来如是；不以水不离水，乃至不以风不离风，观察如来亦如是。彼菩萨如是观时，即能于彼一切法中，善通达知明了无碍。

“尔时，彼菩萨复应当作如是思惟：‘是中更以何等真法，而能得彼阿耨多罗三藐三菩提？为以身得菩提耶？为用心得菩提乎？若身得者，而今此身无觉无识顽痴无知，譬如草木若石若壁。然彼菩提非色非身，非行非得，不可见闻，不可触证。此身如是，云何能得成就菩提？若心得者，而即此心本自无形，无有相貌，不可见闻，不可触证，不可执持，犹如幻化。菩提如是亦无有心，无有触对，不可见闻，不可知证。此心如是，云何能得成就菩提？’不空见，是为菩萨正念思惟，不以身心亦不离身心，而能证得阿耨多罗三藐三菩提耶。”

佛言：“不空见，然彼菩萨常应如是观察思惟。若能如是观诸法时，即得安住于正法中，心无迁变不可移动，当知尔时具足菩萨摩訶萨法，自然远离不善思惟，速疾成就阿耨多罗三藐三菩提，正觉平等真实法界。”

尔时，世尊为重明此义，以偈颂曰：

“过去未来诸世尊， 现在一切遍见者，
冥心空寂行慈爱， 欲睹诸佛无艰难。
往昔诸佛大威光， 怜愍世间等与乐，
彼念人中分陀利， 调御丈夫功德满。
更念下生及入胎， 住胎尊母皆具足，
思彼生家众妙相， 当见等觉弗为难。”

亦念诸好胜庄严，及彼本愿先所行，
微言妙义初中后，彼皆善逝解脱身。
住解脱门及供养，正勤与彼四神足，
应念诸根具满者，力菩提分亦复然。
若念诸佛解脱尊，不久当到胜寂地，
一切世间利益念，善法功德难思量。
妙色及与清净心，复思世尊众好分，
金刚身体百福相，当知如来诸念满。
何得法中名如来？正当观察无边处，
诸佛非色复非受，非彼想行非识心。
如是等法非如来，正见智人亦应体，
亦非离彼是诸佛，应供善逝但有名。
诸佛非眼非耳鼻，非舌身意及法等，
亦非离彼为如来，正觉庄严惟名耳！
唯有大名无真佛，离名何处有实者？
智人若知尽和合，当取等觉实非难。
若以诸阴为如来，彼诸众生皆有阴，
众生即应是诸佛，以阴平等斯共有。
不以色等为诸佛，亦不离阴名如来，
无量数劫正思惟，不思議智乃成就。
身如草木及石壁，菩提无色寂无生，
亦无顽身及草木，云何说身证菩提？
是心无相复无形，菩提非心亦无状，
非身非心能得证，亦非无证难思议。
是为最胜寂静地，外道于中皆荒迷；
若于此法求正勤，必当速得是三昧！”

佛说大方等大集经菩萨念佛三昧经卷第八

思惟三昧品之余

尔时，不空见菩萨摩訶萨复白佛言：“世尊，菩萨摩訶萨当何证知舍离我见耶？”

佛言：“不空见，若诸菩萨摩訶萨得证知时，无有住著则离我见。如是菩萨虽无住著，而能为彼一切世间天人众生作大利益。云何利益？所谓为大法明、燃大法炬、吹大法蠹、击大法鼓、奋大法鞞、乘大法船、设大法桥，方当欲渡一切众生出于生死四流瀑河，置于涅槃无为彼岸。即当观察是身本性，次当观身不净臭秽、腐烂痛脓、屎尿盈溢，是身无常不暂停住，破坏枯槁不可长久，诳惑小儿危脆不坚，犹水沫聚，户虫充满，筋骨相辅，空负而行无实用处。或经百年

及百千岁，纵八万劫一切乐具守护长养，终归堕坏。此身长夜不离烦恼，不出颠倒，恒为诸恶鸟兽食啖，又亦常与地狱、饿鬼、畜生共行，生死往来受诸苦恼，或为奴隶种种苦事，常系于他不得自在，而彼所生，云何当能见苦、断集、证灭、修道？今我此身但是虚空，诳曜愚痴无一坚法，以是我今当应持此一切身分施诸众生。若有众生宝重己身，我当为彼放舍身命。若有众生须我精气，我当给与彼之精气。若有众生须我肉者，我当以肉供奉彼等。何以故？宁我先施令彼得食，无容不施使彼自食。今我以此净心布施所获善根，愿即灭除我见根本。而彼菩萨如是观时不著我见，灭我见已然后舍身，令众生用为惜命者弃舍命根，须精气者授以精气，须肉食者便以肉施。若有众生须其力用，即时为奴充彼驱策。

“不空见，以是因缘，彼菩萨摩訶萨除舍我见，不住我见，证知我见，而能于此不牢固中求牢固身。不空见，譬如都城邑聚村落之中，多有童男或多童女，自舍出已至河岸边见水沫聚，以彼水沫更相嬉戏，所谓破坏水沫分段磨灭，令其消散无有遗余。而彼沫聚不作是念：‘谁于今日能分散我？’是沫虽坏无恼恨心。不空见，如是菩萨摩訶萨，自观己身无常破坏，如彼沫聚不可长久，当知是人得此三昧，疾成阿耨多罗三藐三菩提。”

尔时，世尊为重明此义，以偈颂曰：

“若能远离我见者，一切无有住著处，
为利世间天人故，当证难见大菩提。
彼若厌身诸不净，痛疮所处脓血流，
此身变坏不坚牢，无常羸劣斯破法。
暂住如幻无实体，犹彼聚沫空无真，
长夜养育终无宜，鸟狗斯食最可恶。
虽以众具供赡之，是身会当归败灭，
既不能得牢固法，经无量劫唯有苦。
地狱畜生饿鬼苦，饥渴众恼恒炽然，
世间催切超百罗，初不觉知彼如实。
我身今日自空虚，不常之体须臾变，
谓诸众生食肉者，精气仆役我甘为。
我思此时常发言，其有食肉及精血，
我为其故今放舍，任从啖食我此身。
当令一切宝身者，悉得观我舍斯命，
我今躯命不敢爱，愿速成彼三菩提。
犹如彼沫常破坏，未曾起一嗔恨心，
今我此身如沫团，岂有生于嫌怨事？
若能观身如水沫，此人必定求菩提，
非但得奉十方尊，彼当速获胜三昧。”

示现微笑品第十二

尔时，世尊怡然微笑。诸佛世尊法如是故，即微笑时，世尊口放种种光明，所谓青、黄、赤、白、金色、玻瓈。其光远照上至梵宫，而复还下右绕三周入世尊顶。时，尊者阿难见斯事已，即从座起，整理衣服，右膝著地，合十指掌向佛世尊，以偈问曰：

“最胜世尊非无因， 今现微笑当有以，
世间调御应为说， 而复微笑何因缘？
金刚色体百福身， 由证真如能利益，
一切世间所归依， 今此微笑有何缘？
世尊无上亦无比， 何处当有能超胜，
功德备具无可毁， 今斯微笑有何缘？
一切世间皆归趣， 调御丈夫今当宣，
谁于今日获大利？ 世尊无何微笑者？
今日谁当受大位？ 今日谁得真福聚？
今日谁为安隐王， 能致世尊是微笑？
一切世间所归依， 天人大师今应说，
若闻佛尊斯妙音， 天人欢喜众圣赞。”

尊者阿难设斯问已，于是世尊告阿难曰：“阿难，我当说是正念三昧法门义时，此大众中有三万人，远离尘垢得法眼净；复有八万亿百千那由他诸天子，远尘离垢得法眼净；复有三万比丘、比丘尼众得阿那含果；复有三万比丘、比丘尼、优婆塞、优婆夷得无生忍法；复有三万众生发阿耨多罗三藐三菩提心。此辈皆于星宿劫中成等正觉，此即前发菩提心者是也。复有九万亿那由他菩萨摩訶萨，安住菩提无有退转。此辈当来皆得成佛，彼诸世尊有四种号，或号光明，或号毗卢遮那，或号释迦牟尼，或名日月岁星。有如是等诸种名号，随其刹土出现于世。复有九十二亿百千那由他众生，但发声闻心，是辈未来皆证声闻果。”

尔时，世尊知是事已，以净天眼过于人眼观察十方，见九十亿百千那由他诸佛世界，应作如是大利益故，更出殊大微妙之声，遍此三千大千世界咸得闻已，然后及彼诸佛国土，所有众生亦皆得闻。然后复从眉间白毫相中，放大光明名无边威。此光遍照十方佛国，令无量亿百千那由他众生得须陀洹果、斯陀含果、阿那含果、阿罗汉果。复有过于前数众生发阿耨多罗三藐三菩提心。彼等当来皆得不退转于阿耨多罗三藐三菩提，然后于彼十方国土皆得成佛，号曰难伏如来应供等正觉出现于世。

尔时，世尊为重宣此义，以偈颂曰：

“过百千数无减少， 三种三十复九十，
如是一切见菩提， 彼为发心利益故。
彼满十千诸众生， 复三万智得净眼，
闻已正思等正觉， 解脱人身诸恶道。
复过八亿那由他， 诸天获于圣净眼，
以闻如来妙音故， 永灭恶趣无遗余。
得忍三万亿由他， 发心即离三恶道，
彼辈当来悉成佛， 其犹盛春草木敷。
复有三万亿众生， 从座而起发大心，
以此威德当成佛， 于大地上利世间。
复有六万诸天子， 皆发无上菩提心，
彼等斯同弥勒尊， 以修乐因证乐处。
以是因缘天人师， 为斯广大故微笑，
我已宣扬微笑旨， 阿难当知此笑缘。”

神通品第十三之一

尔时，不空见菩萨摩訶萨白佛言：“世尊，云何当知菩萨摩訶萨住于惭愧，远离于彼无惭愧已，然后当得此三昧耶？”

尔时，佛告不空见菩萨言：“不空见，若有菩萨摩訶萨常行惭愧，而是菩萨行惭愧时，或能造作种种恶事，所谓身恶行时即生惭愧，口恶行时亦生惭愧，意恶行时亦生惭愧，起嫉妒心亦生惭愧，起懈怠心亦生惭愧，于诸如来所亦生惭愧，于大菩萨摩訶萨所亦生惭愧，于住菩萨乘诸众生所亦生惭愧，于声闻乘人所亦生惭愧，于辟支佛乘人所亦生惭愧，于人天所亦生惭愧。云何惭愧？所谓常愧于他，亦惭自身住于一切不善法中故常惭愧；住惭愧已，远离一切无惭无愧，除灭不善思惟善事，荷负重担体性清静，终无毁犯他不能谤，而是菩萨常能具足无毁身业，亦能具足无毁口业，亦能具足无毁意业；具足斯已，然后乃能住是三昧；住三昧已，常不远离见一切诸佛，常不远离听闻诸佛所说妙法，常不远离恭敬供养一切圣僧；具足如斯已，然后乃能疾成阿耨多罗三藐三菩提。

“复次，不空见，我念往昔过无量无边阿僧祇劫，时有大劫名曰善来；于彼善来劫中，后有第三劫名曰宝炬。不空见，彼于劫中复有小劫名九庄严，于彼时中名多劫浊。复次有劫名曰千岁，彼中有转轮王，名善观作。而彼善观作王，宿植德本具大威德。不空见，时善观作王所居大城，名曰净华，妙香充满。其城东西广六十由旬，南北长七十由旬，墙壁周围有一千二百重。彼城身量纯以真金，众具庄严间用七宝。不空见，汝今欲知净华香城善观作王，果报众具庄严殊丽，如先所说无边精进王，善住大城无差异也。不空见，彼城北面有一内

门，名曰华鬘门。外有园名曰无畏，其园纵广四十由旬，周匝皆有七宝树林而为围绕。有一大池，形量方广面十由旬，八功德水弥漫其间，如忉利天镍陀吉尼池也。彼池四面周匝皆有宝多罗树，其金多罗树银为华果，银多罗树琉璃华果，如是乃至真珠多罗树金为华果，如善住城一等无异。

“复次，不空见，当尔之时有佛世尊，号鸯耆罗娑如来、应供、等正觉、明行足、善逝、世间解、无上士、调御丈夫、天人师、佛世尊，出现于世。不空见，时彼鸯耆罗娑如来，处游居止无畏园中，与大比丘众九十九亿百千那由他人俱，前后围绕皆阿罗汉，诸漏已尽无复烦恼皆得自在，心善解脱，慧善解脱，所作已办捐舍重担，尽获己利不受后有，随顺正教达于彼岸。不空见，时彼鸯耆罗娑如来应供等正觉，于晨朝时著衣持钵，与九十九亿百千那由他声闻大众，左右围绕入净华香城。不空见，时彼善观作王知彼世尊晨朝入城，即自庄严乘大调象名曰乐手，与无量亿百千那由他众前后导从，自彼净华香城而出，为奉迎彼佛世尊故。不空见，时善观作王既遥见彼鸯耆世尊寻路而来，光仪端远状若金山，诸根寂静神志和穆，已达第一调柔彼岸，犹如大龙降伏一切，亦如大象所为自在，又如大池澄清映彻。如是见已，自乘而下进诣世尊，头面作礼右绕三周而启白言：‘唯愿世尊，受我明朝所设供养。’

“复次，不空见，时彼鸯耆罗娑如来应供等正觉，闻善观作王如是请已，为诸众生作利益故默然受请。复次，不空见，时善观作王闻彼世尊许纳其请，即于斯夜速命厨官，严办众种上味美食，人间所有靡不毕具。于净华城平治道路，以诸香泥涂饰其地，所在街巷建立宝幢，妙善名幡处处罗布，兼列种种金宝器具。又用上妙牛头栴檀，以为香水洒散其地。复以种种末香、种种散华，上徹于佛而为供养。然后于彼如来应等正觉前，烧种种名香、积种种华鬘而为供养，又以种种歌颂赞叹偈句法言而为供养，又作种种上妙乐音及诸玩具而为供养。彼王如是作诸供养，然后奉献上妙饮食，供养世尊及比丘众。复次，不空见，尔时彼善观作王，广设如是微妙第一最上众具，满足供养鸯耆如来应供等正觉已，更于异时庄严大驾，躬自率彼无量千数诸众生等诣无畏园，至彼鸯耆如来应供等正觉所，顶礼尊足已而白佛言：‘世尊，今正是时，唯愿垂慈作所应作也。’

“复次，不空见，时彼鸯耆罗娑如来闻善观作王殷勤请已，知诸众生堪受化故，于是为彼如所应作种种神通；现神通已，遂与九十九亿百千那由他诸阿罗汉等身升虚空；住虚空已，即放九十九亿百千那由他光明，照于东方无量世界；如是复放前数光明，照彼南方及以西、北、四维、上、下，周遍十方亦皆如是。彼一一方各有九十九亿百千那由他诸大光明，彼一一光皆各化作八十亿百千那由他等大莲华座，彼诸华座皆各有一化如来坐。诸如来形量长短乃至一切威仪多少，一如鸯耆罗娑如来应供等正觉无差别也。不空见，如彼变化诸佛

世尊，各有无量亿那由他诸比丘众，前后围绕住虚空中。又亦各有化天帝释及化梵王，形量大小皆如今此无超胜梵天及大供养天帝释等无有异也。不空见，时彼鸯耆罗娑如来应供等正觉，示现如是神通事时，于须臾间一切诸天所有音乐不鼓自鸣，一切众具不作自现。不空见，时彼欲界诸天既睹鸯耆世尊示现如是大神变时，即以天栴檀、末香、沉水香、多伽罗香、多摩罗跋、牛头栴檀、黑沉水香等奉散佛上。复以种种妙华，所谓鸡娑罗华、大鸡娑罗华等，奉散于彼鸯耆罗娑如来应等正觉。

“复次，不空见，尔时鸯耆世尊告彼善观作王言：‘大王，诸行无常。大王，诸行皆苦。大王，诸行无我。大王，诸行暂住不得久停。大王，诸行不坚是破坏法。大王，诸行炽然如猛火焰。大王，诸行深奥如大火坑。大王，乃至应当念舍诸行，当生深厌亦不可乐，当念远离终思解脱。’不空见，尔时善观作王，一心合掌恭敬向彼鸯耆如来，具领赞曰：‘如是，如是。大德修伽陀，大德婆伽婆，诸行无常。大德婆伽婆，诸行是苦，诸行无我。大德婆伽婆，诚如圣教，一切诸行皆应远离，亦须弃舍终当免脱。’不空见，尔时彼鸯耆罗娑如来，为彼善观作王，说如斯法，令其欢喜，令其专念，令其奉行；令欢喜已，令专念已，令奉行已，然令发阿耨多罗三藐三菩提心。

“复次，不空见，尔时鸯耆罗娑如来，见善观作王闻法欢喜发菩提心，一切众生咸得益已，即与九十九亿百千那由他诸阿罗汉比丘大众，举身腾踊足步虚空出净华城，然后还下如常威仪，前后围绕入无畏园。不空见，时彼善观作王，既得亲睹鸯耆罗娑如来应等正觉广现如是神通事时，发菩提心更作誓曰：‘当令我等于未来世，悉获如是大神通慧，复当令我悉得如是统诸大众，复当令我于未来世悉得如是天人众前大师子吼，一如今日鸯耆如来应供等正觉无有异也。’不空见，时彼善观作王，见彼世尊鸯耆罗娑如来应供等正觉及诸大众乘空而返，王便严驾奉从世尊达本住所，然后乃还。

“复次，不空见，后于异时，彼鸯耆如来应供等正觉，与诸大众次第而行，至善观王宫殿中已当铺而坐。诸比丘僧亦次第坐已，尔时彼善观作王及诸大臣，与其眷属各自围绕，城内人民及其眷属亦各围绕，又皆自持所有供食，各自手奉鸯耆世尊及诸弟子声闻大众。其食香美众味具足，随意奉上佛及众僧，一切啖食皆得充满。然后更以种种妙香、种种华鬘、种种衣服、种种珍宝、一切众具微妙音乐，供养恭敬已，即于是日呼召太子，加以天冠受以王位，弃四天下及诸眷属，深厌生死，请佛出家。即于鸯耆佛世尊所，剃除须发，法服著身。时有八万四千亿百千那由他人民，善根既淳熟故，亦深厌世从王出家。

“复次，不空见，时彼善观作王既出家已，即于众中整理衣服，恭敬合掌，遂便请彼鸯耆如来应供等正觉言：‘世尊，云何菩萨修习思惟念佛三昧耶？菩萨摩訶萨云何证此念佛三昧，即得住于不退转地，

速疾成就阿耨多罗三藐三菩提，现前成就诸功德法？’不空见，时彼善观作王比丘如是问已，彼鸯耆如来即便告彼王比丘言：‘善观作，汝应当知有二种法，菩萨摩訶萨具足修习，即便得此菩萨念佛三昧，能速成就阿耨多罗三藐三菩提。何等为二？一者、信诸如来不生违逆，二者、信佛所说不敢谤毁。作如斯念，是为诸佛广大境界不可思议。善观作，是为菩萨摩訶萨得此三昧，能速成就阿耨多罗三藐三菩提。善观作，复有二法，菩萨摩訶萨具足修习，能速成就阿耨多罗三藐三菩提。何等为二？一者、奢摩他，二者、毗婆舍那。善观作，是为菩萨摩訶萨具足修习得此三昧，能速成就阿耨多罗三藐三菩提。善观作，复有二法，菩萨摩訶萨具足修习得此三昧，能速成就阿耨多罗三藐三菩提。何等为二？一者、远离断见，二者、灭除常见。善观作，是为菩萨摩訶萨具足修习得此三昧，能速成就阿耨多罗三藐三菩提耶。善观作，复有二法，菩萨摩訶萨具足修习得此三昧，能速成就阿耨多罗三藐三菩提。何等为二？一者、住于羞惭，二者、修于耻愧。善观作，是为菩萨摩訶萨具足修习得此三昧，能速成就阿耨多罗三藐三菩提。’

“复次，不空见，时彼如来如是说已，彼善观作王比丘，复白鸯耆罗娑如来言：‘世尊，云何菩萨摩訶萨住惭愧已，而能得斯念佛三昧耶？’尔时，鸯耆罗娑如来应等正觉，即告彼善观作比丘言：‘善观作，若诸菩萨摩訶萨于诸所作常行惭愧，谓起身恶行生惭愧心，起口恶行生惭愧心，起意恶行生惭愧心，起嫉妒时生惭愧心，起懈怠时生惭愧心，于诸佛所生惭愧心，于诸菩萨摩訶萨所生惭愧心，于住诸菩萨乘众生所生惭愧心，于诸声闻乘所生惭愧心，于诸辟支佛乘所生惭愧心，于诸天人所生惭愧心。

佛说大方等大集经菩萨念佛三昧经卷第九

神通品之余

“云何惭愧？所谓常惭于人，亦愧自身住于一切不善法中，常行惭愧，成就惭愧，远离不善，念求善事身荷重担，种性清净无所亏犯。’时彼善观作王比丘，既从彼佛闻教诲已住于惭愧，为灭一切不善法故，勤求精进及以意欲，一心回向住诸善法，又令满足更广思惟不令忘失，专精摄心住于正观深入法界。如是比丘观法界时，不见一法增，不见一法减。彼既观法无增减已，彼当如是见一切法无有去来，彼当如是见一切法无得无丧，彼当如是见一切法无有生灭，彼当如是见一切法无有差别，彼当如是见一切法无有异，彼当如是见一切法因缘生，彼当如是见一切法犹如梦想，彼当如是见一切法犹如阳焰，彼当如是见一切法犹如镜像，彼当如是见一切法犹如形影，彼当如是见一切法犹如声响，彼当如是见一切法犹如幻化，彼当如是见一切法无

有胜负，彼当如是见一切法本无优劣，彼当如是见一切法不可成就，彼当如是见一切法本来不生，彼当如是见一切法无有生处，彼当如是观一切法皆悉平等。不空见，彼既能作如是观已，亦即能作如是修行，不久便能得是三昧。不空见，而彼善观作王比丘得此三昧已，即能成就无碍辩才，说诸法义无有穷尽。又彼善观作王比丘，即于尔时过六十亿百千那由他劫已，然后得成阿耨多罗三藐三菩提。不空见，汝今于此犹有疑心，我为汝释令得除断。不空见，当知彼时善观作王，舍四天下五欲众具，与彼八万四千亿那由他臣民大众，于彼鸯耆佛世尊所，同时出家剃除须发，精勤修道者，非谓异人，汝亦不应更作他观。何以故？不空见，当知彼时善观作王比丘，今彼莲华上如是也。又于尔时善观作王，舍四下一切乐具，与八万四千亿那由他臣民大众，鸯耆佛所出家修道住惭愧行，正观诸法一心思惟，未几即便证此三昧也。

“复次，不空见，以是因缘，我于今者殷勤郑重，为汝宣说此三昧门所作功德甚深广大不可思议！当知非彼不能广种胜妙善根诸众生辈而得听闻，而能读诵受持修行，乃至为他解说义理。复次，不空见，若有诸善男子、善女人，但能耳闻此三昧者，当知彼诸善男子、善女人辈，终非薄福种少善根也，亦非一如来所种诸善根也，亦非二三四五诸如来所种诸善根也，亦非一十、二十、三十、四十、五十，乃至非一百诸如来所种诸善根也，亦非二百、三百乃至千万亿诸如来所种诸善根也，如是乃至亦非于无量亿百千那由他，乃至亦非于无量阿僧祇，及过无量阿僧祇尔许诸如来所，种诸善根厚集功德，而获闻此宝三昧王名字少分！何况当能书写披读，赞诵受持，思量义趣，如法修行，为多人众分别解释也！复次，不空见，若彼一切善男子、善女人辈，但得耳闻此菩萨念佛三昧门者，应知彼善男子、善女人，非是薄福种少善根者。当知彼诸善男子、善女人等，即是具足菩萨乘者。何以故？不空见，若人得闻此三昧王，当知彼辈依其次第，自然证成阿耨多罗三藐三菩提，唯除一切诸漏尽者。”

尔时，不空见菩萨白佛言：“大德世尊，所住行阿耨多罗三藐三菩提。大德世尊，彼等常证此三昧王耶？”

彼佛报言：“不空见，汝见如是，彼等亦证此三昧王也。复次，不空见，譬如有药名曰真正，若以其药用涂军鼓，于斗阵时以椎击打，假彼阵中有为毒箭刀槊所伤，彼药力故皆即平安复安隐无患。如是，不空见，若有善男子、善女人，但能耳闻此三昧王名字少分者，彼等以此三昧名声威力，皆当得成阿耨多罗三藐三菩提，唯除漏尽身证之人。复次，不空见，譬如须弥山王四宝所成，若诸众生至其所者即同其色。何以故？以彼山威光皆同一色。如是，不空见，若彼善男子、善女人，耳暂闻此宝三昧名，彼等皆以三昧名声威德力故，自然速成阿耨多罗三藐三菩提，唯除漏尽正位诸富伽罗。何以故？不空见，以此三昧有不思议胜功能故。复次，不空见，譬如一切大河陂池

及以诸流，皆入大海同一碱味，悉由大海德力弘故。如是，不空见，彼诸善男子、善女人，但能耳闻此三昧名，假令不读不诵，不受不持，不修不习，不为他转，不为他说，亦复不能广分别释，然彼诸善男子、善女人，皆当次第成就阿耨多罗三藐三菩提。何以故？以此三昧名声胜故，威德力故。

“复次，不空见，若有诸善男子、善女人，诚言时、善说时，但能诚言及与善说，诸佛法门必定当得，开示兴显能广利益诸世间者，是名诚言，是名善说。不空见，若彼善男子、善女人能得正言及善说者，必定当得无量无边过阿僧祇不可思议大功德聚，何况彼能善说于此菩萨念佛三昧法门所获功德聚也！不空见，假使无量无边恒河沙菩萨摩訶萨，复经无量无边过恒河沙劫数，修行布施无暂休废，我若说是所得功德不可思议。今更为汝广分别说，若复有一菩萨摩訶萨能听受斯念佛三昧，若读诵、若受持、若少分修行、若少分论说，所得功德望前布施，不可喻比，不可称量，不可计校，不可算数，不可宣说，何况有能具足听受修行，演说是功德聚而可较量耶！”

尔时，世尊为重明此义，以偈颂曰：

“我念往昔无量劫， 有佛世尊鸯耆罗，
一切世间所归依， 具大慈悲演妙法。
于彼所见无不知， 过去未来悉明了，
亦能通达现在事， 等见幽微斯觉察。
诸佛智慧难思议， 怜愍众生故为说，
愚痴众生苦煎迫， 观彼一切兴悲心。
时彼如来有如是， 九十九亿声闻众，
咸具自在有生尽， 悉共围绕正法王。
彼城东北有园林， 具足庄严名无畏，
如来大仙住于此， 兼彼亿众阿罗汉。
彼善观作转轮王， 严备宝驾自出城，
无量臣民众围绕， 一切众生皆爱乐。
王睹世尊心寂静， 身口清净诸根调，
具足胜妙诸威仪， 彼善观王转增敬。
王便往诣彼佛所， 头面顶礼世尊足，
启口请佛受其供， 世尊许纳故默然。
王以如来许受故， 即敕城内诸臣民：
‘今宜具办微妙供， 吾欲奉献鸯耆佛。’
众事既严王亲告：‘唯愿哀愍照此时，
大师世尊及圣僧， 受我今日微末饭。’
鸯耆如来赴王请， 大功德聚广现神，
遂作无量千亿光， 普照十方诸佛土。
彼一一光出无量， 百千亿数大莲华，

微妙鲜明人喜乐， 为发众生诸善本。
汝不空见知诸华， 各出化诸如来形，
意念现前人瞻仰， 十方同说如斯法：
诸行无常亦实苦， 复说无我极羸劣，
终是破坏不坚牢， 孰云智者生贪乐？
诸行焚烧如猛火， 炎赫炫炽甚难当！
鸯耆世尊如如宣， 佛为众生发深厌。
诸天睹斯大神通， 百千乐音俱时作，
香华自然而雨下， 异哉希有难思议。
彼王见佛神变故， 设诸供事不可量，
此四天下可重尊， 投弃五欲如脱履，
佛前释发服袈裟， 便尔请问微妙定：
‘当住何等胜法已， 丈夫能入三昧门？’
鸯耆世尊如是说：‘住于二法善思惟，
当自证此微妙禅， 得不思议最上乐。’
王蒙彼佛诚实言， 深心欢喜触斯定，
常念菩提奉诸佛， 即受尊号上莲华。
若能信受如来语， 于是经典无复疑，
入佛境界深法门， 自然得入此三昧。
若闻实际不惊疑， 于法亦无我人想，
勤念奢摩毗婆舍， 如是深思触胜禅。
住于惭愧及恭敬， 常应修习诸正勤，
知已恶现生耻心， 证三昧王岂能久？
恒观诸法不见增， 亦自弗知诸法减，
见一切法如虚空， 菩萨智人通达此。
诸法非兴复非丧， 本性清净常湛然，
知一切法同睡梦， 如是见者逮三昧。
于彼不作差别相， 本不见灭亦无生，
犹如阳焰及镜像， 能如是见得三昧。
法相平等无高卑， 亦无存亡及优劣，
如彼声影与幻化， 如是见人证三昧。
诸法寂然无胜负， 不见外相及内心，
无有成就复无名， 如是见者证三昧。
比丘如是专精观， 初中后夜常思惟，
顶受尊教于佛所， 不久当证此三昧。
彼当证此三昧时， 已于菩提无缺减，
亦见十方一切佛， 供养功德大众生。
过是六十亿百千， 那由他劫修诸行，
承事无量诸佛已， 然后证彼大菩提。
汝不空见今应知， 尔时彼王其谁是？

智人不当生异见，莲华上佛即善观。
我今教诫于汝辈，一切世间诸天人，
若欲究竟诸法源，当念速净此三昧。
彼必大集功德聚，不可算数难称量，
欲得妙乐不思议，要先净修此三昧。
若欲尽见一切佛，现在未来及十方，
或复求转妙法轮，亦先修习此三昧。
若欲圆满诸妙相，具足众好上庄严，
及求转生清净家，必先受持此三昧。
汝不空见诸众生，即欲远离诸恶道，
悉欲知于下生者，应常赞诵此三昧。
彼非供养于一佛，亦非二三及四五，
乃至亿数那由他，方得闻斯胜三昧。
彼供诸佛过僧祇，为证无上大菩提，
及众所欲皆悉得，乃得闻此胜三昧。
彼供无量百数佛，过去久种诸善根，
常生欢喜尊敬心，方得说此胜三昧。
彼事无量千数佛，天中胜天能放光，
精勤修习无懈怠，尔乃赞诵三昧经。
彼见无量亿数佛，无边净光若日轮，
厚习一切诸善根，然始得闻妙三昧。
又如世间攻战场，其中多有被毒害，
彼或遇闻药鼓音，众毒消除得安乐。
若人说此三昧时，其或得闻胜定者，
三昧威力证菩提，非彼漏尽正位人。
彼定功德等须弥，若人证时无异相，
其或能往到山所，即同其色难别知。
若人得闻三昧声，诸定中胜犹如海，
由斯三昧威德力，彼证菩提不复疑。
亦如众流归大海，大河小河及陂池，
等同一味难别知，彼亦如是无异相。
若人闻此三昧时，即念十方一切佛，
三昧威力登正觉，非彼身证富伽罗。
若诸菩萨唯修檀，过于无边恒沙劫，
供养十方一切佛，下及法界诸众生。
如是旷劫行布施，所获功德虽言多，
犹不及说妙定门，起一念慈被一切。
三昧善思如慈母，光显圣德难度量，
智人若能一心求，当速成佛具自在。”

说修习三昧品第十四之一

尔时，不空见菩萨摩訶萨白佛言：“世尊，菩萨摩訶萨具足几法当能入斯念佛三昧耶？”

佛告不空见菩萨言：“不空见，若诸菩萨摩訶萨具足三法，即能入此念佛三昧。何等为三？一者、具足不贪善根，二者、具足不嗔善根，三者、具足不痴善根。若能具足三善根已，即得成就六波罗蜜。而彼菩萨摩訶萨，以能住彼不贪善根故，而常行施具足成就檀波罗蜜，所生常得家产丰饶财宝具足，所须便至永离贫穷，有大威德，有大势力，其心弘广无复狭劣，自然摄彼贪不善根，以能具足诸福德故，众生见者莫不尊敬，凡所言说人皆信行，不用多功获此三昧，速疾成就阿耨多罗三藐三菩提。又彼菩萨以于一切世间天人诸众生所，无有嗔恚忿恨之心故，故能具足不嗔善根，而常住彼尸波罗蜜、瞢提波罗蜜；能具足满忍波罗蜜已，或逢骂詈谤毁、楚撻撻捶、割截手足、挑髓破脑一切诸苦竞来迫切，不怒不恨，不恚不嗔，于是除灭嗔不善根，起大慈心遍覆一切众生界已，所生不离诸佛世尊，梦寤常安，天神卫护，刀仗不害，毒不能中，火不能烧，水不能溺，常足饮食、汤药、衣服、卧具种种众物，一切世间天人众生见者赞美，不久即能证此三昧，当能速成阿耨多罗三藐三菩提。又彼菩萨以能具足无痴善根故，长夜修习奢摩他、毗婆舍那，具足方便善能断除痴不善根，成就微妙甚深智慧，于一切法了了分明，诸异论门无有挂碍，若他问难辩释无疑。不空见，是为菩萨摩訶萨具足三法证此三昧，当能速成阿耨多罗三藐三菩提。

“复次，不空见，菩萨摩訶萨复有三法能入三昧，复能速成阿耨多罗三藐三菩提。何等为三？一者、观一切行无常如实知，二者、观一切行苦如实知，三者、观一切法无我如实知。菩萨若能如是观已，不久即能入此三昧。不空见，是为菩萨摩訶萨具足三法能证三昧，亦速成就阿耨多罗三藐三菩提。

“复次，不空见，菩萨摩訶萨复有三法能入三昧，亦能速证阿耨多罗三藐三菩提。何等为三？一者、如来现在修诸供养，若灭度后或时供养诸佛舍利，或以种种上妙香华及以华鬘、涂香、末香、烧众名香、燃灯、幡盖、宝幢、音乐等，若自供养或复教他，常发誓愿：‘愿我所生以此供养行愿善根，令我速得念佛三昧，亦当证成阿耨多罗三藐三菩提。’二者、若佛现在及入涅槃，赞说如来真实功德，若戒、若定、若智慧、若解脱、若解脱知见、若威仪、若神通、若辩才、若无诤、若慈悲若喜舍，及余世尊诸功德法皆常赞说，亦发誓愿：‘愿我从今赞叹诸佛所获福聚所得功德，藉此善根当令我得念佛三昧，复能速成无上道果。’不空见，是为菩萨摩訶萨成就三法能入三昧，亦能速成阿耨多罗三藐三菩提。

“复次，不空见，菩萨摩訶萨复有三法，不久则能成就三昧，亦

当速证阿耨多罗三藐三菩提。何等为三？一者、若诸菩萨摩訶萨，或从一切佛世尊所，闻此三昧真实功德，或时但闻三昧名字即自思念：‘如彼过去诸如来应等正觉，本行菩萨求菩提时，彼辈皆求如此三昧，是以闻此三昧即生随喜。我于今日为大菩提，亦应勤求如是三昧，成就具足大利益故，是故我今闻此三昧功德名字深生随喜。’是名具足第一随喜法也。二者、‘如彼未来一切诸如来应等正觉，为求菩提行菩萨时，修此三昧为大利益。是故我今闻此三昧亦生随喜。’是名第二具足随喜法也。三者、‘如今现在所有十方无量无边诸如来应等正觉现住世者，已度诸有已拔习根，断灭语言远离觉观，证甚深定具大慈悲，亦于往昔行菩萨时，闻此三昧皆生随喜。我今既获闻此三昧，何独不可起随喜乎？’如是念时深生随喜，是名具足第三随喜法也。不空见，是为菩萨摩訶萨具足成就三种随喜，所获功德及诸善根，愿与众生同证三昧，亦速成就阿耨多罗三藐三菩提。

“复次，不空见，若复诸善男子、善女人辈，于此三昧生随喜时，所得功德真实广大，无量无边难可称说。我今为汝引诸譬喻，开示少分令汝知耳！不空见，如此三千大千世界，其间所有诸恒河沙，若人取彼诸恒河沙聚置一处，然后于彼大沙聚中，取一一沙末为微尘；然后将此沙之一尘，过恒河沙世界，更复过彼无量无边阿僧祇不可思议不可称不可量恒河沙等世界已，然后方乃置一微尘，如是次第一切沙尘计诸世界悉皆布尽。不空见，汝意云何？假使彼世间人颇能少知世界数不？”

不空见言：“无也，世尊。”

“不空见，且置是事。假使世间聪明智慧第一算师尽其智力及以算术，颇能称量，颇能思察，复能数知世界数不？”

不空见言：“无也，世尊。无也，世尊。今我所见唯有上座舍利弗，及彼不退转地诸菩萨摩訶萨辈，应少仿佛耳！”

佛言：“不空见，若有善男子、善女人，以上尔所诸世界盛满七宝及余众具，持用供养一切众生。不空见，汝意云何？彼人如是供养行檀，所获功德宁为多不？”

不空见言：“甚多，世尊。无量，世尊。”

佛言：“不空见，我更语汝。彼善男子、善女人，虽能以上一切世界盛满七宝众具，供施一切众生功德虽广，然故不及前善男子、善女人等，闻此三昧宝王名字，发起三种随喜之心，誓愿回向阿耨多罗三藐三菩提所得功德。何以故？不空见，以彼三种由多闻生也，彼多闻从正说起故。不空见，由彼正说故，能生一切善根，即此三昧也。何等三昧能生一切善根？所谓即此菩萨念佛三昧也。又复能生一切善根，亦即正说。何等正说？谓正说时善说是也。以是义故，彼三种随喜所获功德，望布施福，不可称量，不可校比。

“复次，不空见，我念往昔过于无量阿僧祇，复无量阿僧祇劫，尔时世界名动不动，彼界有佛，号曰宝山庄严如来、应供、等正遍

知、明行足、善逝、世间解、无上士、调御丈夫、天人师、佛世尊，出兴于世，得大自在调伏一切，具足解脱永度彼岸，最上最妙最胜无比，能为众生作大归依，能与众生为大覆护，能治众生诸烦恼病，通达三世无不明，以自证法为众生说，其所说的法初中后善其义深远，其言巧妙纯一无杂，具足清白梵行之相，为诸众生常如是说。时彼宝山如来应等正觉，住一王城，城名伏怨，与三十亿那由他百千声闻大众皆是学人，当有所作，当有所断，当有所得，应受世间天人供养。不空见，时彼宝山如来从三昧起作如斯念：‘今我此三十亿那由他百千声闻皆是学人，所作未办，未到彼岸。我于今者应为此等如法而说，当令一切速得漏尽。’不空见，尔时彼宝山庄严佛，广现如是大神通事，令彼三千大千世界尽皆烟出猛焰炽然。不空见，尔时彼声闻众，睹彼如来广作如是大神通事，见已欢喜踊跃遍身。犹如比丘入第四禅，彼声闻众身心快乐亦复如是。

“复次，不空见，尔时彼佛于静夜中显示如是神通事已，因即告彼声闻众言：‘汝诸比丘，应当观此三千大千世界满中烟出，又复猛火焰炽炯燃。诸比丘，一切诸行无常亦尔。诸比丘，一切诸行苦事亦尔。诸比丘，一切诸法无我我所，无有坚牢虚妄不真，可破可坏皆灭尽相。诸比丘，我今略说一切诸行，乃至一切放舍莫著，深生厌离自然解脱。’不空见，尔时彼三十亿那由他百千声闻众等，蒙彼如来说如是法、如是教诫，皆得漏尽通达诸法，于诸法中无有挂碍，善住诸法度诸疑网，于教师所听受法已，于诸法中了无所畏，发大声言：‘如是，婆伽婆。如是，世尊，诸行无常。如是，世尊，诸行是苦。如是，世尊，诸法暂住。如是，世尊，诸法破裂不可依止。如是，世尊，诸法炽然，犹如草木及以石壁。如是，世尊，一切诸行，乃至可放可舍可厌可脱。’不空见，时彼宝山庄严如来以如是神通、以如是说法、以如是教诏三种示现，化诸声闻众令入三解脱门谓空无相愿已。复有三十亿那由他百千诸菩萨众，皆当得成阿耨多罗三藐三菩提。不空见，尔时彼佛，为彼三十亿那由他百千诸菩萨众，说此三昧宝王，如是显示已，复为彼天人世间作利益故，经八万四千亿那由他百千岁，转正法轮已，然后于彼无余涅槃而般涅槃。”

尔时，不空见菩萨摩訶萨白佛言：“世尊，彼宝山庄严如来现前教化几菩萨众？复佛灭度后法住几时耶？”

佛告不空见菩萨摩訶萨言：“不空见，于此三千大千世界所有星宿其数可知，然彼宝山庄严如来应等正觉边际数量难得知。而彼如来般涅槃后，正法住世满八十亿那由他百千年，像法住世二十亿岁。其后未几复有佛出，名曰慈行如来应等正觉，出现于世，寿命无量。其佛身量满一由旬，尔时众生身以量足长六拘卢舍。其莲华床大者高三十三由旬，小者犹高六由旬遍满大地，所有众生往返周旋行住坐卧，皆各在于莲华之上。尔时世界名盛莲华，其地柔软犹如羊毳毛，众生触著如天妙衣，其色光泽状似利天黄白之石。彼诸众生等受快乐，亦

如他化自在天宫。彼诸众生欲度东海，瞬息之间便到彼岸，南西北海骏速亦然，彼诸众生凡所之从发心即至。而彼慈行如来初成佛时，其地广博尽四海边。时彼大地纵广正等，满八十亿那由他百千由旬。诸声闻众皆悉充满，诸阿罗汉多一坐食，唯除侍者阿难，及金刚密迹、阿斯多等。复有八十那由他诸大菩萨摩訶萨众，一切皆住不退转地。彼诸菩萨请问甚深妙定法门，而彼慈行如来为诸菩萨开发显示深法门时，慈行世尊唯出一音，即说斯偈：

“若人方便求出家， 应当一心思妙法，
彼必摧坏恶魔军， 犹如香象破草屋。
谁求疾成大菩提， 应为世间常说法，
而欲净斯最胜地， 此三昧乐则能为。”

佛说大方等大集经菩萨念佛三昧经卷第十

说修习三昧品之余

“时，彼慈行如来大化将末，有一比丘名曰树王，广为众生说此三昧示教利喜。于彼如来应供等正觉灭度之后正法之际，有转轮王名曰天主，具足威德有大神通，七宝金轮正法治世。不空见，彼天主王所居大城，名曰因陀罗跋帝，纵广正等十二由旬。其城内外楼观台殿，皆以七宝杂色所成，复以金廊而覆城上。不空见，彼城四面各有三门，若说其城诸庄严事，如上所说精进力王善住大城，庄严华丽殊妙无差也。不空见，后于一时夜过半已，彼天主王睡犹未觉，有净居天下降王所令王梦见，即于梦中为王说此念佛三昧法门名字：‘大王，汝应求此念佛三昧。何以故？若诸菩萨摩訶萨能得成就此三昧者，常不远离诸佛世尊，亦于世间、出世间文字章句音名语言，皆悉明了具足辩才，自然速成阿耨多罗三藐三菩提。’不空见，时天主王梦见天已，即便觉寤白彼天言：‘诸天入辈，如是三昧谁能持者？’彼天报曰：‘大王，汝宁不闻耶？今有比丘名曰树王，现能受持如斯三昧，广为世间分别演说，利益一切人天大众。’

“不空见，彼天主王当得闻此三昧名时，即能受持思惟观察，并亦诵念彼比丘名。过是夜已，即于晨朝，舍四天下金轮王位，亦复舍弃八十亿百千那由他后宫妃后女侍之属，又尽放弃五欲众具，斯皆为是三昧王故。王时复与九十六亿百千那由他众生，求彼比丘舍家出家。不空见，时彼树王比丘，与四部众天、龙、夜叉及人非人周匝围绕，复有九十亿欲界诸天左右听法。复有八十那由他诸菩萨众在前赞说是三昧王，分别解释显其义趣。彼天主王至其所已，即以众宝散比丘上，然后方始五体投地，一心顶礼彼比丘足。又以八十宝箱各容一斛，盛满金华奉散其上。复以天华，所谓优钵罗华、钵头摩华、拘物

头华、分陀利华、曼陀罗华、摩诃曼陀罗华，用散其上。复以天诸妙香，所谓天沉水香、多伽罗香、多摩罗跋、牛头栴檀、黑沉水栴檀末香等，用散其上。广设如是众供具已，然后请为比丘弟子。即于是日，与九十六亿百千那由他臣佐民人在比丘前，剃除须发，服袈裟衣，厌世出家，皆为求此妙三昧故。是后其天主比丘，常得与彼九十六亿那由他百千眷属比丘，亲近供养恒河沙等诸佛世尊，亦皆为此胜三昧故。

“不空见，尔时彼天主比丘，经八十四亿那由他百千岁，以种种众具供养事彼树王比丘求此三昧，读诵受持，如说修行，教诸弟子终不暂懈，又彼眷属比丘大众勇猛精进亦无倦心。不空见，彼天主比丘及其眷属，于树王法师生尊重心起诸佛想，闻说妙法一心受持，长夜精勤初不休息。彼树王比丘皆悉成就彼九十六亿百千比丘，行菩萨行住不退地，然后灭度。彼诸眷属皆亦命终。时复有佛，名阎浮幢如来应供等正觉出现于世，而彼天主比丘与诸眷属，而更于彼阎浮幢如来应供等正觉所，勤求咨问如此甚深三昧经典读诵受持，思惟其义，如说修行，为他解释，利益世间一切天人，为证无上大菩提故。又彼天主比丘为此无上胜三昧故，广分别说诸佛所宣甚深经典，过三千劫已然后作佛；又能教化无量大众，皆得成熟毕竟安住不退转地，悉受阿耨多罗三藐三菩提记。”

佛告不空见：“汝今当知，尔时彼天主王者，岂异人乎？即今之最上行如来应供等正觉是也！是故汝今不应疑惑。

“复次，不空见，汝当一心思惟观察此三昧王善根浅深功德少多，吾今为汝少分说耳！若彼世间无量无边亿那由他百千众生，但能耳闻此三昧名，当来必定成等正觉，何况此众菩萨摩訶萨，亲于我前或在我后，闻我广说此三昧王，若读诵、若受持、若思惟义、若修行、若能为他称扬广说也！不空见，若有菩萨摩訶萨住菩萨乘，闻此三昧经于心耳，彼亦不久必当成就阿耨多罗三藐三菩提。复有初住菩萨乘诸菩萨等，即便速证不退转地，于阿耨多罗三藐三菩提亦不为远。

“复次，不空见，譬如夜分将尽，其日未出，东方明相始现之时，阎浮提人莫不欢喜。何以故？知彼日轮不久当现，广为世间作大照明，令阎浮人咸得睹见，若善若恶、净秽诸色得有所作。如是，不空见，若有善男子、善女人，若但能闻此念佛三昧经于耳者，彼辈不久尽得成于阿耨多罗三藐三菩提。是故汝等于此三昧，作决定心起不坏信，莫生异见，勿怀疑网。

“复次，不空见，如劫将尽，彼第六日现世间时，如是一切三千大千世界大地尽皆烟出；烟既出已，当知不久第七日出，一切世界皆悉洞燃。如是，不空见，若有善男子、善女人，或已住彼菩萨乘中及未住者，若曾闻此念佛三昧经于耳者，或时读诵，或有受持，或思惟义，或如说行，乃至或能为他广说，彼等决定速得成就阿耨多罗三藐

三菩提。

“复次，不空见，如人穿井，若见湿土黏污手足，或时复见水泥杂和，智者当知去水不远。如是，不空见，若有善男子、善女人，闻此菩萨念佛三昧，正意受持，谛善思惟，分别义理，广为他人宣扬解释，当知彼诸善男子、善女人，不久自成阿耨多罗三藐三菩提。

“复次，不空见，譬如有人吞金刚丸，当知是人不久必死。何以故？彼金刚丸不可消故。如是，不空见，若有善男子、善女人，但能听闻如是三昧，或复思惟，或常亲近，或亦修习，或能宣说，当知彼诸善男子、善女人，不久必成阿耨多罗三藐三菩提。何以故？此三昧者，即是过去、现在、未来三世一切诸如来应供等正觉，思惟修习清净成就真实金刚，无有虚伪不可破坏，复能教化诸菩萨辈令其安住，以诸菩萨必能安隐住于大乘故。

“复次，不空见，譬如三十三天，见欢喜园皆生安乐。如是，不空见，彼一切菩萨摩訶萨，皆因闻此三昧名字故，能速成阿耨多罗三藐三菩提。以是三昧法门名字，往昔诸佛之所赞叹，为他广说释解理义，开发显示名味句身，具足圆满安住法界拥护摄持，诸大菩萨教化增长，令乐真道正直淳和常受安乐。不空见，以是因缘，汝应知此，若诸菩萨闻此三昧暂经心耳，如是诸善男子、善女人，不久当证阿耨多罗三藐三菩提。不空见，吾故语汝，汝当善知：若诸菩萨摩訶萨闻此甚深念佛三昧能受持者，彼等善男子、善女人，自然疾成阿耨多罗三藐三菩提。

“复次，不空见，汝应受持如是三昧，常念为彼一切世间比丘、比丘尼、优婆塞、优婆夷，及诸国王、大臣、宰相、刹利、婆罗门、毗舍、首陀一切乞士，并余种种外道尼乾遮罗迦波利婆闍迦等颁宣广说。何以故？以此三昧大德威力，能令彼等速成阿耨多罗三藐三菩提故。

“复次，不空见，若有善男子、善女人，净信敬心分明知此念佛三昧，过去诸佛之所赞叹，一切如来之所印可。如是知已，当即读诵，当即受持，当即修行，当即敷演，复应当作如是思惟：‘今此三昧为不思议大功德聚。’如是思已，当更信敬，当更尊重，当更深入，当更证知。所以者何？今此三昧，乃是一切诸佛之所说也，一切诸佛之所行处也，一切诸佛之所印可也，一切诸佛之正教也，一切诸佛之辩才也，一切诸佛之所觉也，一切诸佛之选择也，一切诸佛之所作也，一切诸佛之财宝也，一切诸佛之府库也，一切诸佛之伏藏也，一切诸佛之仓廩也，一切诸佛之印玺也，一切诸佛之舍利也，一切诸佛之体性也。不空见，若彼善男子、善女人等，能如是知即得无量无边善根。缘此功德，所生常处大刹利家、大婆罗门家，及余一切大威势家、大尊重家、大德天处，乃至当证阿耨多罗三藐三菩提。何以故？不空见，由此三昧具足能得不思议出世间果报聚故。不空见，彼善男子、善女人，若但耳闻此三昧名，当得无量无边福聚，亦复当作无量

无边福行，然彼所得福聚善根，福行功德广大甚深，不可校计，不可算数，不可称量，不可得知。

“复次，不空见，言粗若此义尚未明，我今为汝更引譬喻，令诸智者少分解之。不空见，若有菩萨摩訶萨专心信乐修行檀波罗蜜，日三时施，于日初分以神通力故即令七宝及余众具，充满于彼恒沙世界，还用奉上恒沙如来应供等正觉，及诸弟子声闻众等；如日初分如是行施，日中、后分行施亦然。日别如是三时行施，乃至经彼无量无边亿那由他恒河沙劫，而常行是无有休废，亦复求于阿耨多罗三藐三菩提。不空见，于意云何？彼菩萨摩訶萨能于如是长时行施，所获功德可谓多不？”

不空见言：“甚多，世尊，无量无边，不可算数，不可称量，不可思议也！”

时，佛复告不空见菩萨言：“不空见，吾更语汝，汝宜谛听。假彼菩萨摩訶萨如是修行檀波罗蜜，所种善根所获福聚实为广大，然犹不及斯善男子、善女人但能耳闻此三昧名，或时书写，或时读诵，或时信解如来所说深妙法门少功德也！不空见，然此善男子、善女人，但以闻名所获功德，尚超前福无量无边，不可称量，不可校比，何况彼善男子、善女人，具足得闻是三昧，能即书写、读诵受持、思惟义理，善能为诸人天大众宣扬广释也！不空见，汝今当知我但略说三昧功德，若欲广说此定善根，假经多劫终不能尽。

诸菩萨本行品第十五

尔时，不空见菩萨摩訶萨、善现菩萨摩訶萨、善喜光菩萨摩訶萨、无边见菩萨摩訶萨、无边庄严菩萨摩訶萨、无边幢菩萨摩訶萨、无边光明菩萨摩訶萨、无边称菩萨摩訶萨、无边禅菩萨摩訶萨、无边智菩萨摩訶萨、无边发王菩萨摩訶萨、无边自在王菩萨摩訶萨、思惟最胜无边菩萨摩訶萨、思惟一切法意菩萨摩訶萨、思惟虚空意菩萨摩訶萨、思惟无碍意菩萨摩訶萨、无边宝意菩萨摩訶萨、能灭一切怖畏菩萨摩訶萨、善净意菩萨摩訶萨，如是等菩萨摩訶萨为首，与九十亿那由他百千菩萨摩訶萨俱从座起，偏袒右肩，右膝著地，合掌恭敬而白佛言：“世尊，我等从佛闻是菩萨念佛三昧功德利益，我等要当躬自书写、读诵受持、思惟义理、广为他说，亦令他人如说修行。何以故？我等为欲摄受阿耨多罗三藐三菩提故。世尊，我等于此诸佛世尊所说三昧甚深经典，令诸众生闻已欢喜，我等亦当益其气力与其安乐。所以者何？彼等若能于是大乘修多罗中，次第修行闻已书写、读诵受持、分别思惟、广为他说，亦令他人分别解说，必得成就阿耨多罗三藐三菩提故。”

尔时，世尊知诸菩萨摩訶萨等一心念求，遂便微笑。诸佛世尊法

如是故，即微笑时，世尊面门放种种光，所谓金、银、琉璃、玻瓈、玛瑙、砗磲、真珠，如是一切诸宝光中，各皆复出无量百千异色光明，皆自世尊面门而出，遍游十方无量世界，上至梵宫还住佛顶，如天帝释建立宝幢，端直光华见者欢喜。时此三千大千世界，庄严壮丽微妙无比。

尔时，彼诸菩萨摩诃萨众，见是神变庄严事已，咸皆惊叹：“奇哉希有世尊神通！”于是众中有一菩萨摩诃萨，名如意定智神通，即从座起正持威仪，合掌恭敬顶礼世尊已，用天沉水香、多伽罗香、多摩罗跋香、牛头栴檀、末栴檀等奉散佛上，复以天曼陀罗华、摩诃曼陀罗华、天优钵罗华、波头摩华、拘物头华、分陀利华、鸡娑罗华、摩诃鸡娑罗华等，供养世尊已，说偈赞曰：

“世尊调御无伦匹， 金色相好具足人，
光明威德遍十方， 状若林间开花树，
妙行圆满智无边， 大威能为世间益，
最胜方便愿演说， 今复微笑有何缘？
世尊无等无边智， 挺超众类谁能加？
无上威德今应宣， 何因今日复微笑？
今此世界遍大千， 华敷尽若帝天树，
一切众生皆欢喜， 今更微笑何所因？
盲者能视聋得闻， 哑者得言蹇能步，
狂乱失心获本念， 今复微笑何因缘？
群兽喜跃悉鸣吼， 异鸟欢欣吐清音，
众乐不鼓自然鸣， 今者何因复微笑？
一切乐音同时作， 本非天人之所鼓，
而令人天获安乐， 今更微笑何所缘？
彼天观人明照此， 斯人今亦见彼天，
天人交发希有心， 何缘今更现微笑？
无上丈夫世依止， 大尊今日为我宣，
若闻大慈怜笑者， 唯深庆幸岂能报！”

尔时，世尊即为如意定智神通菩萨摩诃萨，宣说大士所有妙问，亦即宣彼恒沙诸如来应供等正觉名号，其偈词曰：

“诸善男子等， 闻法王妙声，
彼六十八千， 悉发菩提愿。
亦于当来世， 正法毁坏时，
世尊自护持， 如是深妙典。
我闻大名称， 终无有厌倦，
不思議法门， 诸佛之所说。

汝听我今说， 斯诸菩萨众，
非但一佛所， 发此诚敬心。
我念往昔诸生处， 六十六亿那由他，
尔时皆亦如斯起， 唯为护持此深法。
又复过去前于兹， 无量恒沙诸佛所，
于彼为首修虔敬， 最上妙法我护持。
斯诸大士为法故， 能舍重命岂爱身，
其何甘法不惮苦， 独为菩提无上证！
不可思议恒沙数， 无量威德诸如来，
彼时上首皆敬起， 亦唯爱乐斯法故。
宝光火光大光佛， 电光普光不思议，
斯辈三等摄持法， 为求菩提无上道。
唯我神力能知汝， 果报今日皆明现，
不空汝久发斯愿， 经昔无量百千生。
汝于诸佛大师前， 不思议行悉圆满，
常业歌赞两足尊， 苦行熏修诸大誓，
由往积集胜因缘， 今获偈叹大法王。
往昔世尊号善眼， 亦名火幢无边威，
斯辈彼时为上首， 欲求无上正觉故。
往昔有佛庄严王， 刹若他化天宫所，
斯辈多是胜上士， 彼时已就大菩提。
过去有佛名放光， 亦无边光无量相，
斯辈于彼已为首， 初求如是妙三昧。
大摩尼珠火光佛， 普光明聚调御师，
彼时摄法为首起， 求于菩提安乐故。
大光日光不思议， 无量精进无边定，
于彼摄法上首起， 为求安乐菩提故。
善华香佛及金华， 无漏如来无诤行，
彼时皆为护法首， 为求如是上菩提。
如是过去诸如来， 无边智尊两足尊，
于彼三种摄持故， 祈愿最上佛菩提。
八万丈夫通达士， 为证第一妙菩提，
斯辈因是胜善根， 当来奉侍人中觉。
所生常处尊胜家， 一切永除诸恶道，
斯等集会为法朋， 终不远离世间觉。
长违一切外论师， 亦舍一切邪智友，
摄诸功德不可说， 此福要登以菩提。
当来得值弥勒尊， 此辈尔时皆集会，
于是三业持护法， 因此能成胜菩提。
复于弥勒涅槃后， 有佛师子调御师，

亦求彼法三业持， 因此得成等正觉。
当来千佛无上尊， 即是贤劫众生导，
斯等法师世恒说， 因证无碍妙色身。
过是贤劫诸佛已， 复有正觉无量威，
更有如来厥号贤， 及以世尊毗婆尸。
贤与毗婆尸灭后， 复有佛出名娑罗，
彼时智者皆摄持， 广设众具兴供养。
娑罗世尊既涅槃， 有佛如来名观察，
斯辈于彼求法故， 而复供养妙法王。
观察如来涅槃已， 有佛世尊名遍见；
遍见如来涅槃已， 有佛厥名莲华上；
华上如来涅槃已， 有佛称号优钵罗，
尔时诸智还求法， 承事供养两足尊。
优钵罗佛涅槃已， 有佛世尊名曰华；
彼华如来涅槃已， 有佛世尊号庄严；
庄严如来涅槃已， 有佛世尊名胜智；
斯辈于彼亦求法， 兴建供养无有边。
胜智如来涅槃已， 有佛世尊名善见；
善见如来涅槃已， 有佛世尊名善持；
善持如来涅槃已， 有佛名曰具威仪；
彼亦三种法摄持， 唯求证斯菩提道。
具威仪佛涅槃已， 有佛世尊无量威；
无量威佛涅槃已， 有佛世尊名胜王；
胜王如来涅槃已， 有佛世尊名现前；
现前如来涅槃已， 有佛世尊最炽王。
尔时此等为法故， 广设供养不思議，
如是未来诸世尊， 世间胜智超一切，
于已身命无爱吝， 但为求证佛菩提，
因藉如斯胜善根， 将来奉承胜威德。
是佛人中最第一， 如彼调御阿弥陀，
于彼殊胜世尊所， 即欲修证上菩提，
为求法故常精勤， 当设无边妙供养。
彼方所有诸世界， 远离衰恼除五尘，
唯求法乐利群生， 供养忆数恒沙佛。
当来成佛无边智， 能多利益灭众苦，
为求安乐诸众生， 供养无量无边佛。
当得成佛大名称， 彼刹庄严难思议，
尽是众宝人乐观， 犹安乐国殊广大。
多亿那由诸菩萨， 咸受佛记人中尊，
以不思議诸佛智， 如是赞称大法王。

我于今者为汝说， 一切大众诸天人，
其有求于正觉真， 终自同彼如来证。
若能愿乐胜菩提， 彼号上人蒙威护，
诸天守卫及龙鬼， 鸠槃金鸟并夜叉。
若欲祈愿成菩提， 心常乐修佛胜道，
世尊哀愍如一子， 身金色力智多闻。”

般舟三昧经卷上

一名十方现在佛悉在前立定经

问事品第一

闻如是：一时，佛在罗阅祇迦邻竹园中，与大比丘众，比丘五百人皆是阿罗汉，诸漏已尽无复坐垢，生死悉除而得自在，心已解脱照明于慧，譬如大龙圣智通达，所作已办众行具足，弃捐重担所欲自从，已舍诸有其行平等，得制其心度于彼岸，唯除一人贤者阿难。

尔时，有菩萨名毘陀和与五百菩萨俱，皆持五戒，晡时至佛所前，以头面著佛足却坐一面。并与五百沙门俱至佛所，前为佛作礼却坐一面。时佛放威神，诸比丘所在远方无不来者。即时十万比丘，俱相随来会佛所，前为佛作礼却坐一面。佛复放威神，摩诃波和提比丘尼，与三万比丘尼俱相随至佛所，前为佛作礼却坐一面。佛复放威神，罗邻那竭菩萨从堕舍利大国出，桥日兜菩萨从占波大国出，那罗达菩萨从波罗斯大国出，须深菩萨从迦罗卫大国出，摩诃须萨和菩萨与阿难邻坻迦罗越俱从舍卫大国出，因坻达菩萨从鸠睺弥大国出，和伦调菩萨从沙祇大国出，一一菩萨各与二万八千人俱来到佛所，前为佛作礼皆却坐一面。罗阅祇王阿闍世，与十万人俱来到佛所，前为佛作礼却坐一面。四天王、释提桓因、梵摩三钵摩夷巨天、阿迦尼吒天，各各与若干亿亿百千天子俱来到佛所，前为佛作礼却住一面。难头和难龙王、婆竭龙王、摩难斯龙王、阿耨达龙王，各各与若干龙王亿亿百千万俱来到佛所，前为佛作礼却住一面。四面阿须伦王，各与若干阿须伦民亿亿百千万俱来到佛所，前为佛作礼却住一面。时诸比丘、比丘尼、优婆塞、优婆夷、诸天、诸龙、诸阿须伦民、诸阅叉鬼神、诸迦留罗鬼神、诸真陀罗鬼神、诸摩睺勒鬼神、诸人非人，无央数都不可计。

跋陀毘陀和菩萨从座起整衣服，叉手长跪白佛言：“愿欲有所问，既问者欲有所因故。天中天听我言者，今当问佛。”

佛告跋陀毘陀和菩萨：“所用故者便问，佛当为汝说之。”

跋陀毘陀和菩萨问佛言：“菩萨当作何等三昧？所得智慧如大海，如须弥山，所问者不疑，终不失人中之将，自致成佛终不退，终不生愚痴之处，豫知去来之事，未曾离佛时，若于梦中亦不离佛，端政殊好于众中颜色无比，少小常在尊贵大姓家生，若其父母兄弟、宗亲知识无不敬爱者，高才广博所议作者与众绝异，自守节度常内惭色，终不

自大常有慈哀，智虑通达于智中明无有与等者，威神无比精进难及，入诸经中多入诸经中，诸经中无不解者，安乐入禅入定入空，无所想无所著，于是三事中不恐，多为人说经便随护之，在所欲生何所自恣，无异本功德力、所信力，多所至到处其筋力强，无不欲爱力，无不有根力，明于所向力，明于所念力，明于所视力，明于所信力，明于所愿力，在所问如大海无有减尽时，如月盛满时悉遍照无有不减明者，如日初出时、如炬火在所照无所挂碍，不著心如虚空无所止，如金刚钻无所不入，安如须弥山不可动，如门阇正住坚，心软如鹄毛无有羸弃，身无所慕乐于山川如野鹿，常自守不与人从事，若沙门道人多所教授皆护视，若有轻饶者终无嗔恚心，一切诸魔不能动，解于诸经入诸慧中，学诸佛法无有能为作师者，威力圣意无有能动摇者，深入之行常随无所行常柔弱，于经中常悲，承事于诸佛无有厌，所行种种功德悉逮及，所行常至诚，所信常正无有能乱者，所行常净洁，临事能决无有难，清静于智悉明，得所乐行尽于五盖，智慧所行，稍稍追成佛之境界，庄严诸国土，于戒中清静，却罗汉、辟支佛心，所作为者皆究竟，所作功德常在上首，教授人民亦然，于菩萨中所教授无有厌，当所作者度无有极，一切余道无有能及者，未尝离佛不见佛，常念诸佛如父母无有异，稍稍得诸佛威神，悉得诸经，明眼所视无所挂碍，诸佛悉在前立，譬如幻师自在所化作诸法，不豫计念便成法，亦无所从来，亦无所从去，如化作，念过去、当来、今现在如梦中，所有分身悉遍至诸佛刹，如日照水中影悉遍见，所念悉得如向，亦不来亦不去，生死如影之分，便所想识如空，于法中无想，莫不归仰者，一切平等无有异，于经中悉逮知心不可计，一切诸利心不著无所适念，止于诸佛刹无所复挂碍，悉入诸陀罗尼门，于诸经中闻一知万，诸佛所说经悉能受持，侍诸佛悉得诸力，悉得佛威神，勇猛无所难，行步如猛狮子无所畏，于诸国土无不用言者，所闻者未曾有忘时，一切诸佛之议等无有异，悉了知本无经不恐，欲得诸经便自知说，如诸佛终无厌，为世间人之师无不依附者，其行方幅无有谄伪，诸刹照明，眼不著于三处，所行无所挂碍，于众辈中无所适，于本际法中无所慕，于萨芸若教人入佛道中，未曾恐怖无有畏惧时，悉晓知佛诸经所有卷所在，众会中无不蒙福者，见佛极大慈欢喜，所学诸佛经通利，于大众中无所畏，于大众中无有能过者，名声极远，破坏诸疑难无不解者，于经中极尊，于师子座上坐自在，如诸佛法教，悉晓知佛万种语，悉入万亿音，爱重诸佛经，常念在左右侧，未曾离于诸佛慈，于佛经中乐行，常随佛出入，常在善知识边无有厌极时，于十方诸佛刹无所适止，悉逮得愿行，度脱十方万民，智慧珍宝，悉逮得经藏，身如虚空无有想，教人求菩萨道，使佛种不断，行菩萨道未曾离摩诃衍，逮得摩诃僧那僧涅槃广大道，疾逮得一切智，诸佛皆称誉，近佛十力地一切所想悉入中，一切所计悉了知，世间之变悉晓知，成败之事生者灭者悉晓知，入经海宝开第一之藏悉布施，悉于诸

刹行愿亦不在中止，极大变化如佛所乐行，心一反念佛悉在前立，一切适不复愿，适无所生处，十方不可计佛刹悉见，闻诸佛所说经，一一佛比丘僧悉见，是时不持仙道、罗汉、辟支佛，眼视不于是间，终生彼间佛刹尔乃见，便于是间坐悉见诸佛，悉闻诸佛所说经，悉皆受，譬如我今于佛前面见佛菩萨，如是未曾离佛，未曾不闻经。”

佛告跋陀耶菩萨：“善哉！善哉！所问者多所安隐，于世间人民不可复计，天上天下悉安之。今若能问佛如是，若能前世过去佛时，所闻施行作功德所致，供养若干佛已所致，乐于经中所致，作道行守禁戒所致。自守法行清白不烦浊，辄以乞勾自食，多成就诸菩萨，合会教语诸菩萨，用是故极大慈哀，一切人民皆于等心，随时欲见佛即见佛，所愿极广大甚深之行，常念佛智慧，悉持经戒，悉具足佛种圣心如金刚，悉知世间人民心所念，悉在诸佛前。”

佛告跋陀耶菩萨：“若功德以不可复计。”

佛言：“今现在佛悉在前立三昧，其有行是三昧者，若所问者悉可得。”

跋陀耶菩萨白佛言：“愿佛哀说之！今佛说者，多所过度，多所安隐，愿佛为诸菩萨现大明！”

佛告跋陀耶菩萨：“一法行常当习持常当守，不复随余法，诸功德中最第一。何等为第一法行？是三昧名为现在佛悉在前立三昧。”

行品第二

佛告跋陀耶菩萨：“若有菩萨所念现在，定意向十方佛。若有定意，一切得菩萨高行。何等为定意？从念佛因缘，向佛念意不乱，从得黠不舍精进，与善知识共行空，除睡卧，不聚会，避恶知识近善知识，不乱精进，饭知足，不贪衣，不惜寿命，子身避亲属离乡里，习等意得悲喜心，护行弃盖习禅，不随色，不受阴，不入衰，不念四大，不失意，不贪性，解不净，不舍十方人、活十方人、十方人计为我所、十方人计为非我所，一切不欲受，不贸诫习定行，欲讽经，不中犯戒，不失定意，不疑法，不诤佛，不却法，不乱比丘僧，离妄语，助道德家，避痴人世间语，不喜不欲，闻道语具欲闻亦喜，从因缘畜生，不欲闻六味、习为五习，为离十恶，为习十善，为晓九恼，行八精进，舍八懈怠，为习八使，为习九思八大人念，又不著禅闻，不贡高弃自大，听说法，欲闻经，欲行法，不随岁计，不受身相，离十方人，不欲受，不贪寿，为了阴不随或不随所有求无为，不欲生死大畏生死，计阴如贼，计四大如蛇，十二衰计空，久在三界不安隐莫忘得无为，不欲贪欲，愿弃生死，不随人诤，不欲堕生死，常立佛前，受身计如梦，以受信不复疑，意无有异，一切灭思想过去事、未来事、今现在事等意，常念诸佛功德，自归为依佛，定意得自在，不

随佛身相法，一切一计不与天下诤，所作不诤，从因缘生受了，从佛地度得可法，中法中得下，以了空意计人，亦不有亦不灭，自证无为黠眼以净，一切不二觉意不在中边，一切佛为一念入，无有痴黠，无有能诤，自得晓觉意故，佛黠不从他人待，得善知识计如佛无有异意，一切在菩萨无有离时，纵一切魔不能动，一切人如镜中像，见一切佛如昼，一切从法行，为入清净菩萨行如是。”

佛言：“持是行法故，致三昧便得三昧，现在诸佛悉在前立。何因致现在诸佛悉在前立三昧？如是，跋陀耶，其有比丘、比丘尼、优婆塞、优婆夷，持戒完具，独一处止，心念西方阿弥陀佛。今现在随所闻当念，去是间千亿万佛刹，其国名须摩提，在众菩萨中央说经，一切常念阿弥陀佛。”

佛告跋陀耶：“譬如人卧出于梦中，见所有金银珍宝，父母、兄弟、妻子、亲属知识，相与娱乐喜乐无背；其觉已为人说之，后自泪出念梦中所见。如是，跋陀耶菩萨，若沙门、白衣所闻西方阿弥陀佛刹，当念彼方佛不得缺戒，一心念若一日昼夜，若七日七夜；过七日已后，见阿弥陀佛，于觉不见，于梦中见之。譬如梦中所见，不知昼不知夜，亦不知内亦不知外，不用在冥中故不见，不用有所蔽碍故不见。如是，跋陀耶，菩萨心当作是念：‘时诸佛国界名大山须弥山，其有幽冥之处悉为开辟，目亦不蔽，心亦不碍。’是菩萨摩訶萨，不持天眼彻视，不持天耳彻听，不持神足到其佛刹，不于是间终生彼间佛刹乃见，便于是间坐，见阿弥陀佛，闻所说经悉受得，从三昧中悉能具足，为人说之。譬如有人，闻堕舍利国中，有淫女人名须门；若复有人，闻淫女人阿凡和利；若复有人，闻优婆洹作淫女人，是时三人皆在罗阅念。其人未曾见此三女人，闻之淫意即为动，便于梦中各往到其所。是时三人皆在罗阅祇国同时念，各于梦中到是淫女人所与共栖宿，其觉已各自念之。”

佛告跋陀耶：“我持三人以付。若持是事为说经，使解此慧至不退转地无上正真道，然后得佛号曰善觉。如是，跋陀耶，菩萨于是间国土闻阿弥陀佛，数数念；用是念故，见阿弥陀佛，见佛已从问：‘当持何等法生阿弥陀佛国？’尔时，阿弥陀佛语是菩萨言：‘欲来生我国者，常念我数数，常当守念莫有休息，如是得来生我国。’”

佛言：“是菩萨用是念佛故，当得生阿弥陀佛国。常念如是佛身，有三十二相，悉具足光明彻照，端正无比，在比丘僧中说经，说经不坏败色。何等为不坏败色？痛痒、思想、生死、识、魂神，地水火风，世间天上，上至梵摩訶梵，不坏败色，用念佛故得空三昧，如是为念佛。”

佛告跋陀耶：“菩萨于三昧中谁当证者？我弟子摩訶迦葉、因坻达菩萨、须真天子，及时知是三昧者，有行得是三昧者是为证。何等为证？证是三昧知为空定。”

佛告跋陀耶：“乃往过去时有佛，名须波日。时有人行出入大空

泽中，不得饮食饥渴而卧，出便于梦中得香甜美食，饮食已其觉腹中空，自念：“一切所有皆如梦耶？”

佛言：“其人用念空故，便逮得无所从生法乐，即逮得阿惟越致。如是，跋陀毖，菩萨其所向方，闻现在佛，常念所向方欲见佛，即念佛不当念有，亦无我所立，如想空当念佛立，如以珍宝倚琉璃上，菩萨如是见十方无央数佛清净。譬如人远出到他郡国，念本乡里、家室亲属、财产。其人于梦中，归到故乡里见家室亲属，喜共言语，于梦中见已，觉为知识说之：‘我归到故乡里见我家室亲属。’”

佛言：“菩萨如是，其所向方闻佛名，常念所向方欲见佛，菩萨一切见佛，如持珍宝著琉璃上。譬如比丘观死人骨著前，有观青时，有观白时，有观赤时，有观黑时。其骨无有持来者，亦无有是骨，亦无所从来，是意所作想有耳！菩萨如是持佛威神力，于三昧中立，在所欲见何方佛，欲见即见。何以故？如是，跋陀毖，是三昧佛力所成，持佛威神。于三昧中立者，有三事：持佛威神力，持佛三昧力，持本功德力，用是三事故得见佛。譬如，跋陀毖，年少之人，端正姝好庄严，已如持净器盛好麻油，如持好器盛净水，如新磨镜，如无瑕水精，欲自见影，于是自照悉自见影。云何，跋陀毖，其所麻油、水镜、水精，其人自照，宁有影从外入中不？”

跋陀毖言：“不，天中天。用麻油、水精、水镜净洁故，自见其影耳！其影亦不从中出，亦不从外入。”

佛言：“善哉！善哉！跋陀毖。如是，跋陀毖，色清净，所有者清净，欲见佛即见，见即问，问即报，闻经大欢喜，作是念：‘佛从何所来？我为到何所？’自念：‘佛无所从来，我亦无所至。’自念三处：‘欲处、色处、无想处，是三处意所为耳！我所念即见。心作佛，心自见，心是佛，心是怛萨阿竭，心是我身，心见佛，心不自知心，心不自见心，心有想为痴，心无想是泥洹。是法无可乐者，皆念所为，设使念为空耳！设有念者亦了无所有！’如是，跋陀毖，菩萨在三昧中立者所见如是。”

佛尔时颂偈曰：

“心者不知心， 有心不见心，
心起想则痴， 无想是泥洹。
是法无坚固， 常立在于念，
以解见空者， 一切无想念。”

四事品第三

“菩萨有四法，疾逮得是三昧。何等为四？一者、所信无有能坏者，二者、精进无有能逮者，三者、所入智慧无有能及者，四者、常

与善师从事。是为四。菩萨复有四事，疾得是三昧。何等为四？一者、不得有世间思想，如指相弹顷三月；二者、不得卧出，三月如指相弹顷。三者、经行不得休息，不得坐三月，除其饭食左右；四者、为人说经，不得望人衣服饮食。是为四。菩萨复有四事，疾得是三昧。何等为四？一者、合会人至佛所，二者、合会人使听经，三者、不嫉妬，四者、教人学佛道。是为四。菩萨复有四事，疾得是三昧。何等为四？一者、作佛形像若作画，用是三昧故；二者、用是三昧故，持好正素令人写是三昧；三者、教自贡高人内佛道中；四者、常护佛法。是为四。”

佛尔时颂偈曰：

“常乐信于佛法， 受诵是道德化，
精进行解深法， 立具足等慈哀。
当普说佛经卷， 广分布道法教，
慎无得贪供养， 无所著得是法。
在不正嗔恚兴， 意善解便离欲，
常乐定三昧禅， 谨慎行得是法。
常念佛本功德， 天金色百福相，
诸种好有威德， 现譬如像金山。
悉知见诸世间， 过去佛及当来，
并现在人中尊， 天中天皆说是。
当供养斯善救， 上好华众捣香，
欣踊心奉饭食， 得是法终不久。
鼓琴瑟诸妓乐， 箫成供佛形象，
欣然意悦无量， 尊道法得不难。
当造起佛形象， 诸相好若干种，
黄金色无秽漏， 疾逮得是道尊。
坚固敬常以前， 听是法无乱心，
常舍离懈怠行， 得三昧疾不久。
无恚害向他人， 当行哀得慈法，
普救护功德地， 得三昧疾不久。
常恭敬于法师， 当奉事如世尊，
无得惜是经法， 得三昧疾不久。
慎无得疑斯经， 佛赞是正道化，
一切佛所歌叹， 得三昧疾不久。”

佛告跋陀耶：“如是等菩萨，当慈心，当乐于善师，所视师当如佛，悉具足承事。欲书是三昧经时，若欲学时，菩萨敬师如是。跋陀耶，菩萨于善师有嗔恚，有持善师短，视善师不如佛者，得三昧难。譬如，跋陀耶，菩萨明眼人夜半视星宿，见星宿甚众多。如是，跋陀

想，菩萨持佛威神于三昧中立，东向视若干百千佛、若干百万佛、若干百亿佛，如是十方等悉见诸佛。”

佛告跋陀想：“是菩萨如佛眼悉知悉见。如是，跋陀想，是菩萨欲得今现在诸佛悉在前立三昧，布施当具足，持戒如是，忍辱、精进、一心、智慧、度脱智慧身悉具足。”

佛尔时颂偈曰：

“譬如有人眼清静，于夜中半而起观，
仰见星宿无数千，昼日思念皆识知。
菩萨如是得三昧，见无央数百千佛，
皆识念知于诸佛，则为众会说世雄。
譬如今我觉眼明，清静无垢见世间，
佛子菩萨眼若此，三昧普达见世尊。
终不复起吾我想，见十方佛人中尊，
除毒清静无想念，观此菩萨奇特行。
逮闻尊法寂然义，速疾得解空定行，
今我亦训于是法，以成佛道多所安。
如阿弥陀国菩萨，见无央数百千佛，
得是三昧菩萨然，常见无数百千佛。
比丘阿难如勇猛，从我闻法皆受持，
逮得三昧亦如是，闻无数法悉奉持。
当信三昧疾持行，悉弃世间诸所有，
当乐斯经行法施，疾得清静寂定地。”

譬喻品第四

佛告跋陀想：“菩萨慈求三昧者，得是三昧已，不精进行者。譬如，跋陀想，有人载满船珍宝，欲持度大海，未至船中道坏，阎浮利人皆大悲念：‘亡我尔所珍宝。’如是，跋陀想，是菩萨闻是三昧已，不书不学不诵，不持如中法，一切诸天人民皆为大悲忧言：‘乃亡我尔所经宝，用失是深三昧故。’”

佛言：“是三昧经者，是佛所嘱，佛所称誉。闻是深三昧经者，不书不学不诵，不守不持如法者，无返复愚痴人，自用以为高，不受是经意欲高才，反不肯学是三昧。譬如，跋陀想，愚痴之子，有人与满手栴檀香，不肯受之，反谓与之不净栴檀香。其货主语其人言：‘此栴檀香，卿莫谓不净乎！且取麝之知香不？试视之知净不？’痴人闭目不视不肯取。”

佛言：“其闻是三昧者，如是不肯受之，反舍弃去，是为不持戒人，反舍是珍宝经。是为愚痴无智，自用得禅具足为度，反呼世间为

有，不入空，不知无。其人闻是三昧已，不乐不信，不入中，反作轻戏语：‘佛亦有深经乎！亦有威神乎！’反形言：‘世间亦有比丘如阿难乎！’”

佛言：“其人从持是三昧者，所去两两三三，相与语云：‘是语是何等说？是何从所得是语？是为自合会作是语耳！是经非佛所说！’”

佛告跋陀耶：“譬如贾客持摩尼珠，示田家痴子。其人问贾客：‘平此几钱？’贾客报言：‘夜半时于冥处，持摩尼珠著冥中，其明所照至，直满其中宝。’”

佛言：“其人殊不晓其价，反形是摩尼珠言：‘其价能与一头牛等不？宁可买一头牛，想是不复过。与我者善，不肯者已。’如是，跋陀耶，其人闻是三昧不信者，反形是经如是。”

佛言：“如菩萨持是三昧，受信者便随行，四面皆拥护无所畏，持禁戒完具为得高明，黠慧深入为他人说之。菩萨当持是三昧分布语人，展转相传，令是三昧久在。”

佛言：“痴人自于前世佛所不供养，不作功德，反自贡高，多行诽谤嫉妬，用财利故，但欲求名，但欲哗说，不得善师，亦不明经，闻是三昧已不信不乐不入中，反诽谤人言：‘是彼不知愧，为自作是经耳！是经非佛所说！’”

佛告跋陀耶：“今我具语汝如是。跋陀耶，求菩萨道者，若善男子、善女人，持是三千国土满其中珍宝施与佛，设有是功德，不如闻是三昧。若有菩萨闻是三昧信乐者，其福转倍多。”

佛尔时颂偈言：

“假使三千界， 满中珍宝施，
 供养佛世尊， 以用求佛道；
 设复有比丘， 闻是佛三昧。
 信乐而不疑， 其福过彼上。
 谀谄怀自大， 无信在凶害，
 与恶师相随， 不信是法教。
 犯戒近恶友， 坚住自贡高，
 各各共议言：‘是经非佛语，
 佛不说是议， 为自共合造，
 此非法王教！’共诽谤如斯。
 竟无有是语， 此为诽谤佛，
 有乐道法者， 我故为说耳！
 有闻是经者， 仁贤而喜悦，
 其心常不疑， 不言非佛说。
 奉禁戒清净， 受法讽诵利，
 执经普讲说， 则具足道义。”

佛告跋陀耶：“我所说无有异，尔故说是语耳！今见我说是三昧者，其人却后世时，闻是三昧终不疑，不形笑，不言不信。除在恶师边，正使在善师边，其功德薄少，如是辈人，复转与恶师从事。是辈人者，闻是三昧不信不乐不入中。何以故？其人未久学，所更佛少所信，智慧少故不信耳！”

佛告跋陀耶：“其有菩萨闻是三昧，不形笑，不诽谤者，欢喜不中疑，不言乍信乍不信，乐书乐学，乐诵乐持。”佛言：“我悉预知预见已，其人不独于一佛，所作功德不于二、若三、若十，悉于百佛所闻是三昧。却后世时闻是三昧者，书学诵持经卷，最后守一日一夜，福不可计，自致阿惟越致，所愿者得。”

佛告跋陀耶：“听我说譬喻如是，跋陀耶，有人取一佛刹，破碎如尘。其人取此一尘，悉复破碎如一佛刹尘，都卢悉取一一尘，皆复尘破尽如一佛刹尘。云何，跋陀耶，是尘其数宁多不？”

跋陀耶言：“甚多，甚多，天中天。”

佛告跋陀耶：“我为若曹引此譬喻。若有一菩萨，尽取此尘一尘置一佛刹，其数尔数佛刹，满其中珍宝悉持供养诸佛，不如闻是三昧。若一菩萨闻是三昧已，书学诵持为他人说，守须臾间，是菩萨功德不可复计！”

佛言：“持是三昧者，书学诵持为他人说，其福乃尔，何况守是三昧悉具足者！”

佛尔时颂偈曰：

“三千大千之国土， 满中珍宝用布施，
设使不闻是经像， 其功德福为薄少；
若有菩萨求众德， 当讲奉行是三昧，
疾信讽诵此经法， 其功德福无有量。
如一佛国尘世界， 皆破坏碎以为尘，
彼诸佛土过是数， 满中珍宝用布施；
其有受持是世尊， 四句之义为人说，
是三昧者诸佛慧， 得闻功德叵比喻。
何况有人自讲说， 受持讽诵念须臾，
转加增进奉行者， 其功德福无有量！
假使一切皆为佛， 圣智清净慧第一，
皆于亿劫过其数， 讲说一偈之功德，
至于泥洹赞咏福， 无数亿劫悉叹诵，
不能尽究其功德， 于是三昧一偈事。
一切佛国所有地， 四方四隅及上下，
满中珍宝以布施， 用供养佛天中天；
若有闻是三昧者， 得其福祐过于彼，
安谛讽诵讲说者， 引譬功德不可喻。”

其人贡高终不起，亦无有趋恶道时，
解了深法不疑结，行斯三昧得如是。
学士为以见奉吾，德重精进普不著，
增益信明为菩萨，力学三昧佛所赞。
嘱累汝等常劝教，力行精进无放逸，
自动勇猛勤修行，令得大道不复久。
其有诵受是三昧，已为面见百千佛，
假使最后大恐惧，持此三昧无所畏。
行是比丘以见我，常为随佛不远离，
菩萨闻习三昧者，义当受持为人说。
菩萨得是三昧者，尔乃名曰博达慧，
为逮总持佛称誉，疾成佛道智如海。
常恒诵说是三昧，当从佛法世尊教，
闻其种姓得等觉，如佛所叹无有异。”

般舟三昧经卷中

无著品第五

佛告跋陀耶：“是菩萨三昧当云何？譬如佛今于若前说经，菩萨当作是念：‘诸佛悉在前立。’当具足念诸佛端正，悉欲逮见一一相，当想识无有能见诸佛顶上者，悉具足作是想见诸佛，当作是念：‘我身亦当逮得如是，亦当逮得身相如是，亦当逮得持戒三昧如是。’当作是念：‘我当从心得？从身得？’当复更作念：‘佛亦不用心得，亦不用身得，亦不用心得佛，亦不用色得佛。何以故？心者佛无心，色者佛无色，不用是心色，得阿耨多罗三藐三菩提。何以故？佛色以尽，佛痛痒、思想、生死、识了尽。佛所说尽者，愚痴不见不知，智者晓了之。’作是念：‘当持何等念得佛？当持身得佛？当持智慧得佛？’复作是念：‘亦不用身得佛，亦不用智慧得佛。’何以故？智慧索不可得，自复索我了不可得，亦无所得，亦无所见。一切法本无所有，念有因著，无有反言有亦著；是两者亦不念，亦不复适得其中。但用是故，亦不在边，亦不在中，亦不有亦不无。何以故？诸法空，如泥洹，亦不坏，亦不腐，亦不坚，亦不在是间，亦不在彼边，无有想，不动摇。何等为不动摇？智者不计，是故不动摇。如是，跋陀耶，菩萨见佛已，菩萨心念无所著。何以故？说无所有，经说无所有，中不著，坏本绝本，是为无所著。如是，跋陀耶，是菩萨守是三昧，当作是见佛，不当著佛。何以故？设有所著为自烧。譬如大段铁著火中烧正赤，有智者不当以手持。何以故？烧人手。如是，跋陀耶，菩萨见佛不当著，色、痛痒、思想、生死、识不当著。何以故？著者为烧身。见佛但当念其功德，当索摩诃衍。”

佛告跋陀耶：“是菩萨于三昧中不当有所著，不著者疾得是三昧。”

佛尔时颂偈言：

“如新磨镜盛油器， 女人庄饰自照形，
于中起生淫欲心， 放逸恣态甚迷惑。
追不至诚虚捐法， 为色走使烧其身，
女人患害从是起， 用不解法非常空。
有想菩萨亦如是， 我当成佛逮甘露，
度脱人民忧恼患， 有人想故为不解。
求索人本不可得， 亦无生死及泥洹，
法不可拥如水月， 观察佛道无归趣。
黠慧菩萨当了是， 解知世间悉本无，
于诸人物无所著， 疾速于世得佛道。
诸佛从心解得道， 心者清净明无垢，
五道鲜洁不受色， 有解是者成大道。
一切诸法无色漏， 离想者空无想空，
绝去淫欲则脱心， 有解此者得三昧。
精进奉行求佛身， 当听诸法本清净，
无得行求无不求， 于是三昧不难得。
观察所有如虚空， 道意寂然审第一，
无想无作亦无闻， 是为解了尊佛道。
见一切色无想念， 眼无所著无往来，
常观诸佛等如空， 已度世间诸所求。
其人清净眼无垢， 奉行精进常寂然，
无量经法悉受得， 思惟分别是三昧。
行是三昧无所著， 除一切冥得定意，
不见世雄无贤圣， 诸外异道闻此惑。
超度思想当志行， 心以清净得见佛，
睹诸佛已不复见， 尔乃解是尊三昧。
于地水火莫能碍， 风种虚空亦不蔽，
行是精进见十方， 坐遥听受所化法。
如我于是讲说经， 乐道法者面见佛，
作行勤力而不著， 唯从世尊所说法。
行者如是无所念， 专听道义兴法施，
当念解了是三昧， 普谛受诵佛所讲。
过去诸佛皆论法， 当来世尊亦复然，
讲说宣布分别义， 皆共叹讲是三昧。
我亦如是为人尊， 在世无上众生父，
皆悉解知此道眼， 故解说示寂三昧。”

其有讲受是三昧，身常安隐意不荒，
是为诸佛无量德，致尊佛道获不难。
广采众经不可议，欲达一切诸佛化，
速疾去欲诸垢尘，精进行是净三昧。
现世欲见无数佛，乐从诸尊听受法，
速疾去色除所著，行是清净寂三昧。
于是无贪及嗔恚，舍离愚痴捐憎爱，
弃远无黠除狐疑，如是得解寂三昧。”

四辈品第六

跋陀耆菩萨白佛：“难及天中天说三昧者！若有菩萨，弃爱欲作比丘，闻是三昧已，当云何学？云何持？云何行？”

佛言：“若有菩萨，弃爱欲作比丘，意欲学是三昧者，诵是三昧者，持是三昧者，当清净持戒，不得缺戒大如毛发。何等为菩萨不缺戒？一切悉护禁法，出入行法，悉当护不得犯戒大如毛发，常当怖畏远离于谗诤，悉当护禁，作是护者是为清净持戒。何等为菩萨缺戒者？是菩萨求色。何等为求色？其人意念：‘持是功德，使我后世生若作天，若作遮迦越王。’”

佛言：“用是比丘菩萨为缺戒，其人久持是行持是戒，持是自守福欲所生处，乐于爱欲中，是为毁戒。”

佛告跋陀耆：“是菩萨比丘，欲学是三昧者，清净持戒，完具持戒不谗诤。持戒当为智者所称誉，为罗汉所称誉。于经中当布施，当精进所念强，当多信劝乐，常承事于和尚，当承事于善师。所从闻是三昧者，所可闻是三昧处，当视其人如佛。”

佛告跋陀耆：“是菩萨视师如视佛者，得三昧疾。设不恭敬于善师，轻易于善师，欺调于善师，正使久学是三昧，久持久行，设不恭敬师者疾忘之。”

佛告跋陀耆：“是菩萨若从比丘、比丘尼、优婆塞、优婆夷所，得闻是三昧当视如佛，所闻是三昧处当尊敬。”

佛告跋陀耆：“菩萨所闻是三昧处，不当持谄意，向是菩萨不得谄意，常当乐独处止，不惜身命，不得希望人有所索，常行乞食，不受请，不嫉妬，自守节度如法住，所有趣足而已，经行不得懈，不得卧出。如是，跋陀耆，如是经中教其弃爱欲作比丘学是三昧者，当如是守如是。”

跋陀耆菩萨白佛：“难及天中天所说法！若有后世懈怠菩萨，闻是三昧已不肯精进，其人自念：‘我当于后世当来佛所索是三昧耳！’云言：‘我曹身羸极有病瘦恐不能求。’闻是经已懈怠不精进。若复有菩萨精进者，欲学是经，当教之随是经中法教。用是经故，不惜

躯命，不望人有所得者，有人称誉者不用故喜，不大贪钵，震越无所爱慕，常无所欲，闻是经不懈怠常精进。其人不念：‘我当于后当来佛所乃求索。’自念：‘使我筋髓骨肉皆使枯腐，学是三昧终不懈怠。’自念：‘我终不懈怠死，闻是经已无不欢乐。’”

时佛言：“善哉！善哉！跋陀耆，所说者无有异。我助其欢喜，过去、当来、今现在佛悉助欢喜。”

佛尔时颂偈言：

“如我今所说法， 悉受学独处止，
行功德自守节， 是三昧不难得。
常乞食不受请， 悉弃舍诸欲乐，
所从闻是三昧， 敬法师如世尊。
有诵行是三昧， 常精进莫懈怠，
不得惜于经法， 不求供乃与经。
其有受是三昧， 尔乃为是佛子，
学奉行如是者， 得三昧终不久。
常勤力不懈怠， 除睡眠心开解，
当远离恶知识， 然后从是法行。
去放逸不休息， 常舍离众聚会，
比丘求斯三昧， 随佛教当如是。”

跋陀耆菩萨白佛：“比丘尼求菩萨道，欲学是三昧，欲守是三昧，当持何等法，住学守是三昧？”

佛告跋陀耆：“比丘尼求摩诃衍三跋致，是三昧学守者，当谦敬，不当嫉妬，不得嗔恚，去自贡高，去自贵大，却于懈怠，当勤精进弃于睡眠不得卧出，悉却财利，悉当净洁护，不得惜躯命，常当乐于经，当求多学，当弃淫恚痴出魔罗网去，当弃所好服饰珠环，不得恶口，不得贪爱好钵、震越，当为人所称誉不得有谗毁。学是三昧时，当敬善师视如佛，当承是经中教守是三昧。”

佛尔时颂偈言：

“比丘尼行恭敬， 不嫉妬离嗔恚，
除憍慢弃自大， 行是者得三昧。
当精进却睡卧， 捐所欲不贪寿，
一心慈于是法， 求三昧当如是。
无得听贪淫心， 弃嗔恚及愚痴，
莫得堕魔罗网， 求三昧当如是。
设有学是三昧， 无调戏舍贪身，
一切捐众狐疑， 当至诚不虚饰。
舍小慈向大慈， 敬善师无已已，

当去离于众恶， 求三昧当如是。
行求法欲得者， 不贪著钵震越，
从人闻尔三昧， 视如佛等无异。”

跋陀毖菩萨白佛：“若有白衣菩萨，居家修道，闻是三昧已欲学者，欲守者，当云何于法中立，学守是三昧？”

佛告跋陀毖：“白衣菩萨，闻是三昧已欲学守者，当持五戒坚净洁住，酒不得饮，亦不得饮他人；不得与女人交通，不得自为，亦不得教他人，不得有恩爱于妻子，不得念男女，不得念财产，常念欲弃妻子行作沙门；常持八关斋，斋时常当于佛寺斋；常当念布施，不念我当自得其福，当用万民施；常当大慈，于善师、见持戒比丘不得轻易说其恶。作是行已，当学当守是三昧。”

佛尔时颂偈言：

“有居家菩萨， 欲得是三昧，
常当学究竟， 心无所贪慕。
诵是三昧时， 思乐作沙门，
不得贪妻子， 舍离于财色。
常奉持五戒， 一月八关斋，
斋时于佛寺， 学三昧通利。
不得说人恶， 无形轻慢行，
心无所荣冀， 当行是三昧。
奉敬诸经法， 常喜乐于道，
心无有谄伪， 弃舍慳妬意。
有学是三昧， 常当行恭敬，
舍自大放逸， 奉事比丘僧。”

跋陀毖菩萨白佛：“若有优婆夷，求摩诃衍三跋致，闻是三昧已欲学守者，当行何等法，学守是三昧？”

佛告跋陀毖：“若优婆夷，求摩诃衍三跋致，闻是三昧已欲学守者，当持五戒自归于三。何等为三？自归于佛，归命于法，归命于比丘僧。不得事余道，不得拜于天，不得示吉良日，不得调戏，不得慢恣，不得有贪心。优婆夷常当念布施，勤乐欲闻经，力多学问优婆夷常当敬重于善师，心常惓惓不懈。若比丘、比丘尼过者，常以坐席宾主饮食待之。”

佛尔时颂偈言：

“若有优婆夷， 诵是三昧者，
当从佛法教， 奉五戒完具。
守是三昧时， 当尊敬于佛，
及法比丘众， 恭敬于善师。”

不得事外道， 勿祠祀于天，
行是三昧者， 见人立迎逆。
除去杀盗淫， 至诚不两舌，
无得向酒家， 当行是三昧。
心不得怀贪， 常当念施与，
除去谗谄意， 无得说人短。
常当恭敬事， 比丘比丘尼。
闻法语悉受， 学三昧如是。”

授决品第七

跋陀毖菩萨问佛：“少有及者！天中天怛萨阿竭，乃说是三昧。诸菩萨所乐精进行，无有懈怠于阿耨多罗三藐三菩提。佛般泥洹后，是三昧者，当在阎浮利内不？”

佛告跋陀毖菩萨：“我般泥洹后，是三昧者当现在四十岁，其后不复现。却后乱世佛经具欲断时，诸比丘不复承用佛教。然后乱世时，国国相伐，于是时是三昧当复现阎浮利内，用佛威神故，是三昧经复为出。”

跋陀毖菩萨、罗邻那竭菩萨，从座起正衣服，叉手于佛前白佛：“佛般泥洹后乱世时，我曹共护是三昧，持是三昧，具足为人说之，闻是经卷无有厌极时。”

摩诃须萨和菩萨、憍曰兜菩萨、那罗达菩萨、须深菩萨、因坻达菩萨、和轮调菩萨，共白佛言：“佛般泥洹去，却后乱世时，是经卷者，我辈自共护持，使佛道久在。其有未闻者，我辈当共为说，教授是深经。世间少有信者，我曹悉受之。”

时五百人从座起，比丘、比丘尼、优婆塞、优婆夷，皆叉手于佛前往白佛：“佛般泥洹后乱世时，闻是三昧悉自持护。愿持我五百人嘱累是八菩萨。”

时佛笑，口中金色光出，至十方不可计佛国，悉照明还绕身三匝从头上入。阿难从座起更被袈裟，前至佛所为佛作礼，却住叉手，以偈赞曰：

“其心清净行无秽， 神通无极大变化，
已过诸碍超众智， 光明除冥去垢尘。
智慧无量心普解， 佛天中天鹞鸭音，
一切外道莫能动， 何缘而笑出妙光？
愿正真觉为解说， 慈愍一切众生尊，
若有闻佛柔软音， 解释达圣化俗行。
世尊所感非唐举， 众圣导师不妄笑，

今者谁当在决中？ 世雄愿为解此意。
今日谁住道德坚？ 谁当逮得兴妙行？
谁今受得深法藏， 无上道德众所归？
今日谁当愍世间？ 谁当奉受是法教？
谁坚立于佛智慧？ 世尊愿为解说之。”

佛尔时为阿难说偈言：

“佛语阿难汝见不？ 五百人等在前立，
其心欢然歌颂曰： 我等亦当逮是法。
颜色和悦敬礼佛： 我等何时得如是？
皆悉竦立嗟叹佛： 我辈会当逮如是。
五百人等今现在， 名字虽异本行同，
常乐奉受是深经， 于当来世亦复然。
今我嘱累告汝等， 佛慧无量知彼本，
是等不独见一佛， 亦不立此得其慧。
彻照彼之宿世命， 以曾更见八万佛，
五百人等存在道， 常解经义勉行成。
劝助无数诸菩萨， 常行慈哀护经法，
劝化一切众人民， 悉令逮得大道行。
知见过去诸世尊， 睹八十亿那术数，
名德普大脱于心， 拥护是法三转行。
现世于此受我教， 分布供养是舍利，
安谛受习佛所化， 皆悉讽诵有所付。

著于塔寺及山中， 若付天龙乾陀罗，
各各转授经卷已， 寿命终讫生天上。
天上寿尽还世间， 各各而生异种性，
当复取此佛道行， 分别是经如所愿。
用爱乐斯经法故， 求辄得之持奉行，
令无数人得听闻， 欣踊难量心无等。
是等黠慧不厌法， 非贪躯体及寿命，
降伏一切诸外道， 授与经法弘其志。
是经法者无能得， 及持讽诵讲说者，
今四辈人住我前， 五百之众能堪持。
是八菩萨跋陀怱， 罗邻那竭那罗达，
摩诃须萨和轮调， 因坻须深憍曰兜。
比丘及尼清信士， 奉玄妙法上义句，
常以经道哀世间， 宣畅方等普流化。
跋陀怱等八菩萨， 于五百众为英雄，

常当奉持方等经，于世之俗无所著。
释一切缚解空慧，紫磨金色百福相，
恒行慈哀度众生，施以安隐灭诸尘。
寿终之后生法家，不复归于三恶道，
世世相随常和协，然后逮得尊佛道。
已弃舍于八难处，远离一切诸恶道，
其功德行莫能称，所受福祐无能量。
当复值见弥勒佛，咸同一心往自归，
悉共供养等慈哀，逮于无上寂灭句。
其心金然而和同，正意奉事人中尊，
不依俗事得法忍，疾逮无上大道行。
彼常奉持此经法，夙兴夜寐而讽诵，
植众功德修梵行，睹弥勒时义若此。
于是贤劫所兴佛，慈哀世间放光明，
每所在处普持法，奉事去来现在佛。
皆悉供养诸世雄，见三世尊无众毒，
当疾逮得尊佛道，不可思议无有量。
中有前得佛道者，后人展转相供养，
不可计劫那术数，如是终竟乃断绝。
于是居士跋陀耆，罗邻那竭那罗达，
及须萨和憍曰兜，曾见诸佛如恒沙。
彼当奉事正法化，宣布诸佛无亿教，
道行无量不可称，至于无数亿劫中。
假使有人受持名，所周旋处若梦中，
如是勇猛导世间，皆当逮得无上道。
若有睹见及闻声，其心欣然踊跃者，
皆得佛道不复疑，何况奉受供养者！
若嗔恚之及骂詈，持恶意向挝捶者，
于是八人威神恩，当使得佛况恭敬！
彼所受法不可议，名称无量及寿命，
光明无限德无疑，智慧无量行亦然。
常得面见无量佛，清净之戒如恒沙，
于是广普行布施，以用求索无上道。
无数亿劫说其福，莫能齐限厥功德，
受是经法诵习者，逮于大道不复难。
其有爱乐此经卷，受诵讽持讲说者，
当知五百人中人，其心爱乐终不疑。
假使施得是经法，爱乐道义加精进，
行清净戒除睡卧，逮是三昧终不难。
欲获安隐布经戒，比丘受学在闲居，

常行分卫知止足，逮是三昧终不难。
舍离众闹不受请，口莫贪味弃爱欲，
所从闻是经法者，敬如世尊常供事。
除去悭贪受是法，断绝淫欲弃愚痴，
发起大道心无疑，然后学行是三昧。
行无所著舍诸欲，常自谨慎弃恚恨，
精进奉行佛法教，然后受学是三昧。
不贪男女及所有，远离憍慢并妻妾，
居家修道常惭愧，然后学诵是三昧。
无贼害心行柔顺，不乐谤讪舍诸恶，
不用色求得法忍，当善讽诵是三昧。
若比丘尼学是法，常当恭敬弃憍慢，
远离调戏及贡高，得是三昧不复难。
常行精进除睡卧，不计吾我诸人物，
爱乐法者不惜命，然后学诵是三昧。
制淫劬意舍所著，无嗔恚心弃谄谀，
终不复堕魔罗网，持是三昧得如是。
于诸众生行平等，除去放逸众尘埃，
性无卒暴及粗言，然后学诵是三昧。
于钵震越及衣服，不得须臾有贪爱，
尊敬善师视如佛，然后学诵是三昧。
以逮善利离恶道，一心信乐佛法教，
远离一切八难处，持是经者得如是。”

拥护品第八

跋陀怱菩萨、罗邻那竭菩萨、憍曰兜菩萨、那罗达菩萨、须深菩萨、摩诃须萨和菩萨、因坻达菩萨、和伦调菩萨，见佛所说，是八菩萨皆大欢喜，持五百劫波育锦衣，持珍宝布施，持身自归供养佛。

佛语阿难：“是跋陀怱等，于五百菩萨人中之师，常持中正法，合会随顺教莫不欢喜者，欢乐心、随时心、清净心、却欲心。”

是时，五百人皆叉手立佛前。跋陀怱菩萨白佛言：“菩萨持几事得是三昧？天中天。”

佛言：“菩萨有四事疾得是三昧。何等为四？一者、不信余道，二者、断爱欲，三者、如法行，四者、无所贪生。是为四，菩萨疾得是三昧。”

佛告跋陀怱：“若有菩萨学是三昧者，若持若诵若守，今世即自得五百功德。譬如，跋陀怱，慈心比丘终不中毒，终不中兵，火不能烧，入水不死，帝王不能得其便；如是菩萨守是三昧者，终不中毒，

终不中兵，终不为火所烧，终不为水所没，终不为帝王得其便。譬如，跋陀怱，劫尽坏烧时，持是三昧菩萨者，正使堕是火中，火即为灭，譬如大罍水灭小火。”

佛告跋陀怱：“我所语无有异！是菩萨持是三昧者，若帝王、若贼、若水、若火、若龙、若蛇、若阅叉鬼神、若猛兽、若大蟒、若蛟龙、若师子、若虎、若狼、若狗、若人、若非人、若[𧇖+加]𧇖、若薜荔、若鸠𧇖鬼神，若欲烧人，若欲杀人，若欲夺人钵、震越，若坏人禅夺人念，设欲中是菩萨者终不能中。”

佛言：“如我所语无有异！除其宿命不请，其余无有能中者。”

佛言：“我所语无有异！若有菩萨持是三昧者，终不病目若耳鼻口，身体无病，其心终不忧终不厄。是菩萨若死若近死，设有是患者，佛语为有异，除其宿命所作。”

“复次，跋陀怱，是菩萨诸天皆称誉，诸龙皆称誉，诸阅叉鬼神皆称誉，诸阿须轮皆称誉，迦留罗鬼神、真陀罗鬼神、摩睺勒鬼神、若人非人皆称誉是菩萨，诸佛天中天皆称誉是菩萨。复次，跋陀怱，是菩萨为诸天所护，为诸龙所护，四天王、释提桓因、梵三钵天皆护是菩萨，阅叉鬼神、乾陀罗鬼神、阿须伦鬼神、迦留罗鬼神、真陀罗鬼神、摩睺勒鬼神、若人非人皆共拥护是菩萨，诸佛天中天皆共拥护是菩萨。复次，跋陀怱，是菩萨为诸天所敬爱，诸龙、阅叉鬼神、乾陀罗鬼神、阿须伦鬼神、迦留罗鬼神、真陀罗鬼神、摩睺勒鬼神、若人非人皆共敬爱是菩萨，诸佛天中天皆无有爱欲，以道德故皆复敬爱是菩萨。复次，跋陀怱，是菩萨诸天皆欲见之，诸龙、阅叉鬼神、乾陀罗鬼神、阿须伦鬼神、迦留罗鬼神、真陀罗鬼神、摩睺勒鬼神、若人非人皆思乐欲见是菩萨，诸佛天中天皆各各欲使是菩萨往到其所，用人民故欲使往。复次，跋陀怱，是菩萨诸天皆来至其所，诸龙、阅叉鬼神、乾陀罗鬼神、阿须轮鬼神、迦留罗鬼神、真陀罗鬼神、摩睺勒鬼神、若人非人皆来至是菩萨所，与共相见。诸佛天中天，菩萨不但昼日见，夜于梦中，若见诸佛身，若诸佛各各自说其名字。”

“复次，跋陀怱，是菩萨所未诵经，前所不闻经卷，是菩萨持是三昧威神，梦中悉自得其经卷名，各各见悉闻经声。若昼日不得者，若夜于梦中悉见得。”

佛告跋陀怱：“若一劫若复过一劫，我说是菩萨持是三昧者，说其功德不可尽竟，何况力求得是三昧者！”

佛尔时颂偈言：

“若有菩萨学诵是， 佛说三昧寂定义，
假使欲叹其功德， 譬如恒边减一沙。
刀刃矛戟不中伤， 盗贼怨家无能害，
国王大臣喜悦向， 学此三昧得如是。
虺蛇含毒咸可畏， 见彼行者毒疾除，

不复嗔恚吐恶气， 诵是三昧得如是。
怨仇嫌隙莫能当， 天龙鬼神真陀罗，
睹其威光皆默然， 学此三昧得如是。
山野獬豸及大蟒， 师子猛虎鹿[豸+加]獾，
无伤害心摄藏毒， 悉来亲护是行者。
弊恶鬼神将人魂， 诸天人民怀害心，
感其威神自然伏， 学此三昧得如是。
其人不病无苦痛， 耳目聪明无暗塞，
言辞辩慧有殊杰， 行三昧者速逮是。
其人终不堕地狱， 离饿鬼道及畜生，
世世所生识宿命， 学此三昧得如是。
鬼神乾陀共拥护， 诸天人民亦如是，
并阿须伦摩睺勒， 行此三昧得如是。
诸天悉共颂其德， 天人龙鬼真陀罗，
诸佛嗟叹令如愿， 讽诵说经为人故。
其人道意不退转， 法慧之义而无尽，
姿颜美艳无与等， 诵习此经开化人。
国国相伐民荒乱， 饥馑荐臻怀苦穷，
终不于中天其命， 能诵此经化人者。
勇猛降伏诸魔事， 心无所畏毛不竖，
其功德行不可议， 行此三昧得如是。
妖蛊幻化及符咒， 秽浊邪道不正行，
终无有能中其身， 用爱乐法达本故。
一切悉共歌其德， 具足空慧佛尊子，
然后当来最末世， 手得是经得如是。
常行精进怀喜踊， 同心和悦奉此法，
受持经卷讲讽诵， 今我以是为彼说。”

罽罗耶佛品第九

佛告跋陀耶：“乃往昔时不可计阿僧祇劫，尔时有佛，名罽罗耶佛。佛怛萨阿竭阿罗诃三耶三佛，于世间极尊，安定于世间，于经中大明，天上天下号曰天中天。尔时有长者子名须达，与二万人俱，来至罽罗耶佛所，为佛作礼却坐一面。须达长者子问罽罗耶佛是三昧，罽罗耶佛知须达长者子心所念，便为说是三昧。须达长者子闻是三昧已大欢喜，即悉讽受得作沙门，求是三昧八万岁。时长者子须达，从佛闻经甚众多，悉从无数佛闻经，其智慧甚高明。长者子须达，其后寿终生忉利天上，以后复从天上来下生世间。尔时故劫中复有佛，名术闍波提怛萨阿竭阿罗诃三耶三菩。时佛在刹利家生，尔时长者子须

达，复于佛所闻是三昧复求之。时长者子须达，其后复于故劫中复有佛，名赖毗罗耶怛萨阿竭阿罗诃三耶三佛，婆罗门种。时长者子须达，复于佛所受是三昧，求守八万四千岁。”

佛告跋陀耶：“长者子须达，却后八万劫得作佛，名提和竭罗。尔时长者子须达，为人高明勇猛智慧甚广。”

佛言：“见是三昧不？跋陀耶，饶益乃尔，使人成就得佛道。若有菩萨得是三昧者，当学诵、当持、当教人、当守，如是者得佛不久。若曹知不？跋陀耶，是三昧者是菩萨眼、诸菩萨母，诸菩萨所归仰，诸菩萨所出生。汝知不？跋陀耶，是三昧者破去于冥，明于天上天下。若知不？跋陀耶，是菩萨三昧者，是诸佛之藏、诸佛之地，是珍宝渊海之泉，是无量功德之镇益。明哲之经，当作是知三昧所出，如是从中出佛，闻经正立于四意止中。何等为四意止中？一者、自观身、观他人身，自观身、观他人身者，本无身；二者、自观痛痒、观他人痛痒，自观痛痒、观他人痛痒者，本无痛痒；三者、自观意、观他人意，自观意、观他人意者，本无意；四者、自观法、观他人法，自观法、观他人法者，本无法。”

佛告跋陀耶：“是三昧谁当信者？独怛萨阿竭阿罗诃三耶三佛、阿惟越致、阿罗汉，乃信之耳！有愚痴迷惑心者，离是现在佛前立三昧远。何以故？是法当念佛，当见佛。”

佛告跋陀耶：“是菩萨当念佛、当见佛、当闻经，不当有著。何以故？佛本无是法无所因。何以故？本空无所有，各各行自念，是法中无所取，是法无所著，如空等甚清净。是法人所想，了无所有。法无所有故，所因者空耳！如泥洹，是法无所有，本无是法，无所从来，亦无所从去。人本无，是法不著者近，有著者远。”

佛告跋陀耶：“若有守是三昧者，因想入无想中，见佛念佛，守觉闻经念法，守觉不得念我，不得著法。何以故？有守觉，跋陀耶，有守觉不见佛，有所著如毛发不得法，施他人有所希望为不施，持戒有所希望为不净，贪于法不得泥洹，于经中有谗诤不得为高明。乐于众会中，喜于余道，终不能得一行。于欲中念，虽有嗔恚不能忍辱，有所憎恶不得说他人，善求阿罗汉道者，不得于是见现在佛悉在前立三昧中，不逮无所从来生法乐于中立，有所著不得空。菩萨终不得恹贪，有懈怠不得道，有淫劬不入观，有所念不入三昧。”

佛尔时颂偈言：

“是等功德不可计， 奉戒具足无瑕秽，
其心清净离垢尘， 行此三昧得如是。
设有持是三昧者， 智慧普大无缺减，
博达众义常不忘， 功德之行如月明。
设有持是三昧者， 解了觉意不可议，
晓知无量之道法， 无数诸天护其德。”

设有持是三昧者，常自面见无数佛，
闻无量佛讲说法，辄能受持念普行。
设有持是三昧者，恶罪勤苦皆灭除，
诸佛于世行愍哀，悉共嗟叹是菩萨。
假使菩萨欲睹佛，当来无数佛世尊，
一心踊跃住正法，当学讽诵是三昧。
其有持是三昧者，其功德福不可议，
逮得人身最第一，出家超异行分卫。
若有末后得是经，逮功德利最第一，
得其福祚不可限，住是三昧得如是。”

般舟三昧经卷下

请佛品第十

跋陀怱菩萨整衣服，长跪叉手白佛言：“我欲请佛及比丘僧，明日于舍食，愿佛哀受请。”佛及比丘僧默然悉受请。

跋陀怱菩萨知佛已受请，起至摩诃波喻提比丘尼所，白比丘尼言：“愿受我请，明日与比丘尼俱，于舍小饭。”摩诃波喻提比丘尼即受请。

跋陀怱菩萨语罗邻那竭菩萨：“舍弟，诸郡国其有新来人，悉请会佛所。”罗邻那竭菩萨前至佛所，为佛作礼，长跪叉手白佛言：“我兄请佛，所有新来人，悉欲请于舍食，愿哀受之。”

跋陀怱菩萨、罗邻那竭菩萨、憍白兜菩萨、那罗达菩萨、须深菩萨、摩诃须萨和菩萨、因坻达菩萨、和伦调菩萨，悉与宗亲俱，前以头面著佛足，及为比丘僧作礼。作礼已，竟从佛所去，归到罗阅祇国，至跋陀怱菩萨家，共相佐助作诸饭具。四天王、释提桓因、梵三钵，皆共疾来，佐助跋陀怱菩萨作众饭具。

尔时，跋陀怱菩萨，宗亲共庄严罗阅祇国，持若干种杂缯帐覆一国中，其街巷市里皆悬缯幡，举一国中悉散华烧香，作百种味饭具用佛故。比丘僧、比丘尼、优婆塞、优婆夷，及诸贫穷乞丐者，其饭具适等。何以故？不有偏施，于人民及蜎飞蠕动之类悉平等。

跋陀怱与八菩萨，与诸宗亲，以饭时俱往诣佛前，以头面著佛足，却白佛言：“饭食具以办，愿佛可行。”时佛与比丘僧，皆著衣持钵，俱诣来会者，皆随佛入罗阅祇国中，到跋陀怱菩萨家。

跋陀怱菩萨作是念：“今佛威神故，令我舍极广大，悉作琉璃，表里悉相见，城外悉见我舍中，我舍中悉见城外。”佛即知跋陀怱心所念。佛便放威神，令跋陀怱舍极广大，举一国中人民，悉见于舍中。佛前入跋陀怱菩萨家坐，比丘僧、比丘尼、优婆塞、优婆夷，各各异部悉坐于舍中。跋陀怱菩萨见佛比丘僧坐已，自供养佛、比丘

僧，若干百种饭手自斟酌。佛及比丘、比丘尼、优婆塞、优婆夷，皆已乃饭。诸贫穷者悉等与，悉各平足，皆持佛威神恩使之足。跋陀耶菩萨，见佛诸弟子悉饭已，前行澡水，毕竟持一小机，于佛前坐听经。为跋陀耶菩萨及四辈弟子说经，莫不欢喜者，莫不乐闻者，莫不欲闻者。佛以经请比丘僧及诸弟子，佛起与比丘僧俱去。

跋陀耶菩萨饭已，与宗亲俱，出罗阅祇国到佛所，前为佛作礼，皆却坐一面。及罗邻那竭菩萨、桥日兜菩萨、那罗达菩萨、须深菩萨、摩诃须萨和菩萨、因坻达菩萨、和伦调菩萨、跋陀耶菩萨，见人众皆安坐已前问佛：“菩萨用几事得见现在佛悉在前立三昧？”

佛告跋陀耶菩萨：“菩萨有五事，疾得见现在佛悉在前立三昧，学持谛行心不转。何等为五？一者、乐于深经无有尽时不可得极，悉脱于众灾变去，以脱诸垢中，以去冥入明，诸朦胧悉消尽。”

佛告跋陀耶：“是菩萨逮得无所从来生法乐，逮得是三昧。复次，跋陀耶，不复乐所向生，是为二。不复乐喜于余道，是为三。不复乐于爱欲中，是为四。自守行无有极，是为五。”

“菩萨复有五事，疾得是三昧。何等为五？一者、布施心不得悔，无所贪，无所惜，从是不得有所希望，施人已后不复恨。复次，跋陀耶，菩萨持经布施，为他人说经，所语者安谛，无有疑，无所爱惜，说佛深语身自行立是中。复次，跋陀耶，菩萨不嫉妬，所作无有疑，却睡卧，却五所欲，不自说身善，亦不说他人恶。若有骂者，若有形者，亦不得恚，亦不得恨，亦不得瞋。何以故？入空行故。复次，跋陀耶，菩萨是三昧自学复教他人，书是经著好正素上使久在。复次，跋陀耶，菩萨所信多乐，敬长老及知识，于新学人若得所施，当念报恩，常有识信，受人小施念报大，何况于多者！菩萨常乐重于经，弃捐无反复之意，常念有反复，如是者得三昧疾。”

佛尔时颂偈言：

“常爱乐法在深解， 于诸习欲不贪生，
游步五道无所著， 如是行者得三昧。
好喜布施不想报， 所惠无著不退念，
所与不见有受者， 唯欲得解佛深慧。
愍伤众生行布施， 其心喜勇不悔恨，
常立布施及戒忍， 精进一心智慧事。
具足六度摄一切， 慈悲喜护四等心，
善权方便济众生， 如是行者得三昧。
若有兴施除悭贪， 其心欢踊而授与，
既施之后恒欣喜， 如是行者得三昧。
晓知经法分别句， 闻深要义佛所教，
讲说微妙道德化， 如是行者得三昧。
其人学诵是三昧， 具足解慧为人说，

令此经法得化存，如是行者得三昧。
常不秘奥佛经法，不望供养乃为讲，
唯求安隐佛道地，如是行者得三昧。
除去所著弃诸盖，捐去贡高及慢大，
不自称誉说彼短，终不复起吾我想。
其有寂定意不起，便能解是道定慧，
弃捐谄谀心清净，用是速速不起忍。
常行至诚无绮饰，其愿具足无缺减，
植众正德无邪行，爱乐法者得道疾。
所诵习经常不忘，常护禁戒清净行，
如是行者得佛疾，何况奉是寂三昧！”

佛告跋陀耶菩萨：“往昔无数劫，提和竭罗佛时，我于提和竭罗佛所，闻是三昧即受持是三昧，见十方无央数佛，悉从闻经悉受持。尔时诸佛悉语我言：‘却后无央数劫，汝当作佛，名释迦文。’”

佛告跋陀耶菩萨：“我故语汝，今自致作佛。是三昧若曹当学，为知内法第一，众所不能及，出众想去。其有于是三昧中立者，念得佛道。”

佛尔时颂偈言：

“忆念我昔定光佛，于时逮得是三昧，
即见十方无数佛，闻说尊法深妙义。
譬有德人行采宝，所望如愿辄得之，
菩萨大士亦如是，经中求宝即得佛。”

跋陀耶菩萨白佛：“当云何守是三昧？天中天。”

佛告跋陀耶菩萨：“色不当著，不当有所向生，当行空，是三昧当守。何等为三昧？当随是法行。复次，跋陀耶，菩萨自观身无身，亦无所观，亦不见，亦无所著，本亦无所盲，亦无所聋。如经中法，视住亦无所见，亦无所著，无所著为守道者；于法中无所疑，不疑者为见佛，见佛者为疑断。诸法无所从来生。何以故？菩萨有法疑想便为著。何等为著？有人、有寿命、有德、有阴、有人、有对、有想、有根、有欲，是为著。何以故？菩萨见诸法无所著，是念亦不见。何等为不见？譬如愚人学余道自用，有人谓有身，菩萨不作是见。菩萨何等为见？譬如怛萨阿竭阿罗诃三耶三佛、阿惟越致、辟支佛、阿罗汉所见，不喜不忧；菩萨如是见，亦不喜亦不忧；守是三昧，亦不喜亦不忧。譬如虚空，无色无想，清净无瑕秽；菩萨见诸法如是，眼无所挂碍见诸法，用是故见诸佛。见诸佛如以明月珠持著琉璃上，如日初出时，如月十五日在众星中央时，如遮迦越王与诸群臣相随时，如忉利天王释提桓因在诸天中央时，如梵天王在众梵天中央最高坐，如

炬火在高山顶烧，如医王持药行愈人病，如师子出独步，如众野鹰飞行虚空中道有导，如冬月高山上积雪四面皆见，如天地大界金刚山却臭秽，如下水持地，如风持水，诸秽浊悉清净，如虚空等，如须弥山上忉利天为庄严，诸佛如是，佛持戒，佛威神佛功德，无央数国土悉极明；是菩萨见十方佛如是，闻经悉受得。”

佛尔时颂斯偈言：

“佛无垢秽离尘劳，功德众竟无所著，
尊大神通妙音声，法鼓导义喻诸音。
觉天中天脱诸慧，种种香华以供养，
以无数德奉舍利，旛盖杂香求三昧。
闻法普妙学具足，远离颠倒喻灭度，
终不想著于空法，当志解妙无碍慧。
清净如月日出光，譬如梵天立本宫，
常清净心念世尊，意无所著不相空。
譬如冬月高山雪，若如国王人中尊，
摩尼清净超众宝，观佛相好当如是。
如鹰王飞前有导，虚空清净无秽乱，
紫磨金色佛如是，佛子念此供养尊。
去诸幽冥除暗愚，即悉速速净三昧，
捐舍一切诸想求，无垢秽行得定意。
无有尘劳释垢秽，弃去瞋恚无愚痴，
其目清净自然明，念佛功德无碍慧。
思佛世尊清净戒，心无所著不想求，
不见吾我及所有，亦不起在诸色相。
舍离生死无众见，弃舍贡高慧清净，
远除憍慢不自大，闻寂三昧离邪见。
其有比丘佛子孙，信比丘尼清信士，
除去贪欲清信女，念精进学得是法。”

无想品第十一

佛告跋陀耶菩萨：“若有菩萨，欲学是三昧疾得者，当先断色、思想，当弃自贡高；已断思想，已不自贡高，已却当学是三昧。不当诤。何等为诤？诽谤于空是故不当共诤。不当诽谤空，却诵是三昧。”

佛告跋陀耶：“若有菩萨学诵是三昧者，有十事于其中立。何等为十？一者、其有他人，若馈遗钵、震越、衣服者不嫉妬；二者、悉当爱敬人，孝顺于长老；三者、当有反复念报恩；四者、不妄语远离

非法；五者、常行乞食不受请；六者、当精进经行；七者、昼夜不得卧出；八者、常欲布施天上天下，无所惜终不悔；九者、深入慧中无所著；十者、先当敬事善师视如佛，乃当却诵是三昧。是为十事，当如法，作是行者便得八事。何等为八事？一者、于戒清净至究竟；二者、不与余道从事，出入智慧中；三者、于智慧中清净，无所复贪生；四者、眼清净，不复欲生死；五者、高明无所著；六者、清净于精进自致得佛；七者、若有人供养者不用故喜；八者、正在阿耨多罗三藐三菩提不复动。是为八事。”

佛尔时颂偈言：

“有黠慧者不起想， 弃捐贡高及自大，
常行忍辱无粗漏， 尔乃为学是三昧。
智者心明不诤空， 无想寂定是灭度，
不诽谤法莫诤佛， 如是行者得三昧。
明者于是无憍慢， 常念佛恩及法师，
坚住净信志不动， 尔乃为学是三昧。
心不怀嫉远查冥， 不起狐疑常有信，
当行精进不懈怠， 如是行者得三昧。
比丘学是常分卫， 不行就请及聚会，
心无所著不畜积， 如是行者得三昧。
设使手得斯法教， 及持奉行此经卷，
已具足意待如佛， 然后学诵是三昧。
住是至德行诚信， 设有学诵三昧者，
速速疾得是八法， 清净无垢诸佛教。
其清净戒有究竟， 三昧无瑕得等见，
以为空净于生死， 住于是法得具足。
智慧清净无有余， 无秽行者亦不著，
博闻采智舍唐捐， 得行如是为黠慧。
志精进者无所失， 于供养利而不贪，
疾得无上成佛道， 学如是德为明智。”

十八不共十种力品第十二

佛言：“得是上八事者，便获佛十八事。何等为十八事？一者、用其日得佛，用其日般泥洹，从初得佛日，至般泥洹日佛无难；二者、无短；三者、无忘；四者、无不时；五者、终无生法想言我所；六者、无有不能忍时；七者、无有不乐时；八者、无有不精进时；九者、无有不念时；十者、无有不三昧时；十一者、无有不知时；十二者、无有不脱见慧时；十三者、过去无央数世事无有能止佛

无所挂碍所见慧时；十四者、当来无央数世事无有能止佛无所挂碍所见慧时；十五者、今现在十方无央数世事无有能止佛无所挂碍所见慧时；十六者、身所行事智慧，是本常与智慧俱；十七者、口所言事智慧，是本常与智慧俱；十八者、心所念事智慧，是本常与智慧俱。是为佛十八事。”

佛告跋陀耶：“若有菩萨无所复著，求法悉护学是三昧者，有十法护。何等为十法护？佛十种力。何等为十种力？一者、有限无限悉知，二者、过去、当来、今现在本末悉知，三者、弃脱定清净悉知，四者、诸根精进种种各异所念悉知，五者、种种所信悉知，六者、若干种变无央数事悉知，七者、悉晓了悉知，八者、眼所视无所挂碍悉知，九者、本末无极悉知，十者、过去、当来、今现在悉平等无所适著。”

佛告跋陀耶：“若有菩萨，无所从生法悉护，是菩萨得佛十种力。”

佛尔时颂偈言：

“十八不共正觉法， 世尊之力现有十，
设使奉行是三昧， 疾速逮此终不久。”

劝助品第十三

佛告跋陀耶：“是菩萨持有四事，于是三昧中助其欢喜。过去佛时持是三昧助欢喜，学是经者自致阿耨多罗三耶三菩阿惟三佛，其智悉具足，我助欢喜如是。复次，跋陀耶，当来诸佛，求菩萨道者，于是三昧中助欢喜，学是三昧者自致阿耨多罗三耶三菩阿惟三佛，其智悉具足，其皆助欢喜如是。复次，跋陀耶，今现在十方无央数佛，本求菩萨道时，于是三昧中者助欢喜，学是三昧者自致得阿耨多罗三耶三菩阿惟三佛，其智悉具足，其皆助欢喜福。令其与十方人民，及蜎飞蠕动之类，共得阿耨多罗三耶三菩阿惟三佛，持是三昧助欢喜功德令其疾得是三昧，作阿耨多罗三耶三菩阿惟三佛得不久。”

佛告跋陀耶：“是菩萨功德，于是三昧中四事助欢喜，我于是中说少所譬喻。譬如人寿百岁堕地行，至百岁无有休息时，其人行使过疾风周匝四方上下。云何，跋陀耶，宁有能计其道里者不？”

跋陀耶言：“无有能计其道里者，天中天。独佛弟子舍利弗、罗阿惟越致菩萨，乃能计之耳！”

佛告跋陀耶：“我故语诸菩萨：若有善男子、善女人，取是四方上下诸国土，其所行处，满中珍宝布施与佛，不如闻是三昧。若有菩萨闻是三昧，于是四事中助欢喜，其福出过布施佛者，百倍、千倍、万倍、亿倍！若见不？跋陀耶，是菩萨助欢喜，其福宁多不？用

是故当知之，是菩萨助欢喜，其福甚尊大！”

佛尔时颂偈言：

“于是经教中， 持有四事劝，
过去及当来， 现在诸世尊，
劝助功德行， 度脱诸十方，
蜎飞之蠕动， 悉逮平等觉。
譬如此周匝， 四方及上下，
人生行百岁， 尽寿行不息，
欲有计道里， 其数难度量，
独佛弟子知， 不退转菩萨。
满中珍宝施， 不如闻是法，
四事之劝助， 其福出彼上。
跋陀且观是， 四事之欢喜，
布施亿万倍， 不与劝化等。”

师子意佛品第十四

佛尔时告跋陀耆：“乃去久远世时，其劫阿僧祇，不可计不可数不可量不可极阿僧祇，乃尔时有佛，名私诃摩提怛萨阿竭阿罗诃三耶三佛。其威神无有与等者，安隐于世间，于经中之尊，天上天下号曰天中天。于是国土空闲之处，是阎浮利国土丰熟人民炽盛乐。是时间阎浮利内，纵广十八万拘利那术踰旬。是时间阎浮利内，凡有六百四十万国。尔时间阎浮利有大国名跋登加，其国中有六十亿人，私诃摩提佛在是国中。有遮迦越王名惟斯芩王，往到私诃摩提佛所，为佛作礼却坐一面。时私诃摩提佛，即知其王心所念，便为说是三昧。其王闻是三昧助欢喜，即时珍宝散佛上，其心即念：‘持是功德令十方人民皆安隐。’

“时私诃摩提佛般泥洹后，惟斯芩遮迦越王，其寿终已后，还生王家作太子，名梵摩达。尔时间阎浮利，有比丘高明名珍宝，是时为四部弟子，比丘、比丘尼、优婆塞、优婆夷，说是三昧。梵摩达太子，闻是三昧助欢喜心，踊跃乐喜闻是经，持珍宝直百亿，散是比丘上；复持好衣供养之，以发意求佛道。时与千人俱，于是比丘所剃头须作沙门，即于是比丘所从索学是三昧。与千比丘共，承事师八千岁不休懈前后一反得闻是三昧。

“是比丘辈闻是三昧四事，助欢喜入高明之智；持是助欢喜功德，却后更见六万八千佛，辄于一一佛所闻是三昧，自守学复教他人学。其人持是助欢喜功德，其后得作佛，名坻罗惟是逮怛萨阿竭阿罗诃三耶三佛。时是千比丘，从得阿耨多罗三耶三菩阿惟三佛，皆名坻

罗首罗郁沉怛萨阿竭阿罗诃三耶三佛，教不可计人民皆求佛道。”

佛告跋陀耶：“何人闻是三昧不助欢喜者？何人不学者？何人不为他说者？何人不守者？”

佛告跋陀耶：“若有菩萨，守是三昧者疾速得佛。跋陀耶，若有菩萨在四十里外，闻有持是三昧者，菩萨闻之便当行求往到其所。但闻如有是三昧常当求之，何况乃得闻学者！若去百里者，若远四千里，闻有持是三昧者，当行学到其所，但得闻知，何况乃得闻学者！”

佛言：“去人远者常当自行求，何况去人十里、二十里，闻有持是三昧者，不行求学？跋陀耶，若有菩萨，闻是三昧欲行至彼，闻求三昧者，当承事其师十岁、百岁，悉具足供养瞻视。是菩萨不得自用，当随其师教，常当念师恩。”

佛言：“我故相为说之：若菩萨闻有是三昧处去四千里者，欲往到其所，设不得闻是三昧者。”佛言：“我告若曹，其人用精进行求故，终不复失佛道，会自致作佛。见不？跋陀耶，菩萨闻是三昧念欲求不离，其得利甚尊。”

佛尔时颂偈言：

“我念过去有如来，人中尊号私诃末，
尔时有王典主人，至于彼佛闻三昧，
至意黠慧听此经，心悦无量奉持法，
即以珍宝散其上，供师子意人中尊，
心念如是而叹言：‘我身于此当来世，
奉行佛教不敢缺，亦当速得是三昧。’
用是福愿寿终后，辄复来还生王家，
尔时见尊大比丘，号曰珍宝智博达，
应时从闻是三昧，踊跃欢喜即受持，
供以好物若干亿，珍宝妙衣用道故。
即与千人除须发，秉志乐求是三昧，
同时具足八千岁，常随比丘不舍离。
一反得闻不复二，是三昧者譬如海，
执持经卷讽诵说，其所生处闻三昧。
用积累是功德故，当见诸佛大神通，
其所具足八万岁，所见诸佛辄供养。
曾值诸佛六万亿，加复供养六千尊，
闻所说法大欢喜，然后得见师子佛。
蒙此功德生王家，见佛号曰坚精进，
化无数亿诸人民，度脱一切生死恼。
讽诵学是法以后，便复见佛名坚勇，
天上世间诵其称，闻三昧声得作佛。”

何况受持诵说者，于众世界无所著，
广宣分流是三昧，未曾疑忘于佛道！
此三昧经真佛语，设闻远方有是经，
用道法故往听受，一心讽诵不忘舍。
假使往求不得闻，其功德福不可尽，
无能称量其德义，何况闻已即受持！
设有欲求是三昧，当念往时彼梵达，
教习奉行莫退转，比丘得经当如是。”

至诚佛品第十五

佛言：“乃往昔时复有佛，名萨遮那摩怛萨阿竭阿罗诃三耶三佛。时有比丘名和轮，其佛般泥洹后，是比丘持是三昧。我尔时作国王刹利种，于梦中闻是三昧，觉已便行求持是三昧比丘，即从作沙门，欲得于是比丘所一反闻是三昧。承事师三万六千岁，魔事数数起不得一反闻。”

佛告比丘、比丘尼、优婆塞、优婆夷：“我故语若曹：若曹当疾取是三昧无得忘失，善承事其师，持是三昧至一劫、若百劫、若千劫莫得有懈倦，趣当得是三昧。守善师不离，若饮食、资用、衣服、被、床卧，千万珍宝以用上师，供养于师无所爱惜。设无有者当行乞食给趣，当得是三昧莫厌。”

佛言：“置是所供养者此不足言耳！常当自割其肌供养于善师，常不爱惜身，何况其余！当承事善师如奴事大夫。求是三昧者当知是，得是三昧已当坚持，常当念师恩。”

佛言：“是三昧难得值，正使求是三昧至百亿劫，但欲得闻其名声不能得闻，何况得学者，转复行教人？正使如恒边沙佛刹，满其中珍宝持用布施，其福宁多不？不如书是三昧持经卷者，其福极不可计！”

佛尔时颂偈言：

“我自识念往世时，其数具足六万岁，
常随法师不舍离，初不得闻是三昧。
有佛号曰其至诚，时知比丘名和轮，
彼佛世尊泥洹后，比丘常持是三昧。
我时为王君子种，梦中逮闻是三昧，
和轮比丘有斯经，王当从受此定意。
从梦觉已即往求，辄见比丘持三昧，
即除须发作沙门，学八千岁一时闻。
其数具足八万岁，供养奉事此比丘，

时魔因缘数兴起，初未曾得一反闻。
是故比丘比丘尼，及清信士清信女，
持是经法嘱汝等，闻是三昧疾受行。
常敬习持是法师，具足一劫无得懈，
勿难千亿用道故，当得闻是法三昧。
衣服床卧若干亿，比丘家家行乞食，
以用供养于法师，精进如是得三昧。
灯火饮食所当得，金银珍宝供养具，
尚当自割其肌肉，以用供养况饮食！
明者得法疾持行，受学经卷有反复，
是三昧者难得值，亿那术劫常当求。
所周旋处闻是法，当普宣示诸学者，
假使亿千那术劫，求是三昧难得闻。
设令世界如恒沙，满中珍宝用布施，
若有受是一偈说，敬用功德过于彼！”

佛印品第十六

佛于是语跋陀耶：“若有菩萨闻是三昧，闻者当助欢喜当学。得学者持佛威神使得学，当好书是三昧著素上，当得佛印印，当善供养。何等为佛印？所识不当行，无所贪，无所求，无所想，无所著，无所愿，无所向生，无所适，无所生，无所有，无所取，无所顾，无所往，无所碍，无所有，无所结，所有尽，所欲尽，无所从生，无所灭，无所坏，无所败，道要道本。是印中，阿罗汉、辟支佛不能坏、不能败、不能缺，愚痴者便疑是印，是印是为佛印。”

佛言：“今我说是三昧时，千八百亿诸天、阿须轮、鬼、神、龙、人民皆得须陀洹道，八百比丘皆得阿罗汉道，五百比丘尼皆得阿罗汉道，万菩萨皆逮得是三昧，皆逮得无所从生法乐于中立，六万二千菩萨不复还。”

佛语舍利弗、罗摩目犍连、比丘阿难、跋陀耶菩萨、罗邻那竭菩萨、憍曰兜菩萨、罗达菩萨、须深菩萨、摩诃须萨和菩萨、因坻达菩萨、和轮调菩萨，佛言：“我从无央数劫求佛道以来，今已得作佛，持是经嘱累若曹，学诵持守无得忘失。若有跋陀耶菩萨学是三昧者，当具足安谛学。其欲闻者当具闻，为他人说者当具说。”

佛说经已，跋陀耶菩萨等，舍利弗、罗摩目犍连、比丘阿难等，诸天、阿须轮、龙、神、人民，皆大欢喜，前为佛作礼而去。

阿差末菩萨经卷第一

闻如是：一时，佛在如来所游居士，于宝严净巍巍道场，悉是正觉之所建立，大德庄严而依积累神妙行业，成佛报应诸菩萨宫，宣扬无量如来变化，入无底慧游于殊胜，心怀悦豫，剖判平等，所修圣行，咨嗟当来，无际功勋名称无限，平等正觉以成佛道，善转法轮，开化无数诸学门徒，而于诸法常得自在，知众生性晓了诸根度于彼岸，随时方便除诸挂碍，佛事无处住无所住。与大比丘众六百万人俱，心行和安，消灭尘劳恩爱众弊，则是如来为法王子，修深奥法因正法生，威仪礼节进止光光，为大众祐亲归如来。复与无极诸菩萨俱，其数甚多不可称限，一切大圣神通已达，逮得总持辩才无碍，神智妙达不可攀喻，一心念顷游无量国，供养十方诸如来众，明识所奉听法无厌咨受奉宣，常怀勤修训诲群黎权智普备，所度无极立无盖门，皆越妄想无应不应，近一切智诸通慧地。其名曰：天明菩萨、选战菩萨、照藏菩萨、除慢菩萨、勇步菩萨、眼根菩萨、离言菩萨、除冥菩萨。如是等类菩萨会者，浩浩皓皓不可思议德皆如是。

尔时，世尊入诸菩萨所愿成行，其法名曰无阴盖门，净诸开士严妙道场，正觉法力具无所畏，圣慧之室游于诸法而得自在，摄总持印，晓了辩才，所入道门以大神通普至启明，讲畅分别不退法轮等御诸乘，通一法界无所破坏，颁宣众生诸根意性，敏达坚要决一切法，降伏魔场随应顺法皆能开化，尘劳结著迷惑邪见六十二疑，阐无碍智明解无际，所劝助业寻为发遣，入于诸佛平等道慧，无施无望无处所门，演说诸法如审真谛，等处有想及与无想，晓了深奥十二缘起，积功累德不可称限，庄严诸佛身口意行，志得由身所知无尽，修四圣谛，教授声闻身心静寂，化缘觉乘逮一切智，具阿惟颜兴大乘学，入一切法恣已独步，叹咏如来功勋之德，随时宣示委靡抚恤训诲以渐，导阐法藏显其处所，除斯微翳开示明曜。世尊陶演讲释法教，使普流布周于十方。

于时，东方自然出现大金色光。其光照此宝净道场，及曜三千大千世界靡不周遍。大明曜皆蔽此土，日月释梵及四天王，所有威曜悉不复现；大神妙天诸尊巍巍，天、龙、鬼、神、捷沓和、阿须伦、迦留罗、真陀罗、摩睺勒，光明悉歇；诸明月珠焰光宝珠，大火锭燎悉亦消灭。如来至真无极大光，诸阿惟颜菩萨身明独显现耳！其余一切所有光明皆没不现。此大千国回远悬绝窈隐闇冥，日月光明虽为广，威神巍巍不能及逮，照于彼乡悉蒙光辉。其明不碍树木、墙壁、须弥大山、雪山、黑山、目邻山、大目邻山、铁围山、大铁围山，其明通过照于三千大千世界，至无择狱极于上方。地狱、饿鬼、畜生中

者，其身皆荷此道明曜，众苦悉除，恼痛休息，身心为安，各相庆贺自谓遭时。于佛左侧宝净道场，寻自然生六十亿垓七宝莲华。其香芬馥普悉流布，闻莫不欢。其华柔软大如车轮，光色炜晔叶无数亿，百千宝成其形正圆，而斯华上施交露帐校饰珠盖。其华所演甘美好熏，悉遍三千大千世界。此三千国诸天人民所有名香，值斯华香悉亦消索。天上世间所游居类，荷此华香咸乐法香不好爱欲。

于时，贤者舍利弗，睹如是像无极光明清静莲华，惊喜无量，即从座起行诣佛所，长跪叉手问世尊曰：“今者所睹为何瑞应？现如是像显大光明，清静莲华不可称计，自昔已来未曾见闻？”

佛告舍利弗：“有一菩萨名阿差末从东方来，与六十亿菩萨俱，与眷属围绕欲至此土故前现瑞。”佛说未久，阿差末菩萨应时现身，与六十亿菩萨俱进，则以菩萨无极威神显大神足开土变化震动佛国，奋大晖曜雨众华香，亦复俱作百千伎乐，至于宝净广普道场，往诣佛所，住上虚空如处于地，叉手自归，以一音声请告三千大千世界，则以义偈赞世尊曰：

“圣雄舍贪欲，鲜洁无垢染，
其慧除窈冥，施以清静眼。
断三垢劳倦，消尽众瑕疵，
永灭诸尘劳，今故稽首佛。
弃去所破坏，化裂愚痴网，
圣主有十力，畏者悉降伏。
超越于众会，舍寂三放逸，
独步如师子，所游无恐惧。
其离垢光明，无所不照曜，
普念于一切，济度众瑕秽。
无明在蔽隐，消除诸闇塞，
其光所照曜，如日出于云。
见众人孤苦，则为兴愍哀，
蠲除老病死，无救为设护。
导师诱众生，弘慈常愍哀，
其所修行业，如医疗诸疾。
尊舍利御众，化无明愚愍，
闻已他人患，度之如船师。
化无数尘劳，所兴众妄想，
其所游居处，无著如莲华。
了一切诸法，本净是寂寞，
口所演音声，悉从因缘生。
无本横造作，由习而致此，
愍世怀慈哀，降训于众生。

归命如虚空，见一切如此，
处在于世法，不动如大山。
众生因无觉，习行不要业，
虽游习居处，皆度生死难。
道眼甚鲜明，犹如青莲华，
其威神巍巍，如月之盛满。
一切世间人，咸共咨嗟德，
舍恼不乐俗，以故稽首佛。”

于是阿差末，与六十亿菩萨，颂此偈赞佛已，从虚空下稽首佛足，绕圣七匝却坐莲华。

时，舍利弗承佛威神，而前问言：“唯然，世尊，阿差末菩萨为从何来？其佛所号？国土何类？世界远近去是几所？”

佛言：“汝自以此问阿差末，当见发遣。”

时，舍利弗问阿差末：“仁族姓子，所从来处去此远近？其佛所号？世界云何？”

时，阿差末报舍利弗：“耆年续有去来想乎？”

舍利弗曰：“唯族姓子，吾想已断。”

阿差末曰：“唯舍利弗，其想断者志不怀二，何缘兴念而发此问从何所来？唯舍利弗，其有来者为合会迹，假使去者为别离迹；若令不会无别离者，彼无去来，其无去来为圣道行。唯舍利弗，其有来者自然造相，若有去者罪福尽相，计罪福者为自然相；若于罪福尽诸相者则无有相，无往相者圣道所趣。唯舍利弗，其有来者谓所愿相，若有往者离于所愿；其所愿相离所往相则圣道相。唯舍利弗，其有来者为起生相，若有往者则为灭相；除生往相不起不灭，无所往者则圣道相。唯舍利弗，其有来者为训诲门，若有往者教授尽索；生无教授无尽之门则趣圣道。唯舍利弗，若有往来则堕于俗，无有去来乃谓为道。唯舍利弗，以消去来，除于当来及诸境界，乃趣圣道。唯舍利弗，其有来者为现在相，若有去者为是离相；至于现在及去离相则趣圣道。唯舍利弗，其有来者为是报应缘起之相，若有去者尽报应相；无有报应不起不灭，至于无相乃趣圣道。唯舍利弗，其有来者随俗缘合而致径路，若有去者谓是音声言教文字为径路也；设除音声文字因缘径路则趣圣道。”

时，舍利弗问阿差末：“唯族姓子，吾今以此仁有辩才故欲相问。所以然者？欲得听采本所未闻。犹族姓子，关尹主者，应得推问出入往反，设有重货，若复空行，欲得责税故宜难诘：‘卿何所赍？以时输税！’唯族姓子，吾亦如是鄙等徒类为声闻种，依倚他音而得解脱，合与缘响常宜咨受。诸正士等以用护斯将养大乘，从是出生声闻、缘觉。以是之故，善哉族姓子！为分别说所从来处？去此远近？如来国土号字云何？”

阿差末曰：“唯舍利弗，如来在前，便可启问！当为发遣，众会被蒙决诸疑网。”

时，舍利弗前问佛言：“阿差末菩萨所从来处去是远近？其佛所号？国土何类？其闻名者无央数人，咸发道意被大德铠。”

佛言：“舍利弗，谛听善思！彼世界名有称功勋，及如来号若有闻者，勿得怀疑，悉共信之。”

“如来至真无所挂碍亦无阴盖，一切敏达靡不通畅。”咸言受教。

佛告舍利弗：“东方去此度十江沙，诸佛国土满中诸尘，过若干刹有世界，名阿尼弥沙，彼有佛号三曼跋陀如来至真等正觉，现在说法。不眴世界无有声闻、缘觉之名，世尊圣众纯诸菩萨，于往古世造行已备，布施调意，安庠圣哲，禁戒博闻寂无放逸，止足功勋建立闲静，以忍辱力心不怀害，坚固精进积功累德，每生劬励，普皆禅思脱门三昧而正受矣！以神通慧而自娱乐，以无极智光明之曜随时分别班宣一切章句义理，所怀慈心等如虚空，其哀坚强愍于众生，知其志性而开化之。其喜悦者，为雨甘露道法之味，雪除一切嗔恨怨结。其行护者离于二乘，以空无想立无愿法，拔济尘劳众魔秽浊危害之患。明识众生根本所趣十二缘起，观察其疾应病与药；执御斯心平等恒一，如地水火风无有憎爱；降弃一切众邪异学，若干法战坚峙幢幡，犹如勇将大军之师折伏严敌。入于深觉诸佛正法，十力无畏，离二品会，顺从因缘有无之业，超越诸见中间之行，弃捐吾我及人寿命有无处所反真向伪倒见之本。诸经典门，如来法王法印印之，所演辩才无所挂碍，于无央数亿百千劫所畅音辞无能障塞使不通流。以佛神足感化无量佛国，周旋往反终而复始，晓了随时，蠲除一切恐惧嗔恚憍慢自大，所演音声如师子吼，亦如雷震。察于众生上中下行，坚固亲友永立究竟灭度之地，兴无极云感法雷震，畅慧解电雨甘露水，宣道法珍不断三宝。志性清净如明月珠表里通达，正觉照曜相好殊胜，则以禁戒而自庄严，以百千德而文饰体，以诸佛法至阿惟颜一生补处。奉遵修行笃信众生闻化解脱，随其志性令各得所。觉意总持为师子座严净道场，明识超入四无所畏，皆现诸佛所兴事业正觉圣体，取舍进退其心强勇而得自在，转于无上法轮之宝。”

尔时，众会闻诸菩萨功勋之德，欢喜踊跃不能自胜明心生焉！则取天上青黄红白上好莲华及诸意华，金共供养佛，散阿差末诸菩萨上，同俱举声称扬威德：“我等善利为获福庆，乃能遭值此等正士得睹晓遇，稽首归命而供养之！”其有众生，得闻此党诸菩萨名德不可量，因斯所闻悉当兴发菩萨大心。于时于彼三万六千诸来会人，咸发无上正真道意。

佛语舍利弗：“阿尼弥沙土者，无地狱、饿鬼、畜生众恶诸苦，无奉戒敕亦无犯禁，不闻见女人。所以者何？皆由化生莲华交露。无有悭贪，亦无淫恚，离于痴畏，悉都无此三毒之名，何况余乎？其土人民无上中下好丑差别，普等无殊，亦无是我及非我所，复不饮食。

所以者何？喜法为食，解义为浆，常自坦然，了不念渴亦无饥想，亦非我故，亦无他故，亦无众魔恐难之患。又其佛土甚极广大，一日月照六十亿四方之域。所以者何？诸菩萨本愿之所致也，由是之故共一日月。又其土地无有丘墟高下斜倾，普悉平正，皆紺琉璃，皆以众宝而杂厕间。其地柔软如天綰綰，以十八事庄严国界。其树悉宝行伍相当，常生华实，冬夏恒茂，无沙砾石众秽之瑕。黑山、雪山其土诸山，皆以诸宝杂合而成犹如须弥。于彼佛土，天上天下适等无异，舍于世业以法为土则无王者，唯以如来普贤至真而为法王。又其土法不用文辞告诲诸菩萨也，欲咨受经往诣佛所，观之无厌不以为倦。所以者何？其心欣然应时逮得佛心定意，寻则近至无所从生法忍，由是之故其土号曰不阂也。

“何谓得佛心定意？不以色相，不以种好，亦复不以本宿行故而致是德，亦不希望作是致是。所以者何？不念过去当来之者，亦复不念今现在世，亦不由从五阴、六衰而致之也。何谓为五？其五阴者，谓思六根。其六根者，谓眼、耳、鼻、口、身、意所别。其六衰者，知色、声、香、味、细滑、法。不用见闻心意识此众业之所致也，不以巧伪生灭之所致也，无等无邪亦不造意无所希望，亦非以是亦非不是之所致也，亦不从一二三之所致也，不因心意识，亦不以晓内外众念妄想是非之事而致之也，亦不色、痛、想、行、识之所由致，亦不用戒、定、意、慧、解度知见。十力不护、四无所畏诸佛之法，不可以意想知之，不用见闻故之所致，不以想相亦无我想，不以五阴、六衰生灭之处，亦无所住亦无不住，无色、痛、想、行、识之处，亦不眼色、耳声、鼻香、舌味、身软、心法之所致也，亦不得处。所以者何？不可以目而见众相，不可想处见不可见，不起不灭其不终者则不有始。斯住处者，因缘所为乃致于是，消除归灭尘劳之秽。所以者何？用爱欲故，故曰当灭，由斯之故断于因缘。用吾我故以是当灭，其净咸明不增不减，亦复不念是安是苦，作是计者不离于欲，亦不用念而以为烦，诸想本脱故行备悉，已能备悉达如无身，色何可得？无有痛者，何从有痒？常住如法，若不想道则非俗业，设无所闻，何从有识？无所见者亦无所得，无所得者可谓脱矣！亦复不得意念普思心所惟法，亦不贵持无所生矣！不睹来者，不见往生，本不可得犹如诸法皆等无异。譬如有人上向瞻空，其目所睹，不能别知何所是空、何非虚空。佛意如是，菩萨得佛心定意时，知诸佛法，众相种好悉具足成道慧备悉；如来所宣，诸菩萨等皆能解畅，则寻启受讽诵通利，普能周备晓诸佛法。”

佛告舍利弗：“普贤如来，其所颁宣初无二言。何谓为二？一不讲著，二不说断，悉修平等无有适莫。何谓为无？未曾有念从人咨受，亦不自念已有所知。斯诸菩萨适见佛已，辄则具足六度无极。”

佛言：“云何具足？舍众色想无所希望，是则具足施度无极。不想佛身达之本无，则已备悉戒度无极。所以者何？不自想故以得成就

三十二相，计于诸法假有号耳！相无有尽住是不起，是故名曰忍度无极。一切诸法普不可见亦无所闻。所以者何？菩萨大士，见善不悦，见恶不戚，心无适莫，是故名曰进度无极。心不想念，不可想者而寂恬怕，是故名曰寂度无极。解色相空，不以此相而怀自大，是故名曰智度无极。”

佛言：“其诸菩萨在彼土者，因便具足六度无极，逮得无所从生法忍，遍察十方诸佛国土。众菩萨学少有能逮不眴刹土普贤所诲诸菩萨者！”

舍利弗谓阿差末菩萨：“快哉！仁者，彼之佛土诸菩萨众功勋难量。”

阿差末寻问舍利弗：“贤者欲见不眴国土普贤如来乎？”

舍利弗报：“唯欲见之，及众会者皆当被蒙，咸荷福庆功德转增。”

时，阿差末即于座上，三昧正受而现神足。所入三昧其号名曰遍见诸佛土，使诸会者及舍利弗，皆得尽见不眴佛国普贤如来，莫不欣然为未曾有，咸共起住，令为彼佛稽首作礼。佛之圣旨使舍利弗及众会者，于衣袂上自然有天华香，则取东向散彼佛上。其华至彼，于其国土在于佛上，遍诸菩萨普同佛界。彼土菩萨自问其佛：“今此众华微妙殊特，为所从来光光若斯？”

普贤如来告诸菩萨：“此之瑞应，是阿差末今到忍界，奉养咨受释迦文佛。十方菩萨咸往会彼。所以然者？讲大乘故。”

彼土菩萨复问佛言：“此间显变，何佛威神之所恩化？”

彼佛告曰：“释迦文佛十方菩萨咸往会彼。所以者何？讲大乘故。”

彼土菩萨复问佛言：“此间闻之？”

彼佛告曰：“释迦文佛演畅分别大会缘品。”

时，彼菩萨复问其佛：“其忍世界去是远近？”

佛言：“西方去此如十江沙，诸佛国土满中诸尘，设举一尘著一佛土。如是尽取一一诸尘，次布西方诸佛世界，众尘悉索，过若干土，乃至忍界释迦文佛游居教处。”

彼土菩萨复白佛言：“唯愿欲见能仁大圣兴隆道化。”

时，普贤佛演身光明通照十方，彼诸菩萨及众会者皆睹此土。彼诸菩萨寻时皆起遥自归命，为释迦文佛一心作礼。彼众菩萨遥见忍界充满菩萨无空缺处，怪之惊喜自问其佛。彼佛告曰：“十方佛国诸菩萨众不可称载，闻当颁宣大会缘品故往启受。”

舍利弗问阿差末菩萨：“谁字仁者名阿差末(阿差末者晋曰无尽意)？”

答舍利弗：“用诸法故曰不可尽。所以者何？一切诸法亦不可尽。”

舍利弗言：“愿以不可尽法而解说之。”

阿差末言：“本发意时亦不可尽。所以者何？悉遍诸欲淫怒痴醉而无所缚。所以者何？不与罗汉及缘觉乘而俱同尘故，发心已来坚固其志不可转移。所以者何？不为邪业之所迷误，一切众魔不能坏意，有是心者其诸功德悉为成办，游于无常而独总揽众之元首。所以者何？有计常者则生死业。所以特尊解道有常，名曰为尊，出无常故，从发心来其心坦然无所缚著。所以者何？不离诸佛功德业故，所修事业无能得短。所以然者？一切众恶悉尽索故。其心永安，不可动故，其心无侣。所以然者？希有逮故。心如金刚。所以然者？皆知一切诸法之故所不可尽。包裹诸法道慧之故，从发心来强若金刚；等众生故，其心质直而无谄谀，故号曰正而无偏颇。从发心来常怀鲜明。所以然者？本清净故。以去众垢悉消诸冥，其慧显曜窃隐皆明，从发心来沐浴众秽。所以然者？其信甚固无所舍故。发心甚大无有边崖。所以然者？心若虚空。发心旷然。所以然者？含受众生当因度故。发心无尽。所以然者？其慧玄旷无所挂碍。从初发心无所不入。所以然者？大慈无极亦无尽故。其发心行无能断者。所以然者？功德愿故。发心甚安极可爱敬。所以然者？为诸众生所喜乐故。发心特尊与众超异。所以然者？一切外学、声闻、缘觉之所奉故。其所发心无能知意。所以然者？非诸凡俗之所及逮，犹如农夫不能达知圣王之事。发种类心。所以然者？各各从其本种之业皆获其果，一切诸法常存在故。从初发心以为道本。所以然者？由是所致得大安故。发心已来而自庄严。所以然者？成功勋故。发心已来与众殊别。所以然者？达圣慧故。发心已来甚为微妙。所以然者？用广布施普及众生。发心已来建立至愿。所以然者？具足戒禁。其发心已来而无等侣。所以然者？无所不忍。其发心来无能抑制。所以然者？用精进行无懈废故。其发心来无所慕乐。所以然者？寂度无极致定意故。其发心来无所归趣，因其晓了智度无极。其发心来永无所住。所以然者？用无极慈故。其发心来根株坚强。所以然者？用行悲哀故。其发心来常怀悦豫。所以然者？于诸众生怀等心故。其发心来虽遇苦乐不以为动。所以然者？护一切故。其发心来为诸如来所见将养。所以然者？用顺十方诸佛教故。其发心来欲度一切五趣众难。所以然者？兴隆导化。其发心来不舍三宝无所违废。所以然者？将顺佛戒成圣众故。”

阿差末菩萨复谓舍利弗言：“一切智心宁可尽乎？”

舍利弗报言：“不也。犹如虚空不可穷极，其一切智心不可尽极亦复若斯。如来禁戒亦不可尽。所以者何？戒是根源故不可尽。如来定意由无有尽，智慧、解脱度知见无根故不可尽。计于十力、四无所畏、十八不共诸佛之法，斯则是根，此亦心本故不可尽。取要言之，一切诸佛法为元首，由斯心行故不可尽。三宝无断，因是之心故不可尽。犹如一切众生四大。何谓四大？地水火风亦不可尽。计是智慧用一切故，咸复晓了不可思议众生心行，本愿不断故不可尽。所以者何？修奉道愿故不可尽。皆无所生靡不恍惚，一切诸法根源无穷，故

不可尽。”

阿差末菩萨经卷第二

阿差末菩萨谓舍利弗：“发菩萨心永无穷尽。所以者何？不文饰故。亦不谀诌其心质直，故曰殊特。不为绮辞用清净故，平正无邪。其心柔软而无粗犷，笃信真要未曾变改，所立坚强而无转动正住不摇，无能憎嫉而娆害者。以何等故无能娆者？其行治业莫能逮故，有所建立无能诽者。所以莫能讥谤者何？敢所兴造无根源故，所以无根用中正故。所言至诚终无有异，有所兴功无所希望不求名称，为众所叹咸共戴仰无能得短。所以无能得其短者？有所造作长安隐故。所以自致永安隐何？所兴功德无懈倦故。所以不厌，用愍一切众生之故。所以愍念众生者何？用无极慈为懈倦者而兴精进。所以者何？欲以养育众生之故。所以养育众生者何？由斯之便成功德故。所修效力不希望福，所以无求。其心净故皆蒙法恩，故无所求人亦有力。何谓为力？曰是佛力，以是之义护一切故。所以护之？欲令群黎各得其所。所以欲令各得所者？使无恨故。所以无恨？所作事业极安谛故。所以谛者？由是之故，无能制止无能谏抑令止寂然，犹若紫金而无点污。所以喻之如紫金色？以无有秽。所以无秽？用本净故。所以为净？本行去秽故。所以去秽？内以净故。所以消瑕？瑕已尽故由是清净。”

阿差末谓舍利弗：“心已净者贪欲转消，其无贪欲是不可尽，其诸恶心不能复乱，又其心明护于恶意，由是之故曰不可尽。其心嗔怒有所众贪，汲汲于欲贡高自大，诸所不可皆悉尽索。将为菩萨常护是心，当晓是心而不可尽，舍无瞻势及诸垢浊，当达是心不令懈怠，则知其心为不可尽。若愤乱者随时将护，其无智者养育使成计于一切众生之党，有功德法、无功德法，咸便度脱至于大安，则知其心而不可尽。训诲一切众生之等诸在厄难，皆令兴立无极功德，则知是心永不可尽。”

阿差末菩萨谓舍利弗：“菩萨所习亦不可尽。所以者何？用所布施故不可尽，诸可惠与，是名曰习施度无极。于一切物多少取足不以汲汲，是则名曰戒度无极。一切有饶于菩萨身，不起嗔心如毛发者，是则曰习忍度无极。所积功德常在众前而不在后，是则曰习进度无极。一切所学悉勤用心，是则曰习寂度无极。诸所听闻悉欲博达，是则曰习智度无极。菩萨当学修于大慈。何谓大慈？若有厄难来自归者欲求救济，宁亡身命不负要誓是则习慈。其行哀者等犹如称，若有加益不以忻悦，设诽谤者不以忧戚，是为菩萨随时等哀。菩萨所学则以三事，净身、口、心终不传恶，未曾念邪愚蠢之业。菩萨虽学独步无师亦不自大，其所学意不舍普智诸通敏慧，揽诸佛法菩萨之业，在人所求不逆其心无所短乏，致一切法而得自在。又习悔过，身有罪恶未曾藏匿。用无量福劝助功德，菩萨修学赞劝诸佛颁宣道义，奉习勤学

正士之法。所以学此正士之法？欲成觉故。其心坚固不舍弘誓无极德铠。所以不舍？欲化一切众生之故。”

阿差末菩萨谓舍利弗：“菩萨有四为不可尽。何谓为四？一曰、开示之心，二曰、法施，三曰、训诲众生，四曰、积累功德。是为四。复有四：一曰、习在闲居山岩独处，有施多少趣足而已；二曰、于众功德而无厌足；三曰、博学不倦；四曰、所愿智慧不以为劳。是为四。复有四：一曰、校计规度，二曰、思惟本末，三曰、智虑通达，四曰、所念普具。是为四。复有四：一曰、离于众恶而修上脱，二曰、其上脱者是菩萨教，三曰、解诸恶本，四曰、念于微妙无上之脱。是为四。复有四事：一曰、解于五阴，二曰、晓于四大地水火风，三曰、了六衰之原，四曰、其所睹见十二因缘无有边际。是为四。复有四事：一曰、无常生死之语而不可尽，二曰、苦痛之教，三曰、无吾我训，四曰、寂寞无为之业亦不可尽。是为四。”

阿差末谓舍利弗：“举要言之，诸菩萨学皆近佛道，以是之故分别道俗悉不可尽。”

阿差末菩萨谓舍利弗：“菩萨修行心不可尽。所以者何？于诸功德而不懈怠，从次转上成就其处。所云处者？菩萨十地。其所修行犹如大海所苞无厌。所以然者？多所救度一切众生，其所修行则为元首。所以然者？出其上故。修行最上所可总揽，诸在下者令修专行一切法故持众善本。所以者何？用最尊故。所以修度？因则受决，皆由专精用不退故自致具足，因其专精所愿辄成。以成大愿，其所修行永无所恃则是定意，依修柔软所造行者而不缺漏，修行伏意是其道业修行自守。所以者何？以不复与众恶从事故。专精布施，菩萨不以身心有所贪爱，转增上故。专精奉戒亦为甚难。所以然者？教犯戒者使不为恶故。专精忍辱亦为甚难。所以然者？虽在尊位财富极乐，不轻贫贱羸劣弱者，是为忍辱。所修专行精进难及，坐佛树下若有人来，言：‘起避去！我坐其处，先取佛道。’即舍与处，是为精进。专精禅思所以难者？莫能及逮，所修专精辄能成办，无所希望故，是曰禅思。专智慧难。所以者何？积功累德不以劳烦，是为智慧。出入行步安庠和雅威仪备悉。所以然者？其功祚强无能危者。修无所畏晓了深法，钩玄致远故奉修尊心。所以然者？其明极微无不达故行不可尽。所以者何？所住坚固。何谓专精？其意坦然常念一切，无所依者令得其依，若有闇冥使睹道明，无所归者悉受其归，其无善友为之善厚，其谄谀者令修质朴，见其粗犷显示忍辱柔软和雅。所以者何？以德化故。在谲诡中而为列露真正之义，于校饰中不为绮大，在无反复行报恩德，在众恶处而修善行，在废退处奉修德祚，在欺慢处常行恭敬，在贡高处不怀自大，在求便处无能得短，不念人恶不宣缺漏，若在不正辄往将护使入正谛。一切众生皆来到所，见之欣然无嗔恚心，其有谏喻示进退宜当然不然。心无增减，笃信祸福所作归身。若在旷野山居岩处如法无异，不贪利害，不惜身命，心净之故初不增减，常护其

口不忘传语，不求奉敬。所以者何？恒知节限止足而已。其心柔和，不随弊恶失礼义者，有功德故，度于生死息众苦患。所以者何？由是之故，菩萨慧意永不可尽，生死往反亦不可尽。以权方便，明了随时训诲众生迷于终始。不可尽者，使求佛道明不可尽。”

舍利弗问阿差末言：“乃有异不可尽乎？”

阿差末言：“有。”

问：“何所是？”

阿差末曰：“菩萨布施复不可尽。所以者何？六度无极不可尽故。菩萨布施悉无有限，所谓限者某是某非，当施与某不施与某甲，施不普济不应为施。”

舍利弗问言：“菩萨之法当云何施？”

阿差末曰：“饥者食之。所以者何？人依衣食乃得存命便能苏息，座起言语则为安隐，身体康宁气力强盛，渴者施浆除其消渴。所以者何？若在后世，周旋生死常不渴乏。有求车者辄随意与，由是之报后所生处，神足飞行在所至到。其无衣者因施与之，后世所生便不抵突常抱惭愧。若于冥处施之灯火，则得道眼通见十方。若于世尊师父寺舍、二亲长老前，而作倡伎以娱乐之，后世所生得道耳听彻闻无极。若无香者则施与之，后世所生逮致戒香、慧定解脱知见品香，是身为被德熏之香。若复有求杂香名熏，即与所好，后世所生身体香洁莫不悦豫。所有甘美殊异之味，人来求者辄从意与，后世所生常得肴饌，若不甘者入口即美，宿之所植而得是相。其无手巾因施与之，后世所生清净无垢，为人所护。其无护者为之将护犹若屋室，所以喻室覆盖人故，随其所乏而施与之，后世所生悉获所当。寻得周给病与医药，后世所生身常无病不生不死，无有众患恒获安隐，一切备足靡所不主。其无仆使给与奴婢，后世所生自然具足，万乘帝主制上御下无所乏少。其求众宝则能与之，后世所生备悉成就三十有二大人之相。布施杂物若干种品，后世所生得八十种众好之姿。象马施者，后得大乘无极之意。以田施与，因得具足寂度无极。妻子施与惠所珍爱，后无异心当得佛道。所以者何？佛者极上尊无俦匹。假使有人从其菩萨，求满仓谷即能与之未曾贪吝，后逮法藏充备道慧无所匮乏。菩萨设得为转轮王主四天下，七宝盈满。若有来求而不爱惜辄能尽施，后所生处逮一切智，诸通圣慧广济一切。以妙伎乐而施与者，后得经典乐以法乐莫不欢然。若为势位有忠羽翼行菩萨法，犹如王者之忠臣，有人来求以自辅政即能与之，由是之故，后佛法教欲坐道场，于佛树下降伏魔兵。以手施人，后为一切道法之首。耳鼻施者，后身具足无一缺漏。以眼施者，后逮法眼为一切首道法之眼。以头施者，后所生处，三世特尊，独步无侣诸通敏慧。肌肉施者，后成佛道人来听经，舍诸不善皆获真正。菩萨破骨以髓施者，后得佛道，身如金刚无能动摇。”

阿差末曰：“菩萨不以色故而有所施，用修政故，若来求多后人

求少，悉遍与之使各得足。若施与时，不恐不怖不畏不嫌，无贪行施，不怀悔恨心未曾变。菩萨无轻慢施，专心而与；无谗谄施，不持恶物无所中者以与人也。菩萨布施，未曾观察某有福祚、某有罪殃，无有狐疑不别好丑，不中断绝遗漏施也。何谓中断遗漏施？于大会中独与一人，不与一人。悉欲遍济。所以者何？菩萨所施常怀笃信，不念懈倦无恼患施。菩萨布施不呼人至前，目自见面乃与之也。亦不思惟某善某恶，不必选求得成道者，来者便与，施人之后不作是念：‘某已得道，某不得道。’菩萨施与，见奉持戒人来受其物不以欣然，见无戒者亦无异心。其所施与不望还报，有所施者不求名称使远近闻，不自咨嗟，不恶诽谤。菩萨施与，不行烦扰，不怀恨施，无嗔恚施、不欢喜施。菩萨布施，不念后世当得其福，不起忿心骂詈愚施，有来求者不前却彼乃施与之，不轻易施，不倩他人持物往与。所以者何？手自斟酌。亦不念言‘值吾前施，不当前者不施与之’，不挂碍施，自用心施，不卒暴施，手自授之。不沉吟施乍与乍不与，菩萨不念‘吾所可施疲倦劳极’。施从来者不多不少，不选择物恶者与之、好者留之，若有来求，如本言要未曾减损。菩萨所施愍念众生弘无偏党，欲令受者常获安稳。若施与时，则念其人是吾国界。所以者何？一切皆是菩萨之道地也。又所施者，少不轻己，多不欢喜。虽布施多不自察言‘我今广施’，所与如法无希望故。菩萨所施，不念是福当有所生受其功报。所以者何？施于一切众生蒙恩故。所施人者亦不念之：‘吾于天上天下人中独致尊势’，其所施与普为众生，不以其福求慕四王、释、梵之位，亦复不贪转轮圣王，不习声闻、缘觉之心。菩萨施与心不念言‘所施具足亦不惟少’，足与不足有所施者，使一切众不离于佛诸通敏慧。所施与者，常得其时无有不应，不以兵仗毒药施与，以安施人不加烧害。菩萨布施从佛法教，所可惠施知一切空。所以施者？以为因缘有所兴发，由斯之故而不可尽。所施与者悉晓无想，为诸想者建其因缘故不可尽。所可施者皆达无愿，为诸愿者作善因缘，由是之宜故不可尽。以道法意而有所施，其心坚强完具甚安无所破坏。菩萨所施其在三界无能逮者，所可施与欲令其福归流一切菩萨之业，其志常建一切智心，以是之故为不可尽。所施与者以脱诸想，总揽众魔令不自在，离诸烦苛故不可尽。菩萨所施与众超异，明泥洹故，所可施者决众疑心故不可尽，所施与者正住佛道不怀异心，所施等愿故不可尽。菩萨所施坐佛树下得成正觉，所施与者及无央数不可称计众生之类，皆荷济度故不可尽。所施与者不可尽矣！其事广大，所施与者以得道处，无能动者无能超踰，况复施者！故不可尽。所施与者其心坦然，如一切智故不可尽。”

舍利弗言：“善哉！善哉！仁者阿差末，叹菩萨施及不可尽，快哉乃尔！愿欲受听菩萨戒禁不可尽谊。”

阿差末曰：“菩萨戒净亦不可尽，有六十四事。何谓六十四？菩萨行仁不怀害心加于众生，身亦不杀，不取人物，不犯他妻。若见菩

萨及向众生，常行至诚未曾两舌，有诤讼者常和解之，终无骂詈不为恶口。所以者何？常有惭耻。所言护舌不妄说事，于一切人不念嫉妒，不兴恚心向于众生。所以者何？由此能忍后世端正，常正其心不事余学，恒抱悦心在于佛道。所以者何？其心清净无有尘垢爱乐佛法。所以然者？解无异法能出上者，至心在道用慈仁故。若见沙门、梵志，辄以五体而自归礼。何谓为五？两手、两膝及其头脑稽首足下。所以者何？因得佛道一切归故。心常柔软，见人犯非慎己不为所不缺戒。无有声闻、缘觉心故，于诸犯戒而无所犯。所以者何？后世不欲生在于鱼猎愚闇家故。常修精进而不懈怠。所以者何？不与邪恶共从事故。戒禁完具未曾阙漏，亲近智德解深法者，不违远故。笃信禁戒，所奉正故。顺戒如法，一切众生皆歌叹故。其护戒禁清彻至真，本心快故。行持戒要，无能传非说其瑕秽，无邪心故。其戒完具，不复迷惑从六衰故。所奉戒行莫不宣闻，诸佛正觉之所知故。戒无所求，如己乐故。戒知止足，无所贪故。其戒纯淑不杂众恶，身意坦然无所乐故。常好闲居，未曾喜乐于众闹故。戒能备悉如道法训，不从他人有所受故。谨慎禁戒，不以好服而为绮饰，德无能逮誓如本愿，不以甘美而乱意也。所以者何？以有道力制众恶故。所行如戒，诸天人民莫不悦故。行慈心戒，护众生故。修悲哀戒，忍众苦故。遵于护戒，不解怠故。以等心戒为一切众，任于善恶无二心故。常察禁戒不为损耗，不听其心为驰骋故。戒不念恶，不传人非，护一切故。坚执持戒，不听其意随所欲故。顺布施戒，养育一切众生之故。为忍辱戒，不起心故。志精进戒，不回转故。禅思之戒，得安定故。奉智慧戒，博听正义无厌足故。修广闻戒，觉要法故。随善师戒，达诸法故。舍恶师戒，离众邪学不真路故。无倚身戒，知诸万物皆无常故。不贪命戒，其功德业如紫金故。无悔恨戒，其意净故。无虚饰戒，学清净故。不烦苛戒，其意鲜明无垢浊故。不焦然戒，不烧身故。不迷惑戒，不随欲故。不危烧戒，无所害故。无抵突戒，心不乱故。伏心之戒，意无误故。通寂静戒，不为俗业之所废故。顺真正戒，智如教故。具诸愿戒，本清净故。如如来戒。所以者何？随本要故。如佛定戒，常怀等心度众生故。从一切智入道门戒。所以者何？不抱恨故。是为菩萨六十四事，清净禁戒而不可尽。”

阿差末菩萨复谓舍利弗言：“菩萨复有净戒，不自贪身，不念一切，不想我人，不计寿命，不思名、色、痛、想、行、识，不倚四种地、水、火、风，各有四大戒，不有眼色、耳声、鼻香、舌味、身触、心法，无身口心其戒向净，是相一心而不迷荒，谛观诸法戒以过空无想不愿，亦无形像过于三界不著不缚，其戒不念尔故不为已生。所以者何？无所生故。所以为戒，无作不作本无所造，由是之故戒无部界。此止中间亦无所止，意净为戒识无所住。所以者何？无想念故。戒无所拘。所以然者？无欲力故。亦不住色亦不无色而俱同尘，是名曰戒。离淫怒痴因愚冥脱，是故曰戒。不著不断舍十二缘，是故

曰戒。不念我所除我不我，不住欲故是故曰戒。无作不求不住色想，亦不处在一切名色，是故曰戒。不随因缘无烦无苛，无我非我不与疑合，是故曰戒。亦不贪福不无功德，以越诸恶非法之事。所以者何？愚者非法是故曰戒。无有烦恼，其身心止是故戒相。奉慎戒者如病得愈，不断诸佛经典正籍，法身坦然不可尽故不断法身。所以者何？无二业故：一者、不著，二者、不断。不断圣众因用脱故，不断诸学。所以者何？顺禁戒故。”

阿差末菩萨谓舍利弗：“因本清净故不可尽。何谓俗戒？谓生死处亦有尽矣！所以者何？在于五趣故名曰尽。所以尽者？有往反故不住一处。其外神仙五通之戒世俗之智，求上长寿神足命尽。所以者何？戒禁尽故。人戒十善亦复有尽。所以者何？违舍戒故。诸欲天子戒亦有尽。所以者何？功德毕故。诸色天子定戒亦尽。所以者何？其定乱故。无色天子寂戒亦尽。所以者何？寂意荒故。其道迹学无学罗汉戒亦有尽。所以者何？倚泥洹故。其缘觉戒亦复有尽。所以者何？无大哀故。”

阿差末谓舍利弗言：“唯菩萨戒独不可尽。”

舍利弗问：“以何等故戒不可尽？”

阿差末曰：“其戒尽者，斯皆非戒。所以菩萨戒不可尽？其心不舍一切智故，是正真戒，为不断种故不可尽。何谓果实道果无尽？所言种者谓菩萨心，所云果实则佛十力至不可尽，故曰菩萨戒不可尽。”

阿差末谓舍利弗言：“菩萨忍辱亦不可尽，有三十二事。何谓三十二无尽？不著欲者，不兴此念‘是我妻子身皆不犯不令他犯’，是故忍辱亦不可尽。不念众恶不恨一切，不悲众生不惟人恶，不与人诤不忘助人，有所毁击亦不掩戏，自护身行将护众人，慎己心不随，常思善德无爱欲意，得庄严身，信作善恶当得报应，口不妄语其心清净。菩萨心强不舍一切，谛自思计心所念邪，即觉知之。心和柔软，将护其心令恶不生，修清净行生于梵天。从天下还在人间，具足德相众好八十，逮致和音犹如梵天，脱淫怒痴，不以恶颜悲恨向人，所作功德未曾亡失，降伏外学众邪异术，以舍众病不遭厄难，以顺具足诸佛法。是为忍辱悉不可尽三十二。是菩萨忍辱。何谓忍辱？若骂詈身默不和之，若挝捶者不念报之，是谓忍辱。所以者何？不见挝者，不睹己身，杖本空故。若有嗔者亦不怀恨，言若幻化其起意来不生心逆，能伏意故。若念恶者，心若不知自思惟之：‘斯人赍恶，吾不宜效。’有称誉者不用悸喜。所以者何？不生此念得利益也，降伏心故。若有衰耗不以忧戚，已知足故。见人叹者不用为绮，若有诽谤不以为动。所以者何？智广大故。有恭敬者不自贡高，修性安故。设礼拜者不用悦豫，亦不说言卿宜当然，若得势位不以自大。所以者何？心不动故。愍哀众生虽在勤苦不以患厌，在于乐处不用欢喜，晓了俗事皆无常故。不以世八事而见倾动。所以者何？不处其中，为人所娆终不

还报，无敢犯者，假使有人节节解身悉能忍之，因欲具足菩萨业故。若害身者终无异意，了身四大合成，散灭何足可贪。所以者何？缘是忍故当得佛身，悉忍众恼不可计难。所以者何？缘是得致建立大安至道力故。菩萨若在梵志学中，现身入火无所伤害，欲令其人知心清净，化于惑意使志反真因得上天，其梵志学好喜火祠。菩萨所现无所不变，道德超殊莫能逮者。所以者何？诸梵、帝释、四方天王，稽首菩萨皆为作礼。菩萨忍辱无有边底，以是之故曰不可尽。其骂者忍不以为恨，亦不念之谁骂我者，因是寂然便入法忍。不思惟之骂吾眼耳鼻口身意，若骂心乎？骂所在耶？则过诸衰便逮法忍。不念一切谁来骂者，寻能得入无人之忍。是诸忍者悉不为忍。所以者何？假有号耳！谛计其忍犹山中响，有解此者入无常忍。不念得我及得他人，逮中和忍亦不自念，身随法教某不住法，是名曰忍。‘我独住道，其余人者不建立道’不兴斯念。我念空不念实，念无思想不念有想，念忍无余不念忍余，念忍无愿不念有愿，忍无生死不有终始，忍为可无不可，忍为有德不为无德，念忍无生不念所生，忍度于世不与世合，忍为入道不为无道，念忍为脱不为无脱，解忍泥洹不为生死，菩萨忍辱不生此念。所以者何？不平等故。菩萨等忍为何谓也？解入空无所断无所著，是菩萨忍，亦不念生不念不生，不念化生若无化生，不兴念言有之与无，晓了此义至不可尽，以是名曰不可尽。忍悉无所作，不思当然及与不然，无有现者无缚无脱，亦无所生无造起者，故无所生而不可尽。其忍如斯，是为逮得无所从生法忍。如计无所从生法忍，至于如来坐佛树下，入此忍者应得受决曰不可尽。”

说是法忍品时，其在会者咸皆赞曰：“善哉！善哉！如阿差末所说，诚无有异！”

时，十万天悉以天华名香幡盖，供养奉散阿差末身诸菩萨上，诸天伎乐自然为鸣以娱乐之，心各旷然怀宽弘意，一切皆言：“令诸众生普悉得明若如来忍，其闻此音，不恐不惧心不在憾。”诸华名香幡盖充满，遍于三千大千佛土。

阿差末菩萨经卷第三

佛告阿差末：“仁者于今为能苞裹一切众生乎？”

阿差末言：“承佛圣旨，具悉任受。”

阿差末菩萨适入三昧，应时一切诸有色身，供养华香缯盖幢幡皆入脐中，其身如故不增不减。

有一菩萨号曰大净，问阿差末：“所入三昧名曰何耶？显现变化乃能悉受一切色身华香幡盖，其身如故而不增减？”

阿差末曰：“其定号名普受色身。”

大净复问：“是三昧者，但能受此，复受余乎？”

阿差末曰：“三千大千国土悉入于身不见所在。所以者何？以威

神故无所增损。”

时诸众会诸天人民，菩萨声闻皆各有念，犹如久渴望想饮矣，欲见大士所化神变。佛知众心，语阿差末：“为一切人现是三昧。”

阿差末曰：“辄奉圣教。”应时十方诸会菩萨、佛及众僧，悉自见身坐阿差末脐。阿差末脐现有国土名普庄严，诸菩萨服如庄严国众菩萨也，亦复皆现在其脐中，所显普严巍巍如是。现威变已，众会各坐续复如故。

大净菩萨报阿差末：“三昧圣恩威德超殊光光乃尔！”

阿差末曰：“是不足言。所以者何？三千大千天地山陵，悉受色身为微末耳，受江沙土不以为违，况其余耶！”

说忍辱品演神足时，七十垓仁和善人发大道心，万二千菩萨皆得无所从生法忍。

舍利弗问阿差末：“愿乐复闻菩萨精进而不可尽。”

阿差末曰：“菩萨有八精进无尽。何谓为八？一曰、被于弘誓大德之铠，是为精进而不可尽；二曰、合集精进而无所退；三曰、勤学长养一切功德；四曰、常欲养育普及众生；五曰、造立无数福庆之原；六曰、心元无求诸度无极；七曰、晓了智慧而无穷极；八曰、欲得备悉一切佛法以故无尽。是八精进而不可尽。”

阿差末曰：“所以名曰被弘誓铠，不以生死用为劳苦故。所以者何？不计劫数当成佛道，亦不思念于若干劫行菩萨业，所以名曰为弘誓者，不限长远无量劫故。菩萨犹为一切之本，方俗所更始数，一日至十五日、若三十日合为一月，十二月为一岁，如是转进至十万岁、若百千万岁发意求道，悉却是数犹若干载，乃见一佛。如是比数诸江河沙，初发意等一切众人，各皆发心，各悉包容。江河沙等诸菩萨亦如是，无央数不可计一切人悉发意，意所知才及一事，其末所知不可称计。犹如供养江沙等佛，然后乃具施度无极，戒、忍、精进、一心、智慧，三十七品亦复若斯。菩萨闻是其心不懈，不舍弘誓大德之铠。江沙等人皆发道意，合集此德乃能具足一大人相；一切如是各如前功，乃悉周备诸大人相。其大人者，谓菩萨也。菩萨闻是不以为劳。所以者何？未曾违舍弘誓铠故。是为菩萨被弘誓铠而不可尽。

“何谓增长精进而不可尽？若有菩萨勤欲闻法，不计远近，不恶水火。所以者何？无懈倦故。菩萨增长合集功德不用退却，合会劝助众功德故。何故合会？欲以开化众生之故，令其度脱使入泥洹故，而般泥洹不以懈怠，有坚固心无能回者，常求功祚不用厌倦，恒住大哀故曰合集。菩萨所至行步座起不忘道心，如一念顷念佛法教，护于一切不以为烦，故曰合集而不可尽。何谓长养一切精进而不可尽？所立功德志愿常存于诸通慧，以故名曰为不可尽。犹如众龙还雨大海，不可别知沛数多少计之无尽。诸通慧者功德如是至不可尽。何谓造立无数功德？所作用心为一切故常怀等意，所立功祚不离通慧，所修福愿欲使众生皆共蒙恩，以故名曰立无数德。何谓心求诸度无极？众生四

大悉不可尽，不可数者入此诸数，一曰悉教三千大千世界众生之类，如是比像不可称载，阿僧祇人皆开化之无限如斯，百倍、千倍、万倍、亿倍、百亿万倍不可计喻，所教度者为少耳！闻是不恐亦不畏，为应精进，是谓造立无数功德而不可尽。

“何谓晓了智慧而无穷极？菩萨功德不可尽故。如是悉计一切普智诸众生本所作功德，乃及道迹、往来、不还、无著、缘觉皆合此德，乃成于佛一毛功德合集计是。各各悉成体诸毛孔巍巍众德，乃能成佛两眉间相。若斯眉间千倍之福乃成顶相。所以者何？天上天下无能堪任见佛顶故，以是故曰德不可尽慧无穷极。又复何谓慧无穷极？正使三千大千世界众生悉笃信佛，如是信佛其信百倍，乃与奉信者同等功耳！设奉信等周满三千大千世界，其智百倍不及八等人。若八等人满三千大千世界，其智百倍不如道迹。若三千大千世界充满中人，求道迹业、往来、不还及与无著，其智百倍不如缘觉智。若三千大千世界满中缘觉，犹不如一发意菩萨之智。正使三千大千世界，充满其中初发意菩萨，其智百倍不如阿惟越致。正使三千大千世界众生悉成不退转，其智百倍犹不如一生补处菩萨之智。正使三千大千世界众生为一生补处，其智百倍不如一如来处处慧力合诸力无所畏入佛法游要慧。所以者何？其一切智悉入佛意。菩萨闻是不恐不惧不畏不难，是则名曰习无穷慧而不可尽。何故习无穷慧而不可尽？用入一切众生心故。正使过去众生心念无限，其发道意，一人明解悉晓了知此诸过去众生心念，等于众生犹如一人，如斯比像不可称计，众生之党皆淫怒痴之所覆盖。复有一人入淫怒痴惑乱之中，而为众尘见愤迷荒，菩萨发意恒以道慧皆知众生淫怒痴乱，是曰慧明之圣弘智。若诸众生悉各发意，善恶因缘、因缘所为、起者灭者，如是慧者虽处其中心不以烦，皆能畅达犹如虚空。其虚空者无不空处，圣慧者然，心所明解三世众生靡所不达，故名曰慧而无穷极亦不可尽。

“何谓一切佛法亦不可尽？悉具一切六度无极求诸佛法。若有菩萨从初发意所修方便，然后乃致坐佛树下，发心功德不可称计，普悉具足皆成佛法，故曰菩萨合诸佛法而不可尽。复有菩萨合集精进亦不可尽，身所立德不以为难，口演功祚亦不以倦，意惟勤修，其身口心三事精进则是元首。何谓意精进？其意泰然。何谓泰然？用求佛道。用求佛道为何谓也？恢弘其心，寂无所为。何谓发是？发是意者，谓发道心是，此则菩萨之大哀也。何谓菩萨地？信乐无我是曰为忍。何谓发是？其发是者，悉能总摄一切众生故。何谓为处？用得备悉具诸法故，不以生死为勤劳也。其发是者，不著三界。其发是者，身诸所有无所爱吝。又其处者所可施与，不叹宣已有斯德行。所谓处者，不以禁戒而自称叹意存自大。又其处者，忍众苦恼不以是业而怀憍慢。所谓其处所获功德，转曰增益巍巍无量。所谓处者是志度脱，不离布施伏心制意。所谓处者，学问无厌如法习教。所谓处者，如所闻义，奉行不改无有异意。所谓处者，习学思惟不可讲法，权谋方便不以为

难，习无希望所颁宣法，玩习讽诵念察晓了其义之所归趣，不用劳厌而懈怠也。学修元元无所想报，是有四事是为菩萨之所修行。所以者何？其能发此慈悲喜护。又其处者，所瞻察意普怀大哀。又其处者，缘是之故，具足五通习无生死。又其处者，得四意止逮于顺理，不当所思而不惟之。又其处者，知四意断不废功德，亦不抑制无福庆人。所以者何？修中间行。又其处者，神足所习，如佛法教无所希望。又其处者，习学善德诸根不乱，无限非法悉能分别。又其处者谓十种力，无有能胜心怀圣智。又其处者欲求佛觉，诸兴造行入众法义，而不自大成七觉意。又其处者，求斯道德不念诸来，及住去者亦无所想。又其处者慕求肃敬，寂静其志而无愤乱。又其处者欲得正观，明察诸法求其所存。又其处者，曾所博闻便能修习，常如法住务身德行。又其处者，求于法身，而损众俗妄想之著，信达无形。又其处者，谓彼音声常欲庄严，随时畅出通于十方。又其处者乐如道行，脱不脱者使至永安。又其处者，谓不合非劝化四魔。何谓四魔？一曰、身魔，二曰、罪尘魔，三曰、死魔，四曰、天魔。又其处者，离诸恶习修众德本，诸秽寂然而不兴乱。又其处者，普见道慧察众缘起。又其处者，见诸所入世俗所作，消息方便因济度之。又其处者，咸睹道法而随时化，是意精进而不可尽。若有能具一切处者，终无诸难所作悉解，不以妄想住所行慧，亦不动转一切所行皆不离慧。何谓菩萨行不离慧？所行功德悉因是法，常为一切兴无极慈，无极慈者不尽世俗，因佛道慧不随无为，是名菩萨无尽精进。”

宣说精进不可尽时，九十六垓诸天世人皆发无上正真道意，三万二千天子悉得无所从生法忍。

舍利弗复问阿差末菩萨言：“岂复有义施度无极不可尽乎？”

阿差末曰：“用十六事而不可尽，声闻、缘觉所不能及。何谓十六？一曰、所施不怀异心，而悉具足如来法施。二曰、所施不兴斯念：‘吾缘是故当获福报。’三曰、所施普愍一切不怀异心。四曰、所施不念望得三昧正受。所以者何？不乐生于净居天上，常好人间。五曰、所施皆能达知众生心行。六曰、所施其意清和。所以者何？欲使其心随己计故，亦令其身从心所念。七曰、所施如受者意。所以者何？其德以过色无色天。八曰、所施与寂寞俱亦复恬怕。所以然者？过诸声闻、缘觉上故。九曰、所施不协恨心。所以者何？欲使究畅至成就故。十曰、所施威神巍巍无能制断。十一曰、以智慧施普等众生立度一切。十二曰、其所施者，所施与人随意喜乐，而惠救之心常正安。所以者何？能御意故。十三曰、其所施与不断三宝。所以者何？不舍如来至真之种。十四曰、所施常明，不怀犹豫而不迷惑。十五曰、所施与者顺如法教。所以者何？所行随义。十六曰、所施与无所不知，有所兴造乐智慧本。所以者何？欲令其智，无有穷极甚广大故。是为菩萨十六事业施度无极而不可尽。

“何谓为禅？心寂静故。何谓神通？慧具足故。何谓为慧？所见

诸色是则不通，睹诸色尽其意不随此名曰通。所以者何？而不中道行取证故。其所听闻皆在不通，诸可有音悉无逮得此名曰通。悉能晓知众生心行是则不通，心除此智不以尽心而造证矣！所以者何？不取罗汉此名曰通。能自知本因所从来是则不通，不于三世而有挂碍此名曰通。遍诸国土是则不通，虽遍诸国解无所有无刹土想此名曰通。信向诸法是则不通，达见一切诸法本末此名曰通。一切所作有妄想意是则不通，晓了众生无所希望此名曰通。乐欲往生若过诸天、释、梵、四王是则不通，菩萨皆知一切声闻、缘觉所修圣慧，悉能总揽此名曰通。为众元首，所曰元首在于诸法最上之故，因是名曰通慧功德而不可尽。”

阿差末菩萨复谓舍利弗言：“因诸乱意，菩萨以故习自伏心，是曰为禅。其智慧者，悉舍众恶是曰禅定。又菩萨行习住定意则无变心。所以者何？云修正住？修正住故习六度无极，正诸法故。习诸法者，用正故学。习菩萨行等心众生，已等众生便等诸法，已等诸法知菩萨心，已知菩萨则能畅解众生志操，知众生已则知诸法，是名曰习弘等一切众生之类，悉等诸法而无适莫。等住诸法，是名曰定意，为正受矣！空无想愿谓等生死，等生死者便等诸法，其已平等坦无偏党，心普等者等众生心，等众生心已乃谓平等，故曰普等。其心所行平若虚空，如地水火风无有爱憎。其心等者无忧无喜，其身已住不踰佛土，定若三昧，不以谄诤如本际住，而不自大亦不贱己，不痴不恶亦不多辞，唯欲晓了法之本源，是时非时常随时宜，不从一切世俗之秽越世八事——利、衰、毁、誉、苦、乐、有名、失称，舍诸有为不好愤闹，随是法者不离三昧。所以者何？皆见天下所造立行，随其所行续在三昧莫能知者。是曰菩萨善权方便，深入智慧寂度无极。若欲三昧执御其心，由无极哀而随因缘。所以者何？用众生故。斯义名曰善权方便，寂然恬怕三昧之业，此为圣慧。已如三昧所建立者，依仰佛慧，是曰善权；而于诸法永无所求，是曰智慧。奉执定意，又以功德化护诸法是曰善权；其心坦然不坏法身，是曰智慧。以三昧定，住念佛身诸相种好，是曰善权；弘恩元元念佛法身，是曰智慧。于三昧中，念佛诸音犹如梵声，是曰善权；思知诸法无有言辞，是曰智慧。住于三昧心如金刚，是曰善权；虽获禅定，不忘世俗众生群党，是曰智慧。而于三昧念备本愿长育一切，是为处处随时善权；又于禅思解于众生悉无吾我，是曰智慧。游于三昧不舍诸法，是曰善权；晓无本末亦无根源，是曰智慧。修于三昧，思诸佛土悉为清静，是曰善权；解诸佛土都无所有，是曰智慧。在三昧住，惟有佛树修之庄严，是曰善权；身离众欲而无秽浊，是曰智慧。又在三昧念转法轮，是为善权；遵行禅定转无所转，是曰智慧。住于三昧欲见菩萨，以相庄严是曰善权；以济众苦无有烦恼，是如来禅。如来禅者了一切法，永不贪欲不想尘劳，知诸情乐除众法想名曰禅思。是为菩萨所生地慧，开士大士以诸一心与法不同尘是乃名曰不可尽禅，不为一切众魔得便，则

为正觉造诸法器。所以者何？摩不含容。”

正士说此寂度无极不可尽时，四万菩萨得日明三昧。何谓日明三昧定者？犹日出时灯火炬耀，星宿月光闇蔽无明。菩萨已逮是三昧者，一切众圣咸为覆蔽。所以者何？其慧巍巍明弘广故，一切声闻、缘觉智明皆为覆蔽，以故名曰日明三昧。菩萨已住寂度无极，悉能逮成诸三昧定。粗举都较，取要言之，演诸三昧名，有三昧名曰照明，有定名月光，有定名庄严，有定名严耀，有定名修严，有定名无极晖猛伏，有定名其明消冥，有定名如诸法教，有定名成光明，有定名无所忧，有定名立坚固，有定名等如太山，有定名法明，有定名法御，有定名法君，有定名法慧顺教，有定名感法宝，有定名法城总持御，有定名知人意行，有定名幢英弃众烦苛，有定名力制四魔，有定名已成十力，有定名断诸挂碍，有定名造灯光，有定名坚住若地，有定名如须弥，有定名犹安明，有定名智行光耀，有定名智不可计随具教，有定名心教柔软，有定名无所求脱，有定名如水日月光，有定名犹如佛身，有定名等诸无我，有定名调象随教，有定名见得诸佛念，有定名法意无碍，有定名无退不转，有定名众毒消净如月，有定名入空寂，有定名晓众想，有定名无愿，有定名住一心，有定名如金刚，有定名无极光莫能当，有定名自在净，有定名内诸劳烦尽，有定名广大如空，有定名入一切业，有定名心思得慧，有定名慧悦人无尽，有定名成圣慧，有定名总无所忘，有定名冥普见明皆多乐，有定名慈行，有定名心本净大哀，有定名入诸护，有定名心等入无所碍脱，有定名法法住，有定名智明达，有定名解畅，有定名不可数，有定名充饱众，有定名无不了，有定名脱慧随化众，有定名金刚莲华，有定名了无常，有定名尊智慧，有定名勇伏，有定名诸佛念，有定名随教明脱，有定名严佛土，有定名开辟静诸国，有定名入众生心喜，有定名正真直，有定名以菩萨道六度无极严，有定名觉解结，有定名觉意华，有定名施脱若天药，有定名光无不周，有定名明无住佛，有定名甚深妙，有定名积宝如海，有定名如山方面，有定名神足甚广无不总，有定名见无数佛，有定名总诸学，有定名如弹指顷无不知，有定名智不可限计如大海。如是等定亿亿巨垓，菩萨以住寂度无极普备斯定。

阿差末菩萨复谓舍利弗言：“智度无极而不可尽为何谓也？如所闻慧趣建立行故曰不可尽。应如斯行有八十事。何谓八十？顺所闻（一），寻如意（二），如教习（三），从善友命（四），不自大（五），所作不忘（六），常恭恪（七），从经业（八），如言从（九），数习智（十），勤心受（十一），不失节（十二），不忘念（十三），意不乱（十四），兴宝意（十五），显药志（十六），除诸病（十七），是意器（十八），乐忍辱（十九），思乐谛（二十），入慧意（二十一），学无厌（二十二），施无所慕（二十三），施无适莫（二十四），所闻谛思（二十五），欢喜启受（二十六），心悦身轻（二十七），其意清和（二十八），而无烦苛（二十九），所学如本

(三十)，常喜说法(三十一)，闻欲向道(三十二)，法自守者(三十三)，好闻正(三十四)，不在异学(三十五)，唯受雅智度无极(三十六)，逮于菩萨方等经(三十七)，但慕听权方便经(三十八)，又好闻习四等心(三十九)，复察解了无神通(四十)，如初意耳无异念(四十一)，心务于谛善方便(四十二)，唯欲听之无生法(四十三)，不贪世观但悦慈(四十四)，了十二缘达无常(四十五)，知于苦畅无我(四十六)，欲知寂分别空(四十七)，解无相体无愿(四十八)，晓生死了功德(四十九)，达众生知无忘(五十)，严其音若城郭(五十一)，所闻勤执乐听经宝(五十二)，在俗知俗启于中意(五十三)，以为伴侣(五十四)，欲闻降伏(五十五)，诸事业(五十六)，常志思饶(五十七)，普入诸法(五十八)，慕断贫乏(五十九)，所云贫乏(六十)，谓智不足(六十一)，念解遵通(六十二)，晓解圣慧(六十三)，悦受正道(六十四)，晓无智者(六十五)，悉化使知(六十六)，了常遭苦(六十七)，给不足者(六十八)，别离一切(六十九)，无功德业(七十)，明识其本(七十一)，众恶不为(七十二)，畅益身义(七十三)，达利众生(七十四)，解安隐行(七十五)，乐不怀恨(七十六)，欲别至尊(七十七)，无极之事(七十八)，念诸佛法(七十九)，所因获致(八十)。是为名曰如所闻慧辄建立行。”

阿差末菩萨谓舍利弗言：“菩萨有三十二事所入随时。何谓三十二？随音响入(一)。欲入于观(二)。入心所行(三)。入身求脱(四)。而济众生(五)。入不断无常(六)。入无所著(七)。入随因缘所可作为(八)。所入无人(九)。入于无寿(十)。入于无命(十一)。入去来今之所住处(十二)。入功德业(十三)。入空不懈(十四)。入于无想(十五)。而入无愿不废勤修，不以空取证无想不愿护已不堕(十六)。欲入三昧而修正受，悉向成就三昧正受，以故不生无色天。所以者何？拥护所致(十七)。又入诸通智慧之原，虽尔不入尽灭之径(十八)。又入无生济诸所生(十九)。复入本际思惟其义(二十)。欲入无际而不取证。所以者何？有将护故。所云无护则为声闻(二十一)。欲入众生解无吾我不舍大哀(二十二)。入一切畏生死之难(二十三)。所可游入虽有生死无为生故(二十四)。又入所厌众诸尘劳(二十五)。入厌欲者亦不堕落。所以者何？不中取证(二十六)。又入不思贪欲之党入不舍法(二十七)。入诸犯法而不为非(二十八)。入权方便。所以者何？由因众生意堕贪爱欲开化故(二十九缺三十)。所入教授应病与药(三十一)。菩萨所度各得其所(三十二)。是为三十二事所导如事。所以者何？不失节故。犹欲入城会从门入，欲畅众缘当眼察之，解缘业者则不诤讼，欲令无争莫如自守，欲知无言为佳快者不如莫语。所以者何？不喜语者自护身口，不欲所止勿在彼居，不欲动者慎勿得转，无希望者亦无所想，是故曰等。欲不迷色当正坚住，已坚住者尔乃达至，不乐令变常自谨慎。若慕寂静将养己者勿得称己，不欲下者莫自矜高，不高不下具足正法。不喜损者无有能谴，若乐便安所作无失，无所失者则无有疑，无有疑者解无本故便无所失，等于三世而无差特，等三世者无所

增损，不住于色痛想行识，亦无殊特。眼见色识则无所住，耳声识、鼻香识、舌味识、身软识、意法识悉无所住，从本净行如法如慧。如审谛行如无吾我，见诸法行无我曰慧。解诸所有皆无所有，亦悉无本是名曰慧。不以身绮而怀自大，是名曰慧。知于菩萨习正真慧，达为一切众生之故；众生故者心常不舍不离诸法，是乃名曰菩萨习慧。”

阿差末菩萨经卷第四

阿差末菩萨谓舍利弗言：“菩萨习智入于诸法，故无所著是名曰慧。有十六事不与慧合。何谓十六？用无明故而起阴阳，从生老死皆不与慧同。诸所作为亦不同尘，亦复不与六十二见而杂错也。不自贡高亦不卑己，有利无利、若誉若谤、若称失名、若苦若乐，过世八事贡高自大谦卑恭慎。俗间有是二十一事不与合同，去众烦恼不为愚冥，觉寤睡眠脱诸恐惧，不与罪合及诸心垢，不除五阴故至生死，身魔、罪魔、死魔、天魔而共合也。一切众生我人寿命，无所希望而造因缘，诸有希望俗间之念，当尔不尔是与非事皆缚著业。有所贪慕与戒反矣！不奉禁戒、奉禁戒者，忍辱嗔恚，精进懈怠，一心乱意，智慧愚冥，以度无极，贡高谦逊，皆离是事坚住不住谓梵志也。定意坚强功德刚柔，消一切念使无有余，便属无为。国土好丑、众生吉凶、一切善恶、愚慧识明、生死灭度、谛与不谛，离一切念，其智者无所睹、无有见、无有想不想泥洹。何谓为慧？察之计校八法功德，晓了八法。何谓为八？晓于五阴，了四大，解六衰，别四谛，达十二缘，畅明三世，识分别一切罗汉及缘觉至菩萨演诸法。

“何谓晓五阴？诸所生灭犹如幻化、梦中所见、芭蕉、野马、山中之响、镜中之像、水中泡沫；观于诸色、我、人、寿命，解色如此；痛如水泡，想若野马，生死如芭蕉，识者如幻，计水泡沫、野马、芭蕉、幻化。所以者何？此微妙故。其微妙者，无我、无人、无寿、无命，是晓五阴、我、人、寿命犹如幻矣！识亦如幻，是晓五阴。五阴堕俗，世俗相者闪现便无，是为世相。其世相者，非常、苦、空，非身之业，其知是者曰晓五阴。

“何谓了四大地水火风？其法界者不为刚强，水者法界则无有水，火亦法界不以自热，风者法界不用动摇。其四大者，谓眼所识计于法界，不以眼视，视悉知之。其法界者，不以耳而听声，鼻不向香，口不味味，身不细滑，意不著法，悉解法界悉以具足。众生法界如讲授之，叹情志性法界平等平等如称，欲界法界亦等如称，色、无色界法界悉等如称，生死之界、泥洹之界、法身之界等称如空，法界亦如。所以者何？有德无德亦等如空而无有异，亦不可量悉叵称载。其泥洹界亦复若兹不可讲说，此入法界是名曰智，号了四大。

“何谓解六衰？如解言曰：其眼亦空，而无吾我，亦不无我，是亦悉空。所以者何？解我空者在于诸衰而不为衰，是则名曰解于六

衰。谛计六衰不著不断，是为菩萨解于六衰。眼色为衰所视不堕。所以者何？不中道取证。耳、鼻、口、身、意亦悉如是，是曰菩萨解于六衰。何谓六衰？其能分别六衰，别六衰已便入于道，不别衰者则非是道。又如菩萨用大衰故不近不远，以众生故不舍大道亦不离施，是曰菩萨解于六衰。

“何谓别四谛？知苦、习、尽、道。不得五阴处是曰知苦，所生为习，色现寻灭名曰为尽，得道无道心以等住故曰为道。菩萨知四谛而不取证。所以者何？护一切故，是曰别四谛。复有三事。何谓为三？其真谛相审解如本，其世俗言假有号耳！了真谛心不念有无，审解本者一切诸色悉为平等。所以者何？不中道取证以相为应，是则名曰别于四谛。”

阿差末菩萨曰：“其谛有一无有二也。所以者何？如来至真无所希望，亦不想求色与无色，无所希望适得其中，是别四谛。复有五阴苦者是恼之相，好解空者，是曰苦谛。畅达五阴所从缘起，是曰习谛。所见万物皆有想求，别了其意而不贪慕，虽不求者亦复不忘，是曰等知尽灭之义。不与去来今现在事而俱同尘亦不住中，是曰尽谛。欲致道者，了苦习尽不在二事，所谓二事犹豫结网，是曰尽谛。谛观察之知之为苦，是为菩萨别于四谛。一切所见苦乐善恶，心睹世间悉了本末，是曰知苦。诸缘皆苦，是名曰习。解慕世苦不以为求，虽不求望不堕尽证。所以者何？不中取证故。是曰菩萨因知求道。犹欲渡水而不求船，不能横越；思惟其便，若得板木，乘骑其上可以得度。所以者何？不忧不度不愁在苦，作是行住如四谛教，不以色诤而堕取证，是曰菩萨别于谛矣！意察生苦，苦从缘生亦不从缘，是曰知生。一切所生亦无所生无有起者，亦不灭尽不兴灭意，是曰意寂而苦灭矣！乐知求胜而伏其心意解入此，是曰知道不住其中。所以者何？慧无住故。是曰菩萨别知四谛。

“何谓达于十二因缘？谓因无明便致生死，如诸法教其有所生，了不可见亦不可知。所以者何？无有生故亦非不生，以了如斯因缘之事，缘求泥洹谛了众生，所行不等有上中下，缘作罪福故造行道，所当致者兴无生缘，修诸法业与道合者，是为名曰解十二缘。设无是缘则消除矣！所谓消除谓无明灭，无明灭者谓老病死灭，老死已灭，能达此者解十二缘。诸所有因悉法所总，诸所有缘皆法所合，其因缘合非我非彼，亦复不是我、人、寿命，悉无所入，如是入者不在一切诸所有也，其意普解是十二缘。菩萨悉欲具足诸法，具诸法已皆了无常不堕取证。所以者何？护众生故。是曰菩萨解十二缘。

“何谓明三世？悉知去意有德无德，观身他人等无有异。所以者何？身有误差他人有过，悉代悔之逮所作福，因此福祚发心求道，是为菩萨过去功德。其当来意所作功德，悉用发心立菩萨愿，诸所发心以护制持，执心坚固不受浊意，是当来福。今现在意所作求德，以正众缘是为功德，悉舍诸秽不随非教是不离德。所以者何？近佛道故，

是现在福。察去来今信三世空，观三世法，则以智慧无元劝助，去来今佛用善权故，曰则三世诸去法尽。所以者何？不可见故。不以去德而变其心，诸当来法视无所生不以是疑，察现在法亦无所住则无处所。所以者何？不舍道心，是故名曰明于三世普达智慧。过去已灭，当来未至，现在无住，智无破坏，菩萨兴德悉欲合同，是故名曰明于三世。以慧悉念过去功德。所以者何？今者所作皆前世福，因发来心当来发心故，斯智慧业具足所愿。其现作德不以为难。所以者何？菩萨愿故。是则名曰明于三世。为诸众生于过去世悉知作德。所以者何？护众生故。往古所教今续化之，所教训者欲令其人见当来佛神足变化，于法道义便有增益，有增益已亦增福利益诸群黎。佛以兴世多所饶益，其所誓愿悉无挂碍，是则名曰明于三世。

“何谓明解罗汉及缘觉乘、诸菩萨德？若无佛者则无罗汉，佛兴于世有罗汉法，罗汉法者因声听解，得闻声者便备戒禁，戒禁已备谓以如戒，已如戒者具戒、定、慧、度、知见品，是则名曰明解声闻。从是所缘得阿罗汉，知德无德而了非常得脱生死，在于三界悉厌众欲达非常苦。所以者何？诸法无常。其泥洹寂亦无所有不求所生。所以者何？畏生死故。畏生死者不信俗业，身如怨仇，四大若虻，六衰空野不愿所生，五趣周旋受泥洹护，如是行者明解声闻。

“何谓识解缘觉者菩萨皆知？云何缘觉所造立德，所兴功祚出罗汉上？所以者何？所行精进超越过上，施与持戒声闻不逮。所以者何？声闻所行其心局迮，所奉供佛慧不足言，既入佛法所学乐小不愚不慧。所以者何？闻众乐音而秽厌之，所学少少常喜怀恨，依大德勉而乐尊务，所兴施与思十二缘，由求得脱已身校计，独信守道从缘起行而建立功德，是则名曰识解缘觉。

“何谓畅解大乘之业？所入晓德不可称载，其乘广大旷然无极，为众生党行权方便，其德庄严不以为难，皆惠众生之所钦乐，以度无极化成大乘，悉知一切人心所行，欲度脱之越众缘起，不谓佛道为难得也！复以光明照于众生，其心特尊卓然无侣，度一切苦晓了诸法，无有阴盖，降伏众邪皆令清和，总摄道法三十七品，威德殊特犹踰幢幡，游十二缘不著不断，诸所可见忧戚睡眠、淫恚调戏不可之事悉远离之，真以佛慧、诸相种好而为绮饰，以乘严己身口意行。所以者何？无有罪咎，是则名曰大乘功德。大乘功德则是天上天下众生之度。何谓一切众生之度？诸法悉合谓脱不脱。脱不脱者，菩萨大士充续功祚，是名曰脱。晓了生死所兴功德，谓身口心以明晓了，口作功德身立福祚，身口心行三事生死，菩萨以缘晓知脱便，愿萨云若诸通敏慧，是曰明达。脱以复晓诸不脱者，五度无极入智度无极，谓为脱者不以为难，解度无极常悉总摄。菩萨善权皆蒙光明照于一切。所以者何？则以四事总及他人，无我、无人、无寿、无命、无执无舍，是故分别。用脱之故造菩萨愿明解度脱，谓于生死稍稍得进以无所断，无所断者不灭生死，不灭生死者是为菩萨，无所破坏。所以者何？不

与无瞻势者从事，以是故曰分别未脱，空无想愿以此法察，晓了诸见菩萨信故。所以者何？于三脱中能不堕者，是曰未脱；谓不取证，在于三界而无所著，是名曰脱。虽在三界广施方便。所以者何？用明智故不堕取证，是则名曰晓了脱德。所造功法皆以具足诸通敏慧，已具通慧不离普智，是晓诸法。”

阿差末菩萨谓舍利弗：“是八事法与智慧合而不可尽，是智慧法咸知分明，以能分明如佛法者无有殊异。所以者何？以去睡眠非法之故。是则愿力便逮道法，诸经慧相、智慧光明照于本际已入于慧，诸欲见者悉以晓了能至泥洹，总持慧故不舍道法，以信智慧众垢悉除。其大智者则是诸法之元首也！自然慧者无有师主，皆解诸欲而无所著。所以者何？因逮道明以慧断根故不可尽，众想悉空所以造根，由痴冥故欲致圣明，则以慧药教导守道者咸得正住。其来学者以慧训诲各使得所，用智慧明悉照痴冥各令得明。其无眼者悉获法眼金得彻视，无余慧明皆越诸色，真谛之慧无复结网，以慧教告。其不伏者悉令自降，为诸闇冥显智慧眼，不可尽慧靡所不入行莫不周。所以者何？畅十二缘，所宣智明，解诸缚著令无误差，不以生死而为迷荒。”

阿差末菩萨谓舍利弗：“菩萨大士以慧总揽，入众生心随其所行，皆见心念明解分别群黎之党，无功德者以慧导利。菩萨智慧悉遍声闻、缘觉之乘上至正觉，是为慧处。斯菩萨学名曰智慧而不可尽，演智度无极畅不可尽。”

说道品法时，三万二千菩萨悉得无所从生法忍。

阿差末菩萨复谓舍利弗：“慈氏菩萨而不可尽。所以者何？其慈广大无边际故。仁若虚空不可限量。所以无边者？犹若众生四大如空无所不周，以慈普覆亦如四大，地水火风不可称限故不可尽；菩萨弘慈亦复若兹不可穷极，故曰无际。犹空无边一切四大悉不可量，众生无尽仁不可限，故曰菩萨大慈无尽。”

尔时，舍利弗问阿差末：“众生四大数不可尽为何谓也？”

阿差末曰：“地水火风，其数过于药草丛林。”

时，舍利弗复问：“可为众生兴引譬乎？”

阿差末曰：“可假借喻，不可以民庶为数极。”

舍利弗问：“所喻云何？”

阿差末曰：“犹如东西南北、四维、上、下合为世界，各如江沙十方佛土合为大海，取一切人尽住海边，各以一毛取水数，举一滴水为一江沙人，举二滴水为二江沙人；如是滴水大海水尽，众生之限不可尽极，群黎四大亦不可数亦复若斯，菩萨大慈靡所不周。”

阿差末菩萨谓舍利弗：“若能弘慈，其德福庆不可尽极！”

舍利弗言：“实不可尽。”

阿差末曰：“若有菩萨闻众生数不可穷尽，不恐不惧不以怀嫌，尔乃应曰慈不可尽。”

阿差末谓舍利弗言：“其弘慈者是菩萨护，复为众生有功效业。”

所以者何？无有失故。众恶粗犷悉永消除，伏众怒害及诸爱欲，其有见者莫不悦颜。所以者何？无有众邪，诸有恐惧咸悉尽爱。其道正端而无偏邪，悉能化导诸乱心者，其有危难往就慰济。所以者何？欲度脱故。诸有系缚莫不解散，诸谄谀者修备质朴，唯学道要不慕世荣，悉为释梵之所钦奉，常以智慧靡所不睹。所以者何？护众生故。修四等心，不怀异意悉弃尘劳，入佛道要总持慧业，以德自严以超众德，三十二相八十种好，皆以具足诸不备悉，度脱快哉快哉泥洹显导众生，不在八憾不闲之地，乐以法乐以法自娱，总摄众欲不贪王土，等心众生所行无异净此普慧。其犯戒者悉将护之，现忍辱力无得自用而怀慢恣。不舍精进、禅思、一心，三昧正受其心不乱，以智慧业诸所听受，弘慈具足自从身出，不依仰人，不从魔教。所以者何？以获大安。因智慧解耻诸非法，悉愈众病覆护众生，常自安身亦安一切。罗汉法者，但欲自护不护众生。当以大慈加哀一切！”

阿差末谓舍利弗言：“慈有三事。何谓为三？一曰、慈施一切，晓了慈施法等；二曰、慈正真等；三曰、常以普慈加于众生。所谓等者发菩萨心，慈与法等谓成就业，与慈普等因成忍辱，是谓三事慈不可尽。”

阿差末谓舍利弗言：“菩萨大士奉无极哀而不可尽。何谓为人？所云人者喘息为本，本者谓命。菩萨至行以哀为本，成大乘故。犹转轮王紫磨金轮以为始元，然后七宝辄来具足；菩萨大乘亦复若斯，以有大哀，诸佛法宝普悉周备。犹如长者有一微妙清和之乐，其音哀美入于骨髓；菩萨大士逮致弘哀，愍念众生过于骨肉。犹如长者而有一子爱之无极，菩萨之业大哀为本然后具足。所以者何？为一切教大哀无谄，无谄行者有弘哀故，便不自大专自用意，亦不虚饰以至真行，心中至直而无有异，是为弘哀。所以者何？无有邪心以逮愍哀，其心敦诚亦无懦弱而自放逸，顺随一切诱进开化而度脱之。身无所损，以势力故不贪寿命，则自爱己众恶离散，覆护众生其心已净，不舍贫匮诸厄难者。所以者何？不以劳故其心坚固，是则愍哀。其心不退因入大道，菩萨真意能勤将护，是为大哀。若为诸佛作证解明，亦为自己证明供养，复至大哀其心清净所行无异。所以者何？能舍己安而安众生，见危厄者身欲代之，心不协恨，荷负一切不以为重，坚志精进，是名曰哀。所以然者？能忍辱故。其羸劣者将护扶之，若有病者身体臭处其心不恶，欲以劳费众厄难故，请讲法者不以为倦，具足道心随人所喜。随人所喜者，谓入异学各得开解，常抱功德以为庄严，身诸根具而不堕苦，因成愍哀心等无余，以安一切所以曰哀，无人诤讼。所以者何？无所贪故乃能备哀，心无悔恨常护禁戒，悉乐导利一切众生，身若金刚不可毁伤，以身惠施无所吝惜，劝助他人令兴功德，是则愍哀。虽身立德而怀欣然，不如劝人建立福祚不用禅悦。所以者何？常为一切既在欲中，思察道慧不以为劳，是则愍哀。所造功德未曾懈倦，为无畏施舍贪吝心，欲使众生咸成所愿，思开达者辄令建立

无极大哀。所以者何？为懈废护劝赞导首也。若有犯戒及诽谤人，菩萨静定不念是言。所以者何？常以佛戒教训十方，有行恶者心哀伤之，以如来忍海无瞻势及愚冥党。所以者何？化令其人入佛法，菩萨普教令学于佛三十二相，哀亦不可尽。”

阿差末复谓舍利弗言：“菩萨大士一切所施以哀为本，故曰建立无极大哀，亦皆以应布施、持戒、忍辱、精进、一心、智慧六度无极，亦复备悉三十七品。所以者何？独能游步无能为师，所行安谛而无瑕秽，以慧愍成一切众生，曰菩萨哀为不可尽。何谓菩萨喜不可尽？所由等心为不可尽。所以者何？思察法典，其心悦豫不以为劳，舍诸音乐不以为乐，心普住法以法自娱身意降伏。所谓伏者，见人所作不应义理，衣毛为竖心悲雨泪。好菩萨道其心钦乐，愿如来身具诸种好三十二相以为庄严，诸法功勋常欲听经未曾厌饱，恒执经文常欲坚持。以应法者不以世荣而在心怀，常以法乐而以自娱，等心一切随其所喜而开化之。所以者何？各令得所如佛法教，是曰行喜。执意觉弘不违如来至真之法，究畅威灵。其羸劣者心不慕法，诸贪饕者心不清净。虽在三藏不怀自大，能谨慎者代之欢悦。其犯非者加之愍哀显示道径，身心已越恶趣恐惧，坚奉戒法犹如来禁等无差别。若骂詈者心不协恚伏令柔忍，尊敬长老谦逊年幼，颜色常和心无错乱，应人随顺先人问讯未曾谄谀，是则名曰菩萨行护而不可尽。”

阿差末谓舍利弗：“菩萨神通亦不可尽。何谓神通？一曰、天眼，二曰、天耳，三曰、知他心念，四曰、知往古，五曰、飞行，六曰、漏尽。何谓天眼？计诸天眼，龙、捷沓和及诸鬼神、罗汉、缘觉目所见者，不如菩萨目之所睹，悉超于彼，一切彻视无能及者，为尊为上为最殊妙巍巍无匹。菩萨眼者，靡所不达睹诸径路，其眼所见周于十方无边世界，诸有色像粗细大小远近广狭，悉以天眼见之明了一分别。因彼天眼见十方已，睹于五趣所生住处，而察群黎生死所归，知其报应所当获果，识斯根源，亦复晓了诸根强弱。其十方界诸佛世尊国土功勋清净鲜明，咸亦睹之察其戒净。以此功勋劝助己土，常住禁戒所愿辄成。以此天眼则观诸佛，不退转地诸菩萨众适见斯义，正士之党学其所行，威仪礼节举动进止，安庠和雅立于法门，总持辩才智智慧善权，随时方便教学具足。以真谛眼普见一切无所挂碍，察一切色悉为虚伪无一真正。以至诚眼亦见解脱及与结缚。以至诚眼见之本净显曜鲜明，于诸境界悉无所著。以至诚眼不复起生尘劳结网，见若干冥不怀沉吟。以至诚眼不住颠倒一切蔽碍不慎之法，所视明彻用法光辉而照耀之。以至诚眼宣布圣慧，不慕饰著因缘诸行，未曾怀恨无结无望，不倚尘劳一切放逸。以至诚眼剖判劳倦，厌贤圣者随根所由而开化之，不违失相皆遣光明等照众生。以至诚眼其心清净，除诸根株永令无余，离于自大无有垢秽，心性清净而无所著。以至诚眼逮见佛眼，舍心自在而不驰骋，除去虚伪不安诸疾众结之党。以至诚眼达知义理进退所归，其法净者慧圣章句，行无挂碍执御众

生，建立大哀刈弃乱法，谛度彼岸使无有挂，所见审谛亲近道场，无所依怙见乞求者不怀嗔恨，悔毁戒者护众恨心将养懈怠，其乱心者为现禅定，其邪智者施以慧眼，若失径者显以正路，志在小乘教以佛道微妙大法，令入普智顺从正觉不废神通。是为菩萨天眼彻视无尽神通。

“何谓天耳无尽神通？以此天耳普闻十方不可称限，诸佛世界所有形类，天、龙、鬼、神、捷沓和、阿须伦、迦留罗、真陀罗、摩睺勒所说音声，人与非人言语所趣，一切贤圣诸佛、声闻、缘觉言辞，诸菩萨等所畅音教，以此天耳咸悉得闻，所听了了无一蔽碍。及复察闻地狱、饿鬼、畜生音声，么么小虫、蚊虻蚊蜂、[肖+毛]拂音声皆得闻之。其心所乐善恶是非，皆从众生口之所演，悉亦知之口之所宣罪福报应：若有口说贪淫嗔恚愚痴系缚，或有怀结口辞粗犷，或口贪恚出现愚痴，或口讷钝所说粗犷弊恶之言，或口贪欲而演结染，或怀结怒演凶坚辞，或怀愚冥口演驽痴，或有心性清净和调口言侏张，或口言善心性怀害，或口柔和心性安隐所说清净，或身口意不相应者，悉天耳听神通无碍皆晓了之。以此天耳闻诸仁贤及诸不贤，于贤不贤亦无所著。耳听恶声不怀忧戚，常兴悲哀广大慈愍。若遇恶声致无极慈，悉知去来现在众生一切所行达如审谛。以此天耳闻十方佛所颁宣法，辄能受持念之不忘，如己所闻常乐道法，察如应器而训诲之，各令得所不但一反，闻如来法数数启受，无能妨废使心退忘。又其菩萨本行道时，皆从诸佛启奉道教。若干众会各各说法，悉察众生诸耳所听，辄能自然演其法教。彼若群生识经义者听所说法，不识义者不肯听之。假使耳根法界清净，其天耳界圣慧清净。设使耳界自然净者，众生亦净。若察耳界随其音声，文字言义悉能听了。一切众生生在五趣，传若干响所语不同不可称载，随斯音畅而入说法。其耳所听皆从真谛，咸以劝助如来道耳不乐余乘，是为菩萨天耳所听无尽神通。”

阿差末菩萨经卷第五

阿差末言：“唯舍利弗，菩萨神通知他心念亦不可尽。何谓知心？达诸群黎过去所念、当来所思、现在所想。又其菩萨知心如幻，则随时宜劝诲众生，说报应行祸福所趣：某人心和所报善德，某人行中得中间报，某人行劣得劣弱报。某人志性心喜布施，某人好持戒、忍辱、精进、一心、智慧，某人志性爱乐慈心悲哀喜护，某人志性慕学大乘，某人志性好学声闻、缘觉之乘，某人体性本植所种各异不同，某人德本当以某药而疗治之，用修薄福故生贱处，某行净德心性不明，某人心净所行本清，某人心净所行了定。如是比类，悉知众生古昔世时，心所念异所修不同，因其所行而为说法，是则名曰知他心念。佛知当来众人所怀：某人当来因奉禁戒报应如是，布施所报亦复如是，忍辱、精进、一心、智慧其亦若兹，所行俗业得俗事报。某人

来世修学大乘，所行法则威仪礼节报应如是。众生当来举动进止，威仪诸业心念各异，后当报受所种果实悉晓了之。某人志性行不淳淑，当随颠倒众患之难，因其所知心行则解，从其法器而为演法。所宣法者终不倒错，应病与药。若演法时无所置思，咸复达睹现在众生心念是非审谛明了，知于某人怀贪欲心，某性多嗔，某挟痴冥，知某无欲，某无嗔恚愚騃之心，因其尘劳心性驰逸。悉解此等众生所念，缘其劳秽而为说法各令解达。所诣众会察其心本，应病与药各为宣畅。假使众人心怀犹豫，志不自决迷惑驰骋，虽有进退怀抱沉疑，不明智慧惑心恶行，行来所念不能卒解，觉了心性断除尘劳，又去挂碍离垢清静，光明显曜而无所受，无所造立舍于瑕疵，以法光明照于一切众生心行，随时入教而为说法悉令普达。是为菩萨知他心念无尽神通第三之业。”

阿差末言：“菩萨念往古知不可尽，敢可忆念思逮了本，群黎之类皆悉荷蒙，如来圣旨坚住法界，熟惟真宜而不可动，性不卒暴备悉禅定，不怀怨望住而审谛，知十、五十、百世、千世，识不可计亿载世事，天地成败合散进退，一劫、十劫、百劫、千劫，了无数亿百千垓劫，名字种姓、言语、饮食、所更苦乐。自知本原见他众际，古昔从来别已种德，众生善本身所立功，劝助佛道照众生心，使识善本劝发道意，前世宿命苦乐安危，忽已悉过皆归无常、苦、空、非身。愚者迷惑，以色自倚贡高势富，憍恣眷属荒乱自大，恃怙贵位贪释梵职，慕四天王、转轮圣帝，乐诸所趣终如五旋，好于爱欲尊高之处，喜为己身求想安隐。缘是欲得化于他人，设慕世位当察非常、苦、空、非身，畅过去劫所行本末，其现在事无有处所，宁失身命不犯非义。古昔所立功德之本，咸用劝助悉具大道，现在善本执御众生，弃邪行业，不断三宝佛法圣众，发一切智。是为菩萨知往古世而自证明第四神通不可尽谊。

“何谓菩萨神足飞行？神通已达不可尽者，自察己心而好精进摄受法典，所修业行辄能成就，恒得由己常谛奉行，于四神足现在目前，诸通悉达无所复为。以无数品显现神足，威变无量，则以一身化无数身，以无数身还复一体，飞行飘疾如一念顷，不碍墙壁铁围山川，经自通过如鸟游空，坐于虚空如处地上，履水而行如在陆土，出入无间如无门户。以是神足观察人根而开化之，从其众生因可训诲而显神足，为现端正颜色无比，或因毛孔而演大光，或立威神随其形类而开度之，应病与药各令得所。或声闻、缘觉像色貌立之，或现佛身而开化之，或现释梵色像形貌，亦如四镇、转轮圣王，种种异形教诲群生，或现畜生形貌像类，从其众人之所好喜，各为说法因而将养。势力坚强多怀毒害嗔恚盛者，因其所宜而阐慈心，或显大力或四征力，或半钩锁或具钩锁力，其力无极势不可限。须弥山王甚大巍巍，高三百三十六万里，广长入海其数亦等，以一指擎擎之挑掷他方佛国如投一果，其菩萨力终不损耗。又此三千大千世界，广长无边下尽地

际，极于上方三十二天举著右掌，于若干劫擎之不懈。建神足力显其圣慧，以此威德圣慧所致恣意所欲，能举大海投之牛迹，在于牛迹亦不逼迮亦不漏逸，能变牛迹以成大海。假使劫烧天地欲坏，建立威神变为洪水，道化圣旨成为水灾，欲使为火辄如意念。取要言之，在所显示无一蔽碍令变为幻，上中下法如意所欲无不成者，无能动移妨废之者。释梵魔天及与他方，所作如法辄从经教，舍诸佛道威神无尽。其余众人天上世间，无能作威移菩萨德。以此威力，为诸民庶显若干变，悦豫功勋颁宣经道。有是神足，其心坚强未曾退还，度魔境界尘劳之秽，入佛境土不烦扰人，应其所乏各令得所。往古宿世所造德本，诸魔官属不能毁之。是为菩萨神足变化第五神通而不可尽。”

阿差末复谓舍利弗言：“菩萨漏尽神通要者，不住有为，不处无为，以大慈故不造生死，以大悲故不住灭度，欲成道德不著终始，欲现佛身不住灭度，顾恋一切不迷尘欲，化度十方不取灭度，行施、戒、忍、精进、一心、智慧，随时不惑流润，行权方便不慕无为，欲具本愿志性清净，不违道慧方便开化，在于生死五道坦明，不乐无为，六通平正，不难五趣、六度、四等、四恩、四辩、三十七品，疗生病死成其佛土，严净三场不处有无，生死无为皆观自然等如虚空无进无退。是为菩萨第六神通而不可尽。”

阿差末言：“唯舍利弗，菩萨大士有四恩行而不可尽。何谓为四？一曰、布施，二曰、仁爱，三曰、利益，四曰、等与。其布施者谓有二品：一曰、衣食、金银珍宝、车马人从；二曰、法施，广布经典靡不周流。其仁爱者亦有二品：若有求者恣意与之，欲听经者为讲说法。其利益者亦有二品：自成己行，具他人愿。其等与者亦有二品：如自己身所念思惟建立功德，来求衣食诸所可乏悉施与之；加复劝人令住道业。又所谓施，见乞求者踊跃与之，面色不变益加熙怡。彼仁爱者，见来乞求愍如赤子，彼利益者劝诸来求，令住坦然平等之地。彼等与者，假使有人身行口言心念缺漏，训之令护三事相副令入大乘。

“复次，舍心贪嫉则曰布施，精进不断名曰仁爱，有所利益志性清和后不怀恨乃曰利益，劝入大乘不堕小意是曰等与。复次，慈心顺穷则曰布施，兴发欢悦怀怨恋心乃曰仁爱，兴大悲哀被戒德铠为群黎故而忍众苦名曰利益，养护诸行令不损耗劝一切智是曰等与。复次，若求法者亦能惠与，无所吝惜则曰布施。其仁爱者有所施与，兼以法教使得坦然。其利益者亦为己身，复为他人兴隆道化。其等与者，为一切故，寻发道意诸通慧心。复次，内外所有皆能放舍，不怀妄想则曰布施。称誉一切功勋之慧，不违师友乃曰仁爱。舍身之安所便身谊，念忧他人名曰利益。合集要行若住苦恼，既自勤修思慧成道观之如掌，以惠他人不怀悒悒是曰等与。

“何谓法施？如己闻法为他人说。兴仁爱者，若有所演，不贪衣食利养之业。彼利益者，若教他人讽诵经法，随时而授未曾劳倦。何

谓等与？未曾违远一切智心，常随法训不以为患。何谓布施？爱喜法者不乏衣食，钵器履屣、诸床卧具、病瘦医药所当得者，他人所乏辄能与之，观其志性寻为说法各使得所。其等与者，能加施人净三道场，不望想报则用劝助无上正真最正觉心。复次，其法施者，于诸施中最第一尊，作是察已乃兴法施。其仁爱者，斯心质朴显愍哀义。其利益者，念道义理不受严饰。其等与者，班宣佛法道慧具足。复次，其布施者，具足备悉诸度无极。其仁爱者，成于戒禁忍度无极。其利益者进度无极，不堕颠倒退思补过。其等与者，广大禅思智度无极。复次，其布施者，则应初发菩萨心行。其仁爱者，奉修正行顺菩萨本。其利益者，成不退转菩萨法教。其等与者，则谓一生补处菩萨之基业也。复次，其布施者，立道根本。其仁爱者，喻于备悉芽茎枝叶稍成道教。其利益者，喻于道法究竟华茂芬葩炽盛。其等与者，究竟果实道德之业。是为名曰菩萨四恩。”

阿差末言：“唯舍利弗，菩萨大士有四辩才亦不可尽。何谓为四？一曰、义辩，二曰、法辩，三曰、应辩，四曰、辞辩。”

“何谓义辩？晓于诸法真谛之义，明己所达，识报应慧所知和雅，不自修功入因缘慧，不坏法界悉达本净，入于无本悉解本无，了住本际永无有际，晓解空义，奉修无想，在于无愿，晓无所求立无所行，明诸行者入一慧门，不计有人、不见吾我、无寿、无命，道智则一游正真慧，知于过去无央数劫，晓于当来无边际义，识于现在一切众行；悉解五阴犹如幻化、四种如幻、诸入若空，灭寂内行外无所游，解诸国土无有境界，心意无形，其所行至为无所到；观其志性，明识审谛苦无处所，于诸所习而无所造，其灭尽者自然之相晓入径路；分别诸法句义所趣，通入诸根畅达五力建立寂然；明察所观一切所有，如幻、芭蕉、野马、形影、梦中所见、山中之响、水中之月，悉虚无实；以若干相了为一相，知合会者必当别离，今欣欣者后会忧戚。晓声闻乘因音而解，知缘觉乘从十二缘寂静归一，畅大乘学积累无量一切德本乃成大道，是谓义辩。复次，其义辩者唯归仰义，一切诸法皆趣于义亦无所归。所以者何？一切诸法所归趣者悉皆空空，是谓为义；一切诸法悉无有想，其解无想是谓为义；一切诸法悉无有愿，其无有愿是谓为义；一切诸法悉归澹泊，其澹泊者是谓为义；一切诸法悉无有人、无寿、无命，其无寿命是谓为义。若晓诸法分别如此，是谓义辩。其讲说法无所住当言有处所，彼土所讲则不可尽，所演辩才无能障翳，诸佛世尊之所言教，悉遥劝助所宣圣慧，真谛无异无有罪衅，是谓义辩。”

“何谓法辩？若了诸法随时而入，善恶祸福、兴德罪衅、有漏无漏、在世度世、苦乐危害、尘劳嗔恨各有品类，入于生死若处泥洹，分别法界方俗之业，是谓法辩。复次，其法辩者，晓诸贪欲心所恋慕，某人好色知当何药而疗治之，某淫佚盛，某贪欲强或有少欲，某可除欲某不可除，或从住本欲应欲来，或当来世习贪欲相，或于现世

习贪欲相，或复有人内怀贪欲外无恩爱，或复有人外抱贪欲内无恩爱，或复有人内外有欲，或复有人睹其颜色而发情欲闻声不动，或复有人闻其音声而兴贪欲不以色动，或复有人因其声像而兴色欲，或复因香、诸味、细滑、由心诸法而起贪欲，或复有人无色声香味细滑之念。是为贪欲众生所行，当作是入，其贪欲门所习，或欲二万一千，其嗔恚行亦二万一千，其愚痴行亦二万一千，其等分行亦二万一千。若能解了于此诸行八万四千，便能随时而开化之无有损耗，其不入慧诱进令前，不失其节解知应器，殊特下劣有所颁宣无所侵枉，是谓法辩。

“何谓应辩？若能普入一切音词，诸天之声，世间人声，诸龙、鬼、神、揅沓和、阿须伦、迦留罗、真陀罗、摩休勒、人与非人所有音声，悉能得闻五趣众生所说之响，随其音响而为黎庶讲说经法，是谓应辩。如是随顺而为演法，是则应辩。晓了经典，知其文字观所入义，如是品类解一种言十种百种，了男女言大小婴孩，亦知过去、当来、现在文字所趣，亦解一字，又了二字之所入处，亦知一字独而无侣，亦知二字而无有伴，是谓应辩。应于真谛言无缺漏，了了分明而无误失，讷隧之言义理备悉，所在众人皆悦其辞无怨望者，颁宣深义文辞至质合宜文饰，自察其心从佛之教，观于众生志性所趣，而为应义使心开解，欢然踊跃各得其所，是谓应辩。

“何谓辞辩？所说应时辞不乱错，言不中止无能制者，所可说义无能障塞，卒问寻对应机飘疾，答不迟晚如所问报，不失应节不违问者，辩才无诤，所说辩才应真谛法，立忍辱力，所宣深妙演若干义，辩才次第不越来意，布施、持戒、忍辱、精进、一心、智慧，分别一切章句义理，讲说意止、意断、神足、根、力、觉意，发心成道观察寂然，解畅一切禅思脱门三昧正受，入于圣慧剖判三乘，悦可一切众生所念，言词和雅，语无瑕秽亦无粗言不合义者，口不卒暴，舌不迷荒恶言之教，所语柔软清净无病，言语徐详无不实词，随时事义所传辄正，不卒不暴方便随意，无有异词亦无细言窃微盗语，所语列露无屏处言，极高举声言词安隐，有所说者无能得短，诸贤圣众所共咨嗟，所称扬者通流他国，其音微妙亦如梵声闻者悉达，口所言词不违法教，皆见一切众生根本应其心念而为说法。其闻法者，辄随平等断苦恼患，是为菩萨词辩无尽。”

阿差末言：“唯舍利弗，菩萨辩才复有四事而不可尽。何谓为四？一曰、取义不取识，二曰、归慧不取所识，三曰、归于要经而不迷惑，四曰、自归于法而不取人。

“何谓为义？何谓为识？入于世法是谓识著，度世之法乃谓为义。所谓识者，布施调意明智安庠；所谓义者，化于调定寂寞澹泊归于圣慧。所谓识者，咨嗟生死而不患厌；所谓义者，虽在生死不处颠倒，悉能越度终始之患。所谓识者，咨嗟泥洹功德之勋；所谓义者，一切诸法本净灭度不怀望想。所谓识者，随其本乘而为分别；所谓义

者，入一法慧。所谓识者，一切所有皆能布施无所爱惜；所谓义者，净三道场归一大道。所谓识者，护身口意普学禁戒，叹誉止足功德之行；所谓义者，护身口意解不可得悉无所作，是谓禁戒能为清净。所谓识者，见诸贡高自大憍慢放恣怀嗔含毒之士，为演安庠忍辱之德；所谓义者，行能自致无所从生法忍。所谓识者，殷勤精进，分别一切德本之义；所谓义者，无应不应，无双无只，所行精进而无所住。所谓识者，解脱禅思脱门安庠三昧正受；所谓义者，晓了灭尽定意正受。所谓识者，一切所闻辄能受持智慧道原；所谓义者，观于智慧无有处所亦不可得。所谓识者，颁宣于斯三十七品道义之训；所谓义者，奉行遵修诸佛道法，因诸报应致道果证。所谓识者，剖判苦谛及习尽道；所谓义者，至于灭寂证明澹泊。所谓识者，因其所生悉由无明至老病死；所谓义者，以灭无明及老病死亦无永除。所谓识者，讲说所观寂然之本根源所归；所谓义者，因其慧明而得解脱至微妙智。所谓识者，解淫怒痴分数适等本不可别；所谓义者，以得永消众恶诸想不念怀恨。所谓识者，解脱一切诸阴盖法挂碍之难；所谓义者，游无蔽碍解脱慧门。所谓识者，咨嗟三宝功德无量；所谓义者，以离于贪不与欲合奉宣功勋。所谓识者，若有菩萨从初发意，常叹开士一切禁戒名称之美；所谓义者，一心念顷皆能晓了，寻得成就一切敏慧。取要言之，悉能讲宣八万四千诸品法藏，是谓为识；于诸文字诸所识著，解无所得义无处所，是谓为义。

“何谓为慧？何谓为识？住于识者则有四事：一曰、识在于色心处其中，二曰、而怀妄想处在缚著，三曰、游于生死识在周旋，四曰、迷惑识著不能自拔。是谓为四。何谓为慧？其识不处住五阴地，断诸阴盖色痛想行识，是谓为慧。复次，所谓识者，晓了四大地水火风。假使识行不住四种，识不驰骋不坏法界，是谓为慧。复次，所云识者，眼色、耳声、鼻香、舌味、身触、心法，所识之著是谓为识。设使消除外不游逸，慧之所导于一切法无所希望，是谓为慧。有所倚著则生识矣！亦从想念希望多求而生识矣！是谓为识。若无所受亦无希望，心不怀念无所慕乐，志不望报是谓为慧。有为行法则住于识；修无为行识无所住，奉无为明乃谓为慧。若住起分名谓为识，不起不灭识无所住乃谓为慧。

“何谓为取经义？何谓为取？殷勤元元求诸经典，是谓为取；若于经典致入道果，是谓取义。若于诸经成就众行，是谓为取；若能分别诸经本末，是谓取义。若在诸经入造行业，是谓为取；若于诸经灭尽罪福，永除尘劳是谓取义。若于诸经采取要慧，而为他人说尘劳业，是谓为取；若于诸经了了分别清净章句，是谓取义。若于诸经厌生死难，愁戚不乐是谓为取；其于诸经观察生死及与灭度不以为二，是谓取义。若于诸经但宣杂句严饰之教，是谓为取；若于诸经爱乐深义，钩奥致远坦然无为，是谓取义。若于诸经想识无数心念众生，是谓为取；若于诸经意于识知心无所生，是谓取义。若于正经计吾我人

及与寿命，含血之类怀可不可造立希望，所可说者悉无有主，强立本末君长之主，是谓为取；其于诸经解空无想无愿之法，不起不生悉无所行，不计吾我及与寿命，讲三脱门是谓取义。

“何谓为法？何谓为人？若著人者何从修法，是谓为人；若在于人不舍诸法而住境界，是谓取法。复次，所谓人者，云诸凡夫凡庶性行乃谓为人。若于凡夫奉真人义，修于笃信执持经典，合八等人、道迹人、往来人、不还人、无著人、缘觉人、菩萨人。复有一人出现于世，多所慰伤多诸安隐，慈哀三界诸天世人，及三恶趣莫不蒙济，名曰如来。如来正真普安一切，显示径路化于黎庶使入道义。假使有人依倚著求则无有护，因欲开化此等迷惑，故为说是当归于法、莫取于人。计于法者无所造作，无有同像无作不作，住无所住亦无根本，普行平等等于正真，亦等邪业以邪等正以正等邪，邪正无二无所希望悉无所行，于一切法逮致自然，其相究竟犹如虚空，是谓为法。所开导法亦不思念以为恩德。若入于此法门义者，观一切法皆为道法，悉御诸法不以劳倦。是诸菩萨四归之义而不可尽。”

阿差末菩萨经卷第六

阿差末言：“唯舍利弗，菩萨功德业及圣慧业亦不可尽。何谓德业？若能布施出身所有，持戒之德道慧之业，常行慈心思惟定意，行无极哀奉众善本，为己身施亦为他人，合集功德劝施一切三世众生，普及诸学及与不学、诸缘觉乘，亦复劝助诸初发意学菩萨法逮入行者，不退转等、一生补处、过去当来诸现在佛普劝德本，所行休祚咸皆祝愿。诸佛贤圣、讲经法师，以是功德使得长存寿命无极，劝众德本虽合福祚，其不发意劝发道心，已发心者使度无极，若有贫匮救摄以财，其身病者给与医药，随时供养不怀谗谄，其羸劣者劝立忍辱，其蔽藏罪令不匿过，常怀羞耻列露殃，奉敬现在诸过去佛，爱敬归命其师和尚，常行法施化无师主，勤修精进求法不懈，见诸法师视之如佛，听法无厌抱念心怀，闻远有经十四千里，故自举往不以为劳。虽说经法不慕利养，孝顺父母夙夜供养不离左侧，常念反复乳哺之恩，不以怀恨，积德无厌，身行谨敕体无绮饰，常护口辞不演粗言，自守其意心不怀毒，建立佛寺讲说精舍，所获功报犹如梵天。何谓梵福？初成佛时寻欲灭度，诸天俨然皆来劝助：‘本为一切欲度十方，五江三源流注不息，愿守本誓开度一切。迷惑盲冥颠倒上下六十二见，沉塞闭在九十六径，唯须大圣以明济之！’佛言：‘善哉！天王怀慈。五浊之世甚难开化，当分三乘开化诱进，然后能入无上大道。’此梵天福不可称限，其兴佛寺功德亦然积无量度，因此功勋具足诸相三十有二；奉行若干众善之本，由是周满八十种好；修行十善而不自大，庄严其身端正殊好；弃捐一切恶言粗辞，缘是庄严口演辩才；常有慈心不怀毒害，则庄严心净如明珠；庄严佛土神通变化，庄严经典为他人

说，庄严众会令奉道教；弃除两舌恶口、谗言斗人；咨受经典而观察之，以何开度令至大道；有所颁宣未曾越次，亦无所枉；颜色和悦，众人见之莫不欢然；剪去阴盖一心听经，其意明利以为庄严；稽首归命诸佛正觉，庄严道场遵众德本以为元首；净所生处，将护罪福爱欲尘劳；逮得宝掌，皆能布施一切重宝故无所望；以无极财而施与者，得致无尽广大宝藏；面常和悦不兴戚颜，以故亲友伴党同学莫不喜欢；等心众生，缘是得致平坦如掌，不轻末学；喜燃灯火贡上佛寺，父母师友得净光明靡所不照；积德奉戒行无点污，世世所生在清净处不演他秽，若在胎藏常无垢染；奉行十善生于天上，还在人间未曾想念一切结网，以故独步而无虚妄；训无师法，故于诸法最极尊豪；志性清净，普世众人视之无厌；不惜身命未曾欺中无所侵枉，因本诸愿悉能具成诸佛道法，缘是之故备众德本。是舍利弗薄立德本，将育随时获福无量，复过于此不可称限，吾粗举要不悉敷之。

“何谓慧业？所从因由？受其神识知五慧通。何谓为因？何谓为由？其多欲者常求佛法，明慧亲友常与其俱咨受奉敬，执御佛慧不求声闻、缘觉之乘，离于自大奉如尊圣敬如正觉，志性和调睹诸亲友，遵于慧义不著言辞，见诸法师所行道品，不乐外形闻所说法勤修法教。斯行法者是为慧业。何谓法业？希求少欲不在汲汲，少辞鲜言常自觉悟修行精进，有所闻义思惟称量，饥虚于法未曾懈倦，其心鲜明不为五盖之所覆蔽，悔其罪愆消化众殃，其意质朴而无谄谀，以行为要爱法乐法，以法为本举动为法，恒求经义如救头燃发索及肌，勤勤修身习行元元未曾违远，驰趣殊胜捐弃乱会，独在一处乐于闲居，习仁贤行限节知足未曾退还，乐于法乐不慕世荣，求度世法志不忽忘，举动进止常乐要义，求柔顺业积累坚要，常怀惭耻修敏念慧，遣诸无智弃除愚痴，盲冥罗网慧眼清净，其所觉了极为旷远，以无为慧圣意远照，现在智慧当来功勋，不自扬名叹他功勋，善修圣业不离罪福净修道慧。复次，其慧业者，有四事施而得致之：一曰、施纸竹帛；二曰、以笔施惠令写经本；三曰、施与好墨及以上硯；四曰、法师所演讲若干法因从启受，一切世间诸可难致供养法师，或以颂偈施与于人，若有妙法授与法师，不怀谄谀至诚布施。施此四事得致慧业，逮于五事信、戒、慧、解、度知见品，将护四慧而得自在。何谓为四？一曰、将护法师以为师主，二曰、将护种姓不起乱心，三曰、将护土地乡邑人意，四曰、自守护心令不驰骋。是为四事。复有四事亲近慧业令德成就。何谓为四？一曰、以深经典奉进法师，二曰、昼夜殷勤亲近慧义，三曰、衣食供给所乏，四曰、渐近道场而不退还。是为四，缘是之故致五力慧。何谓为五？一曰、信力；二曰、解脱力，精进不废博闻无厌；三曰、意力，不舍道心；四曰、定力，等视诸法；五曰、智力，所闻不忘。是为五力。戒慧力业复有四事。何谓为四？一曰、以法安谛奉行禁本，二曰、思惟经典察义所归，三曰、以法助助于正真道，四曰、务求要训以法为戒。是为四慧。忍行业复有四

事。何谓为四？一曰、精进求法，若加恶者骂詈其身而皆忍之；二曰、爱乐法者，若遇斗讼饥渴寒热悉能忍之；三曰、恭敬善师顺和尚命；四曰、元元思法忍、空无想不愿之义。是为四。精进行业复有四事：一曰、勤求听经不以劳倦，二曰、闻则执持未曾遗忘，三曰、精修说法不以懈怠，四曰、元元奉行以为正业。是为四。禅定行业复有四事：一曰、根心寂静而无愤闹，二曰、常一其意苦乐无二，三曰、一心精专求诸神通，四曰、入于佛慧消除俗智。是为四。智慧行业复有四事：一曰、不住断灭；二曰、不处有常；三曰、其心不迷，晓了不乱缘起之本；四曰、信无吾我。是为四矣！善权慧业复有四事：一曰、乐世法者随俗而化，二曰、计有人者随之牵来，三曰、复以经道因遂诱进，四曰、修慧解者因明而度之。是为四。道慧之业复有四事：一曰、修六度无极而得至道，二曰、以达归尽游于正化，三曰、其学调心调七觉意，四曰、常进遵行一切智慧之本。是为四。无厌圣业复有四事：一曰、闻法无厌，二曰、颁宣经典而无懈难，三曰、[言+戈]總察原不以为劳，四曰、明达高节通利无倦。是为四矣。”

阿差末复言：“其能周入，若布施者当正观业，持戒、忍辱、精进、一心、智慧、慈悲喜护。所以者何？菩萨一切虽未成就，演智慧首为圣土地，悉归于道住于正慧，化无慧义使归大乘，一切诸魔不得其便，皆为诸佛所见建立，至一切智无上正真，是为菩萨圣慧之业而不可尽。”

阿差末言：“唯舍利弗，菩萨意止亦不可尽。彼自观身、观他人身，观身本行成精进业，察身报应所从合成，知身无主无可贪者，犹如观外草木众果丛林刍草，从因缘生悉无主名。是身如是，犹如草木、墙壁瓦石、水中之影，五阴四大诸入所惑，观己身空无有吾我，不得久常无有坚固，危脆之物分离之法，以是之故不当计身是我所也！以此危脆无坚固身当求要义。何谓为要？如来身者乃谓真要。‘吾当勤求成佛圣体无极法身，犹如金刚不可破坏，超越一切三界俗身。’纵使此体瑕疵无量，因是当除一切秽浊，当致如来空慧法身，以勤修力合集众德，真诚俱会察四大身：‘吾以此身皆为众生志求修道。犹如察外所有四大地水火风成若干形，门户井窖造立屋宅，生活之业以安众人；吾四大身亦复如是，以若干事而依怙之，兴若干便无量财货，尔乃得安养身之业。’观身苦痛不可称限，观形无常生死往反，不当复贪无极受形。观身无我，而众生类不解本末，当训诲之令患厌此。观身寂然，将至一定令修静默。当观身空无想无愿，便归澹泊清净本际。彼自观身、观他人身，无所慕乐不计坚固知不长存，察内身行，不复听从内诸尘劳爱欲之患。又观外身，未曾得与外尘俱合，身无劳秽所行清净，身以清净然后遂致，像好体严身像已成，为过诸天及世间人，颜容巍巍无有俦匹。是为菩萨自观己身、观他人身建立意止。

“何谓菩萨自观痛痒、观他人痛痒而得意止？菩萨发意观察如

是，所可经历皆是苦恼。彼察痛痒采求圣慧，选择明智慕乐寂然，正使遭乐不系在欲，若存在欲缘致苦痛。见诸众生堕诸恶趣三塗之难为兴大哀，不以结网而见系缚。虽身以值不苦不乐诸痛痒者，不为痴冥结网而见系缚。虽在痛痒意故寂定，从来所更不苦乐痛，则以圣慧显示众生，弃捐痛痒无益之义，蠲除一切众生痛痒被澹泊铠，心自念言：‘此等群黎归在痛痒不自觉知，缚在众苦痛痒之地常怀忧戚，依倚不苦不乐之痛为之迷荒，以是之故不入智慧。’摄大哀者入于智慧，晓了休息一切痛痒，因此大哀使诸众生免除众难为宣经典。何谓名之为痛痒也？心中怀恼或复成乐。何谓选择此无痛痒无我人寿？又彼菩萨不倚痛痒亦无贪护，所受痛痒无反覆行无倒痛痒，亦无妄想诸见痛痒，亦无眼耳鼻口身心之痛痒，亦无色声香味细滑之痛痒。眼所属者从因缘起，计于苦乐无苦无乐是谓痛痒。取要言之，内外亦然从因缘生以致痛痒、苦乐、善恶、不苦不乐。其一痛痒，因一心识；二痛痒者，谓有内外；三痛痒者，随过去教，从当来行，因现在识；四痛痒者，谓从四种地、水、火、风；五痛痒者，从念五阴色、痛痒、思想、生死、识；六痛痒者，从六衰故；七痛痒者，从七识故；八痛痒者，或从八邪而迷荒故；九痛痒者，谓九神处；十痛痒者，谓十恶业。取要言之，一切痛痒皆由贪乐，因从念欲而致众痛，是故言曰不可数人其痛无量。菩萨于彼观己痛痒，观他人痛痒，知众群黎起分痛痒，当显慧业使诸众生因痛痒慧睹见德本除去诸罪。是为菩萨观己痛痒、观他人痛痒心意止也。

“何谓菩萨自观己心、观他人其意止也？其菩萨心未曾忽忘，举动行步常自将护而复察之：‘心适起已寻便消灭，无常住处不住在内，亦不在外，不两间得。吾从初始发菩萨心已来，彼心尽灭离别星散悉无有处，其无无处不可处之。心在某处其心所集众德之本，是亦灭尽离别星散，无处不处不可分别，所可因劝发道意者亦复自然。以是故曰心者不知心，心者不见心，心心不相待。’何谓其心而发无上正真道意成最正觉？其道心者不与善合，其善本心不与劝助意共俱合，其清净心不舍道心，其人观此不恐不怖亦不怀嫌，又复心念十二因缘甚为深妙不失报应所种果实，心亦不著于一切法：‘假使因缘从报应致，一切诸法无有真谛亦无君主，恣其所欲而自迷惑。吾当精进执其一心使不回转。’何谓心法？何谓迷惑？心如幻化无能净者，是为心法。假使皆舍解迷惑事，劝助佛国是亦迷惑。心如夜梦觉不知处，是为心法。若于禁戒而行谨慎然后自劝，是五神通是为化变。心如野马本末灭尽，是为心法。设以顺从一切忍力，安和正觉庄严其心而化变矣，用劝助之是为化变。心如水月究竟自然，寂静澹泊是为心法。若悉精进劝发具足，无数佛法是为化变。心不可持亦不可见，是为心法。若复备悉禅思脱门三昧正受，愿佛定意是为化变。心者无形无比无教，亦无像色是为心法。若能颁宣分别智慧，劝助佛道推往古世是为化变。心无因缘终不起生，是为心法。若能导御一切德本，是为化

变。设无有对心终不起，是为心法。若因法报修于道心，是谓为变。其心境界永离垢浊初无所生，是为心法。若导御心得致报应，至于佛界是谓为变。菩萨自观己心、观他人心，得神通已其心一定，寻见一切众生心念，因说罪福皆自然矣！菩萨自见其心、见他心已则兴大哀，已兴大哀教化众生不以劳倦，其心不灭亦复不尽，坚住其心不与生死，而俱同尘能自制心，以此圣慧通达之心，入于不起无所生法，不堕声闻、缘觉之地，常自御心堪任具足诸佛道法，一心念顷以智慧心，速得无上正真之道为最正觉。是为菩萨自察己心、观他人心得至意止。

“何谓菩萨自观其法、观他人法得法意止？以明智眼普见诸法，未曾中忘至成佛道。自观其法、观他人法，是时菩萨悉见诸法，其想于空令脱空义，脱无想愿度无所生，亦无所灭而离诸行，等见诸法舍于缘起十二牵连观法界行。菩萨察法不随非法，不计吾我，亦不计人、寿命、处所，是谓为法。何谓非法？自见吾我，计人寿命，睹于断灭，计有常存，而见有无合散之事。一切诸法皆亦是法，一切诸法亦复非法。所以者何？晓空、无想及无愿义，是一切法皆为应法；自计吾我缚在诸见，是一切法悉为非法。彼自观法、观他人法，菩萨行此不见诸法何所佛法、谁非佛法，其无径路无有解脱亦无生死，皆能开导一切诸法，处于众生速得无盖无极大哀，疗诸尘劳己心发念是无尘欲亦无不尘。所以者何？是所趣者开度平等，不疑尘劳不畏贪欲，晓了是者乃名曰佛。尘欲自然，道亦自然，立心如是，虽有所住亦无处所，不住立意而名曰住，是谓为住。立于法界，不住法界，不住人界，则无所住名曰虚空，一切诸法等如虚空。若有菩萨自观身法、观他人法，则能导御诸佛道法。一切诸法皆归解法，若晓了者乃能显发，尽于无为亦无所尽，道无生处、不生之处，观察众生未曾舍离，无生本际趣法意止，意在诸法而令坚住，不著声闻、缘觉、佛法。何谓不著？何谓处当？心所在处常能坚住，其住不迷未曾忽忘，观已来际其法所由，亦观他法而得意止，颁宣无量分别章句，所行无际等御佛法，可悦一切众生心念，降伏众魔得自在慧乃谓道义。是为菩萨自见己法、见他人法得至意止。

“何谓四意断而不可尽？身诸恶法未兴起者令不起生，以生寻灭而修精进，自摄其心所念顺义益加精勤，是谓平等奉精进行，不失顺节习修平均，以能摄心观于正谛此之谓也。所以者何？所念顺义，恶不善法不复重来。何谓不善？毁戒、乱定、惑于智慧。何谓毁戒？欲生天上则谓毁戒，不从法教其缺戒品是谓毁戒。何谓乱定？违失礼谊行不专精，心在他念是乱定意。何谓惑于智慧？断诸邪见见若干品颠倒诸事，阴盖碍法其缺智慧是谓不善。假使诸恶如是像法兴起来者而不听之，是一意断。假使诸恶不善法兴即寻觉之，知之非法不善报应，了之损耗为行秽矣！名之冥室修奉顺义消不净欲，则以慈心而除嗔恚，解十二因缘而灭愚冥，其尽尘劳是谓为断。同因缘起观其所

生，不得本末而无所断，一切诸法从习行致，是二意断。设令善法未兴起者劝令兴发，显使精进自摄其心叹无量德。所以者何？善法无量，菩萨大士所应修行。当乐慧根众德之本，皆由精进致诸福庆，显扬通致德祚之原，是三意断。所谓言善法若兴令得坚住，不畏失节不忽忘之，益乐元元夙夜精进，自摄其心以劝助道斯谓平等。所以者何？劝道心者德本不朽。所以者何？其心清净，虽处三界而无所著。若有劝助德倚三界则谓尽索。若能劝乐志一切智，谓通慧本终不损耗，是四意断。

“何谓菩萨而修神足？神足有四，已自发乐殷勤精进。彼以何习兴神足本？当行四等慈悲喜护，常当遵习四无放逸，广大其心而不贪身，以能治心奉第一禅，如是至四以得禅定身心轻便，身心已便所谓入神通，以入神通即生神足，勤修精进元元志道，以勤乐故辄亲道义，以精进故能成此法，以勤修故而致此义，一心观察以方便法，晓致神通故谓神足。常爱乐故能有所变，以精进故能使成就，以专精故能了广大，聊自修德辄成于道。有计于彼菩萨神足，缘是之故而得亲近，有心自在所欲至到无能违者，谛行所致究竟根源众行备悉，魔不能制等如虚空，彻视无边，洞听无际，定意无限，神足无底，见一切根自睹其原。是为菩萨行四神足而不可尽。

“何谓菩萨修于五根而不可尽？何谓为五？一曰、信根，二曰、精进根，三曰、意根，四曰、定根，五曰、慧根。何谓信根？常信诸法。何谓为法？其正见者信游生死，随其神足以成彼行，不乐他神而解第一真谛之义，脱于深妙十二因缘，无吾我人，空无想愿无所著相，普信诸法不堕诸见，信诸佛法，信于十力、四无所畏，不怀狐疑亦无犹豫，合集佛法令无限际，是谓信根。何谓精进根？所信法者因此精进，诸根益明踰日月光，是精进根。所可用法修精进根，由是之故不失意根，其意广大不住崖际，是谓意根。斯意静然，不违意根意广如空，以之意根专精不乱，是谓定根。其定意根常住寂名而专守一，是谓慧根。观察晓了，若于此法如是色像，分别无我是谓慧根。如是五根能具足者具诸佛法，其能具者住受决地而不动移。犹如外学五通仙人，虽视胎中不能豫别男女之根；诸佛世尊亦复如是，菩萨所学未成五根则不授决，五根已达然后受决。是为菩萨五根无尽。

“何谓诸力则有五力而不可尽？何谓为五？一曰、信力，二曰、精进力，三曰、意力，四曰、定力，五曰、慧力。何谓信力？常怀笃心在一寂静而不迷荒，无有色像住见佛形，亦知他法一心寂静，所在信力未曾退转，是谓信力。何谓精进力？设常元元修于精进，在在修德勤于经典，所生之处其心坚强，所修德本天上世间无能毁者，亦不能制令不增益，由是之故德本兴盛至无限量，是精进力。何谓意力？所在念法心不懈废，爱欲众难无能犯者，以此意力越众尘劳。其菩萨者意之所念，天上世间无能乱者，是谓意力。何谓定力？若在众会游愤闹中所在寂静，颁宣道力进止行步，第一禅者无能蔽碍，所修德本

专精道行亦无能毁；第二禅者修于欢悦，内清澹泊而不有碍；第三禅者欲化众生，将护正法无所观察；逮于四禅者亦无所碍。以此四禅修禅品类无能踰者，所修定意无能乱者，定意自在是谓定力。何谓慧力？若处俗法及度世法悉能晓了，所生之处无能为师，悉知世俗章句文字所造立业，神仙异术、五经六艺、方俗异书，菩萨不学自然知之，及度世法无所不通。菩萨以此圣明之慧，心能通畅天上世间独步无侣，随时颁宣，是谓慧力而不可尽。

阿差末菩萨经卷第七

“何谓觉意？菩萨所行有七觉意。何谓为七？一曰、意觉意，二曰、法觉意，三曰、精进觉意，四曰、喜觉意，五曰、信觉意，六曰、定觉意，七曰、护觉意。何谓意觉意？所思念法而观察经，审于正典思惟经法，称扬专念自察其意，不得法相能晓了此。何谓诸法无有相者？其相自然诸法悉空，其能晓了如是觉念，是谓意觉意。何谓法觉意？若能分别八万四千诸经法藏，选择诸法应于藏义、若不应藏，归于正义、若无正义，近义远义、清义深义，若第一义晓了法力，合者散者、决不决者，悉能选择知其本末，是谓法觉意。何谓精进觉意？若以此意由是宣法，摄取信定所护圣慧，以微妙力乐于强识无能制远，精进修行此平等行，是精进觉意。何谓喜觉意？所爱乐法笃信不离，常怀喜悦而不怯弱，其身口心常得休息，思务道法消化尘劳爱欲之患，是谓喜觉意。何谓信觉意？若能所信永离身心，爱欲尘劳心住定意，是谓信觉意。何谓定觉意？由以意定达了诸法，分别圣慧心以专精，明识诸法诸根通利，断众倒见所住无处，皆由定故能致此耳！解无吾我诸法平等，是谓定觉意。何谓护觉意？若能思惟分别法界，心不驰骋倚在俗法，心无边际，不为俗法之所迷惑，不住假号无能动者，无思无念无喜无戚，由是之故得至圣路柔顺法忍，是谓护觉意。此七觉意而不可尽。

“何谓正见？贤圣度世不住吾我，不住人寿命无所倚见，不住有见及与无见，不住德本不堕邪见六十二疑，是谓正见。何谓正念？凡夫所念淫怒痴病尘劳之弊，菩萨学者不想念此，唯念戒、定、慧、解、度知见事所示现品，常念道义恒一其志，谓心不邪是谓正念。何谓正语？所说言辞不自见身不见他人，言语柔和不演粗义，以此宣教入于圣道，不说世谈无益之言，是谓正语。何谓正治？所修行者罪福众义不行此法，唯修正道平等之义，是谓正治。何谓正业？演贤圣辞多所悦豫，而知止足不舍限节，不贪利养不怀谄谀，心不游逸所修辄善将养威仪，见他得供不怀嫉妒，己所得养安身而已，不犯殃衅随佛教训，是谓正业。何谓正便？若修方便从其正教，不从淫、怒、愚痴、爱欲而俱同尘，常远此便乐于圣道，至成灭度无为之义，常思念此是谓正便。何谓正意？其意所住真正不受不怀谄谀，而悉睹见生死

之难，一心思惟无为之道，不忘圣路是谓正意。何谓正定？以定意故乃谓平等，由是之故诸法悉等，其于正定而立平等，若有菩萨住此定者，等度众生不越正慧，是谓正定而不可尽。去来今佛皆游此路，若有菩萨顺从此教习学颁宣，是则名曰八道而不可尽。”

阿差末言：“唯舍利弗，菩萨寂然所观察者亦不可尽。何谓寂然？其心澹泊寂寞定然，诸根不乱专精无想，作性安隐不卒不暴，庠序静思舍不顺念，乐于一义除众愤闹，好喜闲静其身寂寞，心未曾乱思于闲居，无有众恶不匿其过，不堕邪见而知止足，志性清净威仪备悉，不越礼节知其随时，举动应宜供养顺教，合集德力而不自大，不倚名称功勋远闻，其心专精乐于独处，一心禅思兴于慈悲而行悲哀，修于喜悦奉行观护，从第一禅至八不思议定意之门，是谓寂然。又其寂然业不可量，若能通达于此业者，是谓寂然。”

“何谓为观？分别智慧奉修道法，无我无人无寿无命，观五阴身四大法种，观诸衰入犹如空聚，分别具成而观察知，十二因缘顺无所乱，舍离诸见睹诸报应因果果实践晓识德果，所造证明入于正真，已能入中省众圣慧。所谓观者平等法明，所见诸法而正谛观不见异法，空无想愿唯睹于此三脱之门。所谓观者，不见处所屋室之宅，亦复不无不见起分，不得颠倒妄想之业。所谓观者永无所见，设无所见是谓为观。于诸所见而无所见是谓为观。如是见者名真谛见，乃能晓了随佛之教。如是见者为菩萨故，不堕无行不住正行是谓为观。此则名曰菩萨寂然正观而不可尽。”

阿差末言：“唯舍利弗，菩萨总持辩不可尽。何谓总持？积累德本，思惟大业八万四千诸品法藏执持诵念，思之怀之不舍精进，是谓总持。又总持者，皆能启受诸法所说，声闻、缘觉、诸菩萨众，一切群黎文辞言说，所讲义理悉能识念，是谓总持。假使劫烧天地遇灾其身寿终，又彼菩萨虽遭此难，续识总持怀在心中，未曾忽忘亦不迷茫，以圣慧眼普见诸法如自察掌，是为总持亦不可尽。”

“何谓辩才无有尽者？所谓辩者所说无碍，若讲谊时无能制者，辩才通利无能断者，音辩无限节，卒问寻对应机无难，通达如水无一质碍。前世宿命所造清静行，报应所致乃得此辩！诸佛所护，诸天宿卫，所讲说者终不唐举，辞无所侵趣无为道，如是辩才皆为备悉。恭恪谦下，相人之器而为宣法，其有闻者各得其所，不豫思惟有来问者吾当说此，所诣众会趣见人根发生心念而为说法。本所从来生在人间志性真正，一劫宣经而不休息，所讲经典无所挂碍。是为菩萨辩不可尽。”

阿差末言：“又有菩萨讲一切法皆归无常，物非我有，其慧所说而不可尽；一切皆苦诸法无我，菩萨宣此亦不可尽。何谓无常？观本末事悉归无常无有科律，其无常者不可令常，从始以来无不无常，是谓无常义。何谓苦义？虽有欢乐会当归尽，愿不久存论说众苦悉趣空无，其空无者亦虚无实，虚空苦义正等无异。何谓非身？于我不我永

无本末，彼亦为虚寂静无要，有计其空及空义者悉无有身。何谓寂义？于寂无寂乃谓为寂，所解脱者而于澹泊亦无澹泊是谓为寂。所谓脱者，修于静默除一切想，除诸想已斯曰无为泥洹之寂，此谓寂灭义。是为菩萨行四谛之法而不可尽。

“菩萨所行常修一道不遵他行。何谓一乘道？菩萨独步而无有侣，唯一己身得成无上正真之道为最正觉。被大德铠，自摄精进无极势力，其身独立不从他教，超诸俗力一己游步，被于坚固非常德铠，以此开化一切众生是谓教化。所训诲者诸贤圣教菩萨大士，所训诲者是谓教化。施非我伴我是施侣，持戒、忍辱、精进、一心、智慧，则非我伴吾是慧侣，亦复不住六度无极。吾顺奉行诸度无极四恩之行，不兴发我吾当建立摄诸四恩。取要言之，诸善德本不能立我，吾当建立摄诸德本。如是像法无有伴侣，当自独立而无二伴，住金刚场以己身力降伏众魔，一发心顷得成无上正真之道为最正觉。是为菩萨一乘之道而不可尽。”

阿差末言：“唯舍利弗，菩萨善权亦不可尽。何谓善权？诸佛世尊随时便宜，道法自遇有所开化，以权方便亲近道心。其善权者因虚空生无有边际，志性随时令致殊特。其善权者皆能具足诸度无极，所生之处因权行戒、布施、忍辱，护身口心得至佛道不废精进，若无权者违失精进。善权一心转进圣慧不尔心乱，善权智慧不舍生死周旋之难，善权慈者多所养护除诸不仁，善权哀者不厌生死开化一切，善权喜者不乐一切诸所好慕，善权护者修众德本而不回还，善权天眼得佛十眼彻视十方而无边际，善权天耳得佛十耳闻十方声心所念形，善权知心见众生根悉晓本末，善权方便念过世事见于三世去来今义，善权神足在所至到而无限节多所开化十方黎庶，善权方便知众生性随以方便而诱恤之，善权修行晓众人相本末终始，善权所度过于此际令至彼岸，善权入尘化众爱欲令度诸垢，善权下担去诸五阴所负重殃，善权行限而所颁宣不可称载以诸有限说无边际，善权劝化诸弱劣根诱进退者使广无极。以权方便知其时节，增减进退非时行时；以权方便因其正路，入于邪径众生之类，住于邪路化入正道；以权方便能使鲜少变为广大，其广大者能使无限；以权方便，诸诤乱者伴侣相憎劝令和合；以权方便其在下士小乘之党，使住微妙；以权方便得至灭度，还入生死免此余人；以权方便解诸系缚闭塞罗网；以权方便能使坏结心志忍辱；以权方便常在寂静不堕灭尽；以权方便悉能解达一切所修，威仪礼节不失仪式；以权方便观诸众生，而不毁戒常顺正禁；以权方便有所摄取而不诤讼；以权方便兴隆道法宣布十方；以权方便独步三界而无患难；以权方便得至脱门致无所行；以权方便弃不贤行，虽在其中不与同尘；以权方便与道者俱入不违训，善权方便舍于无为，能入生死济脱众患；以权方便入于魔界，照诸尘劳爱欲之根；以权方便计于一切无有一切亦不无有。是则名曰菩萨所行善权，方便入不可尽。”

阿差末言：“是舍利弗，菩萨所行八十品第而不可尽。诸佛世尊皆由此法，八十无尽而出生矣！”

阿差末菩萨说是法门不可尽品时，七万八千人从本以来未发道心，应时皆发无上正真道意。五万二千菩萨，寻时逮得无所从生法忍。一切众会咸取众华，若干种香诸宝华盖，以用供散如来至真，及阿差末诸菩萨上，奉敬归此无极经要。天于虚空鼓诸天乐，举声称叹：“佛者世尊，从无数劫所积德本，自致正觉广度一切。今阿差末菩萨大士，称举经典宣扬本末不可尽谊。若有人闻此不可尽经典要者，心不怀疑信持讽诵，为他人说笃佛言者，亦当逮得如是功德不可尽谊。”

佛取体衣赐阿差末，一时嗟叹阿差末菩萨言：“善哉！善哉！快说此经。如来所劝代之悦豫，十方江沙今现在佛亦共咨嗟。”

时，阿差末取佛所赐，著其顶上而叹说言：“此世尊衣当以顶奉夙夜承事，为是天上世间拥护至尊无量佛之所服。”

应时，十方各有宝幢、宝盖、宝幡，各自然至，覆阿差末菩萨之上。宝衣、宝盖、宝幢幡中，自然演教而出音言：“善哉！善哉！阿差末菩萨，快说此辞能讲颁宣无尽法门，十方诸佛咸共嗟叹。”

时，舍利弗前问佛言：“今此宝衣、宝盖、宝幢，从何所来乃演此音？”

佛告舍利弗：“阿差末菩萨前所曾化众生之类，使发无上正真道意，各于十方皆成正觉。此如来等故遣此来，供养报恩正士本德，颁宣洪业大会之品，供养经典故覆其上。”

时，诸众会见此变化，闻佛所说，益复加敬阿差末菩萨大士，欢喜踊跃：“我等善利宿本禄厚，乃得值见阿差末菩萨！”

“稽首咨讲其闻此法福不可量！假使有人闻阿差末菩萨名者，德无能限，况复面值得归闻经！其佛大圣嗟叹劝之，岂况凡庶！”佛告舍利弗：“若族姓子、族姓女学菩萨乘，诸佛世尊住世一劫，咸共供养布施所有，奉修禁戒而无所毁，假使众人加之痛害皆能忍之，元元精进行如救头所火燃炽，禅思一心不怀愤乱，观察智慧不失时节，奉敬诸佛如是终劫。复有族姓子、族姓女，闻此经典笃信受持，而讽诵读专修奉行进退在心，佛叹此等六度无极，皆为备悉疾逮无上正真之道为最正觉。所以者何？若有菩萨学此经典，心自发念我学斯经，具为人说颁宣悉周，是则名曰能悉备具施度无极。所以者何？受此经者计于法施，众施之上近于佛道。若具禁戒所度无极无所犯负，众行周悉无一缺漏，是故名曰戒度无极。所以者何？菩萨若宣此经典时普备禁戒，一切众生不能称载，功德之勋所不能逮。假使菩萨忍一切法，众所娆害而心不起，不如诵学此经典要，悉为人说以为行智，而得具足忍度无极。其身口心常行精进，欲度一切未曾懈怠，是则名曰进度无极。其有专精于此经典，思惟不乱一心定意，是第一禅所度无极。若于此经现在察慧，拾取其义知行所趣，是则名曰智度无极。是舍利

弗，若有精学此经典者，因少行故具足菩萨六度无极。以是之故当作斯观：若有菩萨取此经典诵在心怀，若载竹帛上著经卷，为以得摄一切诸法，诸佛经典执在手掌，可使四大变之令异，无能作威转其道意。所以者何？是经名曰诸菩萨印，当求斯印。假使有人奉是印者，则能遵奉一切佛法。”

时四天王与营从俱，皆执兵仗舍之一面，叉手白佛：“我等四天是佛弟子，以得道迹能共堪任，供养此等诸族姓子及族姓女周匝宿卫，受是经典持讽诵者奉之如佛。所以者何？一切诸乘皆由此生。”

于是天帝前白佛言：“数从如来咨受经典，其数百千未曾得闻如此经义，畅达进理无有遗疑。我曾往昔与忉利天，数数闻经初未值斯。若有郡国县邑村落州城大邦宣此经者，当诣其所听所咨讲，拥护法师益其气力，精进坚强勇猛不怯，辩才通利独步无畏，斯族姓子以无所畏独在众中、若在屏处广宣此经。”

佛言：“善哉！善哉！拘翼，若发勇意欲护法师，乐令气力精勤无难。”

佛言：“拘翼，若护法师则护经典，以护经典则能将护一切众生。”

时，梵忍天王前白佛言：“吾当舍离梵天之乐、禅思等心，往诣法师所说经处拥护法师，现四瑞应令觉知之，其梵天王来至斯会从诸天人。何谓为四？一者、令见微妙光明，二者、得闻天香，三者、法师所说流利而无质碍，四者、章句相次义不相越。是谓四事。说是经时，心无所忘口语辩慧，一切众会悉欲来试无能乱者，心怀念法一心听经。以此四事所现慧意，当知梵天与诸眷属来诣彼会。”

时，魔波旬前白佛言：“因此经典，令我羸劣无一势力。若有菩萨闻斯经典则为受决，所游诸国视之如佛。唯然，世尊，我身于今见阿耨多罗三藐三菩提圣力，弃诸贡高不怀自大。所以者何？以此经典当兴拥护宿卫法师，从今自制不敢违教，所在流布行此经典，遥将养之不敢扰乱。”

尔时，世尊告阿难曰：“汝当勤受于此经典，持讽诵读为他人说，当令正法永得久存。”

阿难白佛言：“唯然，世尊，我已启受讽诵已达，但不能堪令普流布如诸菩萨。”

佛告阿难：“汝且默安，自当有人普令流布。今此会中，有诸菩萨主护正法，当令奉宣布此大化。”

于时，彼会有六十亿诸菩萨众，寻从座起应护正法，前白佛言：“唯然，大圣，吾等俱共当受此经大会法品，随时流布遍于十方，及此忍界皆当蒙恩。弥勒菩萨护法王典，当广宣布斯经典要。佛灭度后若有菩萨，在于末俗五浊之世，得闻此经持讽诵读，当知弥勒之所建立。”

时，佛赞告诸菩萨曰：“善哉！善哉！诸正士众，汝等佛前而自

咨嗟欲护正法，则为拥护十方江沙诸佛正法。”

时，阿差末菩萨前白佛言：“唯然，大圣，当见原恕。向者我身所讲经典，力少智薄，所宣句谊或能不备，是故归佛见舍罪衅，及诸菩萨奉无尽法。”

佛告阿差末：“卿所说法句谊相次，无一违理逮无挂碍。若有菩萨无阴盖者，所宣道教无有缺漏，分别经义审如所言，况今正士畅此经典，表里通达所度无极岂不及乎？今阿差末得四分别，辩才智慧所畅自在，而于大乘无所依仰独步无侣，宣决众疑度于彼岸。若有菩萨住此道地，其身口心终无缺漏，于一切慧以为元首无所不通，身口心行而皆备悉。十方无数百千亿佛，皆共咨叹卿所讲说。今佛相恕表里通达无一遗漏，十方诸佛亦复俱然。”

于是阿难前白佛言：“此经典者，所号云何？以何奉持？”

佛告阿难：“此经名曰《阿差末菩萨之所讲说义理章句而不可尽》，其要名曰《阿差末品》。阿难，若有人受此经法者，其心转明强识义理，功勋之正转百千倍，为他人说则立佛事。”

佛说如此，阿差末菩萨、贤者阿难、诸天龙神，莫不欢喜，稽首而去。

大方等大集贤护经卷第一

思惟品第一之一

如是我闻：一时，佛在王舍城迦兰陀竹园精舍，与大比丘众五百人俱，皆是阿罗汉，诸漏已尽，无复烦恼，咸得自在，心善解脱，慧善解脱，调伏一切犹如大龙，所作已办众行具备，弃舍重担不受后生，行于平等获真己利，安住正教得到彼岸，唯除长老阿难一人。

尔时，复有五百诸比丘，于晨朝时，各从住处诣世尊所，恭敬合掌，顶礼佛足，退坐一面。

尔时，尊者舍利弗、尊者大目连，在舍卫城夏安居已，亦与五百诸比丘俱，次第游行城邑聚落至王舍城，入迦兰陀竹园精舍诣世尊所，到已恭敬顶礼佛足，退坐一面。

尔时，世尊以神通力放大威光，令彼诸国城邑聚落，一切所有诸比丘众，咸各来诣王舍大城，入迦兰陀竹园精舍至世尊所，恭敬合掌，顶礼佛足，退坐一面。

尔时，迦兰陀竹园精舍，有百千数诸比丘等，承佛威光皆已云集至世尊所，恭敬合掌，顶礼佛足，退坐一面。

尔时，复有彼摩诃波闍波提比丘尼，亦承世尊威神力故，亦与二万比丘尼俱悉皆大集，入迦兰陀竹园精舍诣世尊所，恭敬合掌，顶礼佛足，退坐一面。

尔时，王舍大城有优婆塞，名曰贤护，为众上首，亦与五百优婆塞俱，受持五戒具足威仪，是大菩萨，久已住于阿耨多罗三藐三菩提行；本愿力故，常随世尊乐闻正法，恒勤精进；为满一切助道法故，于朝旦时，承佛威神从本住处，入迦兰陀竹园精舍至世尊所，恭敬合掌，顶礼佛足，退坐一面。

尔时，毗耶离大城有一离车子，名曰宝生，为众上首，亦与二万八千诸离车俱，于晨朝时，承佛神力，皆自彼城发来入此迦兰陀园至如来所，恭敬合掌，顶礼佛足，退坐一面。

尔时，瞻婆城有一长者子，名曰星藏，为众上首，亦与二万八千长者子俱，于晨朝时，承佛神力，自瞻婆城发来入此迦兰陀园至世尊所，恭敬合掌，顶礼佛足，退坐一面。

尔时，复有一摩那婆，名那罗达多，为众上首，亦与二万八千人俱，于晨朝时，自本住处发来入此迦兰陀园诣世尊所，恭敬合掌，顶礼佛足，退坐一面。

尔时，舍卫国复有长者，名大善商主，并彼给孤独长者，为众上

首，亦与二万八千人俱，自彼舍卫国诣王舍城入迦兰陀园至世尊所，恭敬合掌，顶礼佛足，退坐一面。

尔时，王舍大城复有长者，名曰水天，为最上首，亦与二万八千人俱，从本住处发来入此迦兰陀园诣世尊所，恭敬合掌，顶礼佛足，退坐一面。

尔时，摩伽陀国主韦提希子阿闍世王，亦与百千诸眷属俱，于晨朝时，亦来入此迦兰陀园诣世尊所，顶礼佛足，退坐一面。

尔时，复有四大天王，及天帝释乃至欲界一切天众，各与无量百千亿那由他眷属天众俱，亦于晨朝，悉来入迦兰陀园至如来所，顶礼佛足，退坐一面。

尔时，复有娑婆世界主大梵天王，亦与无量百千亿那由他眷属天众俱，于晨朝时，悉入迦兰陀园至如来所，顶礼佛足，退坐一面。

尔时，复有自在天王，亦与无量百千净居诸天众俱，于晨朝时，悉入迦兰陀园，顶礼佛足，退坐一面。

尔时，复有四阿修罗王，各与无量百千眷属阿修罗众俱，亦于晨朝，入迦兰陀园诣如来所，顶礼佛足，退坐一面。

尔时，复有难陀龙王及跋难陀龙王，各与无量百千眷属诸龙众俱，亦于晨朝，入迦兰陀园诣如来所，顶礼佛足，退坐一面。

尔时，复有娑伽罗龙王、阿那婆达多龙王，及摩那斯龙王、伊跋罗龙王等，各与无量百千眷属诸龙众俱，亦于晨朝，入迦兰陀园诣如来所，顶礼佛足，退坐一面。

尔时，此三千大千世界，一切诸比丘、比丘尼、优婆塞、优婆夷，及以一切天、龙、夜叉、乾闥婆、阿修罗、迦楼罗、紧那罗、摩睺罗伽，乃至人非人，及诸王等信如来者，为听法故，一切皆集迦兰陀园诣如来所，顶礼佛足，各坐一面。

尔时，迦兰陀园其地弘广，如此三千大千世界所有地方大众充满，无空缺处若杖头许而不遍者。如是上至有顶下逮梵宫，所有一切大威德神通诸天大众，乃至一切诸龙、夜叉、乾闥婆、阿修罗、迦楼罗、紧那罗、摩睺罗伽、人非人等皆来集会。

尔时，贤护菩萨摩訶萨即从座起，偏袒右肩，右膝著地，合掌向佛白佛言：“世尊，我于今者，欲得咨问如来应供等正觉，心中所疑。不审世尊，见垂听不？”

尔时，世尊复告贤护菩萨言：“贤护，如来世尊随汝所疑，恣汝所问，为汝宣释，令汝欢喜。”

时，彼贤护菩萨既蒙听许，复白佛言：“世尊，菩萨摩訶萨具足成就何等三昧，而能得彼大功德聚？云何得入多闻大海获智慧藏，问无疑惑故？云何复得无意戒聚不失成就于阿耨多罗三藐三菩提，无退减故？复云何得不生愚痴邪见，空处故？云何当得宿命智，遍知过去故？云何当得不离奉见诸佛世尊，听闻正法乃至梦中故？云何当得殊特端正上妙色身，具足威仪众生乐见故？云何当得常生大姓之家尊贵

之位，见者恭敬故？云何复得父母兄弟宗亲眷属及以知识左右围绕，恒无别离故？云何当得广达博通所为殊异，亦终无缺减于阿耨多罗三藐三菩提心故？云何当得正念正行，节度不移心知足故？云何当得常生惭愧，远离耻辱故？云何当得正智谦恭，降伏我慢故？云何当得策勤精进，远离懈怠故？云何当得大慈大悲大喜大舍，平等与乐故？云何当得闻说甚深真空无相无愿法时，一切无有惊怖退没故？云何当得不乐懒惰，摄受正法故？云何当得智慧通达，明了一切无与等者故？云何当得于一切佛刹，随意得生故？云何当得不为一切外道所摧坏故？云何当得如海，能容纳众问疑释难无减无尽故？云何当得如月满，白净法具足故？云何当得如日初出，破诸闇冥故？云何当得如灯炬，光明照了故？云何当得如虚空性，无有挂碍故？云何当得无所住著，心如虚空故？云何当得如金刚，穿彻通达一切法故？云何当得如须弥山，不可动摇故？云何当得如门闾，一切正住故？云何当得如猫狗兽等，心业成就故？云何当得无为一切诸法中故？云何当得如飞鸟，随意而去故？云何当得摧折憍慢，如旃陀罗子故？云何当得住阿兰若，如诸兽猕猴等不乐城邑聚落，一切出家在家不相参乱故？云何当得统领大众，教诏导示故？云何当得不乐生一切众生中，不动于一切众生故？云何当得不为一切外道，降伏天魔惑乱故？云何当得大辩才，于一切法决了知故？云何当得于一切佛法，不随他行故？云何当得大坚固信，无可毁坏故？云何当得大慈力信，不可动故？云何当得深入信，无所行故？云何当得润泽信，于一切法中多欢喜故？云何当得最胜信，供养承事一切诸佛无厌足故？云何当得种种入信，种诸善根故？云何当得真妙信，增长无虚伪行故？云何当得净喜信，除灭一切嫉妒故？云何当得清净信，得一切种智光明故？云何当得喜乐行信，除灭诸盖障恶故？云何当得智喜信，摄受诸佛境界故？云何当得庄严行信，胜一切世间瓔珞庄严，佛国清净成就故？云何当得清净戒行，永灭一切声闻、辟支佛心故？云何当得庄严大誓，一切所作皆究竟故？云何当得为一切众生中上首，欲行诸善法故？云何当得无有疲倦，为欲教授一切菩萨所学诸波罗蜜故？云何当得不退转，多求一切佛法故？云何当得不可坏，不为一切外道邪师所破故？云何当得深信一切诸佛，不舍此念常见诸佛故？云何当得如父想，绍隆一切佛法故？云何当得佛力加持，于一切佛法光明中生故？云何当得无障碍，一切佛法悉现在前故？云何当得如幻人，于一切法无思念故？云何当得如化者，观一切法无生灭故？云何当得如梦，观察三世无来去故？云何当得如镜像，一切世界斯现身中故？云何当得如响声，一切法无作无为因缘生故？云何当得如形影，于一切生法自无心取舍故？云何当得空无所有，远离一切诸佛想故？云何当得无相，观一切法无有二故？云何当得法界边际，菩提心无限量故？云何当得不起著，一切世界性无分别故？云何当得无碍行，遍游一切诸佛刹中故？云何当得诸陀罗尼，闻一知万善达一切文字分别说故？云何当得如诸法师，善知

一切佛法故？云何当得一切诸佛所护念，一切佛威力加持故？云何当得雄猛不怯弱出声，如大牛王及大师子王步故？云何当得无畏，令一切世间欢喜故？云何当得无疑惑，于一切佛平等无二故？云何当得通达如如，灭除疑惑不著诸法故？云何当得证深法界，善能解释所问义故？云何当得师利益他，具足大慈故？云何当得灭除懒惰，恒乐说法故？云何当得如法住，不舍一切众生故？云何当得不谄曲，性淳直故？云何当得如眼目，为一切世间灯明故？云何当得不可轻蔑，胜出一切三界故？云何当得无诤论，如教说行故？云何当得无艰难行，无住著故？云何当得知于实际，不分别诸法故？云何当得说一切语言智，令诸众生住于大乘故？云何当得至无畏处，远离恐怖永无一切毛竖等事故？云何当得知佛方便说，善达一切修多罗等故？云何当得不空生世间，恒入一切众中获利故？云何当得为一切智首，于一切世间应受供养大名闻故？云何当得无边赞叹功德，为一切众生福田故？云何当得大欢喜踊跃无量，常在诸如来师子座下故？云何当得胜上辩才，能问一切佛法故？云何当得意不怯弱辩才，于一切大众中无怖畏故？云何当得一切论议辩如师子王，降伏一切外道摄受诸异论师故？云何当得不坏本誓庄严，欲摧一切邪异朋党故？云何当得善巧说法常处师子座，一切诸佛印可故？云何当得远离一切世间无义语言，以通达一切正教故？云何当得深爱一切诸佛法，于诸如来生处行故？云何当得乐欲真法，知诸如来不生故？云何当得不懈怠，善承事知识故？云何当得不染著，游行一切世界故？云何当得愿行具足，为教化一切众生故？云何当得如珊瑚，得诸相故？云何当得如虚空，一切法无得相故？云何当得如菩萨，不断佛种故？云何当得不休息行，诸菩萨道未曾远离大乘故？云何当得著大铠甲，诸佛广大戒中决定住故？云何当得一切诸佛所赞灌顶，住于诸如来十力地中故？云何当得一切所想，通达一切诸法行故？云何当得一切算数，巧方便知故？云何当得善知一切成坏，远离一切障碍行故？云何当得一切不住行，不取不舍故？云何当得一切大施主，能施无悔故？云何当得入诸法海，能施胜上法宝藏故？云何当得一切世间行，能舍世间诸相故？云何当得广大神通，随顺诸佛神通满足欢喜故？云何当得一刹那时间行，即能遍至一切诸佛前故？复云何当得住此佛刹，遍见一切十方诸佛听闻正法供养众僧，非但未得出世六通，而实未得世间五通，而亦未舍此世界身，亦无生彼诸佛国土，唯住此土见余世界诸佛世尊，悉闻诸佛所宣正法，一切听受如说修行？世尊，譬如今时圣者阿难，于世尊前亲闻法已，皆悉受持如说奉行。彼诸菩萨身居此土不至彼界，而能遍睹诸佛世尊，听闻法已悉能受持，如说修行亦复如是；从是已后一切生处，常不远离诸佛世尊听闻正法，乃至梦中咸若斯也。”

尔时，世尊告贤护菩萨摩訶萨言：“善哉！善哉！贤护，汝今乃能请问如来如是妙义。汝为利益一切世间诸众生故，亦为安乐诸众生故，复为怜愍诸天人故，复为摄受未来世中诸菩萨故。贤护，而汝往

昔已曾供养无量诸佛种诸善根，听闻正法，受持正法，爱乐正法，敬重正法。汝今但以摩诃迦叶教化行故，少欲知足，恒乐闲静阿兰若处，或居冢间，或在树下，亦露地坐，常坐不卧，一敷不移，受乞食法，一食不再，或一坐食，或唯一抔，唯畜三衣及粪扫衣，赞叹头陀，劝请诸菩萨，教菩萨行法，令诸菩萨喜，诃责诸菩萨，教示诸菩萨，成就诸菩萨，能为利益行大慈悲，于诸众生生平等心，咸得自在。至于彼岸，随意得见一切诸佛，发广大愿行深妙行，乐一切智菩提梁柱，善能随顺如来种性，发菩提心犹如金刚，通达世间众生所念，广大妙行不可校算、不可称量，常在一一切诸佛目前。贤护，于汝功德中未说少分也。贤护，今有菩萨三昧，名曰思惟诸佛现前三昧。若有菩萨，具足修习如是三昧，当得成就如上所问诸功德等。贤护当知，更有无量无边胜上功德说不可尽。”

尔时，贤护菩萨复白佛言：“善哉！世尊，唯愿说此菩萨念一切佛现前三昧，令此世间天、人、梵、魔、沙门、婆罗门，诸龙、夜叉、乾闥婆、阿修罗、迦楼罗、紧那罗、摩睺罗伽、人非人等，多获利益多受安乐故，亦令当来无量众生多得利益受安乐故，又为未来诸菩萨辈作大光明承受威力故。又愿现在未来诸菩萨等，普得闻此念一切佛现前三昧。彼既闻已皆悉受持，既受持已一切皆当如实修学如教奉行，既学行已当令得不退转于阿耨多罗三藐三菩提，现前即能具足成就如是功德及余胜上功德等。”

尔时，世尊复告贤护菩萨言：“贤护，如汝言者，汝当谛听，善思念之，吾今为汝分别解脱。”

贤护复言：“善哉！世尊，我深乐闻如来所说。”

佛复告言：“贤护，云何名为菩萨思惟一切诸佛现前三昧？若有菩萨具足成就此三昧者，即获如前诸功德事，亦得其余殊异功德，所谓心念诸佛皆现在前，其心不乱，不舍作业，求胜上智，勇猛精勤，荷负重担度脱众生，承事供给诸善知识，常修空寂广大思惟，亲善知识灭除诸盖，远离恶友息世语言，塞诸根门，初中后夜减损睡眠，不贪衣服、饮食、汤药、堂房屋宇、床座众具，恒乐空闲住阿兰若，不爱己身不重我命，不著形色不纵其心，修以慈心薰以悲行，一切时喜常行舍心，破坏烦恼成就诸禅，于中思惟不著滋味，观察色想唯得空心不乱正念，不取诸阴不著诸入，不思诸界不贪生处，调伏慢高不妒他财，为诸世间多作饶益，于诸众生起平等心，又于众生生父母想，亦于众生所作一子心，一切法中无有诤想，虽念持戒而不执著，常在禅定亦无耽染，好乐多闻不起分别，戒聚不缺定聚不动，智聚不妄诸法无疑，不背诸佛不谤正法，不坏众僧不好乖离，亲近众圣远离愚痴，不志求出世，虽闻语言意不乐听，亦不耽著世间六味，习近熏修五解脱法，除灭十恶念修十善，断灭众生九种恼处，心常不离九想观门，常思弃捐八种懈怠，一心修习八大人觉，不著禅味不恃多闻，摧伏我慢一心听受，求法殷重修道证知，怜愍众生离我分别，求寿命想

毕竟难得，观察诸阴无有物想，不住涅槃不著生死，诸行烦恼轮发大恐怖想、诸阴怨家想、诸入空宅想、诸界毒蛇想、三界衰恼想、涅槃利安想，观诸欲恶犹如唾涕，深乐出家不违佛教，于众生所劝行功德，于诸世界无复染心，见一切佛皆悉现前，受一切身皆若幻梦，一切诸相观察灭除，思惟往来不见三世，于信清净深信真妙，念一切佛三世平等无有动转而能持诸善根，一切诸佛三昧自在，终不染著诸佛相身，于一切法皆悉平等，不与一切世间共诤，所可应作不相违背，通达甚深十二因缘，穷尽一切如来道地，得胜上忍入真法界，见众生界性无生灭，见涅槃界本来现前，慧眼清净观法无二，彼菩提心无中无边，一切诸佛体无差异，入于无碍清净智门，明见菩提自然觉知，于善知识起诸佛想，于菩萨所不念乖离，已于生死破坏魔军，一切众事皆悉如化，见诸如来如镜中像，应当求彼菩提之心，诸波罗蜜莫不平等，实际无尽集佛功德。贤护，是为菩萨思惟诸佛现前三昧。若有菩萨摩訶萨欲具成就如是三昧，当先成就如是功德。贤护，当知更有无量功德，然亦缘此三昧而生。”

佛复告贤护言：“是中何等三昧能生如是诸功德行？所谓菩萨思惟诸佛现前三昧，能生如是诸功德法。

“复次，贤护，云何名为菩萨思惟诸佛现前三昧也？贤护，若有比丘、比丘尼、优婆塞、优婆夷，清净持戒具足诸行，独处空闲如是思惟，于一切处随何方所，即若西方阿弥陀如来应供等正觉。是人尔时如所闻已，即应自作如是想念：‘如我所闻，彼阿弥陀如来应供等正觉今在西方，经途去此过百千亿诸佛国土，彼有世界名曰安乐。如是如来今现在彼，为诸菩萨周匝围绕，处大众中说法教化。’然而是人依所闻故，系念思惟观察不已，了了分明，终获见彼阿弥陀如来应供等正觉也。

“复次，贤护，譬如世间若男若女，于睡梦中见种种事，所谓金银众宝、珍财仓库，或见朋友诸知识辈，或见觉时心不乐者，是人梦中所对境界，或违或顺或忧或喜，有时语言欢欣极乐，有时躁戚尽意悲哀。是人寤已思惟忆念，如梦所见为他广宣，追念梦中便生忧喜。如是，贤护，彼善男子、善女人，端坐系念专心想彼阿弥陀如来应供等正觉，如是相好，如是威仪，如是大众，如是说法，如闻系念一心相续次第不乱，或经一日或复一夜，如是或至七日七夜，如先所闻具足念故，是人必睹阿弥陀如来应供等正觉也。若于昼时不能见者，若于夜分或睡梦中，阿弥陀佛必当现也。

“复次，贤护，譬如世间若男若女远行他国，于睡梦中见本居家，时实不知为昼为夜，而亦不知为内为外。是人尔时，所有眼根墙壁石山终不能障，乃至幽冥黑闇亦不为碍也。贤护，菩萨摩訶萨心无障碍亦复如是，当正念时于彼所有佛刹中间，凡是一切须弥山王及铁围山、大铁围山，乃至自余诸黑山等，不能与此眼根为障，而亦不能覆蔽此心。然是人者其实未得天眼能见彼佛，亦无天耳闻彼法音，复

非神通往彼世界，又亦不于此世界没生彼佛前，而实但在此世界中，积念熏修久观明利故，终得睹彼阿弥陀如来应等正觉，僧众围绕菩萨会中，或见自身在彼听法，闻已忆念受持修行，或时复得恭敬礼拜尊承供养彼阿弥陀如来应等正觉已。是人然后起此三昧，其出观已次第思惟，如所见闻为他广说。

“复次，贤护，如此摩伽陀国有三丈夫：其第一者，闻毗耶离城有一淫女名须摩那；彼第二人，闻有淫女名庵罗波离；彼第三人，闻有淫女名莲华色。彼既闻已各设方便，系意勤求无时暂废。然彼三人实未曾睹如是诸女，直以遥闻即兴欲心专念不息，后因梦已在王舍城，与彼女人共行欲事，欲事既成求心亦息，希望既满遂便觉寤。寤已追念梦中所行，如所闻见，如所证知，如是忆念来诣汝所，具为汝说者，汝应为彼方便说法随顺教化，令其得住不退转地，究竟成就阿耨多罗三藐三菩提。彼于当来必得成佛，号曰善觉如来、应供、等正觉、明行足、善逝、世间解、无上士、调御丈夫、天人师、佛世尊。如是三人既得忍已，还复忆念往昔诸事了了分明也。

“贤护，彼善男子、善女人等，若欲成就菩萨摩訶萨思惟一切诸佛现前三昧，亦复如是。其身常住此世界中，暂得闻彼阿弥陀如来应供等正觉名号，而能系心相续思惟次第不乱，分明睹彼阿弥陀佛，是为菩萨思惟具足成就诸佛现前三昧。因此三昧得见佛故，遂请问彼阿弥陀佛言：‘世尊，诸菩萨等成就何法，而得生此佛刹中耶？’尔时，阿弥陀佛语是菩萨言：‘若人发心求生此者，常当系心正念相续阿弥陀佛便得生也。’既得生已，世尊于是知彼心故亦即念彼，彼方得见佛世尊耳！贤护，时彼阿弥陀如来应等正觉，告彼人言：‘诸善男子，汝当正念精勤修习发广大心必生此也。’贤护，时彼菩萨复白阿弥陀佛言：‘世尊，是中云何念佛世尊，精勤修习发广大心得生此刹耶？’贤护，时彼阿弥陀佛复告彼言：‘诸善男子，若汝今欲正念佛者，当如是念：今者阿弥陀如来、应、正觉、明行足、善逝、世间解、无上士、调御丈夫、天人师、佛世尊，具有如三十二相、八十随形好，身色光明如融金聚，具足成就众宝辇辇，放大光明坐狮子座，沙门众中说如斯法。其所说者，谓一切法本来不坏亦无坏者，如不坏色乃至不坏识等诸阴故，又如不坏地乃至不坏风等诸大故，又不坏色乃至不坏触等诸入故，又不坏梵乃至不坏一切世主等，如是乃至不念彼如来亦不得彼如来。彼作如是念如来已，如是次第得空三昧。’善男子，是名正念诸佛现前三昧也。贤护，尔时彼菩萨从三昧起已，来诣汝所说此三昧相者，汝时即应为彼说法随顺教化，令于阿耨多罗三藐三菩提得不退转。

大方等大集贤护经卷第二

思惟品第一之二

“贤护，我时则亦授彼佛记：是人当来必得成佛，号曰德光明如来应供等正觉乃至佛世尊。贤护，是中三昧谁当证知？今我弟子摩诃迦叶、帝释德菩萨、善德天子，及余无量诸菩萨辈，咸已修得此三昧者，是为证。云何证？所谓空三昧也。”

“贤护，我念往昔有佛世尊，号须波日。时有一人行值旷野，饥渴因苦遂即睡眠，梦中具得诸种上妙美食，食之既饱无复饥虚，从是寤已还复饥渴。是人因此即自思惟：‘如是诸法皆空无实，犹梦所见本自非真。’如是观时悟无生忍，得不退转于阿耨多罗三藐三菩提。如是，贤护，有诸菩萨若在家若出家，闻有诸佛随何方所，即向彼方至心顶礼，心中渴仰欲见彼佛，故作如是专精思惟；复应当观如是色相，亦即作彼虚空之想；而彼成就虚空想已，得住如是正思惟中；住思惟已，得见彼佛光明清彻如净琉璃，其形端正如真金柱。如是念者，彼见如来亦复如是。”

“复次，贤护，譬如有人忽从本国至于他方，虽在他方而常追忆本所生处曾如是见，亦如是闻，如是忆念，如是了知；久追忆故，于睡梦中明见自身在本生处，游从见闻如前所更。是人后时向诸眷属，具论梦中所见之事：‘我如是见，我如是闻，我如是营，为如是获得。’如是，贤护，有诸菩萨若在家若出家，若从他闻有佛世尊，随何方所即向彼方，至心顶礼欲见彼佛正念不乱，应念即见彼佛形像，或如琉璃或纯金色亦复如是。”

“复次，贤护，譬如比丘修不净观，见新死尸形色始变或青或黄或黑或赤，或时肿胀或已烂坏脓血俱流，虫兽食啖，肉尽骨白，其色如珂，如是乃至观骨离散，而彼骨散无所从来亦无所去，唯心所作还见自心。如是，贤护，若诸菩萨欲得成就彼念诸佛现前三昧，随何方所，先念欲见彼佛世尊，随所念处即见如来。何以故？因缘三昧得见如来。得见彼佛有三因缘。何者为三？一者、缘此三昧，二者、彼佛加持，三者、自善根熟。具足如是三因缘故，即得明见彼诸如来应供等正觉亦复如是。”

“复次，贤护，如人盛壮容貌端严，欲观己形美恶好丑，即便取器盛彼清油，或持净水，或取水精，或执明镜，用是四物观己面像，善恶好丑显现分明。贤护，于意云何？彼所见像，于此油、水、水精、明镜四处现时，是为先有耶？”

贤护答言：“不也。”

曰：“是岂本无耶？”

答言：“不也。”

曰：“是为在内耶？”

答言：“不也。”

曰：“是岂在外耶？”

答言：“不也。世尊，唯彼油、水、精、镜诸物，清明无浊无滓，其形在前彼像随现。而彼现像不从四物出，亦非余处来，非自然

有，非人造作。当知彼像无所从来，亦无所去，无生无灭，无有住所。”

时彼贤护如是答已，佛言：“贤护，如是，如是，如汝所说。诸物清净彼色明朗，影像自现不用多功。菩萨亦尔，一心善思见诸如来，见已即住，住已问义，解释欢喜，即复思惟：‘今此佛者从何所来？而我是身复从何出？观彼如来竟无来处及以去处，我身亦尔，本无出趣岂有转还？’彼复应作如是思惟：‘今此三界唯是心有。何以故？随彼心念还自见心，今我从心见佛，我心作佛，我心是佛，我心是如来，我心是我身，我心见佛。心不知心，心不见心，心有想念则成生死，心无想念即是涅槃。诸法不真，思想缘起；所思既灭，能想亦空。贤护当知，诸菩萨等因此三昧证大菩提。’”

三昧行品第二

尔时，世尊复告贤护菩萨摩訶萨言：“贤护，若诸菩萨摩訶萨具行四法，则能得是现前三昧。何等为四？一者、不坏信心，二者、不破精进，三者、智慧殊胜，四者、近善知识。贤护，是为菩萨具足四法，则得成就现前三昧也。贤护，菩萨摩訶萨复有四法，能具足行则能成就现前三昧。何等为四？一者、乃至至于刹那时无众生想；二者、于三月内不暂睡眠；三者、三月经行唯除便利；四者、若于食时布施以法，不求名利无望报心。贤护，是为菩萨具足四法，则得成就现前三昧也。贤护，菩萨摩訶萨复有四法能具足行，则得成就现前三昧。何等为四？一者、劝他见佛，二者、教人听法，三者、心无嫉妒，四者、劝他发菩提心。贤护，是为菩萨具足四法，则得成就现前三昧也。贤护，菩萨摩訶萨复有四法成就三昧。何等为四？一者、造佛形像劝行供养，二者、书写是经令他读诵，三者、慢法众生教令发心，四者、护持正法令得久住。贤护，是为菩萨具足四法，则得成就现前三昧也。”

尔时，世尊为重明此义，而说偈言：

“汝等当住佛法中，勿藏正言及我法，
念勤精进除睡盖，三月不坐唯经行，
食时广说而施他，宣扬诸佛无比法，
不求名闻及利养，无所著故得此禅。
莫生嫉妒及嗔恚，当思解脱诸欲心，
乐此三昧求住者，勤念无懈尔乃得。
金色百福庄严相，端正圆满若花荣，
世间乐见光明体，常睹诸佛在现前。
往古诸佛及将来，现在一切人中胜，

汝等一心恭敬礼，亦常专念修供养。
汝若供养彼诸佛，应以华香及涂香，
惠施美食起净心，证此三昧殊非难。
诸佛塔前作众乐，螺鼓钲铎诸妙音，
欢喜踊跃难称量，必当成就此三昧。
劝造尊像无比身，彩画庄严具足相，
金色光大无瑕垢，证此三昧良非难。
各各常念修法施，清持禁戒及多闻，
精勤勇猛除懈怠，得此三昧终不久。
不应他所怀毒心，亦舍世间诸欲事，
常以慈悲念一切，三昧岂远在现前！
于法师所常随喜，尊重恭敬等如来，
莫生轻慢与悭贪，喜心供养除嫉妒。
无量诸佛共称扬，汝但勤求自当得！
世尊郑重演说斯，为修如是妙法故！”

见佛品第三

尔时，世尊复告贤护菩萨言：“贤护，若诸菩萨摩诃萨欲得成就此三昧者，当应于彼说法师所生诸佛想，起尊重心勿生憍慢，乃至无有争竞违逆不顺心故，然后于此胜三昧中，精勤修学方能克证。贤护，若人于彼说法法师或比丘所，起不善心、苟违异心、争竞之心、故陵辱心、诸不净心，乃至不生如诸佛想，如是菩萨假令修行，终不能证如是妙定，若得证者无有是处。

“贤护，譬如清静虚空无诸云翳，有明目人，于静夜时仰观空中，无量星宿区别方所，形色各异了了分明。如是，贤护，菩萨摩诃萨思惟观彼法性虚空，以想成故见诸如来，其事若此。然彼菩萨观东方时，多见诸佛，多见百佛，多见千佛，多见百千佛，多见亿佛，多见亿百千佛，多见亿百千那由他佛，不假作意自然现前。而彼菩萨既作如是观东方已，欣观南方及西北方、四维、上、下，十方世界各多见佛，所谓多见百佛，多见千佛，多见百千佛，多见亿佛，多见亿百千佛，多见亿百千那由他佛，不假功用皆现在前。

“复次，贤护，如彼阿弥陀如来应供等正觉，其世界中诸菩萨等生彼国者，于初一日观察东方多见诸佛，多见百佛，乃至多见百千亿那由他佛已，然后于第二日观察南方如是，乃至十方事皆若此。如是，贤护，若菩萨摩诃萨成就菩萨思惟诸佛现前三昧，如是菩萨，于自土中观察十方多见诸佛，多见百佛，乃至多见百千亿那由他诸佛也。

“复次，贤护，如诸如来成就佛眼，如是具已，于一切处悉如是

知、悉如是见。如是，贤护，若菩萨摩訶萨亦既成就菩萨思惟一切诸佛现前三昧已，自然满彼檀波罗蜜、尸波罗蜜、羼提波罗蜜、毗梨耶波罗蜜、禅波罗蜜、般若波罗蜜，乃至满彼一切菩萨诸功德等。”

尔时，世尊为重明此义，以偈颂曰：

“犹如静夜除云雾，有明眼者仰观空，
见彼众星过百千，昼念明了亦无失。
菩萨如是得定已，多见无量亿千佛，
复于起斯三昧后，还为大众演最尊。
如我佛眼清净故，无有障碍见世间，
是诸佛子菩萨眼，出此三昧最胜观。
以无相想思如来，而见十方诸等觉，
破除恼毒及诸想，汝听菩萨妙功德。
若听彼法清凉心，能入空寂无畏处，
如我当今说斯法，为令众生证菩提。
如彼安乐诸菩萨，多见无量佛世尊，
菩萨如是入思惟，亦见百千多调御。
如此比丘唯阿难，一闻我说悉能受，
菩萨如是得三昧，听一切法能总持。
成就信惭具三昧，悉舍一切世语言，
常以慈心慧他说，要当到斯寂静地。”

正信品第四

尔时，世尊复告贤护菩萨言：“贤护，若诸菩萨摩訶萨为求如是三昧宝故，当应勇猛发勤精进，自然速能入此三昧也。贤护，譬如有人乘御大船入于大海，恣意载满众妙珍宝，已过一切诸大难处，垂至此岸未几之间，船忽破坏众宝沉没。当尔之时，阎浮提人发大叫声，生大悲苦，以失如是无价宝故。贤护，有善男子、善女人亦复如是，耳闻如斯胜三昧宝，不能书写读诵受持，复不能思惟如法而住。贤护，当知尔时，一切世间诸天神等，亦应如是发大叫呼生大悲恼，作如是言：‘是诸众生深可怜愍，云何于此诸佛世尊胜三昧宝，一切诸佛之所称扬，一切诸佛之所印可，一切诸佛之所教诫，一切诸佛最上功德，具足成就圆满无缺，菩萨闻已当应勤求，反更远离不肯书写，不乐读诵，不能受持解释义理，不能思惟如法而住？如是放逸懈怠众生，未来必当受大损减。’贤护，何等名为众生损减？所谓于如是三昧宝中，闻已远离，不能书写读诵受持，不能解说思惟义理，不如法住专念修行，丧灭功德是为减损。贤护，是懈怠人恶众生辈，于斯法中得利益者无有是处。

“复次，贤护，譬如有人持赤栴檀示愚痴人，而彼痴人以愚痴故，于赤檀香起臭秽想。时主智人卖檀香者，告愚人曰：‘汝今不应于妙栴檀生臭恶想。何以故？是檀最精香气第一，汝今何故反为臭恶？若不信者，应先嗅尝为臭为香？又汝眼明，亦应以目观察是檀，光色文彩为瘦为肥为善为恶。’然彼愚者，虽闻智人如是语言种种称赞，以愚痴故转生憎恶，以手捻鼻不用嗅闻，掩闭其目不肯观视。如是，贤护，当来之世有恶比丘，憎恶是经其事亦尔。彼恶人辈不知修习身戒心慧，愚痴无智犹如白羊顽騃佞弊。彼诸恶人又薄福故，虽复得闻如是妙典正念诸佛现前三昧，不用书写，不能读诵，不能受持，不能思惟，不能为人宣扬广说，又亦不能广生随喜，云何能得如说修行？若彼恶人能说行者，无有是处。又复闻已更兴诽谤，都无信心谓为真实，虽闻多说终无开解，复作是言：‘若斯法者，但为戏论故神异其事，又为炽盛言教故过饰其词，诱诳世间造斯经典，岂得方比圣者阿难诸比丘辈现在世时宣说如是诸修多罗也？’又于异时发如是言：‘此修多罗非佛所说，乃是恶人自造文章妄言经耳！’贤护当知，如斯恶人，长夜远离如是微妙无上大宝，如彼痴人见妙香已，掩眼塞鼻不用见闻。如是，贤护，彼愚恶辈，闻此妙经三昧宝已，不欲书写，不乐读诵，不念受持，不能宣说，所谓无心亲近不愿闻故。

“复次，贤护，譬如有人卖摩尼宝，有愚痴人见彼宝已，即便问言：‘仁者，斯宝其价云何？’宝主答言：‘汝今当知是宝精胜，世间所无，非可造次以世价论也。吾今且说此宝功能威德力用，粗为约耳！卿若欲知此摩尼宝光明所照近远若干，卿今若须当以真金布满斯地，尔乃相与。’彼愚痴人闻是语已，便大嗤笑种种皆毁是摩尼宝，竟不酬价。如是，贤护，彼未来世诸恶比丘，闻此经中胜三昧宝，无有信心多生嗤笑，更兴诽谤其事亦尔。或有比丘信根深厚慧根明利，已于过去诸如来所亲近承事听闻正法，如教修行种诸善根。彼等闻此菩萨念佛现前三昧，即能读诵思惟义理，为人广说能多利益一切世间，所谓广宣流布，生大信心，发大智慧，成就纯直，具足威仪，常行惭愧，怖畏众罪，修持禁戒，不受诸欲，信甚深法，能多受闻，得深智忍，常行慈悲。然而斯等信根深固得是三昧，得三昧已游诸方国，为他广说解释义理，常作是愿：‘令此菩萨念佛三昧甚深经典，广行流布常住于世。’或有众生，善根微薄福德鲜少，过去未曾亲近诸佛供养承事听闻正法，但为我慢所降，嫉妒所导，利养所覆，名闻所牵，广行放逸不持戒善，常乐乱心不修禅定，远离经教不求多闻，未遇善师唯逢恶友。斯人如是闻此三昧，诽谤轻毁无一信心谓为不实，志性顽愚意无开解，复作是言：‘如斯经典非佛所说！乃是世间钝根比丘，愚痴邪见自作文章严饰词句。若处众中应如是说，亦如是教。汝诸众生，当知今此修多罗典非佛所说！’如是痴人，不知亲近诸佛世尊，不种善根，不修供养，习近恶友多作众恶。当知是人，远离无上深妙法宝，永失无上最胜法利也。”

佛告贤护：“吾复语汝，我今现在一切世间，梵、魔、沙门、婆罗门，及诸天、人、阿修罗等诸大众前，宣说如是妙三昧时。若彼善男子、善女人，闻已随喜，读诵受持念佛三昧，思惟信解最以为真，发如是言‘是为真实诸佛说’者，当知彼人所获福聚不可思议。贤护，若复有诸善男子、善女人，持满三千大千世界种种珍宝，以用供养一切诸佛如来应供等正觉，所得功德虽为广大，然望持经所获福聚，百千万分不及其一，乃至更以无量无边阿僧祇诸福德聚，亦不及一。”

尔时，世尊为重明此义，而说偈言：

“邪曲愚惑人，放逸根不熟，
恶友之所坏，无有正信心。
破戒造众罪，深著于我慢，
彼各言此经，非是诸佛说。
此诸修多罗，非是法王教，
彼辈自意言，我何能说此？
若见大调御，世尊放光明，
我为彼广宣，彼亦能传说。
其或于此经，闻已生欢喜，
斯人无疑网，不言非佛说。
如有戒清净，所见能了知，
敬法起重心，我为此陈说。
若以三千宝，持奉诸如来，
为求大菩提，其福不可说。
若有诸比丘，说佛所叹定，
闻者生信心，此福过于彼。”

受持品第五

尔时，世尊复告贤护菩萨言：“贤护，此众有人今在我前，亲闻我说如是三昧，于我灭后其所生处，还复得闻是三昧宝，虽闻不信诽谤毁訾，远离善友随逐恶人。贤护，复有一人，于善人所闻是三昧深妙经典，尚不生信不以为实不能开解，况恶人处闻是经典，宁能生信而复开解？何以故？贤护，诸佛如来所言难信，诸佛世尊智慧难知故。贤护，若当成就如是三昧，然后乃能于当来世，与诸众生增长佛法。

“复次，贤护，有诸菩萨摩訶萨，若在家若出家，闻此三昧不怖不惊、不悔不退、不谤不毁，闻已随喜生信敬心，决定真实无复疑网，读诵受持思惟义趣。贤护，如是等人，世尊悉见悉知悉识也。贤护，诸佛世尊云何见斯诸善男子及善女人？复云何知？又云何识？贤

护，若能读诵受持思念此三昧门，如是之人终不为恶，不破净戒，不坏正信，不入邪聚。贤护，是诸善男子、善女人等，必定深信成就思惟，能分别成就思惟，于是法中具足信心，常能读诵摄持是法。贤护当知，是人决不求少功德，亦不种少善根。贤护，是善男子、善女人，凡所生处或乏资须，然诸善根广大不少。贤护，是故斯诸善男子、善女人，已于过去诸如来所，修行供养种诸善根。贤护当知，此辈非于一如来所修行供养种诸善根也，亦非于二、三、四、五乃至十如来所种诸善根也，亦非于百千亿数诸如来所种诸善根也。贤护当知，此诸善男子、善女人，已于过百千数无量无边诸如来所，修行供养种诸善根，方得闻此念佛现前三昧，闻已生信心开意解，即以为实无复疑网，既获闻已乐欲书写读诵受持，乃至为他广宣是义。何以故？贤护，斯诸善男子、善女人，往昔已于诸如来前，闻是三昧读诵受持。以是义故如来灭后，于最末世五百年终，法欲灭时，法将坏时，还当得闻如是三昧，闻即生信无有惊疑，不退没生大欢喜遍满身心，读诵受持思惟其义为他解说，乃至一日一夜行是三昧。贤护，若复有人，闻此三昧无有惊怖，亦不退没不生谤毁，闻已随喜即以为实，思惟分别心开意解，但能为他暂时称善，所获福聚尚不可量，况能读诵受持勤思而行，为他广说至一日夜。贤护当知，是善男子、善女人，因是事故，即便获得过于无量阿僧祇大功德聚，遂得住于不退转地，随所愿欲如意即成。

“贤护，其事虽尔，我今为汝更宣譬喻明显此义。复次，贤护，譬如有人取此三千大千世界一切大地尽末为尘，复取一切草木枝叶，不问大小皆为微尘。彼人尔时于彼尘聚，取一微尘破坏分析，还令得作尔许微尘，然后复取彼一切尘，次第分析皆令等彼初微尘数。贤护，于意云何？是微尘数可谓多不？”

贤护答曰：“甚多！世尊。”

佛言：“贤护，若有善男子、善女人，取前尔许微尘数佛刹，盛满众宝持用布施。贤护，于意云何？彼善男子、善女人，所获福聚复为多不？”

贤护报曰：“甚多！世尊。然彼善男子、善女人，因是事故获得过彼无量无边阿僧祇福聚。”

佛复告言：“贤护，吾更语汝，如彼善男子、善女人，以尔许尘数佛刹盛满七宝，持用布施获如斯福；复有善男子、善女人，闻此念佛现前三昧，暂生随喜，信心分别以为真实，心开意解读诵受持，乃至暂时为他解说，是善男子、善女人，所获福聚胜前施福无量无边，非可称算，非可校计，非可思量。贤护，如是善男子、善女人，闻此三昧生随喜心，乃至暂时为他解说，尚获无量无边福聚，何况是善男子、善女人，于此三昧修多罗中，如闻而信，如信而受，如受而说，如说而行也！”

尔时，世尊为重明斯义，以偈颂曰：

“若以三千大千界，盛满七宝用行檀，
我说彼福虽为多，不如闻经少功德。
菩萨为求多福聚，信解读诵复思惟，
解说修行念三昧，斯所获福过于彼！
抹三千界尽为尘，复分一尘等前数，
尽取如是诸尘刹，盛满珍宝以行檀。
诸佛所赞三昧经，单以一偈为他说，
我言斯人获功德，超彼檀福不可量！
若复为他具足说，下至一构牛乳间，
思惟增广诸善根，何况长远无量福！
一切众生尽作佛，净慧终竟证彼如，
假于亿数多劫中，说斯偈福不可尽。
其间彼佛皆灭已，多亿数劫常广宣，
终亦不尽彼福边，缘此深经四句偈。
一切所有诸世界，四方上下及四维，
满中众宝持与他，为求胜福奉诸佛。
彼诸功德难可量，称计与诸世界等，
其有闻受是三昧，善能宣说福过前。
若人于此无迟疑，其于诸法亦明了，
彼则永绝诸恶趣，能入胜寂三昧禅。
彼若常能供养我，必受多福不思议，
增长多闻证菩提，由思诸佛所赞定。
今我语汝诚实言，当念精进莫放逸，
一心欢欣发勇猛，自然速证彼菩提。
彼为供养百数佛，乃能受是三摩提，
假于后世恐怖时，自当速证微妙定。
若有见我与比丘，及汝大士贤护等，
如是菩萨乐多闻，决定当得此三昧。
若得闻此圣三昧，为他解释或书写，
是陀罗尼世尊叹，能证一切佛菩提。
若人善思此三昧，一切诸佛咸共称，
当得种姓及多闻，诸佛次第而演说。”

观察品第六

尔时，世尊复告贤护菩萨言：“贤护，若诸菩萨摩訶萨即欲思惟此三昧者，当云何思？贤护，彼诸菩萨欲思惟者，即应当作如是思惟，如我世尊今者现在天人众中宣说法要。贤护，菩萨如是一心思惟，诸佛如来坐师子座宣说正法，具足成就一切相好，最妙最极殊特

端严乐观无厌。如是观察诸大人相，于——相应当至心，即得明了见诸如来应等正觉。既得见已，当先咨问不见顶相。既得问已，然后次第遍观诸相皆令明了。如是观已更复思惟：‘诸佛如来众相微妙是为希有！愿我未来还得如是具足成就诸妙相身！愿我未来亦得如是清净禁戒具足威仪！愿我未来亦得如是具足三昧！愿我未来亦得如是具足智慧！愿我未来亦得如是具足解脱！愿我未来亦得如是解脱知见！愿我未来成满如是诸相身已，即得成就阿耨多罗三藐三菩提！既成佛已亦当如是处彼天人大众之中，具足宣说如斯妙法！’

“菩萨如是具足观察诸佛如来，乃至成就一切种已，复应更作如是思惟：‘是中何者是我？谁为我所法？谁能得成诸佛菩提？为身得耶？为心得耶？若身得者，是身顽騃无觉无知，犹如草木石壁镜像，然彼菩提无色无形非像非相，不可见知，不可触证，云何更以顽騃无知、不见、无识、无所分别、无作之身得彼菩提？菩提如是既无形色，非相非像，不可见知，不可触证，谁复于中而行证者？若心得者，是心无色不可得见，是心无相不可得知，此心如是同于幻化。然彼菩提亦尔，无色不可见，无相不可知，无漏无为亦同幻化，云何可证？云何觉知？而言身心得菩提耶？’彼菩萨摩訶萨如是观时，分明了了见是身相不得菩提，亦知是心不得菩提。何以故？诸法无有以色证色、心证心故。然彼于言说中知一切法，虽无色无形、无相、无漏、无可睹见、无有证知，亦非无证。何以故？以一切诸如来身无有漏故。又诸如来身无漏故心亦无漏，又诸如来心无漏故色亦无漏。

大方等大集贤护经卷第三

观察品之余

“又诸如来，色无漏故受亦无漏，乃至行识亦无漏。又诸如来戒亦无漏，所有三昧智慧亦无漏，乃至解脱解脱知见亦无漏，如是乃至诸如来，诸如来所有言说，已说、今说、当说，及一切法斯皆无漏也。贤护，诸如是等一切佛法，智人能达，愚者莫知。彼若能作如是观时，一切诸法悉不可得。云何不可得？所谓谁能证也不可得，云何证也亦不可得，何缘证也亦不可得。彼能作是观已，如是入灭寂定，分别诸法亦不分别诸法。何以故？诸法无故。贤护，如火未生，或时有人发如是言：‘我于今日先灭是火。’贤护，于意云何？彼人是语为诚实不？”

贤护答言：“不也，世尊。”

佛告贤护：“如是诸法从本以来毕竟无得，云何于今乃作斯说：‘我能证知一切诸法，我能了达一切诸法，我能觉悟一切诸法，我能度脱一切众生’？于生死中此非正言。所以者何？彼法界中本无诸法亦无众生，云何言度？但世谛中因缘度耳！贤护，于意云何？彼如是

说得为实不？”

贤护答言：“不也，世尊。”

佛告贤护：“是故彼诸善男子、善女人，若欲成就无上菩提，乃至欲成缘觉菩提、声闻菩提者，皆应如是观一切法，作是观时则入寂定，无有分别非无分别。何以故？贤护，彼一切法无所有不生，然彼定有分别即是一边，定无分别复为一边，然此二边所有，是无寂定非无寂定，无思量处，无分别处，无证知处，无经营处，无聚集处，无思念处，无发起处。贤护，是名中道！所有数事处等，但依世谛说故。

“复次，贤护，于彼真实第一义中，若中若边皆不可得。何以故？贤护，一切诸法犹如虚空，本来寂灭非断非常，无有积聚，无有住处，无可依止，无相无为，无有算数。贤护，彼不可数云何为有？不可数故不入于数，不入数故乃至无有智算名言也。贤护，彼菩萨摩訶萨，如是观察诸如来时，不可执著。何以故？一切法无执著故。以无处所而可执著，亦无根本是可断绝，除灭根本故无依处。贤护，彼菩萨摩訶萨，当作如是思惟诸佛现前三昧。若如是见诸如来已，不应取著，不当执持。何以故？贤护，一切诸法不可执持，犹如虚空体性寂灭。贤护，譬如金锤安置火中，善作炉鞴融消冶炼炽然毒热，又如铁丸新从火出炎赫炽然，有智之人不应执触。何以故？铁流金炽，触则炽然故。如是，贤护，菩萨观佛不应取著，其事若此。是故菩萨观佛色时不应生著，如是观受乃至行识不应生著。又彼菩萨若观戒时亦不应著，如是观定乃至智慧、解脱、解脱知见亦不应著。何以故？夫取著者，终不能离生死苦法，以是苦法皆由取著故。是故菩萨观察如是诸如来时，不应生于取著之想。贤护，虽无取著，然应勤求诸佛世尊胜妙功德，所谓佛智、如来智、广大智、自然智、自在智、不思議智、难称量智、无等等智、一切智智。若欲求入如是智者，常当精勤思惟观察见佛三昧也。”

尔时，世尊为重明此义，以偈颂曰：

“譬如明镜与油器，女人庄饰曜其形，
愚夫于是生染心，处处驰骋为求欲。
彼于无中颠倒想，不知是法虚妄生，
彼欲炽火之所烧，斯妇起欲还自发。
若有菩萨作是念，是名无智著我心，
菩提甘露在当来，我拔众生出重苦。
第一义中无众生，世间独有生老死，
诸法无形如水月，岂有菩提而可求？
众色形貌若镜像，如幻如炎如虚空，
凡夫著想而受羈，彼辈虽缚空无实。
若斯智者诸菩萨，知世颠倒故见真，

了达无人谁受苦，彼则当成无上觉。
无意分别佛菩提，其心本来自明净，
不见生死诸滓浊，彼证真实最胜尊。
一切色法诸无漏，不可分别妄与空，
灭除诸欲解脱心，如是知者证三昧。
初念诸佛无相身，后闻诸法本清静，
如是思惟无余念，证此三昧诚非难。
常作空相而思惟，即能灭彼微尘聚，
不分别成及与坏，一切外道失于中。
于一切色无分别，其眼虽睹不累心，
彼见诸佛如日轮，法界世间挺超出。
其心清静眼亦明，虽勤精进常在定，
彼得多闻不可说，证此三昧真思惟。
若以不见证三昧，一切盲者应证知，
亦不以见非不见，是中外道皆迷没。
常离相想而思惟，见彼诸佛清静心，
如是见已一切观，其人速成此三昧。
彼无地水及火风，亦非空界现前住，
若欲观察一切佛，当想处座演妙音。
如我今日宣妙法，心乐法者睹我身，
彼应无复余思惟，唯当想佛说法事。
如是专念莫他观，为求若斯多闻故，
一心观我说此定，总持诸佛之所宣。
无有一佛在过去，亦无现世及当来，
唯此清静微妙禅，彼不可言证能说。
我于三界无上尊，为利世间故特出，
念证诸佛菩提故，宣此三昧无等伦。
若欲身乐及心乐，求佛功德不思议，
乃至证彼妙菩提，要当修此胜三昧。
欲净深广多闻海，为众生故常勤求，
彼应速去诸欲尘，要当修此胜三昧。
若欲一生见多佛，见已恭敬复咨询，
彼应速离勿生著，要当观此妙三昧。
是处无欲复无嗔，亦无愚痴与嫉妒，
又无无明及疑网，要当住此深寂禅。”

戒行具足品第七

尔时，贤护菩萨复白佛言：“希有世尊，乃有如斯最胜三昧。世

尊，若诸菩萨舍家出家，深心乐欲说此三昧，亦当思惟此三昧者，彼等应当安住何法，而能宣说及思惟耶？”

佛告贤护言：“贤护，若有菩萨舍家出家，深乐广宣复欲思惟如是三昧者，彼出家菩萨当先护持清净戒行、不缺戒行、不染戒行、不污戒行、不浊戒行、不著戒行、不动戒行、不被呵戒行、智者所赞戒行、圣所爱敬戒行，应当念知如是诸戒也。贤护，彼出家菩萨云何当得清净戒行？乃至云何当得圣所爱敬戒行也？贤护，彼出家菩萨，应当依彼波罗提木叉，成就威仪，成就众行，乃至成就微尘数等戒行，见已惊怖清净活命，于诸戒中当念成就，应信甚深不得著忍，于空无相无愿诸法中，闻说之时心不惊怖，无有悔没。贤护，以是因缘，彼出家菩萨成就如是清净戒行，不见戒行，不著戒行，乃至成就圣所爱敬戒行也。”

尔时，贤护菩萨复白佛言：“世尊，彼出家菩萨，云何得有如是不清净戒行、缺戒行、染著戒行、污戒行、依倚戒行、智所诃毁戒行、圣所不爱戒行也？”

佛告贤护菩萨言：“贤护，若有出家菩萨，取著色，受持禁戒修于梵行；如是取著受、取著想、取著行、取著识，受持禁戒修行梵行；修行已，作如是念：‘我今如是持戒，如是苦行，如是修学，如是梵行，愿我未来得生天上或生人间，自在有生受诸果报。’贤护，以是因缘，彼出家菩萨成就如是不清净戒，乃至圣者所不爱戒，是谓为求有故，为有生故，为受欲果故，为生处所故。贤护，是故彼出家菩萨，念欲说此三昧、思此三昧者，要当先具清净戒行，乃至成就圣所爱戒，亦念常行檀波罗蜜，所谓最胜施、诸法施、上施、妙施、微妙施、精妙施、无上施，亦常勇猛精进不休，不舍重担，不忘正念常行一心，正信清净无有嫉妒，不著世间利养名闻，如法索求以济形命，恒行乞食不受别请，厌离人间乐阿兰若，尊崇圣种敬事头陀，息世语言但论出世，处众静默假言不多，常敬于他不敢轻慢，于一切时常行惭愧，有恩必知知恩必报，于善知识常念亲近，诸师尊所谨事无违。若闻如是甚深经典，专心听受终无疲厌，于法师所起慈父心、善知识心，乃至生于诸如来想，以为如是微妙法故，成就无上大菩提故，转增爱敬尊重心故。

“复次，贤护，若彼菩萨或时至于声闻人所，闻说如是甚深经典，彼法师所无爱敬心、无尊重心，不生慈父想，不生善知识想，不生诸佛想，不生教师想，不能亲近承事供养，随于何所闻是经典，当知是人不能听受、书写、解说、令法久住。如是之人若能听受，若能书写，若能解说，令法久住，无有是处。复次，贤护，若彼菩萨或复至于声闻人所，闻说如是增上妙法，不生爱敬心，不生尊重心，及至不生诸佛想，不能尽心亲近供养者，若能读诵，若能受持，若能解说，令是经典不速灭者，无有是处。何以故？以不尊重是经典故，是故斯法不久必灭。

“复次，贤护，若彼菩萨或复至于声闻人所，闻说如是微妙经典，生爱敬心，生尊重心，乃起教师想、诸如来想，亲承供养即能听受，亦能书写复能解说，能令是经久住利益，斯有是处。复次，贤护，若彼菩萨复于声闻人所，闻说如是微妙经典，即于彼所生尊重心，如诸佛想亲近承事，恭敬供养者，如是之人虽未修学如是经典即为修习，虽未解释即为解说，令是妙法久住世间，不毁不灭斯有是处。何以故？以能爱敬尊重法故，是故此经久住世间。贤护，以是因缘吾今语汝，是人于是说法师所，生爱乐心，生敬重心，生尊贵心，起善知识想，起教师想，起诸佛想，尽心承事恭敬供养。贤护，若能如是，是则名为行我所行受我教诫也。

“复次，贤护，彼出家菩萨必欲解说如此三昧，复欲思惟此三昧者，常当乐行阿兰若事，不得居处聚落城邑，舍离朋党多求之处，不贪衣食，不得贮聚谷米食具，不得受畜财物生资，不得贪求名闻利养，不惜重命常念舍身，远离贪著恒修死想，常行惭愧不造诸恶，摄受正法无有疑心，常念远离不取众相，当修慈心勿怀嫌怨，常起慈悲无行嗔恚，安心喜舍莫想爱憎常，当经行破除睡盖。贤护，出家菩萨若能安住如是法行，则能修学、解说、思惟如是念佛现前三昧也。”

尔时，贤护菩萨复白佛言：“希有世尊，如来应供等正觉，所说经典甚深甚深，最胜微妙不可思议！然彼未来诸菩萨等懈怠懒惰，虽闻如是深妙经典，生大恐怖惊疑退没，不发欢喜爱乐之心。彼等当复作如是念：‘我今当应余诸佛所乃可修习如是经典。所以者何？我今自知多诸障难，身遇病苦气力甚微，宁堪修行如是经典？’世尊，彼辈如是，于甚深法更生放舍远离之心，不能发勤勇猛精进乐欲成就如是经典。

“世尊，尔时亦当有诸菩萨，精进勤求专念之者，爱乐是法，劝持是法，摄受是法。若诸法师说是法者，于是法中如法行故，能舍身命，不著名闻，不求利养，不自宣说己身功能，不染衣钵，不乐城邑，常趣空闲山林静处。其或闻是微妙法故生大欢喜，更当具足发勤精进，听受如是微妙法门，常读诵故，常念持故，思惟义故，如说行故。彼等于未来世诸如来所，非徒直欲求彼多闻，亦无但求在于有处，唯为成就诸功德故，常念勤求精进勇猛。世尊，然复应有往昔已曾供养诸佛宿种善根诸善男子、善女人辈，发大精进为闻如是微妙法故，更发如是大誓庄严：‘愿我当得干渴肌肤，散骨消髓，炽然身心，苦行不息，必欲成就如是妙典！’终无暂时懈怠懒惰而不听闻微妙胜法，亦无不思甚深义理，复无舍他不为宣说，而常勇猛行大精进，但为摄受诸菩萨故，听闻如来如是妙典，闻已即便生欢喜心。”

尔时，世尊赞彼贤护菩萨言：“善哉！善哉！贤护，如是，如是，如汝所说，我今随喜。贤护，我随喜故，一切三世恒河沙等诸佛世尊皆亦随喜。”

时，彼贤护菩萨复白佛言：“若有在家菩萨，处于世间闻是三

昧，欲自思惟即为他说，乃至一日或经一夜，是人安住几种行法，当得成就思惟三昧为他说也？”

佛言：“贤护，彼在家菩萨处于世间，若欲修习思惟三昧，或一日一夜乃至一𧇖[(𧇖-几)/牛]牛乳时者，吾今语汝：彼在家菩萨既居世间，当应正信不起慳贪，常念行施随多少施，当一切施不求果报，应归依佛、又归依法、亦归依僧，不事天神亦无礼拜，不生嫉妒常念随喜，当须清净如法活命，不爱儿女不著妻妾，不染居家不耽财宝，常乐出家念除须发，修八关斋恒住伽蓝，常怀惭愧发菩提心不念余乘。见有持戒清净比丘修梵行者，终无调戏常行恭敬，从谁闻学如此三昧，当于师所生爱敬心，起尊重心善知识想，生教师想起诸佛想，一切众具悉以奉之，常当识恩恒思报德，以能教我微妙法故。贤护，彼在家菩萨处俗之时，应住如是诸法行已，然后教示如是三昧，如是思惟，如是修习。”

时，彼贤护菩萨复白佛言：“希有世尊！如来应供等正觉，今乃为彼出家在家诸菩萨辈，正信成就乐深法者，宣说如是无上妙法，令住如是无量法行，然后当得思惟解说如是三昧。世尊，如来灭后，如是三昧于阎浮提能广行不？”

佛告贤护菩萨言：“贤护，我灭度后，此三昧经于阎浮提四千年中广行于世。而后五百年末一百岁中，正法灭时、比丘行恶时、诽谤正法时、正法破坏时、持戒损减时、破戒炽盛时、诸国相伐时，当斯之际颇有众生炽然善根，往昔已曾亲近诸佛，供养修行植善种子，为彼诸丈夫辈得是经故，此三昧典复当流行于阎浮提。所谓佛威神故，故令彼等于我灭后，闻此经已欢喜书写，读诵受持思惟其义，为他解释如说修行。”

尔时，贤护菩萨，及宝德离车子，闻如来说正法灭时，悲泣雨泪，从座而起，整理衣服，偏袒右肩，右膝著地，合掌恭敬而白佛言：“世尊，我等当于如来灭后，后五百岁末百年中，沙门颠倒时、正法欲灭时、诽谤正法时、破坏正法时、持戒损减时、破戒增长时、正法护减时、非法护增时、众生浊乱时、诸国相伐时，能于如来所说经典妙三昧中，读诵受持思惟义理为他广说。何以故？我心无厌终不知足。是故我于如来所说修多罗中，能听闻故，能书写故，能读诵故，能受持故，能思惟故，能修行故，能广说故。”

尔时，商主优婆塞，伽诃爰多居士之子，那罗达多摩纳等，闻如来说未来世中正法坏灭，为正法故悲哀泣泪，从座而起，整理衣服，偏袒右肩，右膝著地，恭敬合掌而白佛言：“世尊，我等能于如来所说妙修多罗，及能受持修多罗者，我皆摄护令得增长。世尊，我今复为如来说微妙经典，作其加护，令得广宣久住于世。何以故？以是经典能于无量阿僧祇劫，多所成就阿耨多罗三藐三菩提故。世尊，我等得闻未曾有法，至心受持思惟其义，为他解说广行流布。世尊，我今闻此甚深经法一切世间无有信者，我先为其造善根器，然后为

解。”

尔时，众中有五百比丘、比丘尼、优婆塞、优婆夷四部众等，闻如来说未来世中正法坏灭，为正法故悲泣雨泪，从座而起，整持衣服，偏袒右肩，右膝著地，恭敬合掌而白佛言：“世尊，我等受持如来正法。然诸大士善丈夫辈，尔时于我当作正依，当作覆护，为我经理，能令我等于如来所说如是甚深修多罗中，取真实义如法修行。唯愿世尊，付嘱我等诸善丈夫分明立记。何以故？世尊，我及彼等皆能护持摄受正法及摄受者故。”

尔时，世尊即便微笑放金色光，其明遍照十方世界诸佛国已还至佛所，右绕三匝从顶上没。

尔时，尊者阿难作如是念：“世尊昔来已多微笑，然于笑时必为异事，我今应问微笑因缘。”如是念已，即从座起，整持衣服，偏袒右肩，右膝著地，合掌向佛，以偈白言：

“其心清净行无秽，有大威德巨神通，
一切最尊世中上，显现无垢如明月。
无碍圣智解脱心，迦陵伽声天中最，
一切异轮莫能动，今忽微笑有何缘？
通达正真为我说，能多利益两足尊，
闻是如来微妙音，一切皆当大欢喜。
诸佛世尊岂虚笑？佛复放光有胜人，
谁于斯日获大利？是故今应宣笑旨。
谁于今日得证真？谁于今日受法王？
谁于今日自灌顶？谁于今日登佛位？
谁于今日利世间？谁当总宣佛法藏？
谁于佛智得常住？以是尊应显笑缘。”

尔时，世尊即以偈告长老阿难曰：

“阿难汝见大集不？摄护五百从座起，
身心欢喜发诚言：我辈当来获斯法！
此等一心瞻察我：我于何时亦复然？
咸于我前兴大誓：我辈当来证斯道！
复有八辈从座起，五百上首此为尊，
彼于末世法坏时，为世间法故宣说。
我今告汝如是言：于此众中无碍智，
是辈非于一佛所，起立合掌敬诸尊。
我观往昔无量世，八万诸佛皆现前，
八人为首从座起，还为护持是妙法。
前此八万亿由他，复值如是数诸佛，

心得解脱大名称，彼时此辈已摄持。
今复于我胜法中，能为摄护利益首，
教化无量菩萨众，断除嫉妒诸大人。
此等于我灭度时，取我舍利兴供养，
善持我斯诸佛事，安置篋笥遍十方。
平地造塔或在山，付嘱天龙及金鸟，
斯等依仗于此经，寿终皆得生天上。
后虽转生于人间，而常不离胜家姓，
善持我斯菩提事，还发大愿随本心。
或时为法至他国，恒值如是深妙典，
得已转授众多人，以欢喜心除嫉妒。
求法精诚不懈倦，轻财贱命岂爱身？
降伏一切诸外论，常以妙法惠施彼。
时世无能受斯经，亦无读诵转教人，
唯有此辈五百贤，今于我前从座起。
复此八士诸菩萨，当来北天授斯法，
乐恒广宣多利益，弘是甚深修多罗。
此八正士为上首，彼五百数复无增，
远离嫉妒弃名闻，来世当授广大法。
如是比丘及尼辈，诸优婆塞优婆夷，
巧智无妒登法师，当成正觉大威德。
彼不思議神德具，百福之体相庄严，
得微妙乐除众苦，长拔三毒烦恼根。
此等从今舍命已，终不受生恶道中，
一切生中常和合，所遇菩提最胜事。
既舍一切恶趣生，亦能永离诸难处，
功德不可知边际，如是无量受多福。
复当得见弥勒佛，于彼常起和合心，
恭敬供养利益他，唯求无上菩提故。
彼时此辈恒集会，承事超世两足尊，
为此诸佛妙菩提，当度生死登彼岸。
于后末世法坏时，彼等亦常持此法，
如是所处恒修行，遇弥勒世事若斯。
所可于此贤劫内，广为利益世间灯，
彼一切处护是经，安住三世无所畏。
将来亿数多诸佛，不可思議难得边，
斯皆供养广修行，常护如是胜佛事。
其有在前成菩提，彼彼咸同修供养，
而或于先取灭度，我住多世那由他。
今此贤护大菩萨，及是宝得出众珍，

商主岌多伽摩那，当见恒沙无数佛。
于彼亦受无上经，前已经历多劫数，
妙算不能尽其形，无量亿劫谁能知？
若有众生得闻名，或于觉时及睡梦，
能发勇猛狮子吼，彼辈皆得天人尊。
若有众生但闻名，直能信敬及随喜，
一切作佛无疑虑，何况供养于彼身！
其所受法不思议，寿命住法亦无量，
利益广大无穷尽，功德智慧不可知。
彼过去佛难思量，清净持戒洵沙数，
此辈于彼广行施，唯求无上佛菩提。
彼诸功德不可数，多劫宣说莫能穷，
于菩提中无增减，常念护持是经法。
阿难若人护此经，书写读诵及忆念，
汝应决定兴爱敬，终不离是五百中。
阿难若人持此经，自当勤心求坚固，
净持禁戒舍睡眠，决定得斯妙三昧。
我毗尼处说木叉，诸比丘学居兰若，
若能头陀不舍离，得此三昧定无疑。
一切别请尽能舍，凡是美味皆断除，
师所常起诸佛心，谁云不证斯三昧？
贪恚痴患先觉知，我慢嫉妒咸远离，
情无垢著念无为，读诵思惟胜三昧。
清净意处无可染，调伏诸根息怨嫌，
一心专念如来身，读诵受持妙三昧。
若有菩萨在居家，心常坚住出家事，
受持读诵口业成，心常念学此三昧。
恒应修持五种戒，亦常数受八戒斋，
常住寺庙舍资生，读诵思惟此三昧。
不当耽著众妇妾，勿爱儿女及珍财，
住优婆塞行羞惭，但当忆持此三昧。
莫于他所起害心，唯思除去诸调戏，
无处可著住于忍，但念思惟此三昧。
莫于财物生执著，花香涂粉及诸鬘，
无处染著安彼忍，但当受持此三昧。
若比丘尼求此经，当勤归敬除嫉妒，
调戏贡高及我慢，证彼菩提亦不难。
应发精进破睡眠，一切诸求皆当断，
心爱乐法净命存，唯当读诵此三昧。
心常不共贪欲俱，莫起恚恨无迫恼，

不以魔缚系众生，唯当受持此三昧。
无以谄曲有所为，勿贪好衣及涂薰，
莫行两舌离别他，唯当受持此三昧。
男女声色不系念，寂绝无诸邪念事，
于教师所生佛想，唯当受持此三昧。
所生永离众恶道，于佛法中不空信，
破除三有诸障难，要当受是三摩提。”

大方等大集贤护经卷第四

称赞功德品第八

尔时，贤护菩萨，及宝得离车子，善商主长者，伽诃岌多居士子，那罗达多摩纳，水天长者与五百徒众等，闻佛所说皆大欢喜，即以五百上服奉覆世尊，复以多种供具供养世尊，心乐法故各以己身奉承如来。

尔时，世尊告阿难言：“是贤护菩萨，当于彼等五百徒众，而作义师说法要，教化慰喻令彼欢喜。以欢喜故，彼辈即得随顺之心、真实之心、清净之心、离欲之心，除诸烦恼无复盖缠。”时五百人一心合掌，恭敬顶礼退住一面。

尔时，贤护即白佛言：“世尊，菩萨摩訶萨具足几法，而能得此念佛三昧也？”

尔时，世尊告贤护言：“贤护，若菩萨摩訶萨具足四法得是三昧。何等为四？一者、不著一切外道语言，二者、不乐一切诸爱欲事，三者、常不远离头陀功德，四者、常厌三界诸有生处。贤护，是为菩萨摩訶萨具足四法得此三昧。复次，贤护，若有善男子、善女人，读诵受持是三昧典，或时复能为他解说，现前即获五种功德。何等为五？一者、一切众毒不能损害，二者、一切兵仗不能破伤，三者、一切诸水不能漂没，四者、一切猛火不能焚烧，五者、恶王县官不能得便。所以者何？由是三昧慈心力故。贤护，若彼善男子、善女人，一心勤求是三昧时，读诵受持是三昧时，思惟修习是三昧时，为他解释是三昧时，若有众毒及以兵仗、一切水火、恶王县官，能伤害者无有是处。

“复次，贤护，假使世间坏劫之火，世界焰赫天地洞燃，若彼受持此三昧典诸善男子及善女人，设令堕落大劫火中，三昧威神彼火即灭。贤护，又如罌水能灭小火。如是，贤护，假使持经诸善男子及善女人落彼火中，三昧力故大火随灭，若不灭者无有是处。复次，贤护，若彼善男子、善女人受持经时，若彼恶王、若恶官、若劫贼、若师子、若虎狼、若蛇毒，若能作障碍者无有是处。又设彼等行是经时，若被夜叉、若罗刹、若饿鬼、若鸠槃荼、若毗舍闍乃至一切非人

能为障碍，亦无有是处。又若彼男子女人读诵经时，正思惟时，为他说时，入三昧时，行梵行时，若失衣若失钵，乃至有诸障碍事者，无有是处，唯除宿殃不可转者。复次，贤护，若彼受持三昧经典诸善男子、善女人辈，若患眼、若患耳、若患鼻、若患舌、若患身、若患心，复有诸余种种患难，乃至命难、梵行难者，亦无是处。复次，贤护，若彼男子女人于此经中，得如是闻，得如是见，得如是知，如是具足已，若不值佛，若谤正法，破和合僧，背佛菩提者，亦无是处。贤护当知，即彼持经男子女人，如上诸事莫能为碍，唯除宿殃不能转耳！

“复次，贤护，彼善男子、善女人持是经者，常为一切诸天称赞，亦为一切诸龙称赞，又为一切夜叉称赞，又为一切乾闥婆等之所称赞，又为一切阿修罗等之所称赞，又为一切迦楼罗等之所称赞，又为一切紧那罗等之所称赞，又为一切摩睺罗伽之所称赞，又为一切人非人等之所称赞，又为一切四大天王之所称赞，又为一切忉利天王之所称赞，又为一切大梵天王之所称赞，如是乃至常为一切诸佛世尊之所称赞也。复次，贤护，又彼诸善男子、善女人持是经者，常为一切诸天爱敬，如是乃至常为一切诸龙、夜叉、乾闥婆、阿修罗、迦楼罗、紧那罗、摩睺罗伽、人非人等之所爱敬，又为一切四大天王之所爱敬，如是常为一切忉利天王乃至一切大梵天王之所爱敬，如是常为一切诸菩萨辈乃至一切诸佛世尊之所爱念也。复次，贤护，又彼诸善男子及善女人以经力故，常为一切诸天守护，如是常为一切诸龙、夜叉、乾闥婆、阿修罗、迦楼罗、紧那罗、摩睺罗伽及人非人之所守护，又为一切四大天王，如是忉利天王乃至大梵天王之所守护，如是当为一切诸菩萨辈乃至一切诸佛世尊，悉皆覆护十方世界无量阿僧祇世界中现持法者。

“复次，贤护，又彼诸善男子、善女人，以经威力故，一切诸天皆欲见之，如是一切诸龙、夜叉、乾闥婆、阿修罗、迦楼罗、紧那罗、摩睺罗伽及人非人等皆思欲见，又彼一切四大天王，如是一切忉利天王乃至一切大梵天王皆思欲见，如是一切诸菩萨辈乃至一切诸佛世尊各欲见之。复次，贤护，又彼诸善男子、善女人以经威故，一切诸天常至其所亲见其形令彼观睹，如是一切诸龙、夜叉、乾闥婆、阿修罗、迦楼罗、紧那罗、摩睺罗伽、人非人等，皆见其形随宜利益。又彼一切四大天王、忉利天王乃至一切大梵天王等皆亲临视，如是一切诸菩萨辈乃至一切诸佛世尊，非但昼日或于梦中为现形像，自称名号摩顶慰安称扬劝发也。复次，贤护，又彼诸善男子、善女人，虽未曾闻诸余经典，以是三昧威神力故，自然有人来至其所，乃至梦中为其宣说，令彼得闻忆持不失也。复次，贤护，我若说彼诸善男子及善女人，暂持三昧微妙经典所得功德，设经劫数终不能尽，我之智辩虽复无穷亦不能说，何况彼辈闻此三昧依教修行如法而住也！”

尔时，世尊为重明此义，而说偈曰：

“若人有能解释斯，诸佛大寂胜三昧，
假令我今说功德，犹彼恒河取一沙。
若能为他说三昧，水不能溺火不烧，
刀杖毒害所不伤，王贼恶官不得便。
若能读诵三昧经，不畏一切恐怖事，
如彼大蛇诸大毒，此等经力能灭除。
若有受持是经典，不畏一切诸恶人，
夜叉罗刹及诸龙，彼徒终无得其便。
若常守护供养者，便在兰若为朋类，
师子虎狼诸兽等，犀牛豺豹及野干。
若能护持此三昧，彼有威力不可当，
远离一切恶心人，及诸夜叉啖精气。
若能解说此三昧，彼无诸病及障灾，
所生报眼终不衰，言词清妙有大辩。
若人证知深寂禅，身体雄健无众病，
一生永绝诸恶色，后终不畏地狱道。
若有能读三昧典，诸天守护及龙神，
夜叉罗刹与怨仇，彼虽恶临不惊惧。
若能为他说斯经，人龙夜叉皆欢喜，
诸天昼夜常歌叹，一切世尊爱若子。
若人为他常转读，一切法中无有疑，
彼诸容色无等伦，岂于菩提有退减？
若能转教诸众生，遭值恶王民人乱，
时年亢旱谷价贵，终无受弊及饥荒。
若人解说此三昧，所有功德不思议，
假虽魔娆诸众生，不能动斯一毛发。
我前说彼持经人，众患恐怖及烦恼，
彼终不能加损害，唯除往业先定殃。
若有护持于此经，是则于吾为长子，
我已称赞于彼等，当来之世亦复然。
若能护持如斯法，自应恒发欢喜心，
咸共宣通勿放舍，我今为汝如是说。”

饶益品第九

尔时，世尊复告贤护菩萨言：“贤护，我念往昔过于无量阿僧祇劫，时有一佛，号无畏王如来、应供、等正觉、明行足、善逝、世间解、无上士、调御丈夫、天人师、佛世尊，出兴于世。当尔之时，有长者子名须达多，与二万人俱诣彼佛无畏王所，到已顶礼彼世尊足，

敬礼毕已退坐一面。时须达多即便请彼无畏王如来，广宣如是三昧深义。贤护，尔时彼无畏王如来应供等正觉，知长者子有深信心，乐欲听闻如是三昧，应时随顺而为敷演。贤护，时须达多于彼佛所，闻三昧已读诵受持，思惟其义即如说行。既修行已，还即于彼无畏王如来法中舍家出家，剃除须发，服袈裟衣，经八万岁思惟住持如是三昧。又复在彼无畏王如来所，闻一切法皆悉受持。是后复经诸如来所，闻说斯法亦皆能持，于诸佛所种诸善根，能广成就不思议已，然后舍命即得上生三十三天同受果报。即彼劫中还复值遇第二如来，而彼如来从刹利生出家成道，名曰电德如来应供等正觉。而复于彼电德如来法中，出家修行经八万四千岁，还复思惟如是三昧。而更值遇第三如来，彼第三佛于婆罗门家生已亦出家成道，号曰光王如来应供等正觉。复于彼如来所出家修行，亦于八万四千岁中，常得思惟如是三昧。贤护，时彼长者子须达多，自是之后过百余劫，即得成就阿耨多罗三藐三菩提。贤护，汝应当知，尔时彼长者子须达多者岂异人乎？即彼过去燃灯如来应供等正觉是也。贤护，是故当知，彼长者子须达多者，以有如是爱乐法故，复有如是求法行故，能速成就阿耨多罗三藐三菩提也。

“复次，贤护，汝今当观是三昧王，为诸菩萨及众生辈，而作几许大弘益事？所谓当得一切诸佛智地故，复能摄受一切诸佛多闻海故。贤护，是故汝等当应勤求如是三昧，常乐听闻、读诵受持、思惟修行。既闻受已，当复为他读诵受持、解释义理，令他勤求、咸得闻受、正念思惟、如说修行。所以者何？贤护，若能勤求、读诵受持、正念修行、广宣流布是三昧者，不久当得证诸佛智、诸如来智、大自在智、不思議智、不可称智、无等等智、一切智智，乃至得彼不共他智故。贤护，若复有人能善宣说，彼应正言：‘今此三昧即是一切诸菩萨眼、诸菩萨父、诸菩萨母，能与一切诸菩萨辈诸佛智者。’贤护，如是说者是为善说时善说是三昧也。贤护，若复有诸男子女人能善说时，彼当正言是三昧者，即是佛性，即是法性，即是僧性，即是佛地，是多闻海，是无尽藏头陀，是无尽藏头陀功德，是无尽藏诸佛功德，是无尽藏能生深忍，是能生大慈、能生大悲、能生菩提也。贤护，是为彼能善说时说是三昧也。贤护，若复有人能善宣说是三昧时，彼应正言：‘是三昧王，能破一切诸法黑闇，能作一切大法光明。’贤护，是为彼能善说三昧也。

“贤护，汝宜观此菩萨念佛现前三昧，为诸众生作大利益。乃至一切诸菩萨辈，住于此土，遍见十方一切世界诸佛世尊，到诸佛所恭敬礼拜，听闻正法，供养众僧，亦不贪著。贤护，以是义故，诸菩萨等，若欲成就三昧王者，常当专心精勤观察彼四念处。贤护，云何菩萨观四念处？贤护，菩萨摩訶萨常当专心观察身行，毕竟不见一切诸身；常当专心观察受行，而亦不见一切诸受；常当一心观察心行，而亦不见一切诸心；常当一心观察法行，而亦不见一切诸法。贤护，如

是等事谁能信者？唯彼漏尽阿罗汉及以阿毗跋致诸菩萨等。贤护，是中一切愚惑凡夫，于彼念佛现前三昧，常当思惟诸佛世尊不得生著，又亦思惟诸佛世尊说如斯法而亦不著，又亦思惟我听闻法，一切所为皆不得著。何以故？贤护，诸法皆空，本来无生故。贤护，诸法不可念，无念处故。贤护，诸法远离，绝心想故。贤护，诸法不可执持，真如无得故。贤护，诸法无染，如虚空故。贤护，诸法清净，远离众生故。贤护，诸法无浊，因缘灭故。贤护，诸法无为，福伽罗不可得故。贤护，诸法即涅槃相，本性清净故。贤护，诸法无所有，一切物不可得故。

“贤护，是故诸菩萨等，若欲思惟此三昧者，不可异相而能得入，无得相故得见诸佛，正念诸佛和合相应，亦得思惟助菩提分，念闻正法思量分别选择菩提分，而不见自身亦不证诸法。所以者何？贤护，是中不可以色相故而得见佛，不可以声相故而得闻法，不可以希望心成就檀波罗蜜，不可以乐著诸有具足尸波罗蜜，不可以悭吝秘法而得涅槃，不可以深著福伽罗想而获多闻，不可以攀缘诸行而能远离诸事，不可以乐著住处而得证果，不可以随顺贪爱诫诸过非，不可以常乐斗争成就诸忍，不可以常行恶业而得善果，不可以声闻乘人而证菩萨念佛三昧，亦不可得诸菩萨忍，亦不可以嫉妒取著而得空三昧，亦不可以行爱欲而入奢摩他，亦不可以懈怠懒惰证诸圣道，乃至不可以不舍异念诸物而能成就思惟也。贤护，是故我今以此三昧付嘱世间诸天王辈，受持守护，亦付于汝，当来宣布勿令断绝。”

于是世尊说斯法时，有八那由他欲色界诸天子，皆发阿耨多罗三藐三菩提心。复有无量百千人，亦发阿耨多罗三藐三菩提心。然而斯辈皆于未来过恒沙劫，尽得成就阿耨多罗三藐三菩提，皆同一号，名正解脱如来应供等正觉，住世教化寿命亦等。

“贤护，以斯初发菩提心故，尚得如是无量功德，具足成就阿耨多罗三藐三菩提，况复我昔行菩提时供养我者，彼宁不速成就阿耨多罗三藐三菩提也？贤护，复有无量无边众生，闻说此法得净智眼。复有八百诸比丘等，于诸漏中心得解脱。”

尔时，世尊为重明此义，而说偈言：

“谁当受持此三昧，彼于福聚不可量，
斯等戒行无尘垢，本心清净犹如镜？
谁当受持是三昧，多闻深广无边崖，
智慧自然无缺减，功德盛满若明月？
谁当受持是三昧，得睹诸佛不思议，
智慧观察希有法，不思议人皆守护？
谁常受持此三昧，曾见无量诸世尊，
彼佛说法难称量，皆当奉承修供养？
谁能受持此三昧，彼为世间作灯光，

大悲如斯拔众生，所有世尊悉供养？
谁能受持此三昧，未来无数诸圣尊，
若有菩萨欲见者，清净信心修供养？
谁能受持此三昧，彼胜得利难思议，
善能下生于人间，常得出家善求食？
谁能护持此三昧，彼受多福不思议，
复能住持于将来，获斯功德最后利？”

具五法品第十

尔时，贤护菩萨从座而起，整理衣服，偏袒右肩，右膝著地，恭敬合掌而白佛言：“世尊，唯愿世尊及比丘僧，明日食时临顾我家受我供养，怜愍我等诸众生故。”世尊默然受贤护请。

时，彼贤护知佛受已，顶礼尊足，右绕三匝，于是辞还。遂复诣彼摩诃波闍波提比丘尼所，到已顶礼波闍波提比丘尼足，而即白言：“愿阿梨耶，及诸尼众怜愍我故，受我明朝所设微供。”尔时，摩诃波闍波提比丘尼默然受请，贤护知己顶礼辞还。

时，彼贤护复诣宝德离车子所，语宝德言：“宝德，汝来！汝之所有亲戚眷属朋友知识，及此会中优婆塞众，乃至一切王舍大城，及以自余城邑聚落诸新来者，为我请曰，受我明朝所设饭食。”尔时，宝德离车童子受贤护言，即告会中诸优婆塞亲戚眷属等曰：“仁辈当知，彼贤护菩萨令我告汝：‘明日食时受我微供。’”

尔时，贤护菩萨，宝德离车子，及善商主长者，伽诃岌多居士子，那罗达多摩纳水天长者，并及一切诸眷属朋友知识等，顶礼佛足已，还彼贤护菩萨舍宅。到已佐彼贤护经营，即于其夜约敕家人，办具诸种精妙上膳，所谓世间凡可食啖，色香美味百物备有。乃至外国远来贫穷乞丐，亦为办具种种精膳而供给之，与诸大众一等无异。所以者何？凡诸菩萨心无憎爱不敢轻他，于诸众生皆平等故。尔时，娑婆世界主大梵天王，乃至忉利天王释提桓因，四大天王提头赖吒等，及彼善德天子与诸眷属，咸为自身赞助其事，欲令贤护菩提果报速成就故。尔时，贤护与诸眷属善友知识等，扫洒其家乃至王舍大城街巷道路，处处皆悉悬妙幡盖，广设种种诸庄严具而庄饰之。又以诸种微妙花香布散其地，复烧世间第一名香而为供养。

时，彼贤护如是庄严王舍大城及妙食已，于明旦时，与诸眷属诣世尊所，头面礼敬而启白言：“世尊，我事已办，愿知此时。”

尔时，世尊于晨朝时，为贤护故著衣持钵，与彼无量比丘、比丘尼、优婆塞、优婆夷、天人大众，左右围绕，向彼贤护菩萨舍宅。于是贤护发如斯念：“我家隘小不受多众，自非世尊威灵加护，令宅宽广尽为琉璃，令诸城内一切人民莫不明见，亦令今此天人大众随意受

用无所乏少，不亦快乎！”

尔时，世尊知彼贤护心所念已，即以神力令其家宅严丽宽广，所有众具变成琉璃，亦令城内一切人民皆得睹见分明了，足令大众随意用之。

尔时，世尊入贤护宅，随其床座安详而坐，亦令一切诸比丘、比丘尼、优婆塞、优婆夷、人天大众，随其部类次第而坐。时，彼贤护及宝德离车子、善商主优婆塞、伽诃岌多长者子、那罗达多长者子，既见世尊，与彼四部天人大众皆安坐已，于是贤护躬以自手，持最妙食奉上世尊。世尊受已，然后授与诸四部众，及与一切天人大众种种上妙香美味食，咸令自恣悉皆丰满。如是一切饭食斯毕，澡手漱口乃至洗涤钵器持举皆竟，贤护于是别置小座，在世尊前头面顶礼，然后退坐一心瞻仰。尔时，世尊即为贤护菩萨，及宝德离车子、善商主优婆塞、伽诃岌多长者子、那罗达多摩纳等，乃至四部天人大众等，如应说法令其解知，开导慰喻令其欢喜，然后与诸比丘、比丘尼、天人大众归还本所。

时，彼贤护菩萨后食毕已，将诸眷属善友知识，及百千众左右围绕，至世尊所恭敬礼拜，退坐一面胡跪合掌，而白佛言：“世尊，菩萨摩訶萨具足几法，当能证此现前三昧？”

佛言：“贤护，菩萨若能成就五法，则便得此现前三昧。何等为五？所谓：一者、具甚深忍灭除至尽，二者、实无所尽无有尽处，三者、本无有乱灭除诸乱，四者、本无有垢灭除诸垢，五者、本无有尘断离诸尘。贤护，是为菩萨摩訶萨具足成就无生忍故，而能得此现前三昧。复次，贤护，菩萨摩訶萨复有五法能得三昧：一者、深厌诸有不受诸行，二者、一切生处念菩提心，三者、所生常见诸佛世尊，四者、终不耽著阴界诸入，五者、终不爱著受欲乐事。贤护，是为菩萨摩訶萨具足五法成就三昧。复次，贤护，菩萨摩訶萨复有五法能得三昧：一者、常当思念无边际心，二者、常能善入禅定思惟，三者、分别思惟一切诸法，四者、于诸众生无有诤心，五者、常以四摄摄受众，所谓布施、爱语、利行、同事。贤护，是为菩萨摩訶萨具足五法成就三昧。复次，贤护，菩萨摩訶萨复有五法能得三昧：一者、于诸众生所常行慈心；二者、于一切时念修圣行；三者、常行忍辱，见破戒者恒生敬心；四者、于自和尚阿闍梨所不说己能；五者、于一切处不敢轻他。贤护，是为菩萨摩訶萨具足五法则能证是现前三昧。复次，贤护，菩萨摩訶萨复有五法能得三昧：一者、常依圣教如说修行，二者、清净意业灭身口恶，三者、清净戒行断除诸见，四者、常求多闻深信诸善，五者、常念如来应等正觉。贤护，是为菩萨摩訶萨具足五法则能获得现前三昧。

“复次，贤护，菩萨摩訶萨复有五法能得三昧：一者、常行大施，能为施主不起悭贪，心无嫉妒弘广心施纯直无谄，于诸沙门及婆罗门、贫穷孤独一切乞人，无所爱惜，无有胜上可重之物而不施者，

所谓一切微妙饮食、名衣上服、第一房舍、诸种敷具、灯烛花香，凡所受用皆悉舍之。虽常行施而不求报，怜愍一切无疑惑心，既施之后终无变悔。二者、常为施主而行法施，所谓常为众生说如斯法，所谓第一、最上最胜、最妙最精。修行如是大法施时，能出一切无碍辩才，文义次第相续不断，如来所说甚深法中，皆能安住成就深忍。或时被他诽谤骂辱、捶击鞭打，终无嗔恨秽浊毒心，亦无惊惧种种苦恼，而心无畏常怀欢喜。三者、若闻他说此三昧时，至心听受书写读诵思惟其义，广为他人分别演说，令是妙法久住世间，终无秘藏使法疾灭。四者、常无嫉妒远离诸恼，弃舍盖缠断除尘垢，不自称誉亦不毁他。五者、于诸佛所常重信心，于诸师长常行敬畏，于知识处常生惭愧，于诸幼稚常怀慈怜，乃至受他小恩尚思厚报，何况人有重德而敢辄忘？常住实言未曾妄语。贤护，是为菩萨摩訶萨具足五法则能获得如是三昧。”

尔时，世尊为重明此义，以偈颂曰：

“若于深法心欲乐，厌离一切诸后有，
智者不愿一切生，若能如是得三昧。
不用一切诸外论，乃至语言不听受，
永断世间诸五欲，若能如是证三昧。
清净持戒住梵行，所生不念诸女人，
深厌五欲真佛子，若能如是证三昧。
常行大施不求报，亦无住著悔恨心，
一舍已后不重缘，唯当摄念思诸佛。
怜愍众生行施时，决定除疑无变退，
安住调柔而修施，若能如是得三昧。
若于财施为大主，无有憍慢嫉妒心，
行一切施常踊跃，若能如是得三昧。
又于法施为上首，善解微妙修多罗，
能知甚深寂灭法，若能如是得三昧。
安住甚深诸法中，善能堪忍无嫉妒，
虽被挝骂无恼恨，若能如是得三昧。
或时闻说此经典，书写读诵巧广宣，
唯为法住利世间，若能如是得三昧。
于诸法中不秘吝，不求利养及名闻，
但为绍隆诸佛种，若能如是证三昧。
远离睡眠与衰恼，除断嫉妒及盖缠，
不自称赞轻毁他，能灭我相得三昧。
正信诸佛及法僧，常行诚心无欺诳，
不忘一切诸恩报，彼证三昧无艰难。
若能真说无妄言，凡有所行亦不失，

所作虽微获报广，彼于证法无障碍。
若人有能具斯法，清净持戒护有恩，
彼得菩提尚不难，何况甚深微妙定！”

授记品第十一

尔时，世尊告贤护菩萨言：“贤护，我念往昔过于无量阿僧祇，复过无量阿僧祇劫，初于燃灯佛世尊所闻此三昧，闻已即证如斯三昧，见诸如来常现在前。从是已来，经于无量阿僧祇诸世尊所，皆受是经修行供养。彼佛世尊授我记曰：‘摩纳，汝于来世当得作佛，号释迦牟尼如来、应供、等正觉、明行足、善逝、世间解、无上士、调御丈夫、天人师、佛世尊。’贤护，汝辈亦当专精一心思惟修习如斯圣法，非是凡夫所见境界，甚深寂静众相灭处，如是学已未来自然成就阿耨多罗三藐三菩提，无有艰难如我不异。汝等当知，若有安住是三昧者，自然当得近大菩提。”

尔时，世尊为重明此义，以偈颂曰：

“我昔遇彼燃灯佛，见已即得三摩提，
从是常睹诸如来，具足功德大名称。
汝但多集诸功德，一切专念即得成！
若人能行此法中，当得无上菩提道！”

甚深品第十二

尔时，贤护菩萨复白佛言：“世尊，云何思惟如是三昧？”

佛言：“贤护，若有善男子、善女人，念欲思惟此三昧者，观彼色时不应取著，于彼声中不应取著，于彼香中不应取著，于彼味中不应取著，于彼触中不应取著，于诸法中不应取著，于诸生中不应取著，于一切处不应取著，于是法中当起真实大慈行也。是中何等名为三昧？所谓于一切法中如法行故。若诸菩萨观念处时应当如是，观察身行终不分别见身行处，观察受行亦不分别见受行处，观察心行亦不分别见心行处，观察法行亦不分别见法行处。菩萨当应如是观察思惟三昧。何以故？贤护，彼菩萨观身行时于身不起思惟分别，观受行时于受不起思惟分别，观心行时于心不起思惟分别，观法行时于法不起思惟分别故。所以者何？一切法不可得故。如是诸法既不可得，云何当有分别思惟？贤护，是故一切法无有分别，无分别者无有思惟，无思惟者，当知彼中无法可见。贤护，无可见故便为无碍，一切法中无障碍故，即是菩萨现前三昧。菩萨成就是三昧故，即得睹见无量无数

过阿僧祇诸佛世尊，并所宣说皆悉听闻，闻彼法已咸能受持彼诸如来应等正觉所有一切无碍解脱、解脱知见，亦即能得彼无碍智。

“复次，贤护，菩萨观察四念处时，无法可见，无声可闻，无见闻故则无有法可得分别，亦无有法可得思惟，而亦复非瞽盲聋类，但是诸法无可见故。是故观时不生住著而见诸道，思惟道故即于诸法无有疑网，无疑网故见佛如来，见如来故永离迷谬，无迷谬故知一切法终无可见。何以故？菩萨若有如斯见者则取彼见，取彼见故则取法相，取法相故则取事业，取事业故则见众生，见众生故则见寿命，见寿命故则见富伽罗，见富伽罗故则见诸阴，见诸阴故则见诸入，见诸入故则见诸界，见诸界故则见诸相，见诸相故则见诸物，见诸物故则见彼因，见彼因故则复见缘，以见缘故则便求取，以求取故则有有生。何以故？贤护，一切诸法终不可取，无可取故。菩萨于彼一切诸法，不思不念，不见不闻。贤护，终不如诸外道若外道弟子，取著富伽罗及以我见也。贤护，菩萨终不作如是见。云何见？菩萨见者如如来见终不退转，菩萨见如辟支佛见、如阿罗汉见。菩萨应当作如斯见，如斯见故不忆不念不见不闻，以不忆念及见闻故灭诸妄想，即得思惟如斯三昧也。

“复次，贤护，譬如虚空本无形色，不可观见无有障碍，无所依止，无有住处，清净无染亦无垢浊；诸菩萨辈见一切法亦复如是，所谓于彼有为无为一切法中，无有处障碍乃至亦无处所，以眼清净无障碍故，一切诸法自然现前。彼诸菩萨如是念时即见诸佛，其所庄严状如金辇，具足威仪如百千光，炎赫斯照如秋满月，众星围绕如转轮王，军众炽盛如天帝释，四辅中尊如大梵王，处彼天座如师子王威伏众兽，如鲜白鹄处空而飞，如须弥山王安住大海，如大雪山出诸良药，如铁围山摄持猛风，如彼水界住持大地，如大风轮净虚空界，如须弥顶壮丽天宫。如是，贤护，彼诸如来应等正觉，以智德光照明一切三千大千诸佛世界，其事若此。

“贤护，彼诸菩萨于正观中复如斯念：‘而诸如来有所宣说，我昔听闻，闻已读诵受持修行。’如是念已从三昧起，如彼定中所闻诸法，思惟其义为他宣说。贤护当知，是三昧王，为诸菩萨作斯利益，能与如是诸功德聚，所谓世间、出世间一切诸法也。贤护，是故，若彼善男子、善女人，随欲求证无上菩提，当应听闻如是三昧，闻已书写读诵受持，修习思惟广为他说，令是妙法流布世间。”

尔时，世尊为重明此义，以偈颂曰：

“诸佛清净离尘垢，功德深广无所依，
钟鼓铿锵众妙音，万种咸备修供养，
布散诸种超世香，精异花鬘上宝盖，
燃灯供养众塔庙，所为求此三摩提。
佛法甚深难可见，开示世谛令人知，

彼如自性初不迁，汝当随顺智无碍。
犹日月天初出时，帝释佐天三十二，
众具庄严实周普，求彼三昧亦复然。
譬如梵天处梵众，威仪寂静功德圆，
勇猛精进不可称，彼求三昧亦如是。
又如医王处世间，给施病者众妙药，
随顺诸佛清净心，初未曾离本空性。
譬如雪山诸山王，炜烨同于转轮帝，
亦如宝辇妙庄严，彼见诸佛众相满。
又犹鹄王绝明白，处空自在无碍游，
如是诸佛金色身，世尊真子如斯念。
无垢三昧净智灯，能破大冥诸黑闇，
彼除一切众物想，念诸佛智无碍光。
诸垢消灭无嗔毒，无明清净妙智人，
若能观是无自他，彼终无有诸色相。
无疑惑中净智生，悉能断斯诸有见，
亦已灭亡阴界想，闻法除恼得清凉。
比丘当知诸佛子，及以清静比丘尼，
彼优婆塞优婆夷，若能念此得三昧。”

大方等大集贤护经卷第五

现前三昧中十法八法品第十三

尔时，世尊复告贤护菩萨言：“贤护，若有比丘，乐欲修习此三昧者，先当思惟彼无相想，既思惟已我慢不生。贤护，除慢高已，心意泰然远离众相，尔时即应为他宣说如是三昧，不应起诤。是中云何名为诤也？所谓妄想诽谤即谤于空名为诤也。贤护，是故彼比丘以无诤故，当能修学为他宣说此三昧也。

“贤护，有诸善男子、善女人，若欲修学为他解释此三昧者，应当具足成就十法，然后为他解斯三昧。何等为十？所谓：一者、彼诸善男子、善女人，先摧我慢起恭敬心；二者、知恩不忘心常念报；三者、心无倚著亦无嫉妒；四者、除断疑惑及诸障碍；五者、深信不坏系念思惟；六者、精进勤求经行无倦；七者、常行乞食不受别请；八者、少欲知足调伏诸根；九者、正信甚深无生法忍；十者、常念谁所有是三昧，即于彼师生诸佛想，然后修习如是三昧。

“贤护，是为彼善男子、善女人具足如上十种法已，应当修习如是三昧，亦令他人受持读诵。如是行者当得八事。何等为八？一者、毕竟清静，于诸禁戒无毁犯故；二者、知见清静，智慧和合不与余相应故；三者、智慧清静，更不复受诸后有故；四者、施与清静，不愿

一切诸行果报故；五者、多闻清净，既闻法已毕竟不忘故；六者、精进清净，于一切时求佛菩提故；七者、远离清净，于一切名利不染著故；八者、不退清净，当得阿耨多罗三藐三菩提初不动摇故。贤护，是为彼善男子、善女人所获八法也。”

尔时，世尊为重明此义，以说偈曰：

“智人不起有相想，亦当除慢及我心，
于深忍中无取著，彼能速宣此三昧。
空中本来灭诤根，涅槃无相大寂定，
于佛无嫌不谤法，彼能速宣此三昧。
智者不兴嫉妒意，念佛知恩及法僧，
所生降伏无迁移，如是寂静持三昧。
无有嫉妒亦无疑，思惟深法真实信，
精进不懈离诸欲，彼能如是得三昧。
常行比丘乞食法，舍诸别请况求财？
断除垢染证真如，彼能如是得三昧。
谁能有此三摩提，我应听受广流布，
于教师所起佛想，彼能如是得三昧。
若人修行此三昧，当具功德超世间，
彼应速受八种法，称诸佛心净无垢。
持戒清净无有边，三昧菩提及胜见，
彼能清净诸有中，住以最妙功德聚。
智慧清净不受有，布施离垢入无为，
得彼多闻未曾忘，其为智人功德藏。
勇猛精进得菩提，于世名利不贪染，
若诸智者善行此，彼入无上深妙禅。”

不共功德品第十四

尔时，世尊复告贤护菩萨摩訶萨言：“贤护，彼诸菩萨摩訶萨，复当成就十八不共法。何等名为不共法也？所谓如来初成阿耨多罗三藐三菩提，乃至般涅槃，于其中间如来所有三业智慧为首，一切身业随智慧行，一切口业随智慧行，一切意业随智慧行。又诸如来知见过去无有障碍，知见未来无有障碍，知见现在无有障碍。又诸如来所无有错误，言无漏失，意无忘念，无别异想，常在三昧无不知已舍。又诸如来意欲无减，精进无减，禅定无减，智慧无减，解脱无减，解脱知见无减。贤护，是为如来十八不共法，彼菩萨摩訶萨当应修习具足成满。

“复次，贤护，若菩萨摩訶萨，成就具足甚深难见摄受正法，即

欲宣说是三昧者，应当更受十种胜法。何等为十？所谓如来十力。云何十力？贤护，是中如来是处非处力者，如来于诸处非处事，能以正智如实知故。贤护，如是处非处事，如来能以正智如实知者，此则如来处非处力。如来得此力已知真实处，于大众中作师子吼，转大梵轮昔所未转。若有沙门、婆罗门，若天、若梵、若魔、若人，一切世间终无有能如是转者。贤护，是为如来第一智力，菩萨摩訶萨应当修学具足成满。

“复次，贤护，是中如来一切至处道力者，如来于一切处道差别，皆以正智如实知故。贤护，如是一切至处道事，如来能以正智如实知者，此则如来至处道力也。如来得此力已知真实处，于大众中作师子吼，转大梵轮昔所未转。若诸世间沙门、婆罗门，若天、若梵、若魔、若人，终无有能如是转者。贤护，是为如来第二智力，菩萨摩訶萨应当修学具足成满。

“复次，贤护，是中如来世间种种界力者，如来于世间种种诸界无量差别，能以正智如实知故。贤护，如是世间种种界事，如来皆以正智如实知者，此则如来世间界力也。如来得此力已知真实处，于大众中作师子吼，转大梵轮昔所未转。若诸世间沙门、婆罗门，若天、若梵、若魔、若人，终无有能如斯转者。贤护，是为如来第三智力，菩萨摩訶萨应当修学具足成满。

“复次，贤护，是中如来心行力者，如来于诸众生种种心行无量差别，皆以正智如实知故。贤护，如是众生种种心行无量差别，如来能以正智如实知者，此则如来知心行力也。如来得此力已知真实处，于大众中作师子吼，转大梵轮昔所未转。若诸世间沙门、婆罗门，若天、若梵、若魔、若人，终无有能如是转者。贤护，是为如来第四智力，菩萨摩訶萨应当修学具足成满。

“复次，贤护，如来知众生诸根差别力者，如来于众生诸根种种差别，皆以正智如实知故。贤护，如是众生诸根种种差别，如来皆以正智如实知者，是则如来诸根差别力也。如来得此力已知真实处，于大众中作师子吼，转大梵轮昔所未转。若诸世间沙门、婆罗门，若天、若梵、若魔、若人，终无有能如是转者。贤护，是为如来第五智力，菩萨摩訶萨应当修学具足成满。

“复次，贤护，是中如来禅定力者，如来于一切禅定解脱三昧，生起烦恼及以灭除，斯以正智如实知故。贤护，如是一切禅定解脱三摩跋提生起烦恼乃至清静，如来皆以正智如实知者，是则如来禅定力也。如来得已知真正处，于大众中作师子吼，转大梵轮先所未转。若彼世间沙门、婆罗门，若天、若梵、若魔、若人，终无有能如是转者。贤护，是为如来第六智力，菩萨摩訶萨应当修学具足成满。

“复次，贤护，如来业力者，如来于彼一切诸业种种差别，及彼未来和合得报亦无量差别，如来斯以正智如实知故。贤护，如是诸业种种差别，未来得果亦复差别，如来皆以正智如实知者，斯则如来知

业力也。如来得已知真实处，于大众中作师子吼，转大梵轮先所未转。若彼世间若沙门、婆罗门，若天、若梵、若魔、若人，终无有能如斯转者。贤护，是为如来第七业力，菩萨摩訶萨应当修学具足成满。

“复次，贤护，如来天眼力者，如来常以清净天眼过于人眼，见彼未来诸众生辈死此生彼，其所受身或美或丑或善或恶，所得诸色或好或恶或妙或粗，或生善道或生恶趣，又见众生所作诸业或善或恶。有诸众生，具身恶业、具口恶业、具意恶业，诃骂圣人，诽谤正法，坏和合僧，具足如是诸恶业故，身坏命终生于恶道。又诸众生，具身善业、具口善业、具意善业，恭敬圣人，尊重正法，供养众僧，具行如是诸善业故，命终得生人天善趣，如是等事皆如实知。贤护，如来以净天眼见诸众生死此生彼，乃至命终生于天上，是则如来生死智力。得是力已知真实处，于大众中作师子吼，转大梵轮昔所未转。若彼世间若沙门、婆罗门，若天、若梵、若魔、若人，终无有能若斯转者。贤护，是为如来第八智力，菩萨摩訶萨应当修学具足成满。

“复次，贤护，如来宿命智力者，如来能以诸宿命智，知于过去诸宿命事，所谓众生生此死彼，或于一处初受一生、或二、或三、或五、或十、或百、或千，乃至或受无量百生、无量千生、无量百千生，如是乃至无量转劫、无量定劫、无量转不转劫等，皆如实知。又于彼所生趣，如是处、如是家、如是种姓、如是名字、如是相貌、如是生中、如是服食、如是所作、如是善恶、如是忧喜、如是苦乐乃至若干寿命等，亦如实知。又于某处舍彼身已复生某处，如是身相、如是所说、如是所经，乃至寿命诸过去事，皆悉知故。贤护，如来能以种种无量诸宿命智，知彼众生宿命所经，始自一生及无量生，乃至寿命诸过去事如实知者，是则如来宿命智力也。得是力已，处大众中作师子吼，转大梵轮昔所未转。若彼世间沙门、婆罗门，若天、若梵、若魔、若人，终无有能若斯转者。贤护，是为如来第九智力，菩萨摩訶萨应当修学具足成满。

“复次，贤护，如来漏尽力者，如来能尽一切诸有，无复诸漏，心慧解脱自觉法已，是故唱言：‘我生已尽，梵行已立，所作已办，不受后有！’贤护，如来如是能尽诸漏，心慧明脱自证知故，故言‘我生已尽’乃至‘不受后有’如实知者，是则如来漏尽智力也。如来得已，处大众中作师子吼，转大梵轮昔所未转。若彼世间沙门、婆罗门，若天、若梵、若魔、若人，终无有能若斯转者。贤护，是为如来第十智力，菩萨摩訶萨应当修学具足成满。

“贤护，若诸菩萨摩訶萨，读诵受持思惟修习是三昧者，则能摄受如来十力也。”

尔时，世尊为重明此义，以偈颂曰：

“十八不共等觉法，十力明智诸佛同，

菩萨修习此妙禅，自然成就斯二种。”

随喜功德品第十五

尔时，世尊复告贤护菩萨言：“贤护，若菩萨摩訶萨具足成就四随喜故，即当得斯现前三昧，速疾成满阿耨多罗三藐三菩提。何等名为四种随喜也？所谓彼菩萨摩訶萨应作如是念：‘如彼过去一切诸如来应供等正觉，各于往昔行菩萨时，皆因随喜得是三昧，因三昧故具足多闻，由多闻故速疾成就阿耨多罗三藐三菩提。如我今日亦应如是，依因随喜得是三昧，因三昧故具足多闻，由多闻故速得成就无上菩提。’贤护，是为菩萨摩訶萨第一随喜功德聚也。贤护，彼菩萨摩訶萨，复应如是念：‘如彼当来一切诸如来应供等正觉行菩萨时，皆因随喜得是三昧，因此三昧故具足多闻，由多闻故速疾成就阿耨多罗三藐三菩提。如我今日亦应如是，当因随喜得是三昧，归凭三昧求满多闻，由多闻故速疾成彼无上菩提。’贤护，是为菩萨摩訶萨第二随喜功德聚也。贤护，是菩萨摩訶萨，复应如是念：‘而今现在无量无边阿僧祇诸世界中，一切诸如来应供等正觉，各于往昔行菩萨时，亦因随喜得是三昧，因是三昧具足多闻，由多闻故现皆得成无上菩提。然我今日亦应随喜，乃至为欲速成无上菩提故。’贤护，是为菩萨第三随喜功德聚也。复次，贤护，彼菩萨摩訶萨，复应如是念：‘我今已得仰学，三世一切诸如来本于过去行菩萨时，皆因随喜得是三昧，皆因三昧具足多闻，皆由多闻而得成佛。今我以此随喜功德，愿与一切众生共之，同生随喜，同获三昧，同具多闻，同悉成就阿耨多罗三藐三菩提。’贤护，是为菩萨摩訶萨第四随喜功德聚也。

“复次，贤护，而彼菩萨既得成就如是随喜、如是三昧、如是多闻，如是速疾成就菩提，以是功德悉与众生，共同回向阿耨多罗三藐三菩提，如是功德难可称量！我今为汝略开少分，汝宜谛听善思念之。贤护，譬如有人定寿百岁，身轻气猛行骏若飞，是人生已便能行一世界，先行东方尽世界边，如是次第行于南西北方、四维、上、下，周旋十方穷极地际。贤护，于意云何？假使有人聪明出世善通算术，能计是人所行地界道路近远长短耶？”

贤护白言：“不也。”

“又能称量耶？”

“不也。”

“又能观察耶？”

“不也。”

“亦能思惟耶？”

“不也，世尊。”

“贤护，且置初行，即使是人满足百年速疾往返，遍至十方无量

世界，彼明算人复能知否？”

贤护报言：“不也，世尊。彼明算人尚不能知初时所行地界近远，云何能计是人一世尽力飞行周遍十方，无数世界道路由旬其数多少？若欲的知，唯独世尊及大弟子舍利弗与彼不退诸大菩萨等乃能知耳！”

佛告贤护：“如是，如是。我今语汝，若有善男子、善女人，起信敬心，于彼风行壮人所经世界盛满珍宝，持用奉献十方诸佛，其所获福虽曰极多，然尚不如随喜三昧功德少分！何以故？贤护，由彼菩萨摩诃萨修此三昧，具足如上四大随喜，回向阿耨多罗三藐三菩提，为求多闻成正觉故。贤护，以是因缘持彼施福，望前随喜所获功德，百分不及一，千分不及一，百千万分不及一，亿百千分不及一，乃至算数譬喻所不能及。

“贤护，汝今当知，诸菩萨等随喜回向所得功德。是故我今更为汝说菩萨随喜功德少分，汝宜谛听也。贤护，我念往昔过于无量无边阿僧祇劫，尔时有佛，号师子意如来、应供、等正觉、明行足、善逝、世间解、无上士、调御丈夫、天人师、佛世尊，出现于世。贤护，时此世界阎浮提中，人民炽盛多饶财宝，丰乐安隐甚可爱乐。贤护，尔时此阎浮提其地弘广，具足一万八千由旬。其间城郭聚落乃有一万八千，一切皆以七宝所成。其城纵广十二由旬，于诸城内城别皆有九亿民家。贤护，尔时大城名曰贤作，城中居民有六十亿。彼城即是师子意如来现生处也。贤护，尔时师子意如来，初会说法有九十亿人证阿罗汉果；过七日已，于第二会，复有九十亿人得阿罗汉果；过第二会，第三会中，复有九十亿人得阿罗汉果；过三会已，复有九十亿人咸从他方而来大集，悉是清静诸菩萨众，自后彼佛恒有无限阿僧祇诸声闻众。贤护，尔时人民行十善业，如彼未来弥勒佛教诸众生，具足成就十种业行。尔时人寿八万四千，如弥勒时人寿无异。

“贤护，时彼大城有转轮王名曰胜游，如法治世具足七宝，所谓金轮宝、象宝、马宝、摩尼宝、女宝、长者宝、主兵宝，是为七宝，满足千子身相端严，成就威雄降伏怨敌。彼王所统尽世界边，不用刀兵亦无威迫，无所税敛众具自然。时胜游王诣师子意如来应供等正觉所，顶礼尊足然后退坐。尔时，师子意如来知胜游王渴仰心已，即为广宣现前三昧。时彼王既闻如是三昧，深自庆幸发随喜心，以一把宝奉散佛上。彼王缘此随喜善根，命终之后还生阎浮，为彼王子名曰梵德，复绍王位如法治化。彼佛灭后于正法中有一比丘，其名曰宝，聪明精进，常为四众宣扬广说如是经典。贤护，尔时彼梵德王于比丘所闻三昧已，得深净信起随喜心，持上妙衣价值百千覆比丘上。贤护，又梵德王从比丘所闻三昧已，即发阿耨多罗三藐三菩提心，为爱法故舍家出家，剃除须发，被服袈裟。是时亦有百千人众成就信心，即随彼王法服出家，亦为如是三昧经故。时彼梵德比丘，与彼百千诸比丘众，经八千岁供养承事彼宝比丘无有疲倦，终不能得如是三昧，唯除

一闻。闻已随喜，具以四种随喜功德，回向阿耨多罗三藐三菩提。如初随喜如是广行，然后梵德比丘及百千众，缘此善根寻得值遇六万八千诸佛世尊，凡所生处常得为众颁宣广说如是三昧。彼王比丘因彼善根，复更值遇六万八千亿数诸佛，如是次第种诸善根得此三昧，具足圆满助菩提法已，寻得成就阿耨多罗三藐三菩提，号曰坚固精进如来、应供、等正觉、明行足、善逝、世间解、无上士、调御丈夫、天人师、佛世尊。而彼百千诸比丘众得此三昧，亦能成就助道法故，皆已成于阿耨多罗三藐三菩提，名曰坚勇如来应供等正觉，复令无量百千众生住于阿耨多罗三藐三菩提。

“贤护，彼但耳闻尚获如是，何况菩萨闻受三昧，读诵忆持为他广说，复勤思行而不得也？贤护，以此义故，诸菩萨等闻是三昧谁不随喜，谁不读诵，谁不受持，谁不修习，谁不广说？何以故？贤护，以彼菩萨闻是三昧，即得成就助道法等，速疾成于阿耨多罗三藐三菩提故。贤护，以是因缘吾今语汝，若人正信净心欲求阿耨多罗三藐三菩提者，要先至心求此三昧。菩萨若闻百由旬内有此甚深三昧经者，菩萨即应躬自往诣听是经典，闻已即应读诵受持、修习思惟、为他广说。贤护，且置百由旬内当往听受。又彼菩萨若闻二百由旬、三百、四百、五百，乃至千由旬内有是三昧，在某都城某聚落所，菩萨即应躬往听受习诵受持。何以故？贤护，以是菩萨清净信心，为求成就阿耨多罗三藐三菩提故。是故菩萨不应起懈怠心、生懒惰心、起散乱心，当更发精进心、发猛利心，应当为是三昧速至千由旬所，乃至但得闻是三昧，何况读诵受持思惟解说！何以故？贤护，以是三昧能摄一切助道法故。

“复次，贤护，是中若有菩萨以纯净心为求菩提，应当往诣千由旬所，为听如是三昧法。时，菩萨应当承事供养彼说法师，一切众具悉皆奉上，常当随逐法师而行，或时一年，或复二年，或十、二十或经百年，乃至尽寿随逐法师不得舍离，乃至但求闻是三昧，何况能得读诵受持、思惟义理、为他解释！如是菩萨随法师时，当舍自心诸所为事，常当随顺彼阿闍梨法师意行，谨心承事不得违教，起尊敬心及重爱心，除舍一切无爱敬事，于法师所发善知识想，乃至当起如诸佛心。贤护，彼菩萨于是法师阿闍梨所，能生如是敬爱心已，若当不得读诵受持思惟广说，乃至听闻是三昧者终无是事，唯除往昔诽谤如是甚深经典，业时已熟定堕恶道业不净耳！复次，贤护，假彼菩萨或欲须离彼法师者，常当知恩，常当念恩，常当报恩。何以故？贤护，以是法师宣讲因缘，令斯经典久住不没。

“复次，贤护，若有菩萨为是三昧，尚当应往千由旬处，况复随近城都国邑聚落空处或山野中，而当不往听受读诵、思惟义理、为他广说也？复次，贤护，我今语汝，若有菩萨为三昧故，即能往至千由旬所，乃至不得闻是三昧，而彼菩萨虽复不得闻是三昧，于是法中念求善根，当发精进莫即懒惰。汝应当知如是之人，则为已得不退转于

阿耨多罗三藐三菩提，何况听闻、受持读诵、思惟修习、为他广宣！贤护，汝今当观彼菩萨辈，闻此三昧已而能受持思惟修行，即得尔许大功德聚；乃至求已不能得闻，亦当具足几大善根。若闻不闻，皆为已住不退转地，毕竟成就阿耨多罗三藐三菩提，何况闻已读诵受持、思惟修习、广为他说，亦令多人闻已诵持、修习思惟、炽然流布也！”

尔时，世尊为重明此义，以偈颂曰：

“我念过去有如来，号师子意人中上，
彼时有王为众首，亲往诣佛求三昧。
时大智王得闻已，欢喜遍满不可宣，
以手持宝奉散之，供养人尊师子意。
内心思惟发是言：我今归依无上觉，
为诸世间作饶益，唯愿善说三摩提。
时王兴建此业已，舍身还生于彼宫，
寻得值遇宝比丘，大德名闻满十方。
彼闻比丘善说时，心生欢喜无称量，
即以胜妙众宝服，答彼比丘为菩提。
复与数千众出家，供养承事彼比丘，
经历满于八千岁，为求如是三昧故。
彼唯一说不再宣，闻受深妙如大海，
尔时心智都无倦，求此如实胜寂禅。
彼辈如是修行已，值遇诸佛大威雄，
具满六万有八千，其间亦闻此三昧。
余世供养复承事，六万八千亿世尊，
所闻深妙悉随喜，斯由师子如来故。
彼王如是具修行，终得成佛号坚进，
教化众生无量数，所在生死皆远尘。
从王出家数千众，亦同得佛名坚勇，
德声遍满于十方，闻三昧名证大觉。
何况复能为他说，不染著彼诸世界，
当更广显妙思惟，若斯三昧诸佛演！
若知三昧百由旬，为求菩提诣彼听，
于言教中莫辞倦，闻者功德不可量。
若至于彼不得闻，尚获若干诸福聚，
何况闻已思说者，唯当速求此三昧！
当念彼具梵德人，亲近承事勿生厌，
谁比丘所有此经，即当诣彼修供养。”

觉寤品第十六

尔时，世尊复告贤护菩萨言：“贤护，我念往昔过多无量阿僧祇劫，有佛出世，名萨遮那摩如来应供等正觉，十号具足。时有比丘名曰和轮，于佛灭后称扬广说是三昧经。我于尔时为大国王，一心专求是妙三昧，即于梦中闻有告言是三昧处。既觉寤已，遂便躬诣比丘师所求是三昧，因请法师剃发出家。为求听受是三昧故，躬用承事和轮法师，备经三万有六千岁，天魔障蔽竟不得闻。”

时，佛复告诸比丘、比丘尼、优婆塞、优婆夷言：“我今语汝，汝等当应急疾听受是三昧王，无得踰迟亦无忘失，善承事师无令失所，求是三昧以得为期，若经一劫乃至百千不生懈心，无不得也。贤护，若人一心求是三昧，常随逐师不得远离，当设供养，所谓汤药、饮食、衣服、床敷种种众具，及以一切金银珍宝，凡是资用尽奉于师无所爱惜，如其自无乞求而与，趣得三昧勿生厌心。贤护，且置如斯寻常供具。夫求法者，师若有须，乃至应当自割其身肌肤肢体供奉于师，师若须命尚无爱惜，况余外物而不奉师？贤护，其求法者，承事法师将护随顺其事若此。又承事师如奴随主，如臣事君，事师亦尔。斯人如是疾得三昧，得三昧已当念忆持，常念师恩恒思报答。贤护，是三昧宝不易可闻。正使有人过百千劫，但求闻名尚不得闻，何况闻已书写诵持，转复为他分别说也！贤护，假使恒河沙数诸佛世界，盛满珍宝持以行檀，其福虽多，犹亦不如闻此经名，书写一偈所获功德无可较量！”

尔时，世尊为重明此义，以偈颂曰：

“我念过去无量时，具足数满六千岁，
常随法师不暂舍，初不闻是三昧名。
有佛厥号为至诚，时彼比丘名和轮，
其于世尊灭度后，比丘广说是三昧。
我时为彼天下王，梦中闻告三昧处：
和轮比丘常宣转，王当听受是妙经。
从梦寤已即推求，躬诣比丘请三昧，
遂舍王位而出家，恭敬供养不暂休。
经历三万六千年，但愿得逢彼宣流，
常为天魔来固扰，终竟未果一听闻。
是故比丘比丘尼，诸优婆塞优婆夷，
吾故诫汝此诚言：汝当趣持是三昧。
其欲敬承彼法师，若经一劫及多劫，
备奉药汤诸妙膳，求闻如是三昧经。
又办亿数众衣服，床敷灯烛及诸珍，
精勤如是不觉疲，为听如是妙三昧。”

比丘自无当乞奉，乃至身命无吝情，
何况余物有惜心，如是求者得三昧！
受恩常念思报恩，智人闻已应广说，
亿那由劫专精求，斯妙三昧尔乃闻。
假使恒沙诸世界，盛满珍宝用行檀，
能于是中说一偈，此人功德过于彼！
正言宣说一偈者，过于诸劫那由他，
何况闻已能广传，斯人功德不可说！
若人乐行于菩提，当为一切求是法，
必能正觉无上道，闻已安住斯定中。”

嘱累品第十七

尔时，世尊告贤护菩萨言：“贤护，是故彼善男子有净信者，常当精勤听此三昧，既闻受已读诵总持思惟其义，广为世间分别演说，宜善书写安置藏中。所以者何？贤护，于我灭后当来之世，有诸菩萨摩诃萨辈净信心者，为众生故当求多闻，求多闻故当诣诸方听受正法。贤护，是故彼诸善男子，有欲乐者，具足信心者，摄受正法者，爱乐正法者，总持修多罗者，为如是等广宣说故，以如来力加持故，书写如是大乘经典，以如来印印封之已，然后安置于匣藏中。

“贤护，是中何为如来印？所谓一切诸行无造无作、无造作者、未曾有、无为、无相、无想、无依、无摄、无取、无住。一切诸行尽、苦因尽、有尽、一切烦恼尽，无生无灭，无道无道果。一切诸圣无有覆藏，愚痴所毁，智者所称，巧者能受。”

如来世尊说此经时，无量众生皆于阿耨多罗三藐三菩提，种诸善根。彼恒河沙等诸佛世界，有无量阿僧祇诸菩萨摩诃萨众，皆从本国发来至此，咸为听受是三昧者，彼辈皆得不退转于阿耨多罗三藐三菩提。时此三千大千世界一切大地六种震动，所谓动、大动、等遍动，涌、大涌、等遍涌，起、大起、等遍起，震、大震、等遍震，吼、大吼、等遍吼，觉、大觉、等遍觉，乃至边涌中没、中涌边没，时此世界如是大动。

尔时，世尊告尊者摩诃迦叶、尊者舍利弗、尊者目犍连、尊者阿难，及贤护菩萨、宝德离车子、商主长者、星德长者子、伟德摩纳水天长者等五百人众，并余诸天世人四部众等言：“迦叶，我今以是三大阿僧祇劫修成阿耨多罗三藐三菩提法，付嘱汝等。如是等义，一切世间所不能信。何以故？如来所说修多罗，最胜微妙第一甚深，于当来世能与一切众生阿耨多罗三藐三菩提。是故我今殷勤嘱汝，汝当听受，汝当读诵，汝当忆持，汝当思惟，汝当修行，汝当开发，汝当广宣，汝当解释，汝当尽善，汝当流布勿令断绝。

“复次，阿难，若有诸善男子、善女人，念欲修习此三昧经者，欲读诵者，欲受持者，欲思惟者，欲开示者，欲广说者，当应令他生正信故，令他读诵故，令他受持故，令他思惟故，令他开示故，令他广说故，我今为彼安住大乘诸善男子、善女人辈，广开发已，当如是学，常当念我如斯教敕。”

尔时，世尊说是经已，尊者摩诃迦叶、舍利弗、大目犍连、阿难，自余一切诸大声闻，及彼贤护、宝德、善商主、星德、伟德水天长者等五百优婆塞众，及彼从十方他佛国土诸来菩萨摩訶萨众，乃至一切天龙鬼神、人非人等，闻如来说，皆大欢喜，奉教修行。

拔陂菩萨经

开元录云亦名拔陂经、僧佑录云安公古典经

闻如是：佛在罗悦祇竹园多鸟树下，与众弟子五百比丘俱，皆是阿罗汉，所著尽，无余结，所作满，所求具，皆已下重担，悉至所愿，已断于故胎从政化度，皆悉度八禅，除一凡比丘。

尔时，拔陂菩萨，与五百菩萨俱，皆白衣身受五戒，皆从如来欲受正法。拔陂菩萨便起前到佛所，为佛作礼，却坐一面。诸菩萨及诸比丘，悉以头面礼佛皆坐一面。佛尔时便取神足定意，使诸比丘在他郡国者，皆来会是竹园，悉为佛作礼。尔时，过十余万众比丘皆来会竹园。佛复取神足定意，使大德比丘尼等，从三万余比丘尼，皆来会竹园，为佛作礼悉坐一面。佛复取神足定意，使罗檀迦婆菩萨从惟舍大国，及迦休头菩萨从占波大国，及那达头菩萨从波罗奈大国，及须深无菩萨从迦维罗卫大国，及大大导众菩萨，及给孤独迦罗越从舍卫大国，及尊达菩萨从拘遘大国，及漫论调菩萨从沙号大国，各从二万八千人皆会竹园，悉以头面礼佛足悉坐一面。

尔时，阿闍世王与过十万人俱，来到佛所，皆以头面礼佛悉坐一面。尔时，第一四天王，及忉利天王，及梵天王，与无央数天众，悉来到佛所，为佛作礼悉坐一面。及诸遍净天无央数众，悉来到佛所，作礼皆住一面。及四阿须伦王，从无央数阿须伦众，皆来到佛所，作礼竟悉住一面。及难头和难龙王，及沙迦罗龙王，及摩奈师龙王，及阿耨达龙王，及伊罗钵龙王，共与无央数众龙俱，来到佛所，作礼竟悉住一面。

尔时，是三千日月间无有空无人者，皆大神妙天、龙、神，及人非人从下并梵天。拔陂菩萨便起坐，整衣服，右膝著地，向佛叉手便言：“今欲有所问，愿佛演说，解我所难。”

佛因言：“拔陂恣意所问，如来今我悉能解汝所问，知汝意生灭形象。”

拔陂菩萨便言：“云何得菩萨定意？所闻如海多藏，所闻无有余疑，不忘生念亦不退亦不懈惰于无上之道至德正觉，为佛转生，不落无法处，常识所从来生，未尝离本愿见如来，至便卧梦亦不离正，得形常端正，可爱见者，喜生于豪贵家，常持坚强意，自里所学疾所知不忘，广计虑意坚固惭羞，具了理奇可多行慈，常有默觉，所对多威神，常精进不中悔，传放义常入法，常入止，常入观，常入禅，常入定，空不入相，无形地法不恐不惧，常乐说法，常乐受法，意所愿生

不复违其本愿，本德多力，本意多力，本因缘强，五根强，所作常强，呵止恶常强，所观常强，于解所愿常强，难胜量譬如海，譬如月自具净满，譬如日稍尽阴冥，譬如火能现色，譬如虚空难可涂污无所著意已空，譬如明珠悉达正法，譬如石安住不动，譬如根难摇动，譬如豺及獠奕其意无所痛，譬如飞鸟意以低伏，譬如乞儿不起乐在县国乐山谷，譬如麋鹿亦猴猿不亲爱俗人，亦有学者常导众复牵众，无嗔恚在诸人不复化，悉诸魔随次解度，诸法无教导自意解，于觉法在禅坚不缘邪，有大慈力难可烧，所念常深不离正行，无能计其所得所念，得闻法数依堕泪，所忌常大，一切具佛所行思愿，众来欲采无数善念，愿取海清静信，增愿净洁，妒嫉嗔恚断，常愿明在，一切知至光内欢喜，行愿以断不信忌，为黠所洒，满无数天愿行，一切庄饰世断绮可，便净好行戒净具为，能断弟子、因缘觉地，心所求愿坚不转，所作竟成所求常无造，于天人道善法行不厌事，悉于菩萨成满具度不忧喜，一切于异学不倾邪，一切敬乐诸佛，悉见法光耀无能化坏，常悉会面于诸佛，譬如作幻人一切法非我，譬如化人未来于后法，譬如梦人过去当来现在事，譬如有光一切世悉见身，如双日亦不行，亦无所止因缘分，譬如景于生死，以住无胎，已断胎想过不取法，行远弃已忧法器，菩萨意已无数，一切于世一切无能转不堕，次近无所著，一切佛国界已度符节门，一切足解散善法，自上如法器，一切于诸佛、一切为如来所拜，以佛神住衣毛不动，能力如师子独吼，常见敬一切，能饱满世众不乱误，一切为诸佛所待知，如时觉行化，弃所疑，无彼受法，一切三世无不照知，一切黠慧说无穷，常行慈以得哀，不留事说经明不慧弃住，悉于诸人不两随，身意同生直，心为世眼三界明，悉三界无能轻易者，行非我，世所有展转止，行不求众乐，独行信忆诚信，法不取不弃一切知演教，彼劝人住大学门，已至无恐怖，善说如来正法一切卷句，常行求见者莫不喜，悉众所从大乐得喜，在如来足下断连，当乐善说一切佛法，乐行问不仇意著，于行于众止所受恐怖断，起力言行一切度转，常直取所住不动，一切羸彼助说法坐师子座，数数有悉诸佛所知，一切在世无所堕，悉说行在入知常尊法，悉依诸佛行，常愿法不倦解待愚，如来善交无处所行，在十方世常好行一切，为人弃罪成福，默为日增已得入法门，譬如天法身无形故常擎内人，为菩萨一切不断诸佛诸行，不住止欲，具菩萨弃已被人铠，虽多怨嫉欲胜一切，于佛数数愿，如来十种力地，一切想去已为知悉，了工校计知世聚散，一切行入生死，弃无所住亦不乱，已度于法海为藏贵宝，遍行于世一切已远世，已习行大变化佛力足致无比，聚一意愿见诸佛弃，不用一切世所生生异界，如来有住在者，正觉无所著，遥见佛及其国界，闻其法，见其比丘僧，亦不五达，亦不六达，菩萨亦不从是世致彼听视，犹故住是世耳！遥见正觉，亦闻明法，亦悉受行。譬如今面受奉行，令正等，使吾无疑，亦使如是。诸菩萨无懈怠，常面见佛善听法，至梦倾意不为邪？”

佛便谓拔陂菩萨言：“善哉！善哉！拔陂，是为哀众辞，求众之安，愍念三世，见义见乐见安。于人天能以如是义问如来，先亦自有德，于过去佛已施众善福，已待遇众佛，坐法义座。愿法无所愿援，奉受梵行，少欲约可于无食，喜具戒起诸菩萨，常劝成菩萨，常愿尊菩萨，常愿菩萨意大，愿菩萨盛，愿菩萨得。其所求常慈有大，依一切等心，于人制意度无极，见佛常广，理如来语求佛意。譬如和夷铁无称量，悉人意所常善知觉于面行。是汝德，拔陂，吾已意具知，虽尔者有现在佛定，名为常住止。是定为定意，坚不堕，不失意，下耳根众不他怠，唯如来为我解说是定意，为众学作先，使众人得安。愿愍是世，为人天世及诸菩萨大愿者，皆当以是见光自照。”

佛便告菩萨拔陂言：“常行一法，常作莫厌，奉行如上多益。作莫减如作车成便乘，便可随常所求，已具净，已谛念，已具坚，本力作一切善法，自致踰过便以有。何等为一法？见在佛定意，名为止定住者。所谓因缘，佛意作念，意不邪冥不乱，已默得持精进，不跌无形有待遇，常兴空，厚睡卧为剧怨，且远避众会身常隐，避恶知识莫亲，随善政友可法道，直根莫妄占近厌，欲少食不愿贪，好法衣，不愿寿长，随本命慧，身无所爱，不顾其亲属，本所生国速弃去，已亲慈心，已得哀意，已住喜意，已行护心诸盖，已弃诸禅，已习色想，已分别阴想不取诸入，不受诸大，不宥意，已不乱生受不住不净，已得一切舍向，一切脱人，一切于人如己身，一切人皆非我，一切法无所取，从戒无所愿常习欲定，多闻欲乐戒，阴不漏毁定，阴不动堕，于法无所复疑，与佛无诤，于法无所弃，于僧不诽谤，粗恶言以断止，待遇于有道过者，常远离世音无乐，不用过世音，常用爱乐畜生音，远弃辟六坚法，已习五度脱，常当习十恶作足已弃，十善作足，亲习于九娆，能自解于八无势，悉违舍八精进，常已习九想行，已行八大人念，为已得诸禅莫取爱，莫以闻自大理，可绮下耳听常重法，常欲法色想，已别自想身无所取，想人已悉舍，虽生不为可阴想，已分别所有，已不住常求，欲泥洹愿，不用生死行，于生死恐惧想，于诸阴想如怨，于四大如蛇，于诸入已想空，想三界无所住，见泥洹而独乐，世作不复用，舍世随佛，令于人无诤，一切于世无所亲，一切诸佛常得面，有是身如梦见向脱，常净洁善作，常为求一切诸想，分别计三坚定，常著念一切诸佛，依怙著善本，常思愿一切诸佛，自在欲定，不自愿佛身相等，一切法不分别计世，知义不与诤，从受有能次第，随如来住地利得忍辱，已下入法身空身，为已知人身，不生不灭泥洹身，常以观黠慧眼已为净，一切法非我，愿佛意不堕不踰，一切于佛一其行，不念知欲求到，为无数识申直意，于为业不为彼，随佛智遇善友如见尊，一切于诸菩萨无异意，悉反魔所作，一切世所有如幻，一切诸佛如光，照见如来，常行求菩萨意度无极悉等等，忆诚信见诸佛一切等善法。拔陂，是为现在佛面住定意，亦用是法定意为具来。何等定意具将是法来？所谓现在。现在佛面住定意为何等？拔

跋，若有比丘、比丘尼、优婆塞、优婆夷，于戒常具足，常独处不与众，便起意念言：‘阿弥陀佛为在何方，常在说法如其所闻？’便生念在西方阿弥陀佛如来正觉所治也。去是佛国当过百千亿佛界，名须摩提国，众菩萨所聚，听尊说法已不乱意，常当念是国地。

“拔跋，譬如人卧梦见聚银若金及众宝，亲友知识极爱亲属，常乐欲见不厌，便与共戏乐，至意亲密谈，至寤尚识其所见，如事为人说，便为堕泪念识其想。拔跋，亦如是，菩萨白衣者若学者，闻阿弥陀佛所在国，常当念其方，无毁漏于戒，于戒阴莫用乱意，净心念一日一夜至七日七夜。如是七日七夜毕念便可见阿弥陀佛，或在梦中，如来阿弥陀佛，如来当面自见。譬如上头梦男子，自想为住在空，不想夜亦不想昼，其眼根不为壁墙所遮，不为阴冥所蔽。拔跋，菩萨亦尔，作意行如是。如是于佛界中间，虽有须弥山，有遮迦谤摩呵遮迦谤山，及余黑山，不能遮其眼视，亦不能遮其意。菩萨亦未得天眼，视见阿弥陀佛；亦不得天耳，听闻阿弥陀佛说经；亦未得神足，得往到阿弥陀佛国。菩萨亦不从下世往生彼，但自故住是世，见阿弥陀佛如来，亦闻其说法如闻奉行。菩萨便从是定意，寤如所闻法，便为人广说。

“拔跋，譬如人，从随沙离闻有好女字须闻；复有第二男子，闻有好女字阿凡和利；复有第三男子，闻有好女名为莲华色，从闻展转著污转自作贪。是诸男子皆未见好女，但遥闻数数起意念，便有淫起；从卧便梦见，便往到女处。是故罗阅祇城中男子，如是起意，如是便见，与共会合，便乱习淫法，晓竟便寤故，识如闻如知。拔跋，为汝说如是，从是因缘如是法说，从是不还，受别于无上觉道。我复为其说，当来于后久远，当名为善寤如来无所著正觉。其人但得恣意见想，如是正见。如是菩萨，拔跋，亦如是住在是世间，彼有阿弥陀佛，已闻数数念，便见如来阿弥陀佛见在，佛面见住上定意，见便难问如来：‘从何法会菩萨得生是世？’阿弥陀佛便为诸菩萨说言：‘常念佛意善习不舍，常行幻作便得生是佛国。’何等常念佛念如来法不忘？今是如来无所著正觉，身有三十二大人相，紫磨金色身，如净明月水精珠身，譬如众宝所瓔珞，在众弟子中独说法，如是为其诚说：‘何以无所坏故？何所不坏败者？地水火风神天梵王，是皆不亡色痛想行识。如有念如来，因缘如空，空便为已得，是为念佛意。’菩萨常寤已舍其定。拔跋，汝用是便到彼所，从到便说是事，从有如是法说，可使受别不复还堕，于无上得正觉。拔跋，亦汝及摩呵迦葉，及因陀达菩萨，及须深天子，亦及余，于是定意有得者。

“拔跋，过去久远有一男子，于旷野泽中便大饥复渴，于泽中便得卧，梦得好饭食极意饱食，所饥渴便饱；适寤自意身饱满，便自计是法。譬如梦食，其如是观便忍受别；于佛法菩萨亦如是，居家或学闻佛所在方，常至意当念其方，常愿欲见佛莫取想，于胎亦莫想自有身，常住空想，有想当想念佛，从以空想便以住；以能想念佛，净如

琉璃宝中尊，如是念便见如来。拔陂，譬如人从本生国到他方，久久还念本所生国游戏所见，乐卧便梦还故国，便游戏生想如故所到处，于国中恣意戏；寤便为亲近及知识左右侍人说言：‘我往如是，我见如是，我所到到所作到如是。’拔陂，菩萨亦如是，居家及学闻佛所在方，常当念其方，愿常欲见佛。如是念菩萨，会见如来净如琉璃宝中尊。

“拔陂，譬如观污露比丘，取半坏败色著其前，便见已青黑，亦见坏，亦见空随如烟，但见白骨在前。是骨从何来谁持著？是谁所作？是皆意所作耳！拔陂，菩萨亦如是，持佛不归他，住在是定意，所向方便愿见佛，其方有佛者即见如来身。何以故？以倚著定故。复已持佛故住在是定，以佛威神、复已定力、自复以宿功德作三，令悉见如来。拔陂，譬如人年尚少，乐自拭净器受麻油，净器受清水新磨镜，若于水精器自观其身，悉于是中见其形。拔陂，汝宁谓是人形入油、水镜、水精器不？若已在其中耶？”

对言：“如来，不！我谓内不可得，及麻油、水镜、水精悉见影住其前，亦不从光中来，亦不从身中出。”

佛言：“善哉！善哉！拔陂，实如是，以净色已分别，诸菩萨欲见佛易无难见，即能问得问能对，所闻内喜其复内尔。是诸佛从何来？我到何所？是皆无从来，知如来无从去，云其自身其复生意尔，但意行是三界耳！我欲观天意即见天，以意作佛亦以意见。但是我意，为佛如来但意耳！及我身意也。以意见佛，意不能见意，意不能知意，意想为无智，不想意为泥洹。是法无坚，皆从自可起，自可悉空，求自可亦无有。拔陂，菩萨亦如是住在其定。

“拔陂，有四法菩萨疾得是定。何等为四？一为无央信，二为精进无能逮，三为黠不受彼教，四为亲善友。拔陂，是为四法，菩萨用疾得是定。复有四法，菩萨疾得是定，常求见佛，常愿闻法，计无所住，求佛意不忘，菩萨用是四法疾得是定。复有四法。何等为四？不乐俗言，不乐有人识，不欲世乐，不到睡卧试，但除大小便及饭食时及经行，不识会四辈及余众，常以法布施转增，不乐好色及待遇利。是为四法，菩萨疾得是定。复有四法疾得是定：常作佛形像，次画作其好；常持是定意，亦以意乐是定住久长止；亦书受奉行，是定起；弃绮可意无绮可法，便住无上独尊道，常营护如来教令谛不忘。是为四法，菩萨用疾得是定。”

佛尔时知是义，便说偈言：

“当生信于尊令，莫畏法所空说，
行精进断截卧，满三月当坐行。
常说法尊所言，偏教令演其功，
莫乐著见待遇，无所著得是法。
紫磨色相百福，常作念佛在前，

欢喜光一切照，形极好如金珠。
过去佛及未来，常当念叉手住，
亦见在人天尊，悉恭敬善法念。
常待遇于德王，以华香散其形，
与饮食常净心，求是定当阿难。
鼓吹增及琴瑟，常作乐无量像，
造喜悦无数喜，常愿求无极定。
常造作无比形，好分别相具好，
金色身礼清净，欲愿定是何难？
所念法常念作，净洁戒闻欲求，
偕事聚坏散弃，于是定得不久。
莫生饶于有形，行慈心具依护，
且当观欲善苦，求是定得不久。
生意喜于说法，相待尊常礼尊，
莫绮可弃贪慳，于法说莫疾弄。
如是令善可待，所生灭如来说，
无数佛悉所教，所求定莫为难。

“拔陂，菩萨当于说法比丘恭敬，常当礼遇具作待如尊，于是定便为进。拔陂，菩萨有于说经比丘乱意，有念嫉怨恨无清净心。拔陂，众非义所载令许，菩萨得是定意，至德尊满道义终无是。拔陂，譬如有眼男子，净夜无云雾，于夜半时仰头视上，便见无数星宿。拔陂，菩萨亦如是，受护佛法者观于意，在东方见无数佛，无数百、无数千、无数万、无数亿百千，求见甚易眼精所观见。拔陂，譬如来正觉眼，一切知一切见；菩萨亦如是，于是见在佛住正定意，从幻闻具行，从精进无偕具行，布施具行，戒度具行，忍辱具行，禅意具行，黠度定具行，得脱黠具行，度无上黠具行。”

佛尔时解是义说偈言：

“有眼观上视空，于净月中夜起，
见无数亿千里，虽晓明意在识。
定意尔菩萨得，见无数千佛国，
从定寤意故识，亦于众说国好。
定眼净次觉视，无蔽障观十方，
胜可爱为觉眼，是定净用见尊。
尊无时想观世，观十方三世尊，
断毒净无胎相，愿听善学上德。
亦听法快甚凉，可疾念空止要，
我是法愿与俱，安乐众愿为佛。
如无量菩萨色，见佛国亿万数，

菩萨尔得定后，见无央诸尊形。
有意学遍慈仁，从我闻悉持行，
是定尔菩萨得，无数百法不持。
信羞惭生想爱，悉远弃世所可，
何不作世法施，从是得净止地。

“拔陂，菩萨得定意，当起定意生精进。譬如船满中诸宝，已度大海粗及此岸，船近于岸边没，于是阎浮提人，当大举声称怨，称复悲哭：‘我曹已贫，众不见好宝。’拔陂，于是定意可闻已远，不复书不读不讽不行，亦不求义。比丘、比丘尼及优婆塞、优婆夷，其国处悉诸天世，皆大出声称怨，当复悲哭：‘我曹悉已空贫，众不见是法施。’世已有是深妙定意，亲佛所教，佛所称誉，佛所尊说，闻已不书取，亦不讽受，亦不读，复不行，亦不住，乐听绮满害智，不欲具闻，不取多智，虽闻不欲亦不乐取是定。

“拔陂，譬如愚人少黠，若有人来以栴檀授与之，痴人生不净想，黠人便为其说：‘是栴檀极好香，何为于是生不净想？何不嗅之？闻其好香，何不视之？’见其好色便自挟其鼻，不欲闻香故，闭其眼故，不欲视香色。说是定时亦如是，无戒者不乐欲远，不乐受已习，无慧痛亡其智，到禅便猗著胎归胎。是辈闻是定意，亦不信亦不用亦不随，亦不生内喜，复出声言，于众便作愿：‘善哉！今学光明尚能尔今世有高比丘譬如阿难是经譬如炉中火。’去众于屏处更说非谛：‘是经欲闻巧乱耳！是非佛所说。’

“拔陂，譬如贾人到愚冥人边，出绝好摩尼珠以视痴人。是痴人问主：‘是珠价直几所？’其主言：‘如是珠于夜作光，以宝满其明处。’则是珠于贾子曹便笑戏嘲珠主便度量摩尼珠，复言货主：‘是珠薄一牛宝，则当是其价耳！’拔陂，亦如是，于后有是菩萨定，如有比丘，能持信坚多欲学，直于奉行惭于疑，欲求度多闻有黠，深念行慈得哀，是定自在处，说如是定为可久住。有痴者，于前过胜未尝有行，未尝有福德，自大多嫉用利自取，欲作世名，少闻本无善学。是曹辈闻是定，亦不持亦不信，亦不行亦不乐受，复出声言：‘甚可怪！是曹比丘何一不惭？是比丘何一不解？闻是曹世巧言雅辞强说言是佛所道。’拔陂，我已故为若重说，令汝明解及天人世。拔陂，若有人以是重三千日月，满中七宝施与诸佛如来正觉，不闻是定者；若有菩萨闻是定意，已闻复言，是福独多！”

佛尔时解是义，便说偈言：

“一切是重三千，悉施与满中宝，
愿作佛如是行，常于世无双二。
其能有得此经，善定意佛所尊，
闻便信受奉行，及福快独极尊。

佞调意常自是，收意邪无定根，
常求会恶知识，转相教不信是。
漏无戒恶法具，自可足坚住痴，
转相踰谓可脱，敢坏败胜所教：
‘是经非佛所说，法王亦无是言。’
敢出是恶声说，恶作具不捡意。
有当见大雄尊，三世将光无量，
是义出为是辈，是皆为持法学。
已闻是深妙经，闻便受内生喜，
是曹辈可莫疑，不忧后不为佛。
有戒具清净行，有信悉直无邪，
口说法如海流，我所说为是贤。”

无尽意菩萨经卷第一

如是我闻：一时，佛游王舍城如来行处宝庄严堂，是大功德之所修成，佛一切法本行果报，包容无量诸菩萨众。其所讲宣悉是无量甚深之义，皆是如来神力护持，入无碍行微妙智门。其心欢喜得念进意，分别智慧无轻毁者。若有称赞叹其功德，尽未来世不可穷尽。如来正觉觉平等法，善转法轮度无量众，于一切法而得自在，知众生意尽其根源，善为众生断诸习气，虽为佛事心无所作。与大比丘六百万人，悉是如来法王之子，善得解脱断烦恼习，晓了甚深无生法忍，成就威仪其行端严，堪受供养为众福田，善持诸佛所说教戒。复有菩萨摩訶萨众，其数无量，不可称计，不可思议，不可宣说。是诸菩萨于一念顷，能过无量无边佛刹，已曾供养过去诸佛，咨受妙法无有厌足，常勤教化无量众生，善解方便智慧具足，其心安住无碍解脱，善除忆想取相戏论，近一切智悉是补处。其名曰：电天菩萨、胜诤菩萨、日藏菩萨、勇健菩萨、离恶意菩萨、游行菩萨、观眼菩萨、离闇菩萨。如是无量菩萨大士，德皆如是。

尔时，世尊入诸菩萨所行无碍诸法门经，所谓庄严诸菩萨道甚深佛法，十力无畏智慧成就，获得自在总持印门，分别诸辩大神通门，转不退转无生法轮，通达诸法同于一相，于一相法不生分别，知诸众生根性无碍，善能观察诸法实相，破坏一切诸魔境界，入于通达善思惟门，能除一切烦恼诸见，无碍智慧善权方便，一切佛法平等无二，受持诸佛智慧之门，演说诸法如真实相，忆想取相入平等门，成就功德入深因缘，庄严佛身身口意业，念意进持显示四谛，分别妙慧化声闻故，身心寂静化缘觉故，得一切智化大乘故，入一切法得自在智，赞叹如来诸功德故，如是等门宣说开示教导分别。

时佛说是大集经时，于此东方自然出现大金色光，照此三千大千世界靡不周遍。除佛光明，其中所有日、月、

释、梵、护世天王，诸龙、鬼、神、乾闥婆、阿修罗、迦楼罗、紧那罗、摩睺罗伽，所有光明悉不复现。诸墙壁等树木丛林，小山、大山、目真邻陀山、铁围山、大铁围山，及国土中间其光彻照。若此世界所有地狱皆蒙其光，其中众生光触身时，除一切苦受微妙乐。尔时佛前大众之中，其地自然出六十亿净妙莲华，好香流布种种庄严，诸华杂色悦可众心。其华各有亿百千叶，以宝罗网弥覆其上。华质柔软犹如天衣，其有触者受妙快乐。是一一华所出诸香，遍满三千大千世界。是世界中若天若人，所有诸香悉灭不熏。诸龙八部闻其香者，皆得妙喜渐离烦恼。

尔时，尊者阿难见是金色光明及诸莲华，白佛言：“世尊，今此瑞应谁之所为，有是光明及诸莲华？”

佛告阿难：“有菩萨摩訶萨名无尽意，在此东方，与六十亿诸菩萨俱眷属围绕，欲来至此故先现瑞。”

未久之间，时无尽意即以神力，感动此地令大震动，放无量光雨种种华，亿那由他诸天人等作百千伎乐，与六十亿诸菩萨众周匝围绕来至佛所。至佛所已，寻于佛前住虚空中高七多罗树，合掌向佛出微妙音。其声遍闻大千世界，即以偈颂而赞叹佛：

“清净永离垢，勇健除诸欲，
能灭众尘劳，而得净妙眼。
三垢荒秽等，善断吐洗灭，
一切皆无余，稽首大慈觉。
除去诸怖畏，善灭无明网，
十力圣主王，邪论不能伏。
外道异见人，皆悉怀怖畏，
犹如师子王，独步无所惧。
正觉净光明，无垢普照耀，
天人世间中，能离一切闇。
除尽众闇冥，无有无明网，
其光常明净，如日出云雾。
众生老死苦，无有救护者，
为调是等故，而受无量苦。
能生坚慈悲，唯有等正觉，
犹如大医王，勤行疗众疾。
一切诸法本，其性无有我，

譬如山谷响，皆从众缘生。
众生本无性，无作无受者，
而能为此故，生于大慈悲。
诸有之渊海，无明闇甚深，
其中多觉观，勇溢而波浪。
不从他闻法，自然到彼岸，
如莲华在水，行世不染污。
秋月草木零，盛热河池竭，
比智知世法，迁动不常住。
愚人所亲近，圣智所呵弃，
解法不牢固，独拔渡有流。
其面目开明，譬如优钵罗，
微妙甚清净，过百千日月。
所有过去世，及现在众生，
一切所赞叹，如来悉堪受。
调不调伏故，除热得清凉，
是故我今日，稽首无上尊。
度世增上福，功德无有极，
如人中牛王，顶礼佛福田。”

尔时，无尽意菩萨以如实赞赞叹佛已从空中下，及六十亿诸菩萨众顶礼佛足，礼佛足已右绕三匝，于华台上结跏趺坐。

尔时，舍利弗白佛言：“世尊，是无尽意菩萨摩訶萨，从何处来？佛号何等？世界何名？去此远近？”

佛告舍利弗：“汝可自问，无尽意当为汝说。”

时，舍利弗敬顺佛教，问无尽意：“唯善男子，从何处来？佛号何等？世界何名？去此远近？”

无尽意言：“唯舍利弗，有来想耶？”

舍利弗言：“唯善男子，我知想已。”

无尽意言：“若知想者应无二相，何缘问言从何处来？唯舍利弗，有来去者为和合义。如和合想，是无合无不合，无合无不合即不去不来，不去不来者是圣行处。唯舍利弗，有来去者即是业相。如业相无作无非作，无作无非作即不去不来，不去不来者是圣行处。唯舍利弗，有来去者是国土相。如国土相，无国土无非国土，无国土无非国土即不去不来，不去不来者是圣行处。唯舍利弗，有来去者即是缘想。如缘想，无缘无非缘，无缘无非缘即不去不来，不去不来者是圣行处。唯舍利弗，有去来者即因等生相。如因相，无因无非因，无因无非因即不去不来，不去不来者是圣行处。唯舍利弗，有去来者即是文字语言。如文字相，无文字无非文字，无文字无非文字即不去不来，不去不来者是圣行处。”

舍利弗言：“唯善男子，汝今所说微妙事相，吾从昔来所未曾闻，向之所疑当还启请。如主关人，若见空行、若见担者，即应诘问：‘汝所赍持悉是何物？’若知种稷应收其税。唯善男子，我等如是从他闻法，随音声解以自照心，是故我今应当咨禀。汝等大士，为护大乘出生无量声闻、缘觉。唯善男子，愿为分别说其来处。”

无尽意言：“唯舍利弗，汝今自可咨请如来，如来当说断汝疑网。”

时，舍利弗即白佛言：“唯愿世尊，说是菩萨从何处来？佛号何等？世界何名？去是远近？若闻彼佛及世界名，则令无量无边菩萨庄严菩提。”

佛告舍利弗：“谛听！谛听！善思念之，吾今当说彼土功德及佛名号。汝闻是时勿怀疑惧，应当一心信受奉持。”

时，舍利弗闻是语已，赞言：“善哉！善哉！世尊，愿时宣说，我当一心顶戴受持。”

佛告舍利弗：“东方去此度十恒河沙国土微尘等世界，彼有世界名曰不眴，是有佛，号曰普贤如来、应、正遍知、明行足、善逝、世间解、无上士、调御丈夫、天人师、佛世尊今现在。舍利弗，其土无有声闻、缘觉，乃至不闻二乘之声。一切圣众纯是菩萨，已于过去久修德本，善业成备布施调伏，自守防护戒忍多闻，心不放逸安住功德，威仪成就忍力无碍，于无上道坚固精进。所修善根一切成就，诸禅解脱三摩婆提，游戏神通大智照明，善分别知一切诸法。所怀慈心等如虚空，大悲坚固拯济众生，常行喜心令彼同欢。所有舍心善灭憎爱，魔网诤讼悉使无余，善解众生诸根所趣，随其根量授与法财。其心平等如地水火风，能坏一切外道异论，摧伏敌阵建立胜幡，入深佛法十力无畏，于诸大众心无所惧。常观甚深十二因缘，离有无见行于中道，我及我所、众生、寿命、养育、士夫、作者、受者、断常、有无一一切诸见结缚因缘皆灭不起。总持王印而以印之，所有辞辩分别敷演，那由他劫说不可尽。得大神力感动无量无边佛土，于诸佛土善能往来，断除嗔怖憍慢放逸。其所演说如师子吼，一切众生怨亲中人，悉皆安止究竟涅槃。法云垂布以兴雷震，三明解脱以为电光，无上法雨以为甘露，能注法财三宝不断。内外清净譬如宝珠，相好殊胜最上无比，以诸善根瓔珞其身。佛法灌顶得补处位，善能分别诸众生行，随而调伏令得解脱。能净道场坐师子座，于诸法中得无所畏。能自变形犹如佛身，一切佛事悉能示现，心得自在转于法轮。舍利弗，彼土纯有如是菩萨摩訶萨等以为眷属。”

尔时，大会闻佛称赞彼菩萨众功德智慧踊跃欢喜，以天优钵罗华、拘物头华、波头摩华、分陀利华、曼陀罗华，散无尽意及诸菩萨，异口同音作如是言：“我等今日快得善利，得见如是诸正士等，礼拜供养恭敬围绕！若有众生闻其名者，亦得如是无量善利。若闻赞叹称其功德，悉皆当发无上道心。”说是语时，大会中有三百六十万

众生发阿耨多罗三藐三菩提心。

佛告舍利弗：“彼佛世界无三恶道及其名字，亦无邪行越戒之名，又无女人、悭贪、嫉妒、破戒、嗔恚、懈怠、乱心、愚痴之名，及以障碍荫盖集名。众生根等无上中下，纯是一乘无大小名。佛土无有净秽之名，亦无三宝差别之称，不闻饥渴饮食之声，及我我所遮护之名，无诸魔网妄见集名。彼佛世界平坦广大，一日月照周匝六十亿百千那由他由延，是希有事是彼菩萨本愿所致。其土平正犹如手掌，琉璃众宝杂厕共成。其地柔软犹如天衣，若有触者受微妙乐。宝树庄严行伍相当，宝绳连绵以界八道，所有诸华常自开敷。亦无石沙荆棘秽恶，所有诸山纯以众宝而校饰之。人天无别，法喜禅味以为饮食。其土无有王者之名，唯除普贤如来法王。彼佛世尊及诸菩萨，不以文字而有所说。彼诸菩萨唯修观佛，谛视无厌，目不曾眴，即便能得念佛三昧悟无生忍，是故彼土名曰不眴。

“云何念佛？谓不观色相、出生种性、过去净业，是时心中不生自高；不观现在阴界诸入、见闻觉知、心意识等，无有戏论生住灭相，不取不舍不念不思，不观思想及非思想，不分别想、法想、己想无一异想，境界功德内外中间不起觉观始终之念，不观形貌威仪法式，不观戒、定、智慧、解脱、解脱知见、十力无畏、不共之法。正念佛者，不可思议，不造行，不作想，无等等离思惟，无所念，无思处，无阴入界生住灭想，无有处所非无处所，非动非住，非色非识非想非受非行，于识不生识知，于地水火风不生识知，眼色、耳声、鼻香、舌味、身触、心法亦复如是。如是不缘一切境界，不生诸相、我及我所，不起见闻觉知之想，究竟能到一切解脱，心心数法灭不相续，净诸忆想、非忆想等，善除爱恚灭因缘相，此彼中间悉断无余。是法清净无文字故，法无欢喜不动转故，法无有苦不味著故，法无焦热本寂灭故，法无解脱性舍离故，法无有身离色相故，法无受相无有我故，法无结缚寂无相故，法相无为无所作故，法无言教无识知故，法无始终无取舍故，法无安止无处所故，法无有作离受者故，法无有灭本无生故。心数思惟所缘住法，不取其相不生分别，不受不著，不然不灭，不生不出。法性平等犹如虚空，过于眼色、耳声、鼻香、舌味、身触、心法。是名菩萨念佛三昧。菩萨得是念佛三昧，一切法中得自在智陀罗尼门，闻佛所说悉能受持终不忘失，亦得晓了一切众生言辞音声无碍辩才。

“舍利弗，彼普贤如来，不如此土以二因缘演说正见，所谓从他闻声、内正忆念。彼诸菩萨当见佛时，寻能分别诸深妙义，具足成就六波罗蜜。何以故？若不取色相即是具足檀波罗蜜，若除色相即是具足尸波罗蜜，若观色尽即是具足羼提波罗蜜，若见色寂灭即是具足毗梨耶波罗蜜，若不行色相即是具足禅波罗蜜，若不戏论色相即是具足般若波罗蜜。是诸菩萨即观佛时，寻具如是六波罗蜜得无生忍。舍利弗，诸佛世界严净微妙，少有如彼普贤如来不眴世界。”

时，舍利弗语无尽意：“唯善男子，快哉仁者！汝等大士，得在彼土见普贤佛获无量利。”

时，无尽意语舍利弗：“大德今者，颇欲得见不徇世界普贤世尊及大众不？”

舍利弗言：“唯然欲见，令此大众增长善根。”

时，无尽意即入菩萨示现一切佛土三昧。入三昧已，令此大众及舍利弗，寻见彼土普贤如来及其大会，见是事已即从座起，合掌遥礼彼佛大众。此会大众以佛世尊及无尽意神通力，得微妙华世所希有，其华色香未曾见闻，自然满掬遥散东方，以用供养普贤如来。华寻遍至彼佛世界普贤如来及其大众，彼诸菩萨见是华已，白佛言：“世尊，是华严丽世所希有，为从何处而来至此？”

彼佛答言：“是无尽意在娑婆世界，是中亦有十方世界诸来菩萨而共聚集能仁佛所，供养恭敬尊重赞叹，听佛世尊说大集经，是其大众所散之华。”

彼诸菩萨复白佛言：“其佛世界在何方面？去是远近？”

彼佛答言：“诸善男子，在此西方，去是佛土十恒河沙世界微尘等国，彼有世界名曰娑婆。”

诸菩萨言：“愿乐欲见释迦文佛及其大众。”

尔时，普贤如来寻放大光，其明彻照此佛世界。彼诸大众因佛光明，悉得遥见娑婆世界释迦文佛及诸大众，见已欢喜合掌恭敬作如是言：“希有世尊！其土菩萨一切大众，从何所来而作此集，遍满其界间无空处？”

彼佛答言：“诸善男子，其诸大众悉从十方无量世界而来集会，咨启听受甚深妙法。”

时，舍利弗问无尽意：“谁字仁者为无尽意？”

无尽意言：“唯舍利弗，一切诸法因缘故报名无尽意。所以者何？一切诸法不可尽故。”

舍利弗言：“唯善男子，愿仁当说无尽法门。”

无尽意言：“唯舍利弗，初发无上菩提心时已不可尽。所以者何？发菩提心不离烦恼故，发心相续不希余乘故，发心坚固不参外论故，发心不坏魔不沮故，发心恒顺善根增长故，发心至常有为法无常故，发心不动一切诸佛安慰护助故，发心胜妙离衰损故，发心安止不戏论故，发心无喻无相似故，发心金刚坏诸法故，发心无尽无量功德悉成就故，发心平等利众生故，发心普覆无别异故，发心鲜明性常净故，发心无垢智慧明了故，发心善解不离毕竟故，发心广快慈如虚空故，发心广大悉能容受诸众生故，发心无碍智慧通达故，发心遍至大悲不断故，发心不断善解立愿故，发心为归诸佛所赞故，发心殊胜二乘宗仰故，发心深远一切众生所不知故，发心不败不破佛法故，发心安隐善与众生诸快乐故，发心庄严一切功德悉成就故，发心善察智慧成就故，发心增长随意施与故，发心如愿戒清净故，发菩提心普及怨

亲具忍辱故，发心难坏具精进故，发心寂灭具禅定故，发心无毁具智慧故，发心无愿增长大慈故，发菩提心住根坚牢增长大悲故，发心和悦增长大喜故，发心不动增长大舍故，发心任重诸佛所受故，发心不绝三宝不断故。唯舍利弗，菩萨如是为一切智发菩提心，岂可尽耶？”

舍利弗言：“唯善男子，譬如虚空不可穷尽，为一切智发菩提心，不可得尽亦复如是。”

无尽意言：“唯舍利弗，佛戒无尽，因戒发心故不可尽。佛定无尽，因定发心故不可尽。佛慧无尽，因慧发心故不可尽。佛解脱无尽，因解脱发心故不可尽。佛解脱知见无尽，因解脱知见发心故不可尽。唯舍利弗，如来戒、定、智慧、解脱、解脱知见其性无尽，因是五众发菩提心，岂可尽耶？如来十力、四无所畏、十八不共法无尽，因如是等故发菩提心是故无尽。唯舍利弗，举要言之，一切如来悉皆无尽，因是发心故不可尽。三宝不断故无有尽，众生性无尽故无尽，如实智无尽故无尽，随诸众生无量心行智无尽故无尽，回向无上无尽故无尽，教化众生无尽故无尽，无尽智无生故无尽，离性无生故无尽，知一切法本性无尽故无尽。唯舍利弗，是名菩萨发菩提心不可尽也。

“复次，舍利弗，是菩萨心清净无尽。心清净者不作谄故，不作谄者无奸诈故，无奸诈者善分别故，善分别者无邪命故，无邪命者心清白故，心清白者常正一故，常正一者性殊胜故，性殊胜者无轻毁故，无轻毁者灭诸曲故，灭诸曲者心质直故，心质直者入平正故，入平正者心坚实故，心坚实者不可坏故，不可坏者性牢固故，性牢固者不可动故，不可动者无所依故，无所依者除我心故，除我心者无伴等故，无伴等者息皆蔑故，息皆蔑者作善业故，作善业者无呵责故，无呵责者消过失故，消过失者不热恼故，不热恼者性真实故，性真实者无虚诳故，无虚诳者如说行故，如说行者能善作故，能善作者无瑕疵故，无瑕疵者不错谬故，不错谬者无所滞故，无所滞者不退转故，不退转者观众生故，观众生者大悲根深故，大悲根深者善化众生不疲倦故，善化众生不疲倦者不求己乐故，不求己乐者不贪利养故，不贪利养者不染爱故，不染爱者缘诸法故，缘诸法者观羸劣故，观羸劣者见众生故，见众生者常拥护故，常拥护者为归依故，为归依者无垢累故，无垢累者善观察故，善观察者无讥论故，无讥论者心纯善故，心纯善者不动摇故，不动摇者善清净故，善清净者常精进故，常精进者内清净故，内清净者常鲜明故，常鲜明者无垢染故。唯舍利弗，其净心者能断慳惜，亦化他人令断慳惜。其净心者能断破戒，亦化他人令断破戒。其净心者能断嗔恚，亦化他人令断嗔恚。其净心者能断懈怠，亦化他人令断懈怠。其净心者能断乱心，亦化他人令断乱心。其净心者能断愚痴，亦化他人令断愚痴。舍利弗，净心如是能断一切诸不善法，安诸众生于善法中，是故名曰菩萨净心不可得尽。

“复次，舍利弗，菩萨摩訶萨心行清淨亦不可尽。何以故？菩萨行施时，一切皆见舍诸所有。菩萨行戒亦不可尽，一切皆见持诸禁戒头陀正行威仪无犯。菩萨行忍亦不可尽，一切皆见于诸众生心无患碍。菩萨行进亦不可尽，一切皆见于诸善法精勤修集。菩萨行禅亦不可尽，一切皆见于诸禅定无有错乱。菩萨行慧亦不可尽，一切皆见修习多闻。是名菩萨行施、行戒、行忍、行进、行禅、行慧。菩萨修行慈悲喜舍亦不可尽，一切皆见利益拔苦欢喜踊跃善断爱恚，是名菩萨慈悲喜舍。菩萨所行三业清淨，离身三恶及口四过，心离三恶，所谓贪欲、嗔恚、邪见。菩萨修学多闻无尽不吝惜故，菩萨修行无吝惜者集一切智故，菩萨修集一切智者劝余菩萨发道心故，劝余菩萨发道心者修行安止于善根故，修行安止于善根者愿向无上菩提道故，愿于无上菩提道者摄取一切诸佛法故，摄取一切诸佛法者四事摄取故，菩萨修行四事摄者忏悔诸罪故，菩萨修行悔过法者发露诸恶故，菩萨修行发露诸恶者回向一切诸功德故，菩萨回向诸功德者积聚无量诸珍宝故，积聚无量诸珍宝者劝请诸佛故，劝请诸佛者摄取诸法故，摄取诸法者行大士法故，行大士法者能为众生作重任故，为诸众生作重任者不舍坚牢诸庄严故，不舍坚牢诸庄严者成就众生一切善事故。

“复次，舍利弗，菩萨摩訶萨有四行无尽。何等为四？菩萨心行无尽，法施无尽，教化无尽，善根无尽，是为菩萨四行无尽。菩萨复有四行无尽。何等为四？乐在空闲摄持威仪无有厌足，常乐聚集无量功德而无厌足，多求学问广知诸义而无厌足，常愿无上菩提智慧而无厌足，是名菩萨四行无尽。菩萨复有四行无尽。何等为四？觉校计无尽，觉称量无尽，觉思惟无尽，觉观法无尽，是为菩萨四行无尽。菩萨复有四行无尽。何等为四？觉垢因无尽，觉白法无尽，呵诸烦恼无尽，赞叹白法无尽，是名菩萨四行无尽。菩萨复有四行无尽。何等为四？观诸阴尽无尽，观诸界尽无尽，观诸入尽无尽，观因缘尽无尽，是名菩萨四行无尽。菩萨复有四行无尽。何等为四？说无常行无尽，说苦行无尽，说无我行无尽，说寂灭涅槃无尽，是名菩萨四行无尽。举要言之，菩萨所行一切无尽，向一切智，尊一切智，仰一切智，一切智无尽。以是因缘，菩萨所行悉皆无尽，是名菩萨心行无尽。

“复次，舍利弗，是菩萨心毕竟无尽。何以故？其所思惟乃至一念常缘菩提心不疲倦，专趣诸地过生死故，毕竟增长到彼岸故，毕竟本行转胜增上故，毕竟离负摄胜法故，毕竟无等具足一切诸佛法故，毕竟所缘增长善法故，毕竟能到过心行处故，毕竟庄严无疲厌故，毕竟修行吉祥菩提种种苦行悉成就故，毕竟不望不求己乐故，毕竟随顺无诸恶故，毕竟调伏住圣法故，毕竟不杂离烦恼故，毕竟难施不吝头目故，毕竟难戒拥护犯禁故，毕竟难忍忍无力势诸过恶故，毕竟难进专修苦行舍二乘故，毕竟难定心不味著诸禅定故，毕竟难慧不著一切诸善根故，发行能到一切善事悉成就故，毕竟远离憍慢、增上慢、胜慢、我慢、下慢、憍慢、邪慢善分别故，毕竟能舍施诸众生不求报

故，毕竟不惊观深佛法故，毕竟增进不停滞故，毕竟无尽常精进故，毕竟不诳必为众生作重担故。又毕竟者，调柔众生，慈覆利益诸贤善人，悲心救拔诸行恶者，恭敬尊长，护无护者，归无归者，照无照者，依无依者，伴无伴者，直诸曲者，善不善者，无奸奸者，净邪命者，恩于恩者及无恩者、不知恩者，利不利者，实虚谤者，不憍憍者，不毁作者，软语教呵诸作恶者、护邪行者，见行方便不以为过，于诸受者等心恭敬，于余菩萨常行诱导，以柔软语而演教诲，乐在空处修行善法，离诸利养不惜身命。无有邪念心寂灭故，言无邪谄摄口过故，不以邪业而求利益，其心少欲常知足故，心调柔和无垢秽故，回在生死具善根故，能忍诸苦为众生故。是为大士一切毕竟而不可尽，是菩萨心生死烦恼永不能坏。何以故？是心增长诸功德故，含受一切诸众生故，成就无尽妙智慧故。大德，是名菩萨摩訶萨毕竟无尽。”

尔时，舍利弗语无尽意菩萨摩訶萨言：“唯善男子，颇复更有无尽法不？”

无尽意言：“有！菩萨修行檀波罗蜜不可穷尽。何以故？菩萨摩訶萨行施无量，所谓须食与食，具足命辩色力乐故；须饮与饮，离渴爱故；须衣与衣，具清净色除无惭愧故；须乘与乘，得一切乐具神通故；须灯与灯，具足佛眼清净故；须音乐者施与音乐，具足天耳清彻故；须香与香，身出具足微妙香故；须鬘与鬘，具陀罗尼七觉华故；须涂香、末香悉施与之，具戒定慧熏涂身故；须种种味随意与之，味相成就故；无依止者施与依止，能为众生具足救护为归依故；须敷具者悉施与之，具足究竟断除阴盖，成就梵天贤圣诸佛妙床座故；须座与座，具足三千大千世界以为道场，金刚座处悉成就故；随其所需悉能与之，成就菩提诸所须故；随病施药得无老死，甘露法药悉成就故；须仆使者皆给与之，自在智慧得具足故；若以金、银、琉璃、玻瓈、真珠、珂贝、璧玉、珊瑚种种诸珍用惠施者，具足大人三十二相故；能以种种瓔珞施者，具足八十随形好故；若以象马车乘施者，具足大乘故；若持园林以布施者，具诸禅支故；若持妻子以布施者，具足无上道法爱故；若以仓库谷财施者，具足诸善法宝藏故；以阎浮提若四天下随意施者，具足法王得自在故；以诸乐具持用施者，具足无量法乐乐故；若持脚足以布施者，法足具成进至道场故；若以手施，具足法手安抚众生令得乐故；若以耳鼻用施与者，具足诸根悉通利故；若以眼目持用施者，为欲具足无碍法眼故；若以头施，于三界中具足殊胜一切智慧故；若以血肉持用施者，诸不坚牢具坚牢故；若以髓脑持用施者，具金刚身得不坏故。菩萨不以邪命求财而行布施，不逼众生强求他物转以施人，无恐怖施，无羞耻施，无悭惜施，如其所许无损减施，无不爱施，毕竟常施，无不毕竟施，无谀谄施，无奸诈施，不疑业报施，无邪命施，无愚痴施，无不信施，无不解施，无疲倦施，无依著施，无选择施，无异相施，不求受者施，无有众生不堪

受者持戒犯戒无增减施，于受者所不望报施，不求名施，不毁誉施，无慢非慢施，无热恼施，不悔心施，不自赞施，无杂秽施，不望业报施，无定处施，无有嗔怒垢爱等施，有来乞者不恼害施，无轻易施，不[卑+真]面施，不撩掷施，无不故施，无手不与施，无不常施，无断绝施，无嫉慢施，无齐限施，如其所许不贸易施，无有堪任不堪任施，无非福田施，不轻小施，不赞多施，无衰耗施，不求后生施，不求自在得财宝施，不求释、梵、护世天王、转轮圣王诸果报施，不愿声闻、缘觉乘施，不求王子得自在施，不为一世故施，无厌足施，无不回向一切智施，无不净施，无不时施，无刀毒施，无恼众生施。菩萨行施，不为智者之所轻笑。何以故？观空寂行施，是故无尽；无作所熏施，是故无尽；出三有相施，是故无尽；不取处施，是故无尽；为解脱果，是施无尽；为伏众魔，是施无尽；为断结爱，是施无尽；为增上施，是故无尽；善分别施，是故无尽；助菩提施，是故无尽；正回向施，是故无尽；庄严道场解脱果施，是故无尽；是施无边；是故无尽；是施无坏，是故无尽；是施不断，是故无尽；是施广大，是故无尽；是施无住，是故无尽；是施无伏，是故无尽；无等等施，是故无尽；是施进趣一切种智，是故无尽。唯舍利弗，是名菩萨修行布施而不可尽。”

尔时，舍利弗语无尽意言：“善哉！善哉！唯善男子，仁已快说菩萨摩訶萨修行檀波罗蜜而不可尽，唯愿仁者当说菩萨尸波罗蜜如诸菩萨所得无尽尸波罗蜜！”

无尽意言：“唯舍利弗，菩萨戒众六十七事清净修治亦不可尽。何等六十七？于诸众生不起恼害，于他财物不生窃盗，于他妇女中不生邪视，于诸众生无有欺诳，初不两舌于自眷属知止足故，无有恶口忍粗穢故，无有绮语常善说故，于他乐事不贪嫉故，初无嗔恚忍恶言故，正见不邪贱余道故，深信于佛心不浊故，信顺于法善观法故，信敬于僧尊重圣众故，五体投地志念佛故，五体投地思惟法故，五体投地宗敬僧故，坚持禁戒一切无犯乃至小禁不放舍故，持不缺戒不依余乘故，持不穿戒离恶处生故，持不荒戒不杂诸结故，持不污戒专长白法故，持甚深戒随意回向得自在故，持赞叹戒智者不呵故，持纯善戒正念知故，持不呵戒一切戒不散故，持善坚戒防护诸根故，持名闻戒诸佛所念故，持知足戒无不厌故，受少欲戒断贪惜故，持性净戒身心寂灭故，持阿兰若戒离愤闹故，持圣种戒不求他意故，持威仪戒一切善根得自在故，持如说戒人天欢喜故，持慈心戒护众生故，持悲心戒能忍诸苦故，持喜心戒心不懈怠故，持舍心戒离爱恚故，持自省戒心善分别故，持不求短缺戒护他心故，持善摄戒善守护故，持惠施戒教化众生故，持忍辱戒心无恚碍故，持精进戒不退还故，持禅定戒长诸禅支故，持智慧戒多闻善根无厌足故，持多闻戒博学坚牢故，持亲近善知识戒助成菩提故，持远离恶知识戒远离恶道故，持不惜身戒观无常想故，持不惜命戒勤行善根故，持不悔戒心清净故，持不邪命戒心

行清净故，持不焦戒毕竟清净故，持不烧戒修善行业故，持无慢戒心下不憍故，持不掉戒远离诸欲故，持不高戒心平直故，持柔和戒心无抵突故，持调伏戒无恼害故，持寂灭戒心无垢秽故，持顺语戒如说行故，持化众生戒不离摄法故，持护正法戒不违如实故，持如愿成就戒于诸众生心平等故，持亲近佛戒愿求如来无上戒故，持入佛三昧戒具足一切诸佛法故。舍利弗，是名菩萨六十七事净治戒众而不可尽。

“又舍利弗，菩萨无尽清净戒中无有倚著，所谓破我、人、众生、寿命、养育、士夫、色受想行识、地水火风。是净戒中无眼色相、耳声、鼻香、舌味、身触、意法等相，亦无身心。是戒定相，一向不共故。是戒分别相，方便缘一切法故。是戒空相，得无相际不杂三界故。是戒不作，无生忍故。是净戒中无有已作、今作、当作，是清净戒过去不灭、未来不来、现在不住。又舍利弗，是净戒中，心净无垢，识不止住，思不亲近。是清净戒，不依欲界，不近色界，不住无色界。是清净戒，舍离欲尘，除嗔恚碍，灭无明障。是清净戒，不断不常不逆因缘。是清净戒，无有我相，舍我所相，不住身见。是清净戒，不取假名，不住色相，不杂名色。是清净戒，不系于因，不起诸见，不住疑悔。是清净戒，不住贪嗔痴，不著善根。是清净戒，不恼不热寂灭离相。是清净戒，不断佛种求正法故，不断法种不分别法性故，不断僧种修无为故。

“舍利弗，持净戒者相续不断故不尽。所以者何？凡夫戒者在所受生是故有尽，人中十善尽故有尽，欲界诸天福报功德尽故有尽，色界诸天禅无量心尽故有尽，无色界天所入诸定尽故有尽，外道仙人所有诸戒退失神通尽故有尽，一切声闻学无学戒入涅槃际尽故有尽，辟支佛戒无大悲心尽故有尽。舍利弗，菩萨净戒皆无有尽。何以故？于是戒中出一切戒。如种无尽，果亦无尽；是菩提种不可尽故，如来戒禁亦无有尽，以是故诸大士等所持诸戒皆不可尽。舍利弗，是名菩萨修持净戒而不可尽。”

尔时，舍利弗语无尽意言：“善哉！善哉！善男子，仁已快说菩萨尸波罗蜜而不可尽。唯愿仁者当说菩萨羼提波罗蜜，如诸菩萨所得无尽羼提波罗蜜。”

无尽意言：“唯舍利弗，菩萨具三十二事，修行忍辱亦不可尽。何等三十二？断诸结故当知是忍，不生害故当知是忍，无有缠故当知是忍，无有恼故当知是忍，无覆蔽故当知是忍，无有嗔故当知是忍，无忿诤故当知是忍，无斗讼故当知是忍，于诸尘界心不异故当知是忍，护自他故当知是忍，顺菩提心故当知是忍，善思惟故当知是忍，无二想故当知是忍，识业报故当知是忍，庄严身故当知是忍，口演净言故当知是忍，心清净故当知是忍，心坚牢故当知是忍，言语自在故当知是忍，不忆想故当知是忍，善分别心故当知是忍，护他心故当知是忍，修梵世行故当知是忍，受人天报故当知是忍，身相胜故当知是忍，具妙梵音故当知是忍，除诸过患故当知是忍，断诸荒秽故当知是忍，

忍，断一切不善根故当知是忍，杀诸结贼故当知是忍，于恼害众生得超越故当知是忍，具足一切佛法故当知是忍。舍利弗，是名菩萨三十二事修行忍辱而不可尽。

“舍利弗，云何为忍？若见骂者默受不报，善知音声如响相故；见有呵责默而受之，善知身相如影像相故；见有嗔者心不怀恨，善知心法如幻相故；忿不报忿，心清净故；闻有称名心不生爱，不自高故；闻不称名心不生碍，功德具足故；若遇荣利不生喜悦，善自调故；若遇衰耗不生挂碍，心寂灭故；见有称者心不惊动，善知分别故；见有毁者心不缩没，其心广大故；见有讥者其心不下，善安住故；见有誉者其心不高，不倾动故；若遇乐事心不欢逸，观有为法无常相故；若遇苦事心不疲恼，为众生故；世法不染，不依止故；忍受诸苦，见危逼者以身代故；忍节节支解，具足觉支故；众苦加身悉能堪受，具佛身相故；忍他过患，善作业力故；示现烧热修诸苦行，伏外道故；现入诸道，出过释梵护世诸天故。是名菩萨之忍辱也。

“又毕竟忍者无有诤讼。何以故？若见他骂我能忍者，如是忍者是观二相非毕竟忍。若言谁骂我者，如是忍辱是法功德非毕竟忍。若骂眼耶，如是忍者是观入相非毕竟忍。耳鼻舌身若骂意耶，如是忍者是观诸入非毕竟忍。若无骂者，如是忍辱是观无我非毕竟忍。若知假名，如是忍者是观响相非毕竟忍。彼之与我二俱无常，如是忍者是观无常非毕竟忍。彼是颠倒、我无颠倒，如是忍者是观高下非毕竟忍。彼不勤行、我是勤行，如是忍者是观勤懈非毕竟忍。彼住恶道、我住善道，如是忍者是观善恶非毕竟忍。我忍无常、不忍有常，我能忍苦、不受诸乐，我忍无我、不忍有我，我忍不净、不忍于净，如是忍者是观有对非毕竟忍。我忍于空、不忍诸见，我忍无相、不忍诸觉，我忍无愿、不忍于愿，我忍无作、不忍于作，我忍结尽、不忍结在，我忍于善、不忍不善，我忍出世、不忍在世，我忍无诤、不忍于诤，我忍无漏、不忍于漏，我忍白法、不忍黑法，我忍寂灭、不忍生死，如是忍者是观相对非毕竟忍。

“云何名为毕竟忍耶？若入空寂，不与诸见和合不倚著空，是诸见等亦复皆空，如是忍者是观无二相是毕竟忍。若入无相不与诸觉和合，不倚无相是觉皆空，如是忍者是观无二相是毕竟忍。若入无愿不与愿合，不倚无愿是愿皆空，如是忍者是观无二相是毕竟忍。若入无作不与作合，不倚无作是作皆空，如是忍者是观无二相是毕竟忍。若入尽结不与结合，不倚尽结诸结皆空，如是忍者是观无二相是毕竟忍。若入于善不与不善和合，不倚于善不善皆空，如是忍者是观无二相是毕竟忍。若入出世不与世合，不倚出世在世皆空，如是忍者是观无二相是毕竟忍。若入无诤不与诤合，不倚无诤是诤皆空，如是忍者是观无二相是毕竟忍。若入无漏不与漏合，不倚无漏诸漏皆空，如是忍者是观无二相是毕竟忍。若入白法不与黑合，不倚白法黑法皆空，如是忍者是观无二相是毕竟忍。若入寂灭不与生死和合，不倚寂灭生死皆空，如是忍者是

无二相是毕竟忍。若性不自生、不从他生、不和合生，亦无有出不可破坏，不可坏者是不可尽，如是忍者是毕竟忍。无作非作，无所倚著，无分别，无庄严，无修治，无发进，终不造生，若无生者是不可尽，如是忍者是生忍。无生忍者是不出忍，不出忍者是毕竟忍，如是菩萨修行是忍得受记忍。舍利弗，是名菩萨行忍无尽。”

说是忍时，一切大众赞无尽意言：“善男子，善哉！善哉！快说此忍。”言已即雨种种希有诸华、末香、涂香，无数杂衣、幢幡、宝盖，以用供养于无尽意。百千伎乐于上空中自然出声作如是言：“若有众生欲得如来甚深忍者，闻作是说不应惊怖。”时诸华香、杂衣、幡盖普遍充溢，满此三千大千世界。

尔时，佛告无尽意言：“善男子，汝所供养华香等物，可自求器除去摒挡。”

无尽意言：“唯然世尊，我今当以神通之力即身为器。”

时，无尽意即入菩萨色身三昧，入三昧已一切所有供养之具悉入脐中，身界如故不增不减。

尔时，众中有一菩萨名大庄严，问无尽意：“善男子，所入三昧名为何等，而仁入已诸供养具悉入身中，身界如故而不增减？”

无尽意言：“善男子，其三昧者名为一切色身三昧。”

大庄严言：“是三昧定，颇复更有余力势不？”

无尽意言：“是三昧力，能令身界悉受三千大千世界所有色相，身界如故亦无增减。”

尔时，众中或有人天作是思惟：“宁可得见是定力不？”

尔时，佛知一切大众人所念，告无尽意：“善男子，汝可示现是定神力？”

时，无尽意菩萨摩訶萨，于是三昧久已通达，是故能以一切大众十方诸来大菩萨等、佛及圣僧悉内身中。尔时，其身犹如大宝庄严世界，受诸菩萨摩訶萨等所有种种庄严之事。是时，大众悉自见形在无尽意菩萨身内。时，无尽意示现如是大神通已，是时大众各还如本。

时，大庄严菩萨摩訶萨问无尽意：“善男子，我从昔来未曾见闻如是三昧神通变化。”

无尽意言：“善男子，假使三千大千世界一切所有悉入我身犹无增减，况于此耶！”

说是无尽忍辱现大神变时，七十六那由他天及人发阿耨多罗三藐三菩提心，万二千菩萨摩訶萨得无生法忍。

“舍利弗，是名菩萨修行忍辱而不可尽。”

无尽意菩萨经卷第二

尔时，舍利弗语无尽意言：“善哉！善哉！唯善男子，汝已快说菩萨瞿提波罗蜜而不可尽。唯愿仁者当说菩萨毗梨耶波罗蜜，如诸菩

萨所得无尽毗梨耶波罗蜜。”

无尽意言：“唯舍利弗，菩萨具足八事，修行精进而不可尽。何等为八？发大庄严而无有尽，积集勇进而不可尽，修行诸善而不可尽，教化众生而不可尽，助道功德而不可尽，助无上智而不可尽，助无上慧而不可尽，集助佛法而不可尽。

“云何菩萨庄严无尽？于诸生死心不疲倦，不计劫数当成佛道，若干劫在而作庄严，若干劫在不作庄严，菩萨庄严所经劫数不可称计。如从今日至生死本为一日一夜，如是三十日为一个月，十二月为一岁，于是百千万岁，一发道心一见如来；如是发心所见诸佛如恒沙数，于尔所佛边方得知一众生心行，如是遍知一切众生心之所行犹不退没，是则名曰不懈庄严、无尽庄严。经于如是见佛发心，知他众生心所行时，常修具足檀波罗蜜、尸波罗蜜、羼提波罗蜜、毗梨耶波罗蜜、禅波罗蜜、般若波罗蜜，修集一切助菩提法，具修相好、十力无畏、不共之法，具修一切诸佛法故，是名不懈庄严、无尽庄严。若有菩萨闻作是说，不惊不怖不畏，当知是菩萨不懈精进。是名菩萨庄严无尽。

“云何菩萨勇进无尽？若三千大千世界满中盛火，为见佛故，要当从是火中而过，若为闻法教化众生安止众生于善法故，亦应如是从火中过，是名菩萨勇进无尽。何因缘故名曰勇进？常为他故，为静他故，为调伏他故，为灭尽他故，常不懈慢坚牢不退，心善安止于大悲中常勤精进，而为众生故名勇进。菩萨行时步步御心悉向菩提，常观众生为化度故，虽作是观不起烦恼。是名菩萨勇进无尽。

“云何菩萨修习无尽？如所发起一切善心常愿菩提，是名菩萨修集无尽。何以故？以诸善根回向阿耨多罗三藐三菩提初无尽故。舍利弗，譬如天雨一沛之水堕大海中，其沛虽微终无灭尽；菩萨善根愿向菩提，亦复如是无有灭尽。修集善根者，所谓正回向修集善根，为护众生修集善根，为随众生诸所须故修集善根，为欲成就一切智故修集善根。是名菩萨修集无尽。

“云何菩萨教化无尽？众生之性不可称计，菩萨于中不应称计。若言一日教化三千大千世界满中众生，如是计数乃至无量不可思议不可称劫教化众生者，虽作如是教化众生不可称计不可思议。于众生分犹未是教化百分、千分、百千分、百千万分乃至算数譬喻所知众生。何以故？是众生性无量无边不可称计不可思议。若菩萨闻作是说，不惊不怖不畏，当知是菩萨勤修精进。是名菩萨教化无尽。

“云何菩萨助道无尽？菩萨所修助道功德无量无边，菩萨于中不应限量。何以故？一切众生所有功德若去来现在，及声闻、缘觉所有功德，于佛世尊始是成就一毛孔功德；如是一一毛孔所有功德，乃至一切毛孔功德，聚集成就始成如来一随形好；如是一一随形好等，乃至一切随形好功德，聚集成就如是成就如来一相；如是一一相至三十相，聚集如是三十相百倍功德，始成如来眉间毫相；乃至修集倍是毫

相百千功德，始成如来无见顶相。是名菩萨助道功德无尽。

“云何菩萨助智无尽？菩萨所修助智无量无边，菩萨于中不应限数。若三千大千世界所有众生，如一信行所成就智；如是信行，比一法行所成就智，百分、千分、百千分、百千万分乃至算数譬喻所不能及。若三千大千世界众生悉为法行，比一八人所成就智，百分、千分、百千分、百千万分乃至算数譬喻所不能及。若三千大千世界所有众生悉为八人智，比一须陀洹所成就智，百分、千分、百千分、百千万分乃至算数譬喻所不能及。若三千大千世界所有众生悉为须陀洹智，比一斯陀含所成就智，百分、千分、百千分、百千万分乃至算数譬喻所不能及。若三千大千世界所有众生悉为斯陀含智，比一阿那含所成就智，百分、千分、百千分、百千万分乃至算数譬喻所不能及。若三千大千世界所有众生悉为阿那含智，比一阿罗汉所成就智，百分、千分、百千分、百千万分乃至算数譬喻所不能及。若三千大千世界所有众生悉为阿罗汉智，比一缘觉所成就智，百分、千分、百千分、百千万分乃至算数譬喻所不能及。若三千大千世界所有众生悉成缘觉智，比一百劫菩萨所成就智，百分、千分、百千分、百千万分乃至算数譬喻所不能及。若三千大千世界所有众生悉为百劫菩萨所成就智，比一得忍菩萨所成就智，百分、千分、百千分、百千万分乃至算数譬喻所不能及。若三千大千世界所有众生悉为得忍菩萨所成就智，比一不退菩萨所成就智，百分、千分、百千分、百千万分乃至算数譬喻所不能及。若三千大千世界所有众生悉得不退菩萨智，比一补处菩萨所成就智，百分、千分、百千分、百千万分乃至算数譬喻所不能及。若无量无边世界众生悉如补处所成就智，比一如来是处非处智，百分、千分、百千分、百千万分乃至算数譬喻所不能及，总说如来诸力、无畏、不共之法亦复如是。若菩萨闻作是说，不惊不怖不畏，当知是菩萨勤行精进。是名菩萨助智无尽。

“云何菩萨助慧无尽？一切众生所有心行不可穷尽，菩萨于中不应计数。若过去、未来、现在众生所有心行，若有人于一念中具如是等三世众生所有心行，如是念念皆亦如是具诸心行。如一人心中所具心行，一切无量无边众生皆亦如是。若过去、未来、现在众生所有贪淫、嗔恚、愚痴及诸烦恼，若有一人于一念中具如是等三世众生所有烦恼，如是念念当亦如是具诸烦恼无量无边。如一人心中所具诸结，一切无量无边众生皆亦如是。菩萨于中生慧光明，一念慧光无诸尘翳，悉照过去、未来、现在众生烦恼诸心所缘境界生住灭相无有遗余。是菩萨于诸众生三世相应诸烦恼等无不尽知。舍利弗，譬如虚空无所不覆，菩萨慧光亦复如是无所不照。若菩萨闻作是说，不惊不怖不畏，当知是菩萨勤行精进。是名菩萨助慧无尽。

“云何菩萨修集助佛法无尽？菩萨所行修助佛法无量无边，若菩萨于中不应限量。从初心至坐道场，于其中间，修行具足六波罗蜜，修行具足诸助道法，如是一切发心修行一切善根不可称计悉助佛

法，是名菩萨修助佛法而无有尽。是名菩萨八事修行精进无尽。

“复次，舍利弗，菩萨精进亦不可尽，若身善业、若口善业、若意善业常勤不住。何以故？菩萨所作精进，常与身口意相应。虽身口精进皆由于心，心为增上。云何菩萨心精进耶？所谓心始心终。云何心始？初发心故。云何心终？菩提心寂灭故。云何心始？于诸众生起大悲故。云何心终？无我人故。云何心始？摄众生故。云何心终？不取诸法故。云何心始？不厌生死故。云何心终？无三界故。云何心始？舍所有故。云何心终？无所轻故。云何心始？受持戒故。云何心终？不持戒故。云何心始？修行忍故。云何心终？无忿诤故。云何心始？发行诸善故。云何心终？独不杂故。云何心始？修集定故。云何心终？心清净故。云何心始？多闻无厌故。云何心终？善思惟故。云何心始？习问义故。云何心终？法无言说故。云何心始？求智慧故。云何心终？断戏论故。云何心始？修四梵行故。云何心终？舍真智故。云何心始？具五通故。云何心终？具漏尽故。云何心始？发念处故。云何心终？念无思惟故。云何心始？发正勤故。云何心终？脱善不善故。云何心始？发如意分故。云何心终？具报得故。云何心始？发诸根方便故。云何心终？观诸根法故。云何心始？集诸力故。云何心终？智不坏故。云何心始？发助菩提分故。云何心终？善知分别诸学方便故。云何心始？求助道法故。云何心终？无进趣故。云何心始？求寂灭故。云何心终？心永寂灭故。云何心始？发起慧故。云何心终？善知法故。云何心始？觉知因故。云何心终？善知因故。云何心始？从他闻故。云何心终？于诸法中无放逸故。云何心始？发严饰故。云何心终？知身性故。云何心始？庄严口故。云何心终？圣默然故。云何心始？行三脱故。云何心终？无所作故。云何心始？降四魔故。云何心终？舍结习故。云何心始？知方便故。云何心终？了于慧故。云何心始？善知发故。云何心终？善知度故。云何心始？知世俗故。云何心终？善知真谛故。是名菩萨心精进也。是心具足精进无尽故说始终。菩萨具足如是作相，而心未常住于作业。是菩萨于诸业相知而故作。云何菩萨知而故作？为诸善根故。为诸众生修大悲故不离有为，为一切佛真妙智故不随生死，是名菩萨摩訶萨毗梨耶波罗蜜而不可尽。”

说是法时，七十那由他诸天及人发阿耨多罗三藐三菩提心，三万二千菩萨摩訶萨得无生法忍。

尔时，舍利弗语无尽意言：“善哉！善哉！唯善男子，仁已快说菩萨毗梨耶波罗蜜而不可尽。唯愿仁者当说菩萨禅波罗蜜，如诸菩萨所得无尽禅波罗蜜。”

无尽意言：“若菩萨摩訶萨以十六事修行禅定而无有尽，不与声闻、辟支佛共。何等十六？菩萨修定无有吾我，具足如来诸禅定故。菩萨修定不味不著，不求己乐故；菩萨修定行于大悲，断诸众生烦恼结故；菩萨修定增益诸禅观，见欲界诸过患故；菩萨修定具诸通业，

为知众生诸心行故；菩萨修定其心柔软，于众生中得自在故；菩萨修定诸禅三昧善知入出，过于色界、无色界故；菩萨修定其心寂灭，胜于二乘诸禅三昧故；菩萨修定更无有发，毕竟已作故；菩萨修定无诸衰耗，善断除灭诸习气故；菩萨修定常入智慧，过诸世间到彼岸故；菩萨修定为知众生心，度脱一切诸众生故；菩萨修定不断三宝种，具足无尽诸禅定故，菩萨修定无有退失，其心常定无诸错谬故；菩萨修定而得自在，具足一切诸善法故；菩萨修定内善思惟，断入出息得胜智故。舍利弗，是名菩萨以十六事修行禅定而无有尽，不与声闻、辟支佛共。云何名为菩萨修定？具诸通智故。云何为通？云何为智？若见诸色相是名为通，若知一切色尽法性而不证尽是名为智。若闻音声是名为通，解了三世一切音声无言辞相是名为智。若知一切众生心行是名为通，若知心行悉皆灭尽不证于灭是名为智。若念过去是名为通，若知三世无有挂碍是名为智。若能遍至诸佛世界是名为通，若知佛界同虚空相是名为智。若求诸法无破坏相是名为通，若不见法是名为智。若不坏世间是名为通，若不杂行是名为智。若过梵释护世天王是名为通，过于二乘学无学智是名为智。是名菩萨修行禅定通智差别。

“唯舍利弗，菩萨若知一切众生烦恼乱心，是故修集诸禅定法助成住心。舍利弗，如是众生烦恼心乱，菩萨于中善修聚集助成禅定，令此禅定住平等心，是名菩萨修行禅定。若住众生平等智中，是名为定。心行平等，性相平等，毕竟平等，发行平等，是名为定。住于施、戒、忍辱、精进、禅定、智慧及诸法等，是名为定。如定等者则众生等，众生等者则诸法等，入如是等是名为定。如是等定则等于空，等于空者则众生等，众生等者则诸法等，入如是等是名为定。如空等者则无相等，无相等者则无愿等，无愿等者则无作等，无作等者则众生等，众生等者则诸法等，入如是等是名为定。自心等故他心亦等，是名为定。一切等者，所谓利衰如地水火风，得是等心心如虚空，无有高下常住不动，所行威仪常定不转，本性自尔不忤不高，自在无畏寂默无言，知义知法知时非时，随世所行不杂于世，舍世八法灭一切结，远离愤闹乐于独处。菩萨如是修行诸法，于诸禅定心安止住离世所作。是菩萨以方便慧入禅波罗蜜，入禅定时生大悲心为诸众生，是名方便；其心永寂，是名为慧。入时念佛，是名方便；不依止禅，是名为慧。入时摄取一切善法，是名方便；不分别法性，是名为慧。入时趣向庄严佛身，是名方便；于佛法身不生分别，是名为慧。入时念佛声如梵音，是名方便；于法性中无言说相，是名为慧。入时受持心如金刚，是名方便；思惟诸法本性不乱，是名为慧。入时不舍本所誓愿教化众生，是名方便；于一切法思惟无我，是名为慧。入时思惟一切善根，是名方便；思惟善根性无所住，是名为慧。入时遍观诸佛世界，是名方便；见诸佛界同于虚空，是名为慧。入时庄严菩提道场，是名方便；观所庄严同于寂灭，是名为慧。入时欲转无上法

轮，是名方便；思惟法轮无转不转，是名为慧。入时一向修助觉分，是名方便；为知众生诸热恼心，是故修集如来禅定，知一切法相应不相应、有相无相、一切相续，随顺菩萨决定思惟，是名为慧。是名菩萨入于禅定方便慧也。如是菩萨禅波罗蜜方便、智慧，二事俱行得佛法器，一切诸魔不能破坏。”

说是法时，三万二千菩萨得日灯三昧。

“何因缘故名日灯三昧？譬如日出，灯火月光星宿诸明悉不复现；菩萨大士得是定已，先所修智一切二乘学与无学，及余众生所得诸智，皆亦如是悉不复现，是名日灯三昧。菩萨住于禅波罗蜜，即于无量百千种种诸禅三昧而得自在，今于此中当说少分。其名曰：电灯三昧、净三昧、月光三昧、净庄严三昧、日光三昧、不可思议三昧、勇出三昧、照明三昧、无垢光明三昧、功德光明三昧、一切法中得自在三昧、吉道三昧、无忧三昧、坚称三昧、勇出如须弥山等三昧、法炬三昧、法健三昧、法尊三昧、自在知一切法三昧、住法聚三昧、总持法净三昧、随知他心行三昧、法幢瓔珞三昧、烧一切烦恼三昧、破四魔力三昧、十力声勇健三昧、无碍断碍三昧、手灯三昧、施得名闻三昧、持地三昧、住无我如须弥山三昧、胜诸明智三昧、智焰三昧、生慧三昧、修禅三昧、无量自在三昧、心调伏无我无我所成就三昧、水月三昧、日声三昧、无有高下如佛三昧、离相三昧、如善调象师子游戏三昧、念佛三昧、念法得智自在无碍三昧、无退不退三昧、不胸三昧、胜净光无我三昧、空三昧、无相三昧、无愿三昧、住心平等三昧、金刚三昧、增上三昧、无能胜三昧、旋三昧、净声三昧、善分别三昧、离烦恼三昧、广大如空三昧、入诸功德三昧、念意进觉三昧、勇慧三昧、辩无尽三昧、语无尽三昧、总持三昧、不忘三昧、善作三昧、观一切世三昧、善知所乐三昧、生踊跃三昧、勇慈心净三昧、大悲根本三昧、入喜三昧、舍离三缠三昧、法义三昧、法作三昧、智炬三昧、智海三昧、不波荡三昧、一切心喜三昧、调伏三昧、解脱智三昧、已自在三昧、法场金刚幢三昧、莲华三昧、莲华增上三昧、离世法三昧、不动三昧、慧增上三昧、诸佛所念首楞严三昧、无诤三昧、火三昧、火明三昧、解脱胜智三昧、庄严佛身三昧、遍照三昧、入众生心欢喜三昧、顺助道三昧、庄严诸波罗蜜三昧、宝鬘三昧、与诸觉华三昧、与解脱果三昧、甘露三昧、速疾如风三昧、实际三昧、遮海涛三昧、山相搏三昧、广大神足三昧、见无量诸佛三昧、闻持三昧、不乱三昧、一念智无量功德海净三昧，如是等不可计那由他诸三昧，入禅波罗蜜时悉得清静。舍利弗，是名菩萨修行禅定而不可尽。”

尔时，舍利弗语无尽意言：“善哉！善哉！善男子，仁已快说菩萨禅波罗蜜。唯愿仁者当说菩萨般若波罗蜜，如诸菩萨所得无尽般若波罗蜜。善男子，般若波罗蜜，云何行？云何入？”

无尽意言：“唯舍利弗，般若波罗蜜，如闻修行，善入思惟。”

舍利弗言：“唯善男子，云何如闻修行？”

无尽意言：“闻者具八十行。何等八十？欲修行，顺心行，毕竟心行，常发起行，亲近善友行，无憍慢行，不放逸行，恭敬行，随顺教行，从善语行，数住法师所行，至心听法行，善思惟行，不乱心行，勤进心行，生宝想行，起药想行，除诸病行，念器行，进觉行，意喜行，入觉行，闻无厌行，增长舍行，调智行，亲近多闻行，发欢喜行，身轻悦行，心柔和行，闻无疲倦行，闻义行，闻法行，闻威仪行，闻他说行，闻所未闻行，闻诸通行，不求余乘行，闻诸波罗蜜行，闻菩萨藏行，闻诸摄法行，闻方便行，闻四梵行，闻念正智行，闻生方便行，闻无生方便行，观不净行，思惟慈行，观因缘行，观无常行，观苦行，观无我行，观寂灭行，观空行，观无相行，观无愿行，观无作行，作善行，持真实行，不失行，好恶住处防护心行，勤进无懈行，善分别诸法行，知诸烦恼非伴侣行，护诸善法自伴侣行，降伏烦恼非伴侣行，亲近正法财行，断诸贫穷行，智者所赞行，欣乐利根行，众圣所劝行，令非圣者生欢喜行，观诸谛行，观阴过患行，思量有为多过患行，思义行，不作一切恶行，自利利他行，随顺增进诸善业行，进增上行，得一切佛法行。舍利弗，是名菩萨如其所闻具八十行。

“舍利弗，菩萨摩訶萨行般若波罗蜜，具三十二事善入思惟。何等三十二？善入受持定，善入分别慧，善入心柔和，善入身独行，善入十二缘，善入不断，善入不常，善入因缘生法，善入无众生无命无人，善入无来去住处，善入无进不断因果，善入空不懈，善入无相不废，善入无愿不舍，善入不证空无相无愿，善入生诸禅三昧，善入不随禅定生，善入生诸通智，善入不证无漏法，善入内观法，善入不证决定，善入思量有为法过患，善入不著有为法，善入观一切众生无我而不舍大悲，善入一切趣诸怖畏处，善入虽生诸趣非业故生，善入离欲，善入不证离欲法，善入舍所乐欲，善入不舍法乐，善入舍一切戏论诸觉，善入不舍方便诸观。舍利弗，是名菩萨行般若波罗蜜三十二事善入思惟。

“又复善思惟者，所谓善顺句。善顺句者是不始句，是不终句，是不住句，是无依句，是不动句，是不猗句，是平等句，是非等句，是真实句，是正真句，是不变句，是清净句，是永寂句，是不然句，是不举句，是不下句，是不灭句，是不增句，是不共句，是不戏论句，是如句，是不如句，是如非如句，是非如非不如句，是如实句，是三世平等句，是三际句，是不住色句，是不住受想行识句，是不住地大句，是不住水火风句，是不住眼界、色界、眼识界句，是不住耳界、声界、耳识界句，是不住鼻界、香界、鼻识界句，是不住舌界、味界、舌识界句，是不住身界、触界、身识界句，是不住意界、法界、意识界句，是念义句，是念智句，是了义经句，是念法句，是名菩萨善入思惟。

“又复善思惟者，所谓一切诸法若我无我，如是诸法随顺观察。

若知众生无有我者，即是随顺观察诸法，如是观察即是善入思惟，如善思惟即是思惟生死涅槃同一法界，观是二句无有差别，如是见者是名勤进善入思惟。若观黑法及以白法二性平等无有差别，是名勤进善入思惟。若观诸垢及以无垢不动不恃，是名勤进善入思惟。若菩萨起善思惟，为诸众生而不舍离，于诸法相亦不分别，是名菩萨发善思惟。舍利弗，如闻行者，如是得入报善思惟，是名为慧。

“舍利弗，菩萨慧者，有十六法不于中住。云何十六？不住无明、行、识、名色、六入、触、受、爱、取、有、生、老死乃至不住无明灭至生死灭，不住根本身见乃至不住六十二见，不住高下乃至不住世法利衰毁誉称讥苦乐，不住慢慢、增上慢、胜慢、我慢、下慢、憍慢、邪慢乃至不住二十烦恼，不住因贪所起诸结若粗若细若上中下乃至不住贪欲所起一切诸结，不住痴闇覆盖诸碍乃至不住因痴所起一切诸结，不住淫欲爱浊，不住阴死烦恼天魔乃至不住因魔所起诸魔事等，不住我、人、众生、寿命、养育、士夫乃至不住取众生相，不住业障、报障、法障、烦恼障、诸见障乃至不住一切习气，不住思想、忆想、分别想、缘相想、境界见闻觉知乃至不住一切诸结，不住随众生心行智乃至不住八万四千法聚，不住悭贪布施、破戒持戒、瞋恚忍辱、懈怠精进、乱意禅定、愚痴智慧乃至不住诸波罗蜜伴非伴等，不住定乱、邪正、善不善、世间出世间、可作不可作、有漏无漏、有为无为、黑法白法、生死涅槃乃至不住一切诸法伴非伴等，不住众生异相、诸乘异相、佛界异相、诸佛异相、诸法异相、圣众异相乃至不住一切异相，不住知不知、识不识、世谛真谛乃至不住一切诸相。所谓菩萨思惟慧者，无闻无行，无身无相，无形无为。如是真慧，不住一切忆想思惟心作止住名字异相。舍利弗，是名菩萨真智慧者不住如是十六法中。

“舍利弗，云何菩萨慧者？处所具八方便。何等八？诸阴方便，诸界方便，诸入方便，诸谛方便，诸缘方便，三世方便，诸乘方便，诸法方便。

“云何诸阴方便？若说诸阴如沫如泡，如热时焰，如芭蕉树，如幻如梦，如呼声响，如镜中像，如影如化色，如水沫如水沫性，非我非众生，非命非人，色亦如是，能如是知是名菩萨观色方便。受喻如泡，想喻如焰，行如芭蕉，识喻如幻；如泡、如焰、如芭蕉、幻性，无我、无众生、无命、无人，受想行识亦复如是，能如是知，是名菩萨观受想行识方便。诸阴如梦、如响、如像、如影、如化、如化等性，无我、无众生、无命、无人，是诸阴等亦复如是，能如是知，是名菩萨观阴方便。所谓阴者即世间相，世间相者是可坏相，如可坏相即无常性、苦性、无我性、寂灭性，能如是知，是名菩萨观阴方便。

“云何菩萨知界方便？法界、地界、水火风界，是法界中，无有坚相、湿相、热相、动相。法界、眼界、耳界、鼻舌身意界，是法界中，无有见相、闻相、嗅相、别相、觉相、知相。法界、色界、声香

味触法，是法界中，无眼可见相、耳可闻相、鼻可嗅相、舌可别相、身可觉相、意可知相。法界、眼识界、耳鼻舌身意识界，是法界中，无眼识知色，乃至无意识知法。法界、色界，法界非色作相，乃至法界亦复如是。法界、我界无二无别，法界、欲界、色界、无色界、我界、生死界、涅槃界无二无别。法界、虚空界，一切法界、我界、空界，无相无愿无作不出不生无所有等如涅槃。虚空、涅槃，及一切法等无有二。如是无量有为法界入无为界，能如是知如是说者，是名菩萨知界方便。

“云何菩萨观入方便？如佛所说，眼空、我空、我所空。何以故？是眼性中，无我、无我所，耳鼻舌身意空亦复如是。观是入者见一切法，若善不善无有二相，是名菩萨观入方便。若眼入、色入，若见眼色离欲不证离欲法，是名菩萨观入方便。耳入、声入、鼻入、香入、舌入、味入、身入、触入、意入、法入，若见离欲不证离欲法，是名菩萨观入方便。所谓入者，若圣入、非圣入。云何圣入？若修集道。云何非圣入？不修集道。若菩萨住道，于不修道者生大悲心不舍入道，是名菩萨观入方便。

“云何菩萨观谛方便？所谓甚深难入。云何难入？若苦智、集智、灭智、道智。苦智者观阴无生，集智者观断爱因，灭智者观无明等诸烦恼无有和合，道智者得平等观于一切法无所倚著。菩萨若于四圣谛中作如是观，而不取证为化众生，是名菩萨观谛方便。复有三谛。何等三？俗谛、第一义谛、相谛。云何俗谛？若世间所用语言文字假名法等。云何第一义谛？乃至无有心行，何况当有言语文字？云何相谛？观一切相同于一相，一相者即是无相。菩萨随顺俗谛而不厌倦，观第一义谛而不取证，观诸相谛一相无相，是名菩萨观谛方便。复有二谛。何等二？俗谛、第一义谛。何等俗谛？若说苦集道谛，若世间语言文字假名法等。云何第一义谛？若于涅槃法终不忘失。何以故？如与法界其性常故。菩萨随俗不生厌倦，观第一义而不取证。复有一谛。何等为？于一切法无所倚著。为化众生现有所著，是名菩萨观谛方便。复次五阴苦，若见五阴苦相是名为苦观，苦即空是名苦智观苦圣谛。若观五阴诸烦恼爱因见因是名为集，若观爱因见因不取不著不希不求，是名集智观集圣谛。若五阴毕竟尽相，过去已灭，未来未生，现在不住，是名为灭，能如是知，是名灭智观灭圣谛。若得道者证集灭智比智知已是名为道，若于是中悉见空性，是名道智观道圣谛。若能如是观四圣谛，是名菩萨观谛方便。若一切受是名为苦，若于诸受思惟分别，是名苦智观苦圣谛。受因和合是名为集，若于受因知如真实，是名集智观集圣谛。若除诸受无受者受，观受灭尽不证于灭为化众生，是名灭智观灭圣谛。若有所受是名为道，虽有和合犹如筏喻，不为所受不求于道，是名道智观道圣谛。作如是知，见四圣谛清静平等，是名菩萨观谛方便。复次略说生苦是名为苦，若观于生，是名苦智观苦圣谛。生从因缘是名为集，若观有非有，是名集智

观集圣谛。一切生非生是即非灭，若法不生即无有灭，是名为灭，若观此灭即是灭智观灭圣谛。若如是等，推求称量思惟分别是名为道；若灭如是求称量等，入法门者是名道智。观道圣谛，若住于智不证圣谛，是名菩萨观谛方便。

“云何菩萨观缘方便？集不善思惟故无明集，无明集故行集，行集故识集，识集故名色集，名色集故六入集，六入集故触集，触集故受集，受集故爱集，爱集故取集，取集故有集，有集故生集，生集故老死集，老死集故忧悲苦恼集。若知如是诸苦聚集，是名菩萨观缘方便。若住如是诸法聚集，则不长养，无所作，无诤讼，无有主，无所属，无系缚，所谓若因善法、因不善法、因不动法、若因向涅槃法，如是等法如实分别。若诸众生根量齐限，因是诸根所作诸业，若有受报及非受报，善知其因聚集方便，是名菩萨观缘方便。不善思惟灭则无明灭，无明灭故行灭，行灭故识灭，识灭故名色灭，名色灭故六入灭，六入灭故触灭，触灭故受灭，受灭故爱灭，爱灭故取灭，取灭故有灭，有灭故生灭，生灭故老死灭，老死灭故忧悲苦恼诸苦聚灭。若知如是诸苦聚灭，是名菩萨观缘方便。一切诸法属因属缘属和合，若法属因缘和合，是法则不属我、人、众生、寿命，若法不属我、人、众生、寿命则不入法数，能如是知，是名菩萨观缘方便。若菩萨所修诸法，为助菩提安止菩提，如是诸缘悉见灭尽，而不取证为化众生，是名菩萨观缘方便。

“云何观三世方便？若念过去己身他身善不善心心数法，不善心法呵责毁咎，善心数法悉以回向无上菩提，是名菩萨观过去方便。若未来世心心数法。一向专念菩提之道，若起善心愿悉回向无上菩提，所有不善心心数法不令入心，发如是愿是名菩萨未来方便。若现在世心心数法，善思惟等所作诸业，悉以回向无上菩提，是名菩萨观现在方便。作如是方便，是名菩萨观三世方便。复次，善解三世空无所有，若作是观，观三世空智慧力故，若于三世诸佛所种无量功德，悉以回向无上菩提方便力故。如是方便，是名菩萨观三世方便。复次，虽见过去尽法不至未来，而常修善精勤不懈，观未来法虽无生出不舍精进愿向菩提，观现在法虽念念灭其心不忘发趣菩提。如是方便，是名菩萨观三世方便。过去已灭，未来未至，现在不住，虽如是观心心数法生灭散坏，而常不舍聚集善根助菩提法。如是方便，是名菩萨观三世方便。复次，若诸神通，念过去世所作善根，念已回向无上菩提；念未来世未生善根，愿心所图如意成就；现在世中常生善根，专念不懈回向无上菩提之道。如是方便，是名菩萨观三世方便。复次，若化众生，念过去世所作善根助道功德，所谓随众生心应可化者，如其所乐悉已化讫；若未来世所有众生，或须见佛及诸圣人而得度者，随形应适悉令得度；若现在世所有众生，若应闻法应见神力，亦随所应皆悉化之。随所教化诸众生已，即于三世成自他利，如是之利悉为菩提具无碍智。如是方便，是名菩萨观三世方便。

“舍利弗，云何菩萨观诸乘方便？世有三乘。何等三？声闻乘、缘觉乘、大乘。复有二乘。何等二？天乘、人乘。云何菩萨观声闻乘？佛未出世无声闻乘。何以故？从他闻法生于正见。所谓闻者持戒威仪，威仪具故戒聚具足，戒聚具足已定聚具足，定聚具足已慧聚具足，慧聚具足已解脱聚具足，解脱聚具足已解脱知见聚具足。如是方便，是名菩萨观声闻乘方便。复次，观声闻乘，若善不善及不动行，心常毁谤厌离三界，观一切行无常苦无我寂灭涅槃，乃至一念不希受生，常怀怖惧心不甘乐，观阴如怨、界如毒蛇、入如空聚，于一切趣不愿受生。若能如是开示分别，是名菩萨观声闻乘方便。云何菩萨观缘觉乘方便？若缘觉出世，观其所行如实知之。缘觉所行出过声闻所有功德，欲精进不放逸，持戒少闻不多供养，诸佛世尊给侍使令，以中根故常有厌心，所作众事皆悉鲜少，厌患愤闹常乐远离，独住空闲威仪庠序，出入凝重安心静默简于人事，能为众生现世福田，其心玩乐观十二缘，常念一法出世涅槃，数游禅定不从他闻自然觉了少分境界，因缘悟道故名缘觉。若能如是开示分别，是名菩萨观缘觉乘方便。云何菩萨观大乘方便？其乘无量，今于此中当说少分。是乘无量悉能容受一切众生，无挂碍故。是乘增长一切善根，令无量众生得受用故。是乘具足诸波罗蜜，能随众生心行化故。是乘能过助道之法，进趣无碍至道场故。是乘平等无碍，光明照于一切无量众生悉堪受故。是乘无畏过怯弱道，悉能示现诸佛法故。是乘能坏一切诸魔外道邪众，了十二缘建立佐助菩提幢故。是乘能除一切诸边有无断常因缘诸见所起烦恼、障碍、覆盖、疑网、调戏，得佛无碍真智慧故。是乘富足具诸珍宝真实不虚能益众生，大悲勇猛本愿成就故。是乘具足十力无畏不共之法，相好严身身口意故。如是方便，是名菩萨观大乘方便。云何菩萨观一切法方便？所谓若有为、若无为，菩萨于中善知方便。云何善观有为方便？所有身善业、口善业、意善业，愿以回向无上菩提，是名有为方便。若观身口意业同菩提相回向菩提，是名菩萨观无为方便。复次有为方便，若能聚集五波罗蜜，是名有为方便。虽知般若波罗蜜其性无为，于所聚集终无厌贱要欲具足诸波罗蜜，深解善根同无漏菩提而犹愿成一切种智，是名菩萨无为方便。复次有为方便，住于无碍平等心中，以四摄法摄取众生，是名有为方便。云何无为方便？善解众生无我、无人、无所希求，知四摄法同无为解脱而能回向一切种智，是名无为方便。复次有为方便，若诸烦恼生死相续断令不起，所有善根助菩提者令不断绝，乃至不行少烦恼分，是名有为方便。云何无为方便？虽观空无相无愿，知此三空即助道方便故能不证，是名无为方便。复次有为方便，虽在三界不为三界烦恼所污，是名有为方便。云何无为方便？虽出三界不证于出，是名无为方便。如佛所说知诸法方便则能具足一切种智。何以故？一切种智无量无边，具足正念慧方便故。是故名为一切实法方便。舍利弗，是名菩萨智慧所缘八方便也。舍利弗，是八方便能摄菩萨无尽智慧。

“舍利弗，是慧能解，观了善法不善法故。是慧如箭，善射法故。是慧财行，圣法现在故。是慧真解，断除诸见烦恼障碍诸覆盖故。是慧定愿，悉能满足本所求故。是慧消融，能除烦恼诸焦热故。是慧悦豫，不断法乐故。是慧正念，了所缘义故。是慧安住，具三十七助道法故。是慧得相，如所行乘能具足故。是慧解相，性智照故。是慧能度，过诸流故。是慧能进，成正定决定故。是慧正见，具足一切诸善法故。是慧欢喜，堕烦恼者能拔济故。是慧殊胜，得顶法故。是慧微妙，自然觉故。是慧不行，不近三世故。是慧摄取，具一切方便故。是慧能断，过诸思想故。是慧不放逸，舍离闇喑故。是慧初始，发行一切诸善法故。是慧能发，具诸乘故。是慧照明，除无明网故。是慧与眼，一切众生如其所解得明了故。是慧无依，过眼色故。是慧第一义，出真实故。是慧无诤，善分别故。是慧明了，向智门故。是慧无尽，能遍行故。是慧不逆，见十二缘故。是慧解脱，诸缠系缚悉善断故。是慧不杂，离于一切障碍法故。舍利弗，一切众生所有心行，如是智慧悉能照达。如众生心行慧思智诸烦恼门，如是智慧皆悉观了。若声闻、缘觉、菩萨、如来所有智慧，是菩萨悉能遍学。舍利弗，是名菩萨无尽之慧，以是无尽慧具无尽智。”

说是法时，三万二千菩萨善根熟者，得无生法忍。

无尽意菩萨经卷第三

尔时，无尽意菩萨复语舍利弗：“菩萨修慈亦不可尽。何以故？菩萨之慈无量无边。是修慈者无有齐限等众生界，菩萨修慈发心普覆。舍利弗，譬如虚空无不普覆；是菩萨慈亦复如是，一切众生无不覆者。舍利弗，如众生界无量无边不可穷尽；菩萨修慈亦复如是，无量无边，无有穷尽。虚空无尽故众生无尽，众生无尽故菩萨修慈亦不可尽，是谓大士所修慈心不可得尽。”

舍利弗言：“善男子，齐几名众生界？”

无尽意言：“所有地界、水火风界其量无边，而犹不多于众生界。”

舍利弗言：“唯善男子，颇可得说譬喻比不？”

无尽意言：“可说，但不得以小事为喻。舍利弗，东方去此尽一恒沙佛之世界，南西北方、四维、上、下皆一恒沙佛世界，作一大海其水满溢。使一恒河沙等诸众生聚集，共以一毛破为百分，以一分毛滴取一滴。如是一恒河沙共取一滴，二恒河沙共取二滴。如是展转乃至尽此满大海水尽，是众生界犹不可尽，菩萨慈心悉能遍覆如是众生。舍利弗，于意云何？是修慈善根岂可尽耶？”

舍利弗言：“实不可尽。”

“唯！善男子，是虚空性尚可得尽，菩萨慈心不可尽也。若有菩

萨闻作是说不生惊怖，当知是人得无尽慈。舍利弗，是慈能自拥护己身，是慈亦能利益他人，是慈无诤，是慈能断一切嗔恚荒秽系缚，是慈能离诸结及使，是慈欢喜，是慈不见一切众生破戒之过，是慈无热身心受乐，是慈远离一切恼害，是慈能离一切怖畏，是慈能顺众圣人道，是慈能令嗔者欢喜，是慈能胜一切斗争，是慈能生利养称叹，是慈庄严严净梵威德，是慈常为智人所赞，是慈常护凡夫愚人，是慈常能随顺梵道，是慈不杂远离欲界，是慈能向解脱法门，是慈能摄一切诸乘，是慈能摄非财功德，是慈长养一切功德，是慈过诸无作功德，是慈悉能庄严相好，是慈能离下劣钝根，是慈能开天人涅槃诸善正道，是慈能离三恶八难，是慈爱乐诸善法等，是慈如愿一切所欲成就自在，是慈平等于诸众生，是慈发行离诸异相，是慈正向持戒之门，是慈能护诸犯禁者，是慈能成无上忍力，是慈能离诸慢放逸，是慈发起无诤精进入于正道，是慈根本入圣禅定，是慈善能分别于心离诸烦恼，是慈因慧而生总持语言文字，是慈定伴离魔结伴，是慈常与欢喜同止，是慈善为心之所使，是慈坚持威仪戒法，是慈能离诸掉动等，是慈能灭种种诸相，是慈善香惭愧涂身，是慈能除烦恼臭气。舍利弗，夫修慈者，悉能拥护一切众生，能舍己乐与他众生。声闻修慈齐为己身，菩萨之慈悉为一切无量众生。舍利弗，夫修慈者能度诸流。慈所及处有缘众生，又缘于法，又无所缘。缘众生者初发心也，缘法缘者已习行也，缘无缘者得深法忍也。舍利弗，是名菩萨修行大慈而不可尽。

“复次，舍利弗，菩萨摩訶萨修行大悲亦不可尽。何以故？舍利弗，如人命根即以出息入息为本，菩萨如是修学大乘以大悲为本。如转轮圣王以轮宝为本，菩萨如是修一切智以大悲为本。如大长者唯有一子愍爱情重，菩萨大悲亦复如是，于诸众生爱之若子。如是大悲我已行已，如是大悲作己利己，如是大悲不假他事，如是大悲己心所作出不谄曲，如是大悲所作毕竟出正决定，如是大悲种性所作出于直道，如是大悲心无邪曲出生正直，如是大悲无有憍慢出众生境，如是大悲捐舍己身出如来身，如是大悲不贪寿命出不作恶，如是大悲拥护众生出于菩提，如是大悲护真实法出心清净，如是大悲见诸穷厄出拔济事，如是大悲本誓坚固出不动心，如是大悲不欺己身人天贤圣出不虚诳，如是大悲其行清净出于善业，如是大悲自舍己乐出与他乐，如是大悲不与他苦出不焦热，如是大悲能令众生舍于重担出坚精进，如是大悲有忍势力出护无力，如是大悲不厌可污出瞻病者，如是大悲得法自在出教化钝根，如是大悲覆自功德出显他功业，如是大悲出离诸苦，如是大悲出求无漏乐，如是大悲出舍所爱物，如是大悲出作众善业无所娆恼，如是大悲出善持禁不舍毁戒，如是大悲出教化众生，如是大悲出不惜身命，如是大悲出舍自支节，如是大悲出生他善根，如是大悲出自利益善根，如是大悲出无味诸禅，如是大悲出不厌欲界，如是大慈出于观慧，如是大悲出不污善根，如是大悲出诸众生如所愿

成，如是大悲出有为无为，如是大悲出不证无为，如是大悲出知众生性同无为而能教化，如是大悲出护毁戒者，如是大悲出赞叹佛戒，如是大乘诸悲出于大悲，以是因缘故名大悲。谓大悲者，必定善行布施、持戒、忍辱、精进、禅定、智慧、诸助道法，为得自然无师智慧，营他众生所作事业，精勤专著如修己务，以是因缘故名大悲。舍利弗，是名菩萨修行大悲而不可尽。

“复次，舍利弗，菩萨摩訶萨修行于喜亦不可尽。云何为喜？常念于法欢喜踊跃，不生懈怠无诸恼热，离五欲乐住于法乐，心和悦豫身轻柔软，意勤劝督心常生悲，乐求如来无上法身，乐修相好以自庄严，听法无厌念行正法；行正法已心生欢喜，生欢喜已具得法悲，常于众生不生碍心，以增上欲勤求于法；勤欲法已深心得解甚深佛法，远离二乘发无上心，除诸悭惜发于舍心，见来乞者心生欢喜，舍时欢喜施已无悔，如是布施三时清净；得清净已心则悦豫，于持戒者常行布施，于毁禁者喜心摄取，自持禁戒心则清净，能令恶道怖惧众生得无所畏远离恶处，一心回向如来禁戒，坚持牢固不可亏坏；恶骂加己堪忍不报，于诸众生心无憍慢，于诸尊长谦下恭敬，言常和悦离于嗔蹙，先以爱语终无谄曲，不以邪心诱逛于人，不以利养为他执役，其心清净无有粗过，于诸不可不见其过，不求他短不举人罪，专心正念诸和敬法，于诸菩萨生如来想，爱说法者重于己身，爱重如来如惜己命，于诸师长生父母想，于诸众生生儿息想，于诸威仪如护头首，于诸波罗蜜如爱手足，于诸善法生珍宝想，于教诲者生五欲想，于知足行生无病想，爱乐求法生妙药想，于举罪者生良医想，摄御诸根无有懈怠，是故名喜。是喜寂静觉知微妙故，是喜寂灭无忤戏故，是喜行倚不戏论故，是喜根本心不乱故，是喜多闻取善语故，是喜平等心柔软故，是喜勇猛善作业故，是喜不悔专行善故，是喜正住不懈怠故，是喜不动无所依故，是喜不共难摧伏故，是喜实义不忘失故，是喜真实无变异故，是喜诚谛如所作故，是喜能舍力坚牢故，是喜大力无能胜故，是喜能作诸佛神力求诸佛法故。舍利弗，是名菩萨修行于喜而不可尽。

“复次，舍利弗，菩萨摩訶萨修行于舍亦不可尽。云何菩萨修舍无尽？菩萨行舍，舍有三种。云何为三？舍诸烦恼，舍护己他，舍时非时。云何舍诸烦恼？恭敬供养其心不高，轻蔑毁訾心亦不下，若得利养心不贪恃，若遭衰恼心亦不愁，若遇誉赞心无喜庆，若遭毁者心不退缩，若遇讥者心无亏赧，若有称者善住法界，若遭苦事心力忍受，若遇乐事明见无常，放舍所爱断于嗔恚，于亲非亲得平等心，持戒毁戒意无增减，作善作恶无有二相，于爱非爱心无所著，闻善不善心能堪忍，于善恶语心不系著，于昧过患其量无二，于诸众生得平等心，于上中下得等光明，不惜身命好恶名闻同于法界，于实不实法心得清净，于世法等得菩萨舍，是名菩萨舍于烦恼。云何菩萨舍护己他？若被割截身体支节，心无嗔恨不求仇报，以得舍心故能舍二，内

外身口于此二中不生诤讼，于眼与色无有欲污，耳声、鼻香、舌味、身触、意法亦复如是。故于二中不生诤讼是故名舍，不伤不害是故名舍，舍护己他是故名舍，于利非利心行平等是故名舍，于第一义不生诤论是故名舍，于己心中善能分别是故名舍，观舍己身是故名舍，不害他身是故名舍。菩萨修舍于诸禅定常行舍心，诸佛世尊不听菩萨于诸众生而行舍心。何以故？萨常修精进为利自他勤求善根，是名菩萨舍护己他。云何舍时非时？非器众生舍不引接，衰毁讥苦舍而不受，舍求声闻成决定者，行布施时舍修持戒，修持戒时舍于布施，修忍辱时舍施戒进，修精进时舍施戒忍，行禅定时舍于布施，修智慧时舍五波罗蜜，所不应作终不复作。如是诸法安住戒行，精勤勇猛具足修行，是名菩萨修无尽舍。

“复次，舍利弗，菩萨诸通亦不可尽。云何诸通？天眼通、天耳通、他心通、宿名通、如意通。云何天眼通？菩萨天眼于诸天龙鬼神、诸乾闥婆、学无学人、声闻、缘觉所有天眼为最第一，微妙殊胜开达明了，向一切智功德所成，不与天龙二乘共之。若有十方无量无边诸佛世界，所有形貌色像光明，若粗若细若近若远，菩萨天眼一切悉见，照了分别善解善见，亦见其中所有众生生诸趣者，除无色天其余业行生死相续，若业业果分别诸根悉知无遗。若于十方无量无边诸佛世尊，所有庄严净妙国土悉见无余。如是见已清净持戒，愿以回向庄严己土；住是持戒如其所愿，悉得成就无量大利。菩萨天眼亦见其中，菩萨大众修行于道，身四威仪及正忆念，得解脱法安住总持，辩才方便入慧方便，见已自修如是诸行悉令备足。是菩萨眼清净无碍得见色故，是眼不污不著色故，是眼解脱远离诸见烦恼故，是眼清净性明了故，是眼不依离所缘故，是眼不发断烦恼故，是眼无医断疑网故，是眼不起断障碍故，是眼得明照了法故，是眼念知不行识故，是眼无贪、嗔恚、愚痴能断一切诸结使故，是眼无上趣圣本故，是眼无碍平等光明照众生故，是眼无垢断恶法故，是眼不染性清净故，是眼入佛眼毕竟不舍故，是眼不缚断爱恚故，是眼行义出于真实修行念知净道法故。何以故？是大士安住大悲深解法相，善分别义无有诤讼，随见闻说背不善法，趣向道场心无障碍，见悭惜人能舍财施，见毁禁者修持净戒，见嗔恚者修忍不诤，见懈怠者摄取劝励，见散心者示诸禅支，无智慧者施与慧眼，行邪道者示以正道，修下行者为说甚深微妙佛法令入一切智不退诸通具足菩提。舍利弗，是名菩萨天眼神通而不可尽。

“复次，舍利弗，菩萨摩訶萨天耳神通亦不可尽。云何菩萨天耳神通？若十方无量无边诸佛世界所有诸声，所谓天龙鬼神、乾闥婆、阿修罗、迦楼罗、紧那罗、摩睺罗伽、人非人声，及以圣声，所谓声闻、缘觉、菩萨、正遍知声，一切凡是耳根所对，乃至地狱、饿鬼、畜生、蝇蚁蚊虻所有诸声一切悉闻。若诸众生心所缘处，若善、不善、无记所作事业出诸音声，一切悉解。若口善业、口不善业、口无

记业，如是诸业悉如实知。若有口业因于爱欲说嗔说痴，若有口业因于嗔恚说欲说痴，若有口业因于愚痴说欲说嗔，若因欲说欲因嗔说嗔因痴说痴，如是诸声亦皆能知。或有口业心净口粗，或有口业口净心粗，或有口业口净心净，或有口业口粗心粗，如是一切无碍耳通能如实知。是菩萨天耳，亦知圣声及非圣声。若闻圣声不生爱著，闻非圣声心不生碍。于圣人声得具大慈，非圣人声得具大悲。若闻过去未来诸声，得尽本际如实正智。是菩萨天耳，得闻一切诸佛世尊所说妙法，闻已忆念正智总持不忘不失，随众生器而为说法，善知诸法坚不坚相。是菩萨若听一佛说法，不闻余佛所说法者无有是处，一切诸佛所可演说悉能听受。菩萨若闻善、不善、无记法声，皆悉善知时与非时，所谓若有众时非说法时，闻已默然而无所说。若有说时非有众时，所谓正为一人能堪受者，是故虽说不为一切。事若真实或畏伤他故不为说，事若不实为利益他以清净心方便得说。若所喜声即能得闻，所不喜者便不复闻。若于大众为诸众生演说法时，随其耳识所解所受，是菩萨天耳悉得闻知。若说法时或有众生，应解悟者便得闻法，不解悟者则便不闻。是菩萨耳界，法界其性清净，知见我人众生悉清净故，是菩萨正分别耳界！如言语文字所说之相。若有五趣杂类众生，随其所解言语音声而为说法，持是天耳回向如来所得耳界，不求余乘故。舍利弗，是名菩萨天耳神通而不可尽。

“复次，舍利弗，菩萨知他心通亦不可尽。云何菩萨知他心通？若诸众生上中下心菩萨悉知，知是众生因施根心相，知是众生因戒根心相，知是众生因忍根心相，知是众生因进根心相，知是众生因定根心相，知是众生因智根心相，知是众生因慈悲喜舍根心相，知是众生因声闻、缘觉大乘根心相，知是众生因力增上善根具足，知是众生因行增上善根故得生此，知是众生其行清净心不清净，知是众生其行不净而心清净，知是众生心行俱净，知是众生行之与心二俱不净，知是众生过去世心诸根行因，知是众生随缘悟法，是名菩萨知他心智。又复知他未来世心，知是众生未来世中有持戒因，现在世中有布施因；知是众生未来世中有忍辱因，现在世中有持戒因；知是众生未来世中有精进因，现在世中有忍辱因；知是众生未来世中有禅定因，现在世中有精进因；知是众生未来世中有智慧因，现在世中行俗心因；知是众生未来世中发大乘因，现在世中有下根因；未来众生有如是等诸因诸缘，是诸因缘能如实知。是菩萨于未受化众生终不疲厌，如其心根如实能知，随其器量而为说法，若乐少闻则不多说，说必有益功不唐捐，是名菩萨知他心智。若现在世众生所行，心心数法悉如实知，所谓欲心如实知，欲心、离欲心如实知，离欲心、恚心如实知，恚心、离恚心如实知，离恚心、痴心如实知，痴心、离痴心如实知，离痴心、散心如实知，散心、摄心如实知，摄心、懈怠心如实知，懈怠心、精进心如实知，精进心、下心如实知，下心、上心如实知，上心、乱心如实知，乱心、定心如实知，定心、无解脱心如实知，无解

脱心、有解脱心如实知，有解脱心、无寂静心如实知，无寂静心、有寂静心如实知，有寂静心、有量心如实知，有量心、无量心如实知，无量心——众生——烦恼缠覆心者一切皆知，如是知己，如其出道而为说法。又是菩萨所住之处，先观众生知其根量，随而为说出要之法。是诸众生上中下根悉如实知，是菩萨心知他心时无有障碍。何以故？是菩萨心智猛利善分别故，念意进慧之所知故，善能解了菩提相故，断诸习气故，清净无垢故，明了无诤故，无诸烦恼故，无有渊流故，照一切法故，善入一切众生心故。能如是解，是菩萨心智猛利。于如是法正入知者，是名菩萨他心智通而不可尽。

“复次，舍利弗，菩萨宿命智通亦不可尽。云何菩萨宿命智通？是菩萨念宿命事，若自若他善受忆持，安住法界无有倾动。无倾动者能善解了善作业故，是念无恼安住禅定故，是念无畏善摄智慧故，是念不从他求现得善知故，是念正忆毕竟不失故，是念助功德善解大乘故，是念助智不从他具足故，是念善根诸波罗蜜具足能到一切佛法故。是宿命智，若念一生、二生、三生、四生、五生、十生、二十生、三十生、四十生、五十生，乃至百生、千生、百千生、无量百生、无量千生、无量百千生，及天地成坏无量成世、无量坏世、无量成坏世、无量成坏劫，知诸众生于是中生如是种姓、如是名字、如是色像、如是饮食、如是寿命受苦乐等，于是中死还是中生，于彼中死还彼中生。是菩萨念如是等无量生死，自念宿世及他众生尽过去际。是菩萨念自善根回向阿耨多罗三藐三菩提，念他善根愿令发阿耨多罗三藐三菩提心。是菩萨以正念心，于本生死行苦，善观无常苦无我。若观无常苦无我者，于诸色欲、封禄、寿命、眷属自在悉无贪著，亦复不贪释、梵、护世、转轮圣王及受生处五欲欢乐，为化众生故现受生。是菩萨念于无常苦无我已，过去秽行发露忏悔，现世诸恶乃至失命终不为之，过去善根欲令增广回向阿耨多罗三藐三菩提，现在善根与众生共回向阿耨多罗三藐三菩提。是菩萨离诸恶愿不断三宝种故，所有善根悉以回向阿耨多罗三藐三菩提。舍利弗，是名菩萨念宿命智而不可尽。

“复次，舍利弗，菩萨摩訶萨如意神通亦不可尽。云何菩萨如意神通？若欲进心慧所摄诸法，调伏柔和心得自在，善修集故，现在能得是如意通。是菩萨作种种神通变化，以是神通为化众生。是菩萨一一示现种种神通教化众生，所谓若色相、若力势、若变化。是菩萨示种种色相，令众生见已心伏，所谓若佛色像、若缘觉色像、若声闻色像、若释梵护世转轮圣王色像，及余种种无量色像，乃至示现畜生色像，化众生故作是示现，示现是已随其所应而为说法。若有众生自谓己身有大势力而起憍慢、嗔恚、贡高，菩萨欲为调伏如是诸众生故示现大力，所谓示现那罗延力四分之一、或四分之二、或四分之三，或全示现须弥山王高十六万八千由旬纵广八万四千由延，以三指举掷置他方无量世界譬如掷一阿摩勒果，于菩萨力而无损减，断取三千大

千世界，下尽水际以手举之，高至有顶住经一劫。菩萨成就示现如是大势力时，能令如是嗔恚、憍慢、贡高众生内善调伏，知调伏已然后随应而为说法。是菩萨修如意通，能得智慧变化势力，以变化力诸所欲作悉得成就，能变大海以为牛迹大海不小，又变牛迹以为大海牛迹不大，若劫欲尽火灾起时欲变为水能如意变，水灾起时能变为火，风灾起时能变为火，火灾起时能变为风，风灾起时能变为水，水灾起时能变为风，如是变化皆悉成就，若上中下法随意变化；唯除诸佛，更无人能移动留碍破坏。菩萨如意神通，所谓释梵天王、魔王波旬及其眷属，是菩萨作种种变化，示诸众生令欢喜已，然后随意而为说法。是菩萨神通勇健自在，能过诸魔烦恼境界，入于佛界不恼众生，所有善根皆悉成就，一切魔众无能断者。舍利弗，是名菩萨如意神通而不可尽。

“复次，舍利弗，菩萨四摄亦不可尽。云何为四？一者、布施，二者、爱语，三者、利行，四者、同利。云何布施？施有二种：财施、法施。云何爱语？于求财人及听法者柔和与语。云何利行？于求财人及听法者，随其所求悉令满足。云何同利？求财法者以大乘已利令彼安止。又复施者，见诸乞求心生清净；爱语者，于诸乞士心生欢喜；利行者，于诸乞士随其所利而令具足；同利者，常以大乘劝诲众生。复次施者，所谓舍心；爱语者，行无限齐；利行者，毕竟不悔；同利者，回向大乘。复次施者，起慈行舍；爱语者，不舍喜心；利行者，大悲庄严利于众生；同利者，舍于高下，发心回向一切种智。复次施者，如法求财清净行施；爱语者，将导爱者安止善法；利行者，说于己利以利益他；同利者，令诸众生发一切智心。复次施者，舍于内外；爱语者，功德智慧心无吝惜；利行者，舍自利行而行利他；同利者，弃舍重位心初无悔。复次法施者，如所闻法悉能演说；爱语者，不为利养而演说法；利行者，诲他讽诵心无疲厌；同利者，一切智心所得妙法，即以此法劝励众生。复次法施者，若有众生一一听法次第为说而无错谬；爱语者，为人说法不辞远近；利行者，有求法人供给衣服、饮食、卧具、病瘦医药令无所乏，既施所安然后随应而为演说；同利者，凡所讲说常劝众生回向阿耨多罗三藐三菩提。复次法施者，于诸施中知其最胜，以此胜法为人演说；爱语者，常为利益众生故说；利行者，随义而说不随文字；同利者，常为具足佛法故说。复次施者，具足檀波罗蜜；爱语者，具足尸罗羼提波罗蜜；利行者，具足毗梨耶波罗蜜；同利者，具足禅那般若波罗蜜。复次施者，初发菩提；爱语者，修行菩提；利行者，不退菩提；同利者，一生补处。复次施者，安住菩提种子根本；爱语者，滋长菩提芽茎枝叶；利行者，渐以开敷生菩提华；同利者，已能成就菩提果实。舍利弗，是名菩萨以四摄法摄取众生而不可尽。

“复次，舍利弗，菩萨摩訶萨四无碍智亦不可尽。云何为四？一者、义无碍，二者、法无碍，三者、辞无碍，四者、乐说无碍。云何

义无碍？于诸法中知第一义，是比智，是因智，是缘智，是和合智，是不堕边智，是不住中智，是十二因缘智，是不异法性智，是如实智，是实际智，是觉空空智，是无相相智，是无愿愿智，是无为为智，是观一相智，是观无我智，是观无众生智，是观无命智，是观无我第一智，是观过去无挂碍智，是观未来无有边智，是观现在一切种智，是观诸阴如怨贼智，是观诸界如毒蛇智，是观诸入如空聚智，是观内法永寂灭智，是观外法无行处智，是观所缘如幻化智，是观念正住智，是观忍正法智，是观自身智，是观了诸谛智，是苦不和合智，是集不作智，是灭自性智，是道能到智，是分别诸法智，是观众生诸根心行随所入智，是诸力无能伏智，是诸觉如实解智，是禅定受持智，是慧光明智，是幻化庄严智，是热时焰迷惑智，是梦中所欲智，是响所缘智，是镜中像无去来智，是种种相无相智，是扼离扼智，是取生离生智，是声闻乘从他闻智，是缘觉乘观十二缘智，是大乘具足一切善根智。舍利弗，是名菩萨义无碍智。又复义无碍者，思一切法义。何以故？是一切法无我众生、无命、无人，如无我众生、无命、无人即名为义。如命义者，色等诸法亦复如是，是名义无碍。又复义无碍者，是无住说，是无尽说，是得一切法说。如是义无碍者，诸佛所许，是真实义无别无异，智慧分别无有障碍，是名菩萨义无碍智而不可尽。

“舍利弗，云何菩萨法无碍智？若观诸法，所谓善法不善法、世法出世法、可作法不可作法、有漏法无漏法、有为法无为法、黑法白法、生死法涅槃法，是智法性平等，是智菩提平等，是智性平等，是名法无碍智。又复法无碍者，观于众生，多欲心行，少欲心行，初发欲心行，欲相心行，现在所缘欲心行，现在因缘欲心行，有众生内有欲行外无欲行，外有欲行内无欲行，有内外欲行，有内外无欲行，有色欲行非声香味触，有声欲行非色香味触，有香欲行非色声味触，有味欲行非色声香触，有触欲行非色声香味；入如是观众生诸欲行门行，欲行者二万一千行，恚行者二万一千行，痴行者二万一千行，等分行者二万一千行，观如是众生八万四千心之所行如实而知，随其所应而为说法。舍利弗，是名菩萨法无碍智而不可尽。

“舍利弗，云何菩萨辞无碍智？于诸音声悉观了知，所谓天龙鬼神、乾闥婆、阿修罗、迦楼罗、紧那罗、摩睺罗伽、人非人如是言语文字音声皆悉能知，如是五道杂类众生，随其种类一一音声语言文字而为说法，是名辞无碍智。如是语法文字思惟觉了无碍，是菩萨知一语、二语、三语乃至多语、男语、女语、非男女语、过去语、未来语、现在语，知积一字至多字语，是名辞无碍智。是辞无碍智，说时无谬无有滞碍，妙语通畅，所言审谛，正直无粗，所有文辞具足庄严，大众闻者无不欢喜。如是种种微妙音声，深远广普庄严俗谛、第一义谛，以智慧箭善射邪见。是辞无碍诸佛所许，能令众生皆得欢喜。舍利弗，是名菩萨辞无碍智而不可尽。

“舍利弗，云何菩萨乐说无碍智不可穷尽？所说无碍，所说不住，所说速疾，所说捷利，如所问答，无挂碍答，无违逆答，是相应答，住忍力答，依二谛答，依施、戒、忍、进、定、慧答，依一切法章句而答，依于念处、正勤、如意、根、力、觉、道甚深义答，依寂灭思惟答。所谓乐说无碍智者，若一切言语文字，口所分别正直而答，所谓一切禅定三摩跋提真谛智答，辩畅三乘随诸众生一切心行如应而答，所言巧妙非如哑羊，强梁粗恶卒暴忤戏如是之语悉无复有，所宣寂灭人所受用，威德之言无诸缠缚，相应无违微妙柔软，无可诋诃圣人所赞，如佛世尊所教诲语，梵音清彻一切悉闻。是乐说无碍智诸佛所许，为他众生说微妙法，闻是法者得出世乐灭尽诸苦，是名乐说无碍智也。舍利弗，是名菩萨摩訶萨四无碍智而不可尽。

“复次，舍利弗，菩萨摩訶萨有四依法亦不可尽。何等为四？依义不依语、依智不依识、依了义经不依不了义经、依法不依人。云何依义不依语？语者，若入世法中而有所说；义者，解出世法无文字相。语者，若说布施调伏拥护；义者，知施戒忍入于平等。语者，称说生死；义者，知生死无性。语者，说涅槃味；义者，知涅槃无性。语者，若说诸乘随所安止；义者，善知诸乘入一相智门。语者，若说诸舍；义者，三种清静。语者，说身口意受持净戒功德威仪；义者，了身口意皆无所作而能护持一切净戒。语者，若说忍辱断除恚怒贡高憍慢；义者，了达诸法得无生忍。语者，若说勤行一切善根；义者，安住精进无有终始。语者，若说诸禅解脱三昧三摩跋提；义者，知灭尽定。语者，悉能闻持一切文字智慧根本；义者，知是慧义不可宣说。语者，说三十七助道之法；义者，正知修行诸助道法能证于果。语者，说苦集道谛；义者，证于灭谛。语者，说无明根本乃至生缘老死；义者，知无明灭乃至老死灭。语者，说助定慧法；义者，明解脱智。语者，说贪恚痴；义者，解不善根即是解脱。语者，脱障碍法；义者，得无碍解脱。语者，称说三宝无量功德；义者，三宝功德离欲法性同无为相。语者，说从发心至坐道场，修集庄严菩提功德；义者，以一念慧觉一切法。舍利弗，举要言之，能说八万四千法聚是名为语，知诸文字不可宣说是名为义。

“云何依智不依于识？识者，四识住处。何等四？色识住处，受想行识住处，智者解了四识性无所住。识者，若识地大、水火风大；智者，识住四大法性无别。识者，眼识色住，耳鼻舌身意识法住；智者，内性寂灭外无所行，了知诸法无有忆想。识者，专取所缘思惟分别；智者，心无所缘不取相貌，于诸法中无所希求。识者，行有为法；智者，知无为法识无所行，无为法性无有识知。识者，生住灭相；智者，无生住灭相。舍利弗，是名依智不依于识。

“云何依了义经不依不了义经？不了义经者，分别修道；了义经者，不分别果。不了义经者，所作行业信有果报；了义经者，尽诸烦恼。不了义经者，诃诸烦恼；了义经者，赞白净法。不了义经者，说

生死苦恼；了义经者，生死涅槃一相无二。不了义经者，赞说种种庄严文字；了义经者，说甚深经难持难了。不了义经者，多为众生说罪福相，令闻法者心生欣戚；了义经者，凡所演说必令听者心得调伏。不了义经者，若说我、人、众生、寿命、养育、士夫、作者、受者种种文辞，诸法无有施者受者而为他说有施有受；了义经者，说空、无相、无愿、无作、无生，无有我、人、众生、寿命、养育、士夫、作者、受者，常说无量诸解脱门。是名依了义经不依不了义经。

“云何依法不依于人？人者，摄取人见、作者、受者；法者，解无人见、作者、受者。人者，凡夫善人、信行人、法行人、八人、须陀洹人、斯陀含人、阿那含人、阿罗汉人、辟支佛人、菩萨人，一人出世多所利益多人受乐，怜愍世间生大悲心，于人天中多所余润，所谓佛世尊——如是等名，佛依世谛为化众生故作是说。若有摄取如是见者，是谓依人。如来为化摄人见者故，说依法不依于人。是法性者，不变不易，无作非作，无住不住，一切平等，等亦平等，不平等者亦复平等，无思无缘得正决定，于一切法无别无异，性相无碍犹如虚空，是名法性。若有依止是法性者，终不复离一相之法。入是门者观一切法同一法性，是故说言依一切法不依于人。舍利弗，是名菩萨摩诃萨四依无尽。

无尽意菩萨经卷第四

“复次，舍利弗，菩萨摩诃萨修集助道功德、智慧亦不可尽。云何修集功德无尽？若布施、持戒心所修集，发行慈悲自所有罪发露忏悔，亦代众生发露忏悔。已行忏悔次当随喜，一切众生学无学人及辟支佛、发心菩萨已习行者、坚住不退一生补处，如是诸人于三世中所集功德，当以一心随其欢喜，复于过去、未来、现在诸佛世尊所有善根生随喜心，是随喜菩萨悉当成就如是功德。随喜已讫，次当劝请十方世界一切诸佛，始成道者请转法轮，示涅槃者常住于世，及请一切菩萨圣人，常为众生住世说法，如是善根如菩提想，悉以回向无上菩提。是菩萨未发心者劝令发心，已发心者为说诸度，有贫穷者救摄以财，病施医药随时瞻疗，无势力者劝行忍辱，有犯禁者令不覆藏，已覆藏者劝令发露，现在诸佛及涅槃者悉皆发心供养恭敬，敬重师长如佛世尊，若求法时没命不懈，于此法宝生无价想，于说法者生诸佛想，为听法故过百由旬心力勇锐无疲劳想，凡所讲说不为利养，于父母所知恩报恩，供养给事心初无悔，所作功德常无厌足，护身口意令无谄曲，建立佛塔所得功德等于梵天劝请之福，具足诸相开门大施故，得随形好修诸善根故，庄严身者无憍慢故，庄严口者离口过故，庄严意者不住法故，庄严佛土者神通教化故，庄严法者离诸欲故，庄严大众者不两舌恶口破坏他故，于受法者如实说故，说法欢喜称赞善哉，所作功业不唐捐故，离覆盖者故往听法故，庄严菩提树者以妙园

林奉施佛故，庄严道场者成就一切诸善根故，出生清净者不为烦恼所染污故，得宝手者能舍一切所重物故，得无尽者无量宝藏以布施故，见者欢喜常和悦故，体得法性者心慧光明等照众生故，庄严光明者不轻未学善诱导故，生生清净者持戒功德悉成就故，处胎清净者不见他罪故，生人天者净行十善故，慧明独步者所可教化不生分别故，于法自在者所爱重法无吝惜故，世中独胜者毕竟清净故，微妙解脱者不求少分行故，行一切功德者不舍一切智心故，七财满具者信为根本故，摄取正法者不惜身命故，不诳世间者具本誓愿故，具足一切佛法者诸善根本本已行故。舍利弗，是名略说菩萨功德。若广说者，若经一劫若过一劫不可得尽。

“云何菩萨智慧无尽？若一一因闻说智慧，若一一缘得于智慧。云何为因？内增上欲。云何为缘？外勤求法。如是因缘依佛智慧，非依声闻、缘觉智慧，亲近智者心无憍慢，常于其人起世尊想。是诸智者知受法人心已柔和，为说智慧教令依止，随其正器说无染法；听法之人于是法中，勤修聚集助法精进，是为智慧。云何菩萨助法精进？若无希求简绝事务省少语言，于诸所欲心常知足，初夜后夜减损睡眠，凡所闻义能善思惟筹量分别，数求善法心无爱浊，除诸阴盖无有障蔽，所犯过失寻能除灭，正行坚固趣向倾仰，尊敬法行具精进行，求法不懈如救头燃，无有我行不迟缓行，不舍本行心增上行，呵众闹行爱乐独行，向阿兰若处思惟行，圣种知足行，不动头陀行，欣乐法行，不思惟世间言语行，求出世间法行，不失正念行，发诸法义行，真正道行，知缘总持行，惭愧庄严行，智慧坚牢行，除无明网缠结系缚净慧眼行，善觉了行，广觉了行，不灭觉行，分析觉行，现在知行，不从他功德行，不自恃功德行，赞叹他人诸功德行，善修作业行，因果不动行，知清净业行。舍利弗，是名助法精进。

“复次，舍利弗，菩萨摩訶萨有四种施具足智慧。何等为四？一者、以纸笔墨施与法师令书写经，二者、种种校饰庄严妙座以施法师，三者、以诸所须供养之具奉上法师，四者、无谄曲心赞叹法师。舍利弗，是名菩萨四种布施具足智慧。菩萨复有四持禁戒具足智慧。何等为四？一者、持戒常演说法，二者、持戒常勤求法，三者、持戒正分别法，四者、持戒回向菩提，是名菩萨四种持戒具足智慧。菩萨复有四种忍辱具足智慧。何等为四？一者、于求法时忍他恶骂，二者、于求法时不避饥渴寒热风雨，三者、于求法时随顺和尚阿阇梨行，四者、于求法时能忍空无相无愿。舍利弗，是名菩萨四种忍辱具足智慧。菩萨复有四种精进具足智慧。何等为四？一者、勤于多闻，二者、勤于总持，三者、勤于乐说，四者、勤于正行。舍利弗，是名菩萨四种精进具足智慧。菩萨复有四种禅定具足智慧。何等为四？一者、常乐独处，二者、常乐一心，三者、求禅及通，四者、求无碍解智。舍利弗，是名菩萨四种禅定具足智慧。菩萨复有四种智慧具足智慧。何等为四？一者、不住断见，二者、不入常见，三者、了十二

缘，四者、忍无我行。舍利弗，是名菩萨修行四慧具足智慧。菩萨复有四拥护法具足智慧。何等为四？一者、拥护法师如己君主，二者、护诸善根，三者、将护世间，四者、护利益他。舍利弗，是名菩萨四拥护法具足智慧。菩萨复有四满足法具足智慧。何等为四？一者、说法满足，二者、智慧满足，三者、利益满足，四者、诸法满足。舍利弗，是名菩萨四满足法具足智慧。菩萨复有四力具足智慧。何等为四？一者、精进力求于多闻得解脱故，二者、念力菩提之心不忘失故，三者、定力等无分别故，四者、慧力修多闻故，是名四力具足智慧。复有四方便具足智慧。何等为四？一者、随世所行，二者、随众生行，三者、随诸法行，四者、随智慧行，是名四方便具足智慧。菩萨复有四道具足智慧。何等为四？一者、诸波罗蜜道，二者、助菩提道，三者、行八圣道，四者、求一切智慧道，是名四道具足智慧。菩萨复有四无厌足行具足智慧。何等为四？一者、乐于多闻无有厌足，二者、乐于说法无有厌足，三者、行慧无厌，四者、行智无厌，是名菩萨四无厌足具足智慧。复次，助智慧者，随一切众生心行，随一切法行，随布施行，随持戒、忍辱、精进、禅定、智慧行，随慈悲喜舍行，得具足智慧。何以故？如诸菩萨所发起行，皆以智慧而为根本，智慧成已还依止智。是菩萨安住于智依一切智，诸魔眷属不能留难，是故能得具一切智。舍利弗，是名菩萨助智无尽。

“复次，舍利弗，菩萨摩訶萨四念处亦不可尽。是菩萨观身修身行，见过去、未来、现在诸身颠倒和合，如外草木墙壁瓦石，从因缘有不可长养无所系属。此身如是从因缘生，不可长养无所系属，是阴界入中我我所空、常无常空，是身无我无有所，是身不坚不可依怙，当求菩提正觉之身。云何菩提正觉之身？所谓法身、金刚之身、不可坏身、坚牢身、出三界身。我身虽有无量过患，愿当除灭成如来身。是菩萨所以堪忍久处四大诸结焦然，皆为利益诸众生故。如外四大地水火风，种种门，种种所作，种种形貌，种种器物，种种所用，皆为利益一切众生；我今此身为利众生亦复如是。菩萨摩訶萨见如是利益已，观身众苦不生厌离，观身无常不厌生死，观身无我不舍教化，观身寂灭不随于舍。是菩萨观内身时不生烦恼，观于外身亦复如是。是菩萨离黑污身成白净身业，具足妙相以自庄严，于天人中多所利益，是名菩萨观身修身行。

“云何菩萨观受修受行？菩萨如是思惟：诸受一切皆苦善分别受，智慧筹量知受寂灭。若受乐时不贪所欲，若受苦时观三恶道起大悲心不生嗔恚，若受不苦不乐时不起愚痴。是菩萨正念受处，如其所受若苦、若乐、不苦不乐，于是诸受知出知修，观诸众生受寂灭庄严：‘是诸众生于诸受中不知出修，若受乐时生于贪著，若受苦时便生嗔恚，若受不苦不乐时便生愚痴。我今要当进修智慧，除一切受发诸善根，起大悲心摄取智慧，亦为众生除断诸受而为说法：未解受者受苦，解受者受乐。’云何解受者？所谓无受者、无我人众生寿命养育土

夫，除摄取受者。摄者受、取者受、受者受、有者受、颠倒者受、分别者受、诸见者受、眼相者受、耳鼻舌身意相者受、色相者受、声香味触法相者受、眼缘色生触受、苦受乐受不苦不乐受、耳声鼻舌舌味身触心缘法生触受，苦受、乐受、不苦不乐，是名为受。复有一受，心意觉了；复有二受，内受、外受；复有三受，过去、未来、现在受；复有四受，觉了四大；复有五受，思惟五阴；复有六受，分别六入；复有七受，七识住处；复有八受，八邪法也；复有九受，九众生居处；复有十受，十不善法。舍利弗，举要言之，无量众生诸受思惟所缘境界一切名受。菩萨于中修受观行起大智慧，知诸众生善不善受生住灭相。舍利弗，是名菩萨正受念处而不可尽。

“云何菩萨观心念处？菩提之心不忘不失，正念不乱如是观心，心生已灭无有住相，不于内住不外来。‘我初所发菩提心者，是心已尽过去变异，不至方所不可宣说无有住处。若心所集诸善根等亦是过去尽灭变异，不至方所不可宣说无有住处。若心善根回向阿耨多罗三藐三菩提，是亦灭尽变异之法，不至方所不可宣说无有住处。心不知心，心不见心，心不生心，我以何心成阿耨多罗三藐三菩提？’是菩提心不与善根心合，善根心不与回向心合，回向心不与菩提心合。若菩萨作是观时不惊不怖，是名菩萨勤精进也。又复思惟观察甚深十二因缘不失因果，知是心性属众因缘，不可长养无作无系，一切诸法亦复如是，如法修行如所庄严。‘我今当勤修集庄严不离心性。’云何心性？云何庄严？心性者，犹如幻化无主无作无有施設；庄严者，所作布施悉以回向严净佛土。心性者，如梦所见心相寂灭；庄严者，具足持戒修集诸通。心性者，如镜中像其相清净；庄严者，所修诸忍悉以回向无生法忍。心性者，如热时焰究竟寂灭；庄严者，于一切善深发精进回向具足无上佛法。心性者，无色无对无所为作；庄严者，一切所修禅定解脱三摩跋提回向具足佛之禅定。心性者，不可得见亦不可取；庄严者，于一切问难善能分别回向具足佛之智慧。心性者，无缘不生；庄严者，常观善根。心性者，无因不生；庄严者，因助菩提而发起心。心性者，舍离六尘心则无起；庄严者，入佛境界。如是菩萨观是心行系念神通，得神通已能知一切众生诸心，既知心已如其心量而为说法。又观心行系念大悲，教化众生无有厌倦。又观心行不起尽灭变异之相，不舍生死相续烦恼，正念是心知无生起成正决定。如是行者不堕声闻、辟支佛地，极是心势以一念智成阿耨多罗三藐三菩提。舍利弗，是名菩萨正心念处而不可尽。

“舍利弗，云何菩萨观法念处？常以慧眼见一切法，至坐道场未曾中失。是菩萨当观法时，不见一法乃至微相离空无相无愿无作无生无灭无物，亦不见一法乃至微相不入十二缘者。菩萨观法，见诸非法无不是法。云何为法？谓无我义、无众生义、无寿命义、无人义，是名为法。云何非法？谓我见、众生见、寿命见、人见，断见常见，有见无见，是名非法。复次，一切法是法，一切法是非法。何以故？观

空无相无愿，是名一切法是法；我慢、憍慢、我及我所摄取诸见，是名一切法非法。是菩萨观法时不见有法非菩提因、出世道因，是菩萨知一切法悉是出世得无碍大悲，观一切法烦恼结缚如幻化相，知是诸法非有烦恼非无烦恼。何以故？了诸法义无有二性。是诸烦恼无隐藏处无有聚集，若解烦恼即解菩提，如烦恼性即菩提性。是菩萨安住正念，无有一法可作分别，无诸障碍善能解了正住法性，如住法性即住众生性，如住众生性即住虚空性，如住虚空性即住一切法性。菩萨观法时，依于佛法解一切法即是佛法，其心尔时不生尽智无为，虽尽而亦不尽入无生智，亦观众生不舍假名。法念处者，安住正念一切诸法，所谓声闻、缘觉、菩萨、正觉所知一切假名诸法，尽未来际终不忘失。又法念处者，说无量行亲近佛法，坏诸魔众得自然智。舍利弗，是名菩萨正法念处而不可尽。

“复次，舍利弗，菩萨摩訶萨四正勤亦不可尽。何等为四？若未生恶不善法为不生故，生欲勤进摄心正除；已生恶不善法为断故，生欲勤进摄心正除；未生善法为生故，生欲勤进摄心正除；已生善法安住修集为增广不失故，生欲勤进摄心正除。未生恶不善法为不生故，生欲勤进。所谓欲者，善思惟也。勤精进者，不舍善思惟也。摄心正除者，观善思惟也。何以故？善思惟时，恶不善法不令入心。云何恶不善法？恶不善法，非戒聚伴，非禅定伴，非智慧伴。云何非戒聚伴？若破重戒及毁余戒，是名非戒聚伴。云何非定聚伴？若毁威仪及余乱心法，是非定聚伴。云何非智慧伴？若摄取诸见及余见障碍，是非智慧伴。是名恶不善法，善思惟时如是等恶法不令入心，是名初正勤。已生恶不善法为断故，生欲勤进摄心正除。如上所说，恶不善法心不聚集，无有方所无有住处，是不善法心行断故，已觉了故，从缘生故净故生欲，碍故生恚，无明缘故生于愚痴。是善思惟观不净时灭于欲心，修集慈心灭于嗔恚，观十二因缘灭于愚痴。如是烦恼永寂灭者，即是除断一切假名，亦复不见有可断者，是名第二正勤。未生善法为生故，生欲勤进摄心正除，是诸善法说有无量。何以故？无量善法菩萨修集，于是法中欲为根本勤进修集，摄心者出过善法，正除者在在处处常在善法，是名第三正勤。已生善法安住修集，为增广不失故摄心正住，是诸善根悉已回向阿耨多罗三藐三菩提。何以故？善根回向无上菩提者则不可尽。所以者何？如是善根不依三界，若依三界是则损耗，是故回向一切种智诸善根等不可得尽，是名第四正勤。舍利弗，是名菩萨修四正勤不可穷尽。

“复次，舍利弗，菩萨摩訶萨四如意分亦不可尽。何等为四？欲、进、心、思惟。如是四法，以慈悲喜舍而为根本。是四无量心常亲近，常亲近故心得调柔，心调柔故得入初禅、第二禅、第三禅、第四禅，入诸禅故身得轻软，成就如是身轻心柔入如意分，善入如意分已即生神通。若欲、若进、若心、若思惟，欲者专向彼法，精进者成就彼法，心者观察彼法，思惟者彼法方便，是如意分已具足故能得神

通。欲者庄严，进者成就，心者正住，思惟者能善分别。是菩萨得如意分随其所解，如其所作心得自在，随意所往善作诸业，毕竟成就一切本行，如风行空无所挂碍。舍利弗，是名菩萨四如意分不可穷尽。

“复次，舍利弗，菩萨摩訶萨五根亦不可尽。何等为五？信根、进根、念根、定根、慧根。云何信根？信于四法。何等四？于生死中行世正见信于业报，乃至失命终不作恶；信菩萨行不随诸见，专求菩提不求余乘；信解诸法同空无相无愿之法，同第一义同于了义，甚深因缘无我众生无有分别；信一切佛十力、四无所畏、十八不共法。如是信已消除疑网修集佛法，是名信根。何等进根？若法信根所摄，是法即为进根所修，是名进根。云何念根？若法进根所修，是法终不忘失，是名念根。云何定根？若法念根所摄，是法不忘不失一心不乱，是名定根。云何慧根？若法定根所摄，是慧所观是慧体性，内自照了不从他知自住正行，是名慧根。是五根者共相续生，具一切法得授记别。譬如外道五通神仙不能定知胎中差别男女相现然后乃知，多有菩萨无信等根，诸佛世尊不为授记，若成就者便与授记。舍利弗，是名菩萨五根无尽。

“复次，舍利弗，菩萨五力亦不可尽。何等为五？信力、进力、念力、定力、慧力。云何信力？是信一向不可沮坏，乃至天魔变为佛身，示现出入禅定解脱，不能倾动菩萨信力，是名信力。云何进力？菩萨精进于诸善法得坚固力，如所得力，修诸禅定诸天及人所不能坏，如本所愿皆悉成就，是名进力。云何念力？菩萨住诸善法不为烦恼之所破坏。何以故？是菩萨正念之力能摧伏故。如是念力无能坏者，是名念力。云何定力？远离喧闹常乐独行。是菩萨虽有所说，言语音声不碍初禅，善住觉观不碍二禅，心生欢喜不碍三禅。是菩萨虽乐化众生，不舍佛法而亦不碍于第四禅。是菩萨行四禅时，诸妨定法无能为也。菩萨尔时不舍于定亦不随定，而能自在处处往生，是名定力。云何慧力？是菩萨知世间法、出世间法，无有一法能坏是智。菩萨在在所生之处，一切伎艺不从师受悉自然知。世间外道苦行难行，是菩萨为教化故，亦悉现受同其所行。是出世法能过世者，慧力成就故，诸天及人所不能伏，是名慧力。舍利弗，是名菩萨五力无尽。

“复次，舍利弗，菩萨摩訶萨七觉分亦不可尽。何等为七？念觉分、择法觉分、进觉分、喜觉分、除觉分、定觉分、舍觉分。云何念觉分？若念觉分能观于法，能分别法撰集思智，亦能观察诸法自相。何等为自相？观一切法自性皆空，念如是等令其觉了，是名念觉分。云何择法觉分？若能分别晓了八万四千法聚，如所了法，了义是了义，不了义是不了义，世谛是世谛，第一义谛是第一义谛，假名是假名，正了无疑正是了无疑，如是等法分别选择，是名择法觉分。云何进觉分？若念法、择法、喜法、除法、定法、舍法，以智摄取精进勇猛，欲不退转勤修力励，不舍本意行于正道，是名进觉分。云何喜觉分？所修法喜，于无量法心生悦豫无有懈怠，清净乐法是喜踊跃，能

除身心舍诸烦恼，是名喜觉分。云何除觉分？若除身心及诸烦恼，离于覆盖入定境界令心正住，是名除觉分。云何定觉分？如所入定悉能觉了，非不入定是觉了法。又了诸见烦恼结缚，无始无终其心平等，一切诸法无别异相，能觉如是诸法等者，是名定觉分。云何舍觉分？若法忧喜其心不没，亦复不为世法所牵，无高无下正住不动，无有诸漏无喜无著，无诸障碍正直随顺真谛正道，是名舍觉分。舍利弗，是名菩萨七觉分亦不可尽。

“复次，舍利弗，菩萨摩訶萨八圣道分亦不可尽。何等为八？正见、正思惟、正语、正业、正命、正精进、正念、正定。云何正见？若见出世不起我见、众生寿命养育士夫、断见常见、有见未见，亦复不起善与不善无记等见，乃至不起生死涅槃二相之见，是名正见。云何正思惟？若思能起贪欲、嗔、痴诸烦恼等，是不名正。是正思惟不思不起如是等事，唯思戒、定、智慧、解脱、解脱知见。是正思惟能思如是住戒等聚，如是思惟名正思惟。云何正语？凡所演说令其身而有焦恼，亦不损他，成就如是善妙好语趣于正道，是名正语。云何正业？若业黑有黑报、白有白报、黑白有黑白报，终不敢作；若业非黑非白有非黑非白报，若业能尽业是业必作。是菩萨所依止业，勤修如是诸正业等，是名正业。云何正命？若不舍圣种头陀威仪，不动不转无诸奸诤，不为世间利养所牵，易养易满常自坚持威仪礼节，见他得利心不生热，于己利养常知足，如是正行圣人所赞，是名正命。云何正进？若进向邪非圣所赞，所谓贪淫、嗔恚、愚痴烦恼，是不正精进终不为之；若法能入正谛圣道寂灭涅槃攀缘正路，是正精进修集勤行，是名正进。云何正念？若念不失不动于法，正直不曲，见生死过进向涅槃，系心不忘不失正道，是名正念。云何正定？若定不乱于一切法，是菩萨如是住时成正决定，是名正定。菩萨住是三昧为一切众生得解脱故成正决定，是名正定。是八圣道悉是过去、未来、现在诸佛之道，是菩萨觉了已演说开示，分别显现成就佛道。舍利弗，是名菩萨八圣道分亦不可尽。

“复次，舍利弗，菩萨摩訶萨修行定、慧亦不可尽。云何为定？若心寂静正寂静寂灭不然，心常不乱守护诸根，不动不转无有卒暴，安详静默坚持不失，善调柔软独处闲静，其身远离心不回转，思乐空寂阿练若处，无有恶求亦无所求非有多求，正命正行威仪坚固，知时随时常知足，易养易满堪忍力故，心无高下能忍恶骂，发心专向善法思惟，乐思惟处及诸禅支，发起慈心入于悲心，安住喜心善修舍心，正入初禅、二禅、三禅、四禅、空处、识处、无所有处、非有想非无想处，善能思惟九次第定，是名为定。举要言之，菩萨助定无量无边勤行修集，是名菩萨定不可尽。云何为慧？是慧修道入于诸法无我、无人众生寿命，如是智慧分别诸阴如幻如化，诸界平等入如空聚，分别诸谛皆悉明了，随顺观知十二因缘，分别诸见因果果证。所谓分别者，于一切法能得正见、如实而见、真见、空见、无相愿见。

又分别者无分别故分别。所谓见者，亦无所见无所别知，如是见者为真实见，见真实者即得方便。是菩萨如是慧见不随无为，修行诸善心无所住，是名为慧。舍利弗，是名菩萨修行定慧而不可尽。

“复次，舍利弗，菩萨摩訶萨总持辩才亦不可尽。云何总持？所修善根正念积集，所有八万四千法聚能正受持不忘不失，是名总持。又复总持，若一切佛所说妙法，一切菩萨、缘觉、声闻凡夫众生音声善语，悉能受持是名总持。设劫灾起舍命余生，菩萨尔时正念总持不忘不失。如观掌中阿摩勒果，菩萨观见一切诸法亦复如是，是名总持。云何辩才？菩萨所说无有滞碍，所说无住、所说无断、所说通利、所说喜豫、所说捷疾，如是所说皆是先业清净果报，诸佛护念诸天摄受，说无错谬功不唐捐进向涅槃。菩萨成就如是辩才，所有色像及众生类，辩才应机不豫思惟不豫分别，善能赞说契经偈颂。若至大众、刹利众、婆罗门众、长者众、沙门众、四天王众、三十三天众、魔众、梵众，在在处处自然能知众生根量，以无碍辩而为说法。是菩萨如本喜乐讲宣法要终身不断，是名辩才。舍利弗，是名菩萨总持辩才亦不可尽。

“复次，舍利弗，菩萨摩訶萨撰集四法亦不可尽。何等四？是菩萨知一切行无常、一切行苦、一切法无我、一切法寂灭涅槃。云何无常？义无所有是无常义，无所破坏是无常义。是无常义者即无我义，若法无我能坏者性寂灭故，是名无常义。云何苦义？无所求故是苦义，爱染尽故是苦义，无所愿故是苦义，空无有故是苦义，是名苦义。云何无我义？毕竟无我是无我义，如无我义即是空义、无所有义、虚诳不实义，是名无我义。云何寂灭涅槃义？是寂灭义非念念灭，如非念念灭即是寂灭，菩萨得是无尽智慧，知一切法相同于寂灭，寂灭者即是涅槃，是名寂灭涅槃义。舍利弗，是名菩萨撰集四法而不可尽。

“复次，舍利弗，菩萨摩訶萨一道亦不可尽。云何一道？菩萨所得真实智慧不从他闻。又一道者，菩萨独一无有伴侣，已于阿耨多罗三藐三菩提能大庄严，以自力势精进摄取，毕竟自修不假他作，自以因缘勇猛之力建立如是坚固庄严。‘如诸众生所作善业，我亦如是悉当作之；及诸圣人从初发心所作诸行，我亦当作。施非我伴、我是施伴，戒忍精进禅定智慧非是我伴、我是彼伴，诸波罗蜜不能使我，而我能使诸波罗蜜，一切善根皆亦如是。如是等法虽非我伴我要当行，不恃于他勇猛自力独行无伴，坐于道场金刚座处坏诸魔众，以一念慧成阿耨多罗三藐三菩提，我当如是觉了分别。’舍利弗，是名菩萨一道无尽。

“复次，舍利弗，菩萨摩訶萨所修方便亦不可尽。云何方便？见一切法是方便，发起诸法是方便，为菩萨使是方便，毕竟分别是方便，无有齐限是方便，志意常求出世之法是方便，于布施时即能具足诸波罗蜜是方便，持禁戒时在在处处自在往生是方便，行忍辱时庄严

自身及菩提道是方便，行精进时心无所住是方便，修禅定时无有退失是方便，修行慧时不证无为是方便，修慈心时愍无力势是方便，修悲心时不厌生死是方便，修喜心时无乐处乐是方便，修舍心时发心修集一切善根是方便，能修天眼为欲成就诸佛眼故是方便，修集天耳为欲成就诸佛耳故是方便，修他心智为得佛智知诸众生根量深浅故是方便，修宿命智为得佛智知于三世无挂碍故是方便，修集神通为得诸佛神通力故是方便，随众生心是方便，既自晓了复了众生是方便，能自度已示现未度而方勤修求于度世是方便，已离烦恼示有烦恼是方便，已舍重担示有重担是方便，能知根量随量说法是方便，善能诱进钝根众生是方便，知时非时是方便，知可行道堕邪众生安置正道是方便，能令量作无量无量作量是方便，令损坏者还复如本是方便，示现胜地是方便，示说涅槃有五欲乐是方便，已得解脱示有系缚是方便，处在生死不堕生死是方便，于诸威仪无所专当亦不退失是方便，唯观众生不观持戒及以毁戒是方便，摄诸见缘不生诤竞是方便，悉是音声假名无实是方便，常行三界是方便，得解脱相行是方便，亲近凡夫如亲近圣人是方便，不证涅槃常处生死是方便，于魔行处显大光明无有烦恼是方便，一切是一切非是方便。舍利弗，是名菩萨修行方便亦不可尽。舍利弗，是名菩萨摩诃萨八十无尽。是八十无尽悉能含受一切佛法。”

无尽意菩萨摩诃萨说是法门品时，六十七百千众生未发心者即发阿耨多罗三藐三菩提心，五百二千菩萨摩诃萨得无生法忍。

尔时，大众以种种华香、种种华鬘、种种华盖，供养如来及无尽意并是经典。于上空中有量天乐，自然出声作如是言：“诸佛世尊于无量劫所集阿耨多罗三藐三菩提，无尽意菩萨今于是大集经中已说其义。若有闻是无尽法门，信解受持读诵解说，当知是人则为具足是无尽法。”

尔时，世尊以覆肩衣与无尽意赞言：“善哉！善哉！大士快说是义！非但我许，十方诸佛亦复如是。”

尔时，无尽意菩萨摩诃萨两手捧衣置自顶上，而白佛言：“世尊，诸天世人当视是衣过于塔想，以是如来所受用故。”

尔时，多有种种宝衣、种种宝盖、种种宝幡、种种宝树、种种宝鬘，从十方世界自然而来，覆无尽意而为供养。是时，宝衣、幡盖、树鬘自然演出如是之言：“善哉！善哉！善男子，善能说是无尽法门。如汝所说，我等所许。”

尔时，舍利弗白佛言：“世尊，如是宝衣供养之具，从何处来乃出是言？”

佛告舍利弗：“是无尽意菩萨初发阿耨多罗三藐三菩提心时，所化众生皆于十方已成阿耨多罗三藐三菩提。是彼诸佛正遍知等，知恩报恩故，遣是来称扬赞叹是无尽意真实功德，并复供养所说经典。”

尔时，大众于无尽意菩萨摩诃萨，倍生恭敬尊重赞叹，作如是

言：“我等今者快得大利，得见无尽意菩萨，恭敬供养尊重赞叹，并得闻是无尽法门。若有直得闻无尽意菩萨名字亦得善利，何况眼见兼闻是典！”

尔时，世尊于大众中闻是语已，告舍利弗：“若有善男子、善女人学菩萨道，于一劫中供养诸佛，学戒威仪，以堪忍力尽诸众生生死苦际，精勤修集如救头燃，于诸禅定一心成就智慧方便，若离此经，我说是人未能具足六波罗蜜。舍利弗，若有善男子、善女人，闻是经典信解受持、读诵解义、如说修行，我说是人已为具足诸波罗蜜，速得成就阿耨多罗三藐三菩提。何以故？舍利弗，若有菩萨受持此经为他演说，即为具足檀那波罗蜜。何以故？于诸施中法施为胜。初不忘失菩萨之心，若持此经即是持戒，故能具足尸罗波罗蜜。何以故？一切菩萨所学禁戒是经所摄。若于此经能堪忍乐，一切众生所不能坏，能于是中进修忍辱，即为具足羼提波罗蜜。若是经典勤行转说，身口意业精勤修集，即为具足毗梨耶波罗蜜。若于是经其心寂灭无有散乱，一心定意分别法相，即为具足禅那波罗蜜。若于是经自得现智，不从他闻得正行智，即为具足般若波罗蜜。舍利弗，若有菩萨勤学是经，若欲具足诸波罗蜜则为不难。舍利弗，若有菩萨学习此经，受持读诵，如说修行，书写经卷，当知是人一切佛法已为在手。四大之性可变令异，是菩萨心于阿耨多罗三藐三菩提不可复转。舍利弗，此经典者即是菩萨不退转印，是故菩萨当求是印。若有善男子、善女人亲近是印者，则为亲近一切佛法。”

尔时，四天王及其眷属即从座起，合掌向佛白佛言：“世尊，我等四王是佛弟子，已得道迹。若有善男子、善女人受持是经，我等堪任为作卫护供给侍使，当于是人起如来想。何以故？是经典中出诸乘故。”

尔时，释提桓因即从座起，合掌向佛白佛言：“世尊，我数从佛闻无量无边百千经典，未曾得闻如是经典分别深义。世尊，在在处处国土郡县城邑村落有说此经者，我躬当与三十三天故往听受，并护法师益其气力，勇猛精进正念辩才，令是法师于诸大众得无所畏广能宣说如是经典。”

佛言：“善哉！善哉！憍尸迦，汝欲拥护是说法者，令得勇进正念辩才。憍尸迦，若欲拥护是说法人，即为拥护诸佛正法，护正法者则为拥护一切众生。”

尔时，梵自在天王合掌长跪前白佛言：“世尊，若是经典流布之处，我躬当与其余梵众并诸眷属，舍禅喜乐往诣彼所听受咨请。我往彼时当现四瑞令其觉知。云何为四？一者、令见微妙光明；二者、得闻殊异之香；三者、令说法者得无碍辩及正忆念，所说吉祥不失章句；四者、令其大众发善欲心，喜乐听法无有厌足。以是四瑞，应知梵天王与其眷属躬来听法。”

尔时，第六魔王波旬合掌白佛言：“世尊，如是经典，令我势力

一切羸劣。何以故？若有菩萨闻是经典受持读诵为他广说，当知其人即为受记。世尊，如是菩萨所往之处至诸佛界，当知如佛世尊，我今所有憍慢嫉妒贡高之心，以无尽意威德力故皆已摧伏。我今当护如是经典及说法者，是经所在流布之处，乃至不起一念之心而作留难，何况身往故作因缘？”

尔时，佛告尊者阿难：“汝从今日当为正法久住世故，受是经典持读诵说。”

尔时，阿难正服而起，偏露右肩，右膝著地，前白佛言：“世尊，我今敬奉佛教受持是经，但恨不能广宣流布如诸菩萨。”

佛告阿难：“汝且自安，今此会中有诸菩萨摩訶萨等，自能护持令此经典广宣流布。”

尔时，会中有六十亿诸菩萨摩訶萨应护法者，即从座起合掌白佛言：“世尊，我等要当宣传此经令至十方。娑婆世界弥勒大士，自当于中护持是典及说法者。世尊，若佛灭后后五百岁，若有菩萨闻是经典受持读诵，当知皆是弥勒神力之所建立。”

尔时，佛赞护法菩萨摩訶萨众：“善哉！善哉！诸善男子，汝等不但今于我前护持正法，亦曾护持过去恒沙诸佛正法。”

尔时，无尽意菩萨摩訶萨白佛言：“世尊，我今自以少智慧分说是经典，文字句义必不具足，今于佛前及无尽法所可成就诸菩萨等忏悔过失。”

佛告无尽意菩萨：“善男子，若有菩萨得四无碍智，凡所讲说无有错谬。如是菩萨得真空义分别法门，乃能宣说如是经典。善男子，汝今已到第一之处，成就四辩自在无碍，是大乘经不从他闻而能分别。善男子，汝今成就如是住位，身口意业无有错谬。何以故？菩萨所修三业成就，常以智慧为根本故。善男子，已有无量百千万亿诸佛世尊，皆共称扬听汝所说。无尽意，汝本已于我所及诸佛所，毕竟忏悔无有漏失。”

尔时，尊者阿难白佛言：“世尊，此经何名？云何奉持？”

佛告阿难：“此经名《无尽意所说不可尽义章句之门》，又名《大集》，当如是奉持。阿难，汝应信受如是经典。何以故？汝受是已所得持念倍前千数，若为他说则立佛事。”

佛说是已，无尽意菩萨摩訶萨，尊者阿难、舍利弗，诸天、龙、神、乾闥婆、阿修罗等，一切大众莫不欢喜，作礼而去。

大集譬喻王经卷上

复次说此法时，命者奢利弗，从座而起，一肩优多罗僧伽作已，右膝著地，合掌白言：“大德世尊，我欲少问，愿佛听许，如我所问，赐为解说。”

如是言已，佛告命者奢利弗言：“奢利弗，随汝所欲，当问如来阿罗诃三藐三佛陀。其所问者，我为汝说，令心欢喜。”

如是语已，命者奢利弗言：“大德世尊，此阎浮洲若有雨时，于何处雨当名善雨？”

如是语已，佛告命者奢利弗言：“甚善！奢利弗，汝以妙辩善思念，如是义欲问如来。汝欲利益多众生故，欲令多人得安乐故，怜愍世间利益安乐诸天人故，亦为现在未来发菩萨乘诸善家子、善家女等令生精进力故。奢利弗，善听善念，我为汝说。”

奢利弗言：“如是，世尊，我今乐闻。”

佛告奢利弗言：“奢利弗，阎浮洲人，所有甘蔗、蒲桃、大麦、小麦、胡麻、稻粟、小豆、大豆、江豆、毕豆、迦荼诃利那豆，如是等田及余苗稼，于彼处雨名为善雨。何以故？若于彼处成就诸味，阎浮洲人得用活命，是故于彼处雨名为善雨。”

奢利弗复言：“世尊，善家子、善家女，若欲法施，于何处与名为善与？”

佛告奢利弗言：“奢利弗，我说法施，若于诸处普法施时名为善与。奢利弗，我今复说，若法施时与诸菩萨摩訶萨，于法施中名为胜上善与。何以故？彼善家子为诸众生求法，是故施彼法时，名为胜上善与。

“奢利弗，譬如于大海雨，非不有果，非无受用。如是，奢利弗，若于菩萨摩訶萨所，与法施时，非不有果，非无受用。何以故？彼善家子为诸众生求法故。

“奢利弗，譬如有人磨拭摩尼宝时，若勤用力名为善作。何以故？奢利弗，磨拭摩尼宝时，与作百千水精珠等。如是，奢利弗，于诸菩萨摩訶萨所，若作力者名为善作。何以故？彼善家子为诸众生，当求阿耨多罗三藐三菩提，发行无上菩提故。

“奢利弗，譬如大海，无处不得下，无处不得入。何以故？大海渐深，大海渐下，是故无处不得下，无处不得入。如是，奢利弗，菩萨摩訶萨于般若波罗蜜巧方便中，修菩萨行，亦无有法而不能说。

“奢利弗，譬如一滴水池种优钵罗华叶出生，虽同一池其华外叶不如是妙，不得如是称赞贵重，然彼内华则为男子、女人称赞贵重。如是，奢利弗，声闻、独觉同一法界证已，不得如是称赞贵重；然彼

如来阿罗诃三藐三佛陀，则为世间天、人、阿修罗等称赞贵重。是故，奢利弗，见是义故，善家子、善家女应发是心：‘莫同一法界证而得声闻、独觉名字，不得如是称赞贵重。如彼如来阿罗诃三藐三佛陀，我等今者应发阿耨多罗三藐三菩提心，当得如是称赞贵重，如彼如来阿罗诃三藐三佛陀。’

“奢利弗，譬如若沉水树、若栴檀树，其叶不得称赞贵重如自体香。如是，奢利弗，同一法界证已，声闻、独觉智慧，不得具足如真实香；然彼如来阿罗诃三藐三佛陀，真香具足。奢利弗，见是义故，善家子、善家女所有善根，皆应回向阿耨多罗三藐三菩提。奢利弗，我说彼等由善友满，于阿耨多罗三藐三菩提中，欢喜爱者，教彼勤行令欢喜爱。何以故？奢利弗，我昔亦由善友摄故，今成阿耨多罗三藐三菩提。

“奢利弗，如有一人欲取珍宝，更第二人亦欲取宝。彼者前人示第二人向宝洲道所出宝处，我说是人无有慳吝。如是，奢利弗，若示遍智宝洲道者，我说是人亦无慳吝。奢利弗，如大价宝，直多百千出大海中，宝在海时无人磨拭，至阎浮洲乃有磨拭。如是，奢利弗，若有欲见如来者，发阿耨多罗三藐三菩提心，各各见佛胜功德已，彼即广行当成声闻，彼广行已当成独觉，彼广行已当成阿耨多罗三藐三菩提，余诸善根由值善友皆成广大。奢利弗，见是义故，善家子、善家女，应求善友亲近承事，既承事已须修多业，不久当成阿耨多罗三藐三菩提。何以故？我昔亦由善友摄故，今成阿耨多罗三藐三菩提。

“奢利弗，如摩尼宝，若磨拭时细末流下，然其细末不得如是称赞贵重。如彼摩尼大宝，则为国王、若王大臣及余智能别宝者，称赞贵重。如是，奢利弗，声闻、独觉虽同一法界证，不得如是称赞贵重；然彼如来阿罗诃三藐三佛陀，则为世间诸天及人、若乾闥婆、阿修罗等，称赞贵重。

“奢利弗，譬如有人，自将金持诣金师所、若金师弟子所，到已告言：‘汝取此金为我作钏，我著脚上。’时彼金师若彼弟子告言：‘丈夫，我以此金为作璎珞，随汝顶戴若颈若手，击已多有百千人众，见生欢喜赞叹于汝。’奢利弗，时彼愚人不用金师利益善语，报金师言：‘汝但为我作于脚钏。’如是，奢利弗，善家子、善家女，若如来所、若声闻所，作胜上施法时，或有善友来至其所告言：‘丈夫，汝今作此胜上施法，是不顺善！所谓以此胜上施法，而于有量法中回向，若声闻地、若独觉地。汝今作此胜上施法，所有善根，堪能回向阿耨多罗三藐三菩提。’奢利弗，于世间、出世间法中，诸佛世尊最是第一巧胜智慧。奢利弗，是故诸佛世尊，赞叹阿耨多罗三藐三菩提。何以故？此是无上回向，所谓阿耨多罗三藐三菩提。奢利弗，见是义故，善家子、善家女所有善根，皆应回向阿耨多罗三藐三菩提。

“奢利弗，如有二人，于中一人善作金色劫波娑缕，同一树生，所作细衣价直百千。一人欲作仆使粗衣，到织师所，告言：‘丈夫，我

此金色劫波娑缕善料理讫，同一树生为我好织。’织师报言：‘丈夫，我当与汝作衣价直百千，何用粗衣？’彼人不纳织师善语，报织师言：‘但为我作仆使粗衣。’如是，奢利弗，虽同一法同一善根，或有攀缘声闻地者，或有攀缘独觉地者，或有住于无上道者。奢利弗，于中若有攀缘声闻、独觉地者，应当语言：‘汝此善根是如来因。’若求无上佛菩提者，应亦语言：‘汝此施法所有善根，当同一聚回向阿耨多罗三藐三菩提。如是回向，以彼善根施诸众生，作无尽心当摄取之。因此善根愿诸众生，当得具足不可思智、不可称智、三界最胜无上智等，如彼如来阿罗诃三藐三佛陀。’奢利弗，见是义故，善家子、善家女，应种善根于阿耨多罗三藐三菩提。

“奢利弗，譬如国王第一夫人产生八子，于诸子中惟有一子具足王相，得绍王位以水灌顶，余诸王子复悉围绕依法奉事。奢利弗，于意云何？非彼母腹而有过失，令余王子不得灌顶大王位耶？”

奢利弗言：“不也，大德世尊。何以故？彼余王子，自于往昔不作王业不种善根，以是因缘，彼余王子悉不得绍灌顶王位。”

佛言：“如是，奢利弗，同证一法界已，如来阿罗诃三藐三佛陀得名法王，余诸善家子等得声闻名，非此法界有过失耶？”

奢利弗言：“不也，世尊，非此法界有其过失。然由彼等于往昔时所作善根不能回向无上菩提，不行此道，亦不发愿，不作胜上善根，又不愿求遍知利益，是故今但生声闻事。彼等亦不行如来行，又无如来功德，不具神通如诸如来阿罗诃三藐三佛陀。”

“奢利弗，以是义故，善家子、善家女，所作善根皆应回向无上菩提。奢利弗，譬如波利质多罗俱毗陀罗树，有时初生三十三天皆大欢喜，作如是言：‘此树既生，三十三天不应久空。’如是，奢利弗，有时善家子、善家女发无上菩提心，彼时所有正信三宝天、龙、夜叉、乾闥婆、阿修罗、伽留茶、紧那罗、摩睺罗伽、人非人等，心生忻跃云：‘此道场不应久空，菩萨摩訶萨得成无上菩提。’奢利弗，譬如彼波利质多罗俱毗陀罗树，三十三天见叶出时不赞不重，若见华时心生忻跃。如是，奢利弗，声闻、独觉证一法界，诸天世人不赞不重，若见如来阿罗诃三藐三佛陀，心生欣跃。何以故？如来阿罗诃三藐三佛陀，具诸善根及三十二大丈夫相，所有光明胜于日月，能照无量诸佛刹土怜愍众生。奢利弗，譬如彼波利质多罗俱毗陀罗树，若增长时，三十三天应知此树不久当有多叶，百千俱致那由多叶，乃至无量阿僧祇叶以覆其上。如是，奢利弗，彼初发心菩萨摩訶萨，生时长时应知当有百千俱致那由多等声闻，乃至无量无边阿僧祇诸声闻众，围绕在前，多有声闻、独觉出现。

“奢利弗，譬如须弥山王，有别峰处高百踰阇那，或高二百踰阇那，乃至七百踰阇那，此等别峰不得言是大须弥山。如是，奢利弗，从如来智出生声闻，亦不得言其智具足如诸如来阿罗诃三藐三佛陀，彼亦不具足如来十力、四无畏智、无碍智等，然其如来阿罗诃三藐三

佛陀则具诸力、无畏、无碍智等。奢利弗，譬如须弥山王住处，应知即有多天子众，百千俱致那由多等，乃至无量无边诸天子众，出现于彼在其山顶，受天福报心甚爱乐，天欲游处随意即游。如是，奢利弗，彼初发心菩萨摩訶萨生时长时，善根回向无上菩提，应知当有多声闻众，百千俱致那由多等乃至无量无边诸声闻众出现于世，诸圣行处随意即游。奢利弗，譬如须弥山王住处，即有四畔俱时而住终无先后。如是，奢利弗，菩萨摩訶萨善根回向无上菩提，尔时即有佛性、佛地、佛智、佛功德等，俱时出生亦无先后。奢利弗，譬如须弥山王住处，若分分断比于余山犹为高大。如是，奢利弗，彼初发心菩萨摩訶萨，善根回向无上菩提，若即以比诸余善根，足为最上高大住持。奢利弗，譬如须弥山王有金色边，若诸鸟兽至其边者，皆同一色所谓金色，即与师子兽王同色。奢利弗，虽与师子兽王同一金色，然其力势功德名称，彼悉不共师子王等，亦复不如师子兽王游戏频申无畏吼声。如是，奢利弗，声闻、独觉虽与如来同于一味谓解脱味，不得即共如来阿罗诃三藐三佛陀等，彼无如来如是功德诸力、无畏师子吼声。然其如来则具方便智慧诸法，此方便智声闻、独觉尚皆不闻。况能出生如来功德、如来游戏、如来雷声？如来以师子吼而吼高出诸世。奢利弗，如诸鸟兽与师子王虽同一色，而余功德悉不共等，不得名为师子兽王。如是，奢利弗，声闻、独觉虽与如来同解脱味，而亦不共如来齐等，以彼不得功德名称，不得如来无上上名及如来体，又亦不得无上菩提诸力、无畏、无碍智等。以是诸力无畏无碍智等具足故，名如来阿罗诃三藐三佛陀。奢利弗，见是义故，善家子、善家女所作善根皆当回向无上菩提。

“奢利弗，譬如四天王天普于须弥山边而住，三十三天住于山顶。奢利弗，于意云何？须弥山上岂不容受四天王天，而彼四王不住顶耶？”

奢利弗言：“不也，世尊，须弥山上非是不容四天王天。而彼不住，但彼往昔不种山上受用福报；以其不作如是业故，不得住于须弥山顶。”

“如是，奢利弗，我此法体亦无过失，而不容受诸声闻等，令其不得十方世界智。以彼往昔所作善根，不知回向无上菩提，亦不发愿修如是行，不发最上遍智智心，是故今作声闻，不得游于如来行处，又无如来功德，亦不具足诸力、无畏、无碍智等。以佛具足是智故，名如来阿罗诃三藐三佛陀。

“奢利弗，譬如大海不停死尸。如是，奢利弗，阿鞞跋致菩萨摩訶萨不共慳居。奢利弗，譬如大海潮不过时。如是，奢利弗，阿鞞跋致菩萨摩訶萨若乞士来终不过时。奢利弗，譬如有人若取滴水于大海中，皆是一味所谓碱味。如是，奢利弗，菩萨摩訶萨若以种种百千诸门，所作善根回向无上菩提，皆成一味谓遍智味。奢利弗，譬如金性出金，随种种意作诸瓔珞，转得种种瓔珞名字。如是，奢利弗，以一

佛智转成多种百千瓔珞，所谓出生众生善根。

“奢利弗，如王作钱，若已印有文者得名为钱，若未印无文者不得钱名。如是，奢利弗，菩萨摩訶萨未得无生法忍，诸佛世尊未授阿耨多罗三藐三菩提记；若得无生法忍已，诸佛世尊然后记言：‘汝善家子，于未来世，当得如来阿罗诃三藐三佛陀。’奢利弗，譬如外道仙人有天眼者，若见有人初住胞胎未记色类，以其未成男女相故；后时若成男女相已，外道仙人方以天眼，记言当生是男是女。如是，奢利弗，菩萨未得无生法忍，诸佛世尊未授阿耨多罗三藐三菩提记；若彼后得无生法忍，诸佛世尊方与其记：‘汝善家子，于未来世当得如来阿罗诃三藐三佛陀。’

“奢利弗，譬如日轮出时不作是念：‘我光当照此阎浮洲。’但使日轮共光出时，于阎浮洲必作照明，令阎浮洲所有诸人显明诸色。如是，奢利弗，菩萨摩訶萨若得遍智智时，亦不作念：‘我当照明三千大千世界。’奢利弗，菩萨摩訶萨行是法行坐是地分，具是生相具是善根，彼当如是觉智；以是觉智，彼菩萨摩訶萨必自照明三千大千世界。

“奢利弗，譬如二人皆欲得宝入于宝洲，于中一人取无价宝，其第二人取有价宝。于时智人言：‘丈夫，此处有无价宝，汝可取之。此宝多价，国王大臣若城邑人及余智人别识宝者皆共称赞贵重为上。’此人不用彼人语故取有价宝。如是，奢利弗，此佛教法亦似宝洲，有人到已即作无价念行具足，谓遍智智宝相应念，远离声闻、独觉等念；复有第二人，以声闻、独觉相应念行。奢利弗，同一法界证已，如来阿罗诃三藐三佛陀在法王数，复有自余诸善家子成声闻已在声闻数，得遍智者普见数如如来阿罗诃三藐三佛陀。

“奢利弗，譬如如意宝珠，随到谁手彼即自在，无有一宝而不得者。如是，奢利弗，菩萨摩訶萨无有一众生所而不与作宝事，无有一众生所而不教作善根乃至无为涅槃。奢利弗，譬如作摩尼人若作摩尼弟子，随所有宝外畔浊恶，若磨拭已光色胜上；知色胜已，彼作珠人若彼弟子，当得多种百千财聚而用活命。如是，奢利弗，菩萨摩訶萨随于他心令生善根，如彼善根皆以自心方便智摄，以此善根成诸佛法。奢利弗，如摩尼宝若未净时须好覆藏。何以故？彼摩尼宝是无价故。如是，奢利弗，彼初发心菩萨摩訶萨，初发心时诸天及人若乾闥婆、阿修罗世当须守护。何以故？彼善丈夫为诸大人阿修罗世发阿耨多罗三藐三菩提心。奢利弗，如摩尼宝虽未磨拭，当知即为国王、大臣、若城邑人及余智人别识宝者称赞贵重。如是，奢利弗，彼初发心菩萨摩訶萨，当知亦为诸佛世尊、菩萨、声闻称赞贵重。

“奢利弗，譬如有人若见佛时，当须如是生希有心：‘彼如来阿罗诃三藐三佛陀，时时出世，我今可发阿耨多罗三藐三菩提心，丰正法业，以此正法教诸众生善根聚集。彼诸善根，皆当回向阿耨多罗三藐三菩提。’彼回向时，若有无信比丘、比丘尼、优婆塞、迦优波斯迦，

若摩罗波卑、若摩罗身天来到其所，说大乘过令其舍离令不乐欲。奢利弗，于意云何？彼等岂不为多众生百千俱致那由多等，乃至无量无边阿僧祇诸众生等，作无义利，作不安隐，令苦令堕耶？”

奢利弗言：“如是，大德婆伽婆。如是，大德修伽多。何以故？为诸众生作无义利，作不安隐，令苦令堕，所谓于发大乘诸善家子、善家女所，说大乘过令不乐欲阿耨多罗三藐三菩提，令退令离。”

佛言：“奢利弗，若欲不舍如来阿罗诃三藐三佛陀者，应求阿耨多罗三藐三菩提。是故，奢利弗，诸发大乘善家子、善家女，于阿耨多罗三藐三菩提，应当乐欲莫退莫离。何以故？我说不舍如来阿罗诃三藐三佛陀者，谓发大乘善家子、善家女，于阿耨多罗三藐三菩提乐欲不离不退者是。奢利弗，譬如饥馑恶世，所种不生如在石上种。时若王、若王大臣、若刹帝利、若刹帝利大臣、若婆罗门、若婆罗门大家、若长者、若长者妇、若长者大家，在于城邑为众人故，集种种谷而作大仓。时众人等皆诣仓所，取种种谷将归而食。时有一人，到彼仓处放火烧之。奢利弗，于意云何？是不善人，岂不于多百千俱致那由多等，乃至无量无边阿僧祇诸众生所，作无义利，作不安隐，令苦令堕耶？所谓是不善人，于彼仓处放火烧坏不令受用。”

奢利弗言：“如是，世尊。”

佛言：“奢利弗，如是，如是，正法欲灭于时有人，闻如来阿罗诃三藐三佛陀或时出世；彼人闻已于众生所而生大悲，生大悲已，发阿耨多罗三藐三菩提心。于时若有不善人出，于发大乘诸善家子、善家女所，说大乘过令不乐欲，阿耨多罗三藐三菩提令退令离。奢利弗，于意云何？是不善人，乃与无量无边阿僧祇诸众生等，作无义利，作不安隐，令苦令堕。所谓于发大乘诸善家子、善家女所，说大乘过令不乐欲，阿耨多罗三藐三菩提令退令离。”

奢利弗言：“如是，世尊。”

“奢利弗，譬如商主多将商人在道而去，逢大险河多有流水。时有一人语第二人作如是言：‘丈夫当作方便计校用力求船。’其第二人语彼人言：‘我正住此不能求船。’于时彼人有志有力，勤作方便求船将来置于河边，乃有无量无边阿僧祇众生，得从此岸度至彼岸，既得度已于彼岸住。其第二人懒堕无智少力薄福，仍住本处不能度河。更有余人来到河所亦欲求度，见彼懒堕无智少力薄福人已，语云：‘丈夫，汝何不度？’时懒堕人作如是言：‘共我伴者方便用力，求得船来置于河边，已令百千那由多俱致众生得从此岸度至彼岸。’时彼余人语是人言：‘奇懒堕人！何不学伴而堕此处受无量苦？’如是，奢利弗，我见二人行布施时，一人语彼第二人言：‘丈夫，汝可相应善作方便计校用力，聚集善根于阿耨多罗三藐三菩提。’第二人言：‘我不取阿耨多罗三藐三菩提，但欲到阿罗汉。’若欲到阿罗汉者，亦须相应方便计校用力，当得出生初第耶那，如是出生第二、第三、第四第耶那、虚空无边处、识无边处、无所有无边处、非想非非想处三摩跋帝，于其

中间即使命终，乘此得生非想非非想天，身当得长寿久住，乃至八万四千劫限而住。尔时，彼人证觉阿耨多罗三藐三菩提，觉已为多众生百千那由多俱致，乃至为无量无边阿僧祇众生说法，说法已于后以无余涅槃而取涅槃。时第二人，乘此仍在彼非想非非想天住。”

如是语已，命者奢利弗言：“如是，大德婆伽婆。如是，大德修伽多，实如如来所说。世尊，当知彼人是其懒堕，若乐初第耶那乃至非想非非想天，乐著彼处，即乐著已更不能与上人法合，不作方便计校用力，不近善友随顺承事，不如实观三解脱门，当知是懒堕人。世尊，彼菩萨摩訶萨大勤精进，声闻少信是其懒堕。世尊，见是义故，善家子、善家女所有善根，皆当回向阿耨多罗三藐三菩提。”

“奢利弗，譬如有摩尼宝具多功能，将问作摩尼宝人言：‘此摩尼宝有何功能？’问已彼随所知如是说，于中若多知者说多，若少知者说少。如是，奢利弗，同证一法界已，乃有转生声闻智者，彼等随胜功德而知，随胜功德而说，随其所问还如是答，依有限智，以昔有限发愿故。然如来阿罗诃三藐三佛陀有无限智，以昔无限发愿故；有无限无碍智、无限六波罗蜜，善巧方便成熟众生。何以故？如来阿罗诃三藐三佛陀，昔行菩萨道时集无边愿，以是无边功德法庄严故证于遍智。

“奢利弗，譬如波利质多罗俱毗陀罗树，初生小华其有香气，彼阎浮洲诸生华香，若钵摩那、若婆梨师、若占波迦，自余诸生华香，彼皆不及波利质多罗俱毗陀罗树初生诸小华香。如是，奢利弗，其诸声闻、独觉所有善根，若名闻、若香、若威德、若力，皆不及彼初发菩提心菩萨摩訶萨，何况入行？何况不退？何况一生补处？何况至灌顶时？何况住普贤菩萨行？何况在胜道场？何况如来阿罗诃三藐三佛陀？所有香、所有威德、所有力，具足此力所谓诸佛世尊。

“奢利弗，譬如此阎浮洲所有流泉浴池、泊河、小河、大河等皆入大海，然其大海亦不厌足。如是，奢利弗，菩萨摩訶萨于陀那波罗蜜而不厌足；如是尸罗波罗蜜、羼提波罗蜜、毗梨耶波罗蜜、弟耶那波罗蜜、般若波罗蜜、方便遍智，所有善根亦不厌足。奢利弗，譬如此阎浮洲所有流泉浴池、泊河、小河、大河等，大海之内悉能含受。如是，奢利弗，所有天、龙、夜叉、乾闥婆、阿修罗、伽留茶、紧那罗、摩睺罗伽、人非人等，乃至所有众生界等，菩萨摩訶萨悉能含受，与甘露味令彼等喜。

“奢利弗，譬如大那伽那大力士神所著铠甲，阎浮洲人皆不能著。如是，奢利弗，菩萨摩訶萨于佛法中所著铠甲，为诸众生著彼铠甲，其诸声闻、独觉不能著彼铠甲。如是，奢利弗，从初发心乃至坐胜道场，不舍菩萨摩訶萨如是铠甲行菩萨行。奢利弗，初发大乘善家子、善家女，应如是学，相应用力勤修于业，则当速成阿耨多罗三藐三菩提。

“奢利弗，如雪山王南畔所有诸树，具足诸华诸果诸香，彼等诸

树阎浮洲人皆不得用。如是，奢利弗，声闻、独觉虽有无漏戒、定、智、解脱、解脱知见善根，彼等众生皆不得用。如诸菩萨摩訶萨戒、定、智、解脱、解脱知见善根，诸众生等皆当得用。奢利弗，是故菩萨摩訶萨应著如是铠甲，所有戒、定、智、解脱、解脱知见善根，彼诸众生皆当得用。若诸众生不得用者，我无如是善根戒、定、智、解脱、解脱知见。

“奢利弗，譬如恒伽大河所流行时，彼流行处润此大地令其润泽；又彼流行遍地而去，凡诸尘土草木叶等，彼流行时悉摄将去。如是，奢利弗，菩萨摩訶萨于阎浮洲行住坐卧，如是等处摄诸众生，令其善根皆得润泽；又复行住坐卧遍切，诸无智行、欲嗔痴行及颠倒行，皆摄受已行住坐卧。奢利弗，若发大乘善家子、善家女，闻此上说，虽多懒堕必须发大精进。

“奢利弗，譬如恒伽大河，有处流时作声大声，有处少声有处无声。如是，奢利弗，得无生忍菩萨摩訶萨有处示现出生善根，有处自身示现随顺承事善友，有处自身为他而作善友，随众生器所堪，如是自身示现。奢利弗，譬如镜轮若未善磨不善净时，见其形像即不善净；若彼镜轮善磨净时，然后分明见其形像。如是，奢利弗，初业菩萨摩訶萨，如见自善根即承事善友，如承事善友然后增长佛法。奢利弗，譬如恒伽大河增长满时，于其两岸草木枝叶皆漂将去，乃至于四大海。如是，奢利弗，菩萨摩訶萨应著如是铠甲：‘所有此岸助堕黑事，行于诸见险道，我皆将去乃至到无余涅槃界。’奢利弗，譬如恒伽大河有时增长多沫，于中有多树等，根茎叶果拔已将去；于中复有第二大树，犹生而住。后时第二年中，恒伽大河更长过前，前者大树更及诸木拔已将去。如是，奢利弗，若有善家子、善家女，承事善友发阿耨多罗三藐三菩提心已，而为恶友力故，以昔业行力故，受五欲福娱乐受乐皆共随行，于后必须承事善友，乃至当得无生法忍。何以故？于诸佛所种诸善根终不虚弃，彼等必当出世作佛，号遍智者号普见者。

“奢利弗，譬如有时劫烧，彼时三千大千世界皆大炽然，而作光明同一炽然，若烧若坏无墨无影。如是，奢利弗，菩萨摩訶萨应著如是铠甲：‘无一众生可见，于彼众生界中，所有众生皆不知者，我于彼等当令作不退法。’奢利弗，譬如彼大焰聚然时，所有诸毒诸药，彼等皆同被烧。如是，奢利弗，菩萨摩訶萨应著如是铠甲：‘若有乘众生、若无乘众生，我于彼等皆当平等说法。如彼愿、如彼信，彼诸众生种种信行，当速令度不作二相。何以故？诸法无二不作二相，诸法无我于如不知。’奢利弗，譬如彼大焰聚然时有焰，乃至光音天有焰，不能至尔许远处。如是，奢利弗，同一法界证已，声闻、独觉虽平等入，而于十方世界智慧不转如彼如来阿罗诃三藐三佛陀，法界证已具无量智。奢利弗，譬如彼大火聚，十方世界不来不去，而烧三千大千世界，彼火亦非无因。如是，奢利弗，彼诸佛智，十方世界不来不去亦

不共聚。如来阿罗诃三藐三佛陀具足智者，如实知十方世界诸众生心行，彼智亦非无因，最上遍智当如是见。

“奢利弗，譬如日轮出时，当知蔽诸萤火而作照曜。如是，奢利弗，初发心菩萨生时长时，当知蔽诸具足分智声闻、独觉光明而作照曜。何以故？彼作善根回向阿耨多罗三藐三菩提，是故具无边光。奢利弗，譬如日轮出时，当知蔽诸星宿色光而作照曜，诸处星光皆不复见。如是，奢利弗，菩萨摩訶萨从兜率天下时，多有百千俱致那由多诸天来阎浮洲，出如是声，告如是声，说如是声：‘汝诸人辈，此菩萨摩訶萨，今从兜率天宫舍身。’尔时，此阎浮洲所有独觉大智具者，皆闻声已发心向于涅槃。何以故？最胜福田菩萨摩訶萨，从兜率天下时，有如是自在力，何况生时！何况行七步时！何况初出言时：‘我于世间最大最胜！我当必尽生老病死！’何况出时！何况至道场时！何况证阿耨多罗三藐三菩提时！是故如来于诸众生，可云最胜、最上、最大、最妙无上无上上。奢利弗，见是义故，善家子、善家女所作善根，皆当回向阿耨多罗三藐三菩提。

“奢利弗，譬如大地所有种子，彼等芽生有种种名，同一地尘而有诸相。如是，奢利弗，于一法界证已，种种界众生出种种名而不破法界。是故，奢利弗，菩萨摩訶萨应著如是铠甲：‘当于彼时，我证一法界已，种种界众生种种名字以智当说。以是若干大智而亦不坏法界，法界亦不作二，法界亦无增减可知。’奢利弗，见是义故，菩萨摩訶萨当思如是法行，虽恒伽河沙数诸佛灭度，法界亦无增减可知。现在十方世界所有诸佛世尊具无碍智，所有声闻具于少智，法界亦无增减可知。虚空界极法界相应，如是当知。法界为极，佛法相应亦如是知。是故，奢利弗，菩萨摩訶萨，此深法中当以智观觉无我法。

“奢利弗，譬如虚空界无与相似者。如是，奢利弗，法界亦无与相似者。是故，奢利弗，菩萨摩訶萨于此深法当以智观。奢利弗，譬如有人于大海中取诸滴水，彼皆一味所谓盐味。如是，奢利弗，于一法界出生声闻。何以故？法界一而无二。是故，奢利弗，菩萨摩訶萨此深法中，深处应当以智分别：于此法中般若波罗蜜当随顺行，非在余处广说譬喻。于无我法，当思、当观、当求、当合、当生欲心、当发精进作业用力。善家子、善家女，此深法中当以智观觉无我法。

“奢利弗，譬如大海有鱼，身长百踰阇那者，乃至身长七百踰阇那者。彼诸鱼身虽复增长七百踰阇那，大海亦无增减可见。然彼七百踰阇那鱼身死时，大海亦无增减可见。如是，奢利弗，菩萨摩訶萨当如是学：‘虽有恒伽河沙数等诸佛世尊灭度，而法界亦无增减可见。复有无量声闻灭度，法界亦无增减可见。此虽一味谓解脱味，而诸声闻不能转生是智如诸如来阿罗诃三藐三佛陀。’

“奢利弗，譬如转轮王有诸宝出，彼等诸宝余处不生，唯于宫内出生诸宝。何以故？彼转轮王昔作转轮王业，以作业故唯于宫内出生诸宝。如是，奢利弗，净心菩萨摩訶萨，净心发阿耨多罗三藐三菩

提，若欲施他随其所欲，彼则出生。何以故？以彼先世善净心故。

大集譬喻王经卷下

“奢利弗。譬如有人入宝性中，问先入者言：‘丈夫，诸宝何似何相？’于先入者报彼人言：‘丈夫，汝痴！云何名入宝性自见诸宝复问此宝？’如是，奢利弗，若善家子、善家女作如是问：‘法界何似？法界何相？’奢利弗，于时诸菩萨摩訶萨应著如是铠甲：‘我今当示众生如此法界为说令住。’奢利弗，宝性者，所谓法界；入宝性丈夫问宝者，所谓愚凡夫辈；于先入宝性丈夫者，所谓如来阿罗诃三藐三佛陀。

“奢利弗，譬如大海不作是念：‘我出有价诸摩尼宝，或出无价诸摩尼宝。’如是，奢利弗，法界亦不作是念：‘有知我已出有限智，或有出无边智。’奢利弗，但于法界定随所知得有限智，又于法界定随所知得无边智。奢利弗，譬如未竟一日即知若干刹那、若干罗婆、若干瓶、若干筒，皆知一日有若干残。如是，奢利弗，未竟出生苦集灭道。是故，奢利弗，菩萨摩訶萨当知此是证信我说菩萨乘善家子、善家女未到菩提。奢利弗，譬如水聚下大地彼不令虚空多。如是，奢利弗，虽恒伽河沙等诸佛世尊已入涅槃，而法界不见增减；无边诸声闻众灭度，而法界亦不见增减。是故，奢利弗，菩萨摩訶萨应著如是铠甲：‘所有众生界不见增减，法界亦不见增减，我等作如是师子吼，乃至觉阿耨多罗三藐三菩提。’

“奢利弗，譬如无有是处我分别说，有人至海龙王边，作如是言：‘我欲得破毛端为百分，以一分毛出一滴水。’时海龙王语彼人言：‘丈夫，汝欲百分破于毛端，以一分毛出一滴水，我不舍大海。’如是，奢利弗，于无边众生界，教授作力令喜大喜，彼作是言：‘我等不堪发阿耨多罗三藐三菩提，而我于法亦不作分。’奢利弗，譬如春后夏月热时，有人往诣恒伽大河欲饮其水，而有一人障不听饮。奢利弗，于意云何？彼人于彼无主大水聚中而作障碍，得是顺不。”

答言：“不也，世尊。”

佛言：“如是，奢利弗，无摄法界、无摄诸佛法中，有发大乘善家子、善家女信解渴仰，而有众生说大乘过令离令断。奢利弗，于意云何？彼人顺不？”

答言：“不也，婆伽婆。不也，修伽多。”

佛言：“是故，奢利弗，善家子、善家女，闻是说已应当速发阿耨多罗三藐三菩提，生欲精进相应用力。善家子、善家女，此深法中，当以智观觉无我法。奢利弗，譬如此大地中有地分所，于阎浮洲诸人无用。彼何者是？所谓坑坎、缺崖棘刺、高峻废处。如是，奢利弗，众生界中有诸众生，于诸众生亦无所用。彼何者是？所谓发声闻

乘、独觉乘者，彼等于诸众生则无所用。奢利弗，譬如有大地分，阎浮洲人得有用处。彼何者是？所谓具足园林华池，若有出金银处，彼等阎浮洲人得受用。如是，奢利弗，众生界中有诸众生，于诸众生得有所用，而彼等少。彼何者是？所谓若发阿耨多罗三藐三菩提，彼等为诸众生而作归依，毕竟作乐故。奢利弗，譬如大海中有无价诸摩尼宝，而阎浮洲诸人不得受用。如是，奢利弗，虽诸阿罗汉声闻有无边善根戒、定、智、解脱、解脱知见，而彼等于诸众生则无所用。如诸菩萨摩訶萨所有善根戒、定、智、解脱、解脱知见，彼等为诸众生受用。是故，奢利弗，菩萨摩訶萨应著如是铠甲：‘若不为诸众生受用，毕竟能作乐者非我善根。’

“奢利弗，譬如尼瞿陀子，其形虽小而生时长时多引多覆。如是，奢利弗，其初心菩萨摩訶萨善根生时长时，当知他诸善根皆所不及最上而住。是故，奢利弗，发菩萨乘善家子、善家女，虽小善根不可轻贱，莫言不增长耶。何以故？发大乘人善根若增长时，当知作无量阿僧祇。奢利弗，譬如有人大富多财多受用具，多有贝玉珊瑚金银等，所谓若刹帝利大家子、若婆罗门大家子、若长者大家子，彼等出街市时，谁欲看者看？谁欲至者至？谁欲问者问？尔时所有诸宝大摩尼宝，直多百千欲看者看，欲至者至，欲问者问。何以故？彼等心大于此卖买。如是，奢利弗，菩萨摩訶萨于诸佛法此大乘中，欲问者问，欲说者说。何以故？彼等信大如是言说不断，欲至者至，欲问者问，欲看者看，欲说者说。奢利弗，譬如所有大摩尼宝，其价乃大直多百千。奢利弗，于意云何？彼大价摩尼宝，颇与水精得共居不？”

答言：“不也，婆伽婆。不也，修伽多。何以故？世尊，其摩尼宝，自与摩尼宝居，不共水精等，亦不可为喻。”

佛言：“如是，奢利弗，菩萨乘善家子、善家女，与发大乘众生，应当共居共行共游，亲近承顺给侍，善事共修多业，彼于其间发觉令忆，以如是故即随当学。奢利弗，譬如有人欲学于射，彼当忆念亲近射师。何以故？彼学此处，当须其间发觉令忆而慰喻之，如是取弓，如是作拳，如是把弓，如是放箭。以其射师发觉令忆及慰喻故，彼即随学当得成就。如是，奢利弗，彼发大乘诸善家子、善家女，应当亲近如来阿罗诃三藐三佛陀随顺供养；于发大乘诸善家子、善家女所，应当共居共行共游共念。彼发大乘诸善家子、善家女，亲近随顺供养已，彼应其间发觉令忆，复当慰喻；彼于其间发觉令忆及慰喻时，即随当学，此是陀那波罗蜜，此是尸罗波罗蜜，此是羼提波罗蜜，此是毗梨耶波罗蜜，此是弟耶那波罗蜜，此是般若波罗蜜，此是方便波罗蜜，如是当学；普遍种智所有善根，彼应其间发觉令忆复当慰喻，彼即随当学而得成就。

“奢利弗，譬如转轮王，于阎浮洲中所去游处，阎浮洲人不惊不怖不伤不损，多舍金银令住十善业道，作如是行。其转轮王行时，多有百千俱致那由多众生，悲泣忆念转轮王功德。如是，奢利弗，菩萨

摩诃萨于诸佛刹行时游时，彼应当学诸佛胜德，在在行处顺法界行。彼去游处，令诸众生不惊不怖不伤不损，多舍金银令诸众生住于十善业道，于十善业道上上令生，当如是行至无漏地。当如是作，所有行处彼诸人等，当学当念，此是我善友行，于诸善法摄者、作力者、作觉者、说甚深处者、摄我等者所行去处。奢利弗，菩萨摩诃萨，应学如是胜上功德。

“奢利弗，譬如彼转轮王所去游处次第行处，彼时多有百千俱致那由多无量众生欢喜欲得彼来。何以故？彼以善法教诸众生，彼以善法摄诸众生。如是，奢利弗，菩萨摩诃萨应著如是铠甲，我所去处次第行处，于种种方诸佛刹中，彼时多有百千俱致那由多众生欢喜欲得彼来。何以故？彼当教诸众生善法，又有种种善巧方便当摄众生。奢利弗，譬如彼大价摩尼宝直多百千，彼欲求时从何处得，当于卖处。如是，奢利弗，菩萨摩诃萨随其方便见诸众生堪为成器，彼处彼处而作方便教以善根，后当与取，种种善巧方便求已，教诸众生合善法中，劝于菩提心中。

“奢利弗，譬如若诸王子、若王大臣诸子聚集坐已共作是议，如是当取王位，当制王法，当持王位，当宣王教。如是，奢利弗，诸菩萨摩诃萨炽盛修诸善根，承事多百千俱致那由多诸佛种诸善根，善修于慈常能普念，行于大悲喜菩提心，念道场故而行于舍。彼如是等大信者、欲作师子吼者、欲澍法雨者、欲击法鼓者、欲吹法螺者、欲竖法幢者、欲安法船者、欲度诸堕四流众生者、无量劫欲著铠甲者、欲著大慈大悲大喜大舍牢铠甲者、欲转无上法轮者、欲降伏魔罗及眷属者、欲著不思铠甲者、欲著无比铠甲者、欲著诸三界最胜最上铠甲者，如是等类诸善家子，一处集坐共作是议：‘我等应当摄诸众生于彼无漏诸善根中！我等应当令诸众生回向涅槃界！我等应当苏息诸众生于无为涅槃界中！’

“奢利弗，譬如若诸王子、若王大臣诸子聚集坐时，余下贱人不得至于彼处。如是，奢利弗，诸菩萨摩诃萨聚集坐时，余少分智具足诸众生等，不能见示如是境界，如诸菩萨摩诃萨示现。奢利弗，譬如大海有众生身大如虬子，复有众生身大百踰闍那，复有众生身乃至七百踰闍那。奢利弗，于汝意云何？岂彼大海不容彼等小身众生，若彼大身诸众生耶？”

答言：“不也，婆伽婆。不也，修伽多，非是大海不容。世尊，由造业故彼诸众生成于小身，由造业故彼诸众生成于大身。”

佛言：“如是，奢利弗，以发愿力故，诸声闻少智。然如来阿罗诃三藐三佛陀，有不可量阿僧祇不可思不可称无边不可说智。何以故？彼昔行菩萨行，有不可量阿僧祇不可思不可称无边不可说愿，以造彼业成就乃至到无碍智最胜功德。奢利弗，譬如大海，有诸众生与摩尼宝不相近合不知彼名，何况受用？如是，奢利弗，有诸善家子等于此法律中生，于彼法海具足游者，其诸声闻、独觉犹不知彼三摩地

名，何况具足诸三摩地而欲当行？以具足三摩地故名如来阿罗诃三藐三佛陀。

“奢利弗，譬如射师作手作法，所放箭处彼处不虚。如是，奢利弗，有善方便菩萨摩訶萨，以善方便摄取，般若波罗蜜具足，彼若发心当即不虚，无不摄取，无不回向阿耨多罗三藐三菩提。彼菩提心即不入欲嗔痴，非欲所染，非嗔所恶，非痴所迷。彼若发菩提心，即不入色乃至不入识，不入我乃至不入受，非眼界非色界，不入眼识界乃至非意界、非法界，不入意识界。彼若发菩提心即离欲嗔痴，若无欲嗔痴即有大慈大悲大喜大舍，若有大慈大悲大喜大舍即不可得，若不可得即无生灭。若无生灭即无断常，若无断常是名发菩提心。虚空界极法界究竟，虚空界业合方便智，是名发菩提心。奢利弗，譬如宝树生时长时非无诸宝功能。如是，奢利弗，菩萨摩訶萨以诸善根回向阿耨多罗三藐三菩提，共摄大慈大悲大喜大舍。奢利弗，以是义故，当知菩萨摩訶萨发阿耨多罗三藐三菩提心犹如宝树。

“奢利弗，譬如此三千大千世界所有诸树诸草枝叶，彼等皆为灯炷。此三千大千世界所有诸须弥山王，轮山、大轮山王、目真邻陀山、大目真邻陀山王，余诸黑山及诸石山，彼等皆为灯器。此三千大千世界所有流泉陂池、泊河、小河、大河、大海，彼等皆为油满。若有声闻乘、独觉乘善家子、善家女，在如来阿罗诃三藐三佛陀前，燃彼诸灯。奢利弗，于意云何？彼善家子、善家女，彼因缘故福德多不？”

答言：“甚多！大德婆伽婆。甚多！大德修伽多。”

佛言：“奢利弗，于意云何？若发大乘善家子、善家女，乃至施一灯，彼因缘故何者福多？”

如是语已，奢利弗言：“世尊，发大乘者乃至施一灯，福德是多，非声闻乘、独觉乘以无边阿僧祇无量灯施。”

如是语已，佛言：“奢利弗，甚善！甚善！奢利弗，如是，如是，如汝所说。何以故？若诸菩萨摩訶萨陀那波罗蜜，即诸众生陀那波罗蜜。若诸菩萨陀那波罗蜜，彼诸众生即得饮食、衣服、瓔珞乘等受用众具。若诸菩萨陀那波罗蜜，彼诸众生即得长者财谷仓库等受用众具，亦得田宅、园林殿堂、城邑聚落、国土王都等受用众具。奢利弗，略说诸菩萨尸罗、羼帝、毗梨耶、第耶那、般若。彼破尸罗众生，乃至无智众生，当得智慧。何以故？彼初发心如散种子，当如是见。彼修行已犹如种子增长，不退转地如成枝叶，一生补处犹如出华，彼如来地犹如成果，随众生欲如是聚果，如来涅槃当如是见。奢利弗，以是义故，当知由初发心如来出生，由于如来出诸众生所有乐具，亦由如来出诸声闻、独觉。奢利弗，以是义故，善家子、善家女所有善根，皆当回向阿耨多罗三藐三菩提。

“奢利弗，譬如月轮出时，此阎浮洲所有流泉陂池、泊河、小河、大河，彼处皆见月轮，而彼月天子于自宫不动，彼之月轮不近一

处，而于诸处现月轮影。如是，奢利弗，住十地菩萨摩訶萨，多诸佛刹乃至多百千俱致那由多佛刹自身示现，彼诸佛刹所有村城聚落国土王都诸处，菩萨摩訶萨自身示现，有处示现陀那波罗蜜，或复舍头手足眼耳，或舍皮肉筋骨髓心，或舍子女妻妾宅舍村城聚落国土王都。或现无罪法祀大会，须食与食，须饮与饮，如是乃至骑乘衣服鬘香涂香床座倚枕灯明等示现舍时，为摄慳惜众生故，乃至为舍五受聚故。有处示现尸罗波罗蜜，不缺不穿不斑不杂，亦如牦牛护尾，为摄破戒众生故，乃至令住三解脱门故。有处示现羼帝波罗蜜，若截手足及以挑眼自无嗔恚，为摄高慢嗔毒众生耽富贵者故，乃至令住无生法忍故。有处示现毗梨耶波罗蜜，为懈怠众生炽然精进故，厌离自乐令诸众生住乐故，为摄懈怠小精进众生令住精进故，乃至令住十地故。有处示现弟耶那波罗蜜，游戏弟耶那解脱三摩地三摩钵帝，为摄失念不正知无三摩地心乱心众生故。乃至令住金刚三摩地故。有处示现般若波罗蜜。说难度深佛法故。处非处地非地。如众生行为说法故。如是奢利弗。住十地菩萨摩訶萨。巧摄方便般若波罗蜜具足。如所欲得如是能作。如诸众生信诸波罗蜜，如是是诸众生示现诸波罗蜜。如诸众生信色，如是是诸众生示现于色，如信法本，如是是诸众生说法，令彼众生当得不退转阿耨多罗三藐三菩提。

“奢利弗，譬如有树能与诸欲，若有众生欲得诸宝来到其边，令彼众生所欲得满，若食若衣若瓔珞。若其众生所须诸宝，金、银、毗琉璃、玻瓈、赤真珠、玛瑙、砗磲，如彼众生有所须欲，诸宝即生，彼与众生。诸所欲树，若割若破若斫，不见其树割处、破处及斫损处，转更增长出种种宝。如是，奢利弗，住十地菩萨摩訶萨，有处示现陀那波罗蜜，有处示现尸罗、羼帝、毗梨耶、弟耶那、般若波罗蜜、巧方便为首，有处示现生四天王天、三十三天、须夜摩天、兜率多天、化乐天、他化自在天、诸魔罗身天，乃至诸梵身天、梵光天、梵众天、梵辅天、大梵天、光天、少光天、无量光天、净天、少净天、无量净天、遍净天、广天、少广天、无量广天、广果天、无热天、善见天、善现天，乃至生阿迦尼吒天，示现自身说法；有处示现有想无想众生乃至非想非非想天，有处示现此阎浮洲作转轮王身，为众生说法；有处示现转轮王四分中一分王形色，有处示现力转轮王形色，有处示现刹帝利、长者、大臣、王臣、小男、小女、归女、丈夫、沙门、婆罗门、尼犍梵志、天、龙、夜叉、犍闼婆、阿修罗、伽留茶、紧那罗、摩睺罗伽、人非人等乃至依城者形色，有处示现声闻、独觉形色，有处示现下兜率宫，或入母胎，或出生，或梵释捧接，或行七步，或口出言：‘我是世间尊胜，当穷生死！’或诣学堂，或入天祠，或处宫内，或在阎浮树下，或身出家，或至道场，或降魔罗军众，或证无上菩提，或转法轮，或为四众八部说法，或现涅槃，或一全身，或如芥子，或炽正法，或现法灭。奢利弗，略说如诸众生所信说法者，是诸菩萨摩訶萨自身示现，为成熟诸众生故。如诸众生

信诸法本，是诸菩萨摩诃萨，为诸众生说于法本，令彼诸众生等得不退转阿耨多罗三藐三菩提。

“奢利弗，譬如幻师、若幻师弟子，住四大道示种种幻，所谓象马车步。奢利弗，于意云何？彼四分兵来处去处，十方诸世界中可得知不？”

答言：“不也，婆伽婆。不也，修伽多。彼幻来去不可得知，而彼幻非无因。”

佛言：“如是，奢利弗，彼佛智若来若去，十方诸世界中亦不可知。如来阿罗诃三藐三佛陀，以是智具足故，十方诸世界中诸众生所有心行皆如实知，而彼智非无因，彼智最上当如是见。奢利弗，譬如有人被捉咽喉，则诸处根皆当被捉。如是，奢利弗，若善家子、善家女，以遍智心、菩提心中入诸佛法，请诸众生，摄诸众生，持诸众生。

“奢利弗，譬如有人寿命百岁，将一滴水来与如来阿罗诃三藐三佛陀，作如是言：‘世尊，我寄此一滴水，愿为持之莫杂余水。’如来取已掷恒伽大河中，掷已彼一滴水向于大海。时彼寿百岁人过岁还来，作如是言：‘世尊，与我前所寄一滴之水，不令杂余水者。’奢利弗。如来阿罗诃三藐三佛陀有如是智，谓不思智、无比智、出三界智，如来阿罗诃三藐三佛陀具是智已，从大海出彼前所寄一滴之水不杂余水，还与彼人。如是，奢利弗，如来阿罗诃三藐三佛陀，非一佛刹中说法，亦非二三四五，乃至非千佛刹中说法，种种善巧方便教化众生。何以故？如来阿罗诃三藐三佛陀，不可量阿僧祇不可称不可说无量千佛刹中说法，种种善巧方便教化众生。

“奢利弗，譬如春后夏月正炽热时，有一丈夫乃与大众欲过旷野，彼于行时远见焰动，彼人慰喻彼大众言：‘汝等但来，有水可饮。’尔时，彼人令彼大众望水不绝，速出旷野便得苏息，不损不伤安隐无畏至自境界。如是，奢利弗，如来阿罗诃三藐三佛陀，令诸声闻欲入阿罗汉果，为其说法如阿罗汉所作相应精勤用力，彼既作已便获其利。奢利弗，若信是法，彼即信无尘法；若信无尘法，彼即信如来阿罗诃三藐三佛陀；若信如来阿罗诃三藐三佛陀，彼即于无尘法解脱；若于无尘法解脱，彼即解脱生老病死忧悲苦恼。

“奢利弗，譬如漏尽阿罗汉，在阿兰拏山远险之处诵时，彼处有响，彼时更有异人闻已，即得阿罗汉果。奢利弗，于意云何？彼人是谁调伏？”

答言：“世尊，是阿罗汉。”

佛言：“奢利弗，于意云何？彼漏尽阿罗汉，岂作如是念言：‘我若诵时，当有众生得调伏’耶？”

答言：“不也，婆伽婆。不也，修伽多。”

佛言：“奢利弗，于意云何？彼响从内从外从内外出？莫作是见！若诸众生所出音辞当如是信，若有是说彼亦随我。奢利弗，譬如

丈夫、妇女于睡梦中，乃见如来与声闻众围绕说法。奢利弗，于意云何？如来、声闻其实来不？”

答言：“不也，婆伽婆。不也，修伽多。”

佛言：“如是，奢利弗，若人现见我声闻众围绕说法，当信如梦，彼即现前见我及以法僧。奢利弗，譬如大海非无有宝而不取宝。何以故？彼于先世不曾作取宝业，是故彼摩尼宝黑不识不取。若人曾作摩尼宝业，彼即得入宝洲，入宝洲已取摩尼宝。如是，奢利弗，非无法界，而不觉阿耨多罗三藐三菩提。奢利弗，但彼先世于佛境界，不作善根亦不发起，是故今入声闻。彼等不行如来行处，亦无如来功德，不具如来力、无畏等及无碍智。如来阿罗诃三藐三佛陀，则具如来力、无畏等及无碍智。

“奢利弗，譬如丈夫、妇女执镜自看面轮，见自面相便生喜跃。如是，奢利弗，无闻凡夫不知影喻法本故，驰走流转而生爱乐。是故，奢利弗，菩萨摩訶萨应著如是铠甲：‘我今为诸众生说法，令于流转当知当断。’奢利弗，菩萨摩訶萨当信诸法空虚不牢，如是当行。奢利弗，譬如如来阿罗诃三藐三佛陀有所作化，彼化生时无所生，灭时无所灭，于佛境界若问若答此非二法。如来所化生时无所生，灭时无所灭。如是，奢利弗，得无生法忍菩萨摩訶萨觉诸法无生，觉已不得一法，若生时生无处法生，若灭时灭亦无有为无为。何以故？菩萨摩訶萨觉诸法无二故。

“奢利弗，譬如沫搏无有牢固，彼无牢固当随顺知。如是，奢利弗，诸法无牢固，诸法是空，当随顺知。诸法如海，本性无有二相。奢利弗，譬如水泡从因缘生，以一一因不能得生。如是，奢利弗，凡有众生因不正念欲取于生，彼皆虚无空不牢固。彼诸众生于实际中不如实知，不见不入不觉。我为彼等众生，昔著如是铠甲：‘云何令彼诸众生等当见实际？我应为说流轮转回。’

“奢利弗，譬如鸟行虚空无法障碍。如是，奢利弗，菩萨乘善家子、善家女等，于诸法无碍际、无尘际、无二际，信于遍智，我说是菩萨乘善家子、善家女等，决定阿耨多罗三藐三菩提。奢利弗，譬如神通比丘行虚空时，虽见其行不见步迹。如是，奢利弗，见菩萨行，而不能说彼法及善根回向处。何以故？奢利弗，我所觉法不可言说，彼法诸天、龙、夜叉、捷閼婆、阿修罗、伽留荼、紧那罗、摩睺罗伽、人非人等不能成就，唯除诸菩萨摩訶萨于诸世界最胜具足上智著大铠甲。何以故？彼菩萨摩訶萨，诸天等世皆不能及。

“奢利弗，譬如手足能作诸事。如是，奢利弗，于此法本当如是见。奢利弗，譬如有人能以一指示现五指。于意云何？彼难作不？”

奢利弗言：“甚难！婆伽婆。甚难！修伽多。”佛言：“奢利弗，我此说难，如虚空等法界，虚空等法觉已，为他解说此难于彼，我说希有。何以故？奢利弗，彼菩萨摩訶萨，虚空等法觉已，不作戏论而能增长。如是，奢利弗，所有善根，菩萨摩訶萨当觉阿耨多罗三藐三菩

提，彼诸善根皆是虚无空不牢固。阿耨多罗三藐三菩提提示现已，彼诸善根乃不欺诳，觉阿耨多罗三藐三菩提。是故，舍利弗，菩萨摩訶萨应著如是铠甲：‘我信诸法是不牢固！’若不入此忍者，不能成就八人法、须陀洹法、斯陀含法、阿那含法、阿罗汉法，何况觉阿耨多罗三藐三菩提？唯除诸菩萨摩訶萨于诸三界最胜具足上智。

“舍利弗，是故菩萨摩訶萨应近善友承事供养。何者善友？所谓示教行六波罗蜜，若以余教彼非善友。若菩萨摩訶萨，如是言，如是教，如是应学诸波罗蜜，如是应学诸菩萨法，当知彼名菩萨摩訶萨真实善友。舍利弗，譬如以一滴酥掷大海中。于意云何？此为多不？”

舍利弗言：“不也，婆伽婆。不也，修伽多，于彼水中还是一滴。”

佛言：“如是，如是。舍利弗，诸声闻、独觉戒、定、智、解脱、解脱知见，少摄不能为诸众生而作利益。舍利弗，譬如以一滴油掷华池中，彼则遍满不知其油滴法。如是，舍利弗，诸菩萨摩訶萨戒、定、智、解脱、解脱知见，乃至诸有善根，为诸众生当得受用，乃至究竟涅槃。舍利弗，譬如有一丈夫于大海中破百分毛取一滴水。于意云何？彼一滴水比于大海水聚，何者为多？”

舍利弗言：“世尊，假使取百踰阇那，犹当是少，何况彼人破百分毛取一滴水？”

佛言：“舍利弗，如是诸声闻、独觉智如一滴水，诸菩萨摩訶萨知见如大海水聚。诸菩萨摩訶萨具足是知见故，能成熟诸众生，乃至将到无余涅槃界。”

佛说此赞诸菩萨摩訶萨功德法本时，无量阿僧祇无边诸众生等发阿耨多罗三藐三菩提心，无量阿僧祇无边诸菩萨摩訶萨善根炽然增长劝行成就，无量阿僧祇无边天人等世远尘离垢，于诸法中得法眼净。佛说此经时，尊者舍利弗，及余诸比丘、比丘尼、优婆塞迦、优波斯迦，天、人、犍闍婆、阿修罗等闻佛所说，皆大欢喜。

大哀经卷第一

庄严大会法典品第一

闻如是：一时，佛在王舍城灵鹫山，古昔诸佛之所游居，如来威神之所建立。其地道场，诸菩萨众所共咨嗟。无极法座，天、龙、鬼、神、揅沓和等，咸俱归命稽首为礼。而于佛土宣畅德本、如来威光、慕乐法门、菩萨神明等，入无量无限功德如来所行，成等正觉转妙法轮，为极元首善宣开化，于一切法而得自在。所度无极，明晓众生志性所趣，睹其诸根便度彼岸，晓了一切蠲除挂碍，诸所止处为作佛事而无俗业，坚住于行莫能当者。大比丘众六百万人，一切人民灭除尘欲无众蔽碍，则为如来法王之子，行深妙法，其所由生不从颠倒，柔软和雅威仪礼节而皆备悉，为大众祐，如来之道而得亲近。

诸菩萨众不可称计，行无挂碍，决了普智诸通敏慧。又诸大菩萨大慈大哀，兴布法云而演电明，为雨甘露满饱众生诸久饥渴，等心一切执志如地，诸所妄想倚著结缚皆已除弃，熙降弘恩道品之法三十有七，犹如日殿圣慧之宫，明智光曜靡所不照，灭大幽冥显示世间，指其道路宣其德本，若如莲华开[門@為]之时，枯竭恩爱，志深渊池兴立正业，具大神通游于虚空，譬如月宫照乎夜闇，所可游行等心众生，得其志性靡不忻悦，善权方便有益无损，至于道谊亦无增减，普现所行，志若须弥坚住不动，常修梵行供养三宝，于诸境界无能移转，过诸世间之所有法毁皆诽谤，现于一切诸佛国土而现亲厚，神曜远照志如大海，其器广大盛满法水，修菩萨行，一切众生之所宗戴，犹如师子君主最尊，奉四圣帝怀于大悲心慕慈愍，寂然观察，所察普显，于深妙法而无所畏，坏诸外道，于无央数百千诸劫究竟无底，其若菩萨行不以懈倦，一切诸德悉已具足。其名曰：普观见无尽菩萨、皆睹诸国庄严遍现菩萨、如来种性成就无退菩萨、威仪化众示无嗔恚菩萨、无量辩才幢英变音菩萨、积累清净金光威神王菩萨、分别光明辩解散句菩萨、生无量福积累亲业菩萨，如是等类无数菩萨。

于是世尊颁宣法门，名曰生诸菩萨。佛成正觉时十六年，见诸梵行普皆兴盛，睹诸菩萨咸来集会，欲演如来诸持法藏，而众开士皆悉云至。佛自念言：“吾宁重增诸菩萨行，使得将护兴立道行，曾有经典讲无盖门。如来所为无极变化，为诸菩萨大士之众，当令进入如来境界。”于时世尊以佛境界，变现如来三昧正受。佛适以此佛境，变现定意正受众祐圣旨，上虚空中自然高座，如三千大千佛土广大高远，上至欲界及无色界，悉佛正行如来功德之所兴化。诸菩萨众性行

清静，照于十方诸佛世界，悦可无量众生意行，一切诸天龙神宫殿摩不蒙曜。请召十方诸菩萨等，咨嗟无量名德之称，悉坐无数重阁交露，或有紫金以为墙壁，吉祥藏宝以为轩窗，以玛瑙宝而作户牖，明月藏宝以为栏楯，离垢光宝以为户扇，以普明宝而为重阁，一切众宝而为垣障，垂诸贯珠竖众幢幡，而然庭燎，悬诸缯盖，上好栴檀而用埒塗，异妙栴檀可意众香怀来越度，海中名香而用然之，龙所出宝若干种华而散其上，众宝之树罗列而行，诸宝香炉巍巍微妙。其所光饰，普周十方诸佛世界，清静奇妙欢悦人心，普悉现于高座之中。其师子座不可称数，亿百千垓而自然现，高座粲丽广长而峻，众所钦乐莫不忻庆。此四大域所有部界，则自然生四万宫殿而甚高大。又其栏楯高四丈九广二十里，以夜光珠、离秽宝珠、梵英宝珠悬在幡盖，而以紫金庄饰交露，出自自然音，从地以上乃至高座，又既崇妙自然化成无有作者。如是此四域所兴变化，三千大千世界亦复如是，诸有四域悉等无异，皆自然生无极宫殿。

于时，世尊安隐寂然从三昧起，应时三千大千世界六反震动，其大光明摩所不照。佛与菩萨诸弟子众眷属围绕，诸天在上歌咏功德，而雨众华散诸天衣覆盖虚空，烧众名香，空集乐器而自然鸣，十方佛国皆自然动。光照无量诸佛国已，佛大神足无极变化，境界无限威神无际，圣光无边感动无底，于灵鹫山忽然不现。与大众俱，诸天、龙、神、揅沓和、阿须伦、迦留罗、真陀罗、摩睺勒，侍从世尊欲听经法。又四天王与诸天俱，见佛世尊欲诣讲经，于上叉手雨诸天华，供养大圣以偈赞曰：

“日月之威曜，明珠天然晖，
佛光悉蔽之，消灭三恶趣。
其明遍佛土，越须弥铁围，
悉归命最胜，咸各怀踊跃。”

时四天王从诸天人，各以此偈赞世尊已，忻戴无量。时天帝释与忉利天，见于大圣欲诣大殿，至高座所则施供养，雨诸天香散于佛上，叉手以偈而叹颂曰：

“神足度无极，显变化无等，
现乎亿佛土，最胜日以出。
降伏诸魔界，普德净庄严，
其神足自在，稽首无等伦。”

忉利诸天偈赞佛已，侍从世尊。
时须深天王，见佛欲诣宫殿高座，雨于天衣叉手赞佛：

“安住慧无量，普知众生性，

无著如虚空，皆远三世事。
一心入诸行，悉晓群生性，
是故可奉敬，三世悉戴仰。”

时炎天王偈赞佛已，侍从世尊。

兜率天王与诸天俱，见于世尊欲诣宫殿大高座所，雨天珍宝而供养佛，叉手赞曰：

“宜畅于经谊，观如幻野马，
彼则无文字，何有意心像？
兴愍哀众生，故佛赞尊法，
归知法自然，胜晓无吾我。”

时兜率天王偈赞佛已，侍从世尊。

无憍乐天王与诸天俱，见于世尊欲诣宫殿大高座所，雨宝瓔珞供养佛上，叉手赞曰：

“显示乎法身，十方如虚空，
最胜现色像，愍哀而开化。
宣法无有色，最胜行普平，
礼法自然慧，明识一切谊。”

无憍乐天以偈叹佛，侍从世尊。

化自在天与诸天人，见于世尊欲诣宫殿讲堂高座，雨天宝珠而供养佛，叉手赞曰：

“禁戒离诸垢，则立于清静，
劝化其高尊，定意不可动。
智慧无等伦，如海无嗔恨，
已度于终始，稽首得自在。
神圣之足底，自然立相轮，
显修乎慈哀，从本此为先。
解脱三迳迹，稽首佛德行，
则以悲哀故，增加以平等。
以寂然为华，解脱成其实，
犹如蜂之王，劝化诸眷属。
安住如莲华，以头脑稽首，
善建立禁戒，住于安谛地。
精进之势力，超殊无能逮，
稽首正品类，甚尊不可动。
愍哀为清静，道场成光曜，

智慧离垢秽，威明消闇冥。
无数百众生，咸共归稽首，
则为无极觉，头面礼大圣。
其脱门之迹，音畅于虚空，
智慧驰悬远，光明照十方。
众生华百千，令得解开彼，
觉了离垢秽，稽首无所著。
察之无等伦，何能有踰者，
求之于十方，导师不可逮。
功勋甚众多，一切德备悉，
吾今而咨嗟，其志无饱满。
阿须伦诸龙，帝主所归礼，
无数诸天人，金共叹其德。
其所赞名称，众多难思议，
举誉礼世尊，功勋皆流布。”

化自在天偈赞佛已，侍从世尊。

于时，世尊则以无量佛之境界感动变化，为百千天人所共咨嗟，诣宝高座。时佛世尊适升高座，四域宫殿悉知见之。一切三千大千世界，诸在四域皆复如是，悉知见之。于时，大圣坐于三千宝护高座师子之床，诸菩萨众及大弟子亦复次坐。于是大圣有三昧名无盖法门娱乐，以此定意正受。佛适三昧，圣体诸毛一一毛孔，各出江河沙等光明，威曜尽照东方诸佛世界靡不周至，南西北方、四隅、上、下亦复如是，尽照诸界遍无遗漏。所照十方诸佛国土，应时诸土一切地狱，勤苦拷掠悉为休息，畜生解脱，饿鬼得安。时诸众生诸患消除，不为淫怒愚痴所惑，而无瑕秽苦劳之难，慈心相向共相瞻视，如父如母、如兄如弟、如子如身无异。如来光明照诸菩萨，诸菩萨众承佛威神，光曜之中说此颂曰：

“精进力无量，广普无所住，
又以精勤力，越度亿载劫。
十力功流布，普达于十方，
释迦文威光，广照于一切。
其欲求法谊，故往百千土，
礼佛听尊法，而至忍世界。
其在兜率天，十方诸菩萨，
斯等察此光，佛演安众生。
魔尘异学众，降以精进力，
如莲华出日，须弥照十方。
其身曜无底，晖普于一切，

诣彼听尊法，最胜转法轮。
今日无等伦，颁宣无比经，
十力愍众生，故转尊法轮。
今日众集会，广普难可遇，
笃信欲见佛，今当诣忍土。”

尔时，光明普告十方诸佛国土，说斯颂已，动诸佛国，安于众生，耀诸法界，净除一切尘劳之境，灭众幽冥，蔽魔宫殿，与诸菩萨无数眷属还回忍土，在佛头上忽然不现。

于时，东方无量功德宝福普辞世界，其佛号离垢净光海华无断光言王如来，佛土有菩萨，名首藏华诸法自在。彼光所请，与十江河沙等诸菩萨众会眷属围绕，忽没彼土，须臾之顷至此忍界，诣宝高座住世尊前，稽首足下绕佛万匝，雨夜光珠、众宝瓔珞供养散佛，以颂赞曰：

“十力功勋发，皆达于十方，
嗟叹无等伦，德祚度彼岸。
我等所诣土，欲听经法故，
一切闻名称，释师子之号。
世尊为平等，离垢光普曜，
如诸法无本，亦无有嗔恨。
见危惧众生，辄令得解脱，
为诸法之王，如幻师善学。”

时诸菩萨无央数众，嗟叹佛已，各神足力悉化作座而坐其上。

南方佛辩世界，无量德宝辩如来佛土，有菩萨名宝柱。与十江河沙等诸菩萨俱眷属围绕，在于彼土忽然不见，须臾之顷至此忍界，诣宝高座住于佛前，以白珠交露覆盖佛上，稽首足下绕佛万匝，以颂赞曰：

“世尊悉周匝，愍雨于众生，
开[門@為]光明焰，以空无吾我。
以八平正路，消竭尘欲渊，
寂秘诸树王，长育清白林。
则以智慧光，化灭阴冥母，
悟久梦众生，溺没终始流。
为显示正路，消竭恩爱池，
令逮清净眼，使度如前胜。”

时无数菩萨颂赞佛已，各神足化变作其座皆自处上。

于时，西方照耀世界，普明如来至真佛土，彼有菩萨名显音契

王，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，雨瑛真珠供养世尊，稽首足下绕佛万匝，以赞颂曰：

“其圣体之行，犹如虚空界，
所愿悉清净，劫数无有量。
其身净无垢，永无有众漏，
能周于十方，无思议佛土。
所讲如时雨，雷震梵妙音，
悦可群萌类，应如志所慕。
其心无所行，亦无有不行，
所演畅诸音，出应众生心。”

时无数菩萨颂赞佛已，各神足化变作其座皆自处上。

于时，北方众宝锦界，无量德宝光如来佛土，彼有菩萨号曰海觉，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，稽首足下绕佛万匝，以颂赞曰：

“体色紫磨金，觉施以寂然，
善照于十方，快普现其身。
其体无俦匹，众人若观察，
则灭诸欲尘，忻豫长安隐。
最胜诸学子，瞻戴世光明，
其志咸忻仰，如须弥顶王。
皆诸神足力，若干种变化，
不能见最胜，顶上之威相。”

时无数菩萨颂赞佛已，各各神足变作其座皆自处其上。

于时，东南方无忧世界，除众威冥如来佛土，有菩萨名普曜，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，稽首足下绕佛万匝，以宝交露供养上佛，以颂赞曰：

“于一毛孔里，怀无限佛土，
众生不以患，国土不迫迮。
最胜救济行，为诸无眼目，
诸佛为最妙，识胜之光明。
以一之刹土，畅无数佛国，
其诸所显现，刹土不增减。
随如应方便，大称随时入，
普入一切变，神足所感动。”

时无数菩萨颂赞佛已，各神足变化作其座皆自处上。

于时，西南方善观世界，大哀观众生如来佛土，有菩萨名思于大哀，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，雨妙衣服供养覆佛，稽首足下绕百千匝，以颂赞曰：

“禁戒甚清净，人尊如宝珠，
长夜自将护，如牦牛爱尾。
见于毁禁者，加之以愍哀，
不自叹己身，不皆毁他人。
住如须弥山，意定不可动，
智慧如江海，尊超于神灵。
已度一切有，有为缚刑狱，
化亿载众生，疗其尘劳病。”

时无数菩萨颂赞佛已，各神足化变作其座皆自处上。

于时，西北方离暗冥世界，光净王如来佛土，有菩萨名光曜网，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，以宝璎珞之具用覆佛上，稽首足下绕百千匝，以颂赞曰：

“身觉了生死，犹如幻师化，
示现所感动，如幻无所有。
假如师幻化，众生皆如兹，
其界不可动，众生无自然。
如人卧寐梦，睹见若干形，
寤则无所见，诸色想无为。
圣说法如梦，有为从念生，
见有所退转，不退不回还。”

时无数菩萨颂赞佛已，各神足化变作其座皆自处上。

于时，东北方住净离垢世界，空城离垢心如来佛土，有菩萨名觉无底离垢，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，以常鼓音交露覆盖佛上，稽首足下绕百千匝，以颂赞曰：

“明识深妙法，等解指自然，
省察诸空相，一切诸所法。
普知一切世，众生心所趣，
其心如虚空，清净慧无底。
群黎之所行，三世诸驰逸，

一心一时行，悉知诸所有。
无有众生想，其心谛离念，
已除众妄想，善权普平等。”

时无数菩萨颂赞佛已，各神足化变作其座皆自处上。

于时，下方照明世界，深青莲首如来佛土，有菩萨名曰辩严，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，以明珠交露共覆佛上，稽首足下绕百千匝，以颂赞曰：

“如亿载佛土，其中所有尘，
安住诸子孙，来诣于最胜。
各欲自启问，无数亿千劫，
则以一文字，意化于一切。
圣慧不可喻，权智无等伦，
总持定无量，功德无崖底。
洪勋无能限，颂宣无数劫，
毛孔所咨嗟，不可尽究竟。”

时无数菩萨颂赞佛已，各神足化变作其座皆自处上。

于时，上方庄严世界，名称如来佛土，有菩萨名诸法变王，与十江河沙等诸菩萨俱眷属围绕，在于彼土忽然不现，须臾之顷至此忍界，诣宝高座住于佛前，一切庄严众宝紫金交露之帐覆盖佛上，稽首足下绕百千匝，以颂赞曰：

“一切安住业，今显无崖底，
于心得自在，导师行亦然。
独诸佛所知，非众生所行，
如空无边际，群庶本如此。
其行无俦匹，今日显无底，
成佛转法轮，导师灭度如。
犹若有所种，法不失果实，
十方诸最胜，不可称限量。”

时无数菩萨颂赞佛已，于佛空中，各神足化变作其座皆自处上。

叹会品第二

彼时须臾之间，十方菩萨悉会面现。其菩萨众不可称限无能计会，亿百千数莫能称载，光明所劝集于忍界，诣宝高座住世尊前。时

佛晏然从定意兴，其明晃照自然音出。其自然音，普告于三千大千世界，令闻其教。于时佛土信不信者，已为应器比丘、比丘尼，童男、童女、人与非人，天、龙、鬼、神、捷查和、阿须伦、迦留罗、真陀罗、摩睺勒，闻佛音诏身心坦然，加敬悚息，承佛威神，自然而有妙宝宫殿悉共趣之，须臾之间至宝高座，稽首佛足绕圣三匝各就床榻。又此光音告敕梵天、梵忍天王、梵身天王、梵满天王、梵度著天王、大梵天王、光曜天、少光天、无量光天、光音天、净严天、少净天、无量净天、难还天、净身天、用果天、无捷天、于是天、善施天、善所施天、一善天，如昀之顷集宝高座，稽首足下绕佛七匝，不处地上自处其座。

于时，世尊睹见大众僉然来会，有神光曜名曰显现诸菩萨力，眉间演出于此光明，绕诸菩萨七匝竟已，于诸菩萨顶上而没。时有菩萨名首藏华诸法自在，遇此光曜，应时逮得一切庄严定意，适三昧已，其宝高座自然为佛有师子座，高八十亿垓百千之寻，妙宝为足，众珍栏楯，妙衣敷上，一切诸华以散其上，悦意诸宝以为严饰。一切菩萨睹此缘变断绝所慕，皆令众会自睹其明，可悦一切众生，现其心意所欲求愿，寻时皆了无可犹豫。时首藏华诸法自在菩萨，复以劫叹施诸恶趣三昧正受，别化如来大师子座，庠序安隐，从三昧起恭恪钦敬，叉其十指以颂赞佛：

“其日光明者，但照世俗耳！
天帝威神德，营从乐忉利；
其梵天尊王，慕恋梵天上；
佛之圣威化，变动界若此，
观察法自由，自然如虚空，
若幻野马比，亦如水中月。
诸所作所造，悉为无有主，
晓了如诳诈，见众生清净。
其心慕于色，斯色何所在？
其心为自然，所由皆不实。
一切虽清净，此亦如幻化，
其于自然者，虚伪何有处？
能分别本净，执御心鲜洁，
其境从容来，彼无有尘欲。
思想念诸念，其心已脱此，
则见若干种，幻化之所为。
虚空无所有，从地而出生，
显示国土地，若干明珠宝。
向者为法王，建立师子座，
当处于此座，开化亿众生。

跏趺立缁幡盖，大幢诸严饰，
此无所从来，亦无所越至。
若能晓诸法，无所从来者，
便能为众生，现诸胜变化。
大圣梵音声，所演善哉快，
为世巨锭燎，威神德无极。
愍伤吾之故，当升处高座，
讲说于经典，断生老病死。
其清净众生，十方来会此，
各各次第坐，欲听愍法谊。
本所因发举，愿解于此慧，
圣在师子座，安详颁宣法。”

于是世尊见首藏华诸法自在菩萨志性清净，即便处于大清净法师子之座，寻时讲说诸菩萨行，当所立趣。又有经典名无盖门，净菩萨道诸佛法力，成就宝身圣明屋宅，于一切法而得自在，入总持中分别解说，剖判入门大神通慧，入于微妙不退转轮无能回还，导御一切诸定意乘，入于一乘无毁法界，说众生性根原所趣，为之唱导解发诸法，毁坏诸魔入应顺法，去诸尘劳六十二见，开化当入柔顺之法，令诸爱欲、邪见、乱律入无碍慧，劝众德本普无不接，颁宣权慧皆入一切佛平等圣悉无阴蔽无处所门，所宣诸法分别如谊入于诸法，无念不念，无应不应，觉了深妙十二缘起，圣慧功德乃达魔天，佛身口意皆令庄严，所念志趣智慧明达而不可盖，入乎圣谛开化声闻，晓心所归缘觉之律，普得一切诸慧境界诸菩萨律，一切所入于法自在，颁宣如来功勋名称。

时佛讲说如是比像无极法典，说是语时，教化告敕诸菩萨德，所愿至诚悉已具足，示现如来变化感动，解诸众会狐疑结网，降摄一切诸魔之场，光显如来训诲之谊，备佛本业欲使具足。是故世尊，处师子座宣无盖门。于时宝幢菩萨承佛圣旨，用佛庄严三昧正受，令普众会致佛庄严建立威神。时名闻力菩萨承佛圣旨，用红莲华三昧正受建立众会，一切诸华令成法华，以此众华散于世尊一切菩萨。三昧时海觉菩萨承佛圣旨，以众香定三昧正受，使诸毛孔建立演出妙味栴檀。四明网菩萨承佛圣旨，以光明定三昧正受，令一切光建立众会靡不蒙安。五大哀念菩萨承佛圣旨，以无阇定三昧正受建立众会，瞻戴如来目不敢阇。六离垢察无底菩萨承佛圣旨，以法悦定三昧正受建立众会，慕乐正法、好法、志法、乐以法乐。七辩严菩萨承佛圣旨，以愿迹定三昧正受建立众会，皆令蠲除五盖之患。八变诸法王菩萨承佛圣旨，以无忽忘三昧正受建立众会，志在佛道慕如来行。九心勇菩萨承佛圣旨建立众会，使伏诸魔及外怨害靡不从化。十降诸魔菩萨承佛圣旨，以毁魔场三昧正受，适三昧已，应时三千大千世界所有众魔其数

百亿及诸魔兵，速疾速疾，各从宫殿忽然不现，诣宝高座住于佛前，稽首足下绕于世尊，无央数匝不可称计，奇异妙物供养大圣，恭敬悚息一心叉手，劝助天师颁宣经典，唯愿以时开化说教：“吾身今日降魔菩萨威神所建故来劝助。唯天中天，吾当放舍所作魔事不乱众生，今以法故来至于斯，由是大圣当察吾身志操所趣。”

于时，世尊察魔心念赞曰：“善哉！善哉！诸仁者等，汝等乃能放舍魔事，劝助如来令说经法。缘是之故，汝等之身因此获报，皆当越度一切魔业。所以者何？犹百千岁屋室闇冥，一灯入中寻即消昧。如是诸人于百千劫兴发尘劳闇冥之欲，一善本心力之所变，消灭众患令无有余。譬如诸人一日之宫，一月之殿，一大宝珠，一一各出光明之曜消除众冥。如是诸人一心善本观其修行而念应顺，皆除一切无明众冥、六十二见、九十六见众患之难。以是之故，今日诸仁来覲如来加复劝助，因此德本，稍渐蠲除一切无慧愚痴之冥，当获无极导法之门。”

大哀经卷第二

无盖法门品第三

于是法救王菩萨在于彼会，而白佛言：“唯然世尊，如来境界不可思议，示现建立大圣威光，令诸菩萨永无狐疑各各修行，唯当宣说无盖之门大会法品。所以者何？其大会者今悉集此，皆为菩萨，

（一）被大德铠不可思议（二）以大神通圣慧娱乐（三）皆有功勋通于十方（四）所修清白心离垢秽（五）以明解脱多所照耀（六）皆为诸佛所见咨嗟宣扬功勋（七）于一切法得尊自在（八）诸度无极越终始岸（九）一切皆从权方便生（十）而悉消化魔业欲尘（十一）降伏一切诸外邪道（十二）皆能分别方便讲说章句道理（十三）慧无挂碍智度无极超于彼岸（十四）其意自由勇步无难逮圣总持（十五）建立无盖辩才不断（十六）晓了众生根原所趣，具足缺漏备不备者（十七）察诸众生从应所解而为说法（十八）所宣经道除众罪殃而无遗漏（十九）其音随时柔软和雅，如哀鸾鸣，犹龙海吼，亦如梵声（二十）慈愍众生而示灭度，亦以慈愍令众得济（二十一）心常怀执无极之慈（二十二）志性抱念无盖之哀（二十三）所住坚固而不可动，言行相应（二十四）修立法幢显示十方（二十五）其志坚强犹如金刚，不可破坏如铁围山（二十六）尽建所愿不失本誓（二十七）畅入深妙分别玄奥十二缘起（二十八）蠲除两际断灭常见、一切诸见、六十二疑所习连著（二十九）亦如大乘群庶法王，诱进牵致使入于道（三十）众庶大导将致无难（三十一）从无量劫好乐法宝合集智慧（三十二）为大医王疗众人病（三十三）灭除众生无色尘劳蓄滞之疾（三十四）此诸菩萨大师子王所抚育子（三十五）一切诸行若听异音，闻

说如来秘密之谊，亦不恐惧（三十六）而以相好庄严其身（三十七）皆以大哀具足祠祀（三十八）其心勇猛不怀怯弱（三十九）降伏四魔爱欲境界（四十）善施桥梁开寤眠寐（四十一）如是根力觉意禅思解脱定意正受，以善修成所当为业（四十二）常以殷勤欲度众生（四十三）逮得总持揽制一切（四十四）若利无利、叹誉诽谤、有誉失名、若苦若乐，于世八事而无所著（四十五）其心得入欢喜悦豫乐爱经典（四十六）颁宣流布道法之宝（四十七）充满智慧备悉道空（四十八）其行鲜明犹如莲华（四十九）蠲除一切诸有为法（五十）其光清净覆蔽日月释梵晖曜（五十一）悉已逮得海中三昧（五十二）道御一切诸法之宝（五十三）而于三宝由得自在无能断截（五十四）明识解说一切诸界（五十五）执持诸佛经典之要（五十六）积累合集无量功德咨嗟之称（五十七）造立无限功祚智业（五十八）而得亲近具足佛慧（五十九）达了当来无央数劫本末之际（第六十法经本内缺）。 ”

法赦王菩萨白佛言：“如是，世尊，此诸菩萨大士之会功勋若兹。我意大圣，心自念言，当令世尊为诸菩萨宣无盖门大会法品，诸菩萨众所可由生。至未曾有天中之天，诸佛兴出多所饶益，则能悦可菩萨大士使得成具，当来菩萨德本明哲，其初发意菩萨清净行欲成者令入一乘使不退转，诸菩萨众具足佛法至阿惟颜一生补处，令其果报无所遗失。若有众生所识分明志存决定，怀来因缘缘化使入道。其不决定，当令仰入于无极哀。其有众生永在邪见，为说处所使决其网。乐三乘者，因故佛兴而自严饰。诸天、龙、神、键沓和、人与非人、世人、阿须轮，皆得蒙济。所以者何？佛兴出世实为善哉！如是比像，至未曾有难及希有经典之要，现出于世得共睹知。唯愿大圣，斯等正士发意之顷，建立化变此法高座，一切声闻及诸缘觉，于百千劫所不能逮。吾以是故心自念言，难及难及至未曾有！此人之等，乃能施設如是色像神足变化。谁以见此，当复兴发声闻之行、缘觉之心？所以者何？其有初发菩萨心者，过诸声闻、缘觉之众。今欲引喻！譬如世尊，愚痴之子从生驂冥，舍夜光大宝珠，取水精珠，所见颠倒自以为是；众人所行亦复如是，舍乎大乘，转求声闻、缘觉之乘。若复有人至性真实，发无上正真道意，若已发意、甫发意者，亦当不久具足成就如是法要。”

法赦王菩萨说是语时，彼众会中三亿百千垓天人，皆发无上正真道意。

庄严法本品第四

尔时，世尊睹诸菩萨皆来大会。此诸菩萨皆以法故而来集此，悉以执持如来妙藏，宣畅菩萨诸所行住，无盖法门所由品奥修御法典。复有光明名无畏辩，应时眉间大人之相放斯光曜，绕诸菩萨七匝已

竟，因复绕于总敖王菩萨身百千匝，寻入总敖王菩萨之顶。适蒙此光承佛威神，绕诸菩萨百千匝。其光悉照师子之座，其身威仪转复光曜光明巍巍，益甚加倍踰诸菩萨。总敖王菩萨，时见如来无极威变，即从座起，偏出右肩右膝，著地叉手，于世尊上虚空之中，化成如来庄严宝盖佛所建立，琉璃为幢上至炎天，瑰异琦珍帝青琉璃宝藏殊妙而以严饰，垂贯真珠缯彩旗幡而为庄校，紫金交露周匝缭绕，覆诸菩萨大会之众。其盖广长大如三千大千世界，如是比像建立宝盖奉献如来。雨于天华，威变伎乐而自然鸣，寻时以颂而赞世尊：

“光明普遍靡不见，目所周悉为显谊，
诸法自在权自由，不可思议趣诸德。
大圣正士演光明，其口清净宣辩才，
道光绕我百千匝，在吾顶上没不现。
如本意志所怀念，辩才照明持亦然，
所知百千胜于前，用蒙人雄道师恩。
其身巍巍心清净，踊跃以时获如愿，
乃知正觉慧无量，其大辩才入我身。
佛实难及威无极，其羸劣者不所乐，
承佛圣旨今悉见，当复启问愍众生。
诸菩萨众行所入，等趣世间而御众，
所生光明所变处，当复咨启阿惟颜。
魔众无量悉来会，而独游步上道乘，
及余志求微妙法，为是等故问最胜。
当善执持此魔场，而常谛受斯佛慧，
今适是时世尊说，为众生故开法藏。
鄙身明智无不及，人中之尊慧无量，
能了最胜无限智，今当启问无极权。
世尊圣慧由自在，本于长夜所修学，
善遵敖尊为法王，惟为颁宣道师行。”

总敖王菩萨以颂赞佛已，白世尊曰：“如来境界不可思议，诸菩萨行莫能称限。吾及众会，听察如来至真等正觉所说经法，未曾厌倦睹于众生。最胜世尊行乎大哀，故问此谊！何谓世尊，菩萨庄严而自校饰，以菩萨行而为应谊？何谓菩萨不可思议逮法光明离于闇冥蔽碍之患，以大法门而为清净？何谓菩萨在众生尊，第一大哀修行慈愍，成就所行不舍众生？何谓菩萨逮佛菩萨所行诸业，所尊正法不怀恼法？善哉！世尊，愿分别说诸佛菩萨之所行住等趣法门！犹如菩萨降伏魔众，调除疑网入如来界游菩萨境，晓了一切众生志操，心行清净摄取佛土执持魔场，从如来教而于诸法速得自在无所蔽碍。”

佛告总敖王菩萨：“善哉！善哉！正士，乃能问于如来。欲善决

了诸佛菩萨，仁能逮得无量如来所行了了。族姓子，谛听！善思念之，当为汝说。如诸菩萨行及余菩萨功勋具足，疾逮一切诸法自在。”总教王菩萨及诸大众受教而听。

佛言：“菩萨有四事庄严。何谓四？一曰、戒庄严未曾毁禁，二曰、定意庄严至未曾乱，三曰、智慧庄严心无蔽碍，四曰、总持庄严所闻不忘，是为菩萨四事庄严。于彼何谓以戒庄严？族姓子，知则用一事以戒庄严。何谓一？常愍众生心不怀害，矜哀群黎一切有命，亦敬爱之莫不悦可。复有二事以戒庄严。何谓为二？一曰、杜塞恶趣，二曰、开善趣门。复有三事以戒庄严。何谓为三？一曰、身行清净而无沾污，二曰、口言清净辞不粗犷，三曰、其心清净未尝坏乱。复有四事以戒庄严。何谓为四？一曰、如所志愿必果无异，二曰、如所约誓则得成就，三曰、如所慕乐必成无违，四曰、如所图画则得超至，是为四。复有五事以戒庄严。何谓为五？一曰、与禁戒士俱共精修，二曰、习学智慧未曾懈怠，三曰、勤志解脱不怀慢恣，四曰、修度见品未尝休懈，五曰、益加精进尊于无上无极灭度，是为五。复有六事以戒庄严。何谓为六？一曰、无所毁犯亦不怀恨，二曰、无所缺漏亦不捐弃，三曰、不有沾污无所损落，四曰、不为瑕疵修一清净行，五曰、而博听受不从欲秽，六曰、若有所听不载仰人，是为六。复有七事以戒庄严。何谓七？一曰、戒品清净，二曰、布施清净，三曰、忍辱清净，四曰、精进清净，五曰、禅思清净，六曰、智慧清净，七曰、善权清净而无放逸，是为七。复有八事以戒庄严。何谓八？一曰、所处具足，二曰、其地究竟，三曰、所御备悉，四曰、性戒周密，五曰、不被烧害得至成就，六曰、佛兴出世得无所著，七曰、无盖普达，八曰、得从善师所问具足，是为八。复有九事以戒庄严。何谓九？一曰、而于圣慧无所恐惧，二曰、有所睹见而不怯弱，三曰、晓了空慧，四曰、分别善权，五曰、习于清凉而无恼热，六曰、将护禁戒如蜂采华，七曰、修治其心令无情欲，八曰、其心调和不怀粗犷，九曰、逮得调定中和之地，是为九。复有十事以戒庄严。何谓十？一曰、庄严其身具足诸相，二曰、其口庄严言行相副，三曰、其心庄严而无瑕疵，四曰、国土庄严具足所愿，五曰、开化众生庄严志性清净，六曰、所生庄严一切众恶而无所犯，七曰、菩萨行庄严学如来行，八曰、圣慧庄严不怀自大，九曰、道场庄严劝助众德，十曰、力无所畏不共法庄严，立戒为本未曾舍禁，是为总教王菩萨十事庄严。”

佛告族姓子：“何谓菩萨定意庄严？定有一事。何谓一？常怀慈心愍哀众生。复有二事定意庄严。何谓二？一曰、修行威仪礼节，二曰、性行质直而无谄饰。复有三事定意庄严。何谓三？一曰、无有谄谄，二曰、志性清和，三曰、无有虚伪。复有四事定意庄严。何谓四？一曰、为人仁调而不恨戾，二曰、不怀毒害见他瑕疵，三曰、不犯禁忌致诸患难，四曰、不从愚慧以趣闇蔽，是为四。复有五事定意

庄严，谓去五盖。何谓五？一曰、贪欲，二曰、嗔恚，三曰、睡眠，四曰、调戏，五曰、狐疑。复有六事定意庄严，谓六思念。何谓六？一曰、常念于佛，二曰、常念经法，三曰、常念圣众，四曰、常念禁戒，五曰、常念布施，六曰、常念诸天。复有七事定意庄严，谓不舍道心修七觉意。何谓七？一曰、意念觉意，二曰、法觉意，三曰、欢悦觉意，四曰、精进觉意，五曰、信觉意，六曰、定觉意，七曰、护觉意。复有八事定意庄严，谓八正由路。何谓八？一曰、正见，二曰、正命，三曰、正语，四曰、正业，五曰、正念，六曰、正便，七曰、正意，八曰、正定。复有九事定意庄严，谓菩萨不舍道心常立大哀亦无所住，其心不舍一切众生。何谓九？一曰、断除爱欲，寂灭众恶不善之业，忧怖悦安，此念俱行修第一禅；二曰、其人寂除思念所行，其内库序而为专一，无思无行，忧怖悦安修第二禅；三曰、永观欢悦离欲之行而常安详，其身适安犹如圣贤所说所观，其意行安修第三禅；四曰、断除苦乐，究尽往古忧戚欢悦，观察于斯无苦无乐修第四禅；五曰、皆度一切诸色之想，究畅尽竟性之如地，不复思念若干诸想，游于无量虚空之慧而为修行；六曰、过于一切虚空诸想，游无量识诸识之慧而为修行；七曰、皆越一切诸识智慧，不计有身，不用识慧而为修行；八曰、皆超一切不用识慧，于有想无想之处而为修行；九曰、皆出一切有想无想之处，悉入一切思想所思，定意思惟以为正受，以权方便不于本际而取证也，住于本愿开化众生。复有十事定意庄严。何谓十？一曰、心无所生不怀嗔恚，二曰、具足寂然之行，三曰、不舍所愿，四曰、寂在闲居，五曰、不失德本，六曰、其心忧怖，七曰、身心休息图度计校，八曰、度安诸法，九曰、心得自在，十曰、得贤圣性，是为十事定意庄严。”

佛告族姓子：“何谓菩萨智慧庄严？计有一事智慧庄严。何谓一？于一切法而不卒暴。复有二事智慧庄严：一曰、舍于狐疑，二曰、离诸爱处。复有三事智慧庄严：一曰、断除愚惑，二曰、烧尽无明坏诸阴界，三曰、永灭闇冥幽昧之事。复有四事智慧庄严：一曰、晓断诸苦，二曰、了绝诸习，三曰、明于造证，四曰、不住由路。复有五事智慧庄严：一曰、戒禁清净而无所获，二曰、定意清净精度智慧，三曰、解品清净游于众生，四曰、度知见品而为清净，皆于三世无所挂碍，五曰、法品清净以用成行。复有六事智慧庄严，谓净三场施度无极，净于己场身如野马，人场清净犹如如梦，道场清净无望报故；戒度无极净乎三场，身场清净等如影故，言场清净如浮响故，心场清净等如幻故；忍度无极亦净三场，弃捐粗辞所言清净，除去冤结常喜咨嗟，若有段段支解其身，观察法身清净无秽；进度无极亦净三场，清净无厌好游生死睹之如梦，坚强清净志如金刚故无应不应，清净行者度想著故；寂度无极清乎三场，愚冥清净退入慧故，弃捐清净入于诸法无所著故，勤心清净发神通故；智度无极亦净三场，四思清净化众生故，总持清净摄正法故，所愿清净严佛土故。复有七事智慧

庄严将护其意：一曰、于四意止不起不灭，二曰、于四意断身意担忧，三曰、其神足者晓了诸根，四曰、其五根者降弃一切诸魔尘劳，五曰、其五力者明晓诸法自然之故，六曰、其觉意者无所不达致未曾有，七曰、其由路者无往无来无往来故。复有八事智慧庄严，谓不失圣慧行权方便：一曰、寂然观慧而为担忧，二曰、观察见于诸法为担忧故，三曰、慧品晓法品故，四曰、界品其性本行等境之故，五曰、晓于诸入本无欲故，六曰、明十二缘晓无我故，七曰、达于诚信永无嗔故，八曰、一切诸法无所破坏如实观故。复有九事智慧庄严：一曰、知过去事本清净故，二曰、知于当来未然清净故，三曰、知于现在究竟净故，四曰、知定了了报应之谊无所失故，五曰、知于未定导因缘故，六曰、晓处于邪为开化故，七曰、知佛平等达法身故，八曰、等于诸法法无欲故，九曰、诸圣平等修无为故。复有十事智慧庄严：一曰、所有如梦为惑相故，二曰、了如所梦思想相故，三曰、了如野马分别相故，四曰、了如实见因缘相故，五曰、了如影见形用事合故，六曰、了如呼响用杂会故，七曰、了于法界无坏相故，八曰、了于无本不住相故，九曰、了于本际无动相故，十曰、晓于无为，其无为者自然相故。是族姓子，菩萨所行十事智慧庄严。”

佛告族姓子：“何谓菩萨总持庄严？以有一事而为庄严，其意常达未曾忽忘。复有二事总持庄严：一曰、怀来道谊，二曰、总摄无违。复有三事总持庄严：一曰、晓了诸谊，二曰分别严饰美辞，三曰、明诚所归随其方便。复有四事总持庄严：一曰、言无所著，二曰、无刚硬辞，三曰、所言柔和，四曰、无刺讥辞。复有五事总持庄严：一曰、诸所闻声唯归于谊，二曰、晓诸身识唯归于慧，三曰、一切经典唯归经理，四曰、了诸人响唯归于法，五曰、在于方俗归度世行。复有六事总持庄严：一曰、言行相应，二曰、顺从至诚所言清净，三曰、不怀自大行无所著，四曰、无有谗谄言无所失，五曰、修于大哀如应说法，六曰、方便随品而为宣说等讲俗智。复有七事：一曰、其辩才智适发寻对，二曰、辩才应机，三曰、小辩才捷疾，四曰、辩才无碍，五曰、辩才无滞，六曰、辩才无缺，七曰、辩才应谊。复有八事总持庄严：一曰、晓了诸天所言，二曰、解识诸龙音声，三曰、明察鬼神言响，四曰、分别捷沓和语，五曰、解阿须伦所咏，六曰、达加留罗辞，七曰、畅真陀罗所言，八曰、识摩睺勒及诸众生口之所宣。复有九事总持庄严：一曰、不倚无为，二曰、诸所修行而不怯弱，三曰、勇猛说法，四曰、其智慧圣不为虚伪，五曰、晓了所说广普具足，六曰、其贡高者顺为说法，七曰、得平正者为说质直而开化之，八曰、见有处者为现劫烧，九曰、得境界者随其学乘而为颁宣。复有十事总持庄严：一曰、从其志操不为众生宣粗犷辞，二曰、闻佛说法修习慧明，不复志慕世俗之智，三曰、言不可尽假一文辞耳，四曰、其无所住为说无处，五曰、说于诸佛咨嗟无量，六曰、弃除恶趣尘劳粗辞，七曰、说于灭度不可称限，八曰、忍于众生无碍

根本，九曰、从佛之教，十曰、忍于分别超异辩才。是族姓子，菩萨十事总持庄严。”

于是世尊欲重宣此谊令人重解，即说颂曰：

“诸大圣入，有四庄严，以此应谊，尊之上乘，
戒禁定意，及最智慧，总持如是，明解分别。
为诸众生，所见钦敬，其身口意，常以清静，
悉断狐疑，诸所句迹，其奉戒者，以此庄严。
生天世间，功勋流布，其所志愿，辄得成就，
常修正行，以行为上，其奉净戒，以此庄严，
其人得近，速逮定意，智慧解脱，圣慧若兹，
亲近无为，归此行者，戒禁清静，斯为庄严。
戒无所犯，禁不缺漏，不弄戒法，性无卒暴，
名响畅溢，靡不宣持，戒清静者，斯为庄严。
其戒清静，布施鲜洁，忍辱清静，精进亦然，
一心清静，智慧无异，善权清静，亦无放逸，
所住坚固，强不可动，逮明谛地，行不怀恨，
性不舒缓，志常谨敕，戒清静者，斯为庄严。
其戒茂盛，未常退转，其心不生，众恼烦热，
秉意兴行，未曾悔变，戒清静者，斯为庄严。
不恐不憾，未曾慷慨，其意寂静，无能毁称，
其犯禁者，常被系闭，戒清静者，斯为庄严。
其心修禁，功勋无极，志性仁和，斯意安调，
则为己身，庄严相好，戒清静者，斯为庄严。
如口所言，身行若兹，庄严其口，所护庄严，
不以欲尘，严饰其心，戒清静者，斯为庄严。
斯人则为，庄严佛土，开化众生，使入大道。
此明哲者，庄校生处，以是之故，不犯众恶。
所谓庄严，常奉佛道，修治最胜，于佛道场，
庄严诸力，四无所畏，以为庄严，圣慧无慢，
普加慈愍，一切众生。其明智者，所见正真，
无有谗诤，不怀细碎，不随贪欲，嗔恚愚痴。
志性猛毅，无有五盖，修六思念，而无放逸。
为七觉意，奉道若兹，稍渐思惟，一切定意，
亲近所行，修乎寂然，善顺随时，不失众德，
住乐静思，所察入乱，于道自在，为贤圣种，
未曾犹豫，不达经典，无有狐疑，亦无沉吟，
除去无明，无有愚冥，常处至诚，明识圣慧。
戒清静者，无所逮得，智慧最上，定意清静，
顺从二事，解脱清静，不怀慢者，圣慧清静，

睹见三世，度众为惠，晓了离欲，则法清净。
斯清净者，不怀自大，其智慧者，此为庄严。
智慧行施，以为庄严，若能清净，于三品场，
己身众生，及修道教，如梦幻化，而无所著，
以戒智慧，而为庄严。又复净治，于三品行，
身行口言，心念亦然，影像幻化，亦如浮响，
是为智慧，而成庄严。则能清净，于三品事，
无能屈者，亦不动摇，普观一切，常察法身，
智慧精进，而自庄严。亦复清净，于三品事，
未曾懈怠，志性坚强，未常怀应，亦无不应，
所以智慧，一心庄严。亦以三事，修行清净，
其所观察，无有闇昧，斯明哲者，兴立五通，
善权智慧，以庄严者。亦复清净，于三品事，
善受总持，了平等谊，示众生法，亦净佛土，
于四意止，志不退转，于四意断，不行二事，
身心惧怕，斯为神足，晓了一切，众生根原，
于魔尘欲，永无所有，诸法自在，随顺决了，
无所从来，及致来道，是为威仪，智慧庄严。
永致湛然，为寂禅定，所观察者，行无崖底，
晓诸阴衰，修乎法品，明识诸界，犹如虚空，
分别情入，空无所有，法无吾我，从缘而起，
晓了真谛，慧无怀恨，无恐惧慧，因缘随念，
于三世慧，无所挂碍，明了三聚，之所归趣，
晓识三宝，则为一相，其智慧者，以此庄严。
明晓幻化，为悉惑相，恨从惑相，譬如若梦，
等如芭蕉，为悉惑相，诸法无会，犹如影相，
从缘合生，如水中月，亦如呼响，因对而出。
其法界者，慧常无坏，明了无本，智无所住，
法动无动，本际常然，有为无为，此无有二，
深要智慧，清净为道，是为庄严，诸佛之法。
其人未常，意怀惑乱，怀来遭遇，总持经典，
而常解说，谊理微妙，而恒游步，灭度之惠。
言不卒暴，亦无粗犷，口所宣传，无有不可，
诸所说音，众当察谊，所仰圣慧，常以了了。
识经谊理，靡不闻达，以归于法，不计有人，
一切诸法，度世为要，以此总持，而自庄严。
口所颁宣，常说至诚，口之所言，恒趣平等，
有所为者，常讲经典，随时不虚，无有为事。
欺人兴此，说其辩才，速及正慧，常无挂碍，
而无所住，随顺无失，善自庄严，如好华鬘。

闻知天龙，所说言辞，鬼神捷沓，及阿修伦，迦留真陀，及摩睺勒，亦复晓了，众生所说。此等不来，在于众会，亦复不住，而就见之。此勇猛者，为颁宣法，则以智慧，而达知之。其自大者，见怀乱意，睹斯所说，顺从应时。自大贡高，睹其所说，其怀慢者，无有嗔恚。为分别说，三乘之教，断诸狐疑，令无结网，则得亲见，佛法正真，不依仰人，智慧如是。于一切字，常晓灭尽，所分别晓，谊无质碍。咨嗟诸佛，无量功德，其逮总持，以此庄严。毁咨尘欲，所知无限，善权方便，随时开化。晓了一切，众生根本，诸佛所知，逮分别辩。其以总持，而庄严者，斯人用此，称名普闻。吾住一劫，歌叹其行，不能究竟，斯功德勋。”

八光明品第五

世尊复告总敖王菩萨：“菩萨有八光明，以此光明，离不可思议诸闇昧，修清净行。何谓为八？一曰、念光明，二曰、志光明，三曰、游光明，四曰、法光明，五曰、慧光明，六曰、至诚光明，七曰、神通光明，八曰、奉行光明，是为菩萨八大光明。于彼何谓念光明？有八事为念光明。何谓八？往古所造众德之本未曾忘失，所未立德日日积功，如所闻法未曾忘失，逮知谊理分别所趣，不从六界成就念门，断诸非法具足善德睹有疆心，诸佛世尊所为建立护持法城，志怀于源逮一切法德诸光明，是故菩萨八事光明。所志光明复有八事。何谓八？志解谊理不怀严饰，志在圣慧不怀识著，志在于法不怀尘欲，志在精进不怀诤讼，志在佛道不怀声闻、缘觉，志在微妙不怀小乘，志在于佛不怀魔事，志在大慈大哀未曾怀害加于众生，是为八事所志光明。游光明复有八事。何谓为八？所可游行常颁宣法，游知众生志操所念，所游之处分别辩慧，所游之处常解深妙十二缘起，所游之处有所宣畅亘无不通，所游之处晓了清净前后增损，所游之处普备一切诸佛之法，是为八。法光明复有八事。何谓八？其明照世而为解说入于善本；又为众生演度世法为畅圣慧；诏使令除诸罪之法；无漏法光善宣道教，不住无明及于众漏；见于生死罪福所趣，睹已尘欲光明，不堕灭尽而取证也；其光明法善察所趣客尘之源；无为法光心本清净；自然鲜洁诸法永寂，是为八事。慧光明复有八事。何谓为八？一曰、八等光诸道，二曰、诸道迹光慧，三曰、往来光照，四曰、放不还明，五曰、演无著曜，六曰、缘觉威曜，七曰、菩萨慧明，八曰、如来至真正觉光明，是为八。至诚光明复有八事。何谓为八？其

墮灭尽以至诚行照曜于彼，其行诚谛第一道迹慧光照彼，其行诚谛致第二果则以照彼，其行诚谛得第三果亦复照彼，其行诚谛得第四果亦复照彼，其行诚谛得缘觉果亦复照彼，其行诚谛得菩萨忍亦复照彼，其行诚谛成佛正觉亦复照彼，是为八。神通光明复有八事。何谓为八？所谓光明靡所不曜其天眼者睹诸色像，永寂诸响则以天耳普闻诸音，所念光明识念无央数劫往古行事，本净光明察睹一切众生心行如虚空，无碍光明又其神足游步无限诸佛国土，慧光明者成无漏圣，积德光明开化众生使修善业，慧业光明决断一切众生疑结，是为八事。奉行光明复有八事。所谓奉行？一曰、遵修圣慧，二曰、志智慧明，三曰、行正见明，四曰、奉观察光，五曰、照众生性曜，六曰、修其脱心，七曰、无嗔恚心，八曰、遵修其明令永究竟，是为八。”

佛时颂曰：

“以往古净业，心初不忽忘，
意习无所习，善劝无懈怠。
所闻未曾忘，速得解法谊，
寂然界愴怕，志强弃非法。
晓了于念门，选择所造业，
怀勇者睹之，建立胜自在。
守护于法城，等一众生法，
智者离诸冥，利益于群萌。
速得光明曜，无疑决犹豫，
志强慧自在，速成至佛道。
志在于谊理，不逸存严饰，
慧士不著想，不倚于文字。
其志于法者，善调欲离痴，
有志净善权，不诤安住道。
意常存于道，不念声缘觉，
常怀微妙业，不念于小乘。
思惟于佛道，不从诸魔教，
常怀于大哀，不饶于众生。
假使所颁宣，所游无狐疑，
随时化众生，所在群萌行。
所游分别辩，彼慧无挂碍，
明于因缘法，无有缘起事。
晓了方便慧，安住所步顶，
一切能普入，诸佛所兴法。
世间法光明，悉知人民业，
及度世圣慧，雄为智慧光。
所生无罪豊，大慧修本净，

善遵于道路，常宣无罪业。
于漏无有漏，法光明照曜，
断一切诸漏，利润于众生。
于有数无数，法常游于慧，
是无垢离冥，游入灭尽行。
尘劳诸诤讼，其慧无蔽碍，
明识众尘欲，其心本清净。
其智得灭度，晓不起寂然，
如是类无限，大乘光明业。
彼于八等慧，游达于道迹，
亦晓了往来，分别于不逮。
无著及缘觉，菩萨世吼护，
慧皆能达此，所游解圣贤。
至诚明无量，勇猛善修行，
其逮得果证，无诤议第一。
其行至诚者，入寂第一果，
第二三第四，逮缘觉之果。
设有能加精，逮法忍平等，
如最胜得道，至诚皆照彼。
又其天眼者，普见十方佛，
成就于天耳，闻十方音声。
识念那术劫，前世慧光明，
随顺知他心，清净慧悉照。
游亿垓佛土，神足照十方，
轻举如虚空，逮无为之慧。
功德光无底，神通益众生，
慧界无挂碍，决群黎狐疑。
奉行所应谊，志强法慧光，
至成明无限，则为神通光。
修行圣智慧，意广辩无底，
等观于正见，究竟无结恨。
其净于此八，斯光威无极，
虽未成佛道，常行作佛事。”

大哀经卷第三

大哀品第六

佛复告总敖王菩萨：“菩萨有十六事，常以大哀加于众生。何谓十六？于是菩萨除见贪身，众生处在若干邪见，则为断去迷惑疑业为

说经法，是为菩萨兴发大哀愍于众生。众生处在虚伪颠倒，非常想常，苦想为乐，无身想身，空有净想，当为蠲除此颠倒行，菩萨于彼兴发大哀为说经典。众生处在计有吾我，一切无形而想有形，当为除去吾我之事，菩萨于彼兴发大哀宣经道。于此众生处在五盖而自覆蔽，堕在欲疮多所危害，睡寐无明虚伪狐疑，因缘所覆不了深法，吾当为彼除诸阴盖，菩萨于彼兴发大哀为说经法。众生处在六情挂碍，眼见色而想著为文饰，耳声、鼻香、舌味、身更、意法而怀想著倚受文饰，当为此等灭除六情，菩萨于彼兴发大哀为说经道。众生处在贡高自大，憍慢求敬，是我自由咄吾志耶，怀害虚伪，余人卑贱我为尊贵，自说我所行正于尊复尊经道，又胜加复敖，乃强矜于容色，自计有识而自放恣，永无所获自谓成就，不贤嫉贤不圣嫉圣，处于邪见想住正道，吾当为此说除憍慢贡高自大，菩萨于彼兴发大哀为说经道。众生处在迷惑邪迳离于圣路，当为除邪显示圣道，菩萨于彼兴发大哀为说经道。众生处在虚伪恩爱之著，贪于妻息男女、家居产业，夙夜汲汲无有懈废，当为除此令脱恩爱，菩萨于彼兴发大哀为说经道。众生处在各共诤讼恚恨不和，怀结嗔怒多所讼理，当为除此斗诤嗔恚，菩萨于彼兴发大哀为说经道。众生处在恶友所摄，离于善友兴造恶业，当为除此诸恶知识使从善友，菩萨于彼兴发大哀为说经道。诸天处于慳惜贪饕，不知懈倦离于圣慧，当为除此慳惜贪饕兴隆圣慧，菩萨于彼兴发大哀为说经道。众生处在非谊之业，存有常计断灭之见，当令入于深奥缘起之业，菩萨于彼兴发大哀为说经道。众生处在无明愚冥，倚著我人寿命，当为除去一切邪见，令逮贤圣清静之眼，菩萨于彼兴发大哀为说经道。众生处在娱乐生死，设受五阴五体之贼，当为除去一切三界之所倚著，菩萨于彼兴发大哀为说经道。众生处于魔见系缚，处于思想计是我所应与不应，当令解脱魔网系缚依倚所著，菩萨于彼兴发大哀为说经道。众生处在塞无为门开恶趣户故，当为阐泥洹之门，菩萨于彼兴发大哀为说经道。”

佛言：“总敖王菩萨，是为十六事，菩萨大士兴发大哀愍加众生也。”

开化品第七

尔时，佛告总敖王菩萨：“复有三十二事所修善业，除不顺教罪恶之业。何谓三十二？众生在于自大睡寐立见己身，则以智慧而化导之使入道义，是为菩萨第一之业。志乐于小卑劣之乘，计吾我人，则开化之入于微妙无极大乘。众生若处非法邪见计有身者，则开化之以己所乐正法之义劝助诱之。睹于众生戒不清净，身业鲜洁本性和调，则以此业开化众生。见诸众生堕于邪见六十二疑，则以正见贤圣之业，化导群黎而建立之。见于众生存在无明所念颠倒，则开化之显示

道明。思惟柔顺亦复自立于清和义，见于众生远离法行身自修法，亦开化人住于正法，而复随时为演经义。见于众生慳吝所盖，身心不贪一切所有皆能惠施，亦能化人惠诸所有。见诸众生犯于诸恶住不谨慎，身奉净戒亦化于人立于净业。见于众生多所诤讼嗔恚茂盛，身修忍辱行慈心力，亦复化人奉于慈愍。见于众生处在懈怠多所废落，身不厌倦勤行精进，亦复化人夙夜勤力。见于众生其心愤乱而志放逸，身自摄意一心禅思，令不驰逸其意安详，亦开化人立于庠序。见于众生处于邪点憍慢自大，身修智慧离于愚冥，则以大智而开化之令除闇昧。众生处于非时之行身则自坏，善权方便修平等行，亦化于人权谋随时奉平等业。众生处于尘欲所危思想，多不净行应在不应，身已永除恩爱之源，亦以化人除诸瑕秽。见于众生而处贪身来致刑狱系缚之患，身除贪己众结之难，亦化众人舍于贪身一切颠倒。见于众生不调无寂不顺律教亦未得解，身寂调定解随律教，亦化众人调定顺律。见于众生不奉孝顺而无反复坏诸德本，身承孝道亦修恩义将护善原，劝立众人使修孝事，常念反复不失德本。众生处于挂碍诸蔽顺从恶教，身度蔽碍，亦化众人使离挂碍。众生处于非恶之教，不归先圣不顺众祐，身奉善命从明智教，亦化众人顺从旧德咨受先达。众生处于多为无义虚伪之行汲汲匆匆，身顺义理务众德本，亦复化人令勤修行立诸善源。众人处于贫匮之行离贤圣财，身修无穷遵于七财，信、戒、惭、愧、闻、施、智慧，亦劝立人圣贤七业。众生处于常遭疹疾，摄载四虺身修无患安隐无欲，亦化众人使除诸病永令无难。众生处于若干闇冥离慧光明，身修明曜，化立众人无极大光。众生处于三界，挂碍生死五趣轮转无际，身自断除三界之著，而化众人随时拔去三界之结。众人处于左道之业离于右路，身修正道，亦立众人住于右路。众生处于贪身寿命不睹患难，身不惜命见患所由，亦化众人不倚身命察知众难。众生处于离佛法众，身自修德不断三宝，化立众人随三宝教。见于众生舍于正法，身护经典，亦化众人将护大典，宣传佛教立乎正法。见于众生住远世尊，六思念教身随六念，亦化众人奉六思念。见于众生从于尘劳罪福之业，身离罪尘，亦化众人使舍殃秽。见于众生而从一切不善之法普离众善，身修善法舍于非法，亦化众人住于正真柔顺之法。是族姓子，菩萨所行平等之业，当可所立能顺如此，则奉正真无上大业。”

道慧品第八

佛告总教王菩萨言：“又族姓子，菩萨之业不可称载。所以者何？计如众生贪欲诤门，菩萨修业积功累德，合集众行至初法门。正使族姓子，江河沙等诸佛世界满中众生，皆令成立声闻、缘觉，悉令此等一切众生所立善业；不如发意菩萨功勋，百倍、千倍、万倍、亿

倍、巨亿万倍，不任为喻。所以者何？自断本性所习尘欲，声闻、缘觉住于缘合，菩萨大士蠲除一切众生尘劳所住缘合故。族姓子，一切众生所可造业，声闻、缘觉所立德本，比菩萨业为尊为最，无有侔匹。所以者何？凡夫愚人习从颠倒不顺之业，声闻、缘觉亦随缘习；菩萨业者，有颠倒功勋无量，以是之故，菩萨大士过于众生，越于声闻、缘觉之上。”

于时，总赦王菩萨闻佛所说，欢喜踊跃，善心生焉，劝助赞善：“世尊所演，至未曾有难及难及！如来乃宣菩萨庄严、菩萨光明、菩萨大哀、菩萨化业。唯愿世尊如来至真，垂恩广覆重复解说，何因诸佛而于众生兴立大哀？大哀何所比像？其事云何？以比之瑞应云何？住在何所？诸佛世尊造业云何？善哉！世尊，如来皆知亦能普见，于诸所造业而睹悉达，惟为我等而分别说。”

佛告总赦王菩萨：“谛听！善思！如来当说，如来大哀，如来造业，所可颁宣。族姓子知，诸佛世尊不兴大哀亦不奉行也！所以者何？诸佛世尊常加大哀不舍众生，从无数功积累已成，犹是之故，不行退转不舍众生，是则名曰如来大哀。其哀无量不可称计，难不可当，无可容处，从始至终无能称载。所以者何？如来得道常怀大哀愍于众生，如其佛道大哀亦如是。何谓如来得至佛道？无本无住乃致大道。于彼何谓而住于本？已计身本，立在不诚思想之源，以是之故，如来随时合成于道，名曰无本，亦无所住，以是如来成最正觉；因此达知一切众生无住无本，解其所处，当为宣传如此之诰令其晓了，以故如来于诸众生常怀大哀。

“又族姓子，道者寂然亦复澹泊。何谓寂然？云何澹泊？于内寂然，于外澹泊。所以者何？其眼者空，察无吾我，亦无所受，眼耳鼻口身心亦复空耳！亦无吾我亦无所受，是为眼空。识别除此不为色逸，是谓寂然。耳鼻口身意亦复空耳！识别除此，不为诸法所见驱使，是谓澹泊。众生之类不能晓了，此寂澹泊使明识斯，以故如来于诸众生而怀大哀。

“又族姓子，道者本净亦复显曜。所谓净者，心本清静。何谓言曰其本清静亦复显曜？所谓净者，无所著故亦无所犯，等如虚空。空本净故，与空合同。等如虚空故，曰空等聚。究竟本净又极显曜，以故名曰本净显曜。愚痴凡夫不觉其实，反为客尘而见染污，吾当解彼本净显曜，是故如来于诸众生而怀大哀。

“又族姓子，道无精进亦无不精进。何谓无精进亦无不精进？摄一切法是则名曰为无精进。已能受习一切法者，如来于彼亦无精进，亦无不进，则度诸渎。又如来者，于流诸彼不见此迹彼岸，以故名曰离此彼中。如来至真皆解诸法故成正觉，由是名曰为如来也。是无精进亦无不精进，愚戇凡夫亦不晓了，吾当颁宣令解其意，是故如来于诸众生而怀大哀。

“又族姓子，道者无想亦无因缘。何谓无想亦无因缘？其眼于识

而无所不得，其无想者，不见诸色则无因缘；耳鼻口身意亦复如是，亦无所不得亦无思想，不见诸法则无因缘，是无想无缘为贤圣行。何谓圣行？其于三界而无所行是贤圣行，其此无行为贤圣行。愚戇凡夫不能晓了此贤圣行，吾当开悟使分别此，是故如来于诸众生而怀大哀。

“又族姓子，道者无往无来现在，等于三世断于三场。何谓三场？其心不退游于过去亦不驰骋，于当来慧亦不退念，于现在事于心意识而无所住，不想过去、不念当来、不戏现在，等于此三则净三场。愚痴凡夫不能晓了此贤圣行，吾当开悟使分别此，是故如来于诸众生而怀大哀。

“又族姓子，道者无身亦复无数，亦无明识，亦无耳鼻口身意识。所识者，无为无数，所谓无为不起不坏亦无处所，是则名曰离于三相。是以无为，如其无为解了有为亦复俱然。所以者何？一切所有皆为自然悉无所有，其无所有彼则无二，以故无身亦复无为。愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道者无所坏迹。何谓为迹？何谓无坏？无本为迹，其无所住曰无所坏。界则为迹，无我无坏。本际为迹，无动无坏。空则为迹，无获无坏。无想为迹，无念无坏。无愿为迹，无处无坏。泥洹为迹，无毁无坏。是无坏迹，愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道不从身而成正觉，亦不从心。所以者何？身者愚戇如草木墙壁瓦石影譬，心者如幻，其以身心觉了如此，是名曰道。假有言辞而言兴盛，又其道者无有言辞，亦无身心法与非法，无道不道，无诚无欺。所以者何？道者无言，于一切法而无有道，何所是处？其于言辞而无所说。犹如虚空无有处所，亦无所住无有言辞；道亦如兹，则无所住亦无文辞。如是其于诸法审实求道，则无文辞法亦无言。若能晓了诸法无言，是为诸法之所生也。愚戇凡夫未能晓了，吾当开悟使分别此，是故如来于诸众生而怀大哀。

“又族姓子，道者无取亦无所依。何谓无取而无所依？断于眼识而不得受色，亦无所不得，不依耳鼻身口意。断无识者，亦无所受亦无所不得。诸法无获，是谓无依。如来以此无受无依，怀来于道致最正觉。眼于受色不以为依，识不退从；耳声、鼻香、口味、身更、意法亦无所依，识不退从。已不住识，则能分别此一切众生心之何处。何谓众生心之何处？众生心处则有四事。何谓为四？一曰、色心之处，二曰、痛痒，三曰、思想，四曰、生死之处所。彼于处所而无所住，如来明此于无住际。愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道者则空。谓空者，道则为空。所以空者，诸法皆空。如来于彼达无本空，解一切法而致正觉，空亦复空故成正觉。以此一慧则别空事，彼则无二；其无二者，空与道慧则无有二；已无有二，法则无二；已无有二，则无有名无想无底无行，无所流布所可谓

言：‘所依受者是为归趣，非真谛谊！何所有法而逮色者？’空者曰空犹如虚空，所言虚空，虚空无言故曰空，空无言亦空，诸法处所为若此也。至于无名不言有名，如是无慢无言，处所亦无处所，已无慢说无处所，已名亦若兹。所说法者，又计彼法无有言教亦无不教，一切诸法亦复如斯，生亦复然无正无邪。如来无生晓了无本，如来所知所解脱者，不解不缚是谓平等。愚戇凡夫不能晓了，吾当开悟使分别此，是故如来于诸众生而起大哀。

“又族姓子，道等如空。其虚空者无等无邪，道亦如兹无等无邪。计于诸等无成道者，彼无有等亦无有邪。如来以此无等无邪，解一切法而悉无本成最正觉。又于诸法，而不受正亦不受邪，如其法数慧数亦如承佛圣旨。何谓佛圣法？有所受者故曰为有，是则归趣无所受者；斯无所有则无有主，以是自然而得逮成。离于自然后无游行，亦无有进亦复无退，是谓进行。有所除断，如来说法断如是行。愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道如真迹。何谓真迹？计如道者色复亦如，无本不退。又如道者，痛想行识亦复无本而不退转。又如道者，地水火风其种亦如而不退转。又如道者，眼种、色种及眼识种，耳鼻身口意法杂种，亦复无本而不退转。诸法所绝，使了三际种诸入，如来于彼觉了真谛而成正觉。所晓了者不从颠倒，又如去本中后亦如。其无本者而不退转，其本种者则无所生，其他种者亦复无为中种澹泊。是则名曰如真迹。又如一事一切亦如，如一切事一事亦如，如一事者众多亦然而不可得，是为真谛。愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道者入室则入无室。何谓为室？何谓无室？修行一切诸德善法，是曰为室；于一切法而无所获，是曰无室。所以无室，心无所住无有处所，故曰无室。无想三昧至解脱门，故曰无室。观察想念称量计校越度称量，故曰有室；其无识业是曰无室。观察有为故曰有室，观察无为此则无室。察于无为是则无室，得入无室则为道矣！愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道无穿漏亦无所受。何谓无漏？何谓无受？离于四漏名曰无漏？一曰、欲漏，二曰、有漏，三曰、痴漏，四曰、见漏。离此四漏，所谓无受。离四事受：一曰、受欲，二曰、受有，三曰、受见，四曰、倚戒。离此四受，彼此四受悉归无明恩爱所缠，依倚于内从内发起；如来至真除于内受，所生根本于内清净，归趣一切众生清净。其内净者彼无想念已，无想念除于颠倒，唯念柔顺不住无明；已不住无明，则不复住十二有数；已能不住十二有数，则无所生；其无所生，彼则寂然；其寂然者，彼则无谊；其无谊者，乃第一谊；其第一谊，乃为究竟；其究竟者，彼无人谊；其无人谊，无所获谊；其无获谊，则如来道。是十二缘，已了十二则曰法谊；其法谊者，是则

名曰睹见缘起；其睹缘起，则见于法；其见法者，则见如来。如是观者，则无有本。性极本末有见想乎？何曰所有？于诸所想不兴因缘，此谓于想而无因缘。如是察者，乃为正觉如来所解。如是像法普行平等，其所等者亦无偏邪。如是平等无有诸漏，亦无所受。愚戇凡夫不能晓了，吾当开悟使分别此，是故如来于诸众生而怀大哀。

“又族姓子，道者清净无垢无染。何谓清净无垢无染？空则清净，无想离垢，无愿无染，无生清净，无污离垢，无起无染，本性清净，解脱无染，无游逸则清净，亦无轻戏为离垢，寂调则无染，无本为净法界显曜，本际无染虚空清净，虚无不垢恍惚不染，除内为净于外无逸，则曰无垢。无内外行，则曰无垢。不习诸入，则曰无染。慧尽过净了，净于当来不起无垢；分别现在住于法界，则无所染。是谓清净无垢无染，而平等御于一法矣！至寂然迹，其寂然者则为愴怕，寂然愴怕是谓仁和。

“是族姓子，犹如虚空，道亦如之；如其道者，法亦如之；如一切法，众生亦如；又如众生，国土亦如；如其国土，泥洹亦如；如泥洹，等见于诸法，究尽寂然此已辩矣！于诸部党而无部党，是为清净无垢无染。如来于彼于诸色像，了一切法而无色像，遂成正觉。观于一切众生之界，无净无垢，于此诸数，是则名曰悟寐众生而怀大哀。如来则以善权方便，感致梵天，不以无请而转法轮。于彼应时六万八千梵天之众，自于天宫忽然不现，在波罗奈鹿苑之中，住世尊前稽首足下，劝请世尊令转法轮：‘唯愿大圣，颁宣经道，若说法者多所救济！’梵天尔时叹此颂曰：

“正使诸法，寂然愴怕，清净鲜洁，无垢无染，
既不可获，无音无作，则以道慧，最胜悉了。
于无数劫，造立愍哀，勤行难量，精修长久，
欲得开化，众生迷惑，睡眠来久，大愚所蔽。
众生多有，晓了积德，本以曾修，故诣最胜，
必当识别，殊异尊法，唯愿如来，时转法轮！
已得摄伏，魔所处场，寻时开阐，于甘露门，
为众广演，贤圣句迹，唯愿导师，显示道迳！
假使正觉，矜哀无尽，垂愍众人，转无思议，
我身今日，劝请至尊，唯闻最上，道法之轮！
设使大圣，怀乎恩慈，犹拘那谿，佛讲说教，
亦如迦叶，转其法轮，唯愿世尊，颁宣经道！
譬如天雨，多所润泽，生于药草，及茂五谷，
以大哀云，普周世间，如来为雨，正法之水！
从始生时，口宣妙言，圣自发生，当度众生，
群庶悉集，渴仰饥虚，唯以法味，除其痛渴！”

佛言：“如是，族姓子，其梵天王劝请如来殷勤若兹。又佛正觉不舍大哀，在波罗奈仙人所止苑园之中，寻时即转无上法轮。沙门、梵志、诸大魔、神、梵、天王、世人所不能制，所讲经道出非常音告于三千大千世界，比丘拘轮 第一解法。于时世尊宣乎赞颂：

“深妙不可获，第一无所作，
拘轮解本际，不怀于结恨。”

“如来说此法轮之经，不可称计无央数人众生之类，受教随律见于如来，兴阐大哀；无量无限难不可计会群黎之党，皆发无上正真道意。是族姓子，诸佛世尊以十六事，愍念众生而怀大哀，常以慈愍未曾忽忘，彼亦无业不怀恐怖。如来所修无极之哀不可称载，为一人而造立行，江河沙劫忍在地狱初不退还，以是方便，使诸众生随律受教贤圣之法。以此比像如来至真，为诸众生各各一一受形命者，为一人各各恒河沙劫，忍于地狱勤苦之患，欲使众人随律受教入贤圣法。如来不以懈倦而厌，不违大哀。族姓子知，诸佛世尊愍哀众生，巍巍如是常怀大哀！

“又族姓子，诸弟子众、声闻种类志怀恐惧，其所愍哀，畏怖如鱼慈犹肌肤；菩萨之慈犹如骨髓，诸佛世尊怀无极哀，常当劝助求于佛慧，化声闻哀令入道心奉菩萨哀，诸佛世尊决于道慧故怀大哀。声闻哀者察于慈心，瞻察开化为菩萨哀，究尽启导为佛大哀。厌造立行为声闻哀，精勤转上为菩萨哀，超越诸行为佛大哀。是族姓子，诸佛世尊而于众生常怀大哀，一劫、百劫、千亿万劫，为一人故住在世间，劫数难计不可称载，而于泥洹不永灭度也，必当济之故。族姓子，当解知此，其佛大圣如来至真，在于众生而怀大哀。”

宣劫世品第九

佛言：“族姓子，乃往过去久远之世，不可计会无能称载，长远悬旷不可议劫，尔乃有佛，名栴檀香如来至真等正觉，而出乎世。世界曰香土，劫号上香，其佛寿命千二百六十八万六千岁。其声闻众亦八百六十八万六千人，诸菩萨众不可称限。其如来至真，有一毛孔所演妙香，熏周三千大千世界，其熏巍巍资美难量。彼佛世界曾无秽气，其土所有墙壁树木、山陵溪谷所有形色，以如来香皆被蒙熏，香气芬馥不可为喻，以故世界名曰香土。其有人众生，彼佛土皆悉被荷如来圣香，使身口意不被殃。若有出家在其佛所作沙门者，闻此妙香皆得四禅。其土已更曾与千佛悉同一字，号曰栴檀香，以故其劫名曰上香。栴檀香作佛事竟，然后乃当取般涅槃。临灭度时察众生界：‘何许是人，吾应当化，令随律教？’则道眼见有想无想天而有所

化异人，宿世曾以植众德本，志在微妙佛应所化，在彼天上八万四千劫，在于彼境乃生人间，无有欲尘闻大乘德，当发无上正真道意志不退转。

“时栴檀香如来至真，以权方便，怀抱大哀故示因缘，告诸比丘：‘今是吾时，当般泥洹欲取灭度！’于时其佛兴隆大哀，有三昧名曰无厌定意正受，现大灭度，然后广布舍利靡不周接。其正法住千八百四十八万四千岁，斯法开化多所救济。当尔之世无有像法。彼佛世尊以三昧力，等以神足建立神圣，八万四千劫在彼没形而不自现。如是，族姓子，于八万四千劫多所开化。其彼天人在有想无想天，竟八万四千劫寿已，还生人间生尊者家。年适八岁，是栴檀香如来至真乃从三昧起，在尊者家，显佛身形住诸子前。又其家中余人不得睹，八岁童子独见之耳！其童子者曾志大乘，如应说法演家患难，咨嗟大道不可称载。于时童子至心淳和，发于无上正真道意，寻时得成不退转法。佛见彼心则授其决：‘过七万二千阿僧祇劫，当成无上正真之道为最正觉，名曰宝上如来、至真、等正觉、明行成、为善逝、世间解、无上士、道法御、天人师、为佛众祐。’其余人者不闻授决，独此童子一身知耳！本应器故。

“时万二千天子闻所授决，淑淳一心发无上正真道意，各自兴愿：‘宝上如来成正觉时，吾等当生于彼佛土。’其佛所说必当如愿，生乎彼土宝上佛所。时栴檀香佛，授诸菩萨薊已，乃就泥洹而取灭度，诸天人民供养舍利。故族姓子，诸佛世尊，大哀具足巍巍若斯，非声闻、缘觉地所能及！又族姓子，诸佛圣教若断绝时，故寻复续立。诸天中天所发众祐，其等功德益加炽盛，所化转茂，至不灭度思报功祚，终不相违而亡失也！

“如来讲此大哀谊时，于大会中三分江河沙等众生之类，皆发无上正真道意；减半江河沙等诸菩萨众，逮柔顺法忍；江河沙等诸菩萨众，成立大哀逮得总持如佛世尊，又其法忍名阿惟颜，逮成此忍。于时众会闻说此言，欢喜踊跃善心生焉，俱共咨嗟世尊之德，便雨天华供养世尊，乐器自鸣，当是之时莫不巨然。”

处处业品第十

佛告：“族姓子，何谓如来所作事业？如来事业有三十二。何谓三十二？则以佛无上之慧，处处如有知，非处如有知，有限无限、有为无为靡不通达。彼何谓处？何谓无处？所言非处，无处救济，身行恶、口言恶、心念恶，欲得可意所欲必获欢悦之报生于善处，未之有也！所谓处，处如有所望得护，身行善、口言善、心念善，欲得可意欢悦安隐恩德之报归于善处，此事必果。其慳贪者欲得财富，犯于禁戒而作众恶望生天人，怀毒嗔恚欲求端正，懈怠得道，其志迷乱眩惑

放逸欲入寂灭，其怀邪智驰骋不正欲得坏除，挂碍正处怀来真正，此不可果。施望大富，持戒生人，忍辱端正，精进得度，禅定入寂，正慧圣达，蠲除挂碍所止之处，此事必果。又复豫知其犯逆者，心不存定；禁戒清净，心常寂然；如行颠倒，不能逮得柔顺法忍；如笃信空，逮得法忍；如狐疑者，心不休息；如除结网，心得止息。知于女人不以此身成转轮王、天帝、梵天、魔王之主在世尊前。佛知于女人转女形已，成转轮王、释、梵、魔天、在世为佛。如转轮王以正治国，慈愍万民不行邪恶，知转轮王不行枉横以邪治邦侵怨万民，知郁单越人终不犯恶堕苦地狱，知其域人必生天上快乐之处。知杀生者欲得长寿，盗窃不失，淫劬化生，妄言求辩，醉酒不乱，两舌求和，恶口咨嗟，绮语求名，嗔求好颜，诤颂求安，邪见望度，此事未果。慈人不杀欲圣长寿，清廉不盗，欲望不失贞洁不淫，忠信不欺，圣慧不醉，不斗彼此，言和不粗，辞质不饰，忍辱不嗔，放舍不贪，正见不邪，必得长寿，财安不失，妻息贞良，口气香好，黠慧讲谊，眷属和睦，众人赞扬，听采其言，财宝丰饶，莫不瞻颜，世世识道，此事悉果。豫知八等不得不至于果证也！知得果证得入于时，知于道迹不复往来八反生死；又知往还不复三反而周旋；知于往来二反周旋，弃于五阴而取灭度；知于不还不复还反归于此世，知所在处而取灭度。知无所著不复牵连而有处所，知无所著无余终始，知贤圣士不舍佛道归于异学，知贤圣士当归命佛不信外道。又豫睹知菩萨逮得起法忍终不退转，还就小乘无所从生，法忍菩萨必成其道不复回还。豫知菩萨坐佛树下不成正觉终不起也！坐于树下成于无上正真之道，必果无疑。豫知如来道慧广远而无挂碍，欲求如来慧不通达而有蔽碍，未之有也！欲令如来圣慧损耗而不周普，未之有也！世尊道慧悬旷周接靡不通达，豫知假使有人欲见佛心，未曾有也！如来心者，天上天下无能见者。知天上天下欲见佛顶，无能堪任睹佛顶者！豫知如来常定，心未曾忘普见一切众生所念。豫知佛心未曾挂碍，心常一定见于本际。豫知世尊从本已来而无有失，所说至诚言满十方常无口过。豫知欲求世尊使有阙漏，诸佛大圣身行清净，超明月珠日月释梵，虚空清净无能及者。佛天中之天，道慧超殊巍巍无侣不可为喻！是族姓子，如来处处力无限量，所说无际，所畅文字真谛无欺。”

佛于是颂曰：

“地尚可擘裂，空无动使动，
欲使佛所说，无能令有处！
丈夫尚能化，令空为五色，
世尊所说处，无能令有处！
佛之所宣畅，上下并中间，
一切悉至诚，莫能令不及！
若说非处处，上下及中间，

此事悉真正，终无有变异！
晓了其处处，而为讲经法，
是故实无虚，悉见心志性。
异学外道士，所在皆驰逸，
用不达处处，佛正觉无此。
其知处非处，随时度众生，
诸佛名称广，寻为说其处。
众生无应器，佛亦观于彼，
随时而观察，以何能将养？
是为第一业，诸佛殊胜道，
所作无殃罣，则以度众生。
无量不可计，说处及非处，
是为大仙力，外道无能逮。”

大哀经卷第四

了三世品第十一

佛复告：“族姓子，如来别知当来过去今现在诸所行业所在因缘处所报应。云何别知？于是如来悉解过去所可作者诸善报应若不善事，当来所作善不善事报应之方，现在所作亦复如是。当来之世，两当所作殃罣功德，当悉分野如来悉知。当来所作与众殊特，当来所作方损耗者，当来所作有增益者，如来悉知。假使现在所立造业而有增益，于当来世而复损耗，如来悉知。设于现业如有损耗，复于当来亦复折减，如来悉知。若于现在有所增益，于当来事亦复增益，如来悉知。若于过去修习瑕疵卑贱之业，于当来世又习微妙正士之业，如来悉知。其所行者，因薄少功报以大德，或行大业殊异之德致超异功不可称载，或以声闻之故而有施与，或缘觉故，或佛道故，因其施与，如来悉知。若于现在所遭苦痛若过安隐，若现作安或现得苦，或现在作恶寻遭恼患，或现作恶未来致乐，或现作善辄获安报，如来悉知。一切众生过去当来今现在，罪福因缘所致报应，此皆如审而无有异，罪福之应亦无殊别，如来悉知。以知之故，则为如本而为说法。是为如来第二之业。”

佛于是颂曰：

“如来晓因缘，明眼别报应，
三世无挂碍，知众生所行。
因当报安乐，福趣天世人，
缘其致苦患，安住悉知之。
善恶所造业，因获其果实，

安住亦了此，如明珠在掌。
或为少事业，所获无限量，
是广若薄浅，佛悉知本末。
或为声闻施，若住缘觉乘，
立于最胜业，安住悉知之。
所因造苦行，或复成安乐，
从乐而获苦，因复住于业。
或复苦恶行，反成住于乐，
或有行善恶，报以苦胜患，
或从苦致苦，从乐而作乐，
罪福为自然，佛悉知报应。
三世所展转，众生因缘报，
佛了以圣慧，不虚无有异。”

了众生所品第十二

佛告：“族姓子，如来晓于众生他人异种、所好不同、志学各异，于脱未了悉知如审。云何知之？或时有人住于贪欲志好恚脱，或复有人住于嗔恚因贪欲脱，或复有人住于愚戇信欲恚脱，如来悉知。或复有人住于善德好不善脱，或复有人住于不善志信善道，如来悉知。或复有人，专精下劣信微妙脱，如来悉知。或复有人，专精微妙志好解脱，或复志好专精下劣，住于殊特超异之谊，或复住在殊特专精，堕在下劣所可好信，永在邪业不决了界，或复信乐在不决定成于正业，或有好乐向正定门而得解脱，如来悉知。或有信乐当度欲界，或因信乐得度色界，或有好信超于三界，或从信喜耗减缘致殊特，或好殊特致于损耗，如来悉知。所可生处其色若干，财业各异所受不同，所信乐致顶相，或得住限，如来悉知。如其心所知辄为说法令斯得解。是为如来第三之业。”

佛于是颂曰：

“世间志不同，意所好各异，
志操不可限，佛悉知无际。
佛知志所趣，或之于信乐，
住欲嗔恚贪，或住怒愚戇，
或住痴而欲，住于善不善，
所行特不特，安住悉知之。
因下劣微妙，志性好幽玄，
或从殊异业，专精信解脱。
或从信下劣，因致上微妙，

或从超殊行，便获下胜智，
犹邪不决了，从不了正受，
好信度三界，佛知志所乐。
所生色若干，其在中各异，
从顶异发相，因信得解脱。
三界诸众生，佛悉知说法，
随其应得受，是为十力业。”

别众种类品第十三

佛告：“族姓子，如来悉知世间众类若干种形不可计身。云何知之？其身所为积于罪鬘，如来悉知。若以其身积累功德，如来悉知。若以其身种于秽恶，致无拥护不获济界，如来悉知。又如来者，悉知境界、眼界、色界、眼色识界，了其本末根源所起。云何知之？其内则空，于外亦空，内外亦空，耳鼻口身意亦复如是。意法识一切诸界，了其本末所从出也。云何知之？内空、外空、内外皆空。地种、水种、火种、风种亦复悉空。云何知之？了如虚空，是故知之。亦知欲界、色界及无色界。云何知之？知从想念而致住此。有为界、无为界，知有为界无行为想，知无为界不以非行而造想矣！知尘劳界因从客尘致欲之相，知嗔恨界其本清静鲜洁为相，知于行界从不顺念无明为相，知泥洹界因从顺念显明为相，世间众人身所倚界，为如是也！所可住界所催迫，因界现仪，专精其界，从志性界，因界而住，由界而生，如来悉知，随其所知而应说法。是为第四之业。”

佛于是颂曰：

“其人中师子，皆晓了诸界，
于斯世间人，从身之所行。
其界所兴起，广普不可限，
安住一切智，根源所从出。
罪福所从生，诸身所因出，
由缘所可归，及身之所生。
由是界所立，因得脱诸种，
咸知如是身，最胜为大圣。
眼种亦如是，色种并意种，
最胜悉知空，本净无忧戚。
耳鼻亦如斯，舌种及身界，
其意法诸种，当知悉为空。
地水火风种，此诸界适等，
其人中师子，等解如虚空。”

欲界亦如此，色无色界然，
别知是诸界，因思想成立。
佛知因客相，起欲为自然，
安住解嗔恚，亦复为本净。
分别觉于此，诸行及无行，
又复计泥洹，则无有三想。
所因界出相，犹从不解明，
一切所因出，如巧师合散。
是世身无数，其形为若干，
佛金晓了知，不自念我知。
犹如于虚空，十方无边际，
其人中师子，普知诸境界。
彼最胜圣慧，极上无崖底，
众人所不及，不能知涯际。
是为第四谊，圣人离垢秽，
善明识诸界，因开化众生。
以律启悟意，所作罪福业，
不复起嗔恚，其志悉有别。”

晓众生根本品第十四

佛告：“族姓子，如来悉能晓了他人众生诸根精进。云何晓了？
知于众生软劣根者若中间，亦复有人诸根通利，若殊特根若下劣根，
所因其根缘倚思想，其根本际而兴情故，从嗔恚际起愚痴原，如来皆知。
诸根想念为何等类，杂碎之秽起淫怒痴，如来至真亦悉知此诸根
想念为何等类。其淫怒痴因缘诸根而有所为，从不善缘而有此根，或
从无智而有此根，或从诸念而有此根，如来悉知。又复如来知眼诸
根，耳鼻身口意亦复如是。男根、女根、命根、乐根、苦根、欢根、
恐根、观根、信根、进根、意根、定根、慧根、无异根，所当知根悉
知此根。其根所由眼根因缘，耳根所住，鼻口身诸所根本，有所立处
如来悉知。因耳之缘而有鼻根之所立处，从鼻因缘有立舌根，从舌因
缘而立身根，从身因缘立于眼根，如来悉知。何所众生因从施根而致
应戒，如来悉知。此等诸根增减进退，各为分别演布施事。或有众生
因从戒根而行布施应戒，如来则为演戒本末。或有众生从忍辱根而应
精进，如来即为演忍本末。或有众生从精进根而应忍辱，如来则为演
其精进之本末也。或有众生因一心根而应智慧，如来则为分别禅思。
或有众生从智慧根而应一心，如来则为分别解说诸根增减进退之原。
宣畅智慧根力觉意，八由正路三十七品，亦复如是具足周审，演其本
末靡不究畅，各为一切而令判了。或有众生从声闻根学缘觉乘，如来

知根演声闻乘。或复有人从缘觉根学声闻乘，佛知此等诸根所趣，则为解说缘觉之乘。或有众生从大乘根学于声闻、缘觉之乘，如来悉知此等诸根之所归趣，而为颁宣大乘之业。或有众生各缘异根而学大乘，如来悉知此等诸根各各别异则为解说。无修行根众生之徒，不能修根不应法器，如来见此不应器者因令学观。或人修学根顺应器，如来睹之怀来应器，则以殷勤为说经道。如是，族姓子，如来悉知一切众生他人身根及其异身，诸根所趣所念不同识其本末，若不念者晓知诸根从其比类，知诸人根志操所应因缘所为而可化者，方便从谊坐起经行进退之谊，咸达其根，如来悉畅靡所不通而为宣经。是为如来第五之业。”

佛于是颂曰：

“知根广无极，了众生志性，
其根为何类，最胜悉知行。
下劣中上妙，诸根佛所知，
无等伦如是，从所应解意。
其际欲恶尘，其根若薄鲜，
若复性卒暴，假使怀粗犷，
胜知之何因，晓了其本末，
其不善无别，所依当解脱。
从眼意男女，亦复晓眼根，
苦乐及欢悦，何从致忧恼。
所因观义道，精进意慧定，
及知他余事，意勇复如是。
眼因缘耳处，成致鼻耳舌，
因身至因缘，得兴立眼耳。
施根志戒禁，为说布施事；
戒根学布施，为说戒法谊；
忍根现精进，为演忍辱事；
精进现忍辱，为宣精进事；
从智根致禅，为人说智慧；
从精进致忍，为人说勤力；
从禅根致慧，为人说禅思；
从慧根致禅，为人说圣智；
其声闻乘根，而至于缘觉，
最胜演声闻，为舍缘觉义；
若志缘觉行，学习声闻行，
佛便舍声闻，为讲缘觉事；
其根在尊业，斯人学下劣，
佛说度无极，分别舍缘觉；

见处处有行，胜观为分别，
降以纯熟根，十力为解说。
众人以何缘，诸根所应行，
知其志性趣，报应之所为，
从其尽诸根，如坐成实本，
自以智慧明，是世尊分别。”

普游品第十五

佛复告：“族姓子，如来皆知，普由一切靡所不达，密如有知。云何知之？众生必救于真谛界，知众生界或在邪业矣。悉复分别此群生界，必定不定处于邪事报应之力。彼亦如是，其众生界必在决定，前世宿命报应之果致此功勋，明识精勤诸根通利应当被训，如来则为广说经典。此等之类，于贤圣说当为应器，如来则观宿本缘迹，寻为如应为演经道。众生之界在不决定，存因缘力为教授相，宜以戒度寻为训诲。如应禁戒不得解脱不致济度，如来则为诱入无本，因缘报应病与药。若从如来听闻经典，奉顺道教便致德果，诸佛世尊由此等故兴出世间。众生没溺永在邪业未立德本，意劣弱颜不为应器，如来至真为讲经道。其不应器令得解脱，如来睹此不应器者观察护之，以是之故菩萨大士被弘誓铠而救济之。又复如来则以三事了贪欲者，世尊或以贪欲人故而兴出矣！又以贪欲而见系缚，欲令出家故兴出矣！或以宿命贪吝缘故而为兴出。又知嗔恚复有三事，或以嗔恚而见系缚，思想之故，故兴出世。或有所愿不具足故，故兴出世。或有宿世阴盖所缠故，故兴出世。知其愚戇当有三事，或有愚戇行无明事，或有贪见身故，或有沉吟之故，如来悉知。又如来知则以苦行了本神通，诸根明者因从苦行加痛致神通，懦劣根者以安隐行速成神通；根通利者以勤苦行成神通定，懦劣根者亦因加痛而致神通。以舍因缘行于调和了别神通，不信于道而不休息，当本加杖令成神通，佛悉知之。心性不和其行促暴，知疾可化令致神通，使无暗冥而欢喜悦。或有行者，因集道力使具足成，如来所知不复勤学。或有所行从修道力而具足成，不因集力；或有所行，不因集力，不行道力而具足成；或有所行从合集力，亦行道力而具足成，如来悉知。或有所行，志性和雅其行不应，如来悉知。或有所行，应机成就性不和雅；或有所行，性不和雅所行不成；或有所行，志性和雅所应成就，如来悉知。或有所行，其身清净心口不净；或有所行，口言清净身心不净；或有所行，身口心净；或有所行，其身口心俱不清净，如来悉知。如是之类所可行者，因缘报应所可依倚所从出生一切众生之所行者，如来悉知。慧无损耗，普达悉见。是为如来第六之业。”

佛于是颂曰：

“其有因行者，如往悉知之，
决定之种类，识别众生界。
其不决定者，所行动虚伪，
不应器如是，随邪见之业。
其贪欲行者，则有三因缘，
嗔恚行复三，愚戇亦如是。
斯尘欲之界，无量杂种类，
世尊悉知之，所行因缘应。
所行勤苦事，谓意聪达者，
其懦弱之根，亦复当如是。
诸根通利者，因行安隐来，
世吼悉护知，如是等无异。
而行调和者，而住寂清净，
则以因此故，速得致清净。
亦疾成其行，究竟道调和，
亦复加疾使，寂然寻欢悦。
合集诸所行，积累其功德，
或不以行道，而达于道慧。
或有从行道，而获于成就，
俱知其二事，从殊特行成。
或有修行者，志性而和调，
或有应所行，而不顺应行。
有大人之行，两事俱清净，
佛普见一切，无所不晓了。
或有人作行，其身修清净，
其所言心念，而不能清净。
或复有修己，身口行清净，
其心之所为，未曾行清净。
或有在世间，身口心清净，
众生之所行，佛皆见普达。
或有能成就，或不能究竟，
是为安住佛，第六所了业。”

一心定意品第十六

佛复告：“族姓子，如来至真，知其一心脱门定意正受之业，尘劳嗔恚之所从发，审如有知。云何知之？众生尘欲之所系缚，所因报应而致此缘，当复何缘而致清净，如来悉知。何谓缘报？何谓事业？从不慎念而致缘报，从不明事众生之类而致欲尘，从不明事而致行

矣！从行致识，从识致名色，从名色致六入，从六入致所更，从更致痛，从痛致爱，从爱致受，从受致有，从有致生，从生致老，从老致尘欲，为报应因致事业，因见致爱，从结爱处，是为缘报，是为事业，缘致爱欲尘劳之缚。彼复何谓缘报？云何事业令其众生致于清净？有二报应及十二事，众生因此而致清净。何谓为二？一曰、因从他人闻柔顺谊，二曰、内自己身如应念法。复有二事而致清净：一曰、而一其心专志学问心不愤乱，二曰、晓了方便寂然之谊观察其源。复有二事而致清净：一曰、知无所来发动所起，二曰、知无有来亦无所至。复有二事而致清净：一曰、观无所生本无处所，二曰、致于灭度亘然寂静。复有二事而致清净：一曰、其行成就无有不办，二曰、明慧之事造其正证。复有二事而致清净：一曰、志修道法顺入脱门，二曰、其本清净至度知见。复有二事而致清净：一曰、至灭尽慧而无所著，二曰、无所生慧常无所倚。复有二事而致清净：一曰、则以至诚而致道德，二曰、常以审实获于成就。是二报应及二业清净众生，如来悉知。又尘劳结方便无量，清净方便亦复无限；又其尘劳而致清净，便近成就因审观故；又净方便，随尘劳行而渐近法，摄其慢者，如来圣慧悉达知此拔其因缘。此族姓子，如来之慧寂然于欲，澹泊诸恶不善之法，兴行俱念忽静安隐，行第一禅以能一心，住寂灭界静然正受，从第一禅起修八解门反覆逆顺而修正受，所见皆知三昧正受，显示平等又现定意。如来三昧无所畏难无能坏者，如来三昧无有因缘不从方便，如来常定一心不忘，于诸三昧最为上尊，常住一定普见一切三昧正受，其心不退未尝增减，其所显现无有不定。如来三昧初无所生，无能观察，声闻、缘觉所不能及，过诸菩萨及正真觉。如来三昧无能越者，卓然殊绝巍巍无量，一切众生所不能知。如来之慧亘然无际，无穷无极无可为喻，以权方便开化声闻令得定意。如来悉知，了诸缘觉菩萨行事，随其应时而教诲之。是为如来第七之业。”

佛于是颂曰：

“众生因缘事，其尘劳爱欲，
自在悉知之，其慧无崖底。
如其行清净，及复不清净，
佛大慧自在，悉能晓了此。
不慎念报应，因缘生明慧，
事业无明行，及其所造作。
识名色如是，其本情六根，
世尊悉达之，因缘所事业。
其缘劳尘欲，所贪诸所作，
睹见其因缘，事业于欲行。
思想所缚结，因是为缘起，
众人所住处，从是致因缘。

众人所誓愿， 则有二因缘，
因从人听者， 慎省受其言。
内已如应念， 观诸法悉空，
彼人致解脱， 生死之江海。
寂然而观察， 精勤蠲除二，
思惟而睹之， 无来无有去，
称量省其源， 无生亦无终，
彼寂灭入道， 尔乃为清静。
常住于正行， 慧者修行三，
其无放逸者， 尊崇三脱门，
成于灭尽慧， 至诚逮无生，
是缘报事业， 清净兴上愿。
最胜一心知， 常三昧正受，
逮成于寂灭， 意勇复起立，
观察而思惟， 一切诸逆顺。
其佛大法王， 八解门正受，
则以一定意， 致无量亿定，
无等伦悉见， 其行而普平。
其心定所行， 道法无穷极，
由是之行故， 胜心无所定。
若声闻缘觉， 定意亦如是，
诸菩萨若兹， 若干种定意。
安住之意定， 皆超越其上，
如来所修业， 随时慧教化。”

大哀经卷第五

知众生本行品第十七

佛告：“族姓子，如来见已及他众生，知于往古不可称计本所行业，一世、十世、百世、千世、百千世无数世不可计载，百千亿世天地成败劫立劫尽，亦不可计无限量天地及劫之返数也，而悉知之靡不彻了。本于某处名字种姓、居止饮食、颜色形容、寿命长短，所更苦乐善恶之事，于某处没生于某处，于某处没复生彼处，言语学问音辞章句，而悉说之。己身本末一切众生，皆以了了为众生讲。如来咸知，众生因所从来本末根源，所更苦乐随其应时，察其本末而为说法。识其过去心所执怀，心所抱缘使其挂碍，或无朽废所因兴缘，本为何从而有是心，如来皆知。其一人心所行如是，因其行而起阴蔽，如来能悉颁宣无数恒河沙劫所行本末，亦复观察一切十方众生心之本末等无差特，说其本际当来亦然心之所缘，如来所睹而演本无有过于

此而无穷极。是为如来知其往古过去众生之心不可思议不可称量，佛之圣智不可称计。如来察于众生之行，心怀恐惧扰扰不安，周旋生死，某在某处，某从某来，本植德本志在佛道，或为声闻、缘觉之乘，缘其种德承佛圣慧，悉识念之。是为如来而知众人所植德本因缘之报，应其根源而为说法，而令听者立不退转，各从本行心所信乐，使得其所。是为如来第八之业。”

佛于是颂曰：

“其劫之数，无底亿垓，世之庭燎，悉识往古，
又察己身，及知众生，所观了了，如掌中珠。
名字种姓，颜像亦然，住此终没，所周旋处，
因何所缘，而受其身，其平等乘，演说彼法。
其有过去，无量无底，众人之心，所想念法，
所可由从，而其发心，最胜大慧，而皆知之。
其中间心，从古过去，因人所行，安住悉知，
恒河沙劫，称量本末，咨嗟讲说，不得涯底。
当来无底，本际之源，而为颁宣，往古所行，
其无俦匹，慧不可尽，世尊如是，圣慧如海。
若有众生，立德求佛，设于过去，奉敬最胜，
住佛神足，力无所畏，悉念于此，前世所作。
世尊皆知，众生所念，如其往本，所种众德，
悉识于此，住三乘者，成不退转，解脱净道。
安住别识，过世善行，一切众生，无能思议，
是为大圣，第八之业，以化众生，所度无底。”

彻视品第十八

佛告：“族姓子，如来至真，以净天眼过于凡俗，皆见众生生者死者、微妙瑕秽、善恶祸福、好颜丑姿、趣安趣苦，如其众生所兴祸福报应之果，如其本末悉知斯实。其人如是，身行恶、口言恶、心念毒害，谤毁贤圣坠于邪见，以此邪见所行事业，寿尽身坏，堕于恶趣危害地狱苦恼之中。于是民人其身行善、发口言善、心所念善，不谤贤圣随其正见，则因正见所行快事，寿尽身散，便趣安处快乐世生。如来于彼则以天眼，如其方面观诸佛土，等如空界无边无际，思其法界而不可得亦无所著，超过一切诸所句迹。其有众生受形类者，敢有现世皆见终没而复生者。其诸佛土今现在者，皆见有外散坏合成。又复所现诸菩萨众，悉复睹此尽终没，来就其生而复出家，或复所现坐于树下，成最正觉转于法轮，舍其寿命而取灭度，声闻解脱灭度，皆复见此缘觉之法，显示神足而为众生作祐。或有众生形不现者，外道

异学五通仙人明所不睹，声闻、缘觉及诸菩萨所不能逮，如来至真则以天眼悉睹此类。如来见于众生所有微神，眼如车轮，多于三千大千世界其不现者不可称载，众生之界如是无量，浩浩昊昊无有崖底。如来天眼巍巍如兹，悉睹一切诸佛国土众生种类本末源界，何许众生佛所应化而随律者，从其人本修行佛戒，寻立其前便化其人，余人在边犹不见知。是为如来第九之业。”

佛于是颂曰：

“如来之天眼，清净无垢秽，
严治无量劫，功德威神圣，
睹见于十方，诸佛土众相，
所有及与无，诸所可兴衰。
彼所有众生，有色并无色，
归于善恶趣，生上下中间，
退没来受胎，行恶堕苦恼，
积德则安乐，最胜悉知此。
其诸菩萨众，一切诸佛土，
游步所作行，出生弃家去，
若在佛树下，降伏魔官属，
诸佛皆知此，天眼悉睹之。
若佛为法王，逮上最正觉，
所可转法轮，度脱诸天人，
为作尊佛事，或复放寿命，
若复现灭度，佛亦悉睹彼。
其听导师法，思惟而修行，
致尊清净业，兴立无恼热，
自闻于经道，毁咎于生死，
已度至彼岸，最胜悉见之。
其外道声闻，缘觉及菩萨，
天眼之所睹，不究见生界，
如来之天眼，清净无垢秽，
普见于众生，微妙身神处。
所现如车轮，众生细妙身，
多于三千界，诸天人民形，
生死若干种，众生界如此，
悉知天人想，普为现佛道。
如来所开化，众生根通利，
世雄在前住，为说尊上法，
余人在其边，不见如来化，
是为导师业，天眼之势力。”

诸漏尽品第十九

佛复告：“族姓子，如来至真，皆尽诸漏以无漏心而修解脱，以智慧度已证神通而尊其行，生死已断建立梵行，所作已办知名色源。如来于彼以无漏慧，清净无垢鲜洁显曜，蠲除一切诸所止处挂碍之蔽。诸声闻众诸漏所尽，而有限碍未至止处。其缘觉者所尽诸漏，若有限碍于大哀行而无辩才。如来至真所尽诸漏，众行普会而悉备足，皆除一切诸所止处，执怀大哀，辩才勇猛而无所畏，威神巍巍无能谛察，一切世人所不能逮，一心一时而金平等。如来至真，亦无罪业挂碍止处，威仪礼节亦无缺漏，犹如虚空而本清净，一切诸魔及诸外道所不能当功德名称。是为如来诸漏尽慧，不与一切尘欲挂碍而俱合同。是无漏慧住于坚固，为诸尘漏众生之类讲无漏法，除诸所著而说经典，从不诚思而出生矣！众生由此而成众漏则受阴入，以故汝等观察而审，如来则为兴喻示本，而现其前如应说法，令知尘欲虚伪无实，使知如审以了真谛无受法者。是族姓子，如来至真第十之业。”

佛于是颂曰：

“其导师者，为无漏慧，明阐广普，清净无量，
所以十方，以势超殊，堪任于此，笃信遵道。
诸漏尽慧，谓声闻众，不除止处，缚在挂碍，
人中之上，为众导师，已除止处，独无限碍。
其得缘觉，亦复如是，无有大哀，及与辩才，
有佛世尊，诸漏已尽，以无尽慈，辩才无量。
清净尊人，住无尽慧，知其众人，诸漏所因，
缘其好此，而与众生，不能晓了，其应真迹。
最胜则为，愍哀此三，讲无常法，苦空非身，
今此诸法，本从无出，了是若干，致尊佛道。
亦无有人，及与寿命，号名为人，所作亦然，
一切众生，倚此若干，世尊兴愍，故说解脱。
又其安住，不以懈倦，亦复未曾，减损佛智，
以故最胜，常怀殷勤，心恒怜伤，颁宣经道。
佛业如是，伦匹若兹，是为十方，降伏外道，
十力所住，建立势强，转无称量，殊胜法轮。”

四无畏品第二十

佛告：“族姓子，如来至真，有四无畏谛住勇猛所作业者。吾为至真平等之觉，自了如此，诸天、世人、沙门、梵志、魔王、释、

梵，不能障塞如来之法，言不晓了成最正觉，未之有也。何故如来名等正觉？了一切法悉为平等无有偏党，其凡夫法及与佛法，则悉平等故成正觉。其所学法及不学法、缘觉之法，与菩萨法，至诸佛法悉亦等之，故曰正觉。其计世俗及于度世、有罪无罪、有漏无漏、有为无为、有数无数，此二诸法亦悉等之，故成正觉。彼何故等？以空故等，故曰为等。诸见自然以无想等，想自然故。以无愿等，三界自然故。以无想等，所想自然故。以无行等，行自然故。以无起等，所起自然故。以无依等，所依自然故。能如审等，三世自然故。以慧等，无明恩爱自然之故。以泥洹等，生死自然故。又族姓子，如来至真，于一切法如是平等，故成正觉，是故名曰平等正觉。如其如来晓了诸法成最正觉，如是建立住于大哀，便为众生，若干方便种种因缘，各为如应而分别说，则归命法因法而生，寻时灭尽苦恼之源。其此非师自称为师，不尊称尊，未成正觉自谓正觉。是故如来于此俦类独无所畏，超绝无侣而无伦匹。是为如来十一之业。”

佛于是颂曰：

“于诸法平等，由已成正觉，
是故平等觉，如来而普现。
其凡夫之法，佛法则亦等，
所学不学法，及诸缘觉乘，
诸有世俗法，及与度世法，
诸善不善行，泥洹一类。
解空及无相，弃捐于诸愿，
无生无所行，等见于此事，
等明如是业，所说亦如兹，
因此度众生，是为大仙法。”

佛复告：“族姓子，如来自知诸漏已尽，彼诸天人天上世间，无能讥谤如来至真敢言诸漏不尽者。所谓如来诸漏尽者，如来已脱爱欲之源，心解诸欲无所挂碍。又佛心者已度诸漏，蠲除一切尘劳之行无所挂碍，是故名曰如来至真。诸漏已尽故显现世，以贤圣慧第一真谛，无敢当前能遮蔽法雨，当令除灭秽修之行使其造证，以故曰尽。无有不尽，未曾生尽，以此名为尽。如来所尽，谓真谛者无所复尽，已无所尽此则无为，其已无为彼则无受，无在不在。此无处所，是谓兴立，成诸如来住无所生，是诸法住如法界住。此为应慧，如是应者，则无所应亦不灭度亦无所成，如是像法则不可得，诸漏形色亦不除漏。如来大哀住权方便，皆为众生而演经典使除诸漏。是为如来十二之业。”

佛于是颂曰：

“最胜已尽诸漏欲，未曾复有贪挂碍，
人尊皆脱诸生死，已断瑕秽无有余。
安住皆弃诸无明，未曾可得愚痴冥，
人中师子诸余见，是故无碍无欲尘。
安住所说随其时，皆尽诸漏无死生，
究察诸法无所有，岂能使尽复令长？
其所尽者无伴党，若已尽者假名尽，
其有尽者二有为，计彼又无于三相。
住于此界无取作，佛以圣慧度彼岸，
晓了是以应说法，是为安住十二法。”

佛复告：“族姓子，如来悉了蔽碍坐欲诸挂惑法而无挂碍，天上世间诸天人民，无能堪任毁于如来言不应法。于彼何谓废退于法？又有一事令法废退，何言毁于如来为不为一？谓心愤乱不能专精。复有二法：一曰、不惭，二曰、无愧。复有三法：一曰、身行恶行，二曰、口出粗辞，三曰、意念毒害。复有四法，二行于四至不可至：一曰、[怡-台+龍]悛，二曰、嗔恚，三曰、触忌，四曰、愚痴。复有五法：一曰、杀生，二曰、盗窃，三曰、贪淫，四曰、妄言，五曰、醉酒。复有六法：一曰、无恭敬心，二曰、秘惜经典，三曰、轻毁禁戒，四曰、不随定意，五曰、不怀法念，六曰、憍慢法师。复有七法：一曰、自大，二曰、甚慢，三曰、重慢，四曰、是我，五曰、邪慢，六曰、过诸贡高，七曰、无能及我。复有八法：一曰、邪见，二曰、邪念，三曰、邪言，四曰、邪业，五曰、邪活，六曰、邪便，七曰、邪意，八曰、邪定。复有九法，谓九害恼：一曰、我所敬者而轻蔑之，二曰、今现轻蔑，三曰、将来党侵，四曰、我所憎者而敬爱之，五曰、今现钦敬，六曰、将来钦敬，七曰、曾侵毁我，八曰、今现侵我，九曰、将来侵我，缘是之故起恼害心。复有十法，谓十恶业：一曰、杀生，二曰、盗窃，三曰、淫劬，四曰、妄言，五曰、两舌，六曰、恶口，七曰、绮语，八曰、无明，九曰、斗争，十曰、邪见。是为所行从不顺念，见应顺法而不爱乐，堕于颠倒立在阴盖，依倚邪见恩爱之弊，则失正法远违妨废。身口心行如来悉知，如其所知知诸蔽碍，所说如审，如是法者致于蔽碍当除此法，已能除去故为说法，令诸众生去诸阴盖超然则出。是为如来十三之业。”

佛于是颂曰：

“诸最胜晓了法，其习此不得脱，
著心怀不能舍，谓不知羞惭者。
身口意亦如是，初未能将护斯，
贪嗔恚痴恐惧，犯杀生偷窃人，
犯人妻妾语醉，六失行七憍慢，

说于八邪脱门，皆妨废解脱迹。
若不能制其意，乃及十不善句，
由不舍不顺念，是等类未解脱。
见随逐颠倒著，而依倚放逸谊，
不当习如是法，可成兹人中尊。”

佛复告：“族姓子，如来晓了贤圣所行，寻造平等尽诸苦恼，众生习善因是得生，若造平等便灭患害。假使诸天世间人民，不能障蔽如来正法。谓于至尊，不应众圣之所宗奉不任大道，佛永无畏。何谓所宗？谓一乘道净众生。有二法：一曰、寂然，二曰、所愿。复有三法：一曰、空，二曰、无想，三曰、无愿。复有四法，谓四意止：一曰、身意，二曰、痛痒意，三曰、思想意，四曰、法意。复有五法：一曰、信根，二曰、精进根，三曰、意根，四曰、定根，五曰、智根。复有六法：一曰、念佛，二曰、念法，三曰、念众，四曰、念施，五曰、念戒，六曰、念天。复有七应法：一曰、意觉意，二曰、法觉意，三曰、精进觉意，四曰、欢悦觉意，五曰、信觉意，六曰、定觉意，七曰、护觉意。复有八应法：一曰、正见，二曰、正念，三曰、正言，四曰、正业，五曰、正活，六曰、正便，七曰、正意，八曰、正定。复有九应法：一曰、第一禅，二曰、第二禅，三曰、第三禅，四曰、第四禅，五曰、虚空慧正受，六曰、以慧正受，七曰、不用慧正受，八曰、有想无想而为正受，九曰、灭于一切诸痛思想正受。复有十应法：一曰、离杀生，二曰、离盗窃，三曰、离贪淫，四曰、离妄言，五曰、离两舌，六曰、离恶口，七曰、离詈骂，八曰、离绮语，九曰、离嗔恚，十曰、无邪见住于正业。是谓应行，离于所生，是为诸善三十七品，合集戒品，成于定品，合于慧品，究竟解品，通达度知见品，成贤圣谛离于所生。复次，所谓离于所生，谓修行平等贤圣之事。所谓应贤圣者，彼无法品若二不二、有权无权、有进或退、若生不生、无受无舍，道所越度诸不平等二事之行。诸法无二，则如审慧修所依生，如来以此无所生行为众生说，若能行此，众生归斯寻尽苦恼。是为如来第十四业。”

佛于是颂曰：

“近斯清静，至不可量，人所依倚，逮到清静，
最胜普闻，而悉知之，已知经典，乐说甘露。
至乎众善，无数诸法，道品清静，为佛世尊，
勇猛习此，而得解脱，十力所演，无有所处。
如应顺念，灭尽尘劳，方便等法，无忧丰茂，
不依于法，不倚非法，逮平等脱，精进平均。
其缘善德，不依道法，恍惚虚无，如空无念，
犹如幻化，如梦所见，彼则得度，生死所趣。”

是为十力，所行之业，人所获致，于所周旋，
是以大哀，而度脱之，兴隆慈愍，故无等伦。”

十八不共法品第二十一之一

佛复告：“族姓子，如来至真而无缺漏，智者愚者，得未误失所行正法。所以者何？如来至真身行无阙，则为至真平等之觉，威神巍巍端正殊绝，威仪礼节视瞻举动，顺于等行，被服法衣，手执应器，行步进止往来周旋，经行坐立倚卧出入，郡国州城大邦县邑聚落，足不蹈地，千辐相文自然轮现，柔软殊妙香洁莲华而现乎地，如来之足践于其上。其有虫蚁含血之类，遇如来足昼夜七日而得安隐，寿终之后复生天上。其法衣被自然四寸不褊其体，随蓝之风不能动衣，其傍众生皆得获安。是故言曰如来之身无有缺漏。

“又族姓子，如来至真，有所演辞未曾有短，智者愚者，不能得便求瑕阙者。所以者何？如来至真所言以时，演辞至诚如实无虚，应谊合法顺如律教，所言平等言行相应，语无违失应不应时；口所说者，皆悦一切众生之心；无有复重，谊理美要成就庄严；口演一音，悉应众生志性所念，各得闻知忻然解达。是故名曰如来至真言辞无短。

“又族姓子，如来至真，心之所念亦无误差，而令智者及与愚者求得便者，心念法失。所以者何？如来常定无有不寂，怀众生类得其心本，除诸误差而为说法。是为如来十五诸业。”

佛于是颂曰：

“其尊大人，无有阙漏，身行口言，胜心所念，
其世吼护，无短无罪，愍哀入中，怜伤等现。
欲求佛失，一切悉无，以此经法，示人令寂，
使皆弃此，诸瑕阙行，是为最胜，十五之业。”

佛复告：“族姓子，如来至真无有粗教，所宣音响而令诸魔及与官属，并外异学裸形露精殊别异术而得便者。如来无言亦无有声，离诸倚著。如来难说，一切众生咸皆启受，不以有为，亦复不处在于无为。如来身行靡不究畅，口言无短而今所行人得其便，不与世诤。是故如来无有音响，常顺空行。如来无我亦无所受，复无贪业离一切趣，是故如来无有诤讼。设无音响，因此蠲除众生音响，而为说法。是为如来十六之业。”

佛于是颂曰：

“若闻咨嗟，不以动悦，若闻毁訾，亦不愁戚，

除诸所著，亦无倚望，本修善行，行无所著。
最胜谛修，常顺空行，无我无受，彼无憎爱，
如其所住，讲说经法，是为至诚，所说尊业。”

佛复告：“族姓子，如来常念未曾忽忘亦无悞乱，意不迷慌而违远法也。如来常定，为一切智诸通之慧，则以脱门定意正受。以无能忘，普见一切众生心行之所住处，观察其本，便以应谊而为说法，不违法谊辩才开明，随顺无逆。其不忘者，去来今慧无所挂碍，咸见三世因其己身，自以其心未曾忽忘，慈愍十方一切众生亦复如是，殷勤念济而为说法。是为如来第十七业。”

佛于是颂曰：

“导师所念，未曾忽忘，顺从法禅，脱门为行，
一切众生，志性所行，应其所之，而为说法。
所分别了，未曾忘失，达于三世，应无所犯，
设无所忘，应其说法，是诸大圣，所行之业。”

佛复告：“族姓子，如来至真，心常静然无有不定，坐起行步、卧寐饮食、言辞寂然常以一心。如来至真三昧微妙所度无极，越乎彼岸，禅思一心初无阴蔽，普察众生诸有形类。行定者不定者，永无敢睹察如来思惟念所见心也。除其如来神圣所建，作其威灵乃能见耳！设如大圣常定一心三昧亦然，不可上下为人说法不复观察。所以者何？常见一切众生心故，佛之圣慧巍巍如是，不可攀逮，玄如虚空，无有表里，靡不通达。是为如来第十八业。”

佛于是颂曰：

“佛无进退，心常永定，行步住止，坐卧寝食，
言辞寂然，无能乱者。最胜常定，莫敢迷惑，
八方上下，终无得便，亦无敢知，其心所定，
因其所定，为人说法，常演道谊，是最胜业。”

大哀经卷第六

十八不共法品第二十一之二

佛复告：“族姓子，如来至真，无若干想亦无众念，而令其心迷惑忘也！所以如来无若干想，如虚空土不可穷尽，不察众生而各各异，用其本净无若干故；察于诸佛无若干种，用其法界不可破坏，慧平等故；亦于诸法无差别想，用无欲故。如来不坏奉禁戒者偏爱顺念，亦不毁谤于犯戒者；睹修道者不往肃敬，不尊道者不以弃忽；不

计律教是我所也，永处邪见不轻忽之。如来至真所行平等于一切法，是故名曰如来至真无若干想。设无若干，则便宣此无若干想，开化众生令不各异，众想消除而为说法。是为如来十九之业。”

佛于是颂曰：

“诸安住道，无若干想，一切最后，见诸佛土，
计于经典，无各各异，诸大名称，所行普等。
设奉禁戒，若毁失者，众生易化，若不可化，
诸两足尊，彼心平等，开度众生，各怀贪相。”

佛复告：“族姓子，如来至真，无有犹豫，所观察者悉见根源不复思惟。所以者何？如来大圣道德已成莫观不成，身行谨敕，心怀柔软，戒禁鲜明，智慧殊绝，不当瞻覲。如来圣明不有超异也！佛以智虑常察普护，不从愚冥则由度世，不堕方俗迷惑之行。如来所护因从贤圣，不从不圣贤。如来所护，转于清净无上梵轮，愍哀众生而得自在，独步十方不从他人，而有所誉无有偏党。又其如来所观护者，无卒不暴，常顺庠序而无错谬。若有所往得无受舍，已离于二诸所汨流，已度四渎，称量一劫思惟本末不能究尽，各各异所不念所，不知过去念无所烧触，不自现功，如是审实而无有异，佛悉究畅靡所不达。是为如来观察大哀巍巍若此，护诸众生具足说法。是为如来二十之业。”

佛于是颂曰：

“如来所观护，未曾有懈倦，
善修其道谊，卓然殊特行。
其心身如是，禁戒及智慧，
尊上为大人，所行常至诚。
如来未曾怀，倚著诸危害，
亦无想诸念，不为虚伪事。
其所观护者，真谛无华饰，
便则以此谊，为众生说法。”

佛复告：“族姓子，如来至真，无有贪损。何谓为贪？唯乐善法。其善法者为何谓乎？如来大哀未曾损耗，亦不倚贪，咸于大哀所说经典亦无误差，不令众生从律贪欲而致迷耗，开化众生初不谬惑，不舍闲静，亦无所启而有违废，劝诸菩萨未曾喜忘，而于三宝恒不断绝。如来至真无所贪著，圣明至真道德为乐，是故名曰如来正真。无有贪欲而致损耗，为诸众生颁宣经典，令其慕乐无上正真具诸通慧。是为如来二十一业。”

佛于是颂曰：

“最胜常不贪，慕乐善德业，
慈悲施以法，度脱于众生。
喜乐济群萌，随时而开导，
最胜不损道，劝不断三宝。
无贪嫉嗔恚，不从愚禁忌，
由因诸通慧，善慕经典教。
见众生懈怠，最胜化勤修，
积无量慧业，以此度群黎。”

佛复告：“族姓子，如来至真，于精进事而不损耗，所谓如来精进，云何谓？开化众生，观察殷勤求之所在，因而度脱不遗一人，于听经典常令清彻，是为精进。如来至真，如是比像得诸听经，为诸应器一劫不倦。因而听采甚深法者，大圣宣之一劫不废，为说经典离于食饌将护众生。如来至真以一人故，于恒河沙诸佛国土而独游步，从如开化令发道意。如来身心及口所言不以懈倦，身心静然无有闲据。如来方便精进勤修靡不咨嗟，因随平等则以精进，化乎众生至圣解脱。其致道真，乃至申畅如来功勋。是为如来二十二业。”

佛于是颂曰：

“其人中师子，因精进之力，
以此精进力，常而咨嗟之。
其精勤势力，未曾有损耗，
所演说经法，用应法器故。
安住所精进，无能究畅者，
其身口及心，初未尝劳倦。
已精进平等，一切无罪罣，
其意怀愍哀，常为众生说。”

佛复告：“族姓子，如来至真，意之所念，一切未曾而中忘也！亦不损耗。如来所念竟无中废。所以者何？族姓子，从初得成至最正觉道，以普见一切众生过去、当来、今现在心之所怀念，悉忆识之不中忽忘，永存普达众生之行。如来未尝复重惟极遣慧往察，如来所念实无损耗，入于众生三处诸性，入诸人根观众生行。如来所兴不有观察亦不思惟，而为众生讲说经典，豫知时节进退迟疾，而为分别授其决矣！所以者何？其意永存不中忘故。如其心定因无所忘，识念众生寻为说法。是为如来二十三业。”

佛于是颂曰：

“世雄所念，心未曾忘。又最胜尊，不忆重思。
其所游步，如成正觉，知众生心，无有遗漏，
亦复未尝，倚于识知。见于众生，久长性行，

令其建立，无有事业，人中之尊，为众法王。”

佛复告：“族姓子，如来至真，无失定意三昧正受，一切诸法无有偏党，诸法如审。何故如来不失定意？用修平等无卒之故，三昧亦等故。如来等于欲际，无欲之际亦复等矣！如生死际等，泥洹际亦复如是，以平等故，故能正受此之谓也。赞于如来三昧不忘。所以者何？则于平等无忽无忘亦不退转。如来定者不合于眼，亦复不合耳鼻身口意而同尘也诸根不定。其三昧定不依地种，亦复不依水火风空，亦复不怙欲界、色界、无色界，不慕今世不恃后世，无所著故故不损耗，是故名曰如来至真定意不忘。亦为众生讲说经典，令应法器致乎定意。是为如来二十四业。”

佛于是颂曰：

“最胜为常定，定意不损耗，
等顺一切法，正从佛定意。
不倚地水火，风欲色无色，
大圣不著此，故不损三昧。”

佛复告：“族姓子，如来智慧未曾损耗。何谓为知？敬达诸法无所不通，慧不仰人，为他众生颁宣圣智，方便随时所决无尽，明了一切章句显迹，令入一品住所说经亿百千劫。假使来问去来进退，为决疑网靡不坦然。其慧遍入宣畅三乘，剖判归趣，以诸众生八万四千行，则为讲说八万四千诸经法藏。是为如来智慧无极无量无尽，所说无限慧不损耗，亦为众生显示如是无尽智慧而为说法。是为如来二十五业。”

佛于是颂曰：

“佛正觉智慧，现在志慕乘，
善宣分别解，自在度无极。
为众生说法，从本性所乐，
则以一文字，入无底章句。
知于众生行，所察无边际，
则为此等班，八万四千藏。
安住之所宣，智慧无损耗，
是为十力业，故号人中尊。”

佛复告：“族姓子，如来解脱无有损耗。何谓如来？说诸声闻因声而脱，其缘觉者由于因缘而得解脱，诸佛世尊皆离一切挂碍诸二而得解脱，所以名曰。解脱者何？无过去界不与当来，诸界合同不住现界，其眼于色离于二受，名曰解脱。耳声鼻香舌味身更心法，离于二受而得解脱。心所依倚心本清净而悉了之，故曰发心之顷成无上正真

道。如来随时为诸众生讲说经典，使离倚受令无所著。是为如来二十六业。”

佛于是颂曰：

“诸声闻众，依音解脱；诸缘觉学，因缘为慧，
过诸挂碍，无垢如空，是为诸佛，无依所倚。
其心系在，于过去事，清净解脱，是为执心，
如应解脱，察众生根，开度众生，不令损耗。”

佛复告：“族姓子，如来至真，知于过去一切身行所可造业，其本明识而不废退。如来所睹诸胜所行，因其随时而化众生，有所讲说而度群黎，默然亦度，饮食亦济，威仪礼节显示众生令随律教，或复现于三十二相因而得救，或以自示八十种好因而得度；或复欲观如来顶相，威神巍巍不得谛视，光踰日月超绝无侣，因益喜悦而从得度。或有众生趣来见佛辄随律教；或演光明睹其曜晖而得济度；或见经行举足下足悦而得济；或入城郭从其还出令受开化。诸佛世尊，举动进止威仪礼节，皆以此事益于众生，靡不受化未曾唐举。是故名曰如来至真，一切身业本慧[番+去]党，靡不有益而不损耗。是为如来第二十七业。”

佛于是颂曰：

“其目睹见，威仪礼节，行步所入，若复还出，
诸相种好，及顶威曜，以此开化，而度众生。
导师假使，演其光明，无数群萌，亿载安隐，
见其威曜，则随往教！诸两足尊，常修此业。”

佛复告：“族姓子，如来至真口所演业，皆为慧党晓了自在。所以者何？诸佛世尊所说经道，悉为应时所说无虚善哉随宜，所可宣言至诚无欺无有罪愆，举动安详而不卒暴，离于粗疏未曾荒迷，常怀质直无有谗谄，初不恶口不演粗辞，无所倚著口言柔软，进止应法不为羸弱，性不飘飖亦不狭劣，不为杂碎行步安谛，发言和雅其声柔软音响香美，择言徐语舒缓时出，辞章粲丽滋味具足，无有犷[革+卬]言无疾病思而后语，自护己身，所为应节，心念随时，灭其贪欲而除嗔恚，烧其愚痴降伏诸魔，危害众恶疗治诸疾，别其义理悦智者意，音如哀鸾声如天帝，其响哀和亦如江海，声靖如地，如雕鹗王命诸眷属，其意安隐如须弥山，所发言辞殊赤觚鸟，其声慈愍犹如鸳鸯相呼和时，亦如雁王将导营从，亦如鹿王鸣呼官属。又如箜篌琴箏箫瑟鼓吹，应节吹呗吹笙发音，斯音相和各各悲快；佛之音响柔软清和，过于彼节百千亿倍，深奥微妙声无秽浊，闻者入耳心中欢然积累德本，所宣章句不可穷尽，随时应宜前后相副，不失句义合于法句，各从方便不违时节，见一切人诸根增减而为说法，布施庄严、将养戒禁常令

严净，合集忍辱，精进超殊究畅圣业，观察智慧云集慈心，不厌愍哀其喜显曜，不释所护建立三乘，不断三宝别三峻聚，净三脱门所修至诚，颁宣智慧，为诸明者不见诽谤，诸贤圣所咨嗟，志玄旷如虚空，一切功勋悉为备足。告族姓子，如来言辞发教应节，巍巍如是，复过于此无可为喻。是故言曰一切所说，如来言辞慧响超殊，越诸言声，三界无逮最为慧上，靡不应命而顺从者。是为如来二十八业。”

佛于是颂曰：

“无等伦言辞和，以无垢超诸德，
发一响入诸声，响周遍诸三千，
令声闻听其教，缘觉乘亦如是，
或有闻广其志，发其心求佛道。
其闻慈如次第，各畅辞不错乱，
若讲说殊胜法，又其心无退念。
犹如山之呼响，应其音而来报，
人中上言如是，所演说悦众心。”

佛复告：“族姓子，如来至真，皆如一切众意所念，取为慧党摩所不达。所以者何？察于如来无心意识，初无想念而有进退，以慧照曜消化众冥。其如来慧，普至一切众生心念，亦复遍入存一切意，超诸群生其识所念诸消化法。其三昧定无所依仰，越于阴盖，离十二缘起之行，永舍三念，去于臭秽，降伏魔事，去虚伪列谀诤之秽，舍乎吾我，除去无明愚冥根株，净修道业心如虚空，而无想念不坏法界。告族姓子，如来至真，其心意业慧党若兹。是为如来二十九业。”

佛于是颂曰：

“不当称最胜，两足尊圣心，
积累众圣明，导师业清净。
此安住之慧，处在众生性，
普入靡不周，在自然法界。
禅定意如是，一切善备悉，
其察心意识，一切无想念，
已过诸魔界，超于危害业，
自然如虚空，离垢无所在。”

佛复告：“族姓子，如来至真，知于过去慧无挂碍，其所睹见智无损耗。所及云何？其诸过去诸佛国土，合者成者，皆知其数多少进退。其土所有草木山谷诸药丛林，悉分别之。其佛国土所有众生，蚊行喘息身形种类，悉识知之。人民言语音声种类，蜎飞蠕动悉晓了之。彼土前后诸佛兴出多少之数，悉亦演之。诸佛之所颁宣经典卷数多少，有所显照亦悉畅之。化诸声闻其限若干，开诸缘觉入其律乘，

悉亦识之敢可劝导。为菩萨学，使发大乘无上正真，亦悉具足。其佛国土所有好丑言教行迹，转相瞻侍亦悉恤之。其比丘众言行举动，上下相顺进退之宜，亦悉别之。有睹寿命长短久存中天，亦复晓之。复知随法建立年岁，亦识喘息长短好丑。饮食衣服所止居业，如来悉知。过去众生，终始周旋所当往生，诸根若干其行不同志性各异，所怀心意境界殊特，其心悉畅而不中忽，心念多少好丑善恶，如来悉知。其数之限则见目睹，不以二慧而复再思，如来至真亦不遣心，追推过事而推知之，以慧心悉睹豫见，不复重念。其慧如是巍巍无量，见众生性，不中为废而为说法。是为如来三十之业。”

佛于是颂曰：

“佛之圣明慧，无限无挂碍，
在诸佛之土，而颁宣经典，
劝诸众生界，令笃信佛道。
诸佛国土中，其所行进退，
诸人民根原，志性所归趣，
所有药草木，音响之好丑，
过去心名何，诸所可造行，
平等觉悉达，睹见如所有。”

佛复告：“族姓子，如来至真，知于当来而无损耗，慧无挂碍皆睹悉达。云何知之？于当来世所当兴成若复毁坏其合若散，如来悉知。劫起所烧，其水色何等像类，其佛国土当还复者，其地广长阔狭远近，尘埃之数，一一佛土，诸佛所兴教化群黎，诸声闻数、缘觉之众、诸菩萨等，饮食衣服所止居泽，出入喘息行步举动，所可游居威仪礼节，一一如来所化众生立于声闻、缘觉之乘、若学大乘，如来悉知。一一佛土诸众生类，当往生者，其心生念若干之数，诸念所灭，如来悉知。皆达此已，如来不复而重思念，心察怀抱观于当来，常睹悉见，而为众生广说经道。是为如来三十一业。”

佛于是颂曰：

“于当来世，世之所有，当所合成，若复毁散，
刹土众生，诸佛之数，其佛正觉，皆成此数。
其心未曾，而有忽忘，其意观察，普达当来，
而为众生，应时说法，是两足尊，之所行业。”

佛复告：“族姓子，如来至真，或见现在而不损耗，其慧所睹无所挂碍。所见云何？知于现在十方世界一切国土所有多少之数，诸现在诸佛所、现在一切菩萨、声闻、缘觉之数多少，星宿形像进行运转为有几所，现在一切树木药草、山林溪谷、十方土地、境界远近、国中尘数，悉明其限。十方诸水以执一毛，搯取水知有几滴。十方诸火

境界兴焰，若复衰灭存亡所在，亦悉达之。十方诸风所由形色，所从因出往来周旋成败增益，亦悉知之。十方虚空迥远悠邈，其里亿数无边无际，佛悉知之，无有不及如毛尘者。知于现在三品之行，众生之界，进退难易，根本深浅，受教迟疾。佛知现在地狱众生所犯殃鬻，罪适归此其所因由，从其中出当所生处，复知方便所用除殃。又知现在众生之种蚊行喘息蠕动之类，所因行业而堕此难，了其所便可除殃罪，当所生处。复知现在饿鬼之界，所因慳贪而堕此患，所当因由方便除罪，决所当生。知于一切现在众生心所怀念，所为尘劳爱欲之病，复知离欲无尘秽者。又知现在一切众生，当以何律而受开化。或复有人不从往教，缘知诸天天上意退没所归，佛悉知之。如是本末初未曾念，二慧重思入于无二，而为众生广说经法。是为如来三十二业。”

佛于是颂曰：

“诸最胜慧，普靡不周，无限无量，不可思议，
等如虚空，虚无不喻，一切世间，所不能逮。
其于十方，一切众生，诸所现在，当所造行，
如来悉知，睹其根原，是诸佛业，见悉究畅。”

如来道品第二十二

佛复告：“族姓子，是为如来所行道业。如来以此所行道业，开化众生，以无言辞而演文字，难当难成！又族姓子，如来至诚，无有霸学能禁制者。其业无量不可思议，诸天、龙神及世间人，无能计会称载所知，初无所言而文字现，难是难及无能抑制！遍诸佛土定意周普，现诸正觉皆已超越，无诸邪业无所想念，犹如虚空三昧平等，察诸法界而无差异。所以者何？诸佛世尊所可宣说无有若干，所因兴出无有偏党，等诸众生国土亦然，所说悉同道神不别解脱无异，所至灭度亦无若干。又族姓子，如来至真有诸法界为一种味成最正觉，于众生界无所蔽碍，善权方便以无碍法而悉明了，则为众生转其法轮令不退转阿惟越致。

“譬如，族姓子，上工珠师修于清净无垢宝珠，重治令曜；手执此珠宝，举著浊水令水凝然，去浊就清，不复勤而劳其功，然后则出著于食味，上于瓶瓮若于钵器，令其中水皆使清澄，所劳功夫不足言耳！然后服著大药味中，以微细重而重洗之，所洗已净去诸刺棘，是则名曰夜光宝珠。如来至真亦复如是，察诸众生瑕秽境界，为演无常、苦、空、非身、悲哀辛酸苦毒之灾，众生迷惑爱乐生死，苦恼患厌尔乃令入贤圣法律。如来精进于彼无难，然后乃达空无相愿。如来以慈而开导之，所勤精进而无所著，便次得成于不退转，颁宣经道三

场清静。何谓佛界？而令众生来入其境，已得越度入如来法，故曰无上众祐之要。

“是族姓子，以此因缘，当作此观。如来至真所入三昧不可思议，修乎平等达于三世，不断三宝。如来于彼不可思议，住于道业犹如是空，其身自然无能逮者，现形一切诸佛国土，而于诸法永无所获，不择自在随其音响而教化之。若为众生宣经典时，皆离一切心诸所缘，而悉知见众生心行志性所趣。诸菩萨众志操清静，诸佛世尊以此等故兴出世间。是族姓子，是为如来至成之谊。由无本业，谓无所住而不违远，亦无懈怠，授菩萨决不断言教，是利名曰如来道业。”

佛讲说此如来业时，十方无量不可计会无数佛土六反震动。其大光明普照诸界，雨天华香，其宝清静佛师子座。诸来集会大声闻众，天龙鬼神、犍沓和等，阿须伦、迦留罗、真陀罗、摩睺勒，比丘、比丘尼、童士、童女，咸共听闻如来宣此道业法典，欢喜踊跃不能自胜，善心生焉，各各赍持若干种华、名香、杂香、华鬘、涂香、衣服、幡盖及大幢幡，鼓诸伎乐琴瑟箏篴，供养如来。取头上宝而以散之，或赍麻油，或执雷音，或取其发，或脱宝璎以珠校饰，或明月珠，或怀明珠及解脱华，或持无瑕精洁之供，或获印绶原赦之养或有宝果或以鹰鸟，或以綖缕，或寂然物不倚空物，或头宝璎，或颈著珠，或手或脚所有庄严，而供养佛悉遍散之。或复又取夜光宝珠，或复又取紫磨宝饰，以散其上。或马藏宝、天帝殊紺大青宝、珠火色宝珠、月光宝珠若干种色，瑰异奇宝以供养散。紫磨粟金、杂碎白银，本檀杂香、儋堂杂香、栴檀杂香、黑妙杂香、丹赤真珠、似人杂香，而自退漏雨散。及诸天华，加雨意华、无极意华、月度月华、柔软音大软响华。其华曜目，大地陆地诸华，其轮离垢而有百叶，或有千叶，或百千叶。其光远照香悉周遍，其香美妙洋溢所观靡不欣乐。其光照曜执持其焰，其色无量文饰交露。青莲芙蓉诸所杂华，而自然堕。又复雨地须蔓那华，思怡无忧华瓶梧桐舍著，徐详平顺而雨此华。箏篴乐器箫成鼓吹，鼓舞诸伎自然而鸣。又复加雨诸天华香、杂香、众宝璎珞、宝珠、衣服、卧具。其诸十方来会菩萨，踊住空中，自投其身用供养佛，适各投身不惜躯命。应时空中，周遍自然覆宝高座，有宝交露，垂无央数诸珠璎珞，周遍校饰，紫金杂厕其饰殊特，诚非世有，出若干种诸宝莲华。一切所有珍宝璎珞，一一枚珠各有无数不可称载化菩萨现咸悉共见。诸菩萨出适来出已，绕佛七匝，则复还坐于宝莲华。十方无量诸异国土，不可称计诸佛世尊，一一诸佛各各一切共嗟叹之。其供养以经典之要，以供养故致于清静，各共叹德穷劫不竟。供养法故，佛以威神遣诸弟子，诣此忍土所赍供养，入此忍界。其宝庄严超踰于此，严饰宝座殊绝难及。彼时大会无数众生见是变化，皆发无上正真道意，不可称载诸菩萨众逮得无所从生法忍。

于时，世尊周匝遍察诸菩萨众：“汝等正士，谁能堪任？如是比像清静庄严，菩萨所住所当建立，如来至真意所遣使在遍止宿，将护

视之无有思想亦无音响，所敷髹[娄+毛]髹[登+毛]之具。弥勒如来成佛已后，十六年中当坐于此净宝高座。是为菩萨行愿归趣，名无盖门大会法品经典之要，亦当广布分别其谊。彼时所会一切菩萨。亦当兴发供养此法，弥勒如来及于贤劫诸菩萨众。”

于时会中有一菩萨，名变动诸法王，即从座起，于莲华上右膝长跪，叉手白佛：“唯然世尊，我能堪任，将护于此清净校饰，止息其边无有思想，精勤一心而不懈废，侍于弥勒至成如来，常供养之，及于贤劫诸如来众至真等正觉等。”

时有魔天，名曰所作所立坚强处，将四域来在彼会，谓变动诸法王菩萨：“族姓子，其器云何？为何等类而用其器，受此严净令不毁散？”

变动诸法王菩萨，答所作魔：“族姓子知，一切诸器皆归坏败，无常存者无所堪受，唯有空虚而可不毁，无所妨废，于诸器中最为高尊。仁行当宜谛察我身，目无得眇，必能睹见于无极器。”

时所作魔，观察变动诸法王菩萨，谛视其身而目不眇，即见变动诸法王菩萨脐中有水王光明世界。何故名曰水王光明？其佛世界悉满众水，周遍国土，若有遥视如一大海。彼有如来，名曰乐莲华首至真等正觉，于今现在，淳诸菩萨为说大乘。其水界中又有莲华，名宝庄严，其彼如来及诸菩萨而坐于上。

时所作魔叉手而立，稽首归命变动诸法王菩萨。变动诸法王菩萨，谓所作魔：“仁君，岂见诸菩萨器？”

答曰：“已见，其器无极！”

报曰：“是水君能任受，如是像无极天器，亿百千劫那术诸劫数之报坏，于此庄严校饰，终不枯竭，无能消化。”

时所作魔，稽首礼佛：“唯愿世尊，我本亿念志在杂碎，未见于此诸正士等，未得闻是经典要时，欲得成声闻、缘觉而取灭度。今日又见变动诸法王菩萨威神巍巍，闻此经典感动变化，诸建立至意，当发无上正真道心。如今所作不敢违废，于最正觉愍伤众生，多所安隐多所将护。假使吾身于江河沙劫地狱见煮，然后乃成无上正真，虽遭此厄不以为患，不舍佛道。”

时佛咨嗟所作魔曰：“善哉！善哉！汝身乃为大道之故，一心被服弘誓大铠。今仁如此建立志愿，所誓必果。”

大哀经卷第七

八总持品二十三

时有菩萨名师子英，在会中坐，问总敖王菩萨：“唯族姓子，菩萨所立，于何总持而皆受持，诸佛所说所演经典不可穷尽，则以善教悦可众生，靡不忽然如冥睹明？”

总敖王菩萨报师子英：“菩萨所住此八总持，悦可众生使得开达，其慧无穷。何谓为八有总持？一名、净光音，二名、无尽法藏，三名、无量退进，四名、海印意，五名、莲华严，六名、入无碍印，七名、入分别辩，八名、建立佛庄严，是为八。菩萨住此有所畅说，悦可众生。”

时师子英，复问总敖王菩萨：“仁族姓子，宁可屈意垂哀一切，复重解此八总持谊广演其旨。设诸菩萨闻此总持，所得辩才必当勤学。”

总敖王曰：“族姓子听！今为仁说八总持谊广散所归。何谓净光音？假使菩萨住此总持，其所入门无所挂碍，甚为鲜洁归乎坚要，其意正立而说经典。其音通彻闻一佛国，或二、或三、或四、或五、或十、二十、三十、四十、五十诸佛国土，或百或千，其音教告诸佛国土，或十、二十、三十、四十、五十、百千亿诸佛国土，闻其音教，或复通彻无量无际诸佛国土。从意所乐，欲令音教通乎几何诸佛国土，多少无极悉能堪任，恣意所欲一师子坐，而为十方一切众生，讲说经法。欲令二十里众人得闻，或三十里，或一须弥，或至梵天，从其众生本意应说，处师子床建立其志，为诸众生讲说经法，悦可其心靡不开解。身适处于师子座已，十方诸佛皆现其身，诸佛说法皆得闻之，适闻已后得总持力，悉识念之未曾复忘，以斯法典解达其谊。其所说法诸可听受，无能遏断，入于一文音响之事，皆能演说一切文字，普入诸响、诸因缘句，入文字故入无量门，说于诸法无有来相，诸法无处无所住故，诸法自然无反覆故，诸法怀来无所到故，用清净故，诸法无根用无有处所生无生故，诸法无边无所成故，诸法无尽无所住故，诸法无生无所行故，诸法不起无所作故，诸法不有无因缘故，诸法不乱无等御故，诸法不灭无有生故，诸法无行无所愿故，诸法无戏无有想念应不应故，诸法无言永入无行故，诸法无教用有所说而有失故，诸法无嗔无有恨故，诸法无想无所著故，诸法无念无有虚故，诸法无倚无所望故，诸法无悔于空等故，诸法无辞用无思故，诸法无究无师主故，诸法无生无有教故，诸法悉净无有来故，诸法无我我自然是诸法无人甚清净故，诸法无寿无长存故，诸法无命入于谊故，诸法实空于内寂故，诸法无想其本际者无有际故，诸法无愿无所受故，诸法无行用无为故，诸法无为以越所起章句行故，诸法不坚无所依故，诸法无著无所习故，诸法自然用无身故，诸法无作所作净故，诸法无业无所入故，诸法无报无所合故，诸法无合无所坏故，诸法无舍无所取故，诸法无胸不可捉故，诸法无获无所指故，诸法无触无所造故，诸法无漏无流处故，诸法无有志无成故，诸法清净无[番+去]党故，诸法无属无若干故，诸法无色四大无常故，诸法无痛无所遭故，诸法无想越众念故，诸法无行离诸欲故，诸法无识无所慕故，诸法无界如空等故，诸法无舍越诸界故，诸法无境无所由故，诸法无贪无所想故，诸法无像无处所故，诸法无形无所降故，诸法无浊

除诸愤故，诸法无忆无所执故，诸法无想无有二故，诸法无岸度界迹故，诸法无怙离所在故，诸法无常缘不诤故，诸法无名无所怪故，诸法无杂各随行故，诸法无住无所存故，诸法无烂无所烧故，诸法无恶离诸恶故，诸法如水洗诸垢故，诸法无灾甚清净故，诸法甚清净不可数故，诸法无计无所著故，诸法无求无有动故，诸法无摇不可震故，诸法无为与空等故，诸法虚无所为故，诸法无根无所行故，诸法无现无所曜故，诸法无照舍诸明故，诸法无比无有邪故，诸法无偏等恍惚故，诸法无冥无所视故，诸法无晃无部党故，诸法无罪离于鬻故，诸法歌颂作善业故，诸法入虚用侵欺故，诸法无进无所立故，诸法无见无有类故，诸法无有尝无有味故，诸法无柔无细滑故，诸法无识无诸法故，诸法无缘离心意识故，诸法无惟道平等故，诸法本净以灭诸入不再生故。

“如是，族姓子，菩萨已逮净光音，于诸因缘文字章句，咨嗟其谊，若于一劫复过一劫，颁宣经典，不舍诸缘文字章句，随时所应不以为难。取要言之，一切诸文各各诸字，以一一文为众说法，于彼文字而无穷尽，善住法眼谛演辞谊，其言粲丽。于是菩萨住于总持，究畅清净威仪随时，辩才鲜明其心显曜，遵修慈心。其所布施亦复清净，法施衣食俱无所吝，其戒清净行无缺漏，忍辱清净心不怀害，精进清净造安隐业，一心清净寂然无冥，智慧清净舍于闇昧，广有所照其业清净，无所违失。其目清净，三眼无垢。其耳清净，得天耳听，闻诸如来所讲说业。其鼻清净，闻于如来戒法之香。其舌清净，无可意味志道法味。其身清净，所生一切不为胎垢之所沾污。其心清净，善权随时普入诸法。其色清净，相好庄严。所闻清净，悦耳之音而无乱响。其香清净，戒闻施香所见被熏。其味清净，味味复味成大人相。细滑清净，手脚柔软犹如幼童。其法清净，逮法光明。其意清净，所闻经法怀忆不忘。其志清净，越魔径路。行步清净，普入深妙无极经典。菩萨已住于此总持，自恣从志告诲教授，几何佛土光明所照，其数亦然。又其光明，演出一切十方诸佛所演法教，以用逮致于此总持，因得殊特无言辞故。是族姓子，净光音总持也，所可演出，若有所入所可称说，不可限量。此净音总持，分别所趣不可思议，言辞无极所决无限，所摇方面旷而无际，入无挂碍。”

佛言：“族姓子，何谓无尽法藏总持？谓色无尽，以色无常故曰无尽说色无常，以色苦故亦说苦恼，色无我故亦说无我，色寂然故亦说寂然，色恍惚故亦说恍惚，色如沫故亦说聚沫，色如幻故亦复说幻，色如野马故亦说野马，色如水月故亦说水月，色如梦故亦说梦，色如呼响故亦说呼响，色如形影故亦说形影，色如照面像故亦说面像，色无有故亦说无有，色无学故亦说无学，色无究竟故亦说无究竟，其色空故亦说于空，色无想故亦说无想，色无愿故亦说无愿，色无行故亦说无行，色无生故亦说无生，色无起故亦说无起，色本自然故亦说本自然，色用本无故亦说本无，色过去自然故亦说过去自然，

色当来自自然故亦说当来自然，色中自然故亦说中自然，色惧怕故亦说澹泊，色静嘿故亦说静嘿，色无游故亦说无游，色无戏故亦说无戏，色不可思议故亦说不可思议，色无貌故亦说无貌，色无体故亦说无体，色无人故亦说无人，色无寿故亦说无寿，色无命故亦说无命，色无养故亦说无养，色愚騃故亦说愚騃，色不仁故亦说不仁，色无神故亦说无神，色如束薪故亦说束薪，色如草木墙壁瓦石之类故亦说草木墙壁瓦石之类，色如诳相故亦说诳相，色为四大故亦说四大，色无声故亦说无声，色无教故亦说无教，色不可得故亦说不可得，色念净故亦说念净，色缘起故亦说缘起，色无断故亦说无断，色非常故亦说非常，色如屋故亦说如屋，色无痛故亦说无痛，色从罪福生故亦说罪福，色法界苦故亦说法界，色住法界故亦说住法界，色于本际法界而无动故亦说本际，色无我故亦说无我，色无受故亦说无受，色无载故亦说无载，色无念故亦说无念，色无怯故亦说无怯，色无量故亦说无量，色无边故亦说无边，其色于道本清净故亦说道净，色空等故亦说空等，色于泥洹本清净故亦说泥洹清净。举要言之，五阴六衰、诸法诸名、身形句迹、径路偏章及诸识身，悉入一音之所显曜，说无尽慧。计是四大宝藏之筐，所咨启慧亦不可尽。其宝藏筐圣法经典，亦复游入于无尽慧，所颁宣智，是为无尽法藏之总持也。一切诸所讲说宣传，若于一劫复过一劫，咨嗟此德无尽法藏犹不可尽。”

佛告：“族姓子，何谓无量退进总持？于彼回旋断绝计常而反其流，十二缘起从无名缘而自致行，从行致识，从识致名色，从名色致六入，从六入致更，从更致爱，从爱致痛，从痛致受，从受致有，从有致生，从生致老病死，从死致于哀泣忧戚所不可意；从致五阴大恼之患已除无名，行、识、名色、六入、更、爱、痛、受、有、生、老病死啼哭愁戚，不可阴意大患永除。彼从无量宣无限门入于无底，是故名曰无量退进之总持也！亦受亦舍故曰回旋，无受无舍，此之谓也。亦起亦灭所以回旋，不起不灭，此之谓也。与尘劳合而致诤讼所以回旋，反本清净无著放逸，此之谓也。于一切法而有所行，受应不应念与不念所以回反，无想无念无应不应，此之谓也。因缘诸见所以回反，断因缘见，此之谓也。名之与色所以回反，无名无色，此之谓也。有为无为所以回反，净于三场，此之谓也。有内有外所以回反，不住于识，此之谓也。罪福报应所以回反，无罪福报，此之谓也。善与不善所以回反，永无所行不处善恶，此之谓也。有漏无漏所以回反，无有二事，此之谓也。殃鬘所蔽尘劳之冥所以回反，本净自然，此之谓也。计我不我所以回反，其际清净，此之谓也。生死泥洹所以回反，诸法泥洹其源静然，此之谓也。是族姓子，说无量总持进退无底。若有菩萨，住是无量进退总持，志无所生达法无起，于无央数百千劫中，讲说经典不能究尽，总持之慧其谊微妙。此无量退进总持，若入中慧有所宣畅，则能觉了清净道门，照曜幽冥靡不亘然。”

佛告：“族姓子，何谓海印意总持？犹族姓子，诸四方域世界之

中，诸有形色，又其像貌山谷树木，诸所生草众药之类所有形貌，日月光明明珠水曜焰电诸有像貌，州城大邦郡国县邑居舍屋宅所有像貌，园观浴池川流泉源，入流行色生活之业，自睹形像好丑善恶，中上下貌一切诸色，及与归之，皆依大海而不别异，是谓大海。菩萨若住此海印意总持，等印一切众生之身，亦复等演文字之教，以等心印而印众生。十力诸佛，口演所宣无极大法，此典皆从菩萨口出。佛印见印，所说法者忻而无限。讲诸法印，慧无所印，所可讲说，悉如来印分别众谛。其无印者，永无所行心，自然寂。其离印者，得离欲法清静之行。其度印者，所演究竟摩所不通。其号印者，皆宣名物各各畅了。其乐印者，除去欲贪放逸恩爱。其十印者，具足十力。其被恐印者，净除诸意。其烧咤印者，舍于烧热。其六印者，成六神通。其左披印者，弃捐左道。其审印者，说于真谛。其如印者，所行如实。其哆印者，蠲除一切诸所根本。其迦印者，离所作业。其娑印者，宣畅至诚其现势力故。其生印者，度生老死故。其志印者，谓意清静故。其界印者，不坏法界故。其寂印者，具足憍怕故。其虚印者，虚静空无无不可尽故。其尽印者，消化尽想慧无起故。其立印者，觉意谛住故。其知印者，别知一切众生类故。其普印者，而悉颁宣诸所兴衰。其有印者，觉了分别所有无有。其贪印者，消除贪淫、嗔恚、愚痴之忌难也。其己印者，己身已通而成正觉。其自印者，身自解故。其旦印者，旦自释舍诸所倚相。其数印者，灭遣根源。其处印者，则于处处如有悉知。其无印者，无有若干。其果印者，逮得果证。其阴印者，除诸阴盖。其疾印者，离邪疾故。其施印者，得成施戒香熏故。其坚印者，已逮断坚刚强性故。其究印者，究畅文字摅其根源。如是，族姓子，菩萨说法演若干文，悉知一切文字印说，是为海印入总持门。”

佛告：“族姓子，何谓莲华严总持？菩萨大士若入众会，在所住处辄为说经。设有所宣，于时于彼即生莲华，其色殊妙。菩萨适坐于莲华，逮虚空中则雨莲华。又诸莲华各各演出若干种音，讲说经法唯说深谊，无有杂句严饰之教，攀引典喻正典上要，分别谊归十二部经：一曰、闻经，二曰、得经，三曰、听经，四曰、分别经，五曰、现经，六曰、应时经，七曰、生经，八曰、方等经，九曰、未曾有经，十曰、譬喻经，十一曰、住解经，十二曰、行经。其所演法，若有听者辄尽众苦。菩萨如是自然精进，不释常定。于时莲华所演经典，适断众苦便行佛事。又其菩萨一切毛孔，悉出光明化为莲华。诸莲华上各化菩萨，诣于十方不可涯底无数佛土，奉现诸佛。是族姓子，名曰莲华严入总持门。”

佛复告：“族姓子，何谓入无碍总持门？假使不舍一言辞已，至二三四乃至乎千，所生之处常不忘之，或亿百千种种之说悉能识念，为众宣畅世世不忽，诸根和悦颜色殊绝，与众超异悦可众人，无有恨乱，或能所说闻于无量江河沙等诸佛刹土，或能通畅如佛国尘诸佛国

土。于是所演诸法门者，随时方便。又彼法门，一时悉遍诸佛国土满中尘数诸世界也！或二三四，或五至十百千无量，所说应声亦无所著，则无所住。其音柔和合众人心，辞美随时其谊雅妙不失其节，莫不忻豫入无碍门。”

佛复告：“族姓子，何谓入分别总持？晓了其谊，所宣旨慧而不可尽。分别法者，所宣正慧亦不可想。随时分别，所说明慧亦不可穷。分别辩者，所宣正智亦无涯底。菩萨已获如此慧者，其于东方所有众生，悉能合会集在一处，各各随意言语各异音声若干，从其宜便所知多少来难菩萨，悉能发遣申畅其谊；南方、西方、北方，四隅、上、下亦复如是，来难菩萨各各问谊，一时各各尽为发遣，随音清浊若干种言，悉得开解，各随本心而得入道。各闻其言音不错乱，则以一音入无数音，以无数音则入一音，是为名曰分别庄严总持。”

佛告：“族姓子，何谓建立佛想总持？若有菩萨得此总持，处大法座在于众中，常于虚空。值其顶上变交露帐化佛处上，紫磨金色三十二相众好严身，自承其德顶近如来右手所在，化佛举手适著头上，应时菩萨，其身即变成为佛形庄严相好，建立其口言辞如佛，被蒙其意亦如佛意，适能成就建如是法，则入一切众会心念，从其本行而为宣法。一日、二日至乎五日，半月、一月、半岁、一岁、五百千岁，从意自恣至乎无穷不可计岁，离于饮食，为诸众生而讲说经，所宣经典而无有穷尽。其身不懈心亦不怠，悉是如来之所建立，圣感所接，彼则成致于四大慧。何谓四？一曰、慧解一切众生志操，二曰、分别章句靡不通畅，三曰、则以圣智所宣无穷，四曰、则从其人本而所学乘，了其意归而解说法。是族姓子，如来相建立总持，所入门者，有所宣说。又此总持可演谊，不可称载，无有边际，通佛境界。”

尔时，总敖王菩萨睹于如来说如斯谊，以赞颂曰：

“安住已宣说，于八总持行，
此乘所宣获，分别得解畅，
说亿载经典，辞不得边际，
其谊所分别，说者无所损。
佛音甚柔和，其声微妙快，
宣告江河沙，无量千佛土，
众生得听闻，逮成得灭度。
此总持清净，所畅音无际，
讲说无数劫，其法无穷尽，
一句之言辞，宣布不可说。
一切诸文藻，智者得随时，
是为法篋藏，觉意无涯底，
皆弃诸非受，其行甚清净，
亦不著中间，不随退转界。

斯勇普惟法，专精而奉行，
其逮得总持，蠲除众根源，
其于四域界，诸所有形类，
一切悉等印，江海无思惟。
其有逮得此，海印之总持，
彼行者印门，所说无思议。
若在中众会，大人讲说法，
逮于虚空中，广雨诸莲华。
又诸莲华者，演亿千法教，
莲华严总持，清净德若兹。
一音所演句，二三及五六，
诸音各各闻，声而不错乱。
千亿百那术，言辞不可尽，
有逮得总持，所觉无挂碍。
其所宣辩才，法谊说应时，
十方众生来，各各共难问，
悉为发遣之，决了所疑律，
其逮得总持，意所觉如此。
其大人正士，若坐于高床，
诸佛以右手，而摩著顶上。
其人得辩才，如佛无有异，
用逮此佛化，妙上总持故。
假使此菩萨，逮成总持者，
彼意所怀德，无际不可念，
讲说亿千劫，犹如江河沙，
咨嗟其功德，境界不可尽，
如莲华自然，踊处于三世，
坚住如须弥，所部无能动。
假使有逮得，无上之总持，
其慧则普流，周遍于三世，
若在众会中，勇猛如师子，
调御诸外学，降伏令成就。
假使有逮得，此上之总持，
在所游行处，悉弃诸恐惧，
其光踰大明，所照而随时，
其行若如水，洗除众垢秽，
其行亦如火，无相无有念，
其行亦如风，不著诸境界，
其行亦如医，疗治诸疾厄，
随时给法药，汤火而救济。

其有逮得者，极上妙总持，
彼慧无嗔恨，随根而解说，
其行如月明，能除夜众冥，
心等光明正，而演大晖曜。
其有逮得此，总持最无觉，
众生来观瞻，视之无厌极，
其行喻日光，照曜于闇冥，
开三界众生，使得其悟解。
若逮得于此，最上之总持，
枯竭于众席，爱欲尘劳源，
其行亦如王，典领其国土，
如息意王教，以法施所闻。
其有逮得此，最上之总持，
一切无所受，不著于诸有，
其行犹如龙，意强有神变，
兴云雨众生，亦复出电焰。
其有逮得此，最上之总持，
此放诸法雨，消灭众恼热，
其行如天帝，不为诸容色，
而见所迷惑，心广而思法。
其有逮得此，最上之总持，
诸来众会者，悉瞻戴其颜，
其慈之所行，等游如梵天，
一切无等伦，来生于此世。
其有逮得此，最上之总持，
彼生于梵天，所在常清净，
则成大五通，常与众超异，
游百千佛土，难计无思议。
其有逮得此，最上之总持，
彼供养十方，无央数诸佛，
诸佛所咨嗟，随所止方面，
悉共愍哀之，念之如一子。
其有逮得此，最上之总持，
计如是不久，当逮佛功勋，
其辩甚广远，所演无穷尽，
说种种微妙，无数诸经典。
其有逮得此，最上之总持，
严行如华鬘，辩才如流泉，
在众意坚强，所觉而通畅，
其慧无涯底，所行如虚空。

其有逮得此，最上之总持，
彼则无憍慢，离谗谄自大，
其智慧善权，所游而自恣，
能精进奉行，当修慈愍哀。
其有逮得此，最上之总持，
一切皆蠲除，有为之瑕秽，
知众生言辞，所说之善恶，
了众人所好，一切诸根行。
其有逮得此，最上之总持，
本所可宣畅，其谊不可尽，
精勤神定意，诸根及五力，
觉意路如是，其寂然最上。
其有逮得此，最上之总持，
彼则观诸法，所获甚清净，
于诸度无极，已逮至彼岸，
意强而明达，慧了诸四思。
其逮得于此，最上之总持，
其人自然解，安住诸所行，
寂然成澹泊，仁和无放逸，
威仪礼节行，分别住安谛。
其有逮得此，最上之总持，
其人未曾有，不与诸尘劳，
以成如法幻，志性离瑕秽，
所在胎生处，不能垢所染。
其有逮得此，最上之总持，
则住于莲华，立在诸佛前。
其人身口意，威神无缺漏，
普兴一切慧，周流归众生。
其有逮得此，最上之总持，
诸佛所建化，说法而自立，
已成大智慧，为众生行道，
于无数劫中，叹德不可穷。
其有逮得此，最上之总持，
若有欲叹誉，无能得源际。

于是世尊，赞总敖王菩萨：“善哉！善哉！仁快说此咨嗟总持之所入行。所以然者？此法自然无所依怙，不仰他人，入已曾往过去诸佛，更问深妙总持门故。以是之故，汝族姓子，当作斯观，等无有异。”

大哀经卷第八

往古品第二十四

佛告：“族姓子，乃往过去久远世时，劫数无量不可计会，悬旷极远不可思议，尔时有佛，号离垢光如来、至真、等正觉、明行成、为善逝、世间解、无上士、道法御、天人师，号佛世尊。世界曰善离垢，劫名照明。其界清净，地紺琉璃净如明镜，地平如掌。其界之土琉璃之土，生七宝树，枝叶华实皆亦宝成。又自然生众宝莲华，大如车轮其色若干，见者心欢，其形微妙香洁甚美。宝为交露，屋宅精舍，诸天人民被服饮食，犹如第六自在天上。人民鲜洁行步安详，其淫怒痴鲜而薄少举动言教。其佛世界无有日月，其佛离垢光明，身出大晖遍诸佛土，晨夜常明昧爽不别。莲华合者则知为冥，莲华开者则知为明。

“其离垢光如来至真，诸菩萨众有八百亿，出家菩萨、居士菩萨，无能限量不可称载，建立无上正真之道。其佛土地不闻异学无有异乘，唯修大乘，行悉淳淑立不退转。世尊云何为彼说法？唯演空慧空无相教。佛寿半劫，众人居宅若干种宝，佛即行步皆随时节。诸天亦然。其于地上立交露帐舍宅居中，名之为人；其处虚空而立屋宅棚阁，名之为天，起止饮食等无差别。又其佛界无复国君，唯离垢光世尊，则为无上大法之王。诸天人民无各各异，皆来事师无各异名，所作不别无有异念，唯奉如来咨受经典，思惟其谊。彼无女人，无罪处名，无犯尘欲。其土众生唯学三度？一曰、禁戒，二曰、守心，三曰、学智。何谓为戒？习诸通慧心念不舍，弃捐诸行。何谓守心？住于定意逮得神通。何谓为智？住智度无极得分别辩。如是，族姓子，有学如此，名曰学度。是诸菩萨不受禁戒，其土清净巍巍如是。世尊说法严妙殊绝，卓然无喻。

“时彼佛土诸菩萨中，有一菩萨名曰光首，即从座起，偏出右肩，右膝著地，叉手白佛：‘唯然世尊，所言总持为何谓也？菩萨何住，诸佛所说皆能执持，为众生演令心欢悦？’佛告光首：‘又族姓子，有总持名为宝曜，菩萨住此，悉受诸佛之所讲说，悦众生心。’光首又问：‘唯愿如来，宣宝曜总持。其中谊理我等闻之，奉之如教逮此总持。’离垢光佛，寻为光首菩萨，叹此颂曰：

“欲逮得宝曜，永除诸尘秽，
于垢而无垢，舍诸一切染，
心常净离著，是宝曜总持，
逮得此持者，其明无不照。
其身口清净，光明性离垢，
等意行慈心，是宝曜总持。

已脱三十二，解诸一切想，
则离众悵望，是宝曜总持。
所游入怀勇，大德如虚空，
解明如虚静，是宝曜总持。
不断乎三宝，绝三垢三世，
穷尽众苦源，是宝曜总持。
害贪淫恚痴，除尘诸秽浊，
宝树受欲意，宝曜总持尊。
诸所有音响，世间上中下，
入于一切声，宝曜持离垢。
精勤深奥法，无数妙句谊，
不著吾我人，总持离此二。
逮得分别辩，坚住于四道，
四禅震于梵，是宝曜总持。
第一法藏义，启受四等行，
尊修五神通，宝曜总持尊。
谛住四意止，常顺四意断，
奉于四神足，是宝曜总持。
已受持五根，而立于五力，
无能七觉意，是宝曜总持。
奉于八由路，化寂然所观，
至于明解脱，是宝曜总持。
游戏所住地，近顺解脱道，
断除一切恼，是宝曜总持。
照明一切世，寂光之道场，
眼清净广照，是宝曜总持。
天眼净如此，智慧眼曜冥，
眼净为法目，是佛眼清净。
是尘净于魔，此五阴消害，
亦净于死魔，归命力降魔。
住于此总持，至亿那术土，
见垓数诸佛，得闻上经典。
以听广妙法，意力怀总持，
分别其义趣，为天世人宣。
心明发意知，解了所报应，
其法入于慧，住总持逮此。
辩才无挂碍，三达三眼净，
逮得三脱誼，精进逮总持。
无数诸总持，无限说无量，
逮此总持胜，便获一切所。

其禅及脱门，正受极三昧，
神通自娱乐，当入此总持。
若海诸水王，万川流河归，
是胜总持然，诸法门无量。
入于无尽意，悉解无穷慧，
其福无涯底，行总持逮此。
色像众相好，种姓慧清静，
珠宝离垢掌，逮总持如此。
入乎深要藏，怀无从生忍，
在不退转地，说是总持者。
无数诸菩萨，求于无上道，
已逮此总持，成佛不为难。
十方诸最胜，说法愍众生，
逮此总持者，辩才无断绝。
悦亿垓众生，知根意所信，
口未有所说，逮此总持者。
则转于法轮，度百千众生，
立之于尊乘，勇住此总持。
无数那术劫，嗟叹其功勋，
逮此总持者，不能尽究畅。’

“如是，族姓子，离垢光如来至真，说此总持竟，诸大众中三万二千菩萨逮此总持，光首菩萨亦复逮得此宝曜持。于族姓子所忆云何？尔时光首菩萨，岂异人乎？勿作斯观！所以者何？则尔身是。以是之故，总敖王，于今堪任度诸秽恶，亦复于此咨问如来，章句通利，无犹豫心决其疑网。由是之故，今世勇猛具启前问，不难如来是决总持，宣照世间令意巨然，仁者修法目观达故，会此复重获此总持，意怀勇猛心自颁宣。”

智本慧业品第二十五

于是智积菩萨，时在彼会，前白佛言：“菩萨云何逮宝曜时，已能获致不复忽忘益于众生，以总持力而自立业？”

佛告智积：“族姓子，其有菩萨，住于智本而为智慧业，尔乃逮得宝曜总持，不复忽忘益于众生。”

智积菩萨复白佛言：“善哉！世尊，唯为解说，何谓智本？何谓慧业？”

佛言：“且听！善思念之，当为汝说。”智积菩萨受教而听。

佛告：“族姓子，谛听义旨思存心怀，是为智本；如所闻法则以

具足为他人说，是为慧业。观察分别为智本，启发众会令得开解，是为慧业；随顺观察知其根源，是为智本。随时开化建立众生，是为慧业；修平等行而无偏党，是为智本。奉平正行不为邪疑，是为慧业；心无所生都无所著，是为智本。虽心不生能宣经典，是为慧业；闲处静思其心寂寞，是为智本。身心宴然而无愆乱，是为慧业；心常乐一万事不起，是为智本。识一乘道而不违舍，是为慧业；专修愆怕而普观察，是为智本。得明解脱蠲除众冥，是为慧业；遵乎专一三脱之门，是为智本。证明三达去来今事，是为慧业；笃信道议而无疑惑，是为智本。度于一切诸所挂碍，是为慧业；其心不怯志怀勇慧，是为智本。身心休息离于汲汲，是为慧业；其意安详而不卒暴，是为智本。思惟悬旷而悉识念，是为慧业；如有所毁寻即觉制，是为智本。心常正定而得其所，是为慧业；遵修意止申畅意法，是为智本。意无所存亦无所念，是为慧业；奉四意断令舍根源，是为智本。则已净本蠲除众瑕晓了诸法，是为慧业；修学神足忽然轻举，是为智本。已无所行而远神足，是为慧业；习化五根根源常寂，是为智本。分别诸根之所归趣，是为慧业；住于五力势不可动，是为智本。降魔尘劳令欲不起，是为慧业；晓了七觉逮柔顺忍，是为智本。分别诸业一切自然，是为慧业；合集由路勇畅无滞，是为智本。若以识别浮筏譬喻，其非法者立之于法，是为慧业；明识苦习而修道业，是为智本。明证尽谛智本无尽，是为慧业；讽诵经典识其句谊，是为智本。已通经典而能奉行，是为慧业；一切所闻皆能执持，是为智本。道御众义不违其理，是为慧业；于受音响而无所著，是为智本。顺其经典而识正旨，是为慧业；观诸万物一切无常，是为智本。而悉晓了于无所行一切诸法，是为慧业；观诸万物一切皆苦，是为智本。一切诸法计本空无，是为慧业；察一切法而无吾我，是为智本。观诸众生本悉清净，是为慧业；闻真谛法不怀恐怖，是为智本。分别诸法之所归趣，是为慧业；观察寂然泥洹愆怕，是为智本。一切诸法本净寂灭，是为慧业；闻于经谊不怀犹豫畏惧之难，是为智本。晓了义理知其正归，是为慧业；听如审法不疑深洽，是为智本。分法辩才剖判其本，是为慧业；于一切音听不恐惧，是为智本。随时宣畅各令得所，是为慧业；闻佛辩才不怀弱怯，是为智本。识其辩才而遍颁宣，是为慧业；为众生故慈奉法行，是为智本。不舍慈愍以慈加众，是为慧业；自为己身亦为他人而兴愍哀，是为智本。俱于二事而无所著发无盖哀，是为慧业；爱喜道法而怀悦豫，是为智本。不举不下无所违失，是为慧业；离于结缚危害之事而以观察，是为智本。晓了己身举动进止，是为慧业；常念于佛心无他思，是为智本。明识法身而无所倚，是为慧业；常念经典识其义理，是为智本。而能分别离于欲法，是为慧业；常念圣众供养诸道，是为智本。逮于无为观察无尘，是为慧业；常念惠施济诸穷厄，是为智本。舍一切尘而顺道意，是为慧业；常念戒禁而自谨慎，是为智本。而已习行于无所识行别禁戒，是为慧业；常念

于天使意开解，是为智本。其法清净离于秽尘，是为慧业；若有所闻覆疏其议，是为智本。与诸世俗无所覆校，是为慧业；所作事业安谛无失，是为智本。而悉晓了无作无报，是为慧业；不怀贡高而不自大，是为智本。得无极慧而成大智，是为慧业；所行为已自省其身，是为智本。为已亦及二事俱兴，是为慧业；若能执持八万四千诸法经藏，是为智本。分别八万四千诸行，是为慧业；晓了随时而宣经典，是为智本。如应讲经无所违失，是为慧业；开化众生建立于道，是为智本。智度无极善权方便，教诲众生立不退转，是为慧业；未曾畏惧五趣所生，是为智本。所生之处多所将护，是为慧业；精勤自修逮音响忍，是为智本。常以修行无所怀生，是为慧业；自将其节得柔顺忍，是为智本。若以逮得不起法忍，是为慧业；发意勤修不退转地，是为智本。超然进前阿惟颜地，是为慧业；其已行成坐佛树下，是为智本。所当晓了断除疑碍解是平等，皆以一时发心之顷，随时顺谊，成于无上正真之道，为最正觉，是为慧业。”

佛欲重解宣畅此谊，尔时颂曰：

“若听受其法，启问无放逸，
斯清净众人，咨奉于智本；
闻之则能演，慈心布诸民，
其菩萨殊胜，为造慧之业。
善意而思惟，是为明智本；
分别说所行，是为慧之业。
行如所顺念，是则为智本；
此行为人说，是为慧之业。
逮心无所生，此则智之本；
心行无所趣，是为慧之业。
净修正真行，是则为智本；
宣转造所行，是为慧之业。
专一寂道行，是则为智本；
身心不计我，是为慧之业。
畏难生死习，是则为智本；
爱乐一乘道，是为慧之业。
好乐寂然观，是则为智本；
思惟明脱事，是为慧之业。
精勤三脱门，是则为智本；
明证三达智，是为慧之业。
精修四意止，是则为智本；
念无意无我，是为慧之业。
弃恶修善行，是则为智本；
本净除此法，是为慧之业。

勤致四神足，是则为智本；
不贪习神足，是为慧之业。
笃信净解脱，是则为智本；
度一切挂碍，是为慧之业。
精进不倚息，是则为智本；
身意已休息，是为慧之业。
其志了安详，是则为智本；
不住一切处，是为慧之业。
自觉识定意，是则为智本；
行本净正受，是为慧之业。
善建立五根，是则为智本；
知众生诸根，是为慧之业。
奉行于五力，是则为智本；
殷勤得圣慧，是为慧之业。
觉意柔顺忍，是则为智本；
解了一切法，是为慧之业。
勤修道精进，是则为智本；
弃捐法非法，是为慧之业。
方便苦自然，是则为智本；
于证不灭尽，是为慧之业。
修持随谊典，是则为智本；
导御从谊理，是为慧之业。
不厌倦诸闻，是则为智本；
履顺其要行，是为慧之业。
如应求其议，是则为智本；
奉行于圣达，是为慧之业。
不倚于寿命，是则为智本；
所念如法教，是为慧之业。
求观物无常，是则为智本；
于是知无生，是为慧之业。
信脱万物苦，是则为智本；
诸法悉无为，是为慧之业。
解诸法无我，是则为智本；
其性以清静，是为慧之业。
信脱泥洹寂，是则为智本；
众生永灭度，是为慧之业。
观察其谊理，是则为智本；
觉谊而分别，是为慧之业。
若笃信经典，是则为智本；
畅达于经法，是为慧之业。

不畏一切音，是则为智本；
晓了诸归趣，是为慧之业。
不离佛辩才，是则为智本；
晓了自恣说，是为慧之业。
建立众生慈，是则为智本；
得无缘之愍，是为慧之业。
哀己及他人，是则为智本；
不想著我人，是为慧之业。
常得欢喜悦，是则为智本；
不悦无所起，是为慧之业。
不造为恩爱，是则为智本；
心不得二脱，是为慧之业。
其意常念佛，是则为智本；
若随法身教，是为慧之业。
常思惟经典，是则为智本；
明识法报应，是为慧之业。
念圣众功勋，是则为智本；
若觉了无为，是为慧之业。
若心好布施，是则为智本；
设舍一切尘，是为慧之业。
思戒具清静，是则为智本；
住无漏之禁，是为慧之业。
念于大神天，是则为智本；
若念净复净，是为慧之业。
所闻而覆疏，是则为智本；
不与世同尘，是为慧之业。
善修谨教业，是则为智本；
于作无所作，是为慧之业。
谦逊不自大，是则为智本；
不计吾有慧，是为慧之业。
己身常精勤，是则为智本；
为众生造行，是为慧之业。
若持诸法藏，是则为智本；
晓了众生行，是为慧之业。
度一切诸恶，是则为智本；
归三处众生，是为慧之业。
惠施为仁爱，等立益众生，
开化使离秽，是为慧之业。
皆以等利之，视如佛功德，
正士则如是，是为慧之业。

畏所有然炽，是则为智本；
思惟生于彼，是为慧之业。
不嗔得尽慧，是则为智本；
兴无所生慧，是为慧之业。
若得音响忍，是则为智本；
其行如所念，是为慧之业。
致柔顺法忍，是则为智本；
无所从生忍，是为慧之业。
住不退转地，是则为智本；
得阿惟颜地，是为慧之业。
坐于佛树下，是则为智本；
已逮诸通慧，是为慧之业。
计其智之本，是曰为道心，
依怙于此心，所作为慧业。
常谛住道心，则能不动转，
是业为慧事，所行常随时。
若修行佛道，是心道之本，
佛神力如此，亦分别辩才。
若于无数劫，咨嗟此功勋，
佛德及光明，不可得边际。
其过去诸佛，现在亦如是，
若当来安住，十方不可计，
其有欲供养，此无量最胜，
当顺随道心，则成无放逸。”

佛说于此智本慧业时，十方无量诸佛国土六反震动，宝严高座亦复如是。

于是智积菩萨前白佛言：“唯然世尊，今者何故十方世界不可计会无数佛土六反震动，其虚空中所立高座亦复如是？”

佛言：“族姓子，是智本慧业经典要品，过去如来之所叹说，往古世时。智积菩萨在于虚空，多所持护，启问如来，佛为解答，是故地大震动，光明普照。”

智积菩萨品第二十六

尔时，有菩萨名逮分别辩，前白佛言：“智积菩萨何故号曰为智积耶？”

佛告：“族姓子，乃往过去久远世时，有佛号名首寂如来、至真、等正觉、明行成、为善逝、世间解、无上士、道法御、天人师，

为佛世尊。世界曰精勤，劫名阿摩勒。其佛世界安隐快乐，众生无患。首寂如来，诸菩萨众四万二千，诸声闻众八万四千，皆悉恭恪谦卑顺教。其佛辩才以方等经，为诸菩萨兴百亿难，歌颂悉周告诸菩萨：‘汝等正士，谁能堪任受百亿难，一一解说而发遣之？’彼诸菩萨又报佛言：‘过今夜已当发遣之。’或言七夜，或言半月，或言一月，思惟然后乃能发遣，各各自思，白世尊义。时彼众会有一菩萨，名曰觉意，前白佛言：‘唯愿大圣，我不起坐不整威仪，无所思察，于如来前令尊证明，悉当发遣所可难遣。’

“时此正士适师子吼，三千大千世界六反震动，其大光明普照世间。以此威光，告地上神、四天王天、忉利天、炎天、兜率天、无憍乐天、化自在天，上至魔界天、梵天、梵身天、梵满界、梵度著天、大梵天、光曜天、鲜光天、无量光天、光音天、严净天、鲜净天、无量净天、难及天、善见天、善胜天、离果天、一善天、空慧天、识慧天、不用空慧天、有想无想天，悉来集会。诸比丘、比丘尼、童士、童女不可称计，亦皆来会。及诸十方诸所千界，悉来住立于高座前。

“时觉意菩萨见诸大众悉来集会，承己福力、意强霸力及总持力、分别辩力、无所畏力，奉佛威力在于佛前，诸众会中取百亿难，一一诸难兴百亿义而发遣之，不转其时，不移其坐，亦不起立，不动膝脚，所说流滑义不差错，闻者亘然若冥睹明。因时会中六万人众，皆发无上正真道意，八万四千菩萨逮得无所从生法忍。首寂如来则赞之曰：‘善哉！善哉！’其音应时遍告三千大千世界。其地上神上至净身诸天之众，皆闻其声悉共咨嗟：‘今此菩萨乃能发遣百亿众难，当号名之为智积也！’族姓子，智积以是之故，故曰智积。欲知尔时觉意菩萨，岂异人乎？莫作斯观！所以者何？则是智积菩萨也。”

叹品第二十七

于是总敖王菩萨前白佛言：“未曾有也！世尊，诸佛世雄，乃能善决于是淳淑无上正真之道，畅其文字不可限量，入无限难难受难持，解了深妙十二缘起！不能勤学，亦为甚难，其二行者无能及者，是六情难灭，坐有所著权不能解，非是下度声闻、缘觉地所能逮者。是菩萨行印一切法，覆校法界则以平等犹如虚空，无有作想悉无所著，越所悌望别众生行，晓了一切报应之缘，而复颁宣智度无极，广修善权奉静寂句，逮得神通以等行故，入佛一门无有差特，不为若干，等定如空，党无等伦，等无所等，诸佛平等离于二事，修行灭寂去诸文字，导御于义令分别解，畅其音响于义无获，所得等习奉行三宝，讲三脱门度于三界，晓了三达兴发自在，譬喻定意，则能建立诸佛之法，怀来佛慧饶益一切，诸佛所叹。唯然世尊，若族姓子及族姓女，有能信此去来今佛，如是比像所讲道谊无量之慧，以信乐至发无

上正真道意，将护正法，闻如此比经典之要，持讽诵读具为人说，得福无底，则于如来为有反复孝顺报恩？”

佛言：“如是，如是，族姓子。如尔所云，若族姓子、族姓女，佛目睹见十方诸佛所现国土满中七宝，持用奉施如来至真等正觉。若复有人持是经典，勤讽诵读具足讲说，为众宣传，殷勤精进启受正典，怀之而行，而不违断三宝之教。如是行者，德超乎彼不可称限。”

于时，世尊说此谊已，叹此颂曰：

“吾以佛眼，睹诸国土，诸如来等，如积紫金，
供养如来，福尚鲜少；若闻此典，功德乃广！
其有应器，得听斯经，深奥玄妙，第一至真，
已具即受，持讽诵读，计此功祚，为最上尊。
最胜若此，常住于法，从法养生，不从衣食。
是故当奉，安住之法，则为孝顺，报诸佛恩。”

尔时，世尊告众一切诸会菩萨：“谁能堪任受是过去、当来、现在诸佛世尊无上正真道法之护，吾灭度后于五浊世时俗愤扰，能传此经使广流布，令其正法住在久存？”

应时，彼会六万亿垓诸菩萨众，同时举声而叹颂曰：

“吾等世尊，金共堪任，将护如来，无数亿劫，
百千那术，所集无上，正真道教，于后来世，
当广宣布！又复大圣，唯加威恩，建立神德，
令此经典，于后末世，使广流布。令众生类，
咸共奉命，宣令人民，得植德本，已积德者，
耳得逮闻。”

于时世尊，即叹颂曰：

“正觉言至诚，住于真谛法，
以此建诚言，顺立于斯经。
彼于无尽哀，而住无极慈，
演愍伤众生，故建立斯经。
成就功德品，越诸圣慧党，
普入诸所行，故建立斯经。
降伏一切魔，消化诸异学，
坏一切邪见，故建立斯经。
四王天帝释，梵王演布施，
天龙犍沓和，故建立斯经。
地神虚空天，杂碎诸小天，

见佛名所建，当奉持此诏，
修于四梵行，四谛自庄严，
将护于所部，故建立斯经。
虚空无色像，令无色有色，
佛之所建立，无能动移者。”

于时四天王，异口同音，则于佛前以颂赞曰：

“吾等顺此典，佛威所将护，
子孙及眷属，还逮而侍卫。
若有受持者，精勤于道教，
我等当奉事，四面营翼之。”

于时天帝释，则于佛前叹此颂曰：

“吾等报佛恩，当护导师法，
是神妙经者，行者得成佛。
我等为诸佛，孝顺报护经，
将养如是典，以此奉持法。”

于时梵三钵天王，则于佛前叹此颂曰：

“其不习放逸，越度一切乘，
悉从是经生，深奥谊殊绝。
当舍梵天安，设此经所在，
故当往听受，亦当随营护。”

于时兜率天王，则于佛前叹此颂曰：

“其一生补处，从兜率天下，
便当奉持此，佛所说经典！
世尊我堪任，弃捐天安乐，
游住阎浮提，听说此经典。”

于时魔子导师，则于佛前叹此颂曰：

“以毕魔罪业，不复从害教，
其受持此经，识谊而奉行。
我当拥护此，如来之经典，
令兴其精进，普使具足获。”

于时魔波旬，于世尊前叹此颂曰：

“吾于众生类，不复为败乱！
其有受持此，摄坏众欲尘，
诸魔不得便！说此经典者，
诸佛所建立，吾当将护之！”

于是须深天子，于世尊前叹此颂曰：

“诸佛之正道，此经悉演说！
若有持斯经，则奉一切佛！
我当执此典，为亿数天赞，
劝助发道意，闻者则遵行！”

于是弥勒菩萨，于世尊前叹此颂曰：

“若有志有道，其慈不须属，
拥护一切法，自出意布施，
吾诣兜率天，佛之所建立，
如是正像经，当令普流布

于是耆年大迦葉，于世尊前叹此颂曰：

“吾等慧薄少，声闻之所说，
当任其势力，执持世尊法。
若有受持此，当往侍卫之，
堪以宣辩才，赞之为善哉！”

于时舍利弗，于世尊前叹此颂曰：

“法犹如虚空，世护之所说，
吾当将养之，奉敬斯正典。
若所在方面，奉持如是经，
住在于后世，将念一切族。”

于时耆年大目犍连，于世尊前叹此颂曰：

“世尊今现在，清净诸众生，
以持此经典，察谊观奉行，
于百千劫中，终不归恶趣，
已授于佛决，得为法王子。”

于是贤者阿难，于世尊前叹此颂曰：

“我面于佛前，闻无数千经，
从本未曾更，闻如是比经。
今已遇此典，亲从圣咨受，
当令普流布，为求佛道者。”

尔时，世尊咨嗟释、梵、护世、四天及诸天子、菩萨、声闻：“善哉！善哉！仁等正士，汝等乃能拥护正法，又如是比演师子吼。今我重囑于正士等，殷勤委累。其有众人，志于大乘未得法忍，若遇如此建立经典，受讽诵读，常与如来而面相见，如是不久当得其决成于无上正真之道。若声闻学受佛此经，当于弥勒如来至真第一会数。若缘觉乘以此经典持讽诵读，吾灭度后虽无所闻成缘觉道。”

佛说于此总敖王菩萨所问经典义时，无央数人皆发无上正真道意，不可计会诸菩萨众立不退转地，不可称载诸菩萨等逮得无所从生法忍。无限世界六反震动，其大光明普遍十方，天雨众华。其于十方来会菩萨，启供养佛奉敬正典，普及一切宝严高座，化作宝华，而俱举声宣畅功德：“吾等善利获无极庆，身自亲近得至于此，逮闻如是决疑经典。当令世尊释迦文尼延命久寿长存于世，使此经典在阎浮提永普流布。其比丘、比丘尼、童士、童女，受持如此比像经者，是等亦令当蒙拥护，亦使长寿，常以弘恩加益众生悉缘得度。”

囑累品第二十八

于是总敖王菩萨前白佛言：“至未曾有！世尊，善分别说此经典义，所演微妙其辞粲丽。菩萨元首所当行者，降制一切诸魔异学，方便随时导御诸典，而复悦可得众生心，出生一切诸乘之行，悉入如来无极功勋，亲具诸愿显现大道。是经典者，所名为何？云何奉行？”

佛告总敖王菩萨：“是经号《如来大哀》，佛所宣教当奉持之。闻如来善蒞未曾虚妄，当奉持之。”

佛说如是，总敖王菩萨，十方世界来会开士，诸大弟子，释、梵、四王，天、龙、鬼、神、犍沓和、阿须伦、迦留罗、真陀罗、摩睺勒，比丘、比丘尼、童士、童女，一切众会诸天世人，闻佛所说，莫不欢喜。

宝女所问经卷第一

问慧品第一

闻如是。一时佛游于如来宝净高座。则为如来之所建立。积无极德已为庄严。所游道场。佛慧报应蠲除所行。升菩萨宫讲无量颂。如来所叹显立威变。圣导无碍普有所入。志存微妙诱进权行。等过去慧于当来劫弘大究竟。其德无量。顺平等觉善转法轮。无限之首谛分别慧。于一切法而得自在。悉睹众生心之诸根。度于彼岸。晓了方便断除诸着邪业之行。为造佛事。莫不笃信化令寂定。与大比丘俱六百万。其心调和。消除挂碍尘劳之欲。乃为如来法王之子。修深妙法兴发道化。无有颠倒威仪显曜。成就圣路为大众祐。如来安详获善究竟。复与菩萨大圣众俱。无量无限不可思惟浩浩大会行无所拘。诸菩萨等斯须之间。寻能超越无量佛国。便设权宜供养奉事十方如来。有所咨启听受经典。不以厌倦。而常精勤劝化众生。智慧善权以用超殊。至于彼岸。得度无极而以建立无碍脱门。便得超越一切众想望报罗网。近一切智诸通之慧。

其名曰明天菩萨。选游步菩萨。择战斗菩萨。照明藏菩萨。蠲慢意菩萨。踊步菩萨。眼观菩萨。雷音菩萨。离冥菩萨。如是等类诸菩萨众不可限量。无边无际不可引喻。

尔时世尊叹咏菩萨所生道场。其法名曰无阴盖辞。一切菩萨径路清静。诸佛之法力无所畏。具足究竟圣慧之事。于诸法典而得自由。总持之门。所入法印敢可遭遇。决众法门圣通无极。超入于慧不退转轮。说不回还。诸乘平等所导无二。游无所坏一品法界。而分别说众生心根所入之慧。独步坚强决了诸法。灭除一切诸魔之场。已度众患随应顺法。律化众坐诸邪之见。入无限慧方便劝助。行无边际咨嗟权慧。十方诸佛所共宣畅。达无希望行无挂碍无处之门。分流兴隆一切诸法。决了如应而等普入。有想无想体解圣达。游于深妙缘起之事。显明道业无极德慧。佛身口意而以庄严。于此三事心行所归智慧无尽。越诸圣谛坏声闻乘。身心澹泊开演明哲。教化缘觉致诸通慧。导利大乘入于道品。于一切法而得信忍。宣扬如来所因兴德。讲说分别诵读宣现。智慧教授。开示流布靡不周遍。

尔时世尊讲说于斯善慧法典。宣弘普诵。时众会中有一女人。名曰宝女。即从座起。右手执持妙珠璎珞白世尊曰唯然大圣。如我所言

至诚不虚。设此众会佛所说法大士所讲。吾能具足持斯经典。普于十方流布弘广。劝无量人。于此法宝建立无上正真之道。如是所誓不改易者。如来威神使斯贯珠显示圣旨。于时世尊。因众现变。令诸菩萨。皆于其上。化成棚阁珠交露帐。斯诸正士。然后来世成正觉时。如其佛土微妙严净佛道场树。当使于今现此瑞应。众宝棚阁珠交露帐令斯会者睹其严净悉皆悦豫。于时宝女。前诣佛所则散珠璎。散珠璎已。佛之威神。宝女之德誓愿至诚。在于佛上及诸菩萨上虚空中。化成棚阁珠交露帐。辟方弘广。若干种变奇特殊妙。周匝平等庄严校饰。分布安处正无倾斜。时诸菩萨各心念言。如我等身本往古时志所誓愿。当令吾等佛土严净。道场觉树亦复如是。斯诸菩萨如心所念。各各自见交露棚阁。适睹此已怪未曾有。前白佛言。甚为难及。天中之天。其宝女者所建立力。能为我等显现瑞应。无央数劫所发志愿。今此宝女。一心念顷悉令现矣。世尊告曰。如是正士。如汝所言。宝女发意如志所建。行道以来于六十二百千亿垓诸佛之所。植众德本。乃致若兹至诚所建真实誓愿。以是之故。今斯宝女如其所誓。被德之铠寻使成立。诸正士等。又宝女者设欲志愿。于斯三千大千世界。普雨天华悉令周满。则如所言辄雨名香捣香泽香杂香衣服膳馐。设复欲令幢盖缯幡自然庄饰周遍虚空。寻如意成。若复欲令天地水灾自然兴者。若复火灾则如所言。便有水灾自然灾害。设复欲令水灾火灾蠲除。还复如其所言悉能致之。设欲令此一切众会。悉自然变形体被服如转轮王。寻悉能成。为四天王形体被服。天帝形像。梵天颜貌。大神妙姿容之像。比丘比丘尼清信士清信女色像颜貌。则如所言悉能成之。正使欲令变怪现化亿百千魔。一一魔者手各执持百种刀杖。令此众魔坚住不动。不设刀杖悉使化成若干品种诸珠璎珞。须纓众华思夷之华。皆辄如言。若复欲令玄绝旷野。自然变有饮食衣被。为大城郭。十八亿家游居其中。如其所言皆能致之。三千世界所有形像。欲令颜貌皆成如来。寻辄如志。若复欲令一切众会处在虚空。悉当如言。诸族姓子。斯宝女身欲令无量无限无有边际佛之境界。诸佛世尊所说经典。于虚空中皆为通达。具足众备普闻音声。如佛所言无有缺减。十方佛辞亦如所说但能宣畅。于是宝女。立愿之力神足变化。普示现之如此色像。则于佛前说是颂曰。

以宝为业	执妙圣珍	演说豪尊
无量道德	则以蠲除	尘欲嗔结
乃布惠施	七觉之宝	以宝光明
照众窈冥	若干品类	明月珠曜
尊上琦珍	宝英最胜	今以瑰珠
恭奉安住	假使玛瑙	首藏明珠
焰光之珠	无垢藏珠	日月之明
所出光辉	蒙尊所照	而悉覆蔽

观能仁身	无能限量	所荷之祐
致获十力	住立斯土	极至上界
观察圣体	转显加倍	一切众会
各各见佛	悉自念言	尊在我前
皆从方面	悉见佛颜	紫金纵容
无比之貌	正使坐时	卧寐经行
若复现在	处众会中	言辞若嘿
乐立禅定	威仪无比	圣智无限
一一毛孔	所演光辉	则能普照
一切十方	身如莲华	最胜弘满
犹如志性	令意寂然	常立诚谛
所云真实	如口所言	尊行相应
晓了分别	诸法之谊	稽首道备
得度彼岸		

尔时宝女以此颂偈赞佛德已。白世尊曰。我身今欲咨问如来。于斯经典章品之句志所趣向。设见听者乃当自陈。佛告女曰。恣所欲问。吾当为汝分别说之令心悦豫。于时宝女见佛听之欢喜踊跃。白世尊曰。何谓菩萨常怀至诚。云何如来为诸菩萨说真实辞。何谓菩萨而应顺法。云何如来为诸菩萨讲说经典。何谓菩萨寻应威仪。云何如来为诸菩萨而说议趣。何谓菩萨奉顺律教。云何如来为诸菩萨讲决律事。

佛言。善哉善哉。宝女所问。欲畅仁贤真要辩才。谛听谛听善思念之。唯然世尊。愿乐欲闻。于时宝女受教而听。佛告宝女。菩萨有三法常怀至诚。何谓为三。未曾欺佛。不自欺身。亦不欺诳一切众生。何谓菩萨欺于诸佛而欺己身及与众生。假使菩萨兴发无上正真道意。志慕声闻缘觉之地。而誓求愿意甘乐之。是为菩萨欺佛己身及与众生。何谓菩萨不欺诸佛己身众生。假使菩萨发大道意。设令勤苦遭众恼患为诸众魔所见娆试。为诸外道所见逼迫。毁辱诽谤而戏弄之。百种骂詈挝捶危害虚妄之事而以加己。志性寂然不起怨结。不怀怯弱不成迷误。不恐不畏不以忧戚不以为恨。续秉一志志性坚强。平等之行不舍道意但执惠心珍宝之心。常怀道心。一切世间最尊第一。又复发心为诸众生。救护归命令得超度。所兴之心而无等伦无以为喻。不退不舍不在余乘。常立一志乐于佛道。导御法轮。令诸群萌悉得面见。现于诸力兴显如是。行步举动遵修精进。终不破坏他人言教。是为菩萨不欺诸佛不自欺身亦不侵欺一切众生。假使菩萨不欺诸佛不自欺己不诳众生。是为菩萨第一至诚。彼以四事不欺诸佛顺于坚固。而应威施。所为力强。精进殷勤。复以四事不自欺身。志性仁和。质直其心。无有谗谄。亦无虚弛。彼以四事不欺众生。方便应病。慈心愍

哀。加以四恩。是为菩萨第一至诚。不舍道心而不违失往古之愿。佛复告宝女曰。菩萨至诚。谓口寂然护于言语。所说无缺口辞真谛。在于独处若大众中。言常至诚。不以国故而两舌也。不以珍宝具足货业而欺虚言。不以父母亲族贪财惜费而两舌也。佛告宝女。有三十二事口辞清净。何谓三十二。羞惭(一)。造德(二)。常怀耻愧(三)。等修于善(四)。不为劣恶(五)。不索讥谤(六)。不为卒暴(七)。教化诸天(八)。不兴恐惧(九)。烧诸恶趣(十)。开演善归(一)。贤圣所命(二)。恭奉明智(三)。其内清净(四)。善修于外(五)。而受言教(六)。分别言辞(七)。无[革*亢][革*印]说(八)。口演柔软(九)。言语殊特(十)。口畅香洁(一)。而随教命(二)。无有欺诈(三)。无所热恼(四)。造业可爱(五)。内无有失(六)。外亦无误(七)。不为罪业(八)。造众祐地(九)。乐于佛道(十)。传语至诚(一)。言辄获利(二)。是为三十二事也。

佛告宝女。所谓至诚求愿具足。所以者何。喜布施者为菩萨道。无悭贪故斯成志愿。一切所有设能慧施。睹是以后此则至诚。清净之诚为菩萨道。不为毁禁斯成所愿。假使戒禁具足清净。睹是以后此则至诚。建立忍力为菩萨道。志不怀结斯成誓愿。其忍辱者此为柔和。睹是以后则为至诚。遵修精进为菩萨道。不为懈怠斯成所愿。设能普行一切德本。睹是以后则为至诚。建立禅定为菩萨道。不为乱心斯成所愿。设能怀来习一心者。睹是以后则为至诚。建立智慧为菩萨道。不为邪黠斯成所愿。晓了圣慧。睹是以后则为至诚。四意止行为菩萨道。不为放逸斯成所愿。意以寂定。睹是以后此则至诚。四意之断为菩萨道。不兴众恶心若灭除。斯成所愿。睹是以后此则至诚。四神足行为菩萨道。无有不达已能飞行。斯成所愿。睹是以后此则至诚。五根之事为菩萨道。诸根寂然无有错乱。斯成所愿。诸根澹泊。睹是以后此则至诚。五力之行为菩萨道。不为无势具足十力。斯成所愿。睹是以后斯则至诚。七觉之意为菩萨道。无所不了已能觉达。诸情不起斯成所愿。睹是以后此则至诚。八圣道行为菩萨道。无有邪径。设处圣路斯成所愿。睹是以后此则至诚。四恩之行为菩萨道。不为无救摄诸危厄。斯成所愿。睹是以后此则至诚。修四梵行为菩萨道。不为天人。慈悲喜护救济群黎。斯成所愿。睹是以后此则至诚。神通之慧三达之智。正观寂寞为菩萨道。无诸瑕秽众行普具。斯成所愿。睹是以后此则至诚。具足一切诸德法本。为菩萨道。不为无度。蠲除一切诸不善法。斯成所愿。设能宣备仁贤之法。睹是以后此则至诚。佛告宝女。菩萨亦当玩习奉行贤圣之谛。知于苦慧断于所习。晓了灭尽修行圣路。彼所谓知于苦者。分别五阴无所起故。断于习者。于五阴爱无所习故。究竟恩情无所习行。其为脱门。无所游居不怀所施。其无所怀则于过去而无所至。设于过去无所至者。彼则正法无所蠲除。已于诸法无所除者是为断习。彼知灭尽一切想着。所兴方便睹究竟尽。其灭尽者。为不复怀得于生死。等于所有终始均平。于一切法而无增

减。已等观者。斯为晓了灭尽之慧。彼察平等于八正路则能等疗。无所想念而无邪想。求诸尘劳无有吾我。以无吾我便无所受。则无所生无造业者。悉能善修于一切法。是则名曰为圣路矣。假使于斯至诚之慧。晓了一切。皆畅众生。亦无有内亦无所证。是为菩萨之至诚也。佛说是至诚教时。一万菩萨。具足圣慧逮得法忍。

佛告宝女。何谓菩萨应顺于法御行如法。则随法教思惟于法。法为志性恭敬于法。遵修法行欲慕于法。乐于法乐多存于法。法为妙英法为刀杖。被法之铠誓法自严。修法光明法之锭燎。常志法念以法为意。游步于法分别经典。方便应法游步法行。法为卧寐法为威仪。将护法事以法布施。法为财业法无有尽。普弘演法法为严辨。常修法身法为言辞。思惟法念而不放逸。如是比类遵修法行具足成就。而顺法主不为非法。彼为何谓顺法主者。设使如斯至诚真谛。被佛法铠以法为护。恭敬圣众殷勤听经乐于道意。积累众善不舍至真。志性本净而无所著。不违所应。见诸贤圣习众善友。常行恭敬随其示现。离于憍慢多所咨嗟。游在法会至心听经。慕求法典不以厌足。讲说道义则不懈倦。而于经法无能为师。念报恩慈以有反复。所作成办。处于闲居而无恐惧。贤圣之教无所犯负。不舍止足顺从十善。咨嗟布施劝助佛道。奉于禁戒忍辱为力。遵修精进而怯弱。禅定寂然游入智慧。兴隆道化显扬善权。慈多所护入于愍哀。悦豫行喜护离二事而顺至诚。所可遭遇以善为业。兴发神通导利正法。在所游至以法惠施。于四意止不忘失志。四意断者遵修平等。四神足者现在究竟。诸根明达修治诸力。晓了诸觉超越径路。入于寂寞观察所行。真谛之惠圣明解脱。颁宣晖曜顺诸声闻。随其本地教化缘觉。咨嗟一切大乘之德。则以应谊而理缘起。便于空无无所恐惧。游于无想则无所著。观察无愿五阴如幻。观诸四种亦如虚空。又诸入者本净悉空。七财之业遵修六念。及乐于六行度无极。而获五眼第一之议。常自将护多所超度。善修道业等心一切众生之类。歌颂一切无量诸佛功德之法。佛言宝女。顺法菩萨。不言有我不计有人。亦不计命亦不念寿。不思断绝不睹有常不见所有。若复不离之所睹者。不释边际不猜中间。不从朋友亦无诤讼。亦无不和亦无偏党。不处颠倒不在邪见。越度狐疑蠲除阴盖诸所挂碍。不违远法亦不乱法。不诽谤经不轻慢道。不灭究竟一切诸法。顺道菩萨志存诸法。具足经典所言至诚为顺法矣。无所兴举。于诸异学顺法言者。奸难邪行悉以灭矣。于一切世而顺法言。菩萨顺空行无所获。则无邪想无嗔恚法。顺无愿教。而于三界悉无所行。殷勤专精睹诸瑕秽。顺法菩萨。则无所起亦无所灭。则不受生。本性清净义在寂寞。佛告宝女。所谓法者则不可获。无有文字而无言说亦无辞意。无色无见亦无所趣。无有言诲亦无所教。离心意识无有尘垢。以离瑕疵远于贪欲。无有窈冥无所积聚。则无吾我而无所受。亦无所取离于所受。无有境界便无差特。于十方界而无所著。则为澹泊。弃行身退

亦不可睹。觉了玄旷亦无想念。亦无思行抑制圣贤。为明智者所蒙开化。亦无所遭亦无不遭。休息一切。所可遇者则如真谛。三世为空便无永没。亦无终亡亦无退还。亦无所生无所成就。亦无毁灭亦无所所有。亦不不有亦无所成。亦不成亦无所行。亦无所视亦无不见亦不离视。亦不成相亦无不相则为一相。亦复无相亦无所著。离于所著亦无有余。无著无缚亦无所脱。不是我所。亦无所属无所遵修。亦无诸漏则无等伦。亦无平等等无所等。亦无至诚亦不虚妄。不乐不苦。亦不精进亦无不勤。亦无所应亦不应。亦不专精亦无不精。亦无名色。亦无所起。不为坚固亦无不固。无所破坏亦无不坏。不为金刚亦不坏相。则为真谛。不违至诚。而无别异亦无所远。亦无有像类无有伦比。无有处所亦无有想。亦无有此亦无有彼。亦无差异亦无有内亦无有外。亦无中间。亦无所乐不度彼岸。亦无所见亦无所闻。亦无所念亦无所教。亦无所知亦不无知。亦不有形亦不无形。亦不有作亦不无作。则离一切诸所有形。是谓为法。如是法者。则无音声亦无不声。亦无合会无言无说。是谓菩萨应顺于法也。

佛告宝女。具足一切诸所言辞。则为顺法。其顺法者。未曾与人有所诤讼。其顺法者不轻慢他其顺法者。亦不轻易于未学者。亦不偏敬学成就者。其顺法者。不自称誉亦不显己。其顺法者不乱经典。其顺法者。不以供养而说道义。其顺法者。不为他人顺发狐疑。其顺法者。终不讼说他人之罪。其顺法者不轻慢经。其顺法者。终不妨废他人经道。其顺法者。终不睹见觉了诸法差异分数。其顺法者。不睹诸法离于空者。其顺法者。悉睹诸法不远无常。其顺法者。不睹诸法舍于无愿。其顺法者不坏法界。其顺法者不动无本。其顺法者。亦不超度于真本际。其顺法者。亦不导御随嗔恚也。其顺法者。亦不御念于诸神识。其顺法者。亦不导利有所矜着。其顺法者。亦不思念计有人也。其顺法者。不乱法议不违严饰。其顺法者。不迷神识不惑道义。其顺法者不毁正议。其顺法者不错法品。其顺法者不迷于人。其顺法者不造朋党。其顺法者。亦不顺于缘起之事。其顺法者则无有势。亦无法清静因缘。其顺法者。亦无慳吝尘劳之秽。其顺法者不没禁戒。其顺法者。亦不舍于毁戒之人。其顺法者。无有懈怠嗔恚结恨。其顺法者。不与懈怠垢浊之人而俱同归。其顺法者不失道意。其顺法者。未曾违坏智慧之本。其顺法者。不求他人法之长短。其顺法者。不用憎人厌于经典。其顺法者。不用经典御于典籍。其顺法者不违律教。其顺法者不违法律。其顺法者。亦不遵修而有所应具法非法。其顺法者。不以心念而有所失。其顺法者不没经典。其顺法者不坏成就。其顺法者不取结缚。其顺法者不得生死。其顺法者不除无为。其顺法者。无有亲友怨仇之想。其顺法者。不毁报应所植之果。其顺法者。亦不信乐罪福之应。其顺法者。若加恶言则不念报。其顺法者。不求斗争之瑕缺也。其顺法者则不恣口。其顺法者。将身口心不为诿

谄。其顺法者。不以自显欲令人见处于闲居。其顺法者。不以供养之所贪利而见少事。其顺法者。不以无欲而造凶伪。其顺法者。不用他人及与己身演说佛道。其顺法者不兴反教。其顺法者不以七财而为贪吝。其顺法者不以糒粮而为服食。其顺法者。亦不破坏严父族种。其顺法者不讥人短。其顺法者。亦不称誉己身之德。其顺法者。不分别说佛之道德而有限碍。其顺法者。咨嗟大乘不以懈厌。是为菩萨应顺于法也。

佛告宝女。何谓菩萨寻应威仪。所谓议者。无求名闻非羸劣谊。遵修燎治一切德本积累善谊志性超异。兴发道意合集空谊。假使布施不望报谊。显扬一切诸安之谊。不毁戒谊。忍不忍谊。精进之行一切所造则超度谊。而以禅定为寂寞谊。则于智慧无犹豫谊。遵修慈者等众生谊。设为悲者则于众生一切演谊。其为喜者欢乐法谊。若为护者于诸苦乐无动摇谊。若布施者则无悔谊。欣乐所生无所害谊。造成谊者兴法愿谊。平等谊者。勤化众生志干大乘。而以四恩化黎庶谊。一切万物非常苦谊。一切诸法无吾我谊。于诸尘劳至澹泊谊。而于识者晓圣慧谊。游严饰事为将御谊。一切经典则为帑藏导利典谊。计人命者化以法谊。若能了识睹达法谊。说谊无尽。分别经卷不坏法谊。若睹顺灭入无色慧。而遭辩才。随其众人应病说谊。设布施业不以厌谊。为持戒业具足愿故。博闻之业奉要行故。功德之业满诸相故。为惠业者。晓了一切群生根故。寂然之业将心事故。观察之业通达智故。四意止者制止志故。四意断者。兴显一切功德法故。为神足者游十方故。其五根者。不破他故亦不毁空。为五力者。而不错乱诸尘劳故。七觉意者。晓了一切诸法之故。游求路者。于一切法无结恨故。成神通者。究竟本末无缺漏故。在彼如斯。若兹像类顺法议者。则为究竟法谊之要。若应此谊寻应威仪。不为非谊。如是菩萨寻应威仪。

佛告宝女。一切颠倒众邪见灭则为空谊。行空菩萨为顺谊矣。除一切想应以不应则无想故。无想菩萨便顺谊。离于一切三界之愿则无愿谊。无愿菩萨便顺谊。休息一切诸所造行则无行故。无行菩萨便顺谊。舍远所生一切灭尽则无生故。无生菩萨便顺谊。诸所起受以无所起则无起故。无起菩萨便顺谊。而以蠲除苦习尽道则为尽故。灭尽菩萨便顺谊。一切诸法无有人命则为无故。无人菩萨便顺谊。一切言辞音响之谊而不可得则为故矣。无获菩萨便顺谊。诸行清净则诚谛故。至诚菩萨便顺谊。一切道品法无放逸则为故矣。无骋菩萨便顺谊。一切所闻悉信奉行则为谊也。遵行菩萨便顺谊。一切诸乘由大乘故。若有菩萨随大乘教便顺谊。

佛告宝女。无所坏者。无若干事则为谊矣。一品类者若一味者则为谊矣。无所动摇若无所尽则为谊矣。无所行者不生不起则为谊矣。

无所来者亦无所去则为谊矣。无所生者亦无所灭则为谊矣。无有二事不举不下不高不卑则为谊矣。无所造作亦无有形则为谊矣。无所兴为亦无所有则为谊矣。无有同像无所劝教。亦无有知则为谊矣。去于三瑕净三道场。平等三世三垢永除而无一尘则为谊矣。无所游止无所毁失则为谊矣。无有怨敌为澹泊行。无有恼热则为谊矣。无燕居行则为谊矣。无所宣布无有摄取。常如应行则为谊矣。断去来今无有谗谄则为谊矣。亦不想念正法非法。除有限无限有常无常。平等之惠而超度去则为谊矣。于诸文字所应音声而悉晓了。一切本净无有言辞则为谊矣。晓心意识无所宣畅。而出家者则为谊矣。于淫怒痴尘劳之欲有想无想应与不应。悉分别之而无想着则为谊矣。等于诸法而无若干。不为差特则为谊矣。空无相无愿无所造作。亦无有形则为谊矣。晓了第一至诚事者。不有所信不仰他人。不知相处则为谊矣。亦无敕教不着诸相则为谊矣。相如虚空靖寂之相则为谊矣。无所著相无所造作。无所悦相则为谊矣。无所坏相如其本无真谛无异。无差特相则为谊矣。善开化相计阴如幻自然之相则为谊矣。其四种者为法界相。而不游出径行外相则为谊矣。布施戒惠寂然善权。无有相者则为谊矣。兴设至诚无欺诈相。一切所有为无所有则为谊矣。犹如金刚坚无坏相。处于世间无所诤相则为谊矣。所作极善而谛究竟。具足之相则为谊矣。一切普入而悉济相。无有阴盖所向门相则为谊矣。等于诸趣入于一切诸法之相则为谊矣。平等无邪睹于平均。无所有相则为谊矣。定意智慧因游生相。解度知见而为惠相则为谊矣。依于圣相若有所知。若教命相则为谊矣。如其真谛晓发遣相。等御一切诸法之相则为谊矣。假使菩萨如是具足所修之谊。能说若斯诸谊事者。则能分别一切众谊。故谓大士菩萨寻应威仪者也。

佛告宝女。何谓菩萨奉顺律教。如来讲说而有二律。何谓为二。殃罪之律。决劳欲律。彼何谓殃罪之律。所言罪律。思想之本。不应顺本。无明之本。愚痴之本。颠倒之本。无实之本。虚伪之本。贪身之本。猗我之本。着人之本。懈怠之本。无所舍本。无所归本狐疑之本。慢恣之本。难致慧本。是谓殃罪之律。何谓决尘欲律。住无犹豫而无所念。无有罪处亦不说罪。不说方面。不乐王者。不为尘埃。无有慳贪。亦无所见心无所起。其志安雅离于灭尽。则无所有无有处所。亦无方面无有尘劳。无所吝惜亦无所睹。计如心者罪亦如之。如其罪者。一切诸法亦复如是。无有根本亦无所住。犹如心者不可攀引。清静鲜洁超诸所有。寂然澹泊趣于灭尽。断绝休息生死患难。信遵圣教而秉一心无有犹豫。志于同归无有殃鬻。是则名曰决尘欲律。

佛告宝女。何谓尘劳。何决欲律。所言尘者。谓淫怒痴无明恩爱。及以所受诸有十二所趣。有为因缘之行。是曰尘劳所决欲律。究竟开化一切诸法。所以者何。则以空事开化诸法。彼无欲行无恚恨

痴。则以无相开化诸法。亦无玩习行众劳尘。则以无愿化于诸法。彼则习行诸德善事。于一切行而无所行。已无所有化于诸法。以无所行导利诸法。彼于所造而无所行。一切诸法依猗因缘。于一切见无所遵修。假使于此十二因缘有所归趣。平等诸法于一切劳则无欲尘。本末寂灭。所云空者俗与道空。以是之空。一切尘劳欲事亦空。假使以空等于道者。是决欲律。其有言曰。彼典主律自开化者。乃名曰律。其能知己自化身者。则能晓了开化欲律。何谓开化己身之律。其能分别于我不我知身自然。解已澹泊了己如实。晓于己身无所嗔恨。分别身空己无所有。晓己无本了己无获。分别己身而不动摇。分别己身无有伦比。晓己无生亦无所起。其有了己分别如是。则了尘劳而无有本亦复若斯。如无有我而想有我。彼则颠倒。设如是者。己无尘劳而起劳想。是为颠倒。又如吾我本净无身。如是欲尘则为本净无尘劳也。其有晓了如是观者。是决欲律。彼亦不化过去欲尘。亦无当来亦无现在。所以者何。不习诸行亦不复念尘劳欲尘。其于己身无所念者。则无过去亦无当来亦无现在。又如心者无有色像。则无有内亦无有外亦无所得。欲尘如是则无色像。亦无有内亦无有外亦无所得。无所得者则无嗔恨。亦无诤讼无所灭除。亦无所造无所不造。亦无所作亦复不作。一切欲尘其有游此。于诸欲尘了别恩爱。而无所有亦不离有。是则名曰决欲尘律。佛告宝女。假使菩萨晓了如是开化欲律。则能教导众人欲尘而说法矣。是则名曰奉顺律教。佛说是至诚真教之法随谊奉顺律事。一万菩萨得不起法忍。宝女欣然志怀踊跃善心生焉。前白佛言。未曾有如来。快说此至诚法叹咏谊律。设使菩萨奉行如斯。则为第一无所诤讼。便能蠲除众生所讼。则顺经典。

宝女所问经卷第二

发意三十二宝品第二

尔时贤者舍利弗问宝女曰。今者女身岂能修于至诚之法谊律行乎。宝女答曰。唯舍利弗。其至诚者无有言辞。法者无欲谊不可获。计于律者身心寂然。又如彼者不可发遣亦无所受。唯舍利弗。其至诚者则灭尽相。法憺怕相。仪离严饰律解脱相。以是之故不有言辞亦不可说。唯舍利弗。至诚无本法无差特。议无有二律无造谊。以是之故不有所说。亦无言辞不可赞咏。时舍利弗复问宝女。女所执宝为何等类。而尔名曰为宝女也。于是宝女答舍利弗。菩萨则以三十二事而现目前兴发宝心。一切声闻缘觉之乘所不能及。何谓三十二事。救济一切黎庶之类。皆令兴发诸通慧心不断佛教则发宝心。将护法教则发宝心。亦不断绝圣众之令则发宝心。劝导众生立贤圣安无极之珍则发宝心。蠲除黎庶尘劳之欲。去诸恼患至于大哀则发宝心。一切所有琦珍异宝悉能舍施。内外所有瑰琦之物无所贪惜则发宝心。自能护己禁戒善

行。能以救济毁戒之人则发宝心。忍辱之力和雅安详精进合集。令诸嗔诤患厌怒害。贡高自大怀结之众群黎之类。恃怙力势欲有所加。使兴忍辱。而令众生观于道法忍辱之力则发宝心。不怯不弱亦无懈怠。坚固殷勤永不回还。于大乘行而不懈倦。开化懈怠众生朋党令大精进则发宝心。心意专精而修一行。同等禅定三昧正受。所归差特开化众生。令于欲界而无所著。以权方便退还于禅则发宝心。智慧分别破坏一切诸窈冥法。犹如真正而无有二。入施一品感动圣达则发宝心。等心一切而无加害。道无若干寻以一味为诸通慧则发宝心。离诸结滞而以平等。有为无为有形无形。亦无欢欣不离寂然。无心熙怡善住安谛。意不动摇苦乐不移。将护群黎则发宝心。离于恐惧。于深缘起十二相连奥妙之谊而无所畏。所当度者晓了超越不取诸见则发宝心。积累功德而无厌足周满相好则发宝心。常志好乐欲见正觉。而不违远恒睹诸佛则发宝心。求闻经法听省典籍称量谊趣则发宝心。如所闻法可讲说者发无量心。所兴诸法无所师受则发宝心。建立所行睹毁戒者而以恩济则发宝心。其无所学志存新学而不轻慢则发宝心。舍于贡高自大甚慢邪憍之心。卑下谦顺而受教命。自屈稽首一切众生则发宝心。志存微妙诸根明达。蠲除卑贱下劣之乘。信乐大乘直心向道则发宝心。离于魔事除去劳尘。洁净清白而无垢浊便无瑕疵。贪欲染污乃以永除。乐处所有不以懈厌则发宝心。而常专精行在澹泊。秉闲居德身心寂然。澹虚之行亦不污秽。生死之难志于大哀则发宝心。于是菩萨。舍于己身一切之安。欲安天人开化众生遭苦患者。于众恼热不以懈倦则发宝心。斯菩萨者光明寂然。而如势力逮无漏法。观于解脱如察己事。假使欲令而不远舍所有之事。悉欲具足十方诸佛之法则发宝心。斯为菩萨。非常苦空无我非身。观斯诸法则无有厌不染尘欲。乐志无欲道品之法则发宝心。斯为菩萨空无想无愿。于一切法而无所行。则以观察睹见众生。便于诸法而不造证则发宝心。斯为菩萨。睹于诸趣恐惧之难。忽如失火烧其头发。精进具足不可计会。无央数劫游于生死。而不懈废诸通之慧则发宝心。是为菩萨。设使亲近于佛道者。渐渐加增微妙之身圣慧之业。彼时行者不舍大法。伏意乐顺随诸穷匮。不增秽之不以懈厌则发宝心。是为菩萨。假使劝化群黎之党。第一精勤乐于道谊不计吾我。坚固志性至于大哀则发宝心。唯舍利弗。斯为菩萨三十二事而发宝心。则为名曰无极妙珍宝一切菩萨之宝心也。

于时世尊赞宝女曰。善哉善哉。甚快说此菩萨之行。所发宝心而得入道。又复宝女。斯诸正士有无量德所可叹咏。发于无上正真道意。所以者何。非声闻宝非缘觉宝。斯则名曰为佛道宝为菩萨宝。加复兴隆佛道之宝。因而生出声闻缘觉菩萨发心所兴之宝。皆悉出生一切诸宝。

聪明品第三

于是贤者舍利弗白世尊曰。至未曾有天中天。此宝女身所问辩才。分别解说如所了慧聪明之慧。本岂达乎演畅要事。世尊问曰。于舍利弗所念云何。斯宝女者。不以聪明慧演说法要。莫造斯观。此宝女者。已得聪明无断辩才。于时耆年舍利弗问宝女曰。女乐堪任分别聪慧。解脱缘便。宝女报曰。唯舍利弗。一切诸法悉而应说。皆归聪明所造之业。唯舍利弗。菩萨意者分别解说为聪明慧。所以者何。摄取一切诸法之要故发道心。是为于法聪明之慧。等御法界故发道心。是则名曰辩才之慧。彼所说者皆归灭除。是为灭尽辩才智慧。一切顺旨为聪明慧。发此心已。至无碍颂无断辩才。是为辩才聪明之慧。

宝女复谓。舍利弗。无所行谊无所著谊。心志大谊聪明了谊。而常善思法如幻谊。计其心者则为法事聪达之心。心了诸门有所归者。归于明哲不倚六情。心无所著辩才无碍。分别聪辩所有谊者则为非谊。见法澹泊所谓顺趣。假音声耳。其辩才者托于言辞。所云佛者无不觉谊。由是法生。缘斯顺应分别法矣。有辩才者分别自恣法谊为谊。无恣之法乃为法矣。应顺之法乃为顺矣。法之辩才乃为辩才。无所有谊无为之谊。合会之谊为聪明谊。合会法者一法味谊。圣众顺灭乃为顺灭。有所分别乃为辩才。是为舍利弗诸法讲说章句。常观此法则为聪明谊也。

问宝女品第四

尔时贤者舍利弗问世尊曰。其宝女者。发无上正真道意以来久如。为于何佛而志大道。佛告舍利弗。乃往过去久远世。不可计会无央数劫。尔时有佛。号曰维卫如来至真等正觉兴出于世明行成为善逝世间解无上士道法御天人师为佛众祐。世界曰清静佛土。衣被饮食居宅游观。皆如第四兜术天上诸菩萨众。又彼佛时。纯悉一类唯菩萨众菩萨之会七十六亿皆不退转。得诸总持出于辩才。

佛言舍利弗。时维卫如来至真。有转轮王名曰福报清静。主千世界。帑藏珍宝不可称计福报清静。中宫之内夫人嫔女八万四千。皆国中上真人玉女。王有千子悉皆力士威势难论。其王供养维卫大圣。三十六亿岁一切施安。而诸菩萨奉衣食床卧之具病瘦医药。舍利弗问曰。唯然大圣。维卫如来寿命几何。世尊告曰。寿十中劫。福报清静王供养维卫如来。不可称限。中宫诸子眷属枝党九十二垓。侍从围绕诣维卫佛稽首足下。明月珠璫其价百千奉上世尊。则而又手白维卫佛。唯然大圣。吾身所有供养众备。宁有供养超过此者进如来乎。佛

告舍利弗。维卫如来答福报清净王曰。大王欲知有异供养为尊为上为无俦匹。王所未施設。百倍千倍万倍亿倍巨亿万倍。超胜于王前所施与供养之具。又问何谓。维卫如来见彼大王心之所念。则说颂曰。

亿千诸佛国	无数如恒沙
至亿百千劫	满中珍宝施
而供养如来	合集其福德
不及愍众生	而发道意者
事亿千诸佛	垓数如恒沙
奉无数亿劫	亦如江河沙
佛道心哀胜	七步为超殊
斯供养诸佛	最尊豪无上
斯施为超越	诚无量上忍
此精进坚强	定意慧无动
其发道意者	志愿于导师
是福最无限	所积不可尽
名称远流布	眷属巍巍妙
财宝势力豪	心念如饶获
为转轮圣王	威力天帝梵
若志性欣豫	断意诸通慧
消灭诸恶趣	悉无八难畏
长益清净道	常处天人路
若人建立志	离垢无上道
诸根恒明达	圣聪无闇塞
睹诸佛奉事	而听闻经典
精求智慧圣	常知弘道心
心无犹豫结	离谄常质直
愍济众生故	其志愿道意
不乐诸欲乐	志慕于法乐
普世无所著	行如水莲华
不厌福德慧	志求度无极
发道心如是	孰不建大道
则以巨锭镣	昭济诸群[黍-禾+利]
为尊上明师	众生大导师
处世为最上	施药除诸病
建立于道意	亿无量无尽

佛告舍利弗。福报清净王者。从维卫如来。闻发道意咨嗟功德不可限量。欢喜踊跃不能自胜。则发无上正真道意。时王中宫太子官属群臣百官。及诸小王眷属翼从。说此颂曰。

今以建立	最尊道意	兴发慈心
愍伤众生	假使欲得	吾所敬重
则发道意	令其坚固	生死本际
而不可知	坐行非事	堕于苦恼
殷勤精进	志尚佛道	为众生故
行愍善哉	则能长益	辩才智慧
具足供养	圣达如是	维卫之佛
得不可量	为通慧心	所行若斯
欲获天世	之所安隐	帝释梵天
转轮圣王	有为之安	无为之乐
则当遵修	于斯道意	思摄禅定
不可限量	度于彼岸	道亦如之
圣通之慧	靡所不达	诸一切智
所行如是	十力佛势	不可思议
四无所畏	如来所有	诸佛之法
弘广无边	从清净心	而获致斯
假使欲动	亿千国土	音声普告
而悉闻知	修清净行	恢弘无垢
有聪达者	当发道意	则为十力
之所奉敬	而诸如来	悉咨嗟之
为诸众生	无请之友	有聪慧者
当发道意	设使佛道	现无慧慈
说其功德	无数亿劫	佛之道意
所有功祚	不可尽极	况欲限乎

尔时福报清净大王。适说此偈。九十二垓民人之众。及王后宫并千子。则发无上正真道意。三千大千世界六反震动。十四亿天演劝助音发大道心。然后彼王转轮圣帝则更恭肃。十亿载供养维卫如来之尊。一切施安。净修梵行清净之戒。常听如来所说经典。眷属俱往启受法教。则立长子而为国主。便下须发以家之信。离家为道行作沙门。作沙门已寻则学是四无尽句。次第咨嗟称限求趣。何谓为四。至诚章句。法典章句。妙谊章句。律令章句。具亿千岁入权方便。其王出家学此以后。于千世界三昧正受超度众生。悉于维卫如来之所而作沙门。佛告舍利弗。欲知尔时转轮圣王。福报清净者。岂异人乎。莫造斯观。则是宝女。斯宝女者于维卫佛。初发无上正真道意。时舍利弗问世尊曰。以何罪盖受女人身。佛告舍利弗。菩萨大士。不以罪盖受女身也。所以者何。菩萨大士以慧神通善权方便圣明之故。现女人身开化群黎。于舍利弗意趣云何。斯宝女者为女人乎。莫造斯观。承圣通力而有所变。则真菩萨也。当造斯观。无男子法无女人法。具足一切诸法之要。无来无去。此宝女者。处阎浮提开化教授。九万二千

诸童女众。皆发无上正真道意。于时宝女谓舍利弗。耆年岂能现女人身。而为众生讲说法乎。舍利弗曰。如今吾者则不好乐男子之身。况当复受女人之像。宝女问曰。卿为秽厌于己身乎。便答女曰。实患厌之。宝女答曰。是故菩萨超越一切众生之类而无有侣。舍利弗曰。以何等故。其女答曰。唯舍利弗。声闻之家所可秽厌。其诸菩萨不以患难。声闻之家何所秽厌。五阴四大衰入之事声闻所患。菩萨执持五阴四大六入之事。不以为患。声闻秽厌所生周旋及受吾我。菩萨受身无所患厌。诸声闻众恶受生死。菩萨游入无量终始不以患厌。声闻秽厌所生众难。菩萨所生而无患难。声闻懈厌功德之业。菩萨积累众德。不以厌足亦无患难。声闻恶厌在于众会。菩萨开化群黎之党。不以患难。声闻秽厌郡国县邑。菩萨普入郡国县邑州域大邦。不以恶厌。声闻秽厌。己身尘劳菩萨不患。一切众生尘劳之欲。唯舍利弗。声闻之家所可秽厌。菩萨大士无所患难。

八力品第五

于是舍利弗问宝女曰。菩萨大士。承何威力无所秽厌。宝女答曰。唯舍利弗。菩萨八力无所患厌。何谓为八。一曰慈力无所加害。二曰哀力不舍群黎。三曰和性之力不为下劣。四曰慧力离于尘劳。五曰权力心无所厌。六曰德力行无所著。七曰圣力则无愚戇。八曰进力本志上愿。是为八力。菩萨周旋之所建立。道德之力无所患厌。耆年舍利弗问宝女曰。汝岂具足如斯力乎。若能平等往来周旋耶。宝女答曰。若以平等平等住者。设能如斯行诸平等。彼则无力亦不羸劣。其平等者。彼则不有亦复不无。无无所造不造所行。斯谓平等。平等犹空。一切诸法亦如虚空。其如空者则无虚空。空虚曰寂。便无言说若如旷野。一切诸法亦复如是。犹如虚空恍惚无形亦无言辞。如是平等则无羸劣亦无力势。唯舍利弗。菩萨羸劣则有势力。所以者何。假使若以尘劳爱欲而羸劣者。则以智慧而有力势。若慳贪劣则用布施致于坚强。设以犯戒而羸劣者。则以戒禁而坚强矣。设以嗔恚而羸劣者。则以忍辱为力势矣。其以懈怠为羸劣者。则以精进为力势矣。其以乱意为羸劣者。则以禅定为力势矣。设以邪智为羸劣者。则以正智为力势矣。斯一切法设使菩萨于不善德而羸劣者。则以德本为力势矣。于时世尊赞宝女曰。善哉善哉。若有欲言当作斯说。说是语时五百菩萨逮得法忍。

十种力品第六

宝女白佛。所谓言如来十力。以何等力为十力乎。而得成就。

佛告宝女。假令菩萨行菩萨道。未曾归于成立下乘也。终不兴造不善之业。彼则以斯坚固之力遵诣道场。宝女又问。何谓十力。佛告宝女曰。力达处处以处处力审如有知。有限无限审如有知。设令宝女。如来往处非处处事。有限无限审如有知。是为如来第一之力也。如来以斯于众会中而师子吼。解无著要转净法轮。沙门梵志天龙魔王梵天世人。巍巍之德莫能当焉。常如法故。

复次宝女。行菩萨道。欲令余殃罪福之报未之有也。彼以得蒙遵修力势。速成佛道。过去当来现在罪福悉知其原。设使如来知去来今罪福报应。善恶所趣审如有知。是为如来第二之力也。如来之力而于众会则师子吼。解无著处转净法轮。沙门梵志天龙魔王梵天世人。巍巍之德莫能当焉。复次宝女。行菩萨道。观众生根而为说法。知其原已而度脱之。若使应于众人之根。以此具足速成佛道。为诸众生以精进根限了黎庶审如有知。假令宝女。如来现知众人根本而师子吼。是为如来第三之力。应如法故。复次宝女。行菩萨道入于众生人物之界。随人所好如其黎庶而建立之。彼入斯界究竟之力。速成佛道。而晓世间无数之形若干种体。假令如来入众生界。各从信喜而开导之。是为如来第四之力。应如法故。

复次宝女。行菩萨道。群萌之类志若欲脱。因其所信而得勉济。求于慧见。睹如慈信而不恶秽。彼则以是信解脱力究竟之事。速成佛道。而知黎庶若干种信。无量之乐审如有知。假使宝女。如来了知仙人众生若干种信。所乐无量审如有知。是为如来第五之力。而于众中则师子吼。沙门梵志天龙魔王梵天。巍巍之德莫能当焉。复次宝女。行菩萨道显发遣慧。有为无为有形无形之所有法。求声闻乘缘觉之乘若复大乘。彼以斯慧具足之力速我佛道。一切尽入究竟之慧。审如有知。假使宝女。如来普入众慧靡不周达。审如有知。独步众中而师子吼。天上世间。巍巍之德莫能当焉。常应如法。是为如来第六之力也。

复次宝女。行菩萨道。未宝废失往古德本。而不放逸超越本愿。彼则以斯往古本德不忘失力。具足究竟速成佛道。心念过去无数劫事审如有知。假使宝女。如来知己及他众生不可计量往古之事。悉诚念之审如有知。而于大众师子之吼。是为第七之力。沙门梵志天龙魔王梵天。莫能当焉常如法故。

复次宝女。行菩萨道。遵修禅定三昧正受心无所生。离于欲尘调隐柔仁。彼则以斯柔仁之力。具足究竟速成佛道。了于黎庶一切禅思脱门定意正受之行尘劳怀结。审如有知。假令宝女。如来晓于黎庶一切禅思脱门三昧正受尘劳怀结。审如有知。是为如来第八之力。而于大众师子之吼。沙门梵志天龙魔王梵天。巍巍之德莫能当焉。

复次宝女。行菩萨道。未曾覆蔽众生之功。不轻未学不慢不及。逮致显明照于众生。彼则以斯弘大光耀。究竟具足逮成佛道。天眼彻视如有悉知。假使宝女。如来至真道眼彻视靡不睹见。是为如来第九之力。独游大众而师子吼。沙门梵志天龙魔王梵天。巍巍之德莫能当焉。

复次宝女。行菩萨道。不御众生至有漏法。则为黎庶说漏尽法不长诸漏。以无漏道求于众生。显示正路。彼此无漏笃信之力。具足究竟逮成佛道。普达一切尽诸漏慧。审如有知。假使宝女。如来悉尽诸漏慧者。开示一切无漏之慧。是为如来第十之力。如来以致斯真力者。则于众会而师子吼。了无著处转净法轮。沙门梵志天龙魔王梵天世人。莫能当焉。是为宝女如来十力。如来以是十种之力。具足成就乃得谓正觉。假使菩萨逮闻此力。以斯菩萨十种之力。而逮成就如来十力。

四无所畏品第七

宝女白佛。斯所可谓如来至尊。四无所畏十八不共诸佛之法。又彼菩萨则以何行。致四无畏十八不共诸佛之法。世尊告曰。行菩萨道。未曾于法违失师命。了知是像。常以等心愍于众生。一切所有施而不吝。等奉行法观察所归。无若干想以离众着。适成佛道则师子吼。吾以逮成平等之觉。汝等当知。吾以晓了于此之法。无不觉达。假使若有沙门梵志天龙鬼神魔王梵天及与世人。不能睹见如来瑞应弘雅威曜。设不能睹现应之德。欲求佛短都不睹见。而敢生意心自念言。佛不得成平等正觉。设有言尔。佛无恐惧行无所畏。独步大众而师子吼。知无著处转净法轮。沙门梵志天龙鬼神魔王梵天及与世人。巍巍之德莫能当焉。是为如来第一无畏。

复次宝女。行菩萨道。知于内行别内外法。又复晓了挂碍之法。亦不习行废退之法。亦不顺从亦不自行。不以化人亦不宣布。见诸挂碍悉弃捐之。逮成佛道为师子吼。永不睹见沙门梵志天龙鬼神魔王梵天及余世人而讼理言。如来讲说挂碍之法而令人行。虽有斯言不以恐惧。行无所畏转弘法轮。于大众中而师子吼。是为如来第二无畏。

复次宝女。行菩萨道而常奉行清白之法。无诤讼路讲说经典。净化一切众生之类。现在归趣超异之德。无数重担无为之业。则普得入净除结恨。而自积累无为之业。其佛劝化黎庶之原。逮成佛道则师子吼。吾以净除诸结恨事而讲说法。遵修此行悉得严净。永不睹见沙门梵志天龙鬼神魔王梵天及余世人而讼理言。如来讲说结恨之法。虽有

斯言不以恐惧。行无所畏转大法轮。于大众中而师子吼。是为如来第三无畏。

复次宝女。行菩萨道未曾处于甚重憍慢。吾有所知吾有所见。余人无知而无所见。志常谦逊而不自大。觉了众事不着恶行。彼遵此法悉令具足。逮成佛道则师子吼。当知我身以尽诸漏。如是蠲除生死之患。复为众生广说经典蠲除诸漏。永不睹见沙门梵志天龙鬼神魔王梵天及余世人而讼理言。如来讲说不除诸漏诸漏未尽。虽有斯言不以恐惧。行无所畏转大法轮。于大众中而师子吼。是为如来第四无畏。

宝女所问经卷第三

十八不共法品第八

复次宝女。行菩萨道。诸有众生常失路者。导示其路沟坑嶮地高下邪径。治令平等而设桥梁。窃冥之处边旷之地。则立佛寺高旷弘弘。假令有人处狐疑罪。为无央数群萌之类。蠲犹豫罪。令不堕殃而有处所。亦不兴盛他人狐疑。不说人短言某有罪。知无央数群黎志性。灭除一切众生愿行。而说经法无有狐疑。亦不犹豫。则为兴显法之弘曜。而以授与大智慧明。劝助诸佛一切菩萨令说经典。以法施恩而无谗谄。造立善业转相劝化未曾轻人亦不调戏亦不易弃。不施加害亦不毁谤。国土所习亦不自大。一切言辞唯信佛言。随文字教而得自在知文字空。于诸言辞所有之事不睹瑕秽。不求其短不瞻其缺。设使菩萨行如是法逮成佛道。斯则名曰无有瑕疵。以无瑕疵则能具足一切智慧。若有问事分别解说。靡不通达普悉照曜。善修三昧善能晓了。咸入一切音声总持。常叹如来无缺之辞而说经法。皆于文字而无所造。是为宝女如来第一不共之法。

复次宝女。行菩萨道。弃捐一切口之恶辞。所言至诚。以法为本以议为主。教化为业不为虚妄无所伤害。而悉舍离非贤圣辞。遵修贤圣寂寞之事无有诤讼。顺从沙门所造立法。若闻经典所求得议为他人说。皆为己身及与他人。志求精修灭定之事。未曾与人斗结怀怨无所讼理。不求口舌亦不着空。信解空行则无所著。度法名号笃信如来无业道慧。劝化余人众生之类使入此法。遵斯法已逮成佛道。谓无诤讼彼无音声。不以一字而有言辞。亦无所说不处诸业。劝化他人于斯正法。修是法已逮成佛道。则无言辞。以无音辞。不以一字而有所演。亦无所说无俗之业。为诸会者善说议理可众人意。所说音辞顺而应时感动国土。善修三昧分别晓了无量之行总持之门。则于如来一切顺节诸相具足。及一切好一切毛孔。演出无量不可思议佛法音声。能以一毛所畅音声。悉叙悦可诸会人心。讲说无量诸法之门。音自然出。乃

是往古本愿所建势力所致。如来于彼无有思想。而常寂然无所业求。是为如来第二不共诸佛之法。

复次宝女。行菩萨道。常不违失于六思念。而常念佛念法念众有思念天念行布施念行智慧。亦化他人令行六念。行此法已逮成佛道。常不失意救念众生。于一切法而得自在。善修三昧分别晓了法轮总持。又如来尊。悉念诸法未尝忘失。彼时则以未曾之行。察睹一切众生之类心意所念。欲来问事。如来悉了不复思念。若有问者而解说之。如是所言心根明达无所挂碍。皆能善说悦众人意。以一文字一时须臾而悉周至。是为如来第三不共诸佛之法。

复次宝女。行菩萨道。而常将护他人之心。不令余人造嗔恨心。不令心动。不恼人心。不令心臭。未曾妨废他人德本。不断绝法而信其心犹若如幻。无念无想不以自恣。等心一切众生之类。等观诸法。处一法界入无所坏。行是法已逮成佛道则得常定。无有须臾心不定时。观行诸法一切自然。名等积三昧。而善分别普门总持如来常定。显示一切诸佛之事无有异业。是为如来第四不共诸佛之法。

复次宝女。行菩萨道。无有颠倒诸想之念。心不反行不造邪见不为虚妄。则不自计有我有身。无有人想。亦无寿想。亦无命想。无士夫想。无人意想。无学志想无断绝想。无有常想。无诸见想。无三处想。亦无念离三处之想。亦无有善亦无不善。亦无有罪亦无不罪。亦无有漏亦无不漏。亦无世俗亦无度世。除尘劳根。无有生死及泥洹想。受聚会想。众生志性思想颠倒。蠲除此已遵修众善。则以远离凡夫之想。弃捐一切众邪之见。亦于中间而无所猜。观平等法。行斯法已逮成佛道。无若干想。名曰如来永无诸念。则能善修无想三昧。晓无尽藏总持之门。如来游步行无有想。则兴大哀愍伤群萌诸妄想者。其有黎庶缚着行者。劝化说法不失时节。是为如来第五不共诸佛之法。

复次宝女。行菩萨道。心常观察游生死者。省诸尘劳苦恼法已。则寻导御令至普安。立于法观使不忧戚灭一切苦。于诸利求不以汲汲。则为蠲除恋慕之结。亦不贪惑一切供养所获之利。则于诸利有所忘失不以忧结。观诸万物一切无常悉为苦矣。不观身法信寂泥洹。而已观察于众黎庶。如是色像观察诸法。奉行已达遵修斯法。究竟具足逮成佛道。名曰无碍。不可计会所观察者。则为如来合会宣畅。善修三昧名离三观。晓了有数海印总持也。如来普为诸天龙神阿须轮迦留罗真陀罗魔休勒释梵四天王人非人。悉供养佛无不奉事。不以为厌亦无所著。一切异学诸外道奇术犯戒众生。来娆乱之。不以忧戚其心平等。解诸所有悉无所有。其心平等。譬若如地无所不忍。犹若如水洗诸秽浊。心若如火无所不烧。心若如风普无所著亦无恋慕。心如虚空

亦无结恨。等心疗治一切众生。睹寂寞行则于斯法思惟观察修于人行。所观具足常兴大哀。遍入众生度无所度。开化群萌不舍时节。从人本行而为说法。不以动摇亦不懈怠。是为如来第六不共诸佛之法。

复次宝女。行菩萨道。蠲除众恶殷勤修行。求于一切善德之法。好于微妙爱乐无极。喜于至深若干之种诸善之本。弃舍声闻缘觉之事。志于大乘而不退转。兴发大哀愍于众生。思惟正义未曾忘舍。除己身想为他人故。合集一切诸佛之法。彼则以斯好乐于法不能绝去。志慕佛道。睹诸魔众倚于颠倒反邪见者。故为斯等积累正法速成佛道。因曰如来不失正乐。以能善遵所乐三昧分别晓了。金刚总持自在法。所可应讲而为说之。所向一时须臾之间。所归时节有所持者。众生意性如其法器。各从所行而说经法。常不违失三昧之定。是为如来第七不共诸佛之法。

复次宝女。行菩萨道。常行精进。恒不舍远不厌善本。合集应德而不违废。敬于一切尊于善友。诣诸法师诸佛菩萨。亲近咨受闻其经法。奉事侍从精进无量。游无数土摄护生死。开解无限众生之类。严净无量诸佛国土。供养无量诸佛正觉。揽持无量诸佛之法。觉达无量诸佛圣慧。入于无量众生之行。晓了无量讲诸法门。彼则以斯劝法之故。究竟具足速成佛道。斯则名曰不失精进。如来精进无所忘失。善修于斯精进之行。三昧定意神足变化。如来神足感动变化不可限量。亦现殊特开化度脱无数群萌。坚固至诚无碍阴盖。游诸佛土无所损耗亦无所行。而普周至遍于虚空。是为如来第八不共诸佛之法。

复次宝女。行菩萨道。意常专秉第一执志。又恒安详究竟具足真谛之心。未曾忘失一切世俗及度世法。遵修思惟于四意止。彼则自观内身之行。而专惟于非常苦空非身之事。又观外身身之所行非常苦空非身之行。观内外身非常苦空非身之事。观内痛痒见痛痒空专修于行。观外痛痒见痛痒空。观内外痛痒见内外痛痒。思惟知空。观内心行见其内心。惟念无想。观于外心见外心行。专惟无相。观内外心见内外心。专惟无相。观于内法见于内法。行无所愿。观于外法见于外法。专无愿念。观内外法见内外法。行无愿念。彼则于身得四意止。思惟非常苦空非身。具足成就如来之身。而不断绝身之善德。以解痛痒则获意止。思惟空行察于一切诸趣黎庶而令休息一切恶趣。以设大哀除其苦患。心以解达名曰意止。专修无相亦不违失菩萨之心。稽累遵修大乘之行而不懈废。心归于法名曰意止。专修无愿。不于无欲法而取证观察佛法。等御入于无量法界。修斯法已究竟显达速成佛道。是则名曰不失道意。如来常定志未曾忘。蠲除众行善修三昧。如来讲说变化之事。见诸众生去来现在心之所念信解诸根。度脱尘劳爱欲之行。晓了结缚因缘之着非善行业。报应罪福生死终始。知诸佛土声闻

合会。体解菩萨行受决时。自说父母亲族知识朋友。心根明达而不忘之。分别八处言无一虚。是为如来第九不共诸佛之法。

复次宝女。行菩萨道。常遵智慧。智慧光明。智慧威曜。智慧显识。演智锭晖圣达之慧。深妙之明。厌欲之智。意不可喻。所兴之慧达于一切。声闻缘觉慧所不能及。未曾有慧。旷达窈窕无边之慧。趣异之慧。灭定已慧。念无所住无所著慧。求闻无厌志于圣达。畅于博闻而归智慧。睹于世间如首火然。殷勤志慕大学之慧。有所听闻犹如大海。闻能分别。好乐经典乐于法乐。彼求于法故行精进。以斯法乐无有形类于内于外。而悉放舍无所吝惜。小心恭顺奉敬尊旧常受言诲。于五阴苦靡不能忍。悉舍诸安所可娱乐。彼以好法殷勤为乐。闻一四句颂。不用具足千金之宝。宁欲得闻一句之法。不志获于转轮圣王。愿乐欲求闻度无极。不贪得致帝释梵天。宁乐为人说四句颂以法布施。则不奉赖江河沙等广说祠祀供一切乏。宁乐劝人发于道意。而不用致江河沙等转轮圣王。宁乐为人讲说经典。演度无极所可遵行。而不奉获江河沙等帝释梵王。其有性行。如是成就专精听经。一心而为他人说者。如是精进所受奉行。少有及者一切诸天所见敬奉。诸佛所念。其为诸天所见拥护。诸佛念已。俗间典籍度世正经自然现矣。不学悉达则能堪任。致于无尽智慧光明。行是法已究竟具足逮成佛道。以故名曰为如来也。不共智慧真谛圣达。其明巍巍无所挂碍无有阴盖。皆知一切群萌之等心所行念善恶所归。有言无言。有罪无罪。有漏无漏。世俗度世。尘劳嗔恨。生死泥洹。皆分别说。一切法门所入圣觉。晓了讲诵一切国土满中诸尘。其智慧明知于过去当来现在之事。无所挂碍无有阴盖。劫数如是一切悉了无有蔽碍。晓了本际当来之际诸去来世。说无边际入识察行。善修三昧教授变化。如来至真以一法门。悉能分别一切法门。使一法门入一切法门。是为如来第十不共诸佛之法。

复次宝女。行菩萨道。未曾志慕于居家矣。亦复不乐于舍家。而复示于出家行学。多为沙门好喜澹泊。寂然为上靖默为业。遵修精进深妙之法。而复奉行斯三脱门空无想愿。一切诸魔及外仇敌所不敢当。一切颠倒及诸邪见无能犯者化诸想着众生之类。彼则以此三脱之门而专惟行。便致无盖解脱之门。自然兴发无碍慧明。以度魔界具足圣界。不复习行一切阴盖颠倒覆蔽所处邪见尘劳众想。便以晓了无阴盖门。以三脱门而自娱乐。则分别说深奥之法。但归要义不归严饰。但归要慧不归于识。归分别要不归多辞。但归于法不归于人所归导利一切众生。美辞严饰离诸想会。讲说分别归于要义而令解脱。于色想会讲说分别归于要慧而度脱之。在于多辞而合会矣。说色平等令归正说而度脱之。依于人会分别劝化。使归于法而度脱之。假使会在六十二见。为分别说謏无之要使度脱之。设集游在一切诸想因缘之惑。解

脱无想而度脱之。游在三界分别无愿而度脱之。集在欲行。解脱空净而度脱之。集在嗔恚。分别慈心而度脱之。会游愚行。解说缘起十二相连而度脱之。入于贪会。分别现说施度无极而度脱之。在犯禁众。分别现说戒度无极而度脱之。在嗔恚众。分别现说忍度无极而度脱之。在懈怠众。分别解说进度无极而度脱之。在乱意众。分别现说禅度无极而度脱之。在邪智众。分别现说慧度无极而度脱之。在凡夫众。分别现说圣谛之议而度脱之。在四倒众。分别现说无常苦空非身之法而度脱之。在于一切阴盖之蔽颠倒邪见迷惑之众。分别解说无盖脱门而度脱之。在尘劳众。分别现说十方诸佛道品之法而度脱之。行是法已究竟具足逮成佛道。所以名曰如来不失度脱。以能不失于解脱者。则无嗔怒。究竟根原无有缺减。本末清凉游诸所趣入干深妙。所逮神智而不可及甚难当矣。过于声闻缘觉之乘。普能独步于诸佛道。离秽无垢则无瑕疵。究竟清净而庄严治。寂观之业志有所说。而不可尽无量无边。则于无为无所挂碍修行平等如虚空。善修三昧号离垢藏。皆悉照曜一切诸法。晓了总持。如来说法悉解脱想。一切所归来亲近者。普以晖曜多所开明。向于无为而崇灭度至重泥洹。究竟具足得其边际。是为如来第十一不共诸佛之法。复次宝女。行菩萨道。以慧为尊慧为势力。归于要慧讲论慧土。超越诸慧所归趣者。严治圣道。兴显所行求于超异。净修神通成一切智。修行道意具足究竟。则得圣达至诸通慧。若有欲心知有欲心之所兴发。若无欲心知无欲心之所兴发。若有嗔恚心知嗔恚心之所兴发。离嗔恚心知离恚心之所兴发。若有愚痴心知愚痴心之所兴发。离愚痴心知离愚痴心之所兴发。若有尘劳心知尘劳心之所兴发。离尘劳心知离尘劳心之所兴发。若睡眠心知睡眠心之所兴发。离睡眠心知离睡眠心之所兴发。若合会心知合会心之所兴发。离合会心知离合会心之所兴发。若翼养心知翼养心之所兴发。离翼养心知离翼养心之所兴发。若贪他心知贪他心之所兴发。离贪他心知离贪他心之所兴发。若过上心知过上心之所兴发。若无上心知无上心之所兴发。若阴盖心知阴盖心之所兴发。若无阴盖心知无阴盖心之所兴发。若无决心知无决心之所兴发。若有决心知有决心之所兴发。若有恶心知有恶心之所兴发。若有善德心知有善德心之所兴发。若有罪心知有罪心之所兴发。若离罪心知离罪心之所兴发。若有漏心知有漏心之所兴发。若无漏心知无漏心之所兴发。若世俗心知世俗心之所兴发。若度世心知度世心之所兴发。若有着心知有着心之所兴发。若无著心知无著心之所兴发。若清净心知清净心之所兴发。若薄鲜心知薄鲜心之所兴发。若众愤心知众愤心之所兴发。若习更心知习更心之所兴发。若无更心知无更心之所兴发。若边际心知边际心之所兴发。若无际心知无际心之所兴发。取要言之若慳贪心布施之心。若犯禁心奉戒之心。若嗔恚心忍辱之心。若懈怠心精进之心。若乱意心禅定之心。若邪智心以正智慧度无极心。凡夫之心圣贤之心。趣邪见心趣正见心。声闻乘心缘觉乘心若大乘心。若复晓了大道

之心。又知苦谛所因而有。是为习谛。是苦尽谛斯为苦尽。向道者谛审知如有。已能晓了苦谛如有。则知本净慧无所起。究竟本末无所习慧。而知苦谛审如所有。亦无所断亦无有信令永都尽。晓了径路一切普入。而以等御犹若虚空。无有吾我无所贪爱。又其处所本来悉净。彼皆了此四谛之原。审从而有无所造证。开化众生蠲除谛愿奉行明证。若为群黎讲说经法。以所说法得真柔顺。而不迷惑乱于缘起。弃捐一切众邪异见。处入中正观因缘法。则了诸法解报应缘。不在己土不在人土。不在寿土不在命土。亦复不在众生之土。知彼无明而致斯行。知从所行而致有识。知从所识而致名色。知名色缘而致六入。知六入缘而致习更。知习更缘而致痛痒。知痛痒缘而致恩爱。知恩爱缘而致所受。知所受缘而致所有。知所有缘而致于生。知所生缘而致老死啼泣哀戚勤苦之患。如是因缘致大阴体。悉晓了空。无明已尽。行识名色六入所更痛爱受有生老病死啼泣哀戚大阴之身便永尽矣。彼造斯观。其无明缘。非己身缘。亦非人缘。无寿无命。无众生缘。设使无我无人无命无众生者。斯则为空。已知空者不计有常。亦无断灭不计无常。况断灭者。则于过去而无所生亦无所起。设于过去而无所生无所起者。则于三世而无所著。已于三世无所著者悉无所获。则无所有为自然矣。已无所有自然寂者。便则越度去来之路。已能越度去来路者则第一议。以第一议则曰正真。已为正真彼佛真辞。已佛真辞则无所诤。已无所诤则寂志法。已寂志法自然若空。从斯慧行而晓了之。从习不顺则习无明。以习无明便致行识名色六入习更痛爱受有生老病死啼泣哀戚集大阴苦身恼之患亦不蠲除。所倚诸见悉究畅知。因缘报应而合会成。已能分别无我无人无寿无命。诸法自然不受边际。亦不受亦无所得。不得际者则无根源。已无根源则睹中正。假使不得诸法根源。于彼何缘当有中正。其中正者为何等类。彼以超度无限正法。则离彼此中间之法。便能讲说无量中正经典之要。以能奉行如是法者。究竟具足逮成佛道。是故名曰如来至真终不违损度知见慧。设能不违度知见慧。以度知见慧寻能遵修力进三昧。晓了无量自在总持。而以等御无限中正之法界也。如虚空无有想念。便则讲说无形业慧。分别报应无所忘失。演畅平等去来今事。而目睹察一切众生诸根所趣。说其精进慧之所解。分别决了无央。数身不可计形。嗟咏解说世间之行。而善建立讲无尽事。宣布显现无量之信。若干种信又分别说。一切方面诸内分部。悉能周达决无限难。诸所游步说进退慧。演无思议诸法之门。宣示一切禅定脱门三昧正受。尘劳之欲嗔恚之结。构诸黎庶终始所趣善恶中间。而悉晓了过去无数无阴盖慧。普现无量若干之变。往古世事而皆念之。又咸观察靡所不睹。而悉晓了宣布无量无盖。天眼彻视而悉说之。一切诸碍悉无有余。已能解脱除诸碍慧。一切漏尽及为慧耳。设无所有已为慧者。讲无畏慧。皆无差特平等如称。不断佛事讲说大哀势力之慧。随人本行而叹说法。赞扬诸法无有处所。开化众生则转法轮无有懈怠。差特之慧宣布深奥若干殊

异。超玄无底至化弥弘。智慧之力而为感动。一切声闻缘觉之乘所不能及。是为如来十二不共诸佛之法。复次宝女。行菩萨道。兴造圣业不求名号。则以己身兴智慧业。不复设造一切身秽谄诈欺。无凶害行无慳贪行。常修梵行。身精进事则顺道行。不为身患逼他人。依度无极行大悲哀。常为众生身所遵修。若兹具足。彼以斯法奉行如是逮成佛道。斯谓如来身所行事德慧自在。以身解了一切慧明。等自在已睹一切形。悉能示现诸色三昧。晓了普入总持之要。如来现已无数之形若干种像颜容之类。一切天龙鬼神。提沓和须阿伦迦留罗真陀罗摩休勒。释梵四王。梵志君子长者居士。农夫工师细民。比丘比丘尼。清信士清信女。又无数人不可称计百千之众。悉来会坐。佛现无量威仪礼节。颜貌形像而为最尊。为长为上为极大人为无量正。而为众会讲说经法。劝化发遣多所诱进。中间没身忽然不现。众人因解。是故大会各各相合。共坐说议众人欢喜。所演智慧寂然经行。若有睹者不以为厌。若所说者益用踊跃心逮悦豫。不复欢喜一切欲乐境界财业。设没不现靡不渴仰。欲得奉觐听说经典。设有睹者。贪欲之着恩爱之见。闻所说法好乐听受。因斯报应至于无漏。身口心定而无瑕疵。获斯行业。是为如来十三不共诸佛之法。

复次宝女。行菩萨道。造圣慧业不求名闻。彼口所说惟兴慧事。不为一切瑕恶谄诤佞邪所迷。所言至诚而不两舌。亦无粗辞而不谄人。言辞柔润不为犷说言辄说法。其口所宣不令己身及与他人的心懊恼。口之所说如佛教法议归于善。口之所说言辞则可众生之心。无所中伤其慧安详。言辞具足不遵修名。以此行法究竟具足。逮成佛道。斯谓如来口言等慧智德自在。彼则以此口言等慧智德自在。善修宝事三昧之定。得达三品晓了总持。如来所入以一口辞。以一法言普入一切。宣畅诸音等悦一切众会之心。如来一切所演音声。则合于议不违法理。至诚柔顺观因缘法。除诸瑕秽而离爱欲。寂定游已必当获致至诚之报乃至灭度。是为如来十四不共诸佛之法。

复次宝女。行菩萨道。假使常修造智慧业不慕名色。以心思念圣慧所兴。则令众生离于瑕恶所著邪佞无明嗔恚倒见之事。遵修正见而行慈悲。等心黎庶不舍道意。遵奉慧已究竟具足。不为自大亦无慢恣。行是法已逮成佛道。斯谓如来心之所念精修圣慧志所畅达心等慧事圣明自在。彼已达已。一切慧心等圣自在。善修现在诸佛目前显立三昧。所念清净晓了鲜洁之总持也。如来一心普知一切众生心念。已心等故则能普等一切黎庶。劝助平夷心等一切。则能等已所可劝助。心犹若幻。本性清静。一切诸心自然如空。道法等御一切众生身口心行。以众生法等入己身。所修道法一切诸身犹若现影。若能以慧等御诸身。一切众生入于己身。以能等御一切诸身入己身者。发意之顷令众生身化立佛身。斯所建立无能毁者。亦无能动无能转移。天上世间

诸天人民。诸魔梵志沙门梵天无能进退。是为如来十五不共诸佛之法。

复次宝女。行菩萨道。闻诸过去如来至真无挂碍慧。斯诸等正觉悉普周遍一切世界。无所挂碍无有阴盖。身所行业威仪法式而悉笃信。一切世界音声本寂。靡不得入无量无尽不可思议诸佛音声。分别演说无量法门。斯诸过去如来言辞。则无有二。十方国土诸佛正觉。及众正典。普诸黎庶一切菩萨。亦复如之。达诸声闻缘一觉众一切诸人因缘罪福。所可念行。则复笃信过去如来心之所行光明之曜清净无量无有阴盖。信斯过去诸如来者。不怀狐疑亦无犹豫。不恐不惧亦无畏难。诸佛境界不可思议。晓了众生如是比像。悉乐诸法因劝助之。以行此法究竟具足。逮成佛道。斯名如来过去无量无损智慧所现自在。彼以过去自在智慧。则复善修于勇猛伏三昧之定。分别晓了威曜总持。而知过去诸如来众。各各异名寿命之限。于其中间无边之慧。欲求根源悉能尽极。过去菩萨声闻缘觉亦复如是。众生群萌所可造行。人所修业善恶祸福。有如过去一切劫数。以何等劫成为正觉。觉未觉者。于某劫中。而有若干如来至真等正觉。斯诸如来亦于彼劫。说无量无碍之际不可尽极之根源也。又了过去诸佛世界其名各异。若有杂秽若复清净。多少大小细软微妙。尘劳限数所入之处。如其顺应十方处所。金刚罗网分别所入。诸根罗网所入境界。一切过去无边际。诸佛国土不可究竟得其边际。如来于此一切普说斯过去事。无有捐忘悉能决了。斯诸佛慧。如人观掌视五指矣。是为如来十六不共诸佛之法。

复次宝女。行菩萨道闻诸如来至真等正觉慧无挂碍。斯诸正觉普则周旋一切世界。身无央数无有阴盖。身之所行威仪礼节悉笃信之。音声畅达靡不周遍。诸佛国土皆闻法教。乃入无限所说法门。信于当来如来言辞。十方国土诸佛正觉诸法众生。一切菩萨声闻缘觉。及诸凡夫所作罪福善恶之报。又复信知当来诸佛心之所归。光明威神清净无数无有隐盖。信斯当来诸佛之行。不怀狐疑亦无犹豫。不恐不惧亦无所难。而以笃信不可思议诸佛境界。则复于斯为诸众生劝助合集。如是像法究畅信乐。行此法已究竟具足逮成佛道。斯谓如来当来无数无所损失现慧自在。彼以当来无所损慧。现自在已。则便兴发大哀之力三昧之定。晓了分别师子雷音之总持也。则能了知当来正觉各各异名寿命限量。于其中间说无边际不可尽极。得其根原。又复识知当来菩萨声闻缘觉众生群萌之所行也。黎庶行业所当遭遇祸福报应。又知当来一切诸劫。而于某劫当成正觉觉诸未觉。又于中间说所历劫。无有边际不可尽极得其根原。当来世界各各有名。杂秽清净多少大小细柔微妙。如诸尘数所有齐限。如来知其无所捐忘。而柔顺行十方处所。根原罗网之所有分。悉能普入当来无数诸佛世界。斯诸如来悉分

别说。观如手掌睹五指矣。是为如来十七不共诸佛之法。

复次宝女。行菩萨道闻诸现在如来至真无挂碍慧。斯现正觉其身无数而无阴盖。诸佛境界身所行业。身之所趣咸仪礼节。又其音声咸遍诸国。无所挂碍声无覆蔽。皆笃信解不可思议诸佛音响。说于无量诸法道门。斯诸现在如来言辞。而悉信乐。口所宣畅。十方国土诸佛正觉及众经典。一切黎庶诸菩萨等。声闻缘觉一切人民选择分别。此诸如来心之所行。心所兴业光明清静。不可计数无有阴盖。皆复信此现在如来。不怀狐疑无有结滞。不恐不惧亦无怖惧。诸佛境界不可思议。又复劝化于他众生。如是色像信乐经典。行法若斯具足突竟逮成佛道。斯谓如来现在无数无所损失现慧自在。彼以无数现在如来无损智慧现已自在。则便善修离垢照印三昧之定。晓了分别金刚道场之总持也。如来现在普能分别。诸佛名号各各差异。寿命之限悉能宣布。中间回绝而无边际。不可尽极得其根原。现在一切诸菩萨众。声闻缘觉众生之行。群萌事业罪福报应。现在十方诸劫之数。于其劫中成为正觉。说其根原。现在十方一切国土。各各有名。杂糅清静多少大小柔软微妙悉得普入。如尘数限随其所顺。十方处诸谛根罗网。悉入现在十方世界。于其中间无限边际。不可尽极得其根原。如来于彼。所说分别无所损耗。此诸如来选择智慧。如观手掌察其五指。是为如来十八不共诸佛之法。

是十八品。便得一切不共诸佛之法。何谓不共诸佛之法。无能睹见如来顶相。是为不共诸佛之法。身无限故。如来超殊一切诸形。是为不共诸佛之法。一切人中为最尊故。众生见佛瑕秽消除。是为不共诸佛之法。身如药故。如来之行英妙超殊。是为不共诸佛之法。无罪罣故如来无惧。是为不共诸佛之法。得无畏故如来独步。无有诸漏而得自在。是为不共诸佛之法。遵平等故。如来之心行无所坏。是为不共诸佛之法。晓了贤圣之教诫故。如来调定志性和雅。是为不共诸佛之法。坚住建立于己行故。如来之辩应时而对。是为不共诸佛之法。讲说经典无言教故。如来可悦一切众生心之所念。因曰如来。是为不共诸佛之法。无所进故。如来音声普闻众会。不溢在外。是为不共诸佛之法。讲说经法而不虚妄。开化应度。救济诸根令纯淑故。一切众会在于道场。亲近睹见如来颜貌。是为不共诸佛之法。变化感动无思议故。瞻察如来无有厌足。是为不共诸佛之法。如大德无极树宝柱。大圣体故。如来说法无所侵枉。是为不共诸佛之法。平等觉故。如来之身不可谛视。是为不共诸佛之法。威仪礼节无希望故。如来之身如师子步。是为不共诸佛之法。于大众中无所难故。如来游步无有虚妄。是为不共诸佛之法。智慧为本身造行故。如来之行音声真谛。是为不共诸佛之法。智慧元首口辞真故。如来之眼普视无边。是为不共诸佛之法。圣慧为上心明达故。如来教授言辞显曜。是为不共诸佛之

法。卒对辩故。如来利养名闻流溢。是为不共诸佛之法。无上正真不可尽故。如来之福不可尽极。是为不共诸佛之法。第一分别了诸碍故。成为如来无能当者。是为不共诸佛之法。为大钩锁力士之身。而有十力四无所畏。第一最上度无极故。如来无倦常不退转所说不懈。是为不共诸佛之法。晓了一切众生根故。又如来者。为无数法而作圣师。是为不共诸佛之法。普于诸世独尊师故。寿命无量。是为不共诸佛之法。显法身故。其睹如来若闻音声。亲近稽首无有虚妄。是为不共诸佛之法。为究本末人稽首礼。即令众生至大安故。如来之慧无有结恨。是为不共诸佛之法。解达三世平等之故。如来讲说无有中间是为不共诸佛之法。顺法本故。如来蠲除一切挂碍。是为不共诸佛之法。诸不善法永无余故。如来无师。是为不共诸佛之法。已自然达诸法之故。如来普智。是为不共诸佛之法。分别诸觉晓了大道无有余故。是为皆得一切不共诸佛之法。

宝女所问经卷第四

三十二相品第九

于是宝女问世尊曰。唯然大圣。今所可谓如来至真三十有二大人之相。前世宿命行何功德。而致逮得三十有二大人之相。遍布在体。佛告宝女。吾往古世行无量德合集众行。如来由是逮得三十有二大人之相遍布于体。今粗举要。如来之相。足安平立大人之相者。乃往古世坚固劝助而不退转。未曾覆蔽他人功故。如来手足而有法轮大人相者。乃往古世兴设若干种种施故。如来至真指纤长好大人相者。乃往古世则说经义救护众生令无患故。如来手足生网幔理大人相者。乃往古世未曾破坏他人眷属故。如来手足柔软微妙大人相者。乃往古世而以惠施若干种衣细软服故。如来而有七合充满大人相者。乃往古世广设众施供诸乏故。如来之膝平正无节[跳-兆+專]肠如鹿大人相者。乃往古世奉受经典不违失故。如来之身其阴马藏大人相者。乃往古世谨慎己身远欲法故。如来之身颊车充满犹如师子大人相者。乃往古世广修净业修行备故。如来至真常于胸前自然卐字大人相者。乃往古世蠲除秽浊不善行故。如来肢体具足成就大人相者。乃往古世施以无畏安慰人故。如来手臂长出于膝大人相者。乃往古世人有所作佐助劝故。如来身净而无瑕疵大人相者。乃往古世奉行十善无厌足故。如来脑户充满弘备大人相者。乃往古世其有病者。若干种药瞻视疗故。如来师子步大人相者。乃往古世植众德本具足备故。如来四十齿白大人相者。乃往古世志性等仁于众生故。如来牙齿无有间疏大人相者。乃往古世设人争斗令合和故。如来颌牙大人相者。乃往古世则以微妙可意之物而兴施故。如来清白美好发眉大人相者。乃往古世善自护己身口心故。如来广长舌大人相者。乃往古世所言至诚护口之过故。如来豐

置大人相者。以无量福供养究竟。心行仁和与众生愿使得覆盖。如来梵声哀鸾之音大人相者。乃往古世言语柔和。与众人言护口节辞。无央数人闻其所语无不悦故。如来瞳子紺青色大人相者。乃往古世常以慈目察众人故。如来之眼如月初生大人相者。乃往古世无粗暴志心性和顺故。如来眉间白毫大人相者。乃往古世咨嗟歌诵闲居之德众人行故。如来顶上肉髻自然大人相者。乃往古世敬奉贤圣礼尊长故。如来肌体柔软妙好大人相者。乃往古世心念念集法品藏故。如来身形紫磨金色大人相者。乃往古世多施衣服卧具床故。如来之体一一毛生大人相者。乃往古世离于集会众闹之故。如来之毛上向右旋大人相者。乃往古世尊敬于师受善友教稽首从故。如来头发紺青色大人相者。乃往古世愍伤群黎。不以刀杖而加害故。如来之身平正方圆无有阿曲大人相者。乃往古世己身众生。劝化安之令定意故。如来之脊如大钩锁普有威曜巍巍之德大人相者。乃往古世为诸正觉。兴立形像缮修坏寺。其离散者劝使和合。施无畏惧。其诤讼者化令相顺故。女欲知之。吾往世时。行于无量不可计会众德之本。如来宿世奉行如斯。乃能致此三十有二大人之相。

尔时宝女白世尊曰。至未曾有天中天。如来往古所造德本诚不可及。而分别说诸佛之法。佛告宝女。如是如是如汝所言。如来则为分别解说诸佛之法。若有菩萨逮得闻此如来往古所植德本诸佛所讲。则获善利无极之庆。即当归趣于真谛行。咸能具足诸佛之法。佛说于斯如来十力四无所畏十八不共诸佛之法。及三十二大人之相法门品时。十方世界六反震动。甚大光明普照佛土。不可计量众生之类。皆发无上正真道意。二万五千菩萨得不起法忍。天于虚空百千之众。而雨天华鼓天上乐。琴笛箫瑟举声叹曰。其有众人。逮得闻此如来十力四无所畏十八不共诸佛之法三十二大人之相。功德具足无有罪咎。信乐不疑行如上教。则于大众天上世间天人之前演师子吼。犹如今日如来至真等正觉矣。天人之前而师子吼。所以者何。斯正典者终不归趣下劣少信。处于小乘众人之首。当归清静遵修法者。其人得此经典之要。爱敬可意欣悦踊跃。

法行品第十

于是宝女。白世尊曰。至未曾有天中之天。如来乃讲往古去世一切德本诸佛正典。何谓世尊。菩萨所行遵修经典为行法乎。善哉世尊。愿说菩萨所行之法。佛告宝女。志性清静则为菩萨所行法也。坚固亲友则为行法。有反覆者则为行法。能修加恩则为行法。能忍骂詈则为行法。又归命者而不弃损则为行法。其羸劣者能为忍辱则为行法。所难致者而能施与则为行法。慈哀诸身则为行法。志性愍伤则为

行法。护于犯戒则为行法。思惟经典则为行法。将顺道教则为行法。好乐正典则为行法。将御诸经则为行法。而顺寂然则为行法。而乐独一则为行法。不厌闲居则为行法。等于屏处则为行法。舍于众会则为行法。护于众生则为行法。所睹无损则为行法。专修慈心则为行法。入于大哀则为行法。欢喜爱法则为行法。观于禅思则为行法。兴显道心则为行法。叹大乘法则为行法。弃捐重担则为行法。心不怯弱则为行法。思惟止足则为行法。弃捐贪余多欲之慳。则为行法。知节贤圣有足之德。而少言辞则为行法。无有诤讼斗乱怨恚。忍辱仁和则为行法。信知报应罪福之业。则为行法。信戒闻施惭耻智慧。顺此七财则为行法。奉敬尊长顺从善友。恭礼受命则为行法。心常谦卑恭顺自损。则为行法。不自毁身不害他人。不叹己德不蔽他功。则为行法。蠲除尘欲弃捐嗔恚及愚戆冥。离于憍慢则为行法。威仪礼节所遵具足。则为行法。善听经典欢喜悦豫。则为行法。不离于佛笃信正典敬从圣众。则为行法。布施调意智慧出家净修梵行。则为行法。得利无利若誉若谤。有名无名若苦若乐不以动摇。以过世间之所有法。则为行法。若见亲友及与怨敌。先人问讯面色和悦而无愁悴。则为行法。无有调戏离于闇昧而无谗谄。不为邪性而无瑕疵。志性本末究竟清静。则为行法。而行四恩惠施仁爱。利仁等利一切合集救济众生。则为行法。行坚固法则为行法。念佛念法念于圣众。思念布施念奉禁戒思念诸天。则为行法。施度无极戒忍精进一心住慧所度无极。则为行法。善权方便劝助一切众德之本为诸菩萨。则为行法。身口意净护于十善。则为行法。非常苦空而有无有身。无人无我无寿无命。信解如此则为行法。分别空行建立无想。晓了无愿。在于三界而无所著。则为行法。意止意断遵修神足。根力觉意而入径路观乎寂寞。则为行法。佛告宝女。其行法者。谓无有眼亦无眼行。无色想行。无有耳行亦无声行。不想响行。无有鼻行亦无香行。不想香行。无有舌行亦无味行。不想味行。无有身行无细滑行。不想细滑。而无意行亦无法行。不想法行。亦无色行则为法行。无色想行无色苦想。无我色行不寂色行。则为行法不空色行非色无想行。则为行法。非色无愿行。非色无造行。亦复非色恬怕之行。亦复非色清静之行。亦复非色如审之行。亦复非色无生之行。亦复非色无起之行。亦复非色无著之行。亦不究竟色之所行。亦非于色无本为行。是则行法。如是痛痒思想生死识行。则为行法。非识无常行。非识苦行。非识无我行。非识寂行。非识空行。非识无想行。非识无愿行。非识非无造行。亦复非识恬怕之行。亦复非识清静之行。亦复非识如审之行。亦复非识无所生行。亦复非识无起之行。亦复非识无著之行。亦复非识究竟尽行。亦复非识无本之行。则为行法。亦复非识睹空之行。亦复非识无想之行。亦复非识无愿之行。是则行法。亦非四种行。亦非诸入行。亦非欲色无色之行。是则行法。亦非有行亦非不行。亦复无行。是则行法。亦非往至亦非不行。亦无处所亦无所住。则为行法。无心意识之所行者。则

为行法。是名曰为行法矣。其无有见不闻不知之所行者。是为行法。若使无身口心之行。是为行法。其不行法不行非法。是为行法。若无二行无若干行。是为行法。无过去行无当来行无现在行。是为行法。其无阴行无诸种行。无众入行。是为行法。无欲尘行无有结恨无所念行。是为行法。若无合行无财业行。无我人寿命行无有含血。若有所受同像之行。是为行法。其无发起分数之行。是为行法。其无吾我无己所行。是为行法。无断灭行不计常行。不得诸见崖底之行。不倚中行。是为行法。诸法若住若无所住。吾我之法处所自然。其处非处清净法处。一切法处皆无有处。空无之处究本末处至竟无处。一切诸法无动无著。不可尽极。亦无所有亦无所行。亦无轻戏亦无所依。亦无不依亦无所住亦无所受。其于是法晓了慧者。慧无所念。是曰谛。真谛无本则法之慧。设使宝女。菩萨如是晓了诸法。游在生死开化众生。亦不违失灭度之法。斯为菩萨等造法行。世尊说此行法之时。八千菩萨逮得法忍。

不退转品第十一

于时宝女。即以十亿百千贵价珠璣。贡上大圣口宣斯言。唯然世尊。其有菩萨遵修奉顺此法行者。则具佛法悉能普备。如兹受决处佛道场。降伏众魔怨敌之仇。以不退转印而印之。当造斯观。时舍利弗谓宝女曰。汝岂能知诸菩萨行不退转印所可印乎。于时宝女答舍利弗以偈颂曰。

人界及法界	审谛解平等
了斯无二际	则不退转印
其过去诸佛	当来并现在
法界皆平等	逮成不退转
诸所有境界	并无为之界
寂寞转空议	觉成不退转
本际无崖底	不得其边畔
一时等能解	觉了不退转
其有方俗法	如行之所趣
智慧观平夷	觉了不退转
如魔之境界	佛界则平等
相应为一类	以是印见印
其淫怒痴者	欲尘不可限
觉了诸想着	达解不退转
生死及无为	道教则寂然
等解于灭度	觉了不退转

五阴道如之
犹如幻貌像
计于四种者
晓了无可取
觉眼则为道
若眼道如之
诸入皆如是
当作是了知
众生之所念
则无所挂碍
一切群萌根
于彼度无极
辩才无挂碍
亿劫中诵说
虚空尚可尽
彼明辩才慧
总持行如斯
名德不违心
其十方诸佛
皆得于总持
于过去千劫
咨问真谛教
斯等总持然
智惠及诸根
以空印诸法
以印印于空
虚空印诸法
晓了此本际
诸因缘法无
因缘则非真
诸法相犹幻
以是相印之
一切众生行
一时普能现
于施舍无量
供养虚空界
禁戒高无极
无限无有量
一切众生禁
及不退转戒

有二分别慧
明哲无思想
犹如虚空界
真印而见印
解空无所著
以等上平等
道空常平均
以此印见印
一心悉知之
斯故不退转
卑劣妙中间
逮成不退转
无逝无所住
其法不可尽
风可尚执持
则不可尽极
揽摄一切法
不失于博闻
导师所说法
慧心念不忘
所闻大圣法
善学于总持
辩才亦如之
逮成不退转
无著无所拔
故曰不退转
清净无所有
以印不退转
因缘其惟行
谛相一切法
犹如虚空相
印于不退转
色声之礼节
觉了不退转
功德常无尽
至诚命为一
怀来致佛戒
等游若虚空
学不学缘觉
十六分无伦

忍辱悉尽极	遵修无所生
成就此忍辱	逮成不退转
精进无限量	方便不可极
悦可群萌类	精进为大仙
常为专志定	无乱善谨慎
普见一切法	无诤定三昧
逮无碍智慧	净除所睹处
得佛之尊行	净土令成就
慧飞度无极	善学于善权
以佛印见印	遵修于道行
其行不可知	志性何所疗
积行无边际	开化于众生
诸声闻缘觉	一切魔异学
缘不能及知	大人之所行
彼不着诸行	感动神足定
解空无所有	皆读逮所兴
来过而出生	示现佛形像
坐于佛树下	则转于法轮
普现诸国土	面见十方佛
譬若如日月	等游于虚空
示现取灭度	随大信乐乘
不违示斯印	其印不退转
无限如虚空	智慧普若斯
不退转之法	晓了道如斯

于是宝女。说此颂已不退转印时。三千大千世界为大震动。五千菩萨得不退转受别之印。世尊则赞彼宝女曰。善哉善哉快说斯言。能演菩萨不退转印。

大乘品第十二

于是贤者须菩提白世尊曰。唯然大圣。如今斯女。不退转印而见印矣。不复疑也。乃能有斯如此像类上妙辩才也。设不尔者无缘讲说若兹深法。佛言。如是须菩提。诚如所云。如斯宝女。不退转印而见印矣。以逮法忍。乃得入斯大乘之行。于时宝女前问佛言。所云大乘为何谓乎。佛告宝女。所谓大乘弘广之乘。慰抚一切众生之类故。无有阴盖。示现一切众德异惠故离垢之乘。舍诸尘劳窈冥事故。普照之乘。一切所解脱门相故。显曜之乘无欲着故。随因缘乘脱所挂碍故。清净之乘护戒品故。等善住乘。而谛慎护定品之故。无漏之乘选惠品

故。解脱乘者照解品故。等现一切诸法乘者。晓了度知见品之故。不进退乘者摄十力故。无惧乘者。四无所畏师子吼故。无所住至离处乘者。摄受诸佛十八不共殊胜法故。普平乘者。等行慈心加众生故。无害乘者。则以正法抑制一切诸外学故。消除乘者。降伏一切魔官属故。寂灭乘者坏尘劳故。降化乘者。伏阴魔故。离限乘者。越死魔故。殊胜乘者。弃天魔故。豪富乘者。则能具足施度无极故。无热乘者。戒度无极则具足故。弃怨乘者。忍度无极则具足故。坚无坏乘者。进度无极则具足故。断除一切诸所自在瑕疵之乘者。心离阴盖故。所修乘者。寂度无极则具足故。一切善德一切智慧世俗之事度世之法所遭乘者。智度无极则具足故。普御随一切乘者。权度无极则具足故。至无至乘趣灭度故。归安乘者建八路故。其所至到无处乘者。遵修奉行观寂之故。根力觉意具志乘者。一切诸魔及诸异学无瞻颜故。四神足乘。则能普现诸佛国故。等能超度正谛住乘。蠲除一切诸不善法。遵修众行德善法故。善修谨慎意止乘者。无内怨故。假使不着三界乘者。奉无漏故。不著有为诸界乘者。逮得无为显曜界故。不舍道心御善住乘。不乐一切声闻缘觉所行惠故。超越乘者。则能施以无见顶故。庄严乘者功德成故。选择众生志性乘者。究竟慧故。阇门乘者。所可词祀无所逆故。一味乘者等佛惠故。洪音乘者十方闻故。一切诸天普礼乘者。善修业故。释梵四王所叹乘者。德无量故。其有慳贪能施乘者为元首故。若有犯禁施惠戒乘者。谓大乘故。志怀嗔怒施忍乘者。不加害心于众生故。其懈怠者施精进乘。被坚固铠未曾舍故。其乱心者施禅定乘。令心调定业仁贤故。其邪智者施正惠乘。博闻解故。惠施众安除苦患乘。不造一切众恶之故。佛之圣道无挂碍智无等伦惠所示现者。皆处一切诸乘顶故。以是之故为大乘也。佛讲说此大乘议时。万二千人发无上正真道意。口说斯言。吾等亦当乘斯大乘。令无数人众生之类。皆使得立于此大乘。

于是宝女白世尊曰。唯然大圣。其大乘者。有何堦路。而不疾归诸通之惠。佛告宝女。行大乘者。有三十二挂碍堦路。以此堦故不疾得成诸通之慧。何谓三十二。乐声闻乘(一)。志缘觉乘(二)。求释梵处(三)。倚着所生净修梵行(四)。专一德本言是我所(五)。若得财宝慳贪爱吝(六)。以偏党心而施众生(七)。轻易戒禁(八)。不念道心专精之行(九)。嗔恚之事以为名闻(十)。其心废逸(十一)。而心驰骋(十二)。不求博闻(十三)。不察所造(十四)。贡高自大(十五)。不能清净身口心行(十六)。不护正法(十七)。背舍师恩(十八)。弃舍四恩(十九)。离坚要法(二十)。习诸恶友(二十一)。随诸阴种(二十二)。不劝助道(二十三)。念不善本(二十四)。所发道意无权方便(二十五)。不以殷勤咨嗟三宝(二十六)。憎诸菩萨(二十七)。所未闻法闻之诽谤(二十八)。不觉魔事(二十九)。习恃俗典(三十)。不肯劝化于众生类(三十一)。厌于生死(三十二)。是为三十二事违失大乘堕于堦路。其堕堦路不能疾成诸

通之惠。又复宝女。其学大乘之威神德。以此之乘堕于堑路。所以者何。其于斯乘有为之秽。不如所乘为大乘者。则堕堑路。若以于彼无为之德。如斯行乘为大乘者。名闻之德。计于彼乘。于如来心即为尘劳一切不顺。于斯大乘悉堕堑路。其于斯乘着如来觉。德称之故。如是乘者大乘之德故堕堑路。是故宝女。菩萨大乘当弃尘劳所慕法乘。以斯之法致净大乘。当习此法思惟奉行合斯恢弘。何所是法净致大乘。有三十二法致净大乘。何谓三十二。于诸众生无请之友故。真谛究竟为他人故。志性坚强遵修众德行不以厌至德成故。心无愤乱志性净故。其身清净威仪礼节无想念故。口言清净言行相副故。其心清净不舍道心故。布施清净不望报故。戒行鲜洁护犯禁故。忍清净者不惜身命故。精进清净十力无畏具足故。禅定清净一切尘劳无杂错故。智慧清净蠲除一切挂碍之故。清净心者降伏一切众魔之故。坚固行者度诸愿故。习诸四恩不舍众生故。于佛反覆护正法故。以不懈倦则能具足道品法故。所闻无厌具圣智故。其欢喜者转加胜故无慢善圣以能致到无见顶故。于一切法无诤讼者。因缘报应所见和故。无贫匮者获七财故所以不仆由自在故。德慧成就就不失通故。灭除众生之尘劳者。定于寂然成就之故。如来惠解所变化者具足观故。睹三脱门所示睹者。遵修于空无想愿故。澹泊内者。令诸众生觉了分别寂然惠故。兴尽惠者不起法忍故。修行一切诸法要者。致受别故。佛言宝女。是为三十二法净致大乘。说此三十二事法品典时。七万二千天与人。皆发无上正真道意。万二千菩萨得不起法忍。天于虚空百万之众咨嗟叹吒。雨于天华鼓诸伎乐。各各举声而歌颂曰。其有逮闻于此大乘名德之称。斯等众生振救建立诸佛之德。其闻信乐笃信以后。若执持者审谛奉行。复超此功。

嘱累品第十三

于是天帝释。梵忍迹天王。四大天王。白世尊曰。至未曾有天中之天。乃能善说深奥应议。讲斯经典多所导利。灭诸阴盖及众尘劳。化不顺议示导正义。以降魔怨。弃捐一切诸外异学。总摄一切诸佛之法。是故世尊。吾当受持于斯法典讽诵讲说。若诸法师。揽受奉持此经卷。归身手执若在其舍。书着竹帛宣布远近。诸天龙神及犍沓和。若信是经欲奉持者。当令斯袖宽弘无役。其不悦乐而察阴盖者当令谛受。而使斯等不犯法师不有所娆。于是世尊告天帝释梵忍迹天四大天王。善哉善哉诸仁者等。汝等乃欲将护法师。晓了志愿已能将护于法师者。诸仁者等则为拥护于正法矣。已能拥护于正法者。则为拥护一切群萌。

尔时世尊告贤者阿难。汝当受此经卷之品宝女所问正法之典。受

持讽诵为他人说。假使菩萨于百千劫。而行布施忍辱者。设有菩萨取是经法。受则上口而讽诵者为他人说。建立大哀欲度众生。具足大慈思惟经法立于忍辱。斯之获德出彼福上。速疾得归于此大乘。贤者阿难白世尊曰。吾寻奉受斯法典已。唯然大圣。斯之经法名曰何等。云何奉行。佛告阿难。斯之经法。名曰真谛晓了义律达门之品当持。又名无量之德发意所说当持。如来十力四无所畏十八不共诸佛之法分别诸相。菩萨应时遵修法行。说不退转轮印讲演大乘当奉持之。聚会之品宝女所问当奉持之。阿难。汝若能持此法门品为他人说。便获无量名德诸法法之光曜。则为众生建立佛事。所以者何。是为去来今现诸佛世尊究竟之法。佛说如是。宝女阿难一切众会诸天人民阿须伦世间人闻经莫不欢喜。

无言童子经卷上

闻如是。一时佛游罗阅只耆闍崛山中。与大比丘众千二百五十人俱。摩诃菩萨无央数。尔时城中。师子将军。第一夫人孕有德男。天虚空唱大音声而告之曰。童子。汝当怀抱道教思惟经典。慎莫宣说世之言谈。晓了方便度世之法。少言鲜辞舍方俗事。当归正义不取美辞严饰之说。童子遥闻如是音教。未曾啼泣亦不出声。初不自现婴儿之相。至于七日颜貌悦豫无有憔悴。众人来观视之无厌。或有人言。此儿无声用为育养。父母答曰。是非随宿吾当育之。所以者何。今观此儿威容颜貌端正姝妙巍巍难量。非是凡庶之所能及。实不虚妄。于时父母亲属知识见儿无声。因共字之号曰无言。

于是无言童子。渐遂长大至于八岁。四方众人来观察者无有懈怠。其有方面。或有法会分别义者。辄诣其所咨受法言。寂然静思亦无所说。时彼童子而于异日。与其父母五种亲属朋友知识。至耆闍崛山而诣佛所。稽首足下右绕三匝。于世尊前叉手而立。睹无央数十方世界诸菩萨会亿百千垓各各处于严净之座。心大欢然善意生焉。时舍利弗前白佛言。唯天中天。是无言者师子将军之子。端正姝好威光难量巍巍如此。离于言谈而无所说。其人前世有何余殃。生无有声又不能言。佛告舍利弗。止止勿得辄慢无言童子。所以者何。此人则是菩萨大士。于过去佛植众德本。供养无数诸佛正觉。稽首足下得不退转。当成无上正真之道。初生之时。天于虚空宣扬大音。童子。汝当抱道意。思惟经典勿有世谈。以是之故。今此菩萨寂然不言。受柔顺教于兹八岁。一心结舌而无所说。以斯憺怕奉行四禅。世尊复告舍利弗言。其有众生。若能睹无言菩萨。悉顺道教由此无言。以是之故。今有大会。当说经法开化导利。于无央数不可称人民之众。于是无言菩萨即如其象。三昧正受而现瑞应。令诸声闻及众菩萨天龙鬼神揅查和阿须伦伽留罗真陀罗摩睺勒比丘比丘尼优婆塞优婆夷一切众会。各于右掌化生莲华大如车轮。其色若干微妙鲜好。其香难量见者心欢。彼莲华上则有自然诸化菩萨。结跏趺坐。三十二相庄严其身。无言菩萨见大神足。稽首世尊重自归命其莲华上诸坐菩萨。叉手卑身。亦三自归。无言菩萨。口适宣此稽首归命。应时自然恒边沙等诸佛世界六反震动。大音普闻。天于空中叹若雷震。则雨众华。箜篌乐器不鼓自鸣。无言菩萨承佛威神。大愿所致踊在空中。去地四丈九尺。大菩萨众亦复如是。无言大士而于中。与菩萨异口同音。以偈赞佛。

无形而现形 亦不住于色

欲以开化众	现身而有教
佛者无色会	亦不著有为
皆度一切数	导师故现身
显相三十二	奇好八十种
以严其身体	为众讲说法
法者则无相	亦无有音响
无声不可得	无念寂微妙
佛法觉了法	处在佛树下
彼道无言教	言辞无所说
其法无形法	求相不可得
以无相之法	安可有所说
愍伤于群生	此佛之大恩
分别无所获	所说不失时
晓了无所得	解空无所获
能如此养者	佛义无名字
有为之言教	诸佛因所说
彼数无所有	无为无自然
如无常形色	导师缘见象
此法无所有	为众说此经
又始至八岁	口未曾有言
我初生之时	诸天唱大音
以入惟经典	其耳不闻声
如是怀道业	口亦无所说
无言假有教	辞语无所畅
以言谓有说	清净妙光曜
念誓愿佛道	志在于大乘
当宣于尊教	得佛人中上
道心不可获	无言无相念
是故曰道空	解结成晖曜

于是童子。谓诸众会。道与言教等无有异。不可见。不可持。所可说无能睹。口说志道。人计于道而有所求。其所处愿斯无所有。不可得处则无所住。如是住者道之所立也。诸度无极亦复如是。及余无数众德之本。说于言教亦无所说。但是音声无有言辞。又说布施者。以施当施者。惠与有所向。道住一切等。口说愍哀。施道教亦行慈。其道为自然。平均如虚空。心所晓了有所说。计彼一切悉为清净。其道为普虚端如是。身行口言心有所思。舍施施斯一切尘劳。是乃名曰施度无极。所可劝助亦复如是。布施非是道之恩惠。有计道者不依布施。是二事者但假声耳。永无所著亦无形像。假使如是受道教者。为菩萨行。彼乃名曰施度无极。于布施主则为清净。有所惠与不想报

故。耳闻禁戒不住于色。则无所生亦无所灭。是为戒者。亦复如是。身口心事若无所造。悉无所有而反分别。所讲说因缘合成。口有所说因名曰戒。如口所说戒亦如是。此二事者俱无形像。诸禁戒业。一切假言语无章句。计于道者无所言说。其口所畅及心意。以业是禁戒劝助道德。言戒为道欲曜于戒。一切无像犹如虚空。能晓了此。是谓独步报行禁戒。所可游志超绝无侣。入平等觉。亶亶深妙难及之道。于是赞曰。

如言道亦然	无持不可见
所说无所睹	我宣者佛道
誓愿求于道	所愿无所住
无住无处所	道所立亦然
诸度无极然	及所作众德
言辞托音声	所说无所说
所谓布施	所施当所施
方当所究者	悉住平等道
口所畅布施	敷演于道事
彼道亦自然	等犹如虚空
若能晓了心	口之所说者
彼一切清净	闻净皆至道
身口及心念	舍一切尘劳
所劝亦如斯	是施度无极
布施不归道	道不倚于施
此二者假名	无著亦无象
若无所依倚	其受道若斯
若不望想报	是名曰布施
而假闻禁戒	不住于形色
不起无所灭	是为戒之相
不行戒亦尔	身口心无异
无作无所有	假有言说耳
因缘合有辞	说号禁戒耳
如吾戒正等	此二事无漏
诸可禁戒事	一切假于言
道义所获者	无言亦无业
口说心所作	禁戒劝助道
计戒及道教	一切如虚空
若晓了此者	独步普入戒
则游居于道	深妙难解句

童子又谓诸来会者。所谓言。忍辱教者亦是言辞。解空空义乃

为忍辱。忍如平等三界亦如。说忍形类无像无见。等心于此乃名曰忍。若能虚静为忍辱根。音声香味因缘合成。彼无所有但文字耳。是故宣畅言忍辱矣。如来正觉。说有三忍身口心念。若能晓了此忍辱者。是曰为忍。解断其身节节离散。心无嗔恚。恩爱及身譬如墙壁。察身如是忍辱。远闻恶口所畅说。若能堪任。于诸言辞不昧所说。乃为忍辱。若复游志一切瑕秽。其心静然而无忧结。意能分别诸文字者。心乃入于忍辱。计如忍道亦如此。身口意俱同尔。乃名曰道。宣传于圣教。多所劝助者。一切精进上妙细微。及诸中间。亿劫合集而不可得至于成就。假使精进不可逮得。计于道德亦无所获。不得诸法。是曰精进。所修精进。设能如是不怀怯弱。亦无恐惶是谓极上通大精进猛勇菩萨仁义备悉。于是童子重颂曰。

可所谓忍辱	口之所宣畅
空空义故忍	如忍等三世
说于忍色像	不貌不可见
若心等于斯	尔乃名曰忍
忍类为空静	缘合声香味
彼无有文字	此乃名曰忍
讲宣此三忍	身口及心念
若人晓了此	畅乃名曰忍
节节解其身	而心不怀恚
身受如墙壁	是为身忍辱
远闻有恶言	不报于骂辞
入此音乃忍	悉能住所说
若于诸瑕疵	心不怀爱结
设能了字空	是心入忍辱
如忍道亦然	身口意如是
此乃名曰道	名所而劝助
若诸所精进	最上中微下
合集亿垓劫	不得便成就
精进不可得	道亦无所获
不逮一切法	是曰为精进
若勤力行此	无怯不怀难
彼则大精进	为猛勇菩萨

童子复谓诸来会者。所谓禅思亦不有念。计于禅者亦无所住。弃一切想。是乃名曰寂度无极。则能寂然澹泊无言无放逸。离诸漏而烧灭一切尘。是名曰寂度无极。心于诸法不遣往反。于心离心是则名曰寂度无极。心及禅定常至道意。恒以平等观此众事。若能平等。于诸所观无有邪正。斯谓佛道不为难得。无有文字亦无所说。不可究竟亦

无所有。无有放逸亦不自恣。此乃曰智度无极。无有此际不度彼岸。又于此彼而无所住。正立法界以无所住。亦无所著。亦无文字。无所颁宣。无文字已。不复举假一切思想。若能启受于此法者。尔乃名曰智度无极。六度无极亦复如是。假使有人等观此义。则能均平一切诸法。亦能等于一切众生。若能同象一切诸法。则能均平一切众生。若能平均一切众生。则能平等一切诸佛。等诸佛已。则能奉修于一切智。是故菩萨勇猛无畏。犹斯名曰无极智慧。若能顺从此教命者。则顺法眼不可思议。于是童子以偈颂曰。

禅行无所思	专心不有住
断一切诸想	名寂度无极
寂然而澹泊	不逸无诸漏
弃捐众尘劳	是寂度无极
其心一切法	未曾遣往反
无心脱于心	寂然度彼岸
计心及与道	观之悉平等
若能察平等	佛道不难得
舍文字无言	无本无所有
不乐不自恣	乃名为智慧
无此不度岸	不住彼此际
正立于法界	不住无所著
文字无班宣	不与一切想
以是受诸法	乃名曰智慧
诸度无极然	所见一同类
则能等诸法	平均于众生
以能等诸法	则能等众生
亦等于诸法	便等一切智
是故大智慧	菩萨其勇猛
能随此教令	法眼不可议

彼诸正士。说此章句分别所趣。以千二百人皆发无上正真道意。六万菩萨得无所从生法忍。时莲华上诸坐菩萨。寻即退下稽首佛足。及复礼于无言菩萨。俱共启白。无言菩萨。吾等以报圣师之恩。钦乐正法奉事经典。修行孝顺而有反复。贤者舍利弗。前白佛言。唯然世尊。此诸菩萨。何故口宣如来言辞。吾等孝顺而有反复。佛告舍利弗。此诸菩萨。悉是无言菩萨大士之所劝发。令宣道教演于恩慈仁义礼节。无上正真大乘之教。开化未闻令发道意。是为孝顺而有反复报师之恩。今者故来行供养德。亦欲睹见于此大会奉觐佛圣。听省经典咨受所闻。

于是无言菩萨。白世尊曰。我欲启问如来至真等正觉所怀疑结。设见听者。乃敢自陈。世尊即告无言菩萨。恣意所问。诸不了者。如来一一当为发遣可悦其心令无余疑。时舍利弗。语无言菩萨。汝族姓子。不能语言。云何欲问如来义乎。无言答曰。一切语法。悉无文字亦无言辞。所以者何。一切众生皆悉自然。无诸言教及众想念。唯舍利弗。因心所念口说言辞。若无所思则无所言。心所念者悉虚无实。言不可说。不可示人。亦不可得。咨问行念。其想著者悉无所有。而无文字。其虚无者亦无想念。亦不宣畅文字之说。其诸行念不自想言。吾当宣布文字之说。文字不念当行想念畅文字说。唯舍利弗。十二缘起深奥难逮。巍巍如是。因缘所生。彼则自然了无所有。假使自然无所有者。彼则无有逮成道者。唯舍利弗。一切诸法无所成因缘之事。依无所住有所造作。因于缘合。是故因缘无所兴立。唯舍利弗。一切诸法悉无有主。而君长亦无常主。无有志念。因己思想多所驰骋。从对有念处于众想。颠倒之党从其起生。彼若有问见难问者。所相知一切此法。有想无想悉为一相。谓无有想。彼所以问。是为菩萨行于大哀。唯舍利弗。吾以是故。兴发大哀咨问如来。不以言辞声音问事倚口言教。住于大哀菩萨所问。舍利弗问。若族姓子。设无众生无有人物。何因菩萨。而于众生兴大哀乎。无言答曰。唯舍利弗。设使众生不求成就至于道者。尔乃菩萨。不于众生兴发大哀。然而众生。无有众生起众生想。是故菩萨处于众生兴发大哀。设说有人则反逆矣。一切五趣犹如幻化。呜呼痛哉诸人颠倒。无有众生想。是故为彼讲说经道。使无我本末皆空。由是菩萨为诸众生兴发大哀。无所破坏不毁所有。不坏吾我及人寿命。故曰菩萨入于大哀导利众生。见畅审如分别空事。为诸客尘之所沾污。所可游入等一切色。而自观见本悉清净。是故菩萨而于众生兴发大哀。时舍利弗。赞无言菩萨曰。善哉善哉。族姓子。实如所云一无有异。又从仁贤。向者听者。所讲辩才。故欲发问。当从正士启受如是不可思议。所班宣法。设问所说。当令弊魔不得其便。使如来法得久存立。此诸众会。天龙鬼干沓和阿须伦加留罗真陀罗摩睺勒等人非人。逮得无量道法光明。于是无言菩萨。前白佛言。世尊。常说修正见者。有二因缘。从他闻音思惟其行。善哉大圣。唯愿如来至真正觉。分别宣扬。何谓菩萨承于他音。何谓思惟何贤圣之正见也。佛告无言菩萨。族姓子。谛听善思念之。今当分别。犹如菩萨承他音声。因而思惟。奉顺贤圣之正见。善哉世尊愿乐欲闻。无言菩萨与大众会。受教而听。佛言。族姓子。若有菩萨。劝化众生入于佛道。是为菩萨承于他音。设令其人心不怀乱。是为思惟。假使等观于道意者。是为贤圣之正见也。又若听省柔顺道法。此承他音。若能奉持佛之道义。是为思惟。若能奉行菩萨之道逮得法忍。是为贤圣之正见也。

复次无言。若能宣于所闻微妙之慧无上正真。承此他音。假使能

通达不计吾我。是为思惟。志性清净无有谗谄发起洪业。是为贤圣之正见也。所闻顺义而不违法。是承他音。修众德本是为思惟。所行微妙助道于道。是为贤圣之正见也。专精听受是承他音求殊特义。是为思惟。助道意未曾忘舍。是为贤圣之正见也。顺念如应助道意。初不废退等观贤圣。放舍一切所可闻念是承他音。一切所有敢可尊敬。悉能施与无所爱惜。是为思惟。不望其报。不贪着道。至于大乘。是为贤圣之正见也。闻于禁戒弘雅之教。此承他音。所执戒心无所习舍。是为思惟。戒无所行。笃信至真助道于道。是为贤圣之正见也。听省忍辱仁义大慈。此承他音。而怀愍伤无有害心。是为思惟。究竟闲静。信诸法尽助道佛道。是为贤圣之正见也。听省精进则而顺之。是承他音。其心不住懈怠垢秽。是为思惟。无合无散无所违失。殷勤精进以助道。是为贤圣之正见也。令闻禅定三脱之门三昧正受此承他音。心所为事而不可得观察心本。是为思惟。所修禅定不堕颠倒助道佛道。是为贤圣之正见也。听闻智慧身根华实。此承他音。所闻法观察本末之所归趣。是为思惟。弃捐诸流众崖底源开化之意。是为贤圣之正见。示以四恩。听摄所闻了无所著。此承他音。未曾放废四恩之教。是为思惟。所可救济恩及众生。斯平等义。开度立之于一切智。是为贤圣之正见也。修四梵行慈悲喜护。此承他音。而不坏除愍爱众类亦无所毁。所可奉行不求名称。是为思惟。遵乐空无。为众生故而修愍哀。以法之故而行欢悦。为二报故助道德。是为贤圣之正见也。设令听省四分别辩。此承他音。观察诸法威仪礼节。是为思惟。从法义等于平均。所行具足劝发道意。是为贤圣之正见也。若闻所当奉行微妙导利之事。此承他音。念御顺行而不远离。是为思惟。章句道迹。所由处所宣布佛道。是为贤圣之正见也。若能令闻三十七品正觉之法。此承他音。修于意止悉不愍乱。行于断意。未曾惑随不善之心。而常顺从德义之志。其神足者。精进禅定不怀怯弱。笃信如是。明解章句而不退还。慧能寻对一一观察。心由力不行尘劳。入觉意法等于道心。是为思惟。假使无意无所思念。于四意止不起不灭。于四意断柔和身心。于四神足审如真谛。晓了如是。所趣若斯。执智慧刀截断众垢。情欲不散入于正法。而于觉意下入等观无有二事。所归径路助道心。是为贤圣之正见也。若使听闻四圣谛者。此承他音。五阴苦患。恩爱之难。灭尽所习因缘之报。入于径路。是为思惟。虽处诸苦慧无所起。于诸所习慧无所习。于诸所尽慧究竟尽。由于径路慧无所著。劝发大道。是为贤圣之正见也。若以听受于三脱门。此承他音。笃信于空不畏无相。而于无愿无所志求。是为思惟。不生空行开化诸见兴于无相教导一切。诸所相行发于无愿。所生至诚。是为贤圣之正见也。令初发意顺从大业。此承他音。修菩萨行不舍一切。是为思惟。不退转地成正觉。是为贤圣之正见也。得善知识而从其教。此承他音。目见世尊咨受圣路。是为思惟。如口所言不违所言身口相应。是为贤圣之正见也。听所讲法等于惑乱。此承他

音。观察诸法义之所归。是为思惟。奉行法义不失道教。是为贤圣之正见也。亲近如来咨受所宣。此承他音。识分别道心不舍大猷。是为思惟。受奉行有所开化能使成就。是为贤圣之正见也。设能听受八万四千诸道品法。此承他音。晓了分别八万四千诸佛之行也。是为思惟。八万四千众生之类各异根者。如应说法。是为贤圣之正见也。在在所由悉无所乐。发功德心。此承他音。假使其心不舍功德。是为思惟。以是德心专精劝助于一切智。是为贤圣之正见也。此族姓子。设随顺念则为长命。寿不可极无始无终。贤圣正见。所以者何。五趣周旋。如幻化梦影响野马水月芭蕉。晓了若斯。是承他音。一切诸法悉为平等而无偏邪。是为思惟。若致平等。乃为贤圣之正见也。名曰思惟。不举不下。于一切法无应不应。无进不进。无处不处。无行不行。无念不念。无想不想。无意不意。无惟不惟。无心意教。是为名曰不二入法门。晓了一品。无合无散无违无顺。晓了深念本性清净。极为显曜而当讲说。无冥无明。无浊无清。无有品第。则为法界无所破坏。而于本际不为动摇。入于无本。处于三世而无所处。无我无人无寿无命。无音无声等诸文字。义无所获。无有财业。无所毕置。得诸所尽。一切所行无有众念。离一切想。皆悉断于放逸之事。灭除一切诸所惟行。而无所著舍诸所著。巍巍乃至如来所叹。无为之事。刈去众想是为平等。无有形貌一如应思惟。假使行者从三昧起。则以此法而为众生及他人说。便于其所推求斯本。如应思惟而疗治之。无所动摇。是为名曰立于大哀贤圣正见。佛说贤圣正见之时。一万菩萨寻即逮得贤圣正见。于是舍利弗。谓无言菩萨。仁族姓子。从何闻法乃能兴此贤圣正见。无言答曰。唯舍利弗。吾所从闻法无所造。不从过去心得至于道。亦不当来。亦不现在。平等三世等一切法。有所有趣者而无所归。亦无有法亦无所等。吾从于彼而听闻法。不有为不无为。无识无住无心意识。于一切法莫有所奉。制止一切众生之心。可悦诸人。义无所获亦不动摇。于无力毒而无著。吾正从彼而听闻法。见生于世者不生不起。一切法若不所兴。分别无本而无所说。吾正从彼而听闻法。其住法界等御人界。法界人界及虚空界不以差别。平等诸界而无所生。不造若干。吾正从彼而听闻法。不处道场。不坐树下。亦不经行。亦不得佛。不倚于道。不舍于俗。不令诸着人民之等作是念心。如来得道亦不得道。得于相好若不得相。作证不作证。悉从本净自然之性。惟舍利弗。法者无持。而不可捉则无有身。以无有身无所成就。以无所成就则无所生。以无所生则无所起。以无所起则无终没。以无终没则无所著。以无所著则不动摇。以不动摇则无所作。以无所作则游驶水。已游驶水则无所得。已无所得身度彼岸。已度彼岸无下。不下则无有器。已无有器则无所应。已无所应则离爱欲。已离爱欲则无有想。已无有想则断众乱。已断众乱本性清净。以至清净则无有垢。已无有垢则无尘劳。已无尘劳则无同像。以无同像则住平等。以住本平等则立无动。以立无动则无所求。以无所求则如

真谛。已如真谛则如审实。以如审实则无所有。以无所有则于诸缘而无有缘。以于诸缘无有缘者则度境界。以度诸界所起无起则无所举。以无所举则无所下。以无所下则无有门。以无有门便离言教。以离言教则度识句。以度识句则不复还。以不复还则无有处。以无有处则无非处。以无非处。则无种稷。以无种稷则无根芽。以无根芽则无为。超度诸识之迹。寂之然。以至寂然究竟澹泊。已至澹泊则至无惟然。以无惟然究竟无恨。已至无恨则至了意。以至了意不复更兴。以不复兴。则归平等无为之道。是为法。唯舍利弗。法如是比说经如兹。其正见者为何像类。其正见者。等于己身。以等己身则离合会。以离合会。于诸平等不见平等。睹诸所见若无所想。是舍利弗。宣畅法律贤圣正见。

无言菩萨。谓舍利弗。如等无明恩爱之着。亦等慧明解脱之事。等于灭度无作不作。是为等致贤圣正见。若有所睹不取异见。是为贤圣之正见也。复次念舍利弗。若能等于淫怒愚痴。亦等于空。无相无愿解脱之相则为一相。谓归无相已能归此平等事者。是为贤圣之正见也。复次处正见者。于诸平等不造二事。已无二事不住相应。已无相应不有所住逮得诸法。一切平等而无差特。是为贤圣之正见也。复次等无二者则等众生。则等诸佛。则等诸法。已等诸法则等国土。已等国土则等虚空。其于此等若不转移。能于此等平等住者。修无所处。是为贤圣之正见也。是故舍利弗。如法像类。听者亦然。正见若兹。又舍利弗。耆年为兴正见乎。从何闻法。所见何类。舍利弗答曰。如我于今族姓子。闻所说法。察其义归。有所讲说皆堕短乏。无言答曰。如是如是。舍利弗。敢有言辞皆顾短乏。舍利弗又问。族姓子。如来至真无量福会有所宣畅。其所说者岂堕短乏。无言答曰。如是说者而无所说。不堕短乏。所以者何。如来至真不兴名德。不当慕于如来上福。所以者何。其如来者无德无称。若如来义无本。如来亦复如是。在于无本而不动转。若有不欲如来上德。彼所慕者则无平等。亦无偏邪于欲无欲。有所慕者则堕短乏。舍利弗问。唯族姓子。何谓于法而无短乏。无言答曰。无大五阴六入。不以顶受。无所招致。悉无所行。不有言辞。无悔不悔。而于道法。令心意识无所起生。是法无短。假使有起心意识者。则堕短乏。若于诸法有作无作。则堕短乏。设于诸法无作不作。乃无短乏。复次若于诸法有所分别有所蠲除。而有所行有所造证。则堕短乏。若无晓了无除所去。亦无所行不有造证。乃无短乏。假有所见无所闻说。教化获致识知所趣。则堕短乏。于一切界而无所行。乃无短乏。其有睹见功德瑕秽。则堕短乏。设使所行无有瑕秽。无有德称。亦无所见。乃无短乏。时佛嗟叹无言菩萨。善哉善哉。族姓子。若欲讲法当作是说。是时万二千菩萨。逮得无所从生法忍。

无言菩萨。复白佛言。我识如来为诸菩萨讲说四力。一曰信力。二曰精进力。三曰意力。四曰智力。唯如来至真正等正觉。广分别说此四品力。何谓菩萨笃信精进意智慧力。佛告无言菩萨。谛听善念。善哉世尊。愿乐欲闻。无言菩萨受教而听。佛言族姓子。假使菩萨信诸佛法。爱乐顺从不怀狐疑。亦无犹豫。是为信力。诸佛精进本求道时。志慕此典不以懈废。不怀怯弱亦不退转。是为精进力。若摄其志合集德本无所忘失。其意不乱不舍道心。所可兴废真正之心劝助于道。是为意力。所修智明于一切法。不须他慧而得自在。慧无所碍。是为智慧力。佛复告无言菩萨。信于贤圣。独步三界无所疑难。是为信力。所施精勤恭敬奉顺。是为精进力。心之所念常思贤圣之所班宣。未曾忘舍。是为意力。若从至圣。所闻智慧经典之本则能奉行。是为智力。复次假使笃信罪福之报而不疑乱。是为信力。若能勤行不当作而不为之。是为精进力。念所兴业终无腐朽。是为意力。若能晓了无有罪福报应。有能分别一切诸法。是为智力。

佛复告无言菩萨。假使其心清澈无秽。能摄其意顺道教者。是为信力。意所启受而将养之。是精进力。若令其心常顺志一。是为意力。心观诸法一切如幻。是为智力。复次信一切法皆悉为空。是为信力。所修精进解诸见缚。是为精进力。于内外空不怀恐怖。是为意力。观究竟空本末悉空。为智慧力。无相无愿于一切法无所造行。是为信力。以此道法而为他人分别说者。是精进力。设使于此念于诸法所行安详。是为意力。昔所讲说方当宣畅令班宣者。一切推求永不可得。是为慧力。一切所有心自当思。欲以放舍信布施处。是为信力。有所放舍不怀懈倦。未曾怯劣大道。未曾违。舍施与发布施。又劝助道意。是为意力。不得施者亦无受者。不蒙想报。是智慧力。奉顺禁戒成就真正信戒果实。是为信力。以所精进灭除诸毁戒之心。是为精进力。若以道心念之不忘。所尊禁戒。皆以劝助于一切智。是为意力。观身如影言如呼响心如幻化。察于禁戒而无所行。是为智力。成就忍辱信于威势。是为信力。所行精进不听众想。不演粗辞欲加于人从邪径。假使令支解割截身肉。集忍辱力。未曾怀嗔。慈心忍辱。是为精进力。所行忍辱则以劝助于一切智。是为意力。无身意识不得身心。是智慧力。道为精进不为懈怠。信于此者而心欢乐兴盛笃信。是为信力。常行精进不舍须臾。亦无所著用化众生。将护正典植众德本。奉事于佛供养随顺。皆为一切众生之故。修治佛土庄严清净名德之称。是精进力。蠲除一切众生嗔恚懈怠垢秽。以被德铠所修精进。则以劝助于一切智。是为意力。若不殷勤望想于道。不失威仪礼节之正。选择精进。不得一切诸法处所。是智慧力。乐于闲居宴静独处。不慕众会发兴悦力。是为信力。所行精进修于禅定。兴发脱门三昧正受。是精进力。因由所从致禅思者而不动摇。是为意力。于彼一心观于无常苦空非身。而不乱禅。不轻慢禅。不退转禅。晓了善权方谋宜

适。是为善权方便诱进牵致至于智力。闻于一切诸度无极道品之法。若能信此是为信力。一切所闻执持不忘。能为他人嗟叹方便。设于彼法。若能奉遵若不奉遵。自察本末。是精进力。处于众生其心不乱。游于爱欲譬如莲华。教化一切。是为意力。察三界空犹如泡沫芭蕉野马影响幻化。开示未闻。是为智力。以清澄心慈向众生仁靡不周。是为信力。信于大哀。心所兴造不以懈怠。是精进力。心好正典不舍法乐常执奉行。是为意力。心无所著而不怀害。不造有二。无进不进。逮得静观修行正法。是智慧力。思惟人身。以无央数众恶瑕秽荒乱众力。不得久存。供养于此[怡-台+龍]悞蛇虺。因由邪行。晓了如此。是为信力。若速众没苦痛之患众恼并至。此则为是死生之义。观察佛法。是精进力。假使心变在于不善终不听从。心亦不随声闻缘觉。又心不随尘欲贪嫉。心亦不从毁戒恶智。是为意力。若入法慧分别慧句。入于宣畅体解之慧过去当来今现在慧。是为智力。欢乐为信相。不退精进相。观为意相。晓了为智相。行于信力。不舍进力。不失意力。修智慧力。为人说法应病与药。晓了挂碍则为笃信。度诸挂碍而为精进。无所复着。是名曰意。而审晓碍则为智慧。好喜佛法兴于笃信。以兴笃信即发道意。是为信力。奉修众行合集积累道品之法。是精进力。柔顺法忍则为意力。设使逮得无所从生法忍。是则智力。信根为忍。则为意力。设使逮得无所从生法忍。是则智力。信根为信力。进根为精进力。意根为意力。禅思伏根。大圣达根。靡不周至。是智慧力。佛说是时。八千菩萨逮得无所从生法忍。四万二千人皆发无上正真道意。

无言童子经卷下

尔时会中有一菩萨。名莲华净。问无言菩萨。如族姓子属者兴意。白问如来。宁见答解及微妙行。如受法染可悦心乎。无言答曰。唯族姓子。吾始以来未曾问法。亦无所受。当以何缘而致法染可染心耶。曰族姓子。仁为不曾因于如来听受法乎。答曰不也。又问何故。答曰。非其器故。又问。仁于讲法为非器乎。答曰如是。又问。仁何所器。答曰。吾于诸法之类而为非器。无复奇异。又问族姓子。若为非器。何因当逮无上正真之道成最正觉。答曰道者。非为法器。又问。察其道者非佛法器乎。答曰。假使其道离佛法者佛法非器。又其道者不离佛法。又计佛法则为是道。又其道者则为佛法故。族姓子。吾不欲令诸佛道法离于尘劳。常不志道。况乐佛法离于道乎。所以者何。有佛法者不离尘劳。又其尘劳不离于道。觉了欲尘则名曰道。吾以是故不计我所不别佛道。其异意者各各计别。不当异处而求道也。假使有人于异处求。此等诸异。设复有人。无有异求不以为别。又问。以何为异。答曰。谓吾我别与道不同。是名曰异。谓四大异我人寿命。而心意异。淫怒痴异。是谓为异。若能晓了。吾我自然本末清

净。道者自然本末清静。乃谓无异我人寿命。淫怒愚痴自然清静。道亦自然究竟清静。乃谓无异。假使异者。不可求异。则当于此四大之身于吾我中求一切法。如是求者。求无所得。设无所得中造所著。无所著者则无处所。一切诸法悉无所住。无有本际。设无本际则真本际。以真本际无断绝际。不计当际。无有限际。无量际。一切诸法本际如是。若入此际则不有念亦不无念。不在生死亦不灭度。究竟灭度了一切法。若以此法而灭度者则逮寂然。诸不灭度令得灭度。如世尊曰。不能调己不寂灭脱。而不随教不得灭度。欲开化人令得灭度。未之有也。其自寂然解脱随律。得度无为能度未度。此事如言是菩萨行。设使欲得至灭度法。辄当遵修菩萨之行。则能晓了一切诸行。达法界相。如是行者便能皆见众德之本。目不复睹诸魔官属轮迹之行。当遵修此合集佛法不失三昧。如是行者开化众生。宣畅一切诸界度于无我。如是行者受一切法。皆使尘劳自然悉除。如是行者虽行于世不着方俗。如是行者执持五阴不住于识。如是行者受诸四大立于法界而不动摇。如是行者摄于诸入致解脱门。如是行者所现诸界而度无极。独步大猷入于三界。示现尘劳而无垢秽。如是行者施度无极。不想无极亦无所住。戒忍精进一心智慧。慧度无极不想智慧亦无所住。如是行者不舍众行。所修审谛究竟清静。如是行者修菩萨行。所可遵习道无若干。行菩萨者则无有二。无有二者乃菩萨行。行菩萨道无有吾我及与我所。不计有身亦无所受乃菩萨行。其修道者无有结滞。除诸福废乃为菩萨。其修道者不患危害。觉了分别无会无为乃为菩萨。又问何谓正号为菩萨乎。答曰。为不晓了道义者故。因曰菩萨。顺从道教兴发寂然不毁佛教。奉持法言将护圣众。而于道心则不动转。心不住于声闻缘觉。不乱净性而不宣说无称之辞。究竟要誓。度诸未度。安诸不安。诸不灭度令得灭度。受持尘劳不堕无欲。观于无生所生。而审观于空无将济群生。观于无相不想着道。行于无愿随俗而生。求于佛身不为众欲之所沾染。观于有为觉了所会。亦无所失而不愚颠。得世间慧。执智兵仗降五阴贼六衰之难。开化憍慢。施自庄严。严净佛土。戒庄严心所愿具足。被忍辱铠教授嗔恚。精进坚强能成就已犹如金刚。处于愤乱志执禅定而无所著。智慧明了。而不恶厌所生之秽。行权方便。所在一切推极道源。修于慈心安详柔和。发起众生行于大悲。见于众生未得度者。抚育使安遵修行喜。常为无依令护诸根。行于护观不永寂灭修于观也。遵承深奥难及之事。声闻缘觉所不能逮。念本义藏不思世典。多所将顺一切群生。庄严其身以相饰姿。庄严其口言行相应。庄严其心不舍道意。神通娱乐普能示现。一切所住持心如地。一切众生之所戴仰。洗一切垢。譬如火烧焦一切。艰难衰入譬若如火。心犹若风无有恼热游步无碍。心如虚空未曾愁想。着一切诸法逮得总持。一切所闻识念不忘。辩才具足可悦众生欢然解释。而为诸佛之所建立。能自修心则令清静。顺于法界晓了四食。不想诸应。威仪礼节清修己身。威仪礼节径路清静。为修正业。行步进止具足成

就而修空行。乐于闲居开化众生。而不秽厌于诸聚会。乐于禅思不患其意。未曾贫匮。备悉一切诸贤圣财。修于祠祀伏弊恶心。游旷野者修于坚强。其心刚毅不可毁坏。遵行仁慈究竟灭度。身顺反复而不虚尽。往宿德本志常随顺。报前所由念行思好。为众生故所学精勤。选择举要劝化无智。所修善业无烦恼热。悉能分别行于大哀。一切普游导于三乘不怀狐疑。于一切法众所瞻察。所问能答靡不戴仰。辩才无碍莫不受言。本愿所立明说和雅。所至到处靡不欢悦。所语随时未曾失节。功勋布施人所钦仰如月盛满。志性柔和辞无粗犷。得对能忍诸根不悴。善修其意等度往来犹如桥梁。度脱众生于四使水譬如大舫。亦如导师将导一切诸行来者。常主救济一切异学。为众群黎兴立佛事。故曰菩萨。而不退转如是众行及余德勋。不可思议具足导慧。乃谓菩萨。

于是莲华净菩萨白佛言。唯然世尊。今我观察无言菩萨智慧辩才宣畅道教如是。不久当成无上正真之道为最正觉。当转弘广无上法轮。若复有人。得闻无言菩萨所说。信乐爱敬顺而不诟不久亦当具足致此功德之法。佛言。如是如汝所言。诚无有异。无言菩萨逮得慧明三昧。发意之顷以一句法于百千劫分别说之。义不可尽。莲华净菩萨复白佛言。善哉世尊。愍伤我等及此众会。宿之本德众人云集。为经典故当令庄严。惟愿如来至真等正觉。敷演说此慧明三昧。若有菩萨得闻此教。悉当逮得慧明三昧。设有受者多所将济一切群生。疾成无上正真之道为最正觉。

佛告莲华净菩萨。谛听善思。当为善说慧明三昧。善哉世尊。愿乐欲闻。莲华净菩萨受教而听。佛言。族姓子。所云慧明圣曜之谓。所以名曰慧明。圣曜者何。蠲除众覆蔽结垢闇通过诸碍。离于秽浊荏苒之谓。故曰慧明三昧。解法无二。所观明彻无有犹豫。慧无有侣。不戴仰人。灭众瑕疵。卒发寻对。分别灭度。晓了一慧。解畅过去当来现在三世之慧。严净三场。明识三界。体三脱门。通三达智。广布三宝。畅示三乘。净于三眼。毁三垢本。明三峻聚。决定未定处耶。此谓三峻聚也。识畅入于心意识中。分别阴种诸入之事。觉了因缘和合报应。断不调定沉疑邪见。解知法界能说本无。审如本际最上第一方便至圣。明识一切文字音响。其所入处。若崇讲说言无所毁。辩才无碍莫能制止。若敷演法无能抑者。知识一切诸根各异。决断柔劣中容之源。有明无明入于三教。执持所应入于总持。班宣光辉归趣日行三昧。无量颂三昧。分别宣畅金刚道场三昧。如金刚三昧。觉无嗔三昧。意勇三昧。降除魔场三昧。日光明三昧。曜魔不照无境界三昧。慧无齐限入无想念幢英至三昧。淳淑亲近一切诸法照明华三昧。放无量光入音三昧。了别一切音声所趣德事三昧。普能示现一切功勋善住三昧。知一切法所立之处光曜三昧。等入一切众生之心尽尊王三昧。

分别诸法一切悉尽无住三昧。了众平等无患三昧。一切诸法究竟永无无动三昧。不着诸法钩锁三昧。开化诸见超表三昧。于一切慧无所蔽碍。佛言。族姓子。如是等类六万三昧。吾于往昔见定光佛而见授决。寻时逮得此诸三昧。又计于此六万三昧门。皆来入于慧明三昧。慧明三昧则为元首。入于此中乃致大明。

佛告族姓子。如日宫殿照于水中。显现未曾兴立四事。何谓为四。灭除一切闇冥蔽碍。放其光明所照广远。示现一切诸色形像。所当作者。皆由是日兴业安。慧明三昧亦复如是。若有菩萨住此定者。现昔未有。亦兴四事。何谓为四。灭除一切尘劳垢冥。照曜无量广远智慧。察见一切众生心行相貌诸色。随其所学三乘之行。名为指示建立道业。

佛告族姓子。譬如八角大如意珠。妙光晖善清净玄妙。无诸瑕垢无有秽恶。建于幢首曜四十由旬。众人所志敢有所求皆令得愿。各各得所不失其饶。大如意珠无所爱吝。若有菩萨。得立于此慧明三昧。圣智超绝巍巍如是。清净鲜明若如意珠除诸尘劳结秽众垢。住八清净微妙禁戒三昧之定。智慧解脱度知见品。诚谛鲜洁。善权方便。总持辩才。分别忍辱。靡所不畅。彼以清净。莫能当明。离于瑕疵。无极大哀以为大幢。照曜一切无量佛土。各随众生心本所愿悉得解释。菩萨如是。救济五趣三处之碍。皆至大道。亦无想念。

佛告族姓子。譬如虚空。虚空无际悉能容受一切佛土。执持众水。一切诸火劫烧之时。一切众生无进退处。听其所归为作处所。虚空之域广远玄旷。不可限量无所挂碍。慧明三昧。亦复如是。若有菩萨住此定者。为诸众生一切诸法示导处所。无所归者为受其归。植众德本因缘之报。开解己心。为无央数一切众生。导示径路教化与眼。强于因缘。未得解脱永处邪见群萌之类。听示处所。假使有人。不兴德本。不反道器。不在无本。各各开化为示弘器。显发无上正真道意。而示声闻缘觉处所。闻吾说法寻受奉行。则获果报。声闻缘觉之所慕乘。当为宣畅曾所忘失六典之要。令入法门。缘是之故。诸菩萨众欲求道者。当为颁宣六度无极四等之恩。善权方便劝助指道。各各为畅令心欢然。使不退转逮成无上正真之道。是为一切众生之类开示处所。于彼何谓为一切法示现处所。假使菩萨口自敷演八万四千经典法藏。若有众人心怀狐疑犹豫不决来启问者。菩萨皆常秉志一心。一一为人决其结滞。一句之义亿百千垓。难限劫数普演分别。其慧无量玄旷广远。无所挂碍而不可尽。无有边际。是为一切示法处所。佛告族姓子。譬如大炬光明照远。诸有覆蔽瞠匿形色悉为现矣。炬之光曜所益如此。慧明定意亦复如是。若有菩萨住此定者。则能以一慧明之心显示章句。十方无量不可计会诸佛国土。诸佛菩萨一切众生。莫不

睹见。亦不违远志不动移。慧明之心所察无边。

佛告族姓子。慧明之宅处于意止见诸法源于四意断未发意者。为兴慧源。于诸神足身意寂源。而于诸根处圣达源。所谓力者。云智慧力。于觉意法入于慧源。所谓道者。处正见源。寂然观者观察愴怕。行真诚者善灭之源。其圣谛者善寂慧源。所归念者如义趣源。分别道者法义之源。神通达者漏尽之源。修梵行者兴于大哀四等心源。一切普念思法之源。诸度无极。智度无极以为源首。善权方便应众生心源。十种力者知限无限有处无处。以此为源。无所畏者。晓了平等佛道之源。不共法者。而于三世无所碍源。所言眼者。谓佛之眼庄严其身。眉间顶相无能睹源。庄严口者。颁宣经法无侵损源。庄严其心。行三昧定而不移源。是族姓子。一切诸法皆以归趣智慧之源。是则名曰慧明三昧一切诸法之源首。说是语时。莲华净菩萨逮得是慧明三昧。复有万菩萨亦逮斯三昧。三千大千世界六反震动。其大光明普照十方。尔时诸来一切众会。诸天人民各各赞华供养散佛。于时会中诸菩萨众志大乘者。悉白佛言。我等本来未曾得闻此三昧名。何况广解分别义者。今所可供世尊之福。愿令我等逮是三昧渐渐进行。缘是所誓逮此定意。必获无疑。吾等善利为致善庆。乃能遭遇闻是三昧。若有逮闻于是三昧而欢喜信。功祚难限。未曾违失菩萨之心。亦当不久致此三昧。佛言。如是如仁所言。而无有异。无德之人不种善本。不能值遇此三昧矣。何况得闻。欢喜信者未之有也。假使在于善知识边。若随明师。乃能信乐此定意耳。

佛说是语向欲竟时。世尊脐中一菩萨出。紫磨金色三十二相庄严其身。八十种好而饰其姿。适出于脐。其菩萨身。寻即演放巍巍光明无极弘曜。皆悉覆蔽一切众明。唯世尊光独得显现。时彼菩萨。稽首佛足右绕七匝。则在前住。启白佛言。唯然世尊。执慧曜如来至真等正觉。敬问无量。进止康强游步轻利力势安乎。使我宣传问于大圣。斯六十亿垓数菩萨。来诣此会听说经典。奉觐世尊稽首咨受。又复欲见十方世界大会菩萨。无言菩萨。智慧辩才所可宣畅。启受未闻听是慧明三昧之定。唯天中天。为诸菩萨如应说法。使逮得是慧明三昧。获致无极大法光曜。而数周旋诣此佛土。

于是舍利弗前问佛言。唯然世尊。执慧曜如来至真等正觉。为在何方。今宁现世讲说法乎。去是远近。国土何类。并说于此正土名号。及六十亿垓数菩萨。为何所处。佛告舍利弗。东方去此恒河沙等诸佛国土。有世界名住于坚固金刚之根。执慧曜如来。在于彼土今者现在。佛告舍利弗。彼之世界。何故名曰住于坚固金刚之根。其国下地从底至上。坚固甚牢不可破坏。悉是金刚。斯皆其佛本愿所致。所以者何。其佛坚固金刚之行独步无难。及诸菩萨造金刚行。勇猛牢固

无能坏者。己身威力巍巍具足乃如是也。假使世界泥土成者。则当破坏碎落微散。若其有人生彼世界。身如金刚皆亦坚固不可破坏。是故彼土。名曰住于坚固金刚之根。又舍利弗。卿属所问。今此菩萨名曰何等。号金刚脐。此金刚脐菩萨。一发意顷通过铁围大铁围山。越江沙等诸佛国土。各各在于江河沙等诸佛脐出。悉是诸佛威神功德之所建立。亦复是己六通之慧神足之力。是故菩萨号金刚脐。又舍利弗。向者复问六十亿垓诸菩萨众为处何所。卿当以此问于正士。为汝发遣。贤者舍利弗问金刚脐菩萨。唯族姓子。六十亿垓诸菩萨众为住何所。金刚脐答曰。佛叹耆年智慧最尊。贤者舍利弗。以智慧眼推索本末。此诸菩萨为在何所。时舍利弗。以圣慧眼周遍普求。诸菩萨等不知所在。金刚脐菩萨答曰。尊者舍利弗。自有等类同学志脱。令求所在。即舍利弗。谓阿那律。佛叹耆年天眼最尊。求其所在。时阿那律。则以天眼清净之目超越天人。于是三千大千世界遍察求之。如观掌中果及宝珠。索诸菩萨永不能知。亦复不见之所住处。贤者阿那律报舍利弗。吾普推索。永不能知此诸菩萨为何所处。金刚脐菩萨谓舍利弗。诸贤者等。但有肉眼。不可复言谓有天眼。云何思惟共三昧禅。遍观诸国而不睹见诸国。而不睹诸菩萨众为何所住。舍利弗问。仁族姓子。天眼何类。谓我等辈所未见焉。金刚脐曰。唯舍利弗我之天眼未曾见色。舍利弗等及众弟子诸大声闻。从本以来不能见我。天眼之德为何等类。亦无能当巍巍之明。舍利弗又问族姓子。说所见形像为何等类。而言我等本来未睹。金刚脐曰。耆年曾见住于坚固金刚世界及执慧曜如来至真。舍利弗答曰。今日造闻彼世界名。何因得见。金刚脐曰。唯舍利弗。如是等类。不可称计诸佛国土及众菩萨人民众生。各各异趣所生不同。菩萨大士则以天眼。皆悉见之无有遗脱而不遍者。一切缘觉虽有天眼所不能睹。何况声闻而能及见乎。说是语时。有六万人。曾求声闻缘一觉乘。欢然大悦。寻发无上正真道意。同时发声如嗟叹言。令吾等身得佛法眼。不用声闻及缘一觉之天眼也。荫蔽挂碍。佛之法眼无有限齐。亦无所碍。于是金刚脐菩萨。即如其像。三昧正受建立感应。而现神足佛之圣旨。金刚脐菩萨。威德之变。宿福善本巍巍之力不可称限。普令一切诸来会者。皆共目见六十亿垓诸菩萨众。在于佛身。各处莲华结跏趺坐。叉手听经。不近佛身。亦复不远。皆是如来弘恩无极之感应也。又世尊身不增不减无所挂碍。悉现如故若前不损。一切众会惊喜踊跃。得未曾有。一心叉手礼佛而立。各各叹言。难及难及。诸佛世尊。身形广长威圣无量。神变功德不可称限。乃能容受六十亿垓。在于佛身而坐听经。见本圣之体不增不减。时金刚脐菩萨。普察众会而举声告。以是之故当共知之。如来至真等正觉身。则为法身广长无极。无有相好而不方圆。身无边际不可度量。如来至真发意之顷。欲令三千大千世界诸有众水大海江河川流泉源国土州域丛林草木诸山土地。悉入佛身不增不减。悉现如故。又诸贤者。诸无央数数百千垓诸佛国土众菩萨等若千万数。

遥睹世尊微妙光明相好清净无有尘垢。咸皆发来欲见圣尊咨受经典。悉为天下。劝诸天人民释梵四天王。使蒙拥护。令得自归故往听经。设不来者。不见道变不能发心。佛欲开化度众生故。是以如来。取诸菩萨着于身内。而听受法不见挂碍。无所疑难。或有菩萨住于地里。入宝交露。而自省见坐于莲华。皆佛威神之所感动。道德高远巍巍难量。时诸菩萨承佛圣旨及金刚脐至愿威力。六十亿垓一切同时皆从大圣毛孔中出。稽首佛足右绕七匝。各以威德神足之力。化微妙床身处其上。

于是金刚脐菩萨前白佛言。唯然世尊。无言菩萨何故字无言。佛言。汝自以是问于正士。当为汝说。时金刚脐问无言曰。仁族姓子。何故自号为无言耶。无言默然。如是问三。亦不答报。时金刚脐复重问曰。何故三问而不相答。无言答曰。我求此辞永不得处。以是之故不相答耳。又于族姓子。理不宜问于无言者。用何以故而字无言。计其无言则无辞说。亦无音声。金刚齐又问。设无有言。今何以故口有所说。无言答曰。吾悉法效诸佛所说。亦复效于众生所语。又问。云何法于诸佛所说。答曰。如一切佛所讲经法。吾以意力承其威神。亦复如之。以是之故。吾今悉法诸佛所说。假其音声而等文字无所毁坏。演说经法。是为法于诸佛所说。又问。云何复效众生之言。答曰。随一切人众生之类音响言语。而为说法。是为效于一切众生人民所言。又问。卿族姓子。失言以来为几何乎。答曰。从失心念以来。又问。族姓子。此言何谓。答曰。以是之故不亲心念。亦非不乐。心无所念口则无言。又问。族姓子。言从何出。为从心出从身出乎。答曰。不从身出。亦不从心出。所以者何。身非常存不得自在。其心如幻。以是之故。不从身出亦不从心。又问。为从何出。答曰。设欲问之。所讲言辞为从何出。为从空出。空无色亦不可见。今仁问吾。为何由乎。曰实因于空无见无像。答曰。是故族姓子。言如虚空而不可见。所问亦如其所言辞。亦如虚空而不可见。虚空如是永不可睹。亦无有相。以是之故。求一切法及所言辞。都不可得。如求言辞不可得者。一切诸法寂寞澹泊。论语音辞亦复如是。一切诸法亦如人言。忽不知处。言如虚空无能见处。一切诸法亦如虚空。亦无处所。所言辞者因缘合成。一切诸法亦从缘起。推求诸法根源所在。缘从何起而不可得。其不可得则无所起。便无所生。又无所起则无所兴。其无所兴者则无所发。其无所发彼无眼迹亦无色迹。亦无识迹。亦无耳鼻口身意之迹。亦无法迹。无意识迹。其无迹者无去无来。无去来者名曰独步。其独步者则无所去。于一切行而无所见。当作是观。宁当睹见本所不见乎。又问。本何不见。答曰。不生不起。又问。云何不生不起。答曰。所不可察无有来者。又问。何谓所不可察无有来者。答曰。虚空不可见。无有来者。虚空平等。一切诸法亦等如空。以是之故。诸法平等亦如虚空。故曰不遍一切诸法等如虚空。又问。何谓诸

法等如虚空。答曰。无有侣故。以用诸佛平等之故。一切诸法究竟平等。过去本等。来本亦等。中本亦等。无有分别。计此诸等。以一切诸法本际。如是如真。本际无本。本际如真。本际如审。本际无本。本际等无有异。是则名曰无有二际亦无若干。何谓言二。用计吾我则名曰二。若不贪身不计吾我。则无有二。何谓有二。有眼有色则名曰二。耳声鼻香舌味身更意法。是名曰二。取要言之。若有计着一切诸法。故名曰二。从使有二亦不可得。所以者何。观无所此得则无二。亦无言辞。其法心意及所有识。假使不修于此三事。是名无二。此之无二不当讲说。所以者何。有所说者不离于二。无所言者乃无有二。又问。所云无二谁为造二。答曰其无二者不可造二。所以者何。正使兴发若干方便。欲变无二使有二者。终不可辩。又问。所说法律为是二乎为无二耶。答曰。其法律者无有二也。坚固难移。所以者何。无言乱相亦无所御。以无言说而开导之。无能破坏。不可毁缺用不可坏。是故名曰坚固导御。则无有二。于是金刚齐菩萨前白佛言。唯然世尊。无言菩萨所可宣畅。皆是慧明三昧勇猛之恩德也。佛言。汝所言皆慧明三昧之威恩也。尔时执慧曜国土诸菩萨来者。问于无言。仁族姓子。为学何法。辩才之慧巍巍无量乃如是乎。无言答曰。如佛所说。一切诸法皆从诫立。又复问曰。唯族姓子。宁可垂意顾愍我等。分别敷演建立诫者。答曰。贤者其不住身。不住口心。是为立诫。不住内外亦无中间。是为立诫。若无思想无所惟念。及与教令言辞之事。是曰立诫。无应不应。无念不念。亦无异念。是曰立诫。不住于善亦无不善。不处于世亦不度世。无在不在。无害不害。无漏不漏。无为不为。无生死无灭度。此曰立诫。假使建立如是比像。住于诫者。于一切法则无所住。不住诸法。不作是念。吾有所说宣畅分别。是故贤者。是名曰诫。有所说者则住于二。其真本际。及其住处并至无本。又法界处。吾以住彼而有所论。有所论者永不可得。斯所语者亦无所念。其所宣畅亦无所想。又问。族姓子。其不可得无所念者及无所想。有何言说。答曰自然之数而不可获。亦无所念无有思想。自然说之。又问。其所辞者谁为说之。答曰。贤者吾所辞者。即时灭尽亦无所生。所以者何。向者诸所讲法皆归于尽。一切诸法悉无所生。所生法不可知处。现在有形悉无有形。不可得处。所以者何。斯闲尽而无诸相。其本际者无有言教。故世尊曰。不可想像取过去心。当来现在亦复如之。即起即灭碎散消尽。卒暴易转。不可捉持形像何类。彼欲取想着念虚伪。倚受思想悉如化幻。是故推极一切所言。悉虚无实其义无获。亦不可以有所讲说。不可口宣若心念矣。所以者何。无所造作亦无所行。其有解识兴趣此义。则不复用口之言辞。亦不以心有所念也。有所宣畅分别说者。犹如呼响音声之报。如化如来有所颁宣。其所讲亦复如兹。是为诸佛及众菩萨一切世人所可保义。不可思议。善权方便无能制止。辩才之辞所建立法。不可动移。时诸菩萨赞无言曰。善哉善哉族姓子。快说斯言。是入法门我等亦闻。所归于

门实无有门。等如虚空。其佛世尊及诸菩萨。现说如是。吾等所受亦复如此。

于是金刚齐菩萨问无言曰。来族姓子。俱共往至住于坚固金刚根世界。见执慧曜如来至真等正觉。观彼国土。无言答曰。又族姓子。斯闻则是住于坚固金刚根世界。执慧曜世尊亦复在此。吾身何为舍此就彼。金刚齐问曰。今此世界泥土所成。非为金刚。无言答曰。汝族姓子。发意之顷。越恒沙等诸佛国土。通过铁围无所蔽碍。为能堪任取是佛土举一土尘。不尔乃当知而此世界泥土所成。无言菩萨。寻声则以金刚道场三昧正受。应时于此三千大千世界自然化成。甚大坚固不可伤毁。悉为金刚。于是金刚齐。作大威力兴显神变。被大坚固诫德之铠。欲举此地一土之尘而不能胜。心自念言。怪未曾有。为是大圣之所建立巍巍之变。斯是无言之所感兴。前白佛言。唯然世尊。我者前时发心之顷。通过铁围大铁围山。越恒沙等诸佛国土。今者欲举于此土地一土之尘而不能胜。唯天中天。此谁威神之所兴立。是天中天。慈恩圣旨。为是无言之所变动乎。佛言。无言菩萨之所建立也。所以者何。无言菩萨。金刚道场三昧正受。使此三千大千世界甚大坚固。不可毁缺悉成金刚。若有菩萨住是三昧。自恣其意。欲变几何诸佛国土悉成金刚。辄如所志。智慧圣心兴显道德。以是三昧而以正受。令诸佛土悉成金刚无能毁触。皆是三昧威神境界。于是金刚齐及其所从六十亿垓菩萨前白佛言。菩萨行何法。乃能逮得金刚道场三昧。佛告族姓子。菩萨有四法。逮得于此金刚道场三昧。何谓为四。一曰持志坚如金刚。常怀道心超越一切诸功德本。二曰性行具足无央数劫修治方便庄严大业。三曰入于深法分别十二缘起之原。四曰圣慧备悉无所缺漏。是为四。复有四而自欢娱。何谓为四。一曰超度慧德具足五通。二曰空无相愿一心脱门。三昧正受心不戏逸而自娱乐。三曰建立于戒而住法界。所处无源成就慧明。四曰究竟至诚如深之义。晓了经义寂灭诸法靡所不达。复有四。何谓为四。一曰遵于大哀修四梵行。二曰奉行般若波罗蜜及六度无极。三曰行善权方便三十有七道品之法。四曰为诸众生修诸脱门及四圣谛。是为四。复有四。何谓为四。一曰身所造业犹如金刚。二曰口之所言清微柔和亦如金刚。三曰执心坚固不可动转亦如金刚。四曰志性秉毅不可毁坏。是为四法。菩萨所行速疾逮是金刚道场三昧。说是语时。是诸菩萨寻即获此金刚道场三昧。于是无言菩萨自白其父师子将军。大人岂见诸佛兴出。德馨之称威圣无量。道慧高远超绝无侣。得未曾有难及难及。如是比像不可譬喻。本所悲忆今悉现矣。为无央数众生之类。导示灭度至于大安。惟愿大人。发于无上正真道意。师子将军报无言曰。子当知之。生七日后天来相令而见告语发大道意。佛天中天。道目所观知我志操。其心夙夜念于佛道。无复异师发心可归。惟当归命无极大圣。师子将军及正夫人。男女内外亲属五百群从。皆发无上正真道意。无言

菩萨自报父母兄弟姊妹及其亲族并大众人。仁者今日以发大意。当精进行庄严道心。即时问言。何谓发意庄严道心。无言答曰。有四十事庄严道心。何谓四十事。至信佛道心不疑毁(一)。喜乐于法而令久存(二)。不慢圣众恭敬谦逊(三)。常当习善友(四)。见诸菩萨视之如佛(五)。未曾怀害向于众生(六)。恭敬奉事尊长众祐(七)。等心爱憎(八)。入法无厌(九)。勤听经典(十)。闻趣尊习(一)。为他人说(二)。无希冀心(三)。法无有师(四)。所念如应(五)。奉行无本(六)。一切所爱而不珍惜(七)。奉顺禁戒未曾缺漏(八)。宣畅分布忍辱之力(九)。所行精进靡不周遍(二十)。令备修习禅定一心而顺念于智慧之品(二)。以权方便开化众生(三)。所可劝助未曾忘舍(四)。随护群黎(五)。自调其心降伏他意(六本阙一法第七)。于欲教授不着尘劳(八)。常弃愤闹乐于寂静(九)。思处闲居以为德称(三十)。修贤圣行而知节限(一)。常行止足不可动移(二)。在于俗法不与同尘(三)。而以顺从六坚之法(四)。又不舍废于四恩行(五)。而常奉遵坚志愿(六)。恒不毁失善德之本(七)。所学业者而不放逸(八)。不乐小乘(九)。道心无动(四十)。笃信微妙志不怯弱。舍一切恶无所犯负。皆悉具足一切功勋。合集名称无量福会。怀佩道法处于道场。而不退转是为丈夫四十事行。显发一切诸通慧矣。珍宝道心。以此功德而自庄严。发意之顷三千大千佛之境界所兴德本悉现目前不复远求。譬如日殿处于虚空靡所不曜。师子将军报其子曰。正士汝当数数往来念亲相见。因告示诫将济拥护。令不退转究竟无上正真之道。无言答曰。大人欲知。复有十法菩萨所行。诸佛大士所见常念。何谓为十。恒行精进欲安众生。不念己身独获大安。身力坚强多所诱进。见羸弱人而以慰喻。所造德本皆以放舍施一切人。未曾怀忧。所可化人劝发道者。被大德铠而自誓愿。此诸众生若得佛道受于正法。当以供养而奉事之。然后我乃取最正觉。用正法故没弃身命。不舍正典。宣畅分别一品之义。于百千劫流布一切。被大德铠不以懈倦不怀怯弱。一切诸法皆悉本净。设闻此言不以恐惧。不限大道。不舍佛法。不以为空。所观睹者适知不虚。等于吾我亦等众生。已等众生则等于法。以等经法则便信乐。虚空平等不堕止观。不复堕落生老病死恼患之径。为诸世间所见动转。无央数众勤苦瑕秽。诸魔波旬所可兴者来说众难故诫诽谤。佛道难得。经法难遇。不如早求声闻而速度矣。菩萨闻此。坚持一心发无极志。不以懈怠。不退不转。不舍大乘。住于真正审谛之法。言行相应未曾虚妄。身行至诚不欺己身。诸天众生及十方佛。是为大人十法之事。菩萨所行则为诸佛及诸正士所见常念。说是语时。师子将军及与眷属。寻时逮得柔顺法忍。

尔时世尊告贤者何难。受是经法持讽诵读。具足广普为他人说。所以者何。过去当来今诸佛大圣道德所兴。皆出是法经典藏门。无言菩萨今来至此。思惟真谛宣畅于斯无量法门。劝化无数一切人民。令

学佛道也。是故阿难。欲奉过去当来现在诸佛世尊启受法藏。当奉此经怀抱在心。广为人说是法藏门发无央数众生人民。使成佛道。如来在世灭度之后。假使有人受此经者。悉是佛旨建立所致。持讽诵读行如上教。佛语阿难则有三事福不可量。何谓为三。一曰将护正法。二曰身知道心。三曰未发意者劝发道心。是为三。功德之福不可限量。假使如来叹其功勋而不可尽。何况声闻。尔时会中有七亿垓诸菩萨众。闻佛所说皆从座起。欲护正法。各各说言。我等辈类。当共奉持世尊正典广远流布。持此经卷为他人说劝发道意。无言菩萨前白佛言。唯然世尊。所可解畅建正觉者。彼法宁可受取持乎。佛言不也。又问。佛言。以何等故。诸族姓子。向者佛说此。诸菩萨悉起住立。欲护正法。佛言。吾以将育诸族姓子故。以是像欲有所护。彼无为事不可得法而为颁宣。因文字教言护于法将顺其意。所言护者。不以言问。不用文字而行道也。是则名曰护于正法。又族姓子则有二事护于正法。何谓为二。一曰不可得者乃逮正法。所当拥护常将顺之。不以所说而拥护也。二曰亦不将济于诸虚妄。闻所说者即能奉行。不以慢恣求于名称。是为二。时诸菩萨欲供养佛无言菩萨及此经典。普雨天华散于佛上及诸菩萨。周遍大会。口宣此言。愿令世尊释迦牟尼久在世間。使此经法自然流布遍阎浮利。佛说如是。无言菩萨师子将军与诸群从金刚齐菩萨及六十亿垓诸菩萨等舍利弗大目犍连阿难诸天世人阿须伦。闻佛所说莫不欢喜。

自在王菩萨经卷上

如是我闻：一时，佛在舍卫城祇陀树林给孤独园，与大比丘众二万人俱，菩萨摩訶萨皆是一生补处。其名曰：弥勒菩萨、得大势菩萨、师子意菩萨、师子相菩萨、大相菩萨，如是上首一万人俱。尔时，世尊大众围绕恭敬，为发大乘意众生演说经典。

尔时，众中有菩萨，名自在王，从座而起，偏袒右肩，右膝著地，合掌白佛言：“世尊，欲有所问，若蒙听许，乃敢发言。”

佛告自在王：“诸有所问佛无不听，随意所问，当为汝说令汝得解。”

自在王菩萨，得蒙听许喜悦无量，白佛言：“世尊，云何菩萨摩訶萨于大乘法中得自在行，而能为人演说此法，以自在力摧伏诸魔增上慢者，及诸外道有所见得诸贪著者，令住大乘，具足大愿，成就戒行，得阿耨多罗三藐三菩提？”

佛告自在王菩萨：“善哉！善哉！汝能问佛是义，当为汝说，一心谛听善思念之！诸菩萨云何能令众生得住大乘，具足大愿，成就戒行，得阿耨多罗三藐三菩提？”自在王菩萨受教而听。

佛告自在王：“菩萨摩訶萨有四自在法，以是法故，能自在行令诸众生得住大乘。何等四？一者、戒自在，二者、神通自在，三者、智自在，四者、慧自在。戒自在者，菩萨摩訶萨行具足戒，不毁不缺，不穿不浊，不有所得，不悔不诤，不有热恼，智所称赞随顺道戒，教众生戒，护法戒，欢悦戒，不依生处戒，住定戒，随慧戒，信解深法戒，不退神通戒，空、无相、无作戒，寂灭戒，摄佛法戒，说佛法戒，不舍一切众生戒，慈护戒，大悲根本戒，信净戒，不转仪式戒，头陀细行戒，随顺福田戒，毕竟净戒，不断佛种戒，护法种戒，示圣众戒，安住菩提心戒，助六波罗蜜戒，修四念处戒，修四正勤、四如意足、五根、五力、七菩提分、八圣道分戒，能生一切助菩提法戒。自在王，若菩萨摩訶萨能持如是戒，戒则具足所愿皆得。若菩萨持如是净戒者，三千大千世界劫尽烧时愿欲灭火，言火当灭火即为灭；欲令三千大千世界皆变为水，欲令三千大千世界普雨众华，欲令三千大千世界皆为珍宝，欲令如恒河沙世界诸须弥山合为一山，欲令如恒河沙世界大海合为一海，即皆如意无不成者。持戒力故所愿皆得，所为神力无不称意。菩萨安立如是戒中得如是自在力，持净戒故深愿毕成，得阿耨多罗三藐三菩提。

“自在王，乃往古世过无量阿僧祇劫，有佛名净明光王如来、应、正遍知、明行足、善逝、世间解、无上士、调御丈夫、天人师、佛世尊。尔时，有菩萨比丘，名金刚齐，得持戒力，行净戒故常在闲

处林中经行，欲具佛法故修习正行，修正行已作如是念：‘不得一切法是则名戒，不贪一切法是则名戒，灭一切结是则名戒，观身如镜中像是则名戒，于诸言辞如呼声响是则名戒，观心相如幻是则名戒，善不善法无二无别是则名戒，为贪欲故观身不净是则名戒，为嗔恚故生于慈心是则名戒，以智慧破痴网是则名戒，不得贪恚本是则名戒，于法无观无想分别是则名戒，无我见、无众生见、无寿者见、无人见、无常见、无灭见是则名戒，于一切法不作不起是则名戒，心无所畏是则名戒，不依三界是则名戒，信无生法是则名戒，信解无生法忍是则名戒，不贪利养是则名戒，于诸法空心不惊畏、坏离诸相、蠲除诸愿是则名戒，心无所念是则名戒，不自高不轻彼是则名戒，不著诸入是则名戒，不起五欲是则名戒，了知诸阴同于法阴是则名戒，了知诸性同于法性是则名戒，乐无诤讼是则名戒，于善法中不舍勤行是则名戒，知一切法必寂灭相而以身证是则名戒。’

“自在王，金刚齐比丘如是安住于戒，修习圣法正念无倒。时有魔子名曰障碍，见金刚齐比丘如是持戒，修习圣法正念无倒，与八万四千诸魔及其眷属，贯钾持兵来到其所，自隐其身观是比丘心在何行，千岁随逐乃至不见一念心散可得恼坏。于是魔子及与眷属现其魔身，执持刀铍在比丘前，欲以相怖。比丘见魔大众兵仗欲以相怖，作是誓言：‘若我戒净习于圣法正行不倒，以是缘故，魔众兵仗皆当变成青黄赤白杂色莲华、须曼那华、婆梨师华、奇妙名华以为瓔珞。’是时，魔子与其眷属形色仪法皆如我身。自在王，金刚齐比丘说是语时，魔众兵仗即皆变成妙色之华，殊妙香洁以为瓔珞。一切诸魔皆自见身，如此比丘剃除须发著染袈裟。魔子见比丘现大神力，怪未曾有发希有心，与其眷属俱礼其足，作如是言：‘汝得何法乃有是力？’比丘言：‘此力不从有所得生，亦不依于身口意及一切法生。是力不以住相故生，以无住处故。’魔言：‘比丘，我于千岁求汝心行不能知处。’比丘言：‘汝若以恒河沙劫求之，亦不能得。何以故？是心不在内、不在外、不在中，汝宁能得幻化人心所行处不？’答言：‘幻化之人尚无有心，况心行处？’比丘言：‘如来说一切法空皆如幻化，此中亦无心无思。’魔言：‘若不得心不得思，云何有来去有言说？’比丘言：‘幻人去来言说，我去来言说亦如是。’魔言：‘汝以是进行住于持戒修习圣法，为何所趣？’比丘言：‘趣无所趣。’魔言：‘云何趣无所趣？’比丘言：‘是中无先去、无今去、无当去，无所趣者，即是无作脱门。汝问以是进行安于戒修习圣法何所趣者，我不趣色生、不趣色灭、不趣色住，不趣受想行识灭、不趣受想行识住，于一切法亦不趣生、亦不趣灭、亦不趣住，是名正趣。魔子，正趣者，名不取色，不取受想行识，无所见法是我所趣。我所趣者，不取色，不取受想行识。我所趣者，是诸圣所趣。’魔言：‘比丘，于是法中云何有趣？’比丘言：‘诸凡夫法及诸佛法，同是一法无二无别。学法阿罗汉法、辟支佛法、佛法，同是一切法无二无别。若过去法、若未来法、若现在

法，同是一法无二无别，无出无生以等相故。不舍如是诸法等相者，欲以是法示众生故而为说法，如是趣者名为正趣。魔子，夫正趣者，不趣欲界，不趣色界，不趣无色界。住等法者，于法实相不动不退，是名正趣。如如趣，一切法趣亦如是。如法性趣，一切法趣亦如是。如实际趣，一切法趣亦如是求。如是趣者，亦不念不著诸趣，是名正趣。’魔子语金刚齐比丘：‘汝以是正行为得何法？’答言：‘我以是正行得离诸法分别，以是无念无分别故具足等相。汝问得何法者，是正行中无有得相，无增上慢。以是正行于法无所得，正行者即是无行义。’魔子问金刚齐比丘：‘汝以此戒当得何法？’答言：‘我以此戒当得阿耨多罗三藐三菩提，乃至小法不可得故。’魔子言：‘云何得菩提？’比丘言：‘色等则是得菩提，受想行识等则是得菩提，一切法等则是得菩提。’魔子言：‘如是菩提于何处求？’比丘言：‘当我见性中求。’魔子言：‘云何而求？’比丘言：‘求时不起菩提见。’魔子言：‘比丘，汝师是谁？谁所教诲辩乃如是？’比丘言：‘不坏我见性而得菩提，是则我师。不在垢、不在净，是则我师。若识不在有为、不在无为，是则我师。若不从他闻于诸法，不住不舍能度诸流，是则我师。若遍知一切法而不至一切法，是则我师。若一切所说音声言辞，于不可说诸法相中而不动转，是则我师。若一切法不生不起不出而能转圣法轮，是则我师。不住此岸、不在彼岸、不在中流，是则我师。若一切法不生故生，是则我师。若一切法不灭故灭，是则我师。我随如是师教故辩如是。’魔子言：‘如来以何而转法轮？’答言：‘如来于色不转不还，色如、色法、色空、色无相、色无作、色灭、色离、色无生、色相、色性亦不转不还；受想行识不转不还，识如、识法、识空、识无相、识无作、识灭、识离、识无生、识相、识性亦不转不还。如来以是一切法不转故转于法轮，如是法轮若转若不转，于无量法性终不出过。若能解此转法轮者，是人则能转于法轮。’尔时，魔子及其眷属，皆为金刚齐比丘作弟子，发是言：‘我从今日归依于师。’比丘言：‘汝莫归依我，当归依净明光王佛！我所说者是佛所教。’魔子言：‘可共诣佛。’时金刚齐比丘，与魔子及八万四千魔众，俱诣净明光王佛所，头面礼佛足，合掌恭敬在一面立。净明光王佛因其净戒及圣法行，为说如是法，皆得不退于阿耨多罗三藐三菩提。

“自在王，彼时金刚齐比丘岂异人乎？汝身是也。障碍魔子者，持地菩萨是。自在王，是名菩萨摩訶萨戒自在。菩萨得是戒自在者，能示众生不思议愿力，教化无量众生于阿耨多罗三藐三菩提，亦能自降魔怨，疾成阿耨多罗三藐三菩提。”

佛告自在王：“何谓菩萨摩訶萨神通自在？谓天眼、天耳、他心智、宿命智、如意足。自在王，何谓菩萨天眼自在也？若菩萨眼根，不为墙壁山林、须弥铁围、世界中间之所障碍，是名天眼自在。菩萨以是无碍眼根，见十方无量阿僧祇佛土为一佛土。何以故？空相无别异故，而诸佛土彼此虽别而不合不异。又见诸佛大众围绕皆为一佛，

以法性不坏相故。以见一佛净故见一切佛净，以一切佛净故见自身净，自身净故见一切法净，于自身净诸净之中不生二相。又见诸佛弟子不异见佛净，菩萨以见弟子正见见佛，以见佛正见见弟子。又菩萨于十方无量阿僧祇世界所有众生，若地狱、若畜生、若饿鬼、若人、若天，除无色界，即以天眼悉皆能见生死所趣善恶之处，又知众生行业及报。菩萨虽见众生不取众生相。何以故？信无我际故，虽见行业及报而知一切法无业无报。菩萨以是天眼，见一切色皆无色相，信一切法无所有故，知诸形色皆是虚妄，本来不生故。是名菩萨天眼。菩萨得是天眼智力故，随所能见，或见有数色，或见无数色，或无所不见。菩萨虽在百千万种众生之中，而能入于禅定背舍三昧，乃至不见有一众生。何以故？菩萨达诸法无我如故。是菩萨于色界诸天净妙形前，为现其身令诸天子见，而是菩萨亦见诸天身。菩萨又能令诸天见其身，而诸天不自见身，或令诸天自见其身，而不见菩萨身。自在王，是名菩萨天眼自在。

“自在王，何谓菩萨摩訶萨天耳自在？若菩萨得是天耳，于十方无量阿僧祇世界所有诸声，天声、夜叉、乾闥婆、阿修罗、迦楼罗、紧那罗、摩睺罗伽、人非人声，悉皆得闻。闻是声时，于诸声中无所分别，信一切声是不可说相。又闻是声，不生我相、众生相及音声相，达一切声本来不可说相，信知是声无有住时。菩萨耳性耳识性无有碍故，闻是声时解其实义者，一切声不可说是灭相故。以是实义，而依于义不依于声，一切法无生相故。又闻十方无量阿僧祇现在诸佛之所说法而无有碍，如所闻能持。持已不忘。何以故？菩萨乃至无有一句不知而灭。菩萨有所问法，若有漏若无漏、若有为若无为、若世法若出世法、若善若不善、若有罪若无罪、若声闻乘若辟支佛乘若佛乘，能令是法入一性味，谓离自性。虽有所问不著六尘，虽复闻法不住诸相。菩萨贵法，依法不依非法。何等为法？法名离染，法名无相，法名无为，法名无归处，法名无生无起无得，法名无比。于是法中以相分别，取舍戏论是名非法。自在王，菩萨依于义不依语，不离语入义心听法。云何名入义心？不堕空义见，无相义见，无作义见，是名入义心。菩萨以是入义心听法依于义，是义不可得，不可得亦不可得。又自在王，菩萨若能如是听诸佛法，依了义经不依不了义经。了义经者，一切诸经皆是了义，以依义故，一切法不可说故。菩萨如是名为依了义经。若人于一切经不能如是依义，是名不了义。何故名不了？是人不了义故，行尘垢道常为所牵。为谁所牵？为声所牵。了义者不随于声。何以故？其义不可说故。菩萨知一切法离诸边非了相。自在王，依如是义趣法者，一切诸经皆是了义。不如是依者，一切诸经皆是不了义。又自在王，菩萨于诸佛所听受法时，依于智不依识。何以故？菩萨知识虚妄如幻离相，无性无色无形无对不可识，如是知识相即名为智，不名为识。菩萨依智故不随识，知他识亦不是识，是故不著识如，故说智如。自在王，依智菩萨不住于识，能知他

说而为说法。又自在王，菩萨说法时，虽说众生名，而依于法不依众生。何以故？若于我法中实有众生者，终无净无解。是故，自在王，一切法毕竟无我无众生，如来以世法故说有众生，诸法实无众生，是故菩萨依于法不依众生。法者即是法性义，法性者是不生性义，不生者是毕竟不起不作义，义者是不可说义。何以故？以语说法法不在语中，是故以语示义。有所示说皆非语非说，有所分别、有所说者即非佛法，无分别无所说即是佛法，是故言无说是佛法。若人欲入佛法应如是入而以语说众生，若说法不应生见。若有二者不名佛语，无二无分别即是佛语。若有言声即非佛法，若有论说亦非佛法，若无言声亦无论说是名佛法。是故，自在王，若菩萨入佛法中，则得如是天耳，以一切声随诸法实相行，能得阿耨多罗三藐三菩提。自在王，是名菩萨天耳自在。

“自在王，何谓菩萨摩訶萨他心智自在？若菩萨得他心智自在者，以己心知他心，所至之处为众说法先观众心，知是众生有何深心、何行、何因、何相，随而为说。菩萨自心净故，入一切众生心净。自在王，譬如明镜照诸形色，相貌长短、大小粗细，随其本形皆有像现，不增不减镜无分别，以明净故能示诸像。菩萨亦如是，以自心净法性照明故，众生所起心心数法，皆能得知而无所碍。若是众中有多欲者，能知其心，亦见离欲相。何以故？心相非染故。若众中有多恚多痴，能知其心，亦见离恚离痴相。何以故？心相非恚非痴故。若众中有乐声闻乘者，知其行道法性不作小。若众中有乐辟支佛道者，知其行道法性不作中。若众中有乐大乘者，知其行道法性不作大。菩萨随知众生心性而为说法，不取心相；虽知诸乘而为说法，不坏法性；不坏法性故不坏一切性，而知众生所行。菩萨自以心观他心，自心他心无违无顺，亦知众生心相续生，又知心性即是法性。自在王，是名菩萨他心智自在。以是自在故，于天上人中无不知识。

“自在王，何谓菩萨摩訶萨宿命智自在？若菩萨得宿命智自在，以念力强故，定根利故，忆本所生自身他身恒沙劫事而为他说：我于彼处如是种类姓名寿命，受如是苦乐。又知众生宿世所种善根，有因力者，有缘力者，是人有声闻因，是人有辟支佛因，是人有大乘因，知其先世所因，如是随其所应而为说法。菩萨得是宿命智故，自知本生于诸佛所种诸善根。若先世有善根，而不回向阿耨多罗三藐三菩提者，今当以是善根回向。菩萨虽知宿命亦知先世法无有来者，不见法从先世至后世，亦不见今世至先世，知一切法无所从来亦无所去，又念先际不生先见，亦不生后际中见边见，知一切法无边无中。菩萨虽念众生宿命，亦知先际色离相，知先际受想行识离相，先际五阴离相即是后际五阴离相，后际离相即是现在离相。菩萨知先际一切法性空，知现在一切法性空，知后际一切法性空。自在王，菩萨如是知宿命时善根增长，先世罪业因缘灭尽。何以故？菩萨达一切法相无新无故，成如是智已，信解一切有为法皆空如梦。自在王，譬如梦中见生

死苦乐，菩萨信解一切有为法亦如是。如是信解者，往来生死心不疲倦，于众生中而生悲心，于一切法生假作相。菩萨作是念：‘如我若干千万亿劫生死往来，皆虚妄无所有。一切众生亦如是，生死往来虚妄不实。实名不起四大，四大是虚妄法。’自在王，菩萨见宿命时，诸有为法皆是虚妄。何以故？菩萨念先世转轮王乐，皆悉无常变异之相；念帝释乐，亦皆无常变异之相；亦见诸佛严净世界，声闻众严净，菩萨众严净，所用诸物严净，亦念诸佛色身具足而转法轮，皆悉无常变异之相。如是念时，于有为法无所贪惜。何以故？菩萨作是念：‘如是净土诸佛色身无常灭尽，况我所著？’即入无我无我所法中。依于无常变异之相，作如是念：‘诸有为法皆悉无常，众生于此而生常想。’即于众生生大悲心，于一切法生放舍想。自在王，是为菩萨宿命智自在。菩萨得是自在，信一切法无常，而为成众生故受身，为不受故受，为不取故取，但为教化一切众生故。

“自在王，何谓菩萨摩訶萨如意足自在？若菩萨心自在故，从圣相生如意足欲力、进力、断行信解力。菩萨得是信解如意足非作非起，若欲普至恒沙世界，一念之顷皆能得至。彼诸众生皆见其来，而自于先本处不动。彼见说法，而于此处说法不绝。自在王，是名菩萨如意足自在。菩萨以是如意足自在力，若有众生应以如意足度者，以如意足度之。若诸天入著常相者，示其劫烧。是诸众生见三千大千世界普皆烧尽，而是世界无所损减。若有众生慢心自大，则作执金刚神，执火焰金刚杵而以示之，令生恐惧除其慢心自归礼敬。若有众生乐转轮王形者，以转轮王身而为说法。若有众生乐释提桓因形者，以释提桓因身而为说法。若有众生乐梵天王形者，以梵天王身而为说法。若有众生乐魔王形者，以魔王身而为说法。若有众生乐见佛身者，则现佛身而为说法。菩萨或为众生住于空中结跏趺坐，身放光明而为说法。或有众生乐严净世界者，则为庄严三千大千世界，悬缯幡盖，竖诸幢幡，以宝罗网遍覆其上，烧诸名香，作众伎乐，然后说法。或为众生现三千大千世界为一海水，青红赤白种种莲华遍覆其上，于其水中现师子坐，身处其上而为说法。或为众生自现其身，坐须弥山顶而为说法，声至梵天。或为众生不现其身，但以音声而为说法。或为众生现乾闥婆身，以众乐音而为说法。或为众生现龙王身，起云雷震放大电光，又霖大雨而为说法。或有众生饥渴逼迫，则与天食身得充满，具足悦乐而为说法。若有地狱众生苦恼逼迫，而以神力灭地狱火，以天精气令其毛孔皆得安乐而为说法。若有盲者，如意神力以天眼与，令得开明而为说法。若有聋者，如意神力与其耳根，令得闻声而为说法。若有种种病，自以神力令其除愈而为说法。若有犯罪送至死处，如意神力化人代之，令得免罪心得安乐而为说法。若有众生刖足斩手、刖截耳鼻、形残丑陋，常自愧耻而心退没，如意神力皆令完具而为说法。若有众生在于胎中藏血屎尿不净之处，如意神力化作宝台楼阁令处其中，亦成意识而为说法。若其始生诸根未成，如

意神力令其具足，堪任听受而为说法。自在王，是名菩萨成如意足，以如是等种种不思议神力而为说法。菩萨如意神力故，为度奉事日月众生，以三千大千世界置其右掌远掷他方无量世界，令诸人众皆见其去，而此世界本处不动。又以恒河沙世界入一毛孔举至梵天，掷置他方无量世界，令诸众生无去来想。若恒河沙无量世界劫尽火烧，能一吹令灭，或以两手障蔽日月，身出光明照诸世界而为说法。自在王，是菩萨或坐诸佛前，若欲供养佛，以一掬华如须弥山散佛身上，华至半身。又三千大千世界一切草木皆成为炬，遍满世界火落如雨。自在王，是菩萨随诸众生所贵形色皆悉为现，若释、若梵、若声闻形、若辟支佛形，是名菩萨神通自在。谓天眼见无碍故，得天耳闻无障故，得他心智达一切心心心法故，证宿命智忆过去无量阿僧祇劫故，得如意足于一切形色随意示现故。自在王，神通自在者，能以一切佛事示诸众生，亦能了达分别众生诸根利钝，能以声闻乘度众生，辟支佛乘度众生，大乘度众生故，于生死中众所知识，成众生故众所知识，于善法中出家行道故众所知识，以方便力故众所知识，檀波罗蜜回向故众所知识，尸罗波罗蜜、羼提波罗蜜、毗梨耶波罗蜜、禅波罗蜜、般若波罗蜜回向故众所知识，降伏诸魔令种善根故，名为神通自在。又自在王，菩萨得是神通自在故，色身之力、名闻称赞、家姓财物、眷属人民，普皆殊胜众所知识，是故名为神通自在。又自在王，菩萨得是神通自在故众所知识，谓诸天、龙、夜叉、乾闥婆、阿修罗、紧那罗、迦楼罗、摩睺罗伽、人非人、帝释、梵王、诸护世者，诸佛正遍知者，皆所知识，是故说名多识。自在王，菩萨以是神通不退本誓，而能示现一切众事。

“自在王，何谓菩萨摩訶萨智自在？谓阴智、性智、入智、因缘智、谛智。自在王，何谓阴智？色前际空、后际空、中亦空，受想行识前际空、后际空、中亦空，五阴毕竟空，是名阴智。自在王，何谓性智？地性是法性，水性是法性，火性是法性，风性是法性。何以故？四性入于法性，皆为一性谓之空性；空性、法性同一无性，此中无地性、无水性、无火性、无风性。何以故？不坏性是法性，无二性是法性，无生性是法性，无垢性是法性，无净性是法性。如法性，寿性、众生性、生死性、涅槃性亦如是。如涅槃性，欲性、色性、无色性、有为性、无为性亦如是。如是性智不随他得，是名性智。自在王，何谓入智？眼从本来，不生不起无有作者；耳鼻舌身意从本已来，不生不起无有作者。自在王，眼无有主，是中无有见者；耳无有主，是中无有听者；鼻无有主，是中无有嗅者；舌无有主，是中无有尝者；身无有主，是中无有觉者；意无有主，是中无有识者。自在王，眼性不能见色，耳性不能听声，鼻性不能嗅香，舌性不能知味，身性不能觉触，意性不能识法。何以故？眼无所作，与草木土石无异；耳鼻舌身意亦无所作，与草木土石无异。自在王，眼不染不离，耳鼻舌身意不染不离。何以故？眼从本来是离相，耳鼻舌身意从本已

来是离相。自在王，若能如是知一切入则能离欲，是名入智。自在王，菩萨如是知诸阴性入，不生不起以毕竟灭，灭已而受生退没。虽受阴性入，而不舍阴性入智，是名智自在。谓知阴性入，知阴性入相，而能不舍，现于三界而不住诸结，示有生灭而不生不灭，是名智自在。自在王，何谓缘智？无明缘行，无明不作是念‘我起行’；行缘识，行不作是念‘我起识’；识缘名色，识不作是念‘我起名色’；名色缘六入，名色不作是念‘我起六入’；六入缘触，六入不作是念‘我起触’；触缘受，触不作是念‘我起受’；受缘爱，受不作是念‘我起爱’；爱缘取，爱不作是念‘我起取’；取缘有，取不作是念‘我起有’；有缘生，有不作是念‘我起生’；生缘老死，生不作是念‘我起老死’；老死缘忧悲苦恼，老死不作是念‘我起忧悲苦恼’。自在王，若菩萨能如是观十二缘者，不堕诸见——若断见、若常见。菩萨作是念：‘法属众缘，推求众缘则不可得。’即于十二缘而得真智。何谓真智？知十二缘生法同于无生，无生同空无相无作，空无相无作同众缘生法。如来所用等得一切法，是法同十二缘生法，十二缘生法无有法生，是故说见应十二缘生无生，十二缘无生智即是十二缘生智。自在王，明无明无二，知如是者则知缘；生法行非行无二，知如是者则知缘生法；识非识无二，知如是者则知缘生法；名色非名色无二，知如是者则知缘生法；六入非六入无二，知如是者则知缘生法；触非触无二，知如是者则知缘生法；受非受无二，知如是者则知缘生法；爱非爱无二，知如是者则知缘生法；取非取无二，知如是者则知缘生法；有非有无二，知如是者则知缘生法；生非生无二，知如是者则知缘生法；老死非老死无二，知如是者则知缘生法。从缘生者无有是处，从缘生则是无我、则是空也，从缘生者则是无来无去，从缘生者则非真实，从缘生者则无一相，从缘生者则无所行，如是知者是名缘生智。见缘法者不见无明、不见行、不见识、不见名色、不见六入、不见触、不见受、不见爱、不见取、不见有、不见生、不见老死，若不见如是法者，是名见缘生法。若见缘生法，是名见法。云何见法？见离染法。云何离染？行者于一切法离染见故名为离染，是故说见离染法。云何为见？不为增不为减，如是见如不动不著，如是见如不坏法性亦不见合，如与法性不坏不合，如是见者不毁实际，如是见者亦不见，非以肉眼见，非以天眼见，非以慧眼见。何以故？肉眼无无作故不见，天眼作起相故不见无为法，慧眼无分别相，无分别故不见。自在王，若菩萨能如是见一切法则能见佛，不以色故见，不以受想行识故见，不以诸相故见，不以法故见，不以戒故见，不以定、慧、解脱知见故见，不以过去故见，不以未来、现在故见，如是见者是名见佛。”

自在王菩萨白佛言：“世尊，颇有所缘，菩萨见如是诸法，而能见佛耶？”

佛言：“有。何以故？色是尽相，性无生故，能见色如是，是名见如来；受想行色是尽相，性无生故，能见识如是，是名见如来。戒

是无为无作无起相，能见戒如是，是名见如来；定、慧、解脱知见等亦如是，是名见如来。自在王，我于过去燃灯佛时得见佛净，我于尔时见缘生法故见法，以见法故见如来。”

自在王言：“于燃灯佛已前，云何见诸佛？”

佛言：“以色身相见故见，不以不二法身见故见。今为汝说，我从初发心未曾见佛。何以故？不以色相见故名为见佛。是故，自在王，若菩萨欲得见佛，应如我见燃灯佛，以诸法一相故。云何一相？如我身，燃灯佛身亦如是。如燃灯佛身，我身亦尔。一身故以 身二不分别入一法相，是名见缘生法；以见缘生法名为见法；以见法故名为见佛。若菩萨能于一切念中，证灭而不实灭，生死不可得而以方便智故示，是名菩萨智自在。

自在王菩萨经卷下

“自在王，何谓菩萨摩訶萨谛智？求声闻者，以谛法证声闻解脱，菩萨得此谛而不证解脱，是名自在。求辟支佛者，以谛法证辟支佛解脱，菩萨得此谛而不证解脱，是名自在。谛智者，苦谛虚妄知见。云何知见苦？虚妄不实得时故为苦，以倒故有。若菩萨知苦无生无起，是名知见苦谛。云何断集？诸法随集断。云何为集？集平等故，断亦如是。无所从来故，集无所去故断。是名诸法性，是中无有实法，生已当断。随所爱使故有集，若断爱使是名断集。云何苦灭谛？毕竟灭苦集而无法可坏故，是名苦灭。一切诸缘相灭故，一切法如是灭相于此中不生不灭名为灭谛。云何道谛？随以何道求一切法不得，若善若不善、若有漏若无漏、若有为若无为，是名道谛。是道平等，不分别一切法故；是道寂灭，离诸结热故；是道安乐，离一切烦恼故；是道无漏，一切漏尽故；是道一切有所得者所不能行，正行禅定者易修行故；是道诸佛所不舍；是道无相，断一切相故。以如是道不堕于二，是名道谛。若菩萨以如是门知四谛者，是名谛智。若菩萨先以四谛，为求声闻、辟支佛者说，于此乘中亦无所贪，是名谛智自在。又自在王，菩萨知声闻乘不于中住，知辟支佛乘不于中住，知佛乘不于中住，是名谛智自在。又自在王，若以一心知一切众生心，以一心性知一切心性，而于心智不作二行，是名智自在。又有智自在，知见过去世无碍，心不至过去世；知见未来世无碍，心不至未来世；知见现在世无碍，心不至现在世，不于过去、未来、现在世而生戏论。又有智自在，知一切有为法尽灭而不尽诸善根，知法无生而以摄法摄集众生，是名智自在。又不从他知一切法毕竟灭相，以是智力而自不灭教化众生，是名智自在。自在王，菩萨于此，若欲得智自在力而自在者，应随智行，不随意行。云何意行？所有意业皆是意行，所有识业皆是意行，所有心业皆是意行，所有著心起诸善根皆是意行，堕见行施、堕相持戒、依我行忍皆是意行，‘我是菩萨’则是意行，‘我

发菩提’亦是意行，‘我不断佛种，不断法种，不断僧种’亦是意行，‘我为利众生故发心’亦是意行，‘我当度未度者，解未解者，安未安者，灭未灭者’皆是意行，‘我是施主’、‘我是持戒’、‘我是行忍’、‘我是行进’、‘我是行定’、‘我是行智’皆是意行，‘我是行慈者、行悲者、行喜者、行舍者’皆是意行，‘我是少欲知足离行者、不杂行者、头陀行者、阿兰若者、细行者’如是分别皆是意行，‘我是空行者’、‘我是无相行者’、‘我是无作行者’如是分别皆是意行，‘我是谛语者、实语者、如说行者’皆是意行，‘我是过诸魔业离四魔者’、‘我断一切见得忍’如是分别皆是意行，‘我当得阿耨多罗三藐三菩提转法轮度众生，当于无余涅槃而般涅槃’如是分别皆是意行。自在王，云何菩萨智业？随无心意行处，是名智业。菩萨常作智业，不起意业。云何菩萨智业？菩萨智业有二种。何等二？一者、成众生。二者、受持正法。云何成众生？菩萨随以所知能成众生。云何受持正法？若不受一切法，是名受持正法。若受持色，非受持正法；受持受想行识，非受持正法；若受诸入诸性，非受持正法；若受善不善法，非受持正法；若受罪不罪、有漏无漏、有为无为、世法出世法，非受持正法；若受施相，非受持正法；若受戒、忍、进、定、智，非受持正法。何以故？所可取缘皆是非法非善，非受持正法。何以故？如来所得法，是法无相无碍。若取缘相，非受持正法。如是菩萨业中智，是名智业。以如是智而作智业不终于智，是名智自在。

“自在王，何谓菩萨摩訶萨慧自在？菩萨得慧自在，能知诸法解释章句，得四无碍智力故，谓义无碍智、法无碍智、辞无碍智、乐说无碍智。云何义无碍智？若菩萨于诸语中，依义不依语。义者，于一切法正智。云何正智？谓不可说义是。此义在语中更无异声，从本已来离诸相故，是名为义。不应离语依于义，语中等相即是义，能如是知，名义无碍智。又达一切法义，亦名义无碍智。云何法无碍智？菩萨依于法不依非法，依于法者不见非法。何以故？知一切法离相但有名故。又法无碍者，虽说三乘不坏法性。何以故？法性是一性，谓无相是。菩萨以语说法，即知语同响相，有所说法信解皆同法性，于智于语而无所碍，是名法无碍智。云何辞无碍智？知诸天言辞，知龙、夜叉、乾闥婆、阿修罗、迦楼罗、紧那罗、摩睺罗伽、人非人言辞，知帝释、梵天王、护世者言辞，知一言、二言、多言、略言、广言、男言女言、非男言非女言、过去言未来言现在言，随以方便言辞令其得解，自以净妙言辞，亦不轻毁他语。何以故？知一切法无有言辞。菩萨作是念：‘以言辞说法令其得解。是法于言辞中不可得，言辞于法中亦不可得，从本已来无有言辞。若有言辞，不应以善言辞说不善法。’是故当知，言辞能示善恶。又辞无碍者，即以众生言辞而使行法。何以故？法不行法，能如是行一切法，以言辞说此行使彼得解，是名辞无碍智。云何乐说无碍智？若菩萨于一切文字皆能乐说，于一切音声亦能乐说，一切名字亦能乐说，是名乐说。云何为乐？菩萨若

说法时，乐法乐实乐谛。若信乐修多罗者，为说修多罗；信乐岐夜、伽陀、弊迦兰奈、讴陀那、祢陀那、阿波陀那、伊提郁多伽、阇陀伽、裴佛略、阿浮陀达摩者，皆为说之；信乐过去者为说本事。一切众生所乐诸根皆随所乐而为说法，乐信根者因信根为说法，乐进根者因进根为说法，乐念根者因念根为说法，乐定根者因定根为说法，乐慧根者因慧根为说法，如是诸根皆因而为说法。淫欲多者分别有二万一千，佛知有八万四千根，如来因此诸根皆能乐说，菩萨次能乐说。嗔恚多者分别有二万一千，佛知有八万四千根，如来因此诸根皆能乐说，菩萨次能乐说。愚痴多者分别有二万一千，佛知有八万四千根，如来因此诸根，皆能乐说菩萨次能乐说。杂分者分别有二万一千，佛知有八万四千根，如来因此诸根皆能乐说，菩萨次能乐说。自在王，是名乐说无碍智。于此义无碍、法无碍、辞无碍、乐说无碍，皆以慧为本，慧所住处，慧之所摄。菩萨以慧力故用四自在及余自在皆得自在。”

“世尊，慧以何为本？为住何处？何处所摄？”

“自在王，慧以多闻为本，住多闻处，多闻所摄。”

“世尊，多闻以何为本？为住何处？何处所摄？”

“自在王，多闻以善知识为本，住善知识处，善知识所摄。”

“世尊，善知识以何为本？为住何处？何处所摄？”

“自在王，善知识以敬心为本，住于敬心，敬心所摄。”

“世尊，敬心以何为本？为住何处？何处所摄？”

“自在王，敬心以深心为本，住于深心，深心所摄。”

“世尊，深心以何为本？为住何处？何处所摄？”

“自在王，深心以质直为本，住于质直，质直所摄。”

“世尊，质直以何为本？为住何处？何处所摄？”

“自在王，质直以大悲为本，住于大悲，大悲所摄。”

“世尊，大悲以何为本？为住何处？何处所摄？”

“自在王，大悲以众生为本，住于众生，众生所摄。何以故？自在王，菩萨为度一切众生，生大悲心，生一切智心，是名菩萨慧自在。又慧自在菩萨，以慧自在故因一法门，若一劫若减一劫，种种异辞广说诸法，于实相中无所违失。菩萨或欲不现其身作为众生说法，或从身毛孔演出法音，随众生所行而为说法。菩萨或欲现其身作为众生说法，一切外道论师不能穷尽。又外道仙人所作，若曼哆逻咒术经、韦陀、若语论、若钵追、若诸神通、若诸智门、若日月五星经、若梦经、若地动经、若陀魔陀咒术、若鸟语经、若鸟兽经、若龙乾闥婆夜叉入身经、若王相经、若丰乐饥馑相经、若诸遑游戏经，如是世界经书智慧、伎艺文章、算数色相、音乐歌舞、箜篌箏笛，如音曲折菩萨转身，自然在心皆能通了，以慧力故皆能得知、皆能示现、皆能达知。菩萨虽知如是方术，不恼众生，亦不以是为净妙道。自在王，慧自在菩萨，与百千万诸梵王共住共坐，自现其身与共语论，亦不著梵

王光明德相，而诸梵王迎送菩萨生尊敬心；如是皆于一切天宫现自在力而亦不著，但生无常、苦、空、无我想，依无生法依度一切众生之心。自在王，是名菩萨慧自在。又自在王，慧自在菩萨，如魔所有天宫，复令殊胜自现其身，胜魔所有百千万倍，令诸魔等生渴爱心生贪著心，以此自严破魔慢心，令住阿耨多罗三藐三菩提，然后说法。自在王，慧是菩萨遍行法，若施、若受、若以施回向，而于此处必应用慧；若自持戒、教他持戒、以持戒回向，而于此处亦应用慧；若修行忍、若教他忍、以忍回向，而于此处亦应用慧；若自行进、教他行进、以进回向，而于此处亦应用慧；若自行禅、若教他禅、以禅回向，而于此处亦应用慧；若读诸经、若为他说法、若如所闻以慧正念，一切行立坐卧、一切仪法、一切舍心，皆应用慧。慧力菩萨，则是一切善法力者。慧增上菩萨，于一切法得增上自在。慧自在菩萨，于一切法能自在行。执慧力菩萨，知佛能拒魔军。有慧菩萨，自在随诸法而不用力。如人仰射其箭，还时不须弓力。菩萨亦如是，以慧力故遣自在智入诸善法，坐道场时得是智力，以是力故以右手动十方世界，破大魔军得佛十力，以是十力一切天人无能伏者。

“自在王，是戒自在、神通自在、智自在、慧自在，若人不种善根，不能得闻如斯经典。自在王，若人得闻是经心欢悦者，当知是人得四自在，以是自在现自在力。何以故？自在王，是诸自在，一切声闻、辟支佛之所无有。”

尔时，自在王菩萨闻佛所说，心大喜悦，合掌礼敬，瞻仰尊愿，目不暂舍，作如是言：“世尊，佛今以是四自在力，一切众生亦当得是四自在力。”佛以神力，使自在王菩萨以种种好色香华满其衣袂，以散佛上及诸菩萨。蒙华散者皆成金色，三十二相以严其身。

空中百千万亿诸天，同声叹言：“若有众生信受如是四自在力，发阿耨多罗三藐三菩提心者，是诸众生以佛庄严而以自严。何以故？是四自在皆随一切智心。世尊，若佛本不发阿耨多罗三藐三菩提心者，是诸众生，云何得闻如是不可思议诸自在经？”

诸天子叹已，佛告自在王菩萨：“我念过世于燃灯佛前，第七十佛号普净光王如来，亦广说此四自在法。时有菩萨名智行足，亦以此法问佛。佛说此法时，八千菩萨得此四自在及无生法忍，三万二千人发阿耨多罗三藐三菩提心。自在王，我于尔时初闻此四自在，闻已受持，至燃灯佛时乃得具足。是故，自在王，若于今世若我灭后，有人一心求佛道者，受持是经，当知是人疾得无生法忍。”

说此自在王经时，三万二千人发阿耨多罗三藐三菩提心。诸天子供奉佛故，作百千伎乐雨于天华。以佛神力，从众伎乐出如是音：“若有众生闻此自在王经，信解受持，当知是人诸根明利，乐于佛法，其智广博，为善知识所护，深种善根，于诸众生行大悲道。”

尔时，自在王菩萨白佛言：“世尊，佛有十力、四无所畏、十八不共法，菩萨亦有十力、四无所畏、十八不共法不？”

佛告自在王：“有阿鞞跋致菩萨，已久习行得无生法忍，住第八地欲入九地，为般若波罗蜜方便所护，如是菩萨则能具成菩萨十力、四无所畏、十八不共法。自在王，云何菩萨十力？为萨婆若故，发深坚心力具慈心故，不舍一切众生力，不求一切利养故，舍一切世界饰好故，具大悲力信一切佛法故，能成是法故，心不退没故，具大进力行念安慧故，不坏仪法故，住不动定力离二边故，顺缘生法故，断一切见不别戏论故，具般若波罗蜜力成众生故，受无量生死故，习善德无厌足故，信解有为法如梦故，于生死中无疲倦力观诸法相故，无我无人无众生故，信解不生不起法故，信乐无生法论故，无生法忍力入空无相无作法故，观诸脱门故，得声闻、辟支佛乘解知见故，得脱门力于深法中不随他智故，观一切众生心所行故，具无碍智力。自在王，是名菩萨十力。

“自在王，何谓菩萨四无所畏？得陀罗尼故，一切所闻能持故，常不忘念故，于大众中说法无所畏。随一切众生所信解，而为说法如随病合药，知见一切众生诸根随应说法，于大众中而无所畏。是菩萨众中说法无所疑难，无有东方、南方、西方、北方有来问我我不能答，乃至无有微畏之相，恣于众生之所问难，随问为答而无所畏，善能断疑故，于大众中说法而无所畏。自在王，是名菩萨四无所畏。

“自在王，何谓菩萨十八不共法？菩萨从生已来自能行施，无有教言：‘汝当行施乐行舍心。’若魔作佛形来语之言：‘汝行于施当堕地狱。’菩萨若生慍悔之心无有是处。乐舍一切分布施与，以是行施为阿耨多罗三藐三菩提，不求果报，利益众生故。是为菩萨初不共法。自在王，菩萨自能持戒无有教者，虽不值佛而亦不从他人受戒，善能护持一切诸戒常乐持戒，谓虽在家如戒所说尽能奉持；若其出家戒经所说，不须教导皆能履行，乃至不为寿命诸缘而舍于戒，所持诸戒皆顺菩提，为断众生破戒法故。是为菩萨二不共法。自在王，若贫穷下贱及旃陀罗工巧之人，嗔恚加恶、苦言骂辱、节节支解，菩萨尔时其心不动，于此众生慈心普润，有力能报而不加害，但依于法‘我以佛法缘故忍受此苦’，亦愿是人心得善净发大庄严。是为菩萨三不共法。自在王，菩萨虽遭急难犹故进行，不懈不息而终不生退没之心。若见声闻入于涅槃，见世苦恼而于声闻灭度法中心不贪乐。若见辟支佛灭度，又见生死苦恼，于辟支佛涅槃法中心不贪乐。若见诸佛已成大利，佛法具足入于涅槃，自见其身未得具足六波罗蜜及诸佛法，于此法中心亦不没而勤行进：‘我当于此大乘涅槃而取灭度’。是为菩萨四不共法。自在王，菩萨若作转轮王、若作帝释、若作魔王，百千侍女作天伎乐具受欲乐，而于禅定及无量心皆现在前，常乐舍离愤闹之处，于生死中生大恐惧想，于五欲中生大不净想，于五阴中生怨仇想，于四大中生毒蛇想，于诸入中生空聚想，于己眷属生怨贼想，于宫宅侍女中如在死尸间想，但求行法，但求见佛，但念欲度一切众生，于伎乐之声出禅定法音，或时魔障其声，先世善根力故而于空中得闻佛音、

法音、僧音，闻此音已弃舍世界自在之乐出家入林。是为菩萨五不共法。自在王，菩萨于世禅定之中不生坚想，以智分别离于诸见依法依义，此不共法乃至梦中不生我见、不生法见。菩萨不为诸结见缠所使，离诸疑悔，乃至恶魔不能障蔽令其疑悔离于正法。菩萨为成众生故，或破仪法而于其中无有疑悔。自在王，是为菩萨六不共法。自在王，菩萨从生已来自得身净，离于杀生，不以手足刀杖瓦石有所恼害，常舍刀杖，资生丰足无所乏少，一把之草不与不取，珍宝满地不生贪心，饥穷死困不以邪命而自活也。常修梵行至于心想，不念五欲离诸欲恼，不以五欲之缘而行非法，以智为首成善身业。是为菩萨七不共法。自在王，菩萨净于口业真语实语，言行相应不自欺身，不诳诸佛、诸天、龙、神、夜叉、乾闥婆、阿修罗、迦楼罗、紧那罗、摩睺罗伽、人非人等。菩萨不行两舌，眷属亲爱终始不离。菩萨不行恶口，常行爱语、软语、和柔语、不恶语、不粗语、有理语、乐语、先意语、和悦语。菩萨于诸恶口粗言，侵克苦语，人不喜闻、自恼恼他如是诸语，终不出口。菩萨不为无义语，有则言有，无则言无，深心净故口业皆净。自在王，菩萨得此不共法故，世所生，常得如是随法语口，能以是语，不净之人令其得净，已净人者令起礼敬供奉之心。以是深心不共法故，得实语口，诸有所说皆实无虚。是为菩萨八不共法。自在王，菩萨已心自在得自在行，不贪他物，不恚恼众生行于正见，于菩萨心无等等心终不忘失。菩萨常离一切谄曲不直之心，昼夜常行善净慈心。是为菩萨九不共法。自在王，菩萨所生之处，一切经书咒术医方算数为最为上，不须师教自能知之皆悉了达，亦于世法、出世法中得不随他慧，又不承望听采他语，常为诸天世人之所瞻仰，有所言说皆悉随学。是为菩萨十不共法。自在王，菩萨或为众生疗治诸病，不求利养以大悲为首，疗治病时发心愿言：‘当令众生得出世法，灭诸苦恼令至涅槃’。是为菩萨十一不共法。自在王，菩萨不求不愿转轮王位、释梵天王之处而自得之。何以故？菩萨不为身色端严故行道，不为世界眷属荣位名闻称赞故行道，如是之福不求而得。是为菩萨十二不共法。自在王，菩萨住尊贵处，长寿诸天曾见佛者常来拥护，如是劝发：‘应作是行，行是业者能至菩提。是则退法，是则进法。如是行者，诸根随顺阿耨多罗三藐三菩提。’是诸天神常以如是随宜劝发，令不违失阿耨多罗三藐三菩提。是为菩萨十三不共法。自在王，若有凶暴嗔恚恶人，见此菩萨身口心业，不能加恶心得善净。若或有人恼此菩萨忍受不报，令其心净得住于法。若有众生侵害菩萨，不令以此堕于恶道。何以故？菩萨本来已得具足不共善净之愿：‘若有众生以身口意侵害恼我，令不以此堕于恶道。’菩萨净持戒故随愿皆得。是为菩萨十四不共法。自在王，或有众生慳贪不信，不见业行，不依果报，不识佛法僧，于诸沙门、婆罗门心不善净，不能敬礼听受其语，心不尊重不生希有之想。是诸众生见此菩萨身口意行仪法语论，心即得净礼敬随顺，便生尊重希有之心。何以故？菩萨得不共法

故。是为菩萨十五不共法。自在王，若一切诸天、龙、神、夜叉、乾闥婆、诸仙大人、婆罗门等世之大师见此菩萨生师尊想，于此诸人名称最胜。又诸天、龙、神、夜叉、乾闥婆、仙人、婆罗门等世界之师，诣此菩萨曲躬礼敬供给使令，诸师弟子亦皆礼敬尊重迎送心念知胜得是信心。是为菩萨十六不共法。自在王，菩萨所在国界聚落城邑，能修善法离不善法，能化众生护正法者而生其中，得正见父母，所生之处常为师长礼敬尊重，国界之中众生命终无堕恶道。何以故？菩萨以善法摄众生令行福故，命终之后皆生人天。是为菩萨十七不共法。自在王，菩萨随顺一切助道之法，诸明神通皆具足故，一切诸魔不能得便。是为菩萨十八不共法。自在王，何故名为不共法？菩萨随顺一切佛法故，诸声闻、辟支佛、初发意者之所无有，而况凡夫？”

尔时，自在王菩萨白佛言：“希有世尊！世尊今者，与诸菩萨大智法明无量法光。如我解佛所说义者，若有菩萨得闻此经不乐余经。若人闻此经受持读诵，已为受持一切佛法。若人受持此经已为他人说，则为能以佛之正法以成众生。若人正习此经，则为正习一切佛法。若人于此经中得忍名为顺忍。若人于此经中如所说行，则为随顺一切法行。世尊，若有菩萨不离此经，当知是人已得诸明神通为坐道场。”

佛告自在王：“如汝所说，若人不离此经，当知是人得诸明神通为坐道场。自在王，过去燃灯佛前，威德佛、提沙佛、弗沙佛、光明佛前有佛，号天王如来、应、正遍知、明行足、善逝、世间解、无上士、调御丈夫、天人师、佛世尊。其佛世界严净丰乐，天人充满。其土平正，琉璃为地，阎浮檀金以为莲华遍覆其土，柔软细滑譬如天衣。是时世人身色长短、资生所有、园林池观，皆如兜率天上，所需饮食应念即至与天无异，唯有名别。其三千世界，佛为法王，是故其佛号为天王。如转轮王坐于正座，以法化民无不承顺；天王如来亦复如是，坐师子法座为一切天人演说于法。大众坐处，东西八万四千由旬，南北亦尔八万四千由旬。天王如来说法之时，音声遍满三千大千世界。其诸天天人尽敬尊重赞叹，行无上法以为法供。其土众生无有乐下法者，唯乐佛法。无有声闻、辟支佛名，况发心行者？唯有菩萨以为眷属。无有女人，亦不闻有淫欲之名，皆于莲华结跏趺坐自然化生。唯乐三法。何等为三？一者、乐喜见佛，二者、乐喜闻法，三者、乐观于法好喜离行。其诸人众修习经法常不放逸，福慧具足，寿命无量阿僧祇劫，命终生天，谓到他佛土。若有菩萨命欲终时，上升于空高七多罗树，唱大音言：‘我于此土今当退没。’时众坐菩萨闻此声已，皆共集会试其法忍，作如是言：‘何等法退？何等法生？’时是菩萨于大众中而作是言：‘此中无法若退若生。如来得阿耨多罗三藐三菩提时，知一切法无退无生。何以故？色不退不生，受想行识不退不生，更无异法必定可得，若我、若众生、若寿命，退者、生者。如来得阿耨多罗三藐三菩提时，知一切法皆空无相，空无相法不退不生。’

诸法离际，不作际、不起际、无生际。佛以为证，如是诸际亦不退不生。退名众缘离，生名众缘合，而是诸缘亦不退不生。’是菩萨于大众中说是法已，然后乃退。其身灭已无灰无烟，即生他方现在佛前。是天王佛及诸菩萨，不著袈裟，皆著自生净妙天衣。亦无结惑，世人调顺皆得无生法忍。不为众生广说诸法，而诸众生其根明利小发即悟。若天王佛为诸菩萨演说法时，其诸天人普皆能知，或得法忍，或得陀罗尼，或得乐说无碍，或得诸三昧。

“自在王，是天王佛其大名闻普流十方，于一切天人之中广说此四自在经，七万二千菩萨得受阿耨多罗三藐三菩提记。时有菩萨名曰净光不得受记，作如是念：‘今诸菩萨得受记者，持戒仪式、行道念慧、方便神力、陀罗尼三昧不胜于我，以何缘故，今得受记，而我不得？’时天王佛知其心念，告净光言：‘善男子，于未来世当有佛出，号曰燃灯，彼佛当与汝受记。’时净光菩萨闻佛语已，心大喜悦，上升于空作如是言：‘若燃灯佛过恒沙劫而后乃出，当知我已得受阿耨多罗三藐三菩提记。何以故？诸佛所言皆无虚妄，诸佛皆是真实语者。’自在王，于意云何？彼时净光菩萨，岂异人乎？则我身是。我从是来得值光明佛，我从彼佛得闻是法，闻已受持得光印三昧。从是已后复值弗沙佛，我从彼佛得闻是法，闻已受持得众明三昧。从是已后复值提沙佛得闻是法，闻已受持得照明三昧。从是已后复值威德佛，我从彼佛得闻是法，闻已受持得顺法忍。从是已后复值然灯佛，我从彼佛得无生法忍，证此四自在，谓戒自在、神通自在、智自在、慧自在。自在王，以是缘故，若于今世若我灭后，善男子、善女人求菩萨乘者，得闻是经闻已受持，当知是等皆疾得为菩提真智，得此四自在能转法轮，于佛无上正法之中当得慧光。”

说是经时，万六千菩萨得无生法忍，万二千人皆发阿耨多罗三藐三菩提心，三千大千世界六种震动，百千万诸天喜而唱言：“在在处处有说是经，当知此中则为是佛。若有众生得闻此经，当知此人善根深厚。”

尔时，慧命阿难白佛言：“世尊，当何名此经？云何受持？”

佛告阿难：“此经名为《四自在神力》，当奉持之。”

佛说此已，自在王菩萨及阿难、一切天人，闻佛所说，欢喜受持。

奋迅王问经翻译之记

一切菩萨，功行普修，依德立名，字号平等，随所显发，称谓不同。说法问论，多依自字，故奋迅王问奋迅法，如来为说四种奋迅。其有人能具此奋迅，则于一切皆能奋迅。魏尚书令仪同高公，今欲以此四种奋迅，于一切处普奋迅故，置能译人，在宅上面，出此四种奋迅法门。沙门昙林，瞿昙流支，兴和四年岁次壬戌，月建在申，朔次乙丑，甲午之日，启夹创笔。凡有一万八千三百四十一字。

奋迅王问经卷上

如是我闻：一时，婆伽婆住舍婆提城祇陀树林给孤独园，与大比丘众二万人俱，菩萨摩訶萨一万人，一生当得阿耨多罗三藐三菩提，弥勒菩萨、得大势菩萨、师子意菩萨、师子幢菩萨、大幢菩萨等而为上首。尔时，众中有一菩萨摩訶萨，名奋迅王，在大会坐。尔时，世尊无量百千眷属围绕，恭敬供养而为说法，谓大乘者之所修行。

尔时，奋迅王菩萨摩訶萨，从座而起，整服右肩，右膝著地，合掌向佛，头面礼足，白言：“世尊，我于今者，欲以少法问于如来应正遍知。唯愿世尊，为我解说。”

佛告奋迅王菩萨摩訶萨言：“奋迅王，恣汝所问，我为汝说。奋迅王，汝若问者，随汝心意彼彼所问，如是如是我为汝说，令汝心喜。”

奋迅王菩萨言：“如是，世尊，愿乐欲闻。”

奋迅王菩萨既蒙听许，心大欢喜，白佛言：“世尊，云何诸菩萨摩訶萨大乘奋迅？复为众生说此大乘，以彼奋迅破一切魔、一切慢人、一切诤人、一切分别喜乐见人，令住大乘大愿满足戒行成就，得阿耨多罗三藐三菩提。”

佛告奋迅王菩萨摩訶萨言：“善哉！善哉！奋迅王。善哉！奋迅王，汝今善能问于如来如是之义，当善忆念。汝奋迅王，谛听！谛听！善思念之。我今为汝分别解说，如菩萨如大乘奋迅，复为众生说此大乘，以彼奋迅破一切魔、一切慢人、一切分别喜乐见人，令住大乘大愿满足戒行成就，得阿耨多罗三藐三菩提。”

奋迅王菩萨言：“如是，世尊，愿乐欲闻。”

佛告奋迅王菩萨摩訶萨言：“奋迅王，有四种奋迅。何等为四？一者、戒奋迅，二者、通奋迅，三者、智奋迅，四者、慧奋迅。奋迅王，此是菩萨四种奋迅。

“奋迅王，何者戒奋迅？此菩萨戒具足，谓不缺戒、不穿戒、不

杂戒、不分别戒、不悔戒、不毁戒、不热戒、善护戒、智赞戒、顺道戒、成就他法戒、护一切法戒、喜爱戒、不依一切有道生戒、安住奢摩他戒、随顺毗婆舍那戒、深法解脱戒、不退通戒、空无相无愿戒、清净寂静戒、说佛法僧戒、不舍一切众生戒、慈护心戒、大悲根戒、信清净戒、不分别威仪戒、头陀功德戒、福德田戒、毕竟净戒、不断如来种戒、护法种戒、见圣僧戒、善住菩提心戒、六波罗蜜住戒、修行念处正勤神足根力菩提八圣道戒、生一切菩提分法戒。奋迅王，菩萨如是戒具足已大愿成就。彼云何愿戒具？菩萨劫尽烧时，火满三千大千世界，若如是愿此大寂灭，火即寂灭。若欲令水满此三千大千世界，水即充满；欲令华满，即随意满；欲令宝满，即时满中一切珍宝。又若欲令恒河沙等诸世界中须弥山王彼一切山为一山者，即为一山。奋迅王，菩萨如是戒具足已，若欲令彼恒河沙等诸世界中所有大海彼一切海为一海者，即为一海。彼住戒力，随心所愿皆悉成就，一切所念无不随意。奋迅王，住戒菩萨如是奋迅。若人住戒随愿成就，所谓阿耨多罗三藐三菩提。

“奋迅王，过去久远过阿僧祇阿僧祇劫，无量劫不可思议。彼时有佛，号曰光明无垢光王如来、应、正遍知、明行足、善逝、世间解、无上士、调御丈夫、天人师、佛世尊，出现于世。奋迅王，彼时光明无垢光王如来法中，有一菩萨名金刚齐，安住戒力善清净戒。彼金刚齐阿兰若处经行精进，乐修圣法欲满佛法。彼金刚齐如是观察：‘若不分别一切法者乃得名戒。若不喜乐一切物者乃得名戒。若能寂灭一切烦恼乃得名戒。若身镜像平等知者乃得名戒。若于语言响声平等乃得名戒。若观心法如幻无异乃得名戒。若善不善二法不二乃得名戒。若不净观除灭贪欲乃得名戒。若慈悲观除灭嗔恚乃得名戒。若以智慧灭除愚痴乃得名戒。若不分别贪欲嗔痴乃得名戒。若分别见一切诸法不分别者乃得名戒。若非我见非众生见，亦非命见富伽罗见，亦非常见乃得名戒。若一切法不和合行乃得名戒。若于一切心不惊怖乃得名戒。若于三界心不依止乃得名戒。若信诸法一切不生乃得名戒。若心信解不生法忍乃得名戒。若不希望财利供养乃得名戒。若不畏空乃得名戒。若修无相乃得名戒。若离愿求乃得名戒。若于戒聚心不取戒乃得名戒。若不自戒持聚自高陵蔑他人乃得名戒。若于诸人不赞叹者乃得名戒。若于境界不行不著乃得名戒。若于五阴法阴平等乃得名戒。若于界中法界平等乃得名戒。若不诤讼乃得名戒。若不休息一切善法乃得名戒。若毕竟知一切诸法皆悉寂灭，知寂灭已身则正行乃得名戒。’

“奋迅王，尔时金刚齐菩萨，以如是法住戒成就，修行圣法勤行精进不离正观。魔子名遮，见彼比丘以如是法住戒成就，修行圣法勤行精进，不离正观如是经行，将诸军众八万四千，一切著钵自隐其身，到比丘所而求其便，经一千年随比丘行。彼魔如是于一千年，而彼比丘无有一念乱心可得。彼魔如是伺其心乱，若得乱心则与障碍怖

畏恼乱。尔时遮魔并其军众，经一千年求便不得。复自现身，皆执刀槊种种器仗，在彼比丘面前，怖吓欲令惊畏。彼金刚齐菩萨比丘，见魔军众手执刀槊种种器仗怖吓之已，即作誓言：‘我今真实于此法中，正观修行清净戒聚，此事若实，诸魔眷属手执刀槊种种器仗，一切变为忧钵罗华、钵头摩华、拘物头华、分陀利华、瞻婆迦华、苏摩那华、婆师迦华，种种华鬘。此天魔身一切军众，如我形色正住威仪。’奋迅王，金刚齐菩萨比丘作是誓已，一切魔军所执刀槊种种器仗，即时变成种种妙色无量种色杂色华鬘，有善妙香，见闻心爱可喜殊特，一切魔身色相形服如彼比丘，一切皆如出家举动，身著袈裟剃除须发自他皆见。

“奋迅王，尔时遮魔，见彼比丘胜神通已，生希有心，并诸军众礼彼比丘金刚齐足，问言：‘大仙，汝得何法住神通力能如是耶？’奋迅王，时金刚齐菩萨比丘，答遮魔言：‘大仙当知，如是法者非有得住，以一切法不可得故。大仙当知，身口意等皆无依止，此无依止是我所住，以一切法无依止住。大仙当知，如是住者，非有相住非无相住，如是名住。如是住者非有法住无住无处，故名为住。’

“尔时，遮魔语金刚齐菩萨比丘，作如是言：‘我一千年观汝心行，常求汝便而不能得。’时金刚齐菩萨比丘语言：‘大仙，假使汝于恒河沙劫，求我心行亦不能得。何以故？心不在内亦不在外，不在二处不在中间。又复大仙，幻人心行汝得不耶？’魔言：‘比丘，不可得也。彼幻人者无心无思，何处可得？’菩萨比丘答言：‘大仙，如来常说一切诸法皆如幻相，无心可得，无思可得。’魔言：‘比丘，若汝无心无思可得，汝云何行若去若来？又复云何有所言说？’菩萨比丘答言：‘大仙，如幻人行，若来若去有所言说，我如是行，如是去来，如是言说。’

“魔言：‘比丘，若如是者汝勤精进，安住持戒修行圣法，如是发行何所希求？’比丘答言：‘无发无行，无处希求。’魔言：‘云何无发无行，无处希求？’比丘答言：‘如是处者，无有人去，无有人来，无人当去。大仙当知，无发无行名为无愿。又复大仙，若汝问言：汝勤精进安住持戒修行圣法，如是发行何所希求？如是问者，汝今当听：我此求者，非色生求非色灭求非色处求，如是非受非想非行非识生求非识灭求非识处求，至一切法亦非生求亦非灭求亦非处求。大仙当知，若彼正处非色所摄，如是非受非想非行非识所摄是我求处。我求彼处，若不可见是我求处。若彼正处非色所摄，如是非受非想非行非识所摄，如是正处是我求处，而我不见彼我求处。大仙当知，如圣人求，我如是求。’

“魔言：‘比丘，彼圣人处云何而求？’菩萨比丘答言：‘大仙，若凡夫法、若佛法，此一切法平等不二。若学法、若无学法、若佛法，此一切法平等不二。若缘觉法、若佛法，此一切法平等不二。若过去法、若未来法、若现在法，此一切法平等不二。不生平等是故平等，

不出平等是故平等，不灭平等是故平等。若人不舍如是平等彼修平等，是故能为众生说法。大仙当知，如是正处我如是求。大仙当知，如是正处非欲界处、非色界处、非无色界处。若人如是住平等者，如法不动，非行不行，非他令行。大仙当知，此名正处。如彼发行，一切诸法如是发行；如法界发行，一切诸法如是发行；如实际发行，一切诸法如是发行。若如是求，彼人如是不见行处，心不喜乐故名正处。’

“尔时，遮魔语金刚齐菩萨比丘，作如是言：‘此正修行为何所得？’比丘答言：‘我此正修得无所得，无无所得平等满足。又汝问言得何法者：若有所得非正修行，以离慢故名正修行，正修行者无所得法，言正修者则无所修。’

“尔时，遮魔问金刚齐菩萨比丘，作如是言：‘此戒具足为何所求？’比丘答言：‘我住此戒，为求阿耨多罗三藐三菩提觉，得不灭法得不生法。’魔言：‘菩提为何所觉？’比丘答言：‘色平等觉是菩提觉，受想行识悉平等觉，一切诸法悉平等觉，是菩提觉。’魔言：‘比丘，彼菩提者于何处求？’答言：‘大仙，言菩提者身见中求。’魔又问言：‘云何而求？’比丘答言：‘菩提非起身见非起，如求身见菩提亦尔，我如是求。’

“尔时，遮魔问金刚齐菩萨比丘，作如是言：‘汝师是谁？何人教汝如是辩才？’答言：‘大仙，不瞋自身得菩提者，彼是我师。若不住染不住净者，彼是我师。若何等人，识不住常不住无常，彼是我师。若有人来从其闻法，谓不住法不分别法，如是闻已得度痴海，彼是我师。若智能知一切诸法非次第知，彼是我师。若能遍知一切言语，非次第知而不分别，彼是我师。若一切法不生不出转圣法轮，彼是我师。若非彼住亦非此住非中间住，彼是我师。若说一切诸法不生而自生者，彼是我师。若说一切诸法不灭而自灭者，彼是我师。我于彼师得如是辩。’

“魔言：‘比丘，云何如来转于法轮？’比丘答言：‘非是色转，非色真如，非是色法，非是色空，非色无相，非色无愿，非色寂静，非是色离，非色不生，非色本性，非色自体，非自体转，非是不转；如是次第，受想行识非转不转，识如识法，识空无相无愿寂静，识离不生本性自体非转不转。如来法轮如是而转，一切法轮是则轮转，彼法轮转若或不转，无量法界报际不舍。彼法轮转若人能知，于如是人彼轮则转。’

“尔时，遮魔并诸军众，与金刚齐菩萨比丘以为弟子，作如是言：‘今我等众归依仁者。’彼比丘言：‘勿归依我！汝当归依光明无垢光王如来，此所说法是彼佛法。’彼言：‘去来当共相随至如来所。’时金刚齐菩萨比丘，即与遮魔八万四千诸魔众俱，往诣世尊光明无垢光王佛所，到佛所已头面礼足，合掌向佛住在一面。时彼如来为彼魔众，说此住戒次第乃至修行圣法，如法而说。如是诸魔，一切不退阿

耨多罗三藐三菩提。

“奋迅王，汝意云何？彼金刚齐菩萨比丘，岂异人乎？莫作异观！何以故？汝身即是彼金刚齐菩萨比丘，持地菩萨是彼遮魔。奋迅王，此是菩萨戒奋迅。菩萨得是戒奋迅已，不可思议胜愿亦现，成熟无量众生菩提，破坏魔怨，速得阿耨多罗三藐三菩提觉。

“奋迅王，何者菩萨通奋迅？云何名为通奋迅耶？奋迅王，彼有五种。何等为五？一者、天眼，二者、天耳，三者、知他心，四者、念宿命，五者、神通。

“奋迅王，何者菩萨天眼通奋迅？若有眼根壁所不障，树木山林、须弥轮山、世界中山不能作障。彼无障眼，能见十方无量无数诸佛世界如一世界，于有物处视若虚空，彼此世界皆悉不障，平等一见彼佛世界，诸佛世尊诸声闻众之所围绕，一切皆见一切佛，一佛信解一切法界，不坏修故。若见一佛一切佛皆悉清静，见一切佛一佛清静，如是若以见佛清静自入清静。彼若以是自入清静，则一切法皆见清静。自见清静、法见清静二相不取，若彼世尊诸声闻见，见佛清静见诸声闻则不异见，彼见声闻即是见佛，彼见佛者即见声闻。若彼无量无边世界所有众生、众生所摄，若地狱身、若畜生身、若饿鬼身、若人天身、若阿修罗、若欲界行，除无色界，彼一切见若退若生若减若增，如是众生业报皆知。知见众生及知业报，而实不生众生之想，以知众生皆无我故。虽知业报无业报想，入一切法无业报故。彼人天眼见一切色，而于色相不取应知，以一切色皆无体故，一切色相知不实故，以一切色本际空故。彼人天眼，以何因缘能如是见？以智力故能如是见。如彼所见亦如是见，随自心欲一切不见。若心希望见一切色随心即见，非有少色眼所不见。彼人则于无量百千诸众生中，能修禅定解脱三昧三摩跋提，而彼众生眼所不见。何以故？如是菩萨以知真如法无我故。彼人希望若色界天微细之身、善妙之身、光明之身、不相似身，现于彼天示菩萨身，能令彼天见菩萨身。如是菩萨见彼天身，若欲令天见菩萨身，及自见身即能令见。若欲令天自见其身不见菩萨，彼即自见不见菩萨。若欲令天见菩萨身不见自身，即见菩萨不见自身。奋迅王，菩萨成就如是天眼。

“奋迅王，何者菩萨天耳通奋迅？彼菩萨成就天耳，乃至无量无边世界所有诸声，天声、龙声、夜叉声、乾闥婆声、阿修罗声、迦楼罗声、紧那罗声、摩睺罗迦人非人声，如是等声一切皆闻。虽闻彼声不取自相及众生相，不取声相而知一切音声之相。虽闻音声于声声处信解不实，前声后声皆悉无声。如是通达，彼声无处，无处信解，耳根识界则无障碍，闻彼声已知彼声义。何者声义？谓一切声不可分别不可说者则是声义，寂静义者一切声义。彼菩萨者顺行此义，闻一切声不生依止，以一切法悉不生故。若于十方无数世界，于今现在现命现住诸佛世尊，彼一切佛有所说法，而彼菩萨天耳悉闻无障碍，不取声处而闻一切说法音声，闻已受持无所忘失。云何不忘？若彼菩萨

得一句者可得有忘，以彼菩萨不得一句是故无忘。彼菩萨闻有漏法闻无漏法，若闻常法闻无常法，闻世间法出世间法，善不善法、增法减法，若声闻法、若缘觉法、若大乘法，彼一切法一体一味，如是顺行，谓闻法已得离欲味，闻一切法一切境界不取不著。又复闻法一切相中不住不著，一切法中随顺而行，于非法中不随顺行。何者为法？何者非法？法名离欲，法名无相，法名无为，法名无处，不可譬喻，无尘无得，不生不出，此名为法。若如是法忆念分别，心想观察戏论取舍，此名非法。

“奋迅王，彼菩萨唯取于义而不取语，不为取语听法闻法，为取义故是以听法。云何取义？若见空义不取不著，若无相义不取不著，若无愿义不取不著，是名取义。彼若取义而听于法，于所取义不生分别，于不分别亦不分别，如是菩萨于诸佛所如是听法。又奋迅王，彼菩萨随顺了义修多罗义，不随不了修多罗义。彼了义者，其义云何？以彼一切修多罗义皆是了义。修多罗义皆随顺说无异义故，一切了义修多罗义不可说故，如是了义修多罗义，彼随顺行。若于了义修多罗义，不随顺者则非了义。以何因缘非了义耶？若不了义修多罗义，于彼了义修多罗义不相随顺，与彼了义则不相应。以何因缘而不相应？不随顺故离彼法行。所随顺者谓声随顺，如是了义修多罗者非声随顺。何以故？以彼了义不可说故彼无处著，如是菩萨善知一切不了义法皆如了义。奋迅王，此义如是随顺了义修多罗义，如是随顺一切了义修多罗义。又奋迅王，彼菩萨从佛世尊听闻法已，唯取于智而不取识。何以故？以识知故，以如幻故，不可取故，无自体故，以无色故，不可见故，无障碍故，若如是知则是智知。是故菩萨唯取于智而不取识。识为他知如是知识，于识于智皆不贪著，以识真如说智真如。奋迅王，若菩萨唯取于智不取识者，不为众生说于识法。此天耳通奋迅，得已得此智界。又奋迅王，彼菩萨富伽罗语相应法说，唯取于法而不取人。何以故？奋迅王，若实有人、众生，毕竟于佛法中不可清静不可解脱。奋迅王，若如是者一切诸法毕竟无人，佛依世间是故说人，而实诸法一切无人，如是菩萨唯取于法而不取人。

“奋迅王，法名法界，此法界者名不生界。奋迅王，不生界者名不出界。奋迅王，所言名者以不可说，是故名名。何以故？依彼彼名知彼彼法，彼彼法中名不可得，若不可得随人情故强说言语，一切言语皆随俗说。若我知语彼是佛语，若起意相非是佛语。佛语无意，以无语故名佛语。若入佛语彼入非语，若入非语彼入佛语。若欲入语应入佛语，欲入佛语，取说人语、取说法语，若如是取不入佛语。何处不二亦无不二，彼是佛语。何处有声及以无声，彼非佛语。若不可说非不可说，彼是佛语。如是，奋迅王，若菩萨入佛语者，彼则名为得天耳通，一切音声随顺证法得佛菩提。奋迅王，此是菩萨第二通智所谓天耳。

“又奋迅王，菩萨复得他心通智，于他众生他富伽罗知心知思，

彼人如是入大众中而为说法，初如是观众会之心，何者众生，有何深心，何所修行，何因何相，既观察已如应说法，自心净故能入一切众会净心。奋迅王，譬如镜轮以清净故现如是色，若青黄等若形若相，彼相似见不增不减，镜轮净故，而彼镜轮无所分别而示众像。奋迅王，菩萨如是自心清净，自法界轮如是相似众生心行种种异生彼一切知，而彼菩萨心亦不坏。彼众会中若人欲行，知彼人心，知离欲心。何以故？以心本性无欲染故。彼众会中有瞋痴行，知彼人心，知离痴心。何以故？以心本性无瞋痴故。若复有人信声闻乘，彼人心行菩萨能知法界不下；若复有人信缘觉乘，彼人心行菩萨能知法界不减；彼众会中若复有人心行大乘，彼人心行菩萨能知法界不增；知彼众生心行界已而为说法，然不分别心之本性，如应说法令住诸乘。于一切界不破坏中，一切众生若干种行皆悉遍知。彼菩萨自心观察，非心相续亦非断灭；然彼菩萨以相续心，而能遍知一切众生心亦如是。若界心界如知彼界，法界亦尔不一不二。如是，奋迅王，菩萨得是他心通智，以得通故则名通人，一切天人之所识知。

“又奋迅王，菩萨复得宿命通智，以三昧根能知过去恒河沙劫自他宿命忆念不忘，如是知已然后说法。如是忆念：我于某处如是名字，曾如是生，如是命量，如是受乐，如是受苦。自心能知他众生心，知此众生前因善根，知此众生善根因力，知此众生善根缘力，知此众生声闻乘因，知此众生缘觉乘因，知此众生有大乘因。知彼众生前因缘已，然后乃为如是众生如应说法。彼菩萨自知宿命，知宿命已后复能知本修具足，自知过去于几佛所种诸善根。若彼善根前已愿取阿耨多罗三藐三菩提，如是忆念诸善根已，复更发愿。彼菩萨念本宿命，而于过去一切诸法，心不分别不著不取，于前后行心不分别，于后前行心不分别，于一切法不分别处，若去若来。菩萨忆念过去世已，然于过去不取不著；虽知未来，然于未来亦不取著；知一切法无前无后亦无中间，故不分别不取不著。彼菩萨如是忆念众生宿命。前后色离，菩萨能知；如是前后受想行识一切皆离，菩萨能知；乃至五阴前后中间，一切诸法空无自体，菩萨能知。奋迅王，彼菩萨忆宿命已，过去所修一切善根皆悉增长，过去所作一切业行皆悉尽灭。何以故？业不朽故，是故能知。菩萨如是成就彼知，于一切行信解如梦。譬如梦中见生见死见苦见乐，菩萨信解一切诸行亦复如是，既信解已于彼生死不受苦恼，复于众生而生悲心，知一切法不起生相。又彼菩萨有如是心，我于过去世间生死多千劫行，知皆无实不贪不著，亦如是知一切众生世间生死虚妄不实，不贪不著，若其不实彼不实处，大大不生，大大不实。

“奋迅王，彼菩萨忆宿命已，实见诸行皆悉无常。何以故？彼菩萨忆念过去转轮王乐，乃是无常败坏之法；忆念过去帝释王乐，彼是无常败坏之法；忆念过去梵天王乐，彼是无常败坏之法；思惟忆念诸佛世尊世界庄严、声闻之人功德庄严、菩萨之人功德庄严，又复忆念

彼佛世尊色身具足，如来转法轮具足，彼忆念已则不贪著，一切有为一切所摄皆悉放舍。何以故？彼菩萨有如是心：‘若彼如是佛世界胜、佛色身胜，彼亦无常是尽灭法。我之所摄亦复如是皆悉无常。’复作是念：‘诸行如是一切无常，而诸众生生于常想。’菩萨如是于众生中起大悲心，于一切法皆悉舍离。如是，奋迅王，此是菩萨第四通智。彼菩萨成就此智，则知一切诸法无常，心正思惟摄取有生成就众生，虽摄有生而不贪著。菩萨离有而取诸有成熟众生。

“又奋迅王，何者菩萨神通奋迅？奋迅王，彼菩萨心自在故，得圣神足，谓欲精进寂静信解。彼菩萨现得神通是有为行，彼人希望于一念间悉能遍到恒河沙等诸佛世界，到彼处已，彼处众生见菩萨身，而菩萨身此处不动，彼处众生见闻说法，然于此处说法不断。奋迅王，此是菩萨神通奋迅，以此神通调御众生。若彼众生或天或人，生常想者示劫尽烧；彼见三千大千世界皆悉烧燃，而彼世界实无烧坏。若慢众生，手中金刚示其夜叉，示金刚炎令大怖畏。彼憍慢者，破坏慢心即时向礼。若有众生信转轮王，彼即为现轮王形服而为说法。若有众生信帝释王，彼即为现帝释王色而为说法。若有众生信于梵王，彼即为现梵王形色而为说法。若有众生信于魔王，彼即为现魔王形色而为说法。若有众生信如来者，彼即为现如来形色而为说法。若有众生应见菩萨虚空中住跏趺而坐身出光明，即住空中身放光明而为说法。若有众生于大胜事生信解者，即示三千大千世界幡盖庄严、幡鬘庄严、幢幡庄严，铃鬘具足香薰等乐百千种乐，示如是已然后说法。若有众生应见三千大千世界合为一海，忧钵罗华、拘物头华、分陀利华遍覆水上，于莲华上有师子座，坐彼座上而说法者，彼即示现而为说法。若有众生应见菩萨住须弥顶梵声说者，彼即示现而为说法。若有众生应不见身，唯闻菩萨大声说者，彼即示现而为说法。若有众生应见龙身、乾闥婆身，菩萨即现歌相应声而为说法。若有众生应见龙轮雷声电声及雨堕者，彼即示现而为说法。若有众生饥渴疲倦，以天饮食具足与之，令身饱满一切乐足乃为说法。若地狱中一一众生常受大苦，以神通力灭地狱火，与力令入一切毛根，彼得乐已乃为说法。若盲众生离眼众生，以神通力与其天眼，令得眼根乃为说法。若聋众生离于耳根，以神通力令得耳根乃为说法。若有种种病患众生，以神通力为除众病，令离病已乃为说法。若有众生临欲被杀将欲断命，以神通力设诸方便，偷劫彼人令不得罪，或与财物救赎命已乃为说法。若有众生身分下劣根阙不具，或有小姓怖畏羞惭身心下劣，以神通力令其身分一切具足暂时示现，令身胜已乃为说法。若有众生藏中聋哑，生来顽钝卧在屎尿，先为疗治，以神通力，示宝庄严宫殿坐已乃为说法，令其心意智慧生已乃为说法。若有未生已生众生，根未淳熟，以神通力令根熟已乃为说法。

“奋迅王，彼时菩萨，成就如是神通力已，又复更有不可思议神通说法。若有众生信解日月入法律者，以神通力，三千大千诸世界中

所有日月置手掌中，掷过无量无边世界，一切众生所应度者，皆见日月空中而去，然其日月本处不动。又复能以恒河沙等诸佛世界，置一毛头掷著梵世，然后复掷无量无边世界之外，然诸众生不觉不知，若来若去无往返想。又彼菩萨以一口气，能令无量恒河沙等诸佛世界劫烧火灭。又彼菩萨一跏趺坐，即时令身到恒河沙诸佛世界。又彼菩萨能以两手覆日覆月，以自光明遍照世界而为说法。奋迅王，彼菩萨于如来前跏趺而坐，起心希望供养如来，即时能以须弥山等种种妙华散如来身，令一切华映覆如来唯见半身。若化三千大千世界一切树林以为灯明，如前供养随意即能。天若雨时能令见火示现己身，一切众生皆悉遍见，随彼众生若干信解见何等色，或以自身示帝释身，或示梵身，或声闻身，或缘觉身。奋迅王，此是菩萨神通奋迅，所谓天眼见不障碍，清净天耳闻不障碍，一切众生知心行智阿僧祇劫而能忆念，一切神通悉能示现，名通奋迅。

“奋迅王，所言通者。云何名通？遍见一切诸佛业通，知他一切众生根通，胜声闻乘所有法律、胜缘觉乘法毗尼通，大乘律通，坐退出通，于诸众生淳熟智通，正知出行通，善方便通，布施愿通，戒忍精进禅慧愿通，坏魔摄魔善根成就，是故名通。复次，奋迅王，菩萨得通，他所识知色青等，威德名称力姓种族财众围绕，是故名通。复次，奋迅王，菩萨得通，天、龙、夜叉、乾闥婆、阿修罗、伽楼罗、紧那罗、摩睺罗伽、人与非人，帝释天王、转轮圣王、梵世界主、阿罗汉人，正遍知者一切皆知，是故名通。奋迅王，此菩萨通，菩萨以通不退本愿，能示他人一切诸法。

“奋迅王，何者智奋迅？奋迅王，智奋迅者，所谓阴智、界智、入智、因缘智、实谛智。

“奋迅王，何者阴智？谓知色空，色前际空，色后际空，色中际空；受想行识皆亦如是，识前际空，识后际空，识中际空。此五阴空，谓毕竟空，知此阴空故名阴智。

“奋迅王，何者界智？地界法界、水界法界、火界法界、风界法界。何以故？以此四界法界一界，所谓空界。复法界界，此非地界，亦非水界，亦非火界，亦非风界。何以故？不异界法界，不二界法界，不生界法界，不染界法界，善净界法界，如法界，如我界，如众生界，如命界，如富伽罗界，如生死界，如涅槃界，彼界欲界，彼界色界，彼界无色界，彼界有为界，彼界无为界，故名涅槃界。如若法界智，如是色界智不异因缘智，故名界智。

“奋迅王，何者入智？奋迅王，眼之本性不生不出无造作者。奋迅王，如是耳鼻舌身意性，不生不出无造作者。奋迅王，彼眼无主故不见者，彼耳无主故无闻者，彼鼻无主故无嗅者，彼舌无主故无尝者，彼身无主故无觉者，彼意无主故无知者。奋迅王，眼不见色，耳不闻声，鼻不嗅香，舌不尝味，身不觉触，意不知法。何以故？眼者无觉，如草如木如壁如块；如是耳鼻舌身意等一切无觉，如草如木如

壁如块。奋迅王，眼者无染亦无不染，如是耳鼻舌身意等，一切无染亦无不染。何以故？以眼本性性离染故，如是耳鼻舌身意等，本性如是性离染故。奋迅王，若一切入如是知已心得离欲，故名入智。若如是知阴界入等，不生不出，如是毕竟入涅槃已，摄取生退阴界入等，如阴界入而亦不舍。此智奋迅，知阴界入若相若体，彼一切舍犹行三界而不染著，亦现生死而无生死，此智奋迅。

“奋迅王，何者因缘智？无明缘行，无明不念我能生行；行缘于识，行亦不念我能生识；识缘名色，识亦不念我能生名色；名色缘六入，名色不念我能生六入；六入缘触，六入不念我能生触；触缘于受，触亦不念我能生受；受缘于爱，受亦不念我能生爱；爱缘于取，爱亦不念我能生取；取缘于有，取亦不念我能生有；有缘于生，有亦不念我能生；生缘老死，生亦不念我能生老死。奋迅王，菩萨如是观察因缘则无诸见，无有断见无有常见。彼如是知一切诸法皆因缘生，彼人如是推求因缘亦不可得，彼于因缘得因缘智。云何得智？因缘不生此二平等，如是平等空无相愿，十二因缘皆悉平等。若以平等如是所觉，一切诸法因缘平等，如是因缘则非因缘，彼因缘中无少法生，故名因缘；若知不生亦是因缘，名因缘智。明与无明此法不二，若知此者名因缘智。行与非行此法不二，若知此者名因缘智。识与非识此法不二，若知此者名因缘智。名色非名色此法不二，若知此者名因缘智。六入非六入此法不二，若知此者名因缘智。如六入非六入不二，如是触非触不二，受非受不二，爱非爱不二，取非取不二，有非有不二，生非生不二，老死非老死不二，若知此者名因缘智。如因缘处如彼因缘，皆空无我。如彼因缘不来不去，如彼因缘虚妄不实，如彼因缘无取可取，如是因缘无行无相，若如是知名因缘智。若见因缘不见无明，亦不见行，亦不见识，不见名色，不见六入，亦不见触，亦不见受，亦不见爱，亦不见取，亦不见有，亦不见生，不见老死。若如是见彼见因缘，若见因缘彼则见法。见何者法？见离欲法。离何等欲？一切法中种种见欲，离如是欲故名离欲。彼所见法不增不减，如是所见则是真如不得不染，如是所见则是法界不坏不成，如是所见实际不穿，如是所见虽见不见，如是所见非肉眼见、非天眼见、非慧眼见。何以故？肉眼不觉，以其不觉是故不见；天眼有为，以有为故不见无为，是故不见；慧眼不见以不分别，不分别故亦不能见。奋迅王，菩萨如是见一切法则见如来，非是色见，非受非想非行非识非相等见，非法界见，非戒定慧，非解脱见，亦非解脱知见法见，非过去见、非未来见、非现在见。若如是见，则见如来。”

奋迅王问经卷下

尔时，奋迅王菩萨白佛言：“世尊，若有法者可有见法，若有见法可见如来？”

佛言：“有。何以故？奋迅王，色相不生本性不生，如是见色则见如来；如是受想行识之相，皆悉不生本性不生，如是见识则见如来。戒有为相而是无为，如是见戒则见如来。三昧平等则清净见，如是我于燃灯佛所得清净见。我于彼佛得见因缘，以见因缘即得见法，以见法故即见如来。”

奋迅王菩萨白佛言：“世尊，燃灯佛来所有如来，彼云何见？”

佛言：“奋迅王，皆以色相分别而见，非见法身。奋迅王，我为汝说，汝今应知，我从初发菩提心来更不见佛，惟除燃灯。何以故？非见色相净见如来。奋迅王，菩萨如是欲见佛者，应如我见燃灯如来，以一法故。云何一法？如我之身，彼燃灯身亦复如是；如燃灯身，我身亦尔；一身一法证法不二不分别证，是因缘智。若见因缘彼则见法，以见法故则见如来。若于一切有心生处，皆悉证灭不入涅槃，不得生死方便智说，此是奋迅。

“彼实谛智何者是耶？声闻之人何者实时则触解脱，如是实时菩萨亦得不触解脱，此是奋迅。缘觉之人何者实时则触解脱，如是实时菩萨亦得不触解脱，此是奋迅。实谛智者，所谓知苦非谛非实。何者为智？谓不实智，以是无穷颠倒生故，知苦不生毕竟不生。若如是知苦不生者，此名苦智。云何断集？如彼集法如是断集。云何名集？集故名集，平等断集。若未来集于未来断，此法法尔，非少有法若生若断。爱使集有，彼断爱使故名断爱。何者苦灭？若彼苦集性毕竟灭无法失灭，是故名灭。若灭一切攀缘相者，义不相应，有何法生？有何法灭？何者为道？所谓有道，若善不善、若漏无漏、若垢无垢、有为无为，皆不可得，此名为道。平等名道。以一切法皆真实故，寂静名道。以一切热皆悉离故，安隐名道。不离一切善方便故，无漏名道。诸漏尽故，不行名道。分别见人不能行故，易行名道。正修行者所能行故，不舍名道。过去如来所不舍故，离相名道。以能断除一切疑故，若于此道不入二者，此得名道。若解如是四谛之义，名实谛智。若此四谛，声闻乘愿、缘觉乘愿，于二乘愿不生希望，是乃得名实智奋迅。

“又奋迅王，智奋迅者，知声闻乘不取不住，知缘觉乘不取不住，是智奋迅。又奋迅王，智奋迅者，若以一心遍知一切众生之心，以一心体遍知一切众生心体，若心若智二心不转，是智奋迅。又奋迅王，智奋迅者，知见过去无障无碍，而于过去心亦不转；知见未来无障无碍，未来过去心亦不转；知见现在无障无碍，而于过去未来现在心不戏论，是智奋迅。又奋迅王，智奋迅者，若尽智知而善根行不尽亦知，无生智知知集亦知，是智奋迅。又奋迅王，智奋迅者，若一切法毕竟寂灭，知一切法非他因缘，以智力故不取涅槃，以为成熟诸众生故，此是菩萨智奋迅也。

“如是，奋迅王，菩萨欲以此智奋迅而奋迅者，应当善作智所作业，勿作慢业。何者慢业？诸有意行皆是慢业，诸有识行皆是慢业，

诸有心行皆是慢业，诸乐善行、诸堕见施皆是慢业，诸堕想戒皆是慢业，诸依自他而行忍者皆是慢业，诸有起心分别精进皆是慢业，诸分别身般若亦尔皆是慢业，诸起我慢皆是慢业。我菩萨者，此是慢业。我菩萨住，此是慢业。我能不断佛种、法种、众僧种者，此是慢业。我于众生利益行者，此是慢业。未度众生我令得度，未解脱者我令解脱，未安慰者我能安慰，未涅槃者我令涅槃，此是慢业。我行布施、我持戒、我忍、我行精进、我禅、我慧，此是慢业。我行慈心、我行悲心、我行喜心、我行舍心，此是慢业。我行少欲、我行知足、我远离行、我不染行，此是慢业。我头陀行、空闲正行忆念分别，此是慢业。我行空行、我无相行、我无愿行，此是慢业。我能实语、我能真语、我如说行忆念分别，此是慢业。我过魔业、过四魔胃断一切见，我修行忍忆念分别，此心意业诸如是等，此中略说，我菩提觉，我转法轮，我令众生得解脱已，然后乃入无余涅槃，忆念分别此心意业，奋迅王，诸有心行起心作说，皆是慢业。

“奋迅王，何者智业？于如是处非是心意意识转行，彼是智业。菩萨如是常作智业。菩萨云何常作智业？所谓菩萨常作二业，二者所谓成熟众生、摄取正法。云何菩萨成熟众生？谓自智知成熟众生，自智知者自住离慢，如是自知随于何处自离住知非意非识，菩萨如是非意非识，菩萨如是成熟众生。云何菩萨摄取正法？菩萨若于一切诸法皆不摄者，此是菩萨摄取正法。非色摄者，是摄正法；如是非受非想非行非识摄者，是摄正法；如是次第非界摄者，是摄正法；非入摄者是摄正法。非善法摄不善法摄，是摄正法；非净不净，非漏无漏、有为无为，非世间法、出世间法，非如是摄是摄正法。非施相摄是摄正法，非戒非忍精进禅摄是摄正法。何以故？诸攀缘生皆有相生，非法非律非摄正法。何以故？无相无碍如来正觉，彼不可得相攀缘摄。菩萨若知如是业者，是则名智。若以是智作智所作彼非尽智。

“奋迅王，何者慧奋迅？谓为法分以句分析取四无碍。何等为四？一者、义无碍，二者、法无碍，三者、辞无碍，四者、乐说无碍。义无碍者，于一切字惟取于义而不取字。所言义者，正知一切诸法之义；又复义者不可说义，于种种字皆悉不忘知前后声，此名为义。非取语故得随顺义，若能如是语义平等则随顺义。若如是知名义无碍，于一切义皆无碍故。名义无碍。法无碍者，谓法随顺不顺非法，随顺法者不念非法。何以故？彼一切法离名字智。法无碍者，若乘若法不异法说，于法界相不坏法界。何以故？法界一相所谓无相，彼于何者说法言语？闻彼语已响声平等随顺信解，信说法语法界平等，随世俗知而不取著，以是诸义名法无碍。辞无碍者，谓知字语，若龙、夜叉、若乾闥婆、若阿修罗、若迦楼罗、若紧那罗、摩睺罗伽、人非人等诸字语智，释提桓因、梵世界主诸字语智。一语多语、略语广语、女语男语、若内官语、若过去语、若未来语、若现在语，一切皆知如法字语。若以字语令他众生自意知解，如是而说自语他

语，彼此不障亦不取著。何以故？知一切法无字无语，彼如是念何者字语？若说何法，彼如是法字语中无，故不可得亦不可说。又彼字语于法中无，故不可得亦不可说。若说字语字语无声，若当真实有此言辞，善法言辞、恶法言辞则不可得，应知此辞不在于法。辞无碍者，于一切法皆不障碍诸法不行。何以故？法不行故。一切诸法毕竟不行，如是知己而为他教令知，名辞无碍。何者名为乐说无碍？若一切语皆悉乐说，于一切声皆悉乐说，于一切名皆悉乐说。云何乐说？于义乐说，于法乐说，于真乐说，于实乐说。若有众生于修多罗语音信解，为彼众生修多罗语响声乐说；若于祇夜语音信解，则为祇夜响声乐说；如是伽他、和伽罗那、若忧陀那、若尼陀那、阿波陀那、伊帝曰多伽、若闍多迦、若裴不略阿浮陀达摩语音信解，为裴不略阿浮陀达摩响声乐说。若于前修语音信解，则为前修响声乐说。一切众生诸根乐说，谓于信者信根乐说，于精进者进根乐说，于有念者念根乐说，于有定者定根乐说，于有慧者慧根乐说。如是广说一切诸根二万一千，菩萨乐说；欲行者根八万四千如来所知，彼一切根如来乐说，菩萨随顺相似乐说。彼一切根二万一千，嗔行者根八万四千如来所知，彼一切根如来乐说，菩萨随顺相似乐说。彼一切根二万一千，痴行者根八万四千如来所知，彼一切根如来乐说，菩萨随顺相似乐说。彼一切根二万一千，等行者根八万四千如来所知，彼一切根如来乐说，菩萨随顺相似乐说。彼一切根二万一千，如是名为乐说无碍。

“奋迅王，彼义无碍、法无碍、辞无碍、乐说无碍，如是一切以慧为根，依慧而住，随慧而行。菩萨依慧此等及余种奋迅而皆奋迅。又奋迅王，慧何为根？慧依何住？慧随何行？奋迅王，闻为慧根，慧依闻住，慧随闻行。又奋迅王，闻何为根？闻依何住？闻随何行？奋迅王，善知识者则是闻根，闻者则依善知识住，闻者随顺善知识行。又奋迅王，彼善知识以何为根？依何而住？随顺何行？奋迅王，彼善知识敬重为根，依敬重住，随敬重行。又奋迅王，如是敬重以何为根？依何而住？随顺何行？奋迅王，如是敬重深心为根，依深心住，随深心行。又奋迅王，如是深心以何为根？依何而住？随顺何行？奋迅王，如是深心不谄为根，依不谄住，随不谄行。又奋迅王，如是不谄以何为根？依何而住？随顺何行？奋迅王，如是不谄大悲为根，依大悲住，随大悲行。又奋迅王，如是大悲以何为根？依何而住？随顺何行？奋迅王，一切众生是大悲根，即依一切众生而住，随顺一切众生而行。何以故？奋迅王，菩萨为令一切众生得解脱故，发起大悲一切智心。

“奋迅王，此慧奋迅，菩萨发此一法门已，若于一劫若余残劫，异异法说无法妨碍。欲令众生不见其身而为说法，随意即能。欲令自身一切毛根皆出法声，随意即能。如彼众生深心修行，而为说法辩才乐说，如彼众生身色示现而为说法，他来斗争不能破坏。若诸外道五

通所知，咒读智论、若鞞陀智种种语论、月日星智、知阴阳智，或有梦相、或时地动，陀毗罗咒种种方术若鸟语等，以咒术力能令鹿等轮聚不行，咒龙、夜叉、乾闥婆等，或有王鹿余人身相、丰相俭相、星行戏相，一切皆知。复知世间种种技能，若书若印若数若算一切解知。歌声、乐声、打钹等声，节脉处等一切皆知。彼婆罗门外道之人，如是一切下劣种姓不得为说，彼菩萨如是一切皆悉现得。有慧菩萨此一切法能示他人，如是一切皆悉善解。如是菩萨善知咒毒，知咒毒处知种种论，如是一切菩萨悉知而不恼乱，一切众生不信此等以为正道。

“奋迅王，菩萨如是有慧奋迅：千万梵俱坐住语言，迭互相见，色色相示，语语相示。如是菩萨青等诸色，威德光明胜彼诸梵，于彼梵处心不希望，如是诸梵到菩萨所心生敬重。如是一切天宫殿中示现自在，菩萨于彼不生希望不生贪乐，生无常想苦无我想。菩萨如是随顺一切众生解脱。奋迅王，此慧奋迅。奋迅王，又彼菩萨以慧奋迅，于魔世界化作宫殿，胜彼魔宫过百千倍，令彼诸魔于胜宫殿希望贪著，生贪著已心则离慢；既离慢已，令住阿耨多罗三藐三菩提，然后乃为说无常法。奋迅王，彼慧菩萨一切处行，如是应知。以是慧故，若施、若受、若发愿等一切应知。以是慧故，若自护戒令他持戒，以是持戒愿取菩提，应如是知。以是慧故，若自修忍令他修忍，以是修忍愿取菩提，应如是知。以是慧故，若自精进令他精进，以是精进愿取菩提，应如是知。以是慧故，若自入禅三摩跋提，令他入禅三摩跋提，以是入禅三摩跋提愿取菩提，应如是知。以是慧故，若自摄法，若为他说如闻观察，应如是知。以是慧故，一切行来，一切威仪，一切放舍，应如是知。有慧菩萨以慧力故，则能具得一切善力。有慧菩萨慧自在故，得一切财。有慧菩萨慧奋迅故，于一切法得胜奋迅。有慧菩萨执慧力故，得佛相以庄严庄严。有慧菩萨于一切法，皆随顺行而无功用。奋迅王，譬如世人放箭向上，奋其势力自然向下，乃至到地而无功用。奋迅王，有慧菩萨亦复如是，以慧势力能放愿箭而无功用，自然如是堕在一切善法之地，谓道场地示现慧力。复有何力？以慧力故右手能动恒河沙等诸佛世界，以慧力故胜魔眷属胜魔庄严，乃至获得菩提所摄如来十力。何者为力？他不能胜，所谓天、人、阿修罗等，一切世间所不能坏。奋迅王，此是戒通智慧奋迅。奋迅王，如是戒通智慧奋迅，若有不种善根众生耳所不闻。奋迅王，若人得闻此法门已心欢喜者，如是之人于此奋迅则能奋迅。何以故？如是奋迅，一切声闻、缘觉所无。”

如奋迅王菩萨所问世尊说已，奋迅王闻心生欢喜，合掌向佛，一心瞻仰目不暂舍，而作是言：“一切众生以如是等四种奋迅而为奋迅，犹如如来应正遍知之所奋迅。”

尔时，世尊于奋迅王菩萨面前，出种种色微妙色华、种种妙香叶相盛华。时彼菩萨即取彼华，用散如来并众会中一切菩萨。如是散

已，彼众会中华所著者，一切悉为金相庄严，举众皆见。于虚空中百千诸天，如是见已，一切同声说言：“世尊，若有信解如是奋迅，既信解已，能发阿耨多罗三藐三菩提心者，如是之人以佛庄严而自庄严。何以故？以如是等一切奋迅，悉皆随顺一切智心。又复世尊，若有未发菩提心者，何处当得闻如是等不可思议奋迅法门？”

尔时，世尊赞彼空中诸天子言：“善哉！善哉！”赞善哉已，告奋迅王大菩萨言：“奋迅王，我念过去然灯如来，次前复有第七如来，名普无垢净光明王，彼佛如来广说如是奋迅法门。时有菩萨名具境界，以此法门问彼如来。如来既说此法门已，八千众生得此奋迅，又复更得无生法忍。会中众生三万二千，一切皆发阿耨多罗三藐三菩提心。我于尔时得此奋迅，次后复于燃灯佛所菩提满足。如是，奋迅王，我涅槃已，若有能听此法门者，彼人为取菩提之心，必定速得无生法忍。”

说此奋迅法门之时，会中众生三万二千诸天及人，一切皆发阿耨多罗三藐三菩提心。彼诸天子雨种种华，百千天乐供养如来。以佛力故，彼乐音中出妙声言：“若有众生胜信解心诸根猛利，信解佛法慧行成就，善知识摄宿种善根，大悲怜愍一切众生，尔乃得闻如是法门，闻已信解受持读诵。”

尔时，奋迅王菩萨白佛言：“世尊，如来十力、四无所畏、四无碍智，如是十八不共佛法，世尊所有。如是十力，菩萨有不？此四无畏，菩萨有不？如是十八不共之法，菩萨有不？”

佛言：“皆有。奋迅王，一切菩萨于八地中，作业成就乃得九地，谓具辩才得不退忍，摄善方便慧波罗蜜。奋迅王，菩萨如是具足十力、四无所畏，成就十八不共之法乃得九地。奋迅王，何者菩萨十菩萨力？一者、发起一切智心，坚固深心大慈满足，不舍一切诸众生力；二者、不求一切财利供养名闻，一切世间希有之事不贪乐力；三者、满足大悲之心，一切佛法清净信解法究竟力；四者、勤心不生懈怠，增上精进不离忆念威仪行力；五者、不动安住三昧，远离二边顺因缘法，一切见行皆寂静力；六者、菩萨一切分别及不分别戏论疑网皆悉灭故，满足般若波罗蜜力；七者、成熟一切众生，无量生死摄取未足，摄取世间一切善根，世间生死信解如梦，于生死中不疲倦力；八者、菩萨观察法性本无众生，本性无命无富伽罗，信解诸法不生不出，能于轮法信解不生，一切轮法不生忍力；九者、入空无相无愿观解脱门，于声闻乘、于缘觉乘解脱知见解脱门力；十者、菩萨于甚深法而能自知，观察一切众生心行，知无障碍满足之力。奋迅王，此是菩萨十菩萨力。

“奋迅王，何者菩萨四无所畏？一者、菩萨一切闻持，得陀罗尼忆念不忘，不畏大众而为说法。二者、菩萨信解诸法则得忍力，不生不出信解法已得无生忍，得法忍已入空无相无愿之法，不畏大众而为说法。三者、菩萨于声闻乘观解脱门，辟支佛乘信解知见，信一切入

亦信解脱，如诸众生病药所须，如是而知一切众生诸根成熟，亦如是知如应说法，菩萨如是不畏大众而为说法。四者、菩萨离大众畏，尔时无心，东西南北若有人来，难问我者我不能答，不畏不能不见畏相；菩萨如是一切众生，若有问难皆悉能答，如彼问难相应说答无所怖畏，能断众生一切疑心，不畏大众而为说法。奋迅王，此是菩萨四无所畏。

“奋迅王，何者菩萨十八不共菩萨之法？奋迅王。所谓菩萨无有人教，而舍财物以用布施，又复初生即能起心舍财布施。又若魔王作佛身来说如是言：‘若人布施则入地狱。’而彼菩萨不生慳嫉。又复菩萨一切自物皆用舍施，施心转胜，如是布施是菩提因不望果报，皆愿回与一切众生。奋迅王，此是最初菩萨不共法。

“奋迅王，又复菩萨无有人教，而彼菩萨如来未出无受戒处，于波罗提木叉正行希学，不舍此不共法。菩萨在家如说护戒，虽不出家复无教者，如波罗提木叉说学，失命因缘不舍戒学，一切戒学随顺菩提，愿断一切众生破戒。奋迅王，此是第二菩萨不共法。

“奋迅王，又复菩萨一切众生骂詈毁辱割其身分，不生嗔心。若贫穷人、若栴荼罗、若逼迦婆、若工作师种种骂辱，而菩萨心亦不生嗔，于彼众生慈心普覆，有大势力，能加其恶而不作恶，如是菩萨为随顺法。如是众生乃是菩萨佛法因缘，如是菩萨于彼众生，令心寂静为作饶益，著忍辱铠起勇猛力。奋迅王，此是第三菩萨不共法。

“奋迅王，又复菩萨设多衰恼，而勤精进头陀不舍不生劣心。见声闻乘入于涅槃，见生死苦而心不求声闻涅槃；见缘觉乘入于涅槃，见生死苦心亦不求缘觉涅槃；见佛世尊一切义成一切佛法，所作已办入于涅槃，自未有力知诸众生，未满佛法而心不劣起精进心：‘我亦如佛入于涅槃。’奋迅王，此是第四菩萨不共法。

“奋迅王，又复菩萨若转轮王、若帝释王、若魔自在妇女围绕，有天歌乐一切妙乐皆悉具足，于中入禅修习无量而心乐于离欲之法，不随异语，于生死中心大怖畏，于淫欲法生不净想，于诸阴中生于怨想，于诸界中生毒蛇想，于诸入中生空聚想，于自眷属生于死想，于妇女中生冢墓想，心常乐求摄取正法，希望见佛亲近供养，亦常不毁一切众生，能令伎乐弦歌等中出禅分声，魔既闻已遮则声灭。以彼菩萨前善根力，于虚空中即出佛声、法声、僧声。又彼菩萨舍弃国土富乐自在，入于山林。奋迅王，此是第五菩萨不共法。

“奋迅王，又复菩萨一切世间诸禅定中，不生坚想，有智慧行，远离使见取义取法。如是菩萨乃至梦中，不生自见，不生他见，不生法见。此不共法，若有自见则有使见，以无自见则离疑网。魔王波旬不能令其生于疑见，若有疑见则离于法。菩萨如是，成熟众生饶益众生，不顾自惑无有疑心。奋迅王，此是第六菩萨不共法。

“奋迅王，又复菩萨离一切生无有功用，身业清净远离杀生，于诸众生施与无畏。若手若块若杖若刀不加众生，远离刀杖手不执持。

自财知足，于他所有至一把草不与不取，设宝满地不生贪心。宁失身命，终不邪命而取财利衣服饮食，常行梵行乃至不生欲食之心。菩萨如是离欲斗争及诸烦恼，不行淫欲因缘恶法。是彼菩萨不共法处，先思量已身业成就。奋迅王，此是第七菩萨不共法。

“奋迅王，又复菩萨清净口业，实语真语如说而行，不诳如来。天、龙、夜叉，若乾闥婆、若阿修罗、若迦楼罗、人非人所，口不恶言，不坏眷属自眷属爱，不恶口语，爱语、软语、不粗犷语、作相应语、作利益语，常于先语面状笑语。如是菩萨所有恶语、恶口说语、他不爱语、自他热语一切不说，不违心语，若无言无，若有言有。如是净语，深心净信得不共法。一切生处常得如法法相应语，以如是语能令一切不净心人心得清净，心清净者则能供养。彼以深心不共法故，常得实语，有所言说如语不异，随其所说一切皆尔。奋迅王，此是第八菩萨不共法。

“奋迅王，又复菩萨自心自在，不贪不瞋，正见不邪。如是菩萨，菩提之心、无与等心不忘不失，远离一切谄心、曲心、浊心、乱心，昼夜常行清净慈心。奋迅王，此是第九菩萨不共法。

“奋迅王，又复菩萨即于生时具足世智，若咒若诵若医若药，书印数算一切皆知，一切师术皆悉现知，一切伎能诸论善知。于世间法出世间法，不因他知自智成就，不观他面。一切天人观察菩萨有如是心：‘若菩萨说，我闻修学。’奋迅王，此是第十菩萨不共法。

“奋迅王，又复菩萨若以种种利益众生，能为他人疗治病患，不求财利供养名称，大悲为首疗治世间，然后令住出世间法。如是菩萨心常忆念：‘如是恶界苦恼众生，以何方便何时何法令彼得脱？既得脱已毕竟断灭一切烦恼，所谓断除一切苦恼令住涅槃毕竟之乐。’奋迅王，此第十一菩萨不共法。

“奋迅王，又复菩萨心不希愿帝释天王、若梵天王、若转轮王统王国土，而亦得之。彼菩萨如是不求帝释、天王、梵世界处、转轮圣王统王国土，虽不希望自然而得。又彼菩萨不为色故求于梵行，不求身色，不求国土，不求眷属，不求财富，不求名闻，不求色相，如是梵行虽不希望具足而得。奋迅王，此第十二菩萨不共法。

“奋迅王，又复菩萨住好国土富乐之处不知念佛，而有诸天曾见佛者教令忆念，先呵责已如是教言：‘此法应作，此不应作。若作此业则得菩提。当如是愿，汝如是作如是行已，调伏诸根未来当得阿耨多罗三藐三菩提。’彼天如是教令忆念，于菩提道不越不舍。奋迅王，此第十三菩萨不共法。

“奋迅王，又复菩萨何等恶人，多恶多嗔垢心众生于菩萨所不能加恶，菩萨于彼亦不报恶。彼大恶人多嗔心人，若身若口若心意恶，若见菩萨心即清净。何以故？菩萨于彼不报其恶，置彼恶者住正法中令心清净。彼虽作恶，以菩萨力不入恶道。何以故？以彼菩萨本来如是不共法戒清净满足，有如是心：‘若有众生，若以身业、若以口业、

若以意业于我起恶，愿彼众生不入恶道。’以有戒故随愿成就。奋迅王，此第十四菩萨不共法。

“奋迅王，又复菩萨，若有众生不信慳贪邪见懈怠，不信业报，离佛法僧，若于沙门若婆罗门，心不清净，见则不礼亦不供养不生敬重，亦复不生希有之心。如是众生若见菩萨即住威仪，若闻语说心即清静，起迎礼拜供养恭敬生希有心。何以故？以彼菩萨之势力故。奋迅王，此第十五菩萨不共法。

“奋迅王，又复菩萨，若有天龙，若有夜叉、若乾闥婆，若有仙人、若婆罗门，于菩萨所生于师想，诸世间中为师首者皆师菩萨。以通力故，能令世间天、龙、夜叉、若乾闥婆、若诸仙人、若婆罗门皆来归敬，彼既来已归菩萨语，礼拜菩萨供养恭敬，是等皆悉先为归首；既见菩萨，即便礼拜恭敬尊重，生尊胜想深相敬信。奋迅王，此第十六菩萨不共法。

“奋迅王，又复菩萨随生何处于何种姓，若村若城或人集处，彼处众生善法增长断不善法，成熟众生摄取正法。生正见家，父母正信正行正入。随何方处何处人中，菩萨生彼师中最胜，彼处众人供养恭敬，无一众生入恶道者。如彼菩萨善根所摄，彼处众生死则生天若生人中。奋迅王，此第十七菩萨不共法。

“奋迅王，又复菩萨随顺一切菩提分法，胜通满足，一切诸魔不能得便。奋迅王，此第十八菩萨不共法。

“奋迅王，不共法者。云何不共？一切佛法随顺正行，故名不共法。”

尔时，奋迅王菩萨白佛言：“世尊，希有世尊！如来乃能与诸菩萨，大法光明能作无量殊胜光明。如我解佛所说法义，若有菩萨闻此法门，一经于耳得清静心，余修多罗则不能尔。若得闻已受持读诵，彼人则摄一切佛法。若人能于此法门正观察者，则为已修一切佛法。于此法门所有法忍，得随顺忍。若有能行此法门者，一切佛法皆已修行，应如是知。又复世尊，若人不离此法门者彼则得通，如是菩萨既得通已当住道场。”

佛言：“如是，如是。奋迅王，如汝所说，若人不离此法门者彼则得通，如是菩萨既得通已当住道场。奋迅王，过去往世然灯如来前复久远有佛，号曰波多婆那，次前又远复有如来号曰提沙，次前又远复有如来号曰弗沙，次前久远复有如来号波除大，次前久远复有如来至佛世尊号曰天王，出现于世。尔时，于彼天王如来佛之世界，一切充足安隐丰乐，天人炽盛地平如掌，以毗琉璃、阎浮檀金、钵头摩华种种间错。其地柔软，触力犹如迦遮邻提。人民安乐如兜率陀，所须饮食随念速至，身色形相戏乐之处，及诸宫殿与天不异，惟天与人二名不同。

“彼三千界中更无有王，唯有如来故名天王。譬如转轮圣正坐饶益座，以法治世非是非法；天王如来亦复如是，坐于法座师子座上，

为诸天人如应说法。欲说法时，东西南北纵广八万四千由旬大众充满。尔时，如来说法音声遍三千界，彼诸天人供养恭敬，礼拜如来，尊重如来，所谓无上佛法供养。彼无下劣信解众生，惟信佛法。如是彼处无有声闻、缘觉之名，岂有乘处？况复有行？惟有清静大菩萨众围绕世尊！彼处清静无有女人，耳初不闻欲行之名。彼诸众生皆悉化生于莲华中结跏趺坐。如是化生，彼诸人天受三种乐。何等为三？见如来乐，及闻法乐，观察正法离欲之乐。彼诸天人心不放逸，具足财富迭互说法，常勤精进，寿命长远无量无数，业尽退时不生余道，生佛世界。

“如是菩萨临欲退时，上升虚空高七多罗，出声说言：‘我今于此佛世界退。’无量菩萨闻彼声已，皆共和合而来集会，观彼菩萨示于法忍，作如是言：‘于何法退？于何法生？’彼退菩萨，于彼菩萨集会众中，说如是言：‘大仙，当知非有少法若退若生。如来所觉一切诸法，皆无有退皆无有生，非色有退，非色有生，非受非想非行非识有退有生。第一义中无我无命，亦无众生无富伽罗，无人非人若退若生。世尊正觉，一切法空无相无愿，彼空无相无愿法中无退无生。如来世尊，证离欲际，证无为际，证不生际，非不生际有退有生。无退因缘，是故不退；无生因缘不相和合，是故不生。如是因缘无有和合，无退无生。’如是菩萨，为菩萨众说此法已然后乃退。彼退菩萨如是退已，无身无皮，无块无可知见，退已复到余佛世界现见如来。

“天王如来并诸菩萨，不著袈裟，皆著清静妙好天衣。彼不学戒而悉调顺，一切皆得无生法忍。为菩萨众不广说法。何以故？彼众一切少闻多解，以利根故。若彼如来为诸菩萨众会说法，既说法已彼处彼处乃至彼佛世界之中，若人若天一切皆知，彼彼众生有得忍者，或有获得陀罗尼者，或有众生得辩才者得三昧者。时彼如来名闻十方。

“奋迅王，天王如来，为诸天人广演分别如是法门，有诸菩萨七万二千皆得授记。彼有菩萨名曰无垢清静光明，不得授记，有如是念：‘此诸菩萨威仪无碍，忆念意行，若慧若通得陀罗尼及得三昧，不生于我皆得授记。若彼得记，我何因缘不得授记？’天王如来，知彼菩萨心所念已，而语之言：‘汝未来世当得授记。善男子，于未来世然灯如来应正遍知，为汝授记。’无垢清静光明菩萨，闻是语已心生欢喜，上升虚空说如是言：‘若未来世恒河沙劫，然灯如来出现于世，我到彼时得一切智，如来真语。如来实语不异语故！’

“奋迅王，汝意云何？彼时无垢清静光明大菩萨者，岂异人乎？莫作异观！何以故？我是彼时无垢清静光明菩萨。奋迅王，次后如来名波除大，我于尔时供养彼佛，彼佛为我说此法门，我既闻已受持读诵，尔时获得光印三昧。次后如来名曰弗沙，我于尔时供养彼佛，闻此法门受持读诵，尔时获得光明三昧。次后供养堤沙如来，闻此法门受持读诵，复得毗卢遮那三昧。次后供养波多般那如来世尊，闻此法门受持读诵，得柔顺忍。次后供养然灯如来，尔时我得无生法忍。我

时得此四种奋迅，谓戒奋迅、通奋迅、智奋迅、慧奋迅。奋迅王，此门如是应当善知：若有何人，若善男子、若善女人行菩萨行，今于我所闻此法门受持读诵，一切速疾得通菩萨，得此奋迅；得奋迅已转大法轮，于此无上光明法中得智光明。”

如来说此法门之时，会中一万六千菩萨一切得忍，复有一万二千众生发菩提心。三千大千世界震动，百千诸天皆赞叹言：“若此法门所在之处，则为有佛。若有深种善根众生，乃能得闻如是法门。”

尔时，慧命阿难陀白佛言：“世尊，当以何名名此法门？如是法门云何受持？”

佛言：“阿难，此法门者名《四奋迅神通法门》，如是受持。”

世尊说已，奋迅王菩萨，慧命阿难陀，并诸天人及乾闥婆、阿修罗等，闻如来说，欢喜赞叹。

宝星经序

唐释法琳撰

宝星经梵本三千余偈。如来初证觉道，度目连身子，及降伏魔王，护持国土，说此经也。自像化东渐，绵历岁时，三轮八藏之文，四树五乘之旨，显神光于石室，流梵响于清台，虽鞞译相寻尚多疑阙。我大唐皇帝，乃圣乃神，允文允武，乘机抚运，拯溺救焚，反上皇之风，行不言之信。去泰去甚，既揜顿于八弦；无事无为，乃朝宗于万国。瀚海天山之地，尽入提封；龙庭凤穴之卿，咸沾声教。仁踰解网，治踵结绳。大德闲闲，外齐八则；小心翼翼，内整四仪。临赤县而溢慈悲，寄玄扈而敷弘誓。每以诸有非乐，物我俱空，眷言贞要，无过释典。

有中天竺国三藏法师波颇，唐言光智，誓传法化，不惮艰危远涉葱河，来游真丹。以贞观元年景戌，泊于京辇。既登上席，爰懋锦衣，有诏所司，搜扬硕德，兼闲三教，备举十科者，一十九人。于大兴善寺，请波颇三藏，相对翻译。沙门慧乘等证义，沙门玄奘等译语，沙门慧明法琳等执笔，承旨殷勤详覆，审名定义，具意成文。起贞观三年三月，讫四年四月，凡十卷十三品，用纸一百三十幅，总六万三千八百八十二言。归命一切佛菩萨。

宝星陀罗尼经卷第一

降魔品第一

如是我闻：一时，婆伽婆住王舍城竹林迦兰陀池边，与大比丘众一千人俱，皆阿罗汉，诸漏已尽，所作已办，舍诸重檐，逮得己利，尽诸有结，皆得正知，心善解脱。及大菩萨一万人俱，其名曰：持须弥顶童真、水智童真、地智童真、胜智童真、空智童真、明智童真、电智童真、文殊师利童真、降伏胜童真、水天童真、无垢童真。弥勒菩萨摩诃萨等而为上首，一切皆得瞿提陀罗尼三摩提，具足一切法无障碍智，于一切众生其心平等，过诸魔界，善入一切如来智境界，具足大慈大悲善解方便智，皆随佛住王舍大城竹林迦兰陀池边。

尔时，王舍大城有二外道，聪慧明达过十八明处，与五百人俱，一名优波底沙，二名俱利多，而为上首，共相谓言：“契同甘露！”

尔时，长老阿说示（唐言马胜）于日初分著衣持钵，入王舍大城

乞食。时优波底沙，见阿说示生希有心：“我未曾见如此沙门威仪庠序，更无有人如彼比丘。我应往问，今此长老以谁为师？依谁出家？依谁求法？”

尔时，优波底沙即往彼所到已问讯，种种语已却住一面，白长老阿说示言：“以谁为师？依谁出家？依谁求法？”

尔时，长老阿说示答优波底沙言：“有释种子，勇猛精进能大苦行，于一切处最上自在，已度生死无边大海，今以大悲欲度众生，号为佛，觉悟众生干竭苦海无与等者，我常归依求无垢法。”

优波底沙言：“彼师为汝说何等法？以何教示？”

时，长老阿说示答优波底沙曰：“善哉！快哉！谛听！谛听！当为汝说。”便说偈言：

“烦恼业因缘，世间如是转；
烦恼业不生，导师如是说，
生老死定坏，彼解脱无上！
如彼勇牛王，如来自悟说。”

尔时，优波底沙闻此法已，远尘离垢，法眼清净，得须陀洹果，而说偈言：

“我证解实法，永竭生死河，
所谓如来说，难得甘露藏。
众生得息苦，智慧能断除，
诸法种种修，能作究竟道，
行此究竟道，得无等涅槃！”

尔时，优波底沙说此偈已，白长老阿说示言：“长老，汝师如来阿罗诃三藐三佛陀今在何处？”

阿说示答言：“长老，我师如来，今在王舍城竹林迦兰陀池边，与大比丘众一千人俱——本是外道值佛出家。”

优波底沙言：“我今辞善知识及诸眷属诣佛出家。”

尔时，优波底沙礼阿说示足，右绕三匝辞已而去，往俱利多所。

时，俱利多见优波底沙从远而来，见已白优波底沙言：“仁者，诸根清净，颜色怡悦，必得甘露。”

优波底沙言：“如是，长老，我于今者得甘露法。谛听！谛听！今为汝说我所得法。”

尔时，俱利多即从座起，偏袒右肩，右膝著地，合掌恭敬，便说偈言：

“说此吉祥无忧道，此道疾度三界海，
分别诸阴大怨贼，乘此道已不还有。”

尔时，优波底沙以所闻偈，即为说之：

“烦恼业因缘，世间如是转；
烦恼业不生，导师如是说，
生老死定坏，彼解脱无上！
如彼勇牛王，如来自悟说。”

尔时，俱利多闻此偈已心大欢喜，重更赞叹请说前偈：

“苦灭寂无垢，牟尼说此法，
一切烦恼灭，诸见无知断！
秽恶有为空，无我不可信，
重说无垢句，我闻得涅槃。”

尔时，优波底沙即便重为说所闻偈：

“烦恼业因缘，世间如是转；
烦恼业不生，导师如是说，
生老死定坏，彼解脱无上。
如彼勇牛王，如来自悟说！”

尔时，俱利多闻此偈已，远尘离垢，法眼清净，得须陀洹果，复以偈赞：

“如此真行法，度流之疾船，
此智息三苦，能度于世间。
诸阴烦恼魔，知此能调伏，
解脱离怨诤，干竭于苦海。”

时，俱利多言：“今佛世尊住在何所？”

优波底沙言：“长老，我闻世尊在王舍大城竹林迦兰陀池边，与大比丘僧及菩萨众俱。我今定当与汝俱往至世尊所，求佛出家。”

俱利多言：“如是，长老，可语弟子往世尊所相随出家。”时，优波底沙与俱利多往自众所。

尔时，恶魔于一念顷，闻中摩伽陀国有二外道，优波底沙共俱利多及诸眷属，聪明具足名称广远，是善丈夫，欲于沙门瞿昙法中出家学道。彼作是念：“呵奇哉！若此二人于彼沙门瞿昙法中而出家者，空我境界。我应至彼二丈夫所，破其出家令著恶见。”

尔时，恶魔于一念顷从自宫没，作阿说示形相威仪，便于中道现二人前，作如是说：

“如我先所说，试汝非决定，
如汝意所行，宜速受欲乐。
一切黑白业，因果悉皆无，
无生老病死，亦无于后世，
福非福果业，无有此因作。
释子为利说，汝莫信故去！”

尔时，优波底沙、俱利多闻此说已咸作是念：“此恶魔来欲坏我等出家之事。”

尔时，优波底沙顾谓弟子作如是言：“汝等今者当忆世间所有过患。”便说是偈：

“众生为老逼，死苦之所缠，
应当断彼二，决定当出家。”

尔时，俱利多即以偈颂答魔王曰：

“知无上善智，持法灭三苦，
汝说不断贪，我智终不动。
如是坚固心，于余人所无，
我等出苦轮，正智所不惑。
勿假师子像，而作野干声！”

尔时，见谛诸天住虚空中赞二丈夫言：“善哉！善哉！汝二丈夫，于一切众生中最为上首。此道胜妙，于一切世间最为第一。此道息一切苦，此道入一切如来行处，此道一切诸佛所共称扬，所谓依佛出家。”是时，恶魔心生忧苦便没不现。

尔时，优波底沙共俱利多，自观己众唤诸弟子作如是言：“汝等应知，我等欲度老死苦海故依佛出家。汝等若不乐佛出家，可于此住。”

时，五百弟子咸作是言：“我等解法，皆依师学。二师决定大处出家，二师所依出家处，我等随师，亦依彼众出家学道。”

尔时，优波底沙及俱利多，与五百徒众欲往佛所。是时，恶魔知彼事已，于王舍城外化作大坑，深百由旬，令彼二人不得往诣佛世尊所。是时，如来以神通力，令彼二人不见大坑直道而去。是时，恶魔于二人前，复更化作高峻大山，高千由旬，峻岭坚岨无有穿缺；于彼山中复更化作一千师子，威猛可畏。是时，世尊以神通力加彼二人，不见大山及彼师子，又无威猛可畏之声，直道而往诣世尊所，及彼无量百千之众，围绕供养说法之处。

尔时，世尊告诸比丘：“汝等见彼二善丈夫为众上首，与诸徒众来至我所，汝等见不？”

—诸比丘答，咸言我见。

佛言：“此善丈夫及诸徒众我边出家，一人于我一切声闻弟子之中智慧第一，一人于我声闻众中神通第一。”

是时，众中有一比丘，以偈赞曰：

“此二聪睿眷属俱，利益上者佛已记，
具智神通无所畏，故我承迎二丈夫。”

尔时，彼比丘说此偈已即从座起，与无量比丘众及出家优婆塞等迎彼二人，善言问讯。

时彼二人往到佛所，到已顶礼佛足，右绕三匝住立佛前，白佛言：“世尊，我等今者求佛出家，受比丘戒修行梵行。”

佛言：“善男子，汝二人名字何等？”

优波底沙言：“底沙是父，舍利是母。我今从母，故名舍利弗。父母今者听我出家。”

俱利多言：“憍陈如是父，目伽罗是母。我今从母，故名目伽罗。父母今者听我出家。”

佛言：“汝等二人及诸眷属，可于我所出家具足修行梵行。”作是语已，时此二人成具足戒。五百徒众未久之间，亦同二师得具足戒。

尔时。恶魔即自化身作摩醯首罗像。住立佛前说如是偈“

“世间利智能议论，方便胜智到彼岸，
彼等悉来顶礼我，我是彼等大导师。
瞿昙弟子并眷属，一切宜速归依我，
我今为汝当广说，安隐寂灭善妙道。”

尔时，世尊以偈答曰：

“汝所说道趣恶道，众生行者沉苦海，
我道能令动不动，世间苦海悉干竭。
何故惊慢耐无耻，复作矜高野干声？
我今退破汝魔事，不复于我能所作。”

尔时，恶魔变摩醯首罗像即没不现，复作梵天王像住于佛前，说如是偈：

“烦恼有业芽，智慧已斩除，
何故强于此，勤苦利众生？
于世无自在，以无堪道器，
牟尼病已除，宜速入涅槃。”

尔时，世尊即以偈颂报魔王曰：

“我观诸众生，过彼恒沙量，
以大慈悲力，教化令解脱。
上中下众生，令世间解脱，
众生解脱已，然后乃涅槃。
何故以恶惠，诈谄请于我？”

尔时，恶魔心生忧悔，于佛前没还自天宫，入忧恼室默然而坐。当于尔时一刹那顷，魔诸眷属互相推问：“今我大王以何因缘，入忧恼室无人知者？”

尔时，魔王五百妓女种种庄严，各持华鬘、末香、塗香，鼓天伎乐五百音声，第一微妙歌舞戏乐，甚可爱乐集魔王前。尔时，魔王悲啼握手抑止悲声，如是作已暂时默住。诸妓女等复更歌舞，作欣悦状令魔欢喜。尔时，魔王举手大叫作如是语：“莫声！莫声！”乃至七返。诸伎女等默然而住。

尔时，魔宫有一妓女名电可意声，至魔王所曲躬合掌，说如是偈：

“汝今居自在，如见死相忧，
为是担重担，今乃生怖懼？
谁有胜力怨，而忧不欢悦？”

是时，魔王说偈报曰：

“我有大怨调伏心，善学幻术释迦子，
我无方便能坏彼，如是不久欲界空。”

时，彼妓女便说偈曰：

“大家方便甚无量，勤力坏彼必无余，
三有长缚谁能解？贪海沉没谁能竭？”

是时，魔王说偈报曰：

“檀那及苦行，悲愿为胃索，
持空无相弓，器仗中第一，
能断于生死，诸有尽无余。
以空为城林，弟子居山谷，
精勤常修定，尽诸有过患，
方便神通力，慈悲为伴助。

优波俱利等，牟尼悉降伏，
于彼三界中，方便善调摄，
欲空我境界，一切悉无余。”

尔时，五百妓女于魔王边，闻叹如来所有功德，即得菩萨三昧，名离一切相电光三昧。时彼五百妓女，即以天上诸庄严具，雨天香华及天伎乐，遥向佛所供养世尊，于竹林上犹如雨下。以得如来神力加故，令彼天女遥见世尊及诸徒众，见已欢喜生清净信第一爱敬。

尔时，众中诸比丘等，见竹林间有如是相，便生疑怪，白佛言：“世尊，我等昔来未曾见闻于竹林间如此瑞应香华等雨，将非舍利弗、目犍连等现此相耶？何因缘故睹斯希有？”

尔时，世尊告诸比丘：“非此二人现神通相。此乃天魔五百妓女，于彼魔宫雨此香华及庄严具，持供养我；不久来此，皆于我边得受阿耨多罗三藐三菩提记。”

时，彼魔王五百妓女遥闻佛记，转复欢喜生清净信，以净信故即得不退菩提心三昧。

尔时，魔王五百妓女著一肩衣，右膝著地，于魔宫中向佛方面，合掌恭敬说如是偈：

“一切世间盲无眼，唯佛一人名见者，
能竭人天渴爱河，如来自度及一切。
我等云何速成佛？人天恭敬能说者，
女身可厌宜应舍，速近牟尼闻正法。
如来最上神通智，开示我等为胜导，
持彼无上觉支宝，无垢妙说如净灯，
胜力降魔无等伦，觉悟我等当受记。”

尔时，魔宫五百妓女，从座而起至魔王所，异口同音而说是偈：

“如来胜德终不动，云何于佛而生嗔？
此身众苦之所逼，更起醉慢而自塗。
应舍此嗔决定信，拔彼生死憍慢泥，
众生体性佛所知，我等应往慈悲所。”

尔时，魔王念彼诸女，生于如是增上恶意：“我今应以五种之缚，缚此五百诸妓女等，令住于此不往佛边。”此五百女以得如来念力加故，而彼魔王所不能制。

尔时，五百诸妓女等，于彼魔宫欲往佛所。当发足时，魔甚嗔恨，便作是念：“我今自以境界之力制此诸女。”即起非时毗岚大风遍满虚空，欲令诸女迷失诸方，还住我宫不见瞿昙。以佛力故，尚不能起微细之风，乃至不能动一毛端，何况无量！

尔时，魔王转增忧苦，心生悔恼悲泣高声，唤其诸子及其眷属，一切魔宫大声遍满，而说偈言：

“爱子眷属悉皆集，我心热恼如毒树，
坏我神通境界力，美言谄幻释师子。”

尔时，魔王所有男女并诸眷属，闻此音声悉皆驰赴住魔王前。彼眷属中有一魔子名曰胜智，合掌住立说如是偈：

“此非劫烧非死相，何故种种忧恼生？
此无大力能胜怨，何故异智似愚痴？”

尔时，魔王说偈报曰：

“今此释迦子，坐彼林树下，
现前有大怨，云何汝说无？
彼谄有胜力，令我心荒怖，
我军并我子，如炭入炽火。
名称胜丈夫，聪睿多才艺，
现集及未集，今悉归依彼。
我怨以诈亲，谄智力甚诤，
高名胜智人，悉为法钩牵。
今此诸侍女，于我无悲心，
见舍昔所爱，尽往沙门所。
指我以为证，今日归依彼，
一切三有地，谄幻悉令空。
彼虽有大力，我破令作灰，
我辈一切众，应当勤所作。”

尔时，魔王一切诸子，并其内外所有眷属，悉皆合掌咸作是言：“我等一切悉皆严驾，以神通力而自加被，以此境界示彼令知，退彼释子令碎如灰。若当胜者，我等善好。若不胜者，当归依彼。我等往昔大军围绕，诣菩提树面睹释子，独一无二以神通力，我等军众尽皆退坏，况复今时无量徒众悉皆成就！”

时魔报言：“且去子辈！若能杀彼沙门瞿昙，当须回还。若不能者，亦须还宫而自守护。”

是时，魔王即以左右十二万众，复过此数乃至八万四千由旬，所有兵众悉皆遍满。复以迅疾神通之力，现大黑风，吹大黑云，雨大炬火，悉皆遍满一切四洲。复以手击须弥山王，一切四洲悉皆震动。复出最恶可畏之声，须弥山王及诸山王，大地峰石一切惊动。由此震击小大池河，及大海水悉皆波浪。一切诸龙、大龙、夜叉、大夜叉，见

是事已踊上虚空。此诸魔众住须弥顶，复掷大石等由旬量，于中摩伽陀国如大暴雨振击惊动。复雨刀、杵、挝、大石、月钗、曲撩、短槊、铁把、虎牙大棒及大月箭犹如雨下。

尔时，世尊即入碎魔军场三昧，于虚空中所有兵仗及大炬火变成华雨，所谓优钵罗华雨、波头摩华雨、俱物头华雨、分陀利华雨、曼陀罗华雨、摩诃曼陀罗华雨，雨中摩伽陀国。复变可畏惊动之声，为彼种种微妙音声，所谓佛声、法声、僧声、波罗蜜声、神通声、阿毗跋致声、受职声、四魔退声、往菩提道场声，乃至取俱声不取俱声。复变此四洲一切大地所有药草丛林山石土地皆成七宝。是时，世界无有风尘一切恬静。

尔时，世尊现其身相过于梵世自在而转。从其身分一一诸相，乃至无见顶相出大光明，遍照三千大千世界普皆大明。是时，三千大千世界所有天、龙、夜叉、乾闥婆、阿修罗、伽楼罗、紧那罗、摩睺罗伽、薜荔多、毗舍闍、鸠槃荼、人非人等，地狱、畜生、阎罗世界，如是一切悉见世尊及大光明。是时，天、龙、夜叉、人非人等，各与若干百千眷属，地及虚空来诣佛所散华供养，到已右绕赞叹礼拜。是时，地狱及诸畜生、阎罗世界，无量百千阿閼毗俱胝那由他等，各自忆念先种善根，称南无佛陀，恶趣终已生于天上。

尔时，魔王所有诸子二万二千并诸眷属，见佛神变如是相已，各于佛所得希有信，共彼五百魔王妓女礼世尊足，合掌恭敬以偈赞叹：

“妙色净身映智海，名称高远无不至，
金色光焰类须弥，我等无怙归依彼。
众生失道无能见，如来智日能明照，
养护众生永不退，亲导我等归依彼。
积集智藏富无量，解脱心性如虚空，
慈悲润泽随机说，一切成就归依彼。
生死旷野难济越，如来解脱能开示，
巧说因果能显了，住第一慈归依彼。
境界幻炎如水月，无智翳闇著诸欲，
佛为医王救世间，是故我等归依彼。
佛真法桥渡四流，富有七财恒资给，
世尊正道示世间，大悲我亲应供养。
我等恶意向如来，今悉忏悔第一觉，
所有诸恶能永断，愿佛受我最上依。
我等悉舍魔部党，共发无上菩提心，
普请一切众生类，菩提大愿至无余。
佛能显示我胜行，如我所行波罗蜜，
如来所说无异说，几法具足到菩提。
所散佛华成华盖，示现无量诸刹土，

我今顶礼两足尊，愿涅槃乐利世间。”

尔时，一切魔诸眷属并魔妓女，各持天华遥散佛上。以佛世尊神力加故变成华盖，遍覆十方无量俱胝那由他百千恒河沙诸佛刹土。复过此数变成华盖，遍覆十方现在诸佛，于虚空中邻盖佛顶。时彼魔王五百妓女并诸眷属，一切悉见十方无量阿僧祇诸佛刹土安隐说法，及见彼佛眷属围绕众坐微妙威仪炽盛，及见华盖住上虚空邻覆佛顶。彼诸佛皆同一色，形相示现悉皆同等，唯彼世尊在师子座，种种眷属功德庄严所现不同。又闻诸佛音声遍满句义说法。此魔眷属以佛世尊念所加故，得见如是神通变化；既见此已，第一爱乐生清净信，礼佛足已佛前听法。

尔时，魔王所有诸子，并诸眷属十二频婆罗，退还魔宫白魔王言：“我等广作如此恶事，乃至不能毁坏瞿昙一毛孔等。”尔时，复有二万诸魔归依如来，佛前听法。

尔时，魔王既失威德，复大嗔怒发如是言：“我于今日无异觉意！乃至不能诛灭释种所生之子令彼灭坏，云何此住？”便还魔宫，入忧恼室，默然而坐。

宝星陀罗尼经卷第二

本事品第二

时，魔妓女及魔王诸子并其眷属白佛言：“希有！婆伽婆，我等今者志求如是相、如是乘、如是辩才智智慧、如是神通大悲方便。希有！婆伽婆，具足如是智慧方便神通等法。婆伽婆，具足几法，能令菩萨摩訶萨远离恶友，速得阿耨多罗三藐三菩提？”

佛言：“善男子，若菩萨摩訶萨能具四法远离恶友，速疾当得阿耨多罗三藐三菩提。何等为四？一者、不取，二者、不说，三者、不见，四者、空无分别。善男子，云何不取？所谓不取一切法，无一法可得，不受不舍，不可非不可，不建立不念著，不分别非不分别，所谓行檀波罗蜜不取檀波罗蜜果，不受不舍，不可非不可，不立不著，不分别非不分别；乃至行般若波罗蜜亦复如是，不分别非不分别。复次，善男子，云何不说？所谓不说众生可得，不说命者，不说寿者，不说人，不说众生界可得，不说有意有所取，乃至不分别非不分别。复次，善男子，云何不见？所谓不见色声香味触法，不取色声香味触法，乃至不分别非不分别。复次，善男子，云何空无分别？所谓一切三世三界阴界入等因缘果报，所缘之法无起无依，无有生相不取不舍，乃至不分别非不分别。何以故？舍离一切行、一切持、一切身，及分别不分别故，一切智智相应不可得故，当如是行。所以者何？善男子，一切法及一切智，乃至无声无相，无字无愿，无生无灭，无体

无著，无缘无我，不可见寂静，离相离念离灭，无闇无明，无处所无境界，无根本无伴助，不可思不可量，无贪无悭，无行无说，无深无浅，无受无依，无识无取，无影无一念顷，无分齐无所有毕竟无所有。何以故？一切智等犹如虚空，相应不可得故，不立相应，不取相应，不行相应。若相应若不相应，不分别非不分别，当如是行。善男子，是名具足四法能令菩萨摩訶萨远离恶友，速疾当得阿耨多罗三藐三菩提。

“善男子，所有一切内外境界，若以一切智智，观察推求依持建立，著此二相以意分别；起二著故，彼便远离一切智也。云何二相？若观察入等取立相二，是名远离一切智也。若取立行果，是二分别。于诸众生有取立相，是二分别。开示施設语言之道，建立总持音声之法，以智观察是断是常，是二分别。众生、寿命、养育、人、丈夫，作使作想建立依持，是二分别。此彼所有建立筹量不建立筹量，是二分别。若以一切智智观察三世，推求我作集业所作，彼此立取是二分别。若以分别有二相者，则不能得一切智也。善男子，如寒求火而返取地，如渴求饮而返取火，如饥求食而返取石，如庄求华而返取衣，如薰求香而返取尸，如行求衣而返取垢，如塗求香而返取空。如是，如是，善男子，若行执著观察是身取立相二，求一切智者徒捐精进，无道无果。”

尔时，众中有一菩萨名曰持智，从座而起于世尊前，曲躬合掌作如是言：“婆伽婆，若法不可说，彼不能得菩提。”

佛言：“汝今当知：无得菩提，亦无菩提可说。善男子，谛听！谛听！汝问如是，如汝所乐，随汝意说。若所有物，若一切智，有性有相有名字耶？”

持智菩萨白佛言：“不也，婆伽婆。若有言说即堕常见，若无言说即堕断见。乃至中道亦不可得，非有非无，不取不著，不生不坏，过阿僧祇不可量不可数，无闇无明，若如是观乃得菩提。”

电慧菩萨言：“婆伽婆，无来无去，如是善知，如是善入，乃得菩提。”

毗卢遮那菩萨言：“如是，婆伽婆，法不到相非不到相，非得时非不得时，非作证非不作证，非灭非不灭，非三世非不三世，非三乘非不三乘，亦非行愿合集称量可得，如是知者乃得菩提。”

地慧菩萨言：“婆伽婆，若一切法非三界非三结，非三明非三乘，非阴界入，非分别非不分别，非减非增无有合集，如是知己乃得菩提。”

金刚慧菩萨言：“凡夫法圣人法，学法无学法，声闻法辟支佛法，非分别非不分别，亦非合集称量之所能知，如是知者乃得菩提。”

坚慧菩萨言：“如如寂静，如如观察，不舍不住乃得菩提。”

宝手菩萨言：“若一切法不生不到不时，无分别相乃得菩提。”

不思議慧菩薩言：“若以觀察三界心計入在心，是名二心。如是二心觀察不可得者，以無所得乃得菩提。”

退怨菩薩言：“若一切法無著無貪，無舍無碍，無愿無痴，無執無放，乃得菩提。”

蓮華藏菩薩言：“若罪福性等入是如法，深忍不著我我所作，非分別非不分別，如是觀者乃得菩提。”

月光菩薩言：“若觀一切法聚散隨緣，無有自性犹如水月，如是解已乃得菩提。”

虛空慧菩薩言：“若一切諸法，有闇有明，有生有灭，有增有減，不于諸心數法而起分別，如是知者乃得菩提。”

无尽慧菩薩言：“若修習三輪清淨波羅蜜，相應不可得，不染非不染，如是修者乃得菩提。”

弥勒菩薩言：“若不緣不受三界依止、梵住依止，乃得菩提。”

文殊師利菩薩言：“婆伽婆，若解甚深一法門者，于一切法不染非不染。一法門者所謂無我，了彼一法不覺不觀，無有將來、亦无送去，亦无可聚可散、可明可闇、可生可灭、可增可減、可解脫者，不應染濁无分別故，以一法門一切智智乃得菩提。”

坏愛樂菩薩言：“文殊師利，如是一法門一切智智，悉入如法甚深空處，何故意有所作及修行方便？”

文殊師利言：“舍離惡見修行正見不妄置立，舍諂曲心修質直行不妄置立，舍離十惡敬重三寶不妄置立，善说不妄置立，正命不妄置立，舍一切結不妄置立，大悲平等不舍一切眾生不妄置立，三护不妄置立，无虛誑法不妄置立，不生不灭不妄置立，护持正法不妄置立，舍一切所有不妄置立，少力眾生常作建助不妄置立，怖畏者得归依不妄置立，非道者示正道不妄置立，忍辱柔和不妄置立，不執著一切相不妄置立，舍離一切尘垢闇阴不妄置立，舍離一切回向果報不妄置立。善男子，此二十种方便能得一切智智。所有文字音声语言句义差别，一切皆如是，名入一切智智方便。一切如来所说，及余外道所说，一切取舍生灭，乃至能知一切三解脱，依止因缘业行之法悉入于如，当知皆是一切智觉智方便也。”

坏愛樂菩薩言：“如是，如是。文殊師利，若解甚深法門者无一法可見，亦无所说法及以能说者，乃至文字句义皆应悉舍。若修行若识知无有相应，一切入如是名智觉智。”

佛言：“善哉！善哉！善男子，汝能善说此一法門，以一切智智乃得是法。云何一切法不妄置立？所谓不生不坏际不妄置立，生死涅槃际不妄置立，虛空涅槃际不妄置立，无生无说际乃至一切諸法亦复如是。示一切眾生一切法无实际，示一切著物一切三世三界阴界入等无所有际，入三行空际，入法阴、报阴、聚散阴无实际，入空入真际，具足一切无说法义，是名菩薩摩訶薩入一切智智，复以一切智智而得受记。”

说是法时，魔诸妓女及魔王子眷属二万，闻佛所说，同时皆得无生法忍，悉舍身意所有粗业得自性生身。复有二万八千众生得无生法忍，九十二万天人得菩萨种种三摩提陀罗尼无生法忍。

尔时，得无生法忍诸菩萨摩訶萨等，雨天众华散于佛上，缤纷而坠犹如雨下，头面著地顶礼佛足，作如是言：“婆伽婆，我等若值不善恶友，与恶和合自在作恶，于一切众生一切功德善根之聚，终不能起一念善心。”

佛言：“善男子，汝于过去无量亿劫，亲近供养无数诸佛，以此业缘今生爱乐还得值佛。我今为断众生疑故，当为汝说宿世因缘。善男子，乃往过去无量无数阿僧祇劫，有劫名曰具足大势。此阎浮提有转轮王，名优钵罗华，得自在力统四天下。王及臣民皆寿六万八千岁。时世有佛，号月光明香胜如来、应供、正遍知、明行足、善逝、世间解、无上士、调御丈夫、天人师、佛世尊。彼国众生虽居五浊，以修善故不染欲法。尔时，彼佛常为四众宣说三乘相应之法。时优钵罗王严四种兵，与其夫人后宫眷属，往诣彼佛月光明所；到已顶礼佛足，散种种华，烧种种香，作众伎乐，供养佛已右绕三匝，并复顶礼比丘僧足，以此二偈赞问彼佛：

“天龙所仰大功德，过患永断无上尊，
以七法财利世间，愿说得何等妙慧？
作大慈灯灭世闇，降伏堕生老死忧，
能遮人天三恶趣，说何等法脱魔道？”

“善男子，尔时彼月光明香胜如来告优钵罗王言：‘大王，具足三法能得菩萨微妙智慧。何等为三？一者、大悲如母，能作一切众生极依止处；二者、精勤不息，能灭一切众生苦恼；三者、等观一切诸法无命、无养育、无人、无种种相。大王，是名具足三法能得菩萨微妙智慧。大王，复有具足三法，能令不著魔罣。何等为三？一者、所谓于一切众生，得不起瞋不求过短；二者、平等观一切众生作福田想；三者、能得一切法作一法观，所谓虚空等一切法，无作无种种、无生无起无灭，一切空如实相，舍离不可得相应观。大王，是名具足三法，令善男子不著魔罣永脱魔道。’时优钵罗王第一夫人，名天孙陀利，共彼宫人嫔女八万四千人俱，前后围绕往彼月光明香胜如来所；到已以种种华散彼佛上，顶礼佛足以偈赞曰：

“烦恼翳障已永尽，无比功德解脱尊，
云何教我转女身，令我具足男子相，
速疾远离诸恶趣，于法自在心调柔？
最上善逝天人师，能与世间第一利，
如蒙世尊舍女身，当得欢喜寂灭乐！”

云何速说此丈夫，自调调他利益者？
我得出离恩爱坑，世间无等最第一，
念持广大功德聚，能速调伏诸群生！
今我于此必取转，唯愿速开甘露道！”

尔时，释迦如来作如是言：“善男子，彼月光明香胜如来，告优钵罗王第一夫人孙陀利言：‘夫人有智方便当依修习，速转先世所种女身，乃至阿耨多罗三藐三菩提，究竟涅槃更不重受，除自发愿。夫人，依何方便无量先世所种女业速尽无余？夫人，有宝星陀罗尼建立大事，具大功德能大拥护，善灭女身三业恶行，一切苦报令无有余。若有女人闻此宝星陀罗尼至心诵念，尽此女形后生当得端正丈夫，一切身分悉皆满足，具质直行有大辩才，身口意业善相和顺，能令现在未来一切怨嫌悉皆退散。若有身口种种恶业，现在将来应受苦报，以闻宝星陀罗尼威神力故，所作恶业现世消灭无复遗余。置作五逆、诽谤正法、谤圣人者，以闻是经威德力故，至其身尽即舍命时，如是等罪亦皆随灭毕竟无余。若有女人身口所造恶业果报量等须弥，后世定受无量众苦，如是种种苦报、种种业障种子余报，以闻经力尽灭无余。所以者何？由过去一切诸佛阿罗诃三藐三佛陀，说此宝星陀罗尼，受持读诵现前赞叹称扬随喜。是诸众生所有苦报，以经力故悉皆灭尽，所作善根随时增长。若十方刹土现在诸佛阿罗诃三藐三佛陀，为众生故各各方面，说此宝星陀罗尼，众生闻者欢喜爱乐，所有罪障无不消灭，所作善根皆令增长。若当来世十方刹土，一切诸佛说是经处，乃至一念生欢喜心，是诸众生皆得尽苦增长善根。我于今者亦说此经，若有闻者皆当随喜。十方现在诸佛世尊说是经处，当共称扬当共欢喜。

“夫人，若有已受玺印刹利王至他土境，得此宝星陀罗尼书持爱乐者，以经力故彼刹利王，威德高远有大名称，遍满十方无量国土；乃至一切欲色界天闻其德声，一切天、龙、夜叉、乾闥婆等，无量俱胝那由他百千万亿刹利诸王，常所随逐所共守护。彼王国土所有一切斗争饥馑、他方怨敌、风雨寒热、疫病过患皆得除灭。一切恶鬼、夜叉、罗刹、师子象狼皆生慈心，虽在其国不为损害。其王国土亦无一切粗涩苦味，恶触痛恼无不消灭。一切财宝、五谷果实、药草华叶、滋茂美味皆得增长。若受印刹利王，欲与敌国余刹利王共斗战时，应悬此经置自幢头；以经力故，彼怨敌王所有兵众自然退散。若彼二刹利王受天印者共交战时，各悬是经置一幢头；以经威力，时彼二王便相钦爱共相和好。如是成就无量功德，利益安乐一切人王。是宝星陀罗尼随有之处，若城邑聚落，若人非人、四足多足诸恶毒虫，无有能令闻是经者疾病横死及故恼乱。若是经典所在之处，应当尽心设大供养，应以供养之具奉迎此经，亦以经卷置师子座。读是经人及听经者，应当至心清净洗浴，香油塗身著新净衣，受持梵行，散杂色华，

烧众名香，种种美味，恭敬围绕供养是经。其人若有一切病苦、横死之厄及以怖畏恶相之征，以经力故悉灭不现。若有女人为求男女，皆应澡浴著新净衣，修习梵行烧香散华，恭敬供养是妙经典，便生福德智慧男女。如是女人虽不为己，以经威重熏修力故，舍身之后，乃至阿耨多罗三藐三菩提，及得涅槃，毕竟不复受女身也，除自发愿成熟众生。夫人，随有此经一偈一句一声经耳，乃至飞禽走兽闻此经者亦复如是，皆得舍彼畜生之身，亦令一切速得不退阿耨多罗三藐三菩提。’善男子，彼过去月光明香胜如来说是经时，便以右脚拇指触地，而此世界六种震动。”

释迦牟尼如来，今说此经亦复如是，佛神力故，时此佛刹山河大地六种震动。十方无量阿僧祇天、龙、夜叉、乾闥婆、阿修罗、迦楼罗、紧那罗、摩睺罗伽、薛荔多、毗舍遮、鸠槃荼、人非人等，皆生疑怪。一切佛刹大光遍满，地平如掌，须弥山轮围、大轮围、树林墙壁悉隐不现。当地动时，彼诸天、龙、夜叉先怀疑怪。如来神力所加被故，诸天龙等四方观望，去一箭道便见释迦牟尼如来，各各惊喜生希有心，一时合掌瞻仰世尊。

尔时，释迦牟尼如来，作如是言：“善男子，过去月光明香胜如来说是经时，以脚触地六种震动，而此佛刹平如水面，一切天人皆生疑怪，四方观望去一箭道，便睹彼佛月光明香胜如来，见已合掌生希有心。善男子，彼月光明香胜如来，即于天龙大众之中，为众生故，说此宝星陀罗尼咒曰：

“多地也他闍卢计（一）闍卢迦慕计（二）闍梨闍罗（三）闍梨你（四）闍罗婆啰帝（五）闍晒利（六）婆啰布楼沙罗叉那娑摩娄晒耶（七）阿摩迷阿摩迷（八）婆摩迷婆摩迷（九）那婆迷（十）摩呵迷（十一）闍呵迷（十二）闍呵迷咤婆罗迷（十三）婆罗迷（十四）婆罗迷（十五）婆罗迷（十六）婆婆鞞（十七）婆呵鞞（十八）傍伽鞞（十九）婆闍鞞（二十）婆罗多婆利筛（二十一）闍呵迷佉（二十二）婆啰鞞（二十三）阿罗闍晒离（二十四）禅堵离（二十五）禅堵母嶭（二十六）婆呵啰（二十七）婆呵啰（二十八）悉陀唎啰帝（二十九）檀地罗（三十）檀地驮罗（三十一）苏利耶毗呵咤（三十二）栴达啰毗呵咤（三十三）斫咄殊帝沙毗呵咤（三十四）萨婆叉耶（三十五）悉帝履埤苏啰（三十六）毗呵咤（三十七）闍咤伽（三十八）闍咤伽（三十九）苏咤伽（四十）毗呵摩（四十一）阿没履咤（四十二）阿没履咤（四十三）阿没履咤（四十四）阿没履咤（四十五）阿没履咤（四十六）阿没履咤（四十七）阿没履咤（四十八）阿没履咤（四十九）阿没履咤（五十）没履咤没履咤没履咤（五十一）毗婆侈陀羯摩（五十二）度泥度泥（五十三）郁波陀毗耶侈陀（五十四）若那讠履多（五十五）阿讠哆波陀（五十六）咤伽离纽迦（五十七）鸯咎隶（五十八）朋瞿隶（五十九）毗薄俱隶（六十）俱罗呵（六十

一)因陀罗钵履婆呵(六十二)毗也婆侈陀揭婆(六十三)遮婆啰底(六十四)遮婆啰底(六十五)遮婆啰底阿慕呵达履舍奴(六十六)钵履跋多婆沙也咭摩(六十七)讫履摩殊底(六十八)咭伽履阁咽(六十九)阁呵殊底(七十)你虱迦毗啰娑(七十一)毗啰娑(七十二)毗啰娑毗啰娑(七十三)毗啰阁(七十四)摩底履伽摩婆婆(七十五)讫履跋也摩呵讫履波(七十六)晒隶晒晒隶(七十七)阿喽拏婆啰帝(七十八)三摩邪你瑟计(七十九)陀摩驮那(八十)地夜那(八十一)阿波啰没履(八十二)颇罗君茶罗薄嶠(八十三)你跋多悉底履婆婆(八十四)羯摩叉耶钵啰突婆婆否喽沙哆梵(八十五)阿三摩三摩(八十六)三摩耶毗地阁若(八十七)哆他伽多(八十八)娑婆呵(八十九)。”

尔时，释迦如来说此宝星陀罗尼已，于时无间，而此大地复更震动。时彼魔王五百妓女，以闻宝星陀罗尼故，即转女形具丈夫相；及无量阿僧祇天女、龙女、夜叉女、乾闥婆女、阿修罗女、迦楼罗女、紧那罗女、摩睺罗伽女，乃至薜荔多、毗舍遮、鸠槃荼等一切诸女，闻此宝星陀罗尼故，亦转女形具丈夫相。亦令一切诸善男子，速得不退阿耨多罗三藐三菩提。乃至一切诸女人等，于未来世当受女身，以经力故来业即灭。

尔时，一切女人皆共合掌，头面礼足释迦如来，同时高声作如是言：“南无南摩希有能作无上利益者，释迦如来阿罗诃三藐三佛陀！唯愿大悲广为我等说此本事，我今何故女人形相皆已灭尽，丈夫身分满足成就？以此希有转变深生欢喜，我今已发阿耨多罗三藐三菩提心。惟愿世尊说此本事，令无量天人皆得道果。”

尔时，释迦如来重告贤首善男子言：“过去月光明香胜如来，为优钵罗王夫人天孙陀利，宣说宝星陀罗尼时。孙陀利并其后宫嫔女眷属八万四千人等，女人相灭丈夫相现。无量无数阿僧祇诸天女，乃至人非人等一切诸女，各转女形具男子相，及未来世应受女身之业亦灭无余。尔时，优钵罗王舍其自在转轮王位，以四天下委授太子，即与夫人天孙陀利丈夫并其千子，共八万四千天孙陀利丈夫（此言天爱），及九万二千诸余民庶，于月光明香胜佛所，信家非家舍家出家，剃除须发而披法服；既出家已勇猛精进，读诵受持意乐寂静。

“时，彼无量俱胝那由他百千众生皆是念：‘何故转轮圣王出家入道？’其著邪者各共相谓作如是言：‘此香胜如来勤乐魔业解作谄幻，或时转女人根成丈夫相，或时剃除须发随与染衣，或为生天上故说生天事，或为生人中故说人中事，或为畜生中生说畜生事，或为饿鬼中生说饿鬼事，或为地狱中生说地狱事，或说不生不灭之法，或复幻作女人之身，勤乐魔业具如上事。彼月光明作沙门像，我今决定离此住处，不忍见彼沙门形相，亦不欲闻所出语言。’时彼众中鸠摩罗臣心生疑倒，向彼国人作如是言：‘我等所有妻妾侍女皆被沙门之所幻

化，改其女形作丈夫质，变化一切剃发染衣，唯我独身怀忧得脱。我今当入深山峻谷无人之处，如仙人游避其妖幻。汝等一切共我和合可相随去，慎勿入彼沙门魔胃。鄙幻沙门，我今不欲闻其音声，何况目睹？’而彼臣民未得心者，闻其所言一切欢喜。鸠摩罗臣说是语时，无量俱胝百千众生皆堕邪网。复为众生宣说邪法：‘无有生死亦无解脱，作善作恶未来亦无诸业报果。此虚诞沙门勤行魔业，若往见彼、若礼拜彼、若听彼法惑乱人心，唯欲剃发舍家家间修行，日唯一食以乞自资，乐寂静处入房少语，常厌五欲伎乐歌舞，舍离华鬘、塗香、散香严身之具，亦复不乐种种华醉酒昏淫适情之事。而彼沙门勤乐宣说行魔胃道，即是一切众生怨家。我本不见不闻沙门所作，令无量俱胝百千众生见如是相，往昔已来亦未曾睹此恶见者。’

“善男子，复于后时，优钵罗大沙门闻其国人逃窜山谷，或复自行恶道，复教余人令著恶见，毁谤三宝谤正为邪，闻是事已即自思惟：‘若彼众生皆堕恶见，不得解脱不住正见，不利益者不安立者，我为沙门，云何令彼未来之世盲冥众生，离三恶道去四魔胃，未解脱者能令解脱，乃至究竟令得阿耨多罗三藐三菩提？’尔时，优钵罗大沙门作是念已，即白月光明香胜如来言：‘我于今者为众生故发大勇猛行大慈悲！’便与无量百千众生，前后围绕往彼边地，城邑聚落空山峻处，为诸众生宣说正法：‘若彼众生堕恶见者，我今当遮令入正见，乃至教其安住阿耨多罗三藐三菩提。或有愿求辟支佛乘，或求声闻乘，或安立圣果，或令出家，或劝受持优婆塞戒，或八斋戒，或三归行，或为安立一切女人具丈夫形断女根业，说此宝星陀罗尼咒。乃至无量百千万亿众生，于如来边曾生疑倒，如是一切著恶见者，我当遮断令其发露，作是教已，悉令安立阿耨多罗三藐三菩提，皆于月光明香胜佛所，俱共出家净修梵行。’

“善男子，鸠摩罗臣先作是愿：‘彼大沙门能说幻法，破我徒众，诱我眷属。汝未来世当得佛时，我还于彼作种种魔事，所谓始处胎时，为童子时，盛年戏乐及出家时，菩提树下坐道场时，我当种种恼乱种种破坏，令其退失菩提之心。’善男子，时大沙门倍加勤苦，勇猛精进游其本国，入彼山峻慈语爱语，种种譬喻开晓其民。彼诸众生咸见本王，闻其说法皆生欢喜，即回邪心断昔恶见，于沙门所求哀忏悔，同发阿耨多罗三藐三菩提心。鸠摩罗臣及其徒众，调伏邪心俱怀正信，便作愿言：‘若大沙门具大悲者，将来之世得阿耨多罗三藐三菩提时，愿垂为我授菩提记。’善男子，汝等欲知往昔转轮圣王优钵罗者，岂异人乎？今我身是也。其王夫人孙陀利者，今弥勒菩萨是。诽谤正法怀恶见臣鸠摩罗者，今魔王是。尔时无量那由他百千众生，闻我说法共舍恶见，住三乘道俱得出家，及无量女人以经力故成丈夫者，于今汝等大众之中四部弟子是也。

“善男子，汝等今当信受我语，闻说过去优钵罗王本事之时勿生疑惑！所以者何？忆念在昔鸠摩罗臣，见其眷属及彼无量百千众生，

同舍魔业在佛法中出家为道，便起恶念：‘愿我当来兴魔兵众，破汝眷属还如今日。’善男子，汝等曾于月光明胜如来所，生不净信作不善语，以恶见报迷陷众生，值佛因缘而得解脱；由一念善出家力故，从是已来亲近无量百千诸佛，供养供给不生劬劳，于诸佛所发大誓愿心乐听法，乃至常行六波罗蜜。汝等昔来以身口意所行恶业，经无量劫常处三塗加诸苦恼，业障所引生魔道中。因我释迦牟尼如来，说此宝星陀罗尼，彼魔众中五百妓女即转女身，同时皆得无生法忍。无量无数那由他百千众生，一切世间天人大众，咸发阿耨多罗三藐三菩提心，及得不退阿耨多罗三藐三菩提。复有无量无数那由他等百千众生，皆得不退声闻、辟支佛乘。”

宝星陀罗尼经卷第三

魔王归伏品第三

尔时，释迦牟尼如来，说此宝星陀罗尼经时，放大光明，遍照此娑婆世界百俱胝四天下处，悉皆大明。应时此间百俱胝处欲界诸魔，以佛力故皆起惊动，共睹此光所现因缘，咸作念言：“决定是彼恶魔所为，于四天下有大威德，彼于我等大自在力故现此光。”作是念时，观见恶魔坐忧恼室极生悵恨。尔时此界百俱胝魔，各舍魔宫到此四天下恶魔王所，作如是言：“汝欲界主有大自在，放此光明普照一切，复何因缘坐忧恼室？”

尔时，魔王即便遍答百俱胝处所有诸魔：“汝等应知，此是沙门出于释种，第一谄幻放此光明，照于世界一切惊动。世间所有明慧之人，诸梵天王，及诸龙王、夜叉王、阿修罗王、摩睺罗伽王、迦楼罗王、紧那罗王，乃至其余人非人等，其中所有聪睿之士，一切归向供养于彼。乃至六年独坐无二，成就无相大幻之力。我以自力示现神通，严驾军众三十六俱胝周匝围绕，一切魔力用大勤劳，毕竟不能令彼首陀惊畏一毛，何况复能作余障碍动彼法坐？今此首陀成就如是无相之幻，所作示现动此大地并退我军，如诛大树根枝俱倒，一切魔界悉皆闇蔽，于彼坐处成就大明，从座起已，为诸众生开示演说。此四天下所有众生聪明智慧，悉亦为幻钩所牵。我亦不知彼等之心，何处何趣，何时死何处生。今此六趣归依彼者，我尚不能惊动一毛，况复能令动彼信心？我此五百微妙妓女，及二万子并诸眷属，皆悉归依沙门瞿昙在彼前坐。我于今日不能遮制！汝等今者有力有福有智自在，当助于我断彼释子首陀罗命，所有众生归依彼者悉令破散，幻谄沙门黑闇部党悉令降伏。我等魔众白净部党悉令明显，从尔已后当受乐触。”

尔时，有魔名曰光明，观此阎浮于法坐上见如来身，又闻梵音美妙说法，见闻此已毛竖惊起，向彼魔王说如是偈：

“一切刹土中，此色最胜异，
功德及智慧，久已净其身。
解脱诸烦恼，长夜善相应，
解脱于诸有，尽彼一切忧。
汝今勿复嗔，自在所不容，
归依此处者，三有第一归。
汝若于此处，起于刹那嗔，
以彼愚痴故，自得于乐坏。”

尔时，众中复有一魔，名珊你弭迦，向彼魔王说如是偈：

“彼大神通力，最上功德相，
一切无所依，依者趣解脱。
苦尽无有余，能说苦尽道，
无量百千魔，所不能恼乱。”

尔时，魔王说偈报曰：

“我今所有自在人，彼大自在悉归从，
如是不久空我界，我无趣处复无得。”

尔时，众中复有一魔，名曰新尘，向彼魔王说如是偈：

“第一势力汝先有，自在勇健之所作，
汝今失力复无能，无得共比一切智。”

尔时，众中复有一魔，名曰刀月，向彼魔王说如是偈：

“慈悲众生无恶意，自性清净无所依，
解脱三界游行处，无趣无行无能害。”

尔时，魔王说偈报曰：

“欲界所有诸众生，迷醉倒情著诸欲，
于我所作常随转，云何共汝不害彼？”

尔时，众中复有一魔，名曰地水，向彼魔王说如是偈：

“诸有不坚如幻炎，能知诸有断诸爱，
不著诸有如虚空，云何于彼能逼恼？”

尔时，魔王说偈报曰：

“彼虽自在三界，饮食衣服恒资用，
彼于三受所乐住，云何将死不能害？”

尔时，众中复有一魔，名曰舍爱，向彼魔王说如是偈：

“神通境界有所有，恶魔天龙夜叉等，
种种恼佛无所触，云何将死能害彼？”

尔时，魔王说偈报曰：

“我等昔日断彼食，于虚空中雨大石，
无边骂詈百种声，我欲动彼所依处。”

尔时，众中复有一魔，名曰知眼，向彼魔王说如是偈：

“汝于彼时作恼乱，颇见少许嗔过不？
舒颜视汝不嗔蹙，软音慰喻无恶声。”

尔时，魔王说偈报曰：

“彼有智慧能常忍，能断爱痴诸过失，
慈心一切诸众生，聚集所行无不集。”

尔时，众中复有一魔，名难降伏，向彼魔王说如是偈：

“三结若能冒缚者，我等可应恼乱彼，
佛乃灭此痴冒障，云何将死能恼彼？”

尔时，魔王说偈报曰：

“汝等助我力，装束莫放逸，
我变地为水，束四山为鬘，
虚空雨大石，又放铁沙聚，
月箭曲刀镞，掷彼身即碎。
如是勤方便，极作恼乱彼，
汝等相运助，释子定为灰。”

尔时，诸魔各各说偈，乃至百俱胝处所有诸魔，说偈问答皆亦如是。

尔时，彼众一切诸魔，同时发声作如是言：“如是应去各各自宫庄严甲冑，并诸军众悉皆擐甲。若使我等神通之力，一切境界示彼令知。沙门瞿昙虽复勇猛，岂当我辈军众之锋？”如是语时于刹那顷，

百俱胝处所有诸魔，各从自宫甲冑庄严。一一魔军千俱胝众，著种种甲，持种种器仗，各别严驾，于夜分中下阎浮提，到中摩伽陀国，各住虚空邻近于佛。乃至四洲天、龙、夜叉、乾闥婆、阿修罗、伽楼罗、吉那罗、摩睺罗伽、薜荔多、毗舍闍、鸠槃荼，各于佛边生不信心无恭敬意，于法僧边亦不信心，彼一切魔各遣军众，种种器仗擐甲庄严，大集彼处欲害如来。

有一仙人名曰光昧，于十八明处及神通境界学过彼量，而常承事摩醯首罗，与五百徒众住雪山边。尔时，魔王即自变身作摩醯首罗像，住仙人前说如是偈：

“瞿昙姓种生，大仙依通者，
 聪慧住摩伽，今王舍城乞。
 汝当坚固心，往共种种论，
 汝极五神通，当决定自在。”

尔时，魔王说此偈已即隐不现，还于魔宫自眷属所，说如是偈：

“汝等今日我边听，我今思得无比知，
 释子所摄所共语，神通加彼令具足。
 彼幻示现自境界，夺我魔之广大力，
 如母向子常软语，悉令弟子生喜乐。
 恒日初分入城邑，徐步摄持正威仪，
 弟子所行所断欲，彼彼自当我捉持。
 美妙歌舞现其前，令彼见闻生惑著，
 弟子记闻惑著已，应恼释迦大仙意。”

尔时，众中复有一魔，说如是偈：

“我今化现可畏事，师子驼象虎水牛，
 速疾奔驰彼城邑，惊动现威雷震声。
 神通化现无量事，复现兵器逼其前，
 彼彼所弃诸欲者，或时迷乱令忘失。”

尔时，众中复有一魔，说如是偈：

“我今于彼四衢道，化作楼观挟其前，
 种种奇形丑恶面，种种器仗逼动彼。
 空中大声雨刀剑，惊动可畏雷雹声，
 于彼境界不自在，速令消灭不现前。”

尔时，魔王以神通力一切严驾，广作如上一切境界。如来大慈威

德力故，亦广如彼种种示现，即时变此三千大千佛之世界，令此地性犹如金刚，一切魔力不能改转，亦复不能更作恶声，及以火山四方猛焰，亦不能作非时黑云及恶风气。佛力持故，乃至无有一龙能运其身下一滴雨。

尔时，四大声闻日初分时，著衣持钵入王舍大城乞食。时尊者舍利弗，于城南门值魔童子其数五十，第一端正妙色庄严大人子相，同在街路歌舞而行。遥见尊者舍利弗来，即前共持尊者两手，谓尊者曰：“汝舞沙门！汝歌沙门！”

时，舍利弗语童子言：“汝当谛听！先所未闻，当令汝闻。”即为童子，说如是偈：

“诸入可厌患，杀处常欺我，
我今厌患已，尽彼入边际。
诸阴可厌患，杀处常欺我，
我今厌患已，尽彼阴边际。”

尔时，舍利弗为魔童子说此偈已，即说咒曰：

“哆哩他（一）婆呵啰（二）婆呵啰（三）婆啰婆呵（四）麽利脂婆呵（五）萨遮（猪迦切）婆呵（六）阿磨婆呵（七）萨婆呵（八）。”

尔时，舍利弗于歌音中，说如是偈及陀罗尼。时魔王童子五十人等，闻是法音得未曾有，甚大欢喜信心清净，向舍利弗说如是偈：

“正导我等今忏悔，为世间亲善说者，
说阴可畏教我离，令我于此常证见。”

时魔童子说是偈已，头面著地礼尊者足，便于道中共坐听法。

尔时，尊者大目犍连，欲入王舍大城乞食，于城东门见五十童子，乃至于歌音中说如是偈：

“诸界可厌患，杀处常欺我，
我今厌患已，尽彼界边际。
诸受可厌患，杀处常欺我，
我今厌患已，尽彼受边际。
思惟可厌患，杀处常欺我，
我厌思惟已，尽思惟边际。
诸想可厌患，杀处常欺我，
我今厌患已，尽彼想边际。”

时大目连，于歌声中说是偈已，复说咒曰：

“多地也他阿磨婆（一）阿磨婆（二）阿磨婆（三）磨婆（四）
阿啰闍（五）拏闍呵（六）奢藐他（七）奢藐他（八）奢藐他（九）
伽伽那婆摩（十）娑婆诃（十一）。 ”

尔时，长老目犍连为魔童子，说如是偈及陀罗尼。时五十童子，第一欢喜生净信心，说如是偈：

“具足密神通， 圣主牟尼子，
生死道过患， 法灯普照示。
能断诸过恶， 故我生信乐，
今既归依佛， 法僧亦归依。”

尔时，五十魔之童子，于街道中即便接足礼大目连，于彼前坐正仪听法。

尔时，长老富楼那弥陀罗尼子，于城北门入城乞食，乃至街中随彼童子所唱歌声，于歌音中说如是偈：

“诸触可厌患， 杀处常欺我，
我今厌彼触， 故尽触边际。
诸根增上主， 杀处常欺我，
我今厌增上， 故尽增上边。
惑业常流转， 杀处常欺我，
我今厌惑业， 尽惑业边际。
诸有可厌患， 杀处常欺我，
我今厌诸有， 尽诸有边际。”

尔时，富楼那于歌音中，为魔童子说此偈已，告童子曰：“人命轻速难可保住！犹如山水迅浪奔流，命甚于彼，愚痴凡夫都不觉知。复次，童子，一切凡夫色酒所醉无觉知者，声酒所醉无觉知者，香酒所醉无觉知者，味酒所醉无觉知者，触酒所醉无觉知者。复次，童子，人命轻速甚彼山水，愚痴凡夫都不见知，法酒所醉无觉知者，阴酒所醉无觉知者，界酒所醉无觉知者，封食所醉无觉知者，乐酒所醉无觉知者，生酒所醉无觉知者，欲酒所醉无觉知者。复次，童子，人命轻速犹如山水迅浪奔流，命甚于彼，愚痴凡夫都不见知。乃至为彼一切情识取著之酒，为所迷醉都不觉知。”即为童子而说咒曰：

“多地也他揭伽婆（一）揭伽婆（二）揭伽婆（三）鼓尼（四）
阿伐多（五）毗伐多（六）咭伐多（七）跋啰末他（八）殊底伐多
（九）娑婆诃（十）。 ”

尔时，长老富楼那于歌声中，为魔童子说如此偈及陀罗尼句。时彼五十童子，第一欢喜生净信心，说如是偈：

“汝今教我寂灭道，诸界犹如彼幻炎，
世间唯从分别生，故我身命归三宝。”

尔时，五十魔之童子，于街道中即便接足礼富楼那，于彼前坐正仪听法。

尔时，长老须菩提，于城西门入王舍城次第乞食。于街道中逢值魔王五十童子，华年盛美颜色端正，容止庠雅大人子相，共戏街道歌舞而行，见须菩提即便趋往，各共捉彼尊者两手，作如是言：“汝歌沙门！汝舞沙门！”

须菩提言：“谛听！童子，汝先歌音所未闻者当令汝闻，汝且默然听我歌声！”时须菩提，即为童子说如是偈：

“一切有为法，动性皆无常，
如彼幻泡炎，虽见不可得。
速疾生灭法，唯智者乃知，
触受是苦担，愚痴者随著。
有为逼迫苦，一切悉无我，
更无一知识，令脱于苦者。
如信菩提道，亲近修一相，
谓离诸法想，不净及无我。
一切行相应，无实无性相，
诸法无命养，无人无作者。
汝舍魔谄意，发觉生净信，
诸识依本起，如电依虚空。
触受思无我，观察无有实，
愚痴凡夫聚，此阴恒流转。
净心分别生，作者不可得，
真际寂灭空，能离一切边。
此法无无明，故说菩提行，
如彼大船师，普运到菩提。”

尔时，长老须菩提，为魔童子说此偈已，即说咒曰：

“多地也他苏文第（一）毗文第（二）文陀阍醯（三）死梨死梨死梨（四）阿婆死梨（五）阿婆呵死梨（六）多他多婆死梨（七）部多句胝死梨（八）娑婆呵（十三）。 ”

尔时，长老须菩提，为此童子于歌声中，说此偈辞及陀罗尼句。

时彼五十童子，第一欢喜生净信心，说如是偈：

“我依恶知识，未闻如是法，
愚痴无智故，造作此恶业。
我今发露悔，愿尊证知我，
尊从胜法生，故我发大愿，
愿我得作佛，普利益世间！”

时五十童子，于街道中即便接足礼须菩提，于彼前坐正仪听法。

尔时，世尊以神通力，令此街道百由旬量，广博严净而为示现。

时，舍利弗北面而坐，大目犍连西面而坐，富楼那南面而坐，须菩提东面而坐，四人住处共半由旬。应时于彼四大声闻坐处地中现大莲华，纵广正等五十肘量，阎浮檀金为茎，青毗琉璃为叶，胜藏宝为须，真珠为蕊，华气芬馥过彼天香，如此莲花是出世间善根所生。从此莲华出大光明，普照三千大千世界。于彼街道其华上踊，高三人量而为示现；乃至四天王天此莲华现，以彼天量高五由旬而为示现；乃至三十三天此莲华现，以彼天量高百由旬而为示现；阿迦尼吒天此莲华现，以彼天量高半由旬以为示现。于莲华叶宣示种种美妙句义，此地众生及彼诸天，皆闻华中如此偈颂：

“唯佛清净生此刹，退彼魔王并军众，
佛勇猛故转法轮，世间因此故无疑。
诸有聪慧解义论，知法求法求解脱，
一切世间聪睿人，优波俱利最为上。
此为导师已调伏，善巧说此妙大法，
一切世间上供养，供养牟尼能说者。
具三世智能善说，所学三学能开示，
能救世间人天者，无量法义令解知。
利益世间教善行，方便智灯照世间，
巧说妙法断三垢，智慧利益无疲倦。
世间极苦令解脱，无明闇蔽诸众生，
能与法眼不颠倒，一切大众普已会。
此佛不久师子吼，如来能示第一义，
妙色力具展转说，见世沉没大苦海。
来处世间击法鼓，六根护中住上护，
此六随行六通知，六度上法佛所说。
决定说此六种子，能杀六根居村者，
六无上事所念者，佛调御主令彼念。”

于莲华中说是偈已，乃至于彼六欲诸天，于莲华中复为诸天说如是偈：

“汝等和合游，乐著贪诸欲，
放逸心迷醉，爱盖之所覆，
愚痴常乐著，诸欲酒所醉，
以彼放逸故，不供养善逝。
诸欲无常坏，如彼水中月，
死生坚牢罟，众生无脱者，
此等无所依，放逸著诸欲，
以乐诸欲故，永不得涅槃。
常处放逸地，与灭不相应，
不看先所作，为净为不净，
为业受老死，怖畏恒围绕，
汝等放逸故，三恶地所行。
以施调系心，恒修不放逸，
先所作善业，应当勤护持，
念舍欲不净，难得后边故，
汝等归善逝，听彼说大义！
汝等修智慧，解脱寂灭因，
与妙法相应，听如是大义！”

如是莲华中说是偈已，乃至色界十六天，处于莲华中复为诸天说如此偈：

“分别善法勤修习，一心乐禅离愤闹，
寂静不乱求解脱，慧所应作断嗔恚。
所有我相十三种，分别为说修胜忍，
以此毕竟速解脱，得至生死解脱处。
贪嗜色聚分别者，我性坚固见湛然，
彼等不减所生法，由见流转趣恶地。
观彼三界常无我，不实无自空无作，
修忍分别随顺彼，得彼一切趣解脱。
彼等不老不病死，不怨憎会离恶趣，
一切诸法等虚空，所修相应不二修。
毕竟净道最无上，意无所著净诸根，
犹如释子降四魔，应修无相一法性。
所有一切相皆离，调顺威仪二种断，
此道为彼最上说，一切法空分别修。
若能分别修此空，无主无作受亦无，
如空自性解菩提，远离希求最无上。”

尔时，如来于此净色莲华台中，出此大声句义法时，此世界中一

切所有人非人等，普来街中绕莲华座，乃至无量无数阿迦尼吒天，悉下天宫绕莲华座瞻仰听法。

是时，魔王闻此偈已，周匝普观见王舍大城，街中莲华出此法声；及见无量无数百千俱胝那由他人，围绕莲华共坐听法；又见六欲诸天无量无数百千俱胝那由他等，一切诸天悉舍宫殿，随绕莲华而坐听法；见闻是已转过前量，加大忧苦悔恼缠心，毛竖战栗遍身流汗，走虚空中，以大音声唤余魔众，说如是偈：

“汝等当听，善摄外意，我于境界，无自在力，
此乃释迦，最上胜力，功德广行，流布世间。
令彼众生，坚固所作，于莲华台，出此法声。
人天诸子，尽来无余，决定善人，咸皆渴仰，第一无上。
沙门所作，幻此三界，迷惑一切，令无余意。
人天大众，围绕莲华，疾放雨石，作恐怖声，
以魔凶众，往摧坏彼。”

尔时，余魔对彼魔王，说如是偈：

“汝听我等语，此语能利益，
汝知何等法，而不止息意？
如来胜持力，魔军尽消灭，
我等见善逝，心皆大迷闷。
佛为大船师，光颜胜圆满，
置佛善归依，更无胜归处。”

尔时，复有余魔对彼魔王，举体掉动，面目嚬蹙，悲泣极嗔，说如是偈：

“汝失善道住恶道，可不自知力所能，
汝无羞愧比导师，魔力消灭由佛力！
世间和合莲华所，听法怡悦净身心，
我等秽身失精进，不去消灭刹那顷！
今者一切悉归依，归依牟尼因陀罗！”

尔时，复有诸魔悉皆合掌，向彼魔王说如是偈：

“汝舍法行乐作恶，佛为特怙利世间，
于诸众中佛众胜，佛今已来于此城。
我等宜以清净眼，以喜乐心速往彼，
归依三界之所尊，一切众生妙良药。”

尔时，此虚空中复有一魔，名曰智声，向彼魔王即便高声说如是偈：

“汝等和合以信乐，一切相应听我语，
发意言行断恶见，曲躬合掌舍嗔恚。
以醒悟心当净信，随喜如来最上说，
对佛归依难得归，我当今日信供养。”

尔时，诸魔无量无边，于刹那顷悉从空下，到王舍大城七宝之门，各持种种庄严供具来至佛所；为欲供养婆伽婆故，或有变作转轮王像，或有变作梵天王像，或有变作魔醯首罗像，或有变作自在天像，或有变作那罗延像，或有变作兜率陀形，或有变作焰摩天像，或有变作释提桓因，或有变作三十三天，或有变作童子之形，或有变作毗沙门像，或有变作毗楼勒叉，或有变作毗楼博叉，或有变作提头赖吒，或有变作四天王天臣佐之形，或有变作日天子形，或有变作月天子形，或有变作星宿天子大小之形，或有变作阿修罗像，或有变作伽楼拏形，或有变作紧那罗像，或有变作摩呼罗伽形，或有变作宝山之形，或有变作金聚之形，或有变作种种宝形，或有变作宝树之形，或有变作刹帝利像，或有变作余外道形，或有变作轮宝之形，或有变作摩尼宝形，或有变作伊罗婆荼象宝之形，或有变作婆罗呵马宝之形，或有变作女宝之像，或有变作主藏臣宝，或有变作主兵臣宝。如是种种各自现化，为供养故住于佛前。或有现于青色青身，以白色具庄严其身，各共执持赤盖幢幡、真珠、瓔珞，以一多罗树量之高住虚空中；或有现于白色白身，以赤色具庄严其身，各共执持黄盖幢幡瓔珞之具住虚空中；或有现于赤色赤身，以金色衣庄严其身，各共执持青盖幢幡行列而住；或有现于红色红身，雨白真珠；或有现于白色白身，雨红真珠；或有现作天仙之色，住虚空中雨于华雨；或有变作声闻之像，为供佛故种种天香雨虚空中；或有变作犍闼婆色，击天伎乐；或有变作天女之色，种种宝器香水洒地；或有变作净金黑色，烧种种香；或有变作诸天子像，歌唱喜舞；或有变作种种之色，合掌瞻仰赞叹如来。或有魔众随佛方面一心瞻仰，各持种种摩尼之宝供养世尊。或有街衢、殿堂楼阁、窗牖门阙台上，四阶之道墙堞楼檐，门间树上重阁钩栏，各随所住合掌瞻仰供养如来。

尔时，魔王见彼一切所有魔众，各与眷属归依如来。是时，魔王转加嗔怒过于前量，惊怖迷乱，举声悲泣，说如是偈：

“我失胜威德，无复有见助，
沙门胜神通，夺我魔境界！
应更勤方便，思后时所作，
斫断莲华根，令众散诸方！”

莲华根断已，令大众迷乱，
若众迷乱已，此我后愿力！”

尔时，魔王说是偈已，如所思惟犹如疾风从空而下，至彼莲华所现之街，即便前进欲拔莲华。以佛力故尚不能触，何况侵拔？既不能拔，复欲摘彼莲华之叶及损华台，又不能损。即欲举手遥拍彼华，是时魔王见彼莲华如电如影，虽对眼根不可损触。尔时，魔王尽其神力如其所作，于彼莲华竟不能损；复欲惊动一切大众，即出高大可畏之声，声亦不出；复现威猛，以大力势即举两手，欲拍大地令地震动，是时大地犹如虚空，乃至不可以手摩触，况能令动？是时，魔王见此大地不可得触，复生是念：“今此大会所有众生，我当打之令使心乱。”作是念时，乃至不见有一众生可得可触，况能加逼？以佛力故有如是相。是时，魔王转加忧恼，遍身掉动如大风树，发声号哭悲恨流泪，遍观四方说如是偈：

“沙门以幻力，普摄诸世间，
令我心昏醉，迷乱一念顷。
境界功德力，此是我所有，
彼以幻力故，一切侵夺尽。
我今被所弃，宜速还自宫，
乃至若不去，复及我寿命。”

尔时，魔王即欲还宫，虽生是念复不能去，转加惊哭，复作是念：“我今于此神通尽也，为复瞿昙自在力也！莫复于彼怨家之前令我命尽。”复作是念：“我今可隐出此娑婆佛刹之外！宁死于彼，莫令于此佛刹有一众生见我死者。”作是念时，乃至不能离此方维，况能隐去？即时自见被五系缚，转复惊嗔高声悲哭，复作是言：“呵哉！爱子及诸亲属不复可见。”

尔时，有魔名曰智声，即自变身作转轮王形，向彼魔王说如是偈：

“汝意何故忧，号叫生悲恼？
世间最上者，如来为上上，
佛为无所畏，宜速求归依！
救护诸世间，如灯照诸趣，
归依恃怙者，毕竟脱三苦。
若亲近如来，当得寂灭乐！”

尔时，魔王作如是念：“若我用彼智声语者，沙门瞿昙应当归依，我此系缚应得解脱。”是时，魔王随佛方面，曲躬合掌作如是言：“南无无上人中丈夫，佛能解脱老病死者，我今归依。”是时，魔

王以偈颂曰：

“此缚甚峻大可怖，我速归依求善逝，
归依如来得解脱，今始归依第一众。
我以痴盲瞋正觉，所造过失为最极，
今依汝语故忏悔，置汝现前以为证。”

尔时，魔王用彼智声善丈夫语，即于佛前归依世尊，应时自见身缚解脱；既解脱已，复念欲还魔所住宫，即自见身复五系缚，于此众中无能去处。即时还复归依如来，生此念时，即于佛边复得解脱。作念欲去即见系缚，生念欲住即见解脱，如是如是乃至七遍。系缚解脱魔王自知，无所能为，便于佛边默然安坐。

宝星陀罗尼经卷第四

大集品第四

时，彼四大声闻入王舍大城乞食，逢魔童子执声闻手共走衢中，请四沙门非法歌舞。时，大声闻在歌音中，为说涅槃相应道句。尔时，于刹那顷大地震动。如是无量百千天、龙、夜叉、乾闥婆、阿修罗、迦楼罗、紧那罗、摩睺罗伽，先于佛教中得清净信者，面目流泪说如是偈：

“最上导师现在世，于圣教中恶怪起，
辱彼声闻令世见，众生云何生净信？”

尔时，无量百千俱胝那由他天、龙、夜叉、罗刹，面目流泪往到佛所，到已于佛前住，说如是偈：

“圣教现在此，当善观今日，
智者勿放舍，为护正法故。”

尔时，世尊复说偈言：

“我今自往彼魔所，令魔军众悉降伏，
当作一切世间导，普教同向涅槃城。”

尔时，一切大众异口同音作如是言：“世尊，勿往！勿往！世尊先说，诸佛不可思议，诸佛境界不可思议，魔境界不可思议，龙境界不可思议，业及业境界不可思议。如是一切诸境界中，唯佛境界最胜无能及者。唯愿世尊不起此坐，令无量俱胝那由他等诸魔军众自然降

伏。复能开示无量百千那由他等阴界诸法，竭烦恼海坏诸见网，能令无量那由他众生入智慧海。世尊，今日非是去时。”

佛言：“所有众生界众生，彼一切众生尽变为魔，乃至大地尽为微尘，如是一一尘复变作魔。彼一切魔力欲来害我，乃至不能动我一毛，况能损坏我此身分？我坐此座，能胜无量俱胝那由他魔，又能调伏，唯置此魔眷属难可调伏。虽然我今当往。所以者何？此魔以神通力，于王舍城已变作种种严饰之具供养于我，怜愍彼故我今当受，令彼魔心能发希有第一欢喜生清净信，当种阿耨多罗三藐三菩提善根种子。”

尔时，世尊说是语已，从座欲起。时，彼护竹林天，名曰端正，往至佛所，涕泪交流而说偈言：

“世尊于今日，非是入城时，
此城极广大，魔众皆充满。
如是一一魔，中心怀重恶，
咸与亿千众，欲围绕世尊。
嗔火皆炽然，毒意转狂乱，
竞持锐器仗，争恼害如来。
唯愿释师子，毕竟慎勿往！
或当被非命，失我大归依。”

世尊闻已默然不答，即起法座。时，彼护伽蓝天，名曰持慧，顶礼佛足而说偈言：

“恶魔大将有五千，各各竞持精器仗，
纯怀恶心立待佛，今日勿往牟尼尊。”

世尊闻已默而不答，将出伽蓝。时有药天，名曰成慧，头面礼足而说偈言：

“呵哉失正觉，法门当破坏，
法舟俄欲沉，慧灯奄不照，
世间法味减，烦恼贼盈满。
于诸有界中，我无少自在，
最上法散坏，云何能住持？
彼魔军甚众，住于恶法中，
各持利刀仗，毒心争害佛。
善逝用我语，为利世间故，
唯愿十力仙，善步莫入城！”

世尊闻已默然不答，将发伽蓝。时，大门内有一树天，名曰持

势，即于佛前大悲啼泣，以身投地向佛作礼，而说偈言：

“依怙三有当失眠， 满意所欲将灭坏，
空中刀箭如毒蛇， 伺求害佛愿莫去！”

世尊闻已默然不答。尔时，守大门天，名曰水光，举声号泣，头面著地顶礼佛足，而说偈言：

“城中名闻大梵志， 持月刀仗候待佛，
共怀毒害有二万， 在此城中愿莫去！”

世尊闻已默然不对，将入王舍城门。时彼守城门天，名曰多摩罗树叶坚固，于虚空中举声号哭，驰至佛所顶礼佛足，而说偈言：

“此道师子象围绕， 起勇健心争害佛，
及恼比丘作障碍， 悲愍天龙愿莫去！
四道众中因陀罗， 见佛教灭生忧苦，
相与云集共一处， 怖畏战栗共相谓：
如来既是退魔者， 魔今变作极恶面，
恐大法灭世灾起， 日月失度星辰翳。
睹恶相现皆拍头， 奇哉善逝有退相，
日眼散坏法炬灭， 蹂践正觉竭法水。
世间妙法坏将至， 众魔恶党渐炽盛！”

世尊闻已默然不答。彼城门天谏佛不回，悲啼流泪复说偈言：

“普观世间牟尼尊， 最上说者去当死，
莫近我城取死灭， 我被三界常毁咎！
愿听我说坚固者， 今日莫向城中灭，
怜愍众生此处侍， 解脱众生生苦怖。
如来当忆本誓愿， 得大菩提度众生，
无量众生为苦烧， 安隐众生最上医。
无量俱胝劫住世， 为诸著欲凡夫众，
说法令彼得寂灭， 谓入自性空相义。”

尔时，世尊默然不答，欲入大门。时，彼地天与大滋味天，并其同类一万天俱，被发两面共到佛所，合掌住立而说偈言：

“佛忆昔行檀， 施血过四海，
头骨如铁围， 眼等恒沙数，
及种种妙宝， 妻子与象马，

衣食房卧具，随病所须药，
作最上供养，护戒不放逸，
数习多闻忍，常孝养父母，
修难行苦行，解脱苦众生。
汝昔所发愿，成佛说上道，
济拔世苦海，为众生说法，
令竭苦无余，使入无畏城，
置于菩提道，遍满众生界。
行恶失道者，忏悔毁闻戒，
随顺昔所愿，说法俱抵劫，
浴以八戒水，令度烦恼河，
三界众生中，更无如佛者。
自既得解脱，复解脱世间，
运度诸众生，于此三有海，
唯佛得如是，世间第一觉！
唯佛是世亲，愿布甘露法！”

尔时，世尊入城门已，刹那之顷，时有无量亿那由他天、龙、夜叉八部鬼神，于虚空中各各雨泪，而说偈言：

“我见昔善逝，调众安隐时，
说法作利益，无如是恼乱。
大师出恶世，自然成大觉，
说烦恼障法，成熟世间故。
常作师子吼，无量诸恶魔，
欲如是灭法，佛今莫入城！”

时有余天，复说偈言：

“诸佛转法轮，住一方利益，
今佛处处往，无令得逢恶。”

尔时，复有余天同说偈言：

“以悲为导师，常行利众生，
莫独入城中，如我见有损！”

彼时，复有无量百千俱胝那由他天、龙、夜叉、罗刹、阿修罗、摩睺罗伽等，面目雨泪，从虚空中作行而下住于佛前，有无量种异形，或有被发，或绝璎珞，或有宝盖幢幡皆悉倾倒，或复举身投地，或捉佛足，或大哀号，或举两手捶胸懊恼，或有在佛足下躃踊悲哭宛

转于地，或于佛前合掌赞叹礼拜，或散种种杂色妙华、末香、塗香、华鬘、鬘摩缯彩严饰之具，或散织成宝服真珠璎珞种种异物。时余天众供养佛已，同时举声而说偈言：

“佛所行苦行，为利益世间，
生此末世时，为众勿舍去！
作佛事未多，天人得证少，
久住开示法，度三有世间。
有行清净行，成就甘露器，
应起悲教我，救世间苦逼。
六趣旷野中，生死失正道，
为彼示善路，教圣法解脱。
此最希有悲，愿大觉久住，
转无上法轮，勿令世无怙！”

时有余天，复说偈言：

“导师若灭没，世间悉盲冥，
八圣三解脱，于此悉皆无。
我等已种善，三业不放逸，
一切乐具足，久住功德藏。”

尔时，复有净居天众，与其眷属无量无边亿那由他集在一处，各共相谓而说偈言：

“汝等勿怖佛无衰，应于大觉当了然！
我忆往昔亲见佛，欲界所有俱胝魔，
遍满三十六由旬，利斧利剑并刀槊，
飘勇迅疾如云奔，魔众雄猛声可畏，
至菩提树悉走散，于刹那顷皆惊怖，
况今果圆名称广，彼等何能为障碍？”

时有余天，相与悲泣而说偈言：

“昔一魔军无大力，今有千亿俱大势，
来坏如来定无疑，佛若灭没世皆闇！”

尔时，梵释诸天护世间者，顶礼佛足而说偈言：

“以我小智劝佛住，用我等语悲愍者，
无量诸天忧火烧，今为彼等洒法雨。”

尔时，世尊以大慈眼遍观一切同来天众，出妙梵声普垂安慰而说偈言：

“汝等勿怖今无畏，一切魔众一时来，
彼等不能损动我，乃至一毛况复身？
我今安慰一切众，常于世间说妙法，
我于如是失道者，当广分别示正道。
我昔已行难行事，广施众生以饮食，
房舍医药不乏少，谁能今日恼乱我？
我舍车乘与象马，严饰宝具亦如是，
奴婢城廓及聚落，谁能与我作恼乱？
妻妾男女并眷属，爱重自在王种位，
我与众生利益故，我身何故今当坏？
头目及耳鼻，手足身皮血，
以命施众生，谁能恼乱我？
无量俱胝佛，自手普供养，
常乐戒多闻，谁能散坏我？
作无量难事，甚能摄伏心，
遍割身不嗔，今谁能恼我？
烦恼已退成正觉，于诸众生等慈心，
永无嫉妒及秽怒，现前无有如我者。
我今破魔所有力，能退无量俱胝魔，
决定与汝作解脱，何故恐怖不入城？
所有十方及此土，住此诸佛刹土者，
彼等一切我普请，及大神通菩萨众，
愿令世间悉遍满，及以福智薰世间，
共彼如佛法式住，亦持诸佛所顺可。”

尔时，无量百千万亿那由他阿僧祇天、龙、夜叉、阿修罗、迦楼罗、紧那罗、摩睺罗伽、人非人等，俱来大众一时同声唱言：“善哉！”复作是言：“南无希有未曾有无数精进具足如今世尊！南无南无大希有未曾有无数精进具足如今世尊！安慰一切天人及众生类皆蒙度脱，退诸魔众散灭众生烦恼垢聚，破我慢山斫受生树，碎生死日除无明闇，生外道信竭四流水，然正法炬示菩提路，授与众生柔和忍辱，游戏三昧处禅定乐，普令觉悟四圣谛道。大悲导师广度众生，于生死海引诸天人入无畏城！”

时诸天、人、阿修罗等，各以种种天妙华香、塗香、末香、杂宝华鬘庄严之具散于佛上。为供养佛故扫饰衢巷，以天宝衣、天妙华、天绮縠遍覆道上。又雨曼陀罗、波卢沙、迦卢遮、大卢遮、优钵罗、俱物陀、分陀利等种种莲华，随佛所履布于足下。其道两边化作天

树，枝叶华果悉以七宝而严饰之。七宝树上，复现种种妙宝天衣、天冠耳珰、环玊宝饰庄严之具。是诸树间有天华池，其池四边周匝七宝，清冷美水八德具足，众宝莲华及妙音鸟，杂色间发盈满其中。

彼诸天众供养佛故，于虚空中各持七宝幢幡华盖，校以种种金绳露缦真珠瓔珞，又雨金屑、银屑、毗琉璃屑，及散一切沉水末香、多伽罗末香、黑栴檀末香、多摩罗叶香，复雨牛头优罗伽栴檀香等，种种末香遍于道上。复雨金绳交络真珠瓔珞、摩尼珠瓔珞、如意珠瓔珞，缤纷布濩于虚空中随风回转。其城内外有道上，悉以种种天庄严具而严饰之；乃至城中魔及眷属，亦以妙好天庄严具而严饰之。

尔时，世尊怜愍一切诸众生故，便入首楞严三昧。其心正受，以如所入定在道徐行，即现种种微妙色身，威仪相好光明希有，于其城内道中正立，令彼道上一切众生悉见佛身。所有事梵天者，应以梵身而得解脱，世尊即现梵身而化度之；所有事释天者，应以释身而得解脱，即现释身而化度之。所有事那罗延者，应以那罗延身而得解脱，即现那罗延身而化度之。所有事摩醯首罗者，应以摩醯首身而得解脱，即现摩醯首身而化度之。所有事四天王天者，应以四天王身而得解脱，即现四天王身而化度之。所有事转轮圣王者，应以转轮王身而得解脱，即现转轮王身而化度之。所有事诸小王者，应以诸小王身而得解脱，即现诸小王身而化度之。所有事大神通者，所有事沙门者，所有事童男童女妇女身者，皆现彼身而化度之。及至所有事师子事、龙事、象事、兔事、阿修罗杂类身者，是诸众生应以彼身威仪色相而得解脱，如来悉皆现彼形相而化度之。世尊如是种种作示现时，彼一切道行众生，见是事已皆共合掌，头面著地礼拜赞叹，围绕如来得未曾有。所有事象事、龙事、阿修罗，乃至所有事兔神者，彼等众生即见如来，同兔形相威仪在道而行。所有众生事于佛者，彼等众生即见如来，如佛威仪在道而行。彼等众生悉皆合掌赞叹礼拜，相与依随从佛后行。

尔时，雪山光味仙人，与其徒众五百人俱，为魔所遣，诣王舍大城令至佛所。是时，光味于城门外住待如来，见佛身相犹如仙人，威仪形相显发庄严，及见无量百千俱胝诸天围绕供养，见是事已复作是念：“如此人者，真大仙人，有大加护，应受人天最上供养！及见一切身分庄严似圣智者，我等二人，谁为尊胜？智慧谁胜？我于今者如何了知？”又作是念：“我应近问，以何生类？以何姓氏？受持何等？以何志乐？以何等行？”光味仙人自观徒众，说如是偈：

“今见多闻大福德，能持大行应供者，
能知善道牟尼最，大忍智义法具足。
汝等一切殷重心，以大方便常供养，
我当于此功德者，闻其善说度彼岸。”

尔时，光味一切徒众摩那摩等，皆共同声作如是言：“如是，大师，应如是作。”

时，光味仙人并诸眷属往世尊所，到佛前已合掌住立，作如是言：“汝今是谁？”

世尊答言：“我是婆罗门。”

仙人复言：“汝姓何等？”

世尊答言：“我姓瞿昙。”

仙人复言：“汝何志乐？”

世尊答言：“三解脱门。”

仙人复言：“行何等行？”

世尊答言：“我行真实际。”

仙人复言：“出家几时？”

世尊答言：“如彼无明久如所起，我今出家亦复如是。”

仙人复言：“如是大仙星宿应现，如所明记颇诵不耶？”

世尊答言：“如彼平等我不忘置，彼何所有有何坚固？如此相者世间智知。”

仙人复言：“为欲令诸智慧之人心生欢喜故作此说。”

世尊问言：“云何名为星宿之句？”

仙人答言：“二十八宿日月所依随转而行，各依彼人横手八指以为量法。彼十二八指以为身量，以一八指用为顶量，以一八指为足掌量，如是十四八指，应知是为星宿量法之句。若解如此更无异法，各随其人有廕记处以为定法。若不尔者大牟尼听，我今当说星宿之句。

“卯星生者，于面右边权下四指有赤黑廕，廕上有毛，名闻智慧爵禄相应威势炽盛，卯星生者有如是相。毕星生者，身上有疵若四指量，聪睿贞实，心常守法，智慧惭愧，爵禄具足，于一切时心常勇健能摧胜怨。参星生者，颈下四指中有黑疵，为性勇健，爵禄具足。嘴星生者，从顶量已下一揲手半左相有廕，性多嗔痴而有爵禄。富那婆苏（唐言井宿）星生者，于左胁下当有黑疵，财谷具足而少智慧。富沙（此言鬼宿）星生者，有最上相，手中轮相犹如日轮，上妙端正发相右旋，一切依住上身圆满，能破烦恼为大导师。阿失丽沙（此言柳宿）星生者，胸有黑疵，好斗犯戒，难与共住，性多淫欲（上七星是东方宿）。

“莫伽（唐言星宿）星生者，若胸若背而有小疣，是善丈夫能如法行而多财货。初破求（此言张宿）星生者，或脐左右必当有疵，多慳短命。第二破求（此言翼宿）星生者，脐下四指若见廕者，爵禄持戒皆悉失坏。阿萨多（此言轸宿）星生者，脐关无下当有赤廕，性好作贼，谄曲少智，聪明薄福。质多罗（此言角宿）星生者，男女阴上当有廕子，为性纯直而多爱欲，复好歌舞。萨婆底（此言亢宿）星生者，或男根头或在根下有黄廕生，受性多贪，嗔恼大众而无智慧。苏舍佉（此言氏宿）星生者，从跨已下八指量内随处而有赤廕生者，眷

属具足多有僮仆，位居卿相聪明惭愧，勇健谋决能退怨敌，常受安乐命终生天（上七星属南方）。

“阿奴逻陀（此言房宿）星生者，从膝已上八指量内若有小疣，持戒有法爵禄具足。逝瑟吒（此言心宿）星生者，髀内有靨，短寿贫穷，犯戒少慈，为人憎嫉。暮罗（此言尾宿）星生者，髀上当有小疵，此有福德而速灭门。初阿沙茶（唐言箕宿）星生者，膝盖有靨，性好舍施，能知法道命终生天。第二阿沙茶（此言斗宿）星生者，于右胫上当有青靨，性好斗诤，人不依附而不信受。失罗婆（此言牛宿）星生者，于右胫上必有两靨，常丰爵禄受身无病，人所爱乐命终生天。陀你瑟吒（此言女宿）星生者，胫上有靨多嗔少贪，虽有智慧而无爵禄（上七星属西方凡少虚宿）。

“舍多毗沙（此言危宿）星生者，从膝已下十六指内当有黑靨，为性愚痴溺水而死。第一跋陀罗跋陀（此言室宿）星生者，从曲膝下八指内膊上必当有疵，令人嗔恼，愚痴贫穷好作贼盗。第二跋陀罗（此言辟宿）星生者，于虎口内当有靨子，好施持戒念力强记，有智有悲性无所畏。丽婆底（此言奎宿）星生者，为人卑下庸力自活。阿湿毗胝（唐言娄宿）星生者，足母指间当有青靨，身无病恼而常大力。婆逻尼（此言胃宿）星生者，于足掌下当有靨子，受性无悲好为宰手，破戒恶行死入地狱（此北方星）。

“如上所说此即名为星宿之句，以此得知人之性行贫富好恶。若知此者，能令众生到于彼岸。”

尔时，世尊告仙人曰：“此是愚痴凡夫所见，依心随著住分别行。凡夫热病之所妄见，如彼狗蛇鱼鳖之类。若复其余种种众生，此富沙星之所生者彼非乐分。如汝神通得定解脱，我复能为一切示者，汝今何故不问于我？”

时，光味仙人生大欢喜以华散佛，即便以偈而赞请曰：

“仙人人形相，我见最上相，
不知彼种姓，为天为人耶？
音声言语法，犹如大梵天，
持行持色相，久远仙相似？
昔所不闻见，具足牟尼相，
所师何所说，及说汝之姓？”

尔时，世尊即便以偈，答仙人曰：

“不知此彼岸，故有相建立，
被缚一切苦，汝非解脱器。
六度是我姓，六通婆罗门，
说彼六和敬，六根分别修。

三法三解脱，平等知无我，
菩提心发时，彼时我出家。
我相不可得，善修于无相，
无人无寿命，知无我亦空。
三受三行法，分别修所空，
我度智彼岸，此为无等说。
无所著如空，菩提心作者，
彼忍力具足，当得如是智。
不著于诸法，得报者亦无，
如是解顺如，菩提不难得。
不立于诸法，及不依彼此，
真际分别修，此当得如来。
无相无想相，离于有所得，
诸法非和合，此当得如来。
汝舍此等相，自心惑亦舍，
汝觉等虚空，如是当得佛。”

尔时，世尊说此偈时，时中无间，光味仙人并诸眷属，即见世尊形相威仪，还如佛住复得忆念，自念久远先种善根而得现前。时光味仙人即得菩萨三昧，名曰宝星，所得三昧于菩萨三昧一切观见，如在高幢观见一切三昧，自在境界无所系属，不依他见，无人能坏，无人能夺。

时，光味仙人即于佛前合掌而住，两手捧华以偈赞佛：

“无边称实说，世间善依怙，
如来慧眼光，照一切众生。
出过众生上，精进常慈悲，
稽首坚固者，导师尽诸著。
紫磨金色光，触众生清凉，
觉一切众生，以菩提功德。
佛转大法轮，能破烦恼山，
最后所行讫，今得菩提智。
众生中大医，真实相庄严，
说我当得佛，众生中导师。
割坏诸爱网，自度亦度他，
久近得佛记，当作人中上。
苦流漂众生，令度于有海，
涅槃安隐处，置立无漏道。
所有十方佛，功德如大海，
彼为我作证，回向菩提心。

一切诸众生，苦触极恶恼，
三世及福德，我本身口意，
及一切众生，苦灭得佛乐，
众生普具足，得常住涅槃。
众生病寂灭，烦恼水枯涸，
得智等诸根，自性常坚固。
众生到杀处，及受众苦缚，
以我福德光，普令速解脱。
一一众生界，得如海功德，
得无量福智，一切乐具足。
弃彼诸恶见，速亲近正见，
忆念前生处，众生得法行。
一切得法船，度有海彼岸，
既度彼岸已，得佛一切法。
久住无量劫，普雨大法雨，
法云清净水，净洗诸众生。
若我身口意，一切所作恶，
我一切发露，唯佛作证知。
我生敬重意，莫复行恶业，
佛不可思议，常得现前见。
若有一福德，回向为菩提，
我因诸众生，忍受一切苦，
我劝请众生，行菩提上道，
净诸刹土劫，及众生智海。
我得净刹土，随彼证菩提，
得清净徒众，净忍住诸地，
决定五神道，我得师子说，
无著智示者，导师当记我。
若定得佛时，一切法调御，
我所散之华，空中成华盖。
天龙人等众，一切来作证，
我顶礼佛足，令地大震动。”

尔时，光味仙人所散之华，住处空中近佛顶上合为一盖。时，光味仙人见此已，倍复过量无余希望，第一爱乐生大欢喜，即便稽首两膝著地礼世尊足。光味大仙礼佛足时，应时无间，一切三千大千世界六种震动。所有无量阿僧祇众生，百千俱胝那由他等，普来集会悉皆悲喜，生大惊叹怪未曾有。

是时，如来随彼众生所应见者现种种身，应以象形而教化者，即见如来如彼象形生爱乐心。又见大仙人所散之华，住上虚空变成华

盖，及大地动。既见此已，倍复过量生希有心，到世尊所顶礼佛足。所有众生应以佛身而教化者，彼见如来如佛身相生希有心。是时，世尊即便起定，从首楞严三昧安详而起。无量众生所教化者，皆见世尊无余悵望，皆大喜悦生爱乐心，各如所得华鬘、衣服、末香、塗香诸庄严具持散供养。

尔时，世尊即为光味仙人，说受记偈：

“速起听受记，导师今为说，
大仙得菩提，地动华一盖。
住上虚空中，无比加护故，
汝得两足尊，自在利世间。
佛有无边福，边量等虚空，
三界中坚固，法灯照世间。”

尔时，光味菩萨摩訶萨即前恭敬白佛言：“世尊，我得佛刹似何等相，我于彼刹转大法轮？”

是时，世尊告光味言：“汝未来世过无量阿僧祇劫，于北方分有世界名开敷香，具足庄严有如是相，如今西方安乐世界。汝善丈夫于彼佛刹当得阿耨多罗三藐三菩提，号无垢香光胜如来、应供、正遍知、明行足、善逝、世间解、无上士、调御丈夫、天人师、佛世尊。彼佛寿命十中劫量，唯诸菩萨摩訶萨俱，无有声闻、辟支佛乘，纯说无上清净大乘。”

时，彼大众闻佛世尊授彼光味仙人记已，各以所持供养之具供养仙人。时，五百摩那婆等，及九十二那由他百千俱胝众生，发阿耨多罗三藐三菩提心，及得菩萨不忘菩提心三摩提。

宝星陀罗尼经卷第五

相品第五

尔时，三千大千世界百亿诸魔生如是念：“今佛世尊入王舍城门，我等应以最上庄严，严饰此城门之内及彼地方，如彼城外天、龙、夜叉之所庄严。”

尔时，世尊以他心智知百亿魔心之所念，欲以神通最上色相庄严佛处。是时，世尊以神通力，于王舍大城十二门内，一一门中皆有如来及诸大众，共入城门。时，百亿魔即以神通种种庄严胜中胜者阿僧祇等诸庄严具，严饰城门及地方城壁诸树，地上虚空胜妙庄严而庄严之。时，百亿魔并诸眷属，或有作于梵天之形，乃至作于大仙之形，于诸重阁窗门、楼櫓却敌、树间诸处，地及虚空各于中住，以种种华、末香、烧香、金粟、银粟，以摩尼真珠及种种庄严以严衣服，并

诸绮绣庄严具等普雨供养。又以种种天之音乐，击鼓拍手，种种赞叹歌咏如来无量功德。悉皆聚集供养世尊，以如是第一最胜庄严大希有相，所未曾有，所未曾闻。

尔时，世尊住城门下，以右足指触城门闕。应时无间，一切三千大千世界普皆震动。及此三千大千世界所有释、梵、日月、护世大自在天、天、龙、夜叉、乾闥婆、阿修罗、伽楼罗、紧那罗、摩睺罗伽等主，地天、水天、大海诸山城邑等天，及诸男女、童男童女、天仙等众，乃至阿迦尼吒天宫已来，所有众生得大滋味色貌光泽。彼一切众见地大动光照觉悟，于王舍大城地及虚空围绕而住，乃至华香黑栴檀末散佛供养。

是时，世尊释迦牟尼佛，以神通力令彼散华乃至末香普遍十方微尘等刹，一一方分所有清净及不清净、空不空等诸佛刹土，悉皆供养供给彼佛。彼佛刹土所散华，并诸末香庄严具等，皆出如是偈句之声：

“汝等疾觉悟，观不放逸行，
最上菩提因！流转甚生死，
我今拔济汝，宜速舍世事，
忆往昔誓愿，时到熟相应，
各得菩提记。牟尼因陀罗，
利益世间故，今入王舍城！
大仙胜无忧，已降百亿魔，
转清净法轮，应当大欢喜。
如是利世间，普示勇健事，
解脱世间苦，今为摩利沙，
当得菩提故，今授汝等记。
速往彼刹土，见妙好庄严，
自然如是得，入彼无忧城，
渐次菩提行，决定当得佛！”

尔时，十方微尘等一切佛刹彼彼大众，以佛力故，悉见此佛竹林大众，菩萨摩訶萨各各三昧思量。是时，竹林所有菩萨摩訶萨思惟住者，并诸声闻、大声闻，皆见世尊于王舍城门调伏住待。彼诸大众随世尊后住，见大庄严具中出诸偈已，悉皆遍满十方一切微尘等净不净、空不空一切佛刹。彼诸佛刹所有菩萨摩訶萨及住声闻，闻此声已作如是念：“何处有此法声，遍满如是可意声、如是美妙、如是可爱、如是可乐、如是可喜、如是劝发、如是大功德称扬之声，及见华末香雨，雨于十方无量庄严，无量华香细末之雨？”时，彼菩萨摩訶萨及大声闻，舍所作业皆大惊叹。

尔时，释迦如来即入三昧，名依佛庄严严饰三昧。入三昧已，应

时无间，一切娑婆世界及十方一切微尘佛刹所有大众，悉见此佛刹中如是大庄严相，如彼未来世中普见如来净无染聚世界功德庄严，唯无一事，谓城壁等而自然庄严。一切十方诸佛刹土微尘等世界诸佛世尊，普见释迦如来住王舍大城，光明赫奕甚大端严。彼诸佛刹所有大菩萨摩訶萨等及大声闻，闻此偈已各皆忆念观于四方，见此世界如对目前。以一切诸佛境界力故，及见诸天种种庄严。

时，彼菩萨摩訶萨等及大声闻作如是念：“我等决定往于彼土大集会中庄严之处，及彼佛刹功德庄严普观察之，见释迦如来已修行供养，我等于彼佛所得阿耨多罗三藐三菩提记。”

时，彼十方一切佛刹微尘等世界，诸菩萨摩訶萨等及大声闻，释迦如来神力加故，各自佛刹，于刹那罗婆摸呼多顷，彼没此现到娑婆世界。时，彼十方一一方分无量无数佛刹，微尘等菩萨摩訶萨，一切悉来到此佛刹，地及虚空遍满而住。彼诸菩萨摩訶萨等，各依菩萨种种善根若干力故，修营供养释迦如来。且置是事，或有菩萨于此佛刹，雨种种华一切遍满，为供养事供养世尊。或有雨于种种真珠，乃至或有金、银、毗琉璃、玻瓈、石藏宝、摸萨罗、牛头栴檀、龙坚栴檀、多摩罗叶，悉以为末而满虚空，为供养事供养世尊。或有雨于种种严饰诸庄严具衣服绮绣，为供养事供养世尊。或竖种种幢幡华盖，为供养事供养世尊。或烧种种之香，或散种种宝鬘，或击种种伎乐，或有示现种种歌舞，或有种种香水雨此方地而洒润之，或有种种宝器盛种种宝，于世尊前捧持供养。或有种种宝器盛满香水，以华果叶而庄严之，于世尊前捧持供养。或有种种宝树种种天衣，华果庄严举手捧持，于世尊前为供养事。或有化作大梵天身合掌佛前，乃至广说如前所作。或有化作师子之形，于世尊前如是礼拜。

彼诸众生以佛神力，及自善根加护力故，互相观视，于自眼根不取诸色，以佛世尊现如是相，及魔王所作，大境界天之所作若干境界，及以如来自念处、正断、神足、根、力、觉、道、十八不共法诸佛境界若干变现，随世尊后入王舍大城，向彼中街莲华之所。世尊到已，以右手掌摩莲华叶而挽住之。时彼莲华因挽动故，于此佛刹，一切魔宫魔所坐处悉皆振动。彼魔男女所有眷属，及诸徒众所居住者，皆生怖畏惊愕而住，自相谓言：“无因无缘，我此宫室如是震动。莫复我等魔王境界自失位耶？莫复我等所住宫室灭没之法于此起耶？我等今者决须观察。”

时，彼诸魔见此已，作如是念：“此佛刹土昔是五浊，谁复今者能令如是微妙庄严甚可爱乐？”时，彼诸魔于自境界所居住处，并诸眷属悉不复见，唯见释迦如来三十二相大人之相，具足庄严光明赫奕甚大显照。于此一切三千大千世界及一切佛刹，种种诸相色貌现住众生普遍，而无有一可识众生。时，彼一切无量众生，于世尊前悉见修营为供养事。时，彼诸魔作如是念：“我等决定往彼释迦如来所，见已礼拜并诸所问：我等魔王并诸眷属，今日悉皆何处去耶？”尔

时，此佛世界百俱胝魔，并诸眷属往世尊所，到已恭敬于佛前住。
时，彼魔王向佛曲躬，合掌恭敬说如是偈：

“我以清净心，归依于世尊，
速放我令去，从今行法行！”

尔时，世尊以偈答曰：

“我不障一人，来者及去者，
汝若能知道，随汝欲所去。”

尔时，魔王复说偈曰：

“如我所欲去，所乐自宫室，
今见五种缚，瞿昙之所缚。”

尔时，世尊以偈答曰：

“我断诸分别，自解脱世间；
我既解脱缚，令他离恼害。”

尔时，世尊即以佛眼观视一切此佛刹土地及虚空众生遍满，而说偈言：

“汝等今当听，一切普来者，
弃舍诸疑惑，且各默然住。
世间佛难值，法僧值亦难，
具足净信难，菩提行复难！
亲于世尊前，得闻法甚难，
能修于诸忍，此一时亦难！
调伏心为难，及修于空行，
能断诸分别，一切世间恶。
菩提行难得，如我先所行，
我当为汝说，但说一华分，
暗阴令灭坏，示现无上道，
所得菩提者，今当断三垢。
听大师善说，度彼岸诸流，
舍诸大渴爱，建立三解脱。
安立三护等，三界诸烦恼，
散灭令无余。汝为供三宝，
复为法故来，世尊天及魔，

三世加护故，三世惑覆心，
皆得最胜断，得解脱三界，
灭烦恼之忍，及四种颠倒。
颠倒诸凡夫，分别无体性，
彼非有忍器，眼等著诸色，
身口意覆翳，彼无四禅定，
亲近于生死。聪明智慧者，
能修于禅定，彼今得解脱，
离于四颠倒，及解脱众生，
自在拔四流，解知诸起灭，
所有调柔者，当得度彼岸。
菩萨具四行，及以无所畏，
正智皆能断，众生诸有缚。
能解知五阴，无漏离胃缚，
不复数数生，到有海彼岸。
汝等诸佛前，速发露诸恶，
诸恶断无余，到彼无畏岸。
所有生死苦，随受有为者，
数数生诸有，随遂于恶友。
当远离恶友，断除于恶见，
忆念生死苦，修习第一义。
当饮无上水，应修习于空，
第一义无体，无实亦无相。
六根犹如空，此中无作者，
分别相如是，唯分别无法。
六受及六爱，六触为其本，
六触入如是，亦须解知空。
观察无一切，如法自体性，
无起亦无灭，此中见无实。
诸法同法性，三世无一物，
若知无热恼，此道最无上。
离十三我相，众生想分别，
如是修羼提，此彼得解脱。”

尔时，世尊以无碍福力而无所畏，依种植善根故能变现出大圆音声遍十方，说如此偈。

尔时，十方无量阿閼毗恒河沙譬喻等诸空不空五浊世界，悉皆闻此圆音演说。闻此声已彼刹那顷，如是一一无量佛刹，无量无数百千俱胝那由他等，所有众生甚无所欲，唯有清净爱乐之心，于往昔所得阿耨多罗三藐三菩提更不退转，或得种种三摩提羼提陀罗尼。于此佛

所集无量无数众生，闻如此句义文字已即得阿毗跋致。复有无量无数众生，于三乘法各随得度。

尔时，光味菩萨摩诃萨，以己神力化作七宝阶，以华遍布其上为莲华座；欲令如来升此座故，向佛恭敬曲躬合掌，说如是偈：

“佛一切智月，观世老病死，
忧患所没溺，世间动不动，
为彼作法桥。佛观满刹土，
无量大众生，悉皆合掌待，
分布施法会，示现已所得，
破众生烦恼，无比方便智，
于此普示现。佛升莲华座，
普雨大法雨，十方一切佛，
及余智大仙，与佛作证明。
牟尼因陀罗，降伏大魔王，
自性空无有，知法如虚空。
忆念昔誓愿，转无上法轮，
今当拔众生，住于四流者。
人中师子王，佛今知此法，
令度三有海，佛说无等法。
除众生罪垢，世尊大智慧，
利益诸众生，安置善逝道！”

尔时，世尊如其所化宝阶之上钵头摩座升莲华台。如来坐已，遍观十方一切大众告魔王言：“汝今于此应生欢喜，由汝因缘今得此处大集法门。”说此法时，无量无数所有众生，今世来世皆得解脱，处胎殃横老死四流，普各得度住吉祥道，又复令得虚空等智。“魔王，汝今此处为首，令诸众生善根增长。魔王，汝可请我说法，令此众中高慢众生，度诸流故而为说法。”

是时，魔王说如是偈：

“瞿昙若无过，及无嗔慢者，
云何惊动我，今此说大法？
若有此嗔慢，云何得解脱？
我今未审知，牟尼为我说。”

尔时，世尊即以偈颂，答魔王曰：

“我处十月胎，同彼人中事，
汝魔欲害我，我都无秽憎。
我忍度诸恶，秽恶悉无余。

我既出生已，汝复动大地，
雨石来害我，复欲断我乳，
令乳速干竭，无量不爱事，
何种而不作？我住禅定时，
遣诸女恼我；我又乞食时，
障他令不施；请我作国王，
令我轮生死；踰城出家时，
复令夜黑暗；兵众围绕城，
是皆汝所作。我乘神通往，
复放大风雨，令地为沟坑，
沙石高满路。我住寂静林，
现作畏恶声，于彼苦行处，
吹作切寒风。在河欲度处，
汝复放暴流，现作猛师子，
复欲令杀我。我欲饮食时，
汝以毒和食。我往菩提树，
雨下金刚雹，刀箭雨器仗，
袈裟法衣服，悉欲令塗污。
我处金刚座，利益诸众生，
彼时汝亦遣，诸女来恼我。
汝并将军众，不忆害我时，
我无微尘意，于汝作恼乱。
我证无上道，已曾降伏汝，
汝今乃无耻，复说是恶语。
往以恶方便，恼大迦葉等，
无量众生善，汝皆所灭坏。
汝既无悲怜，今复欲害我，
我入城乞食，复放凶醉象，
调达放大石，三月食大麦，
孙陀罗恶声，火坑恶毒食，
是皆汝所作，决定重恶业。
汝昔向道树，威力并军众，
以无量刀箭，持来欲害我，
不动我一毛，何故复住此，
如为醉毒塗，起发俱胝魔，
那由他众生，来满此佛刹？
如是证知我，我住慈悲心，
怜愍于一切；而汝常于我，
极作恶障碍。此诸牟尼尊，
因陀罗牛王，悉现证知我，

我今于恶时，施作于佛事。
我为众生故，住于解脱心，
纵汝加诸恶，我终不舍忍。
我无嫉妒意，秽恶诸过患；
我为随摄汝，如是常勤劳。
我欲寂灭汝，今应请我说，
甘露第一法，令三界寂灭。
为汝除恶业，汝速清净意，
于我生依怙，我常清净心，
欲令汝解脱。汝常怀恶心，
应当舍恶见，意作清净信。
汝今当觉知，不久得授记！”

尔时，魔王复于佛所倍增嗔恨，从此欲去自知五缚，即欲出于可畏之声复不能出，以己嗔力发热毒气，其气猛盛欲害如来。是时，世尊以慈善力，变此恶气为苏摩那华盖，普遍十方一切佛刹，于一切诸佛寿命安隐现说法者，苏摩那盖于虚空中近佛顶住。时，彼佛刹所有菩萨摩诃萨各各请问：“今此华盖从何而来？是谁神力之所变化？”

时，彼诸佛各答所问诸菩萨言：“诸善男子，彼有世界名曰萨诃，五浊不净。有佛世尊，名释迦如来阿罗诃三藐三佛陀，以本愿力故，成阿耨多罗三藐三菩提已，现在说法，为欲摧灭诸魔境界力故，竖立一切诸佛力无所畏佛境界故，一切诸佛教法三宝种灯令久住故，一切善根增长故，以精进神力变化降伏一切外道之怨故，一切惊怖、不吉争论、恶梦恶相、内外怨敌、斗争系缚、言讼不和、水旱荒俭、非时之雨、寒热风湿、疫气病疢、恶声销灭故，一切天、龙、夜叉、人非人等悉令回向故，一切刹利亦令回向故，一切四姓诲以法义然智慧炬示以正路故，一切家宅、城邑聚落、人主断事、国王王宫、市廛之处悉令回向故，一切星耀、昼夜度数、半月一月、时节年岁悉皆正行故，一切五谷华果药草悉皆成熟故，一切工巧生业处所不令散失所作成就故，一切身口意业过患悉得销灭故，善作筹量、念慧总持、勇猛无畏色相乐说悉皆增长故，一切法无障碍明觉四圣种法作受持故，光显大乘增长菩萨摩诃萨、安慰阿毗跋致地金刚心作护持故，作十地一味故，解无生法忍受佛职建立菩提故，所化众生如所随摄转大法轮、大悲普覆一切众生住波罗蜜、住无上道、雨于法雨、以法滋味充足众生故，满足一切诸佛之事解脱一切四魔境界故，建立无余涅槃之界故，有陀罗尼印名金刚摧碎心高缘法等句入差别记欲说故。一切过去如来阿罗诃三藐三佛陀，名金刚摧碎心高缘法等句陀罗尼印入差别记，受持互相随喜；及现在十方诸佛住世寿命将养，一切诸佛亦说彼金刚摧碎心高缘法等句陀罗尼印入差别记，现说受持互相随喜；于未来世十方世界，诸余如来阿罗诃三藐三佛陀，所有诸佛当出于世，亦

说此金刚摧碎心高缘法等句陀罗尼印入差别记，亦当说受持互相随喜。”

尔时，彼诸佛刹所有菩萨各各请佛，白言：“世尊，此是何法？我昔未闻金刚摧碎心高缘法等句陀罗尼印入差别记，能作如是无量利益，能具足如是不可思议法利，能作一切法无障碍明，乃至寂灭。诸佛世尊说此金刚摧碎心高缘法等句陀罗尼印入差别记时，一切魔力境界磨灭，乃至彼无余涅槃而般涅槃，于诸众生无量利益无量安乐，为欲怜愍一切世间，利益安乐无量天人众生聚故。”

时，彼诸佛告彼菩萨作如是言：“善男子，我亦共汝往彼娑婆世界释迦如来阿罗诃三藐三佛陀之所住处。所有十方现在世尊寿命将养，诸余世界彼诸世尊，共一切菩萨前后围绕，并声闻僧侍于前，彼诸世尊亦当往彼释迦如来大集会所。彼释迦如来共诸佛，亦当说此金刚摧碎心高缘法等句陀罗尼印入差别记。当共受持，当互随喜，利益众生遮恶业行。为满贤行满无上智故，一切诸佛今悉集彼，与诸菩萨、声闻僧等围绕夹侍，今悉现前在彼佛所。若汝欲得此金刚摧碎心高缘法等句陀罗尼印入差别记，应往彼听，及欲供养无量无数恒河沙等之所譬喻一切佛刹诸佛世尊一时现在；及欲见彼，昔所未见诸佛境界、菩萨境界、诸天境界、诸魔境界，佛刹庄严之所严饰；及欲见彼昔所未见无量佛集者，今正是时，可共我等往彼世界释迦如来所住之处大集会。”

时，彼菩萨摩诃萨各白佛言：“如是，如是，大德世尊，我等当与如来俱往彼处娑婆世界释迦如来所集法会，于彼佛所昔所未闻，为听彼法金刚摧碎心高缘法等句陀罗尼印入差别记故。我等于彼无量无数诸佛世尊，一时一集住世将养者得供养故，及闻彼法。我等于娑婆世界，得见彼四种神通境界严饰普庄严事，及见彼大集会庄严。我等若往彼佛刹说陀罗尼时，得容止处不？及得承事供养彼佛听法以不？又彼如是所集徒众菩萨摩诃萨得供养不？”

时，彼诸佛各各告彼诸大菩萨摩诃萨及大声闻作如是言：“诸善男子，汝等莫疑于彼世界有容止处不？何以故？诸佛境界入无边平等智巧，无边成熟众生，无边广博空处。诸善男子，彼释迦如来大巧方便具足。善男子，所有众生众生界所摄者，但界入所依处，彼诸众生，若一一众生假使如须弥等身，彼释迦如来，能令一切无量众生如是等身入芥子中。一一众生所居之处，皆得广博空处，远不相见。一切众生如是大身入一芥子，而不觉知有增减相。

“复次，善男子，所有地界是坚鞣者，释迦如来悉能令彼一切地界入一最细邻虚尘中，彼大地微尘亦不觉知有增减相，是名如来巧方便智如是具足。复次，善男子，一切水界所有津润，释迦如来悉能令彼一切水界入一最细毛端之中，彼一毛端一切水界亦不觉知有增减相。复次，善男子，一切火界所有暖相，悉能令彼一切三世所有火界入一最细邻虚尘中，而彼火界入细微尘行自境界，犹如广博虚空之

处。复次，善男子，所有风界可觉者，释迦如来悉能令彼一切风界入一毛孔，彼一切风于一毛孔行自境界，犹如广博虚空之处。复次，善男子，十方佛刹一切众生及彼四大，释迦如来悉能令彼入一最细邻虚尘内，一切众生并彼四大，行自境界所用之事，犹如虚空不相娆乱，亦不觉知彼一微尘有增减相，是名如来巧方便智如是具足。

“复次，善男子，乃至三世所摄众生，六入行取、愿持语言、音声文字、言说三行、作业阴界、分别长养、种种所作，彼一切众生往昔已来，三世所摄六趣生死起灭；乃至一切众生三世所摄，过刹那、罗婆、牟忽多者；乃至一切众生三世所摄，乃至及一切众生三世所摄受，所受苦乐觉知。彼一切一刹那顷，彼释迦如来悉能觉知，若干诸相悉具足知。而如来不分别，无分别无思念，如三世际悉知是相。善男子，诸佛入境界智方便，平等成熟众生方便具足。”

尔时，诸佛说释迦如来如此相时，种种诸方彼诸如来各各徒众，无量无数百千菩萨，愿智神通胜妙境界，皆度彼岸。

宝星陀罗尼经卷第六

陀罗尼品第六

尔时，于彼东方之分，有世界名可乐，佛名阿閼，与无量无数菩萨摩訶萨俱，诸佛境界种种加护神通力故，于一刹那顷从彼发来，到此释迦如来阿罗诃三藐三佛陀中四天下所住之处。时阿閼佛，如自所化坐莲华座。彼诸菩萨摩訶萨亦如己功德神通之力，化作莲华微妙法座，于莲华台向佛而坐。如是东方无量无数微尘等佛刹众首，诸佛世尊住世将养，于刹那顷一如来，与无量无数菩萨摩訶萨，百千俱胝那由他声闻大众，从彼发来，到此释迦如来阿罗诃三藐三佛陀于中四天下所住之处。彼来大众如己神通，化作莲华微妙法座，于莲华台向佛而坐。

尔时，于彼南方之分，如来名宝星，乃至广说，于莲华台向佛而坐。尔时，于彼西方之分，有佛名阿弥陀，乃至广说，于莲华台向佛而坐。如是北方有佛，名曰鼓音，下方有佛，名毗卢遮那，乃至于彼莲华台上，广说如前。上方如来名曰智光，与无量无数百千俱胝那由他如恒河沙佛刹微尘等菩萨摩訶萨俱，以诸佛境界种种加护，于一刹那顷从彼发来，到此佛刹中四天下释迦如来阿罗诃三藐三佛陀所住之处。时智光佛到已，如自所化坐莲华座。彼诸菩萨摩訶萨等既到此已，各各如己所量功德神通之力，化作莲华微妙法座，于莲华台向佛而坐。

时，彼十方诸来菩萨普集会者，或有雨于阎浮檀金，为供养事供养世尊，乃至广作如前所说。或有右绕一切佛刹者，或有渴仰合掌佛前如法听者，或有以己常所行善根之分思惟住者。尔时，须菩提童真

恭敬合掌，以己神通及佛神力加护持故，于一切佛刹法声遍满，说如是偈：

“一切疑断者，牟尼月普来，
此昔未见闻，众成就悉现，
一切诸佛满，及净戒菩萨，
佛刹如塔庙，一切皆礼拜。
佛今非无因，牟尼佛日来，
此土五浊恶，众生可秽污，
今当降伏魔，黑暗党破坏，
摄受诸善行，为此今故来。
听闻寂灭法，魔众悉摧散，
生起清净意，当得三佛陀。
行于大乘道，汝应披忍铠，
及为尽诸惑，汝听陀罗尼！
各坐莲华座，同声请导师，
说此拥护法，摄持一切法，
不退陀罗尼，为正法久住，
一切障销灭。”

尔时，无量无数得忍菩萨摩訶萨等，咸共同声作如是言：“唯愿世尊坐莲华座！今大悲者，为无上忍大慈所薰，依无畏说摄持一切法，除诸怖畏门，过诸魔道，摧倒魔幢，建立法幢，灭诸烦恼，降一切怨，断一切疑，入一切智，解脱怖畏，于诸护中为最上护，能示菩萨一切法，所谓若念、若慧、若道、若持、若不忘、若巧方便，乃至一切行安乐成就福德所依加护三摩提、羼提陀罗尼、入巧明智，乃至持三十七助道法心，为诸众生光色怡悦故，力名闻故，乐独住故，乐说辩念令增长故，闻持不忘故，一切怨退故，五谷成熟故，持净戒故，念器成故，行成就故，到菩提故。

“世尊今为我说法陀罗尼法，正法随摄久住故，三宝种不断故，示现无上菩提道故，真际如如虚空无差别故，一切明闇相此彼分别无分别故，众生、寿命、养育、我、人无差别故，不生不起不灭一切法平等相无体真际如如虚空无差别故，地水火风虚空识界无差别故。诸佛世尊，我今说此一切法性出生道场陀罗尼时，无量无数百千俱胝那由他等众生即闻法时，无量众生于三宝中得不坏信，诸众生等为善知识共相利益，及无量无数众生当发阿耨多罗三藐三菩提心，得不退转而得受记。普请一切，诸佛世尊说大法故。”

彼诸佛等默受请已，即时于彼莲华台上端身正坐，即入如诸佛境界入平等愿三昧。入三昧已，欲令一切诸佛刹内，诸来会众一切众生，一切诸苦皆悉销灭，一切善根皆得圆满，及得信净念解成就。诸

佛世尊即见如是，此佛刹内诸来众生，贪嗔痴等见慢醉高、身见、疑、取、有、爱、沉下等过诸心心数皆悉销灭。一一众生皆如是解：“唯我一人于如来前正身听法，不为余人。唯我一人，如来以一切思观我一切心，一切热恼皆得销灭。更无余人为听法故请如来。”

尔时，所有此佛刹内，一切众生普来会者诸根猛利，合掌同声白佛言：“世尊，为我等说法！大德善逝，为我等说法！我等当共随顺成就佛世尊法。”

尔时，释迦如来以香庄严最上胜妙出过一切，遍满一切诸佛刹土，为供养诸余佛世尊故住诸佛前。及一切诸佛刹内诸来大众，一切众生复以种种宝、种种华、种种鬘、种种香、种种盖、种种幢、种种幡、种种庄严捧持满掬，现诸佛前以为供养。

尔时，释迦如来作如是言：“诸佛世尊一心念我，所有现在十方世界各各世尊，余世界中普来问我。我于往昔本愿如是，于种种秽恶五浊世界，得阿耨多罗三藐三菩提。是诸众生失所依止，失三乘道，无明暗室、烦恼暗翳、不善法聚缠绕一切，舍远善法趣三恶道，远离一切聪慧之者，作诸恶逆者，谤毁正法者，谤毁圣人者，依无慈悲者。我为慈愍此等众生故，发大悲力、大精进力，于彼寒热疲劳诸苦我忍受之，城邑国土、道路宫室足步游行。为欲利益诸众生故，乏少粗涩少味饮食，最可厌恶不喜之食。为诸众生植善根故，忍受种种粗涩苦触，舍那劫贝粗麻衣服，以如是等粪扫之衣而取著之，山谷林藪空舍家间依此止住，乃至受草舍那粗麻树叶，涩臭恶触诸恶卧具。以巧方便，我著大悲精进之铠，为诸众生说示种种，为刹利王说自在法，为婆罗门说四毗陀星论等法，为诸大臣说于教导众生等法，为诸医师说诸药性所宜之法，为诸商人说卖买法，为诸农夫说田种法，为诸女人说于严饰养育自在无他行法，为诸沙门说忍辱柔和坐禅诵经劝营众事；为欲示诲成熟众生，未到者令到故，未证者令证故，未脱者令脱故，忍受种种诸苦恼事，成就众生故游于人间。

“我今犹被此诸众生，因嫉妒故骂詈毁谤，以淫欲法谤毁于我。复以恶言诽谤于我，道我谎言击赞、诈谄幻伪、妄言粗穢，共诸女人说爱欲语。复以恶事加害于我，尘土坌污、刀毒火轮、铁捶箭槊、钺斧大石、恶器仗等雨害于我，狂象、毒蛇、师子、虎、狼、水牛、恶牛，以大力士悉共打掷来害于我。于我房舍止息之处及僧伽蓝，以不净臭秽污满其中。我诸声闻入城内时，此非法众生，以非法歌舞，劝请声闻为非法事。以无量百千万方便欲害于我，为欲隐蔽正法故，欲灭法灯故，欲破法船故，欲散我法会故，欲倒我法幢故。”

尔时，释迦如来作如是言：“当观过去诸佛法式，如彼诸佛，于此秽恶五浊恶世，普大集会作妙法式，为令妙法久住故，于一切魔诸恶境界令摧碎故，三宝种不断故，为诸众生增长善根故，一切外道所有言论以法摧伏故，为诸众生饥馑荒乱、斗讼疫病、他方怨敌、禁缚

言讼、不时寒、不时热、不时风、不时雨、身口意业诸过恶见令销灭故，为令一切天、龙、夜叉、人非人等正回向故，一切家宅、聚落城邑、衢路诸处悉拥护故，一切谄毒、蛊道悖闷、恶梦灾相悉令坏故，一切五谷、药草华果滋味令资养故，刹利、婆罗门、毗舍、首陀诲示善行故，菩提心令滋茂故，勤修诸波罗蜜故，为令菩萨摩訶萨巧方便智念行勇猛乐说辩才得增长故，受佛职位安慰入智度彼岸故。

“如彼往昔如来阿罗诃三藐三佛陀，说此金刚法等因缘法心建立摧碎陀罗尼印句入差别记法门，演说受持互相随喜：‘善哉！善哉！如是！如是！’于今现在所有十方诸佛世尊住世将养者，悉来到此娑婆佛刹五浊恶世，来问讯我各在华座。彼诸佛等拥护此佛刹内诸众生故，应说此金刚法等因缘法心建立摧碎陀罗尼印句入差别记法门，演说受持互相随喜，令妙法久住故，一切诸魔恶境界力令磨灭故，如前广说，乃至无障碍智度彼岸故，慈愍摄受及受我请故，为令此佛刹内说妙法门得久住故，一切外道不能过故，得不坏法及三宝种不断绝故，一切众生得受法味故。”

尔时，一切诸佛世尊咸如是言：“如是！如是！我等决定作如是事，于此佛刹护持妙法令久住故，一切诸魔恶境界力令摧碎故，乃至无障碍智度彼岸故，我等当说此金刚法等因缘法心建立摧碎陀罗尼印句差别门记大持法门。汝等大众，今当谛听！”一切诸佛大集此刹，说如是咒：

“多地也他 鸯伽逻鸯伽逻（一）崩伽逻（二）钵啰朋迦逻（三）婆耶弭呵弭哆蓝婆斯（四）阿嶮阿佉门跋利（五）度迷徒曼帝（六）鸡跋诘鸡榆利（七）三摩婆呵泥（去音八）三曼多跋达利（九）达迷达迷（十）驮摩鸡（十一）闇破鸡（十二）弭哆啰丑破[[（七/矢）+余]]（十三）破啰婆帝（十四）伽尼（臈宜切十五）伽拏婆蓝帝（十六）晒利底利（十七）晒啰晒啰鸡（十八）闍（时瞻切）婆帝婆帝（十九）吒迦斯吒建帝（二十）吒迦婆蓝帝（二十一）伽拏婆漠帝（二十二）晒闍帝（二十三）始闍帝（二十四）娑头婆帝（二十五）衢婆（去声）醯（二十六）受离弭多啰受离（二十七）受履阿伽离（二十八）阿婆迷（二十九）娑写多他当（三十）呼卢晒离（三十一）梅涕[[（七/矢）+余]]三摩达迷（三十二）驮迷（三十三）俱朱卢（三十四）[[（墓-土）/言]朱卢（三十五）阿质吒至离（三十六）至遮婆呵（三十七）朱卢朱卢（三十八）弭多啰婆呵（三十九）俱卢俱卢（四十）娑啰娑啰（四十一）俱株俱株（四十二）摩呵萨啰（四十三）都株都株（四十四）磨呵萨底耶（四十五）奚离驮耶补数箴（四十六）苏补数箴（四十七）度磨钵离呵[[（七/矢）+余]]（四十八）阿婆移卢至泥（四十九）迦乐差脾（五十）阿婆耶磨萨堵毗婆呵（五十一）底底[[（七/矢）+余]]（五十二）磨磨[[（七/矢）+余]]（五十三）钵湿缚呿（五十四）尸尸啰（五十五）卢迦毗那耶迦（五十六）跋时

[(匕/矢)+余]]跋时啰达[(匕/矢)+余]](五十七)跋时啰婆帝(五十八)跋时啰驮提(五十九)斫迦啰跋时提(六十)斫迦啰跋时[(匕/矢)+余]](六十一)斫迦[(匕/矢)+余]]遮婆泥(六十二)达[(匕/矢)+余]]达[(匕/矢)+余]](六十三)婆[(匕/矢)+余]]婆[(匕/矢)+余]](六十四)布[(匕/矢)+余]](六十五)吒[(匕/矢)+余]](六十六)呼呼[(匕/矢)+余]](六十七)傍伽娑婆[(匕/矢)+余]](六十八)舍利舍利(六十九)至离朱离(七十)慕[(匕/矢)+余]](七十一)漫茶[(匕/矢)+余]](七十二)漫茶泥(七十三)伽伽啰泥(七十四)慕茶泥(七十五)萨波谟茶泥(七十六)地地啰耶泥(七十七)磨醯湿缚啰罗耶泥(七十八)奚离莘阁泥(七十九)驮婆婆至(八十)栴茶罗栖迷(八十一)萨婆萨写阿地瑟(去音)多(八十二)叱电都婆呵那(八十三)磨弭泥(八十四)波罗罗底(八十五)乌闍伽[(匕/矢)+余]](八十六)毗至泥(八十七)婆那啰呵(八十八)蒲蒲[(匕/矢)+余]](八十九)瞿卢瞿卢(九十)慕卢慕卢(九十一)晒离晒离(九十二)呵啰呵啰(九十三)迦建茶婆呵(九十四)晒晒哆(九十五)阿喻那建茶(九十六)时缚罗婆栖(九十七)揭驮泥(九十八)阿陀阿泥(九十九)末伽阿毗卢呵泥(一百)破罗萨底(一百一)阿卢沙婆底(一百二)晒离晒离(一百三)耶他婆闍耶萨缚伽啰(一百四)耶他婆闍者奚驮耶婆呵(一百五)萨底耶钵履婆婆(一百六)末伽避卢呵泥(一百七)阿遮罗勃提(一百八)驮驮钵啰遮啰(一百九)波遮耶(一百一十)旃达遮啰拏(一百一十一)阿遮[(匕/矢)+余]]输达泥(一百一十二)钵啰讠履底末祇(一百一十三)伊罗伊离离(一百一十四)钵啰鞞(一百一十五)娑啰勃啰帝(一百一十六)萨婆哆啰哆他多(一百一十七)萨底耶阿奴伽帝(一百一十八)阿那婆啰那勃啰帝(一百一十九)阿罗哆(一百二十)鸯瞿隶(一百二十一)奢[弓+(珍-王)]泥(一百二十二)勃啰磨婆喻晒呵阿晒哆婆晒啰(一百二十三)尼啰婆耶婆(一百二十四)阿指啰末伽(一百二十五)罗那罗瞿萨隶(一百二十六)底履啰多那傍世(一百二十七)达磨迦耶(一百二十八)时缚罗旃达隶(一百二十九)萨母达啰婆底(一百三十)磨呵步驮毗耶(一百三十一)萨母达啰鞞伽婆底(一百三十二)陀罗尼没达隶(一百三十三)磨伽没达啰(一百三十四)苏啰钵啰底三毗陀没达啰(一百三十五)阿跋哆尼(一百三十六)三跋哆尼(一百三十七)三慕贺塞迦啰(一百三十八)毗地喻多啰栖那(一百三十九)厕底没达离都死(一百四十)曳鸡质毕利地毗婆呵(一百四十一)婆呵婆呵婆呵(一百四十二)鸡吒迦婆吒(一百四十三)世罗钵啰底底耶奚离多曳那(一百四十四)没达离多陀啰尼(一百四十五)驮啰驮啰驮啰(一百四十六)檀地罗檀地罗(一百四十七)呼色迦萨婆奚驮耶(一百四十八)达离都死(一百四十九)闍茶闍婆吒(一百五十)闍呿娑吒(一百五十一)苏末底末底(一百五十二)磨呵驮步哆达哆(一百五十三)质杀茶耶单那尼

失离多步多（一百五十四）伊尼弭尼（一百五十五）萨遮尼（一百五十六）瞿沙萨遮尼（一百五十七）没达离多遮离耶阿地瑟佉那（一百五十八）薄钵他那阿溺他（一百五十九）磨呵布尼耶三没遮耶阿婆多啰（一百六十）磨呵迦卢拏耶没达离多（一百六十一）萨婆三藐波啰底钵地指啰啰哆蓝（一百六十二）时缚罗堵达磨泥底离（一百六十三）萨鞞慕尼勃离沙婆磨呵迦卢拏三磨提（一百六十四）若那罗婆跋隶那（一百六十五）梅底离底耶伽底（一百六十六）毗离耶跋隶那阿地瑟耆多（一百六十七）萨婆步都乌波遮耶也（一百六十八）萨婆呵。”

尔时，一切诸佛土中所有大众，至此佛刹普来会者，皆共同声作如是言：“南无一切诸佛！南无一切诸佛！”皆共三反作如是言：“怪哉！牟尼众集甚大希有！大菩萨集甚大希有！大声闻集甚大希有！如是希有实未曾有！我昔未闻此金刚法等因缘法心建立一切法摧碎陀罗尼印句差别法门，一切教师正法住持，三宝种不断绝，悉能摧破魔境界力，断魔胃缚降伏魔怨，建立法幢护持法分，乃至能满诸佛境界故。今一切诸佛世尊说此陀罗尼印句差别法门记，是一切众生心印大希有行，调伏六入，乃至令一切众生得无上涅槃故。”说此陀罗尼印记法时，三十恒河沙等菩萨摩訶萨，成就此陀罗尼得三昧忍。

尔时，月光童子即从座起，合掌普观佛加护故，及自神通力出大法声，悉皆遍满此佛刹内，说如是偈：

“佛月难得值，值是众亦难，
 聪慧众难得，及菩萨行者，
 如是妙法印，第一难得闻！
 如来大悲者，能护持正法，
 摧一切魔党，及退诸怨敌。
 三宝永不断，诸佛受持故，
 一切障坏破，忍辱柔和增。
 及众生回向，护王并国土，
 遮诸作恶者，及断诸恶见。
 安慰诸菩萨，示现菩提道，
 增长波罗蜜，贤善行满足，
 乐说方便智，如是等增长。
 皆受持佛语，摄持诸白法。
 拥护陀罗尼，明净菩提道，
 炽然证实法。汝等一切众，
 皆当断疑网，信于陀罗尼，
 此是满足道，所谓得菩提。
 我等复欲说，拥护陀罗尼，

守护说法者，增长闻慧故，
谁有与欲者？菩萨大名闻，
及得无障故，能令诸众生，
利益增长故。”

尔时，恒河沙等童真菩萨摩訶萨，咸共同声作如是言：“我等今者与此受持陀罗尼欲。若有善男子、善女人，比丘、比丘尼、优婆塞、优婆夷，当净洗浴著净衣服，用种种华庄严为帐，烧种种香，设种种食，种种衣服安置敷设，严饰绮绣，竖立种种微妙幡幢，及诸华盖庄严道场，升柔软触师子之座，开示分别此陀罗尼者，于彼无有心乱者、四大乱、身乱、意乱，无有毒气嘘触其身，无有能令头痛者，内外身分及以四支悉无病恼，无有能令音声蹇涩。若彼法师，往昔所有不善之业，四大乱声乱者，若彼法师读此陀罗尼故，一切业障尽灭无余得安隐住。有来听者，亦无四大乱及以声乱。若有闻此陀罗尼者，彼不善业四大长病，及声乱者一切皆灭。”

是时，月光童子瞻仰无量恒河沙等诸佛世尊，诸大菩萨之所围绕。月光童子曲躬合掌，作如是言：“诸佛世尊慈悲念我，当与我欲，今当说此陀罗尼咒！”即于佛前说大明咒：

“多地也他羼帝（一）阿娑摩路卑（二）弥哆离苏摩婆坻（三）缁呬娜婆军闍脾（四）娜婆军闍脾（五）娜婆军闍脾（六）茂罗输陀泥（七）婆茶呌（八）婆茶呌（九）摩啰婆哆他多（十）跋履侈陀（十一）婆颇娑婆颇婆（十二）阿茂罗（十三）阿者罗（十四）陀陀波啰者罗（十五）脾地离（十六）缁迦娜耶跋履侈陀（十七）旃陀那蒂（都泥切）履尼（十八）菩萨离（十九）菩萨啰蒂履尼（二十）呌伽藪啰蒂履尼（二十一）娑娜婆藪啰蒂履尼（二十二）步多句胝跋履侈陀（二十三）闍〔祈-斤〕+羅（来可切）呌攞呌（二十四）婆曳闍蒂呌（二十五）娜摩佉叉呌（二十六）迦迦佉（二十七）呵呵呵呵（二十八）虎虎虎（二十九）娑波履奢脾陀娜波履侈陀（三十）阿摩摩你也摩摩（三十一）弃也摩摩（三十二）娑母陀啰母陀啰婆佉（三十三）僧塞迦啰娘跋履侈陀（三十四）菩提娑（上音三十五）乞史坻脾摩（三十六）摩诃脾摩（三十七）部（去音）哆句胝（三十八）阿迦捨娑娑娑跋履侈陀（三十九）娑娑呵。”

尔时，一切他方佛土诸佛世尊，菩萨摩訶萨及大声闻，释、梵、护世、天、龙、夜叉、乾闥婆等，诸大神王大威德者，咸共称赞：“善哉！善哉！”白诸佛言：“世尊，此陀罗尼甚大迅疾有大力势，能遮一切怨敌怖畏病患诸难，恶梦恶相皆悉解脱，乃至无障智、无上智、大福智聚之所依故，说此陀罗尼。”

尔时，世自在主大梵天王，以大梵力境界庄严变为女人，于无量

寿佛前坐，第一端正色相圆满胜过于天，第一具足衣服庄严、华鬘塗香持用严饰。时世自在大梵天王，即从座起，合掌恭敬作如是言：“世尊，当拥护我圆音演说？如是音声悉能遍满一切佛刹，普得闻知而无障碍。如我今者如此咒句，善能护持说法法师及听法者。若于后时，若魔若魔眷属，若天若天男女，或龙、龙女，或龙父母男女眷属，乃至毗舍遮女、毗舍遮父母，男女大小并其眷属人非人等，于说法师及听法者伺求其短，实作怨家诈为亲友，于说法师及听法者，乃至恼害损触一毛，或夺精气，或毒气嘘，或恶心视，乃至一念顷，我于彼等人若非人，诸魔鬼辈禁止断除，令彼昏浊与其要誓。我当拥护诸佛世尊圆音演说，能以法声满诸佛刹。唯愿世尊当念助我！”时无量寿佛默然受请。

时大众中，有一释天名曰持髻，以金天冠胜妙光明庄严其身，在于佛前不远而坐。尔时，持髻释天告自在如是言：“姊妹，勿以染污之心于无量寿如来座前而坐，勿恼世尊！何以故？乐戏论者是凡夫法，如来世尊永无戏论。有为暂现是起尽相，一切名色句差别如如。汝若如是，惑倒如来。姊妹，如来平等无违无诤，一味如如等虚空界，虚空亦不妄置。三行尽相，如虚空不分别无分别，诸行如是。如来如是，诸欲功德，不为戏论，不分别无不分别，而无所住不受不取。如是无命、无生者、无养育、无人、无阴界入、无取、无戏论。姊妹，汝今云何于如来前而作戏论？”

尔时，无量寿如来告天主言：“汝应审谛然后发言，勿作不如法语，令汝得罪受不爱果。此是大善丈夫，为无量诸佛之所注意，于诸佛所种诸善根。又此善丈夫，为欲供养如来事故，现女人相妙饰庄严。汝勿于此说言是女！”

时，持髻释天白世自在梵天言：“善男子，当起慈悲摄受于我，施我欢喜，莫令我今以此粗言得恶果报。”

尔时，怀乐菩萨白无量寿佛言：“世尊，若此释天不悔此语时得何果报？”

时，无量寿佛告怀乐菩萨言：“善男子，今此释天若不悔过，于未来世八万四千生中，作草驴身为他轻贱。是故，善男子等，常须慎意护此口业。”

尔时，佛告世自在梵天言：“善男子，随汝乐说，我已拥护汝所说也。”

世自在梵天既蒙护念，欢喜合掌，遍观十方作如是言：“唯愿世尊一心念我！若佛菩萨及声闻众，天、龙、夜叉、乾闥婆、阿修罗、迦楼罗、紧那罗、摩睺罗伽，欲令正法久住世者，愿于此处同与我欲。若法师及听众，欲得随顺相应无恼乱者，当与我欲。若彼恶魔、人非人等，未来之世于说法者及众生类作恼乱时，我当遮障与彼要誓断其恶心。”自在梵天作是语时，所出音声遍满一切诸佛世界。

尔时，一切诸梵天王，一时同声作如是言：“我等亦以此陀罗尼

同共与欲。所以者何？我等于后亦当受持此陀罗尼，亦当拥护未来之世善男子等。有能开示演说如是法门及听法众，我当令彼随顺相应得如所愿。我等今于佛世尊菩萨摩訶萨及大声闻众前，与此陀罗尼欲。”

时，彼自在梵天作如是言：“唯愿世尊，及菩萨、声闻大弟子众，拥护于我。”即说咒曰：

“多地也他阿摩离（一）毗摩离（二）伽拏山地（三）呵离氈地（四）摩呵氈地（五）遮弥摩呵遮弥（六）苏弥萨他弥（七）阿婆呵（八）毗婆呵（九）鸯伽阇（十）泥哆啰佉毗（十一）茂罗波履侈啼（十二）药叉氈驰（十三）比舍遮氈驰（十四）阿跋哆泥（十五）三跋陀泥（十六）僧迦啰泥（十七）调波泥（十八）摸呵泥（十九）呕遮吒泥（二十）呵摩呵呵摩呵摩呵（二十一）阿军遮泥（二十二）佉伽舍婆（二十三）阿摩罗（二十四）阿茂罗（二十五）茂罗波履跋坻（二十六）阿婆罗佉婆（二十七）娑婆呵。

“世尊，若有男子、女人，违逆不行圣众大集所说神咒者，眼睛堕落，头顶破裂，支节分散。”复说咒曰：

“多地也他阿者者（一）阿婆呵（二）者者蒂迦啰叉（三）遮遮吒佉遮遮（四）那佉伽遮遮（五）遮遮遮遮（六）那遮呵茂罗遮遮（七）遮茂罗遮遮（八）呵摩茂罗遮遮（九）呵牟呵牟（十）婆茶婆呵（十一）娑婆呵。”

尔时，一切梵王乃至毗舍遮王，闻是说已皆唱善哉，作如是言：“假使鬼神有大威力雄猛迅疾，所向摧碎力能过千，我今以此陀罗尼章句悉令冒著。如是一切诸恶鬼神，能与众生作不利者，皆使潜灭无逃活处。”

自在梵天复作是言：“若有住恶无慈愍心，不知恩德恼众生者，若鬼若魔及其眷属，常来伺求受灌顶职刹利王等，或伺求妃后、王子、王女及彩女等，乃至宰相官属并余民庶，于佛法中得清净信者，若男若女、童男童女、优婆塞、优婆夷乐听法者，比丘、比丘尼禅诵精进不放逸者，如是鬼魔、人非人等求其长短，我当拥护，乃至能令一刹那顷恶心不起，况复于彼一毛恼乱？若起恶心恼乱破坏，夺其精气以毒噓身，如是伺求觅其过者，以此陀罗尼威神力故，若魔眷属、人非人等头破作七分，眼精殒坠，心水干枯，得白癞病其身臭烂，失本神通陷没于地；复为恶风所吹，掷置四方无人之处，尘土垒身，狂迷心乱，周惶驰走，所行之地地皆破裂随堕其中，深八万四千由旬，于彼命终。若是魔等违背此咒水行之类，于佛圣教得清净信者，勤营僧事比丘、比丘尼等，彼诸鬼神作恼乱者，亦得如上所说恶报，头破七分及以命终。

“若是不退魔场陀罗尼，随所在处，我等当勤加护。所有一切乐法众生，我当勤心昼夜守护。及彼一切恶毒夜叉、富单那等，我当驱逐出其境界。若陀罗尼所在之处，一切国土斗争饥馑、他方怨敌、非时风雨、寒热疫病，我当除断令无有余，亦令其国一切人民善根成就，随顺和合安隐丰饶。能令法师及听法者，名闻高远无有病苦，亦为劝励四辈檀越利养供给。”

尔时，众中有一大梵天王，名曰妙音，位居十住摩诃萨地，若于梵中诸梵中尊，若于魔中诸魔中尊，若于释中诸释中尊，乃至毗沙门、毗楼茶、毗楼博叉、提头赖吒、大自在、那罗延、阿修罗等，于诸天主天主中尊。是时，妙音梵王变作第一女人之形，色相圆满威仪具足，以胜庄严而自庄严，于释迦如来前合掌而坐。以其两手捧如意宝珠为供养佛故，瞻仰尊颜目不异视，诸根寂然不以诸相而观如来。

尔时，世尊告妙音梵天：“汝今何故目不暂瞬，乃至无相观于我耶？善男子，颇有一法名为佛耶？颇有一物可为名耶？如贪嗔痴无明烦恼，有名物缘相，相缘无明，无明缘行，乃至广说，相灭无明灭行灭亦复如是。”

妙音梵天言：“诚如圣说。何以故？无明不可得。世尊，若无明不可得者，彼十二有支从何而起？可从虚空生耶？虚空复不可得。”

佛言：“如是，如是，善男子，一切法如虚空。所以者何？虚空无物无相，非闇非明，不分别无分别，无成无坏不可说，无一物无分齐断一切物。如是，如是，善男子，佛法真际断，佛法如如，佛法不取此彼岸，佛法不减不增，佛法非阴界入，体无分齐，若实若物若相一切皆无，佛法无动无住不妄置立，佛法一切言语道断。”说此法时，八万四千众生发阿耨多罗三藐三菩提心。

时有恶魔作如是言：“若佛法如虚空，非物不可说，汝以何等智慧精进，劬劳方便恼乱于我，破我境界，乃至夺我境界众生，复教众生不来不去无物幻术？汝若如是教众生者，不复见彼烦恼行起。汝以何故，为我于此娑婆世界，召集如是无量无数诸佛世尊，菩萨摩訶萨及大声闻，梵、释、护世、摩醯首罗，有大神通有大加护，乃至天、龙、夜叉、乾闥婆、阿修罗、迦楼罗、紧那罗、摩睺罗伽等大众，普皆同来满于一切诸佛刹土，令此无慈大梵说如是咒？我等既闻普皆头痛受大苦恼，乃至令身上下烂臭。”

尔时，复有六万八千诸魔王等，及其魔众无量无边，极恶夜叉、罗刹、鸠槃荼、毗舍遮等，一切同声唱如是言：“我等徒党即闻咒时，增益头痛，身皆烂臭受极重苦。”

释迦如来告彼魔言：“忆我昔日菩提树下坐道场时，汝魔军众遍在八十由旬及以虚空，皆悉充满欲来害我，乃至今日复将军众无量俱胝共来害我。我亦如是召集无量无数诸佛世尊、菩萨摩訶萨，乃至人非人等普来集会，为欲令汝及余诸魔、人非人等悉降伏故，灭一切苦得大涅槃寂灭乐故，亦为教汝不来不去无所有性如幻法故，一切趣、

一切灭、一切起、生死爱流悉枯竭故，亦令汝等及一切邪见众生入无余涅槃境界而般涅槃故。魔王，汝等今者，速发阿耨多罗三藐三菩提心，汝此头痛当得解脱，渐渐修习性空佛法当得现前，及得诸佛境界，胜魔境界获大利益。”

尔时，六万八千诸魔，及其徒众同声唱言：“世尊，我等今发阿耨多罗三藐三菩提心，云何当得自性空等佛法现前，乃至得佛胜妙境界希有利益？”时有恶魔作如是言：“纵复令我尽后边身得重头痛，我终不以如是谄幻发菩提心！”

尔时，妙音大梵作如是言：“我今亦于一切佛前，以此佛刹微妙教法勇猛受持，于此五浊世界，流布释迦如来尊重之教。从今已往，乃至释迦灭度之后，我当令此法化常得炽然，随有国土正信众生，皆令不退速出魔网。若此法门世间不流行者，我令流行。若已行处，令其信心倍复增广。所有城邑聚落善男子、善女人等，我当拥护慈心将养，遮其非义示诲善义。随处有此不退魔场陀罗尼法门，乃至书持，亦随有法师之处升师子座。欲开示演说此法门时，先当于彼至心诵此陀罗尼章句，召唤于我并诸眷属，我当自往彼法师所为作拥护，令听法众得大吉祥。”即于佛前，而说咒曰：

“多地也他 阿婆弥阿婆弥（一）庵婆离庵婆离（二）跋履军阇那茶那茶（三）补沙迦啰婆阿闍漏佉（四）摩佉耶（五）伊梨弭梨（六）枳梨弭梨坻遮啰母陀离（七）母陀啰母跋（八）娑婆呵。

“世尊，随有法师说法之处，要当先诵此咒章句。我以清净天耳，在彼上界闻其音声，而不往彼作守护者，我即欺诳过去未来现在一切诸佛已，亦莫令我得阿耨多罗三藐三菩提。然我决定往彼法师说法之所接足顶戴，亦与法师乐说辩才。又令法师及听法众，一切病苦、恶见恶作、邪疑之心悉令断灭。世尊，随所方面说此法门，有能受持温诵之者，我及眷属当往彼所。若有一切斗争饥馑、病患忧恼、内外怨敌、亢旱水涝、寒热失序、风雨不时、恶见恶作者当令消灭。人及非人、畜生等畏，及彼一切不吉祥梦，恶相恶人无有润泽，苦涩恶味辛臭恶触，如是诸患悉当断除。乃至师子恶兽、毒龙、野牛、豺狼、盗贼奸诈、人非人等，无量诸畏悉皆断灭。为使众生得乐具故，而令种种谷药华果、上味饮食、衣服舍宅、毡褥卧具果报成就悉皆充满。随有流通此法门处，不利益事我当遮之，利益之事当令成就。若彼众生信乐正法行善行者，我当诲示令福增长。我今于此一切佛前立大誓愿，唯愿诸佛同怜愍我，令我所作佛事大愿成就！愿成就故，意所依处皆令满足；愿满足故，即我丈夫所作成就。”

尔时，释迦如来为首，与一切诸佛，同共怜愍摄受妙音大梵故，作如是言：“善男子，我等当以陀罗尼咒与汝受持。所以者何？若一切释、梵、护世四天王，及诸余天、龙、夜叉、阿修罗等，于佛圣教

起不净心者，以咒力故皆当摄伏。”

妙音大梵作如是建立大丈夫所作事时，十方诸佛同唱是言：“当愿妙音大梵愿力成就！”即说咒曰：

“多地他者问池（一）问茶跛履侈提（二）呵茂摩（三）呵茂摩（四）娑啰叉（五）婆罗九娑（六）弭佉跛履婆诃（七）遮啰么（八）也他者〔（钟-中）+（灾/又）〕比佉（九）阿茂罗跛履侈提（十）萨婆部驮地史耽坻（十）娑婆呵。”

尔时，释迦牟尼世尊，说是咒已作如是言：“善男子，此陀罗尼，能令一切魔及释、梵、护世，诸余天、龙、夜叉、阿修罗有大光泽，摄受一切人非人等，皆令回向诸佛功德。汝今若能受持如是陀罗尼者，即是能作大丈夫所作事也。”

妙音大梵言：“婆伽婆，我今以是女人形相，当善护持一切女人，当善成熟一切女人。婆伽婆，若有女人厌恶女身求丈夫相，应当受持读诵书写供养此经，我当往彼女人之所满其所愿。若有女人厌患男女，亦当受持读诵书写供养此咒；如是女人持咒力故，虽未离欲更不受胎。复有女人为他轻贱，被人欺凌失诸乐受，亦应读诵此陀罗尼；以陀罗尼威神力故，一切愿满诸乐成就。”

尔时，大梵为供养故，为护持此陀罗尼神法门故，为满一切众生愿故，即以两手捧摩尼宝珠，奉施十方一切诸佛。

尔时，诸佛同发声言：“如是，如是，善男子，愿汝常能护持佛教，满众生愿。”

宝星陀罗尼经卷第七

摄受妙法品第七

尔时，会中有菩萨摩訶萨，名妙慧通达，在胜珠炎如来前坐，去释迦如来不远。于牟尼多顷现作梵形，于刹那顷现作魔形，乃至现释天形、他化自在天形，又复现作诸天主形、化乐、兜率、夜摩天形、四天王天、大自在形，或现夜叉、阿修罗、迦楼罗、紧那罗、摩睺罗伽、罗刹、饿鬼、毗舍遮、鸠槃荼、刹利、婆罗门、毗舍、首陀等形，或现狮子、象、马、水牛等形，乃至示现种种畜生之形。于刹那顷或现鸟、树、山果、衣服、卧具、种种医药、宝庄严器，牟尼多顷示现比丘、比丘尼像，一刹那顷示现佛像，或现八万四千种种色相，乃至方圆处色净妙形貌。

尔时，长老富楼那弥多罗尼子，即起合掌问释迦牟尼如来言：“世尊，何因何缘，而此菩萨有如是八万四千净妙之相，方圆处色种种类身？”

佛告富楼那：‘此菩萨有大功德摄受力境界，一切声闻、辟支佛所不能及。妙慧通达菩萨摩訶萨，随彼住受力境界成熟众生，一切声闻、辟支佛非其地。随是众生遍满十方无量无数，若净不净诸佛刹土，常以无障碍慧眼，如所愿如所意，如是哀恼所缠，如所归依，此菩萨入如是三昧，以是色貌威仪，随处方圆，种种色相具足乃至佛形，如所化度众生，皆安置三乘住不退地。若众生为贪不自在种种爱求，为断彼贪故与其所须，然后置于不退之地；若病患须医药者即与其药，然后立于不退地也。富楼那，此妙慧通达菩萨，于一日中能度如恒河沙数众生，解脱诸苦置于三乘不退之地。’

富楼那白佛言：“世尊，此善男子，成就众生故，为丈夫事其来久如？”

佛言：“阿僧祇佛刹微尘数劫！此善男子，发阿耨多罗三藐三菩提心，经尔所时得三昧力加护，建丈夫事已来，复更经六十四阿僧祇劫。”

富楼那言：“妙慧菩萨，从此久如于何佛刹，当得阿耨多罗三藐三菩提？”

佛言：“更经二十六百千大劫，过彼已后有劫名能度，世界名摩尼华须，其国众生皆寿四十千岁。妙慧菩萨于五逆不善法恶众生中，当成阿耨多罗三藐三菩提，其佛号曰开敷无边光如来阿罗呵三藐三佛陀。佛于四十千年中恒作佛事，以三乘法成熟众生，乃至令其得般涅槃；于是已后，无边光佛以无余涅槃而般涅槃。”

富楼那言：“世尊，此菩萨先所成熟彼诸众生当生何处？”

佛言：“此菩萨先作如是不自摄受愿：‘十方世界于一一方微尘数等无间佛刹，彼刹土中所有诸佛令我得见。我若不见彼等诸佛，不取阿耨多罗三藐三菩提。我先所行菩萨道时劝发众生，最初发阿耨多罗三藐三菩提心，示教建立于六波罗蜜，已成熟者遍于十方诸佛刹土，已得阿耨多罗三藐三菩提者亦令我见。以如是三摩提庄严力加护故，于十方无间一一佛刹微尘等诸刹土中，能为如是大丈夫事。及彼诸佛刹中作五逆罪不可治众生，乃至具足不善法众生，于彼命终，乘我愿力皆生我国。我为菩萨，令是众生种诸善根置不退地，然后我身当取正觉。’妙慧菩萨有是大愿。”

尔时，十方诸佛刹土俱来菩萨同作是言：“我等今者普来云集至此佛刹，今得见于大师所得有如是相，及见如是大集会大悲具足诸菩萨等，及以昔所未闻，过去、未来、现在诸佛金刚法等因缘法心能建立摧碎陀罗尼印句差别门记法式拥护，令我得闻。”

授记品第八

尔时，阿閼如来普告一切大众，作如是言：“我等劝汝诸善男

子，梵、释、四王、天、龙、夜叉、阿修罗、迦楼罗、紧那罗、摩睺罗伽、人非人等，诸有于佛教得清净信来此集会者，得见一切诸佛世尊，及诸菩萨摩訶萨，释、梵、天王、人非人等普来云集，如是大相，甚为难得！汝等今见此处集会，皆应于如来前各各自愿。汝今于此佛刹，若现在世及未来世，必能护持如是妙法，令三宝种常得炽然。”

尔时，有魔名曰息华，以七宝器盛种种华果及诸谷萌芽，自变其形为女人像，具足微妙第一端正，色相圆满无与等者，第一衣服严饰其身，持宝器华以供养佛，作如是言：“一切诸佛世尊一心念我！若此世界及余世界，所有诸佛已集会者，如是一切诸佛世尊，我今以一切华果诸谷萌芽，满于宝器奉献诸佛，唯愿慈悲普皆摄受，与我成就满菩提愿。若我尽此贤劫，于一切佛刹，以女人形惠施众生饮食华果，乃至成熟众生，以是福报令我六波罗蜜具足圆满，得成阿耨多罗三藐三菩提；及我所化众生，皆悉供给无所乏少。”

是时，一切诸佛同作是言：“善哉！善哉！善男子，汝能以清净心建立大施，及供养一切诸佛世尊。我已受汝所施，令汝如所求如所求，乃至尔所时求满汝意愿，功德成就，神通成就。”

时息华魔复作是言：“所有城邑村落，有能受持开示此经典者，书写经卷及供养者，我当于彼国邑聚落乃至边疆有人住处，丛林华果五谷秀实皆令成就。彼一切处所有众生，乃至禽兽食华果者皆令充足。世尊，若有一人于其方所应食果实，竟不得食而命终者，我今即为欺诳一切三世诸佛及此大会诸圣众等，亦莫令我得阿耨多罗三藐三菩提！唯除业尽及命尽者，所有华果美味之属，皆令众生普得受用，以此因故，令我具足檀波罗蜜。若诸众生食果实者，是等众生当起悲心互相利益，以此因故，令我具足尸波罗蜜。若诸众生受用华果，是等众生起柔软心，以此因故，令我具足羼提波罗蜜。若诸众生受用华果，当令坚固精进之心，以此因故，令我具足毗梨耶波罗蜜。若诸众生受我华果，心心数法起无常想，以此因故，令我具足禅波罗蜜。若诸众生乃至禽兽食华果者，皆令乐法得住性空，以此因故，令我具足般若波罗蜜。

“复次，随所有处行此法门，彼诸众生所有种种稻禾麦豆杂类果实，我以是故心甚勤劳，为彼众生多获种子，亦令一切仓窖盈满。若彼众生乃至禽兽食华果者，以此因故，令我具足般若波罗蜜。若一方流通开示此法门处，随彼所有甘蔗蒲桃石榴等果，一切汁味无不香美倍胜于常。众生所有瓶盆瓷器皆令盈满。若诸众生受用食时，悉得增长智慧色力，以此因故，令我具足般若波罗蜜。世尊，我得如是六波罗蜜净因满足，令我得阿耨多罗三藐三菩提。一切诸佛及一切菩萨摩訶萨众，当随喜我能作如是菩萨行相。”时大众中，一切诸佛默然许可。

尔时，有佛名曰智星，作如是言：“善男子，汝当普请一切众生为大施主，以如是相、如是力、如是精进勇猛、如是劬劳不息。汝善

男子，能作如是相、力、精进者，即是菩萨丈夫所作。”

时，息华魔于智星佛前，闻如是安慰已，即白佛言：“唯愿世尊一心护念，与我善业成就满足。在在处处，若此法门不流行处，我与眷属不入其境。若是法门流行之处，我与眷属恒住于彼，令其土地谷药华果倍复滋茂，色香美味悉皆具足，众生受用随时饱满，仓廩地窖悉皆盈积，乃至畜生所食之物亦令丰穰，以此善根令我具足般若波罗蜜。世尊，我尽千劫于此佛刹，令诸众生如是相、如是力、如是受用饮食，当令充足。世尊，如是无量无数恒河沙等五浊世界一一刹土，誓于千劫大作佛事，然后我身当得阿耨多罗三藐三菩提。世尊，我今以此神咒章句愿自呼摄。”即说咒曰：

“多地也他遮弥佉（一）遮弥佉（二）遮弥佉（三）毗毗履多呵娑帝（四）娑呵娑呵娑呵（五）娑么啰阿娑磨剑（六）娑啰知（七）毗娑娑娑脾（八）娑啰娑练陀离（九）娑啰摩显陀离（十）娑啰娑闍练陀离（十一）珊怛跋夜娑摩剑（十二）朽朽朽朽朽朽（十三）阿僧伽社脾（十四）哆佉哆佉哆佉（十五）婆由婆义（十六）优波娜也（十七）珊怛跋夜（十八）鼻闍颇罗补所报所提（十九）陀那驮泥移那（二十）𩇑陀啰差多（二十一）社闻娑呵泥（二十二）娑么啰娑磨剑（二十三）三藐波啰底钵那婆焰（二十四）娑哆迦里野么弥（二十五）么弭么弭么泯闍婆啰（二十六）娑婆呵。”

时，息华魔说是咒已，白佛言：“世尊，所在之处，有能开示此经法门及陀罗尼章句，我往彼处，为欲自成熟故，为菩提行满足故。”

尔时，一切诸佛同共赞言：“善哉！善哉！”

在会大众菩萨摩訶萨，及一切梵、释、天王、护世四王，天、龙、夜叉、乾闥婆、阿修罗、迦楼罗、紧那罗、摩睺罗伽、鸠槃荼、毗舍遮、人非人等，从一切佛刹中来者，皆共同声唱如是言：“善哉！善哉！善男子，汝能以此女形修行六波罗蜜成熟众生。以我等福德精进劳力故，唯愿令汝所作佛事当得成就。”

释迦如来作如是言：“谁有怜愍此善男子能佐助者？”

尔时，息华魔眷属同声唱言：“世尊，我等眷属随顺佐助！若汝善男子，得阿耨多罗三藐三菩提时，当与我等授菩提记。”

息华魔言：“如是，善男子！”

魔眷属言：“所有众生下种于地收诸果实而受食者，以此善根当令我等，得大安乐，得大利益。”

息华魔复白释迦如来言：“我是护持世尊教法者，我是炽然世尊正法者，我于此中初作灭饥馑者。唯愿世尊，与我受阿耨多罗三藐三菩提记！”

时息华魔，五轮著地，头面礼拜释迦如来足已，却坐一面。

尔时，世尊即为息华，而说偈言：

“汝起勇猛善逝子，无垢清净莲华面，
今日能发坚牢愿，当得第一大菩提。
此诸众生饥火逼，我为至亲能救护，
解脱一切众生者，起大悲心当作佛。
以空无相无愿力，解脱六趣苦众生，
恒以虚空清净法，令诸众生得无垢。
不久于此佛刹土，当证觉法名胜慧，
于未来世得作佛，勇猛善智降胜怨！”

时，息华魔闻是偈已，便生清净第一欢喜，即以天华散于佛上。

尔时，复有菩萨摩訶萨名成就智，即起于坐向彼十方诸来世尊，先以声觉作如是言：“唯愿世尊一心念我！所以者何？忆我往昔初入贤劫，当于拘留孙佛所发大誓愿，普欲成就一切众生受女形，为令众生四百四病得消灭故。复取大地精味，散布种种诸草木根，和合四百四味，随药功能众生受用病皆消灭。示以根药四百四种，示以果药四百四种，示以苏煎药四百四种，示以油煎药四百四种，示以写药四百四种，示以诸治阿伽陀药，乃至汤散丸等，总治身分内外众药，凡有一千四百种类。我为成熟诸众生故，为欲消灭诸病苦故，亦为利益诸众生故，如是众药并皆示之。

“世尊，我为拘留孙佛及彼众会，常作种种驱使给侍，本心希望得授记。是时，拘留孙佛便告我言：‘善男子，未来之世人寿百岁，尔时有佛出现于世，名释迦牟尼如来阿罗诃三藐三佛陀。释迦如来以大愿故，大集诸佛及菩萨众，汝当于彼得授阿耨多罗三藐三菩提记。’从是已来，拘那含如来亦如是说，迦叶如来亦如是说。我自昔来久发此愿，乃至恒河沙等大劫，于此佛刹作大药天，为除众生一切病故。我于彼时，久以大地淳浓精味，布散种种诸药根枝华叶果实，令诸众生普得受用，及灭内外诸病苦故。所有众生若正和合受用之时，令起无常、苦、空、无我，分别心及心数法转，以此善根令我具足般若波罗蜜，如是我于此佛刹作大丈夫事。如是，如是，十方恒河沙等诸世界中以女人形，于——世界如恒河沙劫，以如是相、如是力、如是勇猛精进、如是劬劳乃至给侍。如是，如是，病苦众生令成熟故，然后我身当得阿耨多罗三藐三菩提。及我今日复于佛前增进本愿，与此息华作大功德其心坚固，常为佐助无有劬劳。我等二人共为女形同一色貌，为欲成熟诸众生故，乃至倍加成熟诸女人故。今我二人取地精气和合饮食，令诸香味悉皆具足，老病众生食此味者，一切病患皆得消灭，以此胜因令我具足般若波罗蜜。若我得阿耨多罗三藐三菩提者，愿佛世尊摄受我等为称善哉。若佛世尊同与我等菩提记者，愿为我等称赞善哉。”

尔时，世尊称赞成就智菩萨言：“善哉！善哉！善男子，汝能如是作大利益丈夫！”即为成就智菩萨，而说偈言：

“汝为世间病者医，能持诸根得安乐，
莲华清净最上刹，得佛号毗卢遮那。”

持地菩萨摩诃萨亦作是愿，以女人形化度众生，如地持物希念授记。释迦如来为说偈言：

“汝如大地持一切，今当速得所希念，
刹名胜摄功德满，作佛名曰智自在。”

智上菩萨愿受女形化度一切，作如是念希得授记。释迦如来为说偈言：

“汝智充足诸众生，及以华果方便摄，
未曾闻刹上清净，得佛名为上胜因。”

示现灰菩萨作女人形，受用火事成熟众生，愿得授记。释迦如来为说偈言：

“示诸世间无常想，成熟众生于菩提，
刹名生坐最吉祥，于彼作佛名灯火。”

动众生离尘菩萨愿作女形，为成熟众生故受用风事，希念授记。释迦如来为说偈言：

“摇动众生令欢喜，能令烦恼究竟灭，
刹名清净现平等，当得作佛号月光。”

无障碍灯菩萨愿作女形，为成熟众生故受用虚空事，亦希授记。释迦如来为说偈言：

“得无依智清净者，能说无上正觉道，
刹名调障无染著，当得作佛号智上。”

妙香说菩萨愿作女形，为成熟故受用华事，为菩提故希望授记。释迦如来为说偈言：

“现作香华普供养，开示诸佛无上道，
莲华藏刹清净土，得佛号普香如来。”

袈裟色菩萨愿作女形，为成熟众生故，受用种种染色愿得授记。释迦如来为说偈言：

“以袈裟衣利众生，相应供养三宝种，
青光刹中最无上，当得作佛号宝光。”

尔时，无量诸种子天、林天、果天，乃至六十七俱胝那由他百千菩萨摩訶萨，为欲成熟诸众生故，倍为度脱诸女人故作女人形，发愿同得阿耨多罗三藐三菩提记。释迦如来，各说一偈各得记莳。何以故？转男为女其事则易，转女作男其事则难。是时，百俱胝诸大龙王及诸小龙，同作是愿希望授记，释迦如来，各说一偈授菩提记。复有六万四千频婆，及八十俱胝阿修罗，七十阿閼毗俱胝那由他百千诸天及诸天女，九十九频婆俱胝百千诸魔及其眷属，乃至恒河沙等人非人众，及刹利、婆罗门、毗舍、首陀，男子女人、童男童女，亦皆同心希望阿耨多罗三藐三菩提记，如是等类，一一各得一偈授记。过于数量天、龙、夜叉、乾闥婆、阿修罗、迦楼罗、紧那罗、摩睺罗伽、薛荔多、毗舍遮、人非人等未发心者，今于佛前同发阿耨多罗三藐三菩提心。过于数量众生住阿毗跋致地，过于数量众生得菩萨种种三昧忍陀罗尼，过于数量众生漏尽离欲得阿罗汉果，亦过数量众生回声闻、辟支佛心住佛阿毗跋致地。如是等一切同声而作是言：“我等依一切诸佛教故受此法门。若有受持读诵书写此法门者，我及眷属，当共如法供给供养。”

慈愍品第九

尔时，释迦牟尼如来，复作是言：“一切诸佛，若怜愍此佛刹众生来相问讯者，当一心念。此息华善男子等，欲令众生得衣服、饮食及诸药物，随心受用令充足者，又以女人形相，于阿耨多罗三藐三菩提成熟众生者，一切诸佛应当加护是息华等，令愿满足。如彼善男子所愿，如其所欲，如其所为，随彼种种所须衣服饮食并诸药物，若化施设皆令满足，使诸众生所须供侍随意受用，即发心时如是等事悉得成就。彼善男子能作如是建立丈夫所作之事！”

诸佛世尊依大悲功德定慧庄严，忆念众生作如是言：“以此神咒章句施与汝等，随意所愿皆令具足，一切善根所依，一切三世诸佛世尊所共受持。”即说咒曰：

“哆地也他树祇婆娑（一）地履底婆娑（二）牟尼婆娑（三）娑底也婆娑（四）否若楞迦啰婆娑（五）地也娜娑娑（六）摩呵迦喽拏婆娑（七）摩呵婆啰哆婆娑（八）阿慕呵婆娑（九）楼底婆娑（十）

差底婆婆（十一）娑履攞婆婆（十二）佉伽婆婆（十三）婆诱婆婆（十四）伐哆婆婆（十五）阿地所咤娜婆婆（十六）阿么婆婆（十七）阿呵娜婆婆（十八）哆他多婆婆（十九）部多句致婆婆（二十）涅鼻履底婆婆（二十一）底履鸠捨攞婆婆（二十二）底履夜娜婆婆（二十三）哆[(七/矢)+余]驮计迦婆婆（二十四）底履毗慕去所婆婆（二十五）底履首迦罗婆婆（二十六）啰所吒啰地所吒娜婆婆（二十七）婆婆婆婆婆婆（二十八）娑摩多（二十九）阿娜若婆么哆（三十）吒吒吒吒吒所咤死地（三十一）萨婆鸠捨逻茂逻地所咤那也（三十二）娑婆呵。

“善男子，此一切法平等神咒，能令一切悵望者悉皆满足。汝等眷属应当受持，令一切众生随所受用皆得成熟，能令汝等菩提行满足故。”

尔时，息华胜天、成智天、地持天等而为上首，与十千菩萨俱，为令众生随所受用得成熟故，以女人形勤劳化度，一时同声作如是言：“由此咒力，诸佛世尊，令我所愿皆得满足。如是神咒，能与我等作大加护，能令我等得无上智。是故我等当共受持此陀罗尼，欲令一切众生悉成熟故，以大勤劳供给所须。今于一切如来前，愿一切众生普得成熟住于自解。若有天乃至人，于如来所说妙法，欲破坏散灭者，我若不勤方便遮障令妙法久住者，我等则为欺诳一切三世诸佛世尊，亦莫令我得阿耨多罗三藐三菩提。若有善男子若天乃至若人，欲恼乱比丘、比丘尼、优婆塞、优婆夷，我等若不勤作方便遮障，令彼烦恼不消灭者，我等则为欺诳一切三世诸佛世尊，亦令我等莫得菩提。若有求无上菩提善男子、善女人，有遭水火毒害、厌蛊热病、温疟等病，或一日、二日、三日、四日数发动者，如是等畏，乃至天、龙、夜叉、迦吒富单那，刹利、婆罗门、毗舍、首陀，师子犬等、疾疫饥渴、种种厄难、诸余灾恼，有是等畏者，以此一切诸佛所持一切悵求满足陀罗尼神咒章句，令诵念者悉得解脱，唯除先世决定业障。若我等不除彼障，则为欺诳一切三世诸佛世尊，亦莫令我得阿耨多罗三藐三菩提。”

时彼一切诸佛世尊，同来此佛刹集会者，皆称是言：“善哉！善哉！善男子，汝等所愿甚为胜妙，能作如是大丈夫所作事。”

尔时，释迦如来即为魔王，而说偈言：

“于诸来佛当起信，应生最上欢喜心，
为菩提故生庆幸，应当速发利他意。
汝魔境界无亲友，亦无所欲如意者，
汝以无力失魔业，何能等类我牟尼？”

于是恶魔复说偈言：

“我无一念信菩提，心亦不作欢喜想，
语汝牟尼且默然，我亦自有亲友者。
由彼亲友我有力，我今住于自境界，
我有最上威德力，尽汝寿命我不从。”

拥护品第十

尔时，会中有佛世尊，名曼陀罗香，白释迦如来言：“彼过去诸佛，从种种刹土中来于五浊佛刹大集时，并共拥护此法门也！亦令无量俱胝魔众自然退散。以慈悲眼视诸众生，有恶见者皆令解脱，炽然智炬安置众生于吉祥道。说此金刚法等缘法心建立摧碎陀罗尼印章句差别门记法门之时，为令恶党悉皆退散建立法幢。如是，如是，我等十方诸佛今日住世，亦为将养怜愍诸众生故，亦于秽恶五浊佛刹同作大集，拥护如此微妙法门，乃至建立无上法幢。释迦佛日灭度之后，谁能于此刹土，当作第一护持妙法，当令正法炽然流布，当使众生普皆成熟，入此大集数者？我等以此法门付嘱谁手？”

释迦如来白曼陀罗香如来言：“所有旧住此佛刹者，得忍菩萨及释、梵、护世、天、龙、夜叉、乾闥婆、阿修罗、紧那罗、摩睺罗伽等王，勤加拥护此妙法门。及此世界四天下中旧住众生，于此法门生净信者，释、梵、护世乃至摩睺罗伽王等，以此陀罗尼印清净法门付其手中。”

是时，曼陀罗香如来，以无障碍圆满之声遍此佛刹，作如是言：“诸善男子，谛听！谛听！所有来此佛刹者。诸如来阿罗诃三藐三佛陀难得兴世！及一切诸佛世尊，于一刹那顷集一佛刹亦甚为难！如此一切诸佛世尊，怜愍汝等故来此集，摄受一切诸众生故，护持诸佛大法门故，置立无上道故。一切诸佛入三世数者，今日护持一切地界、一切水界、一切火界、一切风界、一切空界，令此妙法久住世故，令三宝种不断绝故，成熟一切诸众生故，乃至度彼生死岸故。尔时，一切诸佛世尊，及诸佛刹旧住菩萨摩訶萨，释、梵、护世、天、龙、夜叉、乾闥婆、阿修罗、迦楼罗、紧那罗、摩睺罗伽等王，及诸余精气中有大精气众生，乃至所有四天下世界居住者，彼一切众作如是言：‘善男子，我等以此诸佛所护正法重付嘱汝：为令众生普成熟故，汝等常应炽然如是不灭坏法不坠没法！若有信心善男子、善女人，当共受持书写大集法门。乃至比丘、比丘尼、优婆塞、优婆夷，彼等一切诸善男子，受持诵念此法门者，汝等常当拥护供给，以此法门如法付嘱。若法师乐求法、乐禅定、乐听法、乐持法者，汝等宜应拥护乃至供给。何以故？所有过去如来阿罗诃三藐三佛陀，彼一切如来，亦于秽恶五浊佛刹集者，共以妙法付嘱释梵护世故，令此妙法不隐没故，护持未来传法人故，乃至成熟一切众生故。’如是，如是，所

有当来十方诸佛，于五浊世一刹那顷普皆云集利益众生故，当说陀罗尼，当拥护妙法，当付嘱释、梵、护世等，当供给所须。我等今者亦复如是。

“汝此佛刹诸旧住者，及四天下释、梵、护世、天、龙、夜叉、乾闥婆、阿修罗、迦楼罗、紧那罗、摩睺罗伽等王倍加付嘱，未来之世倍加拥护，倍加供给故。汝亦如是应当忆念，如金刚不可坏法广令炽然。若有信心护持此法善男子、善女人，及受持此法比丘、比丘尼、优婆塞、优婆夷，乃至但书持经卷安置家中者，有能说法及乐听者，有勤修禅定受持法者，汝等皆当护彼善心供养供给。何以故？一切诸佛普皆受持此法门故。随所有处，若村、若城、若国中、若边地、若王宫内、若阿练若处，若流通此法门、若开示宣说、若授与人、若能温诵，乃至但书写经卷安置家中者，是等众生以此法力故，能令地味及众生精气悉皆增长。汝等以彼精气光泽，精进勇健皆得增长，亦令眷属及其田宅增长丰饶。当令人王常得拥护势力自在，亦当拥护王之化内，以彼法味常令充足。阎浮提内诸人王等，当生和合相利益心，恒信业报，种善根心，无悭吝心，常于一切众生作利益心，常于一切众生起慈愍心。乃至令王能生正见，各各于己国土自生喜乐，能令具足行善之人充满其国，丰乐倍常地土精味自然倍胜，花果药物无不甘美，谷米财宝亦倍增多，触处可乐，一切人民无病苦者，一切斗诤、他方怨敌、蚊虻毒蛇、恶鬼罗刹、恶禽恶兽、豺狼师子、非时风雨如是恶事悉当消灭，昼夜常宿、一月半月、时节年岁悉皆正行。是诸众生多行十善，于彼命终皆生天上，还与汝等而作眷属。如是无量功德甚多，皆由称扬一切诸佛大法陀罗尼法门故。

“是诸众生皆度生死此岸得入无余，名闻增长果报满足，所种女身现生后受，以法力故，如是等身一切皆尽；唯置作五逆者、诽谤正法者、谤无贤圣者，身口意业所作之恶业及果报一切皆灭。若此法门乃至经卷，若但书持置于宅中，彼等所有诸业烦恼能为障碍量等须弥皆悉消灭，一切善根悉得增长，一切善分皆悉满足，意所希冀皆悉成就，身口意善悉当增长，一切恶见断灭无余，一切怨敌以法调伏，一切微细寂灭之道悉当得入，以此一切诸佛世尊所共护持大集陀罗尼法门加护力故。随所有国此陀罗尼法门当流行地，能令彼地肥腻精味倍上成就，美果妙味当得增长，苦辛恶味当得远离，华果财谷色类成就，仓库贮器悉皆增满，衣服饮食汤药所用倍胜增多，由法力故。若有众生受彼饮食者，当得无病颜色成就，气力强健忆念坚固，乐求善法远离诸恶。彼诸众生若命终已，当生汝等种类之中，眷属增长，势力具足，怨不能坏。以法力故，当得四姓之所拥护，当以法义共相示诲。汝等若能如是作者，即为供养一切三世诸佛世尊已。”

尔时，曼陀香如来，即依诸佛清净境界智慧音声随类句义，以一切诸佛世尊语悉满此刹，遍告此佛刹中一切诸菩萨摩訶萨及释主、梵主、摩呼罗伽主所有居此佛刹者，倍复加劝此四天下中所居住

者：“汝等应当住持开示此诸佛语大集法门，拥护此经微妙正法。”

尔时，众中九万七千俱胝得忍诸菩萨摩訶萨，弥勒为首，居此佛刹者，一切同声作如是言：“我等今者奉诸佛教，为欲供养一切三世诸如来故，于此一切诸佛世尊微妙法门，恭敬顶戴尊重如佛，悲愍成熟诸众生故，乃至安置无上道故。我等于诸聚落城邑州县国土王宫诸寂静处，以此法门广布显示，为欲成熟诸众生故，令此妙法得久住故。”

尔时，一切诸佛世尊来此刹者，咸作是言：“善哉！善哉！汝等如是作所应作。”

是时，一切释、梵、摩呼罗伽主等居此土者，并余来众六十四俱胝那由他等大精味中有大威德众生，一切同声作如是言：“我等于此微妙大集法门悉当受持，乃至广为开示显说，成熟众生故，妙法久住故，乐法听法者悉当拥护。我等今者奉诸佛教，随此法门流行之处，令使一切斗争违背、谋计争论、饥俭荒乱、他方怨敌、非时风雨、非时寒热、苦辛涩味、恶人恶物悉当消灭，安隐快乐丰饶和合悉当成就，此妙正法当令久住，倍加勤勇拥护供给正法国王，及以勤修禅定众生悉当拥护。”

时，彼一切诸佛世尊同声赞言：“善哉！善哉！善男子，汝等今者应如是作，勤作自他利益之事，即于一切三世诸佛为供养已。如汝等勤劳成熟诸众生故，令此妙法得久住故，汝等皆当速得阿耨多罗三藐三菩提。”

尔时，中四天下释、梵、天主，乃至摩呼罗伽主，及大威德中最上首者，一切悉皆从座而起，恭敬合掌作如是言：“我等亦奉一切诸佛世尊教故，悉共光显此妙正法拥护住持。及此大集一切诸佛所护陀罗尼印法门，当如法受。乃至于诸聚落城邑州县国土王宫诸寂静处，当广开示。持妙法人拥护供给，所有住信正法法师及听法者，比丘、比丘尼、优婆塞、优婆夷，善男子、善女人信受此法，乃至若但书写经卷置之家中，勤修禅定，我等于彼拥护供给种种供养衣服、饮食、华盖、幢幡、涂香、末香，乃至一切医药资具，诸有所须善作供给。

“若人能于此妙法门，诵时读时开示说时，我等自往彼法座所，为听法故如大师想，于此法门恭敬尊重一心赞叹，诸盖幢幡持以供养。何以故？我等于此一切诸佛之所拥护陀罗尼法门广开示时，以法味故当得精气、具足力、具足精进、具足志、具足念、具足智、具足善友、具足眷属、具足所有军众，怨不能坏。是故我等令一切国界所有斗争、谋计言讼、饥俭疾病、他方怨贼、非时风雨、极寒极热、灾旱愆时、恶梦恶相、粗涩无腻、苦辛恶味、恶人恶物诸不善分悉当消灭，倍复安隐丰熟喜乐，无病和合悉当成就，时风时雨寒热以时，昼夜位分、半月一月、时节年岁悉令正行，诸宿星曜日月之次不令失度，泉池陂河皆令满足。随有众生所依住处，瀑水漂溺我皆遮断不令覆没。我等于彼国邑聚落利众生故，所有枝叶、华果根茎、诸谷药味

悉当肥腻、色相鲜泽、美味滋多，财谷药味、衣服庄严、诸资具等，令诸众生悉当具足无所减少。

“彼诸众生求善根心离诸恶业，胜福德聚及彼寿命悉令成就。所有聚落国土，以此一切诸佛之所拥护陀罗尼法门开示，乃至书写经卷安置家中，若读若诵恭敬供养，于置经处，若有刹利灌顶之王，我当拥护供给所须令无所乏，所无利益当为彼等而除断之，所有利益当为彼等随而与之，一切灾怪、惊动不吉、恶见恶作、为恶所持、恶愿恶归、奸诈赞毁、幻谄妄语、嫉妒嗔忿、诸悭吝等悉当消灭，正见正道、直信调伏、一心惭愧如是等法悉当示诲。妃后内宫、宰相辅臣、主藏亲族、刑罚官将，一切人民四姓男女童男童女等，亦当拥护供给乃至惭愧示诲，所在诸方乃至四足亦当拥护。随有国土以此法门宣布开示，乃至书写经卷及经卷住处，以大勤勇彼诸众生悉当拥护，此妙正法随处光显不令隐没。我等当起精进力故，作如是事。”

是时，一切诸佛世尊，悉共称赞：“诸善丈夫，善哉！善哉！诸善男子，汝等如是作所应作，以此正法及三宝种，不令隐没故作勤劳。汝等如是如汝所作，即于一切三世诸佛为供养已。”

宝星陀罗尼经卷第八

护正法品第十一

尔时，世尊释迦如来告诸大众：“释梵天王、毗楼勒叉、毗楼博叉、提头赖吒、毗沙门等，诸善男子，我以大悲愍众生故，于此五浊秽恶佛刹难得法时，愿得阿耨多罗三藐三菩提。是中众生堕无明闇，烦恼怨贼奸狡恼害，我为众生灭烦恼故，退诸魔党建立法幢，无量众生苦解脱，雨大法雨退俱胝魔。诸善男子，是故我今以此妙法，殷勤付嘱汝等手中。如此十方无量世界，过数过量诸佛世尊，及诸菩萨摩訶萨等普来集者，以此金刚法等因缘法心建立一切法摧碎陀罗尼印句门记法门，拥护佛土并诸地味众生所居者，诸过恶消灭故，成熟众生故，一切不善业尽无余故，三宝种久住故，乃至一切佛事成就故。是故汝等受持拥护我妙正法，能令善根福行增长，若温诵教示为他说，授趣三归依优婆塞，护住净梵行，诸善根等福行增长；若修初禅福行增长，乃至修灭受想定；若须陀洹果，乃至佛菩提果福行善根，如是等相皆得增长；现在所作乃至未来当作然妙法灯，能令一切福行增长，是故付嘱汝等手中。如来所觉妙法令炽然故，劝发汝等福德增长，是故付嘱汝等手中。若未来世于此法门，乃至书写经卷安置家中，以法力故，一切恶业悉当灭尽。随所有处若在村城，若欲受持当净洗身著新净衣，以华布散烧种种香，敷种种毡褥严师子座，开示此法说此法门，乃至书写经卷受持读诵。若汝等于彼不来听法，拥护法师及听法者，自他恶业尽故，汝等则为欺诳诸佛愚失正道。”

尔时，娑婆世界主梵天王白佛言：“世尊，若于今时若未来世，随所有处，乃至此妙正法未灭已来，若聚落城邑、州县国土、边疆远处、王城宫内，若僧伽蓝、若寂静处、若婆罗门家、若长者大家、若庶民家、若说法师，比丘、比丘尼、优婆塞、优婆夷，及余清信善男子、善女人等，好洗浴、好塗身、著新净衣，散华布饰庄严道场，烧种种香，敷种种缯彩，设种种味，升师子座，广为他人开示演说此陀罗尼印。若书若读时，我共无量百千徒众，当往彼处围绕听法，拥护彼法师故，及诸听法者自他恶业尽故，一切善法成熟故，大妙正法炽然故，入大智明第一道故。彼诸城邑乃至庶民家，我当拥护彼诸众生，令彼众生财谷丰饶仓库盈满故。若我不来闻所未闻，即于一切佛世尊前违昔誓愿。”

时，梵天王即于佛前而说咒曰：

“多地也他 鸯咎呵澄（去音）伽否啰茶（去）拏（一）耶弭咤（二）佉佉（三）佉婆（四）佉婆（五）吉利那佉婆（六）娑婆呵（七）。”

时，梵天王说此咒已，重白佛言：“世尊，若我于彼说法师处，不来听者，不拥护者，乃至财谷丰饶仓库增长故，众生充足故，即违本誓愿。”

尔时，一切诸佛世尊，及大菩萨摩訶萨，一切天人、人非人等，同声赞彼大梵天王：“善哉！善哉！”

尔时，释天主憍尸迦白佛言：“世尊，随所在处，若今现在、若未来世，乃至村城，若我不往闻所未闻，即于一切佛世尊前，违昔誓愿为有过者。”即于佛前而说咒曰：

“多地也他 佉婆弭履佉（一）佉婆弭履佉（二）那攞伽（三）阿母若（四）阿母婆呵（五）阿咭吒（六）阿咭（七）阿捨咭（八）嗜那婆啰揭（九虚偈切）娑婆呵。”

时，释天主说此咒已，重白佛言：“世尊，若我不作如昔所愿者，此即是我自违誓愿为有过者。”是时，大众乃至人非人等咸称叹言：“善哉！善哉！释迦天主。”

尔时，毗楼勒叉天王白佛言：“世尊，随所在处，若今现在、若未来世，乃至城邑有此法门，我若不往不作拥护。世尊，此即是我自违誓愿为有过者。”即于佛前而说咒曰：

“多地也他欧佉（一）那婆娑茶（二）娑母陀啰细儿（三）哆他注多（四）婆楼（上声）拏娑婆啰阁（五）娑婆呵（六）。”

是时，大众乃至人非人等，咸共称叹毗楼勒叉大护世言：“善

哉！善哉！”

尔时，毗楼博叉天王白佛言：“世尊，若今现在、若未来世，随所在处乃至城邑有此法门，我若不往为作拥护闻所未闻，即于佛前违昔誓愿为有过者。”即于佛前而说咒曰：

“多地也他阍老伽（一）阿到伽（二）阿历耄伽（三）阿么么（四）娑连社婆（五）脾（毗也切）耶母阍（六）娑婆呵（七）。”

是时，大众乃至人非人等，咸共称叹毗楼博叉天王言：“善哉！善哉！”

尔时，提头赖吒天王白佛言：“世尊，若今现在、若未来世，随所有处乃至城邑有此法门，我若不往为作拥护闻所未闻，即于佛前违昔誓愿为有过者。”即于佛前而说咒曰：

“多地也他频头社婆（一）佉婆社婆（二）啰母佉（三）叉娑啰（四）否迦婆呵（五）阿（上声）末伽婆吒（六）娑婆呵（七）。”

是时，大众乃至人非人等，咸共称叹提头赖吒天王言：“善哉！善哉！”

尔时，毗沙门天王白佛言：“世尊，若今现在、若未来世，随所有处乃至城邑有此法门，我若不往为作拥护闻所未闻，即于佛前违昔誓愿为有过者。”便于佛前而说咒曰：

“多地也他箴（初后切）陀利（一）箴箴箴陀利（二）箴陀利（三）阿你箴陀利（四）那也那箴陀利（五）醯履哆夜箴陀利（六）娑伽啰醯履哆箴陀利（七）僧九娑箴陀利（八）达摩叉耶箴陀利（九）娑婆呵（十）。”

是时，大众乃至人非人等，咸共称叹毗沙门天王言：“善哉！善哉！”

尔时，于此世界，此四天下所有一百一十二夜叉大将主将军众于四天下守卫拥护者，复有四万夜叉于此四天下居住者，复有大神通中最胜诸天、龙、夜叉、乾闥婆、阿修罗、伽楼罗、紧那罗、摩呼罗伽等，咸共同声白佛言：“世尊，若今现在、或未来世，随所在处有此法门，乃至此妙法灯不灭已来，若在聚落城邑、州县国土、王城王宫、阿兰若处，若婆罗门家、长者家、居士家庶民家，若法师，若比丘、比丘尼、优婆塞、优婆夷，复有诸信心善男子、善女人，应好洗浴，以香塗身，著新净衣，散华布饰庄严道场，敷置种种毡褥衣服，烧种种香，种种美味盛满净器，施設妙好师子法座。升此坐已，广为

他人分别开示此经，及读诵时，我等一一与无量百千眷属围绕往彼听法，为拥护法师，为拥护己众及余众生，为拥护故，成熟众生故。

“我等若不往彼城邑乃至庶民家，及以眷属不受教敕不成熟众生，不令众生丰饶财谷、仓库盈满，又复一切斗争、饥馑疾病、他方怨敌、非时风雨、极寒极热、诸灾难等若不遮断，我等则为欺诳过去、未来、现在诸佛世尊，违本誓愿空无所得，得白癞病，退失神通，身体烂坏。世尊，虽复如此，我等今者并诸眷属，若今现在、若未来世，于此世界四天下处，决定光显释迦如来微妙正法，及信此法人当为拥护供给所须，所作成熟恶业灭尽。我等于此法门教示开显彼说法人，又令说法人及听法者财谷丰饶，诸所受用悉当增长，于佛所说不坏不灭法，悉当受持。”

彼一切诸佛世尊，一切大众人非人等，咸共同声，赞彼天龙护法神等：“善哉！善哉！汝等如是善所应作。”

尔时，怀乐菩萨于大众中即白释迦如来言：“世尊，云何此百俱胝所有诸魔并诸眷属，一切尽皆来到此耶？”

佛言：“善男子，此一切魔并诸眷属悉来此会。”

怀乐菩萨复白佛言：“云何，世尊，此一切魔并诸眷属，于三宝中得清净信不？”

佛言：“不也！复次，善男子，此诸恶魔一千眷属，于三宝中而不得意，不清净信返生嗔恨：‘若今现在、若未来世，乃至此妙正法炽然已来，当勤方便伺求其短，令正法灭坏故，隐没故。’如是复有十八诸魔，并其眷属一万三千；如是复有二百诸魔，并其眷属二千一百；彼诸魔等，于三宝中悉不得意，不清净信返生嗔恨：‘若今现在及未来世，乃至此妙正法广流行时，常勤方便伺求其短，令我教法及妙正法灭坏故，隐没故。’何以故？往昔已来憎嫉力持故，不种善根故，为恶知识所摄故，于善离欲无受乐中，永无希望无欲愿故。彼诸魔心，于如来心及菩萨心未曾和顺，住不净信不解脱故。是诸魔等今虽不信，以见如来大集妙色，及得闻此甚深陀罗尼，以是因缘故，于后时得清净信得阿耨多罗三藐三菩提。”

怀乐菩萨作如是言：“希有！世尊。希有！善逝。彼等众生乃至不种善根，若但耳闻触此法门，如是因缘故当得阿耨多罗三藐三菩提。”

尔时，有魔名曰不去，曾于佛所极多供养，于三宝中净信不动，得阿耨多罗三藐三菩提记，作大仙人形从座而起，于释迦如来前合掌遍观如来，世尊威力加故，于一切佛刹大声遍满，作如是言：“诸佛世尊一心念我！一切菩萨摩訶萨，及天、龙、夜叉、乾闥婆、阿修罗、伽楼罗、紧那罗、摩呼罗伽、人非人等，魔及眷属听我所说：今此世尊释迦牟尼大悲导师，往昔之时誓愿如是，于极秽恶五浊佛刹，得阿耨多罗三藐三菩提。作逆众生、诽谤妙法、谤无圣人、具不善根、恶行相应，心相续成就者，普令出过三恶道故，成熟三乘故，修

忍三昧陀罗尼故，引向清净诸佛刹土，令三宝种久住不断，成就大愿，断除一切秽浊佛刹，成满一切功德庄严。

“是故我等当如是作：为令如来正教久住，及妙正法得不灭坏，若今现在、若未来世，无有若魔若魔眷属，于如来所受正法，欲灭坏阴没，乃至不能恼一众生，唯除少随顺不具信者。若持此妙法者，随顺此法者，说此法者，听此法者，比丘、比丘尼、优婆塞、优婆夷，及余信心善男子、善女人，勤修三业能自策勤，坐禅诵经，营理塔寺，恒勤作福，勤事供养佛法僧宝，勤断三界烦恼系缚，勤断一切众生诸苦，悉令解脱者。彼等行人若为魔使，若魔女魔男、若魔眷属欲恼乱彼，伺求其短障难善业，作乱心因者，为彼等故，我今现前请诸世尊，当与我力善业成就，怜愍我故。一切菩萨摩訶萨等，并一切魔及魔眷属，一切天、龙、夜叉、乾闥婆、阿修罗、伽楼罗、紧那罗、摩呼罗伽、人非人等，所有一切来此佛刹者，及大地众，为欲利益诸众生故，佛教正法得久住故，当怜愍我。今欲说咒与我成就，若魔若魔眷属欲恼彼等人及法者，我当降伏，令其心乱，令其身苦，令身恼缩退失神通，故说此咒句。若诸恶魔并魔眷属，魔男、魔女、若魔使等，若于佛教起一念恶不清净心，恼乱诸比丘、比丘尼、优婆塞、优婆夷，乃至但起一刹那心，欲作恼乱退失善分；若于村城国邑，乃至王城宫内，边疆静处，随所在处，有此法门开示分别，若于此等起破坏心，乃至一刹那，于彼诸方斗争疫死、饥俭诸病、他方怨敌、非时风雨、极寒极热、瀑水卒起、地动地吼、火星流堕，有如是等诸恶相起，或于华叶果实诸谷药味，欲于彼等起破坏心时，即令彼魔乃至魔使，郁热所烧熏污烂臭，无所能作不能起举，五系缚之令其自见，乃至一切支节卷缩不能舒展。令得黑闇不睹光色。退失神通心意错乱。令彼六根不能缘境。”即说咒曰：

“𧈧多地也他阿摩离（一）阿𧈧（呼甘切）么离（二）阿𧈧么离（三）阿闍婆婆（四）阿闍婆婆（五）茂啰娑离（六）鞞夜佉娑离（七）社么娑离（八）呵呵呵呵呵呵（九）瞿啰娑吒（十）社那佉伽（十一）[(余-水)/小]也佉伽（十二）比（毗蜜切）[(余-水)/小]也娑娑佉伽（十三）阿茂叉啰（十四）叉叉叉叉叉叉（十五）茂啰娑啰（十六）佉伽娑婆佉若（十七）娑婆跋履跋哆茂啰（十八）阿（上声）若若娑由若（十九）𧈧陀啰嗽履也若若（二十）那婆（上声）呵（上声）若若（二十一）葛啰叉若若（二十二）娑婆若若（二十三）部哆句毗哆他（上声）多若若（二十四）萨婆[(余-水)/小]脾啰地（上声）史耻多（二十五）若若婆迦啰么（二十六）底履健哆叉婆（二十七）叉么摩叉摩若（二十八）差（初几切）比哆摩啰毗沙也（二十九）娑婆呵（三十）。”

尔时，不去魔说是咒时，于刹那顷，由得一切智拥护故，诸魔境

界悉皆灭坏无所成就；如是，如是，所有欲作不利益者，皆不成果。是时，一切诸佛世尊，咸共称赞：“善哉！善哉！”及一切菩萨摩訶萨，天、龙、夜叉、人非人等，亦共称赞：“善哉！善哉！”是时，大地皆大震动，四海涌沸，诸须弥山王，魔及眷属悉大惊动。是时，恶鬼神等亦复如是，唯除于佛教法清净信者，及得忍菩萨不生惊怖。

尔时，魔王问坚固慧菩萨言：“善男子，何等因缘，此不去魔有是胜力？是谁加彼？此无慈悲，令我部党及我境界力之所作，一切散灭悉皆退坏，乃更建立沙门瞿昙，黑党亲眷说断恶见！我即闻此陀罗尼时，令我身体臭恶烂坏无所能为，一切诸方为我黑闇，不见诸光大热所烧耶！”

尔时，坚固菩萨答魔王言：“此是一切诸佛世尊神力加护，亦是一切人非人等，与此不去魔力故，令汝等一切诸魔境界之力，如所欲作悉皆摧碎。今说此不退陀罗尼句时，汝今应生清净信心，于如来所，发阿耨多罗三藐三菩提心。汝今若能如是作者，此身口意诸苦恼触悉当解脱。”

是时，魔王答坚固菩萨言：“我今宁当忍耐此苦，令身口意，受于无量无数大苦恼事，至于最后边际劫，我终不发阿耨多罗三藐三菩提心。”

阿吒薄俱品第十二

尔时，夜叉众中，大将军主名阿吒薄俱，而作可畏夜叉之形；复有夜叉名曰为想，而作鹿形；复有夜叉名曰智炬，作猕猴形；复有夜叉名舍渴爱，作羖羊形；复有夜叉名曰断流，而作象形。此五夜叉是善丈夫，去释迦如来不远，于憍陈如如来前坐。此等五人一切身分，皆出清净微妙香光，各以两手捧光明大宝，为供养世尊故。

尔时，怀乐菩萨摩訶萨，以清净心观彼五人清净所依，乃是菩萨摩訶萨，即告阿吒薄俱大夜叉军将言：“善丈夫，汝等今者见何等义，现如是相威仪所作供养世尊？”

时，阿吒薄俱答怀乐菩萨言：“善男子，于过去九十一劫，于此佛刹有佛出世，号毗婆尸如来应供正遍知。彼佛世时，我等兄弟同一母生，于彼佛所，俱发阿耨多罗三藐三菩提心，为成熟众生勤作方便。从彼已来于尸弃如来所，如是毗叶婆如来所，乃至于此大贤劫中最初如来名拘留孙，彼佛出世，从尔已来我等大愿常作同母兄弟。于彼如来，我等兄弟以种种供养供给所须，彼佛世时想善丈夫为优婆塞，乐修禅定作如是愿：‘愿我常于大贤劫中作夜叉大将！若有夜叉居住空野之处，于诸众生常怀恶心无有悲愍，种种杂类夜叉之形，乃至迦吒富单那等，我以方便现同彼类，为说正法令生净信；得净信已为受戒法，置之吉祥安隐善道；乃至随所有处，诸畜生趣亦复如是，獐

鹿虎狼猪羊犬等为其说法；乃至恒河沙数恶夜叉等，诸畜生趣尽同所作，为其说法令种善根，彼成熟已安置于彼三乘正道，然后我得阿耨多罗三藐三菩提记！’

“智炬夜叉愿作猕猴形者，为成熟猕猴故；舍渴爱夜叉愿作羖羊形者，为成熟住八难众生故；断流夜叉愿作象形者，为成熟象等故；如是万二千诸大神通夜叉，居四天下者，往昔已来作种种愿，为成熟众生故，为求阿耨多罗三藐三菩提故，于彼拘留孙如来前，求阿耨多罗三藐三菩提时，为成熟恶夜叉故：‘愿尽大贤劫，彼恶夜叉无悲愍心，乐作恶法无恩慈心，乃至迦吒富单那夺精气者，狂乱他心者，作不善心者，杀害众生者，乃至邪见者，刹利、婆罗门、毗舍、首陀等心狂乱者，道路城邑州县国土等中作狂乱者，作诸灾怪星宿日月、昼夜度数、半月一月、时节年岁皆令失度，斗争谋计、饥馑疾病、他方怨敌、非时风雨、极寒极热和合集起如是恶事，种子药草花果汁味悉欲破坏，众生喜乐无病和合，于善法欲、地味精气、财谷宝物、食味、法味、解脱味皆令灭没者，有如是等诸恶夜叉，教令受戒置不退地，然后我乃取阿耨多罗三藐三菩提记！’

“我从彼已来，常生诸恶大夜叉中为大军将，乃至极恶迦吒富单那等，以三乘法成熟安立，置于不退之地。从是已来，见下中上鬼不曾轻欺，如所见形我同彼形，随类与语筹量渐进令其欢喜，断除诸恶立慈悲心；满悌望已，教令供养佛法僧宝，令不退转。随有夜叉眷属之处，我当往彼以法教示。彼诸夜叉随其住处，若见我來咸共白言：‘善来！阿吒薄俱。’由彼称我名阿吒薄俱故，我名阿吒薄俱。若今时人无先圣法，住于恶戒常行黑业，彼命终已生三恶道，少分众生生于人中。若行杂业者，于三宝中时有净信，彼命终已由杂业故，杂生诸恶夜叉、迦吒富单那中，于世间中倍复增长，彼等一切白法之方便灭坏，由彼恶故，今时斗争倍复增长。我又不能于一切时，于恶夜叉乃至恶富单那，以柔软语置于白法。我又不能于一切时，于沙门、婆罗门、刹利、毗舍、首陀罗等，男女长幼、小男小女除其扰乱。我又不能于一切时，城邑州县国土道路除其扰乱。我又不能于一切时，令诸鬼神等心心数法置解脱味。

“善男子，我今蒙一切诸佛威德力故，已得善入一切夜叉迦吒富单那等方便谄心智。善男子，有陀罗尼，名金刚佉婆娑履诸鬼心大暴恶明咒。若有行此咒者，诸夜叉女、夜叉父母、夜叉男女、夜叉夫妇并其眷属，若罗叉、罗叉女，乃至龙、龙女，鸠槃荼、鸠槃荼女，颠病鬼、疟病鬼，若日日发，乃至四日发鬼，若迦吒富单那、迦吒富单那女、迦吒富单那父母、迦吒富单那男女、迦吒富单那夫妇并其眷属，不复更能恼乱刹利、婆罗门、毗舍、首陀，乃至国土。复次，善男子，随所有处，若城邑州县，若王宫内，乃至庶民家，此金刚佉婆娑履诸鬼心大暴恶明咒，随处开示。时彼处所有恶夜叉、迦吒富单那等，往昔已来憎嫉随逐，不善业者愿令悉舍，生于慈悲柔软之心，于

一切众生起利益心。若一切聚落家宅，为天、龙、夜叉、迦吒富单那等之所扰乱，一切日月星宿、灾怪毒气等之所加害，厌蛊扰乱，及身中风病、黄病、阴病、疟病，若日日发，或二日、三日、四日发，癩病癣疥、欬嗽丁疮、腹痛支节等病之所扰乱，皆得除灭。愿令人非人等及至禽兽，勤修白业断诸怖畏，具足喜乐昼夜受乐，布施调伏摄护身口而不懈怠，勤修乐求助菩提道。”

又作如是言：“善男子，诸佛世尊随喜加护，与我此咒成就业句，能除一切扰乱恶法，遮断一切不善之分，增长一切善法之分。我今欲说此一切诸恶金刚佉婆娑履大明咒句，释迦如来当加护我圆音演说。若我圆音演说此文字声满一切佛刹者，如是诸来大众，闻此圆音演说句义文字皆令欢喜。”

尔时，世尊释迦如来，告阿吒薄俱大夜叉军将言：“善男子，我等诸佛已加护汝此圆音演说金刚佉婆娑履诸鬼心大暴恶陀罗尼咒，破坏黑党炽然白法。善男子，汝当勇猛，说此能除一切扰乱金刚佉婆娑履诸鬼心大暴恶明咒，遮断一切诸恶咒句。”

是时，阿吒薄俱大夜叉军将，即从座起曲躬合掌，向释迦如来以大音声，尽此佛刹普皆告知，即于佛前说此咒句：

“多地也他豆（上声）摩豆摩（一）驮摩驮摩（二）度摩度摩（三）你履娜（四）娜罗努罗你罗（五）鸠吒你鸠吒你（六）摩诃鸠吒泥（七）吒吒吒株（八）摩诃吒吒（九）阿婆娑（十）阿毗阿毗（十一）履尼履尼（十二）摩诃履尼履尼（十三）履弭履弭履弭（十四）陀履弥（十五）履筏（平声）摩诃履筏（十六）首楼首楼（十七）摩诃首楼首楼（十八）首楼首楼陀（十九）摩诃首楼首楼（二十）呕舅摩舅摩（二十一）舅摩那（二十二）履弭履弭（二十三）醯履醯履（二十四）醯履醯履（二十五）醯履醯履（二十六）醯履醯履（二十七）醯履（二十八）你弭你弭（二十九）醯你醯你（三十）母你母你（三十一）部地履（三十二）跋啰婆啰（三十三）悉履所吒（三十四）视泥视泥（三十五）视娜履沙婆（三十六）视娜视娜履沙婆（三十七）娑婆呵（三十八）。”

是时，阿吒薄俱大夜叉军将说此咒已，即白佛言：“世尊，随所有处若城邑乃至庶民家，说此金刚佉婆娑履耶大明咒句时，若有夜叉乃至迦吒富单那，心不净信，及身口意不受教戒，不于众生起慈悲心，以是故，我今更说倍复严迅大明咒句。”即于佛前而说咒曰：

“多地也他阿（上声）[目+支]（一）阿[目+支]（二）母泥母泥（三）阿（上声）耆（上声）泥朽朽（四）母泥母泥（五）么娜履沙婆（上声）朽朽（六）阿迦啰檀地（七）阿哆檀地（八）阿哆阿哆（九）阿底（十）呕吒（十一）醯（上声）你（十二）醯弥（十三）

醯履醯履醯履醯履醯履醯履醯履（十四）哆啰舅么（十五）舅么舅么舅么（十六）醯履醯履（十七）你里你里（十八）摩呵你里（十九）三母陀罗[𑖀+𑖥]（去音）佉（二十）呵吒呵吒呵吒（二十一）陀啰拏弥（去声）佉（二十二）叉婆佉叉婆佉（二十三）比履地毗（二十四）阿（去声）跋（二十五）帝（多易切）殊（二十六）婆由（二十七）阿迦捨（二十八）[𑖀+𑖥][𑖀+𑖥]陀穷卑（二十九）朋穷脾（三十）恶差（初饥切）穷脾（三十一）视许婆穷脾萨傍（去声）伽穷脾（三十二）啰祛穷脾（三十三）娑陀娑斗穷脾（三十四）娑婆呵（三十五）。 ”

尔时，阿吒薄俱夜叉大将说此咒时，应时无间，一切天、龙、夜叉、迦吒富单那皆大惊怖，此佛刹土地及虚空住者悉皆战怖。一刹那顷如是一切诸鬼，即于佛前合掌敬仰作如是言：“南无一切诸佛！南无南无一切诸佛！最胜大悲愿悲愍我。”阿吒薄俱夜叉大将，说入一切鬼心咒句。

诸佛还国品第十三

尔时，一切诸佛世尊，从十方来者，各从座起现还国相。是时，大众地及虚空住者悉皆战怖，一切大地悉皆震动，从空雨华，于虚空中作百亿乐，烧香末香从空而下，光明遍照此佛刹内，一切大众皆悉合掌。

尔时，娑婆世界主梵天王问大栴檀香佛言：“世尊，是诸众生，以何善根当得具足？诸佛世尊以几种法加护众生，于未来世得此法门，当受当持当读当温诵，及为余人，当广开示，书写此经，书写已安置家中。”

尔时，世尊大栴檀香如来告梵天王言：“如是，梵王，一切诸佛，加护众生六界之身，调伏魔党故，息灭斗乱故，成熟众生故，妙法久住故，净无上道故。如是一切诸佛世尊、诸大菩萨，有十种法加护众生，于未来世得此法门，当受持读诵，书写经已安置家中。何等为十？一者、一切诸佛诸大菩萨，殷勤付嘱一切天、龙、夜叉、乾闥婆、阿修罗、伽楼罗、紧那罗、摩呼罗伽等，常令拥护受持法人，不起非法身口意业，示诲善法，随所受用衣服饮食常令丰足，无病安隐乃至舍己身命，护持法人令无过失。二者、彼人所得念慧乐说，趣巧方便得无过失，及彼欲乐相应意觉深忍具足，随所住心如空如地。三者、以四摄法劝诸四众及余众生，得住善法取坚固身，三事清净行菩提道。四者、得宝幢三昧，得是三昧巧能观察诸三昧门。五者、彼持法人随处命终，无量无数诸佛世尊，诸比丘众，诸菩萨众，常现在前将养说法。六者、诸佛世尊所说成就句义文字法，时悉皆得闻，即得

一切最胜圣法无受喜乐；彼一切业障，随彼命终最后刹那，舍寿死识，得如法灭，犹如死法阿罗汉灭。七者、如所希望清净佛刹随意化生，彼诸世尊住世将养，常说清净大乘教法；彼持法人，于此大乘无障碍智，具足如虚空心而住。八者、不久于此功德悉得具足。九者、彼持法人，秽浊佛土不复受生，除自本愿。十者、速疾当得阿耨多罗三藐三菩提。是为十法。诸佛世尊，以此十法加持法人。若于今时、若未来世，此妙正法当得炽然。若有受持此陀罗尼法门，乃至但书写此经安置家中，一切诸佛、诸大菩萨当拥护彼持法之人，一切烦恼悉得解脱，即是菩萨摩訶萨也。”

尔时，世尊释迦如来告释梵护世：“诸善男子，此诸世尊，皆从十方普来会者，怜愍汝等诸众生故，令此世界外物清净故，成熟一切众生故，显示菩提行故，退魔党故，建立法幢故，显示一切佛事故，三宝种不断故，灭一切病故，遮一切恶故，拥护一切怖畏故，断一切恶见故，入菩提道故，满足如来十力故，尽一切烦恼业故，说此希有大希有相，昔未曾有昔所未闻，甚深句义陀罗尼，拥护家宅城邑国土，乃至拥护此四天下，天、龙、人非人等，谷药花果，护说法师及听法者，为得无著陀罗尼故，入如虚空智故，以一法式得一切智智故。

“复次，善男子，以此法门故，一切诸佛依入大悲智，以十种法护此佛刹中一一诸物增长不坏。善男子，一切诸佛菩萨，于此佛刹遍皆受用无空缺处，护持一切善法故。一切佛土所受生者，于此佛刹当起尊重礼拜，如塔庙想，如大师想。由此佛刹所受生者，善能建立一切法故，灭除业障五逆罪故，具不善法得不爱果尽无余故，住诸善法。善男子，此是诸佛于此佛刹大丈夫业。善男子，汝等应当恭敬受持此法。若有在家及出家人，受持此法者，及信此法者，汝等应当守护此人，汝等当得利益安乐故。”

尔时，俱苏摩幢如来，于此法门称扬功德，说如是偈：

“净金满诸刹，舍供诸如来，
不如持此经，福德无边量。”

尔时，胜宝盖如来亦复如是，称叹此经无量功德，说如是偈：

“若持金宝聚，施与恒沙佛，
不得如此福，如彼持经者。”

尔时，须弥峰如来亦复如是，称叹此经无量功德，说如是偈：

“最上华聚盖，连布覆虚空，
普施于诸佛，净喜心供养；
末法欲尽时，多诸怖畏事，

持此经福量，诸佛不能说。”

尔时，释迦如来亦复如是，称扬此经无量功德，说如是偈：

“若起净心牟尼前，炷如须弥香油灯，
无量俱胝大劫中，熙怡持此以供养；
复有余人乐福德，悌求无障解脱身，
法欲尽时以此经，为信者说福胜彼。”

尔时，阿閼如来亦复如是，称赞此经无量功德，说如是偈：

“若修持忍慧，常起精进行，
禅定摄身仪，及以广大智；
末世斗争时，持此妙法印，
修忍进无等，智慧亦无比。”

尔时，净三昧勇力如来亦复如是，称赞此经无量功德，说如是偈：

“开示此经法，受持及书写，
授与他相应，复能常读诵，
烧香以供养，华鬘及上服，
所得诸功德，无能度量者。”

尔时，无量无数诸佛世尊，称扬此经功德利益无量无边，既称赞已即告释梵护世：“诸善男子，汝等一切受此法门，尽烦恼障、一切业障。于后末世，若有众生但闻此经，尽烦恼障、一切业障。”

佛说此经已，一切世间得信善男子，天、人、阿修罗、乾闥婆等，闻佛所说，欢喜奉行。

度诸佛境界智光严经

如是我闻：一时，佛住摩伽陀国法林菩提光明宫殿，大功德所造，能令见者生大欢喜。无量功德莲华之像师子高座，佛在其上，正遍知意清净，无等正行，到诸佛等法心无障碍，到不退法，不舍无边佛事，安住不可思议，向无相法，三世平等，身满世界知法无疑，一切智身智慧无量，诸大菩萨之所受持，已到诸佛无等禅那，究竟满足得解脱智，大慈大悲转于法轮，究竟无边有色身。

及余比丘众六万二千，其名曰：舍利弗、摩诃目犍连、摩诃迦葉、阿□楼駄、须菩提、迦旃延、摩诃劫宾那、离婆多、难陀、那提迦葉、伽耶迦葉、分那弥多罗尼子、伽梵钵底、周利般特、蹋腊骠末利至、迦提罗尼伽、准陀、摩诃俱絺罗、罗睺罗、阿难陀，如是等六万二千众，一切定一切行，等入诸法性，无住无依，度诸烦恼，入佛法界，随从一法，向一切智，不舍一切智道，乐一切智不退，已到毗婆舍那第一波罗蜜，已生诸方便境界行处。

及与万比丘尼，摩诃波闍波提比丘尼、耶输陀罗比丘尼，等入一切善神清白之法，近一切智入一切智明，善达诸法无性，入诸法无性，入诸法无相，得诸法实际，知诸法不生，一切安立不思议解脱之定教化众生，不作意不思惟而能现身四种威仪。

复有十佛世界不可说亿万那由他微尘数等菩萨摩诃萨，其名曰：普贤菩萨摩诃萨、普眼菩萨、普化菩萨、普慧菩萨、普焰菩萨、普光菩萨、普明菩萨、普光明菩萨、普幢菩萨、普意菩萨、大勇猛菩萨、大持勇猛菩萨、大神通菩萨、大神通王菩萨、大勇猛菩萨、大勇猛力菩萨、大嚩申菩萨、大嚩申力菩萨、大香象菩萨、大月菩萨、善月菩萨、普光明月菩萨、法无垢月菩萨、光炎月菩萨、明月菩萨、放光月菩萨、满月菩萨、梵大自在菩萨、梵帝释震声菩萨、地鸣声菩萨、法界响声菩萨、除一切魔界声菩萨、法鼓响声菩萨、普语言声菩萨、无思惟声菩萨、地上响声菩萨、一切声性宫殿声菩萨、普上菩萨、普无垢上菩萨、功德藏菩萨、光曜菩萨、地藏菩萨、宝藏菩萨、月藏菩萨、日藏菩萨、热光藏菩萨、莲华吉藏菩萨、意菩萨、大意菩萨、胜意菩萨、震意菩萨、广意菩萨、上意菩萨、增长意菩萨、无边菩萨、严意菩萨、觉意菩萨、无尽意菩萨、海意菩萨、弥楼灯菩萨、大灯菩萨、法炬灯菩萨、一切光耀灯菩萨、普灯菩萨、除一切闇灯菩萨、照一切趣灯菩萨、专一光明灯菩萨、月灯菩萨、日灯菩萨、文殊师利童子菩萨、观世音菩萨、得大精进菩萨、金刚藏菩萨、密室菩萨、舍恶趣菩萨、药王菩萨、药上菩萨、慈不声菩萨、莲华手菩萨、日光菩萨、无微尘勇猛菩萨、金刚意菩萨、伏一切界菩萨、魔不胜菩萨、宝

顶菩萨、百光所照明菩萨、大魔不胜菩萨、不可生菩萨、不可胜菩萨、不可入菩萨、不可近意菩萨、扫恶趣菩萨、弥勒菩萨，如是等诸菩萨，十佛世界不可说万亿那由他微尘等菩萨摩訶萨，一生相续余世界集，晓了众生，成熟众生，安住菩萨智慧方便，入世间法，了泥洹处，观了一切校计习已，断行取于晓了不断摄受众众生，善入一切无边无中，晓了一切众生业果而不失，于无所得智，观众生结使，具方便智慧，了去来今诸佛义句善能受持，智慧分别入世出世，无边无中能观有为及无为法，向去来今诸如来智，了心刹那刹那生灭，初生、出家、方便苦行、坐菩提树、降魔得佛、转于法轮及般涅槃，不离众生起菩提业。此诸菩萨，以一众生心缘，入一切众生心缘，方便生智慧地，不退菩萨身，得一切智地，行不退转，不断菩萨所行，入无功用智慧，为一众生事，行无边事无行，转法轮教化世间，晓了能持诸佛法本，绍如来种使不断绝，于无佛世能现作佛，秽恶世界能令清净，能除一切菩萨业障，令得入于无障碍法相应，虚空等一切世界相应，无障碍等实际相应，与法界等知一切业所造果报如彼因缘故造果报相应，印彼印造诸法等智相应，像现一切等智相应，于响声知诸假名等。此诸菩萨，安住不可思议解脱定，游戏首楞严三昧，安住无边佛身，具众陀罗尼，于一毛孔现诸世界成就去来现在诸佛清净住处，受持殊胜行愿，成就普贤行愿，了知诸佛初生灭度劝请说法利安众生，一毛孔中现于十方初生、出家、方便苦行、坐菩提树、降魔成佛、转于法轮及般涅槃。此诸菩萨，以智慧相应，于一坐处能现十方一切世界，于一佛土遍能庄严诸佛世界，晓了庄严一佛世界，能现一切诸佛世界；于十方世界诸如来众能现一如来众，于一如来众能现十方诸如来众；晓了说法无中无边，能于自身现一切众生；于一佛身能现多佛，于多佛身能现一佛；能令自身现十方世界，晓了三世能现一众生身；于过去世现未来世、于未来世现过去世、于过去世现现在世、于现在世现过去世、于未来世现现在世、于现在世现未来世，能以一身出入无量无数禅定三摩钵提，以无量无数身出入一定三摩钵提；能现菩提于一切身，能于一众生身现一切众生，于一切众生身现一众生；能于一佛身现一切众生，于一切众生身能现于一佛，能现一切身、法身、众生身；于一切世界能现一世界，分布一世界能现多世界；能令十方世界入一毛孔，能现诸众生一切诸佛得菩提愿力处，能现十方世界成熟众生得阿耨多罗三藐三菩提，能现无数劫一世界中修菩萨行，能现一心生于十方一切世界；于一切世界一切众生，胎生、卵生、湿生、化生，有色、无色、有想、无想，二足、四足、无足、多足，天、龙、夜叉、乾闥婆、阿修罗、迦楼罗、紧那罗、摩睺罗伽，释、梵、四天王人及非人，如所成熟，教化众生心无功用，不以思惟起威仪事，于一微尘能现无量无数不可说世界一切众生，亦无迫迮；无量无数不可说劫威仪果报事，能于一念中现于一念威仪果报事；于无量无数不可说劫中，现如是所作，心无功用，不作思惟，现身威仪及诸

转变。复有余菩萨，具足不可称量功德亿万那由他。

复有不可说诸天、龙、夜叉、乾闥婆、阿修罗、迦楼罗、紧那罗、摩睺罗伽，释、梵、四天王、人非人等，从诸佛世界来集于此。从此世界百千万亿四天王，一四天王，有一大天及诸眷属，来至佛所，礼拜供养听受正法。复有无量百千万亿天帝释，复有无量百千万亿夜摩天王，复有无量百千万亿兜率陀天王，复有无量百千万亿化乐天，复有无量百千万亿他化自在天王，来至佛所，礼拜供养听受正法。复有诸天魔眷属，亦来佛所，礼拜供养听受正法。复有无量百千万亿梵天王，复有无量百千万亿大梵天王，复有无量百千万亿少光天，复有无量百千万亿无量光天，复有无量百千万亿光耀天，复有无量百千万亿少净天，复有无量百千万亿无量净天，复有无量百千万亿遍净天，乃至阿迦尼吒诸天，一一天众共来佛所，礼拜供养听受正法。复有无量百千万亿净居诸天，及大自在天子，来至佛所，礼拜供养听受正法。复有无量百千万亿龙王，复有无量百千万亿夜叉王，复有无量百千万亿乾闥婆王，复有无量百千万亿紧那罗王，复有无量百千万亿摩睺罗伽王等，来至佛所，礼拜供养听受正法。复有无量阿僧祇人非人等，来至佛所，礼拜供养听受正法。复有无量百千万亿优婆塞、优婆夷，来至佛所，礼拜供养听受正法。复有山神、树神、草木等神，及弥楼、摩诃弥楼、目真邻陀、摩诃目真邻陀、雪山、铁围等诸山神，来至佛所礼拜供养听受正法。复有小海、大海、小江、大江、湖池等神，来至佛所，礼拜供养听受正法。复有村邑国城诸神，来至佛所，礼拜供养听受正法。复有龙神、夜叉、乾闥婆、紧那罗、摩睺罗伽住处诸神，来至佛所，礼拜供养听受正法，以佛神力悉无迫迮。复有百千万亿月天子，复有百千万亿日天子，一一天子各将大眷属，来至佛所，礼拜供养听受正法。复有阿□达多大龙王，来至佛所，礼拜供养听受正法。

尔时，世尊光明照耀过诸大众。如月十五日，圆满明净无诸云翳，光明照耀过于众星；如是世尊光明照耀，过于一切释梵诸天，佛身不动如须弥山王。

尔时，文殊师利童子菩萨，谓伏一切诸盖菩萨摩訶萨言：“佛子，此如来身安住不动。”

如是语已，伏一切诸盖菩萨摩訶萨，复语文殊师利言：“于此众中，有人见佛欲出家踰城，或有见佛已出家，或有见佛已修苦行，或有见佛向菩提树，或有见佛已坐道树，或有见佛为无量无数魔所围绕，或有见佛已破魔军，或有见无量无数诸天、龙王、夜叉、乾闥婆、紧那罗、摩睺罗伽、人非人、释梵诸天说如是言愿如来胜，或有见佛为帝释所请，或有见佛为梵王所请，或有见佛为四天王所请。或复有人于此众中，见佛为我说布施法，有见为我说持戒法，有见为我说忍辱法，有见为我说精进法，有见为我说禅定法，有见为我说智慧法，有见为我说方便法，有见为我说于愿法，有见为我说声闻法，有

见为我说缘觉法，有见为我说菩萨法，有见为我说地狱生法，有见为我说饿鬼生法，有见为我说畜生法，有见为我说人生法，有见为我说四天王生法，有见为我说三十三天生法，有见为我说焰摩天生法，有见为我说兜率陀天生法，有见为我说化乐天生法，有见为我说他化自在天生法，有见为我说梵天生法，有见为我说转轮王生法。或复有人于此众中，见于如来身长二寻，或见佛身长一句卢舍，或见佛身长二句卢舍，或见佛身长一由旬，或见佛身长十由旬，或见佛身长千由旬，或见佛身长十、二十、三十、四十、五十千由旬，或见佛身长百千由旬，或见佛身长十、二十、三十、四十、五十百千由旬，或见佛身长八万四千由旬，或见佛身过于数量百千由旬，或见佛身紫金之色，或见佛身宝琉璃色，或见佛身因陀罗青摩尼宝珠色，或见佛身大青摩尼珠色，或见佛身火光摩尼宝珠色，或见佛身摩尼宝莲华色，或见佛身过帝释摩尼宝珠色，或见佛身金刚光明宝摩尼色，或见佛身一切天宝光摩尼色，或见佛身日月光明摩尼宝色，或见佛身水精摩尼宝色，或见佛身自在天王宝摩尼色，或见佛身一切光明聚宝摩尼色，或见佛身师子鬘毛宝摩尼色，或见佛身师子幢宝摩尼色，或见佛身海住清净庄严遍光明宝摩尼色，或见佛身如意宝摩尼色。文殊师利，是诸众生见如来身，闻所说法，入如来行，至佛境界；彼诸众生各见如来，同其所行。

“文殊师利，于东方不可数量不可思议不可称说世界，布满诸天、龙、夜叉、乾闥婆、阿修罗、紧那罗、摩睺罗伽，释、梵、四天王、人非人等；如东方，南西北方、四维、上下亦如是，不可数量不可思议不可称说布满诸天、龙、夜叉、乾闥婆、阿修罗、紧那罗、摩睺罗伽，释、梵、四天王、人非人等，大众充满，如竹林园，如甘蔗园，如稻麻园。文殊师利，若诸众生得见如来则可教化。彼诸众生在如来前，去一寻住，瞻仰如来。是时众生随见如来，现四威仪各住其前。文殊师利，若以说法成熟众生，彼诸众生皆闻说法。文殊师利，若以行成熟众生，彼诸众生唯见佛行。文殊师利，如来所现，无异功用，无异思惟，随众生性自见不同。文殊师利，如十五日夜，阎浮提人各见月现在其上，月不作意我现其上，亦不作意令其得见。何以故？不共法故。文殊师利，如来应正遍知于大众中，众生皆见各在其前，佛不作意我现其前，亦不作意令彼见我，应受化者随其自见。何以故？不共法故。

“文殊师利，如最胜水精摩尼宝珠，随种种衣成种种色。若珠置在黄衣之上，珠成黄色；置赤衣上，珠成赤色；置青衣上，珠成青色。此摩尼珠，亦不作意亦不思惟令成异色。如来应正遍知亦复如是，由众生故现种种色。若诸众生应见金色而受化者，即见如来身黄金色。若应见水精摩尼珠色而受化者，即见如来水精摩尼珠色。应见真珠色而受化者，即见如来真珠之色。应见因陀罗摩尼珠色而受化者，即见如来因陀罗摩尼珠色。应见大青摩尼珠色而受化者，即见如

来大青摩尼珠色。应见一切光明聚摩尼珠色而受化者，即见如来一切光明聚摩尼珠色。应见师子鬘摩尼珠色而受化者，即见如来师子鬘摩尼珠色。应见师子幢上摩尼珠色而受化者，即见如来师子幢上摩尼珠色。应见海住清静庄严普光明摩尼珠色而受化者，即见如来海住清静庄严普光明摩尼珠色。应见以电灯摩尼珠色而受化者，即见如来电灯摩尼珠色。应见水清静摩尼珠色而受化者，即见如来水清静摩尼色。文殊师利，若有众生应见如来，以帝释、梵天、四天王色而受化者，即见如来，帝释、梵天、四天王色。如是地狱、畜生、饿鬼、阎罗王至无色界，胎卵湿化、有色无色、有想无想，随以身相而受化者，彼诸众生皆见如来有种种相，如来亦不作意分别：‘此众生愿见我金色者，莫令见我水精摩尼珠色。此众生愿见我水精摩尼珠色者，莫令见我金色。此众生愿见我水精摩尼珠色者，莫令见我真珠色。此众生愿见我真珠色者，莫令见我水精摩尼珠色。此众生愿见我因陀罗摩尼珠色，莫令见我大青摩尼珠色。此众生愿见我大青摩尼珠色者，莫令见我因陀罗摩尼珠色。此众生愿见我一切光明聚摩尼珠色者，莫令见我师子鬘摩尼珠色。此众生愿见我师子鬘摩尼珠色者，莫令见我一切光明聚摩尼珠色。此众生愿见我师子幢上摩尼珠色者，莫令见我海住清静庄严普光明摩尼珠色。此众生愿见我海住清静庄严普光明摩尼珠色者，莫令见我师子幢上摩尼珠色。此众生愿见我电灯摩尼珠色者，莫令见我水清静摩尼珠色。此众生愿见我水清静摩尼珠色者，莫令见我电焰摩尼珠色。此众生愿见我帝释、梵天、四天王色者，莫令见我地狱、畜生、饿鬼、阎罗等色。此众生愿见我地狱、畜生、饿鬼、阎罗等色者，莫令见我帝释、梵天、四天王色。’如来不作意思惟以无功用，亦不分别以成其事。

“文殊师利，如自在王摩尼宝生处，是处不生铁，及诸众具亦不得生。自在王摩尼宝亦不作意：‘是处我生，铁及众具不应得生。’文殊师利，是处自在王摩尼宝自生，是处终不生铁，及诸众具亦不得生。文殊师利，如是佛境界处，如来生处，尼乾外道亦不得生，诸邪见等亦不得生，一切诸乱亦不生，五逆亦不生，十不善道亦不生，制法亦不生，日月光明亦不生，帝释、梵天、四天王等诸天光明亦不生，诸宝摩尼光明亦不生，火光明亦不生，电光明亦不生，一念半念、一月半月、一年半岁数亦不生。文殊师利，如来虽复成就众生，不作思惟，心无功用一切成就。

“文殊师利，如人为大青摩尼宝珠光明所触，彼人即成大青摩尼宝珠色，大青摩尼宝珠不作意思惟。若人为如来智慧光明所触，彼人即成一切智色，如来亦不作意思惟心无功用。文殊师利，如水精摩尼珠善磨莹之，随所安处以为庄严，或庄严足，或庄严手，或庄严头，或庄严颈，随庄严处皆大光明，诸庄严具悉随光明。文殊师利，如来应正遍知，行四威仪随所住处，如来光明彼亦光明，如来不作思惟心无功用。

“文殊师利，如地安住一切诸种种草木药树悉得增长，地不作意思惟分别。文殊师利，如来安住一切众生善根增长，如来亦不作意思惟心无功用。文殊师利，犹如大云普覆大地，于一切种降一味雨，令诸草木成种种味，成种种色，云不作意思惟分别。文殊师利，如来应正遍知于十方世界，以佛身云普覆众生种种善根、种种诸愿、种种心解脱、种种住解脱，降大法雨，令种种善根、种种诸愿、种种心解脱悉得增长，如来亦不作意思惟：‘我令增长此众生声闻善根，我令增长此众生缘觉善根，我令增长此众生佛智慧善根，我令增长此众生四天王生善根，我令增长此众生三十三天生善根，我令增长此众生焰摩天生善根，我令增长此众生兜率陀天生善根，我令增长此众生化乐天天生善根，我令增长此众生他化自在天生善根，我令增长此众生乃至五净居天生善根。’文殊师利，如来不作意分别：‘我令增长此众生种种王生善根，我令增长此众生人生善根，我令增长此众生富贵生善根。’文殊师利，如来虽不作意分别，利益事成，如其愿，如其意，如其乐，善根成就，于一切处恒行舍心，无有思惟无有分别。

“文殊师利，如日初出，放无量百千万亿那由他光，除闇浮提一切诸闇，光不作意‘我令闇灭’，虽无思惟日用得成。文殊师利，佛日初出，放无量百千万亿那由他智慧光明，灭邪见闇，除如来应现为成熟众生。文殊师利，如来亦不作意分别：‘我灭众生邪见烦恼。’不以功用如来事成。

“文殊师利，又如幻师现种种事，不以功用，不以思惟，所作幻事自然而成，所为幻事不可言说不生不灭，无字无声，无性无相，不可思议，不去不来，无等无对。文殊师利，如来应正遍知为诸众生，行四威仪一切处现，而此如来不可言说，不生不灭，无字无声，无性无相，不可思议，不去不来，无等无对，与法界等。

“文殊师利，如日于须弥四洲，众生各各异见，有见日出，有见日入，有见正中，有见中夜，日不作意思惟分别；因须弥故，四洲世界现种种事为见不同。文殊师利，如来应正遍知于一众处，令诸众生各各异见，有见如来当得作佛，有见如来当入涅槃，有见如来已得成佛，有见如来已般涅槃，有见如来正法兴隆，有见如来正法衰灭，有见如来或十、二十至四十年说法，有见如来或十、二十、三十、四十、亿百千不可说劫已入涅槃。文殊师利，如来亦不作意分别，由众生故自见不同。

“文殊师利，如阎浮提大风吹动，东方草木一时皆伏，西方草木一时皆起，如是随方起伏种种不同，而此草木亦不作意思惟，由风吹故令现种种。文殊师利，如来应正遍知由诸众生，于无数劫现四威仪。若诸众生缘于如来生诸行者，断无数劫地狱、饿鬼、畜生、阎魔王生。若有众生一念作意缘如来者，所得功德无有限极，不可称量百千万亿那由他。诸大菩萨悉得不可思议解脱定，不能计较得其边际。

“文殊师利，如日从大海出，放无数无量百千万亿那由他光，现

城邑聚落，灭诸闇、干湿泥、生草木、成众事，然后行动，日不作意思惟分别。文殊师利，如来应正遍知，从生死海出，住无数量，放无数量百千万亿那由他智慧光明，现于十方一切世界，除无明闇，干烦恼泥，令生善根，成就一切于本处不动，如来亦不思惟分别，而一切皆成。

“文殊师利，若有善男子、善女人，于十方世界微尘等诸佛及声闻众，施百味饮食及微妙天衣，日日不废，满恒河沙劫彼诸如来悉入涅槃，为——佛于十方世界——世界，起尘数塔。阎浮檀金为塔，电光摩尼宝珠以布其地，一切光明聚摩尼宝珠为基，真摩尼宝珠为幡，自在摩尼宝珠为网，覆其上造如是塔。宝伞遍覆大千世界，——幢衣，——幡华，——诸香王自在，——摩尼宝珠，——如意摩尼宝珠，其数如云散以供养，一日三时日日不废满恒沙劫。复教无数无量众生，设诸供养，如上所说。文殊师利，若有一善男子、一善女人，信此如来功德智慧不可思议境界，度脱众语言法，所得功德胜彼无量。

“文殊师利，若有菩萨信此言说，能令满足不可称量百千亿那由他波罗蜜，能知无数百千万亿那由他佛游戏处，能破无数憍慢之山，能倒无数嫉妒之幢，能干无数渴爱之河，能度无数生死之海，能断无数魔王之绳，能胜诸日月、帝释、梵天王等光明，能从佛境界至诸佛境界，能度地狱、畜生、饿鬼、阎罗王生令得值佛与菩萨俱，亦能得海印三昧、现一切界无过三昧、一切诸法自在三昧、一切法入三昧、无行庄严三昧、宝生三昧、作游戏三昧、莲华庄严三昧、破虚空三昧、随一切世间三昧、法华三昧、境界自在三昧、大嚩申三昧、心行自在三昧、师子嚩申三昧、日等三昧、无边转三昧、随流行三昧、金刚缘三昧、金刚幢三昧、金刚喻三昧、金刚三昧、持地三昧、山等三昧、弥楼幢三昧、宝藏三昧、心自在三昧、一切众生心自在三昧、一切诸行境界行三昧、深密方便三昧、种种乐说三昧、无观三昧、观一切诸法三昧、游戏三昧、一切通行三昧、胜魔境界三昧、现一切色三昧、修身三昧、随一切法则三昧、智慧灯三昧、作证菩提光明三昧、说四无碍三昧、入一切行功德三昧、一切分别说三昧、寂静分别神通三昧、首楞严三昧、大深不量海水岸三昧，得如是等无数百千亿那由他三昧。复得无边佛身色众具陀罗尼、智慧陀罗尼、清净音声陀罗尼、无尽藏陀罗尼、无边转陀罗尼、海印陀罗尼、莲华庄严陀罗尼、不著入门陀罗尼、度分别辩陀罗尼、佛庄严受持陀罗尼，得如是等阿僧祇百千万亿那由他陀罗尼，到一切胜行，到一切诸法不由他知，到一切诸法无疑。复得阿僧祇百千佛游戏，复得诸胜行方便。文殊师利，如须弥山，于一切山光明殊特；如是若菩萨信此言者，于一切善根光明，最为殊胜。”

是时，文殊师利童子语伏一切诸盖菩萨言：“佛子，更有余胜法，是菩萨信乐处。若菩萨能信者，得无量胜功德不？”

伏一切诸盖菩萨言：“有五法，是菩萨信乐处，得无量胜功德。云何五法？一者、信一切诸法无对，不生不灭不可说；二者、信过阎浮提微尘诸行威仪事，如来不以功德不以思惟，念念自生；三者、信常成熟众生，于恒沙劫久已成佛；四者、信从燃灯佛来乃至得佛中间所作是佛境界，无边劫来久已得佛现行此事；五者、信灭释种示现此事，成熟众生是佛境界。文殊师利，此谓五法，是菩萨所信，得无边胜功德。

“文殊师利，若有善男子、善女人，于日日中以百味食及微妙衣，施得六通及八解脱诸阿罗汉满恒沙劫；复有善男子、善女人，一日之中施一缘觉，如上供养，胜于前人所得功德。文殊师利，若有善男子、善女人，于十方世界起于塔寺如微尘数，于一世界，真阎浮檀金，电灯摩尼宝布地，一切光明聚摩尼宝为基，真珠摩尼宝为幡盖，牛头栴檀以涂其地，自在王摩尼宝为网覆上安置，海清净普光明庄严摩尼宝为柱，师子鬘摩尼珠为板覆上，师子幢上摩尼宝为窗牖，悬诸幡盖，无量百千缘觉所住，日日施与百味饮食及上妙衣，经恒沙劫。文殊师利，若有一善男子、善女人，闻佛者，闻世尊者，闻如来者，闻一切智者，此善男子、善女人，所得功德胜彼无量不可计数。

“文殊师利，若复有善男子、善女人，为佛造像，或以彩画，或用泥木，其人所得功德，复胜于彼无数不可计量，何况复以香华幡盖种种供养，所得功德无量无边不可称计！若复有善男子、善女人，归依如来，一日守护如来禁戒，是人所得功德，复胜于彼无量无数不可称计！

“文殊师利，若复有善男子、善女人，以百味食百种妙衣，施于十方一切诸佛，及诸菩萨、声闻大众，经恒沙劫，彼诸如来入于涅槃，为一如来，于十方界微尘数等起诸宝塔，一一宝塔纵广如四天下，庄严具足，以真阎浮檀金、灯摩尼宝布地，一切光明聚摩尼宝为基，真珠摩尼宝为幡盖，牛头栴檀以涂其地，自在王摩尼宝为网覆上，又以宝盖遍覆三千大千世界，复以诸幡华其数如云，复以种种上妙妓乐，供养于塔。文殊师利，若复有善男子、善女人，能信此经如来功德智慧不可思议，乃至以一揣食施于畜生，是人所得功德，复胜于彼不可数量。

“文殊师利，若有菩萨信于修多罗，如前所说而为供养。若有菩萨信此经法，复见余人信此法者，生大欢喜发踊跃心，起恭敬意，奉迎合掌礼拜问讯，随所能办以为供养。此人功德，复胜于彼无量无边不可称计。何以故？以此功德能生佛智，世尊所印。”

文殊师利闻此言已，皆大欢喜。及诸菩萨、声闻大众，天、人、阿修罗、迦楼罗等，皆悉随喜，顶礼而退。

大乘金刚髻珠菩萨修行分经

尔时，普思义菩萨摩訶萨，白佛言：“世尊，云何菩萨修行悟入此三摩地？”

佛言：“善男子，如无悟入是名悟入，亦当如我修菩提时之所悟入。”

普思义菩萨白佛言：“世尊，云何如来所修悟入？唯愿说之。”

佛言：“善男子，往昔有王名曰金刚髻珠，在于寂静园林之处，结跏趺坐正念思惟。如是住时，于座右边忽然出生一大莲华。其华微妙众宝合成，所谓龙绕坚固，栴檀以为其茎，阎浮檀金以为其叶，摩尼宝珠以为其须，甄叔迦宝以为其台。尔时，众宝最胜莲华台上，忽然化生悉陀太子，结跏趺坐安详而起，下莲华台于右边膝上而坐。尔时，金刚髻珠大王，欢喜爱念悉陀太子，即将及八万四千王子，俱诣彼佛法界摩尼山日光明王如来阿罗诃三藐三佛陀所，听受正法；得闻如是法界缁髻与金刚如来心品三摩地已，得五神通。云何名为法界缁髻与金刚如来心品三摩地耶？尔时法界摩尼山日光明王如来，当为演说，即此枳罗句、金刚句、法句、印句、理句、相应句、密句、持句、承事句、转句、驰走句、速疾句、显示句、明咒句，说此品句已系缚众魔，枳罗系缚、印系缚、句系等，一切诸句悉入慈句，无所诤论，是名法界缁髻与金刚如来心品三摩地，是彼法界摩尼山日光明王如来演说。

“善男子，汝知之不？昔称摩尼宝金银所成世界者，今楞伽摩罗耶山城是。其摩尼宝金银所成世界，是彼法界摩尼宝山日光明王如来佛刹。善男子，是金刚髻珠大王，曾于摩尼宝金银所成世界日光明王如来佛刹，作千世界转轮圣王，岂异人乎？即金刚手菩萨是。善男子，是髻珠大王，于其刹中为转轮王，有百亿子，岂异人乎？今十方诸来菩萨是，皆为听闻法界缁髻与金刚如来心品三摩地法故。善男子，汝应知之，时萨婆悉陀太子，有二十八大丈夫相皆得成就。何以故？我身即是悉陀太子。曾于髻珠大王微妙音声园苑之中，其王正念端坐思惟，而于右边龙坚栴檀甄叔迦宝莲华台上忽然化生，即往彼佛法界摩尼宝山日光明王如来所，得闻法界缁髻与金刚如来心品三摩地法门。从是已来，我于无量亿那由他百千如来所，承事供养，为闻法界缁髻与金刚如来心品，未曾忘失。从彼已来，经无量亿那由他百千劫，常忆念以三昧力故，一劫忆念百劫、千劫、百千劫，我亦忆念未曾忘失。成劫亦忆念，坏劫亦忆念，成坏劫中间我亦忆念，乃至亿那由他百千劫，亦常忆念。于一如来所，忆念百如来、千如来、百千如来，乃至不可说不可说如来，俱胝那由他如来，亦常忆念。于诸如来

阿罗诃三藐三佛陀所，已得法界缁髻与金刚如来心品法门，未曾忘失。”

尔时，世尊欲重宣此义，而说偈言：

“我念过去世，无量无数劫，
见诸清净刹，金宝海庄严，
摩尼净土王，号曰金刚髻，
有自在力，统领千世界，
乃至十千界，更无能过者。
具足千亿子，能破诸怨敌，
皆具二十八，丈夫之色相，
朝参大王所，王子那由他。
欢喜园林中，池树悉严丽，
庄饰诸宝具，为供世间灯，
见在诸如来，平等咸劝请。
普眼大导师，是最为初首，
我亲奉承事，为闻正法故。
次有普贤佛，次有华灯佛，
次有金刚灯，次有大灯佛，
次有最胜灯，次有法灯佛，
次有功德灯，次有宝灯佛，
次有宝幢灯，次有财灯佛，
次有髻灯佛，次有寂灯佛，
次有妙灯佛，次有声灯佛，
次有香灯佛，次有味灯佛，
次有月灯佛，次有日灯佛，
次有威光灯，次有莲华灯，
次有摩尼灯，次有竭闍灯，
次有姓灯佛，次有种族灯，
次有世间灯，次有法王灯，
次有胜灯佛，次有殊胜灯，
次有梵光灯，次有光明灯，
次有因灯佛，次有灯灯佛，
次有新灯佛，次有积灯佛，
次有智灯佛，次有贤善灯，
次有戒灯佛，次有忍辱灯，
次有精进灯，次有禅定灯，
次有般若灯，次有施舍灯，
次有大慈佛，次有大悲佛，
次有大喜佛，次有大舍佛，

次有正住佛，次有功德住，
次有威德住，次有胜灯住，
次有最胜佛，次有议论佛，
次有梵处佛，次有人间佛，
次有天王佛，次有大乘佛，
次有最胜佛。

“佛子，如是等如来名号，各于一劫中出现于世，我皆承事如供塔庙，皆为希求此三摩地。佛子，次复彼诸劫过，复过十不可说不可说诸佛刹土微尘等量，于大劫中有佛，号摩尼山日光明王如来，最初出现我亲承事，为希求此三摩地故。次复有号金山髻如来，次复有法界摩尼金刚山顶灯王如来，我亦承事。次复有号金山摩尼峰日髻如来，我亦承事。次复有离垢摩尼灯如来，次复有法界摩尼金刚顶灯如来，次复有金刚王如来，次复有虚空等摩尼金刚如来，次复有福德山金刚号如来，我亦承事。次复有种族灯王如来，次复离垢金刚灯手王如来，次复金刚灯如来，次复有金刚如来，次复离垢光明金刚如来，我亦承事。次复有精进金刚如来，我亦承事。次复有俱利奢金刚如来，次复有金刚髻如来，次复有俱那含金刚如来，次复有金刚藏如来，次复有金刚月如来，我亦承事。次复有海月如来，次复有庵俱舍金刚如来，次复有普遍摩尼金刚髻如来，次复有那罗延金刚如来，次复有离垢月如来，次复有法爱如来，次复有法真如来，次复有法音声如来，次复有甘露音声如来，次复有甘露月如来，次复有甘露金刚如来，次复甘露华如来，次复甘露名称如来，次复甘露日如来，次复甘露光明如来，次复甘露出现如来，次复法轮音声光明出现如来，次复雷声光明如来，次复有震旦香如来，次复善香如来，次复善光如来，次复普藏如来，次复有普顶如来，次复有日月如来，次复善商主如来，次复有金山光明如来，次复有音声光明如来，次复有决定无所住地如来，次复有胜幢如来，次复有出现威光如来，次复大焰如来，次复宝焰如来，次复有大真如来，次复有日月光如来，次复有栴檀香出现如来，次复有师子幢如来，次复有莲华光如来，次复有金决定摩尼山光明日光王如来，是等如来我皆承事。

“善男子，如是我为求此法门故，一劫忆念，百劫忆念，千劫忆念，百千劫亦忆念，成劫亦忆念，坏劫亦忆念，成坏劫中间亦忆念，乃至不可说不可说成坏劫，亿那由他百千劫，我亦忆念。善男子，我百佛亦忆念，千佛、百千佛亦忆念，乃至不可说亿那由他百千佛亦忆念。是诸如来阿罗诃三藐三佛陀所，此法界缁髻兴金刚如来心品三摩地，于彼听闻，我皆供养承事，我此三摩地终不忘失。是故，佛子，若有善男子、善女人，三业清净，此三摩地应当愿求。若有乐明义者、色声香味触相者、爱法义者、爱辩才者、乐神通者、乐名闻者、乐端正者、爱咒术者，应当于此三摩地受持供养广为人说。若有四众

比丘、比丘尼、优婆塞、优婆夷、天、龙、夜叉、捷閼婆、阿修罗、迦楼罗、紧那罗、摩睺罗伽、人非人等，及释、梵、护世等，应当希求。何以故？此法门者，平等摄取苦恼众生，如地宝藏，是爱乐法财者，是大光明鉴了堕无明闇者，是欲入涅槃道者之大电光。此之法門，愚者之智慧。佛子，此法门者，入一切诸佛法中。

“佛子，譬如三千大千世界，以七宝满中作一分，若有人闻此法门，积集善根福德果报增胜于彼。且置三千大千世界七宝为分，若恒河沙三千大千世界六道众生，若有人勇猛威力，成就彼众生界，所须乐具悉皆与之，恭敬尊重复经无量百千万亿那由他岁。其一切众生灭度之后，复当为造七宝妙塔，如是福德无量无边。若有闻此法门，功德胜于彼。且置恒沙六道一切众生之事，若恒沙三千大千世界中，诸有随信随法行种性八人，诸须陀洹、斯陀含、阿那含、阿罗汉，诸辟支佛，是人于无量劫百千俱胝那由他劫，恭敬给与衣服、卧具、汤药，及须爱乐受用之物皆悉与之，乃至般涅槃后，为造宝塔高千由旬，诸宝铃网庄严其塔，昼夜六时尽心供养此诸塔庙。若有闻此法门，积集善根福德资粮，胜彼功德。复置三千大千世界六道四生，又置三千世界随信行随法行八人，初果至第四果及缘觉等，乃至三千大千世界中，诸大乘菩萨摩訶萨，及诸如来应等正觉，供养如前。亦置是事，若恒河沙三千国土普遍云雨海等世界，其中道场所能积集，与金刚等菩萨摩訶萨及诸如来应等正觉，此大丈夫思惟校计，以所爱乐衣服、卧具、饮食、汤药，种种供养彼诸菩萨摩訶萨及诸如来，供养尊重恭敬赞叹，经无量岁无量百千亿那由他岁，及无量百千亿那由他劫，无量坏劫、无量成劫、无量成坏劫，乃至不可说不可说佛刹微尘等那由他劫，已能获得金刚心定，及诸如来应等正觉入般涅槃，造七宝塔宝盖铃网，乃至高出梵世。若有男子女人，闻此法门，能积集福德善根资粮，胜前所得。

“佛子，今更为汝说以譬喻，由此喻故，丈夫智慧者于此所说能得解了，起深重信不生诽谤。于如是等解法师所，应起尊重希有爱乐如向于佛。佛子，譬如有人，于恒河沙三千界中，所有佛刹土微尘等六道众生胎卵湿化，及随信行法行种性八人，初果至第四果独觉，乃至于佛所行道场积集福德，诸菩萨摩訶萨及诸如来应等正觉，悉夺其命及破坏诸塔。佛子，复有丈夫，成就众生及诸一切声闻、辟支佛，及彼一切菩萨所行道积集资粮，与金刚俱如来心定，及已得者，诸如来应等正觉现在位者，悉作供养华香幡盖、诸味饮食、俱陀那食种种备具，及般涅槃后，以作七宝塔乃至高至梵世，盖网铃铎庄严。如是二人罪福差别，论其升降远近多少，乃至不可说不可说成坏劫等不得其边。佛子，若有人闻如是福、非福果，于此法门深生重信，所有善根积集资粮，定为最胜，不得其边。复次，若复有人诽谤此法门，其罪最大至不可说，不得其边。若有人随喜信受，所得福报亦最广大，于须弥山微尘劫说不可尽。佛子，我今更作譬喻诸，有智者能得解

了，入此法门获大利益。何者是耶？佛子，譬如有人，以一毛析为百分，以一分毛于大海中取一滴水。于汝意云何？二水之中，为毛取水多耶？为海中水多耶？”

普思义言：“一毛之水不足为言，海中在者其水甚多，无量无量。”

佛言：“佛子，我所说福、非福者，如毛取水，其未说者如海中之水，应如是知。”

尔时，普思义菩萨复白佛言：“世尊，我虽智浅，闻此法门违顺之教成大利益！复更思惟生多疑心，愿为说之。”

佛言：“善哉！善哉！随意咨问。”

普思义言：“世尊，我见沙门若婆罗门，及余外道遮迦波利波斫迦尼健子等，如是之类，或炙身苦行，或竖双脚，或复屈膝，以衣缠脚蹲踞而坐，或两石相击取谷而食，或以灰涂身，或投高岩，或卧刺上，或入大水及火等法，或食牛粪，或翹一足，或竖两臂，或但食菜，或食稗子，或食树叶，或冷水浴，或恒河水受用洗浴而为戏乐。如是等人皆欲乞求解脱之法，愚夫顽瞽，乃至如是果报云何？世尊，有诸检校知事等类，因生憍慢喜怒自在纵愚夫势，不能了知所作之业善恶因果，应与不与，不与而与，回改称意以为势力，如是等类果报云何？”

“世尊，复有一类同修出家，不能恭敬有德业者，多畜门徒不时教诲，应不应作、犯与不犯，是有为法、是无为法，是世间法、是出世法，又自不解、不令他解。世尊，是业成就当生何道？复次，世尊，或复有人，不能敬重父母师长，不护家族尊者，当生何处？世尊，复有一类行贪嗔痴及等分者，其人业报复生何道？世尊，复有杀、盗、邪淫、妄言、绮语、两舌、恶口、嫉妒、嗔恚、邪见等业，当生何处？复有一类作咒术法，不从师受自妄出法，当生何处？世尊，复有一类愚痴之人，越三摩耶自在作法，当生何处？世尊，以我思惟见闻，如是心不能了，唯愿为说，解释我疑而生利益。”

尔时，如来即便称叹普思义菩萨摩訶萨言：“善哉！善哉！”又复叹言：“善哉！善哉！普思义。”如是三叹：“汝为利益怜愍世间诸众生故，又复开演至理因缘甚深之业作如是问，我当为汝分别解说。汝当谛听，善思念之。”

普思义言：“愿乐欲闻。”

佛言：“普思义，若有沙门、婆罗门，及诸外道遮迦波利波斫迦尼健子等，如是炙身苦行、双竖其脚、衣缠而坐、两石击谷而为食法，以灰涂身、粪秽埋身唯出其头，称解脱法；或卧棘刺，投于深水，五热炙身，或投大火，或食牛粪，常翹一足，或竖两臂，或专食菜，或食稗子，或食树叶，或冷水洗忍寒求净，或浴恒河而称解脱。彼诸愚痴专执为理，闻其正法而生诽谤，我当说其后受果报。佛子，其有蹲踞缠衣服者，至大莲华地狱之中。其两石相击手自食者，当生

驼驴之中。若灰涂身欢乐为道者，当生食吐毗舍阁鬼中。若投高岩者，当生水罗刹中。若以糞秽埋身唯出其头执为道者，生刀剑林大地狱处。若投入于水为解脱者，当生摩竭大鱼腹中。若五热炙身，当堕大火地狱。若食牛糞为净解毒，当堕猪道自食其糞，次后复生饿鬼之中。若翘足诵咒执为道者，当作镬脚夜叉。若竖两臂举向头上为解脱者，当作竖发饿鬼。若唯食菜树叶稗子，当作骆驼、驴、象、牛、羊等身。若以冷水及恒河中取冻为道者，当堕寒冰地狱。若有如是外道等类，执为正道起诸业行，生于十六及三十二诸地狱中。

“复有作捡校者，或以自在或以无智，或以势力或不羞耻，强相侵夺，或应与此而将与彼，或施物交互，輒生改换将与人，或以冬施僧物而夏与之，或夏之物而冬与之，或速之物而迟与之，或有多物而速用尽，诸如是等皆违至理，命终之后当生十六及三十二地狱之中。其于狱中所受形体随业各异，或于一身生无量头面亦差别，或马面、驼面、象面、猪面、鼠狼面、错鱼面、低弥鱼面、鲇忙鱼面、吉罗鱼面、瞿奈娑面、猫狸面、乌鹊面、黄狐面、野干面、猿猴面、百岁虫面、百足虫面、水牛面、黑面螭面、师子面、虎狼猫牛面、兔面、羊面、鸞面、狗面、饿鬼渴面、罗刹怒面、诸恶禽兽使人怖面，如是可畏极恶之类，于一身上有诸头面。此等业果生于利刃刀剑地狱，转动其身备受诸苦、极痛苦、猛酷苦、惨毒苦、夺命苦。受是诸苦其罪未毕，经尔所俱胝那由他百千劫，生生受身皆亦如是，或一头下百千身分，一一身上百千亿头，一一头中百千舌，一一舌间有百千亿炽热猛焰铁犁牛等耕尽其舌。如是千百亿身，各各皆有百千亿万虫，啖食其身，渴饮其血，饥食其肉，饥渴苦逼拔其心肝而啖食之。如是受报经无量岁，至无量劫乃至不可说不可说亿那由他劫，过是已后，即复更生海罗刹身。或时经过如须弥山微尘等劫，复生饥渴饿鬼之中。其中复经净居诸天三万六千劫，若以人间算数论之，即不可说不可说劫，从饿鬼中舍身，方作畜生之身驼驴猪狗。其经人间算数十千岁，为众合地狱一日夜。经于地狱百千亿那由他岁已，生于人间恶种姓家，人所憎恶，人所毁辱，旃荼罗家、押油家、竹作家，贫穷苦极，如是等家而生其中。生生之身常患腹大水肿恶病，为人轻贱，极粗恶身，极复羸瘦。复多贪食食无饱足，手足不具诸根多阙，身体班驳性复痴顽，如是展转难得出离。佛子，是故知事之人诸捡校主，不如法者，当得果报必定不虚，固当用心司存其事。

“佛子，复有如是一类出家之者，偃蹇憍慢，或尊重者之所驱使，或为承事，由是得贪利养名闻而不恭敬有德业者，又不能为和尚所应作事，亦复不能修行别解脱戒，是故常当思念：‘云何令我大得名利，若百若干侍从围绕？’若入寺，入村城邑聚落及以王都，于诸同住及以依止不能教诫，又不为说轻重戒律，既自不解不令他解。自不调伏宁静隐密，云何能令他人调伏宁静隐密？无有是处。自坏善根令他同住，依止等人亦坏善根。如是之人命终即共堕于冓索地狱，一劫流

转受苦；以净居天日月算数，若人间岁满足千劫。其同住依止，生于十六眷属地狱及水罗刹，常被鞭阞洋铜灌口。佛子，是愚痴人，当生是处。

“佛子，复有不顺轻慢应对于父母者，当生鸕鷀鸟中。若不知尊重父母师长，当生大声骆驼之中。若有轻慢沙门、婆罗门等，当生长项孔雀之中。若有不尊敬家长者，当生喑哑猪羊之中。若行贪秽色欲之者，生三恶趣，复生人中诸根短阙。若行嗔恚，当生四趣或阎罗界。若行痴者亦复如是，乃至等分罪报如上生无断绝。杀生之人当堕地狱、畜生、饿鬼、阎魔罗界，若生人中得二种报：一者、短命，二者、多病。若偷盗者堕于三趣，若生人间得二种果：一者、贫穷，二者、共财不得自在。邪淫之人乃至邪见，堕三恶趣及阎罗界，得受人身皆二种报：一短命，二多病，于一切处、一切时中常不安隐。佛子，如是业报当知分明。佛子，复有一类持咒之人，不从师受三摩耶法，自作法咒，彼即毁谤三代如来，即被毗那野迦之所残害，其诸咒法亦不成就，得虚妄罪。佛子，以不从师、不解三摩耶故。彼持咒人自陷及他，即为欺诳十方三世一切诸佛。”

尔时，普思义菩萨摩訶萨，于世尊前欲重宣其义，以偈颂曰：

“善现色相具成就，持咒无畏大仙王，
最初恼习巧断除，如月破闇我稽首。
人天中主众所依，自在坚固金刚力，
能破怨敌烦恼缚，及诸魔军悉摧伏。
阴魔死魔自在等，一切降灭无有余，
证得四住无畏法，无碍解脱名为佛。
往昔曾作太子时，离垢化生时感现，
于日光王如来所，最初闻此三摩地，
终不舍离于精进，为求如此三昧王。
如是展转遇诸佛，数过须弥微尘等，
以天妙物诸香华，供养无量大导师，
精进希求心不懈，愿获证入三摩地。
舍于身肉及手足，丰乐玩具及王位，
常以给施于贫乞，为求三摩难得法。
千万须弥微尘佛，承事具修菩萨行，
未曾辄起厌倦心，常当重发上精进，
于冬分时修苦行，净持禁戒诸律仪。
有施供物若侵用，或回时日及别僧，
当舍自身得异身，于一身出无量头，
一一头如弥娄山，长舌生如连钩锁，
一一头中舌如是，百俱胝犁耕其舌，
一一身中出诸虫，数如弥娄微尘等，

饥渴热恼烧逼身，还各啖食其身肉。
诸罪业报如是类，象形马形及猪形，
师子猫黑猿猴形，展转递相食其肉。
此是罪业恶果报，毒蛇猛盛嗔怒起，
乌与薰胡野干等，狗及鹭鸟俱罗罗，
瞿捺娑共余恶鸟，食此恶业诸众生。
所经成劫及坏劫，无量成坏之劫数，
食啖诸恶业众生。众合地狱甚切恶，
剑叶猛利及黑绳，冷热解散其支节，
炽然烧煮罪业者。大叫胃索如利刃，
及黑绳索亦复尔，腐其身肉磨榨之，
锯截上下诸骨节，惨切缠缚苦烧煮。
造恶业者殷重心，饥火烧逼互相食，
受于烧狱满一劫，复半劫中堕畜生。
成劫之时生人间，常生贫贱极恶处，
下劣种姓旃陀罗，终不生于贵胜族。
身常斑驳多白癞，以罪果报诸色类，
或生夜叉饿鬼界，复常生于旃陀家，
双盲或眇或聋哑，或癰瘰等由罪累。
生辄诸根不具足，或手足机或都无，
语言倒错心迷惑，此果皆由业所致。
或生叫唤黑绳狱，或一劫中及半劫，
如是色类诸苦报，罪业缘生获此果。
若得施物回别异，若施夏中回冬分，
乘此业生八难中，彼诸难中甚严酷。
亦生十六诸眷属，诸苦烧煮甚可畏，
形类十八或二十，皆以业缘受恶报。
若生轻慢父母心，不敬尊者及老宿，
命终之后堕畜生，诸飞鸟等鸬鹚类。
上下中人不尊敬，命终之后生畜生，
或生长项孔雀中，为于父母不孝养。
不敬国德诸尊人，命终之后生畜生，
大声骆驼及驴中。若有轻慢于父母，
堕于猪驴食不净。若有聪慧诸智者，
达于生死此彼岸，应当尊重敬父母，
以为无上大福田，生于大富正信家。
若有轻慢诸德业，护法诸天当舍离，
诸恶鬼神得其便，夜叉之众来惊怖。
若有轻慢于父母，生生常处贫穷家，
一切时中受轻毁，复生顽痴奴仆中。

若有轻慢于父母，终无少选得安乐，
妻子亲识皆逼恼，又无饮食得充饱，
举国饲之常不足，生饿鬼形极恶报。
若有轻慢于父母，当必生于海罗刹，
色身如赫焰火燃，日夜恒食热铁汁。
若有轻慢于父母，及诸耆宿尊德者，
常为世人所厌离，所有妻妾心亦然。
如是种种恶色类，说之穷劫不可尽！
若不作过于尊者，是名聪慧有智人，
三种贪嗔痴不生，身口意业常安乐。
若嗔恶心断生命，堕四趣中长受苦！
劫盗邪淫及妄语，恶口两舌无义语，
贪嗔恚痴诸业果，终不得于人中乐。
清净心中施财宝，常当守慎诸戒业，
修习忍辱无退转，精进不懈入禅定，
般若鉴了常远离，是必当得萨婆若。
终不犯于邪淫欲，常远离于口意过，
是则当得大导师，而为众生演正法。
嗔恚之心不暂有，离魔系缚及邪见，
不久当作世间灯，十善明法化一切。
若偷盗人及邪见，当来生于针口虫，
绮语两舌恶心者，常以语言坏正见。
若有习行外道法，投身高岩卧棘刺，
如是邪见施财物，当得少分资生报。
施与修习正向者，必获无尽大果报，
若欲成就三道场，皆应教授从师学。
诸有不从教授者，虚妄作法非真实，
以不尊重导师故，不能行用曼荼罗。
若欲最上依最胜，大普集经实法中，
三界最胜广博场，金刚种族摩尼宝。
莲华白象诸高贵，诸佛于中运自在，
大胜自在殊法宝，最上月鬘金刚髻。
宝鬘及以日光鬘，及法周罗摩尼顶，
一切皆入金刚鬘，拥护神咒皆由是。
常当念诵无断绝，念念即能灭罪障，
日夜三时相续咒，决定利益无有疑。
或在高处河岸边，诸神灵庙胜妙处，
草野冢间宁静谧，决定常恒乞食食，
由是成就曼荼罗，如教如说称要道。
彼真实义得相应，必当获成大义理，

三十二种功成就，以持得实道场法。
是名不损成等要，即是三种曼荼罗，
护摩护沙百遍成，由是成最曼荼罗。
终不有疑念决定，最胜法中常深信，
慎勿诵于质多咒，亦不敬礼诸邪神，
若不礼事余圣神，是作三等曼荼罗。
若常不损害他命，亦不破坏于他心，
由以离咒魅著人，即能成就曼荼罗。
若衣殺羊及恶食，恶心损坏诵诸咒，
所作咒法皆不成，彼即退失成咒法。
有常护彼金刚杵，不食油麻华饼等，
智者应作最胜咒，是咒法义应当成。
若有不取师教授，毗那野迦速疾著；
若能从师而作咒，为诸如来灌其顶。
不损害他不著魅，是名三等曼荼罗！
智者谦心说理趣，于尊卑类心平等，
于诸世间真成就，以得平等真实咒。
于多人中虚妄言，东西南北行不利，
所作事业不称心，彼不应说咒成就，
薄福之人起过患，毗那野迦所损害。
若能彩画咒法成，烧香灯明如法者，
咒法成就品类是，彼等皆由慈业办。
第一不杀成就业，有慈有悲真实者，
召请十方诸咒王，明说决定实利益，
以诸供具实体性，诸持咒者修习之。
彼诸咒者有聪慧，彼应成就曼荼罗，
三十三天吉祥处，同等三种三摩耶，
我应品类咒法成，其福德力不可说。
若有造作第一者，曼荼罗所说理趣，
如其净信作法成，三种三摩地相应，
以明咒坏于三界，于三界咒皆成就。
精勤用功弥加行，所作咒法皆得成，
金刚杵形画相似，及以莲华形相好，
应于露地曼荼罗，彩画界道用珠珍。
智者若如法成就，是名实真广利益！
画坛不画金刚杵，不画佛形及佛子，
持咒制吒及制征，毗那野迦及使者，
杜吒杜底紧伽罗，应在像前咸画成。
随其力分恭敬信，奉献尔所诸导师；
上味施与制吒等，及毗野迦令欢喜。

诸持咒仙应设供，成就如法佛像前，
普皆于彼曼荼中，画于佛前如法作。
安置道场诸门户，应画毗那野迦像，
应画守护地方神，复画诸山持咒仙，
合掌皆于佛前住。如是咒神二十八，
一一方面各图七，日月天形咒神形，
守护持者令成就。东面画作因陀罗，
南面画作乌尸罗，西面画作日没山，
北面画作于香山，诸山画作咒仙座，
合掌向佛像前住。锁系毗那野迦项，
住在持咒大仙前，使者缠手执铁索，
于咒法作扰乱相。紧那罗有三十二，
一一方面各有八，清净坛中画作形。
若成就佛坛法者，千灯千华为庄严，
千香水瓶杂供物，箏篋琴瑟及箏篋，
笙笛箫鼓诸音乐，长笛方响诸乐器，
诸天神有爱乐者，于佛像前来鼓击。
又张种种诸罗网，种种诸妙色界道，
种种宝瓶供如云，能成曼荼胜妙法。
若为毗那野迦著，彼人终不成胜法，
速疾失坏诸咒力，勤行力用亦不成。
不行诸定离修习，不应胜坛得成就，
是愚痴人作是法，终不能成上胜利。
若能依教作坛法，已能满足十二年，
专诵持咒不余业，于高险岸及净处，
以咒力能灭诸罪。若欲诵咒及坛处，
常以粳米乳酪等，昼夜各以三时诵。
诵时尽力限遍数，月八十五及满月，
修行习作曼荼罗，必当即得胜成就。
若有思惟分别者，成就最胜理趣经，
掘地一丈取净土，将泥净地作坛法，
清净洗浴著净衣，如法至心系念诵。
或三四肘七七肘，取净好土作净坛，
应请大乘妙胜经，作法能获大饶益。”